


Tnúhu ní cáháⁿ yă
ndiöxí xito cùu uú



New Testament in Mixtec, Peñoles (MX:mil:Mixtec, Peñoles)

Tnúhu ní cáháⁿ yǎ ndiǒxí xito cùu uú

New Testament in Mixtec, Peñoles (MX:mil:Mixtec, Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 25 Nov 2022 from source files dated 29 Jan 2022
872f7754-0986-5ecd-a059-925a708a6939

Contents

SAN MATEO	1
SAN MARCOS	79
SAN LUCAS	127
SAN JUAN	202
LOS HECHOS	253
ROMANOS	321
1 CORINTIOS	353
2 CORINTIOS	385
GÁLATAS	405
EFESIOS	416
FILIPENSES	427
COLOSENSES	434
1 TESALONICENSES	441
2 TESALONICENSES	447
1 TIMOTEO	451
2 TIMOTEO	460
TITO	466
FILEMÓN	470
HEBREOS	472
SANTIAGO	497
1 PEDRO	504
2 PEDRO	513
1 JUAN	519
2 JUAN	526
3 JUAN	527
JÚDAS	528
APOCALIPSIS	531

TNÚHU NÍ CHÍDÓ TNÜNÍ TÉ MÀTEÚ

Nchaa cue téé ní xíndecu ndéé sanaha cùtnàhá vátá quíxí-gá Xítóhó Jesucristú

(Lc. 3:23-38)

¹ Te ñaní tnáhá Xítóhó Jesucristú ní cuu ndíi Dàvíí ndíhi ndíi Àbráhám, cue téé ní xíndecu ndéé sanaha vihi-gá ñuyíú-a. Te duha ndùu cuendá dava-gá cue téé ní cuu ñaní tnáhá-gá ní xíndecu ndéé sanaha.

² Ndíi Àbráhám ní xóo ìⁿ déhe ndíi, te ndíi-án ní xínani ndíi Isàác. Te déhe ndíi Isàác-án ní cuu ndíi Jàcób, te déhe ndíi Jàcób-án ní cuu ndíi Jùdá, te diu-ni ndíi Jàcób-án ní cuu tātá dava-gá cue ñaní ndíi Jùdá-án. ³ Te déhe ndíi Jùdá-án ndíhi ñadìhí ndíi, ndíi Tàmár ní cuu ndíi Fàrés ndíhi ndíi Zàrá. Te déhe ndíi Fàrés-án ní cuu ndíi Èsróm, te déhe ndíi Èsróm-án ní cuu ndíi Àrám. ⁴ Te déhe ndíi Àrám-án ní cuu ndíi Aminàdáb, te déhe ndíi Aminàdáb-án ní cuu ndíi Nàsón, te déhe ndíi Nàsón-án ní cuu ndíi Sàlmón. ⁵ Te ñadìhí ndíi Sàlmón-án ní xínani-aⁿ Ràháb, te ní xóo ìⁿ déhe-yu ní xínani-dě Bòóz. Te ñadìhí ndíi Bòóz-án ní xínani-aⁿ Rùt, te ní xóo ìⁿ déhe-yu ní xínani-dě Òbéd, te déhe ndíi Òbéd-án ní cuu ndíi Isàí. ⁶ Te déhe ndíi Isàí-án ní cuu ndíi Dàvíí téé ní xíndaha ñaha xii cue ñáyíu isràél, Te déhe ndíi Dàvíí-án ndíhi ñadìhí ndíi ní cuu ndíi Salòmón. Te díhma-gá ndíi Úriás ní cándeca ndíi ñadìhí-án te dàtnùní ní naqueheⁿ ñaha ndíi Dàvíí-án.

⁷ Te déhe ndíi Salòmón ní cuu ndíi Ròboám, te déhe ndíi Ròboám-án ní cuu ndíi Àbíás, te déhe ndíi Àbíás-án ní cuu ndíi Àsá. ⁸ Te déhe ndíi Àsá-án ní cuu ndíi Josàfát, te déhe ndíi Josàfát-án ní cuu ndíi Jòráám, te déhe ndíi Jòráám-án ní cuu ndíi Ùziás.

⁹ Te déhe ndíi Ùziás-án ní cuu ndíi Jótám, te déhe ndíi Jótám-án ní cuu ndíi Àcáz, te déhe ndíi Àcáz-án ní cuu ndíi Ezèquiás. ¹⁰ Te déhe ndíi Ezèquiás-án ní cuu ndíi Manàsés, te déhe ndíi Manàsés-án ní cuu ndíi Àmón, te déhe ndíi Àmón-án ní cuu ndíi Jòsiás. ¹¹ Te déhe ndíi Jòsiás-án ní cuu ndíi Jecònias. Te diu-ni ndíi Jòsiás-án ní cuu tātá nchaa dava-gá cue ñaní ndíi Jecònias-án. Te dàv-á-án ní quide yica cue téé ñúú Babiloniá ndécá-güedé ñáyíu isràél cuáháⁿ ñúú-güedé cuendá yàcáⁿ cundecú-yu.

¹² Te sátá ní yáha ducaⁿ ní cuu, te ndíi Jecònias ní xóo ìⁿ déhe ndíi ndíhi ñadìhí ndíi, te téé-án ní xínani-dě Salàtiél. Te déhe ndíi Salàtiél-án ní cuu ndíi Zorobàbél. ¹³ Te déhe ndíi Zorobàbél-án ní cuu ndíi Àbíúd, te déhe ndíi Àbíúd-án ní cuu ndíi Eliàquím, te déhe ndíi Eliàquím-án ní cuu ndíi Àzór. ¹⁴ Te déhe ndíi Àzór-án ní cuu ndíi Sádóc, te déhe ndíi Sádóc-án ní cuu ndíi Àquím, te déhe ndíi Àquím-án ní cuu ndíi Èliúd. ¹⁵ Te déhe ndíi Èliúd-án ní cuu ndíi Eleàzár, te déhe ndíi Eleàzár-án ní cuu ndíi Mátán, te déhe ndíi Mátán-án ní cuu ndíi Jàcób. ¹⁶ Te déhe ndíi Jàcób-án ní cuu ndíi Chèé téé ní cuu yíi tá Màriá xíchí ní cuu nàná Jesús Yáá ní tendaha Dútú Ndiòxí ní quixi ñuyíú-a.

¹⁷ Te sa ní cuu úxúú tnàhá cue téé cùu ñaní tnáhá ndíi Àbráhám ndécú dàv-á-án, te dàtnùní ní cacu ndíi Dàvíí diu-ni ñaní tnáhá ndíi. Te núú tnàhá méé ndíi Àbráhám ndíhi ndíi Dàvíí ní cuu úxícúmí tnàhá-güedé. Te ducaⁿ te sa ní xínu úxícúmí-gá tucu-güedé ní cacu, te dàtnùní ní tñi ñaha cue téé ñúú Babiloniá xii ñáyíu isràél ndécá ñaha-güedé xii-yu cuáháⁿ ñúú-güedé cuendá yàcáⁿ cundecú-yu. Te sátá ní yáha sá dúcáⁿ ní cuu, te ní cacu úxúní tucu cue téé ní cuu ñaní tnáhá ndíi Àbráhám ndíhi ndíi Dàvíí, te dàtnùní ní cacu Xítóhó Jesucristú ñuyíú-a. Te núú tnàhá méé-gá ní

cuu úxícúmí tnàhá-güedé.

*Ní cacu Jèsús
(Lc. 2:1-7)*

¹⁸ Te duha ní cuu cútnàhá ní cacu Xítohó Jesucristú, chi dává-án ní xíndecu ìn xíchí cuéché ní xínani Màriá. Te xíchí-án sa ní cundáá tnúhu sá tnàndaha-xi ndihi ìn téé nàni Cheé. Te cùmání-gá tnàndaha-xi ndihi téé-án te Espíritú Yá Ndiöxí ní guide ní ngúhuⁿ déhe-xi. ¹⁹ Te té Chèè téé cuení candeca ñaha xii xíchí-án ní cutnùní iní-dé sá ñúhú déhe-xi. Te cùu-dé ìn téé guide ndáá, núu xiáⁿ duuⁿ duuⁿ ní sani iní-dé sá vā tnàndaha-gá-dé ndihi-xi, te dicó-ni sá ñà túú ní cāháⁿ dé chi ní cuení-dé sá vā cāháⁿ cuèhé cāháⁿ duha ñáyiú cuendá-xi. ²⁰ Te sáta dúcáⁿ ní sani iní-dé te ní ngáva-dé ní xidí-dé, te núú sání-dé ní sáháⁿ ìn espíritú xínú cuèchi núú Yá Ndiöxí ní xáhaⁿ-xi xii-dé:

—Yóhó té Chèè téé cùu ñani tnàhá ndii Dávíí, yúhú cāchí tnúhu-í xii-n sá ñà túú nā cani iní-n, tnàndaha nahi-ni-n ndihi tá Màriá cuéi ñúhu déhe-xi, chi mee Espíritú Yá Ndiöxí ní guide-xi ducaⁿ ní ngúhuⁿ déhe-xi. ²¹ Te na càcu déhe-xi-án te danàni-n-dé Jèsús. Te ducaⁿ cùnani-dé, chi téé-án cada-dé cuendá sá vā cundècu-gá cue ñani tnàhá-dé ñáyiú isràél ichi cuèhé ichi duha —duha ní xáhaⁿ espíritú-án xii té Chèè-án núú sání-dé.

²² Te ducaⁿ ní cuu chi ní quee ndáá-xi nācuáa ní xáhaⁿ Yá Ndiöxí xii ìn téé ní cāháⁿ tnúhu-gá ndéé sanaha. Te téé-án ní chídó tnùní-dé núú tütú-gá nācuáa ní xáhaⁿ-gá xii-dé, te duha ní xáhaⁿ-gá:

²³ Cundecu ìn xíchí cuéché ndéé cuéé-gá.

Te òré ndécú íi-xi vátá ñihí-gá yii-xi te ngúhuⁿ déhe-xi.

Te òré ná cacú déhe-xi te danàni ñahá-yu Emànuél.

Duha ní xáhaⁿ-gá xii téé-án ní chídó tnùní-dé núú tütú-gá. Te tnúhu Emànuél-án quée-xí: Yá Ndiöxí ndécú ndihi-o. Núu xiáⁿ ducaⁿ ní cuu vitna.

²⁴ Te òré ní ndiquíú iní té Chèè-án te ní guide-dé nācuáa ní xáhaⁿ espíritú-án xii-dé chi ní tnàndaha-dé ndihi tá Màriá. ²⁵ Dico ndi dííⁿ ní xíndecú-yu ndéé ní sáá nduu ní cacu déhe-xi. Te òré ní cacu déhe-xi-án te ní danàni ñaha-dé Jèsús.

2

Cue téé cuángoto ñaha xii Jèsús

¹ Te Jèsús ní cacu-gá ìn ñúú nání Bèlén, te ñúú-án yíndèhu-xi distritú Jùdeá. Te dává-án cùnùu té Hèrodés yíndàha-dé ñáyiú. Te ñúú Jerusalén ní quexio cue téé véxi ndàa xio nācuáa quène nchíanchii, cue téé túha dàcuaha cuendá nchaa sá ndéé andiú. ² Te ndúcu tnúhu-güedé núú ñáyiú ñúú-án, te xáhaⁿ-güedé:

—¿Vá cündèe iní-ndó cāchí tnúhu-ndo ndéé ndécú téé quindaha ñaha xii ñáyiú isràél-án? Chi ní xíní-ndí ní quene chódíní-dé ndàa xio nācuáa quène nchíanchii, núu xiáⁿ véxi-ndí chi cuení-ndí quini-ndí-dé te chiñuhu-ndí-dé —cāchí-güedé xáhaⁿ-güedé xii-yu.

³ Te òré ní níhí téé cùnùu nani Herodés tnúhu sá ndúcu tnúhu cue téé-án ndéé ndécú téé quindaha ñaha xii ñáyiú isràél, te ñá túú tnàhí ni cùu váha iní-dé, te diu-ni ducaⁿ ñà túú ní cùu váha iní tnàhá nchaa ñáyiú ñúú-án. ⁴ Te ní cana-dé cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chídó tnùní ndíi Moisés, te ní xicáⁿ tnúhú-dé núú-güedé núu xíní-güedé ndéé cacu Crístú téé tendaha Yá Ndiöxí quixi ñuyú-a. ⁵ Te ní xáhaⁿ-güedé xii-dé:

—Ín ñúú yíndèhu distritú Jùdeá cacu-dé, te ñúú-án nání-xí Bèlén, chi quee ndáá-xi nācuáa ní xáhaⁿ Yá Ndiöxí xii ìn téé ní xóo cāháⁿ tnúhu-gá ndéé sanaha. Te duha ndùu tnúhu ní chídó tnùní-dé núú tütú-gá:

⁶ Ñúú Bèlén cúu-xí ìn ñúú líhli yíndèhu distritú Jùdeá,

te ío-gá cúnùu-xi dacúúxi
dàva-gá ñúú cúnùu yindehu
distrítú-áⁿ,

chi ñu ñúú-áⁿ quee ñⁿ téé ío cúnúu.

Te téé cunuú-áⁿ quindaha-dě ñáyiú
cùu cuendá-í ñáyiú isráél.

Duha ní xáhaⁿ-gã xii téé ní xóo
cáháⁿ tnúhu-gá, te ducaⁿ ñí chídó
tnùnì-dé núú tütú-gá —càchí-güedé
xáhaⁿ-güedé xii té Hèrodés.

⁷ Te sátá dúcáⁿ te té Hèrodés
dayuhu ñí cana-dé cue téé ndücu
tnúhu núu ndéé ní cacu téé
quindaha ñaha xii ñáyiú isráél, te
ní xícáⁿ tnúhú-dě núú-güedé ná
nduu cùu-xi nduu díhna nuu ñí
xiní-güedé chódíní. ⁸ Te sátá dúcáⁿ
te ní xáhaⁿ-dě xii-güedé:

—Chí cuáháⁿ ñúú Bèlén te nducu
tnúhu váha-ndo núu ndéé ní cacu
téé ducaⁿ quindaha ñaha xii ñáyiú
isráél. Te òré ná nàníhí-ndó-dě te
quixi-ndo càchí tnúhu-ndo cuendá
quíhíⁿ-í tnàhá-í chiñuhu-í-dé —
càchí-dé xáhaⁿ-dě xii-güedé.

⁹ Te sátá dúcáⁿ ñí xáhaⁿ tē
Hèrodés-áⁿ te ní xica-güedé
cuáháⁿ-güedé. Te chódíní ñí
xiní-güedé ní quene ndàa xio
nacuáa quène nchícanhii-áⁿ yòdo
nuu-di núú-güedé cuáháⁿ. Te
ní ngüíñí chódíní-áⁿ, te núú ñí
ngüíñí-di-áⁿ yíndáá núú ndécú
Jesús. ¹⁰ Te òré ní xiní cue téé-áⁿ
ñí ngüíñí chódíní-áⁿ núú yíndáá
ndécú-gã, te ní cudíí víhí ñí-güedé.

¹¹ Te ducaⁿ te ní quexìo-güedé
ndéé núú cáá vèhe ndecu Jesús.
Te òré cuánguihu-güedé xití vehe
te ní xiní-güedé Jesús ndécú-gã
ndihí náná-gã Màriá. Te ní ngüíñí
xití-güedé, te ní ngüíta-güedé ní
cachí-güedé sá ío càhnu cuu Jesús.
Te dàtnùnì ní nacaáⁿ-güedé càjá
xínehe-güedé, te ní tava-güedé
díhúⁿ cuááⁿ, ndihí dúsa sá ío
váha sàháⁿ tnámí nàni insiensú,
ndihí yúcu sá nání mírriá ní taxi
ndecu-güedé núú Jesús cuendá
cuu-xi ñí táhú sá cúu-xí-gã.

¹² Te Yá Ndióxi ní cáháⁿ-gá núú
sàni-güedé, te xáhaⁿ-gã xii-güedé
sá vã náyáha-gã-güedé cáháⁿ
ndihí-güedé té Hèrodés. Núu xááⁿ
cue téé-áⁿ cuánuhú-güedé ingá ichi,
te ñá túú-gã ní náyáha-güedé núú
ndécú tē Hèrodés.

*Cuáháⁿ-yu ndihí Jesús nàcióⁿ
Ègiptú*

¹³ Te sátá ñí yáha cuánuhú cue
téé ní sángoto ñaha xii Jesús, te ní
quexìo ñí espíritu xínú cuèchi núú
Yá Ndióxi núú sàni té Chèé, te
xáhaⁿ-xi xii-dé:

—Véxi-í càchí tnúhu-í xii-n sã
ndácóo-n, te ndee-n ñúú-a ndihí
Jesús, ndihí náná-gã cunu-ndo
quíhíⁿ-ndó nàcióⁿ Ègiptú, chi té
Hèrodés tendaha-dě cue téé quixi
nanducu ñaha xii Jesús cuendá
cahni ñaha-güedé. Te yàcáⁿ cun-
decu-ndo ndéé cachí tnúhu-í xii-n
nduu ndixi-ndo —cachí espíritu-áⁿ
xáhaⁿ-xi xii té Chèé núú sàni-dé.

¹⁴ Te té Chèé-áⁿ ñí ndacóo-dé,
te niú ní xica-dé ndihí tá Màriá
ndécá-yu Jesús cuáháⁿ nàcióⁿ
Ègiptú. ¹⁵ Te nàcióⁿ Ègiptú-áⁿ
ndécú-yu ní xihí té Hèrodés. Te
ducaⁿ ñí cuu chi ní quee ndáá-xi
nacuáa ní cachí ñí téé ní xóo cáháⁿ
tnúhu Yá Ndióxi ndéé sanaha
ñí quide-dé núú-gã ní cáháⁿ-dé
yuhu-gá, te duha ní xáhaⁿ-gã ní
cáháⁿ-dé: “Nàcióⁿ Ègiptú ndécú
Dèhe-í ní cùu, te ní xáhaⁿ-í xii-dé sã
ndéé-dě ñúú-áⁿ vã cündecu-gã-dé”,
duha ní xáhaⁿ-gã xii téé ní cáháⁿ
tnúhu-gã ní quide-dé núú-gã.

*Té Hèrodés ní táuchúú-dě
cahni-güedé cue landú*

¹⁶ Te cue téé ní sángoto ñaha
xii Jesús ní dándàhú-güedé té
Hèrodés, chi ñá túú ní náyáha-güedé
cúñaha-güedé sá ñí naníhí-güedé
Jesús. Te sátá ñí cutnùnì iní té
Hèrodés sá ñí dándàhú ñáhá-güedé
xii-dé te ní cudééⁿ víhí-dě, te ní
tendaha-dě cue téé cuáháⁿ ñúú
Bèlén, ndihí nchaa dava-gã ñúú
cáá yàtni xíáⁿ cuendá cahni-güedé

mee-ni cuè landú tée. Te ndéé cue landú íchí ní cacu, ndíhi ndéé cue landú sa ní núnahá úú cuiá-xi nchaa-güexi cahni-güedé ní xáhaⁿ-dè. Te ducaⁿ ní quide-dé chi ní quide cuèndá-dé nàcuáa ndùu tnúhu ní xáhaⁿ cuè tée ní sángoto ñaha xii Jesús nduu ní xini-güedé chódini, núu xíáⁿ ducaⁿ ní táuchíúⁿ-dè ní quide cue tée-áⁿ. ¹⁷ Te ducaⁿ ní cuu chi ní quee ndáá-xi nàcuáa ní cachí ndíi Jeremiás tée ní xóo cáháⁿ tnúhu Yá Ndióxi ndéé sanaha, te duha ní cachí ndíi:

¹⁸ Ní tecú ndàhí víhi ñáyiú ñúú Rámá sá ndìhú iní-yu, te ñáyiú xíndáhyú-áⁿ cúú-yu ñani tnáhá tá Ràquél, te ndàhyú-yu cuèndá sá ní xíhí déhe-yu.

Te ñáyiú-áⁿ ñà túú ní cuini-yu dàñá-yu sá ndìhú iní-yu cuèndá sá ní xíhí déhe-yu.

Duha ní cachí ndíi Jeremiás.

¹⁹ Te sátá ní xíhí té Hèrodés te ní sáháⁿ tucu espíritú xínú cuèchi núú Yá Ndióxi núú sàní té Chèé òré ndécú-dè nacióⁿ Egiptú, te ní xáhaⁿ-xi xii-dé:

²⁰ —Véxi tucu-í càchí tnúhu-í xii-n sá ndácóo-n, te núhú-n ndíhi Jesús ndíhi náná-gá ñúú cue ñani tnáhá-n ñáyiú isràél cundecu-ndo, chi sa ní xíhí cue tée cuini cahni ñaha xii Jesús ní cuu —cachí espíritú-áⁿ xáhaⁿ-xi xii té Chèé núú sàní-dé.

²¹ Te té Chèé-áⁿ ní ndacóo-dé, te ní ndee-dé ndíhi Jesús ndíhi náná-gá cuánuhú-yu ñúú cue ñáyiú isràél ñáyiú cuu ñani tnáhá-yu.

²² Te té Chèé ní níhí-dè tnúhu sá tē Arquelaú ní nucúnutnii-dé núú tátá-dè té Hèrodés distritú Jùdeá yíndáha-dé ñáyiú. Te ní yuhú té Chèé-áⁿ, te ñà túú ní cuini-dé quíhíⁿ-dé cundecu-dé distritú-áⁿ. Te Yá Ndióxi ní cáháⁿ-gá núú sàní-dé, te ní xáhaⁿ-gá xii-dé sá quíhíⁿ-dé distritú Galileá, núu xíáⁿ yá cáⁿ cuáháⁿ-yu. ²³ Te òré ní quexió-yu distritú Galileá, te ní

sáháⁿ-yu iiⁿ ñúú nání Nazarét ní xíndecú-yu. Te ducaⁿ ní cuu chi ní quee ndáá-xi nàcuáa ní cachí cue tée ní xóo cáháⁿ tnúhu Yá Ndióxi ndéé sanaha sá Jèsús cuu-gá tée ñúú Nazarét.

3

Té Juáá tée dàcuandute ñaha xii ñáyiú càháⁿ-dé tnúhu Yá Ndióxi xii yucu

(Mr. 1:1-8; Lc. 3:1-9, 15-17; Jn. 1:19-28)

¹ Te ní xica nduu sá dúcáⁿ ní cuu, te tée nani Juáá tée dacuandute ñaha xii ñáyiú ní quexió-dé yucu distritú Jùdeá càháⁿ-dé tnúhu Yá Ndióxi núú ñáyiú xii yucu-áⁿ. ² Te xáhaⁿ-dè xii-yu:

—Chí dándixi túu iní sá ñà túú quide váha-ndo ndècu-ndo, te dañá-ndo nchàa ichi cuehé ichi duha, chi sa ní cuyatni nduu ndíhu ndaha ñaha Yá Ndióxi xii-ndo —càchí-dé xáhaⁿ-dè xii-yu.

³ Te diu cuèndá té Juáá-áⁿ ní chídó tnùní ndíi Chàiaⁿ tée ní xóo cáháⁿ tnúhu Yá Ndióxi ndéé sanaha, te duha ndùu tnúhu ní chídó tnùní ndíi cuèndá-dé:

Tècú càháⁿ níhi iiⁿ tée yíhi xii yucu, te càchí-dé:

“Chí dañá nchàa ichi cuehé ichi duha ndècu-ndo, te tnii-ndo ichi váha,

Te ducaⁿ càda-ndo cuendá cundecu túha-ndo chi véxi Yaá ío cùnuu”, duha quesaha tée-áⁿ.

Duha ndùu tnúhu ní chídó tnùní ndíi Chàiaⁿ-áⁿ cuèndá té Juáá.

⁴ Te té Juáá-áⁿ ní xóo cuíhnu-dé dóo idi càméyu, te iiⁿ ñii ní cuu pañú xii-dé, te ní xóo caxi-dé tíca làngóstá ndíhi ndudí ñúñú cuéchi.

⁵ Te ñáyiú ñúú Jerusalén, ndíhi ñáyiú nchaa ñúú yíndèhu distritú Jùdeá, ndíhi ñáyiú nchaa ñúú cáa yàtni yúte Jòrdán ní sáháⁿ-yu ní xíndedóho-yu nàcuáa ní cáháⁿ té Juáá. ⁶ Te ní nguíta-yu ní náhmá-yu nchaa cuéchi-yu núú Yá Ndióxi. Te òré ducaⁿ ní náhmá-yu te ní

dacuándute ñaha té Juáá xii-yu yúte Jordán.

⁷ Te vai cue tée cùu fariséu ndihi cue tée cùu saducéu cuháⁿ-güedé núú ndécú tè Juáá cuñí-güedé dacuándute ñaha-dé xii-güedé. Te òré ní quexìo-güedé núú ndécú-dé, te ní xáhaⁿ-dè xii-güedé:

—¡Nchaa nchòhó cúu-ndó dàtná ìⁿ cóó dèéⁿ chi ío cuihna ìní-ndó! ¿Te nása ní cuu núu tnàhá nchòhó ndúcú-ndó ñacuáa cada-ndo càcu nihnu-ndo núú tnùndòho cahnu vihi ta cuyatni ñaha xii-ndo véxi-i?

⁸ Te chí cáda váha vitna cundecu-ndo cuendá ducaⁿ cùtnuní sá ní dáñá-ndó ncháa ichi cuehé ichi duha ndècu-ndo. ⁹ Te vá càchí-ndó sá ío càhnu cuu-ndo cuendá sá cúu-ndó ñàní tnáhá ndii Abrahám, Chí cuéi ndéé yúú te ndacu Yá Ndiòxí ndada-gá ñáiyu te cuú-yu ñaní tnáhá ndii Abrahám. ¹⁰ Te caá chí ndècu túha-xi sá quehndé-xi nchaa yutnu sá dúcáⁿ ñà túú càváha sávidí-xi-áⁿ, chí nchaa yutnu-áⁿ tēhndé-xi te cuángēe-xi núú ñuhú càyú-xi. Te duha sàtnahá-xi ndoho nchaa ñáiyu ñá túú quide váha-áⁿ chí nchaa ñáiyu ñá túú quide váha cùu-yu dàtná nchaa yutnu sá ñà túú càváha sávidí-xi. ¹¹ Te ña càchí tnúhu ndáá-í xii-ndo sá yúhú dacuándute-í mee-ni ñáiyu ní dáñá ncháa ichi cuehé ichi duha. Dico nchìcúⁿ tucu ingá tée véxi, te tée-áⁿ taxi-dé Espiritú Yá Ndiòxí cundecu ndihi-ndo. Te cùu-xi datná ìⁿ ñuhú, chí ndada ndoo ndada nine-xi ìní-ndó. Te tée-áⁿ ío-gá cùnùu-dé dàcúúxí yúhú, chí yúhú cùu-í ìⁿ tée duuⁿ duuⁿ ñá túú tau cuita nehe ni chàu-dé dico quide-í chiúⁿ-dé. ¹² Te tée-áⁿ sa véxi túha-dé sá cáda ðìⁿ ñaha-dé xii-o dàtná quidé ñáiyu ndada ndoo triú, chí ñáiyu-áⁿ sa nèhe túha-ná-yu yaxíⁿ-yu òré náñani cuendá ndada ndoó-yu. Te òré ndádá ndoó-yu triú-áⁿ te dàquee ðìⁿ-yu mihi-xi, te tàxúha-yu mee-ná triú-áⁿ te sàhmí-yu mihi-xi-áⁿ. Te dàtná quidé-yu mihi triú-áⁿ ducaⁿ

sàtnahá-xi cada ñaha tée-áⁿ xii nchaa ñáiyu ñá túú quide váha, chí daquihíⁿ ñáhá-dé xii-yu núú ñuhú núú càyú, te ñuhú-áⁿ ñà túú tnàhí ndàhvá —càchí-dé xáhaⁿ-dè xii-güedé.

Sàndute Jesús

(Mr. 1:9-11; Lc. 3:21-22)

¹³ Te Jèsús ní quee-gá distritú Galilea cuháⁿ-gá yúte Jordán núú ndécú tè Juáá cuendá dacuándute ñaha-dé xii-gá. ¹⁴ Te òré ní quexio Jesús núú ndécú tè Juáá, te ñá cuñí-dé dacuándute ñaha-dé xii-gá ní cùu, te ní xáhaⁿ-dè xii-gá:

—Yúhú tau-í sá dacuándute ñaha-n xii-í, te ñá díú dà yúhú dacuándute ñaha-í xii-n —càchí-dé xáhaⁿ-dè xii-gá.

¹⁵ Te Jèsús ní xáhaⁿ-gá xii-dé:

—Queheⁿ dañá, chí dacuitíí xini ñuhu-xi ducaⁿ cada-o ñacuáa cundáá-ó núú Yá Ndiòxí —càchí-gá xáhaⁿ-gá xii-dé.

Te té Juáá-áⁿ ñí sáháⁿ uuⁿ-dé tnúhu ní xáhaⁿ Jèsús xii-dé. ¹⁶ Te ní dacuándute-dé Jèsús. Te òré ní nene-gá xití ndute te ní xiní-gá nchii andiú, te ní quee Espiritú Yá Ndiòxí véxi cuuⁿ-xi ngúndecu ndihi ñaha-xi xii-gá, te dàtná cáá ìⁿ lómá cáá Espiritú-áⁿ véxi cuuⁿ-xi. ¹⁷ Te òré-áⁿ ñí tecu ní cáhánⁿ Yá Ndiòxí ndéé andiú, te xáhaⁿ-gá xii Jèsús:

—Yòhó cúu-n Dèhe-í tée ío cùu ìní-í te ío cùdíí ìní ñáhà-í xii-n —càchí-gá xáhaⁿ-gá xii Jèsús.

4

Sáculhná quidé yica-xi cada Jesús sá ñà túú tau-gá cada-gá ní cùu

(Mr. 1:12-13; Lc. 4:1-13)

¹ Te Espiritú Yá Ndiòxí ndécá-xí Jèsús cuháⁿ ìⁿ xití yucu cuendá yacáⁿ cundecu tnaa-gá, te yacáⁿ quexio sáculhná coto ndéé ñáhá-xí xii-gá te núu ndisa sá vá cáda-gá ìⁿ sá ñà túú tau-gá cada-gá.

² Te Jèsús ñá ní xèxi-gá údico nduu údico niú, te ducaⁿ te dàtnuní ní

xicáⁿ iní-gá caxi-gá. ³ Te sátá dúcáⁿ te ní quexio sácúhná quidé yica-xi cada Jesús ^h sá ñà túú tau-gá cada-gá, te xáhaⁿ-xi xii-gá:

—Te núu ndisa sá cúu-n Déhe Yá Ndióxi te cúñaha xii yúu-a na nduu-xi paá —càchí-xi xáhaⁿ-xi xii-gá.

⁴ Te Jèsús ní xáhaⁿ-gá xii-xi:

—Núú tütú Yá Ndióxi càchí-xi: “Ñá díú mèe-ni paá candeca-xi iní ñáyiú ñuyúú, chi tnàhá nchaa tnúhu càháⁿ Yá Ndióxi candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dätñuní sácúhná-áⁿ ndécá ñaha-xi xii-gá cuáháⁿ ñuú Jerusálén, te yacáⁿ ní xáhaⁿ-xi xii-gá cuásaá-gá díquí véñuhu càhnu sá ïo cùnuu núú ñáyiú isràél, ⁶ te dätñuní ní xáhaⁿ tucu-xi xii-gá:

—Te núu ndisa cùu-n Déhe Yá Ndióxi te cuandèe ndaya núú ñúhú cuendá quee ndáá-xi nàcuáa càháⁿ-xi núú tütú-gá núú càchí-xi: “Yá Ndióxi tendaha-gá cue espíritu xínú cuèchi núú-gá quixi-xi cuendá coto ñaha-xi xii-n, te núú ndáhá-xí càundodo-n cuendá sá vá dánicuèhé yúú sáháⁿ”, duha càchí-xi núú tütú-gá —càchí sácúhná-áⁿ xáhaⁿ-xi xii Jesús.

⁷ Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndióxi: “Vá cáni iní-n còto ndeé-n Dütú Ndióxi Yaá cúú Ndióxi-n cuendá-ni sá cùni-n sá dácacu nihnu ñaha-gá xii-n ^h sá sání iní-n cada-n”, duha càchí-xi núú tütú-gá —càchí-gá xáhaⁿ-gá xii-xi.

⁸ Te sácúhná ndécá tucu-xi Jesús cuáháⁿ ^h núú tündúú dúcúⁿ, te uuⁿ ní dánèhé núú ñáhá-xí xii-gá nchaandi túhú nacióⁿ cáá ñuyúú, ndihi nchaa sá vaha ìo ^h nacióⁿ-áⁿ. ⁹ Te ní xáhaⁿ-xi xii-gá:

—Te núu yòhó nguñí xítí-n núu-í chiñuhu ñaha-n xii-í ñá, te taxi cuendá-í nchaa sá ní dánèhé ñáhá-í-a cuu cuendá-n —càchí-xi xáhaⁿ-xi xii-gá.

¹⁰ Te Jèsús ní xáhaⁿ-gá xii-xi:

—Xocuñí yòhó sácúhná núú ndécú-í-a, chi vá cúú càda-í nàcuáa càchí-n, chi núú tütú Yá Ndióxi càchí-xi: “Chiñuhu-ndo Dütú Ndióxi Yaá cúú Ndióxi-ndó, te ñiu-ni-gá cada-ndo nchaa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

¹¹ Te dätñuní sácúhná ní dáñá-xí Jesús ní xica-xi cuáháⁿ-xi. Te sátá dúcáⁿ te ní quexio cue espíritu xínú cuèchi núú Yá Ndióxi ní xinu cuechi-xi núú Jesús.

Distritú Galileá ní chisaha Jèsús chiúⁿ ní táhú Tátá-gá Dütú Ndióxi cada-gá

(Mr. 1:14-15; Lc. 4:14-15)

¹² Te òré ní níhí Jesús tnúhu sá ní ngava té Juáá tée dàcuandute ñaha xii ñáyiú vecea, te ní xica-gá cuáháⁿ-gá distritú Galileá. ¹³ Te ní ñà túú ní xindecu-gá ñuú Nazàrét, chi ní yáha-gá cuáháⁿ-gá ndéé ñuú Capernaúm yacáⁿ ní xindecu-gá, te ñuú-áⁿ cáá yatni yuhu lagúná, te yatni xíaⁿ cáá ñuhu nani Zabulón, ndihi ñuhu nani Neftalí. ¹⁴ Te ducaⁿ ní cuu chi ní quee ndáá-xi nàcuáa ní chídó tnùní ndí Chaiá tée ní xóo càháⁿ tnúhu Yá Ndióxi ndéé sanaha núú tütú-gá núú càchí-xi:

¹⁵ Ñuhu nani Zabulón, ndihi ñuhu nani Neftalí, ñuhu-áⁿ yíndèhu-xi distritú Galileá, te xíaⁿ xindecu cue ñáyiú ñá túú cùu ñáyiú isràél,

te càa-xi yatni yuhu lagúná te ndaa ingá xio yúte Jòrdán cúú-xí.

¹⁶ Te cue ñáyiú-áⁿ ndécú-yu ^h núú nées chi ndécú-yu ichi cuèhé ichi duha,

te sáá nduu te cada iní-ndó sá ñáyiú-áⁿ quee-yu núú ditó chí vá cùndècu-gá-yu ichi cuèhé ichi duha.

Te ñiu-ni ñáyiú-áⁿ cúu-yu ñáyiú ta xita nihnu duuⁿ cuáháⁿ, dico sáá nduu te vá cuíta nihnu-gá-yu.

Duha ní chídó tnùní ndí núú tütú-gá.

17 Te dàvá-áⁿ ní ngúíta Jèsús ní dánhé-gá ñáyiú, te ní xáhaⁿ-gá xii-yu:

—Chí dándixi túu iní sá ñà túú quide váha-ndo ndècu-ndo te dañá-ndo ncháa ichi cuehé ichi duha, chí sa ní cuyatni nduu ndíhu ndaha ñaha Yá Ndióxi xii-ndo — càchí-gá xáhaⁿ-gá xii-yu.

Jèsús càháⁿ-gá cúmí tnhá cue téé tñhí chácá

(Mr. 1:16-20; Lc. 5:1-11)

18 Te Jèsús ñúhú-gá ichi cuáháⁿ-gá tá yáha-gá yuhu làgúná Galiléa, te ní xiní-gá úú tnhá cue téé xídáquè-güedé ñunu-güedé xití ndute tñhí-güedé chácá, chí quití tnhá-án cúú chiuⁿ-güedé tñhí-güedé-di. Te ñⁿ-dé nání-dé Xímú, àdi Pelú chí úú òú-dé, te ñání-dé cúú ìngá téé ndihí-dé te téé-án nání-dé Ndríxi. 19 Te Jèsús ní xáhaⁿ-gá xii-güedé:

—Chí dáñá chiuⁿ quide-ndo-án te quixi-ndo chítnahá ñáhá-ndó xii-í, te taxi-í ìngá núú chiuⁿ cada-ndo chí quíhíⁿ-ndó dàcáháⁿ-ndó ñáyiú cuendá tuha ñáhá-yu xii-í — càchí-gá xáhaⁿ-gá xii-güedé.

20 Te òré-ni-án ní dáñá cuè téé-án ñunu-güedé, te ní tuha-güedé Jèsús.

21 Te ní xica tucu Jèsús cuáháⁿ-gá luha-gá, te ní xiní tucu-gá úú-gá tnhá cue téé tñhí chácá. Te ñⁿ téé-án nání-dé Jàcobó, te ñání-dé cúú ìngá téé ndihí-dé te téé-án nání-dé Juáa, te ndi ndúú-güedé cúú-güedé déhe té Zebèdè. Te xixínucóo-güedé ndihí tātá-güedé xití bàrcú xinatícu-güedé ñunu-güedé, te Jèsús ní cana ñaha-gá xii-güedé.

22 Te òré-ni-án ní dándóo-güedé bàrcú-güedé, ndihí tātá-güedé, te ní tuha ñaha-güedé xii-gá.

Jèsús dánhé-gá cuhé víhí ñáyiú
(Lc. 6:17-19)

23 Te Jèsús tá xica ndodo-gá ñihí distritú Galiléa cuáháⁿ tá

dánhé-gá ñáyiú tñúhu váha tñúhu sá sánú ichi ñaha xii-yu nàcuáa ndíhu ndaha ñaha Yá Ndióxi xii-yu. Te ndi tnhá ñⁿ ñⁿ ñúú sàá-gá te ducaⁿ cuànguihu-gá xití veñúhu dánhé-gá ñáyiú tñúhu-án. Te ndi díⁿ ndi díⁿ núú cuhé tnhá ñⁿ ñⁿ ñáyiú dico ncháa-ni-yu ta quide tátna-gá cuáháⁿ. 24 Te ndéé ncháa ñáyiú yìndehu distritú Siríá ní ñihí-yu tñúhu ncháa nàcuáa quide Jèsús. Te ní queé-yu ñúú-yu te ndécá-yu ncháa ñáyiú tnhá ndi díⁿ núú cuhé cuáháⁿ núú ndécú Jèsús. Te cuéi ñáyiú xiyihí, ndihí ñáyiú ñá túú-gá càndá ñihnu, ndihí ñáyiú yihí ñaha espíritú cündihí yucu ñáváha ndécá-yu cuáháⁿ núú-gá, te ncháa-yu ní quide tátna ñaha-gá xii-yu. 25 Te ío vèi ñáyiú ní chinchícúⁿ ñáhá xii Jèsús, chí ní chinchícúⁿ ñáhá ñáyiú distritú Galiléa, ndihí ñáyiú ncháa ñúú xíndáa Dècápolis, ndihí ñáyiú ñúú Jerusálen, ndihí cue ñáyiú ncháa ñúú yìndèhu distritú Jùdeá, ndihí ñáyiú xíndecu yatni yúte Jordán ndàa xio quene nchícanhii.

5

Jèsús núcòo-gá ñⁿ núú tìndúú dánhé-gá ñáyiú

1 Te sáta ní xiní Jèsús sá cuhé víhí ñáyiú nchícúⁿ ñáhá xii-gá, te ní xica-gá cuásáa-gá ñⁿ núú tìndúú te xiáⁿ ní ngóo-gá, te cue téé xica cuu ndihí-gá ní nadúcúⁿ ndéé ñáhá-güedé xii-gá. 2 Te ní ngúíta-gá dánhé ñáhá-gá xii-güedé ndihí cue ñáyiú-án, te xáhaⁿ-gá:

Cuendá ñáyiú ío váha táhú-xi
(Lc. 6:20-23)

3 —Váha táhú ncháa ñáyiú cùtnuní iní-xi sá ío-gá cúmāñi-yu cudúu-yu núú Yá Ndióxi, chí ñáyiú-án nduu táhú-yu ndíhu ndaha ñaha-gá xii-yu.

⁴ Váha táhú nchaa ñáyiú ndàhyú sá ndìhú iní-yu, chi Yá Ndiòxí cuañaha-gã tnúhu ndee iní cundecu ndihí-yu.

⁵ Váha táhú nchaa ñáyiú ndàhú iní-xi, chi ñáyiú-áⁿ nduu táhú-yu cundecú-yu ñⁿ xichi núú cuañaha Yá Ndiòxí xií-yu.

⁶ Váha táhú nchaa ñáyiú ío cuini cada nchaa nàcuáa càháⁿ Yá Ndiòxí, chi ñáyiú-áⁿ ío nduu vétú iní-yu.

⁷ Váha táhú nchaa ñáyiú cùndahú iní tnàha ñáyiú-xi, chi ñáyiú-áⁿ ñu-ni ducaⁿ càda ñaha Yá Ndiòxí xií-yu cundàhú iní ñáhá-gã.

⁸ Váha táhú nchaa ñáyiú ní nduu ndoo ní nduu nine iní-xi, chi cue ñáyiú-áⁿ nduu táhú-yu cundecú-yu ndihí Yá Ndiòxí.

⁹ Váha táhú nchaa ñáyiú càháⁿ dóho tnàha ñáyiú-xi nàcuáa cundecu ndihí váha tnàhá-yu, chi cùtnuní sá ñáyiú-áⁿ cuú-yu déhe Yá Ndiòxí.

¹⁰ Váha táhú nchaa ñáyiú ío ndòho ndecu ñuyúú-a sá cuendá sá quidé-yu nàcuáa càháⁿ Yá Ndiòxí, chi ñáyiú-áⁿ nduu táhú-yu ndìhu ndaha ñaha-gã xií-yu.

¹¹ Te cùu-ndo ñáyiú ío váha táhú-xi te núu na cùcùehé ñáhá ñáyiú, àdi cada úhú ñáhá-yu xii-ndo, àdi daciaa díquí ñáhá-yu nándi cuéchi neñúú xii-ndo sá cuendá-í. ¹² Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi ío váha càa sá ndécú àndiú nduu táhú-ndó cùndecu ndihí-ndo nduu na saá-ndó yacáⁿ cundecu-ndo, chi ñu-ni ducaⁿ ní xóo cada ñaha cue ñani tnàhá-yu xii cue téé ní xóo càháⁿ tnúhu Yá Ndiòxí ní xíndecu ndéé sanaha.

Cuendá ñíí ndihí cuendá ñuhú
(Mr. 9:50; Lc. 14:34-35)

¹³ Te nchòhó cada iní-ndó sá cúu-ndó dàtná ñíí cuendá ñuyúú-a. Te ñíí chi nàndihí-xi dico núu na ndùu víxiⁿ-xi, te ñá túú-gã nándihí-xi chi dǎngoyo-ná-ó, te

yáha ñáyiú xènihnú-yu. Te ducaⁿ sátnahá-xi cùu nchòhó chi cùu-ndo dàtná ñíí váha te núu na càda váha-ndo, te núu vá càdá váha-ndo te quee tíhú-ndó.

¹⁴ Te nchòhó cada iní-ndó sá cúu-ndó dàtná ñⁿ sá dayèhé ndécú ñuyúú-a, chi sànu ichi-ndo ñáyiú ichi váha. Te nchòhó xini-ndo sá núu ñⁿ ñuú cáá ñⁿ núú tìndúú te vá cúu càchí-ó sá nguiváha-xi. ¹⁵ Te ñá túú xini-ó ñⁿ ñáyiú teñuhú-yu ñⁿ lìntèrná te chiváha-yu xití ñⁿ càjá, chi tàxi ndecú-yu núú ññu cuendá cutnùni núú nchaa ñáyiú ndècu vehe. ¹⁶ Te ducaⁿ càda nchòhó cada váha-ndo dàtná quidé ñⁿ ñuhú dayèhe-xi núú ñáyiú, te ducaⁿ quini ñáyiú nàcuáa quide-ndo ndecu-ndo, te tnàhá-yu cachí-yu sá ío càhnu cuu Dútú Ndiòxí Yaá cúú Tàtá-ndó ndècu andiú chi quini-yu sá quidé váha-ndo ndècu-ndo.

Cuendá tnúhu ní chídó tnùnì ndíi Moisés

¹⁷ Te vá cáni iní-ndó sá yùhú véxi-í xocàni-í tnúhu ní chídó tnùnì ndíi Moisés, te ní vá cáni iní-ndó sá véxi-í xocàni-í tnúhu ní chídó tnùnì cue téé ní xóo càháⁿ tnúhu Yá Ndiòxí ndéé sanaha, chi yùhú véxi-í sá càdá-í nàcuáa càháⁿ nchaa tnúhu-áⁿ. ¹⁸ Te na càchí tnúhu ndáá-í xii-ndo sá tnúhu ní chídó tnùnì ndíi Moisés ío ndáá càháⁿ-xi, chi dacuítí cùu nchaa nacuáa càháⁿ-xi. Te yáchí-gã naa andiú ndihí ñuyúú dàcúúxí sá quèe cáva ñⁿ tnúhu-áⁿ. ¹⁹ Núu xíáⁿ nchaa ñáyiú na càchí sá dáva tnúhu ní chídó tnùnì ndíi Moisés ñá túú xini ñuhú-xi chi ñá túú cùnuu-xi, te ñáyiú-áⁿ ñu-ni ducaⁿ dànehé-yu nchaa dava-gã tnàha ñáyiú-yu, te sá dúcáⁿ quidé-yu te vá cùnùu vihi-yu núú ndécú Yá Ndiòxí táxi tnùnì-gã, chi cuú-yu dàtná ñⁿ ñáyiú nchìcúⁿ cuí-ná. Dico nchaa ñáyiú nchìcúⁿ nihnu quide nchaa nacuáa càháⁿ nchaa tnúhu-áⁿ, te ñu-ni ducaⁿ dànehé-yu nchaa dava-gã tnàha ñáyiú-yu, te ñáyiú-áⁿ ío cunúú-yu núú ndécú Yá

Ndiõxí táxí tnùnì-gá. ²⁰ Te na càchí tnúhu-í xii-ndo sã ïo xini ñuhu-xi cada-ndo nchaa nacuaa cãháⁿ Yã Ndiõxí, te vã cadã-ndó dàtnã xiquide cue tée dãnehé ñãhá xii ñáyiu nchaa tnúhu ní chidó tnùnì ndí Moisés, ndihì dàtnã xiquide cue tée cùu fariséu, chi núu na càda-ndo datnã xiquide cue tée-áⁿ ñã, te vã ndúú tãhú-ndó ndíhu ndaha ñãha Yã Ndiõxí xii-ndo.

Jèsús càháⁿ-gá cuendá ñáyiu cùdéeⁿ

(Lc. 12:57-59)

²¹ Te nchòhó sa xini-ndó sã ncháã ñáyiu ní cuu ñani tnáhã-ndó nã xindecu ndée sanaha nã níh-yu tnúhu sã vã cúú cãhni-yu tnãha ñáyíu-yu, chi núu ducaⁿ na cadã-yu te nachãhu-yu cuèchi-yu. ²² Dico vitna na càchí tnúhu-í xii-ndo sã núu ndédani càa-ndo na cudéeⁿ-ndó núú tnãha ñáyiu-ndo, te nachãhu-ndo sã dúcãⁿ quide-ndo, àdi núu na cùcuèhé-ndó-yu te núú chítú núú tàcã cundãã cuèchi-ndo te núu ducaⁿ na càda-ndo, àdi núu nã cùu-ndo tnãha ñáyiu-ndo ìⁿ tnúhu vée vîhi, te cucuéchi vîhi xii-ndo chi quihíⁿ-ndó núú ùhú núú ndàhú.

²³ Te xíãⁿ núu nchòhó òrè ndécú ndihì-ndo ìⁿ sã cùnì-ndó cuãha-ndo Yã Ndiõxí nduu tãhú-gã, te òrè cuáhã-ndó cuãñaha-ndo xii-gã, te òrè ní quexio-ndo núú dúcãⁿ cuãñaha-ndo xii-gã sã ndúú tãhú-gã, te ní ndacu inì-ndó sã ndécú ñáyiu ñã túú cùu váha inì ñãhá xii-ndo cuendá ìⁿ sã ní cumání núú tnáhã-ndó. ²⁴ Te dãndóo-ndo sã dúcãⁿ nèhe-ndo cuáhãⁿ nduu tãhú Yã Ndiõxí, te díhna-gá quihíⁿ-ndó nãcãháⁿ cãhnú inì tnáhã-ndó ndihì ñáyiu ñã túú cùu váha inì ñãhá xii-ndo-áⁿ, te dàtnùnì ducaⁿ te quihíⁿ-ndó cuãha-ndo Yã Ndiõxí sã ndúú tãhú-gã.

²⁵ Te núu ïó ìⁿ-ndo nã sãháⁿ ñáyiu núú tée cùchiuⁿ ní sacãⁿ cuèchi-yu cuendã-ndó cuendã ìⁿ sã ní quide-ndo, te òrè ní naníhí

tnáhã-ndó ndihí-yu cuáhãⁿ-ndó núú tée cùchiuⁿ-áⁿ, te nacãháⁿ cãhnú inì tnáhã-ndó ndihí-yu cuendã sã vã cuãha cuendã ñãhá-gã-yu xii-ndo núú tã cùchiuⁿ, chi núu ducaⁿ na cadã-yu te tée cùchiuⁿ-áⁿ cuãha cuendã ñãhá-dẽ xii-ndo núú cuè tée cùu poleciã, te cue tée-áⁿ chihi ñaha-güedẽ vecaã xii-ndo. ²⁶ Te na càchí tnúhu ndãã-í xii-ndo sã vã cãcu-ndo te núu na ngãva-ndo vecaã ndée nachãhu-ndo nchãa sã tàú-ndó.

Cuendã cue ñáyiu ñã túú quide váha

²⁷ Te nchòhó sa xini-ndó nacuaã nduu tnúhu ní cãháⁿ cue tée ní xindecu ndée sanaha, te duha ní cãchí-güedẽ: “Nchaa cue tée vã cúú cãháⁿ ndihì-güedẽ ñadihí te núu ñã díú ÿⁿ-yu cùu-güedẽ”, duha ní cãchí-güedẽ. ²⁸ Dico yúhú càchí tnúhu-í xii-ndo sã ndéda-ni càa cue tée na cundehe ìⁿ ñadihí te núu na càni inì-güedẽ cundecu díⁿ inì-güedẽ ndihí-yu te cada inì-ndó sã dàtnã sã sã ní cãháⁿ ndihì ñaha-güedẽ xií-yu sã dúcãⁿ ní sani inì-güedẽ.

²⁹ Te núu ìⁿ xio tinùu-ndo quide-xi quide-ndo nãndi sã cuèhé sã dúhá te tava-ndo, chi váha-gã sã ná cuíta te ñã díú ñihí ní ndúú yiqui cuñú-ndó quihíⁿ-xi núú ùhú núú ndàhú. ³⁰ Te núu ìⁿ xio ndaha-ndo quide-xi quide-ndo nãndi sã cuèhé sã dúhá te quehdé-ndó, chi váha-gã sã ná cuíta ìⁿ xio ndaha-ndo te ñã díú sã ñihí ní ndúú yiqui cuñú-ndó quihíⁿ-xi núú ùhú núú ndàhú.

Jèsús càháⁿ-gá cuendã cue ñáyiu dàña tnaha

(Mt. 19:9; Mr. 10:11-12; Lc. 16:18)

³¹ Te nchòhó sa nãha tucu-ndo nacuaã ní cãháⁿ tucu cue tée ní xindecu ndée sanaha, te duha ní cãchí-güedẽ: “Te núu ìⁿ tée na

dãña tnaha-dé ndihî ñadîhî-dé, te xîni ñuñu-xî cadúha-dé ìⁿ tutú cuãñaha-dé núú cáháⁿ-xî sá ñí dáñá ñaha-dé”, duha ní cachí-güedé.

³² Dico yúhú càchî tnúhu-í xii-ndo sã cúú dãña ìⁿ téé ñadîhî-dé, te núú cutnuni ndáá iní-dé sá cáháⁿ ndihî-aⁿ ingá téé. Dico núú ñá túú dùcaⁿ quide-aⁿ te ñá túú ndùu váha-xî dãña ñaha-dé. Te núú ñá túú dùcaⁿ quide ñadîhî-dé, te cada iní-ó sã méé-dé ní sanu ichi ñaha-dé xii-aⁿ cáháⁿ ndihî-aⁿ ingá téé te núú na dãña ñaha-dé. Te téé na nàqueheⁿ ñaha xii ñaha ní dáñá ñaha yî-xi-áⁿ, te ñu-ni ñá túú ní quide váha-dé sá dúcáⁿ ñí naqueheⁿ-dé ñaha-áⁿ.

Ñáyiu càcunehe ñaha xii Yá Ndiõxí cuendá cutnuni iní tnàha ñáyíu-yu sá ndáá cada-yu ìⁿ sá sání iní-yu cada-yu

³³ Te sa nàha tucu-ndo nacuaáa ní cáháⁿ tucu cue téé ní xindecu ndéé sanaha, chí cue téé-áⁿ ñí cachí-güedé: “Te núú càcunehe-ndo Yá Ndiõxí núú tnàha ñáyiu-ndo nàcuáa cutnuni iní-yu sá ndáá cada-ndo ìⁿ sá sání iní-ndó càda-ndo, te cada-ndo”, duha ní cáháⁿ dóho tnàha-güedé. ³⁴ Dico yúhú càchî tnúhu-í xii-ndo sã ñá túú ñá cacunehe-ndo sã ndáá cada-ndo ìⁿ sá sání iní-ndó càda-ndo. Te ñí vã cáçú nèhe-ndo andiu chí yacáⁿ cúú-xí núú núcõo Yá Ndiõxí táxî tnuni-gá. ³⁵ Te ñí vã cáçú nèhe-ndo ñuyíu-a, chí tnàhá ñuyíu-a ndècu-gá, te ñí vã cáçú nèhe-ndo ñuú Jerusàlén chí ñuú-áⁿ cúú cuendá-gá, te ñu-gá cúú-gã Yaá ío cunu. ³⁶ Te ñí vã cáçú nèhe-ndo díquí-ndó chí nàha-ndo sá ñí ìⁿ idi díquí-ndó ñá ndácú-ndó ndàda cuixíⁿ-ndó àdi ndada tnuu-ndo. ³⁷ Te váha-gá sá núu ìⁿ sá sání iní-ndó càda-ndo, te cachí-ni-ndo: “Cuu cada-ndí, àdi vá cúú càda-ndí”, cachí-ni-ndo. Chí nchaa dava-gá sá chidó-ndó cáháⁿ-ndó òré ducaⁿ sání iní-ndó càda-ndo ìⁿ sá cáda-ndó cùu-xî sá dácàhu iní ñáhá yùcu ñávàha.

Cuendá ñáyiu nàchinaa sá quidé ñàha tnaha ñáyíu-xi
(Lc. 6:29-30)

³⁸ Te sa nàha tucu-ndo nacuaáa ní cáháⁿ tucu cue téé ní xindecu ndéé sanaha, chí cue téé-áⁿ ñí cachí-güedé: “Ñáyiu na càda ñaha tnaha ñáyíu-xi ìⁿ sá ñá túú vãha, te nanchòcava-yu nachinaá-yu sá ñí quide ñaha tnàha ñáyíu-yu”, duha ní cachí-güedé. ³⁹ Dico yúhú càchî tnúhu-í xii-ndo sã ñá túú ñá cada-ndo nchàa cue ñáyíu cuìhna iní-xi te núú quide ñahá-yu ìⁿ sá ñá túú vãha xii-ndo. Te núú ní canihá-yu ìⁿ xito te cuìní tucú-yu canihá-yu ingá xito te dãña-ndo na canihá-yu. ⁴⁰ Àdi ní sacáⁿ cuéchi-yu núú cuè téé cùchiuⁿ cuendá-ndó, te cuìní-yu quendeé-yu dúhnú-ndó te dãña-ndo na cànehé-yu quíhíⁿ, te tnàhá-ni dóó ndíxí ndòdo-ndo dãña-ndo na canehé-yu quíhíⁿ. ⁴¹ Te núú quide yicá-yu caca-ndo dàtná úú kilómetrú cuido-ndo ndàchiúⁿ-yu ña, te chido-ndo úú-gá tucu kilómetrú cuido-ndo ndàchiúⁿ-yu. ⁴² Te núú ío ìⁿ sá xicáⁿ-yu núú-ndó te cuãñaha-ndo, àdi ío ìⁿ sá sánúu-yu núú-ndó te cuãñaha núu-ndo.

Cuu iní-ó nchàa ñáyiu cùu úhú iní ñáhá xii-o
(Lc. 6:27-28, 32-36)

⁴³ Te sa nàha tucu-ndo nacuaáa ní cachí tucu cue téé ní xindecu ndéé sanaha, chí cue téé-áⁿ ñí cachí-güedé: “Cuu iní-ndó cuè ñáyíu ndècu ndihî váha-ndo, te cuu úhú iní-ndó cuè ñáyíu cùu úhú iní ñáhá xii-ndo”, duha ní cachí-güedé. ⁴⁴ Dico yúhú càchî tnúhu-í xii-ndo sã cúú iní-ndó cuè ñáyíu cùu úhú iní ñáhá xii-ndo, te cáháⁿ váha-ndo cuendá cue ñáyíu cáháⁿ úhú ñáhá xii-ndo, te cada-ndo sã vãha sá cúú-xí cuè ñáyíu cùu úhú iní ñáhá xii-ndo, te cáháⁿ ndihî-ndo Yá Ndiõxí cuendá cue ñáyíu xicuehé ñáhá xii-ndo, ndihî cuendá cue ñáyíu quide úhú ñáhá xii-ndo. ⁴⁵ Te núú na càda-ndo

nchaa nacuaa cãháⁿ-í-a, te ducaⁿ te cutnùni sã cúu-ndó dèhe Tãtã-ndó Dütú Ndiõxí Yaa ndécú àndiu. Te ðiu-gã cúu-gã Yaa quidé quène nchíanchii, te ðiu-ni-gã cúu-gã Yaa dácuuⁿ dáu ñuyúⁿ-a, te ducaⁿ quide-gã cuendá cuu-xi sã vãha sã cúu-xí cuè ñáyiú quide vãha, ndihi sã cúu-xí cuè ñáyiú ñã túú quide vãha. ⁴⁶ Te núu nchòhó ná cúu ñni-ndó mée-ni ñáyiú na cúu ñni ñháá xii-ndo, te vá càchí-ndó sã Yã Ndiõxí taxi-gã sã ndúú tãhú-ndó sã dúcãⁿ quide-ndo, chi cuèi cue tée cuihna ñni-xi quide cobrá ñháá xii cue ñáyiú cuendá impuèstú ducaⁿ xiquide-güedé. ⁴⁷ Te núu mee-ni ñáyiú ndècu ndihi vãha-ndo ño vãha cãháⁿ ndihi-ndõ-yu, te vá càchí-ndó sã ño vãha quide-ndo sã dúcãⁿ quide-ndo, chi cuèi ndéé nchaa ñáyiú ñã túú xini dana cuendá Yã Ndiõxí ducaⁿ xiquide-yu. ⁴⁸ Te duha ndùu tnúhu cãháⁿ-í cuendá sã nchòhó cada ndãã-ndó cùndecu-ndo datná quidé ndãã mée Tãtã-ndó Dütú Ndiõxí Yaa ndécú àndiu —duha ní dánèhè ñháá Jesús xii cue tée xica cuu ndihi-gã ndihi nchaa ñáyiú.

6

Jèsús dánèhè-gã ñáyiú nãcuãa cada-yu sã vãha

¹ Te Jèsús ndécú-ni-gã dánèhè-gã cue tée xica cuu ndihi-gã ndihi nchaa ñáyiú, te xãhaⁿ-gã:

—Te òré quidé-ndó sã vãha te vá cáda-ndó núú ñáyiú cuendá-ni sã cuini-ndó cãháⁿ vãha-yu cuendá-ndó, chi núu núú ñáyiú ducaⁿ na càda-ndo te Dütú Ndiõxí Yaa cúu Tãtã-ndó vá taxi-gã sã ndúú tãhú-ndó. ² Te xããⁿ núu nchòhó òré chindèe-ndo ñáyiú ndàhú, te vá cũñaha-ndo xii cue ñáyiú sã chindèe-ndo cue ñáyiú ndàhú-ãⁿ datná xiquide cue ñáyiú dandahú mée-xí sã quidé ndãã te ñã ndãã sã quidé ndãã-yu, chi ñáyiú-ãⁿ ducaⁿ xiquide-yu òré sãháⁿ-yu veñúhu, chi dàtecú

tnúhu-yu nchaa ñáyiú òré ducaⁿ chindee-yu ñáyiú ndàhú. Te ðiu-ni ducaⁿ quide-yu xãháⁿ-yu xii cue ñáyiú sã chindèe-yu cue ñáyiú ndàhú-ãⁿ nchaa núú xicã cúu-yu, te ducaⁿ xiquide-yu cuendá cuini-yu cãháⁿ vãha ñáyiú cuendá-yu. Te yúhú na càchí tnúhu ndãã-í xii-ndo sã ñã túú ñã nduu tãhú ñáyiú-ãⁿ núú Yã Ndiõxí sã dúcãⁿ quide-yu chi mee-ni núú tnãha ñáyiú-yu cùdiú-yu. ³ Te nchòhó òré chindèe-ndo ñáyiú ndàhú, te cuèi ñáyiú ño-gã vãha ndècu ndihi-ndo dico vá cũñaha-ndo sã dúcãⁿ chindee-ndo cue ñáyiú ndàhú-ãⁿ, te ni cuèi dava-gã ñáyiú vá cũñaha-ndo. ⁴ Chi vãha-gã sã ñni mée-ni-ndó ná cùhuⁿ sã dúcãⁿ chindee-ndo cue ñáyiú ndàhú-ãⁿ. Te núu ducaⁿ na càda-ndo ñã, te Dütú Ndiõxí Yaa cúu Tãtã-ndó taxi-gã sã ndúú tãhú-ndó chi ðiu-ni mee-gã ndéhè-gã nãcuãa quide-ndo ndecu-ndo.

Jèsús dánèhè-gã ñáyiú nãcuãa cãháⁿ ndihi-yu Yã Ndiõxí

(Lc. 11:2-4)

⁵ Te nchòhó òré cãháⁿ ndihi-ndo Yã Ndiõxí, te vá cáda-ndó datná xiquide cue ñáyiú dandahú mée-xí càchí sã quidé ndãã te ñã ndãã sã quidé ndãã-yu, chi ñáyiú-ãⁿ tnãhá ñni-yu cunutni-yu cãháⁿ ndihi-yu Yã Ndiõxí òré yihí-yu veñúhu. Te ðiu-ni ducaⁿ xiquide-yu nchaa núú xicã cúu-yu, te ducaⁿ quide-yu cuendá sã cuini-yu quini ñáyiú nãcuãa xiquide-yu. Te na càchí tnúhu ndãã-í xii-ndo sã ñã túú ñã nduu tãhú ñáyiú-ãⁿ núú Yã Ndiõxí sã dúcãⁿ quide-yu chi mee-ni núú tnãha ñáyiú-yu cùdiú-yu. ⁶ Te nchòhó òré cuini-ndó cãháⁿ ndihi-ndo Yã Ndiõxí, te ndíhu ndedí nihnu-ndo xití vehe-ndo, chi ðiu-gã cúu Tãtã-ndó te ndècu ndihi ñaha-gã xii-ndo, te ðiu-ni mee-gã ndéhè ñaha-gã xii-ndo nãcuãa quide-ndo, te núu ducaⁿ

na càda-ndo te taxi-gá sá ndúú tǎhú-ndó.

⁷ Te òré càháⁿ ndihì-ndo Yǎ Ndiǒxí te vǎ sùúni cuèndá-ni dacáá-ndó tnúhu càháⁿ ndihì-ndo-gǎ dàtná xǐquide cue ñáyiú ñá túú xìní tnúhu-gá, chí ñáyiú-áⁿ sání iní-yu sá tédòho ñaha vǐhi-gá Yǎ Ndiǒxí xii-yu sá dúcáⁿ sùúni dàcaá-yu tnúhu càháⁿ ndihì ñàhá-yu xii-gá dico ñàhá. ⁸ Dico nchòhó, vǎ càdá-ndó dàtná xǐquide cue ñáyiú-áⁿ, chí mee Tǎtá-ndó Dǔtú Ndiǒxí sa nàha-gá ná cúú nchàa sá xìní ñùhu-ndo cuéi òré vǎtá càcáⁿ-gá-ndó núú-gá.

⁹ Te duha càháⁿ-ndó òré càháⁿ ndihì-ndo Yǎ Ndiǒxí:

Yòhó Tǎtá-ndí Dǔtú Ndiǒxí Yáá ndécú àndiú,
nchaa ñáyiú na càháⁿ-yu sá cúú-n
Yáá ío yǐñùhu.

¹⁰ Te xicáⁿ tǎhú-ndí núú-n sǎ ná sàà nduu ndíhu ndàhá-n-yu.

Te cada-n dàtná càchí iní-n ñùyíú-a dàtná quidé-n àndiú.

¹¹ Te xicáⁿ tǎhú-ndí núú-n sǎ táxí-n sǎ cóhó-ndí sá cǎxí-ndí ñⁿ nduu ñⁿ nduu.

¹² Te cada càhnu iní-n nchàa yícá cuèchi-ndí, chí tnàhá nchúhú quidé càhnu iní-ndí nchaa sá quidé ñàha tnaha ñáyiú-ndí.

¹³ Te vǎ dáñá-n dàcàháⁿ ñàhá yècu ñávǎha xii-ndí cada-ndí sǎ ñá túú vǎha, chí coto ñaha-n xii-ndí cuèndá sá vǎ dúcáⁿ càda ñaha-xi.

Te diu-n cùu-n Yáá ío cùnuu nchaa nduu nchaa quíú, te ío càhnu cuu-n, te diu-ni-n quìndaha ñaha-n xii-ndí ni caa ni quíhíⁿ. Te ducaⁿ na cùnduu.

Duha dànehé ñàhá-í xii-ndo càháⁿ ndihì-ndo Yǎ Ndiǒxí.

¹⁴ Te núú nchòhó quidé càhnu iní-ndó nchàa sá quidé ñàha tnaha ñáyiú-ndo, te ducaⁿ te Tǎtá-ndó Dǔtú Ndiǒxí Yáá ndécú àndiú cada cahnu iní-gá nchaa sá ñá túú vǎha quide-ndo tucu. ¹⁵ Dico núú nchòhó vǎ càdá càhnu iní-ndó nchàa sá quidé ñàha tnaha ñáyiú-ndo ña, te

ni Dǔtú Ndiǒxí Yáá cúú Tǎtá-ndó vǎ càdá càhnu iní-gá nchaa sá quidé-ndó tucu.

Cuèndá ñáyiú ñá túú tnàhí ná xéxí ãma càháⁿ ndihì-yu Yá Ndiǒxí

¹⁶ Te nchòhó, nduu ñá túú tnàhí ná xéxí-ndó càháⁿ ndihì-ndo Yǎ Ndiǒxí, te vǎ cùndiyí-ndó dàtná xǐquide nchaa ñáyiú dándahú méé-xí càchí sá quidé ndáá te ñá ndáá sá quidé ndáá-yu, chí ñáyiú-áⁿ ducaⁿ xǐquidé-yu cuèndá sá cuíní-yu cutnùni iní ñáyiú sá ñá túú tnàhí ná xéxí-yu càháⁿ ndihì-yu Yá Ndiǒxí. Te yúhú càchí tnúhu-í xii-ndo sǎ sá dúcáⁿ quidé-yu te ñá túú nǎ chindee ñàha-xi xii-yu cuèndá ñihí-yu ñⁿ sá ndúú tǎhú-yu núú Yǎ Ndiǒxí. ¹⁷ Dico nchòhó, nduu dùcaⁿ quide-ndo ñá túú tnàhí ná xéxí-ndó càháⁿ ndihì-ndo Yǎ Ndiǒxí, te vǎha vǎha naquete-ndo núú-ndó, te vǎha vǎha chíhi-ndo cùcá ¹⁸ cuèndá sá vǎ cùtnùni iní ñáyiú sá ñá túú nǎ xéxí-ndó nduu ducaⁿ càháⁿ ndihì-ndo Yǎ Ndiǒxí. Te Dǔtú Ndiǒxí Yáá cúú Tǎtá-ndó ndécú ndihì-ndo diu-ni mee-gá ndéhé-gá nàcuáa quide-ndo ndecu-ndo, te diu-gá taxi-gá sá ndúú tǎhú-ndó.

Cuèndá nchaa sá vǎha nduu tǎhú-ó

(Lc. 12:33-34)

¹⁹ Te vǎ cání iní-ndó cùu-ndo ñáyiú cuica nǎndí sá cùndècu ndihì-ndo ñuyíú-a chí vǎ cùdii-xi, chí dava quee tíquidi, te dava caxi cudí ñùhu, àdi quíhu ñadúhú vehe-ndo te duhu-güedé. ²⁰ Te vǎha-gá chí ndúcú nàcuáa cada-ndo cuèndá ducaⁿ ngündecu sá ndúú tǎhú-ndó àndiú, te xǐáⁿ cudii-xi cundecu ndihì-ndo ni caa ni quíhíⁿ, chí yàcáⁿ vǎ quée-gǎ tíquidi, te ni vǎ cǎxí-gǎ cudí ñùhu, te ni vǎ quíní-gá-ndó ñadúhú duhu-güedé ndachluⁿ-ndo. ²¹ Te núú cùu-ndo ñáyiú cuica ndècu ñuyíú-a, te diu-ni nchaa sá ndécú ndihì-ndo ñuyíú-a ñùhu iní-ndó. Àdi cuu-ndo ñáyiú

quide nacuáa ngúndecu sá ndúú tãhú-ndó àndiu, te diu-ni sá ndúú tãhú-ndó ndècu andiu-án ñuhú iní-ndó.

Núú-ó cùu-xi datná ìñ ñuhú
(Lc. 11:34-36)

²² Te cada iní-ndó sã núú-ndó cùu-xi datná ìñ ñuhú. Te núú núú-ndó càvãha te cùtnuní iní-ndó nã cúú sã ndécú núú-ndó. ²³ Dico núú cùhú núú-ndó ñã túú cùtnuní cundehe-ndo ñã, te ñã túú cùtnuní iní-ndó nã cúú sã ndécú núú-ndó. Te sã dúcáⁿ cùhú núú-ndó te cada iní-ndó sã ndécú-ndó datná ìñ núú néé. Te duha nduu tnúhu càháⁿ-í chi núú sãni váha iní-ndó cuëndá Yã Ndióxi ñã, te cùu vii cuu váha iní-ndó ndècu-ndo. Áⁿ te núú ñã túú sãni váha iní-ndó cuëndá-gã ñã, te ñã túú tnãhí cùu váha iní-ndó ndècu-ndo. Te sã dúcáⁿ ñã túú sãni váha iní-ndó cuëndá-gã te cada iní-ndó sã ndécú-ndó datná ìñ núú néé.

Vã ndácú ìñ téé cunu cuechi-dé núú úú patróóⁿ
(Lc. 16:13)

²⁴ Te ni ìñ téé xìnu cuechi vá ndácú-dé cunu cuechi-dé núú úú patróóⁿ, chi téé-án cuu váha iní-dé núú ìñ patróóⁿ-dè te tní-dé nchaa tnúhu càháⁿ patróóⁿ téé cùu váha iní-dé núú-xi-án. Te núú ingá tucu patróóⁿ-dè vá cúú váha iní-dé, te ni vá tní-dé tnúhu càháⁿ ingá téé-án. Te duca sãtnahá-xi cùu nchóhó chi vá ndácú-ndó cunu cuechi-ndo núú Yã Ndióxi te cuhuⁿ iní-ndó nchãa sã ío ñuyú-a.

Yã Ndióxi xító-gã nchaa ñáyiu cùu déhe-gã
(Lc. 12:22-31)

²⁵ Te na càchí tnúhu-í xii-ndo sã vã ío cani iní-ndó núu nãsa níhí-ndó sã cóhó sã cáxi-ndó, te ni vã ío cani iní-ndó núu nãsa níhí-ndó dõó cuihnu-ndo, chi cunu-gã méé-ndó dàcúúxí sã nchító-ndó, te ducaⁿ cunu-gã yiqui cùñú-ndó dàcúúxí dõó sácuihnu-ndo. ²⁶ Te chí cádá cuëndá sã nchãá quiti ndava ñã túú tnãhí ná xítú-güedi, te ni ñã túú ndéé cuáhãⁿ-güedi nãtahu-güedi, te

ni ñã túú nã nãtãxúha-güedi, te ni ñã túú ndéé cáá yácã-güedi, chi mee Tãtã-ó Dütú Ndióxi Yã ndécú àndiu xito ñaha-gã xii-güedi níhí-güedi sã xéxi-güedi. Te núu cue quiti-án ducaⁿ xito ñaha-gã xii-güedi, ìte uuⁿ-gã xító ñaha-gã xii nchòhó, chi nchòhó ío-gã cùnùu-ndo dacúúxí cuè quiti-án! ²⁷ Te cuèi nãndi sã sãní vñhi iní-ndó ndècu-ndo, dico ñã ndácú-ndó càda-ndo nacuáa cuehnu-ndo cuèdicó ìñ yiqui-gã.

²⁸ Te vã ío cani iní-ndó núu nãsa níhí-ndó dõó cuihnu-ndo. Te chí cádá cuëndã nãcuáa sãhnu nchaa itã ío yucu, chi nchaa itã-án ñã túú quide chiuⁿ-xi, te ni ñã túú quèheⁿ-xi idi. ²⁹ Te na càchí tnúhu-í xii-ndo sã ndíi Salòmón cuèi ío vii ní xínduu dõó ní xóo cuihnu ndíi, dico ñã túú nãtnahá-xi nãcuáa càa nchaa itã, chi ío-gã vii càa nchaa itã. ³⁰ Te nchaa itã ío yucu tnaa-ni cùdii-xi, te yìchí-xi te sãhmi ñáyiu. Te cuèi ducaⁿ dico mee Yã Ndióxi quidé-gã ío vii sãcúnduu-xi. Te núu nchaa itã-án ducaⁿ quide-gã xító-gã sãcúnduu vii-xi, te xiãⁿ cùtnuní sã ío-gã coto ñaha-gã xii-ndo, dicó-ni sã ñã túú sãndãá váha iní-ndó-gã. ³¹ Te xiãⁿ núu ñã túú xìni ñuhú vñhi-xi cani iní-ndó núu nãsa níhí-ndó sã cóhó sã cáxi-ndó, àdi nãsa níhí-ndó dõó cuihnu-ndo. ³² Chi nchaa ñáyiu ñã túú xìni nãcuáa càháⁿ tnúhu Yã Ndióxi mee-ni nchãa xiãⁿ ñuhú iní-yu. Dico nchòhó chi mee Tãtã-ndó Dütú Ndióxi sa nãha-gã ná cúú sã xíní ñuhu-ndo. ³³ Te xiãⁿ núu ío xìni ñuhu-xi sã cùhúⁿ iní-ndó sã Yã Ndióxi yíndãha ñaha-gã xii-ndo, te ducaⁿ càda-ndo nchaa nacuáa cuní-gã, te ducaⁿ te taxi-gã nchaa sã xíní ñuhu-ndo. ³⁴ Núu xiãⁿ vã ío cani iní-ndó nãsa cundece-ndo nduu tneé, chi cani iní-ndó nãcuáa cada-ndo cundece-ndo vitna, chi nduu tnéé-án te òré-nã te cutnùní núu nãsa cada-ndo cundece-ndo. Chi nchòhó sa nãha-ndo sã ío titní núu sã quidé-xí ìñ nduu ìñ duu — duha ní dãnèhé ñãhá Jèsús xii cue téé xìca cuu ndihi-gã ndihi nchaa

ñáiyu.

7

Vá càháⁿ cuèhé-ó cuendá tnàha ñáiyu-o

(Lc. 6:37-38, 41-42)

¹ Te Jèsús ndéccu-ni-gá dánèhé-gá cue téé xica cuu ndihi-gá ndihi nchaa ñáiyu, te xàhaⁿ-gã:

—Vá càháⁿ cuèhé-ndó cuendá tnàha ñáiyu-ndo, te ducaⁿ te Yá Ndiòxí ñá túú ná tnúhu cúñaha-gã xii-ndo. ² Chi núu na càháⁿ cuèhé-ndó cuendá tnàha ñáiyu-ndo,

te Yá Ndiòxí íó ìⁿ sá cádá ñàha-gá xii-ndo. Te núu nchòhó ná càháⁿ cuèhé víhí-ndó cuendá tnàha ñáiyu-ndo te Yá Ndiòxí ío-gá dandòho ñàha-gá xii-ndo. ³ Te

ná cuendá ndéhé-ndó ìⁿ sá ñá túú vâha quide tnaha ñáiyu-ndo te mee-ndo víhi-gá quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìⁿ mihi líhli ñùhu núú tnàha ñáiyu-ndo te mee-ndo ñùhu ìⁿ mihi cahnu-gá núú-ndó te ñá túú quide cuendá-ndó. ⁴ Te

núu na nàcanu ichi-ndo tnaha ñáiyu-ndo cuendá sá ñá túú quide váha-yu ndécú-yu, te mee-ndo víhi-gá quidé-ndó ñá, te cada iní-ndó sá xàhaⁿ-ndo xii tnaha ñáiyu-ndo sá nátava-ndo mihi líhli ñùhu núú-yu sá dúcáⁿ quide-ndo, te mihi cahnu ñùhu núú méé-ndó ñá túú quide cuendá-ndó. ⁵ Te sá dúcáⁿ quide-ndo te ío dandahú-ndó mèe-ndo sá quidé ndáá-ndó te ñá ndáá sá quidé ndáá-ndó, te ñini ñùhu-xi díhna-gá ãña-ndo nchaa sá ñá túú vâha quide-ndo, te dàtnúni ducaⁿ te cuu nàcanu ichi-ndo tnàha ñáiyu-ndo cuendá nchaa sá ñá túú vâha quidé-yu.

⁶ Te nchaa ñáiyu ío sáá iní-xi, te vá cádá yica-ndó-yu cundedóho-yu tnúhu Yá Ndiòxí, chi núu na càda yica-ndó-yu te ngóo-yu cuu úhú iní ñàhá-yu xii-ndo. Te ñáiyu-áⁿ cúú-yu dàtná iná chi quiti-áⁿ núu na cuñaha-o ìⁿ sá cuñaha-o, te núu ñá túú cùtnuní iní-dí ná cúú

xǎⁿ te tñi ñàha-dí xii-o. Te cùu tucú-yu dàtná cùchí chi quiti-áⁿ núu na chùcu-o núú-dí yúú vâha sá ío víi càa nani pérá, te dicó-ni cùnu sáhá-dí chí ñá túú cùtnuní iní-dí sá cúú-xí yúú vâha.

Cácáⁿ-ó núú Yá Ndiòxí núu ná cuini-ó

(Lc. 11:9-13; 6:31)

⁷ Te na càchí tnúhu-í xii-ndo sá cácaⁿ-ndó núú Yá Ndiòxí te núu ná cuini-ndó te taxi-gá, te vá ãña ndéé-ndó cácaⁿ-ndó núú-gã núu ná cuini-ndó te ducaⁿ te níhí-ndó. Te cada iní-ndó sá ní quexio-ndo vehe ìⁿ tnaha ñáiyu-ndo te ní càháⁿ-ndó, te ñáiyu-áⁿ ní tedóho ñàhá-yu xii-ndo te ní nacaⁿ-yu yuyèhe. Te ducaⁿ càda iní-ndó chí Yá Ndiòxí tedóho ñàha-gã xii-ndo, te taxi-gá sá ná cácaⁿ-ndó núú-gã. ⁸ Chi nchaa ñáiyu ducaⁿ xiquide,

te Yá Ndiòxí tedóho ñàha-gã xii-yu te níhí-yu sá cuini-yu. Te ãu-ni ducaⁿ tucu nchaa ñáiyu na càcáⁿ núú-gã ìⁿ sá cuini-yu, chí sãñaha-gã sá xicáⁿ-yu núú-gã. Te ãu-ni ducaⁿ tucu nchaa ñáiyu ñá túú ãña ndéé xicáⁿ núú Yá Ndiòxí sá cuini-yu chí níhí-yu.

⁹ Te nchòhó cue téé cùu tátá, ñá túú cùndee iní-ndó cuñaha-ndo xii cue déhe-ndo ìⁿ yúú caxi-güexi òré xicáⁿ-güexi ìⁿ paá núú-ndó càxi-güexi. ¹⁰ Te ní ñá túú cùndee iní-ndó cuñaha-ndo ìⁿ cóo caxi-güexi òré xicáⁿ-güexi ìⁿ chácá núú-ndó càxi-güexi. ¹¹ Te nchòhó cuéi ndéé dau-na sáá iní-ndó dico sãha-ndo cué déhe-ndo sá vâha xèxi-güexi òré ná cúú sá xicáⁿ-güexi núú-ndó càxi-güexi. Te núu nchòhó ducaⁿ quide-ndo, ãte uuⁿ-gá ducaⁿ quide Tátá-ndó Dütú Ndiòxí Yá ndécú àndi, chí taxi-gá sá vâha sá cúú-xí-ndó te núu na càcáⁿ-ndó núú-gã!

¹² Te nchaa sá vâha cuini-ndó càda tnaha ñáiyu-ndo, te cada-ndo tnàhá-ndó ndíhí-yu, chí ducaⁿ sànu ichi ñàha tnúhu ní chídó tnúni ndí Moisés, te ãu-ni ducaⁿ sànu ichi

ñaha tucu nchaa tnúhu ní chídó
tnùnì cue téé ní xóo cáháⁿ tnúhu Yá
Ndiòxí ndéé sanaha.

Yuyèhe cuiñi

(Lc. 13:24)

13-14 'Te xini ñuhu-xi nducu-ndo
nacuáa cada-ndo tnii-ndo ichi Yá
Ndiòxí. Te ichi-gá-áⁿ cúu-xí dàtná
iiⁿ ichi cuiñi, àdi datná iiⁿ yuyèhe
cuiñi. Te duha càháⁿ-í chi ío úhú
xínu iní-ndó tnii-ndo ichi Yá Ndiòxí,
te sacú-ni nchòhó cue ñáyiú ndècu
ñuyúú-a tnii-ndo ichi-gá. Te nchaa
ñáyiú ndècu ichi cuehé ichi duha
ta xíta nihnú-yu cuáháⁿ. Te ichi
ndécú-yu-áⁿ cada iní-ndó sá cúu-xí
iiⁿ ichi cahnu ichi quehéⁿ, àdi iiⁿ
yuyèhe quehéⁿ. Te duha càháⁿ-í chi
íó vai ñáyiú ndécú-yu ichi-áⁿ.

*Ndi ñáyiú yutnu xini-ó ñá yutnu
cúu-xi cuendá sá sávidí-xi*

(Lc. 6:43-44)

15 'Te càchí tnúhu-í xii-ndo sá ío
quihí iní-ndó cundecu-ndo cuendá
sá vǎ dándahú ñáhá cue téé càchí
sá càháⁿ tnúhu Yá Ndiòxí te ñá
ndáá sá càháⁿ-güedé tnúhu-gá. Chi
cue téé-áⁿ sànuu sá quidé-güedé
dàtná quidé mbéé quiti ío váha
iní-xi, dico ñá ndáá chi ñá túú ñuhu
váha iní-güedé, chi quide-güedé
dàtná quidé quiti dééⁿ quiti nàni
yihí. 16 Te òré quexio-güedé núú
ndécú-ndó te cada cuendá-ndó
nacuáa quide-güedé cuendá ducaⁿ
cùtnuní iní-ndó ñá ñáyiú cùu-güedé.
Te nchòhó xini-ndó sá ñá túú cùuⁿ
ndéhé yoho yáha stilé tnu ñnu, te
ni ñá túú xini-ndó cùuⁿ ngúxí iiⁿ
tnu ñnu. 17-18 Te xini tucu-ndo sá
ncháá yutnu váha cùuⁿ sávidí váha,
te nchaa yutnu váha-áⁿ ñá túú cùuⁿ
sávidí sá ñá túú váha. Te nchaa
yutnu sá ñá túú váha ñá túú cùuⁿ
sávidí váha, chi mee-ni sávidí sá
ñá túú váha cùuⁿ. 19 Te nchaa
yutnu sá ñá túú cùuⁿ sávidí váha
xèhndé-güedé, te cuánguee-xi núú
ñuhú càyú-xi. Te ducaⁿ sàtnahá-xi
yáha nchaa cue téé dándahú ñáhá
càchí sá càháⁿ tnúhu Yá Ndiòxí te ñá
ndáá sá càháⁿ-güedé tnúhu-gá, chi

quihíⁿ-güedé núú ñuhú núú càyú.
20 Te nchòhó cutnùnì iní-ndó ñá
ñáyiú cùu cue téé-áⁿ cuendá nchaa
sá quidé-güedé.

*Ñá ncháá ñáyiú ngündecú-yu núú
ndécú Yá Ndiòxí táxi tnùnì-gá*
(Lc. 13:25-27)

21 'Te na càchí tnúhu-í xii-ndo sá
íó vai ñáyiú cachí-yu sá yuhú cùu-í
Xítohó-yu, dico ñá ncháá-yu nduu
táhú-yu cundecu-yu núú ndécú
Tàtá-í Dútú Ndiòxí táxi tnùnì-gá, chi
mee-ni ncháa ñáyiú na càda nchaa
nacuáa càháⁿ-gá ñáyiú-áⁿ nduu
táhú-yu cundecu-yu núú ndécú-gá
táxi tnùnì-gá. 22 Te na sáá nduu
càda ndáá Yá Ndiòxí cuèchi nchaa
ñáyiú, te vai-yu cúñahá-yu xii-í:
“Yòhó Xítohó Jesucristú nchúhú
cúu-ndí ñáyiú ní càháⁿ tnúhu-n
nacuáa ní cachí-n, te diu-ni-n ní
cacunehe-ndí te ní sándáá iní ñáhá
ncháa espíritu cundíhi yucu ñávaha
xii-ndí ní quee-xi yiqui cùñú
ñáyiú, te diu-ni yòhó ní chindee
ñàha-n xii-ndí ní ndacu-ndí ní
quide-ndí titni núú sá vǎ yóo tnàhí
ndàcu cada”, duha cúñahá-yu xii-í
dává-áⁿ. 23 Dico yuhú cúñaha-í
xii-yu: “Ñá túú tnàhí xini ñáhà-í xii
nchòhó núu ndéé ñáyiú cùu-ndo,
te chí xócuñi nchaa nchòhó ñáyiú
quide nchaa sá cuèhé sá dúhá núú
ndécú-í-a”, duha cúñaha-í xii-yu.

*Hⁿ vehe ndècu cimientú-xi ndihi iiⁿ
vehe ñá túú cimientú-xi*
(Mr. 1:22; Lc. 6:47-49)

24 'Te nchaa ñáyiú sàcündedóho
tnúhu càháⁿ-í te núu na tnii-yu,
te ñáyiú-áⁿ cùu-yu dàtná iiⁿ téé ío
váha cùtnuní iní-xi. Chi téé-áⁿ ní
dácáá-dé iiⁿ vehe, dico díhna-gá ní
xete-dé ndéé ní tnahá-dé yúú cáxiⁿ
te dàtnùnì ní tava-dé cimientú-xi.
25 Te òré ní cuuⁿ dáu te ní ndee
ndute ñuhu, te ní dándáá-xi ndéé
núú cáá vehe-áⁿ, dico ñá túú ní
ndàcu-xi cuidu-xi. Te ní quene
tucu táchí ñihi dico ñá túú ní
ndàcu-xi cuidu-xi vehe-áⁿ, te ducaⁿ

chi téé ní dácáá vehe-áⁿ ní tava-dé cimiéntú-xi núú yúú caxíⁿ. Duha sãtnahá-xi cùu nchaa ñáiyu tñi tñúhu cãháⁿ-í. ²⁶ Dico nchaa ñáiyu sãcúndedóho tñúhu cãháⁿ-í te ñã túú cuíní-yu tñi-yu, ñáiyu-áⁿ cúy-yu dàtná ñⁿ téé ñã túú tñàhí cùtnuní iní-xi. Chi téé-áⁿ ní dácáá-dé ñⁿ vehe núú yúú mèe-ni ñuhu cúchí. ²⁷ Te òré ní cuuⁿ dáú te ní ndee ndute ñuhu, te ní dándáá-xi ndéé núú cáá vehe-áⁿ, te ní quene táchí ñhi te íi-ni ní xido-xi vehe-áⁿ cuendá sã núú ñuhu cúchí ñi sáá. Duha sãtnahá-xi cùu nchaa ñáiyu sãcúndedóho tñúhu cãháⁿ-í te ñã túú cuíní-yu tñi-yu —duha ní dánèhé ñháá Jèsús xii cue téé xica cuu ndihí-gá ndihí nchaa ñáiyu.

²⁸ Te òré ní ndihí Jèsús sá dúcáⁿ ní cáháⁿ-gá, te nchaa ñáiyu ní xíndedóho nchaa tñúhu ní cáháⁿ-gá ío ní cuñúhu-yu nãcuáa ní dánèhé ñháá-gã xii-yu. ²⁹ Chi ní cáháⁿ-gá dàtná cãháⁿ cue téé cùnuu, te cùnuu ndisa-gá, te ñã túú ní cáháⁿ-gá dàtná cãháⁿ nchaa cue téé dàcuaha ñaha xii ñáiyu nchaa tñúhu ní chidó tñuní ndí Moisés.

8

Jèsús quidé tãtna-gá ñⁿ téé tñàhá cuhé sã dátèhyú nihnu-xi yiqui cùñú-ó

(Mr. 1:40-45; Lc. 5:12-16)

¹ Te Jèsús ní xica-gá cuánuu-gá dñi tñdúú núú dúcáⁿ ní xíndecu-gá ní dánèhé-gá ñáiyu-áⁿ, te cuhéé víhí ñáiyu nchicúⁿ ñháá xii-gá cuánuu. ² Te ní quexío ñⁿ téé tñàhá cuhéé sã dátèhyú nihnu-xi yiqui cùñú-ó núú Jèsús, te ní ngúñí xití-dé núú-gã, te xãhaⁿ-dè xii-gã:

—Mèstrú, véxi-í cãháⁿ ndàhú-í núú-n núú vá cùndèe iní-n cãda tãtna ñaha-n xii-í, chi cùtnuní iní-í sã ndácú-n —cãchí-dé xãhaⁿ-dè xii-gã.

³ Te Jèsús ní dácáá-gá ndaha-gá ní tendaha ñaha-gá xii-dé, te xãhaⁿ-gã:

—Cuu cada tãtna ñaha-í xii-n, te vitna ndúha-n —cãchí-gá xãhaⁿ-gã xii-dé.

Te òré-ni-áⁿ ní xócuñí cuhéé tñàhá-dé. ⁴ Te Jèsús ní xãhaⁿ tucu-gá xii-dé:

—Te vitna cuanùhú te vá yõo ñⁿ cùñaha-n sã yùhú ní quide tãtna ñaha-í xii-n, núú dùtú-ni cuaháⁿ cuendá sã ná quini ñãhá-dè xii-n sã ní ndúha-n, te cuãñaha-n sã ndúú tãhú Yã Ndiõxi dàtná ní cachí ndí Moisés. Te ducaⁿ cãda-n cuendá cutnùní iní ñáiyu sã ní ndúha-n —cãchí-gá xãhaⁿ-gã xii téé ní quide tãtna-gã-áⁿ.

Jèsús quidé tãtna-gá ñⁿ téé xinu cuechi núú ñⁿ téé cùu capitáⁿ

(Lc. 7:1-10)

⁵ Te Jèsús ní xica-gá cuaháⁿ-gá ñuú Capèrnaúm. Te òré cuánguñu-gá ñuú-áⁿ te ní quexío ñⁿ téé cùu capitáⁿ cãháⁿ ndàhú-dé núú-gã, ⁶ te xãhaⁿ-dè xii-gã:

—Mèstrú, véxi-í cãháⁿ ndàhú-í núú-n núú vá cùndèe iní-n cãda tãtna-n ñⁿ téé xinu cuechi núú-í, chi cùhú-dé te cãhú víhí tñàhá-dé, te ío ndòho-dé te ní ñã cùndèe-gã-dé candá nihnu-dé —cãchí-dé xãhaⁿ-dè xii-gã.

⁷ Te Jèsús ní xãhaⁿ-gã xii-dé:

—Te na quihíⁿ-ó cãda tãtna-í-dé —cãchí-gá xãhaⁿ-gã xii-dé.

⁸ Te téé cùu capitáⁿ-áⁿ ní xãhaⁿ-dè xii-gã:

—Mèstrú, ñã túú tàú-í sã quñu-n ndéé xití vehe-í, chi cùu-í ñⁿ téé cùtexínu sã cúú-xí-n, te cáháⁿ-ni sã ndúha téé xinu cuechi núú-í te ndúha-dé. ⁹ Chi yùhú ndècu cue téé tàxi tñuní ñháá xii-í, te ducaⁿ yùhú tucu ndècu cue sandadú táxi tñuní-í. Te òré xãhaⁿ-í xii ñⁿ-dè quihíⁿ-dè ñⁿ chiúⁿ te cuaháⁿ-dè, te òré xãhaⁿ-í xii ingá-dé quixi-dé te véxi-dé, te òré xãhaⁿ-í xii ñⁿ téé xinu cuechi núú-í cada-dé ñⁿ chiúⁿ te quide-dé. Núu xiáⁿ yòhó cáháⁿ-ni sã ndúha téé xinu cuechi núú-í te ndúha-dé —cãchí-dé xãhaⁿ-dè xii Jèsús.

¹⁰ Te Jèsús ío ní cuñúhu-gá sã dúcáⁿ ní cáháⁿ téé cùu capitáⁿ-áⁿ, te

ní xáhaⁿ-gã xii nchaa ñáyiú nchícúⁿ ñáhá xii-gá:

—Na cächí tnúhu ndáá-í xii-ndo sã vátá quíni-gá-í ní ñⁿ ñáyiú isràél, ñáyiú súúni ío váha sàndáá iní ñáhá xii Yá Ndióxi dätná sàndáá iní ñáhá tée-a xii-gá. ¹¹ Te na cächí tnúhu ndáá tucú-í xii-ndo sã ío cuéhé ñáyiú quixi ndaa xio nacuáa quène nchíanchii, te ñiú-ni ducaⁿ ío cuéhé tucú-yu quixi ndaa xio nacuáa quée tucú nchíanchii. Te nchaa ñáyiú-áⁿ naníhí tnáhã-yu ndihi té Àbrahám, ndihi té Isàac, ndihi té Jácób núú ndécú Yá Ndióxi táxi tnùni-gá te yàcáⁿ cundecu ndihi ñáhã-yu xii-güedé. ¹² Te nchaa ñáyiú tau nduu táhú cundecu núú ndécú Yá Ndióxi táxi tnùni-gá ní cùu, ñáyiú-áⁿ quee tíhũ-yu, chí quíhíⁿ-yu ñⁿ xichi núú néé núú ío ndohó-yu cundecu-yu, te yàcáⁿ ío ndáhí-yu, te dicó rúhñú-nã cuu núhu-yu sã sätú iní-yu cuendá sã ndohó-yu —cächí-gá xáhaⁿ-gã xii-yu.

¹³ Te Jèsús ní xáhaⁿ tucú-gá xii tée cùu capitáⁿ-áⁿ:

—Yòhó tée ndècu ndihi tée cùhú cuanùhú vehe-ñ vitna chí ndúha-dé chí ní sàndáá iní-n Yá Ndióxi —cächí-gá xáhaⁿ-gã xii-dé.

Te ñiú-ni òré ducaⁿ ñí xáhaⁿ Jèsús xii tée cùu capitáⁿ-áⁿ ñí ndúha tée xinu cuechi núú-dé.

Jèsús quidé tãtna-gã nãná ñadhí té Pèlú

(Mr. 1:29-31; Lc. 4:38-39)

¹⁴ Te Jèsús ní xica-gá cuáhãⁿ-gã vehe té Pèlú, te òré ní quexio-gã vehe-dé te ní xiní-gá cáá nãná ñadhí-dé cùhú-áⁿ ñùhu vihi-áⁿ cahni. ¹⁵ Te Jèsús ní tñi-gã ndaha ñaha cùhú-áⁿ, te òré-ni-áⁿ ñí nchíco-áⁿ cahni te ní ndacóo-áⁿ ní xinu cuechi-áⁿ núú-güedé ndihi-gá.

Jèsús quidé tãtna-gã vai ñáyiú cùhú

(Mr. 1:32-34; Lc. 4:40-41)

¹⁶ Te òré ní dáhu nchíanchii te ní quexio ñáyiú núú ndécú Jèsús, te ndècã-yu vai ñáyiú yíhi ñaha

espíritú cündihí yucu ñávãha ní sáa núú-gã te ndèca tucú-yu vai ñáyiú tnáhã dava-gã núú cuéhé. Te ñⁿ-ni tnúhu ní cáháⁿ Jèsús ní tenãã-gã nchaa espíritú cündihí yucu ñávãha yíhi ñaha xii nchaa ñáyiú-áⁿ, te ní quee-xi yiqui cùñú-yu cuáhãⁿ-xi. Te tnáhã nchaa dava-gã ñáyiú cùhú-áⁿ ñí quide tãtna-gã. ¹⁷ Te ducaⁿ ñí cuu chí ní quee ndáá-xi nacuáa ní cáháⁿ ndíi Chãíá tée ní xóo cáháⁿ tnúhu Yá Ndióxi ndée sanaha, te duha ní cachí ndíi: “Mee-gã cada tãtna ñaha-gã xii-o, chí ñiú-gã xocani-gã nchaa sã quidé ùhú yiqui cùñú-ó”, duha ní cachí ndíi.

Ñáyiú cuíni tuha ñaha xii Jèsús
(Lc. 9:57-62)

¹⁸ Te òré ní xiní Jèsús sã ío cuéhé ñáyiú xixúcu núú ndécú-gã, te ní xáhaⁿ-gã xii cue tée xica cuu ndihi-gã sã quée-gã ndihi-güedé bàrcú cuendá téhndé-gã ndihi-güedé ndaa ingã xio yuhu làgúnã. ¹⁹ Te mei òré-áⁿ ñí quexio ñⁿ tée dàcuaha ñaha xii cue ñáyiú nchaa tnúhu ní chídó tnùni ndíi Moisés, te xáhaⁿ-dè xii-gã:

—Mèstrú, cuíni-í canchicúⁿ ñáhã-í xii-n ndèni ní cuu na quíhíⁿ-n —cächí-dé xáhaⁿ-dè xii-gã.

²⁰ Te Jèsús ní xáhaⁿ-gã xii-dé:

—Nchaa ñúcuí chí ndècu yaú cúu vehe-güedi saquíhi-güedi, te nchaa cue quiti ndáva caa tacã-güedi diquí yutnu. Dico yúhú Tée cùu ñaní tnáhã-ndo nchãa-ndo chí ñã túú ndèé cáá vehe-í ñuyúú-a ndetatú-í —cächí-gã xáhaⁿ-gã xii-dé.

²¹ Te ñⁿ tée ní chitnahá ñáhã xii Jèsús ní xáhaⁿ-dè xii-gã:

—Jèsús, dañã na nùhú-í cundetú-í cuú tãtã-í te chindúxi-í-dé dätñuní quixi-í chitnahá ñáhã dùcaⁿ-ná-í xii-n —cächí-dé xáhaⁿ-dè xii-gã.

²² Te Jèsús ní xáhaⁿ-gã xii-dé:

—Dañã ñáyiú ñã túú sàndáá iní ñáhã xii-í ná chindúxi tnáhã

meé-yu, chi ñáiyu-án cúŷ-yu dàtná ñáiyu ní xihí cuéi ndècu-ní-yu núú ñuyú-a, te yòhó canchicún ñáhá-ní xii-í —càchí-gá xáhaⁿ-gá xii-dé.

Jèsús ngáni-gã táchí ndihi ndute làgúná

(Mr. 4:35-41; Lc. 8:22-25)

²³ Te sátá dúcáⁿ te Jèsús cuánguee-gá bàrcú ndihi cue téé xica cuu ndihi-gá, te ní xica bàrcú-án cuáháⁿ-xi. ²⁴ Te ñini ñùhu bàrcú-án ichi cuáháⁿ-xi núú ndute ní xidí Jèsús, te ní ngúíta-xi níhi vihi quene táchí, te ta nàdachitú-xi ndute xití bàrcú cuáháⁿ. ²⁵ Te cue téé xica cuu ndihi-gá cuáháⁿ-güedé núú cáá-gã xidí-gá, te xáhaⁿ-güedé xii-gá:

—jMèstrú, ndiquúí iní chi dàcácu ñaha-n xii-o chi quée naa-o cuini-xi! —càchí-güedé xáhaⁿ-güedé xii-gá.

²⁶ Te Jèsús ní xáhaⁿ-gã xii-güedé:

—¿Ná cuendá ndéé ducaⁿ ïo yùhú-ndó? ¿Náa ñá túú sàndáá iní ñáhá ndisa-ndo xii-í-án? —càchí-gá xáhaⁿ-gã xii-güedé.

Te Jèsús ní ndacóo-gá te ní tenáa-gá táchí-án ndihi ndute-án, te ní ngúíñí táchí-án te ní nucúndecu nahi-ná ndute làgúná-án. ²⁷ Te nchaa cue téé ñùhu xití bàrcú-án ní cuñúhu-güedé sá dúcáⁿ ní quide-gá ní xiní-güedé, te ní xitnáha-güedé:

—¿Te ná téé cùu téé-a núú duha ní cáháⁿ-ni-dé te ní ngúíñí táchí te ní nucúndecu nahi-ni ndute làgúná-a-í? —càchí-güedé xitnáha-güedé.

Cue téé ñuú Gàdará cue téé yìhi ñaha espíritú cúndihi yucu ñávãha

(Mr. 5:1-20; Lc. 8:26-39)

²⁸ Te òré ní quèxio Jèsús ndàa ingá xio yuhu làgúná yucu cue téé ñuú Gàdará, te úú tnahá cue téé quide vehe núú yíndüxi ndíyí ní quee-güedé cuáháⁿ-güedé núú ndécú Jèsús, te ndi ndüü-güedé yíhi ñaha espíritú cúndihi yucu ñávãha xii-güedé, te ïo mãñá-güedé chi vá yòo tnahí dàña-güedé yáha yatni

núú ndécú-güedé. ²⁹ Te cue espíritú yíhi ñaha xii-güedé-án ní quide-xi níhi ní cáháⁿ-güedé, te xáhaⁿ-güedé xii-gá:

—¿Ná cuendá véxi-ò Jèsús Déhe Dútú Ndiõxí chidácá ñáhá-n xii-ndí? ¿Áⁿ sàma véxi-n dàndoho ñaha-n xii-ndí? Te vátá sàá-gá nduu dùcaⁿ cada-n —càchí-güedé xáhaⁿ-güedé xii-gá.

³⁰ Te yatni xíaⁿ xixica cuu vãi cuchí xixexi-güedi. ³¹ Te cue espíritú cúndihi yucu ñávãha yìhi ñaha xii cue téé-án ní cáháⁿ ndàhú-xi núú Jèsús, te xáhaⁿ-xi:

—Te núu vá dàñá-gã-n quìhi-ndí yiqui cuñú cue téé-a, te cáháⁿ ndàhú-ndí núú-n sã dàña-n na quíhíⁿ-ndí quíhu-ndí yiqui cuñú nchaa cùchí-án —càchí cue espíritú-án xáhaⁿ-xi xii-gá.

³² Te Jèsús ní xáhaⁿ-gã xii cue espíritú cúndihi yucu ñávãha-án:

—Chí táquèe yiqui cuñú cue téé-án te quíhíⁿ-ndó núu ndéé ichi quíhíⁿ-ndó —càchí-gá xáhaⁿ-gã xii nchaa espíritú-án.

Te cue espíritú cúndihi yucu ñávãha-án ní quee-xi yiqui cuñú cue téé-án, te cuáháⁿ-xi cuánguìhu-xi nchaa cùchí-án. Te cue quití-án ní xinu-güedi duha ní quée-güedi ndàa núú dèhvã yuhu làgúná-án, te ní ngaunihnu-güedi xití ndute, te ní ndihi-güedi ní cáhá.

³³ Te cue téé xito ñaha xii nchaa cuchí-án ní yùhú-güedé te ní xinu-güedé, te ní sáháⁿ-güedé ní caní-güedé cuendú núú cué ñáiyu ndècu xití ñuú nchaa nàcuáa ní cuu cuendá cue téé ní xihí ñaha nchaa espíritú cúndihi yucu ñávãha-án. ³⁴ Te nchaa ñáiyu ñuú-án ní queé-yu cuáháⁿ-yu núú ndécú Jèsús. Te òré ní quexiò-yu núú ndécú-gã te ní cáháⁿ ndàhú-yu núú-gã sá ná quèe-gá yucu ñuú-yu núhú-gá.

9

Jèsús quidé tãtãna-gá ìªn tée cùhú ñã cùú-gá candá nihnu

(Mr. 2:1-12; Lc. 5:17-26)

¹ Te sãtã dúcãªn nĩ cuu te Jèsús cuãndee-gã bãrcú cuáhãªn-gã ní natehndé-gã ndãa ingã xio yuhu làgúnã. Te xiãªn nĩ ndexio-gã ñũú núú quidé ñũú-gã. ² Te xiãªn ndécú-gã ní quexio cue tée nchìdo-güedé ìªn tée cùhú ñã cùú-gã candá nihnu ñũhu-dé xito, te Jèsús ní cutnùnĩ iní-gã sã sãndãã ndisa iní ñãhá-güedé xii-gã nõu ní xãháªn-gã xii tée cùhú-ãªn:

—Yòhó tée cùhú vá ndìhú-gã iní-n, chi sa ní quide càhnu iní-í nchaa cuèchi-n —càchí-gã xãháªn-gã xii-dé.

³ Te sã dúcãªn nĩ cãháªn-gã nõu xiãªn cue tée dàcuaha ñaha xii ñãyiu nchaa tnúhu ní chídó tnùnĩ ndíi Moisés ní sani iní-güedé: “Tée-a cãháªn cuèhé-dé cuendã Yã Ndiõxí”, duha ní sani iní-güedé. ⁴ Te Jèsús ní cutnùnĩ iní-gã ñacuãa sãni iní-güedé nõu ní xãháªn-gã xii-güedé:

—¿Nã cuendã ducaªn sãni cuèhé sãní dùha iní-ndó? ⁵ Te sã dúcãªn nĩ xãháªn-í xii tée cùhú-a sã nĩ quide càhnu iní-í nchaa yicã cuèchi-dé, te xiãªn nchòhó ñã túú cutnùnĩ iní-ndó nõu ndãã cãháªn-í ãdi ñã ndãã. Dico nõu cùú-í-dé sã ndãcõo-dé te caca-dé, te cutnùnĩ ndãã iní-ndó nõu ndãã cãháªn-í ãdi ñã ndãã, chi cundehe nõú-ndó ñacuãa cada-í. ⁶ Te vitna na càda-í ñacuãa cutnùnĩ iní-ndó nchãa-ndo sã yúhú Tée cùu ñãni tnãhá-ndó nchãa-ndo ndecu ndìhĩ-í tnúhu ndee ìni ñuyú-a sã cáda càhnu iní-í nchaa cuèchi ñãyiu —càchí-gã xãháªn-gã xii-güedé.

Te sãtã dúcãªn te ní xãháªn-gã xii tée cùhú-ãªn:

—Ndacõo, te ndocani-n xito ñũhu-n véxi-ãªn te núhú-n vèhe-n —cachí-gã xãháªn-gã xii-dé.

⁷ Te òré-ni-ãªn nĩ ndúha tée cùhú-ãªn te ní ndacõo-dé te ní ndocani-dé xito ñũhu-dé ní quexio-ãªn te ní xica-dé cuãnuhú-dé vehe-dé. ⁸ Te nchaa ñãyiu xĩndecu-ãªn ìo ní

cuñúhu-yu sã dúcãªn nĩ quide Jèsús ní xiní-yu, te ní cachí-yu sã ìo càhnu cuu Yã Ndiõxí cuendã sã nĩ sãñaha-gã xii Jèsús tnúhu ndee ìni cada-gã nchaa sã vã yõo tnãhĩ ndãcu cada.

Jèsús cãháªn-gã ìªn tée ñãni Mateú chitnahã ñãhá-dé xii-gã

(Mr. 2:13-17; Lc. 5:27-32)

⁹ Te Jèsús ní nucúhuªn tucu-gã ichi cuáhãªn-gã, te ichi ñũhu-gã ní xiní-gã núcõo ìªn tée ñãni Mateú quidé cõbrã-dé ñãyiu chi cõbrãdõr impuèstú cùú-dé, te ní xãháªn-gã xii-dé:

—Mãteú, néhé chitnahã ñãhá-n xii-í —cãchí-gã xãháªn-gã xii-dé.

Te té Mãteú-ãªn nĩ ndacuñĩ-dé ní chitnahã ñãhá-dé xii-gã.

¹⁰ Te ìªn xito ndècu Jesús ìªn vehe, te yìhĩ-gã mèsã ndìhĩ cue tée xica cuu ndìhĩ-gã xéxĩ ndìhĩ ñaha-gã xii-güedé. Te tnãhá cue tée cuihna ìni-xi quide cõbrã ñãhá xii ñãyiu cuendã impuèstú yìhĩ ndìhĩ-gã mèsã, te tnãhá tucu dava-gã cue tée ndècu ichi cuehé ichi duha yìhĩ ndìhĩ-gã mèsã. ¹¹ Te sã nĩ xiní cue tée cùu farisèú xéxĩ Jèsús ndìhĩ nchaa cue tée-ãªn, te ní xicãªn tnúhú-güedé nõú cuè tée xica cuu ndìhĩ-gã, te xãháªn-güedé:

—¿Nã cuendã ducaªn quide tée cùu mestrú-ndó xèxi-dé ndìhĩ cue tée cuihna ìni-xi quide cõbrã ñãhá xii ñãyiu cuendã impuèstú, ndìhĩ nchaa dava-gã cue tée ndècu ichi cuehé ichi duha-í? —càchí-güedé xãháªn-güedé.

¹²⁻¹³ Te Jèsús ní tecú dóho-gã ñacuãa ndùu tnúhu ní xãháªn-güedé xii cue tée xica cuu ndìhĩ-gã, nõu ní xãháªn-gã xii-güedé:

—Nchaa ñãyiu ñã túú cùhú chi ñã túú xiní ñuhú-yu ñãtãtnã, dico nchaa ñãyiu cùhú chi xiní ñuhú-yu ñãtãtnã. Te yúhú véxi-í cãháªn-í ñãyiu cutnùnĩ iní-xi sã ndécú cuèchi-xi cuendã dãñã-yu nchaa sã cuèhé sã dúhá quidé-yu, te ñã

túú vëxi-í cáháⁿ-í ñáiyu càchí sá ñà túú ndëcu cuéchi-xi. Te chí cádá cuëndá váha nàcuáa cáháⁿ Yá Ndióxi núú tütú-gá núú càchí-xi: “Yúhú cuíni-í sá cündáhú iní-ndó cuè tnaha ñáiyu-ndo, te ñà díú mèè-ni sá cáhni-ndó quitì nduu táhù-í”, duha càchí-gá núú tütú-gá —càchí Jèsús xáhaⁿ-gá xii-güedé.

Cue téé ndücu tnúhu núú Jèsús cuëndá ñáiyu ñà túú tnàhí ná xéxi áma cáháⁿ ndihí-yu Yá Ndióxi

(Mr. 2:18-22; Lc. 5:33-39)

14 Te cue téé xica cuu ndihí té Juáá téé dácuanute ñaha xii ñáiyu ní sáháⁿ-güedé núú ndécú Jèsús, te xicáⁿ tnúhú-güedé núú-gá, te xáhaⁿ-güedé:

—Cuíni-ndí cachí tnúhu-n ñà cuëndá nchúhú, ndihí cue téé cùu fariséu ñà túú tnàhí ná xéxi-ndí áma cáháⁿ ndihí-ndí Yá Ndióxi, te cue téé xica cuu ndihí-n ñà túú dùcaⁿ quide-güedé —càchí-güedé xáhaⁿ-güedé xii-gá.

15 Te Jèsús ní xáhaⁿ-gá xii-güedé:

—Nchòhó xiní-ndó sá vã cúú cñaha-o xii ñáiyu ñuhu vico tnándaha sá vã cúú càxí-yu nini ndëcu ndihí ñaha téé tnándaha xii-yu, dico sáá nduu vã cündëcu ndihí ñaha-gá téé tnándaha-án xii-yu, te dàvá-án te cahni iní-yu vã càxí-yu cuëndá sá ndihú iní-yu.

16 Te ni vã yõ dándée luha dóó sáá ñⁿ dóó sa ní cuu tühú víhí, chí dóó sáá-án nàndiyi-xi te uuⁿ-gá ndata-xi dóó sá ñⁿ cuu tühú-án. 17 Te ni vã yõ chíhi ndidí sáá xití ñⁿ lamba sa ní cuu tühú víhí, chí núu yoo ducaⁿ na càda te ndava lamba sa ní cuu tühú-án chí ío níhi yócó ndidí-án, te cuíta-ni ndidí-án te cuíta-ni lamba-án te núu ducaⁿ na càdá-yu, núu xiáⁿ xini ñuhu-xi queé ndidí sáá-án xití ñⁿ lamba saa cuëndá ducaⁿ ñà túú ñà cuu cováha-xi —càchí-gá xáhaⁿ-gá xii-güedé.

Cuëndá déhe yoco té Jàirú ndihí cuëndá ñⁿ ñaha ní tnándée dóó Jèsús
(Mr. 5:21-43; Lc. 8:40-56)

18 Te cáháⁿ dúcáⁿ-ní Jèsús ní quexio ñⁿ téé cùnuu núú ndécú-gá, ñⁿ téé tàxi tnuní veñúhu, te ní ngüñí xití-dé núú-gá cáháⁿ ndáhú-dé, te xáhaⁿ-dè xii-gá:

—Véxi-í cáháⁿ ndàhú-í núú-n núu vã cündèe iní-n quíhíⁿ-ó vèhe-í dandòto-n déhe yoco-í chí ní xihí-xi tnàví, te yúhú cùtnùnì iní-í sá núu quíhíⁿ-n tëndaha-n yiqui cuñú-xi te ndoto-xi —càchí-dé xáhaⁿ-dè xii-gá.

19 Te Jèsús ní xica-gá cuáháⁿ-gá ndihí-dé ndihí cue téé xica cuu ndihí-gá. 20 Te ichi ñuhu-gá

cuáháⁿ-gá ní sáháⁿ ñⁿ ñadìhí ní tnándée-aⁿ yuhu dóó-gá ndàa sátá-gá, te ñaha-áⁿ sa ní cuu úxúú cuíá sá cùhú-aⁿ ngòyo ñaha ñíhí xii-aⁿ. 21 Te ducaⁿ ní quide-aⁿ chí ní sani iní-aⁿ sá núu ndacu-aⁿ tnándée-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. 22 Te Jèsús ní nchócótó-gá ndàa sátá-gá te ní xiní-gá ñadìhí-án, te ní xáhaⁿ-gá:

—Yòhó ñaha cùhú, vã ndihú-gá iní-n vitna chí sa ní ndúha-n, chí ní sándáá iní ñáhá-n xii-í —càchí-gá xáhaⁿ-gá xii-aⁿ.

Te òré-ni-án ñⁿ ndúha ñaha cùhú-áⁿ.

23 Te òré ní quexio Jèsús vehe téé cùnuu taxi tnuní veñúhu-án, te ní xiní-gá xíndáhí víhí ñáiyu, te xíndecu mūsicú. 24 Te ní xáhaⁿ-gá xii-yu:

—Chí táquèe xití vehe-a, chí xíchí-a ñà túú ní xihí-xi chí dicó xidí-xi —càchí-gá xáhaⁿ-gá xii-yu.

Te ní sácú ndeé ñáhá-yu xii-gá sá dúcáⁿ ñⁿ cáháⁿ-gá, chí sá cúú-xí mèè-yu te ní xihí ndisa xíchí-áⁿ. 25 Te ñáiyu-án ñⁿ queé-yu te cuánguñu Jèsús núú cándòdo xíchí ñⁿ xihí-án, te ní tnⁿ-gá ndaha-xi te òré-ni-án ñⁿ ndacóo-xi. 26 Te nchaa ñuú cáá yàtni xiáⁿ ñⁿ níhi ñáiyu tnúhu nàcuáa ní quide Jèsús.

Jèsús quidé tātna-gá núú úú tnàhá cue téé cuàá

²⁷ Te sáta dúcáⁿ ní cuu te ní xica Jèsús cuánuhú-gá, te ichi ñuhu-gá ní chinchicúⁿ ñáhá úú tnàhá cue téé cuàá xii-gá, te níhi cáháⁿ-güedé, te xáhaⁿ-güedé xii-gá:

—Yòhó Jèsús, téé cùu ñaní tnàhá ndíi Dàvíi, cundàhú iní ñáhá xii-ndí —càchí-güedé xáhaⁿ-güedé xii-gá.

²⁸ Te òré ní nasáá Jèsús núú quidé vèhe-gá, te cue téé cuàá-áⁿ ní quexìo-güedé ndéé núú-gá, te ní xicáⁿ tnúhú-gá núú-güedé, te xáhaⁿ-gá:

—¿Sándáá iní-ndó sá yùhú ndacu-í cada tātna-í núú-ndó-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Sándáá iní-ndí sá díú yòhó Jèsús ndacu-n càda tātna-n núú-ndí —càchí-güedé xáhaⁿ-güedé xii-gá.

²⁹ Te Jèsús ní dácàá-gá ndaha-gá ní tendaha-gá núú-güedé, te ní xáhaⁿ-gá xii-güedé:

—Te vitna, ndúha núú-ndó chi ní sándáá iní-ndó sá díú yùhú ndacu-í cada tātna-í núú-ndó —càchí-gá xáhaⁿ-gá xii-güedé.

³⁰ Te òré-ni-áⁿ ní ndúha núú-güedé, te Jèsús ní cáháⁿ víhí-gá dóho-güedé cuendá sá vǎ cáháⁿ-güedé nàcuáa ní cuu ní ndúha núú-güedé.

³¹ Te cue téé-áⁿ òré ní ndee-güedé núú ndécú Jèsús, te ní ngúita-ni-güedé ní cani-güedé cuendú núú ñáyiú nàcuáa ní quide ñaha-gá xii-güedé. Te nchaa dava-gá ñuu cáá yàtni xíaⁿ ní sáháⁿ-güedé ní cani-güedé cuendú núú ñáyiú nàcuáa ní quide ñaha Jèsús xii-güedé.

Jèsús quidé tātna-gá ñⁿ téé ñíhí

³² Te íchí ní ndee cue téé ní ndúha núú-xi-áⁿ núú ndécú Jèsús, te ní quexìo ñⁿ úú ñáyiú ndécá-yu ñⁿ téé ñíhí yíhí ñaha espíritú cundíhi yucu ñávaha. ³³ Te Jèsús ní queñuhu-gá espíritú cundíhi yucu ñávaha yíhi

ñaha xii téé-áⁿ, te òré-ni-áⁿ ní cuu ní nacáháⁿ-dé. Te nchaa ñáyiú xindecu-áⁿ ño ní cuñúhu-yu, te ní xitnàhá-yu:

—Ñá túú tnàhí xini-ó ñⁿ téé duha cada ñuu nchoo cue ñáyiú israél ní cùu —cachí-yu xitnàhá-yu.

³⁴ Te cue téé cùu fariséú ní ngúita-güedé xitnàha-güedé:

—Téé-a chi sáculháⁿ chindèe ñaha-xi xii-dé queñuhu-dé nchaa espíritú yíhí ñaha xii ñáyiú te diu-ni sáculháⁿ-áⁿ táxi tnúni-xi nchaa espíritú-áⁿ —càchí-güedé xitnàha-güedé.

Jèsús cundàhú iní-gá ñáyiú

³⁵ Te Jèsús cuáháⁿ-gá nchaa ñuu náhnú ndíhi nchaa ñuu líhli, te ndí tnàhá ñⁿ ñⁿ ñuu sàá-gá te ducaⁿ cuanguíhu-gá ñⁿ ñⁿ veñúhu càa nchaa ñuu-áⁿ dánèhé-gá ñáyiú tnúhu váha, tnúhu sá sánú ichi ñaha xii-yu nàcuáa ndíhu ndaha ñaha Yá Ndióxi xii-yu. Te ducaⁿ-ni ta quide tātna-gá nchaa ñáyiú cùhú cuáháⁿ cuéi ndí dííⁿ ndí dííⁿ núú cuéhé tnàhá-yu ñⁿ ñⁿ-yu. ³⁶ Te sá ní xiní Jèsús sá ño vǎi ñáyiú nchicúⁿ ñáhá xii-gá, te ní cundàhú iní ñáhá-gá xii-yu chi ño ndíhú iní-yu, te vǎ yòo nèhe cuendá ñáhá xii-yu, te cùu-yu dàtná cue mbéé cue quiti ñá túú tòli-xi. ³⁷ Te Jèsús ní xáhaⁿ-gá xii cue téé xica cuu ndíhi-gá:

—Nchòhó xini-ndó sá òré ná sàá nduu cùu nchaa sá xítú ñáyiú te ío vǎi cuu. Te na cǎchí tnúhu ndáá-í xii-ndo sá dàtná ño vǎi sá xítú ñáyiú cùu, ducaⁿ ño vǎi ñáyiú cùmání cundedóho tnúhu-í, te ío sacú ñáyiú dàcuaha ñaha xii-yu. ³⁸ Núú xíaⁿ xiní ñuhu-xi cǎcáⁿ-ndó núú Yá Ndióxi Yaá cúú Xitohó-ndó ndíhi-yu cuendá sá ná dàcáháⁿ-gá iní-yu cáháⁿ-yu tnúhu-gá núú nchaa dava-gá tnàha ñáyiú-yu cùmání cundedóho tnúhu-gá —càchí-gá xáhaⁿ-gá xii-güedé.

10

Jèsús sãñaha-gã tnúhu ndee iní xii ndi ùxúú cue tée xica cuu ndihi-gá

(Mr. 3:13-19; Lc. 6:12-16)

¹ Te Jèsús ní cana-gá ndi ùxúú cue tée xica cuu ndihi-gá, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritu cündihi yucu ñávãha yíhi ñaha xii ñáyiu, ndihi cuendá sá cáda tãtna-güedé nchaa dava-gá ñáyiu cùhú cuèi nãndi núú cuéhé tnàhá-yu.

² Te duha xñani ndi ùxúú cue tée-án: tée cunu-gá nãní-dé Ximú, àdi Pelú chi úú ñi-dé, te ñani-dé cúú té Ndríxí, te tnàhá tée-án cúú-dé tée xica cuu ndihi Jesús, ndihi té Jãcobó ndihi ñani té Jãcobó-án tãe nãni Juaá, te ndi ndúú cue tée-án cúú-güedé déhe té Zebèdeú. ³ Te tnàhá té Lipé xíca cùu ndihi-gá, ndihi té Bartolomé, ndihi té Mãxí, ndihi té Mãteú té cùu cobradór impuèstú ní cùu, ndihi té Jãcobó déhe té Àlfeú, ndihi té Lèbeú tée dãnani-güedé Tãdeú, ⁴ ndihi té Ximú tée ní cundihi cue tée cananístã, ndihi té Jüdás Iscarioté tée ní sãá nduu ní sãha cuendá ñãhá xii Jesús núú cuè tée cùu úhú iní ñãhá xii-gá.

Jèsús téndãha-gá ndi ùxúú cue tée xica cuu ndihi-gá quíhí-güedé cáhá-güedé tnúhu-gá núú ñáyiu

(Mr. 6:7-13; Lc. 9:1-6)

⁵⁻⁶ Te Jèsús ní xáha-gã xii ndi ùxúú cue tée xica cuu ndihi-gá sá quíhí-güedé cáhá-güedé tnúhu-gá núú ñáyiu, te cùmãni-gã caca-güedé quíhí-güedé, te ní xáha-gã xii-güedé:

—Na cãchí tnúhu-í xii-ndo sã mée-ní ñúú núú xĩndecu cue ñáyiu isràél quíhí-ndó cáhá-ndó tnúhu-í, te vã quíhí-ndó ñi ñi ñúú yĩndèhu distritú Sãmariã, te ñi vã quíhí-ndó dàva-gá ñúú núú xĩndecu ñáyiu ñã túú cùu ñáyiu

isràél. Te cue ñáyiu isràél-án cúú-yu dàtnã cue mbéé cue quiti ní xita chi ta xita nihnú-yu cuáhã. ⁷ Te cúñaha-ndo xii-yu sã sã ní cuyatni nduu ndíhu ndaha ñãha Yã Ndióxi xii-yu. ⁸ Te cada tãtna-ndo nchãa ñáyiu cùhú cuèi ñáyiu tnàhá cuéhé sã dátèhyú nihnu-xi yiqui cũñú-yu, te queñuhu-ndo nchãa espíritu cündihi yucu ñávãha yíhi ñaha xii ñáyiu, te dandòto-ndo cue ñáyiu sa ní xíhí, te vã càcã-ndó yãhu-ndo núú ñáyiu òré cada-ndo nchãa chiu-án, chi sa nãha-ndo sã dicó duca ñi taxi-í tnúhu ndee iní ndécú ndihi-ndo.

⁹ Te vã cãnehẽ-ndo díhú cuu ichi-ndo, ¹⁰ te ñi vã cãnehẽ-ndo ñunu cuhu ndachiu-ndo, te ñi vã cãnehẽ-ndo ingã ichi dóó-ndó nãdãma-ndo, te ñi vã cãnehẽ-ndo úú-gã chàu-ndó chi ñi-ñi chàu yíhi-ndó-ã xíã-ñi quíhi-ndo, te ñi vã cãnehẽ-ndo tatnu, te duca cãda-ndo chi nchòhó sa nãha-ndo sã nchãá ñáyiu quide chiu ñi-ñi cuendá chiú quide-yu ñihí-yu sã xéxi-yu.

¹¹ Te ndi tnãhá ñúú ná quèxio-ndo te nducu-ndo ñáyiu cùtnuní iní-ndó sã cúú-yu ñáyiu vãha, te vehe ñáyiu-án cundecu-ndo ndèé sãá nduu ndèe-ndo ñúú-án. ¹² Te òré quèxio-ndo vehé-yu te cúñaha-ndo xii-yu: “Yã Ndióxi chĩndèe chitúu ñaha-gã xii-ndo ndècu-ndo”, duha cúñaha-ndo xii-yu. ¹³ Te núú ní cáhá vãha ndihi ñãhá-yu xii-ndo, te cuu-xi sã vãha sã cúú-xi-yu cuendá tnúhu ní xáha-ndo-ã, dico núú ñã túú ní cáhá vãha ndihi ñãhá-yu xii-ndo, te cúñaha-ndo xii-yu sã vã cúú-xi sã vãha xii-yu tnúhu ní xáha-ndo-ã. ¹⁴ Te núú ní sãá-ndó ñi ñúú àdi ñi vehe, te núú ñã túú ní cáhá ndihi ñaha vãha-yu xii-ndo te ñi ñã túú ní cuini-yu cundedóho-yu tnúhu cáhá-ndó te ndee-ndo ñúú-án àdi vehe-án, te naquidi-ndo tãcã chũhmã ñi tñi

sáhá-ndó cuendá ná cùtnuní iní-yu sá ñà túú quide váha-yu. ¹⁵ Te na cächí tnúhu ndáá-í xii-ndo sá sàá nduu te ío-gá dandóho ñaha Yá Ndiöxí xii ñáiyu ducaⁿ na càda ñaha xii-ndo-áⁿ dàcúxí ñáiyu ní xíndecu ñúú Sòdomá ndihí ñúú Gòmorrá.

Ndoho tnahá-ó cùndecu-o ichi Xítoho Jesucristú

¹⁶ Te cada iní-ndó sá cúu-ndó dàtná cue mbéé cue quití cuháⁿ núú ío yíhí. Te ducaⁿ sátnahá-xi cùu-ndo chi yúhú tendaha ñaha-í xii-ndo quíhíⁿ-ndó núú xíndecu cue ñáiyu cuihna iní-xi, te ío váha cuáha-ndo cuendá nàcuáa cada-ndo dàtná quidé cõó, dico cunduu váha iní-ndó ñà túú nã cada-ndo dàtná quidé lómá. ¹⁷ Te quíhí iní-ndó chi cue ñáiyu na cùu úhú iní ñáhá xii-ndo, te cuáha cuendá ñáhá-yu xii-ndo núú cuè téé cùchiuⁿ, te caniha-güedé xii-ndo xítí veñúhu-güedé. ¹⁸ Te dava tucu ñáiyu cuu úhú iní ñáhá xii-ndo candeca ñáhá-yu xii-ndo quíhíⁿ núú cuè téé cùnuu yindaha nacióⁿ, àdi núú dàva-gá cue téé cùnuu sá cuendá-í. Te nchòhó níhí-ndó nàcuáa cada-ndo cáháⁿ váha-ndo cuendá-í núú-güedé ndihí núú cuè ñáiyu ñà túú cùu ñáiyu isràél. ¹⁹⁻²⁰ Dico òré cuáha cuendá ñáhá-yu xii-ndo núú nchàa cue téé-áⁿ, te vá cáni iní-ndó núu nãsa cunduu tnúhu cáháⁿ-ndó núú-güedé, chi òré-nã te níhí-ndó tnúhu cáháⁿ-ndó. Te ñà díú mèe-ndo cahu iní-ndó tnúhu cáháⁿ-ndó, chi mee Espíritú Yá Ndiöxí Yáá cúú Tátá-ndó dàcahú iní ñáhá-xí xii-ndo nacuáa cunduu tnúhu cáháⁿ-ndó.

²¹ Te dava cue téé cuáha cuendá-güedé ñani-güedé núú cuè téé cùchiuⁿ cuendá cahni ñaha-güedé, te dava cue téé cùu tátá díu-ni ducaⁿ càda-güedé déhe-güedé, te díu-ni ducaⁿ càda ñaha dava cue ñáiyu cùu déhe xii tátá-yu ndihí nãná-yu, chi cuáha cuendá ñáhá-yu núú cuè téé cùchiuⁿ cuendá cahni ñaha-güedé xií-yu.

²² Te nchòhó chi nchaa ñáiyu ngüíta-yu cuu úhú iní ñáhá-yu xii-ndo sá cuendá-í. Te núu na càda ndee-ni iní-ndó càncicúⁿ nihnu-ni-ndo ichi-í cuèi nãndi sá ná càda ñáhá-yu xii-ndo ndéé ná sàá nduu vã cùndecu-gá-ndó ñùyíú-a ña, te nduu táhú-ndó cùndecu-ndo ni caa ni quíhíⁿ ndihí Yá Ndiöxí. ²³ Te núu ñúú cùni-güedé tñi ñaha-güedé xii-ndo càda úhú ñáhá-güedé sá cuendá-í, te cunu-ndo núú-güedé quíhíⁿ-ndó ìngá ñúú. Te na cächí tnúhu ndáá-í xii-ndo sá cùmání-gã quíhíⁿ-ndó nchàa dava-gá ñúú núú xíndecu ñáiyu isràél cáháⁿ-ndó tnúhu-í, te sa quixi tucu yúhú, Téé cùu ñani tnahá-ndó nchàa-ndo ñuyíú-a.

²⁴⁻²⁵ Te nchòhó xini-ndó sá ni ñiⁿ téé dàcuaha ñà túú cùnuu-dé dàcúxí mèstrú-dé, te núu mèstrú téé-áⁿ nãndi yãha-dé ndécú-dé te tàú-dé nduu vétú iní-dé te núu tnahá-dé yãha-dé dàtná yãha mèstrú-dé-áⁿ. Te díu-ni ducaⁿ sátnahá tucu-xi cùu ñiⁿ téé xinu cuechi, chi ñà túú cùnuu-dé dàcúxí pàtróoⁿ-dè, te nchaa sá yãha pàtróoⁿ-dè-áⁿ te tàú-dé nduu vétú iní-dé te núu tnahá-dé yãha-dé dàtná yãha pàtróoⁿ-dè-áⁿ. Te núu yúhú Yáá táxi tnùnì ñáhá xii-ndo cachí-yu sá cúu-í sácuhlá, te uuⁿ-gá ducaⁿ cññáhá-yu xii nchòhó cue téé cùndihí-í.

Vá yùhú-ó cuendá nchaa sá càdá ñaha ñáiyu xii-o

(Lc. 12:2-7)

²⁶ Te nchòhó vá yùhú-ndó núú ñáiyu. Chi nchaa tnúhu sá cúú yùhu ni cuu vá cúú yùhu-gá, chi nchaa dacuití sá quéé tũu-xi núú ñáiyu. ²⁷ Te nchaa tnúhu sá cächí tnúhu-í xii-ndo núú méé núú ñiⁿ-ó, cùu-xi tnúhu sá ndúú yùhu ni cuu datúu-ndo núú cuè ñáiyu cuèi núú chítú núú tàcá. ²⁸ Te xini ñuñu-xi sá vá yùhú-ndó cuè ñáiyu cuèi na càhni ñáhá-yu xii-ndo, chi díu-ni yiqui cññú-ndó ndàcú-yu cahni-yu,

dico ñá túú nǎgá ndacú-yu cada ñáhá-yu xii-ndo. Te tàú-ndó sǎ Yá Ndiǒxí yùhú-ndó chi Yaá-áⁿ ndacu-gá danáa-gá yiqui cùñú-ndó, te ndacu-gá daquihíⁿ ñáhá-gǎ xii-ndo núú úhú núú ndàhú.

²⁹ Te nchòhó xini-ndó sǎ ndéé úú tnàhá tǐlaá cùyáhu-di núú ìⁿ-ní dǐhúⁿ, te ni ìⁿ-di ñá túú xihí cùtexinu-di chi ndéé núú mee Yá Ndiǒxí Yaá cúú Tǎtá-ndó ná cǎchí-gǎ te xihí-di. ³⁰ Dico nchòhó chi ío-gǎ néhé cuendá ñáhá Yá Ndiǒxí xii-ndo chi ndéé idi díquí-ndó yindehu. ³¹ Núú xǐáⁿ cǎchí-í sǎ vǎ yùhú-ndó chi cùnuu-gǎ-ndó dàcúúxí tǐlaá cuéi vǎi vihi-güedi.

Nchaa ñáyiu dàtúu núú tnàha ñáyiu-xi sǎ ndécú ndihí-yu Xitohó Jesucristú

(Lc. 12:8-9)

³² Te na cǎchí tnúhu-í xii-ndo sǎ ncháá ñáyiu na dàtúu núú tnàha ñáyiu-xi sǎ ndécú ndihí ñáhá-yu xii-í, te ducaⁿ te tnàhá yúhú dàtúu-í núú Tǎtá-í Dútú Ndiǒxí Yaá ndécú àndiu sǎ ndécú ndihí-í-yu. ³³ Dico nchaa ñáyiu na cùñaha xii tnaha ñáyiu-xi sǎ ñà túú ndécú ndihí ñáhá-yu xii-í, te ñiu-ni ducaⁿ càda yúhú tucu chi cùñaha-í xii Tǎtá-í Dútú Ndiǒxí Yaá ndécú àndiu sǎ ñà túú ndécú ndihí-í-yu.

Ñá túú cùu ìⁿnuu ñáyiu

(Lc. 12:51-53; 14:26-27)

³⁴ Te na cǎchí tnúhu-í xii-ndo sǎ vǎ cáni ìni-ndó sǎ yùhú véxi-í ñuyú-a te cuu ìⁿnuu-gǎ ñáyiu cundecú-yu, chi da ngüita-yu vǎ cúú ìⁿnuu-gǎ-yu cundecú-yu, te ducaⁿ chi nchaa ñáyiu vǎ quindáá ìni ñáhá xii-í ñáyiu-áⁿ ngóo-yu cuu úhú ìni-yu nchaa ñáyiu quindáá ìni ñáhá xii-í. ³⁵ Te ñava cue téé xǐndecu tǎtá-xi te ngóo-güedé cuu úhú ìni-güedé tǎtá-güedé, te ñiu-ni ducaⁿ càda cue ñáyiu dǐhí xǐndecu nǎná-xi, chi ngóo-yu cuu úhú ìni-yu nǎná-yu, te ñiu-ni ducaⁿ càda tucu

cue ñáyiu cùu sǎnu, chi ngóo-yu cuu úhú ìni-yu nǎná yǐ-yu. ³⁶ Te ndi mée-yu vehé-yu ngóo-yu vǎ cúú ìⁿnuu-gǎ-yu cundecú-yu.

³⁷ Te na cǎchí tnúhu tucu-í xii-ndo sǎ ncháá ñáyiu ío-gǎ ná cùu ìni tǎtá-xi àdi nǎná-xi dàcúúxí yùhú, te ñáyiu-áⁿ ñà túú tàú-yu cundecu ndihí ñáhá-yu xii-í, te nchaa ñáyiu ío-gǎ ná cùu ìni déhe ducu-xi, àdi déhe yoco-xi dàcúúxí yùhú, te ñiu-ni ducaⁿ ñà túú tàú-yu cundecu ndihí ñáhá-yu xii-í. ³⁸ Te nchaa ñáyiu vǎ cǎnchícúⁿ nihnu ñaha xii-í cuendá sǎ yùhú-yu ndohó-yu dàtná ndoho-í ñáyiu-áⁿ ñà túú tàú-yu cundecu ndihí ñáhá-yu xii-í. ³⁹ Te cue ñáyiu na yùhú cuú sǎ cuendá-í te ñáyiu-áⁿ cuíta nihnú-yu, dico nchaa ñáyiu vǎ yùhú cuú sǎ cuendá-í, te ñáyiu-áⁿ nduu tǎhú-yu cundecú-yu ni caa ni quihíⁿ ndihí Yá Ndiǒxí.

Cuendá sǎ ndúú tǎhú-ó

(Mr. 9:41)

⁴⁰ Te nchaa ñáyiu na quèheⁿ cuendá ñáhá xii-ndo te cada ìni-yu sǎ tnàhá yúhú ní queheⁿ cuendá-yu. Te nchaa ñáyiu na quèheⁿ cuendá ñáhá xii-í, te cada ìni-yu sǎ tnàhá Tǎtá-í Dútú Ndiǒxí Yaá ní tendaha ñaha xii-í véxi-í ñuyú-a ní queheⁿ cuendá-yu. ⁴¹ Te nchaa ñáyiu na quèheⁿ cuendá ìⁿ téé cǎháⁿ tnúhu Yá Ndiǒxí cuendá sǎ quidé-dé chùu-gǎ, te dàtná-ni càa tǎhú cuǎñaha-gǎ nduu tǎhú téé ducaⁿ cǎháⁿ tnúhu-gǎ-áⁿ, ñiu-ni ducaⁿ cùnduu tǎhú cuǎñaha-gǎ nduu tǎhú ñáyiu ducaⁿ na quèheⁿ cuendá ñáhá xii-dé. Te nchaa ñáyiu na quèheⁿ cuendá ìⁿ téé quidé váha cuendá sǎ dúcáⁿ quidé váha-dé, te dàtná-ni càa tǎhú nduu tǎhú téé-áⁿ ñiu-ni ducaⁿ cùnduu tǎhú nduu tǎhú ñáyiu na quèheⁿ cuendá ñáhá xii-dé. ⁴² Te nchaa ñáyiu na cuǎñaha ìⁿ yaxiⁿ ndute coho ìⁿ ñáyiu cùu cuendá-í cuendá sǎ ñi tuha ñáhá-yu xii-í cuéi ñá túú cùnuu vihi-yu, te ñáyiu

ducaⁿ na cuãñaha ndüte-áⁿ nihĩ-yu sá ndúú tãhũ-yu núú Yã Ndiõxí — càchí Jësús xãhaⁿ-gã xii-güedé.

11

Jësús càháⁿ ndihi-gá cue téé xica cuu ndihi té Juáá

(Lc. 7:18-35)

¹ Te sátá ní yáha ducaⁿ ní xáhaⁿ Jësús xii ndi ùxúú cue téé xica cuu ndihi-gá, te ní xica-gá cuáháⁿ-gá nchaa ñúú cáá yàtni xiáⁿ dánèhé-gá ñáyiu tnúhu-gá.

² Te té Juáá yihí-dé vecaá te ní níhí-dé tnúhu nchaa nàcuáa quide Xítohó Jesucristú. Te sátá dúcáⁿ te ní tendaha-dé ìⁿ úú cue téé xica cuu ndihi-dé cuáháⁿ-güedé núú ndécú Jësús. ³ Te òré ní quexìo-güedé núú ndécú-gã, te xicáⁿ tnúhú-güedé núú-gã nàcuáa ní xáhaⁿ tã Juáá xii-güedé, te xãhaⁿ-güedé xii-gá:

—Véxi-ndí xicáⁿ tnúhú-ndí núú-n nũu sá diú-n cùu-n Cristú Yaá ní tendaha Yã Ndiõxí véxi ñuyíú-a, àdi sá cündètu nahí-ni-ndí mei Yáá-áⁿ —càchí-güedé xãhaⁿ-güedé xii-gá.

⁴ Te Jësús ní xáhaⁿ-gã xii-güedé:

—Chí cuánùhú te cani-ndo cuèndú núú tã Juáá nchaa sá ní xiní-ndó quide-í, ndihi nchaa nàcuáa ndúu tnúhu ní càháⁿ-í ní xíndedóho-ndo. ⁵ Te cùñaha-ndo xii-dé sá quidé tãtna-í núú cuè ñáyiu cuáá, te quide tãtna-í cue ñáyiu yacua, ndihi cue ñáyiu tnàhá cuéhé sá dátèhyú nihnu-xi yiqui cùñú-yu, ndihi cue ñáyiu doho, nchaa ñáyiu-áⁿ quidé tãtna-í, te ndúha-yu, te ndéé tnàhá cue ñáyiu sa ní xihí dándòto-í cùñaha-ndo. Te cùñaha tùcu-ndo xii-dé sá ndécuu-í dánèhé-í nchaa ñáyiu ndàhú, tnúhu sá sánú ìchi ñaha xii-yu nàcuáa naníhí tãhú-yu. ⁶ Te cùñaha tùcu-ndo xii-dé sá ïo vãha tãhú nchaa ñáyiu ñã túú quide sáá iní-xi nchaa tnúhu càháⁿ-í, duha cùñaha-ndo xii-dé —càchí-gã xãhaⁿ-gã xii-güedé.

⁷ Te sátá ní yáha-güedé cuánuhú-güedé te ní ngúíta Jësús ní

càháⁿ-gá núú ñáyiu cuèndá té Juáá, te xãhaⁿ-gã xii-yu:

—Nchòhó ní sáháⁿ ndéhé-ndó ìⁿ téé ndècu xití yucu, te téé-áⁿ ñã túú sàni ìⁿ saní úú iní-dé, chí ñã túú quide-dé dàtná quidé nchaa ité náhnú cuáháⁿ-xi duha cuáháⁿ-xi dàcáⁿ òré quéné tãchí. ⁸ Te ní ñã túú ní sáháⁿ ndéhé-ndó ìⁿ téé nihnu dóó vãha dóó vii cãa. Te nchòhó xiní-ndó sã nchãá ñáyiu nihnu dóó vãha dóó vii cãa xíndecú-yu vehe cue téé cùnúu yíndaha ñáyiu. ⁹ Dico nchòhó chí ní sándéhé-ndó ìⁿ téé càháⁿ tnúhu Yã Ndiõxí, te ndáá sá díú ìⁿ téé càháⁿ tnúhu-gá cúú-dé, te cùnúu-gá-dé dàcúúxí dàva-gá cue téé càháⁿ tnúhu-gá. ¹⁰ Te diu cuèndá té Juáá-áⁿ càháⁿ-xi núú tùtú Yã Ndiõxí nàcuáa ní xáhaⁿ-gã xii Cristú, te duha ní xáhaⁿ-gã:

Tendaha-í ìⁿ téé càháⁿ-dé tnúhu-í codonú-dé núú-n,

cuèndá dàtúha-dé ñáyiu cuèndá quíndáá iní-yu tnúhu-n.

Duha ní xáhaⁿ-gã, te ducaⁿ ní ngódó tnùní núú tùtú-gá. ¹¹ Te na càchí tnúhu ndáá-í xii-ndo sã ní ìⁿ cue téé ñuyíú-a ñã túú cùnúu-güedé dàtná cùnúu té Juáá téé dàcuandute ñaha xii ñáyiu. Te nchaa ñáyiu sa ta ndíhu ndaha ñaha Yã Ndiõxí vitna cuáháⁿ cùnúu-gá-ni tucú-yu dàcúúxí té Juáá cuèi cùú-yu ñáyiu ñã túú cùnúu dacúúxí dàva-gá ñáyiu yíndaha-gá.

¹² Te ndéé cùtnàhá ní ngúíta té Juáá téé dàcuandute ñaha xii ñáyiu càháⁿ-dé tnúhu Yã Ndiõxí ñuyíú-a, ndéé dàvá-áⁿ ní ngúíta ñáyiu cuíní-yu sá ndíhu ndaha ñaha Yã Ndiõxí xii-yu te ndècu ndeé-yu quidé-yu nàcuáa ndíhu ndaha ñaha-gã xii-yu. ¹³ Te nchaa cue téé ní xóo càháⁿ tnúhu Yã Ndiõxí ndéé sanaha ní càháⁿ-güedé sá díú-gã ndíhu ndaha-gã cue ñáyiu, te diu-ni ducaⁿ ní càháⁿ tucu ndíi Moisés ní ngódó tnùní núú tùtú ndíi. Te diu-ni ducaⁿ cùnúu nchaa tnúhu-áⁿ càháⁿ-xi nàcuáa ndíhu

ndaha Yá Ndióxi ñáyi ndéé ní sáá nduu ní nguíta té Juàá càháⁿ-dé tnúhu-gá ñuyíú-a. ¹⁴ Te na càchí tnúhu-í xii-ndo sá cáda cuendá-ndó, chí núú tútú Yá Ndióxi càchí-xi sá ndíxí tē Èliás, te ñuú tē Èliás-án ní quide té Juàá. ¹⁵ Te nchaa nchòhó ñáyi ndèdóho nchaa tnúhu càháⁿ-í-a te ío váha chí cuáha cuendá.

¹⁶ Te na càchí tnúhu tucu-í xii-ndo nàcuáa sàtnahá-xi cùu ñáyi ndècu vitna. Chí ñáyi-án cúu-yu dàtná cue landú sácóo núú yáhu dàdiqui-güexi te níhi càháⁿ-güexi, te xitnáha-güexi ndi mee landú-güexi: ¹⁷ “Ní tíú-ndí yaá ndíhi vílu te ñá túú ní cuíní-ndó càta-ndo, Te ío yica iní ní xita yuhu-ndí te ñá túú ní ndáhyú-ndó”, càchí-güexi xitnáha-güexi. Te ducaⁿ sàtnahá-xi cùu ñáyi ndècu vitna, ¹⁸ chí té Juàá ío ndàhú ní xóo caxi-dé, te ní ñá túú ní xóo cohó-dé ndudí ndéhé yoho yáha stíle sá sá ní nduu-xi ndidí, te sá dúcáⁿ ní xóo cada-dé te ní cachí-yu sá ní xindecu ndíhi-dé espíritú cündíhi yucu ñáváha. ¹⁹ Te sáta ní quexío yúhú Tée cùu ñaní tnáhá-ndó ncháa-ndo, te xèxi-í xíhi-í quidè-í, te càchí-yu sá yúhú cúu-í ñⁿ tée xèxi vihi te xíhi vihi, te càchí tucú-yu sá cúu-í tée xica cuu ndíhi cue tée cuíhna iní-xi quide cobrá ñáhá xii-yu cuendá impuèstú ndíhi nchaa dava-gá cue tée ndècu ichi cuehé ichi duha, duha càchí-yu. Te ñáyi ní tnahá tnúhu ndíhi Yá Ndióxi, ñáyi-án quidè-yu sá váha nàcuáa cutnùní sá méé-gá ío ndècu ndíhi-gá sá xini tnùní-gá —càchí-gá xáhaⁿ-gá xii-yu.

Cuendá ñáyi dava ñuú ñá túú sàndáá iní tnúhu Xitohó Jesucrístú
(Lc. 10:13-15)

²⁰ Te Jèsús ní nguíta-gá càháⁿ-gá dóho nchaa ñáyi ñuú núú ío-gá vai núú sá vá yóo tnàhí ndàcu cada ní quide-gá, chí nchaa ñáyi ñuú-án ñá túú cuíní-yu ndixi túu iní-yu sá

ñá túú quide váha-yu ndècú-yu, te xáhaⁿ-gá xii-yu:

²¹ —ñDàhú nchòhó cue ñáyi ñuú Coràzin! jTe ndàhú nchòhó cue ñáyi ñuú Bètsaidá! Chí núú dícó ñuú Tírú ndíhi ñuú Sìdón ní quide-í nchaa sá vá yóo tnàhí ndàcu cada datná ní quide-í ñuú-ndó-á ní xini-ndó ñá, te sá ndéé ama-gá cuíhnú-yu dóo ndàhú te cunu cóo-yu núú yaá cuendá sá ndíxí cuèchi iní-yu sá ñá túú quide váha-yu ní cùu. ²² Dico sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Tírú ndíhi ñáyi ñuú Sìdón. ²³ Te nchòhó cue ñáyi ñuú Capèrnaúm ío quide cahnu-ndo mee-ndo, te quide iní-ndó sá sá cuándaa-ná-ndó àndíu, dico ñáhá chí núú ùhú núú ndàhú nduu táhú-ndó cundecu-ndo. Te núu dícó ñuú Sodomá ní quide-í nchaa sá vá yóo tnàhí ndàcu cada datná ní quide-í ñuú-ndó ní xini-ndó ñá, te ñáyi-án vá náá-yu chí cundecu-ní-yu ndéé vitna ní cùu. ²⁴ Te na càchí tnúhu-í xii-ndo sá sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Sodomá —càchí-gá xáhaⁿ-gá xii nchaa ñáyi ñuú-án.

Jèsús cuíní-gá sá túhá ñaha ñáyi xii-gá

(Lc. 10:21-22)

²⁵ Te sáta xáⁿ te Jèsús ní nguíta-gá càháⁿ ndíhi-gá Tàtá-gá Dútú Ndióxi, te xáhaⁿ-gá:

—Yòhó Tàtá-í Dútú Ndióxi, ío chíñu ñaha-í xii-n chí ñuú-n tàxi tnùní-n àndíu ndíhi ñuyíú-a, te dànehé-n cuè ñáyi nchaa tnúhu váha, te ñuú-ñáyi-án cúu-yu ñáyi ñá túú cutnùní iní-xi nchaa tnúhu càháⁿ cue tée càchí sá ío túha, te nchaa tnúhu váha-án ñá túú dàtúu-n núú ñáyi càchí sá ío túha te ío váha sáá díquí-xi. ²⁶ Chí ducaⁿ cuíní-n cunduu —cachí-gá xáhaⁿ-gá xii Tàtá-gá.

²⁷ Te xáhaⁿ-gá xii nchaa ñáyi xindecu-án:

—Mee Tătà-í Dútú Ndiöxí ní cachi-gá sá cùnùu-í núú nchàandi tùhú sá íó. Te vá yõ ìⁿ-gá xìní nàcuáa sàni iní yúhú Déhe Dútú Ndiöxí, chi ìⁿdií díi-ni mee-gã xìní-gá nàcuáa sàni iní-í, te mee-í xìní-í nàcuáa sàni iní meé-gã. Te nchaa ñáyiú cächí iní-í sá quíní-yu nàcuáa sàni iní Tătà-í Dútú Ndiöxí te xĩtnùhu-í-yu, te vá yõ ìⁿ-gá xìní chi ñu-ni ñáyiú ducaⁿ xĩtnùhu-í-áⁿ xìní-yu. ²⁸ Te nchaa nchòhó ñáyiú ñá túú ndècu váha, ñáyiú ñá túú ñihí nàcuáa cada cundecu váha iní-xi quixi-ndo tùha ñaha-ndo xii-í nàcuáa ducaⁿ cundecu váha iní-ndó. ²⁹ Te cuu vii cuu váha iní-ndó tnì-ndo nchaa tnùhu càháⁿ-í, te ío dacuàha-ndo, te ducaⁿ càda-ndo chi yúhú ío càhnu iní-í, te ío ndàhú iní-í. Te núú ducaⁿ na càda-ndo te ío váha cuu iní-ndó cundecu-ndo. ³⁰ Te tnì-ndo nchaa tnùhu càháⁿ-í chi ñá túú cùu-xi ìⁿ sá vé, chi cada iní-ndó sá cúú-xí dàtná ìⁿ chiuⁿ ñamá —cächí-gá xàhaⁿ-gã xii-yu.

12

Cue téé xica cuu ndihi Jesús sahñú-güedé yoco triú nduu ndètatú ñáyiú

(Mr. 2:23-28; Lc. 6:1-5)

¹ Te ìⁿ nduu cùu-xi nduu ndetatú ñáyiú ñùhu Jesús ichi ndihi cue téé xica cuu ndihi-gá, te ta yàha-gá ndihi-güedé ìⁿ xichi núú cáá triú te xixíhí-güedé docó núú xiáⁿ ní ngüíta-güedé sahñú-güedé yoco triú-áⁿ, te ndihi ndaha-güedé quíⁿ-güedé quéé triú-áⁿ tá xèxi-güedé cuáháⁿ. ² Te cue téé cùu fariséú ní xini-güedé nàcuáa quide cue téé xica cuu ndihi Jesús, núú ní xáhaⁿ-güedé xii-gá:

—¿Ná cuèndá ducaⁿ quide cue téé xica cuu ndihi-n sahñú-güedé yoco triú, te vitna cùu-xi nduu ndetatú-í? Te ñá túú tau-güedé ducaⁿ càda-güedé —cächí-güedé xàhaⁿ-güedé xii-gá.

³ Te Jesús ní xáhaⁿ-gã xii-güedé:

—¿Náa ñá túú dacuaha-ndo núú tütú Yá Ndiöxí núú càháⁿ-xi nàcuáa ní quide ndii Dàvíí cùtnàhá ní xihí ndii docó ndihi cue téé ní xica cuu ndihi ndii-áⁿ? ⁴ Chi ndii-áⁿ ní quíhu ndii vehe Yá Ndiöxí ní queheⁿ ndii pàá ní cuu íí ndécú-áⁿ ní xexi ndii ndihi cue téé ní xica cuu ndihi ndii, te ñá túú tau ndii sá dúcáⁿ càda ndii ndihi cue téé-áⁿ ní cùu, chi mee-ni cuè dútú tau-güedé caxi-güedé pàá-áⁿ ní cùu. ⁵ ¿Te náa ñá túú xini-ndó nàcuáa càháⁿ-xi núú tütú ndii Moisés sá ncháá cuè dütú vá ndètatú-güedé nduu cùu-xi nduu ndetatú-áⁿ? Te ñá díú ìⁿ cuéchi cùu-xi sá dúcáⁿ ñá túú ndètatú-güedé nduu cùu-xi nduu ndetatú. ⁶ Te na cächí tnùhu-í xii-ndo sá yúhú cùu-í téé ío-gá cúnuu ndecu ndihi-ndo dacúxí veñùhu sá ío cúnuu. ⁷ Dico nchòhó chi ñá tècú tnùnì-ndó nàcuáa càháⁿ Yá Ndiöxí núú tütú-gá núú cächí-xi: “Yúhú cuiní-í sá cundàhú iní-ndó cuè tnaha ñáyiú-ndo te ñá díú mèe-ni sá cáhni-ndó quiti nduu táhù-í”, duha cächí-gá núú tütú-gá. Te núú dicó nchòhó tècú tnùnì-ndó ñá, te vá càháⁿ cuèhé-ndó cuèndá nchaa ñáyiú ñá túú ndècu cuéchi-xi. ⁸ Te yúhú Téé cùu ñani tnàhá-ndó nchaa-ndo, tnàhá-í ndécú ndihi-í tnùhu ndee ìní sá cùu-í nchaa ñáyiú nàcuáa cada-yu nduu ndètatú-ó-á —cächí-gá xàhaⁿ-gã xii-güedé.

Íⁿ téé ní yíhí ìⁿ xio ndaha-xi

(Mr. 3:1-6; Lc. 6:6-11)

⁹ Te Jesús ní xica-gá cuáháⁿ-gá, te cuánguihu-gá xiti ìⁿ veñùhu. ¹⁰ Te xiáⁿ ndécú ìⁿ téé ní yíhí ìⁿ xio ndaha-dé. Te ñáyiú cue téé xindecu-áⁿ ndúcú-güedé nàcuáa cada-güedé cacáⁿ cuéchi-güedé cuèndá-gá núú cuè téé cúnuu, te ní xicáⁿ tnùhú-güedé núú-gã, te xáhaⁿ-güedé:

—Cächí tnùhu xii-ndí núú cuu cada tátna-o ìⁿ téé cùhú nduu cùu-xi nduu ndetatú-ó ñá ñàhá —cächí-güedé xáhaⁿ-güedé xii-gá.

¹¹ Te Jesús ní xáhaⁿ-gã xii-güedé:

—Te nchòhó òré ná ngàunihnu ìḡ mbéé-ndó ìḡ déhva cùnú te nàtava-ndo-di cuéi cùu-xi nduu ndetatú-ó. ¹² Te ìḡ ñáiyu ío-gá cùnùú-yu dàcúxí ìḡ mbéé, núu xíá táú-ó sá cádá-ó sá vâha sá cùú-xi-yu cuéi cùu-xi nduu ndetatú-ó —càchí-gá xâhaⁿ-gá xii-güedé.

¹³ Te dàtnùní ní xâhaⁿ-gá xii téé cùhú ndaha-xi-á:

—Ndacani ndaha-n —càchí-gá xâhaⁿ-gá xii-dé.

Te téé-áⁿ ñí ndacani-dé ndaha-dé, te òré-ni ní ndúha ní nduu-xi dàtná cáá ìngá xio ndaha-dé. ¹⁴ Te cue téé cùu fariséú ní ndee-güedé xití veñúhu, te ní ngúíta-güedé ndátnúhu-güedé núu nása cada-güedé cahni-güedé Jèsús.

Nàcuáa sa ndéé tñuní cuèndá Jèsús

¹⁵ Te sáta ñí cutnùní iní Jèsús nàcuáa cuèni-güedé cada ñaha-güedé xii-gá te ní xica-gá cuáháⁿ-gá, te ío vâi ñáiyu nchìcúⁿ ñáhá xii-gá cuáháⁿ, te tñahá cue ñáiyu cùhú nchìcúⁿ ñáhá xii-gá cuáháⁿ, te ní quide tátna-gá cue ñáiyu-áⁿ. ¹⁶ Te ní xâhaⁿ-gá xii-yu sá vâ càháⁿ-yu yoo cùu-gá. ¹⁷ Te ducaⁿ ñí cuu chi ní quee ndáá-xi nàcuáa ní xâhaⁿ Yâ Ndióxi xii ndíi Chàia téé ní xóo cáháⁿ tñúhu-gá ndéé sanaha ñí chídó tñuní ndíi núú tütú-gá, te duha ndúu tñúhu ní xâhaⁿ-gá:

¹⁸ Téé-a cùu-dé téé ní sani iní-í sá cùnú cuèchi-dé núú-í,

te ío cùu iní-í-dé, te cùdìí iní-í-dé.

Te yùhú cuáñaha-í Espiritú-í cundecu ndíi-dé,

te ñii-dé cùñaha-dé xii nchaa ñáiyu ñuyú sá yùhú ío ndáá quidé-í.

¹⁹ Te vâ dácáá-dé tñúhu cáháⁿ-dé ndíi ñáiyu, te ni vâ cána sâa-dé òré cáháⁿ-dé,

te ni vâ yôo níhí tñúhu nása cáháⁿ-dé cuhuⁿ-dé ichi.

²⁰ Te ní ñá tùú ná cada-dé cue ñáiyu cùu dàtná ìḡ tñu ndóó sá cuèni-xi tñáhnú, te ñii-ni

ñáiyu-áⁿ cùú tütú-yu dàtná ìḡ mèchá càndíl sá ío quène ñúhmá te cuèni-xi ndahvá.

Te ducaⁿ sátnahá-xi cùu ñáiyu-áⁿ chi ñá tùú níhí ndéé-yu cundecú-yu sá cùú-xi-í, te mee-ni sá vâha cada ñaha-dé xii-yu,

te ñii-ni ducaⁿ càda-dé ndéé sáá nduu cutnùní iní nchaa ñáiyu sá ío ndáá quidé-dé.

²¹ Te nchaa ñáiyu níhí ñuyú ío cundee cùu cahnu iní ñáhá-yu xii-dé.

Duha ní xâhaⁿ-gá xii ndíi Chàia ní chídó tñuní ndíi núú tütú-gá.

Càchí-güedé sá ndécú ndíi Jèsús espíritú cundíi yucu ñávâha

(Mr. 3:20-30; Lc. 11:14-23; 12:10)

²² Te ní quexío ìḡ úú cue téé núú ndécú Jèsús, te ndéca-güedé ìḡ téé ñíhí te cuáá-dé, te yíhí ñaha espíritú cundíi yucu ñávâha xii-dé, te Jèsús ní queñuhu-gá espíritú cundíi yucu ñávâha yíhí ñaha xii-dé, te òré-ni-áⁿ ñí cuu ní nacáháⁿ-dé te ní ndúha núú-dé. ²³ Te nchaa ñáiyu xíndecu-áⁿ ío ní cuñúhu-yu sá dúcáⁿ ñí quide-gá, te ní xítñahá-yu:

—Váa téé-a cùu-dé ñani tñahá ndíi Dávíí téé tendaha Yâ Ndióxi quixi ñuyú-a —càchí-yu xítñahá-yu.

²⁴ Te cue téé cùu fariséú ní tecú dóho-güedé nàcuáa ndúu tñúhu xítñahá-yu, núu xíáⁿ ní xítñaha-güedé:

—Téé-a ndèñuhu-dé nchaa espíritú cundíi sácúíhná yíhí ñaha xii ñáiyu, chi ñii-ni sácúíhná-áⁿ chíndèe ñaha-xi xii-dé te ñii-ni-xi tàxi tñuní-xi nchaa espíritú-áⁿ —duha ní xítñaha-güedé.

²⁵ Te Jèsús ní cutnùní iní-gá nàcuáa ndúu tñúhu ní xítñaha-güedé, núu ní xâhaⁿ-gá xii-güedé:

—Te nchòhó ximí-ndó sá núu ìḡ téé yíndaha ìḡ nacióⁿ vâ cùú ìḡ nuu-dé ndíi cue téé cundíi-dé, te vâ cùdìí-dé cunuu-dé. Te ñii-ni

ducaⁿ sãtnahá tucu-xi cùu tucu cue tée cùchiuⁿ ìⁿ ñúú, chi núu vá cúú ìⁿnuu-güedé cundecu-güedé, te vá cùdĩ-güedé cundecu-güedé taxi tnùnı-güedé. Te ñu-ni ducaⁿ sãtnahá tucu-xi cùu cue ñáyıu xĩndecu ìⁿ-ni vèhe, chi núu vá cúú ìⁿnuú-yu cundecú-yu te vá cùdĩ-yu cundecu càhnú-yu.

²⁶ Te núu sácúihná ducaⁿ quide-xi queñuhu-xi cue espíritú cùndĩhi-xi yihı ñaha xii ñáyıu ña, te ñá túú cùu ìⁿnuu-xi ndecu-xi te núu ducaⁿ, te vá cùdĩ sácúihná-ãⁿ cundecu-xi taxi tnùnı-xi te núu ducaⁿ quide-xi.

²⁷ Te duha càháⁿ-ı chi nchòhó càchı-ndó sã chĩndèe ñaha sácúihná xii-ı queñuhu-ı nchaa espíritú

cùndĩhi-xi yihı ñaha xii ñáyıu. Te núu yúhú quidé cuendá-ndó sã sácúihná chĩndèe ñaha-xi xii-ı, te xini ñuhu-xi cada cuendá-ndó yòo chĩndee ñaha xii cue tée xica cuu ndĩhi-ndo queñuhu-güedé nchaa espíritú cùndĩhi yucu ñávaha yihı ñaha xii ñáyıu. Te mee-güedé càchı-güedé sã nchòhó ñá túú càháⁿ ndáá-ndó sã dúcáⁿ càháⁿ-ndó.

²⁸ Dico yúhú chi Espíritú Yã Ndiòxı chĩndèe ñaha-xi xii-ı queñuhu-ı nchaa espíritú cùndĩhi sácúihná yihı ñaha xii ñáyıu, te sã dúcáⁿ chĩndee ñaha Espíritú-gá xii-ı, xĩãⁿ cùtnunı sã sã ní sáá nduu cuını-gá ndıhu ndaha ñaha-gá xii-ndo.

²⁹ 'Te nchòhó xini-ndó sã cuè ñaduhú chi vá ndácú-güedé cuendá-ni quıhu-güedé duhu-güedé vehe ìⁿ tée ío ndee, chi díhna-gá xini ñuhu-xi tnı-güedé tée-ãⁿ dacutu ñaha-güedé xii-dé dãtnunı ducaⁿ te ndacu-güedé duhu-güedé nchaa sã ndécú ndĩhi-dé.

³⁰ 'Te nchaa ñáyıu ñá túú cùndĩhi ñaha xii-ı, te cùu úhú inı ñáhã-yu. Te nchaa ñáyıu ñá túú chĩndee ñaha xii-ı, te dàquee tíhũ-yu chiunⁿ quide-ı.

³¹ 'Te na càchı tnúhu-ı xii-ndo sã ncháá ñáyıu quide nchaa sã cuèhé sã dúhá cuu cada càhnı inı ñáhã Yã Ndiòxı xii-yu, te ñu-ni ducaⁿ

cùu cada cahnu inı-gá nchaa tnúhu cuèhé tnúhu duha càháⁿ-yu. Dico cue ñáyıu na càháⁿ úhú cuendá Espíritú-gá, te ñáyıu-ãⁿ vá cádá càhnı inı ñáhã tnàhı-gá xii-yu.

³² Te nchaa ñáyıu na càháⁿ úhú cuendá yúhú Téee cùu ñanı tnáhã-yu ncháã-yu, te cuu cada càhnı inı ñáhã Yã Ndiòxı xii-yu. Dico cue ñáyıu na càháⁿ úhú cuendá Espíritú-gá te vá cádá càhnı inı ñáhã tnàhı-gá xii-yu cuèi vitna ndècu vívũ-yu, te cuèi na cùu-yu.

Ndi dıⁿ núu yutnu xini-ó nã yutnu cùu-xi cuendá sã sãvidı-xi (Lc. 6:43-45)

³³ 'Te nchòhó xini-ndó sã ndı dıⁿ núu yutnu xini-ó nã yutnu cùu-xi cuendá sã sãvidı-xi, te xini-ó sã ncháá yutnu váha cùuⁿ mee-ni sãvidı váha, dico nchaa yutnu sã ña túú váha te cùuⁿ mee-ni sãvidı sã ña túú váha. Te duha càháⁿ-ı cuendá cada cuendá váha-ndo nãcuáa nduu chiunⁿ quide-ndo ìⁿ ìⁿ-ndo cuendá ducaⁿ cùtnunı ná ñáyıu cùu-ndo.

³⁴ Dico nchòhó cúú-ndó dàtná ìⁿ cóo déeⁿ chi ío cuihna inı-ndó, te vá canı inı-ndó sã ndácú-ndó càháⁿ-ndó ìⁿ tnúhu váha, chi ío cuihna inı-ndó. Te nchòhó xini-ndó sã ncháá ñáyıu càháⁿ-yu nani véxi inı-yu. ³⁵ Te nchaa ñáyıu váha inı-xi càháⁿ-yu tnúhu váha, chi ñu-ni tnúhu váha-ãⁿ ñúhú inı-yu. Te nchaa ñáyıu cuihna inı-xi càháⁿ-yu tnúhu cuèhé tnúhu duha, chi ñu-ni tnúhu cuèhé tnúhu duha-ãⁿ ñúhú inı-yu.

³⁶ Te na càchı tnúhu-ı xii-ndo sã ná sáá nduu càda ndáá Yã Ndiòxı cuèchi nchaa nchòhó ñáyıu ndècu ñuyú-a, te nchaa tnúhu cuèhé tnúhu duha càháⁿ-ndó càháⁿ-gá sã ña túú ní quide váha-ndo sã dúcáⁿ nı càháⁿ-ndó tnúhu-ãⁿ.

³⁷ Te nãcuáa nduu tnúhu ní càháⁿ-ndó ìⁿ ìⁿ-ndo, te ducaⁿ càháⁿ Yã Ndiòxı te núu ndècu cuèchi-ndo àdi ñá túú ndècu cuèchi-ndo. Te núu ñá túú cuèchi-ndo te càcu-ndo, dico núu ndècu cuèchi-ndo te vá càcu-ndo

—càchí-gá xăhaⁿ-gă xii cue tée cùu fariséú-áⁿ.

Cue tée cuiní sá cádá Jèsús ìⁿ sá vă yõo tnàhí ndàcu cada

(Mr. 8:12; Lc. 11:29-32)

³⁸ Te cue tée cùu fariséú, ndihì cue tée dàcuaha ñaha xii ñáiyu nchaa tnúhu ní chídó tnùnì ndíi Moisés xăhaⁿ-güedé xii Jèsús:

—Mèstrú, cuiní-ndí cada-n ìⁿ sá vă yõo tnàhí ndàcu cada cuendá ducaⁿ cùtnuní iní-ndí sá Yă Ndiõxí chindèe ñaha-gá xii-n —càchí-güedé xăhaⁿ-güedé xii-gá.

³⁹ Te Jèsús ní xăhaⁿ-gă xii-güedé:

—Ñáiyu ndècu ichi cuehé ichi duha ñă túú cuiní-yu tní-yu tnúhu càháⁿ Yă Ndiõxí, te ñáiyu-áⁿ cuiní-yu cada-í ìⁿ sá vă yõo tnàhí ndàcu cada nacuáa cutnùnì iní-yu núu ndáá sá Yă Ndiõxí chindèe ñaha-gá xii-í. Dico yúhú chi ñă túú năgá cada-í quini-yu, chi sa nihí-yu tnúhu nàcuáa ní yáha ndíi Jónás tée ní xóo cáháⁿ tnúhu Yă Ndiõxí ndéé sanaha, te ñiyu-ni ducaⁿ yáha yúhú tucu. ⁴⁰ Chi ndíi Jónás-áⁿ ní xúhuⁿ ndíi únì nduu únì niú xití ìⁿ chácá cáhnú vñhi nanì ballená. Te ñiyu-ni ducaⁿ yáha yúhú Tée cùu ñaní tnàhá-ndó nchàa-ndo, chi únì nduu únì niú cuhuⁿ-í xití ñuⁿhu. ⁴¹ Te na sáa nduu càda ndáá Yă Ndiõxí cuéchi nchaa ñáiyu ndècu ñuyíú-a, te dàvá-áⁿ cachí nchaa ñáiyu ñuu Níivé sá ñà túú ní quide ndáá nchaa ñáiyu ndècu vitna, te ducaⁿ cáháⁿ-yu chi mèe-yu ní dáñă-yu ichi cuehé ichi duha cùtnàhá ní sáháⁿ ndíi Jónás ñuu-yu ní cáháⁿ ndíi tnúhu Yă Ndiõxí núu-yu. Dico vitna iha ndècu ndihì ñaha-ndo xii yúhú, te ñiyu-í io-gá cùnùu-í dàcúúxí ndíi Jónás. ⁴² Te nduu càda ndáá Yă Ndiõxí cuéchi nchaa ñáiyu, te dàvá-áⁿ quini-ndó ìⁿ ñadihí ñaha ní xíndaha ìⁿ nacióⁿ cáá ndàa xio datni núú quéné nchicanchii, te ñaha-áⁿ io xica ní xíndecu-aⁿ te ní sáháⁿ-aⁿ ní xíndedóho-aⁿ nchaa tnúhu ní cáháⁿ ndíi Salómón, chi ndíi-áⁿ io ní sáá sá xini tnùnì ndíi.

Te tnàhá ñaha-áⁿ cáháⁿ-aⁿ sá ñà túú ní quide ndáá nchaa ñáiyu ndècu vitna. Dico vitna iha ndècu ndihì ñaha-ndo xii yúhú, te ñiyu-í io-gá cùnùu-í dàcúúxí ndíi Salómón.

Espíritú cùndihì yucu ñávăha sá nánchòcáva xito cùu uu

(Lc. 11:24-26)

⁴³ Te òré ná queé ñaha ìⁿ espíritú cùndihì yucu ñávăha xii ìⁿ ñáiyu, te cuáháⁿ-xi ndècu-xi ìⁿ xichi núú cùndècu-xi te ñă nihí-xi te ní sani iní-xi: ⁴⁴ “Văha-gá núhú tucu-í núú nñ xíndecu-í”, duha ní sani iní-xi. Te cuánuhú-xi, te òré ní nasáá-xi, te ní xiní-xi sá cáá iní ñáiyu-áⁿ dàtná cáá-nă ìⁿ vehe ní natíhú ní nduu vii-ná te vă yõo-gá ndécú. ⁴⁵ Te sáta dúcáⁿ te ní xica-xi cuáháⁿ-xi cuándúcú-xi ùsá tnàhá espíritú cùndihì-xi sá nèhè víhí-gă xíquide. Te òré ní nihí-xi cue espíritú-áⁿ te ndèca ñaha-xi cuáháⁿ cuendá ngúndecu ndihì-xi ñáiyu-áⁿ. Te ñáiyu-áⁿ uuⁿ-gá nándi yáha-yu dàcúúxí ndèé díhna. Te ñiyu-ni ducaⁿ sátnahá-xi yáha nchaa ñáiyu cuíhna iní-xi ndècu ñuyíú-a vitna —càchí-gá xăhaⁿ-gă xii-güedé.

Cue ñaní Jèsús ndihì nănă-gă

(Mr. 3:31-35; Lc. 8:19-21)

⁴⁶ Te càháⁿ dúcáⁿ-ní Jèsús ní quexio nánă-gă ndihì cue ñaní-gá cuiní-yu cáháⁿ ndihì ñàhá-yu xii-gá, te ní ngúnu tní-yu ndàa quehé vehe núú ndécú-gă. ⁴⁷ Te ìⁿ cue ñáiyu xíndecu-áⁿ ní xáhăⁿ-yu xii-gá:

—Ní quexio nánă-n ndihì cue ñaní-n xínutnii-yu quehé, te cuiní-yu cáháⁿ ndihì ñàhá-yu xii-n —càchí ñáiyu-áⁿ xáhăⁿ-yu xii-gá.

⁴⁸ Te ní xăhaⁿ-gă xii ñáiyu ducaⁿ xăhaⁿ xì-gă-áⁿ:

—Te cachí tnúhu yóndi-gá ñáiyu cùu datná nănà-í ndihì dàtná cue ñaní-í —càchí-gá xăhaⁿ-gă xii ñáiyu-áⁿ.

⁴⁹ Te ní dánèhé ñàhá-gă nchaa cue tée xica cuu ndihì-gá, te ní xăhaⁿ-gă xii ñáiyu-áⁿ:

—Cue té-a cùu-güedé dàtná nǎnà-í, ndihí dàtná cue ñaní-í.
 50 Te nchaa ñáyiú na càda nchaa nacuáa càháⁿ Tǎtǎ-í Dútú Ndiöxí Yáá ndécú àndiú, te ñáyiú-án cùu-yu dàtná nǎnà-í, ndihí dàtná cue ñaní-í, ndihí dàtná cue cúha-í —càchí-gá xǎhaⁿ-gǎ xii ñáyiú ducaⁿ ní dáyǎha tnúhu núu-gǎ-án.

13

Nàcuáa quide téa cuángacáⁿ triú
 (Mr. 4:1-9; Lc. 8:4-8)

¹ Te ñiú-ni nduu-án ní quee Jèsús vehe núu ndécú-gǎ, te ní xica-gá cuáháⁿ-gá ní ngóo-gá yuhu làgúná.
² Te ío cuéhé ñáyiú ní tacá núu ndécú-gǎ. Te sá dúcáⁿ ío cuéhé ñáyiú núu ní quee-gá xití ñⁿ bàrcú nútñ^ñ xití ndute làgúná-án, te núu xǎⁿ ní ngóo-gá, te nchaa ñáyiú-án xǎxúcu-yu yuhu làgúná-án.
³ Te Jèsús ní ngúita-gá ní caní-gá titní cuendú núu-yu nàcuáa tecú tnùní-yu nchaa nàcuáa ndùu tnúhu-gá, te xǎhaⁿ-gǎ xii-yu:

—Ñⁿ téa cuángacáⁿ-dé triú, ⁴ te òré ní ngúita-dé dǎngoyo-dé triú-án, te dava ní quene ndava ní ngava ndéé ichi, te ní xiní cue tǎláá te ní nadatàcá-güedi.
⁵ Te dava ní ngava ñuhu yadi núu yíhí vǐhi yúú, te ndihí-ni ní xínu-xi chí ñá túú càvǐhi ñuhu.
⁶ Dico òré ní nayahé te ñá túú ní cùndee iní-xi chí ní yíchí-xi, chí ñá túú ní ñhí quǐhíⁿ cùnú yóho-xi.
⁷ Te dava ní ngava núu yúcu ndǐquⁿ tnu ññu, te ñⁿnuu-ni ní xínu-xi ndihí tnu ññu. Te tnu ññu-án ní sahnu-xi te ní dánáá-xí nchǎa triú sá ní xínu-án.
⁸ Dico dava-gá triú ní ngava núu ndécú ññu cocoⁿ te xǎⁿ ío váha ní cuu, chí núu ñⁿ-ní triú-án te dava yoco-xi ní ngúihí ócó úxí triú-xi, te dava yoco-xi ní ngúihí únídico triú-xi, te dava yoco-xi ní ngúihí ñⁿ ciendú triú-xi.
⁹ Te vitna nchaa nchòhó ñáyiú ní xǐndedóho tnúhu ní cáháⁿ-i-a, te ío váha chí

cuáha cuendá —càchí-gá xǎhaⁿ-gǎ xii-yu.

Cue téa xica cuu ndihí Jesús ndúcú tnúhu-güedé núu-gǎ ná cuendá caní-gǎ cuendú núu ñáyiú
 (Mr. 4:10-12; Lc. 8:9-10)

¹⁰ Te cue téa xica cuu ndihí Jesús ní sáháⁿ-güedé ndéé núu-gǎ, te xǎhaⁿ-güedé xii-gǎ:

—Ndúcu tnúhu-ndí núu-n ññu ná cuendá ducaⁿ mee-ni cuendú caní-n núu ñáyiú —càchí-güedé xǎhaⁿ-güedé xii-gǎ.

¹¹ Te ní xǎhaⁿ-gǎ xii-güedé:

—Nchòhó chí sa càchí tnúhu Yá Ndiöxí xii-ndo ñⁿ sá vǎtá quǐní-gǎ-ndó, chí càchí tnúhu-gá nàcuáa quide-gá ndǐhu ndaha-gǎ ñáyiú, dico dava-gá ñáyiú chí ñá túú nǎ xǎhaⁿ-gǎ xii-yu.
¹² Te nchaa ñáyiú sa tècú tnùní te uuⁿ-gá cuita tecú tnùní-yu quǐhíⁿ, te nchaa ñáyiú ñá túú tècú tnùní te uuⁿ-gá vǎ tècú tnùní-yu.
¹³ Te xǎⁿ núu duha caní-í mee-ni cuendú núu-yu, chí cuéi na quǐní-yu nchaa nàcuáa cuu dico ní vǎ cùtnùní iní-yu ná cuendá ducaⁿ cùu, te cuéi na cùndedóho-yu dico ní vǎ tècú tnùní-yu.
¹⁴ Te ñiú cuendá ñáyiú-án ní xǎhaⁿ Yá Ndiöxí xii ndíi Chàíá téa ní xóo cáháⁿ tnúhu-gá ndéé sanaha ñí chídó tnùní ndíi núu tütú-gá núu càchí-xi:

Nchaa nchòhó cùndedóho-ndo tnúhu càháⁿ-í, dico ní vǎ tècú tnùní-ndó, te cuéi na quǐní-ndó nchǎa nacuáa cada-xi, dico ní vǎ cùtnùní iní-ndó nǎ cuendá ducaⁿ quide-xi.

¹⁵ Te ducaⁿ chí cùu-ndo ñáyiú ío sǎá iní-xi,

te cùu-ndo ñáyiú ñá túú tècú tnùní tnúhu càháⁿ-í,

te cùu tucau-ndo datná cue ñáyiú cuáa chí ñá túú cuǐní-ndó càda cuendá-ndó tnúhu-í,

te ní ñá túú cuǐní-ndó cùndedóho-ndo, te ní ñá túú cuǐní-ndó tècú tnùní-ndó,

te ní ñá túú cuǐní-ndó nàtuha ñaha-ndo xii-í cuendá cada

càhnu iní-í nchaa yíca
cuèchi-ndo nàcuáa ío váha
cuu iní-ndó cùndecu-ndo.

Duha ní xáhaⁿ Yá Ndióxi xii ndíi
Cháia ní chídó tñuní ndíi núu
tútú-gá.

¹⁶ Dico nchòhó chi ío váha
táhú-ndó chi cùtnuní iní-ndó nchàa
nacuáa quide-i, te cùtnuní tucu
iní-ndó nchàa nacuáa ndùu tñuhu
càháⁿ-í. ¹⁷ Te na cächí tñuhu
ndáá-í xii-ndo sá ío vâi cue tée ní
xóo càháⁿ tñuhu Yá Ndióxi ndéé
sanaha ndíhi nchaa dava-gá ñáyi
váha iní-xi ní cuiní-yu cundehé-yu
nchaa sá ndéhé-ndó vitna quide-í
dico ñá túú ní xini-yu, te ní
cuiní tucú-yu cundedóho-yu nchaa
tñuhu ndèdóho-ndo vitna càháⁿ-í te
ñá túú ní xindedóho-yu.

*Jesús càháⁿ-gá nàcuáa quèe-xi
cuendá tée cuángacáⁿ triú*

(Mr. 4:13-20; Lc. 8:11-15)

¹⁸ Te vitna cundedóho váha-ndo
na cächí tñuhu-í xii-ndo nàcuáa
quèe-xi cuendú tée cuángacáⁿ triú
ní cani-í núu-ndó. ¹⁹ Te triú sá
ní quene ndava ní ngava ndéé
ichi, xiáⁿ cúu-xí dàtná ñáyi ní
xindedóho tñuhu sá càháⁿ nàcuáa
ndíhu ndaha ñaha Yá Ndióxi xii-yu,
dico ñá túú ní cuiní-yu tñí-yu,
chi sácúihná cuáháⁿ-xi nàdatuhú-xi
iní-yu cuendá sá vâ cànchicúⁿ
nihnú-yu nàcuáa càháⁿ tñuhu-áⁿ.
²⁰ Te triú sá ní ngava ñuhu yadi
núu yíhi vîhi yúú-áⁿ, xiáⁿ cúu-xí
dàtná ñáyi ní xindedóho tñuhu Yá
Ndióxi te díí iní ní tñí-yu tñuhu-gá,
²¹ dico òré ná ngüita ñáyi cúcuèhé
ñáhâ-yu xii-yu àdi nândi-gá sá
yâha-yu sá cuendá tñuhu-gá, te ñá
cúndèe iní-yu chi dàñá-yu tñuhu-gá
cuendá sá ñá túú nihí ndéé-yu. ²² Te
triú sá ní ngava núu yúcu ndíquíⁿ
tnu iñu-áⁿ, xiáⁿ cúu-xí dàtná ñáyi
ní tecú dóho-xi tñuhu Yá Ndióxi
dico cuéé cuéé ní nacuanaá-yu
tñuhu-gá, chi cuendá mee-ni sá ío
ñuyúú-a ñuhu iní-yu, ndíhi cuendá
sá ío sâni iní-yu cuu cuicá-yu, te
mee-ni nchàa xiáⁿ ñúhú iní-yu

te ñá túú ñuhu iní-yu tñuhu sá
ní xindedóho-yu-áⁿ nàcuáa cada
váha-yu cundecú-yu. ²³ Dico triú sá
ní ngava núu ndécú ñuhu cocoⁿ-áⁿ,
xiáⁿ cúu-xí dàtná ñáyi ní xindedóho
tñuhu Yá Ndióxi te quidé-yu nàcuáa
càháⁿ tñuhu-gá. Te cada iní-ndó
sá ñáyi-yu-áⁿ cúu-yu dàtná triú sá
ní nguíhi yoco-xi ócú úxí triú-xi,
ndíhi triú sá ní nguíhi yoco-xi
únídico triú-xi, ndíhi triú sá ní
nguíhi yoco-xi ìⁿ ciendú triú-xi.
Ducaⁿ sâtnahá-xi cúu-yu chi ío
váha quidé-yu —cächí-gá xáhaⁿ-gá
xii-güedé.

*Cuendá nchaa cúhú sá ñá túú
vâha xínu xití triú*

²⁴ Te Jèsús ní cani-gá ìⁿ cuendú
núu ñáyi nàcuáa tecú tñuní-yu
tñuhu-gá, te xáhaⁿ-gá xii-yu:

—Te vitna na caní-í ìⁿ cuendú
núu-ndó nàcuáa tecú tñuní-ndó
nàcuáa cada-xi òré ndíhu ndaha
ñaha Yá Ndióxi xii ñáyi. ìⁿ tée ío
váha triú ní sacáⁿ-dé núu ñúhú-dé.
²⁵ Dico xití niú ní sáháⁿ ìⁿ tée cùu
úhú iní ñáhâ xii-dé, te ní dângoyo-dé
ndíquíⁿ yúcu sá ñá túú vâha núu
ní sacáⁿ-dé triú-áⁿ. ²⁶ Te òré vitna
váha váha ní ngüita-xi quèe yoco
nchaa triú-áⁿ, te ní xínu coyo nchaa
yúcu sá ñá túú vâha-áⁿ. ²⁷ Te cue
tée xínu cuèchi núu tée ní sacáⁿ
triú-áⁿ ní xitñuhu ñaha-güedé xii-dé
sá dúcáⁿ ní xínu cúhú sá ñá túú
vâha-áⁿ núu triú-dé, te xáhaⁿ-güedé:
“Pàtróón, ñása ní cuu núu ní xínu
cúhú sá ñá túú vâha núu triú-n,
te ío váha càa triú ní sacáⁿ-n ní
cúu?”, cächí-güedé xáhaⁿ-güedé.
²⁸ Te tée cùu patróón-güedé-áⁿ ní
xáhaⁿ-dé xii-güedé: “Ìⁿ tée cùu
úhú iní ñáhâ ñahi xii-í ducaⁿ ní
quide-dé ní sáhâⁿ-dé ní dângoyo-dé
ndíquíⁿ cùhú sá ñá túú vâha-áⁿ núu
triú-í núu ducaⁿ ní xínu coyo-xi”,
cächí-dé xáhaⁿ-dé xii-güedé. Te
cue tée xínu cuèchi núu-dé ní
xáhaⁿ-güedé xii-dé: “Te núu cuiní-n
te quíhíⁿ-ndí tñuhu-ndí nchaa
cúhú sá ñá túú vâha ní xínu núu

triú-n", cächí-güedé xähaⁿ-güedé xii-dé. ²⁹ Te téé cùu xitohó triú-áⁿ ní xähaⁿ-dé xii cue téé xinu cuechi núú-dé-áⁿ: "Ñähá, vá quihíⁿ-ndó tñuhu-ndo, chi òré tñuhu-ndo te tñähá-ni triú quene chi cäa vihi cühú-áⁿ. ³⁰ Vähá-gá chí dáñá ná cùhnu nahí ndéé ná cùu triú, te dàtnüni nducu-í cue téé quihíⁿ-güedé tñuhu-güedé nchaa cühú sã ñà túú vaha-áⁿ, te dacùtu nuhní-güedé te cahmi-güedé, te dàtnüni nàquehndé-güedé triú nacani-güedé te nataxüha-güedé xití yacá-í", cächí-dé xähaⁿ-dé xii-güedé —duha ní cani Jèsús cuendú núú-yu.

Cuendá ndíquíⁿ yutnu nàni mostázá

(Mr. 4:30-32; Lc. 13:18-19)

³¹ Te Jèsús ní cani tucu-gá ingá cuendú núú ñäyiu nàcuáa tecú tñüni-yu tñuhu-gá, te xähaⁿ-gã xii-yu:

—Na càni-í ìⁿ cuendú núú-ndó nàcuáa tecú tñüni-ndó nàcuáa cada-xi òré ndíhu ndaha ñaha Yá Ndiöxi xii ñäyiu. ìⁿ téé ní queheⁿ-dé ndíquíⁿ yutnu nàni mostázá te nèhe-dé cuáháⁿ ní sacáⁿ-dé núú ñühú-dé. ³² Te ndíquíⁿ yutnu-áⁿ ïo chàhu, dico òré ná xinu-xi te sähmu-gá-xi dàcúxí nchaa cühú, te cue quití ndàva núú tàchí cädüha-güedi tacá-güedi núú dité-xi —cächí-gá xähaⁿ-gã xii-yu.

Nàcuáa quide levadurá

(Lc. 13:20-21)

³³ Te Jèsús ní xähaⁿ tucu-gá xii ñäyiu:

—Te na cächí tñuhu tucu-í xii-ndo nàcuáa cada-xi òré ndíhu ndaha ñaha Yá Ndiöxi xii ñäyiu. ìⁿ ñadìhí ní chíhi-aⁿ levadurá úní arróbá yuchi triú, te levadurá-áⁿ ní quide-xi ní ndaa ñihí yusaⁿ-áⁿ —cächí-gá xähaⁿ-gã xii-yu.

Mee-ni cuendú ní cani Jèsús núú ñäyiu

(Mr. 4:33-34)

³⁴ Te mee-ni cuendú ní cani Jèsús núú ñäyiu ndí tñähá òré ní dánèhé ñähá-gã xii-yu tñuhu-gá.

³⁵ Te ducaⁿ ní quide-gá chi ní quee ndáá-xi nàcuáa ní chidó tñüni ìⁿ téé ní xóo cäháⁿ tñuhu Yá Ndiöxi ndéé sanaha núú tütú-gá núú cächí-xi:

Mee-ni cuendú cani-í núú ñäyiu òré danèhé-í-yu tñuhu-í cuendá tecú tñüni-yu,

te nchaa tñuhu sã vátá yóo-gá cund-edóho danèhé-í-yu, te nchaa tñuhu-áⁿ ndúú yuhu-xi ndéé cütñähá ní ngáva ñuyú.

Duha ní chidó tñüni téé-áⁿ núú tütú-gá.

Jèsús cäháⁿ-gá nàcuáa quèe-xi cuendá cühú sã ñà túú vaha cäa xití triú

³⁶ Te Jèsús ní dándácá-gã ñäyiu te cuánuhú-gá vehe, te cue téé xica cuu ndíhi-gá ní xähaⁿ-güedé xii-gá:

—Cächí tñuhu xii-ndí nása quèe-xi cuendá cühú sã ñà túú vaha cäa xití triú —cächí-güedé xähaⁿ-güedé xii-gá.

³⁷ Te Jèsús ní xähaⁿ-gã xii-güedé:

—Téé cächí-í ní sacáⁿ triú cävähá-áⁿ cùu yühú Téé cùu ñani tñähá-ndó nchaa-ndo. ³⁸ Te nchaa núú ní sacáⁿ téé-áⁿ triú cùu-xi ñùyú. Te tatá vaha-áⁿ cùu-xi cué ñäyiu yindaha ñaha Yá Ndiöxi. Te nchaa cühú sã ñà túú vaha-áⁿ cùu-xi ñäyiu yindaha ñaha sácülná.

³⁹ Te téé ní dängoyo ndíquíⁿ cühú sã ñà túú vaha núú triú-áⁿ cùu-dé mee sácülná. Te nduu nàtehndé-ná triú-áⁿ cùu-xi nduu ndíhi nihnu-ná nchaa sã ío ñuyú-a. Te nchaa ñäyiu nàquehndé triú-áⁿ cùu-yu mee-ni cué espíritú xínú cuèchi núú Yá Ndiöxi. ⁴⁰ Te dàtná cada cue téé quihíⁿ tñuhu nchaa cühú sã ñà túú vaha-áⁿ dacùtu nuhní-güedé te cahmi-güedé, ducaⁿ sätñähá-xi yáha nchaa ñäyiu cündíhi yucu ñávaha na sãa nduu. ⁴¹ Te yühú Téé cùu ñani tñähá-ndó nchaa-ndo tendaha-í nchaa espíritú xínú cuèchi núú-í quihíⁿ-xi nadatácá-xi

nchaa ñáyiú sànu ichi cue tnaha ñáyiú-xi ichi cuèhé ichi duha, ndihi nchaa dava-gá ñáyiú ñá túú quide váha, te nchaa ñáyiú-áⁿ xĩndecú-yu nchaa núú ndécú cuè ñáyiú yĩndaha-í. ⁴² Te cue espíritú-áⁿ daquihíⁿ-xi cue ñáyiú-áⁿ núú ñùhú núú càyú, te yàcáⁿ ío ndáhyú-yu te dicó rúhñú-ná cuu núhu-yu sá sàtú iní-yu sá ndóhó-yu. ⁴³ Te nchaa ñáyiú quide nchaa nacuáa cuiní Tátá-yu Dútú Ndióxi, ñáyiú-áⁿ ío cunúú-yu cundecú-yu núú ndécú-gá táxi tñuní-gá, chi cuú-yu dàtná nchíanchii dayèhé-yu cundecú-yu núú ndécú-gá. Te nchaa nchòhó ñáyiú ndédóho nchaa tñúhu càháⁿ-í-a, te ío váha chí cuáha cuèndá —càchí-gá xáhaⁿ-gá xii-güedé.

Cuèndá ñⁿ sá ïo ndèyáhu

⁴⁴ Te Jèsús xáhaⁿ tucu-gá xii-güedé:

—Na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñⁿ téé ní naníhí-dè ñⁿ sá ïo ndèyáhu yĩndúxi ñⁿ xichi, te ní nachindúxi tucu-dé diu-ni núú ní naníhí-dè-áⁿ, te ío ní cudíí iní-dé sá dúcáⁿ ñí naníhí-dè xíáⁿ. Te ní xica-dé cuánuhú-dé te ní nadico-dè nchaa sá ndécú ndihí-dé, te ní nacuaaⁿ-dé ñuhu núú dúcáⁿ ñí naníhí-dè xíáⁿ.

Cuèndá ñⁿ sá ïo ndèyáhu nàni pèrlá

⁴⁵ Te na càni tucu-í ingá cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. ñⁿ téé quide ndáhu ndúcú-dè sá nání pèrlá sá ïo ndèyáhu. ⁴⁶ Te ní naníhí-dè ñáyiú ndècu ndihí ñⁿ pèrlá sá ïo-gá ndèyáhu, te ní xica-dé cuánuhú-dé te ní nadico-dè nchaa sá ndécú ndihí-dé, te ní sáháⁿ-dé ní saaⁿ-dé pèrlá sá ïo-gá ndèyáhu-áⁿ.

Cuèndá ñunu tñi-güedé chácá

⁴⁷ Te na càni tucu-í ingá cuèndú núú-ndó nàcuáa tecú tñuní-ndó

nàcuáa cada-xi òré ndíhu ndaha ñàha Yá Ndióxi xii ñáyiú. Cue téé tñi chácá ñí dàquèe-güedé ñunu-güedé xití ndute làmár tñi-güedé chácá, te dácá nuu dácá ñihnu chácá cuànguee-güedi xití ñunu-áⁿ. ⁴⁸ Te òré ní cutnùní iní-güedé sá ñí chítú ñunu-güedé, te ní natava-güedé ní nene yuhu làmár, te ní ngüita-güedé nácáxi-güedé nchaa chácá-áⁿ. Te nchaa chácá váha dàquèe-güedé-di xití tídihi, te nchaa chácá nèhé dāngoyo-güedé-di. ⁴⁹ Te dàtná ní quide cue téé-áⁿ ducaⁿ càda cue espíritú xínú cuèchi núú Yá Ndióxi ná sáa nduu vā cundecu-gá nchaa sá ío ñuyíú-a, chi cue espíritú-áⁿ daquèe diⁿ-xi nchaa ñáyiú ní quide váha tnuu nchaa ñáyiú ñá túú ní quide váha. ⁵⁰ Te nchaa ñáyiú ñá túú ní quide váha-áⁿ daquihíⁿ ñáhá-xí xii-yu núú ñùhú núú càyú, te yàcáⁿ ío ndáhyú-yu, te dicó rúhñú-ná cuu núhu-yu sá sàtú iní-yu cuèndá sá ndóhó-yu —càchí-gá xáhaⁿ-gá xii cue téé xica cuu ndihí-gá.

Cuèndá cue téé ndècu ndihí sá ñí quee túu díhna ndihí sá ñí quee túu saa

⁵¹ Te Jèsús ní xícáⁿ tñuhú-gá núú-güedé, te xáhaⁿ-gá xii-güedé:

—¿Ní tecú tñuní-ndó nàcuáa nduu nchaa tñúhu ní càháⁿ-í-áⁿ? —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Ní tecú tñuní-ndí —càchí-güedé xáhaⁿ-güedé xii-gá.

⁵² Te ní xáhaⁿ tucu Jèsús xii-güedé:

—Te núú ñⁿ téé dàcuaha ñàha xii ñáyiú nchaa tñúhu ní chídó tñuní ndí Moisés ná cutnùní iní-dé nàcuáa quide Yá Ndióxi ndíhu ndaha-gá ñáyiú, te téé-áⁿ cúú-dé dàtná ñⁿ téé cùu xítóhó vehe. Te téé cùu xítóhó vehe-áⁿ ñí queñuhu-dé nchaa sá ñí quee túu díhna ndècu ndihí-dé, ndihí nchaa sá ñí quee túu saa. Te ducaⁿ sàtnahá-xi cùu téé-áⁿ te núu na cutnùní iní-dé nàcuáa quide Yá Ndióxi ndíhu ndaha-gá ñáyiú —càchí-gá xáhaⁿ-gá xii-güedé.

Jèsús ndécú-gǎ ñúú núú nǐ sahanu-gá

(Mr. 6:1-6; Lc. 4:16-30)

⁵³ Te sátá nǐ yáha ducaⁿ nǐ cani Jèsús cuèndú núú-güedě, te ní xica-gá cuánuhú-gá. ⁵⁴ Te ní ndexìo-gá ñúú núú cúú ñùú-gá, te cuánguihu-gá xití veñúhu càa ñúú-án te ní ngüíta-gá dánèhé-gá ñáyiu. Te nchaa ñáyiu ndedóho nchaa tnúhu càháⁿ-gá xǐcuñúhu-yu, te xitnàhá-yu:

—¿Nása ní cuu núú ío váha cùtnuní iní té-a nàcuáa cunduu tnúhu càháⁿ-dé, te quide-dé nchaa sá vǎ yóo tnàhí ndàcu cada-i? ⁵⁵ Te dícó déhe tée cùu carpinterú ndihí tá Màriá cúú-dě, te ñaní-dé cúú tǎ Jàcobó, ndihí té Chèé, ndihí té Xímú, ndihí té Jüdás. ⁵⁶ Te cue cúha-dé ndécú ndihí ñahá-yu xii-o ñúú-a. ¿Te nása ní quide-dé ñúu ndéé dàcáⁿ ío váha cùtnuní iní-dé nàcuáa cunduu tnúhu càháⁿ-dé-i? —càchí-yu xitnàhá-yu.

⁵⁷ Te ñá túú ní cuiní-yu càháⁿ ndihí váha-yu Jèsús, dico mee-gǎ ní xáhaⁿ-gǎ xii-yu:

—Te núu ñⁿ tée càháⁿ tnúhu Yá Ndióxi ná nàsáá-dé ñúú-dě, te nchaa ñáyiu ñúú-dé-án ndihí nchaa ñáyiu cùu ndimee-dé ñá túú nèhé-yu sá yíñúhu núú-dě, dico cue ñáyiu nchaa dava-gá ñúu chi nèhé-yu sá yíñúhu núú-dě —càchí-gá xáhaⁿ-gǎ xii-yu.

⁵⁸ Te ñá túú ní quide Jesús titní núú sǎ vǎ yóo tnàhí ndàcu cada ñúú-án, chi ñá túú ní cuiní-yu quindáá iní ñáhá-yu xii-gá.

14

Nàcuáa ní cuu ní xihí té Juáá tée dàcuandute ñaha xii ñáyiu

(Mr. 6:14-29; Lc. 9:7-9)

¹ Te ñu-ni dàvá-án nǐ níhí tǎ Hèrodés tnúhu nchaa nàcuáa quide Jesús, te té Hèrodés-án cúú-dě tée tàxi tnuñí distrítu Galiléa. ² Te ní xáhaⁿ-dě xii nchaa cue tée ndècu ndihí-dé:

—Tée dii cuèndú-xi ñihí-ó-án cùu-dé té Juáá tée dàcuandute ñaha xii ñáyiu, tée ní xihí ní cùu te ní ndoto-dé ñúu dàcáⁿ ndácú-dě quide-dé nchaa sá vǎ yóo tnàhí ndàcu cada —càchí-dé xáhaⁿ-dě xii-güedě.

³ Te ducaⁿ nǐ càháⁿ té Hèrodés chi mee-dé ní taúchiúⁿ-dě ní tnii ñaha-güedě xii té Juáá, te ní dácútú ñaha-güedě xii-dé, te ní chihi ñaha-güedě vecaá. Te ducaⁿ nǐ quide té Hèrodés-án sǎ cuèndá ñaha nàni Herodiás, ñaha ní càndeca ñaní-dé té Lìpé, te ní naqueheⁿ ñaha-dě xii-aⁿ ndèca ñaha-dé. ⁴ Te té Juáá ní xáhaⁿ-dě xii té Hèrodés:

—Ñá túú ní quide váha-n dùha ní naqueheⁿ-n ñaha ní càndeca ñaní-n —duha ní xáhaⁿ té Juáá xii té Hèrodés.

⁵ Te sá dúcáⁿ nǐ xáhaⁿ tǎ Juáá-án xii té Hèrodés, te ní cuiní té Hèrodés-án cahni-dé té Juáá-án, dico ñá túú ní cùyi-dé chi ní yuhú-dé núú cuè ñáyiu, chi nchaá-yu ní cutnùní iní-yu sá tǎ Juáá cúú-dě ñⁿ tée càháⁿ tnúhu Yá Ndióxi. ⁶ Te ñⁿ nduu ní quide té Hèrodés vico vehe-dé ní quide càhnu-dé nduu nǐ cacu-dé. Te ndècu ñⁿ déhe yoco ñaha nani Herodiás-án, te xíchí-án nǐ quíhu-xi xití vehe núú cúú vico-án nǐ xita saha-xi. Te nùcáo té Hèrodés ndihí cue tée ní càháⁿ-dé ndéhé-güedě, te ío ní cudí iní-dé nàcuáa ní xita xíchí-án. ⁷ Te té Hèrodés-án nǐ cacunehe-dé ndéé Yá Ndióxi nàcuáa cutnùní iní xíchí-án sǎ ndáa cuáñaha-dé ñúu ná cúú sǎ ná càcáⁿ-xi núú-dě. ⁸ Te xíchí-án nǐ dácáhu iní ñáhá nǎná-xi xii-xi ná cúú sǎ càcáⁿ-xi núú tǎ Hèrodés, núu xíáⁿ ní xáhaⁿ-xi xii-dé:

—Cuiní-í quehndé-n ñiquí tǎ Juáá tée dàcuandute ñaha xii ñáyiu te taxi-n, dico na cùhuⁿ ñⁿ xití cóhó taxi-n —càchí-xi xáhaⁿ-xi xii-dé.

⁹ Te sá dúcáⁿ nǐ xáhaⁿ-xi, te ní cundiyí té Hèrodés, dico ñá túú ní níhí-dé nása cada-dé, chi ndedóho ñáyiu òré ní cacunehe-dé Yá Ndióxi sá ndáa cuáñaha-dé

ɨ̃n sá ná càcáⁿ-xi núú-dě. Te ní quide-dé nàcuáa ní xáhaⁿ-xi. ¹⁰ Chi ní táuchíúⁿ-dě ní sáháⁿ cue téé ní xehndé-güedé díquí tē Juáa òré yíhí-dě vecaá. ¹¹ Te ní chihi-güedé díquí-dě ɨ̃n xití cóhó te nèhe-güedé cuánuhú ní sáñaha-güedé xii xíchí-ǎⁿ, te xíchí-ǎⁿ nǐ nacuañaha-xi xii náná-xi.

¹² Te cue téé xica cuu ndihi té Juáa-áⁿ nǐ sáháⁿ-güedé ní naqueheⁿ-güedé yíqui cùñú-dé ní chindúxi-güedé, te dàtnùní ní sáháⁿ-güedé ní xáhaⁿ-güedé xii Jèsús nàcuáa ní cuu.

Jèsús dácàxi-gá úhúⁿ mǐl cue téé te ðìⁿ ñáyíu ðìhí ndihi landú

(Mr. 6:30-44; Lc. 9:10-17; Jn. 6:1-14)

¹³ Te Jèsús ní níhí-gǎ tnúhu nàcuáa ní cuu ní xihí té Juáa. Te sátá xǎⁿ te cuánguee-gá ɨ̃n bàrcú cuáháⁿ-gá ɨ̃n xichi núú ñà túú ñáyíu ndécu, dico nchaa ñáyíu xǐndécu nchaa ñuú cáa yàtni xíaⁿ nǐ níhí-yu tnúhu sá cuáháⁿ-gá, te ní quee-yu ñuú-yu xica sahá-yu cuáháⁿ núú quídě-yu cuendá quexio Jèsús. ¹⁴ Te òré ní quexio Jèsús núú cuáháⁿ-gá, te ní quene-gá bàrcú, te ní xiní-gá cuéhé víhí ñáyíu xǐxúcu-yu xíaⁿ, te ní cundàhú iní ñáhá-gǎ xii-yu, te ní quide tátna-gá nchaa ñáyíu cùhú ndihí-yu. ¹⁵ Te sátá nǐ cuaa te ní sáháⁿ cue téé xica cuu ndihi Jèsús núú-gǎ, te xáhaⁿ-güedé xii-gá:

—Sa ní cuu dandàca-n nchaa ñáyíu-a chi sa ní cuaa, te na quihíⁿ-yu nchaa ñuú cáa yàtni iha cuaáⁿ-yu sá cáxi-yu, chi núú ndécú-ó ìha ñà túú tnàhí ná ió —càchí-güedé xáhaⁿ-güedé xii-gá.

¹⁶ Te Jèsús ní xáhaⁿ-gǎ xii-güedé:

—Ñáhá, vá dandàca-í-yu, váha-gá mee-ndo chí cuañaha sǎ ná càxi-yu —càchí-gá xáhaⁿ-gǎ xii-güedé.

¹⁷ Te ní xáhaⁿ-güedé xii-gá:

—Ñá túú nǎgá ndécú ndihí-ndí, chi úhúⁿ duha-ná pàa ndihi

úú-nǎ chácá ndécú ndihí-ndí —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gǎ xii-güedé:

—Chí cànèhe paá-áⁿ ndihi chácá-áⁿ táquixi iha —cachí-gá xáhaⁿ-gǎ xii-güedé.

¹⁹ Te Jèsús ní xáhaⁿ-gǎ xii nchaa ñáyíu sá ná ngõo-yu nchaa-yu núú ité cuíí cáa xíaⁿ, te ní queheⁿ-gá ndi úhúⁿ pàa-áⁿ ndihi ndi nduú chácá-áⁿ te ní ndacoto-gá andiu, te ní ndacáⁿ táhú-gǎ núú Yǎ Ndiõxí, te dàtnùní ní táhú cuèchi-gá pàa-áⁿ te ní sáñaha-gǎ xii cue téé xica cuu ndihi-gá ní dácãhñu-güedé cue ñáyíu ní xexí-yu. ²⁰ Te nchaa-yu ní xexí-yu ní ndahá xití-yu. Te sátá nǐ túhú cóhõ-yu te ní nadatacá-güedé nchaa sá nǐ quendóo, te ní chítú ùxúú tnàhá tídihi mee-ni sá nǐ quendóo. ²¹ Te nchaa ñáyíu ní xexí-áⁿ nǐ xínu úhúⁿ mǐl mee-ni cuè téé chi mee-ni cuè téé-áⁿ nǐ quíúndehu, te ðìⁿ cue ñáyíu ðìhí ndihi cue landú.

Jèsús xicá-gǎ núú ndute

(Mr. 6:45-52; Jn. 6:16-21)

²² Te òré-ni-áⁿ nǐ xáhaⁿ Jèsús xii cue téé xica cuu ndihi-gá sá quèe-güedé bàrcú téhndé-güedé ndàa ingá xio yuhu làgúná, te mee-gá quendóo-gá cada ndee iní tnàhá-gǎ ndihi cue ñáyíu. ²³ Te sátá nǐ yáha ní quide ndee iní tnàhá-gǎ ndihi cue ñáyíu, te medi-gá ní xica-gá cuása-gá ɨ̃n tǐndúú cáa yàtni xíaⁿ cuendá cáháⁿ ndihí-gá Yǎ Ndiõxí, te diu-ni medi-gá ndécú xíaⁿ nǐ cundiquiⁿ. ²⁴ Te bàrcú sá ñúhú cuè téé xica cuu ndihi-gá-áⁿ sa cuáháⁿ-xi ndéé cuádava xití làgúná-áⁿ, te níhí víhi quene táchí ndàa ichi cuáháⁿ-xi, te dàcandau ndeé-xi ndute nchaa ðìñi-xi. ²⁵ Te tàcuíhndá váhi-gá tá xica Jèsús núú ndute cuáháⁿ tá cùyatni-gá bàrcú-áⁿ. ²⁶ Te cue téé xica cuu ndihi-gá ní xiní ñáhá-güedé xii-gá tá xica-gá núú ndute cuáháⁿ, te ní

yùhú-güedé te níhi ní cáháⁿ-güedé te xítñàha-güedé:

—j^h àlmá! —càchí-güedé xítñàha-güedé.

²⁷ Te Jèsús ní cáháⁿ-gá, te xàhaⁿ-gã xii-güedé:

—Ñíí cunduu-ndo vã yùhú-ndó, chi yùhú cùu-í —càchí-gá xàhaⁿ-gã xii-güedé.

²⁸ Te té Pèlú ní xáhaⁿ-dë xii-gá:

—Mèstrú, te núu diu-n te tauchìuⁿ sá tnàhá-í ná càca-í núú ndute quixi tnahá ñàhá-í xii-n —càchí-dë xàhaⁿ-dë xii-gá.

²⁹ Te Jèsús ní xáhaⁿ-gã xii-dé:

—Taquixi —cachí-gá xàhaⁿ-gã xii-dé.

Te té Pèlú ní nuu-dé núú bàrcú, te ní ngüíta-dé tá xica-dé núú ndute cuáháⁿ cuátnahá ñáhá-dë xii-gá.

³⁰ Te ní cutnùní iní-dé sá ïo níhi xico táchí, te ní ngüíta-dé yùhú-dé. Te òré-ni-áⁿ tá quëe naa-dé xití ndute cuáháⁿ ní cùu, te níhi ní cáháⁿ-dë xàhaⁿ-dë xii Jèsús:

—jMèstrú, vá dáñá-n quëe naa-í xití ndute! —càchí-dé xàhaⁿ-dë xii-gá.

³¹ Te òré-ni-áⁿ ñí tñii Jèsús ndaha-dé, te ní xáhaⁿ-gã xii-dé:

—¿Ná cuendá ñá túú sàndáá ndisa iní ñáhá-n xii-í sàni j^h sàni úú iní-n-í? —càchí-gá xàhaⁿ-gã xii-dé.

³² Te òré cuánguee Jèsús ndihi té Pèlú xití bàrcú, te òré-ni-áⁿ ñí ngüíñí táchí. ³³ Te cue téé ñùhu xití bàrcú-áⁿ ñí ngüíñí xití-güedé núú-gã, te xàhaⁿ-güedé xii-gá:

—Sá ndáá sá cuítí sã díú yòhó cùu-n Dëhe Dútú Ndiöxí —càchí-güedé xàhaⁿ-güedé xii-gá.

Jèsús quidé tãtna-gã ñáiyu cùhú j^h xichi núú nání Gènesarét
(Mr. 6:53-56)

³⁴ Te ní quexio Jèsús ndihi cue téé xica cuu ndihi-gá ndàa ingá xio yuhu làgúná, te núú ñí quexio-gã ndihi-güedé-áⁿ nání-xí Gènesarét.

³⁵ Te nchaa ñáiyu xindecu xíáⁿ ñí cutnùní iní-yu sá díú-gã ní

quexio, te ní dátècú tnùhu-yu nchaa dava-gã ñáiyu xindecu yatni xíáⁿ sã ñí quexio-gá. Te ndecá-yu nchaa ñáiyu cùhú ndécú ndihí-yu cáháⁿ núú ndécú Jèsús. ³⁶ Te nchaa ñáiyu cùhú-áⁿ ñí ngüíta-yu cáháⁿ ndàhú-yu núú Jèsús sá ná dàña-gã tnándeé-yu cuèdicó luha yuhu dõó-gã cuendá ndúha-yu, te cue ñáiyu cùhú, ñáiyu ní tnándeé yuhu dõó-gã ní ndúha-yu.

15

Cuendá nchaa sá quidé-xí ngüindecu cuèchi ñáiyu
(Mr. 7:1-23)

¹ Te sátá dúcáⁿ te j^h úú cue téé cùu fariséu ní quee-güedé ñuu Jerusálén, ndihi cue téé dàcuaha ñaha xii ñáiyu nchaa tnùhu ní chidó tnùní ndíi Moisés ní quexio-güedé núú ndécú Jèsús, te xàhaⁿ-güedé xii-gá:

² —¿Ná cuendá cue téé xica cuu ndihi-n ñá túú nàquete-güedé ndaha-güedé òré caxi-güedé nàcuáa ní cachí cue ñani tnahá-ó ñí xindecu ndéé sanaha-í? —càchí-güedé xàhaⁿ-güedé xii-gá.

³ Te Jèsús ní xáhaⁿ-gã xii-güedé:

—Te nchòhó tucu, ¿ná cuendá ñá túú quide-ndo nacuáa ní cachí Yá Ndiöxí cada-ndo, núu da nàcuáa ta quide cue téé ñuyú-a quide-ndo-í?

⁴ Te Yá Ndiöxí càchí-gá núú tütú-gá: “Canehe-ndo sã yíñùhu núú tãtá-ndó ndihi núú náná-ndó”, càchí-gá. Te càchí tucu-gá ingá xichi núú tütú-gá: “Nchaa ñáiyu na cáháⁿ úhú tãtá-xi ãdi náná-xi te cahni ñaha-güedé xii-yu”, duha càchí-gá núú tütú-gá. ⁵ Dico nchòhó càchí-ndó sã cuè ñáiyu chi cuu cùñahá-yu xii tãtá-yu ãdi náná-yu: “Vá cùú chindee ñaha-ndí xii-n, chi sá táxi-ndí xii-n ñí cùu, xíáⁿ ní nduu cuendá Yá Ndiöxí”, cuu duha cùñaha ñáiyu xii tãtá-yu ãdi náná-yu càchí-ndó. ⁶ Te càchí-ndó sã cuè ñáiyu ducaⁿ na cùñaha xii tãtá-xi ãdi náná-xi te ñá túú-gã tàu-yu

chindèé-yu ni tātā-yu ni nānā-yu. Te ducaⁿ quide-ndo chi ní dáquée tihú-ndó nàcuáa ní cachí Yá Ndiõxí cada-ndo, te mee-ni nàcuáa ta quide cue tée ñuyú-a véxi nchicúⁿ nihnu-ndo quide-ndo. ⁷ Te nchòhó cúú-ndó ñáyu ío dándahú méé-xí, chi càchí-ndó sá quidé ndáá-ndó te ñá ndáá sá quidé ndáá-ndó! Te ní quee ndáá-xí nàcuáa ní chídó tñuní ndí Chàíá tée ní xóo cáhánⁿ tñúhu Yá Ndiõxí ndéé sanaha núú tütú-gá núú cáhán-xi nàcuáa ní cáhán-gá cuendá-ndó, te duha ní cachí-gá:

⁸ Ñáyu-a càchí-yu sá ío càhnu cuu-í dico dicó-ni yuhu cáhánⁿ-yu, chi duuⁿ duuⁿ ñá túú ñúhu iní ñáhā-yu xii-í.

⁹ Te àúⁿ nā cuu chiñuhu ñahá-yu xii-í chi ñá túú vèdana ndèé nándihí-xi,

chi cue ñáyu-a dàcuahá-yu cue tñaha ñáyíú-yu nàcuáa cundecú-yu, dico mee-ni tñúhu sá ní cahu iní cue ñáyíu ñuyú-a cáhánⁿ-yu.

Duha ní chídó tñuní ndí Chàíá núú tütú Yá Ndiõxí nàcuáa ní cáhán-gá cuendá-ndó —càchí-gá xāhāⁿ-gā xii-güedé.

¹⁰ Te ní xāhāⁿ-gā xii cue ñáyu:

—Chí táquixi ndehe iha, te cundedóho váha-ndo tñúhu na cáhán-í, te ío váha cuáha-ndo cuendá. ¹¹ Nchaa sá xéxi-ndó chi ñá túú nā quidé-xí iní-ndó, dico nchaa sá cuèhé sá dúhá sàni iní-ndó cáhán-ndó nchàa xíáⁿ quidé-xí ndècu cuéchi-ndo —càchí-gá xāhāⁿ-gā xii-yu.

¹² Te cue tée xica cuu ndihí-gá ní sáhán-güedé ndéé núú-gā, te xāhāⁿ-güedé xii-gā:

—Véxi-ndí càchí tñúhu-ndí xii-n sá cuè tée cùu farisèú ñá túú cùu váha iní-güedé cuendá tñúhu ní cáhán-n —càchí-güedé xāhāⁿ-güedé xii-gā.

¹³ Te ní xāhāⁿ-gā xii-güedé:

—Nchaa ñáyu ñá túú cùu cuendá Tātā-í Dútú Ndiõxí cuita nihnú-yu, chi ñáyu-ánⁿ cúú-yu dàtná nchaa

cúhú sá ñà túú nándihí te tñúhu ñáyu. ¹⁴ Te vá cáda cuendá-ndó nàcuáa cáhánⁿ cue tée-ánⁿ, chi cùu-güedé dàtná cue ñáyu cuáa sácuíta nehe tñaha. Te nchòhó xini-ndó sá núu ìⁿ ñáyu cuáa ná cuítá nehe tucú-yu ingá ñáyu cuáa, te ndi ndúu-yu quée-yu déhvá —càchí-gá xāhāⁿ-gā xii-güedé.

¹⁵ Te té Pèlú ní xāhāⁿ-dè xii-gā:

—Cachí tñúhu xii-ndí nàcuáa quée-xi tñúhu ní cáhán-n-ánⁿ —càchí-dé xāhāⁿ-dè xii-gā.

¹⁶ Te Jèsús ní xāhāⁿ-gā:

—¿Náa tñaha nchòhó ñá túú ní təcú tñuní-ndó nàcuáa ndùu tñúhu ní cáhán-í núú ñáyu-ánⁿ ñá? ¹⁷ Nchaa sá xéxi-yu cuánguee-xi xití-yu, te dàtnuní náyāha ñaha-xi xii-yu.

¹⁸ Dico nchaa tñúhu cuèhé tñúhu duha cáhánⁿ-yu xíáⁿ véxi quene-xi iní-yu, te diu nchaa xíáⁿ quidé-xí ndècu cuéchi-yu. ¹⁹ Te iní-yu-ánⁿ cácu nihnu nchaa sá cuèhé sá dúhá, chi sàni cuèhé sàni dùha iní-yu, te sàhni-yu tñaha ñáyíú-yu, te cue

tée cáhánⁿ ndihí-güedé ñáyu dñí te ñá díú ñàdihí-güedé cúú-yu. Te diu-ni ducaⁿ quide cue ñáyu dñí cáhánⁿ ndihí-yu cue tée te ñá díú yíⁿ-yu cùu-güedé, te cuèi tée te cuèi ñadihí mee-ni ichi díí iní cúdí iní-yu cundecú-yu, te dùhu ndachiuⁿ tñahá-yu, te dàcuandehndé-yu, te cáhánⁿ cuèhé-yu cuendá tñaha ñáyíú-yu. ²⁰ Te nchaa xíáⁿ quidé-xí

ndècu cuéchi-yu, dico ñá díú sá ñà túú ndahá-yu dàtná ní cachí cue tée ndéé sanaha, chi xíáⁿ ñá túú quide-xi cuendá ngúndecu cuéchi-yu —càchí-gá xāhāⁿ-gā xii-güedé.

—Véxi-ndí càchí tñúhu-ndí xii-n sá cuè tée cùu farisèú ñá túú cùu váha iní-güedé cuendá tñúhu ní cáhán-n —càchí-güedé xāhāⁿ-güedé xii-gā.

¹² Te cue tée xica cuu ndihí-gá ní sáhán-güedé ndéé núú-gā, te xāhāⁿ-güedé xii-gā:

—Véxi-ndí càchí tñúhu-ndí xii-n sá cuè tée cùu farisèú ñá túú cùu váha iní-güedé cuendá tñúhu ní cáhán-n —càchí-güedé xāhāⁿ-güedé xii-gā.

Híⁿ ñadihí ñaha cùu ñani tñahá ñáyu canàneá ní sándáá iní-aⁿ Jèsús

(Mr. 7:24-30)

²¹ Te Jèsús ní xica-gá cuáhán-gá ní sáa-gá yucu cue tée ñuú Tírú, ndihí yucu cue tée ñuú Sídón. ²² Te ìⁿ ñadihí ñaha cùu ñani tñahá ñáyu

canànea ndécú yàtni-aⁿ xíáⁿ, te níhi ta càháⁿ-aⁿ ní quexío núú ndécú Jèsús, te xáhaⁿ-aⁿ xii-gá:

—jMèstrú, ñaní tnáhá ndí Dàvíí, cundàhú iní ñháá xii-í cada tátna-n dèhe yoco-í! Chi yíhi ñaha espíritú cundíhi yucu ñáváha xii-xi te ío dándoho ñaha-xi —cachí-aⁿ xáhaⁿ xii-gá.

23 Dico Jèsús ñá túú tnàhí ní càháⁿ-gá, te cue tée xica cuu ndíhi-gá ní sáháⁿ-güedé núú-gá, te xáhaⁿ-güedé xii-gá:

—Cúñaha xii ñaha-án ná nùhú-aⁿ, chí ío níhi càháⁿ-aⁿ nchícúⁿ ñháá-án xii-o —cachí-güedé xáhaⁿ-güedé xii-gá.

24 Te Jèsús ní xáhaⁿ-gá xii-güedé:

—Yá Ndióxi ní tendaha ñaha-gá xii-í véxi-í mee-ni ñúú núú xindecu cue ñáyíu isràél, chí ñáyíu-án cúú-yu dàtná cue mbéé cue quití ní xíta, chí ta xíta nihnú-yu cuáháⁿ —càchí-gá xáhaⁿ-gá xii-güedé.

25 Te ñadíhi-án ní sáháⁿ-aⁿ ndéé núú Jèsús ní ngúíñí xítí-án, te xáhaⁿ-aⁿ xii-gá:

—jMèstrú, chindee ñaha xii-í! —càchí-aⁿ xáhaⁿ-aⁿ xii-gá.

26 Te Jèsús ní xáhaⁿ-gá xii-aⁿ:

—Vá cúú chindee-í cue ñáyíu ñá túú cùu ñáyíu isràél, chí ñ-ni cùu-xi núu na quèheⁿ-o paá cúú cuèndá cue landú te cuáha-o iná caxi-di —càchí-gá xáhaⁿ-gá xii-aⁿ.

27 Dico ñaha-án ní xáhaⁿ-aⁿ xii-gá:

—Ndáá càháⁿ-n, dico cue iná chí nàdatacá-güedi sá ngóyo yúhu cóhó xitohó-güedi —càchí-aⁿ xáhaⁿ-aⁿ xii-gá.

28 Te Jèsús ní xáhaⁿ-gá xii-aⁿ:

—jYòhó ñaha cùhú dèhe-xi, ío váha sàndáá iní ñháá-n xii-í! Te na càda-í nàcuáa cuíni-n —càchí-gá xáhaⁿ-gá xii-aⁿ.

Te òré-ni-án ní ndúha dèhe-aⁿ.

Jèsús quidé tátna-gá vài ñáyíu cùhú

29 Te sáta dúcáⁿ ní cuu te Jèsús ní xica-gá cuáháⁿ-gá ní yáha-gá yuhu làgúná distritú Galileá, te cuásaá-gá

ñⁿ tindúú te xíáⁿ ní ngóo-gá. 30 Te xíáⁿ núcòo-gá ní quexío cuéhé víhí ñáyíu, te ndecá-yu ñáyíu yacua, ndíhi ñáyíu ní yíchí ñⁿ xio ndaha-xi, ndíhi ñáyíu cuáá, ndíhi ñáyíu ñíhí, te vài dava-gá cue ñáyíu cùhú tnàhá dava-gá núú cuéhé ndecá-yu ní quexío núú ndécú-gá. Te ní taxi ndecu ñháá-yu núú Jèsús te ní quide tátna ñaha-gá xii-yu te ní ndúha-yu. 31 Te nchaa ñáyíu xindecu-án ío ní cuñúhu-yu sá dúcáⁿ ní xini-yu ní cuu ní nacáháⁿ nchaa ñáyíu ñíhí, ndíhi cuèndá sá ní ndúha nchaa cue ñáyíu yacua, ndíhi cuèndá sá ní ndúha cue ñáyíu ní yíchí ñⁿ xio ndaha-xi, ndíhi cuèndá sá ní ndúha núú cuè ñáyíu cuáá. Te nchaa-yu ní cachí-yu sá ío càhnu cuu Yá Ndióxi Yáá cúú Ndióxi cue ñáyíu isràél.

Jèsús dácaxi-gá cúmí mìl cue tée te dñⁿ ñáyíu dñí ndíhi landú
(Mr. 8:1-10)

32 Te Jèsús ní cana-gá cue tée xica cuu ndíhi-gá, te ní xáhaⁿ-gá xii-güedé:

—Yúhú cundàhú iní-í nchaa ñáyíu-a, chí sa ní cuu úní nduu ndècu ndíhi ñháá-yu xii-o ìha, te ñá túú tnàhí-gá sá cáxi-yu, te ñá túú cuíni-í natendaha-í-yu núhú tnámá-yu vehé-yu, chí ná ndéé cuáháⁿ cuneé-yu docó ichi —càchí-gá xáhaⁿ-gá xii-güedé.

33 Te ní xáhaⁿ-güedé xii-gá:

—¿Te ndéé níhí-ó sá cuñaha-o càxi nchaa ñáyíu-a, te ío cuéhé-yu te ñá túú nã ío ìha chí cùu-xi xití yucu-i? —càchí-güedé xáhaⁿ-güedé xii-gá.

34 Te Jèsús ní xícáⁿ tnúhú-gá núú-güedé, te xáhaⁿ-gá:

—¿Ná daha-gá paá ndécú ndíhi-ndo-i? —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Ndècu ndihi-ndí úsá-gá tñàhá pàá ndihi ìⁿ ùú-gá chácá — cächí-güedé xàhaⁿ-güedé xii-gá.

³⁵ Te Jèsús ní xàhaⁿ-gá xii nchaa ñáyiu sá ná ngóo-yu nchaa-yu, te ní ngóo-yu. ³⁶ Te ní queheⁿ-gá ndi ùsá pàá-áⁿ ndi ìⁿ ùú-gá chácá-áⁿ, te ní ndacáⁿ táhú-gá núú Yá Ndiöxí, te dätñuní ní táhú cuèchi-gá pàá-áⁿ ndihi chácá-áⁿ te ní sãñaha-gá xii cue téé xica cuu ndihi-gá ní dácãhñu-güedé nchaa ñáyiu-áⁿ. ³⁷ Te nchaa-yu ní xexí-yu ní ndahá xití-yu. Te sátá ní túhú cóhó-yu te ní nadatácá-güedé nchaa sá ní quendóo, te ní chítú ùsá tñàhá tídihi mee-ni sã ní quendóo-áⁿ. ³⁸ Te núú ncháá ñáyiu ní xexi te ní xínu cúmí mĩ mee-ni cuè téé chi diu-ni cue téé-áⁿ ní quiúndehu, te diⁿ cue ñáyiu dihi ndihi cue landú. ³⁹ Te sátá dúcáⁿ te Jèsús ní dándácá ñàha-gá xii-yu, te cuánguee-gá bàrcú cuáháⁿ-gá yucu cue téé ñuú Màgdalá.

16

Cue téé cùu fariséú ndihi cue téé cùu saducéú xàhaⁿ-güedé xii Jèsús cada-gá ìⁿ sá vã yõo tñàhí ndàcu cada

(Mr. 8:11-13; Lc. 12:54-56)

¹ Te cue téé cùu fariséú ndihi cue téé cùu saducéú ní sáá-güedé núú ndécú Jèsús xító ndèè ñàhá-güedé xii-gá, te xàhaⁿ-güedé sá ná cádá-gá ìⁿ sá vã yõo tñàhí ndàcu cada cundehe-güedé nàcuáa cutnùní iní-güedé núu ndáá sá Yá Ndiöxí ní tendaha ñàha-gá xii-gá véxi-gá ñuyú-a. ² Te Jèsús ní xàhaⁿ-gá xii-güedé:

—Nchòhó chi òré tá cuàa cuáháⁿ te ndàcoto-ndo andiu, te cächí-ndó: “Ío váha cada-xi tneé chi càa vícò tícuèhé andiu”, duha cächí-ndó. ³ Te òré dátneé ndàcòto tucu-ndo andiu, te cächí-ndó: “Vã cádá vãha-xi nduu vitna chi tícuèhé andiu, te càa vícò”, duha cächí-ndó. ¡Dico nchòhó cúú-ndó ñáyiu ío

dàndahú mée-xí sã quidé ndáá te ñá ndáá sã quidé ndáá-ndó! Te cùtnuní iní-ndó nàcuáa quide-xi andiu, dico ñá túú cùtnuní iní-ndó nàcuáa quèe-xi nchaa sá quidé Yá Ndiöxí vitna. ⁴ Dico nchaa nchòhó ñáyiu ndècu ñuyú vitna ío cuihna iní-ndó, te ñá túú cuini-ndó càda ndáá-ndó núú Yá Ndiöxí, te cuini-ndó càda-í ìⁿ sá vã yõo tñàhí ndàcu cada dico ñá túú nãgá cada-í, chi diu-ni nàcuáa ní quide Yá Ndiöxí ndí Jònás diu-ni ducaⁿ càda tucu-gá vitna —cächí-gá xàhaⁿ-gá xii-güedé.

Te ducaⁿ te ní xica-gá cuáháⁿ-gá ndihi cue téé xica cuu ndihi-gá.

Cuèndá cue téé cùu fariséú ndihi cuèndá cue téé cùu saducéú
(Mr. 8:14-21)

⁵ Te òré ní quexìo ndihi ñaha-gá xii-güedé ndáa ingá xio yuhu làgúná, te ní ndacu iní-güedé sá ní cunaa-güedé canehe-güedé pàá quihíⁿ caxi-güedé. ⁶ Te Jèsús ní cáháⁿ-gá dóho-güedé, te xàhaⁿ-gá xii-güedé:

—Na cächí tñuhu-í xii-ndo sã ío quihi iní-ndó cùndecu-ndo, te vã cádá cuèndá tñàhí-ndo lèvadurá cue téé cùu fariséú ndihi cue téé cùu saducéú —cächí-gá xàhaⁿ-gá xii-güedé.

⁷ Te ní ngúita-güedé xitnàha-güedé:

—Cuèndá sá ñá túú ní cànehe-o pàá quixi xiãⁿ duha càháⁿ-gá — cächí-güedé xitnàha-güedé.

⁸ Te Jèsús ní cutnùní iní-gá nàcuáa nduu tñuhu xitnàha-güedé, núu ní xàhaⁿ-gá xii-güedé:

—Nchòhó chi ñá túú sàndáá iní ñàhá vãha-ndo xii-í núu xiãⁿ da sá ñá túú ní cànehe-ndo pàá quixi càháⁿ-ndó. ⁹ ¿Te náa ñá ndácú iní-ndó sã núú ùhúⁿ-ni pàá, te ní taxi-í ní dácãhñu-ndo ní xexi ùhúⁿ mĩ cue téé, chi diu-ni cue téé-áⁿ ní quiúndehu, te sátá ní túhú cóhó-güedé te ní chítú títní tídihi mee-ni sã ní quendóo-áⁿ? Te ñá tècú tñuní-ndó nàcuáa quèe-xi nàcuáa ní quide-í. ¹⁰ ¿Te náa

ñá ndácú tucu iní-ndó sá nũú úsá-ni paa te ní taxi-í ní dácãhũu tucu-ndo nĩ xexi cúmí mĩl cue téé, chi ñu-ni cue téé-á nĩ quíundehu, te sátá nĩ túhú cóhó-güedě te ní nadatácá-ndó nchàa sá nĩ quendóo, te ní chíú tĩtĩ tídihi mee-ni sá nĩ quendóo-á? ¹¹ Dico nchòhó chí ñá túú ní quide cuendá-ndó nàcuáa ndũu tnũhu càháⁿ-í òré ní cachí-í sá vã quéhéⁿ cuendá-ndó lèvadurá cue téé cùu fariséú ndihi cue téé cùu saducéú, chí ñá díú cuendá paa ní càháⁿ-í —càchí-gá xãhaⁿ-gã xii-güedě.

¹² Te sátá dúcáⁿ nĩ xãhaⁿ Jèsús xii cue téé xica cuu ndihi-gá, te ní tecú tnùnĩ-güedě sá xãhaⁿ-gã xii-güedě sá vã tnĩ-güedě tnũhu càháⁿ cue téé cùu fariséú ndihi cue téé cùu saducéú, te ñá díú cuendá levadurá sá quĩhu yuchi cuãha paa ní càháⁿ-gã.

Té Pèlú xãhaⁿ-dě xii Jèsús sá díú-gã cúú-gã Cristú
(Mr. 8:27-30; Lc. 9:18-21)

¹³ Te Jèsús ní quexio-gá yucu cue téé ñuú Cèsareá Filipú, te ní xícáⁿ tnũhú-gã núú cuè téé xica cuu ndihi-gá, te xãhaⁿ-gã xii-güedě:

—¿Yoo cùu yúhú Téé cùu ñaní tnáhá-ndó nchàa-ndo cachí cue ñáyiu-va? —càchí-gá xãhaⁿ-gã xii-güedě.

¹⁴ Te ní xãhaⁿ-güedě xii-gã:

—Davá-yu càchí-yu sá cúú-n ndĩ Juáá téé ní xóo dacuandute ñaha xii ñáyiu, te davá-yu càchí-yu sá cúú-n tẽ Èliás, te davá-yu càchí-yu sá cúú-n ndĩ Jeremiás téé ní xóo càháⁿ tnũhu Yá Ndiõxí ndéé sanaha, àdi cuu-n ingá téé ní xóo càháⁿ tnũhu-gã ndéé sanaha, duha càchí-yu —càchí-güedě xãhaⁿ-güedě xii-gã.

¹⁵ Te Jèsús ní xícáⁿ tnũhú tucu-gã núú-güedě, te xãhaⁿ-gã xii-güedě:

—Te nchòhó, ¿yoo sàni iní-ndó cùu-í-i? —càchí-gá xãhaⁿ-gã xii-güedě.

¹⁶ Te té Ximú, àdi Pelú chí úú ñu-dé, ní xãhaⁿ-dě xii-gã:

—Yòhó cúú-n Cristú Yáá ní tendaha Yá Ndiõxí véxi ñuyíú-a, te ñu Yá Ndiõxí cúú-gã Yáá ndécú nchàa nduu nchaa quíú, te yòhó cúú-n Dèhe-gã —càchí-dé xãhaⁿ-dě xii-gã.

¹⁷ Te Jèsús ní xãhaⁿ-gã xii-dé:

—Yòhó té Ximú déhe té Jónás, ío váha táhú-n chí mee Tãtã-í Dútú Ndiõxí ní dácáhú iní ñáhá-gã xii-n nàcuáa cunduu tnũhu càháⁿ-n, te ñá díú ñĩ ñáyiu ñuyíú-a ducaⁿ ní dácahu iní ñáhã-yu xii-n tnũhu-án.

¹⁸ Te yúhú xãhaⁿ-í Pèlú xii-n, te tnũhu-án quée-xí yúú, chí quèe ndáá-xi nàcuáa nani-n, chí cuu-n ñĩn téé vã cání ñĩn caní úú iní-xi canu ichi-n cuè ñáyiu nàcuáa cundecu ndihi ñáhã-yu xii-í. Te nchaa ñáyiu cùu cuendá-í vã ndácú yucu ñávãha dacuĩta nihnu ñaha-xi xii-yu. ¹⁹ Te yúhú taxi-í tnũhu ndee iní cundecu ndihi-n cuendá cunuu-n nũú cuè ñáyiu yindaha ñaha Yá Ndiõxí, te nchaa sá ná càháⁿ-n sá cúú-xí sá vãha, te ñu-ni ducaⁿ càháⁿ Yá Ndiõxí, te nchaa sá ná càháⁿ-n sá ñá túú cùu-xi sá vãha, te ñu-ni ducaⁿ càháⁿ tucu-gã, chí quide-n nacuáa cuiní-gã —càchí-gá xãhaⁿ-gã xii-dé.

²⁰ Te sátá dúcáⁿ te ní xãhaⁿ Jèsús xii cue téé xica cuu ndihi-gá sá vã yoo cúñaha-güedě sá díú-gã cúú-gã Cristú Yáá ní tendaha Yá Ndiõxí véxi ñuyíú-a.

Jèsús càháⁿ-gã sá cáhni ñaha-güedě xii-gã

(Mr. 8:31-9:1; Lc. 9:22-27)

²¹ Te ndéé davá-áⁿ nĩ ngúĩta Jèsús xãhaⁿ-gã xii cue téé xica cuu ndihi-gã:

—Dacuĩtí sá quihíⁿ-í ñuú Jerusálén, te yácáⁿ cue téé cùu sacuéhé nũú ñáyiu isráél, ndihi cue dútú cùnũu, ndihi cue téé dàcuaha ñaha xii ñáyiu nchaa tnũhu ní chídó tnùnĩ ndĩ Moisés, nchaa cue téé-áⁿ ío dandòho ñaha-güedě xii-í, te cahni ñaha-güedě, dico nduu úní sá

cùu-í te ndoto-í —càchí-gá xáhaⁿ-gã xii-güedé.

²² Te té Pèlú ní cana-dé Jèsús ìⁿ xio, te ní ngüita-dé ténää ñáhá-dě xii-gá, te xáhaⁿ-dě:

—¡Sá vã càchí Ndiöxí sá dúcáⁿ ndòho-n chi ñá túú tàù-n sã dúcáⁿ ndòho-n! —cachí-dé xáhaⁿ-dě xii-gá.

²³ Te ndaa sátá Jèsús nútñí té Pèlú òré ducaⁿ xáhaⁿ-dě xii-gá ñuu ní nchócuñhu-gá, te xáhaⁿ-gã xii-dé:

—¡Xocuiñí yòhò yucu ñãvãha núu-í-a chi dico quidé tñèñu-n! Chi ñá túú sàni iní-ò dàtná sání ìní Yã Ndiöxí chi ìⁿ-ni sàni iní-ò ndihi dava-gá cue ñáyiú ndècu ñuyíú-a —càchí-gá xáhaⁿ-gã xii-dé.

²⁴ Te sátá dúcáⁿ te ní xáhaⁿ-gã xii nchaa cue téé xica cuu ndihi-gá:

—Nchaa ñáyiú cuini chitnahá ñáhá xii-í, te xini ñuhu-xi dañá-yu vá cáda-gá-yu sá sání ìní mée-yu, te ío cada ndee ìní-yu cundecu túha-yu ndohó-yu cuendá-í, te cuèi na ndòhó-yu dàtná ndoho-í.

²⁵ Te nchaa ñáyiú cuini sá ñá túú tñàhí ná yãha cundecu ñuyíú-a cuíta nihnú-yu, dico nchaa ñáyiú ñá túú tñàhí yùhú cuèi nándí sá ná yãha-yu cundecú-yu ñuyíú-a sá cuendá-í, te ñáyiú-áⁿ nanihí tàhú-yu. ²⁶ Te cuèi nchaandi túhú sá ío ñuyíú-a na nihí ñáyiú cundecu ndihi-yu, dico núu diu nchaa xíãⁿ ná càda cuíta nihnú-yu te ñá túú vèdãna nàndíhi-xi sá dúcáⁿ ndècu ndihi-yu nchaa xíãⁿ. Te ni ìⁿ sá ío ñuyíú-a vá chindée ñaha-xi xií-yu cuendá nanihí tàhú-yu. ²⁷ Te ndáá quéé-xí tñuhu càháⁿ-í, chi na quixi tucu yùhú Téé cùu ñani tñáhá-yu nchaa-yu, te dàvá-áⁿ quini-yu sá ío càhnu cuu-í dàtná càhnu cuu Tátà-í Dútú Ndiöxí, te quixi-í ndihi cue espíritú xínú cuèchi núú-gã, te dàvá-áⁿ cuãha-í nchaa ñáyiú sá ndúú tàhú-yu nàcuãa nduu sá ní quidé-yu ìⁿ ìⁿ-yu. ²⁸ Te na càchí tñuhu ndáá-í xii-ndo sã ío dava nchòhó ñáyiú ndècu iha vitna vá

cùu-ni-ndo, chi cundecu-ni-ndo ndéé quini-ndó quixi tucu yùhú Téé cùu ñani tñáhá-ndó nchaa-ndo taxi tñuni-í nchaa ñáyiú —càchí-gá xáhaⁿ-gã xii-güedé.

17

Ní nadáma dóo Jèsús ndihi núú-gã (Mr. 9:2-13; Lc. 9:28-36)

¹ Te núú ìñú nduu sá dúcáⁿ ñí cáháⁿ Jèsús, te ní xica-gá cuásaá-gá ìⁿ yucu dùcúⁿ, te ndèca-gá té Pèlú, ndihi té Jàcobó, ndihi té Juáa ñani té Jàcobó-áⁿ cuásaá. Te úní tñàhí-ni cue téé-áⁿ ndécá-gã cuásaá.

² Te yucu-áⁿ ndécú-gã ní nadáma núú-gã ndihi dóo-gã, te núú-gã súúni dàtásaⁿ-xi dàtná quidé-xí núú nchícanhii, te dóo-gã súúni ñí nduu cuixíⁿ dàtná cáá ñùhú cuixíⁿ. ³ Te òré-ni-áⁿ ñí xini-güedé ndii Moisés ndihi té Èliás nútñí-güedé ndihi-gá ndátnùhu ndihi ñaha-güedé xii-gã. ⁴ Te té Pèlú ní xáhaⁿ-dě xii Jèsús:

—Mèstrú, ¡vãha ní cuu sá ndécú-ó iha vitna! Te núu cuini-n, te na dàcaa-ndí úní tñáhá vehe tñuvixiⁿ, te ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èliás —càchí-dé xáhaⁿ-dě xii-gã.

⁵ Te nini dùcaⁿ caháⁿ té Pèlú ní quexio ìⁿ vícò núú ndécú-güedé ní dádãhu ñaha-xi xii-güedé te súúni chàhnhí. Te xití vícò-ãⁿ ñí tecú ní cáháⁿ Yã Ndiöxí, te xáhaⁿ-gã xii-güedé:

—Téé-a cùu-dé Déhe-í téé ío cùu iní-í, te ío cùdí ìní-í-dé, te cund-edóho-ndo nchaa tñuhu càháⁿ-dé —duha ní xáhaⁿ-gã xii-güedé.

⁶ Te sá dúcáⁿ ñí cáháⁿ Yã Ndiöxí ní tecú dóho cue téé xica cuu ndihi Jesús te ío ní yùhú-güedé, te ní ngüñí xití-güedé te ní nuu núú-güedé ndaa núú ñùhú. ⁷ Te Jèsús cuáháⁿ-gã núú xíndecu cue téé xica cuu ndihi-gã, te ní tendaha ñaha-gã, te xáhaⁿ-gã xii-güedé:

—Chí ndácuñí, vá yùhú-ndó —càchí-gá xáhaⁿ-gã xii-güedé.

⁸ Te òré ní ndanehe núú-güedé, te ñá túú-gá ní xìní-güedé cue téé úú-áⁿ chi mee-nă Jèsús. ⁹ Te òré cuánuu ndíhi ñaha Jèsús xii-güedé tindúú-áⁿ, te ní xáhaⁿ-gă xii-güedé:

—Vá yóo cúñaha-ndo ni ìⁿ sá ní xìní-ndó núú nì sáá-ó-á, te cuu cáháⁿ-ndó dico ndéé ná yáha ndoto yúhú Téé cùu ñaní tnáhá-ndó nchàa-ndo sá cùu-í —càchí-gá xáhaⁿ-gă xii-güedé.

¹⁰ Te cue téé xica cuu ndíhi-gá ní xáhaⁿ-güedé xii-gá:

—Cuíní-ndí cachí tnúhu-n nă cuendá cue téé dàcuaha ñaha xii ñáiyu nchaa tnúhu ní chídó tnúni ndíi Moisés càchí-güedé sá díhna-gá té Èliás quixi, te dàtnúni quixi Yaá tendaha Yă Ndiôxí quixi ñuyúú-a —càchí-güedé xáhaⁿ-güedé xii-gá.

¹¹ Te Jèsús ní xáhaⁿ-gă xii-güedé:

—Ndáá sá códó núu ìⁿ téé quixi-dé te cada-dé dàtná ní quide té Èliás te téé-áⁿ cada ndáá-dé nchaa năcuáa cùu. ¹² Te na càchí tnúhu-í xii-ndo vitna sá sà ní quixi téé ní quide dàtná ní xóo cada té Èliás, te cue ñáiyu ñá túú ní cùtnúni iní-yu sá díú-dě, te ní quide ñahá-yu xii-dé nchaa năcuáa ní quixi iní mée-yu, te ðu-ni ducaⁿ càda ñaha tucú-yu xii yúhú Téé cùu ñaní tnáhá-yu nchaá-yu, chí dandòho ñahá-yu xii-í —càchí-gá xáhaⁿ-gă xii-güedé.

¹³ Te cue téé xica cuu ndíhi-gá ní cutnúni iní-güedé sá cuendá ndíi Juáá téé ní xóo dacuandute ñaha xii ñáiyu ní cáháⁿ-gá.

Jèsús quidé tătna-gá ìⁿ téé cuechi tnáhá cuéhé xiyíhí

(Mr. 9:14-29; Lc. 9:37-43)

¹⁴ Te Jèsús ní nasáá-gá ndíhi cue téé ní sáá ndíhi-gá tindúú-áⁿ núú xĩndecu vai ñáiyu, te ní quexio ìⁿ téé núú-gă ní ngúíñí xítí-dě, te xáhaⁿ-dě xii-gá:

¹⁵ —Mèstrú, cundàhú iní déhe-í chí tnáhá-dé cuéhé xiyíhí, te ío dándoho ñaha-xi xii-dé, te ní cuu

vai xito daquée ñaha-xi núú ñùhú xii-dé, te ní cuu vai tucu xito dangaunihnu ñaha-xi ndute xii-dé. ¹⁶ Te sa ndèca-í-dé ní quixi núú cuè téé xica cuu ndíhi-n dico ñá túú ní ndàcu-güedé cada tătna ñaha-güedé xii-dé —càchí-dé xáhaⁿ-dě xii-gá.

¹⁷ Te Jèsús ní xáhaⁿ-gă xii nchaa ñáiyu xĩndecu-áⁿ:

—Nchaa nchòhó ñáiyu ndècu ñuyúú-a, ío sáá iní-ndó chí ñá túú cuíní-ndó quĩndáá iní-ndó Yă Ndiôxí, te ní cuu vai nduu quide ndee iní-í nchaa sá quidé-ndó. ¿Te ná ndéé ama vá dúcáⁿ-gă cada-ndo-í? Te chí cándèca téé cùhú-áⁿ táquixi iha —cachí-gá xáhaⁿ-gă xii-yu.

¹⁸ Te Jèsús ní tenáá-gá espíritú cùndíhi yucu ñávaha yíhi ñaha xii téé-áⁿ, te ní quee ñaha-xi xii-dé, te òré-ni-áⁿ ní ndúha-dé.

¹⁹ Te sátá dúcáⁿ te òré ndécú mée Jèsús ndíhi cue téé xica cuu ndíhi-gá, te ní xicáⁿ tnúhú-güedé núú-gă, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cùndíhi yucu ñávaha yíhi ñaha xii téé-áⁿ —càchí-güedé xáhaⁿ-güedé xii-gá.

²⁰ Te Jèsús ní xáhaⁿ-gă xii-güedé:

—Te ñá túú ní ndàcu-ndo, chí ñá túú sàndáá ndisa iní-ndó Yă Ndiôxí, Te na càchí tnúhu ndáá-í xii-ndo sá núu nchòhó quĩndáá ndisa iní-ndó Yă Ndiôxí cuèdicó luha líí dàtná líhli ndiquíⁿ yutnu nàni mostázá, te ducaⁿ te cuu cúñaha-ndo xii ìⁿ tindúú xocuiñí-xi núú ndécú-xi te xocuiñí-xi. Te nchaa núú sá vaha ndacu-ndo càda-ndo te núu na quĩndáá iní ndisa-ndo Yă Ndiôxí.

²¹ Te xìní ñuhu-xi sá ío cáháⁿ ndíhi-ndo-gă te ñá túú tnáhí ná caxi-ndo cáháⁿ ndíhi-ndo-gă, te ducaⁿ te ndacu-ndo queñuhu-ndo espíritú cùndíhi yucu ñávaha yíhi ñaha xii ñáiyu, dàtná cúu espíritú sá yíhí ñaha xii téé-áⁿ ní cùu —cachí-gá xáhaⁿ-gă xii-güedé.

Jesús cáháⁿ tucu-gá sá cáhni ñáha-güedé xii-gá

(Mr. 9:30-32; Lc. 9:43-45)

²² Te nini xica cuu Jesús ndihi cue té xica cuu ndihi-gá distritú Galileá, te ní xáhaⁿ-gã xii-güedé:

—Yúhú Tée cùu ñani tnáhá-ndó ncháa-ndo sáá ñⁿ nduu te cuáha cuendá ñáhá-güedé xii-í núu cué té cùu úhú iní ñáhá, ²³ te cahni ñaha-güedé xii-í dico nduu úní sá cùú-í te ndoto-í —càchí-gá xáhaⁿ-gã xii-güedé.

Te sá dúcáⁿ ñí xáhaⁿ-gã xii-güedé, te ío ní ndíhú iní-güedé.

Díhúⁿ cuendá veñúhu

²⁴ Te òré ní quexio Jesús ndihi cue té xica cuu ndihi-gá ñúú Capèrnaúm, te cue té xica quide cobrá díhúⁿ cuendá veñúhu ní sáháⁿ-güedé ní cáháⁿ ndihi-güedé té Pèlú, te xáhaⁿ-güedé:

—¿Cháhu mèstrú-ndó úú díhúⁿ sã nání drácmá cuendá veñúhu ãⁿ ñáhá? —càchí-güedé xáhaⁿ-güedé xii-dé.

²⁵ Te té Pèlú ní xáhaⁿ-dë:

—Cháhu-dé —càchí-dé xáhaⁿ-dë xii-güedé.

Te té Pèlú cuánguihu-dé xití vehe núu ndécú Jesús, te díhna-gá ní cáháⁿ-gá, te xáhaⁿ-gã xii-dé:

—Xímú, ¿nása sáni iní-n, ná cúú ñáyi quide cobrá ñáhá cué té yíndaha ñáyi ndècu ñuyíú-a cuendá nchaa sá ndúú yáhu ñúú-güedé ndihi cuendá nchaa díhúⁿ sã ngáútnàha, cue ñáyi ñúú-güedé ãⁿ cué ñáyi véxi xica quide cobrá-güedé? —càchí-gá xáhaⁿ-gã xii-dé.

²⁶ Te té Pèlú ní xáhaⁿ-dë xii-gá:

—Cue ñáyi véxi xica quide cobrá-güedé —càchí-dé xáhaⁿ-dë xii-gá.

Te Jesús ní xáhaⁿ-gã xii-dé:

—Te núu ducaⁿ te cue ñáyi ñúú-güedé ñá túú ná cháhu-yu te núu ducaⁿ. ²⁷ Dico cuendá sá vã yõ dasátú-ó iní-xi, te cuáháⁿ làgúná te dàquée-n sã tñíⁿ chácá xití ndute,

te chácá díhnanuu na tàva-n te cundehe-n yùhu-dí, chí yíhi ñⁿ díhúⁿ cuixíⁿ. Te díhúⁿ-ãⁿ canehe-n quíhíⁿ cháhu-n cuendá-í ndihi cuendá-n, chí díhúⁿ-ãⁿ sa tnáhá quéyáhu cuendá-ó ndí ndúú-ó —càchí-gá xáhaⁿ-gã xii-dé.

18

Cue té ndücu tnúhu núú Jesús yoo ío-gá cúnüu

(Mr. 9:33-37; Lc. 9:46-48)

¹ Te sáta dúcáⁿ te cue té xica cuu ndihi Jesús ní sáháⁿ-güedé núú-gá, te xáhaⁿ-güedé xii-gá:

—Cachí tnúhu xii-ndí, yoo ío-gá cúnüu núú cué ñáyi yíndaha ñaha Yá Ndiõxí —càchí-güedé xáhaⁿ-güedé xii-gá.

² Te Jesús ní cana-gá ñⁿ té líhli te ní sanutñí ñaha-gã xii-dé cuádava tnuú-güedé. ³ Te xáhaⁿ-gã xii-güedé:

—Na càchí tnúhu ndáá-í xii-ndo sã ñúú vã dáñá-ndó ncháa sá ñá túú váha quide-ndo, te nduu ndáhu iní-ndó dátñá ndáhu iní té líhli-a, te vã ndúú táhú-ndó ndíhu ndaha ñaha Yá Ndiõxí xii-ndo. ⁴ Te ñáyi quide datñá quidé tẽ líhli-a ndáhu iní-yu, te ñá túú quide cahnú-yu mée-yu, ñáyi-áⁿ ío cunúú-yu núú ndécú Yá Ndiõxí táxi tnúú-gá. ⁵ Te nchaa ñáyi na quèheⁿ cuendá ñⁿ landú dátñá té líhli-a cuendá sá cúú iní ñáhá-yu xii-í ñá, te cada iní-yu sá yúhú ní queheⁿ cuendá-yu —càchí-gá xáhaⁿ-gã xii-güedé.

Quihi iní-ó vã cündècu-o ichi cuehé ichi duha

(Mr. 9:42-48; Lc. 17:1-2)

⁶ Te Jesús xáhaⁿ tùcu-gá xii-güedé:

—Te núu ñⁿ té na dàcaháⁿ-dë cue ñáyi sándáá iní ñáhá xii-í cadá-yu nándi sá cuéhé sá dúhá, te váha-gá sá ná dàcutu ndeé-güedé ñⁿ yúú yõdó dücúⁿ-dë, te dàquée ñaha-güedé xii-dé xití ndute làmár, te ñá díú sã cündècu-dé ducaⁿ càda-dé. ⁷ Te ndáhu ní cuu nchaa ñáyi xíndecu ñuyíú-a, chí coo cue

tée dacáháⁿ ñáhá xii-yu cadá-yu nándi sá cuèhé sá dúhá te dacuití sá dúcáⁿ càda-xi! ;Dico ndàhú ní cuu cue tée ducaⁿ na dàcaháⁿ ñáhá xii-yu cadá-yu nándi sá cuèhé sá dúhá!

⁸ Te núu ìⁿ xio ndaha-ndo àdi ìⁿ xio sáhá-ndó quide-xi quide-ndo nándi sá cuèhé sá dúhá, te quehndé-ndó ná cuíta, chi váha-gá sá nánihí tãhú-ndó cuèi na cuíta ìⁿ xio ndaha-ndo àdi ìⁿ xio sáhá-ndó, te ñá díú sã quihíⁿ-ndó ñihí ní ndúú-ndó núú ñùhú núú càyú. ⁹ Te núu ìⁿ xio tinuu-ndo quide-xi quide-ndo nándi sá cuèhé sá dúhá, te tava-ndo na cuíta-xi, chi váha-gá sá nánihí tãhú-ndó cuèi na cuíta ìⁿ xio tinuu-ndo, te ñá díú sã ndì ndúú xio núú-ndó quihíⁿ-ndó núú ñùhú núú càyú.

*Cuèndá ìⁿ mbéé quiti ní xíta
(Lc. 15:3-7)*

¹⁰ Te vá dáquèe tihú-ndó cuè ñáyiu cùu cuendá-í cuèi cùu-yu ñáyiu ío ndàhú iní-xi. Te na càchí tnúhu-í xii-ndo sã cue espíritu xínú cuèchi núú Yã Ndiòxí, cue espíritu néhé cuèndá ñáhá xii-yu ñuyú-a, ncha-a-ni nduu ncha-a-ni òré ndécú-xí núú Tãtà-í Dútú Ndiòxí Yáá ndécú àndiú. ¹¹ Te ducaⁿ chi yúhú Tée cùu ñani tnáhá-ndó nchaa-ndo véxi-í ñuyú-a dàcácu nihnu-í ñáyiu núú ùhú núú ndàhú, ñáyiu ta xíta nihnu cuáháⁿ.

¹² Te nása sàni iní-ndó cuèndá ìⁿ tée ndècu ìⁿ ciendú mbéé-xi?, chi núu na cuíta ìⁿ-di te dándóo-dé cúmídícó sãhúⁿ cúmí-di cundecu-di ìⁿ yucu te quihíⁿ-dé cúnúndúcú-dé quiti ní xíta-áⁿ. ¹³ Te núu na nánihí-dě-di, te nchòhó sa cùtnuní iní-ndó sã ìo-gá cudíí iní-dé cuèndá quiti ní xíta-áⁿ òré naníhí-dě-di dàcúxí cúmídícó sãhúⁿ cúmí quiti ñá túú ní xíta-áⁿ. ¹⁴ Te ducaⁿ sãtnahá-xi quide Tãtà-ó Dútú Ndiòxí Yáá ndécú àndiú, chi cuiní-gá sá vã cuíta ni ìⁿ cue ñáyiu cùu cuendá-gá.

*Cada càhnu iní-ó sã quidé ñàha
tnaha ñáyiu-o
(Lc. 17:3)*

¹⁵ Te núu ìⁿ ñáyiu ndècu ndihí-ndo ní quidé-yu ìⁿ sá ñà túú tàú-yu cadá-yu sá cúú-xí-ndó, te cáháⁿ-ndó dõho-yu núú méé núú ìⁿ-ndó ndihí-yu cuèndá sá ná ndixi cuèchi iní-yu sá ñà túú quide váha-yu. Te núu ní tní-yu tnúhu ní xáhaⁿ-ndo xii-yu, te ní ndacu-ndo ñi nacanu ichi-ndõ-yu.

¹⁶ Te núu ñá túú ní cuiní-yu tní-yu tnúhu xãhaⁿ-ndo xii-yu, te nducu-ndo ìⁿ àdi úú tnàhá cue tée canehe núú-güedé cuèndá cundedõho-güedé nãcuáa nduu tnúhu ndãtnúhu-ndo ndihí-yu. ¹⁷ Te tnàhá cue tée-áⁿ cãháⁿ-güedé dõho-yu, dico núu ni tnúhu cãháⁿ cue tée-áⁿ ñà túú ní cuiní-yu tní-yu, te dàtúu-ndo núú dàva-gá ñáyiu ndècu ndihí-ndo ichi Xítóhó Jesucristú cuèndá cutnùní iní-yu nãcuáa quide ñáyiu-áⁿ. Te núu ñáyiu ndècuéchi-áⁿ ñà túú ní cuiní-yu tní-yu tnúhu sá ñi xáhaⁿ dàva-gá cue ñáyiu ndècu ichi-gá, te cada-ná iní-ndó sã cúú-yu ñáyiu ñá túú ndècu ichi Yã Ndiòxí dàtná cue tée cuihna iní-xi quide cobrá ñáhá xii ñáyiu cuèndá impuèstú.

¹⁸ Te na càchí tnúhu ndáá-í xii-ndo sã núu nchòhó ná càchí-ndó sã ndécú cuèchi ñáyiu, te ñiu-ni ducaⁿ cãháⁿ Yã Ndiòxí, àdi cachí-ndó sã ñà túú cuèchi-yu te ñiu-ni ducaⁿ cãháⁿ tucu-gá, te ducaⁿ chi nchòhó quidé-ndó nãcuáa cãháⁿ-gá.

¹⁹ Te na càchí tnúhu-í xii-ndo sã núu úú tnàhá-ndó cùu ìⁿ nuu-ndo cãháⁿ ndihí-ndo Tãtà-í Dútú Ndiòxí Yáá ndécú àndiú xicáⁿ-ndó núú-gã núu ná cúú sã cuiní-ndó, te taxi-gá núu ná cúú sã xicáⁿ-ndó núú-gã. ²⁰ Te núu úú tnàhá-ndó àdi úní tnàhá-ndó ñi natacá-ndó ìⁿ xichi cuèndá sã ñùhú iní ñáhá-ndó xii-í, te xíáⁿ ndécú ndihí ñàha-í xii-ndo — càchí-gá xãhaⁿ-gã xii-güedé.

21 Te té Pèlù ní sáháⁿ ndehe yatni-dé núú Jèsús, te xáhaⁿ-dè xii-gá:

—Mèstrú, cachí tnúhu xii-í ná daha xito cada càhnu iní-í tñàha ñáyiu-í te núú ìⁿ sá ná cada ñàhá-yu xii-í. ¿Cuèdicò úsá xito-àⁿ? — cächí-dé xáhaⁿ-dè xii-gá.

22 Te Jèsús ní xáhaⁿ-gã xii-dé:

—Yúhú cächí-í sá ñà díú-ní úsá xito cada càhnu iní-n-yu, chí ùnídico úxí xito ndìhi úsá ndìhi úsá xito cada càhnu iní-n-yu —cächí-gá xáhaⁿ-gã xii-dé.

Cuèndá téé ñá túú quide cahnu iní tñàha ñáyiu-xi

23 Te xáhaⁿ tùcu-gá xii-güedé:

—Na càni-í ìⁿ cuèndú núú-ndó nàcuáa tecú tñùni-ndó nàcuáa cada-xi òré ndìhu ndaha ñàha Yá Ndiòxí xii ñáyiu. ìⁿ téé yìndaha ñàha xii ñáyiu ní sani iní-dé sá cada ndáá-dé ndìhi cue téé xìnu cuechi núú-dé cuèndá nchaa sá tàú-güedé núú-dé. 24 Te òré sa ní ngúndecu túha-dé te ní quexìo ìⁿ téé xìnu cuechi núú-dé. Te téé-áⁿ tàú-dé cuèhé víhí díhúⁿ núú-dé, chí tàú-dé úxí mìl díhúⁿ sá nání tàlentú. 25 Te téé xìnu cuechi-áⁿ ñà túú díhúⁿ ndécú ndìhi-dé nacháhu-dé sá tàú-dé núú patróóⁿ-dè-áⁿ, núú xiáⁿ ní táúchíúⁿ tée cùu patróóⁿ-dè-áⁿ dico ñàha-güedé xii-dé ndìhi ñàdìhí-dé ndìhi cue déhe-dé ndìhi nchaa sá ndécú ndìhi-dé cuèndá ncháá-yu cuú-yu ñáyiu ñá túú tñàhí dàñá quee núú chíúⁿ patróóⁿ-xi, te ducaⁿ te ndéyáhu sá tàú-dé núú patróóⁿ-dè. 26 Te téé xìnu cuechi-áⁿ ní ngüíñí xítí-dé núú patróóⁿ-dè, te xáhaⁿ-dè: “Patróóⁿ, càháⁿ ndàhú-í núú-n sá ìo ndee ìo càhnu cada iní-n sá dúhá tàú-í núú-n, te ñà túú ná caní iní-n chí nacháhu-í nchaa sá tàú-í núú-n”, cächí-dé xáhaⁿ-dè xii patróóⁿ-dè. 27 Te téé cùu patróóⁿ-dè-áⁿ ní cundàhú iní ñàhá-dè xii-dé, te ní quide càhnu iní ñàhá-dè, te ní dàñá ñàha-dé cuánuhú-dé. 28 Te téé xìnu cuechi-áⁿ ní naníhí-dè ìⁿ téé xìnu cuechi

ndìhi-dé ichi cuánuhú-dé, te téé ní naníhí-dè-áⁿ tàú-dé sacú-ní díhúⁿ núú-dé chí ìⁿ cièndú-ní díhúⁿ denàriú tàú-dé. Te ní tñi-dé téé tàú núú-dè-áⁿ dácüèhé ñàhá-dè xii-dé, te xáhaⁿ-dè: “Nacháhu sá tàú-n núú-í”, cächí-dé xáhaⁿ-dè.

29 Te téé tàú-áⁿ ní ngüíñí xítí-dé núú tée dii núú-xi tàú-dè-áⁿ, te xáhaⁿ-dè: “Càháⁿ ndàhú-í núú-n sá cada càhnu iní ñàhá-n xii-í sá tàú-í núú-n, te nacháhu cuèé-í nchaa sá tàú-í núú-n”, cächí-dé xáhaⁿ-dè.

30 Dico téé dii núú-xi tàú-dè-áⁿ ñà túú ní cuñí-dé cada ndee iní-dé cundetu-dé nacháhu cuèé téé-áⁿ sá tàú-dé, chí ní chíhi ñàha-dé vecaá cuèndá yàcáⁿ quíhi-dé ndée nacháhu-dé nchaa sá tàú-dé. 31 Te dava-gá cue téé xìnu cuechi ní xini-güedé nàcuáa ní quide téé-áⁿ, te ní cudééⁿ-güedé núú-dé, te ní sáháⁿ-güedé ní xitnùhu-güedé téé cùu patróóⁿ-güedé sá dúcáⁿ ní quide-dé. 32 Te téé cùu patróóⁿ-güedé-áⁿ ní cana-dé téé ducaⁿ ní quide-áⁿ, te ní xáhaⁿ-dè: “Yòhó cúú-n ìⁿ téé ìo cuihna iní-xi xìnu cuechi núú-í, chí yúhú ní quide càhnu iní ñàhá-í xii-n cuèndá nchaa sá tàú-n núú-í òré ní càháⁿ ndàhú-n. 33 Te tñàhá yòhó tàú-n dùcaⁿ cada-n cada cahnu iní-n tée xìnu cuechi ndìhi-n núú-í cuèndá nchaa sá tàú-dé núú-n dàtná ní quide ñàhá-í xii-n ní quide càhnu iní-í cuèndá nchaa sá tàú-n”, cächí téé cùu patróóⁿ-áⁿ xáhaⁿ-dè xii téé ducaⁿ ní quide-áⁿ. 34 Te téé cùu patróóⁿ-áⁿ ní cudééⁿ víhí-dè sá dúcáⁿ ní quide téé-áⁿ, te ní táúchíúⁿ-dè dandòho ñàha-güedé xii-dé ndée nacháhu-dé nchaa sá tàú-dé —duha ní caní Jèsús cuèndú núú-güedé.

35 Te xáhaⁿ tùcu-gá xii-güedé:

—Dàtná ní quide téé cùu patróóⁿ-áⁿ ní dándóhó-dè téé tàú núú-dè-áⁿ ducaⁿ cada ñàha Tàtá-í Dútú Ndiòxí Yaá ndécú àndìu xii-ndo, te núú vá ní yùhu ní iní-ndó cada cahnu iní-ndó sá quidé ñàha tñàha ñáyiu-ndo xii-ndo —cachí-gá xáhaⁿ-gã xii-güedé.

19

*Jèsús càháⁿ-gá cuendá cue ñáyi
dàña tnahá*

(Mr. 10:1-12; Lc. 16:18)

¹ Te sáta ní yáha ducaⁿ ñí cáháⁿ Jèsús, te ní ndee-gá distritú Galileá cuáháⁿ-gá ndàa ingá xio yúte Jòrdán yucu distritú Jùdeá. ² Te ío cuéhé ñáyi nchicúⁿ ñáhá xii-gá cuáháⁿ, te yàcáⁿ ní quide tátna-gá nchaá ñáyi cùhú.

³ Te ní quexio ñí úú cue tée cùu fariséu núú ndécú Jèsús xitó ndéé ñáhá-güedé xii-gá ñúu nása cunduú tñúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tñúhú-ndí núú-n, ¿cuu daña ñí téé ñadihí-dé ñúu ndédani cãa ñí sá ñá túú cundãa-yu-ãⁿ? —cächí-güedé xáhaⁿ-güedé xii-gá.

⁴ Te Jèsús ní xáhaⁿ-gá xii-güedé:

—Te nchòhó, ¿náa ñá túú dàcuaha-ndo núú tütú Yã Ndiòxí, te diu núú tütú-gá cáháⁿ-xi sá cùtnáhá ní cadúha-gá ñáyi, te téé ñadihí ní cadúha-gá-ãⁿ? ⁵ Te ñuha cächí tucu-xi núú tütú Yã Ndiòxí nãcuáa ní cáháⁿ-gá: “Cue téé na ñihí ñadihí-xi te ñí-ná cada-güedé tátá-güedé ndihí nãná-güedé, chi ñadihí-nã-güedé cuu cuu ndihí-güedé, te cada iní-ndó sã ñí-nã yiqui cùnú cuú-yu cundecú-yu”, duha cächí Yã Ndiòxí núú tütú-gá. ⁶ Te xiãⁿ ñúu cada iní-ndó sã cué ñáyi úú-áⁿ ñí-nã yiqui cùnú cúu-yu, te ñá túú-gá ndí ñíⁿ ndí ñíⁿ yiqui cùnú cúu-yu. Núú xiãⁿ ñá túú ndùu váha-xi daña cué téé ñadihí-güedé, chi mee Yã Ndiòxí ní cachí-gá sá cúú úu-yu cundecú-yu —cächí Jèsús xáhaⁿ-gá xii-güedé.

⁷ Te ní xáhaⁿ-güedé xii Jèsús:

—Te núu ducaⁿ, ¿te ná cuendá ndí Moisés ní cachí ndí sá ñúu ñí téé cuini-dé daña-dé ñadihí-dé, te cuu cadúha-dé ñí tütú núú cáháⁿ-xi sá ñí dáñá-dé ñadihí-dé, te ducaⁿ te

cuu daña ñaha-dé ní cachí ndí vãⁿ? —cächí-güedé xáhaⁿ-güedé xii-gá.

⁸ Te Jèsús ní xáhaⁿ-gá xii-güedé:

—Te ducaⁿ ñí cachí ndí Moisés sá cúú dàña-ndo ñadihí-ndó, chi nchòhó ío sãa iní-ndó, dico ndéé díhna chi ní tecú tñúhu nchaá cue téé sá vã dáñá-güedé ñadihí-güedé. ⁹ Dico yúhú cächí tñúhu-í xii-ndo sã ñúu ñí téé na dàña-dé ñadihí-dé te naqueheⁿ-dé ingá ñadihí te ío nèhé quidé-dé, te núu ñá díú cuendá sã cáháⁿ ndihí-aⁿ ingá téé ducaⁿ na dáña ñaha-dé. Te sá dúcáⁿ cuendá-ni na dáña ñí téé ñadihí-dé, te ñí-ni cuéchi cùu-xi ndihí cuéchi quide téé ndéca ñadihí te cáháⁿ ndihí-dé ingá ñadihí —cächí-gá xáhaⁿ-gá xii-güedé.

¹⁰ Te cue téé xica cuu ndihí-gá ní xáhaⁿ-güedé xii-gá:

—Te núu ducaⁿ cùu cuendá cue téé ndihí ñadihí-güedé, te váha-gá sá vã cándeca cue téé ñadihí —cächí-güedé xáhaⁿ-güedé xii-gá.

¹¹ Te Jèsús ní xáhaⁿ-gá xii-güedé:

—Ñá ncháá ñáyi ducaⁿ ndùu táhú-yu cundecú-yu, chi mee-ni ñáyi ní cachí Yã Ndiòxí sá dúcáⁿ tñahí nduu táhú cundecu mee. ¹² Te ío cue téé ducaⁿ tñahí ní nduu táhú-güedé ndéé òré ní cacu-güedé sá vã cándeca-güedé ñadihí. Te ío cue téé ñá ndácú-güedé candeca-güedé ñadihí cuendá sá ñí quide ñaha dáva-gá cue tñaha téé-güedé xii-güedé. Te dava-güedé ñá túú cándeca-güedé ñadihí chi cuini-güedé sá vã dáñá ndéé-güedé cunu cuéchi-güedé núú Yã Ndiòxí. Te nchaá cue téé ducaⁿ ñí nduu táhú ñúu Yã Ndiòxí cundecu mee, te váha-ni te núu na cundecu mee-güedé —cächí-gá xáhaⁿ-gá xii-güedé.

*Jèsús xicáⁿ táhú-gá núú Yã Ndiòxí
cuendá landú*

(Mr. 10:13-16; Lc. 18:15-17)

¹³ Te ñí úú ñáyi ndéca-yu landú líhli cuáháⁿ núú Jèsús, chi cuini-yu sá téndaha ñaha-gá xii-güexi, te

cácáⁿ táhú-gă núú Yă Ndiöxí cuendá-güexi. Te cue tée xica cuu ndihi-gă ní ngüíta-güedé ténáá ñáhá-güedé xii-yu, te xáhaⁿ-güedé sá vâ dúcáⁿ càdá-yu. ¹⁴ Te Jèsús ní xáhaⁿ-gă xii-güedé:

—Chí dáñá ná quèxi nahi cue landú lihli-áⁿ núú-í-a, te vâ càdí-ndó ìchi-güexi, chi dàtná cúú vâha iní cue landú lihli-áⁿ ducaⁿ cùu vâha iní cue ñáyi yindaha ñaha Yă Ndiöxí—càchí-gă xáhaⁿ-gă xii-güedé.

¹⁵ Te ní tendaha ñàha-gă xii-güexi, te ní xicáⁿ táhú-gă núú Yă Ndiöxí cuendá-güexi, te sátá dúcáⁿ nî quide-gă te ní xica-gă cuáháⁿ-gă.

*Hⁿ tée cuica càháⁿ ndihi-dé Jèsús
(Mr. 10:17-31; Lc. 18:18-30)*

¹⁶ Te ìⁿ tée cuechi nî quexìo-dé núú ndécú Jèsús, te xicáⁿ tnúhú-dé núú-gă, te xáhaⁿ-dë xii-gă:

—Yöhó Mèstrú, cùu-n tée ío vâha iní-xi, te cuíní-í núu vâ cündèe iní-n càchí tnúhu-n nâ cúú sâ vâha cada-í cuendá nduu táhú-í cundecu-í ndihi Yă Ndiöxí ní caa nî quíhíⁿ—càchí-dé xáhaⁿ-dë xii-gă.

¹⁷ Te Jèsús ní xáhaⁿ-gă xii-dé:

—¿Te cùtnuní iní-n nàcuáa ndùu tnúhu càháⁿ-n sâ yúhú vâha iní-áⁿ?, chi ìⁿdií díí-ni Yă Ndiöxí ío vâha iní-gă. Te núu cuíní-n naníhí táhú-n te tnî-n nchàa tnúhu càháⁿ Yă Ndiöxí, tnúhu sá sánú ìchi ñaha xii ñáyi nàcuáa cadá-yu cundecú-yu—càchí-gă xáhaⁿ-gă xii-dé.

¹⁸ Te tée cuechi-áⁿ ní xáhaⁿ-dë xii-gă:

—¿Te ndëndida càa tnúhu càháⁿ Yă Ndiöxí cada-í-i? —càchí-dé xáhaⁿ-dë xii-gă.

Te Jèsús ní xáhaⁿ-gă xii-dé:

—Te duha ní cachí Yă Ndiöxí cada ñáyi: “Vâ cáhni-ndó tnàha ñáyi-ndo, vâ càháⁿ ndihi-ndo ñàdihí te núu ñá díú ñàdihí-ndó cúu-yu, te ducaⁿ-nì nchòhò cue ñáyi díhí tucu vâ càháⁿ ndihi-ndo tée te núu ñá díú yì-ndo cuu-güedé, te vâ dúhú-ndó sâ ndécú ndihi tnaha ñáyi-ndo, vâ dácàcu-ndo

cuèchi neñúú sá cúú-xí tnàha ñáyi-ndo. ¹⁹ Te canehe-ndo sâ yíñùhu núú tâtá-ndó ndihi núú náná-ndó, te cundàhú iní-ndó tnàha ñáyi-ndo dàtná cundàhú iní-ndó mèe-ndo”, duha ní cachí Yă Ndiöxí cada ñáyi —càchí-gă xáhaⁿ-gă xii-dé.

²⁰ Te tée cuechi-áⁿ ní xáhaⁿ-dë xii-gă:

—Nchaa xíáⁿ ní ngüíta-í quidè-í ndéé cùtnàhá cúú làndú-í, ¿te vitna nágá cúmání cada-í-i? —càchí-dé xáhaⁿ-dë xii-gă.

²¹ Te Jèsús ní xáhaⁿ-gă xii-dé:

—Te núu cuíní-n cùu-n ìⁿ tée ío vâha cada ndáá, te cuáháⁿ dico-n nchàa sá ndécú ndihi-n, te díhú-n cuáha táhú-n cuè ñáyi ndàhú, te ducaⁿ te nduu táhú-n ngündecu vâha-n núú ndécú Yă Ndiöxí táxí tnúni-gă. Te sátá ná yâha ducaⁿ càda-n te quixi-n chìtnahá ñáhá-n xii-í—càchí-gă xáhaⁿ-gă xii-dé.

²² Te sá dúcáⁿ nî xáhaⁿ Jèsús xii-dé te ío ní cundiyí-dé, chi ío cuica-dé, te ní xica-dé cuáháⁿ-dë.

²³ Te Jèsús ní xáhaⁿ-gă xii cue tée xica cuu ndihi-gă:

—Na càchí tnúhu ndáá-í xii-ndo sâ ío úhú quindáá iní ñaha cuè ñáyi cuica xii Yă Ndiöxí cuendá ndíhu ndaha ñàha-gă xii-yu. ²⁴ Te na càchí tnúhu tucu-í xii-ndo sâ yáchí-gă yâha ìⁿ càméyu yaú ìⁿ yiqui ticú dàcúxí sâ quindáá iní ìⁿ ñáyi cuica Yă Ndiöxí cuendá ndíhu ndaha ñàha-gă xii-yu —càchí-gă xáhaⁿ-gă xii-güedé.

²⁵ Te sá dúcáⁿ nî cáháⁿ Jèsús, xíáⁿ ío ní cuñúhu cue tée xica cuu ndihi-gă, te ní ngüíta-güedé xítnàha-güedé:

—¿Yoo naníhí táhú te núu ducaⁿ vâⁿ? —càchí-güedé xítnàha-güedé.

²⁶ Te Jèsús ní ndacoto-gă núú-güedé, te xáhaⁿ-gă xii-güedé:

—Nchaa ñáyi ñuyú-a chi vâ ndácú-yu ná cadá-yu nàcuáa ndíhu ndaha ñàha Yă Ndiöxí xii-yu, dico mee-gă chi ndacu-gă ndíhu ndaha

ñaha-gá xii-yu chi nchaandi túhú sá vâha ndâcu-gá quidé-gă —câchí-gá xâhaⁿ-gă xii-güedé.

²⁷ Te té Pèlú ní xâhaⁿ-dê xii-gá:

—Nchúhú ní dándõ-ndí nchaa sá ndécú ndihí-ndí, te ní tuha ñaha-ndí xii-n, ¿te ná cúú sâ ñihí-ndí nduu táhú-ndí sá dúcáⁿ ñi quide-ndí-i? —câchí-dé xâhaⁿ-dê xii-gá.

²⁸ Te Jèsús ní xâhaⁿ-gă xii-güedé:

—Na câchí tnúhu ndáá-í xii-ndo sâ ná sâá nduu, ndùu saa nchaa sá ío andiú ndihí ñuyíú-a, te dàvá-áⁿ cunucóo yúhú Tée cùu ñaní tnáhá-ndó nchâa-ndo ñiⁿ núú xilé váha, te nchaa ñáyiu quini-yu sá ío câhnu cuu-í, te nchòhó cue tée ní tuha ñaha xii-í tnáhá-ndó cùnucóo-ndo núú ñiⁿ caa xilé váha ndí úxúú tnáhá-ndó, te xíáⁿ cunucóo-ndo cada ndáá-ndó cuéchi ndí úxúú xichí cue ñáyiu isràél. ²⁹ Te nchaa ñáyiu na dándóo vehe-xi, àdi ñaní-xi, àdi cúha-xi, àdi tátá-xi, àdi náná-xi, àdi ñadihí-xi, àdi déhe-xi, àdi ñuhu-xi, te núu ducaⁿ na cada-yu sá cuëndá-í te ío-gá cuéhé sâ cuñaha Yá Ndiõxí cundecu ndihí-yu, te ñá díú-ní xíáⁿ chi tnáhá nduu táhú-yu cundecú-yu ndihí-gá ñi caa ñi quíhíⁿ. ³⁰ Te dava ñáyiu cùnnu ndecu ichi Yá Ndiõxí vitna, ñáyiu-áⁿ sâá nduu te vá ío-gá cunúú-yu dàtná cùnúú-yu vitna, te dava ñáyiu nchícúⁿ ñá túú cùnnu vitna, ñáyiu-áⁿ sâá nduu te ío cunúú-yu —câchí-gá xâhaⁿ-gă xii-güedé.

20

Cuëndá cue tée quide chiuⁿ

¹ Te xâhaⁿ tucu Jesús xii cue tée xica cuu ndihí-gá:

—Na càni-í ñiⁿ cuëndú núú-ndó cuëndá tecú tnúni-ndó nâcuáa cada-xi òré ndihu ndaha ñaha Yá Ndiõxí xii ñáyiu. ñiⁿ tée ní xitu-dé yoho yâha stilé, te ñiⁿ nduu ní queue-dé nehé-ñi cuándúcú-dé cue tée cada chiuⁿ núú dúcáⁿ ñi xitu-dé

yoho yâha stilé-áⁿ. ² Te òré ní ñihí-dé cue tée cada chiuⁿ-áⁿ, te ní quide ndáá-dé ndihí-güedé sá châhu ñaha-dê xii-güedé ñiⁿ díhúⁿ denariú ñiⁿ nduu. Te sáta dúcáⁿ te ní tendaha ñaha-dé xii-güedé cuáháⁿ-güedé cada chiuⁿ-güedé núú dúcáⁿ ñi xitu-dé yoho yâha stilé-áⁿ. ³ Te dàtnúni ní xica tucu-dé cuáháⁿ-dê dàtná òré caá ñiⁿ dàtnéé cuándúcú-gă-dé cue tée cada chiuⁿ núú ñi xitu-dé yoho yâha stilé-áⁿ, te ní xiní-dé xînutnii ñiⁿ úú cue tée núú yâhu te ñá túú nâ chiuⁿ xiquide-güedé.

⁴ Te ní xâhaⁿ-dê xii-güedé: “Ñá túú cùdana cuyáchí-ndó cada-ndo chiuⁿ-í te châhu ñaha-í xii-ndo nâcuáa tàú-xi cunduu-áⁿ”, câchí-dé xâhaⁿ-dê xii-güedé. Te cue tée-áⁿ ñi sâha-güedé tnúhu cada chiuⁿ-güedé te ní xica-güedé cuáháⁿ-güedé. ⁵ Te tée ní xitu yoho yâha stilé-áⁿ ñi xica tucu-dé dàtná òré caúxúú nduu cuándúcú-gă-dé cue tée cada chiuⁿ-dê, te ní ñihí tucu-dé cue tée cada chiuⁿ. Te ní queue tucu-dé dàtná òré caá úní sacuaa, te díu-ñi ducaⁿ ñi quide tucu-dé. ⁶ Te ní queue tucu-dé dàtná òré caá úhúⁿ sacuaa cuándúcú-gă-dé cue tée cada chiuⁿ-dê, te ní xiní-dé xînutnii ñiⁿ úú cue tée díu-ñi núú yâhu-áⁿ te ñá túú nâ chiuⁿ quide-güedé, te ní xâhaⁿ-dê xii-güedé: “Sânuu sá nchòhó ní cuu nchâca vitna ñá túú ñihí-ndó chiuⁿ cada-ndo”, câchí-dé xâhaⁿ-dê xii-güedé. ⁷ Te cue tée-áⁿ ñi xâhaⁿ-güedé xii-dé: “Ñá túú ñihí-ndí chiuⁿ cada-ndí chi vá yòo ndúcu ñaha xii-ndí”, câchí-güedé xâhaⁿ-güedé xii-dé. Te ní xâhaⁿ-dê xii-güedé: “Yúhú taxi-í chiuⁿ cada-ndo, te quíhíⁿ-ndó núú ñi xitu-í yoho yâha stilé yacáⁿ cada chiuⁿ-ndo, te châhu ñaha-í xii-ndo nâcuáa tàú-xi cunduu”, câchí-dé xâhaⁿ-dê xii-güedé. ⁸ Te sáta ñi dáhu nchíanchii, te tée díi chiuⁿ-xi-áⁿ ñi xâhaⁿ-dê xii tée tàxi tnuní ñáhá xii cue tée quide chiuⁿ-áⁿ: “Cúñaha xii nchaa cue

tée quide chiuⁿ-áⁿ ná quíxí-güedé te cháhu-n-güedé, te díhna-gá cue tée nchicúⁿ cuií-ná cuánguihu núú chíúⁿ ngüita-n cháhu-n, te ndéé núú ní ndihi-ná cháhu-n cuè tée cuánguihu díhna nuu-gă núú chíúⁿ”, cächí-dé xăhaⁿ-dê xii tée tàxi tnuní ñáhá xii cue tée quide chiuⁿ-áⁿ. ⁹ Te díhna-gá cue tée cuánguihu caá úhúⁿ sacuaa ní quexio-güedé cuendá cháhu ñaha-dê, te ní cháhu ñaha-dê ìⁿ caa díhúⁿ denàriú xii ìⁿ ìⁿ-güedé. ¹⁰ Te sáta ní cháhu-dé dava-gá cue tée ní quide chiuⁿ. Te ndéé núú ní ndihi-ná ní cháhu-dé cue tée cuánguihu díhna nuu-gă núú chíúⁿ. Te cue tée-áⁿ ní sani iní-güedé sá vái-gă cháhu ñaha-dê xii-güedé, dico ñáhá chi ìⁿ caa-ni díhúⁿ denàriú ní cháhu ñaha-dê xii ìⁿ ìⁿ-güedé. ¹¹ Te cue tée-áⁿ ní queheⁿ cuendá-güedé díhúⁿ-güedé dico ñá túú ní quide váha-xi iní-güedé. ¹² Te ní xăhaⁿ-güedé xii tée dii chiuⁿ-xi ní quide-güedé: “¿Ná cuendá cue tée nchicúⁿ cuií-ná cuánguihu núú chíúⁿ ìⁿ-ni ní cháhu ñaha-n xii-ndí ndihi-güedé, te ìⁿ-ni oré duha ní quide chiuⁿ-güedé? Te nchúhú nchàca ncha ní sahani iní-ndí ní quide chiuⁿ-ndí, te ní ndoho-ndí cahni, te ìⁿ-ni ní cháhu ñaha-n xii-ndí ndihi-güedé”, cächí-güedé xăhaⁿ-güedé xii tée dii chiuⁿ-xi ní quide-güedé. ¹³ Te tée dii chiuⁿ-xi ní quide-güedé-áⁿ ní xăhaⁿ-dê xii ìⁿ tée-áⁿ: “Yòhó, ñá túú quide-í ìⁿ sá ñá túú tàú-í cada-í sá cúú-xí-n, chi ní quide ndáá-ó sá díú-ni ìⁿ díhúⁿ denàriú cháhu ñaha-í xii-n ìⁿ nduu. ¹⁴ Te vitna queheⁿ díhúⁿ cuendá nduu-n te núhú-n, chi yúhú cuiñí-í sá ìⁿ-ni cháhu ñaha-í xii-n ndihi cue tée nchicúⁿ cuií-ná cuánguihu núú chíúⁿ. ¹⁵ Chi yúhú cuu-ni cada-í náni cuiñí-í ndihi díhúⁿ-í, ¿adi dico ñá túú quide váha-xi iní-n sá dúhá cundahú iní-í cue tée-áⁿ ducaⁿ cháhu-í-güedé?”, cächí tée cùu patróón-áⁿ xăhaⁿ-dê

xii tée-áⁿ. Duha ndùu cuendú cáni-í núú-ndó. ¹⁶ Te duha càháⁿ-í chi dava ñáyi cùnuu ndecu ichi Yá Ndióxi vitna sáá nduu te vá cùnuu vihi-gá-yu dátá cùnuú-yu vitna, te dava ñáyi ñá túú cùnuu vitna sáá nduu ìo cunúú-yu. Te ìo cuéhé ñáyi càháⁿ ñáhá Yá Ndióxi xii-yu dico sacú-ni-yu nduu táhú-yu cundecú-yu ndihi-gá —cächí-gá xăhaⁿ-gă xii-güedé.

Jèsús càháⁿ tucu-gá sá cáhni ñaha-güedé xii-gá

(Mr. 10:32-34; Lc. 18:31-34)

¹⁷ Te ñuhu Jesús ichi cuásaá-gá ñuu Jerusálén ndihi cue tée xica cuu ndihi-gá, te ní cana ñaha-gă xii-güedé ní naníhí tnáhá-güedé ndihi-gá, te ta ndàtnúhu ndihi ñaha-gă xii-güedé cuáháⁿ, te xăhaⁿ-gă xii-güedé:

¹⁸ —Vitna ñuhu-o ichi cuásaá-ó ñuu Jerusálén, te yacáⁿ cuáha cuendá ñáhá-güedé xii yúhú Tée cùu ñani tnáhá-ndó nchàa-ndo núú cuè tée cùu dútú cùnuu, ndihi núú cuè tée dàcuaha ñaha xii ñáyi nchaa tnúhu ní chídó tnuní ndíi Moisés. Te diu cue tée-áⁿ cùñaha-güedé xii dava-gá cue tée sá cáhni ñaha-güedé xii-í. ¹⁹ Te cuáha cuendá ñáhá-güedé xii-í núú cuè tée ñá túú cùu cue tée israhél, te cue tée-áⁿ cudíquí ndéé ñáhá-güedé xii-í, te caniha-güedé ndihi ñi, te dátñuní cata caa ñaha-güedé xii-í núú cùrúxí te núú cùrúxí-áⁿ cuú-í, dico nduu úni sá cùú-í te ndoto-í —cächí-gá xăhaⁿ-gă xii-güedé.

Nána tē Jácobó ndihi té Juáa cuiñí-aⁿ sá cùnuu-güedé ndihi Jèsús

(Mr. 10:35-45)

²⁰ Te cue déhe té Zebèdeú té Jácobó ndihi té Juáa ndéca ñaha náná-güedé xii-güedé cuáháⁿ núú ndécú Jèsús, te òré ní quexio-aⁿ ndihi-güedé núú ndécú-gă te ní ngüñí xítí-áⁿ núú-gă cuendá cuiñí-aⁿ ndàtnúhu ndihi ñaha-aⁿ xii-gá cuendá sá cúú-xí cuè déhe-aⁿ.

21 Te cùmání-gă cáháⁿ-aⁿ te ní xícáⁿ tnúhú Jèsús núú-aⁿ, te xáhaⁿ-gă:

—¿Ná cuíní-n? —cächí-gă xáhaⁿ-gă xii-aⁿ.

Te ní xáhaⁿ-aⁿ xii-gă:

—Véxi-í cáháⁿ ndáhú-í núú-n núu vá cundee iní-n cùnucóo ìⁿ déhe-í-a xio cuha-n, te ingá-dé cùnucóo-dé xio dàtni-n na saá nduu cùnucóo-n núú táxi tnùnì-n —cächí-áⁿ xáhaⁿ-aⁿ xii-gă.

22 Te Jèsús ní xáhaⁿ-gă xii úú cue tée-áⁿ:

—Nchòhó, ñá túú cùtnuní váha iní-ndó nàcuáa ndùu sá xícáⁿ-ndó núú-í. ¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tùcu iní-ndó càhni ñahá-yu xii-ndo dàtná cahni ñahá-yu xii-í-áⁿ? —cächí-gă xáhaⁿ-gă xii-güedé.

Te ní xáhaⁿ-güedé xii-gă:

—Cundee iní-ndí yáha-ndí nchaa nàcuáa cáháⁿ-n-áⁿ —cächí-güedé xáhaⁿ-güedé xii-gă.

23 Te Jèsús ní xáhaⁿ-gă xii-güedé:

—Ndáá sá cundee iní-ndó ndòho-ndo nchaa nàcuáa ndòho-í, dïcò sá dúcáⁿ cuíní-ndó sá ìⁿ-ndó cùnucóo-ndo xio cuha-í, te ìⁿ-ndo cùnucóo-ndo xio datni-í, te xíáⁿ chi ñá díú yúhú tàù-í cachí-í núu sá cúú cùnucóo-ndo àdì sá vǎ cúú cùnucóo-ndo, chi mee Tàtá-í Dútú Ndiòxí cachí-gă te núu ná cúú ñáyiú nduu tǎhú cùnucóo dǎñi-í dàvǎ-áⁿ —cächí-gă xáhaⁿ-gă xii-güedé.

24 Te òré ní níhí ùxi-gă cue tée xica cuu ndihi-gă tnúhu nàcuáa ndùu sá cuíní cue tée úú-áⁿ, te ní cudééⁿ-güedé núú cuè tée úú-áⁿ.

25 Te Jèsús ní cana-gă nchaa cue tée xica cuu ndihi-gă, te ní xáhaⁿ-gă xii-güedé:

—Nchòhó xìnì-ndó sǎ cuè tée yindaha nacióⁿ quidé-güedé sá ìo cùnucóo-güedé, te nchaa dava-gă cue tée cùnucóo ndihi-güedé quidé-güedé tnáhá-güedé sá ìo cùnucóo-güedé. 26 Dico nchòhó chi vá dúcáⁿ càda-ndo, chi núu dava-ndo cuínì-ndó cùnucóo-ndo,

te xìnì ñuhu-xi cuu cuechi núú tnáhá-ndó te vá cáda-ndó sǎ cùnucóo-ndo. 27 Te núu dava-ndo cuínì-ndó quène cáva-ndo, te cuu-ndo dàtná cue ñáyiú ñá túú tnáhí dàñá quee núú chíúⁿ patróoⁿ-xi cuu cuechi núú

tnáhá-ndó. 28 Te cada-ndo dàtná quidé yúhú Tée cuu ñani tnáhá-ndó nchaa-ndo, chi yúhú véxi-í ñuyúú-a dico ñá díú sǎ cùnucóo cuèchi ñáyiú núú-í chi véxi-í sǎ cùnucóo cuèchi-í núú-yu. Te cuú-í ñuyúú-a cuendá vai-yu cácu nihnú-yu núú ùhú núú ndáhú —cächí-gă xáhaⁿ-gă xii-güedé.

Jèsús quidé tǎtna-gă núú úú tnáhá cue tée cuáá

(Mr. 10:46-52; Lc. 18:35-43)

29 Te òré ní quee Jèsús ñuú Jericó ndihi cue tée xica cuu ndihi-gă, te cuéhé víhí ñáyiú nchicóⁿ ñahá xii-gă cuáháⁿ. 30 Te yuhu ìchi cuáháⁿ-gă xìnucóo úú tnáhá cue tée cuáá, te cue tée-áⁿ ñi cutnùnì iní-güedé sǎ Jèsús ñuhú-gă ichi-áⁿ te ní ngúíta-güedé níhi cáháⁿ-güedé, te xáhaⁿ-güedé xii-gă:

—¿Yòhó Mèstrú, ñani tnáhá ndíi Dáví, cundáhú iní ñahá xii-ndí! —cächí-güedé xáhaⁿ-güedé xii-gă.

31 Te cue ñáyiú tènaá ñahá-yu xii-güedé, te xáháⁿ-yu sá ná càdì-güedé yuhu-güedé, dico uuⁿ-gă níhi ní cáháⁿ-güedé, te xáhaⁿ-güedé xii-gă:

—¿Yòhó Mèstrú, ñani tnáhá ndíi Dáví, cundáhú iní ñahá xii-ndí! —cächí-güedé xáhaⁿ-güedé xii-gă.

32 Te ní ngúíñi Jèsús te ní cana ñaha-gă xii-güedé, te ní xícáⁿ tnúhú-gă núú-güedé, te xáhaⁿ-gă:

—¿Ná cuínì-ndó càda ñaha-í xii-ndo-í? —cächí-gă xáhaⁿ-gă xii-güedé.

33 Te ní xáhaⁿ-güedé xii-gă:

—Mèstrú, cuínì-ndí sǎ cáda tǎtna-n núú-ndí cuendá cundehe-ndí —cächí-güedé xáhaⁿ-güedé xii-gă.

³⁴ Te Jèsús ní cundàhú iní ñàhá-gǎ xii-güedé, te ní tendaha-gǎ núú-güedé. Te òré-ni ní ndúha núú-güedé, te nchicúⁿ ñàhá-güedé xii-gǎ cuáháⁿ.

21

Jèsús cuánguihu-gǎ ñúú Jerusalén
(Mr. 11:1-11; Lc. 19:28-40; Jn. 12:12-19)

¹ Te òré sa ta cùyatni Jèsús ndihí cue téé xica cuu ndihí-gǎ ñúú Jerusalén, te ní quexio-gǎ ndihí-güedé yatni vií-nǎ ñúú Bèttagé, te xíáⁿ cáá yùcu nani Olivú. Te ní ndatnúhu-gǎ ndihí úú cue téé xica cuu ndihí-gǎ, ² te ní xáhaⁿ-gǎ xii-güedé:

—Chí cuáháⁿ ñúú cáá yàtni yacáⁿ, te òré quexio-ndo yacáⁿ te nanihí-ndó ìⁿ búrru ðihí ndètníi-di ndihí déhe-di, te nandaxi-ndo-güèdi te candeca-ndo-güèdi quixi. ³ Te núú ió ñáyiu dàdahaⁿ ñaha xii-güedi, te cúñaha-ndo xii-yu sá yǎhú Yaá xicá cùu ndihí-ndo xini ñuhu-í-güedi, te ndihí-ni natendaha-í-güedi núhú-güedi cúñaha-ndo —càchí-gǎ xáhaⁿ-gǎ xii-güedé.

⁴ Te ducaⁿ ní cuu chi ní quee ndáá-xi nàcuáa ní chídó tnùní ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gǎ núú càchí-xi:

⁵ Chí cǔñaha cuè ñáyiu ñúú Siòn ná cáá cuèndá-yu, chi véxi téé yindaha ñaha xii-yu yòdo-dé ìⁿ búrru lìhli déhe ìⁿ búrru quiti sa xido,

te cùu-dé ìⁿ téé ió ndàhú iní-xi. Duha ní chídó tnùní ìⁿ téé ní xóo cáháⁿ tnúhu Yá Ndiòxí ndéé sanaha núú tütú-gǎ.

⁶ Te cue téé xica cuu ndihí-gǎ ní xica-güedé cuáháⁿ-güedé, te ní quide-güedé nàcuáa ní xáhaⁿ-gǎ xii-güedé cada-güedé. ⁷ Te ní ndexio-güedé ndécá-güedé ìⁿ búrru ðihí ndihí déhe-di, te ní sacáⁿ ndodo-güedé dóo-güedé sátá-güedi, te dàtnúní cuásáá Jèsús sátá ìⁿ-di

ní ngódó ñàha-gǎ xii-di. ⁸ Te ió cuéhé ñáyiu ta sàcáⁿ-yu dóo-yu ichi cuáháⁿ-gǎ cuèndá núú dóo-yu-áⁿ yáha-gǎ ndihí quiti yòdo-gǎ. Te davá-yu xèhndé-yu ndaha yùtnu ñúú tá sàcáⁿ-yu cuáháⁿ. ⁹ Te nchaa ñáyiu yòdonuu núú-gǎ ndihí nchaa ñáyiu nchicúⁿ ndàa sátá-gǎ ní ngüíta-yu níhi càháⁿ-yu, te càchí-yu:

—Ío càhnu cuu Yaá cúú ñàní tnáhá ndíi Dàvií! ¡Te Yá Ndiòxí ió na chindee ñaha-gǎ chi cùu-gǎ Yaá ní tendaha Yá Ndiòxí véxi quide núú-gǎ! ¡Te ndéé nchaa sá ió andíu na càchí-xi sá ìo càhnu cuu-gǎ! —duha càchí-yu.

¹⁰ Te òré cuánguihu Jèsús ñúú Jerusalén, te nchaa ñáyiu ñúú-áⁿ ní ngüíta-yu xicuáá-yu, te davá-yu ní ngüíta-yu xitnàhá-yu:

—¿Yoo cùu téé-ǎⁿ? —càchí-yu xitnàhá-yu.

¹¹ Te davá-yu xitnàhá-yu:

—Téé-ǎⁿ cúú-dé Jèsús téé càháⁿ tnúhu Yá Ndiòxí, te cùu-dé téé ñúú Nazàrét ñúú yindèhu distritú Galileá —càchí-yu xitnàhá-yu.

Jèsús ñá túú tnàhá iní-gǎ nàcuáa xǐquide ñáyiu xití veñúhu

(Mr. 11:15-19; Lc. 19:45-48; Jn. 2:13-22)

¹² Te Jèsús cuánguihu-gǎ xití veñúhu càhnu sá ìo cùnuu, te xití veñúhu-áⁿ xindecu ñáyiu quide ndáhú nádicó-yu, ndihí ñáyiu xisaaⁿ, te ncháa-yu ní queñuhu ñaha Jèsús xii-yu quehé, te ní dándüá-gǎ mèsá nchaa ñáyiu dàma dihún, ndihí nchaa xilé sácóo nchihí ñáyiu dico lómá xindecu xití veñúhu-áⁿ. ¹³ Te ní xáhaⁿ-gǎ xii-yu:

—Núú tütú Yá Ndiòxí càháⁿ-xi nàcuáa ní càháⁿ-gǎ, te ní cachí-gǎ: “Vehe-í cúú-xí núú càháⁿ ndihí ñaha ñáyiu xii-í”, duha ní càháⁿ-gǎ càchí-xi núú tütú-gǎ. Dico nchòhó quidé-ndó vehe-gǎ vehe ñadúhú —càchí-gǎ xáhaⁿ-gǎ xii-yu.

¹⁴ Te xíáⁿ ndécú Jèsús ní quexio cue téé cuáá ndihí cue téé yacua,

te ní quide tátna ñaha-gã xii-güedé te ní ndúha-güedé. ¹⁵ Te cue dútú cúnúu ndihi cue tée dàcuaha ñaha xii ñáyiú nchaa tnúhu ní chidó tnúni ndíi Moisés ní xiní-güedé ní quide Jèsús sá vã yõ tnàhí ndàcu cada, te ndèdóho tucu-güedé níhi xicáháⁿ cue landú xití veñúhu càhnu sá ïo cúnúu-áⁿ, te cächí-güexi: “Ïo càhnu cuu Yaá cúú ñàní tnáhá ndíi Dàvíí”, cächí-güexi. Te ní cudééⁿ-güedé, ¹⁶ te ní xáhaⁿ-güedé xii Jèsús:

—¿Ndèdóho-n nàcuáa càhán cue landú-án ñã? —cächí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Ndèdóho-í, te nchòhó náa ñã túú dàcuaha-ndo núú tütú Yã Ndiõxí núú càháⁿ-xi cuendá cue landú-án, te duha cächí-xi:

Yòhó ní quide-n sã cuè landú vitna sàdi, ndihi cue dava-gá landú,

chiñuhu ñaha-güexi xii-n nàcuáa tàú-xi cunduu.

Duha cächí-xi núú tütú-gá — cächí-gá xáhaⁿ-gã xii-güedé.

¹⁷ Te xíaⁿ ní dándóo ñaha Jèsús xii-güedé, te ní xica-gá cuáháⁿ-gã ñuú Bètaniá, yacáⁿ ní xíndecu-gá niú-án.

Jèsús xáhaⁿ-gã xii yutnu ngüxí sá vã cúúⁿ-gã sávidí-xi

(Mr. 11:12-14, 20-26)

¹⁸ Te nduu tnéé-án nehé-ni cuáháⁿ tucu Jèsús ñuú Jerusalén, te ichi ñuhu-gá ní xihí-gá docó. ¹⁹ Te ní xiní-gá ñⁿ yutnu ngüxí núnñi ñⁿ xio yuhu ichi, te ní xica-gá cuáháⁿ ndéhé-gã núu ndèè sávidí-xi, dico ñã túú ñã ndèè chi mee-ni ndàha-xi ndéé. Te ní xáhaⁿ-gã xii yutnu ngüxí-án:

—¡Vitna te vã ñⁿ ndúu-gá cuuⁿ sávidí-n! —cächí-gá xáhaⁿ-gã xii-xi.

Te òré-ni-án ní yíchí yutnu ngüxí-án. ²⁰ Te sá dúcáⁿ ní cuu ní xiní cue téé xica cuu ndihi Jèsús, te ïo ní cuñúhu-güedé, te ní xicáⁿ tnúhu-güedé núú-gã, te xáhaⁿ-güedé:

—¿Ná cuendá ndéé dàcáⁿ ïo ndíhi ní yíchí yutnu ngüxí-án-i? — cächí-güedé xáhaⁿ-güedé xii-gá.

²¹ Te Jèsús ní xáhaⁿ-gã xii-güedé:

—Na cächí tnúhu ndáá-í xii-ndo sã núu nchòhó quindáá ndisa iní-ndó Yã Ndiõxí, te vã caní ñⁿ caní úú iní-ndó, te ñã díú-ní sã ní quide-í-a ní xiní-ndó ndàcu-ndo cada-ndo, chi ndéé tündúú-a xocuñí-xi núú ndécú-xí te núú cūñaha-ndo sã xocuñí-xi te quihíⁿ-xi quée-xi xití lámár. Te díu ducaⁿ càda-xi te núu na quindáá iní-ndó. ²² Te nchaa sá ná cacáⁿ-ndó núú Yã Ndiõxí òré càháⁿ ndihi-ndo-gã te taxi-gá te núu sàndáá ndisa iní-ndó sã táxi-gã sá xicáⁿ-ndó núú-gã —cächí-gá xáhaⁿ-gã xii-güedé.

Jèsús ndécú ndíhi-gá tnúhu ndee ñí

(Mr. 11:27-33; Lc. 20:1-8)

²³ Te Jèsús cuánguihu-gá xití veñúhu càhnu sá ïo cúnúu danehé-gã ñáyiú, te xíaⁿ ndécú-gã ní quexio cue dútú cúnúu ndihi cue téé cùu sacuéhé núú ñáyiú isràél, te xáhaⁿ-güedé xii-gá:

—Cuñí-ndí cachí tnúhu-n xì-ndí nása ndúu tnúhu ndee ñí ndécú ndíhi-n núu quide-n nándi sá quidé-n, ¿te yoo ducaⁿ ní taxi tnúhu ndee ñí-án xii-n-i? —cächí-güedé xáhaⁿ-güedé xii-gá.

²⁴ Te Jèsús ní xáhaⁿ-gã xii-güedé:

—Yúhu tnàhá-í cuñí-í cacáⁿ tnúhu-í ñⁿ sã cacáⁿ tnúhu-í núú-ndó, te núu na cächí tnúhu-ndo te cachí tnúhu-í xii-ndo yòo ní taxi tnúhu ndee ñí duha quide-í. ²⁵ Te chí cächí tnúhu xii-í yoo ní táuchíúⁿ ní dácúándüte ndíi Juáá ñáyiú, ¿Yã Ndiõxí ñã cuè téé ñuyúú-a ní táuchíúⁿ dùcaⁿ ní quide ndíi?, te chí cächí tnúhu —cächí-gá xáhaⁿ-gã xii-güedé.

Te ní ngúita-güedé xitnàha-güedé:

—¿Nása cúñaha-o? Chi núu na cūñaha-o sã Yã Ndiõxí ní táuchíúⁿ

dùcaⁿ ní quide ndí Juàá ñá, te que-saha-dé: “¿Ná cuèdá ñá túú ní sàndáá iní-ndó tnúhu ní cáháⁿ ndíí vaiⁿ?”, quesaha-dé. ²⁶ Te núu na cūñaha-o sá cuè ñáyiú ñuyíú-a ní táúchíúⁿ dùcaⁿ ní quide ndíí ñá, te cudééⁿ ñáyiú núú-ó, chi nchaá-yu càchí-yu sá Yá Ndióxi ní xáhaⁿ-gã xii ndíí sá càháⁿ ndíí tnúhu-gá núú ñáyiú —càchí-güedé xitnàha-güedé.

²⁷ Te ní xáhaⁿ-güedé xii Jèsús:

—Ñá túú xini-ndí yoo ní táúchíúⁿ dùcaⁿ ní dácüándute ndíí Juàá ñáyiú —càchí-güedé xáhaⁿ-güedé xii-gá.

Te ní xáhaⁿ-gã xii-güedé:

—Te núu ducaⁿ te ni yúhú vá càchí tnúhu-í xii-ndo yòo ní taxi tnúhu ndee iní duha quide-í —càchí-gã xáhaⁿ-gã xii-güedé.

Cuèdá ñá tée ndíhi úú déhe-dé

²⁸ Te Jèsús ní xáhaⁿ tucu-gá xii-güedé:

—Na càni-í ñá cuèndú núú-ndó nácüáa tecú tnúni-ndó tnúhu càháⁿ-í. ñá tée ndècu úú déhe-dé, te ní xáhaⁿ-dè xii déhe-dé tée sacuéhé-gã: “Yòhó déhe-í, véxi-í càháⁿ ndàhú-í núú-n núu vá cündèe iní-n cuànundaha ñaha-n xii-í cada chiuⁿ-o núú ní xitu-í yoho yàha stilé”, càchí-dé xáhaⁿ-dè. ²⁹ Te ní xáhaⁿ déhe-dé xii-dé: “Vá quíhíⁿ-í cada chiuⁿ-í núú chíúⁿ-n”, càchí-dé xáhaⁿ-dè xii tátá-dé. Dico cuèé ní nacani iní-dé te ní sáháⁿ-dé ní quide chiuⁿ-dé núú chíúⁿ tátá-dé.

³⁰ Te tée-án ñá sáháⁿ tucu-dé ní xáhaⁿ-dè xii déhe-dé té líhli-gá núu vá cündèe iní-dé cuànundaha ñaha-dé, te ní xáhaⁿ déhe-dé-án xii-dé: “Cuu cuànundaha ñaha-í xii-n”, càchí-dé xáhaⁿ-dè. Dico ñá túú ní sáháⁿ-dé cada chiuⁿ-dé. ³¹ Te vitna chí càháⁿ núu ndédacáa cue tée úú-án ní quide-güedé sá cuini tátá-güedé —càchí-gã xáhaⁿ-gã xii-güedé.

Te ní xáhaⁿ-güedé xii-gá:

—Tée cùu sacuéhé-gã, tée ní cáháⁿ ndíhi-dé díhna —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Na càchí tnúhu ndáá-í xii-ndo sá ncháá cuè tée cuihna iní-xi quide cobrá ñáhá xii ñáyiú cuèdá impuèstú, ndíhi cue ñáyiú díhí xíndecu ichi díí iní yáchí-gá ndíhu ndaha ñáha Yá Ndióxi xii cue tée-án ndíhi cue ñáyiú díhí-án dácüúxí nchòhó. ³² Chi ndíí Juàá tée ní xóo dácüándute ñaha xii ñáyiú ní cáháⁿ ndíí nácüáa cadá-yu cundecú-yu, dico nchòhó chi ñá túú cuini-ndó quíndáá iní-ndó nácüáa ní cáháⁿ ndíí, dico cue tée cuihna iní-xi quide cobrá ñáhá xii ñáyiú cuèdá impuèstú, ndíhi cue ñáyiú díhí xíndecu ichi díí iní, chi sàndáá iní-güedé ndíhi-yu tnúhu ní cáháⁿ ndíí. Te nchòhó cuèi ndèhe-ndo sá sàndáá iní cue ñáyiú-án nchaa tnúhu ní cáháⁿ ndíí, dico ñá túú cuini-ndó ndíxi cuèchi iní-ndó cuèdá nchaa sá cuèhé sá dúhá quide-ndo cuèdá tñi-ndo tnúhu ní cáháⁿ ndíí —càchí-gã xáhaⁿ-gã xii-güedé.

Cuèdá cue tée cuihna iní-xi
(Mr. 12:1-12; Lc. 20:9-19)

³³ Te xáhaⁿ tucu Jèsús xii-güedé:

—Cundedóho-ndo na càni tucu-í ingá cuèndú núú-ndó cuèdá tecú tnúni-ndó tnúhu càháⁿ-í. ñá tée ní nacúxi-dé mee-ni yoho yàha stilé núú ñúhú-dé, te ní chidoco-dé cuèdá sá vá cùú dàñú, te ní cadúha-dé núú quíhí-dé ndéhé yoho yàha stilé-án òré ná cùu, te ní cadúha-dé ñá xító dùcúⁿ núú cáúndódo cue tée coto nchaa yoho yàha stilé-án.

Te ní sáá ñá nduu quèe-dé quíngaca cuu xica-dé te ní dándóo ndaha-dé sá ñá xitu-dé-án xii ñá úú cue tée xini tnáhá ndíhi-dé cuèdá cada chiuⁿ-güedé, te ní ndatnúhu-güedé sá òré ná cùú te cuu cuèdá dava-güedé, te ducaⁿ te ní quee-dé cuáháⁿ-dé. ³⁴ Te sáta ñá sáá nduu ñá cuu ndéhé nchaa yoho yàha stilé sá ñá xitu-dé-án, te ní xáhaⁿ-dè xii ñá úú cue tée xinu cuechi núú-dé: “Chí cuáháⁿ cácaⁿ-ndó sá cùú cuèdá-í núú cuè

tée ní dándõ ndaha-í nchaa yoho yàha stilé sá nǐ xitu-í”, càchí-dé xàhaⁿ-dè xii-güedé. ³⁵ Te cue tée ní dándõ ndaha-dè nchaa yoho yàha stilé sá nǐ xitu-dé-áⁿ nǐ tñi-güedé cue tée xinu cuechi núú-dé-áⁿ, te ñⁿ-dé ní cani-güedé, te ñⁿ-dé ní sahní ñaha-güedé, te ingá-dé ní sáñaha-güedé yúú. ³⁶ Te tée ní xitu yoho yàha stilé-áⁿ nǐ tendaha-dè titní-gá tucu cue tée xinu cuechi núú-dè cuáháⁿ-güedé cuángacáⁿ-güedé sá cúú cuendá-dé núú cue tée ní dándõ ndaha-dè sá nǐ xitu-dé-áⁿ, dico ñi-ni ducaⁿ nǐ quide ñaha cue tée-áⁿ xii cue tée xinu cuechi núú-dé-áⁿ.

³⁷ Te tée cùu xitohó nchaa yoho yàha stilé-áⁿ nǐ sani iní-dé: “Váha-gá nǔu tendaha-í déhe-í-a núhú-dé, chi òré quini ñáhá-güedé xii-dé te canehe-güedé sá yíñuhu núú-dé”, duha ní sani iní-dé. Te ní tendaha-dè déhe-dé cuánuhú-dé. ³⁸ Dico òré ní xiní cue tée quide chiúⁿ-áⁿ déhe tée cùu xitohó nchaa yoho yàha stilé-áⁿ, te ní xitnáha-güedé: “Tée-áⁿ tée véxi nduu táhú ñuhu-a ndíhi nchaa sá cáá núú-xi, dico cahni-o-dé te mee-o nduu táhú-ó sá ndúú táhú-dé”, càchí-güedé xitnáha-güedé. ³⁹ Te ní tñi-güedé tée-áⁿ te ndéca ñaha-güedé cuáháⁿ ñⁿ xio yuhu ñuhu-áⁿ, te ní sahní ñaha-güedé xii-dé —duha cuáháⁿ cuendú ní cani Jèsús núú-güedé.

⁴⁰ Te ní xáhaⁿ tucu Jèsús xii-güedé:

—¿Te nchòhó sa cutnuni iní-ndó nǎsa cada ñaha xitohó ñuhu-áⁿ xii cue tée-áⁿ ñá? —càchí-gá xáhaⁿ-gá xii-güedé.

⁴¹ Te cue tée-áⁿ nǐ xáhaⁿ-güedé xii-gá:

—Tée cùu xitohó ñuhu-áⁿ núhú-dé, te vá cundáhú iní-dé cue tée cuihna iní-xi-áⁿ chi cahni ñaha-dé xii-güedé, te dándõ ndaha-dé ñuhu-dé xii cue tée cutnuni iní-dé cada ndáá cuendá ndí tnahá cúúⁿ ndéhé nchaa yoho yàha stilé sá nǐ xitu-dé-áⁿ te cuáñaha-güedé xii-dé

sá cúú cuendá-dé —càchí-güedé xáhaⁿ-güedé xii-gá.

⁴² Te Jèsús ní xáhaⁿ-gá xii-güedé:

—Te nchòhó, náa ñá túú dàcuaha-ndo núú tütú Yá Ndióxi núú càchí-xi:

Yúú sá nǐ dáquéé tihú cue tée dàcaa vehe, ní cuu-xi yúú cúnúu vitna.

Chi mee Dütú Ndióxi ducaⁿ nǐ cachi-gá cunduu, te cùu-xi ñⁿ sá lo cùnñuhu-o vitna.

Duha càchí-xi núú tütú-gá. ⁴³ Te duha càháⁿ-í chi Yá Ndióxi cada-gá te vá ñihí-ndó tñuhu ndee iní cundecu ndíhi-ndo cuendá ndíhu ndaha ñaha-gá xii-ndo, chi tñuhu ndee iní-áⁿ cundecu ndíhi cue ñáyiú cada ndáá cuendá ndíhu ndaha ñaha Yá Ndióxi xii-yu. ⁴⁴ Te yúú sá cúnúu-áⁿ cúú-xi yñhú, te nchaa ñáyiú ñá túú tñi tñuhu-í cùu-yu dàtná ñⁿ ñáyiú ndúá núú yúú-áⁿ te tñahnú duúⁿ-yu, àdi núu na tàú ñáhá-xi xii-yu, te dacàchi duuⁿ ñaha-xi —càchí-gá xáhaⁿ-gá xii-güedé.

⁴⁵ Te sá dúcáⁿ ndúu cuendú ní cani Jèsús te cue tée cùu dütú cúnúu-áⁿ, ndíhi cue tée cùu fariséú ní cutnuni iní-güedé sá cuendá-güedé ní cáháⁿ-gá. ⁴⁶ Te ní cuini-güedé tñi ñaha-güedé xii-gá òré-áⁿ dico ñá túú ní cùyi-güedé, chi ní yùhú-güedé cue ñáyiú, chi ní cutnuni iní-yu sá cúú-gá ñⁿ tée cáháⁿ tñuhu Yá Ndióxi.

22

Cuendá ñⁿ vico tñándaha

¹ Te Jèsús ní ngüita tucu-gá caní-gá ingá cuendú núú-güedé, te xáhaⁿ-gá:

² —Na caní tucu-í ingá cuendú núú-ndó cuendá tecu tñuni-ndó nàcuáa cada-xi òré ndíhu ndaha ñaha Yá Ndióxi xii ñáyiú. ñⁿ tée yíndaha ñaha xii ñáyiú ní quide-dé ñⁿ vico ní dàtñándaha-dé déhe ducuⁿ-dé. ³ Te ní tendaha-dé cue tée xinu cuechi núú-dé cuáháⁿ-güedé cuángana-güedé cue

ñáyiú sa ní cáháⁿ-dé cuhuⁿ vico, dico ñáyiú-án ñà túú ní cuíní-yu quíhíⁿ-yu. ⁴ Te ní xáhaⁿ tùcu-dé xii dava-gá cue téé xínu cuechi núú-dé: “Quíhíⁿ-ndó cũñaha-ndo xii cue ñáyiú sa ní cáháⁿ-í cuhuⁿ vico sá sà ní quide túha-í sá cáxi-yu, te sa ní sahni-í ndicutu ndíhi nchaa dava-gá quití ní dánucũhnu-í, te nchaa sa ní quide túha-í, te na quixí-yu cuhúⁿ-yu vico cächí-í cũñaha-ndo”, cächí-dé xáhaⁿ-dë xii cue téé xínu cuechi núú-dë-án. ⁵ Dico ní ìⁿ ñáyiú ní cáháⁿ-dë-án ñà túú ní cuíní-yu quíhíⁿ-yu cuhúⁿ-yu vico. Chi ìⁿ-yu ní sáháⁿ-yu ní quide chiúⁿ-yu núú ñühü-yu, te ingá-yu ní sáháⁿ-yu ní nadicó-yu núú nándi cùu ndáhú quidë-yu. ⁶ Te dava-gá-yu ní tñíⁿ-yu dava cue téé xínu cuechi núú tée quide vico-án, te ní canihá-yu ndéé ní sahni ñàhá-yu xii-güedé. ⁷ Te téé yindaha ñaha xii ñáyiú quide vico-án ñi cudééⁿ víhí-dë sá dúcáⁿ ñi quidë-yu, te ní tendaha-dë cue sandadú-dé ní sáháⁿ-güedé ní sahni-güedé cue ñáyiú ducaⁿ ñi quide-án, te ní sahmi-güedé nchaa vehe càa ñuú-yu. ⁸ Te sátá dúcáⁿ te ní xáhaⁿ-dë xii dava-gá cue téé xínu cuechi núú-dë: “Nchaa sa ndëcu túha, te cue ñáyiú ní cáháⁿ-í cuhuⁿ vico-a ni cùu ñà túú-gã táu-yu sá cùhüⁿ-yu. ⁹ Te chí cuáháⁿ ndëni ní cuu te cáháⁿ-ndó nchaa ñáyiú na naníhí-ndó ichi na quixí-yu cuhúⁿ-yu vico-a”, cächí-dé xáhaⁿ-dë xii-güedé. ¹⁰ Te cue téé xínu cuechi-án ñi quee-güedé cuáháⁿ-güedé, te ní cáháⁿ-güedé nchaa ñáyiú ní naníhí-güedé ichi, te cuëi ñáyiú váha iní-xi, te cuëi ñáyiú cuihna iní-xi, te ní chítü-yu núú cúú vico-án.

¹¹ Te sátá dúcáⁿ te téé yindaha ñáyiú quide vico-án ñi quíhu-dé xití vehe ní xindéhé-dë cue ñáyiú ñuhu vico-án, te ní xini-dé ìⁿ tée ñùtnahá tnuú-yu te ñà túú càa dóó-dë dàtná

cáa dóó níhnú cuè ñáyiú ñuhu vico-án. ¹² Te ní xáhaⁿ-dë xii tée-án: “¿Táta, nása ní cuu cuángũhu-ó iha, te ñà túú càa dóó-n dàtná cáa dóó níhnú cuè ñáyiú ñuhu vico tnándaha-i?”, cächí-dé xáhaⁿ-dë xii tée-án. Dico tée-án ñà túú ní níhí-dë tñuhu cáháⁿ-dë. ¹³ Te téé yindaha ñáyiú quide vico-án ñi xáhaⁿ-dë xii cue ñáyiú xínu cuechi núú mësá: “Chí tñíⁿ tée-án te dacutu-ndo-dé, te queñuhu-ndo-dë ná quíhíⁿ-dë cundecu-dé ìⁿ xichi núú néé núú ïo ndoho-dé, te yacáⁿ ïo ndáhyú-dé te dicó rúhñú-nã cuu núhu-dé sá sätú iní-dé sá ndóhó-dë”, cächí-dé xáhaⁿ-dë xii cue ñáyiú xínu cuechi núú mësá-án. ¹⁴ Te duha ndüu cuendú cáháⁿ-í chí ïo cuéhé ñáyiú cáháⁿ ñháⁿ Yã Ndiöxí xii-yu, dico sacú-ni-yu nduu táhü-yu cundecú-yu ndíhi-gá — cächí-gá xáhaⁿ-gã xii-güedé.

Cuendá impuèstú

(Mr. 12:13-17; Lc. 20:20-26)

¹⁵ Te cue téé cùu fariséú ní sáháⁿ-güedé ìⁿ xichi ní ndatnúhu-güedé nàcuáa cada-güedé daticánuu-güedé Jësús núú tñuhu cáháⁿ-gá cuendá ducaⁿ ñíhí-güedé nàcuáa cada-güedé cacáⁿ cuéchi-güedé cuendá-gã. ¹⁶ Te ní tendaha-güedé ìⁿ üú cue téé cündíhi-güedé, ndíhi cue téé cündíhi té Hèrodés cuáháⁿ-güedé núú ndécú Jësús. Te òré ní quexlo-güedé núú ndécú-gã, te ní xáhaⁿ-güedé xii-gá:

—Mèstrú, níhí-ndí tñuhu sá ïo ndáá cáháⁿ-n, te cáháⁿ ndáá-n nàcuáa cáháⁿ Yã Ndiöxí cundecu-o ñüyú-a, te cuëi ndéda-ni càa ñáyiú ìⁿ-ni cáháⁿ-n ndíhi-yu chí ñà túú quide cuendá-n cuëi ná ñáyiú cùú-yu. ¹⁷ Te cachí tñuhu xii-ndí, núú váha-ni quide-ndí sá cháhu-ndí té Cèsár téé ïo cùnuu cuendá impuèstú án ñháⁿ —cächí-güedé xáhaⁿ-güedé xii-gá.

¹⁸ Dico Jësús ní cutnùni iní-gá sá xító ndéé ñáhá-güedé xii-gá, núú ní xáhaⁿ-gã xii-güedé:

—Nchòhó cue tée dándahú mée-xí sá quidé ndáá te ñá ndáá sá quidé ndáá-ndó, ¿ná cuendá xító ndèè ñáhá-ndó xii-í? ¹⁹ Chí dánèhé ñáhá xii-í ìⁿ díhúⁿ sá chāhu-ndo cuendá impuèstú núu nása cāa — cachí-gá xāhaⁿ-gā xii-güedé.

Te ní dánèhé ñáhá-güedé xii-gá ìⁿ díhúⁿ sá nání dènaríú. ²⁰ Te òré ní xini-gá díhúⁿ-áⁿ te ní xicáⁿ tnúhú-gá núu-güedé, te xāhaⁿ-gā:

—Chí cāchí tnúhu yoo núu-xi ndèè ndihí yoo diu-xi ndeé — cāchí-gá xāhaⁿ-gā xii-güedé.

²¹ Te ní xāhaⁿ-güedé xii-gā:

—Núú tē Cēsár ndèè ndihí diu-dé — cāchí-güedé xāhaⁿ-güedé xii-gā.

Te Jèsús ní xāhaⁿ-gā xii-güedé:

—Te núu ducaⁿ te chí nācuāha té Cēsár sá cúu cuendá-dé, te sá cúu cuendá mée Yá Ndiòxí te xíáⁿ nācuāha-ndo-gā — cāchí-gá xāhaⁿ-gā xii-güedé.

²² Te cue tée-áⁿ ío ní cuñúhu-güedé sá dúcáⁿ ní cāháⁿ-gā, te ní natni-güedé ichi cuánuhú-güedé.

Cuendá cue ñáyiu ndoto

(Mr. 12:18-27; Lc. 20:27-40)

²³ Te diu-ni nduu-áⁿ ní quexio ìⁿ úú cue tée cūu saducéú núu ndécú Jèsús. Te cue tée-áⁿ ñá túú sándáá iní-güedé sá ndótó cue ñáyiu ní xihí, te ní xāhaⁿ-güedé xii-gā:

²⁴ —Mèstrú, ndí Moisés ní cachí ndíi sá núu ìⁿ tée ndècu ñadihí-xi cuú-dé te quendóo ñadihí-dé, te núu ñá túú dēhe-dé ní xōo ndihí-aⁿ te tée cūu ñaní-dé naqueheⁿ-dé ñaha ní quendóo quèé-áⁿ cuendá coo déhe-dé ndihí-aⁿ cuendá ñaní-dé tée ní xihí-áⁿ. ²⁵ Te ñuú-ndí-a ní xīndecu úsá tnàhá cue tée mee-ni ndí ñaní-güedé. Te tée díhna ní níhí ñadihí-dé te ñá túú ní cùdí-dé cundecu-dé chí ní xihí-dé, te ní ìⁿ déhe-dé ñá túú ní xōo ndihí ñadihí-dé-áⁿ. Te tée cūu uú ní nāqueheⁿ-dé ñaha ní quendóo quèé-áⁿ. ²⁶ Dico ní xihí tucu-dé, te ní ìⁿ tucu déhe-dé ñá túú ní xōo ndihí ñaha-áⁿ, te diu-ni ducaⁿ ní yāha tée cūu uní, te ní xīnu ndi

úsá-güedé ní cāndeca ñaha-güedé xii ñaha-áⁿ dico diu-ni ducaⁿ ní xihí-güedé. ²⁷ Te ndeé núu ní

ndihí-ná te ní xihí tnàhá ñadihí-áⁿ. ²⁸ Te na sáá nduu ndòto-güedé ndihí ñaha-áⁿ, ¿te ndèdacāa-güedé ñadihí-güedé cuu-aⁿ-í? Chí ndi úsá-güedé ní cāndeca ñaha-güedé xii-aⁿ — cāchí-güedé xāhaⁿ-güedé xii-gā.

²⁹ Te Jèsús ní xāhaⁿ-gā xii-güedé:

—Ní xíta nchòhó tnúhu cāháⁿ-ndó, chí ñá túú xini-ndó nācuāa cāháⁿ Yá Ndiòxí núu tütú-gā, te ní ñá túú cùtnuní iní-ndó sá díú-gā ndácú-gā quidé-gā nchaandi tūhú sá vāha. ³⁰ Te na cāchí tnúhu-í xii-ndo sá òré ná sáá nduu ndòto nchaa ñáyiu ní xihí, te dàvá-áⁿ vā yōo-gā dasaⁿ dēhe yoco-xi chí vā yōo-gā candeca tnàha, chí cuu-ná-yu dàtná cue espíritú xínú cuèchi núu Yá Ndiòxí.

³¹ ¿Te náa ñá túú quide cuendá-ndó nācuāa cāháⁿ Yá Ndiòxí núu tütú-gā núu cāháⁿ-gā cuendá cue ñáyiu ní xihí-áⁿ? Te duha cāchí-gā: ³² “Yúhú cūu-í Ndiòxí tē Àbrahám, ndihí té Isàac, ndihí té Jacób”, duha cāchí-gā núu tütú-gā. Te cue tée-áⁿ chí cuèi ní xihí-güedé núu ñùyíú-a, dico sá cúu-xí Yá Ndiòxí chí ndècu vívú-ni-güedé. Chí diu-gā cúu-gā Ndiòxí mee-ni cue ñáyiu xīndecu vívú, te ñá túú cūu-gā Ndiòxí cue ñáyiu ñá túú ndècu vívú — cāchí-gā xāhaⁿ-gā xii-güedé.

³³ Te sá dúcáⁿ ní cāháⁿ-gā ní xii-gā cue tée-áⁿ, te ío ní cuñúhu nchaa ñáyiu cuendá sá ío váha ndúu tnúhu ní cāháⁿ-gā.

Tnúhu sá ío-gā cúnúu

(Mr. 12:28-34)

³⁴ Te cue tée cūu fariséú ní xini-güedé ní sadí Jèsús yuhu cue tée cūu saducéú, chí ñá túú ní níhí-gā-güedé tnúhu cūñaha-güedé xii-gā, te cue tée cūu fariséú-áⁿ ní nācacá-güedé te cuháⁿ-güedé núu ndécú Jèsús. ³⁵ Te ìⁿ tée cūu fariséú-áⁿ ío váha cùtnuní iní-dé

nàcuáa ndùu nchaa tnúhu ní chídó tnùní ndíi Moisés te xito ndeé-dé Jèsús, te xáhaⁿ-dê xii-gá:

³⁶ —Mèstrú, cachí tnúhu ndédacáa tnúhu sá ní chídó tnùní ndíi Moisés io-gá cúnùu cada-o —cachí-dé xáhaⁿ-dê xii-gá.

³⁷ Te Jèsús ní xáhaⁿ-gã xii-dé:

—Duha càháⁿ tnúhu sá io-gá cúnùu: “Cuu iní-ndó Dütú Ndiòxí Yaá cúu Ndiòxí-ndó ní yuhu ní iní-ndó, te caní iní-ndó càda-ndo datná cùini mée-gã, te mee-ni tnúhu váha caní iní-ndó nàcuáa cuu vii cuu váha-ndo núu-gã”, ³⁸ duha càháⁿ tnúhu sá io-gá cúnùu. ³⁹ Te duha càháⁿ tucu ingá tnúhu cùu uú sá io cúnùu, te sa yatni ìⁿ-ni cùu-xi ndíi tnúhu díhna nuu, te càchí-xi: “Cuu iní-ndó tnàha ñáyi-u-ndo datná cúu iní-ndó mée-ndo”, duha càháⁿ tnúhu cùu uú-án. ⁴⁰ Te cuèndá úú tnúhu-a ní cáá nchaa tnúhu ní càháⁿ ndíi Moisés nàcuáa cada ñáyi-u, te díu-ni cuèndá úú tnúhu-a ní cáá tnúhu ní càháⁿ nchaa cue téé ní xóo càháⁿ tnúhu Yá Ndiòxí ndeé sanaha —càchí-gá xáhaⁿ-gã xii-güedé.

Yoo cùu Xítohó Jesucristú

(Mr. 12:35-37; Lc. 20:41-44)

⁴¹ Te ndècu ducaⁿ-ni cue téé cùu fariséú núu ndécú Jèsús. ⁴² Te ní xicáⁿ tnúhú-gã núu-güedé, te xáhaⁿ-gã:

—Cuíní-í cachí tnúhu-ndo yòo déhe-xi cùu Cristú Yaá tendaha Yá Ndiòxí quixi ñuyú-a —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Déhe ndíi Dàvií cúu Yáá-án —càchí-güedé xáhaⁿ-güedé xii-gá.

⁴³ Te Jèsús ní xáhaⁿ-gã xii-güedé:

—¿Te nása càchí-tu-ndo sã dèhe ndíi Dàvií cúu Cristú Yaá tendaha Yá Ndiòxí quixi ñuyú-a, te mee ndíi Dàvií-án ní dácáhu iní ñáhá Espiritú Yá Ndiòxí xii ndíi, te ní cachí ndíi sá Cristú Yaá tendaha Yá Ndiòxí quixi ñuyú-a cùu-gá Xítohó ndíi? Te duha ní cachí ndíi:

⁴⁴ Dútú Ndiòxí ní xáhaⁿ-gã xii Yaá cúu Xítohó-í:

“Ngóo xio cùha-í, te yúhú cada-í te nchaa sá cúu úhú iní ñáhá xii-n canehe-xi sá yíñuhu núu-n.”

Duha ní xáhaⁿ Dütú Ndiòxí xii Yaá cúu Xítohó-í, càchí ndíi. ⁴⁵ ¿Te nása cùu Cristú déhe ndíi Dàvií, te mee ndíi ní cachí ndíi sá cúu-gã Xítohó ndíi? —càchí Jèsús xáhaⁿ-gã xii-güedé.

⁴⁶ Te ní ìⁿ-güedé ñá túu-gã ní níhí-güedé tnúhu cùñaha-güedé xii-gá. Te ndeé nduu-án ñà túu-gã ní cùyi-güedé ná tnúhu cacáⁿ tnúhú-güedé núu-gã.

23

Jèsús càháⁿ-gá cuèndá cue téé cùu fariséú ndíi cuèndá cue téé dàcuaha ñaha xii ñáyi-u

(Mr. 12:38-40; Lc. 11:37-54; 20:45-47)

¹ Te Jèsús ní càháⁿ ndodo-gá núu nchaa ñáyi-u, ndíi núu cuè téé xica cuu ndíi-gã, te xáhaⁿ-gã:

² —Cue téé dàcuaha ñaha xii ñáyi-u nchaa tnúhu ní chídó tnùní ndíi Moisés, ndíi cue téé cùu fariséú ndécú ndíi-güedé tnúhu ndee iní càháⁿ-güedé nchaa tnúhu sá ní chídó tnùní ndíi Moisés-án.

³ Te cada-ndo nàcuáa dānehé ñáhá-güedé xii-ndo, dico vá cáda-ndó datná xíquide-güedé, chi tucu ndùu tnúhu càháⁿ-güedé, te tucu quide-güedé. ⁴ Te quide-güedé datná quidé ñáyi-u dàcuído ìⁿ tnaha ñáyi-u-xi ìⁿ sá io véé, te mée-yu ní lùha ñá túu cuíní-yu cuidó-yu. Te ducaⁿ sãtnahá-xi cùu-güedé chi dānehé ñáhá-güedé xii-ndo nàcuáa cada-ndo, dico mee-güedé chi ní lùha ñá túu cuíní-güedé cada-güedé nàcuáa dānehé ñáhá-güedé xii-ndo.

⁵ Te mee-ni ndūcu-güedé nàcuáa quide-güedé cuèndá quini ñáyi-u sá io cùu cahnu-güedé. Te ndeé xindá sá ndeé ìⁿ úú tnúhu Yá Ndiòxí tneé-güedé ndíi ndaha-güedé, te tnàhá iní-güedé sá io-gá cunduu quèhéⁿ xindá-án dàcúúxí xindá

dava-gá ñáyiu. Te tnàhá tucu iní-güedé sá ío-gá cunduu nàni núú dǒó sácuihnu-güedé dàcúúxí dǒó sácuihnu dava-gá-yu. ⁶ Te ndi tnahá òré sácǒo vico, òré quíhu-güedé mèsá caxi-güedé te ío-gá cǔdǎ iní-güedé cunucóo-güedé núú xilé núú sácǒo cue téé cǔnuu-gá, te ðiu-ni ducaⁿ quide tucu-güedé cuéi xití veñúhu. ⁷ Te nchaa núú xicá cǔu-güedé cuiní-güedé sá ndihi tnúhu yíñúhu cáháⁿ ndihi ñaha ñáyiu xii-güedé, te cuiní tucu-güedé sá cǔñahá-yu xii-güedé mèstrú.

⁸ Dico nchòhó vá cǔñaha-ndo xii ñáyiu sá cǔñahá-yu mèstrú xii-ndo, chi nchòhó ìⁿ-ni cǔu-ndo ndecu-ndo, chi ducaⁿ ìⁿdii-ni yúhú Yaá ní tendaha Yá Ndiǒxí véxi ñuyíú-a cǔu-í Mèstrú ndécú ndihi ñaha-í xii-ndo. ⁹ Te ìⁿdii-ni Dútú Ndiǒxí Yaá ndécú àndiu cuu-gá Tátá-ndó, núú xǎⁿ vá cáháⁿ-ndó sá dǎva cue téé ñuyíú-a cǔu-güedé tátá-ndó. ¹⁰ Te ni vá cání iní-ndó càda-ndo nacuáa cáháⁿ ñáyiu sá cǔnùu-ndo, chi ìⁿdii-ni yúhú Crístú Yaá ní tendaha Yá Ndiǒxí véxi ñuyíú-a cǔnuu-í. ¹¹ Te ñáyiu ío-gá cǔnùu ndecu ndihi-ndo, ñáyiu-áⁿ cǔú-yu ñáyiu xinu cuechi núú-ndó. ¹² Te nchaa ñáyiu quide cahnu mee-xi ñáyiu-áⁿ vá cǔú-yu ñáyiu cǔnuu, te nchaa ñáyiu ñá túú quide cahnu mee-xi ñáyiu-áⁿ cunùu-yu.

¹³ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihi nchòhó cue téé cǔu fariséú, cǔu-ndo cue téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi sǎdí-ndó ichi ñáyiu ñá dǎñá-ndó ndihi ndaha ñaha Yá Ndiǒxí xii-yu, te ni mèe-ndo ñá túú quide-ndo nacuáa ndihi ndaha ñaha-gá xii-ndo, te ni dǎva-gá cue ñáyiu cuiní sá ndihi ndaha ñaha-gá xii-yu ñá dǎñá-ndó.

¹⁴ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihi nchòhó cue

tée cǔu fariséú, cǔu-ndó cuè téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi quèndeé-ndó vèhe cue ñáyiu quèé, te ío naha cáháⁿ ndihi-ndo Yá Ndiǒxí cuèndá cuiní-ndó sá vá yǒo cutnùní iní-xi nǎcuáa quide-ndo. Te sá dúcáⁿ quide-ndo te ío-gá ndoho-ndo núú ùhú núú ndàhú dàcúúxí dǎva-gá ñáyiu.

¹⁵ Te nchòhó cue téé dàcuaha ñaha xii ñáyiu nchaa tnúhu ní chídó tnùní ndíi Moisés, ndihi nchòhó cue téé cǔu fariséú, cǔu-ndó cuè téé ío dǎndahú méé-xí sá quidé ndǎá te ñá ndǎá sá quidé ndǎá-ndó, te ndàhú ní cuu-ndo chi sǎhni iní-ndó cuáháⁿ-ndó ndèñi ní cuu dàcaháⁿ-ndó ñáyiu cuèndá cuiní-ndó tníⁿ-yu ichi ndècu-ndo. Te òré ná xǎnu iní-yu tníⁿ-yu ichi ndècu-ndo-áⁿ te uuⁿ-gá cuíta nihnú-yu dàcúúxí mèe-ndo.

¹⁶ Te nchòhó cǔú-ndó dǎtná cue ñáyiu cuáá, chi ñá cǔtnùní iní-ndó nǎcuáa canu ichi-ndo ñáyiu, te ndàhú ní cuu-ndo chi càchí-ndó: “Ìⁿ ñáyiu na càcunehe veñúhu càhnu sá ío cǔnuu òré cuiní-yu cutnùní iní tnàha ñáyíú-yu sá ndǎá cadá-yu ìⁿ sá sání iní-yu cadá-yu, te vá cǔú cuèchi xii-yu cuéi vá cadǎ-yu. Dico núu na càcu nehé-yu díhúⁿ cuááⁿ yíhí xití veñúhu-áⁿ te cuu cuèchi xii-yu te núu vá cadǎ-yu sá ní cachí-yu cadá-yu”, duha càchí-ndó.

¹⁷ Nchòhó cǔú-ndó cuè téé ío nǎ díquí-xi, te cǔu-ndo datná cue ñáyiu cuáá chi ñá tècú tnùní-ndó! Te vá càchí-ndó sá ío-gá cǔnùu díhúⁿ cuááⁿ dàcúúxí veñúhu, chi ðiu cuèndá veñúhu-áⁿ ní cuu í díhúⁿ cuááⁿ-áⁿ. ¹⁸ Te càchí tucu-ndo: “Ìⁿ ñáyiu na càcunehe xito núú sácǒó sá ndúú tǎhú Yá Ndiǒxí òré cuiní-yu cutnùní iní tnàha ñáyíú-yu sá ndǎá cadá-yu ìⁿ sá sání iní-yu cadá-yu, te vá cǔú cuèchi xii-yu cuéi vá cadǎ-yu, dico núu na càcu nehé-yu sá ndúú tǎhú Yá Ndiǒxí yódó núú

xíto-áⁿ te cuu cuéchi xií-yu te núu vá cáda-yu sá ní sani iní-yu cada-yu”, duha cáchi-ndó. ¹⁹ ¡Te cùu-ndo cue téé ío ñi díquí-xi, te cùu-ndo datná cue ñáyiú cuàá chi ñá təcú tnùní-ndó! Te vá cáni iní-ndó sá ío-gá nándihi sá ndúú tǎhú Yá Ndiǒxí sácódó núú xíto núú sácódó tnáhi sá ndúú tǎhú-gá-áⁿ dácúúxí mèè xíto-áⁿ. ²⁰ Chi nchaa ñáyiú ducaⁿ càcunehe xíto-áⁿ, te tnàhá-ni sá yódó núú-xi càcu nehé-yu òré ducaⁿ càháⁿ-yu. ²¹ Te nchaa ñáyiú ducaⁿ càcunehe veñúhu càhnu sá ío cùnuu te ñá díú mèè-ni veñúhu càcu nehé-yu òré ducaⁿ càháⁿ-yu, chi tnàhá-ni Yá Ndiǒxí Yaá cúú cuendá veñúhu-áⁿ cácu nèhé-yu òré ducaⁿ càháⁿ-yu. ²² Te nchaa ñáyiú càcunehe andiú cuendá cutnùní iní tnàha ñáyiú-yu sá ndàá cada-yu ñⁿ sá sání iní-yu cada-yu, te ñá díú mèè-ni andiú cacu nehé-yu chi tnàhá-ni núú núcõo Yá Ndiǒxí táxi tnùní-gá cácu nehé-yu òré ducaⁿ càháⁿ-yu, te tnàhá méé-gá cácu nèhé-yu òré ducaⁿ càháⁿ-yu.

²³ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cúú-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó. Te cuèi núú úxi xichi yúcú mèntá nihí-ndó, te sáñaha-ndo ñⁿ xichi xii Yá Ndiǒxí, te díu-ni ducaⁿ quíde-ndo yúcú nání ànis, ndihi yúcú nání còminú, dico ndàhú ní cuu-ndo chi ñá túú quíde cuendá-ndó nàcuáa càháⁿ nchaa tnúhu sá ío-gá cúnúu sanu ichi ñaha xii-ndo, te tnúhu-áⁿ càchí-xi sá ío xini ñuhu-xi cada ndáá-ndó cùndecu-ndo, te cundàhú iní-ndó cuè tnaha ñáyiú-ndo, te quíndáá iní-ndó Yá Ndiǒxí, te cada-ndo nchaa nacuáa ndúu tnúhu càháⁿ-ndó, te nchaa tnúhu-áⁿ cúú-xí tnúhu sá ío cùnuu xini ñuhu-xi cada-ndo nacuáa càháⁿ-xi, dico vá dáña ndèé-ndó càda-ndo nchaa dava-gá nacuáa càháⁿ tnúhu sá sánú ichi ñaha xii-ndo. ²⁴ ¡Te nchòhó cúú-ndó dàtná cue ñáyiú

cuàá, chi ñá túú cùtnuní iní-ndó nàcuáa canu ichi-ndo ñáyiú, chi quíde cuendá-ndó mèè-ni nchaa tnúhu sá ñá túú ío cùnuu, dico nchaa tnúhu sá ío-gá cúnúu xini ñuhu-xi cada cuendá-ndó ñá túú quíde cuendá-ndó!

²⁵ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cùu-ndo cue téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná cue ñáyiú nàquete sáta-ni tásáⁿ ndihi sáta-ni còhó te xití-xi càndehe caduha-ni. Te ducaⁿ sátnahá-xi cùu-ndo chi mee-ni sá ndécú ndihi tnaha ñáyiú-ndo ñuhu iní-ndó, te nándi dándahú-ndó-yu te quèhe-ndo sá ndécú ndihi-yu. ²⁶ Te nchòhó cue téé cùu fariséú, cúú-ndó dàtná cue ñáyiú cuàá, chi ñá túú cùtnuní iní-ndó nàcuáa ndúu sá quidé-ndó. Te ío xini ñuhu-xi sá cáda-ndó nàcuáa ndúu ndoo nduu nine iní-ndó cuendá ndacu-ndo càda-ndo sá vaha, te xíáⁿ núu chí cáda dàtná xíquide ñáyiú nàquete ndaa xití tásáⁿ ndihi ndaa xití còhó.

²⁷ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cùu-ndo cue téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú ní cuu-ndo chi cùu-ndo datná núú yíndúxi ndíyi núú nì cuáha vii te ní nacáhyú sá cuixíⁿ, dico xití yaú-áⁿ chi càndehe caduha chi mee-ni yíqui ndíyi ñuhu. ²⁸ Te ducaⁿ sátnahá-xi cùu-ndo chi sanu sá cúú-ndó cuè téé vaha dico iní-ndó chi mee-ni sá cuèhé sá dúhá ñuhu, te ío dándahú-ndó mèè-ndo sá quidé ndáá-ndó te ñá ndáá sá quidé ndáá-ndó.

²⁹ Te nchòhó cue téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihi nchòhó cue téé cùu fariséú, cúú-ndó cuè téé ío dándahú méé-xí sá quidé ndáá te ñá ndáá sá quidé ndáá-ndó. Te ndàhú

ní cuu-ndo chi càduha-ndo nchaa núú ní nguindüxi cue téé ní xóo cáháⁿ tnúhu Yá Ndióxi ndéé sanaha, te ío vii quide-ndo nchaa núú sã ní cuáha núú yindüxi cue ñáyiú ní quide váha ní xindecu ñuyíú-a. ³⁰ Te cãchí-ndó: “Te núú dicó nchoo ni xindecu-o cütñhá ní xindecu cue ñani tnáhá-ó ndéé sanaha, te vá chítnáhá-ó-güedé cahni-o cue téé ní xóo cáháⁿ tnúhu Yá Ndióxi dává-áⁿ ní cùu”, duha cãchí-ndó. ³¹ Te sã dúcáⁿ cãháⁿ-ndó, te xiáⁿ cütñuní sã ñiⁿ-ní cùu-ndo ndihí cue ñani tnáhá-ndó cue téé ní xindecu ndéé sanaha, cue téé ní sahani ñaha xii cue téé ní cáháⁿ tnúhu Yá Ndióxi dává-áⁿ. ³² Te núú ducaⁿ te chí dâxínu cava chiúⁿ ní tausaha-güedé.

³³ Te nchòhó cúú-ndó cue téé ío cuihna iní-xi, chi cùu-ndo datná cóó dééⁿ! Te nchòhó vá nihí-ndó nâcuáa cada-ndo càcu nihnu-ndo núú úhú núú ndàhú. ³⁴ Te cuèndá xiáⁿ núú tendaha-í cue téé cãháⁿ tnúhu Yá Ndióxi quixi núú-ndó, ndihí cue téé cùu mestrú danèhé ñáhá xii-ndo tnúhu-gá, ndihí cue téé ío váha cütñuní iní-xi cuèndá cáháⁿ-güedé tnúhu-gá núú-ndó. Dico nchòhó chí da cùu úhú iní-ndó-güedé, chí dava-güedé cahni-ndo-güedé, te dava-güedé cata caa-ndo-güedé núú cùrúxi, te dava-güedé cani-ndo-güedé xiti veñúhu, te ndi tnahá ñuú ndi tnahá ñuú quíhíⁿ-ndó nànducu-ndo-güedé cuèndá cada úhú iní-ndó-güedé.

³⁵ Te sã dúcáⁿ ná càda-ndo, te ndadíquí-ndó cue téé ní quide ndáá ní xindecu ní xihí ní sahani ñaha cue ñani tnáhá-ndó. Te ndéé ndíi Abél téé ío váha ní quide ndáá ní xindecu ní sahani-güedé ndadíquí-ndó, ndihí nchaa dava-gá cue téé ní sahani-güedé, ndihí ndéé ndíi Zacàriá déhe ndíi Berèquiás téé ní sahani-güedé ndéé núú ní ndihí-ná ndadíquí-ndó, te ndíi-áⁿ ní sahani-güedé mei tnúú veñúhu càhnu sã ío cùnuu ndihí xító núú sácóó sã ndúú táhú Yá Ndióxi, te nchaa cue téé-áⁿ ndadíquí-ndó

chí datná tnúhu mee-ndo ní sahani-ndo cue téé-áⁿ, chí diu-ni ñani tnáhá mèe-ndo ducaⁿ ní sahani ñaha xii-güedé. ³⁶ Te na cãchí tnúhu ndáá-í xii-ndo sã nchaa cue téé ní quide ndáá ní xindecu ní sahani-güedé, nchaa cue téé-áⁿ ndadíquí nchaa ñáyiú ndècu vitna —cãchí-gá xãhaⁿ-gã xii-güedé.

Jèsús cãháⁿ-gá cuèndá ñáyiú ñuú Jerusàlén

(Lc. 13:34-35)

³⁷ Te xãhaⁿ Jèsús xii ñáyiú ñuú Jerusàlén:

—Nchòhó ñáyiú ñuú Jerusàlén sãhni-ndo cue téé ní tendaha Yá Ndióxi véxi cãháⁿ tnúhu-gá núú-ndó, te mee-ni ndihí yúú sãhni-ndó dâva-güedé. Te yúhú titní xito ní cuini-í coto ñaha-í xii-ndo datná quidé nchüxi xito-güedi déhe-güedi sãquíhi-güedi xiti ndíxiⁿ-güedi, dico nchòhó ñá túú ní cuini-ndó, te diu-ni ducaⁿ sãni iní-í ndéé vitna! ³⁸ Te na cãchí tnúhu ndáá-í xii-ndo sã sã nduu te ío ndàhú yãha ñuú-ndó, te vá cündècu-gá-ndó. ³⁹ Te na cãchí tnúhu tucu-í xii-ndo sã vã quini ñáhá-gá-ndó xii-í, dico sãá nduu quini ñáhá tucu-ndo, te dává-áⁿ cãchí-ndó: “Ío càhnu cuu Yáá ní tendaha Dütú Ndióxi véxi”, duha cãchí-ndó —cãchí-gá xãhaⁿ-gã xii-yu.

24

Jèsús cãchí-gá sã ngóyo veñúhu
(Mr. 13:1-2; Lc. 21:5-6)

¹ Te Jèsús ní quee-gá veñúhu càhnu sã ío cùnuu, te mei òré ní queheⁿ-gá ichi quíhíⁿ-gá ñiⁿ xichi, te ní sãndehe yatni cue téé xica cuu ndihí-gá diñi-gá, te xãhaⁿ-güedé xii-gá:

—Cundehe veñúhu-a ñã ío váha ní sãá —cãchí-güedé xãhaⁿ-güedé xii-gá.

² Te Jèsús ní xãhaⁿ-gã xii-güedé:

—Na cãchí tnúhu ndáá-í xii-ndo sã nchãá sã ndéhé-ndó-á vitna sãá

nduu te vá cùndùu-gá-xi dàtná cáá-xí vitna, chi ni ìⁿ-gá yúú vǎ códó nchìhi tnaha-xi chi ndìhi ngoyo — cǎchí-gá xǎhaⁿ-gǎ xii-güedé.

Nàcuáa cada-xi nduu ta cùyatni naa ñuyúú-a
(Mr. 13:3-23; Lc. 21:7-24; 17:22-24)

³ Te Jèsús ní sǎá-gá ndìhi cue téé xìca cuu ndìhi-gá yucu Òlívú, te xíáⁿ nǐ ngóo-gá te núú núcòo-gá-áⁿ nǐ sǎháⁿ cue téé xìca cuu ndìhi-gá, te dayuhu nǐ xǎhaⁿ-güedé xii-gá:

—Cuìní-ndí cachí tnúhu-n nǎ nduu dùcaⁿ cada-xi ngoyo veñúhu cǎhnu sǎ Ìo cùnuu, ndìhi nándi cùu sǎ cádá-xí òré sa ta cùyatni nduu quixi tucu-n ñuyúú-a, ndìhi òré sa ta cùyatni naa-xi —cachí-güedé xǎhaⁿ-güedé xii-gá.

⁴ Te Jèsús ní xǎhaⁿ-gǎ xii-güedé:

—Ío quihi iní-ndó cùndecu-ndo cuendá sǎ vǎ yòo dandàhú ñáhá xii-ndo. ⁵ Chi ío cuéhé cue téé coo ñuyúú, te danàni-güedé méé-güedé dàtná nǎmì-í, te cachí-güedé: “Yúhú cùu-í Crístú Yaá ní tendaha Yǎ Ndiòxí véxi ñuyúú-a”, duha cachí-güedé. Te sǎ dúcáⁿ cǎháⁿ-güedé te ío vǎi ñáyiu dandàhú-güedé. ⁶ Te níhi-ndó tnúhu nǎá-güedé nděni ní cuu, dico vá yùhú-ndó chi dacuití sǎ dúcáⁿ càda-xi, dico vátá sǎá-gá nduu nǎa ñuyúú òré ducaⁿ càda-xi. ⁷ Chi cue téé ìⁿ nàcióⁿ nǎá-güedé ndìhi cue téé ìngá nàcióⁿ, te titní ñuú ngúita-güedé nǎá-güedé, te titní xichi ñuyúú coo tnamá, te titní tucu xichi ñuyúú quixi cuéhé, te titní tucu xichi ñuyúú Ìo níhi tnáa. ⁸ Te nchaa xǎⁿ cuu-xi tnúndòho sǎ vitná vǎha vǎha quèsaha sǎ cúú-xí cuè ñáyiu xǐndecu ñuyúú.

⁹ Te cue ñáyiu na cùu úhú iní ñáhá xii-ndo cuáha cuèndá ñáhǎ-yu núú cuè téé cùchiuⁿ cuendá caniha-güedé xii-ndo, te dava-ndo cǎhni ñaha-güedé, te nchaa ñáyiu cuu úhú iní ñáhǎ-yu

xii-ndo sǎ cuèndá-í. ¹⁰ Te dàvá-áⁿ Ìo vǎi ñáyiu dàñá-yu sǎ sǎndáá iní-yu Yǎ Ndiòxí, te ngóo-yu cuu úhú iní tnáhǎ-yu, te cuáha cuèndá tnáhǎ-yu núú cuè téé cùchiuⁿ. ¹¹ Te ío vǎi cue téé cachí-güedé sǎ cǎháⁿ-güedé tnúhu Yǎ Ndiòxí te ñǎ ndáá sǎ cǎháⁿ-güedé tnúhu-gá, te ducaⁿ Ìo vǎi ñáyiu dandàhú-güedé. ¹² Te dàvá-áⁿ cunuu mēe-ni nchaa sǎ cuéhé sǎ dúhá càdá-yu, te vǎi-yu vá cúú ìní-gá-yu tnàha ñáyiu-yu. ¹³ Dico nchaa ñáyiu na càda ndee-ni iní canchicúⁿ nihnu ñaha-ni xii-í, ñáyiu-áⁿ naníhi tǎhú-yu. ¹⁴ Te nihí ñuyúú quíhíⁿ ñáyiu cǎháⁿ-yu tnúhu vǎha, tnúhu sǎ cǎháⁿ nàcuáa ndíhu ndaha ñàha Yǎ Ndiòxí xii ñáyiu, te sǎtá ná nihí nchaa ñáyiu tnúhu-áⁿ te naa ñuyúú.

¹⁵ Te ndí Dániél téé ní xóo cǎháⁿ tnúhu Yǎ Ndiòxí ndéé sanaha nǐ chídó tnúni ndí cuèndá ìⁿ sǎ dáquèe tihú Yǎ Ndiòxí cundecu ìⁿ xichi núú nǐ cuu íí, te xǎⁿ cada-xi sǎ vǎ cùndecu-gá ni ìⁿ ñáyiu xíáⁿ. Te cada cuèndá vǎha-ndo nàcuáa ní cǎháⁿ ndí, chi nduu na quìní-ndó xǎⁿ cundecu-xi núú dúcáⁿ nǐ cuu íí, ¹⁶ te dàvá-áⁿ nchaa ñáyiu xǐndecu distritú Júdeá xini ñùhu-xi cunú-yu quíhíⁿ-yu xití yucu. ¹⁷ Te nchaa ñáyiu ndáa ndódó ñiquí véhé-xí vǎ ndíhu-gá-yu vehé-yu quehéⁿ-yu ìⁿ ndachiuⁿ-yu canehé-yu quíhíⁿ. ¹⁸ Te nchaa ñáyiu cuáháⁿ yucu vá nùhú-gá-yu vehé-yu cúnúquehéⁿ-yu dóo-yu. ¹⁹ Te ndàhú ní cuu nchaa ñáyiu ñíhi ñúhú ñéhe-xi, ndìhi cue ñáyiu ñíhi xǐndeca ñéhe vitna sǎdi na sǎá nduu dùcaⁿ cada-xi! ²⁰ Te nchòhó, chí cǎcáⁿ tǎhú núú Yǎ Ndiòxí cuèndá sǎ vǎ dúcáⁿ ndòho-ndo yóo quidé víxiⁿ-xi, te ni vǎ dúcáⁿ ndòho-ndo nduu cuu-xi nduu ndetatú-ndó. ²¹ Chi dàvá-áⁿ coo tnúndòho cǎhnu vihi ñuyúú, te vátá ìⁿ ndúu-gá coo tnúndòho cǎhnu vihi-áⁿ ndéé cùtnáhá ní ngáva ñuyúú, chi ñu-ni dàvá-áⁿ coo tnúndòho cǎhnu vihi-áⁿ, te ni núú cuáháⁿ núú véxi

vá cóo-gă tnúndòho-án. ²² Te Yá Ndiöxí cächí-gá sá vǎ ìo vǎi nduu coo tnúndòho cahnu vihi-án sǎ cuèndá nchaa ñáyiú ní cǎháⁿ-gá cundecu ndihí-gá. Chi núu vǎi nduu na coo tnúndòho-án te vǎ yǒo cǎcu nihnu.

²³ Te núu ió ñáyiú cächí-yu xii-ndo: “Chí cúndèhe iha, chi iha ní quexìo Cristú Yáá ní tendaha Yá Ndiöxí véxi ñuyíú-a”, àdi cächí-yu: “Chí cúndèhe yacáⁿ chi yácáⁿ ndécú-gǎ”, cächí-yu ña. Te vǎ quèndáá iní-ndó tnúhu cǎháⁿ-yu.

²⁴ Chi coo cue tée cächí-güedé sǎ cúu-güedé Yáá ní tendaha Yá Ndiöxí véxi ñuyíú-a, te dava-güedé cächí-güedé sǎ cúu-güedé cue tée cǎháⁿ tnúhu Yá Ndiöxí dico ñá ndáá sǎ cúu-güedé cue tée cǎháⁿ tnúhu-gá, te cada-güedé titní núu sǎ vǎ yǒo tnǎhí ndàcu cada cuendá dandáhú-güedé ñáyiú. Te caní iní-güedé dandáhú-güedé ndéé cue ñáyiú ní cǎháⁿ Yá Ndiöxí cundecu ndihí-gá. ²⁵ Te duha nduu tnúhu cǎháⁿ-í dátúha ñaha-í xii-ndo. ²⁶ Te núu cächí-yu xii-ndo: “Xití yucu-ǎⁿ ní quexìo Yáá ní tendaha Yá Ndiöxí véxi ñuyíú-a”, cächí-yu. Te vǎ quèndáá iní-ndó quihíⁿ-ndó, àdi cächí-yu: “Vehe-ǎⁿ ndécú Yáá ní tendaha Yá Ndiöxí véxi ñuyíú-a”, cächí-yu. Te vǎ quèndáá iní-ndó tnúhu cǎháⁿ-yu. ²⁷ Chi dàtná xini nchaa ñáyiú quide-xi oré sǎá ndúté dàyehé-xi ní cǎa xico ñuyíú ducaⁿ cǎda-xi oré quixi tucu yúhú Tée cùu ñani tnáhá-ndó nchaa-ndo chi nchaa-yu quini ñáhá-yu xii-í. ²⁸ Te nchòhó xini-ndó sǎ ncháá núu yúcu yiqui cunú ní xihí te yácáⁿ tàcá nchaa ndixíí xéxi-güedí.

Nàcuáa cada-xi òré quixi tucu Tée cùu ñani tnáhá cuè ñáyiú

(Mr. 13:24-37; Lc. 21:25-33; 17:26-30, 34-36)

²⁹ Te na yǎha-ni coo tnúndòho cahnu vihi-án, te vǎ dàyehé-gá nchícanhii, te ní vǎ dàyehé-gá yóó,

te ngoyo nchaa chódini ndéé andiú, te quidi-xi andiú ³⁰ nàcuáa cutnuni iní ñáyiú sǎ sǎ véxi yúhú Tée cùu ñani tnáhá-yu nchaa-yu. Te cue ñáyiú nihí ñuyíú ndáhyú-yu sǎ ndihú iní-yu òré ducaⁿ cǎda-xi, te nchaa-yu quini ñáhá-yu xii-í quee-í andiú quixi-í ichi xití vícò, te quini-yu sǎ ìo cǎhnu cuu-í, te quide-í nchaa sǎ vǎha. ³¹ Te tauchiuⁿ-í cue espíritu xínú cuèchi núu-í níhi tiú-xi cútú nadatácá-xi nchaa ñáyiú ní cǎháⁿ-í chitnahá ñáhá xii-í xindecu ní cǎa xico ñuyíú.

³² Te nchòhó sa xini-ndó nàcuáa quide yutnu ngúxí, chi yutnu-án ndúú yùte núu dité-xi te nǎtáhú ndaha-xi. Te òré ducaⁿ quide-xi te cächí-ndó sǎ sǎ ní cuyatni nuu cahni. ³³ Te ñu-ni ducaⁿ sǎtnahá-xi cada-xi ñuyíú-a òré ná quini-ndó cǎda-xi nchaa nàcuáa ní cǎháⁿ-í, te cutnuni iní-ndó sǎ sǎ ní cuyatni vii-nǎ nduu nǎ ñuyíú. ³⁴ Te na cächí tnúhu ndáá-í xii-ndo sǎ òré vátá cúu-gá nchaa ñáyiú xindecu ñuyíú-a vitna, te cada-xi nchaa nàcuáa ní cǎháⁿ-í. ³⁵ Te andiú ndihí ñuyíú-a chi ndihí nihnu-xi, dico tnúhu-í chi vǎ ndihí nihnu-xi chi cùu-xi tnúhu ndáá cuiti.

³⁶ Dico ñá túú cutnuni ná nduu quixi tucu-í, te ní ñá túú cutnuni ná òré chi vǎ yǒo xini, te ní cuè espíritu xínú cuèchi núu Yá Ndiöxí ñá túú xini-xi ná nduu quixi-í, te ní mee yúhú Tée cùu Déhe Dútú Ndiöxí ñá túú xini-í ná nduu quixi tucu-í, chi ñndí dí-ni mee-gǎ xini-gá núu ná nduu quixi-í.

³⁷ Te nduu na quixi tucu yúhú Tée cùu ñani tnáhá-ndó nchaa-ndo ñuyíú-a te cada-xi dàtná ní quide-xi cútñahá ní xindecu ndí Nöé. ³⁸ Chi nchaa ñáyiú ní xindecu dàvá-án òré vátá ndáá-gǎ ndute ñuyíú, te xéxi-yu xihí-yu quidé-yu, te davá-yu ió-yu vico tnándaha, te davá-yu dásáⁿ-yu déhe yòcò-yu candeca ñaha téé, te ducaⁿ-ni xíquidé-yu ndéé ní sǎá nduu cuànguee té Nöé xití bàrcú. ³⁹ Te ñá

túu ní cùtnuní iní-yu nàcuáa cada-xi ñuyú ndéé ní sáa nduu ní ngúita-xi ní cuuⁿ dáu ní ndaa ndute ñuyú ní dánáa ñaha-xi xii-yu. Te ñu-ni ducaⁿ sãtnahá tucu-xi cada-xi nduu na quixi tucu yúhú Tée cùu ñaní tnáhã-yu nchaá-yu ñuyú-a, chi nduu ñà túu nã yíhí iní-yu te quixi tucu-í. ⁴⁰ Te dàvá-án nũu úu tnáhã cue tée yíhí-güedé xití yucu, te ñⁿ-dé ndanchita te ñⁿ-dé quendóo. ⁴¹ Adi úu ñáyiu ñíhí nchicõ-yu ñⁿ-ni vehe, te ñⁿ-yu ndanchita te ñⁿ-yu quendóo.

⁴² Te duha ndũu tnúhu càháⁿ-í cuendá nchòhò cundecu túha-ndo, chi ñà túu xini-ndó nã òré quixi tucu yúhú Yaá cúu Xitohó-ndó. ⁴³ Te nchòhò xini-ndó sã nũu ñⁿ tée cùu xitohó vehe xini-dé ná òré cúu-xi niú quihu ñadúhú vehe-dé duhu-güedé, te quihu iní-dé cundecu-dé cuendá sã vã dáñá-dé quihu ñadúhú-ãⁿ vehe-dé duhu-güedé, dico ñà túu xini-dé. ⁴⁴ Te duha càháⁿ-í chi nchòhò xini ñũhu-xi cundecu túha-ndo, chi na cuáhãⁿ òré ñà túu nã yíhí iní-ndó quexio yúhú Tée cùu ñaní tnáhã-ndó nchãa-ndo.

*Cuendá ñⁿ tée xinu cuechi
(Lc. 12:41-48)*

⁴⁵ Te na càni-í ñⁿ cuendú núu-ndó. ñⁿ tée xinu cuechi núu ñⁿ patrónⁿ cúu-dé ñⁿ tée ío váha tecú tnúni, te quide ndáá-dé ndécú-dé. Te ñⁿ xito ní dándõo ndaha ñaha patrónⁿ-dè xii-dé nchaa cue ñáyiu ndècu vehe-dé cuendá coto ñaha-dè xii-yu cuãñaha-dè sã cáxi-yu òré tàu-xi caxi-yu, te tée cùu patrónⁿ-án nĩ quee-dé cuáhãⁿ-dè. ⁴⁶ Te váha táhú tée xinu cuechi-án te núu ndècuu-dé quidé-dé nchaa nàcuáa ní xãhãⁿ patrónⁿ-dè cada-dé mei òré ní nasáa patrónⁿ-dè-án. ⁴⁷ Te na càchí tnúhu ndáá-í xii-ndo sã tée cùu patrónⁿ-dè-án cuñaha-dè xii-dé sã quindãha-dé nchaa sã ndécú ndíhi-dé. ⁴⁸ Dico núu tée xinu cuechi-án ní cùu-dé ñⁿ tée cuihna iní-xi, te ngóo-dé cani

iní-dé sã cùyaa patrónⁿ-dè vá nasáa ndíhi-dé. ⁴⁹ Te ngúita-dé cani-dé nchaa dava-gã cue ñáyiu xinu cuechi ndíhi-dé, te ngóo-dé caxi-dé coho-dé cada-dé ndíhi nchaa cue tée quihu. ⁵⁰ Te ñⁿ nduu òré ñà túu yíhí iní-dé nasáa patrónⁿ-dè, ⁵¹ te ío dandõho ñaha patrónⁿ-dè xii-dé, chi daquihíⁿ ñáhã-dè xii-dé núu xindecu cue ñáyiu ní cachí sã nĩ quide ndáá te ñà ndáá sã nĩ quide ndáá-yu. Te ducaⁿ sãtnahã-xi dandõho ñaha Yá Ndiõxí xii ñáyiu, chi daquihíⁿ ñáhã-gã xii-yu ñⁿ xichi núu ío ndohó-yu te yacãⁿ ío ndáhyú-yu, te dicó rúhñú-nã cuu núhu-yu sã sätú iní-yu sã ndóhõ-yu —càchí-gã xãhãⁿ-gã xii-güedé.

25

Cuendá úxí ñáyiu ñíhí

¹ Te xãhãⁿ tucu Jesús xii-güedé:

—Na càni-í ñⁿ cuendú núu-ndó nàcuáa tecú tnúni-ndó nàcuáa cada-xi òré ndíhu ndaha ñaha Yá Ndiõxí xii ñáyiu. Te úxí tnáhã ñáyiu ñíhí ñáyiu cuechi nĩ quehéⁿ-yu lintèrnã-yu, te cuáhãⁿ-yu ñⁿ xichi núu cóo vico tnãndaha cuendá cundetú-yu quexio tée tnãndaha.

² Te úhúⁿ ñáyiu cuechi-ãⁿ ío váha cùtnuní iní-yu, te úhúⁿ-yu ñáhã.

³ Te ndi úhúⁿ ñáyiu cuechi dùcaⁿ ñà túu cùtnuní iní-xi-áⁿ ñà túu ní cànehé-yu sã ndèe lintèrnã-yu.

⁴ Dico ndi úhúⁿ ñáyiu cuechi cùtnuní iní-xi-áⁿ nèhé-yu sã ndèe lintèrnã-yu. ⁵ Te tée tnãndaha-án cùyaa-dé quexio-dé núu ndétú ñáhã-yu-án, te nini dùcaⁿ cuyaa-dé ní tnã ñaha sàní xii-yu ní xidí-yu.

⁶ Te cùu-xi datná dava niú níhi ní cáhãⁿ dava-gã ñáyiu, te càchí-yu: “Sa véxi tée tnãndaha, chí táquèe quehé quehéⁿ cuendá-ndó-dè”, càchí-yu. ⁷ Te ndi úxí ñáyiu cuechi-ãⁿ nĩ ndacóo-yu quide túha-yu lintèrnã-yu. ⁸ Te ndi úhúⁿ ñáyiu cuechi ñà túu cùtnuní iní-xi-áⁿ nĩ xãhãⁿ-yu xii cue ndi

ùhúⁿ ñáyiú cùtnuní iní-xi-áⁿ: “Chí táxi nùu luha sá ndëe lintérná-ndó ná ndëe lintérná-ndí chí ñá cuíní-xi cáyú mee-ni ndàhvá”, cächí-yu xähãⁿ-yu. ⁹ Te cue ñáyiú cuechi cùtnuní iní-xi-áⁿ ñí xähãⁿ-yu: “Vá táxi nùu-ndí chí vá tnàhá canehe chiúⁿ mee-ndí, te váha-gá chí cuàháⁿ cuaaⁿ-ndo nùú cué ñáyiú xídíco cuèndá sá vã cúmãní xii-ndo, te vá cúmãní xii nchúhú tucu”, cächí-yu xähãⁿ-yu. ¹⁰ Te ñini cuàháⁿ ndí ùhúⁿ ñáyiú ducaⁿ ñà túú cùtnuní iní-xi-áⁿ cuãguaáⁿ-yu sá ndëe lintérnã-yu ní quexìo téé tnándaha. Te ndí ùhúⁿ ñáyiú cuechi cùtnuní iní-xi-áⁿ ñí queheⁿ cuèndá ñáhã-yu xii-dé, te cuãnguìhu ndíhi ñàhá-yu xii-dé núú cóo víco tnándaha, te sátá dúcáⁿ te ní nandedí yuyèhe. ¹¹ Te òré ní nasáá cue ñáyiú cuechi ñáyiú ní sãnguaaⁿ sá ndëe lintérná-xi-áⁿ, te ní ngúíta-yu càháⁿ-yu xñutnii-yu ndaa sátá yuyèhe ndaa quehé, te xähãⁿ-yu xii téé tnándaha-áⁿ: “¡Tãta, nacaáⁿ yuyèhe na quíhu-ndí!”, cächí-yu xähãⁿ-yu xii-dé. ¹² Te téé tnándaha-áⁿ ñí xáhaⁿ-dë xii-yu: “Na cächí tnúhu ndáá-í xii-ndo sã nchòhò ñá túú tau-ndó quíhu-ndo víco-a, chí ñá túú tnàhá tnúhu ndíhi ñàha-ndo xii-í”, cächí-dé xáhaⁿ-dë xii-yu —cächí Jësús xáhaⁿ-gã xii-güedé.

¹³ Te xáhaⁿ tùcu Jësús xii-güedé:

—Ío quíhi iní-ndó cùndecu-ndo, chí ñá túú xini-ndó nã nduu, te ñí ñà túú xini-ndó nã òré quixi tucu yúhú Téé cùu ñaní tnàhá-ndó nchàa-ndo —cachí-gá xáhaⁿ-gã xii-güedé.

Cuèndá cue téé ní ndóo ndaha dñhúⁿ

(Lc. 19:11-27)

¹⁴ Te xáhaⁿ tùcu Jësús xii-güedé:

—Na càni tucu-í ingá cuèndú núú-ndó nàcuáa tecú tnùní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Hⁿ téé sa ñùhu ichi-ná-dé sá cáca-dé quingaca cuu xica-dë, te ní cana-dé

cue téé xinu cuechi núú-dë cuèndá dándóo ndaha ñàha-dé dñhúⁿ-dë xii-güedé.

¹⁵ Te nàcuáa ndùu chiuⁿ guide hⁿ hⁿ-güedé te ducaⁿ dñhúⁿ ñí sãñaha-dë xii-güedé, te hⁿ-dé ní sãñaha-dë ùhúⁿ tnàhá dñhúⁿ sã ío yahu nãni talentú, te ingá-dé ní sãñaha-dë úú tnàhá dñhúⁿ-ãⁿ, te ingá-dé ní sãñaha-dë hⁿ dñhúⁿ-ãⁿ, te dãtnuní ní quee-dé cuàháⁿ-dë. ¹⁶ Te téé ní queheⁿ cuèndá ùhúⁿ tnàhá dñhúⁿ sã nãní talentú ní guide-dé ndáhú ndíhi-xi te ní níhi tucu-dé ùhúⁿ-gá tucu tnàhá dñhúⁿ-ãⁿ. ¹⁷ Te dñu-ni ducaⁿ ñí guide tucu téé ní níhi úú dñhúⁿ sã nãní talentú-áⁿ, chí ní guide-dé ndáhú te ní níhi tucu-dé úú-gá tucu tnàhá. ¹⁸ Dico téé ní níhi hⁿ-ni dñhúⁿ-ãⁿ chí da ní chiváha-dé dñhúⁿ patróoⁿ-dë, chí ní xete-dé hⁿ yaú te ní chindúxi-dé.

¹⁹ Te ní cuu cuéhé nduu sá ñí quee patróoⁿ-güedé-áⁿ ní sãngaca cuu-dé, te ní nasáá-dé te ní ngúíta-dé quídé ndáá-dé ndíhi-güedé cuèndá dñhúⁿ sã ñí dándóo ndaha ñàha-dé xii-güedé. ²⁰ Te téé ní quendóo ndaha ùhúⁿ tnàhá dñhúⁿ-ãⁿ ñí xáhaⁿ-dë xii patróoⁿ-dë: “Patróoⁿ, náu ùhúⁿ tnàhá dñhúⁿ sã ñí dándóo ndaha ñàha-n xii-í-a, te ní sãháⁿ-í ní guide-í ndíhi-xi ndáhú te ní chídó-xí ùhúⁿ-gá tucu tnàhá, te náu-a naqueheⁿ cuèndá-n”, cächí-dé xáhaⁿ-dë xii patróoⁿ-dë. ²¹ Te téé cùu patróoⁿ-dë-áⁿ ñí xáhaⁿ-dë xii-dé: “Ío váha ní guide-n, te vitna quide ñaha-í xii-n hⁿ téé váha téé quide ndáá, te sá sàcú dñhúⁿ ñí dándóo ndaha ñaha-í xii-n te ní guide ndáá-n, te sá dúcáⁿ ñí guide-n te vai-gá taxi cuèndá ñàhá-í xii-n. Te vitna cuu cundecu-n nùú ndécù-í, te ío cudíi iní-ó cùndecu ndíhi tnaha-o”, cachí téé cùu patróoⁿ-dë-áⁿ xáhaⁿ-dë xii-dé. ²² Te sátá dúcáⁿ te téé ní quendóo ndaha úú tnàhá dñhúⁿ sã nãní talentú-áⁿ ñí xáhaⁿ-dë xii patróoⁿ-güedé: “Patróoⁿ, náu úú

tnàhá díhú sã ní dándõ ndaha ñaha-n-a, te ní sáháⁿ-í ní quide-í ndihi-xi ndáhú, te ní chídó-xí ùú-gá tucu tnàhá, te náu-a naqueheⁿ cuendá-n”, cächí-dé xãhaⁿ-dë xii patróóⁿ-güedé. ²³ Te ní xáhaⁿ tée cùu patróóⁿ-án xii-dé: “Ío váha ní quide-n, te vitna quide ñaha-í xii-n ìⁿ tée váha tée quide ndáá, te sá sàcú díhúⁿ ní dándõ ndaha ñaha-í xii-n te ní quide ndáá-n, te sá dúcáⁿ ní quide-n te vãi-gá taxi cuendá-í. Te vitna cuu cundecu-n núú ndécú-í, te ío cudíⁿ iní-ó cundecu ndihi tñaha-o”, cächí tée cùu patróóⁿ-án xãhaⁿ-dë xii-dé. ²⁴ Te tée ní ndóo ndaha ìⁿ-ni díhúⁿ-ãⁿ ní xáhaⁿ-dë xii tée cùu patróóⁿ-dë-án: “Patróóⁿ, yúhú sa nàha-í sá yòhó cúu-n ìⁿ tée ndücu mee-ni sá cúu-xí mèe-xi te tàhu-n chiuⁿ cuáháⁿ nchúhú cue tée xinu cuechi núú-n sàcáⁿ-ndí triú, te òré ná nàtaxi tñaha-ndí, te yòhó dícó-nã náqueheⁿ cuendá-n tàxúha-n. ²⁵ Te núu xíãⁿ ní yùhú-í cada-í ndáhú ndihi díhúⁿ-n, te ní sáháⁿ-í ní xete-í ìⁿ yaú te ní chindúxi-í, te náu díhúⁿ-n-án naqueheⁿ cuendá-n”, cächí-dé xãhaⁿ-dë xii tée cùu patróóⁿ-án. ²⁶ Te tée cùu patróóⁿ-án ní xáhaⁿ-dë: “Yòhó cúu-n ìⁿ tée cuihna iní-xi xinu cuechi núú-í te cuhndu-n, te núu yòhó sání iní-n sã cùu-í ìⁿ tée tàuchiuⁿ cuáháⁿ-ndó sàcáⁿ-ndó triú te òré nàtaxi tñaha-ndo, te yúhú dícó-nã náqueheⁿ cuendá-í nãtàxúha-í. ²⁷ Te núu sãni iní-n sã dúcáⁿ quide-í, te dasaⁿ núu-n díhúⁿ-í te cúñaha-n chãhu-yu díquí-xi ni cùu, te òré ndexio-í te sa ngódó lùha-gá díquí-xi naqueheⁿ-í ní cùu”, cächí-dé xãhaⁿ-dë xii tée xinu cuechi-án. ²⁸ Te tée cùu patróóⁿ-án ní xáhaⁿ-dë xii dava-gá cue tée ndècu ndihi-dé: “Chí quéndèé ìⁿ díhúⁿ sã nání tàlentú nèhé tée-án, te cuáha-ndo tée nèhe úxí tnàhá ñu-ni díhúⁿ-ãⁿ. ²⁹ Chí cue tée sa ndècu ndihi te níhí-gã-güedé cundecu ndihi-güedé, te ní vã níhí-gã-güedé ndèé cundecu ncha

sá cùndècu ndihi-güedé. Te cue tée ñá túu nã ndécú ndihi vai, te ncha sá ndécú ndihi-güedé vá cùndècu ndihi-gã-güedé. ³⁰ Te tée xinu cuechi ñá túu vèdana nàndihi-án, chí tníⁿ-dë te daquihíⁿ-ndó-dë ìⁿ xichi núu née núú ío ndoho-dé, te yàcáⁿ ndáhyú-dé, te dícó rúhñú-nã cuu núhu-dé sá sàtú iní-dé sá ndóhó-dë”, cächí tée cùu patróóⁿ-án xãhaⁿ-dë xii-güedé. Duha sãtnahá-xi ndoho ncha ñáyiú ñá túu quide váha —cächí-gá xãhaⁿ-gã xii-güedé.

Cuendá cue ñáyiú ní quide váha ndihi cuendá cue ñáyiú ñá túu ní quide váha

³¹ Te xãhaⁿ tucu Jesús xii-güedé:

—Te nduu na quixi tucu yúhú Tée cùu ñani tnàhá-ndó nchà-ndo, te quixi-í ndihi ncha cue espíritú xínú cuèhi núu-í, te ncha ñáyiú quini-yu sá ío càhnu cuu-í, te ðavá-án cunucóo-í núú táxí tnùní-í, te ío cuñúhu ñáyiú sá ío càhnu cuu-í. ³² Te ðavá-án natacá ncha ñáyiú xindecu ní càa xico ñuyíú cundecú-yu núu-í, te cada-í-yu ðatná quidé ìⁿ toli oré táú ðìⁿ-dé ncha mbéé ndihi ncha chivá chí ðìⁿ taxi ndecu-dé ncha mbéé, te ðìⁿ taxi ndecu-dé ncha chivá, ³³ Te ducaⁿ sãtnahá-xi cada-í chí ncha ñáyiú ní quide ndáá núu-í ñáyiú-án taxi ndecu-í-yu xio cùha-í, te ncha ñáyiú cuihna iní-xi ñá túu ní cuini cada ndáá núu-í ñáyiú-án taxi ndecu-í-yu xio ðatni-í. ³⁴ Te ducaⁿ te yúhú tée ío cùnuu cúñaha-í xii ñáyiú na cundecu xio cuhá-í: “Ncha nchòhó ñáyiú ní quide váha ñaha Tãtã-í Dútú Ndiõxí, chí nèhé chí vitna ní sáá nduu cundecu-ndo núú ndécú-gã táxí tnùní-gá, chí ndéé cùtnàhá ní ngáva ñuyíú sa ndècu túha tnàhí núu ndécú-gã-án sã nchòhó nduu táhú-ndó cundecu-ndo. ³⁵ Te ducaⁿ chí òré xihí-í docó te ní taxi-ndo sã ní xexi-í, te òré yichí-í ndute te ní taxi-ndo ndute ní xihí-í, te òré

ñùhu-í ichi te ní taxi-ndo vèhe ní ndetatú-í. ³⁶ Te òré xíní ñùhu-í dóó cuihnu-í te ní taxi-ndo, te òré ní cuhú-í te ní quixi coto ñaha-ndo xii-í, te òré ní xíhi-í vecaá te ní quixi tucu-ndo ní quixi coto ñaha-ndo xii-í”, duha cúñaha-í xii nchaa ñáyiu-áⁿ. ³⁷ Te nchaa ñáyiu ducaⁿ ní quide ndáá-áⁿ cùñahá-yu xii-í: “Yòhó Yaá cúú Xìtohó-ndí, ni ñⁿ xito ñá túú ní tàxi-ndí sá cáxí-n òré xihí-n dòcò, te ni ñⁿ xito ñá túú ní tàxi-ndí ndute coho-n òré yìchí-n. ³⁸ Te ni ñá túú ní tàxi-ndí vehe ndetatú-n òré ñùhú-n ìchi, te ni ñá túú ní tàxi-ndí dóó cuihnu-n òré xíní ñùhu-n. ³⁹ Te ni ñá túú ní quixi coto ñaha-ndí xii-n òré ní cuhú-n, te ni ñá túú ní quixi coto ñaha-ndí xii-n òré ní xíhi-n vècaá”, duha quesàhá-yu cúñahá-yu xii-í. ⁴⁰ Te yúhú téé cùnnu cúñaha-í xii-yu: “Na càchí tñúhu ndáá-í xii-ndo sã sã cuendá sã ñá túú ní quide-ndo ñⁿ sã vãha sã cúú-xí cuè ñáyiu ndècu ichi-í cuèi ío ndàhú xíndáa-yu, te sã dúcáⁿ ní quide-ndo ñá túú ní quide-ndo sã vãha sã cúú-xí-yu, te cada iní-ndó sã mèe-í ducaⁿ ní quide-ndo ní xito ñaha-ndo xii-í”, duha cúñaha-í xii-yu.

⁴¹ Te dàtnùní cúñaha-í xii ñáyiu na cùndecu xio datní-í: “Nchaa nchòhó ñáyiu ní xíta nihnu chí xócuiñí núú ndécú-í-a, chí nchòhó ní nduu táhú-ndó cùndecu-ndo núú ñùhú núú càyú, ñiu-ni núú ní quide túha-í cundecu sácuihná ndihí nchaa espíritú cùndihí-xi, te yàcáⁿ cundecu-ndo ní caa ni quíhíⁿ. ⁴² Chi yúhú òré xihí-í docò te ñá túú ní tàxi-ndo sá cáxí-í, te ni òré yìchí-í ndute te ñá túú ní tàxi-ndo ndute coho-í. ⁴³ Te ni òré ní xúhu-í ichi ñá túú ní tàxi-ndo vehe ndetatú-í, te ni òré xíní ñùhu-í dóó cuihnu-í te ñá túú ní tàxi-ndo, te ni òré ní cuhú-í te ñá túú ní quixi-ndo quixi coto ñaha-ndo xii-í, te ni òré ní xíhi-í vecaá te ñiu-ni ducaⁿ ní quide-ndo ñá túú ní quixi-ndo quixi coto ñaha-ndo xii-í”, duha cúñaha-í

xii-yu. ⁴⁴ Te ñáyiu-áⁿ cùñahá-yu xii-í: “Yòhó Yaá cúú Xìtohó-ndí ni ñⁿ xito ñá túú ní xíní-ndí òré xihí-n dòcò cuendá taxi-ndí sá cáxí-n, te ni ñⁿ xito ñá túú ní xíní-ndí òré yìchí-n ndute cuendá taxi-ndí ndute coho-n, te ni ñⁿ xito ñá túú ní xíní-ndí cuhu-n ìchi cuendá taxi-ndí vehe ndetatú-n, te ni ñⁿ xito ñá túú ní xíní-ndí òré xíní ñùhu-n dóó cuendá taxi-ndí dóó cuihnu-n, te ni ñⁿ xito ñá túú ní xíní-ndí òré cùhú-n cuendá quixi coto ñaha-ndí xii-n, te ni ñⁿ xito ñá túú ní xíní-ndí quihí-n vècaá cuendá quixi coto ñaha-ndí xii-n”, duha quesàhá-yu cúñahá-yu xii-í. ⁴⁵ Te yúhú cúñaha-í xii-yu: “Na càchí tñúhu ndáá-í xii-ndo sã sã cuendá sã ñá túú ní quide-ndo ñⁿ sã vãha sã cúú-xí cuè ñáyiu ndècu ichi-í cuèi ío ndàhú xíndáa-yu, te sã dúcáⁿ ní quide-ndo ñá túú ní quide-ndo sã vãha sã cúú-xí-yu, te cada iní-ndó sã mèe-í ducaⁿ ní quide-ndo ñá túú ní quide-ndo sã vãha sã cúú-xí-í”, duha cúñaha-í xii-yu. ⁴⁶ Te nchaa ñáyiu-áⁿ quíhíⁿ-yu núú ùhú núú ndàhú ni caa ni quíhíⁿ. Te nchaa ñáyiu ní quide ndáá núú-í ní xíndecu ñuyúú-a, ñáyiu-áⁿ nduu táhú-yu ío vãha cundecú-yu ni caa ni quíhíⁿ —càchí-gá xãhaⁿ-gã xii-güedé.

26

Cue téé cùu úhú iní ñáhá xii Jesús ndúcú-güedé nàcuáa cada-güedé tñi ñaha-güedé xii-gá

(Mr. 14:1-2; Lc. 22:1-2; Jn. 11:45-53)

¹ Te sáta ní yáha ducaⁿ ní cáhán Jèsús, te ní xáhaⁿ-gã xii cue téé xica cuu ndihí-gá:

² —Nchòhó sa xíní-ndó sã cùmání úú-gá nduu te coo vico pàscuá, te càchí tñúhu-í xii-ndo sã yúhú Téé cùu ñani tñáhá-ndó nchàa-ndo tñi ñaha-güedé xii-í, te cuáha cuendá ñáhá-güedé núú cuè téé cùu úhú iní

ñahá xii-í, te cata caa ñaha-güedé núú cùrúxí te núú cùrúxí-án cuú-í — cächí-gá xáhaⁿ-gá xii-güedé.

³ Te ñu-ni òré càháⁿ ndihi Jèsús cue téé xica cuu ndihi-gá ní nataká cue téé cùu dútú cùnùu, ndihi cue téé dàcuaha ñaha xii ñáyiú nchaa tnúhu ní chidó tnùní ndíi Moisés, ndihi cue téé cùu sacuéhé núú ñáyiú israhél. Te mei quéhé vehe núú cúú vèchiuⁿ té Caifás téé cùu dútú ño-gá cùnùu ní nataká-güedé. ⁴ Te xíaⁿ ní ndatnúhu-güedé nàcuáa cada-güedé dandàhú-güedé Jèsús cuendá tñii ñaha-güedé xii-gá, te cahni ñaha-güedé. ⁵ Te ní xitnàha-güedé:

—Váha-gá sá vǎ tñii-ó Jèsús mei ndùu vico, chi núu ducaⁿ na càda-o te ío dusaⁿ càda ñáyiú —cächí-güedé xitnàha-güedé.

Íiⁿ ñadihi chíhi-án àciti díqui Jèsús
(Mr. 14:3-9; Jn. 12:1-8)

⁶ Te ndècu Jèsús ñuú Bètaniá vehe ñiⁿ téé nàni Xímú, téé ní tnahá cuéhé sǎ dátèhyú nihnu-xi yiqui cùñú-ó. ⁷ Te xíaⁿ ndécú-gǎ ní quexìo ñiⁿ ñadihi néhé-án ñiⁿ sǎ ní cuáha yúú vǎha nàni alabastrú, te xití xíaⁿ ñúhú àciti sàháⁿ tnámí sǎ ño ndèyáhu. Te yíhi Jèsús mèsá xéxi-gǎ, te ñaha-án ní sàháⁿ-aⁿ ní sódo-aⁿ àciti ñúhú xití xíaⁿ díqui-gǎ. ⁸ Te òré ní xiniⁿ cue téé xica cuu ndihi Jèsús sǎ dúcáⁿ ní quide ñaha-án te ní cudééⁿ-güedé, te ní ngúita-güedé xitnàha-güedé:

—Ñá túú quide váha ñaha-án dàcáⁿ quidé-án dacuíta-aⁿ aciti-án. ⁹ Chi váha-gá núu cuyáhu aciti-án ní cùu chi ío ndèyáhu, te díhúⁿ cuyáhu aciti-án cuu cuendá cue ñáyiú ndàhú ní cùu —cachí-güedé xitnàha-güedé.

¹⁰ Te Jèsús ní cutnùní iní-gá nàcuáa ndùu tnúhu xitnàha-güedé, núu ní xáhaⁿ-gǎ xii-güedé:

—Vǎ dásatú-ndó iní ñadihi-a, chi sǎ ní quide ñaha-aⁿ xii-í cúú-xí ñiⁿ sǎ vǎha. ¹¹ Chi cue ñáyiú

ndàhú ducaⁿ-ni cùtnahá ñáyiú-án tnuú-ndó, dico yúhu chi vá ncháa ndùu cundecu ndihi ñaha-í xii-ndo ñuúyú-a. ¹² Te sǎ dúhá ní quide ñaha ñadihi-a xii-í ní sódo-aⁿ àciti díqui-í, te xíaⁿ cada iní-ndó sǎ sǎ quide túha-aⁿ yiqui cùñú-í cuendá nguíndúxi-xi. ¹³ Te na cächí tnúhu ndáá-í xii-ndo sǎ ndèni ní cuu ñihí ñuyíú ná càháⁿ ñáyiú tnúhu-í, te càháⁿ-yu tnàhá cuendá ñadihi-a cuendá quiniⁿ nchaa ñáyiú nàcuáa ní quide-aⁿ te ducaⁿ vǎ nàcuánaá-yu —cächí-gǎ xáhaⁿ-gǎ xii-güedé.

Té Jüdás ndúcú-dé nàcuáa cada-dé cuáha cuendá-dé Jèsús núú cué téé cùu úhú iní ñahá xii-gá

(Mr. 14:10-11; Lc. 22:3-6)

¹⁴ Te sátá dúcáⁿ te té Jüdás Iscarioté ní sàháⁿ-dé ní ndatnúhu-dé ndihi cue téé cùu dútú cùnùu. Te núú tnàhá té Jüdás-án cúú úxúú cue téé xica cuu ndihi Jèsús. ¹⁵ Te ní xáhaⁿ-dè xii cue téé cùu dútú cùnùu-án:

—¿Ndédau cháhu ñaha-ndo xii-í te taxi cuendá-í Jèsús xii-ndo-i? — cächí-dé xáhaⁿ-dè xii-güedé.

Te cue dútú-ǎⁿ ní xáhaⁿ-güedé xii-dé sǎ cuañaha-güedé óco úxí díhúⁿ cuixíⁿ, te ñu-ni ducaⁿ ní sáñaha-güedé xii-dé. ¹⁶ Te ndéé òré ní queheⁿ cuendá té Jüdás-án díhúⁿ, te ní ngúita-dé ndúcú-dé nàcuáa cada-dé cuáha cuendá-dé Jèsús núú-güedé.

Cùdini Jèsús ndihi cue téé xica cuu ndihi-gá

(Mr. 14:12-25; Lc. 22:7-23; Jn. 13:21-30; 1 Co. 11:23-26)

¹⁷ Te ní sáá nduu ní quesaha vico xexi ñáyiú pǎá sǎ ña túú yíhi levadurá ñu-ni vico pàscuá, te cue téé xica cuu ndihi Jèsús ní sàndehe yatni-güedé ñiñi-gǎ, te xáhaⁿ-güedé xii-gǎ:

—Mèstrú, véxi-ndí xicáⁿ tnúhú-ndí núú-n núu ndéé cuiniⁿ càda túha-ndí cuendá cudini-o

sacuaa nduu vico pascuá — cächi-güedé xähaⁿ-güedé xii-gá.

18 Te Jèsús ní xähaⁿ-gä xii-güedé:

—Chí cuäháⁿ xití ñúú-ãⁿ, te yàcáⁿ naníhí-ndó ñⁿ téé cùtnuní iní-ndó sã sã xini ñähá-dé xii-o, te cùñaha-ndo xii-dé: “Yaá cúú Mèstrú cächí-gá sã sã ní cuyatni nduu vã cündècu-gá ñuyú-u, te vehe-n cuini-gá cada-gá vico pascuá ndihi cue téé xica cuu ndihi-gá”, duha cùñaha-ndo xii téé-áⁿ —cächí-gá xähaⁿ-gä xii-güedé.

19 Te cue téé xica cuu ndihi-gá-áⁿ ñí xica-güedé cuäháⁿ-güedé, te ní quide-güedé nacuáa ní xähaⁿ-gä xii-güedé, te ní quide túha-güedé sã cùdini-güedé ndihi-gá sacuaa nduu vico pascuá-áⁿ. 20 Te òré sa ní cundi^{qu} te cuánguihu Jèsús ndihi ndí ùxúú cue téé xica cuu ndihi-gá mèsá cuèndá cudini-gá ndihi-güedé. 21 Te ñini xèxi-gá ndihi-güedé ní xähaⁿ-gä xii-güedé:

—Na cächí tnúhu ndáá-í xii-ndo sã díú ñⁿ nchohó cue téé xica cuu ndihi-í cuäha cuèndá ñähá-ndó xii-í núú cuè téé cùu úhú iní ñähá —cächí-gá xähaⁿ-gä xii-güedé.

22 Te sã dúcáⁿ ñí xähaⁿ-gä xii-güedé te nchaa-güedé ní ngüíta-güedé cündiyí-güedé, te da ñⁿ da ñⁿ-güedé ní ngüíta-güedé xähaⁿ-güedé xii-gá:

—Mèstrú, ¿ñá díú yùhú ducaⁿ sàni iní-n càda-í-u? —cächí-güedé xähaⁿ-güedé xii-gá.

23 Te ní xähaⁿ-gä xii-güedé:

—Téé nacaxi ndihi-í ñⁿ-ni cóhó caxi-ndí, téé-áⁿ cuäha cuèndá ñähá-dé xii-í núú cuè téé cùu úhú iní ñähá. 24 Te yúhú Téé cùu ñani tnáhá-ndó nchaa-ndo ñuhu ichi-í cuähá-í yáha-í nacuáa càháⁿ-xí núú tütú Yã Ndiòxí, dico ndàhú ní cuu téé ducaⁿ na cuäha cuèndá ñähá xii-í núú cuè téé cùu úhú iní ñähá, chí váha-gá sã vã cácu téé-áⁿ candecu-dé ní cùu, te ñã díú sã ñí cacu-dé te ducaⁿ càda-dé —cächí-gá xähaⁿ-gä xii-güedé.

25 Te sátá dúcáⁿ te ní cáháⁿ té Jüdás téé cuäha cuèndá ñähá xii-gá, te xähaⁿ-dè:

—Mèstrú, ¿te náa sàni iní-n sã yùhú cuäha cuèndá ñähá-í xii-n núú cuè téé cùu úhú iní ñähá xii-n-áⁿ? —cächí-dé xähaⁿ-dè xii-gá.

Te Jèsús ní xähaⁿ-gä xii-dé:

—Diu-n —cächí-gá xähaⁿ-gä xii-dé.

26 Te ñini cùdini cue téé xica cuu ndihi Jèsús ní queheⁿ-gá pàá, te ní ndacáⁿ táhú-gä núú Yã Ndiòxí, te dàtnuní ní táhú cuèchi-gá te ní ngüíta-gá dácãhñu-gá cue téé xica cuu ndihi-gá-áⁿ, te xähaⁿ-gä xii-güedé:

—Chí quéhéⁿ pàá-a caxi-ndo, te cada iní-ndó sã yiqui cuñú-í cúu-xí —cächí-gá xähaⁿ-gä xii-güedé.

27 Te ní queheⁿ-gá vàsú ñùhú ndùdí ndéhé yoho yàha stilé, te ní ndacáⁿ táhú-gä núú Yã Ndiòxí, te dàtnuní ní ngüíta-gá sãñaha-gä xii-güedé cuèndá coho-güedé luha luha sã ñùhú xití-xi, te xähaⁿ-gä xii-güedé:

—Chí cóhó nchaa nchohó ndudí ndéhé yoho yàha stilé ñùhú xití vàsú-a. 28 Te cada iní-ndó sã cúu-xí dàtná ññi-í sã cáti òré cahni ñaha-güedé xii-í, te sã dúcáⁿ càti ññi-í xíãⁿ cutnùní ndáá sã Yã Ndiòxí cada-gá ingá núú sã váha sã cúu-xí vai ñáyiú dàtná ní cachí-gá cada-gá, te ío vai ñáyiú cada càhnu iní-gá cuèchi-yu. 29 Te na cächí tnúhu-í xii-ndo sã vítná-nã duha xihí ndihi ñaha-í xii-ndo ndùdí ndéhé yoho yàha stilé-a, te vã cóhó ndihi ñaha-gá-í xii-ndo, dico na sãá nduu nànihí tnáhá-ó núú ndécú Tãtã-í Dútú Ndiòxí táxi tnùní-gá te dàvã-áⁿ cada iní-ndó sã dàtná sã cóhó ndihi ñaha tucu-í xii-ndo chí ío cudí iní-ó —cächí-gá xähaⁿ-gä xii-güedé.

Té Pèlú cùñaha-dé xii ñáyiú sã ñã túú xini-dé Jèsús

(Mr. 14:26-31; Lc. 22:31-34; Jn. 13:36-38)

30 Te Jèsús ní xita-gá ìᵐ ndudú ndìhì cue téé xìca cuu ndìhì-gá, te dàtnùní ní xica-gá cuáhán-gá ndìhì-güedé yucu Olívú. 31 Te yàcáⁿ ní xáhaⁿ-gá xii-güedé:

—Na càchí tñùhu-í xii-ndo sã ncháá-ndó dándóo ñaha-ndo xii-í niú vitna, chí quee ndáá-xi nàcuáa càháⁿ-xi núú tütú Yã Ndiõxí núú càchí-xi: “Yúhú cuáha-í tñùhu cahni-güedé téé cùu toli, te nchaa mbéé-dě ndìhì-güedi cuténuu”, duha càchí-xi núú tütú-gá. 32 Dico na ndòto-í te codonùu-í núú-ndó quíhìⁿ distritú Galileá —càchí-gá xáhaⁿ-gá xii-güedé.

33 Te té Pèlú ní xáhaⁿ-dě xii-gá:

—Te cuèi nchaa-güedé ná dándóo ñaha-güedé xii-n, dico yúhú chí vá dándóo ñaha-í xii-n —càchí-dé xáhaⁿ-dě xii-gá.

34 Te Jèsús ní xáhaⁿ-gá xii-dé:

—Na càchí tñùhu ndáá-í xii-n sã niú vitna cùmání-gá cana ìᵐ líhì, te únì xito cáháⁿ-n núú ñyiu sá ñà túú xìnì ñáhà-n xii-í —càchí-gá xáhaⁿ-gá xii-dé.

35 Te té Pèlú ní xáhaⁿ-dě xii-gá:

—Cuèi na cùú ndìhì ñaha-í xii-n dico vá càháⁿ-í núú ñyiu sá ñà túú xìnì ñáhà-í xii-n —càchí-dé xáhaⁿ-dě xii-gá.

Te nchaa dava-gá cue téé xìca cuu ndìhì-gá ñu-ni ducaⁿ ní xáhaⁿ-güedé xii-gá.

Jèsús càháⁿ ndìhì-gá Yã Ndiõxí ìᵐ xichi núú nání Gètsemaní (Mr. 14:32-42; Lc. 22:39-46)

36 Te Jèsús ní quexìo-gá ndìhì cue téé xìca cuu ndìhì-gá ìᵐ xichi núú nání Gètsemaní, te xíáⁿ ní xáhaⁿ-gá xii-güedé:

—Chí cùnúcòo iha cundetun-ndo na quíhìⁿ-í yàcáⁿ cáháⁿ ndìhì-í Yã Ndiõxí —càchí-gá xáhaⁿ-gá xii-güedé.

37 Te ndèca-gá té Pèlú, ndìhì ndì ndúú déhe té Zebèdeu cuáhánⁿ, te ní ngüíta-xi súúní ndìhú iní-gá. 38 Te ní xáhaⁿ-gá xii cue téé únì-áⁿ:

—Súúní ndìhú iní-í dàtná sá cùú-í, te chí quéndóo nchòhò iha

te vá cùdú-ndó chí yúhú vá cùdú-í —càchí-gá xáhaⁿ-gá xii-güedé.

39 Te sa ñùnchí luha ní xica ndehe Jèsús núú ndécú-güedé, te ní ngüíñí xítí-gá te ní nuu núú-gá ndàa núú ñùhú, te ní ngüíta-gá càháⁿ ndìhì-gá Tãtá-gá Dútú Ndiõxí, te xáhaⁿ-gá:

—Yòhó Tãtá mée-í, càháⁿ ndàhú-í núú-n núú vá cùndèe iní-n tàunihnu ñaha-n xii-í cuendá sá vá ndòhò-í ná sãá òré, dico vá cádá-n nàcuáa càchí iní mée-í, chí cada-n nàcuáa càchí iní mée-n —càchí-gá xáhaⁿ-gá xii Tãtá-gá Dútú Ndiõxí.

40 Te sãtá ñí yáha ní cáháⁿ ndìhì-gá Tãtá-gá Dútú Ndiõxí, te cuánuhú-gá núú ñí dándóo-gá cue téé únì-áⁿ te xixídí-güedé òré ní nasáá-gá, te ní xáhaⁿ-gá xii té Pèlú:

—¿Náa ñá cùndèe iní-ndó vá cùdú-ni-ndo cuèdicó ìᵐ òré ñini càháⁿ ndìhì-í Yã Ndiõxí-áⁿ? 41 Te chí quéndóo tucu te cuhuⁿ iní-ndó vá cùdú-ndó, te cáháⁿ ndìhì-ndo Yã Ndiõxí cuendá sá vá dácàháⁿ ñáhà yùcu ñávàha xii-ndo càda-ndo sá ñà túú tàun-ndó càda-ndo. Te xìnì ndáá-í sá nchòhò cuìni-ndó càda-ndo nchaa nacúáa càháⁿ-í dícò-ni sá ñà túú ñihí ndéé-ndó —càchí-gá xáhaⁿ-gá xii-güedé.

42 Te xito cùu uú cuáhánⁿ tucu Jèsús cáháⁿ ndìhì-gá Tãtá-gá Dútú Ndiõxí, te xáhaⁿ-gá:

—Yòhó Tãtá mée-í, te núú vá cùndèe iní-n tàunihnu ñaha-n xii-í cuendá sá vá ndòhò-í, te cada nàcuáa càchí iní mée-n —càchí-gá xáhaⁿ-gá xii Tãtá-gá Dútú Ndiõxí.

43 Te òré ní yáha ní cáháⁿ ndìhì-gá Tãtá-gá Dútú Ndiõxí, te cuánuhú tucu-gá núú xíndecu cue téé únì xíca cùu ndìhì-gá-áⁿ, te xidí-ni tucu-güedé òré ní nasáá-gá, te ducaⁿ ñí quide-güedé chí súúní ñùhu saní núú-güedé. 44 Te ní dándóo ñaha tucu Jèsús xii-güedé xíáⁿ, te cuáhánⁿ tucu-gá xito cùu únì cáháⁿ ndìhì tucu-gá Tãtá-gá Dútú Ndiõxí, te ñu-ni tñùhu sá sá ní xáhaⁿ-gá xii Tãtá-gá Dútú Ndiõxí, ñu-ni tñùhu-áⁿ ní xáhaⁿ tucu-gá.

45 Te sáta ní yáha ní cáháⁿ ndihi-gá Tátá-gá Dútú Ndióxi, te cuánuhú tucu-gá núú ndécú cuè téé xica cuu ndihi-gá-áⁿ, te òré ní nasáá-gá, te ní xáhaⁿ-gá xii-güedé:

—¿Te náa xidí-ni tucu-ndo? Te sa ní sáá òré cuáha cuèndá ñáhá-güedé xii-í núú cuè téé ndécú ichi cuehé ichi duha. 46 Dico vitna chí ndácóo na quíhíⁿ-ó, chí sa véxi téé cuáha cuèndá ñáhá xii-í núú cuè téé cùú úhú iní ñáhá —càchí-gá xáhaⁿ-gá xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mr. 14:43-50; Lc. 22:47-53; Jn. 18:2-11)

47 Te càháⁿ dúcáⁿ-ní Jèsús ní quexìo té Jùdás. Te núú tñhá téé-áⁿ cùú ùxúú tñhá cue téé xica cuu ndihi-gá ní cùu te ducaⁿ ní quide-dé. Te ndihi-dé vai cue téé ní quexìo te dava-güedé xínehe-güedé machití, te dava-güedé xínehe-güedé carrutí. Te cue téé-áⁿ ní tendaha ñaha cue dútú cúnúu, ndihi cue téé cùu sacuéhé núú ñáyiú isràél.

48 Te té Jùdás téé cuáha cuèndá ñáhá xii-gá-áⁿ sa ní xitnúhu-dé cue téé-áⁿ nàcuáa cada-dé cuáha cuèndá-dé Jèsús núú-güedé, te duha ní xáhaⁿ-dè xii-güedé:

—Cundehe-ndo téé na tèyuhu-í te téé-áⁿ tñi-ndo-dè chí téé-áⁿ cùú-dè téé ndéé iní-ndó —duha ní xáhaⁿ-dè xii-güedé.

49 Te sáta dúcáⁿ ní xáhaⁿ-dè xii-güedé, te ní sándehe yatni-dé núú Jèsús, te ní xáhaⁿ-dè xii-gá:

—¡Ràcióⁿ Mèstrú! —càchí-dé xáhaⁿ-dè xii-gá.

Te ní teyuhu ñaha-dé xii-gá. 50 Te Jèsús ní xáhaⁿ-gá xii-dé:

—Yòhó téé ní chitnahá ñáhá xii-í, ¿ná cuíni-n núú véxi-n núú-í? —càchí-gá xáhaⁿ-gá xii-dé.

Te òré-ni-áⁿ ní tñi ñaha cuè téé ndihi té Jùdás-áⁿ xii Jèsús, te ndéca ñaha-güedé xii-gá cuáháⁿ.

51 Te ñiⁿ cue téé ndihi Jèsús ní tava-dé machití-dé, te ní

xehndé-ni-dé ñiⁿ xio lóho ñiⁿ téé xinu cuechi núú dútú cúnúu te ní quendeé duuⁿ lóho-dé. 52 Te Jèsús ní xáhaⁿ-gá xii téé ducaⁿ ní xehndé lóho téé-áⁿ:

—Nachihí machití-n ñiⁿ-xi, chí nchaa cue téé na nàá ndihi machití cahni-güedé tñaha ñáyiú-güedé te diu-ni ndihi machití cuú méé-güedé tucu. 53 Te na càchí tñuhu-í xii-ndo sá núú yúhú cuíni-í cacú-í te cáháⁿ ndihi-í Tátá-í Dútú Ndióxi, te tendaha-gá cuéhé víhí espíritú xínú cuèchi núú-gá quixi-xi dàcácu ñaha-xi xii-í. 54 Dico núú ducaⁿ na càda-í te vá queé ndáa-xi nàcuáa cáháⁿ-xi núú tütú Tátá-í Dútú Ndióxi núú ndéé tñuni sá dàcuítí xini ñuhu-xi nándi ndoho-í —càchí-gá xáhaⁿ-gá xii-dé.

55 Te Jèsús ní xáhaⁿ-gá xii cue téé ducaⁿ ní tñi ñaha xii-gá-áⁿ:

—Nchaa-ni nduu ní xini-ndó ní xóo cunucóo-í xití veñúhu càhnu sá ìo cúnúu ní xóo danèhé-í ñáyiú, te ñá túú ní tñi ñaha-ndo xii-í, ¿te ná cuèndá vitna quide ñaha-ná-ndó xii-í dàtná quidé-ndó ñiⁿ ñadúhú, nèhe-ná-ndó màchití nèhe-ná-ndó càrrutí ní quexìo ní tñi ñaha-ndo xii-í-i? 56 Dico dacuítí sá dúhá càda-xi nacuáa quee ndáa-xi nàcuáa ní cáháⁿ cue téé ní xóo cáháⁿ tñuhu Yá Ndióxi ndéé sanaha ní ngódó tñuni núú tütú-gá —càchí-gá xáhaⁿ-gá xii-güedé.

Te nchaa cue téé xica cuu ndihi-gá ní xinu-güedé ní dándóo ñaha-güedé xii-gá.

Jèsús ndécú-gá jùndá

(Mr. 14:53-65; Lc. 22:54-55, 63-71; Jn. 18:12-14, 19-24)

57 Te cue téé ní tñi ñaha xii Jèsús ndécá ñaha-güedé xii-gá cuáháⁿ núú té Caifás téé cùu dútú cúnúu-gá. Te núú ndécú dútú cúnúu-gá-áⁿ sa ní tacá cue téé dàcuaha ñaha xii ñáyiú nchaa tñuhu ní chídó tñuni ndí Moisés, ndihi cue téé cùu sacuéhé núú ñáyiú isràél cuèndá cada-güedé jùndá. 58 Te té Pèlú xica xica-ni nchicúⁿ ñáhá-dè xii-gá cuáháⁿ ní sáa-dé

ndéé quehé vehe núú ndécú tēe cùu dútú cúnùu-gá-án, te xián ní ngóo-dé ndihi cue tēe cùu poleciá cuendá cuní-dé quini-dé nása cada ñaha-güedē xii Jèsús.

⁵⁹ Te cue tēe cùu dútú cúnùu, ndihi cue tēe cùu sacuéhé núú ñáiyu israhél, ndihi nchaa dava-gá cue tēe xíndecu jündá ndúcú-güedē nàcuáa cada-güedé dacàa-güedé ìn cuéchi díquí Jèsús cuéi cùu-xi ìn sá ñá ndáa cuendá níhí-güedē nàcuáa cada-güedé cahni ñaha-güedē xii-gá. ⁶⁰ Te vai cue tēe ní ngúita-güedé dacàa-güedé cuéchi díquí-gá, dico ñá túú ní cùndee tnúhu-güedé chi mee-ni tnúhu ndehnde cùu-xi. Te sátá dúcán te ní quexìo tucu úú tnàhá cue tēe dācuandehnde-güedé, ⁶¹ te xáhaⁿ-güedē xii nchaa cue tēe xíndecu jündá:

—Véxi-ndí cāchí tnúhu-ndí xii-ndo sá tēe-a cāchí-dé sá dāngoyo-dé veñuhu cāhnu sá ìo cūnuu núú chíñuhu-o Yá Ndióxi, te dandaa-dé ingá veñuhu saa, ñu-ni núú cáá tnàhí veñuhu-án, te xití úní-ni nduu sa nadaxínu-dé, duha cāchí-dé —cāchí-güedé xáhaⁿ-güedé.

⁶² Te tēe cùu dútú cúnùu-gá-án ní ndacuíní-dé, te xáhaⁿ-dē xii Jèsús:

—¿Ná cuendá duha ndùu tnúhu cāháⁿ cue tēe-a cuendá-n? Te cāháⁿ núu nása cunduú tnúhu cāháⁿ-n —cāchí-dé xáhaⁿ-dē xii-gá.

⁶³ Dico Jèsús ñá túú tnàhí ní cāháⁿ-gá. Te tēe cùu dútú cúnùu-gá-án ní xáhaⁿ tucu-dé xii-gá:

—Yúhú, cācú nèhe-í Yá Ndióxi chi cuní-í sá cāchí tnúhu ndáa-n xii-ndí núu sá díú Crístú Déhe Yá Ndióxi Yaa ní tendaha-gá véxi ñuyíu-a cùu-n —cāchí-dé xáhaⁿ-dē xii-gá.

⁶⁴ Te Jèsús ní xáhaⁿ-gá xii-dé:

—Ñu Yaa-án cùu-í dātná cāchí-n-án, te na cāchí tnúhu-í xii-ndo sá sáa nduu te quini-ndó yúhú Tēe cùu ñaní tnàhá-ndó nchaa-ndo cunucóo-í xio cùha Dútú Ndióxi Yaa ndácú quide nchaandi

túhú sá vāha. Te dāvá-án quini ñáhá-ndó xii-í quee-í andiu quixi-í ichi xití vícò —cāchí-gá xáhaⁿ-gá xii-dé.

⁶⁵ Te dútú cúnùu-gá-án ní ndátá-dē dóo níhnu-dē cuendá sá ñá túú ní tnàhá iní-dé nàcuáa ní cāháⁿ Jèsús, te ní xáhaⁿ-dē xii nchaa cue tēe xíndecu jündá:

—Tēe-a cāháⁿ úhú-dé cuendá Yá Ndióxi, te vitna ñá túú-gá xini ñuhu-xi cue tēe cāháⁿ ndáa núu ndáa sá ndécuechi-dé àdi ñá túú ndécuechi-dé, chi sa ní tecú dóho-o nàcuáa ndùu tnúhu ní cāháⁿ-dē ní cāháⁿ úhú-dé cuendá Yá Ndióxi. ⁶⁶ Te nchaa-ndo chí cāháⁿ vitna núu nása sàni iní-ndó cunduú cuendá tēe-a —cāchí-dé xáhaⁿ-dē xii nchaa cue tēe-án.

Te cue tēe-án ní xáhaⁿ-güedé:

—Nchúhú cāchí-ndí sá tàú-xi cuú-dé chí ndécuechi-dé —cāchí-güedé xáhaⁿ-güedé.

⁶⁷ Te ní ngúita-güedé ní tíu díí ñáhá-güedé xii-gá te ní caniha-güedé, te tnàhá núú-gá ní cani-güedé. ⁶⁸ Te ní cudíquí ndeé ñáhá-güedé xii-gá, te xáhaⁿ-güedé:

—Yòhó Tēe cāchí sá cúú Crístú Yaa ní tendaha Yá Ndióxi véxi ñuyíu-a, cāháⁿ ná còto yoo ní caniha xii-n —cāchí-güedé xáhaⁿ-güedé xii-gá.

Té Pèlú xáhaⁿ-dē xii ñáiyu sá ñá túú xini-dé Jèsús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Te ñini núcòo té Pèlú quehé, te ní sáháⁿ ìn xíchí xínú cuéchi vehe-án núu-dé, te xáhaⁿ-xi xii-dé:

—Yòhó tnàhá-n cùu-n tēe xica cuu ndihi Jèsús tēe distritú Galileá —cāchí-xi xáhaⁿ-xi xii-dé.

⁷⁰ Te té Pèlú ñá túú ní nūnuu-dé, te ndedòho nchaa ñáiyu xíndecu-án ní xáhaⁿ-dē xii xíchí-án:

—Yúhú, ñá túú cùtnuní iní-í nása ndùu tnúhu cāháⁿ-n —cāchí-dé xáhaⁿ-dē xii-xi.

⁷¹ Te ní xica té Pèlú cuáhá-dé ndaa nacuáa nchií yuyèhe vehe-án, te ní xini ñáhá tucu ingá xíchí xínú

cuèchi vehe-án, te xáhaⁿ-xi xii nchaa ñáyiú xíndecu-án:

—Tée-a tnàhá-dé xicá cùu-dé ndihí Jèsús téé ñuú Nazàrét — càchí-xi xáhaⁿ-xi xii-yu.

⁷² Te té Pèlú ní xáhaⁿ-dè:

—Nchàcuiṭi Yá Ndiòxí sá ñà túú xini-í téé càcunehe-ndo-án — càchí-dé xáhaⁿ-dè xii-yu.

⁷³ Te tna tnaa-ni ní cuu, te dava ñáyiú xíndecu xíán ñí xáhaⁿ tùcú-yu xii té Pèlú:

—Ndáá sá tnàhá-n xica cuu-n ndihí téé ndèca-güedé cuànguihu-án, chí ñáyúhú cáháⁿ-n —càchí-yu xáhãⁿ-yu xii-dé.

⁷⁴ Te té Pèlú ní xáhaⁿ-dè xii-yu:

—Nchàcuiṭi Yá Ndiòxí sá yúhú cáháⁿ ndáá-í sá ñà túú xini-í téé càcunehe-ndo-án —càchí-dé xáhaⁿ-dè xii-yu.

Te òré-ni-án ñí cana ñí lihi, ⁷⁵ Te ní ndacu iní té Pèlú nàcuáa ní xáhaⁿ Jèsús xii-dé sá cùmání-gá cana ñí lihi te úní xito cáháⁿ-dé sá ñà túú xini ñàhá-dè xii-gá. Te ní quee-dé tnuú ñáyiú-án cuáhãⁿ-dé ñí xio ní ndáhyú víhí-dè ní ndixi cuéchi iní-dé.

27

Ndèca-güedé Jèsús cuáhãⁿ núú tē Pìlatú
(Mr. 15:1; Lc. 23:1-2; Jn. 18:28-32)

¹ Te sátá ñí túndaá te nchaa cue téé cùu dútú cùnùu, ndihí cue téé cùu sacuéhé núú ñáyiú isràél ní ndatnúhu-güedé nàcuáa cada-güedé cahni-güedé Jèsús. ² Te ní dácútú ñàha-güedé xii-gá, te ndèca ñàha-güedé cuáhãⁿ núú tē Pìlatú téé cùu gobiernú.

Ní xihí té Jùdás

³ Te té Jùdás téé ní sáha cuèndá ñàhá xii Jèsús ní cutnùnì iní-dé sá cáhni ñàha-güedé xii-gá, te ní ndixi cuéchi iní-dé sá ñà túú ní quide váha-dé sá dúcãⁿ ñí quide-dé ní sáha cuèndá ñàhá-dè xii-gá núú cuè téé cùu úhú iní ñàhá, te ní xica-dé cuáhãⁿ-dé danchòcáva-dé ócò úxí díhúⁿ cuixíⁿ núú cuè dútú cùnùu-án,

ndihí núú cuè téé cùu sacuéhé núú ñáyiú isràél, chí diu cue téé-án ñí sáñaha-güedé díhúⁿ xii-dé. ⁴ Te òré ní quexìo té Jùdás-án núú ndécú-güedé, te xáhaⁿ-dè xii-güedé:

—Yúhú, ñà túú ní quide váha-í sá dúcãⁿ ñí quide-í ní taxi cuèndá-í ñí téé ñà túú tnàhí cuéchi-xi cahni-ndo-dé —càchí-dé xáhaⁿ-dè xii-güedé.

Te cue téé-án ñí xáhaⁿ-güedé xii-dé:

—Nchúhú, ñà túú nágá cuèndú cuini-ndí cáháⁿ ndihí ñàha-ndí xii-n, te mee-n ñàha núu nása sàni iní-n càda-n —cachí-güedé xáhaⁿ-güedé xii-dé.

⁵ Te té Jùdás ní dāngoyo-dé díhúⁿ-án xití veñúhu càhnu sá ño cùnùu, te ní xica-dé cuáhãⁿ-dé ní dácuehné-dé mée-dé.

⁶ Te cue dútú cùnùu ní naqueheⁿ-güedé díhúⁿ-án, te ní xitnàha-güedé:

—Díhúⁿ-a ní quéyãhu cuèndá sá cùu ñí ñáyiú, núu xíãⁿ vá cúu nàchihi-o xití càjá núú ñúhú sá cúu cuèndá Yá Ndiòxí —càchí-güedé xitnàha-güedé.

⁷ Te ní ndatnúhu-güedé te ní cuu ñí nnuu-güedé cuèndá nacuaaⁿ-güedé ñí xichi núú cáá ñúhu danani-güedé Núú Cuãha Nchaa Sá Cuãha Ñuhu, te xíãⁿ ñí saaⁿ-güedé cuèndá xíãⁿ nguñdúxi nchaa ñáyiú véxi xica. ⁸ Te ní nadáma diu ñuhu-án, te vitna dānani-güedé Ñuhu Yáhu Níñí, duha dānani-güedé. ⁹ Te ducaⁿ ñí cuu chí ní quee ndáá-xi nàcuáa ní cáháⁿ ndí Jeremiás téé ní xóo cáháⁿ tnúhu Yá Ndiòxí ndéé sanaha, te duha ní cachí ndí: “Cue téé isràél ní cachí-güedé sá ócò úxí díhúⁿ cuixíⁿ cháhu-güedé cuèndá ñí téé queheⁿ cuèndá-güedé. Te díhúⁿ-án nàqueheⁿ-güedé, ¹⁰ te cuaaⁿ-güedé ñí xichi núú nání Núú Cuãha Nchaa Sá Cuãha Ñuhu, te ducaⁿ càda-xi chí ducaⁿ ñí cachí Yá Ndiòxí cunduu”, duha ní cachí ndí Jeremiás-án.

Jèsús ndécú-gã núú tẽ Pilatú
(Mr. 15:2-5; Lc. 23:3-5; Jn. 18:33-38)

¹¹ Te Jèsús ndécú-gã núú tẽ Pilatú tée cùu gobiernú, te tée-án nĩ xícáⁿ tnúhú-dẽ núú-gã, te xãhaⁿ-dẽ xii-gá:

—¿Ndáá sá díú-n cùu-n tée yìndaha ñaha xii ñáyiú isràél-ãⁿ? — cãchí-dé xãhaⁿ-dẽ xii-gá.

Te Jèsús ní xãhaⁿ-gã xii-dé:

—Diu-í yìndaha-í-yu —cãchí-gã xãhaⁿ-gã xii-dé.

¹² Te cue dútú cúnùu ndihì cue tée cùu sacuéhé núú ñáyiú isràél sácáⁿ cuéchi-güedé núú tẽ Pilatú cuendá Jèsús, dico mee-gã ní ñⁿ tnúhu ñá túú ní cãháⁿ-gá. ¹³ Te té Pilatú ní xãhaⁿ-dẽ xii-gá:

—Cáháⁿ, ná cuendá ñá túú cãháⁿ-n, te cundehe nã ndéé duha titní cuéchi dàcaa cue tée-a díquí-n —cãchí-dé xãhaⁿ-dẽ xii-gá.

¹⁴ Dico Jèsús ñá túú tnàhí ní cãháⁿ-gá, te té Pilatú tée cùu gobiernú-án ño ní cuñúhu-dé sá dúcáⁿ ñá túú tnàhí ní cãháⁿ-gá.

Ní quide ndáá-güedé sá cãhni-güedé Jèsús

(Mr. 15:6-20; Lc. 23:13-25; Jn. 18:38-19:16)

¹⁵ Te ndi tnahá nduu vico pascuá dácãcu té Pilatú tée cùu gobiernú-án ñⁿ tée yìhi vecaá chi ducaⁿ tnàhí quide-dé, te mee ñáyiú cãháⁿ-yu te núu ndëdacãa tée yìhi vecaá-án cãcu-dé te tée-án dácãcu-dé. ¹⁶ Te dàvá-án yìhí ñⁿ tée nàni Barrabás vecaá, te tée-án ió cuendú-dé sá ño nèhé ní quide-dé. ¹⁷ Te ní natacá nchaa ñáyiú, te té Pilatú ní xícáⁿ tnúhú-dẽ núú-yu, te xãhaⁿ-dẽ:

—¿Ndëdacãa núú ùú cue tée-a cuini-ndó dácãcu-í-güedé-í? ¿Té Barrabás ãⁿ Jèsús tée nàni Cristú? — cãchí-dé xãhaⁿ-dẽ xii-yu.

¹⁸ Te ducaⁿ nĩ cãháⁿ té Pilatú, chi ní cutnùni iní-dé sá dicó sá cuedú iní-güedé ducaⁿ nĩ quide-güedé ní sãha cuendá ñáhá-güedé xii Jèsús núú-dẽ.

¹⁹ Te nini nùcúo té Pilatú núú xèhndé-dé cuéchi ní tendaha ñàdihí-dé tnúhu cuáháⁿ núú-dẽ, te duha ndùu tnúhu ní tendaha-aⁿ: “Vá cãní iní-n nã cada-n tée ní taxi cuendá ñáhá-güedé xii-n, tée ñá túú tnàhí cuéchi-xi, chi icuini ío nèhé ní dácóto ñaha saní-í cuendá-dé”, duha ndùu tnúhu ní xãhaⁿ-aⁿ xii té Pilatú.

²⁰ Dico cue tée cùu dútú cúnùu, ndihì cue tée cùu sacuéhé núú ñáyiú isràél ní xãhaⁿ-güedé xii ñáyiú sá ná cuñáhá-yu xii té Pilatú dácãcu-dé té Barrabás te cahni-dé Jèsús, te ní quide-yu nàcuáa ní xãhaⁿ-güedé.

²¹ Te té Pilatú-án nĩ xãhaⁿ tucu-dé xii-yu:

—¿Ndëdacãa núú ùú cue tée-a cuini-ndó dácãcu-í? —cãchí-dé xãhaⁿ-dẽ xii-yu.

Te ní xãháⁿ-yu xii-dé:

—Té Barrabás dácãcu-n — cãchí-yu xãháⁿ-yu xii-dé.

²² Te té Pilatú ní xícáⁿ tnúhú-dẽ núú-yu, te xãhaⁿ-dẽ:

—¿Te ná cuini-ndó cada-í Jèsús tée nàni Cristú tée cãchí sá Yã Ndiöxí ní tendaha ñaha xii-dé véxi-dé ñuyíú-a-í? —cãchí-dé xãhaⁿ-dẽ xii-yu.

Te nchaá-yu ní cãháⁿ-yu, te xãháⁿ-yu:

—Cata caa-dé núú cùrúxí — cãchí-yu xãháⁿ-yu xii-dé.

²³ Te té Pilatú ní xãhaⁿ tucu-dé xii-yu:

—¿Te ná cúú cuéchi ní quide-dé núu ducaⁿ cuini-ndó cada-í-dé-í? — cãchí-dé xãhaⁿ-dẽ xii-yu.

Dico nchaá-yu uuⁿ-gá níhi ní cãháⁿ-yu, te xãháⁿ-yu xii-dé:

—¡Cata caa-dé núú cùrúxí! — cãchí-yu xãháⁿ-yu xii-dé.

²⁴ Te té Pilatú ní cutnùni iní-dé sá vá nihí-dé nàcuáa cada-dé, chi uuⁿ-gá ní nguíta ñáyiú xícuaá-yu, te xíãⁿ ní xícáⁿ-dé ndute ní ndáhá-dé núú nchaa ñáyiú, te ní xãhaⁿ-dẽ xii-yu:

—Tée-a cùu-dé ñⁿ tée ñá túú tnàhí cuéchi-xi, te nchòhó cuini-ndó sá cùú-dé, dico diu-ni mee-ndo cùdo yáhu-ndo-dẽ chi yúhú vá

cuidó yáhu-í-dé —càchí-dé xáhaⁿ-dë xii-yu.

²⁵ Te nchaá-yu ní xáhãⁿ-yu xii-dé:

—jDiu nchúhú ndihí cue déhe-ndí cuido yáhu-ndí-dé! —càchí-yu xáhãⁿ-yu.

²⁶ Te sátá dúcáⁿ te té Pilatú ní dácácu-dé té Barrábás, te ní táuchíúⁿ-dë ní cani-güedé Jèsús. Te sátá dúcáⁿ ní quide ñaha-güedë xii-gá, te ní táuchíúⁿ-dë candeca ñaha-güedë xii-gá quihíⁿ cata caa ñaha-güedë xii-gá núú cùrúxí.

²⁷ Te cue téé cùu sandadú té Pilatú ndécá-güedë Jèsús cuánguihu xiti vehe càhnu cuu cuendá-dé, te cue téé cùu sandadú-áⁿ ní cana-güedé dava-gá cue sandadú núú dúcáⁿ ndèca-güedé Jèsús cuánguihu-áⁿ.

²⁸ Te xiáⁿ ní taunuu-güedé dóó-gã, te ní dácúihnú ñaha-güedé xii-gá ìⁿ dóó tícuèhé víhí. ²⁹ Te ní cadúha-güedé ìⁿ coróná iñu ní chihi-güedé díquí-gã, te ní chitnii-güedé ìⁿ carrutí ndaha cùha-gá, te ní nguñí xítí-güedé núú-gã cúdíquí ndeé ñáhá-güedë xii-gá, te xáhãⁿ-güedë:

—jÍo càhnu cuu yohó téé yíndaha ñaha xii ñáyiú isràél! —càchí-güedé xáhãⁿ-güedë xii-gá.

³⁰ Te ní tiú díí ñáhá-güedë xii-gá, te ní queheⁿ-güedé carrutí sá ní sáñaha-güedë xii-gá te ní ducuⁿ-güedé díquí-gã. ³¹ Te sátá ní yáha ní cudíquí ndeé ñáhá-güedë xii-gá, te ní nataunuu ñaha-güedë xii-gá dóó tícuèhé víhí sá ní dácúihnú ñaha-güedé xii-gá, te ní dándíúnuu ñaha-güedë xii-gá dóó méé-gã, te dátñuní ndécá ñaha-güedé cuáháⁿ núú cáta càa ñaha-güedé xii-gá núú cùrúxí.

Sàta caa-güedé Jèsús núú cùrúxí

(Mr. 15:21-32; Lc. 23:26-43; Jn. 19:17-27)

³² Te ñuhu-güedé ndihí-gá ichi, te ní naníhí-güedé ìⁿ téé ñuú Cirené

nání-dë Xímú, te téé-áⁿ ní quide yica-güedé ní xido-dé cùrúxí sá nchídó Jèsús.

³³ Te ní sáá-güedé ndihí-gá ìⁿ xichi núú nání Gólgotá, te tnúhu-áⁿ quéè-xí: Núú nání yìqui díquí ndíyi, duha quèè-xi tnúhu-áⁿ. ³⁴ Te xiáⁿ sáñaha-güedë ndudí úá coho-gá ní cùu, te ñá túú ní xihí-gá chi dico-ni ní xito ndeé-gá.

³⁵ Te ní sata caa ñaha-güedë xii-gá núú cùrúxí, te sátá dúcáⁿ te cue téé cùu sandadú-áⁿ ní xito ndeé-güedé núu ndèdacàa-güedé cuu cuendá-güedé dóó-gã. Te ducaⁿ ní cuu chi ní quee ndáá-xi nàcuáa ní cáháⁿ ìⁿ téé ní xóo cáháⁿ tnúhu Yá Ndióxi ndeé sanaha yòdo tnuní núú tütú-gá, te duha càchí-xi: “Ní xito ndeé-güedé núu ndèdacàa-güedé cuu cuendá-güedé dóó-gã”, duha ní cachí téé-áⁿ te ducaⁿ ní ngódó tnuní núú tütú-gá.

³⁶ Te sátá dúcáⁿ ní quide-güedé, te ní ngóo-güedé ndeé ñáhá-güedë xii-gá. ³⁷ Te ní taxi ndecu-güedé ìⁿ sá ndeé lètrá ndàa díquí-gã. Te lètrá-áⁿ càháⁿ-xi ná cuendá ducaⁿ ní quide ñaha-güedë xii-gá, te duha càháⁿ lètrá-áⁿ: “Téé-a cùu-dé téé yíndaha ñaha xii ñáyiú isràél”, duha càchí-xi. ³⁸ Te tnáhá úú cue téé cùu ñadúhú ní sata caa-güedé diu-ni núú cùrúxí tucu, te ìⁿ-dé ní sata caa-güedé xio cùha-gá, te ingá-dé ní sata caa-güedé xio dátñi-gá.

³⁹ Te nchaa ñáyiú yáha yatni núú tácàa-gá-áⁿ, te dàcuicó-yu díquí-yu ndèhe ñáhá-yu xii-gá, te xícuèhé ñáhá-yu.

⁴⁰ Te xáhãⁿ-yu xii-gá:

—Yohó càchí-n sá dàngoyo-n veñúhu càhnu sá ìo cùnuu, te dandàa-n ingá veñúhu saa, te xiti úní-ni nduu sa nadaxínu-n, te vitna tanuu núú cùrúxí-áⁿ dácácu-n mée-n te núu ndisa sá Dèhe Yá Ndióxi cúu-n —càchí-yu xáhãⁿ-yu xii-gá.

⁴¹ Te diu-ni ducaⁿ cúdíquí ndeé ñáhá cuè téé cùu dútú cúnúu xii-gá, ndihí cue téé dàcuaha ñaha xii ñáyiú

nchaa tnúhu ní chídó tnùní ndíi Moisés, ndíhi cue tée cùu fariséú, ndíhi cue tée cùu sacuéhé núú ñáyiú israél, te xítñaha-güedé:

42 —Tée-a ní ndacu-dé ní dácácu-dé dava ñáyiú, te mee-dé ñá ndácú-dé dácácu nihnu-dé méé-dé. Te núu ndisa sá cúú-dé tée yíndaha ñaha xii ñáyiú israél, te na cùndehe-o nuu-dé núú cùrúxí-a cuendá quíndáá iní-ó-dé. 43 Te càchí-dé sá sándáá iní-dé Yá Ndiöxí, te mee-gá ná dácácu ñaha-gá xii-dé te núu cùndahú iní ñáhá-gá, chi mee-dé càchí-dé sá Déhe-gá cúú-dé —càchí-güedé xítñaha-güedé.

44 Te ndéé tnàhá cue tée cùu ñadúhú táca xio xio diñi-gá xícüehé ñáhá-güedé xii-gá.

Ní xíhi Jèsús

(Mr. 15:33-41; Lc. 23:44-49; Jn. 19:28-30)

45 Te òré ní cuu cuádava nduu te ní cunee nihíi ñuyíú, te ducaⁿ-ní càa ní cuu caá úní sacuaa. 46 Te òré sa ta cüyatni cuu caá úní sacuaa-án, te níhi ní cáháⁿ Jèsús, te càchí-gá:

—Èlí, Èlí, ¿láma sabàctani? —càchí-gá.

Te tnúhu-án quée-xí: Ndiöxí méé-í, Ndiöxí méé-í, ¿ná cuendá ní dáñá ñaha-n xii-í?, duha quèe-xi tnúhu-án.

47 Te dava cue tée xíndecu yatni núú táca-gá-án ní tecú dóho-güedé nàcuáa ní cáháⁿ-gá, te ní xítñaha-güedé:

—Tée-a càna-dé té Èliás —càchí-güedé xítñaha-güedé.

48 Te òré-ni-án ní quene cunu ñⁿ cue tée xíndecu-án ní queheⁿ-dé luha cáchí, te ní chindóyo-dé xití ndudí íá, te ní chinenu-dé díqui ñⁿ yutnu càni te ní ndocani-dé ní chihi-dé yuhu-gá. 49 Te dava-güedé ní xáhaⁿ-güedé xii téé-án:

—Cundetú tnaa na cùndehe-o nacoto núu quixí té Èliás dácácu ñaha-dé xii-dé —càchí-güedé xáhaⁿ-güedé xii téé-án.

50 Te Jèsús níhi ní cana saa-gá, te ní xíhi-ni-gá. 51 Te sáta dúcáⁿ te ní ndátá dõó cúú còrtiná xití veñúhu càhnu sá ño cùnuu ní quée dava ndáá, te ndàa núú ñnu ní ngúíta-xi ní ndátá, te ní tnáa, te dava cava nahnu ní táhú. 52 Te dava yaú núú yíndüxi ñáyiú ní xíhi ní sándáá iní ñáhá xii Yá Ndiöxí ní naçaáⁿ te ní ndotó-yu. 53 Te sáta ní yáha ní ndoto Jèsús, te cue ñáyiú ní ndoto-án cuàngühú-yu xití ñuu Jerusàlén, te cue ñáyiú ñuu-án ño vai-yu ní xiní-yu cue ñáyiú ducaⁿ ní ndoto-án.

54 Te sá dúcáⁿ nãndi ní guide-xi, ndíhi sá dúcáⁿ ní tnáa xíáⁿ ño ní yuhú tée cùu capitáⁿ ndíhi ichaa dava-gá cue tée ndècu ndíhi-dé ndèé-güedé yiqui cùñú Jèsús, te ní xítñaha-güedé:

—Sá ndàá ndisa sá díú tée-a cùu-dé Déhe Yá Ndiöxí ní cùu —càchí-güedé xítñaha-güedé.

55 Te xica xínutñi vai ñáyiú diñi ndéhè-yu nchaa nàcuáa ní guide ñaha-güedé xii Jèsús, te ñáyiú-án cúú-yu ñáyiú ní chindèé-yu Jèsús, te ndéé distritú Galilea ní chinchícúⁿ ñáhá-yu xii-gá. 56 Te tnúú ñáyiú-án tnàhá tá Màriá Magdalèna, ndíhi tá Màriá nãná tẽ Jàcobó ndíhi té Chèé, ndíhi nãná cue déhe té Zebèdeú.

Chíndüxi-güedé Jèsús

(Mr. 15:42-47; Lc. 23:50-56; Jn. 19:38-42)

57 Te ndècu ñⁿ téé cuica nàni-dé Chèé te cùu-dé téé ñuu Arimàtea, te tnàhá-dé ní tnahá tnúhu-dé ndíhi Jèsús. Te òré sa ní cuaa, 58 te ní sáháⁿ-dé núú tẽ Pilatú, te xáhaⁿ-dè núu vá cùndèe iní-dé daña-dé chíndüxi-dé yiqui cùñú Jèsús. Te té Pilatú-án ní sáha-dé tnúhu, te ní táuchíúⁿ-dè sá cuáha cuendá-güedé té Chèé-án yiqui cùñú-gá. 59 Te té Chèé-án ní queheⁿ cuendá-dé yiqui cùñú-gá, te ní chidúcúⁿ-nuu-dé ñⁿ dóó cùxíⁿ dóó cándò. 60 Te sa nchí ñⁿ yaú sáa ní caáⁿ té Chèé-án ñⁿ yiqui naha càva te xíáⁿ cúú cuendá-dé, te yaú-án ní chihi-dé yiqui cùñú

Jèsús, te dàtnùní ní sadí-dé ìᵀn yúú cáhnú yúú quèhéⁿ yuhu yàú-áⁿ, te ní xica-dé cuánuhú-dé. ⁶¹ Te tnàhá tá Màriá Magdalèná, ndìhì ingá xíchí nání Màriá ní quexió-yu ní ngóo-yu yatni núú nchìi yáú-áⁿ.

Cue téé ndèé yáú núú yíhí yìqui cuñú Jèsús

⁶² Te sátá nǐ yáha ní quide túha ñáyiu nchaá sá nándìhì-yu nduu tnèé nduu ndètatú-yu-áⁿ, te ìiu-ni nduu ndètatú-yu-áⁿ nǐ sáháⁿ cue dútú cúnùu, ndìhì cue téé cùu fariséú ní cáháⁿ ndìhì-güedé té Pìlatú. ⁶³ Te xáhaⁿ-güedé xii-dé:

—Yòhó téé cùnùu, véxi-ndí càchí tnúhu-ndí sá nǐ ndacu iní-ndí sá tée ndehnde nǐ xíhí-áⁿ càchí-dé òré ndécú-gá-dé sá ndùu úní sá cùú-dé, te ndoto-dé. ⁶⁴ Te tendaha-n cuè téé na quíhíⁿ-güedé cundeé-güedé yuhu yáú núú nǐ chihi-güedé yìqui cùñú-dé, chi na cuáháⁿ quíhíⁿ cue téé ní xica cuu ndìhì-dé duhu-güedé yìqui cùñú-dé, te cùñaha-güedé xii ñáyiu sá nǐ ndoto-dé. Chi núu ducaⁿ na càda-güedé te ío-gá dandàhú-güedé cue ñáyiu dàcúxí dàtná ní quide mee tée ní xíhí-áⁿ —càchí-güedé xáhaⁿ-güedé.

⁶⁵ Te té Pìlatú ní xáhaⁿ-dè xii-güedé:

—Náu cue sandàdú-a can-deca-ndo-güedé quíhíⁿ, te cadí váha-ndo ndìhì-güedé yuhu yáú-áⁿ nàcuáa tàú-xi cunduu, te na cundeé-güedé nàcuáa sàni iní-ndó cùnduu —cachí-dé xáhaⁿ-dè xii-güedé.

⁶⁶ Te cue téé-áⁿ nǐ xica-güedé cuáháⁿ-güedé, te ní tee-güedé ìᵀn sèñá yúú ndèdí yèhe yáú-áⁿ, te ní dándòo-güedé cue sandàdú-áⁿ ndèé-güedé yáú-áⁿ, te ducaⁿ nǐ quide-güedé cuèndá sá vǎ yòo quíhíⁿ nacaáⁿ yáú-áⁿ.

28

Ní ndoto Jèsús

(Mr. 16:1-8; Lc. 24:1-12; Jn. 20:1-10)

¹ Te sátá nǐ yáha nduu ndètatú ñáyiu, te ndumíngú nehé víhí-ní nǐ xica tá Màriá Magdalèná ndìhì ingá xíchí nání Màriá cuángotó-yu yáú núú nǐ chihi-güedé yìqui cùñú Jèsús. ² Te uuⁿi níhì víhì ní tnáa, te òré ducaⁿ nǐ quide-xi chi ìᵀn espíritú xínú cuèchi núú Yá Ndiòxí ní quexio-xi núú dúcáⁿ nchìi yáú núú nǐ chihi-güedé yìqui cùñú Jèsús, te ní xócání espíritú-áⁿ yúú ndèdí yèhe yáú-áⁿ te ní ngóo-xi núú yúú-áⁿ. ³ Te dàtná dátásaⁿ-xi òré sáa nduté dùcaⁿ datásaⁿ-xi núú espíritú-áⁿ, te dóo níhnú-xí cuixíⁿ quiyí. ⁴ Te òré ducaⁿ nǐ quide-xi te cue sandàdú ndèé yáú-áⁿ nǐ quidi ñaha-xi xii-güedé sá nǐ yùhú-güedé, te ní nduá-güedé, te ní xíta sá xíní tnùnì-güedé. ⁵ Te espíritú-áⁿ nǐ xáhaⁿ-xi xii cue ñáyiu ìhí cuángoto yáú-áⁿ:

—Nchòhó ñáyiu ìhí véxi coto yáú-a, vá yùhú-ndó chi yùhú cùtnùní iní-í sá nchòhó véxi-ndo nànducun-do yìqui cùñú Jèsús Yáá ní xíhí núú cùrúxí. ⁶ Dico Yáá-áⁿ chí ñá túú-gǎ ndécú yìqui cuñú-gá iha, chí sa ní ndoto-gá, te ìiu ducaⁿ nǐ cachí-gá sá ndótó-gǎ cùtnàhá vátá cùú-gá, te chí táquixi cundehe-ndo núú nǐ sacáⁿ-güedé yìqui cùñú-gá ní cùu te quini-ndó nǎ ñá túú-gǎ. ⁷ Te vitna ío ndìhì chí cuáháⁿ núú xíndecu cue téé ní xica cuu ndìhì-gá, te duha cùñaha-ndo xii-güedé: “Ní ndoto Jèsús Yáá ní xíhí ní cùu, te codonùu-gá núú-ndó quíhíⁿ distrítú Galiléa te yácaⁿ quini-ndó-gǎ”, duha cùñaha-ndo xii-güedé. Duha ndùu tnúhu ní cachí tnúhu-í xii-ndo —càchí espíritú-áⁿ xáhaⁿ-xi xii cue ñáyiu ìhí-áⁿ.

⁸ Te cue ñáyiu ìhí-áⁿ nǐ natnái-yu ichi, te súúnì ndìhì cuánuhú-yu

núú xĩndecu cue téé ní xica cuu ndihí Jèsús cuèndá nacani tnúhu-yu núú-güedě nàcuáa ní xáhaⁿ espíritú-áⁿ xii-yu, te cuèi ní yùhú-yu dico súúni cùdíí ìní-yu. ⁹ Te ichi ñùhú-yu cuánuhú-yu, te na ìní-yu ní quexio Jesús núú-yu ní dándácõo váha ñaha-gã xii-yu. Te ñáyiu-áⁿ nĩ ngüíñí xitĩ-yu núú-gã, te ní numi ñahá-yu xii-gã, te ní chiñuhu ñahá-yu. ¹⁰ Te ní xáhaⁿ-gã xii-yu:

—Vá yùhú-ndó, chí cuáháⁿ cúñaha-ndo xii cue téé ní xica cuu ndihí-í sá ná quihíⁿ-güedé distritú Galileá, te yacáⁿ quini ñahá-güedé xii-í —càchí-gã xáhaⁿ-gã xii-yu.

Nàcuáa ndüu tnúhu ní nacani cue sandàdú

¹¹ Te nini ñùhu cue ñáyiu ñihí-áⁿ ichi cuánuhú-yu, te dava cue sandàdú cue téé ndéé yaú-áⁿ ní cùu ní xica-güedé cuánuhú-güedé ñuú cuèndá nacani tnúhu-güedé núú cuè téé cùu dútú cùnùu nacuáa ní cuu. ¹² Te cue téé cùu dútú cùnùu-áⁿ nĩ quide-güedé jündá ndihí cue téé cùu sacuéhé nũú ñáyiu israél, te ní ndatnúhu-güedé nàcuáa cada-güedé, te ní quide ndáá-güedé ndihí cue sandàdú-áⁿ sã cuñaha-güedé vai díhúⁿ cuèndá dacuàndehnde-güedé. ¹³ Te ní xáhaⁿ-güedé xii cue sandàdú-áⁿ:

—Cuíni-ndí sá vã càháⁿ ndáá-ndó nũú ñáyiu nàcuáa ní cuu, chí cúñaha-ndo xii-yu sá òré xidí-ndó nĩ quixi cue téé ní xica cuu ndihí-dé ní dúhú-güedé yiqui cùñú-dé néhé-güedé cuáháⁿ, duha cúñaha-ndo xii-yu. ¹⁴ Te núu na ñihí té Pilatú téé cùu gobiernú tnúhu nàcuáa cúñaha-ndo xii ñáyiu, te nchúhú cada ndáá-ndí ndihí-dé cuèndá sá ñà túú nã cada ñaha-dé xii-ndo —càchí-güedé xáhaⁿ-güedé xii cue sandàdú-áⁿ.

¹⁵ Te cue sandàdú-áⁿ nĩ queheⁿ cuèndá-güedé díhúⁿ, te ní xica-güedé cuáháⁿ-güedé te ní cáháⁿ-güedé nàcuáa ní xáhaⁿ cuè

téé-áⁿ cãháⁿ-güedé. Te nchaa ñáyiu israél ní ñihí-yu tnúhu ní cáháⁿ-güedé-áⁿ, te ñiu-ni tnúhu-áⁿ càháⁿ-yu ndéé vitna.

Jèsús xáhaⁿ-gã xii cue téé ní xica cuu ndihí-gã nàcuáa ndüu chiuⁿ cada-güedé

(Mr. 16:14-18; Lc. 24:36-49; Jn. 20:19-23)

¹⁶ Te ndi ùxí ñⁿ cue téé ní xica cuu ndihí Jèsús ní xica-güedé cuáháⁿ-güedé ñⁿ yucu càa distritú Galileá núú nĩ xáhaⁿ-gã naníhí tnáhá-güedé ndihí-gã. ¹⁷ Te òré ní xiní-güedé Jèsús te ní chiñuhu ñaha-güedé xii-gã, dico dava-güedé sãni ñⁿ sani úú ñi-güedé nũu ñiu-gã àdi ñã díú-gã. ¹⁸ Te Jèsús ní sãndehe yatni-gã ndéé núú-güedé, te ní xáhaⁿ-gã xii-güedé:

—Yúhú ndécú ndihí-í tnúhu ndee ñi táxí tnùni-í cuèi andüu te cuèi ñuyíú-a. ¹⁹ Te vitna tàuchiuⁿ-í sá quihíⁿ-ndó ñihí ñuyíú cáháⁿ-ndó tnúhu-í núú ñáyiu cuèndá tuha ñahá-yu xii-í, te dacuàndute-ndó-yu. Te òré ducaⁿ càda-ndo, te cacunehe-ndo tátá-ó Dútú Ndióxi ndihí yúhú Yaá cùú Dèhe-gã ndihí Espiritú-gã. ²⁰ Te cúñaha-ndo xii-yu sá ná càdá-yu nchaa nàcuáa sa ní dánèhé ñahá-í xii-ndo càda-ndo. Te na càchí tnúhu-í sã cùndecu ndihí ñaha-ñi-í xii-ndo ñuyíú-a ndéé ná sãá nduu nãa-xi —cachí-gã xáhaⁿ-gã xii-güedé. Te ducaⁿ na cùnduu.

TNÚHU NÍ CHÍDÓ TNÚNÍ TĒ MĂCÚ

Té Juáá tée dàcuandute ñaha xii ñáyiú càháⁿ-dé tnúhu Yá Ndióxi xití yucu

(Mt. 3:1-12; Lc. 3:1-9, 15-17; Jn. 1:19-28)

¹ Duha ní quesaha tnúhu sá càháⁿ nàcuáa naníhí tǎhú-ó tnúhu Xítoho Jesucristú Déhe Yá Ndióxi.

² Te ndí Chàíá téé ní xóo cáháⁿ tnúhu Yá Ndióxi ndéé sanaha ní chídó tnùní ndíi nàcuáa ní xáhaⁿ Yá Ndióxi xii Déhe-gá, te duha ní xáhaⁿ-gǎ:

Tendaha-ǎ ñⁿ téé codonùu-dé núú-n,

te dàtúha-dé ñáyiú cuendá tñi-yu tnúhu-n.

³ Te téé-áⁿ quihi-dé xití yucu te níhí cáháⁿ-dé cúñaha-dě xii ñáyiú: “Chí dáñá nchàa ichi cuehé ichi duha ndècu-ndo, te tñi-ndo ichi váha, te ducaⁿ càda-ndo cuendá cundecu túha-ndo, chí véxi Yáá ío cùnùu”, duha cúñaha-dě xii-yu.

Duha ndùu tnúhu ní chídó tnùní ndí Chàíá nàcuáa ní xáhaⁿ Yá Ndióxi xii Déhe-gá. ⁴ Te téé ñi cuendá-xi ní ngódo tnùní-áⁿ nání-dě Juáá, te téé-áⁿ ní xíhi-dé xití yucu ní cáháⁿ-dé tnúhu Yá Ndióxi, te ní xóo dacuandute-dé ñáyiú, te duha ní xáhaⁿ-dě xii-yu:

—Chí dándixi túu ñí sá ñà túú quide váha-ndo ndècu-ndo, te dañá-ndo nchàa ichi cuehé ichi duha te cuandute-ndo, te ducaⁿ te Yá Ndióxi cada càhnu ñí-gá nchaa yíca cuèchi-ndo —duha ní xáhaⁿ-dě xii-yu.

⁵ Te nchaa ñáyiú distritú Jùdeá, ndíhi ñáyiú ñúú Jerusálén ní sáháⁿ-yu ndéé yúte Jòrdán núú ndécú tē Juáá ní xíndedóho-yu nchaa tnúhu ní cáháⁿ-dé. Te cue ñáyiú ní náhmá nchaa yíca cuèchi-xi te ní dácuañdute ñaha-dé xii-yu.

⁶ Te té Juáá-áⁿ ní xíhnu-dé dóo idi caméyu, te ñⁿ ñí ní cuu pǎñú xití-dé, te ní xóo caxi-dé tíca làngóstá ndíhi ndudí ñúñú cuéchi. ⁷ Te ní xáhaⁿ tucu-dé xii ñáyiú:

—Nchícúⁿ ñⁿ téé véxi, te téé-áⁿ ío-gá cùnùu-dé dàcúúxi yúhú, chí yúhú cùu-í ñⁿ téé duuⁿ duuⁿ ñá túú tàù-í ngúnundeyi-í nandaxi cuèdicó ñí ñihnu chàu-dé dico quide-í chiúⁿ-dé. ⁸ Te yúhú dácuañdute ñaha-í xii-ndo, dico mee-dé taxi-dé Espiritú Yá Ndióxi cundecu ndíhi-ndo —càchí-dé xáhaⁿ-dě xii-yu.

Sàndute Jesús

(Mt. 3:13-17; Lc. 3:21-22)

⁹ Te dàvá-áⁿ ní quee Jèsús ñúú Nazàrét ñⁿ ñúú yíndèhu distritú Galileá cuáháⁿ-gá yúte Jòrdán. Te yàcáⁿ ní dácuañdute ñaha té Juáá xii-gá. ¹⁰ Te òré ní nene-gá xití ndute, te ní xíní-gá nchii andíu, te ní quee Espiritú Yá Ndióxi véxi cuuⁿ-xi ngúndecu ndíhi ñaha-xi xii-gá, te dàtná cáá ñⁿ lómá cáá Espiritú-áⁿ véxi cuuⁿ-xi. ¹¹ Te òré-áⁿ ní tecú ní cáháⁿ Yá Ndióxi ndéé andíu, te xáhaⁿ-gá xii Jèsús:

—Yòhó cùu-ñ Déhe-í téé ío cùu ñí-í te ío cùdí ñí ñáhà-í xii-n —càchí-gá xáhaⁿ-gá.

Sácuñhá quidé yíca-xi cada Jesús sá ñà túú tàù-gá cada-gá dico ñá túú ní quide-gá

(Mt. 4:1-11; Lc. 4:1-13)

¹² Te Espiritú Yá Ndióxi ndécá-xi Jèsús cuáháⁿ ñⁿ xití yucu. ¹³ Te xití yucu-áⁿ ío víhí quítì dééⁿ, te xíaⁿ ndécú Jèsús ní ngúita sácuñhá quidé yíca-xi cada-gá ñⁿ sá ñà túú tàù-gá cada-gá dico ñá túú ní sàndáá ñí-gá. Te cue espíritú xínú cuèchi núú Yá Ndióxi ní xinu cuèchi-xi núú-gá. Te ní xíndecu-gá údico nduu xití yucu-áⁿ.

Distritú Galileá ní chisaha Jèsús chiuⁿ ní táhú Tátá-gã Dúrtú Ndiõxí cada-gá

(Mt. 4:12-17; Lc. 4:14-15)

¹⁴ Te sátá nǐ ngava té Juàá vecaá, te Jèsús cuáháⁿ-gá distritú Galileá dānehé-gá ñáyiú tnúhu váha, tnúhu sá cāháⁿ nācuáa ndíhu ndaha ñaha Yá Ndiõxí xii-yu. ¹⁵ Te xāhaⁿ-gá xii-yu:

—Vitna sa ní cuyatni nduu ndíhu ndaha ñaha Yá Ndiõxí xii-ndo, te chí dáñá nchàa ichi cuehé ichi duha ndècu-ndo, te quindáá iní-ndó tnúhu váha, tnúhu sá cāháⁿ nācuáa naníhí tàhú-ndó —cāchí-gá xāhaⁿ-gá xii-yu.

Jèsús cāháⁿ-gá cúmí tñahá cue téé tñè chácá

(Mt. 4:18-22; Lc. 5:1-11)

¹⁶ Te Jèsús ñúhú-gã ichi cuáháⁿ-gá tá yāha-gá yuhu lāgúná Galileá, te ní xiní-gá té Xímú ndíhi ñaní-dé té Ndríxí xídáquēe-güedé ñunu-güedé xití ndute tñè-güedé chácá, chí quití tñahí-án cúú chiuⁿ-güedé tñí-güedě-di. ¹⁷ Te Jèsús ní xāhaⁿ-gá xii-güedé:

—Chí dáñá chiuⁿ quide-ndo-án, te quixi-ndo chitnahá ñahá-ndó xii-í te taxi-í ingá núú chiuⁿ cada-ndo chí quíhíⁿ-ndó cāháⁿ-ndó ñáyiú cuendá dacuáhá-yu tnúhu-í —cāchí-gá xāhaⁿ-gá xii-güedé.

¹⁸ Te órè-ni-án nǐ dáñá cuè téé-án ñunu-güedé te ní tuha ñaha-güedě xii-gá.

¹⁹ Te cuáháⁿ-gá luha-gá, te ní xiní-gá té Jācobó ndíhi ñaní-dé té Juàá ñúhú-güedé xití bàrcú-güedé nátcu-güedé ñunu-güedé, te ndí ndúú-güedé cúú-güedé déhe té Zebèdeú. ²⁰ Te ní cana ñaha-gá xii-güedé, te ní dāndõo-güedé tātá-güedě ndíhi cue téé xinu cuechi núú-güedě xití bàrcú, te ní tuha ñaha-güedě xii-gá.

Íⁿ téé yíhi ñaha espíritú cúndíhi yucu ñávāha

(Lc. 4:31-37)

²¹ Te ní quexio Jèsús ndíhi cue téé-án ìⁿ ñúú nání Cāpernaúm, te yàcáⁿ ndécú-gã ní tñahá nduu ndètatú ñáyiú, te cuánguihu-gá veñúhu ñáyiú isràél dānehé ñahá-gã xii-yu. ²² Te xicuñúhu vñí-yu nchaa tnúhu cāháⁿ-gá, chí quide-gá sá cúú-gã ìⁿ Yá táxí tñuní vñí, te ñá túú dācuaha ñaha-gá xii-yu dātná dācuaha ñaha cue téé dācuaha ñaha xii-yu nchaa tnúhu ní chidó tñuní ndí Moisés. ²³ Te xití veñúhu-án ndécú tñahá ìⁿ téé yíhi ñaha ìⁿ espíritú cúndíhi yucu ñávāha, te espíritú-án nǐ quide-xi níhi ní cāháⁿ téé-án, te xāhaⁿ-dě xii Jèsús:

²⁴ —¿Te ná cuíní yòhó Jèsús téé ñúú Nazàrét cada ñaha-n xii-ndí núu vèxi-n núú ndécú-ndí-i? ¿Áⁿ vèxi-n dānaa ñaha-n xii-ndí? Chí yúhú xiní ñahá-í xii-n sá cúú-n ìⁿ téé ñá túú tñahí cuèchi-xi, chí núú Yá Ndiõxí ní quee-n vèxi-n ñuyúú-a —cāchí-dé xāhaⁿ-dě xii-gá.

²⁵ Dico Jèsús ní tenàá-gá espíritú cúndíhi yucu ñávāha-án, te xāhaⁿ-gá:

—¿Cadí yuhu-n, te taquèe yiqui cuñú téé-án! —cāchí-gá xāhaⁿ-gá xii espíritú-án.

²⁶ Te espíritú cúndíhi yucu ñávāha-án nǐ dācüyíhi ñahá-xí xii téé-án, te ní dācáná sàa ñaha-xi, te ní quee-xi yiqui cuñú-dé cuáháⁿ-xi. ²⁷ Te nchaa ñáyiú xīndecu-án ío ní cuñúhu-yu, te ní xitñahá-yu:

—¿Te nása ndúu-tu sá quidé tēe-a? ¿Nduú sáá cāháⁿ-tu-dé sánúu? Te quide-dé dātná quidé ìⁿ téé cūnuu vihi, chí cāháⁿ-ni-dé te sàndáá iní ñahá nchàa espíritú cúndíhi yucu ñávāha —cāchí-yu xitñahá-yu.

²⁸ Te ío ndíhi ní níhi nchaa ñáyiú dava-gá ñúú yīndèhu distritú Galileá tnúhu nchaa nācuáa cāháⁿ Jèsús ndíhi nchaa sá quidé-gá.

Jèsús quidé tātna-gá náná ñadhí té Xímú
(Mt. 8:14-15; Lc. 4:38-39)

²⁹ Te òré ní ndee Jèsús veñúhu cue ñáyiú isràèl, te cuáháⁿ-gá ndihí té Jàcobó ndihí té Juàà vehe té Xímú ndihí té Ndríxí. ³⁰ Te náná ñadhí té Xímú cùhú-aⁿ ñùhu vihi-aⁿ cahni, te ndihí-ni ní xáhaⁿ-güedé xii Jèsús sá cùhú-aⁿ. ³¹ Te ní sáháⁿ-gá núú cáá ñàha cùhú-áⁿ te ní tñi-gá ndaha-aⁿ ní ndocani ñaha-gã xii-aⁿ. Te òré-ni-áⁿ ñí nchíco-aⁿ cahni, te ní ngüíta-aⁿ xínu cuechi-aⁿ núú-güedé ndihí-gá.

Jèsús quidé tātna-gá vai ñáyiú cùhú
(Mt. 8:16-17; Lc. 4:40-41)

³² Te òré sa cuíní-xi cundiⁿⁱ te ní quexio ñáyiú núú ndécú Jèsús, te nchaa ñáyiú cùhú ní dátacá-yu ndecá-yu ní sáá núú-gã, te tñahá cue ñáyiú yìhi ñaha espíritú cùndihí yucu ñávãha ndecá-yu ní sáá núú-gã. ³³ Te nchaa ñáyiú ñuú-áⁿ ñí chítú níhnú-yu yuyèhe vehe núú ñí quexio Jèsús. ³⁴ Te Jèsús ní quide tātna-gá nchaa ñáyiú cùhú cuèi ndi díⁿ ndi díⁿ núú cuèhé tñahá-yu ñí ñí-yu, te ní queñuhu-gá nchaa espíritú cùndihí yucu ñávãha yìhi ñaha xii ñáyiú, te ñá túú ní dàña-gá cáháⁿ cue espíritú cùndihí yucu ñávãha-áⁿ ni ñí tñúhu, te ducaⁿ ñí quide-gá chi cue espíritú-áⁿ sa xímí-xi yoo cùu-gá.

Jèsús càháⁿ-gá tñúhu Yá Ndiòxí distritú Galiléa
(Lc. 4:42-44)

³⁵ Te òré vátá tñndaá váha-gá ní ndacóo Jèsús cuáháⁿ-gá ñí xio yuhu ñuú núú ñà túú ñáyiú ndècu cuendá yàcáⁿ cáháⁿ ndihí-gá Yá Ndiòxí. ³⁶ Te té Xímú ndihí cue té cùndihí-dé nánducu ñaha-güedé xii-gá. ³⁷ Te òré ní naníhí ñáhá-güedé xii-gá, te ní xáhaⁿ-güedé:

—Nchaa ñáyiú nánducu ñáhá-yu xii-n —càchí-güedé xáhaⁿ-güedé xii-gá.

³⁸ Te ní xáhaⁿ-gã xii-güedé:

—Chí ná quihíⁿ-ó nchaa ñuú xíndáa yatni-a, chi danèhé-í ñáyiú tñúhu Yá Ndiòxí chí ñuú cùhú-áⁿ vèxi-í —càchí-gá xáhaⁿ-gã xii-güedé.

³⁹ Te Jèsús tá xica ndodo-gá cuáháⁿ nchaa ñuú yíndèhu distritú Galiléa dánèhé-gá ñáyiú, te ndi tñahá ñí ñí ñuú sáa-gá te ducaⁿ cuànguihu-gá veñúhu-yu dānehé ñáhá-gã xii-yu tñúhu Yá Ndiòxí, te cue ñáyiú yìhi ñaha espíritú cùndihí yucu ñávãha ta queñuhu-gá nchaa espíritú-áⁿ yiqui cùñú-yu cuáháⁿ.

Jèsús quidé tātna-gá ñí tée tñahá cuèhé sá dátèhyú nihnu-xi yiqui cùñú-ó

(Mt. 8:1-4; Lc. 5:12-16)

⁴⁰ Te ní quexio ñí tée tñahá cuèhé sá dátèhyú nihnu-xi yiqui cùñú-ó núú Jèsús, te ní ngüíñí xítí-dé núú-gã càháⁿ ndáhú-dé, te xáhaⁿ-dè xii-gá:

—Vèxi-í càháⁿ ndáhú-í núú-n núú vá cùndèe iní-n càda tātna ñaha-n xii-í chí cùtnuní iní-í sá ndácú-n —càchí-dé xáhaⁿ-dè xii-gá.

⁴¹ Te Jèsús ní cundàhú iní ñáhá-gã xii-dé te ní dácaá-gá ndaha-gá ní tendaha ñaha-gá xii-dé, te xáhaⁿ-gã:

—Cuu cada tātna ñaha-í xii-n, te vitna ndúha-n —càchí-gá xáhaⁿ-gã xii-dé.

⁴² Te òré-ni-áⁿ ñí xócuíñí cuèhé tñahá-dé. ⁴³⁻⁴⁴ Te Jèsús ní cáháⁿ víhí-gã dóho-dé, te xáhaⁿ-gã xii-dé:

—Vitna cuanùhú-na, dico vá yoo ñí cùñaha-n sà ní quide tātna ñaha-í xii-n, te núú dütú-ni cuáháⁿ cuendá sá ná quíní ñáhá-dé xii-n sà ní ndúha-n te cuáha-n-dè sá ndúú tãhú Yá Ndiòxí dátá ní cachí ndí Moisés cuendá ná quíní ñáyiú sá ndáá ní ndúha-n —càchí-gá xáhaⁿ-gã xii-dé.

⁴⁵ Te tée ní cùhú-áⁿ ñí xica-dé cuáháⁿ-dè, te ní ngüíta-dé xáhaⁿ-dè xii nchaa ñáyiú ta náníhí-dè nàcuáa

ní quide Jèsús ní quide tátna ñaha-gã xii-dé. Te sá dúcáⁿ ní xíté nuu tée-áⁿ cuëndú nàcuáa ní quide ñaha Jèsús xii-dé ní quide tátna ñaha-gã ní ndúha-dé, te xiáⁿ núu dayuhu ní xóo quihu-gá dawa ñúú núú ïo vài ñáyiu ndèhe ñaha xii-gá, te ní xóo cundecu-gá xiti yucu núú ñà túú ñáyiu ndècu. Te nchaa ñúú ní quee ñáyiu ní sáháⁿ-yu núú ndécú-gã ní cáháⁿ ndihi ñàhá-yu xii-gá.

2

Jèsús quidé tátna-gá ñⁿ tée cùhú ñá cùú-gã candá nihnu

(Mt. 9:1-8; Lc. 5:17-26)

¹ Te sátá ní cuu ñⁿ úú nduu sá ní quee Jèsús ñúú Capèrnaúm te ní nasáá tucu-gá, te cue ñáyiu ní níhí-yu tnúhu sá ní ndexìo-gá núú quidé vèhe-gá. ² Te ndíhi-ni ní tacá cuéhé víhí-yu, te ní chítú víhí-yu ndéé yuyèhe te ñá ní tnàhá-gá-yu. Te ní ngúíta-gá ní dánèhé ñàhá-gã xii-yu tnúhu Yá Ndiöxí. ³ Te òré-áⁿ ní quexìo cúmí tnàhá cue tée núú ndécú-gã nchídó-güedé ñⁿ tée cùhú ñá cùú-gã candá nihnu-dé. ⁴ Dico ñá túú ní ndàcu-güedé sáá-güedé ndéé núú-gã chí ïo cuéhé ñáyiu ndècu. Te xiáⁿ núu ní sáá-güedé díquí véhé núú yíhí-gã-áⁿ ní caáⁿ-güedé, te ichi ndàa díquí véhé-áⁿ ní dáquèe-güedé tée cùhú-áⁿ, te ñùhu-dé ñⁿ xító ní dáquèe ñaha-güedé ndéé núú-gã. ⁵ Te Jèsús sa ní cutnùnì iní-gá sá sàndáá iní ñàhá-güedé xii-gá núu ní xáhaⁿ-gã xii tée cùhú-áⁿ:

—Yòhó tée cùhú, sa ní quide càhnu iní-í nchaa cuèchi-n — càchí-gá xáhaⁿ-gã xii-dé.

⁶ Te xiáⁿ xñucóo ñⁿ úú cue tée dàcuaha ñaha xii ñáyiu nchaa tnúhu ní chídó tnùnì ndíi Moisés, te sá dúcáⁿ ní cáháⁿ Jèsús núú cue tée-áⁿ ní sani iní-güedé: ⁷ “Tée-a càháⁿ cuéhé-dé cuëndá Yá Ndiöxí duha càháⁿ-dé, chí vá yòo ñⁿ

ndàcu cada cahnu iní nchaa yicá cuèchi ñáyiu chí ñⁿdi dí-ñi Yá Ndiöxí quidé càhnu iní-gá”, duha ní sani iní-güedé. ⁸ Dico òré-ni-áⁿ ní cutnùnì iní Jèsús nàcuáa sàni iní-güedé, núu ní xáhaⁿ-gã xii-güedé:

—¿Te ná cuëndá ducaⁿ sàni iní-ndó-í? ⁹ Te sá dúhá ní xáhaⁿ-í xii tée cùhú-a sá ní quide càhnu iní-í nchaa yicá cuèchi-dé, te xiáⁿ nchòhó ñá túú cutnùnì iní-ndó núu ndáá càháⁿ-í àdi ñá ndáá. Dico núu cùu-í-dé sá ndácóo-dé, te ndocani-dé xito ñùhu-dé véxi, te caca-dé, te cutnùnì ndáá iní-ndó núu ndáá càháⁿ-í àdi ñá ndáá cada-í. ¹⁰ Te vitna na càda-í nàcuáa cutnùnì iní-ndó nchaa-ndo sá yùhú Tée cùu ñani tnàhá-ndó nchaa-ndo ndecu ndihi-í tnúhu ndee iní sá càdá càhnu iní-í nchaa cuèchi ñáyiu ñuyíú-a — càchí-gá xáhaⁿ-gã xii-güedé.

Te sátá dúcáⁿ te ní xáhaⁿ-gã xii tée cùhú-áⁿ:

¹¹ —Ndacóo te ndocani-n xito ñùhu-n véxi-áⁿ, te núhú-n vèhe-n — cachí-gá xáhaⁿ-gã xii-dé.

¹² Te òré-ni-áⁿ ní ndacóo-dé, te ní ndocani-dé xito ñùhu-dé ní quexìo-áⁿ, te ndèhe nchaa ñáyiu xñdecu-áⁿ ní ndee-dé tnuú-yu cuáháⁿ-dé. Te sá dúcáⁿ ní quide Jèsús ní quide tátna-gá tée-áⁿ, xiáⁿ ïo ní cuñúhu nchaa ñáyiu, te ní xítnàhá-yu:

—Càhnu vihi cuu Yá Ndiöxí, chí ñá ñⁿ ndùu quini-ó dùha cuu datná ní cuu vitna —càchí-yu xítnàhá-yu.

Jèsús càháⁿ-gá ñⁿ tée nàni Leví

(Mt. 9:9-13; Lc. 5:27-32)

¹³ Te Jèsús cuáháⁿ tucu-gá yuhu làgúná, te ïo cuéhé ñáyiu ní sátnàhá ñàhá xii-gá, te ní dánèhé ñàhá-gã xii-yu tnúhu Yá Ndiöxí. ¹⁴ Te òré ní yáha ní dánèhé ñàhá-gã xii-yu, te ní naqueheⁿ-gá ichi, te ní yáha yatni-gá ñⁿ xichì núú núcóo ñⁿ tée nàni Leví déhe ñⁿ tée nàni Alfeú quidé còbrá-dé ñáyiu cuëndá impuèstú chí cobràdór cùú-dé. Te

òré ní xini ñáhá-gǎ xii-dé, te ní xáhaⁿ-gǎ:

—Néhé chitnahá ñáhá-n xii-í — cǎchí-gǎ xáhaⁿ-gǎ xii-dé.

Te té Lèví-án nǐ ndacuíñí-dé, te ní tuha ñaha-dě xii-gǎ.

¹⁵ Te té Lèví-án cuǎháⁿ-dé ndihí Jèsús vehe-dé. Te yihí Jèsús mèsá xéxí-gǎ ndihí cue téé xica cuu ndihí-gǎ, te tnàhá vǎi cue téé cuihna iní-xi quide cobrá ñáhá xii ñáyiu cuendá impuèstú, ndihí dava-gǎ cue téé ndècu ichi cuehé ichi duha núcóo ndihí ñaha-güedé xii-gǎ xéxí ndihí ñaha-güedé, te ducaⁿ chí ío vǎi ñáyiu nchicúⁿ ñáhá xii-gǎ.

¹⁶ Te sá nǐ xini cue téé dàcuáha ñaha xii-yu nchaa tnúhu ní chídó tnùní ndíi Moisés, ndihí cue téé cuu fariséu xéxí Jèsús ndihí nchaa cue téé-án nǔu ní xicáⁿ tnúhú-güedé núu cuè téé xica cuu ndihí-gǎ, te xáhaⁿ-güedé:

—¿Ná cuendá ducaⁿ quide téé cuu mestrú-ndó xéxí-dé ndihí cue téé cuihna iní-xi quide cobrá ñáhá xii ñáyiu cuendá impuèstú, ndihí nchaa dava-gǎ cue téé ndècu ichi cuehé ichi duha-i? —cǎchí-güedé xáhaⁿ-güedé.

¹⁷ Te Jèsús ní tecú dóho-gǎ nàcuáa nduu tnúhu ní xáhaⁿ-güedé xii cue téé xica cuu ndihí-gǎ, núu ní xáhaⁿ-gǎ xii-güedé:

—Nchaa ñáyiu ñá túú cùhú chí ñá túú xini ñuhú-yu ñátátná, dico nchaa ñáyiu cùhú chí xini ñuhú-yu ñátátná. Te yúhú véxi-í cǎháⁿ-í ñáyiu cùtnuní iní-xi sá ndécú cuèchi-xi te ñá túú véxi-í cǎháⁿ-í ñáyiu cǎchí sá ñá túú ndècu cuèchi-xi —cǎchí-gǎ xáhaⁿ-gǎ xii-güedé.

Cuendá cue ñáyiu ñá túú tnàhí ná xéxí áma cǎháⁿ ndihí-yu Yá Ndiöxí

(Mt. 9:14-17; Lc. 5:33-39)

¹⁸ Te cue téé xica cuu ndihí té Juáá, ndihí cue téé xica cuu ndihí cue téé cuu fariséu ñá túú tnàhí ná xéxí-güedé áma cǎháⁿ ndihí-güedé Yá Ndiöxí. Te ñⁿ nduu ducaⁿ

xíquide-güedé, te ní sáháⁿ ñáyiu ní xicáⁿ tnúhú-yu núu Jèsús, te xáhaⁿ-yu xii-gǎ:

—Cuini-ndí cachí tnúhu-n ná cuendá cue téé xica cuu ndihí té Juáá, ndihí cue téé xica cuu ndihí cue téé cuu fariséu ñá túú tnàhí ná xéxí-güedé áma cǎháⁿ ndihí-güedé Yá Ndiöxí, te cue téé xica cuu ndihí-n ñá túú ducaⁿ quide-güedé —cǎchí-yu xáhaⁿ-yu xii-gǎ.

¹⁹ Te Jèsús ní xáhaⁿ-gǎ xii-yu:

—Nchóhó xini-ndó sǎ vǎ cúú cǎháha-o xii ñáyiu ñuhu vico tnándaha sǎ vǎ cúú cǎxí-yu nini ndècu ndihí ñaha téé tnándaha xii-yu. ²⁰ Dico sǎá nduu te vǎ cúndècu ndihí ñaha-gǎ téé tnándaha-án xii-yu, te dàvá-án te cahni iní-yu vǎ cǎxí-yu cuendá sǎ ndihú iní-yu.

²¹ Te vǎ yǎo ñⁿ dándée luha dóo sǎá ñⁿ dóo sa ní cuu tùhú vihí, chí dóo sǎá-án nàndiyi-xi te uuⁿ-gǎ ndata-xi dóo sǎ ní cuu tùhú-án. ²² Te ní vǎ yǎo ñⁿ chihí ndidí sǎá xití ñⁿ lamba sa ní cuu tùhú vihí, chí núu yoo ducaⁿ na cǎda te ndava lamba sa ní cuu tùhú-án, chí ío níhi yócó ndidí-án, te cuíta-ni ndidí-án te cuíta-ni lamba-án te núu ducaⁿ na cǎdá-yu. Núu xǎáⁿ xini ñuhu-xi quée ndidí sǎá-án xití ñⁿ lamba saa —cǎchí-gǎ xáhaⁿ-gǎ xii-yu.

Cue téé xica cuu ndihí Jèsús sǎhnú-güedé yoco triú nduu ndetatú ñáyiu

(Mt. 12:1-8; Lc. 6:1-5)

²³ Te ñⁿ nduu cuu-xi nduu ndetatú ñáyiu ñuhu Jèsús ichi ndihí cue téé xica cuu ndihí-gǎ, te ta yǎha-gǎ ndihí-güedé ñⁿ xichi núu cǎá triú, te ní ngúíta-güedé sǎhnú-güedé yoco triú-án. ²⁴ Te cue téé cuu fariséu ní xáhaⁿ-güedé xii-gǎ:

—¿Ná cuendá ducaⁿ quide cue téé xica cuu ndihí-n sǎhnú-güedé yoco triú vitna cuu-xi nduu ndetatú-i? Te ñá túú tau-güedé ducaⁿ cǎda-güedé —cǎchí-güedé xáhaⁿ-güedé xii-gǎ.

25 Te ní xáhaⁿ-gã xii-güedé:

—¿Te náa vátá dácuàha tnahi-gá-ndó núu tütú Yá Ndiöxí núú cáháⁿ-xi nàcuáa ní quide ndíi Dàvíí cútñàhá ní xíhí ndíi docó ndíhi cue téé ní xica cuu ndíhi ndíi-áⁿ? 26 Te dàvã-áⁿ nĩ xíndecu ìⁿ téé ní xínani Abiàtár ní cuu-dé dütú cúnùu, te ndíi Dàvíí ní quíhu ndíi xití vehe Yá Ndiöxí ní queheⁿ ndíi pàá ní cuu íí ndécú-áⁿ nĩ dácãhñu ndíi cue téé ní xica cuu ndíhi ndíi ní xexi ndíi ndíhi-güedé, te mee-ni cuè dütú tàú-güedé caxi-güedé pàá-áⁿ ní cùu —cachí-gá xãhaⁿ-gã xii-güedé.

27 Te ní xáhaⁿ tucu Jesús xii-güedé:

—Mee Yá Ndiöxí ní taxi ndecu-gá nduu ndètátú ñáyíu, te ñá túú ní cächí-gá sá meè-yu náandi cani iní-yu cadá-yu canehe ìⁿ-yu nduu ndètátú-yu-áⁿ. 28 Te yúhú Téé cùu ñaní tnáhã-ndó nchãa-ndo, tnáhã-í ndécú ndíhi-í tnúhu ndee iní sã cùu-í nchaa ñáyíu nàcuáa cadá-yu nduu ndètátú-ó-áⁿ — cächí-gá xãhaⁿ-gã xii-güedé.

3

Ìⁿ téé ní yíhí ìⁿ xio ndaha-xi (Mt. 12:9-14; Lc. 6:6-11)

1 Te Jesús cuànguihu tucu-gá xití veñúhu, te xití veñúhu-áⁿ ndécú ìⁿ téé ní yíhí ìⁿ xio ndaha-dé. 2 Te xíáⁿ ndécú cuè téé xito dayuhu ñaha xii-gá, te núu cada tãtna-gá téé cùhú-áⁿ nduu cùu-xi nduu ndetátú-güedé ndíhi ñáyíu, cuèndá ducaⁿ te níhí-güedé nàcuáa cada-güedé cacáⁿ cuèchi-güedé cuèndá-gá. 3 Te ní xáhaⁿ-gã xii téé cùhú ndaha-xi-áⁿ:

—Ndacuíñí te ngúnutñí-n cuãdava iha —cächí-gá xãhaⁿ-gã xii-dé.

4 Te ní xícãⁿ tnúhú-gã núú-güedé, te xãhaⁿ-gã:

—Chí cächí tnúhu ná cúú sã cúú càda-o nduu ndetátú-ó. ¿Sã vãha ñã sã cuèhé? ¿Sã cadá tãtna-o ñáyíu

cùhú ñã sã cáhni-ó-yu? —cächí-gá xãhaⁿ-gã xii-güedé.

Dico ní ìⁿ-güedé ñã túú tnàhí ní cáháⁿ-güedé. 5 Te Jesús ní xíndéhé vãha-gá núú nchãa-güedé te ní cudééⁿ-gã, te ní ndíhú iní-gá chí ío sãá iní-güedé, te ní xáhaⁿ-gã xii téé cùhú ndaha-xi-áⁿ:

—Ndocani ndaha-n —cächí-gá xãhaⁿ-gã xii-dé.

Te ní ndocani-dé ndaha-dé, te òré-ni-áⁿ nĩ ndúha. 6 Te cue téé cùu fariséú ní xica-güedé cuáhãⁿ-güedé ìⁿ xichi núú nĩ naníhí tnáhã-güedé ndíhi cue téé cùndíhi té Hèrodés cuèndá ndatnúhu-güedé nása cada-güedé cahni-güedé Jesús.

Cuéhé víhí ñáyíu ní quexio yuhu lagúná

7 Te Jesús ní xica-gá cuáhãⁿ-gá ndíhi cue téé xica cuu ndíhi-gá yuhu làgúná distritú Galileá, te ío cuéhé ñáyíu distritú-áⁿ nchícúⁿ ñáhã-yu xii-gá cuáhãⁿ. 8 Te núú nĩ quexio-gá-áⁿ nĩ sáhãⁿ ñáyíu distritú Jùdeá, ñáyíu ñúú Jerusálén, ñáyíu distritú Idùmeá, ñáyíu xíndecu ndãa ìngã xio yúte Jòrdán, ndíhi ñáyíu xíndecu yatni ñúú Tirú ndíhi ñúú Sídón, te ducaⁿ ío vãi-yu ní sáhãⁿ núú ndécú-gã chí ní níhí-yu tnúhu nchaa nàcuáa quide-gá. 9 Te Jesús ní xáhaⁿ-gã xii cue téé xica cuu ndíhi-gá sã cadá tũha-güedé ìⁿ bàrcú cuèndá caa-gá núú-xi cuèndá sã vã dádèhnde ñáhã-yu xii-gá chí ío cuèhé-yu. 10 Te sã dúcãⁿ nĩ níhí-yu tnúhu sã quidé tãtna-gã ñáyíu cùhú, núu xíãⁿ nchaa dava-gã ñáyíu cùhú súúni dicó ngõnchíhi tnáhã-yu cuáhãⁿ-yu núú ndécú-gã cuñí-yu tnãndeé ñáhã-yu xii-gã cuèndá sã cuñí-yu ndúha-yu. 11 Te cue ñáyíu yìhi ñaha espíritú cùndíhi yucu ñávãha ní sanu xití ñaha-xi xii-yu núú Jesús òré ní xini ñáhã-xí xì-gá, te xíãⁿ ní quide níhí ní cáháⁿ-yu, te xãhãⁿ-yu xii Jesús:

—¿Yòhó cúú-n Dèhe Yá Ndiöxí! — cächí-yu xãhãⁿ-yu xii-gá.

12 Te Jèsús ní tenàá-gá nchaa espíritú cùndìhì yucu ñávãha-án, te ní xáhaⁿ-gã xii nchaa ñáyiu ní xíhì-xi-áⁿ sã vã càháⁿ-yu núú ñáyiu yoo cùu-gá.

Jèsús cãxi-gá úxúú tnàhá cue tée dacuàha ñaha xii ñáyiu tnúhu-gá
(Mt. 10:1-4; Lc. 6:12-16)

13 Te sátá dúcáⁿ ní cuu te Jèsús ní sáa-gá ìⁿ yucu, te xíaⁿ ndécú-gã ní cana-gá nchaa cue tée càhí iní-gá. Te òré ní quexìo nchaa cue tée-áⁿ núú-gã, 14 te ní cáxi-gá úxúú tnàhá cue tée caca cuu ndìhi-gá, te ñiu-ni cue tée-áⁿ tendaha-gã quíhìⁿ-güedé cáháⁿ-güedé tnúhu-gá núú ñáyiu. 15 Te ní sãñaha-gã xii-güedé tnúhu ndee iní cundecu ndìhi-güedé cuendá cada tátna-güedé ñáyiu cùhú, ndìhi cuendá queñuhu-güedé nchaa espíritú cùndìhì yucu ñávãha yìhì ñaha xii ñáyiu. 16 Te duha xìnani ndi úxúú cue tée-áⁿ: Ìⁿ-dé nání-dě Xímú, te mee-gã ní taudìu ñaha-gá xii-dé sá cúnàni-dé Pèlú. 17 Te ingá-dé nání-dě Jàcobó, te ingá-dé nání-dě Juàá, te ñani té Jàcobó-áⁿ cúú té Juàá te ndi ndúu-güedé cúu-güedé déhe té Zebèdé, te ndi ndúú cue tée-áⁿ ní dánání ñaha Jèsús xii-güedé Boànergés, te tnúhu-áⁿ quée-xí: Cue tée ío yáchí cúdèéⁿ, duha quèe-xi tnúhu-áⁿ. 18 Te duha xìnani dàva-gá-güedé: Té Ndríxí, té Lípé, té Bartolómé, té Mâteú, té Mǎxí, té Jàcobó déhe té Àlfeú, té Tàdeú, té Xímú tée ní cundìhì cue tée canànistá ní cùu, 19 ndìhì té Jüdás Iscàrioté tée ní sáa nduu ní sáha cuendá ñáhá xii Jèsús núú cue tée cùu ìhú iní ñáhá xii-gá, duha xìnani cuè tée ní cáxi Jèsús ní xica cuu ndìhi-gá.

Càhí-güedé sá ndécú ndìhi Jèsús yucu ñávãha dico ñá ndàá
(Mt. 12:22-32; Lc. 11:14-23; 12:10)

Te sátá dúcáⁿ te cuáháⁿ-gá ndìhi-güedé núú quídé vèhe-gá.

20 Te ío vai ñáyiu ní tacá-ni tucú-yu xíaⁿ, te ni ñá ní ñíhí-gã nása cada-gá caxi-gá ndìhi cue tée xica cuu ndìhi-gá cuendá sã ío vai-yu. 21 Te cue ñáyiu cùu ndi mee Jèsús ní ñíhí-yu tnúhu nchaa nàcuáa cùu, te nchaa ñáyiu ñá cùtnuní váha iní-xi ní cachí-yu sá ní nduu lùcú-gá núu xíaⁿ cuáháⁿ ñáyiu cùu ndi mee Jèsús núú ndécú-gã cuendá candeca ñàhá-yu xii-gá núhú ní cùu.

22 Te cue tée dàcuaha ñaha xii ñáyiu nchaa tnúhu ní chídó tnùnì ndí Moisés véxi ndéé ñuu Jerusálén ní cáháⁿ cuèhé-güedé cuendá Jèsús, chí ní xítñaha-güedé:

—Tée-a ndècu ndìhi-dé sácúíhná, te ñiu xíaⁿ chindèe ñaha-xi xii-dé queñuhu-dé nchaa espíritú cùndìhì-xi yìhì ñaha xii ñáyiu, te ñiu-ni-xi tàxi tnùnì-xi nchaa espíritú-áⁿ—duha ní xítñaha-güedé.

23 Te Jèsús ní cana ñaha-gã xii-güedé, te ní cani-gá ìⁿ cuendú núu-güedé nàcuáa tecú tnùnì-güedé tnúhu-gá, te xáhaⁿ-gã xii-güedé:

—¿Te nása cada sácúíhná queñuhu-xi cue espíritú cùndìhì-xi yìhì ñaha xii ñáyiu-i? 24 Te nchòhó xìnì-ndó sã núu ìⁿ tée yìndaha ìⁿ nacióⁿ vá cúú ìⁿnuu-dé ndìhi cue tée cùndìhì-dé, te vá cúdí-dé cunu-dé. 25 Te ñiu-ni ducaⁿ sãtnhá-xi cùu tucu ñáyiu xìndecu ìⁿ-ni vèhe, chí núu vá cúú ìⁿnuú-yu, te vá cúdí-yu cundecu càhnú-yu. 26 Te núu sácúíhná ñá túú cùu ìⁿnuu-xi ndìhi cue espíritú cùndìhì-xi, te vá cúdí-xi cundecu-xi taxi tnùnì-xi te núu ducaⁿ quide-xi.

27 Te nchòhó xìnì-ndó sã cuè ñadúhú chí vá ndácú-güedé cuendá-ni quíhu-güedé duhu-güedé vèhe ìⁿ tée ío ndee, chí díhna-gá xínì ñuhu-xi tñi-güedé tée-áⁿ dacùtu ñaha-güedé xii-dé dàtnùnì ducaⁿ te ndacu-güedé duhu-güedé nchaa sá ndécú ndìhi-dé.

28 Te na càhí tnúhu ndáá-í xii-ndo sã ncháá sã cuèhé sá dúhá quide ñáyiu, ndìhi nchaa tnúhu

cuèhé tnúhu duha càháⁿ-yu cuèndá Yá Ndiõxí cuu cada càhnu iní-gá. ²⁹ Dico cue ñáyiú na càháⁿ cuèhé cuèndá Espiritú Yá Ndiõxí, ñáyiú-áⁿ vǎ cáda càhnu iní ñáhá tnáhí-gá xií-yu, chi cundecu-ni cuéchi-yu núú-gǎ ni caa ni quíhíⁿ —càchí-gá xǎhaⁿ-gǎ xii-güedé.

³⁰ Te ducaⁿ ñí cáháⁿ-gá chi càchí-güedé sá ndécú ndíhi-gá espíritú cündíhi yucu ñávaha.

*Ñaná Jèsús ndíhi cue ñaní-gá
(Mt. 12:46-50; Lc. 8:19-21)*

³¹ Te ní quexio náná Jèsús ndíhi cue ñaní-gá núú ndécú-gǎ xínutnǐi-yu quehé, te ní xáhǎⁿ-yu xii ñí ñáyiú xíndecu-áⁿ sǎ dáyaha-yu tnúhu núú-gǎ cuèndá quee-gá ndatnúhu ndíhi ñaha-gǎ xií-yu. ³² Te cue ñáyiú xínucóo ni càndéé dǐñi-gá ní xáhǎⁿ-yu xii-gá:

—Ñaná-n ndíhi cue ñaní-n ndécú-yu quehé nándúcu ñáhá-yu xii-n —càchí-yu xáhǎⁿ-yu xii-gá.

³³ Te Jèsús ní xáhǎⁿ-gǎ xií-yu:

—Te cachí tnúhu-ndo yǒndi-gá ñáyiú cùu datná nǎnà-í ndíhi dàtná cue ñaní-í —càchí-gá xǎhaⁿ-gǎ xii-yu.

³⁴ Te dàtnúní ní xíndéhé vǎha-gá núú nchaa ñáyiú xínucóo ni càndéé dǐñi-gá-áⁿ, te ní xáhǎⁿ-gǎ xií-yu:

—Nchaa ñáyiú-a cúú-yu dàtná nǎnà-í ndíhi dàtná cue ñaní-í. ³⁵ Chi nchaa ñáyiú quide nacuaá càháⁿ Yá Ndiõxí, ñáyiú-áⁿ cúú-yu dàtná cue ñaní-í, ndíhi dàtná cue cùha-í, ndíhi dàtná nǎnà-í —càchí-gá xǎhaⁿ-gǎ xii-yu.

4

*Nàcuáa quide téé cuángacáⁿ triú
(Mt. 13:1-9; Lc. 8:4-8)*

¹ Te Jèsús ní ngüíta-gá dácuaàha tucu-gá ñáyiú yuhu làgúná. Te cuéhé víhí-yu ní tacá xíaⁿ núu cuásaá-gá núú ñí bàrcú núnǐi xití ndute làgúná-áⁿ, te núú xǎáⁿ ní ngóo-gá te ní ngüíta-gá

dánèhé ñáhá-gǎ xií-yu, te nchaá-yu xíxúcu-yu yuhu làgúná-áⁿ. ² Te ní ngüíta-gá ní caní-gá titní cuèndú núú-yu nàcuáa tecú tnúní-yu tnúhu-gá, te xǎhaⁿ-gǎ xií-yu:

³ —Chí cündédóho vǎha ñíⁿ cuèndú ná càni-í-a. ñíⁿ téé cuángacáⁿ-dé triú.

⁴ Te òré ní ngüíta-dé dǎngoyo-dé triú-áⁿ, te dava ní quene ndava ní ngava ndéé ichi, te ní xiní cue tílaá te ní nadatácá-güedi. ⁵ Te dava ní ngava ñuhu yadi núú yíhí víhi yúú, te ndíhi-ni ní xínu-xi cuèndá sǎ ñà túú càvivi ñuhu. ⁶ Dico òré ní nayehé ñá túú ní cündee iní-xi chi ní yíchí-xi, chi ñá túú ní ñíhí quíhíⁿ cúnú yóho-xi. ⁷ Te dava ní ngava núú yúcu ndíquíⁿ tnu ñu, te ñíⁿ nuu-ni ní xínu-xi ndíhi tnu ñu, te tnu ñu-áⁿ ní sahnu-xi te ní dánáá-xi nchaa triú sǎ ní xínu-áⁿ.

⁸ Dico dava triú-áⁿ ní ngava-xi núú ndécú ñuhu cocoⁿ, te xíaⁿ ní xínu-xi te ní sahnu-xi te ío vǎha ní cuu, chi núú ñíⁿ-ní triú-áⁿ te dava yoco-xi ní ngüíhi ócò úxí triú-xi, te dava yoco-xi ní ngüíhi únídico triú-xi, te dava yoco-xi ní ngüíhi ñíⁿ cièndú triú-xi —càchí-gá xǎhaⁿ-gǎ xií-yu.

⁹ Te xǎhaⁿ tùcu-gá xií-yu:

—Nchaa nchòhó ñáyiú ní xíndedóho nchaa tnúhu ní cáháⁿ-í-a, te ío vǎha chí cuáha cuèndá —càchí-gá xǎhaⁿ-gǎ xií-yu.

*Jèsús càháⁿ-gá ná cuèndá ducaⁿ
càni-gá cuèndú*

(Mt. 13:10-17; Lc. 8:9-10)

¹⁰ Te sátá ní ndaca ñáyiú-áⁿ te ní quendóo mee-nǎ Jèsús ndíhi cue téé xíca cuu ndíhi-gá, ndíhi ñíⁿ úú-nǎ ñáyiú. Te ñáyiú-áⁿ ndíhi cue téé-áⁿ ní xícáⁿ tnúhǔ-yu ndíhi-güedé núú-gǎ, núu nása quèe-xi cuèndú ní caní-gá núú-yu ndíhi-güedé. ¹¹ Te ní xáhǎⁿ-gǎ:

—Nchòhó chi sa càchí tnúhu Yá Ndiõxí xii-ndo ñíⁿ sǎ vǎtá quíní-gá-ndó, chi càchí tnúhu-gá nàcuáa cada-gá ndíhu ndaha-gǎ ñáyiú, dico dava-gá ñáyiú càni-í

mee-ni cuèndú núŭ-yu. ¹² Chi cuéi na quini-yu nchaa nàcuáa cuu dico ni vã cútnùni iní-yu ná cuèndá ducaⁿ cùu, àdi cuéi na cùndedóho-yu dico ni vã tècú tnùnì-yu. Te ducaⁿ ndòhó-yu cuèndá sá vã quindáá iní-yu Yá Ndiòxí, ndihi cuèndá sá vã cáda càhnu iní-gá nchaa yíca cuèchi-yu —càchí-gá xãhaⁿ-gã xii-yu ndihi-güedé.

Jèsús càháⁿ-gá nàcuáa quèe-xi cuèndá tée cuángacáⁿ triú

(Mt. 13:18-23; Lc. 8:11-15)

¹³ Te ní xáhaⁿ tùcu Jèsús xii cue tée xica cuu ndihi-gá, ndihi cue ñáiyu-áⁿ:

—Nchòhó, ñá túú ní tècú tnùnì-ndó cuèndú ní cani-í núú-ndó, te núu ducaⁿ, ÷te nása tecú tnùnì-ndó dàva-gá cuèndú cani-í núú-ndó-í? Te ña càchí tnúhu-í xii-ndo nàcuáa quèe-xi cuèndú ní cani-í núú-ndó. ¹⁴ Te tée cuángacáⁿ triú-áⁿ cúu-dě dàtná ñⁿ tée cuáháⁿ càháⁿ tnúhu Yá Ndiòxí núú ñáiyu. ¹⁵ Te triú-áⁿ cúu-xí dàtná tnúhu Yá Ndiòxí, te triú sá ñi quene ndava ní ngava ndéé ichi, xíãⁿ cúu-xí dàtná ñáiyu ní tnahá iní-xi tnúhu Yá Ndiòxí, dico sácuihná cuáháⁿ-xi xòcani-xi tnúhu-gá iní-yu cuèndá sá vã cáncñícúⁿ nihnú-yu nàcuáa càháⁿ tnúhu-áⁿ. ¹⁶ Te triú sá ñi ngava ñuhu yadi núú yíhí vîhi yúú, xíãⁿ cúu-xí dàtná ñáiyu ní xíndedóho tnúhu Yá Ndiòxí te díí iní ní tní-yu tnúhu-gá. ¹⁷ Dico òré ná ngüita ñáiyu cúcuèhé ñãhá-yu xii-yu àdi nándi-gá sá yãha-yu sá cuèndá tnúhu-gá, te ñá cùndèe iní-yu chí dàñá-yu tnúhu-gá cuèndá sá ñã túú nihí ndéè-yu. ¹⁸ Te triú sá ñi ngava núú yúcu ndíquíⁿ tnu iñu xíãⁿ cúu-xí dàtná ñáiyu ní tecú dóho-xi tnúhu Yá Ndiòxí, ¹⁹ dico cuéé cuéé ní nacuanaá-yu tnúhu-gá, chí cuèndá mee-ni sá cúu-xí mèe-yu ñuhu iní-yu, ndihi cuèndá sá ño sàni iní-yu cuu cuicá-yu, ndihi cuèndá sá ño cùdíí iní-yu nchaa sá ío

ñuyíu-a, te ñá túú ñuhu iní-yu tnúhu sá ñi xíndedóho-yu-áⁿ nàcuáa cada váha-yu cundecú-yu. ²⁰ Dico triú sá ñi ngava núú ndécú ñuhu cocoⁿ, xíãⁿ cúu-xí dàtná ñáiyu ní xíndedóho tnúhu Yá Ndiòxí te quidè-yu nchaa nàcuáa càháⁿ tnúhu-áⁿ. Te cada iní-ndó sá ñáiyu-áⁿ cúu-yu dàtná triú sá ñi nguíhi yoco-xi ócó úxi triú-xi, ndihi triú sá ñi nguíhi yoco-xi únídico triú-xi, ndihi triú sá ñi nguíhi yoco-xi ñⁿ cièndú triú-xi. Te ducaⁿ sátnahá-xi cúu-yu chí ío váha quidè-yu —càchí-gá xãhaⁿ-gã xii cue tée xica cuu ndihi-gá ndihi cue ñáiyu-áⁿ.

Cuèndá iti

(Lc. 8:16-18)

²¹ Te xãhaⁿ-gã xii nchaa ñáiyu:

—Ñá túú ñi ñⁿ ñáiyu tèñuhú iti te chiváha-yu ñⁿ xití quídi, àdi chiváha-yu ñⁿ caha càamá, chí tàxi ndecú-yu ñⁿ núú dùcúⁿ cuèndá cutnùní núú nchaa ñáiyu. ²² Te ñi ñⁿ tnúhu sá ñã tècú tnùnì ñáiyu vitna cachí-ó sã vã tècú tnùnì-yu chí dacuitíí sã tècú tnùnì-yu, te ñi ñⁿ tnúhu sá càchí-ó cùu yuhu vitna vá cúu yùhu chí dacuitíí sã quée tũ-xi núú ñáiyu. ²³ Te nchòhó cue ñáiyu ní xíndedóho nchaa tnúhu ní càháⁿ-í-a, te ío váha chí ná cuãha cuèndá —càchí-gá xãhaⁿ-gã xii-yu.

²⁴ Te ní xáhaⁿ tùcu-gá:

—Ío váha chí cùndedóho tnúhu na càháⁿ-í-a. Te nàcuáa-ni quide-ndo danehé-ndó ñáiyu tnúhu Yá Ndiòxí, te ñu-ni ducaⁿ càda ñaha-gá xii-ndo, te uuⁿ-gá ducaⁿ càda-gá sá cúu-xí-ndó. ²⁵ Te nchaa nchòhó ñáiyu tècú tnùnì tnúhu Yá Ndiòxí, uuⁿ-gá cuita tecú tnùnì-ndó tnúhu-gá quíhíⁿ. Te nchaa nchòhó ñáiyu ñã túú tècú tnùnì tnúhu-gá, te uuⁿ-gá vá tècú tnùnì-ndó —càchí-gá xãhaⁿ-gã xii-yu.

Nàcuáa sàhnu triú

²⁶ Te Jèsús xãhaⁿ tùcu-gá:

—Na càni-í ìⁿ cuèndú núú-ndó cuèndá tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. Ìⁿ téé cuángacáⁿ-dé triú. 27-28 Te sátá nǐ yáha ní sacáⁿ-dé triú-áⁿ, te cuánuhúⁿ-dé vehe-dé ndétátúⁿ-dé. Te ducaⁿ-ni ta xica nduu cuáháⁿ te ní xínu triú-áⁿ, te nàcuáa ta sàhnu-xi cuáháⁿ te ta quèe ndaha-xi, te ducaⁿ-ni cùu ní sáá nduu nǐ quene yoco-xi te ní nguíhi triú-xi, dico téé ní sacáⁿ triú-áⁿ ñà túú xini-dé nása ní sahnu-xi, chi mee ñùhu ní quide-xi ní sahnu triú-áⁿ. 29 Te òré sa ní ndihi ní cuaaⁿ te ní nguíta téé ní sacáⁿ-áⁿ náquèhndé-dé nátàxi tnahá-dé —càchi-gá xàhaⁿ-gá xii-yu.

Cuèndá ndíquíⁿ yutnu nàni mostázá

(Mt. 13:31-32; Lc. 13:18-19)

30 Te xàhaⁿ tucu Jesús xii-yu:

—Na càni tucu-í ingá cuèndú núú-ndó cuèndá tecú tñuní-ndó nàcuáa cada-xi òré ndíhu ndaha ñàha Yá Ndióxi xii ñáyiú. 31 Ìⁿ yutnu nàni mostázá cúú-xi ìⁿ yutnu sá lǐhli vìhi-gá ndíquíⁿ-xi dàcúúxi ndíquíⁿ nchaa cúhú, 32 dico òré ná càcáⁿ-güedé núú ñùhú-güedé, te na xínu-xi te sàhnu-gá-xi dàcúúxi nchaa cúhú, te nchaa dité-xi ío cùu cahnu-xi, te ndéé cue quiti ndàva núú tàchí sácõo-güedi nchaa núú dité-xi xínu ndeti-güedi —cachí-gá xàhaⁿ-gá xii-yu.

Ío titní cuèndú ní cani Jèsús núú ñáyiú

(Mt. 13:34-35)

33 Te ío-gá vài cuèndú ní cani Jèsús núú ñáyiú cuèndá tecú tñuní-yu tñuhu Yá Ndióxi, dico dava cuèndú ñà túú ní càni-gá núú-yu, chi ní cutnùní iní-gá sá vǎ tècú tñuní-yu nchaa. 34 Te mee-ni cuèndú ní cani Jèsús núú ñáyiú ndi tnahá òré ní dánèhé ñàhá-gá xii-yu tñuhu-gá. Te òré ndécú mée Jesús ndihi cue téé xica cuu ndihi-gá, te ní

xàhaⁿ-gá xii-güedé nàcuáa quèe-xi ìⁿ ìⁿ cuèndú ní cani-gá núú ñáyiú.

Jèsús ngáni-gá táchi ndihi ndute làgúná

(Mt. 8:23-27; Lc. 8:22-25)

35 Te diu-ni nduu-áⁿ òré sa ta cùndiquíⁿ cuáháⁿ ní xàhaⁿ Jèsús xii cue téé xica cuu ndihi-gá:

—Chí ná quíhíⁿ-ó ndàa ingá xio yuhu làgúná —càchi-gá xàhaⁿ-gá xii-güedé.

36 Te ní quide ndee ìní-gá nchaa ñáyiú xixúcu-áⁿ, te diu-ni bàrcú sá ñùhú-gá òré ní dánèhé-gá ñáyiú tñuhu-gá diu-ni xíáⁿ ní dácácá cuè téé xica cuu ndihi-gá ndécá ñàha-güedé xii-gá cuáháⁿ, te tnahá ìⁿ ùú-gá bàrcú ní xica-xi nchicúⁿ-xi bàrcú ñùhú-gá-áⁿ cuáháⁿ. 37 Te ñùhu bàrcú ñùhú-gá-áⁿ ichi cuáháⁿ-xi núú ndute, te ní quexìo ìⁿ táchí nǐhi, te ta nàdachitúⁿ-xi ndute xití bàrcú-áⁿ cuáháⁿ, te sa cuíní-nǎ-xi quèe naa bàrcú-áⁿ xití ndute ni cùu. 38 Te Jèsús cáá-gá xidí-gá ìⁿ xichi ndàa sátá bàrcú-áⁿ, te yìnchihi ìⁿ dóo díquíⁿ-gá. Te sá dúcáⁿ cuíní-xi quèe naa bàrcú-áⁿ núu ní sáháⁿ-güedé ní ndocani ñàha-güedé xii-gá, te xàhaⁿ-güedé:

—ìMèstrú, ndíquíú ìní! ¿Náa ñà túú ndíhú iní-n sǎ tá quèe naa-o cuáháⁿ-áⁿ? —càchi-güedé xàhaⁿ-güedé xii-gá.

39 Te Jèsús ní ndíquíú ìní-gá te ní ndacóo-gá, te ní tenàa-gá táchí-áⁿ, te ní xàhaⁿ-gá xii ndute làgúná:

—ìTnavíí-nǎ cuhuⁿ, chi ío dusaⁿ! —càchi-gá xàhaⁿ-gá xii ndute-áⁿ.

Te òré-ni ní nguíñí táchí-áⁿ te ní nucúndecu nahi-nǎ ndute làgúná-áⁿ. 40 Te Jèsús ní xàhaⁿ-gá xii-güedé:

—¿Ná cuèndá ndéé dúcáⁿ yùhú-ndó-í? ¿Náa ñà túú sàndáá iní ñàhá ndisa-ndo xii-í-áⁿ? —càchi-gá xàhaⁿ-gá xii-güedé.

41 Dico mee-güedé chi ío ní yuhú-güedé sá ducaⁿ ní quide-gá ní xini-güedé, te ní xitnàha-güedé:

—¿Te ná tée cùu téa-núu ní cáháⁿ-ni-dé, te ní ngüíñí táchí te ní nucúndecu nahí ndúte lagúná-a-i? —càchí-güedé xitnàha-güedé.

5

Íⁿ tée yìhi ñaha espíritú cúndìhi yucu ñávàha

(Mt. 8:28-34; Lc. 8:26-39)

1 Te ní sáá Jèsús ndìhi cue tée xica cuu ndìhi-gá ndàa ingá xio yuhu làgúná yucu cue tée ñuú Gàdará.

2 Te òré ní quene-gá xití bàrcú te ñⁿ tée yìhi ñaha espíritú cúndìhi yucu ñávàha ní quee-dé núú yíndüxi ndíyí cuáhán-dé núú-gá.

3 Te mee-ni núú yíndüxi ndíyí-áⁿ quidé vèhe-dé, te cuèi dàcutu ñaha-güedé cadená xii-dé dico ñá túú tñahí ndàcu-güedé núú-dé.

4 Te ío títí xito ní dácútú-güedé cadená sáhá-dé ndìhi ndaha-dé dico ní dándává-ni-dé, te ní xóo dacàchi-gá-dé nchaa cadená-áⁿ, te ñá túú tñahí ní ndàcu-güedé núú-dé. 5 Te cuèi nduu cuèi niú ní xóo cana saa-dé, te váha-ni núu xití yucu ndècu-dé àdi núu yíndüxi ndíyí dico càna saa nahí-ni-dé, te ío ní xóo dánícuèhé-dé méé-dé ndìhi yúu. 6 Te òré ní xini-dé Jèsús te xinu-dé ní sáhán núú-gá, te ní ngüíñí xití-dé, 7 te espíritú yìhi ñaha xii-dé-áⁿ ní quide-xi níhi ní cáháⁿ-dé, te xàhaⁿ-dè xii-gá:

—¿Ná cuendá véxi yòhó Jèsús Déhe Dútú Ndióxi sàdí-n ìchi-í? Te càháⁿ ndàhú-í núu Ndióxi yuhu núú-n sá vā dándòho ñaha-n xii-í —càchí-dé xàhaⁿ-dè xii-gá.

8 Te ducaⁿ ní cáháⁿ-dé cuendá sá Jèsús ní xàhaⁿ-gá xii espíritú cúndìhi yucu ñávàha yìhi ñaha xii-dé-áⁿ sá queé ñaha-xi xii-dé.

9 Te Jèsús ní xicáⁿ tñuhú-gá núú-dé, te xàhaⁿ-gá:

—¿Nása nàni-n-i? —cachí-gá xàhaⁿ-gá xii-dé.

Te ní xàhaⁿ-dè:

—Vai Sandadú, duha nàni-í chi ío cuèhé-ndí —càchí-dé xàhaⁿ-dè xii-gá.

10 Te cue espíritú cúndìhi yucu ñávàha-áⁿ ní cáháⁿ ndàhú-xi núu Jèsús sá vā téndàha ñaha-gá xii-xi quíhíⁿ-xi ingá xichi. 11 Te diu-ni yatni yucu núu ndécú Jèsús-áⁿ yìhi vāi cuchí xixexi-güedi. 12 Te nchaa cue espíritú-áⁿ ní cáháⁿ ndàhú-xi núú-gá, te xàhaⁿ-xi xii-gá:

—Càháⁿ ndàhú-ndí núú-n sá dáñá-n quíhu-ndí yiqui cùñú nchaa cùchí-áⁿ —càchí-xi xàhaⁿ-xi xii-gá.

13 Te Jèsús ní xàhaⁿ-gá sá cúu quíhu-xi yiqui cùñú-güedi, te xínu dàtná úu mīl-güedi yìhi yucu-áⁿ. Te nchaa espíritú cúndìhi yucu ñávàha yìhi ñaha xii tée-áⁿ ní quee ñaha-xi xii-dé, te cuánguìhu-xi yiqui cùñú nchaa cùchí-áⁿ, te nchaa-güedi ní xinu-güedi duha ní quee-güedi ndàa núu dèhvá yuhu làgúná-áⁿ, te ní ngaunihnu-güedi xití ndute te ní ndìhi-güedi ní cáhá.

14 Te òré ní xini cue tée xito cuchí-áⁿ nàcuáa ní cuu te ní xinu-güedé, te ní sáhán-güedé ní cani-güedé cuendú núu cuè ñáyiú ndècu xití ñuú, ndìhi núu cuè ñáyiú ndècu xití yucu. Te nchaa ñáyiú ní níhí tñuhu ní xicá-yu cuáhán ndéhè-yu nàcuáa ní cuu. 15 Te òré ní quexió-yu núu ndécú Jèsús te ní xini-yu tée ní xìhi ñaha cuè espíritú cúndìhi yucu ñávàha-áⁿ núcòo-dé núu sáhá Jèsús, te nihnu-ná-dé dóo-dé te núcòo-ná-dé dàtná ñⁿ ñáyiú váha, te ní yuhú-yu òré ní xini ñáhà-yu xii-dé. 16 Te nchaa ñáyiú ní xini nàcuáa ní cuu ní ndúha tée yìhi ñaha cue espíritú cúndìhi yucu ñávàha-áⁿ ní cùu ní caní-yu cuendú núu nchaa ñáyiú ní quexio-áⁿ nàcuáa ní cuu ní ndúha tée-áⁿ ndìhi nàcuáa ní cuu cuendá

nchaa cùhí-án. ¹⁷ Te sá dúcáⁿ ní níhí ñáyiú-án tñuhu nàcuáa ní cuu núu nchaa-yu ní ngüita-yu cãháⁿ ndàhú-yu núú Jèsús sá ná quèe-gá yucu ñuú-yu núhú-gá.

¹⁸ Te ní xica-gá cuáháⁿ-gá núú ndécú bàrcú, te òré ndée-gá bàrcú-án nùhú-gá ní ngüita tée ní xíhi ñaha cuè espíritú cúndíhi yucu ñávãha-án cãháⁿ ndàhú-dé núú-gã nõu vá cúndèe iní-gá quíhíⁿ ndíhi ñaha-gã xii-dé. ¹⁹ Dico ñá túú ní sãha-gá tñuhu quíhíⁿ ndíhi ñaha-gã xii-dé, te ní xáhaⁿ-gã xii-dé:

—Cuanùhú vehe-n, te cani-n cuendú núú cuè ñáyiú sá Yã Ndiõxí ní cundáhú iní ñáhá-gã xii-n, te ío cãhnu cuu nchaa sá vãha ní quide-gá sá cúu-xi-n —cãchí-gã xãhaⁿ-gã xii-dé.

²⁰ Te tée-án ní xica-dé cuánuhú-dé, te ní sáháⁿ-dé ndí ùxí ñuú nání Dècápolis, te ní cani-dé cuendú núú nchaa ñáyiú sá ío cãhnu cuu nchaa sá vãha ní quide ñaha Jèsús xii-dé, te nchaa-yu ío ní cuñúhu-yu.

Cuendá déhe yoco té Jàirú ndíhi cuendá ñá ñadíhi ní tnándeé dóó Jèsús (Mt. 9:18-26; Lc. 8:40-56)

²¹ Te Jèsús cuánde-gá bàrcú, te ní natehdé-gá ndàa ingá xio yuhu làgúná, te ío vai ñáyiú ní tacá núú ní quexio-gá-án, te xíaⁿ ndécú-gã ²² ní quexio ñá tée tàxi tñuní veñúhu núú-gã, te tée-án nání-dé Jàirú, te ní ngüíñí xítí-dé núú-gã. ²³ Te ní ngüita-dé cãháⁿ ndàhú-dé núú-gã, te xãhaⁿ-dé xii-gã:

—Ío cãhú tñahá déhe yoco-í cùhú-xi, te ndècu-ná-xi sá cúu-xi, te véxi-í cãháⁿ ndàhú-í núú-n nõu vá cúndèe iní-n quíhíⁿ-ó vèhe-í tendaha-n-xi cuendá ndúha-xi, te cundecu-xi —cãchí-dé xãhaⁿ-dé xii-gã.

²⁴ Te Jèsús ní xica-gá cuáháⁿ-gá ndíhi tée-án, te ío vai ñáyiú nchícúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu. ²⁵ Te tnuú nchaa ñáyiú-án ñútnàhá ñá

ñaha cùhú, te ñaha-án sa ní cuu úxúú cuía sá cùhú-aⁿ ngòyo ñaha níñí xii-aⁿ. ²⁶ Te ío ta ndòho-aⁿ véxi, te ío cuéhé ñátátná ní cuu ta quide tátna ñaha xii-aⁿ, te sa ní ndíhi nchaa sá ndécú ndíhi-aⁿ ní nadico-aⁿ cuendá ní níhi-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ dico ní ñá-yu ñá túú ní ndàcú-yu ndúha-aⁿ, chi da uuⁿ-gá tá cùu cahú-aⁿ cuáháⁿ. ²⁷ Te òré ní níhi-aⁿ tñuhu cuendá Jèsús, te ní xica-aⁿ cuáháⁿ-aⁿ núú ndécú-gã. Te òré ní quexio-aⁿ núú ndécú-gã te ní sáháⁿ ndehe yatni-aⁿ ndàa sátá-gã ní tnándeé-aⁿ dóó-gã. ²⁸ Te ducaⁿ ní quide-aⁿ chi ní sani iní-aⁿ sá nõu ndacu-aⁿ tnándeé-aⁿ cuèdicó luha yuhu dóó Jèsús te ndúha-aⁿ ní sani iní-aⁿ. ²⁹ Te òré ducaⁿ ní quide-aⁿ te ñá túú-gã ní ngòyo ñaha-gá níñí xii-aⁿ, te òré-án ní cutnùní iní-aⁿ sá ní ndúha-aⁿ cuéhé tñahá-aⁿ. ³⁰ Te Jèsús ní cutnùní iní-gá sá ñá-yu ní ndúha sá cuendá-gã, núu ní nchócótó-gã ndàa sátá-gã te ní xicáⁿ tñuhú-gã núú nchaa ñáyiú nchícúⁿ ñáhá xii-gã, te xãhaⁿ-gã xii-yu:

—¿Ndèdacàa-ndo ní tnándeé ñáhá xii-í? —cãchí-gã xãhaⁿ-gã xii-yu.

³¹ Te cue tée xica cuu ndíhi-gá ní xãhaⁿ-güedé xii-gã:

—Mèstrú, ndèhe-n sá vái ñáyiú nchícúⁿ ñáhá xii-n, te texio texio dàdehnde ñahá-yu xii-n te xicáⁿ tñuhú-gã-n yòo ní tnándeé ñáhá xii-n —cachí-güedé xãhaⁿ-güedé xii-gã.

³² Te Jèsús ní xíndéhé vãha-gá xio xio díñí-gá nõu ndèdacàa ñáyiú ní tnándeé ñáhá xii-gã. ³³ Te sá dúcáⁿ ní cutnùní iní ñadíhi-án nàcuáa ní cuu, nõu yuhú yuhú-aⁿ ní sáháⁿ-aⁿ ní ngüíñí xítí-án nõu Jèsús, te ní xáhaⁿ ndáa-aⁿ xii-gã nàcuáa ndùu cuendá-aⁿ. ³⁴ Te Jèsús ní xãhaⁿ-gã xii-aⁿ:

—Yòhó ñaha cùhú ní cùu, ní sándáa iní ñáhá-n xii-í, nõu ní ndúha-n, te vitna cuanùhú te vá

ndìhú-gá iní-n, chi vá dúcáⁿ-gã ndoho-n —càchí-gá xãhaⁿ-gã xii-aⁿ.

35 Te cãháⁿ dúcáⁿ-ní Jèsús ní sáá cue tée xinu cuechi vehe té Jàirú tée tàxi tnuní veñúhu-áⁿ, te xãhaⁿ-güedé xii-dé:

—Sa ní xihí déhe-n, vá chíchìuⁿ-gá-n Mèstrú —càchí-güedé xãhaⁿ-güedé xii-dé.

36 Dico Jèsús ñá túú ní quide cuendá-gá nãcuáa nduu tñúhu ní cãháⁿ cue tée-án, te ní xãhaⁿ-gã xii tée tàxi tnuní veñúhu-áⁿ:

—Ñá túú nã caní iní-n, quindáá iní ñáhá-ní-n xii-í —càchí-gá xãhaⁿ-gã xii-dé.

37 Te Jèsús vá yõo-gá ní cuñí-gá canchicúⁿ ñáhá xii-gá quihíⁿ, chi té Pèlú-ni, ndihí té Jãcobó-ni, ndihí ñaní-ni-dé té Juáa cuáháⁿ ndihí ñaha-gã xii-güedé. 38 Te òré ní quexio-gá ndihí-güedé vehe tée tàxi tnuní veñúhu-áⁿ, te ní xiní-gá sá ïo vai ñáiyu xĩndecu, te súúni dùsaⁿ quidé-yu te níhi xicáháⁿ-yu te xĩndáhí-yu. 39 Te òré cuánguihu-gá xití vehe, te ní xãhaⁿ-gã xii-yu:

—¿Ná cuendá ndéé dúcáⁿ ïo dusaⁿ quide-ndo, te ndáhyú-ndó? Te xíchí-a ñá túú ní xihí-xi chi dicó xidí-xi —càchí-gá xãhaⁿ-gã xii-yu.

40 Te ní sácú ndéé ñáhã-yu xii-gá sá dúcáⁿ ní cãháⁿ-gã, chi sá cúu-xí mèe-yu chi ní xihí ndisa xíchí-ãⁿ. Te òré-áⁿ ní queñuhu-gá nchaá-yu quehé, te cuánguihu-gá núu cándodo yiqui cuñú xíchí ní xihí-áⁿ. Te ndeca-gá tãtã xíchí ní xihí-áⁿ ndihí nãná-xi cuánguihu, te tñahá cue tée úní ndihí-gá-áⁿ cuánguihu ndihí-gá. 41 Te ní tñi-gá ndaha xíchí ní xihí-áⁿ, te ní xãhaⁿ-gã:

—Tálita, cúmí —càchí-gá xãhaⁿ-gã.

Te tñúhu-áⁿ quée-xí: Yohó xíchí cuéchí yúhú càchí-í sá ndácõo-n, duha quèe-xi tñúhu-áⁿ.

42 Te òré-ni-áⁿ ní ndoto xíchí cuéchí-ãⁿ ní ndacõo-xi ní nacaca cuu-xí, te ndecu-xi úxúú cuíá-xi.

Te ïo ní cuñúhu nchaa ñáiyu sá dúcáⁿ ní dándótó ñaha Jèsús xii-xi.

43 Te Jèsús ní cãháⁿ víhí-gã dóho tãtã-xi ndihí nãná-xi sá vá yõo ïⁿ cuñàhá-yu sá ní dándótó ñaha-gã xii-xi. Te sátá dúcáⁿ te ní xãhaⁿ-gã xii-yu sá cuñàhá-yu xii-xi sá cáxi-xí.

6

Jèsús ndécú-gã ñuu Nazàrét
(Mt. 13:53-58; Lc. 4:16-30)

1 Te Jèsús ní ndee-gã ñuu núu ní dándótó-gã xíchí ní xihí-áⁿ, te cuánuhú-gá núu cúu ñuu-gã, te tñahá cue tée xica cuu ndihí-gã cuánuhú ndihí-gã. 2 Te ndecu Jèsús ñuu-gã ní tnahá nduu ndetátú ñáiyu. Te nduu-ãⁿ cuánguihu-gã xití veñúhu dàcuaha ñaha-gã xii-yu. Te vai ñáiyu ndedóho nchaa tñúhu càháⁿ-gã, te xicuñúhu víhí-yu, te xitnãhá-yu:

—¿Ndéé ní sáháⁿ dácuahá tẽ-a núu ndéé duha váha càháⁿ-dé, nása ní quide-dé núu ndéé duha ïo váha cùtnuní iní-dé, te ndacu-dé quidé-dé nchaa sá vá yõo tñahí ndacu cada-i?

3 Te dicó carpintèrú cúu-dé, dicó déhe tá Màriá cúu-dé, te ñaní-dé cúu té Jãcobó, ndihí té Chèé, ndihí té Jüdás, ndihí té Ximú, te ñiu-ni cue cúa-dé cúu ñáiyu ndecu ndihí-o ñuu-a —càchí-yu xitnãhá-yu.

Te ñá túú ní cuñí-gã-yu cãháⁿ ndihí váha ñàhá-yu xii-gã. 4 Te Jèsús ní xãhaⁿ-gã xii-yu:

—Te núu ïⁿ té cãháⁿ tñúhu Yá Ndiõxí ná nãsãá-dé ñuu-dé dacuaha-dé ñáiyu tñúhu-gã, te nchaa ñáiyu ñuu-dé-áⁿ, ndihí nchaa ñáiyu ndecu ndihí-dé vehe-dé, ndihí nchaa ñáiyu cùu ndi mee-dé ñá túu nèhé-yu sá yĩñùhu núu-dé, dico cue ñáiyu nchaa dava-gã ñuu chi nèhé-yu sá yĩñùhu núu-dé —càchí-gã xãhaⁿ-gã xii-yu.

5 Te ñá túú ní quide tãtã Jèsús vai ñáiyu cuendá sá ñá túú ní sãndáá iní ñáhã-yu xii-gã, dico ní quide

tátna-gá ìⁿ úú ñáyiú cùhú ní sándáá iní ñáhá xii-gá. Te ní tendaha ñaha-ni-gá xii-yu te ní ndúha-yu. ⁶ Te ío ní cuñúhu-gá sá dúcáⁿ ñà túú ní cuñí-yu quindáá iní ñáhã-yu xii-gá. Te sátá dúcáⁿ te ní xica-gá cuáhãⁿ-gá nchaa dava-gá ñuú lihli càa yatni xíaⁿ cuendá dacuàha-gá ñáyiú tnúhu-gá.

Jèsús táuchiuⁿ-gá quíhíⁿ cue téé xica cuu ndíhi-gá cáháⁿ-güedé tnúhu Yá Ndiöxí núú ñáyiú

(Mt. 10:5-15; Lc. 9:1-6)

⁷ Te Jèsús ní cana-gá ndi ùxúú cue téé xica cuu ndíhi-gá, te ní sáñaha-gã xii-güedé tnúhu ndee iní cundecu ndíhi-güedé cuendá queñuhu-güedé nchaa espíritú cündíhi yucu ñávãha yíhi ñaha xii ñáyiú. Te ní xáhaⁿ-gã xii-güedé sá ndi ndúú ndi ndúú-güedé quíhíⁿ-güedé cáháⁿ-güedé tnúhu Yá Ndiöxí núú ñáyiú. ⁸⁻⁹ Te cùmání-gã caca-güedé quíhíⁿ-güedé, te ní xáhaⁿ-gã xii-güedé:

—Vã canèhe-ndo ñunu cuhuⁿ ndachiuⁿ-ndo, te ní vã canèhe-ndo sá cáxi-ndó, te ní vã canèhe-ndo díhúⁿ, chí ìⁿ caa-ni tátnu canehe-ndo, te chàú yíhí-ni-ndó-ãⁿ xíaⁿ-ni quíhi-ndo, te vã canèhe-gá-ndó ìngá ichi dóó-ndó chí ðiu-ni dóó níhnú-ndó-ãⁿ xíaⁿ tnàhí-ni cuihnu-ndo te ñá túú tnàhí-gá ná canehe-ndo —càchí-gá xáhaⁿ-gã xii-güedé.

¹⁰ Te xáhaⁿ tùcu-gá:

—Te òré ná sàá-ndó ìⁿ ñuú, te ío ñáyiú cáháⁿ ñáhã-yu xii-ndo vèhé-yu, te xíaⁿ-ni cundecu-ndo ndéé ná sàá nduu ndèe-ndo ñuú-ãⁿ. ¹¹ Te núú ío dava ñuú ñá túú cuñí-yu cáháⁿ ndíhi ñaha váha-yu xii-ndo, te ní ñà túú cuñí-yu cundedóho-yu tnúhu càháⁿ-ndó, te ndee-ni-ndo ñuú-ãⁿ te naquidi-ndo ticáchúhmã ní tní sáhã-ndó cuendá ná cùtnuní iní-yu sá ñà túú quide váha-yu. Te ná càchí tnúhu ndáá-í xii-ndo sã ná sàá nduu càda

ndáá Yá Ndiöxí cuéchi nchaa ñáyiú, te cue ñáyiú ducaⁿ na càda ñaha xii-ndo-ãⁿ ïo-gá ndohó-yu dàvã-ãⁿ dàcúúxí dàtnã ndoho cue ñáyiú ñuú Sòdomá ndíhi cue ñáyiú ñuú Gòmorra —càchí-gá xáhaⁿ-gã xii-güedé.

¹² Te cue téé-ãⁿ ní xica-güedé cuáhãⁿ-güedé te ní ngúita-güedé dacuàha-güedé cue ñáyiú tnúhu Yá Ndiöxí, te xáhaⁿ-güedé xii-yu:

—Chí dándixi túu iní sá ñà túú quide váha-ndo ndècu-ndo, te dañã-ndo nchãa ichi cuehé ichi duha ndècu-ndo. —càchí-güedé xáhaⁿ-güedé xii-yu.

¹³ Te vãi espíritú cündíhi yucu ñávãha yíhi ñaha xii ñáyiú ta queñuhu-güedé yiqui cùnú-yu cuáhãⁿ, te vãi tucu ñáyiú cùhú tá quide tátna-güedé cuáhãⁿ chíhí ñaha-güedé acití xii-yu te ndúha-yu.

Nàcuãa ní cuu ní xíhi té Juãá téé dàcuandute ñaha xii ñáyiú

(Mt. 14:1-12; Lc. 9:7-9)

¹⁴ Te nchaa xichi ní níhí ñáyiú tnúhu nchaa nàcuãa quide Jèsús, te tnàhá té Hèrodés téé yindaha ñaha xii ñáyiú ní níhí-dé tnúhu nchaa nàcuãa quide-gá, te ní cachí-dé:

—Té Juãá téé ní xóo dacuandute ñaha xii ñáyiú ní ndoto núú dàcãⁿ ndácú-dé quidé-dé nchaa sá vã yõo tnàhí ndàcu cada —duha ní cachí-dé.

¹⁵ Te dava ñáyiú càchí-yu sá té Eliás téé ní xóo cáháⁿ tnúhu Yá Ndiöxí ndéé sanaha ní nasáá-dé.

Te davã-yu càchí-yu sá cúú-gã dàtnã ìⁿ téé ní xóo cáháⁿ tnúhu Yá Ndiöxí ndéé sanaha. ¹⁶ Te té Hèrodés ní níhí-dé tnúhu nchaa nàcuãa càháⁿ-yu, te ní cachí-dé:

—Ðiu té Juãá téé ní táuchiuⁿ-í ní xehndé-güedé díquí-xi ní ndoto —càchí-dé.

¹⁷⁻¹⁸ Te duha ní cuu cùtnàhá ní sahní té Hèrodés téé Juãá, chí dàvã-ãⁿ ní naqueheⁿ té Hèrodés-ãⁿ ìⁿ ñaha nani Herodiás ndéca-dé, te ñaha-ãⁿ sã ní cãndeca ñaha ñàní-dé té Lípé.

Te té Juáá ní xáhaⁿ-dë xii té Hèrodés sá ñà túú ní quide vâha-dé sá dúcáⁿ ñi naqueheⁿ-dé ñaha ní cándeca ñani-dé, núú sá cuëndá ñaha-áⁿ ñi táúchíúⁿ tē Hèrodés ní tñii-güedé té Juáá ní chihi ñaha-güedé vecaá, te ní dácútú ñaha-güedé xii-dé, te ducaⁿ ñi quide-dé cuëndá sá ndécá ñaha-dé xii-aⁿ.

¹⁹ Te ñaha ñani Herodiás ndécá tē Hèrodés-áⁿ ío ní cuu úhú iní-aⁿ té Juáá, te ní cuini-aⁿ cahni-aⁿ-dé, dico ñá túú ní ñihí-aⁿ nâcuáa cada-aⁿ. ²⁰ Te mee tē Hèrodés chí ní cutnùní ndáá iní-dé sá tē Juáá cúú-dé ñiⁿ tēe quide mee-ni sá vâha, te quide ndáá-dé núú Yá Ndióxi, te ní xóo yùhú ñáhá-dé núú xiáⁿ ñá túú ní dàña-dé ná cada ñaha ñaha ndeca-dé-áⁿ xii té Juáá. Te té Hèrodés-áⁿ ío ní cudíí iní-dé ní xindedóho-dé nchaa tñúhu ní xáhaⁿ tē Juáá xii-dé, dico ñá túú ní sàni iní-dé duuⁿ duuⁿ tñii-dé tñúhu-áⁿ. ²¹ Te ñiⁿ nduu ní xóo vico vehe tē Hèrodés ní quide cãhnu-dé nduu ní cacu-dé. Te nduu-áⁿ ñi ñihí ñaha ñani Herodiás-áⁿ nâcuáa cada-aⁿ cuëndá cuú tē Juáá. Te nduu-áⁿ ní cáháⁿ té Hèrodés nchaa cue tēe cùchiuⁿ, ndihí nchaa cue tēe tàxi tñuní ñáhá xii cue sandadú, ndihí nchaa cue tēe cuica ndècu distritú Galiléa cuëndá cudini ndihí ñaha-dé xii-güedé nduu-áⁿ. ²² Te ndècu ñiⁿ déhe yoco ñaha nani Herodiás-áⁿ, te xíchí-áⁿ ñi quíhu-xi vehe núú cúú vico-áⁿ ñi xita saha-xi mèi oré yíhí tē Hèrodés mèsá ndihí nchaa cue tēe ní cáháⁿ-dé, te ío ní cudíí iní-dé ndihí nchaa cue tēe-áⁿ nâcuáa ní xita xíchí-áⁿ. Te té Hèrodés ní xáhaⁿ-dë xii-xi:

—Cácaⁿ núú-í núú ná cuini-n te taxi-í —càchí-dé xáhaⁿ-dë xii-xi.

²³ Te ní cacunehe-dé ndéé Yá Ndióxi nâcuáa cutnùní iní xíchí-áⁿ sá ndáá cuãñaha-dé núú ná cúú sá ná càcáⁿ-xi núú-dé cuéi ndéé cuádava nchaa sá ndécú ndihí-dé, te núú na càcáⁿ-xi. ²⁴ Te sá dúcáⁿ ñi xáhaⁿ-dë xii-xi núú ní quee-xi quehé ní xáhaⁿ-xi xii náná-xi:

—Náá, ¿ná cúú sá càcáⁿ-í núú tē Hèrodés? —càchí-xi xáhaⁿ-xi xii-aⁿ.

Te náná-xi-áⁿ ñi xáhaⁿ-aⁿ xii-xi:

—Cuáháⁿ cácaⁿ-n díqui tē Juáá tēe dàcuandute ñaha xii ñáyiú —càchí-aⁿ xáhaⁿ-aⁿ.

²⁵ Te ndihí-ni cuándihu xíchí-áⁿ xití vehe núú yíhí tē Hèrodés-áⁿ, te xáhaⁿ-xi xii-dé:

—Cuini-í sá mèi nduu vitna quehndé-n díqui tē Juáá tēe dàcuandute ñaha xii ñáyiú te taxi-n, díco na cùhuⁿ ñiⁿ xití cóhó taxi-n —càchí-xi xáhaⁿ-xi xii-dé.

²⁶ Te té Hèrodés ní ngüita-dé ndihú víhí iní-dé sá dúcáⁿ ñi xáhaⁿ-xi xii-dé, dico ñá túú ní cùyi-dé cuãñaha-dé xii-xi sá vâ cúú cuãñaha-dé sá xicáⁿ-xi, chí cuëndá sá núú nchaa ñáyiú ní xáhaⁿ-dë sá cúú cuãñaha-dé núú ná cúú sá ná càcáⁿ-xi, te ní cacunehe-dé ndéé Yá Ndióxi nâcuáa cutnùní iní-xi sá ndáá cuãñaha-dé sá ná càcáⁿ-xi núú-dé. ²⁷ Te té Hèrodés-áⁿ ndihí-ni ní xáhaⁿ-dë xii ñiⁿ sandadú sá quíhíⁿ-dë quehndé-dé díqui tē Juáá. ²⁸ Te sandadú-áⁿ ñi xica-dé cuáháⁿ-dë vecaá núú yíhí tē Juáá-áⁿ, te ní quexio-dé te ní xehndé-ni-dé díqui tē Juáá, te ní chihi-dé ñiⁿ xití cóhó te nèhe-dé cuánuhú ní sáha-dé xíchí xicáⁿ-áⁿ, te xíchí-áⁿ ñi nâcuáha-xi náná-xi. ²⁹ Te oré ní ñihí nchaa cue tēe ní xica cuu ndihí ndíi Juáá-áⁿ tñúhu sá dúcáⁿ ñi sahni ñaha-güedé xii ndíi, te ní sáháⁿ-güedé ní ndocani-güedé yiqui cùñú ndíi te ní chindúxi-güedé.

Jésús dácàxi-gá úhúⁿ mîl cue tēe te ñiⁿ ñáyiú ñihí ndihí landú

(Mt. 14:13-21; Lc. 9:10-17; Jn. 6:1-14)

³⁰ Te nchaa cue tēe ní táúchíúⁿ Jésús cuáháⁿ cáháⁿ tñúhu Yá Ndióxi núú ñáyiú ní ndexio-güedé núú-gã te ní ngüita-güedé nácani tñúhu-güedé nchaa nâcuáa ní quide-güedé ndihí nchaa nâcuáa ní dánéhé ñáhá-güedé xii-yu. ³¹ Te Jésús ní xáhaⁿ-gã xii-güedé:

—Chí nèhé ná quíhíⁿ-ó ìíⁿ xi-chi núú ñà túú ñáyíu ndetatú-ó —càchí-gá xáhaⁿ-gá xii-güedé.

Te ducaⁿ ní xáhaⁿ-gá xii-güedé, chí ío cuéhé ñáyíu cuáháⁿ véxi-yu cùú-yu núú ndécú-gá. Te ní ñà ñihí-gá nása cada-gá caxi-gá ndihí cue téé xíca cuu ndihí-gá. ³² Te Jèsús cuánguee-gá bàrcú ndihí mee-ni cuè téé ní táuchíúⁿ-gá cáháⁿ tnúhu-gá, te cuáháⁿ-gá ndihí-güedé ìíⁿ xichi núú ñà túú ñáyíu ndècu. ³³ Dico vai ñáyíu ní cutnùníní iní-yu sá díú-gá ñúhú bàrcú-áⁿ cuáháⁿ ndihí cue téé xíca cuu ndihí-gá, te nchaa ñúú cáá yàtni xíáⁿ ní quee ñáyíu xixinú-yu cuáháⁿ núú ní quidè-yu cuèndá quexìo Jesús, te sa ndècu-yu xíáⁿ ní quexìo-gá. ³⁴ Te òré ní quene Jèsús xití bàrcú, te ní xiní-gá cuéhé víhí ñáyíu xixúcu núú ní quexìo-gá-áⁿ, te ní cundàhú iní ñáhá-gá xii-yu chí ndècu-yu dàtná xíndecu cue mbéé cue quiti ñà túú tòli-xi, te ío vai núú sá ní ngúíta-gá ní dácuháⁿ ñàha-gá xii-yu. ³⁵ Te sátá tá cuáa cuáháⁿ te ní sáháⁿ cue téé xíca cuu ndihí Jesús núú-gá, te xáhaⁿ-güedé xii-gá:

—Sa ní cuaa te ñà túú ñáyíu ndècu yatni iha. ³⁶ Váha-gá dandàca nchaa ñáyíu-a chí na quíhíⁿ-yu nchaa vehe càa xití yucu-a, ndihí nchaa ñúú cáá nchaa yatni iha cuaáⁿ-yu sá caxí-yu —càchí-güedé xáhaⁿ-güedé xii-gá.

³⁷ Te Jèsús ní xáhaⁿ-gá:

—Mee-ndo chí cuañaha sá ná caxí-yu —càchí-gá xáhaⁿ-gá xii-güedé.

Te xáhaⁿ-güedé xii-gá:

—¿Te nása cada-ndí, chí xini ñuhu-xi datná úú cièndú díhúⁿ denàriú cuèndá cuaaⁿ-ndí sá caxí-yu? —càchí-güedé xáhaⁿ-güedé xii-gá.

³⁸ Te Jèsús ní xáhaⁿ-gá xii-güedé:

—Chí cuáháⁿ cundehe-ndo núu ná daha pàá ndécú ndihí-ndo te cachí tnúhu-ndo —càchí-gá xáhaⁿ-gá xii-güedé.

Te ní sáháⁿ ndéhé-güedé núu ná daha pàá ndécú, te ní xáhaⁿ-güedé xii-gá:

—Úhúⁿ duha-ná pàá ndihí úú-nà chácá ndécú —càchí-güedé xáhaⁿ-güedé xii-gá.

³⁹ Te Jèsús ní xáhaⁿ-gá xii nchaa ñáyíu sá ná ñihí tnáhá-yu cuu titní xichí-yu, te ngóo-yu nchaa núú cùhú cuí cáa xíáⁿ. ⁴⁰ Te nchaa-yu ní ngóo-yu, te dava xichí-yu ní ngóo ìíⁿ cièndú-yu, te dava xichí-yu ní ngóo údico úxí-yu. ⁴¹ Te sátá ní ndihí-yu ní ngóo, te ní queheⁿ Jèsús ndi ùhúⁿ pàá ndi úú chácá-áⁿ, te ní ndacoto-gá andíu te ní ndacáⁿ táhú-gá núú Yá Ndióxí, te dàtnùníní ní táhú cuèchi-gá pàá-áⁿ te ní sáñaha-gá xii cue téé xíca cuu ndihí-gá ní dácáhñu-güedé nchaa ñáyíu-áⁿ ní xexí-yu. Te díu-ni ducaⁿ ní quide tucu-gá úú chácá-áⁿ. ⁴² Te nchaa-yu ní xexí-yu ní ndahá xití-yu. ⁴³ Te sátá ní túhú cohó-yu te ní ndatàcá-güedé nchaa sá ní quèndóo, te ní chítú ùxúú tnàhá tídihí mee-ni sá ní quèndóo núú ùhúⁿ-ni pàá, ndihí núú ùú-ni chácá. ⁴⁴ Te nchaa ñáyíu ní xexí-áⁿ chí xinu úhúⁿ míl mee-ni cuè téé chí díu-ni cue téé-áⁿ ní quíundehu, te dííⁿ ñáyíu díhí ndihí cue landú.

Jèsús xíca-gá núú ndute

(Mt. 14:22-27; Jn. 6:16-21)

⁴⁵ Te òré-ni-áⁿ ní xáhaⁿ Jèsús xii cue téé xíca cuu ndihí-gá sá quèe-güedé bàrcú codonùu-güedé quíhíⁿ-güedé ìíⁿ ñúú nání Bètsaidá cáá ndaa ingá xio yuhu làgúná núú ndécú-güedé-áⁿ, te mee-gá quèndóo-gá cada ndee ìní tnáhá-gá ndihí cue ñáyíu. ⁴⁶ Te sátá ní yáha ní quide ndee ìní tnáhá-gá ndihí-yu, te ní xica-gá cuáháⁿ-gá ìíⁿ tindúú cáá yàtni xíáⁿ cuèndá cáháⁿ ndihí-gá Yá Ndióxí. ⁴⁷ Te òré sa ní cundiⁿ te bàrcú sá ñúhú cuè téé xíca cuu ndihí-gá sa cuáháⁿ-xí ndéé cuádava xití làgúná-áⁿ, te mee-gá ndécú-gá

ɛ̃ⁿ núú t̃ndúú. ⁴⁸ Te túu ndèhe-gá sá sũúni ndòho-güedé tá dácaca-güedé bàrcú-áⁿ cuáháⁿ, chi cuèndá ndàa nacuáa cuáháⁿ-xi-áⁿ duha véxi táchí te nàtúndaha-xi. Te ingá nduu-áⁿ tàcuíhndá-gá sa ní cuyatni vií-nã Jèsús bàrcú ñúhú-güedé-áⁿ, dico núú ndute tá xìca-gá cuáháⁿ te luha-ná te yáha ñaha-gã xii-güedé ní cùu. ⁴⁹⁻⁵⁰ Te òré ní xini ñáhá cuè téè ñùhu bàrcú-áⁿ xii-gá te ní yùhú-güedé ní cana saa-güedé, chi ní sani iní-güedé sá ñⁿ almá cúu-gã. Te ní xáhaⁿ-gã xii-güedé:

—jÑí cunduu-ndo, vá yùhú-ndó, chi yùhú cúu-í! —càchí-gá xáhaⁿ-gã xii-güedé.

⁵¹ Te Jèsús cuánguee-gá xití bàrcú ñúhú-güedé-áⁿ, te sátá cuánguee-gá te òré-ni ní ngũíñí táchí, te ní cuñúhu vihi-güedé. ⁵² Te ducaⁿ chi cue téé-áⁿ ñà túú ní cùtnuní iní-güedé nása quide-gá, chi ñá túú ní cùtnuní váha iní-güedé nàcuáa ndùu sá ní quide-gá òré ní nadacàyá-gá pàá, chi ío ñí dǐquí-güedé.

Jèsús quidé tãtma-gá ñáyiu cùhú ñúú Genesàrét
(Mt. 14:34-36)

⁵³ Te ní yáha-güedé ndihi-gá ndàa ingá xio yuhu làgúná, te ní sáa-güedé ndihi-gá yucu cue téè ñúú Genesàrét. Te yàcáⁿ ní dácútú ndèé-güedé bàrcú-güedé yuhu làgúná. ⁵⁴ Te òré ní quene Jèsús ndihi cue téè xìca cuu ndihi-gá xití bàrcú, te nchaa ñáyiu x̃ndecu-áⁿ ñí cutnùní iní-yu sá díú-gã. ⁵⁵ Te ñáyiu-áⁿ ndihi-ni ní sáháⁿ-yu nchaa núú x̃ndecu cue ñáyiu cùhú, te cue ñáyiu cùhú-áⁿ ñí quée-yu xító nchido ñahá-yu cuáháⁿ ndi tnahá ñⁿ xichi núú ñihí-yu tñúhu quèxio Jèsús. ⁵⁶ Te nchaa ñúú náhnú ndihi nchaa ñúú lĩhli núú cuáháⁿ Jèsús, ducaⁿ x̃ndecá-yu nchaa ñáyiu cùhú cuáháⁿ xití ñúú sàcáⁿ ñáhã-yu núú-gã cuèndá cada tãtma

ñaha-gã xii-yu. Te diu-ni ducaⁿ x̃iquidé-yu nchaa dava-gá xichi núú cuáháⁿ-gá núú x̃ndecu cue ñáyiu, te càháⁿ ndàhú-yu núú-gã sá ná dáñá-gã tñándeé cue ñáyiu cùhú-áⁿ cuèdicó luha yuhu dǒó-gã cuèndá ndúha-yu. Te nchaa ñáyiu cùhú ní tñándeé yuhu dǒó-gã ní ndúha-yu.

7

Cuèndá nchaa sá quidé-xí ng̃ndecu cuèchi ñáyiu
(Mt. 15:1-20)

¹ Te ñúú Jerusàlén ní quee cue téè dàcuaha ñaha xii ñáyiu nchaa tñúhu ní chídó tñùní ndíi Moisés, te ní quexio-güedé núú ndécú Jèsús, te tñahá cue téè cùu fariséú ní quexio ndihi-güedé. ² Te cue téé-áⁿ ñí xini-güedé sá dàva cue téè xica cuu ndihi Jèsús ñá túú ndàha-güedé dàtná ndáhá mée cue téè cùu fariséú-áⁿ òré caxi-güedé. Te xiãⁿ núu cue téè ní quexio-áⁿ ñí càháⁿ cuèhé-güedé cuèndá cue téè xica cuu ndihi-gá. ³ Te ducaⁿ chi nchaa cue téè cùu fariséú-áⁿ ndihi nchaa ñáyiu isràél nchicúⁿ nihnú-yu quidé-yu dàtná ní xóo cada nchaa cue ñani tñáhã-yu ní x̃ndecu ndéé sanaha, chi nchaa ñáyiu-áⁿ và caxi-yu te núu và ndáhã-yu dàtná ní xóo ndaha nchaa cue ñani tñáhã-yu ní x̃ndecu ndéé sanaha-ãⁿ. ⁴ Te ñáyiu-áⁿ ndi tnahá òré cuáháⁿ-yu núú yãhu te nàsáa-yu, te ndáhã-yu nàcuáa sàni iní-yu ndùvétú iní Yã Ndiòxí, te núu và dúcáⁿ cadá-yu te và caxi-yu. Te tñahá náquèté-yu vàsú sá sácũhuⁿ sá xĩhĩ-yu, ndihi litu, ndihi cóhó càá, ndihi càamá. Te nchaa xéhé náquèté-yu nàcuáa sàni iní-yu ndùvétú iní Yã Ndiòxí. Te ío-gá titní sá ñí xóo cada nchaa ñáyiu ní x̃ndecu ndéé sanaha-ãⁿ nchicúⁿ nihnú-yu quidé-yu. ⁵ Te cue téè cùu fariséú-áⁿ, ndihi cue téè dàcuaha ñaha xii ñáyiu nchaa tñúhu ní chídó tñùní ndíi Moisés-áⁿ ní xáhaⁿ-güedé xii Jèsús:

—¿Ná cuendá cue tée xica cuu ndihi-n ñá túú nàquete-güedé ndaha-güedé òré caxi-güedé dàtná ní cachí nchaa cue tée ní xíndecu ndéé sanaha-i? —càchí-güedé xáhaⁿ-güedé xii-gá.

⁶ Te Jèsús ní xáhaⁿ-gá xii-güedé:

—Nchòhó cúú-ndó cuè tée ío dàndahú mée-xí chi càchí-ndó sá ío quide ndáá-ndó te ñá ndáá sá quidé ndáá-ndó. Te ní quee ndáá-xi nàcuáa ní chídó tnùní ndíi Chàjá tée ní xóo cáháⁿ tnúhu Yá Ndiòxí ndéé sanaha núú tütú-gá núú cáháⁿ-xi nàcuáa ní cáháⁿ-gá cuendá-ndó, te duha ní cachí-gá:

Ñáyi-u-a càchí-yu sá ío càhnu cuu-í, dico dicó-ni yuhu càháⁿ-yu, chi ñá túú ñuhu iní ñáhã-yu xii-í.

⁷ Te àúⁿ nã cuu chiñuhu ñahã-yu xii-í, chi ñá túú vèdana ndèe nándihi-xi,

chi cue ñáyi-u-a dàcuahã-yu cue tnàha ñáyiú-yu nàcuáa cundecú-yu, dico mee-ni tnúhu sá ñi cahu iní cue ñáyi-u ñuyiú-a càháⁿ-yu.

Duha ní chídó tnùní ndíi Chàjá núú tütú Yá Ndiòxí nàcuáa ní cáháⁿ-gá cuendá-ndó. ⁸ Te nchòhó ní dàñá-ndó nàcuáa ní cachí Yá Ndiòxí cada-ndo, te nchicúⁿ nihnu-ndo quide-ndo nàcuáa ní cahu iní cue ñáyi-u ñuyiú-a, chi nàquete-ni-ndo lítu, te nàquete-ni-ndo vasú sácũhuⁿ sá xihí-ndó nàtava-ndo nàcuáa ní xóo cada ñáyi-u-áⁿ ní xóo na-queté-yu nchaa xiãⁿ, te nándi-gá nchaa núú sá quidé-ndó —càchí Jèsús xáhaⁿ-gá xii-güedé.

⁹ Te ní xáhaⁿ tùcu-gá xii-güedé:

—Te nchòhó, ñá túú cuiní-ndó càda-ndo nàcuáa cuiní Yá Ndiòxí, chi mee-ni nàcuáa ní cachí cue tée ní xíndecu ndéé sanaha nchicúⁿ nihnu-ndo quide-ndo. ¹⁰ Te ndíi Moisés ní cachí ndíi sá ncháá ñáyi-u canehé-yu sá yíñuhu núú tãtã-yu ndihi núú nãñã-yu. Te nchaa ñáyi-u na càháⁿ úhú cuendá tãtã-yu àdi cuendá nãñã-yu te cahni ñaha-güedé xii-yu ní cachí

ndíi. ¹¹ Te nchòhó càchí-ndó sá nũu ñiⁿ tée na cũñaha-dé xii tãtã-dé ndihi nãñã-dé sá sá ñi sani ini-dé cuãñaha-dé xii-yu cùu-xi Corbán, te ñá túú-gã xini ñuhu-xi sá cuãñaha-dé xii-yu, te tnúhu Còrbán-áⁿ queé-xi: Sá cúú cuendá Yá Ndiòxí. ¹² Te sá dúcáⁿ nã càháⁿ ñiⁿ tée-áⁿ te nchòhó chindèe tnúhu-ndo-dé cuendá sá vã chindèe-gã-dé tãtã-dé ndihi nãñã-dé. ¹³ Te ducaⁿ quide-ndo chi ní dáqueé tihú-ndó nàcuáa ní cachí Yá Ndiòxí cada-ndo, te mee-ni nàcuáa ta quide cue tée ñuyiú-a véxi nchicúⁿ nihnu-ndo quide-ndo, te diu-ni ducaⁿ ta sãnu ichi tnaha-ndo véxi, te nándi-gá nchaa sá cáhú iní-ndó quide-ndo —cachí-gá xáhaⁿ-gá xii-güedé.

¹⁴ Te Jèsús ní xáhaⁿ tùcu-gá xii cue ñáyi-u xíndecu-áⁿ:

—Chí táquixi ndehe iha, te cundedóho váha-ndo tnúhu na càháⁿ-i-a te ío váha cuáha-ndo cuendá. ¹⁵ Nchaa sá xéxi-ndó chi ñá túú nã quidé-xi iní-ndó, dico nchaa sá cuéhé sá dúhá sani iní-ndó quide-ndo, nchaa xiãⁿ quidé-xi ndècu cuéchi-ndo. ¹⁶ Te nchaa nchòhó ñáyi-u ndedóho nchaa tnúhu càháⁿ-i-a ío váha chí cuãha cuendá —càchí-gá xáhaⁿ-gá xii-yu.

¹⁷ Te Jèsús ní dándõ-gá nchaa ñáyi-u núú xixúcu-yu-áⁿ te cuándihu-gá xití vehe. Te cue tée xica cuu ndihi-gá ní xicáⁿ tnúhú-güedé núú-gã nũu nása quee-xi cuendú ní cani-gá núú ñáyi-u-áⁿ. ¹⁸ Te ní xáhaⁿ-gá xii-güedé:

—¿Te náa tnàhá nchòhó ñá túú ní təcú tnùní-ndó cuendú ní cani-í núú ñáyi-u-áⁿ? Nchaa sá xéxi-yu cuánguee xití-yu ñá túú quide-xi iní-yu nàcuáa ngúndecu cuéchi-yu. ¹⁹ Chi ñá díú iní-yu cuánguee-xi chi cuánguee ndáá-xi xití-yu, te nàyáha ñaha-xi xii-yu —càchí-gá xáhaⁿ-gá xii-güedé.

Te sá dúcáⁿ ñi cáháⁿ-gá te ní dátũu-gá sá cúú càxi-o nchaa núú

sá cúú càxi-o. ²⁰ Te ní xáhaⁿ tùcu-gá xii-güedé:

—Nchaa sá cuèhé sá dúhá quide ñáyiú xiáⁿ cáciu ñihnu-xi iní-yu, te nchaa xiáⁿ quidé-xi ndècu cuéchi-yu. ²¹ Te iní-yu-áⁿ cáciu ñihnu nchaa sá cuèhé sá dúhá, chi sàni cuehé sání dùha iní-yu. Te cue téé càháⁿ ndihí-güedé ñadihí te ñá díú ñadihí-güedé cúú-yu, te diu-ni ducaⁿ quide cue ñáyiú dihí càháⁿ ndihí-yu téé te ñá díú yíi-yu cùu-güedé. Te sàhni-yu cue tnàha ñáyiú-yu, te mee-ni lchi díú ìni cúdí ñi-yu cundecú-yu. ²² Te dùhu ndachiuⁿ tnahá-yu, te xihó-yu cundecu ndihí-yu sá ndécú ndihí tnaha ñáyiú-yu, te ío quide úhú iní-yu sá cúú-xi tnàha ñáyiú-yu, te ío dándahú tnáhá-yu, te mee-ni nchàa sá cuèhé sá dúhá cùdí ñi-yu quidé-yu, te ío cuédú ñi-yu, te ío yiti yùhú-yu, te ío quide cahnú-yu mée-yu, te quidé-yu nándi-gá sá ñà túú tàú-yu cadá-yu. ²³ Te nchaa sá cuèhé sá dúhá-áⁿ cáciu ñihnu-xi iní-yu, te nchaa xiáⁿ quidé-xi ndècu cuéchi-yu, te ñá túú cùu-xi sá vaha sá cúú-xi iní-yu.

Èⁿ ñadihí véxi ñuú xicá ñi sándáá iní-aⁿ Jèsús

(Mt. 15:21-28)

²⁴ Te ní xica Jèsús cuáháⁿ-gá ndéé yucu cue téé ñuú Tìrú, ndihí yucu cue téé ñuú Sidón. Te òré ní quexìo-gá xiáⁿ te cuánguihu-gá èⁿ vehe te xiáⁿ cundecu-gá, te cuìní-gá sá vã quìní ñáyiú sá xiáⁿ ndécú-gá ní cùu, dico dai ní ñihí-yu tnúhu. ²⁵ Te èⁿ ñadihí ndécú èⁿ déhe yoco-aⁿ, te yíhi ñaha espíritú cùndihí yucu ñávaha xii-xi, te ñaha-áⁿ ìo ndihí ní ñihí-aⁿ tnúhu sá ní quexìo Jèsús xiáⁿ nùu ní sáháⁿ-aⁿ núú ndécú-gá, te ní nguíñi xití-áⁿ nùú-gã. ²⁶ Te ní nguíta-aⁿ càháⁿ ndàhu-aⁿ núú-gã, te xàhaⁿ-aⁿ sá nùu vá cùndèe iní-gá queñuhu-gá espíritú cùndihí yucu

ñávaha yíhi ñaha xii déhe-aⁿ. Dico ñá díú ñaha israél cúú-áⁿ chi ñaha ñuú Sirofeniciá cúú-áⁿ te tnúhu griégú cúú tnúhu-aⁿ. ²⁷ Te xiáⁿ nùu ní xáhaⁿ Jèsús xii-aⁿ:

—Daña na càxi tnaa nchaa landú chítú xiti-güexi, te dàtnùni caxi cue iná, chi ñá túú ndùu váha-xi queheⁿ-o sá xéxi làndú te cuáha-o ìná —càhí-gá xàhaⁿ-gã xii-aⁿ.

²⁸ Te ní xáhaⁿ-aⁿ xii-gã:

—Mèstrú, ndáá-ni càháⁿ-n, dico iná chi nàdatacá-güedi sá ngóyó yùhu cóhò làndú —càhí-aⁿ xàhaⁿ-aⁿ xii-gã.

²⁹ Te Jèsús ní xáhaⁿ-gã xii-aⁿ:

—Ío váha ní càháⁿ-n, te cuanùhú te ñá túú-gã ná caní iní-n, chi sa ní quee espíritú cùndihí yucu ñávaha yíhi ñaha xii déhe-n —càhí-gá xàhaⁿ-gã xii-aⁿ.

³⁰ Te ñaha-áⁿ ñi nasáá-aⁿ vehe-aⁿ te cãa déhe-aⁿ núú cãmá, dico ñá túú-gã espíritú cùndihí yucu ñávaha yíhi ñaha xii-xi chi sa ní quee ñaha-xi.

Jèsús quidé tãtna-gá èⁿ téé ñá cúú càháⁿ váha te doho-dé

³¹ Te Jèsús ní ndee-gá yucu cue téé ñuú Tìrú te ní yáha-gá yucu cue téé ñuú Sidón, ndihí yucu ñi ùxi ñuú nání Dècápolis, te ní sáá-gá ndéé yuhu làgúná distritú Galileá.

³² Te xiáⁿ ndécú-gã ní quexìo ñáyiú ndéé núú-gã ndecã-yu èⁿ téé ñá cúú càháⁿ váha-dé te doho-dé. Te càháⁿ ndàhú-yu núú-gã sá ná tëndaha ñaha-gá xii-dé cuendá ndúha-dé.

³³ Te Jèsús ní queñuhu ñaha-gã xii-dé tnuú-yu, te ndèca ñaha-gã cuáháⁿ èⁿ xio, te ní dáquihu-gá díquí ndáhá-gã yaú lóho-dé, te ní dácànùu-gá díí-gã díquí ndáhá-gã, te ní tendaha-gã yàa-dé. ³⁴ Te ní ndacoto-gá andiu te ní sánuu iní-gã, te ní càháⁿ-gã tnúhu mee-gã, te xàhaⁿ-gã:

—jÉfatá! —càhí-gá xàhaⁿ-gã xii-dé.

Te tnúhu-án quée-xí: Nacaán yòhó lóho. ³⁵ Te òré-ni-án nĩ nacaán lóho-dé, te ní nduu váha yaa-dé, te ní cuu cáháⁿ váha-dé. ³⁶ Te Jèsús ní cáháⁿ víhi-gă dóho ñáyi ndihĩ ñaha xii téé ní quide tátna-gă-án sã vã yòo ìⁿ cùñahá-yu sá nĩ quide tátna ñaha-gă xii-dé, dico uuⁿ-gă ní quidé-yu ní cáháⁿ-yu núú ñáyi sá nĩ quide tátna-gă téé-án. ³⁷ Te nchaá-yu ío ní cuñúhu-yu, te ní xitnàhá-yu:

—Váha víhi quide-dé, chi nchaá-ni ndàcu-dé quidé-dé, chi quide tátna-ni-dé ñáyi doho, te quide tátna-ni-dé ñáyi ñihĩ — cächí-yu xitnàhá-yu.

8

*Jèsús dácàxi-gă cùmí mĩ ñáyi
(Mt. 15:32-39)*

¹ Te ìⁿ nduu tucu ío cuéhé ñáyi ní tacá núú ndécú Jèsús, te ñã túú tnàhĩ sá cáxi-yu. Te ní cana-gă cue téé xica cuu ndihĩ-gă, te ní xáhaⁿ-gă xii-güedé:

² —Yúhú, cùndahú iní-í nchaá ñáyi-a chi sa ní cuu únĩ nduu ndècu ndihĩ ñahá-yu xii-o ìha, te ñã túú tnàhĩ ná sá cáxi-yu. ³ Te núú na nàtendaha-í-yu núú tnámă-yu vehé-yu, te cuneé-yu docó ichi, chi davá-yu ío xica ndécú-yu — cächí-gă xáhaⁿ-gă xii-güedé.

⁴ Te ní xáhaⁿ-güedé xii-gă:

—¿Te ndèé níhĩ-ó sã cuañaha-o càxi nchaá ñáyi-a, te ìha ñã túú nã ío chi cùu-xi xití yucu-í? — cächí-güedé xáhaⁿ-güedé xii-gă.

⁵ Te Jèsús ní xícáⁿ tnúhú-gă núú-güedé, te xáhaⁿ-gă:

—¿Ná daha-gă pàá ndécú ndihĩ-ndo-í? — cächí-gă xáhaⁿ-gă xii-güedé.

Te ní xáhaⁿ-güedé xii-gă:

—Ndècu ndihĩ-ndĩ úsá-gă tnàhá — cächí-güedé xáhaⁿ-güedé xii-gă.

⁶ Te Jèsús ní xáhaⁿ-gă xii nchaá ñáyi sá ngòo-yu nchaá-yu, te ní ngóo-yu, te ní queheⁿ-gă ndi úsá

pàá-án, te ní ndacáⁿ táhú-gă núú Yã Ndiòxí. Te dătnùní ní táhú cuèchi-gă te ní sãñaha-gă xii cue téé xica cuu ndihĩ-gă ní dácãhñu-güedé nchaá ñáyi-án. ⁷ Te ndècu ndihĩ-güedé ìⁿ úú chácá ìhli, te ðiu-ni ducaⁿ nĩ quide-gă ní ndacáⁿ táhú-gă núú Yã Ndiòxí. Te dătnùní ní táúchíúⁿ-gă ní dácãhñu ñaha-güedé xii-yu. ⁸ Te nchaá-yu ní xexí-yu ní ndahá xití-yu. Te sátá nĩ túhú còhò-yu te ní nadatácá-güedé nchaá sá nĩ quendóo, te ní chítú úsá tnàhá tídihi mee-ni sã nĩ quendóo-án. ⁹ Te núú ncháá ñáyi ní xexi-án xĩnu dătná cùmí mĩ-yu. Te sátá nĩ yáha ní dácáxí ñaha Jèsús xii-yu te ní dándácá ñaha-gă. ¹⁰ Te dătnùní cuánguee-gă bàrcú ndihĩ cue téé xica cuu ndihĩ-gă cuáháⁿ-gă ndihĩ-güedé yucu cue téé ñuú Dalmànutá.

*Cue téé cùu fariséú xáhaⁿ-güedé
xii Jèsús cada-gă ìⁿ sã vã yòo tnàhĩ
ndàcu cada*

(Mt. 16:1-4; Lc. 12:54-56)

¹¹ Te núú nĩ quexìo Jèsús xíaⁿ nĩ sáá cue téé cùu fariséú, te ní nguíta-güedé nándi tnúhu xáhaⁿ-güedé xii-gă xitó ndéé ñahá-güedé. Te xáhaⁿ-güedé sá ná cádá-gă ìⁿ sã vã yòo tnàhĩ ndàcu cada cundehe-güedé nàcuáa cutnùní iní-güedé nũ ndáá sá Yã Ndiòxí ní tendaha ñaha-gă xii-gă véxi-gă ñuyíú-a. ¹² Te ní sánuu iní-gă te ní xáhaⁿ-gă xii-güedé:

—Nchaá nchòhó ñáyi ndècu ñuyíú-a cuní-ndó cada-í ìⁿ sã vã yòo tnàhĩ ndàcu cada nacúáa cutnùní iní-ndó nũ ndáá sá Yã Ndiòxí chĩndéé ñaha-gă xii-í. Dico na cächí tnúhu ndáá-í xii-ndo sã vã cádá-í sã cuní-ndó — cächí-gă xáhaⁿ-gă xii-güedé.

¹³ Te ní dándòo-gă ñáyi xĩndecu-án, te cuándeé-gă bàrcú ndihĩ cue téé xica cuu ndihĩ-gă te cuáháⁿ-gă ndihĩ-güedé ndáa ìngá xio yuhu làgúná.

Nàcuáa quide cue tée cùu fariséu
(Mt. 16:5-12)

14 Te ní cunaa-güedé canehe-güedé sá cáxi-güedé quihí, te ìndi-ni paá ndécú xítí bàrcú-án nì naníhí-güedé.

15 Te Jèsús ní cáháⁿ-gá dóho-güedé, te xáhaⁿ-gá xii-güedé:

—Na càchí tnúhu-í xii-ndo sã ìo quihí iní-ndó cùndecu-ndo te vá cáda cuendá tnáhi-ndo lèvadurá cue tée cùu fariséu, ndihí levadurá cue tée cùndihí té Hèrodés —càchí-gá xáhaⁿ-gá xii-güedé.

16 Te ní ngúíta-güedé xítnàha-güedé:

—Cuendá sã ñà túú ní cãnehe-o paá quixi núu xíáⁿ duha càháⁿ-gá —càchí-güedé xítnàha-güedé.

17 Te Jèsús ní cutnùní iní-gá nàcuáa ndùu tnúhu xítnàha-güedé, núu ní xáhaⁿ-gá xii-güedé:

—¿Ná cuendá da sã ñà túú ní cãnehe-ndo paá quixi càháⁿ-ndó? Te ñà díú cuendá paá-án ní cáháⁿ-í, te dícó-ni sã mée-ndó ñà túú quide cuendá váha-ndo nàcuáa ndùu tnúhu càháⁿ-í, te ni ñã tècú tnùní-ndó chi ío ñi díquí-ndó. 18 Te cuèi ndèhe-ndo dico ñã túú cùtnuní iní-ndó nã cuú nchàa sã quidè-í, te cuèi ndèdóho-ndo nchàa tnúhu càháⁿ-í dico ñã cùtnuní iní-ndó nãsa ndùu-xi, te ni ñã ndécú iní-ndó nchàa sã tá quide-í véxi. 19 Te chí dándacu iní cùtnàhá ní táhú cuèchi-í úhú-ni paá te ní xexi úhúⁿ míl mee-ni cuè tée chi diu-ni cue tée-án ñi quíundehu. Te chí càchí tnúhu ná daha tídihi ní chítú mee-ni sã ní quendóo òré ní nadatácá-ndó —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úxúú tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

Te xáhaⁿ tùcu-gá:

20 —Te cùtnàhá ní táhú cuèchi tucu-í úsá tnàhá paá ní xexi cùmí míl ñáyiú, te chí càchí tnúhu ná daha tucu tídihi ní chítú mee-ni sã ní quendóo —càchí-gá xáhaⁿ-gá xii-güedé.

Te ní xáhaⁿ-güedé xii-gá:

—Úsá tnàhá tídihi ní chítú mee-ni sã ñi quendóo —càchí-güedé xáhaⁿ-güedé xii-gá.

21 Te Jèsús ní xáhaⁿ tùcu-gá xii-güedé:

—Vitna, ¿te sa ní tecú tnùní-ndó tnúhu ní cáháⁿ-í ãñ ñãhá? —càchí-gá xáhaⁿ-gá xii-güedé.

Jèsús quidé tãtna-gá ñi tée cuáá ñuú Bètsaidá

22 Te Jèsús ní sáa-gá ndihí cue tée xica cuu ndihí-gá ñuú Bètsaidá. Te ñuú-án ndécú-gá ní quexio ñáyiú núú-gá tánèhé-yu ñi tée cuáá, te càháⁿ ndàhú-yu núú-gá ñuú vá cùndèe iní-gá tendaha ñàha-gá xii-dé cuendá ndúha núú-dé. 23 Te Jèsús ní tni-gá ndaha tée cuáá-án, te ní queñuhu ñaha-gá tnuú-yu, te ndèca ñaha-gá cuáhán ñi xio yuhu ñuú. Te yacáⁿ ní dácànù-gá díí-gá núú-dé te ní tendaha ñàha-gá xii-dé, te dàtnùní ní xicáⁿ tnúhú-gá núú-dé, te xáhaⁿ-gá:

—¿Cùtnuní núú-n-ãñ? —càchí-gá xáhaⁿ-gá xii-dé.

24 Te tée cuáá-án ñi ndonehe núú-dé, te xáhaⁿ-dè xii-gá:

—Cùtnuní núú-í ndèhé-í nchaa cue tée-ãñ, dico dà ndáa yutnu cuí ndáa-güedé te xica-güedé —càchí-dé xáhaⁿ-dè xii-gá.

25 Te Jèsús ní tendaha tùcu-gá núú-dé te ní cuu ní ndacoto váha-gá-dé, te òré-án ñi ndúha núú-dé. Te nchaandi túhú sã ndèhé-dé ní cutnùní váha núú-dé nándi cùu nchaa xíáⁿ. 26 Te ní xáhaⁿ Jèsús xii-dé:

—Vitna te núhú-n, dico ndáa ichi vehe-n ñuhú-n te ñã díú dà xítí ñuú quihíⁿ-n, te vá yõ ñi cùñaha-n sã yúhú ní quide tãtna-í núú-n ñi ndúha —càchí-gá xáhaⁿ-gá xii-dé.

Té Pèlú xáhaⁿ-dè xii Jèsús sã díú-gá cuú-gá Cristú

(Mt. 16:13-20; Lc. 9:18-21)

27 Te Jèsús ní xica-gá cuáhán-gá ndihí cue tée xica cuu ndihí-gá nchaa ñuú líhli càa ñuú Cèsareá Filipú, te òré ñuhú-gá ndihí-güedé

ichi te ní xícáⁿ tnúhú-gă núú-güedě, te xăhaⁿ-gă xii-güedě:

—Chí cächí tnúhu nása cãháⁿ ñáyiu cuëndá-í. ¿Yoo cùu-í cächí-yu-va? —cächí-gă xăhaⁿ-gă xii-güedě.

²⁸ Te ní xăhaⁿ-güedě xii-gă:

—Davá-yu cächí-yu sá cùú-n ndii Juáá téé ní xóo dacuândute ñaha xii ñáyiu, te davá-yu cächí-yu sá cùú-n té Èliás, te dava tucú-yu cächí-yu sá cùú-n ìⁿ téé ní xóo cáháⁿ tnúhu Yá Ndiõxí ndéé sanaha, duha cächí-yu —cächí-güedě xăhaⁿ-güedě xii-gă.

²⁹ Te ní xícáⁿ tnúhú tucu-gă núú-güedě, te xăhaⁿ-gă xii-güedě:

—Te nchòhó, ¿yoo sàni iní-ndó cùu-í-í? —cächí-gă xăhaⁿ-gă xii-güedě.

Te té Pelú ní xăhaⁿ-dě xii-gă:

—Yòhó cùú-n Cristú Yáá ní ten-daha Yá Ndiõxí véxi ñuyíú-a —cächí-dé xăhaⁿ-dě xii-gă.

³⁰ Te Jèsús ní cáháⁿ-gă dóho-güedě, te xăhaⁿ-gă:

—Vá yóo ìⁿ cúñaha-ndo yòo cuu-í —cächí-gă xăhaⁿ-gă xii-güedě.

Jèsús cãháⁿ-gă sá cáhni ñaha-güedě xii-gă

(Mt. 16:21-28; Lc. 9:22-27)

³¹ Te Jèsús ní ngúita-gă xitnũhu-gă cue téé xica cuu ndihi-gă năcuáa yáha-gă, te xăhaⁿ-gă xii-güedě:

—Yúhú Téé cùu ñani tnáhá-ndó nchàa-ndo chi ío ndoho-í, chi daquèe tihú ñáhá nchàa cue téé cùu sacuéhé nũ ñáyiu israhél, ndihi cue dútú cúnũu, ndihi cue téé dàcuaha ñaha xii ñáyiu nchaa tnúhu ní chídó tnùní ní chídó tnùní ndii Moisés, nchaa cue téé-áⁿ dàquee tihú ñáhá-güedě xii-í. Te sáá nduu te cahni ñaha-güedě xii-í, dico nduu úní sá cùu-í te ndoto-í —cächí-gă xăhaⁿ-gă xii-güedě.

³² Te ducaⁿ ñí cáháⁿ Jèsús núú cuè téé xica cuu ndihi-gă năcuáa tecú tnùní váha-güedě tnúhu cãháⁿ-gă. Te té Pelú ní cana ñaha-dě xii-gă ìⁿ xio, te ní ngúita-dé ténàá ñáhá-dě

xii-gă ní cùu. ³³ Dico Jèsús ndihi-ni ní nchócuĩhmu-gă ní ndàcoto-gă núú nchàa-güedě chi ndàa sátá-gă xĩndecu-güedě, te ní ngúita-gă ténàá-gă té Pelú, te xăhaⁿ-gă xii-dé:

—¿Xocuiñi yòhó núu-í-a, chi dàtná cãháⁿ yucu ñávaha cãháⁿ-n! Chi ñá túú sàni iní-ò dàtná sání iní Yá Ndiõxí, chi ìⁿ-ni sàni iní-ò ndihi dava-gă cue ñáyiu ndècu ñuyíú-a —cächí-gă xăhaⁿ-gă xii-dé.

³⁴ Te Jèsús ní cana-gă nchaa cue téé xica cuu ndihi-gă, ndihi nchaa ñáyiu xĩndecu-áⁿ, te ní xăhaⁿ-gă:

—Nchaa ñáyiu cuini chitnahá ñáhá xii-í, te xini ñuhu-xi vá cádá-gă-yu sá sání iní méè-yu, te ío cada ndee iní-yu cundecu túha-yu ndohó-yu cuëndá-í, te cuèi na ndòhó-yu dàtná ndoho-í. ³⁵ Te nchaa ñáyiu cuini sá ñá túú tnàhí ná yáha cundecu ñuyíú-a cuita nihnú-yu, dico nchaa ñáyiu ñá túú tnàhí yùhú cuèi nándi sá ná yáha-yu cundecú-yu ñuyíú-a sá cuëndá-í, ndihi sá cuëndá tnúhu-í, te ñáyiu-áⁿ naníhí tàhú-yu. ³⁶ Te cuèi nchaandi túhú sá ío ñuyíú-a na nihí ñáyiu cundecu ndihi-yu, dico núu ñuu nchaa xiáⁿ ná cada cuita nihnú-yu te ñá túú vèdana nándihi-xi sá dúcáⁿ ndècu ndihi-yu nchaa xiáⁿ. ³⁷ Te ni ìⁿ sá ío ñuyíú-a vá chĩndèe-xi ñáyiu cuëndá naníhí tàhú-yu. ³⁸ Te nchaa ñáyiu na cùcahaⁿ núu-xi cáháⁿ váha cuëndá-í, ndihi cuëndá tnúhu-í núú nchàa ñáyiu dàquee tihú ñáhá xii Yá Ndiõxí, ñáyiu xĩndecu ichi cuèhé ichi duha, te tnáhá yúhú Téé cùu ñani tnáhá-yu ncháa-yu cucahaⁿ núu-í núu-yu òré ná quixi tucu-í ndihi cue espíritú xínú cuèchi núú Tàtá-í Dútú Ndiõxí. Te mee-gă cada cutnùní iní nchaa ñáyiu sá yùhú ío cãhnu cuu-í.

9

¹ Te na cächí tnúhu ndáá-í xii-ndo sá ío dava nchòhó ñáyiu xĩndecu iha vitna vá cùu-ni-ndo, chi cundecu-ni-ndo ndèé quini-ndó

sáá nduu ndíhu ndaha ñaha Yá Ndióxi xii ñáyiú, te ðavá-áⁿ quini-ndó sá ndácú-gã quidé-gã nchaandi túhú sá vaha —càchí-gã xáhaⁿ-gã xii cue téé xica cuu ndihi-gã ndihi cue ñáyiú-áⁿ.

Jèsús ní nadama dóó-gã ndihi núú-gã

(Mt. 17:1-13; Lc. 9:28-36)

² Te núú ñnú nduu sá ðucáⁿ ní cáháⁿ Jèsús te ní xica-gã cuásaá-gã ñⁿ yucu ðucúⁿ, te ndèca-gã té Pèlú, ndihi té Jàcobó, ndihi té Juáá cuásaá, te úní tñahí-ni cue téé-áⁿ ndécá-gã cuásaá. Te yucu-áⁿ ndécú-gã ní nadama núú-gã, ³ te ní nadama dóó-gã. Te dóó-gã-áⁿ sùúni ní nduu cuixíⁿ quiyí te tásaⁿ, te ní ñⁿ ñáyiú ñuyíú-a ñá túú ndácú-yu naqueté-yu ñⁿ dóó nduu cuixíⁿ dàtná ní nduu dóó-gã. ⁴ Te ní xini-güedé té Moisés ndihi té Èliás nútñi-güedé ndihi-gã ndátnúhu ndihi ñaha-güedé xii-gã. ⁵ Te té Pèlú ní xáhaⁿ-dè xii Jèsús:

—Mèstrú, jváha ní cuu sá ndécú-ó ìha vitna! Te na dàcaa-ndí úní tñahá vehe tnuvixíⁿ, te ñⁿ cuu cuendá-n te ñⁿ cuu cuendá té Moisés te ñⁿ cuu cuendá té Èliás —càchí-dé xáhaⁿ-dè xii-gã.

⁶ Te ducaⁿ ní cáháⁿ-dé chí ío ní yuhú-güedé, te cuendá-ni ní cuu yáchí-dé ní cáháⁿ-dé, te ní mèe-dé ñá túú ní cùtnuní iní-dé nása ndùu tñúhu ní cáháⁿ-dé. ⁷ Te òré-áⁿ ní quexìo ñⁿ vícò núú ndécú-güedé ndihi Jèsús ní dàdáhu ñaha-xi xii-güedé ndihi-gã, te xití vícò-áⁿ ní cáháⁿ Yá Ndióxi ní tecú dóho-güedé, te xáhaⁿ-gã xii-güedé:

—Tée-a cùu-dé Déhe-í téé ío cùu iní-í, te cundedóho-ndo nchàa tñúhu càháⁿ-dé —càchí-gã xáhaⁿ-gã xii-güedé.

⁸ Te òré ní quide cuendá-güedé, te ñá túú-gã ní xini-güedé cue téé úú-áⁿ chí mee-ná Jèsús ndécú.

⁹ Te òré cuánuu ndihi ñaha-gã xii-güedé yucu-áⁿ, te ní cáháⁿ-gã dóho-güedé, te xáhaⁿ-gã:

—Vá yõ ñⁿ cúñaha-ndo nchàa sá ní xini-ndó núú ní sáá-ó-á, te cuu cáháⁿ-ndó dico ndéé ná yáha ndoto yuhú Tée cùu ñaní tñahá-ndó nchàa-ndo sá cùú-í —càchí-gã xáhaⁿ-gã xii-güedé.

¹⁰ Núú xiáⁿ cue téé-áⁿ ní xúhuⁿ nahi-ni iní-güedé nchaa sá ní xini-güedé núú ní sáháⁿ-güedé ndihi Jèsús te ñá túú tñahí ní cáháⁿ-güedé, dico ní ndúcú tñúhu núú tñahá-güedé ná cuendá ducaⁿ ní cáháⁿ-gã sá ndèé ná yáha ndoto-gã sá cùú-gã te dàtnuní cáháⁿ-güedé nàcuáa nduu nchaa sá ní xini-güedé. ¹¹ Te ní xicáⁿ tñúhú-güedé núú Jèsús, te xáhaⁿ-güedé xii-gã:

—¿Cuini-ndí cachí tñúhu-n ná cuendá càchí cue téé dàcuaha ñaha xii ñáyiú nchaa tñúhu ní chidó tñuní ndí Moisés sá ðìhna-gã té Èliás ndixi-dé te dàtnuní quixi Yáa tendaha Yá Ndióxi quixi ñuyíú-a? —càchí-güedé xáhaⁿ-güedé xii-gã.

¹² Te Jèsús ní xáhaⁿ-gã:

—Ndáá sá códó núu ñⁿ téé quixi-dé te cada-dé dàtná ní quide té Èliás, te téé-áⁿ cada ndáá-dé nchaa nàcuáa cùu. Dico núú tütú Yá Ndióxi cáháⁿ-xi cuendá yuhú Tée cùu ñaní tñahá-ndó nchàa-ndo sá ío ndoho-í, te daquée tihú ñahá ñáyiú xii-í. ¹³ Te na càchí tñúhu-í xii-ndo vitna sá sá ní quixi ñⁿ téé ní quide dàtná ní xóo cada té Èliás, te cue ñáyiú ñá túú ní cãnehé-yu sá yíñúhu núú-dé, te ní quide ñahá-yu xii-dé nchaa nàcuáa ní quixi iní mèé-yu. Te núú tütú Yá Ndióxi sa ndèé tñuní nchaa nàcuáa yáha-dé, te nchaa xiáⁿ sa ní quide ñaha ñáyiú xii-dé —càchí-gã xáhaⁿ-gã xii-güedé.

Jèsús quidé tãtna-gã ñⁿ téé cuechi yíhi ñaha espíritu cundíhi yucu ñávaha
(Mt. 17:14-21; Lc. 9:37-43)

¹⁴ Te Jèsús ní ndexìo-gã ndihi cue téé úní-áⁿ núú xíndecu ðava-gã cue téé xica cuu ndihi-gã, te vãi vihi ñáyiú ndècu núú ndécú-güedé-áⁿ, te

tnháá cue téé dâcuaha ñaha xii-yu nchaa tnúhu ní chídó tnùní ndíi Moisés xĩndecu, te cue téé-áⁿ nãndi tnúhu xãhaⁿ-güedé xii cue téé xica cuu ndihí Jesús. ¹⁵ Te òré ní xiní-yu ní ndexio-gá, te nchaá-yu ío ní cuñúhu-yu, te xinú-yu ní sáháⁿ ní cáháⁿ ndihí ñáhá-yu xii-gá. ¹⁶ Te ní xicáⁿ tnúhú-gã núú cuè téé xica cuu ndihí-gá nõu ná tnúhu ndãtnúhu-güedé ndihí cue téé-áⁿ. ¹⁷ Te ñⁿ ñáyiu xĩndecu xiáⁿ ñi xáhãⁿ-yu xii-gá:

—Mèstrú, ndèca-í déhe-í véxi nãnducu ñaha-í xii-n, chí yihí ñaha espíritú cündihí yucu ñávãha xii-dé, te diu xiáⁿ ní quide ní cuu ñihí-dé. ¹⁸ Te ío ndòho-dé chí súúni ndèni ní cuu ngótnii ñaha-xi xii-dé, te òré ducaⁿ quide ñaha-xi xii-dé te dànduá ñáhá-xí, te quène tíñú yuhu-dé, te cùrúhñú nõhu-dé, te ndàda ruúⁿ ñáhá-xí xii-dé. Te sa ní xáhãⁿ-í xii cue téé xica cuu ndihí-n sã queñúhu-güedé espíritú cündihí yucu ñávãha yihí ñaha xii-dé dico ñá túú ní ndãcu-güedé queñuhu-güedé-xi —cächí ñáyiu-áⁿ xáhãⁿ-yu xii-gá.

¹⁹ Te Jèsús ní xáhãⁿ-gã:

—¡Nchaa nchòhó ñáyiu ndècu ñuyú-a ío sãá iní-ndó, chí ñá túú cuíni-ndó quĩndáá iní-ndó Yã Ndiõxí, te ní cuu vai nduu quide ndee iní-í nchaa sã quidè-ndó! ¿Te ná ndéé ama vá dúcãⁿ-gã cada-ndo-i? Te chí cándèca téé cùhú-áⁿ táquixi iha —cächí-gã xáhãⁿ-gã xii-yu.

²⁰ Te ñáyiu ndihí ñaha xii téé yihí ñaha espíritú cündihí yucu ñávãha-áⁿ ndécã ñáhá-yu xii-dé cuháⁿ ndéé núú Jèsús, te òré ní xiní ñáhá espíritú cündihí yucu ñávãha-áⁿ xii-gá, te ní ngüita-ni-xi sãhni yihí ñáhá tùcu-xi xii-dé, te ní dãnduá ñáhá-xí xii-dé, te ní ngüita-dé xíchí ñùhu-dé, te quène tíñú yuhu-dé. ²¹ Te Jèsús ní xicáⁿ

tnúhú-gã núú tãtã-dé, te xáhãⁿ-gã xii-dé:

—¿Ná ndéé ama ní ngüita-xi duha ndòho déhe-n? —cächí-gã xáhãⁿ-gã xii-dé.

Te téé-áⁿ ñi xáhãⁿ-dè xii-gã:

—Ndéé cütñahá cúú lihli-dé ní ngüita espíritú cündihí yucu ñávãha duha quide ñaha-xi xii-dé. ²² Te ní cütitní xito dãngaunihnu ñaha-xi xii-dé núú ñùhú, te ní cutitní tucu xito dãngaunihnu ñaha-xi xii-dé ndute cuíni-xi cahni ñaha-xi xii-dé. Te ndèca-í-dé véxi núú-n te núu ndacu-n càda tãtna-n-dé, te cundàhú iní ñáhá-n xii-ndí chindee ñaha-n —cächí-dé xáhãⁿ-dè xii-gã.

²³ Te Jèsús ní xáhãⁿ-gã:

—Te ná cuendá cächí-n nõu ndacu-í cada tãtna-í déhe-n, chí nchaa ñáyiu na quĩndáá iní ñáhá xii-í te nihí-yu sã ná càcãⁿ-yu núu-í —cächí-gã xáhãⁿ-gã xii-dé.

²⁴ Te tãtã téé cuechi-áⁿ ñihí ní cáháⁿ-dè xáhãⁿ-dè xii-gã:

—Sãndáá iní ñáhã-í xii-n, dico chindee ñaha xii-í cuendá ná quĩndáá iní ñáhã-gã-í xii-n —cächí-dé xáhãⁿ-dè xii-gã.

²⁵ Te Jèsús ndéhé-gã sã ïo vai ñáyiu ta tàcã núú ndécú-gã-áⁿ. Te ní tenãã-gã espíritú cündihí yucu ñávãha-áⁿ, te xáhãⁿ-gã xii-xi:

—Yòhó espíritú cündihí yucu ñávãha, ní quide ñihí-n ñi quide doho-n téé-a, dico vitna yúhú cächí-í sã quèé-n yiqui cuñú-dé te vá ndíhu-gã-n —cächí-gã xáhãⁿ-gã xii espíritú cündihí yucu ñávãha-áⁿ.

²⁶ Te espíritú cündihí yucu ñávãha-áⁿ ñi dácãná sãa ñaha-xi xii téé-áⁿ, te ní sahni yihí ñáhá tùcu-xi xii-dé, te dãtnùní ní quee ñaha-xi xii-dé cuháⁿ-xi, dico téé-áⁿ chí dacãa-ni ndíyi càa-dé càtùu-dé. Te nchaa ñáyiu xĩndecu xiáⁿ cächí-yu sã ñi xihí-dé ní cùu. ²⁷ Te Jèsús ní tñii-gã ndaha-dé ní ndocani ñaha-gã xii-dé, te ní ndacóo-dé ní nucúnutñii-dé.

28 Te Jèsús cuándihu-gá xití vehe ndihi cue téé xica cuu ndihi-gá, te òré ndéhé-güedé ñá túú-gá ñáyiú, te ní xicáⁿ tnúhú-güedé núú-gá, te xáhaⁿ-güedé xii-gá:

—Cachí tnúhu xii-ndí ná cuendá ñá túú ní ndàcu-ndí queñuhu-ndí espíritú cündihí yucu ñávãha yìhi ñaha xii téé-ãⁿ —cächí-güedé xáhaⁿ-güedé xii-gá.

29 Te Jèsús ní xáhaⁿ-gã xii-güedé:

—Na cächí tnúhu-í xii-ndo sã núú òré cuíní-ndó queñuhu-ndo espíritú cündihí yucu ñávãha yìhi ñaha xii ñáyiú dàtná cúú espíritú cündihí-xi yìhi ñaha xii téé-ãⁿ ní cùu ña, te xìni ñuhu-xi sá ïo cãháⁿ ndihi-ndo Yã Ndiòxi te ñá túú tnàhí ná caxi-ndo cãháⁿ ndihi-ndo-gã, te ducaⁿ te ndacu-ndo queñuhu-ndo espíritú cündihí yucu ñávãha yìhi ñaha xii ñáyiú —cächí-gã xáhaⁿ-gã xii-güedé.

Jèsús cãháⁿ tucu-gá sá cáhni ñãha-güedé xii-gá

(Mt. 17:22-23; Lc. 9:43-45)

30 Te Jèsús ní quee-gá núú ndécú-gã-ãⁿ ndihi cue téé xica cuu ndihi-gã cuáhãⁿ-gã ndihi-güedé distritú Galileá, te cuíní-gã sá vã quini ñáyiú ndéé ichi cuáhãⁿ-gã. 31 Te ducaⁿ ñí sani iní-gã, chi mee-gã sa nãha-gã sá ndãá cada-xi nãcuáa xáhaⁿ-gã xii cue téé xica cuu ndihi-gã, te duha xáhaⁿ-gã xii-güedé:

—Yúhú Téé cùu ñani tnáhã-ndó nchãa-ndo sáá ïⁿ nduyú te cuáha cuendá ñáhã-güedé xii-í núú cue téé cùu úhú iní ñáhã, te cahni ñaha-güedé xii-í, dico nduu úní sá cúú-í te ndoto-í —cächí-gã xáhaⁿ-gã xii-güedé.

32 Dico ñá túú tnàhí ñi təcú tnùní-güedé nása ndùu tnúhu ní cãháⁿ-gã, te ñi ñá túú ní cùyi-güedé cãcãⁿ tnúhú-güedé núú-gã.

Cue téé ndùcu tnúhu núú tnáhã núú ndédacãa-güedé io-gã cùnùu
(Mt. 18:1-5; Lc. 9:46-48)

33 Te Jèsús ní quexìo-gã ndihí cue téé xica cuu ndihi-gã ñuú Capernaúm, te òré sa ndècu-gã ïⁿ vehe te ní xicáⁿ tnúhú-gã núú-güedé, te xáhaⁿ-gã xii-güedé:

—¿Nándi cùu tnúhu ta xitnãha-ndo véxi? —cächí-gã xáhaⁿ-gã xii-güedé.

34 Dico ñá túú tnàhí ñi cãháⁿ-güedé cùnãha-güedé xii-gã núú ná tnúhu xitnãha-güedé òré ñúhú-güedé ichi. Te ducaⁿ ñí guide-güedé chi cuendá tá ndãtnúhu-güedé núú ndédacãa-güedé io-gã cùnùu. 35 Te Jèsús ní ngóo-gã, te ní xáhaⁿ-gã xii ndi ùxúú cue téé xica cuu ndihi-gã:

—Chí táquixi iha te cund-edóho-ndo tnúhu na cãháⁿ-i-a. Te núú ió dava-ndo cuíní-ndó cùnùu-ndo, te cada-ndo sã cúú-ndó ñáyiú nchicúⁿ cuí-ñã, te cunu cuechi-ndo núú tnãha ñáyiú-ndo —cächí-gã xáhaⁿ-gã xii-güedé.

36 Te Jèsús ní sanutñi-gã ïⁿ té lihli cuádava tnuú-güedé, te dàtnùni ní nguídèhé ñáhã-gã xii-dé, te xáhaⁿ-gã xii-güedé:

37 —Nchaa ñáyiú na quèheⁿ cuendá ïⁿ té lihli dàtnã té lihli-a cuendá sã ñúhú ñi ñáhã-yu xii-í ñã, te cada iní-yu sã yúhú ní quèheⁿ cuendá-yu. Te nchaa ñáyiú na quèheⁿ cuendá ñáhã xii-í te ñá díú-ní mèe-í ní quèheⁿ cuendá-yu, chi tnáhã Tãtã-í Dútú Ndiòxi Yáá ní tendaha ñaha xii-í véxi-í ñuyúú-a ní quèheⁿ cuendá-yu —cächí-gã xáhaⁿ-gã xii-güedé.

Nchaa ñáyiú ñá túú cùu úhú iní ñáhã xii-o te cündihí ñáhã-yu

(Mt. 10:42; Lc. 9:49-50)

38 Te té Juáa ñi-ni ïⁿ téé xica cuu ndihi-gã ní xáhaⁿ-dè xii-gã:

—Mèstrú, ní xiní-ndí ïⁿ téé càcunehe ñaha-dé xii-n, te queñuhu-dé espíritú cündihí yucu ñávãha yìhi ñaha xii ñáyiú, te nchúhú ñá túú ní dàña-gã-ndí ducaⁿ càda-dé, chi ñá túú xica

cuu ndihi ñaha-dé xii-o —càchí-dé xáhaⁿ-dê xii-gá.

³⁹ Te Jèsús ní xáhaⁿ-gá xii-güedé:

—Daña-ndo na cada nahi-dé ní cuu, chi ñá túú ní ñí ñáiyu ndihi ndihi-ni ndacu cáháⁿ cuèhé cuendá-í te núu càcunehe ñahá-yu xii-í, te quidé-yu sá vã yõo tnàhí ndàcu cada. ⁴⁰ Te nchaa ñáiyu ñá túú cuu úhú iní ñáhá xii-o te cündihi ñahá-yu. ⁴¹ Te na càchí tnúhu-í xii-ndo sã cuè ñáiyu na tàxi ñí yaxiⁿ ndute coho-ndo cuendá sã cúu-ndó cuè téé xica cuu ndihi-í, te ñáiyu-áⁿ sãá nduu te dacuèí sá nihí-yu sá ndúú tãhú-yu —càchí-gá xáhaⁿ-gá xii-güedé.

Cada cuendá-ó vã cündecu-o ichi cuèhé ichi duha

(Mt. 18:6-9; Lc. 17:1-2)

⁴² Te xáhaⁿ tucu Jesús xii-güedé:

—Te núu ñí téé na dàcaháⁿ-dé cue ñáiyu sãndáá iní ñáhá xii-í cada-yu nándi sá cuèhé sá dúhá, te váha-gá sá nõu na dàcutu ndeé-güedé ñí yúú yõó dücúⁿ-dê, te dàquée ñaha-güedé xii-dé xití ndute lámár, te ñá díú sã cündecu-dé ducaⁿ cada-dé. ⁴³ Te núu ñí xio ndaha-ndo quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèí na cuíta ñí xio ndaha-ndo te ñá díú sã quihíⁿ-ndó nihí ní ndúú-ndó nõú ùhú núú ndàhú núú dicó sãá ndáhá itá ñuhú ní caa ní quihíⁿ. ⁴⁴ Chi yacáⁿ cúu-xí nõú ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ. ⁴⁵ Te núu ñí xio sáhá-ndó quide-xi quide-ndo nándi sá cuèhé sá dúhá, te quehndé-ndó cuíta-xi, chi váha-gá sá nánihí tãhú-ndó cuèí na cuíta ñí xio sáhá-ndó, te ñá díú sã quihíⁿ-ndó nihí ní ndúú-ndó nõú ùhú núú ndàhú núú dicó sãá ndáhá itá ñuhú ní caa ní quihíⁿ. ⁴⁶ Chi yacáⁿ ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ. ⁴⁷ Te núu ñí xio tinùu-ndo quide-xi quide-ndo

nándi sá cuèhé sá dúhá, te tava-ndo cuíta-xi, chi váha-gá sá cündecu-ndo núú ndécú Yã Ndiõxí táxí tnùn-í-gá cuèí na cuíta ñí xio tinùu-ndo, te ñá díú sã ndí nduú xio núú-ndó quihíⁿ-ndó nõú ùhú núú ndàhú. ⁴⁸ Chi yacáⁿ ñá túú tnàhí ndàhvã ñuhú, te ío ndoho-ndo cündecu-ndo xíáⁿ ní caa ní quihíⁿ.

⁴⁹ Te dàtná quidé-güedé quiti sãhni-güedé chihí-güedé cuñú-dí ñí te dàquée-güedé núú ñuhú, ducaⁿ sãtnahá-xi ndoho cue ñáiyu chi ío ndohó-yu. ⁵⁰ Te ñí chi ío váha nãndihí-xi, dico núu na nduu víxiⁿ-xi te ñá túú-gá nándihí-xi te ní ñá túú-gá nása cada-o nduu úhá tucu-xi. Te ío váha cada cuendá-ndó nãcuáa cundecu-ndo cuendá cuu-ndo ñáiyu váha, te ducaⁿ te cuu-ndo dàtná ñí sã ñá túú nduu víxiⁿ, te ío váha cundecu ndihi tnàha-ndo —càchí-gá xáhaⁿ-gá xii-güedé.

10

Jèsús càháⁿ-gá cuendá cue ñáiyu dàña tnaha

(Mt. 19:1-12; Lc. 16:18)

¹ Te Jèsús ní xica-gá cuáháⁿ-gá ní yáha-gá yucu distritú Júdeá ní téhndé-gá ndáa ingá xio yúte Jórdán. Te yacáⁿ ndécú-gá ní tacá tucu cuèhé víhí ñáiyu, te ní ngüita-ni tucu-gá dánèhé ñáhá-gá xii-yu tnúhu-gá chi ducaⁿ tnàhí quide-gá. ² Te ní quèxio ñí úú cue téé cuu fariséú núú ndécú Jèsús xito ndéé ñáhá-güedé xii-gá nõu nása cunduu tnúhu cáháⁿ-gá, te xáhaⁿ-güedé xii-gá:

—Véxi-ndí xicáⁿ tnúhú-ndí núu-n nõu cuu dàña ñí téé ñadihí-dé ñí ñáhá —càchí-güedé xáhaⁿ-güedé xii-gá.

³ Te Jèsús ní xáhaⁿ-gá xii-güedé:

—Te nchòhó, ¿nása ní cachí ndí Moisés cada-ndo-í? —càchí-gá xáhaⁿ-gá xii-güedé.

⁴ Te ní xáhaⁿ-güedé xii-gá:

—Ndii Moisés ní cachí ndii sá cúú dàña ìⁿ téé ñadihí-dé dicó-ni sá cadúha-dé ìⁿ tutú cuañaha-dé, te núú tütú-áⁿ codo tnùní sá ní dáñá ñaha-dé, te ducaⁿ te cuu daña-dé ñadihí-dé —càchí-güedé xáhaⁿ-güedé xii-gá.

⁵ Te Jèsús ní xáhaⁿ-gá xii-güedé:

—Te ducaⁿ ní chídó tnùní ndii Moisés cada-ndo cuendá sá ío sáá iní-ndó. ⁶ Dico Yá Ndióxi cútñahá ní cadúha-gá ñuyíú ndihi nchaa sá ío, chi téé ñadihí ní cadúha-gá. ⁷ Te xíáⁿ núu nchaa cue téé na nihí ñadihí-xi, te dñⁿ-ná cada-güedé tátá-güedé ndihi náná-güedé, chi mee-ná ñadihí-güedé cuu cuu ndihi-güedé. ⁸ Te cue ñáyíu úú-áⁿ ñá túú-gá ndí dñⁿ ndí dñⁿ yìqui cuñú cúú-yu, chi cada iní-ndó sá ííⁿ-ná yìqui cuñú cúú-yu. ⁹ Te xíáⁿ núu ñá túú ndùu váha-xi dàña cuè téé ñadihí-güedé, chi mee Yá Ndióxi ní cachí-gá sá cúú úú-yu cundecú-yu ndéé naa ndéé cuú-yu —càchí-gá xáhaⁿ-gá xii-güedé.

¹⁰ Te òré yíhí Jèsús ndihi cue téé xíca cuu ndihi-gá vehe, te ní xícáⁿ tnúhú-güedé núú-gá nása ndùu tnúhu ní cáháⁿ-gá cuendá cue ñáyíu dàña tnaha. ¹¹ Te Jèsús ní xáhaⁿ-gá xii-güedé:

—Te núu ìⁿ téé na dàña-dé ñadihí-dé te naqueheⁿ-dé ingá ñadihí, te ío nèhé quidé-dé, te ìⁿ-ni cuèchi cùu-xi ndihi cuèchi quide téé ndèca ñadihí te càháⁿ ndihi-dé ingá ñadihí. ¹² Te ñíu-ni ducaⁿ sátnahá-xi cùu tucu ñáyíu ñíhí te núu na dàñá-yu yíⁿ-yu te naquehéⁿ-yu ingá téé, chi ìⁿ-ni cuèchi cùu-xi sá quidé-yu ndihi sá quidé cuè ñáyíu ñíhí ndécú yíⁿ-xi, te càháⁿ ndihi-yu ingá téé —càchí-gá xáhaⁿ-gá xii-yu.

Jèsús xícáⁿ táhú-gá núú Yá Ndióxi cuendá landú

(Mt. 19:13-15; Lc. 18:15-17)

¹³ Te ìⁿ úú ñáyíu ndècá-yu landú líhli cuaháⁿ núú Jèsús, chi cuíní-yu

sá téndaha ñaha-gá xii-güexi. Te cue téé xíca cuu ndihi-gá ní ngúíta-güedé ténáá ñahá-güedé xii-yu, te xáhaⁿ-güedé sá vá dúcáⁿ cadá-yu. ¹⁴ Te òré ní xini-gá sá dúcáⁿ quide-güedé, te ní cudééⁿ-gá núú-güedé, te xáhaⁿ-gá xii-güedé:

—Chí dáñá ná quixi nahi cue landú líhli-áⁿ núú-í-a te vá càdí-ndó íchi-güexi, chí dàtná cúú váha iní cue landú líhli-áⁿ ducaⁿ cùu váha iní cue ñáyíu yíndaha Yá Ndióxi. ¹⁵ Te na càchí tnúhu ndáá-í xii-ndo sá núu vá quindáá iní ñahá-ndó dàtná quidé cuè landú líhli sàndáá iní ñahá xii-í, te vá ndíhu ndaha ñaha Yá Ndióxi xii-ndo —càchí-gá xáhaⁿ-gá xii-güedé.

¹⁶ Te sáta dúcáⁿ ní xáhaⁿ-gá te ní nguídèhé-gá cue landú-áⁿ te ní tendaha ñaha-gá xii-güexi, te ní xícáⁿ táhú-gá núú Yá Ndióxi cuendá-güexi.

Íⁿ téé cuica càháⁿ ndihi-dé Jèsús

(Mt. 19:16-30; Lc. 18:18-30)

¹⁷ Te òré sa ñúhu ichi Jesús caca-gá quíhíⁿ-gá ingá xichi ni cùu ní quexio cunu ìⁿ téé ní ngúíñí xítí-dé núú-gá, te xáhaⁿ-dè xii-gá:

—Yòhó Mèstrú, cùu-n téé ío váha iní-xi, te cuíní-í núu vá cündèe iní-n càchí tnúhu-n ná cúú sá cadá-í cuendá nduu táhú-í cundecu-í ndihi Yá Ndióxi ní caa ni quíhíⁿ —càchí-dé xáhaⁿ-dè xii-gá.

¹⁸ Te Jèsús ní xáhaⁿ-gá xii-dé:

—¿Te cùtnuní iní-n nàcuáa ndùu tnúhu càháⁿ-n sá yúhú váha iní-áⁿ? Chí ìⁿndí díí-ni Yá Ndióxi ío váha iní-gá. ¹⁹ Te yòhó xini-n nàcuáa ní cachí Yá Ndióxi cada ñáyíu, te duha ní cachí-gá: “Nchòhó cue téé vá càháⁿ ndihi-ndo ñadihí te núu ñá díú ñadihí-ndó cùu-yu, te ducaⁿ-ni nchòhó cue ñáyíu ñíhí tucu vá càháⁿ ndihi-ndo téé te núu ñá díú yíⁿ-ndo cuu-güedé, te vá cáhni-ndó tnàha ñáyíu-ndo, te ní vá dúhú-ndó sá ndécú ndihi-yu, te ní vá dácàcu-ndo cuèchi neñúu

sá cúú-xí tnàha ñáyiú-ndo, te ni vâ dâcuândeñde-ndo, te canehe-ndo sâ yíñùhu núú tâtá-ndó ndîhi núú nâná-ndó”, duha ní cachí Yá Ndiöxí cada ñáyiú —câchí-gá xâhaⁿ-gâ xii-dé.

²⁰ Te téé-áⁿ ní xâhaⁿ-dê xii-gá:

—Mèstrú, nchaa xiáⁿ ní ngúíta-í quidê-í ndéé cútnáhá cúú lândú-í —câchí-dé xâhaⁿ-dê xii-gá.

²¹ Te Jèsús ní xíndéhé ñàha váha-gá xii-dé, te ní cuu váha iní ñáhá-gâ, te ní xâhaⁿ-gâ xii-dé:

—Dico cùmání ìngá núú sâ cadá-n. Vitna te quíhíⁿ-n te dico-n nchâa sâ ndécú ndîhi-n, te díhúⁿ-n cuâha táhú-n cuè ñáyiú ndàhú. Te ducaⁿ, te nduu táhú-n núcúndecu váha-n núú ndécú Yá Ndiöxí táxí tnúni-gá, te sâtá ná yâha ducaⁿ càda-n, te quixi-n chìtnahá ñáhá-n xii-í cuèi na ndòho-n datná ndoho-í —câchí-gâ xâhaⁿ-gâ xii-dé.

²² Te sâ dúcáⁿ ní xâhaⁿ Jèsús xii-dé te ío ní cundiýí-dé chi ío cuica-dê, te ní xica-dé cuánuhú-dé.

²³ Te ní ndacoto-gá ni càndéé òñí-gâ, te ní xâhaⁿ-gâ xii cue téé xica cuu ndîhi-gá:

—Cue ñáyiú cuica chi ío úhú quíndáá iní-yu Yá Ndiöxí cuèndá ndîhu ndaha ñàha-gá xií-yu —câchí-gá xâhaⁿ-gâ xii-güedé.

²⁴ Te cue téé xica cuu ndîhi-gá-áⁿ ío ní cuñúhu-güedé nàcuáa ní cáháⁿ-gá, te ní xâhaⁿ tucu-gá xii-güedé:

—Nchòhó cue téé xica cuu ndîhi-í câchí tnúhu tucu-í xii-ndo sâ ío úhú quíndáá iní cue ñáyiú cuica Yá Ndiöxí cuèndá ndîhu ndaha ñàha-gá xií-yu, chi sâni iní-yu sâ ncháá sâ ndécú ndîhi-yu dàcâcu nihnu ñaha-xi xií-yu núú ùhú núú ndàhú. ²⁵ Te yáchí-gá yâha ìⁿ

câméyu yaú ìⁿ yiqui ticú dàcúúxí sâ quíndáá iní ìⁿ ñáyiú cuica Yá Ndiöxí cuèndá ndîhu ndaha ñàha-gá xií-yu —câchí-gá xâhaⁿ-gâ xii-güedé.

²⁶ Te cue téé xica cuu ndîhi-gá ní cuñúhu víhi-gá-güedé sâ dúcáⁿ ní cáháⁿ-gá, te ní ngúíta-güedé xitnàha-güedé:

—¿Te yoo sa ndacu naníhí tàhú te núu ducaⁿ vaiⁿ? —câchí-güedé xitnàha-güedé.

²⁷ Te Jèsús ní xíndéhé vâha ñaha-gá xii-güedé, te ní xâhaⁿ-gâ:

—Nchaa ñáyiú ñuyúú-a chi vá ndácú-yu ná cadá-yu nàcuáa ndîhu ndaha ñàha Yá Ndiöxí xií-yu, dico mee-gâ chi ndacu-gá ndîhu ndaha ñàha-gá xií-yu, chi nchaandi túhú sâ váha ndàcu-gá quidê-gâ —câchí-gá xâhaⁿ-gâ xii-güedé.

²⁸ Te té Pèlú ní xâhaⁿ-dê xii-gá:

—Nchúhú ní dándöo-ndí nchaandi túhú sâ ndécú ndîhi-ndí te ní tuha ñaha-ndí xii-n —câchí-dé xâhaⁿ-dê xii-gá.

²⁹ Te Jèsús ní xâhaⁿ-gâ xii-dé:

—Na câchí tnúhu ndáá-í xii-ndo sâ ncháá ñáyiú na dándöo vehe-xi, àdi ñaní-xi, cúha-xi, tâtá-xi, nâná-xi, déhe-xi, àdi ñuhu-xi, te núu ducaⁿ na cadá-yu sâ cuèndá-í ndîhi sâ cuèndá tnúhu-í, ³⁰ te ío-gá cuéhé sâ cuñàha Yá Ndiöxí cundecu ndîhi-yu, chi níhí-yu vehé-yu, ñuhú-yu, ñaní-yu, cúha-yu, nâná-yu, déhe-yu, te ñá díú-ní sâ nchâa xiáⁿ níhí-yu cundecu ndîhi-yu, chi tnàhá nduu táhú-yu cundecu ndîhi ñáhá-yu xii-í ni caa ni quíhíⁿ ná sâá nduu. Dico díhna-gá ndoho tnahá-yu núú ñuyúú-a sâ cuèndá-í. ³¹ Te dava ñáyiú cunuu ndecu ichi Yá Ndiöxí vitna, ñáyiú-áⁿ sâá nduu te vá ío-gá cunúú-yu datná cunúú-yu vitna, te dava ñáyiú nchìcúⁿ ñá túú cunuu vitna ñáyiú-áⁿ sâá nduu te ío cunúú-yu —câchí-gá xâhaⁿ-gâ xii-güedé.

Jèsús càháⁿ tucu-gá sâ cáhni ñàha-güedé xii-gá

(Mt. 20:17-19; Lc. 18:31-34)

³² Te ñúhu Jèsús ichi ndîhi cue téé xica cuu ndîhi-gá cuásaá ndîhi

ñaha-gã xii-güedé ñuú Jerusálén, te yòdo nuu-gá núú-güedé cuásaá. Te cue téé-áⁿ xícuñúhu-güedé sá dúcáⁿ cuáháⁿ-gá ñuú Jerusálén, te dava cue ñáyiú xínchícúⁿ xiyùhú-yu. Te ní taudìⁿ-gá ndì ùxúú cue téé xìca cuu ndìhi-gá, te ní ngúíta-gá cání-gã cuèndú núú-güedé nchaa nàcuáa yáha-gá. ³³ Te xáhaⁿ-gã xii-güedé:

—Vitna ñuhu-o ichi cuásaá-ó ñuú Jerusálén, te yácáⁿ cuáha cuèndá ñáhá-güedé xii yúhú Tée cùu ñaní tñhá-ndó nchaa-ndo núú cuè téé cùu dútú cùnùu, ndìhi núú cuè téé dàcuaha ñaha xii ñáyiú nchaa tñúhu ní chídó tñùnì ndíi Moisés. Te dñu cue téé-áⁿ cùñaha-güedé xii dava-gá cue téé sá cáhni ñaha-güedé xii-í, te cuáha cuèndá ñáhá-güedé xii-í núú cuè téé ñá túú cùu cue téé isràél. ³⁴ Te cue téé-áⁿ cudíquí ndeé ñáhá-güedé xii-í, te caniha-güedé ndìhi ñii, te tiú díi ñáhá-güedé, te cahni ñaha-güedé xii-í dico nduu únì sá cùú-í te ndoto-í —càchí-gá xáhaⁿ-gã xii-güedé.

Té Jàcobó ndìhi té Juàá càháⁿ ndàhú-güedé núú Jèsús sá cádá-gã ñⁿ sá cuíní-güedé

(Mt. 20:20-28)

³⁵ Te cue déhe té Zebèdeú té Jàcobó ndìhi té Juàá ní quexìo-güedé núú Jèsús, te xáhaⁿ-güedé xii-gá:

—Mèstrú, véxi-ndí càháⁿ ndàhú-ndí núú-n nñu vá cùndèe iní-n càda-n ñⁿ sá cuíní-ndí —càchí-güedé xáhaⁿ-güedé xii-gá.

³⁶ Te Jèsús ní xícáⁿ tñúhú-gã núú-güedé, te xáhaⁿ-gã:

—¿Ná cùú sã cuíní-ndó càda-í-í? —càchí-gá xáhaⁿ-gã xii-güedé.

³⁷ Te ní xáhaⁿ-güedé xii-gá:

—Cuíní-ndí sá òré ná sàà nduu cùndecu-n núú táxí tñúmì-n, te ñⁿ-ndí cunucóo-ndí xio cùha-n te ñⁿ-ndí cunucóo-ndí xio dàtni-n —càchí-güedé xáhaⁿ-güedé xii-gá.

³⁸ Te Jèsús ní xáhaⁿ-gã xii-güedé:

—Nchòhó, ñá túú cùnnumì iní-ndó nàcuáa ndùu sá xìcáⁿ-ndó nñù-í.

¿Te náa cundee iní-ndó dàndoho ñaha ñáyiú xii-ndo dàtná dandòho ñahá-yu xii-í, te cundee tucu iní-ndó càhni ñahá-yu xii-ndo dàtná cahni ñahá-yu xii-í-á? —càchí-gá xáhaⁿ-gã xii-güedé.

³⁹ Te ní xáhaⁿ-güedé xii-gá:

—Cundee iní-ndí yáha-ndí nchaa nàcuáa càháⁿ-n-áⁿ —càchí-güedé xáhaⁿ-güedé xii-gá.

Te Jèsús ní xáhaⁿ-gã xii-güedé:

—Ndáá sá cùndèe iní-ndó ndòho-ndo nchaa nàcuáa ndòho-í, te cundee tucu iní-ndó càhni ñahá-yu xii-ndo, chi yúhú cahni ñahá-yu xii-í. ⁴⁰ Dico sá dúcáⁿ cuíní-ndó, sã ñⁿ-ndó cùnucóo-ndo xio cuha-í te ñⁿ-ndo cùnucóo-ndo xio datni-í, te xíáⁿ chi ñá díú yùhú tàú-í cachí-í te núú sá cùú cùnucóo-ndo àdi sá vá cùú cùnucóo-ndo, chi mee Tàtà-í Dútú Ndióxi cachí-gá te núú ná cùú ñáyiú nduu táhú cunucóo dñi-í dàvá-áⁿ —càchí-gá xáhaⁿ-gã xii-güedé.

⁴¹ Te òré ní níhí ùxí-gá cue téé xìca cuu ndìhi-gá tñúhu nàcuáa ndùu sá cuíní té Jàcobó ndìhi ñaní-dé té Juàá, te ní cudéáⁿ-güedé núú cuè téé úú-áⁿ. ⁴² Te Jèsús ní cana-gá nchaa cue téé xìca cuu ndìhi-gá-áⁿ, te ní xáhaⁿ-gã xii-güedé:

—Nchòhó xini-ndó sã cuè téé yìndaha ñⁿ nacióⁿ quide-güedé sá ño cùnuu-güedé, te nchaa dava-gá cue téé cùndìhi-güedé tñáhá-güedé quidè-güedé sã ño cùnuu-güedé.

⁴³ Dico nchòhó chi vá dúcáⁿ càda-ndo. Chi núú dava-ndo cuíní-ndó cùnuu-ndo te xini ñuhu-xi cunu cuechi núú tñáhá-ndó te vá cádá-ndó sã cùnùu-ndo. ⁴⁴ Te núú dava-ndo cuíní-ndó quène cáva-ndo, te cuu-ndo dàtná cue ñáyiú ñá túú tñahí dañá quee núú chíúⁿ pàtróoⁿ-xi cunu cuechi núú tñáhá-ndó. ⁴⁵ Te yúhú Tée cùu ñaní tñáhá-ndó nchaa-ndo, chi ñá túú véxi-í sá cúnú cuèchi ñáyiú nñù-í, chi véxi-í sá cúnú cuèchi-í núú-yu. Te cuú-í ñuyúú-a cuèndá vài-yu

cácu nihnu núú ùhú núú ndàhú —
càchí-gá xáhaⁿ-gá xii-güedé.

*Jèsús quidé tátna-gá ìⁿ téé cuàá
nání-dě Bartimeú*
(Mt. 20:29-34; Lc. 18:35-43)

46 Te Jèsús ní quexio-gá ñuú Jericó
ndihí cue téé xica cuu ndihí-gá, te ní
yáha-gá ndihí-güedé ichi xiti ñuú-áⁿ,
te ío cuéhé ñáyiú nchicúⁿ ñáhá
xii-gá cuáháⁿ te ìⁿ xio yuhu ichi
sá ñí quee xiti ñuú-áⁿ núcõo ìⁿ téé
cuàá nání-dě Bartimeú, te tátá-dě
nání-dě Tímeú, te téé-áⁿ núcõo-dé
yuhu ichi-áⁿ xicáⁿ ndàhú-dé. 47 Te
téé-áⁿ ní cutnùní iní-dé sá Jèsús téé
ñuú Nazàrét ñúhú-dě ichi, te ní
ngüíta-dé níhi càháⁿ-dé, te xáhaⁿ-dě
xii-gá:

—Jèsús, ñaní tnáhá ndíi Dàvíi,
cundàhú iní ñáhá xii-í! —càchí-dé
xáhaⁿ-dě xii-gá.

48 Te vài ñáyiú tènaá ñáhá-yu
xii-dé, te xáháⁿ-yu sá ná càdí-dé
yuhu-dé dico uuⁿ-gá níhi ní
cáháⁿ-dé xáhaⁿ-dě xii-gá:

—Jèsús, ñaní tnáhá ndíi Dàvíi
cundàhú iní ñáhá xii-í! —càchí-dé
xáhaⁿ-dě xii-gá.

49 Te Jèsús ní ngüíñí-gá te ní
xáhaⁿ-gá xii cue téé ndihí-gá:

—Chí cuànguaca téé cuàá-áⁿ can-
deca-ndo-dě quixi iha —càchí-gá
xáhaⁿ-gá.

Te cue téé-áⁿ ñí xica-güedé
cuànguaca-güedé téé cuàá-áⁿ, te
òré ní quexio-güedé núú-dě te ní
xáhaⁿ-güedé xii-dé:

—Ndacuñí te vá ndíhú-gá iní-n,
na quíhíⁿ-ó chi càna ñaha Jèsús xii-n
—càchí-güedé xáhaⁿ-güedé xii-dé.

50 Te téé-áⁿ ñí xócání-dě dóo
ndíxí-dě, te ndíhí-ni ní ndacuñí-dé
te ní xica-dé cuáháⁿ-dé núú Jèsús.
51 Te òré ní quexio-dé te ní xicáⁿ
tnúhú-gá núú-dě, te xáhaⁿ-gá xii-dé:

—¿Ná cuení-n càda ñaha-í xii-n-í?
—càchí-gá xáhaⁿ-gá xii-dé.

Te téé cuàá-áⁿ ñí xáhaⁿ-dě xii-gá:

—Mèstrú, cuení-í cada tátna-n
núú-í cuèndá cundehe-í —càchí-dé
xáhaⁿ-dě xii-gá.

52 Te Jèsús ní xáhaⁿ-gá xii-dé:

—Cuanùhú vitna, chi sa ní ndúha
núú-n chi ní sándáá iní-n Yá Ndiòxí
—càchí-gá xáhaⁿ-gá xii-dé.

Te òré-ni-áⁿ ñí ndúha núú-dě te
nchicúⁿ-dě Jèsús cuáháⁿ.

11

Jèsús cuànguihu-gá ñuú Jerusàlén
(Mt. 21:1-11; Lc. 19:28-40; Jn.
12:12-19)

1 Te Jèsús ní cuyatni-gá ndihí cue
téé xica cuu ndihí-gá ñuú Bètaniá,
ndihí ñuú Bètfaqé, te xiáⁿ cáá yucu
nani Olivú, te yatni vii-ná xiáⁿ
cáá ñuú Jerusàlén. Te Jèsús ní
cana-gá úú-ni tnáhá cue téé xica
cuu ndihí-gá. 2 Te ní xáhaⁿ-gá
xii-güedé:

—Chí cuáháⁿ ñuú cáá yàtni
yacáⁿ, te òré quexio-ndo yacáⁿ te
naníhí-ndó ìⁿ búrru ndètníⁿ-dí, te
vátá yóo ìⁿ-gá codo ñaha xii-dí, te
nandaxi-ndo-dí te candeca-ndo-dí
quixi. 3 Te núu yoo na càcáⁿ tnúhú
núú-ndó ná cuèndá nándaxi-ndo-dí,
te cúñaha-ndo sá yùhú Yaá xicá
cúu ndihí-ndo xini ñuhu-í-dí, te na
yáha canehe chiúⁿ-í-dí te ndíhí-ni
natendaha-í-dí, duha cúñaha-ndo
—càchí-gá xáhaⁿ-gá xii-güedé.

4 Te cue téé-áⁿ ñí xica-güedé
cuáháⁿ-güedé, te òré ní quexio-güedé
ñuú-áⁿ te ní naníhí-güedé ìⁿ búrru
ndètníⁿ-dí ìⁿ yutnu nihnu yatni ìⁿ
yuyehe vehe caa yatni yuhu ichi, te
ní ngüíta-güedé nándaxi-güedé-dí.

5 Te mei òré nándaxi-güedé-dí ní
quexio ñáyiú xáháⁿ-yu xii-güedé:

—¿Ná cuèndá nándaxi-ndo
búrru-áⁿ-í? —càchí-yu xáháⁿ-yu
xii-güedé.

6 Te cue téé-áⁿ ñí xáhaⁿ-güedé
xii-yu nàcuáa ní xáhaⁿ Jèsús
cúñaha-güedé. Te sátá dúcáⁿ te
ní dáñá-yu ndèca-güedé búrru-áⁿ
cuáháⁿ núú ndécú Jèsús. 7 Te
òré ní quexio-güedé ndihí-dí núú

ndécú-gã, te ní sacáⁿ ndodo-güedé dóo-güedé sátá-di, ní ngódó ñaha Jesús xii-di. ⁸ Te ío cuéhé ñáiyu ta sácáⁿ-yu dóo-yu ichi cuáháⁿ-gã cuendá núú dǒo-yu-án yãha-gã ndihi quití yòdo-gã, te davá-yu xèhndé-yu ndaha yùtnu ta sacáⁿ-yu cuáháⁿ.

⁹ Te nchaa ñáiyu yòdo nuu núú-gã ndihi nchaa ñáiyu nchicúⁿ ndaa sátá-gã ní nguíta-yu níhi càháⁿ-yu, te càchí-yu:

—jÍo càhnu cuu Yaá-a! jTe Yá Ndióxi ná chindee ñaha-gã, chi ñu-gã cúú-gã Yaá ní tendaha-gã véxi quide núú-gã! ¹⁰ jTe ñu-ni Yaá-á cúú-gã Yaá véxi quindaha ñaha xii-o datná ní xóo cada ndí Dáví! jTe ndéé nchaa sá ío andíu na càchí-xi sá ío càhnu cuu-gã! — duha càchí-yu.

¹¹ Te Jesús ní quexio-gã ñuú Jerusálén, te cuánguihu-gã xití veñúhu càhnu sá ío cunu, te ní xíndéhé vãha-gã nchaa sá ndécú xití veñúhu-án. Te sátá dúcáⁿ te ní ndee-gã cuáháⁿ-gã ñuú Bètaniá ndihi ndi ùxúú cue téé xica cuu ndihi-gã chi sa ní cuaa.

Jèsús xãhaⁿ-gã xii yutnu ngüxi sá vã cúúⁿ-gã sávidí-xi

(Mt. 21:18-19)

¹² Te nduu tnéé-án ní quee Jesús ñuú Bètaniá ndihi cue téé xica cuu ndihi-gã, te ichi ñuhu-gã ní xihí-gã docó. ¹³ Te xica ní xiní-gã nútñi ñⁿ yutnu ngüxi, te ní xica-gã cuándéhé-gã núu ndéé sávidí-xi te ñá túú ná ndéé, chi mee-ni ndãha-xi ndéé chi ñá díú yóo sácundeé sávidí-xi. ¹⁴ Te Jesús ní xãhaⁿ-gã xii yutnu ngüxi-án:

—Vitna te vá yóo ñⁿ-gã caxi sávidí-n, chi vá cúúⁿ-gã —càchí-gã xãhaⁿ-gã xii yutnu ngüxi-án.

Te cue téé xica cuu ndihi-gã ní tecú dóho-güedé nãcuáa ní xãhaⁿ-gã xii yutnu ngüxi-án.

Jèsús ñá túú tnãhá iní-gã nãcuáa quide ñáiyu xití veñúhu

(Mt. 21:12-17; Lc. 19:45-48; Jn. 2:13-22)

¹⁵ Te Jesús ní quexio tucu-gã ndihi cue téé xica cuu ndihi-gã ñuú Jerusálén, te cuánguihu tucu-gã xití veñúhu càhnu sá ío cunu, te xití veñúhu-án xíndecu cue ñáiyu quide ndáhú nádicó-yu, ndihi cue ñáiyu xísaaⁿ. Te nchaaⁿ-yu ní queñuhu ñaha Jesús xii-yu quehé, te ní dándüá-gã mèsá cue ñáiyu dàma díhúⁿ, ndihi nchaa xilé sácóo nchihi cue ñáiyu dico lómá xíndecu xití veñúhu-án. ¹⁶ Te ñá túú tnãhí-gã ní dàña-gã yãha cue ñáiyu ndihi nchaa sá nchidó-yu ichi xití veñúhu-án. ¹⁷ Te ní xãhaⁿ-gã xii-yu:

—Núú tütú Yá Ndióxi càháⁿ-xi nãcuáa ní càháⁿ-gã, te ní cachí-gã: “Vehe-í cúú-xi vèhe núú tàcá ñáiyu nihí ñuyú càháⁿ ndihi ñãhá-yu xii-í”, duha ní càháⁿ-gã càchí-xi núú tütú-gã. Dico nchóhó quidé-ndó vèhe-gã vehe ñadúhú —càchí-gã xãhaⁿ-gã xii-yu.

¹⁸ Te nchaa dútú cúnú, ndihi nchaa cue téé dàcuaha ñaha xii-yu nchaa tnúhu ní chidó tnùní ndí Moisés ní tecú dóho-güedé nãcuáa ní càháⁿ-gã te ní nguíta-güedé ndúcú-güedé nãcuáa cada-güedé cahni ñaha-güedé xii-gã, chi yuhú-güedé sá ío cunu-gã, te ducaⁿ chi nchaa ñáiyu ío cunúhu-yu nchaa tnúhu càháⁿ-gã. ¹⁹ Te òré sa ní cuaa cuí-nã, te ní quee tucu Jesús ndihi cue téé xica cuu ndihi-gã ñuú Jerusálén cuáháⁿ-gã ndihi-güedé ingá xichi.

Ní yichí yutnu ngüxi

(Mt. 21:20-22)

²⁰ Te nduu tnéé nehé-ni ní yãha tucu Jesús ndihi cue téé xica cuu ndihi-gã núú níhnú yùtnu ngüxi, te ní xiní-güedé sa ní yichí nihí ndéé yóho-xi. ²¹ Te té Pelú ní ndacu iní-dé nãcuáa ní xãhaⁿ Jesús

xii yutnu ngüxí-án, te ní xáhaⁿ-dë xii-gá:

—Mèstrú, cundehe nã ní yíhí yutnu ngüxí sá ní xáhaⁿ-n sã vã cúúⁿ-gã sávidí-xi —càchí-dé xãhaⁿ-dë xii-gá.

²² Te Jèsús ní xáhaⁿ-gã xii-güedé:

—Quindáá ndisa iní-ndó Yã Ndiöxí. ²³ Te na càchí tnúhu ndáá-í xii-ndo sã nũu nchòhó cũñaha-ndo xii tindúú-a xocuiñí-xi núú ndécú-xí, te quíhíⁿ-xi quée-xi xití lámár. Te ðiu ducaⁿ càda-xi te núu nchòhó vã cání ìⁿ caní úú iní-ndó, te quindáá iní-ndó sã dúcáⁿ càda-xi. ²⁴ Te xiãⁿ nũu càchí tnúhu-í xii-ndo sã nchàa sã ná càcáⁿ-ndó núú Yã Ndiöxí òré càháⁿ ndihi-ndo-gã, te taxi-gá te núu nchòhó sàndáá ndisa iní-ndó sã táxi-gã sã xicáⁿ-ndó núú-gã. ²⁵ Te òré càháⁿ ndihi-ndo Yã Ndiöxí te dandacu iní-ndó te núu ndècu ñáiyu ñã túú cùu vãha iní ñáhã xii-ndo, te cada càhnu iní-ndó-yu cuendá ducaⁿ càda cahnu iní ñáhã Tãtá-ndó Dútú Ndiöxí Yaá ndécú àndiu xii-ndo cuendá nchaa sã ñã túú vãha quide-ndo. ²⁶ Dico núu nchòhó vã cadá càhnu iní-ndó sã quidé ñaha tnaha ñáiyu-ndo xii-ndo, te ní Tãtá-ndó Dútú Ndiöxí vã cadá càhnu iní ñáhã-gã xii-ndo cuendá nchaa sã ñã túú vãha quide-ndo —cachí-gã xãhaⁿ-gã xii-güedé.

Jèsús ndécú ndihi-gá tnúhu ndee iní
(Mt. 21:23-27; Lc. 20:1-8)

²⁷ Te Jèsús ní ndexio tucu-gá ñúú Jerusalén ndihi cue téé xica cuu ndihi-gá, te cuánguihu tucu-gá xití veñúhu càhnu sã ìo cùnuu ndihi-güedé. Te xití veñúhu-áⁿ yíhí-gã ní quexio cue dútú cúnùu ndihi cue téé dàcuaha ñaha xii ñáiyu nchaa tnúhu ní chídó tnùní ndíi Moisés, ndihi cue téé cùu sacuéhé nũú ñáiyu isráel. ²⁸ Te xãhaⁿ-güedé xii-gá:

—Cuíní-ndí cachí tnúhu-n xii-ndí nása ndùu tnúhu ndee iní ndécú

ndihi-n núu quide-n nándi sá quidé-n, ¿te yoo ducaⁿ ní taxi tnúhu ndee iní-án xii-n-i? —càchí-güedé xãhaⁿ-güedé xii-gá.

²⁹ Te Jèsús ní xáhaⁿ-gã xii-güedé:

—Yúhú tnàhá-í cuíní-í càcáⁿ tnúhu-í ìⁿ sã càcáⁿ tnúhu-í núú-ndó te núu na càchí tnúhu-ndo, te cachí tnúhu-í xii-ndo yòo ní taxi tnúhu ndee iní xii-í duha quide-í. ³⁰ Te chí càchí tnúhu xii-í yoo ní táuchíúⁿ ní dácuanđute ndíi Juáá ñáiyu, ¿Yá Ndiöxí áⁿ cuè téé ñuyúú-a ní táuchíúⁿ dùcaⁿ ní quide ndíi? Te chí càchí tnúhu —càchí-gã xãhaⁿ-gã xii-güedé.

³¹ Te ní ngüíta-güedé xitnàha-güedé:

—¿Nása cũñaha-o? Chi núu na cũñaha-o sã Yã Ndiöxí ní táuchíúⁿ dùcaⁿ ní quide ndíi Juáá ñã, te quesaha-dë: “¿Ná cuendá ñã túú ní sàndáá iní-ndó tnúhu ní càháⁿ ndíi vãⁿ?” , quesaha-dë. ³² Te ní vã cúú cũñaha-o sã cuè ñáiyu ñuyúú-a ní táuchíúⁿ dùcaⁿ ní quide ndíi Juáá —càchí-güedé xitnàha-güedé.

Te ducaⁿ ní xitnàha-güedé chí ñã túú ní cùtnuní iní-güedé nása cũñaha-güedé xii-gá, chí xiyùhú-güedé cue ñáiyu chí nchaa ñáiyu-áⁿ ní cutnùní ndáá iní-yu sã Yã Ndiöxí ní táuchíúⁿ-gã ducaⁿ ní quide ndíi Juáá. ³³ Te ní xáhaⁿ-güedé xii Jèsús:

—Ñã túú xìní-ndí yoo ní táuchíúⁿ dùcaⁿ ní dácuanđute ndíi Juáá ñáiyu —càchí-güedé xãhaⁿ-güedé xii-gá.

Te Jèsús ní xáhaⁿ-gã xii-güedé:

—Te núu ducaⁿ te ní yúhú vã càchí tnúhu-í xii-ndo yòo ní taxi tnúhu ndee iní duha quide-í —càchí-gã xãhaⁿ-gã xii-güedé.

12

Cuendá cue téé cuihna iní-xi
(Mt. 21:33-46; Lc. 20:9-19)

¹ Te Jèsús ní ngüíta-gã cání-gã ìⁿ cuendú núú ñáiyu nàcuáa tecú tnùní-yu tnúhu-gã, te xãhaⁿ-gã xii-yu:

—#n tée ní nacúxi-dé mee-ni yòho yaha stilé núú ñhú-dě, te ní chidoco-dě cuèndá sá vâ cúú dâñú, te ní cadúha-dé núú quíhni-dě ndéhé yoho yàha stilé-án òré ná cùu, te ní cadúha-dé #n xító dùcúⁿ núú cáundòdo cue tée coto yoho yàha stilé-án.

'Te ní sáá #n nduu quèe-dé quíngaca cuu xica-dě vâi nduu, te ní dándòo ndaha-dě sá nǐ xitu-dé-án xii #n úú cue tée càháⁿ ndihi-dě cuèndá cada chiùⁿ-güedé, te ní ndatnúhu-güedé sá òré ná cúú te cuu cuèndá dava-güedé te ducaⁿ te ní quee-dé cuáháⁿ-dé. ² Te sáta nǐ sáá nduu nǐ cuu ndéhé yoho yàha stilé sá nǐ xitu-dé-án, te ní xáhaⁿ-dě xii #n tée xínu cuechi núú-dé: “Cuáháⁿ cácaⁿ-n sá cúú cuèndá-í núú cuè tée ní dándòo ndàha-í nchaa yoho yàha stilé sá nǐ xitu-í-án”, càchí-dé xáhaⁿ-dě. Te tée xínu cuechi-án nǐ xica-dé cuáháⁿ-dé. ³ Te cue tée-án nǐ tñii-güedé tée xínu cuechi-án, te ní caniha-güedé xii-dé, te dâtnúni ní nacúicúⁿ ñáhá-güedé, te ñá túú tñahí ná ní sãñaha-güedé. ⁴ Te tée cùu xítóhó yoho yàha stilé-án nǐ tendaha tùcu-dé ingá tée xínu cuechi núú-dé cuáháⁿ-dé. Te òré ní quexìo tée xínu cuechi-án te cue tée-án nǐ sáha ñaha-güedé yúú xii-dé, te ní táhú-güedé díquí-dě, te ní xícüehé ñáhá-güedé xii-dé. ⁵ Te tée cùu xítóhó nchaa yoho yàha stilé-án nǐ tendaha tùcu-dé ingá tée xínu cuechi núú-dé cuáháⁿ-dé núú cuè tée-án, dico tée-án òré ní quexìo-dé te ní sahani ñaha-güedé xii-dé. Te tée cùu xítóhó nchaa yoho yàha stilé-án nǐ tendaha-dě vâi-gá cue tée xínu cuechi núú-dé cuáháⁿ ngácáⁿ-güedé sá cúú cuèndá-dé ní cùu dico diu-ní ducaⁿ nǐ quide ñaha tùcu cue tée ndèè nchaa yoho yàha stilé-án xii-güedé, chi dava-güedé ní caniha-güedé te dava-güedé ní sahani ñaha-güedé.

⁶ Te tée cùu xítóhó nchaa yoho yàha stilé-án ndécú #ndii-ná tée tendaha-dě quíhíⁿ núú cuè tée ní

dándòo ndaha-dě sá nǐ xitu-dé-án, te tée tendaha-dé-án cúú-dě déhe ducuⁿ-dé, te ío cùu iní ñáhá-dě. Te ní sani iní-dé: “Váha-gá núu tendaha-í déhe-í-a núhú-dé, chi òré quini ñáhá-güedé xii-dé te cànehe-güedé sá yíñuhu núú-dě”, duha ní sani iní-dé. Te ducaⁿ te ní xáhaⁿ-dě xii déhe-dé-án sã núhú-dé, te tée-án cuànuhú-dé cuáháⁿ ngácáⁿ-dé sá cúú cuèndá tãtã-dě núú cuè tée-án. ⁷ Dico òré ní xini cue tée quide chiùⁿ-án déhe tée cùu xítóhó nchaa yoho yàha stilé-án, te ní xítñaha-güedé: “Tée-án tée véxi nduu táhú ñuhu-a ndihi sá cáá núú-xi, dico cahni-o-dé te mee-o nduu táhú-ó sã ndúú táhú-dě”, duha ní xítñaha-güedé. ⁸ Te ní tñii-güedé tée-án, te ní sahani ñaha-güedé, te ní dàquéné-güedé yiqui cùñú-dé #n xio yuhu ñuhu núú cáá yòho yaha stilé-án —duha cuáháⁿ cuèndú ní cani Jèsús núú-yu.

⁹ Te Jèsús ní xáhaⁿ tùcu-gá xií-yu:

—¿Te nchòhó sa cùtnuní iní-ndó nàcuáa cada xítóhó ñuhu-án ãⁿ? Chi núhú-dé te cahni-dé cue tée-án te dándòo ndaha-dě ñuhu-dé xii cue tée cùtnuní iní-dé cada ndáá —càchí-gá xáhaⁿ-gá xií-yu.

¹⁰ Te xáhaⁿ tùcu-gá xií-yu:

—Te nchòhó, náa ñá túú dàcuaha-ndo núú tütú Yã Ndióxi núú càchí-xi:

Yúú sã ní dàquée tñhú cue tée dàcaa vehe,

ní cuu-xi yúú cúnú vitna.

¹¹ Chi mee Yã Ndióxi ducaⁿ nǐ cachí-gá cunduu, te cùu-xi #n sá ío cùñuhu-o vitna.

Duha càchí-xi núú tütú-gá —càchí Jèsús xáhaⁿ-gá xií-yu.

¹² Te cue tée ní xíndedóho nàcuáa nduu tñuhu ní cáháⁿ-gá ní cuini-güedé tñii ñaha-güedé xii-gá ní cùu, chi ní cutnùní iní-güedé sá cuèndá-güedé ní cáháⁿ-gá, dico ní yùhú-güedé tñii ñaha-güedé xii-gá cuèndá sá ío vâi ñáyiú, te ná ío ná cada ñáhá-yu xii-güedé ní sani iní-güedé, te ní xica-güedé cuáháⁿ-güedé.

Cuendá impuèstú

(Mt. 22:15-22; Lc. 20:20-26)

13 Te sáta ñi xica-güedé cuáhán-güedé, te ní tendaha-güedé ñi úú cue tée cùu fariséú, ndihi ñi úú cue tée cùndihi té Hèrodés cuáhán-güedé núú ndécú Jèsús ndúcú-güedé nàcuáa cada-güedé datícánuu ñaha-güedé xii-gá núú tnúhu càháⁿ-gá. 14 Te cue tée-án ñi quexio-güedé núú Jèsús, te xáhaⁿ-güedé xii-gá:

—Mèstrú, cùtnuní iní-ndí sá ío ndáá càháⁿ-n, te ñá túú quide cuendá-n nàcuáa càháⁿ ñáiyu, te cuèi ndédani càá-yu ñi-ni càháⁿ-n ndihí-yu chi ñá túú quide cuendá-n cuèi ná ñáiyu cùu-yu, te càháⁿ ndáá-n nàcuáa càháⁿ Yá Ndióxi cundecu-o ñuyíú-a. Te cachí tnúhu xii-ndí núu váha-ni quide-ndí sá cháhu-ndí té Cèsár tée ío cùnuu cuendá impuèstú áⁿ ñhá —càchí-güedé xáhaⁿ-güedé xii-gá.

15 Dico Jèsús ní cutnúní iní-gá sá xító ndéé ñhá-güedé xii-gá, núu ní xáhaⁿ-gá xii-güedé:

—¿Ná cuendá ducaⁿ xito ndéé ñhá-ndó xii-í? Chí dánèhé ñhá xii-í ñi díhúⁿ sá cháhu-ndo cuendá impuèstú te núu nása càa —cachí-gá xáhaⁿ-gá xii-güedé.

16 Te cue tée-án ñi dánèhé ñhá-güedé xii-gá ñi díhúⁿ sá cháhu-güedé cuendá impuèstú. Te Jèsús ní xáhaⁿ-gá xii-güedé:

—Chí cachí tnúhu xii-í núu yoo núu-xi ndéé ndihi yoo diu-xi ndéé —cachí-gá xáhaⁿ-gá xii-güedé.

Te ní xáhaⁿ-güedé xii-gá:

—Núu tē Cèsár ndéé ndihi diu-dé —cachí-güedé xáhaⁿ-güedé xii-gá.

17 Te Jèsús ní xáhaⁿ-gá xii-güedé:

—Te núu ducaⁿ te chí nàcuáha té Cèsár sá cùu cuendá-dé, te sá cùu cuendá méé Yá Ndióxi te xáⁿ nàcuáha-ndo-gá —cachí-gá xáhaⁿ-gá xii-güedé.

Te cue tée-án ío ní cuñúhu-güedé sá dúcáⁿ ñi càháⁿ-gá.

Cuendá cue ñáiyu ndoto

(Mt. 22:23-33; Lc. 20:27-40)

18 Te sáta dúcáⁿ te ní quexio ñi úú cue tée cùu saducéú núú ndécú Jèsús, te cue tée-án ñá túú sàndáa iní-güedé sá ndótó cue ñáiyu ní xihí, te ní xáhaⁿ-güedé xii-gá:

19 —Mèstrú, ndíi Moisés càchí ndíi núú tütú ndíi ndècu vitna sá núu ñi tée na cùu-dé te quendóo ñadihí-dé, te núu ñá túú ní xóo déhe-dé ndihi ñadihí-dé-án, te tée cùu ñaní-dé naqueheⁿ-dé ñaha ní quendóo quèé-án cuendá coo déhe-dé ndihi-án cuendá tée ní xihí-án. 20 Te ní xíndecu úsá tnàhá cue tée mee-ni ndí ñaní-güedé. Te tée díhna ní níhí ñadihí-dé, te ñá túú ní cùdí-dé cundecu-dé chi ní xihí-dé, te ní ñi déhe-dé ñá túú ní xóo ndihi ñadihí-dé. 21 Te tée cùu úú ní naqueheⁿ-dé ñaha ní quendóo quèé-án, dico ní xihí tucu-dé, te ní ñi tucu déhe-dé ñá túú ní xóo ndihi ñaha-án. Te diu-ni ducaⁿ ñi xihí tée cùu uní. 22 Te ní xínu ndí úsá-güedé ní cándeca ñaha-güedé xii ñaha-án, dico ní ñi-güedé ñá túú ní xóo déhe-güedé ndihi-án, te ní ndihi-güedé ní xihí te ndéé núu ñi ndihi-ná ní xihí tnàhá ñadihí-án. 23 Te na sáa nduu ndóto-güedé ndihi ñaha-án, ¿te ndédacàa-güedé ñadihí-güedé cuu-aⁿ-i? Chí ndí úsá-güedé ní cándeca ñaha-güedé xii-aⁿ —cachí-güedé xáhaⁿ-güedé xii-gá.

24 Te Jèsús ní xáhaⁿ-gá xii-güedé:

—Ní xíta nchòhó tnúhu càháⁿ-ndó, chi ñá túú xini-ndó nàcuáa càháⁿ Yá Ndióxi núú tütú-gá, te ní ñá túú xini-ndó sá díú-gá ndácú-gá quidé-gá nchaandi tühú sá váha. 25 Te ña cachí tnúhu-í xii-ndo sá òré ná sáa nduu ndóto nchaa ñáiyu ní xihí, te dàvá-án vǎ yóo-gá dasaⁿ déhe yoco-xi chi vǎ yóo-gá candeca tnàha, chi na ndótó-yu te cuu-ná-yu dàtná cue espíritú xínú cuèchi núu Yá Ndióxi. 26 Te núu nchòhó cuini-ndó càháⁿ-ndó cuendá nchaa ñáiyu

ndoto, te díhna-gá dachuaha-ndo nacuaá ní chidó tnùní ndíi Moisés núú tütú ndíi ní cùu. Chì diu núú tütú ndíi càháⁿ-xì nàcuáa ní xáhaⁿ Yá Ndióxi xii ndíi cútnàhá ní càháⁿ ndíi ñaha-gã ìⁿ xichi núú níhnú tnútaú nchìcúⁿ ñuhú. Te duha ní xáhaⁿ-gã xii ndíi: “Yúhú cùu-í Ndióxi tē Àbrahám, ndíi tē Isàác, ndíi tē Jácób”, duha ní xáhaⁿ Yá Ndióxi xii ndíi cächí-xì núú tütú ndíi. ²⁷ Te Yá Ndióxi ñá tuú cùu-gá Ndióxi cue ñáyiú ní xíhí, chí cùu-gá Ndióxi cue ñáyiú xíndecu vívú, núú xíáⁿ nchòhó ío xíta-ndo tnúhu càháⁿ-ndó. Te sá dúcáⁿ ní càháⁿ-gã cuendá cue tée-áⁿ, te xíáⁿ cútnùní sá cuèi ní xíhí-güedé sá cúú-xí tnàha ñáyiú-güedé, dico ndècu vívú-güedé sá cúú-xí-gã —cächí-gã xáhaⁿ-gã xii-güedé.

Tnúhu sá ïo-gá cúnúu
(Mt. 22:34-40)

²⁸ Te tnàhá ìⁿ tée dàcuaha ñaha xii ñáyiú nchaa tnúhu ní chidó tnùní ndíi Moisés ndèdóho-dé nchaa tnúhu càháⁿ Jèsús ndíi cue tée cùu saducéú-áⁿ, te ndèdóho-dé sá sùúní vâha ñihí-gá tnúhu nàdanchocáva-gá. Te ní sándehe yatni-dé núú-gã, te xáhaⁿ-dè xii-gã:

—Cächí tnúhu xii-í ndèdaçaa tnúhu sá ní càháⁿ Yá Ndióxi ío-gá cúnúu cuu díhma —cächí-dé xáhaⁿ-dè xii-gã.

²⁹ Te Jèsús ní xáhaⁿ-gã xii-dé:

—Duha càháⁿ tnúhu sá ïo-gá cúnúu: “Nchòhó ñáyiú isràél ío vâha chí cündèdóho tnúhu-a. Ìⁿ dîi díi-ni Yá Ndióxi ndécú, te diu-ni-gã cúú-gã Ndióxi-ó. ³⁰ Te cuu iní-ndó Dütú Ndióxi Yaá cúú Ndióxi-ndó ñi yuhu ñi iní-ndó, te caní iní-ndó càda-ndo datná cuini méé-gã, te mee-ñi tnúhu vâha caní iní-ndó cuendá cuu víi cuu vâha-ndo núú-gã, te coo iní-ndó càda-ndo nacuaá cuu vâha iní-gã”, duha càháⁿ tnúhu sá ïo-gá cúnúu. ³¹ Te duha càháⁿ tucu ingá tnúhu cùu uú sá ïo cúnúu: “Cuu iní-ndó tnàha ñáyiú-ndo datná cúú iní-ndó mèe-ndo”, duha càháⁿ tnúhu cùu

uú-áⁿ. Te úú duha-ni tnúhu-a cùu-xi tnúhu sá ïo-gá cúnúu —cächí-gã xáhaⁿ-gã xii-dé.

³² Te tée dàcuaha ñaha xii ñáyiú nchaa tnúhu ní chidó tnùní ndíi Moisés ní xáhaⁿ-dè xii-gã:

—Mèstrú, vâha-ni càháⁿ-n chí ndáá sá ìⁿ dîi-ni Yá Ndióxi ndécú, te ñá tuú-gã ndèé ndécú ingá ndiòxi.

³³ Te datná ní cachí-n sá ñi yuhu ñi iní-ó cùu iní-ó Yá Ndióxi, te caní iní-ó càda-o nacuaá cuu víi cuu vâha iní-gã te ío víi ío vâha cuu iní-ó datná cuini méé-gã, te coo iní-ó càda-o nacuaá cuu vâha iní-gã, te cuu iní-ó cuè tnàha ñáyiú-ndo datná cúú iní-ó mèe-o. Te nchaa xíáⁿ ío-gá xíni ñuhu-xi cada-o dacúúxi sá cuãñaha-o quiti cahni-güedé te cáyú-di nduu táhú ñáhá Yá Ndióxi, ndíi dàcúúxi nchaa dava-gã sá sãñaha-o nduu táhú-gã —cächí-dé xáhaⁿ-dè xii-gã.

³⁴ Te sá dúcáⁿ ío vâha nduu tnúhu ní càháⁿ tée-áⁿ, núú ní xáhaⁿ Jèsús xii-dé:

—Luha-ná cúmãní xii-n te ndíhu ndaha ñaha Yá Ndióxi —cächí-gã xáhaⁿ-gã xii-dé.

Te sá dúcáⁿ ñi xáhaⁿ-gã xii tée-áⁿ, núú vá yõo ìⁿ-gã ní cùyi nágá tnúhu nducu tnúhu-yu núú-gã.

Yoo cùu Xítohó Jesucristú
(Mt. 22:41-46; Lc. 20:41-44)

³⁵ Te Jèsús yíhí-gã xití veñúhu càhnu sá ïo cúnúu danehé-gã ñáyiú, te xáhaⁿ-gã xii-yu:

—Cue tée dàcuaha ñaha xii ñáyiú nchaa tnúhu ní chidó tnùní ndíi Moisés cächí-güedé sá Cristú Yaá tendaha Yá Ndióxi quixi ñuyúú-a cùu-gã déhe ndíi Dàvíí, te ndíi-áⁿ ñi cunaha víhi ní xíhí ndíi. ¿Te ná cuendá ducaⁿ càháⁿ-güedé? ³⁶ Te mee ndíi Dàvíí-áⁿ ñi dácáhú iní ñáhá Espiritú Yá Ndióxi xii ndíi nàcuáa càháⁿ ndíi, te duha ní cachí ndíi: Dütú Ndióxi ní xáhaⁿ-gã xii Yaá cúú

Xítohó-í:
“Ngóo xio cùha-í,

te yúhú cada-í te nchaa sá cúu úhú
iní ñháá xii-n canehe-xi sá
yiñùhu núú-n.”

Duha ní xáhaⁿ Dütú Ndiöxí xii Yaa
cúu Xítohó-í.

Duha ní cachí ndíi. ³⁷ ¿Te nása cùu
Cristú déhe ndíi Dàvíí, te mee ndíi ní
cachí ndíi sá cúu-gã Xítohó ndíi? —
cachí Jèsús xáhaⁿ-gã xii-yu.

Te ío cuéhé ñáyiú ní xíndedóho
nchaa tnúhu ní cáháⁿ-gã, te ío ní
cudíí ìní-yu ní xíndedóho ñháá-yu
xii-gã.

*Jèsús cáháⁿ-gã cuendá cue téé
dàcuaha ñaha xii ñáyiú nchaa tnúhu
ní chídó tnùní ndíi Moisés*

(Mt. 23:1-36; Lc. 11:37-54;
20:45-47)

³⁸ Te òré dánèhé ñháá Jèsús xii
cue ñáyiú, te xáhaⁿ-gã xii-yu:

—Cada cuendá-ndó vã cádá-ndó
dàtná quidé cue téé dàcuaha
ñaha xii ñáyiú nchaa tnúhu ní
chídó tnùní ndíi Moisés, chi
cue téé-áⁿ tnàhá ìní-güedé cui-
hnu-güedé dóó nání sá sácúihnu
cue téé cùnuu-gã te cuíní-güedé
sá méé-ní ndíi tnúhu yiñùhu
cáháⁿ ndíi ñaha ñáyiú xii-güedé
nchaa núú xícá cùu-güedé. ³⁹ Te
nàcáxi-güedé xilé sácóo nchihi
cue téé cùnuu-gã xití veñúhu
sácóo nchihi-güedé. Te ducaⁿ-ni
quide-güedé cuéi òré quíhu-güedé
mèsá caxi-güedé òré ndécú-güedé
íⁿ vico, chi mee-ni núú sácóo
cue téé cùnuu cuíní-güedé
coo-güedé. ⁴⁰ Te quèndeé-güedé
vehe nchaa ñáyiú quèé, te ío
naha cáháⁿ ndíi-güedé Yã Ndiöxí
dàndahú-güedé méé-güedé sá
ío quide ndáá-güedé cuendá sá
cuíní-güedé cáháⁿ váha ñáyiú
cuendá-güedé. Te sá dúcáⁿ
quide-güedé te ío-gã ndoho-güedé
núú úhú núú ndàhú dácúúxí
dàva-gã ñáyiú —cachí-gã xáhaⁿ-gã
xii-yu.

*Díhúⁿ nduu táhú Yã Ndiöxí ní
dáquée íⁿ ñaha ndàhú ñaha quéeé
(Lc. 21:1-4)*

⁴¹ Te núcóo Jèsús xití veñúhu
yatni núú ndécú àlcan-ciá te
ndèhe-gã xídáquée ñáyiú díhúⁿ xití
alcanciá-áⁿ, te tnàhá cue ñáyiú
cuica xídáquée-yu vài díhúⁿ. ⁴² Te
ní quexío íⁿ ñaha ndahú ñaha quéeé,
te ndèhe-gã ní dáquée-aⁿ úú tnàhá
díhúⁿ còbrí xití alcanciá, te díhúⁿ-áⁿ
ío sacú yáhu-xi. ⁴³ Te Jèsús ní
cana-gã cue téé xica cuu ndíi-gã,
te ní xáhaⁿ-gã xii-güedé:

—Na cachí tnúhu ndáá-í xii-ndo
sá ñaha ndahú ñaha quéeé-a ío-gã
nándíi díhúⁿ ní dáquée-aⁿ xití al-
canciá dácúúxí díhúⁿ ní dáquée
dava-gã-yu. ⁴⁴ Chi nchaa ñáyiú-áⁿ
ní dáquée-yu mee-nã díhúⁿ sã ní
quendóo-ná, dico ñaha quéeé-a cuéi
ndàhú-aⁿ dico ní dáquée-aⁿ ñíhí
díhúⁿ sã cuááⁿ sã cáxí-áⁿ ní cùu —
cachí-gã xáhaⁿ-gã xii-güedé.

13

*Jèsús cachí-gã sá ngóyó veñúhu
(Mt. 24:1-2; Lc. 21:5-6)*

¹ Te òré ní ndee Jèsús xití veñúhu
càhnu sá ío cùnuu, te íⁿ téé xica cuu
ndíi-gã ní xáhaⁿ-dẽ xii-gã:

—¡Mèstrú, cundehe nã ío víi
ní sáá veñúhu-aⁿ ndíi nchaa
vehe nèhe tnaha ndíi-xi, te ío víi
ndãa nchaa yúú yíhí! —cachí-dé
xáhaⁿ-dẽ xii-gã.

² Te Jèsús ní xáhaⁿ-gã xii-dé:

—Nchaa nàcuáa càa nchaa vehe
sá cúnúhu-n-a vitna sáá nduu
te vã cünduu-gã-xi dàtná cáá-xí
vitna, chi ní íⁿ-gã yúú vã códó
nchihi tnaha-xi, chi ndíi ngoyo —
cachí-gã xáhaⁿ-gã xii-dé.

*Nàcuáa cada-xi nduu ta cùyatni
naa ñuyúú*

(Mt. 24:3-28; Lc. 21:7-24; 17:22-
24)

³ Te Jèsús ní xica-gã ndíi cue
téé xica cuu ndíi-gã cuáháⁿ ndíi
ñaha-gã xii-güedé yucu nàni Olívú,

te yucu Òlívú-áⁿ tũu ndáá núú cáá veñúhu càhnu sá ïo cùnuu. Te Jësús ní quexio-gá ndihi-güedé yucu Òlívú-áⁿ, te xíaⁿ ní ngóo-gá te núú núcõo-gá-áⁿ ní sáháⁿ té Pèlú ndihi té Jàcobó ndihi té Juáá ndihi té Ndrĩxí, te dayuhu ní xáhaⁿ-güedé xii-gá:

4 —Cuini-ndí cachí tnúhu-n nã nduu dùcaⁿ cada-xi ngoyo veñúhu càhnu sá ïo cùnuu, àdi nãndi cùu sá cáda-xí cuendá cutnùní iní-ndí sá sà ta cuyatni nduu ducaⁿ cada-xi — cachí-güedé xáhaⁿ-güedé xii-gá.

5 Te Jësús ní xáhaⁿ-gá xii-güedé:

—Ïo quihi iní-ndó cùndecu-ndo cuendá sá vã yõo dandáhú ñáhá xii-ndo. ⁶ Chi ïo cuéhé cue tée coo ñuyíú te danãni-güedé méé-güedé dàtnã nãni-í, te cachí-güedé: “Yúhú cùu-í Cristú Yaá ní tendaha Yã Ndiõxí véxi ñuyíú-a”, duha cachí-güedé. Te sá dúcáⁿ cáháⁿ-güedé te ïo vai ñáyiu dandáhú-güedé.

7 Te òré ná ñihí-ndó tnúhu sá nãá-güedé ndèni ní cuu, te vã yùhú-ndó chi dacuití sã dúcáⁿ càda-xi, dico vátá sãá-gá nduu nãa ñuyíú òré ducaⁿ càda-xi. ⁸ Chi cue tée ñⁿ naciõⁿ nãá-güedé ndihi cue tée ñngá naciõⁿ, te titní ñuú ngúita-güedé nãá-güedé, te titní xichi ñuyíú ñihi vihi tnáa, te titní tucu xichi ñuyíú coo tnamá, te ïo-gá cuéhé sã yãha ñáyiu. Te nchaa sá dúcáⁿ càda-xi-áⁿ cùu-xí tnũndõho sá vítná vãha vãha quësaha-xi sácúú-xí cue ñáyiu ndècu ñuyíú-a.

9 Dico nchõhó ïo quihi iní-ndó cùndecu-ndo, chi nchaa ñáyiu na cùu úhú iní ñáhá xii-ndo cuáha cuendá ñáhã-yu xii dava-ndo núú cuè tée cùchiuⁿ, te candeca ñaha-güedé xii-ndo quíhíⁿ xití veñúhu-güedé, te yácáⁿ caniha-güedé xii-ndo. Te quíhíⁿ-ndó núú cuè tée yìndaha naciõⁿ àdi núú dàva-gá cue tée cùnuu sá cuendá-í, te nchõhó ñihí-ndó nãcuáa cada-ndo cáháⁿ

vãha-ndo cuendá-í núú-güedé. ¹⁰ Te cùmání-gã sãá nduu nãa ñuyíú-a te sa cutènuu tnúhu-í ní càa xico ñuyíú-a, te tnúhu-áⁿ càháⁿ-xi nãcuáa naníhí tãhú ñáyiu. ¹¹ Te òré ná candeca ñaha ñáyiu xii-ndo quíhíⁿ núú cuè tée cùchiuⁿ cuáha cuendá ñáhã-yu, te òré vátá sãá-gã-ndó núú-güedé te vã cáni iní-ndó nũu nãsa cunduu tnúhu cùñaha-ndo xii-güedé. Chi òré-nã te Yã Ndiõxí dacàhu iní ñáhã-gã xii-ndo nãsa danduu tnúhu cùñaha-ndo xii-güedé, te diu-ni tnúhu sá dácàhu iní ñáhã-gã-áⁿ cùñaha-ndo xii-güedé. Te ñã díú mèe-ndo cáháⁿ-ndó chi Espiritú Yã Ndiõxí cáháⁿ-xi yuhu-ndo. ¹² Te dava cue tée cuáha cuendá-güedé ñani-güedé núú cuè tée cùchiuⁿ cuendá cahni ñaha-güedé. Te dava cue tée cùu tátã diu-ni ducaⁿ càda-güedé cuáha cuendá-güedé déhe-güedé núú cuè tée cùchiuⁿ. Te dava cue tée cùu déhe cuu úhú iní-güedé tátã-güedé ndihi nãná-güedé, te cuáha cuendá ñáhã-güedé xii-yu núú cuè tée cùchiuⁿ cuendá cahni ñaha-güedé xii-yu. ¹³ Te ïo cuéhé ñáyiu cuu úhú iní ñáhã-yu xii-ndo sã cuendá-í, dico nchaa nchõhó ñáyiu na càda ndee-ni iní canchicúⁿ nihnu ñaha-ni xii-í te naníhí tãhú-ndó.

14 Te ndí Dãniél téé ní xóo cáháⁿ tnúhu Yã Ndiõxí ndéé sanaha ní chídó tnùní ndíi núú tütú ndíi cuendá ñⁿ sã dáquèe tihú Yã Ndiõxí cundecu ñⁿ xichi núú ñã túú tàú-xi cundecu-xi, te xíãⁿ cada-xi sã vã cùndècu-gá ni ñⁿ ñáyiu xíaⁿ. Te càda cuendá vãha-ndo nãcuáa ní cáháⁿ ndíi, chi nduu na quini-ndó xíãⁿ cundecu-xi ñⁿ xichi núú ñã túú tàú-xi cundecu-xi, te dàvã-áⁿ nchaa ñáyiu xìndecu distritú Jùdeá xíní ñùhu-xi cunú-yu quíhíⁿ-yu xití yucu. ¹⁵ Te nchaa ñáyiu ndáa ndódó dìquí véhé-xí vã ndíhu-gá-yu vehé-yu quehéⁿ-yu ñⁿ ndachíuⁿ-yu canehé-yu quíhíⁿ. ¹⁶ Te nchaa ñáyiu cuáháⁿ yucu ni vã nùhú-gá-yu vehé-yu cúnúquehéⁿ-yu dóó-yu.

17 ꞑTe ndàhú ní cuu nchaa ñáyiú ðìhí ñùhú ðèhe-xi, ndihí cue ñáyiú ðìhí xĩndeca ðèhe vitna sàdi na saá nduu ðucaⁿ cada-xi! 18 Te nchòhó ío chí càcáⁿ táhú núú Yá Ndiòxí cuendá sá vǎ ðúcáⁿ ndòho-ndo yóó quidé víxiⁿ-xi. 19 Chi ðává-áⁿ coo tnúndòho cahnu vihi ñuyíú, te vátá ìíⁿ ndùu-gá coo tnúndòho cahnu vihi-áⁿ ndéé cútñahá ní cadúha Yá Ndiòxí ñuyíú, chi ðiu-ni ðává-áⁿ coo tnúndòho cahnu vihi-áⁿ, te ni núú cuaháⁿ núú véxi vǎ cóo-gǎ tnúndòho-áⁿ. 20 Te Yá Ndiòxí càchí-gǎ sá vǎ ío vǎi nduu coo tnúndòho cahnu vihi-áⁿ ñuyíú sǎ cuendá nchaa ñáyiú ní cáháⁿ-gǎ cundecu ndihí-gǎ. Te núu vǎi nduu na coo tnúndòho-áⁿ, te vǎ yóo cácu nihnu.

21 'Te ðává-áⁿ cũñaha ñáyiú xii-ndo: "Chí cundèhe iha, chí iha ní quexìo Cristú Yaa ní tendaha Yá Ndiòxí véxi ñuyíú-a", duha cũñahá-yu xii-ndo. Àdi quesahá-yu: "Chí cundèhe yacáⁿ chí yacáⁿ ndécú-gǎ", quesahá-yu. Te vǎ quĩndáá iní-ndó tnúhu càháⁿ-yu. 22 Te coo cue tée danàni-güedé mée-güedé ðàtná nání-í te cachí-güedé sá cúu-güedé Yaa ní tendaha Yá Ndiòxí véxi ñuyíú-a. Te ðava-güedé cachí-güedé sá cúu-güedé cue tée càháⁿ tnúhu Yá Ndiòxí dico ñá ndáá sá cúu-güedé cue tée càháⁿ tnúhu-gǎ, te cada-güedé titní núú sǎ vǎ yóo tnàhí ndàcu cada cuendá dandàhú-güedé ñáyiú, te caní iní-güedé dandàhú-güedé ndéé cue ñáyiú ní cáháⁿ Yá Ndiòxí cundecu ndihí-gǎ. 23 Te vitna ío váha cuáha-ndo cuendá, te quihí iní-ndó cundecu-ndo, chí nchaa sa ní dátúha ñaha-í xii-ndo.

Nàcuáa cada-xi òré quixi tucu Tée cùu ñani tnáhá nchaa ñáyiú

(Mt. 24:29-35,42-44; Lc. 21:25-36)

24 'Te nà yáha-ni coo tnúndòho cahnu vihi-áⁿ, te vǎ ðáyèhé-gǎ

nchíanchii te ni vǎ ðáyèhé-gǎ yóó. 25 Te ngoyo nchaa chódíní ndéé andiu, te quidi-xi andiu. 26 Te ðává-áⁿ quini ñáhá nchaa ñáyiú xii yúhú Tée cùu ñani tnáhá-yu nchaa-yu quee-í andiu quixi-í ichi xití vícò, te quini-yu sá ío càhnu cuu-í, te quide-í nchaa sá vǎha. 27 Te tendaha-í cue espíritú xínú cuèchi núu-í quihíⁿ-xi nadatácá-xi nchaa ñáyiú ní cáháⁿ-í chitnahá ñáhá xii-í xĩndecu ní càa xico ñuyíú.

28 'Te cundehe-ndo nàcuáa quide yutnu ngúxí, chí yutnu-áⁿ ndúú yùte núú ðité-xi te nàtahú ndaha-xi, te òré ducaⁿ quide-xi te càchí-ndó sǎ sǎ ní cuyatni nuu cahni. 29 Te ducaⁿ sǎtnahá-xi cada-xi òré ná quini-ndó càda-xi nchaa nacuáa ní cáháⁿ-í, te cutnùni iní-ndó sǎ sǎ ní cuyatni vii-nǎ nduu nàa ñuyíú. 30 Te na càchí tnúhu ndáá-í xii-ndo sǎ òré vátá cùu-gǎ cue ñáyiú xĩndecu ñuyíú-a vitna, te cada-xi nchaa nàcuáa ní cáháⁿ-í. 31 Te andiu ndihí ñuyíú-a chí ndihí nihnu-xi, dico tnúhu-í chí vǎ ndíhí nihnu-xi chí cùu-xi tnúhu ndáa.

32 'Dico ñá túú cùtnuní ná nduu quixi tucu-í, te ni ñá túú cùtnuní ná òré chí vǎ yóo xini, te ni cuè espíritú xínú cuèchi núú Yá Ndiòxí ñá túú xini-xi ná nduu quixi-í, te ni mée yúhú tée cùu Déhe Dútú Ndiòxí ñá túú xini-í ná nduu quixi tucu-í, chí ìíⁿ ðii-ni mee Tàtá-í Dútú Ndiòxí xini-gǎ núu ná nduu quixi-í.

33 'Te nchòhó xini ñùhu-xi sá ío quihí iní-ndó cundecu-ndo, te càháⁿ ndihí-ndo Yá Ndiòxí, chí ñá túú xini-ndó ná nduu quixi tucu-í. 34 Te na càchí tnúhu-í xii-ndo cuendá ìíⁿ tée cuini quingaca cuu xica. Te tée-áⁿ cùmání-gǎ quee-dé vehe-dé te ní xáhaⁿ-dè xii cue tée xinu cuechi núu-dè sǎ ná cáda cuendá-güedé vehe-dé. Te ní sǎñaha-dè xii-güedé ndí ðííⁿ núu-güedé chiúⁿ cada-güedé. Te ní xáhaⁿ-dè xii tée ndéé yuyèhe sǎ ná cundecu túha-ni-dé yuyèhe ndéé

nàsáá-dé. ³⁵ Te duha ndùu tnúhu càháⁿ-í cuèndá nchòhó cundecu túha-ndo, chi ñá túú xini-ndó nã nduu te ni ñá túú xini-ndó nã òré quixi tucu yúhú Yaa cúú Xitohó-ndó, núu òré sa ní cundiⁿquiⁿ, àdi dava niú, àdi oré sa ní cana uuⁿ lihi, àdi oré sa ta cùditó cuáháⁿ, núu xiáⁿ ío chí cùndècu túha. ³⁶ Te duha càháⁿ-í chí na cuáháⁿ òré ñá túú nã yihí iní-ndó quèxio-í, te ñá túú ndècu túha-ndo. ³⁷ Te dàtná-ni xáhaⁿ-í xii nchòhó sá cùndècu túha-ndo, te diu-ni ducaⁿ xáhaⁿ-í xii nchaa dava-gá ñáyiú sá cùndècu túha-yu —càchí-gá xáhaⁿ-gã xii-güedé.

14

Ndùcu-güedé nàcuáa cada-güedé cahni-güedé Jèsús

(Mt. 26:1-5; Lc. 22:1-2; Jn. 11:45-53)

¹ Te cùmání úú-gá nduu te que-saha vico pascuá, vico xèxi ñáyiú pàá sá ñá túú yihí levadurá. Te cue dútú cùnùu, ndihi cue tée dàcuaha ñaha xii ñáyiú nchaa tnúhu ní chídó tnùnì ndíi Moisés ndúcú-güedé nàcuáa cada-güedé dandàhú-güedé Jèsús cuèndá tni ñaha-güedé xii-gá te cahni ñaha-güedé. ² Te ní xitnàha-güedé:

—Váha-gá sá vã tñí-ó Jèsús mei ndùu vico, chí núu ducaⁿ na càda-o te ío dusaⁿ càda ñáyiú —càchí-güedé xitnàha-güedé.

Íi ñadìhí chíhí-áⁿ àciti díquí Jèsús
(Mt. 26:6-13; Jn. 12:1-8)

³ Te Jèsús ndécú-gã ñuú Bètania vehe ìiⁿ tée nàni Xímú, tée ní tnahá cuéhé sá dátèhyú nihnu-xi yiqui cùñú-ó. Te yihí Jèsús mèsá xéxi-gã ní quexìo ìiⁿ ñadìhí néhé-áⁿ ìiⁿ sá ñi cuáha yúú vãha yúú nání àlabastrú, te xití xiáⁿ ñúhú àciti sàháⁿ tnámí sá nání nãrdú sá ìo ndèyáhu, te ní tãhú-áⁿ xiáⁿ te àciti ñúhú xití-xi-áⁿ ñi sódó-aⁿ díquí Jèsús. ⁴ Te ìiⁿ úú cue tée xíndecu-áⁿ ñi

cudééⁿ-güedé sá dúcáⁿ ñi quide-aⁿ, te ní xitnàha-güedé:

—Ñá túú quide váha ñaha-ãⁿ dàcáⁿ quidé-áⁿ, chí íi ñi dácuíta-aⁿ àciti váha-ãⁿ. ⁵ Chí váha-gá ñuú cuyáhu àciti-ãⁿ sá ùní cièndú díhúⁿ denariú, te díhúⁿ sá cùyáhu àciti-ãⁿ cuu cuèndá ñáyiú ndàhú ní cùu —càchí-güedé xitnàha-güedé.

Te ní tenáa-güedé ñaha-áⁿ sá dúcáⁿ ñi quide-aⁿ.

⁶ Te Jèsús ní xáhaⁿ-gã xii-güedé:

—Chí dáñá, vá dásatú-ndó iní ñadìhí-a, chí sá ñi quide ñaha-aⁿ xii-í cúú-xí ìiⁿ sá vãha. ⁷ Chí cue ñáyiú ndàhú ducaⁿ-ni cùtnahá ñáyiú-áⁿ tnuú-ndó, te nání òré càchí iní-ndó te chindee-ndó-yu. Dico yúhú chí vá nchaa nduu cundecu ndihi ñaha-í xii-ndo ñùyíú-a. ⁸ Te ñadìhí-a ní quide-aⁿ ìiⁿ sá vãha ndéé neni ní ndacu-aⁿ, chí sá dúhá ñi quide ñaha-aⁿ xii-í ní chihi ñaha-aⁿ àciti, te xiáⁿ cada iní-ndó sã sã quide túha-aⁿ yiqui cùñú-í cuèndá quíndúxi-xi. ⁹ Te na càchí tnúhu ndáá-í xii-ndo sã ndèni ní cuu nihí ñuyíú ná càháⁿ ñáyiú tnúhu-í, te càháⁿ-yu tnahá cuèndá ñadìhí-a cuèndá quiní nchaa ñáyiú nàcuáa ní quide-aⁿ, te ducaⁿ vã nàcuána-yu —càchí-gá xáhaⁿ-gã xii-güedé.

Té Jüdás ndúcú-dě nàcuáa cada-dé cuáha cuèndá-dé Jèsús núú cuè tée cùu úhú iní ñáhá xii-gá
(Mt. 26:14-16; Lc. 22:3-6)

¹⁰ Te té Jüdás Iscarioté ní sáháⁿ-dé ní ndatnúhu-dé ndihi cue tée cùu dútú cùnùu sá cuáha cuèndá-dé Jèsús núú-güedé, te núu tnahá té Jüdás-áⁿ cúú ùxúú tnahá cue tée xica cuu ndihi-gá ní cùu. ¹¹ Te òré ducaⁿ ñi ndatnúhu-dé ndihi-güedé, te ío ní cudí iní-güedé, te ní xáhaⁿ-güedé xii-dé sá cuáñaha-güedé díhúⁿ xii-dé. Te té Jüdás-áⁿ ñi ngüíta-dé ndúcú-dě nàcuáa cada-dé cuáha cuèndá-dé Jèsús núú-güedé.

Cùdini Jesús ndihi cue tée xica cuu ndihi-gá

(Mt. 26:17-29; Lc. 22:7-23; Jn. 13:21-30; 1 Co. 11:23-26)

¹² Te ní sáá nduu nĩ quesaha vico pascuá, vico ñá túú xèxi ñáyiú pàá sá ñà túú yìhi levadurá, te ñu-ni nduu-áⁿ sáhní-güedé ñⁿ mbéé lĩhli xèxi-yu nduu vico pascuá-áⁿ. Te cue tée xica cuu ndihi Jesús ní xicáⁿ tnúhú-güedé núú-gá, te xáhaⁿ-güedé xii-gá:

—Mèstrú, véxi-ndí xicáⁿ tnúhú-ndí núú-n nũu ndéé cáá vèhe cuiní-n càda túha-ndí sá cùdini-o sacuaa nduu vico pascuá —cächí-güedé xáhaⁿ-güedé xii-gá.

¹³ Te Jesús ní xáhaⁿ-gá xii úú-ni tnáhá cue tée xica cuu ndihi-gá:

—Chí cuáháⁿ xití ñuú-áⁿ, te yàcáⁿ naníhí-ndó ñⁿ tée tànehe yóó ndute, te tée-áⁿ cándèndaha-ndo-dé quíhíⁿ. ¹⁴ Te núu ndèdacàa vehe na ndíhu-dé te xíáⁿ quĩhu-ndo. Te cúñaha-ndo xii xitohó vehe-áⁿ: “Yáa cúú Mèstrú cächí-gá sá nũu ndèdacàa xichi xití vehe-n cuñaha nũu-n xii-gá cudini-gá ndihi cue tée xica cuu ndihi-gá sacuaa nduu pascuá”, duha cúñaha-ndo. ¹⁵ Te dàtnùní danéhé ñáhá-dé xii-ndo ñⁿ cuartú cáhnú càa núú ñĩnu, chí vehe yòdo tnaha cuu-xi, te sa ní quide túha-dé nchaa sá nándĩhi, te nchòhò dìcò-nă comidá cada túha-ndo cùdini-o —cachí-gá xáhaⁿ-gá xii-güedé.

¹⁶ Te cue tée-áⁿ nĩ xica-güedé cuáháⁿ-güedé xití ñuú-áⁿ, te nchaa-ni nàcuáa ní xáhaⁿ Jesús ní cuu. Te ní quide túha-güedé sá cùdini-güedé ndihi-gá sacuaa nduu vico pascuá-áⁿ.

¹⁷ Te sátá nĩ cundiquiⁿ te ní quexio Jesús ndihi ndi ùxúú cue tée xica cuu ndihi-gá. ¹⁸ Te cuánguihu-gá mèsá ndihi-güedé cuèndá cudini ndihi ñaha-gá xii-güedé, te òré yíhí-gá mèsá ndihi-güedé, te xáhaⁿ-gá xii-güedé:

—Na cächí tnúhu ndáá-í xii-ndo sá ñⁿ nchòhó cue tée xèxi ndihi ñaha xii-í cuáha cuèndá ñáhá-ndó núú cuè tée cùu úhú iní ñáhá xii-í —cächí-gá xáhaⁿ-gá xii-güedé.

¹⁹ Te sá dúcáⁿ nĩ xáhaⁿ-gá xii-güedé, te nchaa-güedé ní ngüíta-güedé cündiyí-güedé. Te da ñⁿ da ñⁿ-güedé ní ngüíta-güedé xicáⁿ tnúhú-güedé núú-gá, te xáhaⁿ-güedé xii-gá:

—¿Ñá díú yúhú ducaⁿ sàni iní-n càda-í-u? —cächí-güedé xáhaⁿ-güedé xii-gá.

²⁰ Te Jesús ní xáhaⁿ-gá xii-güedé:

—Ñu-ni ñⁿ nchòhó cue tée úxúú xicá cùu ndihi-í, tée na dàquèndaha còhó òré dàquèndaha-í, tée-áⁿ cuáha cuèndá ñáhá-dé xii-í núú cuè tée cùu úhú iní ñáhá. ²¹ Te yúhú Téé cùu ñani tnáhá-ndó nchaa-ndo ñuhu ichi-í cuáháⁿ-í ndoho-í nàcuáa càháⁿ-xi núú tütú Yá Ndióxi. Dico ndáhú ní cuu tée ducaⁿ na cuáha cuèndá ñáhá xii-í núú cuè téé cùu úhú iní ñáhá, chí váha-gá sá vá cáci tée-áⁿ cundecu-dé ní cùu, te ñá díú sá nĩ cacu-dé te ducaⁿ càda-dé —cächí-gá xáhaⁿ-gá xii-güedé.

²² Te nini cùdini cue téé xica cuu ndihi Jesús ní queheⁿ-gá pàá, te ní ndacáⁿ táhú-gá núú Yá Ndióxi, te dàtnùní ní táhú cuèchi-gá, te ní ngüíta-gá dácáhũ ñaha-gá xii-güedé, te xáhaⁿ-gá:

—Chí quéhéⁿ pàá-a caxi-ndo, te cada iní-ndó sá cúú-xí dàtná yiqui cùñú-í —cächí-gá xáhaⁿ-gá xii-güedé.

²³ Te ní queheⁿ-gá vàsú ñũhú ndudí ndéhé yoho yàha stilé, te ní ndacáⁿ táhú-gá núú Yá Ndióxi, te dàtnùní ní ngüíta-gá sãñaha-gá xii-güedé cuèndá coho-güedé luha luha sá ñúhú xití-xi, te nchaa-güedé ní xihí. ²⁴ Te ní xáhaⁿ-gá xii-güedé:

—Ndudí ndéhé yoho yàha stilé-a cada iní-ndó sá cúú-xí dàtná ñĩñ-í sá cáci òré cahni ñaha-güedé xii-í. Te sá dúcáⁿ cãti ñĩñ-í xíáⁿ cutnùní ndáá sá Yá Ndióxi cada-gá ingá núú sá váha sá cúú-xí vai ñáyiú

dàtná ní cachí-gá cada-gá. ²⁵ Te na cächí tnúhu ndáá-í xii-ndo sã vitná-nã duha xihí-í ndudí ndéhé yoho yãha stilé-a te vá cóhó-gã-í, dico na sãá nduu cundeçu-í núú ndécú Yã Ndiõxí táxí tnúni-gá, te dàvá-án cada iní-í sã dàtná sã cóhó tùcu-í chí ío cudí iní-í —cächí-gá xãhaⁿ-gã xii-güedé.

Jèsús càháⁿ-gá sá tẽ Pèlú cúñaha-dẽ xii ñáyiú sá ñà túú xìní ñáhá-dẽ xii-gá

(Mt. 26:30-35; Lc. 22:31-34; Jn. 13:36-38)

²⁶ Te Jèsús ní xita-gá ñⁿ ndudú ndihí cue tée xica cuu ndihí-gá, te dàtnúni ní xica-gá cuáháⁿ-gá ndihí-güedé yucu Òlívú. ²⁷ Te yàcáⁿ ní xáhaⁿ-gã xii-güedé:

—Na cächí tnúhu-í xii-ndo sã ncháá-ndó dàña nihnu ñaha-ndo xii-í niú vitna, chí quee ndáá-xi nàcuáa càháⁿ-xi núú tùtú Yã Ndiõxí núú cächí-xi: “Yúhú cuáha-í tnúhu cahni-güedé tée cùu toli, te nchaa mbéé-dẽ ndihí-güedé cuténuu”, duha cächí-xi núú tùtú-gá. ²⁸ Dico na cùú-í te ndoto-í te codonù-í núú-ndó quihíⁿ distritú Galileá —cächí-gá xáhaⁿ-gã xii-güedé.

²⁹ Te té Pèlú ní xáhaⁿ-dẽ xii-gá:

—Te cuéi nchaa-güedé ná dándóo ñaha-güedé xii-í, dico yúhú chí vá dándóo ñaha-í xii-n —cächí-dé xáhaⁿ-dẽ xii-gá.

³⁰ Te Jèsús ní xáhaⁿ-gã xii-dé:

—Na cächí tnúhu ndáá-í xii-n sã niú vitna cùmání-gá cana líhi úú xito, te úní xito càháⁿ-n núú ñáyiú sã ñà túú xìní ñáhà-n xii-í —cächí-gá xáhaⁿ-gã xii-dé.

³¹ Dico té Pèlú ní càháⁿ ñí-dé, te xáhaⁿ-dẽ xii-gá:

—Cuéi na cùú ndihí ñaha-í xii-n dico vá càháⁿ-í núú ñáyiú sã ñà túú xìní ñáhà-í xii-n —cächí-dé xáhaⁿ-dẽ xii-gá.

Te nchaa dava-gá cue tée xica cuu ndihí-gá diu-ni ducaⁿ ní xáhaⁿ-güedé xii-gá.

Jèsús càháⁿ ndihí-gá Yã Ndiõxí ñⁿ xichi núú nání Gètsemaní
(Mt. 26:36-46; Lc. 22:39-46)

³² Te Jèsús cuáháⁿ-gá ndihí cue tée xica cuu ndihí-gá ñⁿ xichi núú nání Gètsemaní. Te òré ní quexìo-gá ndihí-güedé xiáⁿ, te ní xáhaⁿ-gã xii-güedé:

—Chí cúnúçoo iha cundetun-do na quihíⁿ-í yàcáⁿ càháⁿ ndihí-í Yã Ndiõxí —cächí-gá xáhaⁿ-gã xii-güedé.

³³ Te ndèca-gá té Pèlú, ndihí té Jàcobó, ndihí té Juàá cuáháⁿ, te ñà túú tñahí-gá cùú vãha iní-gá te ní ngúíta-xi súúni ndihú iní-gá. ³⁴ Te ní xáhaⁿ-gã xii cue tée úní-án:

—Súúni ndihú iní-í dàtná sã cùú-í, te chí quéndóo iha te vá cùdú-ndó —cächí-gá xáhaⁿ-gã xii-güedé.

³⁵ Te sã ñùnchí luha ní xica ndehe Jèsús núú ndécú-güedé, te ní ngáundeyi-gá ndéé ñuhu càháⁿ ndihí-gá Tátá-gã Dútú Ndiõxí sã núu vá cündée iní-gá taunihnu ñaha-gã xii-gá cuendá nchaa nàcuáa yãha-gá. ³⁶ Te òré càháⁿ ndihí Jèsús Tátá-gã Dútú Ndiõxí, te xáhaⁿ-gã:

—Yòhó tátá mèe-í, nchaandi túhú sã vãha ndàcu-n quide-n, te càháⁿ ndàhú-í núú-n núu vá cündée iní-n taunihnu ñaha-n xii-í cuendá sã vá ndóhò-í ná sãá òré, dico vá cádá-n nàcuáa cächí iní mèe-í chí cada-n nàcuáa cächí mee-n —cächí-gá xáhaⁿ-gã xii Tátá-gã Dútú Ndiõxí.

³⁷ Te sátá ñí yãha ní càháⁿ ndihí-gã Tátá-gã Dútú Ndiõxí, te cuánuhú-gá núú ní dándóo-gá cue tée úní-án, te xixidí-güedé òré ní nasáá-gá, te ní xáhaⁿ-gã xii té Pèlú:

—Ximú, ¿náa sama xidí-n? ¿Náa ñà cündée tñahi núú-n vá cùdú-ni-n cuédicó ñⁿ òré-án? —cächí-gã xáhaⁿ-gã xii-dé.

Te ní xáhaⁿ tùcu-gá xii-güedé:

³⁸ —Te chí quéndóo tuçu, te cuhúⁿ iní-ndó vá cùdú-ndó, te càháⁿ ndihí-ndo Yã Ndiõxí cuendá sã vá dácàháⁿ ñáhà yùcu ñávãha

xii-ndo càda-ndo sá ñà túú tàú-ndó càda-ndo. Te na cächí tnúhu ndáá-í xii-ndo sá nchòhó cuíní-ndó càda-ndo nchaa nacuaá cáhá-í dícó-ni sá ñà túú ñihí ndéé-ndó — cächí-gá xáhaⁿ-gá xii-güedé.

³⁹ Te Jèsús ní xica tucu-gá cuáháⁿ-gá cáháⁿ ndihi-gá Tátá-gá Dútú Ndiöxí, te diu-ni nàcuáa ní xáhaⁿ-gá díhna xáhaⁿ tucu-gá. ⁴⁰ Te òré ní yáha ní cáháⁿ ndihi-gá Tátá-gá Dútú Ndiöxí, te cuánuhú tucu-gá núú xindecu cue téé úní xicá cùu ndihi-gá-áⁿ, te xidí-ni tucu-güedé òré ní nasáá-gá, te ducaⁿ ní quide-güedé chi súúní ñúhu saní núú-güedé, te ñá ní ñihí-güedé tnúhu cúnaha-güedé xii-gá òré ní nasáá-gá. ⁴¹ Te ní sáháⁿ tucu-gá xito cùu úní ní cáháⁿ ndihi-gá Tátá-gá Dútú Ndiöxí, te òré ní nasáá tucu-gá núú xindecu-güedé, te xáhaⁿ-gá xii-güedé:

—¿Te náa xidí-ni tucu-ndo?, te vitna vá cùdú-gá-ndó chi sa ní sáá òré cuáha cuendá ñáhá-güedé xii yúhú Téé cùu ñaní tnáhá-ndó nchaa-ndo núú cuè téé ndècu ichi cuehé ichi duha. ⁴² Te vitna chí ndácóo na quihíⁿ-ó chi sa véxi téé cuáha cuendá ñáhá xii-í núú cuè téé cùu úhú iní ñáhá —cächí-gá xáhaⁿ-gá xii-güedé.

Ní tñi-güedé Jèsús ndécá ñaha-güedé xii-gá cuáháⁿ

(Mt. 26:47-56; Lc. 22:47-53; Jn. 18:2-11)

⁴³ Te cáháⁿ dúcáⁿ-ní Jèsús ní quexio té Júdás. Te núú tnáhá téé-áⁿ cùú ùxúú tnáhá cue téé xica cuu ndihi-gá. Te ndihi-dé vai cue téé ní quexio, te dava-güedé xínehe-güedé machiti te dava-güedé xínehe-güedé carrutí. Te cue téé-áⁿ ní tendaha ñaha cue dútú cúnúu ndihi cue téé dàcuaha ñaha xii ñayiu nchaa tnúhu ní chídó tnùní ndíi Moisés, ndihi cue téé cùu sacuéhé núú ñayiu isráel. ⁴⁴ Te té Júdás téé cuáha cuendá ñáhá xii Jesús sa ní xitnúhu-dé cue téé-áⁿ nacuaá cada-dé cuáha cuendá

ñáhá-dé xii Jèsús núú-güedé. Te duha ní xáhaⁿ-dé xii-güedé:

—Cundehe-ndo téé na tøyuhu-í, te téé-áⁿ tñi-ndo-dé chi téé-áⁿ cùú-dé téé ndéé iní-ndó, te ío quihí iní-ndó càndeca-ndo-dé quihíⁿ — duha ní xáhaⁿ-dé xii-güedé.

⁴⁵ Te òré ní quexio té Júdás ndihi cue téé-áⁿ núú ndécú Jèsús, te ní xáhaⁿ-dé xii-gá:

—Mèstrú —cächí-dé xáhaⁿ-dé xii-gá.

Te ní tøyuhu ñaha-dé. ⁴⁶ Te nchaa cue téé ndihi-dé-áⁿ ní tñi-güedé Jèsús cuendá candeca ñaha-güedé xii-gá quihíⁿ. ⁴⁷ Te ñiⁿ cue téé cündihi Jesús ní tava-dé machiti-dé, te ní xehndé-ni-dé ñiⁿ xio lóho ñiⁿ téé xinu cuechi núú dútú cúnúu, te ní quen-deé duuⁿ lóho téé-áⁿ. ⁴⁸ Te Jèsús ní xáhaⁿ-gá xii cue téé ní tñi ñaha xii-gá-áⁿ:

—Nchòhó, nèhe-ná-ndó màchiti, nèhe-ná-ndó càrrutí véxi ní tñi ñaha-ndo xii-í, dàtná quidé-ndó ñiⁿ ñadúhú quidé ñaha-ndo xii-í. ⁴⁹ Te nchaa-ni nduu ní xini-ndó ñiⁿ xindecu-í xiti veñúhu càhnu sá ío cúnúu ní xóo danèhé-í ñayiu, te ñá túú ní tñi ñaha-ndo xii-í. Dico dàcuítí sá dúhá yáha-í cuendá quee ndáá-xi nàcuáa cáháⁿ-xi núú tütú Yá Ndiöxí —cächí-gá xáhaⁿ-gá xii-güedé.

⁵⁰ Te nchaa cue téé xica cuu ndihi-gá ní xinu-güedé ní dándóo ñaha-güedé xii-gá.

Ñiⁿ téé cuechi ní xinu-dé

⁵¹ Te ñiⁿ téé cuechi ndëndaha-dé Jèsús cuáháⁿ, te lavichi-dé, ñiⁿ-ní dóo yadí yidúcúⁿ nuu-dé ñihí-dé, te ní tñi ñaha-güedé xii-dé, ⁵² dico ní ndacu-dé ní quenuñi-dé te ní dándóo-dé dóo yidúcúⁿ nuu-dé-áⁿ ní xinu-dé.

Jèsús ndécú-gá jündá

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Te cue téé ní tñi ñaha xii Jesús ndécá ñaha-güedé xii-gá cuáháⁿ

núu tée cùu dútú cúnùu-gá. Te xiáⁿ nĩ tacá nchaa dava-gá cue tée cùu dútú cúnùu, ndihĩ cue tée cùu sacuéhé núu ñáyiũ isràél, ndihĩ cue tée dàcuaha ñaha xií-yu nchaa tnúhu ní chídó tnùnĩ ndjĩ Moisés cuendá cada-güedé jündá. ⁵⁴ Te té Pèlú xica xica-ni nchicúⁿ ñáhá-dé xii-gá cuáháⁿ ní sáá-dé ndéé quehé vehe núu ndécú tée cùu dútú cúnùu-gá-án, te xiáⁿ nĩ ngóo teté-dé yuhu nùhú ndihĩ cue tée cùu poleciá.

⁵⁵ Te cue tée cùu dútú cúnùu ndihĩ nchaa dava-gá cue tée xĩndecu jündá ndúcú-güedé ñáyiũ dacàa ìⁿ cuéchi díquí Jèsús cuendá ducaⁿ nĩhĩ-güedé nàcuáa cada-güedé cahni ñaha-güedé xii-gá, dico ñá túú ní ndàcu-güedé. ⁵⁶ Te cuèi vai ñáyiũ dàcaá-yu cuéchi díquí-gá dico mee-ni sã nĩ cahu iní mèě-yu ní cãháⁿ-yu, chí tucu cãháⁿ ìⁿ tucu cãháⁿ ìⁿ-yu. ⁵⁷ Te davá-yu ní ndacuíñi-yu te ní ngüíta-yu dàcaá-yu ìⁿ cuéchi neñúú díquí-gá, te xãháⁿ-yu xii nchaa cue tée cùnùu:

⁵⁸ —Nchúhú ní tecú dóho-ndí cãchĩ-dé sã dãngòyo-dé veñúhu cãhnu sã ïo cùnùu sã nĩ dácáá cuè tée ñuyíú-a, te dandaa tucu-dé ìngá veñúhu saa, ñu-ni núu cáá tnàhĩ veñúhu-án te xití únĩ-ni nduu sa nadaxĩnu-dé, te vá cúu-gã-xi veñúhu sã nĩ dácáá cuè tée ñuyíú-a, ñuha cãchĩ-dé ní tecú dóho-ndí —cãchĩ-yu xãháⁿ-yu xii-güedé.

⁵⁹ Dico ni ñucaⁿ ñá túú ní cùu ìⁿnuú-yu nchaa tnúhu ní cãháⁿ-yu.

⁶⁰ Te tée cùu dútú cúnùu-gá ní ndacuíñi-dé tnuú nchaa ñáyiũ, te xãháⁿ-dè xii Jèsús:

—¿Ná cuendá ñuha ndùu tnúhu cãháⁿ ñáyiũ-a cuendá-n? Te cãháⁿ nũ ñása ndùu tnúhu cãháⁿ-n —cãchĩ-dé xãháⁿ-dè xii-gá.

⁶¹ Dico Jèsús ñá túú tnàhĩ ní cãháⁿ-gá. Te tée cùu dútú cúnùu-gá-án nĩ xãháⁿ tùcu-dé xii-gá:

—Cuìnĩ cachĩ tnúhu-n xii-ndí núu sã díú Cristú Déhe Yá Ndiòxí Yáá ní tendaha-gã véxi ñuyíú-a cùu-n. Te ñu Yá Ndiòxí cúu-gã Yáá quidé cãhnu-ndí —cãchĩ-dé xãháⁿ-dè xii-gá.

⁶² Te Jèsús ní xãháⁿ-gã xii-dé:

—Ñu Yáá-án cúu-í, te na cãchĩ tnúhu-í xii-ndo sã sãá nduu te quini-ndo yúhú Tée cùu ñani tnàhá-ndo nchaa-ndo cuucóo-í xio cùha Dútú Ndiòxí Yáá ndácú quide nchaandi túhú sã vãha. Te davá-án quini ñáhá-ndo xii-í quee-í andiũ quixi-í ichi xití vícò —cãchĩ-gá xãháⁿ-gã xii-dé.

⁶³ Te dútú cúnùu-gá-án nĩ ndátá-dè dóó caní nĩhnu-dé cuendá sã ñá túú ní tnàhá iní-dé nàcuáa ní cãháⁿ Jèsús, te ní xãháⁿ-dè xii nchaa cue tée xĩndecu jündá:

—Ñá túú-gã xini ñuñu-xi cue tée cãháⁿ nũ ndáá sã ndècuéchi-dé àdĩ ñá túú ndècuéchi-dé. ⁶⁴ Chí sa ní xĩndedóho-o nàcuáa ndùu tnúhu ní cãháⁿ-dè ní cãháⁿ úhú-dé cuendá Yá Ndiòxí, te nchaa-ndo chí cãháⁿ vitna núu ñása sãni iní-ndo cùnduu cuendá tée-a —cãchĩ-dé xãháⁿ-dè xii-í-güedé.

Te nchaa-güedé ní cachĩ-güedé sã ná cúu-dé.

⁶⁵ Te dava-güedé ní ngüíta-güedé ní tíú ñi ñáhá-güedé xii-gá, te ní dádãhu-güedé núu-gã, te ní ngüíta-güedé canĩha-güedé xii-gá, te xãháⁿ-güedé:

—¿Cãháⁿ ná cótó ñá cúu tée ní canĩha xii-n! —cãchĩ-güedé xãháⁿ-güedé xii-gá.

Te cue tée cùu poleciá ní canĩ-güedé núu-gã.

Té Pèlú cãháⁿ-dé núu ñáyiũ sã ñá túú xini-dé Jèsús

(Mt. 26:69-75; Lc. 22:56-62; Jn. 18:15-18, 25-27)

⁶⁶ Te ndéé xití vehe cãa núu nĩnu quide-güedé jündá, chí vehe yòdo tnaha cuu-xi, te té Pèlú núcóo-dé quehé vehe-án. Te ìⁿ xíchĩ xínú cuèchi núu dútú cúnùu-án nĩ quexio-xi núu núcóo té Pèlú. ⁶⁷ Te

òré ní xini ñáhá-xí xii-dé núcõo teté-dé yuhu nùhú, te ní xindéhé ñàha váha-xi xii-dé, te xàhaⁿ-xi:

—Yòhó tnháá-n cùu-n téé xica cuu ndihi Jèsús téé ñuú Nazàrét — càchí-xi xàhaⁿ-xi xii-dé.

⁶⁸ Te té Pèlú ní xàhaⁿ-dè xii-xi:

—Yùhú ñà túú xini-í téé-áⁿ, te ní ñà túú cùtnuní iní-í nása ndùu tñúhu càháⁿ-n — càchí-dé xàhaⁿ-dè xii-xi.

Te té Pèlú ní xica-dé cuáháⁿ-dè ndàa nacúaa nchiì yuyèhe vehe-áⁿ, te ní cana ìⁿ líhi. ⁶⁹ Te xíchí xínú cuèchi-áⁿ ní xini ñáhá tucu-xi xii-dé, te xàhaⁿ-xi xii nchaa ñáyiú xĩndecu-áⁿ:

—Dìu téé-áⁿ tnháá-dé xicá cùu-dé ndihi téé ndèca-güedé cuánguihu-a — càchí-xi xàhaⁿ-xi xii-yu.

⁷⁰ Dico té Pèlú ñà túú ní nñnuu tucu-dé sá xicá cùu-dé ndihi Jèsús. Te tna tnaa-ni ní cuu sá dúcáⁿ ní xàhaⁿ xíchí-áⁿ xii-dé, te ní xàhaⁿ tucu dava cue ñáyiú xĩndecu-áⁿ xii-dé:

—Ndáá sá tnháá-n cùu-n téé xica cuu ndihi téé ndèca-güedé cuánguihu-áⁿ chi cùu-n téé distritú Galileá, te càháⁿ-n dàtná càháⁿ-güedé — càchí-yu xàháⁿ-yu xii-dé.

⁷¹ Te té Pèlú ní xàhaⁿ-dè xii-yu:

—Nchàcuiiti Yá Ndiõxí sá yùhú càháⁿ ndáá-í sá ñà túú xini-í téé càcunehé-ndo-áⁿ — càchí-dé xàhaⁿ-dè xii-yu.

⁷² Te òré-ni-áⁿ ní cana tucu líhi xito cùu úú, te òré-áⁿ ní ndacu iní té Pèlú nàcuáa ní xàhaⁿ Jèsús xii-dé sá cùmání-gá cana ìⁿ líhi úú xito te úní xito càháⁿ-dè núú ñáyiú sá ñà túú xini ñáhá-dè xii-gá. Te òré ducaⁿ ní ndacu iní-dé nàcuáa ní xàhaⁿ Jèsús xii-dé, te ní ndáhyú-dé ní ndixi cuéchi iní-dé.

15

Jèsús ndécú-gá núú tē Pilatú

(Mt. 27:1-2, 11-14; Lc. 23:1-5; Jn. 18:28-38)

¹ Te sáta ní túnadaa te cue téé cùu dútú cùnùu, ndihi cue téé cùu sacuéhé núú ñáyiú isràél, ndihi cue téé dàcuaha ñaha xii ñáyiú nchaa tñúhu ní chídó tñuní ndíi Moisés, ndihi nchaa dava-gá cue téé cùnùu

ní xĩndecu jundá ní nataká-güedé, te ní dácútú-güedé Jèsús te ndèca ñaha-güedé xii-gá cuáháⁿ núú tē Pilatú. ² Te té Pilatú ní xicáⁿ tñúhú-dè núú Jèsús, te xàhaⁿ-dè xii-gá:

—¿Ndáá sá díu-n cùu-n téé yĩndaha ñaha xii ñáyiú isràél-áⁿ? — càchí-dé xàhaⁿ-dè xii-gá.

Te Jèsús ní xàhaⁿ-gá xii-dé:

—Dìu-í yĩndaha-í-yu — càchí-gá xàhaⁿ-gá xii-dé.

³ Te cue téé cùu dútú cùnùu da-caa-güedé vai cuéchi díquí-gá. ⁴ Te té Pilatú ní xicáⁿ tñúhú tucu-dé núú-gá, te xàhaⁿ-dè xii-gá:

—Cáháⁿ, ná cuendá ñà càháⁿ-n te cundehe nã ndéé duha titní cuéchi dàcaa díquí ñáhá cue téé-a xii-n — càchí-dé xàhaⁿ-dè xii-gá.

⁵ Dico Jèsús ñà túú tnháí ní cãháⁿ-gá te té Pilatú ío ní cuñúhu-dé sá dúcáⁿ ñà túú tnháí ní cãháⁿ-gá.

Cue ñáyiú xàháⁿ-yu xii té Pilatú sá cáhni-dè Jèsús

(Mt. 27:15-31; Lc. 23:13-25; Jn. 18:38-19:16)

⁶ Te ndi tnháá nduu víco pas-cuá dácácu té Pilatú ìⁿ téé yìhi ve-caá chi ducaⁿ tnháí quide-dé, te mee ñáyiú càháⁿ-yu te núu ndèdacàa téé yìhi vecaá-áⁿ cãcu-dé, te téé-áⁿ dácácu-dé. ⁷ Te yìhi ìⁿ téé nani Barrabás vecaá ndihi dava-gá cue téé cùndihi-dé. Te té Barrabás-áⁿ ní sanu ichi-dé ñáyiú ñuú ingá ichi, te ní ngúita-yu ndihi-dé ní cuu úhú iní-yu cue téé cùchiuⁿ, te ní sahni-dé ndiyi núu xĩaⁿ ní chihí ñaha-güedé vecaá xii-dé. ⁸ Te nchaa ñáyiú ní sáháⁿ-yu núú tē Pilatú, te càháⁿ ndáhú-yu núú-dè sá ná cáda nahi-ni-dé dàtná quidé-dè. ⁹ Te té Pilatú ní xàhaⁿ-dè xii-yu:

—¿Cuini-ndó sá dácácu-í téé yĩndaha ñaha xii ñáyiú isràél-áⁿ? — càchí-dé xàhaⁿ-dè xii-yu.

¹⁰ Te ducaⁿ ní càháⁿ té Pilatú, chi ní cutnuni iní-dé sá dicó sá cuèdú

íní cuè dútú cúnùu núu xíáⁿ ducaⁿ ní quide-güedé ní sáha cuèndá ñáhá-güedé xii Jèsús núu-dě. ¹¹ Te cue dútú cúnùu ní xáhaⁿ-güedé xii nchaa ñáyiú sá ná cùñáhá-yu xii té Pilatú dácácu-dé té Barrábás, te ní quide-yu nàcuáa ní xáhaⁿ-güedé. ¹² Te té Pilatú ní xícaⁿ tnúhú-dě núu-yu, te xáháⁿ-dě xií-yu:

—¿Ná cuíni-ndó càda-í tée càchí-ndó yìndaha ñaha xii ñáyiú isràel-i? —càchí-dé xáháⁿ-dě xií-yu.

¹³ Te ncháá-yu níhi ní cáháⁿ-yu, te xáháⁿ-yu xii-dé:

—¿Cata caa-dé núu cùrúxí! — càchí-yu xáháⁿ-yu xii-dé.

¹⁴ Te té Pilatú ní xáhaⁿ-dě xií-yu:

—¿Te ná cúu cuèchi ní quide-dé te núu ducaⁿ cuíni-ndó càda-í-dé-i? — càchí-dé xáháⁿ-dě xií-yu.

Dico ncháá-yu uuⁿ-gá níhi ní cáháⁿ-yu, te xáháⁿ-yu xii-dé:

—¿Cata caa-dé núu cùrúxí! — càchí-yu xáháⁿ-yu xii-dé.

¹⁵ Te té Pilatú ní quide-dé nàcuáa ní xáháⁿ-yu xii-dé cuèndá sá cúdiu-dé núu-yu, te ní dácácu-dé té Barrábás, te ní táuchíuⁿ-dě ní cani-güedé Jèsús ndíhi ñíi. Te sáta dúcáⁿ ní quide ñaha-güedé xii-gá, te ní táuchíuⁿ-dě candeca ñaha-güedé quíhíⁿ cata caa ñaha-güedé xii-gá núu cùrúxí.

¹⁶ Te cue tée cùu sandadú ndéca ñaha-güedé xii-gá cuáháⁿ vechíuⁿ, te diu-ni xíáⁿ cúu vèhe tée cùu gobiernú. Te xíáⁿ ní tacá nchaa dava-gá cue tée cùu sandadú.

¹⁷ Te xíáⁿ ní dácúíhnú ñaha-güedé xii-gá ñí dóo tìcuèhé víhí, te ní cadúha-güedé ñí coróná íñu ní chihi-güedé díquí-gá. ¹⁸ Te ní ngúíta-güedé níhi càháⁿ-güedé cúdíquí ndeé ñáhá-güedé xii-gá, te xáhaⁿ-güedé:

—¿Ío càhnu cuu yohó tée yìndaha ñaha xii ñáyiú isràel! —càchí-güedé xáhaⁿ-güedé xii-gá.

¹⁹ Te càni-güedé díquí-gá ndíhi ñí carrútí, te tíu díí ñáhá-güedé

xii-gá, te ngüíñí xítí-güedé núu-gá quidé-güedé sá néhé-güedé sá yíñuhu núu-gá dico ñá ndáa chi díco cúdíquí ndeé ñáhá-güedé xii-gá. ²⁰ Te sáta dúcáⁿ ní

cúdíquí ndeé ñáhá-güedé xii-gá, te ní nataunuu ñaha-güedé xii-gá dóo tìcuèhé víhí sá ní dácúíhnú ñaha-güedé, te ní dándíunuu ñaha-güedé xii-gá dóo méé-gá. Te dātñuní ndéca ñaha-güedé cuáháⁿ núu cáta càa ñaha-güedé xii-gá núu cùrúxí.

Sàta caa-güedé Jèsús núu cùrúxí

(Mt. 27:32-44; Lc. 23:26-43; Jn. 19:17-27)

²¹ Te ichi cuáháⁿ-güedé ndíhi Jèsús ní naníhí-güedé ñí tée ñuú Cìrené nání-dě Xímú, te déhe-dé cúu ñí tée nàni Lijandrú, ndíhi ingá tée nàni Rúfú. Te té Xímú-áⁿ ñúhú-dě ichi duha cuándixi-dé ní sáháⁿ-dé yucu, te ní quide yica-güedé ní xido-dé cùrúxí sá nchídó Jèsús.

²² Te ndéca-güedé Jèsús cuáháⁿ ñí xichi núu nání Gólgotá, te tnúhu-áⁿ quée-xí: ñí xichi núu nání yìquí díquí ndíyi, duha quèe-xi tnúhu-áⁿ.

²³ Te ní sáñaha-güedé xii-gá ndudí sá ní quée yúcu nání mirrá coho-gá ní cùu dico ñá túu ní xíhi-gá. ²⁴ Te ní sata caa ñaha-güedé xii-gá núu cùrúxí. Te sáta dúcáⁿ te cue tée cùu sandadú-áⁿ ní xito ndeé-güedé núu ndédacàa-güedé cuu cuèndá-güedé dóo-gá.

²⁵ Te cùu-xi caá ñí dātñéé òré ní sata caa ñaha-güedé xii-gá núu cùrúxí. ²⁶ Te ní taxi ndecu-güedé ñí sá ndeé lètrá núu tácaà-gá. Te lètrá-áⁿ càháⁿ-xi ná cuèndá ducaⁿ ní quide ñaha-güedé xii-gá. Te duha càháⁿ lètrá-áⁿ: “Tée yìndaha ñaha xii ñáyiú isràel”, duha càchí-xi. ²⁷ Te tnàhá úu cue tée cùu ñadúhú ní sata caa-güedé diu-ni núu cùrúxí tucu. Te ñí-dé ní sata caa-güedé xio cùha-gá, te ingá-dé ní sata caa-güedé xio dātñi-gá. ²⁸ Te ducaⁿ ní cuu chi ní quée ndáa-xi

nàcuáa cáháⁿ-xi núú tütú Yá Ndiöxí núú cächí-xi: “Hⁿ-ni ní quide ñaha-güedě xii-gá ndihi cue téé ndecu cuéchi-xi”, duha cächí-xi núú tütú-gá.

²⁹ Te nchaa ñáyi yáha yatni núú táca-gá dácuicó-yu díqui-yu te xícuéhé ñáhá-yu xii-gá, te xáháⁿ-yu:

—Te ná cuendá ducaⁿ càa-n taca-n xiáⁿ, te cächí-n sá dāngoyo-n veñúhu cànhu sá ïo cūnuu te dandāa-n ingá veñúhu saa, te xití úní-ni nduu sa nadaxīnu-n cächí-n. ³⁰ Te vitna tanūu núú cūrúxí-áⁿ dācācu-n mēe-n — cachí-yu xáháⁿ-yu xii-gá.

³¹ Te diu-ni ducaⁿ ñi quide cue téé cūu dūtú cūnūu, ndihi cue téé dācuaha ñaha xii ñáyi nchaa tnúhu ní chídó tnūni ndíi Moisés, chí ní cudíqui ndeé ñáhá-güedě xii-gá, te ní xitnáha-güedě:

—Tée-a ní ndacu-dé ní dācācu nihnu-dé ñáyi, ¿te ná cuendá ñá ndácú-dě dācācu nihnu-dé mēe-dě-i? ³² Te núu ndáá sá diú-dě cúú-dě Crístú Yáá ní tendaha Yá Ndiöxí véxi ñuyíú-a quindaha ñaha xii ñáyi israhél, te na cūndehe-o nuu-dé núú cūrúxí, cuendá quíndáá iní-ó-dě —cächí-güedě xitnáha-güedě.

Te ndeé tnáhá cue téé tàcaa xio xio diñi-gá xícuéhé ñáhá-güedě xii-gá.

Ní xihí Jèsús

(Mt. 27:45-56; Lc. 23:44-49; Jn. 19:28-30)

³³ Te òré ní cuu cuádava nduu, te ní cunee nihíi ñuyíú, te ducaⁿ-ni càa ní cuu ndeé caá úní sacuaa. ³⁴ Te diu-ni òré caá úní sacuaa-áⁿ ñihi ní cáháⁿ Jèsús, te xáháⁿ-gá xii Tātá-gá Dútú Ndiöxí:

—Elói, Elói, láma sabāctaní — cächí-gá xáháⁿ-gá.

Te tnúhu-áⁿ quée-xí: Ndiöxí mēe-í, Ndiöxí mēe-í, ná cuendá ní dáña ñaha-n xii-í, duha quée-xi tnúhu-áⁿ.

³⁵ Te dava cue téé xīndecu yatni núú táca-gá-áⁿ ñi tecú

dóho-güedé nàcuáa ní cáháⁿ-gá, te ní xitnáha-güedé:

—Chí cūndédóho chí càna-dé té Eliás —cächí-güedé xitnáha-güedé.

³⁶ Te ñiⁿ cue téé xīndecu-áⁿ xínú-dě ní sáháⁿ ní chindóyo-dé luha cächí xití ndudí íá, te ní chinenu-dé díqui ñiⁿ yutnu càni te ní ndocani-dé chíhí-dě yuhu-gá cuendá coho-gá. Te ní xáháⁿ cué téé xīndecu-áⁿ xii téé-áⁿ:

—Cundetú tnaa na cūndehe-o nacoto núu quixi té Eliás nunehe ñaha-dě xii-dé núú cūrúxí — cächí-güedé xáháⁿ-güedě xii-dé.

³⁷ Te Jèsús níhi ní canasaa-gá te ní xihí-ni-gá. ³⁸ Te sátá dúcáⁿ te ní ndátá dōó cúú cōrtinā xití veñúhu cànhu sá ïo cūnuu ní quée dava ndáá, te ndāa núú ñinu ní ngüíta-xi ní ndátá. ³⁹ Te téé cūu capitáⁿ nútñi-dé ndāa núú Jèsús, te ndehe-dé nàcuáa ní quide-gá òré ní xihí-gá, te ní cachí-dé:

—Sá ndāa ndisa sá diú tēe-a cūu-dé Déhe Yá Ndiöxí ní cūu — duha ní cachí-dé.

⁴⁰ Te xica xīnutñiⁿ ñiⁿ úú ñáyi dihi ndéhē-yu nchaa nàcuáa ní quide ñaha-güedě xii Jèsús, te tnáhá tá Mária Magdaléná, ndihi tá Salómé, ndihi tá Mária náná tē Chēe ndihi té Jācobó téé cächí-güedé cúú lihli-gá.

⁴¹ Te cue ñáyi dihi-áⁿ ñi xica cuú-yu ndihi Jèsús distritú Galiléa ní xinu cuèchi-yu núú-gá. Te cue ñáyi dihi-áⁿ nchicúⁿ ñáhá-yu xii-gá ní quexio ndeé ñuú Jerusalén ndihi dava-gá ñáyi dihi nchicúⁿ ñáhá xii-gá cuáháⁿ.

Chindúxi-güedé Jèsús

(Mt. 27:57-61; Lc. 23:50-56; Jn. 19:38-42)

⁴² Te cūu-xi nduu vispré nduu ndetátú ñáyi. Te nduu-áⁿ xíquide túha-yu sá cúú ñngá nduu nduu ndetátú-yu-áⁿ, te diu-ni nduu-á sa ní cuaa vihi, ⁴³ te ñiⁿ téé nāni Chēe téé ñuú Arimátea ní cuyi-dě ní sáháⁿ-dé núú tē Pilatú, te ní

xáhaⁿ-dě sá nũu vá cundèe iní-dé daña-dé chindúxi-dé yiqui cùñú Jèsús. Te tnàhá té Chèé-án cùú-dě ìⁿ tée cùnũu cundihi-dé cue tée quide jundá, te tnàhá-dé ndétú-dě sáá nduu ndíhu ndaha ñàha Yá Ndiõxí xii-dé ndihi cue ñáyiu. ⁴⁴ Te té Pilatú io ní cuñũhu-dé sá dúcáⁿ io ndíhi ní xíhí Jèsús, te ní cana-dé tée cùu capitáⁿ ní xícáⁿ tnúhú-dě núú-dě nũu ndisa sá sà ní xíhí-gá. ⁴⁵ Te tée cùu capitáⁿ-án ñí xáhaⁿ-dě xii té Pilatú sá ndàá ní xíhí Jèsús, núu xíáⁿ té Pilatú-án ñí sáha-dé tnúhu chindúxi té Chèé-án yiqui cùñú-gá. ⁴⁶ Te té Chèé-án ñí saaⁿ-dé ìⁿ dóó vâha, te ní sáháⁿ-dé ní nunehe-dé yiqui cùñú Jèsús núu cùrúxí, te ní chidúcúⁿnuu-dé yiqui cùñú-gá dóó vâha sá ñí saaⁿ-dé-án, te dàtnũní nehé-dé yiqui cùñú-gá cuáháⁿ ní chihi-dé ìⁿ yaú nchũ yiqui naha càva, te ní sadí-dé yuhu yaú-án ndihi ìⁿ yúu quèhéⁿ. ⁴⁷ Te tá Màriá Magdalèná, ndihi tá Màriá nãná tẽ Chèé ní xiní-yu núú ñí chihi-dé yiqui cùñú Jèsús.

16

Ní ndoto Jèsús

(Mt. 28:1-10; Lc. 24:1-12; Jn. 20:1-10)

¹ Te sátá ñí cundiquiⁿ nduu ndètatú ñáyiu, te tá Màriá Magdalèná, ndihi tá Salómé, ndihi tá Màriá nãná tẽ Jàcobó ní saáⁿ-yu acití sàháⁿ tnámí cuèndá canehé-yu quíhíⁿ chihí-yu yiqui cùñú Jèsús. ² Te ndumìngú nehé-ni òré vitna vâha vâha ní xínu coño núú nchicanchii ní quexió-yu núu nchũ yaú yíhí yiqui cùñú Jèsús. ³ Te ní xítnàhá-yu:

—Yoo cùñaha-o xòcani yúu ndèdí yuhu yaú-a, chi vá yõ tnàhí ndècu iha —cachí-yu xítnàhá-yu.

⁴ Te òré ní xíndéhé vâha-yu te ní xiní-yu sá yũ cáhnú ndèdí yuhu yaú-án ìⁿ xio-ná ndécú. ⁵ Te cuánguìhú-yu xití yaú-án, te ní

xiní-yu nùcòo ìⁿ espíritú xínu cuèchi núú Yá Ndiõxí ndàa xio cuhá-yu, te càa-xi datná cáá ìⁿ tée cuechi, te ñihnu-xi ìⁿ dóó cuixíⁿ dóó cání, te ní yùhú-yu òré ní xiní-yu espíritú-án. ⁶ Te espíritú-án ñí xáhaⁿ-xi xii-yu:

—Vá yùhú-ndó, chi yùhú sa cùtnuní iní-í sá nchòhó véxi-ndo nãnducu-ndo yiqui cùñú Jèsús tée ñuu Nazàrét tée ní sahani-güedé núú cùrúxí, dico ñá túú-gã yiqui cùñú-dé ndécú iha chi sa ní ndoto-dé, te chí cündèhe núú ñí sacáⁿ-güedé yiqui cùñú-dé te quini-ndó nã ñá túú-gã-dé. ⁷ Te chí cuáháⁿ núú ndécú tẽ Pèlú ndihi dava-gá cue tée ní xica cuu ndihi-dé, te duha cùñaha-ndo xii-güedé: “Jèsús codonũ-gá núú-ndó quíhíⁿ distritú Galiléa, te yácáⁿ quini-ndó-gã dàtná ní cachí-gá xii-ndo”, duha cùñaha-ndo xii-güedé —càchí espíritú-án xáhaⁿ-xi xii-yu.

⁸ Te cue ñáyiu dìhí-án io ní yùhú-yu, te ní quene cunú-yu cuánuhú-yu, te quidi ñaha-ná-xi xii-yu sá io ní yùhú-yu, te ñá túú tnàhí ná tnúhu ni xáhãⁿ-yu xii cue ñáyiu ní naníhí-yu ichi cuèndá sá io ní yùhú-yu.

Tá Màriá Magdalèná ní xiní-xi Jèsús

(Jn. 20:11-18)

⁹ Te sátá dúcáⁿ ñí ndoto Jèsús ndumìngú nehé-ni-án, te díhna nuu-gá tá Màriá Magdalèná ní quee túú-gá núú-xi, te ñiu tá Màriá-án cùú-xi xíchí ñí xíhí ñaha ùsá espíritú cündihi yucu ñávâha ni cùu, te Jèsús ní queñuhu-gá nchaa espíritú-án yiqui cùñú-xi. ¹⁰ Te xíchí-ãⁿ ñí sáháⁿ-xi ní xítnũhu-xi cue tée ní xica cuu ndihi Jèsús nãcuáa ní cuu, te xíndáhí-güedé sá ndíhu iní-güedé òré ní quexio-xi núú ndécú-güedé. ¹¹ Te òré ní xáhaⁿ tá Màriá xii-güedé sá ñí ndoto Jèsús ndihi sá ní xiní

ñáhá-xí xì-gá, te ñá túú ní sàndáá iní-güedé.

Jèsús ní quee túu-gá núú úú cue téé ní xica cuu ndihi-gá

(Lc. 24:13-35)

¹² Te úú tñhá cue téé ní xica cuu ndihi Jèsús ñúhú-güedé ichi cuáhá-güedé yucu, te uuⁿi ní quee túu-gá núú-güedé, te ní dácótó ñàha-xi xii-güedé sá ñà túú-gá cáá-gá dàtná cáá-gá. ¹³ Te cue téé úú-áⁿ ní xica-güedé cuáhá-güedé ní xitnúhu-güedé nchaa dava-gá cue téé ní xica cuu ndihi-gá sá ní xiní ñáhá-güedé xii-gá, dico ñu-ni ducaⁿ ñà túú ní sàndáá iní cue téé-áⁿ tñúhu ní cáhá-güedé.

Jèsús xáhaⁿ-gá xii cue téé ní xica cuu ndihi-gá nàcuáa ndiù chiuⁿ cada-güedé

(Mt. 28:16-20; Lc. 24:36-49; Jn. 20:19-23)

¹⁴ Te ndí ùxí ñⁿ cue téé ní xica cuu ndihi Jèsús yíhi-güedé mèsá xéxí-güedé, te ní quee túu-gá núú-güedé te ní tenàá ñáhá-gá xii-güedé cuèndá sá ño sàá iní-güedé ñá túú sàndáá iní ñáhá vâha-güedé xii-gá, chi ñá túú ní cuìní-güedé quíndáá iní-güedé nàcuáa ní xáhaⁿ ñáyiú ní xiní ñáhá xì-gá sátá ní yáha ní ndoto-gá. ¹⁵ Te ní xáhaⁿ-gá xii-güedé:

—Quíhíⁿ-ndó ñihí ñuyíú cãháⁿ-ndó núú nchaa ñáyiú tñúhu váha tñúhu sá cãháⁿ nàcuáa naníhí tãhú-yu. ¹⁶ Te nchaa ñáyiú na quíndáá iní tñúhu-áⁿ te cuanduté-yu, te naníhí tãhú-yu, dico nchaa ñáyiú vá quíndáá iní tñúhu-áⁿ te cuíta ñihnú-yu. ¹⁷ Te nchaa ñáyiú na quíndáá iní ñáhá xì-í te cadá-yu sá vâ yõ tñáhi ndàcu cada, te cacunehe ñáhá-yu xii-í, te queñuhú-yu nchaa espíritú cúndíhi yucu ñávâha yíhi ñaha xii ñáyiú. Te uuⁿi ndacú-yu cáháⁿ-yu ingá núú tñúhu sá vátá dácuaàha-gá-yu. ¹⁸ Te cuèi na tñí-yu

cóo dèéⁿ dico ñá túú nã cada ñaha-dí xì-yu, te cuèi venènú ná cáxí-yu dico ñá túú nã tñahá-yu, te tendàhá-yu cue ñáyiú cùhú te ndúha-yu —càchí-gá xáhaⁿ-gá xii-güedé.

Jèsús cuánda-gá andiu

(Lc. 24:50-53)

¹⁹ Te sátá ní yáha ducaⁿ ní xáhaⁿ Jèsús xii cue téé ní xica cuu ndihi-gá, te ní ndanchita-gá cuánda-gá andiu te ní ngóo-gá xio cùhú Dútú Ndiõxí. ²⁰ Te cue téé-áⁿ ní xica-güedé cuáhá-güedé, te ní ngúíta-güedé cãháⁿ-güedé tñúhu Xítóhó Jesucristú nchaa xichi. Te mee-gá ní chindee ñàha-gá xii-güedé ní quide-güedé nchaa sá vâ yõ tñáhi ndàcu cada cuendá cutnùní iní ñáyiú sá ndáá cãháⁿ-güedé tñúhu-gá. Duha ní cuu dàvâ-áⁿ.

TNÚHU NÍ CHÌDÓ TNÛNÍ TÈ LÛCÁ

Nàcuáa ní ngódó tnùnì tnúhu Yá Ndiòxí

¹ Te vài ñáiyu chido tnuní-yu nchaa nàcuáa nduu tnúhu ñihí-yu nàcuáa ní cuu, te nchoo tnàhá-ó sà naha-o nàcuáa ní cuu. ² Te ñu-ni nchaa tnúhu chido tnuní-yu-án cúú-xí tnúhu ní cáháⁿ nchaa cue tée ní xini ndáá nàcuáa ní cuu ndéé díhna, cue tée ní cáháⁿ tnúhu Yá Ndiòxí. ³ Te yúhú sa ní cuu nduu quide cuendá-í nchaa nàcuáa ní cuu, núu xíáⁿ ní sani iní-í tee váha-í nchaa tnúhu-a núu tütú sá cúú-xí yòhó té Tèofilú chi ío váha cùu iní-í sá cúú-xí-n, ⁴ te tée-í cuendá cutnùnì iní-n sã sã ndáá cúú-xí nchaa sá ñí dàmèhé ñàhá-güedé xii-n.

Íⁿ espíritú xínú cuèchi núú Yá Ndiòxí càchí-xi sá cáci íⁿ tée cunani Juáá

⁵ Te cúnàhá ní xíndaha té Hèrodés ñáiyu distritú Júdeá dàvá-án ñí xíndecu íⁿ dútú ñí xínani-dé Zacàriá, te ní cundihi-dé cue dútú Àbiás. Te ñadihi-dé ní xínani-aⁿ Elisabét, te ñaha-án ñí cuu-aⁿ ñani tnàhá ndíi Àrón. ⁶ Te ndi nduu-yu ío ní quide ndáá-yu núu Dütú Ndiòxí, chi ní tñí-yu nchaa tnúhu ní cáháⁿ-gá. ⁷ Te ñá túú ñí ñí déhe-yu, chi ducaⁿ tãhú tá Elisabét sá vã cóó déhe-aⁿ, te ducaⁿ ndi nduu-yu ío ní sahnú-yu.

⁸ Te íⁿ nduu xínu cuechi tucu té Zacàriá ndihi nchaa cue tée cundihi-dé núú Yá Ndiòxí xití veñúhu. ⁹ Te dàvá-án ñí xito ndeé-güedé cuendá cutnùnì iní-güedé núu ndédacáa-güedé quíhu núu nàá xití veñúhu-án cahmi-güedé sá sàháⁿ tnámí, te ní cutnùnì sá té Zacàriá quíhu-dé. Te ducaⁿ ñí quide-güedé, chi ducaⁿ tnàhí ní xóo cada nchaa cue dútú

dàvá-án. ¹⁰ Te ñini sàhmi té Zacàriá sá sàháⁿ tnámí núu nàá, te vài vihi ñáiyu xíndecu quehé veñúhu-án càháⁿ ndihí-yu Yá Ndiòxí. ¹¹ Te ní xini té Zacàriá íⁿ espíritú xínú cuèchi núú Yá Ndiòxí nútní-xi xio cùha núu nàá núu càyú sá sàháⁿ tnámí-án. ¹² Te òré ní xini té Zacàriá espíritú-án te ñá ní cùtnunì iní-dé nása cada-dé chi ío ní yúhú-dé. ¹³ Te espíritú-án ñí xáhaⁿ-xi:

—Zacàriá, vá yúhú-n chi Yá Ndiòxí ní tedóho-gá tnúhu ní cáháⁿ-n, te vitna coo íⁿ déhe ñadihi-n tá Elisabét te danani-n-dé Juáá. ¹⁴ Te ío cudíi iní-n, te ducaⁿ ío vài ñáiyu cudíi iní-yu na càcu-dé. ¹⁵ Te ío cudíu-dé núú Yá Ndiòxí, te ñí vã cóhó-dé ndidí te ñí vã cóhó-dé ndudí sá ñí natiu, te sa cundecu ndihi-dé Espíritú Yá Ndiòxí òré cacu-dé. ¹⁶ Te ñu-dé cada te ío vài ñáiyu isráel natuhá-yu ichi Dütú Ndiòxí Yaá cúú Ndiòxí-ó. ¹⁷ Te té Juáá-án codonuu-dé núú-gã, te cundecu ndihi-dé Espíritú-gá, te taxi tnùnì-dé dàtná ní quide té Èliás. Te nacanú ichi-dé cue tée cùu sacuéhé cuendá cada-güedé sá vãha sá cúú-xí cuè tée cuechi, te cuèi cue tée ío sàá iní-xi, te ñu-dé cada te tñi-güedé tnúhu váha, tnúhu càháⁿ ñáiyu quide ndáá. Te ducaⁿ càda-dé cada túha-dé ñáiyu cuendá cunu cuèchí-yu núú Dütú Ndiòxí — càchí-xi xáhaⁿ-xi xii-dé.

¹⁸ Te té Zacàriá ní ndúcú tnúhu-dé núú espíritú-án, te xáhaⁿ-dè:

—¿Te nása cutnùnì ndáá iní-í tnúhu càháⁿ-n-í? Chi yúhú ío ní sahnú-í ndihi ñadihi-í —càchí-dé xáhaⁿ-dè xii-xi.

¹⁹ Te espíritú-án ñí xáhaⁿ-xi:

—Yúhú cùu-í espíritú nání Gàbriél, te xínu cuechi-í núú Yá Ndiòxí, te mee-gã ní táuchíuⁿ-gã náha-í tnúhu-gá véxi cuendá cutnùnì iní-n nàcuáa cada ñaha-gã xii-ndo. ²⁰ Te vitna cuu ñihí-n te vá càháⁿ-gá-n ndéé ná sãá nduu càcu déhe ñadihi-n, chi ñá túú ní sàndáá-ni iní-n tnúhu ní cáháⁿ-í. Te

dacutíí sǎá nduu càda-xi nacúaá ní cáháⁿ-í-a —càchí espíritú-áⁿ xǎhaⁿ-xi xii-dé.

²¹ Te nchaa ñáyiú xĩndecu quehé ndétú-yu té Zacàriá, te xĩcuñúhu-yu sá ío cùyaa-dé xití veñúhu. ²² Te òré ní ndee té Zacàriá, te ñá ní cùu-gá cáháⁿ ndíhi ñaha-dé xii-yu, te òré-áⁿ nĩ cutnùnì iní-yu sá ní xiní-dé ìⁿ espíritú xínú cuèchi núú Yǎ Ndiòxí xití veñúhu. Te mee-nǎ ndaha-dé ní quide-dé núú-yu chi ñá ní cùu-gá cáháⁿ-dé.

²³ Te ní xínu nduu nĩ xinu cuechi tē Zacàriá núú Yǎ Ndiòxí xití veñúhu, te cuánuhú-dé vehe-dé. ²⁴ Te sátá dúcáⁿ nĩ cuu te ñadhí-dé tá Elisàbét ní ngúhuⁿ déhe-aⁿ, te úhúⁿ yóó ñà túú tnàhí-gá ní quèe-aⁿ caca cuu-aⁿ, te ní cachí-aⁿ: ²⁵ “Mee Dútú Ndiòxí duha ní cundàhú iní ñáhá-gǎ sá cóó ìⁿ déhe-í cuèndá sá vǎ cúú yíchí iní ñáhá ñáyiú xii-í”, duha ní cachí-aⁿ.

Ìⁿ espíritú xínú cuèchi núú Yǎ Ndiòxí càchí-xi sá cacú Jèsús

²⁶⁻²⁷ Te núú ìñú yóó sǎ nĩ ngúhuⁿ déhe tá Elisàbét, te ní tendaha tùcu Yǎ Ndiòxí espíritú nání Gábriél cuáháⁿ-xi ìⁿ ñúu nání Nàzarét cuáháⁿ ngoto-xi ìⁿ xíchí cuèchí nání Mariá. Te ñúú-áⁿ yíndèhu-xi distritú Galiléa. Te xíchí-áⁿ sa ní cundáá tnúhu sá tnándaha-xi ndíhi ìⁿ téé nání Cheé ñaní tnáhá ndíi Dàvíí. ²⁸ Te espíritú-áⁿ nĩ quíhu-xi ndéé xití vehe núú ndécú tá Màriá, te ní xáhaⁿ-xi:

—jCóvǎha-n-aⁿ! Dútú Ndiòxí ío cùu iní ñáhá-gǎ xii-n te ndècu ndíhi ñaha-gá, te ío-gá xitó ñaha-gá xii-n dàcúxí dàva-gá ñáyiú dǐhí —càchí espíritú-áⁿ xǎhaⁿ-xi.

²⁹ Dìco òré ní xiní tá Màriá espíritú-áⁿ, te ní quiyùhú iní-xi sá dúcáⁿ nĩ cáháⁿ espíritú-áⁿ. Te ní sani iní-xi: “¿Ná cuèndá duha càháⁿ-tu espíritú-a-í?”, duha ní sani iní-xi. ³⁰ Te espíritú-áⁿ nĩ xáhaⁿ-xi:

—Màriá, vǎ yùhú-n chi ducaⁿ ní nduu táhú-n núu Yǎ Ndiòxí. ³¹ Te vitna ngúhuⁿ déhe-n, te na

càcu-dé te danàni-n-dé Jèsús. ³² Te ío cunuu-dé, chi Dútú Ndiòxí Yáá ío cùnuu cachí-gá sá Déhe-gá cúú-dé, te diu-gá cada te cuu-dé ìⁿ téé cùnuu núú ñáyiú isràél dàtná ní quide-gá ndíi Dàvíí. ³³ Te taxi tnùnì-dé ñáyiú isràél, te ducaⁿ-ni cùnuu-dé nĩ caa nĩ quíhíⁿ —càchí-xi xǎhaⁿ-xi.

³⁴ Te tá Màriá ní xáhaⁿ-xi xii espíritú-áⁿ:

—¿Te nása cuu tnúhu càháⁿ-n te ñá túú yii-í-i? —càchí-xi xǎhaⁿ-xi.

³⁵ Te ní xáhaⁿ espíritú-áⁿ:

—Espíritú Yǎ Ndiòxí quixi cundecu ndíhi-n, te ducaⁿ Yǎ Ndiòxí cada-gá ìⁿ sá vǎha sá cúú-xi-n ná càcu déhe-n. Te Yǎ Ndiòxí càchí-gá sá ío cundecu yíñúhu-dé núú-gǎ, chi Déhe-gá cúú-dé. ³⁶ Te tnàhá didí-n tá Elisàbét ñúhú déhe-aⁿ cuèj ío ní sahnú-aⁿ, te diu-aⁿ càchí-yu sá vǎ cóó déhe-aⁿ nĩ cùu, te vitna sa ní cuu ìñú yóó ñúhú déhe-aⁿ. ³⁷ Chi Yǎ Ndiòxí ndácú-gǎ quidé-gǎ nchaa sá vǎ yóo tnàhí ndàcu cada —cachí-xi xǎhaⁿ-xi.

³⁸ Te tá Màriá ní xáhaⁿ-xi:

—Yùhú ná cùnú cuèchí-í núú Dútú Ndiòxí, te mee-gǎ ná cadá ñaha-gá xii-í nàcuáa ní cachí-n —càchí-xi xǎhaⁿ-xi xii espíritú-áⁿ.

Te sátá dúcáⁿ te espíritú-áⁿ nĩ xica-xi cuáháⁿ-xi.

Tá Màriá cuáháⁿ ngoto-xi tá Elisàbét

³⁹ Te tá Màriá ío ndíhi cuáháⁿ-xi ìⁿ ñúu cáá xití yucu distritú Júdeá.

⁴⁰ Te ní sáá-xi vehe té Zacàriá, te cuánguihu-xi ní dándácõo vǎha-xi tá Elisàbét. ⁴¹ Te òré ní tecú dóho tá Elisàbét ní cáháⁿ tá Màriá, te ní candá déhe-aⁿ xití-aⁿ, te òré-áⁿ nĩ ngúndecu ndíhi-aⁿ Espíritú Yǎ Ndiòxí. ⁴² Te níhi ní cáháⁿ-aⁿ, te xáhaⁿ-aⁿ xii tá Màriá:

—Yǎ Ndiòxí ío xitò ñaha-gá xii-n dàcúxí dàva-gá tnàha dǐhí-ó, te ducaⁿ-ni xito-gá cuèi déhe-n. ⁴³ ¿Te ná cúú yùhú núu véxi coto ñaha yòhó náná Yáá cúú Xitohó-í-i? ⁴⁴ Chi òré-ni ní tecú dóho-í ní cáháⁿ-n te

ní candá-ni dehe-í xití-í sá cudíí iní-dé. ⁴⁵ Te váha táhu yohó sá ní sándáá iní-n, chí dacuitíí sá cádá Dútú Ndiöxí nàcuáa ní cáháⁿ espíritú ní tendaha-gá ní quixi ní cachí tnúhu xii-n nàcuáa cada-gá — cächí-aⁿ xáhaⁿ-aⁿ xii tá Màriá.

⁴⁶ Te ní xáhaⁿ tá Màriá:

Ío càhnu cuu Dútú Ndiöxí,

⁴⁷ Ío cudíí iní-í chí diu-gá taunihnu ñaha-gá xii-í núú ùhú núú ndàhú.

⁴⁸ Chí ní ndacu iní ñáhá-gá xii yúhú, te dicó ñⁿ xíchí xínú cuèchi núú-gá cúu-í,

te vitna te nchaandi túhú ñáyiú cachí-yu sá ío váha táhú-í.

⁴⁹ Te Yá Ndiöxí cándò caa nine iní-gá, te ío càhnu ñⁿ sá váha ní quide-gá sá cúu-xi-í.

⁵⁰ Te cùndahú iní-gá nchaa ñáyiú nèhe sá yíñùhu núú-gá.

Te ducaⁿ-ni cuèi ñáyiú sa ndècu ñuyíú-a ndihí ñáyiú vitna véxi.

⁵¹ Chí ta quide-gá nchaa sá vā yōo tñahí ndàcu cada véxi, te ta dándóo canúú-gá cue ñáyiú quide cahnu mee-xi.

⁵² Te cue ñáyiú tàxi tnuní ñá túú-gá dáñá-gá taxi tnùní-yu, te cue ñáyiú ndàhú ní quide nínu ñaha-gá xií-yu.

⁵³ Te cue ñáyiú ndècu ndihí tnúndòho tnúhu ndàhú ní quide váha ñaha-gá xií-yu, te cue ñáyiú cuica ñà túú nã ní ñihí-gá-yu cundecu ndihí-yu.

⁵⁴ Te chindee-gá ñáyiú isràél, ñáyiú xínu cuechi núú-gá, te ñá túú dáña nihnu ñaha-gá xií-yu, chí cùndahú iní ñáhá-gá.

⁵⁵ Chí ducaⁿ ní xáhaⁿ-gá xii ndíi Àbrahám, ndihí cue ñani tnáhá ndíi.

Duha ní xáhaⁿ tá Màriá xii tá Elisábét.

⁵⁶ Te ní xindecu tá Màriá dàtná úní yóó ndihí tá Elisábét te dàtnùni cuánuhú-xi vehe-xi.

Ní cacu té Juàá tée dacuàndute ñaha xii ñáyiú

⁵⁷ Te ní sáá nduu ní cacu ñⁿ dehe téé tá Elisábét. ⁵⁸ Te nchaa ñáyiú ndècu yatni ndihí-aⁿ, ndihí nchaa ñani tnáhá-áⁿ ní ñihí-yu tnúhu nàcuáa ní chindee ñaha Yá Ndiöxí xii-aⁿ. Te ío ní cudíí iní-yu cuendá-aⁿ. ⁵⁹ Te núú ùná nduu sá ní cacu dehe-aⁿ, te ní sáháⁿ ñáyiú núú ndécú-áⁿ cuendá cuáhá-yu señá ñii dehe-aⁿ. Te cuíní-yu cunani dehe-áⁿ Zacàriá dàtná nání tãtá ní cuu. ⁶⁰ Te ní xáhaⁿ nãná dehe-áⁿ:

—Ñáhá, chí Juàá cunani-dé — cächí-aⁿ xáhaⁿ-aⁿ xii-yu.

⁶¹ Te ní xáhãⁿ-yu:

—¿Te ná cuendá te ñá túú ní ñⁿ ñani tnáhá-ndó ducaⁿ nani-i? — cachí-yu xáhãⁿ-yu.

⁶² Te ní quidé-yu ndàhá-yu núú tãtá dehe-áⁿ cuendá cuíní-yu núú nása cuíní mée-dé cunani dehe-dé. ⁶³ Te ní xicáⁿ-dé ñⁿ tutú ní chídó tnùní-dé nàcuáa cunani dehe-dé, te duha ní chídó tnùní-dé: “Juàá cunani-dé”, cächí-xi núú tutú ní tee-dé-áⁿ. Te nchaa ñáyiú xindecu-áⁿ ní cuñúhu-yu nàcuáa ní cuu. ⁶⁴ Te òré-áⁿ ní nacáháⁿ té Zacàriá sá ní cuu ñihí-dé ní cuu, te ní ngúita-dé ní cachí-dé sá ío càhnu cuu Yá Ndiöxí. ⁶⁵ Te nchaa ñáyiú xindecu yatni ndihí-dé ní cuñúhu-yu, te nchaa ñáyiú xindecu ñihí xití yucu distritú Júdeá ní ñihí-yu tnúhu nàcuáa ní cuu. ⁶⁶ Te nchaa ñáyiú-áⁿ ío vãi ní sani iní-yu, te ní xitnàhá-yu:

—¿Ná cúú sã cádá tēe-ãⁿ ndéé idá-gá ná cuèhnu-dé? —cächí-yu xitnàhá-yu.

Te ducaⁿ ní xitnàhá-yu chí Dútú Ndiöxí ndécú ndihí ñaha-gá xii-dé.

Té Zacàriá cächí-dé sá ío càhnu cuu Yá Ndiöxí

⁶⁷ Te té Zacàriá tãtá tē lihli-áⁿ ní ngúndecu ndihí-dé Espíritú Yá Ndiöxí te ní cáháⁿ-dé nchaa tnúhu sá ní dánéhé ñáhá-gá, te ní cachí-dé:

⁶⁸ Ío càhnu cuu Dútú Ndiöxí nchoo ñáyiú isràél,

chi ní quixi coto ñaha-gã xii-o, te cùu-o ñáyiú cùu cuendá-gá, chi dàcácu nihnu ñaha-gã xii-o vitna.

69 Chi ní tendaha-gã ìᵐ tée véxi-dé dàcácu nihnu ñaha-dě xii-o núú ùhú núú ndàhú.

Te cùu-dé ñaní tnáhá ndíi Dàvíi tée ní xinu cuechi núú-gã ndée sanaha.

70 Te ñu-ni tnúhu ní cáháⁿ Yá Ndiòxí ní cáháⁿ cue tée ní quide ndáá ní xíndecu núú-gã ñuyúú-a ndée sanaha.

71 Te ní cachí-güedé sá táúnihnu ñaha-gá xii-o núú nchàa ñáyiú cùu ùhú iní ñáhá, ndihí núú nchàa ñáyiú ñá túú cùu quini ndee ñáhá.

72 Te ní xáhaⁿ-gã sá cùndàhú iní ñáhá-gã xii-o, te ducaⁿ càda-gá chi vá nácuaⁿ-gã tnúhu ní cáháⁿ-gã ndihí-güedé.

73 Te ñu ducaⁿ ndúu tnúhu ní xáhaⁿ-gã xii ndíi Ábrahám sá

74 táúnihnu ñaha-gá xii-o núú nchàa ñáyiú cùu ùhú iní ñáhá, cuendá sá vã yùhú-ó cùnu cuechi-o núú-gã.

75 Te cada ndáá-ó, te cundecu yíñuhu-o núú-gã ndi nchàa nduu cundecu-o ñuyúú-a.

Duha ní cachí té Zacàriá.

76 Te xáhaⁿ-dě xii té líhli-án:

Te yòhó té líhli, cáháⁿ ñáyiú cuendá-n sá cúú-n ìᵐ tée çáháⁿ tnúhu Dútú Ndiòxí Yáá ío cùnuu,

chi quíhíⁿ-n còdonuu-n núú Yáá cúú Xitohó-ó dàtúha-n ñáyiú cuendá cundecu túha-yu óré quexio-gá.

77 Te cúñaha-n xii ñáyiú isràél sá cùní-gá cada càhnu iní-gá nchaa cuéchi-yu,

te naníhí tàhú-yu.

78 Te ducaⁿ càda-gá chi ío cùu iní ñáhá-gã xii-o, chi ndée andíu ní tendaha-gã ìᵐ tée véxi

cuuⁿ-dé dandixi túu-dé iní-ó cuendá cutnùní iní-ó nácuaⁿ nduu cuendá Yá Ndiòxí.

79 Te ducaⁿ dandixi túu-dé iní nchaa ñáyiú ndècu ichi cuehé ichi duha ta xíta nihnu cuáháⁿ cuendá nucúnu ichi-yu ìᵐ ichi váha.

Duha ní xáhaⁿ tẽ Zacàriá xii déhe-dé.

80 Te té líhli-án tá sàhnu-dé, te ta chindee chitúu ñaha Yá Ndiòxí xii-dé cuáháⁿ, te ní xíndecu-dé xití yucu ndée ní sáá nduu ní ngúita-dé ní cáháⁿ-dé núú cuè ñáyiú isràél tnúhu Yá Ndiòxí.

2

Ní cacu Jèsús

(Mt. 1:18-25)

1 Te dàvá-án nĩ táúchíúⁿ tẽ Àugustú Césár nucódó tnùní nchaa ñáyiú nàcióⁿ yíndàha-dé. 2 Te xéhe sã díhnanuu nĩ nucódó tnùní ñáyiú, te ñu-ni dàvá-án nĩ cunuu té Cìreniú distritú Siriá. 3 Te nchaa ñáyiú ní natacá-yu ñuu núú nĩ cacú-yu cuendá nucódó tnùní-yu. 4 Núu xíáⁿ ní quee té Chèé ñuu Nazàrét ìᵐ ñuu yíndèhu distritú Galileá, te cuáháⁿ-dé ñuu Bèlén ìᵐ ñuu yíndèhu distritú Jùdeá, chi xíáⁿ nĩ cuu ñuu ndíi Dàvíi, te ñu-ni ñaní tnáhá tẽ Chèé-án nĩ cuu ndíi. 5 Núu xíáⁿ cuáháⁿ-dé ndée ñuu Bèlén nucódó tnùní-dé, te tnáhá tá Màriá xíchí nĩ cundáá tnúhu sá tnàndaha ndihí-dé cuáháⁿ ndihí ñaha-dé, te sa ñuhu déhe-xi. 6 Te nini cùyaá-yu ñuu Bèlén-án nĩ sáá òré cacu déhe-xi. 7 Te ní cacu déhe díhna-xi, te ní chidúcúⁿ-nuu-xi dóó, te ní sacáⁿ ñáhá-xí ìᵐ vehe núú cúú vèhe quití, chi ñá túú ní nĩhí-yu vehe coó-yu.

Cue espíritú xínú cuèchi núú Yá Ndiòxí ndihí cue toli.

8 Te yatni ñuu-án xíndecu ìᵐ úú toli ndée-güedé mbèé-güedé ndécú-güedé majadá niú-án. 9 Te uuⁿ ní quexio ìᵐ espíritú xínú cuèchi núú Yá Ndiòxí, te Yá Ndiòxí ní quide-gá ní dáyhé-xi ní càndée núú xíndecu-güedé, te

ní yùhú víhí-güedě. ¹⁰ Te ní xáhaⁿ espíritú-áⁿ:

—Vá yùhú-ndó, chi nàha-í ⁱⁱn tnúhu váha véxi sá cúu-xí-ndó, te ío cudíí iní-ndó ndíhi nchaa ñáyiú. ¹¹ Chi vitna ní cacu ⁱⁱn téé dàcácu nihnu ñaha xii-ndo núú ùhú núú ndàhú ñuú ndíi Dávii, te téé-áⁿ cúu-dě Xítóhó Jesucristú. ¹² Te dàtná ⁱⁱn sèñá te naníhí-ndó tē líhli-áⁿ yídúcúⁿ nuu-dé dóó cáá-dě ⁱⁱn vehe quití —càchí-xi xáhaⁿ-xi xii-güedě.

¹³ Te òré-áⁿ ní quexìo cuéhé víhí espíritú véxi cuuⁿ andíu ní naníhí tnáhá-xí ndíhi espíritú-áⁿ, te ní ngúíta-xi ní chiñuhu-xi Yá Ndióxi, te càchí-xi:

¹⁴ ¡Ío càhnu cuu Yá Ndióxi Yá ndécú àndíu, te na cùndecu váha-ni nchaa ñáyiú cùu iní méé-gá!
Duha càchí cue espíritú-áⁿ.

¹⁵ Te òré cuánda cue espíritú-áⁿ andíu, te ní ngúíta cue toli-áⁿ xitnàha-güedě:

—Na quíhíⁿ-ó ñuú Belén quini-ó nàcuáa ní cuu, chi Dútú Ndióxi sa ní cachí tnúhu-gá —càchí-güedě xitnàha-güedě.

¹⁶ Te ní tñii-güedě ichi súúni ndíhi cuáháⁿ-güedě, te ní naníhí-güedě tá Màriá ndíhi té Chéé, ndíhi té líhli-áⁿ cáá-dě xití ⁱⁱn vehe quití.

¹⁷ Te òré ní xiní ñáhá-güedě te ní xáhaⁿ-güedě xii-yu nàcuáa ní xáhaⁿ espíritú-áⁿ xii-güedě cuendá té líhli-áⁿ. ¹⁸ Te nchaa ñáyiú ní tecú dóho-xi ní cuñuhu-yu nàcuáa ní cáháⁿ-güedě. ¹⁹ Dico tá Màriá chi ñihu nahi-ni iní-xi, te dicó-ni sàni iní-xi cuendá nchaa tnúhu-áⁿ. ²⁰ Te cue toli-áⁿ ní natñii-güedě ichi, te ta xitnàha-güedě cuánuhú sá ío càhnu cuu Yá Ndióxi cuendá nchaa tnúhu ní xindedóho-güedě, ndíhi cuendá nchaa sá ní xiní-güedě, chi cuendá sá ndáá ní cuu nchaa nàcuáa ní tecú tnúhu-güedě.

Ndécá-yu Jesús cuáháⁿ veñúhu

²¹ Te núú ùná nduu sá ní cacu té líhli-áⁿ, te ní sáha-güedě señá ñii-dé, te ní dánání ñàha-güedě Jesús xii-dé, diu-ni nàcuáa ní xáhaⁿ espíritú xínú cuèchi núú Yá Ndióxi xii tá Màriá ndéé cùtnáhá vátá ngúhuⁿ-gá-dé xití-xi.

²² Te sátá ní tnahá nduu, nduu íi-yu nàcuáa càháⁿ nchaa tnúhu ní chídó tñuní ndíi Moisés, te ndécá-yu té líhli-áⁿ cuáháⁿ ñuú Jerusálén cuendá quee túu-dé núú Dútú Ndióxi. ²³ Te ducaⁿ ní quidé-yu, chi ducaⁿ càháⁿ-xi núú tütú Yá Ndióxi sá ncháá làndú téé na càcu díhna quetúu-güexi núú-gá cuendá cundecu-ná-güexi cuendá-gá. ²⁴ Te ní quidé-yu nàcuáa càháⁿ Yá Ndióxi núú tütú-gá núú càchí-xi: “Canehe-ndo úú lómá àdi úú cùcu quíhíⁿ nduu táhú ñáhá Yá Ndióxi”, duha càháⁿ-gá núú tütú-gá.

²⁵ Te dàvá-áⁿ ndécú ⁱⁱn téé nàni Mió ñuú Jerusálén. Te ío váha iní-dé, te chiñuhu-dé Yá Ndióxi, te ndètu-dé sáá nduu chindee ñaha Yá Ndióxi xii ñáyiú isràél. Te ndécu ndíhi té Mió-áⁿ Espíritú Yá Ndióxi.

²⁶ Te sa ní xáhaⁿ-xi xii-dé sá vā cùu-ni-dé, chi dacuití quini-dé Crístú Yá tendaha Yá Ndióxi quixi ñuyú-a. ²⁷ Te téé-áⁿ ndécá ñàha Espíritú Yá Ndióxi xii-dé cuáháⁿ veñúhu càhnu sá ío cùnuu. Te cuáháⁿ-yu ndíhi Jesús veñúhu-áⁿ cuendá cadá-yu ndíhi-gá nàcuáa càháⁿ tnúhu ní chídó tñuní ndíi Moisés. ²⁸ Te òré ní sáa-yu, te té Mió-áⁿ ní nguídéhé-dé Jesús, te ní cáháⁿ-dé sá ío càhnu cuu Yá Ndióxi, te ní xáhaⁿ-dē xii-gá:

²⁹ Yòhó Dútú Ndióxi sa ní cuu daña-n cùu-í vitna,

chi sa ní quide-n nàcuáa ní cachí-n xii yùhú téé xínu cuechi núu-n.

³⁰ Chi sa ní xiní núu-í Yá dàcácu nihnu ñaha xii ñáyiú núú ùhú núú ndàhú vitna.

³¹ Te Yáá ní tendaha-n vèxi núú ndécú ncháa ñáyiú ñuyú-a.

32 Te cùu-gá dàtná ìⁿ ñuhú, chi dandìxi túu-gá iní ñáiyu cuendá cutnùnì iní-yu cuendá Yá Ndiòxí cuèí ñá díú ñáiyu isràél cùu-yu.

Te ñu-gá cada, te canehe ñáiyu dava-gá ñuú sá yíñuhu núú ñáiyu isràél chi ñu ñáiyu isràél cùu-yu ñáiyu cùu cuendá-n.

Duha ní xáhaⁿ tē Mió xii Yá Ndiòxí.

33 Te té Chèé ndihi náná Jèsús ní cuñuhu-yu tnúhu ní cáháⁿ té Mió cuendá-gá. 34 Te dàtnùnì té Mió ní xícáⁿ táhú-dē núú Yá Ndiòxí cuendá-yu, te xáhaⁿ-dē xii tá Màriá náná Jèsús:

—Cundedóho tnúhu na càháⁿ-í-a, té lĩhli-a ní nduu táhú-dē nacanu ichi-dē dava ñáiyu isràél ichi Yá Ndiòxí, te davá-yu vá tnĩ-yu tnúhu cáháⁿ-dē, te ñáiyu-áⁿ cuíta ni-hnú-yu, te cada-dē nàcuáa cutnùnì iní ñáiyu sá Yá Ndiòxí ní tendaha ñaha-gá xii-dē, dico vá quèndáá iní-yu, chi daquèe tíhú ñáhã-yu xii-dē. 35 Te ducaⁿ te cutnùnì nàcuáa sàni iní ìⁿ ìⁿ ñáiyu. Dico sá cúu-xí yohó chi ío cada ndàhú-xi iní-n, chi súúni dàtná sá ñí nícuèhé iní-n càda-xi —cachí-dē xáhaⁿ-dē xii tá Màriá.

36 Te xíaⁿ ndécú tnàhá ìⁿ ñaha càháⁿ tnúhu Yá Ndiòxí nání-áⁿ Aná, te tátá-aⁿ ní xínani-dē Fànuél ñani tnáhá ndíi Asér. Te ñaha-áⁿ sa ní sahnu vñhi-aⁿ, te cuechi-ni-aⁿ ní tnándaha-aⁿ te úsá-ni cuíá ní xíndecu-aⁿ ndihi yñi-aⁿ, 37 te ní quendóo quèé-aⁿ, te sa ñuhu-aⁿ cúmídíco cúmí cuíá-aⁿ. Te ñá túú ní xóo quee-aⁿ veñuhu càhnu sá ío cùnuu, chi nduu niú ní xóo chiñuhu-aⁿ Dútú Ndiòxí, te áma ñá túú tnàhí ná ní xóo caxi-aⁿ ní xóo cáháⁿ ndihi-aⁿ Yá Ndiòxí. 38 Te ñu-ni òré ndécú-yu ndihi Jèsús ní quexìo-aⁿ núu-yu, te ní ndacáⁿ táhú-áⁿ núú Yá Ndiòxí cuendá sá ní xíní-aⁿ Jèsús, te dàtnùnì ní ngúita-aⁿ cáháⁿ vñha-aⁿ cuendá-gá núu nchàa ñáiyu, ñáiyu ndètu quíní sáá nduu

dàcácu Yá Ndiòxí ñáiyu Jerusàlén núú tnündòho tnúhu ndàhú.

Cuánuhú-yu ñuú Nazàrét

39 Te sáta ñí quidé-yu nchaa nàcuáa càháⁿ tnúhu Yá Ndiòxí, te cuánuhú-yu ñuú Nazàrét núú ndécú tnàhí-yu, te ñuú-áⁿ yíndèhu-xi distritú Galileá. 40 Te té lĩhli nàni Jèsús-áⁿ tá sàhnu-dē, te ta ñihí ndéé-dē cuáháⁿ, te ducaⁿ ío váha ta sàá sá xíní tnùnì-dē cuáháⁿ, chi Yá Ndiòxí ndécú ndihi ñaha-gá xii-dē.

Jèsús ndécú-gã veñuhu

41 Te ndi tnahá cuíá ñí xóo quíhíⁿ té Chèé ndihi náná Jèsús vico pàscuá ñuú Jerusàlén. 42 Te cútñahá ní chítú Jèsús úxúu cuíá-gã, te cuáháⁿ-yu ndihi-gã ñuú Jerusàlén vico pàscuá, chi ducaⁿ tnàhí quidé-yu. 43 Te òré ní yáha vico, te ní natñií-yu ichi cuánuhú-yu, te ní quendóo-gã ñuú Jerusàlén, te ní náná-gã, te ní tē Chèé ñá túú ní xíní ní quendóo-gã. 44 Chi ní sani iní-yu sá ñútnahá-gã tnuú nchaa ñáiyu ní sáháⁿ vico cuánuhú. Te ní xúhuⁿ-yu ìⁿ ñu nduu ichi ta ndùcu tnúhu-yu-gã núu nchàa ñani tnáhã-yu, ndihi núu nchàa ñáiyu xíní tnáhá ndihí-yu, 45 te ñá túú ní nánihí ñáhã-yu xii-gã. Núu ní nacucó-yu cuánuhú tucú-yu ñuú Jerusàlén cuendá yàcáⁿ nanducu ñahã-yu xii-gã.

46 Te núú ùní nduu sá ñí dana núú ñáhã-yu xii-gã, te ní nanihí ñáhã-yu núcòo-gã xití veñuhu càhnu sá ío cùnuu tnuú cue tée dàcuaha ñaha xii-yu nchaa tnúhu ní chídó tnùnì ndíi Moisés, te ndédóho ñaha-gã xii-güedé, te nándi sá ndúcú tnúhu-gã núu-güedé. 47 Te nchaa cue tée xíndedóho ñaha xii-gã xícuñuhu-güedé sá ío váha sàá sá xíní tnùnì-gã, te ío váha ñihí-gã tnúhu nàdanchocáva-gã. 48 Te òré ní xíní ñahá té Chèé ndihi náná-gã xii-gã, te ío ní cuñuhu-yu, te ní xáhaⁿ náná-gã xii-gã:

—Yòhó déhe-í, ¿ná cuendá ducaⁿ nĩ quide ñaha-n xii-ndí? Te tātá-n ndihí yúhú ndihú iní-ndí xicá nànducu ñaha-ndí xii-n —càchí-xi xáhaⁿ-xi xii-gá.

⁴⁹ Te ní xáhaⁿ Jèsús xii-yu:

—¿Ná cuendá nánducu ñaha-ndo? ¿Náa ñá túú xini-ndo sá núú chíúⁿ Tātá-í tàú-í caça cuu-í-ãⁿ? —càchí-gá xáhaⁿ-gá xii-yu.

⁵⁰ Dico meé-yu ñá túú ní tècu tnùnì-yu nàcuáa ní xáhaⁿ-gá.

⁵¹ Te sáta dúcáⁿ te cuánuhú ndihí ñáhá-yu xii-gá ñuu Nazarét, te ío ní sándáa iní ñáhá-gá xii-yu. Te nchaa sá nĩ quide-gá-án nĩ xúhuⁿ nahi-ni iní náná-gá. ⁵² Te Jèsús ducaⁿ-ni ta sàhmu-gá cuáháⁿ, te ta sàá-gá sá xini tnùnì-gá cuáháⁿ, te ducaⁿ cùdìu-gá núú Yá Ndióxi, ndihí núú nchaa ñáiyu.

3

Té Juáa tée dàcuandute ñaha xii ñáiyu càhàⁿ-dé tnúhu Yá Ndióxi xití yucu

(Mt. 3:1-12; Mr. 1:1-8; Jn. 1:19-28)

¹ Te ní cuu sáhúⁿ cuía sá yíndàha té Tiberiú cuéhé nacióⁿ, te dàvá-án nĩ cunuu té Pilatú distritú Júdeá, te té Herodés ní cunuu-dé distritú Galiléa, te ñaní-dé té Lipé ní cunuu-dé distritú Itureá ndihí ingá distritú nání Traconité, te té Lisaniás ní cunuu-dé distritú Abiliniá. ² Te té Anás ndihí té Caifás ní cuu-güedé dútú cùnùu. Te dàvá-án nĩ càháⁿ ndihí ñaha Yá Ndióxi xii té Juáa déhe té Zacaría xití yucu sá quihíⁿ-dé càháⁿ-dé tnúhu-gá núú ñáiyu. ³ Te té Juáa ní yáha-dé nchaa ñuu cáa yàtni yúte Jòrdán, te xáhaⁿ-dè xii nchaa ñáiyu:

—Chí dándixi túu iní sá ña túú quide váha-ndo, te dañá-ndo nchaa ichi cuehé ichi duha ndècu-ndo, te cuandute-ndo, te ducaⁿ te cada càhnu iní Yá Ndióxi nchaa yicá cuèchi-ndo —duha ní xáhaⁿ-dè xii-yu.

⁴ Te ducaⁿ nĩ quide-dé chi ní quee ndáa-xi nàcuáa ní chídó tnùnì ndí Cháiaa té ní xoo càháⁿ tnúhu Yá Ndióxi ndéé sanaha núú tütú ndí núú càchí-xi:

Tècu càháⁿ níhi ìⁿ té yìhi xití yucu, te xáhaⁿ-dè xii ñáiyu:

“Chí dáña nchaa ichi cuehé ichi duha ndècu-ndo, te tniⁿ-ndo ichi váha,

te ducaⁿ càda-ndo cuendá cundecu túha-ndo, chí véxi Yáa ío cùnuu.

⁵ Te nchaa núú cùnú nachítú, te nchaa tindúú ndihí nchaa yucu ngoyo nihnu cuendá nduu ndáa,

te nchaa ichi ñá túú cuáháⁿ ndáa nduu ndáa,

te nchaa ichi ñá túú càváha nduu váha.

⁶ Te nchaa ñáiyu ñuyú-a níhi-yu tnúhu sá Yá Ndióxi véxi-gá dàcácu nihnu ñaha-gá xii-yu núú ùhú núú ndàhú.”

Duha ní chídó tnùnì ndí Cháiaa núú tütú ndí.

⁷ Te òré ní xica ñáiyu cuáháⁿ-yu cuendá dacuandute ñaha té Juáa xii-yu, te ní xáhaⁿ-dè:

—¿Nchaa nchòhó cúú-ndó dàtná ìⁿ cóó dèéⁿ chí ío cuihna iní-ndó! ¿Te nása ní cuu núu tnáha nchòhó ndúcú-ndó nàcuáa cácu nihnu-ndo núú tnündòho càhnu vihi sá tá cùyatni ñaha xii-ndo véxi-í? ⁸ Te chí cáda váha vitna cuendá ducaⁿ cùnuni sá nĩ dáña-ndó nchaa ichi cuehé ichi duha ndècu-ndo. Te vá càchí-ndó sá ío càhnu cuu-ndo cuendá sá cúú-ndó ñaní tnáha ndí Abrahám, chí cuèi ndéé yúú te ndacu Yá Ndióxi ndada-gá ñáiyu te cuú-yu ñaní tnáha ndí Abrahám. ⁹ Te caá chi ndècu túha-xi sá quèhndé-xi nchaa yutnu sá ña túú càváha sávidí-xi, chí nchaa yutnu-án tèhndé-xi te cuánguee-xi núú ñuhú càyú-xi. Te duha sátnahá-xi ndoho nchaa ñáiyu ña túú quide váha, chí nchaa ñáiyu ducaⁿ ña túú quide váha cùnú-yu dàtná nchaa yutnu sá ña túú càváha sávidí-xi. —càchí-dé xáhaⁿ-dè xii-yu.

¹⁰ Te ní xícáⁿ tnúhu-yu núú-dě, te xǎháⁿ-yu:

—¿Te nása cada-ndí váín? — cǎchí-yu xǎháⁿ-yu xii-dě.

¹¹ Te xǎháⁿ-dě:

—Te núu ndědacàa-ndo ndecu ndihí-ndo úú dóó te cuǎñaha-ndo ìⁿ xii ñáyiú ñá túú ndècu ndihí, àdi núu ndècu ndihí-ndo sá nchító-ó te cuáha-ndó-yu na cǎxí-yu —cǎchí-dé xǎháⁿ-dě xii-yu.

¹² Te ní quexìo ìⁿ úú cue tée cuihna iní-xi quide cobrá ñáhá xii ñáyiú cuendá impuèstú cuendá cuàndute-güedé, te ní xícáⁿ tnúhu-güedé núú tē Juáá, te xǎháⁿ-güedé:

—Mèstrú, ¿te nása cada-ndí cuendá cuu váha iní Yǎ Ndiòxí-i? —cǎchí-güedé xǎháⁿ-güedé xii-dě.

¹³ Te té Juáá ní xǎháⁿ-dě:

—Vá cuídó-ndó càda cobrá-ndó ñáyiú —cǎchí-dé xǎháⁿ-dě xii-güedé.

¹⁴ Te tnàhá ìⁿ úú cue tée cùu sandadú xindecu-áⁿ nǐ xícáⁿ tnúhú-güedé núú tē Juáá, te xǎháⁿ-güedé:

—Te nchúhú ¿nása cada-ndí cuendá cuu váha iní Yǎ Ndiòxí-i? —cǎchí-güedé xǎháⁿ-güedé xii-dě.

Te ní xǎháⁿ tē Juáá:

—Vá quèndèe-ndó sǎ néhé tnàha ñáyiú-ndo, te ni vǎ dácàa díquí-ndó-yu ìⁿ sá ñà túú nǎ quidè-yu, te nduu vétú iní-ndó nàcuáa ñùhu yáhu-ndo —cǎchí-dé xǎháⁿ-dè xii-güedé.

¹⁵ Te nchaa ñáyiú xǐndetu sá quíxí Crìstú sàni ìⁿ sàni úú iní-yu núu sá díú Crìstú Yáá tendaha Yǎ Ndiòxí quixí ñuyúú-a cùu te Juáá àdi ñáhá.

¹⁶ Dico té Juáá ní cǎháⁿ ndodo-dé núú-yu nchaa-yu, te xǎháⁿ-dè:

—Na cǎchí tnúhu ndáá-í xii-ndo sǎ yùhú véxi-í sǎ cuendá-ni dacuàndute ñaha-í xii-ndo dàtná ní cachí Yǎ Ndiòxí, dico nchìcúⁿ ingá té véxi, te té-áⁿ taxi-dé Espiritú Yǎ Ndiòxí cundecu ndihí-ndo, te cùu-xi datná ìⁿ ñuhú, chi ndada ndoo ndada nine-xi iní-ndó. Te té-áⁿ lo-gá cùnùu-dé dácúúxí yùhú,

chi yùhú cùu-í ìⁿ té duuⁿ duuⁿ ñá túú tàú-í nandaxi-í cuèdicó ñii chàú-dé dico quide-í chiúⁿ-dè.

¹⁷ Te té-áⁿ sa véxi túha-dé sá cáda díⁿ ñaha-dé xii-o dàtná quidé ñáyiú ndàda ndoo triú, chi ñáyiú-áⁿ sa nèhe túha-ná-yu yaxíⁿ-yu òré náñani cuendá ndada ndoo-yu, te òré ndádá ndòó-yu triú-áⁿ te dàquee díⁿ-yu mihi-xi, te tàúha-yu mee-nǎ triú-áⁿ, te mihi-xi-áⁿ sǎhmí-yu. Te dàtná quidè-yu mihi triú-áⁿ ducaⁿ sǎtnahá-xi càda ñaha té-áⁿ xii nchaa ñáyiú ñá túú quide váha, chi daquihíⁿ ñáhá-dé xii-yu núú ñùhú núú càyú, te ñuhú-áⁿ ñà túú tnàhí ndàhvá —cǎchí-dé xǎháⁿ-dè xii-yu.

¹⁸ Te titní vǐhí-gǎ tnúhu váha ní xǎháⁿ tē Juáá xii-yu òré ní dásàhú ñáhá-dé. ¹⁹ Te ní cǎháⁿ-dè dóho té Hèrodés cuendá sǎ ndécá-dè ìⁿ ñaha nani Herodiás ñaha ní cǎndeca ñani-dé té Lipé, te ní xǎháⁿ-dè cuendá nchaa dava-gá sá cuèhé sá dúhá quide-dé. ²⁰ Dico té Hèrodés ñá túú ní quide cuendá-dé tnúhu ní cǎháⁿ té Juáá, chi nèhé-gá tucu ní quide-dé, chi da vecaá ní chihí-dé té Juáá.

Sàndute Jesús

(Mt. 3:13-17; Mr. 1:9-11)

²¹ Te òré dácuaàndute té Juáá nchaa ñáyiú, te tnàhá Jèsús ní dácuaàndute ñaha-dé xii-gá. Te nini cǎháⁿ ndihí-gá Dútú Ndiòxí ní nacaáⁿ andiu, ²² te ní quee Espiritú Yǎ Ndiòxí véxi cuuⁿ túu-xi, te càa-xi datná cáá ìⁿ lómá, te òré-áⁿ nǐ tecú ní cǎháⁿ Yǎ Ndiòxí ndéé andiu, te xǎháⁿ-gǎ xii Jèsús:

—Yòhó cùu-n Dèhe-í téé ío cùu iní-í, te ío cùdí iní ñáhà-í xii-n —cǎchí-gá xǎháⁿ-gǎ xii Jèsús.

Cue téé ní xindecu díhna-gá ñuyúú-a dácúúxí Xìtohó Jesucristú

(Mt. 1:1-17)

²³ Te ndècu Jèsús dàtná ócó úxí cuía-gá cùtnàhá ní chisaha-gǎ chiúⁿ ní táhú Tǎtá-gǎ Dútú Ndiòxí

cada-gá. Te ní cuu-gá déhe té Chèé chi ducaⁿ sàni iní ñāyiu ñuyíú-a. Te té Chèé-án nǐ cuu-dé déhe té Èlí,²⁴ te té-án nǐ cuu-dé déhe té Mátát. Te té Mátát-án nǐ cuu-dé déhe té Lèví, te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Jáná, te té-án nǐ cuu-dé déhe té Chèé,²⁵ Te té Chèé-án nǐ cuu-dé déhe té Matatías, te té-án nǐ cuu-dé déhe té Àmós. Te té Àmós-án nǐ cuu-dé déhe té Nàhúm, te té-án nǐ cuu-dé déhe té Èslí. Te té Èslí-án nǐ cuu-dé déhe té Nagàí,²⁶ te té-án nǐ cuu-dé déhe té Maaát. Te té Maaát-án nǐ cuu-dé déhe té Matatías, te té-án nǐ cuu-dé déhe té Semèí. Te té Semèí-án nǐ cuu-dé déhe té Chèé, te té-án nǐ cuu-dé déhe té Jùdá.²⁷ Te té Jùdá-án nǐ cuu-dé déhe té Jóná, te té-án nǐ cuu-dé déhe té Rèsá. Te té Rèsá-án nǐ cuu-dé déhe té Zorobàbél, te té-án nǐ cuu-dé déhe té Salàtiél. Te té Salàtiél-án nǐ cuu-dé déhe té Nèrí,²⁸ te té-án nǐ cuu-dé déhe té Mèlquí. Te té Mèlquí-án nǐ cuu-dé déhe té Àdí, te té-án nǐ cuu-dé déhe té Còsám. Te té Còsám-án nǐ cuu-dé déhe té Elmòdám, te té-án nǐ cuu-dé déhe té Ęr.²⁹ Te té Ęr-án nǐ cuu-dé déhe té Jòsué, te té-án nǐ cuu-dé déhe té Elièzér. Te té Elièzér-án nǐ cuu-dé déhe té Jòrím, te té-án nǐ cuu-dé déhe té Mátát.³⁰ Te té Mátát-án nǐ cuu-dé déhe té Lèví, te té-án nǐ cuu-dé déhe té Mió. Te té Mió-án nǐ cuu-dé déhe té Jùdá, te té-án nǐ cuu-dé déhe té Chèé. Te té Chèé-án nǐ cuu-dé déhe té Jónán, te té-án nǐ cuu-dé déhe té Eliàquím.³¹ Te té Eliàquím-án nǐ cuu-dé déhe té Mèleá, te té-án nǐ cuu-dé déhe té Mainán. Te té Mainán-án nǐ cuu-dé déhe té Mátatá, te té-án nǐ cuu-dé déhe té Nàtán,³² Te té Nàtán-án nǐ cuu-dé déhe té Dàvíí, te té-án nǐ cuu-dé déhe té Isàí. Te té Isàí-án nǐ cuu-dé déhe té Obéd, te té-án nǐ cuu-dé déhe té Bòóz. Te té Bòóz-án nǐ cuu-dé déhe té Salmón, te té-án nǐ cuu-dé déhe té Naàson.³³ Te té Naàson-án nǐ cuu-dé déhe té Aminadáb, te té-án nǐ cuu-dé déhe té Àrám. Te té Àrám-án nǐ cuu-dé déhe té Èsróm,

te té-án nǐ cuu-dé déhe té Fàrés, Te té Fàrés-án nǐ cuu-dé déhe té Jùdá,³⁴ te té-án nǐ cuu-dé déhe té Jàcób. Te té Jàcób-án nǐ cuu-dé déhe té Isàác, te té-án nǐ cuu-dé déhe té Àbrahám. Te té Àbrahám-án nǐ cuu-dé déhe té Tàré, te té-án nǐ cuu-dé déhe té Nàcór.³⁵ Te té Nàcór-án nǐ cuu-dé déhe té Sèrúg, te té-án nǐ cuu-dé déhe té Ragàú. Te té Ragàú-án nǐ cuu-dé déhe té Pèlég, te té-án nǐ cuu-dé déhe té Hèbèr. Te té Hèbèr-án nǐ cuu-dé déhe té Salá,³⁶ te té-án nǐ cuu-dé déhe té Cainán. Te té Cainán-án nǐ cuu-dé déhe té Arfàxád, te té-án nǐ cuu-dé déhe té Sèm. Te té Sèm-án nǐ cuu-dé déhe té Nòé, te té-án nǐ cuu-dé déhe té Làméc.³⁷ Te té Làméc-án nǐ cuu-dé déhe té Matusalén, te té-án nǐ cuu-dé déhe té Ènóc. Te té Ènóc-án nǐ cuu-dé déhe té Jàréd, te té-án nǐ cuu-dé déhe té Mahalaleél. Te té Mahalaleél-án nǐ cuu-dé déhe té Cainán,³⁸ te té-án nǐ cuu-dé déhe té Ènós. Te té Ènós-án nǐ cuu-dé déhe té Sèt, te té-án nǐ cuu-dé déhe té Àdán. Te té Àdán-án chi mee Yà Ndiòxi ní cadúha ndaha ñàha-gá xii-dé.

4

Sácuíhná quidé yica-xi cada Jesús sá ñà túú tàù-gá cada-gá ní cùu (Mt. 4:1-11; Mr. 1:12-13)

¹ Te Jèsús ní naqueheⁿ-gá ichi yuhu yúte Jòrdán cuánuhú-gá. Te sa ndècu ndi^h-gá Espiritú Yà Ndiòxi, te Espiritú-án ndéca ñàha-xi xii-gá cuáhán ìⁿ xití yucu. ² Te yàcán ní xindecu-gá údico nduu, te sácuíhná nǐ cuini-xi coto ndéé ñàhá-xí xii-gá te núu ndisa sá vǎ cáda-gǎ ìⁿ sá ñà túú tàù-gá cada-gá. Te ñà túú tnàhí ná ní xèxi-gá ndi ùdico nduu-án, te sáta dúcán te ní xícán iní-gá caxi-gá. ³ Te sácuíhná-ǎn nǐ xáha-xi xii-gá:

—Te núu ndisa sá cúú-n Dèhe Yà Ndiòxi, te cúñaha xii yúú-a na ndùu-xi paá —càchí-xi xàhaⁿ-xi xii-gá.

⁴ Te Jèsús ní xáhaⁿ-gǎ xii-xi:

—Núú tùtú Yà Ndiòxi càchí-xi: “Ñá diú mèè-ni paá candeca-xi iní

ñáiyu, chi tnàhá nchaa tnúhu càháⁿ Yá Ndiöxí candeca-xi iní-yu”, duha càchí-xi núú tütú-gá —càchí-gá xáhaⁿ-gá xii-xi.

⁵ Te dàtnùní sácúíhná ndécá ñàha-xi xii-gá cuáháⁿ ìⁿ núú tìndúú dùcúⁿ, te uuⁿni ní dánèhé núú ñáhá-xí xii-gá nchaandi túhú nàcióⁿ cáá ñùyú. ⁶ Te ní xáhaⁿ-xi xii-gá:

—Yúhú cada-í, te taxi tnùnín nchàa-ndi túhú nàcióⁿ-a ndihi nchaa sá vâha ío ñu-ni nchaa nàcióⁿ-a, te cachí ñáiyu sá ño cùnuu-n, chi yúhú cúú cuèndá-í nchaa sá ío nchaa nàcióⁿ-a, te ndédani càa ñáiyu cùu iní-í te cúñaha-í xii-yu taxi tnùnín-yu. ⁷ Te núú ní yùhu ní iní-n chiñuhu ñaha-n xii-í ñá, te nchaa taxi-í cuu cuèndá-n —càchí-xi xáhaⁿ-xi xii-gá.

⁸ Te Jèsús ní xáhaⁿ-gá xii-xi:

—Xocuíñí yòhó sácúíhná núú ndécú-í-a, chi vá cúú càda-í nàcuáa càchí-n chi núú tütú Yá Ndiöxí càchí-xi: “Chiñuhu-ndo Dütú Ndiöxí Yaá cúú Ndiöxí-ndó, te ìⁿdii díí-ni-gá cada-ndo nchàa nacuáa càháⁿ-gá”, duha càchí-xi núú tütú-gá —càchí-gá xáhaⁿ-gá xii-xi.

⁹ Te sácúíhná ndécá ñàha tucu-xi xii-gá cuáháⁿ ñuú Jerusálén, te ní xáhaⁿ-xi xii-gá cuásaá-gá díquí veñúhu càhnu sá ño cùnuu, te ní xáhaⁿ tucu-xi:

—Te núú ndisa cùu-n Déhe Yá Ndiöxí te cuandèe ndava ndéé núú ñúhú ¹⁰ cuèndá quee ndáá-xi nàcuáa càháⁿ-xi núú tütú Yá Ndiöxí núú càchí-xi:

Yá Ndiöxí tendaha-gã cue espíritu xínú cuèchi núú-gã quixi-xi coto ñaha-xi xii-n.

¹¹ Te núú ndáhá-xí càundodo-n cuèndá sá vá dancuèhé yúú sáhá-n,

duha càchí-xi núú tütú-gá —càchí sácúíhná xáhaⁿ-xi xii-gá.

¹² Te Jèsús ní xáhaⁿ-gá xii-xi:

—Te càchí tucu-xi núú tütú Yá Ndiöxí: “Vá cání iní-n coto ndeé-n Dütú Ndiöxí Yaá cúú Ndiöxí-n núú ndisa sá dácacu nihnu ñaha-gã xii-n

cuèndá ìⁿ sá sání iní-n càda-n sá cúú-xí mée-n”, duha càchí-xi núú tütú-gá —càchí-gá xáhaⁿ-gá xii-xi.

¹³ Te sáta dúcáⁿ te sácúíhná ñà tütú-gá ní cùtnuní iní-xi nása cada-xi Jèsús, núú xíáⁿ ní xica-xi cuáháⁿ-xi ní sanaa tnaa-xi.

Distritú Galileá ní chisaha Jèsús chiúⁿ ní táhú Tátá-gã Dütú Ndiöxí cada-gá

(Mt. 4:12-17; Mr. 1:14-15)

¹⁴ Te Jèsús cuáháⁿ tucu-gá distritú Galileá, dico sa ndècu ndihi-gá Espiritú Yá Ndiöxí, te ní càa xico xíáⁿ ní níhí-yu tnúhu nchaa nàcuáa quide-gá. ¹⁵ Te ndi tnahá ñuú cuáháⁿ-gá ducaⁿ cuànguñhu-gá veñúhu-yu dānehé ñáhá-gã xii-yu, te ncháá-yu càchí-yu sá ño càhnu cuu-gá.

Jèsús ndécú-gã ñuú Nazàrét

(Mt. 13:53-58; Mr. 6:1-6)

¹⁶ Te Jèsús ní sáháⁿ-gá ñuú Nazàrét ñuú núú ní sahnu-gá. Te nduu ndetátú ñáiyu ní quíhu-gá veñúhu, chi ducaⁿ tnahí quide-gá, te ní ngúnutñii-gá dácuaaha-gá tutú ndèé tnúhu Yá Ndiöxí. ¹⁷ Te ní sáñaha-güedé xii-gá tutú ndéé tnúhu ní càháⁿ ndii Chaiá téé ní xóo càháⁿ tnúhu Yá Ndiöxí ndéé sanaha, te òré ní nandica-gá núú tütú-án te ní naníhí-gá núú càchí-xi:

¹⁸ Espiritú Yá Ndiöxí ndécú ndihi ñaha-xi xii-í,

chi ní cachí-gá sá càháⁿ-í tnúhu-gá sá cúú-xí ñáiyu ndáhú, ñáiyu vátá cündedóho tnahí-gá.

Te véxi-í cuèndá vá ndihú-gá iní ñáiyu ñá túú ndècu váha iní-xi,

te cue ñáiyu sa nèhe váha ñaha-nã yucu ñávãha dácacu nihnu-í-yu.

Te cue ñáiyu cuáa nacaáⁿ-í núú-yu, te ñáiyu ndòho dandoho ñaha tnaha ñáiyu-xi taunihnu-í-yu.

¹⁹ Te cúñaha-í xii ñáiyu sá sáá nduu càda Yá Ndiöxí ìⁿ sá vâha sá cúú-xi-yu.

Duha càchí-xi núú tütú dáciuàha-gá.

²⁰ Te Jèsús ní nacadí-gá núú tütú-án, te ní nacuáha-gá ìⁿ téé xìnu cuechi veñúhu-án, te ní ngóo-gá. Te nchaa ñáyiú yìhi veñúhu ñá núú nũ-yu ndèhe ñahá-yu xii-gá. ²¹ Te xáhaⁿ-gá xii-yu:

—Mei vitna ní quee ndáá-xi náciuá càháⁿ-xi núú tütú Yá Ndiòxí —càchí-gá xáhaⁿ-gá xii-yu.

²² Te nchaá-yu ní cáháⁿ váha-yu cuendá-gá, te ní cuñúhu-yu tnúhu váha càháⁿ-gá, te xitnàhá-yu:

—¿Te náa ñá díú téé-a cùu-dé déhe té Chèé-áⁿ? —càchí-yu xitnàhá-yu.

²³ Te Jèsús ní xáhaⁿ-gá:

—Na càchí tnúhu ndáá-í xii-ndo sã ñúhú ìní-ndó cùñaha-ndo xii-í ìⁿ tnúhu cùtexínu sá càháⁿ méé-ndó, te quesaha-ndo: “Ñátátná cada tátna mee-n”, duha quesaha-ndo. Te cùñaha tucu-ndo xii-í: “Sa ní níhí-ndí tnúhu náciuá ní quide-n ñúú Capèrnaúm, te cada-n tnàhá ñúú núú ní sahnu-n”, duha quesaha-ndo —càchí-gá xáhaⁿ-gá xii-yu.

²⁴ Te ní xáhaⁿ tucu-gá:

—Na càchí tnúhu ndáá-í xii-ndo sã ní ìⁿ téé càháⁿ tnúhu Yá Ndiòxí ñá túú tnàhá ìní ñahá ñáyiú ñúú-dé.

²⁵ Te na càchí tnúhu ndáá tucu-í xii-ndo sã ìo vài ñáyiú dìhí ñáyiú quèé ní xíndecu nàcióⁿ Isràél cùtnàhá ní xíndecu té Èliás cùtnàhá ñá túú ní cùuⁿ dáú ùní cuiá dava, te dàvá-áⁿ ìo ní ndoho ñáyiú docó nitùhú nàcióⁿ. ²⁶ Dico Yá Ndiòxí ñá túú ní tëndaha-gá té Èliás quihíⁿ-dé vehe ndédani càa ñáyiú dìhí-áⁿ, chi vehe ìⁿ ñaha ñúú Sàreptá ní xáhaⁿ-gá ní sáháⁿ-dé, te ñúú-áⁿ cáá yàtni-xi ñúú Sìdón. ²⁷ Te ní xíndecu tucu ingá téé ní xóo cáháⁿ tnúhu Yá Ndiòxí ndéé sanaha, te téé-áⁿ ní xínani-dě Eliseú, te diu-ni dàvá-áⁿ ní xíndecu tucu vài ñáyiú cùhú nàcióⁿ Isràél, ñáyiú ní tnàhá cuhéé sã dátèhyú nihnu-xi yiqui cùñú-yu dico ñá túú ní ndúha-yu, chi ìⁿ dìi-ni té Nàamán téé distrìtú Siríá

ní ndúha-dé —càchí-gá xáhaⁿ-gá xii-yu.

²⁸ Te sá dúcáⁿ ní cáháⁿ-gá te xíáⁿ ní cudééⁿ víhí nchaa ñáyiú yìhi veñúhu-áⁿ núú-gá. ²⁹ Te ní queñuhú-yu Jèsús yuhu dèhvá tìndúú núú cáá ñúú-yu-áⁿ cuendá yácáⁿ dàquée-yu-gá dèhvá ní cùu. ³⁰ Dico Jèsús vii-ni ní quee-gá tnuú-yu cuaháⁿ-gá.

Ìⁿ téé yìhi ñaha espíritú cùndìhi yucu ñávaha

(Mr. 1:21-28)

³¹ Te Jèsús cuaháⁿ-gá ñúú Capèrnaúm, te ñúú-áⁿ yíndèhu-xi distritú Galiléa. Te yácáⁿ ndécú-gá ní tnàhá nduu ndètatú ñáyiú, te ní ngúita-gá dáciuàha-gá ñáyiú. ³² Te xicuñúhu-yu nchaa náciuá dènehé ñahá-gá xii-yu, chi càháⁿ-gá dàtná càháⁿ ìⁿ téé cùnuu, te cùnuu ndisa-gá.

³³ Te xití veñúhu yìhi ìⁿ téé yìhi ñaha ìⁿ espíritú cùndìhi yucu ñávaha, te espíritú-áⁿ ní quide-xi níhi ní cáháⁿ téé-áⁿ, te xáhaⁿ-dè xii Jèsús:

³⁴ —¿Te ná cùní yòhó Jèsús téé ñúú Nazàrèt cada ñaha-n xii-ndí nũu véxi-n núú ndécú-ndí-i? ¿Áⁿ vèxi-n dànaa ñaha-n xii-ndí? Chi yúhú xini ñahá-í xii-n sã cúu-n ìⁿ téé ñá túú tnàhá cuéchi-xi chi núú Yá Ndiòxí ní quee-n véxi-n ñùyíú-a —càchí-dé xáhaⁿ-dè xii-gá.

³⁵ Te Jèsús ní tenàá-gá espíritú cùndìhi yucu ñávaha-áⁿ, te xáhaⁿ-gá:

—¿Cadi yuhu-n, te taquèe yiqui cuñú téé-áⁿ! —càchí-gá xáhaⁿ-gá.

Te espíritú cùndìhi yucu ñávaha-áⁿ ní dándùá-xi téé-áⁿ ndéé ñuhu tnuú ñáyiú xíndecu-áⁿ, te ñá túú-gá ná ní quide ñaha-xi, te ní quee ñaha-xi xii-dé. ³⁶ Te nchaa ñáyiú xíndecu-áⁿ ní cuñúhu-yu, te ní xitnàhá-yu:

—¿Te nása nduu-tu tnúhu càháⁿ téé-áⁿ ñá? ¿Te càháⁿ-dè dàtná càháⁿ ìⁿ téé tàxi tnuun víhí, chi càháⁿ-ni-dé

te nchaa espíritú cúndìhi yucu ñávàha quèe-ni-xi yiqui cuñú-yu! —càchí-yu xĩtnàhá-yu.

³⁷ Te nchaa xichi ní níhĩ-yu tnúhu nàcuáa quide Jesús.

Jesús quidé tãtna-gá nãná ñadìhĩ té Xímú

(Mt. 8:14-15; Mr. 1:29-31)

³⁸ Te Jèsús ní ndee-gá xití veñúhu, te cuáháⁿ-gá vehe té Xímú. Te nãná ñadìhĩ té Xímú-áⁿ cùhú-aⁿ ñùhu vihi-aⁿ cahni, te ní cáháⁿ ndàhú-yu núú Jèsús cuendá-aⁿ. ³⁹ Te Jèsús ní sáháⁿ-gá núú ndécú-áⁿ, te ní ngúnundeyi-gá te ní xáhaⁿ-gã xii cahni-áⁿ sã ná xòcuñĩ-xi, te ní xòcuñĩ-ni-xi, te òré-ni-áⁿ ñí ndúha ñaha cùhú-áⁿ te ní ndacóo-aⁿ ní xinu cuechi-aⁿ núú-güedé ndihĩ-gá.

Jesús quidé tãtna-gá vài ñáyiú cùhú

(Mt. 8:16-17; Mr. 1:32-34)

⁴⁰ Te òré ní ngódó tnúú nchíanchii, te nchaa ñáyiú xĩndecu ndihĩ ñáyiú cùhú vehe-xi ndéca ñahá-yu cuáháⁿ núú Jèsús. Te Jèsús ní sacáⁿ ndodo-gá ndaha-gá díquí ìⁿ ìⁿ ñáyiú cùhú-áⁿ, te ducaⁿ ñí quide-gá te ní ndúha-yu. Te ndi dííⁿ núú cuéhé tnàhá-yu ìⁿ ìⁿ-yu ni cùu. ⁴¹ Te tnàhá dava ñáyiú cùhú-áⁿ yíhĩ ñaha espíritú cúndìhi yucu ñávàha xii-yu ní cùu, te òré ní quée ñaha-xi xii-yu, te xíáⁿ ní quide-xi níhi ní cáháⁿ-yu, te xãháⁿ-yu xii Jèsús:

—Yòhó cúú-ñ Dèhe Dútú Ndiòxi —càchí-yu xãháⁿ-yu xii-gá.

Dico Jesús níhi ní cáháⁿ-gá ní tenáá-gá nchaa espíritú cúndìhi yucu ñávàha-áⁿ, te xãhaⁿ-gã sã vã dúcáⁿ-gã cada-xi, chi sa xini-xi sã díú-gã cúú-gã Crístú Yaa ní tendaha Yã Ndiòxi véxi ñuyíú-a.

Jesús dánèhé-gá ñáyiú distritú Galiléa

(Mr. 1:35-39)

⁴² Te ìⁿ nduu ní túndaá-ni ní quée Jesús ñuu núú ndécú-gã-áⁿ cuáháⁿ-gã ìⁿ xichi núú ñã túú ñáyiú

ndècu. Te cue ñáyiú ní ngúita-yu nànducu ñahá-yu xii-gá te ní nanihí ñahá-yu, te cuini-yu ngani ñahá-yu xii-gá cuendá sã ñã túú-gã ndéé quihĩⁿ-gá ní cùu. ⁴³ Dico ní xáhaⁿ-gã xii-yu:

—Dacuití quihĩⁿ-í cúñaha-ĩ xii nchaa ñáyiú dava-gá ñuu tnúhu sã cáháⁿ nàcuáa ndíhu ndaha ñaha Yã Ndiòxi xii-yu, chi chiúⁿ tnahi-áⁿ véxi-í —càchí-gã xãhaⁿ-gã xii-yu.

⁴⁴ Te ní xica cuu Jèsús ní dánèhé-gá ñáyiú tnúhu-gá nchaa xití veñúhu ndãa distritú Galiléa.

5

Jesús ní quide-gá ní níhĩ-güedé chácá

(Mt. 4:18-22; Mr. 1:16-20)

¹ Te ìⁿ xito ndècu Jesús yuhu làgúná Genesàrét, te ío cuéhé ñáyiú ní sáá, te ta dàdehnde ñaha-ná-yu xii-gá cuáháⁿ sã cuini-yu cund-edóho-yu nchaa tnúhu cáháⁿ-gã. ² Te Jèsús ní xiní-gá úú bàrcú cue tée tñi chácá xĩnutñi-xi yatni yuhu làgúná-áⁿ, te sa ní quene cue tée ñùhu xití-xi-áⁿ xĩnaquete-güedé ñunu-güedé. ³ Te Jèsús cuásaá-gá núú ìⁿ bàrcú-áⁿ, te bàrcú-áⁿ cúú-xi bàrcú té Xímú, te ní xáhaⁿ-gã xii té Xímú-áⁿ sã dánundehe-dé-xi luha-gá xití ndute. Te dátñuni ní ngóo-gá núú bàrcú-áⁿ, te xíáⁿ núcòo-gá ní ngúita-gá dánèhé-gá ñáyiú. ⁴ Te òré ní túhú ní dánèhé ñahá-gã xii-yu, te ní xáhaⁿ-gã xii té Xímú:

—Daquihĩⁿ bàrcú-a xití làgúná mei núú cùnú-gá, te dàquée-ndo ñunu-ndo tñi-ndo chácá —càchí-gã xãhaⁿ-gã xii-dé.

⁵ Te té Xímú ní xáhaⁿ-dè:

—Mèstrú, ni niú ní quide chiúⁿ-ndí te ni ìⁿ chácá ñã túú ní níhĩ-ndí, dico vitna cuendá-ni sã yòhó táuchiuⁿ-n te na dàquée-ndí ñunu-ndí váⁿ —càchí-dé xãhaⁿ-dè xii-gá.

6 Te òré ní dáquèe-güedé ñunu-güedé te súúni vâi chácá ní níhí-güedé, te ta ndátá-nâ ñunu-güedé cuáháⁿ ní cùu. 7 Núu ní quide-güedé ndaha-güedé núu dàva-gá cue tée cùndihí-güedé xixúhuⁿ ingá bàrcú cuèndá quíhíⁿ-güedé chindee ñaha-güedé. Te cue tée-áⁿ ní sáháⁿ-güedé ní chindee tnàha-güedé ní dáchítú-güedé ndi ndúú bàrcú mee-ni chácá, te súúni ní cuu véé núu cuíni-na-xi quée naa-güedé ndihí bàrcú ní cùu. 8 Te sá dúcáⁿ cuíni-xi quée naa bàrcú ní cùu, núu té Xímú, àdi Pelú chi úú ñiù-dé, ní ngúíñi xítí-dé núú Jèsús, te xàhaⁿ-dè:

—Xocuíñi yòhó Jèsús núu ndécú-í-a, chi yúhú cùú-í ñⁿ téé ío ndècu cuéchi-xi —càchí-dé xàhaⁿ-dè xii-gá.

9 Te ducaⁿ ní cáháⁿ-dé chi ní yùhú-dé, te ní cuñúhu-dé ndihí nchaa cue téé ndihí-dé-áⁿ cuèndá sá ío vâi chácá ní níhí-güedé. 10 Te tnàhá té Jàcobó ndihí té Juáa cue déhe té Zebèdú ío ní cuñúhu-güedé, te ñiù-ni cue téé cùndihí té Xímú-áⁿ cùú-güedé tnàhá-güedé. Te Jèsús ní xàhaⁿ-gá xii té Xímú:

—Vá yùhú-n, chi neni vitna quíhíⁿ-n dàcaháⁿ-n ñáyiú cuèndá tuha ñàhá-yu xii-í —càchí-gá xàhaⁿ-gá xii-dé.

11 Te ní quene-güedé ndihí bàrcú ndéé ñuhu yìchí yuhu làgúná-áⁿ. Te òré-áⁿ ní dándõo-güedé nchaandi túhú sá ndécú ndihí-güedé, te ní tuha-güedé Jèsús.

Jèsús quidé tâtna-gá ñⁿ téé tnàhá cuéhé sã dátèhyú nihnu-xi yiqui cùñú-ó

(Mt. 8:1-4; Mr. 1:40-45)

12 Te òré ní quexio Jèsús ñⁿ ñuú, te ní quexio ñⁿ téé cùhú tnàhá-dé cuéhé sã dátèhyú nihnu-xi yiqui cùñú-ó, te òré ní xiní-dé Jèsús te ní sáháⁿ-dé núu ndécú-gã, te ní ngúíñi xítí-dé núú-gã te ní nuu núú-dé

ndàa núu ñúhú te càháⁿ ndàhú-dé, te xàhaⁿ-dè xii-gá:

—Mèstrú, véxi-í càháⁿ ndàhú-í núú-n núu vá cùndèe iní-n càda tâtna ñaha-n xii-í, chi cùtnuní iní-í sá ndácú-n —càchí-dé xàhaⁿ-dè xii-gá.

13 Te Jèsús ní dácáa-gá ndaha-gá ní tendaha ñaha-gá xii-dé, te xàhaⁿ-gã:

—Cuu cada tâtna ñaha-í xii-n, te vitna te ndúha-n —càchí-gá xàhaⁿ-gã xii-dé.

Te òré-ni ní xócuíñi cuéhé tnàhá-dé. 14 Te dátñuní ní xàhaⁿ tucu Jèsús xii-dé:

—Vá yõ ñⁿ cùñaha-n sã ní quide tâtna ñaha-í xii-n, núú ñtú-ni cuáháⁿ cuèndá sá ná quíni ñàhá-dé xii-n sã ní ndúha-n te cuáha-n-dé sá ndúú tãhú Yã Ndiõxí dátñá ní cachí ndíi Moisés cuèndá ná quíni ñáyiú sá ndáa ní ndúha-n —càchí-gá xàhaⁿ-gã xii-dé.

15 Te ducaⁿ ta xíté nuu-gá tnúhu nchaa nàcuáa quide Jèsús, te ío cuéhé ñáyiú ní xóo tacá nchaa núu ní xindecu-gá cuèndá sá cuíni-yu cundedóho-yu tnúhu càháⁿ-gá, ndihí cuèndá sá cuíni-yu cada tâtna ñaha-gã xii-yu. 16 Dico Jèsús ní xóo quee nihni-gá tnuú-yu ní xóo quíhíⁿ-gá núu ñà túú ñáyiú ndècu ní xóo cáháⁿ ndihí-gá Yã Ndiõxí.

Jèsús quidé tâtna-gá ñⁿ téé cùhú ñã cùú-gã candá nihnu

(Mt. 9:1-8; Mr. 2:1-12)

17 Te ñⁿ nduu dànehé-gá ñáyiú, te xínucóo ñⁿ úú cue téé cùu fariséú, ndihí cue téé dàcuaha ñaha xii ñáyiú nchaa tnúhu ní chídó tnùní ndíi Moisés. Te cue téé-áⁿ ní quee-güedé nchaa ñuú yíndèhu distritú Galiléa, ndihí distritú Júdeá, ndihí ñuú Jerusálén, te nchaa ñuú-áⁿ ní quee-güedé cuáháⁿ-güedé núu ndécú-gã. Te Yã Ndiõxí chindèe ñaha-gá quidé tâtna-gá ñáyiú cùhú. 18 Te ñⁿ úú cue téé nchido-güedé ñⁿ téé cùhú ñã cùú-gã candá nihnu ñúhu-dé xító ní quexio ndihí ñaha-güedé, te

cuíní-güedé quíhu ndíhi ñaha-güedé ndéé xítí vehe, sáá-güedé ndéé núú Jèsús ndíhi téé cùhú-án. ¹⁹ Dico ñá túú ní ñíhí-güedé ndéé ichi quíhu-güedé, chi cuendá ío cuéhé ñáiyu ndècu, núú xiáⁿ ní sáá-güedé díquí véhé-án ní caáⁿ-güedé te ndáa díquí véhé-án ní dáquëe-güedé téé cùhú-án, te ñùhu-ni-dé xító ní dáquëe ñaha-güedé tnuú ñáiyu ní sáá ndéé núú Jèsús. ²⁰ Te Jèsús ní cutnùní iní-gá sá ní yuhu ní iní-güedé sàndáá iní ñáhá-güedé xii-gá, núú ní xáhaⁿ-gá xii téé cùhú-án:

—Yòhó téé cùhú, sa ní quide càhnu iní-í nchaa cuéchi-n — cächí-gá xáhaⁿ-gá xii-dé.

²¹ Te cue téé dàcuaha ñaha xii-yu nchaa tñuhu ní chidó tñuní ndíi Moisés ndíhi cue téé cùu fariséú ní sani iní-güedé: “¿Ná cúú tée-a núú càháⁿ cuéhé-dé cuendá Yá Ndiòxí-i? Te vá yòo ìⁿ ndàcu cada cahnu iní nchaa yíca cuéchi ñáiyu, chi ìⁿ ddi díi-ni Yá Ndiòxí quidé càhnu iní-gá”, duha ní sani iní-güedé.

²² Dico Jèsús sa ní cutnùní iní-gá nàcuáa sàni iní-güedé núú ní xáhaⁿ-gá xii-güedé:

—¿Te ná cuendá ducaⁿ sàni iní-ndó-i? ²³ Te sá dúhá ní xáhaⁿ-í xii téé cùhú-a sá cáda càhnu iní-í nchaa yíca cuéchi-dé, te xiáⁿ nchòhó ñá túú cùtnuní iní-ndó núú ndáá càháⁿ-í àdi ñá ndáa. Dico núú cúu-í-dé sá ndácoo-dé, te caca-dé te cutnùní ndáá iní-ndó núú ndáá càháⁿ-í àdi ñá ndáa, chi cundehe núú-ndó nàcuáa cada-í. ²⁴ Te vitna na cáda-í nàcuáa cutnùní iní-ndó nchaa-ndo sá yùhú Téé cùu ñaní tñáhá-ndó nchaa-ndo ndecu ndíhi-í tñuhu ndee iní sá cáda càhnu iní-í nchaa cuéchi ñáiyu ñuyú-a — cächí-gá xáhaⁿ-gá xii-güedé.

Te sáta dúcáⁿ te ní xáhaⁿ-gá xii téé cùhú-án:

—Ndacóo, te ndocani-n xító ñùhu-n véxi-án, te núhú-n véhe-n — cachí-gá xáhaⁿ-gá xii-dé.

²⁵ Te òré-ni-án ní ndúha téé cùhú-án te ní ndacóo-dé, te ní ndocani-dé xító ñùhu-dé ní quexìo-án, te ní natnù-dé ichi ta càháⁿ-dé cuánuhú sá ío càhnu cuu Yá Ndiòxí. ²⁶ Te nchaa ñáiyu xindecu-án ní cuñùhu-yu, te tñáhá-yu ní cachí-yu sá ío càhnu cuu Yá Ndiòxí, te ducaⁿ ío ní yùhú-yu, te ní xitnàhá-yu:

—Vitna ní xiní-ó ìⁿ sá ñá túú tñáhí xiní-ó ní cùu —cachí-yu xitnàhá-yu.

Jèsús cáná-gá té Lèví

(Mt. 9:9-13; Mr. 2:13-17)

²⁷ Te sáta dúcáⁿ ní cuu te ní quee Jèsús xiáⁿ, te ní xiní-gá ìⁿ téé nàni Leví núcco-dé ìⁿ xichí quide cobrá-dé ñáiyu cuendá impuèstú, chi cobradór cúu-dé, te ní xáhaⁿ-gá xii-dé:

—Néhe chitnàhá ñáhá-n xii-í — cächí-gá xáhaⁿ-gá xii-dé.

²⁸ Te té Lèví-án ní ndacuíñí-dé te ní dándoo-dé nchaa sá ndécú ndíhi-dé núú núcco-dé-án, te ní tuha-dé Jèsús.

²⁹ Te sáta dúcáⁿ te té Lèví-án ní quide-dé ìⁿ vico càhnu vehe-dé sá cúu-xí Jèsús, te ní tacá vai cue téé quide chiuⁿ quide-dé, te nchaa-güedé cuánguñu-güedé mèsá ní ngóo-güedé ndíhi dava-gá ñáiyu ní quexìo cuendá caxi-güedé ndíhi-yu. ³⁰ Dico cue téé cùu fariséú ndíhi cue téé dàcuaha ñaha xii-yu nchaa tñuhu ní chidó tñuní ndíi Moisés ní ngúita-güedé xicuéhé-güedé cue téé xica cuu ndíhi-gá, te xáhaⁿ-güedé:

—¿Ná cuendá xéxi-ndó xihí-ndo ndíhi cue téé cuihna iní-xi quide cobrá ñáhá xii ñáiyu cuendá impuèstú, ndíhi nchaa dava-gá cue téé ndècu ichi cuéhé ichi duha-i? — cächí-güedé xáhaⁿ-güedé.

³¹ Te Jèsús ní xáhaⁿ-gá xii-güedé:

—Nchaa ñáiyu ñá túú cùhú chi ñá túú xiní ñuhú-yu ñátátná, dico nchaa ñáiyu cùhú chi xiní ñuhu ñáhá-yu. ³² Te yùhú véxi-í càháⁿ-í ñáiyu cùtnuní iní-xi sá ndécú cuéchi-xi cuendá dàñá-yu nchaa sá

cuèhé sá dúhá quidé-yu, te ñá túú vēxi-í càháⁿ-í ñáiyu cāchí sá ñá túú ndècu cuéchi-xi —cāchí-gá xāhaⁿ-gá xii-güedé.

Cue téé ndūcu tnūhu núú Jèsús cuèndá ñáiyu ñá túú tnàhí ná xéxí āma càháⁿ ndihí-yu Yá Ndiōxí

(Mt. 9:14-17; Mr. 2:18-22)

³³ Te ní xāhaⁿ-güedé xii Jèsús:

—Te āma ñá túú tnàhí ná xéxí cue téé xica cuu ndihí té Juāa càháⁿ ndihí-güedé Yá Ndiōxí, te dū-ni ducaⁿ quide cue téé xica cuu ndihí nchúhú cue téé cūu fariséú. ¿Te ná cuèndá cue téé xica cuu ndihí-n ñá túú dùcaⁿ quide-güedé nūu nchaa-ni nduu xèxi-güedé xihí-güedé quidé-güedé-i? —cāchí-güedé xāhaⁿ-güedé xii-gá.

³⁴ Te Jèsús ní xāhaⁿ-gá xii-güedé:

—Nchòhó xini-ndó sá vā cúú cūñaha-o xii cue ñáiyu ñūhu vico tnāndaha sá vā cúú cāxí-yu ñini ndècu ndihí ñaha téé tnāndaha-áⁿ xii-yu. ³⁵ Dico sáá nduu te vā cūndècu ndihí ñaha-gá téé tnāndaha-áⁿ xii-yu, te dāvá-áⁿ te cahni iní-yu vā cāxí-yu sá ndihú iní-yu —cāchí-gá xāhaⁿ-gá xii-güedé.

³⁶ Te ní cani-gá ñⁿ cuèndú núú ñáiyu nācuáa tecú tnūni-yu tnūhu-gá, te xāhaⁿ-gá:

—Vā yōo ñⁿ dāndée luha dóo sáá ñⁿ dóo sa ní cuu tūhú víhí, chi núu yoo ducaⁿ na càda, te dóo sáá-áⁿ nāndiyi-xi te uuⁿ-gá ndata-xi dóo sá ní cuu tūhú-áⁿ, te luha dóo sáá-áⁿ ñá túú nātaú-xi ndée dóo sá ní cuu tūhú-áⁿ. ³⁷ Te ní vā yōo ñⁿ chihí ndidí sáá xití ñⁿ lamba sa ní cuu tūhú víhí, chi núu yoo ducaⁿ na càda, te ndava lamba sa ní cuu tūhú-áⁿ chi ío níhí yócó ndidí-áⁿ, te cuíta-ni ndidí-áⁿ te cuíta-ni lamba-áⁿ. ³⁸ Núu xíáⁿ xini ñūhu-xi quée ndidí sáá-áⁿ xití ñⁿ lamba saa cuèndá ducaⁿ ñá túú nā cuu cováha-xi. ³⁹ Te ní ñⁿ ñáiyu ñá túú tnàhí iní-yu cohó-yu ndidí sáá, te núu díhna-gá ná còhó-yu ndidí

sá ní quene díhna-gá, chi cāchí-yu sá xihí vāha-gá ndidí sá ní quene díhna-gá-áⁿ dācúxí ndidí sáá —cāchí-gá xāhaⁿ-gá xii-yu.

6

Cue téé xica cuu ndihí Jesús sàhnú-güedé yoco triú nduu ndetátú ñáiyu

(Mt. 12:1-8; Mr. 2:23-28)

¹ Te ñⁿ nduu cūu-xi nduu ndetátú ñáiyu ñūhu Jesús ichi ndihí cue téé xica cuu ndihí-gá, te ta yāha-gá ndihí-güedé ñⁿ xichi núú cáá triú, te ní ngūita-güedé sàhnú-güedé yoco triú-áⁿ te ndihí ndaha-güedé quíⁿ-güedé quée triú tá xèxi-güedé cuáháⁿ. ² Te ñⁿ úu cue téé cūu fariséú ní xāhaⁿ-güedé xii cue téé xica cuu ndihí-gá:

—¿Te ná cuèndá ducaⁿ quide nchòhó ñⁿ sá ñá túú tau-ó càda-o vitna cuu-xi nduu ndetátú-ó-i? —cāchí-güedé xāhaⁿ-güedé.

³ Te Jèsús ní xāhaⁿ-gá xii-güedé:

—¿Te náa ñá túú dācuaha-ndo núú tutú Yá Ndiōxí núú càháⁿ-xi nācuáa ní quide ndí Dāvíí cūtnáhá ní xihí ndí docó ndihí cue téé ní xica cuu ndihí ndí-áⁿ? ⁴ Chi ní quíhu ndí vehe Yá Ndiōxí, te ní queheⁿ ndí páá ní cuu í ndécú-áⁿ ní dācāhñu ndí cue téé xica cuu ndihí ndí ní xexi ndí ndihí-güedé, te ñá túú tau ndí sá dúcáⁿ càda ndí ní cūu, chi mee-ni cuè dūtú tau-güedé caxi-güedé páa-áⁿ ní cūu —cāchí-gá xāhaⁿ-gá xii-güedé.

⁵ Te ní xāhaⁿ tūcu-gá:

—Te yúhú Téé cūu ñani tnáhá-ndó nchaa-ndo, tnàhá-í ndécú ndihí-í tnūhu ndee iní sá cūu-í nchaa ñáiyu nācuáa cadá-yu nduu ndetátú-ó-á —cāchí-gá xāhaⁿ-gá xii-güedé.

Ñⁿ téé ní yichí ñⁿ xio ndaha-xi

(Mt. 12:9-14; Mr. 3:1-6)

⁶ Te ingá nduu dū-ni nduu ndetátú ñáiyu cuānguíhu Jesús xití veñúhu dānehé-gá ñáiyu. Te xíáⁿ ndécú ñⁿ téé cūhú ní yichí nihnu ñⁿ xio ndaha cūha-dé. ⁷ Te cue téé

dàcuaha ñaha xii ñáyiú nchaa tnúhu ní chídó tnùnì ndíi Moisés, ndíhi cue tée cùu fariséú ndéhé-güedé nùu cada tátna ñaha Jèsús xii tée cùhú-áⁿ nduu ndetátú-güedé-áⁿ cuèndá níhí-güedé nàcuáa cada-güedé cacáⁿ cuéchi-güedé cuèndá-gá. ⁸ Dico Jèsús sa ní cutnùnì iní-gá nàcuáa sàni iní-güedé, te ní xáhaⁿ-gá xii tée cùhú ndaha-xi-áⁿ:

—Ndacuiñí te ngúnutnii-n cuádava tnuú-ndí-a —càchí-gá xáhaⁿ-gá xii-dé.

Te tée-áⁿ ñí ndacuiñí-dé te ní ngúnutnii-dé cuádava tnuú-güedé ndíhi-gá. ⁹ Te dàtnùnì Jèsús ní xicáⁿ tnúhú-gá núu cuè ñáyiú xíndecu-áⁿ, te xáhaⁿ-gá xii-yu:

—Cuini-í cachí tnúhu-ndo ñá cúú sá váha cada-o ndúu ndetátú-ó. ¿Híⁿ chiúⁿ váha àdi híⁿ chiúⁿ cuehé, sá cádá tátna-o ñáyiú cùhú àdi sá cáhni-ó-yu? —càchí-gá xáhaⁿ-gá xii-yu.

¹⁰ Te dàtnùnì ní ndacoto-gá núu-yu nchaá-yu, te ní xáhaⁿ-gá xii tée cùhú ndaha-xi-áⁿ:

—Ndocani ndaha-n —càchí-gá xáhaⁿ-gá xii-dé.

Te ní ndocani-dé ndaha-dé, te òré-ni ní ndúha. ¹¹ Te cue tée xíndecu-áⁿ súmí ñí cudééⁿ-güedé sá dúcáⁿ ñí quide tátna Jèsús tée cùhú-áⁿ, te ní ngúíta-güedé ndátnúhu-güedé nùu nása cada ñaha-güedé xii-gá.

Jèsús caxi-gá úxúú tnàhá cue tée dacuáha ñaha xii ñáyiú tnúhu-gá

(Mt. 10:1-4; Mr. 3:13-19)

¹² Te sáta dúcáⁿ ñí cuu te ní xica Jèsús cuáháⁿ-gá xiti yucu cuèndá yacáⁿ cáháⁿ ndíhi-gá Tátá-gá Dútú Ndióxi, te ni niú ní cáháⁿ ndíhi ñaha-gá. ¹³ Te sáta ní tundaá, te ní cana-gá nchaa cue tée xica cuu ndíhi-gá, te ní caxi-gá úxúú tnàhá-güedé, te cue tée-áⁿ ñí xáhaⁿ-gá sá díú-güedé cuu-güedé cue tée quíhíⁿ cáháⁿ tnúhu-gá núu ñáyiú. ¹⁴ Te duha xínani ndi úxúú

cue tée-áⁿ. Té Xímú, àdi Pelú chi úú díu-dé, ndíhi ñani-dé té Ndríxi, ndíhi té Jácobó, ndíhi té Juáa, ndíhi té Lipé, ndíhi té Bartolomé, ¹⁵ ndíhi té Mäteú, ndíhi té Mǎxi, ndíhi té Jácobó déhe té Alféu, ndíhi ingá té Xímú té ní cundihi cue tée cananistá, ¹⁶ ndíhi té Júdás ñani té Jácobó, ndíhi té Júdás Iscarioté té ní sáá nduu ñí sáha cuèndá ñáhá xii Jèsús núu cuè tée cùu úhú iní ñáhá xii-gá, duha xínani cuè tée ní caxi Jèsús ní xica cuu ndíhi-gá.

Jèsús dánèhé-gá cuéhé víhi ñáyiú
(Mt. 4:23-25)

¹⁷ Te Jèsús cuánuu-gá yucu núu ñí sáá-gá-áⁿ, te ní ngava-gá híⁿ núu ndáa ndíhi cue tée xica cuu ndíhi-gá, te xiáⁿ ñí ngúnutnii-gá. Te xiáⁿ ndécú dàva-gá cue tée xica cuu ndíhi-gá ndíhi vai ñáyiú ndètu ñahá-yu xii-gá, te ñáyiú-áⁿ vèxi-yu nchaa ñúú cáá dístrítú Júdeá, ndíhi ñúú Jerusálén, te ndècu ñáyiú vèxi ndaa yuhu lamár yatni ñúú Tirú, ndíhi ñúú Sidón. Te nchaa ñáyiú-áⁿ ñí quexió-yu cuini-yu cundedóho-yu nchaa tnúhu cáháⁿ Jèsús, ndíhi cuèndá sá cuini-yu ndúha-yu nchaa cuéhé tnàhá-yu. ¹⁸ Te tnàhá ñáyiú yíhi ñaha espíritú cundihi yucu ñávaha. ¹⁹ Te nchaá-yu cuini-yu dacáa-yu ndahá-yu tendahá-yu Jèsús ní cùu cuèndá sá ñí níhi-yu tnúhu sá ndècu ndíhi-gá tnúhu ndee iní quidé tátna-gá nchaa ñáyiú cùhú.

Cuèndá ñáyiú ío váha táhú-xi
(Mt. 5:1-12)

²⁰ Te Jèsús ní ndacoto-gá núu cuè tée xica cuu ndíhi-gá, te ní xáhaⁿ-gá: —Váha táhú nchaa nchòhó cue ñáyiú ndàhú, chi nduu táhú-ndo cùndecu-ndo núu táxi tnùnì Yá Ndióxi.

²¹ Váha táhú nchaa nchòhó ñáyiú ío cuini cundedóho tnúhu Yá Ndióxi chi ío víi ío váha cuu iní-ndó.

Váha táhú nchaa nchòhó ñáyiú ndàhyú sá ndíhú iní-ndó, chi sáa

nduu te cudíí iní-ndó nì caa ni quíhíⁿ.

²² Váha táhú nchaa nchòhó ñáiyu na cùu úhú iní ñáhá tnàha ñáiyu-xi, chi sáá nduu te vá dáñá-gã-yu quíhu-ndo vèñúhu, te cúcuèhé ñáhã-yu xii-ndo, te cachí-yu sá ñà díú ñáiyu váha cùu-ndo, te ducaⁿ càda ñahá-yu xii-ndo sã cuendá yúhú Tée cùu ñaní tnáhá-ndó nchàa-ndo. ²³ Te òré ducaⁿ na càda ñahá-yu xii-ndo te cudíí víhí-ní iní-ndó cùndecu-ndo, chi sáá nduu ndùu táhú-ndó sã ïo váha càa ndecu andu cundecu ndíhi-ndo nduu na nasaá-ndó yacáⁿ cundecu-ndo, chi ñu-ndu ducaⁿ nì xóo cada ñaha cue ñaní tnáhã-yu xii cue tée ní xóo cáháⁿ tnúhu Yá Ndióxi ní xíndecu ndéé sanaha.

²⁴ Te ndàhú ní cuu nchaa ñáiyu cuica ñà túú sàndáá iní ñáhá xii Yá Ndióxi, chi vitna ío váha ndècú-yu, dico sáá nduu te nduu ndàhú-yu.

²⁵ Te ndàhú ní cuu tucu nchaa ñáiyu ñã túú tnàhí ná cúmãní xii-xi vitna, chi sáá nduu quini-yu tnúndòho tnúhu ndàhú.

Te ndàhú ní cuu nchaa ñáiyu cùdíí iní-xi ndècu ichi cuehé ichi duha vitna, chi sáá nduu te ndáhyú-yu sá ndíhú iní-yu.

²⁶ Te ndàhú ní cuu nchaa ñáiyu na càháⁿ váha dava-gã ñáiyu cuendá-xi, chi ducaⁿ nì xóo cáháⁿ váha-yu cuendá nchaa cue tée ní xóo dandàhú ñáhá xii ñáiyu ndéé sanaha, chi ní cachí-güedé sá càháⁿ-güedé tnúhu Yá Ndióxi te ñã ndáá —càchí-gã xãhaⁿ-gã xii-güedé.

Cuu iní-ó nchàa ñáiyu cùu úhú iní ñáhá xii-ó

(Mt. 5:38-48; 7:12)

²⁷ Te Jèsús ní xáhaⁿ-gã xii nchaa ñáiyu xíndecu-áⁿ:

—Nchaa nchòhó ñáiyu xíndedóho ñaha càchí tnúhu-í xii-ndo sã cúú iní-ndó ñáiyu cùu úhú iní ñáhá xii-ndo, te cada-ndo sã váha sã cúú-xí-yu cuei nándí sá ná cádá ñahá-yu xii-ndo. ²⁸ Te cácáⁿ táhú-ndó núú Yá Ndióxi

cuendá ñáiyu càháⁿ úhú ñáhá xii-ndo, ndíhi cuendá ñáiyu tée ñaha cuechi neñúú xii-ndo. ²⁹ Te núu ní canihá-yu xii-ndo ñⁿ xito te cuini tucú-yu canihá-yu, te dañã-ndo na cànihá-yu, àdi núu na quèndeé-yu dóo ndíxí ndòdo-ndo, ndíhi dúhnú-ndó, te dañã-ndo na cànehé-yu quíhíⁿ. ³⁰ Te núu xicáⁿ-yu ñⁿ sá nándíhi-yu núu-ndó te cuañaha-ndo, àdi quèndeé-yu ñⁿ ndachíu-ndo, te vá nándacáⁿ-ndó núú-yu. ³¹ Te nchaa sá váha cuini-ndó càda tnaha ñáiyu-ndo, te cada-ndo tnáhá-ndó ndíhi-yu.

³² Chi núu nchòhó ná cùu iní-ndó mée-ni ñáiyu cùu iní ñáhá xii-ndo, te vá càchí-ndó sã ïo váha quide-ndo, chi tnáhá nchaa ñáiyu ndècu ichi cuehé ichi duha ducaⁿ xíquidé-yu. ³³ Àdi mee-ni ñáiyu quide ñaha sá váha xii-ndo quide váha-ndó-yu, te vá càchí-ndó sã ïo váha quide-ndo, chi tnáhá nchaa ñáiyu ndècu ichi cuehé ichi duha ducaⁿ xíquidé-yu. ³⁴ Àdi mee-ni ñáiyu sàni iní-ndó nàcoto ñaha xii-ndo cuañaha-ndo ñⁿ sá xicáⁿ-yu núu-ndó, te vá cáni iní-ndó sã ïo quide váha-ndo, chi tnáhá ñáiyu ndècu ichi cuehé ichi duha dàsaⁿ nuú-yu ñⁿ sá néhé váha-yu, te ndètu cahnu-ná-yu nacoto ñaha ñáiyu ní sáha núu-yu-áⁿ. ³⁵ Dico nchòhó xini ñúhu-xi cuu iní-ndó ñáiyu cùu úhú iní ñáhá xii-ndo, te cada-ndo sã váha sá cúú-xí-yu, te cuañaha núu-ndo ñⁿ sá ná ndíhi-yu te núu xicáⁿ-yu núu-ndó, te vá cùndètu-ndo nacoto ñahá-yu xii-ndo. Te ducaⁿ te ío-gã cuehé níhí-ndó cùndecu ndíhi-ndo, te cuu ndisa-ndo dèhe Dútú Ndióxi, chi ío càhnu iní-gã sá cúú-xí nchàa ñáiyu ñã túú ndacáⁿ táhú núú-gã cuendá nchaa sá váha quide-gã, ndíhi sá cúú-xí nchàa ñáiyu ndècu ichi cuehé ichi duha. ³⁶ Te cunduu càhnu iní nchòhó tuçu dàtná càhnu iní Tãtã-ó Dútú Ndióxi.

Vá càháⁿ cuehé-ó cuendá tnàha

ñáiyu-o

(Mt. 7:1-5)

³⁷ Te vá càháⁿ cuèhé-ndó cuèndá sá quidé tnàha ñáiyu-ndo, te ducaⁿ te Yá Ndiöxí ñá túú nà tnúhu cùñaha-gã xii-ndo. Te vá cùñaha-ndo xii ñáiyu sá quihíⁿ-yu ìⁿ xichi núú ùhú núú ndàhú ndohó-yu cuèndá nchaa sá ñà túú vâha quidé-yu, te ducaⁿ te Yá Ndiöxí vá cùñaha-gã xii-ndo sá tnàhá-ndó quihíⁿ-ndó ìⁿ xichi núú ùhú núú ndàhú ndoho-ndo. Te chí cáda càhnu iní nchaa sá quidé-yu, te ducaⁿ te Yá Ndiöxí cada càhnu iní ñáhá-gã xii-ndo tùcu. ³⁸ Te chí cuñaha xii ñáiyu núu ná cúú sá xíní ñùhú-yu, te dàtná chitu ìⁿ yicá súúni xidó coyo-ná, ducaⁿ tàxi Yá Ndiöxí xii-ndo. Te nánicuáa na càda-ndo cada vâha-ndo sá cúú-xí tnàha ñáiyu-ndo, te ñiu-ni ducaⁿ càda ñaha Yá Ndiöxí xii-ndo —càchí Jësús xâhaⁿ-gã xii-yu.

³⁹ Te dàtnùní ní cani-gã ìⁿ cuèndú núú-yu nàcuáa tecú tnùnì-yu tnúhu-gã, te xâhaⁿ-gã:

—Ìⁿ tée cuáá chi ñá ndácú-dě cuita nehe-dé ingá tée cuáá, chi núu ducaⁿ na càda-güedé te ndi ndùú-güedé ngaunihnu-güedé déhvá. ⁴⁰ Te ni ìⁿ landú yíhí scuèlá ñá túú cùnuu-gã-güexi dàcúúxí mèstrú-güexi, te ndéé núu na cùtúha vâha-güexi, te dàtnùní nùtnahá-güexi tée dànehé ñáhá xii-güexi.

⁴¹ Te na càchí tnúhu-í xii-ndo sá nchàa cuéchi quide ñáiyu cùu-xi datná ìⁿ mihi líhli. ¿Te ná cuèndá ndéhé-ndó ìⁿ sá ñà túú vâha quide tnaha ñáiyu-ndo, te mee-ndo vihi-gã quidé-ndó-í? Te sá dúcáⁿ quide-ndo te cada iní-ndó sá ndéhé-ndó dàtná ìⁿ mihi líhli ñùhu núú tnàha ñáiyu-ndo, te mee-ndo ñùhu ìⁿ mihi cahnu-gã núú-ndó. ⁴² Te núu na nàcanu ichi-ndo tnaha ñáiyu-ndo cuèndá sá ñà túú quide vâha-yu ndécú-yu te mee-ndo vihi-gã quidé-ndó ñá, te cada iní-ndó sá xâhaⁿ-ndo xii-yu sá

nátava-ndo mihi líhli ñùhu núú-yu, te mihi càhnu ñùhu núú méé-ndó ñà túú quide cuèndá-ndó. ¿Te sá dúcáⁿ quide-ndo te ío dândahú-ndó mèe-ndo sá quidé ndáá-ndó te ñá ndáá sá quidé ndáá-ndó! Te xini ñùhu-xi díhna-gã daña-ndo nchàa sá ñà túú vâha quide-ndo, te dàtnùní ducaⁿ te cutnùní vâha iní-ndó nàcuáa nàcanu ichi-ndo tnàha ñáiyu-ndo.

Ndi dîíⁿ núú yutnu xini-ó nã yutnu cùu-xi cuèndá sá sãvidí-xi
(Mt. 7:17-20; 12:34-35)

⁴³ Te ñá túú ni ìⁿ yutnu vâha te quiní-ó cùuⁿ sãvidí sá ñà túú vâha, te ni ìⁿ yutnu sá ñà túú vâha, te quiní-ó cùuⁿ sãvidí vâha, chi mee-ni sãvidí sá ñà túú vâha cùuⁿ. ⁴⁴ Te ndi dîíⁿ núú yutnu xini-ó nã yutnu cùu-xi cuèndá sá sãvidí-xi, chi ñá túú xini-ó cùuⁿ ngúxí ìⁿ tnu iñu, te ni ñà túú xini-ó cùuⁿ ndéhé yoho yâha stilé díquí ìⁿ yoho yâha cutexínu. ⁴⁵ Te nchaa ñáiyu vâha iní-xi càháⁿ-yu tnúhu vâha, chi ñiu-ni tnúhu vâha tnàhí-án ñùhú iní-yu, te nchaa ñáiyu ñá túú vâha iní-xi càháⁿ cuèhé-yu, chi ñiu-ni tnúhu cuèhé tnàhí-án ñùhú iní-yu, chi nchaa sá ñùhú iní-yu te xíáⁿ càháⁿ-yu.

Ìⁿ vehe ndècu cimientú-xi ndihí ìⁿ vehe ñá túú cimientú-xi
(Mt. 7:24-27)

⁴⁶ ¿Te ná cuèndá càchí-ndó sá yùhú cùú-í Yaá cúú Xítoho-ndó te ñá túú quide-ndo nchaa nacúáa càháⁿ-í-í? ⁴⁷ Te na càchí tnúhu-í xii-ndo cuèndá ñáiyu tûha ñaha xii-í, chi ñáiyu-án sácündedóho-yu nchaa tnúhu càháⁿ-í te tníⁿ-yu. ⁴⁸ Te ñáiyu-án cúú-yu dàtná ìⁿ tée ní dácáá ìⁿ vehe, chi tée-án díhna-gã ní xete-dé ndéé ní tnahá-dé yúú cáxíⁿ te dàtnùní ní tava-dé cimientú-xi, te òré ní cuuⁿ dáú, te ní ndee ndute ñùhu, te ní ndacáⁿ-xi ndéé núú cáá vèhe-án, dico ñá túú ní ndàcu-xi cuidu-xi, te ducaⁿ chi tée ní dácáá vèhe-án ní tava-dé cimientú-xi núú

yúú cáxiⁿ. Duha sátnahá-xi cùu nchaa ñáyiú sácúndedóho tnúhu cáhán-í te tñí-yu. ⁴⁹ Te ñáyiú sácúndedóho tnúhu cáhán-í te ñá túú tñí-yu, ñáyiú-áⁿ cúú-yu dàtná ìⁿ téé ní dácáá ìⁿ vehe, te ñá túú ní tàva-dé cimientú-xi, te òré ní cuuⁿ dáú, te ní ndee ndute ñuhu, te ní ndacáⁿ-xi ndéé núú cáá vehe-áⁿ, te í-ni ní xido-xi vehe-áⁿ cuèndá sá ñá túú ní quène cimientú-xi. Duha sátnahá-xi cùu nchaa ñáyiú sácúndedóho tnúhu-í te ñá túú cuúni-yu tñí-yu —càchí-gá xáhaⁿ-gá xii-yu.

7

Jèsús quidé tātna-gá ìⁿ téé xinu cuechi núú ìⁿ téé cùu capitáⁿ
(Mt. 8:5-13)

¹ Te sáta ní yáha ní cáhán Jèsús ndíhi ñáyiú, te cuáhán-gá ñúú Capèrnaúm. ² Te yàcáⁿ ndécú ìⁿ téé cùu capitáⁿ, te cùhú ìⁿ téé xinu cuechi núú-dé téé ío-gá cúú iní-dé, te sa ndècu-ná-dé sá cúú-dé. ³ Te òré ní níhi téé cùu capitáⁿ-áⁿ tnúhu cuèndá Jèsús, te ní tendaha-dé ìⁿ úú cue téé cùu sacuéhé núú ñáyiú isràél cuáhán-güedé cáhán ndàhú-güedé núú-gá núu vá cündèe iní-gá quíhíⁿ-gá cada tātna-gá téé xinu cuechi núú-dé-áⁿ. ⁴ Te ní quexìo-güedé núú ndécú Jèsús, te ní ngüita-güedé cáhán ndàhú víhí-güedé núú-gá, te xáhaⁿ-güedé:

—Téé cùu capitáⁿ ní cachí-dé véxi-ndí núu vá cündèe iní-n quíhíⁿ-n càda tātna-n ìⁿ téé xinu cuechi núú-dé chi cùhú-dé, te tàú ndísa-n càda-n ñacuáa cáhán capitáⁿ-áⁿ, ⁵ chi téé-áⁿ ío cùu iní ñáhá-dé xii nchaa nchúhú ñáyiú isràél te díu-dé ní táuchíúⁿ-dè ní sáá veñuhu-ndí —càchí-güedé xáhaⁿ-güedé xii-gá.

⁶ Te sáta dúcáⁿ te Jèsús ní xica-gá cuáhán-gá ndíhi-güedé, te òré tá cùyatni-gá vehe núú ndécú téé cùhú-áⁿ cuáhán, te téé cùu capitáⁿ-áⁿ

ní xáhaⁿ-dè xii ìⁿ úú cue téé cáhán ndíhi-dé:

—Quíhíⁿ-ndó cūñaha-ndo xii Yaá cúú Mèstrú sá càchí-í sá ñà túú nã cani iní-gá, chi ñá túú tàú-í sá quíhu-gá ndéé xití vehe-í, ⁷ chi ní sá cùnú ndúcú mèe-í-gá ñá túú ní cùyí-í. Núu xiáⁿ cūñaha-ndo xii-gá sá ná cáhán-ni-gá sá ndúha téé xinu cuechi núú-í-a te ndúha-dé, ⁸ Chi yúhú ndécú cue téé tàxi tnuní ñáhá xii-í, te ducaⁿ yúhú tucu ndècu cue sandadú táxi tnuní-í. Te òré xáhaⁿ-í xii ìⁿ-dé quíhíⁿ-dé ìⁿ chiuⁿ te cuáhán-dé, te òré xáhaⁿ-í xii ingá-dé quixi-dé te véxi-dé, te òré xáhaⁿ-í xii téé xinu cuechi núú-í cada-dé ìⁿ chiuⁿ te quide-dé. Duha càchí-í cūñaha-ndo xii-gá —càchí-dé xáhaⁿ-dè xii cue téé cáhán ndíhi-dé-áⁿ.

⁹ Te sáta dúcáⁿ ní xáhaⁿ-güedé xii Jèsús, te ní cuñúhu-gá nchaa tnúhu ní cáhán téé cùu capitáⁿ-áⁿ, te ní nchócótó-gá núú nchaa ñáyiú nchícúⁿ ñáhá xii-gá cuáhán, te ní xáhaⁿ-gá:

—Na càchí tnúhu ndáá-í xii-ndo sá vātá quini-gá-í ní ìⁿ ñáyiú isràél, ñáyiú ío vaha sàndáá iní-xi Yá Ndiòxi dàtná sàndáá iní ñáhá tée-áⁿ xii-gá —càchí-gá xáhaⁿ-gá xii-yu.

¹⁰ Te òré ní ndexìo cue téé nèhe tnúhu-áⁿ ní sáhán núú Jèsús, te sa ní ndúha téé cùhú-áⁿ.

Jèsús dándòto-gá déhe ìⁿ ñaha quèé

¹¹ Te sáta dúcáⁿ ní cuu te ní xica Jèsús cuáhán-gá ìⁿ ñúú nání Nàin, ndíhi cue téé xica cuu ndíhi-gá, ndíhi vài ñáyiú. ¹² Te òré ní sáá-gá yuhu ñúú-áⁿ, te ní xiní-gá nchídó-güedé ìⁿ ndíyi cuáhán chindúxi ñaha-güedé, te ndíyi-áⁿ cúú déhe ìⁿ ñaha quèé, te ìⁿndí ducaⁿ-ni déhe-aⁿ ndècu ní cuu te ní xihí-dé. Te ío cuéhé ñáyiú cuáhán chindúxi ñaha. ¹³ Te òré ní xiní ñáhá Jèsús xii-aⁿ ndàhyú-aⁿ te ní cundáhú iní ñáhá-gá, te ní xáhaⁿ-gá: —Vá ndàhyú-n —càchí-gá xáhaⁿ-gá xii-aⁿ.

14 Te ní dáyátní-gã càjá ñúhú ndíyí-án te ní dácàá-gá ndaha-gá te ní tendaha-gã càjá-án, te ní ngüñí cue téé nchìdo ñaha-án. Te ní xáhaⁿ-gã xii ndíyí-án:

—Tée cuechi, yúhú càchí-í sá ndácòo-n —càchí-gã xáhaⁿ-gã xii ndíyí-án.

15 Te téé ní xíhí-án nǐ nucúnucòo-dé te ní ngüita-dé càháⁿ-dé, te Jèsús ní nacuáha cuèndá ñáhá-gã xii-dé ndaha nǎná-dě. 16 Te sá dúcáⁿ nǐ quide Jèsús ní xiní-yu te ío ní yùhú-yu, te ní xítñàhá-yu:

—Ío càhnu cuu Yá Ndiòxí chi ìⁿ téé càháⁿ tnúhu-gá ní quexìo núú ndécú-ó —càchí-yu xítñàhá-yu.

Te ní xítñàha tucú-yu:

—Yá Ndiòxí véxi-gã chindee ñàha-gã xii nchaa nchoo ñáyiu cùu cuendá-gã —càchí-yu xítñàhá-yu.

17 Te nchaa ñúu distritú Jùdeá, ndihi dava-gã ñúu ní níhí-yu tnúhu nàcuáa ní quide Jèsús.

Cue téé ní tendaha té Juàá cuáhán núú ndécú Jèsús

(Mt. 11:2-19)

18 Te cue téé xìca cuu ndihi té Juàá ní xáhaⁿ-güedé xii-dé nchaa sá nǐ quide-gã, núu ní cana-dé úú tnàhá-güedé 19 cuèndá cúñaha-dě quíhíⁿ-güedé nducu tnúhu-güedé núú Jèsús, te núu sá díú-gã cúú-gã Crístú Yaa ní tendaha Yá Ndiòxí véxi ñuyíú-a àdi sá cùndètu nahi-ni-güedé mei Yàá-án. 20 Te òré ní quexìo cue téé ní tendaha tè Juàá núú ndécú Jèsús, te xáhaⁿ-güedé xii-gã:

—Té Juàá téé dàcuandute ñaha xii ñáyiu ní tendaha ñàha-dé xii-ndí véxi-ndí cácaⁿ tnúhú-ndí núú-n, núu sá díú-n cùu Crístú Yaa quixi ñuyíú-a, àdi sá cùndètu-ndí mei Crístú càchí-dé —càchí-güedé xáhaⁿ-güedé xii-gã.

21 Te mei òré ní quexìo-güedé-án nǐ quide tátna Jèsús vai ñáyiu cùhú, te davá-yu càhú víhí tnàhá-yu,

te ndí dííⁿ ndí dííⁿ núú cuèhé tnàhá-yu ìⁿ ìⁿ-yu, te cue ñáyiu yíhi ñaha espíritú cùndíhi yucu ñávàha ní queñuhu-gã espíritú-án yiqui cùñú-yu, te ío vai ñáyiu cuáá ní nacaáⁿ-gã núú-yu. 22 Te Jèsús ní xáhaⁿ-gã xii-güedé:

—Chí cuánùhú te cani-ndo cuèndú núú tè Juàá nchaa sá nǐ xiní-ndó quide-í, ndihi nchaa nàcuáa ndùu tnúhu ní cáháⁿ-í ní xíndedóho-ndo. Te cúñaha-ndo xii-dé sá quidé tátna-í núú cue ñáyiu cuáá, te quide tátna-í cue ñáyiu yacua, ndihi cue ñáyiu tnàhá cuèhé sá dátèhyú nihnu-xi yiqui cùñú-yu, ndihi cue ñáyiu doho, nchaa ñáyiu-án quide tátna-í te ndúha-yu, te ndéé cue ñáyiu sa ní xíhí dándòto-í cúñaha-ndo xii-dé, te cúñaha tùcu-ndo xii-dé sá ndécúu-í dánèhé-í nchaa ñáyiu ndàhú tnúhu sá sánú ìchi ñaha xii-yu nàcuáa naníhí tǎhú-yu. 23 Te cúñaha tùcu-ndo xii-dé sá ío váha tǎhú nchaa ñáyiu ñá túú quide sáá iní nchaa tnúhu càháⁿ-í, ùha cúñaha-ndo xii-dé —càchí-gã xáhaⁿ-gã xii-güedé.

24 Te sátá nǐ yáha-güedé cuánuhú-güedé, te ní ngüita Jèsús ní cáháⁿ-gã núú ñáyiu cuèndá té Juàá, te xáhaⁿ-gã xii-yu:

—Nchòhó ní sándéhé-ndó ìⁿ téé ndécú xití yucu, te téé-án ñà túú sàni ìⁿ sàni úú iní-dé, chi ñá túú quide-dé dàtná quidé nchaa ité náhnú cuáhán-xi ùha cuáhán-xi dácáⁿ òré quèné tǎchí. 25 Te ní ñà túú ní sándéhé-ndó ìⁿ téé nihnu dóó vǎha dóó vii càa. Te nchòhó xíní-ndó sá ñáyiu sàcúhnu dóó vǎha dóó vii càa ñá túú nǎ cùmǎní xii-yu, te nchaa ñáyiu-án ndécú-yu vehe cue téé cùnuu yindaha ñaha xii ñáyiu. 26 Dico nchòhó chi ní sándéhé-ndó ìⁿ téé càháⁿ tnúhu Yá Ndiòxí. Te ndáá sá díú tèe càháⁿ tnúhu-gã cúú-dé dico cùnuu-gã-dé dàcúxí dǎva-gã cue téé càháⁿ tnúhu-gã. 27 Te diu cuèndá té Juàá-án càháⁿ-xi núú tütú Yá Ndiòxí

nàcuáa ní xáhaⁿ-gã xii Crístú, te duha ní xáhaⁿ-gã:

Tendaha-í ìⁿ tée cáháⁿ tnúhu-í codonúu-dé núú-n cuèndá dàtúha-dé ñáyiú cuèndá quíndáá iní-yu tnúhu-n.

Duha ní xáhaⁿ-gã, te ducaⁿ nǐ ngódó tnúní núú tütú-gá. ²⁸ Te na cächí tnúhu-í xii-ndo sã ñi ìⁿ cue tée ñuyú-a ñá túú cùnūu-güedé dàtná cùnūu té Juáá tée dàcuandute ñaha xii ñáyiú. Te nchaa ñáyiú sa ta ndíhu ndaha ñaha Yá Ndiöxí vitna cuáháⁿ cùnūu-gá-ni tucú-yu dàcúxí té Juáá cuéi cùu-yu ñáyiú ñá túú cùnūu dacúxí dàva-gá ñáyiú yìndaha-gá —cächí Jèsús xáhaⁿ-gã xii-yu.

²⁹ Te sá dúcáⁿ nǐ cáháⁿ Jèsús, núu nchaa ñáyiú ní dácúandute té Juáá ní cachí-yu sá ïo váha quide Yá Ndiöxí, te ñi-ni ducaⁿ nǐ cáháⁿ cue tée cuihna iní-xi quide cobrá ñáhá xii ñáyiú cuèndá impuèstú, cue tée ní dácúandute-dé. ³⁰ Dico cue tée cùu fariséú, ndíhi cue tée dàcuaha ñaha xii ñáyiú nchaa tnúhu ní chidó tnùní ndíi Moisés, cue tée ñá túú ní dàcuandute té Juáá ñá túú ní tnàhá iní-güedé cada-güedé nchaa sá váha cuíni Yá Ndiöxí. ³¹ Te Xítoho Jesu-crístú ní xáhaⁿ-gã xii-yu:

—Na cächí tnúhu-í xii-ndo nàcuáa sãtnahá-xi cùu ñáyiú ndècu vitna. ³² Chi ñáyiú-áⁿ cùu-yu dàtná cue landú sácóo núú yáhu dàdiqui-güexi te níhi cáháⁿ-güexi, te xítnàha-güexi: “Ní túú-ndí yaá ndíhi vlu te ñá túú ní cuíni-ndó càta-ndo. Te ïo yica iní ní xita yuhu-ndí te ñá túú ní ndáhyú-ndó”, cächí-güexi xítnàha-güexi. Te ducaⁿ sãtnahá-xi cùu ñáyiú ndècu vitna. ³³ Te té Juáá tée ní xóo dacuandute ñaha xii ñáyiú ïo ndàhú ní xóo caxi-dé, te ñi ñá túú ní xóo coho-dé ndudí ndéhé yoho yàha stilé sá sá ní nduu-xi ndidí, te ní cachí-ndó sã ní xíndecu ndíhi-dé espíritú cündíhi yucu ñávàha. ³⁴ Te sáta nǐ quexio yúhú Tée cùu ñani tnàhá-ndó

nchaa-ndo, te xèxi-í xìhi-í ndècù-í te cächí-ndó sã cùu-í tée xèxi vihi te xìhi vihi-í. Te cächí tucu-ndo sã cùu-í tée xica cuu ndíhi cue tée cuihna iní-xi quide cobrá ñáhá xii ñáyiú cuèndá impuèstú, ndíhi nchaa dava-gá cue tée ndècu ichi cuehé ichi duha, duha cächí-ndó. ³⁵ Te ñáyiú ní tnàhá tnúhu ndíhi Yá Ndiöxí, ñáyiú-áⁿ quidè-yu nàcuáa cutnùní sá mée-gã ïo ndècu ndíhi-gá sá xini tnùní-gá —cächí-gá xáhaⁿ-gã xii-yu.

Jèsús ndècu-gã vehe ìⁿ tée cùu fariséú tée nani Xímú

³⁶ Te ìⁿ tée cùu fariséú ní cáháⁿ-dé Jèsús vehe-dé caxi-gá, te òré ní quexio-gá te cuánguihu-gá mèsá. ³⁷ Te xiáⁿ núcõo-gá ní sáá ìⁿ ñadìhí te ñi-ni ñaha ñuú-áⁿ cùu-áⁿ, te ndècu-aⁿ ichi díi iní, te sá ñi níhi-aⁿ tnúhu sá cuängaxi Jèsús vehe tée cùu fariséú-áⁿ, núu nèhe-aⁿ ìⁿ yoó chitu àcítí sàháⁿ tnámí. ³⁸ Te ní ngóo-aⁿ ìⁿ xio díni Jesús, te ní ngüita-aⁿ ndàhyú-aⁿ te ndíhi ndute núu-aⁿ ní naquete-aⁿ sàhá-gã. Te dàtnùní ní nadayichí-aⁿ ndíhi idi díqui-aⁿ, te ní teyuhu-aⁿ sàhá-gã, te ní chíhi ñaha-aⁿ àcítí sàháⁿ tnámí-áⁿ. ³⁹ Te sá dúcáⁿ nǐ quide-aⁿ ní xini tée cùu fariséú tée ní cáháⁿ ñáhá xii-gá-áⁿ núu ní sani iní-dé: “Te núu dicó ndisa tée càháⁿ tnúhu Yá Ndiöxí cùu tée-a ña, te sa cutnùní iní-dé yoo cùu ñaha tnàndéé ñáhá xii-dé, àdi ná ñáyiú cùu-aⁿ, te dicó ìⁿ ñaha ndècu ichi díi iní cùu-áⁿ”, duha ní sani iní-dé. ⁴⁰ Te Jèsús ní xáhaⁿ-gã xii-dé:

—Xímú, ndècu ìⁿ tnúhu cachí tnúhu-í xii-n —cächí-gá xáhaⁿ-gã xii-dé.

Te tée cùu fariséú-áⁿ xáhaⁿ-dè xii-gá:

—Cachí tnúhu, Mèstrú —cächí-dé xáhaⁿ-dè xii-gá.

⁴¹ Te Jèsús ní xáhaⁿ-gã:
—Ní xíndecu ìⁿ tée ní xóo dasaⁿ núu díhúⁿ, te ní xítaú úú tnàhá-güedé núu-dé. Te ìⁿ-dé ní sàhá-dé úhúⁿ cièndú díhúⁿ denáriú, te ingá-dé ní sàhá-dé údico úxí. ⁴² Te

ñá ní ñhí-güedě nacháhu-güedé núú-dě, te téé ní sánùu ñaha-áⁿ ñi quide càhnu iní-dé ndi ndúú-güedé. Te vitna cachí-ò tucu te núu ndéda càa-güedé cúú iní ñhá-gá-güedé xii-dé —càchí-gá xáhaⁿ-gá xii-dé.

⁴³ Te ní xáhaⁿ tē Ximú-áⁿ:

—Sànuu sá tēe tàù vài-gá díhúⁿ ïo-gá cúú iní-dé téé ní sánùu ñaha díhúⁿ-áⁿ —càchí-dé xáhaⁿ-dē xii-gá.

Te ní xáhaⁿ Jèsús:

—Sá ndáá càháⁿ-n —càchí-gá xáhaⁿ-gá xii-dé.

⁴⁴⁻⁴⁶ Te Jèsús ní ndacoto-gá núú ñadìhí-áⁿ, te ní xáhaⁿ-gá xii té Ximú-áⁿ:

—¿Ndèhe-n nacuaá quide ñadìhí-a ñá? Chi cuánguihu-í vehe-n, dico ñá túú ní tàxi-n ndute ndoo sáhà-í, te ní ñá túú ní tēyuhu ñaha-n, te ní ñá túú ní chìhi-n acití díquí-í, dico ñadìhí-a ní naquete-aⁿ ndihi ndute núú-aⁿ sáhà-í, te ní nadayichí-aⁿ ndihi idi díquí-aⁿ, te nuu núu teyuhu-aⁿ sáhà-í, te ní chìhi-aⁿ acití sáháⁿ tnámí sáhà-í. ⁴⁷ Te na càchí tnúhu-í xii-n sá ïo cùu iní ñhá-áⁿ xii-í, te núu xiáⁿ cùtnùní iní-ó sá cuéí ïo vài sá cuèhé sá dúhá ñi quide-aⁿ, dico Yá Ndióxi sa ní quide càhnu iní ñhá-gá xii-aⁿ. Chi Yá Ndióxi quidé càhnu iní-gá ñáyiú cuéí vài àdi sacú cuéchi-yu, te núu sacú cuéchi-yu te sacú cúú iní ñhá-yu xii-í —càchí-gá xáhaⁿ-gá xii-dé.

⁴⁸ Te ní xáhaⁿ-gá xii ñadìhí-áⁿ:

—Sa ní quide càhnu iní-í ncha cuéchi-n —càchí-gá xáhaⁿ-gá xii-aⁿ.

⁴⁹ Te cue tēe xīnucóo ndihi-gá xītnàha-güedé:

—¿Ná tēe cùu tēe-a núu nándi sá quidé-dē, te ndéé ncha yíca cuéchi ñáyiú quide cahnu iní-dé-í? —càchí-güedé xītnàha-güedé.

⁵⁰ Te Jèsús ní xáhaⁿ tucu-gá xii ñadìhí-áⁿ:

—Sa ní cácu nihnu-n núú ùhú núú ndàhú vitna chì ní sándáá iní ñhá-n xii-í, te vitna cuanùhú te ñá túú-gá ná caní iní-n —càchí-gá xáhaⁿ-gá xii-aⁿ.

8

Ñáyiú díhí ní chindee ñàha xii Jèsús

¹ Te sáta dúcáⁿ ñi cuu te Jèsús ní xica-gá cuáháⁿ-gá titní víhí ñúú náhnú, ndihi ñúú líhli dānehé-gá ñáyiú nàcuáa ndíhu ndaha ñàha Yá Ndióxi xii-yu. Te cuáháⁿ ndihi-gá ndi ùxúú tnàhá cue tēe xica cuu ndihi-gá, ² ndihi ñiⁿ úú ñáyiú díhí ní quide tátna-gá ní xíhi ñaha espíritú cùndihi yucu ñávàha, ndihi ñáyiú tnàhá dāva-gá cuéhé ùhú ní cùu. Te xíaⁿ tnàhá tucu ñiⁿ ñaha nàni Mariá Magdalená, te ñaha-áⁿ ñi xíhi ñaha ùsá espíritú cùndihi yucu ñávàha xii-aⁿ ní cùu, te ní quee ñaha-xi. ³ Te tnàhá ñiⁿ ñaha nàni Juáná ñadìhí ñiⁿ tēe nàni Chúza tēe ní cunuu ñi xinu cuechi vehe té Hérodés, ndihi ingá ñaha nàni Susaná ncha ñáyiú-áⁿ ñi chindee ñàhá-yu xii-gá ndihi ncha sá ndécú ndihí-yu, te diu-ni ducaⁿ ñi quide vài-gá tucu ñáyiú nchicúⁿ ñhá xii-gá cuáháⁿ.

Nàcuáa quide tēe cuángacáⁿ triú (Mt. 13:1-9; Mr. 4:1-9)

⁴ Te ïo vài ñáyiú ndaa ñúú ní tacá-yu núú ndécú Jèsús, te ní ngúita-gá ní caní-gá ñiⁿ cuèndú núu-yu cuèndá tecú tnùni-yu tnúhu-gá, te xáhaⁿ-gá xii-yu:

⁵ —Ñiⁿ tēe cuángacáⁿ-dé triú. Te òré ní ngúita-dé dāngoyo-dé triú-áⁿ te dāva ní quene ndāva ní ngava ndéé ichi, te ní xénihnu ñáyiú, te ní xini tílaá te ní nadatàcá-güedi.

⁶ Te dāva ní ngava ñuhu yadi núú yíhí víhi yúú, te ní xinu-xi dico núú sàcú-ni nduu te ní yíhí-xi, chì ñá túú cōhyo yíhi. ⁷ Te dāva ní ngava núú yúcu ndíquíⁿ tnu ñiⁿ, te ñiⁿ nuu-ni ní xinu-xi ndihi tnu ñiⁿ-áⁿ, te tnu ñiⁿ-áⁿ ñi dānāá-xi nchāa triú sá ñi xinu-áⁿ. ⁸ Dico dāva triú-áⁿ ñi ngava-xi núú ndécú ñuhu cocoⁿ, te xiáⁿ ní xinu-xi te ní sahnú-xi, te ïo váha ní cuu, chì núú ñiⁿ-ní triú te ní

nguíhi yoco-xi ìn cièndú triú-xi —
càchí-gá xáhaⁿ-gã xií-yu.

Te níhi ní cáháⁿ-gá ní xáhaⁿ
tùcu-gá xií-yu:

—Nchaa nchòhó ñáiyu ní
xíndedóho tnúhu ní cáháⁿ-í-a, te ío
váha chí cuáha cuèndá —càchí-gá
xáhaⁿ-gã xií-yu.

*Nàcuáa quèe-xi tnúhu ní cáháⁿ
Jèsús*

(Mt. 13:10-17; Mr. 4:10-12)

⁹ Te cue tée xica cuu ndihi Jesús
ní xícaⁿ tnúhú-güedé núú-gã nõu
nása quèe-xi cuèndú ní caní-gá núú
ñáiyu. ¹⁰ Te ní xáhaⁿ-gã xii-güedé:

—Nchòhó chí sa càchí tnúhu
Yá Ndióxi xii-ndo ìn sá vátá
quíní-gá-ndó, chí càchí tnúhu-gá
nàcuáa cada-gá ndihu ndaha-gã
ñáiyu, dico dava-gá ñáiyu caní-í
mee-ni cuèndú núú-yu, chí cuéi na
quíní-yu nchaa nàcuáa cuu dico
ní vá cútnúni iní-yu ná cuèndá
ducaⁿ cùu, àdi cuéi na cùndedóho-yu
dico ní vá tècú tnùní-yu —càchí-gá
xáhaⁿ-gã xii-güedé.

*Jèsús càháⁿ-gá nàcuáa quèe-xi
tnúhu cuèndá tée cuángacáⁿ triú*

(Mt. 13:18-23; Mr. 4:13-20)

¹¹ Te xáhaⁿ tùcu-gá xii-güedé:

—Duha quèe-xi cuèndú ní caní-í
núú-ndó, chí triú ní sacáⁿ tée-áⁿ
cúú-xí dàtná tnúhu Yá Ndióxi,
¹² Te triú sá ní quene ndava ní
ngava ndéé ichi-áⁿ, xíáⁿ cúú-xí
dàtná ñáiyu ní quée iní-xi tnúhu
Yá Ndióxi, dico sácuíhná cuáháⁿ-xi
xòcani-xi tnúhu-gá iní-yu cuèndá
sá vã quíndáá iní-yu, te vá nánihí
tàhú-yu. ¹³ Te triú sá ní ngava
ñuhu yadi nõu yíhí vîhi yúú, xíáⁿ
cúú-xí dàtná ñáiyu ní xíndedóho
tnúhu Yá Ndióxi te díí iní ní tní-yu
tnúhu-gá, dico òré ná dàcáháⁿ ñáhá
yücu ñáváha xií-yu nándi cadá-yu,
te dàña nihnú-yu tnúhu-gá chí ñá
nihí ndéé-yu canchicúⁿ nihnú-yu
nàcuáa càháⁿ tnúhu-gá. ¹⁴ Te triú
sá ní ngava núú yúcu ndíquíⁿ

tnu iñu-áⁿ, xíáⁿ cúú-xí dàtná ñáiyu
ní tecú dóho-xi tnúhu Yá Ndióxi,
dico cuèé cuèé ní nacuaaná-yu
tnúhu-gá, chí cuèndá mee-ni sã
cúú-xí mèè-yu ñùhu iní-yu, ndihi
cuèndá sã ío sàni iní-yu cuu
cuicá-yu, ndihi cuèndá sã ío cùdíí
iní-yu nchaa sã ío ñuyú-a núu
xíáⁿ àúⁿ nã cuu ní xíndedóho-yu
tnúhu-gá. ¹⁵ Dico triú sá ní ngava
núú ndécú ñùhu cocoⁿ, xíáⁿ cúú-xí
dàtná ñáiyu váha iní-xi ní xíndedóho
tnúhu Yá Ndióxi chí ñá túú dàña
nihnú-yu, te ní yùhu ní iní-yu
quidé-yu nchaa nàcuáa càháⁿ
tnúhu-gá.

Nàcuáa quidé-yu iti

(Mr. 4:21-25)

¹⁶ Te ñá túú ní ìn ñáiyu tèñuhú-yu
ìn iti te dàdáhu-yu, àdi chiváha-yu ìn
caha camá, chí tàxi ndecú-yu núú
ñinu cuèndá cutnúni núú nchaa
ñáiyu ndècu vehe. ¹⁷ Te ní ìn
tnúhu sã ñã tècú tnùní ñáiyu vitna
vá càchí-ó sã vã tècú tnùní-yu chí
dacuéi sã tècú tnùní-yu, te ní ìn
tnúhu sã càchí-ó cùu yuhu vitna vá
cúú yùhu chí dacuití sã quée tũu-xi
núú ñáiyu.

¹⁸ Te chí cùndedóho váha tnúhu
na càháⁿ-í-a. Nchaa ñáiyu sàndáá
iní ñáhá xii Yá Ndióxi ío-gá cuita
quíndáá-gá iní ñáhá-yu xii-gá
quíhíⁿ, te nchaa ñáiyu ñá túú
sàndáá iní ñáhá xii-gá uuⁿ-gá cuita
cuu sàá-gá iní-yu núú-gã quíhíⁿ —
càchí-gá xáhaⁿ-gã xii-güedé.

Cue ñani Jèsús ndihi náná-gã

(Mt. 12:46-50; Mr. 3:31-35)

¹⁹ Te ní quexìo náná Jèsús ndihi
cue ñani-gã vehe núú ndécú-gã, te
ñá ndácú-yu cáháⁿ ndihi ñáhá-yu
xii-gá chí ío cuéhé ñáiyu ndècu núú
ndécú-gã. ²⁰ Te ìn ñáiyu xíndecu-áⁿ
ní dáyaáha-yu tnúhu núú-gã, te
xáháⁿ-yu:

—Ní quexìo náná-n ndihi cue
ñani-n xínutní-yu quehé, te

cuini-yu cahaⁿ ndihi nahá-yu xii-n
—cachi-yu xaháⁿ-yu xii-gá.

²¹ Te ní xahaⁿ-gá:

—Nchaa ñáyiú sácúndedóho
tnúhu Yá Ndióxi te quidé-yu nchaa
nacuáa cahaⁿ tnúhu-gá, ñáyiú-áⁿ
cúu-yu dátá ná ná-í ndihi dátá cue
ñani-í —cachi-gá xahaⁿ-gá xii ñáyiú
ní dáyáha tnúhu núu-gá-áⁿ.

*Jesús ngáni-gá táchi ndihi ndute
làgúná*

(Mt. 8:23-27; Mr. 4:35-41)

²² Te ñⁿ nduú ní quée Jesús bàrcú
ndihi cue téé xica cuu ndihi-gá, te ní
xahaⁿ-gá:

—Chí ná quihíⁿ-ó ndaa ingá xio
yuhu làgúná —cachi-gá xahaⁿ-gá
xii-güedé.

Te cuaháⁿ-güedé ndihi-gá. ²³ Te
nini ñúhu bàrcú ichi cuaháⁿ-xi
núú ndute ní xidí Jesús. Te ní
ngúita-xi níhi vihi quene táchi te
ta nàdachitú-xi ndute xití bàrcú-áⁿ
cuaháⁿ, te sa cuini-ná-xi quée naa
bàrcú-áⁿ xití ndute ni cùu. ²⁴ Te ní
saháⁿ-güedé núú cáá Jesús xidí-gá,
te ní xahaⁿ-güedé xii-gá:

—¡Mèstrú, ndiquiú iní chi tà
quée naa-o cuaháⁿ! —cachi-güedé
xahaⁿ-güedé xii-gá.

Te Jesús ní ndiquiú iní-gá te ní
ndacóo-gá te ní tenáa-gá táchi-áⁿ
ndihi ndute làgúná-áⁿ, te ní
ngúití-ni táchi-áⁿ te ní nucúndecu
nahi-ná ndute làgúná-áⁿ. ²⁵ Te ní
xahaⁿ-gá xii-güedé:

—¿Náa ñá túú sándáá iní ñáhá
ndisa-ndo xii-í áⁿ? —cachi-gá
xahaⁿ-gá xii-güedé.

Te ní cuñúhu-güedé sá dúcáⁿ
ní quide-gá ní xiní-güedé, te ní
yuhú-güedé, te ní xitnáha-güedé:

—¿Te ná téé cùu téé-a núu
ní cahaⁿ-ni-dé te ní ngúití
táchi te ní nucúndecu nahí-ni
ndúte làgúná-a-í? —cachi-güedé
xitnáha-güedé.

*Tée yíhi ñaha cue espíritu cúndihi
yucu ñáváha*

(Mt. 8:28-34; Mr. 5:1-20)

²⁶ Te ní sáa-gá ndihi-güedé yucu
cue téé ñúú Gàdará, te yíhi ndáá-ni
ndaa ingá xio làgúná-áⁿ cáá distritú
Galileá. ²⁷ Te òré ní quene Jesús
xití bàrcú te ní dáyátní ñaha ñⁿ
téé ñúú-áⁿ xii-gá, te yíhi ñaha
titní espíritu cúndihi yucu ñáváha
xii-dé. Te ní cunaha ñà túú-gá
sácúñnu-dé dóó-dé, te ní ñà túú-gá
sácúndecu-dé vehe-dé, chi da nchaa
núú yíndüxi ndíyi quide vehe-dé.

²⁸ Te òré ní xiní-dé Jesús te ní ngúití
xití-dé núú-gá, te cue espíritu yíhi
ñaha xii-dé-áⁿ ní quide-xi níhi ní
cahaⁿ-dé, te xahaⁿ-dè xii-gá:

—¿Ná cuendá véxi-ó Jesús Déhe
Dútú Ndióxi sàdí-n ichi-í-i? Te
cahaⁿ ndahú-í núú-n sá vā dándòho
ñaha-n xii-í —cachi-dé xahaⁿ-dè
xii-gá.

²⁹ Te ducaⁿ ní cahaⁿ-dé cuendá sá
Jesús ní xahaⁿ-gá xii nchaa espíritu
cúndihi yucu ñáváha yíhi ñaha sá ná
quée ñaha-xi xii-dé. Te nchaa xiáⁿ
ní xóo dacaháⁿ-xi iní-dé nándi sá
ní xóo cada-dé ñúu ní xóo dacùtu
ñaha-güedé cadená xii-dé cuendá
sá ñà túú-gá ná cada-dé, te ní
xóo cundeé ñáhá-güedé, dico cuéi
ducaⁿ dico ní xóo dandava-ni-dé
cadená, te cue espíritu cúndihi yucu
ñáváha-áⁿ ní xóo dacùnu ñaha-xi
xii-dé ní xóo quihíⁿ-dé xití yucu.
³⁰ Te Jesús ní xicáⁿ tnúhú-gá núú-dé,
te xahaⁿ-gá:

—¿Nása nani-n-í? —cachi-gá
xahaⁿ-gá.

Te ní xahaⁿ-dè:

—Vai Sandadú nani-í —cachi-dé
xahaⁿ-dè xii-gá.

Te ducaⁿ ní xahaⁿ-dè xii-gá
cuendá sá ïo cuéhe espíritu cúndihi
yucu ñáváha yíhi ñaha xii-dé. ³¹ Te
nchaa espíritu-áⁿ ní cahaⁿ ndahú-xi
núú Jesús sá vā téndaha ñaha-gá
xii-xi quihíⁿ-xi núú ùhú núú ndahú.
³² Te diu-ni yatni yucu núú ndécú

Jèsús-án yíhí vai cuchí xixexi-güedi, te nchaa espíritú-án ní cáháⁿ ndàhú-xi núú-gá sá ná dàña-gá quíhu-xi yiqui cùnú nchaa cùchí-án, te Jèsús ní xáhaⁿ-gá sá cúú quíhu-xi yiqui cùnú-güedi. ³³ Te ní quee ñaha nchaa espíritú-án xii téé-án, te ní quíhu-xi nchaa cùchí-án, te cùchí-án ní xinu-güedi duha ní quee-güedi ndaa núú dèhvá yuhu làgúná-án, te ní ngaunihnu-güedi xití ndute te ní ndihí-güedi ní cáhá.

³⁴ Te òré ní xiní cue téé xito cuchí-án nàcuáa ní cuu te ní yùhú-güedé ní xinu-güedé, te ní sáháⁿ-güedé ní cani-güedé cuèndú núú cuè ñáyiú ndècu xití ñuú, ndihí núú cuè ñáyiú ndècu xití yucu. ³⁵ Te nchaa ñáyiú ní níhí tñuhu ní queé-yu cuáháⁿ ndéhé-yu nàcuáa ní cuu. Te òré ní quexió-yu núú ndécú Jèsús, te ní xiní-yu téé ní xíhí ñaha cuè espíritú cùndihí yucu ñáváha-án núcóo-dé núú sàhá Jèsús, te nihnu-ná-dé dóó-dé, te núcóo-dé dàtná ñáyiú váha, te ní yùhú-yu òré ní xiní ñáhá-yu xii-dé. ³⁶ Te nchaa ñáyiú ní xiní nàcuáa ní cuu ní ndúha téé yíhí ñaha cue espíritú cùndihí yucu ñáváha-án ní cùu ní caní-yu cuèndú núú nchaa ñáyiú ní quexió-án nàcuáa ní cuu ní ndúha téé-án ndihí nàcuáa ní cuu cuèndá nchaa cùchí-án. ³⁷ Te sá dúcáⁿ ní níhí-yu tñuhu nàcuáa ní cuu, núú nchaa ñáyiú ñuú Gàdará ío ní yùhú-yu te ní nguíta-yu càháⁿ ndàhú-yu núú Jèsús sá ná nùhú-gá núú ndéé ichi véxi-gá. Te sá dúcáⁿ ní cáháⁿ-yu núú cuáháⁿ-gá núú ndécú bàrcú. Te òré ndéé-gá bàrcú-án nùhú-gá ³⁸ ní nguíta téé ní xíhí ñaha cuè espíritú cùndihí yucu ñáváha càháⁿ ndàhú-dé núú-gá núú vá cùndèe iní-gá quíhíⁿ ndihí ñaha-gá xii-dé, dico Jèsús ní quide ndee iní ñáhá-ni-gá xii-dé, te ní xáhaⁿ-gá:

³⁹ —Cuanùhú vehe-n, te cani-n

cuèndú núú nchaa ñáyiú sá ío càhnu cuu nchaa sá váha ní quide ñaha Yá Ndiòxí xii-n —càchí-gá xáhaⁿ-gá xii-dé.

Te téé-án ní xica-dé cuánuhú-dé te ní nguíta-dé ní cani-dé cuèndú núú nchaa ñáyiú xíndecu nihí ñuú sá ío càhnu cuu nchaa sá váha ní quide ñaha Jèsús xii-dé.

Cuèndá déhe yoco té Jàirú, ndihí cuèndá ñá ñadìhí ní tnándeé dóó Jèsús (Mt. 9:18-26; Mr. 5:21-43)

⁴⁰ Te òré ní ndexìo Jèsús ndaa ingá xio yuhu làgúná, te ñáyiú xíndecu xíáⁿ sa ndètu cahnu ñaha-ná-yu, te ío váha ní cáháⁿ ndihí ñáhá-yu xii-gá òré ní nasáá-gá. ⁴¹ Te ñá téé tãxi tñuní veñúhu ní quexió-dé núú ndécú Jèsús, te téé-án nání-dé Jàirú, te ní nguíñí xití-dé núú-gá càháⁿ ndàhú-dé, te xáhaⁿ-dè xii-gá:

—Véxi-í càháⁿ ndàhú-í núú-n núú vá cùndèe iní-n quíhíⁿ-ó vèhe-í cada tátna-n déhe yoco-í —càchí-dé xáhaⁿ-dè xii-gá.

⁴² Te ducaⁿ ní xáhaⁿ-dè chi ndècu ñá dii-ni déhe yoco-dé, te ndècu-xí datná úxúú cuiá-xi, te càhú víhí tñáhá-xi cùhú-xi te cùlní-xi cuú-xi. Te Jèsús ní xica-gá cuáháⁿ-gá ndihí téé-án, te ío vai ñáyiú nchìcúⁿ ñáhá xii-gá cuáháⁿ, te dàdehnde ñaha-ná-yu xii-gá ní cùu.

⁴³ Te tñuú nchaa ñáyiú-án ñútnáhá ñá ñaha cùhú, te ñaha-án sá ní cuu úxúú cuiá sá cùhú-aⁿ ngòyo ñaha ñíñí xii-aⁿ, te ío cuéhé díhúⁿ ní cuu dàndoñuhu-aⁿ chí ní nadico-aⁿ nchaa sá ndécú ndihí-aⁿ cuèndá ní níhí-aⁿ díhúⁿ ní queheⁿ nchaa ñáyiú ní quide tátna ñaha xii-aⁿ, dico ní ñá-yu ñá túú ní ndàcú-yu ndúha-aⁿ. ⁴⁴ Te ní sáháⁿ ndehe yatni-aⁿ ndaa sátá Jèsús, te ní tnándeé-aⁿ luha yuhu dóó-gá te òré-ni-án ní ndúha-aⁿ.

⁴⁵ Te Jèsús ní xicáⁿ tñuhú-gá núú-yu, te xáhaⁿ-gá:

—¿Ndèdacàa-ndo ní tnándeé ñáhá xii-í? —càchí-gá xáhaⁿ-gá xii-yu.

Te nchaá-yu ní xáhã-n-yu sá nĩ ñⁿ-yu ñá túú ní tnãndeé ñáhá xii-gá. Te té Pèlú ndihi cue tée cundìhi-dé ní xáhaⁿ-güedé xii-gá:

—Mèstrú, ndèhe-n sá vái ñáiyu nchicúⁿ ñáhá xii-n, te xio xio dàdehnde ñáhá-yu, te xicáⁿ tnúhú-gã-n yõo ní tnãndeé ñáhá xii-n —cachí-güedé xãhaⁿ-güedé xii-gá.

⁴⁶ Dico Jèsús ní xáhaⁿ-gã xii-yu:

—Dico ñu ñⁿ-ndo nĩ tnãndeé ñáhá xii-í, chi ní cutnùnì iní-í sá ñⁿ ñáiyu cùhú ní tnãndeé ñáhá xii-í te ní ndúha-yu —cachí-gá xáhaⁿ-gã xii-yu.

⁴⁷ Te sátá nĩ xiní ñaha-áⁿ sã nĩ cutnùnì iní Jèsús sá nĩ tnãndeé ñáhá-áⁿ xii-gá, te yùhú yùhú-aⁿ ní sáhá-aⁿ ní ngüñí xití-áⁿ núú-gã, te ní náhmá-aⁿ núú-gã, ndihi núú nchãa ñáiyu ná cuendá ducaⁿ nĩ quide-aⁿ ní tnãndeé-aⁿ-gá, ndihi cuendá sá òré-ni-áⁿ nĩ ndúha-aⁿ.
⁴⁸ Te Jèsús ní xáhaⁿ-gã xii-aⁿ:

—Yõhó ñaha cùhú, ní sãndáá iní ñáhá-n xii-í nũu ní ndúha-n, te cuanùhú vitna te ñá túú-gã ná cani iní-n —cachí-gá xáhaⁿ-gã xii-aⁿ.

⁴⁹ Te càháⁿ dúcáⁿ-ní Jèsús ní sáá ñⁿ té xinu cuechi vehe té Jàirú té tãxi tnuní veñúhu, te xáhaⁿ té xinu cuechi-áⁿ xii-dé:

—Sa ní xihí déhe-n, vá chíchiuⁿ-gã-n Mèstrú —cachí-dé xáhaⁿ-dè.

⁵⁰ Te sá dúcáⁿ xãhaⁿ tõe xinu cuechi-áⁿ xii té Jàirú ní tecu dóho Jèsús, núu ní xáhaⁿ-gã xii-dé:

—Vá ndihú iní-n, quindáá iní ñáhá-ní-n xii-í te ndúha déhe-n —cachí-gá xáhaⁿ-gã xii-dé.

⁵¹ Te òré ní sáá-gã vehe té Jàirú te ñá ní dàña-gã quihu ñáiyu cùtexínu, núu té Pèlú-ni ndihi té Jácobó-ni, ndihi té Juáá-ni, ndihi tãtã ndihi nãná-ni xichí ní xihí-áⁿ cuãnguïhu ndihi-gã xití vehe. ⁵² Te nchaa ñáiyu sa xindecu vehe-dé-áⁿ xindáhyú-yu sá ndihú iní-yu cuendá sá nĩ xihí-xi. Te Jèsús ní xáhaⁿ-gã xii-yu:

—Vá ndàhyú-ndó, chi dicó-ni xidí-xi ñá túú ní xihí-xi —cachí-gá xáhaⁿ-gã xii-yu.

⁵³ Te ní sácú ndeé ñáhã-yu xii-gá, chi sá cùú-xí mèe-yu chi ní xihí ndisa xichí-áⁿ. ⁵⁴ Te Jèsús ní tni-gã ndaha xichí ní xihí-áⁿ, te níhi ní cáháⁿ-gá, te xáhaⁿ-gã:

—Xichí cuéchí, ndacóo —cachí-gá xáhaⁿ-gã.

⁵⁵ Te xichí-áⁿ nĩ ndoto-xi, te òré-ni ní ndacóo-xi, te Jèsús ní xáhaⁿ-gã sá ná cuãñáhã-yu sá cáxi-xí. ⁵⁶ Te tãtã-xi ndihi nãná-xi súúnì ní cuñúhu-yu sá dúcáⁿ nĩ dándótó ñaha Jèsús xii-xi, te ní xáhaⁿ-gã xii-yu sá vã yõo ñⁿ cùñáhã-yu sá dúcáⁿ nĩ quide-gã.

9

Jèsús téndàha-gã ndi ùxúú cue té xica cuu ndihi-gã quihíⁿ-güedé cáháⁿ-güedé tnúhu-gã

(Mt. 10:5-15; Mr. 6:7-13)

¹ Te Jèsús ní cana-gã ndi ùxúú cue té xica cuu ndihi-gã, te ní sãñaha-gã xii-güedé tnúhu ndee iní cundecu ndihi-güedé cuendá queñuhu-güedé nchaa espíritú cundìhi yucu ñávãha yihí ñaha xii ñáiyu, ndihi cuendá sá cádá tãtna-güedé nchaa ñáiyu cùhú.

² Te ní xáhaⁿ-gã xii-güedé sá quihíⁿ-güedé danèhé-güedé ñáiyu nàcuáa cada Yá Ndiõxí ndihu ndaha ñaha-gã xii-yu, te ducaⁿ càda tãtna-güedé cue ñáiyu cùhú. ³ Te cùmánì-gã caca-güedé quihíⁿ-güedé, te ní xáhaⁿ-gã xii-güedé:

—Ñá túú tnàhí ná canehe-ndo cùu ichi-ndo, ni tãtnu, ni ñunu, ni sã cáxi-ndó, ni dñúⁿ. Te ni vã cãnehe-ndo ingá ichi dóo-ndó, chi ñu-ni dóo ññnú-ndó-áⁿ xiãⁿ tnàhí-ni. ⁴ Te ndédani càa vehe na saá-ndó, te xiãⁿ cundecu-ndo ndeé ná sã nduu ndeè-ndo. ⁵ Te núu ñá túú cuini-yu queheⁿ cuendá ñáhã-yu xii-ndo, te ndee-ndo ñùú-áⁿ, te naquidi-ndo ticá

chúhmá nǐ tñí sáhá-ndó cuendá sá ná cùtnuní iní-yu sá ñà túú quide váha-yu —càchí-gá xáhaⁿ-gã xii-güedé.

⁶ Te sátá dúcáⁿ nǐ xáhaⁿ Jèsús xii-güedé, te ní quee-güedé cuáháⁿ-güedé nchaa ñúú dácuaáha-güedé ñáiyu tñúhu Yá Ndiõxí, tñúhu sá càháⁿ nàcuáa naníhí tãhú-yu, te ducaⁿ ta quide tátna-güedé nchaa ñáiyu cùhú cuáháⁿ.

Nàcuáa ní cuu ní xíhí té Juáá té dácuaandute ñaha xii ñáiyu

(Mt. 14:1-12; Mr. 6:14-29)

⁷ Te té Hèrodés téé cùu gobiernú ní níhí-dé tñúhu nchaa nàcuáa quide Jèsús, te quíyuhú iní-dé te sàni iní-dé yoo cùu-gá. Te ducaⁿ nǐ sani iní-dé chi dava ñáiyu càchí-yu sá tẽ Juáá téé ní xóo dácuaandute ñaha xii ñáiyu ní ndoto cùu-gá. ⁸ Te davá-yu càchí-yu sá tẽ Èliás cúu-gã, te davá-yu càchí-yu sá ñⁿ téé ní xóo càháⁿ tñúhu Yá Ndiõxí ndéé sanaha vñi ní ndoto cùu-gá, càchí-yu. ⁹ Dico té Hèrodés ní cachí-dé:

—Yúhú ní táuchíúⁿ-í ní xehndé-güedé díquí tẽ Juáá. ¿Te yoo cùu téé dii cuendú-xi níhí-a sá sũúni cuèhé núú sã quidé-dé váiⁿ? —duha ní cachí-dé.

Te té Hèrodés ndúcú-dé nàcuáa cada-dé cuendá quini-dé Jèsús.

Jèsús dácàxi-gá úhúⁿ mǐl cue téé te dñⁿ ñáiyu dñí ndíhi landú

(Mt. 14:13-21; Mr. 6:30-44; Jn. 6:1-14)

¹⁰ Te nchaa cue téé ní táuchíúⁿ Jèsús cuáháⁿ càháⁿ tñúhu Yá Ndiõxí núú ñáiyu ní ndexìo-güedé núú-gã te ní ngüíta-güedé nácàni tñúhu-güedé nchaa nàcuáa ní quide-güedé. Te dàtnuní ní xica-gá medi-ni-gá ndécá ñaha-gá xii-güedé cuáháⁿ ñⁿ xichi núú ñà túú ñáiyu ndècu, yatni núú cáá ñúú Bètsaidá. ¹¹ Dico òré ní níhí ñáiyu tñúhu sá cuáháⁿ Jèsús, te nchìcúⁿ-yu-gá cuáháⁿ, te òré ní quexìo-yu núú-gã, te ní queheⁿ

cuendá ñáhá-gã xií-yu, te ní dánèhé ñáhá-gã xií-yu nàcuáa ndíhu ndaha ñaha Yá Ndiõxí xií-yu, te ní quide tátna-gá nchaa ñáiyu cùhú.

¹² Te òré sa ní cuaa te ní nataká ndi ùxúú cue téé xica cuu ndíhi-gá ñúú-gã, te ní xáhaⁿ-güedé xii-gá:

—Sa ní cuu dandàca-n nchaa ñáiyu-a, chi sa ní cuaa, te na quíhíⁿ-yu nchaa vehe càa yatni iha, ndíhi nchaa xití ñúú cáá yàtni iha cuaáⁿ-yu sá cáxí-yu, te diu-ni yacáⁿ ndetatú-yu, chi núú ndécú-ó iha ñá túú tñahí ná ió —càchí-güedé xáhaⁿ-güedé xii-gá.

¹³ Te Jèsús ní xáhaⁿ-gã xii-güedé:

—Mee-ndo chí cuñaha sã ná cáxí-yu —càchí-gá xáhaⁿ-gã xii-güedé.

Te ní xáhaⁿ-güedé xii-gá:

—Ñá túú nãgá ndécú ndíhi-ndí, chi úhúⁿ duha-ná pàá, ndíhi úú-nã chácá ndécú ndíhi-ndí, te diu-ni núú quíhíⁿ-ndí cuaaⁿ-ndí sá cáxí-yu —càchí-güedé xáhaⁿ-güedé xii-gá.

¹⁴ Te xínu dàtná úhúⁿ mǐl mee-ni cuè téé, te dñⁿ ñáiyu dñí ndíhi landú. Te Jèsús ní xáhaⁿ-gã xii cue téé xica cuu ndíhi-gá:

—Chí cñaha na ngõo ndi údico úxí ndi údico úxí-yu ñⁿ ñⁿ xichi —càchí-gá xáhaⁿ-gã xii-güedé.

¹⁵ Te ducaⁿ nǐ quide-güedé, te ní ngóo-yu nchaá-yu. ¹⁶ Te dàtnuní ní queheⁿ-gá ndi úhúⁿ pàá-án, ndíhi ndi ndúú chácá-án. Te ní ndacoto-gá andíu, te ní ndacáⁿ tãhú-gã núú Yá Ndiõxí, te dàtnuní ní tãhú cuèchi-gá pàá-án ndíhi chácá-án, te ní sãha-gá nchaa cue téé xica cuu ndíhi-gá ní dácãhñu ñaha-güedé xií-yu. ¹⁷ Te nchaá-yu ní xexí-yu ní ndahá xití-yu. Te sátá nǐ túhú cóhõ-yu te ní nadatácá-güedé nchaa sá nǐ quendóo, te ní chítú ùxúú tñahá tídihi mee-ni sã nǐ quendóo.

Té Pèlú xǎhaⁿ-dě xii Jèsús sá díú-gǎ cúú-gǎ Crìstú

(Mt. 16:13-19; Mr. 8:27-29)

¹⁸ Te ìⁿ nduu ndècu mee Jèsús ndihi cue tée xica cuu ndihi-gá, te càháⁿ ndihi-gá Yǎ Ndiǒxí, te sáta nǐ yáha ní cáháⁿ ndihi-gá Yǎ Ndiǒxí, te ní xícáⁿ tnúhú-gǎ núú-güedé, te xáhaⁿ-gǎ xii-güedé:

—¿Yoo cùu yúhú càchí ñáyiú-va?
—càchí-gǎ xáhaⁿ-gǎ xii-güedé.

¹⁹ Te ní xáhaⁿ-güedé xii-gǎ:

—Davá-yu càchí-yu sá cúú-n ndǐ Juáa tée ní xóo dacuàndute ñaha xii ñáyiú, te davá-yu càchí-yu sá cúú-n tē Èliás, te davá-yu càchí-yu sá ìⁿ tée ní xóo cáháⁿ tnúhu Yǎ Ndiǒxí ndéé sanaha nǐ ndoto cùu-n, duha càchí-yu —càchí-güedé xáhaⁿ-güedé xii-gǎ.

²⁰ Te ní xícáⁿ tnúhú tucu-gǎ núú-güedé, te xáhaⁿ-gǎ xii-güedé:

—Te nchòhó, ¿yoo sàni iní-ndó cùu-í-í? —càchí-gǎ xáhaⁿ-gǎ xii-güedé.

Te té Pèlú ní xáhaⁿ-dě xii-gǎ:

—Yòhó cúú-n Crìstú Déhe Dútú Ndiǒxí —càchí-dé xáhaⁿ-dě xii-gǎ.

Jèsús càháⁿ-gǎ sá cáhní ñaha-güedé xii-gǎ

(Mt. 16:20-28; Mr. 8:30-9:1)

²¹ Te ní xáhaⁿ-gǎ xii-güedé sá vǎ yóo ìⁿ cúñaha-güedé yoo cùu-gǎ.

²² Te ní xáhaⁿ-gǎ xii-güedé:

—Yúhú Tée cùu ñani tnáhá-ndó nchàa-ndo ío cuéhé sǎ ndòhò-í, chi daquèe tihú ñáhá cuè tée cùu sacuéhé nùú ñáyiú isràél, ndihi cue dútú cúnù, ndihi cue tée dàcuaha ñaha xii ñáyiú nchaa tnúhu ní chídó tnùnǐ ndǐ Moisés, te sáá nduu te cahni ñaha-güedé xii-í, dico nduu úní sá cùu-í te ndoto-í —càchí-gǎ xáhaⁿ-gǎ xii-güedé.

²³ Te dàtnùnǐ ní xáhaⁿ-gǎ xii nchaa ñáyiú:

—Nchaa ñáyiú cuení chitnahá ñáhá xii-í, te xini ñuhu-xi vǎ cáda-gǎ-yu sá sání iní méè-yu, te ìⁿ nduu ìⁿ nduu cada ndee iní-yu cundecu túha-yu ndohó-yu

cuendá-í, te cuèi na ndòhò-yu dàtná ndoho-í. ²⁴ Te nchaa ñáyiú cuení sá ñà túú tnàhí ná yáha cundecu ñuyíú-a cuíta nihnú-yu. Dico nchaa ñáyiú ñà túú yúhú cuèi nándí sá ná yáha-yu cundecú-yu ñuyíú-a sá cuendá-í, te ñáyiú-áⁿ naníhí tǎhú-yu. ²⁵ Te cuèi nchaandi túhú sá ío ñuyíú-a na nihí ñáyiú cundecu ndihí-yu, dico núu ðu nchaa xǎⁿ ná càda cuíta nihnú-yu te ñà túú vèdapa nàndíhi-xi sá dúcáⁿ ndècu ndihí-yu nchaa xǎⁿ.

²⁶ Te nchaa ñáyiú na cùcahaⁿ núú-xi cáháⁿ váha cuendá-í ndihi cuendá nchaa tnúhu-í, te tnáhá yúhú Tée cùu ñani tnáhá-ndó nchaa-ndo cucahaⁿ núú-í núu-yu òré quixi tucu-í ndihi cue espíritú xínú cuèchi núú Tǎtà-í Dútú Ndiǒxí, te mee-gǎ cada cutnùnǐ iní nchaa ñáyiú sá ío càhnu cuu-í. ²⁷ Te na càchí tnúhu ndáá-í xii-ndo sǎ ío dava nchòhó ñáyiú ndècu iha vitna vǎ cùu-ni-ndo, chi cundecu-ni-ndo ndéé quini-ndó sáá nduu ndíhu ndaha ñaha Yǎ Ndiǒxí xii ñáyiú —càchí-gǎ xáhaⁿ-gǎ xii-yu.

Ní nadáma dóo Jèsús ndihi núú-gǎ
(Mt. 17:1-8; Mr. 9:2-8)

²⁸ Te ní cuu dàtná úná nduu sá dúcáⁿ nǐ cáháⁿ Jèsús, te cuásaá-gǎ ìⁿ yucu cáháⁿ ndihi-gǎ Yǎ Ndiǒxí, te ndèca-gǎ té Pèlú, ndihi té Jàcobó, ndihi té Juáa cuásaá. ²⁹ Te nini càháⁿ ndihi-gǎ Yǎ Ndiǒxí ní nadáma núú-gǎ ndihi dóo-gǎ, te dóo-gǎ-áⁿ sùúni nǐ nduu cuixíⁿ víhí, te sùúni dàtásaⁿ-xi. ³⁰ Te òré-ni-áⁿ nǐ xini-güedé úú tnáhá cue tée càháⁿ ndihi-gǎ, te ìⁿ-dé cúú-dé té Moisés, te ingá-dé cúú-dé té Èliás, ³¹ te sùúni dàtásaⁿ-xi ni càndéé núú ndécú cuè tée úú-áⁿ ndihi-gǎ, te xǐndatnúhu-güedé nàcuáa ndoho Jèsús cuú-gǎ ñuu Jerusálén dàtná ní cachí méé-gǎ. ³² Te té Pèlú ndihi úú-gǎ-güedé cuení víhí-güedé cúdú-güedé, dico ní sahni iní-güedé ñà túú ní xidí-güedé, te ní dánhé núú ñáhá-xi xii-güedé sá sùúni

vãha cãa núú ndécú Jèsús, ndìhi úú cue tée càháⁿ ndìhi-gá-áⁿ. ³³ Te òré sa ndùcu ndee cue tée úú-áⁿ caca-güedé núhú-güedé, te ní xáhaⁿ tẽ Pèlú xii-gá:

—Mèstrú, ¡vãha ní cuu sã ndécú-ó ìha vitna! Te na dàcaa-ndí úní tnhá vehe tnuvixiⁿ, ìⁿ cuu cuendá-n, te ìⁿ cuu cuendá té Moisés, te ìⁿ cuu cuendá té Èlías —càchí-dé xáhaⁿ-dẽ xii-gá.

Dico té Pèlú chi nì mèe-dé ñã túú ní cùtnuní iní-dé nása ndùu tnúhu ní cáháⁿ-dé. ³⁴ Te nini cáháⁿ-dé ní quexìo ìⁿ vicó núú ndécú-güedé-áⁿ nĩ dádãhu ñaha-xi xii-güedé, te ní yùhú-güedé sã dúcáⁿ nĩ quexìo vicó-ãⁿ nĩ dádãhu ñaha-xi. ³⁵ Te xití vicó-ãⁿ nĩ tecú ní cáháⁿ Yã Ndiõxí, te xáhaⁿ-gã xii-güedé:

—Tée-a cùu-dé Déhe-í, tée ío cùu iní-í, te tni-ndo nchãa tnúhu cáháⁿ-dé —duha ní xáhaⁿ-gã xii-güedé.

³⁶ Te sãtã dúcáⁿ nĩ cáháⁿ Yã Ndiõxí, te ní quide cuendá-güedé sã mèdii-nã Jèsús ndécú-gã xiáⁿ. Te vã yõ ìⁿ nĩ xáhaⁿ-güedé nãcuãa ndùu nchaa sã nĩ xiní-güedé-áⁿ.

Jèsús quidé tãtna-gã ìⁿ tée cuechi yìhi ñaha espíritú cùndìhi yucu ñãvãha (Mt. 17:14-21; Mr. 9:14-29)

³⁷ Te ingã nduu-ãⁿ cuãnuu-gã yucu-ãⁿ ndìhi-güedé, te ío cuéhé ñãyiu cuáhãⁿ tnhá ñáhã xii-gã. ³⁸ Te ìⁿ tée ñùhu tnhá tnuú-yu-ãⁿ nĩ cáháⁿ níhi-dé, te xáhaⁿ-dẽ xii-gã:

—Mèstrú, ío cáháⁿ ndàhú-í núú-n nũu vã cùndèe iní-n càda tãtna-n dèhe-í, chi ìⁿdiì duha-dé ndécú, ³⁹ te yìhi ñaha espíritú cùndìhi yucu ñãvãha xii-dé, te òré ná nãtni ñaha-xi xii-dé, te dàcana saa ñaha-xi, te ndàda ruúⁿ ñáhã-xí xii-dé, te tàva-xi tíñú yuhu-dé. Te ío dàndoho ñaha-xi xii-dé, chi ndéé núú ñã cúú-gã, te dàña ñaha tnaa-xi xii-dé.

⁴⁰ Te sa ní cáháⁿ ndàhú-í núú cuè tée xica cuu ndìhi-n queñuhu-güedé-xi, dico ñã túú ní ndàcu-güedé —càchí-dé xáhaⁿ-dẽ xii-gã.

⁴¹ Te Jèsús ní xáhaⁿ-gã xii nchaa ñãyiu:

—¡Nchaa nchòhó ñãyiu ndècu ñuyíú-a ío sãá iní-ndó, chi ñã túú cuini-ndó quindãá iní-ndó Yã Ndiõxí! Te ní cuu vãi nduu quide ndee iní-í nchaa sã quidé-ndó, ¿te ná ndéé ama vã dúcãⁿ-gã cada-ndo-i? —càchí-gã xáhaⁿ-gã xii-yu.

Te ní xáhaⁿ-gã xii tée cùhú déhe-xi-áⁿ:

—Taxi déhe-n ìha —cachí-gã xáhaⁿ-gã xii-dé.

⁴² Te òré cuáhãⁿ tée cuechi-ãⁿ núú-gã, te espíritú cùndìhi yucu ñãvãha-áⁿ nĩ dándùã ñáhã-xí xii-dé, te sãhni yìhí ñáhã tucu-xi xii-dé ní cùu, dico Jèsús níhi ní cáháⁿ-gã ní tenãã-gã espíritú-áⁿ, te ní quee ñaha-xi xii-dé, te ní nacuãha cuendá ñáhã-gã xii-dé tãtã-dè. ⁴³ Te nchaa-yu ní cuñuhu-yu sã dúcãⁿ nĩ cuu, te ní cachí-yu sã ío càhnu cuu Yã Ndiõxí.

Jèsús cáháⁿ tucu-gã sã cùú-gã (Mt. 17:22-23; Mr. 9:30-32)

Te nini xicuñuhu-yu nãcuãa ní quide Jèsús, te ní xáhaⁿ-gã xii cue tée xica cuu ndìhi-gã:

⁴⁴ —Nchòhó cundedóho vãha-ndo tnúhu na cáháⁿ-í-a, te vã ná cuãnaa-ndo, chi yùhú Tée cùu ñaní tnhã-ndó nchãa-ndo sãá ìⁿ nduu te cuãha cuendá ñáhã-güedé xii-í núú cuè tée cùu úhú iní ñáhã —càchí-gã xáhaⁿ-gã xii-güedé.

⁴⁵ Dico cue tée-áⁿ ñã túú ní tècú tnùnì-güedé nãcuãa ndùu tnúhu ní xáhaⁿ-gã xii-güedé, te ducaⁿ nĩ yãha-güedé, chi ducaⁿ tnhá ní cachí-gã sã vã tècú tnùnì-güedé, te ní yùhú-güedé cácaⁿ tnúhú-güedé núú-gã nása ndùu tnúhu ní xáhaⁿ-gã xii-güedé.

Cue tée ndùcu tnúhu núú tnhã nũu ndèdaca-güedé ío-gã cùnùu (Mt. 18:1-5; Mr. 9:33-37)

⁴⁶ Te cue tée xica cuu ndìhi-gã ní ngüita-güedé ndãtnúhu-güedé núu ndèdaca-güedé ío-gã cùnùu, ⁴⁷ dico

Jèsús ní cutnùní iní-gá nàcuáa sàni iní-güedé nùu ní cana-gá #ⁿ té lĩhli, te ní sanu tní ñaha-gã #ⁿ xio dñi-gá. 48 Te ní xáhaⁿ-gã xii-güedé:

—Nchaa ñáyiú na queheⁿ cuendá #ⁿ té lĩhli dātñá té lĩhli-a cuendá sá ñuhú iní ñáhá-yu xii-í ñá, te cada iní-yu sá yúhú ní queheⁿ cuendá-yu, te nchaa ñáyiú na queheⁿ cuendá ñáhá xii yúhú, te cada iní-yu sá tnáhá Tātá-í Dútú Ndiöxí Yaá ní tendaha ñaha xii-í véxi-í ñuyiú-a ní queheⁿ cuendá-yu. Te nchaa ñáyiú ño ndáhú iní-xi mee-ni xinu cuechí-yu, ñáyiú-áⁿ ño-gá cúnúú-yu —cächí-gá xáhaⁿ-gã xii-güedé.

Ñáyiú ñá túú cùu úhú iní ñáhá cùndihí ñahá-yu xii-o

(Mr. 9:38-40)

49 Te té Juàá dñu-ni #ⁿ téé xica cuu ndihí-gá ní xáhaⁿ-dẽ xii-gá:

—Mèstrú, ní xiní-ndí #ⁿ téé càcunehe ñaha-dé xii-n, te ndèñuhu-dé espíritú cùndihí yucu ñávaha yìhí ñaha xii ñáyiú, te nchúhú ñá túú ní dàña-gá-ndí ducaⁿ càda-dé, chí ñá túú xica cuu ndihí ñaha-dé xii-o —cächí-dé xáhaⁿ-dẽ xii-gá.

50 Te Jèsús ní xáhaⁿ-gã xii-dé:

—Daña-ndo na càda nahi-dé ní cùu, chí ñáyiú ñá túú cùu úhú iní ñáhá xii-o te cùndihí ñahá-yu —cächí-gá xáhaⁿ-gã xii-dé.

Jèsús càháⁿ-gá dóho té Jacobó ndihí té Juàá

51 Te òré sa ta cùyatni ndaa Jesús andiú, te ní xica-gá cuáháⁿ-gá ñuú Jerusalén, chí duuⁿ duuⁿ ní sani iní-gá sá quihíⁿ-gá. 52 Te ní tendaha-gã cue téé yòdo nuu cuáháⁿ, te ní quexio-güedé #ⁿ ñuú, te ñuú-áⁿ yíndèhu-xi distritú Sámariá, te ndücu-güedé #ⁿ vehe cada túha-güedé òré quexio-gá. 53 Dico ñáyiú Sámariá ñá túú ní cuíni-yu cuáñaha núu-yu vehe, chí cuendá sá ní cutnùní iní-yu sá ìchi

yáha-ni-gá quihíⁿ-gá ñuú Jerusalén. 54 Te sá dúcáⁿ ní quidé-yu ñá túú ní cuíni-yu cuáñaha núu-yu vehe ndetatú-gá, núu ní xáhaⁿ té Jacobó ndihí té Juàá cue téé xica cuu ndihí-gá xii-gá:

—Mèstrú, ¿cuíni-n càcáⁿ táhú-ó nùú Yã Ndiöxí cuendá dangáva-gá ñuhú danáa-gá ñáyiú ñuú-a dātñá ní quide té Eliás téé ní xóo cáháⁿ tnúhu Yá Ndiöxí ndéé sanaha-ãⁿ? —cächí-güedé xáhaⁿ-güedé xii-gá.

55 Te Jèsús ní nchócótó-gã núu-güedé, te níhi ní cáháⁿ-gá dóho-güedé, te xáhaⁿ-gá:

—Nchòhó, chí ñá túú vaha iní-ndó te núu ducaⁿ càháⁿ-ndó. 56 Chí yúhú Téé cùu ñaní tnáhá-ndó nchàa-ndo véxi-í sá dácacu nihnu-í ñáyiú, te ñá díú véxi-í sá dácúta nihnu-í-yu —cächí-gá xáhaⁿ-gã xii-güedé.

Te sátá dúcáⁿ ní xáhaⁿ-gã, te ní xica-gá cuáháⁿ-gá ndihí-güedé ingá ñuú.

Ñáyiú cuíni chitnahá ñáhá xii Jesús ní cùu

(Mt. 8:19-22)

57 Te ñuhu Jesús ichi ndihí-güedé, te #ⁿ téé ní xáhaⁿ-dẽ xii-gá:

—Mèstrú, cuíni-í canchicúⁿ ñáhá-í xii-n ndèni ní cuu na quihíⁿ-n —cächí-dé xáhaⁿ-dẽ xii-gá.

58 Te Jèsús ní xáhaⁿ-gã xii-dé:

—Nchaa ñucui chí ndècu yaú cúu vèhe-güedi saquihí-güedi, te nchaa quiti ndàva caa tacá-güedi díquí yutnu, dico yúhú Téé cùu ñaní tnáhá-ndó nchàa-ndo chí ñá túú ndéé cáá véhe-í ñuyiú-a ndetatú-í —cächí-gá xáhaⁿ-gã xii-dé.

59 Te dātñùní ní xáhaⁿ tùcu-gá xii ingá-dé:

—Yòhó taquixi chitnahá ñáhá-n xii-í —cächí-gá xáhaⁿ-gã xii-dé.

Dico téé-áⁿ ní xáhaⁿ-dẽ xii-gá:

—Mèstrú, dañá na nùhú-í cundetú-í cuú tātá-í te chindúxi-í-dé, te dātñùní quixi-í chitnahá ñáhá dùcaⁿ-ná-í xii-n —cächí-dé xáhaⁿ-dẽ xii-gá.

60 Te Jèsús ní xáhaⁿ-gá xii-dé:

—Daña ñáyiú ñá túú sándáá iní ñáhá xii-í ná chindúxi tñaha mee-yu, chí ñáyiú-áⁿ cúú-yu dàtná ñáyiú ní xíhí cuèi ndècu-ní-yu núú ñuyúú-a. Te yòhó taquixi, chí quihíⁿ-n dànehé-n ñáyiú nàcuáa cada Yá Ndiòxí ndíhu ndaha ñaha-gá xii-yu —càchí-gá xáhaⁿ-gá xii-dé.

61 Te ní xáhaⁿ tùcu ingá-dé xii-gá:

—Mèstrú, cuiní-í chitnahá ñáhà-í xii-n, dico díhna-gá daña na nùhú-í cada ndee iní-í nchaa ñáyiú ndècu vehe-í, te dàtnùní quixi-í —càchí-dé xáhaⁿ-dè xii-gá.

62 Te Jèsús ní xáhaⁿ-gá:

—Nchaa ñáyiú ní sándáá iní ñáhá xii-í, te núú vá cànchícúⁿ nihnu ñáhá-yu ni yùhu ni iní-yu, te cúú-yu dàtná ìⁿ téé ní tñii ndaha látú cutu-dé, chí téé-áⁿ nùu na ndàcoto-dé ndaa sáta-dé òré xítú-dé, te vá quihíⁿ ndáá látú-dé ducaⁿ sàtnahá-xi cúú-yu. Te cue ñáyiú chí vá cúú ndáá-yu nàcuáa ndíhu ndaha-gá dava-gá ñáyiú—càchí-gá xáhaⁿ-gá xii-dé.

10

Jèsús téndàha-gá únídico úxí cue téé quihíⁿ cáháⁿ tnúhu-gá núú ñáyiú

1 Te sáta dúcáⁿ ñí cuu, te ní cáxi tucu Xítohó Jesucristú únídico úxí cue téé codonù-güedé quihíⁿ-güedé cáháⁿ-güedé tnúhu-gá nchaa ñuú, ndihí nchaa dava-gá xichi núú quihíⁿ-gá, te ndi ndúú ndi ndúú-güedé tendaha ñaha-gá xii-güedé quihíⁿ-güedé. 2 Te cùmání-gá caca-güedé, te ní xáhaⁿ-gá xii-güedé:

—Nchòhó xiniⁿ-ndó sá òré ná sáá yóó cuu nchaa sá xítú ñáyiú, te ío vài cuu. Te na càchí tnúhu ndáá-í xii-ndo sá dàtná vài sá xítú ñáyiú cùu, ducaⁿ ío vài ñáyiú cùmání cundedóho tnúhu Yá Ndiòxí te ío sacú ñáyiú dàcuaha ñaha xii-yu tnúhu-gá, núú xiáⁿ xiniⁿ ñùhu-xi cácaⁿ-ndó núú Yá Ndiòxí cuèndá

sá ná dàcaháⁿ-gá iní ñáyiú cáháⁿ-yu tnúhu-gá núú ñáyiú cùmání cundedóho tnúhu-gá. 3 Te nchòhó cúú-ndó dàtná cue mbéé cue quiti cuaháⁿ núú yíhí cue quiti déé. Chí tendaha ñaha-í xii-ndo quihíⁿ-ndó núú xíndecu nchaa ñáyiú cuihna iní-xi. 4 Te vá cànèhe-ndo ñunu cuhuⁿ ndachiuⁿ-ndo, ni núú cúhúⁿ díhúⁿ-ndó, te ni vá cáda tùha-gá-ndó chàú-ndó chí diu-ni chàú yíhí-ndó-áⁿ xiáⁿ-ni quihí-ndo, te vá ío cuyaa-ndo cáháⁿ ndihí-ndo ñáyiú ñùhu ichi. 5 Te òré ná quèxio-ndo ìⁿ vehe, te duha cúñaha-ndo xii ñáyiú dii vèhe-xi-áⁿ: “Yá Ndiòxí chindee ñaha-gá xii-ndo ío váha cuu iní-ndó cùndecu-ndo”, duha cúñaha-ndo xii-yu. 6 Te núú ñáyiú-áⁿ ñí nduu táhú-yu sá cùndècu váha iní-yu núú Yá Ndiòxí, te cuu-xi sá vaha sá cúú-xi-yu tnúhu cúñaha-ndo-áⁿ, dico núú ñá túú ní cáháⁿ váha ndihí ñáhá-yu xii-ndo, te cúñaha-ndo sá vá cúú-xi sá vaha sá cúú-xi-yu. Dico núú ní cáháⁿ váha ndihí ñáhá-yu xii-ndo, 7 te diu-ni vehe-áⁿ cada vehe tnaa-ndo, te ñá túú-gá ndéé nducu-ndo vèhe cùndecu-ndo, te caxi-ndo nchaa sá ná tàxí-yu, chí nchaa cue téé quide chiuⁿ dacutíí tàú-güedé sá nihí-güedé sá cáxi-güedé cuèndá nchaa chiuⁿ quide-güedé. 8 Te núú ní sáá-ndó ìⁿ ñuú núú ñí queheⁿ cuèndá ñáhá-yu xii-ndo, te caxi-ndo nchaa sá ná tàxí-yu. 9 Te cada tátna-ndo cuè ñáyiú cùhú xíndecu ñuú-áⁿ, te cúñaha-ndo xii-yu sá sà ní sáá nduu ndíhu ndaha ñaha Yá Ndiòxí xii-yu. 10 Dico núú ní sáá-ndó ìⁿ ñuú núú ñá túú ní quèheⁿ cuèndá ñáhá-yu xii-ndo, te tñii-ndo ichi cuita cáháⁿ-ndó cuaháⁿ, te cúñaha-ndo xii-yu: 11 “Ndéé tíca chúhmá ñí tñii sáhá-ndí ñuú-ndó nàquidi-ndí, te duha quide-ndí cuèndá cutnùní iní-ndó sá ñá túú quide váha-ndo ndècu-ndo. Dico cunaha-ndo sá

sà ní sáá nduu ndíhu ndaha ñaha Yá Ndióxi xii-ndo ní cùu”, duha cùñaha-ndo xii-yu. ¹² Te na càchí tnúhu-í xii-ndo sá ná sáá nduu càda ndáá Yá Ndióxi cuéchi nchaa ñáyi, te ñáyi ñuú-áⁿ ïo-gá ndohó-yu dàvá-áⁿ dàcúxí ñáyi ñuú Sòdomá —càchí-gá xáhaⁿ-gá xii-güedé.

Cuendá ñáyi dava ñuú ñá túú sàndáá iní tnúhu Xitohó Jesucristú
(Mt. 11:20-24)

¹³ Te Jèsús xáhaⁿ-gá xii ñáyi dava ñuú ñá túú sàndáá iní tnúhu-gá:

—¡Ndàhú nchòhó cue ñáyi ñuú Coràzín! ¡Te ndàhú nchòhó cue ñáyi ñuú Bètsaidá! Chi núu dícó ñuú Tírú, ndíhi ñuú Sídón ní quide-í nchaa sá vā yōo tnàhí ndacu cada datná ní quide-í ñuú-ndó-áⁿ ní xiní-ndó ñá, te sá ndéé ama-gá cuihnú-yu dóo ndàhú, te cunucóo-yu núu yàá cuendá sá ndíxí cuéchi iní-yu sá ñá túú quide váha-yu ní cùu. ¹⁴ Dico sáá nduu te ío-gá dandòho ñaha Yá Ndióxi xii-ndo dàcúxí ñáyi ñuú Tírú, ndíhi ñáyi ñuú Sídón. ¹⁵ Te nchòhó ñáyi ñuú Capèrnaúm quide iní-ndó sá sà cuándaa-ndo àndiu, dico ñáhá chi núu úhú núu ndàhú cundecu-ndo —duha ní xáhaⁿ-gá xii nchaa ñáyi ñuú-áⁿ.

¹⁶ Te xáhaⁿ tùcu-gá xii cue tée tendaha-gá quíhíⁿ cáháⁿ tnúhu-gá-áⁿ:

—Nchaa ñáyi na cùndedóho nchaa tnúhu cáháⁿ-ndó, te cada iní-yu sá yúhú cáháⁿ-í ndedóho-yu, te nchaa ñáyi na dàquee tihú ñáhá xii-ndo, te tnàhá yúhú daquèe tihú-yu, te nchaa ñáyi ducaⁿ na dàquee tihú ñáhá xii-í, te tnàhá Tàtá-í Dútú Ndióxi Yáá ní tendaha ñaha xii-í véxi-í ñuyú-a dàquee tihú-yu —càchí-gá xáhaⁿ-gá xii-güedé.

Te ducaⁿ te ní xica-güedé cuáháⁿ-güedé.

Ní nasáá cue tée únídico úxí ní tendaha Jèsús ní sáháⁿ ní cáháⁿ tnúhu-gá núu ñáyi

¹⁷ Te cue tée únídico úxí-áⁿ ní nasáá-güedé te súuní cudíí iní-güedé, te xáhaⁿ-güedé xii Jèsús:

—Mèstrú, ndéé espíritú cùndíhi yucu ñávaha sàndáá iní ñáhá-xí xii-ndí òré cáciu nèhe ñaha-ndí xii-n —càchí-güedé xáhaⁿ-güedé xii-gá.

¹⁸ Te Jèsús ní xáhaⁿ-gá:

—Ndáá cáháⁿ-ndó chi yúhú ní xiní-í cùtnàhá ní xíta nihnu yucu ñávaha, chi datná ní ngava ìⁿ tasaⁿ ní ngava-xi ñuyú-a. ¹⁹ Te datná quidé-ndó òré xènihnu-ndo ìⁿ cóó, àdi ìⁿ nchacua ducaⁿ cada-ndo daquee tihú-ndó yucu ñávaha, te ñá túú nà cada ñaha-xi xii-ndo, chi ní taxi-í tnúhu ndee iní ndécú ndíhi-ndo. ²⁰ Dico vá cudíí iní-ndó cuendá sá sàndáá iní ñáhá cuè espíritú cùndíhi yucu ñávaha xii-ndo, chi cudíí iní-ndó cuendá sá sà yodo tnuní-ndó núu tütú Yá Ndióxi Yáá ndécú àndiu —cachí-gá xáhaⁿ-gá xii-güedé.

Jèsús cudíí iní-gá

(Mt. 11:25-27; 13:16-17)

²¹ Te òré-áⁿ súuní ní quide díí iní ñáhá Espíritú Yá Ndióxi xii Jèsús, te ní xáhaⁿ-gá xii Yá Ndióxi:

—Yòhó Tàtá-í Dútú Ndióxi, ío chíñuhu ñaha-í xii-n chí ñu-n taxi tnuní-n àndiu ndíhi ñuyú-a, te dànehé-n cuè ñáyi nchaa tnúhu váha, te ñu-ni ñáyi-áⁿ cúu-yu ñáyi ñá túú cùtnuní iní-xi nchaa tnúhu cáháⁿ cue tée túha, te nchaa tnúhu cáháⁿ-n-áⁿ ñá túú ní datúu-n núu ñáyi càchí sá ïo túha, te ío váha sáá díquí-xi. Te ducaⁿ quide-n, chi ducaⁿ cuíní-n cùnduu —cachí-gá xáhaⁿ-gá xii Yá Ndióxi.

²² Te xáhaⁿ tùcu-gá xii cue tée ní nasáá-áⁿ:

—Mee Tàtá-í Dútú Ndióxi ní cachí-gá sá cùnùu-í núu nchaa-ndí túhú sá ío. Te vá yōo ìⁿ xini nàcuáa sàni iní yúhú Déhe Dútú Ndióxi, chí ìⁿ dli díí-ni mee-gá xini-gá nàcuáa sàni iní-í. Te ducaⁿ ìⁿ dli-ni yúhú xini-í nàcuáa sàni iní mée-gá, te

nchaa ñáyu càchí iní-í sá quini-yu nàcuáa sàni iní Tàtá-í Dútú Ndiõxí te xitnúhu-í-yu, te vá yõo ñⁿ-gã xini nàcuáa sàni iní-gá chi diu-ni ñáyu ducaⁿ xitnúhu-í-áⁿ xini-yu — càchí-gá xáhaⁿ-gã xii-güedé.

23 Te ní nchócótó-gã núú xĩndecu mee-ni cuè téé xica cuu ndihi-gá, te ní xáhaⁿ-gã xii-güedé:

—Váha táhú nchòhó ndihi nchaa ñáyu ndèhe nchaa nacuáa quide-í vitna. 24 Chi ío cuéhé cue téé ní xóo cáháⁿ tnúhu Yá Ndiõxí ndéé sanaha, ndihi cue téé ní xindaha ñaha xii ñáyu ní cuini-güedé cundehe-güedé nchaa sá ndéhé-ndó quide-í vitna, te ñá túú ní xini-güedé, te ní cuini-güedé cundedóho-güedé nchaa tnúhu càháⁿ-í ndédóho-ndo vitna, te ñá túú ní xĩndedóho-güedé —càchí-gá xáhaⁿ-gã xii-güedé.

Nàcuáa ní quide ñⁿ téé distritú Sámariá

25 Te ñⁿ téé dàcuaha ñaha xii ñáyu nchaa tnúhu ní chidó tnúni ndíi Moisés ní ndacuñí-dé xító ndéé-dé Jèsús núu nása cunduu tnúhu cáháⁿ-gá, te xáhaⁿ-dẽ xii-gá:

—Mèstrú, ¿ná cúú sã cadà-í cuendá nduu táhú-í cundecu-í ndihi Yá Ndiõxí ni caa ni quihíⁿ-í? —càchí-dé xáhaⁿ-dẽ xii-gá.

26 Te Jèsús ní xáhaⁿ-gã xii-dé:

—Cuini-í cachí tnúhu-n nása càháⁿ-xi núú tütú ndíi Moisés —càchí-gá xáhaⁿ-gã xii-dé.

27 Te xáhaⁿ-dẽ xii-gá:

—Ndíi Moisés càchí ndíi núú tütú ndíi: “Cuu iní-ndó Dútú Ndiõxí Yáa cúú Ndiõxí-ndó ni yuhu ni iní-ndó, te cani iní-ndó cada-ndo datná cuini mée-gã, te mee-ni tnúhu váha cani iní-ndó nàcuáa cuu vii cuu váha-ndo núú-gã, te coo iní-ndó cùu iní-ndó-gã. Te cuu iní-ndó tnàha ñáyu-ndo datná cúú iní-ndó mée-ndo”, duha càchí ndíi núú tütú ndíi —càchí-dé xáhaⁿ-dẽ xii-gá.

28 Te Jèsús ní xáhaⁿ-gã:

—Váha-ni cáháⁿ-n, te núu cada-n nàcuáa cáháⁿ-n áⁿ, te nduu táhú-n

cũndecu-n ndihi Yá Ndiõxí ni caa ni quihíⁿ —càchí-gá xáhaⁿ-gã xii-dé.

29 Te sá dúcáⁿ ní xáhaⁿ Jèsús xii-dé núu ndũcu-dé nàcuáa cada-dé cácu nihnu-dé núu tnúhu ní cáháⁿ-dé, te ní xicáⁿ tnúhú-dẽ núú-gã, te xáhaⁿ-dẽ:

—¿Yoo cùu tnaha ñáyu-í-í? —càchí-dé xáhaⁿ-dẽ xii-gá.

30 Te Jèsús ní cani-gá ñⁿ cuendú núú-dẽ nàcuáa tecú tnúni-dé tnúhu-gá, te xáhaⁿ-gã:

—Ñⁿ téé ní ndee-dé ñuú Jerusalén ñúhú-dẽ ichi cuánuu-dé cuáháⁿ-dé ñuú Jericó, te ní quee ñadúhú ichi-dé ní dúhú-güedé dóo níhnú-dẽ, ndihi nchaa sá néhé-dé, te ní caniha vihi-güedé, te nchito diu-ná-dé ní daña ñaha-güedé te cuáháⁿ-güedé. 31 Te mei òré

cátuu-dé-áⁿ ñúhú ñⁿ dútú ichi-áⁿ, te òré ní xini ñáhá dütú-áⁿ xii-dé, te ñⁿ xio-ni ní xócõo ndee-dé ní yáha-dé. 32 Te ñúhu tucu ñⁿ téé

cùu levitá ichi-áⁿ, te òré ní xini-dé téé-áⁿ cátuu-dé, te diu-ni ducaⁿ ní quide-dé ñⁿ xio-ni ní xócõo ndee-dé ní yáha-dé. 33 Dico ñⁿ téé distritú Sámariá ñúhú tucu-dé ichi-áⁿ te òré ní xini-dé téé-áⁿ cátuu-dé, te ní cundáhú iní ñáhá-dé. 34 Te ní sáháⁿ-dé núú cátuu téé-áⁿ, te ní quide tátna-dé nchaa núú ní

nícuéhé xii téé-áⁿ ní chihi-dé yúcu, te ní dácútú-dé. Te dàtnúni ní dácáa ñaha-dé sáta quiti-dé, te ndéca ñaha-dé cuáháⁿ ñⁿ vehe núú sácõo cue ñáyu sácúhuⁿ ichi, te yacáⁿ ní xito ñaha-dé. 35 Te ingá nduu òré

ní nucúhuⁿ téé Samaritanú-áⁿ ichi, te ní tava-dé úú díhúⁿ denariú, te ní sáha-dé téé cùu xitohó vehe-áⁿ, te ní xáhaⁿ-dẽ: “Coto saú-n tée-a, te núu ñá ní tnàhá díhúⁿ sá ní taxi-í, te cuéi na dàndoñuhu-gá-n díhúⁿ-n

cuendá-dé, te òré ná quixi tucu-í te nacháhu-í”, duha ní xáhaⁿ tée Samaritanú-áⁿ xii téé dii vehe xíáⁿ. 36 Te vitna cáháⁿ, te núu ndédacáa cue téé úní-áⁿ cúú-güedé téé váha

cùu iní-güedé tnàha ñáyu-güedé —càchí-gá xáhaⁿ-gã xii téé dàcuaha

ñaha xii-í ñáyi-u-áⁿ nchaa tnúhu ní chídó tnúni ndíi Moisés.

³⁷ Te té-e-áⁿ ní xáhaⁿ-dë xii-gá:

—Té-e ní cundàhú iní ñáhá xii té-e ní dánicuehé ñáhá cue ñadúhú-áⁿ, té-e-áⁿ cúu-dë té-e cùu iní tnàha ñáyi-u-xi —càchí-dé xáhaⁿ-dë xii-gá.

Te Jèsús ní xáhaⁿ-gá:

—Cuàháⁿ te ñu-ni ducaⁿ càda-n tnahá-n —càchí-gá xáhaⁿ-gá xii-dé.

Jèsús ndécú-gá vehe tá Mārta ndíi tá Mária

³⁸ Te Jèsús ñúhú-ni-gá ichi cuaháⁿ-gá ndíi cue té-e xica cuu ndíi-gá, te ní sáa-gá ìⁿ ñúú líhli, te xíáⁿ ní quee ìⁿ xíchí nání Mārta ní cáháⁿ ñáhá-xí xii-gá vehe-xi.

³⁹ Te tá Mārta ndècu ìⁿ cùhú-xi nàni-xi Mariá, te xíchí-áⁿ ní ngóo-xi núú Jèsús ndédóho-xi nchaa tnúhu càháⁿ-gá. ⁴⁰ Te tá Mārta-áⁿ ndíi vihi-ni iní-xi quide-xi chiuⁿ-xi, te ní sáháⁿ-xi núú Jèsús, te ní xáhaⁿ-xi:

—Mèstrú, ¿náa ñá túú tnàhí sàni iní-n sá ní dándóo ndaha ñàha cùhú-í nchaa chiuⁿ-áⁿ? Cúñaha sàù ná quixi-xi chindee ñaha-xi —cachí-xi xáhaⁿ-xi xii-gá.

⁴¹ Dico Jèsús ní xáhaⁿ-gá:

—Yòhó Mārta, ñúhu tneñu vihi-n, te ndíhú iní-n sá ìo vài chiuⁿ-n ñuhu, ⁴² dico xini ñuhu vihi-gá-xi cundedóho-n tnúhu càháⁿ-í, chi tá Mária-a sa ndédóho-xi tnúhu-í, te vá yòo ìⁿ ndacu xocàni tnúhu-í sá ní ngúndecu ndíi-xi —càchí-gá xáhaⁿ-gá xii-xi.

11

Jèsús dánèhé-gá cue té-e xica cuu ndíi-gá nàcuáa cáháⁿ ndíi-güedé Yá Ndiöxí

(Mt. 6:9-15, 7:7-11)

¹ Te ìⁿ nduu càháⁿ ndíi Jèsús Yá Ndiöxí ìⁿ xichí, te sáta ní yáha ní cáháⁿ ndíi-gá Yá Ndiöxí, te ní xáhaⁿ ìⁿ té-e xica cuu ndíi-gá xii-gá:

—Mèstrú, danèhé ñáhá xii-ndí nása cáháⁿ ndíi-ndí Yá Ndiöxí dàtná ní quide ndíi Juáa ní dánèhé ndíi cue té-e ní xica cuu ndíi ndíi —càchí-dé xáhaⁿ-dë xii-gá.

² Te Jèsús ní xáhaⁿ-gá:

—Òré cáháⁿ ndíi-ndo Yá Ndiöxí, te cachí-ndó:

Yòhó tátá-ndí Dútú Ndiöxí Yaá ndécú àndiu,

nchaa ñáyi-u na càháⁿ-yu sá cúu-n Yáa ío yíñúhu.

Te xicáⁿ táhú-ndí núú-n sá ná sáa nduu ndíhu ndàhá-n-yu.

Te cada-n dàtná càchí iní-n ñùyú-u-a dàtná quidé-n àndiu.

³ Te xicáⁿ táhú-ndí núú-n sá táxi-n sá cándèca iní-ndí ìⁿ nduu ìⁿ nduu.

⁴ Te cada càhnu iní-n nchàa yíca cuèchi-ndí, chi tnàhá nchúhú quidé càhnu iní-ndí nchaa sá quidé ñàha tnaha ñáyi-u-ndí.

Te vá dáñá-n dàcaháⁿ ñáhá yùcu ñávàha xii-ndí cada-ndí sá ñà túú vàha, chi coto ñàha-n xii-ndí cuèndá sá vã dúcáⁿ càda ñaha-xi,

duha cáháⁿ-ndó

—càchí-gá xáhaⁿ-gá xii-güedé.

⁵ Te Jèsús ní xáhaⁿ tùcu-gá:

—Te núu ndèdacàa nchóhó ndécú ìⁿ té-e tnàha tnúhu ndíi-ndo, te daya niú cuaháⁿ-ndó vehe-dé, te òré ní quexio-ndo, te xáhaⁿ-ndo xii-dé: “Véxi-í núu vá cùndèe iní-n tàxi nuu-n úní tnàhá pàá, ⁶ chi ìⁿ té-e xini tnàhá ndíi-í ñúhú-dë ichi ní quexio-dé vehe-í, te ñá túú tnàhí ná cuañaha-í caxi-dé”, quesaha-ndo cùñaha-ndo. ⁷ Te

té-e-áⁿ càháⁿ-dë ndéé xití vehe-dé, te cúñaha-dë xii-ndo: “Vá dásàtú nihá-n chi ndèdí yuyèhe-í, te càa-í ndíi cue landú-í, te vá cúu ndàcòo-í taxi-í sá cuini-n”, quesaha-dë cúñaha-dë xii-ndo.

⁸ Te na càchí tnúhu-í xii-ndo sá cuèi cùu-dé té-e tnàha tnúhu ndíi-ndo, dico ducaⁿ cúñaha-dë xii-ndo, dico dacuití sá ndácòo-dé taxi-dé sá cuini-ndó cuèndá sá vã dásàtú-gá-ndó iní-dé. ⁹ Te yúhú càchí-í xii-ndo sá cãcáⁿ-ndó núu ná cuini-ndó núu Yá Ndiöxí te taxi-gá. Te vá dáñá ndéé-ndó cãcáⁿ-ndó núu-gá núu ná cuini-ndó,

te ducaⁿ te níhí-ndó. Te cada iní-ndó sã ní quexio-ndo vehe ìⁿ tnaħa ñáyíu-ndo te ní cáħáⁿ-ndó, te ñáyíu-áⁿ ní tedóħo ñàħá-yu xii-ndo te ní nacaáⁿ-yu yuyèhe. Te ducaⁿ càda iní-ndó chi Yá Ndiöxí tedóħo ñaha-gá xii-ndo, te taxi-gá sá ná càcáⁿ-ndó nõú-gã. ¹⁰ Chi nchaa ñáyíu ducaⁿ xiquide te Yá Ndiöxí tedóħo ñaha-gá xii-yu nihí-yu sá cuíní-yu. Te ðíu-ni ducaⁿ tùcu nchaa ñáyíu na càcáⁿ nõú-gã ìⁿ sá cuíní-yu, chi sãñaha-gá sá xicáⁿ-yu nõú-gã. Te ðíu-ni ducaⁿ tùcu níhí nchaa ñáyíu ñá túú dàña ndeé xicáⁿ nõú Yá Ndiöxí sá cuíní-yu, chi nihí-yu.

¹¹ Te nchòhó cue téé cùu tátá ñá túú cùndee iní-ndó cuãħa-ndo cuè déhe-ndo ìⁿ yúú caxi-güexi òré xicáⁿ-güexi ìⁿ pàá nõú-ndó càxi-güexi, te ni ñá túú cùndee iní-ndó cuãñaha-ndo ìⁿ cóó caxi-güexi òré xicáⁿ-güexi ìⁿ chácá nõú-ndó càxi-güexi. ¹² Te ni ñá túú cùndee iní-ndó cuãñaha-ndo ìⁿ nchacua caxi-güexi òré xicáⁿ-güexi ìⁿ ndíú nõú-ndó càxi-güexi. ¹³ Te nchòhó cuèi ndeé dau sáá iní-ndó, ðico sãħa-ndo cuè déhe-ndo sã vãħa xèxi-güexi òré xicáⁿ-güexi nõú-ndó. Te nõu nchòhó ducaⁿ quide-ndo, ðte uuⁿ-gá ducaⁿ quide Tátá-ndó Dùtú Ndiöxí Yá ndécú àndíu, chi taxi-gá Espiritú-gá cundecu ndihí-ndo te nõu na càcáⁿ-ndó nõú-gã! — càchí-gá xáħaⁿ-gã xii-güedé.

Càchí-güedé sá ndécú ndíhi Jesús yucu ñávãħa

(Mt. 12:22-30; Mr. 3:20-27)

¹⁴ Te Jèsús ndéññuhu-gá espíritú cùndihí yucu ñávãħa yíhi ñaha xii ìⁿ téé ní quide ñihí-xi, te òré ní ndee ñaha espíritú-áⁿ xii téé-áⁿ, te ní nacáħáⁿ-dé. Te ío ní cuññuhu ñáyíu sá dúcáⁿ ní quide-gá. ¹⁵ Te davá-yu ní xitnãħá-yu:

—Téé-a ndéññuhu-dé nchaa espíritú cùndihí sácúíhná yíhi ñaha xii ñáyíu, chi ðíu-ni sácúíhná-ãⁿ

chíndèe ñaha-xi xii-dé, te ðíu-ni-xi tàxi tnuní-xi nchaa espíritú-áⁿ — càchí-yu xitnãħá-yu.

¹⁶ Te davá-yu xito ndeé ñãħã-yu xii-gá, te xãħãⁿ-yu sá ná cáda-gã ìⁿ sá vã yòo tnãħí ndácu cada ñuyíú-a cundèhé-yu nãcuáa cutnùní iní-yu nõu ndáá sá Yá Ndiöxí ní tendaha ñaha-gá xii-gá vèxi-gá ñuyíú-a. ¹⁷ Dico mee-gá sa ní cutnùní iní-gá nchaa nãcuáa sãni iní-yu, nõu ní xáħaⁿ-gã xii-yu:

—Te nchòhó xini-ndó sã nõu ìⁿ téé yíndaha ìⁿ nacióⁿ vã cúú ìⁿnuu-dé ndihí cue téé cùndihí-dé, te vã cúdíi-dé cunuu-dé. Te ðíu-ni ducaⁿ sãtnahá tuçú-xi cùu cue ñáyíu xindecu ìⁿ-ni vèhe, chi nõu vã cúú ìⁿnuú-yu cundecu-yu, te vã cúdíi-yu cundecu càhnú-yu. ¹⁸ Te ducaⁿ sãtnahá-xi cùu sácúíhná, chi nõu vã cúú ìⁿnuu-xi ndihí nchaa espíritú cùndihí-xi te vã cúdíi-xi cundecu-xi taxi tnùní-xi. Te ðíuħa càħáⁿ-í chi nchòhó càchí-ndó sá sácúíhná chíndèe ñaha-xi xii-í queññuhu-í nchaa espíritú cùndihí-xi yíhi ñaha xii ñáyíu. ¹⁹ Te nõu yúhú quidé cuendá-ndó sã sácúíhná chíndèe ñaha-xi xii-í, te xini ññuhu-xi cada cuendá-ndó yòo chindee ñaha xii cue téé xica cuu ndihí-ndo queññuhu-güedé nchaa espíritú cùndihí-xi yíhi ñaha xii ñáyíu. Te mee-güedé càchí-güedé sá nchòhó ñá túú càħáⁿ ndáá-ndó sá dúcáⁿ càħáⁿ-ndó. ²⁰ Te ndáá sá Yá Ndiöxí chíndèe ñaha-gá xii-í queññuhu-í nchaa espíritú cùndihí sácúíhná yíhi ñaha xii ñáyíu, te xíãⁿ cutnùní iní-ndó sã sá ní sáá nduu ndíhu ndaha ñaha Yá Ndiöxí xii-ndo.

²¹ Te nõu ìⁿ téé ío ndee, te súúní ññí cáá-dé, te ndeé-dé vehe-dé cuendá sá vã cuíta, te ní quide túħa-dé titní sá dèéⁿ, te ío vãħa nèħe vãħa-dé nchaa ndachíuⁿ-dé. ²² Dico nõu quexio ingá téé ío-gá ññí cáá te ndee-gã-dé, te ngüíta-dé nãá-dé ndihí téé ndeé vehe-xi-áⁿ,

te cada cànarí ñáhá t̃e-áⁿ xii t̃e ndéé vehe-xi-áⁿ, te quendeé-dé nchaa sá d̃ééⁿ cùndèe iní-dé, te taxi t̃nùní-na-dé nchaa xiãⁿ, ndihí nchaa sá ndécú ndihí-dé, te dàcáhñu-dé nchaa cue t̃e cùndihí-dé nchaa sá ná ñihí-dé.

23 Te nchaa ñáyiú ñá túú cùndihí ñaha xii-í, te cùu úhú iní ñáhà-yu, te nchaa ñáyiú ñá túú chindee ñaha xii-í, te dàquee tíhũ-yu chiⁿ quide-í.

Espiritú cùndihí yucu ñávãha sã nánchòcãva xito cùu uú
(Mt. 12:43-45)

24 Te òrè ná quèe ñaha ìⁿ espíritú cùndihí yucu ñávãha xii ìⁿ ñáyiú, te cuáháⁿ-xi ndũcu-xi ìⁿ xichi núú cùndècu-xi te ñá ñihí-xi, te ní sani iní-xi: “Vãha-gã núhú tucu-í núú ñí xíndecu-í”, duha ní sani iní-xi. 25 Te cuánuhú-xi, te òrè ní nasáá-xi, te ní xini-xi sá cáá iní ñáyiú-áⁿ dàtná cáá-ñã ìⁿ vehe ní natihú, chi ní nduu vii-ná, vá yõ-gã ndécú. 26 Te sãtã dúcãⁿ te ní xica-xi cuáháⁿ-xi cuándúcú-xi úsã tñáhã espíritú cùndihí-xi sã nèhé víhí-gã xiquide, te òrè ní ñihí-xi cue espíritú-áⁿ te ndèca ñaha-xi cuáháⁿ cuendã ngúndecu ndihí-xi ñáyiú-áⁿ, te ñáyiú-áⁿ uuⁿ-gã nándi yãha-yu dàcúúxí ndèé díhna — càchí-gã xãhaⁿ-gã xii-yu.

Cuendã ñáyiú cùu váha ndisa iní-xi

27 Te ñini càháⁿ J̃esús tñúhu-áⁿ núú ñáyiú ní cáháⁿ ñihí ìⁿ ñadhí tnuú-yu, te xãhaⁿ-aⁿ xii J̃esús:

—jSã váha táhú ñadhí ní dácácú ñaha xii-n, te ní dácuéhnú ñaha-aⁿ! —cachí-aⁿ xãhaⁿ-aⁿ xii-gã.

28 Te J̃esús ní xãhaⁿ-gã:

—jVãha-gã táhú nchãa ñáyiú sãcúndedóho nchaa tñúhu càháⁿ Yã Ndiõxí te sãndáá iní-yu! —cãchí-gã xãhaⁿ-gã xii-aⁿ.

Ñáyiú ñá túú sãndáá iní ñáhã xii J̃esús cuini-yu cada-gã ìⁿ sã vã yõ tñáhí ndàcu cada

(Mt. 12:38-42; Mr. 8:12)

29 Te ta tàcã vai ñáyiú te dàdehnde tñaha-ná-yu, te ní ngúita J̃esús xãhaⁿ-gã xii-yu:

—Nchòhó ñáyiú ndècu ñuyú vitna, chi ío sãá iní-ndó, te cùní-ndó càda-í ìⁿ sã vã yõ tñáhí ndàcu cada cuendã cuini-ndó cùtnuní iní-ndó núu ndisa sã Yã Ndiõxí ní tendaha ñaha-gã xii-í véxi-í. Dico ñá túú nãgã cada-í quini-ndó, chi sa ñihí-ndó tñúhu nàcuáa ní yãha ndíi J̃onás t̃e ní xóo cáháⁿ tñúhu Yã Ndiõxí ndéé sanaha, te ñiu-ni ducaⁿ yãha yúhú tucu. 30 Chi nchaa ñáyiú ñúú Ñinivé ní cutnùní iní-yu sã Yã Ndiõxí ní tendaha ñaha-gã xii ndíi J̃onás ní sãháⁿ ndíi ñuu-yu. Te ducaⁿ sãtnahá-xi cùu yúhú T̃e cùu ñani tñáhã-ndó nchãa-ndo, chi sãá nduu te cutnùní iní-ndó sã Yã Ndiõxí ní tendaha ñaha-gã xii-í véxi-í ñuyú-a. 31 Te na sãá nduu càda ndáá Yã Ndiõxí cuéchi nchaa nchòhó ñáyiú ndècu ñuyú-a, te dàvã-áⁿ quini-ndó ìⁿ ñadhí ñaha ní xindaḡa ìⁿ nacióⁿ cáá ndãa xio cuha núú quèné nchicanhii. Te ñaha-áⁿ ío xica ñí xíndecu-aⁿ, te ní sãháⁿ-aⁿ ní xíndedóho-aⁿ nchaa tñúhu ní cáháⁿ ndíi Salómón, chi ndíi-áⁿ ío ní sãá sã xini tñùní ndíi. Te ñaha-áⁿ càháⁿ-aⁿ dàvã-áⁿ sã nchòhó ñáyiú ndècu vitna ñá túú ní quide ndáá-ndó. Dico vitna iha ndècu ndihí ñaha-ndo xii yúhú, te ñiu-í ío-gã cùnúu-í dàcúúxí ndíi Salómón. 32 Te ñiu-ni nduu càda ndáá Yã Ndiõxí cuéchi nchaa nchòhó ñáyiú ndècu ñuyú-a vitna, dàvã-áⁿ tñáhã cue ñáyiú ní xíndecu ñúú Ñinivé cundecú-yu núú Yã Ndiõxí, te tñáhã-yu cachí-yu sã ñã túú ní quide ndáá-ndó. Chi ñáyiú ñúú Ñinivé-áⁿ ní ndixi túu iní-yu sã ñã túú quide váha-yu ndécú-yu te ní natuhã-yu ichi Yã Ndiõxí cùtnáhã ní cáháⁿ ndihí ñaha ndíi J̃onás tñúhu-gã xii-yu. Dico vitna iha ndècu ndihí ñaha-ndo xii yúhú t̃e càháⁿ tucu tñúhu Yã Ndiõxí, te ñiu-í ío-gã cùnúu-í dàcúúxí ndíi

Jónás.

*Núú-ó cùu-xi datná ìⁿ ñuhú
(Mt. 5:15; 6:22-23)*

³³ Te ñá túú nì ìⁿ ñáyiú tēñuhú ìⁿ lintérná, te taxi ndecú-yu ìⁿ núú yídāhu, àdi chiváha-yu xití ìⁿ tídihi, chi tàxi ndecú-yu ìⁿ núú ñnu cuendá nchaa ñáyiú quíhu vehe cutnùnì núú-yu. ³⁴ Te núú-ndó cùu-xi datná ìⁿ ñuhú, chi ìⁿ sá ná quìní-ndó te ndìxi túú iní-ndó ñá cúú xǎⁿ, te núu caváha núú-ndó, te ducaⁿ cùtnuní iní-ndó ñá cúú sá ndécú núú-ndó, áⁿ te núu cùhú, te vá cùtnuní iní-ndó ñá cúú sá ndécú núú-ndó. Te sá dúcáⁿ cùhú núú-ndó te cada iní-ndó sá ndécú-ndó datná ìⁿ núú néé. ³⁵ Te ío cada cuendá-ndó vǎ cǎní cuèhé iní-ndó cuendá tnúhu Yá Ndióxi cuendá cutnùnì iní-ndó nàcuáa cundecu-ndo, chi núu na cǎni cuèhé iní-ndó cuendá tnúhu-gá, te cùu-ndo datná ìⁿ ñáyiú ñá túú cùtnuní núú-xí. ³⁶ Te núu cǎndoo canine iní-ndó, te mee-ní sǎ vǎha ñuhu iní-ndó, te cùtnuní vǎha iní-ndó tnúhu ndáá datná cùtnuní vǎha núú-ndó òré cǎyú ñuhú, ducaⁿ cùtnuní iní-ndó —cǎchí-gá xǎhaⁿ-gǎ xii-yu.

Jèsús cǎháⁿ-gá cuendá cue tée cùu fariséú ndìhi cue tée dàcuaha ñaha xii-í ñáyiú

(Mt. 23:1-36; Mr. 12:38-40; Lc. 20:45-47)

³⁷ Te òré ní ndìhi tnúhu ní cǎháⁿ Jèsús, te ìⁿ tée cùu fariséú ní cǎháⁿ ñǎhá-dé xii-gá vehe-dé caxi-gá, te cuánguihu-gá vehe-dé, te ní ngóo-gá mèsá. ³⁸ Te tée cùu fariséú-áⁿ ío ní cuñúhu-dé, chi Jèsús ñá túú ní ndàha-gá nàcuáa sǎni iní-güedé nduu vétú iní Yá Ndióxi òré ní ngóo-gá caxi-gá datná quidé mèe-güedé. ³⁹ Te Jèsús ní xǎhaⁿ-gǎ xii-dé:

—Nchòhó cue tée cùu fariséú xìní-ndó sǎ ío ñáyiú nàquete sátá-ni tásáⁿ ndìhi sátá-ni còhó, te xití-xi cǎndehe caduha-ni. Te ducaⁿ sǎtnahá-xi cùu nchòhó,

chi ndaha-ni-ndo nàquete-ndo, te iní-ndó ñá túú nduu ndoo, te nándi dándahú-ndó tnàha ñáyiú-ndo, te quèheⁿ-ndo sá ndécú ndìhí-yu, te nándi-gá nchaa sá cuèhé sá dúhá ñuhu iní-ndó quide-ndo. ⁴⁰ Te nchòhó cúú-ndó cuè tée ío ñá iní-xi! Te ná ñá túú cùtnuní iní-ndó sǎ Yá Ndióxi Yá ní cadúha yiqui cùñú-ó diu-ni-gá ní chihi-gá iní-ó-ǎⁿ? ⁴¹ Te nchaa sá vǎha ndècu ndìhi-ndo cuáha-ndo nchaa ñáyiú xini ñuhu na cundecu ndìhí-yu, te núu ducaⁿ na càda-ndo, te cuu-ndo ñáyiú sa ní nduu ndoo ní nduu nine iní-xi.

⁴² Te ndàhú ní cuu nchaa nchòhó cue tée cùu fariséú! Chi sǎha-ndo Yá Ndióxi núú ùxí xìchi yúcú nǎní mǎntá, ndìhi yúcú rúdá, ndìhi nchaa dava-gá núú yúcú quèe comidá, dico ñá túú quide ndáá-ndó, te ní ñá túú ñuhu iní-ndó Yá Ndióxi. Dico tnúhu cǎháⁿ-í-a tǎu-ndó càda-ndo, te ní vǎ dáñá ndèé-ndó càda-ndo nchaa dava-gá sá vǎha.

⁴³ Te ndàhú ní cuu nchòhó cue tée cùu fariséú! Chi cuìní-ndó cùnucóo-ndo núú sǎcòo cue tée ío cùnuu xití veñúhu, te cuìní-ndó mèe-ni ndìhi tnúhu yíñuhu cǎháⁿ ndìhi ñaha ñáyiú xii-ndo nchaa núú xícá cùu-ndo.

⁴⁴ Te ndàhú ní cuu nchòhó cue tée dàcuaha ñaha xii ñáyiú nchaa tnúhu ní chidó tnùnì ndíi Moisés, ndìhi nchòhó cue tée cùu fariséú chi ío dándahú-ndó mèe-ndo sá quidé ndáá-ndó te ñá ndáá sá quidé ndáá-ndó! Chi cùu-ndo datná ìⁿ ñáyiú ní xihí te ní nguindüxi, te ñá túú cùtnuní-gá ndèé yíndüxi-yu, te cuèí nà yǎha ñáyiú dico ñá túú cùtnuní sá yíndüxi ndíyi. Te ducaⁿ sǎtnahá-xi cùu nchòhó, chi nchaa ñáyiú ndèhe ñaha xii-ndo ñá túú cùtnuní iní-yu nchaa sá cuèhé sá dúhá sǎni iní-ndó —cǎchí-gá xǎhaⁿ-gǎ xii-güedé.

⁴⁵ Te ní xǎhaⁿ ìⁿ tée dàcuaha ñaha xii-yu nchaa tnúhu ní chidó tnùnì ndíi Moisés xii-gá:

—Mèstrú, te sá dúcáⁿ càháⁿ-n te tnàhá nchúhú xícuèhé-n àⁿ — cächí-dé xáhaⁿ-dè xii-gá.

46 Te Jèsús ní xáhaⁿ-gá:

—jNdàhú ní cuu tnàhá nchaa nchòhó cue téè dàcuaha ñaha xii ñáyiú nchaa tnúhu ní chídó tnùnì ndíi Moisés! Chi quíde-ndo datná quidé ñáyiú dácuido ñⁿ tnaha ñáyiú-xi ñⁿ sá ïo véé, te mèè-yu ni lùha ñá túú cuínì-yu cuidó-yu. Te ducaⁿ sàtnahá-xi quíde nchòhó chi dānehé-ndó ñáyiú nācuāa cadá-yu, dīco mee-ndo chi ni lùha ñá túú cuínì-ndó cāda-ndo nācuāa dānehé-ndó-yu.

47 'jTe ndàhú ní cuu tucu-ndo! Chi cādúha-ndo nūú nī nguindūxi cue téè ní xóo cāháⁿ tnúhu Yá Ndiōxí ndéé sanaha cuēndá sá cúnàha-ndo núú yindūxi cue ndíi, te dīu-ni cue ñanì tnáhá-ndó nī sahnì-güedé cue ndíi. 48 Te nchòhó sa nàha-ndo nācuāa ní quíde cue ñanì tnáhá-ndó, te cächí-ndó sá nī quíde váha-güedé sá dúcáⁿ nī sahnì-güedé cue ndíi-áⁿ, te vitna cādúha-ndo nūú nī nguindūxi cue ndíi.

49 'Te Yá Ndiōxí ïo sàá nchaa sá xínì tnùnì-gá, te ní cächí-gá sá dācāháⁿ-gá iní cue téè cuēndá cāháⁿ-güedé tnúhu-gá núú ñáyiú, te cada-güedé nchaa nācuāa cuínì-gá, te dāva-güedé cahni ñāhá-yu xii-güedé, te dāva-güedé ïo dandòho ñāhá-yu xii-güedé ñaha ní cächí-gá. 50 Te nchaa ñáyiú ñuyíú vitna tnàhá-yu nacháhu-yu núú Yá Ndiōxí cuēndá sá nī sahnì-güedé cue téè ní cāháⁿ tnúhu-gá ndéé cútñahá ní ngáva ñuyíú. 51 Te ndéé ndíi Àbél téè ní sahnì-güedé ndéé díhna nuu, ndíhì ndéé ndíi Zacariá téè ní sahnì-güedé ndéé núú nī ndíhì-ná ndácáⁿ cuēndá ñāhá Yá Ndiōxí núú ñáyiú ndéu ñuyíú vitna, te dīu ndíi-áⁿ nī sahnì-güedé mei tnúú veñúhu cāhnu sá ïo cūnuu, ndíhì xító núú sácódó sá ndúú tǎhú Yá Ndiōxí.

52 'jTe ndàhú ní cuu tucu nchaa nchòhó cue téè dācuaha ñaha xii ñáyiú nchaa tnúhu ní chídó tnùnì ndíi Moisés! Chi quíde-ndo datná quidé ñⁿ téè tàxi tnùnì ñⁿ vehe, chi nacadí-dé te ñá dáñá-dé quíhu ñáyiú te ni mèè-dé ñá túú quíhu-dé. Te ducaⁿ sàtnahá-xi quíde-ndo, chi dācuaha-ndo tnúhu Yá Ndiōxí te ñá túú cuínì-ndó quindáá iní-ndó te ni ñá túú dānehé-ndó ñáyiú cuínì tníi tnúhu-gá nācuāa tǎu-xi cunduu cuēndá naníhì tǎhú-yu —cächí-gá xáhaⁿ-gá xii-dé.

53 Te òré ní ndee Jèsús vehe téè cūu fariséú-áⁿ, te cue téè dācuaha ñaha xii ñáyiú nchaa tnúhu ní chídó tnùnì ndíi Moisés, ndíhì cue téè cūu fariséú ní cudééⁿ-güedé núú-gá, te ní ngüíta-güedé nāndi sá xicáⁿ tnúhú-güedé núú-gá cuēndá cuínì-güedé nūu vá cuíta-gá ñⁿ tnúhu càháⁿ-gá 54 cuēndá ducaⁿ nihì-güedé nācuāa cada-güedé cacáⁿ cuéchi-güedé cuēndá-gá.

12

Jèsús càháⁿ-gá cuēndá cue téè dāndahú mée-xi

1 Te òré-áⁿ nī taçá titní mīl ñáyiú núú ndécú Jèsús, te súunì dīcú ngōnchihì tnàha-ná-yu. Te ndèdòho-yu ní xáhaⁿ Jèsús xii cue téè xica cuu ndíhì-gá:

—Cada cuēndá-ndó vǎ cāncñicúⁿ nihnu-ndo nācuāa quíde cue téè cūu fariséú, chi cue téè-áⁿ ïo dāndahú-güedé mée-güedé sá quidé ndáá-güedé dīco ñá ndáá sá quidé ndáá-güedé. 2 Te nchaa tnúhu sá cúu yūhu ni cuu vá cúu yūhu-gá, chi nchaa dacuítíi sǎ quée tūu-xi núú ñáyiú. 3 Chi nchaa tnúhu càháⁿ dayuhu-ndo quée túu-xi núú chítú núú taçá, te nchaa tnúhu càháⁿ mée-ndó vèhe-ndo dacuítíi sǎ nihì ñáyiú tnúhu.

Yá Ndiōxí xínì ñūhu-xi yuhú-ó-gǎ (Mt. 10:26-31)

4 'Te nchòhó cue tée ío váha tnáhá tnúhu ndihí-í ná càchí tnúhu-í xii-ndo sã vã yùhú-ndó cuè ñáyiú cuèi na càhni ñahá-yu xii-ndo, chi ðiu-ni yiqui cùñú-ndó ndacú-yu cahní-yu, te ñã túú nãgã ndacú-yu cada ñahá-yu xii-ndo. 5 Te na càchí tnúhu-í xii-ndo sã Yã Ndiòxí tàú-ndó yùhú-ndó-gã, chi mee-gã ío cùnuu-gã, te ðiu-gã quidé-gã sã vã cùndecu-gã ñáyiú ñuyíú, te daquihíⁿ ñahá-gã xii-yu núú úhú núú ndàhú, núú xiãⁿ càchí tnúhu-í xii-ndo sã Yãá-áⁿ tàú-ndó yùhú-ndó-gã.

6 'Te nchòhó xini-ndó sã ndèé úhúⁿ tnáhá tiláá cùyáhu-ðì núú úú díhúⁿ, dico Yã Ndiòxí ñã túú cùnaa-gã ni ñⁿ-güedi, chi nèhe cuendá ñahá-gã xii-güedi. 7 Te nchòhó ndéé ñⁿ ñⁿ idi díquí-ndó yìndehu, núú xiãⁿ càchí-í sã vã yùhú-ndó, chi cùnuu-gã-ndó dàcúxí tiláá cuèi vãi vihi-güedi.

Ñáyiú na dàtúu núú dàva-gã ñáyiú sã ndécú ndihí-yu Xitohó Jesucristú (Mt. 10:32-33; 12:32; 10:19-20)

8 'Te na càchí tnúhu-í xii-ndo sã núu na dàtúu-ndo núú dàva-gã ñáyiú sã ndécú ndihí ñaha-í xii-ndo. Te ducaⁿ te tnáhá yùhú Tée cùu ñani tnáhá-ndó nchàa-ndo datúu-í núú nchaa cue espíritú xínú cuèchi núú Yã Ndiòxí sã nchòhó ndécú ndihí ñaha-ndo xii-í. 9 Dico núu na cùñaha-ndo xii ñáyiú sã ñã túú ndècu ndihí ñaha-ndo xii-í, te ðiu-ni ducaⁿ càda yùhú Tée cùu ñani tnáhá-ndó nchàa-ndo, chi cùñaha-í xii cue espíritú xínú cuèchi núú Yã Ndiòxí sã ñã túú ndècu ndihí ñaha-í xii-ndo.

10 'Te ndèdani càa ñáyiú na càháⁿ cuèhé cuendá yùhú Tée cùu ñani tnáhá-ndó nchàa-ndo, te cada càhnu iní ñahá Yã Ndiòxí xií-yu. Dico ñáyiú na càháⁿ cuèhé cuendá Espíritú Yã Ndiòxí, te ñáyiú-áⁿ vã cáda càhnu iní ñahá-gã xií-yu.

11 'Te òré ná càndeca ñaha-güedé xii-ndo quihíⁿ veñúhu, àdi núú cuè tée cùchiuⁿ, te ni vã cáni iní-ndó

núu nása cunduu tnúhu cùñaha-ndo xii-güedé, te ni vã cáni iní-ndó núu ná tnúhu nadànchocáva-ndo núu ná tnúhu na cùñaha-güedé xii-ndo, 12 chi òré-nã te mee Espíritú Yã Ndiòxí dacàhu iní ñahá-xí xii-ndo tnúhu cùñaha-ndo xii-güedé — càchí-gã xáhaⁿ-gã xii-güedé.

Cuendá ñⁿ tée cuica

13 Te ñⁿ tée ñùhu tnáhá tnuú ñáyiú-áⁿ nã xáhaⁿ-dè xii Jèsús:

—Mèstrú, cùñaha xii ñani-í sã ná chidava-dé sã nã dándõ tãtã-ndí cuu cuendá-ndí —càchí-dé xáhaⁿ-dè xii-gã.

14 Te Jèsús ní xáhaⁿ-gã xii-dé:

—¿Te ná cuendá ducaⁿ càháⁿ-n?

Te ñã díú chiúⁿ-áⁿ vèxi-í cada-í, chi ñã díú tée cùchiuⁿ cuu-í —càchí-gã xáhaⁿ-gã xii-dé.

15 Te xáhaⁿ-gã xii nchaa ñáyiú xìndecu-áⁿ:

—Nchaa nchòhó ñáyiú ndèdòho nchaa tnúhu càháⁿ-í ío váha cada cuendá-ndó, te vã cáni iní-ndó nãndi nducu-ndo cùndecu ndihí-ndo, chi cuèi vãi vihi na nihí-ndó cùndecu ndihí-ndo, dico vã chindèe ñaha-xi cudíi-ndo cùndecu-ndo ñuyíú-a —càchí-gã xáhaⁿ-gã xií-yu.

16 Te dàtnùni ní ngüita-gã cáni-gã ñⁿ cuendú núu-yu cuendá tecú tnùní-yu tnúhu-gã, te xáhaⁿ-gã:

—Ñⁿ tée cuica sùúni nã cuu nchaa tãtã ní xitú-dé núú ñúhú-dé.

17 Te ní ngüita-dé sani iní-dé: “¿Te nása cada-í? Te ñã túú ndèe nataxúha-í nchaa sã nã xitú-í”, duha ní sani iní-dé. 18 Te dàtnùni ní sãha váha tucu-dé cuendá nãcuáa cada-dé, te ní cachí-dé: “Duha na cunduu, dangòyo-í yacá-í, te ndada càhnu-gã-í, te xití-xi nataxúha-í nchaandi túhú sã nã xitú-í, ndihí nchaa dava-gã sã ndécú ndihí-í.

19 Te sátá dúcãⁿ, te cachí-í: Ío vãi sã ndécú ndihí-í, te cudíi-xi cuèhé cuiã, te vitna ndetatú-í, te coho-í te caxi-í cada-í, te nãndi-gã cada-í cuendá cudíi iní-í ndecu-í, duha quesaha-í”, càchí-dé. 20 Dico Yã

Ndiöxí ní xáhaⁿ-gã xii-dé: “Yòhó, ñá túú nàndíhi sá sání iní-n, chi yúhú càchí-í sá niú vitna cuú-n, te nchaa sá ndécú ndíhi-n ɔyoo cuu sá vâha xii-aⁿ-i?”, càchí-gá xáhaⁿ-gã xii-dé. ²¹ Duha yâha nchaa ñâyiu nândi sâni iní-xi cundecu ndíhi-xi ñuyíú-a, dico ñâyiu-áⁿ ío ndàhú-yu chi ñá túú nã nduu táhú-yu núú Yã Ndiöxí cundecu ndíhi-yu —càchí Jèsús xáhaⁿ-gã xii-yu.

Yá Ndiöxí xító-gã nchaa ñâyiu sândáá iní ñáhá xii-gá
(Mt. 6:25-34)

²² Te ní xáhaⁿ Jèsús xii cue téé xica cuu ndíhi-gá:

—Te na càchí tnúhu-í xii-ndo sã vã ío cani iní-ndó nõu nása cundecu-ndo, àdi nása níhi-ndó sã cáxi-ndó, àdi nása níhi-ndó dõó cuihnu-ndo. ²³ Chi cùnnu-gá mée-ndó dàcúxí sã nchító-ndó, te ducaⁿ yiqui cuú-ndó cùnnu-gá-xi dàcúxí dõó sãcuihnu-ndo. ²⁴ Te chí cuãha cuëndá nãcuáa quide cue tícacá, chi ni ñá túú chíhi-güedi tatá cuu itú natahu-güedi te ni ñá túú ndéé nútñi yacá-güedi, te níhi-güedi xèxi-güedi, chi Yá Ndiöxí xító ñàha-gá xii-güedi. ¡Te nchòhó cùnnu-gá-ndó dàcúxí nchàa cue quiti ndava! ²⁵ Te cuèi nândi sá sání vîhi iní-ndó ndècu-ndo, dico ñá ndácú-ndó càda-ndo nacuáa cuehnu-ndo cuédicó ñⁿ yiqui-gã. ²⁶ Te núu ni sã lúhá xíãⁿ ñá ndácú-ndó càda-ndo, ɔte ná cuëndá ío sâni iní-ndó cuëndá nchaa sã cuñí-ndó níhi-ndó cundecu ndíhi-ndo?

²⁷ Te chí cãdá cuëndá nãcuáa sãhnu ñⁿ tnu itá, chi ni ñá túú quide chiúⁿ-xi, te ni ñá túú quèheⁿ-xi idi. Te na càchí tnúhu-í xii-ndo sã ndíi Salòmón ío vii ní cãa nchaa sã ñí xindecu ndíhi ndíi, dico vii-gá tucu càa nchaa itá dàcúxí nchàa sã ñí xindecu ndíhi ndíi. ²⁸ Te cùhú sã ío vitna tnaa-ni cùdí-xi te sãhmí-yu, te cuèi ducaⁿ dico ío vii càdúha Yá Ndiöxí nchaa cùhú-ãⁿ. ¡Te nchòhó ío

cùnnu-ndo dacúxí nchàa cùhú-ãⁿ, núu xíãⁿ ío xító ñàha-gá xii-ndo, te dicó yica cùu iní-ndó sândáá iní-ndó-gã! ²⁹ Te vã ío canchicúⁿ nihnu-ndo sã cóhó sã cáxi-ndó, te ni vã dándíhú-ndó iní-ndó nõu nása cada-ndo níhi-ndó. ³⁰ Chi nchaa ñâyiu ñá túú sândáá iní ñáhá xii Yã Ndiöxí ducaⁿ mée-ni sã cóhó sã cáxi-yu xica nchicúⁿ nihnú-yu. Dico mee Tãtá-ó Dütú Ndiöxí sa nàha-gá nândi cùu sá xíní ñùhu-ndo, te taxi-gá. ³¹ Te cada-ndo nchàa nacuáa càháⁿ Yã Ndiöxí Yaá yindàha ñaha xii-ndo, te ducaⁿ te taxi-gá nchaa sã xíní ñùhu-ndo.

Cuëndá sã vãha nduu táhú-ó núú Yã Ndiöxí
(Mt. 6:19-21)

³² Te vã yùhú nchòhó cue téé ndècu ndíhi-í cuèi ío sacú-ndó, chi Tãtá-ó Dütú Ndiöxí ní cachí-gá sã ndúú táhú-ndó cundecu-ndo núú ndécú-gã taxi tnúni-ndó tnàhá-ndó. ³³ Te chí dicó nchàa sã ndécú ndíhi-ndo, te chí cuãha nchaa ñâyiu ndàhú díhúⁿ-ndó ñâyiu xini ñuhu, te cada vãha-ndo cundecu-ndo, te ducaⁿ te nduu táhú-ndó sã ío-gá vãha núú Yã Ndiöxí cundecu ndíhi-ndo, te xíãⁿ vã cúú tũhú tnàhi-gá-xi, te ni vã ndíhi ñihnu-gá-xi, te ni ñadúhú vã ndácú-güedè duhu-güedè, te ni tiquidi vã quée-dí. ³⁴ Te núu xíãⁿ cúú cuëndá-ndó ñá, te diu-ni xíãⁿ ñúhú iní-ndó, áⁿ te núu mee-ni sã ndécú ñuyíú-a ndècu ndíhi-ndo, te diu-ni nchaa xíãⁿ ñúhú iní-ndó.

Xini ñuhu-xi quíhi iní-ó cundecu-o

³⁵⁻³⁶ Te ío quíhi iní-ndó cundecu-ndo, te cada-ndo dàtná quidé dàva cue téé xínu cuechi sacúndecu túha-güedé cuèi nãni òré-ãⁿ ndétú-güedè pãtróóⁿ-güedè ná òré nasáá-dé sã cuahãⁿ-dé vico tnãndaaha. Te núu niú te sa cúu cãyú-ni ñuhú-güedè sã cundetu ñaha-güedé, chi òré ná nasáá-dé dacàsaⁿ-dé yuyèhe, te ndíhi-ni nacaáⁿ-güedé ndíhu-dé. ³⁷ Te

váha táhu nchaa cue tée xínu cuechi-áⁿ, chí ndécu túha-ni-güedé ndétú-güedé ndéé òré ní nasáá patróóⁿ-güedé, te na càchí tnúhu ndáá-í xii-ndo sá òré ná násáá patróóⁿ-güedé-áⁿ te chíhi ñaha-dé mèsá xii-güedé, te ndacáⁿ ndee-dé dóó níhnú-dé núú yíquí-dé, te nguíta-dé cani-dé cóhó-güedé cuendá caxi-güedé. ³⁸ Te ñiu-ni ducaⁿ càda-dé cuèi dava niú, àdi tacuíhnda-gá, te núú ñá túú xidí-güedé òré nasáá-dé, te cue tée xínu cuechi-áⁿ ò váha tnahá-güedé. ³⁹ Te núú dicó ñⁿ téé cùu xitohó ñⁿ vehe xini-dé ná òré quíhu ñadúhú vehe-dé ñá, te quíhi iní-dé te vá cùdú-dé, te vá dáñá-dé nacaáⁿ-güedé yuyèhe-dé quíhu-güedé duhu-güedé. ⁴⁰ Te nchòhó tucu nchaa-ni nduu quíhi iní-ndó cùndecu túha-ndo, chí na cuháⁿ nduu ñá túú yíhi iní-ndó, te quixi tucu yúhú Téé cùu ñani tnahá-ndó nchaa-ndo —cachí-gá xáhaⁿ-gá xii-güedé.

Cue téé quide ndáá ndíhi cue téé ñá túú quide ndáá

(Mt. 24:45-51)

⁴¹ Te té Pélú ní xicáⁿ tnúhú-dé núú Jèsús, te xáhaⁿ-dé:

—Mèstrú, ¿te tnúhu ní cáháⁿ-n-áⁿ cùu-xi mee-ni cuendá nchúhú áⁿ cuendá nchaa ñáiyu? —càchí-dé xáhaⁿ-dé xii-gá.

⁴² Te Jèsús ní xáhaⁿ-gá:

—Cáháⁿ-í cuendá ñáiyu quide váha dàtná quidé ñⁿ téé tàxi tnuní ñáhá xii cue ñáiyu xínu cuechi ndecu vehe patróóⁿ-xi, chí téé-áⁿ ò váha tècú tnùní-dé, te quide-dé nchaa nàcuáa cáháⁿ patróóⁿ-dé, te dàcaxi-dé cue ñáiyu xínu cuechi òré tàú-xi caxí-yu. ⁴³ Te núú ducaⁿ quide váha téé tàxi tnuní ñáhá xii cue ñáiyu xínu cuechi-áⁿ ñá, te ò váha tnahá-dé òré násáá patróóⁿ-dé núú ndéé cuháⁿ-dé. ⁴⁴ Te na càchí tnúhu ndáá-í xii-ndo sá téé quide ndáá táxi tnùní ñáhá xii cue ñáiyu xínu

cuechi-áⁿ cūñaha-ñá patróóⁿ-dē xii-dé sá ncháándi túhú-ñá sá ndécú ndíhi-dé quindaha-dé. ⁴⁵ Dico núú téé tàxi tnuní ñáhá xii cue ñáiyu xínu cuechi-áⁿ ná cani iní-dé sá cùyàa patróóⁿ-dé vá násáá ndíhi-ni-dé ñá, te nguíta-dé cani-dé nchaa ñáiyu xínu cuechi, cuèi téé cuèi ñadíhi, te nguíta-dé caxi-dé coho-dé, te dàxini-dé méé-dé, ⁴⁶ te nduu ñá túú yíhi iní-dé te násáá patróóⁿ-dé, te dandòho ñaha patróóⁿ-dé-áⁿ xii-dé, te daquíhiⁿ ñáhá-dé xii-dé núú ndécú ñáiyu ñá túú ní quide ndáá.

⁴⁷ Te dava cue téé xínu cuechi xini-güedé nàcuáa cuíni patróóⁿ-güedé cada-güedé te ñá túú quide-güedé, te ní ñá túú cuíni-güedé cundecu túha-güedé cundetu-güedé patróóⁿ-güedé, te nchaa cue téé ducaⁿ xiquide dandòho ñaha patróóⁿ-güedé, chí ñani víhi-güedé. ⁴⁸ Te dava cue téé xínu cuechi ñá túú xini-güedé nàcuáa cuíni patróóⁿ-güedé cada-güedé, te ní quide-güedé sá neñúu-güedé ñⁿ sá ñá túú tàú-güedé cada-güedé ñá, te cue téé-áⁿ sacú-gá dandòho ñaha patróóⁿ-güedé, chí sacú-gá ñani-güedé. Te ñáiyu cùtnuní iní-xi nàcuáa cuíni Yá Ndióxi cadá-yu, te ñiu-ni ducaⁿ tàú-yu cadá-yu nàcuáa cuíni-gá. Te ñáiyu vai-gá tècú tnùní nàcuáa cáháⁿ-gá, te ñiu-ni ducaⁿ vai nchaa sá cáháⁿ-gá tàú-yu cadá-yu.

Ñá túú cùu ñⁿnuu ñáiyu

(Mt. 10:34-36)

⁴⁹ Te yúhú véxi-í ñuyúu-a cuendá cutnùní iní ñáiyu nàcuáa cada ñaha Yá Ndióxi xií-yu, ¿te cuíni-í sá ndíhi-ni cada-gá nàcuáa sàni iní-gá! ⁵⁰ Te yúhú ò vai tnúhu sàni iní-í, ¿chi sáá nduu te ò ndoho-í, te ñiu-ni xiáⁿ cuhuⁿ iní-í ndéé ná sáá nduu dūcaⁿ yáha-í! ⁵¹ Te nchòhó vá caní iní-ndó sá yúhú véxi-í ñuyúu-a te cundecu ndíhi tnahá váha-ni ñáiyu, te ñáhá chí da nguíta-yu vá cùu

ñⁿnuú-yu cundecú-yu. ⁵² Te ndéé není vitna ngúita ñáiyu vá cúú ñⁿnuú-yu cundecú-yu, te na càda-o cuendá te núu úhúⁿ ñáiyu xĩndecu ñⁿ-ni vèhe, te vá cúú ñⁿnuu-gá-yu, chí úní-yu ndatnúhu-yu te nàá-yu ndihí úú-gá-yu, ádi ñáiyu úú-áⁿ ndatnúhu-yu te nàá-yu ndihí ñáiyu úní-áⁿ. ⁵³ Te dava cue téé cùu tátá vá cúú ñⁿnuu-gá-güedé ndihí déhe ducuⁿ-güedé, te ní dáva cue ñáiyu cùu náná vá cúú ñⁿnuu-gá-yu ndihí déhe yòcò-yu, te ní sánu-yu vá cúú ñⁿnuu ndihí-gá-yu. Te ducaⁿ cadá-yu chí davá-yu quindáá iní ñáhã-yu xii-í, te davá-yu vá quindáá iní ñáhã-yu —càchí-gá xáhaⁿ-gã xii-güedé.

Ñáiyu cùtnuní iní-xi nàcuáa quide-xi ñuyúú ndihí andiu

(Mt. 16:1-4; Mr. 8:11-13)

⁵⁴ Te Jèsús ní xáhaⁿ-gã xii nchaa ñáiyu xĩndecu-áⁿ:

—Te nchòhó òré ndéhé-ndó ndànchita vícò ndaa xio quée nchíanchii, te càchí-ndó sã cúúⁿ dǎú, te diu ducaⁿ ndisa quide-xi. ⁵⁵ Te òré ná quène táchí ndaa xio datni nacuáa quène nchíanchii, te càchí-ndó sã ïo cada ihni-xi, te diu ducaⁿ ndisa quide-xi. ⁵⁶ Te nchòhó ïo váha cùtnuní iní-ndó nàcuáa quide-xi andiu ndihí ñuyúú, ¿te ná cuendá quidé-ní-ndó sã ñã tècú tnúní-ndó nàcuáa quide Yá Ndiõxí vitna? Te sá dúcáⁿ quide-ndo-áⁿ ïo dándahú-ndó mèe-ndo sá ïo váha cùtnuní iní-ndó, chí ñã ndaa sá cùtnuní iní-ndó.

Nducu-o nàcuáa nucúndecu ndihí váha-o ñáiyu cùu úhú iní ñáhã

(Mt. 5:25-26)

⁵⁷ Te nchòhó, ¿ná cuendá ñã túú dándixi túu-ndo iní-ndó càda-ndo mee-ni sá váha sá táu-ndó càda-ndo-i? ⁵⁸ Te núu ïó ñⁿ-ndo ní sacáⁿ cuéchi ñáiyu cuendá-ndó cuendá ñⁿ sá ní quide-ndo, te cuáhã-ndó ndihí-yu núu tée cùchiuⁿ, te nini ñùhu-ndo ndihí-yu

ichi, te nducu-ndo nàcuáa cada-ndo nàcáhãⁿ cáhmú iní tnáhã-ndó ndihí-yu cuendá sá vá càndeca ñaha-gá-yu quihíⁿ núu tée cùchiuⁿ, chí núu ducaⁿ na càdá-yu te tée cùchiuⁿ-áⁿ nachihi ñaha-dě ndaha cue téé cùu poleciá, te cue téé-áⁿ chíhi ñaha-güedé vecaá xii-ndo. ⁵⁹ Te na càchí tnúhu-í xii-ndo sã núu na ngáva-ndo vecaá, te vá càcu-ndo te núu vá náchãhu-ndo nchãa sá táu-ndó —càchí-gá xáhaⁿ-gã xii-yu.

13

Xini ñuhu-xi natuha-o ichi Yá Ndiõxí

¹ Te diu-ni òré-áⁿ ní ngúnutnii ñⁿ úú ñáiyu núu Jèsús cáni-yu cuendú núu-gã nàcuáa ní quide ñaha té Pilatú xii cue téé distritú Galileá cue téé ní sahani quití nduu táhú Yá Ndiõxí, te mei òré ní sahani-güedé cue quití-áⁿ ní táuchíuⁿ tè Pilatú cue sandadú-dé ní sahani-güedé cue téé Galileá-áⁿ, te ní xica ñiñi-güedé núu ñúhú ndihí níñi cue quití-áⁿ, te ní nadácánuu-xi. ² Te Jèsús ní xáhaⁿ-gã xii-yu:

—Te núu nchòhó sání iní-ndó sã sá dúcáⁿ ní yáha cue téé distritú Galileá-áⁿ te cùu-güedé cue ndecu vihi-gá cuéchi-xi dàcúúxí cùe téé ñuú-güedé ñã. ³ Te na càchí tnúhu-í xii-ndo sã ñáhã. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ñã, te tnáhã nchaa nchòhó cuíta nihnu-ndo te núu vá nátnii-ndo ichi Yá Ndiõxí. ⁴ Te núu nchòhó sání iní-ndó sã ñáiyu sáhúⁿ úní ní xihí ní táu ñáhã vèhe ducúⁿ Silóé ïo-gá ndécú cuéchi-yu dàcúúxí nchaa ñáiyu xĩndecu ñuú Jerusalén ñã, ⁵ te na càchí tnúhu tucu-í xii-ndo sã ñáhã. Te núu nchòhó vá ndíxí cuéchi iní-ndó cuendá nchaa sá cuéhé sá dúhá quide-ndo ndecu-ndo ñã, te tnáhã nchaa nchòhó cuíta nihnu-ndo te núu vá nátnii-ndo ichi Yá Ndiõxí —càchí-gá xáhaⁿ-gã xii-yu.

Yutnu ngüxi ñá túú cùuⁿ sávidí-xi

⁶ Te Jèsús ní cani tucu-gá ìⁿ cuèndú núŭ-yu nàcuáa tecú tñuní-yu tñuhu-gá, te xáhaⁿ-gã:

—Ìⁿ téé nùtní ìⁿ yutnu ngüxi núú ñúhú-dé, te cuáháⁿ ndéhé-dé núú ní cuuⁿ sávidí-xi ní cùu, te ní ìⁿ ñá túú ní cùuⁿ. ⁷ Te ní xáhaⁿ tée-áⁿ xii téé ndéé ñuhu-dé; “Nàha-n sá vitna ní cuu úní cuíá quíxi còto-i yutnu ngüxi-a te ñá túú xini-í ní ìⁿ sávidí-xi. Te quehndé-n vitna, chí àúⁿ nã cuu nùtní-xi quide tneñu-xi núú ñuhu-áⁿ”, cächí-dé xáhaⁿ-dë xii téé ndéé ñuhu-dé-áⁿ. ⁸ Te téé ndéé ñuhu-áⁿ ní xáhaⁿ-dë: “Pàtróóⁿ, daña na cùhnu-xi cuíá vitna-ná, te na nàdatayá-í ñuhu núú sàhá-xi, te chihi-í saháⁿ. ⁹ Te ducaⁿ te cudana cuuⁿ sávidí-xi, àdi núú ñá túú ní cùuⁿ sávidí-xi ña te téhndé-nã-xi”, cächí-dé xáhaⁿ-dë xii pàtróóⁿ-dë — cächí-gá xáhaⁿ-gã xii-yu.

Jèsús quidé tátna-gá ìⁿ ñadìhí ní nduu cueyi sàtá-xi nduu ndetátú ñáyiu

¹⁰ Te ìⁿ xito cùu-xi nduu ndetátú ñáyiu, te yìhi Jèsús ìⁿ veñúhu dànehé-gá ñáyiu. ¹¹ Te xíaⁿ ndécú ìⁿ ñadìhí ní cuu sáhúⁿ úní cuíá sã cùhú-aⁿ yìhi ñaha espíritú cùndìhi yucu ñávãha xii-aⁿ, te xíaⁿ ní ndada cueyi-xi sàtá-aⁿ, te ñá dáñá-gã-xi nucúnutnì ndáá-aⁿ. ¹² Te òré ní xini ñáhá Jèsús xii-aⁿ te ní cana ñaha-gã, te xáhaⁿ-gã:

—Yòhó ñaha cùhú, ndúha-n cuèhé tñáhá-n — cächí-gá xáhaⁿ-gã xii-aⁿ.

¹³ Te ní dácàà-gá ndaha-gá ní tendaha ñaha-gá xii-aⁿ, te òré-ni-áⁿ ní ndúha-aⁿ te ní nucúnutnì ndáá-aⁿ, te ní ngüíta-aⁿ ní cachí-aⁿ sá ìo càhnu cuu Yá Ndiòxí. ¹⁴ Dico téé tàxi tñuní veñúhu ní cudééⁿ-dë sá dúcáⁿ ní quide Jèsús ní quide tátna-gá ñaha cùhú-áⁿ nduu ndetátú-yu, te ní xáhaⁿ-dë xii-yu:

—Íó ìñú nduu tàú-ó càda chiuⁿ-o, te ndédani càa nduu-áⁿ quixi-ndo cùtátna-ndo, dico ñá díú ndùu

cuu-xi nduu ndetátú-ó — cächí-dé xáhaⁿ-dë xii-yu.

¹⁵ Te ní xáhaⁿ Jèsús:

—Nchòhó chí ìo dándahú-ndó mèe-ndo sá quidé ndáá-ndó dico ñá ndáá sá quidé ndáá-ndó, ¿náa ñá túú nàndaxi-ndo ndicutu-ndo àdi búrru-ndo dàcoho-ndo-güedi ndute nduu ndetátú-ó áⁿ? ¹⁶ Te ñadìhí-a cùu-aⁿ ñaní tñáhá ndíi Ábrahám, te dicó-ni sá yucu ñávãha quide duha cùhú-aⁿ ní cuu sáhúⁿ úní cuíá, ¿te náa ñá túú xini ñuhu-xi cutátna-aⁿ cuéi cùu-xi nduu ndetátú-ó áⁿ? — cächí-gá xáhaⁿ-gã xii-dë.

¹⁷ Te sá dúcáⁿ ní cáháⁿ Jèsús, núu nchaa cue téé cùu úhú ìní ñáhá xii-gá ní cucahaⁿ núú-güedé, dico nchaa dava-gá ñáyiu chí xicúdí ìní-yu xindéhé-yu nchaa sá vã yòo tñáhí ndàcu cada quide-gá.

Cuèndá ndíquíⁿ yutnu nàni mostázá

(Mt. 13:31-32; Mr. 4:30-32)

¹⁸ Te ní xáhaⁿ-gã xii-yu:

—Na càni-í ìⁿ cuèndú núú-ndó nàcuáa tecú tñuní-ndó nàcuáa cada-xi òré ndíhu ndaha ñàha Yá Ndiòxí xii-ndo. ¹⁹ Ìⁿ téé ní queheⁿ-dë ndíquíⁿ yutnu nàni mostázá te nèhe-dé cuáháⁿ ní sacáⁿ-dë núú ñúhú-dé te ní xínu-xi, te ní sahnu-xi ní cuu dúcúⁿ-xi, te cue quiti ndáva núú tàchí cádúha-güedi tacá-güedi núú dìté-xi — cächí-gá xáhaⁿ-gã xii-yu.

Nàcuáa quide levadurá

(Mt. 13:33)

²⁰ Te ní xáhaⁿ tucu Jèsús xii-yu:

—Te na cächí tñuhu tucu-í xii-ndo nàcuáa cada tucu Yá Ndiòxí òré ndíhu ndaha ñaha-gá xii-ndo. ²¹ Ìⁿ ñadìhí ní queheⁿ-aⁿ levadurá ní chihi-aⁿ úní arròbá yuchi triú, te levadurá-áⁿ ní quide-xi ní ndaa nihí yusaⁿ-áⁿ — cächí-gá xáhaⁿ-gã xii-yu.

Yuyèhe cuiñi

(Mt. 7:13-14, 21-23)

²² Te ichi ñuhu Jèsús cuáháⁿ-gá ñúú Jerusàlén, te nchaa ñúú náhnú,

ndihí nchaa ñúú líhli ta yáha-gá ducaⁿ ta dānehé-gá ñáyiú tnúhu-gá cuaháⁿ. ²³ Te ñⁿ ñúú-áⁿ ní xáhaⁿ ñⁿ téé xii-gá:

—Mèstrú, cuiní-í cacáⁿ tnúhu-í ñⁿ tnúhu núú-n, ¿ndáá sá ío sacú ñáyiú nānīhí tǎhú-ǎⁿ? —cāchí-dé xáhaⁿ-dē xii-gá.

Te Jèsús ní xáhaⁿ-gǎ xii-dé ndihí nchaa ñáyiú:

²⁴ —Cada-ndo sǎ nānīhí tǎhú-ndó, te tñi-ndo ichi Yá Ndióxi, te ichi-gá-áⁿ cúú-xí dátá ñⁿ yuyèhe cuiñi, te cāchí tnúhu-í xii-ndo sǎ ío cuéhé ñáyiú cachí iní-yu quihu-yu yuyèhe cuiñi-áⁿ dico vá ndácú-yu. ²⁵ Te na cāni tucu-í ingá cuéndú núú-ndó nācuáa tecú tñmí-ndó tñhu cǎháⁿ-í. Te òré ná ndācuñi téé cūu xitohó vehe, te nacadi-dé yuyèhe, te nchaa nchòhó ñáyiú na quèndó quehé dacāsaⁿ-ndo yuyèhe, te quesaha-ndo cūñaha-ndo xii-dé: “Tátá, nacaáⁿ yuyèhe na quihu-ndí”, quesaha-ndo cūñaha-ndo xii-dé. Dico téé cūu xitohó vehe-áⁿ cūñaha-dē xii-ndo: “Ná túú xini-í nchòhó ndéé ñáyiú cūu-ndo”, duha cūñaha-dē xii-ndo. ²⁶ Te dátñmí ngúita nchòhó cūñaha-ndo xii-dé: “Nchúhú ní xexi ndihí ñaha-ndí, te ní xihí ndihí ñaha-ndí xii-n, te nchaa ichi ní xóo dacuáha ñaha-n xii-ndí”, quesaha-ndo cūñaha-ndo xii-dé. ²⁷ Dico cāchí tucu téé cūu xitohó vehe-áⁿ cūñaha-dē xii-ndo: “Sa ní cachí-í sá ñā túú xini-í ndéé ñáyiú cūu-ndo. Te chí xócuñi nchòhó ñáyiú ndècu ichi cuehé ichi duha núú ndècu-í”, quesaha-dé cūñaha-dē xii-ndo. ²⁸ Te na sáa nduu dūcaⁿ cada-xi te quini-ndó tē Àbrahám, ndihí té Isàác, ndihí té Jácób, ndihí nchaa cue téé ní xóo cǎháⁿ tnúhu Yá Ndióxi, te nchaa cue téé-áⁿ ndécú-güedé núú ndécú-gǎ táxi tñmí-gá, te nchòhó quee tihú-ndó núú-gǎ sá tñhu ñā túú ní cuini cada ndáá, te dāvá-áⁿ ndāhyú-ndó te cuu rúhñú-nǎ núhu-ndo sǎ sātú

iní-ndó cuéndá sá ndóhó-ndó. ²⁹ Te dāvá-áⁿ quihu nchaa ñáyiú ndi cūmí xio ñuyíú núú ndécú Yá Ndióxi táxi tñmí-gá caxí-yu ndihí-gá, te cundécú-yu ndihí-gá. ³⁰ Te dava ñáyiú nchícúⁿ ñā túú cūnuu ndecu ichi Yá Ndióxi vitna, ñáyiú-áⁿ sǎa nduu te ío cunúú-yu. Te dava ñáyiú cūnuu ndecu ichi-gá vitna, ñáyiú-áⁿ sǎa nduu te vá ío-gá cunúú-yu — cāchí-gá xáhaⁿ-gǎ xii-yu.

Jèsús ndāhyú-gá cuéndá ñáyiú ñúú Jerusálén

(Mt. 23:37-39)

³¹ Te diu-ni nduu-ǎⁿ ní quexio ñⁿ úú cue téé cūu farisèú núú ndécú-gǎ, te xáhaⁿ-güedé xii-gá:

—Quee-n iha quihíⁿ-n núu ndéé quihíⁿ-n, chí téé cūu Herodés cuini-dé cāhni ñaha-dē xii-n — cāchí-güedé xáhaⁿ-güedé xii-gá.

³² Te Jèsús ní xáhaⁿ-gǎ:

—Chí cuaháⁿ te cūñaha-ndo xii téé nèhe maña-áⁿ sǎ cāchí-í sá ná cūndedóho váha-dé ñⁿ tnúhu cǎháⁿ-í, chí cūmání ñⁿ úú-gá nduu cundecu-í xocāni-í nchaa espíritu cūndihí yucu ñāvāha yihí ñaha xii ñáyiú, te cada tátna-í nchaa dava-gá ñáyiú cūhú, te ducaⁿ te ndihí chiñúⁿ-í, duha cūñaha-ndo xii-dé. ³³ Dico dacuití sǎ cūhúⁿ-í ichi ñⁿ úú-gá nduu, te ducaⁿ te sáa-í núú quihíⁿ-í, chí vá cúú tñhí cuú ñⁿ téé cǎháⁿ tnúhu Yá Ndióxi ingá ñúú, chí mei ñúú Jerusálén cuú-güedé — cāchí-gá xáhaⁿ-gǎ xii-güedé.

³⁴ Te ní xáhaⁿ-gǎ xii ñáyiú ñúú Jerusálén:

—Nchòhó chí sǎhni-ndo nchaa cue téé cǎháⁿ tnúhu Yá Ndióxi, cue téé ní tendaha-gǎ véxi, te mee-ni ndihí yúú sǎhni-ndó-güedé. ¡Te titní xito ní cuini-í nadatácá ñáhà-í xii-ndo dátá ñā dátacá ñⁿ nchuxi cué déhe-di sǎquihi-güedi xití ndíxiⁿ-di, dico ñā ní cuini-ndó, te ducaⁿ-ni sǎni iní-í ndéé vitna! ³⁵ Te chí cūndedóho tucu ingá tnúhu na cǎháⁿ-í-a: Yá Ndióxi dañā ñaha-gá xii-ndo. Te na cāchí

tnúhu tucu-í xii-ndo sã vã quini ñáhá-gã-ndó xii-í, dico sáá nduu te quini ñáhá tucu-ndo, te nduu-án cachi-ndó sã ïo càhmu cuu yúhú Yaá ní tendaha Dütú Ndiõxí véxi ñuyíú-a —càchí-gã xáhaⁿ-gã xií-yu.

14

Jèsús quidé tátna-gá ìⁿ téé ñùhu cuiñu

¹ Te duha ní cuu ìⁿ nduu, nduu ndetátú ñáyiú chi ìⁿ téé cùu fariséú cúnùu ní cáháⁿ-dé Jèsús vehe-dé caxi-gá, te cue téé ndècu vehe-dé ndéhé-güedé nùu nása cada-gá. ² Te xiáⁿ ndécú tnháá ìⁿ téé cùhú ñùhú-dé cuiñu. ³ Te Jèsús ní xicáⁿ tnúhú-gá núú cuè téé dàcuaha ñaha xii ñáyiú nchaa tnúhu ní chídó tnùní ndíi Moisés, ndihí núú cuè téé cùu fariséú, te xáhaⁿ-gã:

—¿Cuu cada tátna-o ìⁿ ñáyiú cùhú nduu ndetátú-ó áⁿ ñáhá? —càchí-gã xáhaⁿ-gã xii-güedé.

⁴ Dico cue téé-áⁿ ñà túú tnháí ní cáháⁿ-güedé. Te ní dácàá-gá ndaha-gá ní tendaha-gá téé cùhú-áⁿ ní quide tátna ñaha-gã xii-dé, te ní xáhaⁿ-gã sá ná nùhú-dé vehe-dé. ⁵ Te ní xicáⁿ tnúhú-gá núú nchaa cue téé-áⁿ, te xáhaⁿ-gã:

—¿Te núu nchòhó ná ngáúnìhmu ìⁿ búrru-ndo àdi ìⁿ ndicutu-ndo déhvá, te vá ná tàva ndihí-ni-ndo-di cuèi cùu-xi nduu ndetátú-ndó-áⁿ? —càchí-gã xáhaⁿ-gã xii-güedé.

⁶ Te ñá túú ní ñihí-güedé tnúhu na dànocháva-güedé.

Ñáyiú càháⁿ-yu quíhíⁿ vico tnándaha

⁷ Te ndèhe Jèsús nàcuáa xíquide nchaa ñáyiú ndècu vico sá súúni ní nacáxi-yu xilé sácõo nchihí cue téé cùnuu-gá conchihí-yu òré cuánguìhú-yu mèsá caxí-yu, núu ní xáhaⁿ-gã xií-yu:

⁸ —Òré ná càháⁿ ñáhá ìⁿ ñáyiú xii-ndo ìⁿ vico tnándaha, te vá cóó-ndó nùú xilé sácõo cue téé cùnuu-gá, chí núu ducaⁿ na càda-ndo, te cudana quexìo

dava-gá ñáyiú cùnuu-gá dàcúxí nchòhó. ⁹ Te ñáyiú ní cáháⁿ ñáhá xii-ndo-áⁿ quixí-yu te cùñáhá-yu xii-ndo: “Chí cuãñaha xilé núcõo nchihí-ndo-áⁿ ná cõnchihí ñáyiú ní quexìo-a”, quesáhá-yu cùñáhá-yu xii-ndo. Te cuini-ndó ñáhá cuèi cùcahaⁿ núú-ndó ndàcuñí-ndó quíhíⁿ-ndó ngõo-ndo núú xilé xìnutnì ndéé núú ní ndihí-ná ndàa sátá-xi. ¹⁰ Te yúhú càchí-í sá òré ná càháⁿ ñáhá-yu xii-ndo, te ngóo-ndo núú xilé xìnutnì ndéé núú ní ndihí-ná ndàa sátá-xi chí cuendá òré ná quèxio ñáyiú ní cáháⁿ ñáhá xii-ndo, te cùñáhá-yu xii-ndo: “Nchòhó cue ñáyiú càháⁿ ndihí-í, chí yáha núú xilé sácõo cue téé cùnuu-gá coo-ndo”, duha cùñáhá-yu xii-ndo. Te ducaⁿ te cada nínu ñaha nchaa ñáyiú yìhí ndihí-ndo mesá. ¹¹ Te nchaa ñáyiú na càda nínu mee-xi, te ñáyiú-áⁿ ñà túú cùu nínu-yu, te nchaa ñáyiú ñà túú quide nínu mee-xi, ñáyiú-áⁿ cúu nínu-yu —càchí-gã xáhaⁿ-gã xií-yu.

¹² Te dàtnùnì ní xáhaⁿ-gã xii téé ní cáháⁿ ñáhá xii-gá:

—Te yòhó òré cuini-n càda-n ìⁿ vico, te vá càháⁿ-n mée-ni cue téé càháⁿ ndihí-n, ní cuè ñani-n, ní cuè ñáyiú cùu ñani tnháá-n, ní cuè ñáyiú cuica ndècu yatni ndihí-n, chí ñáyiú-áⁿ ducaⁿ càdá-yu ìⁿ nduu càháⁿ ñáhá-yu xii-n te ndéyáhu-ni sá ní quidé-n-yu. ¹³ Te ñáhá chí òré ná càda-n ìⁿ vico, te cáháⁿ-n ñáyiú ndàhú, ndihí ñáyiú ñà cúú càca, ndihí ñáyiú yacua, ndihí ñáyiú cuáá. ¹⁴ Te núu ducaⁿ na càda-n, te cuu-xi ìⁿ sá vãha xii-n, chí ñáyiú-áⁿ vã ñihí-yu nacoto ñáhá-yu xii-n, dico na cùú-n te sáá nduu ndòto-n ndihí nchaa ñáyiú ní quide ndáá ní xíndecu ichi Yá Ndiõxí, te dàvá-áⁿ taxi-gá sá ndúú tàhú-n —càchí-gã xáhaⁿ-gã xii-dé.

Nàcuáa xíquide ñáyiú òré càháⁿ ñáhá ìⁿ téé cada vico
(Mt. 22:1-10)

15 Te sá dúcáⁿ ní cáháⁿ Jèsús ní tecú dóho cue tée yìhi mesá-áⁿ, núu ní xáhaⁿ ìⁿ-dé xii-gá:

—Ío váha táhú nchaa ñáiyu na càxi nchaa sá cuàha ñaha Yã Ndiõxí nduu na sáa-yu cundecú-yu núu ndécú-gã táxi tnùnì-gá —càchì-dé xáhaⁿ-dè xii-gá.

16 Te Jèsús ní xáhaⁿ-gã xii-dé:

—Ìⁿ tée quide-dé vico, te ní dátècú tnúhu-dé cuéhé víhí ñáiyu quíhíⁿ-yu caxí-yu. 17 Te òré sa ní cuu-ná sá cáxi-yu, te ní xáhaⁿ-dè xii tée xínu cuechi núú-dè sá quíhíⁿ-dé cúñaha-dè quíhíⁿ-yu caxí-yu, chi sa ndècu túha nchaa sá cáxi-yu. 18 Dico nchaaⁿ ní xáháⁿ-yu xii-dé sá ná cádá càhnu iní tée càháⁿ ñáhá-áⁿ, chí ñá túú cùyáchi-yu quíhíⁿ-yu vico-áⁿ. Te tée ní cáháⁿ ndihì tée xínu cuechi-áⁿ díhna ní xáhaⁿ-dè: “Íchí ní saaⁿ-í ìⁿ pedású ñuhu, te quíhíⁿ ndéhè-í tnavíí, núu xiáⁿ càháⁿ ndàhú-í núú-n sã cùñaha-n xii tée càháⁿ ñáhá-áⁿ xii-í sá ná cádá càhnu iní-dé chí ñá túú cùyáchi-í”, càchì-dé xáhaⁿ-dè. 19 Te ingá-dé ní xáhaⁿ-dè: “Ní saaⁿ-í úhúⁿ yúndá ndicutu sa xítu, te cue quiti-áⁿ quíhíⁿ-í coto ndeé-í-güedi vitna, núu xiáⁿ càháⁿ ndàhú-í núú-n sã cùñaha-n xii tée càháⁿ ñáhá-áⁿ xii-í sá ná cádá càhnu iní-dé chí ñá túú cùyáchi-í”, càchì-dé xáhaⁿ-dè. 20 Te ingá tucu-dé ní xáhaⁿ-dè: “Íchí ní tnándaha-í núu xiáⁿ vá cùyáchi-í quíhíⁿ-í”, càchì-dé xáhaⁿ-dè. 21 Te òré ní nasáá tée xínu cuechi-áⁿ, te ní nacani tnúhu-dé núu patróóⁿ-dè nchaa nàcuáa ní xáháⁿ-yu. Te ní cudééⁿ tée cùu patróóⁿ-áⁿ, te ní xáhaⁿ-dè xii tée xínu cuechi núú-dè-áⁿ: “Yáchi cuáháⁿ nanducu-n nchaa ñáiyu ndàhú, ndihì nchaa ñáiyu ñá cúú càca, ndihì nchaa ñáiyu yacua, ndihì nchaa ñáiyu cuáá, te ndèni ní cuu na nàníhì-n-yu te candècá-n-yu quixi”, càchì-dé xáhaⁿ-dè. 22 Te sáta ní nasáá tée xínu cuechi-áⁿ, te ní xáhaⁿ-dè xii patróóⁿ-dè: “Patróóⁿ,

sa ní quide-í chiúⁿ ní táhú-n, dico ndècu-gá núú cóo-yu”, càchì-dé xáhaⁿ-dè. 23 Te tée cùu patróóⁿ-dè-áⁿ ní xáhaⁿ-dè: “Cuáháⁿ tucu ndèni ní cuu te cada yica-n na quíxí-yu quíhu-yu cuendá ná chítú vehe-í. 24 Te na càchí tnúhu-í xii-n sã ñì ìⁿ ñáiyu ní cáháⁿ-í díhna vá cúú-gã caxí-yu sá sà ní quide túha-í caxí-yu ní cùu”, cachí tée-áⁿ xáhaⁿ-dè xii tée xínu cuechi núú-dè —càchì-gá xáhaⁿ-gã xii tée-áⁿ.

Ndoho-o cùndecu-o ichi Xítóhó Jেসুসရိ

(Mt. 10:37-38)

25 Te ío cuéhé ñáiyu nchìcúⁿ-yu Jèsús, te ní xáhaⁿ-gã xii-yu:

26 —Te núu dava nchòhó cuínì-ndó chitnahá ñáhá-ndó xii-í, te cuu iní ñáhá ndisa-ndo. Te cuèi na dàndóo-ndo tãtã-ndó, ndihì nánã-ndó, ndihì ñadihí-ndó, ndihì déhe-ndo, ndihì ñani-ndó, ndihì cúha-ndo, te cani iní-ndó sã cuèi na cúú-ndó sã cuendá-í, te ducaⁿ te cuu ndisa-ndo cuè ñáiyu tnàhá tnúhu ndihì-í. 27 Te nchaa ñáiyu vá cãncñícúⁿ nihnu ñaha xii-í cuendá sá yùhú-yu ndohó-yu dàtná ndoho-í, ñáiyu-áⁿ vá cúú-yu ñáiyu tnahá tnúhu ndihì-í. 28 Te núu ìⁿ nchòhó ná càni iní-ndó dàcaa-ndo ìⁿ vehe ducúⁿ, ¿te náa ñá díú díhna-gá cada cuendá-ndó núu ndédau díhúⁿ cuu, ducaⁿ te cutnùnì iní-ndó núu tnahá díhúⁿ-ndó càa vehe-áⁿ àdi ñáhá? 29 Chi núu vá dúcáⁿ càda-ndo, te na ngüita-ndo tàusaha-ndo te vá xínu cada-ndo, te nchaa ñáiyu na cùndehe ñaha xii-ndo, te cáháⁿ cuéhé-yu cuendá-ndó. 30 Te cachí-yu: “Tée-áⁿ ní ngüita-dé dácàa-dé ìⁿ vehe te ñá ní ndàcu-dé xínu”, cachí-yu. 31 Àdi te núu ìⁿ tée yìndaha ñaha xii ñáiyu cuínì-dé nàá-dé ndihì ingá tucu tée yìndaha ñaha xii ñáiyu, ¿te náa ñá díú díhna-gá cada cuendá-dé te núu ndacu-dé ndihì úxí mĩl cue sandàdú-dé nàá-güedé, ndihì ócò mĩl cue sandàdú ingá tucu tée

yíndaha ñaha xii ñáyiú cùú úhú iní tñáhá ndìhi-dé-áⁿ? ³² Àdi te núú xító-dé sá vǎ ndácú-dé ñá, te òré vátá cùyàtñi ñaha-gá tée cùú úhú iní tñáhá ndìhi-dé-áⁿ, te tendaha-dě ìⁿ tée quíhíⁿ-dé quíhu-dé tnúhu ndàhú núú tée-áⁿ cuendá sá vǎ nàá-güedé. ³³ Te duha càháⁿ-í chi núú nchòhó vǎ cadá ndèe iní-ndó dàña-ndo nchaa sá ndécú ndìhi-ndo cuendá chitnahá ñáhá-ndó xii-í, te vǎ cùú-ndó cué ñáyiú tñáhá tnúhu ndìhi-í.

Ñí nǎ nduu víxiⁿ
(Mt. 5:13; Mr. 9:50)

³⁴ Te ñí chi ío váha, dico núú na ndùu víxiⁿ-xi, ¿te nása-gá cada-o nàndíhi-o te núú ducaⁿ-í? ³⁵ Chi ñá túú-gǎ nàndíhi-xi nì sá dàcá ñuhu, te nì sá dàcá saháⁿ, chi cuendá-nǎ dǎngoyo-o. Te nchaa nchòhó ñáyiú ní xíndedóho tnúhu ní càháⁿ-í-a xini ñuhu-xi ío váha cuáha-ndo cuendá —càchí-gǎ xáhaⁿ-gǎ xii-yu.

15

Cuendá ìⁿ mbéé quiti ní xíta
(Mt. 18:10-14)

¹ Te cue tée cuihna iní-xi quide cobrá ñáhá xii ñáyiú cuendá impuèstú ndìhi cue dava-gǎ ñáyiú ndècu ichi cuehé ichi duha ní quexió-yu núú ndécú Jèsús cuendá cundedóho-yu tnúhu càháⁿ-gǎ. ² Te ní ngúíta cue tée cùú fariséú, ndìhi cue tée dàcuaha ñaha xii ñáyiú nchaa tnúhu ní chídó tnùnì ndí Moisés xicáháⁿ cuèhé-güedé cuendá-gǎ, te càchí-güedé:

—Tée-a quèheⁿ cuendá-dé ñáyiú ndècu ichi cuehé ichi duha, te xèxi ndìhi ñaha-dé xií-yu —càchí-güedé xitnàha-güedé.

³ Te Jèsús ní cani-gǎ ìⁿ cuendú nàcuáa tecú tnùnì-güedé tnúhu-gǎ, te xáhaⁿ-gǎ xii-güedé:

⁴ —Ìⁿ tée ndècu ìⁿ ciendú mbéé-dé, te ní xíta ìⁿ-di, te nchòhó sa cùtnuní iní-ndó nàcuáa cada tée-áⁿ, chi dándóo-dé cùmídíco sǎhúⁿ cùmí-di ìⁿ yucu, te cúnúndúcú-dé quiti ní xíta xíáⁿ

ndèé ndéé naníhí-dé-di. ⁵ Te òré ní naníhí-dé-di te ní dácáá-dé-di chíó-dé ní docó-dé-di sá cùdíⁿ iní-dé. ⁶ Te òré ní nasáá-dé vehe-dé, te ní dátacá-dé nchaa cue tée càháⁿ ndìhi-dé, ndìhi nchaa ñáyiú ndècu yatni ndìhi-dé, te ní xáhaⁿ-dé: “Chí ná cùdíⁿ iní-ó vitna, chi ní naníhí-í mbéé-í quiti ní xíta ní cùú”, càchí-dé xáhaⁿ-dé xií-yu. ⁷ Te yúhú càchí-í sá ío-gǎ cùdíⁿ iní Yǎ Ndióxi ndìhi cue espíritú xínú cuèchi núú-gǎ núu ìⁿ ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñá túú váha quidé-yu ndécú-yu te tñí-yu ichi-gǎ, dàcúúxí cùmídíco sǎhúⁿ cùmí ñáyiú sa ní tuha ichi-gǎ, chi ñá túú-gǎ ximí ñuhu-xi ndixi cuèchi iní-yu chi sa ndécú-yu ichi-gǎ —càchí-gǎ xáhaⁿ-gǎ xii-güedé.

Cuendá díhúⁿ nǎ xíta

⁸ Te ní cani Jèsús ingá cuendú núú-güedé, te xáhaⁿ-gǎ:

—Ìⁿ ñadíhí ndécú ndìhi-aⁿ úxí díhúⁿ cuixíⁿ, te ní dácúíta-aⁿ ìⁿ te ní teñuhú-aⁿ iti, te ní ngúíta-aⁿ nàtihu-aⁿ vehe, te súní váha váha ní nanducu-aⁿ ndéé ní naníhí-aⁿ. ⁹ Te òré ní naníhí-aⁿ, te ní dátacá-aⁿ nchaa ñáyiú díhí càháⁿ ndìhi-aⁿ ndìhi nchaa ñáyiú ndècu yatni ndìhi-aⁿ, te ní xáhaⁿ-aⁿ: “Chí ná cùdíⁿ iní-ó vitna chi ní naníhí-í díhúⁿ-í sá nǎ xíta ní cùú”, càchí-aⁿ xáhaⁿ-aⁿ xií-yu. ¹⁰ Te yúhú càchí-í sá dúcáⁿ ío cùdíⁿ iní nchaa espíritú xínú cuèchi núú Yǎ Ndióxi, núu ìⁿ ñáyiú ndècu ichi cuehé ichi duha na ndìxi cuèchi iní-yu cuendá nchaa sá ñá túú váha quidé-yu, te tñí-yu ichi-gǎ —càchí-gǎ xáhaⁿ-gǎ xii-güedé.

Cuendá ìⁿ tée ñá túú ní quide váha

¹¹ Te ní cani tucu Jèsús ingá cuendú núú-güedé, te xáhaⁿ-gǎ:

—Ìⁿ tée ndècu úú déhe ducuⁿ-dé, ¹² te tée líhli-gǎ ní xáhaⁿ-dé xii tǎtá-dé: “Táu, taxi-n tǎhú sǎ cùú cuendá-í”, càchí-dé xáhaⁿ-dé. Te

tátá-dě-án nĩ sáñaha-dě ndí dííⁿ núú-güedé sá cúú cuëndá-güedé. ¹³ Te núú sàcú-ni nduu, te déhe-dé téé lihli-gá-án nĩ nadico-dé nchaa sá nĩ sáñaha tátá-dě, te ní xica-dé cuáháⁿ-dé ìⁿ ñuú xicá, te yacáⁿ ní tñí-dé ìⁿ ichi cuéhé ichi duha, te ní ndihí díhúⁿ-dě ní dándóñùhu-dé ndihí cue téé càháⁿ ndihí-dé, ndihí nchaa ñáyiu díhí xíndecu ichi díí ìní. ¹⁴ Te ní ndihí ndoo díhúⁿ-dě ní dándóñùhu-dé, te núú sàcú-ni nduu ní sáá tnamá ñuú núú ndécú-dě-án, te ñá nihí-gá-dé sá caxí-dé, te xihí-dé docó. ¹⁵ Núú ní xica-dé cuáháⁿ ndúcú chiúⁿ-dé núú ìⁿ téé diu-ni ñuú xiáⁿ, te téé-án nĩ sáha chiúⁿ ñaha-dé ìⁿ xichi núú ñuhú-dé coto-dé cùchí. ¹⁶ Te súúní xihí-dé docó te cùní-dé caxi-dé nchaa sá sáha-yu cùchí-án ní cùu, dico ñá túú ní sáñahá-yu xii-dé. ¹⁷ Te uuⁿni ní sani váha iní-dé, te ní cachí-dé: “Ío cuéhé cue téé xínu cuechi vehe tátá-í te ío cuéhé sá xéxi-güedé ndécú, te yuhú duha ndòho-í docó iha! ¹⁸ Te ndacuñí-í te núhú-í vehe tátá-í, te cùñaha-í xii-dé: Táú, ñá túú ní quide váha-í núú Yá Ndióxi te ní ñá túú ní quide váha-í núú-n, ¹⁹ te ñá túú-gá tàú-í sá cúú-í déhe-n vitna, te cada ñaha-ñá-ñ xii-í dātná ìⁿ téé xínu cuechi núú-n”, duha ní sani iní-dé cùñaha-dé xii tátá-dé. ²⁰ Te sātá dúcáⁿ ní sani iní-dé, te ní natñí-dé ichi cuánuhú-dé vehe tátá-dé, te xica-gá cuánuhú-dé ní xiní ñáhá tátá-dé xii-dé te ní cundàhú iní ñáhá-dé. Te xínu tátá-dě-án nĩ sáháⁿ nútñahá ñáhá-dé, te ní numi ñaha-dé, te ío váha ní cáháⁿ ndihí ñaha-dé. ²¹ Te ní xáhaⁿ déhe-dé-án xii-dé: “Táú, ñá túú ní quide váha-í núú Yá Ndióxi te ní ñá túú ní quide váha-í núú-n, te ñá túú-gá tàú-í sá cúú-í déhe-n vitna”, cachí-dé xáhaⁿ-dé.

²² 'Dico tátá-dě-án nĩ xáhaⁿ-dě xii cue téé xínu cuechi núú-dé: “Chí quéñùhu ndihí-ni dóó váha-gá cuáha-ndo déhe-í-a na cuñhu-dé, ndihí ìⁿ dehé ná quíhi díquí ndáhá-dé, ndihí chàú váha na

quíhi-dé. ²³ Te quíhíⁿ ngueheⁿ-ndo ìⁿ ndicutu numa quiti caváha-gá, te cahni-ndo-di, te na càda-o vico, te na caxi-o-di. ²⁴ Chí déhe-í-a ní sani iní-í sá nĩ xihí-dé ní cùu, te ñáhá chi ndècu vívú-dé, te ní sani tucu iní-í sá ní xita-dé ní cùu te ní nasáá méé-dé”, càchí-dé xáhaⁿ-dě xii cue téé xínu cuechi núú-dě-án. Te ní ngúita-güedé ní quide-güedé vico.

²⁵ 'Te déhe-dé téé sàcuéhé-gá cuáháⁿ-dé yucu, te òré cuándixi-dé tá ndùu yatni-dé vehe, te ní tecú dóho-dé ío yaá cúú vico. ²⁶ Te ní cana-dé ìⁿ téé xínu cuechi, te ní xicáⁿ tñuhú-dé núú-dé ná cuëndá ducaⁿ ío yaá. ²⁷ Te téé xínu cuechi-án nĩ xáhaⁿ-dé: “Ñaní-ñ téé cuáháⁿ ní cùu ní nasáá-dé, te tátá-n nĩ táuchíúⁿ-dě ní xihí ìⁿ ndicutu numa quiti caváha-gá cuëndá sá ní nasáá váha-dé”, càchí-dé xáhaⁿ-dé.

²⁸ 'Dico ñaní-dé téé sàcuéhé-án nĩ cudééⁿ-dé, te ní cachí-dé sá vá ndíhu-dé vehe cundecu-dé vico-án ní cùu, dico ní quee tátá-güedé ní cáháⁿ ndàhú-dé núú-dé cuëndá ndíhu-dé. ²⁹ Te ní xáhaⁿ-dě xii tátá-dé: “Táú, cundedóho váha saú-n tñuhu na càháⁿ-í-a, yuhú ío cuéhé cuíá ní cuu xínu cuechi-í núú-n, te ní ìⁿ xito ñá túú quide sáa iní-í núú-n, te ní ìⁿ chivá lihli ñá túú tàxi-n-di caxi díí ìní-í-di ndihí cue téé càháⁿ ndihí-í. ³⁰ Te vitna ní nasáá déhe-n téé ní sáháⁿ ní dándóñùhu díhúⁿ-n ndihí nchaa ñáyiu xíndecu ichi díí ìní. Te ní sahani-n ìⁿ ndicutu numa quiti caváha-gá sá cuëndá-dé”, càchí-dé xáhaⁿ-dě xii tátá-dé. ³¹ Te ní xáhaⁿ tátá-dé xii-dé: “Yóhó déhe-í ducaⁿ-ni ndècu ndihí ñaha-n xii-í, te nchaa sá ndécú ndihí-í cúú-xi cuëndá-n. ³² Te vitna dacutíí tàú-xi sá cáda-ó vico, te cudíí ìní-ó, chí ñaní-n-án nĩ quide-í cuëndá sá ní xihí-dé ní cùu, te ñáhá chi ndècu vívú-dé, te sa ní xita-dé ní cùu, te ní nasáá méé-dé”, càchí-dé xáhaⁿ-dě xii déhe-dé téé sàcuéhé-gá-án — duha cuáháⁿ cuëndá ní cani Jèsús

núu-güedé.

16

Nàcuáa ní quide ìn tée tàxi tnuní ñáhá xii cue tée xinu cuechi

¹ Te Jèsús xáhaⁿ-gá xii cue tée xica cuu ndihi-gá:

—Ní xindecu ìn tée cuica, te ducaⁿ ní xindecu ìn tée ní taxi tnuní ñáhá xii cue tée ní xinu cuechi núu-dé. Te tée-án ní xini ñáhá ñáyiù dùhu-dé díhúⁿ tée cùu patróóⁿ-dè, te cuáháⁿ-dé dándòñuhu-dé, te ní xáháⁿ-yu xii tée cùu patróóⁿ-dè sá dúcáⁿ quide-dé. ² Te tée cùu patróóⁿ-dè-án ní cana ñaha-dé xii-dé, te ní xáhaⁿ-dè: “¿Ná cuendá duha càháⁿ ñáyiù cuendá-n? Yáchi chi na tàxi cuendá-n nchaa chiuⁿ ní quide-n, chi vitna te vá táxi tnuní-gá-n cuè tée xinu cuechi núu-í?”

càchí-dé xáhaⁿ-dè. ³ Te tée tàxi tnuní ñáhá xii cue tée xinu cuechi-án ní sani iní-dé: “¿Te nása cada-í vitna na quèhndé patróóⁿ-í chiuⁿ-í? Chi ñá cùndè-gá-í cada-í chiuⁿ vée, te cùcahaⁿ núu-í cácaⁿ ndàhú-í. ⁴ Dico duha cada-í cuendá queheⁿ cuendá ñáhá ñáyiù vehé-yu òré ná quèhndé duuⁿ-ná patróóⁿ-í chiuⁿ-í”, duha ní sani iní-dé. ⁵ Te sáta dúcáⁿ te ní cana-dé ìn ìn cue tée tau núu patróóⁿ-güedé. Te tée díhna ní xicáⁿ tnúhú-dè núu-dé, te xáhaⁿ-dè: “¿Ndèé dau tau-n núu patróóⁿ-í?”

càchí-dé xáhaⁿ-dè. ⁶ Te tée-án ní xáhaⁿ-dè: “Táu-í ìn cièndú bàrril acití”, càchí-dé xáhaⁿ-dè. Te tée tàxi tnuní ñáhá xii cue tée xinu cuechi-án ní xáhaⁿ-dè: “Iha náu reciù-n-á, te ndadúha ingá sá ùdico úxí taxi-n”, càchí-dé xáhaⁿ-dè. ⁷ Te dàtnuní ní xicáⁿ tnúhú tucu-dé núu ingá-dé, te xáhaⁿ-dè: “Te yòhó, ¿ndèé dau tau-n-í?”

càchí-dé xáhaⁿ-dè. Te tée tau-án ní xáhaⁿ-dè: “Ìn cièndú ngohnchi triù tau-í”, càchí-dé xáhaⁿ-dè. Te tée tàxi tnuní ñáhá xii cue tée xinu cuechi-án ní xáhaⁿ-dè: “Iha náu reciù-n-á, te cadúha ingá sá cùmídícó-ná taxi-n”, càchí-dé xáhaⁿ-dè. ⁸ Te tée cùu patróóⁿ-án ní cachí-dé sá ò váha ñuhu

díquí tée dùhu-án nàcuáa cada-dé cundecu váha-dé. Te nchaa ñáyiù xindecu ichi cuèhé ichi duha, ío-gá váha ñuhu díquí-yu nàcuáa cada-yu cundecu váha-yu ndihi nchaa ñáyiù cùndihí-yu dàcúxí ñáyiù ndècu ichi Yá Ndiòxí.

⁹ Te yúhú càchí-í sá cáda-ndó sá váha ndihi nchaa sá ndécú ndihi-ndo ní cuáha ñuyúú yíca cuèchi-a, te ducaⁿ te coo cue tée ío váha tnahá tnúhu ndihi-ndo, te òré ná ndihi nchaa sá ío ñuyúú-a, te Yá Ndiòxí queheⁿ cuendá ñáhá-gá xii-ndo, te cundecu-ndo ndihi-gá ní caa ní quíhíⁿ.

¹⁰ Te núu ìn tée quide ndáá cuèi ìn chiuⁿ líhli na càda-dé, te òu-ni ducaⁿ quide ndáá-dé cuèi ìn chiuⁿ cahnu na cada-dé. Dico tée ñá túú quide ndáá, chi cuèi chiuⁿ líhli àdi chiuⁿ cahnu na cada-dé dico ìn-ni quide-dé. ¹¹ Te núu nchòhó

vá cáda-ndó sá váha ndihi nchaa sá ní cuáha ñuyúú yíca cuèchi-a ña, te Yá Ndiòxí vá táxi-gá sá váha ndècu ndihi-gá xii-ndo. ¹² Te núu vá cáda ndáá-ndó còto-ndo nchaa sá táxi núu tnahá ñáyiù-ndo, te vá yò taxi sá ndúú tàhú-ndó.

¹³ Te ní ìn tée xinu cuechi vá ndácú-dé cunu cuechi-dé núu úú patróóⁿ, chi tée-án cuu váha iní-dé núu ìn patróóⁿ-dè te tní-dé nchaa tnúhu càháⁿ patróóⁿ tée cùu váha iní-dé núu-xi-án. Te núu ingá tucu patróóⁿ-dè vá cúu váha iní-dé, te ní vá tní-dé tnúhu càháⁿ patróóⁿ-dè-án. Te ducaⁿ sàtnahá-xi cùu nchòhó chi vá ndácú-ndó cunu cuechi-ndo núu Yá Ndiòxí te cuhuⁿ iní-ndó nchaa sá ío ñuyúú-a — càchí-gá xáhaⁿ-gá xii-güedé.

¹⁴ Te nchaa cue tée cùu fariséú ío ñuhu iní-güedé nchaa sá ío ñuyúú-a, te xindedóho-güedé nchaa tnúhu càháⁿ Jèsús, te ní càháⁿ yíchí-güedé cuendá-gá. ¹⁵ Te Jèsús ní xáhaⁿ-gá xii-güedé:

—Nchòhó cùú-ndó cuè tée ío váha càháⁿ núu ñáyiù cuendá-ni sá cuini-ndó càháⁿ váha-yu

cuendá-ndó, dico Yá Ndiöxí xini ndáá-gá nàcuáa càa iní-ndó ìⁿ ìⁿ-ndo, te nchaa sá cächí cue ñáyiú ñuyíú-a sá ïo nàndíhi, Yá Ndiöxí dáquèe tíhú-gă.

Cuendá nchaa tnúhu ní chídó tnùní ndíi Moisés

¹⁶Te nchaa tnúhu ní chídó tnùní ndíi Moisés cúnú-xi ní cuu, ndíhi nchaa tnúhu ní chídó tnùní cue téé ní xóo cáháⁿ tnúhu Yá Ndiöxí ndéé sanaha. Dico cútñáhá ní ngúíta téé ní xóo dacuàndute ñaha xii ñáyiú ní cáháⁿ-dé tnúhu-í, ndéé dàvá-áⁿ ñà túú-gă ní cùnú nchaa tnúhu ní chídó tnùní ndíi Moisés ndíhi nchaa tnúhu ní chídó tnùní cue téé ní xóo cáháⁿ tnúhu Yá Ndiöxí ndéé sanaha. Te ñu-ni ndéé dàvá-áⁿ ní quesaha ta tècú tnùní ñáyiú nàcuáa ndíhu ndaha ñaha Yá Ndiöxí xii-yu, te vai ñáyiú ïo sàni iní-yu vitna nàcuáa cadá-yu ndíhu ndaha ñaha Yá Ndiöxí xii-yu. ¹⁷Te nchaa tnúhu ní chídó tnùní ndíi Moisés ïo ndáá cáháⁿ-xi, te ndíhi-gá naa andiu ndíhi ñuyíú dàcúúxí sá ndíhi ìⁿ ìⁿ tnúhu-áⁿ cada-xi nàcuáa cáháⁿ-xi.

Jesús càháⁿ-gá cuendá ñáyiú dàña tnaha

(Mt. 19:1-12; Mr. 10:1-12)

¹⁸Te núu ìⁿ téé na dàña tnaha-dé, ndíhi ñadíhi-dé, te tnándaha tucu-dé ndíhi ingá-yu, te nèhé víhi quide-dé te núu ducaⁿ na càda-dé, te téé na tnándaha ndíhi ñaha ní dáñá yè-xi, te ñu-ni ducaⁿ ñà túú cùu-xi sá vaha te núu ducaⁿ na càda-yu — cächí-gá xáhaⁿ-gá xii-güedé.

Cuendá ìⁿ téé nàni Lázaru ndíhi cuendá ìⁿ téé cuica

¹⁹Te xáhaⁿ tucu-gá xii-güedé:

—Ní xindecu ìⁿ téé cuica, te ní xóo cuihnu-dé mee-ni dóo vaha dóo víi càa, te nchaa nduu súúni vaha ní xóo cada-dé vico vehe-dé. ²⁰Te ní xindecu tucu ìⁿ téé ndàhú ní xínani-dé Lázaru, te téé-áⁿ ní cuhú-dé ní xindeé-dé nitùhú-dé ndíhiyí, te ìⁿ nduu ìⁿ nduu ní xóo taxinucóo ñaha-güedé xii-dé yuyèhe

tée cuica-áⁿ. ²¹Te téé ndàhú-áⁿ ní xóo cuú-dé docó, te ní xóo cuini-dé caxi-dé nchaa sá ñà túú-gă ní xóo yaha caxi téé cuica-áⁿ, te ñà túú ní xóo níhi-dé. Te cuéi iná ní xóo quihíⁿ-di ní xóo nayuu-di nchaa núu ndíhiyí ndéé-dé-áⁿ. ²²Te ní sáá ìⁿ nduu te ní xíhi téé ndàhú-áⁿ, te cue espíritu xínú cuèchi núu Yá Ndiöxí ndécá ñaha-xi xii-dé cuánda núu ndécú té Abraham cundecu-dé. Te ní sáá nduu ní xíhi téé cuica-áⁿ tnàhá-dé, te ní chindúxi ñaha-güedé xii-dé. ²³Te ní sáá-dé núu xindecu nchaa ñáyiú ní xíhi ñà túú ní quide ndáá núu Yá Ndiöxí te xíáⁿ ïo ndòho-dé ndécú-dé, te ní ndonehe núu-dé te xica ní xini-dé té Abraham ndíhi té Lázaru-áⁿ xindecu-güedé. ²⁴Te níhi ní cáháⁿ-dé, te xáhaⁿ-dè: “Yòhó tātá Abraham, cundàhú iní ñáhá xii-í, te cùñaha xii té Lázaru ná dandaxiⁿ-dé díqui ndáhá-dé, te na quixi-dé dandaxiⁿ-dé yàa-í, chi ïo ndòho-í ñùhù-í núu ñùhú núu càyú-a”, cächí-dé xáhaⁿ-dè xii té Abraham.

²⁵Dico té Abraham ní xáhaⁿ-dè: “Ndàhú yòhó ñani tnàhá-í, dandacu iní sá ïo vaha ní xindecu-n ñuyíú, te té Lázaru ïo ndàhú ní ndòho-dé ní xindecu-dé. Te vitna ní nucunde cu váha-dé iha, te yòhó ndòhó-n vitna. ²⁶Te ñà díu-ní sá xíáⁿ tucu, chi cuáda ndècu ìⁿ dhé vá cùnú ñùhú ñèhu-xi núu ndécú-ó, te cuéi nchaa ñáyiú xindecu iha na cächí iní-yu quixi-yu núu ndécú-ndó dico vá ndácú-yu, te ni nchòhó vá ndácú-ndó quixi-ndo núu ndécú-ndí”, cächí-dé xáhaⁿ-dè. ²⁷Te ní xáhaⁿ téé cuica-áⁿ: “Te núu ducaⁿ te càháⁿ ndàhú-í núu yòhó tātá Abraham vitna sá tэндàha-n té Lázaru ná quihíⁿ-dé vehe tātá-í, ²⁸chi ndècu úhúⁿ-gá ñani-í, te na cùñaha-dé xii-güedé sá vā cadá-güedé dàtná ní quide-í cuendá sá vā quixi-güedé tnàhá-güedé núu ndécú-í ndòhó-í-a”, cächí-dé xáhaⁿ-dè. ²⁹Te té Abraham ní xáhaⁿ-dè: “Mee-güedé ndécú

ndìhi-güedé nchaa tnúhu ní chídó tnúni ndíi Moisés, ndìhi nchaa tnúhu ní chídó tnúni cue tée ní xóo cáháⁿ tnúhu Yá Ndióxí ndéé sanaha, te nchaa tnúhu-áⁿ ná tnì-güedé nàcuáa càháⁿ-xi”, càchí-dé xáhaⁿ-dè xii-dé. ³⁰ Te ní xáhaⁿ tùcu tée cuica-áⁿ: “Tátá Àbrahám, dico vá cáda cuendá-güedé nchaa tnúhu-áⁿ, dico núu ìⁿ ñáyiú ñá túú-gã ndécú ñùyíú ìⁿ ñáyiú ndècu ndìhi-n quíhíⁿ-yu cáháⁿ ndìhi ñàhá-yu xii-güedé nàcuáa ndùu tnúhu váha, te ndíxi cuéchi iní-güedé nchaa sá ñà túú quide váha-güedé ndécú-güedé, te cada váha-güedé”, càchí-dé xáhaⁿ-dè xii-dé. ³¹ Dico té Àbrahám ní xáhaⁿ-dè: “Te núu ñá túú cùni-güedé tnì-güedé tnúhu ní cáháⁿ ndíi Moisés, ndìhi tnúhu ní cáháⁿ cue tée ní xóo cáháⁿ tnúhu Yá Ndióxí ndéé sanaha ña, te ñu-ni ducaⁿ càda-güedé cuéi ìⁿ ñáyiú ní xíhí ná ndótó-yu cùñhá-yu nàcuáa ndùu tnúhu váha, chi vá quindáá iní-güedé”, càchí té Àbrahám xáhaⁿ-dè xii tée cuica-áⁿ — càchí Jèsús xáhaⁿ-gã xii cue tée cùu fariséú.

17

Quihi iní-ó vã cündècu-o ichi cuehé ichi duha

(Mt. 18:6-7, 21-22; Mr. 9:42)

¹ Te Jèsús ní xáhaⁿ-gã xii cue tée xica cuu ndìhi-gã:

—Dacuiíí sã cóo cuè tée dacáháⁿ-güedé ñáyiú cadá-yu nándi sá cuèhé sá dúhá, ìdico ndàhú ní cuu cue tée ducaⁿ na dacáháⁿ ñàhá xii-yu cadá-yu nándi sá cuèhé sá dúhá! ² Chi váha-gã sá núu na dàcutu ndéé ñáyiú ìⁿ yúú yódó dücúⁿ-güedé te dàquée ñàhá-yu xii-güedé xití ndute làmár, te ñá díú sã cündècu-güedé dacáháⁿ-güedé ñáyiú cadá-yu nándi sá cuèhé sá dúhá, cuéi ñáyiú ndàhú iní-xi dandàhú-güedé. ³ Te ío quihi iní-ndó cündècu-ndo.

⁴ Te núu ìⁿ ñaní tnáhá-ndó quide-dé ìⁿ sá ñà túú tàú-dé

çada-dé sá cúu-xi-ndó te cáháⁿ-ndó dôho-dé, te núu ní ndíxi cuéchi iní-dé sá ñà túú ní quide váha-dé, te cada càhnu iní-ndó sã ní quide-dé. ⁴ Te cuéi úsá xito na càda-dé nándi sá ñà túú tàú-dé cada-dé sá cúu-xi-ndó ìⁿ nduu, te núu na quixi-dé úsá xito núu-ndó, te cachí-dé sá vã dúcáⁿ-gã cada-dé, te xini ñuhu-xi cada cahnu iní-ndó-dé —càchí-gã xáhaⁿ-gã xii-güedé.

Ñáyiú sàndáá ndisa iní-xi

⁵ Te ní xáhaⁿ cuè tée xica cuu ndìhi Jèsús xii-gã:

—Chindee ñàha xii-ndí cuendá ducaⁿ te quindáá-gã iní-ndí sá Yá Ndióxí ndácú-gã quidé-gã nchaa sá váha —càchí-güedé xáhaⁿ-güedé xii-gã.

⁶ Te ní xáhaⁿ Jèsús:

—Te núu nchòhó quindáá ndisa iní-ndó sùúni cuèdicó luha líj dàtná cùni-ndó càa ìⁿ ndíquiⁿ yutnu nàni mostázá, te ducaⁿ te cuu cùñaha-ndo xii ìⁿ yutnu: “Quene-n ìha te quíhíⁿ-n cuìhnu-n xití làmár”, duha cùñaha-ndo. Te ducaⁿ càda-xi te núu na quindáá ndisa iní ñàhá-ndó xii-í —càchí-gã xáhaⁿ-gã xii-güedé.

Nàcuáa tàú ìⁿ tée xinu cuechi cada-dé

⁷ Te xáhaⁿ tùcu-gã xii-güedé:

—Te núu ìⁿ nchòhó ndécú ìⁿ tée xinu cuechi núu-ndó, te cuáháⁿ-dé yucu cuángada chiúⁿ-dé, àdi cuáháⁿ-dé yucu coto-dé quiⁿ, te òré ní nasáá-dé vehe sá ní sáháⁿ-dé yucu, te vá cùñaha nchòhó cue tée cùu patróoⁿ-dè xii-dé: “Yáchí nehé caxi-n dítá”, vá dúhá cùñaha-ndo. ⁸ Chi nchòhó cue tée cùu patróoⁿ-dè cùñaha-ndo xii-dé: “Cundihí iní cada túha sá cùdini-í, te díhna-gã-í caxi-í dítá te dàtnúni caxi-n”, duha cùñaha nchòhó cue tée cùu patróoⁿ xii-dé. ⁹ Te òré ná ndíhí chiúⁿ ní táhú nchòhó cue tée cùu patróoⁿ cada tée xinu cuechi núu-ndó, te ñá túú tàú-ndó ndàcáⁿ táhú-ndó núú tée xinu cuechi núu-ndó. ¹⁰ Te

duha càháⁿ-í chi núu òré ná ndìhì nchaa chiuⁿ ní tǎhú Yá Ndiòxí cada-ndo, te cachí-ndó: “Nchúhú cúú-ndí cue téé xínu cuechi núú Yá Ndiòxí, dico ñá túú tǎu-gá ndacáⁿ tǎhú-gǎ núú-ndí, chi mee-ni chiuⁿ ní tǎhú-gǎ ní quide-ndí”, duha cachí-ndó —càchí-gǎ xáhaⁿ-gǎ xii-güedé.

Jèsús quidé tǎtna-gǎ úxí cue téé tnàhá cuéhé sǎ dátèhyú nihnu-xi yiqui cùñú ñáyiú

¹¹ Te ñùhu Jèsús ichi cuáháⁿ-gǎ ñúú Jerusalén, te ní yáha-gǎ núú ràyá distritú Sámariá ndìhì distritú Galileá. ¹² Te ta cùyatni-gǎ ìⁿ ñúú líhli cuáháⁿ, te ní sǎtnahá ñáhá úxí tnàhá cue téé cùhú xii-gǎ, te tnàhá-güedé cuéhé sǎ dátèhyú nihnu-xi yiqui cùñú-ó dico xica lùha ní ngúnu tní-güedé, ¹³ te níhì ní cáháⁿ-güedé, te xáhaⁿ-güedé xii Jèsús:

—¡Mèstrú, cundáhú iní ñáhá xii-ndí! —càchí-güedé xáhaⁿ-güedé xii-gǎ.

¹⁴ Te òré ní xiní ñáhá Jèsús xii-güedé, te ní xáhaⁿ-gǎ:

—Chí cuáháⁿ núú dǔtú ná cundehe ñaha-dé xii-ndo —càchí-gǎ xáhaⁿ-gǎ xii-güedé.

Te ní xica-güedé cuáháⁿ-güedé, te ichi-ni ñùhu-güedé cuáháⁿ-güedé ní ndúha-güedé cuéhé tnàhá-güedé. ¹⁵ Te nchaa-güedé ní cutnùní iní-güedé sǎ ní ndúha-güedé, dico ìⁿ-ni-dé ní nacuico-dé, te ní ngúita-dé níhì ní cáháⁿ-dé, te ní cachí-dé sǎ ìo càhnu cuu Yá Ndiòxí. ¹⁶ Te ní ngúíñí xítí-dé núú Jèsús, te ní nuu núú-dé ndàa núú ñúhú ndacáⁿ tǎhú-dé núú-gǎ. Te téé-áⁿ cúú-dé téé distritú Sámariá. ¹⁷ Te Jèsús ní cachí-gǎ:

—Úxí tnàhá-güedé ní ndúha cuéhé tnàhá-güedé. ¿Te ndéé ndécú dàva-gǎ-güedé-í? ¹⁸ ¿Te náa ìⁿdii-ni téé ingá ñúú-a ní nacuico-dé ndacáⁿ tǎhú-dé núú Yá Ndiòxí, te cachí-dé sǎ ìo càhnu cuu-gǎ ñá? —càchí-gǎ.

¹⁹ Te ní xáhaⁿ-gǎ xii téé-áⁿ:

—Ndacuíñí te núhú-n, chi sa ní ndúha-n cuéhé tnàhá-n, chi ní sándáá iní-n Yá Ndiòxí —càchí-gǎ xáhaⁿ-gǎ xii-dé.

Nàcuáa yìndaha ñaha Yá Ndiòxí (Mt. 24:23-28, 36-41)

²⁰ Te cue téé cùu fariséú ní xicáⁿ tnúhú-güedé núú Jèsús núu ná ama ngúita Yá Ndiòxí ndìhu ndaha-gǎ ñáyiú. Te ní xáhaⁿ-gǎ:

—Ñá túú ñá cada-xi ñuyúú quini-ndó cuendá cutnùní iní-ndó sǎ ndìhu ndaha ñàha Yá Ndiòxí xii-ndo. ²¹ Te ní vǎ yóo cachí: “Tha ndècu-gǎ táxí tnùní-gǎ, àdi yacáⁿ ndècu-gǎ táxí tnùní-gǎ”, chi tnuú-ndó sǎ ndècu-gǎ ndìhì nchaa ñáyiú yìndaha-gǎ —càchí-gǎ xáhaⁿ-gǎ xii-güedé.

²² Te ní xáhaⁿ-gǎ xii cue téé xica cuu ndìhì-gǎ:

—Te nchòhò chi sǎá nduu, te cachí iní-ndó sǎ sùúní cuèdicó ìⁿ nduu quini ñáhá-ndó xii yúhú Téé cùu ñaní tnàhá-ndó nchàa-ndo, dico vǎ quini ñáhá-gǎ-ndó xii-í. ²³ Te coo ñáyiú cùñàhá-yu xii-ndo: “Tha ndècu-gǎ, áⁿ yacáⁿ ndécú-gǎ”, quesàhá-yu cùñàhá-yu xii-ndo. Dico vǎ quindáá iní-ndó quíhíⁿ-ndó ndìhì-yu núú càchí-yu, te ní vǎ cání iní-ndó quíhíⁿ méé-ndó. ²⁴ Chi dàtná cuíni-ndó quide-xi òré sǎá ndúté àndiú, chi uuⁿni dàyehé-xi nihíi ñuyúú, ducaⁿ càda-xi nduu na quixi tucu yúhú Téé cùu ñaní tnàhá-ndó nchàa-ndo, te dàvá-áⁿ quini ñáhá nchàa-ndi túhú ñáyiú xii-í. ²⁵ Dico díhna-gǎ ndoho vihi-í, te daquèe tíhú ñáhá ñáyiú ñuyúú-a xii-í. ²⁶ Te cadá-yu dàtná ní quide ñáyiú ní xíndecu cùtnàhá ní xíndecu té Nòé, te diu-ni ducaⁿ sǎtnahá-xi cada nchaa ñáyiú ndècu vitna ndéé sǎá nduu quixi tucu yúhú Téé cùu ñaní tnàhá-ndó nchàa-ndo. ²⁷ Chi caxi-ni-yu, coho-ni-yu, te caca cuu-ni cue téé xica ndáhú, te tnàndaha-ni-yu, chí ducaⁿ ní

quidé-yu dàvá-án ndéé ní sáá nduu cuãnguee té Nôé xítí bàrcú, te ní ngúita-xi ní cuuⁿ dáú ní ndaa ndute ñuyíú, te nchaá-yu ní xíhí ní cáhá-yu dàvá-án. ²⁸ Te ñu-ni ducaⁿ ní quide tucu ñáyíu cútnàhá ní xíndecu té Lôt, chi xèxí-yu xihí-yu, te sàáⁿ-yu te nàdicó-yu, te xíxitú-yu nándi sá xíxitú-yu, te nchaa cue téé xídacáá-güedé vehe. ²⁹ Te òré ní quee té Lôt ñuú Sòdomá, te ní ngoyo ñuhú andíu, te dàcá yúú súúni dicó ní nduu ñuhú-ñá-xi, te ní xíhí nchaandi túhú ñáyíu ñuú-án. ³⁰ Te ñu-ni ducaⁿ sãtnahá-xi cada ñáyíu na sáá nduu quixi tucu yúhú Téé cùu ñani tnáhá-ndó nchàa-ndo ñuyíú-a.

³¹ Te núu ñu ñáyíu càndodó-yu díquí véhë-yu nduu-án, te ní vá ndíhu-gá-yu quehéⁿ-yu ñu ndachíuⁿ-yu canehé-yu quíhíⁿ, te ñáyíu cuáháⁿ yucu, te ní vá nùhú-gá-yu vehé-yu. ³² Te chí dándàcu iní nàcuáa ní yáha ñadíhí té Lôt. ³³ Te nchaa ñáyíu cuíni dàcácu nihnu mee-xi ñuyíú-a ña, te cuíta nihnú-yu, te nchaa ñáyíu na cùú sá cuendá-í, te naníhí tãhú-yu.

³⁴ Te na càchí tnúhu tucu-í xii-ndo sã nduu-án, te núu úú-yu càa ñu núu xító, te ñuⁿ-yu ndanchitá-yu ndaá-yu andíu, te ñuⁿ-yu quendóo. ³⁵ Te núu úú ñáyíu ñíhí nchícó-yu ñu-ni vèhe, te ñuⁿ-yu ndanchitá-yu ndaá-yu andíu, te ñuⁿ-yu quendóo. ³⁶ Te núu úú cue téé yíhí-güedé yucu, te ñuⁿ-dé ndanchita-dé ndaa-dé andíu, te ñuⁿ-dé quendóo —càchí-gá xáhaⁿ-gã xii-güedé.

³⁷ Te sá dúcáⁿ ní cáháⁿ-gá ñuu ní xicáⁿ tnúhú-güedé núu-gã, te xáhaⁿ-güedé xii-gã:

—Mèstrú, ¿te ndéé ducaⁿ càda-xi-i? —cachí-güedé xáhaⁿ-güedé xii-gã.

Te ní xáhaⁿ-gã:

—Te nchòhó xini-ndó sã ncháá núu yúcu yiqui cuñú ní xíhí, te

yàcáⁿ tàcá cue ndixíí xéxí-güedi —cachí-gá xáhaⁿ-gã xii-güedé.

18

Jèsús càháⁿ-gá cuendá ñu juéxí ndíhi cuendá ñu ñaha quèé

¹ Te Jèsús ní cani-gá ñu cuendú núu-güedé cuendá sá vã ná tũhú iní-güedé cáháⁿ ndíhi-güedé Yã Ndióxi nchaa-ni òré. ² Te xáhaⁿ-gã:

—Ñu ñuú ndécú ñu juéxí, te ní ña túú sãndáá iní-dé Yã Ndióxi, te ní ñuⁿ tnúhu xáhaⁿ ñáyíu ñá túú cuíni-dé cada cuendá-dé. ³ Te ñu-ni ñuú-án ndécú túcu ñu ñadíhí ñaha quèé, te ní sáháⁿ-aⁿ càháⁿ ndàhú-aⁿ núu juéxí-án cuendá cada ndaá-dé ñuⁿ cuéchi. ⁴ Te tĩtní xito ní cuu sáháⁿ-aⁿ càháⁿ ndàhú-aⁿ núu-dé te ñá túú cuíni-dé cada cuendá-dé tnúhu càháⁿ-aⁿ ní cùu, te ndéé núu ña cúú-gã te ní sani iní-dé: “Te cuéi ñá túú sãndáá iní-í Yã Ndióxi, te ní ña túú quide cuendá-í nchaa tnúhu càháⁿ ñáyíu cada-í, ⁵ dico na càda ndaá-í cuendá ñaha quèé-a ndíhi ñáyíu cùu úhú iní tnáhá ndíhi-aⁿ, chi vá cùndèe-gá iní-í nuu núu quixi-aⁿ dasatú iní ñáhá xii-í”, duha ní sani iní téé cùu juéxí-án —càchí-gá xáhaⁿ-gã xii-güedé.

⁶ Te ní xáhaⁿ túcu-gá xii-güedé:

—Cada cuendá-ndó nàcuáa ní sani iní juéxí téé cuíhna iní-xi-án.

⁷ Te Yã Ndióxi ío chĩndee-gá nchaa ñáyíu ní cáháⁿ-gá cundecu ndíhi-gã, chí cuéi nduu cuéi niú càháⁿ ndíhi ñáhá-yu xii-gã, te vá cùyaa-gã nachinaa-gã nchaa sá quidé ñaha nchaa ñáyíu cùu úhú iní ñáhá xii-yu. ⁸ Te ío ndíhi ducaⁿ càda-gã. Te òré ná quixi yúhú Téé cùu ñani tnáhá-ndó nchàa-ndo, ¿te náa naníhí-gã-í ñáyíu sãndáá ndisa iní Yã Ndióxi-án? —càchí-gá xáhaⁿ-gã xii-güedé.

Nàcuáa quide ñu téé cùu fariséu ndíhi ñu téé cùu cobradór

⁹ Te Jèsús ní cáháⁿ-gã núu ñáyíu nàcuáa quide ñáyíu sãni iní sá ío

quide ndáá te dàquee tǎhǔ-yu tnàha ñáiyú-yu, te xáhaⁿ-gǎ xií-yu:

10 —Úú cue tée cuáháⁿ-güedé veñúhu càhnu sá ío cùnno cáháⁿ ndihí-güedé Yá Ndióxi, te ìⁿ-dé cúú-dé tée cùu fariséú, te ingá-dé cúú-dé tée cuìhna iní-xi quide cobrá ñáhá xii ñáiyu cuèndá impuèstú.

11 Te tée cùu fariséú-áⁿ nǔtní-dé cáháⁿ ndihí-dé Yá Ndióxi, te xáhaⁿ-dé xii-gá: “Yòhó Dútú Ndióxi ndàcáⁿ tǎhǔ-í núú-n, chí ñá túú quide-í dàtná quidé dàva-gá-güedé, chí dùhu-güedé, cáháⁿ ndihí-güedé ñadihí te ñá díú ñadihí-güedé cúú-yu, te nándi-gá nchaa sá cuèhé sá dúhá quide-güedé, te ni ñà túú quide-í dàtná quidé tée cuìhna iní-xi quide cobrá ñáhá xii ñáiyu cuèndá impuèstú ndécú ìha. 12 Chí yúhú ñá túú tnàhí ná xéxi-í úú nduu xití samàná cuèndá sá cáháⁿ ndihí ñaha-í xii-n, te nchaa sá ñihí-í te càhu-í úxi xichi, te ìⁿ xichi tàxi-í xii-n”, càchí-dé xáhaⁿ-dè xii Yá Ndióxi. 13 Dico tée cuìhna iní-xi quide cobrá ñáhá xii ñáiyu cuèndá impuèstú-áⁿ chí xica lùha nutní-dé, te ni lùha ñá túú cùyí-dé ndonehe núú-dé andiu cuèndá sá ndíxi cuèchi iní-dé nchaa sá ñà túú váha quide-dé, te ndèdí ndaha-dé pèchú-dé sá ndihú iní-dé, te xáhaⁿ-dè xii Yá Ndióxi: “ìYòhó Dútú Ndióxi cundàhú iní ñáhá xii-í, chí ío cuèhé sá ñà túú váha quide-í núú-n!”, càchí-dé xáhaⁿ-dè xii Yá Ndióxi. 14 Te na càchí tnúhu-í xii-ndo sá tée cuìhna iní-xi quide cobrá ñáhá xii ñáiyu-áⁿ ní tedóho Yá Ndióxi nchaa tnúhu ní cáháⁿ-dé, te ní quide càhnu iní-gá nchaa sá ñà túú váha ní quide-dé, te cuánuhú-dé vehe-dé. Te tée cùu fariséú-áⁿ ñà túú ní tedóho ñaha Yá Ndióxi xii-dé. Chí nchaa ñáiyu na càda cahnu mee-xi ñuyú-a te vá cúú-yu ñáiyu cùnno, te nchaa ñáiyu ñá túú quide cahnu mee-xi, ñáiyu-áⁿ cunúú-yu —càchí Jèsús xáhaⁿ-gǎ xií-yu.

Jèsús quidé ì-gǎ landú

(Mt. 19:13-15; Mr. 10:13-16)

15 Te ìⁿ úú ñáiyu ndécá-yu landú ìhli cuáháⁿ núú Jèsús chí cuìní-yu sá téndàha ñaha-gá xii-güexi, te òré ní xiní cue tée xica cuu ndihí-gá sá ndécá-yu landú-áⁿ cuáháⁿ núú-gǎ, te ní ngüíta-güedé ténàá ñáhá-güedé xií-yu, te xáhaⁿ-güedé sá vá dúcáⁿ càdá-yu. 16 Dico Jèsús ní cana ñaha-gǎ xii-güedé, te ní xáhaⁿ-gǎ:

—Chí dàñá ná quixi nahi landú ìhli-áⁿ núú-í-a, te vá càdí-ndó ìchi-güexi, chí dàtná cúú váha iní cue landú ìhli-áⁿ ducaⁿ cùu váha iní cue ñáiyu yindaha ñaha Yá Ndióxi. 17 Te na càchí tnúhu ndáá-í xii-ndo sá núu vá quindáá iní ñáhá-ndó dàtná quidé dàva landú ìhli sàndáá iní ñáhá xii-í, te vá ndíhu ndaha ñaha Yá Ndióxi xii-ndo, te vá ndúú tǎhǔ-ndó cùndecu-ndo ndihí-gá ni caa ni quíhíⁿ —càchí-gá xáhaⁿ-gǎ xii-güedé.

Ìⁿ tée cuica cáháⁿ ndihí-dé Jèsús

(Mt. 19:16-30; Mr. 10:17-31)

18 Te ìⁿ tée cùnno ní xicáⁿ tnúhú-dé núú Jèsús, te xáhaⁿ-dè xii-gá:

—Yòhó Mèstrú, cùu-n tée ío váha iní-xi, te cuìní-í núu vá cùndèe iní-n càchí tnúhu-n ná cúú sá váha càdá-í cuèndá nduu tǎhǔ-í cundecu-í ndihí Yá Ndióxi ni caa ni quíhíⁿ —càchí-dé xáhaⁿ-dè xii-gá.

19 Te Jèsús ní xáhaⁿ-gǎ xii-dé:

—¿Te cùtnuní iní-n nàcuáa nduu tnúhu cáháⁿ-n sá yǔhú váha iní-áⁿ? Chí ìⁿ díú-ni Yá Ndióxi váha iní-gá. 20 Te yòhó xini-n nàcuáa ní cachí Yá Ndióxi càda ñáiyu, te duha ní cachí-gá: “Nchòhó cue tée vá cáháⁿ ndihí-ndo ñadihí te núu ñá díú ñadihí-ndó cùú-yu, te ducaⁿ-ni nchòhó cue ñáiyu ñihí tucu vá cáháⁿ ndihí-ndo tée te núu ñá díú yí-ndo cuu-güedé, te vá cáhni-ndó tnàha ñáiyu-ndo, te ni vá dúhú-ndó sá ndécú ndihí-yu, te ni vá dácàcu-ndo

cuéchi neñúu sá cúu-xí tnàha ñáiyu-ndo, te canehe-ndo sá yíñùhu núu tátá-ndó ndìhi núu náná-ndó”, duha ní cachí Yá Ndiòxí cada ñáiyu —càchí Jèsús xáhaⁿ-gã xii-dé.

²¹ Te té-e-áⁿ ñí xáhaⁿ-dë xii-gá:

—Nchaa xíãⁿ ní ngüíta-í quidè-í ndéé cútñahá cúu làndú-í —càchí-dé xáhaⁿ-dë xii-gá.

²² Te Jèsús ní xáhaⁿ-gã xii-dé:

—Dico cùmání ìngá núu sá cadá-n, vitna te quíhíⁿ-n te dico-n nchàa sá ndécú ndìhi-n, te díhúⁿ-n cuáha táhú-n cuè ñáiyu ndàhú, te ducaⁿ te nduu táhú-n cundecu váha-n núu ndécú Yá Ndiòxí táxi tnùnì-gá, te na yáha ducaⁿ cada-n te quixi-n chitnahá ñáhá-n xii-í —càchí-gá xáhaⁿ-gã xii-dé.

²³ Te sá dúcáⁿ ñí xáhaⁿ Jèsús xii-dé, te ío ní cundiyí-dé, chi ío cuica-dë. ²⁴ Te sá ñí xiní ñáhá Jèsús xii-dé cundiyí-dé, núu ní cachí-gá:

—Ío úhú quíndáá iní ñáiyu cuica Yá Ndiòxí cuèndá ndíhu ndaha ñàha-gá xii-yu! ²⁵ Te yáchì-gá yáha ìⁿ càméyu yaú ìⁿ yiqui ticú dàcúuxí sá quíndáá iní ìⁿ ñáiyu cuica Yá Ndiòxí cuèndá ndíhu ndaha ñàha-gá xii-yu —duha ní cachí-gá.

²⁶ Te nchaa ñáiyu ní tecú dóho-xi tnúhu ní cáháⁿ-gá ní xáhãⁿ-yu xii-gá:

—¿Te yoo naníhí tàhú te núu ducaⁿ vaiⁿ? —càchí-yu xáhãⁿ-yu xii-gá.

²⁷ Te Jèsús ní xáhaⁿ-gã xii-yu:

—Cue ñáiyu ñuyíú-a chi vá ndácü-yu ná cadá-yu nàcuáa ndíhu ndaha ñàha Yá Ndiòxí xii-yu, dico mee-gã chi ndacu-gá ndíhu ndaha ñàha-gá xii-yu chi nchaa sá vâha ndacu-gá quidé-gã —càchí-gá xáhaⁿ-gã xii-yu.

²⁸ Te té Pèlú ní xáhaⁿ-dë xii-gá:

—Nchúhú ní dándöo-ndí nchaa sá ndécú ndìhi-ndí, te ní tuha ñàha-ndí xii-n —càchí-dé xáhaⁿ-dë xii-gá.

²⁹ Te ní xáhaⁿ-gã xii ñáiyu:

—Na càchí tnúhu ndáá-í xii-ndo sá ncháá ñáiyu na dándöo vehe-xi, àdi tátá-xi, náná-xi, ñaní-xi, cúha-xi, ñadihí-xi, déhe-xi cuèndá sá cuínì-yu ndíhu ndaha ñàha Yá Ndiòxí xii-yu, ³⁰ te ío-gá cuéhé sá cuáñaha-gã xii-yu cundecu ndìhí-yu, te ñá díú-ní xíãⁿ, chi tnàhá nduu táhú-yu cundecu ndìhi ñàhá-yu xii-í ni caa ni quíhíⁿ ná sàa nduu —càchí-gá xáhaⁿ-gã xii-yu.

Jèsús càháⁿ tucu-gá sá cáhni ñàha-güedé xii-gá

(Mt. 20:17-19; Mr. 10:32-34)

³¹ Te Jèsús ní taudìⁿ-gá ndi ùxúú cue tée xica cuu ndìhi-gá tnuú ñáiyu, te ní xáhaⁿ-gã xii-güedé:

—Vitna te quíhíⁿ-ó ñúú Jerusàlén, chi yàcáⁿ cada-xi nchaa nàcuáa sa ní chidó tnùnì cue tée ní xóo cáháⁿ tnúhu Yá Ndiòxí ndéé sanaha nàcuáa yáha yúhú Téé cùu ñaní tnáhá-ndó nchàa-ndo. ³² Chi cuáha cuèndá ñàha-güedé xii-í núu cuè téé ñá túú cùu cue téé isràél, te cudíquí ndeé ñàhá-güedé xii-í, te cúcuèhé ñàhá-güedé, te tiú díí ñàhá-güedé xii-í. ³³ Te caniha-güedé ndìhi ñíi, te dàtnùnì cahni ñàha-güedé xii-í, dico nduu únì sá cùú-í te ndoto-í —càchí-gá xáhaⁿ-gã xii-güedé.

³⁴ Dico ní ìⁿ tnúhu ní cáháⁿ-gá ñá túú ní tècú tnùnì-güedé, chi ío yidáhu tnúhu ní cáháⁿ-gá núu xíãⁿ ni ìⁿ ñá túú ní tècú tnùnì-güedé.

Jèsús quidé tãtna-gá núu ìⁿ téé cuàá ñúú Jericó

(Mt. 20:29-34; Mr. 10:46-52)

³⁵ Te òré tá cùyatni Jesús ñúú Jericó cuáháⁿ, te yuhu ìchi cuáháⁿ-gá-áⁿ núcöo ìⁿ téé cuàá xicáⁿ ndàhú-dé. ³⁶ Te òré ní tecú dóho-dé xicáháⁿ vai ñáiyu xiyáha-yu, te ní xicáⁿ tnúhú-dé núu ñáiyu ndècu ndìhi-dé ná cuèndá ducaⁿ vai-yu yáha. ³⁷ Te ní xáhãⁿ-yu sá Jèsús téé ñúú Nazàrét ñúhú-dé ìchi. ³⁸ Te níhi ní cáháⁿ-dë, te xáhaⁿ-dë xii-gá:

—Jèsús ñani tnáhá ndíi Dàvíi, cundàhú iní ñáhá xii-í! —càchí-dé xáhaⁿ-dē xii-gá.

³⁹ Te ñáyiú xixódó núú núú Jèsús ní tenáá ñáhá-yu xii-dé, te xáháⁿ-yu sá ná càdí-dé yuhu-dé dico uuⁿ-gá níhi ní cáháⁿ-dé xáhaⁿ-dē xii-gá:

—jYòhó téé cùu ñani tnáhá ndíi Dàvíi, cundàhú iní ñáhá xii-í! —càchí-dé xáhaⁿ-dē xii-gá.

⁴⁰ Te Jèsús ní ngüñí-gá, te ní táuchíuⁿ-gá ní sángueheⁿ ñaha cué téé ndíhi-gá. Te òré ní quexìo-dé núú-gá, te ní xicáⁿ tnúhú-gá núú-dé, te xáhaⁿ-gá:

⁴¹ —¿Ná cuñí-n càda ñaha-í xii-n-í? —càchí-gá xáhaⁿ-gá xii-dé.

Te téé cuáá-áⁿ ní xáhaⁿ-dē:
—Mèstrú, cuñí-í cada tátna-n núú-í cuendá cundehe-í —càchí-dé xáhaⁿ-dē xii-gá.

⁴² Te Jèsús ní xáhaⁿ-gá:
—Sa ní ndúha núú-n chi ní sándáá iní-n Yá Ndiòxí —càchí-gá xáhaⁿ-gá xii-dé.

⁴³ Te òré-ni-áⁿ ní ndúha núú-dé, te ní chinchicúⁿ-dé Jèsús, te ní cachí-dé sá ïo càhnu cuu Yá Ndiòxí, Te nchaa ñáyiú ní xiní nàcuáa ní cuu ní ndúha núú-dé tnàhá-yu ní cachí-yu sá ïo càhnu cuu Yá Ndiòxí.

19

Jèsús ndíhi ñⁿ téé nàni Zaqueú

¹ Te Jèsús ní sáá-gá ñuú Jericó, te ta yáha-gá xití ñuú-áⁿ cuáháⁿ.

² Te ñuú-áⁿ ndécú ñⁿ téé cuica nàni-dé Zaqueú, te cùnnu-dé táxi tnúni-dé cue téé cündíhi-dé, cue téé cuihna iní-xi quide cobrá ñáhá xii ñáyiú cuendá impuèstú. ³ Te téé-áⁿ cuñí-dé quini-dé Jèsús òré-áⁿ ní cùu te ñá ní ndàcu-dé, chi ïo cuéhé ñáyiú, te ñá túú dùcúⁿ-dé. ⁴ Te xinu-dé ní ngódó núú-dé te ní sáá-dé díquí ñⁿ yutnu sicómorú nùtní yatni yuhu ichi núú yáha Jèsús cuendá cuñí-dé quini ñáhá-dé xii-gá.

⁵ Te òré tá yáha Jèsús xiáⁿ, te ní ndonehe núú-gá díquí yutnu núú cándodo-dé-áⁿ, te ní xáhaⁿ-gá xii-dé:

—Zaqueú, tanùu ndíhi díquí yutnu-áⁿ, chi tnavíi quexìo-í vehe-n ndètatú-í —càchí-gá xáhaⁿ-gá xii-dé.

⁶ Te té Zaqueú-áⁿ ní nuu ndíhi-dé díquí yutnu-áⁿ, te ïo ní cudíi iní-dé ní queheⁿ cuendá-dé Jèsús vehe-dé.

⁷ Te sá ní xiní ñáyiú ní quexìo Jèsús vehe-dé, te nchaa-yu ní ngüita-yu cáháⁿ cuéhé-yu cuendá-gá, te xitnàhá-yu:

—Téé-a cuánguihu-dé vehe ñⁿ téé ndècu ichi cuehé ichi duha —càchí-yu xitnàhá-yu.

⁸ Te té Zaqueú-áⁿ ní ndacuñí-dé tnuú-yu, te xáhaⁿ-dē xii Jèsús:

—Yòhó Mèstrú, na cuáha-í ñáyiú ndàhú cuádava nchaa sá ndécú ndíhi-í. Te núu yoo ní dándàhú-í ní dúhù-í, te codo ùni-gá tnàhá sá ní dúhù-í-yu nacuañaha-í xii-yu —càchí-dé xáhaⁿ-dē xii-gá.

⁹ Te Jèsús ní xáhaⁿ-gá xii té Zaqueú:

—Vitna ní naníhí tàhú-n ndíhi nchaa ñáyiú xindecu vehe-n, chi tnàhá-n cùu-n ñani tnáhá ndíi Abrahám. ¹⁰ Te yúhú Téé cùu ñani tnàhá-ndo nchàa-ndo véxi-í nándücu-í ñáyiú ní xita nihnu cuendá dácacu nihnu-í-yu núú ùhú núú ndàhú —càchí-gá xáhaⁿ-gá xii-dé.

Nàcuáa ní quide-güedé ndíhi díhúⁿ cuááⁿ

(Mt. 25:14-30)

¹¹ Te nchaa ñáyiú-áⁿ ní sani iní-yu sá ndíhi-ni ndíhu ndaha ñaha Yá Ndiòxí xii-yu cuendá sá ní cuyatni Jèsús ñuú Jerusálén, te xiáⁿ núu ní ngüita Jèsús ní cani-gá ñⁿ cuendú núú-yu cuendá tecú tnúni váha-yu tnúhu-gá. ¹² Te xáhaⁿ-gá xií-yu:

—Ní xindecu ñⁿ téé cùu ñani tnàhá ñáyiú cùnnu, te cuáháⁿ-dé ingá ñuú xicá cuendá yacáⁿ cuáha ñaha-güedé chiúⁿ coo-dé, te dátñúni ndixi-dé quindaha-dé titní ñuú.

¹³ Te cùmání-gá quee-dé quíhíⁿ-dē, te ní cana-dé úxí cue téé xinu cuechi núú-dē, te ní sáñaha-dē

ndí díhⁿ núú-güedé ìⁿ caa ìⁿ caa díhúⁿ cuàáⁿ, te ní xáhaⁿ-dè: “Chí cádá ndáhú ndìhì díhúⁿ-áⁿ ndèé ná sàá nduu nàsáá-í”, càchí-dé xáhaⁿ-dè xii-güedé. ¹⁴ Dico nchaa ñáyiú ñuú quindaha-dè-áⁿ ñà túú tnàhá iní-yu sá quindaha ñaha-dé, núú ní tendàhá-yu cue tée nèhe tnúhu cuáháⁿ núú cuè tée cuáñaah chiuⁿ coo-dé-áⁿ, te ní xáháⁿ-yu sá cūñaha-güedé sá ñà túú tnàhá iní-yu sá tēe-áⁿ quindaha ñaha-dé xií-yu. ¹⁵ Dico dacuítí sá ñí sáha-güedé tēe-áⁿ chiuⁿ coo-dé sá díú-dé quindaha-dé ñáyiú nchaa ñuú-áⁿ, te ní nacuico-dé cuánuhú-dé ñuú-dé. Te òré ní nasáá-dé vehe-dé, te ní tendaha-dé ìⁿ tēe ní sánúcana ñaha xii cue tēe xinu cuechi núú-dé, cue tēe ní dándó ndaha-dé díhúⁿ cuendá cácaⁿ tnúhú-dé núú-güedé ìⁿ ìⁿ-güedé núu ndèé dau ní chídó-xí díquí díhúⁿ sá ñí dándó ndaha ñaha-dé-áⁿ. ¹⁶ Te tēe ní ndèxio díhna xáhaⁿ-dè: “Pàtróóⁿ, ní quide-í ndáhú ndìhì díhúⁿ-n sá ñí dándó ndaha ñaha-n xii-í, te sá ìⁿ ní taxi-n te ní chídó-xí úxi-gá tnàhá te ná-a naqueheⁿ cuendá-n”, càchí-dé xáhaⁿ-dè. ¹⁷ Te tēe cùu patróóⁿ-dè-áⁿ ñí xáhaⁿ-dè: “Ío váha tēe xinu cuechi cuu-n chí ío váha ní quide-n, te sá ñí quide váha-n ndìhì sacú díhúⁿ sá ñí dándó ndaha ñaha-í xii-n, te xiáⁿ núu yúhú càchí-í sá táxi tnùnì-n úxi ñuú vitna”, càchí-dé xáhaⁿ-dè. ¹⁸ Te ní ndexìo ingá-dé, te ní xáhaⁿ-dè: “Pàtróóⁿ, ní quide-í ndáhú ndìhì díhúⁿ-n sá ñí dándó ndaha ñaha-n xii-í, te sá ìⁿ ní taxi-n te ní chídó-xí úhúⁿ-gá tnàhá te ná-a naqueheⁿ cuendá-n”, càchí-dé xáhaⁿ-dè. ¹⁹ Te ní xáhaⁿ tēe cùu patróóⁿ-dè-áⁿ xii-dé: “Te yòhó taxi tnùnì-n úhúⁿ ñuú”, càchí-dé xáhaⁿ-dè xii tēe xinu cuechi-áⁿ. ²⁰ Te dātñunì ní ndexìo tucu ingá-dé, te xáhaⁿ-dè: “Pàtróóⁿ, náu díhúⁿ-n-á, te naqueheⁿ cuendá-n chí ní taxúha-í ní chidúⁿ nuu-í ìⁿ pāñú te ñà túú ní quide-í

ndáhú ndìhì díhúⁿ-n, ²¹ chí ní yùhú ñàhà-í xii-n, chí cùu-n ìⁿ tēe dí, te nàqueheⁿ-n ìⁿ sá ñà túú ní tàxi ndecu-n, te nàtahu-n ìⁿ xichi núú ñà túú ní chíhi-n tatá”, càchí-dé xáhaⁿ-dè xii patróóⁿ-dè. ²² Te ní xáhaⁿ patróóⁿ-dè xii-dé: “Yòhó cùu-n ìⁿ tēe cuihna iní-xi xinu cuechi núú-í, te díu-ní nchaa tnúhu càháⁿ-n-áⁿ càchí tnùnì-xi nàcuáa cuu ndáá cuéchi-n. Te núu sàni iní-n sá cùu-í ìⁿ tēe dí, te nàqueheⁿ-í ìⁿ sá ñà túú ní tàxi ndecu-í, te nàtahu-í ìⁿ xichi núú ñà túú ñí chíhi-í tatá, ²³ te núu ducaⁿ ña, ¿te ná cuendá ñà túú ní càhu iní-n dàsaⁿ nuu-n díhúⁿ ñí taxi-í, te cūñaha-n chāhu-yu díquí-xi, te òré ná nàsáá-í vehe-í, te sa ngódó lùha-gá díquí-xi naqueheⁿ cuendá-í ní cùu-í?”, càchí-dé xáhaⁿ-dè xii tēe xinu cuechi-áⁿ. ²⁴ Te ní xáhaⁿ tēe cùu patróóⁿ-áⁿ xii cue tēe xīndecu xiáⁿ: “Chí quendéé díhúⁿ cuàáⁿ néhé tēe-a, te cuáha-ndo tēe nèhe úxi tucu díhúⁿ cuàáⁿ-áⁿ”, càchí-dé xáhaⁿ-dè xii-güedé. ²⁵ Te ní xáhaⁿ-güedé: “Pàtróóⁿ, dico sa nèhe-dé úxi díhúⁿ cuàáⁿ”, càchí-güedé xáhaⁿ-güedé. ²⁶ Te ní xáhaⁿ tēe cùu patróóⁿ-áⁿ: “Na càchí tnúhu-í xii-ndo sá cuè ñáyiú ío xii-xi te níhí-gá-yu cundecu ndìhì-yu, te cue ñáyiú sacú ndécú ndìhì cuita ndìhì nihnu nchaa sá ndécú ndìhì-yu”, càchí tēe cùu patróóⁿ-áⁿ xáhaⁿ-dè xii-güedé. ²⁷ Te xáhaⁿ tucu-dé xii-güedé: “Nchaa ñáyiú cùu úhú iní ñàhá xii-í ñà tnàhá iní-yu quindaha-í-yu, te chí cándécá-yu taquixi iha, te cahni-ndó-yu núu-í-a”, càchí tēe cùu patróóⁿ-áⁿ xáhaⁿ-dè xii-güedé —duha cuáháⁿ cuendú ní cani Jèsús núú ñáyiú.

Jèsús cuánguihu-gá ñuú Jerusalén (Mt. 21:1-11; Mr. 11:1-11; Jn. 12:12-19)

²⁸ Te sáta dúcáⁿ ñí cáháⁿ-gá, te ní nucúhuⁿ ichi-gá cuáháⁿ-gá ñuú Jerusalén. ²⁹ Te òré sa ní cuyatni-gá ñuú Bètfaqé, ndìhì ñuú Bètaniá te

xíáⁿ cáá yùcu nani Olívú, te ní xáhaⁿ-gã xii úú cue téé xìca cuu ndihi-gá:

30 —Chí cuáháⁿ ñuú cáá yàtni yacáⁿ, te òré quexio-ndo yacáⁿ, te naníhí-ndó ñⁿ búrru ndètñí-di, te vátá yõ ñⁿ-gá codo ñàha xii-di, te nandaxi-ndo-di te candeca-ndo-di quìxi. 31 Te núu yoo na càcáⁿ tnúhu núú-ndó nã cuèndá nándàxi-ndo-di, te cùñaha-ndo xii-yu sá yùhú Yaa xícá cùu ndihi-ndo xini ñuhu-í-di —càchí-gá xáhaⁿ-gã xii-güedé.

32 Te cue téé-áⁿ ñí xica-güedé cuáháⁿ-güedé, te nchaa-ni nàcuáa ní xáhaⁿ Jèsús ducaⁿ ní cuu, 33 chí meí òré nándàxi-güedé búrru-áⁿ ñí quexio cue ñáyiú cùu xítóhó-di xicáⁿ tnúhu-yu núú-güedé, te xähãⁿ-yu:

—¿Ná cuèndá nándàxi-ndo búrru-ndí-i? —càchí-yu xähãⁿ-yu.

34 Te ní xáhaⁿ-güedé xii-yu:

—Nà ndaxi-ndí-di chí Yaa xícá cùu ndihi-ndí xíní ñùhu ñaha-gá xii-di —càchí-güedé xáhaⁿ-güedé xii-yu.

35 Te ndèca-güedé-di cuáháⁿ núú ndécú Jèsús, te òré ní quexio-güedé ndihi-di núú ndécú-gã te ní sacáⁿ ndodo-güedé dóo-güedé sátá-di, te ní ngódó ñáhá-gã xii-di. 36 Te ío cuéhé ñáyiú ta sàcáⁿ-yu dóo-yu ichi cuáháⁿ-gã cuèndá núú dóo-yu-áⁿ yàha-gá ndihi quiti yòdo-gá. 37 Te ní nucuíta nuu-gá ichi tìndúú yucu Òlívú tá cùyatni-gá ñuú Jerusalén cuáháⁿ, te nchaa ñáyiú sàndáá iní ñáhá xii-gá nchìcúⁿ ñähãⁿ-yu te ní ngúita-yu níhi càháⁿ-yu sá cúdñí ñí-yu, te càchí-yu sá ío càhnu cuu Yá Ndiõxí cuèndá sá ñí xíní-yu nchaa sá vã yõ tnàhí ndàcu cada ní quide-gá. 38 Te càchí-yu:

—Ío càhnu cuu Yaa véxi quindaha ñàha xii-o, te ñu-gá cúú-gã Yaa ní tendaha Yá Ndiõxí véxi quide núú-gã! ¡Te ío càhnu cuu mee-gá! ¡Te andiu ñà túú tnàhí ná cúú! —duha càchí-yu.

39 Te ñⁿ úú cue téé cùu fariséú ñùhú tnàhá tnuú ñáyiú-áⁿ ñí xáhaⁿ-güedé xii Jèsús:

—Mèstrú, cùñaha nchaa ñáyiú ndihi-n na càdí-yu yuhú-yu —càchí-güedé xáhaⁿ-güedé xii-gá.

40 Dico Jèsús ní xáhaⁿ-gã xii-güedé:

—Te na càchí tnúhu-í xii-ndo sã nùu ñáyiú-a na càdí-yu yuhú-yu ña, te nchaa yúú càháⁿ níhi-xi dàtná ñⁿ ñáyiú —càchí-gá xáhaⁿ-gã xii-güedé.

41 Te òré ní cuyatni-gá ñuú Jerusalén te ní xíní-gá, te ní ndáhyú-gá cuèndá nchaa ñáyiú ñí ñúú-xi-áⁿ sã ndihú iní-gá. 42 Te ní xáhaⁿ-gã xii cue ñáyiú-áⁿ:

—Ío cuu váha iní-í te núu dicó nchóhó tecú tnùní-ndó vïtna ñⁿ tnúhu sá cadá vãha ñàha xii-ndo, chí ñá túú-gã ná cuu cundecu-ndo, te núu na tècú tnùní-ndó. Dico ñá tècú tnùní-ndó, chí ío yidáhu tnúhu-a.

43 Te sáá nduu tnùndóho tnúhu ndàhú sá cúú-xi-ndó, te nchaa cue téé dava-gá ñuú cúú ùhú iní tnàhá ndihi-ndo quixi-güedé chidoco ñàha-güedé xii-ndo, te ni càndéé núú ndécú-ndó-áⁿ dacàa-güedé ndóho cuèndá xíáⁿ quihí váha-güedé nàa ndihi ñàha-güedé xii-ndo, te vá dáñá-güedé cunu-ndo. 44 Te cahni ñàha-güedé xii-ndo, te ndihi nchaa vehe-ndo dàngoyo-güedé ndéé cimièntú-xi, chí ñá túú ní cùní-ndó nàcuáha-ndo cuèndá òré ní quixi coto ñàha Yá Ndiõxí xii-ndo —duha ní xáhaⁿ-gã xii ñáyiú ñuú-áⁿ.

Jèsús ñá túú tnàhá iní-gá nàcuáa quidé-yu veñúhu

(Mt. 21:12-17; Mr. 11:15-19; Jn. 2:13-22)

45 Te Jèsús cuànguihu-gá xití veñúhu càhnu sá ío cùnuu, te xití veñúhu-áⁿ xìndecu cue ñáyiú quide ndáhú ndihi cue ñáyiú xísaaⁿ. Te ní queñuhu ñàha Jèsús xii-yu quehé. 46 Te ní xáhaⁿ-gã xii-yu:

—Núú tütú Yá Ndiõxí càháⁿ-xi nàcuáa ní càháⁿ-gã, te duha ní

cachí-gá: “Vehe-í cúú-xí núú cãháⁿ ndihi ñaha ñáiyu xii-í”, duha ní cãháⁿ-gá cachí-xi núú tütú-gá. Dico nchòhó quidé-ndó vèhe-gá vehe ñadúhú —càchí-gá xáhaⁿ-gá xii-yu.

⁴⁷ Te Jèsús nchaa nduu dànehé-gá ñáiyu xití veñúhu, dico cue tée cùu dútú cùnùu, ndihi cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndihi cue tée cùnùu ñuú-áⁿ ndúcú-güedé nàcuáa cada-güedé cahni ñaha-güedé xii-gá. ⁴⁸ Dico ñá ñihí-güedé nàcuáa cada-güedé, chi cuendá nchaa ñáiyu ío cùdíí ñí-yu ndèdòho-yu nchaa tnúhu cãháⁿ-gá.

20

Jèsús ndécú ndihi-gá tnúhu ndee ñí

(Mt. 21:23-27; Mr. 11:27-33)

¹ Te ñⁿ nduu yíhi Jèsús xití veñúhu càhnu sá ío cùnùu danehé-gá ñáiyu tnúhu sá cãháⁿ nàcuáa naníhí tãhú-yu. Te ní quexìo cue tée cùu dútú cùnùu ndihi cue tée dàcuaha ñaha xii ñáiyu nchaa tnúhu ní chídó tnùní ndíi Moisés, ndihi cue tée cùu sacuéhé núú ñáiyu isráel, ² te ní xáhaⁿ-güedé xii-gá:

—Cuíní-ndí cachí tnúhu-ñ xii-ndí nása ndúu tnúhu ndee ñí ndécú ndihi-n núu quide-n nándí sá quidé-n. ¿Te yoo ducaⁿ ñí taxi tnúhu ndee ñí-áⁿ xii-n? —càchí-güedé xáhaⁿ-güedé xii-gá.

³ Te Jèsús ní xáhaⁿ-gá:

—Yúhú tnãhá-í cuíní-í cácaⁿ tnúhu-í ñⁿ sá cácaⁿ tnúhu-í núú-ndó, te cachí tnúhu-ndo. ⁴ Te chí cachí tnúhu xii-í yoo ní táuchíúⁿ ñí dácúandüte ndíi Juáá ñáiyu. ¿Yá Ndióxi áⁿ cuè tée ñuyú-a ní táuchíúⁿ dùcaⁿ ní quide ndíi? —càchí-gá xáhaⁿ-gá xii-güedé.

⁵ Te ní ngüíta-güedé xitnãha-güedé:

—¿Nása cúñaha-o? Chí núu nã cúñaha-o sã Yã Ndióxi ní táuchíúⁿ dùcaⁿ ní quide ndíi Juáá ñá, te quesaha-dé: “¿Ná cuendá ñá túú ní sãndáá ñí-ndó tnúhu ní cáháⁿ ndíi

vái?”; quesaha-dé. ⁶ Àdi te núu nã cúñaha-o sã cuè ñáiyu ñuyú-a ní táuchíúⁿ dùcaⁿ ní quide ndíi ñá, te nchaa ñáiyu cuáha ñãhá-yu yúu xii-o, te cahni ñãhá-yu, chí cachí-yu sá ndáá sá Yã Ndióxi ní táuchíúⁿ-gá ní cáháⁿ ndíi Juáá tnúhu-gá núú ñáiyu —càchí-güedé xitnãha-güedé.

⁷ Te ní xáhaⁿ-güedé xii-gá sá ñá túú xini-güedé yoo ní táuchíúⁿ dùcaⁿ ní dácúandüte ndíi Juáá ñáiyu. ⁸ Te ní xáhaⁿ Jèsús xii-güedé:

—Te núu ducaⁿ te ni yúhú vá cachí tnúhu-í xii-ndo yòo ní taxi tnúhu ndee ñí duha quide-í —càchí-gá xáhaⁿ-gá xii-güedé.

Cuendá cue tée cuihna ñí-xi
(Mt. 21:33-44; Mr. 12:1-11)

⁹ Te sátá dúcaⁿ te ní ngüíta Jèsús ní caní-gá ñⁿ cuendú núú ñáiyu nàcuáa tecú tnùní-yu tnúhu-gá, te xáhaⁿ-gá xii-yu:

—Ñⁿ tée ní xitu-dé mee-ni yòho yaha stilé núú ñúhú-dé. Te ní sáá ñⁿ nduu quingaca cuu xica-dé vãi nduu te ní dándõo ndaha-dé sá ñí xitu-dé-áⁿ xii ñⁿ úu cue tée cãháⁿ ndihi-dé cuendá cada chiúⁿ-güedé, te ní ndatnúhu-güedé sá òré ná cùu te cuu cuendá dava-güedé te ducaⁿ te ní quee-dé cuáhã-dé. ¹⁰ Te sátá ñí sáá nduu ñí cuu nchaa ndéhe yoho yaha stilé sá ñí xitu-dé-áⁿ, te ní xáhaⁿ-dè xii ñⁿ tée xinu cuechi núú-dé; “Cuáhãⁿ cácaⁿ-ñ sã cúú cuendá-í núú cuè tée ní dándõo ndãha-í nchaa yoho yaha stilé sá ñí xitu-í”, càchí-dé xáhaⁿ-dè. Te tée xinu cuechi-áⁿ ñí xica-dé cuáhã-dé, dico cue tée ndéé nchaa yoho yaha stilé-áⁿ ñí tñi-güedé tée xinu cuechi-áⁿ te ní caniha-güedé, te ní nacuícúⁿ ñãhá-güedé xii-dé, te ñá túú tnãhí ná ní sãñaha-güedé. ¹¹ Te dãtnúí tée cùu xitohó nchaa yoho yaha stilé-áⁿ ñí tendaha tucu-dé ingá tée xinu cuechi núú-dé cuáhã-dé, dico ñi-yu ducaⁿ ní quide ñaha-güedé xii-dé, chí ní xícüehé ñãhá-güedé, te ní caniha-güedé te ñí nacuícúⁿ

ñáhá-güedě, te ñá túú tñahí ná ní sãñaha-güedě. ¹² Te tée cùu xítóhó nchaa yoho yàha stilé-án ní tendaha tùcu-dé ingá-dé cuáhán-dé, te ñiu-ni ducaⁿ ní quide ñaha tùcu-güedé, chi ní dánicüehè ñáhá-güedě, te ní nacuícúⁿ ñáhá-güedě.

¹³ Te tée cùu xítóhó nchaa yoho yàha stilé-án ní sani iní-dé: “¿Nása cada-í vitna? Váha-gá tendaha-í déhe-í tée ío cùu iní-a núhú-dé, chi cudana te òré quini ñáhá-güedé xii-dé, te canehe-güedé sá yíñùhu núú-dě”, duha ní sani iní-dé. ¹⁴ Dico òré ní xiní cue tée quide chiuⁿ-án dèhe xítóhó nchaa yoho yàha stilé-án, te ní xítñaha-güedé: “Tée-án tée véxi nduu tãhú ñuhu-a ndihí nchaa sá cáá núú-xi, dico cahni-o-dé te mee-o ndùu tãhú-ó sá ndúú tãhú-dě”, cächí-güedé xítñaha-güedé. ¹⁵ Te ní queñuhu ñaha-güedé ñⁿ xio yuhu ñuhu-án, te ní sañhi ñaha-güedé xii-dé —duha cuáhán cuendú ní cani Jèsús núú-yu.

Te dàtnüni ní xáhaⁿ tùcu-gá xii-yu:

—¿Te nchòhó sa cùtnüni iní-ndó nàcuáa cada ñaha xítóhó ñuhu-án xii cue tée-án ñá? ¹⁶ Chi núhú-dé te cahni-dé cue tée-án, te dándóo ndaha-dé ñuhu-dé xii cue tée cùtnüni iní-dé cada ndáá —cächí-gá xáhaⁿ-gá xii-yu.

Te sá dúcáⁿ ní cáháⁿ-gá, núu ní cachí-yu:

—¡Sá vã cächí Ndiõxí sá dúcáⁿ yàha-o! —cächí-yu.

¹⁷ Te Jèsús ní ndacoto-gá núú-yu, te ní xáhaⁿ-gá:

—Chí cächí tñuhu nása quèe-xi nacuáa cáháⁿ-xi núú tütú Yã Ndiõxí, núú cächí-xi:

Yúú sã ní dáquée tñhú cue tée dàcaa vehe ní saa-xi cùu-xi yúú cùnùu vitna.

Duha cächí-xi núú tütú-gá. ¹⁸ Te nchaa ñáyiú ñá túú cuñí tñi tñuhu-í, te ndohó-yu dàtná ñⁿ ñáyiú tñahnú duuⁿ òré ndúá-yu núú yúú, àdi núu na tàú ñáhá-xí te dàcachi

duuⁿ ñaha-xi —cachí-gá xáhaⁿ-gá xii-yu.

Cuendá impuèstú

(Mt. 21:45-46; 22:15-22; Mr. 12:12-17)

¹⁹ Te cue tée cùu dútú cùnùu, ndihí cue tée dàcuaha ñaha xii ñáyiú nchaa tñuhu ní chídó tñüni ndí Moisés ní cuini-güedé tñi-güedé Jèsús òré-ni-á ní cùu, chi ní cutnüni iní-güedé sá cuendá-güedé ní cáháⁿ-gá, dico ní yùhú-güedé cuendá sá ío vãi ñáyiú. ²⁰ Te ní ndúcú-güedé nàcuáa cada-güedé tñi ñaha-güedé xii-gá, te ní tendaha-güedé cue tée cuáhán ngoto dayuhu ñaha xii-gá, te cuáhán-güedé dàtná cue tée váha iní-xi, te ndücu-güedé nàcuáa cada-güedé núu cáháⁿ-gá ñⁿ tñuhu sá ñà túú tàú-gá cáháⁿ-gá cuendá ducaⁿ te candeca ñaha-güedé xii-gá quíhíⁿ cuáha cuendá ñáhá-güedé núú tée cùnùu. ²¹ Te ní xáhaⁿ-güedé xii Jèsús:

—Mèstrú, nihí-ndí tñuhu sá dánèhé-n ñáyiú mee-ni tñuhu váha, te cuéi ndédani cáa ñáyiú ñⁿ-ni cáháⁿ-n ndihí-yu, te cáháⁿ ndáá-n nàcuáa cáháⁿ Yã Ndiõxí cundecu-o ñüyú-a. ²² Te cachí tñuhu xii-ndí núu váha-ni cháhu-ndí té Cèsár tée ío cùnùu cuendá impuèstú ñⁿ ñáhá —cächí-güedé xáhaⁿ-güedé xii-gá.

²³ Dico Jèsús ní cutnüni iní-gá sá xító ndèe ñáhá-güedé xii-gá, núu ní xáhaⁿ-gá xii-güedé:

²⁴—Chí dánèhé ñáhá xii-í ñⁿ díhúⁿ cuixíⁿ te cachí tñuhu-ndo núu yoo núú-xi ndèe, ndihí yoo ñiú-xi ndèe —cächí-gá xáhaⁿ-gá xii-güedé.

Te ní xáhaⁿ-güedé xii-gá:

—Núú tẽ Cèsár ndèe ndihí ñiú-dé —cächí-güedé xáhaⁿ-güedé xii-gá.

²⁵ Te ní xáhaⁿ tùcu-gá xii-güedé:

—Te núu ducaⁿ te chí nacuáha té Cèsár sá cúu cuendá-dé, te sá cúu cuendá méé Yã Ndiõxí, te xáⁿ nacuáha-ndo-gá —cächí-gá xáhaⁿ-gá xii-güedé.

26 Te ñá ní ndàcu tnahí-güedé daticánuu ñaha-güedé xii-gá núú tñuhu càháⁿ-gá, chi òré ní càháⁿ-gá, te da ní cuñuhu-güedé nchaa tñuhu ní càháⁿ-gá, te váha-gá ní sadí-güedé yuhu-güedé.

Cuèndá nchaa ñáyiú ndoto
(Mt. 22:23-33; Mr. 12:18-27)

27 Te sátá dúcáⁿ te ní sáá ìⁿ ùú cue téé cùu saducéú núú ndécú Jèsús. Te cue téé-áⁿ ñá túú sàndáá ìni-güedé sá ndótó cuè ñáyiú ní xihí, te ní xáhaⁿ-güedé xii-gá:

28—Mèstrú, ndíi Moisés càchí ndíi núú tütú ndècu vitna sá núú ìⁿ téé na cùú, te quendóo ñadìhí-dé te ñá túú dèhe-dé ní xõ ndìhi-aⁿ, te téé cùu ñaní-dé naqueheⁿ-dé ñaha ní quendóo quèé-áⁿ cuèndá coo dèhe-dé ndìhi-aⁿ cuèndá ñaní-dé téé ní xihí-áⁿ. 29 Te ní xindecu ùsá tñàhá cue téé mee-ni ndí ñaní-güedé. Te téé dìhna ní níhí ñadìhí-dé, dico ñá túú ní cùdii-dé cundecu-dé chi ní xihí-dé, te ni ìⁿ dèhe-dé ñá túú ní xõ ndìhi ñadìhí-dé-áⁿ. 30 Te téé cùu uú ní naqueheⁿ-dé ñaha ní quendóo quèé-áⁿ dico ní xihí tucu-dé, te ni ìⁿ tucu dèhe-dé ñá túú ní xõ ndìhi ñaha-áⁿ. 31 Te téé cùu uní ní naqueheⁿ tucu-dé ñaha ní quendóo quèé-áⁿ, te diu-ni ducaⁿ ní xihí-dé, te ní xínu ndí ùsá-güedé ní cándeca ñaha-güedé xii ñaha-áⁿ, dico ni ìⁿ-güedé ñá túú ní xõ dèhe-güedé ndìhi-aⁿ, te ní ndìhi-güedé ní xihí. 32 Te ndéé núú ní ndìhi-ná ní xihí tñàhá ñadìhí-áⁿ. 33 Te na sáá nduu ndòto-güedé ndìhi ñaha-áⁿ ¿Te ndèdacàa-güedé ñadìhí-güedé cuu-aⁿ-i? Chi ndí ùsá-güedé ní cándeca ñaha-güedé xii-aⁿ —càchí-güedé xáhaⁿ-güedé xii-gá.

34 Te Jèsús ní xáhaⁿ-gá xii-güedé:

—Nchaa ñáyiú ñuyíú-a tñandahá-yu. 35 Dico nchaa ñáyiú ní nduu táhú ndoto dìhna nuu ñáyiú-áⁿ cundecú-yu ndìhi Yá Ndióxi ní caa ní quíhíⁿ, te yàcáⁿ ñá túú-gá sá

cándeca tnahá-yu. 36 Te ni ñà túú-gá tñuhu xihí, chi cuu-ná-yu dàtná cue espíritu xínu cuèchi núú Yá Ndióxi cuèndá sá ní ndotó-yu, chi cùu-yu dèhe-gá. 37 Te ndéé ndíi Moisés ní chídó tñùnì ndíi núú tütú ndíi sá ncháá ñáyiú ní xihí ndotó-yu, te diu-ni xíaⁿ càháⁿ-xi cuèndá tnutàú nchicúⁿ ñuhú, te diu-ni xíaⁿ càchí tucu-xi sá Yá Ndióxi cùú-gá Ndióxi ndíi Ábrahám, ndíi Isàác, ndìhi ndíi Jàcób. 38 Te cue téé-áⁿ chi cuèi ní xihí-güedé sá cùú-xí nchòhó, djo sá cùú-xí Yá Ndióxi chi ndècu vívú-ni-güedé. Chi cùtnunì ìni-ó sá Yá Ndióxi cùú-gá Ndióxi mee-ni cuè ñáyiú xindecu vívú, te ñá túú cùu-gá Ndióxi cue ñáyiú ñá túú ndècu vívú. Te sá cùú-xí mèe-gá chi nchaa ñáyiú ndècu ndìhi-gá ndécú vívú-yu cuèi sa ní xihí-yu núú ñuyíú-a —càchí-gá xáhaⁿ-gá xii-güedé.

39 Te ìⁿ téé dàcuaha ñaha xii ñáyiú nchaa tñuhu ní chídó tñùnì ndíi Moisés ní xáhaⁿ-dè xii Jèsús:

—Mèstrú, váha-ni càháⁿ-n —càchí-dé xáhaⁿ-dè xii-gá. 40 Te ñá túú-gá ní cùyii-güedé cacaⁿ tñuhú-güedé ni ìⁿ tñuhu núú-gá.

Yoo dèhe-xi cùu Cristú
(Mt. 22:41-46; Mr. 12:35-37)

41 Te Jèsús ní xáhaⁿ-gá xii-güedé:

—¿Te nása càchí-tu-yu sá Cristú Yaá tendaha Yá Ndióxi quixi ñuyíú-a cùu-gá dèhe ndíi Dàví? 42 Te mee ndíi Dàví-áⁿ ní cachí ndíi núú librú Sàlmú:

Dútú Ndióxi ní xáhaⁿ-gá xii Yaá cùú Xìtohó-í:

“Ngóo xio cùha-í,

43 te yúhú cada-í te nchaa sá cùú ùhú ìni ñàhá xii-n canehe-xi sá yíñuhu núú-n.”

Duha ní xáhaⁿ Dútú Ndióxi xii Yaá cùú Xìtohó-í càchí ndíi núú librú Sàlmú. 44 ¿Te nása cùu Cristú dèhe ndíi Dàví, te mee ndíi ní cachí ndíi sá cùú-gá Xìtohó ndíi-i? —càchí Jèsús xáhaⁿ-gá xii-güedé.

Jèsús càháⁿ-gá cuendá cue té dâcuaha ñaha xii ñáyiú nchaa tnúhu ní chídó tnùní ndí Moisés

(Mt. 23:1-36; Mr. 12:38-40; Lc. 11:37-54)

⁴⁵ Te òré ndátnúhu Jèsús ndihi cue téé xica cuu ndihi-gá xîndedóho ñaha ñáyiú, te xáhaⁿ-gã xii-güedé:

⁴⁶ —Cada cuendá-ndó vã cádá-ndó nâcuáa quide cue téé dâcuaha ñaha xii ñáyiú nchaa tnúhu ní chídó tnùní ndí Moisés, chi tnàhá iní-güedé cuihnu-güedé dóó nání sã sâcuíhnu cue téé cûnuu. Te nchaa núú tàcá ñáyiú cuiní-güedé sã ndihi tnúhu yîñúhu cáháⁿ ndihi ñàhá-yu xii-güedé, te nâcáxi-güedé xilé sácõo nchihi cue téé cûnuu-gá xití veñúhu conchihi-güedé, te ducaⁿ-ni quide-güedé cuèi òré quíhu-güedé mèsá caxi-güedé òré ndécú-güedé ìⁿ vico, chi mee-ni núú sácõo cue téé cûnuu-gá cuiní-güedé coo-güedé. ⁴⁷ Te quèndeé-güedé vehe nchaa ñáyiú dihí ñáyiú quèé, te ío naha càháⁿ ndihi-güedé Yã Ndiõxí cuendá cuiní-güedé cáháⁿ váha-yu cuendá-güedé. Te sã dúcáⁿ quide-güedé te sáá nduu te ío-gá ndoho-güedé núú ùhú núú ndàhú dàcúúxí dàva-gá ñáyiú —câchí-gá xáhaⁿ-gã xii-güedé.

21

Díhúⁿ nduu táhú Yã Ndiõxí ní dáquèe ìⁿ ñaha ndàhú ñaha quèé

(Mr. 12:41-44)

¹ Te Jèsús ní xiní-gá xití veñúhu xidáquèe cue téé cuica díhúⁿ nduu táhú Yã Ndiõxí xití alcanciá. ² Te ní xiní-gá tnàhá ìⁿ ñaha ndàhú ñaha quèé ní dáquèe-aⁿ úú díhúⁿ còbrí, ³ te ní xáhaⁿ Jèsús xii cue ñáyiú xîndecu-áⁿ:

—Na câchí tnúhu ndáá-í xii-ndo sã ñaha ndahú ñaha quèe-a ío-gá nândíhi díhúⁿ ñí dáquèe-aⁿ xití alcanciá nduu táhú Yã Ndiõxí dàcúúxí díhúⁿ ñí dáquèe dàva-gá-yu. ⁴ Chi nchaa ñáyiú-áⁿ ñí dáquèe-yu mee-nã sã ñí ndóo-ná,

dico ñaha quèe-a cuèi ndàhú-aⁿ dico ní dáquèe-aⁿ ñihí díhúⁿ sã cuááⁿ-áⁿ sã cãxí-áⁿ ní cûu —cachí-gá xáhaⁿ-gã xii-yu.

Jèsús câchí-gá sã ngóyó veñúhu

(Mt. 24:1-2; Mr. 13:1-2)

⁵ Te ìⁿ úú ñáyiú xicáháⁿ-yu cuendá veñúhu càhnu sã ío cûnuu sã ío vii càa nchaa yúú yíhí, ndihi cuendá nchaa sã ñí sãñaha táhú ñáyiú yíhí xití-xi. Te Jèsús ní xáhaⁿ-gã xii-yu:

⁶ —Sáá nduu te nchaa sã cúñúhu-ndo-a vã cûndúu-gá-xi dàtná cáá-xí vitna, chi ñí ìⁿ-gá yúú vã códó nchihi tnaha-gá-xi chi ndihi ngoyo —câchí-gá xáhaⁿ-gã xii-yu.

Nâcuáa cada-xi nduu ta cûyatni naa ñuyúú

(Mt. 24:3-28; Mr. 13:3-23)

⁷ Te cue téé xîndecu-áⁿ ñí xicáⁿ tnúhú-güedé núú Jèsús, te xáhaⁿ-güedé xii-gá:

—Mèstrú, ¿te ná nduu dùcaⁿ cada-xi ngoyo veñúhu, àdi nândi cûu sã cádá-xí cuendá cutnùní iní-ndí sã sã ta cuyatni nduu ducaⁿ cada-xi-i? —cachí-güedé xáhaⁿ-güedé xii-gá.

⁸ Te Jèsús ní xáhaⁿ-gã xii-güedé:

—Ío quíhi iní-ndó cûndecu-ndo, te vá dáñá-ndó mée-ndo dan-dahú ñàhá ñáyiú xii-ndo. Chi ío cuèhé cue téé coo ñuyúú-a, te danani-güedé mée-güedé dàtná nání-í te cachí-güedé: “Yúhú cúú-í Cristú Yáá ní tendaha Yã Ndiõxí véxi ñuyúú-a”, duha cachí-güedé. Te cachí tucu-güedé: “Vitna sa ní sáá nduu càda-xi nchaa nacuáa ní cáháⁿ-í”, duha cachí-güedé. Dico vá quindáá iní-ndó, te ñí vá túhá-ndó-güedé.

⁹ Te òré ñá ñihí-ndó tnúhu sã titní nâcióⁿ xînáá-güedé te dàva ñúú xînáá-güedé ndi mée-güedé, te vá yùhú-ndó chi dacuítí sã dúcáⁿ càda-xi, dico vátá sáá-gá nduu nãa ñuyúú òré ducaⁿ càda-xi —cachí-gá xáhaⁿ-gã xii-güedé.

10 Te xǎhaⁿ tùcu-gá xii-güedé:

—Nchaa cue téé ìⁿ nàcióⁿ nàá-güedé ndìhi cue téé ìngá nàcióⁿ, te titní ñúú ngüíta-güedé nàá-güedé.

11 Te titní xichi ñuyúú ñìhi vìhi tnáa, te titní tucu xichi ñuyúú coo tnamá, te titní tucu xichi ñuyúú quixi cuéhé, te titní núú sǎ cáda-xí àndiù, te yùhú ñáyiu.

12 Te òré cúmǎní-gǎ cada-xi nchaa nàcuáa càháⁿ-i-a, te cue téé cùu úhú iní ñáhá xii-ndo. tñi ñaha-güedé, te candeca ñaha-güedé xii-ndo quíhíⁿ xití veñùhu-güedé cada ndáá-güedé cuéchi-ndo, te chihi ñaha-güedé vecaá xii-ndo, te candeca ñaha-güedé quíhíⁿ núú cuè téé cùnuu yindaha nacióⁿ àdi núú dàva-gá cue téé cùnuu sá cuèndá-í.

13 Te òré ducaⁿ na càda ñaha-güedé xii-ndo, te òré-ánⁿ tàù-xi càháⁿ váha-ndo cuèndá-í núú-güedé. 14 Te vá cání ìní-ndó nùu nása cunduu tnùhu cúñaha-ndo xii-güedé cuèndá cácu nihnu-ndo. 15 Chi yùhú dacàhu iní ñáhà-í xii-ndo tnùhu cúñaha-ndo xii-güedé, te taxi-í sá vǎtá quini tnùnì-gá-ndó, te ni ìⁿ ñáyiu cùu úhú iní ñáhá xii-ndo vá ñìhí-gá-yu tnùhu cúñáhá-yu xii-ndo. 16 Te ndéé tǎtá-ndó,

ndìhi ñanì-ndó, ndìhi cue ñáyiu cùu ñanì tnáhá-ndó, ndìhi cue ñáyiu càháⁿ ndìhi váha-ndo cuàha cuèndá ñáhá-yu xii-ndo nùú cuè téé cùchiuⁿ, te dava-ndo càhni ñaha-güedé xii-ndo. 17 Te ío cuéhé ñáyiu cuu úhú iní ñáhá-yu xii-ndo sǎ cuèndá-í. 18 Dico Yá Ndióxi ío coto ñaha-gǎ xii-ndo chi ndéé idi díquí-ndó còto-gá. 19 Te núu na càda ndee iní-ndó càncicúⁿ nihnu ñaha-ndo xii-í, te nduu táhú-ndó cùndecu-ndo ndìhi Yá Ndióxi ñi caa ni quíhíⁿ.

20 Te nduu na quini-ndó ñùhu doco sandadú ñi càndéé yuhu ñùú Jerusálén, te sa cutnùni iní-ndó sǎ sǎ ní cuyatni nduu dànaa-güedé ñúú-án. 21 Te dàvá-ánⁿ nchaa

ñáyiu xǐndecu distrítu Jùdeá xíní ñùhu-xi cunú-yu quíhíⁿ-yu xití yucu, te nchaa ñáyiu xǐndecu ñúú Jerusálén queé-yu xití ñúú-án, te ñáyiu ñá túú xǐndecu ñúú-án vǎ ndìhu-gá-yu. 22 Chi dàvá-ánⁿ cuu-xi nduu tnùndòho tnùhu ndàhú, te ducaⁿ càda-xi chi ducaⁿ ndéé tnuní núú tùtú Yá Ndióxi nàcuáa dandòho ñaha-gá xii-yu. 23 Te ndàhú ní cuu nchaa ñáyiu dìhí ñùhú dèhe-xi, ndìhi nchaa ñáyiu ndéca déhe vitna sàdi na sáa nduu dùcaⁿ cada-xi! Chi ío cuéhé tnùndòho tnùhu ndàhú coo núú ndécú-yu dàvá-ánⁿ, te xǎⁿ cuu-xi ìⁿ tnùndòho tendaha Yá Ndióxi quixi sá cúu-xi-yu. 24 Te dava cue téé cuú-güedé cahni ñaha-güedé, te dava-güedé tñi ñaha-güedé candeca ñaha-güedé quíhíⁿ nchaa ñúú xícá, te cue téé dava-gá ñúú cunuu-güedé ñúú Jerusálén, te mee Yá Ndióxi cachí-gá te núu ná daha nduu cunuu-güedé ñúú-án.

Nàcuáa cada-xi òré quixi tucu Téé cùu ñanì tnáhá cuè ñáyiu

(Mt. 24:29-35, 42-44; Mr. 13:24-37)

25 Te cada-xi ìⁿ sá vǎtá quini-gá ñáyiu núú nchìcanchii, ndìhi núú yóó, ndìhi núú nchàa chódíní, te ñuyúú-a coo tnùhu ndìhú iní-xi te vá cutnùni iní-yu nása càda-yu cuèndá sá ío dusaⁿ càda ndute lamár òré candaundéé tnáhá-xi. 26 Te nchaa ñáyiu cuneé-yu sá yùhú-yu, ndìhi sá ndìhú iní-yu cuèndá nchaa sá cáda-xí ñùyúú-a, te quidi-xi andiù. 27 Te sǎtá dúcáⁿ te quini-ndó yùhú Téé cùu ñanì tnáhá-ndó nchàa-ndo quee-í andiù quixi-í ichi xití vícò, te dàvá-ánⁿ quini ñáhá nchàa ñáyiu sá ío cùnuu-í te ndàcu-í quide-í nchaa sá vǎha. 28 Te òré ná ngüíta-xi ducaⁿ càda-xi, te cuita cundee-gǎ iní-ndó quíhíⁿ, te quíhí iní-ndó chi sa ní cuyatni víi-nà nduu cácu nihnu-ndo vǎ cùndecu-gá-ndó

núú ñuyíú yíca cuěchi-a —càchí-gá xáhaⁿ-gã xii-güedé.

²⁹ Te ní cani-gá ìⁿ cuèndú núú-güedé nàcuáa tecú tnùní váha-güedé tnúhu-gá, te xáhaⁿ-gã xii-güedé:

—Chí cündèhe yutnu ngúxí ndìhi nchaa dava-gá yutnu. ³⁰ Chi nàtahú ndaha-xi, te òré ducaⁿ quide-xi te càchí-ndó sà sà ní cuyatni nuu cahni. ³¹ Te ñu-ni ducaⁿ sàtnahá-xi cùu oré ná quìní-ndó càda-xi nchaa nacuáa càháⁿ-í, te sá dúcáⁿ te cutnùní iní-ndó sà sà ní cuyatni nduu ndíhu ndaha ñaha Yá Ndiõxí xii-ndo.

³² Te na càchí tnúhu ndáa-í xii-ndo sà òré vátá cùú-gá cue ñáyiú xíndecu ñuyíú-a vitna, te cada-xi nchaa nàcuáa ní cáháⁿ-í. ³³ Te andiu ndìhi ñuyíú-a chi ndìhi nihnu-xi, dico tnúhu-í chi vá ndíhí nihnu-xi, chi cùu-xi tnúhu ndáa.

³⁴ Te quihí iní-ndó vã cündècu-ndo ìchi cuehé ìchi duha, te vá cùú-ndó ñáyiú quihu, te vá cùhúⁿ iní-ndó mèe-ni nchaa sá ío ñuyíú-a, chi núu ducaⁿ na càda-ndo te nacuaana-ndo sã sãá nduu càda-xi nacuáa ní cáháⁿ-í. Te uuⁿni sãá nduu-ãⁿ, ³⁵ te cada-xi dàtná cuìní-ndó quide ìⁿ trampá chi uuⁿni ngáva-xi, te ducaⁿ càda-xi nchaa ñáyiú xíndecu ñuyíú-a, chi uuⁿni sãá nduu-ãⁿ. ³⁶ Te nchòhó cundecu túha-ndo te ío cáháⁿ ndìhi-ndo Yá Ndiõxí cuèndá ndacu-ndo yáha-ndo nchàa tnúndòho quixi ñuyíú-a, te ducaⁿ te nasáa-ndó cündecu-ndo núú ndécú yúhu Té cùu ñaní tnáhá-ndó nchàa-ndo —cachí-gá xáhaⁿ-gã xii-güedé.

³⁷ Te nduu ndùu ní xóo danèhé Jèsús ñáyiú tnúhu-gá xití veñúhu càhnu sá ío cùnuu, te niú niú ní xóo quíhíⁿ ngúdú-gá xití yucu Olívú. ³⁸ Te nehé nehé ní xóo quíhíⁿ nchaa ñáyiú veñúhu-ãⁿ ní xóo cundedóho-yu nchaa tnúhu càháⁿ-gã.

22

Ndùcu-güedé nàcuáa cada-güedé cahni-güedé Jèsús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Te sa ní cuyatni nduu tnàhá vico pásuá, te vico-áⁿ xexí ñáyiú pàá sá ñà túú yìhi levadurá. ² Te cue té cùu dútú cùnùu, ndìhi cue té cùu dàcuaha ñaha xii ñáyiú nchaa tnúhu ní chídó tnùní ndíi Moisés ndúcú-güedé nàcuáa cada-güedé cahni-güedé Jèsús, te dicó-ni sá xiyùhú-güedé ñáyiú.

³ Te yucu ñávaha ní dácáhu iní ñáhá-xí xì té Jùdás déhe té Iscàrioté, te núú tnàhá té-áⁿ cùú ùxúú tnàhá cue té cùu cuu ndìhi-gá ní cùu.

⁴ Te té Jùdás-áⁿ ñí sáháⁿ-dé ní ndatnúhu-dé ndìhi cue té cùu dútú cùnùu, ndìhi cue té cùu tàxi tnuní ñáhá xii cue té cùu quide cuendá veñúhu nàcuáa cada-dé cuáha cuendá-dé Jèsús núú-güedé. ⁵ Te ío ní cudíí iní-güedé, te ní xáhaⁿ-güedé xii-dé sá cuáñaha-güedé díhúⁿ, ⁶ te ní xáhaⁿ-dé sá cùú quèheⁿ-dé díhúⁿ-ãⁿ, te ní ngúita-dé ndúcú-dé nàcuáa cada-dé cuáha cuendá-dé Jèsús núú-güedé òré ñà túú ñáyiú.

Cùdini Jèsús ndìhi cue té xica cuu ndìhi-gá

(Mt. 26:17-29; Mr. 14:12-25; Jn. 13:21-30; 1 Co. 11:23-26)

⁷ Te ní sáá nduu ñí quesaha vico xexí-yu pàá sá ñà túú yìhi levadurá, te ñu-ni nduu-ãⁿ sáhní-güedé ìⁿ mbéé líhli xèxí-yu. ⁸ Te Jèsús ní xáhaⁿ-gã xii té Pèlú ndìhi té Juáa:

—Chí cuaháⁿ chi cada túha-ndo núú cùdini-o sacuaa nduu vico pásuá —càchí-gá xáhaⁿ-gã xii-güedé.

⁹ Te ní xicáⁿ tnúhú-güedé núú-gã, te xáhaⁿ-güedé xii-gã:

—¿Te ndéé cáá vèhe cuini-n càda túha-ndí-í? —càchí-güedé xáhaⁿ-güedé xii-gã.

¹⁰ Te ní xáhaⁿ Jèsús xii-güedé:

—Chí cündedóho na càchí tnúhu-í xii-ndo nàcuáa cada-ndo. Òré

quihu-ndo xití ñuú núú quihíⁿ-ndó, te naníhí-ndó ñⁿ téé tãnehe ñⁿ yoó ndute, te téé-án candéndaha-ndo-dé quihíⁿ, te núú ndédacãa vehe na ndihu-dé te xíaⁿ quihu-ndo. ¹¹ Te cúñaha-ndo xii xitohó vehe-án: “Yaá cúú Mèstrú càchí-gã núú ndédacãa xichi xití vehe-n cuñaha núu-n xii-gã cudini-gã ndihí cue téé xica cuu ndihí-gã sacuaa nduu vico pascuá”, duha cúñaha-ndo. ¹² Te dàtnùni danèhé ñáhá-dé xii-ndo ñⁿ cuartú càhnú càa núú ñinu, chi vehe yòdo tñaha cuu-xi, te sa ní quide túha-dé nchaa sá ná ndihí, te nchòhò dicó-nã sá cudini-o cada túha-ndo —càchí-gã xáhaⁿ-gã xii-güedé.

¹³ Te ní xica-güedé cuáháⁿ-güedé, te nchaa-ni nãcuáa ní xáhaⁿ Jèsús xii-güedé ní cuu, chi nchaa sa ndècu túha, te ní quide túha-güedé sá cudini-güedé ndihí-gã sacuaa nduu vico pascuá-áⁿ.

¹⁴ Te sáta ní tñahá òré cudini Jèsús ndihí cue téé ní táuchíúⁿ-gã cáhãⁿ tnúhu-gã núú ñãyiu, te cuánguihu ndihí ñaha-gã xii-güedé mèsá. ¹⁵ Te xáhaⁿ-gã xii-güedé:

—¡Ducaⁿ-ni ìo sãni iní-í sá cudini ndihí ñaha-í xii-ndo sãcuua nduu vico pascuá òré cúmãní-gã sáa nduu ndòho-í te cuú-í! ¹⁶ Te na càchí tnúhu-í xii-ndo sã vã dúhá-gã caxi ndihí ñaha-í xii-ndo nduu vico pascuá, chi ndéé òré ná sãa nduu nàsáa-ndó núú táxí tnùní Yã Ndiòxí cundecu-o, te dàvá-áⁿ cada iní-ndó sã dàtná sá cãxí tucu-o chi ìo vãha cuu iní-ó cundecu-o —cachí-gã xáhaⁿ-gã xii-güedé.

¹⁷ Te ní queheⁿ-gã ñⁿ vãsú ñúhú ndùdí ndéhé yoho yãha stilé, te ní ndacáⁿ táhú-gã núú Yã Ndiòxí, te dàtnùni ní xáhaⁿ-gã xii-güedé:

—Chí quéhéⁿ vãsú ñúhú ndùdí ndéhé yoho yãha stilé-a, te coho-ndo lùha luha nchaa-ndo. ¹⁸ Te na càchí tnúhu tucu-í xii-ndo sã vítñá-nã duha xihí ndihí ñaha-í xii-ndo ndùdí ndéhé yoho yãha stilé-a te vá cóhó ndihí ñaha-gã-í,

dico na sãa nduu nãníhí tñahá-ó núú ndécú Tãtà-í Dútú Ndiòxí táxí tnùní-gã, te dàvá-áⁿ cada iní-ó sã dàtná sá cóhó ndihí ñaha tucu-í xii-ndo, chi ìo cudíⁿ iní-ó —càchí-gã xáhaⁿ-gã xii-güedé.

¹⁹ Te sáta ní túhú cóhó-güedé ní cudini-güedé, te ní queheⁿ-gã pãa te ní ndacáⁿ táhú tucu-gã núú Yã Ndiòxí, te dàtnùni ní táhú cuèchi-gã, te ní dácãhñu ñaha-gã xii-güedé, te xáhaⁿ-gã:

—Pãa-a cùu-xi datná yiqui cùñú-í, chi cahni ñaha-güedé xii-í sã cuendá-ndó, te ducaⁿ-ni càxi-ndo paá-a cuendá ndacu iní ñáhá-ndó xii-í —càchí-gã xáhaⁿ-gã xii-güedé.

²⁰ Te ñu-ni ducaⁿ ní quide-gã ndihí vãsú ñúhú ndùdí ndéhé yoho yãha stilé, chi ní queheⁿ-gã te òré sãñaha-gã xii-güedé coho-güedé, te ní xáhaⁿ-gã:

—Ndudí ñúhú vãsú-a cada iní-ndó sã cúu-xí dàtná ñiñí-í sã càtí òré cahni ñaha-güedé xii-í. Te sã dúcáⁿ càtí ñiñí-í xíãⁿ cutnùní ndáá sã Yã Ndiòxí cada-gã ñgã núú sã vãha sã cúu-xí-ndó.

²¹ ‘Dico vitna chi iha tñahá téé cuáha cuendá ñáhá xii-í núú cue téé cùu úhú iní ñáhá yihi-dé mèsá. ²² Te yúhú Téé cùu ñani tñahá-ndó nchaa-ndo ñuhu ichi-í cuáháⁿ-í cuú-í dàtná ní cachí Yã Ndiòxí. ¡Dico ndàhú ní cuu téé ducaⁿ na cuáha cuendá ñáhá xii-í núú cue téé cùu úhú iní ñáhá! —càchí-gã xáhaⁿ-gã xii-güedé.

²³ Te ní ngüita-güedé ndúcú tnúhu núú tñahá-güedé núú ndéda càa-güedé ducaⁿ cada cuáha cuendá ñáhá xii-gã núú cue téé cùu úhú iní ñáhá.

Xíndatnúhu-güedé ndédacãa-güedé cunuu-gã

²⁴ Te sáta dúcáⁿ te ní ngüita-güedé xíndatnúhu-güedé núú ndédacãa-güedé táu-güedé cunuu-güedé. ²⁵ Dico Jèsús ní xáhaⁿ-gã xii-güedé:

—Nchaa cue téé yíndaha ñaha xii ñãyiu ìo tàxi tnùní-güedé, te

mee-güedé cuíní-güedé sá cáháⁿ váha ñáyiú cuendá-güedé. ²⁶ Dico nchòhó vá dúcáⁿ càda-ndo, chi núú ìⁿ-ndo cùnúú te cada-ni-ndo sá ñà túú cùnúú-ndo, àdi cuu-ndo ìⁿ téé tàxi tñuní ñáhá xii cue téé xínu cuechi, te cada-ni-ndo sá cúú-ndó ìⁿ téé xínu cuechi-án; ²⁷ Te vá càchí-ó sá téé xínu cuechi cùnúú-gá-dé, chi téé quíhu mèsá cúnúú-gá-dé. Dico yúhú ndécú ndìhi ñaha-í xii-ndo dàtná ìⁿ téé xínu cuechi.

²⁸ Te nchòhó ducaⁿ-ni ndècu ndìhi ñaha-ndo xii-í, te tàyáha ndìhi ñaha-ndo xii-í nchaá sá táyáha-í véxi. ²⁹ Te Tātà-í Dútú Ndiòxí ní càchí-gá sá táxi tñuní-í, te yúhú càchí-í xii-ndo sá sàá nduu te tñáhá-ndó tàxi tñuní-ndó. ³⁰ Te dàvá-án caxi-o coho-o càda-o núú tàxi tñuní-í, te yacáⁿ nguíta-ndo càda ndáá-ndó cuèchi ndì ùxúú xi-chi ñáyiú isràél —càchí-gá xáhaⁿ-gá xii-güedé.

Jesús càháⁿ-gá sá tē Pèlú cúñaha-dě xii ñáyiú sá ñà túú xini ñáhá-dě xii-gá

(Mt. 26:31-35; Mr. 14:27-31; Jn. 13:36-38)

³¹ Te Xítohó Jesucristú ní xáhaⁿ-gá xii té Ximú:

—Yòhó Ximú, cundedóho váha ìⁿ tñúhu na càháⁿ-í-a, chi dàtná cuíní-n quide táchí triú sácáⁿ-xi duha sàcáⁿ-xi dàcáⁿ, ducaⁿ quèsaha yucu ñáváha cada ñaha-xi xii-ndo. Chi coto ndeé ñáhá-xí xii-ndo te núú ndisa sàndáá iní ñáhá-ndó xii-í. ³² Dico yúhú xicáⁿ táhù-í núú Yá Ndiòxí cuendá-n, cuendá sá vā dáñá ndeé-n quindáá iní ñáhá-n xii-í. Te òré ndixi túú iní-n sá ñà túú ní quide váha-n, te quihíⁿ-n cuáha-n cuè téé cundihi-n tñúhu ndee ìní cuendá canchicúⁿ nihnu-ni-güedé ichi Yá Ndiòxí —càchí-gá xáhaⁿ-gá xii-dé.

³³ Te ní xáhaⁿ-dě xii-gá:

—Mèstrú, sa ndècu túha-í sá quihíⁿ ndìhi ñaha-í xii-n vècaá, àdi cuéi na cùú ndìhi ñaha-í xii-n —càchí-dé xáhaⁿ-dě xii-gá.

³⁴ Te Jèsús ní xáhaⁿ-gá:

—Pèlú, na càchí tñúhu-í xii-n sá cùmání-gá cana ìⁿ líhi te úní xito càháⁿ-n núú ñáyiú sá ñà túú xini ñáhá-n xii-í —càchí-gá xáhaⁿ-gá xii-dé.

Sa ní cuyatni ndoho Jèsús

³⁵ Te Jèsús ní xáhaⁿ-gá xii-güedé:

—Te cútñahá ní tendaha ñaha-í xii-ndo ní sáháⁿ-ndó chiuⁿ-í, chi ñá túú ní cànehe-ndo ní ìⁿ sá cúhúⁿ dìhúⁿ-ndó, te ní ìⁿ sá cúhúⁿ ndàchìuⁿ-ndo ñá túú ní cànehe-ndo. Te chí càchí tñúhu núú ió ìⁿ sá ní cùmání xii-ndo —càchí-gá xáhaⁿ-gá xii-güedé.

Te ní xáhaⁿ-güedé:

—Ñáhá, chi ní ìⁿ sá ñà túú ní cùmání xii-ndí —càchí-güedé xáhaⁿ-güedé xii-gá.

³⁶ Te ní xáhaⁿ-gá:

—Te vitna núú ndècu ndìhi-ndo sá sácúhuⁿ dìhúⁿ-ndó, àdi sá sácúhuⁿ ndachìuⁿ-ndo te canehe-ndo. Te núú ñá túú ndècu ndìhi-ndo machití, te nadico-ndo dóó tìcachi nihnu-ndo te cuaaⁿ-ndo. ³⁷ Te na càchí tñúhu-í xii-ndo sá dàcuítí sá yáha-í nàcuáa càháⁿ-xi núú tütú Yá Ndiòxí núú càchí-xi: “Ìⁿ-ni ní quide ñaha-güedé xii-gá, ndìhi cue téé ndècu cuèchi-xi”, duha càchí-xi núú tütú-gá. Te ñá díú-ní xíáⁿ yáha-í chi nchaandi túhú nàcuáa càháⁿ-xi núú tütú-gá yáha-í —càchí-gá xáhaⁿ-gá xii-güedé.

³⁸ Te xáhaⁿ-güedé:

—Mèstrú, iha ndècu úú machití —càchí-güedé xáhaⁿ-güedé xii-gá.

Te ní xáhaⁿ-gá:

—Chí návii-ná yuhu-ndo, vá càháⁿ-gá-ndó —càchí-gá xáhaⁿ-gá xii-güedé.

Jesús càháⁿ ndìhi-gá Yá Ndiòxí yucu Òlívú

(Mt. 26:36-46; Mr. 14:32-42)

³⁹ Te Jèsús ní quee-gá cuáháⁿ-gá yucu Òlívú, chi ducaⁿ tñahí quide-gá. Te cue téé xica cuu ndìhi-gá nchicúⁿ ñáhá-güedé xii-gá

cuáhá. 40 Te òré ní quexìo-gá xián, te ní xáhaⁿ-gã xii-güedé:

—Chí càháⁿ ndihì Yá Ndiòxí cuendá sá vã dácàháⁿ ñáhá yùcu ñáyáha xii-ndo càda-ndo sá ñà túú tàù-ndó càda-ndo —cachí-gá xáhaⁿ-gã xii-güedé.

41 Te sátá dúcáⁿ te ní quee dîⁿ-gá tnuú-güedé cuáháⁿ-gá ìⁿ xio, te sa ñũnchií luha ní xica ndehe-gá núú ndécú-güedé, te xián nĩ ngüíñí xítí-gã càháⁿ ndihì-gá Tátá-gã Dútú Ndiòxí. 42 Te xáhaⁿ-gã:

—Táu, te núú dicó cachí-n te tau-nihnu ñaha-n xii-í cuendá sá vã ndóhò-í ná sáá òré, dico vã cadá-n nàcuáa càchí iní mée-í, chí cada-n nàcuáa càchí iní mée-n —cachí-gá xáhaⁿ-gã xii Tátá-gã Dútú Ndiòxí.

43 Te sátá dúcáⁿ te ní quexìo ìⁿ espíritú xínú cuèchi núú Yá Ndiòxí ní sáñaha-gã-xi tnúhu ndee iní xii-gá. 44 Te òré súúní ndihú iní-gá, te uuⁿ-gá súúní nì yuhu ní iní-gá càháⁿ ndihì-gá Dútú Ndiòxí, te tnée-gã cáá dàtná cáá ñíñí te ngóyó núú ñúhú.

45 Te sátá nĩ yáha ní càháⁿ ndihì-gá Tátá-gã Dútú Ndiòxí, te ní ndacuíñí-gá cuánuhú-gá núú nĩ dándõo-gá cue téé-áⁿ, te òré ní nasáá-gá te xixidí-güedé cuendá sá ìo cuéhé tnúhu sàni iní-güedé cuendá-gá. 46 Te xáhaⁿ-gã xii-güedé:

—¿Ná cuendá xidí-ndó? Chí ndácõo, te càháⁿ ndihì-ndo Yá Ndiòxí cuendá sá vã dácàháⁿ ñáhá yùcu ñáyáha xii-ndo càda-ndo sá ñà túú tàù-ndó càda-ndo —cachí-gá xáhaⁿ-gã xii-güedé.

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Jn. 18:2-11)

47 Te càháⁿ dúcáⁿ-ní Jèsús ní quexìo vai cue téé, te ìⁿ téé xica cuu ndihì-gá nání Jüdás cúnùu-dé yódó nùu-dé núú-güedé ní quexìo ndée núú-gã, te ní teyuhu ñaha-dé xii-gá, te núú tnàhá téé-áⁿ cúú ùxúú cue

tée xica cuu ndihì-gá. 48 Te ní xáhaⁿ Jèsús xii-dé:

—Jüdás, ¿te yòhó cuáha cuendá ñáhá-n xii yúhú Tée cùu ñaní tnàhá-ndó nchaa-ndo núú cuè téé cùu úhú iní ñáhá xii-í càháⁿ-n nùu duha tàyuhu ñaha-n-áⁿ? —cachí-gá xáhaⁿ-gã xii-dé.

49 Te sátá nĩ xiní nchaa cue téé cündihí Jèsús nàcuáa cùu cue téé ní quexìo-áⁿ, núú ní xicáⁿ tnúhú-güedé núú-gã, te xáhaⁿ-güedé xii-gá:

—Mèstrú, ¿cùu nàá-ndí ndihì-güedé ndihì machití-a ñã? —cachí-güedé xáhaⁿ-güedé xii-gá.

50 Te ìⁿ-dé ní xehndé-ni-dé lóho xio cùha ìⁿ cue téé ní quexìo-áⁿ, te téé-áⁿ xínú cuèchi-dé núú dütú cúnùu-gá, te ní quendéé duuⁿ lóho-dé. 51 Te Jèsús ní xáhaⁿ-gã xii-güedé:

—Chí dáñá-güedé, vá dúcáⁿ càda-ndo —cachí-gá xáhaⁿ-gã xii-güedé.

Te ní dácàá-gá ndaha-gá ní tendaha-gã núú nĩ xindeé lóho téé-áⁿ, te ní nduu váha dàtná-ni càa. 52 Te nchaa cue téé cùu dütú cúnùu, ndihì cue téé tàxi tnuní nchaa cue téé quidé cuendá veñúhu sá ìo cúnuu, ndihì cue téé cùu sacuéhé núú ñáyiu isràél, nchaa cue téé-áⁿ vèxi tñi ñaha-güedé xii-gá, te ní xáhaⁿ-gã xii-güedé:

—Nchòhó, nèhe-ná-ndó màchití, nèhe-ná-ndó càrrutí véxi-ndo núú ndécú-í, dàtná quidé-ndó ìⁿ ñadúhú quidé ñaha-ndo xii-í. 53 Te ducaⁿ-ni nĩ xiní-ndó nĩ xindecu-í xítí veñúhu càhnu sá ìo cúnuu ní xóo danèhé-í ñáyiu, te ní lùha ñá túú ní cùu tnàndéé ñáhá-ndó xii-í òré-áⁿ, te vitna ní sáá òré ducaⁿ càda-ndo, te cada sácuihná nàcuáa cùu iní-xi —cachí-gá xáhaⁿ-gã xii-güedé.

Té Pèlú càháⁿ-dé núú ñáyiu sá ñà túú xiní-dé Jèsús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

54 Te ní tñi-güedé Jèsús, te ndèca ñaha-güedé xii-gá cuáháⁿ vehe téé cùu dütú cúnùu-gá, te té Pèlú

xica xica-ni nchicúⁿ ñáhá-dě xii-gá cuáháⁿ. ⁵⁵ Te òré ní quexio-güedé xíaⁿ te ní dátñáhá-güedé ñuhú quehé vehe-áⁿ, te ní càndéé yuhu nùhú-áⁿ nǐ ngóo teté-güedé, chi quèide víxiⁿ-xi, te tñáhá té Pèlú ní ngóo teté ndihi ñaha-dě xii-güedé.

⁵⁶ Te xíaⁿ ndécú ñⁿ xíchí xínú cuèchi vehe-áⁿ, te òré ní xini-xi nùcòo teté tñáhá té Pèlú, te ní ndacoto-xi núú-dě, te ní xáhaⁿ-xi xii-güedé:

—Tñáhá té-a xica cuu ndihi-dé té ndèca-güedé cuànguihu-áⁿ — càchí-xi xáhaⁿ-xi xii-güedé.

⁵⁷ Dico té Pèlú ñá túú ní nǎnuu-dé, te xáhaⁿ-dě xii-xi:

—Yúhú ñá túú xini-í té-áⁿ — càchí-dé xáhaⁿ-dě xii-xi.

⁵⁸ Te tna tnaa-ní ní cuu, te ní xini ñáhá tucu ñⁿ-dé, te xáhaⁿ-dě:

—Yòhó tñáhá-n xica cuu ndihi-n té ndèca-güedé cuànguihu-áⁿ — càchí-dé xáhaⁿ-dě xii-dé.

Dico té Pèlú ní xáhaⁿ-dě:

—Ñáhá, ñá díú yúhú xicá cùu ndihi-í-dé —càchí-dé xáhaⁿ-dě.

⁵⁹ Te sa ní cuu dátñá ñⁿ òré te càchí tucu ingá-dé:

—Ndáá sá tée-a xica cuu ndihi-dé té ndèca-güedé cuànguihu-áⁿ, chi tñáhá-dé cúú-dě té distritù Galilea —càchí-dé xáhaⁿ-dě xii-güedé.

⁶⁰ Te té Pèlú ní xáhaⁿ-dě xii té-áⁿ:

—Yúhú ñá túú cùtnuní iní-í nása ndùu tñuhu càháⁿ-n —càchí-dé xáhaⁿ-dě.

Te ní vátá xǐnu ducaⁿ-gǎ tñuhu càháⁿ-dé ní cana-ni ñⁿ líhi. ⁶¹ Te Xítóhó Jesucristú ní nchócótó-gǎ núú-dě, te òré-ni-áⁿ nǐ ndacu iní-dé tñuhu ní xáhaⁿ-gǎ xii-dé sá cùmání-gǎ cana ñⁿ líhi, te úní xito càháⁿ-dé sá ñá túú xini ñáhá-dě xii-gá. ⁶² Te té Pèlú ní quee-dé tnuú-güedé cuáháⁿ-dé ñⁿ xio, te ní ndáhyú víhí-dě ní ndixi cuèchi iní-dé.

Cùdíquí ndeé-güedé Jèsús

(Mt. 26:67-68; Mr. 14:65)

⁶³⁻⁶⁴ Te cue té ndeé ñáhá-xi Jèsús ní cudíquí ndeé ñáhá-güedé xii-gá, te ní dádáhu-güedé núú-gǎ, te ní caniha-güedé xii-gá, te xáhaⁿ-güedé:

—¡Cáháⁿ ná cótó yòo ní caniha xii-n! —càchí-güedé xáhaⁿ-güedé xii-gá.

⁶⁵ Te cuèhé víhí-gǎ tñuhu cuèhé ní xáhaⁿ-güedé xii-gá.

Jèsús ndécú-gǎ jùndá

(Mt. 26:59-66; Mr. 14:55-64; Jn. 18:19-24)

⁶⁶ Te sátá nǐ túndaá, te ní tacá cue tée cùu sacuéhé núú ñǎyiu isràél, ndihi cue tée cùu dútú cùnùu, ndihi cue tée dàcuaha ñaha xii-yu nchaa tñuhu ní chidó tñuní ndíi Moisés, te ndèca-güedé Jèsús cuáháⁿ núú càdá-güedé jùndá, te òré ní quexio-güedé ndihi-gǎ núú càdá-güedé jùndá-áⁿ, te ní xáhaⁿ-güedé xii-gá:

⁶⁷ —Cùiní-ndí cachí tñuhu-n xii-ndí nùu diu-n cùu-n Cristú Yaá ní tendaha Yá Ndióxi véxi ñuyú-a —càchí-güedé xáhaⁿ-güedé xii-gá.

Te ní xáhaⁿ-gǎ xii-güedé:

—Te núu na càchí-í sá díú-í cùu Cristú ñá, te ní vá quindáá iní-ndó, ⁶⁸ àdi te núu ñⁿ sá ná càcáⁿ tñuhu-í núú-ndó, te ní vá càchí tñuhu-ndo, te ní vǎ dáñá ñaha-ndo. ⁶⁹ Dico vitna ní cuyatni nduu ngóo yúhú Tée cùu ñani tñáhá-ndó nchaa-ndo xio cuha Dútú Ndióxi Yaá io cùnùu —càchí-gǎ xáhaⁿ-gǎ xii-güedé.

⁷⁰ Te dàtñuní nchaa-güedé ní xicáⁿ tñuhú-güedé núú-gǎ, te xáhaⁿ-güedé xii-gá:

—¿Te yòhó cùu-n Dèhe Yá Ndióxi te núu ducaⁿ vani? —càchí-güedé xáhaⁿ-güedé xii-gá.

Te ní xáhaⁿ Jèsús:

—Ndáá sá díú Dèhe-gǎ cùu-í dátñá càchí mée-ndó-áⁿ —càchí-gǎ xáhaⁿ-gǎ xii-güedé.

⁷¹ Te ní xitnàha-güedé:

—Ñá túú-gǎ xini ñuhu-xi cue tée càháⁿ nùu ndáá sá ndécuéchi-dé àdi ñá túú ndécuéchi-dé chi yuhu mee-dé ní càháⁿ-dé vitna ní xíndedóho-o —càchí-güedé xitnàha-güedé.

23

Jèsús ndécú-gã núú tẽ Pilatú

(Mt. 27:1-2, 11-14; Mr. 15:1-5; Jn. 18:28-38)

¹Te nchaa-güedé ní ndacuíñí-güedé, te ndëca-güedé Jèsús cuháⁿ núú tẽ Pilatú, ²te núú tẽe-áⁿ nĩ ngüíta-güedé sácáⁿ cuéchi-güedé cuëndá-gá, te xáhaⁿ-güedé:

—Ní naníhí-ndĩ tẽe-a dándahú-dé ñáyíu ñuú-ó, chi xáhaⁿ-dẽ xii-yu sá vã chãhu-gá-yu impuèstú xii tẽ Cêsár tẽe ío cùnuu, te càchí-dé sá díú-dẽ cúú-dẽ Cristú Yaa ní tendaha Yã Ndióxi véxi ñuyíú-a te yíndaha-dé ñáyíu càchí-dé — càchí-güedé xáhaⁿ-güedé xii-dé.

³Te tẽ Pilatú ní xícáⁿ tnúhu-dé núú-gã, te xáhaⁿ-dẽ xii-gá:

—¿Ndáá sá díú-n cùu-n tẽe yíndaha ñaha xii ñáyíu isráel-ã? — càchí-dé xáhaⁿ-dẽ xii-gá.

Te Jèsús ní xáhaⁿ-gã xii-dé:

—Díu-í yíndaha-í-yu —càchí-gá xáhaⁿ-gã xii-dé.

⁴Te tẽ Pilatú ní xáhaⁿ-dẽ xii nchaa ñáyíu, ndihí cue tẽe cùu dútú cùnùu:

—Yúhú cútñuní iní-í sá ñà túú nĩ ñⁿ cuéchi tẽe-a —càchí-dé xáhaⁿ-dẽ xii-yu.

⁵Dico níhi-gá ní cáháⁿ-güedé, te xáhaⁿ-güedé:

—Càchí-ndí sá ío dusaⁿ xíquide ñáyíu cuëndá nchaa sá dánèhé ñáhá-dẽ xii-yu, te ní quesaha-dẽ ndéé distritú Galiléa, te ní yáha-dé nihí distritú Júdeá dánèhé-dé ñáyíu, te vitna ní sáá-ni-tu-dé ndéé ndíha dánhé-dé-yu —càchí-güedé xáhaⁿ-güedé xii tẽ Pilatú.

Jèsús ndécú-gã núú tẽ Hèrodés

⁶Te sá dúcáⁿ nĩ tecú dóho tẽ Pilatú ní cacu nehé-yu distritú Galiléa, núu xiáⁿ ní xícáⁿ tnúhú-dẽ núu-yu núu tẽe Galiléa cúú-gã.

⁷Te ní xáhãⁿ-yu sá díú tẽe yácáⁿ cúú-gã, núu xiáⁿ ní na dayáha ñaha-dẽ xii-gá ndaha tẽ Hèrodés tẽe cùu gobiernú distritú Galiléa chi nduu-áⁿ ndécú-dẽ tnáhá-dé ñuú

Jerusalén-áⁿ. ⁸Te òré ní xiní tẽ Hèrodés-áⁿ Jèsús te ío ní cudíí iní-dé, chi ní cunaha dùcaⁿ-ni cuiní-dé quini ñáhá-dẽ xii-gá te ñà túú tnáhí xiní ñáhá-dẽ xii-gá ní cùu, chi cuëndá-ni tnúhu nihí-dé cuëndá-gá, te ndetu-dé sáá ñⁿ nduu quini ñáhá-dẽ xii-gá, te cada-gá ñⁿ sá vã yõo tnáhí ndácu cada cundehe-dé ní sani iní-dé. ⁹Te vãi sá ní xícáⁿ tnúhú-dẽ núú Jèsús, dico ní ñⁿ tnúhu ñà túú ní cáháⁿ-gá. ¹⁰Te xiáⁿ xíndecu tnáhá cue tẽe cùu dútú cùnùu, ndihí cue tẽe dàcuaha ñaha xii ñáyíu nchaa tnúhu ní chídó tnùní ndíi Moisés, te cue tẽe-áⁿ sùuní ío iní-güedé sácáⁿ cuéchi-güedé cuëndá-gá. ¹¹Te tẽ Hèrodés ndihí cue tẽe cùu sandadú-dé ñà túú ní cùu váha iní-güedé núú Jèsús, te ní cudíquí ndeé ñáhá-güedé xii-gá, te ní dácúñnú ñaha-güedé dóo váha xii-gá dàtná cáá dóo sácúñnu cue tẽe sáquíndaha ñaha xii ñáyíu. Te dàtnuní tẽ Hèrodés ní dánùhú ñáhá tucu-dé xii-gá ndaha tẽ Pilatú. ¹²Te nduu-áⁿ nĩ tnáhá tnúhu tẽ Pilatú ndihí tẽ Hèrodés, chi cùu úhú iní tnáhá-güedé ní cùu.

Càchí-güedé sá cáhni-güedé Jèsús

(Mt. 27:15-26; Mr. 15:6-15; Jn. 18:39-19:16)

¹³Te tẽ Pilatú ní nadatácá-dé nchaa cue tẽe cùu dútú cùnùu ndihí dava-gá cue tẽe cùnuu, ndihí nchaa ñáyíu ñuú-áⁿ, ¹⁴te ní xáhaⁿ-dẽ:

—Nchòhò ndécá-ndó tẽe-a véxi ní taxí cuëndá-ndó-dé iha, te càchí-ndó sã ío dusaⁿ quide ñáyíu cuëndá nchaa sá dánèhé ñáhá-dẽ xii-yu, te núu-ndó ndúcu tnúhu-í núú-dé núu ná ní quide-dé. Dico yúhú cútñuní iní-í sá ñà túú nĩ ñⁿ cuéchi-dé dàtná cáháⁿ-ndó-áⁿ. ¹⁵Te cuéí tẽ Hèrodés díu-ni ducaⁿ cáháⁿ-dẽ sá ñà túú cuéchi-dé núu ní techíuⁿ ñaha tucu-dé cuándixi-dé iha. Te vitna sa ní cutñuní iní-ó sã ñà túú táu-xi cahni-o-dé chi ñà túú cuéchi ní quide-dé. ¹⁶Te na dándoho-ni-í-dé te dàcácu-í-dé — càchí-dé xáhaⁿ-dẽ xii-yu.

17 Te ndi tnahá nduu víco pas-cuá te dacuití sã dácácu té Pilatú-án ìñ cue tée yìhi veceaá, chi ducañ tnahí quide-dé. 18 Dico nchaá-yu ní cuáá-yu, te xãhãñ-yu xii-dé:

—¡Queñuhu tée nãni Jesús-án, te cahni-n-dé! ¡Te dácácu-n té Barrábás! —càchí-yu xãhãñ-yu xii-dé.

19 Te té Barrábás-án ñi sanu ichi-dé ñáyiu ñuú ingá ichi, te ní ngüita-yu ndihi-dé ní cuu úhú iní-yu cue tée cùchiuñ, te ní sahani-dé ndíyí núu xíãñ ní chihí ñaha-güedé veceaá xii-dé. 20 Te té Pilatú cuini-dé dácácu-dé Jesús núu xíãñ cãháñ ndihi ñaha tucu-dé xii-yu ni cùu, 21 dico uuñ-gá ñihi ní cuáá-yu, te ní xãhãñ-yu xii-dé úu xito:

—¡Cata caá-dé núu cùrúxí! ¡Cata caá-dé núu cùrúxí! —càchí-yu xãhãñ-yu xii-dé.

22 Te xito cuu úní ní xãháñ té Pilatú:

—¿Te ná cúu cuéchi ní quide-dé te núu ducañ cuini-ndó cada-í-dé-í? Te yúhú cùtnúni iní-í sã ñã túu cuéchi ní quide-dé núu xíãñ ñã túu tàú-xi cahni-o-dé, te na dândoho-ni-í-dé te dácácu-í-dé —càchí-dé xãháñ-dé xii-yu.

23 Dico ñihi-ni cãháñ-yu xãhãñ-yu sã ná càta caa ñaha-dé xii-gá núu cùrúxí, te ñáyiu-án ndihi nchaa cue tée cùu dútú cùnùu xicãháñ ñihi-güedé ndihí-yu ndéé ní xínu iní té Pilatú cada-dé nãcuáa càchí iní-yu. 24 Te ní xãháñ-dé xii-yu sã cúu cada-dé nãcuáa xãhãñ-yu. 25 Te ducañ te ní dácácu-dé té Barrábás tée ní sanu ichi ñáyiu ñuú ingá ichi, te ñiu-ni-dé ní sahani-dé ndíyí núu xíãñ ní xíhi-dé veceaá, te dãtnúni ní táuchíuñ-dé cada-güedé Jesús nãcuáa xãhãñ-yu.

Sãta caa-güedé Jesús núu cùrúxí
(Mt. 27:32-44; Mr. 15:21-32; Jn. 19:17-27)

26 Te ndèca-güedé Jesús cuáhán núu cáta caa ñaha-güedé xii-gá, te ichi cuáhán-güedé ndihi-gá

ní tñii-güedé ìñ tée ñuú Cirené nání-dé Xímú ñúhú-dé ichi duha cuándixi-dé ní sãháñ-dé yucu, te ní dácúidó ñaha-güedé xii-dé cùrúxí nchídó Jesús, te ní ngüita nchicúñ-dé sátá-gã.

27 Te ío cuéhé ñáyiu nchicúñ ñáhá xii-gá cuáhán, te vai ñáyiu ñíhí ío ñihi ndàhí-yu sã ndíhú iní-yu cuendá Jesús. 28 Te Jesús ní nchócótó-gã núu-yu, te ní xãháñ-gã:

—Nchòhó ñáyiu ñíhí ñuú Jerusálén, vá ndàhyú-ndó cuendá-í chí ndàhyú cuendá méé-ndó ndihi cuendá déhe-ndo. 29 Chi sáá nduu quésaha ñáyiu: “Sã vãha tàhú nchaa ñáyiu ñã túu càcu déhe-xi, ndihi nchaa ñáyiu vátá quini-gá cuhuñ déhe-xi, chi ni ñã túu xini-yu dacadí-yu”, duha quésahá-yu. 30 Te dàvá-án cùñaha ñáyiu xii nchaa tindúu ndihi nchaa núu xìquí: “Chí tácuñ ngónchihi ñaha-ndo xii-ndí”, duha cùñahá-yu. 31 Te núu yúhú tée quide ndáa duha quide ñaha-güedé xii-í vitna, te ndéé-gá cada-güedé nchaa ñáyiu ndècu ichi cuéhé ichi duha —càchí-gá xãháñ-gã xii-yu.

32 Te ndèca tucu-güedé úu tnahá cue tée ndècu ndisa cuéchi-xi cuáhán cuendá cahni ñaha-güedé xii-güedé ndihi Jesús. 33 Te òré ní quexìo-güedé ndihi-gá ìñ xichi núu nání Yiqui Díquí Ndíyí, te xíãñ ñi sata caa ñaha-güedé xii-gá núu cùrúxí, ndihi úu cue tée ndècu ndisa cuéchi-xi-án, te ìñ-dé ní sata caa-güedé xio cùha-gá te ingá-dé ní sata caa-güedé xio dàtni-gá ñiu-ni núu cùrúxí tucu. 34 Te ní xãháñ-gã xii Tãtã-gã Dútú Ndiòxi:

—Táu, cada càhnu iní sã quidé-güedé, chí ñã túu cùtnúni iní-güedé ná cúu sã quidé-güedé —càchí-gá xãháñ-gã.

Te cue tée cùu sandadú ní xito ndéé-güedé núu ndèdaca-güedé cuu cuendá-güedé dóo-gã. 35 Te nchaa ñáyiu xindecu-án ndéhë-yu nãcuáa quide-güedé Jesús, te

nchaa cue tée cùnuu ní cudíquí ndeé ñáhá-güedé xii-gá, te ní xítñaha-güedé:

—Te dava ñáyiú ní ndacu-dé ní dácácu nihnu-dé, te vitna na dácácu nihnu-dé méé-dé, te núu ndisa sá Crístú Yáá ní tendaha Yá Ndiöxí véxi ñuyíú-a cùu-dé —cächí-güedé xítñaha-güedé.

³⁶ Te tñahá cue tée cùu sandadú ní cudíquí ndeé ñáhá-güedé xii-gá, chi ní sándehe yatni-güedé núu táca-a-gá sáñaha-güedé ndudí íá còho-gá ní cùu, ³⁷ te ní xáhaⁿ-güedé xii-gá:

—Te núu yòhó cúu-n tée yìndaha ñaha xii ñáyiú isràél, te dácácu nihnu mee-n —cächí-güedé xáhaⁿ-güedé xii-gá.

³⁸ Te ní taxi ndecu-güedé ìⁿ sá ndeé lètrá ndàa díquí-gá te ndeé úní núu tñùhu, tñúhu grìègú, ndìhi tñúhu làtín, ndìhi tñúhu hèbreú, te duha quèe-xi ndì nuní núu tñùhu-áⁿ “Tée-a cùu-dé tée yìndaha ñaha xii ñáyiú isràél”, duha quèe-xi.

³⁹ Te ìⁿ tée ndècu ndisa cuèchi-xi, tée ní sata caa-güedé dñi-gá xícüehé ñáhá-dé xii-gá, te xáhaⁿ-dè:

—Te núu yòhó cúu-n Crístú Yáá ní tendaha Yá Ndiöxí véxi ñuyíú-a, te dácácu nihnu mee-n, te dácácu nihnu ñaha xii nchúhú tñahá-ndí tucu —cächí-dé xáhaⁿ-dè xii-gá.

⁴⁰ Dico íngá tée cùndìhi-dé tée tàcaa íngá xio dñi-gá ní tenàá ñáhá-dé xii-dé, te xáhaⁿ-dè:

—¿Te náa ñá túú ndàcu iní-n Yá Ndiöxí vitna duha cãa-o ndoho-o ndìhi tée nàni Jesús-a ñã? ⁴¹ Chi nchoo tàu ndisa-o sã dúhá ndòho-o nacháhu-o cuèchi-o, dico Jesús-a chi ñá túú cuèchi-dé —cächí-dé xáhaⁿ-dè xii tée tàcaa ndìhi-dé-áⁿ.

⁴² Te dàtnùní ní xáhaⁿ-dè xii-gá:

—Jèsús, ndacu iní ñáhá-n xii-í òré ná quìxi-n taxi tñuní-n ñuyíú-a —cächí-dé xáhaⁿ-dè xii-gá.

⁴³ Te Jèsús ní xáhaⁿ-gá:

—Na cächí tñúhu ndáá-í xii-n sã méi ndùu vitna cundecu ndìhi

ñaha-í xii-n núú ní nduu táhù-í cundecu-í —cächí-gá xáhaⁿ-gá xii-dé.

Ní xihí Jèsús

(Mt. 27:45-56; Mr. 15:33-41; Jn. 19:28-30)

⁴⁴ Te òré ní cuu cuádava nduu. Te ní cunee nihíi ñuyíú, te ducaⁿ-ní cãa ní cuu ndeé caá úní sacuaa. ⁴⁵ Chi ñá túú-gá ní dàyehé nchìcanchii te ní ndátá dđó cúú còrtiná veñúhu càhnu sá ío cùnuu ní quée dava ndáá. ⁴⁶ Te níhi ní cáháⁿ Jèsús, te xáhaⁿ-gá xii Tátá-gá Dútú Ndiöxí:

—Táu, naqueheⁿ cuendá-n espíritú-í —cächí-gá xáhaⁿ-gá xii Tátá-gá.

Te tñúhu-ná-áⁿ ní cáháⁿ-gá te ní xihí-ni-gá.

⁴⁷ Te òré ní xiní tée cùu capitáⁿ sá dúcáⁿ ní cuu, te ní ndacu iní-dé Yá Ndiöxí, te ní cachí-dé:

—Sá ndáá ndisa sá tēe-a cùu-dé ìⁿ tée ío quide ndáá ndécú ñuyíú-a ní cùu —duha ní cachí-dé.

⁴⁸ Te chitu ñáyiú ní tacá xiáⁿ chi cuíní-yu cundéhé-yu nása cada-güedé Jèsús. Te sátá ní yáha ní xiní-yu nàcuáa ní quide ñaha-güedé xii-gá, te ní ndìhi-yu ní ndaca ta càní-yu pèchú-yu cuánuhú sá ndìhú iní-yu. ⁴⁹ Dico ndècu tñahá cue ñáyiú xiní tñahá ndìhi Jesús, ndìhi ñáyiú dñí ní chinchícúⁿ ñáhá xii-gá ndeé distritú Galileá, te ñáyiú-áⁿ xica-ni xixínutñi-yu xíndéhè-yu nchaa nàcuáa ní quide ñaha-güedé xii-gá.

Chìndúxi-güedé Jèsús

(Mt. 27:57-61; Mr. 15:42-47; Jn. 19:38-42)

⁵⁰ Te ndècu ìⁿ tée ñuú Arimateá nání-dé Chèé, te ñuú-áⁿ yìndèhu-xi distritú Jùdeá, te ío váha iní-dé te quide ndáá-dé núú Yá Ndiöxí, te tñahá-dé cúú-dé chiuⁿ te ní xíndecu-dé jùndá cue tée isràél.

⁵¹ Te ñá ní tñahá tñahí iní-dé nàcuáa ní cáháⁿ-güedé núú jùndá nàcuáa cada-güedé Jèsús. Te tée-áⁿ ndétú-dé sáá nduu ndìhu ndaha

ñaha Yá Ndióxi xii-dé ndihi ñáyi. ⁵² Te té-án ní sáhán-dé núú tē Pilatú te ní xáhaⁿ-dē sá ñuú vā cúndēe iní-dé dañá-dé chindúxi-dé yiqui cùñú Jèsús. Te té Pilatú-án ní sáha-dé tnúhu. ⁵³ Te ní nunehe-dé yiqui cùñú-gá núú cùrúxí, te ní chidúcúⁿnuu-dé ñⁿ dóó cuixíⁿ, te ní chihi-dé ñⁿ yaú nchìi yiqui naha càva, te vátá yōo ñⁿ-gá nguindúxi yaú-án. ⁵⁴ Te cùu-xi nduu vispré nduu ndètatú ñáyi, núu xíquide túha-ná-yu sá cúu ìngá nduu.

⁵⁵ Te nchaa ñáyi dīhí ní chinchícúⁿ ñáhá xii Jèsús ndéé distritú Galileá ndèndáhá-yu té Chèé ní sáhán núú nchìi yaú-án, núu ní xiní-yu nàcuáa ní sacáⁿ-dé yiqui cùñú-gá xití yaú-án. ⁵⁶ Te ducaⁿ te cuánuhú-yu vehé-yu, te ní quide túha-yu acití sáhán tnámí, ndihi pomàdá, te ní ndetatú-yu ìngá nduu-án ñⁿ quidé-yu nàcuáa cáhán tnúhu Yá Ndióxi.

24

Ní ndoto Jèsús

(Mt. 28:1-10; Mr. 16:1-8; Jn. 20:1-10)

¹ Te ndumìngú nehé víhí-ní cuáhán tucu ñáyi dīhí núú nchìi yaú ní chihi-güedé yiqui cùñú Jèsús, te nèhé-yu nchaa sá sáhán tnámí ñⁿ quide túha-yu-án cuáhán, te tnàhá tucu ñⁿ úú-gá tnàha dīhí-yu nchícúⁿ ñáhá xii-yu cuáhán. ² Te òré ní quexió-yu yuhu yaú-án te ní xiní-yu sá yūú ndèdì ñⁿ xio-ná ndécú, ³ te ní quíhu-yu xití yaú-án, dico ñá túú-gã yiqui cùñú Jèsús yíhí. ⁴ Te ñá ní cùtnuní tnàhí iní-yu ndéé ichi cuáhán yiqui cùñú-gá, te ní xiní-yu úú espíritú xínú cuèchi núú Yá Ndióxi xñutnñ-xi dññí-yu te xixíhnu-xi dóó chàhnchí. ⁵ Te ní yùhú-yu te ñá túú ní cùyí-yu cundèhé-yu cue espíritú-án, te cue espíritú-án ñⁿ xáhaⁿ-xi xii-yu:

—¿Ná cuendá nándücu-ndo Jèsús Yaá ndécú vívú núú yíndúxi ñáyi ní xihí-i? ⁶ Te ñá túú-gã yiqui cùñú-gá ndécú iha chi sa ní ndoto-gá, te chí dándacu iní nàcuáa ní cáhán-gá cùtnàhá ní xíndecu-ndo ndihi-gá distritú Galileá, ⁷ chi ní cachí-gá sá méé-gã cúú-gã ñaní tnàhá-ndó nchàa-ndo, te dacuití cuàha cuendá ñáhá-güedé xii-gá núú cuè téé ndècu ichi cuehé ichi duha, te cata caa ñaha-güedé xii-gá núú cùrúxí, te núú cùrúxí-án cuú-gá dico nduu úní sá cúú-gá te ndoto-gá, duha ní cachí-gá xii-ndo.

⁸ Te òré-án ñⁿ ndacu iní-yu tnúhu ní cáhán Jèsús. ⁹ Te sátá dúcán te ní naquehéⁿ-yu ichi cuánuhú-yu, te ní caní-yu cuèndú núú ndì úxí ñⁿ cue téé ní táuchíúⁿ Jèsús cáhán tnúhu-gá, ndihi núú dàva-gá ñáyi. ¹⁰ Te ñáyi ducaⁿ ñaha tnúhu cuánuhú núú-güedé-án cúú tá Màriá Magdalèná, ndihi tá Juáná, ndihi tá Màriá náná tē Jàcobó, ndihi dàva-gá ñáyi dīhí. ¹¹ Dico cue téé-án ñⁿ sani iní-güedé sá dícó cáhú ìní-yu tnúhu xáhán-yu xii-güedé ñuú ñá túú ní sàndáá iní-güedé nàcuáa ní xáhán-yu.

¹² Dico té Pèlú ní quee-dé xínú-dé cuáhán cuándéhé-dé yaú núú ñⁿ chihi-güedé yiqui cùñú Jèsús, te ní sáa-dé te ní ngáundeyi-dé xitó ñhni-dé xití yaú-án te ní xiní-dé sá méé-nã dóó ñⁿ xiducúⁿ nuu-gá yúcu ñⁿ xio, te ío ní cuñúhu-dé sá dúcán ñⁿ cuu, te ní natnñ-dé ichi cuánuhú-dé vehe núú xíndecu-güedé.

Ichi ñuú Emàús (Mr. 16:12-13)

¹³ Te ñu-ni nduu-án ñúhú úú cue téé ní xica cuu ndihi Jèsús ichi cuáhán-güedé ñⁿ ñuú nání Emàús, te sàcúhuⁿ-güedé dàtná úú òré ichi ndéé ñuú Jerusálén, te ndéé ñuú Emàús. ¹⁴ Te ta ndàtnúhu-güedé cuáhán nchaa nàcuáa ní cuu, ¹⁵ te ñini dùcaⁿ xicáhán-güedé, te Jèsús ní

natnahá ñáhá-gǎ xii-güedé te ndèca tnaha-gá ndihi-güedé cuáháⁿ. ¹⁶ Te cuèi ndèhe ñaha-güedé xii-gá dico dàtná ìⁿ sá ndédí núú-güedé, chi ñá ná quíni ñáhá-güedé xii-gá ní cùu. ¹⁷ Te Jèsús ní xicáⁿ tnúhú-gá núú-güedé, te xáhaⁿ-gǎ:

—¿Ná tnúhu xícáháⁿ-ndó ñùhu-ndo ichi núu ducaⁿ ìo cùu ndiyí-ndó-í? —càchí-gá xáhaⁿ-gǎ xii-güedé.

¹⁸ Te ìⁿ téé nàni Cleofás ní xáhaⁿ-dè xii-gá:

—¿Te ná cuendá nchaa ñáyiú íchí ní sáá ñúú Jerusalén xiní-yu nchaa nàcuáa ní cuu, te ìⁿ dii-ná yòhó ñá túú xiní-n-í? —càchí-dé xáhaⁿ-dè xii-gá.

¹⁹ Te ní xáhaⁿ-gǎ xii-güedé:

—¿Te ná ní cuu-í? —càchí-gá xáhaⁿ-gǎ xii-güedé.

Te ní xáhaⁿ-güedé xii-gá:

—Cuendá Jèsús téé ñúú Nazàrét càháⁿ-ndí, chi téé-án cúú-dè ìⁿ téé càháⁿ tnúhu Yá Ndiòxí, te ìo váha ndùu tnúhu càháⁿ-dè ní cùu, te quide-dé sá vǎ yòo tnàhí ndàcu cada nacuáa cudíí ìní Yá Ndiòxí ndihi ñáyiú ní cùu. ²⁰ Te cue téé cùu dútú cùnùu, ndihi cue téé cùnùu taxi tnuní ñáhá xii-ndí ní sáha cuendá ñáhá-güedé xii-dé núú tē Pilatú te ní sata caa ñaha-güedé te núú cùrúxí-án ní xihí-dé. ²¹ Dico vitna sa ní cuu úní nduu sá ní xihí-dé, te nchúhú ní sani ìní-ndí sá tē-án dàcácu nihnu ñaha-dè xii nchúhú ñáyiú isràél núú nchaa tnúndòho tnúhu ndàhú ndécú-ndí. ²² Dico ìo cùñúhu-ndí cúú, chi ìⁿ úú ñáyiú dihí ní tuha ñaha xii-dé ndécú ndihi-ndí ní sáháⁿ ngotó-yu ndéxuehe tàcuíhndá-gá yaú núú ní chihi-güedé yiqui cùñú-dé, ²³ te ní nasáa-yu càchí-yu xii-ndí sá ñá túú-gǎ yiqui cùñú-dé yihí xití yaú-án. Te ní xiní-yu espíritu xínú cuèchi núú Yá Ndiòxí, te ní xáhaⁿ-xi xii-yu sá ndécú vívú-dé.

²⁴ Te sáta dúcáⁿ te ìⁿ úú cue téé cùndihí-ndí ní sáháⁿ ndéhé-güedé

yaú-án, te ní xiní-güedé sá ndáa cúú-xí nchaa tnúhu ní càháⁿ ñáyiú dihí-án, dico ñá túú ní xiní-güedé téé-án —càchí-güedé xáhaⁿ-güedé xii-gá.

²⁵ Te Jèsús ní xáhaⁿ-gǎ xii-güedé:

—¿Ío cùmání sǎ xiní tnùní-ndó, chi ìo cuèé sàndáá ìní-ndó tnúhu ní càháⁿ cue téé ní xóo càháⁿ tnúhu Yá Ndiòxí ndéé sanaha! ²⁶ ¿Te náa ñá túú tàú-xi sá ndóhó Cristú òré cùmání-gǎ sáa nduu ndaa-gá andiú núú ndécú Dütú Ndiòxí cundecu-gǎ-án? —càchí-gǎ xáhaⁿ-gǎ xii-güedé.

²⁷ Te ní ngúta-gǎ xáhaⁿ-gǎ nàcuáa quèe-xi nchaa tnúhu càháⁿ-xi núú tütú Yá Ndiòxí cuendá-gǎ, te díhna-gǎ ní càháⁿ-gǎ nàcuáa ndùu nchaa tnúhu yòdo tnuní núú tütú ndíi Moisés, te dàtnùní ní càháⁿ-gǎ nàcuáa ndùu nchaa tnúhu yòdo tnuní núú tütú nchaa cue téé ní xóo càháⁿ tnúhu Yá Ndiòxí ndéé sanaha.

²⁸ Te òré ní quexio-güedé yuhu ñúú núú cuáháⁿ-güedé-án, te Jèsús ní quide-ni-gǎ sá yáha-gǎ quíhíⁿ-gǎ ingá xichi ní cùu. ²⁹ Dico ní càháⁿ ndàhú-güedé núú-gǎ sá quéndòo-gǎ xíaⁿ ndetatú-gǎ ndihi-güedé, te xáhaⁿ-güedé xii-gá:

—Quendóo ndihi ñaha xii-ndí iha ndetatú-n chi sa ní cuaa, te tnavíi cundiquiⁿ —càchí-güedé xáhaⁿ-güedé xii-gá.

Te xíaⁿ cáá ìⁿ vehe cuánguihu-güedé ndetatú-güedé ndihi-gǎ. ³⁰ Te òré sa yihí-güedé mèsá ndihi-gǎ cùdini ndihi ñaha-güedé, te ní queheⁿ-gǎ pàa te ní ndacáⁿ táhú-gǎ núú Yá Ndiòxí, te ní táhú cuèchi-gǎ te dàtnùní ní dácáhñu ñaha-gǎ xii-güedé. ³¹ Te òré-án ní naquiní ñáhá-güedé xii-gǎ ní cùu, dico uuⁿ ní ndóñhúhú-gǎ. ³² Te ní xítnàha-güedé:

—Te ndáa sá sùúní cùdíí ìní-ó òré tá ndàtnúhu-o ndihi Jèsús véxi ichi, te ta dānehé ñáhá-gǎ xii-o nchaa nacuáa quèe-xi tnúhu càháⁿ-xi

núú tütú Yá Ndióxi —càchí-güedé xĩtnàha-güedé.

³³ Te ñá túú-gã ní xĩndetu-güedé chi ndihi-ni ní natnii-güedé ichi cuánuhú-güedé ñúú Jerusalén, te ní nasáá-güedé núú xĩndecu ndi úxi ñⁿ cue téé ní táuchíúⁿ Jèsús cáháⁿ tnúhu-gã, ndihi dava-gã ñáyiú. ³⁴ Te cue téé xĩndecu-áⁿ xáhaⁿ-güedé:

—Ndáá sá ñi ndoto Yaá cúú Mèstrú, chi ní xini ñáhá tè Ximú —càchí-güedé xáhaⁿ-güedé.

³⁵ Te cue téé ní nasáá-áⁿ ñi cani-güedé cuendú nàcuáa ní cuu ichi, ndihi nàcuáa ní cuu ní naquini-güedé Jèsús òré ní táhú-gã páá ní dácãñu ñaha-gã xii-güedé.

Jèsús ní quexio-gá núú xĩndecu cue téé ní xica cuu ndihi-gá

(Mt. 28:16-20; Mr. 16:14-18; Jn. 20:19-23)

³⁶ Te càháⁿ dúcáⁿ-ní-güedé nàcuáa ní cuu ní quexio Jèsús ní ngúnutnii-gã ndéé tnuú-güedé, te xáhaⁿ-gã xii-güedé:

—Yá Ndióxi chindèe ñaha-gã xii-ndo ío váha cùu iní-ndó ndècu-ndo —cachí-gã xáhaⁿ-gã xii-güedé.

³⁷ Te da ní yùhú-güedé, te ní sani iní-güedé sá dícó ñⁿ espíritú cúú sá ndéhé-güedé ní cùu. ³⁸ Dico Jèsús ní xáhaⁿ-gã xii-güedé:

—¿Ná cuendá yùhú-ndó, te sàni ñⁿ sani úú iní-ndó-í? ³⁹ Chí cündèhe ndaha-í ndihi sáhá-í te quini-ndo nã ñu-ni-í. Te chí téndàha ñaha xii-í te cundehe-ndo, te núú ñⁿ espíritú ndécú yiqui cuñú-xi dàtná ndécú ndihi yùhú —càchí-gã xáhaⁿ-gã xii-güedé.

⁴⁰ Te sáta dúcáⁿ ñi xáhaⁿ-gã te ní dánèhé ñáhá-gã xii-güedé ndaha-gã ndihi sáhá-gã. ⁴¹ Te ío ní cuñuhu-güedé, te ní cudí iní-güedé sá ndécú-gã tnuú-güedé dico sàni ñⁿ sani úú iní-güedé, te ní xáhaⁿ Jèsús xii-güedé:

—¿Ndècu ndihi-ndo luha sá cáxi-ó íha ñá? —càchí-gã xáhaⁿ-gã xii-güedé.

⁴² Te ní sãñaha-güedé xii-gã luha chácá ñi chíhó, ndihi dítá ñũñú ñúhú ndùdí, ⁴³ te ní queheⁿ-gã te ndèhe-güedé ní xexi-gã. ⁴⁴ Te dàtnùni ní xáhaⁿ-gã:

—Nchaa sá ñi yáha-í-a cùu-xi sá ñi cachí tnúhu-í xii-ndo cùtnàhá ndécú ndihi ñaha-gã-í xii-ndo, chi ní cachí-í sá dàcùití càda-xi nchaa nacuáa cáháⁿ-xi núú tütú ndí Moisés, ndihi núú tütú ndéé tnúhu ní cáháⁿ cue téé ní xóo cáháⁿ tnúhu Yá Ndióxi ndéé sanaha, ndihi núú libré Sãlmú —càchí-gã xáhaⁿ-gã xii-güedé.

⁴⁵ Te òré-áⁿ ñi sãñaha-gã sá xini tnùni-güedé, te ní tecú tnùni-güedé nchaa tnúhu cáháⁿ-xi núú tütú Yá Ndióxi. ⁴⁶ Te ní xáhaⁿ-gã xii-güedé:

—Ducaⁿ ndéé tnuú núú tütú Yá Ndióxi sá dàcùití sá yùhú Cristú cuú-í, te nduu úní ndoto-í. ⁴⁷ Te nihí ñuyú cùténuu tnúhu ní cáháⁿ-í, dico díhna nuu-gã ñúú Jerusalén ngüita-yu cacunehe ñáhá-yu xii-í, te cáháⁿ-yu nàcuáa ní dánèhé-í-yu, te cùñáhá-yu xii cue ñáyiú sá ná dándixi túu-yu iní-yu sá ñá túú quide váha-yu, te dàñá-yu nchaa ichi cuèhé ichi duha ndécú-yu, te natnii-yu ichi Yá Ndióxi, te ducaⁿ te cada càhnu iní-gã nchaa yíca cuèchi-yu. ⁴⁸ Te vitna nchòhó cuu-ndo cuè téé cáháⁿ ndáá nchaa nàcuáa ní cuu chí ní xini núú-ndó. ⁴⁹ Te yùhú tendaha-í Espíritú Yá Ndióxi quixi cundecu ndihi-ndo, chi ducaⁿ ñi cachí-gã. Dico chí cündècu-ni ñúú Jerusalén-áⁿ ndéé ná quèxio Espíritú Yá Ndióxi ngúndecu ndihi-ndo cuendá chindee ñaha-xi xii-ndo cada-ndo nchaa nacuáa ní cáháⁿ-í —càchí-gã xáhaⁿ-gã xii-güedé.

Jèsús cuánda-gá andiu

(Mr. 16:19-20)

⁵⁰ Te Jèsús ní queñuhu ñaha-gã xii-güedé ñúú Jerusalén ndéca

ñàha-gá cuáháⁿ ñuú Bètaniá, te xíáⁿ nĩ ndonehe-gá ndaha-gá núú nĩnu, te ní xí cáⁿ táhú ñàha-gá xii-güedé núú Yă Ndiöxí. ⁵¹ Te sátá nĩ xí cáⁿ táhú ñàha-gá xii-güedé núú Yă Ndiöxí, te ní quee-gá tnuú-güedé cuándaa-gá andiü. ⁵² Te ní ngüíta-güedé ní cachí-güedé sá ïo càhnu cuu Jesús, te ní natnii-güedé ichi cuánuhú-güedé ñuú Jerusálén, te súúní cùdíí iní-güedé ñúhú-güedě ichi. ⁵³ Te nchaa nduu ní xíndecu-güedé veñúhu càhnu sá ïo cùnuu ní ndacáⁿ táhú-güedě núú Yă Ndiöxí, te ní cachí-güedé sá ïo càhnu cuu-gá. Duha ní cuu dàvá-áⁿ.

TNÚHU NÍ CHÍDÓ TNÛNÍ TĒ JUÁÁ

Déhe Yá Ndióxi ní cuu-gá ñ̃ ní ñáiyu

¹ Cùmání-gã ngáva ñuyíú, te sa ndècu ndihì Yá Ndióxi Déhe-gá. Te ñ̃-ni x̃cucu-gá. Te Déhe-gá-áⁿ ñ̃ cuu-gá dàtná ñ̃ tnúhu, chí ní cachí tnúhu-gá nàcuáa càa Tátá-gã Dútú Ndióxi. ² Te sa ndècu-gá ndihì Dútú Ndióxi te ní ngáva ñuyíú. ³ Te ñ̃-ni tnúhu mee Dútú Ndióxi ní cuu ní cadúha Déhe-gá nchaa sá ío ñuyíú. Te núu ñá túú Dèhe-gá ñá, te ñá túú nã coo ñuyíú-a ní cùu. ⁴ Te ñ̃-ni Déhe-gá quidé-gã ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xité nuu-xi núú ndécú nchaa ñáiyu ñuhu ichi cuehé ichi duha. Te ñáiyu-áⁿ cúú-yu dàtná cue ñáiyu ndècu ñ̃ núú née, te ñ̃-ni-yu cachí iní-yu xocànì-yu tnúhu-gá dico vá ndácũ-yu.

⁶⁻⁷ Te ní x̃ndecu ñ̃ tée ní x̃inani-dě Juáá, te tée-áⁿ ñ̃ táuchíúⁿ Yá Ndióxi sá càháⁿ-dē tnúhu-gá núú ñáiyu. Te ní xáhaⁿ-dē xii-yu sá véxi Déhe-gá ñuyíú-a, te dandixi túu-gá iní-yu cuendá cutnùnì iní-yu nàcuáa ndùu cuendá Yá Ndióxi cuendá quíndáá iní-yu tnúhu-gá. ⁸ Te ñá díú mēe té Juáá ní dandixi túu-dé iní-yu cuendá cutnùnì iní-yu nàcuáa ndùu cuendá Yá Ndióxi, chí cuendá-ni ní xica cuu-dé ní càháⁿ-dē sá Dèhe Yá Ndióxi véxi-gá dandixi túu-gá iní-yu. ⁹ Te ndáá ndisa sá mēe-gã dandixi túu-gá iní ñáiyu ñuyíú-a cuendá cutnùnì iní-yu nàcuáa ndùu cuendá Yá Ndióxi.

¹⁰ Te ní x̃ndecu-gá ñuyíú-a, te ñáiyu ñuyíú-a ñá ní cùtnùnì iní-yu yoo cùu-gá, te ñ̃-ni mee-gã ní cadúha-gã ñuyíú-a ní quíde-gá ch̃iúⁿ ní táhú Dútú Ndióxi. ¹¹ Te ní quixi-gá ñuyíú ní cadúha mee-gã, dico cue ñáiyu ñuyíú-a ñá ní cùu váha iní-yu núú-gã. ¹² Dico davá-yu

ní sándáá iní ñáhã-yu xii-gá, te ní nduu táhũ-yu ní nduu déhe ñaha Yá Ndióxi xii-yu. ¹³ Te ñá túú ní nduu déhe ñaha-gã xii-yu sá cúú-yu déhe ñáiyu ñuyíú-a, àdi sá ndécú tãtã-yu, nãñã-yu chí mee Yá Ndióxi ducaⁿ ní cuiní-gá cunduu sá ndúú dēhe ñaha-gã xii-yu.

¹⁴ Te Déhe-gá ní quixi túu-gá ñuyíú-a, te ní cuu-gá ñ̃ yiqui cùñú ní x̃ndecu ndihì ñaha-gã xii nchoo cuè ñáiyu ní xica cuu túu ndihì-gá. Te ní xini-ó sá ío càhnu cuu-gá cuendá sá ñ̃ ñ̃ d̃i d̃i-ni-gã cúú-gã Déhe Yá Ndióxi, te ío cùndahú iní ñáhã-gã ch̃indēe ñaha-gã xii nchoo ñáiyu ndècu ñuyíú-a, te ío ndáá càháⁿ-gã. ¹⁵ Te duha ní càháⁿ té Juáá cuendá Déhe Yá Ndióxi ní xáhaⁿ-dē xii ñáiyu:

—Cuendá tée iha ní càháⁿ-í ndéé cãni-gá ní cachí-í sá quíxí ñ̃ tée quixi. Te tée-áⁿ cùnũ-gá-dé, chí d̃ihna-gá-dé sa ndècu-dé d̃acúúxí yũhú —duha ní xáhaⁿ-dē xii-yu.

¹⁶ Te ío váha iní Yaá-áⁿ chí x̃ito ñaha-gã xii-o nchaa-o ñ̃ nduu ñ̃ nduu. ¹⁷ Te nd̃i Moisés ní cachí tnúhu nd̃i tnúhu Yá Ndióxi tnúhu sá s̃ánú ichi ñaha xii-o nacúaa cundecu-o, dico Déhe-gá Xitohó Jesucristú ní cachí-gá sá ío cùu iní ñáhã Yá Ndióxi xii-o. Te ní càháⁿ-gã nchaa dava-gá tnúhu ndáá. ¹⁸ Te ñá ñ̃ ñáiyu x̃inì túu-yu Yá Ndióxi. Dico ñ̃ ñ̃ d̃i d̃i-ni Déhe-gá Yaá ndécú ndihì-gá càchí tnúhu-gá nàcuáa cà-gã.

Té Juáá tée d̃acuanđute ñaha xii ñáiyu càháⁿ váha-dé cuendá Xitohó Jesucristú

(Mt. 3:11-12; Mr. 1:7-8; Lc. 3:15-17)

¹⁹ Te cue tée israél ndécú ñúú Jerusalén ní tendaha-güedé cue dútú ndihì cue tée cùu levitá cuáhãⁿ-güedé núú ndécú tē Juáá ndúcú tnúhu-güedé núú-dē ñúu ná tée cùu-dé. ²⁰ Te ní càháⁿ ndáá-dē ní xáhaⁿ-dē xii-güedé:

—Yúhú, ñá díú Crístú Yaa ní tendaha Yá Ndiöxí véxi ñuyíú-a cùu-í — cächí-dé xáhaⁿ-dë.

²¹ Te ní xáhaⁿ tùcu-güedé:

—¿Te yoo cùu yohó váíⁿ? ¿Á yòhó cùu-n tē Èliás? —cächí-güedé xáhaⁿ-güedé xii-dé.

Te ní xáhaⁿ tē Juàá:

—Yúhú, ñá díú tē Èliás cùu-í — cächí-dé xáhaⁿ-dë.

Te xáhaⁿ tùcu-güedé:

—¿Te yòhó cùu-n tē ní cachí cue tēe ndéé sanaha quixi cáháⁿ tnúhu Yá Ndiöxí-áⁿ? —cächí-güedé xáhaⁿ-güedé xii-dé.

Te ní xáhaⁿ-dë:

—Ni ñá díú tēe-áⁿ cùu-í — cächí-dé xáhaⁿ-dë xii-güedé.

²² Te ní xáhaⁿ tùcu-güedé:

—¿Te ná tēe cùu yohó váíⁿ?, cuendá ducaⁿ nàcani tnúhu-ndí núú cuè tēe ní tendaha ñàha xii-ndí véxi-ndí, te cáháⁿ duuⁿ-n núu ná tēe cùu-n —cachí-güedé xáhaⁿ-güedé xii-dé.

²³ Te ní xáhaⁿ tē Juàá:

—Yúhú cùu-í tēe xica cáháⁿ xití yucu nàcuáa ní cáháⁿ ndí Chaiá, chí ndí-áⁿ ní cachí ndí: “Chí dáñá ichi cuehé ichi duha ndècu-ndo te tní-ndo ichi váha, chí véxi Yaa ío cùnuu”, duha ní cachí ndí —cächí tē Juàá xáhaⁿ-dë xii-güedé.

²⁴ Te cue tēe ndùcu tnúhu núú tē Juàá núu ná tēe cùu-dé, cue tēe-áⁿ ní tendaha ñàha cue tēe cùu fariséú xii-güedé. ²⁵ Te ní xáhaⁿ tùcu-güedé xii tē Juàá:

—¿Ná cuendá dáciuandute-n ñáyiu te núu ñá díú Crístú cùu-n, te ni ñá díú tē Èliás, te ni ñá díú tēe véxi cáháⁿ tnúhu Yá Ndiöxí cùu-n váíⁿ? —cächí-güedé xáhaⁿ-güedé xii-dé.

²⁶⁻²⁷ Te ní xáhaⁿ tē Juàá:

—Yúhú ní ngódó núu-í dáciuandute-í ñáyiu. Dico nchícúⁿ ñí tēe véxi, te tēe-áⁿ cúnùu-gá-dé dáciuúxí yùhú, chí yùhú cùu-í ñí tēe duuⁿ duuⁿ ñá túú tau nandaxi cuèdicó ñí chàu-dé dico quide-í chluⁿ-dë. Te tēe-áⁿ sa ñùhu tnahá-dé tnuú-ndó dícó-ni

sá ñá túú xini-ndó-dë —cächí-dé xáhaⁿ-dë.

²⁸ Duha ní cuu ñuú Bètábará ñuú cáá ndaa ingá xio yúte Jordán, yacáⁿ ní xindecu tē Juàá ní dáciuandute-dé ñáyiu.

Jèsús quidé càhnu iní-gá nchaa yíca cuèchi ñáyiu

²⁹ Te nduu tnéé ní xini tē Juàá Jèsús véxi yatni-gá núú ndécú-dé ndihi ñáyiu. Te ní xáhaⁿ-dë xii-yu:

—Chí cündèhe tēe-áⁿ, chí tēe-áⁿ cùu-dé Crístú Yaa ní tendaha Yá Ndiöxí véxi ñuyíú-a, te véxi-dé cada càhnu iní-dé nchaa yíca cuèchi ñáyiu ñuyíú. Te cùu-dé dàtná ñí mbéé quití ío váha iní-xi. ³⁰ Te diu tēe-áⁿ ní cachí-í sá cánchezúⁿ-dë quixi. Te cúnuu-gá-dé dáciuúxí yùhú, chí díhna-gá-dé sa ndècu ní cachí-í xii-ndo. ³¹ Te ni yùhú ñá túú xini-í-dé ní cùu, dico xica cuu-í dáciuandute-í ñáyiu cuendá nchaa ñáyiu israél quini ñàhá-yu xii-dé —cächí-dé xáhaⁿ-dë xii-yu.

³² Te ní xáhaⁿ tùcu-dé:

—Ní xini-í Espiritú Yá Ndiöxí ní quee-xi andiu véxi cuuⁿ-xi ngúndecu ndihi ñaha-xi xii-dé, te dàtná cáá lõmá cáá Espiritú-áⁿ véxi cuuⁿ-xi. ³³ Te yùhú ñá túú xini-í-dé ní cùu, dico Yá Ndiöxí Yaa ní tendaha ñàha xii-í xíca cùu-í dáciuandute-í ñáyiu, Yaa-áⁿ ní cachí tnúhu-gá sá tēe na quini-í ngúndecu ndihi Espiritú-gá sá véxi cuuⁿ andiu, te tēe-áⁿ taxi-dé Espiritú-gá cundecu ndihi-o. ³⁴ Te yùhú ní xini-í-dé te xini ndáá-í sá Dèhe Dútú Ndiöxí cùu-dé. Te xíáⁿ cächí tnúhu-í xii-ndo —cächí tē Juàá xáhaⁿ-dë xii-yu.

Cue tēe díhna nuu xica cuu ndihi Jèsús

³⁵ Te nduu tnéé-áⁿ diu-ni xíaⁿ ndécú tē Juàá ndihi úú cue tēe xica cuu ndihi-dé. ³⁶ Te ní xini-dé Jèsús ñúhú-gá ichi, te ní xáhaⁿ-dë xii cue tēe xica cuu ndihi-dé-áⁿ:

—Chí cündèhe tēe-áⁿ, chí tēe-áⁿ cùu-dé Crístú Yaa ní tendaha Yá Ndiöxí véxi ñuyíú-a. Te cùu-dé

dàtná ìⁿ mbéé quití ío váha iní-xi —
càchí-dé xáhaⁿ-dë.

³⁷ Te sá dúcáⁿ ní cáháⁿ té Juàá
núú cuè téé úú ndíhi-dé-áⁿ núú
ní chinchícúⁿ-güedé Jèsús. ³⁸ Te
ní nchócótó-gã ndàa sátá-gã, te
ní xiní-gá sá nchícúⁿ ñáhá-güedé
xii-gá. Te ní xáhaⁿ-gã xii-güedé:

—¿Ná nándücu-ndo? —cachí-gá
xáhaⁿ-gã xii-güedé.

Te ní xáhaⁿ-güedé:

—¿Ndèé ndécú-n, Ràbíí? —
càchí-güedé xáhaⁿ-güedé xii-gá.

Te Ràbíí-áⁿ quée-xí Mèstrú tnúhu
mee-güedé. ³⁹ Te ní xáhaⁿ Jèsús
xii-güedé:

—Chí nèhé te quini-ndó —
càchí-gá xáhaⁿ-gã.

Te ní xica-güedé cuáháⁿ-güedé, te
ní quexio-güedé núú quidé vèhe-gá.
Te ndëcu-ni-güedé ndíhi-gá ní cuaa,
chí dàtná òré caa cúmí sacuaa ní
sáa-güedé.

⁴⁰ Te úú cue téé-áⁿ ní tñi-güedé
tnúhu ní cáháⁿ té Juàá, te ní
chinchícúⁿ-güedé Jèsús. Te núú úú
cue téé-áⁿ, ìⁿ-dé nání-dé Ndríxí,
te ñaní-dé cúú tã Xímú, àdi Pelú
chí úú diù-dé. ⁴¹ Te té Ndríxí-áⁿ
ní nandücu-ni-dé ñaní-dé te ní
xáhaⁿ-dë:

—Ní naníhi-ndí téé cùu Mesías —
càchí-dé xáhaⁿ-dë.

Te Mèsiás-áⁿ quée-xí Cristú tnúhu
mee-güedé, Yaá ní tendaha Yã
Ndiöxí véxi ñuyíú-a. ⁴² Te ndëca té
Ndríxí ñaní-dé cuáháⁿ núú ndécú
Jèsús. Te òré ní xiní ñáhá Jèsús xii
té Xímú, te ní xáhaⁿ-gã:

—Yòhó cúú-n tã Xímú déhe té
Jónás, te vitna danàni ñaha-í Céfás
xii-n —càchí-gá xáhaⁿ-gã.

Te Céfás-áⁿ quée-xí Pèlú tnúhu
mee-güedé.

*Jèsús ní cáháⁿ-gá té Lìpé ndíhi té
Natanàél*

⁴³ Te nduu tnéé ní sani iní-gá
quíhíⁿ-gá distritú Galileá. Te ní
naníhi-gã ìⁿ téé nàni Lìpé, te ní
xáhaⁿ-gã xii-dé:

—Néhé ná quíhíⁿ-ó núú quíhíⁿ-í-a
—càchí-gá xáhaⁿ-gã.

⁴⁴ Te té Lìpé-áⁿ cúú-dë téé ñúú
Bètsaidá. Te diu-ni ñúú yacáⁿ cúú
ñúú té Ndríxí ndíhi té Pèlú. ⁴⁵ Te
té Lìpé ní naníhi tnáhá-dé ndíhi té
Natanàél, te ní xáhaⁿ-dë:

—Ní naníhi-ndí téé dii cuendú-xi
ní chídó tnúni ndíi Moisés ndíhi
dava-gá cue téé ní xóo cáháⁿ tnúhu
Yã Ndiöxí ndéé sanaha. Te téé-áⁿ
nání-dé Jèsús déhe té Chéé, téé ñúú
Nazàrét —càchí-dé xáhaⁿ-dë.

⁴⁶ Te ní xáhaⁿ tã Natanàél xii té
Lìpé:

—¿Te náa ío váha càa ñúú Nazàrét
núú da yacáⁿ quée téé cáháⁿ tnúhu
Yã Ndiöxí? —càchí-dé xáhaⁿ-dë.

Te ní xáhaⁿ tã Lìpé:

—Néhé ná quíhíⁿ-ó te quini-n —
càchí-dé xáhaⁿ-dë.

⁴⁷ Te òré ní xiní Jèsús té Natanàél
tá cùyatni-dé cuáháⁿ, te ní cáháⁿ-gá
cuendá-dé te ní cachí-gá:

—Téé véxi-áⁿ cúú-dë mei tã is-
ràèl, te ñá ìⁿ ndúu dandahú-dé
ñáyú —càchí-gá xáhaⁿ-gã.

⁴⁸ Te ní xáhaⁿ tã Natanàél xii
Jèsús:

—¿Te nása náquini ñáhá-n? —
càchí-dé xáhaⁿ-dë.

Te ní xáhaⁿ Jèsús:

—Yúhú sa ní xiní ñàhà-í xii-n òré
ndécú-gá-n càha yutnu ngúxí-áⁿ te
ni tã Lìpé vátá cáná ñàha-gá-dé xii-n
òré-áⁿ —càchí-gá xáhaⁿ-gã xii-dë.

⁴⁹ Te sá dúcáⁿ ní cáháⁿ-gá, núú ní
xáhaⁿ tã Natanàél xii-gá:

—Mèstrú, yòhó cúú-n Dèhe Dútú
Ndiöxí yíndàha-n ñáyú isràèl —
càchí-dé xáhaⁿ-dë xii-gá.

⁵⁰ Te Jèsús ní xáhaⁿ-gã:

—Cuendá sá ní xiní ñàhà-í xii-n
càha yutnu ngúxí xíáⁿ iní ñáhá-n,
dico cuéhé-gã núú sã quini-n —
càchí-gá xáhaⁿ-gã xii-dé.

⁵¹ Te ní xáhaⁿ tùcu-gá:

—Na càchí tnúhu ndáá-í sá sáa
nduu, te quini-ndó nàcaáⁿ andú.
Te quini-ndó cuè espíritu xínú
cuèchí núú Yã Ndiöxí sá ndàa
nuu-xi quide-xi núú cündëcu yúhú

Tée cùu ñaní tnàhá-ndó nchàa-ndo
—cachí-gá xáhaⁿ-gã xii-güedé.

2

Vico tnãndaha ió ñuú Cànaá

¹ Te nduu úní sá dúcáⁿ nĩ cuu te ní xóo ìⁿ vico tnãndaha ñuú Cànaá, ìⁿ ñuú yíndèhu distritú Galileá. Te yacáⁿ ní xíndecu nãná Jèsús. ² Te tnàhá Jèsús ndihí cue tée xica cuu ndihí-gá ní cáháⁿ-yu cuáháⁿ-gá ndihí-güedé vico-áⁿ. ³ Te òré ní ndihí vinú, te ní xáhaⁿ nãná Jèsús xii-gá:

—Ñá túú-gã vinú ndécú ndihí-yu
—càchí-aⁿ xáhaⁿ-aⁿ.

⁴ Te ní xáhaⁿ Jèsús xii-aⁿ:

—Nãá, ñá túú xini ñuhu-xi da yúhú cúñaha-n cuendá vinú-áⁿ, chi vátá tnàhá-gá òré quini-yu yoo cùu yúhú —càchí-gá xáhaⁿ-gã xii-aⁿ.

⁵ Te ní xáhaⁿ-aⁿ xii ñáiyu xinu cuechi:

—Cada-ndo nchàa nacuaá na cáháⁿ Jèsús —càchí-aⁿ xáhaⁿ-aⁿ.

⁶ Te yacáⁿ nútñi ìñú quídi yúú te queé dàtná ìⁿ cièndú lítrú ndute ìⁿ ìⁿ quídi-áⁿ. Te ndute-áⁿ nãndĩhi ñáiyu isràél ndáhã-yu te nàqueté-yu cóhõ-yu chi ducaⁿ tnàhí quidé-yu nàcuáa sãndáá iní-yu Yá Ndìòxí. ⁷ Te ní xáhaⁿ Jèsús xii nchaa cue tée xinu cuechi:

—Nadachitú-ndó ndùte ndi nchaa quídi-áⁿ —càchí-gá xáhaⁿ-gã xii-güedé.

Te ní nadachitú-güedé. ⁸ Te ní xáhaⁿ-gã:

—Vitna te tava-ndo lùha, te canehe-ndo quĩhíⁿ cuáha-ndo tée quide vico —cachí-gá xáhaⁿ-gã xii-güedé.

Te ducaⁿ nĩ quide-güedé ní tava-güedé luha nèhe-güedé cuáháⁿ ní sáha-güedé tée quide vico. ⁹ Te ní xito ndéé tée quide vico-áⁿ, te sa ní nduu-xi vinú, te ñá túú ní xini-dé ndéé véxi-xi, dico mee cuè tée xinu cuechi sa naha-güedé núú nĩ tava-güedé. Ducaⁿ te tée quide

vico-áⁿ nĩ cana-dé tée tnãndaha.
¹⁰ Te ní xáhaⁿ-dè:

—Nchaa ñáiyu quide vico queñuhú-yu díhna-gá vinú váha. Te sa vai vinú váha xihí-yu, te dàtnúni queñuhú-yu vinú ndáhú. Te yohó díhna-gá vinú ndáhú ní queñuhu-n, te ndéé núú ní ndihí-ná ní queñuhu-n vinú váha —càchí tée quide vico-áⁿ xáhaⁿ-dè xii tée tnãndaha-áⁿ.

¹¹ Te sá nĩ nadatiu Jèsús ndute-áⁿ nĩ nduu-xi vinú cúu-xi ìⁿ chiuⁿ díhna nuu sã vá yoo tnàhí ndacu cada ní quide-gá ñuú Cànaá, ìⁿ ñuú yíndèhu distritú Galileá, te chiⁿ ní quide-gá-áⁿ cúu-xi ìⁿ chiuⁿ cahnu vihi, núu xiáⁿ ní cutnùni iní-yu sá ìo cahnu cuu-gá, te ní sãndáá iní ñhá nchàa cue tée xica cuu ndihí-gá.

¹² Te sátá nĩ yáha vico, te ní xica Jèsús ndihí nãná-gã, ndihí cue ñaní-gá, ndihí nchaa cue tée xica cuu ndihí-gá cuáháⁿ-yu ñuú Capernaúm. Te yacáⁿ ní xíndecú-yu ìⁿ úú nduu ndihí-gá.

Jèsús ñá túú tnàhá iní-gá nàcuáa quide ñáiyu xiti veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáiyu isràél vico pascuá, te ní xica Jèsús cuáháⁿ-gá ñuú Jerusalén. ¹⁴ Te sátá nĩ sáa-gá yacáⁿ, te ní xica-gá cuáháⁿ-gá veñuhu cahnu sá ìo cùnuu, te xiti veñuhu-áⁿ nĩ xini-gá ndécú ñáiyu dicó-yu ndicutu, mbéé ndihí lómá, te tnàhá ñáiyu dàma díhúⁿ núcõo-yu ní xini-gá. ¹⁵ Te ní queheⁿ-gá ìⁿ úú yoho, te ní cáunuu tnàha-gá, te ní dáyuhu-gá ñáiyu ní queé-yu quehé veñúhu, ndihí ndicutú-yu ndihí mbéé-yu. Te cue ñáiyu dàma díhúⁿ-ãⁿ ní dãngõyo-gá díhúⁿ-yu, te ní dándúá-gá mèsá-yu. ¹⁶ Te ní xáhaⁿ-gã xii cue ñáiyu dico lómá:

—¡Queñuhu-ndo nchàa quití-a xiti veñuhu-a! ¡Vá cáda-ndó vèhe núú

yáhu núu cúu vèhe Tàtá-í Dútú Ndiöxí! —càchí-gá xáhaⁿ-gã xií-yu.

¹⁷ Te xiáⁿ ní ndacu iní cue téé xica cuu ndihi-gá sá dúcáⁿ yòdo tñuní núu tütú-gá, te càchí-xi: “Ío cùyica iní-í chí ñá cuiní-yu canehe ñí-yu vehe Tàtá-í”, duha càchí-xi núu tütú-gá.

¹⁸ Te ní xáhaⁿ cuè téé isràél xii-gá:

—¿Ná cúu sã vã yõo tñàhí ndàcu cada, cada-n cuendá cutnùní iní-ndí sá cúu dùha taxi tñuní ñáhá-n xii-ndí-í? —càchí-güedé xáhaⁿ-güedé xii-gá.

¹⁹ Te ní xáhaⁿ Jèsús:

—Chí dängöyo veñúhu-a, te není xití úní nduu te sa nadáxínu-í —càchí-gá xáhaⁿ-gã xii-güedé.

²⁰ Te ní xáhaⁿ tucu cue téé isràél:

—Údico íñú cuía ní xindecuu-güedé ní sáá veñúhu-a, te yòhò cuiní-n nadáxínu-n xití úní-ni nduu —càchí-güedé xáhaⁿ-güedé xii-gá.

²¹ Dico sá ní cáháⁿ-gá chí ñá díú cuendá veñúhu ní cáháⁿ-gá chí cuendá yiqui cùñú-gá ní cáháⁿ-gá. ²² Núu sátá ní xihí-gá, te ní ndoto-gá, te òré-áⁿ ní ndacu iní cue téé ní xica cuu ndihi-gá nàcuáa ní cáháⁿ-gá, núu xiáⁿ ní sándáá iní-güedé tñúhu yòdo tñuní núu tütú-gá. Te ducaⁿ te ní sándáá iní-güedé tñúhu ní cáháⁿ-gá.

Jèsús xiní-gá nàcuáa càa iní nchaa ñáyíu

²³ Te òré ndécú Jèsús vico pàscuá, te ío vài ñáyíu ní sándáá iní ñáhá xii-gá cuendá ío titní sá vã yõo tñàhí ndàcu cada ní quide-gá ní xiní-yu. ²⁴ Dico Jèsús ñá ní cáháⁿ-gá nchaa tñúhu ñúhu iní-gá, chí sa ní cutnùní iní-gá sá ñá túú cùu váha iní-yu. ²⁵ Te ñá túú xini ñúhu-gá ñí ñáyíu cùñaha nàcuáa càa iní nchaa tñàha ñáyíu-yu, chí mee-gá sa ñàha ndáá-gá nàcuáa càa iní-yu nchaa-yu.

3

Jèsús ndihi té Nicòdemú

¹ Ní xindecu ñíⁿ téé cùu fariséu ní xínani-dé Nicòdemú, te ní cuu-dé ñíⁿ téé cùnuu núu ñáyíu isràél. ² Te téé-áⁿ ñí sáháⁿ-dé niú ní cáháⁿ ndihi-dé Jèsús, te ní xáhaⁿ-dé:

—Mèstrú, yúhú ndihi dava-gá-güedé sa ñàha-ndí sá Yá Ndiöxí ní tendaraha ñàha-gá xii-n vèxi-n dànehé ñáhá-n xii-ndí, chí núu ñá túú Yá Ndiöxí ndécú ndihi-n, te vá ndácú-n càda-n nchaa sá vã yõo tñàhí ndàcu cada guide-n —cachí-dé xáhaⁿ-dè.

³ Te ní xáhaⁿ Jèsús:

—Na càchí tñúhu ndáá-í xii-n sã ncháá ñáyíu vá ná càcu saa tucu, te vá ndíhu ndaha ñàha Yá Ndiöxí xií-yu —càchí-gá xáhaⁿ-gã xii-dé.

⁴ Te ní xáhaⁿ tè Nicòdemú:

—¿Te nása cada ñíⁿ ñáyíu sa ní yí te cacu-ni tucú-yu? ¿Náa ndíhu tucú-yu xití nãñá-yu te cacu tucú-yu xito cùu uú-ãⁿ? —càchí-dé xáhaⁿ-dè xii-gá.

⁵ Te ní xáhaⁿ Jèsús:

—Na càchí tñúhu ndáá-í xii-n sã ncháa ñáyíu na nduu ndoo nduu nine iní-xi cuú-yu ñáyíu ní na càcu saa ndihi ndute ndihi Espiritú Yá Ndiöxí, ñáyíu-áⁿ ndíhu ndaha ñàha-gá xií-yu. ⁶ Te nchaa ñáyíu càcu ñuyíú-a, chí déhe ñáyíu ñuyíú-a cùú-yu. Te ñáyíu ní nduu ndoo ní nduu nine iní-xi, ñáyíu-áⁿ ní nduu tãhú-yu Espiritú Yá Ndiöxí te tàxi tñuní ñáhá-nã Espiritú-gá xií-yu. ⁷ Te vá cùñúhu-n tñúhu ní cáháⁿ-í-a, chí nchaa ñáyíu ní sándáá iní ñáhá xii-í ní nduu ndoo ní nduu nine iní-yu, te ñáyíu-áⁿ cùú-yu dàtná ñáyíu ní nacacu saa. ⁸ Táchí ndèni xiáⁿ tècú dóho-o xico-xi, dico ñá túú xiní-ó ndèè ichi vèxi-xi, te ní ñá túú xiní-ó ndèè ichi cuáháⁿ-xi. Ducaⁿ sãtnahá-xi cùu Espiritú-gá ndécú ndihi ñáyíu ní nduu ndoo ní nduu nine iní-xi —càchí-gá xáhaⁿ-gã xii-dé.

⁹ Te dātñuní ní xí cáⁿ tnúhú tùcu té Nicòdemú núú-gá, te xáhaⁿ-dě xii-gá:

—¿Te nása ndùu tnúhu càháⁿ-n dùcaⁿ caháⁿ-n? —càchí-dé xáhaⁿ-dě xii-gá.

¹⁰ Te ní xáhaⁿ Jèsús:

—Yòhó cúu-n ìⁿ tée cùtnuní iní-xi, chí dācuaha-n ñáyiú isràél, ¿te ñá tècú tnùní-n tnúhu càháⁿ-í-u? ¹¹ Te na càchí tnúhu ndáá-í xii-n sá nchúhú càháⁿ-ndí ìⁿ sá ní tecú tnùní-ndí, te càháⁿ ndáá-ndí cuendá ìⁿ sá ní xiní-ndí. Dico nchòhó ñá tècú tnùní-ndó tnúhu càháⁿ-ndí. ¹² Te ñá sàndáá iní-ndó tnúhu càháⁿ-í cuendá nchaa nācuáa cùu ñuyúú-a, te uuⁿ-gá cada-ndo núu càháⁿ-í cuendá nchaa nācuáa cùu andiú.

¹³ Vá yò ìⁿ sàá andiú, te cani-xi cuendú nācuáa càa. Chí ìⁿ dīi-ni yúhú véxi cuuⁿ-í andiú, te cùu-í ñani tnáhá-ndó nchaa-ndo ìⁿ nduu, ¹⁵ te ducaⁿ yáha-í cuendá nchaa ñáyiú na quindáá iní ñáhá xii-í te nduu táhú-yu cundecú-yu ndihí Yá Ndiòxí ní caa ní quíhíⁿ —càchí-gá xáhaⁿ-gá xii-dé.

Yá Ndiòxí ío cùu iní-gá ñáyiú ñuyúú-a

¹⁶ Te Yá Ndiòxí ío cùu iní-gá ñáyiú ñuyúú-a. Te ìⁿ dīi-ni Déhe-gá ndécú, te ní tendaha ñaha-gá ní quixi-gá ñuyúú-a, te núu na quindáá iní ñáhá ñáyiú, te vá cuíta nihnú-yu, chí nduu táhú-yu cundecú-yu ndihí-gá ní caa ní quíhíⁿ. ¹⁷ Te Yá Ndiòxí ñá túú ní tendaha-gá Déhe-gá quixi-gá ñuyúú-a dacuíta nihnu-gá ñáyiú, chí ní tendaha-gá Déhe-gá ní quixi-gá sá dáccu nihnu-gá ñáyiú ñuyúú-a núú ùhú núú ndàhú.

¹⁸ Nchaa ñáyiú sàndáá iní ñáhá xii Déhe-gá, te vá cuíta nihnú-yu. Te

nchaa ñáyiú ñá túú sàndáá iní ñáhá xii Déhe-gá ñùhú-yu ichi cuáháⁿ-yu núú ùhú núú ndàhú, chí ñá túú sàndáá iní-yu Déhe Dútú Ndiòxí. ¹⁹ Chí ní quixi Déhe-gá ñuyúú-a ní dándíxí túu-gá iní-yu cuendá cutnùní iní-yu nācuáa ndùu cuendá Yá Ndiòxí te tníⁿ-yu ìⁿ ichi váha ní cùu, te ñá ní tnáhá iní-yu, chí ní cudíí-gá iní-yu nchaa sá cuèhé sá dúhá dācúúxí sá vāha, núu xíáⁿ tá xíta nihnú-yu cuáháⁿ. ²⁰ Te nchaa ñáyiú quide nchaa sá cuèhé sá dúhá ñá tnáhá iní-yu cutnùní iní-yu nācuáa ndùu cuendá Yá Ndiòxí, te ñá tníⁿ-yu tnúhu-gá cuendá yùhú-yu nduu tnùní nchaa sá quidé-yu. ²¹ Te nchaa ñáyiú ñùhu ichi ndáá cùiní-yu cutnùní iní-yu nācuáa ndùu cuendá Yá Ndiòxí, te cùtnuní sá chindèe ñaha-gá xii-yu, chí quide váha-yu.

Té Juáá tée dācuandute ñaha xii ñáyiú càháⁿ váha tucu-dé cuendá Jèsús

²² Te sátá dúcáⁿ ní cuu, te ní quee Jèsús cuáháⁿ-gá ndihí cue tée xica cuu ndihí-gá distritú Júdeá. Te yàcáⁿ ní xíndecu tnaa-gá ndihí-güedé ní xóo dacuandute-güedé ñáyiú. ²³ Te ndècu té Juáá ìⁿ xichi núú nání Ènón yatni ñuú Sàlém dācuandute-dé ñáyiú, chí yàcáⁿ ío váha ñùhu ndute, núu xíáⁿ ní xóo quíhíⁿ ñáyiú yàcáⁿ ní xóo cuandute-yu. ²⁴ Duha ní cuu cùtnáhá vátá ngává-gá té Juáá vecaá.

²⁵ Te ní cacu ìⁿ cuendú ní càháⁿ cue tée xica cuu ndihí té Juáá ndihí ìⁿ úú cue tée isràél, núu ndèdacaà sá vāha-gá cada ñáyiú cuendá nduu ìⁿ-yu. ²⁶ Te ní sáháⁿ-güedé núú ndécú té Juáá ní xáhaⁿ-güedé:

—Mèstrú, tée ní quixi núú ní xíndecu-n ndàa ingá xio yúte Jòrdán, tée dīi cuendú-xi ní càháⁿ-n, tée-áⁿ dācuandute-dé tnáhá-dé ñáyiú. Te ío

vài ñáiyu ní chinchícúⁿ ñáhá xii-dé
—càchí-güedé xáhaⁿ-güedé xii-dé.

²⁷ Te ní xáhaⁿ tē Juáa:

—Te vá yõo ñⁿ ndácu cada ñⁿ chiuⁿ nacuaá cuu váha iní Yá Ndiõxí, te núu ñá túú mée-gá chindèe ñaha-gá xií-yu. ²⁸ Te nchòhó sa ñaha-ndo sá yúhú ní cáháⁿ ndáá-í sá ñà díú Crístú cúu-í, dico mee Yá Ndiõxí ní tendaha ñaha-gá yódó núu-í véxi núú Yáa-áⁿ. ²⁹ Te nchòhó xiní-ndó sá ñⁿ tée tnándaha te xíchí tnándaha ndihí-ná-dé cündihí-dé. Te tée ní xica ndáhú ïo cùdíí ñí-dé ndédóho-dé nchaa tnúhu càháⁿ tée tnándaha-áⁿ. Te ducaⁿ sátnahá-xi cúu yúhú, chi ïo cùdíí ñí-í sá vái ñáiyu ta chinchícúⁿ ñáhá xii Jesús cuáháⁿ. ³⁰ Te uuⁿ-gá cuita cuu vai ñáiyu cutnùní ñí-xi sá ïo cùnuu-gá, te yúhú cuita ndóo ndee-í quíhíⁿ —càchí-dé xáhaⁿ-dè xii-güedé.

Crístú véxi cuuⁿ-gá andïu

³¹ Te ñⁿdii díí-ni Crístú Yáá véxi cuuⁿ andïu cùnuu-gá núú ñuyíu-a. Te nchaa ñáiyu ndècu ñuyíu-a cúu-yu ñáiyu ñuyíu iha, te càháⁿ-yu sá cúu-xí ñuyíu-a. Dico Crístú Yáá véxi cuuⁿ andïu ³² càháⁿ-gá ñⁿ sá ñí xiní-gá, te càháⁿ-gá ñⁿ sá ñí tecu dóho-gá. Te ñá túú cuíni-yu quindáá ñí-yu tnúhu càháⁿ-gá. ³³ Te nchaa ñáiyu tnèi tnúhu càháⁿ Yáá véxi cuuⁿ andïu-áⁿ càháⁿ-yu sá tnúhu Yá Ndiõxí cúu-xí ñⁿ sá ndáa. ³⁴ Te Déhe-gá Yáá véxi cuuⁿ andïu càháⁿ-gá mee-ni tnúhu-gá. Te ñá ùhú ñí-gá ní sáñaha-gá Espíritú-gá ndécú ndihí Déhe-gá. ³⁵ Te Dútú Ndiõxí ïo cúu ñí-gá Déhe-gá, núu ní xáhaⁿ-gá sá mée-gá taxi tnùní-gá nchaandi túhú sá ïo. ³⁶ Te nchaa ñáiyu na quindáá ñí ñáhá xii Déhe-gá, ñáiyu-áⁿ cundecú-yu ndihí-gá ní caa ní quíhíⁿ. Te nchaa ñáiyu vá quindáá ñí ñáhá xii Déhe Yá Ndiõxí ïo dandòho ñaha-gá xií-yu.

4

Jèsús ndihí ñⁿ ñaha Sàmariá

¹ Te ní ñíhí cue tée cúu fariséú tnúhu sá vai-gá ñáiyu ta chinchícúⁿ ñáhá xii Jesús. Te ducaⁿ vai-gá-yu ta dácuañdute-gá cuáháⁿ dàcúúxí tē Juáa. ² Te cuēi ñá díú mée-gá dácuañdute ñaha-gá xií-yu, dico cue tée xica cuu ndihí-gá dácuañdute ñaha-güedé xií-yu. ³ Te ní ñíhí Jèsús tnúhu nácuaá càháⁿ cue tée cúu fariséú, núu ní ndee-gá distritú Jùdeá cuánuhú tucu-gá distritú Galileá.

⁴ Te ichi ñùhu-gá ní nayáha-gá distritú Sàmariá. ⁵ Te ní sáá-gá ñⁿ ñúu nání Sicár te ñúu-áⁿ yíndèhu-xi distritú Sàmariá. Te xíaⁿ cáá yàtni ñùhu núú ñí sáha táhú ndíi Jàcób déhe ndíi ndíi Chéé. ⁶ Te yàcáⁿ cáá dòco ní cuu cuendá ndíi Jàcób. Te cúu-xi datná cuádava nduu ñùhu Jesús ichi, te ïo ní xáu-gá núu ní sáá-gá yuhu dòco-áⁿ ní ngóo-gá ndétátú-gá. ⁷⁻⁸ Te ní xica cue tée xica cuu ndihí-gá cuáháⁿ-güedé xití ñúu Sicár cuánguaaⁿ-güedé sá cáxí-güedé. Te yuhu dòco-áⁿ núcõo-gá ní sáá ñⁿ ñadìhí ñaha distritú Sàmariá véxi quéhnu-aⁿ ndute, te ní xáhaⁿ Jèsús:

—Taxi táhú luha ndute na cohó-í —càchí-gá xáhaⁿ-gá.

⁹ Te ní xáhaⁿ ñadìhí-áⁿ:

—¿Ná cuendá da núu-í xicáⁿ-n ndute cohó-n? Te yòhó cúu-n tē israél, te yúhú cúu-í ñaha Sàmariá —càchí-aⁿ xáhaⁿ-aⁿ xii-gá.

Te ducaⁿ ñí xáhaⁿ-aⁿ, chi ñá túú ndècu váha ñáiyu israél ndihí ñáiyu distritú Sàmariá. ¹⁰ Te ní xáhaⁿ Jesús xii-aⁿ:

—Ñá cútñùní ñí-n nã taxi Yá Ndiõxí xii-n, te ní ñá cútñùní ñí-n yòo xicáⁿ ndute núu-n. Te núu dicó xini-n yòo cuu yúhú á, te da mee-n cãcáⁿ-n ndute núu-í cohó-n, te yúhú taxi-í ndute cundecu ndihí-n núu cuáháⁿ núu véxi —càchí-gá xáhaⁿ-gá.

11 Te ní xáhaⁿ tùcu ñadihí-án:

—Tátá, ñí sá quèhnu-n ndùte ñá túú nèhe-n, te doco-a cùnú víhí, te ñá túú ndèe quíngueheⁿ-n ndùte taxi-n coho-í. 12 Ndíi Jàcób ñaní tñáhá-ndí ní xíndecu ndèe sanaha ñí cadúha ndíi doco-a ñí tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnù-gá-n dàcúúxí ndíi-án? — cächí-aⁿ xáhaⁿ-aⁿ xì-gá.

13 Te ní xáhaⁿ Jèsús:

—Nchaa ñáyíu xihí ndute doco-a, te vá cúú vétú dúcáⁿ iní-yu chí dayìchí ñáhá-ní tùcu-xi ndute-a. 14 Dico nchaa ñáyíu na còho ndute na cuáñaha-í, te vá ñíⁿ ndùu-gá dayìchí ñáhá-xí ndùte-áⁿ xii-yu, chí ndute cuáñaha-í cúú-xí ndùte váha-gá. Te dàtná quée ñihí ndute xití doco-a, nchaa-ni nduu ñùhu ñá túú yìchí, ducaⁿ sàtnahá-xi cada-xi chí candeca-xi iní-yu ñí caa ñí quíhíⁿ, te núu na còhó-yu ndute cuáñaha yùhú —cächí-gá xáhaⁿ-gá xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vâ dáyìchí ñáhá tñáhí-gá-xi ndute. Te vá quíxí-gá-í quixí quèhnu-í ndute doco-a — cächí-aⁿ xáhaⁿ-aⁿ xì-gá.

16 Te ní xáhaⁿ Jèsús:

—Cuáháⁿ cuángàna yìi-n, te quixi-ndo iha —cachí-gá xáhaⁿ-gá xii-aⁿ.

17 Te ní xáhaⁿ-aⁿ:

—Ñá túú yìi-í —cächí-aⁿ xáhaⁿ-aⁿ xì-gá.

Te ní xáhaⁿ tùcu Jèsús:

—Ndáá càháⁿ-n sá ñà túú yìi-n.

18 Dico ní cuu úhúⁿ tée càndeca-n, te tée ndèca-n vitna chí ñá díú yìi-n cuu-dé, te ndáá càháⁿ-n sá ñà túú yìi-n —cachí-gá xáhaⁿ-gá xii-aⁿ.

19 Te sá dúcáⁿ ñí xáhaⁿ-gá núu ní xáhaⁿ tùcu-aⁿ:

—Tátá, yúhú sání iní-í sá yòhó cúú-n ñíⁿ tée càháⁿ tnúhu Yá Ndiòxí. 20 Te cue ñaní tñáhá-ndí ní xíndecu

ndéé sanaha ñí xóo cada càhnú-yu Yá Ndiòxí tindúú-a, dico nchòhó ñáyíu isràél cächí-ndó sá ndéé ñúú Jerusalén cada càhnu-o-gá — cächí-aⁿ xáhaⁿ-aⁿ xì-gá.

21 Te ní xáhaⁿ Jèsús xii-aⁿ:

—Ñíⁿ tnúhu na càháⁿ-í-a, te quíndáá iní-n. Sa ta cùyatni sáá nduu sá ñà díú-gá mee-ni tindúú-a, te ñí ñà díú-gá mee-ni ñúú Jerusalén cada càhnu-ndo Tátá-ó Dütú Ndiòxí, chí ndèni ní cuu cada càhnu-ndo-gá. 22 Te nchòhó cue ñáyíu Sàmariá chí ñá cùtnuní iní-ndó ñá cúú sá quidé càhnu-ndo, dico nchúhú ñáyíu isràél, chí cùtnuní iní-ndí ná cúú sá quidé càhnu-ndí. Chí ñíⁿ tée isràél véxi-dé dàcácu nihnu-dé ñáyíu cuendá vá quíhíⁿ-yu núú ùhú núú ndàhú. 23 Te není vitna ngüita-yu cada càhnu ndisá-yu Tátá-ó Dütú Ndiòxí, te cadá-yu ñí yùhu ñí iní-yu sá cúú-xí-gá, chí mee-gá ducaⁿ cuíni-gá cadá-yu cada càhnú-yu-gá.

24 Te Yá Ndiòxí chí ñíⁿ espíritu cúú-gá. Te nchaa ñáyíu na càda cahnu ñaha, te cadá-yu ñí yùhu ñí iní-yu sá cúú-xí-gá te cadá-yu dàtná càháⁿ tnúhu-gá —cächí-gá xáhaⁿ-gá xii-aⁿ.

25 Te ní xáhaⁿ ñàdihí-án:

—Xiní-í sá quíxí tée cùu Mesías, tée cächí-güedé nání Cristú. Te tée-án ná sàa-dé, te cachí tnúhu ndáá-dé nàcuáa cuu —cächí-aⁿ xáhaⁿ-aⁿ xì-gá.

26 Te ní xáhaⁿ Jèsús:

—Díu tée-án cúú yùhú tée ndàtnúhu ndihí-n —cächí-gá xáhaⁿ-gá xii-aⁿ.

27 Te òrè-áⁿ ñí ndexio cue tée xica cuu ndihí-gá, te ní cuñúhu-güedé sá ndàtnúhu-gá ndihí ñadihí-án. Dico ñí ñíⁿ-güedé ñá ní xicáⁿ tnúhú-güedé núú-gá núu ná cuendú ndàtnúhu-gá ndihí ñadihí-án. 28 Ducaⁿ te ní dándóo ñadihí-án yoó ndute-aⁿ xíaⁿ, te ní xica-aⁿ cuánuhú-aⁿ ñúú

cútnühu-aⁿ ñáiyu cuendá Jèsús. ²⁹ Te ní xáhaⁿ-aⁿ:

—Chí nèhé ná quíhíⁿ-ó, chi quini-ndó ná cúú ñⁿ téé nùcúo yuhu dòco-ánⁿ núu ñá díú Crìstú Yáá ní tendaha Yá Ndiòxí véxi ñuyíu-a cùu-dé núu ní cáháⁿ ndáá-dé nàcuáa cùu ndecu-í —càchí-aⁿ xáhaⁿ-aⁿ xii-yu.

³⁰ Te sá ñí níhí ñáiyu ñuú-ánⁿ tnühu, xíáⁿ ní xicá-yu cuáháⁿ-yu. ³¹ Te òré vátá sáá-gá-yu xíáⁿ ní xáhaⁿ cuè téé xica cuu ndihi-gá xii-gá:

—Mèstrú, cudèhñu na cudehñu-o —cachí-güedé xáhaⁿ-güedé xii-gá.

³² Te ní xáhaⁿ-gá:

—Ndècu ñⁿ sá cáxi-í, ñⁿ sá ñà túú xini nchòhó —càchí-gá xáhaⁿ-gá xii-güedé.

³³ Te cue téé xica cuu ndihi-gá xitnaha-güedé:

—Váa íó ñáiyu ní quixi nehe sá ñí xexi-gá núu duha càháⁿ-gá —càchí-güedé xitnaha-güedé.

³⁴ Te ní xáhaⁿ-gá:

—Dàtná cùní-ndó cùu vétú iní-ó òré xéxi-ó, ducaⁿ cùu vétú iní-í quidè-í nchaa nàcuáa ní cáháⁿ Yá Ndiòxí Yáá ní tendaha ñaha xii-í véxi-í ñuyíu-a, te chiⁿ-gá ío cùdí iní-í dandihí-í. ³⁵ Te nchòhó càchí-ndó sá cùmání cùmí-gá yóó te cuu itú. Dico yúhú càchí-í sá cundehe-ndo ñáiyu-áⁿ, chi sa ndècu túha-yu, dàtná cúu-ná itú sá sà ní cuu-ná natahu-o cùu-yu, chi sa ndècu túha-ná-yu cundedóho-yu tnühu-í. ³⁶ Te dàtná cúú ñáiyu nàtahu itú chi sa cúhuⁿ yáhu-yu, ducaⁿ sàtnahá-xi cùu ñáiyu na càháⁿ tnühu-í, chi cuáñaha-í sá ndúú tãhú-yu na sáá nduu. Te nchaa ñáiyu na tnè tnühu-í te nduu tãhú-yu cundecu-í ndihí-yu ni caa ni quíhíⁿ. Te dàtná cúú ñáiyu ní chíhi tatá-xi, ndihí ñáiyu ní natahu itú-xi cùdí-ná iní-yu. Ducaⁿ sàtnahá-xi cùu ñáiyu na càháⁿ tnühu-í. ³⁷ Chi ndáá quée-xí nàcuáa cuáháⁿ ñⁿ cuendú sá càchí-xi: “Tucu téé ní chíhi tatá, te tucu téé ní

natahu”, duha cuáháⁿ cuendú-ánⁿ. ³⁸ Te yúhú tendaha ñaha-í xii-ndo quíhíⁿ-ndó cáháⁿ-ndó tnühu-í núu sá ní yáha-güedé ní cáháⁿ-güedé tnühu-í. Te nchòhó quíhíⁿ-ndó dicó-ná nduu cuendá-ndó chiⁿ-ánⁿ —càchí-gá xáhaⁿ-gá xii-güedé.

³⁹ Te ío cuéhé ñáiyu ñuú-ánⁿ ní xíndedóho-yu cuendú ní cani ñadihí-ánⁿ núu-yu sá Jèsús ní xáhaⁿ-gá nchaa nàcuáa quide-aⁿ, te xíáⁿ ío vai-yu ní sándáá iní-yu Jèsús. ⁴⁰ Te ní quexió-yu núu ndécú-gá, te ní cáháⁿ ndahú-yu núu-gá sá quéndó-gá ñuú-yu, núu xíáⁿ ní xíndecu-gá ndihí-yu úu nduu. ⁴¹ Te ío cuéhé-gá-yu ní sándáá iní-yu tnühu ní cáháⁿ mée-gá. ⁴² Te ní xáháⁿ-yu xii ñadihí-ánⁿ:

—Vitna te ñá díú mèe-ni tnühu ní cáháⁿ-n ní sándáá iní-ndí-gá, chi ní cáháⁿ mée-gá ní xíndedóho-ndí vitna núu ní sándáá ndisa iní-ndí sá díú-gá cúu-gá Crìstú Yáá ní tendaha Yá Ndiòxí véxi ñuyíu-a dàcácu nihnu-gá ñáiyu núu ùhú núu ndàhú —càchí-yu xáháⁿ-yu xii-aⁿ.

Jèsús quidé tãtna-gá déhe ñⁿ téé ndèé chíúⁿ núu gobiernú

⁴³ Te nduu úní ní nucúhuⁿ Jèsús ichi cuáháⁿ-gá distritú Galiléa. ⁴⁴ Te cuáháⁿ-gá yacáⁿ, chi mee-gá ní cachí-gá sá núu ñⁿ téé na càháⁿ-dé tnühu Yá Ndiòxí ñuú núu ní cacu-dé, te ñá túú nèhé-yu sá yíñühu núu-dé. ⁴⁵ Te òré ní sáá-gá distritú Galiléa, te ío váha ní cuu iní ñáhá-yu xii-gá, chi cuendá tnàhá-yu ní xíndecu ndihí-gá vico pascuá ñuú Jerusalén. Te yacáⁿ ní xini-yu nchaa sá ñí quide-gá.

⁴⁶ Te ní sáháⁿ tucu-gá ñuú Cànaá ñⁿ ñuú yíndèhu distritú Galiléa, núu ñí nadatiu-gá ndute ní nduu-xi vñú. Te ñuú Capèrnaúm ndécú ñⁿ téé ndèé chíúⁿ núu tée cùu gobiernú, te téé-ánⁿ cùhú ñⁿ déhe-dé. ⁴⁷ Te ní níhí-dé tnühu sá ñí ndee Jèsús distritú Júdeá ní ndexió-gá

distritú Galileá, núu ní sáháⁿ-dé núu ndécú-gá, te ní cáháⁿ ndáhú-dé núu-gá sá quihíⁿ-gá cada tátna-gá déhe-dé, chi sá ndècu-na-dé sá cúú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quìndáá ini ñáhá-ndó xii-í te núu vá cáda-í ìⁿ sá vâ yòo tnahí ndàcu cada quini-ndó —càchí-gá xáhaⁿ-gá xii-dé.

⁴⁹ Te ní xáhaⁿ tùcu téé cùhú déhe-xi-áⁿ xii-gá:

—Tátá, cundee ìní-n ná quihíⁿ-ni-o càda tátna-n dèhe-í ná cuu-dé, chi càhú víhí tnahá-dé —càchí-dé xáhaⁿ-dè xii-gá.

⁵⁰ Te ní xáhaⁿ Jèsús:

—Cuanùhú te quini-n nã ní ndúha déhe-n —càchí-gá xáhaⁿ-gá xii-dé.

Te ní sándáá iní-dé tñúhu ní cáháⁿ Jèsús, te cuánuhú-dé. ⁵¹ Te ñúhu-dé ichi cuánuhú-dé ní sánú tnahá ñáhá cuè téé xinu cuechi núú-dé. Te ní xáhaⁿ-güedé sá sá ta ndúha déhe-dé cuáháⁿ.

⁵² Te ní xicáⁿ tñuhú-dé núu-güedé ná òré cúú-xí ní ngüíta-xi ta quétaú cuéhé-dé. Te ní xáhaⁿ-güedé:

—Icu dàtná òré caá ìⁿ sacuaa ní nchíco-dé cahni —càchí-güedé xáhaⁿ-güedé xii-dé.

⁵³ Te tátá téé cùhú-áⁿ ní ndacu iní-dé sá díú òré ní quétaú cuéhé-dé ní cáháⁿ ndihí-dé Jèsús ní xáhaⁿ-gá sá ndúha déhe-dé. Te xiáⁿ núu ndi nchaa téé-áⁿ vehe-dé ní sándáá ini-yu Jèsús.

⁵⁴ Te sá ní quide-gá-áⁿ cúú ùú xito quide-gá sá vâ yòo tnahí ndàcu cada. Te sá ní quide-gá xito cùu uú-áⁿ cúú-xí sá ní quide-gá cútnáhá ní ndee-gá distritú Jüdeá cuánuhú-gá distritú Galileá.

5

Jèsús quidé tátna-gá ìⁿ téé cùhú ìⁿ xichi núú nání Bètesdá

¹ Te sáta dúcáⁿ ní cuu, te ní tnahá nduu ní quide ñáyiu israhél ìⁿ vico. Te ní sáháⁿ Jèsús ñúú Jerusalén. ² Te ní càa xico yuhu ñúú-áⁿ ñúhú dòco, te titní yèhe-xi ndecu. Te

ìⁿ yèhe-xi-áⁿ nání Yùyehe Mbéé, te yatni xiáⁿ caá ìⁿ tanquí ndute dàna-ni-yu Bètesdá tñúhu mèe-yu tñúhu hèbreú, te yuhu tànquí-áⁿ caá ùhúⁿ corrèdór, ³ Te xití corrèdór-áⁿ xindecu cuéhé ñáyiu cùhú, ñáyiu cuáá, ñáyiu yacua, ñáyiu ñá cúú-gá candá nihnu, ndètú-yu candá ndute-áⁿ. ⁴ Chi nihí-yu tñúhu sá áma nihnu cùuⁿ ìⁿ espíritú xínú cuèchi núú Yã Ndiòxí, te dàcandá-xi ndute ñúhu tanquí-áⁿ. Te ñáyiu díhna nuu nà quée xití ndute-áⁿ, te òré-ni ndúha-yu. ⁵ Te yacáⁿ ñútnáhá ìⁿ téé ní cuu ócò sáhúⁿ úní cuíá sã cùhú-dé. ⁶ Te ní xini Jèsús caá-dé, te ní cutnùní ini-gá sá ní cuu cuéhé cuíá cùhú-dé, te ní xáhaⁿ-gá:

—¿Cuíní-n ndúha-n-áⁿ? —càchí-gá xáhaⁿ-gá xii-dé.

⁷ Te ní xáhaⁿ téé cùhú-áⁿ:

—Táta, vá yòo nihí-í dàquée ñaha xii-í xití tànquí-a òré càndá ndute, chi òré cuíní-í quée-í, te ingá-ni tucú-yu quèndúu-yu núú-í cuángueé-yu —càchí-dé xáhaⁿ-dè xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gá xii-dé.

⁹ Te òré-ni-áⁿ ní ndúha téé cùhú-áⁿ, te ní ndaca-ni-dé yuu-dé, te ní xica-dé cuáháⁿ-dé. Te nduu-áⁿ cúú-xí nduu ndetatú ñáyiu, ¹⁰ núu ní xáhaⁿ cuè téé israhél xii téé ní cùhu-áⁿ:

—Vitna cùu-xi nduu ndetatú-ó núu vá cúú cuído-n yuu-n —cachí-güedé xáhaⁿ-güedé xii-dé.

¹¹ Te ní xáhaⁿ-dè:

—Mee téé ní quide tátna ñaha xii-í ní cachí-dé sá ndácàni-í yuu-í, te caca-í —càchí-dé xáhaⁿ-dè xii-güedé.

¹² Te ní xáhaⁿ-güedé:

—¿Te ná cúú téé ducaⁿ ní cachí sá ndácàni-n yuu-n te caca-n-í? —càchí-güedé xáhaⁿ-güedé xii-dé.

¹³ Dico téé ní cùhú-áⁿ ñá túú ní cutnùní iní-dé ná cúú téé ní quide tátna ñaha xii-dé, chi Jèsús òré-ni ní xica-gá cuáháⁿ-gá tnuú nchaa ñáyiu

chitu xĩndecu xíaⁿ. ¹⁴ Te sáta dúcáⁿ te ní naníhí tnáhá Jèsús ndíhi téé ní quide tátna-gá-áⁿ xití veñũhu càhnu sá ïo cũnuu, te ní xáhaⁿ-gã xii-dé:

—Ní xiní-n nã ní ndũha-n-va. Te vitna vá cáda-gã-n nãndi sá cuèhé sá dúhá, chi núu na cáda-ni-n ña, te quixi ingá cuèhé, te vihi-gã ndoho-n —càchí-gá xáhaⁿ-gã xii-dé.

¹⁵ Ducaⁿ te ní xica téé ní cuhú-áⁿ cuãngũñaha-dé xii cue téé isràél sá Jèsús ní quide tátna ñaha-gã xii-dé. ¹⁶ Núu sáta ní níhí cue téé isràél tnũhu, te ní cuu úhú iní-güedé Jèsús. Te ní cuiní-güedé cahni ñaha-güedé xii-gá cuendá sá dúcáⁿ ní quide tátna-gá nduu ndetàtú-güedé. ¹⁷ Te ní xáhaⁿ Jèsús xii-güedé:

—Tãtã-í Dútú Ndiõxí quidé chiuⁿ-ni-gá nõu xíaⁿ quidé chiuⁿ-í tnàhá-í —càchí-gá xáhaⁿ-gã xii-güedé.

¹⁸ Te ní cudééⁿ-güedé sá ñã ní cãnehe íi-gã nduu ndetàtú-güedé, te ní cuiní-güedé cahni ñaha-güedé, te uuⁿ-gá ní cuiní-güedé cahni ñaha-güedé xii-gá sá ní cachí-gá sá Tãtã-gã cúu Dútú Ndiõxí, chi ní sani iní-güedé sá cuiní-gá nútnahá-gá Yã Ndiõxí nõu xíaⁿ ïo ní cudééⁿ-güedé.

Jèsús Déhe Yã Ndiõxí táxi tnùní-gá

¹⁹ Te ní xáhaⁿ tùcu Jèsús xii-güedé:

—Na càchí tnũhu ndáá-í xii-ndo sá yũhú chi ni ñⁿ sá ñã ndácù-í cada mee-í nõu ñã túú mèe Tãtã-í dánèhé ñáhã-gã xii-í nãcuáa cada-í, chi nchaa sá quidé Tãtã-í quidè-í tnàhá-í. ²⁰ Te Tãtã-í ïo cũu iní ñáhã-gã xii-í nõu dánèhé ñáhã-gã nchaa nãcuáa quide-gá. Te vitna ndècu vai-gá chiuⁿ tahu-gá cada-í, chiuⁿ sá vãtã quiní-gã-ndó cáda-í nãcuáa cuñũhu vihi-ndo. ²¹ Chi Tãtã-í dandòto-gã ñãyiu ní xihí. Te yũhú cada-í te nduu táhú nchaa ñãyiu càchí iní-í cundecu ndíhi ñáhã-yu xii-í ni caa ni quihíⁿ.

²² Te na sãá nduu te ñã díú Tãtã-í cada ndáá-gã cuèchi ñãyiu, chi ní cachí-gá sá yũhú cada ndáá-í ²³ cuendá nchaa ñãyiu canehé-yu

sá yĩñũhu núu-í dàtná nèhẽ-yu sá yĩñũhu núu Tãtã-í Yáá ní tendaha ñaha xii-í véxi-í ñuyíú-a. Te nchaa ñãyiu ñã túú nèhe sá yĩñũhu núu yũhú, te ni nõú Tãtã-í ñã túú nèhé-yu sá yĩñũhu.

²⁴ Te na càchí tnũhu ndáá-í xii-ndo sã nchaa ñãyiu na cundedóho tnũhu na càháⁿ-í, te núu na quindáá iní-yu Dútú Ndiõxí Yáá ní tendaha ñaha xii-í véxi-í ñuyíú-a ña, te vá cuíta nihnú-yu chi nduu táhũ-yu cundecú-yu ndíhi-gã ni caa ni quihíⁿ. ²⁵ Te vitna na càchí tnũhu ndáá-í xii-ndo sã nchaa ñãyiu ndècu ichi cuèhé ichi duha cùu-yu dàtná ñⁿ ñãyiu ní xihí, te vitna ní sãá nduu cundedóho-yu tnũhu càháⁿ yũhú Déhe Dútú Ndiõxí, te nchaa ñãyiu na quindáá iní-xi, te naníhí tàhú-yu. ²⁶ Te dàtná quidé mèe Tãtã-í dácãcu nihnu-gã ñãyiu, ducaⁿ ní cachí-gá cada-í dácãcu nihnu-í-yu. ²⁷ Te ní cachí-tucu-gá sá sãá ñⁿ nduu, te cada ndáá-í cuèchi nchaa ñãyiu ñã túú quide ndáá, chi yũhú táxi tnùní-í, te cùu-í ñani tnáhã-ndó nchãa-ndo. ²⁸ Te ni vã cũñũhu-ndo tnũhu càháⁿ-í, chi sãá nduu te nchaa ñãyiu ní xihí tecú dóho-yu tnũhu càháⁿ-í. ²⁹ Te ndoto nchaa ñãyiu ní quide váha cundecu ndíhi-í-yu ni caa ni quihíⁿ, te ndoto tnàhá nchaa ñãyiu ní quide cuèhé ní quide duha, te ñãyiu-áⁿ quihíⁿ-yu núu ùhú núu ndàhú.

Yã Ndiõxí chindèe tnũhu-gá Jèsús

³⁰ Te yũhú, chi ni ñⁿ sá ñã ndácù-í cada mee-í nõu ñã díú mèe Yã Ndiõxí táuchiuⁿ-gã nãcuáa cada-í. Te quide ndáá-í cuèchi ñãyiu nãcuáa tàxi tnuní-gã cada-í, te yũhú ñã túú quide-í sá cúu iní mèe-í chi Tãtã-í ní táuchíuⁿ-gã nãcuáa cada-í. ³¹ Te núu na càháⁿ-í sã mèe-í táxi tnùní-í, te vá quindáá iní-ndó. ³² Chi Yã Ndiõxí chindèe tnũhu ñaha-gã xii-í, te yũhú xìní-í sá tnũhu càháⁿ-gã cuendá-í cúu-xí ñⁿ sã ndáá. ³³ Te

nchòhó ní téchíúⁿ-ndó cuè téé ní sáháⁿ ní ndúcuⁿ tnúhu-güedé núú tē Juàá nūu ná tnúhu cáháⁿ-dé cuendá-í, te téé-ǎⁿ ní cáháⁿ ndáá-dé nàcuáa ndùu cuendá-í. ³⁴ Dico yúhú, chí ñá túú xini ñuhu-í-íⁿ ñáyíu ñuyíú-a chindee tnúhu ñáhá-yu xii-í, dico té Juàá ní cáháⁿ váha-dé cuendá-í, te xiǎⁿ càchí tnúhu tucu-í cuendá quíndáá iní-ndó, te naníhí tǎhú-ndó. ³⁵ Te dàtná cuíní-ndó cùu íⁿ ití ndéñuhú te dáyehé-xi, ducaⁿ sǎtnahá-xi ní cuu té Juàá, chí sacú-ni nduu ío ní cudíⁿ iní-ndó tnúhu ní cáháⁿ-dé. ³⁶ Te váha-ni ní cáháⁿ té Juàá, dico yúhú chí ndècu nchaa sá tá quíde-í véxi nàcuáa ní táuchíúⁿ Yǎ Ndiòxí cada-í, te nchaa xiǎⁿ cúu-xi íⁿ sá cùtnùní iní-ndó sá méé Yǎ Ndiòxí ní tendaha ñaha-gá xii-í véxi-í ñuyíú-a. ³⁷ Te ñu-ni-gá chíndèe tnúhu ñaha-gá xii-í, dicó-ni sá méé-ndó ñá túú cuíní-ndó càda cuendá-ndó tnúhu cáháⁿ-gá, te ní ñá túú xini-ndó nàcuáa càa-gá. ³⁸ Te ñá túú quèe iní nchòhó tnúhu càháⁿ-gá, chí ñá túú sàndáá iní ñáhá-ndó xii yúhú Déhe-gá. ³⁹ Te dàcuaha vihi-ndo tutú ndèe tnúhu-gá, chí sàni iní-ndó sǎ xiǎⁿ-ni dacuàha-ndo te naníhí tǎhú-ndó. Te váha-ni quíde-ndo, chí ñu tutú-ánⁿ càháⁿ-xi cuendá-í. ⁴⁰ Te nchòhó ñá túú cuíní-ndó quíndáá iní ñáhá-ndó xii-í cuendá naníhí tǎhú-ndó.

⁴¹ Te yúhú, ñá túú xini ñuhu-í sá cáda càhnu ñaha-ndo xii-í. ⁴² Dico sá xini-í nàcuáa sàni iní-ndó chí ñá túú cùu iní-ndó Yǎ Ndiòxí. ⁴³ Te yúhú véxi-í ñuyíú-a chí Tǎtà-í ní tendaha ñaha-gá, te nchòhó ñá túú cuíní-ndó tnìⁿ-ndo tnúhu cáháⁿ-í, dico núu quixi íⁿ tée cáháⁿ cuendá méé-xi, chí quíndáá iní-ndó. ⁴⁴ Te ná váha nchòhó ná tnìⁿ-ndó tnúhu càháⁿ-í, te xio xio-ni quíde cahnu tnaha-ndo, te ñá túú quíde cuendá-ndó sǎ tnúhu váha càháⁿ Yǎ Ndiòxí cuu xii-ndo. ⁴⁵ Te vá cání iní-ndó sǎ yúhú ndàcáⁿ cuéchi-í núú Tǎtà-í nàcuáa quíde-ndo, chí ndí Moisés

ní chídó tnùní ndíi núú tütú Yǎ Ndiòxí nàcuáa quíde-ndo sá ñá túú quíde váha-ndo, te mee-ndo sàni iní-ndó sǎ naníhí tǎhú-ndó cuendá tnúhu ní cáháⁿ ndíi. ⁴⁶ Chí núu nchòhó sàndáá ndisa iní-ndó tnúhu ní cáháⁿ ndíi Moisés ñá, te ducaⁿ te quíndáá iní-ndó yúhú ní cùu, chí ndíi-ǎⁿ ní chídó tnùní ndíi nàcuáa cada-í ñuyíú-a vitna. ⁴⁷ Te núu ñá túú sàndáá iní-ndó tnúhu ní chídó tnùní ndíi, te ñu-ni ducaⁿ càda ñaha-ndo xii-í vá quíndáá iní-ndó tnúhu càháⁿ-í —càchí-gá xáhaⁿ-gá xii-güedé.

6

Jèsús dácaxi-gá úhúⁿ mǐ ñáyíu

(Mt. 14:13-21; Mr. 6:30-44; Lc. 9:10-17)

¹ Te sáta dúcáⁿ ñí cuu, te ní quee Jèsús cuáháⁿ-gá ingá xio yuhu làgúná Galileá, àdi Tiberiás chí úú ñu-xi. ² Te ío cuéhé ñáyíu nchícúⁿ ñáhá xii-gá cuáháⁿ cuendá sá ñí xini-yu nchaa sá vǎ yòo tnàhí ndàcu cada ní quíde-gá, chí ní quíde tátna-gá nchaa ñáyíu cùhú. ³ Te ní sáa Jèsús ndíhi cue téé xica cuu ndíhi-gá íⁿ núú tìndúú, te xiǎⁿ ñí ngóo-gá ndíhi-güedé. ⁴ Te ta cùyatni coo vico pascuá, vico quíde ñáyíu isràél. ⁵ Te ní xini-gá sá ío vǎi ñáyíu nchícúⁿ ñáhá xii-gá cuáháⁿ, te ní xáhaⁿ-gá xii té Lìpé:

—¿Ndèe quíhíⁿ-ó quínguaaⁿ-o sǎ cǎxí nchàa ñáyíu-a? —càchí-gá xáhaⁿ-gá xii-dé.

⁶ Te ducaⁿ ñí xáhaⁿ-gá xii-dé cuendá sá cuíní-gá quini-gá nása cunduu tnúhu cáháⁿ-dé, dico mee-gá sá xini-gá nàcuáa cada-gá. ⁷ Te ní xáhaⁿ té Lìpé xii-gá:

—Te cuéi úú cièndú díhúⁿ denariú ná dàndoñuhu-o cuaaⁿ-o paá, te ní vǎ tnàhá caxi-yu luha luha —càchí-dé xáhaⁿ-dè xii-gá.

⁸ Te té Ndríxí ingá téé xica cuu ndíhi-gá, ñani té Ximú, àdi Pelú chí úú ñu-dé, ní xáhaⁿ-dè:

⁹ —Iha ndècu íⁿ té líhli nèhe-dé úhúⁿ pǎa cebàdá te úú chácá, dico

ndéé tnahá xéhé, te cuéhé víhí ñáyi
—càchí-dé xáhaⁿ-dè xii-gá.

¹⁰ Te ní xáhaⁿ Jèsús xii-güedé:

—Chí cūñaha nà ngóo-yu
nchaá-yu —càchí-gá xáhaⁿ-gá.

Te ñáyi-áⁿ ní ngóo-yu, te cãa vihi
ité núú ní ngóo-yu-áⁿ, te xínu dàtná
úhúⁿ mĩ mee-ni cuè téé, te ðìⁿ ñáyi
dihí ndihí landú. ¹¹ Te ní queheⁿ
Jèsús pãá, te ní ndacáⁿ táhú-gã
núú Yã Ndiõxí, te ní sãñaha-gã
pãá-áⁿ xii cue téé xica cuu ndihí-gá,
te cue téé-áⁿ ní dácãhñu-güedé ní
xexi nchaa ñáyi xixúcu-áⁿ. Te
diu-ni ducaⁿ ní quide-gá chácá, te
ní dácãhñu tucu-güedé-di ní xexi
ñáyi ní ndahá xití-yu. ¹² Te òré
ní túhú cóhó-yu, te ní xáhaⁿ Jèsús
xii cue téé xica cuu ndihí-gá sá
ná nãqueheⁿ-güedé nchaa sá ní
quendóo cuendá sá vã quihíⁿ-xi núú
mihí.

¹³ Te cue téé-ãⁿ ní naqueheⁿ-güedé
nchaa sá ní quendóo, te ní chítú
ùxúú tídihí núú úhúⁿ-ni pãá
cebádá. ¹⁴ Te sá ní xiní-yu ní
nadacáyá-gá sá ní xexi-yu, xiãⁿ ní
ngúíta-yu ní xitnãhá-yu:

—Ndáá sá tẽ-a sa ió cuendú sá
quixí-dé ñuyíú-a cáháⁿ-dé tnúhu Yã
Ndiõxí —càchí-yu xitnãhá-yu.

¹⁵ Te ní cutnùní iní Jèsús sá
cádá yicá-yu candeca ñáhá-yu
xii-gá quihíⁿ cuendá cundecu-gá
quindaha ñaha-gá xií-yu ni cùu,
núú xiãⁿ ní xica tucu-gá cuáháⁿ-gá
xití yucu mee ðì chícúú-gá.

Jèsús xicá-gã núú ndute

(Mt. 14:22-27; Mr. 6:45-52)

¹⁶ Te òré ní cuu ndiquíⁿ, te cuáháⁿ
cue téé xica cuu ndihí-gá yuhu
làgúná. ¹⁷ Te ní quée-güedé bàrcú
cuáháⁿ-güedé ñuú Capernaúm cáá
ndaa ingá xio yuhu làgúná, te sa ní
cuu ndiquíⁿ, te ñã túú Jèsús quexìo
quée-gá bàrcú ñúhú-güedé-áⁿ. ¹⁸ Te
ní ngúíta-xi quène táchí ñihí, te
níhí dàcandau ndéé tnahá ndùte
làgúná-áⁿ. ¹⁹ Te sa ní cuu dàtná

úhúⁿ kilómetrú cuáháⁿ-güedé, te ní
xiní-güedé Jèsús tá cùyatni-gá bàrcú
ñúhú-güedé véxi-gá núú nduté, te
ní yùhú-güedé. ²⁰ Te ní xáhaⁿ Jèsús
xii-güedé:

—Yúhú véxi-í, vá yùhú-ndó —
càchí-gá xáhaⁿ-gã xii-güedé.

²¹ Te ío ní cudíí iní-güedé sá ní
quexìo-gá cuánguee-gã bàrcú, te
òré-ni ní quexìo-güedé ndihí-gá
ndéé ingá xio yuhu làgúná núú
cuáháⁿ-güedé.

Ñáyi nãnducu ñaha xii Jèsús

²² Te ingá nduu-ãⁿ xĩndecu-ni
nchaa ñáyi ní quendóo yuhu
làgúná. Te ní quide cuendá-yu
sá ñⁿ ðì-ná bàrcú nùtnã-áⁿ ní cùu
ñã túú-gã, chí cue téé xica cuu
ndihí Jèsús ní quée-güedé bàrcú-áⁿ
cuáháⁿ-güedé. Te ní níhí-yu tnúhu
sá ñã túú ní quée tnahá Jèsús.
²³ Te diu-ni nduu-ãⁿ ní quée ñⁿ úú
bàrcú ñuú Tiberiás ní sáá-xi yatni
núú ní xexi-yu pãá sá ní ndacáⁿ
táhu Jèsús núú Yã Ndiõxí. ²⁴ Te ní
xiní-yu sá ñã túú Jèsús ndihí cue téé
xica cuu ndihí-gá, núu ní quée-yu
bàrcú-áⁿ cuáháⁿ-yu ñuú Capernaúm
cuánúndúcú ñáhá-yu xii-gá.

Jèsús cúú-gã dàtná ñⁿ sá nchító-ó

²⁵ Te ní sáá-yu ingá xio yuhu
làgúná, xiãⁿ ní naníhí-yu Jèsús, te ní
xãháⁿ-yu xii-gá:

—Mèstrú, ¿ná òré ní sáá-n ìha? —
cachí-yu xãháⁿ-yu xii-gá.

²⁶ Te ní xáhaⁿ Jèsús:

—Na càchí tnúhu ndáá-í sá
nchòhó nãnducu ñaha-ndo xii-í
cuendá-ni sá ní xexi-ndo ní ndahá
xití-ndó, dico ñã díú cuendá sá
ní quide-í sá vã yõo tnahí ndàcu
cada nanducu ñaha-ndo. ²⁷ Te
vá cáda cuendá-ndó sá mée-ní sá
cáxi-ndó cáda chiuⁿ-ndo chí xiãⁿ
vá cúdí-xí. Chí ío-gá xíní ñúhu-xi
cada cuendá-ndó tnúhu Yã Ndiõxí
te tní-ndo, te naníhí táhú-ndó. Te
tnúhu-áⁿ cachí tnúhu yúhú Téé cùu
ñani tnahá-ndó nchaa-ndo, te xiãⁿ
candeca-xi iní-ndó nì caa ní quihíⁿ,

chi mee Dütú Ndiöxí ní cachí-gá sá dúcáⁿ cada-í —càchí-gá xáhaⁿ-gá xii-yu.

²⁸ Te ní xáhaⁿ-yu:

—¿Nása cada-ndí cuendá ngúnu ichi-ndí nàcuáa cuení Yá Ndiöxí cundu-í? —càchí-yu xáhaⁿ-yu xii-gá.

²⁹ Te ní xáhaⁿ Jèsús xii-yu:

—Yá Ndiöxí cuení-gá sá quindáá iní ñhá-ndó xii yúhú, téé ní tendaha-gá véxi ñuyú-a —càchí-gá xáhaⁿ-gá xii-yu.

³⁰ Te ní xáhaⁿ tùcú-yu xii-gá:

—¿Ná cúu sá vǎ yǒo tnàhí ndàcu cada, cada-n cundehe-ndí cuendá quindáá iní ñhá-ndí xii-n-í? ¿Ádi nágá cúu sá cáda-n cuendá cutnùní iní-ndí sá ndàà càháⁿ-n-í? ³¹ Chi cue ñaní tnàhá-ó ní xindecu ndéé sanaha ñí xexí-yu pàa nání mánáá xití yucu dàtná yódó tnùní núu tùtú Yá Ndiöxí núu càchí-xi: “Yá Ndiöxí ní sáñaha-gá sá ñí xexí-yu, te ní cuuⁿ tùu-xi andiu”, duha càchí-xi núu tùtú-gá —càchí-yu xáhaⁿ-yu xii-gá.

³² Te ní xáhaⁿ Jèsús:

—Na càchí tnúhu ndáá-í xii-ndo sá ñà díú ndíi Moisés ní sáñaha ndíi pàa ní cuuⁿ andiu ní xexí-yu, chi mee Tàtá-í ní sáñaha-gá sá ñí xexí-yu. Te sá táxí-gá vitna cùu-xi ³³ datná pàa véxi cuuⁿ andiu càndeca-xi iní-ndó ñí caa ñí quíhíⁿ —càchí-gá xáhaⁿ-gá xii-yu.

³⁴ Te ní xáhaⁿ-yu xii-gá:

—Tàtá, mee-ñí pàa-áⁿ taxi-n càxi-ndí —càchí-yu xáhaⁿ-yu xii-gá.

³⁵ Te ní xáhaⁿ Jèsús:

—Yúhú cúu-í dàtnáⁿ sá xexí-ndó càndeca-xi iní-ndó. Te duha ndúu tnúhu càháⁿ-í, chi nchaa ñáyiu na quindáá iní ñhá-xi-í, te vá ndóhó-gá-yu docó te vá ndóhó-gá-yu ndute. ³⁶ Dicó-ñí sá nchòhó ñá túu sàndáá iní ñhá-ndó cueí xini ñhá-ndó xii-í. ³⁷ Te nchaa ñáyiu na càchí Tàtá-í nduu cuendá-í nasaá-yu núu-í, te ñáyiu-áⁿ vǎ dáquèè tíhù-í-yu. ³⁸ Te ñá díú

yúhú sá véxi cuuⁿ-í andiu te quide-í nchaa sá cúu iní mee-í, chi véxi cuuⁿ-í sá cáda-í nchaa nàcuáa ní táuchíuⁿ mee Tàtá-í Dütú Ndiöxí Yá ní tendaha ñàha xii-í véxi-í ñuyú-a. ³⁹ Te cuení-gá sá ncháá ñáyiu ní cachí-gá nduu cuendá-í vá dáña-í-yu cuíta nihnú-yu, te na sáá nduu te ñu-ñí dandòto-í-yu. ⁴⁰ Chi ducaⁿ ñí cachí Dütú Ndiöxí cunduu sá ncháá ñáyiu na tníi tnúhu càháⁿ-í, te quindáá ndisa iní ñhá-yu xii yúhú Déhe-gá, te nduu táhù-yu cundecú-yu ndíhi Yá Ndiöxí ñí caa ñí quíhíⁿ, te yúhú dandòto-í-yu na sáá nduu —càchí-gá xáhaⁿ-gá xii-yu.

⁴¹ Te ñá ñí tnàhá iní ñáyiu israél tnúhu ní càháⁿ Jèsús nñu ní ngúita-yu ní càháⁿ cuèhé-yu cuendá-gá cuendá sá ñí xáhaⁿ-gá sá mee-gá cúu-gá dàtná sá xexí-ó véxi cuuⁿ andiu. ⁴² Te ní xitnàhá-yu:

—¿Náa ñá díú tée-a cùu-dé Jèsús déhe té Chèé? Nchoo xini-ó tātá-dé, te xini-ó náná-dé, ñá cachí-tu tée-a sá andiu véxi cuuⁿ-dé! —càchí-yu xitnàhá-yu.

⁴³ Te ní xáhaⁿ Jèsús xii-yu:

—Vá càháⁿ cuèhé-gá-ndó cuendá-í, chí dáña. ⁴⁴ Vá yǒo quindáá iní ñhá-xi yúhú nñu ñá túu mee Tàtá-í táxí cuendá ñhá-gá xii-yu. Te ñu-gá ní tendaha ñàha-gá xii-í véxi-í, te yúhú dandòto-í-yu na sáá nduu. ⁴⁵ Te núu tùtú cue tée ní xóo càháⁿ tnúhu Yá Ndiöxí ndéé sanaha càchí-xi: “Yá Ndiöxí danèhé ñhá-gá xii-yu tnúhu-gá”, duha càchí-xi. Te nchaa ñáyiu na cùndedóho nchaa tnúhu càháⁿ Dütú Ndiöxí, te cutúha-yu nàcuáa càháⁿ-gá, te ñáyiu-áⁿ quindáá iní ñhá-yu xii yúhú.

⁴⁶ Te vá yǒo xini ñhá-xi Dütú Ndiöxí chi ñndi-ñí yúhú xini-í-gá, chi núu ndécú-gá ní quee-í véxi cuuⁿ-í —càchí-gá xáhaⁿ-gá xii-yu.

⁴⁷ Te xáhaⁿ tùcú-gá:

—Na càchí tnúhu ndáá-í xii-ndo sá nchaa ñáyiu na quindáá iní

ñáhá xii-í, te naníhí tǎhú-yu. ⁴⁸ Te yúhú cùu-í dàtná ìⁿ sá xéxí-ndó càndeca-xi iní-ndó, te ducaⁿ sǎtnahá-xi cùu-í chi yúhú cada-í te nduu tǎhú-ndó cùndecu-ndo ndihí Yá Ndióxi ní caa ní quíhíⁿ. ⁴⁹ Te cue ñaní tñáhá-ó ní xíndecu ndéé sanaha ní xexí-yu pǎá ñaní mànáá xití yucu, dico ní sáá nduu te dacuítí ní xíhí-yu. ⁵⁰⁻⁵¹ Te yúhú càháⁿ-í cuendá mèè-í, chi véxi cuuⁿ-í andiu. Te cùu-í dàtná ìⁿ sá nchító-ndó, te nchaa ñáyiu na càxi te candeca-xi iní-yu ní caa ní quíhíⁿ te vá cuíta nihnu-gá-yu. Te sá táxi-í xii-ndo xǎⁿ cúu-xí yiqui cuñú-í, te cùu-xi cuendá nchaa ñáyiu nihí ñuyíu cuendá nduu tǎhú-yu cundecú-yu ndihí Yá Ndióxi ní caa ní quíhíⁿ —càchí-gá xáhaⁿ-gǎ xii-yu.

⁵² Te ní nguíta ñáyiu israhél xitnàhá-yu:

—¿Nása cada-tu tée-a núu càchí-tu-dé sá yiqui cuñú-dé taxi-dé caxi-o-í? —càchí-yu xitnàhá-yu.

⁵³ Te ní xáhaⁿ Jèsús:

—Na càchí tñúhu ndáá-í xii-ndo sǎ núu na càda iní-ndó sǎ dàtná sá cǎxí-ndó yiqui cuñú yúhú Téé cùu ñaní tñáhá-ndó nchàa-ndo, te cada tuu iní-ndó sǎ dàtná sá cóhó-ndó níñi-í ñá, te xǎⁿ quéé-xí sǎ quíndáá iní ñáhá-ndó ní yuhu ní iní-ndó te naníhí tǎhú-ndó, te núu ñáhá te cuíta nihnu-ndo. ⁵⁴ Nchaa ñáyiu na càda iní-xi sá dàtná sá cǎxí-yu yiqui cuñú-í te cohó-yu níñi-í, ñáyiu-án naníhí tǎhú-yu te yúhú dandòto-í-yu na sáá nduu. ⁵⁵ Chi yiqui cuñú-í ndihí níñi-í cúu-xí mèè-í. ⁵⁶ Te nchaa ñáyiu na càda iní-xi sá dàtná sá cǎxí-yu yiqui cuñú-í te cohó-yu níñi-í, te ñáyiu-án ìⁿ-nǎ cuu-í ndihí-yu chi cundecu ndihí-í-yu. ⁵⁷ Te yúhú nchító-í chi ducaⁿ nchító Tǎtá-í Yá ní tendaha ñaha xii-í véxi-í ñuyíu-a. Te diu-ni ducaⁿ nchàa ñáyiu na quíndáá iní ñáhá xii-í te cundecu

ndihí-í-yu ní caa ní quíhíⁿ. ⁵⁸ Te yúhú cùu-í dàtná ìⁿ sá nchító-ndó véxi cuuⁿ andiu, dico ñá diú pǎá sá ñaní mànáá ní véxi cue ñaní tñáhá-ó ní xíndecu ndéé sanaha, chi ní xexí-yu pǎá te dacuéi ní xíhí-yu. Te nchaa ñáyiu na quíndáá iní ñáhá xii yúhú Yáá véxi cuuⁿ andiu, te cundecu ndihí-í-yu ní caa ní quíhíⁿ —càchí-gá xáhaⁿ-gǎ xii-yu.

⁵⁹ Nchaa tñúhu-a ní càháⁿ-gǎ xití veñúhu ñáyiu ñuú Capernaúm.

Jèsús càchí tñúhu-gǎ nàcuáa naníhí tǎhú-ó

⁶⁰ Te sá dúcǎⁿ ní càháⁿ-gǎ núu vai ñáyiu nchícúⁿ ñáhá xii-gǎ ní xitnàhá-yu:

—Vá tñí cuíti-o tñúhu càháⁿ-dé chi ñá diú tñúhu sá cúu vǎha iní-ó càháⁿ-dé —càchí-yu xitnàhá-yu.

⁶¹ Te ní cutnùni iní Jèsús sá ñà túu càháⁿ vǎha-yu cuendá tñúhu ní càháⁿ-gǎ, núu ní xáhaⁿ-gǎ xii-yu:

—¿Náa ñá tñáhá iní-ndó nàcuáa càháⁿ-í-a? ⁶² Te uuⁿ-gǎ cada nchòhó núu quini-ndó yúhú Téé cùu ñaní tñáhá-ndó nchàa-ndo ndaa-í núu ní xíndecu-í dihna. ⁶³ Te espíritú ndécú ndihí yiqui cuñú-ó, xǎⁿ ndécá ñaha-xi xii-o, te núu ñá túu xǎⁿ, te yiqui cuñú-ó ñà túu nàndíhi-xi. Dico núu nchaa tñúhu càháⁿ-í-a quéé-xi iní-ndó ñá, te quini-ndó nǎ xéhé candeca ñaha-xi xii-ndo núu cuàháⁿ núu véxi. ⁶⁴ Te dava nchòhó chi ñá túu sàndáá iní-ndó —càchí-gǎ xáhaⁿ-gǎ xii-yu.

Te ducaⁿ ní xáhaⁿ-gǎ chi sa nàha-gǎ nándi cùu ñáyiu vá quíndáá iní ñáhá xii-gǎ. Te ducaⁿ sǎ naha-gǎ ndédacáa téé cuáha cuendá ñáhá xii-gǎ núu cué téé cùu úhú iní ñáhá. ⁶⁵ Te ní xáhaⁿ tucu Jesús xii-yu:

—Te duha càháⁿ-í chi sa ní cachí tñúhu-í xii-ndo sǎ vǎ yóo ìⁿ cuini tñi tñúhu-í te núu ñá túu Tǎtá-í Dútú Ndióxi sánú ichi ñaha-gǎ xii-yu —càchí-gǎ xáhaⁿ-gǎ xii-yu.

⁶⁶ Te òré-án ío vai ñáyiu nchícúⁿ ñáhá xii-gǎ ní xócóo-yu ñá ní xica cuu-gǎ-yu ndihí-gǎ. ⁶⁷ Te xǎⁿ ní

xáhaⁿ Jèsús xii ndi ùxúú cue téé xica cuu ndihi-gá:

—¿Cuini-ndó dándóo ñaha-ndo tnàhá-ndó-áⁿ? —càchí-gá xáhaⁿ-gá xii-güedé.

⁶⁸ Te ní xáhaⁿ tē Ximú, àdi Pelú chi úú òu-dé:

—Mèstrú, ñá túú-gã ndèé quihíⁿ-ndí, chi nchúhú náhá-ndí sá tnúhu mee-n, cùu-xi sá vãha candeca-xi iní-ndí ni caa ni quihíⁿ.

⁶⁹ Chi nchúhú sa ní sándáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndióxi yaá ndécú àndiu —cachí-dé xáhaⁿ-dē xii-gá.

⁷⁰ Te ní xáhaⁿ Jèsús:

—Nàha-ndo sá yúhú ní cáháⁿ ñáhá-í xii ndi ùxúú-ndó xica cuu ndihi ñaha-í xii-ndo, dico ìⁿ-ndo quihu ñaha yècu ñávãha xii-ndo —càchí-gá xáhaⁿ-gã xii-güedé.

⁷¹ Duha ní cáháⁿ Jèsús cuendá té Jüdás déhe té Ximú Iscarioté ìⁿ téé ñùtnhá núú ùxí ìⁿ cue téé xica cuu ndihi-gá, chi sa nàha-gá sá téé-áⁿ cuàha cuendá ñáhá-dē xii-gá ìⁿ nduu núú cuè téé cùu úhú iní ñáhá.

7

Cue ñaní Jèsús ñá túú sándáá iní-güedé nàcuáa ndüu tnúhu càháⁿ-gá

¹ Te sáta dúcáⁿ ñi cuu, te ní xica cuu Jèsús distritú Galileá, te ñá ní sáháⁿ-gá distritú Júdeá, chi yacáⁿ cuini cue téé israhél cahni ñaha-güedé xii-gá ní cùu. ² Te ní cuyatni nduu cadá-yu vico, vico sá dánani-yu Vico Vehe Tnuvixiⁿ. ³ Te ní xáhaⁿ cuè ñaní Jèsús xii-gá:

—Váha-gá quihíⁿ-n distritú Júdeá te vá cündecu-n iha, chi yacáⁿ cada-n ncháa sá quidé-n iha cuendá quini nchaa ñáyiú cündihi ñaha xii-n ndecu yacáⁿ. ⁴ Chi núu cuini-ó quini nchaa ñáyiú ná chiúⁿ cada-o te vá cadá dáyuhu-o. Te yòhó cuéhé núú sá quidé-n, te cada-n

na quini nchaa ñáyiú —càchí-güedé xáhaⁿ-güedé xii-gá.

⁵ Ducaⁿ ñi cáháⁿ cue ñaní-gá, chi ni mée-güedé ñá túú sándáá iní-güedé nàcuáa ndüu tnúhu càháⁿ-gá. ⁶ Te ní xáhaⁿ Jèsús xii-güedé:

—Vátá tnàhá-gá òré quihíⁿ-í dico nchòhó ndédani càa òré cuu quihíⁿ-ndó. ⁷ Chi nchaa ñáyiú ñúhu ichi cuéhé ichi duha chi ñá túú cùu úhú iní ñáhá-yu xii nchòhó. Dico yúhú chi cùu úhú iní ñáhá-yu xii-í cuendá sá càháⁿ-í sá quidé-yu nchaa sá cuéhé sá dúhá. ⁸ Te chí cuáháⁿ nchòhó vico chi yúhú vá quihíⁿ-ni-í chi vátá tnàhá-gá òré quihíⁿ-í —càchí-gá xáhaⁿ-gã xii-güedé.

⁹ Te ducaⁿ ñi xáhaⁿ-gã te ní ndóo-gá Galileá, te cue téé-áⁿ cuáháⁿ-güedé.

Jèsús ndécú-gã ìⁿ vico chiñuhú-yu Yá Ndióxi

¹⁰ Dico sáta cuáháⁿ cue ñaní-gá, te ní xica-gá cuáháⁿ-gá tnàhá-gá dicó-ni sá dáyuhu cuáháⁿ-gá. ¹¹ Te ñáyiú israhél ñáyiú xñdecu vico nànducú-yu Jèsús, te xitnàhá-yu:

—¿Ndéé ndécú Jèsús? —càchí-yu xitnàhá-yu.

¹² Te nchaa ñáyiú xñdecu vico xñdatnúhu-yu cuendá-gá. Te davá-yu xitnàhá-yu sá ìo váha iní-gá, te davá-yu xitnàhá-yu sá ñá díú téé váha cùu-gá, chi dándahú-gá ñáyiú.

¹³ Dico mee-ni xicáháⁿ náhi-yu, chi xiyúhú-yu cue téé cùnuu núú-yu.

¹⁴ Te ta ngúhuⁿ dava vico, te cuánguihu Jèsús veñúhu càhnu sá ìo cùnuu, te ní ngúita-gá dácuaaha-gá ñáyiú. ¹⁵ Te ñáyiú israhél ní cuñúhu vihi-yu sá ìo váha càháⁿ-gá, te ní xitnàhá-yu:

—¿Ná cuendá ìo váha ñúhu-tu díquí téé-a tnúhu cáháⁿ-dé te ñá túú ní dácuaaha-dé-í? —càchí-yu xitnàhá-yu.

16 Te ní xáhaⁿ Jèsús:

—Ñá díú cuendá mée-í cúu-xí sá dánéhé ñàhà-í xii-ndo, chi cuendá Dútú Ndiòxí Yaá ní tendaha ñàha xii-í véxi-í cúu-xí. 17 Te núu ìó dava-ndo ni yuhu ni iní-ndó cuini-ndó càda-ndo nacuaa cuini Yá Ndiòxí cunduu, te cutnuni ndáa iní-ndó sá tnúhu dàcuaha ñàha-í xii-ndo cùu-xi cuenda mée Dútú Ndiòxí, te ñá díú cuendá mée-í cúu-xí. 18 Te tée cuini sá cáda càhnu ñàha ñáyiu xii-dé, tée-áⁿ càhàⁿ-dé nàcuáa véxi iní mée-dé. Dico yúhú cuini-í sá cáda càhnú-yu Dútú Ndiòxí Yaá ní tendaha ñàha xii-í véxi-í ñuyíú-a, te càhàⁿ ndáa-í te ñá túú dàcuandehnde-í.

19 Te ndíi Moisés ní taxi ndíi tnúhu sá sánú ichi ñàha xii-ndo nacuaa cundecu-ndo, te ni òucaⁿ ñá túú sàndáa iní-ndó nàcuáa càhàⁿ tnúhu-áⁿ. ¿Te ná cuendá cuini-ndó càhni ñàha-ndo xii-í? —càchí-gá xáhaⁿ-gá xii-yu.

20 Te ní xáhàⁿ-yu xii-gá:

—Yucu ñávàha dàcoto ñàha xii-ó, chi vá yòo ìⁿ cuini cahni ñàha xii-n —càchí-yu xàhàⁿ-yu xii-gá.

21 Te ní xáhaⁿ Jèsús xii-yu:

—Sá ní quide-í ìⁿ sá vā yòo tnàhí ndàcu cada nduu cuu-xi nduu ndetátú-ó, xiáⁿ ío ní cuñúhu ñàha-ndo xii-í. 22 Te ndíi Moisés ní càchí ndíi sá cuàha-yu seña ñiⁿ cue landú tée, dico ñá díú mée ndíi ni càhu iní ndíi chi òucaⁿ tnàhí ní xóo cada cue ñàni tnàhá-ó dàvá-áⁿ, núu xiáⁿ nchòhó sàha-ndo seña ñiⁿ landú tée cuèi cùu-xi nduu ndetátú-ó. 23 Te òucaⁿ quide-ndo cuendá sá ñà túú nà cumání-ndó núu tnúhu sá sánú ichi ñàha xii-ndo ní dándòo ndíi Moisés. ¿Te ná cuendá cúdeéⁿ-ndó núu-í sá ní quide tátna-í tée cùhú nduu ndetátú-ó-í? 24 Te váha váha cada cuendá-ndó, te vá cuendá-ni càhàⁿ-ndó sá yúhú ndècuéchi-í chi ñá túú xini-ndó —càchí-gá xáhaⁿ-gá xii-yu.

Jèsús xáhaⁿ-gá xii-yu núu véxi-gá

25 Te dava ñáyiu ñuú Jerusalén ní ngúita-yu xitnàhá-yu:

—¿Náa ñá díú tée-áⁿ nánducu-güedé cahni-güedé?, 26 núu ná-dé núnñi núu chítu núu tàcá-áⁿ càhàⁿ-dé, te vá yòo cùyⁿ cùñaha xii-dé ìⁿ tnúhu. Cudana te cue tée cùchiuⁿ sandáa iní-güedé sá díú-dé cúu-dé Cristú Yaá ní tendaha Yá Ndiòxí véxi ñuyíú-a. 27 Dico nchoo xini-ó ndèe ichi véxi tée-áⁿ, dico Crìstú ná quixi-gá chi vá yòo ìⁿ quini ndèe ichi quixi Yaá-áⁿ —càchí-yu xitnàhá-yu.

28 Te yìhi Jèsús xití veñúhu càhnu sá ío cùnuu danehe-gá ñáyiu, te ní tecú dóho-gá tnúhu càhàⁿ-yu. Te níhi ní càhàⁿ-gá, te xáhaⁿ-gá xii-yu:

—¡Ná quini-tu nchòhó ndèe ichi véxi yúhú! Yúhú véxi-í dico ñá díú sá cúu iní mée-í, chi Yá Ndiòxí Yaá quidé nchàa-ndi túhú sá váha ní tendaha ñàha-gá xii-í véxi-í, te nchòhó ñá túú xini-ndó-gá. 29 Te yúhú xini-í-gá chi núu ndécú-gá ní quee-í véxi-í, te diu mee-gá ní tendaha ñàha-gá véxi-í —càchí-gá xáhaⁿ-gá xii-yu.

30 Te sá dúcáⁿ ní càhàⁿ-gá, núu cuini-güedé tñi ñàha-güedé xii-gá quihíⁿ-gá vecaá ní cùu, dico vá yòo ìⁿ ni cùyⁿ tñi ñàha xii-gá chi vátá sàa-gá òré tñi ñàha-güedé. 31 Dico vèi-yu ní sàndáa iní ñàhà-yu xii-gá, te ní xitnàhá-yu:

—¿Nágá cúu sá cáda Crìstú ná quixi-gá-í?, te tée-a ío cuéhe núu sá tá quide-dé véxi. Váa diu tée-a cùu-dé Crìstú Yaá ní tendaha Yá Ndiòxí véxi ñuyíú-a —càchí-yu xitnàhá-yu.

Cue tée cùu fariséu cuini-güedé quihíⁿ Jèsús vecaá

32 Te ní níhi cue tée cùu fariséu tnúhu nàcuáa càhàⁿ ñáyiu cuendá Jèsús, núu ní ndatnúhu-güedé ndíhi cue dútú cùnùu, te ní techiⁿ-güedé cue tée quide cuendá veñúhu cuáhàⁿ-güedé cuátni ñàha-güedé xii-gá ní cùu. 33 Te ní xáhaⁿ-gá xii-güedé:

—Sacú duha nduu cundecu ndihí ñaha-í xii-ndo, te núhú tucu-í núú ndécú tãtã-í Yaá ní tendaha ñaha xii-í véxi-í ñuyíú-a. ³⁴ Te cuèi na nãnducu ñaha-ndo dico vá ná nihí ñáhá-ndó chi vá sãa-ndó núú cundecu-í —cãchí-gá xãhaⁿ-gã xii-güedé.

³⁵ Te ní ngüíta ñáyiú isrãél xitnãhá-yu:

—¿Ndéé quihíⁿ-tu téa te vá ná nihí-ó-dé-i? ¿Àdi quihíⁿ-dé na chitnãhá-dé ñáyiú isrãél ñáyiú nchiténuu nchaa ñuú xicá cuendá danèhé-dé ñáyiú griégú? ³⁶ ¿Nãsa cãháⁿ-tu-dé duha cãháⁿ-dé: “Nãnducu ñaha-ndo te vá nãnihí ñáhá-ndó chi vá sãa-ndó núú cundecu-í”, cãchí-tu-dé? —cãchí-yu xitnãhá-yu.

Nãcuáa cada Espiritú Yã Ndiõxí iní-ó

³⁷ Te nduu ñí yãha-ná vico cùu-xi nduu cahnu vihi, te nduu-ãⁿ ñí ngúnu tñi Jèsús tnuú ñáyiú, te níhi ní cãháⁿ-gã, te xãhaⁿ-gã xii-yu:

—Núu ió dava-ndo yichí-ndó ndüte, te quixi-ndo núú-í, te coho-ndo. ³⁸ Duha cãháⁿ-í chi nchaa ñáyiú na quindáá iní ñáhá xii-í, te cada-xi iní-yu dàtná ñí núú xicá ndüte, nchaa-ni nduu xica ñá túú yichí, ducaⁿ càda-xi iní-yu núú cuaháⁿ núú véxi dàtná cãháⁿ-xi núú tütú Yã Ndiõxí —cãchí-gá xãhaⁿ-gã xii-yu.

³⁹ Te ducaⁿ ñí cãháⁿ-gã cuendá sá quixí Espiritú Yã Ndiõxí ngúndecu ndihí nchaa ñáyiú na quindáá iní ñáhá xii-gã, chi sáá nduu ndãa-gã andiú càda cahnu ñaha Tátã-gã xii-gã, te dàvá-ãⁿ te quixi Espiritú Yã Ndiõxí cundecu ndihí-yu.

Ñá ní cùu ñí nuú-yu cuendá tñuhu ní cãháⁿ Jèsús

⁴⁰ Te dava ñáyiú ní xindedóho tñuhu ní cãháⁿ Jèsús ní xitnãhá-yu:

—Ndáá sá tãe-a cùu-dé téa cãchí-yu quixí cãháⁿ tñuhu Yã Ndiõxí —cãchí-yu xitnãhá-yu.

⁴¹ Te dava tucú-yu xitnãhá-yu:

—Téa-a cùu-dé Cristú Yaá ní tendaha Yã Ndiõxí véxi ñuyíú-a —cãchí-yu xitnãhá-yu.

Te dava-gá tucú-yu xitnãhá-yu:

—¿Nãa ndãa distritú Galileá quixi Cristú Yaá tendaha Yã Ndiõxí quixi ñuyíú-a? ⁴² Chi núú tütú Yã Ndiõxí cãchí-xi sá Cristú Yaá tendaha Yã Ndiõxí quixi ñuyíú-a cuu-gã ñí ñani tñhá ndií Dãvií, te quee-gã ñuú Bèlén ñuú méé ndií Dãvií, duha cãháⁿ-xi núú tütú Yã Ndiõxí —cãchí-yu xitnãhá-yu.

⁴³ Te xãⁿ núú ñá ní cùu ñí nuú-yu cuendá Jèsús. ⁴⁴ Te davá-yu cuini-yu tñi-yu Jèsús quihíⁿ-gã vecaá ní cùu, dico ni ñí-yu ñá túú ní cùyí-yu tñi ñáhá-yu xii-gã.

Cue téa cùchiuⁿ ñá túú sãndáá iní-güedé Jèsús

⁴⁵ Te cue téa cuaháⁿ tñi ñaha xii Jèsús ní cùu ní ndexio-güedé núú cue téa cùu fariséu ndihí núú cue dütú cùnùu. Te xãhaⁿ cue téa cùnuu-ãⁿ:

—¿Ná cuendá ñá ní cãndeca-ndo tãe-ãⁿ quixi? —cãchí-güedé xãhaⁿ-güedé.

⁴⁶ Te cue téa ní sãháⁿ chiúⁿ ní xãhaⁿ-güedé:

—Ni ñí téa ñá túú xini-ndí cãháⁿ dàtná cãháⁿ téa-ãⁿ —cãchí-güedé xãhaⁿ-güedé.

⁴⁷ Te ní xãhaⁿ cue téa cùu fariséu:

—¿Nãa tñhá nchòhó ní sãndáá iní-ndó tñuhu ndehnde cãháⁿ téa-ãⁿ? ⁴⁸ ¿Nãa ñá túú xini-ndó sã ní ñí cue téa tãxi tnuní nchúhú, te ní ñí nchúhú cue téa cùu fariséu ñá túú sãndáá iní-ndí téa-ãⁿ ñã? ⁴⁹ Nchaa ñáyiú tñha ñaha xii téa-ãⁿ ñá túú sãndáá iní-yu nãcuáa cãháⁿ tñuhu sá sãnú ichi ñaha xii-o, dico cuíta nihnú-yu sá dúcãⁿ quidé-yu —cãchí-güedé xãhaⁿ-güedé xii cue téa-ãⁿ.

⁵⁰ Te té Nicòdemú téa ní sãháⁿ niú ní ndatnùhu-dé ndihí Jèsús cúu-dé tñhá-dé ñí téa fariséu, te ní xãhaⁿ-dè xii-güedé:

⁵¹ —Tñuhu sá sãnú ichi ñaha xii-o nacuáa cundecu-o cãchí-xi sá ndéé cundedóho-o nãsa cãháⁿ téa

tàú cuéchi cuèndá cutnùní iní-ó nã ní quide-dé, te dàtnùní cáháⁿ-ó nũ ndisa ndècuéchi-dé àdi ñá túú ndècuéchi-dé —càchí-dé xáhaⁿ-dè.

⁵² Te ní xáhaⁿ-güedé:

—Cùu ní cachí sá tnàhá-ò cúú-n tée distritú Galilea nũu ducaⁿ càháⁿ-n. Dacuàha tutú yódó tnùní tnúhu Yá Ndiòxí te quiní-n nàcuáa càháⁿ-xi sá nì ìⁿ tée véxi distritú Galilea ñá túú càháⁿ-dé tnúhu Yá Ndiòxí —càchí-güedé xáhaⁿ-güedé.

⁵³ Ducaⁿ te ndi díⁿ cañuhú-güedé vehe-güedé.

8

Èⁿ ñadìhí ndécú vihi cuéchi-xi

¹ Te Jèsús cuáháⁿ-gá yucu Òlívú.

² Te sátá nì túndaá nduu tnée, te cuáháⁿ tucu-gá veñúhu càhnu sá ìo cùnuu. Te ío cuéhé ñáyiu ní chítú níhnũ-yu núú-gã, te ní ngóo-gá ní dánèhé ñáhá-gã xií-yu. ³ Te ní quexìo cue tée dàcuaha ñaha xií-yu nchaa tnúhu ní chídó tnùní ndíi Moisés, ndihi cue tée cùu fariséú, te ndèca-güedé ìⁿ ñadìhí ní sáá, te ñaha-áⁿ nì xiní ñáhã-yu càháⁿ ndihi-aⁿ ìⁿ tée dico ñá díú yì-aⁿ cuu-dé, te ní sanutnì ñaha-güedé xii-aⁿ tnuú nchaa ñáyiu xIndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xiní ñáhã ñáyiu xii-aⁿ càháⁿ ndihi-aⁿ ìⁿ tée dico ñá díú yì-aⁿ cuu-dé. ⁵ Te tnúhu ní chídó tnùní ndíi Moisés càchí-xi sá yúú cahni-o nchaa ñáyiu dìhí duha quide. Te yòhó, ¿nása càchí-n cùnduu-ì? —cachí-güedé xáhaⁿ-güedé xii-gá.

⁶ Duha ní càháⁿ-güedé chi cuèndá sá cuìní-güedé coto ndeé ñáhã-güedé xii-gá nũu nása càháⁿ-gá cuèndá nùcòo nchihi ñaha-güedé xii-gá ní càháⁿ-güedé. Te ní ngúnu ndeyi-gá te ní ngúita-gá tée-gã ndihi díquí ndáhã-gã lètrá núú ñúhú. ⁷ Te xìcáⁿ tnúhú-ní tucu-güedé núú-gã nũu ní ndonehe núú-gã, te ní xáhaⁿ-gã:

—Ndédani càa nchohó te núu ñá túú nã cuéchi quide-ndo te díhna nuu-gã-ndó chí cuàha-aⁿ yúú —càchí-gã xáhaⁿ-gã xii-güedé.

⁸ Te ní ngúnu ndeyi tucu-gá tée tucu-gá lètrá núú ñúhú. ⁹ Te sá dúcáⁿ nì xáhaⁿ-gã xii-güedé te ní ndixi túu iní-güedé sá ñá túú quide váha mee-güedé tnàhá-güedé, núu da ìⁿ da ìⁿ-güedé ní ndee, te díhna-gá cue tée cùu sacuéhé nì ndee te ní ngúita nchicúⁿ dava-gã-güedé. Te sátá nì ndihi-güedé ní ndee, te ní quendóo mee-nã Jèsús ndihi ñadìhí-áⁿ. ¹⁰ Te ní ndonehe núú Jèsús te ní xiní-gá sá nì ndihi-güedé cuáháⁿ te mee-nã ñadìhí-áⁿ nì ndóo-aⁿ, te ní xáhaⁿ-gã xii-aⁿ:

—¿Ndèndi cuáháⁿ cue tée càchí sá nì quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —càchí-gã xáhaⁿ-gã xii-aⁿ.

¹¹ Te ní xáhaⁿ-aⁿ xii Jèsús:

—Ñáhã, chi ni ìⁿ-güedé ñá ní ndàcu-güedé —càchí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhã-ì castiú xii-n. Te vitna te núhú-n te vá cádá-gã-n nãndi sá cuéhé sá dúhá —càchí-gã xáhaⁿ-gã xii-aⁿ.

Jèsús dándixi túu-gá iní-ó

¹² Te ní càháⁿ tucu Jèsús núú ñáyiu, te xáhaⁿ-gã xií-yu:

—Yúhú cúú-í dàtná ìⁿ ñuhú dáyèhe-ì ñuyiú-a, te nchaa ñáyiu na chìtnahá ñáhã xii-ì, te vá cùndecu-gá-yu ichi cuéhé ichi duha, chi yúhú dándixi túu-ì iní-yu cuèndá cutnùní iní-yu nàcuáa ndùu cuèndá Yã Ndiòxí, te cundecu-ì ndihi-yu ni caa ni quíhíⁿ —càchí-gã xáhaⁿ-gã xií-yu.

¹³ Te ní xáhaⁿ cuè tée cùu fariséú xii-gá:

—Medii-n caháⁿ-n sã cúú-n tée váha, te vá yòo ìⁿ-gã chindèe tnúhu ñaha xii-n núu ná tée cùu-n, dico

xíãⁿ ñá túú nándíhi-xi —càchí-güedé xáhaⁿ-güedé xii-gá.

¹⁴ Te ní xáhaⁿ Jèsús:

—Cuéi càháⁿ-í cuendá mée-í dico nándíhi tnúhu càháⁿ-í. Chi yúhú ñaha-í ndèé ichi véxi-í, te xìní-í ndèé ichi núhú-í, dico nchòhó chi ñá túú xìní-ndó ndèé ichi véxi-í, te ñi ñá túú xìní-ndó ndèé ichi quíhíⁿ-í. ¹⁵ Te nchòhó chi cuendá-ni càháⁿ-ndó cuendá ñáyiú núu quide váha-yu àdi ñá túú quide váha-yu. Te yúhú ñá túú càháⁿ-í cuendá ñáyiú núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mée-í càháⁿ, chi tnàhá Tàtá-í Yaá ní tendaha ñaha xii-í véxi-í ñuyíú-a càháⁿ-gá chindée tnúhu ñaha-gá xii-í. ¹⁷ Te tnúhu sá sánú ichi ñaha xii-ndo cachí-xi sá núu ña cundecu úu cue téé càháⁿ ndáá-güedé nacuáa cùu ìⁿ sá cundáá, te núu ìⁿ-ni tnúhu na càháⁿ-güedé ndi ndúú-güedé te xíãⁿ nándíhi-xi, duha càchí tnúhu-áⁿ. ¹⁸ Te ñu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mée-í, te ñu-ni dátá càháⁿ-í càháⁿ Tàtá-í Yaá ní tendaha ñaha xii-í véxi-í ñuyíú-a —càchí-gá xáhaⁿ-gá xii-güedé.

¹⁹ Te ní xáhaⁿ-güedé xii-gá:

—¿Te ndèé ndécú Tàtá-n-í? —càchí-güedé xáhaⁿ-güedé.

Te ní xáhaⁿ Jèsús:

—Te núu dico xìní-ndó yòo cuu yúhú-á te ducaⁿ te quiní-ndó Tàtá-í. Te ni yúhú ñá túú xìní-ndó yòo cuu-í núu xíãⁿ ñá túú xìní-ndó Tàtá-í —càchí-gá xáhaⁿ-gá xii-güedé.

²⁰ Duha ní càháⁿ Jèsús ñini dàcuaha-gá ñáyiú xití veñúhu núu ndécú àlcanciá díhúⁿ. Te vá yòo ìⁿ ni cùyiⁿ tñiⁿ ñaha xii-gá chi vátá sàá-gá òré tñiⁿ ñaha-güedé.

Ñáyiú ñá túú sàndáá iní ñáhá xii Jèsús vá ndácú-yu quíhíⁿ-yu núu núhú-gá cundecu-gá

²¹ Te ní xáhaⁿ tùcu Jèsús xii-güedé:

—Yúhú núhú-í te nanducu ñaha-ndo te vá náníhí ñáhá-ndó, te cuú-ndó núu yíca cuéchi-ndo, chi vá ndácú-ndó sáá-ndó núu núhú-í cundecu-í —càchí-gá xáhaⁿ-gá xii-güedé.

²² Te ní xítñaha cue téé isràél:

—¿Te náa cahni-dé mée-dé núu càchí-dé sá vá ndácú-ó sàá-ó núu quíhíⁿ-dé-áⁿ? —càchí-güedé xítñaha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñuhu iní-ndó sá ío ñuyíú-a. Te yúhú chi téé núu ñinu cùu-í núu xíãⁿ ñá túú sá ío ñuyíú-a ñuhu iní-í. ²⁴ Te xíãⁿ núu càchí-í sá cuú-ndó núu yíca cuéchi-ndo, chi ñá cuíní-ndó quíndáá iní-ndó sá yúhú véxi cuuⁿ-í andiⁿ, te núu xíãⁿ ñu-ni núu yíca cuéchi-ndo cùu-ndó —càchí-gá xáhaⁿ-gá xii-güedé.

²⁵ Te ní xícaⁿ tnúhú-güedé núu-gá, te xáhaⁿ-güedé:

—¿Te ná cúú yòhó núu ducaⁿ càháⁿ-n-í? —càchí-güedé xáhaⁿ-güedé xii-gá.

Te ní xáhaⁿ-gá:

—Sa ní cachí tnúhu-í xii-ndo ndèé díhna —càchí-gá xáhaⁿ-gá xii-güedé.

²⁶ Te xáhaⁿ tùcu-gá:

—Ndècu cuéhé tnúhu càháⁿ-í cada ndáá-í cuendá nchòhó. Te Tàtá-í Yaá ní tendaha ñaha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní càháⁿ-gá ní xíndedóho-í —càchí-gá xáhaⁿ-gá xii-güedé.

²⁷ Te mee-güedé ñá túú ní tècú tnùnì-güedé sá cuendá Dútú Ndiòxi ní càháⁿ Jèsús. ²⁸ Te ní xáhaⁿ-gá xii-güedé:

—Òré ná catá càa ñaha-ndo xii yúhú Téé cùu ñani tnáhá-ndó nchàa-ndo núu cùrúxí cahni ñaha-ndo, te òré-áⁿ cutnùnì iní-ndó yòo cuu-í, te ñá túú quide-í sá cúú iní mée-í, chi yúhú càháⁿ-í nacuáa ní dánèhé ñáhá Tàtá-í ²⁹ Yaá ní tendaha ñaha xii-í véxi-í. Te ñu-gá ndécú ndíhi ñaha-gá xii-í, te ñá

túu dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gá xii-güedé.

³⁰ Te sá dúcáⁿ ñí cáháⁿ-gá ñúu ío vai ñáyiú ní sándáá iní ñáhá xii-gá.

Ñáyiú sándáá iní ñáhá xii Yá Ndiöxí ndihi ñáyiú ndècu ichi cuehé ichi duha

³¹ Te ní xáhaⁿ Jèsús xii ñáyiú isràél ñáyiú ní sándáá iní ñáhá xii-gá:

—Te ñúu vá dáñá ndèé-ndó càda-ndo nchaa nacúáa cáháⁿ-í, te cuu ndisa-ndo cuè tée tñahá tñúhu ndihi-í, ³² te tecú tñúni-gá-ndó tñúhu ndáá, te ducaⁿ te cácu nihnu-ndo —càchí-gá xáhaⁿ-gá xii-yu.

³³ Te ní xáháⁿ-yu:

—Nchúhú cúu-ndí cue ñani tñahá ndíi Abrahám, te ñí ñíⁿ nduu ñá túú ndèé sácündedí nihnu-ndí ndoho tñahá-ndí ñúu cáchí-ö sá dàcácu nihnu ñaha-n xii-ndí —càchí-yu xáháⁿ-yu xii-gá.

³⁴ Te ní xáhaⁿ Jèsús xii-yu:

—Na càchí tñúhu ndáá-í xii-ndo sá nchaa ñáyiú quide nchaa sá cuèhé sá dúhá tàxi tñuni ñáhá-ná-xi xii-yu. ³⁵ Te cue ñáyiú xinu cuechi te vá cúu ñíⁿ-ná cuú-yu ndihi ñáyiú dii vèhe-xi xinu cuechi-yu, dico cue déhe ñáyiú dii vèhe-xi-án chi ñíⁿ-ni cùu ndihi ñaha-güexi xii-yu. ³⁶ Te núu yúhú Yaa cúu Dèhe Yá Ndiöxí dàcácu nihnu ñaha-í xii-ndo ñúu nchaa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xini-í sá nchòhó cúu-ndó ñani tñahá ndíi Abrahám, te dicó-ní sá ñá tñahá iní-ndó tñúhu cáháⁿ-í ñúu xiáⁿ cuini-ndó càhni ñaha-ndo. ³⁸ Te yúhú cáháⁿ-í nàcuáa ní dánèhé ñáhá Tàtà-í, te nchòhó quidé-ndó nàcuáa cáháⁿ tātá-ndó —càchí-gá xáhaⁿ-gá xii-yu.

³⁹ Te ní xáháⁿ-yu:

—Ndíi Abrahám cúu tātá-ndí —càchí-yu xáháⁿ-yu xii-gá.

Te ní xáhaⁿ Jèsús:

—Núu ndisa ñani tñahá ndíi Abrahám cúu-ndó, te cada-ndo

nàcuáa ní xóo cada ndíi ní cùu. ⁴⁰ Te yúhú cuèi cáháⁿ-í ñíⁿ tñúhu ndáá nàcuáa cáháⁿ Yá Ndiöxí càchí tñúhu-gá xii-í, te cuini-ndó càhni ñaha-ndo. ¡Dico ndíi Abrahám chi ñá túu dùcaⁿ ni quide ndíi! ⁴¹ Te nchòhó quidé-ndó nàcuáa quide tātá-ndó —càchí-gá xáhaⁿ-gá xii-yu.

Te ní xáháⁿ-yu:

—Nchúhú, ñá túu yàyacáⁿ ndécú tātá-ndí, chi ñíⁿ dii Yá Ndiöxí cúu tātá-ndí —càchí-yu xáháⁿ-yu xii-gá.

⁴² Te ní xáhaⁿ Jèsús:

—Núu dicó Yá Ndiöxí ndisa cùu Tātá-ndó te cuu iní ñáhá-ndó xii-í ní cùu chi yúhú ní quee-í núu ndécú-gá véxi-í ñuyúú-a. Te ñá túu véxi-í sá cúu ñíⁿ mee-í, chi mee-gá ní tendaha ñaha-gá véxi-í. ⁴³ Te ñá túu təcú tñúni-ndó tñúhu cáháⁿ-í chi ñá túu tñahá iní-ndó. ⁴⁴ Te nchòhó chí tātá-ndó cùu yucu ñávaha núu cùdí iní-ndó quide-ndo nchaa nacúáa cùu iní-xi, chi ndéé öre ní ngáva ñuyúú ducaⁿ-ni ndècu-xi dacáháⁿ-xi iní-ndó sàhni tñaha-ndo. Te ñá ñíⁿ ndúu cáháⁿ-xi ñíⁿ tñúhu ndáá chi ñá túu xica-xi ichi ndáá, chi mee-ni ichi tñúhu ndehnde xica-xi chi ducaⁿ iní-xi. Te diu-xi dàcahu-xi iní-ndó dàcuandehnde-ndo. ⁴⁵ Te yúhú cáháⁿ-í tñúhu ndáá te ñá túu cuini-ndó quindáá iní ñáhá-ndó. ⁴⁶ ¿Te ndèdacàa nchòhó xini-ndó sá quidè-í ñíⁿ sá cuèhé sá dúhá-í?, te yúhú ñá túu ná quidè-í chí cáháⁿ ndáá-í, ¿te ná cuendá ñá túu cuini-ndó quindáá iní-ndó tñúhu cáháⁿ-í? ⁴⁷ Te nchaa ñáyiú ndècu ichi Yá Ndiöxí, ñáyiú-án sácündedóho-yu nchaa tñúhu cáháⁿ-gá. Te nchòhó chí ñá díú ichi Yá Ndiöxí ndécú-ndó ñúu ñá túu sácündedóho-ndo tñúhu cáháⁿ-gá —càchí-gá xáhaⁿ-gá xii-yu.

Díhna-gá Crístú sa ndècu dacúúxi ndíi Abrahám

⁴⁸ Te ní xáhaⁿ ñáyiú isràél:

—Váha-ni cáháⁿ-ndí sá tée samaritánú cúu-n, te yucu ñávaha ndècu ndihi-n —cachí-yu xáháⁿ-yu xii-gá.

49 Te ní xáhaⁿ Jèsús:

—Yúhú, ñá túú yùcu ñávãha ndècu ndihí-í, chí Tãtã-í quidé càhnu-í, te nchòhó da cùu úhú iní ñáhá-ndó xii-í —càchí-gá xáhaⁿ-gá xii-yu.

50 Te xáhaⁿ tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndióxi cuíní-gá sá cádá càhnu ñaha-ndo xii-í. Te mee-gã cáháⁿ-gá nõu ndédacãa-ndo guide váha, te ndédacãa-ndo ñá túú quide váha. 51 Te na càchí tnúhu ndáá-í xii-ndo sã nchàa ñáyiu na tn̄i tnúhu càháⁿ-í te vá cuíta nihnú-yu —càchí-gá xáhaⁿ-gã xii-yu.

52 Te ní xáhaⁿ tùcu ñáyiu isràél:

—Vitna te ní xiní ndáá-ndí sá yùcu ñávãha ndècu ndihí-n, chí ndíi Abrahám ndihí nchaa cue téé ní xóo cáháⁿ tnúhu Yá Ndióxi ndéé sanaha ní xihí-güedé, te yòhó càchí-tu-n sã ncháá ñáyiu na tn̄i tnúhu càháⁿ-n te vá cùu-gá-yu. 53 ¿Náa ío-gá càhnu çuu-ó dàcúxí ñàní tnáhá-ndí ndíi Abrahám-ãⁿ? Téé-ãⁿ dai ní xihí-dé ndihí cue téé ní xóo cáháⁿ tnúhu Yá Ndióxi ndéé sanaha. ¿Te yòhó nágá-tu cùu-n te vá cùu-n càháⁿ-n-i? —cachí-yu xãháⁿ-yu.

54 Te ní xáhaⁿ Jèsús:

—Te núu dìcò mée-í quidé càhnu-í mée-í ñá, te ñá túú nandíhi sá quidé-í nõu ducaⁿ. Dico Tãtã-í quidé càhnu ñaha-gá xii-í, te diu-ni Yáá-ãⁿ càchí-ndó cùu Ndióxi-ndó. 55 Te nchòhó chí ñá túú xiní-ndó-gã. Te yúhú chí xiní-í-gá. Te núu na càchí-í sá ñá túú xiní-í-gá te dàcuandehnde-í dàtná ndehnde mée-ndo. Te yúhú chí xiní ndisa-í-gá te tn̄i-í nchaa tnúhu càháⁿ-gá. 56 Te ndíi Abrahám ñaní tnáhá-ndó ní xindecu ndéé sanaha ío ní cudíi iní ndíi sá quíní ñáhá ndíi xii-í, te ní sáá nduu ní xiní ñáhá ndíi xii-í nõu ío ní cudíi iní ndíi —càchí-gá xáhaⁿ-gã xii-yu.

57 Te ní xáhaⁿ ñáyiu isràél xii Jèsús:

—Ni vátá cùhúⁿ-gã-n ùdico úxí cuiá-n te càchí-n sã ní xiní-n ndíi Abrahám, te ní cunaha vîhi ní xihí ndíi-ãⁿ —càchí-yu xãháⁿ-yu xii-gá.

58 Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gã cundecu ndíi-ãⁿ ñuyú-a te yúhú sa ndècu-gá-í —càchí-gá xáhaⁿ-gã xii-yu.

59 Te sá dúcãⁿ ní cáháⁿ-gá nõu xiãⁿ ní quehéⁿ-yu yúú cuãha ñáhá-yu xii-gá ní cùu, te ní nguivãha-gá nõu-yu te ní quee-gá xití veñúhu cuáhãⁿ-gá.

9

Jèsús quidé tãtna-gá ñⁿ téé cuáá

1 Te núu xicá cùu Jesús ní naníhí-gã ñⁿ téé cuáá, te sa ducaⁿ tnáhí càa núu-dé ní cacu-dé. 2 Te ní xáhaⁿ cuè téé xica cuu ndihí-gá xii-gá:

—Mèstrú, ¿ná cuendá dàcãⁿ cuáá téé-ãⁿ ní cacu-dé? ¿Sá cuendá nchaa yicá cuèchi tãtã-dé, ãⁿ sã cuendá nchaa yicá cuèchi nãná-dé, ãⁿ sã cuendá nchaa yicá cuèchi mee-dé dàcãⁿ cáá-dé ní cacu-dé? —càchí-güedé xãháⁿ-güedé xii-gá.

3 Te ní xáhaⁿ Jèsús:

—Ni ñá díú sã cuendá nchaa yicá cuèchi mee-dé, te ni ñá díú sã cuendá nchaa yicá cuèchi tãtã-dé, te ni ñá díú sã cuendá nchaa yicá cuèchi nãná-dé, chí mee Yá Ndióxi ní cuíní-gá sá dúcãⁿ cùnduu-dé sáá-dé ñuyú-a cuendá sã ñuyú-a quíní ñáyiu nása cada ñaha Yá Ndióxi xii-dé ndúha núu-dé. 4 Te vitna ío-gá nduu cùyica sá cádá-í nchaa chiúⁿ ní táhú Yáá ní tendaha ñaha xii-í véxi-í ñuyú-a, chí sáá nduu te vá ndácú-gã-í cada-í chiúⁿ-gá. 5 Te nini ndècu-gá-í ñuyú-a te dàndixi túu-í iní nchaa ñáyiu cuendá cutnùní iní-yu nãcuáa nduu cuendá Yá Ndióxi —càchí-gá xáhaⁿ-gã xii-güedé.

6 Te sátá dúcáⁿ ní cáháⁿ-gá, te ní sati-gá dí-gá núú ñhú te ní dácá-gã luha ñuhu ní cuáha ndéhyú, te ndéhyú-ãⁿ ní dácánù-gá ndúú xio núú tée cuáá-áⁿ. 7 Te ní xáhaⁿ-gã xii-dé:

—Quíhíⁿ-n nàquete-n núú-n ndùte tanquí Silòé —càchí-gá xáhaⁿ-gã xii-dé. Te Silòé-áⁿ quéé-xí tñuhu mèe-yu: Tée xica chiuⁿ.

Te ní sáháⁿ tée cuáá-áⁿ ní naquete-dé núú-dé, te òré ní ndexì-dé te sa ndèhe-dé. 8 Te nchaa ñáyi ndècu yatni núú ndécú-dé ndíhi nchaa ñáyi xini ñáhá xii-dé núú xicáⁿ ndàhú-dé ní xitnàhá-yu:

—¿Náa ñá díú tée-ãⁿ ní xóo cácáⁿ ndàhú-dé? —càchí-yu xitnàhá-yu.

9 Te davá-yu càchí-yu sá díú-dé, te davá-yu càchí-yu sá ñá díú-dé, dico ducaⁿ càa-dé, càchí-yu xitnàhá-yu.

Dico mee-dé ní xáhaⁿ-dè xii-yu sá díú-dé.

10 Te ní xicáⁿ tñuhú-yu núú-dé, te xáhãⁿ-yu:

—¿Náa ní cuu núu ní ndúha núú-n ndèhe-n vitna? —cachí-yu xáhãⁿ-yu xii-dé.

11 Te ní xáhaⁿ-dè:

—Tée nani Jesús-ãⁿ ní cadúha-dé luha ndéhyú te ní dácánù-dé núú-í, te ní táuchíuⁿ-dè ní sáháⁿ-í tãnquí Silòé ní naquete-í núú-í, te òré-áⁿ ñi cju cundehe-í —càchí-dé xáhaⁿ-dè xii-yu.

12 Te ní xicáⁿ tñuhú tucú-yu núú-dé, te xáhãⁿ-yu:

—¿Te ndèé ndécú tée-áⁿ? —càchí-yu xáhãⁿ-yu xii-dé.

Te ní xáhaⁿ-dè:

—Ñá túú xini-í —càchí-dé xáhaⁿ-dè xii-yu.

Cue tée cùu fariséú ndátñuhu-güedé ndíhi tée ní ndúha núú-xi

13 Te ndèca-güedé tée ní ndúha núú-xi-áⁿ cuáhãⁿ núú cuè tée cùu fariséú. 14 Te cuendá sá ndùu ndetátú-yu ní cadúha Jesús ndéhyú ní dácánù-gá núú tée-áⁿ te ní ndúha,

15 xíãⁿ núu ní xicáⁿ tñuhú cuè tée cùu fariséú núú-dé, te xáhaⁿ-güedé:

—¿Náa ní cuu ní ndúha núú-n? —càchí-güedé xáhaⁿ-güedé xii-dé.

Te ní xáhaⁿ-dè xii-güedé:

—Íⁿ tée ní dácánù-dé ndéhyú núú-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dè xii-güedé.

16 Te dava cue tée cùu fariséú ní xitnàha-güedé:

—Ñá díú Yã Ndiõxí ní tëndaha ñaha-gá xii tée-ãⁿ véxi-dé núu duha quide-dé nchaa sá vã yõ tñáhí ndàcu cada, te ñá túú sàndáá iní-dé canehé í-dé nduu ndetátú-ó —càchí-güedé xitnàha-güedé.

Te dava-güedé ní xitnàha-güedé:

—¿Náa ndacu-dé cada-dé sá vã yõ tñáhí ndàcu cada te núu cùu-dé tée yicá cuèchi? —càchí-güedé xitnàha-güedé.

Te ñá túú ní cùu ñⁿnuu-güedé tñuhu ní cáháⁿ-güedé. 17 Te ní xicáⁿ tñuhú tucu-güedé núú tée ní ndúha núú-xi-áⁿ, te xáhaⁿ-güedé:

—Te yòhó, ¿náa càchí-n cuendá tée ní quide tátna núú-n te ní ndúha? —càchí-güedé xáhaⁿ-güedé xii-dé.

Te ní xáhaⁿ-dè:

—Yúhú càchí-í sá íⁿ tée càháⁿ tñuhu Yã Ndiõxí cúú-dé —càchí-dé xáhaⁿ-dè xii-güedé.

18 Dico cue tée israhél ñá ní sàndáá iní-güedé sá cuáá-dé ní cùu, chí cuendá sa ní ndúha núú-dé ní xini ñáhá-güedé, te xíãⁿ núu ní cana-güedé tátá-dé ndíhi nãná-dé, 19 te ní xicáⁿ tñuhú-güedé núú-yu, te xáhaⁿ-güedé:

—¿Diu tée-a déhe-ndo tée càchí-ndó cuáá-dé ní cacu-dé-ãⁿ? ¿Te náa ní cuu ní ndúha núú-dé? —càchí-güedé xáhaⁿ-güedé xii-yu.

20 Te ní xáhaⁿ tátá-dé ndíhi nãná-dé:

—Diu déhe-ndí cúú-dé te sa cuáá ndisa-dé ní cacu-dé, 21 dico ñá túú xini-ndí náa ní cuu ní ndúha núú-dé, te ni ñá túú xini-ndí yoo ní quide tátna. Chí cacáⁿ tñuhú núú méé-dé xíãⁿ núu sa sàcuéhé-dé,

te na cãháⁿ-dé nõu nása ní cuu ní ndúha núú-dě —cãchí-yu xãháⁿ-yu xii-güedé.

²² Duha ní cãháⁿ tãtã-dě ndihi nãná-dě ní xãháⁿ-yu xii-güedé cuendá sã yùhú-yu cue tée cùnũu núú ñãyiũ isrãél, chi cue tée-ãⁿ sa ní ndatnúhu-güedé ní cuu ñⁿnuu-güedé sã nõu ndédacãa ñãyiũ na cãháⁿ sã Jèsús cúu-gã Crístú Yaá ní tendaha Yã Ndiõxí véxi ñuyiũ-a, te vã dãña-gã-güedé quíhu-yu veñúhu. ²³ Núu xiãⁿ ní xãháⁿ tãtã-dě ndihi nãná-dě sã ná cãcãⁿ tnúhú-güedé núú mée-dě chi sa sacuéhé-dě.

²⁴ Te xiãⁿ nõu ní cana tucu-güedé tée ní ndúha núú-xi-ãⁿ, te ní xãháⁿ-güedé:

—Cãháⁿ-n ñⁿ tnúhu ndáá chi Yã Ndiõxí ndéhé ndi-gã nãcuãa ní cuu ní ndúha núú-n, chi nchúhú xini-ndí sã dicó ñⁿ tée ndècu yicã cuèchi-xi cùu tée cãchí-n ní quide tãtã núú-n —cãchí-güedé xãháⁿ-güedé xii-dé.

²⁵ Te ní xãháⁿ-dë:

—Yùhú, ñã túú xini-í te núu tée ndècu yicã cuèchi-xi cùu-dé àdi ñãhá. Dico-ni sã xini-í sã cuãã-í ní cùu te vitna ní cuu cundehe-í —cãchí-dé xãháⁿ-dë xii-güedé.

²⁶ Te ní xicãⁿ tnúhú tucu-güedé núú-dë, te xãháⁿ-güedé:

—¿Nãsa ní quide ñaha-dë xii-n te ní ndúha núú-n-í? —cãchí-güedé xãháⁿ-güedé xii-dé.

²⁷ Te ní xãháⁿ-dë:

—Yùhú sa ní cãháⁿ-í te ñã túú quide cuendã-ndó. ¿Te ná cuendã cuini-ndó cãchí tnúhu-ni tucu-í? ¿Á tnãhá-ndó cuini-ndó quindãá ini-ndó tnúhu cãháⁿ-dé? —cãchí-dé xãháⁿ-dë xii-güedé.

²⁸ Te ní cudéãⁿ-güedé núú-dë, te ní xãháⁿ-güedé xii-dé:

—Te núu yohó cuini-n chinchicúⁿ-n tée-ãⁿ te cuãháⁿ, dico nchúhú chi canchicúⁿ niñnu nahi-ni-ndí nãcuãa ní cãháⁿ ndí Moisés. ²⁹ Te nchúhú chi ñaha-ndí sã Yã Ndiõxí ní cãháⁿ ndihi-gã ndí Moisés, dico

tée cãchí-n-ãⁿ chi ní ñã túú xini-ndí ndéé tée cùu-dé —cãchí-güedé xãháⁿ-güedé xii-dé.

³⁰ Te ní xãháⁿ tée ní ndúha núú-xi-ãⁿ:

—¿Te nãa ñã díú nchòhó cãchí-ndó sã ño túha-ndo? Te núu ducaⁿ cãháⁿ-ndó sã ñã túú xini-ndó ndéé tée cùu-dé, te diu-dé ní quide tãtã-dé núú-í ní ndúha —cãchí-dé xãháⁿ-dë xii-güedé.

Te xãháⁿ tucu-dé:

³¹ —Xini-ó sã Yã Ndiõxí ñã túú tédòho-gã tnúhu cãháⁿ ñãyiũ quide nchaa sã cuèhé sã dúhá, chi nchaa ñãyiũ quide cahnu ñaha xii-gã te quidé-yu nchaa nãcuãa cùu ini-gã, te ñãyiũ-ãⁿ tédòho-gã tnúhu cãháⁿ-yu. ³² Te ñã ñⁿ ndũu cãháⁿ ñãyiũ cuendã ñⁿ tée cada tãtã núú ñⁿ ñãyiũ cuãã ndéé ní cacu-xi te ndúha. ³³ Te núu ñã díú mée Yã Ndiõxí ní tendaha ñaha-gã xii tée-ãⁿ véxi-dé ñã, te vã ndácú-dë cada tãtã-dé núú-í ní cùu —cachí-dé xãháⁿ-dë xii-güedé.

³⁴ Te ní xãháⁿ-güedé:

—Dico yohó ndéé yatni vai cuèchi sa ta quide-n véxi, ¿te vitna nacanu ichi ñaha-n xii-ndí cãháⁿ-n-ãⁿ? —cãchí-güedé xãháⁿ-güedé xii-dé.

Te ní queñuhu ñaha-güedé xii-dé tnuú-güedé ñã túú ní dãña-gã-güedé nihi tnãhá ndihi ñaha-dé xii-güedé.

Ñãyiũ ñã túú ndixi túu ini cuendã nchaa sã cuèhé sã dúhá quidé-yu

³⁵ Te ní nihi Jèsús tnúhu sã ni queñuhu-güedé tée ní cuhú núú-xi-ãⁿ tnuú-güedé cuendã sã vã tnãhá tnúhu ndihi ñaha-gã-dé xii-güedé, te ní naníhi ñãhá-gã xii-dé te ní xãháⁿ-gã:

—¿Sãndãá ini-n Dëhe Yã Ndiõxí-ãⁿ? —cãchí-gã xãháⁿ-gã.

³⁶ Te ní xãháⁿ tée ní cuhú núú-xi-ãⁿ:

—Mèstrú, cachí tnúhu núu ndéé ndécú tée-ãⁿ cuendã quindãá ini-í-dé —cãchí-dé xãháⁿ-dë xii-gã.

³⁷ Te ní xãháⁿ Jèsús:

—Sa xini-n-dě chi diu-dé cúu yúhú tée ndàtnúhu ndíhi-n — càchí-gá xáhaⁿ-gã xii-dé.

³⁸ Te ní ngúíni xítí-dě núu-gã, te ní xáhaⁿ-dě:

—Xítohó Jesucrístú, sàndáá iní ñáhà-í xii-n —càchí-dé xáhaⁿ-dë xii-gã.

³⁹ Te ní xáhaⁿ tùcu Jesús:

—Yúhú véxi-í ñuyíú-a cada ndáá-í cuéchi ñáyíu. Te nchaa ñáyíu ñá túú quide váha cúu-yu dàtná ìⁿ ñáyíu cuàá, dico nchaa ñáyíu cùnuní iní-xi sá ñà túú quide váha, te núu na quindáá iní-yu tnúhu càháⁿ-í, te cada iní-ndó sã dàtná sá ñí nacaáⁿ núu-yu chi tní-yu tnúhu càháⁿ-í. Te ñáyíu càchí sá quidé váha vá núu núu-yu cuéchi-yu chi quesàhá-yu sá ïo ndáá quidë-yu, ñáyíu-áⁿ cúu-yu dàtná ìⁿ ñáyíu cuàá, chi vá ndíxi túu iní-yu sá ñà túú quide váha-yu ndècú-yu, te vá tní-yu tnúhu càháⁿ-í —càchí-gá xáhaⁿ-gã xii-dé.

⁴⁰ Te sá dúcáⁿ ñí càháⁿ-gá, núu ní càháⁿ ìⁿ úú cue tée cùu fariséú, te xáhaⁿ-güedë:

—¿Te náa tnàhá nchúhú cuàá-ndí càháⁿ-n-áⁿ? —càchí-güedë xáhaⁿ-güedë xii-gã.

⁴¹ Te ní xáhaⁿ Jèsús:

—Te núu dico nchòhó cuàá-ndó ñá, te vá cùndëcu cuéchi-ndo ni cùu, dico càchí-ndó sã ndéhé-ndó ìⁿ sá quidé-ndó te ñà ndáá, núu xíáⁿ ïo ndëcu cuéchi-ndo.

10

Jèsús càháⁿ-gá cuendá cùrrálí mbëé

¹ Te na càchí tnúhu ndáá-í xii-ndo sã ìⁿ tée ñà túú quíhu ndàa yuyehe ìⁿ currálí mbëé, te cùtexínu-ni na cuidó-dé, tée-áⁿ cúu-dë ñádúhú. ² Dico tée quíhu ichi yèhe currálí-güedi, tée-áⁿ cúu-dë xítohó-güedi. ³ Te tée ndë yèhe currálí-güedi nacaáⁿ-dé te cuánguihu xítohó-güedi te ní càháⁿ-dé, te ní nucúhuⁿ ndudú

ñáhá-güedi xii-dé. Te ní càháⁿ díú-dë-güedi te ní queñuhu-dë-güedi cùrrálí. ⁴ Te sáta ñí quee-güedi cùrrálí, te ní ngódó núu-dë núu-güedi, te ní ngúita nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chinchícúⁿ-güedi ìⁿ tée tàtú, chi nucúhuⁿ ndudú-güedi sá ñà díú xítohó-güedi cùu-dé, núu xíáⁿ xínú-güedi núu-dë —càchí-gá xáhaⁿ-gã xii-güedë.

⁶ Duha ní càháⁿ Jèsús cuendá sá cuiní-gá dacuahá-yu tnúhu-gá ní cùu, dico ñá ní tècú tnùní-yu nása nduu tnúhu ní càháⁿ-gã.

Jèsús cúu-gã dàtná ìⁿ toli

⁷ Te ní xáhaⁿ tùcu Jesús xii-güedë:

—Na càchí tnúhu ndáá-í xii-ndo sã yúhú cúu-í dàtná ìⁿ yèhe currálí núu ndíhu cue mbëé. ⁸ Te nchaa cue tée sa yòdo nuu-gá ní quixi ní dándàhú-güedë ñáyíu cùu-güedë dàtná ñádúhú dùhu-güedë cue mbëé ní cùu, dico ñá ní quide cuendá ñáhá-güedi xii-güedë, chi ní cutnùní iní-güedi sá ñà díú xítohó-güedi cùu-güedë. ⁹ Te yúhú cúu-í dàtná yuyèhe currálí cue mbëé. Te ducaⁿ sàtnahá-xi cùu-í chi nchaa ñáyíu na túha ñaha xii-í te naníhí tàhú-yu. Te cúu-yu dàtná cue mbëé quiti xíquee cùrrálí-xi cuáháⁿ-güedi núu cáá ité caxi-güedi, te dàtnùní cuándihu-ná-güedi cùrrálí, ducaⁿ sàtnahá-xi cúu-yu.

¹⁰ Ñádúhú òré véxi-dé chi dùhu-dé, sàhni-dé te dànaa-dé mbëé, dico yúhú chi véxi-í cuendá sá naníhí tàhú-ndó te ïo cudíⁿ iní-ndó cùnu cuechi-ndo núu Dútú Ndióxi ní caa ní quíhí. ¹¹ Te yúhú cúu-í dàtná ìⁿ toli tée ïo nèhe cuendá mbëé-xi, chi tée-áⁿ cuéi na cúu-dé sá cúu-xi mbëé-dë cuendá-nà sá ná cãcu-güedi. ¹² Te núu ìⁿ tée na còto ñaha xii-güedi, te tée-áⁿ cuendá-ni sá ñúhú yáhu-dé xító-dë-güedi. Te núu na quíní-dé sáá ìⁿ quiti

déⁿ te dàña-dé-güedi xinu-dé, te ndih-güedi xité nuu ñaha quiti dééⁿ-ãⁿ, chi ñá díú mèi xitohó-güedi cùu-dé. ¹³ Chi cuendá-ni sá ñúhú yáhu-dé xitó-dé-güedi núu ñá túú ná ndihú iní-dé cuèi na dandih ñaha quiti cuhna. ¹⁴ Te yúhú cùu-í dàtná ìⁿ téé ío váha xito mbéé-xi, chi téé-áⁿ da ìⁿ da ìⁿ-di xini-í-dé nàcuáa ndáa-di, te ducaⁿ xini ñáhá-güedi xii-dé. Te ducaⁿ sãtnahá-xi cùu yúhú ndih nchaa ñáyi sãndáá iní ñáhá xii-í, chi yúhú xini-í-yu te ducaⁿ mèé-yu xini ñáhá-yu xii-í.

¹⁵ Te ñu-ni ducaⁿ cùu-í ndih Tãtà-í, chi xini ñáhá-gã xii-í te xini-í-gã. Te sáá nduu cùu-í cuendá nchaa ñáyi sãndáá iní ñáhá xii-í. ¹⁶ Te ndècu-gã ñáyi vátá quindáá iní ñáhá-gã xii-í. Te xini ñuhu-xi cundedóho-yu tnúhu-í te quindáá iní ñáhá-yu cuendá ìⁿ-ná ichi cuú-yu, te ducaⁿ cùndecu ìⁿ-ná téé coto ñaha xií-yu cuu-dé dàtná ìⁿ tóli-yu, te téé coto ñaha xií-yu-áⁿ cùu yúhú.

¹⁷ Te Tãtà-í ío cùdí ìni ñáhá-gã xii-í cuendá sá sáá ìⁿ nduu te cuú-í, te cuú-í chi ducaⁿ càchí iní-í, te ñá díú sá cùu ìni ñáyi ñuyúú-a cuú-í, te cuú-í dico ndoto-í. ¹⁸ Te vá yóo ìⁿ te ndacu cahni ñaha xii-í, te núu ñá díú sá cùu ìni mèé-í cuú-í. Te dàtná-ni cùu iní-í sá cùu-í te ñu-ni ducaⁿ ndoto-í chi ducaⁿ ni càchí Tãtà-í Dútú Ndióxi cunduu — càchí-gã xáhaⁿ-gã xii-güedé.

¹⁹ Te sá dúcáⁿ ni cáháⁿ-gã te ñá ní cùu ìⁿnuu tucu ñáyi isràél. ²⁰ Te davá-yu ní xitnàhá-yu:

—¿Ná cuendá sãndáá-tu iní-ndó tnúhu cáháⁿ téé-ãⁿ, te yucu ñávãha ndècu ndih-dé, lúcú téé-ãⁿ? — càchí-yu xitnàhá-yu.

²¹ Te davá-yu ní xitnàhá-yu:

—¿Náa xini-ndó ìⁿ téé ndècu ndih yucu ñávãha duha váha cáháⁿ-dé? ¿Náa xini-ndó núu ndacu yucu ñávãha cada tátna-xi núu ìⁿ téé cuàá te ndúha? —càchí-yu xitnàhá-yu.

Ñáyi isràél dáquèe tihú-yu Jèsús

²² Te ndi tnahá cuía ndádá cãhnú-yu vico veñúhu cãhnu sá ío cùnuu ñuú Jerusalén, te mei yóo quidé víxiⁿ-xi quidé-yu vico-áⁿ. ²³ Te corrèdór veñúhu-áⁿ nání-xi Salomón, te xiáⁿ xicá cùu Jèsús. ²⁴ Te ní chítú níhnú ñáyi isràél núú-gã, te ní xáháⁿ-yu:

—¿Ná ndéé òré cachí tnúhu ndáá-n, te núu sá Cristú Yaá ní tendaha Yã Ndióxi véxi ñuyúú-a cùu-n, àdi ná téé cùu-n?, cáháⁿ-ni-n —càchí-yu xáháⁿ-yu xii-gã.

²⁵ Te ní xáhaⁿ Jèsús:

—Sa ní cachí tnúhu-í te ñá sãndáá iní-ndó, te ndèhe-ndo sá vái núú sá quidé-í sá ní táuchíúⁿ Tãtà-í cada-í, te cùu-xi ìⁿ sá cùtnúni iní-ndó ná téé cùu-í. ²⁶ Dico nchòhó ñá sãndáá iní-ndó, chi ñá túú cùu-ndo ñáyi ní chitnahá ñáhá xii-í. ²⁷ Chi nchaa ñáyi ní chitnahá ñáhá xii-í cùu-yu dàtná cue mbéé quiti xindecu ndih xitohó-xi chi núcúhuⁿ ndudú-güedi xitohó-güedi, te ducaⁿ nàquiní ñáhá-ni xitohó-güedi xii-güedi. Ducaⁿ sãtnahá-xi cùu nchaa ñáyi ní chitnahá ñáhá xii-í. ²⁸ Te yúhú cada-í te nduu táhú-yu cundecu ndih ñáhá-yu xii-í ni caa ni quíhⁿ te vá ìⁿ ndúu-gã cuíta nihnú-yu, te ni vá yóo ìⁿ ndacu naquendeé ñáhá xií-yu ndaha-í. ²⁹ Chi Tãtà-í ní taxi cuendá ñáhá-gã xií-yu. Te ío cùnuu-gã núu xiáⁿ vá yóo ìⁿ ndacu naquendeé ñáhá xii-yu ndaha-gã. ³⁰ Yúhú ndih Tãtà-í Dútú Ndióxi ìⁿ-ni cùu-ndí —càchí-gã xáhaⁿ-gã xií-yu.

³¹ Te ní queheⁿ tucu ñáyi isràél yúú cuãha ñáhá-yu xii-gã ní cùu.

³² Te ní xáhaⁿ-gã xií-yu:

—Ío cuéhé sã vãha ní quide-í núú-ndó ni chindee ñaha Tãtà-í Dútú Ndióxi. ¿Te ndédacáa sá ñá tnahá iní-ndó núu cuini-ndó cuãha ñaha-ndo yúú xii-í-í? —càchí-gã xáhaⁿ-gã xií-yu.

³³ Te ní xáhaⁿ ñáyi isràél:

—Ñá díú cuendá nchaa sá vǎha ní quide-n cuini-ndí cuáha ñaha-ndí yúú xii-n, chí ìⁿ òi-ní sá ío cáháⁿ úhú-n cuendá Yǎ Ndiòxí. Te dicó ìⁿ téé ñuyíú-a cùu-n te càchí-n sá cúú-n Ndiòxí —càchí-yu xǎhǎⁿ-yu xii-gá.

³⁴ Te ní xáhaⁿ Jèsús:

—Núú tütú Yǎ Ndiòxí sá ndécú ndíhi-ndo cáháⁿ-xí nàcuáa ní cáháⁿ-gá, te duha ní cachí-gá: “Nchòhó quidé-ndó ñù-í”, duha ní cachí-gá. ³⁵ Te nàha-o sá vǎ cúú quèhndé nihnu-o tnúhu yòdo tñuní núú tütú Yǎ Ndiòxí, chí mee-gǎ ní cachí-gá sá cádá-yu núú-gǎ, te vǎ càchí-ó sǎ ñǎ ndáá. ³⁶ Te núú ducaⁿ ní cáháⁿ-gá sá núú-gǎ quidé nchàa ñáiyu ní sándáá iní ñáhá xii-gá ñá, ¿te ná cuendá cúdèéⁿ-ndó núú yúhú sá càchí-í sá cúú-í Déhe-gá? Te mee Yǎ Ndiòxí ní tendaha ñaha-gá xii-í véxi-í ñuyíú-a sá cádá-í chiúⁿ-gá. ³⁷ Te núú ñá túú quide-í nàcuáa ní táuchíúⁿ Tǎtà-í cada-í ñá, te vǎ quindáá iní ñáhá-ndó. ³⁸ Te núú quide-í ñá, te cuèi vǎ quindáá iní ñáhá-ndó xii mee-í dico quindáá iní-ndó nchàa chiúⁿ quide-í. Ducaⁿ te cutnùní ndáá iní-ndó sǎ Yǎ Ndiòxí ndécú ndíhi-í te ìⁿ-ní cùu-ndí —càchí-gá xáhaⁿ-gǎ xii-yu.

³⁹ Te ní cuini-güedé tñi ñaha tucu-güedé xii-gá quíhíⁿ-gá vecaá ní cùu, dico ní xinu núú ñáhá-gǎ xii-güedé.

⁴⁰ Te ní xica-gá cuáháⁿ-gǎ ndàa ingá xio yúte Jórdán núú ní xóo dacuàndute ndí Juáá ñáiyu ndéé díhna, yàcáⁿ ní xindecu-gá. ⁴¹ Te yàcáⁿ ío vǎi ñáiyu ní sáháⁿ ní cáháⁿ ndíhi ñaha xii-gá, te ní xitnàhá-yu:

—Ndí Juáá, cuèi ñá túú ní quide ndí sá vǎ yóo tnàhí ndàcu cada dico ndáá ní cáháⁿ ndí, chí dàtná-ní ní cáháⁿ ndí quide téé-a —càchí-yu xitnàhá-yu.

⁴² Te yàcáⁿ ío vǎi-yu ní sándáá iní ñáhá-yu xii-gá.

11

Ní xíhí té Lǎzarú

¹ Núú Bètaniá ní xindecu ìⁿ téé ní xínani-dé Lǎzarú. Te càhú víhí ní tnàhá-dé ní cuhú-dé, te ní xindecu ndíhi-dé cue cúha-dé tá Màriá ndíhi tá Màrta chí xiáⁿ ñúú-yu. ² Te tá Màriá-áⁿ cúú-xí xíchí ní sódo àcítí sáháⁿ tnámí sáhá Jèsús, te ní nadayíchí-xi sáhá-gǎ ndíhi idi díquí-xi. Te cuendá sá cùhú cúha-yu té Lǎzarú, ³ núú ní tendàhá-yu ñáiyu nàha tnúhu cuáháⁿ núú Jèsús, te xǎhǎⁿ-yu xii-gá:

—Mèstrú, téé ío cùu iní-n ío càhú tnàhá-dé cùhú-dé —càchí-yu xǎhǎⁿ-yu xii-gá.

⁴ Te sá dúcáⁿ càa tnúhu ní sáá, núú ní xáhaⁿ Jèsús xii-yu:

—Dico cuhéé-ǎⁿ chí vǎ cùú-dé sá cúú dúcáⁿ-dè, chí Yǎ Ndiòxí cuini-gá sá quini-yu nchaa sá cádá-gǎ cuendá chiñuhu ñáhá-yu xii-gá, te díu-ni ducaⁿ chiñuhu ñáhá-yu xii yúhú Déhe-gá —càchí-gá xáhaⁿ-gǎ xii-yu.

⁵ Te cuèi ío cùu iní ñáhá Jèsús xii té Lǎzarú ndíhi cue cúha-dé ⁶ dico òré ní níhí-gǎ tnúhu, te ní cuyaa-gǎ úú-gá nduu núú ndécú-gǎ. ⁷ Te ní xáhaⁿ-gǎ xii cue téé xica cuu ndíhi-gá:

—Na quíhíⁿ tucu-o distritú Jùdeá —càchí-gá xáhaⁿ-gǎ xii-güedé.

⁸ Te ní xáhaⁿ cuè téé xica cuu ndíhi-gá xii-gá:

—Mèstrú, vitna-ni cuini cue téé isràél xindecu yàcáⁿ cuáha ñaha-güedé xii-n yúú ní cùu, ¿te cuini-ni tucu-n quíhíⁿ-n-ú? —càchí-güedé xáhaⁿ-güedé xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núú nduu na càca cuu-o, te ñá túú ná candaundeé-ó chí cutnùní núú-ó chí dìtó. ¹⁰ Dico núú niú ná càca cuu-o, te ío ná candaundeé-ó chí vǎ cutnùní núú-ó —càchí-gá xáhaⁿ-gǎ xii-güedé.

¹¹ Te ní xáhaⁿ Jèsús:

—Té Lǎzarú téé ío váha tnàhá tnúhu ndíhi-o ní xídí-dé dico

quihíⁿ-ó chi ndocani-o-dě —
càchí-gá xáhaⁿ-gã xii-güedé.

¹² Te ní xáhaⁿ-güedé xii-gá:

—Mèstrú, te núu xidí-dé te váa sa ta ndúha-dé cuáháⁿ —càchí-güedé xáhaⁿ-güedé xii-gá.

¹³ Duha ní cáháⁿ Jèsús, chi té Lázará sa ní xihí-dé te cue téa xica cuu ndihi-gá ní sani iní-güedé sá ní xidí ndisa-dé. ¹⁴ Te Jèsús ní xáhaⁿ ndáá-gá xii-güedé:

—Sa ní xihí té Lázará. ¹⁵ Váha-gá sá ñã ní sáháⁿ-í quíngoto-í-dé, chi ndècu ingá chiúⁿ cada-í quini-ndó, te quindáá iní ñáhá-gã-ndó xii-í, te vitna na quihíⁿ-ó núú ndécú yiqui cuñú ndíi —càchí-gá xáhaⁿ-gã xii-güedé.

¹⁶ Te té Mǎxí téa xáhaⁿ-güedé cuáchí ní xáhaⁿ-dè xii dava-gá-güedé:

—Na quihíⁿ-ó ncháa-o chi yacáⁿ cuú-ó ndihi-dé —càchí-dé xáhaⁿ-dè xii-güedé.

Jèsús cáháⁿ-gá sá cuèi na cuú ñáyiu dico ndotó-yu cundecú-yu ndihi-gá

¹⁷ Te òré ní sáá Jèsús ñuú Bètaniá, te ní xáháⁿ-yu sá sà ní cuu cúmi nduu ní xihí té Lázará. ¹⁸ Te ñuú-áⁿ cáa yatni-ni-gá ñuu Jerusàlén, dátá cuádava-ná òré cuhuⁿ-o ichi te saá-ó. ¹⁹ Núu xiáⁿ vai ñáyiu isràél ní sáháⁿ-yu ní cáháⁿ ndihi-yu tá Mǎrta ndihi cúhú-xi tá Màriá, te ní sáñáhá-yu tnúhu ndee iní sá dúcáⁿ ní xihí cúha-yu. ²⁰ Te ní níhí tá Mǎrta tnúhu sá ñúhú Jèsús ichi cuáháⁿ-gá núú ndécú-yu núu ní sáháⁿ-xi ní sátnahá-xi-gá, te cúhú-xi tá Màriá ní ndóo-xi vehe. ²¹ Te òré ní naníhí tá Mǎrta Jèsús, te ní xáhaⁿ-xi xii-gá:

—Mèstrú, te núu dicó ní xíndecu-n ìha te vá cuú cúha-ndí ní cuú. ²² Te cuèi vitna te núu ná sá ná cacáⁿ-n núú Yá Ndióxi te taxi-gá xii-n —càchí-xi xáhaⁿ-xi xii-gá.

²³ Te ní xáhaⁿ Jèsús:

—Vá ndihú iní-n chi ndoto cúha-n —càchí-gá xáhaⁿ-gã xii-xi.

²⁴ Te ní xáhaⁿ tá Mǎrta:

—Ndáá chi sa xini-í sá ndotó-dè ná quítnahá nduu ndoto nchaa ñáyiu ní xihí —càchí-xi xáhaⁿ-xi xii-gá.

²⁵ Te ní xáhaⁿ Jèsús:

—Yúhú dandòto-í-yu cuèndá cundecú-yu ni caa ni quihíⁿ ná sáá nduu. Te nchaa ñáyiu na quindáá iní ñáhá xii-í, te cuèi na cuú-yu dico ndotó-yu cundecu-í ndihi-yu ni caa ni quihíⁿ. ²⁶ Te nchaa ñáyiu ndècu vívú ñuyú-a te núu na quindáá iní ñáhá-yu xii-í, te cundecu ndihi-í-yu ni caa ni quihíⁿ. ¿Sàndáá iní-n tnúhu-a ñã? —càchí-gá xáhaⁿ-gã xii tá Mǎrta.

²⁷ Te xáhaⁿ-xi:

—Mèstrú, sàndáá iní-í, te sàndáá tucu iní-í sá diú-n cuu-n Cristú Déhe Yá Ndióxi, Yaá ní tendaha-gã vèxi ñuyú-a —càchí-xi xáhaⁿ-xi xii-gá.

Jèsús ndáhí-gá núú ní nguíndüxi té Lázará

²⁸ Sátá dúcáⁿ ní cáháⁿ-xi te ní sáháⁿ ngana-xi cúhú-xi tá Màriá, te dayuhu ní xáhaⁿ-xi:

—Yacáⁿ ní quexio Mèstrú, te càna ñaha-dé xii-n —càchí-xi xáhaⁿ-xi.

²⁹ Te sá dúcáⁿ xáhaⁿ cúhú tá Màriá sá cáná ñaha Jèsús xii-xi, núu ndihi-ni ní xica-xi cuáháⁿ-xi núú ndécú-gá. ³⁰ Te Jèsús vátá quihu-gá xiti ñuú, chi ndècu-ni-gá núú ní sáháⁿ tnahá ñáhá tá Mǎrta. ³¹ Te ñáyiu isràél ndécú sáñaha tnúhu ndee iní xii tá Màriá ndihi cúhú-xi ní sani iní-yu sá cuáháⁿ-xi núú yíndüxi cúha-xi ndáhyú-xi ní cáháⁿ-yu, núu nchicúⁿ-yu-xi cuáháⁿ.

³² Te ní sáá tá Màriá núú ndécú Jèsús te ní nguíñi xiti-xi núú-gá, te xáhaⁿ-xi xii-gá:

—Mèstrú, te núu dicó ní xíndecu-n ìha te vá cuú cúha-ndí ní cuú —cachí-xi xáhaⁿ-xi xii-gá.

³³ Te sá ní xini Jèsús ndáhyú tá Màriá ndihi ñáyiu isràél nchicúⁿ ñáhá cuáháⁿ, xiáⁿ ío ní cuyica iní-gá.

³⁴ Te ní xáhaⁿ-gã xii-yu:

—¿Ndèé ní taxi ndecu-ndo yìqui cuñú-dé-í? —càchí-gá xáhaⁿ-gã xii-yu.

Te ní xáhãⁿ-yu:

—Mèstrú, néhé ná quihíⁿ-ó te quini-n —càchí-yu xáhãⁿ-yu xii-gá.

³⁵ Te ní ndáhyú-gá tñàhá-gá. ³⁶ Te ní xítñàha ñáyiu isràél:

—Súúni cùu iní-dé ndí ni cùu —cachí-yu xítñàhá-yu.

³⁷ Te davá-yu xítñàhá-yu:

—Tée-a ní quide tátna-dé núu tée cuàá te ní ndúha. ¿Te nása ní cuu núu ñá túú ní quide tátna-dé té Lázaru cuendá sá vã cùú-dé ní cùú-í? —cachí-yu xítñàhá-yu.

Jèsús dándoto-gá té Lázaru

³⁸ Te ío ní cuyica tucu iní Jèsús òré ní quexio-gá yuhu yàú núú ní chihi-güedé yiqui cuñú té Lázaru. Te yuhu yàú-án ndedí ìⁿ yúú. ³⁹ Te ní xáhaⁿ Jèsús xii-yu:

—Chí xócàni yúú-ãⁿ —càchí-gá xáhaⁿ-gã xii-yu.

Te ní xáhaⁿ tã Màrta cúha tée ní xihí-áⁿ:

—Mèstrú, sa tucu sàháⁿ-dé chi sa ní cuu cùú nduu sá ní xihí-dé —càchí-xi xáhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ní cachí-í sá núu na quindáá iní-n, te quini-n sá ìo càhnu cuu Yá Ndiòxí? —càchí-gá xáhaⁿ-gã xii-xi.

⁴¹ Te ní xócàni-yu yúú ndedí yuhu yàú-án. Te ní ndacoto-gá andiu, te ní xáhaⁿ-gã xii Tátá-gã Dútú Ndiòxí:

—Táu, ndacáⁿ tãhù-í núú-n sá ní tédoho-n tñúhu ní cáháⁿ-í. ⁴² Te yúú sa náha-í sá ncháá-ni òré ndèdóho ñaha-n xii-í, dico duha cáháⁿ-í cuendá sá ná tècú dóho nchaa ñáyiu ndecu iha cuendá quindáá iní-yu sá díú-n ní tendaha ñaha-n xii-í véxi-í ñuyú-a —càchí-gá xáhaⁿ-gã xii Dútú Ndiòxí.

⁴³ Te sátá dúcáⁿ ní cáháⁿ-gá ndihí Yá Ndiòxí, te níhi ní cáháⁿ-gá xáhaⁿ-gã xii tée ní xihí-áⁿ:

—¡Lázaru, tandèe xíá! —càchí-gá xáhaⁿ-gã xii-dé.

⁴⁴ Te ní ndee tée ní xihí-án yaú-án, te ndùtu dóo cuñí ndàha-dé ndihí sàhá-dé, te dàhu tucu ìⁿ dóo núú-dé. Te ní xáhaⁿ Jèsús xii-yu:

—Chí nándàxi-dé te dañà-ndo-dé ná cáca-dé —càchí-gá xáhaⁿ-gã xii-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyiu nchicúⁿ ñáhá xii tá Màriá cuáháⁿ ío vãi-yu ní sándáá iní-yu Jèsús sá ní xini-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè tée cùu fariséú, te ní caní-yu cuèndú núú-güedé nàcuáa ní quide Jèsús. ⁴⁷ Te cue tée cùu fariséú ndihí cue dútú cùnùu ní nataká-güedé ní xóo-güedé jundá, te ní xítñàha-güedé:

—¿Náa cada-o?, chi tée-ãⁿ ío vãi sá vã yõ tñàhí ndàcu cada quide-dé. ⁴⁸ Te núu na dàña ío te nchaa ñáyiu quindáá iní ñáhã-yu xii-dé, te quixi cue tée ñúú Rómá dangòyo-güedé veñúhu-o te danàa-güedé nchaa ñúú-ó —càchí-güedé xítñàha-güedé.

⁴⁹ Te ìⁿ cue tée-ãⁿ nání-dé Caifás, te cùnùu-gá-dé núú dàva-gá cue dútú cuíá-ãⁿ, te ní xáhaⁿ-dè xii-güedé:

—Nchòhó ni lùha ñá túú cùtñuní iní-ndó. ⁵⁰ Te ní ñá sàha-ndo cuendá sá vaha-gá tñahá-ó, te núu na cùú ìⁿ-ni tée cuendá nchaa ñáyiu isràél, te ñá díú sá dánàa ñaha-güedé xii-yu —càchí-dé xáhaⁿ-dè xii-güedé.

⁵¹ Dico té Caifás chi ñá díú sá cúú iní mée-dé ní cáháⁿ-dè, chi cuendá sá cuíá-ãⁿ ní cunuu-dé núú cuè dútú, núu xiáⁿ Yá Ndiòxí ní dácáhu ìni ñáhã-gã nàcuáa cáháⁿ-dè sá Jèsús cuú-gá sá cúú-xí nchaa ñáyiu isràél.

⁵² Te ñá díú cuendá mee-ni ñáyiu-án cuú-gá, chi cuú-gá tñàhá cuendá nchaa ñáyiu ní sándáá iní ñáhã xii-gá, ñáyiu nchitènuu nihí ñuyúú, te ìⁿ-nà cuú-yu ndihí-gá. ⁵³ Núu ndéé nduu-ãⁿ ní ndatnúhu cue

tée cùnno núú ñáyiú isràél nàcuáa cada-güedé cahni-güedé Jèsús.

⁵⁴ Te xiáⁿ núú ñá ní xica cuu-gá Jèsús quini ñáhá ñáyiú isràél, te ní quee-gá cuáháⁿ-gá ñuú Efráin, ñⁿ ñuú cáá yàtni yucu, yàcáⁿ ní ngüíñi-gá ndihi cue tée xica cuu ndihi-gá.

⁵⁵ Te ta cùyatni nduu cadá-yu vico páscaú. Te cuéhé ñáyiú ní quee-yu ñuú-yu cuáháⁿ-yu ñuú Jerusalén cuendá sá sà ndihí-yu nchaá-yu nduu íí, te tnahá nduu vico páscaú.

⁵⁶ Te yàcáⁿ nánducú-yu Jèsús ní cùu te ñá tuú-gá òré-áⁿ, te ní naníhí tnahá-yu xití veñúhu, te xitnahá-yu:

—¿Nása sàni iní-ndó-í? ¿Quixi Jèsús vico ãⁿ ñhá? —càchí-yu xitnahá-yu.

⁵⁷ Te cue tée cùu fariséú ndihí cue dútú cúnno sa ní xáhaⁿ-güedé xii ñáyiú sá núú ndéda-ni cáá-yu xini-yu núú ndécú Jèsús te na càháⁿ-ni-yu cuendá tñi ñaha-güedé xii-gá.

12

*Íⁿ ñadihí chíhí-áⁿ Jèsús acití
(Mt. 26:6-13; Mr. 14:3-9)*

¹ Íñú-gá nduu cùmání tnahá vico páscaú, te ní sáháⁿ Jèsús ñuú Bètania, ñuú té Lázaru tée ní dándótó-gá. ² Te xiáⁿ ní cadúha-yu sá ñi cudini Jesús. Te tá Márta ní sani-xi cóho, te té Lázaru yíhí-dé mésá ndihi Jèsús, ndihí dava-gá-güedé xéxi-güedé. ³ Te tá Mária néhé-xí cuádava lítrú acití sáháⁿ tnámí sá ío ndeyáhu, te acití-áⁿ ñi cuáha mee-ni yúcu nárdú, te ní sódo-xi sáhá Jèsús, te ní nadayichí-xi ndihí idi díquí-xi sáhá-gá. Te nihí xití vehe ní xité nuu dicó acití-áⁿ. ⁴ Te té Jüdás déhe té Ximú Iscarioté ñuú-ni ñⁿ tée xica cuu ndihí-gá, tée cuáha cuendá ñáhá xii-gá núú cué tée cùu úhu iní ñhá ní xáhaⁿ-dè xii-gá:

⁵ —¿Ná cuendá ñá ní cùyáhu acití-a sá ùni cièndú díhúⁿ denàriú

cuu cuendá ñáyiú ndàhú? —càchí-dé xáhaⁿ-dè xii-gá.

⁶ Dico sá dúcáⁿ ñi cáháⁿ té Jüdás chi ñá díú sá ndísá ñùhu iní-dé ñáyiú ndàhú chi dicó-ni ñⁿ ñádúhú cúu-dé, chi ñuú-dé néhé cuendá-dé díhúⁿ-güedé ncha-güedé te ní xóo duhu ñáha-dé xii-güedé. ⁷ Te ní xáhaⁿ Jèsús:

—Daña, vá dásatú-n iní xichí-a na tàxúha nahi-xi àciti-a, chi nándihí ndéé òré ná nguñdúxi-í. ⁸ Chi nchòhó chi cuhúⁿ tnahá-ni ñáyiú ndàhú tnuú-ndó, dico yúhú chi vá ncháá nduu cundecu ndihí ñaha-í xii-ndo —càchí-gá xáhaⁿ-gá xii-dé.

*Tnahá té Lázaru cuini-güedé
cahni ñaha-güedé xii-dé*

⁹ Te vài ñáyiú isràél ní nihí-yu tñúhu sá ndécú Jèsús ñuú Bètania. Te ní sáháⁿ-yu cuendá quini-yu-gá, te quini-yu tnahá té Lázaru tée ní dándótó-gá. ¹⁰ Te cue dútú cúnno ní ndatnúhu-güedé ní cuu ñⁿnuu-güedé cuendá sá cáhni-güedé tnahá té Lázaru ní cùu, ¹¹ chi ñuú cuendá tée-áⁿ ñi cuu cuéhé ñáyiú isràél tá daña nihnú-yu-güedé cuáháⁿ cuendá sá ñi sándáá iní-yu Jèsús.

*Jèsús cuánguihu-gá ñuú Jerusalén
(Mt. 21:1-11; Mr. 11:1-11; Lc. 19:28-40)*

¹² Te nduu tnée-áⁿ vài ñáyiú ní quexìo ñuú Jerusalén cuendá cundecu-yu vico, te ní nihí-yu tñúhu sá Jèsús sáá-gá tnahá-gá cundecu-gá vico-áⁿ, ¹³ núu ní xehndé-yu ndaha yùtnu ñuú, te néhé-yu ní sáháⁿ ní sátnahá ñáhá-yu xii-gá. Te nihí ní cáháⁿ-yu, te càchí-yu:

—Ío càhnu cuu Yá Ndióxi! Te ducaⁿ-ñi ío càhnu cuu Yaá ní tendaha-gá véxi quindaha ñaha xii-o —duha ní cachí-yu.

¹⁴ Te Jèsús ní nihí-gá ñⁿ búrru, te yòdo-gá-di cuáháⁿ. Te ducaⁿ ñi cuu chi ní quee ndáá-xi nàcuáa càháⁿ-xi núú tütú Yá Ndióxi núú càchí-xi:

¹⁵ Vá yùhú nchòhó cue ñáyiú ndécu ñuú Sìón,

chi iha véxi téé yíndaha ñaha xii-ndo yodo-dé ìⁿ búrru.

Duha càchí-xi núú tütú-gá. ¹⁶ Dico cue téé xica cuu ndihi Jesús ñá ní ndàcu iní-güedé nàcuáa càháⁿ-xi núú tütú Yá Ndiòxí nàcuáa cada Jèsús. Dico sáta cuándaa-gá andiu cada cahnu ñaha Tátá-gá xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ ní cuu.

¹⁷ Nchaa ñáyiú ní xíndecu ndihi Jèsús òré ní dándótó-gá té Lázaru, ya yàcáⁿ ní caní-yu cuéndú núú ñáyiú nàcuáa ní quide ñaha-gá xii-dé.

¹⁸ Te vai-yu ní sáháⁿ-yu núú ndécú Jèsús cuéndá sá ní níhí-yu tnúhu ní quide-gá sá vā yòo tnáhi ndacu cada. ¹⁹ Te cue téé cùu fariséú ní xítñaha-güedé:

—Ní xito-ndo nã ñá túú nàndihi sá quidé-ó-vá, chi nchaa ñáyiú ní chinchícúⁿ ñáhã-yu xii-dé — càchí-güedé xítñaha-güedé.

Ñáyiú ñá túú cùu ñáyiú isràel nándicú-yu Jèsús

²⁰ Te tnàhá ñáyiú ñá túú cùu ñáyiú isràel ní sáháⁿ-yu vico ñuú Jerusalén ní quide càhnú-yu Yá Ndiòxí. ²¹ Te ñáyiú-áⁿ ní sáháⁿ-yu núú tè Lipé téé ñuú Betsaidá, te ñuú-áⁿ yíndèhu-xi distritú Galiléa. Te ní xáhãⁿ-yu xii-dé:

—Tátá, vā cündèe iní-n càchí tnúhu-n núú ndéé ndécú Jèsús, chi cùníní-ndí càháⁿ ndihi-ndí-gá — càchí-yu xáhãⁿ-yu xii-dé.

²² Te té Lipé ní naníhí-dé té Ndríxí te ní xáhaⁿ-dè nàcuáa càháⁿ-yu, te ndi nduú-güedé ní sáháⁿ-güedé ní xáhaⁿ-güedé xii Jèsús nàcuáa càháⁿ-yu. ²³ Te ní xáhaⁿ Jèsús xii-güedé:

—Vitna ní cuyatni òré cada càhnú ñaha Tátá-í xii-í, te quini-yu sá ìo càhnú cuu yúhú Téé cùu ñaní tnáhã-yu nchaá-yu. ²⁴ Te na càchí tnúhu ndáá-í xii-ndo sá núú ìⁿ tatá vā ngává-xí núú ñúhú tēhyú-xi ña, te diu-ni ducaⁿ

cúnduu-xi cundecu-xi. Dico ìⁿ tatá ná ngává núú ñúhú xínu déhe-xi, te xáⁿ nádàcayá tnáhá-xí, te mee-xi tēhyú-xi. ²⁵ Te nchaa ñáyiú ìo ñúhu iní-xi cundecu ñuyúú-a ñá túú ñúhu iní-yu Yá Ndiòxí, te ñáyiú-áⁿ cuíta nihnú-yu. Te nchaa ñáyiú ìo ñúhu iní ñáhá xii Yá Ndiòxí, ñáyiú-áⁿ cundecú-yu ndihi-gá ní caa ní quíhíⁿ. ²⁶ Te nchaa ñáyiú cùníní cunu cuechi núú-í xini ñuhu-xi natuha ñahá-yu xii-í, te nduu táhú-yu cundecú-yu núú ñúhú-í cundecu-í. Te nchaa ñáyiú na cunu cuechi núú-í, te cada càhnú ñaha Tátá-í xii-yu —càchí-gá xáhaⁿ-gá xii-güedé.

Jèsús càháⁿ-gá sá càhní ñaha-güedé xii-gá

²⁷ Te ní xáhaⁿ tucu-gá:

—Ìo ndihú iní-í. Te cúñaha-í xii Tátá-í taunihnu ñaha-gá núú dicó sá cúú, dico vā cúú chi cuéndá tnáhi-a véxi-í —càchí-gá xáhaⁿ-gá xii-güedé.

²⁸ Te ní xáhaⁿ-gá xii Tátá-gá Dútú Ndiòxí:

—Táu, cada nàcuáa ní sani iní-n cunduu cuéndá sá ná cadá càhnú ñaha ñáyiú xii-n —càchí-gá xáhaⁿ-gá.

Te ducaⁿ te ní tecú ní càháⁿ Yá Ndiòxí ndéé andiu, te càchí-gá:

—Sa ní quide-í nàcuáa cachí ñáyiú sá ìo càhnú cuu-í. Te cada tucu-í cuéndá cada càhnú ñaha-gá-yu xii-í —càchí Yá Ndiòxí xáhaⁿ-gá xii Déhe-gá.

²⁹ Te nchaa ñáyiú xíndecu ní tecú dóho-yu ní càháⁿ-gá, dico ñá túú ní sàni iní-yu sá mée-gá ní càháⁿ, chi davá-yu ní xítñahá-yu sá ñúhu ní càháⁿ, te davá-yu ní xítñahá-yu sá ìⁿ espíritú xínú cuèchi núú Yá Ndiòxí ní càháⁿ. ³⁰ Te ní xáhaⁿ Jèsús xii-yu:

—Ñá díú cuéndá yúhú ní càháⁿ Yá Ndiòxí, chi ní càháⁿ-gá cuéndá sá nchòhó cundedóho-ndo. ³¹ Te vitna ní sáa nduu càda ndáá Yá Ndiòxí cuèchi nchaa ñáyiú ñuyúú-a, te ducaⁿ te vā cúnú-gá yucu ñávaha.

³² Te na càta caa ñaha-güedé xii-í núú cùrúxí, te xiáⁿ cuú-í te nihí-yu tnúhu ni caa xico ñuyíú, te quindáá iní-yu tnúhu-í —càchí-gá xáhaⁿ-gá xii-yu.

³³ Duha ní cáháⁿ-gá cuendá cutnùní iní-yu nàcuáa ndoho-gá òré cuú-gá. ³⁴ Te ní xáháⁿ-yu xii-gá:

—Nihí-ndí tnúhu sá núú tütú yódó tnùní tnúhu Yá Ndióxi cáháⁿ-xi sá Cristú Yaá tendaha-gá quixi ñuyíú-a cundecu-gá ni caa ni quíhíⁿ. ¿Te yòhó nása cáháⁿ-tu-n sá ìⁿ téé cùu ñani tnáhá ncháa ñáyiú ñuyíú-a cahni ñaha-güedé núú cùrúxí? Te cachí tnúhu-n ná cúú tée-áⁿ —càchí-yu xáháⁿ-yu xii-gá.

³⁵ Te ní xáháⁿ Jèsús:

—Yúhú cùú-í dàtná ìⁿ ñuhú dáyehé ñuyíú-a, dico sacú-ni nduu ndècu ndíhi ñaha-í xii-ndo. Te caca-ndo ichi ndáá vitna dáyehé-gá-í núú-ndó chi na cùnee te vá cùtnùní-gá núú-ndó ndèé ichi quíhíⁿ-ndó. ³⁶ Quindáá iní ñáhá-ndó xii-í vitna ndècu ndíhi ñaha-gá-í xii-ndo dándixi túu-í iní-ndó, cuendá cutnùní iní-ndó nàcuáa ndùu cuendá Yá Ndióxi, te cuu-ndo dèhe-í —càchí-gá xáhaⁿ-gá xii-yu.

Te sátá dúcáⁿ ñí cáháⁿ Jèsús, te ní quee-gá cuáháⁿ-gá ìⁿ núú vā ná nihí ñáhā-yu xii-gá.

Ñáyiú isráel ñá cuini-yu quindáá iní-yu Jèsús

³⁷ Te cuéi ío vāi sá vā yōo tnáhi ndàcu cada ní quide Jèsús ní xiní-yu, dico ni dūcaⁿ ñá túú ní sàndáá iní-yu-gá. ³⁸ Te ducaⁿ ñí quidé-yu chi dacuítí ñí quee ndáá-xi nàcuáa ní chídó tnùní ndí Chàia ndí ní cáháⁿ tnúhu Yá Ndióxi ndéé sanaha núú tütú-gá núú càchí-xi:

Yòhó Yaá cúú Xitohó-í, vā yōo ìⁿ sàndáá iní tnúhu cáháⁿ-ndí. Te vā yōo ìⁿ cùtnuní iní-xi sá ìo càhnu cuu-n. Duha ní chídó tnùní ndí Chàia núú tütú-gá. ³⁹ Te ñá ní sàndáá iní-yu

chi ní quee ndáá-xi nàcuáa ní chídó tnùní tucu ndí Chàia núú tütú Yá Ndióxi nàcuáa cáháⁿ Jèsús:

⁴⁰ Mee Yá Ndióxi ní quide-gá sá vā tēcú tnùní-yu,

chi ní dádáhu ndodo iní ñáhá-gá xii-yu,

chi ío sáá iní-yu núu ñá ní cuini-gá-yu quindáá iní ñáhā-yu xii-gá.

Te ni vā túhá ñáhā-yu xii yúhú cuendá dacācu nihnu-í-yu.

⁴¹ Duha ní chídó tnùní ndí Chàia nàcuáa cáháⁿ Jèsús chi ní xiní ndí sá ìo càhnu cuu-gá.

⁴² Te cuéi ducaⁿ ñí cuu dico titní cue téé cūnuu núú ñáyiú isráel ní sàndáá iní ñáhá-güedé xii-gá. Dico ñá túú ní xōo cáháⁿ ndáá-güedé chi ní xōo yúhú-güedé sá vā dáñā-gá cue téé cūu fariséú quíhu-güedé veñúhu. ⁴³ Chi ní xōo cudí-gá iní-güedé sá cáháⁿ ñáyiú dàcúxí tnúhu cáháⁿ Yá Ndióxi.

Ñáyiú ñá túú sàndáá iní tnúhu Jèsús cuita nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiú na quindáá iní ñáhá xii-í, te ñá díú-ní mèe-í quindáá iní-yu, chi tnáhá Tàtā-í Yaá ní tendaha ñaha xii-í véxi-í ñuyíú-a quindáá iní-yu. ⁴⁵ Te ñáyiú xiní ñáhá xii yúhú xiní-yu tnáhá Tàtā-í.

⁴⁶ Te yúhú véxi-í dándixi túu-í iní ñáyiú ñuyíú-a cuendá cutnùní iní-yu nàcuáa ndùu cuendá Yá Ndióxi, te nchaa ñáyiú na quindáá iní ñáhá xii-í te vā cùndècu-gá-yu ichi cuèhé ichi duha. ⁴⁷ Te núu ìo davá-yu ndèdòho-yu nàcuáa cáháⁿ-í te ñá túú tní-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dācuíta nihnu-í-yu, chi véxi-í sá dācācu nihnu-í-yu. ⁴⁸ Te nchaa ñáyiú na cūyíhí iní ñáhá xii-í te ñá túú quide cuendá-yu nàcuáa cáháⁿ-í, te ñáyiú-áⁿ ná sáá nduu te cuita

nihnú-yu chi ñá ní tnǎ-yu tnúhu ní cáháⁿ-í. ⁴⁹ Te yúhú ñá túú cáháⁿ-í tnúhu véxi iní meé-í, chi mee Tātá-í Yaá ní tendaha ñaha xii-í véxi-í ñuyú-a ní cachí tnúhu-gá nàcuáa cunduu tnúhu cáháⁿ-í danèhé-í ñayiu. ⁵⁰ Te yúhú xini-í sá tnúhu ní táuchíúⁿ Tātá-í cáháⁿ-í cúú-xí ñⁿ sá vāha sá cúú xii-ndo chi nduu táhú-ndo cundecu-ndo ndihí-gá ni caa ni quíhíⁿ, núu xiáⁿ cáháⁿ-í nchaa nàcuáa ní táuchíúⁿ-gá —càchí-gá xáhaⁿ-gá xii-yu.

13

Jesús naquete-gá sáhá cuè téé xica cuu ndihí-gá

¹ Te cùmání-gá tnahá vico pascuá, te Jèsús sa nàha-gá sá sà ní cuyatni òrè dándoo-gá ñuyú-a, te ndaa-gá núú ndécú Tātá-gá. Te ío ní cuu iní-gá nchaa ñayiu ní sándáá iní ñáhá xii-gá, te ní quide ndisa-gá sá ní cuu iní ñáhá-gá xii-yu.

²⁻⁴ Te ní quíhu yucu ñávāha díquí tē Jūdás déhe té Xímú Iscarioté, te ní saní iní-dé nàcuáa cada-dé cuáha cuèndá-dé Jèsús núú cuè téé cùu úhú iní ñáhá xii-gá. Te Jèsús sa nàha-gá sá meé Yá Ndiòxí Yaá cúú Tātá-gá ní sáñaha-gá tnúhu ndee iní xii-gá sá cádá-gá núú-gá, te nàha-gá sá díú núú Tātá-gá ní quee-gá véxi-gá ñuyú-a. Te sáá nduu nàsáá tucu-gá núú Tātá-gá. Te cùdini Jesús ndihí cue téé xica cuu ndihí-gá ní cùu, te ní ndacuñí-gá yuhu mèsá, te ní taunuu-gá ñⁿ dóo níhnú-gá, te ní queheⁿ-gá ñⁿ dóo ní dácútú-gá núú yíquí-gá. ⁵ Te ní chihi-gá ndute ñⁿ tñá, te xiáⁿ ní naquete-gá sáhá cuè téé xica cuu ndihí-gá, te ndihí dóo ndútú núú yíquí-gá-áⁿ ní nadayichí-gá sáhá-güedē.

⁶ Te òrè naquete-gá sáhá tē Xímú, àdi Pelú, ní cùu ní xáhaⁿ-dē xii-gá:

—Mèstrú, ¿te yòhó naquete-n sáhà-í-u? —càchí-dé xáhaⁿ-dē xii-gá.

⁷ Te ní xáhaⁿ Jèsús:

—Vitna ñá cutnùnì iní-n sá quidè-i-a dico sáá nduu te cutnùnì iní-n —càchí-gá xáhaⁿ-gá xii-dé.

⁸ Te ní xáhaⁿ tē Pèlú:

—Yúhú chi vá ñⁿ nduu te naquete-n sáhà-í —càchí-dé xáhaⁿ-dē xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cádá-gá-n cuèndá sá ndécú ndihí ñaha-í xii-n —càchí-gá xáhaⁿ-gá xii-dé.

⁹ Te ní xáhaⁿ tē Pèlú:

—Te núu ducaⁿ te vá meé-ní sáhà-í naquete-n, chi naquete-n tnahá ndaha-í ndihí díquí-í —càchí-dé xáhaⁿ-dē xii-gá.

¹⁰ Te ní xáhaⁿ Jèsús xii-dé:

—Téé íchí ní xichí chi xini ñuhu-xi sá sáhá-na-dē ndoo, te ducaⁿ te nduu ndoo-dé nihí-dé. Te nchòhó sa càndoo-ndo cuéi ñá ncháá-ndo càndoo —cachí-gá xáhaⁿ-gá xii-dé.

¹¹ Te ducaⁿ ní cáháⁿ Jèsús chi sa nàha-gá sá ñⁿ cuè téé-áⁿ cuáha cuèndá ñáhá-güedē xii-gá núú cuè téé cùu úhú iní ñáhá, xiáⁿ núu ní xáhaⁿ-gá sá ñá túú càndoo-güedē nchaa-güedē.

¹² Te sátá ní naquete-gá sáhá-güedē, te ní ndécúñmu-gá dóo-gá, te ní nucóo-gá yuhu mèsá, te ní xáhaⁿ-gá xii-güedē:

—¿Te ní cutnùnì iní-ndo sá ní quide ñaha-í xii-ndo-áⁿ? ¹³ Te

nchòhó váha-ni cáháⁿ-ndó sá cùnùu-í, te òdanani ñaha tucu-ndo Mèstrú xii-í, te ndáá cáháⁿ-ndó.

¹⁴ Te núu yúhú cùu-í Mèstrú, te cùu tucu-í téé cùnùu te náquète-í sáhá-ndó, te díu-ni ducaⁿ càda nchòhó tucu naquete sáhá tnahá-ndó.

¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na

càchí tnúhu ndáá-í xii-ndo sá ní ñⁿ téé xinu cuechi ñá túú cùnùu-dé dácúúxí pàtróoⁿ-dē, te ní ñⁿ téé

xica chiúⁿ ñá túú cùnùu-dé dácúúxí téé tēndaha ñaha xii-dé cuáháⁿ-dē chiúⁿ.

Te ducaⁿ sàtnahá-xi cùu yúhú ndihí nchòhó. ¹⁷ Te núu ní cutnùnì iní-ndo nàcuáa ní quide

ñaha-ĩ xii-ndo ña, te ducaⁿ cada tñaha-ndo te cuu váha iní ñáhá Yá Ndióxi xii-ndo.

¹⁸ Yúhú, ñá túú cáháⁿ-í cuendá-ndó nchaa-ndo, chi yúhú sa nàha-í nàcuáa sàni iní ìⁿ ìⁿ nchòhó cue téé ní nanducu nñihu-í tnuú nchaa ñáyiú ñuhu ichi cuehé ichi duha ní cachí-í chitnahá ñáhá-ndó xii-í. Chi dacuití sá queé ndáá-xi nàcuáa cáháⁿ-xi núú tütú Yá Ndióxi núú cáhí-xi: “Téé xèxi ndìhi ñaha xii-í ngóo-dé cuu úhú iní ñáhá-dé”, duha cáhí-xi núú tütú-gá. ¹⁹ Te cùmání-gá sáá nduu cada ñaha-dé sá sání iní-dé, núú xíáⁿ cáhí tñuhu-í xii-ndo nàcuáa cada-dé, chi na sáá nduu-áⁿ te cutnùní iní-ndó sá yúhú cúu-í Cristú Yaá ní tendaha Yá Ndióxi véxi ñuyú-a. ²⁰ Te na cáhí tñuhu ndáá-í xii-ndo sá nchaa ñáyiú na queheⁿ cuendá ñáhá xii cue téé tendaha-ĩ cáháⁿ tñuhu-í, te cada iní-yu sá tñáhá yúhú ní queheⁿ cuendá-yu. Te nchaa ñáyiú na queheⁿ cuendá ñáhá xii-í, te cada iní-yu sá tñáhá Tàtá-í Dútú Ndióxi Yaá ní tendaha ñaha xii-í véxi-í ñuyú-a ní queheⁿ cuendá-yu —cáhí-gá xáhaⁿ-gá xii-güedé.

Jèsús cáhí-gá sá té Júdás cuáha cuendá ñáhá-dé xii-gá núú cué téé cùu úhú iní ñáhá

(Mt. 26:20-25; Mr. 14:17-21; Lc. 22:21-23)

²¹ Te sátá dúcáⁿ ñí cáháⁿ Jèsús te ío ní ndíhú iní-gá, te ní xáhaⁿ-gá xii-güedé:

—Na cáhí tñuhu ndáá-í xii-ndo sá ñíu-ní ìⁿ nchohó cuáha cuendá ñáhá-ndó xii-í núú cué téé cùu úhú iní ñáhá —cáhí-gá xáhaⁿ-gá xii-güedé.

²² Te ní ngúíta cue téé xica cuu ndíhi-gá ndéhé ìⁿ ndehe ìⁿ núú tñáhá-güedé, chi ñá ní cùtnùní iní-güedé ndédacàa-güedé cuendá-güedé ní cáháⁿ-gá. ²³ Te ìⁿ téé-áⁿ ío cùdíí iní ñáhá Jèsús, te ndècu yatni-dé ñíhi-gá cùdini-dé ndíhi-gá. ²⁴ Te té Xímú, àdi Pelú chi úu ñíu-dé, ní quide-dé seña

núú téé ndècu yatni ñíhi-gá-áⁿ sá càcáⁿ tñuhú-dé núú-gá ñuu ndédacàa-güedé cuendá-güedé ní cáháⁿ-gá. ²⁵ Te téé-áⁿ ní sáháⁿ ndehe yatni-gá-dé ñíhi Jèsús, te ní xáhaⁿ-dé xii-gá:

—Mèstrú, ¿ndédacàa-ndí cuendá-ndí ní cáháⁿ-n-í? —cáhí-dé xáhaⁿ-dé xii-gá.

²⁶ Te ní xáhaⁿ Jèsús:

—Na chindóyo-í luha pàá, te téé na cuáha-í te téé-áⁿ cúu-dé —cáhí-gá xáhaⁿ-gá xii-dé.

Te ní chindóyo-gá luha pàá, te ní sáha-gá té Júdás déhe té Xímú Iscarioté. ²⁷ Te òré ní queheⁿ-dé pàá, te ní ngúndecu ndíhi ñaha ñuuⁿ-ná yucu ñávaha xii-dé. Te ní xáhaⁿ Jèsús:

—Sá ñí sani iní-n càda-n te cada ndíhi-ni-n —cáhí-gá xáhaⁿ-gá xii-dé.

²⁸ Te ní ìⁿ cue téé cùdini ndíhi-gá ñá ní tècú tñuni-güedé nása nduu tñuhu ní xáhaⁿ-gá xii té Júdás. ²⁹ Te dava-güedé ní sani iní-güedé sá sá cuendá sá ndécú ndíhi-dé sá ñúhú ñíhúⁿ, te váa ío ìⁿ sá cuááⁿ-dè nàndíhi-güedé vico, àdi ñíhúⁿ cuáha-dé ñáyiú ndáhú xáhaⁿ-gá ní cáháⁿ-güedé. ³⁰ Te sa ní cundiquiⁿ ní queheⁿ cuendá té Júdás pàá caxi-dé, te òré ní níhí-dé pàá-áⁿ te ní quee-dé cuáháⁿ-dé.

Jèsús cáhí tñuhu-gá nàcuáa cada-o

³¹ Te sátá ñí quee té Júdás cuáháⁿ-dé, te ní xáhaⁿ Jèsús xii dava-gá-güedé:

—Vitna te quiní-ndó ndíhi nchaa ñáyiú sá ío càhnu cuu yúhú Téé cùu ñaní tñáhá-ndó nchaa-ndo, te òré-áⁿ cutnùní iní-ndó sá ío càhnu cuu tucu mee Yá Ndióxi. ³² Te núu yúhú quidé càhnu-í Yá Ndióxi, te ñíu-ní ducaⁿ cada cahnu ñaha-gá xii yúhú, te ñá túú-gá titní nduu te ducaⁿ càda-gá. ³³ Te nchòhó cue déhe-í na cáhí tñuhu-í sá sàcú duha-ná nduu ndècu ndíhi ñaha-í xii-ndo.

Te nchòhó nanducu ñàha-ndo xii-í dico vá ná ñihí ñáhá-ndó dàtná ní xáhaⁿ-í xii ñáyiú isràél, te ðiu-ni ducaⁿ càháⁿ-í núú-ndó sã vã ndácú-ndó quíhíⁿ-ndó núú quíhíⁿ-í. ³⁴ Te duha sànu ichi ñaha tucu-í xii-ndo nàcuáa cada-ndo sã cúú ñí tnáhá-ndó ìⁿ ìⁿ-ndo datná yúhú cúú ñí ñáhà-í xii-ndo. ³⁵ Te núu na cùu ñí tnáhá-ndó ìⁿ ìⁿ-ndo ña, te ducaⁿ te cutnùní ñí nchaa ñáyiú sã cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gã sã tè Pelú vá nñnuu-dé sã xicá cùu ndihí ñaha-dé xii-gã

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tè Xímú, àdi Pelú chi úú ðiu-dé, xii Jèsús:

—Mèstrú, ¿ndéé quíhíⁿ-n-í? —càchí-dé xáhaⁿ-dè xii-gã.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quíhíⁿ núú quíhíⁿ-í, dico na sãá nduu te dai sãá-n núú cündecu-í —càchí-gá xáhaⁿ-gã xii-dé.

³⁷ Te ní xáhaⁿ tè Pelú xii-gã:

—Mèstrú, ¿te ná cuendá núu vá ndácú-í canchicúⁿ ñáhà-í xii-n quíhíⁿ vitna-í? Chi yúhú ñá túú tnàhí yúhú-í cuèi na cùú-í sã cuendá-n —càchí-dé xáhaⁿ-dè xii-gã.

³⁸ Te ní xáhaⁿ Jèsús:

—¿Te ndáá sã xèhndé ñí-n sã cuèi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñá túú xini ñáhá-n xii-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó núú ndécú Yã Ndiòxí

¹ Te ní xáhaⁿ-gã xii-güedé:

—Te ñá túú nã caní ñí-ndó. Quindáá ñí-ndó Yã Ndiòxí, te quindáá ñí-ndó yúhú. ² Chi núú ndécú Tãtà-í ío nùne núú cündecu-o, chi núú ñáhá ñá te sa cachí tnúhu-í xii-ndo ní cùu. Te vitna na nùhú-í

te cada túha-í núú cündecu-ndo. ³ Te dàtnùní quixi tucu-í te candeca ñaha-í xii-ndo quíhíⁿ cuendá ìⁿ-ni xichi cundecu-o. ⁴ Te sa ñaha-ndo ndéé quíhíⁿ-í te sa xini-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tè Mǎxí xii-gã:

—Mèstrú, ñá túú xini-ndí ndéé quíhíⁿ-n te da ichi-ná quini-ndí —càchí-dé xáhaⁿ-dè xii-gã.

⁶ Te ní xáhaⁿ Jèsús:

—Yúhú cùú-í dàtná ìⁿ ichi te càháⁿ-í tnúhu ndáá, te yúhú cada-í te naníhí tǎhú-ndó, Te ìⁿ ðií ðií-ni yúhú cada-í te sãá-ndó núú Yã Ndiòxí cundecu-ndo te núu na quindáá ñí ñáhá-ndó xii-í. ⁷ Te núu ðicó cùtnùní ndisa ñí-ndó yòo cuu-í-áⁿ, ducaⁿ te cutnùní ñí-ndó yòo cuu Tãtà-í ní cùu. Dico vitna dàtná sã ñí xini núú-ndó Dútú Ndiòxí Yáá cúú Tãtà-í cada ñí-ndó, chi ní xini-ndó yúhú —càchí-gá xáhaⁿ-gã xii-dé.

⁸ Te ní xáhaⁿ tè Lìpé xii-gã:

—Mèstrú, dánèhé ñáhá xii-ndí Dútú Ndiòxí chi na cùu váha ñí-ndí —càchí-dé xáhaⁿ-dè xii-gã.

⁹ Te ní xáhaⁿ Jèsús xii-dé:

—Lìpé, ¿te náa ñá túú xini ñáhá-n xii-í? Te sa ní cuu vãi nduu ndecu ndihí ñaha-í xii-ndo, chi ñáyiú xini ñáhá xii-í te xini-yu tnàhá Tãtà-í. ¿Te ná cuendá yòhó càchí-n sã dánèhé ñáhà-í xii-ndo Tãtà-í?

¹⁰ ¿Náa ñá túú sãndáá ñí-ndó sã yúhú ndécú-í ndihí Tãtà-í? Te mee-gã ndécú ndihí ñaha-gã xii-í. Te nchaa tnúhu càháⁿ-í núú-ndó ñá túú càháⁿ-í sã véxi ñí mée-í, chi Tãtà-í Yáá ndécú ndihí ñaha xii-í chindée ñaha-gã quidè-í chiuⁿ-gã.

¹¹ Te quindáá ñí-ndó sã yúhú ndécú-í ndihí Tãtà-í, te ducaⁿ mée-gã ndécú ndihí ñaha-gã xii-í. Te núu ñá túú sãndáá ñí-ndó tnúhu càháⁿ-í-a, te dandacu ñí-ndó nchaa chiuⁿ ta quide-í véxi, te quindáá ñí ñáhá-ndó. ¹² Te na càchí tnúhu ndáá-í xii-ndo sã nchaa ñáyiú na quindáá ñí ñáhá xii-í, te

cadá-yu chiùⁿ quide-í te càhnu-gá chiùⁿ cadá-yu chi yúhú nùhú-í núú ndécú Tàtá-í cundecu-í nàcuáa níhí ndéé-gá-yu cundecu-yu. ¹³ Te nchaa sá ná càcáⁿ-ndó te taxi-í te núu na quindáá iní ñáhá-ndó xii-í, te nchaa cada-í cuendá cutnùní iní ñáiyu sá ío càhnu cuu Tàtá-í Dútú Ndiòxí. ¹⁴ Te yúhú cada-í nchaa sá cuíní-ndó càcáⁿ táhú-ndó núu-í, te núu na quindáá iní ñáhá ndisa-ndo xii-í.

Jesús càchí-gá sá téndàha-gá Espiritú Yá Ndiòxí quixi cundecu ndihí-o

¹⁵ Te núu nchòhó cúú iní ñáhá-ndó xii-í te tñii-ndo nchaa tnúhu càháⁿ-í. ¹⁶ Te yúhú cacáⁿ táhú-í núú Tàtá-í sá téndàha-gá Espiritú-gá quixi cundecu ndihí-ndo cànu ichi ñaha-xi xii-ndo nacuaa cundecu-ndo, te chindee ñaha-xi xii-ndo ni caa ni quihíⁿ. ¹⁷ Te nchaa ñáiyu ndècu ichi cuehé ichi duha ñá túú xiní-yu Espiritú Yá Ndiòxí te ni vā cúú cundecu ndihí-yu. Dico nchòhó sa xiní-ndó Espiritú-gá te ndècu ndihí ñaha-xi xii-ndo. Te sáá ìⁿ nduu te cunuu Espiritú-gá iní-ndó. ¹⁸ Te yúhú vā dáñá ñihnu ñaha-í xii-ndo, chi quixi tucu-í cundecu ndihí ñaha-í xii-ndo. ¹⁹ Te sácú duha-ná nduu ndècu-í te vā quini ñáhá-gá ñáiyu xii-í, dico nchòhó chi quini ñáhá-ní-ndó xii-í. Te ducaⁿ-ni cundecu-ndo ichi váha chi cundecu ndihí ñaha-í xii-ndo ni caa ni quihíⁿ. ²⁰ Te dàvá-áⁿ cutnùní iní-ndó sá ndécú-í ndihí Tàtá-í, te ducaⁿ nchòhó cundecu ndihí ñaha-ni-ndo xii-í. ²¹ Te nchaa ñáiyu dàcuaha tnúhu-í te tñii-yu, ñáiyu-áⁿ quidé ndisá-yu sá cúú iní ñáhá-yu xii-í. Te ducaⁿ Tàtá-í cúú iní ñáhá-gá xii-yu, te ducaⁿ-ni yúhú cúú iní-í-yu tucu, te ducaⁿ te cutnùní iní-yu sá ndécú ndihí-í-yu —càchí-gá xáhaⁿ-gá xii-dé.

²² Te ní cáháⁿ ìⁿ téé nàni Judás dico ñá díú tē Júdás déhe té Xímú

Iscarioté ní càháⁿ, chi ingá té Júdás ní xáhaⁿ-dē xii-gá:

—Mèstrú, ¿nása cada-n cuendá cutnùní iní-ndí sá cundècu ndihí ñaha-n xii-ndí, te ñáiyu ñúhu ichi cuehé ichi duha vā cundècu ndihí-n-yu-í? —càchí-dé xáhaⁿ-dē xii-gá.

²³ Te ní xáhaⁿ Jèsús xii-güedé:

—Nchaa ñáiyu cùu iní ñáhá xii-í te tñii-yu tnúhu càháⁿ-í, te ñáiyu-áⁿ cúú iní ñáhá Tàtá-í xii-yu, te yúhú ndihí Tàtá-í ndécú-ndí ndihí-yu. ²⁴ Te nchaa ñáiyu ñá túú cùu iní ñáhá xii-í te ñá túú tñii-yu tnúhu càháⁿ-í. Te nchaa tnúhu ní cáháⁿ-í ní xindédóho-ndo chi Tàtá-í Yáá ní tendaha ñaha xii-í véxi-í ñuyúu-a ní dácáhu iní ñáhá-gá xii-í, te ñá díú mèe-í ní càhu iní-í tnúhu cáháⁿ-í.

²⁵ Duha nduu tnúhu càháⁿ-í núú-ndó vitna ndecu ndihí ñaha-gá-í xii-ndo. ²⁶ Dico Yá Ndiòxí tendaha-gá Espiritú-gá quixi-xi cada-xi núú-í taxi-xi tnúhu ndee iní xii-ndo, te díu-xi chindee ñaha-xi xii-ndo te danèhé ñáhá-xí xii-ndo nchaa sá cúmáni quini-ndó, te díu-ni-xi dandàcu iní ñáhá-xí xii-ndo nchaa nacuaa ní cáháⁿ-í.

²⁷ Te yúhú chindee chítuu ñaha-í xii-ndo ío váha cuu iní-ndó cundecu-ndo datná yúhú ío váha cùu iní-í ndécú-í, chi sa ta cùyatni nduu núhú-í. Te yúhú càchí tnúhu ndáá-í sá chindèe ñaha-í xii-ndo, te vā cadà-í datná quidé ñáiyu ñúhu ichi cuehé ichi duha. Te ni vā ndihú iní-ndó, te ni vā yúhú-ndó. ²⁸ Te sa ní xindédóho-ndo ní cáháⁿ-í sá nùhú-í, te quixi tucu-í cundecu ndihí ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núú ndécú Tàtá-í, te cudí iní-ndó ní cùu, chi ío càhnu cuu-gá dàcúúxí yúhú. ²⁹ Te sa ní cachí tnúhu-í sá nùhú-í, te na sáá òré nùhú-í núú ndécú Tàtá-í, te quindáá iní ñáhá-ndó xii-í.

³⁰ Te ñá túú-gá vāi tnúhu ndatnúhu ndihí ñaha-í xii-ndo chi sa véxi yucu ñávaha sá táxi tnùní

ñuyíu-a, dico vá táxi tñuní ñáhá-xí xii yúhú. ³¹ Te cada-í nchaa nàcuáa ní táuchíuⁿ Tàtá-í cuèndá cutnùnì iní nchaa ñáyiú ñuyíu-a sá yúhú ío cùu iní-í-gá. Te vitna chí ndácuñí ná quíhíⁿ-ó —càchí-gá xáhaⁿ-gá xii-güedé.

15

Cuèndá yoho yàha stilé ndihi nchaa dité-xi

¹ Te ní xáhaⁿ tucú-gá xii-güedé:

—Yúhú cùu-í dàtná yoho yàha stilé, te Tàtá-í cùu-gá dàtná ìⁿ téé xito yoho yaha stilé-áⁿ. ² Te nchaa ñáyiú ní sándáá iní ñáhá xii-í cùu-yu dàtná dité nchaa yoho yàha stilé-áⁿ. Te téé xito yoho yaha stilé-áⁿ xèhndé-dé nchaa dité-xi sá ñà cùnì-gá-xi cuuⁿ ndéhé-xi, te ndàda ndoo-dé nchaa dité-xi sá cùuⁿ cuèndá cuuⁿ-gá. ³ Te ducaⁿ sàtnahá-xi cùu nchohó, chí sa ní xócuñí nchaa sá cuèhé sá dúhá ndècu ndihi-ndo, chí ní sándáá iní-ndo tnúhu ní cáháⁿ-í. ⁴ Te cuu ìⁿnuu-ndo cundecu ndihi ñaha-ndo xii-í, te núu ducaⁿ na càda-ndo, te cundecu ndihi ñaha-í xii-ndo. Chí núu ìⁿ yutnu vídì ná quèndé dité-xi, te dité-xi sá ní quèndé-áⁿ vá cùuⁿ-gá sávidí-xi chí duuⁿ duuⁿ ní xíta-xi. Ducaⁿ sàtnahá-xi cùu nchohó chí vá ndácú-ndo càda-ndo chiúⁿ-í, te núu vá cundecu ndihi ñaha-í xii-ndo.

⁵ Chí yúhú cùu-í dàtná yutnu vídì-áⁿ, te nchòhó cùu-ndo dàtná nchaa dité-xi. Te nchaa ñáyiú cùu ìⁿnuu ndihi ñaha xii-í, te ndècu ndihi-í-yu, te ndácú-yu quidè-yu chiúⁿ-í. Te núu vá cùu ìⁿnuu ndihi ñahá-yu xii-í, te vá ndácú-yu cadá-yu chiúⁿ-í. ⁶ Te nchaa ñáyiú vá cùu ìⁿnuu ndihi ñaha xii-í, te yáha-yu dàtná yàha ìⁿ dité yutnu vídì sá ñà túú cùuⁿ sávidí-xi, chí xèhndé-güedé yìchí-xi, te sàhmi-güedé.

⁷ 'Cuu ìⁿnuu ndihi ñaha-ndo xii-í, te vá nàcuána-ndo nacuáa ní cáháⁿ-í. Te núu ducaⁿ na càda-ndo,

te nánì cuìní-ndo cǎcáⁿ-ndo núu-í te taxi-í. ⁸ Te núu nchòhó ná cadá vǎha-ndo cundecu-ndo, te ío cada càhnu-ndo Tàtá-í, te ducaⁿ cutnùnì sá ndísá cùu-ndo cue téé ní chitnahá ñáhá xii-í. ⁹ Te yúhú ío cùu iní ñáhá-í xii-ndo dàtná cùu iní ñáhá Yá Ndióxi xii-í. Te cada-ni-ndo mèe-ni sá vǎha cuèndá cudí iní ñáhá-gá-í xii-ndo. ¹⁰ Te núu na quèndáá iní-ndo càda-ndo nchaa nacuáa ní cáháⁿ-í, te ío cuu iní ñáhá-í xii-ndo, chí yúhú ducaⁿ ìo sándáá iní-í Tàtá-í quidè-í nchaa nàcuáa ní cáháⁿ-gá, te xǎⁿ núu ío cùu iní ñáhá-gá xii-í.

¹¹ 'Duha cáháⁿ-í núu-ndo cuèndá cudí ndísá iní-ndo dàtná cudí iní mèe-í. ¹² Te duha ndùu tnúhu cáháⁿ-í cuèndá sá cùu iní tnáhá-ndo ìⁿ ìⁿ-ndo datná cùu iní ñáhá-í xii-ndo. ¹³ Te núu ní xihó sá cùu-xi ìⁿ téé ío vǎha tnáhá tnúhu ndihi-o, te xǎⁿ cutnùnì iní ñáyiú sá ío cùu iní-ó-dé. ¹⁴ Te nchòhó cuu-ndo cuè téé ío vǎha tnáhá tnúhu ndihi-í te núu na càda-ndo nchaa nacuáa cáháⁿ-í. ¹⁵ Te vá cǔnaha-gá-í xii-ndo sá cùu-ndo cuè téé xínu cuechi núu-í, chí ní ìⁿ téé xínu cuechi ñá túú xini-dé ná quidè pàtróⁿ-dé. Te yúhú càchí-í xii-ndo sá cùu-ndo cuè téé ío vǎha tnáhá tnúhu ndihi-í, chí ní cachí tnúhu-í nchaa nacuáa ní cáháⁿ Tàtá-í. ¹⁶ Te ñá díú nchòhó ní cáháⁿ ñáhá-ndo xii yúhú, chí yúhú ní cáháⁿ ñáhá-í xii-ndo. Te yúhú tauchiúⁿ-í quíhíⁿ-ndo càda-ndo nchaa nacuáa ní cáháⁿ-í, chí tnúhu-áⁿ vá ndíhí ñhnu-xi. Te ducaⁿ nchaa sá ná cǎcáⁿ-ndo núu Tàtá-í Yá Ndióxi te taxi-gá, te núu na quèndáá iní ñáhá-ndo xii-í. ¹⁷ Te yúhú cáháⁿ-í dóho-ndo sá cùu iní tnáhá-ndo ìⁿ ìⁿ-ndo.

Ñáyiú ndècu ichi cuehé ichi duha cùu úhú iní-yu Jèsús ndihi nchaa ñáyiú sándáá iní tnúhu-gá

¹⁸ 'Te nchaa ñáyiú ndècu ichi cuehé ichi duha ñá cùu quíni ñáhá-yu xii-ndo, te sa nàha-ndo sá díhna-gá yúhú ní ngúíta-yu ducaⁿ ñá cùu quíni ñáhá-yu xii-í. ¹⁹ Te

núu dicó tnàhá nchòhó ndécú-ndó ichi cuehé ichi duha ña, te cuu iní ñáhã-yu xii-ndo dàtná cúú iní tnáhã-yu ndi mèé-yu ni cùu. Te yúhú ní nanducu ñihnu ñaha-í xii-ndo tnúú ñáyiu ndècu ichi cuehé ichi duha, núu xiãⁿ ío cùu úhú iní ñáhã-yu xii-ndo cuendá sá ñà túú-gã chítñahá-ndó-yu. ²⁰ Te dandácu iní-ndó nàcuáa ní cãháⁿ-í sá ni ñⁿ tée xinu cuechi ñá túú cùnuu-dé dàcúúxi pàtróóⁿ-dè. Te yúhú cúú úhú iní ñáhã-yu, te ñiu-ni ducaⁿ càda ñahá-yu xii nchòhó. Te núu dicó ní tnã-yu tnúhu ní cãháⁿ-í ñá, te ñiu-ni ducaⁿ tnã-yu tnúhu cãháⁿ-ndó nũ-yu ni cùu. ²¹ Te ducaⁿ càda ñahá-yu xii-ndo sá cuendá-í, chi ñá xini-yu Tãtà-í Yáá ní tendaha ñàha xii-í véxi-í ñuyú-a.

²² Te váa vá cùndècu cuèchi-yu ni cùu, te núu ñá túú yúhú ní cãháⁿ-í nũ-yu, te vitna vá cúú tnàhí cachí-yu sá ñà túú cuèchi-yu. ²³ Chi nchaa ñáyiu cùu úhú iní ñáhá xii-í, te cùu úhú iní-yu tnàhá Tãtà-í. ²⁴ Te váa ni ñⁿ cuèchi-yu vá cùndècu ni cuu, te núu dicó ñá túú ní xini-yu nchaa sá ní quide-í sá vá yòo tnàhí ndàcu cada. Te cuèi ní xini-yu dico dai cùu úhú iní ñáhã-yu xii-í ndihí Tãtà-í. ²⁵ Te duha quidè-yu chi dacuítí quèe ndáá-xi nàcuáa yòdo tnuní núú tütú Yã Ndiõxi sá dácuahá-yu, chi càchí-xi sá ñà túú nã cuèchi-í te cuu úhú iní ñáhã-yu xii-í.

²⁶ Te Espiritú Tãtà-í Dútú Ndiõxi sá ndécú nũú-gã tendaha-í quixi chindee ñàha-xi xii-ndo, te canu ichi ñaha-xi nàcuáa cundecu-ndo, te Espiritú-áⁿ cãháⁿ ndáá-xi cuendá cutnùní iní nchaa ñáyiu yoo cùu-í. ²⁷ Te nchòhó tnàhá-ndó cãháⁿ váha-ndo cuendá-í cuendá cutnùní iní-yu yoo cùu-í, chi ñaha-ndo sá ndéé òré ní nguíta-í quidè-í chiúⁿ Tãtà-í ní chitnahá ñáhã-ndó xii-í — càchí-gá xãhaⁿ-gã xii-güedé.

16

¹ Te ní xáhaⁿ tùcu-gá xii-güedé:

—Duha càháⁿ-í cuendá ná nanchòcáva iní-ndó nũhú-ndó ichi cuehé ichi duha. ² Chi vá dáñá-gã-güedé quihu-ndo vèñuhu, te ní vá cúú-gá quini ndéé ñáhã-güedé xii-ndo. Te sáá ñⁿ nduu te cahni ñaha-güedé xii-ndo, te xiãⁿ cuu cahaⁿ-güedé sá quidè-güedé chiúⁿ Yã Ndiõxi. ³ Te ducaⁿ càda-güedé chi ñá túú xini-güedé Tãtà-í, te ní ñà túú xini ñáhã-güedé xii yúhú. ⁴ Te duha nduu tnúhu càháⁿ-í núú-ndó, chi na sáá òré te ndacu iní-ndó nchaa tnúhu sá sá ní cachí tnúhu-í xii-ndo nàcuáa cada ñaha-güedé xii-í.

Nchaa chiúⁿ quide Espiritú Yã Ndiõxi

⁵ Te ñá túú ní càchí tnúhu-í xii-ndo ndéé díhna chi ndècu ndihí ñaha-í xii-ndo. ⁶ Dico vitna sa ta cüyatni nduu nũhú-í núú ndécú Tãtà-í Yáá ní tendaha ñàha xii-í véxi-í ñuyú-a. Te ní ñⁿ nchòhó ñá túú xicáⁿ tnúhú-ndó nũú-í nũu ndéé quihíⁿ-í. ⁷ Chi mee-ni sá ndihú iní-ndó sá dúcáⁿ ní cãháⁿ-í. ⁸ Te na càchí tnúhu ndáá-í xii-ndo sá váha-gá sá cúú-xi-ndó nũu nũhú-í, chi tendaha-í Espiritú Yã Ndiõxi quixi cundecu ndihí-ndo chindee ñaha-xi, chi núu vá nũhú-í te vá quixí Espiritú-gá cundecu ndihí-ndo chindee ñaha-xi xii-ndo. ⁹ Te na quixi Espiritú-gá te dandixi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhã-xi sá ndécú ñⁿ ichi váha ichi ndáá. Te Espiritú-gá-áⁿ cada-xi nàcuáa cutnùní iní-yu sá Yã Ndiõxi cada ndáá-gá cuèchi-yu. ¹⁰ Te ducaⁿ te cutnùní iní-yu sá ndécú cuèchi-yu, chi ñá túú sàndáá iní ñáhã-yu xii-í. ¹¹ Te ducaⁿ te cutnùní iní-yu nàcuáa nduu cuendá ichi váha ichi ndáá, chi yúhú nũhú-í núú ndécú Tãtà-í, te nchòhó vá quini ñáhã-gã-ndó. ¹² Te ducaⁿ te cutnùní iní-yu sá Yã Ndiõxi cada ndáá-gá cuèchi-yu, chi

sa ní cáháⁿ-gá sá yúcu ñávaha sá táxí tnùní ñuyíú-a quíhíⁿ-xi núú ùhú núú ndàhú.

¹² Te vâi-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchaa vitna. ¹³ Te na quixi Espiritú Yá Ndiòxí, Espiritú càháⁿ ndáá cuiti, te Espiritú-áⁿ danèhé ñáhá-xí nchaa tnúhu váha tnúhu ndáá. Te vá dácàhu iní ñáhá-xí xii-ndo sá vèxi iní méé-xí chí dacàhu iní ñáhá-xí nchaa sá càháⁿ Yá Ndiòxí, te cachí tnúhu-xi nchaa ñàcuáa cada-xi ndéé núú cuáháⁿ núú vèxi-gá. ¹⁴ Te Espiritú-gá-áⁿ cada càhu ñaha-xi xii yúhú chí ndècu ndihí-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndihí Tàtá-í ndécú ndihí-í tnàhá-í, núú xíáⁿ càchí-í sá Espiritú-gá danèhé ñáhá-xí nchaa tnúhu-í xii-ndo.

Nchaa ñáyiú ndìhú iní-xi nduu dǎi iní-yu na quixi tucu Jesús

¹⁶ Te ìⁿ úú-ná nduu ndècu-í te vá quini ñáhá-gá-ndó xii-í, dico núú sàcú-ni nduu te quini ñáhá tucu-ndo xii-í, te ducaⁿ chi núhú-í núú ndécú Tàtá-í —càchí-gá xáhaⁿ-gá xii-güedé.

¹⁷ Te sá dúcáⁿ ní cáháⁿ-gá nùu ní nguíta ìⁿ úú cue téé xica cuu ndihí-gá xitnàha-güedé:

—¿Nása ndùu-tu tnúhu càháⁿ-gá sá càchí-gá sá ìⁿ úú-ná nduu ndècu-gá te vá quini-gá-ó-gá, dico núú sàcú-ni nduu te quini tucu-o-gá-i?, chí núhú-gá núú ndécú Tàtá-gá —càchí-güedé xitnàha-güedé.

¹⁸ Te xitnàha tucu-güedé:

—¿Nása cuáháⁿ-tu tnúhu-áⁿ sá sàcú-ni nduu? Te ñá tècú tnùní-ó nása ndùu tnúhu càháⁿ-gá —càchí-güedé xitnàha-güedé.

¹⁹ Te Jèsús ní cutnùní iní-gá sá cuini-güedé cácaⁿ tnúhú-güedé núú-gá nása ndùu tnúhu ní cáháⁿ-gá, núú ní xáhaⁿ-gá:

—Cuèndá sá ní cachí-í sá ìⁿ úú-ná nduu ndècu-í te vá quini

ñáhá-gá-ndó xii-í, dico núú sàcú-ni nduu te quini ñáhá tucu-ndo xii-í ní cachí-í, ¿xíáⁿ ndúcu tnúhu núú tnàhá-ndó-áⁿ? —càchí-gá xáhaⁿ-gá xii-güedé.

²⁰ Te ní xáhaⁿ tucu-gá:

—Te na càchí tnúhu ndáá-í xii-ndo sá nchòhó ndihú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chí da cudǎi iní-yu. Dico nchòhó ñáyiú ndáhyú chí sáá nduu te nduu dǎi iní-ndó. ²¹ Chí dàtná cuini-ndó cùu ìⁿ ñadihí ñaha ní tnàhá nduu cacu déhe-xi vâi sani iní-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gá ndácú iní-aⁿ sá ní quide úhú ñáhá-xí xii-aⁿ chí mee-ná sá cudǎi iní-aⁿ déhe-aⁿ. ²² Ducaⁿ sàtnahá-xi cùu nchohó vitna chí ndihú iní-ndó sá nùhú-í, dico quixi tucu-í quixi coto ñaha-í xii-ndo, te òré-áⁿ te cudǎi ndisa iní-ndó, te vá yóo ìⁿ-gá dandihú iní ñáhá xii-ndo davá-áⁿ.

²³ Te davá-áⁿ ñá túú-gá ná nducu tnúhu-ndo nùu-í. Te na càchí tnúhu ndáá-í xii-ndo sá Tàtá-í taxi-gá nchaa sá ná cácaⁿ-ndó núú-gá nùu na quindáá iní ñáhá-ndó xii-í. ²⁴ Te ndéé vitna vátá dúcáⁿ-gá cada-ndo cácaⁿ-ndó. Dico cácaⁿ-ndó núú-gá nùu ná cuini-ndó te taxi-gá cuèndá cudǎi ndisa iní-ndó —càchí-gá xáhaⁿ-gá xii-güedé.

Xitohó Jesucristú ní cunuu tnúhu-gá núú yucu ñávaha

²⁵ Te xáhaⁿ tucu-gá xii-güedé:

—Mee-ni ní chidáhu ndodo-í tnúhu ní cáháⁿ-í núú-ndó, dico sáá nduu te vá chidáhu-gá-í tnúhu cáháⁿ-í, chí cáháⁿ ndáá-na-í cuèndá Tàtá-í. ²⁶ Te davá-áⁿ cácaⁿ-ndó núú Tàtá-í nùu ná cuini-ndó te taxi-gá, te núu na quindáá iní ñáhá-ndó xii yúhú Déhe-gá. Te ñá túú-gá xini ñúhu-xi sá yúhú cácaⁿ-í núú-gá cuèndá-ndó chí cácaⁿ méé-ná-ndó. ²⁷ Chí mee Tàtá-í ío cùu iní ñáhá-gá xii-ndo cuèndá cúú iní ñáhá-ndó xii-í, te sàndáá iní-ndó sá nùú-gá

ní quee-í véxi-í. ²⁸ Te yúhú ní quee-í núú Tàtá-í véxi-í ñuyú-a, te vitna dándóo-í ñuyú-a te núhú-í núú ndécú-gá —càchí-gá xáhaⁿ-gá xii-güedé.

²⁹ Te ní xáhaⁿ cuè téé xica cuu ndihí-gá:

—Vitna chi càháⁿ ndáá-ná-n, ñá túú-gá chídáhu-n tnúhu càhá-n.

³⁰ Te vitna ní xiní-ndí sá ïo váha cùtnuní iní-n ncháa nacuaa cùu, te cùtnuní iní-n ncháa nacuaa sàni iní ncháa ñáyiu. Te ñá túú xiní ñuhu-xi nágá nducu tnúhu-yu núú-n chi ncháa sa ní dátúu-n nũ-yu. Te xiáⁿ nũu sándáá iní-ndí sá nũú Yá Ndiöxí ní quee-n véxi-n —càchí-güedé xáhaⁿ-güedé xii-gá.

³¹ Te ní xáhaⁿ Jèsús:

—¿Te vitna sándáá iní-ndó-ãⁿ?

³² Vitna ní sáá nduu ní sáá òré sá ncháá nchòhò cuténuu-ndo caa ïⁿ caa úú cuu-ndo, te dándóo mee ñaha-ndo xii-í. Dico ñá díú mèe dii-í quendóo chi ndècu ndihí-í Tàtá-í.

³³ Duha càháⁿ-í cuendá cuu váha iní-ndó cündecu-ndo, chi ñuyú-a cuu úhú iní ñáhã-yu xii-ndo, dico ni vã yùhú-ndó chi yúhú sa ní dáqueé tñhù-í ncháa sá cuèhé sá dúhá ïó ñuyú-a —càchí-gá xáhaⁿ-gá xii-güedé.

17

Jèsús xicáⁿ tãhú-gã núú Tàtá-gã Dútú Ndiöxí cuendá cue téé xica cuu ndihí-gá

¹ Te sáta dúcáⁿ ní cáháⁿ Jèsús te ní ndacoto-gá andú, te ní xáhaⁿ-gã xii Tàtá-gã Dútú Ndiöxí:

—Táu, vitna ní sáá nduu càda cahnu ñaha-n xii-í cuendá ducaⁿ càda cahnu ñaha-í xii-n. ² Chi mee-n ní cachí-n sá táxi tnúni-í ncháa ñáyiu ñuyú-a, te dácacu nihnu-í ncháa ñáyiu ní cachí-n nàníhí tãhú.

³ Te cundecu ndihí-ö-yu ni caa ni quíhⁿ, chi sándáá iní ñáhã-yu sá ïⁿ díi-ni yòhó cúú-n Ndiöxí ndisa, te ducaⁿ xiní ñáhã-yu xii yúhú Jesu-crístú téé ní tendaha-n véxi ñuyú-a.

⁴ Te yúhú ní chiñuhu ñaha-í xii-n ñuyú-a, te ní xínu chiúⁿ ní cachí-n càda-í. ⁵ Táu, vitna na nàsáá-í núú-n te cada cahnu ñaha-n xii-í dàtná ní xóo cada cahnu ñaha-n xii-í ndéé cùtnáhá vátá ngáva-gá ñuyú.

⁶ Te ncháa ñáyiu ní nanducu nihnu-n tnuú ncháa ñáyiu ndècu ichi cuehé ichi duha, ní taxi cuendá-n-yu, te ní xáhaⁿ-í xii-yu yoo cùu-n. Te cuendá-n cùu-yu, te ní taxi cuendá-n-yu, te ní sándáá iní-yu tnúhu-n. ⁷ Te vitna ní cutnúni iní-yu sá ncháá tnúhu ndècu ndihí-í díu-ni mee-n ní taxi-n. ⁸ Te ní dánèhé-í-yu ncháa tnúhu sá ní dánèhé ñáhã-n xii-í, te ní sándáá iní-yu. Te ní cutnúni iní-yu sá nũú-n ní quee-í véxi-í, te ní sándáá iní-yu sá yòhó ní tendaha ñaha-n xii-í véxi-í ñuyú-a.

⁹ Te yúhú càháⁿ ndàhú-í núú-n cuendá ncháa ñáyiu ní taxi cuendá-n. Te ñá túú càháⁿ ndàhú-í núú-n cuendá ñáyiu ndècu ichi cuehé ichi duha, chi cuendá ncháa ñáyiu ní taxi cuendá-n càháⁿ-í, chi cuendá-n cùu-yu. ¹⁰ Te ncháa sá cúú cuendá-í cúú-xí cuendá-n, te ncháa sá cúú cuendá-n cùu-xi cuendá-í tnáhã-í. Te xiquide cahnu ñahã-yu xii-í.

¹¹ Te yúhú vá cündècu-gá-í ñuyú-a, dico mèe-yu chi cundecu-ni-yu, te yúhú ndixi-í núú ndécú-n. Táu, yòhó ïo yíñuhu ndecu-n, te yúhú càháⁿ ndàhú-í núú-n sã ní yùhu ni iní-n còto-n ncháa ñáyiu ní taxi cuendá-n, ñáyiu ní sándáá iní tnúhu-í cuendá sá ïⁿ-ní ichi cuú-yu cundecú-yu dàtná ïⁿ-ni cùu nchoo. ¹² Chi òré ndécú-í ndihí-yu ñuyú-a ní xito-í-yu nàcuáa cùu iní-n, te ni ïⁿ-yu ñá túú ní xíta nihnu, chi ïⁿ-ni té Jüdás ní xíta nihnu tnàhí-dé, te ducaⁿ ní cuu cuendá sá ní quee ndáá-xi nàcuáa yòdo tnuní núú tütú-n.

¹³ Te vitna sa ndixi-í núú ndécú-n, dico nini ndècu-gá-í ñuyú-a duha càháⁿ-í cuendá

sá cúdĩ iní-yu dàtná cúdĩ iní mée-í. ¹⁴ Te yúhú ní dánèhé-í-yu tnúhu-n, dico nchaa ñáyi ndècu ichi cuehé ichi duha cùu úhú iní ñáhà-yu xii-yu cuèndá sá ñà túú-gã ndécú-yu ichi cuehé ichi duha-áⁿ dàtná yúhú ñà túú ndècu-í ichi-áⁿ. ¹⁵ Te ñà túú càchí-í sá xócàní-n-yu ñuyíú-a, dico càháⁿ ndàhú-í núú-n sã dáçacu nihnú-n-yu núú yucu ñãvãha. ¹⁶ Te yúhú ñà túú ndècu-í ichi cuehé ichi duha, te ducaⁿ mée-yu ñà túú-gã ndécú-yu ichi cuehé ichi duha. ¹⁷ Te ío na cùndecu yihí ñuhu-gá-yu núú-n dàcuahá-yu tnúhu-n, chi cùu-xi ìⁿ tnúhu ndáá. ¹⁸ Te dàtná ní tendaha ñaha-n xii yúhú véxi-í tnuú nchaa ñáyi ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yu tnúhu-í tnuú nchaa ñáyi ndècu ichi cuehé ichi duha. ¹⁹ Te yúhú ndécú yíñuhu-í núú-n, te cada ñaha-n xii-í nàcuáa cùu iní-n sã cuèndá-yu, te ducaⁿ te cundecu yíñuhú-yu núú-n dàcuahá-yu tnúhu-n.

²⁰ Te ñà díú cuèndá mee-ni ñáyi sa ní sándáá iní-xi càháⁿ ndàhú-í núú-n, chi tnáhà cuèndá nchaa ñáyi na quíndáá iní ñáhà xii-í ndéé idá-gá ñu na cùndedóho-yu tnúhu cáháⁿ ñáyi na tendaha-í. ²¹ Te xicáⁿ táhú-í núú-n sã ncháá-yu ìⁿ-nã ichi na cùu-yu, te ìⁿ-nã caní iní ndihí ñáhà-yu xii-o dàtná cúu nchòo ìⁿ-ni cuu-o. Te ducaⁿ ìⁿ-ná cuu-o ndihí-yu cuèndá sá ná quíndáá iní nchaa ñáyi ndècu ichi cuehé ichi duha sá díú-n ñi tendaha ñaha-n xii-í véxi-í ñuyíú-a. ²² Te nchaa sã vãha ní taxi-n ndècu ndihí-í ní dánèhé-í-yu cuèndá sá ìⁿ-nã cuú-yu cundecú-yu dàtná ndécú nchòo. ²³ Te yúhú cundecu ndihí-í-yu, te yòhó cundecu ndihí ñaha-n xii yúhú cuèndá ìⁿ-nã cuu ndisá-yu cundecú-yu. Te ducaⁿ te cutnúní iní nchaa ñáyi ndècu ichi cuehé ichi duha sá díú mée-n ní tendaha

ñaha-n xii-í véxi-í ñuyíú-a, te cùu iní-n-yu dàtná cúu iní ñáhà-n xii yúhú.

²⁴ Táu, mee-n ñi taxi cuèndá-n-yu, te cuní-í sá cùndecú-yu núú cùndecú-í cuèndá quini-yu sá quidé càhnu ñaha-n xii-í chi ducaⁿ-ni cùu iní ñáhà-n xii yúhú ndéé cùtnáhà vátá ngáva-gã ñuyíú. ²⁵ Táu, yòhó ío yíñuhu ndècu-n. Te ñáyi ndècu ichi cuehé ichi duha ñà túú xini ñáhà-yu xii-n, dico yúhú chi xini ñáhà-í xii-n, dico ñáyi ní sándáá iní ñáhà xii-í sa xini-yu sá díú-n ñi tendaha ñaha-n xii-í véxi-í ñuyíú-a. ²⁶ Te sa xáhaⁿ-í xii-yu yoo cùu-n, te díu-ni ducaⁿ càda-í cuèndá cuu iní tnáhà-yu dàtná cúu iní ñáhà-n xii-í, te ducaⁿ cùndecu-í ndihí-yu — càchí-gã xáhaⁿ-gã xii Tátá-gã Dútú Ndióxi.

18

Ní tñi-güedé Jèsús ndécá ñaha-güedé cuáháⁿ

(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñi cáháⁿ Jèsús, te ní quee-gã ndihí cue téé xica cuu ndihí-gã cuáhàⁿ-güedé ndàa ingá xio yuhu yúu Cèdrón. Te yàcáⁿ cáá ìⁿ lahuertá, te xití lahuertá-áⁿ cuãnguihu Jèsús ndihí cue téé xica cuu ndihí-gã. ² Te té Jüdás déhe té Ximú Iscarioté téé ní sáha cuèndá ñáhà xii-gã núú cuè téé cùu úhú iní ñáhà sa xini-dé lahuertá-áⁿ chi titní xito ní sáhàⁿ Jèsús ndihí-güedé xíaⁿ. ³ Núu ndáá ichi xíaⁿ ñi sáá té Jüdás ndihí vãi sandadú, ndihí cue téé quide cuèndá veñúhu ní techíuⁿ ñaha cue dútú cúnúu, ndihí cue téé cùu fariséú. Te xinehe-güedé machití ndihí ìⁿ úú-gã sá dééⁿ, te yòtnúú-güedé linterná ndihí iti ní sáá. ⁴ Te Jèsús sa nàha-gã nchaa nàcuáa cada ñaha-güedé xii-gã ñu ní sáhàⁿ tuha ñaha-gã xii-güedé, te ní xáhaⁿ-gã:

—¿Yoo nànducu-ndo? —cachí-gã xáhaⁿ-gã xii-güedé.

⁵ Te ní xáhaⁿ-güedë:
—Jèsús tée ñúú Nazàrét
nándücu-ndí—càchí-güedé xáhaⁿ-güedé
xii-gá.

Te ní xáhaⁿ Jèsús:
—Yúhú ducaⁿ nàni-í, te náu-í
ndécú-á te núu yúhú nándücu-ndo
—cachí-gá xáhaⁿ-gã xii-güedé.

Te tnàhá té Jüdás tée ní sáha
cuendá ñháá xii-gá ndihi-güedé. ⁶ Te
òré ní xáhaⁿ Jèsús sá díú-gã cúú
tée nándücu-güedé, te ní nacaca
dùma-güedé te ní nduá-güedé ndéé
ñuhu. ⁷ Te ní xicáⁿ tnúhú tucu Jesús
núú-güedé yoo nándücu-güedé. Te
ní xáhaⁿ tucu-güedé sá Jèsús tée ñúú
Nazàrét nándücu-güedé, ⁸ núu ní
xáhaⁿ-nã Jèsús:

—Sa ní cáháⁿ-í sá díú yúhú ducaⁿ
nàni-í, te núu yúhú nándücu-ndo,
te dañà-ndo nchàa cue tée iha na
núhú-güedé —càchí-gá xáhaⁿ-gã
xii-güedé.

⁹ Duha ní cuu chi ní quee ndáá-xi
nàcuáa ní cáháⁿ méé Jèsús chi ní
cachí-gá sá ncháá ñáyüu ní sáha
cuendá ñháá Yã Ndiòxi cundecu
ndihi-gá vá cuíta niñnú-yu. ¹⁰ Te
té Xímú, àdi Pelú chi úú diu-dé,
néhé-dë ñⁿ machití, te ní tava-dé
machití-áⁿ ñⁿ-xi te ní xehndé-dé
lóho xio cùha ñⁿ tée nàni Malcú
ní quéndéé duuⁿ. Te tée-áⁿ xínú
cuèchi-dé núú dùtú cúnüu-gá. ¹¹ Te
ní xáhaⁿ Jèsús xii té Pelú:

—Nataxúha machití-áⁿ núú
ñúhú-xí, chi dacuitíí sã ndòhò-í
nàcuáa ní cachí Tàtà-í cunduu —
càchí-gá xáhaⁿ-gã xii-dé.

*Jèsús ndécú-gã núú dùtú
cúnüu-gá*

(Mt. 26:57-58; Mr. 14:53-54; Lc.
22:54)

¹² Te cue sandàdú ndihi cue tée
cúnüu-gá núú-güedé, ndihi cue tée
quide cuendá veñúhu ní tnii-güedé
Jèsús, te ní dácútú ñháa-güedé. ¹³ Te
ndèca ñháa-güedé xii-gá cuáhánⁿ núú
ndécú té Ànás, te té Ànás-ánⁿ cúú-dé
tátá ñadiñí té Caifás. Te té Caifás-ánⁿ
ní cuu-dé dùtú cúnüu-gá cuíá-áⁿ.

¹⁴ Te diu-ni tée-ánⁿ ñí xáhaⁿ-dë xii
ñáyüu isràél sá vaha-gá sá ñⁿ-ní tée
na cúú-dé sá cuendá-yu nchaa-yu.

*Té Pelú càháⁿ-dé núú ñáyüu sá ñà
túú xini-dé Jèsús*

(Mt. 26:69-70; Mr. 14:66-68; Lc.
22:55-57)

¹⁵ Te té Pelú, àdi Xímú chi úú
diu-dé, ndihi ingá tucu-dé nàcuáa
xica cuu ndihi-güedé Jèsús nchicúⁿ
ñháa-güedé xii-gá cuáhánⁿ. Te ñⁿ
tée-ánⁿ xini tnàhá-dë ndihi dùtú
cúnüu-ánⁿ núu nchicúⁿ-dé tnàhá-dé
Jèsús cuánguihu ndéé núú cáá vèhe
tée cúnüu-ánⁿ. ¹⁶ Dico té Pelú ní
ndóo-dé yuyèhe ndaa quehé, núu
ní ndee tée ndihi té Pelú-ánⁿ ñí
cáháⁿ ndihi-dé ñháa ndéé yuyèhe,
te ndèca-dé té Pelú cuánguihu. ¹⁷ Te
ní xáhaⁿ ñháa ndéé yuyèhe-ánⁿ xii té
Pelú:

—¿Náa ñà díú yòhó tnàhá-n
xica cuu ndihi-n tée ndèca-güedé
cuánguihu-a? —càchí-aⁿ xáhaⁿ-aⁿ
xii-dé.

Te ní xáhaⁿ tē Pelú:

—Ñháa, ñà túú tée-ánⁿ xicá cùu
ndihi-ú —càchí-dé xáhaⁿ-dë xii-aⁿ.

¹⁸ Te ío víxiⁿ quide-xi núu cue
tée xinu cuechi, ndihi cue tée quide
cuendá veñúhu ní dátñhá-güedé
ñuhú, te xínutñí teté-güedé ndihi té
Pelú.

*Dútú cúnüu nducu tnúhu-dé núú
Jèsús*

(Mt. 26:59-66; Mr. 14:55-64; Lc.
22:66-71)

¹⁹ Te dùtú cúnüu ní xicáⁿ
tnúhú-dë núú Jèsús núu nándí cùu
cue tée xica cuu ndihi-gá, te nándí
sá dánèhé ñháa-gã xii-güedé. ²⁰ Te
ní xáhaⁿ-gã:

—Yúhú càháⁿ ndodo-í núú nchàa
ñáyüu cuéi xití veñúhu càhnu sá ío
cúnüu, te cuéi xití nchaa dava-gá
veñúhu núú tàcá nchaa ñáyüu isràél
ducaⁿ-ni dānehé-í-yu, te ñà túú
dàyuhu cáháⁿ-í. ²¹ Núu vá càcáⁿ
tnúhú-n núu-í. Càcáⁿ tnúhú núú
nchàa ñáyüu sácúndedóho tnúhu
càháⁿ-í, te na càháⁿ-yu núu nása

ndùu tnúhu càháⁿ-í chi xini-yu —
càchí-gá xáhaⁿ-gã xii-dé.

²² Te sá dúcáⁿ nĩ cáháⁿ Jèsús
núu ìⁿ tée quide cuendá veñúhu
nútnĩ-dé tnàhá-dé te ní caní-dé ìⁿ
déhndé núu-gã. Te ní xáhaⁿ-dè:

—¿Ná cuendá ducaⁿ càháⁿ-n núu
dütú cúnùu-i? —cachí-dé xáhaⁿ-dè
xii-gã.

²³ Te ní xáhaⁿ Jèsús xii-dé:

—Te núu nèhè ní cáháⁿ-í te
cáháⁿ-n nása ndùu tnúhu ní cáháⁿ-í,
te yúhu càháⁿ váha-í te ducaⁿ
càniha-n —cachí-gá xáhaⁿ-gã xii-dé.

²⁴ Te ndùtu yoho-ni Jesús ní
dánùhú ñháá tẽ Anás xii-gã ndaha
té Caifás dütú cúnùu-gã.

*Té Pèlú càháⁿ tucu-dé núu ñáyi
sá ñà túú xini-dé Jèsús*

(Mt. 26:71-75; Mr. 14:69-72; Lc.
22:58-62)

²⁵ Te té Pèlú nútnĩ teté-ni-dé, te ní
xáhaⁿ-güedé xii-dé:

—¿Náa ñá díú tnàhá yòhó xíca
cùu ndìhi tée ndèca-ndí véxi-ãⁿ? —
càchí-güedé xáhaⁿ-güedé xii-dé.

Te ní xáhaⁿ tẽ Pèlú:

—Ñáha, ñá túú tẽ-áⁿ xíca
cùu ndìhi-ú —càchí-dé xáhaⁿ-dè
xii-güedé.

²⁶ Te ìⁿ ñaní tnáhá tẽe ní xehndé
té Pèlú lóho-xi-áⁿ xínú cuèchi-dé
tnàhá-dé núu dütú cúnùu. Te tée-áⁿ
ní xáhaⁿ-dè xii té Pèlú:

—¿Náa ñá díú tnàhá-n ndìhi-n-dé
ní xini ñháá-í òré ní tnĩ-ndí-dé
xiti lahuertá? —càchí-dé xáhaⁿ-dè
xii-dé.

²⁷ Te té Pèlú ní xáhaⁿ tùcu-dé sá ñà
díú-dè, te òré-áⁿ nĩ cana ìⁿ líhi.

Jèsús ndécú-gã núu tẽ Pilatú

(Mt. 27:1-2, 11-14; Mr. 15:1-5;
Lc. 23:1-5)

²⁸ Te ní ndeñuhu-güedé Jèsús vehe
té Caifás, te ndèca ñaha-güedé xii-gã
cuáháⁿ vechiùⁿ tée cùu gobiernú. Te
sa ta cùdító-ni-gã cuáháⁿ núu ñá ní
cùiní cue tée isràél quíhu-güedé xiti
vechiùⁿ tée cùu gobiernú-áⁿ. Te núu
ní quíhu-güedé vechiùⁿ-áⁿ ñá, te vá
cúu-gã quíhu-güedé cudini-güedé

vico pàscuá ní cùu chi ducaⁿ tnàhí
quide-güedé. ²⁹ Núu té Pilatú tée cùu
gobiernú ní quee-dé vechiùⁿ-dé ní
cáháⁿ ndìhi ñaha-dè xii-güedé, te ní
xáhaⁿ-dè:

—¿Ná cuèchi ní quide tée-a núu
ndèca-ndo-dé véxi? —càchí-dé
xáhaⁿ-dè xii-güedé.

³⁰ Te ní xáhaⁿ-güedé:

—Te núu dicó ñá túú cuèchi-dé-áⁿ
te vá cándèca-ndí-dé quixi núu-n
ní cùu —cachí-güedé xáhaⁿ-güedé
xii-dé.

³¹ Te ní xáhaⁿ tùcu té Pilatú
xii-güedé:

—Chí cándèca-dé cuánùhú, te
cada ndáá-ndó cuèchi-dé nàcuáa
càa leí méé-ndó —càchí-dé xáhaⁿ-dè
xii-güedé.

Te ní xáhaⁿ-güedé:

—Dico nchúhú ñáyi isràél chi ñá
túú dùcaⁿ taxi tnuní leí sá cáhni-ndí
—càchí-güedé xáhaⁿ-güedé xii-dé.

³² Te ducaⁿ nĩ cuu chi dacuití nĩ
quee ndáá-xi nàcuáa ní cáháⁿ méé
Jèsús cada-xi cuú-gã. ³³ Te cuándihu
té Pilatú vechiùⁿ-dé, te ní cana-dé
Jèsús ní xicáⁿ tnúhú-dè núu-gã, te
xáhaⁿ-dè:

—¿Yòhó yíndàha-n ñáyi is-
ràél-áⁿ? —càchí-dé xáhaⁿ-dè xii-gã.

³⁴ Te ní xáhaⁿ Jèsús:

—¿Te xiáⁿ càháⁿ-n sã véxi iní
méé-n, àdi ió ìⁿ ñáyi ní cachí tnúhu
xii-n cuendá-í? —càchí-gã xáhaⁿ-gã
xii-dé.

³⁵ Te ní xáhaⁿ tẽ Pilatú xii-gã:

—Ñá díú tẽ isràél cùu-í núu
ducaⁿ càháⁿ-n, chi cue ñaní tnáhá-n
cuè tée isràél ndìhi cue dütú cúnùu
ní taxi cuendá ñháá-güedé xii-n
iha. ¿Te ná ní quide-n? —càchí-dé
xáhaⁿ-dè xii-gã.

³⁶ Te ní xáhaⁿ Jèsús:

—Ñá díú tẽ ñuyú-a cùu-í te ní
ñà túú véxi-í taxi tnuní-í ñuyú-a,
chi núu dicó iha taxi tnuní-í áⁿ te
cue tée xica cuu ndìhi-í nàá-güedé
ndìhi cue tée isràél cuendá sã vá
tní ñaha-güedé xii-í ní cùu, dico ñá
túú véxi-í sã táxi tnuní-í ñuyú-a —
càchí-gã xáhaⁿ-gã xii-dé.

37 Te ní xáhaⁿ tẽ Pilatú:

—¿Te tée yìndaha ñáyiu cùu-ó vání? —càchí-dé xáhaⁿ-dẽ xii-gá.

Te ní xáhaⁿ Jèsús:

—Te dàtná càchí-n-ãⁿ yìndaha ndisa-í ñáyiu, chi yúhú véxi-í ñuyíu-a te iha ní cacu-í te càháⁿ-í mee-ni tnùhu ndáá. Te nchaa ñáyiu na cùdíí iní-xi tnùhu ndáá, te tedóho-yu nchaa tnùhu càháⁿ-í —càchí-gá xáhaⁿ-gã xii-dé.

38 Te ní xáhaⁿ tẽ Pilatú:

—¿Te ná cuú-tu tnùhu ndáá-áiⁿ? —càchí-dé xáhaⁿ-dẽ xii-gá.

Càchí-güedé sá cáhni-güedé Jèsús

(Mt. 27:15-31; Mr. 15:6-20; Lc. 23:13-25)

Te sátá ñi yáha ní xicáⁿ tnúhú tẽ Pilatú núu Jèsús, te ní quee tucu-dé quehé, te xáhaⁿ-dẽ xii cue tée isràél:

—Ñá túu ná cuèchi tée-a. 39 Te váha-ni chi ducaⁿ tnàhi quide nchohó sá ndi tnahá nduu víco pascuá cuini-ndó sá dácácu-í ñⁿ tée yìhi vecaá. Te núu cuini-ndó te na dácácu-í tée yìndaha ñaha xii-ndo —càchí-dé xáhaⁿ-dẽ xii-güedé.

40 Te sá dúcáⁿ ñi cáháⁿ-dé, núu nchaa-güedé níhi ní cáháⁿ-güedé, te xáhaⁿ-güedé:

—¡Vá dácácu-n tée-áⁿ, té Barrábás dácácu-n! —càchí-güedé xáhaⁿ-güedé xii-dé.

Te té Barrábás-áⁿ ñi cuu-dé ñⁿ ñadúhú.

19

1 Te té Pilatú ní táuchíuⁿ-dẽ ní tniñ ñaha cuè sandadú xii Jèsús, te ní caniha-güedé xii-gá ndehi ñi. 2 Te ñiu-ni cue tée-áⁿ ñi cadúha-güedé ñⁿ coroná iñu ní chihi-güedé díquí-gã, te ní dáquíu nuu ñaha-güedé xii-gá ñⁿ dóo tícuèhé víhí. 3 Te ní sáháⁿ ndehe yatni-gá-güedé núu-gã, te ní xáhaⁿ-güedé:

—¡Ío càhnu cuu yohó tée yìndaha ñaha xii ñáyiu isràél! —càchí-güedé xáhaⁿ-güedé cúdíquí ndéé ñáhá-güedé xii-gá.

Te ní cani-güedé déhndé núu-gã.

4 Te ní quee tucu té Pilatú quehé te ní xáhaⁿ-dẽ xii nchaa ñáyiu xindecu quehé:

—Te cundehe-ndo-dẽ ná ndéé ñùhu-í-dé iha, chi yúhú sáha-í cuendá sá ñà túu cuèchi-dé —càchí-dé xáhaⁿ-dẽ xii-yu.

5 Te ní ndeñuhu ñaha té Pilatú xii Jèsús xití vechiùⁿ-dé te ñùhu ñⁿ coroná iñu díquí-gã, te ñihnu-gá dóo tícuèhé víhí-ãⁿ. Te ní xáhaⁿ tẽ Pilatú xii-yu:

—¡Nái-dé-a! —càchí-dé xáhaⁿ-dẽ xii-yu.

6 Te ní xiní ñáhá cuè dútú cúnùu ndihí cue tée quide cuendá veñuhu. Te ní cuáá-güedé, te xáhaⁿ-güedé:

—¡Cata caa-dé! ¡Cata caa-dé núu cùrúxí! —càchí-güedé xáhaⁿ-güedé xii-dé.

Te ní xáhaⁿ tẽ Pilatú:

—Váha-gá núu candeca mee-ndo-dẽ quíhíⁿ cata caa-ndo-dẽ núu cùrúxí, chi yúhú cútnùní iní-í sá ñà túu na cuèchi-dé —càchí-dé xáhaⁿ-dẽ xii-güedé.

7 Te ní xáhaⁿ cuè tée isràél:

—Léi ndécú ndihí nchúhú càchí-xi sá dài cuú-dé, chi càchí-dé sá Déhe Yá Ndióxi cúu-dé —càchí-güedé xáhaⁿ-güedé xii-dé.

8 Te sá dúcáⁿ ñi xáhaⁿ-güedé xii té Pilatú, te vaa-gá ní yùhú-dé. 9 Núu cuándihu tucu-dé vechiùⁿ-dé, te ní xáhaⁿ tucu-dé xii Jèsús:

—¿Te yòhó ndéé tée cùu-n-i? —càchí-dé xáhaⁿ-dẽ xii-gá.

Dico Jèsús ñà túu ní cáháⁿ-gá.

10 Núu ní xáhaⁿ tẽ Pilatú xii-gá:

—¿Te vá càchí tnùhu-n núu ndéé tée cùu-n-u? ¿Náa ñà túu xiní-n sá yúhú táxi tnùní-í, te cuu-ni tauchiùⁿ-í cata caa ñaha-güedé xii-n núu cùrúxí cuú-n, te cuu-ni dácácu ñaha-í xii-n-ãⁿ? —càchí-dé xáhaⁿ-dẽ xii-gá.

11 Te ní xáhaⁿ Jèsús:

—Yòhó ñà túu sá táxi tnùní ñáhá-n xii yúhú ní cùu núu ñà túu Yá Ndióxi ní cuini-gá sá dúcáⁿ cùnduu, te tée ní taxi cuendá ñáhá

xii-í núú-n tēe-áⁿ ño-gá ndècuéchi-dé dácúxí yòhó —càchí-gá xáhaⁿ-gá xii-dé.

¹² Te òré-áⁿ nǐ ngüita té Pilatú ndúcú-dě nàcuáa cada-dé dácácu-dé Jèsús ní cùu, dico cue tée israhél ní ngüita-güedé ní cuáá-güedé, te xáhaⁿ-güedé:

—Te núu na dácácu-n tēe-áⁿ, te ñá díú tēe tnàhá tnúhu ndihi té Cèsár cùu-n. Chì ndéda-ni caa tēe na cachi sá cùú-dé tēe yindaha ñaha xii ñáiyu cùu úhú iní-dé té Cèsár. Te té Jèsús-áⁿ càchí-dé sá táxí tnùní-dé —càchí-güedé xáhaⁿ-güedé xii-dé.

¹³ Te sá dúcáⁿ nǐ xáhaⁿ-güedé xii té Pilatú núu ní quee-dé ndihi Jèsús cuáháⁿ ndihi ñaha-dě corrèdór núu nǐ quee mee-ni yúú váha núú ñúhú, te xíaⁿ nání-xí Gábatá tnúhu hēbreú. Te xíaⁿ ndécú xilé sácóo nchihi té Pilatú xèhndé-dé cuéchi ñáiyu, núu ní nucóo-dé núu xilé-dé òré ní quexio-dé ndihi Jèsús. ¹⁴ Te cùu-xi datná cuádava nduu, nduu vispré vico pascuá. Te ní xáhaⁿ tē Pilatú xii ñáiyu israhél:

—¡Nái tēe yindaha ñaha xii-ndo-a! —càchí-dé xáhaⁿ-dē xii-yu.

¹⁵ Te ní cuáá-yu, te xáháⁿ-yu:

—¡Cahni-dé! ¡Cahni-dé! ¡Cata caa-dé núu cùrúxí! —càchí-yu xáháⁿ-yu.

Te ní xáhaⁿ tē Pilatú:

—¿Te yúhú cata caa-í tēe yindaha ñaha xii-ndo-u? —càchí-dé xáhaⁿ-dē xii-yu.

Te cue dútú cúnúu ní xáhaⁿ-güedé:

—Nchúhú ñá túú-gá tēe yindaha ñaha xii-ndí, chí ñⁿdii-ni té Cèsár yindaha ñaha-dé xii-ndí —càchí-güedé xáhaⁿ-güedé xii-dé.

¹⁶ Te té Pilatú ní xáhaⁿ-dē ní queheⁿ cuèndá-güedé Jèsús ndécá ñaha-güedé cuáháⁿ cata caa ñaha-güedé núu cùrúxí.

Sata caa-güedé Jèsús núu cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gá cùrúxí cuáháⁿ ñⁿ xichi núu nání Yiqui Diqui Ndiyi. Te tnúhu hēbreú queé-xí Gōlgotá. ¹⁸ Te yacáⁿ ní sata caa ñaha-güedé xii-gá núu cùrúxí-áⁿ. Te xio xio ñiñi-gá ní sata caa-güedé úu cue tēe ndècu ndisa cuéchi-xi ñiñi-ni núu cùrúxí tucu. ¹⁹ Te ní táuchíúⁿ tē Pilatú ní taxi ndecu-güedé ñⁿ sá ndéè lètrá núu cùrúxí tá caa-gá, te duha càchí lètrá-áⁿ: “Jèsús tēe ñúú Nazàret, tēe yindaha ñaha xii ñáiyu israhél”, duha càchí-xi. ²⁰ Te vài ñáiyu israhél ní xiní-yu nàcuáa càháⁿ lètrá-áⁿ, chí yatni-ni yuhu ñúú ní sata caa ñaha-güedé xii-gá núu cùrúxí. Te lètrá-áⁿ càháⁿ-xi tnúhu hēbreú, te càháⁿ-xi tnúhu griégú, te càháⁿ-xi tnúhu làtín. ²¹ Te ní xáhaⁿ cuè dútú cúnúu xii té Pilatú:

—Vá táuchíuⁿ-n tee-güedé lètrá càháⁿ-xi “Tēe yindaha ñaha xii ñáiyu israhél” ní cùu, váha-gá tauchíuⁿ-n tee-güedé lètrá càháⁿ-xi “Tēe càchí yindaha ñaha xii ñáiyu israhél ní cùu” —càchí-güedé xáhaⁿ-güedé xii-dé.

²² Te ní xáhaⁿ tē Pilatú:

—Nàcuáa ní táuchíuⁿ-í ní tee-güedé te ducaⁿ quèndóo-xi —càchí-dé xáhaⁿ-dē xii-güedé.

²³ Te sataⁿ nǐ sata caa ñaha cue sandadú xii Jèsús núu cùrúxí, te cùmí xichi ní quide-güedé dóó-gá, te ñⁿ ñⁿ xichi dóó-gá ní cáhñu cue sandadú-áⁿ. Te ndècu ñⁿ dóó-gá dóó cáni ñà túú ní tícu. ²⁴ Te cuèndá dóó-áⁿ nǐ xitnaha cue sandadú-áⁿ:

—Vá ndátá-ó dóó-a, váha-gá núu na còto ndéé-ó cuèndá quini-ó ndèdacàa-o cuu cuèndá-ó —càchí-güedé xitnaha-güedé.

Te ducaⁿ nǐ quide-güedé chí ní quee ndáá-xi nàcuáa càháⁿ-xi núu tütú Yá Ndióxi núu càchí-xi: “Titni xichi ní cáhñu-güedé dóó-í. Te ní xito ndéé-güedé cuèndá cutnùní iní-güedé ndèdacàa-güedé níhí-güedé dóó-í”, duha càchí-xi núu tütú-gá. Te sá dúcáⁿ càháⁿ-xi núu tütú Yá Ndióxi núu xíaⁿ ducaⁿ ní quide cue sandadú-áⁿ.

25 Te yatni ñiñi curúxi núu tácaà Jesús nútñi ñaná-gã, ndihi cùhu-xi, ndihi tá Màriá ñadihi té Clèofás, ndihi tá Màriá Magdalená. 26 Te ní xiní Jèsús ñaná-gã nútñi-aⁿ ñiñi ìⁿ té ní xica cuu ndihi-gá, téé ío cùu iní-gá, te ní xáhaⁿ-gã xii ñaná-gã:

—Ñáá, téé nútñi-áⁿ nduu-dé òⁿ dátná déhe mee-n —càchí-gá xáhaⁿ-gã xii-aⁿ.

27 Te ní xáhaⁿ-gã xii téé ní xica cuu ndihi-gá-áⁿ:

—Ñaha-áⁿ nduu-aⁿ òⁿ dátná ñaná mee-n —càchí-gá xáhaⁿ-gã xii-dé.

Núu ndéé òⁿ dátná-áⁿ ñi nduu ñaná ñáhá téé-áⁿ xii ñaná-gã.

Ní xihí Jèsús

(Mt. 27:45-56; Mr. 15:33-41; Lc. 23:44-49)

28 Te ní cutnùní iní Jèsús sá ní ndihi chiⁿ ní táhu Tátá-gã Dútú Ndiòxí ní quide-gá núu ní cachi-gá:

—Yichí-í ndute —càchí-gá.

Te duha ní cáháⁿ-gá chí ní quee ndáá-xi ñàcuáa cáháⁿ-xi núu tùtú Yá Ndiòxí.

29 Te ndècu ìⁿ lítu ñùhu ndudí íá. Te sá dúcáⁿ ní cáháⁿ-gá sá yichí-gá ndute, núu xíáⁿ ní queheⁿ-güedé cachi te ní chindóyo-güedé xití ndudí íá-áⁿ, te ní chinenu-güedé díquí ìⁿ dité yutnu ñàní hisópó, te ní ndocani-güedé ní chihí-güedé yuhu-gá. 30 Te sátá ñi xihí-gá ndudí íá-áⁿ, te càchí-gá:

—Vitna ní dáxínu cava-í nchaa chiⁿ ní cachi Tátá-í cada-í —duha ní cachi-gá.

Te ní xócuíta dúcúⁿ-gã ndàa núu-gã, te ní xihí-ni-gá.

Íⁿ sandàdú ní caáⁿ-dé yiqui naha Jèsús ndihi ìⁿ pùyá yihí caá núu-xi

31 Te cuendá sá nduu vispré vico pascuá cúu-xí núu ñá ní cuñí cue téé israhél cundecu-ni yiqui cùñú-gá núu cùrúxí ndihi yiqui cùñú cue téé ní sata caa-güedé ñiñi-gá, chí cuendá nduu tñé-áⁿ cúu-xí nduu ndetata ñáyiⁿ, te ío quide cahnú-yu nduu-áⁿ, núu ní xáhaⁿ-güedé xii

té Pilatú sá táuchiuⁿ-dé quihíⁿ cue téé cahnú-güedé ñiñi Jèsús ndihi ñiñi cue téé tácaa ndihi-gá, te xocani-güedé yiqui cùñú-gá ndihi yiqui cùñú-güedé yacáⁿ. 32 Te sátá dúcáⁿ te ní sáháⁿ cue sandàdú ní sáhnú-güedé ñiñi cue téé tácaa xio xio ñiñi Jèsús. 33 Te òⁿ ní cuyatni-güedé núu-gã, te ní xiní-güedé sá sà ní xihí-gá núu ñá ní sáhnú-güedé ñiñi-gá.

34 Dico ìⁿ sandàdú-áⁿ ní cúxi-dé pùyá néhé-dé ìⁿ xio yiqui naha-gã, te yihí caá núu-xi núu ní caáⁿ-xi yiqui naha-gã ní quee níñi ndihi ndute cuí. 35 Te yúhú té Juáá téé ní cadúha tutú-a ní xiní-í ñàcuáa ní cuu ní xihí Jèsús, te xíáⁿ núu cáháⁿ ndáá-í cuendá quindáá iní-ndó. 36 Te ducaⁿ ní cuu ñá ní sáhnú-güedé ñiñi Jèsús, chí ní quee ndáá-xi ñàcuáa cáháⁿ-xi núu tùtú Yá Ndiòxí núu càchí-xi: “Vá cahnú-güedé ní ìⁿ yiqui-gá”, duha càchí-xi. 37 Te ducaⁿ ní quide-güedé Jèsús ní caáⁿ-güedé yiqui naha-gã, chí ingá xichi núu tùtú Yá Ndiòxí càchí-xi: “Sáá nduu te quiní-güedé ìⁿ téé ní dánicuèhé-güedé”, duha càchí-xi.

Chindúxi-güedé Jèsús

(Mt. 27:57-61; Mr. 15:42-47; Lc. 23:50-56)

38 Te sátá dúcáⁿ ní cuu, te té Chèé téé ñuu Arimateá tñahá-dé ní sándáá iní-dé tñuhu Jèsús dico dayuhu, chí ní xóo yúhú-dé cue téé cùnnu núu ñáyi israhél. Te téé-áⁿ ní xáhaⁿ-dè xii té Pilatú núu vá dáñá-dé canehe-dé yiqui cùñú Jèsús quihíⁿ chindúxi-dé, te té Pilatú ní xáhaⁿ-dè xii-dé sá cúu canehe-dé yiqui cùñú Jèsús quihíⁿ, núu ní sáháⁿ-dè ní nuu nehe-dé yiqui cùñú-gá núu cùrúxí nchídó-dé cuáháⁿ. 39 Te té Nicodemú téé ní sáháⁿ niú ní cáháⁿ ndihi-dé Jèsús ndéé ñiñi, téé-áⁿ néhé-dé ócú úxí kilú yuchi ní cuáha mee-ni yúcu sá ñáñi mirrá ndihi yúcu sá ñáñi

àloés. Te ío váha tnàmi sahán. ⁴⁰ Te ní naníhí tnáhá-dě ndihí té Chéé, te ní chidúcúⁿ nuu-güedé yiqui cùñú Jèsús mee-ni dǒó vǎha, te nàcuáa ta dùcuⁿ nuu-güedé yiqui cùñú-gá dǒó-ǎⁿ, te ducaⁿ ta chido-güedé yuchi sáhán tnámí-ǎⁿ núú dǒó-ǎⁿ chi ducaⁿ tnáhí quide ñáyiú isràél òrè chindǔxi tnáhá-yu. ⁴¹ Te yatni núú ní sata caa-güedé Jèsús cáá ìⁿ lahuertá. Te xítí lahuertá-áⁿ nchí ìⁿ yaú cava duha cuáhán ndáá-xi, te vátá yǒo ìⁿ-gá nguindǔxi xián. ⁴² Te cuendá sá ní cuyatni tnahá nduu ndetátú ñáyiú isràél núu xián yaú cava nchí yatni-ni xián ní chihi-güedé yiqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumíngú tacuñhdá-gá cuáhán tá Màriá Magdalèná cuáhán ngoto-xi yaú núú ní chihi-güedé yiqui cùñú Jèsús, te ní sáá-xi ní xiní-xi sá ñá túú-gǎ ndedí yúú yèhe yaú-áⁿ. ² Núu xínu-xi cuánuhú núú ndécú tǎ Xímú, àdi Pelú chi úú diu-dé, ndihí ingá téé ní xica cuu ndihí-gá téé ío cùu ini-gá, te ní xáhaⁿ-xi xii-güedé:

—Nèhe-güedé yiqui cùñú Jèsús cuáhán, te ñá xiní-ó ndèé ní taxi ndecu-güedé —càchí-xi xáhaⁿ-xi xii-güedé.

³ Te ní quee té Pelú ndihí ingá téé-áⁿ cuáhán ndéhé-güedé yaú núú ní chihi-güedé yiqui cùñú-gá.

⁴ Te ndúú-güedé xínú-güedé cuáhán ní cùu, dico ingá téé-áⁿ ní cuu níhi-gá sáhá-dě cuáhán-dé núu díhna-gá-dé ní sáá-dé yuhu yaú núú ní chihi-güedé yiqui cùñú Jèsús ní cùu. ⁵ Te ní ngáundeyi-dé xító nihni-dé xítí yaú-áⁿ, te ní xiní-dé mee-nǎ dǒó vǎha sá ní xidúcúⁿ nuu-gá yúcu, dico ñá ní quíhu-dé. ⁶ Te sátá ní sáá té Pelú te cuánguihu-dé xítí yaú-áⁿ,

núu tnáhá-dé ní xiní-dé nchaa dǒó ní xidúcúⁿ nuu-gá yúcu-áⁿ. ⁷ Te ní xiní-dé sá dǒó ní xindútú dǐquí-gǎ ñá túú càtuu jundú-xi ndihí dǒó ní xidúcúⁿ nuu-gá chi ní nadúcúⁿ nuu-ná càtùu ìⁿ xio. ⁸ Te nchicúⁿ tucu téé ní sáá díhna-gá-áⁿ cuánguihu xítí yaú-áⁿ, te ní xiní-dé sá dǒó-nǎ yúcu, te ñá túú-gǎ yiqui cùñú Jèsús núu ní sándáá ini-dé sá ní ndoto-gá. ⁹ Chi vátá tècú tnùní-gá-güedé nàcuáa càháⁿ-xi núu tütú Yǎ Ndiǒxí núu càchí-xi sá Jèsús ndoto-gá. ¹⁰ Te ní xícó ndi ndúú cue téé ní sángoto yaú núú ní chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndihí tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú ní chihi-güedé yiqui cùñú Jèsús te ní ngúita-xi ndàhyú-xi, te ní ngáundeyi-xi xito nihni-xi xítí yaú-áⁿ. ¹² Te xítí yaú-áⁿ ní xiní-xi úú espíritú xínú cuèchi núu Yǎ Ndiǒxí xíxíhnu-xi mee-ni dǒó cùixíⁿ xindecu-xi núú ní cáa yiqui cùñú-gá. Te ìⁿ-xi núcóo núú ní cáa díquí-gǎ, te ìⁿ-xi núcóo núú ní cáa sáhá-gǎ. ¹³ Te espíritú-áⁿ ní xáhaⁿ-xi xii tá Màriá:

—¿Ná cuendá ndàhyú-n? — càchí-xi xáhaⁿ-xi.

Te ní xáhaⁿ tá Màriá:

—Ndàhyú-í chi nèhe-güedé yiqui cùñú Yaá cúú Xitohó-í cuáhán, te ñá túú xiní-í ndèé ní taxi ndecu-güedé —càchí-xi xáhaⁿ-xi xii cue espíritú-áⁿ.

¹⁴ Te tnúhu-ni-áⁿ ní cáhá-xi te ní nchócótó-xí ìⁿ xio, te ní xiní-xi Jèsús núnñi-gá dico ñá túú ní cùtnuní ini-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gǎ xii-xi.

Te mee-xi ní sani ini-xi sá tèe xito lahuertá-áⁿ cúú téé-áⁿ, núu ní xáhaⁿ-xi:

—Tàta, te núu yòhó néhé-n yìqui cuñú Jèsús cuáháⁿ, te cáháⁿ-n ndéé ní taxi ndecu-n chi cuèndá naqueheⁿ-í canehe-í núhú — cächí-xi xáhaⁿ-xi.

16 Te ní cáháⁿ díú ñàha-gá xii-xi, te xáhaⁿ-gá:

—¡Màriá! —cächí-gá xáhaⁿ-gá xii-xi.

Te ní ndacoto-xi núú-gá, te ní cáháⁿ-xi tnúhu hèbreú, te xáhaⁿ-xi:

—¡Rabòní! —cächí-xi xáhaⁿ-xi. Te tnúhu-áⁿ quéé-xi Mèstrú.

17 Te ní xáhaⁿ Jèsús:

—Daña vá ngání ñàha-n chi vátá ndáá-gá-í núú ndécú Tàtá-í. Te núhú-n cùñaha-n xii cue téé ío váha ní tnahá tnúhu ndihí-í sá ndáá-í núú ndécú Tàtá-í Dútú Ndiòxi, te díu-gá cúú Tàtá-ndó nchàa-ndo, te díu-ni-gá cúú Ndiòxi-ndó — cächí-gá xáhaⁿ-gá xii-xi.

18 Te ní natnii tá Màriá Magdalèná ichi cuánuhú-xi cùñaha-xi xii cue téé ní xica cuu ndihí-gá sá ní xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gá xii-xi.

Ní quexìo Jesús núú xíndecu cue téé ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

19 Te díu-ni ndumìngú sandiquiⁿ ní natacá cue téé ní xica cuu ndihí-gá, te xíndedí nihnu-güedé vehe sá xiyùhú-güedé cue téé cùnuu núú ñàyiú isràél. Te ní quíhu Jèsús ndéé tnuú-güedé ní ngúnutnii-gá, te ní xáhaⁿ-gá:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo —cachí-gá xáhaⁿ-gá xii-güedé.

20 Te ní dánèhè ñàhá-gá ndaha-gá ndihí yiqui naha-gá xii-güedé. Te ío ní cudíí iní-güedé sá díú ndìsa-gá ní xiní ñàhá-güedé. 21 Te ní xáhaⁿ tùcu Jesús xii-güedé:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo. Te dátá ní tendaha ñàha Tàtá-í Dútú Ndiòxi xii-í véxi-í ñuyíú-a, te ducaⁿ tendaha

ñàha-í xii-ndo quíhíⁿ-ndó cáháⁿ-ndó tnúhu-í núú ñàyiú —cächí-gá xáhaⁿ-gá xii-güedé.

22 Te ní chiyóco-gá núú-güedé, te ní xáhaⁿ-gá:

—Chí ndúú tàhú Espiritú Yá Ndiòxi cundecu ndihí-ndo. 23 Te nchaa ñàyiú na quíndáá iní-xi tnúhu-í te cùñaha-ndo xii-yu sá ní quide càhnu iní Yá Ndiòxi nchaa cuèchi-yu. Te nchaa ñàyiú vá quíndáá iní tnúhu-í te cùñaha-ndo xii-yu sá vâ cadá càhnu iní-gá cuèchi-yu —cächí-gá xáhaⁿ-gá xii-güedé.

Té Mǎxí cáháⁿ ndihí-dé Jesús

24 Te núú ùxúú cue téé ní xica cuu ndihí-gá, te ìíⁿ-dé nání-dé Mǎxí téé ní xóo danàni-güedé Cuächí, te téé-án ñà túú-dé ndécú ndihí-güedé òré ní sáháⁿ Jèsús. 25 Te dava-gá cue téé ní xica cuu ndihí-gá ní xáhaⁿ-güedé xii-dé:

—Ní xiní-ndí Jèsús —cächí-güedé xáhaⁿ-güedé.

Te ní xáhaⁿ tē Mǎxí:

—Te vá quíndáá iní-í, chi ndéé quíní-í ndaha-gá núú ñí quéé nduyú, te dàquíhu-í díquí ndáhà-í núú ñí caáⁿ nduyú-án, te dàquíhu ndàha-í yiqui naha-gá núú ñí caáⁿ, ducaⁿ te quíndáá iní-í —cächí-dé xáhaⁿ-dè xii-güedé.

26 Te núú ùná tucu nduu ní natacá tucu cue téé ní xica cuu ndihí Jèsús ìíⁿ vehe, te nduu-án tnahá té Mǎxí ndécú ndihí-güedé. Te cuèi ndedí nihnu-güedé vehe-án, te ní quíhu Jèsús ndéé tnuú-güedé, te ní xáhaⁿ-gá:

—Yá Ndiòxi chíndèe ñàha-gá xii-ndo ío váha cùu iní-ndó ndècu-ndo —cachí-gá xáhaⁿ-gá xii-güedé.

27 Te ní xáhaⁿ-gá xii té Mǎxí:

—Cundehe ndàha-í te dàquíhu-n díquí ndáhá-n núú ñí quéé nduyú, te dàquíhu-n ndàha-n yiqui naha-í-a cuèndá quíndáá iní-n te vá cání ìíⁿ

cani úú iní-n —càchí-gá xáhaⁿ-gã xii-dé.

²⁸ Te ní xáhaⁿ tē Mǎxí xii-gá:

—¡Yòhó cúú-n Xítóhó-í! ¡Yòhó cúú-n Ndiõxi-í! —càchí-dé xáhaⁿ-dē xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gã iní nchaa ñáyiú ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gã xii-dé.

Quindáá iní-ó tnũhu yòdo tnuní núú tütú-a

³⁰ Te vâi-gá sá vǎ yõ tñàhí ndàcu cada ñá túú yòdo tnuní núú tütú-a ní quide Jèsús núú cuè téé ní xica cuu ndihí-gá. ³¹ Dico dava-gá ní ngódó tnùnì núú tütú-a cuendá sá quindáá iní-ndó sǎ Jèsús cúú-gã Cristú Déhe Dútú Ndiõxí, te naníhí tǎhú-ndó te núu na quindáá iní-ndó-gã.

21

Úsá cue téé ní xica cuu ndihí Jèsús ní xiní ñáhá-güedē xii-gá

¹ Te ingá nduu tucu xĩndecu cue téé ní xica cuu ndihí Jèsús yuhu làgúná ñuú Tiberiás, te ní sáháⁿ-gá núú xĩndecu-güedé-áⁿ. Te duha ní cuu ní xiní ñáhá-güedē xii-gá. ² Te ndécú té Xímú, ãdi Pelú chi úú diu-dé, ndihí té Mǎxí téé ní xóo cúñaha-güedē Cuǎchí, ndihí té Natanàel téé ñuú Cánaá, te ñuú-áⁿ yíndèhu-xi distritú Galileá, te tñàhá ndi ndúú déhe té Zebèdeú, ndihí úú-gá tucu cue téé ní xica cuu ndihí-gá. ³ Te ní xáhaⁿ tē Pelú xii-güedé:

—Quíhíⁿ-í quítñi-í chácá —càchí-dé xáhaⁿ-dē xii-güedé.

Te ní xáhaⁿ-güedé:

—Tñáhá nchúhú canchicúⁿ ñáhá-ndí xii-n quíhíⁿ tucu —càchí-güedé xáhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú,

te ní quée-güedé xití bàrcú-áⁿ cuáháⁿ-güedé. Te niú-áⁿ ñǎ ní ñihí tñàhí-güedé chácá. ⁴ Te sa ta cùditó-nǎ cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gã. ⁵ Te ní xáhaⁿ-gã xii-güedé:

—Cue téé cuechi, ¿ní ñihí-ndó chácá caxi-o ñǎ? —càchí-gá xáhaⁿ-gã xii-güedé.

Te ní xáhaⁿ-güedé:

—Védana chácá ñá túú ní ñihí-ndí —càchí-güedé xáhaⁿ-güedé xii-gá.

⁶ Te ní xáhaⁿ Jèsús:

—Chí dáquēe ñunu-ndo ndáa xio cuha bàrcú chi ñihí-ndó-dí —càchí-gá xáhaⁿ-gã xii-güedé.

Te ducaⁿ ñí quide-güedé, te òré nǎtáva-güedé ñunu xití ndute, te ñá cùndèe-gá-güedé natava-güedé cuendá sá ñí chítú chácá xití-xi. ⁷ Te téé ní xica cuu ndihí-gá téé ío cùu iní-gá ní xáhaⁿ-dē xii té Pelú:

—¡Díu Xítóhó Jesucristú! —càchí-dé xáhaⁿ-dē xii-dé.

Te sá ñí tecú dóho té Pelú sá dúcáⁿ càháⁿ-dé ñuu ní ndíúnuu-dé dóo-dé, chi dóo sǎ yimáa-ni-dé ñihnú-dē ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-áⁿ ñí quene-dé ndéé ñuhu yichí. ⁸ Te dava-gá cue téé ndihí té Pelú diu-ni cue téé ní xica cuu ndihí Jèsús ní quendóo-güedé dàtná ñⁿ ciendú-gá mètrú te quene-güedé yuhu ndùte. Te tǎñuhu-ni-güedé ñunu-güedé chitu chácá ñí quene-güedé ndéé yuhu ndùte. ⁹ Te òré ní quene-güedé ñuhu yichí, te ní xiní-güedé càyú ñuhú, te núú ñùhú-áⁿ ñùhú ñⁿ chácá ndihí ñⁿ pàá. ¹⁰ Te ní xáhaⁿ Jèsús xii-güedé:

—Quíhíⁿ ngheheⁿ-ndo ñⁿ úú chácá quítí íchí ñí tñi-ndo —càchí-gá xáhaⁿ-gã xii-güedé.

¹¹ Núu té Pelú ní sáháⁿ-dé núú ndécú bàrcú, te ní quée-dé xití-xi ní cándeé-dé ñunu ñùhu chácá tǎñuhu-dé ní quene ndéé ñuhu

yìchí, te chitu chácá náhnú, te ñuhu ìⁿ ciendú údicu úxí úní-dí xití ñunu-áⁿ, te cuéi ducaⁿ vâi-dí ñuhu dico ñá ní ndátá ñunu-áⁿ. ¹² Te ní xáhaⁿ Jèsús:

—Chí nèhé cadí iní-ndó — cächí-gá xáhaⁿ-gã xii-güedé.

Dico ni ìⁿ cue téé ní xica cuu ndihi-gá-áⁿ ñã ní xicáⁿ tnúhú-güedé núú-gã nõu yoo cùu-gá, chi sa ní cutnùní iní-güedé sá díú Jèsús cúu-gá. ¹³ Te Jèsús ní sáháⁿ-gá ní queheⁿ-gá pãá ní sãñaha-gã xii-güedé caxi-güedé, te dàtnùní ní queheⁿ tucu-gá chácá ní sãñaha-gã xii-güedé.

¹⁴ Vitna cùu úní xito sá xini ñáhá cue téé ní xica cuu ndihi-gá sátá ní ndoto-gá.

Jèsús cãháⁿ ndihi-gá té Pèlú

¹⁵ Te sátá ní túhú cóhó-güedé ní sadí iní-güedé te ní xicáⁿ tnúhú Jèsús núú tẽ Xímú, àdi Pelú chi úú dìu-dé, te xáhaⁿ-gã:

—Xímú, déhe té Jònás, ¿cùu iní-gá-n yùhú dàcúúxí dàva-gá cue téé-a ñã? —cächí-gá xáhaⁿ-gã xii-dé.

Te ní xáhaⁿ tẽ Pèlú:

—Mèstrú, cùu iní ñáhà-í, yòhó sa nãha-n —cachí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé líhli-í —cächí-gá xáhaⁿ-gã xii-dé.

Te cue mbéé-áⁿ cúu-güedí ñáiyu cùu cuendá-gá.

¹⁶ Te ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —cächí-gá xáhaⁿ-gã xii-dé.

Te ní xáhaⁿ tucu té Pèlú:

—Mèstrú, cùu iní ñáhà-í, yòhó sa nãha-n —cachí-dé xáhaⁿ-dẽ xii-gá.

Te ní xáhaⁿ-gã:

—Te núu ducaⁿ, te coto-n cué mbéé-í —cächí-gá xáhaⁿ-gã xii-dé.

¹⁷ Te xito cùu úní ní xáhaⁿ tucu-gá xii té Pèlú:

—Xímú, déhe té Jònás, ¿cùu iní ñáhá-n-ãⁿ? —cächí-gá xáhaⁿ-gã xii-dé.

Te té Pèlú ío ní cundiýí-dé sá dúcáⁿ ní cuu úní xito xicáⁿ tnúhú-gã núú-dẽ nõu ndisa sá cúu iní ñáhá-dẽ xii-gá, te ní xáhaⁿ-dẽ:

—Mèstrú, yòhó nchaa sa xini-n, te sa cùtnuní iní-n sã cúu iní ñáhà-í xii-n —cächí-dé xáhaⁿ-dẽ xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé-í. ¹⁸ Te na cächí tnúhu ndáá-í xii-n sã cùtnáhá cuechi-gã-n ní xóo ndécuihnu mee-n dõó-n, te ní xóo quihíⁿ-n ndèni ní xóo cachí iní-n, dico na yìi-n te dacáa-n ndãha-n, te ingá téé dacuihnu ñaha xii-n dóó-n te cada yica-dẽ candeca ñaha-dẽ xii-n quihíⁿ ìⁿ núú ñà túú tnàhá iní-n —cächí-gá xáhaⁿ-gã xii-dé.

¹⁹ Te sá dúcáⁿ ní cáháⁿ Jèsús cúu-xí sã ní dátècú tnúhu ñaha-gã xii té Pèlú nãcuáa cada-xi cuú-dé, te ducaⁿ càda cahnu-dé Yã Ndióxi, te ní xáhaⁿ-gã xii-dé:

—¿Canchicúⁿ ñáhá-n xii-í! — cächí-gá xáhaⁿ-gã xii-dé.

Téé ío cùu iní-gá

²⁰ Te ní nchócótó tẽ Pèlú ndaa sátá-dẽ, te ní xini-dé sá nchicúⁿ ñáhá ingá téé xica cuu ndihi-gá cuáháⁿ, téé ío cùu iní-gá téé ní xínucóo diñi-gá òré ní cudini ndihi ñaha-gã xii-güedé, te diu-ni téé-áⁿ ní xicáⁿ tnúhú-dé núú-gã dàvá-áⁿ nõu ndèda càa téé cuáha cuendá ñáhá xii-gá núú cué téé cùu úhú iní ñáhá.

²¹ Te òré ní xini té Pèlú sá nchicúⁿ ñáhá tẽ-áⁿ, te ní xicáⁿ tnúhú-dé núú Jèsús, te xáhaⁿ-dẽ:

—Mèstrú, te téé-ãⁿ, ¿ná cúu sã yãha-dé-í? —cächí-dé xáhaⁿ-dẽ xii-gá.

²² Te ní xáhaⁿ Jèsús:

—Te núu yúhú cuini-í sá cundècu-ni-dé ndéé ná quixi tucu-í ñuyú-a, ¿te yòhó ná cuendá-n nõu xicáⁿ tnúhú-n? Yòhó canchicúⁿ ñáhá-ni xii-í —cächí-gá xáhaⁿ-gã xii-dé.

²³ Te ní xinu tnúhu núú nchàa ñáiyu sãndáá iní tnúhu-gá sã téé-ãⁿ vã cùu-dé. Dico Jèsús ñá túú

dùcaⁿ ní xáhaⁿ-gǎ sá vǎ cùú-dé,
 chi ní xáhaⁿ-gǎ: “Núu yúhú cuìní-í
 sá tēe-ǎⁿ cundecu-ni-dé ndéé ná
 quìxi tucu-í ñuyíú-a, ¿te yòhó ná
 cuèndá-n?”, duha ní xáhaⁿ-gǎ xii té
 Pèlú.

²⁴ Te diu-ni yúhú té Juàá tée ní
 sani iní-yu sá vǎ cùú càháⁿ ndáá-í
 nchaa nàcuáa ní cuu, te ducaⁿ ñí
 tee-í núú tütú-a, te cùtnuní iní-ndó
 sǎ tñúhu ndáá cúú-xí.

²⁵ Te ndècu vai-gǎ núú sǎ ñí quide
 Jèsús. Te núu dicó ní ngǔndee
 nchaandi tǔhú ñǎ, te vǎa ni te ñihí
 ñuyíú te vǎ tñàhá núú-xi cundecu
 librú, te núu dicó ní ngǔndee nchaa.
 Te ducaⁿ ña cùnduu. Te ío chí cádá
 ndée ini-nǎ vitna.

NCHAA NÀCUÁA NÍ QUIDE CUE TÉE NÍ TÁÚCHÍÚⁿ JÈSÚS DACUÀHA ÑAHA XII ÑÁYIU TNÚHU-GÁ

Jèsús ní cachí tnúhu ndáá-gá sá quixí Espíritú Yá Ndióxi cundecu ndihi ñáyiú

¹ Te duha ní cáháⁿ té Lùcá ní xii-dé té Tèofilú: Yúhú sa ní chidó tnúni-í núú libré ndéé díhna nchaa sá ní quide Jèsús, ndihi nchaa sá ní dáciuhá-gá ñáyiú. Te ní chidó tnúni-í nchaa sá ní quide-gá ndéé nduu ní quesaha-gá quidé chiúⁿ-gá, ² ndihi nchaa sá ní quide-gá ndéé òré cuánda-gá andiú. Te sa ta cùyatni nduu ndaa-gá andiú, te ní ndatnúhu-gá ndihi cue tée ní cáháⁿ-gá dacuàha ñaha xii ñáyiú tnúhu-gá, te mee Espíritú Yá Ndióxi ní chindee ñaha-xi xii-gá ní xáhaⁿ-gá náciua cada-güedé. ³ Te sáta ní xihí-gá te ní ndoto-gá, te ní xindecu-gá údico nduu. Te titní xito ní sáháⁿ-gá núú ní xindecu-güedé, te ducaⁿ ní quide-gá cuèndá quini-güedé sá ndáá ní ndoto-gá, te ní xáhaⁿ-gá náciua quide Yá Ndióxi ndihu ndaha-gá ñáyiú.

⁴ Te ñiⁿ nduu ndècu ndihi ñaha-gá xii-güedé, te ní xáhaⁿ-gá:

—Vá quéé-ní-ndó ñúú Jerusalén, chi cundetú-ndo quixi Espíritú Yá Ndióxi cundecu ndihi-ndo, chi sa ní cachí tnúhu-í sá dúcáⁿ ní cáháⁿ Tátá-ó Dütú Ndióxi Yaa ndécú andiú náciua cunduu. ⁵ Te ndáá sá ndii Juáá ní dáciuándüte ñaha ndii xii-ndo, dico vitna ñá túú-gá cuéhé nduu, te quexio Espíritú Yá Ndióxi cundecu ndihi-ndo —càchí-gá xáhaⁿ-gá xii-güedé.

Jèsús cuánda-gá andiú

⁶ Te òré ní xindecu-güedé ndihi Jèsús, te ní xáhaⁿ-güedé xii-gá:

—Mèstrú, cuíni-ndí cachí tnúhu-n núu sa ta cùyatni nduu chindee-n ñáyiú ñúú Isráél cuèndá taxi tnúni tucú-yu ñúú-yu —càchí-güedé xáhaⁿ-güedé xii-gá.

⁷ Te ní xáhaⁿ Jèsús xii-güedé:

—Ñá túú xini ñuhu-xi cunaha nchóhó xíáⁿ, chi Tátá-ó Dütú Ndióxi náhá-gá ná nduu càda-gá nchaa sá ní cáháⁿ-gá. ⁸ Te òré quexio Espíritú Yá Ndióxi cundecu ndihi-ndo, te cuyi-ndo ní yuhu ní iní-ndó quíhíⁿ-ndó cáháⁿ-ndó tnúhu-í núú ñáyiú ñúú Jerusalén ndihi núú ñáyiú distritú Júdeá ndihi núú ñáyiú distritú Sàmaría. Te ducaⁿ-ni cáháⁿ-ndó quíhíⁿ-ndó ní caxico ñuyú —càchí-gá xáhaⁿ-gá xii-güedé.

⁹ Te sáta dúcáⁿ ní cáháⁿ-gá, te ndèhe-güedé ní ndanchita-gá cuánda-gá andiú cuándihu-gá xiti vícò, te ñá túú-gá ní xini náhá-güedé xii-gá. ¹⁰ Te ndèhe vihi-güedé andiú núu ndéé quini náhá-güedé xii-gá yòtnúhu, te ní quexio cunu úú cue tée ñihnu dóó cuixíⁿ núú ndécú-güedé. ¹¹ Te xáhaⁿ-güedé:

—Nchóhó cue tée Galiléa, ¿ná cuèndá ndéhé-ndó andiú? Te dàtná-ni càa Jesús cuánda-gá andiú vitna, te ducaⁿ-ni cunduu-gá quixi tucu-gá —càchí cue tée ñihnu dóó cuixíⁿ-án xáhaⁿ-güedé.

Cuèndá sá ñà túú-gá ndii Júdás núu ní nanducu-güedé té Màtiá ní nucúnutni-dé núú ndii

¹² Te ní ndee-güedé yucu Ólívú cuánuhú-güedé ñúú Jerusalén, te ní xúhuⁿ-güedé cuèdicó cuádava òré ichi. ¹³ Te òré ní ndexio-güedé ñúú-án, te cuánda-güedé cuártú ndéé núú ñinu, chi vehe yòdo tnaha ndecu-güedé. Te ní naníhí tnáhá-güedé nchaa-güedé té Pélú, té Jacobó, té Juáá, té Ndrixí, té Lípé, té Mǎxí, té Bartolómé, té Mǎteú, té

Jacobó déhe té Àlfeú, ndihi té Xímú téé ní cundihi cue téé canànistá, ndihi té Jùdás ñaní té Jacobó. ¹⁴ Te ní naníhí tnáhá-güedě nchaa-güedé yacáⁿ ndihi tá Màriá náná Jèsús, ndihi cue ñaní-gá ndihi dava-gá cue ñáyiu dīhí. Te ñⁿ-ni ní cuú-yu ní cáháⁿ ndihí-yu Yá Ndiöxí.

¹⁵ Te ñⁿ nduu ní xíndecu dàtná ñⁿ ciendú óco mee-ni ñáyiu sàndáá iní tnúhu Jèsús, te ní ngúnutnī té Pèlú núu-yu, te ní xáhaⁿ-dē xií-yu:

¹⁶⁻¹⁷ —Nchòhó cue ñáyiu ndècu ndihí-í ichi Xítohó Jesucristú, na càn-í cuendú núu-ndó nàcuáa ní chídó tnùní ndii Dàvíí téé ní xíndecu ndéé sanaha nàcuáa ní cáháⁿ Espiritú Yá Ndiöxí cuendá té Jùdás. Te dacuití dùcaⁿ ní cuu, chi tnàhá té Jùdás ní xíndecu ndihí-o, te ní xinu cuechi-o ndihí-dé núu-gá sá dīhna, te ducaⁿ ñ quide-dé ní sáha cuendá-dé Jèsús núu cuè téé cùu úhú iní ñáhá xii-gá. ¹⁸ Te ní cháhu ñaha-güedé xii-dé cuendá sá ñ sáha cuendá ñáhá-dē xii-gá. Te ní sáháⁿ-dé ñⁿ xichi ní sata caa-dé méé-dē, te ní ngava-dé, te ní cahndí duuⁿ xití-dé te xiáⁿ ñ xihí-dé. Te ní naqueheⁿ-güedé díhúⁿ sá ñ cháhu-güedé ndii, te ní nacuaaⁿ-güedé ñuhu núu ñ ngava ndii-áⁿ. ¹⁹ Te nchaa ñáyiu Jerusálén ní níhí-yu tnúhu, te ní dánání-yu ñuhu-áⁿ Acèldamá. Te tnúhu mèé-yu quèe-xi: Ñuhu núu ñ sati ññí. ²⁰ Te duha ní cáháⁿ ndii Dàvíí ní chídó tnùní ndii núu librí Sálmú ní dándóo ndii: “Nà ndóo nahi vèhe-dé, vá yóo ñⁿ quihíⁿ cundecu”, duha ní cáháⁿ ndii. Te ingá tucu tnúhu ní cachí ndii: “Na nànducu-güedé ingá téé nucúnutnī núu ndii”, duha ní cáháⁿ ndii Dàvíí —cachí té Pèlú xáhaⁿ-dē xií-yu.

²¹⁻²² Te ní xáhaⁿ tùcu-dé:

—Te ducaⁿ ñ cáháⁿ ndii Dàvíí, te vitna xini ñuhu-xi nanducu-o ñⁿ téé nucúnutnī-dé núu ndii Jùdás, te xini ñuhu-xi diu-ni ñⁿ téé ní xica cuu ndihí Xítohó Jesucristú

cútnàhá ní xica cuu-o ndihí-gá, ñⁿ téé ní xini ndéé òré ní dácuañdùte ñaha ndii Juáá xii-gá, te ndéé òré cuánda-gá andiu. Te téé nanducu-o cùndecu-dé cáháⁿ-dé nàcuáa ní cuu ní ndoto-gá —cachí té Pèlú xáhaⁿ-dē xií-yu.

²³ Te ní cacunehe-güedé úu tnàhá-güedé ñuu ndédacàa-güedé nduu táhú-güedé nucúnutnī-güedé núu ndii. Te ñⁿ-dé nání-dē Chèé Barsábás, àdi Justú chi úu diu-dé, te ingá-dé nání-dē Mátia. ²⁴ Te ní cáháⁿ ndihí-güedé Yá Ndiöxí, te xáhaⁿ-güedé xii-gá:

—Yohó Dútú Ndiöxí xini-n iní nchaa ñáyiu, te mee-n ñaha-n núu ndéda caa núu úu cue téé-a tnàhá iní-n ²⁵ cáháⁿ-güedé tnúhu-n núu ñáyiu, te téé-áⁿ nucúnutnī-dé núu ndii Jùdás, chi cuáháⁿ ndii núu ùhú núu ndàhú núu tàú-xi quihíⁿ ndii —cachí-güedé xáhaⁿ-güedé xii-gá.

²⁶ Te ní xito ndéé-güedé, te ní cutnùní sá tée nani Matia quendóo-dé ndihí úxí ñⁿ cue téé ní táuchíúⁿ-gá dácuaà ñaha xii ñáyiu tnúhu-gá.

2

Ní quexio Espiritú Yá Ndiöxí cundecu ndihí ñáyiu

¹ Te ní sáá nduu còo vico Pentecostés te xíndecu nchaa ñáyiu ñⁿ-ni xichi. ² Te ní tecú dóho-yu uuⁿni ní níhi andiu, dàtná quidé ñⁿ táchí níhi vīhi ní quide-xi, te ducaⁿ ñ cuu ndéé xití vehe núu ndécú-yu nchaá-yu. ³ Te ní xini-yu dàtná cáá itá ñuhú cáá sá ndécú xití vehe, te ní xité nuu-xi ní ngoyo ndodo-xi díquí-yu nchaá-yu. ⁴ Te ducaⁿ ñ quide-xi òré ní quexio Espiritú Yá Ndiöxí ní ngúndecu ndihí-yu nchaá-yu. Te ní nguíta-yu ní cáháⁿ-yu tnúhu cue ñáyiu ñá túu cùu ñáyiu isràel, te nchaa xiáⁿ ní quide Espiritú Yá Ndiöxí.

⁵ Te vai ñáyiu isràel xíndecu nchaa dava-gá ñuu ní tacá-yu ñuu

Jerusalén, te ñáyiú-áⁿ ío ndùcu ndeé-yu dâcuahá-yu nchaa ndudú sá dâcuàha tnahí-yu. ⁶ Te òré ní tecú dóho-yu ñíhi, te ní sáháⁿ-yu ní xíndedóho-yu tnúhu càháⁿ mēē-yu ñⁿ ñⁿ ñuú-yu, chí ndí ñíⁿ ndí ñíⁿ tnúhu càháⁿ ñáyiú ndècu-áⁿ. ⁷ Te xíáⁿ ío ní cuñúhu ñáyiú véxi dava-gá ñuú, te ní xítñahá-yu:

—Ñáyiú ducaⁿ xícáháⁿ cúŷ-yu ñáyiú ñítrítú Galileá. ⁸ ¿Te nása ní quidé-yu ní cutúha-yu nâcuáa càháⁿ-ó ñⁿ ñⁿ-o ndeé líhli-o? ⁹ Te íha véxi ñáyiú dava nâcióⁿ, chí véxi ñáyiú Pàrtiá, véxi ñáyiú Mèdiá, véxi ñáyiú Èlám, véxi ñáyiú Mesopòtamiá, véxi ñáyiú Jùdeá, véxi ñáyiú Capàdociá, véxi ñáyiú Pòntó, véxi ñáyiú Àsiá, ¹⁰ véxi ñáyiú Frìgiá, véxi ñáyiú Pànfilíá, véxi ñáyiú Ègíptú, véxi ñáyiú Áfricá ñáyiú ndècu ndeé núú-gá-xi ñuú Cìrené. Te tnàhá ñáyiú ñuú Rómá véxi, te ñáyiú-áⁿ chí ñá díú mèe-ni ñáyiú isrâél cúŷ-yu nchaaⁿ-yu, dico ñⁿ-ni cùu sá dâcuahá-yu. ¹¹ Te véxi ñáyiú Crètá, véxi ñáyiú Àrabiá. Te nchaa-o sa ndedóho-o càháⁿ-yu nâcuáa cuáháⁿ tnúhu mee-o ñⁿ ñⁿ-o. Te nchaa ñáyiú xícáháⁿ tnúhu-o càháⁿ-yu cuèndá nchaa sá vâ yõ tnàhí ndàcu cada ní quide Yá Ndiõxí —càchí-yu xítñahá-yu.

¹² Te ní cuñúhu vîhí-yu, te ñá ná sáá iní-yu nása ní cuu, te xítñahá-yu:

—¿Nása ní cuu duha càháⁿ-yu tnúhu-o? —càchí-yu xítñahá-yu.

¹³ Te davá-yu ní sácú ndeé yíchí ñáhã-yu, te xítñahá-yu:

—Xíxíni ñáyiú-áⁿ nõu ñá náhã-yu tnúhu càháⁿ-yu —càchí-yu xítñahá-yu.

Tnúhu ní xáhaⁿ tē Pèlú xii cue ñáyiú

¹⁴ Te ní ngúnutñí té Pèlú ndíhi úxí ñⁿ cue tée ní táuchíúⁿ Jèsús dacuàha ñaha xii ñáyiú tnúhu-gá, te níhi ní càháⁿ-dé, te xáhaⁿ-dē xii-yu:

—Nchaa nchòhó ñáyiú ñítrítú Jùdeá ndíhi nchòhó ñáyiú ñuú Jerusalén, cundedóho váha-ndo tnúhu na càháⁿ-í-a. ¹⁵ Ñá ndàá tnúhu càháⁿ-ndó, chí ñá túú xíni-ndí te ducaⁿ càháⁿ-ndó, chí davitna cùu-xi caá ñⁿ dátneé, vátá tnàhá-gá òré coho ñáyiú ndidí. ¹⁶ Te yúhú ná càchí tnúhu-í xii-ndo vîtna nâcuáa ní xáhaⁿ Yá Ndiõxí xii ndí Joél tée ní xóo càháⁿ tnúhu-gá ndeé sanaha nâcuáa cada ñaha-gá xii ñáyiú, te ndí-áⁿ ní chídó tnùní ndí nâcuáa ní càháⁿ-gá. ¹⁷ Te duha ní xáhaⁿ-gá xii ndí:

Cumání-gã sáá nduu nàa ñuyúú, te cuñaha-í Espiritú-í cundecu ndíhi nchaa ñáyiú na quíndáá iní ñáhá xii-í.

Te cue déhe-yu càháⁿ-yu tnúhu-í, te cue tée cuechi dacòto núú ñáhá-xi xii-güedé,

te ducaⁿ-ni cuè tée ní sàhnu càháⁿ saní-güedé,

te ñu-ni cuèndá nchaa sá quidè-í ducaⁿ dâcoto núú ñáhá-xi xii-güedé.

¹⁸ Te nchaa ñáyiú xínu cuechi núú-í càháⁿ-yu tnúhu-í, te cuñaha-í Espiritú-í cundecu ndíhi-yu.

¹⁹ Te ndeé andíu, yàcáⁿ vâi sá cadà-í nâcuáa cuñúhu vîhí-yu, te núú ñuyúú-a cada-í ñⁿ sá vátá quíni tnàhí-gá-yu,

te ngoyo ñíí te ngoyo ñuhú te quene vîhi ñíhã.

²⁰ Te vâ dáyèhé-gá nchíanchii, cuu nee ñuyúú te cuu ticuèhé núú yõ dátñá ticuèhé nííí.

Te davá-áⁿ sáá nduu quixi Yáá cúú Xitohó-yu,

te nduu-ãⁿ cuu-xi ñⁿ nduu càhnu vîhi, chí cada-gá nchaa sá ñá túú xíni-yu, te cuñúhu vîhí-yu.

²¹ Te òré xíáⁿ te nchaa ñáyiú càháⁿ ndíhi ñaha xii Yáá cúú Xitohó-yu-áⁿ naníhí tãhú-yu. Duha ní xáhaⁿ Yá Ndiõxí xii ndí Joél ní chídó tnùní ndí.

22 "Te nchòhó ñáyiú isràél, cund-edóho váha-ndo tnúhu na càháⁿ-í-a cuèndá Jèsús téé ñuú Nazàrét. Te Jèsús ní quide-gá chiúⁿ Yá Ndiòxí, chi mee Yá Ndiòxí ní chindee ñàha-gá ní quide Jèsús ná daha núú chiúⁿ, núú xiáⁿ ní ndacu-gá ní quide-gá nchaa sá vǎ yǎ tnàhí ndàcu cada, te xiáⁿ ní cuñúhu vihi-ndo. Te sa nàha-ndo nacuáa ní quide-gá cúnàhá ní xica cuu-gá ñuyíú. 23 Te ndíi Jùdás ní taxi cuèndá ñàhá ndíi Jèsús xii nchòhó cue téé ní cuu úhú iní ñàhá xii-gá, te ní ndúcú-ndó cuè téé úhú iní-xi ní tñi ñaha-güedé xii-gá te ní sata caa ñaha-güedé núú cùrúxí, te núú cùrúxí-áⁿ ní xihí-gá. Dico sa ní cutnúni iní Yá Ndiòxí sá dúcáⁿ càda-ndo Jèsús, te mee Yá Ndiòxí ní cachí-gá sá dúcáⁿ ndòho Jèsús. 24 Te ñuú-ni mee Yá Ndiòxí ní dándótó-gǎ Jèsús, chi sa ní càháⁿ-gá sá òré cuú-gá te vǎ cùú dúcáⁿ-gǎ. 25 Te ndíi Dàvií téé ní xindaha ñàha xii cue ñani tnàhá-ó ní xindecu ndéé sanaha ní chídó tnùni ndíi nàcuáa ní càháⁿ Jèsús, te duha ní càháⁿ-gá: Cùtnuní iní-í sá ncháá ndùu ndecu ndíhi-í Yá Ndiòxí, te ío chindee ñaha-gá xii-í,

te ñá túu tnàhí sá yùhú-í.

26 Te ío ndàcáⁿ tǎhú-í núú Yá Ndiòxí chi cùdǎí iní-í, chi sa nàha-í sá cùú-í dico ndoto-í,

27 chi vǎ dáñá-gǎ quíhíⁿ dúcáⁿ àlmá-í núú ndécú ñáyiú ní xihí,

te vǎ dáñá-gǎ téhyú yiqui cùñú-í chi cùu-í Déhe-gá, te yùhú sa nàha-í sá cùú iní ñàhá-gǎ xii-í.

28 Te sa ní cachí tnúhu-gá nàcuáa cada-í cundecu-í ichi váha, te cuèndá sá ndécú ndíhi ñaha-gá xii-í núú ío cùdǎí iní-í. Duha ní càháⁿ Jèsús, te ducaⁿ ní chídó tnùni ndíi Dàvií.

29 "Te nchòhó cue ñani tnàhá-í, na càchí tnúhu ndáá-í xii-ndo cuèndá ndíi Dàvií téé ní xindecu ndéé sanaha vihi, chi ní xihí-dé, te ní chindúxi ñaha-güedé, te nàha-o

tnavíí núú ní chindúxi ñaha-güedé.

30 Te ndíi Dàvií ní xóo càháⁿ ndíi tnúhu Yá Ndiòxí, te sa nàha ndíi sá Yá Ndiòxí ní càháⁿ ndáá cuiti-gá sá díú-ní ñⁿ tnaha ndíi taxi tnùni-dé ñáyiú isràél ndéé cuèè-gá dàtná ní xóo taxi tnùni méé ndíi cùtnàhá ní xindecu ndíi, te téé taxi tnùni-áⁿ cùú Crìstú chi cùu-gá ñⁿ tnaha ndíi.

31 Te sa ní cutnúni iní ndíi sá ndótó Crìstú, núú xiáⁿ ní chídó tnùni ndíi sá vǎ dáñá Yá Ndiòxí sá quíhíⁿ dúcáⁿ àlmá-gá cundecu-xi núú ndécú ñáyiú ní xihí, te vǎ dáñá-gǎ téhyú yiqui cùñú-gá.

32 "Te ndáá chi Yá Ndiòxí ní dándótó-gǎ Jèsús, te nchúhú ní xiní-ndí sá ní ndoto-gá. 33 Te ní xáhaⁿ Yá Ndiòxí xii Jèsús sá cundecu ndíhi ñaha-gá, te taxi tnùni Jèsús ni caa ni quíhíⁿ. Te Yá Ndiòxí ní sáñaha-gǎ Espiritú-gá ní ngúndecu ndíhi-gá nàcuáa ní xáhaⁿ-gǎ, te ñuú Jèsús ní quide-gá nchaa sá ní xiní-ndó vitna ndíhi nchaa sá ní xindedóho-ndo. 34 Te ndíi Dàvií ñá túu ní ndàa túu ndíi andíu ndíhi yiqui cùñú ndíi, te òré ndécú-gá ndíi ñuyíú-a ní cachí ndíi:

Dútú Ndiòxí ní xáhaⁿ-gǎ xii Yáa cùú Xitohó-í:

"Ngóo xio cùha-í,

35 te yùhú cada-í te nchaa sá cùú úhú iní ñàhá xii-n canehe-xi sá yíñúhu núu-n."

Duha ní xáhaⁿ Dütú Ndiòxí xii Yáa cùú Xitohó-í càchí ndíi.

36 "Te nchòhó ñáyiú isràél cùu-ndo ndí mee-í, te cuíní-í cundedóho váha-ndo ñⁿ tnúhu na càháⁿ-í-a. Jèsús ní sata caa-ndo-gǎ núú cùrúxí, dico Yá Ndiòxí ní cachí-gá sá Jèsús dacácu nihnu-gá ñáyiú, te vǎ cání ñⁿ caní úú iní-ndó, chi ñuú-gá cùnùu-gá núú ncháa ñáyiú —càchí té Pèlú xáhaⁿ-dé xii-yu.

37 Te ñáyiú ní xindedóho tnúhu ní càháⁿ té Pèlú ní ndixi túu iní-yu nàcuáa quidé-yu ndécú-yu, te ní xáhǎⁿ-yu xii-dé ndíhi dava-gá cue

tée ní táuchíúⁿ Jèsús dacuàha ñaha xii-yu tnúhu-gá:

—Nchaa nchòhó cue ñaní tnáhá-ndí, ¿nása cachí-ndó cùnduu, nása cada-ndí vitna? —càchí-yu xǎháⁿ-yu xii-güedé.

³⁸ Te ní xáhaⁿ tē Pèlú xii-yu:

—Daña-ndo nchàa sá cuèhé sá dúhá quide-ndo, te cada càhnu iní Yá Ndióxi nchaa yíca cuèchi-ndo. Te cuandute-ndo cuèndá quini-yu sá ñí natuha-ndo ichi Jesús, te ducaⁿ te taxi Yá Ndióxi Espiritú-gá cundecu ndihi-ndo, ³⁹ chi cùní-gá taxi-gá Espiritú-gá xii mee-ndo ndihi déhe-ndo, te cuañaha-gǎ Espiritú-gá xii nchaa ñáiyu ní càa xico ñuyú, ñáiyu cáháⁿ-gá cundecu ichi-gá ndéé idá-gá —càchí té Pèlú xáhaⁿ-dē xii-yu.

⁴⁰ Te titní-gá tnúhu ní xáhaⁿ-dē nàcuáa cadá-yu, te xáhaⁿ tùcu-dé:

—Daña-ndo nchàa sá cuèhé sá dúhá quide-ndo, vá cadá-ndó sá quidé dāva-gá-yu —càchí-dé xáhaⁿ-dē.

⁴¹ Te nchaa ñáiyu ní sándáá iní-xi tnúhu ní cáháⁿ té Pèlú ní sandute-yu, te diu-ni nduu-áⁿ ñí cuu dàtná úní mǐl ñáiyu ní sándáá iní-xi ní xíndecu ndihi ñáiyu xídacuáhá tnúhu Yá Ndióxi.

⁴² Te ío ní xíndedóho-yu tnúhu ní cáháⁿ cue tée ní táuchíúⁿ Jèsús dacuàha ñaha xii-yu tnúhu-gá, te ío váha ní xíndecú-yu ní xóo ndatnúhu váha-yu. Te ní xóo caxi càhnú-yu cuèndá náhá-yu sá dúcáⁿ ñí quide Jèsús cútñahá vátá cáhni ñaha-gá-güedé xii-gá, te ní xóo cáháⁿ ndihí-yu Yá Ndióxi.

Nàcuáa ní quide nchaa ñáiyu ní sándáá iní tnúhu Jèsús ndéé díhna nuu

⁴³ Te nchaá-yu ní cuñúhu vihí-yu, chi cue tée ní táuchíúⁿ-gǎ dacuàha ñaha xii-yu tnúhu-gá ní quide-güedé titní núú sǎ vǎ yóo tnàhí ndàcu cada, te xǎáⁿ ní cutnùni iní-yu sá méé Yá Ndióxi chíndee ñaha-gá xii-güedé. ⁴⁴ Te nchaa ñáiyu sándáá

iní tnúhu Jèsús càháⁿ ndihi tnàha váha-yu, te cuèi-ni nchaa ndachíuⁿ nandihí-yu ndècu cahnu. ⁴⁵ Te ní dícò-yu nchaa ndachíuⁿ sá ñà túú xìni ñuhú-yu, te ní níhí-yu díhúⁿ te ní sǎñahá-yu xii nchaa ñáiyu ñá ñihí, ⁴⁶ Te ñíⁿ nduu ñíⁿ nduu ní xóo quíhíⁿ ndihi tnàhá-yu veñúhu càhnu sá ío cùnuu. Te ní xexi ndihí tnàhá-yu vehé-yu. Te ío ní cudíí iní-yu chi ñíⁿ-ni ní cuú-yu nchaá-yu. ⁴⁷ Te ío ní ndacáⁿ táhú-yu núú Yá Ndióxi, te nchaa dāva-gá ñáiyu ní cáháⁿ váha-yu cuèndá ñáiyu-áⁿ. Te mee Yá Ndióxi ní quide-gá ní sándáá iní vǎi-gá ñáiyu, te ní xíndecú-yu ndihi dāva-gá ñáiyu xídacuáhá tnúhu-gá.

3

Quide tátna-güedé ñíⁿ tée yacua

¹ Te ñíⁿ nduu òré caá úní sacuaa, òré xícáháⁿ-yu ndihi Yá Ndióxi cuáháⁿ té Pèlú ndihi té Juáa veñúhu càhnu sá ío cùnuu sácúú-xí ñáiyu isràél. ² Te ndècu ñíⁿ tée yacua, te ducaⁿ-ni càa-dé ní cacu-dé. Te sǎháⁿ ndihi ñahá-yu veñúhu càhnu sá ío cùnuu, te sácóo-dé ñíⁿ xio yuyèhe veñúhu sá nání Yèhe Vii Caa, chi ducaⁿ nàni-xi, te xícáⁿ ndàhú-dé núú nchàa ñáiyu sǎháⁿ veñúhu. ³ Te ñí xini-dé té Pèlú ndihi té Juáa cuánguihu-güedé veñúhu, te xícáⁿ ndàhú-dé núú-güedé. ⁴ Te ní ndacoto-güedé núú-dé, te ní xáhaⁿ té Pèlú xii tée yacua-áⁿ:

—Cundehe ñaha xii-ndí —càchí té Pèlú xáhaⁿ-dē xii-dé.

⁵ Te ní xíndéhé ñaha-dé xii-güedé, chi ní cáháⁿ-dē sǎ ío ñíⁿ sá cuañaha-güedé. ⁶ Te ní xáhaⁿ té Pèlú:

—Ñá túú tnàhí díhúⁿ néhè-í dico chindee ñaha-í xii-n, te Xítóhó Jesucristú Yáa ní xíndecu ñuú Nazàrét, ndacu-gá cada tátna ñaha-gǎ xii-n, ndacuñí te caca-n —càchí-dé xáhaⁿ-dē.

⁷ Te té Pèlú ní tnú-dé ndaha cùha tée yacua-áⁿ, te ní ngúita-dé ndácàni ñaha-dé, te òré xíaⁿ ñí

naníhí ndéé-dě, te ní ndúha sáhá-dě. ⁸ Te ní ndacuñí cunu mee-dě te ní xica-dé, te ní cachí-dé sá ïo cãhnu cuu Yá Ndiöxí cuendá sá ní ndúha-dé, te ta sãndava-dé cuãnguïhu ndihi ñaha-güedě veñúhu. ⁹ Te nchaa ñáyiu xĩndecu-áⁿ ní xiní-yu sá ní nduu váha-dé, te ndéhé-yu ndácáⁿ táhú-dě núú Yá Ndiöxí. ¹⁰ Te ní naquini ñáhã-yu xii-dé sá díú tée xicáⁿ ndàhú tée ní xóo cunucóo yuyèhe veñúhu sá nání Yèhe Vii Caa cuu-dé, te ní cuñúhu vihi-yu sá ní ndúha-dé.

Té Pèlú ní cáháⁿ-dé corredór sá néhé ñuu ndí Salòmón

¹¹ Te sãtã veñúhu càa corredór sá néhé ñuu ndí Salòmón. Yacáⁿ ndécú té Pèlú ndihi té Juáá ndihi tée ní ndúha sáhã-xi, te ñã cuini tée ní ndúha sáhã-xi-áⁿ dañã-dě quihíⁿ-güedé dandõ ñaha-güedě xii-dé. Te chitú-yu ní quexio coyó-yu núú ndécú-güedě, te ní cuñúhu vihi-yu sá ní ndúha sáhã tée cùhú-áⁿ. ¹² Te té Pèlú ní xiní-dé ní quexio coyó-yu, te ní xáhaⁿ-dě xii-yu:

—Nchòhó ñáyiu isràél, ¿ná cuendá ndéé dúcáⁿ ndèhe ñaha-ndo xii-ndí te cùñúhu-ndo sã ní ndúha tée yacua-áⁿ? Nchòhó cáháⁿ-ndó sã méé-ndí ní quide tátna-ndí-dé sá ïo váha iní-ndí, dico ñáhã chi ñã díú mèe-ndí ní quide tátna-ndí-dé. ¹³ Chi Yá Ndiöxí ní ndadúha ñaha-gã xii-dé, chi ñuu-gã cúú Ndiöxí ndíi Ábrahãm ndihi ndíi Isàác ndihi ndíi Jãcób, te ñuu-ni cue tée-áⁿ cúú ñani tnáhã-ó ní xĩndecu ndéé sanaha vihi. Te ñuu-ni Ndiöxí-áⁿ ní xáhaⁿ-gã xii Déhe-gã Jèsús sá táxí tnúni-gã nchaa sá ïo andíu ndíi nchaa ñáyiu ndècu ñuyú-a, dico mee-ndo ní sãha cuendá-ndó Jèsús núú tée cùchiuⁿ. Te té Pilatú ní cuini-dé dacãcu-dé Jèsús ní cùu, te mee-ndo ñã ní cuini-ndó. ¹⁴ Te Yá Ndiöxí ní cachí-gã sá ïo váha iní Jèsús te ñã túú tnàhí cuéchi-gã. Te mee-ndo ñã túú ní

cuini-ndó cãcu-gã núu ní xáhaⁿ-ndo xii té Pilatú sá váha-gã dacãcu-dé ñⁿ tée ndècu vihi cuéchi-xi, te vá dacãcu-dé Jèsús. ¹⁵ Te ní xáhaⁿ-ndo sã cáhni-güedě Jèsús Yáá quidé nchito-o ndecu-o, dico Yá Ndiöxí ní dándótó ñaha-gã, te ní xiní-ndí sá ndãá ní ndoto-gã. ¹⁶ Te nchúhú sa ñaha-ndí sá díú Xitohó Jesucristú ní ndadúha-gã tée yacua, te náí-dé nútñi-a. Te ducaⁿ ní quide-gã chi ní sãndãá iní ñáhã-dě xii-gã, te vitna ní xiní-ndó sã ndãá ní ndúha-dé.

¹⁷ Te nchòhó ndihi cue tée cùnuu ní sahi-ndo Xitohó Jesucristú, chi ñã ní cùtnuni iní-ndó sã ní quide-ndo. ¹⁸ Te cue tée ní xóo cáháⁿ tnúhu Yá Ndiöxí ndéé sanaha ní chidó tnúni-güedě nãcuãa ní xáhaⁿ Yá Ndiöxí xii-güedé sá Cristú quixi-gã ñuyú-a, te ndoho vihi-gã, te xĩãⁿ núu ducaⁿ ní cuu ïo ní ndoho-gã. ¹⁹ Te vitna te dañã-ndo nchã sã cuéhé sá dúhá quide-ndo. Te quindãá iní-ndó Yá Ndiöxí, te ducaⁿ te cada cãhnu iní-gã nchaa sã ñã túú váha ní quide-ndo ñuyú-a, te canu ichi ñaha-gã xii-ndo ñⁿ ichi váha. ²⁰ Te ní tendaha-gã Cristú ní quixi-gã ñuyú-a, chi mee Yá Ndiöxí ní cachí-gã sá díú Cristú taunihnu ñaha-gã xii-ndo. ²¹ Te dacuití cùndecu-gã andíu ndéé ná sãá nduu nãtaxi ndecu-gã nchaa sã ndécú ñuyú nãcuãa sãni iní méé-gã. Te ñuu ducaⁿ ní cáháⁿ Yá Ndiöxí núu ducaⁿ ní chidó tnúni cue tée ní xóo cáháⁿ tnúhu-gã ndéé sanaha. ²² Te ndíi Moisés ní xáhaⁿ ndíi xii cue ñani tnáhã-ó ní xĩndecu ndéé sanaha: “Yá Ndiöxí tendaha-gã ñⁿ tée quixi-dé cáháⁿ-dé tnúhu-gã dàtnã cuini-ndó ní quide ñaha-gã xii yúhú, te tée-áⁿ cuu-dé ñⁿ ñani tnáhã-ndó. Te cundedóho váha-ndo nchãa tnúhu cáháⁿ-dé. ²³ Te nchaa ñáyiu vá quindãá iní tnúhu cáháⁿ-dé, te cuíta nihnú-yu chi vá quihíⁿ-yu núú quihíⁿ ñáyiu sãndãá iní tnúhu Yá Ndiöxí”, duha ní xáhaⁿ ndíi Moisés xii-yu —càhí

té Pèlú xăhaⁿ-dê xii-yu.

²⁴ Te ní xăhaⁿ tùcu té Pèlú xii-yu:

—Ndií Sămuélⁿ ndihî nchaa cue tée nchîcúⁿ-gá ní xóo cáhâⁿ tnúhu Yá Ndiôxí ndéé sanaha ní cáhâⁿ-güedé năcuăa cada-xi vitna. ²⁵ Te Yá Ndiôxí ní cáhâⁿ-gá ndihî cue tée ní cáhâⁿ tnúhu-gá ndéé sanaha. Te ní quide ndăá-gá ndihî nchaa ñanı tnáhâ-ó ní xindecu ndéé sanaha năcuăa cada-gá nanihî tăhú-ó. Te duha ní xăhaⁿ-gá xii ndí Àbrahâm: “Ío nduu cacu ìⁿ tnàha-n, te tée-áⁿ cada-dé te nanihî tăhú ñăyiu ñuyú-a”, duha ní xăhaⁿ-gă xii ndí Àbrahâm. ²⁶ Núu xîăⁿ ní tendaha-gă Déhe-gá ní quixi-gá núu ndécú-ndó cuendá daña-ndo nchăa sá cuèhé sá dúhá quide-ndo, te nanihî tăhú-ndó —căchî té Pèlú xăhaⁿ-dê xii-yu.

4

Té Pèlú ndihî té Juăá ndécú-güedé ndaha tée cùchiuⁿ

¹ Te té Pèlú ndihî té Juăá cāhāⁿ dúcāⁿ-ni-güedé ndihî ñăyiu, ní quexio cue dútú ndihî tée tàxi tnunî ñáhâ xîi cue tée quide cuendá veñúhu cānu sá ïo cūnuu, ndihî cue tée cūu saducéú. ² Te ní cudééⁿ-güedé nchaa-güedé núu tē Pèlú ndihî té Juăá sá xăhaⁿ-güedé xii ñăyiu sá ndótó ñăyiu ní xîhî dātná ní ndoto Jêsús. ³ Te ní tñî ñaha-güedé ní chihî ñaha-güedé vecaá xii-güedé, te ñă ní quide ndăá tée cùchiuⁿ cuéchi-güedé nduu-ăⁿ chi sa ní cuaa. ⁴ Te ío vâi ñăyiu ní sândăá inî-yu tnúhu ní cáhâⁿ-güedé, te ñăyiu-ăⁿ ndihî ñăyiu sa ní sândăá inî-xî ndéé cāni-gá ní xînu dātná úhúⁿ mîl mee-ni cuè tée, te dîⁿ ñăyiu dîhî ndihî landú.

⁵ Te nduu tněé-ăⁿ diu-nî ñuú Jerusălén-ăⁿ ní tacá cue tée yîndaha veñúhu, ndihî cue tée cūu sacuéhé núu ñăyiu isrăél ndihî cue tée dăcuaha ñaha xii-yu nchaa tnúhu ní chídó tnunî ndí Moisés. ⁶ Te tnàhá dútú cūnuu-gá tée nani Anás ndécú ndihî té Caifás, ndihî té Juăá, ndihî

té Lijandrú ndihî dava-gá ñanı tnáhâ dútú cūnuu-gá-ăⁿ ndécú. ⁷ Te ní xăhaⁿ-güedé xii cue tée xînu cuechi núu-güedé:

—Chí cuahāⁿ queñuhu-ndo tē Pèlú ndihî té Juăá vecaá, te na quixi-güedé iha —căchî-güedé xăhaⁿ-güedé.

Te ní quexio té Pèlú ndihî té Juăá núu cuè tée cūnuu, te cue tée cūnuu-ăⁿ ní xicāⁿ tnúhú-güedé núu-güedé, te xăhaⁿ-güedé:

—¿Năsa ní quide-ndo cuendá tée yacua-ăⁿ? ¿Yoo ní táuchíuⁿ dūcaⁿ cada-ndo? —căchî-güedé xăhaⁿ-güedé.

⁸ Te ndécú ndihî té Pèlú Espiritú Yă Ndiôxí, núu xîăⁿ ní xăhaⁿ-dê xii-güedé:

—Nchôhó cue tée cùchiuⁿ ndihî nchôhó cue tée cūu sacuéhé núu ñăyiu isrăél, ⁹ te núu cuinî-ndó quinî-ndó năsa ní quide-ndí ní ndúha tée yacua-ăⁿ, ¹⁰ te cund-edóho-ndo ìⁿ tnúhu na cāhāⁿ-í-a. Xîni ñuhu-xî cundedóho nchaa ñăyiu isrăél cuendá quinî-yu năcuăa ní cuu ní ndúha tée-ăⁿ. Xítóhó Jesucristú Yăá ní xindecu ñuú Nazàrét ní quide tátna-gá sáhâ tēe yacua ní ndúha, te diu-nî-gá ní sata çaa-ndo núu cùrúxi te núu cùrúxi-ăⁿ ní xihî-gá, te ní dāndótó ñaha Yá Ndiôxí xii-gá. ¹¹ Te núu tütú Yă Ndiôxí căchî-xi: “Crîstú cūú-gă dātná ìⁿ yúu ndécú xiquí ìⁿ vehe. Te yúu căchî-yu sá ñă túu nāndîhî, te diu xîăⁿ ní nāndîhî-xî ní ngūnutñî-xî xiquí véhé”, duha căchî-xî núu tütú-gá. Te ducaⁿ sātnahâ-xî cūu Jêsús, chi căchî-ndó să ñă túu nāndîhî-gá, ¹² dico Yá Ndiôxí ñă túu ndéé ní tàxi ndecu-gá ingá tée dăcācu nihnu ñaha xîi-o núu úhú núu ndāhú, chi ìⁿ dîi dîi-nî Déhe-gá Xítóhó Jesucristú dacācu nihnu ñaha-gă xii-o —căchî té Pèlú xăhaⁿ-dê xii-güedé.

¹³ Te tē Pèlú ndihî té Juăá ñă túu tūha-güedé, te cūñúhu cue tée cùchiuⁿ sá ïo ñîi xîndăa-güedé. Te

ní cutnùni iní cue tée cùchiuⁿ-áⁿ sá Jèsús ní xica cuu ndihi-güedé, núu xíáⁿ ñá túú tñahí yùhú-güedé càháⁿ-güedé. ¹⁴ Te cuendá ndécú ndihi té Pèlú ndihi té Juáá tée ní ndúha sáhá-xi, núu xíáⁿ ñá ní ñihí cue tée cùchiuⁿ tñuhu càháⁿ-güedé. ¹⁵ Te ní xáhaⁿ-güedé xii té Pèlú ndihi té Juáá sá queé-güedé quehé cuendá ndóo mee-güedé ndatnúhu-güedé. ¹⁶ Te ní xítnàha-güedé:

—¿Nása cada-o úú cue tée-áⁿ?, chi nchaa ñáyiú ñuu Jerusálén nahá-yu sá ní quide tátna-güedé ñⁿ tée yacua, te xíáⁿ xícuñúhu vihi ñáyiú. Te vá cúú càchí-ó sá ñá ndàá, chi vai ñáyiú ní xiní nàcuáa ní cuu. ¹⁷ Te dayùhú-ó-güedé te cúñaha-o sá vǎ càháⁿ-gá-güedé tñuhu Jèsús, chi núu ñáhá te quindáá-gá iní-yu — càchí-güedé xítnàha-güedé.

¹⁸ Te ní cana tucu-güedé té Pèlú ndihi té Juáá, te xáhaⁿ-güedé sá vǎ dácuaⁿha-gá-güedé ñáyiú tñuhu Jèsús. ¹⁹ Te té Pèlú ndihi té Juáá ní xáhaⁿ-güedé:

—Chí cuáha cuendá, te núu sá càchí nchòhó cada-ndí àdi sá càháⁿ Yǎ Ndiòxí cada-ndí. Te cada càhnu iní-ndó chí vá cúú càda-ndí sá càchí-ndó, chí cada nahi-ni-ndí sá càchí Yǎ Ndiòxí. ²⁰ Chi dacuití càháⁿ-ndí nàcuáa ní càháⁿ Jèsús, te càháⁿ-ndí nchaa sá ní xiní-ndí ní quide-gá —càchí-güedé xáhaⁿ-güedé.

²¹ Te cue tée cùchiuⁿ níhi-gá ní càháⁿ-güedé xáhaⁿ-güedé sá cáda càstiú ñáhá-güedé núu vá dáñá-güedé sá dácuaⁿha-güedé ñáyiú. Te ducaⁿ te ní dáñá ñàha-güedé cuánuhú-güedé, chí ñá ní ñihí-güedé nása cada-güedé cada castiú ñáhá-güedé, chí nchaa-yu ndàcáⁿ táhǔ-yu núu Yǎ Ndiòxí sá ní ndúha tée yacua. ²² Te tée ní quide tátna-güedé-áⁿ ndécú-dé vihi-gá údico cuía-dé, te ío ní cuñúhu-yu sá ní ndúha-dé.

Ñáyiú sàndáá iní tñuhu Jèsús xicáⁿ táhǔ-yu núu-gǎ sá vǎ yùhú-yu càháⁿ-yu tñuhu-gá

²³ Te ní ndee té Pèlú ndihi té Juáá cuánuhú-güedé núu ndécú cuè tée cùndihi-güedé, te ní nacani tñuhu-güedé nàcuáa ní xáhaⁿ cuè dútú cùnùu ndihi cue tée cùu sacuéhé núu ñáyiú isràél. ²⁴ Te sátá ñí xíndedóho-yu tñuhu ní càháⁿ-güedé, te ñⁿ-ni tñuhu ní càháⁿ-yu nchaa-yu ndihi Yǎ Ndiòxí, te ní xáhǎⁿ-yu xii-gá:

—Yòhó Dútú Ndiòxí, ní cadúha-n àndiú, ní cadúha-n ñùyíú, ní cadúha-n làmár, ní cadúha-n nchàandi túhú sá ío ñuyíú. ²⁵ Te ndí Dávíí ní sàndáá iní ndí tñuhu ní càháⁿ-n, te ní chídó tñuní ndí nàcuáa ní xáhaⁿ-n càháⁿ ndí, te ñiú-ni Espiritú-n ní chindee ñàha-xi xii ndí ní chídó tñuní ndí, te duha ní chídó tñuní ndí:

Ñáyiú ñá túú cùu ñáyiú isràél ío cùdèéⁿ-yu núu Yǎ Ndiòxí, te cuini-yu nàá-yu ndihi-gá, dico vá ndácǔ-yu chí mee-gǎ cùnùu-gá.

²⁶ Te cue tée yìndaha nacióⁿ ndihi cue tée cùchiuⁿ tacá-güedé nàá-güedé ndihi Dútú Ndiòxí ndihi Crístú Yaá ní quixi ñuyíú-a.

Duha ní chídó tñuní ndí Dávíí nàcuáa ndùu tñuhu ní càháⁿ-n — càchí-yu xáhǎⁿ-yu xii Yǎ Ndiòxí.

²⁷ Te xáhaⁿ tucú-yu xii-gá:

—Ndáá ní càháⁿ ndí Dávíí chí ñiú-ni ñuu íha ní tacá té Hèrodés ndihi té Pònciú Pilatú ndihi ñáyiú ñá túú cùu ñáyiú isràél ndihi ñáyiú isràél ní càháⁿ cuèhé-yu cuendá Jèsús. Te Yòhó Dútú Ndiòxí, Déhe-n cùu Jesús núu ío váha iní-gá, te ní sáha chiúⁿ-n-gá, te ío úhú ní cuu iní ñáhá ñáyiú xii-gá. ²⁸ Te ní quidé-yu nàcuáa ní saní iní-n càdá-yu ndéé sanaha, ndéé cùtnàhá ní ngáva ñuyíú. ²⁹ Te Yòhó Dútú Ndiòxí sa ñàha-n nása càháⁿ cue tée cuini cada úhú ñáhá xii-ndí. Te quide-ndí chiúⁿ tahu-n, te vitna chindee ñàha-n

xii-ndí cuendá sá vă yùhú-ndí cáháⁿ-ndí tnúhu-n. ³⁰ Te cada tátna-n ñáyi cuhú, te chindee ñaha-n xii-ndí, te cada-ndí nchaa sá vă yòo tnàhí ndàcu cada nacuaa cuñúhu vîhî-yu. Te xini-ndí sá méé Jèsús chindee ñaha-gá xii-ndí, chi quide-gá chiⁿ tahu-n —cachî-yu xăhăⁿ-yu xii Yá Ndiôxí.

³¹ Te sátá nî yáha ní cáháⁿ-yu ndîhi Yá Ndiôxí, te ní quidi-xi vehe núú xindecú-yu, te òré-án nî cutáhú tucú-yu nchaa-yu Espiritú-gá. Te ní cáháⁿ-yu tnúhu Yá Ndiôxí, te ñá túú tnàhí ní yùhú-yu.

Cuendá nchaa ndachîⁿ cánehe chiúⁿ-yu

³² Te nchaa ñáyi ní sándáá iní tnúhu Yá Ndiôxí ìⁿ-ní tnúhu ní cáháⁿ-yu nchaa-yu. ìⁿ-ní tnúhu ní sani iní-yu, te ní xóo chindee tnàhá-yu chi ní xóo cuáha táhú tnăhă-yu nchaa sá xini ñuhú-yu, te ní ìⁿ-yu ñá túú ní cáháⁿ-yu sá ndachîúⁿ-yu ìⁿdi-ní-yu cùu nchaa sá ndécú ndîhi-yu. ³³ Te cue téé ní táuchíúⁿ Jèsús dacuàha ñaha xi-yu tnúhu-gá ío yáha ní cáháⁿ-güedé nàcuáa ní cuu ní ndoho Xitohó Jesucristú. Te ío ní chindee ñaha Yá Ndiôxí ní cáháⁿ-yu tnúhu-gá, te ñá túú ní cáháⁿ cuèhé dava-gá-yu cuendá ñáyi dacuaha tnúhu-gá. ³⁴ Te ñá túú tnàhí ní cùndahú-yu díhúⁿ, chi nchaa ñáyi ndècu ndîhi ñuhu-xi, ndîhi nchaa ñáyi càa vehe-xi ní nadicó-yu, te da ìⁿ da ìⁿ ndachîúⁿ-yu ní nadicó-yu òré xini ñuhú-yu díhúⁿ. ³⁵ Te ní sãñaha-yu xii cue téé ní táuchíúⁿ Jèsús dacuàha ñaha xi-yu tnúhu-gá, te cue téé-án nî dácăhñu-güedé nchaa ñáyi xini ñuhu. ³⁶ Te distritú Chìpré ndécú ìⁿ téé nani-dé Chèè ñani tnàhá ndîhi Lèví, te ní xóo cunu cuechî-dé veñúhu ñáyi isràél. Te cuendá sá sãñaha-dé tnúhu ndee iní xi-yu, xíáⁿ nñu ní dánáni ñaha-güedé Vée xii-dé. ³⁷ Te téé-án nî nadico-dé luha ñuhu-dé, te nèhe-dé díhúⁿ cuáháⁿ

núú cuè téé ní táuchíúⁿ-gă dacuàha ñaha xi-yu tnúhu-gá.

5

Té Ananiás ndîhi tá Sàfirá ñá túú ní quide ndáá-yu

¹ Te ndècu ìⁿ téé nani Ananiás, te ñadihî-dé nani-án Sàfirá, te ñáyi-án nî nadicó-yu luha ñuhú-yu. ² Te ní taxúha-dé sacú díhúⁿ, te sacú-gá néhé-dé cuáháⁿ ní sãñaha-dé xii cue téé ní táuchíúⁿ Jèsús dacuàha ñaha xii ñáyi tnúhu-gá, te ní dándahú ñáhá-dé xii-güedé, chi ní xáhaⁿ-dè sá ñihî ní sãñaha-dé, te ñaha ñadihî-dé sá dúcáⁿ ní quide-dé. ³ Te ní xáhaⁿ tè Pèlú xii-dé:

—Ananiás, çná cuendá ducaⁿ ní quide-n ní dáñá-n ní quíhu sácúíhná ñni-n? Te ní dácúándèhnde-n núú Espiritú Yá Ndiôxí, te ní taxúha-n sacú díhúⁿ ní níhî-n cuendá ñuhu-n. ⁴ ¿Te ñuhu-án cuendá sá ñuhú mée-n, àdi díhúⁿ-án cuendá sá díhúⁿ méé-n cùu-xi, te cuu-ni cada-n nàcuáa càchî iní-n càhaⁿ-n ñá? ¿Ná cuendá ducaⁿ ní quide-n? ¿Ná ní quide-xi iní-n nñu ní dácúándèhnde-n núú Yá Ndiôxí? Chi ñá díú-ní mée-ni ñáyi ní dándahú-n —càchî té Pèlú xáhaⁿ-dè xii-dé.

⁵ Te òré ní ndîhi tnúhu ní xáhaⁿ tè Pèlú, te uuⁿ ní nduá-dé te ní xihî-ni-dé. Te nchaa ñáyi ní níhî tnúhu sá ní xihî-dé, te ní yùhú víhî-yu. ⁶ Te ní quixi ìⁿ úú cue téé cuechî, te ní ndanehe ñaha-güedé ní sacáⁿ ñáhá-güedé núú yuu, te ní ducuⁿ nuu ñaha-güedé yuu-án, te ní xido ñaha-güedé néhé ñaha-güedé cuáháⁿ chindúxi ñaha-güedé xii-dé.

⁷ Te ní cuu úú uní òré, te ní quexìo ñadihî téé ní xihî-án, te vátá quini-gá-aⁿ sá ní xihî yî-aⁿ. ⁸ Te ní xáhaⁿ tè Pèlú xii-aⁿ:

—Cuini-í cachî tnúhu ndáá-n, ¿Ndèdau ní dícó-ndó ñuhu, ní dícó-ndó nàcuáa ní cachî yî-n àⁿ? —càchî té Pèlú xáhaⁿ-dè xii-aⁿ.

Te ní xáhaⁿ-aⁿ:

—Ndáá sá díú-ní dùcaⁿ—cachí-aⁿ xáhaⁿ-aⁿ.

⁹ Te ní xáhaⁿ tē Pèlú:

—¿Ná cuèndá ducaⁿ nǐ chitnáha tnúhu-ndo dùcaⁿ ní quide-ndo nǐ cuiní-ndó dándahú-ndó Espíritú Yá Ndióxi? Quiní-n, chi sa cuándixi cue tée ní sáháⁿ ní chindúxi yíi-n, te yòhó tnàhá-n càndeca ñaha tucu-güedé xii-n quíhíⁿ vitna —càchí-dé xáhaⁿ-dē xii-aⁿ.

¹⁰ Te òrē-áⁿ ní nduá-aⁿ núú tē Pèlú, te ní xihí-ni-aⁿ. Te cuándihu cue tée cuechi-áⁿ xití vehe, te ní xiní-güedé sá sà ní xihí-aⁿ, núú ní xido ñaha tùcu-güedé cuáháⁿ chindúxi-güedé-aⁿ diñi yíi-aⁿ. ¹¹ Te ní yùhú víhí ñáyiú ní sándáá iní tnúhu Yá Ndióxi, ndihi dava-gá ñáyiú ní níhí tnúhu nàcuáa ní cuu.

Ní quide-güedé titní núú sǎ vǎ yǎo tnàhí ndàcu cada te ío ní cuñúhu ñáyiú

¹² Te cue tée ní táuchíúⁿ Jèsús dacuàha ñaha xii-yu tnúhu-gá titní víhí sǎ vǎ yǎo tnàhí ndàcu cada ní quide-güedé, te ní cuñúhu víhí-yu. Te nchaa ñáyiú ní sándáá iní-xi tnúhu Jèsús ní xóo tacá-yu corrèdór néhé diú ndí Salòmón. ¹³ Te nchaa ñáyiú ñá túú dacuaha tnúhu-gá ñá ní cùyí-yu chitnahá-yu ñáyiú ní sándáá iní-xi tnúhu-gá, díco nchaá-yu ní cáháⁿ váha-yu cuèndá ñáyiú ní sándáá iní-xi tnúhu-gá.

¹⁴ Te vǎi tée, vǎi ñadihí ní sándáá iní-yu tnúhu-gá. ¹⁵ Te cuèndá sá nǐ níhí-yu tnúhu sá quidé tátna cue tée ní xica cuu ndihi Jèsús, núú xiǎⁿ ní queñuhú-yu nchaa ñáyiú cùhú ichi, te davá-yu ní quide túha-yu camá te davá-yu ní quide túha-yu yuu, núú núú ncháa xiǎⁿ tá sàcáⁿ-yu cue ñáyiú cùhú-áⁿ cuáháⁿ, te xiǎⁿ cáǎ-yu ndetú-yu, chi ní sani iní-yu sá òrē yáha tē Pèlú te cuèdicó cuándahú-dē yáha ndodo ñaha-xi xii-yu te ndúha-yu. ¹⁶ Te ní quixi ñáyiú ñúú yatni Jerusàlén ndécá-yu ñáyiú cùhú, ndihi ñáyiú yíhi ñaha

espíritú cündihí yucu ñáváha ní quixi, te nchaá-yu ní ndúha.

Ío ní quide úhú-güedé tē Pèlú ndihi tē Juàá

¹⁷⁻¹⁸ Te dútú cúnú-gá ndihi cue tée cùu saducéú cue tée cündihí-dé ní cudééⁿ-güedé sá ío chitú-yu dácuaaha tnúhu Jèsús, núú xiǎⁿ ní tñi-güedé cue tée ní táuchíúⁿ Jèsús dacuàha ñaha xii-yu tnúhu-gá ní chihí ñaha-güedé vecaá. ¹⁹ Te xití niú-áⁿ ní quexio íiⁿ espíritú xínú cuèchi núú Yá Ndióxi ní nacaáⁿ-xi yèhe vecaá ní quee-güedé, te ní xáhaⁿ-xi xii-güedé:

²⁰ —Quíhíⁿ-ndó veñúhu càhnu sá ío cúnúu te cuñaha-ndo xii ñáyiú nàcuáa cadá-yu nanihí tǎhú-yu —càchí espíritú-áⁿ xáhaⁿ-xi xii-güedé.

²¹ Te sá dúcáⁿ ní xáhaⁿ-xi núú sáta nǐ tundaá, te ní sáháⁿ-güedé veñúhu càhnu sá ío cúnúu sá cúu-xí ñáyiú isràel ní dacuáha ñaha-güedé xii-yu.

Te dútú cúnú-gá ndihi cue tée cündihí-dé ní nadatàcá tnàhá-güedé ndihi nchaa cue tée cùu sacuéhé núú ñáyiú isràel ndihi cue tée cùchiuⁿ, te ní tendaha-güedé sandàdú cuáháⁿ queñuhu-güedé cue tée yíhi vecaá ní cùu. ²² Te ní quexio-güedé yèhe vecaá, te ní xiní-güedé sá nǐ íiⁿ-gá cue tée dacuaha ñaha xii ñáyiú tnúhu Jèsús ñá túú-gǎ-güedé yíhi. Te cuánuhú-güedé ²³ ní xitnùhu-güedé cue tée cùchiuⁿ, te xáhaⁿ-güedé:

—Ní sáháⁿ-ndí ní sándéhé-ndí vecaá, te ndéé chóo-ni, te xindecu-ní sandàdú cue tée xindeé yèhe vecaá. Te ní nacaáⁿ-ndí vecaá, te vá yǎo íiⁿ-gá yíhí —càchí-güedé xáhaⁿ-güedé.

²⁴ Te sá dúcáⁿ ní xáhaⁿ-güedé, te cuáháⁿ iní cue dútú cúnú ndihi tée tàxi tñuní cue tée xindeé veñúhu càhnu sá ío cúnúu, te ní xitnàha-güedé:

—¿Nása cada-xi vitna duha càa ní cuu ní xinu cue tée yíhi vecaá-i? —càchí-güedé xitnàha-güedé.

25 Te ní quexìo ìⁿ téé ní xáhaⁿ-dè:
—Cundedóho-ndo na càchí
tnúhu-í ìⁿ tnúhu. Cue téé ní
chihi-ndo vècaá ndécú-güedé
veñúhu càhnu sá ïo cúnuu
dacuaha-güedé ñáyiú —càchí-dé
xáhaⁿ-dè.

26 Te cue téé ndèé veñúhu
ndihí téé tàxi tnuní ñáhá xii-güedé
cuánguaca ñaha-güedé, te ñá túú
ní quide úhú ñáhá-güedé, chi ní
yuhú-güedé cuáha yúú ñáhá ñáyiú
dii ñúú-xi-áⁿ. 27 Te ní ndexìo ndihí
ñaha-güedé núú cuè téé cùu sacuéhé
ndihí núú cuè téé cùchiuⁿ. Te
dútú cúnuu-gá ní ngúita-dé ténáá
ñáhá-dé xii-güedé, te xáhaⁿ-dè:

28 —Te náá ñá díú ní cachí-ndí
sá vǎ dacuaha-gá-ndó ñáyiú tnúhu
Jèsús te dàcuaha-ni-ndó-yu, te vitna
nchaa ñáyiú ñúú Jerusálén ní
níhi-yu tnúhu nàcuáa càháⁿ-ndó.
¿Te ná cuendá ducaⁿ quide-ndo, te
càchí-ndó sǎ nchúhú ndècuéchi-ndí
ní sahani-ndí Jèsús-i? —càchí dútú
cúnuu-gá xáhaⁿ-dè xii-güedé.

29 Te té Pèlú ndihí dava-gá cue
téé ní táuchíúⁿ Jèsús dacuáha ñaha
xii-yu ní xáhaⁿ-güedé xii cue téé
cùchiuⁿ:

—Nchúhú, Yá Ndiòxí cúnuu-gá
sándáá iní-ndí tnúhu càháⁿ-gá
dàcúúxi tnúhu càháⁿ ñáyiú. 30 Te
nchòhó ní sata caa-ndo Jèsús núú
cùrúxí te núú cùrúxí-áⁿ ní xihí-gá,
dico ní dándótó ñaha Yá Ndiòxí
xii-gá. Te Yá Ndiòxí ní sándáá
iní cue ñani tnáhá-ndí ní xindecu
ndéé sana. 31 Te Yá Ndiòxí
ní xáhaⁿ-gá sá cündecu Jèsús xio
cùha-gá cuendá taxi tnùní-gá te
dacăcu nihnu-gá ñáyiú isràél núú
ùhú núú ndàhú. Te ducaⁿ-ni dacăcu
nihnu-gá nchaa ñáyiú na dañá
nchaa sá cuèhé sá dúhá, te cada
càhnu iní-gá nchaa yíca cuèchi-yu.

32 Te ní xiní-ndí nàcuáa ní quide-gá,
núú xǎⁿ cání-ndí cuendú núú nchaa
ñáyiú, te Espíritú Yá Ndiòxí chindèe
ñaha-xi xii-ndí càháⁿ-ndí tnúhu-gá.
Te diu-ni Espíritú-gá ní sáñaha-gá
xii nchaa ñáyiú ní sándáá iní-xi

tnúhu-gá —càchí té Pèlú ndihí
dava-gá-güedé xáhaⁿ-güedé xii cue
téé cùchiuⁿ.

33 Te sátá dúcáⁿ ní xáhaⁿ-güedé xii
cue téé cùchiuⁿ, te ní cudééⁿ-güedé,
te ní ndatnúhu-güedé sá cáhni
ñaha-güedé. 34 Te ìⁿ téé cùu
fariséú tnàha-dé cúú-dé chiúⁿ, te
nàni-dé Gamaliél, te cùu-dé mèstrú
dacuáha-dé ñáyiú nàcuáa ní chidó
tnùní ndí Moisés, te ío yǎñúhu
caháⁿ ndihí ñáhá-yu xii-dé. Te
ní ngúnutnǎi-dé, te ní xáhaⁿ-dè
sá ná quèe tnaa té Pèlú ndihí
dava-gá-güedé quehé. 35 Te ní
xáhaⁿ-dè xii cue téé cùchiuⁿ:

—Nchòhó cue téé isràél, xini
ñuhu-xi sá cání vaha iní-ndó nása
cada-ndo ndihí cue téé-áⁿ. 36 Chi
ní cunaha ní xindecu ìⁿ téé ní
xinani Tèudás, te ní cachí-dé sá
cúnuu-dé, te ní cundihí-dé dàtná
cúmi çiendú cue téé, te ñá ní
cúni-güedé cuu ìⁿ nuu-güedé ndihí
cue téé cùchiuⁿ. Te ní sahani ñaha
cuè téé cùchiuⁿ-áⁿ xii téé Tèudás, te
ní ndihí cue téé ní xica cuu ndihí-dé
ní xité nuu-güedé, te ñá túú-gá
ní quide-güedé nàcuáa ní sani
iní-güedé cada-güedé. 37 Te sátá ní
xihí téé-áⁿ, te ní tnahá nduu núcódó
tnùní ñáyiú. Te dàvá-áⁿ ní xindecu
ìⁿ téé distritú Galiléa ní xinani-dé
Júdás. Te titnǎi-güedé ní chitnahá
ñáhá-güedé xii-dé. Te tnáhá-dé ní
sahni ñaha tucu cue téé cùchiuⁿ, te
nchaa cue téé ní xica cuu ndihí-dé
ní xité nuu-güedé. 38 Te na càchí
tnúhu-í sá dañá-ndó cuè téé-áⁿ, te
ní ñá túú nǎgá tnúhu cúñaha-ndo
xii-güedé, chi núú chiúⁿ mee-güedé
quidé-güedé te cuíta-güedé, 39 dico
núú chiúⁿ Yá Ndiòxí quidé-güedé, te
vá ndáñihnu chiúⁿ quide-güedé. Te
núú quide-güedé chiúⁿ Yá Ndiòxí,
te vá nàá-ndó ndihí-güedé, chi
Yá Ndiòxí nàá ndihí-ndo sá dúcáⁿ
xǎquide-ndo —càchí té Gamaliél
xáhaⁿ-dè xii cue téé cùchiuⁿ.

40 Te nchaa-güedé ní cáháⁿ
sá tnúhu ndáá càháⁿ-dè. Te
dàtnùní ní nacana tucu-güedé

té Pelù ndihi dava-gá-güedé te ní caniha-güedé, te ní cáháⁿ níhi-güedé, te xáhaⁿ-güedé sá vâ cáháⁿ-gá-güedé tnúhu Jësús, te dâtnùní ní dáñá ñaha-güedé cuánuhú-güedé. ⁴¹ Te ío ní cudíí ìní-güedé, chi mee Yá Ndiöxí ní cachí-gá sá dúcáⁿ ndòho-güedé dacuàha-güedé ñáyiú tnúhu Jësús. ⁴² Te ìⁿ nduu ìⁿ nduu ní dâcuáhá-güedé ñáyiú xití veñúhu càhnu sá ío cùnuu ndihi nchaa vehé-yu. Te ní xáhaⁿ-güedé xií-yu sá Jësús cuú-gá Crístú Yáá ní quixi ñuyúú-a.

6

Ní ndúcú-güedé úsá cue tée cundecu dacáhñu sá cáxí ñáyiú

¹ Te ñu-ní dâvâ-áⁿ ñí sándáá ìní vâi ñáyiú tnúhu Jësús. Te cue ñáyiú grìégú ní cáháⁿ cuèhé-yu cuèndá ñáyiú isràél, sá ñáyiú ñíhi ñáyiú queé ñáyiú càháⁿ tnúhu grìégú ñá túú tnàhá sá cáxí-yu, chi ñá túú sãñaha ìⁿnuu-güedé. ² Te cue téé úxúú ní táúchíúⁿ Jësús dacuàha ñaha xií-yu tnúhu-gá, cue téé-áⁿ ñí cana-güedé nchaa ñáyiú sándáá ìní tnúhu Jësús. Te ní xáhaⁿ-güedé xií-yu:

—Nchúhú chi vá cuú dacáhñu-ndí sá cáxí-yu, chi mee-ní tnúhu Yá Ndiöxí càháⁿ-ndí. ³ Te nchòhó cue téé ndècu ndihi-ndí ichi Xitohó Jesucristú cáháⁿ ndihi-ndo úsá cue téé xíndecu iha, cue téé càháⁿ ndihi ñàhá-yu mee-ní tnúhu yíñùhu, cue téé ndècu ndihi Espíritú Yá Ndiöxí, mee-ní cuè téé cùtnuní váha ìní-xi. Te cue téé-áⁿ cuàha-ndí-güedé chìuⁿ cada-güedé dacáhñu-güedé sá cáxí-yu. ⁴ Te nchúhú mee-ní Yá Ndiöxí cáháⁿ ndihi-ndí, te mee-ní tnúhu-gá dacuàha-ndí-yu —càhí-güedé xáhaⁿ-güedé xií-yu.

⁵ Te nchaá-yu ní tñí-yu tnúhu ní cáháⁿ-güedé, núu ní ndúcú-yu cue téé cada chìuⁿ-áⁿ. Te ìⁿ-dè nání-dé Tévá, te ío váha sándáá ìní-dé Yá Ndiöxí, te ndècu ndihi-dé

Espíritú-gá. Te duha ní xínani dâva-gá-güedé: té Lìpé, té Pröcoró, té Nicànór, té Tímón, té Pàrmenás, té Lãxí téé ñuú Antiòquia téé ní sándáá ìní-xi sá dâcuàha ñáyiú isràél te vitna ní sándáá ìní-dé tnúhu Jësús. ⁶ Te úsá cue téé-áⁿ ñí sáháⁿ-güedé núu cuè téé úxúú ní táúchíúⁿ Jësús dacuàha ñaha xií-yu tnúhu-gá, te cue téé úxúú-áⁿ ñí cáháⁿ ndihi-güedé Yá Ndiöxí, te ní sacáⁿ ndodo-güedé ndaha-güedé díquí cuè téé úsá-áⁿ.

⁷ Te ñáyiú ní sándáá ìní tnúhu Jësús cuáháⁿ-yu titní xichi càháⁿ-yu tnúhu-gá. Te vâi-gá ñáyiú ta sándáá ìní-yu tnúhu-gá cuáháⁿ, te ní xíndecú-yu ndihi dava-gá ñáyiú dâcuaha tnúhu-gá ñuú Jerusàlén. Te titní dútú ní sándáá ìní-güedé tnúhu-gá.

Ní tñí-güedé té Tévá

⁸ Te té Tévá ní quide-dé titní núu sá vâ yòo tnàhí ndàcu cada, te ní cuñúhu vihí-yu sá dúcáⁿ ñí quide-dé, te ducaⁿ ñí quide-dé chi ndècu ndihi-dé Yá Ndiöxí chíndèe ñaha-gá. ⁹ Te ní xíndecu cue téé ní xóo cunu cuechi núu ìⁿ téé tàxi tñuní, te téé tàxi tñuní-áⁿ ñã ní xóo dañá tnàhí-dé quee-güedé núu chíúⁿ-dè, te ní xinu-ná-güedé. Te sátá xãⁿ, te ní dácáá-güedé veñúhu-güedé, te veñúhu-áⁿ sáháⁿ ñáyiú ñuú Cirené, ñáyiú ñuú Alejándriá, ñáyiú ñuú Ciliciá, ndihi ñáyiú distrítú Asiá. Te nchaa ñáyiú-áⁿ ñí nàá ndihí-yu té Tévá. ¹⁰ Te ñá ní ñíhi-yu tnúhu cáháⁿ-yu, chi ío váha ní sáá díquí-dé nâcuáa ní xáhaⁿ-dè xií-yu, chi Espíritú Yá Ndiöxí ní chindee ñaha-xi xii-dé. ¹¹ Te ní cháhu-yu cue téé ní dâcuándèhnde tnúhu ní cáháⁿ té Tévá núu-yu. Te ní xáhaⁿ-güedé sá càháⁿ cuèhé-dé cuèndá ndíi Moisés ndihi cuèndá Yá Ndiöxí. ¹² Te cuèndá sá dúcáⁿ ñí dâcuándèhnde-güedé núu ní sándáá ìní-yu, te ní cudéñ-yu núu té

Těvá. Te ní cudééⁿ cue tée cùu sacuéhé, te tnàhá cue tée dàcuaha ñaha xii-yu nchaa tnúhu ní chídó tnùní ndíi Moisés ní cudééⁿ-güedě. Te ní sáháⁿ-güedé ní tñi-güedé té Těvá ndécá ñaha-güedé cuáháⁿ núú quidé cuè tée cùchiuⁿ jundá, ndihi cue tée cùu sacuéhé. ¹³ Te ndécá-yu cue tée dàcuandehnde cuáháⁿ núú quidé-güedé jundá, te ní quesaha-ni tucu-güedé cáháⁿ cuèhé-güedé, te xáhaⁿ-güedé:

—Tée-a mee-ni cáháⁿ cuèhé-dé cuendá veñúhu sá ïo cùnuu, veñúhu ní cuu í, te cáháⁿ cuèhé-dé cuendá nchaa sá ní chídó tnùní ndíi Moisés. ¹⁴ Te ní tecú dóho-ndí cächí-dé sá Jèsús tée ñuú Nazàrèt dangoyo-dé veñúhu càhnu sá ïo cùnuu te vá dáñá-gá-dé cada-ndí nàcuáa ní cachí ndíi Moisés cada-ndí — cächí-güedé xáhaⁿ-güedé.

¹⁵ Te nchaa cue tée ndècu jundá ní ndacoto váha-güedé núú tē Těvá. Te ní dáyehé-xi núú-dě dàtná quidé-xí núú espíritú xínú cuèchi núú Yá Ndiöxí.

7

Té Těvá xáhaⁿ-dě sá ñà túú cuèchi-dé

¹ Te ní xáhaⁿ dütú cùnùu-gá xii-dé:

—¿Ndáá tnúhu cáháⁿ-güedé cuendá-n-ãⁿ? —cächí-dé xáhaⁿ-dē.

² Te tē Těvá ní xáhaⁿ-dē xii-güedé:

—Nchòhó cue ñani tnáhà-í ndihi nchòhó cue tée cùu sacuéhé, cundedóho-ndo ñiⁿ tnúhu na cáháⁿ-í-a. Yá Ndiöxí ïo cùnuu-gá, te ní cáháⁿ ndihi-gá ndíi Àbrahám nacióⁿ Mesopotamiá cùtnáhá vátá quihíⁿ-gá ndíi cundecu ndíi ñuú Hārán. ³ Te ní xáhaⁿ-gá xii ndíi: “Daña-n nchaa ñani tnáhá-n, te daña-n ñuhu-n, te quihíⁿ-n ñiⁿ xichi núú dánéhé ñáhà-í cundecu-n”, duha ní xáhaⁿ Yá Ndiöxí xii ndíi Àbrahám. ⁴ Te sátá dúcáⁿ ní xáhaⁿ Yá Ndiöxí xii ndíi Àbrahám, te ní ndee ndíi ñuú Càldeá, te cuáháⁿ ndíi cundecu ndíi ñuú Hārán. Te sátá ní xihí tātá ndíi, te ní xáhaⁿ

Yá Ndiöxí quixi ndíi cundecu ndíi núú ndécú-ó vitna. ⁵ Te Yá Ndiöxí ñá túú ní sãñaha-gã ní lùha ñuhu cuu cuendá ndíi núú ñi xindecu ndíi. Te ní xáhaⁿ ndáá Yá Ndiöxí xii ndíi sá cuãñaha-gã ñuhu cuu cuendá ndíi, te na cùu ndíi, te ndóo ndihi nchaa ñani tnáhá ndíi cacu túu ndéé cuèé-gá. Te ducaⁿ ní xáhaⁿ-gã cuèi vátá cündècu-gá ní ñiⁿ déhe ndíi. ⁶ Te ní xáhaⁿ tucu Yá Ndiöxí xii ndíi Àbrahám sá diú-ní ñani tnáhá ndíi quihíⁿ-yu núú xicá cündecú-yu cúmi ciendú cuíá, te vá dáñá-yu queé-yu núú chíuⁿ-yu, te ïo dandòho ñaha-güedé núú cündecú-yu. Duha ní xáhaⁿ Yá Ndiöxí xii ndíi, te ndáá ducaⁿ ní cuu. ⁷ Te ní xáhaⁿ tucu Yá Ndiöxí xii ndíi Àbrahám: “Yúhú dandòho-í nchaa ñáyu na dandòho ñaha xii cue ñani tnáhá-n. Te dàvá-áⁿ tē ndee cue ñani tnáhá-n núú cündecú-yu, te quixi-yu chíñuhu ñáhá-yu xii-í iha”, duha ní xáhaⁿ

Yá Ndiöxí xii ndíi Àbrahám, te ndáá ducaⁿ ní cuu. ⁸ Te Yá Ndiöxí ní quide ndáá-gá ndihi ndíi Àbrahám, te ní xáhaⁿ-gã xii ndíi sá cuãha-güedé seña ñiⁿ nchaa landú tée cuendá cunáhá-yu nàcuáa ndùu sá ní quide ndáá-gá ndihi ndíi Àbrahám. Núu xiáⁿ núú ùná nduu sá ní cacu té Isàác déhe ndíi Àbrahám, te ní sáha ndíi seña tñi-dé. Te diu-ni ducaⁿ ní quide tucu té Isàác déhe-dé té Jàcób, te diu-ni ducaⁿ ní quide té Jàcób, chi úxúú déhe-dé ní xindecu, te nchaa-güedé ducaⁿ ní quide-dé. Te ndíi úxúú cue tée-áⁿ ní cuu-güedé ñani tnáhá-ó.

⁹ Te ñiⁿ déhe té Jàcób ní xínani-dē Chèé. Te ñá ní cùu váha iní cue ñani-dé núú-dē, núu ní dicó ñaha-güedé ní queheⁿ ñaha cuè tée cuáháⁿ nacióⁿ Ègiptú, te Yá Ndiöxí ñá ní dàña ñaha-gá xii-dé cuíta nihnu-dé. ¹⁰ Te ní chindee ñaha-gá xii-dé ní cacu-dé cùtnáhá ní ndòho vihi-dé. Te tée yindaha Egiptú ïo ní cudíi iní-dé té Chèé, te ní cutnùní iní-dé sá ïo váha túha té

Chèé, te ducaⁿ nĩ cutnùnĩ iní-dé, chi Yá Ndiõxí ní chindee ñaha-gá xii té Chèé. Te ní xáhaⁿ tõe yĩndaha Egiptú xii té Chèé sá díú tẽ Chèé coo-dé gobièrnú Ègiptú, te taxi tnùnĩ-dé nchaa ñáyiú xĩnu cuechi núú tõe yĩndaha Egiptú-áⁿ.

11 'Te ní quíhu tnamá nihii nacióⁿ Ègiptú ndihi nacióⁿ Cànaá, te ío ní ndohó-yu. Te nchaa ñaní tnáhá-ó nĩ xĩndecu ndéé sanaha ñã ní xõo níhĩ-gã-yu sá cáxi-yu. 12 Te ní níhĩ tẽ Jácób tnúhu sá ío triú Ègiptú, núu ní tendaha-dẽ cue dèhe-dé ní sáháⁿ-güedé ní sãnguuaⁿ-güedé triú-áⁿ, te dàvá-áⁿ nĩ sáháⁿ cue ñaní tnáhá-ó xito díhna nuu nacióⁿ Ègiptú. 13 Te xito cùu uú cuáháⁿ-güedé, te ní xáhaⁿ tẽ Chèé sá ñaní-dé cúú-güedé. Te tée yĩndaha Egiptú ní cutnùnĩ iní-dé sá díú-nĩ ñaní té Chèé cúú-güedé. 14-15 Te ní cana té Chèé tãtã-dẽ té Jácób ndihi nchaa ñaní tnáhá-dẽ. Te cùu-xi datná únídico sáhúⁿ-yu ndèca té Jácób cuáháⁿ nacióⁿ Ègiptú núú ndécú tẽ Chèé, te xiáⁿ nĩ quexiò-yu ní ngóo-yu. Te yàcáⁿ ní xihí té Jácób ndihi nchaa dèhe-dé cue ñaní tnáhá-ó. 16 Te sáta ní cuu titní cuía, te ní natava-güedé yiqui ndii Jácób ndihi nchaa dèhe ndii nchido-güedé cuáháⁿ ñuu Sìquém. Te ndii Àbrahám sa ní cuu titní-gá cuía sã nĩ nacuaaⁿ ndii ñuhu núú cuè dèhe ndii Hãmór. Te xiáⁿ nchii yaú ní nachindúxi-güedé yiqui-áⁿ.

17 'Te cútnáhá vátá nátava-gã-güedé yiqui cue ndii, te sa ta tnáhá yatni cada Yá Ndiõxí nãcuáa ní xáhaⁿ-gã xii ndii Àbrahám cada-gã sá cúú-xi ñãyiú isràél ndécú Ègiptú, te ta cãyá víhĩ-yu cuáháⁿ. 18 Te dàvá-áⁿ chi ingá tée yĩndaha nacióⁿ Ègiptú, te ñã túú-gã ní xini-dé nása ní xóo cada ndii Chèé. 19 Te tée yĩndaha Egiptú ñã ní quide ndáá-dé, chi ío ní dándóhó-dé ñaní tnáhá-ó nĩ xĩndecu dàvá-áⁿ. Te ní táuchíúⁿ-dẽ

sá xócuñi-yu dándóo-yu dèhe yiquiⁿ cuèndá ndihi-güexi cuú. 20 Te dàvá-áⁿ ní cacu té Moisés, te ío ní cudii iní ñáhá Yá Ndiõxí xii-dé. Te ní xĩndecu ndihi ñaha nãná-dé ndihi tãtã-dé únĩ-nĩ yóó. 21 Te ndèca ñahá-yu cuáháⁿ ingá xichi, te yàcáⁿ ní dándóo ñáhá-yu xii-dé, te ní naníhĩ ñáhá dèhe yoco tée yĩndaha Egiptú, te ní xito-xi-dé datná xitó-xi ñⁿ dèhe mee-xi nĩ xito-xi-dé ndéé ní sahnú-dé. 22 Te ní cutúha-dé nchaa sá xini cue tée ègiptú, te ío váha ní sáá díqui-dé tnúhu cáháⁿ-dé ndihi nchaa sá cádá-dẽ.

23 'Te cútnáhá ndécú-dé údico cuía-dé, te ní cachí-dé sá quihĩⁿ-dé cáháⁿ ndihi-dé cue ñaní tnáhá-dé ñãyiú isràél. 24 Te ní xini-dé ní caniha ñⁿ tée ègiptú xii ñⁿ tée isràél, te ñã ní cundee iní-dé cundehe-dé núu ní sáháⁿ-dé ní chindee-dé tée isràél, te ní sahnĩ-dé tée ègiptú, 25 chi ní cachí Yá Ndiõxí sá díú-dé dacãcu-dé ñaní tnáhá-dé ñãyiú isràél núú cuè tée ègiptú. Te ní sani iní-dé sá cútnùnĩ iní-yu nãcuáa ní xáhaⁿ Yá Ndiõxí xii-dé, dico ñã túú ní cùtnunĩ iní-yu. 26 Te nduu tnéé ní xini-dé nãá úú cue tée isràél, te ñã túú ní tnáhá iní-dé nãá-güedé núu ní xáhaⁿ-dẽ xii-güedé: "¿Ná cuèndá ducaⁿ xĩnãá-ndó? ¿Nãa ñã díú ndimee-ndo núu ducaⁿ xĩnãá-ndó?" Duha ní xáhaⁿ tẽ Moisés xii-güedé. 27 Te tée ndècuéchi ní sáháⁿ-dé ní chindaha ñihnu-dé té Moisés ñⁿ xio, te ní xáhaⁿ-dẽ: "¿Ná cúú yohó núu véxi-n tàxi tnunĩ ñáhá-n? 28 Te tnáhá-ni tucu yúhu cahni-n datná ní sahnĩ-n tée ègiptú icu cáhaⁿ-n á", duha ní xáhaⁿ-dẽ xii té Moisés. 29 Te sá dúcáⁿ nĩ cáháⁿ tée isràél núu ní yuhú té Moisés ní xinu-dé cuáháⁿ-dé ní sáá-dé nacióⁿ Mèdián. Yàcáⁿ ní ngóo-dé, te yàcáⁿ ní tnándaha-dé, te ní cacu úú dèhe tée-dé.

30 'Te sáta nĩ xĩnu údico cuía, te ní sáháⁿ té Moisés ñⁿ xio yucu Sináí. Te yàcáⁿ ní xini-dé ñⁿ tnutãú nchicúⁿ ñuhú, te xití itá ñuhú-áⁿ nĩ xini-dé

yíhí ìᵐ espíritú xínú cuèchi núú Yá Ndiòxí. ³¹ Te òré ní xini-dé sá yíhí-xí xití itá ñuhú-án, te ní cuñúhu vîhî-dé sá ní xini-dé espíritú-án xití itá ñuhú-án, te ní sândehe-gá-dé, te ní xindéhé vâha-dé. Te ní tecú dóho-dé ní cáháⁿ Yá Ndiòxí, te xáhaⁿ-gã xii-dé: ³² “Yúhú cúu-í Ndiòxí ní cáháⁿ ndihî cue ñani tnáhá-n ndéé sanaha, ndíi Ábrahám ndihî ndíi Isáac ndihî ndíi Jácób, ndihî dava-gá cue ñani tnáhá-n. Nchaa cue ndíi-án ní xóo cáháⁿ ndihî-i.” Duha ní xáhaⁿ-gã xii té Moisés. Te ní quidi ñaha-xi xii té Moisés sá ní yùhú-dé, te ñá ní cùyî-gá-dé cundehe-dé tnutáú nchìcúⁿ ñuhú-án. ³³ Te Yá Ndiòxí ní xáhaⁿ-gã xii-dé: “Queñuhu chàú-n, chi núú ñuhú ní cuu íi nùtnᵐ-n. ³⁴ Te yùhú ndéhé-í sá ío ndóho nchaa ñáyiu cùu cuendá-í, ñáyiu ndècu nacióⁿ Ègiptú. Te ní tecú dóho-í sá ío ndáhú xícáháⁿ-yu, núu xíáⁿ véxi-í càchî tnúhu-í sá ñuhú-n nacióⁿ Ègiptú cuendá ndeñùhú-n-yu yàcáⁿ.” Duha ní xáhaⁿ Yá Ndiòxí xii té Moisés.

³⁵ Te ñá ní sândáá iní-yu té Moisés ndéé díhna, chi ní xáháⁿ-yu: “¿Ná cuendá véxi-n tàxi tnuni ñáhá-n xii-ndí?” Duha ní xáháⁿ-yu xii té Moisés. Te ñu-ni té Moisés ní tendaha ñaha Yá Ndiòxí ní sáháⁿ-dé dacâcu-dé ñáyiu isràél nacióⁿ Ègiptú cuèi ñá ní sândáá iní ñáhâ-yu xii-dé. Dico ní taxi tnùnî-dé-yu, chi ducaⁿ ní xáhaⁿ-gã òré ní xini-dé espíritú xínú cuèchi núú-gã xití tnutáú nchìcúⁿ ñuhú. ³⁶ Te té Moisés ní ngüita-dé ní quide-dé sá vâ yôo tnàhî ndàcu cada, te ní cuñúhu vîhî-yu sá dúcáⁿ ní quide-dé, te ducaⁿ ní quide-dé Ègiptú ndihî Lámár Tícuèhé. Te ní ngódó núú-dé núy-yu ní queé-yu Ègiptú cuáháⁿ-yu ìᵐ ichi xití yucu núú vâ yôo tnàhî ndècu, te ní xihî-yu údico cuiá xití yucu-án, te xíáⁿ ní xóo cada-dé sá vâ yôo tnàhî ndàcu cada.

³⁷ Te ñu-ni té Moisés ní xáhaⁿ-dê xii cue ñani tnáhá-dê dàvâ-án; “Yá Ndiòxí cada-gá te coo ìᵐ ñani tnáhá-ndó ndéé cuèé-gá, te téé-án cáháⁿ-dé tnúhu-gá núú-ndó dàtná cuinî-ndó ní cachî-gá quidé yùhú, te ío xini ñuhu-xi cundedóho-ndo tnúhu cáháⁿ-dé”, duha ní xáhaⁿ té Moisés xii-yu dàvâ-án. ³⁸ Te ñu-ni té Moisés ní xindecu ndihî-dé ñáyiu isràél xití yucu, te ní sáá-dé yucu Sináí, te xíáⁿ ní quixi ìᵐ espíritú xínú cuèchi núú Yá Ndiòxí ní cáháⁿ ndihî ñaha-xi xii-dé, te yàcáⁿ ní dâcuáhá ñaha-xi tnúhu-gá, te ñu-ni tnúhu-án ní ndóo dàcuaha-o.

³⁹ Te cue ñani tnáhá-ó ní xindecu ndéé sanaha ñá ní sândáá iní-yu té Moisés, te ñá ní ndéé iní ñáhâ-yu xii-dé, chi ní cuinî-yu nuhú tucú-yu ñuú Ègiptú cundecú-yu. ⁴⁰ Te òré ndécú té Moisés yucu ní xáháⁿ-yu xii ñani-dé té Àrón: “Cadúha-n ìᵐ úú ndiòxí díhúⁿ cuàáⁿ codonùu núú-ó cùhuⁿ-o ichi, chi ñá túú cùtnunî iní-ó ndéé ichi cuáháⁿ té Moisés, téé yòdo nuu núú-ó ndùu ní quee-o Ègiptú”, duha ní xii-yu té Àrón. ⁴¹ Te dàvâ-án ní cadúha-güedé ìᵐ chèhlu mee-ni díhúⁿ cuàáⁿ, te ní sahni-güedé ìᵐ úú quitî nchito ní quide càhnu-güedé chèhlu-án. Te ío ní cudíi iní-yu quitî-án, chi ní cachî-yu sá díú-ní ndiòxí cúú-dí. ⁴² Te sá dúcáⁿ ní quidé-yu, xíáⁿ ní dáñá ñaha Yá Ndiòxí xii-yu. Te ní dáñá-gã ní xóo cada càhnú-yu nchíanchii, ndihî yóó, ndihî nchaa chódínî. Te duha ní chídó tnùnî ìᵐ téé ní xóo cáháⁿ tnúhu Yá Ndiòxí ndéé sanaha nâcuáa ní xáhaⁿ-gã xii ñáyiu dàvâ-án:

Nchòhò ñáyiu isràél, ní cuu údico cuiá yíhî-ndó yùcu,

te ní sahni-ndo quitî-ndo ní quide càhnu ñaha-ndo xii-í cáháⁿ-ndó, dico ñáhá chi ní sahni-ndo-güèdî ní quide càhnu-ndo sá ní cadúha mee-ndo.

⁴³ Te ní cadúha-ndo ìᵐ veñúhu líhli,

te ní sanutñi-ndo Mòlóc sá cächí-ndó cùu ndiòxi-ndó xìca nchido-ndo xití yucu,

te ní cadúha-ndo ìñ chódíní, te quití-ãñ cächí-ndó sã cúu-dí ndiòxi Rènfan,

te ndi ndùú sá ñí cadúha-ndo-ãñ ñí quide càhnu-ndo.

Te cuèndá sá dúcáñ ñí quide-ndo te yúhú queñuhu ñaha-í xii-ndo quiññ-ndó cùndecu-ndo ingá xio nacióñ Babiloniá.

Duha ní xáhañ Yã Ndiòxi xii-yu, te ducañ ñí chídó tñuní téé ní xóo cáháñ tñuhu-gá.

⁴⁴ Te xití yucu-áñ ñí dácáá-güedé ñí veñuhu vehe dóó. Te vehe-áñ ñí cuu-xi ñí sá cùtñuní iní-yu sá Yã Ndiòxi ndécú ndìhi ñaha-gá xii-yu. Te vehe-áñ ñí dácáá-güedé nàcuáa ní xáhañ Yã Ndiòxi xii té Moisés, chi ní dánèhé ñahá-gá xii-dé nàcuáa dacàa-güedé. ⁴⁵ Te sátá ñí xihí nchaa cue téé-áñ, te ní ndóo ndìhi nchaa déhe-güedé veñuhu-áñ. Te ní xido tucu-güedé veñuhu-güedé cuáháñ-güedé, te cuáháñ ndìhi-güedé té Jòsué núu cùndécú-yu. Te sátá ñí quexió-yu, te ní dácùnñ-yu ñáyiu dii ñùú-xi-áñ chi mee Yã Ndiòxi ní chindee ñaha-gá xii-yu. Te sátá ñí ndìhi nchaa ñáyiu ní xica nchido veñuhu dóó-ãñ ñí xihí, te ní ndóo ndìhi dava-gá-yu. Te ducañ-ndi ndècu-xi ní cacu té Dàvií, téé ní xindaha ñaha xii-yu. ⁴⁶ Te Yã Ndiòxi ní cudíí víhí iní-gá té Dàvií. Te ní xicáñ tñuhú-dé núu-gá núu cuu dacàa-dé veñuhu cuu cuèndá-gá, chi ñí-ndi Yã Ndiòxi ní xóo cada càhnu té Dàvií ndìhi té Jácób, ñaní tñahá-ó ñí xindecu ndéé sanaha víhi-gá. ⁴⁷ Te Yã Ndiòxi ñá ní dàña-gá dacàa té Dàvií veñuhu-gá dico déhe-dé té Salómón, chi ní dáñá-gã ní dácáá-dé veñuhu cuu cuèndá-gá ⁴⁸ cuèí ñá túu sácùndecu-gá veñuhu dàcaa cue téé ñuyúú-a, chi ndèni xii-ndécú-gã chi espíritú cúu-gã. Te duha ní chídó tñuní téé ní xóo

cáháñ tñuhu Yã Ndiòxi ndéé sanaha nàcuáa ní cáháñ-gá:

⁴⁹ Yúhú táxi tñuní-í andiú ndìhi ñuyúú,

te xii-áñ núu nchòhó vá ndácú-ndó chihí ñaha-ndo xití veñuhu dàtná quidè-yu sá cächí-yu cùu ndiòxi-yu ní cadúha-yu.

Te ñá túú xini ñuhu-í núu ndétátú-í, ⁵⁰ chi yúhú ní cadúha-í nchaa sá ío ñuyúú-a.

Duha ní cáháñ Yã Ndiòxi, te ñi-ndi ducañ ñí chídó tñuní téé ní xóo cáháñ tñuhu-gá —duha nduú nchaa tñuhu ní xáhañ té Tèvá xii-güedé.

⁵¹ Te ní xáhañ tñucu-dé:

—Nchòhó, ío sàá iní-ndó chi quide-ndo datná quidé ñáyiu ñá túú cùu ñáyiu isráel chi ñá túú tédòho-ndo tñuhu cáháñ Yã Ndiòxi, chi ñá cuini-ndó quindáa iní-ndó tñuhu-gá, mee-ni cùu úhú iní-ndó Espiritú-gá dàtná ní xóo cada cue ñaní tñahá-ndó ñí xindecu ndéé sanaha. ⁵² Chi cue téé-áñ ío ní xóo dandòho-güedé nchaa cue téé ní xóo cáháñ tñuhu Yã Ndiòxi ndéé sanaha. Te ní sahani-güedé nchaa cue téé ní cáháñ sá quixí Crìstú ñuyúú-a, te Yaá-áñ ñá túú cuèchi-gá. Te ñi-ndi ducañ ñí quide-ndo Crìstú cùtñahá ní quixi-gá ñuyúú-a, chi ní sáha cuèndá-ndó-gã núu cuè téé ní cuu úhú iní ñahá xii-gá ní sahani ñaha-güedé. ⁵³ Te ndècu ndìhi-ndo tñuhu ní chídó tñuní ndí Moisés nàcuáa ní xáhañ espíritú xínú cuèchi núu Yã Ndiòxi xii ndíí, te ní dùcañ ñá túú sàndáa iní-ndó tñuhu-áñ núu ní sahani-ndo Jèsús. Te ñi-ndi tñuhu-áñ ndécú ndìhi-ndo ndéé vitna —cächí té Tèvá xáhañ-dé xii-güedé.

Ní sahani-güedé té Tèvá

⁵⁴ Te sá dúcáñ ñí xáhañ té Tèvá xii-güedé, te ní cudééñ víhí-güedé núu-dé, núu ní quide rúhñú-güedé núu-güedé sá sátú iní-güedé. ⁵⁵ Te té Tèvá ndécú ndìhi-dé Espíritú Yã Ndiòxi, te ní ndacoto váha-dé andiú, te ní xini-dé súuní dàtásañ-xi núu ndécú Yã Ndiòxi, te ní xini-dé

Xítóhó Jesucristú nǔtnǎi-gá xio cùha Yá Ndiǒxí. ⁵⁶ Te ní xáhaⁿ tē Těvá xii-güedé:

—Chí cündèhe andiu chi yúhu ndéhé-í Xítóhó Jesucristú nǔtnǎi-gá xio cùha Yá Ndiǒxí, te diu-gá cúú-gá ñani tnáhá-ndó nchaa-ndo —cachí-dé xáhaⁿ-dē.

⁵⁷ Te ní sadí-güedé dóho-güedé cuendá sá ñá ní tnáhá iní-güedé cundedóho-güedé tnúhu cãháⁿ-dé, te uuⁿ ní cuáá-güedé, te ní taxi ndaha ñaha-güedé xii-dé ⁵⁸ ndécá ñaha-güedé cuáháⁿ ndéé ñⁿ xio yuhu ñúú, te yácáⁿ ní sãñaha-güedé yúú xii-dé. Te ndècu ñⁿ tée cuechi nani-dé Sàulú, te tée-áⁿ ñí quide cuendá-dé dóó-güedé cuendá ní nune ndaha-güedé ní sãñaha-güedé yúú xii té Těvá. ⁵⁹ Te òré sãñaha-güedé yúú, te ní cáháⁿ ndihí-dé Xítóhó Jesucristú te xáhaⁿ-dē:

—Yòhó Xítóhó Jesucristú, naqueheⁿ-n iní-í —cachí-dé xáhaⁿ-dē xii-gá.

⁶⁰ Te ní ngúñí xítí-dē, te níhi ní cáháⁿ-dē, te xáhaⁿ-dē:

—Yòhó Xítóhó Jesucristú, vá tēcüechi-n cuè tée-a sá dúhá quide ñaha-güedé xii-í —cachí-dé xáhaⁿ-dē xii-gá.

Te xíãⁿ-nã ní cáháⁿ-dē, te ní xihí-dé.

8

Té Sàulú chíhí-dē ñáiyu sándáá iní-xi tnúhu Jèsús vecaá

¹ Te té Sàulú ní nduu yétú iní-dé sá ñí sañni-güedé té Těvá.

Te diu-ni nduu-ãⁿ ñí cuu níhi cuendá nchaa ñáiyu sándáá iní-xi tnúhu Jèsús ñúú Jerusalén. Te ní ndihí-yu ní xité nuu cuáháⁿ-yu distritú Júdeá ndihí distritú Sãmariá. Te cue tée ní táuchíúⁿ Jèsús dácuàha ñaha xii-yu tnúhu-gá ní ndóo-güedé ñúú Jerusalén. ² Te nchaa cue tée cãháⁿ ndihí Yá Ndiǒxí ní chindúxi-güedé ndí Těvá. Te ío ní ndáhyú ñáiyu ní sándáá iní tnúhu

Jèsús sá ñí xihí ndí. ³ Te té Sàulú ío dándoho-dé-yu, chí ndí vehe ndí vehe cuáháⁿ-dē cuatni-dé cuèi tée cuèi ñadihi ndécá-dé cuáháⁿ vecaá.

Cãháⁿ-yu tnúhu Yá Ndiǒxí distritú Sãmariá

⁴ Te nchaa ñáiyu ní xité nuu cuáháⁿ-yu cãháⁿ-yu tnúhu Jèsús nchaa núú quexió-yu. ⁵ Te té Lìpé cuáháⁿ-dē distritú Sãmariá cãháⁿ-dē tnúhu Xítóhó Jesucristú Yáá ní tendaha Yá Ndiǒxí ní quixi ñuyú-a. ⁶ Te ío vai núú sã vá yõ tnáhí ndàcu cada ní quide-dé, te ní cuñúhu vihí-yu, te ní xindedóho váha-yu nchaa tnúhu ní cáháⁿ-dē.

⁷ Te vai ñáiyu yíhi ñaha espíritú cündihí yucu ñávãha ní queñuhu-dé nchaa espíritú-áⁿ yiqui cuñú-yu, te ní cana saa-xi òré ní ndee-xi yiqui cuñú-yu cuáháⁿ-xi, te ní ndúha-yu. Te vai ñáiyu cùhú ñá cúú-gá candá nihnú-yu ndihí ñáiyu yacua ní quide tátna-dé, te ní ndúha-yu. ⁸ Te sá dúcáⁿ ñí cáháⁿ-dē tnúhu Jèsús te ní quide tátna-dé-yu, xíãⁿ ío ní cudíí iní ñáiyu ñúú-áⁿ.

⁹ Te diu-ni ñúú-áⁿ ndécú ñⁿ tée nani Xímú, te tée-áⁿ xini-dé cada ndúu-dé, te ní cuu naha dùcaⁿ quide-dé, te ní xóo cuñúhu ñáiyu distritú Sãmariá sá dúcáⁿ quide-dé, te ní cachí-dé sá díú-ní-dē cúnúu. ¹⁰ Te nchaa ñáiyu cuèi ñáiyu cuica te cuèi ñáiyu ndàhú ío nèhé-yu sá yíñúhu núú-dē, te xitnãhá-yu:

—Tée-ãⁿ ío chindee ñaha Yá Ndiǒxí xii-dé núu vai núú sã quidé-dé —cachí-yu xitnãhá-yu.

¹¹ Te ní sándáá iní-yu nàcuáa ní xóo cada ndúu-dé, te ní xóo cuñúhu vihí-yu, te ní cuu naha dùcaⁿ-ni dandahú ñáhá-dē xii-yu. ¹² Te té Lìpé ní cáháⁿ-dē tnúhu Xítóhó Jesucristú, te ní xáhaⁿ-dē xii-yu sá Yá Ndiǒxí cuini-gá ndíhu ndaha ñaha-gá xii-yu. Te cuèi tée cuèi ñadihi ní sándáá iní-yu tnúhu-gá, te ní sanduté-yu. ¹³ Te tnáhá té Xímú

ní sándáá iní-dé tnúhu-gá, te ní sandute-dé, te ní xica cuu-dé ndihí té Lìpé, te ní cuñúhu-dé chi titní núú sá vâ yôo tnâhí ndâcu cada ní quide té Lìpé, te ní cuñúhu vihi nchaa ñâyiu.

14 Te dava-gá cue tée ní táuchíúⁿ Jèsús dacuàha ñaha xii ñâyiu tnúhu-gá ní níhí-güedé tnúhu sá ñâyiu distritú Sàmariá ní sándáá iní-yu tnúhu Yá Ndiòxí. Te ní tendaha-güedé té Pèlú ndihí té Juàá cuáhán-güedé distritú Sàmariá. 15 Te ní quexio-güedé, te ní cáháⁿ ndihí-güedé Yá Ndiòxí ní xicán-güedé Espiritú-gá quixi cundecu ndihí-yu. 16 Chi ní ñⁿ-yu vátá sàá-gá Espiritú-gá cundecu ndihí-yu, chi òré ní sanduté-yu, te mee-ni Jèsús ní cacunehe-güedé. 17 Te òré ní sacáⁿ ndodo-güedé ndaha-güedé díquí-yu, te ní quexio Espiritú-gá ní ngúndecu ndihí-yu.

18 Te ní xiní té Xímú nâcuáa ní quide-güedé ní quexio Espiritú-gá ní ngúndecu ndihí-yu, te cuíní-dé cuáñaha-dé díhúⁿ xii té Pèlú ndihí té Juàá ní cùu. 19 Te ní xáhaⁿ-dê:

—Chindee ñaha-ndo cuendá ndéda-ni cáa-yu cacáⁿ ndodo-í ndaha-í díquí-yu, te níhí-yu Espiritú Yá Ndiòxí cundecu ndihí-yu —càchí-dé xáhaⁿ-dê xii-güedé.

20 Te té Pèlú ní xáhaⁿ-dê xii-dé:

—Yòhó cuíta nihnu-n ndihí díhúⁿ-n, chi cuíní-n cuáaⁿ-n sá vâha quide Yá Ndiòxí. 21 Yòhó vá cúú càda-n chiúⁿ quide-ndí, chi ñá túú ndècu vâha iní-n núú Yá Ndiòxí. 22 Te vá dúcáⁿ cáháⁿ-n, chi ío nèhé cáháⁿ-n sá dúcáⁿ cáháⁿ-n. Te cáháⁿ ndâhú-n núú Yá Ndiòxí sá ná cádá càhnu iní-gá tnúhu ní cáháⁿ-n. 23 Te yúhú sa xiní-í sá ío úhú iní-n, chi mee-ni sá cuèhé sá dúhá chido nuu-n quide-n —cachí té Pèlú xáhaⁿ-dê xii té Xímú.

24 Te ní xáhaⁿ tè Xímú xii-güedé:

—Cáháⁿ ndâhú-ndó núú Yá Ndiòxí sá ñâ túú nâ tnahá-í sá dúcáⁿ ní cáháⁿ-í —càchí-dé xáhaⁿ-dê.

25 Te té Pèlú ndihí té Juàá ní cáháⁿ-güedé tnúhu Yá Ndiòxí núú ñâyiu ñuú-áⁿ. Te ní xáhaⁿ-güedé nchaa nâcuáa ní quide Jèsús ní xiní-güedé òré ní xica cuu-gá ñuyíú-a. Te ní tñii-güedé ichi cuánuhú-güedé ñuú Jerusalén, te ní yâha-güedé titní ñuú yíndèhu distritú Sàmariá, te ní cáháⁿ-güedé tnúhu-gá.

Té Lìpé ndihí ñⁿ tée ñuú Etiòpiá

26 Te ñⁿ espíritú xínú cuèchi núú Yá Ndiòxí ní quexio-xi ñuú Jerusalén ní xáhaⁿ-xi xii té Lìpé:

—Cada túha-n chi quée nuu-n ñuú Gázá, dico mee-ni xití yucu cuáhán ichi —càchí-xi xáhaⁿ-xi xii-dé.

27 Te ní xica-dé cuáhán-dé, te ní natnahá-dé ñⁿ tée nacióⁿ Etiòpiá ñúhú-dé ichi. Te cùu-dé tesorerú xínú cuèchi-dé núú ñⁿ ñadihí ñaha yíndaha nacióⁿ Etiòpiá, te ñaha-áⁿ nání-áⁿ Cándacé. 28 Te tée etiòpiá-áⁿ ní sáhán-dé ñuú Jerusalén ní cáháⁿ ndihí-dé Yá Ndiòxí, te ñúhu-dé ichi cuánuhú-dé ñuú-dé ñúhú-dé carrétá, te dâcuaha-dé tnúhu ní chídó tnúni ndí Chaiá tée ní xóo cáháⁿ tnúhu Yá Ndiòxí ndéé sanaha. 29 Te ní xáhaⁿ Espiritú Yá Ndiòxí xii té Lìpé:

—Quíhíⁿ tuha-n carrétá-áⁿ —càchí Espiritú-gá xáhaⁿ-xi xii-dé.

30 Te té Lìpé ní sátuha-dé carrétá-áⁿ, te ní tecú dóho-dé nâcuáa cáháⁿ tée etiòpiá-áⁿ, tée ñúhu carrétá-áⁿ dâcuaha-dé nâcuáa ní chídó tnúni ndí Chaiá. Te ní xáhaⁿ tè Lìpé xii tée etiòpiá-áⁿ:

—¿Técú tnúni-n nchâa tnúhu dâcuaha-n-áⁿ? —càchí té Lìpé xáhaⁿ-dê xii-dé.

31 Te ní xáhaⁿ tée etiòpiá:

—¿Nâsa tecú tnúni-í te vá yôo dànehé ñáhá xii-í? Ta quène iha çoo-n chi danèhé ñáhá-n —càchí-dé xáhaⁿ-dê xii té Lìpé.

Te cuásaá té Lipé núú carrètá ní ngóo-dé. ³² Te ndédóho-dé nàcuáa dàcuaha téte etiópíá-áⁿ nàcuáa ní chídó tñúni ndí Chàíá núú tútú Yá Ndióxi núú càchí-xi:

Dàtná quidé ìⁿ mbéé cada-dé òré candeca ñaha-güedé xii-dé quíhíⁿ cahni ñaha-güedé chi ñá túú nã cada-dé,

dàtná cuini-ndó quide mbéé òré dètè-di ñá túú ndàhí-di ducaⁿ càda-dé òré cahni ñaha-güedé chi ni vã càháⁿ-dé.

³³ Te mee-ni cùdiquí ndeé ñáhá-güedé xii-dé, te ni vã ndúcú tñuhu-güedé núú-dé nũu ndáá ndècuéchi-dé.

Te ío cuu nduu cuihna iní cue ñani tñáhá-dé, chi cahni ñaha-güedé xii-dé ñuyú-a.

Duha càháⁿ tutú ní dácuháá tée etiópíá ní xíndéóho té Lipé.

³⁴ Te ní xáhaⁿ tucu téte Etiópíá xii té Lipé:

—Cundee iní-n càchí tñuhu-n yòo cacunehe téte ní càháⁿ tñuhu Yá Ndióxi ndeé sanaha, núú càháⁿ-dé cuendá méé-dé àdi càháⁿ-dé cuendá ingá ñáiyu —càchí téte etiópíá-áⁿ xáhaⁿ-dé xii té Lipé.

³⁵ Te té Lipé ní cani-dé cuendú núú tée etiópíá nàcuáa ní càháⁿ ndí Chàíá nàcuáa cada Jèsús òré quixi-gá ñuyú-a. Te ní xáhaⁿ-dè nàcuáa nduu tñuhu Jèsús ndíhí nàcuáa ní quide-gá. ³⁶ Te ñuhu-güedé ichi cuáháⁿ-güedé ní naníhí-güedé ìⁿ xichí núú ñuhú ndute, te ní xáhaⁿ tée etiópíá:

—Iha ñuhu ndute, ¿te vã cúu cuàndute-í iha-ãⁿ? —càchí-dé xáhaⁿ-dè xii té Lipé.

³⁷ Te xáhaⁿ té Lipé:

—Te núu sàndáá ndisa iní-n Jèsús, te cuu cuandute-n —càchí-dé xáhaⁿ-dè.

Te ní xáhaⁿ tée etiópíá:

—Sàndáá ndisa iní-í sá Dèhe Yá Ndióxi cúu Xítoho Jesucristú —càchí-dé xáhaⁿ-dè.

³⁸ Te ní ngani-dé carrètá, te ní nuu-güedé ndi ndúú-güedé, te

cuánguee-güedé xití ndute, te ní dácuañdute ñaha té Lipé xii-dé. ³⁹ Te òré ní nene-güedé xití ndute, te ndèca ñaha Espiritú Yá Ndióxi xii té Lipé cuáháⁿ. Te ñá túú ní xini tée ní sandute-áⁿ ndeé ichi cuáháⁿ té Lipé.

Te ío ní cudí iní-dé sá ní natuha-dé ichi Yá Ndióxi, te cuàndaa-dé núú carrètá-dé cuánuhú-dé. ⁴⁰ Te ní quexio té Lipé ñuu Azotó, te ndi tñahá ñuu ndi tñahá ñuu cuáháⁿ-dé càháⁿ-dé tñuhu Yá Ndióxi, te ní yáha-dé cuáháⁿ-dé ní quexio-dé ndeé ñuu Cèsareá.

9

Té Sàulú ní tuha-dé ichi Xítoho Jesucristú

(Hch. 22:6-16; 26:12-18)

¹ Te té Sàulú mee-ni càháⁿ cuèhé-dé cuendá ñáiyu ní sàndáá iní tñuhu Jèsús, te cuini-dé cahni ñaha-dé xií-yu. Te ní sáháⁿ-dé núú dütú cúnú-gá, ² te ní xáhaⁿ-dè sá cádũha dütú-ãⁿ ìⁿ tutú canehe-dé quíhíⁿ cuáha-dé cue tée xíndeé nchito veñuhu ñuu Dámascú, chi cuini-dé tñi-dé nchaa ñáiyu dàcuaha tñuhu Xítoho Jesucristú candeca ñaha-dé quíhíⁿ ñuu Jerusálén. ³ Te ní xica-dé cuáháⁿ-dé tá cùyatni-dé ñuu Dámascú, te uuⁿni ní quee ñuhú andi, te ní dáyèhé-xi ndeé núú nútñ-dé. ⁴ Te ní nduá-dé ndeé ñuhu, te ní tecú dóho-dé càháⁿ ìⁿ sá càháⁿ núú ñinu, te xáhaⁿ-xi xii-dé:

—Yòho Sàulú, ¿ná cuendá cúu ùhú iní ñáhá-n xii-í te dàndoho ñaha-n? —càchí sá càháⁿ-áⁿ xáhaⁿ-xi xii-dé.

⁵ Te ni xáhaⁿ-dè:

—¿Ná cúu yòho sá càháⁿ-áⁿ-i? —càchí-dé xáhaⁿ-dè.

Te ní xáhaⁿ sá càháⁿ xii-dé:

—Yúhú cúu-í Jèsús tée cuu úhú iní-n. Te ío dàndoho-n mee-n, chi dàtná quidé ndicutu quide-n, chi quiti-áⁿ nũu na cuxi-güedé-di pùyá te sáha-di patadá núú-xi, te quide úhú-di mee-di. Te ducaⁿ sãtñahá-xi cuu yòho chi ñá túú sàndáá iní

ñáhá-n xii-í —càchí sá cáháⁿ-án xáhaⁿ-xi xii-dé.

⁶ Te té Sàulú ní quidi ñaha-xi xii-dé sá ñi yùhú-dé, te ní xáhaⁿ-dë:

—Xítóhó Jesucristú, ¿te ná cuíní-n cada-í-í? —càchí-dé xáhaⁿ-dë.

Te Jèsús ní xáhaⁿ-gã xii-dé:

—Ndacóo, te quíhíⁿ-n ñùú-ãⁿ, te yàcáⁿ tecú tnúhu-n nã cúú sã cadá-n —càchí-gã xáhaⁿ-gã xii-dé.

⁷ Te cue té cuáháⁿ ndihi té Sàulú ní tecú dóho-güedé cáháⁿ ñⁿ sá cáháⁿ, dico vá yõo tnàhí ní xini-güedé, te ní yùhú víhí-güedé, te ñá túú tnàhí ní cáháⁿ-güedé.

⁸ Te ní ndacóo té Sàulú, te ñá ní cùu-gã cundehe-dë, chi ní cuaa-dé, te ní tñi-güedé ndaha-dé ndécá ñaha-güedé cuáháⁿ ñuú Dàmascú.

⁹ Te yàcáⁿ ní xindecu-dé úní nduu, te ñá ní cùu tnahí cundehe-dë, te ñá túú nã ní xexi-dé, te ñá túú ní xihí-dé ndute.

¹⁰ Te ndëcu té sàndáá iní tnúhu Jèsús ñuú Dàmascú, nání-dë Ananiás, te ní sáháⁿ Jèsús núú sàní-dé, te ní xáhaⁿ-gã xii-dé:

—¡Ananiás! —càchí-gã xáhaⁿ-gã.

Te ní xáhaⁿ-dë:

—¿Yúhú cáháⁿ ndihi-n-ãⁿ? —càchí-dé xáhaⁿ-dë.

¹¹ Te ní xáhaⁿ-gã:

—Ndacuñí, te quíhíⁿ-n ñⁿ chiuⁿ ichi núú dánani-güedé Ichi Ndáá, te yàcáⁿ nanducu-n vehe té Jüdás, chi vehe té-áⁿ ndécú ñⁿ té-áⁿ ñuú Tàrsú nání-dë Sàulú, te té-áⁿ sa cáháⁿ ndihi ñaha-dë xii-í. ¹² Te té-áⁿ ñi dácótó ñaha-xi sá ñi xini ñáhá-dë xii-n ñi quexio-n núú ndécú-dë, te ní sacáⁿ ndodo-n ndaha-n díqui-dë, te ducaⁿ te ní nacaáⁿ núú-dë ní dácótó ñaha-xi xii-dé —càchí-gã xáhaⁿ-gã.

¹³ Te té Ananiás ní xáhaⁿ-dë:

—Yòhó Xítóhó Jesucristú, càchí tnúhu-í xii-n sã ñi ñihí-í tnúhu nàcuáa quide-dé sá io quide úhú-dé ñáyiu cáháⁿ ndihi-n ñuú Jerusálén.

¹⁴ Chi nèhe-dé tutú ní sañaha cue dútú cúnùu cuendá ñihí-dë nàcuáa cada-dé tñi-dé nchaa ñáyiu sàndáá

iní ñáhá xii-n —cachí-dé xáhaⁿ-dë xii-gã.

¹⁵ Te Jèsús ní xáhaⁿ-gã xii-dé:

—Quíhíⁿ-n ndàtnúhu-n ndihi-dé, chi cuíní-í cada-dé chiú-í, quíhíⁿ-dë cáháⁿ-dë tnúhu-í núú cuè ñáyiu is-ràél, ndihi núú cuè ñáyiu ñá túú cùu ñáyiu isràél, ndihi núú cuè téé yìndaha ñaha xii-yu. ¹⁶ Te yúhú cúñaha-í xii-dé sá ndóhó víhi-dé cuendá-í —càchí-gã xáhaⁿ-gã xii té Ananiás.

¹⁷ Te cuáháⁿ té Ananiás vehe núú ndécú té Sàulú te ní sacáⁿ ndodo-dé ndaha-dé díqui té Sàulú, te ní xáhaⁿ-dë:

—Yòhó té Sàulú té-áⁿ ndëcu ndihi-í ichi Xítóhó Jesucristú, ñu-ni Xítóhó Jesucristú Yaá ní cáháⁿ ndihi ñaha xii-n ichi ní tendaha ñaha-gã véxi-í cuendá cacáⁿ táhú-í núú-gã cuendá-n te ndúha núú-n, te dàtnúni quixi Espiritú-gã cundecu ndihi-n —càchí-dé xáhaⁿ-dë.

¹⁸ Te dàtná sá ñi xócání-ó ñⁿ sá ndèdí núú-dë ní quide ñaha-xi xii-dé, te ní nacaáⁿ núú-dë, te ní sandute-dé. ¹⁹ Te ní xexi-dé, te ní naníhí ndéé-dë, te titní nduu ní xindecu ndihi-dé ñáyiu ní sàndáá iní tnúhu-gã ñuú Dàmascú.

¹⁹ Te ní xexi-dé, te ní naníhí ndéé-dë, te titní nduu ní xindecu ndihi-dé ñáyiu ní sàndáá iní tnúhu-gã ñuú Dàmascú.

Té Sàulú dácúaha-dé ñáyiu tnúhu Yá Ndiõxi ñuú Dàmascú

²⁰ Te sáta ñi ndúha núú-dë, te ní sáháⁿ-dë veñúhu cue ñáyiu isràél ní xáhaⁿ-dë sá Jèsús cúu-gã Déhe Yá Ndiõxi. ²¹ Te nchaa ñáyiu ní xíndedóho tnúhu ní cáháⁿ-dë, te ní cuñúhu víhí-yu, te ní xitnàhã-yu:

—Ñu té-áⁿ ní sañhi-dé ñáyiu ní xóo chiñuhu ñaha xii Jèsús ñuú Jerusálén. Te ní quixi-dé iha ní cuíní-dé tñi ñaha-dë xii-yu candeca ñaha-dë quíhíⁿ núú cuè dútú cúnùu ni cuu —cachí-yu xitnàhã-yu.

²² Te ió iní-gã té Sàulú xáhaⁿ-dë xii-yu sá díú Jèsús cúu-gã Cristú Yaá ní tendaha Yá Ndiõxi ní quixi ñuyíú-a, te xíãⁿ ñá ní ñihí ñáyiu isràél ndécú ñuú Dàmascú tnúhu cáháⁿ-yu, te ní cuñúhu víhí-yu.

Té Sàulú ní dáxíó-dě núú ñàyiú isràél

²³ Te sátá nǐ cuu títí nduu, te ní ndatnúhu cue téé isràél sá cáhí-güedé té Sàulú. ²⁴ Te té Sàulú ní níhí-dě tnúhu nàcuáa cáhá-güedé cada ñaha-güedé xii-dé, te cuèi nduu cuèi níú néhé cuèndá-güedé yuyèhe núú ñúdòco ndóho yuhu ñúú cuèndá cuíni-güedé tñi ñaha-güedé xii-dé te cahni ñaha-güedé. ²⁵ Te ìⁿ níú ndécá ñaha cue téé ní sándáá iní-xi tnúhu Jèsús cuáháⁿ ndéé núú ñúdòco ndóho yuhu ñúú. Te ní sáá-güedé núú ndóho, te ní chihí ñaha-güedé xii-dé xití tídihi te ní dándéé ñaha-güedé núú ñúhú, te ní quene-dé cuáháⁿ-dé.

Te Sàulú ndécú-dě ñúú Jerusàlén

²⁶ Te té Sàulú ní nasáá-dé ñúú Jerusàlén, te cuíni-dé chitnahá-dé ñáyiú sándáá iní tnúhu Jèsús, te ní yùhú-yu chi ní cáhán-yu sá dándàhú ñáhá-dé sá sándáá iní-dé Jèsús. ²⁷ Te té Bèé ndécá-dé té Sàulú cuáháⁿ núú ndécú cuè téé ní táúchíúⁿ Jèsús dacuàha ñaha xií-yu tnúhu-gá. Te ní cani té Bèé cuèndú núú-güedé nàcuáa ní cuu ní naníhí tñáhá tē Sàulú ndihí Jèsús ichi, te ní cáháⁿ ndihí ñaha-gá xii-dé. Te ní xáhaⁿ tucu té Bèé nàcuáa ní cáháⁿ té Sàulú tnúhu Jèsús núú ñáyiú Dàmascú, te ñá túú tñahí ni yùhú-dé ní cáháⁿ-dé, cächí té Bèé xáhaⁿ-dē xii-güedé. ²⁸ Te ní xíndecu té Sàulú ndihí ñáyiú xídacuáhá tnúhu-gá ñúú Jerusàlén. Te ní ndicuu ndicuu-dé ní cáháⁿ-dé tnúhu Jèsús, te ñá túú tñahí ni yùhú-dé ²⁹ ní cáháⁿ ndihí-dé ñáyiú isràél ñáyiú cáháⁿ tnúhu griégú. Te ñáyiú-áⁿ nǐ ngúíta-yu ndatnúhu-yu sá cáhí ñáhá-yu xii-dé. ³⁰ Te ñáyiú sándáá iní tnúhu-gá ní níhí-yu tnúhu nàcuáa cuíni ñáyiú cáháⁿ tnúhu griégú cada ñáhá-yu xii té Sàulú, núú ní sándeca ñáhá-yu xii-dé ñúú Cèsareá, te yàcáⁿ ní tendaha ñáhá-yu cuánuhú-dé ñúú Tàrsú.

³¹ Te sátá xíáⁿ te ní sanaá-yu ñá túú-gá ní xóo cada úhú-yu nchaa ñáyiú sándáá iní tnúhu Jèsús níhí distritú Júdeá, ndihí distritú Galileá, ndihí distritú Sàmariá. Te ní níhí ndéé-yu ní quidé-yu nàcuáa ní xáhaⁿ Yá Ndióxi cadá-yu, te ío ní xíndecu yíñuhú-yu núú-gá, te Espíritú-gá ní chindee ñaha-xi xií-yu, te vai-gá ñáyiú ní sándáá iní-yu tnúhu-gá.

Té Pèlú ní quide tátna-dé té Èneás

³² Títí xichi ní sáháⁿ té Pèlú ní cáháⁿ-dē tnúhu Yá Ndióxi. Te ìⁿ nduu ní sáháⁿ-dē ñúú Lidá ní cáháⁿ ndihí-dé ñáyiú sándáá iní ñáhá xii Jèsús. ³³ Te yàcáⁿ ní naníhí-dé ìⁿ téé nàni Eneás, te ní cuu úná cuía cùhú-dé, te ní lùha ñá cuú-gá candá nihnu-dé. ³⁴ Te ní xáhaⁿ tē Pèlú xii-dé:

—Èneás, Xítoho Jesucristú cada tátna ñaha-gá xii-n tñavíi. Ndacóo te ndocani-n yùu-n —cachí-dé xáhaⁿ-dē.

Te òré-ni ní ndacóo-dé. ³⁵ Te nchaa ñáyiú ñúú Lidá ndihí ñáyiú ñúú Sàrón ní xiní-yu sá nǐ ndúha-dé, te ní sándáá víhí iní-yu Xítoho Jesucristú.

Ní ndoto tá Dòrcás

³⁶ Te ñúú Jòpé ndécú ìⁿ ñadihí sándáá iní-aⁿ tnúhu Jèsús, te nàni-aⁿ Tabitá, te tnúhu griégú xáháⁿ-yu Dòrcás, te ío váha ní xóo cada-aⁿ chí ío váha iní-aⁿ, te ní xóo chindee-aⁿ ñáyiú ndáhú. ³⁷ Te váha-ni ndécú-aⁿ ni cuu, te ní tñi ñaha cuèhé nǐ xíhí-aⁿ, te ní nadacúchi ñahá-yu, te ní chihí ñáhá-yu ìⁿ cuártú ndécú ndéé núú nǐnu. ³⁸ Te ñáyiú ní sándáá iní tnúhu Jèsús ñúú Jòpé ní níhí-yu tnúhu sá ndécú tē Pèlú ñúú Lidá. Te yatni-ni cāa ñúú-áⁿ, te ní tendáhá-yu úú cue téé cuáháⁿ-güedé núú ndécú-dé cuèndá cúñaha-güedé candeca ñaha-güedé xii-dé quíhíⁿ núú ndécú-yu. Te ní xáhaⁿ-güedé xii té Pèlú:

—Yáchí ná quihíⁿ-ó ñúú-ndí, chi yacáⁿ cáná ñàhá-yu quihíⁿ-n tnàvíí —càchí-güedé xāhaⁿ-güedē xii té Pèlú.

³⁹ Te té Pèlú ní xica-dé cuáháⁿ-dé ndihí cue téé-áⁿ ñúú Jòpé, te òré ní quexio-güedé ndihí-dé, te cuásaá ndihí ñaha-güedé cuártú ndéé núú ñnu. Te nchaá ñáyiú dìhí ñáyiú quèé ní tacá ndèé ñáhá xii ndíyi-áⁿ xíndáhyú-yu, te ní dánèhé ñáhá-yu nchaá dóó ní cadúha ñaha ní xihí-áⁿ. Chi ní xóo cadúha-aⁿ dícúⁿ, te ní xóo cadúha-aⁿ díó òré ní xíndecu-aⁿ ñuyíú-a, te nchaá xíáⁿ ní dánèhé ñáhá-yu xii té Pèlú. ⁴⁰ Te té Pèlú ní xāhaⁿ-dē sá quèé-yu nchaá-yu quehé, te ní queé-yu. Te ní ngüíñí xítí-dé te ní cáháⁿ ndihí-dé Yá Ndiöxí, te dātnùní ní ndacoto-dé núú cándòdo ndíyi-áⁿ, te ní xāhaⁿ-dē:

—Tàbitá, ndacóo —càchí-dé xāhaⁿ-dē.

Te ní ndacoto-aⁿ núú tē Pèlú te ní ndacóo-aⁿ. ⁴¹ Te ní tñii-dé ndaha-aⁿ ní nacanutñii ñaha-dē. Te ní cana-dé nchaá ñáyiú dìhí ñáyiú quèé ndihí nchaá ñáyiú sàndáá iní tñuhu Jèsús cuendá quiní-yu sá ní ndoto-aⁿ. ⁴² Te nchaá ñáyiú ñúú Jòpé ní níhí-yu tñuhu nācuáa ní quide té Pèlú ní ndoto ñaha ní xihí-áⁿ, te vāi-yu ní sàndáá iní-yu Xítohó Jesucristú. ⁴³ Te titñí nduu ní xíndecu té Pèlú vehe té Xímú té dācuitá ñii.

10

Té Pèlú ndihí té Còrneliú

¹ Te ndècu ñⁿ téé nāñi-dé Còrneliú ñúú Césareá té cūu-dé capitáⁿ, te ndècu ndihí-dé ñⁿ cièndú sandàdú. Te cue téé-áⁿ nání-güedé Sandàdú Itàlianú. ² Te téé cūu capitáⁿ ío váha iní-dé, te mee-dē ndihí ñadihí-dé ndihí nchaá landú-dé ío nèhé-yu sá yíñùhu núú Yá Ndiöxí, te sáha-dé ñáyiú ndàhú ñáyiú isràél díhúⁿ, te ío càháⁿ ndihí-dé Yá Ndiöxí. ³ Te ñⁿ nduu dātná òré caá úní sacuaa ní dācótó núú ñáhá-xí xii-dé sá ní

sáháⁿ ñⁿ espíritú xínú cuèchi núú Yá Ndiöxí núú-dē, te ní xāhaⁿ-xi:

—Còrneliú —càchí-xi xāhaⁿ-xi xii-dé.

⁴ Te ní xini-dé ndi ndùú xio núú-dé espíritú-áⁿ. Te ío ní yùhú-dé. Te ní xāhaⁿ-dē:

—¿Ná chíúⁿ vèxi-n? —càchí-dé xāhaⁿ-dē.

Te xāhaⁿ-xi:

—Ío càháⁿ ndihí-n Yá Ndiöxí, te ñáyiú ndàhú sáñaha-n díhúⁿ-n, te nchaá xíáⁿ sa nàha-gá. ⁵ Te vitna tendaha-n cuè téé na quihíⁿ-güedé ñúú Jòpé quíngana-güedé ñⁿ téé nàni Xímú, àdi Pelú chi úú diu-dé, te candeca ñaha-güedé quixi. ⁶ Te òré quexio-dé te cachí tñuhu-dé nchaá ñava-gá sá cuini Yá Ndiöxí cada-n. Te ndècu-dé vehe íngá tucu téé nàni Xímú téé dācuitá ñii, te vehe téé-áⁿ caá ñⁿ xio yuhu lamár —càchí-xi xāhaⁿ-xi xii-dé.

⁷ Te sáta cuáháⁿ espíritú-áⁿ, te té Còrneliú ní cana-dé úú tñàhá cue téé xínu cuechi núú-dē ndihí ñⁿ sandàdú xínú cuèchi tucu núú-dē, te tñàhá sandàdú-áⁿ ío càháⁿ ndihí-dé Yá Ndiöxí. ⁸ Te té Còrneliú ní cani-dé cuèndú núú-güedé nācuáa ní cáháⁿ espíritú xínú cuèchi núú Yá Ndiöxí. Te ní tendaha ñaha-dé xii-güedé cuáháⁿ-güedé ñúú Jòpé.

⁹ Te nduu tñéé-áⁿ ñúhú-ní-güedé ichi cuáháⁿ-güedé, te cūu-xi datná òré cauxúú nduu ta cūyatni-güedé ñúú-áⁿ, te òré-áⁿ ní sáá té Pèlú díquí vèhé càháⁿ ndihí-dé Yá Ndiöxí. ¹⁰ Te òré-áⁿ sa xihí-dé docó cuini-dé caxi-dé, te nini cadúha-yu sá cáxi-dé ní dācótó núú ñáhá-xí ¹¹ sá ní xini-dé ñⁿ sá ndécú àndiu, te cāa datná caá ñⁿ dóó cáhnú nchicúⁿ yoho ndi cūmí xiquí-xi véxi cuuⁿ núú ñúhú. ¹² Te núú dōó-áⁿ yódó cōó ndihí quiti ndàva ndihí nchaá núú quiti ndéé cūmí sáhá-xi. ¹³ Te ní tecú dóho-dé càháⁿ ñⁿ sá càháⁿ, te xāhaⁿ sá càháⁿ-áⁿ xii-dé:

—Pèlú, ndacuíñí cahni-n ndèda-ni càa quitia-caxi-n-di — cachí sá càháⁿ-áⁿ xāhaⁿ-xí xii-dé.

¹⁴ Te té Pèlú ní xāhaⁿ-dē;

—Vá cáhni-í-di chí cāchí tnúhu sá sánú ìchi ñaha xii nchúhú ñāyiu isràél sá vā cúú cāxi-ndí nchaa quitia-chi cuu cuéchi, te vátá cāxí-gā-í-di ni ñⁿ xito —cachí-dé xāhaⁿ-dē.

¹⁵ Te ní cáháⁿ tucu sá ní cáháⁿ-áⁿ, te xāhaⁿ-xi:

—Vá cúú cāchí-n sá vā cúú cāxi-n-di, chí mee Yá Ndióxi ní cachí-gá sá díú nchaa quitia-cuu caxi-o vitna —cachí sá ní cáháⁿ-áⁿ xāhaⁿ-xi xii-dé.

¹⁶ Te ducaⁿ ñí cáháⁿ sá ní cáháⁿ-áⁿ ũní xito, te dātñúni cuánda tucu dóó-áⁿ andiu.

¹⁷ Te té Pèlú ñá ní cūtñúni iní-dé ná cuèndá ducaⁿ ní dácótó núú ñáhá-xí xii-dé, núú xíǎⁿ ío cuéhé ní sani iní-dé. Te òré-áⁿ ní quexio cue téé ní tendaha té Còrneliú ndéé yuyèhe, chí ndi vehe ndi vehe cuáháⁿ-güedé ndúcú tnúhu-güedé ndéé cáá vehe té Xímú téé dii vehe-xi ndecu té Pèlú.

¹⁸ Te ní cáháⁿ ñihí-güedé, te xāhaⁿ-güedé: —Ñá túú cùdana iha ndecu ñⁿ téé nānducu-ndí nání-dē Xímú, àdi Pelú chí úú ñiú-dé —cāchí-güedé xāhaⁿ-güedé.

¹⁹ Te té Pèlú vāi sani iní-dé sá ní dácótó núú ñáhá-xí xii-dé. Te òré-áⁿ ní xāhaⁿ Espiritú Yá Ndióxi xii-dé:

—Cundedóho-n ñⁿ tnúhu na càháⁿ-í-a. Ní quexio ũní cue téé nānducu ñaha xii-n. ²⁰ Yáchí, cuandèe chí quíhíⁿ-n ndihí-güedé, te vā yùhú-n chí yùhú ní xāhaⁿ-í véxi cuaca ñaha-güedé xii-n —cāchí Espiritú-gá xāhaⁿ-xí xii té Pèlú.

²¹ Te ní xica-dé cuánde-dé núú ndécú cuè téé xica nānducu ñaha xii-dé, te xāhaⁿ-dē xii-güedé:

—Yúhú cúú téé nānducu-ndo-áⁿ. Náu-í-a núú ná chíúⁿ cuñí ñáhá-ndó —cāchí-dé xāhaⁿ-dē xii-güedé.

²² Te xāhaⁿ-güedé:

—Téé cùu capitáⁿ téé nāni Corneliú ní tendaha ñaha-dé véxi-ndí, te téé-áⁿ ío vāha iní-dé, chí ío sàndáá iní-dé Yá Ndióxi, te nchaa ñāyiu

isràél ío vāha càháⁿ-yu cuèndá-dé. Te ñⁿ espíritú xínú cuèchi núú Yá Ndióxi ní xāhaⁿ-xí xii-dé sá cáná ñaha-dé xii-n quíhíⁿ-n vèhe-dé dacuaha-n-dé tnúhu Yá Ndióxi —cāchí cue téé ní tendaha té Còrneliú xāhaⁿ-güedé xii té Pèlú.

²³ Te ní xāhaⁿ tē Pèlú sá quíhu-güedé vehe-dé, te candeca tnaha-güedé ndihí-dé quíhíⁿ ndéé nduu tnéé. Te nduu tnéé-áⁿ ní xica-güedé ndécá tnaha-güedé ndihí té Pèlú cuáháⁿ, te tnaha ñⁿ úú cue téé sàndáá iní tnúhu Jesús ñúú Jòpé cuáháⁿ ndihí ñaha-güedé xii-dé.

²⁴ Te ndéé ingá nduu ní quexio-güedé ñúú Cèsareá. Te té Còrneliú ndétú ñaha-dé xii-güedé vehe-dé te sa ndècu túha-dé ndihí ñadihí-dé ndihí nchaa landú-dé ndihí cue téé ío vāha tnahá tnúhu ndihí-dé, chí ní cana ñaha-dé ní nítñáhā-yu ndihí-dé cundetú-yu té Pèlú. ²⁵ Te sáta ñí quèxio té Pèlú vehe té Còrneliú, te ní quee-dé quehé, te ní ngüñí xítí-dē núú tē Pèlú chíñùhu ñaha-dé ní cùu. ²⁶ Te té Pèlú ní xāhaⁿ-dē:

—Ndacuíñí vā ngüñí xítí-n nùú-í chí ñá díú Ndióxi cúu-í, dícó ñⁿ téé ñuyiú-a cùu-í —cāchí té Pèlú xāhaⁿ-dē xii-dé.

²⁷ Te ta cáháⁿ té Pèlú ndihí té Còrneliú cuānguihu-güedé xítí vehe, te chitu ñāyiu xixíhí xítí vehe. ²⁸ Te ní xāhaⁿ tē Pèlú xii-yu:

—Sa ñaha-ndo sá cāchí tnúhu sá sánú ìchi ñaha xii nchúhú ñāyiu isràél sá vā cúú quixi-ndí vehe ni ñⁿ nchóhó ñāyiu ñá túú cùu ñāyiu isràél te ní vā cúú tnahá tnúhu ndihí ñaha-ndí xii-ndo. Díco Yá Ndióxi ní cachí-gá sá vā cúú cáháⁿ-í sá vā cúú cáháⁿ ndihí-í ñāyiu ñá túú cùu ñāyiu isràél, chí cuu cuéchi.

²⁹ Núú xíǎⁿ ndihí-ni véxi-í òré ní quexio tnúhu sá cáná ñaha-ndo. Te cachí tnúhu-ndo nā cuèndá cáná ñaha-ndo —cachí té Pèlú xāhaⁿ-dē xii-yu.

³⁰ Te té Còrneliú ní xāhaⁿ-dē:

—Ní cuu cúmí nduu, te ñiu-ni ðatná òré iha cùu-xi, te yúhú ndècu-í ñiu-ni vehe-í, te ñá túú tñáhi ná xéxi-í cáháⁿ ndihi-í Yá Ndiöxí, te òré-áⁿ ní quexio ñⁿ espíritú xínú cuèchi núú-gá níhú-xí dǒó cuixíⁿ dǒó chàhchí, ³¹ Te cächí-xi: “Còrneliú, ní xíndedóho Yá Ndiöxí tñúhu ní cáháⁿ-n ndihi-gá, te xíní-gá sá sáñaha-n ðihúⁿ xii ñáyiú ndàhú. ³² Te ñuú Jòpé ndécú ñⁿ téé nàni Xímú, àdi Pelú chi úú ñiu-dé, te ndècu-dé vehe ñⁿ téé nàni tucu Xímú téé ðacuitá ñii, te càa vehe-dé ñⁿ xio yuhu làmár, te cana-n-dé ná quixi-dé ndatnúhu-n ndihi-dé”, duha ní cáháⁿ espíritú xínú cuèchi núú Yá Ndiöxí. ³³ Núu xíáⁿ ndihi-ni ní cana ñaha-í xii-n. Te táxáhu xii-n sá vèxi-n chi iha ndècu-ndí nchaa-ndí ndétú ñaha-ndí xii-n cùndedóho-ndí tñúhu Yá Ndiöxí, te cuini-ndí cachí tñúhu-n nchàa tñúhu ní cachí Yá Ndiöxí cáháⁿ-n —cächí té Còrneliú xáhaⁿ-dè.

Té Pèlú ní ndatnúhu-dé ndihi ñáyiú ní tacá vehe té Còrneliú

³⁴ Te té Pèlú xáhaⁿ-dè xii-yu:

—Vitna ní xini-í sá Yá Ndiöxí cáháⁿ ndihi-gá ñáyiú cuèi ndèda-ni càa ñuú, te ñⁿ-ni quide-gá ndihi nchaa-yu. ³⁵ Te nchaa ñáyiú nèhe sá yíñùhu núú Yá Ndiöxí, te xíquide váha-yu, te nchaa-yu cùu váha iní ñáhá-gá xii-yu. Te ñá túú quide cuendá-gá cuèi ná ñáyiú ñuú cùu-yu. ³⁶ Te Yá Ndiöxí ní tendaha-gá Xítoho Jesucristú ní sáháⁿ-gá ní xíndecu-gá nacióⁿ Isràél, te ní xáhaⁿ-gá xii-yu ñⁿ tñúhu váha nàcuáa cuu váha iní-yu. Te ñiu-ni mee Jèsús cùnùu-gá núú ñáyiú ni càa xico ñuyíú. ³⁷ Te nàha-ndo sá ðihna-gá ndíi Juáá ní cáháⁿ ndíi tñúhu Yá Ndiöxí núú ñáyiú, te ní ðacuándute ñaha ndíi xii-yu. Te ðatnùní ní ngúita Jèsús ní cáháⁿ-gá tñúhu-gá ðistrítú Galiléa, te ðatnùní ní sáháⁿ-gá nihíi nacióⁿ Isràél ní cáháⁿ-gá tñúhu-gá núú

ñáyiú. ³⁸ Te sa nàha-ndo sá Yá Ndiöxí ní sáñaha-gá Espíritú-gá xii Jèsús téé ñuú Nazàrè ndécú ndihi-dé chíndèe ñaha-xi xii-dé. Te nàha-ndo sá ní xica cuu Jèsús ní quide tátna-gá nchaa ñáyiú yíhi ñaha espíritú cùndihi yucu ñáváha. Te ío vai-gá sá váha ní quide ñaha-gá xii-yu, te ducaⁿ ní quide-gá, chi Yá Ndiöxí ní chindee ñaha-gá. ³⁹ Te mee-ndí ní xini-ndí nàcuáa ní quide Jèsús ñuú Jerusalén ndihi nihíi nacióⁿ Isràél. Te ní sata caa ñaha-güedé xii-gá núú cùrúxí te yàcáⁿ ní xihí-gá. ⁴⁰ Te núú úní nduu ní ðándótó ñaha Yá Ndiöxí xii-gá. Te ní cuini-gá sá cùndecu Xítoho Jesucristú titní nduu sáta ní ndoto-gá cuendá cáháⁿ ndihi ñaha-gá xii-ndí nchaa-ndí nàcuáa ní xica cuu-ndí ndihi-gá. ⁴¹ Te ñá ncháá ñáyiú ni xini ñáhá xii-gá, chi mee-ni nchùhú cue téé ní cachí-gá sá càháⁿ ndáá-ndí sá ní ndoto-gá, chi ní xíndecu ndihi-ndí-gá, te ní xihí ní xexi-ndí ndihi-gá, núu càháⁿ ndáá-ndí sá ní ndoto-gá. ⁴² Te ní cachí-gá sá nchùhú quihíⁿ-ndí cúñaha-ndí xii ñáyiú sá mée Yá Ndiöxí ní táuchíúⁿ-gá sá Jèsús cada ndáá-gá cuèchi nchaa ñáyiú ndècu vívú ndihi cuèchi nchaa ñáyiú ní xihí. Te ducaⁿ ní xáhaⁿ Yá Ndiöxí xii Jèsús, te ñiu-ni ducaⁿ ní cachí Jèsús cáháⁿ-ndí. ⁴³ Te cue téé ní cáháⁿ tñúhu Yá Ndiöxí ndéé sanaha ní cáháⁿ-güedé sá quixí Jèsús, te ní cachí-güedé sá ncháá ñáyiú na quíndáá iní ñáhá xii Jèsús, te cada càhnu iní-gá nchaa cuèchi-yu —cächí té Pèlú xáhaⁿ-dè xii-yu.

Ní quexio Espíritú Yá Ndiöxí ní ngúndecu ndihi cue ñáyiú ñá túú cùu ñáyiú isràél

⁴⁴ Te mei òré càháⁿ-dè ndèdóho-yu ní quexio Espíritú Yá Ndiöxí ní ngúndecu ndihi nchaa ñáyiú-áⁿ. ⁴⁵ Te cue téé isràél cuáháⁿ ndihi té Pèlú, cue téé ní sándáá iní

tnúhu Jèsús ní cuñúhu vîhi-güedé sá ñí quexio Espíritú Yá Ndiöxí ní ngúndecu ndihí-yu, chi cuèndá sá ñà díú ñâyü isrâél cúu-yu núu xiãⁿ ní cuñúhu-güedé. ⁴⁶ Te ní cutnùní sá ñí quexio Espíritú Yá Ndiöxí ní ngúndecu ndihí-yu, chi ní ngúita-yu càháⁿ-yu tnúhu sá dácàhu iní ñáhá Espíritú-gá, tnúhu sá ñà túú xini-yu càháⁿ-yu. Te ní ndacáⁿ táhü-yu núú Yá Ndiöxí cuèndá nchaa sá ñí quide-gá. ⁴⁷ Te dàtnùní ní xáhaⁿ tē Pèlú:

—Vitna te cuandute ñâyü ní natuha ichi Xítohó Jesucristú chi sa ndècu ndihí-yu Espíritú Yá Ndiöxí dàtná cuiní-ndó ndècu ndihí nchoo, núu xiãⁿ vá cúú càchí dava-gá ñâyü sá vā cúú cuànduté-yu —càchí-dé xāhaⁿ-dē xii-yu.

⁴⁸ Te dàtnùní ní xáhaⁿ-dē xii ñâyü:

—Vitna te cuandute-ndo, te òré-áⁿ te cacunehe-ndo Xítohó Jesucristú —càchí-dé xāhaⁿ-dē xii-yu.

Te dàtnùní ní càháⁿ ndàhú-yu núú tē Pèlú cundecu ndihí ñaha-dē xii-yu ñú nduu.

11

Té Pèlú ní cani-dé cuèndú núú ñâyü sándáá iní tnúhu Jèsús ñuú Jerusálén

¹ Te cue téé ní táuchíúⁿ Jèsús dacuàha ñaha xii ñâyü tnúhu-gá, ndihí cue ñâyü ní sándáá iní tnúhu-gá, ñâyü ndècu distritú Jùdeá ní níhi-yu tnúhu sá ñâyü ñà túú cúú ñâyü isrâél ní sándáá iní-yu tnúhu Yá Ndiöxí. ² Te òré ní ndexio té Pèlú ñuú Jerusálén, te ñâyü isrâél ñâyü ní cachí sá cáda nchaa nacuaa ní càháⁿ ndíi Moisés ní şatnuhu ñáhá-yu xii-dé. ³ Te ní xáhaⁿ-yu xii té Pèlú:

—¿Ná cuèndá ní sáháⁿ-n ndéé ndiácaⁿ ní càháⁿ ndihí-n ñâyü-áⁿ, te ñà túú quide-yu dàtná quidé nchò-i? Te ní sáháⁿ-n yàcáⁿ

ní xexi-n ndihí-yu —càchí-yu xāhāⁿ-yu xii-dé.

⁴ Te té Pèlú ní cani-dé cuèndú nācuāa ní cuu núú ní sáháⁿ-dē, te xāhaⁿ-dē:

⁵ —Ní xīndecu-í ñuú Jòpé. Te òré càháⁿ ndihí-í Yá Ndiöxí, te ní dácótó ñāha-xi xii-í sá vēxi cuuⁿ ñⁿ dóó càhnú àndü, te ndùtu ndi cumí xiquí-xi, te ní ngava-xi núú ndécü-í.

⁶ Te ní xindéhé vāha-í, te ní xiní-í nchaa quiti yòdo núú-xi. Te ñⁿ xichi yòdo quiti cúmí sáhá-xi, te ñⁿ xichi yòdo quiti dééⁿ, te ñⁿ xichi yòdo cóó, te ñⁿ xichi yòdo quiti ndava. ⁷ Te ní tecú dóho-í càháⁿ ñⁿ sá càháⁿ, te càchí-xi: “Pèlú, ndacuñí cahni-n ndéda-ni càa quiti-a caxi-n-dí”,

cachí sá ñí càháⁿ-áⁿ. ⁸ Te ní xáhaⁿ-í: “Vá càhni-í-dí chi càchí tnúhu sá sánú ichi ñaha xii nchúhú ñâyü isrâél sá vā cúú càxi-ndí nchaa quiti-a”, xāhaⁿ-í. ⁹ Te ní tecú dóho-í càháⁿ-ni tucu núú ñinu, te càchí sá càháⁿ-án: “Vá cúú càchí-n sá vā cúú càxi-n-dí, chi mee Yá Ndiöxí ní cachí-gá sá díú nchaa quiti-áⁿ

cuu caxi-o”, càchí sá càháⁿ-áⁿ. ¹⁰ Te ducaⁿ ñí càháⁿ sá ñí càháⁿ-áⁿ ùní xito, te dàtnùní cuāndaa dóó-áⁿ ndihí nchaa quiti-áⁿ andü. ¹¹ Te òré-ni ní quexio úmí cue téé vehe núú ndécü-í. Te cue téé-áⁿ ní tendaha ñaha ñⁿ téé ñuú Cēsareá nāndücu ñaha-güedé xii-í. ¹² Te mee Espíritú Yá Ndiöxí ní cachí-xi sá quihíⁿ-í ndihí-güedé, te ní cachí-xi sá ñà túú ñā cani iní-í. Te tnàhá ñū cue téé ndècu iha ní sáháⁿ ndihí ñaha-güedé xii-í, te nchaa-ndí ní sáháⁿ-ndí vehe té Còrneliú ñuú Cēsareá. ¹³ Te ní cani-dé cuèndú nācuāa ní cuu ní sáháⁿ ñⁿ espíritú xínú cuèchi núú Yá Ndiöxí vehe-dé,

te ní quihu-xi ndéé xití vehe-dé, te ní xáhaⁿ-xi xii-dé: “Tendaha-n cuè téé na quihíⁿ-güedé ñuú Jòpé quíngana-güedé ñⁿ téé nàni Xímú,

àdi Pelú chi úú diu-dé. Te candeca ñaha-güedé quixi. ¹⁴ Te téé-áⁿ cachí tnúhu-dé nāsa cada-n nāñihí tãhú-n ndihí ñadihí-n, ndihí landú-n, ndihí

nchaa ñáyu xínu cuechi vehe-n”, duha ní xáhaⁿ espíritú-áⁿ xii té Còrneliú. ¹⁵ Te òré ní ngúíta-í cáháⁿ ndihí-í-yu ní quexio Espíritú Yá Ndiòxí ní ngúndecu ndihí-yu dàtná ní quide-xi cùtnàhá ní taxi Yá Ndiòxí Espíritú-gá ndéé díhna ní ngúndecu ndihí nchoo. ¹⁶ Te ní ndacu iní-í nàcuáa ní cáháⁿ Xítóhó Jesucristú, te duha ní cachí-gá: “Té Juáá ní xóo dacuàndute-dé ñáyu, dico yúhú sãñaha-í Espíritú Yá Ndiòxí cundecu ndihí-yu”, duha ní cachí-gá. ¹⁷ Te Yá Ndiòxí ní sãñaha-gã Espíritú-gá cundecu ndihí ñáyu ñá túú cùu ñáyu isràél dàtná ní quide-gá cùtnàhá ní sándáá iní-ó tnúhu Jèsús, núu xíáⁿ vã càchí-í sá vã cúú càda-í ìⁿ sá cuìní Yá Ndiòxí cada-í —càchí té Pèlú xáhaⁿ-dè xii-yu.

¹⁸ Te sátá dúcáⁿ ñí xáhaⁿ tẽ Pèlú, te ñá túú-gã ná tnúhu ní cãháⁿ-yu, te ío ní cudíí iní-yu nchaa nàcuáa ní quide Yá Ndiòxí, te ní xítñahá-yu:

—Tnàhá nchaa ñáyu ñá túú cùu ñáyu isràél naníhí tãhú-yu núu na dàñá-yu nchaa sá cuèhé sá dúhá quidé-yu, chi ducaⁿ cuìní Yá Ndiòxí cunduu —càchí-yu xítñahá-yu.

Ñáyu sàndáá iní tnúhu Jèsús ñúú Antiòquiá

¹⁹ Te sátá ñí sahani-güedé té Tèvá, te ní cuìní-güedé cada úhú-güedé nchaa ñáyu ní sándáá iní-xi tnúhu Jèsús, te ní xíté nuú-yu ndi tnahá ìⁿ ìⁿ ñúú. Te davá-yu cuáháⁿ-yu ndéé distritú Fènicia ndihí distritú Chìpré ndihí ñúú Antiòquiá. Te ní cáháⁿ-yu tnúhu Jèsús núu mee-ni ñáyu isràél, te ñá ní xítñu-yu dava-gá-yu. ²⁰ Te dava-gá ñáyu distritú Chìpré ndihí ñáyu ñúú Cirené ní sáháⁿ-yu ñúú Antiòquiá. Te ñá díú mèe-ni ñáyu isràél ní cáháⁿ ndihí-yu, chi tnahá ñáyu ñá túú cùu ñáyu isràél ní xáhaⁿ-yu tnúhu Jèsús. ²¹ Te ní chindee ñaha-gá xii ñáyu càháⁿ tnúhu-gá, te vãi-gá-yu

ní sándáá iní-yu-gá chi ní tuhá-yu ichi-gá.

²² Te ñáyu ndècu ñúú Jerusàlén ñáyu ní sándáá iní tnúhu Jèsús ní níhí-yu tnúhu nàcuáa ní cuu, núu xíáⁿ ní tendàhá-yu té Bèé cuáháⁿ-dè ñúú Antiòquiá. ²³ Te òré ní quexio té Bèé, te ní xiní-dé nàcuáa ní quide ñaha-gã xii-yu sá ñí naníhí tãhú-yu, núu xíáⁿ ío ní cudíí iní-dé. Te ní dácáhu iní ñáhá-dè, te ní xáhaⁿ-dè:

—Ío nducu ndèe-ndo cada-ndo nchaa sá càchí Yá Ndiòxí cada-ndo —càchí-dé xáhaⁿ-dè xii-yu.

²⁴ Te té Bèé cúú-dè ìⁿ tée váha iní-xi, te ndècu ndihí-dé Espíritú Yá Ndiòxí, te ío sándáá iní-dé tnúhu Jèsús. Te vãi vihi ñáyu ní tuhá-yu ichi-gá.

²⁵ Te dàtnùní cuáháⁿ té Bèé ñúú Tarsú cuánúndúcú-dè té Sàulú. ²⁶ Te òré ní naníhí ñáhá-dè, te ndèca ñaha-dé cuáháⁿ ñúú Antiòquiá, te yàcáⁿ ní xíndecu-güedé ìⁿ cuía ndihí ñáyu ní sándáá iní tnúhu Jèsús, te vãi-yu ní dácúhá ñaha-güedé tnúhu-gá. Te diu-ni ñúú Antiòquiá ní dánání ñáhá-yu Cristiànú xii nchaa ñáyu sándáá iní tnúhu Jèsús.

²⁷ Te ndéé dàvá-áⁿ ñí quee ìⁿ úú cue tée càháⁿ tnúhu Yá Ndiòxí ñúú Jerusàlén cuáháⁿ-güedé ñúú Antiòquiá. ²⁸ Te ìⁿ-dè nání-dè Àgabú, te ní chindee ñaha Espíritú Yá Ndiòxí xii-dé, te ní sáháⁿ-dè núu nchaa ñáyu sándáá iní tnúhu-gá, te ní xáhaⁿ-dè xii-yu sá quíxí ìⁿ tnamá nihí ñuyíú. Te ducaⁿ ñí cuu sátá ñí ngúnutnii té Claudiú tée yíndaha cuèhé nacióⁿ. ²⁹ Núu xíáⁿ nchaa ñáyu sándáá iní tnúhu Jèsús ñúú Antiòquiá ní ndatnúhu-yu sá chíndèé-yu nchaa ñáyu sándáá iní tnúhu-gá ndécú distritú Júdeá cuèndá vã ndóhó vihí-yu docó. Te nàcuáa ní níhí-yu, te ducaⁿ ñí sacáⁿ tñáhá-yu. ³⁰ Te ní tacá díhú-ãⁿ, te nèhe té Bèé ndihí té Sàulú cuáháⁿ, cuáha-güedé cue tée yíndaha ñáyu sándáá iní tnúhu-gá.

12

Sátá nǐ xǐhí té Jàcobó, te ní ngava té Pèlú vecaá

¹ Te ndéé dàvâ-áⁿ nǐ ngüita té Hèrodés téé yǐndaha ñaha xii ñáyiú isràél ní quide úhú-dé ìⁿ úú ñáyiú sàndáá iní tnúhu Yá Ndiòxí. ² Te ní táuchíúⁿ-dè ní tñi-güedé té Jàcobó ñani té Juáá, te ní sahní ñaha-güedé ndihi machiti. ³ Te ío ní cudíí iní dava ñáyiú isràél cuendá sá nǐ sahní ñaha-güedé xii té Jàcobó, núu xiáⁿ ní tendaha tucu té Hèrodés sandàdú-dé ní sáháⁿ tñi tucu-güedé té Pèlú. Te ducaⁿ nǐ quide-dé cútnáhá ní xóo vico ní xexí-yu pàá sá ñà túú yìhi levadurá. ⁴ Te ní naníhí-güedé té Pèlú, te ní tñi ñaha-güedé ndécá ñaha-güedé cuáháⁿ vecaá. Te té Hèrodés ní táuchíúⁿ-dè cuáháⁿ sáhúⁿ ìⁿ sandàdú cundeé-güedé té Pèlú. Te ní xáhaⁿ-dè:

—Cundeé-ndó ndì cúmí ndì cúmí-ndó tēe-ǎⁿ—càchí-dé xáhaⁿ-dè xii-güedé.

Te té Hèrodés ní sani iní-dé queñuhu-dé té Pèlú vecaá òrè ná yáha vico cuendá cahni ñaha-güedé cáhán-dè ní cùu. ⁵ Te ní xǐhí-ni té Pèlú vecaá, te ní xindeé cuaa ñaha sàndadú xii-dé. Te cue ñáyiú sàndáá iní tnúhu Yá Ndiòxí ío ní xicáⁿ tǎhú-yu núú-gá cuendá sá ñà túú nǎ cada ñaha-güedé xii-dé.

Yá Ndiòxí ní dácăcu-gá té Pèlú vecaá

⁶ Ìⁿ niú-gá quíhi té Pèlú vecaá ní cùu, te nduu tnéé tauchiúⁿ té Hèrodés quíhíⁿ sandàdú queñuhu ñaha-güedé xii-dé vecaá cuendá quini nchaa ñáyiú nása cada ñaha-güedé ní cùu. Te té Pèlú cáá-dè xidí-dé xití vecaá, te ndi ndúú dúcúⁿ ndáhá-dé ndútú càdená, te xio xio dǐñi-dé ndécú sandadú, te dava-gá sandàdú xindeé-güedé yèhe vecaá. ⁷ Te ní quexio ìⁿ espíritú xínú cuèchi núú Yá Ndiòxí xití vecaá núú cáá té Pèlú xidí-dé, te uuⁿ ní dáyehé-xi

xití vecaá, te ní danguǐhi ñaha-xi xii-dé, te xáhaⁿ-xi xii-dé:

—Yáchí, ndàcáo —càchí-xi xáhaⁿ-xi xii-dé.

Te ní ndacáo-dé, te nchaa cadená ndútú dúcúⁿ ndáhá-dé ní nandáxí. ⁸ Te ní xáhaⁿ tucu espíritú-áⁿ xii-dé:

—Yáchí, nucuíhnu dóó-n, te ndíhu-n chàu-n —càchí-xi xáhaⁿ-xi xii-dé.

Te ní ndíhu nuu-dé dóó-dè, te ní xáhaⁿ tucu espíritú-áⁿ:

—Candixi dóó-n, te na quíhíⁿ-ó —càchí-xi xáhaⁿ-xi xii-dé.

⁹ Te té Pèlú ní chinchícúⁿ-dé espíritú-áⁿ, te ñá ní cùtnuní iní-dé núu ndáá ìⁿ espíritú xínú cuèchi núú Yá Ndiòxí ducaⁿ quide àdi ñáhá, te dàcoto ñaha-xi xii-dé ní sani iní-dé. ¹⁰ Te ndèndaha-ni-dè espíritú-áⁿ cuáháⁿ

ní yáha-dé nàcuáa xñutnǐ sandàdú, te ta yáha-gá-dé núú ndécú dàva-gá-güedé. Te ní sáá-dé ndéé yuyèhe núú ndèdí caá nàcuáa ní yáha ichi sá cuáháⁿ ndéé xití ñuu, te ní nacaáⁿ mée yèhe-áⁿ, te ní quee-dé cuáháⁿ-dè ndihi espíritú-áⁿ. Te ní tnahá-dé ìⁿ tnuú, te yàcáⁿ ní dándóo ñaha espíritú-áⁿ xii-dé. ¹¹ Te dàtnuní ní nene yáha sani núú-dè, te ní cutnùní iní-dé, te ní cachí-dé:

—Ndáá sá Yá Ndiòxí ní tendaha-gá espíritú-áⁿ ní quixi-xi ní dácăcu ñaha-xi xii-í cuendá sá vâ cáhni ñaha té Hèrodés. Te dava ñáyiú isràél ío ní cudíí iní-yu cuendá sá nǐ cuini té Hèrodés cahni ñaha-dè xii-í —duha ní cachí-dé sátá ní cutnùní iní-dé.

¹² Te sátá ní cutnùní iní-dé sá nǐ cácu-dé, te cuáháⁿ-dè vehe ìⁿ ñaha nani Mariá náná té Juáá, àdi Mácú chí úú diú-dé, te xiáⁿ ndécú vai-yu càhán ndihí-yu Yá Ndiòxí. ¹³ Te té Pèlú ní quexio-dé ndéé yuyèhe ní dácásáⁿ-dè, te ní quixi ìⁿ xíchí nání Ròdè ní quixi ndehe-xi nǎ cúú ñáyiú dàcăşan. ¹⁴ Te ní nucúhuⁿ ndudú-xi sá díú té Pèlú, te ní cudíí víhí iní-xi, dico ñá ní nacaáⁿ-xi yuyèhe. Te ní quene cunu-xi cuáháⁿ ngueñaha-xi

xii-yu sá nútn̄hí té Pèlú yuyèhe ndaa quehé. ¹⁵ Te ñá ní sàndáá iní-yu tnúhu ní cáháⁿ-xi, te xáháⁿ-yu xii-xi: —¡Ná tnúhu vihi cáháⁿ-õⁿ xíchi lúcú! —càchí-yu xáháⁿ-yu.

Te xáhaⁿ-xi sá ndàá nútn̄hí-dé, te xáháⁿ-yu:

—Ñá díú tē Pèlú chi espíritú sá xító ñaha xii-dé cúú sá cáháⁿ —càchí-yu xáháⁿ-yu xii-xi.

¹⁶ Te òré ducaⁿ xitnàhá-yu, te té Pèlú ní dácásáⁿ tùcu-dé yuyèhe. Te ní sáháⁿ-yu ní nacaáⁿ-yu yuyèhe, te ní xiní-yu sá díú tē Pèlú, te ní cuñúhu vihi-yu. ¹⁷ Te ní quide-dé ndaha-dé núu-yu cuèndá cadí-yu yuhú-yu. Te ní ngúita-dé ní cani-dé cuèndú nàcuáa ní quide ñaha Yá Ndiõxí xii-dé sá ní dácäcu ñaha ñⁿ espíritú xínú cuèchi núu-gã xii-dé vecaá, te ní xáhaⁿ-dē xii-yu:

—Cúu-ndo tē Jácobó ndihi dava-gá ñáyiú sàndáá iní tnúhu Jèsús nàcuáa ní quide ñaha Yá Ndiõxí xii-í —càchí-dé xáhaⁿ-dē xii-yu.

Te sátá dúcáⁿ ní xáhaⁿ-dē, te ní quee-dé cuáháⁿ-dé ingá xíchi.

¹⁸ Te sátá ní túnnaá, te ní ngúita nchaa sandàdú cáháⁿ ñⁿ cáháⁿ ñⁿ-güedé, te xitnàha-güedé:

—Ñá túú-gã té Pèlú yíhi vècaá, ¿te nása cada-o-í? —càchí-güedé xitnàha-güedé.

¹⁹ Te té Hèrodés ní tendaha-dē titn̄í sandàdú cuáháⁿ-güedé cuánúndúcú ñaha-güedé, te ñá ní nánihí ñáhá-güedé xii-dé. Te dàtn̄n̄í ní cana-dé sandàdú cue tē ní xindeé ñáhá xii té Pèlú, te ní tenáá ñáhá-dē xii-güedé, te ní xáhaⁿ-dē xii dava-gá cue sandàdú-dé:

—Cahni-ndo cuè tē-ãⁿ —càchí té Hèrodés xáhaⁿ-dē.

Te dàtn̄n̄í ní quee té Hèrodés distritú Júdeá cuáháⁿ-dé ñuú Cèsareá, yacáⁿ ní ngúndecu-dé.

Ní xíhi té Hèrodés

²⁰ Té Hèrodés ní cudééⁿ-dē núú ñáyiú ñuú Tirú ndihi núú ñáyiú ñuú

Sidón. Te xíãⁿ ní ndatnúhu-yu ní cuu ñⁿnuu tnúhu-yu, te ní xicá-yu cuáháⁿ-yu cuáháⁿ ndatnúhu ndihi ñáhá-yu xii-dé, te ní ndatnúhu ndihí-yu té Blástú. Te tē-áⁿ cúú-dē chùⁿ quide-dé núú tē Hèrodés, te ní chindee tnúhu ñaha-dē xii-yu, chi ní cáháⁿ ndàhú-yu núú tē Hèrodés sá vã cadá ùhú ñáhá-dē xii-yu. Te ducaⁿ ní quide-yu cuèndá ñuú té Hèrodés-áⁿ queé sá xéxi-yu. ²¹ Te ní xáhaⁿ tē Hèrodés ná nduu quíñⁿ-yu ndatnúhu ndihi ñaha-dē xii-yu, te nduu-ãⁿ ní quíunuu-dé ñⁿ dóó vaha, ñⁿ sá sácúñhu tē taxi tnuní. Te ní ngóo-dé núú xilé vaha, xilé sá sácóo nchihi tē taxi tnuní, te ní ngúita-dé ní cáháⁿ sàhú-dé dóho-yu. ²² Te uuⁿni ní cuáá-yu te càchí-yu:

—¡Tēe-a cáháⁿ-dē dico ñá díú tē ñuyíú-a cúú-dé chi ndiõxí cúú-dé! —càchí-yu xitnàhá-yu.

²³ Te ñuú-ñi òré-ãⁿ ní yáha ñⁿ espíritú xínú cuèchi núú Yá Ndiõxí, te ní sáñaha-xi cuéhé xii té Hèrodés. Te ducaⁿ ní tnahá-dé chi mee-dé ñá ní xáhaⁿ-dē sá ñáyiú cúú-dé, te ní cáháⁿ-yu sá ndiõxí cúú-dé. Te nchìto-gá-dé ní sanú ñáhá tìndácú xii-dé, te dàtn̄n̄í ní xíhi-dé.

²⁴ Te ío titn̄í xíchi ní sáháⁿ ñáyiú sàndáá iní tnúhu Yá Ndiõxí ní cáháⁿ-yu tnúhu-gá, te ío chitú-yu ní sàndáá iní-yu tnúhu-gá.

²⁵ Te té Bèé ndihi té Sàulú ní ndihi chùⁿ-güedé, te ní ndee-güedé ñuú Jerusalén cuáháⁿ-güedé ndihi té Juáá, àdi Mácú chi úú ñuú-dé.

13

Té Bèé ndihi té Sàulú cuáháⁿ-güedé dácúaha-güedé ñáyiú tnúhu Yá Ndiõxí nchaa ñuú xicá

¹ Te ñuú Antiòquia ndécú ñⁿ úú cue tē cáháⁿ tnúhu Yá Ndiõxí núú nchaa ñáyiú ní sàndáá iní-xi tnúhu-gá. Te ndécú tucu ñⁿ úú cue tē cúu mestrú dácúaha ñaha-güedé xii-yu tnúhu-gá. ñⁿ-dē nání-dē Bèé, te ñⁿ-dē nání-dē Xímú, te té

Ximú-áⁿ xáhaⁿ-güedě Nęgrú chi tnuu-dě. Te ingá-dé nání-dě Lúciú, te té-áⁿ cúú-dě téé űúú Cirené. Te ingá-dé nání-dě Sàulú, te ingá tucu-dé nání-dě Manàen. Te té Manàen-áⁿ ndihí té Hērōdés téé cūu gobiernú Galileá ío váha ní xóo cáháⁿ ndihí tnàha-güedé cútñahá ní cuu lĩhli-güedé. ² Te ĩⁿ nduu űá túú nã ní xèxi űáyiú ní sándáá iní tnúhu Yá Ndióxi cuendá mee-ni-gã ní cáháⁿ ndihí-yu, te ní xáhaⁿ Espiritú Yá Ndióxi xii-yu:

—Tendaḡa-ndo tē Bèè ndihí té Sàulú quihíⁿ-güedé dava-gá űúú cada-güedé chiúⁿ tahu-í, chi ducaⁿ cuini-í cunduu —càchí Espiritú-gá xáhaⁿ-xi xii-yu.

³ Te ní cáháⁿ ndihí tucú-yu Yá Ndióxi, te űá túú tnàhí ná ní xèxi tucú-yu, te ní sacáⁿ ndodo-güedé ndaha-güedé díquí tē Bèè ndihí té Sàulú. Te sátá dúcáⁿ űi quide-güedé, te ní quide ndee iní űáhã-yu xii-güedé.

Té Bèè ndihí té Sàulú cuáhãⁿ-güedé distritú Chìpré cáháⁿ-güedé tnúhu Yá Ndióxi

⁴ Te té Bèè ndihí té Sàulú ní quee-güedé cuáhãⁿ-güedé cuendá ducaⁿ cuini Espiritú Yá Ndióxi cunduu sá cacá cūu-güedé dava-gá űúú, te ní quexìo-güedé űúú Selèuciá, te yàcáⁿ ní quee-güedé bàrcú cuáhãⁿ-güedé distritú Chìpré. Te űúú-áⁿ cáá xití làmár chi ndècu űuhu yichí xití ndute. ⁵ Te ní quexìo-güedé mei űúú Salàminá, te ní quene-güedé bàrcú, te ní xica-güedé cuáhãⁿ-güedé nchaa veñúhu űáyiú isràel cáháⁿ-güedé tnúhu Yá Ndióxi. Te cuáhãⁿ ndihí-güedé té Juàá cuendá chindee űàha-dé xii-güedé. ⁶ Te ní tñi-güedé ichi cuáhãⁿ-güedé űúú Páfós cáá ndàa ingá xio Chìpré, te yàcáⁿ ní naníhí tnáhã-güedé ndihí ĩⁿ téé isràel nání-dě Barjèsús, te té-áⁿ xini-dé cada ndúu-dé, te càchí-dé sá cáháⁿ-dé tnúhu Yá Ndióxi dico űã ndáá. ⁷ Te té-áⁿ

quidé chiúⁿ-dé ndihí té Sèrgiú, àdi Páblú chi úú ñiú-dé, te cūu-dé gobiernú Chìpré, te ío túha-dé. Te ní cana-dé té Bèè ndihí té Sàulú, chi cuini-dé cundedóho-dé tnúhu Yá Ndióxi. ⁸ Te téé quide nduu-áⁿ űã ní dàña-dé cáháⁿ-güedé tnúhu-gá, chi űã ní cuini-dé sá téé cūu gobiernú-áⁿ tuha-dé ichi Yá Ndióxi. Te ducaⁿ űi quide té Barjèsús, téé xáhaⁿ-güedé Èlimás. ⁹ Te tnáhã tucu té Sàulú ndécú úú ñiú-dé chi xáhaⁿ tucu-güedé Páblú, te ndècu ndihí-dé Espiritú Yá Ndióxi. Te ní xindéhé űi űáhã-dé xii téé quide nduu-áⁿ. ¹⁰ Te ní xáhaⁿ-dē:

—Yòhó, chi dàtná quidé yùcu űávãha quide-n chi mee-ni dandahú-n űáyiú. Yòhó cúú-n dēhe sácúfñhá, chi nchaa tnúhu váha cuini Yá Ndióxi cáháⁿ-yu, te yòhó űã dáñã-n. ¹¹ Te vitna quini-n nàcuáa cunduu, chi taxi Yá Ndióxi ĩⁿ castúu xii-n chi vá cútñuní-gá núu-n càca cuu-n ĩⁿ úú nduu —càchí-dé xáhaⁿ-dē xii téé quide nduu-áⁿ.

Te òré ducaⁿ űi xáhaⁿ tē Páblú xii-dé, te òré-ni ní cuaa-dé, te űã túú ní cútñuní tnáhí-gá núu-dé, te ní xóo nducu-nã-dé űáyiú ní xóo cuita nehe űaha xii-dé. ¹² Te téé cūu gobiernú ní xini-dé nàcuáa ní quide té Páblú, te ío ní cuñúhu-dé. Te ní tnáhã iní-dé tnúhu Jèsús, núu xíãⁿ ní sándáá iní-dé.

Té Páblú ndihí té Bèè ndécú-güedé űúú Antiòquia Pìsidia

¹³ Te té Páblú ndihí dava-gá cue téé xica cuu ndihí-dé ní quee-güedé bàrcú, te ní quee-güedé űúú Páfós cuáhãⁿ-güedé űúú Pèrgé, te űúú-áⁿ yindèhu-xi distritú Pànfilia. Te té Juàá ní nacuico-dé ní dándõ űaha-dé xii-güedé cuánuhú-dé űúú Jerusalén. ¹⁴ Te dava-gá-güedé ní quee-güedé űúú Pèrgé cuáhãⁿ-güedé űúú Antiòquia, te Pìsidia yindàha-xi űúú-áⁿ. Te nduu xindetatú-yu, te ní sáhãⁿ-güedé veñúhu űáyiú isràel, te ní ngóo-güedé xití veñúhu. ¹⁵ Te cue

tée ndècu veñúhu ní queheⁿ-güedé tutú yódó tnùnì nchaa tnúhu sá nǐ chídó tnùnì ndíí Moisés ndihì tutú yódó tnùnì nchaa tnúhu sá nǐ chídó tnùnì dava-gá cue tée ní xóo cáháⁿ tnúhu Yá Ndiòxí ndéé sanaha, te ní dácuhá-güedé ní xíndedóho cue ñáiyu, te dátñùnì cue tée yíndaha veñúhu-áⁿ nǐ xáhaⁿ-güedé xii té Páblú ndihì dava-gá-güedé:

—Nchòhó cue tée cùu ñaní tñáhá-ndí, te núu cuiní-ndó cáháⁿ-ndó tnúhu Yá Ndiòxí, te cuu cáháⁿ-ndó tnávíí cuèndá cutúha-yu —càchí-güedé xáhaⁿ-güedé.

¹⁶ Te té Páblú ní ndacuíñí-dé, te ní ndacani-dé ndaha-dé cuèndá cadí-yu yuhú-yu te cundedóho-yu tnúhu cáháⁿ-dé, te ní xáhaⁿ-dè:

—Te nchòhó ñáiyu quide nchaa nacuaá cáháⁿ Yá Ndiòxí ndihì nchaa nchòhó ñáiyu isràél, cundedóho-ndo ncháa-ndo ñⁿ tnúhu na cáháⁿ-í-a. ¹⁷ Te cuèí ndéé sanduu te cuèí vitna chindee ñaha-ní Yá Ndiòxí xii nchaa ñáiyu isràél, te ní nacáxi ñaha-gá xií-yu te ní chindee ñaha-gá cuèndá cáyá-yu, chi cuiní-gá sá cúu vai-yu, te ducaⁿ nǐ quide-gá cútnáhá ní xíndecú-yu nàcióⁿ Ègiptú. Te dátñùnì ní dácácu ñaha-gá xií-yu ñuu-áⁿ, chi mee-gá nchaa ndàcu-gá quidé-gá. ¹⁸ Te ní xíndecú-yu ñⁿ xichi núu ñà túú tñáhí sàcúndecu ñáiyu údico cuíá, te xití údico cuíá-áⁿ nǐ cundee ìní-gá nchaa sá nǐ quidé-yu. ¹⁹ Te Yá Ndiòxí ní chindee ñaha-gá xii ñáiyu isràél, te ní dánáá-yu úsá nàcióⁿ, chi cuèndá ní cuiní-gá cuu cuèndá-yu ñuhú-áⁿ. ²⁰ Te dátñùnì ní cachí Yá Ndiòxí sá díúⁿ-ní cue tée cùchiuⁿ taxi tnùnì-güedé nchaa ñáiyu, te ducaⁿ nǐ quide-güedé dátñá cùmí cièndú dava cuíá. Te sátá xǎⁿ, te ní xíndecu té Sàmuél tée ní cáháⁿ tnúhu Yá Ndiòxí. ²¹ Te dàvá-áⁿ ní cuiní ñáiyu isràél sá cùndècu ñⁿ tée quíndaha ñaha-dé xií-yu, te Yá Ndiòxí ní cachí-gá sá tē Sàúl quíndaha-dè-yu, te tée-áⁿ nǐ cuu-dé déhe té Cís, te té Benjàmín tée ní xíndecu ndéé

sanaha-gá ní cuu ñaní tñáhá-dè. Te té Sàúl ní xíndaha-dè ñáiyu údico cuíá. ²² Te Yá Ndiòxí ñá ní cuiní-gá cundecu-ni-dé quíndaha-dè ñáiyu, chi ní cuiní-gá sá tē Dàvíí ndíhu ndaha-dè cue ñáiyu isràél, te ní cachí-gá: “Ío váha ní tñahá iní-í nàcuáa quide té Dàvíí déhe tée Isàí, te cada-dé nchaa nàcuáa cùñaha-í xii-dé”, duha ní cachí Yá Ndiòxí —càchí té Páblú xáhaⁿ-dè xií-yu.

²³ Te ní xáhaⁿ tucu té Páblú:

—Díu-ni ñaní tñáhá tē Dàvíí cúú Jèsús. Te Yá Ndiòxí ní tendaha-gá Jèsús ní quixi-gá ñuyíú-a cuèndá nchaa ñáiyu isràél ná quíndáá iní ñáhá xii Jèsús naníhí tàhú-yu, chi ducaⁿ nǐ cachí Yá Ndiòxí cunduu. ²⁴ Te cútnáhá vátá ngùíta-gá Jèsús cáháⁿ-gá tnúhu Yá Ndiòxí, te ní cáháⁿ té Juáá núu ñáiyu isràél sá xíní ñùhu-xi dañá-yu nchaa sá cuèhé sá dúhá, te cuanduté-yu. ²⁵ Te sa ta cùyatni-ni-gá cuú-dé, te ní xáhaⁿ-dè xií-yu: “Nchòhó càchí-ndó sá yùhú cùú-í Cristú Yáá ndétú-ndó dico ñáhá, chi ñá díú yùhú cùú-í Cristú, chi davitna quixi Cristú Yáá tendaha Yá Ndiòxí quixi ñuyíú-a. Te yùhú cùú-í ñⁿ tée duuⁿ duuⁿ ñá túú tau nandaxi cuèdicó cháú-gá dico quide-í chiurⁿ-gá”, duha ní cáháⁿ te Juáá —càchí té Páblú xáhaⁿ-dè xií-yu.

²⁶ Te ní xáhaⁿ tucu té Páblú:

—Cundedóho tucu-ndo ñngá tnúhu na cáháⁿ-í. Nchòhó tñáhá-ndó cùu-ndo ñaní tñáhá ndíí Abrahám, te xíní-ndó sá Yá Ndiòxí cùnùu-gá. Te díu-ni-gá cuiní-gá sá ncháá-ndó cundedóho-ndo tnúhu-gá, chi cùu-xi tnúhu sá cáháⁿ nàcuáa naníhí tàhú-ndó. ²⁷ Te nchaa ñáiyu ndècu ñuu Jerusàlén ndihì nchaa cue tée cùnuu ñá ní cùtnunì iní-yu ndihì-güedé sá Yá Ndiòxí ní tendaha-gá Jèsús ní quixi-gá ñuyíú-a. Te ñá ní sàha-yu cuèndá sá díú Jèsús ní cacunehe cue tée ní cáháⁿ tnúhu Yá Ndiòxí ndéé sanaha cuèí ní dácuhá-yu

tnúhu-gá veñúhu-yu ndi tnahá úná nduu, nduu ndetátú-yu. Te ní cachí-yu sá ndècuéchi Jèsús, te ní xáháⁿ-yu sá cáhni ñaha-güedé xii-gá. Te xíáⁿ sa náha cue téé ní xóo cáháⁿ tnúhu-gá ndéé sanaha sá dúcáⁿ cãháⁿ-yu. ²⁸ Te cuéi ñá túú nã ní quide-gá te ní xáhãⁿ-yu xii té Pilatú téé cùu gobiernú sá táúchìuⁿ-dé cahni ñaha-güedé xii-gá. ²⁹ Te xíáⁿ núu ní sata caa ñaha-güedé xii-gá núú cùrúxí. Te ní quide-güedé nchaa nàcuáa ní chídó tnùnì cue téé ní cáháⁿ tnúhu Yá Ndiòxí ndéé sanaha. Te sátá nì xíhí-gá, te ní nunehe ñaha-güedé xii-gá núú cùrúxí, te nchìdo ñaha-güedé cuáhãⁿ, te ní chihì ñaha-güedé ìⁿ xití yaú. ³⁰ Te Yá Ndiòxí ní dándótó-gã Jèsús. ³¹ Te titní xito ní sáhãⁿ Jèsús núú ndécú ñáyiu ní xica cuu ndihì-gá, ñáyiu ní quee distrítu Galileá ní sáhãⁿ-yu ndihì-gá ñuú Jerusálén. Te vitna nchaa ñáyiu-áⁿ xáhãⁿ-yu xii dava-gá ñáyiu isràél nàcuáa ní cuu ní ndoto-gá.

³² Te nchúhú cãháⁿ-ndí nàcuáa cada-ndo naníhí tàhú-ndó, chí Yá Ndiòxí ní xáhãⁿ-gã xii cue ñani tnahá-ó nì xíndecu ndéé sanaha sã téndàha-gã Déhe-gã Jèsús quixi-gã ñuyú-a. ³³ Te ní quixi-gá ní xíhí-gá, te ní dándótó ñaha Yá Ndiòxí xii-gá, te núu xíáⁿ naníhí tàhú-ó núu na quíndáa iní-ó-gã. Te ìⁿ téé ní cáháⁿ tnúhu Yá Ndiòxí ndéé sanaha ní chídó tnùnì-dé núú sãlmú cúú úú nàcuáa ní cáháⁿ Yá Ndiòxí ní xáhãⁿ-gã xii Déhe-gá, te duha ní xáhãⁿ-gã: “Yòhó cúú-n Dèhe-í, te vitna cutnùnì iní ñáyiu sá yùhú cúú-í Tãtã-n”, duha ní xáhãⁿ-gã xii Jèsús. Te ñu-ni ducaⁿ nì chídó tnùnì téé ní cáháⁿ tnúhu-gá ndéé sanaha. ³⁴ Te ñngã xichì tucu núú tütú-gá ní chídó tnùnì ìⁿ téé ní xíndecu ndéé sanaha nàcuáa ní xáhãⁿ-gã xii Déhe-gá, te duha ní xáhãⁿ-gã: “Mee-nì sã vãha cada ñaha-í dàtná ní xí-í té Dàvíí”, duha

ní xáhãⁿ-gã. Te ducaⁿ nì chídó tnùnì téé ní xíndecu ndéé sanaha nàcuáa ní cáháⁿ Yá Ndiòxí, chí òré ní xíhí Jèsús te ní dándótó ñaha-gá cuendá sã vã tíú yìqui cuñú-gá. ³⁵ Te núu xíáⁿ duha ní chídó tnùnì ìⁿ téé ní xíndecu ndéé sanaha núú librú Sãlmú nàcuáa ní xáhãⁿ-dè xii-gá: “Vã dáñã-n sã tíú yìqui cuñú Déhe-n chí ò vãha quide-gã”, duha ní chídó tnùnì téé ní xíndecu ndéé sanaha — cáhí té Pãblú xáhãⁿ-dè xii-yu.

³⁶ Te xáhãⁿ tucu-dé:

—Te té Dàvíí ní quide-dé nchaa chiuⁿ ní táhú Yá Ndiòxí cada-dé, te dàtnùnì ní xíhí-dé. Te ní chindúxi ñaha-güedé xii-dé yatni nàcuáa yíndúxi cue ñani tnahá-dè ndéé sanaha-gã, te xíáⁿ nì téhyú yìqui cuñú-dé. ³⁷ Te Jèsús chí ñá ní téhyú yìqui cuñú-gá, chí ní dándótó ñaha Yá Ndiòxí xii-gá. ³⁸ Te cuiní-í cachí tnúhu-í xii-ndo cuendá cutnùnì iní-ndo nchaa-ndo sã cadá càhnu iní Yá Ndiòxí nchaa cuéchi-o, chí ní xíhí Jèsús cuendá naníhí tàhú-ó.

³⁹ Te nchaa ñáyiu na quíndáa iní ñáhã xii Jèsús te cada càhnu iní-gã nchaa sã ñá túú vãha ní quide-yu, chí núu mee-nì tnúhu ní chídó tnùnì ndí Moisés ná quíndáa iní-yu te vã naníhí tàhú-yu. ⁴⁰⁻⁴¹ Te ò coto-ndo mée-ndo cuendá sã vã yãha-ndo dàtná ní cachí Yá Ndiòxí yãha cue ñáyiu ñá túú ní quide vãha ní xíndecu ndéé sanaha. Te nàcuáa ní cáháⁿ-gã ní chídó tnùnì ìⁿ téé ní cáháⁿ tnúhu-gã ndéé sanaha, te duha ní xáhãⁿ-gã xii-yu dàvã-áⁿ:

Cundedóho nchaa nchòhó ñáyiu cuéhé yuhu-xi na cáháⁿ-í ìⁿ tnúhu te quiní-ndó nã cuñúhu-ndo,

yúhú quidè-í vãi núú sã ò vãha vitna ndècu-ndo ñuyú-a, te cuéi na còo ñáyiu cachí tnúhu xii-ndo nàcuáa ndúu nchaa sã vãha-áⁿ, dico nchòhó vã quíndáa iní-ndó,

te sã dúcãⁿ càda-ndo vã quíndáa iní-ndó, te dàcuíta ni-hnu-ndo mée-ndo.

Duha ní xáhaⁿ-gã xii-yu te ducaⁿ ní chídó tnúni téé ní cáháⁿ tnúhu-gá ndéé sanaha —càchí té Páblú xáhaⁿ-dë xii-yu.

⁴² Te òré ní ndee té Páblú veñúhu ñáiyu isràél ndihí cue téé xica cuu ndihí-dé, te ní cáháⁿ ndàhú ñáiyu yihí veñúhu núú-dë sá quihíⁿ-dé núú ùná nduu, te ñu-ni tnúhu ní cáháⁿ-dé cáháⁿ tucu-dé òré quexio-dé. ⁴³ Te sáta ní túhú veñúhu-yu, te vai ñáiyu isràél ndihí ñáiyu ní chitnahá ñáhá xii-yu nchícúⁿ nihnu quide nacuaá quide-yu càháⁿ ndihí-yu Yá Ndiòxí cuáháⁿ ndihí-yu té Páblú ndihí té Bèé. Te ní xáhaⁿ-güedë xii-yu sá vã dáñá ndéé-yu canchicúⁿ nihnú-yu tnúhu sá càháⁿ nàcuáa quide Yá Ndiòxí sá cúú-xi-yu.

⁴⁴ Te núú ùná nduu, nduu ndetátú-yu ní quexio vai vihi ñáiyu, chi nihí ñuú ní quexio ndedóho-yu tnúhu Yá Ndiòxí. ⁴⁵ Te cuèndá sá ïo vai ñáiyu ní quexio, núú xiáⁿ ní cuu cuédú ïní ñáhá ñáiyu isràél xii té Páblú, te ní xicuèhé ñáhá-yu xii-dé. Te ní xáháⁿ-yu xii-dé sá dándàhú ñáhá-dë xii-yu ndihí tnúhu càháⁿ-dé. ⁴⁶ Te té Páblú ndihí té Bèé ñá túú ní yùhú ñáhá-güedë xii-yu. Te ní xáhaⁿ-güedë:

—Xini ñuhu-xi díhna-gá nchòhó ñáiyu isràél cáháⁿ ndihí-ndí tnúhu Yá Ndiòxí, te mee-ndo ñã cuíni-ndó cündedóho-ndo. Te sá dúcáⁿ quide-ndo, te vã nánihí tàhú-ndó, te ni vã càháⁿ-gá-ndí tnúhu Yá Ndiòxí núú-ndó, dico cáháⁿ-ndí núú dàva-gá ñáiyu cuèi ñá díú ñáiyu isràél cúú-yu, ⁴⁷ chi ducaⁿ ní táuchíúⁿ Yá Ndiòxí cada-ndí. Te ní cachí-gá:

Cuini-í cundecu-ndo dàtná ïⁿ téé yòtnuú ñuhú cundecu-ndo càháⁿ-ndó tnúhu-í núú nchàa ñáiyu ñá túú cündihí-ndo ñáiyu ndècu nihí ñuyúú, te naníhí tàhú-yu, duha ní cáháⁿ-gá —càchí té Páblú ndihí té Bèé xáhaⁿ-güedë xii-yu.

⁴⁸ Te ñáiyu ñá túú cùu ñáiyu isràél ïo ní cudíí ïní-yu sá dúcáⁿ ní cáháⁿ-güedë, te ní xitnàhá-yu sá ïo váha cuáháⁿ tnúhu Yá Ndiòxí. Te mee Yá Ndiòxí sa nàha-gá nándi cùu ñáiyu naníhí tàhú, te ñu-ni ñáiyu-áⁿ ní sándáá ïní-yu. ⁴⁹ Te nchaa xichi xiáⁿ ní sáháⁿ-yu ní cáháⁿ-yu tnúhu-gá. ⁵⁰ Te cue téé isràél ní ndatnúhu-güedë ndihí cue téé cùnuu, ndihí cue ñáiyu ñihí cùnùu, te ñáiyu ñihí-áⁿ ñã túú tnàhí cùmáñi-yu veñúhu. Te ní xáhaⁿ-güedë sá cádá ùhú-yu té Páblú ndihí té Bèé, te dàtnúni cuícúⁿ ñáhá-yu xii-güedë, te ducaⁿ ní quide-yu. ⁵¹ Te ní casaⁿ ñuhu té Páblú ndihí té Bèé sáhá-güedë ní naquidi-güedë tíca chúhmá ní tñi sáhá-güedë. Te ducaⁿ ní quide-güedë cuèndá cutnùni ïní-yu sá ñã túú ní quide váha-yu. Te dàtnúni ní quee-güedë cuáháⁿ-güedë ñuú Ìconiú. ⁵² Te ñáiyu ní sándáá ïní-xi tnúhu Jèsús ïo váha ní cuu ïní-yu cuèndá sá ní naníhí tàhú-yu, te nchaa-yu sa ndècu ndihí-yu Espiritú Yá Ndiòxí.

14

Té Páblú ndihí té Bèé ndécú-güedë ñuú Ìconiú

¹ Te ní quexio té Páblú ndihí té Bèé ñuú Ìconiú. Te ní sáháⁿ-güedë veñúhu ñáiyu isràél, te ïo váha ní cáháⁿ-güedë tnúhu Yá Ndiòxí, te vai ñáiyu isràél ndihí ñáiyu ñá túú cùu ñáiyu isràél ní sándáá ïní-yu tnúhu-gá. ² Te dava ñáiyu isràél ñã ní sándáá ïní-yu, te ní cáháⁿ cuèhé-yu cuèndá té Páblú ndihí té Bèé cuèndá sá vã quíndáá ïní ñáiyu ñá túú cùu ñáiyu isràél. ³ Te ní xindecu-güedë titní nduu, te ñã túú tnàhí ní yùhú-güedë ní dácuáhá-güedë ñáiyu tnúhu Yá Ndiòxí. Te mee-gá ní chindee ñàha-gá ní quide-güedë titní núú sã vã yòo tnàhí ndàcu cada, te

ío ní cuñúhu-yu. Te ducaⁿ ní quide-gá cuendá cutnùní iní-yu sá ndáá càháⁿ-güedé sá méé-gá ío cùu iní ñáhá-gá xii-yu, te naníhí tãhú-yu núu na quindáá iní-yu tnúhu-gá. ⁴ Te ní quee dava ñáiyu ñúú Ìconiú, davá-yu cùndihí-yu ñáiyu isràél ñáiyu ñá túú sãndáá iní tnúhu Jèsús. Te davá-yu cùndihí-yu cue tée ní táuchíúⁿ Jèsús càháⁿ tnúhu-gá. ⁵ Te ñáiyu isràél ndihí dava-gá ñáiyu ñá túú sãndáá iní-xi ní cuu ìⁿnúú-yu ndihí cue tée cùnúu sá cáni-yu-güedé, te cuáha yúú ñáhã-yu xii-güedé. ⁶ Te té Pãblú ndihí té Bèé ní níhí-güedé tnúhu sá cuiní-yu canihá-yu, núu xíáⁿ dayuhu ní quee-güedé cuáhãⁿ-güedé ñúú Lìstrá ndihí ñúú Dèrbé. Te ndi ndúú ñúú-áⁿ yíndèhu-xi Licaoniá. Te ní sáhãⁿ-güedé dava-gá ñúú líhli càa yatni xíáⁿ. ⁷ Te nchaa ñúú-áⁿ ní càháⁿ-güedé tnúhu Jèsús.

Ñúú Lìstrá ní sãha yúú ñáhã-yu xii té Pãblú

⁸ Te ñúú Lìstrá ndécú ìⁿ tée yacua, mee-ni núcóo-dé chi ducaⁿ tnàhí càa-dé ní cacu-dé. ⁹ Te ndédóho-dé tnúhu càháⁿ té Pãblú, te ní cutnùní iní té Pãblú sá ío sãndáá iní tée yacua-ãⁿ sã Yã Ndiòxí cada tátna ñaha-gã xii-dé, núu xíáⁿ ní xíndéhé ñaha váha té Pãblú xii-dé. ¹⁰ Te té Pãblú ní càháⁿ níhi-dé, te ní xáhaⁿ-dè:

—Ndacuñí cunutnii váha-n — cãchí-dé xáhaⁿ-dè.

Te ní ndacuñí cunu-dé te ní xica-ni-dé. ¹¹ Te òré ní xini-yu sá té Pãblú ní quide tátna-dé tée yacua-ãⁿ, te ncháa-yu ní càháⁿ-yu tnúhu méé-yu tnúhu Licàoniá. Te ní càháⁿ níhi-yu, te xitnãhá-yu:

—Cue tée-ãⁿ sãnuu sá ñáiyu cùu-güedé dico ñáhã, chi ndiòxí cùu-güedé te ní quexìo-güedé ñuyú-a — cãchí-yu xitnãhá-yu.

¹² Te ní cachí-yu sá té Bèé cùu-dé ndiòxí dánàni-yu Jüpitér, te té Pãblú cùu-dé ndiòxí dánàni-yu

Mèrcuriú, chi cuendá tée-áⁿ cùu-dé tée càháⁿ. ¹³ Te càa ìⁿ veñúhu yuhu ñúú-áⁿ núú quidé càhnú-yu ndiòxí sá dánàni-yu Jüpitér. Te dútú yíndãha veñúhu-áⁿ ndécã-dè ìⁿ úú ndicutu cuáhãⁿ quehé veñúhu, te ñùhu itá dúcúⁿ-güedi. Te cue quiti-áⁿ cahni-dé cada càhnú-dé ndihí-yu té Bèé ndihí té Pãblú ní cùu, chi ducaⁿ quidé-yu quide càhnú-yu ndiòxí-yu. ¹⁴ Te té Bèé ndihí té Pãblú ní níhí-güedé tnúhu nãcuáa sãni iní-yu cadã-yu, te ní ndátã-güedé dóo-güedé cuendá cutnùní iní-yu sá ñã tnãhá iní-güedé nãcuáa sãni iní-yu cadã-yu. Te xinu-güedé cuãnguihu-güedé tnuu-yu, te níhi ní càháⁿ-güedé, te xáhaⁿ-güedé:

¹⁵ —¿Nã cuendã ducaⁿ cuiní-ndó càda-ndo? Te ñu-ni tnãha ñáiyu-ndo cùu-ndí, dicó-ni tnúhu Yã Ndiòxí véxi-ndí dacuãha ñaha-ndí xii-ndo cuendã sã vã cadã-gã-ndó nãcuáa quide-ndo, te quindãá iní-ndó Yã Ndiòxí, chi ìⁿdii-ni Yã Ndiòxí ndécú. Te ñu-gã ní cadúha-gã andíu ndihí ñuyú-a ndihí lámãr ndihí ncháandi túhú sã ío ñuyú-a. ¹⁶ Te ndéé sanaha ní dáñã Yã Ndiòxí ní quidé-yu nãcuáa cuáhãⁿ iní méé-yu. ¹⁷ Te ní xóo cada-gã sã váha cuendã cutnùní iní-yu sã ío váha iní-gã. Te ñu-gã dácuuⁿ-gã dáú, te tàxi-gã sã nchító-ó chi xito-gã nchaa tátã xítú-ó, te xíãⁿ cúdñí iní-ó ndècu-o ñuyú-a — cãchí té Pãblú ndihí té Bèé xáhaⁿ-güedé xii-yu.

¹⁸ Te cuéi ducaⁿ ní xáhaⁿ-güedé nchaa tnúhu-áⁿ, dico ío úhú ní sãndãá iní-yu ñã ní sãhni-yu ndicutu-áⁿ chi cuendã ducaⁿ tnãhí quidé-yu sãhni-yu ndicutu òré quidé càhnú-yu ndiòxí-yu.

¹⁹ Te ñúú Antiòquiã ndihí ñúú Ìconiú xíndecu dava ñáiyu isràél, te ní quee-yu cuáhãⁿ-yu ñúú Lìstrá núú ndécú té Pãblú. Te xíáⁿ ní quexìo-yu te ní xáháⁿ-yu xii ñáiyu dii ñúú xíáⁿ sã càhni-yu té

Päblú. Te ní sáha yúú ñáhã-yu xii-dé, te ní cáhãⁿ-yu sá ñí xihí-dé, te ní tñi ñaha-güedé xii-dé, te tãñuhu ñaha-güedé xii-dé cuáhãⁿ ñⁿ xio yuhu ñúú ní sá dáquéné ñaha-güedé. ²⁰ Te ní quexio cue ñáyi sándáá iní tñuhu Jèsús núú cátuu-dé-áⁿ, te ní nadúcúⁿ ndéé ñáhã-yu xii-dé, te ñini xñutñiⁿ-yu-áⁿ ñí ndacóo-dé cuánuhú ndihí ñaha tucu-dé xi-yu xití ñúú. Te nduu tñéé-áⁿ ñí ndee-dé ndihí té Bèé cuáhãⁿ-güedé ñúú Dèrbé.

²¹ Te ní cáhãⁿ-güedé tñuhu Yá Ndiöxí ñúú-áⁿ, te ío vãi ñáyi ní sándáá iní-yu tñuhu-gá. Te dàtnùní ní quee-güedé cuáhãⁿ tucu-güedé ñúú Listrá, ndihí ñúú Ìconiú, ndihí ñúú Antiöquiá. ²² Te ní xáhaⁿ-güedé xi-yu sá vã dáñá ñihnú-yu tñuhu Jèsús. Te sá dúcáⁿ ñí cáhãⁿ-güedé, te vñhi-gá ní cudíⁿ iní-yu cadá-yu nãcuáa cuíni Yá Ndiöxí cadá-yu, te ní xáhaⁿ-güedé:

—Dacuití cùndecu-o ñuyúú-a ndoho-o, te dàtnùní ducaⁿ te nacuaca ñaha Yá Ndiöxí xii-o — cãchí-güedé xáhaⁿ-güedé xi-yu.

²³ Te ní sáhãⁿ-güedé ndi tnahá ñⁿ ñⁿ xichí núú ndécú ñáyi dàcuaha tñuhu Yá Ndiöxí, te ní taxi ndecu-güedé cue téé quindaha ñaha xi-yu, te ní cáhãⁿ ndihí-güedé Yá Ndiöxí, te ñá túú tñáhí ná ní xèxi-güedé cuëndá sá ñí cáhãⁿ ndihí-güedé-gá. Te ní xáhaⁿ-güedé sá Yá Ndiöxí coto ñaha-gã xi-yu chi diu-ni-gá ní sándáá iní-yu.

Té Päblú ndihí té Bèé cuáhãⁿ tucu-güedé ñúú Antiöquiá Siria

²⁴⁻²⁵ Te dàtnùní ní quee té Päblú ndihí té Bèé cuáhãⁿ-güedé, ní yáha-güedé distritú Pisidiá. Te ní quexio-güedé ñúú Pèrgé, xiáⁿ ñí cáhãⁿ-güedé tñuhu Jèsús. Te ñúú-áⁿ yíndèhu-xi Panfliá. Te dàtnùní cuáhãⁿ-güedé ñúú Àtaliá. ²⁶ Te yàcáⁿ ní quee-güedé bàrcú cuánuhú tucu-güedé ñúú

Antiöquiá. Te ñúú-áⁿ cúu-xí ñúú núú ñí xicáⁿ tãhú-yu núú Yá Ndiöxí cuëndá sá chñdèe ñaha-gá xii-güedé chiuⁿ quide-güedé. Te cuëndá sá ñí ndihí chiuⁿ-güedé nchaa ñúú núú ñí sáhãⁿ-güedé, núú xiáⁿ cuánuhú-na-güedé. ²⁷ Te ní ndexio-güedé ñúú-áⁿ, te ní cana-güedé nchaa ñáyi sándáá iní tñuhu-gá, te ní cani-güedé cuëndú núu-yu nchaa nãcuáa ní cuu núú ñí sáhãⁿ-güedé, te xáhaⁿ-güedé: “Yá Ndiöxí ío ní chindee ñaha-gá xii-ndí ní cáhãⁿ-ndí tñuhu-gá núú ñí sáhãⁿ-ndí, te mee-gã ní quide sá tñahá ñáyi ñá túú cuu ñáyi isràél ní xíndedóho-yu tñuhu-gá cuëndá quíndáá iní-yu”, cãchí-güedé xáhaⁿ-güedé xi-yu. ²⁸ Te vãi nduu ní xíndecu-güedé ñúú Antiöquiá ndihí nchaa ñáyi ní sándáá iní tñuhu Jèsús.

15

Ní natacá ñáyi sándáá iní tñuhu Jèsús ñúú Jerusalén

¹ Te ní quee ñⁿ úú cue téé distritú Jùdeá cuáhãⁿ-güedé ñúú Antiöquiá, te ní sáa-güedé, te ní xáhaⁿ-güedé xii ñáyi sándáá iní tñuhu Jèsús sá núu vã cuãha-güedé señá ñiⁿ nchaa cue téé dàtná ní cachí ndí Moisés, te vã nánihí tãhú-güedé. ² Te sá dúcáⁿ ñí cáhãⁿ cue téé-áⁿ, te ní ngüíta té Päblú ndihí té Bèé ní tenàa-güedé cue téé-áⁿ, chi dandàhú ñáhã-güedé cuíni-güedé ní cuu. Te nchaa ñáyi sándáá iní tñuhu-gá ní cachí-yu sá quíhíⁿ té Päblú ndihí té Bèé ndihí ñⁿ úú-gá-güedé ñúú Jerusalén. Te yàcáⁿ cada-güedé ñⁿ jündá ndihí mee-ni cuè téé ní táuchíúⁿ Jèsús cáhãⁿ tñuhu-gá, ndihí cue téé yíndaha ñáyi sándáá iní tñuhu-gá ñúú-áⁿ, te jündá-áⁿ cada ndáa-güedé tñuhu ní cáhãⁿ cue téé ní sáa ñúú Antiöquiá.

³ Te nchaa ñáyi sándáá iní tñuhu-gá ní quide ndee iní ñáhã-yu

xii-güedé, te ní tñi-güedé ichi cuáhán-güedé. Te ní yáha-güedé distritú Fènicíá ndihi distritú Sámariá, te yàcáⁿ ní cani-güedé cuèndú nása ní cuu ní tuha ñáyiú ñá túú cùu ñáyiú isràél ichi Yá Ndiòxí, te ní cudíí víhí iní nchaa ñáyiú ní xíndedóho-áⁿ.

⁴ Te té Páblú ndihi té Bèé ní ndexìo-güedé ñuú Jerusalén, te ío ní cudíí iní-yu sá ní ndexìo váha-güedé. Te ndècu dava-gá cue téé ní táuchíúⁿ Jèsús dacuàha ñaha xii-yu tnúhu-gá, ndihi cue téé yìndaha ñaha xii-yu, ndihi dava-gá ñáyiú sàndáá iní tnúhu-gá, te ní cani-güedé cuèndú núu-yu nàcuáa ní quide Yá Ndiòxí ní chindee ñaha-gá xii-güedé ní quide-güedé chiuⁿ-gá. ⁵ Te ndècu ñⁿ úú cue téé ní tuha ichi Yá Ndiòxí, te cue téé-áⁿ cúu-güedé cue téé fariséu, te ní ndacuíñi-güedé, te ní xáhaⁿ-güedé:

—Dacuitíí xini ñuhu-xi sá cuàha-güedé sèñá ñiⁿ cue téé cùmání cue téé ñá túú cùu ñáyiú isràél, te cùñaha-ndo sá ná cadá-güedé nchaa nàcuáa ní chídó tnùnì ndíi Moisés —càchí cue téé cùu fariséu-áⁿ xáhaⁿ-güedé xii-güedé.

⁶ Te cue téé ní táuchíúⁿ Jèsús dacuàha ñaha xii ñáyiú tnúhu-gá, ndihi cue téé yìndaha ñáyiú sàndáá iní tnúhu-gá ní quide-güedé jùndá cuèndá ní ndatnúhu-güedé nása cunduu. ⁷ Te vài vihi tnúhu ní cáháⁿ-güedé. Te té Pèlú ní ndacuíñi-dé, te ní xáhaⁿ-dè xii-güedé:

—Nchòhó cue téé ndècu ndihi-í ichi Xítóhó Jesucristú, chí cùndedóho ñⁿ tnúhu na càháⁿ-í-a. Sa nàha-ndo sá ní cachí Yá Ndiòxí sá díu-í cáháⁿ-í tnúhu Jèsús núu ñáyiú ñá túú cùu ñáyiú isràél cuèndá sá quìndáá iní-yu, te naníhí tàhú-yu. ⁸ Dico Yá Ndiòxí sa nàha-gá nása càa iní ñⁿ ñáyiú. Te cùtnunì iní-ó sá cúu iní ñáhá-gá xii cue ñáyiú ñá túú cùu ñáyiú isràél, chí ní sáñaha-gá Espiritú-gá ndécú ndihí-yu dàtná

cuíní-ndó ní taxi-gá ndécú ndihí nchoo. ⁹ Chi Yá Ndiòxí ñⁿ nuu-ni cùu iní ñáhá-gá xii-o nchàa-o ndihi cue ñáyiú ñá túú cùu ñáyiú isràél, chí tnàhá-yu ní xócání-gá nchaa sá cuèhé sá dúhá ní xóo cadá-yu ndéé òré ní sàndáá iní-yu Jèsús. ¹⁰ ¿Te ná cuèndá nchòhó cuíní-ndó càda ñáyiú ní sàndáá iní tnúhu-gá ñⁿ sá ñá tnàhá iní-gá sá cadá-yu? Te cuíní-ndó dándoho-ndó-yu. Te nì nchòe te nì cue ñanì tnàhá-ó ní xindecu ndéé sanaha ñá ní ndàcú-yu cadá-yu nchaa xiáⁿ.

¹¹ Te vá dúcáⁿ càháⁿ-ndó, chí sa nàha-ndo sá Yá Ndiòxí ní cundahú iní ñáhá-gá xii-o, te diò ducaⁿ ní quide-gá sá naníhí tàhú-ó nchàa-o. Te diu-ni ducaⁿ ní quide-gá ñáyiú ñá túú cùu ñáyiú isràél, te ní naníhí tàhú-yu —càchí té Pèlú xáhaⁿ-dè xii-güedé.

¹² Te dàtnunì té Bèé ndihi té Páblú ní ngúita-güedé ní cáháⁿ-güedé, te ní xíndedóho-yu nchaa tnúhu ní cáháⁿ-güedé. Te ní xáhaⁿ-güedé xii-yu nàcuáa ní chindee ñaha Yá Ndiòxí xii-güedé, te ní quide-güedé vài núu sá vā yòo tnàhí ndàcu cada, te ducaⁿ te ní cutnùnì iní ñáyiú ñá túú cùu ñáyiú isràél sá ndáá càháⁿ-güedé. ¹³ Te òré ní ndihi cuèndú ní cáháⁿ-güedé, te té Jàcobó ní xáhaⁿ-dè:

—Nchòhó cue téé ndècu ndihi-í ichi Xítóhó Jesucristú, chí cùndedóho ñⁿ tnúhu na càháⁿ-í-a. ¹⁴ Té Xímú, àdi Pelú chí úú diu-dé, ní cani-dé cuèndú nàcuáa ní quide Yá Ndiòxí ndéé díhna ní dáquéé díⁿ-gá ñáyiú ñá túú cùu ñáyiú isràél tnuú nchaa ñáyiú ñá túú ndècu ichi-gá, cuèndá cuíní-gá chiñuhu ñáhá-yu xii-gá. ¹⁵ Te dàtnunì ní cáháⁿ-dé nàcuáa ní cáháⁿ Yá Ndiòxí ndéé sanaha. Te duha ní chídó tnùnì cue téé ní xóo cáháⁿ tnúhu-gá ndéé sanaha nàcuáa ní cáháⁿ-gá, te duha ní cachí-gá:

¹⁶ Dàtná cuíní-ndó cùu ñⁿ vehe ní sáá te ní ngoyo te dàndaa-güedé xito cùu úú,

ducaⁿ sãtnahá-xi cada-xi ñⁿ
nduu,
chi ñaní tnáhá ndíi Dávíí ní xóo
cáháⁿ ndíhi ñáhá-yu xii-í
ní cùu, te ní dáñá ndèè-yu
ichi-í,

te na quixi-í te natuha ñaha tùcú-yu.

17 Te ducaⁿ te vãi ñáyíu ñá túú
cùu ñáyíu isràél nandúcú-yu
ichi-í te cáháⁿ ndíhi ñáhá-yu.

18 Duha ní cáháⁿ Yã Ndióxi, te ducaⁿ
ní chídó tnùní cue téé ní xóo cáháⁿ
tnúhu-gá ndéé sanaha —càchí té
Jácobó xáhaⁿ-dè xii-güedé.

19 Te xáhaⁿ tùcu-dé:

—Yúhú càchí iní-í sá vã cúú
dàsatu-ó iní nchaa ñáyíu ta sãndáá
iní-xi tnúhu Yã Ndióxi, ñáyíu ñá
túú cùu ñáyíu isràél, te ñⁿ úú-ni
tnúhu cúñaha-o nàcuáa cada-yu.

20 Dico xini ñuhu-xi daquihíⁿ-ó tùtú
cúñaha-o sã vã caxí-gã-yu nchaa
sá nchító-ó ndùu táhú nchaa sá
càchí-yu cùu ndióxí-yu. Te cúñaha-o
sã vã cáháⁿ ndíhi cue téé ñadíhi te
núu ñá díú ñadíhi-güedé cúu-yu, te
ni cuè ñáyíu díhi vã cáháⁿ ndíhi-yu
téé te núu ñá díú yí-yu cùu-güedé, te
vã caxí-yu cuñú quití cuèhné, te vã
caxí-yu níñí. 21 Te ducaⁿ cúñaha-o,
chi ndi tnahá ñuú núu ndécú-yu,
te xĩndecu ñáyíu isràél dácuahá-yu
tnúhu ní chídó tnùní ndíi Moisés,
te ndi tnahá nduu ndètátú-yu
dàcuahá-yu tnúhu ndíi veñúhu-yu
—càchí té Jácobó xáhaⁿ-dè xii-güedé.

22 Te dàtnùní cue téé ní táuchíúⁿ
Jèsús dácuahá ñaha xii-yu tnúhu-gá,
ndíhi cue téé yĩndaha ñáyíu sãndáá
iní tnúhu-gá ní cachí-güedé sá
ndúcú-güedé ñⁿ úú-gá cue téé quíhiⁿ
ndíhi té Páblú ndíhi té Bèé ñuú
Antiòquiá, te diu-ni ducaⁿ ní cáháⁿ
dava-gá ñáyíu ndècu ichi-gá. Te
úú cue téé ní ndúcú-güedé, ñⁿ-dé
nání-dè Silás, te ñⁿ-dé nání-dè Jüdás,
àdi Barsabás chi úú diu-dé, te
cùnuu-güedé ndi ndúú-güedé. 23 Te
ní cadúha nchaa cue téé cùnuu
tutú canehe-güedé quíhiⁿ, te duha
cáháⁿ-xi:

“Cóvãha díi-ndó nchaa-ndo.
Nchúhú cue téé ní táuchíúⁿ Jèsús
cáháⁿ-ndí tnúhu-gá, ndíhi cue
téé yĩndaha cue ñáyíu sãndáá
iní tnúhu-gá quide ndee iní
ñáhá-ndí xii nchòhó cue ñáyíu
ndècu ndíhi-ndí ichi-gá cuèi ñá díú
ñáyíu isràél cúu-ndó. Te nchòhó
ñáyíu xĩndecu ñuú Antiòquiá, ndíhi
nchòhó ñáyíu ndècu distritú Siriá,
ndíhi nchòhó ñáyíu ndècu distritú
Ciliciá, càchí tnúhu-ndí xii-ndo
sã 24 ní níhi-ndí tnúhu sá ñⁿ úú
cue téé ndècu iha ní quixi-güedé
núu ndécú-ndó, te ñá túú chiúⁿ
ni tahu-ndí quixi-güedé. Te
sá ñⁿ tnúhu ní cáháⁿ-güedé ní
xáhaⁿ-güedé xii-ndo sã ngĩndecu
sèñá ñii-ndo, te canchicúⁿ ni-
hnu-ndo nchaa nacúaa ní chídó
tnùní ndíi Moisés, te xiãⁿ ní sani
ñⁿ ní sani úú iní-ndó, chi ñá
túú xini-ndó nõu ndáá tnúhu
cáháⁿ-güedé adi ñá ndáa. 25 Te ní
ndatnúhu-ndí nàcuáa cunduu sá
téndaha-ndí úú cue téé quixi-güedé
ndíhi té Bèé ndíhi té Páblú, cue
téé ío cùu iní-ndí, te cue téé-ãⁿ
cáháⁿ-güedé nàcuáa cáháⁿ-ndí-a.
26 Te diu-ni té Bèé ndíhi té Páblú ní
sáháⁿ-güedé ní cáháⁿ-güedé tnúhu
Xítóhó Jesucristú nchaa xichi. Te
ndi tnahá cuáháⁿ-güedé cuini-yu
cahni ñáhá-yu xii-güedé. 27 Te
tendaha-ndí té Jüdás ndíhi té Silás
quixi-güedé tnahá-güedé cachí
tnúhu váha-güedé nàcuáa cuáháⁿ
tnúhu cáháⁿ-ndí. 28 Te diu-ni
ducaⁿ cáháⁿ-ndí càchí tnúhu-ndí
nàcuáa cáháⁿ Espiritú Yã Ndióxi
cada-ndo, chi nchúhú vã cáháⁿ-ndí
sá cadá-ndó nchaa sã ní cáháⁿ
ndíi Moisés cada ñáyíu, chi ío
úhú, te vã yõo ndacu cada. Te
vĩtna na cáháⁿ-ndí ñⁿ úú-ni tnúhu
nàcuáa cada-ndo. 29 Vã caxí-ndó sã
nchító-ó ndùu táhú nchaa sá càchí
ñáyíu cùu ndióxí-yu, te vã caxí-ndó
níñí, te vã caxí-ndó cuñú quití
cuèhné, te vã cáháⁿ ndíhi cue téé

ñadihi te núu ñá díú ñadihi-güedé cúu-yu, te ni cue ñáyiú díhi vá cáhán ndihí-yu téé te núu ñá díú yíi-yu cùu-güedé. Te núu na càda-ndo nchaa nacuaá cáhán-ndí-a, te cada váha-ndo. Te vitna ío cada ndee ñí-ndó ncháa-ndo-na.” Duha ní chídó tnúni-güedé núú tütú ní tendaha-güedé cuáhán.

³⁰ Te ní quide ndee ñí-yu cue téé quíhiñ ñúú Antiòquia, te ducañ te ní xica-güedé cuáhán-güedé. Te òré ní quexìo-güedé ñúú-án, te ní cana-güedé nchaa ñáyiú sàndáá ñí tnúhu Jèsús, te ní sáñaha-güedé tütú xií-yu. ³¹ Te ní dácuáhá-yu tütú ní sáñaha-güedé-án, te ní cudíí víhi ñí-yu chí ío váha cáhán tütú-án. ³² Te té Jùdás ndihí té Silás tnáhá-güedé ní nduu táhú-güedé cáhán-güedé tnúhu sá dácàhu ñí ñáhá Yá Ndiòxí. Te ní xáhañ-güedé vai tnúhu nàcuáa cadá-yu, te víhi-gá ní cudíí ñí-yu cadá-yu nàcuáa cáhán Yá Ndiòxí cadá-yu. ³³ Te ní xíndecu-güedé ñí ùú nduu ndihí-yu, te dàtnúni ní quide ndee ñí ñáhá-yu xii-güedé cuendá sá nùhú-güedé núú vèxi-güedé, te mee-ni té Jùdás cuánuhú-dé. ³⁴ Te té Silás ní xáhañ-dé sá vá nùhú-ni-dé, ³⁵ Te té Páblú ndihí té Bèé ní ndóo-güedé ní cáhán-güedé tnúhu Yá Ndiòxí ñúú Antiòquia, te vai-gá tucu ñáyiú Antiòquia ní cáhán-yu tnúhu-gá.

Xito cùu uú cuáhán té Páblú cáhán-dé tnúhu Yá Ndiòxí núú ñáyiú

³⁶ Te sátá ní cuu cuéhé nduu, te ní xáhañ té Páblú xii té Bèé:

—Na quíhiñ-ó ncháa ñúú núú ní sáhán-ó ní cáhán-ó tnúhu Yá Ndiòxí cáhán ndihí-o ncháa ñáyiú ní tuha ichi-gá cuendá quini-ó nùu ndècu váha-yu —càchí-dé xáhañ-dé.

³⁷ Te té Bèé ní xáhañ-dé sá quíhiñ ndihí-güedé té Juáá, àdi Mácú chí uú díu-dé. ³⁸ Díço té Páblú ñá ní dàña-gá-dé quíhiñ té Juáá, chí ní dándóo ñaha-dé xii-güedé

cútnáhá ní xíndecu-güedé Pànfiliá, te ní nacuico-dé cuánuhú-dé, te ñá tütú-gá ní sáhán ndihí ñaha-dé xii-güedé. ³⁹ Xíáñ ní cuu ní tenáa tnáhá té Bèé ndihí té Páblú, te ichi càa ichi caa ní cuu-güedé. Te té Bèé ndihí té Mácú ní quée-güedé bàrcú cuáhán-güedé Chìpré. ⁴⁰ Te té Páblú ní xáhañ-dé xii té Silás sá quíhiñ ndihí ñaha-dé, te ñáyiú sàndáá ñí-xi tnúhu Jèsús ní cáhán ndihí-yu Yá Ndiòxí sá chíndèe ñaha-gá xii-güedé. ⁴¹ Te ní xica-güedé cuáhán-güedé te ní yáha-güedé ñihí distritú Síría ndihí distritú Cìlicia. Te ní cáhán-güedé tnúhu Jèsús núú ncháa ñáyiú ní sàndáá ñí tnúhu-gá, núu xíáñ ío-gá ní cudíí ñí-yu cadá-yu nàcuáa cáhán Yá Ndiòxí.

16

Tnáhá té Timùteú cuáhán ndihí-dé té Páblú ndihí té Silás

¹ Te té Páblú ndihí té Silás cuáhán-güedé ñúú Dèrbé ndihí ñúú Lìstrá, te ñúú Lìstrá yacáñ ndécú ñí téé nàni Timuteú. Te téé-án sàndáá ñí-dé tnúhu Jèsús, te tnáhá náná-dé sàndáá ñí-añ tnúhu-gá, te ñaha isràél cúu-án, te téé grìégú cúu tātá-dé.

² Te nchaa ñáyiú ní sàndáá ñí tnúhu-gá ñáyiú ndècu ñúú Lìstrá, ndihí ñáyiú ñúú Iconiú, nchaa ñáyiú-án cudíí ñí-yu nàcuáa quide-dé. ³ Te ní cuini té Páblú sá tnáhá té Timùteú quíhiñ ndihí-dé dava-gá ñúú, núu xíáñ díhna-gá seña ní sáha té Páblú ñí té Timùteú, chí ñá ní tnáhá ñí té Páblú sá cáhán cuéhé ñáyiú isràél cuendá té Timuteú. Te nchaa ñáyiú isràél ndécú ñúú-án xini-yu sá téé grìégú cúu tātá-dé, te ñá díú téé isràél cúu-dé, te xíáñ ní sáha té Páblú seña ñí té Timùteú. ⁴ Te ndi tnáhá ñúú ndi tnáhá ñúú cuáhán-güedé cáhán ndihí-güedé nchaa ñáyiú ní sàndáá ñí tnúhu Jèsús. Te ní xáhañ-güedé nàcuáa cáhán tütú ní cadúha cue téé ní táuchíúñ Jèsús dacuàha ñaha

xii-yu tnúhu-gá, ndihí cue tée yíndaha ñáyiú sándáá iní tnúhu-gá ñúú Jerusalén. ⁵ Te cuendá ducaⁿ ní sáháⁿ-güedé nchaa ñúú núú ndécú ñáyiú sándáá iní tnúhu-gá ní dácuáhá ñaha-güedé xii-yu, núú xíáⁿ tá cùu túha-gá-yu tnúhu Yá Ndiöxí, te vai-gá-yu ní tuhá-yu ichi-gá.

Ní dácótó ñaha-xi xii té Páblú sá ní xiní-dé ñⁿ té distritú Macèdoniá

⁶ Te ñá ní daña Espiritú Yá Ndiöxí quihíⁿ-güedé cáháⁿ-güedé tnúhu-gá distritú Àsiá, núú ní sáháⁿ-güedé distritú Frigiá ndihí distritú Gàlaciá cáháⁿ-güedé tnúhu-gá. ⁷ Te ní sáá-güedé yuhu distritú Misiá. Te quihíⁿ-güedé distritú Bitiniá ní cùu, dico ñá ní dàña Espiritú Yá Ndiöxí quihíⁿ-güedé yàcáⁿ. ⁸ Te ní yáha-güedé Misiá, te ní quexio-güedé ñúú Tròás, te yàcáⁿ ní nanínáháⁿ-ndí ndihí-dé. ⁹ Te ñⁿ niú ní dácótó-xi núú té Páblú sá ní xiní-dé ñⁿ té distritú Macèdoniá nútñi-dé, te ní xáhaⁿ tée-áⁿ xii té Páblú: “Cada ndee iní-n quihíⁿ-n Mácèdoniá chi dacuàha ñaha-n nchaa sá xiní-n”, cächí-dé xáhaⁿ-dë, ní dácótó ñaha-xi xii té Páblú. ¹⁰ Te cuendá sá dúcáⁿ ní dácótó ñaha-xi xii té Páblú núú ní ndatnúhu-ndí quihíⁿ-ndí Macèdoniá, chi ní cutnúni iní-ndí sá cáná ñaha Yá Ndiöxí quihíⁿ-ndí cáháⁿ-ndí tnúhu-gá núú ñáyiú yàcáⁿ.

Té Páblú ndihí té Silás ndécú-güedé ñúú Filipú

¹¹ Te ní quée-ndí bàrcú ñúú Tròás, te cuáháⁿ ndáá-ndí ñúú Samòtraciá, te yàcáⁿ ní quexio-ndí, te ní yáha-ni-ndí cuáháⁿ-ndí. Te nduu tnéé ní quexio-ndí ñúú Nèápolis. ¹² Te yàcáⁿ ní quene-ndí bàrcú, te xica-na-ndí cuáháⁿ-ndí ñúú Filipú te ñúú-áⁿ yíndèhu-xi distritú Macèdoniá. Te yàcáⁿ ní cudíi-ndí ní xíndecu tnaa-ndí. Te ñúú Filipú-áⁿ ío cùnuu-xi, chi ío

chitu ñáyiú ròamá ní ngóo-yu. ¹³ Te nduu ndetátú-yu ní quee-ndí ñúú cuáháⁿ-ndí ñⁿ xio yuhu yúte, chi yàcáⁿ sáháⁿ-yu càháⁿ ndihí-yu Yá Ndiöxí. Te òré ní quexio-ndí, te ní naníhí tnáháⁿ-ndí ndihí mee-ni ñáyiú dñí, te ní cáháⁿ-ndí tnúhu Yá Ndiöxí ní xíndedóho-yu. ¹⁴ Te ndècu ñⁿ ñaha nani Lidiá ní xíndedóho-aⁿ nàcuáa ní cáháⁿ-ndí, te ñaha ñúú Tiàtirá cùu-áⁿ, te dico-aⁿ dóo murádú, te ío càháⁿ ndihí-aⁿ Yá Ndiöxí. Te ñⁿ-ni mee Yá Ndiöxí ní chindee ñaha-gá ní sándáá iní-aⁿ tnúhu ní cáháⁿ té Páblú. ¹⁵ Te ní sandute-aⁿ ndihí landú-aⁿ, ndihí nchaa ñáyiú xínu cuechi núu-aⁿ, te ní cachí-aⁿ xii-ndí:

—Te núú ní cutnúni iní-ndó sá ní sándáá ndisa iní-í tnúhu Jèsús, te cundecu tnaa-ndo vehe-í —cächí-aⁿ xii-ndí.

Te ní quide yica-aⁿ ní xíndecu-ndí vehe-aⁿ.

¹⁶ Te ñⁿ nduu ñúhu-ndí ichi cuáháⁿ-ndí núú càháⁿ ndihí-yu Yá Ndiöxí, te ní naníhí-ndí ñⁿ xíchí ñúhú ichi, te yíhí ñaha espíritú cúndihí yucu ñávaha xii-xi. Te xíáⁿ ní quide ní cáháⁿ-xi nchaa sá vã yóo tnáhí cùtnuní iní-xi núú nchaa ñáyiú ní sángándihí ñaha xii-xi. Te ñáyiú dii vehe-xi xínu cuechi-xi ío vai díhúⁿ ní níhí-yu chi ní cháhu nchaa ñáyiú ní sángándihí ñaha xii-xi. ¹⁷ Te xíchí-áⁿ ní chinchicúⁿ ñáhá-xí xii-ndí ndihí té Páblú ndèndaha ñaha-xi cuáháⁿ, te ní cáháⁿ níhí-xi xáhaⁿ-xi xii dava-gá ñáyiú:

—Cue téa-xi xínu cuechi-güedé núú Yá Ndiöxí, chi ío càhnu cuu-gá, te cächí tnúhu-güedé nása cada-ndo naníhí tahú-ndó —cächí-xi xáhaⁿ-xi xii-yu.

¹⁸ Te títní xito ní yáha-ndí ducaⁿ-ni ní cáháⁿ-xi. Te ñá ní cùndee-gá iní té Páblú sá dúcáⁿ càháⁿ-xi, núú ní nanchocuíhu-dé núú nútñi-xi, te ní xáhaⁿ-dë xii

espíritú cúndìhi yucu ñávaha yìhi ñaha xii-xi:

—Ío càhnu cuu Xítohó Jesucrístú, núu xíáⁿ càchí-í sá xócuñí-n vâ quíhí-gá-n yiquí cuñú xíchí-a —càchí-dé xáhaⁿ-dê.

Te òré-ni ní quee espíritú cúndìhi yucu ñávaha-áⁿ yiquí cùñú-xi.

¹⁹⁻²⁰ Te ñáyiú dii vèhe-xi xinu cuechi-xi-áⁿ ní cutnùní iní-yu sá vâ ñhí-gá-yu díhúⁿ cuendá tnúhu càháⁿ-xi, núu ní tñí-yu té Páblú ndihi té Silás ndécá ñàhá-yu cuáhⁿ núu cuè tée cùchiuⁿ Romá, te xáháⁿ-yu xii-güedé:

—Cue tée-a cùu-güedé cue tée isráel, te ío dusaⁿ xíquide-güedé ñuú-ó. ²¹ Te cuñí-güedé cada-o nàcuáa quide-güedé, te vâ cúu dùcaⁿ cada-o chí ñáyiú nacióⁿ Rómá cúu-ó —càchí-yu xáháⁿ-yu xii cue tée cùchiuⁿ.

²² Te uuⁿi ní cáháⁿ nchaá-yu, te xáháⁿ-yu sá ñá túu quide váha té Páblú ndihi té Silás. Te cue tée cùchiuⁿ ní cãndeé-güedé dóo té Páblú ndihi dóo té Silás ní ndátá-güedé, te ní táuchíuⁿ-güedé caniha-güedé ndihi tñudí xii-güedé. ²³ Te ní caniha-güedé, te dãtnùní ní chihi ñaha-güedé vecaá. Te ní xáhaⁿ-güedé xii tée ndënchito vecaá sá cáda cuèdadú víhí-dê cuendá ná canú-güedé vecaá. ²⁴ Te cuendá sá dúcáⁿ ní cáháⁿ-güedé, núu tée ndënchito vecaá ní dáyáha ñaha-dê ingá cuártú ndécú xítí vecaá, te ní chihi-dé sáhá-güedé yaú nduhu, te ní quide tñí-dé.

²⁵ Te dava niú ní cáháⁿ ndihi té Páblú ndihi té Silás Yá Ndióxí, te ní xita-güedé ndudú ní quide càhnu ñaha-güedé xii-gá. Te dava-gá cue tée yìhi vecaá ní xíndedóho-güedé nàcuáa ní xita-güedé. ²⁶ Te uuⁿi níhi víhi ní tnáa ní quidi-xi ndéé cimièntú vecaá, te ní nacaáⁿ nchaa yèhe vecaá, te ní ndihi cadená ndútú cuè tée yìhi vecaá ní nandáxí. ²⁷ Te ní ndiquíú cúnú iní tée ndënchito vecaá, te ní quide

cuendá-dé nchíi nchaa yèhe vecaá. Te ní tava-dé machítí-dé cahni-dé méé-dé ní cùu, chí ní cáháⁿ-dê sá ní ndihi cue tée yìhi vecaá ní xinu ní cùu. ²⁸ Te té Páblú ní cáháⁿ níhi-dé, te xáhaⁿ-dê xii tée ndënchito vecaá:

—Vâ dúcáⁿ càda-n cahni-n mee-n, chí nchaa-ni-ndí yíhí —càchí-dé xáhaⁿ-dê xii tée ndënchito vecaá.

²⁹ Te dãtnùní ní xícáⁿ tée ndënchito vecaá ñuhú, te xinu-dé cuánguihu xítí vecaá núu yíhí té Páblú ndihi té Silás, te quidi ñaha-ná-xi xii-dé ní quexílo-dé ní ngüíñí xítí-dê núu-güedé. ³⁰ Te dãtnùní ndécá ñàhá-dé xii-güedé ní ndee vecaá, te ní xícáⁿ tnúhú-dê núu-güedé, te xáhaⁿ-dê:

—Nchòhó cachí tnúhu-ndo ñasa cada-í naníhí tãhú-í —càchí-dé xáhaⁿ-dê.

³¹ Te ní xáhaⁿ-güedé:

—Quindáá iní-n ndihi ñadihí-n, ndihi landú-n, ndihi nchaa ñáyiú xinu cuechi núu-n tnúhu càháⁿ Xítohó Jesucrístú, te naníhí tãhú-ndo —càchí-güedé xáhaⁿ-güedé.

³² Te ní dácuáhá ñaha-güedé xii tée ndënchito vecaá ndihi nchaa ñáyiú ndècu vehe-dé tnúhu Yá Ndióxí. ³³ Te ñu-ni òré-áⁿ ní naquete-dé sátá-güedé núu ní ñáni, te dãtnùní ní sandute-dé ndihí-yu.

³⁴ Te ndèca ñaha-dé cuáháⁿ vehe-dé ní sãñaha-dê sá ní xexi-güedé, te ní cudíí víhí iní tée ndënchito vecaá ndihi nchaa-dé vehe-dé sá ní tuhá-yu ichi Yá Ndióxí. Te cuándihu tucu té Páblú ndihi té Silás vecaá.

³⁵ Te nduu tnéé ní xáhaⁿ cuè tée cùchiuⁿ xii poleciá cuáháⁿ-güedé cúu-güedé tée ndënchito vecaá queñuhu-dé úu cue tée cuánguihu ndedí nduu ícu núhú-güedé. ³⁶ Te tée ndënchito vecaá ní xáhaⁿ-dê xii té Páblú ndihi té Silás:

—Cue tée cùchiuⁿ ní cachí-güedé sá queé-ndó ñuhú-ndo, chí ñá túu-gã ná cada-güedé, chí sa ní yáha cuendá-ndo —càchí tée ndënchito vecaá xáhaⁿ-dê xii-güedé.

³⁷ Te té Páblú ní xáhaⁿ-dě xii cue tée cùu poleciá:

—Tée ròma cúu-ndí, te vá cúu òucaⁿ-ni cunduu, chi ní caniha-güedē tnudii xii-ndí, te ní xiní-yu nchaá-yu. Te ñá túú tnàhí ní xicáⁿ tnúhú-güedē nūu ndáá ndècuéchi-ndí àdi ñáhá, chi cuendá-ni ní chihi ñaha-güedē vecaá xii-ndí. Te vitna cuiní-güedé dacăcu ñaha-güedē núhú-ndí cuendá sá vā yōo quini ñáhá nūhú-ndí cáháⁿ-güedē, dico vá cúu òucaⁿ cada ñaha-güedé xii-ndí. Chí cuáháⁿ cúñaha-ndo na quixi mee-güedé queñuhu ñaha-güedē —càchí té Páblú xi-dé cue poleciá.

³⁸ Te cue tée cùu poleciá cuánuhú-güedé núú ndécú cuè tée cùchiuⁿ, te ní xáhaⁿ-güedē nàcuáa ní cáháⁿ té Páblú. Te sá òucáⁿ ñí xáhaⁿ poleciá sá tée ròma cúu-güedē, xiáⁿ ní yùhú-güedé. ³⁹ Te ní sáháⁿ cue tée cùchiuⁿ yehe vecaá, te ní xáhaⁿ-güedē sá cáda càhnu iní-güedé sá ñí chihi ñaha-güedē vecaá, te ní ndeñuhu ñaha-güedē vecaá. Te ní cáháⁿ ndàhú-güedé núú cuè tée ní xihi vecaá sá ndéé-güedē ñuú-áⁿ nūhú-güedé. ⁴⁰ Te ní ndee-güedé vecaá, te cuáháⁿ-güedé vehe tá Lidiá, te ní ndatnúhu-güedé ndihi nchaa ñáyiú ní sándáá iní-xi tnúhu Jèsús, te ní xáhaⁿ-güedé xií-yu nàcuáa cada-yu, te ío ní cudí iní-yu, te ducaⁿ te ní xica-güedé cuáháⁿ-güedé.

17

Ío dusaⁿ quide ñáyiú ñuú Tesalónica

¹ Te ní yáha-güedé ñuú Anfipolís ndihi ñuú Apoloniá, te ní quexiò-güedé ñuú Tesalónica, te yacáⁿ cáá ñí veñúhu ñáyiú isràél. ² Te ní sáháⁿ té Páblú veñúhu-áⁿ, chí ducaⁿ tnàhí quide-dé, te ndi tnàhá nduu ndetatú-yu ní sáháⁿ-dé veñúhu-áⁿ ùní xito. Te ní ndatnúhu

ndihi ñaha-dē xií-yu nàcuáa ní chídó tnúni cue tée ní xóo cáháⁿ tnúhu Yá Ndióxi ndéé sanaha. ³ Te ní xitnúhu ñaha-dē nàcuáa ní cáháⁿ cue té-áⁿ sá Cristú Yá tendaha Yá Ndióxi quixi ñuyú-a ndoho vihi-gá, te cuú-gá, te ndoto-gá, te xáhaⁿ-dē:

—Te òu Jèsús cúu Cristú Yá ní tendaha Yá Ndióxi ní quixi ñuyú-a, núu xiáⁿ càchí tnúhu-í vitna —càchí té Páblú xáhaⁿ-dē xií-yu.

⁴ Te dava ñáyiú isràél ní sándáá iní-yu tnúhu ní cáháⁿ té Páblú, te ní níhí tnáhá-yu ndihi-dé, ndihi té Silás. Te vāi ñáyiú griégú ñáyiú cáháⁿ ndihi Yá Ndióxi ní sándáá iní-yu tnúhu Jèsús. Te ndecu titní ñáyiú ñíhí ñáyiú cūnuu, te ñáyiú-áⁿ tnàhá-yu ní sándáá iní-yu tnúhu-gá. ⁵ Te dava ñáyiú isràél ñá túú ní cùu váha iní-yu núú tē Páblú nūu ní ndúcū-yu cue tée cuihna iní-xi tuhío-güedé cada chiⁿ-güedé, chí ndi cuihnu ndi cuihnu-ni-güedé, te nchaá-yu ndihi cue té-áⁿ ndi coyo ndi coyó-yu xicuáa-yu. Te sátá ñí tecú dóho dava-gá-yu, te ní sáháⁿ tuhá-yu, te ío ní quide òusáⁿ-yu. Te nísáháⁿ-yu vehe té Jàsón, te ní quide yicá-yu ní quíhu-yu vehe-dé nándúcú-yu té Páblú ndihi té Silás cuendá queñuhu ñàhá-yu núú nchàa ñáyiú. ⁶ Te ñá ní nàníhí ñáhá-yu xii-güedé, núu xiáⁿ ní tní-yu té Jàsón ndihi ñí ùú-gá cue té sándáá iní tnúhu Jèsús, te tàñuhu ñàhá-yu xii-güedé cuáháⁿ núú cuè tée cùchiuⁿ. Te òré ní quexiò-yu núú ndécú cuè tée cùchiuⁿ, te ní ngüíta-yu ní cuáa-yu, te xáháⁿ-yu xii-güedé:

—Ní quexiò cue té-áⁿ ñuú-ó, te ío dusaⁿ quide-güedé, te ducaⁿ-ni quide-güedé nchaa ñuú núú xicá cùu-güedé. ⁷ Te té Jàsón-áⁿ ní xáhaⁿ-dē sá cúu cūndecu-güedé vehe-dé, te ñá túú sándáá iní-güedé nàcuáa cáháⁿ té Cèsár té yindaha cuéhé nacióⁿ, te càchí-güedé sá ndécú ñngá té cūnuu-gá tucu

nàni-dé Jèsús —càchí-yu xǎhǎⁿ-yu xii cue tée cùchiuⁿ.

⁸ Te sáta dúcáⁿ nǐ cáháⁿ-yu, te ní cudééⁿ víhí cuè tée cùchiuⁿ ndihí dava-gá ñáyiú ndèdóho. ⁹ Te vǎi díhúⁿ nǐ xícáⁿ cue tée cùchiuⁿ núú té Jásón ndihí dava-gá cue tée cuáháⁿ ndihí-dé cuendá té Pǎblú ndihí té Silás, te núu na ndèe-güedé nùhú-güedé, te nacuañaha cue tée cùchiuⁿ díhúⁿ-güedé.

Té Pǎblú ndihí té Silás ndécú-güedé ñúú Bèréá

¹⁰ Te òré ní cundiquiⁿ, te ní quide ndee iní ñáhá ñáyiú sàndáá iní tnúhu Jèsús xii té Pǎblú ndihí té Silás, te ní xica-güedé cuáháⁿ-güedé ñúú Bèréá. Te ñúu-ni nduu nǐ sáa-güedé yàcáⁿ ní sáháⁿ-güedé veñúhu ñáyiú isràél. ¹¹ Te váha-gá iní ñáyiú ñúú Bèréá dàcúxí ñáyiú ñúú Tesalónica, chi ío ní cudéé iní-yu ní xíndedóho-yu tnúhu Jèsús, te ñúu nduu ñúu ní dácuaáhá-yu tnúhu ní chídó tnúni cue tée ní xóo cáháⁿ tnúhu Yá Ndióxi ndéé sanaha cuendá cuiní-yu quini-yu núu ndáá cáháⁿ té Pǎblú ndihí té Silás. ¹² Te titní ñáyiú isràél ní sàndáá iní-yu tnúhu-gá ndihí titní cue tée griégú ndihí ñáyiú díhí ñáyiú cùnuu ní sàndáá iní-yu. ¹³ Te dava ñáyiú isràél ndécú-yu ñúú Tesalónica, te ñáyiú-áⁿ nǐ níhí-yu tnúhu sá ndécú té Pǎblú ndihí té Silás ñúú Bèréá cáháⁿ-güedé tnúhu Yá Ndióxi, núu xǎhǎⁿ ní sáháⁿ-yu ñúú Bèréá ní dácuaándèhndé-yu núu ncháa ñáyiú vátá dácuaàha-gá. Te ñáyiú-áⁿ nǐ sàndáá iní-yu tnúhu ndehnde te ní cudééⁿ víhí-yu núu-güedé. ¹⁴ Te òré-áⁿ nǐ xáhaⁿ ñáyiú sàndáá iní tnúhu-gá xii té Pǎblú sá quihíⁿ-dé yuhu lámár, te ní xica-dé cuáháⁿ-dé, te té Silás ndihí té Timùteú ní quendóo-güedé ñúú Bèréá. ¹⁵ Te ñúu-güedé cuáháⁿ ndihí-güedé té Pǎblú, te ndèca ñaha-güedé cuáháⁿ ndéé ñúú Àtenás, te ní xáhaⁿ té Pǎblú xii-güedé:

—Núu na nùhú-ndó, te cúu-ndo té Silás ndihí té Timùteú ná quixí ndihí-ni-güedé nanítnáhá-ndí iha —càchí-dé xáhaⁿ-dè.

Te ní xica-güedé cuánuhú-güedé.

Té Pǎblú ndécú-dé ñúú Àtenás

¹⁶ Te ñúú Àtenás ndétú té Pǎblú quihíⁿ té Silás ndihí té Timùteú. Te yàcáⁿ ní xiní-dé sá ío cuéhé sá càchí-yu cùu ndiòxi-yu ndècu te ñá ndáá sá díú ndiòxi cúu-xí, te xǎhǎⁿ ñá túu ní cùu váha iní-dé, chi ñá tnàhá iní-dé nàcuáa quidè-yu. ¹⁷ Te ní sáháⁿ-dé veñúhu ní cáháⁿ ndihí-dé ñáyiú isràél ndihí dava-gá ñáyiú cáháⁿ ndihí Yá Ndióxi. Te ñúu nduu ñúu nduu sáháⁿ-dé xití ñúu cáháⁿ-dé tnúhu-gá ndihí ncháa ñáyiú xica cuu yacáⁿ. ¹⁸ Te cue tée cùu epicureú ndihí cue tée cùu estoicú, cue tée-áⁿ nǐ ndatnúhu-güedé ndihí té Pǎblú, te dava-güedé xitnàha-güedé:

—¡Ná tnúhu vñi cáháⁿ tée lùcú-áⁿ! —càchí-güedé xitnàha-güedé.

Te dava-güedé xitnàha-güedé:

—Sàni iní-ndí sá cáháⁿ-dé cuendá ndiòxi sá vátá quini-gá-ó —càchí-güedé xitnàha-güedé.

Te ducaⁿ xitnàha-güedé, chi cáháⁿ té Pǎblú tnúhu Jèsús, te ní cáháⁿ-dé nàcuáa ní dándótó ñaha Yá Ndióxi xii-gá, xǎhǎⁿ núu ducaⁿ xitnàha-güedé. ¹⁹ Te ndèca ñaha-güedé xii té Pǎblú cuáháⁿ ñúu xichi núu nání Àreopagú, te ní xáhaⁿ-güedé xii-dé:

—Cachí tnúhu ndáá-n nása cuáháⁿ tnúhu cáháⁿ-n, chi na cùtnuní ndáá iní-ndí, ²⁰ chi ducaⁿ-ni cáháⁿ-n tnúhu sá ñá túu sàcúndedóho-ndí, te cuiní-ndí cachí tnúhu ndáá-n nása nduu tnúhu-áⁿ cuendá cutnùní váha iní-ndí —càchí-güedé xáhaⁿ-güedé xii-dé.

²¹ Te ncháa ñáyiú ñúú Àtenás ndihí ñáyiú dava-gá ñúú, mee-ni tnúhu saa cuiní-yu cáháⁿ-yu, ncháa sá vátá cùndedóho-gá-yu cuiní-yu cundedóho-yu.

²² Te té Pǎblú ní ngúnutnii-dé núu xixúcu-yu ncháa-yu, te xáhaⁿ-dè:

—Nchòhó cue ñáyiú ñuú Àtenás, cundedóho-ndo nchàa tnúhu na càháⁿ-í-a. Ío quide cahnu nchohó sá càchí-ndó cùu ndiòxí-ndó. ²³ Te vitna ní quexio-í ñuú-ndó, te ní xiní-í sá yàyacáⁿ ndécú nchàa sá càchí-ndó cùu ndiòxí-ndó càháⁿ ndihí-ndo. Te ní xiní-í ìⁿ xichi núu ndéé tñuní quidé càhnu-ndo Yá Ndiòxí Yaá ñá túú xiní-ndó, te ñu-ñi ducaⁿ càháⁿ lètrá ndéé tñuní xiáⁿ, te càchí-xi: “Iha quide cahnu-ndí Ndiòxí sá ñá túú xiní-ndí”, duha càháⁿ lètrá-áⁿ. Te quide cahnu-ndo Yá Ndiòxí càháⁿ-ndó, dico ñá túú xiní-ndó nãsa càa-gá, te yúhú xiní ndáá-í nàcuáa càa Yá Ndiòxí, chi ñu-ñi Yá Ndiòxí càháⁿ ndihí-í, te ñu tnúhu-gá càháⁿ-í vitna.

²⁴ Te ñu Yá Ndiòxí ní cadúha-gá ñuyú-a ndihí nchaa sá ío, núu ñu-gá cúu Xitohó ñuyú-a ndihí andiú. Te ñá túú xiní ñuhu-gá vehe dàcaa ñáyiú ñuyú-a cundecu-gá. ²⁵ Te ñá túú xiní ñuhu-gá ñáyiú chindee ñàhá-yu xii-gá, chi mee-gá quidé-gá nchitó-ó ndècu-o te tàxi-gá yócó tàchí-ó ndihí nchaa sá xiní ñuhu-o.

²⁶ Te ndéé sanaha ñí cadúha-gá ìⁿ ñu-ñi téé, te ñu-ñi ñíñí-dé cúu ñáyiú ndècu nicaxico ñuyú. Te ñu-ñi mee Yá Ndiòxí ní xáhaⁿ-gá nchaa núu cundécú-yu, te mee-gá ní càháⁿ-gá ná daha cuíá cudíi nchaa nacióⁿ ndihí mèé-yu. ²⁷ Te cuíni-gá sá nchàá ñáyiú nanducu ñàhá-yu càháⁿ ndihí ñàhá-yu xii-gá, te mee-gá ndécú túha-gá sá càháⁿ ndihí ñàha-gá xii-yu ìⁿ ñu-ñi. ²⁸ Te ñu-ñi Yá Ndiòxí xitó ñàha-gá xii-yu núu cùdíi-yu ndécú-yu te càndá-yu. Te duha ní càháⁿ ìⁿ ñaní tnàhá-ndó, téé ní cutnùnì iní-xi ní xindecu ndéé sanaha, te ní xáhaⁿ-dé xii-yu: “Nchaa-o cùu-o déhe Yá Ndiòxí”, duha ní xáhaⁿ-dé xii-yu. ²⁹ Te núu déhe Yá Ndiòxí cùu-yu nchaa-yu, te vá cúu càháⁿ-yu sá Yá Ndiòxí cúu sá ñí cadúha-yu ndahá-yu. Te

sá ñí cadúha-yu cùu ndiòxí-yu-áⁿ, dava cùu-xi díhúⁿ cuááⁿ, dava cùu-xi díhúⁿ cuíxíⁿ, dava cùu-xi yúú. Te mèé-yu ní cahu iní-yu nàcuáa cunduu sá cúu ndiòxí-yu. ³⁰ Te cùtnàhá ñá túú ní cùtnuní iní-yu sá nèhé ní quidé-yu ní cadúha-yu nchaa xiáⁿ, te ñá túú ní quide cuendá Yá Ndiòxí sá dúcáⁿ ñí quidé-yu. Te vitna càchí Yá Ndiòxí sá dáñá nchàa ndi túhú-yu nchaa sá cuèhé sá dúhá quidé-yu. ³¹ Te Yá Ndiòxí nàhá-gá ná nduu cundecu nchaa ñáyiú núu-gá, te mee-gá sa nàha-gá ndèndida càa ñáyiú ní quide váha, te ndèndida càa ñáyiú ñá túú ní quide váha. Te mee-gá ní xáhaⁿ-gá xii Déhe-gá Yaá nání Jèsús cùñaha-gá xii-yu núu ndèndida càa-yu ní quide váha te ndèndida càa-yu ñá túú ní quide váha. Te mee Jèsús càháⁿ ndáa cuíti-gá, te sa nàha-o sá nchàá xiáⁿ cada Jèsús, chi ñu cuendá-áⁿ ñí dándótó ñàha Yá Ndiòxí xii-gá —càchí té Páblú xáhaⁿ-dé xii-yu.

³² Te òré ní càháⁿ té Páblú sá ñí ndoto Jèsús, te dava ñáyiú ñá ní tnàhá iní-xi tnúhu ní càháⁿ-dé ní càháⁿ yíchí-yu. Te davá-yu ní xáhaⁿ-yu xii-dé:

—Te ingá xito quixi-n, te càháⁿ tucu-n tnúhu ní càháⁿ-n vitna —cachí-yu xáhaⁿ-yu xii-dé.

³³ Te ní xica-dé cuáháⁿ-dé. ³⁴ Te dava ñáyiú ní xíndedóho tnúhu ní càháⁿ té Páblú ní sándáá iní-yu Jèsús, te ní chindee tnúhu ñàhá-yu xii-dé. Te ìⁿ téé cùchiuⁿ Areópagú nání-dé Níxú ndihí ìⁿ ñadihí nání-áⁿ Damarís, tnàhá-yu ní sándáá iní-yu tnúhu-gá ndihí dava-gá-yu.

18

Té Páblú ndécú-dé ñuú Còrintú

¹ Te té Páblú ní quee-dé ñuú Àtenás cuáháⁿ-dé ñuú Còrintú. ² Te yàcáⁿ ní naníhí tnàhá-dé ndihí ìⁿ téé isràél nání-dé Àquilú, te téé-áⁿ cúu-dé téé distritú Póntó, te ní xíndecu-dé ndihí ñadihí-dé

tá Priscilá ñuú Rómá. Te té Cèsár téé yindaha cuéhé nacióⁿ, téé nàni Claudiu ní xáhaⁿ-dè sá vâ cúú-gâ cundecu ñáyiú isrâél ñuú Rómá, te xiáⁿ núu ní ndee té Àquilú ndihí ñadhí-dé cuáháⁿ-yu ñuú Còrintú. Te sácú-ni nduu ní cuu sá ní quexiò-yu ñuú-áⁿ, te ní sáháⁿ té Páblú ní ndatnúhu ndihí ñaha-dé xii-yu vehé-yu. ³ Te ní xáháⁿ-yu sá cundècu-dé cada chiúⁿ ndihí ñahá-yu, chi ñⁿ-ni chiúⁿ quide-dé ndihí-yu, te ní xóo dacáá-yu vehe dóo. Te núu xiáⁿ ní xindecu ndihí ñaha té Páblú ní quide chiúⁿ ndihí ñaha-dé xii-yu. ⁴ Te núu ùná núu ùná nduu, nduu ndètatú-yu, ní xóo quíhíⁿ-dé veñúhu ñáyiú isrâél. Te ní ndatnúhu-dé ndihí ñáyiú isrâél ndihí ñáyiú ñá túú cùu ñáyiú isrâél, te ní xáhaⁿ-dè sá quindáá iní-yu tnúhu Jèsús.

⁵ Te té Silás ndihí té Timùteú ní quee-güedé distritú Macèdoniá cuáháⁿ-güedé núu ndécú té Páblú. Te óré ní quexiò-güedé, te ní cáháⁿ-ni té Páblú tnúhu Yá Ndióxi núu ñáyiú isrâél, te xáhaⁿ-dè xii-yu sá Jèsús cúú-gâ Crístú Yaá ní tendaha Yá Ndióxi ní quixi ñuyú-a. ⁶ Te sá dúcáⁿ ní cáháⁿ-dè núu ní nàá ndihí ñahá-yu xii-dé, te ní cáháⁿ cuéhé-yu cuendá-dé, núu xiáⁿ ní naquidi-dé dóo-dé. Te ducaⁿ ní quide-dé cuendá sá cútñni iní-yu sá ñá ní tnàhá iní-dé ñacuáa ní cáháⁿ-yu, te ní xáhaⁿ-dè xii-yu:

—Yúhú ñá túú cuèchi-í, te núu ní xíta nihnu-ndo, xiáⁿ quèndóo cuèchi mee-ná-ndó. Te vitna quíhíⁿ-í cáháⁿ ndihí-í ñáyiú ñá túú cùu ñáyiú isrâél, te vâ nándücu-gá-í nchòhó ñáyiú isrâél cáháⁿ ndihí ñaha-í xii-ndo —càchí-dé xáhaⁿ-dè xii-yu.

⁷ Te ní xica-dé cuáháⁿ-dè vehe ñⁿ téé nàni Justú, te téé-áⁿ ndécú yàtni-dé núu cáá veñúhu, te tnàhá-dé cáháⁿ ndihí-dé Yá Ndióxi. ⁸ Te té Crispú téé yindaha veñúhu-áⁿ ní sándáá iní-dé Jèsús ndihí ñadhí-dé ndihí landú-dé. Te vâi

ñáyiú ñuú Còrintú ní sáháⁿ-yu ní xindedóho-yu tnúhu-gá, te ní sándáá iní ñahá-yu xii-gá, te ní sandute-yu. ⁹ Te ñⁿ niú ní cáháⁿ saní té Páblú sá ní xáhaⁿ Yá Ndióxi xii-dé:

—Cáháⁿ-ni-n tnúhu-í, te vâ yúhú-n nchàa tnúhu cuéhé tnúhu duha càháⁿ ñáyiú, ¹⁰ chi yúhú chindee ñaha-í xii-n, te vâ yóo ñⁿ cada úhú ñahá xii-n, te vâi-gá ñáyiú ñuú-áⁿ quindáá iní-yu tnúhu-í —càchí-gá xáhaⁿ-gá núu saní-dé.

¹¹ Te ñuú Còrintú ní xindecu té Páblú ñⁿ cuía dava, te mee-ni tnúhu Yá Ndióxi ní xóo dacuàha-dé ñáyiú.

¹² Te ndècu-gá-dé ñuú-áⁿ ní ngóo té Galióⁿ chiúⁿ taxi tnuní-dé distritú Acáyá. Te dàvá-áⁿ ní cudééⁿ ñáyiú isrâél núu té Páblú, te ní tní ñahá-yu xii-dé ndécá ñahá-yu cuáháⁿ núu cuè téé cùchiuⁿ. ¹³ Te ní xáháⁿ-yu xii té Galióⁿ téé cùu gobiernú:

—Té-a ní quexiò-dé ñuú-ó xica cuu-dé te cuní-dé dandàhú ñahá-dé chitnahá-ndí-dé cada-ndí ñacuáa quide-dé quidé càmu-dé Ndióxi-dé, te dañá-ndí vâ cadá-gá-ndí ñacuáa càháⁿ tnúhu sá sanú ichi ñaha xii-o ñacuáa cundecu-o cuini-dé —càchí-yu xáháⁿ-yu xii téé cùu gobiernú.

¹⁴ Te té Páblú cuini-dé cani-dé cuèndú ní cùu, te ní ngúita té Galióⁿ càháⁿ-dè, te xáhaⁿ-dè xii-yu:

—Nchòhó ñáyiú isrâél, cundedóho-ndo tnúhu na càháⁿ-í-a, Te núu ndècu núu ñⁿ cuèchi ní quide-dé àdi ní sahní-dé ñⁿ ndiyi, te cuu cundáá-xi iha, te cáháⁿ-ndó núu nándi cùu sá ní quide-dé, ¹⁵ àdi dico-ni sá ñⁿ tnúhu ní cáháⁿ-dè, te yáchí-gá chí cuáháⁿ yàcáⁿ ndatnúhu-ndo núu méé-ndó, chi mee-ni sá ñá túú quide-dé ñacuáa càháⁿ tnúhu sá sanú ichi ñaha xii-ndo cáháⁿ-ndó, te yúhú ñá túú tnàhá iní-í cada ndáá-í nchaa xiáⁿ —càchí-dé xáhaⁿ-dè.

¹⁶ Te ní cudééⁿ-dè, te ní ndeñuhu ñaha-dé xii-yu vechüⁿ. ¹⁷ Te ñáyiú ñá túú cùu ñáyiú isrâél ní tní-yu té

Sostenés té yĩndaha veñúhu ñáiyu israhél, te ndèhe té Gàlión tée cùu gobiernú ní canihá-yu xii-dé, dico ñá túú tñàhí ná tnúhu ní cáháⁿ-dé taunihnu-dé té ní caní-yu-áⁿ.

Té Pǎblú cuáháⁿ tucu-dé ñuú Antiòquiá, te yàcáⁿ ní xica tucu-dé cuáháⁿ-dé dava-gá ñuú cáháⁿ-dé tnúhu Yá Ndiòxí

¹⁸ Te titní-gá nduu ní xĩndecu té Pǎblú ñuú Còrintú, te ní quide ndee iní-dé nchaa ñáiyu ní sándáá iní-xi tnúhu Jèsús, te ní tñi-dé ichi cuáháⁿ-dé distritú Siríá ndihí té Àquilú ndihí ñadihí té Àquilú-áⁿ tá Priscilá, te ní quexió-yu ñuú Cèncreá. Te cùmání-gǎ tñi-yu ichi quihíⁿ-yu ñuú Éfesú, te ní deté díquí tē Pǎblú, chí ducaⁿ ní xáhaⁿ-dē xii Yá Ndiòxí sá ndéé xĩnu ñiⁿ chiuⁿ ní sani iní-dé cada-dé cuendá-gá, te dǎtnùní deté-dé. Te ní quee-yu bàrcú cuáháⁿ-yu. ¹⁹ Te ní quexió-yu ñuú Éfesú, te yàcáⁿ ní xáhaⁿ tē Pǎblú sá cùndecu té Àquilú ndihí ñadihí-dé, te mee-dé quihíⁿ-dé dava-gá ñuú. Te cùmání-gǎ caca-dé quihíⁿ-dé, te ní sáháⁿ-dé veñúhu ñáiyu israhél ní ndatnúhu ndihí ñaha-dé xii-yu. ²⁰ Te ní xáháⁿ-yu sá cùndecu-dé titní nduu, te ñá ní cuiñí-dé cundecu-dé. ²¹ Te ní xáhaⁿ-dē:

—Núhú-í chí dacuitíí xini ñuhu-xi cundecu-í vico coo ñuú Jerusálén, te quixi tucu-í te núu Ndiòxí ná cǎchí-gá, te vitna chí cǎdá ndèe iní —cǎchí-dé xáhaⁿ-dē xii-yu.

Te ní quee-dé bàrcú cuáháⁿ-dé. ²² Te ní quexio-dé ñuú Cèsareá, te ní quene-dé bàrcú, te ní xica-dé cuánuhú-dé ñuú Jerusálén, te ní ndexio-dé, te ní dándácõo váha-dé ñáiyu ndècu ichi Yá Ndiòxí, te dǎtnùní ní xica-dé cuáháⁿ-dé ñuú Antiòquiá. ²³ Te yàcáⁿ ní xĩndecu-dé titní nduu, te dǎtnùní ní tñi-dé ichi cuáháⁿ-dé. Te ní sáháⁿ-dé ndihí distritú Gàlaciá ndihí distritú Frigiá. Te ndi tnahá ñuú ní sáháⁿ-dé ní cáháⁿ-dé ndihí ñáiyu sándáá

iní tnúhu Yá Ndiòxí, te ní ndúcú ndéé-gǎ-yu ní quidé-yu nchaa nàcuáa ní xáhaⁿ-dē cadá-yu.

Té Àpolós cáháⁿ-dé tnúhu Yá Ndiòxí ñuú Éfesú

²⁴ Te dāvá-áⁿ ñi quèxio ñiⁿ té israhél ñuú Éfesú, te nàni-dé Àpolós, te cùu-dé té ñuú Alejandriá, te ío váha túha-dé tnúhu Yá Ndiòxí, te ío váha ñuhu díquí-dé nàcuáa cáháⁿ-dé, ²⁵ chí sa xini-dé nàcuáa ní xóo cáháⁿ ndi Juáá cùtnàhá ní xóo dacuàndute ndi ñáiyu. Te ío ní cudíí iní-dé ní cáháⁿ-dé nchaa nàcuáa ní cuu cuendá Jèsús, dico vátá dácuaⁿha-gá-dé nchaa tnúhu ní cáháⁿ mée Jèsús. ²⁶ Te ní sáháⁿ-dé veñúhu ñáiyu israhél, te yàcáⁿ ní cáháⁿ-dé ni yùhu ni iní-dé. Te ndècu té Àquilú ndihí ñadihí-dé tá Priscilá ndedóho-yu tnúhu ní cáháⁿ-dé, te ní xáháⁿ-yu sá quihíⁿ-dé vehé-yu, te ní sáháⁿ-dé, te ní xitnúhu ñahá-yu xii-dé dava-gá tnúhu Yá Ndiòxí sá ñá túú xini-dé. ²⁷ Te ní cachí té Àpolós sá quihíⁿ-dé distritú Acáyá, núu xíáⁿ ní cadúha ñáiyu ñuú Éfesú ñiⁿ tutú canehe-dé quihíⁿ ndaha ñáiyu sándáá iní tnúhu-gá xĩndecu Acáyá. Te xáháⁿ-yu núu tütú-yu: “Cáháⁿ váha-ndo ndihí té Àpolós núu ní quexio-dé”, cǎchí-yu xáháⁿ-yu núu tütú-yu. Te ní xica-dé cuáháⁿ-dé, te ní quexio-dé Acáyá. Te nchaa ñáiyu sándáá iní tnúhu-gá yàcáⁿ, diu-ni mee Yá Ndiòxí ní chindee ñaha-gá ní sándáá iní ñahá-yu xii-gá. Te té Àpolós ío váha ní cáháⁿ-dé tnúhu Yá Ndiòxí núu-yu, te xíáⁿ ío ní ndúcú ndéé-gǎ-yu ní quidé-yu chiuⁿ-gá. ²⁸ Te té Àpolós ní ndatnúhu-dé ndihí ñáiyu israhél, te ní xĩndedóho dava-gá-yu. Te ío váha ní caní-dé cuendú nchaa nàcuáa ní xóo cáháⁿ cue té ndéé sanaha sá quixí Cristú ñuyíu-a. Te ní cáháⁿ ndáá-dé ní xáhaⁿ-dē sá diú-ní Jèsús cúu-gǎ Cristú Yáá ní tendaha Yá Ndiòxí ní quixí ñuyíu-a. Te ñáiyu

israél xĩndatnúhu-yu sá ñã ndàá nàcuáa càháⁿ-dé, dico ñá ní nihĩ-yu tnúhu cúñahá-yu xii-dé, chi ío váha ññuhu díquí-dé tnúhu càháⁿ-dé.

19

Té Páblú ndécú-dé ñuú Éfesú

¹ Te cútnahá ndécú-gã té Àpolós ñuú Còrintú, te ní xica té Páblú cuáháⁿ-dé tá yãha-dé mee-ni xití yucu cuáháⁿ, te ní sáá-dé ndéé ñuú Éfesú. Te ñuú-áⁿ nĩ nanihí tnáhá-dé ndihĩ cue tée sàndáá iní tnúhu Jèsús. ² Te ní xicáⁿ tnúhú-dé núu-güedé, te xãhaⁿ-dè:

—¿Sa ní quexìo Espíritú Yã Ndiöxí ní ngúndecu ndihĩ-ndo ndéé òré ní sàndáá iní-ndó Jèsús-ãⁿ? —càchí-dé xãhaⁿ-dè xii-güedé.

Te ní xáhaⁿ-güedé:

—Ñá túú xìní-ndí sá ío Espíritú Yã Ndiöxí —càchí-güedé xãhaⁿ-güedé xii-dé.

³ Te ní xáhaⁿ tùcu-dé:

—¿Nása ní càháⁿ tée ní dácúándute ñaha xii-ndo-i? —càchí-dé xãhaⁿ-dè xii-güedé.

Te ní xáhaⁿ-güedé:

—Ní càháⁿ-dé nàcuáa ní xóo càháⁿ ndíi Juáá —càchí-güedé xãhaⁿ-güedé xii-dé.

⁴ Te ní xáhaⁿ tè Páblú:

—Ndíi Juáá ní dácúándute ñaha ndíi xii ñáiyu, chi ní cuiní-yu sá dáñã-yu nchaa sá cuèhé sá dúhá quidé-yu. Te ní xáhaⁿ ndíi xii-yu: “Quindáá iní-ndó tnúhu Jèsús chi dacuití quixi-gá ñⁿ nduu”, duha ní xáhaⁿ ndíi Juáá xii-yu —càchí té Páblú xãhaⁿ-dè xii-güedé.

⁵ Te sá dúcáⁿ nĩ càháⁿ té Páblú xãhaⁿ-dè xii-güedé, núu xiáⁿ ní sandute-güedé nàcuáa ní dándõo tnúhu Jèsús. ⁶ Te ní sacáⁿ ndodo té Páblú ndahá-dé díquí-güedé, te òré-ni ní quexìo Espíritú Yã Ndiöxí ní ngúndecu ndihĩ-güedé, te ní ngúita-güedé ní càháⁿ-güedé tnúhu sá dácàhu iní ñahá Espíritú-gá, tnúhu sá ñã túú xìní-güedé

càháⁿ-güedé, te ní càháⁿ-güedé tnúhu Yã Ndiöxí nàcuáa ní dácáhú iní ñahá Espíritú-gá xii-güedé. ⁷ Te cùu datná úxúú tnàhá-güedé.

⁸ Te té Páblú ní sáháⁿ-dé veñúhu ñáiyu israél ní càháⁿ ndihĩ-dé-yu, te úní yóó nĩ xínu ní xica cuu-dé veñúhu-yu. Te ío váha ññuhu

díquí-dé tnúhu càháⁿ-dé, núu xiáⁿ ní cuyi-dé ní càháⁿ-dé, te ní xáhaⁿ-dè sá quindáá iní-yu tnúhu Jèsús, te ducaⁿ te ndíhu ndaha ñaha Yã Ndiöxí xii-yu. ⁹ Te davá-yu ío sáá iní-yu ñã ní cuiní-yu quindáá iní-yu, te ío ní càháⁿ cuèhé-yu

cuèndá Jèsús xití veñúhu núu dàva-gá-yu. Te té Páblú ní ndee-dé veñúhu cuáháⁿ-dé ndihĩ ñáiyu sàndáá iní tnúhu Jèsús. Te ñⁿ nduu ñⁿ nduu ní sáháⁿ-dé scuèlá té Tiranú ní dácúahá ñaha-dé xii-yu. ¹⁰ Te úú cuíá ducaⁿ nĩ sáháⁿ-dé scuèlá ní dácúahá-dé ñáiyu. Te nchaa ñáiyu

israél ñáiyu ndècu nihíi distrítú Àsiá ndihĩ nchaa ñáiyu ñã túú cùu ñáiyu

israél ní xindedóho-yu tnúhu Jèsús. ¹¹ Te té Páblú ío ní chindee ñaha Yã Ndiöxí xii-dé ní quide-dé vai núu sã vã yõo tnàhí ndàcu cada. ¹² Te

pàñú díquí-dé ndihĩ dóo cándèé núu yíquí-dé ní xicáⁿ-yu nèhé-yu ní sáháⁿ núu ndécú ñáiyu cùhú, te xiáⁿ ní tnⁱⁱ ñáiyu cùhú ndihĩ ñáiyu yihí ñaha espíritú cündihĩ yucu ñávaha, te ní ndúha-yu.

¹³ Te ñuú Israél véxi cue tée tatna xica cuu-güedé quidé tátna-güedé ñáiyu yihí ñaha espíritú cündihĩ yucu ñávaha. Te ní ngúita-güedé ní cacu nèhe-güedé Jèsús cuèndá quee espíritú-ãⁿ yíquí cùñú-yu, te ní xáhaⁿ-güedé:

—Xocuiñi-n, chi càchí Jèsús sá vã cündècu ndihĩ-gá-n tée-a. Te diu-ni Jèsús cacú nèhe té Páblú òré càháⁿ-dè tnúhu-gá —càchí-güedé xãhaⁿ-güedé xii-espíritú-ãⁿ.

¹⁴ Te úsá tnàhá-güedé ducaⁿ nĩ xóo cada-güedé. Te tátá-güedé ní xínani-dè Èsevá, te tée-áⁿ nĩ cuu-dé

dútú cúnú. ¹⁵ Te sá dúcáⁿ nĩ cáháⁿ-güedé, te ní xáhaⁿ espíritú cúndihí yucu ñávaha-áⁿ xii-güedé:

—¿Te ná cúú nchòhó nùu dayúhú ñáhá-ndó? Te xìní-í Jèsús, te xìní-í yoo cùu té Pàblú, te nchòhó ñá túú xìní ñáhà-í xii-ndo —càchí espíritú-áⁿ xáhaⁿ-xi xii-güedé.

¹⁶ Te tée yìhí ñaha espíritú cúndihí yucu ñávaha-áⁿ nĩ ndanchita-dé ní tñi-dé cue tée quide tátna-áⁿ, te ní ndihí dóó-güedé ní ndátá-dé, te ní dánicuehé ñáhá-dé xii-güedé, te ní xinu-güedé cuáháⁿ-güedé. ¹⁷ Te nchaa ñáyiú israhél ndécú ñúú Éfesú ndihí dava-gá ñáyiú ndècu ñu-ñi ñúú-áⁿ nĩ níhí-yu tñúhu nàcuáa ní cuu, te ío ní yùhú-yu, te vai-yu ní cachí sá ío càhnu cuu Xítohó Jesu-crístú.

¹⁸ Te dava ñáyiú ní sándáa iní-xi tñúhu Jèsús ní sáháⁿ-yu núú ndécú tē Pàblú, ndihí núú ndécú nchaa ñáyiú ní sándáa iní tñúhu-gá ní náhmá-yu nàcuáa ní xóo cada-yu.

¹⁹ Te titní ñáyiú ní xóo cada ndùu nehé-yu tutú-yu ní sáháⁿ núú ndécú nchaa ñáyiú sándáa iní-xi tñúhu-gá, te yacáⁿ ní ndada cuendá-yu sá ío yahu ní sáha-yu tutú-yu, chi ndéé údico úxí mĩ díhúⁿ cuixíⁿ ní sáha-yu núú ncháa. Te ncháa-yu ní sahmí-yu tutú-yu. ²⁰ Te sátá nĩ cáyú nchaa tutú-áⁿ, te vai-gá ñáyiú ní tuhá-yu ichi Yá Ndiöxí, te ní sáha-yu cuendá sá ío xini ñuhu tñúhu Yá Ndiöxí.

²¹ Te ní cachí té Pàblú sá quíhíⁿ-dé distritú Macèdoniá ndihí distritú Acáyá, te dátñúni núhú-dé ñúú Jerusalén, te ducaⁿ te dátñúni quíhíⁿ-dé ñúú Rómá. ²² Te ndècu ndihí-dé té Timùteú ndihí té Èrastú cue tée chindee ñaha xii-dé. Te té Pàblú ní xáhaⁿ-dé xii-güedé sá códo nùu-güedé quíhíⁿ Macèdoniá, te ní xica-güedé cuáháⁿ-güedé, te mee-dé ní quendóo-dé.

Ñáyiú Éfesú ío dusaⁿ quidè-yu ñúú-yu

²³ Te dàvá-áⁿ ío ní cudéⁿ-yu núú nchaa ñáyiú ní tuha ichi Yá Ndiöxí. ²⁴ Te ñⁿ téé ñúú Éfesú nání-dé Demètriú. Te téé-áⁿ ní xóo canehé chiuⁿ-dé mee-ni díhúⁿ cuixíⁿ ní xóo cadúha-dé veñúhu líhli, dátna cuini-ndó caa veñúhu Diáná sá cúú ndiöxí-yu. Te vai díhúⁿ nĩ xóo níhí-dé ndihí cue téé ní xóo cada chiúⁿ ndihí-dé. ²⁵ Te ní cana-dé cue téé quide chiuⁿ ndihí-dé, ndihí nchaa cue téé quide chiuⁿ ndihí díhúⁿ cuixíⁿ, te ní xáhaⁿ-dē xii-güedé:

—Nàha-ndo sá ío váha níhí-ó díhúⁿ cuendá chiúⁿ quide-o. ²⁶ Te nàha-ndo sá càchí tē Pàblú sá ñá díú ndiöxí cúú sá nĩ cadúha ñáyiú ñuyú-a. Te ducaⁿ cáháⁿ-dé ñúú-ó, te ducaⁿ-ni cáháⁿ-dé níhí distritú Asiá, te ío-gá vai ñáyiú sándáa iní tñúhu cáháⁿ-dé. ²⁷ Te ío úhú nùu na cuita chiúⁿ quide-o, vá yóo-gá cuaaⁿ sá cadúha-o. Te ngúita-yu cáháⁿ-yu sá veñúhu Diáná ñá túú càváha, te vá cadá càhnu-gá-yu sándú-ó. Te nàha-ndo sá ío càhnu cuu Dianá, chi nchaa ñáyiú distritú Asiá quidé càhnu ñahá-yu ndihí ñáyiú xindecu ní caa xico ñuyú —càchí té Demètriú xáhaⁿ-dē xii-güedé.

²⁸ Te sá dúcáⁿ nĩ cáháⁿ té Demètriú, xiáⁿ ní cudéⁿ-güedé núú tē Pàblú, te uuⁿ ní cuáa-güedé te càchí-güedé:

—Ío càhnu cuu Dianá sándú ñáyiú Éfesú! —càchí-güedé.

²⁹ Te nchaa ñáyiú ñúú Éfesú ndí coyo ndi coyó-yu xicáháⁿ-yu. Te tñahá úú cue téé distritú Macèdoniá xicá cùu-güedé ndihí té Pàblú, ñⁿ-dé nání-dé Gáyú, te ñⁿ-dé nání-dé Aristarcú. Te ní tñi-güedé úú cue téé-áⁿ, te cuánguihu coyo ndihí ñaha-güedé vehe núú quidé-güedé jündá. ³⁰ Te té Pàblú cuini-dé quíhu-dé tñahá-dé vehe-áⁿ cáháⁿ ndihí ñaha-dē ní cùu, te ñá ní dàña cue téé ní sándáa iní tñúhu-gá. ³¹ Te ñⁿ úú cue téé cùnno distritú Asiá ní cáháⁿ váha-güedé cuendá té Pàblú, te ní xáhaⁿ-güedé xii ñⁿ téé xinu

cuechi núú-güedé ní sáháⁿ-dé ní xáhaⁿ-dë xii té Páblú sá vǎ quǎhu-dé vehe núú quidé-güedé jündá. ³² Te uuⁿni ní cuáá-yu nchaá-yu, te ñá ñⁿ-ní tnúhu ní cǎháⁿ-yu, chi ndi dííⁿ tnúhu ní cǎháⁿ-yu ñⁿ ñⁿ-yu. Te chítu-gǎ ñáyiú ñá ní cùtnuní iní-yu ná cuendá ní dátacá ñáhá-güedé xítí vehe-áⁿ, chi ñá ñⁿ-ní tnúhu ní cǎháⁿ-yu. ³³ Te davá-yu ní cǎháⁿ-yu sá cuéchi té Lijandrú cúú-xí, chi ní xáhaⁿ ñáyiú isrâél xii-dé sá cǎháⁿ-dé yuhú-yu chindee tnúhu ñaha-dë xii-yu. Te ní quide-dé ndaha-dé núú-yu sá cündedóho-yu tnúhu cǎháⁿ-dé chindee tnúhu ñaha-dë xii-yu yòtnúhu. ³⁴ Te ní cutnùní iní-yu sá tée isrâél cúú-dë, te uuⁿni ní cuáá tucú-yu, ñá ní dàñá-yu cǎháⁿ-dé, te cǎchí-yu:

—¡Ío cùnuu Dianá sàndú ñuú Éfesú! —cǎchí-yu. Te dàtná úú òré ñⁿ-ni tnúhu ní cǎháⁿ-yu.

³⁵ Te tée cùu secretariú-ni-gá ní cǎháⁿ-dé, te dàtnùní cuèé cuèé ní sadí-yu yuhú-yu. Te ní xáhaⁿ-dë xii-yu:

—Ncha-ndo cùndedóho-ndo ñⁿ tnúhu na cǎháⁿ-í-a. Ío cùnuu Dianá, te nchaandi túhú ñáyiú sa nàhá-yu sá ncháá-ó ío nêhe cuendá-ó veñúhu-ǎⁿ. Te nàhá-yu sá néhé cuendá-ó sàndú-áⁿ, chi véxi cuuⁿ-gá andiú. ³⁶ Te vǎ yóo ñⁿ cǎchí sá ñǎ ndáá. Te coto-ndo mée-ndo, te vǎ cuídó-ndó cǎháⁿ-ndó, te vǎ cuídó-ndó cǎháⁿ-ndó. ³⁷ Te ná cuendá ndécá-ndó cuè tée-áⁿ véxi, te ñá túú nǎ ní quide-güedé, te ñá túú nǎ ní dùhu-güedé veñúhu, te ñá túú cǎháⁿ cuèhé-güedé cuendá Diáná. ³⁸ Te núu ío yoo nàá ndihi ñaha xii té Demètriú ndihi cue tée quide chiuⁿ ndihi-dé, te quíhíⁿ-güedé cacáⁿ cuéchi-güedé núú cuè tée cùchiuⁿ. Te cue tée cùchiuⁿ na cundoho-güedé núu quehndé-güedé cuéchi-yu àdi ñáhá. ³⁹ Àdi ío-gá ná cuèndú ñúhú iní-ndó, te cǎháⁿ-ndó òré ná cóó jündá.

⁴⁰ Te ío úhú núu na ñihí tée tàxi tnuní ñáhá xii-o tnúhu sá dúhá ío quide dusaⁿ-o, te cǎchí-dé sá ndècuéchi-o chi ñá túú sàndáá iní-ó-dé quesaha-dé. Te ñá túú tnàhí ndúu váha-xi sá dúhá càda-o ní cuu, te vitna duha ní quide-o, te ñá cùtnùní iní-ó nǎsa cùñaha-o xii tée tàxi tnuní ñáhá xii-o núu na càna ñaha-dé —cǎchí tée cùu secretariú xáhaⁿ-dë xii-yu.

⁴¹ Te ní xáhaⁿ-dë sá nùhú-yu te ní ndihí-yu cuánuhú.

20

Té Páblú cuáháⁿ-dé distritú Macèdoniá ndihi distritú Grèciá

¹ Te òré ñá túú-gǎ ní quide dusáⁿ-yu, te ní cana ñaha tǎ Páblú xii nchaa ñáyiú sàndáá iní tnúhu Jèsús ní cǎháⁿ-dé dóho-yu nàcuáa cadá-yu. Te ní quide ndee iní ñáhá-dë xii-yu, te ní tnú-dé ichi cuáháⁿ-dé distritú Macèdoniá. ² Te tayáha-dé cuáháⁿ ñⁿ ñⁿ ñuú yíndèhu Macèdoniá. Te cǎháⁿ-dé dóho nchaa ñáyiú sàndáá iní tnúhu Jèsús nàcuáa cadá-yu, te ní cudíí iní-yu cadá-yu nàcuáa cǎháⁿ Yǎ Ndióxi cadá-yu sá dúcáⁿ ní cǎháⁿ-dé dóho-yu. Té ní quexìo-dé distritú Grèciá. ³ Te xiáⁿ ní xíndecu-dé úní yóó. Te xiáⁿ quèe-dé bàrcú quíhíⁿ-dé distritú Siriá ní cùu, te ní níhí-dé tnúhu sá ndétú ñaha ñⁿ úú cue tée isrâél cahni ñaha-güedé xii-dé ní cùu, núu xiáⁿ ní tnú-dé ichi cuáháⁿ-dé ní yáha-dé ichi distritú Macèdoniá. ⁴ Te cuáháⁿ ndihi-dé té Sopàtér tée ñuú Bèrea, ndihi té Arístarcú, ndihi ñⁿ tée nàni Segundú. Te ndi ndúú cue tée-áⁿ cúú-güedé cue tée ñuú Tesalònicá. Te tnàhá té Gáyú tée ñuú Dèrbé, ndihi té Timùteú cuáháⁿ ndihi-dé, te tnàhá té Tiquicú ndihi té Trófimú cuáháⁿ ndihi-dé, te úú cue tée-áⁿ cúú-güedé cue tée distritú Asiá. Te nchaa cue tée-áⁿ cuáháⁿ ndihi-güedé té Páblú. ⁵⁻⁶ Te ní quexìo-güedé ñuú Filipú, te yàcáⁿ ní naníhí ñáhá-güedé xii-ndí. Te té Páblú ní tendaha-dë

cue té ndihí-dé cuáháⁿ-güedé ñúú Tróás, te ní xáhaⁿ-dè sá díú-ní yàcáⁿ cundetu ñaha-güedé xii-ndí. Te ní ndóo-í ndihí-dé, te ní xíndecu-ndí vico xèxí-yu pàá sá ñà túú yìhì levadurá. Te sátá ñí yáha vico, te ní quée-ndí bàrcú cuáháⁿ-ndí, te ní xúhuⁿ-ndí ichi úhúⁿ nduu, te ní quexìo-ndí ñúú-áⁿ. Te yàcáⁿ ní naníhí tnáhá-ndí ndihí cue té yòdo nuu cuáháⁿ ní xíndecu-ndí úsá nduu.

Té Páblú cuáháⁿ ngándihí-dé ñáyíu ñúú Tróás

⁷ Te ñⁿ nduu ndumìngú ní naníhí tnáhá-ndí ndihí nchaa ñáyíu ní sándáá iní-xi tnúhu Jèsús ní xexi-ndí pàá ndihí-yu. Te ducaⁿ ñí quide-ndí, chi ní cachí Jèsús sá dúcáⁿ càda-o cuendá sá vā nācuānaa-o sá ñí xíhí-gá cuendá naníhí tǎhú-ó. Te té Páblú ní ngúita-dé cǎháⁿ-dé tnúhu-gá, te cǎháⁿ-dé ní cuu dava niú, chi cuendá ná tǎndaá ingá nduu-áⁿ, te caca-dé quihíⁿ-dé ingá xichi. ⁸ Te ndécú-yu vehe yòdo tnaha, te yìhí-yu ndéé cuártú cúú ùní núú ñínu, te càyú víhí ñùhú xítí cuártú-áⁿ. ⁹ Te ñⁿ tée sa ta cùu saçuéhé luha nàni-dé Eùticú núcòo-dé yèhe ventaná, cuìní-dé cúdú-dé, chi ní cunaha vìhì cǎháⁿ té Páblú, te ní tní ñaha sàní xii-dé ní xídí-dé, te ní ngava-dé ndéé ñuhu. Te ní nuú-yu núú ñùhú cuendá ndacani ñàhá-yu, te sa ní xíhí-dé, chi ío dúcúⁿ ní ngava-dé. ¹⁰ Te tnàhá té Páblú nchícúⁿ-dé ní nuu. Te ní quexìo cunu-dé núú cǎtùu tée ní xíhí-áⁿ, te ní numi ñaha-ni-dé, te ní xáhaⁿ-dè xii-yu:

—Vá ndihú iní-ndó, chi ní ndoto-dé —cǎhí-dé xǎhaⁿ-dè xii-yu.

¹¹ Te dàtnùní cuándaa ndihí ñaha tucu-dé xii-yu cuártú núú yìhí-yu ni cùu, te yàcáⁿ ní xexi ndihí ñaha-dè xii-yu, dàtnùní ní ngúita-dé vǎi-gá tnúhu ní cǎháⁿ-dé, te cǎháⁿ-ni-dé

ní tǎndaá, te dàtnùní ní xica-dé cuáháⁿ-dè. ¹² Te tée ní ngava-áⁿ ní sánúndeca ñàhá-yu xii-dé ndéé vehe-dé, te ío ní cudí iní-yu sá ñí ndoto-dé.

Ní quée-güedé ñúú Tróás cuáháⁿ-güedé ñúú Miletú

¹³ Te té Páblú ní cachí-dé sá quihíⁿ-ndí ndihí bàrcú ndéé ñúú Àsón, te mee-dé caca saha-dé, te yàcáⁿ naníhí tnáhá-ndí ndihí-dé te quée-dé bàrcú, te ní quée-ndí bàrcú cuáháⁿ-ndí. ¹⁴ Te ní naníhí tnáhá-ndí ndihí-dé ñúú Àsón, te yàcáⁿ ní quée-dé bàrcú tnàhá-dé cuáháⁿ-ndí ñúú Mitilené. ¹⁵ Te ní quexìo-ndí ndéé ingá nduu yatni ñúú Quiú, te ndéé nduu tnéé ní quexìo-ndí ñúú Sámú te yàcáⁿ ní yáha-ndí, te ní quexìo-ndí ñúú Trògiliú. Te ndéé nduu idá ní quexìo-ndí ñúú Miletú. ¹⁶ Te té Páblú ñá ní cuìní-dé yáha-ndí ñúú Éfesú, chi ñá túú ní tnàhá iní-dé cuyaa-dé ichi, chi ío ndíhì iní-dé cuendá cuìní-dé quini-dé núu vá ndácú-dé ndexìo-dé ñúú Jerusalén cundecu-dé vico Pentecòstés.

Té Páblú cǎháⁿ ndihí-dé cue tée yíndaha ñaha xii ñáyíu sándáá iní tnúhu Jèsús ñúú Éfesú

¹⁷ Te òré ndécú té Páblú ñúú Miletú, te ní cana-dé cue tée yíndaha ñaha xii ñáyíu sándáá iní tnúhu Jèsús ñúú Éfesú sá quihíⁿ-güedé núú ndécú-dé. ¹⁸ Te sátá ñí quexìo-güedé, te ní xáhaⁿ-dè xii-güedé:

—Nàha-ndo nacuáa ní quide-í ndéé cǎtnàhá ní quexìo-í distritú Àsiá. ¹⁹ Chi ní quide-í nācuāa ní cǎháⁿ Yǎ Ndiōxí cada-í, ñá túú ní tǎhío-í, te ñá túú ní quide cǎhnu-í mēe-í, te ío ní ndáhyú-í sá quidé dāvá-yu, chi ío sǎá iní-yu. Te sa nàha-ndo sá tǎtní xito ní cuìní ñáyíu isràel cǎhni ñàhá-yu xii-í ní cùu, te ío ní ndoho-í ní cácu-í. ²⁰ Te

sa naha-ndo sá ncháándì túhu sá ní cachí tnúhu-í nàcuáa cada-ndo cuendá sá chindèe ñaha Yá Ndiöxí xii-ndo. Te ní cáháⁿ-í tnúhu-gá núú-ndó ncháa-ndo, te ñu-ni ducaⁿ nǐ quixi-í ndi tnahá vehe-ndo nǐ cáháⁿ-í tnúhu-gá núú-ndó. ²¹ Te ní xáhaⁿ-í xii ñáyiú isràél ndihí ñáyiú ñá túú cùu ñáyiú isràél sá dǎñá-yu nchaa sá cuèhé sá dúhá quidé-yu te quindáá iní-yu tnúhu Xítohó Jesucristú. ²² Te dacuití quihíⁿ-í ñuú Jerusàlén, chi Espiritú Yá Ndiöxí ní cachí-xi sá dáí quihíⁿ-í, te ñá túú xiní-í nándi cada ñaha-güedé xii-í yacáⁿ te núu na quèxio-í. ²³ Te ñⁿ ñⁿ ñuú núú sàháⁿ-í cǎchí tnúhu Espiritú-gá sá chíhí ñaha-güedé vecaá, te cada úhú ñáhá-güedé. ²⁴ Dico ñá túú tnàhí ná cuu cuèj na cǎhni ñaha-güedé xii-í, dico cuíni-í sá díí iní dandihí-í nchaa sá ní cachí Xítohó Jesucristú cada-í. Te ní cachí Yá Ndiöxí sá cáháⁿ-í núú ñáyiú sá ïo cùu iní ñáhá-gǎ xii-yu, te naníhí tàhú-yu núu na quindáá iní-yu tnúhu-gá.

²⁵ Te sa ní cachí tnúhu-í xii-ndo ncháa-ndo sá núu na quindáá iní-ndó Yá Ndiöxí, te ndíhu ndaha ñaha-gá xii-ndo. Te na cǎchí tnúhu-í sá ní ñⁿ nduu-gá vá quíni ñáhá-ndó xii-í ñuyíú-a. ²⁶⁻²⁷ Te yúhú ñá túú cuèchi-í núu ïó ñáyiú vá naníhí tàhú, chi sa ní cachí tnúhu-í nchaa sá ní cáháⁿ mée Yá Ndiöxí cada-ndo. ²⁸ Te coto-ndo mée-ndo, te coto-ndo tnàhá ñáyiú sàndáá iní tnúhu-gá, chi Espiritú-gá ní cachí-xi sá cúnúu-ndo núú-yu dacuàha-ndó-yu tnúhu-gá. Te cada-ndo cuendá sá dàtná mbéé-ndó cùu-yu, te mee-ndo cùu-ndo datná toli xito-ndó-yu ducaⁿ cada-ndo cuendá, chi nàha-ndo sá Jèsús ní sati níñí-gǎ, te ní xíhí-gá cuendá naníhí tàhú-ó ndihí-yu. ²⁹ Te yúhú sa cùtnuní iní-í sá òré ñá túú-gǎ-í ndécú, te quixi ñáyiú dandáhú ñáhá xii-ndo cuendá daña-ndo tnúhu Yá Ndiöxí, te cada ñáhá-yu

xii-ndo dàtná quidé ñáñá òré tníí-dí mbéé. ³⁰ Te ñu-ni ñⁿ úú cue téé ndècu ndihí-ndo, cue téé-áⁿ dacuàndehnde-güedé, te cudana davá-yu quindáá iní-yu chítnáhá ñáhá-yu xii-güedé. ³¹ Te xáhaⁿ núu cǎchí tnúhu-í sá ïo quihí iní-ndó cùndecu-ndo ndihí nchaa ñáyiú sàndáá iní tnúhu-gá. Te naha-ndo sá yúhú ní xíndecu-í úní cuía ní cáháⁿ-í tnúhu Jèsús núú ñáyiú cuèi nduu cuèi níú. Te áma ní xóo ndáhyú-í, chi ñá ní cuíni-yu quindáá iní-yu ncháa-yu tnúhu ní cáháⁿ-í —cǎchí té Páblú xáhaⁿ-dè xii-güedé.

³² Te xáhaⁿ tùcu-dé:

—Nchòhó cue téé ndècu ndihí-í ichi Xítohó Jesucristú, ïo cuíni-í sá mée Yá Ndiöxí chindèe ñaha-gá xii-ndo. Te mee-gǎ ní cáháⁿ-gá sá ïo cùdíí iní ñáhá-gǎ xii-ndo. Te naníhí tàhú-ndó ndihí nchaa ñáyiú cùu cuendá-gǎ, te chindèe ñaha-gá xii-ndo cuendá cada-ndo ncháa sá cáháⁿ-gá. ³³ Te òré ní xíndecu ndihí ñaha-í xii-ndo, te ní díhúⁿ ní dóó ñá túú ní cùdíí iní-í. ³⁴ Te mee-ndo sá naha-ndo sá yúhú ní quide chiuⁿ-í, te ní níhí-í nchaa sá ní nandihí-í ndihí cue téé xica cuu ndihí-í. ³⁵ Te sa ní xiní-ndó nàcuáa ní quide-í ní quide chiuⁿ-í, te ñu-ni ducaⁿ cada chiuⁿ-ndo cuendá chindèe-ndo ncháa ñáyiú ndáhú, chi sa naha-ndo nacuáa ní cachí Xítohó Jesucristú, te duha ní cachí-gá: “Cùdíí-gǎ iní-ó cuàha-o ñáyiú ndáhú sá xiní ñùhú-yu dàcúúxí sǎ táxí-yu xii mee-o”, duha ní cachí-gá —cǎchí té Páblú xáhaⁿ-dè xii-güedé.

³⁶ Te sátá dúcáⁿ ní cáháⁿ-dé, te ní ngüíñí xítí-dé ndihí dava-gǎ-güedé, te ní cáháⁿ ndihí-dé Yá Ndiöxí. ³⁷ Te sátá ní túhú tnúhu ní cáháⁿ-dé ndihí Yá Ndiöxí, te ní ndáhyú víhí-güedé sá quihíⁿ-dé, te ní numi ñaha-güedé, te ní teyuhu ñaha-güedé. ³⁸ Te ní ndíhú víhí iní-güedé, chi ní xáhaⁿ tē Páblú sá ní ñⁿ nduu-gá vá naníhí tnáhá-güedé cáháⁿ ndihí

tnàha-güedé. Te cuáháⁿ ndihí ñaha-güedé xii-dé núú ndécú bàrcú.

21

Té Páblú cuáháⁿ-dé ñúú Jerusalén

1 Te ní quide ndee iní-ndí nchaa cue tée cùnuu. Te ní quée-ndí bàrcú cuáháⁿ ndáá ichi-ndí ñúú Còs. Te nduu tnée ní sáháⁿ-ndí ñúú Ròdás, te ní yáha-ndí cuáháⁿ-ndí ñúú Pàtará. 2 Te yàcáⁿ ní naníhí-ndí ñⁿ bàrcú ñúhú ichi-xi quíhíⁿ-xi distritú Fènicía, xiáⁿ ní quée-ndí cuáháⁿ-ndí. 3 Te ichi cuáháⁿ-ndí ní xiní-ndí distritú Chìpré cáá cuådava xití làmár, te ní yáha-ndí, te ní quendóo ñúú-áⁿ xio dàtni-ndí. Te cuáháⁿ-ndí ñúú Tìrú ñⁿ ñúú yíndèhu distritú Siríá cuèndá yàcáⁿ tava-güedé nchaa sá nchídó bàrcú. 4 Te yàcáⁿ ní naníhí tnáhá-ndí ndihí ñáyíu ní sàndáá iní tnúhu Jèsús, te ní xíndecu-ndí úsá nduu ndihí-yu. Te ní xáháⁿ-yu sá vǎ quíhíⁿ té Páblú ñúú Jerusalén, chí Espíritú Yǎ Ndiòxí ní xáhaⁿ-xi xii-yu sá ndóhó vǎhi-dé nǎu na quíhíⁿ-dé. 5 Te sátá nǎ yáha nduu úsá, te ní quée-ndí cuáháⁿ-ndí yuhu làmár. Te ní quée nchaa ñáyíu ní sàndáá iní tnúhu-gǎ, té, ñadìhí, nchaa landú, ncháá-yu ní sàndeca ñáhá-yu yuhu làmár, te òré ní quexìo-ndí, te ní ngúíñí xití-ndí ní cáháⁿ ndihí-ndí Yǎ Ndiòxí. 6 Te ní quide ndee iní tnáhá-ndí ndihí-yu, te dàtnùnì ní quée-ndí bàrcú, te ní naquehéⁿ-yu ichi cuánuhú-yu vehé-yu.

7 Te ní xica bàrcú ñúhú-ndí ní quée-xi ñúú Tìrú cuáháⁿ-ndí ndihí-xi ñúú Tolèmaidá. Te xiáⁿ nǎ sáa-xi te ní quene-ndí, te ní sáháⁿ-ndí ní cáháⁿ ndihí-ndí nchaa ñáyíu sàndáá iní-xi tnúhu Jèsús, te ní xíndecu-ndí ndihí-yu ñⁿ nduu. 8 Te nduu tnée ní ndée tucu-ndí bàrcú cuáháⁿ-ndí ñúú

Cèsareá, te yàcáⁿ ní quene tucu-ndí bàrcú, te cuáháⁿ-ndí vehe té Lipé cundecu-ndí ndihí-dé. Te té-áⁿ nǎ xóo cada chiùⁿ ndihí-dé íñú-gǎ cue tée ní chindee ñaha xii ñáyíu sàndáá iní tnúhu-gǎ ñúú Jerusalén ní xóo cuáñaha-güedé sá nǎ xóo caxí-yu. Te dàtnùnì mee-nǎ tnúhu Yǎ Ndiòxí càháⁿ-dé xicá cùu-dé. 9 Te té Lipé-áⁿ ndècu cùmí déhe dǎhí-dé, te ní ñⁿ-yu vátá ndúcú ñaha-gǎ tée xií-yu, te ncháá-yu càháⁿ-yu tnúhu Yǎ Ndiòxí tnúhu sá dácàhu iní ñáhá mèe-gǎ. 10 Te xiáⁿ nǎ cuu titní nduu ndècu-ndí, te ní quexìo ñⁿ tée nàni Agabú ñúú-áⁿ, véxi-dé distritú Jùdeá, te té-áⁿ tnáhá-dé càháⁿ-dé tnúhu Yǎ Ndiòxí. 11 Te ní níhí-dé tnúhu núú ndécú-ndí nǎu ní quixi-dé ní cáháⁿ ndihí ñaha-dé xii-ndí. Te ní xicáⁿ-dé cínchú té Páblú, te ní ngóo-dé, te ní ngúíta-dé ní dácútú-dé sáhá-dé ndihí ndaha-dé, te ní cachí-dé xii-ndí:

—Espíritú Yǎ Ndiòxí ní cachí-xi sá tǎe dii cínchú-xi-a tñi ñaha cuè tée isràèl ñúú Jerusalén, te duha dacùtu ñaha-güedé xii-dé, te cuáha cuèndá ñáhá-güedé xii-dé núú cuè tée ñúú Ròmá. Duha ní cáháⁿ Espíritú-gǎ —càchí té Agabú.

12 Te sá dúcáⁿ nǎ cáháⁿ-dé, te ní xáhaⁿ-ndí nchaa-ndí sá vǎ quíhíⁿ té Páblú ñúú Jerusalén. 13 Te té Páblú ní cachí-dé:

—¿Ná cuèndá ndée dúcáⁿ ndàhyú-ndó dǎndìhú iní ñáhá-ndó xii-í-í? Te ñá túú nǎ cuu cuèi na dácutu ñaha-güedé, àdi cuèi na càhni ñaha-güedé xii-í cuèndá sá cáháⁿ ndihí-í Jèsús, chí sa ndècu túha-í sá cùú-í —càchí-dé.

14 Te ñá túú ní sàndáá iní-dé sá dúcáⁿ xáhaⁿ-ndí, núu xiáⁿ ñá túú-gǎ ná ní xáhaⁿ-ndí xii-dé sá vǎ quíhíⁿ-dé, te ní xitnàha-ndí:

—Mee-ni-gǎ Yǎ Ndiòxí ná cùnaha-gǎ nása sàni iní-gǎ cada-gǎ —xitnàha-na-ndí.

15 Te ní queheⁿ-ndí ndàchiuⁿ-ndí, te ní xica-ndí cuáháⁿ-ndí ñúú Jerusalén. 16 Te cuáháⁿ ndihí-ndí ñúú cue té Cèsareá, cue té ní sándáá iní tnúhu Jèsús. Te ndèca ñaha-güedé xii-ndí cuáháⁿ vehe té Mnàsón, te té-áⁿ cúú-dě té distritú Chìpré, te ndècu-dé ñúú Jerusalén, te sa ní cuu vài nduu ní sándáá iní-dé tnúhu-gá, te vehe té-áⁿ ní xíndecu-ndí.

Té Páblú ndátnúhu-dé ndihí té Jácobó

17 Te òré ní quexio-ndí ñúú Jerusalén, te nchaa ñáyiú ní sándáá iní tnúhu Jèsús ní quixí-yu ní dándácõo váha ñahá-yu, chi ní cudíí víhí iní-yu sá ní quexio-ndí. 18 Te nduu tnèé cuáháⁿ ndihí-ndí té Páblú cuèndá cáháⁿ ndihí-ndí té Jácobó, te òré ní quexio-ndí núú ndécú-dě, te ndècu ndihí-dé nchaa cue té yíndaha ñaha xii ñáyiú sándáá iní tnúhu Jèsús. 19 Te té Páblú ní dándácõo váha ñaha-dě xii-güedé, te ní xáhaⁿ-dè nàcuáa ní quide Yá Ndiõxí ní chindee ñaha-gá xii-dé ní cáháⁿ-dé tnúhu-gá núú ñáyiú ñá túú cùu ñáyiú isràél. 20 Te sátá ní yáha ní cáháⁿ-dè, te ní ndácáⁿ táhú-yu núú Yá Ndiõxí cuèndá nchaa sá ní quide-gá. Te dàtnúni ní xáhaⁿ-güedé xii té Páblú:

—Yòhó sa ñaha-n sá ní cuu titní mìl ñáyiú isràél ní sándáá iní-yu tnúhu Jèsús, te cächí-yu sá ìo xìni ñuhu-xi cadá-yu nchaa nàcuáa cáháⁿ tnúhu sá ní chídó tnúni ndíi Moisés. 21 Te ní níhí-yu tnúhu sá dácuàha-n ñáyiú isràél ñáyiú ndècu ñúú xíca cuèndá sá vâ cadá-gá-yu nàcuáa ní cachí ndíi Moisés cadá-yu. Te xáhaⁿ-n xii-yu sá vâ cuàha-gá-yu sèñá ñii landú-yu, te vâ cadá-gá-yu dàtná ní xóo cada ñáyiú ndéé sanaha, duha dàcuaha-n ñáyiú ní níhí-yu tnúhu. 22 Te na níhí-yu tnúhu sá ndécú-n ìha, te tnávíí ngúíta-yu cáháⁿ cuèhé-yu cuèndá-n.

23 Te na cächí tnúhu-ndí nàcuáa cada-n. Ndècu cúmi cue téé vátá cadá-gá-güedé nàcuáa ní cáháⁿ mée-güedé sá cadá-güedé cuèndá nduu vétú iní Yá Ndiõxí. 24 Te quíhíⁿ-n ndihí-güedé te cada-n nchaa nàcuáa ní xóo cada ñáyiú ndéé sanaha cuèndá nduu vétú iní Yá Ndiõxí. Te tava-n dñúⁿ cuu núú-güedé cháhu-güedé veñúhu, te ducaⁿ te dàtnúni ndacu dèté díquí-güedé. Nchaa xíáⁿ cada-n, te quíni ñáyiú sá ñá ndáá tnúhu cáháⁿ nchaa ñáyiú cáháⁿ cuèhé cuèndá-n. Te na cùtnúni iní-yu sá tnàhá-n quide-n nchaa nàcuáa ní chídó tnúni ndíi Moisés cadá-yu. 25 Te sa ní quide ndáá-ndí cuèndá nchaa ñáyiú ñúú xíca, nchaa ñáyiú ní tuha ichi Jèsús. Te sa ní cadúha-ndí tutú ní tendaha-ndí cuáháⁿ ndaha nchaa ñáyiú-áⁿ sá vâ cáxi-yu nchaa sá nchító-ó ndúu táhú nchaa sá cächí-yu cùu ndiõxí ní cadúha cue ñáyiú ñuyúú-a. Te ní xáhaⁿ-ndí sá vâ cáxi-yu níñí, te vâ cáxi-yu cuñú nchaa quiti cuèhné. Te vâ cáháⁿ ndihí cue téé ñadìhí te núu ñá díú ñadìhí-güedé cúú-yu, te ní cuè ñáyiú dñí vâ cáháⁿ ndihí-yu téé te núu ñá díú yí-yu cùu-güedé. Duha ní tee-ndí núú tütú cuáháⁿ —cächí-güedé xáhaⁿ-güedé xii té Páblú.

Ní tnú-güedé té Páblú xiti veñúhu ñáyiú isràél

26 Te nduu tnèé cuáháⁿ té Páblú ndihí cúmi cue téé veñúhu càhnu sá ìo cùnuu núú ñáyiú isràél cada-güedé nàcuáa ní xóo cada ñáyiú ndéé sanaha cuèndá nduu vétú iní Yá Ndiõxí. Te ní quíhu-dé veñúhu càhnu sá ìo cùnuu-áⁿ ní xáhaⁿ-dè ná daga-gá nduu cùmání dandìhí-güedé nàcuáa ní xóo cada ñáyiú ndéé sanaha, te dàtnúni cànehe-güedé sá ndúú táhú Yá Ndiõxí quíhíⁿ veñúhu.

27 Te cùmání-gá cuu úsá nduu sá ní sáháⁿ-güedé veñúhu càhnu sá ìo

cùnuu, te sa ndècu tucu té Pàblú veñúhu. Te cue tée isràèl véxi distritú Asiá ní xini-güedé té Pàblú yíhí-dě veñúhu, te ní tñi ñaha-güedé xii-dé, te ío ní cáháⁿ cuèhé-güedé cuendá-dé núú dáva-gá ñáyi yíhi veñúhu cuendá sá cúdeèⁿ-yu núú tē Pàblú. ²⁸ Te níhi ní cáháⁿ-güedé, te xáhaⁿ-güedé xii-yu:

—¡Nchòhó ñáyi isràèl, yáchí-ndó chì cuànùndaha ñaha-ndo! Chì tée-a yayacáⁿ cuaháⁿ-dé cáháⁿ-dé sá ñà túú nàndíhi-o, te cáháⁿ-dé sá vǎ cadǎ-ó nchaa nacuaa cáháⁿ tñúhu sá ní chídó tñuní ndíi Moisés, te cächí-dé sá ñà túú nàndíhi veñúhu-a. Te ñà díú-ní xiǎⁿ chí sa ní quíhu-dé veñúhu-a ndíhi cue tée ñà túú cùu ñáyi isràèl, te sá dúcáⁿ ní quide-dé, te ñà túú-gǎ ní cǎnehe íi-dě xití veñúhu. Te veñúhu-a cùu-xi vehe Yá Ndióxi — cächí-güedé xáhaⁿ-güedé xii-yu.

²⁹ Te ducaⁿ ní cáháⁿ-güedé chí ní sani iní-güedé sá ní quíhu ndíhi-dé té Trófimú veñúhu-güedé, chí ní xini-güedé xicá cùu ndíhi ñaha-dé xití ñúú. Te tée-áⁿ cúu-dě tée ñúú Efesú, te ñà díú tée isràèl cúu-dě.

³⁰ Te chitu ñáyi ñúú-áⁿ ní tacá-yu ní tñi-yu té Pàblú táñúhu ñahá-yu ní ndee veñúhu cǎnu sá ío cùnuu, te òré-ni ní nacadí-güedé yèhe veñúhu-áⁿ. ³¹ Te sa cahní-yu té Pàblú ní cùu, te ní sáháⁿ ñⁿ úú-güedé núú ndécú tée cùu capitáⁿ cùnuu-gǎ, te ní xáhaⁿ-güedé xii-dé sá ncháá ñáyi ñúú Jerusalén xínáá-yu. ³² Te òré-áⁿ cuaháⁿ tée cùu capitáⁿ cùnuu-gǎ ndíhi dava-gá cue tée nchícúⁿ-gǎ ndíhi sandádú-dé. Te òré ní xini-yu ní quexio coyo-güedé núú xixúcu-yu, te ní yuhú-yu ñà túú-gǎ ní càní-yu té Pàblú. ³³ Te tée cùu capitáⁿ ní sátuha-dé té Pàblú, te ní xáhaⁿ-dě xii cue sandádú-dé sá tñi ñaha-güedé dacùtu ñaha-güedé úú cadená. Te dátñuní ní xicáⁿ tñuhú-dě núú-yu, te xáhaⁿ-dě:

—¿Ná cúu tée-a? ¿Ná ní

quide-dé? —cächí-dé xáhaⁿ-dě xii-yu.

³⁴ Te tée cùu capitáⁿ-áⁿ ñǎ ní cùtñuní iní-dé nùu ná cúu sǎ ní quide té Pàblú, chí uuⁿ ní ní cuáá-yu. Te tucu cáháⁿ ñⁿ, tucu cáháⁿ ñⁿ-yu, núu xiǎⁿ ní xáhaⁿ-dě cue sandádú-dé sá cándèca ñaha-güedé xii-dé quíhiⁿ cuártél núú ndécú-güedé. ³⁵⁻³⁶ Te nchícúⁿ ñáhǎ-yu cuaháⁿ ní quexio ndéé nàcuáa cǎa nchio cùni-yu cahní ñahá-yu xii-dé ní cùu. Te níhi ní cáháⁿ-yu xǎhǎ-yu sá cǎhí ñaha-güedé, te xiǎⁿ ní ndacani ñaha-güedé ndécá ñaha-güedé cuásaá nchio-ǎⁿ.

Té Pàblú xáhaⁿ-dě xii-güedé sá ñà túú cuèchi-dé

³⁷ Te cuánguihu-güedé cuártél ndíhi té Pàblú ní cùu, te ní xáhaⁿ-dě xii tée cùu capitáⁿ cùnuu-gǎ:

—Cáháⁿ ndàhú-í núú-n cùndetu-n na cùñaha-í ñⁿ úú tñúhu xii-yu — cächí-dé xáhaⁿ-dě.

Te tée tàxi tñuní-áⁿ ní xáhaⁿ-dě:

—¿Náa tñahá yòhò cáháⁿ-n tñúhu griégú? ³⁸ Te ní cáhàⁿ-í sá tée ègíptú cúu-n, chí diu-n ní ndúcú-n cuè tée ní nàá ndíhi tée cùchiuⁿ Césár ní cáhàⁿ-í, chí diu ñⁿ tée yacáⁿ ní ndúcú-dé cùmí mǐl cue tée ní sahni ndíyi. Te ndèca tñaha-güedé ní sáháⁿ xití yucu ní xíhi váha-güedé — cächí-dé xáhaⁿ-dě xii té Pàblú.

³⁹ Te té Pàblú ní xáhaⁿ-dě:

—Ñà díú tée ègíptú cùu-í, chí tée isràèl cùu-í, chí diu-ni tée isràèl cúú tǎtà-í, te dicó-ni sá ní cacu-í ñúú Tàrsú ñúú cǎhnú, te ñúú-áⁿ yíndèhu-xi distritú Ciliciá. Te cùni-í cada ndee iní-n dàña-n na caháⁿ ndíhi-í-yu — cächí-dé xáhaⁿ-dě.

⁴⁰ Te ní xáhaⁿ tée cùu capitáⁿ cùnuu-gǎ sá cúu cáháⁿ té Pàblú, núu ní ngúnutñi-dé núú nchio, te ní quide-dé ndaha-dé sá cùndédóho-yu. Te ní sadí-yu yuhú-yu, te ní cáháⁿ-dé tñúhu ñáyi isràèl, te xáhaⁿ-dě xii-yu:

22

1—Chí cádá càhnu iní nchòhò cue tée sa cuéhé ndìhì nchòhò cue tée cuechi, na càháⁿ-í ìⁿ tnúhu cundedóho-ndo sá ñà túú cuèchi-í, chí ñà túú nã ní quide-í, te ni ñà túú nã tnúhu càháⁿ-í —càchí-dé xàhaⁿ-dë xii-güedé.

2 Te cuëndá sá dúcáⁿ nĩ càháⁿ-dë tnúhu mèé-yu núu tnàvíí-nã ní sadí-yu yuhú-yu ní xíndedóho-yu ní càháⁿ-dë, te xàhaⁿ-dë:

3 —Yúhú cùu-í tée isràél, te ní cacu-í ñuú Tàrsú, te ñuú-áⁿ yíndèhu-xi Ciliciá. Te davitna lìhli-í cutnàhá ní quexio-í ñuú Jerusàlén ní dácúháá ñàha té Gamaliél. Te ní dácúhááⁿ nchaa tnúhu ní chídó tnùnì nchaa cue tée ndéé sanaha nàcuáa cada ñáyiu. Te yúhú ní cahu iní-í ní quide-í titní núú chiúⁿ nacuáa cuu váha iní Yã Ndiòxí ní càháⁿ-í, te ñuú-ndi-í ducaⁿ quide nchohó tucu. 4 Te ní sánú ndúcù-í nchaa ñáyiu sàndáá iní-xi tnúhu Jèsús, cuèi tée, cuèi ñáyiu ñàhì ní dácùtù-í-yu, te ní chihi-í-yu vecaá, te ní níhì-í tnúhu ndee iní sá càhni-ndí-yu. 5 Te dútú cúnù-gá ndìhì cue tée cùnùu núú-ndó ñàha-güedé sá ndáá càháⁿ-í chí mee-güedé ní taxi-güedé tutú cuáñaha-í xii ñáyiu isràél ñáyiu ndècu ñuú Dàmascú cuëndá cutnùnì iní-yu ná chíúⁿ cuáháⁿ-í ní cùu. Te ñùhu-í ichi cuáháⁿ-í ñuú-áⁿ cuànúndúcù-í ñáyiu ní sàndáá iní-xi tnúhu Jèsús cuëndá dacùtu-í-yu te candeca-í-yu ndixi, te iha cada úhú ñàhá-güedé xii-yu ni cùu.

Te Páblú xàhaⁿ-dë xii ñáyiu nàcuáa ní cuu ní tuha-dé ichi Jèsús (Hch. 9:1-19; 26:12-18)

6 'Te ta cùyatni-í ñuú Dàmascú cuáháⁿ-í, te cùu-xi datná òré cauxúú nduu, te uuⁿni ní quee ñuhú andiu, te ní dáyèhé-xi ndéé núú nútñí-í. 7 Te ní quide nee-xi núu-í, xíáⁿ ní nduá-í ndéé ñuhu. Te ní tecú dóho-í càháⁿ ìⁿ sá càháⁿ andiu, te càchí-xi: “Yòhó té Sàulú,

¿ná cuëndá cùu ùhú iní ñàhá-n dándoho ñaha-n xii-í?” càchí sá càháⁿ-áⁿ. 8 Te ní xàhaⁿ-í: “¿Ná cùu yòhó sá càháⁿ-áiⁿ?” xàhaⁿ-í. Te ní càháⁿ tucu ingá xito te càchí-xi: “Yúhú cùu-í Jèsús tée ní xíndecu ñuú Nazàrét, te ducaⁿ òré dándoho ñaha-n xii-í”, càchí sá càháⁿ-áⁿ. Te xíáⁿ ní cutnùnì iní-í sá díú Jèsús càháⁿ. 9 Te nchaa cue tée ndìhì-í ní xiní-güedé ní dáyèhé ñuhú, te ní yùhú-güedé, dico ñà túú ní tècú dóho-güedé òré ní càháⁿ-gá. 10 Te ní xàhaⁿ-í xii-gá: “Yòhó Xítohó Jesucristú, ¿ná cùnì-n càda-í?” xàhaⁿ-í xii-gá. Te ní cachí-gá: “Ndacóo, te quíhìⁿ-n ñuú Dàmascú, yàcáⁿ tecú tnúhu-n nchàa nacuáa cùnì Yã Ndiòxí cada-n”, càchí-gá —càchí té Páblú xàhaⁿ-dë xii-yu.

11 Te ní xàhaⁿ tucu té Páblú:

—Te cuëndá sá ní dácúáá ñàha ñuhú xii-í ñuú ní tnì cue tée ndìhì-í ndaha-í ndecá ñàha-güedé cuáháⁿ ndéé ñuú Dàmascú.

12 'Te yàcáⁿ ndécú ìⁿ tée nani Ananiás, te òré sá ní chídó tnùnì ndí Moisés cada-yu quide-dé. Te nchaa ñáyiu ñuú Dàmascú òré váha càháⁿ ndìhì ñàhá-yu xii-dé. 13 Te ní quexio-dé núú ndécù-í, te ní cachí-dé: “Yòhó té Sàulú, tée ndècu ndìhì-í ichi Xítohó Jesucristú, ndúha núu-n”, càchí-dé. Te òré-ni ní nacaáⁿ núu-í te ní xiní-í-dé. 14 Te dátñùnì ní cachí-dé: “Yã Ndiòxí ní càháⁿ ndìhì-gá ñani tnàhá-ó ní xíndecu ndéé sanaha. Te ñuú-gá ní cáxi ñàha-gã xii-n cuëndá quini-n nchàa sá váha cùnì-gá cada-n. Te quini-n Jèsús Yaá ñà túú cuèchi-xi, te ñuú-ni mee-gã càháⁿ ndìhì ñàha-gã xii-n. 15 Te càháⁿ-n tnúhu Jèsús núu nchàa ñáyiu, te càháⁿ-n nchàa sá ní xiní-n ndìhì nchaa sá ní xíndedóho-n. 16 Tnàvíí, te quíhìⁿ-n cuàndute-n, te càháⁿ ndìhì-n Yã Ndiòxí cuëndá cada càhnu iní-gá nchaa sá cuéhé sá dúhá ní quide-n”, duha ní cachí té Ananiás xii-í —càchí té Páblú xàhaⁿ-dë xii-yu.

Té Páblú ní caní-dé cuèndú nàcuáa ní xáhaⁿ Jèsús cada-dé quíhíⁿ-dé ñúú núú xíndecu ñáyiú ñá túú cùu ñáyiú isràél

¹⁷ Te ní xáhaⁿ tùcu té Páblú:

—Te ní ndee-í cuándixi-í ñúú Jerusalén. Te ní sáháⁿ-í veñúhu càhnu sá ïo cùnunu ní cáháⁿ ndíhí-í Yá Ndiòxí, te ní dácótó núú ñáhá-xí sá méé Jèsús ní xini-í xití veñúhu, ¹⁸ te ní cachí-gá: “Yáchí, quee-n ñúú Jerusalén, chí ñáyiú-a vá quíndáá iní-yu nàcuáa ní cachí-í cuñaha-n xii-yu cuèndá-í”, duha ní cachí-gá xii-í. ¹⁹ Te ní xáhaⁿ-í xii-gá: “Yóhó Xítohó Jesucrístú, sa xini-n sá ncháá ñáyiú nàhá-yu sá ní sáháⁿ-í ndí tnahá ñⁿ ndí tnahá ñⁿ veñúhu nànducu-í ñáyiú sandáá iní tñúhu-n, te ní tñú-í-yu, ní chihi-í-yu vecaá, te ní táuchíuⁿ-í ní caniha-güedé xii-yu. ²⁰ Te cútnàhá ní sahní-güedé ndí Tévá téé ní xóo cáháⁿ tñúhu-n, te tñáhá-í ndécú òré-áⁿ te ní xindeé-í dóó cue téé ní sahní ñaha xii ndí. Te yúhú ní cáháⁿ-í sá ní quide váha-güedé sá dúcáⁿ ní quide-güedé”, duha ní xáhaⁿ-í xii-gá. ²¹ Te ní cachí tñúhu-gá xii-í: “Cuàháⁿ chí cuíni-í quíhíⁿ-n ncháa ñúú xicá núú xíndecu cue ñáyiú ñá túú cùu ñáyiú isràél cáháⁿ-n tñúhu-í”, càchí-gá —càchí té Páblú xáhaⁿ-dé xii-yu.

Te Páblú ndíhí téé tàxi tñuní ñáhá xii cue sandadú

²² Te sá dúcáⁿ ní cáháⁿ-dé, te ñá ní tñáhá-gá iní-yu cundedóho-yu tñúhu cáháⁿ-dé. Te ñⁿ-ní ní cuú-yu ncháá-yu, te ní cuáá-yu, te xáháⁿ-yu:

—¡Chí cáhni-dé! ¡Ñá díú sá cündecu-dé ñuyíú-a! —càchí-yu xáháⁿ-yu.

²³ Te meí òré ducaⁿ ní cáháⁿ-yu, te ní ndátá-yu dóó-yu, te ní dáquènè-yu núú ñnu sá sàtú iní-yu. Te ní quéhnu-yu ñuhu, te ní dácácòyó-yu núú ñnu sá ïo sàtú iní-yu. ²⁴ Te téé cùu

capitáⁿ cùnùu-gá ní xáhaⁿ-dé xii cue sandadú-dé:

—Chí ditá-dé ná quíhu-dé ndéé xití vehe, te caní-ndo-dé ñí, chí na quène yuhu-dé ná tñúhu ní cáháⁿ-dé núu ndéé dúcáⁿ cùdèéⁿ-yu núú-dé —càchí-dé xáhaⁿ-dé xii-güedé.

²⁵ Te sáta ní dácútú ñàha-güedé xii té Páblú sá caní ñàha-güedé ní cùu, te ní xáhaⁿ-dé xii téé cùu capitáⁿ ndécú-áⁿ:

—Te na cachí tñúhu-í sá vā cúú caniha-güedé ñí, chí téé ròmá cúú-í, te vátá quíni ndáá-gá-ndó núu ndécuéchi-í àdi ñáhá —càchí-dé xáhaⁿ-dé xii téé cùu capitáⁿ.

²⁶ Te sá dúcáⁿ ní cáháⁿ-dé, te ní sáháⁿ téé cùu capitáⁿ núú téé cùnunu-gá, te ní xáhaⁿ-dé:

—Vá cúú cani-o téé-áⁿ, chí téé ròmá cúú-dé —càchí-dé xáhaⁿ-dé.

²⁷ Te ní sáháⁿ téé cùu capitáⁿ cùnùu-gá ndéé núú tē Páblú, te ní xáhaⁿ-dé:

—Cáháⁿ ndáá-n núu ndisa téé ròmá cúú-n —càchí-dé xáhaⁿ-dé.

Te ní xáhaⁿ tē Páblú:

—Ndáá sá téé ròmá cúú-í —càchí té Páblú xáhaⁿ-dé xii téé cùnunu-áⁿ.

²⁸ Te ní xáhaⁿ téé cùnunu-áⁿ:

—Yúhú tñáhá-í cúú-í téé ròmá, chí vāi díhúⁿ ní cháhu-í —càchí-dé xáhaⁿ-dé.

Te té Páblú ní xáhaⁿ-dé:

—Tñáhá-í cúú-í téé yacáⁿ tucu, chí tátá-í cúú-dé téé ròmá —càchí té Páblú xáhaⁿ-dé xii téé cùu capitáⁿ cùnùu-gá.

²⁹ Te uuⁿ ní nacaca sata cuè téé cuáháⁿ caniha xii-dé ní cuu. Te ní yúhú téé tàxi tñuní sá dúcáⁿ ní xáhaⁿ tē Páblú sá téé ròmá cúú-dé, chí ní xáhaⁿ-dé ní dácútú ñàha-güedé xii-dé, núu xíáⁿ ní yuhu-dé.

Té Páblú ní cáháⁿ ndíhí-dé cue téé cùnunu òré ní quide-güedé jundá

³⁰ Te téé tàxi tñuní sandadú ñá ní xini-dé ná cuéchi ní dácáá ñáyiú isràél díquí tē Páblú, núu xíáⁿ nduu tñéé ní cana-dé cue dútú cùnùu, ndíhí cue téé cùchiuⁿ, ndíhí cue téé cùu sacuéhé, te ní xáhaⁿ-dé sá cáda-güedé jundá cuèndá nducu

tnũhu-güedé núú tẽ Pãblú ná cuéchi ní dácáã-yu díquí-dẽ. Te ní xáhaⁿ-dẽ xii cue sandádú sá nándaxi ñaha-güedé cadená ndútú-dẽ, te candeca ñaha-güedé quíhíⁿ núú cádá-güedé jündá. Te ní sáháⁿ-güedé ní nandaxi ñaha-güedé xii-dé ndécá ñaha-güedé cuáháⁿ jündá, te ní quexìo-güedé, te ní ngúnutnii-dé núú cuè tée cùchiuⁿ.

23

¹ Te yacáⁿ ní xindéhé vaha té Pãblú núú nchaa-güedé, te ní xáhaⁿ-dẽ:

—Cada càhnu iní nchòhó cue tée cùchiuⁿ, te ducaⁿ nchòhó cue tée cùu sacuéhé, véxi-í cächí tñũhu-í sá ñà túú cuèchi-í, chi mee Yã Ndiõxí náhá-gã nása ndècu-í ñuyú-a, te ñà túú cùcahaⁿ núú-í núú-gã —cächí té Pãblú xáhaⁿ-dẽ xii-güedé.

² Te té Ananiás tée cùu dútú cúnùu-gá ní xáhaⁿ-dẽ xii cue tée nùtnii yatni ñii té Pãblú sá cáni-güedé déhndé yuhu-dé. ³ Te té Pãblú ní xáhaⁿ-dẽ xii dútú-ã:

—Yòhó, chi úhú tñahí iní-n, chi ní ndúcú-n tée ní caniha xii-í, te ñà túú cuèchi-í, dico quini-n ná cada ñaha Yã Ndiõxí xii-n. Te yòhó ní cana ñaha-n ndùcu tñũhu-n nõu quide-í nchaa nàcuáa càháⁿ tñũhu sá ní chidó tñuni ndii Moisés cada-o. Te mee-n ní ndúcú-n tée ní caniha, te ñà túú ducaⁿ ní càháⁿ ndii cada-o —cächí té Pãblú xáhaⁿ-dẽ xii dútú cúnùu-gá-áⁿ.

⁴ Te cue tée xĩnutnii ñii té Pãblú ní xáhaⁿ-güedé xii-dé:

—Nèhé ní quide-n chi ní xicuéhé-n dútú cúnùu-gá tée xĩnu cuechi núú Yã Ndiõxí —cächí-güedé xáhaⁿ-güedé xii té Pãblú.

⁵ Te té Pãblú ní xáhaⁿ-dẽ xii-güedé:

—Cada càhnu iní-ndó chi ñà túú xini-í sá dútú cúnùu-gá cùú-dẽ, chi núú tütú Yã Ndiõxí cächí-xi sá vã cùú càháⁿ cuèhé-ó cuendá ñii tée cùnùu ñuú-ó yòtnũhu. Te yùhú ñà túú xini-í sá tée cùnùu cuu-dé nõu ní sácóo-í ní càháⁿ-í —cächí té Pãblú xáhaⁿ-dẽ xii-güedé.

⁶ Te òrè-áⁿ ní cutnùní iní té Pãblú sá dáva-güedé cündihí-güedé cue tée cùu saducéú, te dava-güedé cündihí-güedé cue tée cùu fariséú, te ñihi ní càháⁿ-dẽ ní xáhaⁿ-dẽ xii-güedé:

—Yùhú cùu-í tée fariséú, te tñahá tãtã-í ndihí xii-í cùú-güedé cue tée fariséú tucu. Te tñahá yùhú sandáá iní-í sá ndótó nchaa ñayiu ní xihí, te núu xiãⁿ cuini-ndó ndùcu tñũhu-ndo nõu-í cáná ñaha-ndo —cächí-dé xáhaⁿ-dẽ xii-güedé.

⁷ Te sá dúcáⁿ ní càháⁿ-dẽ xiãⁿ ní nãá ndihí tñaha cue tée cùu fariséú ndihí cue tée cùu saducéú, chi ñà ñii-ní tñũhu ní càháⁿ-güedé, chi ní ndi queheⁿ ndi queheⁿ-güedé sá ní càháⁿ-güedé. ⁸ Te cue tée cùu saducéú cächí-güedé sá vã ndótó cuè ñayiu ní xihí, te cue tée cùu fariséú cächí-güedé sá ndótó-yu. Te cue tée cùu saducéú cächí-güedé sá ñà túú espíritú xínú cuèchi núú Yã Ndiõxí, te cue tée cùu fariséú cächí-güedé sá ió espíritú xínú cuèchi núú-gã. ⁹ Te ta cùdèéⁿ-güedé cuáháⁿ, te ñihi-gã cùú iní-güedé càháⁿ-güedé, te ñii úú cue tée cùu fariséú cue tée dàcuaha ñaha xii ñayiu nchaa tñũhu ní chidó tñuni ndii Moisés ní càháⁿ ñihi-güedé, te xáhaⁿ-güedé:

—Ñà túú cuèchi-dé, te cudana te ní càháⁿ ndihí-dé ñii espíritú xínú cuèchi núú Yã Ndiõxí te vã ngõo vã cùú vaha iní-ó nõu-gã —cächí cue tée cùu fariséú xáhaⁿ-güedé xii-güedé.

¹⁰ Te cuendá sá ió xĩnãá-güedé, xiãⁿ ní yùhú tée cùu capitáⁿ cúnùu-gá sá càhni-güedé té Pãblú, núu xiãⁿ ní xáhaⁿ-dẽ sá quíhíⁿ-güedé cúnúcuaca ñaha-güedé candeca ñaha-güedé núhú cuártel.

¹¹ Te ndéé niú cùú úú ní quexìo Xitohó Jesucristú núú ndécú té Pãblú, te ní xáhaⁿ-gã:

—Ñii cunduu-n, vã yùhú-n, chi nàcuáa ní càháⁿ-n ní cacunehe ñaha-n xii-í iha, te ñii-ni ducaⁿ càháⁿ-n càcunehe ñaha-n xii-í

quihíⁿ-n ñùú Rómá —càchí-gá xáhaⁿ-gã xii-dé.

Cahni-güedé té Páblú ní cùu

¹²⁻¹³ Te nduu tnée ní natacá vîhi-gá údico cue téé isrâél ní ndatnúhu-güedé sá cahní-güedé té Páblú, te ní xítñaha-güedé:

—Ní dítá vã cáxí-ó te ni ndüte vá cóhó-ó ndéé ndacu-o cahní-o té Páblú, te dâtnúni caxi-o dítá, te coho-o ndüte, chi sa ní sani iní-ó sã cádá-ó, te cuu cuéchi xii-o ñúú vá cádá-ó —càchí-güedé xítñaha-güedé.

¹⁴ Te ní sáhán-güedé núú ndécú nchàa dútú cúnúu ndîhi nchaa cue téé cùu sacuéhé, te ní xáhaⁿ-güedé:

—Ní cachí-ndí sá ni dítá vã cáxí-ndí ndéé ñúú ní ndacu-ndí ní sahní-ndí té Páblú, chi sa ní sani iní-ndí sá cádá-ndí, te cuu cuéchi núú vá cádá-ndí. ¹⁵ Te duha cada-ndo ndîhi dava-gá cue téé cùnúu, chi cùñaha-ndo xii téé cùu capitáⁿ cúnúu-gá: “Quixi ndîhi-n tã Páblú núú ndécú-ndí cuendá ndatnúhu ndîhi-ndí-dé, chi cuíní-ndí nducu tnúhu váha-gá-ndí ná cúú sã ñí quide-dé”, duha cùñaha-ndo xii téé tàxi tñuní sandádú. Te ducaⁿ-ni cùñaha-ndo dândahú-ndó-güedé cuendá quixi ndîhi-güedé té Páblú, te nchúhú sa cundetú-ndí-güedé ichi, chi quini té Páblú ná cahni-ndí-dé —càchí-güedé xáhaⁿ-güedé xii cue téé cùchiuⁿ.

¹⁶ Te déhe cúha té Páblú ní níhí-dé tnúhu nàcuáa cada-güedé dító-dé. Te ní sáhán-dé cuártel, te ní xáhaⁿ-dè xii dító-dé nàcuáa càháⁿ-güedé cada ñaha-güedé. ¹⁷ Te ní cana té Páblú ñⁿ téé cùu capitáⁿ, te ní xáhaⁿ-dè:

—Vá cündèe iní-n, quihíⁿ ndîhi-n tãe-a na càháⁿ ndîhi-dé téé cùnúu-gá, chi ndécú ñⁿ cuendú cùñaha-dé cuíní-í —càchí té Páblú xáhaⁿ-dè xii téé cùu capitáⁿ.

¹⁸ Te dâtnúni ní xica téé cùu capitáⁿ ndécá-dé dáxíⁿ té Páblú cuáháⁿ núú ndécú tãe cùnúu-gá, te

òré ní quexìo-güedé núú-dé, te ní xáhaⁿ tãe cùu capitáⁿ xii-dé:

—Té Páblú tãe yîhi vecaá ní cana ñaha-dé xii-í, te ní cachí-dé véxi-í ndîhi tãe-a cuendá cachí tnúhu-dé ñⁿ cuendú cuíní-dé —càchí-dé xáhaⁿ-dè xii téé cùnúu-gá.

¹⁹ Te téé cùnúu-áⁿ ñí tñii-dé ndaha dáxíⁿ tã Páblú, te tãnehe ñaha-dé cuáháⁿ ñⁿ xio, te ní xicáⁿ tnúhú-dé núú-dé, te xáhaⁿ-dè:

—¿Ná cuendú cuíní-n càháⁿ-n? —càchí-dé xáhaⁿ-dè xii dáxíⁿ tã Páblú.

²⁰ Te ní xáhaⁿ-dè xii téé cùnúu-áⁿ:

—Cue téé isrâél ní ndatnúhu ndáa-güedé sá quixí-güedé tneé càháⁿ ndáhú-güedé núú-n càndeca-n té Páblú quihíⁿ jundá, te yàcáⁿ cácáⁿ tnúhú ndáa-güedé núú-dé ná cúú sã ñí quide-dé, càchí-güedé xítñaha-güedé. ²¹ Te vá quíndáa iní-n chi dícó dandáhú ñáhá-güedé, chi vîhi-gá údico-güedé ndátnúhu-güedé cundedí-güedé ichi cahni ñaha-güedé. Te xítñaha-güedé sá ni dítá vã cáxí-güedé, te ni ndüte vá cóhó-güedé ndéé ñúú ní ndacu-güedé ní sahní ñaha-güedé, te dâtnúni caxi-güedé dítá, te coho-güedé ndüte, chi sa ní sani iní-güedé sá cádá-güedé, te cuu cuéchi núú vá cádá-güedé, càchí-güedé xítñaha-güedé. Te cundecu túha-ná-güedé cundetú ñaha-güedé tneé, te núú na quíndáa iní-n càndeca-n-dé quihíⁿ jundá —càchí-dé xáhaⁿ-dè xii téé cùnúu-áⁿ.

²² Te téé cùnúu-áⁿ ñí xáhaⁿ-dè: —Cuanùhú, te vá yóo tñahí cùñaha-n sã ñí quixi-n ñí cachí tnúhu-n nàcuáa càháⁿ-güedé cada-güedé té Páblú —càchí-dé xáhaⁿ-dè.

—Cuanùhú, te vá yóo tñahí cùñaha-n sã ñí quixi-n ñí cachí tnúhu-n nàcuáa càháⁿ-güedé cada-güedé té Páblú —càchí-dé xáhaⁿ-dè.

Ndèca-güedé té Páblú cuáháⁿ núú tã Juéli téé cùu gobiernú

²³ Te téé cùnúu-gá ní cana-dé úú cue téé cùu capitáⁿ, te xáhaⁿ-dè:

—Tava-ndo úú ciendú sandádú cue téé xica saha, ndîhi únídico úxí sandádú cue téé yódo cuayú, ndîhi

úú cièndú sandàdú mee-ni cuè téé xìnehe lànzá. Te cada túha-ndo chi caca-ndo òré caá ííⁿ niú quíhíⁿ-ndó ñúú Cèsareá ndíhi té Páblú. ²⁴ Te nducu-ndo cuèdicó ííⁿ úú cuàyú codo-dé ndíhi cue téé ndèé ñáhá xii-dé. Te cada cuèdádú-ndó-dé ichi, te candeca-ndo-dé quíhíⁿ quíndeca-ndo-dé núú téé cùu gobiernú —càchí téé cùnuu-áⁿ xáhaⁿ-dé xii cue téé cùu capitáⁿ.

²⁵ Te téé cùnuu-áⁿ ñí cadúha-dé tutú cuèndá quíhíⁿ ndaha té Juéllí téé cùu gobiernú. Te duha ní chídó tnùní-dé núú tutú cuáháⁿ:

²⁶ “Cóvaha díí-n, tātá gobernàdór. Ío cada càhnu iní, yúhú nání-í Claudiú Lisiás. Yúhú ní tendaha-í ííⁿ tutú véxi ndaha-n cuèndá quíni tnùní-n nàcuáa ní cuu iha. ²⁷ Cue téé israél ní tñii-güedé ííⁿ téé nàni Páblú cuíni-güedé cahni ñaha-güedé ní cùu, te ní níhí-í tnúhu sá téé rómá cùú-dé núu ní sáhá-í ndíhi sandàdú-í ní dácäcu-ndí-dé. ²⁸ Te ní cuíni-í quíni-í ná cuèndá téé ñaha-güedé cuéchi xii-dé, núu xíáⁿ ndécá-í-dé ní sáháⁿ núú ñí quide cue téé cùchiuⁿ israél jundá. ²⁹ Te yacáⁿ ní níhí-í tnúhu sá ñà túú ñà cuéchi ni quide-dé, chi cuèndá-ni sá ñí níhí-güedé tnúhu sá ñà túú sandáá iní-dé cada-dé nchaa sá ñí xóo cada ñáyiú ní xíndecu ndéé sanaha nchícúⁿ nihnu-güedé quide-güedé, xíáⁿ ní cudééⁿ-güedé núú-dé. Te ñá túú cuéchi càhnu ni quide-dé núu quíhíⁿ-dé vecaa àdi cahni-í-dé. ³⁰ Te ní níhí-í tnúhu sá cuè téé israél ndúcú-güedé nàcuáa cada-güedé cahni ñaha-güedé xii-dé, xíáⁿ ní xáhaⁿ-í xii sandàdú-í sá cándèca ñaha-güedé quixi xíáⁿ. Te ní xáhaⁿ-í xii cue téé tèe ñaha cuéchi sá quixí-güedé ndéé xíáⁿ cáháⁿ-güedé núu ná cuéchi ní quide-dé. Te cada càhnu iní-n chi duha-ni ndùu tnúhu cáháⁿ-í, te cundee iní-n quèheⁿ cuèndá-n-dé”, duha ní chídó tnùní téé ní cadúha tutú cuáháⁿ ndaha té Juéllí.

³¹ Te cue sandàdú ní quide-güedé

nàcuáa ní xáhaⁿ téé tàxi tnùní ñáhá xii-güedé chí ní xica-güedé ndíhi té Páblú òré caá ííⁿ niú, te ñiu-ni niú-áⁿ ñí quexio-güedé ñuú Antipatrís. ³² Te sáta ní túndaá, te ní nacuico cuè téé xìnehe lànzá ndíhi dava-gá sandàdú xíca sàha cuánuhú-güedé cuàrtél, te mee-ñà sandàdú cue téé yòdo cuayú cuáháⁿ ndíhi té Páblú. ³³ Te òré ní quexio-güedé ñuú Cèsareá, te ní sàha-güedé téé cùu gobiernú tutú néhé-güedé cuáháⁿ. Te ní quèheⁿ cuèndá-dé té Páblú. ³⁴ Te sáta ñí dácúahá téé cùu gobiernú-áⁿ tutú-áⁿ te ní xícaⁿ tnúhú-dé núú té Páblú, te xáhaⁿ-dè:

—¿Ndéé téé cùu-n? —cachí-dé xáhaⁿ-dè.

Te ní xáhaⁿ té Páblú:

—Téé Ciliaciá cùú-í —càchí-dé xáhaⁿ-dè.

³⁵ Te ní xáhaⁿ téé cùu gobiernú-áⁿ:

—Òré quexio cue téé tèe ñaha cuéchi xii-n, te cáháⁿ-n nàsa ní cuu, chí níhí-í nàcuáa cada ndáá-í cuèndá-n —càchí-dé xáhaⁿ-dè xii té Páblú.

Te ní xáhaⁿ-dè xii sandàdú sá cùndèé-güedé té Páblú vehe càhnu té Hèrodés.

24

Té Páblú xáhaⁿ-dè xii té Juéllí sá ñà túú cuéchi-dé

¹ Te sáta ñí cuu úhúⁿ nduu, te té Ananiás dútu cùnùu-gá cuáháⁿ-dé ñuú Cèsareá ndíhi cue téé cùu sacuéhé ndíhi ííⁿ téé nàni Tértulú téé cáháⁿ yuhu-güedé. Te cuáháⁿ-güedé núú téé cùu gobiernú cuáháⁿ dácúándèhnde-güedé núú-dé sá ndècuéchi té Páblú. ² Te ní sànguaca-güedé té Páblú. Te òré ní quexio-dé núú-güedé, te ní ngúita té Tértulú xáhaⁿ-dè xii té Juéllí nàcuáa càa cuéchi tèe-güedé té Páblú:

—Ío càhnu cada iní tātá gobernàdór. Duha ndùu chiuⁿ ndéé iní ñáhá-ndí xii-n véxi-ndí, núu nàsa cachí-n cùnduu. Tàxahu xii-n, chí ío váha ndècu nchaa ñáyiú, te ñá túú nàá-yu chí ío váha quide-n. ³ Te ío cùdíí iní-yu chí

nchaa-ni nduu xĩndecu váha-yu nchaa-yu, te ío táxáhu Ndiõxí xii-n sá dúcáⁿ quide-n. ⁴ Te cada càhnu iní, cuiní-í ndatnúhu-o ìⁿ úú-ni cuèndú cuèndá sá vã cùyaa-o dacuíta-í chùuⁿ-n. ⁵ Te ìⁿ téé iha ío dásatú iní ñáhá-dẽ, chi ndèni ní cuu cuáháⁿ-dẽ ndatnúhu-dẽ ndihí ñáyiú isràél dánáá-dẽ-yu. Te nèhẽ quidé-dẽ chi cuáháⁿ-dẽ dácàháⁿ-dẽ nchaa ñáyiú cuèndá quíndáa iní-yu tnúhu téé ní xĩndecu ñuú Nazàrèt. ⁶ Chi ducaⁿ càháⁿ cue téé iha sá ní sáháⁿ-dẽ veñúhu càhnu sá ío cùnuu, te cuiní-dẽ daquèe tíhú-dẽ veñúhu cuèndá cuiní-dẽ xocani-dẽ sá íi ndécú, núu xíáⁿ ní tñii ñaha-güedẽ ndécá ñaha-güedé cuáháⁿ núu cuè té cùchiuⁿ cuèndá cácaⁿ tnúhú-güedé núu-dẽ núu ná cuèndá ducaⁿ cuiní-dẽ cada-dẽ, chi ducaⁿ càa leí ndécú ndihí-güedé sá cáda ndáá-güedé núu ná ìⁿ sá cúu. ⁷ Te té Lisíú téé cùu capitáⁿ cúnùu-gá ní quexio-dẽ ndihí sandàdú, te ní dácúnú-güedẽ nchaa cue téé nùtní ndihí té Páblú, te dàtnùní ní tñii ñaha-güedẽ xii-dẽ ndécá ñaha-güedé cuáháⁿ. ⁸ Te sátá xíáⁿ, te ní xáhaⁿ-dẽ sá quíxí-güedẽ ndéé ndíha cundáa cuéchi-dẽ. Te yòhó cundee iní-n càcáⁿ tnúhú-n núu-dẽ, te núu ndáá ducaⁿ ní quide-dẽ àdi ñáhá —càchí té Tèrtulú xáhaⁿ-dẽ xii té Juéllí téé cùu gobiernú.

⁹ Te dava-gá cue téé isràél xĩnutnii xíáⁿ ní càháⁿ-güedé sá ndáa càháⁿ té Tèrtulú. ¹⁰ Te téé cùu gobiernú ní quide-dẽ ndaha-dé núu té Páblú cuèndá càháⁿ-dẽ, te té Páblú ní xáhaⁿ-dẽ:

—Yòhó sa ní cuu titní cuía ndécú-n iha xehndé-n cuéchi nchaa ñáyiú xĩnàá, núu xíáⁿ ío cùdí iní-í sá ndíha téhndé cuéchi tèe ñaha-güedé xii-í. Te cundee iní-n cãndedóho-n na càni-í cuèndú nàcuáa ní cuu. ¹¹ Te nducu tnúhu-n te quiní-n ná càháⁿ ndáá-í, chi sa ní cuu úxúú nduu sá ní sáháⁿ-í veñúhu càhnu sá ío cùnuu ñuú Jerusalén ní càháⁿ ndihí-í Yá Ndiõxí. ¹² Te ni ñà túú

ní nàá-í ndihí ñáyiú xití veñúhu, te ñá túú ní xáhaⁿ-í nàá-yu ni ìⁿ xichi, te ni ìⁿ veñúhu líhli ní sáháⁿ-í ñá túú nã ní xáhaⁿ-í cadá-yu. ¹³ Te ni ñà túú quèñuhu-güedé cue téé càháⁿ ndáá te núu ndáá ducaⁿ ní quide-í. ¹⁴ Te yúhú càháⁿ ndáá-í sá càháⁿ ndihí-í Yá Ndiõxí, chi ñu-ni Yá Ndiõxí ní xóo càháⁿ ndihí ñáyiú ndéé sanaha, núu xíáⁿ ní tuha-í ichi-gá. Te cue téé-a càchí-güedé sá ñà díú ìⁿ ichi váha ni tuha-í. Te yúhú sandáa iní-í nchaa sá ní chidó tnùní ndíi Moisés ndihí dava-gá cue téé ní xóo càháⁿ tnúhu Yá Ndiõxí ndéé sanaha. ¹⁵ Te sandáa tucu iní-í sá ndótó nchaa ñáyiú ní xíhí, cuèi ñáyiú váha iní-xi, te cuèi ñáyiú úhú iní-xi, dico ndotó-yu. Te ducaⁿ ní xóo quíndáa iní nchaa ñáyiú ní xĩndecu ndéé sanaha. ¹⁶ Te yúhú ío ndùcu ndee-í quidé-í nchaa sá càháⁿ Yá Ndiõxí cuèndá sá vã cúu càhaⁿ núu-í núu-gá ndihí núu ñáyiú ñuyíu-a.

¹⁷ Te sa ní cuu titní cuía sã ñà túú-gã sáháⁿ-í ñuú Jerusalén, te ní sáháⁿ tucu-í nèhè-í díhúⁿ ní taxi ñáyiú ñuú xicá cuèndá cuañaha-í xii ñáyiú ñuú Jerusalén. Te ní ndúcú-í sá cuãha táhú-í Yá Ndiõxí. ¹⁸ Te ní xĩndecu-í veñúhu càhnu sá ío cùnuu ní quide-í nchaa nàcuáa ní xóo cada ñáyiú ní xĩndecu ndéé sanaha cuèndá nduu vétú iní Yá Ndiõxí. Te ñà túú chitù-yu ni sáháⁿ, te ni ñà túú nã ní cùu, te ní naníhí ñáhá ìⁿ úú cue téé isràél xii-í, cue téé véxi distritú Asiá. ¹⁹ Te quixi mee-güedẽ iha càháⁿ-güedé, te núu sá ndáa ní xini-güedé sá yúhú ndècuéchi-í ní cùu, ²⁰ àdi ñáhá. Dico càchí tnúhu cue téé-áⁿ nãsa ní cuu òré ní xĩndecu-í jündá-güedé núu ndècuéchi-í àdi ñà túú ndècuéchi-í. ²¹ Dico ñà túú cuéchi-í chi ìⁿ ñi-ni tnúhu ní càháⁿ-í ní xáhaⁿ-í xii-güedé sá sandáa iní-í sá ndótó nchaa ñáyiú ní xíhí, te ñu-ni núu xíáⁿ càchí-güedé sá ndècuéchi-í —càchí té Páblú xáhaⁿ-dẽ xii té Juéllí.

²² Te té Juéllí sa xíní váha-dé

nàcuáa cuáháⁿ tnúhu Jèsús, núu xíáⁿ ñá ní cuíní-gá-dé ndatnúhu-dé ndihí té Páblú, te ní xáhaⁿ-dë:

—Sa ní cuu, cundetu-n na quèxio té Lìsiú té cùu capitáⁿ cúnúu-gá, te òré-áⁿ cundáá cuèndá-n —càchí té Juélí xáhaⁿ-dë.

²³ Te ní xáhaⁿ-dë xii té cùu capitáⁿ:

—Cundeé-n tē Páblú-áⁿ, te núu nása càchí-dé cada-n, te dañá-n na càháⁿ ndihí-dé cue téé xíní tnáhá ndihí-dé núu cuáñaha-güedē nchaá sá xíní ñúhu-dé àdi nása cada-güedé —càchí té Juélí xáhaⁿ-dë xii té cùu capitáⁿ.

²⁴ Te ní cuu titní nduu, te ní sáháⁿ té Juélí vechiúⁿ ndihí ñadihí-dé, te ñaha-áⁿ nání-áⁿ Drüsílá, te ñaha is-ràél cùú-áⁿ. Te ní xáhaⁿ-dë sá quíngueñuhu-güedé té Páblú, te òré ní quexìo-dé vechiúⁿ, te ní cáháⁿ-dë núu-yu nchaá-yu sá quíndáá iní-yu tnúhu Xítohó Jesucristú. ²⁵ Te ní xáhaⁿ-dë:

—Mee-ni sã vâha cada-ndo. Te coto-ndo mēe-ndo, te vâ cadá-ndó nì ìⁿ sá cuèhé sá dúhá, chi ìⁿ nduu cáháⁿ Yã Ndióxi ndédacâa ñáyiú vâha iní-xi, te ndédacâa ñáyiú úhú iní-xi —càchí té Páblú xáhaⁿ-dë.

Te sá dúcáⁿ ní xáhaⁿ-dë, te ní yùhú té Juélí, te ní xáhaⁿ-dë:

—Vá càháⁿ-gá-ó tnáví, cuáháⁿ, te òré cùyáchí-í, te cana ñaha-í xii-n —càchí-dé xáhaⁿ-dë.

²⁶ Te té Juélí ní quide-dé cuèndá sá cuáñaha tē Páblú díhúⁿ te vâ ndíhu-gá-dé vecaá ní cùu, núu xíáⁿ titní xito ní cana-dé té Páblú vechiúⁿ ní ndatnúhu ndihí tnáha-güedé, dico ñá túú ní chãhu-dé. ²⁷ Te úú cuíá ducaⁿ ñí quide-güedé, te dàtnúni ní xínu té Juélí chiúⁿ-dé, te ní ngúnutní tē Pòrsiú Fèstú. Te òré ní xínu té Juélí chiúⁿ-dé, te ní dándõ-dé té Páblú yíhí-ni-dë vecaá. Te ducaⁿ ñí quide-dé cuèndá ní cuíní-dé cudíu-dé núu cuè téé is-ràél.

25

Té Páblú càháⁿ ndihí-dé té Fèstú

¹ Te ní cuu úní nduu sá ñí quexìo té Fèstú ñúú Cèsareá ní queheⁿ-dé chiúⁿ, te ní quee-dé cuáháⁿ-dé ñúú Jerusálén. ² Te yàcáⁿ ní naníhí tnáhá-dé ndihí nchaá dútú cúnúu ndihí nchaá cue téé tàxi tñuní ñáhá xii ñáyiú is-ràél, te xáhaⁿ-güedé xii té Fèstú sá ndáá ndècuéchi té Páblú. ³ Te ní cáháⁿ ndáhú-güedé núú-dë sá téndàha-dé sandàdú-dé quíngueñuhu ñaha-güedé vecaá xii-dé ndéé ñúú Cèsareá te candeca ñaha-güedé quíhíⁿ. Te ducaⁿ ñí cáháⁿ-güedé, chi ní ndatnúhu-güedé sá cáhmi ñaha-güedé xii té Páblú ichi ní cùu. ⁴ Te té Fèstú ní xáhaⁿ-dë:

—Vá cúu quíxi-dé ndéé ndíha. Na cundetu-dé ñúú Cèsareá chi sacú-ni nduu cuyaa-í iha te dàtnúni núhú-í yàcáⁿ. ⁵ Te yáchí-gá quíhíⁿ ndihí-í cue téé cúnúu-gá, te yàcáⁿ cuu cáháⁿ-ndó núu ndáá ndècuéchi-dé àdi cáháⁿ mée-dë núu ndáá ndècuéchi-dé àdi ñáhá, te cutnúni iní-ndó —càchí-dé xáhaⁿ-dë.

⁶ Te ní xíndecu té Fèstú úná úxí nduu ñúú Jerusálén, te dàtnúni cuánuhú-dé ñúú Cèsareá. Te nduu tñé cuáháⁿ-dë vechiúⁿ, te òré ní quexìo-dé, te ní xáhaⁿ-dë xii cue sandàdú xínú cuèchi sá quíhíⁿ-güedé queñuhu-güedé té Páblú vecaá te candeca ñaha-güedé quíhíⁿ vechiúⁿ. ⁷ Te òré ní quexìo té Páblú vechiúⁿ, te sa ndècu cue téé is-ràél cue téé ní quee ñúú Jerusálén, te cuánguihu-güedé ndéé díñí té Páblú ní ngúnutní-güedé, te xáhaⁿ-güedé xii cue téé cùchiúⁿ sá ndècuéchi víhi-dé, dico ñá túú ní cundee tnúhu-güedé. ⁸ Te té Páblú ní xáhaⁿ-dë xii té Fèstú:

—Ñá túú ndècuéchi-í, ñá túú ñá ní quide-í, chi ñá túú tnáhá iní-í cada-í ìⁿ sá càchí lèi sá vâ cúu càda-o. Te ni xití veñúhu càhnu sá ïo cúnúu ñá túú ñá quidè-í, te ní té Cèsár téé yíndaha cuèhé nàcióⁿ ñá túú càháⁿ cuèhé-í cuèndá-dé —càchí té Páblú xáhaⁿ-dë xii-dé.

⁹ Te té Fèstú ní cuiní-dé cada-dé nàcuáa cudíu-dé núu cuè téé israhél ní cùu, núu xǎⁿ ní xáhaⁿ-dé xii té Páblú:

—¿Cundee iní-n quíhíⁿ-n ñúú Jerusalén-án? Te yàcáⁿ cundáá cuéchi sá sàá díquí-n —càchí té Fèstú xáhaⁿ-dé xii té Páblú.

¹⁰ Te xáhaⁿ tē Páblú:

—Díu-ni ñⁿ vechiⁿ tēe cùchiuⁿ Cèsár ndécù-í iha, te díu-ni iha cada ndáá-n ñúu cuiní-n ní cùu. ¿Te ná cuendá candeca ñaha-n quíhíⁿ ingá xichi? Yòhó tñàhá-n xini-n sǎ ñà túú nǎ quidè-í ñáyiú israhél. ¹¹ Chi núu dícó yúhú ní quide-í ñⁿ cuéchi càhnu, te ñà túú nǎ cada-xi cuèi na càhni ñaha-ndo xii-í ní cùu. Te sa ní cutnùni iní-n sǎ ñà ndáá, chi mee-ni tñùhu ndehnde xícáháⁿ-güedé, te ñà túú ndùu váha-xi ducaⁿ càda-n cúñaha-n sǎ quíhíⁿ-í ndihi-güedé ingá xichi. Te xǎⁿ cuiní-í quíhíⁿ-í núú tē Cèsár tēe yindaha cuéhé nacióⁿ, te yàcáⁿ cáháⁿ mée-dé ñúu ndáá ndécuechi-í —càchí té Páblú xáhaⁿ-dé xii té Fèstú.

¹² Te ní ndatnúhu té Fèstú ndihi cue tēe chindee tñùhu ñaha xii-dé, te dàtnùni ní xáhaⁿ-dé xii té Páblú:

—Te sa ní cáháⁿ-n sǎ quíhíⁿ-n quítnahá-n tē Cèsár te díu-ni quíhíⁿ-n, te quiní-n nǎsa cáháⁿ tēe-án yàcáⁿ —càchí-dé xáhaⁿ-dé xii té Páblú.

Té Páblú càháⁿ ndihi-dé té Àgripá tēe yindaha nacióⁿ Israhél

¹³ Te sáta ñí cuu cuéhé nduu, te ní quee té Àgripá tēe yindaha nacióⁿ Israhél cuáháⁿ-dé ñúú Cèsareá ndihi ñadhi-dé, te ñaha-án nání-án Berènicé te òré ní quexió-yu, te ní cáháⁿ ndihí-yu té Fèstú. ¹⁴ Te sáta ñí cuu titní nduu, te ní cáháⁿ té Fèstú cuendá té Páblú ní xii-dé té Àgripá:

—Ndècu ñⁿ tēe ní dándóo té Juéllí vecaá nání-dé Páblú. ¹⁵ Te cùtnàhá ní sáháⁿ-í ñúú Jerusalén ní nanítnàhá-í ndihi cue dútú cùnùu ndihi cue tēe cùu sacuéhé núú ñáyiú israhél. Te ní dácáá

díquí-güedé té Páblú cuéchi, te ní cachí-güedé sá táuchiuⁿ-í cahni ñaha-güedé xii-dé ní cùu. ¹⁶ Te ní xáhaⁿ-í xii-güedé sá vǎ cùú, chi ñà túú ducaⁿ quide nchúhú cue tēe ròmá cùtexínu cada castiú-ndí ñáyiú, chi díhna-gá ndúcú tñùhu-ndí núú ñáyiú sàá cuéchi díquí-xi cuendá quiní-ndí ñúu nǎsa cáháⁿ mée-yu ndihi ñáyiú sàcáⁿ cuéchi cuendá-yu, te òré-án cùtnùni iní-ndí ñúu ndáá ndécuechi-yu àdi ñáhá, te ducaⁿ te ñihí-ndí nàcuáa quide ndáá-ndí cuendá-yu, duha ní xáhaⁿ-í xii-güedé —càchí té Fèstú xáhaⁿ-dé xii té Àgripá.

¹⁷ Te ní xáhaⁿ tūcu té Fèstú:

—Te sáta ñí quexió-güedé ndéé ndíha, te nduu tñéé ní sáháⁿ-ñi-ndí vechiⁿ. Te ní xáhaⁿ-í sá quingueñuhu-güedé té Páblú candeca ñaha-güedé quixi, te òré ní quexió-dé, ¹⁸ te ní ngüita-güedé xáhaⁿ-güedé sá ndécuechi-dé. Te ní saní iní-í sá ñⁿ cuéchi càhnu tee ñaha-güedé dico ñáhá, chi dícó-ni sá ñⁿ tñùhu ní cáháⁿ-dé, xǎⁿ ducaⁿ ñí quide-güedé. ¹⁹ Te ní tenáá ñáhá-güedé xii-dé, chi càchí-güedé sá ñà túú càháⁿ váha-dé cuendá ndiòxí-güedé. Te tñàhá-ni cuendá ñⁿ tēe nàni Jesús càháⁿ-dé, chi càchí-dé sá ñí xihí tēe-án te ní ndoto-dé càchí-dé xáhaⁿ-dé xii-güedé, càchí-güedé. ²⁰ Te ñà ní cùtnùni iní-í nǎsa cúñaha-í xii-güedé cuendá téhndé cuéchi-dé. Te xǎⁿ ní xicáⁿ tñùhu-í núú tē Páblú ñúu cundee iní-dé quíhíⁿ-dé ñúú Jerusalén, te ndéé ndiácaⁿ cada ndáá-ndí cuendá-dé, te núu ndáá ndécuechi-dé nàcuáa càháⁿ-güedé àdi ñáhá ní cùu. ²¹ Te dàtnùni té Páblú ní cachí-dé sá cùndècu tnaa-dé vecaá te dàtnùni quíhíⁿ-dé núú tē Cèsár, te tēe-án cada ndáá-dé cuendá-dé. Te cuendá sá dúcáⁿ ñí cáháⁿ té Páblú, xǎⁿ núu ní xáhaⁿ-í sá cùndéé ñáhá cuè sandadu xii-dé, nini na còto-í nǎsa cada-í quíhíⁿ-dé

núú tĕ Cēsár, duha ní xáhaⁿ-ĩ xii-güedé —cächí tĕ Fĕstú xáhaⁿ-dĕ xii tĕ Àgripá.

²² Te tĕ Àgripá ní xáhaⁿ-dĕ xii tĕ Fĕstú:

—Te tnàhá yúhú ío cudíí ìní-í cundedóho-í tnúhu càháⁿ-dé —cächí-dé xáhaⁿ-dĕ.

Te ní xáhaⁿ tĕ Fĕstú:

—Tnĕe cana-í-dé te cundedóho-n nása càháⁿ-dé —cächí-dé xáhaⁿ-dĕ.

²³ Te nduu tnĕé ní quexio tĕ Àgripá ndihi ñadhí-dé tá Berĕnicé vechi^u, te ío ní quide càhnu ñaha-güedé xii-yu. Te cuánguihú-yu vechi^u ndihi cue tĕe cùu capitáⁿ cúnù-gá ndihi cue tĕe cùnùu ñúú Cēsareá. Te tĕ Fĕstú ní xáhaⁿ-dĕ sá quingueñuhu-güedé tĕ Pāblú vecaá, te òrĕ ní quexio-dé, ²⁴ te ní xáhaⁿ tĕ Fĕstú xii tĕ Àgripá ndihi nchaa ñáyi^u xĩndecu-áⁿ:

—Chí cündĕhe tĕe iha chi tĕe-a cächí cue tĕe isràél sá ndĕcuéchi-dé, te cúnàhá ní xĩndecu-í ñúú Jerusalén ní cachí-güedé sá ndáá ndĕcuéchi-dé, te ñu-ni ducaⁿ càháⁿ-güedé iha. Te nchaa-güedé ní cuáá-güedé te cächí-güedé sá táuchi^u-í cahni ñaha-güedé xii-dé ní cùu. ²⁵ Te sáta ní ndihi cuëndú ní càháⁿ-güedé, te ní cutnùní ìní-í sá ñà túú ñì ĩⁿ cuéchi càhnu ñi quide-dé, núu ñà túú ní tàuchi^u-í cahni ñaha-güedé xii-dé. Te mee-dĕ ní cachí-dé sá quihíⁿ-dé núú tĕ Cēsár tĕe yĩndaha cuéhé nacióⁿ, te ní xáhaⁿ-í sá cúú quihíⁿ-dé. ²⁶ Te ñà túú ní xini váha-í nása ní quide-dé, núu xĩáⁿ ñà ní ñhì-í nàcuáa cadúha-í tutú quihíⁿ ndaha tĕ Cēsár, te xĩáⁿ ní cana-í-dé véxi-dé iha cuëndá nchaa-ndo càháⁿ ndihi-ndo-dĕ. Te ducaⁿ cànuu cadíhna-gá yòhó tātá Àgripá cacáⁿ tnúhú-n núú-dĕ núu nása càháⁿ-dé, te òrĕ-áⁿ cutnùní ìní-í nása cada-í cadúha-í tutú quihíⁿ ndaha tĕ Cēsár. ²⁷ Chi sàni ìní-í sá ñà túú ndùu váha-xi sá quihíⁿ ĩⁿ tĕe tàú cuéchi te núu vá códó tnùn^í núú ĩⁿ tutú nàcuáa càa cuéchi tàú-dĕ —cächí tĕ Fĕstú xáhaⁿ-dĕ xii-güedé.

26

Te Pāblú càháⁿ ndihi-dé tĕ Àgripá

¹ Te dàtnùní ní xáhaⁿ tĕ Àgripá tĕe yĩndaha nacióⁿ isràél xii tĕ Pāblú:

—Te vitna càháⁿ-n núu nása ní cuu cuëndá-n —cächí-dé xáhaⁿ-dĕ.

Te tĕ Pāblú ní ndacani-dé ndaha-dé sá cündĕdóho-güedé, te ní xáhaⁿ-dĕ xii tĕ Àgripá tĕe yĩndaha nacióⁿ isràél:

²⁻³ —Tātá Àgripá, ío cudíí ìní-í sá ñi naníhí tnàhá-ó vitna, chi yòhó ío váha xini-n nchàa nacuáa quide ñáyi^u isràél quidé càhnú-yu Yá Ndiòxí, te ío váha xini-n nchàa tnúhu xitnàhá-yu. Te vitna cundee ìní-n cündĕdóho-n ĩⁿ úú tnúhu na càháⁿ-í. Na cächí tnúhu-í sá ñà ndáá ní quide-í nchaa sá càháⁿ cue tĕe isràél.

Tĕ Pāblú càháⁿ-dé nàcuáa ní quide-dé cúnàhá vátá túhá-gā-dé ichi Yá Ndiòxí

⁴ Te sa naha nchaa cue tĕe cùnùu núú ñáyi^u isràél nàcuáa ní quide-í ñúú-í ndihi ñúú Jerusalén cúnàhá ní cuu landú-í. ⁵ Te mee-güedé náha-güedé sá ndĕé lihli-í ní chitnahá-í cue tĕe cùu fariséú. Te núu cuini-güedé càháⁿ-güedé sá tĕe fariséú cùu-í àdi ñáhá dico nchaa-güedé sa naha-güedé sá cué tĕe-áⁿ ñi chitnahá-í. Te cue tĕe cùu fariséú-áⁿ ío cuini-güedé cada-güedé nchaa nàcuáa nchicúⁿ nihnu ñáyi^u quidé-yu. Te yúhú nchaa sá nchicúⁿ nihnú-yu quidé-yu-áⁿ ñi quide-í. ⁶ Te vitna ndĕcu-í iha, te càháⁿ-n núu váha-ni quide-í àdi ñáhá, chi cue tĕe-áⁿ tĕe ñaha-güedé cuéchi xii-í cuëndá sá sàndáá ìní-í sá ndótó nchàa ñáyi^u ní xihí. Te ñu-ni ducaⁿ ñi xáhaⁿ Yá Ndiòxí xii nchaa ñani tnàhá-ó ñi xĩndecu ndĕé sanaha. ⁷ Te nchaa ñáyi^u-áⁿ xĩndetú-yu nduu ndòto ñáyi^u ní xihí ní cùu. Te ñu-ni ducaⁿ ndĕtu nchaa ñani tnàhá-ó ndĕcu ñuyú-a ndĕé vitna, te xĩáⁿ núu cuĕi nduu cuĕi niú càháⁿ ndihi-yu Yá Ndiòxí. Te sá sàndáá ìní-í núu xĩáⁿ ní càháⁿ-í, te tĕe ñaha cue tĕe isràél

cuéchi xii-í. ⁸ ¿Te ná cuendá nchòhò cue téé isràèl ñá túú cuiní-ndó quindáá iní-ndó sá dándòto Yá Ndiòxí nchaa ñáiyu ní xíhí? —càchí té Páblú xáhaⁿ-dè.

Té Páblú caní-dé cuendú sá ní xóo chihi-dé ñáiyu sàndáá iní tnúhu Jèsús vecaá

⁹ Te ní xáhaⁿ tùcu té Páblú:

—Ndéé dàvá-áⁿ ní quide úhú-í ñáiyu sàndáá iní-xi tnúhu Jèsús Yá ní quee ñuu Nazàrèt, te ní càháⁿ-í sá vâha-ní ní quide-í sá dúcáⁿ ní quide-í. ¹⁰ Te ñu-ni ducaⁿ ní quide-í ñuu Jerusàlén. Te cue dútú cúnù ní taxi-güedé ñⁿ tutú cuendá tñi-í ñáiyu ní sàndáá iní tnúhu Jèsús, te vâi-yu ní chihi-í vecaá. Te òré ní càháⁿ-güedé sá càhni-güedé ñáiyu-áⁿ, te tnàhá-í ní càháⁿ-í sá cúú càhni ñaha-güedé xií-yu. ¹¹ Te titní xito ní sáháⁿ-í nchaa veñúhu ñáiyu isràèl, te ní caní-í-yu te ní xáhaⁿ-í sá dáñá-yu ichi Jèsús. Te cuendá ío ní cudéè-í núú-yu, xiáⁿ ní sáháⁿ-í nchaa ñuu xíca ní sánúndúcù-í dava-gá ñáiyu sàndáá iní tnúhu-gá cuendá dandòho ñaha-güedé xií-yu.

Té Páblú càháⁿ tucu-dé nása ní cuu ní tuha-dé ichi Yá Ndiòxí
(Hch. 9:1-19; 22:6-16)

¹² Te cuendá xiáⁿ ní xíca tucu-í cuáháⁿ-í ñuu Dàmascú, néhè-í tutú ní taxi cue dútú cúnù cuáháⁿ, cuendá sá ndácù-í tñi-í nchaa ñáiyu sàndáá iní tnúhu Jèsús ní cùu. ¹³ Te òré caúxúú nduu ñúhu-í ichi cuáháⁿ-í, te uuⁿni ní quee ñuhú andüu ní dáyèhé-xi ndéé núú núnñi-í ndihi cue téé ndèca tnaha ndihi-í, te níhi-gá ní dáyèhé-xi dàcúxí nchicanhii. ¹⁴ Te nchaa-ndí ní nduá-ndí ndéé ñuhu, te ní tecú dóho-í càháⁿ ñⁿ sá càháⁿ tnúhu ñáiyu isràèl, te càchí-xi: “Yòhó Sàulú, ¿Ná cuendá cúú úhú iní ñáhá-n xii-í dándòho ñaha-n? Te ío dándòho-n mee-n, chi dàtná cuiní-n quide ndicutu quide-n chi quiti-áⁿ òré cùxi-güedé-di pùya te sàha-di patadá núú-xi, te sá dúcáⁿ quide-di te quide úhú-di mee-di. Te

ducaⁿ sàtnahá-xi cùu yohó chi ñá túú sàndáá iní ñáhá-n xii-í”, càchí sá ní càháⁿ-áⁿ. ¹⁵ Te ní xáhaⁿ-í: “¿Ná cúú yòhó sá ní càháⁿ-áⁿ?” xáhaⁿ-í. Te càchí sá càháⁿ-áⁿ: “Yúhú cùu-í Jèsús Yá cúú úhú iní-n”, duha ní cachí sá càháⁿ-áⁿ. Te xiáⁿ ní cutnùní iní-í sá Jèsús càháⁿ.

¹⁶ Te ní cachí-gá: “Ndacuíñi-n chi yúhú càháⁿ-í chi cuiní-í quíhíⁿ-n càda-n chiuⁿ-í, chi quíhíⁿ-n càháⁿ-n núú ñáiyu nàcuáa ní cuu ní xiní ñáhá-n xii-í vitna, te quixi tucu-í càháⁿ ndihi ñaha-í xii-n, te cùñaha-n xii-yu nàcuáa càháⁿ-í. ¹⁷ Chi cuiní-í quíhíⁿ-n càháⁿ-n tnúhu-í núú ñáiyu isràèl ndihi núú ñáiyu ñá túú cùu ñáiyu isràèl, te coto ñaha-í xii-n cuendá vá càhni ñáhá-yu xii-n. ¹⁸ Te cuiní-í quíhíⁿ-n cùñaha-n xii-yu sá dáñá-yu nchaa ichi cuèhé ichi duha ndècú-yu, te tuhá-yu ichi váha cuendá vá quindáá iní-yu cadá-yu sá càháⁿ yucu ñávâha, te quindáá iní-yu cadá-yu nchaa nàcuáa càháⁿ Yá Ndiòxí. Te núu na quindáá iní-yu tnúhu càháⁿ-í, te cada càhnu iní-í nchaa cuéchi-yu, te naníhí tàhú-yu ndihi dava-gá ñáiyu sa ní xócuñi nchaa sá cuèhé sá dúhá ní xíndecu iní-yu”, duha ní cachí-gá xii-í —càchí té Páblú xáhaⁿ-dè xii té Agripá téé yíndaha nacióⁿ Isràèl.

Té Páblú quidé-dé nchaa nàcuáa ní xáhaⁿ Jèsús cada-dé

¹⁹ Te ní xáhaⁿ tùcu té Páblú xii té Àgripá:

—Ñá túú dàña ndeé-í quidé-í nchaa nàcuáa ní càháⁿ Jèsús òré ní càháⁿ-gá andüu. ²⁰ Te díhna-gá ñáiyu ñuu Dàmascú ní càháⁿ-í tnúhu-gá núú-yu, te ní xáhaⁿ-í xii-yu sá dáñá-yu nchaa sá cuèhé sá dúhá quidé-yu, te càháⁿ ndihi-yu Yá Ndiòxí, te cadá-yu mee-ni sá vâha cuendá cutnùní iní dava-gá-yu sá ní dáñá-yu nchaa sá ñá túú vâha ní xóo cadá-yu. Te ducaⁿ-ni ní xáhaⁿ-í xii ñáiyu ñuu Jerusàlén

ndihí ñáiyu ñihí ñacióⁿ Isràél ndihí nchaa ñáiyu ñá túú cùu ñáiyu isràél. ²¹ Te cuendá sá dúcáⁿ ní cáháⁿ-í ñúu ní tñi ñaha cùe tée isràél xii-í cùtnàhá ní sáháⁿ-í veñúhu cahnú sá lo cùnuu cahni ñaha-güedé ní cùu. ²² Te ñi-ñi mee Yá Ndióxi ní chindee ñaha-gá xii-í ñúu ndècu-í iha tñaví cáháⁿ-í tñúhu-gá, te mee-ni tñúhu-gá cáháⁿ ndihí-í nchaá-yu, cuèi ñáiyu cuica, te cuèi ñáiyu ndàhú. Te ndíi Moisés ndihí dava-gá cue tée ní xóo cáháⁿ tñúhu Yá Ndióxi ndéé sanaha ní cáháⁿ-güedé ñacuáa cada-xi vitna, te ñi-ñi ducaⁿ cáháⁿ-í nchaa-ni nduu. ²³ Te cue tée-áⁿ ní cachí-güedé sá Crístú Yaa tendaha Yá Ndióxi quixi ñuyíú-a ndoho tnahá-gá, te cuú-gá, te dàtnùni ndoto-gá. Te ducaⁿ cada-xi nchaa ñáiyu ní xihí ndotó-yu núu na sáa nduu chi ducaⁿ cada-xi ní cachí mée Yá Ndióxi. Te cuendá sá dúcáⁿ ní ndoto-gá, xiáⁿ cùtnùni sá cúu nànhí tnhú ñáiyu, cuèi ñáiyu isràél, te cuèi ñáiyu ñá túú cùu ñáiyu isràél. Te dàtná-ni nduu tñúhu ní cáháⁿ cue tée ní xóo cáháⁿ tñúhu-gá ndéé sanaha-áⁿ, te ñi-ñi ducaⁿ cáháⁿ yúhú tucu —cachí té Páblú xáhaⁿ-dè.

Té Páblú xáhaⁿ-dè xii té Àgripá sá quindáa iní-dé tñúhu Jèsús

²⁴ Te sá dúcáⁿ ní cáháⁿ té Páblú, te ní cáháⁿ ñihí té Fèstú, te xáhaⁿ-dè:

—Páblú, jóo lùcú cáháⁿ-n! Cuendá ío vai ní dácuahá-n, núu xiáⁿ ndádá lùcú ñahá-xí xii-n —cachí-dé xáhaⁿ-dè.

²⁵ Te ní xáhaⁿ té Páblú:

—Ñahá, vá dúcáⁿ cáháⁿ-n chi ñá díú sá lùcú-í duha cáháⁿ-í, chi tñúhu ndáa cáháⁿ-í. ²⁶ Te té Àgripá-a sa ñaha-dé ndihí nchaa ñáiyu isràél ñacuáa ní cuu, chi sa ní ñihí-dè tñúhu ndihí dava-gá-yu ñacuáa ní cáháⁿ-í, núu xiáⁿ cùyi-í cáháⁿ ndihí-í-dé —cachí-dé xáhaⁿ-dè xii té Fèstú.

²⁷ Te ní xáhaⁿ-dè xii té Àgripá:

—Yúhú sa xini-í sá sandáa iní-n tñúhu ní chidó tñùni cue tée ní xóo

cáháⁿ tñúhu Yá Ndióxi ndéé sanaha —cachí-dé xáhaⁿ-dè.

²⁸ Te ní xáhaⁿ té Àgripá:

—¿Quède-n cuendá sá ñiⁿ úú tñúhu ní cáháⁿ-n te quindáa iní-í tñúhu Jèsús cáháⁿ-n-áⁿ? —cachí-dé xáhaⁿ-dè.

²⁹ Te ní xáhaⁿ tucu té Páblú:

—Cuèi vitna te cuèi ndéé cuèé-gá dico cuini-í sá dácuitíi sá quindáa iní-n tñúhu Jèsús. Te ñi-ñi ducaⁿ xiáⁿ tnhú-í núu Yá Ndióxi sá ncháa ñáiyu ndècu ndihí-o iha quindáa iní-yu tñúhu-gá dàtná cuini-n ní quide yúhú, ducaⁿ cada-yu. Dico-ni sá ñúu vá quihíⁿ-ni-yu vecaá dàtná cuini-n ndòho yúhú —cachí-dé xáhaⁿ-dè xii té Àgripá.

³⁰ Te sáta dúcáⁿ ní cáháⁿ-dé, te ní ngúnutñi té Àgripá tée yindaha nacióⁿ Isràél, ndihí té Fèstú tée cùu gobiernú, ndihí tá Berenicé ndihí dava-gá ñáiyu xñucóo yatni. ³¹ Te ní tnahá-yu ndèca tnahá-yu cuaháⁿ ñiⁿ xio. Te ní xitnahá-yu:

—Té-áⁿ ñá túú ñá cuèchi ní quide-dé ñúu chihí ñaha-güedé vecaá àdi cahni ñaha-güedé —cachí-yu xitnahá-yu.

³² Te té Àgripá ní xáhaⁿ-dè xii té Fèstú:

—Cuèchi mee-dè chi ní cachí-dé sá quitnahá-dé té Cèsár, xiáⁿ ñúu ndihu tucu-dé vecaá, te núu ñá túú ducaⁿ ní cáháⁿ-dé, te cacu-dé ní cùu —cachí-dé xáhaⁿ-dè xii té Fèstú.

27

Té Páblú cuaháⁿ-dé ñúu Rómá

¹⁻² Te ní ndatñúhu-güedé sá quihíⁿ té Páblú ndihí bàrcú nacióⁿ Itàliá, te tnahá yúhú quihíⁿ-í ndihí-dé. Te tnahá ñiⁿ té nani Aristarcú cuini-dé quihíⁿ ndihí-ndí-dé, te cùu-dé té ñúu Tesalónicá, te ñúu-áⁿ yindèhu-xi distritú Macèdoniá. Te ní sáha cuendá-güedé té Páblú ndihí ñiⁿ úú-gá cue tée xixihi vecaá ní queheⁿ cuendá ñahá té Jülüú té

cùu capitán, tée yíndaha nchaa sandadú nání Augustú, te ní quée-ndí nchaa-ndí bàrcú ñúú Adràmitíú. Te ní xica bàrcú-án cuáhán-ndí ndihí-xi te cuíta yáha-ndí ñúú ñúú yíndèhu distritú Àsiá quíhíⁿ. ³ Te nduu tnée ní quexìo-ndí ñúú Sìdón. Te ío váha ní quide té Jülüú, chí ní dǎñá-dé ní quene té Páblú ní sáhán-dé ní cáháⁿ ndihí-dé cue téé ío váha tnàhá tnúhu ndihí-dé ñúu cudana cundáhú iní ñáhá-güedé cuñaha-güedé nchaa sá xíní ñúhu-dé. ⁴ Te dǎtnùní ní ndée tucu-dé bàrcú cuáhán-ndí. Te ío níhi táchí te ñá ní dǎña-xi caca ndáá bàrcú, te ní sáhán bàrcú ndée yatni yuhu distritú Chìpré, te distritú-án cáá cuádava xití lámár, te xíaⁿ ñá túú cuéhé táchí ní yáha-ndí. ⁵ Te ta yáha-ndí cuáhán, te ní yáha-ndí ñúú xio yuhu distritú Cìliciá ndihí yuhu distritú Pànfilíá, te ní sáá-ndí ndée ñúú Mírá ñúú ñúú yíndèhu distritú Lìciá.

⁶ Te ní quene tée cùu capitán cuándúcú-dé ingá bàrcú, te ní níhí-dé ñúú bàrcú tée ñúú Alejándriá, ñúhú ichi-xi quíhíⁿ-xi nacióⁿ Itáliá. Te ní ndicuaca ñaha-dé xii-ndí cuáhán-ndí ní quée-ndí bàrcú-án, te ní xica-xi cuáhán-xi. ⁷ Te ío cuée cuáhán bàrcú-án, cuéhé nduu ní xúhuⁿ-xi ichi, te yica-ni ní quexìo-ndí yuhu ñúú Nidú, te ñá ní dǎña-gá táchí quíhíⁿ ndáá bàrcú ñúu ní xícó ndúú-xi. Te ní yáha-ndí ñúú xio yuhu distritú Crétá núú ñá túú quene vihi táchí, te ñúu-ni cuádava tucu lámár cáá distritú-án. Te ní yáha-ndí yuhu ñúú Sàlmón, te ñúu-ni Crétá yíndaha-xi ñúú-án. ⁸ Te ní yáha-ndí cuáhán-ndí mee-ná núú ràyá distritú Crétá, te ío ní ndoho-ndí ní sáá-ndí ñúú xichi núú nání Puértú Váha, yatni víi-ni-gá ñúú Làseá.

⁹ Te ní cuyaa vihi-ndí ichi, ducaⁿ-ni cùu-ndí ní tnahá yóó cúúⁿ dǎú táchí, te ío úhú yáha bàrcú ñúu

na quíhíⁿ-ni-xi. ¹⁰ Te ní xáhaⁿ té Páblú xii-güedé:

—Nchaa-ndo cùndedóho-ndo tnúhu na cáháⁿ-í-a. Ío úhú núú na càda yica-o quíhíⁿ-ó ndihí barcú chí cuíta càrgá te cuíta bàrcú, te cuu-ni iní-xi tnàhá-ni mee-o cùú-ó chí cáhá-ó núu na ngàunihnu-o xití ndute —càchí-dé xáhaⁿ-dè xii-güedé.

¹¹ Te tée cùu capitán ñá ní sàndáá iní-dé tnúhu ní cáháⁿ té Páblú. Dico tnúhu ní cáháⁿ tée dàcaca barcú ndihí xitohó-xi chí ní sàndáá iní-dé. ¹² Te ñá ní tnàhá iní-güedé Puértú Váha cuèndá sá ní tnahá yóó cúúⁿ dǎú táchí, te ñá túú dǎhu váha táchí xíaⁿ, núu vai-güedé ní cuiní-güedé yáha-güedé quíhíⁿ-güedé sáá-güedé ndée ñúú Fènicé ní cùu. Te yácáⁿ cundecu-güedé yóó cúúⁿ dǎú táchí cuèi ñá túú càváha vihi, chí nchí nàcuáa yáha bàrcú, te yácáⁿ quíhu táchí, dico dǎhu-gá. Núu xíaⁿ ndée ndiáçáⁿ nátacá bàrcú yóó cúúⁿ dǎú táchí, te ñúu-ni Crétá yíndaha-xi ñúú-án.

Nitùhú lámár cúúⁿ dǎú táchí

¹³ Te duha ní quene nuu luha táchí, xíaⁿ ní sani iní-güedé sá ndácú-güedé quíhíⁿ-güedé, núu ní natava-güedé caá ndètní ndée bàrcú, te ní xica-xi cuáhán-xi ní yáha-ndí yatni víi yuhu distritú Crétá. ¹⁴ Te tnaa-ni ní cuu sá ní xica bàrcú, te duha ní cunuu dǎú táchí ñúú xio yuhu ñúú-án ¹⁵ te nchita ichi cuáhán bàrcú. Te ñá ní ndàcu-gá-xi quíhíⁿ ndáá-xi nàcuáa cuáhán-xi ní cùu, núu ní dǎñá-ndí cuáhán méé-ná bàrcú. ¹⁶ Te ní yáha-ndí ñúú ñúú nání Clàudá, te ñúú-án cáá cuádava xití lámár. Te ñúú xio yuhu ñúú núú ñá túú quene vihi táchí ní yáha-ndí, te bàrcú líhli sá nchicúⁿ sáta bàrcú cáhnú, chí ní ndacu-ndí ní taxúha-ndí xití bàrcú cáhnú. ¹⁷ Te sáta ní ndacu-ndí ní taxúha-ndí bàrcú líhli, te ní ducuⁿ nuu-güedé yóó bàrcú cáhnú. Te ío ní yùhú-güedé

sá yáha bàrcú ndéé núú ñúhú cùchí yuhu ñúú Sírte, núu xíáⁿ ní ndihí dóó nchítá dǐquí bàrcú ní nuu nehe-güedé, chí dóó-ánⁿ ío níhi chindaha táchí, núu xíáⁿ cuáháⁿ bàrcú ìⁿ xio. Te ní dáñá-güedé ñá túú-gǎ ní dàcaca-güedé, núu cuáháⁿ méé-nǎ-xi ta chindaha táchí cuáháⁿ.¹⁸ Te ío níhi dáú táchí, te ñá ní cuíni tñahí-xi yáha. Te nduu úú sá dúcáⁿ ñá túú-gǎ ní dàcaca-güedé bàrcú te ní ngüíta-güedé ní dǎngöyo-güedé sá nchídó-xí cuendá cuíni-güedé nduu ñamá-xi.¹⁹ Te nduu úni ní dǎngoyo-güedé nchaa ndachíuⁿ cánehe chíuⁿ-güedé xítí bàrcú.²⁰ Te cuéhé nduu ñá túú ní xíní-ndí ní chòdíní ní nchíanchii, chí ío níhi ní cuuⁿ dáú táchí, núu ní cáháⁿ-ndí sá vǎ cácu-ndí, chí ndihí-ndí cáhá ní cáháⁿ-ndí.

²¹ Te ní cuu titní nduu ñá túú-gǎ xéxí-ndí, núu xíáⁿ ní ngúnutníⁿ té Pǎblú núú-güedé, te xáhaⁿ-dǎ:

—Quindáá iní-ndó tñuhu ní cáháⁿ-í, te cundecu nahi-o Crétá ní cùu. Te núu ní tñi-ndo tñuhu-í, te vǎ dácuíta-o cárgá ndihí dava-gǎ ndáchíuⁿ ní cuu.²² Te vǎ yùhú-ndó chí vǎ cùú ní ìⁿ-ndo dico bàrcú chí cuíta.²³ Te nàha-ndo sá yùhú càháⁿ ndihí-í Yǎ Ndiòxí te quide-í nàcuáa càháⁿ-gǎ. Te ñu-ni mee-gǎ ní techíuⁿ-gǎ ìⁿ espíritú xínú cuèchi núú-gǎ ní quixi,²⁴ te ní cachí-xi xii-í: “Vǎ yùhú-n chí vǎ cùú-n, dico dacuití quíhíⁿ-n cáháⁿ ndihí-n té Césár. Te ní ìⁿ té ndihí-n vǎ cùú, chí ío cùdí iní ñáhá Yǎ Ndiòxí xii-n”, duha ní cáháⁿ espíritú xínú cuèchi núú-gǎ ní cachí tñuhu-xi xii-í.²⁵ Núu xíáⁿ cachí tñuhu-í sá vǎ yùhú-ndó, chí sa cùtnuní iní-í sá cádá Yǎ Ndiòxí nàcuáa ní cáháⁿ espíritú xínú cuèchi núú-gǎ.²⁶ Te mee táchí chindaha-xi bàrcú daquíhíⁿ-xi ndéé yuhu ndute — cachí té Pǎblú xáhaⁿ-dǎ xii-güedé.

²⁷ Te sa ní cuu sáhúⁿ nduu sáhúⁿ niú sá ní ngüíta-xi cùú dáú táchí, te ñá túú-gǎ dáca-güedé bàrcú, chí

mee-nǎ táchí tá chindaha-xi bàrcú cuáháⁿ núu ndute lámár Adriá. Te sáta ní cuu dava niú, te ní quide cuendá cue tée dàcaca bàrcú sá tá cùyatni-güedé ñuhu yichí.²⁸ Te ní chícuáhá-güedé ná daha-gǎ mètrú néhé-xí sá cùnú xítí ndute cuendá cutnùní iní-güedé sá tá cùyatni-xi ndéé yuhu lámár, te nehe-xi ócò sáhúⁿ ìⁿ-ni-gǎ mètrú. Te ní xica tucu bàrcú luha-gǎ, te dàtnuní ní chícuáhá tucu-güedé, te xíáⁿ néhé-xí ócò úsá-ni-gǎ mètrú.²⁹ Te ní yùhú-güedé sá candaundeé-xi cava, te ní queheⁿ-güedé cúmí caá nahnú sá nchícúⁿ yoho, te ní dáquèe-güedé xítí ndute ndaa sáta bàrcú, te dàtnuní ní ngüíhí-xi ñá ní xica-gǎ-xi, te ní cuíni-güedé sá òré-ni tundaá ní cùu.³⁰ Te cue tée dàcaca bàrcú ní natava-güedé bàrcú líhli dǎndée-güedé núu ndute ní cùu, te ní cachí-güedé sá quíhíⁿ-güedé ndaa núu bàrcú dàquée-güedé úú-gǎ caá cuendá cuita candeé-xi bàrcú cáhnú cuendá sá vǎ cáca-xí. Te cuíni-güedé dandáhú-güedé dava-gǎ nchúhú cue tée ñuhu ndihí-güedé bàrcú, chí ní ndatnúhu-güedé sá cùnú-güedé ní cùu.³¹ Te té Pǎblú ní xáhaⁿ-dǎ xii tée cùu capitáⁿ ndihí dava-gǎ sandàdú:

—Te núu na dǎndóo ñaha cuè tée dàcaca bàrcú cunu-güedé, te vǎ cácu-o —cachí-dé xáhaⁿ-dǎ.

³² Te sá dúcáⁿ ní xáhaⁿ-dǎ nǔú ní sáháⁿ sandàdú ní xehndé-güedé yoho nchícúⁿ bàrcú líhli dǎngáuníhnu-güedé xítí ndute cuáháⁿ-xi.

³³ Te váha váha-ni ta tundaá cuáháⁿ, te ní xáhaⁿ té Pǎblú:

—Sa ní cuu sáhúⁿ nduu ñá túú tñahí xèxi-ndo sá ndihú iní-ndó.³⁴ Te vitna yáchí-ndó, chí caxi-ndo cuendá naníhí ndéé-ndó, te vǎ yùhú-ndó chí ñá túú nǎ tnahá ní ìⁿ-ndo —cachí-dé xáhaⁿ-dǎ xii-güedé.

³⁵ Te sáta dúcáⁿ ní cáháⁿ-dé, te ní queheⁿ-dé ìⁿ pǎá, te ní

ndacáⁿ táhú-dě núú Yă Ndiôxí, te núú-güedě nchaa-güedé ducaⁿ ní quide-dé, te dătnúni ní táhú-dě luha ní xexi-dé. ³⁶ Te ducaⁿ te dătnúni ní cuyi-güedé ní xexi-güedé nchaa-güedé. ³⁷ Te úú ciendú únídico sáhúⁿ iⁿ-ndí ñuhú bàrcú núú tnàhá té Păblú, te nchaa-ndí ní xexi ndihi-ndí-dé. ³⁸ Te ní xexi-ndí ní ndahá xití-ndí, Te dătnúni ní nguíta-güedé ní tava-güedé nchaa ngohnchi triú ní dăngoyo-güedé xití ndute cuendá nduu ñamá-gá bàrcú.

Ní dáhu bàrcú xití làmár

³⁹ Te sáta ní túndaá, te ñá ní cùtnúni-gá iní-güedé ndéé cúú-xí nùú ní sáá-güedé, te ní xiní-güedé iⁿ xichi núú ní xícó ndúú luha yuhu làmár, te vâi vihi cúchí dándáá-xí yùhu ndute, te xíaⁿ ñá túú dăcandá víhí táchí ndute. Te ní ndatnúhu-güedé sá ndácú-güedé dacàca-güedé bàrcú quíhíⁿ-xi ndéé núú ñuhú cúchí. ⁴⁰ Te xíaⁿ nùú ní sáháⁿ-güedé ní xehndé-güedé nchaa yoho nchícúⁿ caá tácandéé bàrcú ní ndóo xití làmár, te ní nadatáyá-güedé vítú sá dăculco-xi bàrcú, te ní nacata caa-güedé iⁿ dóo díquí bàrcú, te ta chindaha táchí cuáháⁿ yuhu làmár tá cùyatni-xi ñuhu yichí cuáháⁿ. ⁴¹ Te ndècu iⁿ xichi ní natacá víhí cúchí xití ndute, te xíaⁿ ní nguíndúxi nihnu bàrcú-güedé, te ní cuti-xi xití cúchí, te ñá ní ñihí-gă-güedé năcuáa cada-güedé nene-xi. Te ío níhi ní dăcandá táchí ndute, te ní chúcú ndéé-xi ndàa sáta bàrcú, te ní ndihi ní táhú-xí. ⁴² Te cue sandádú ní xítñaha-güedé sá cáhni-güedé nchaa cue téé ní xíhi vecaá cuendá sá vâ quíhíⁿ-güedé núú ndute te cunu-güedé. ⁴³ Te téé cùu capitáⁿ ñá ní dăña-dé cahni-güedé cue téé ní xíhi vecaá, chí ñá ní cùndee iní-dé cahni-güedé tnàhá té Păblú. Te ní xáhaⁿ-dě xii-güedé sá cuè téé xícuu cada

quíhíⁿ núú ndute te na yăha-güedé ndute quene-güedé yuhu làmár. ⁴⁴ Te dava cue téé ñá cúú cada, ní xáhaⁿ-dě nanducu-güedé vítú ní ñá vítú ní táhú sá ní xíhi bàrcú, te núú xíaⁿ caundodo-güedé yăha-güedé ndute quene-güedé ndéé yuhu làmár. Núu duha ní cuu ní cácu-ndí nchaa-ndí.

28

Té Păblú ndécú-dě ñuu Măltá cáa cuádava làmár

¹ Te sáta ní cácu-ndí ní nene-ndí ñuhu yichí, te ní níhí-ndí tnúhu năcuáa nàni ñuu núú ní sáá-ndí, te ñuu-áⁿ nání-xí Măltá, te caa-xi cuádava làmár. ² Te ío quide víxiⁿ-xi cuendá ío cùuⁿ dáú. Te ñáyiú ñuu-áⁿ ní cundáhú iní ñáhă-yu xii-ndí, ní dătnàhá-yu ñuhú te ní cana ñáhă-yu ní sáháⁿ-ndí ní nacuídí-ndí. ³ Te té Păblú dátacá-dé nducú, te tnàhá-ni iⁿ cóo dēéⁿ ní tñi nihnu-dé-di, te òré cuáháⁿ ndaha-dé chucu-dé núú ñuhú, te ní ñáni-di cahni, te ní ndee-di xití nducú ní sándúú-dé ndaha-dé, te ní xexihaⁿ-di xii-dé. ⁴ Te nchaa ñáyiú ndèhé-yu sá tácandéé-di ndaha-dé, te ní nguíta-yu ní xítñahă-yu:

—Váa ndíyi ní sahani téé-a, te ñá ní xíhí-dé làmár, te dacuitíi sá cùú-dé vitna, chí sa nàha Yă Ndiôxí ná ní quide-dé ñuyíú-a —càchí-yu xítñahă-yu.

⁵ Te té Păblú ní quidi-dé ndaha-dé ní ngaunihnu-di núú ñuhú, te ñá túú tnàhí ná ní cùu núú ní xexi-di. ⁶ Te ñáyiú ñuu-áⁿ xíndéhé-yu núu daquíhíⁿ-xi chúhúⁿ ñá nduá-dé cuú-dé. Te naha ní xíndéhé ñáhă-yu núu nása cada ñaha-xi xii-dé, te ñá túú tnàhí ná ní quide ñaha-xi, te ní xítñahă-yu:

—Váa ndiôxí cúú tēe-a núu dăcáⁿ ñá túú tnàhí ná ní quide-xi ndaha-dé núú ní xexi cóo —càchí-yu xítñahă-yu.

⁷ Te yatni núú dúcáⁿ ní xexihaⁿ cóo-ăⁿ cáa ñuhu xitu téé nàni

Publiú, te téé-án táxi tnùní-dé nìhí ñúú cáá cuádava xití lámár núú ndécú-ndí nduu-án. Te ío váha iní-dé chí ní cana ñaha-dé ní sáhán-ndí ní xíndecu-ndí úní nduu vehe-dé. ⁸ Te tátá tē Pùbliú-án cáá-dé cùhú-dé ñhú-dé cahni, te tnàhá-dé daxi. Te té Pàblú ní sáhán-dé núú cáá-dé, te ní cáháⁿ ndihí-dé Yá Ndiöxí, te ní sacáⁿ ndodo-dé ndaha-dé díquí tēe cùhú-án, te ducaⁿ-ni ní quide-dé, te ní ndúha tēe cùhú-án. ⁹ Te sátá dúcáⁿ ní quide té Pàblú, te ní quixi nchaa ñáyiú cùhú núú ndécú-ndí, te ní quide tátna ñaha tē Pàblú xii-yu te ní ndúha-yu. ¹⁰ Te òré ndécú-ndí xíaⁿ, te vài sá ní taxi táhú-güedé, te òré ní xica-ndí ní taxi tucu-güedé nchaa sá xíní ñuhu-ndí ichi.

Té Pàblú ní quexio-dé ñúú Rómá

¹¹ Te yacáⁿ ní xíndecu-ndí úní yóó, te sa ndècu ñⁿ barcú tēe ñúú Alejandriá òré ní quexio-ndí, te ní xíndecu-xi nìhí yóó cúúⁿ dáu táchí. Te núú-xi càndodo sandú sá dánàni-güedé Cástór ndihí sàndú sá dánàni-güedé Pólúx, te xití bàrcú-án ní quée-ndí cuáhán-ndí. ¹² Te ní quexio-ndí ñúú Siràcusá, te yacáⁿ ní xíndecu-ndí úní nduu. ¹³ Te ní xica tucu bàrcú cuáhán-xi, te ní quexio-ndí ñúú Règiú. Te nduu tnéé duha ní quene nuu táchí. Te ní xica bàrcú cuáhán-xi, te ndéé nduu úú ní quexio-ndí ñúú Pùteolí. ¹⁴ Te yacáⁿ ní naníhí tnàhá-ndí ndihí ñáyiú sàndáá iní tnúhu Jèsús, te ní cachí-yu sá cùndècu-ndí úná nduu, núú xíaⁿ ní xíndecu-ndí úná nduu ndihí-yu. Te ní xica tucu bàrcú cuáhán-xi, te ní quexio-ndí ñúú Rómá. ¹⁵ Te ñáyiú rómá ñáyiú sàndáá iní tnúhu Jèsús, ní nìhí-yu tnúhu sá cuáhán-ndí, te ní quixí-yu ní quixi tnàhá ñáhà-yu ichi. Te davá-yu ní naníhí-ndí ñúú Fòrú Àpiú, te davá-yu ní naníhí-ndí ñúú

Úní Tàbernás. Te òré ní xíní té Pàblú nchaa ñáyiú véxi tnàhá ñáhá xii-ndí, te ndee ndéé ní cuu iní-dé, te ní ndacáⁿ táhú-dé núú Yá Ndiöxí sá dúcáⁿ ní quidé-yu. ¹⁶ Te sátá ní quexio-ndí ñúú Rómá, te cue tēe cùchiuⁿ ní xáhaⁿ-güedé xii té Pàblú sá cùndècu ñⁿ-dè, te ní xíndéé ñáhá cuàa sandadú xii-dé.

Té Pàblú càháⁿ-dé tnúhu Yá Ndiöxí ñúú Rómá

¹⁷ Nduu úní sá ní quexio té Pàblú, te ní cana-dé cue tēe cùnuu núú ñáyiú isràél ndécú ñúú Rómá, te ní sáhán-güedé núú ndécú-dé, te ní xáhaⁿ-dè;

—Nchòhó cue tēe isràél, càchí tnúhu-í sá ñà túú nã ní quide-í ní ñⁿ ñáyiú cùtnàhá ní xíndecu-í ñúú Jerusalén. Te ñá túú ní cáháⁿ cuèhé-í sá quidé-yu nchaa nàcuáa ní xóo cada cue ñaní tnàhá-ó ní xíndecu ndéé sanaha, te ñá túú nã ní quide-í te ní tñi ñaha-güedé ní sáha cuèndá ñáhá-güedé xii-í núú cuè tēe rómá, cue tēe ndècu yacáⁿ. ¹⁸ Te cue tēé-án ní ndúcú tnúhu-güedé nùu ndáá ndècuèchi-í, te ní cutnùni iní-güedé sá ñã túú nã ní quide-í, te xíaⁿ cuìní-güedé queñuhu ñaha-güedé xii-í vecaá ní cùu. ¹⁹ Te ñⁿ-ni cue tēe isràél ñã ní dàña-güedé cácu-í, chí cuìní-güedé sá cáhni ñaha cue tēe rómá, cue tēe xíndecu yacáⁿ xii-í ní cùu, te xíaⁿ nùu ní xáhaⁿ-í sá quixí-í cáháⁿ ndihí-í té Cèsar cuèndá ñha cada ndáá méé-dé cuèndá-í, te vã yóo ñⁿ tee-í cuèchi. ²⁰ Núú xíaⁿ ní cana ñaha-í xii-ndo cuèndá cunaha-ndo nàcuáa ní cuu, Te ní xáhaⁿ-í sá sàndáá iní-í sá ndóto ñáyiú ní xihí, te ñⁿ-ni ducaⁿ cáháⁿ dava-gá ñáyiú isràél, te sá dúcáⁿ ní cáháⁿ-í, te ní chíhi ñaha-güedé vecaá, te xíndéé ñáhá-güedé ndéé vitna —càchí té Pàblú xáhaⁿ-dè xii-güedé.

²¹ Te ní xáhaⁿ-güedé xii-dé:

—Ñá túú tnàhí tutú ní tèndaha cue tēe distritú Júdeá quixi cuèndá-n. Te ní cuè tēe isràél ñã túú ní quixi-güedé cáháⁿ cuèhé-güedé cuèndá-n. ²² Te

cuini-ndí cundedóho-ndí nása cunduu tnúhu cáháⁿ-n, chi sa ní níhí-ndí tnúhu sá ncháá xichi ío xicáháⁿ cuèhé-yu cuèndá nchaa ñáyiú sàndáá iní tnúhu Jèsús — càchí-güedé xáhaⁿ-güedé xii té Páblú.

²³ Te ní xáhaⁿ-güedé nduu cüyáchí-güedé te quixi-güedé cundedóho-güedé dava-gá cuèndú cáháⁿ té Páblú. Te ní tnahá nduu ní ndatnúhu-güedé quíhíⁿ-güedé núú quidé vehe-dé, te vai-yu ní sáháⁿ-yu ní xindedóho-yu tnúhu ní cáháⁿ-dé, te ncháca nchaa ní cáháⁿ ndíhi-dé-yu. Te ní xáhaⁿ-dè xii-yu sá ndí Moisés ndíhi dava-gá cue téé ní xóo cáháⁿ tnúhu Yá Ndióxi ndéé sanaha ní chídó tnùní-güedé núú tütú-güedé sá díú-gá tendaha-gá Crístú quixi-gá ñuyíú-a. Te ní chídó tnùní-güedé nchaa nàcuáa cada-gá, te ñu-ni nàcuáa cáháⁿ tutú-güedé cada Crístú, te ducaⁿ ní quíde-gá cútñahá ní xica cuu-gá ñuyíú-a, núú xíáⁿ ní cutnùní sá díú Jèsús cúu-gá Crístú Yáá ní tendaha Yá Ndióxi ní quixi ñuyíú-a. Te núú quindáá iní-yu, te ndíhu ndaha ñaha Yá Ndióxi xii-yu. ²⁴ Te davá-yu ní sàndáá iní-yu tnúhu ní cáháⁿ-dé, te davá-yu ñá túú ní sàndáá iní-yu.

²⁵ Te cuèndá sá ñá ííⁿ-ní tnúhu ní cáháⁿ-yu, núú xíáⁿ cuini-yu núhú-yu ní cùu. Te ní xáhaⁿ té Páblú sá cündètu tnaá-yu cáháⁿ-dé ingá tnúhu, te xáhaⁿ-dè:

—Ní xáhaⁿ Espíritú Yá Ndióxi xii ndí Chàíá nàcuáa cáháⁿ ndí núú ncháa ñaní tñahá-ó ní xíndecu ndéé sanaha. Te ní cáháⁿ Espíritú-gá ííⁿ sá ndáá ní xáhaⁿ-xi xii ndí, te duha ní xáhaⁿ-xi:

²⁶ Quíhíⁿ-n te cúñaha-n xii ñáyiú:

Nchòhó mee-ni cundedóho-ndo tnúhu cáháⁿ Yá Ndióxi, dico ní và tècú tnùní-ndó.

Te cada-gá titní núú sá và yóo tñahí ndàcu cada, dico ní và cútñuní iní-ndó nàcuáa ndùu sá cádá-gá,

²⁷ chi cuèndá sá ío sàá iní-ndó,

xíáⁿ ducaⁿ ñá túú sáha-ndo cuèndá nása cuáháⁿ tnúhu cáháⁿ-gá, chi ñá cuini-ndó cundedóho-ndo, te ní ñá sàndáá iní-ndó.

Te ní ñá cuini-ndó dàña-ndo nchaa sá cuèhé sá dúhá quíde-ndo cuèndá xocàni-gá nchaa xíáⁿ iní-ndó,

duha cúñaha-n xii-yu.

Càchí Espíritú-gá xáhaⁿ-xi xii ndí.

²⁸ Te na càchí tnúhu-í sá quíhíⁿ cue téé cáháⁿ tnúhu Yá Ndióxi cáháⁿ-güedé tnúhu-gá núú ñáyiú ñá túú cùu ñáyiú isràél, chi ñáyiú isràél ñá túú cuini-yu cundedóho-yu. Dico ñáyiú ñá túú cùu ñáyiú isràél chi cùdí iní-yu cundedóho-yu, núú xíáⁿ naníhí tàhú-yu —càchí té Páblú xáhaⁿ-dè xii-yu.

²⁹ Te sáta ní ndíhi cuèndú ní xáhaⁿ-dè, te ní ndeé-yu cuánuhú-yu ta ndàtnúhu-yu cuáháⁿ.

³⁰ Te úú cuíá ní xínu ní xíndecu té Páblú ííⁿ vehe ní cháhu-dé. Te ní xóo cáháⁿ váha-dé ndíhi nchaa ñáyiú ní xóo quíhíⁿ vehe-dé. ³¹ Te ní xáhaⁿ-dè sá ndíhu ndaha ñaha Yá Ndióxi xii-yu núú quindáá iní-yu tnúhu-gá, te và yóo ííⁿ ní sádí yuhu-dé. Te mee-ni tnúhu Xítóhó Jesucristú ní cáháⁿ-dè núú-yu.

TUTÚ NÍ CADÚHA TÉ PĀBLÚ QUIHIⁿ NDAHA ÑÁYIU ÑUÚ RÒMÁ

*Té Pāblú cādúha-dé tutú quíhíⁿ
ndaaha ñáyiú xĩndecu ichi Xítoho Jesu-
crístú ndécú ñúú Ròmá*

¹ Yúhú té Pāblú xínú cuèchi-í nùú Xítoho Jesucristú, chi mee Yá Ndiòxí ní cachí-gá sá cùu-í ñⁿ tée cáhⁿ tnúhu-gá nùú ñáyiú, te tnúhu-gá cúu-xí tnúhu sá cáhⁿ nàcuáa naníhí tǎhú-ó, nùú ñiú-gá ní tendaha ñaha-gá xii-í xicá cùu-í cáhⁿ-í tnúhu-gá.

² Te ndéé sanaha ñí cachí Yá Ndiòxí sá dàcuiítí sáá nduu ngũndecu ndíhi ñáyiú tnúhu-gá. Te ducaⁿ ñí xáhaⁿ-gá xii cue tée ní cáhⁿ tnúhu-gá dāvá-áⁿ ñí chídó tnùn-í-güedé nùú tütú-gá. ³ Te tnúhu-gá sá cáhⁿ-í-a cáhⁿ-xi ñiú-ní cuendá Xítoho Jesucristú Yaá cúu Dèhe-gá. Te Dèhe-gá-áⁿ cúu-gá ñⁿ ñáyiú, te cùu-gá ñaní tnáhá ndíi Dàvíí. ⁴ Te cùu-gá Yaá ñá túú tnáhí cuèchi-xi. Te ní xihí-gá te ní ndoto-gá, te xĩⁿ cútnùn-í iní-ó sá cúu-gá Dèhe Yá Ndiòxí, te ío càhnu cuu-gá. ⁵ Te ñiú-ní Xítoho Jesucristú ní quide-gá ní nduu tǎhú-í nùú Yá Ndiòxí sá cáhⁿ-í tnúhu-gá nùú cué ñáyiú ñuyíú-a cuendá quíndáá iní-yu tnúhu-gá te canchicúⁿ nihnú-yu cadá-yu nchaá nàcuáa cáhⁿ-xi, te ducaⁿ ío cuu càhnu-gá. ⁶ Te tnáhá nchòhó cúu-ndó ñáyiú sa nchìcúⁿ nihnu quide-ndo nchaá nacuáa cáhⁿ tnúhu-áⁿ, chi ní cachí Yá Ndiòxí sá nchòhó tnáhá tnúhu-ndo ndíhi Xítoho Jesucristú. ⁷ Te nchòhó ñáyiú xĩndecu ñúú Ròmá, ñáyiú ío cùu iní ñáhá Yá Ndiòxí, cādúha-í tutú-a daquixi-í ndaha-ndo. Te ñiú-ní nchòhó cúu-ndó cué ñáyiú

ní cachí Yá Ndiòxí cada ndáá cundecu-ndo nùú-gá. Te xicáⁿ tǎhú-í nùú Tǎtá-ó Dütú Ndiòxí ndíhi nùú Xítoho Jesucristú sá ío na chindee chitúu ñaha-gá xii-ndo, te ducaⁿ ndí nduú-gá ná càda te ío váha cuu iní-ndó cundecu-ndo.

*Té Pāblú cuíní-dé quíhíⁿ ngoto-dé
cue ñáyiú xĩndecu ichi Xítoho Jesu-
crístú ndécú ñúú Ròmá*

⁸ Te díhna nuu-gá càchí tnúhu-í xii-ndo sá ío ndàcáⁿ tǎhú-í nùú Yá Ndiòxí cuendá sá ío sàndáá iní-ndó-gá, te nchaá ñáyiú nihí-yu tnúhu sá dúcáⁿ quide-ndo. Te Xítoho Jesucristú dáyaha-gá nchaá tnúhu cáhⁿ-í nùú Yá Ndiòxí. ⁹ Te ndí tnáhá òré cáhⁿ ndíhi-í Yá Ndiòxí ducaⁿ-ní xicáⁿ tǎhú-í nùú-gá cuendá-ndó, te mee-gá náhá-gá sá cáhⁿ ndáá-í, te ñiú-ní nùú-gá xínú cuèchi-í ñí yúhu ñí iní-í, chi cáhⁿ-í nàcuáa ní quide Dèhe-gá Xítoho Jesucristú cuendá naníhí tǎhú-ó. ¹⁰ Te xicáⁿ tǎhú-í nùú Yá Ndiòxí sá nùu mee-gá ná càchí te sáá ñⁿ nduu quixi coto ñaha-í xii-ndo. ¹¹ Chi ío cuíní-í cundecu ndíhi ñaha-í xii-ndo dànehé ñáhá-í ñⁿ úú tnúhu nàcuáa ío-gá chindee ñaha Espiritú Yá Ndiòxí xii-ndo, te ducaⁿ ío-gá cuita nducu ndèe-ndo cada-ndo nchaá nacuáa cuíní-gá. ¹² Te ío chí ná cuáha tnàha-o tnúhu ndee iní cundecu-o íchi-gá, chi nchòhó ndíhi yúhú ío sàndáá iní-ó-gá.

¹³ Te nchòhó ñáyiú ndècu ndíhi-í ichi Xítoho Jesucristú na càchí tnúhu-í xii-ndo sá dúcáⁿ-ní ío sàni iní-í quixi coto ñaha-í xii-ndo. Te cuíní-í sá òré quixi coto ñaha-í xii-ndo, te vá cuíta chiúⁿ quixi-í dàtná quidè-í òré sǎngoto-í nchaá ñáyiú dāva-gá ñúú ñá túú xíta chiúⁿ-í chi ío váha sàhúuⁿ-yu tnúhu cáhⁿ-í, dico ñá ndácú-í quixi-í quixi coto ñaha-í xii-ndo. ¹⁴ Te yúhú yídiquí-í cáhⁿ-í tnúhu Xítoho Jesucristú nùú nchàa ñáyiú cáhⁿ tnúhu griégú, ndíhi nùú nchàa ñáyiú cáhⁿ dāva-gá nùú tnúhu, ndíhi nùú nchàa ñáyiú túha, ndíhi

núú nchaa ñáiyu ñá túú túha. ¹⁵ Te cuendá sá dúhá yìdíquí-í cáháⁿ-í tnúhu-gá, xiáⁿ ío cuini-í danèhé ñáhà-í xii nchaa nchòhò ñáiyu ñuú Rómà nàcuáa ndùu tnúhu sá cáháⁿ nàcuáa naníhí tàhú-ó.

Ío cùnuu tnúhu Xítohó Jesucristú

¹⁶ Te yúhú ñá túú tnàhí cùcahaⁿ núú-í cáháⁿ-í tnúhu Xítohó Jesucristú, chí cùu-xi tnúhu ío cùnuu, chí Yá Ndióxi ní cachí-gá sá ncháá ñáiyu na quindáá iní-xi tnúhu-áⁿ te naníhí tàhú-yu. Te ní cachí-gá sá díhnanuu-gã ñáiyu isràèl ngúndecu ndihí-yu tnúhu-áⁿ te dàtnùní ngúndecu ndihí ñáiyu ñá túú cùu ñáiyu isràèl. ¹⁷ Te tnúhu-áⁿ dánèhé ñáhá-xí xii-o sá cúdiu-o núú Yá Ndióxi te núu mee-ni sá quindáá iní-ó-gã dàtná cáháⁿ-xi núú tùtú-gá núú cachí-xi: “Nchaa ñáiyu sàndáá iní ñáhá xii Yá Ndióxi cúdiu-yu núú-gã, te ndècu ndihí ñahá-yu xii-gã”, duha càchí-xi núú tùtú-gã.

Nchaa ñáiyu ndècu ñuyú ndècuéchi-yu

¹⁸ Te ndéé andiu tèndaha Yá Ndióxi sá ùhú quixi sá cúú-xi nchaa ñáiyu ñá túú quide ndáá núú-gã, ñáiyu quide nchaa sá cuèhé sá dúhá. Te cuendá nchaa sá quidè-yu-áⁿ xiáⁿ ñá túú cuini-yu tnií-yu tnúhu ndáá tnúhu Yá Ndióxi cuendá cuu-xi ìⁿ sá vaha sá cúú-xi-yu. ¹⁹ Te cuèi ducaⁿ quidè-yu dico cùtnuní ndáá iní-yu nàcuáa ndùu sá sání iní Yá Ndióxi ndihí nàcuáa ndùu sá quidè-gã dàtná cùtnuní iní nchaa dava-gá-yu, chí diu-gã dánèhé ñáhá-gã xii-yu. ²⁰ Te ni vã ndácú-ó quini núú-ó nãsa càa-gã, te ni vã ndácú-ó quini-ó nãsa càa iní-gã, te ni vã ndácú-ó quini-ó nãsa quide-gã táxi tnùní-gã nchaa nduu nchaa quíú. Te cuèi ducaⁿ dico ndéé cùtnàhá ní ngáva ñuyú ní ngúita nchaa ñáiyu tècú tnùní váha-yu nàcuáa ndùu sá sání iní-gã ndihí nàcuáa ndùu sá quidè-gã te ducaⁿ

tècú tnùní-yu cuendá nchaa sá ñí cadúha-gã ndéhè-yu ío ñuyú-a, núu xiáⁿ vã càchí-yu sá ñá túú cuèchi-yu. ²¹ Te cuèi ducaⁿ ñí cutnùní iní-yu cuendá Yá Ndióxi dico ñá túú cuini-yu canehé-yu sá yíñùhu núú-gã nàcuáa tàu-xi cunduu. Te ni ñá túú cuini-yu ndacáⁿ táhù-yu núú-gã cuendá nchaa sá vaha quide ñaha-gã xii-yu, chí mee-ni nchaa sá ñá túú vèdana nàndíhí ñuhu iní-yu. Te quidè-yu dàtná quidè ìⁿ ñáiyu ñá túú ndècu ndihí nchaa sá xini tnùní-xi. Te uuⁿ-gá uuⁿ-gá tá quidè-yu cuáháⁿ. ²² Te càchí-yu sá cúú-yu ñáiyu ío váha sàá sá xini tnùní-xi dico ñá ndáá, chí cùu-yu ñáiyu ío ñí díquí-xi. ²³ Te ñá túú cuini-yu cáháⁿ-yu sá ío càhnu cuu Yá Ndióxi Yá ndécú nchaa nduu nchaa quíú, chí da nchaa sá ñí cadúha mèé-yu quide cahnú-yu. Te ní cadúha-yu nchaa sá nahá ñáiyu ñá túú cùdí ndècu ñuyú-a. Te ní cadúha-yu sá nahá quiti ndáva, ndihí sá nahá quiti sàcuíta ñuhu mee-xi, ndihí sá nahá nchaa dava-gã quiti, nchaa xiáⁿ quidè cahnú-yu.

²⁴ Te xiáⁿ núu ní dáñá Yá Ndióxi quidè-yu nchaa sá cuèhé sá dúhá sàni iní-yu. Te xiáⁿ ío quide ndihí tnahá-yu sá cuèhé sá dúhá sàcúú-xi yìqui cuñú-yu. ²⁵ Te ducaⁿ quidè-yu chí ñá túú sàndáá iní-yu tnúhu ndáá tnúhu Yá Ndióxi. Te mee-ni tnúhu ndehnde sàndáá iní-yu, te nèhé-yu sá yíñùhu núú dáva sá ñí cadúha-gã ío ñuyú-a ndihí dava sá ndéé andiu te quide cahnú-yu, te ñá túú càchí-yu sá mèé-gã ío càhnu cuu-gã, dico mee-gã xini ñuhu-xi cáháⁿ-yu sá ío càhnu cuu-gã ni caa ni quíhíⁿ. Te ndáá ndisa sá ío càhnu cuu-gã.

²⁶ Te sá dúcáⁿ ñá túú quide váha-yu núu xiáⁿ ní dáñá-ñá Yá Ndióxi quidè-yu nchaa sá cuèhé sá dúhá sàni iní mèé-yu. Te dava ñáiyu ñíhí càháⁿ ndihí tnahá-yu ndi mèe

dihí-yu te ñá túú quidé-yu nàcuáa ní nduu táhũ-yu cada-yu. ²⁷ Te ñu-ni ducaⁿ xiquide dava cue tée chi sàni cuehé sání dùha iní-güedé sá cúú-xí yìqùì cuñú-güedé ndi mèe tnaha tée-güedé, chi càháⁿ ndihì tnàha ndi mee-güedé te ñá túú quide-güedé nàcuáa ní nduu táhũ-güedé cada-güedé, te sá dúcáⁿ quide-güedé te ñá túú tnàhí cùu váha iní-güedé ndécú-güedé, te ducaⁿ tnàhí tàú-xi ndoho-güedé cundecu-güedé.

²⁸ Te ñá túú tnàhí ñũhu iní-yu Yá Ndiòxí nõu xíáⁿ duuⁿ duuⁿ ní dáñá ñĩnu ñaha-gá xii-yu sàni cuehé sání dùha iní-yu, te quidé-yu nchaa sá ñà túú tàú-yu cada-yu. ²⁹ Te nchaa núú sá cuehé sá dúhá cùnũu quidé-yu. Te cue tée càháⁿ ndihì-güedé ñáiyu dihí te ñá díú ñàdihì-güedé cúũ-yu. Te ñu-ni ducaⁿ xiquide cue ñáiyu dihí chi càháⁿ ndihí-yu cue tée te ñá díú yĩ-yu cùu-güedé. Te mee-ni sá ñà túú váha quidé-yu sá cúú-xí tnàha ñáiyú-yu, te xihó-yu cundecu ndihí-yu sá ndécú ndihì dava-gá tnàha ñáiyú-yu, te ío sàni cuehé sání dùha iní-yu sá cúú-xí tnàha ñáiyú-yu, te ío cuédú iní-yu, te sàhni tnahá-yu, te ío plètú-yu, te dándahú tnáhã-yu, te cùu úhú iní-yu cue tnàha ñáiyú-yu, te ío yiti yùhú-yu. ³⁰ Te càháⁿ cuehé-yu cuendá nchaa dava-gá tnàha ñáiyú-yu, te cùu úhú iní-yu Yá Ndiòxí, te xio xio cuñí-yu cunuu tnũhu-yu, te mee-ni sàni iní-yu sá ío váha cunduú-yu, te ío quide cahnú-yu mèe-yu, te ío sàni iní-yu sá cádá úhú-yu tnàha ñáiyú-yu, te ñá túú sàndáá iní-yu ni tãtä-yu ni nãñã-yu. ³¹ Te ñá túú tècú tnúni-yu sá váha, te ñá túú quidé-yu ñⁿ sá càháⁿ-yu, te ñá túú cùu iní-yu ñi ñáiyu cùu ndi meé-yu, te ni dàva-gá tnàha ñáiyú-yu, te ñá túú quide cahnu iní-yu ñⁿ sá cúmãní nõú tnáhã-yu, te ni ñà túú cùndahú

iní-yu tnàha ñáiyú-yu. ³² Te Yá Ndiòxí ní cachí-gá sá ncháá ñáiyu ducaⁿ xiquide quihíⁿ-yu núú úhú núú ndàhú. Te xini-yu sá Yá Ndiòxí daquihíⁿ ñáhã-gã xii-yu núú úhú núú ndàhú sá dúcáⁿ quidé-yu, dico uuⁿ-gá quidé-yu chi váha-gá cúú iní-yu cue ñáiyu quide datná quidé mèe-yu.

2

Yá Ndiòxí cada ndáá-gá cuéchi nchaa ñáiyu ndècu ñuyúú

¹ Te nchòhó ñáiyu càchí sá ío ndècu cuéchi dava-gá ñáiyu tnáhã-ndó ío ndècu cuéchi-ndo cuèj nágá ñáiyu cùu-ndo, chi tnáhã-ndó quide-ni-ndo nchaa nacúaa quide dava-gá ñáiyu càchí-ndó ndècu cuéchi-xi, te sá dúcáⁿ càháⁿ-ndó sá ndécú cuéchi ñáiyu-án te dàcaa-ndo cuéchi díquí-ndó chi tnáhã-ndó quide-ndo datná quidé-yu. ² Te nchoo xini-ó sá Yá Ndiòxí ío váha cùtnuní iní-gá nàcuáa cada ndáá-gá cuéchi ñⁿ ñⁿ nchoo ñáiyu ndècu ñuyúú-a, chi daquihíⁿ-gá nchaa ñáiyu quide nacúaa ní càháⁿ-í núú úhú núú ndàhú. ³ Te nchòhó ñáiyu ñⁿ-ni quide ndihì ñáiyu càchí méé-ndó sá ndécú cuéchi-xi dacutíí sá ná chãhu-ndo nõú Yá Ndiòxí sá dúcáⁿ quide-ndo. ⁴ Te ñá túú cùu váha iní-ndó sá Yá Ndiòxí cùndahú iní ñáhã-gã xii-ndo, te ni ñà túú cùu váha iní-ndó sá ío cuñí-gá cada càhnu iní-gá nchaa sá ñà túú váha quide-ndo, te ni ñà túú quide cuendá-ndó sá Yá Ndiòxí quidé váha ñaha-gã xii-ndo cuendá cuñí-gá sá nchòhó ndixi túu iní-ndó sá ñà túú quide váha-ndo ndècu-ndo. ⁵ Te nchòhó cúú-ndó ñáiyu ío sáa iní-xi, chi ñá túú cuñí-ndó ndixi túu iní-ndó sá ñà túú quide váha-ndo ndècu-ndo, te xíáⁿ nõu ío-gá tá cùu vai tnúndòho sá cúú-xí-ndó. Te na sáa nduu tnũhu ndòho tnũhu ndàhú te ío ndoho-ndo, chi Yá Ndiòxí cada ndáá-gá nacúaa ndũu cuéchi-ndo.

⁶ Te dàvâ-áⁿ cada ndáá Yá Ndiöxí nchaa nàcuáa nduu nchaa sá ní quide ìⁿ ìⁿ ñáyiú ndècu ñuyíú-a.

⁷ Te nchaa ñáyiú nchicúⁿ nihnu-ni quide mee-ni sá vâha, ñáyiú-áⁿ nduu táhũ-yu cundecú-yu ndihí Yá Ndiöxí ní caa ní quíhíⁿ, te ducaⁿ quide váha-yu chi cuíní-yu sá Yá Ndiöxí cuu váha iní ñáhá-gã xii-yu, te cuíní tucú-yu nduu táhũ-yu núú ïo váha càa ndecu Yá Ndiöxí cundecú-yu ní caa ní quíhíⁿ. ⁸ Te ïo cùdééⁿ-gã núú nchaa ñáyiú ñuhu iní mee-ni sá cùú-xí mèe-xi, te ñá túú sàndáá iní-yu tnúhu ndáá chi mee-ni sá cuèhé sá dúhá quide-yu. ⁹ Te nchaa ñáyiú ducaⁿ xiquide ïo ndíhú iní-yu. Te díhna-gá ñáyiú isràél ngúita-xi ndohó-yu, te dàtnùnì ngúita-xi ndoho nchaa ñáyiú ñá túú cùu ñáyiú isràél. ¹⁰ Te nchaa ñáyiú ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ní quide váha-yu, te ïo váha cuu iní-yu cundecú-yu. Te díhna-gá ñáyiú isràél ñáyiú ní quide váha ducaⁿ càda ñaha-gá xii-yu, te dàtnùnì ducaⁿ càda ñaha-gá xii ñáyiú ñá túú cùu ñáyiú isràél ñáyiú ní quide váha.

¹¹ Te ñá túú quide cuendá-gá cuèi náí ñáyiú cùú-yu. ¹² Te nchaa ñáyiú ndècu ndihí nchaa tnúhu ní chídó tnùnì ndíi Moisés, Yá Ndiöxí cada ndáá-gá cuèchi-yu nàcuáa càháⁿ nchaa tnúhu-áⁿ. Te nchaa ñáyiú ñá túú ndècu ndihí tnúhu ní chídó tnùnì ndíi-áⁿ, Yá Ndiöxí vá cáda ndáá-gá cuèchi-yu nàcuáa càháⁿ nchaa tnúhu-áⁿ. Dico nchaa ñáyiú quide nándi sá cuèhé sá dúhá dàcuítí cuíta nihnú-yu cuèi ndècu ndihí-yu tnúhu ní chídó tnùnì ndíi Moisés àdi ñá túú ndècu ndihí-yu. ¹³ Te nchaa ñáyiú dicó-ni sàcúndedóho nchaa tnúhu ní càháⁿ ndíi Moisés te ñá túú tñi-yu, ñáyiú-áⁿ ñà túú cùdúú-yu núú Yá Ndiöxí, dico nchaa ñáyiú tñi nchaa tnúhu ní càháⁿ ndíi, ñáyiú-áⁿ càchi

Yá Ndiöxí sá cùdúú-yu núú-gã, chi ñá túú-gã cuèchi-yu ndècu núú-gã. ¹⁴ Te nchaa ñáyiú ñá túú ndècu ndihí tnúhu ní chídó tnùnì ndíi Moisés, te núú quide-yu nchaa nàcuáa ní càháⁿ ndíi te cùu-xi ìⁿ sá sání tñahí iní mèe-yu cada-yu, te sá sání iní-yu-áⁿ cùú-xí ìⁿ tnúhu váha sá sánú ichi ñaha xii-yu nàcuáa cada váha-yu cundecú-yu. ¹⁵ Te sá dúcáⁿ quide-yu xiáⁿ cùtnùnì sá sání iní-yu dàtná càháⁿ tnúhu ní chídó tnùnì ndíi Moisés cada ñáyiú isràél, te ïo váha cùtnunì iní-yu nchaa nàcuáa quide-yu chi ndixi túu iní-yu òré ñá túú quide váha-yu. ¹⁶ Te sáá nduu te Yá Ndiöxí cùñaha-gã xii Xítoho Jesucristú cada ndáá-gá nchaa cuèchi ñáyiú, nchaa sá sání iní mèe-yu nduu yuhu, te cada-gá dàtná càháⁿ tnúhu sá sánú ichi ñaha xii-o nacuáa naníhí tãhú-ó, tnúhu sá dánèhé ñáhà-í xii-ndo.

Cuèndá ñáyiú isràél ndihí cuèndá nchaa tnúhu ní chídó tnùnì ndíi Moisés

¹⁷ Te nchòhó ñáyiú isràél nchaa-ndo cùu-ndo ndi mee-í, te càchi-ndó sá nchicúⁿ nihnu-ndo quide-ndo nchaa tnúhu ní càháⁿ ndíi Moisés nũu xiáⁿ ndécú váha-ndo, te càchi-ndó sá ïo càhnu cuu-ndo sá ndécú ndihí-ndo Yá Ndiöxí. ¹⁸ Te cùtnunì iní-ndó nchaa nacuáa cuínì Yá Ndiöxí cada-ndo, te sá dúcáⁿ nchicúⁿ nihnu-ndo quide-ndo nacuáa càháⁿ tnúhu-áⁿ xiáⁿ cùtnùnì iní-ndó nchaa sá ïo-gá váha xini ñuhu-xi cada-ndo. ¹⁹ Te càchi-ndó sá ïo váha xini-ndó cànuichi-ndo nchaa ñáyiú ñá túú cùtnunì iní-xi, te càchi tucu-ndo sá ïo váha xini-ndó nà canu ichi-ndo nchaa ñáyiú ndècu ichi cuèhé ichi duha. ²⁰ Te sànu ichi-ndo nchaa ñáyiú ïo nñi díquí-xi, ndihí nchaa ñáyiú vitna ta tècú tnùnì nchaa sá vâha, te ducaⁿ quide-ndo chi ndècu ndihí-ndo nchaa tnúhu ní chídó tnùnì ndíi Moisés, te tnúhu-áⁿ cùú-xí tnúhu ndáá, chi sànu ichi ñaha-xi xii-ndo nacuáa cada-ndo. ²¹ Te nchòhó

dàcuaha-ndo ñáiyu nàcuáa cada-yu, te mee-ndo ñà túú dàcuaha-ndo cada-ndo nchaa nacuáa tàú-xi cunduu, te xáhaⁿ-ndo xii-yu sá vã cúú dùhú-yu te mee-ndo dùhu-ndo. ²² Te dàcuaha-ndó-yu sá cuè téé vã cúú cãháⁿ ndihi-güedé ñáiyu dìhí te núu ñá díú ñàdihí-güedé cúú-yu, te ducaⁿ-ni cuè ñáiyu dìhí, vã cúú cãháⁿ ndihí-yu téé te núu ñá díú yï-yu cùu-güedé. Te nchaa sá xáhaⁿ-ndo vã cúú càda ñáiyu te mee-ndo quide-ni-ndo, te xáhaⁿ-ndo xii-yu sá vã cãnehé-yu sá yíñùhu núú nchaa sá cãchí-yu cùu ndiöxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñúhu. ²³ Te cãchí-ndó sã ïo cùnuu nchaa tnúhu ní chídó tnùní ndíi Moisés, te ñá túú quide-ndo nchaa nacuáa ní cãháⁿ ndíi, te sá dúcáⁿ quide-ndo-áⁿ te dàquee tíhú-ndó Yã Ndiöxí. ²⁴ Te quèe ndáá-xi nàcuáa cãháⁿ-xi núú tütú Yã Ndiöxí nàcuáa quide-ndo-áⁿ núú cãchí-xi sá ncháá ñáiyu ñá túú cùu ñáiyu isràél cãháⁿ cuèhé-yu cuendá Yã Ndiöxí sá cuendá-ndó. ²⁵ Te nchòhó ñáiyu isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcáⁿ te núu quide-ndo nchaa nacuáa ní cãháⁿ ndíi Moisés. Dico núú ñá túú quide-ndo nchaa nacuáa ní cãháⁿ ndíi ña, te ñá túú nàndihí-xi sá cúú-ndó ñáiyu isràél cuèi ndècu seña ñii-ndo. ²⁶ Te nchaa ñáiyu ñá túú ndècu ndihí seña ñii-xi, te núu quidé-yu nchaa nàcuáa ní cãháⁿ ndíi Moisés, te cùu-yu dàtná cue ñáiyu ndècu ndihí seña ñii-xi, chi quidé-yu nchaa nàcuáa ní cãháⁿ ndíi. ²⁷ Te ñáiyu ñá túú ndècu ndihí seña ñii-xi, te núu na càda-yu nchaa nàcuáa ní cãháⁿ ndíi Moisés, te ñáiyu-áⁿ cachí-yu sá ñà túú quide ndáá nchaa nchòhó ñáiyu ndècu ndihí seña ñii-xi, chi ndècu ndihí-ndo nchaa tnúhu ní chídó tnùní ndíi te ñá túú quide-ndo nacuáa cãháⁿ tnúhu-áⁿ. ²⁸ Te

nchòhó ñáiyu isràél, ñáiyu nchicúⁿ nihnu-ni quide nchaa nacuáa ta quide tnahi-ndo véxi, ñá túú quide-ndo sá cúú-ndó ñáiyu isràél, te mee-ndo ndècu seña ñii-ndo dico ñá túú quide-ndo nacuáa tàú-xi cada nchaa ñáiyu ndècu seña ñii-xi, te mee-ni seña-áⁿ sãha-ndo ñii-ndo te ñá túú quide-ndo nacuáa cuení Yã Ndiöxí cada-ndo. ²⁹ Te nchaa ñáiyu sàndáa ndisa iní-xi Yã Ndiöxí, ñáiyu-áⁿ cúú ndisá-yu ñáiyu isràél, te sa ní nduu ndoo ní nduu nine iní-yu chi Espiritú Yã Ndiöxí ducaⁿ ní quide-xi, dico ñá díú sã sãha-yu seña ñii-yu dàtná ní cachí ndíi Moisés. Te ñáiyu-áⁿ cúú váha iní ñáhá Yã Ndiöxí xii-yu cuèi ñá túú cãháⁿ váha tnàha ñáiyu-yu cuendá-yu.

3

¹ Te sá dúhá cãháⁿ-í te ïo dava ñáiyu quesàhá-yu sá ñii-ní cùu ñáiyu ñá túú cùu ñáiyu isràél ndihí nchoo ñáiyu isràél, te quesaha tucú-yu sá ñii-ní quide tucu-xi cuèi na cuãha àdi vã cuãha seña ñii-yu. ² Dico yúhú cãchí-í sá ncháá ñáiyu isràél ïo-gá cùnùú-yu, chi ïo titní núú sã váha ní quide ñaha Yã Ndiöxí xii-yu, chi ní sãñaha-gã tnúhu-gá ndécú ndihí-yu. ³ Te davá-yu ñá túú cuini-yu cada ndáá-yu, dico ñá díú sã xíãⁿ te cùyica iní Yã Ndiöxí ñá túú quide ndáá-gá. ⁴ Dico ñáhá chi xini ñuhu-xi sã ncháá ñáiyu cada cuendá-yu sã Yã Ndiöxí cúú-gã Yaá quidé ndáá cuiti, te cuèi ncháá-yu na cãchí-yu sã ñà túú quide ndáá-gá, dico mee-gã chi quide ndáá-ni-gã. Te núú tütú-gá cãháⁿ-xi nàcuáa ní xáhaⁿ ñiiⁿ téé ní xíndecu ndéé sanaha xii-gá, te duha ní xáhaⁿ-dè: Yòhó Dútú Ndiöxí, cùnnumí iní ñáiyu sá ïo ndáá cãháⁿ-n, te cùnuu nahi-ni tnúhu-n cuèi òré cãchí ñáiyu sá ñà túú cãháⁿ ndáá-n.

Duha ní xáhaⁿ tée ndéé sanaha-ãⁿ xii-gá cächí-xi núú tütú-gá.

⁵ Te cuëndá nchaa sá cuèhé sá dúhá quide ñáyiú, xiãⁿ cùtnùní iní-yu sá Yã Ndiõxí cúú-gã Yaá ío váha quide ndáá, chi mee-gã ñá túú dùcaⁿ quide-gá. Te cuèi ducaⁿ dico vá cání iní-yu sá Yã Ndiõxí ñá túú quide ndáá-gá sá dándòho ñaha-gá xii-yu na sàá nduu, te núú ducaⁿ na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. ⁶ Te vá dúcáⁿ càni iní-yu, chi núú Yã Ndiõxí ñá túú quide ndáá-gá ñá, te vá cúú càda ndáá-gá nchaa cuèchi cue ñáyiú ñuyúú-a te núú ducaⁿ.

⁷ Te núú yúhú ná càni iní-í cáháⁿ-í ñⁿ tnúhu ndehnde, te sá tnúhu-áⁿ te caní tucu iní-í sá quidé cànmu-gá-í tnúhu ndáá tnúhu Yã Ndiõxí, te sá dúcáⁿ ná cáháⁿ-í te caní tucu iní-í sá vá cúú cáháⁿ Yã Ndiõxí sá ndécú cuèchi-í. ⁸ Te núú na càni tucu iní-í sá vãha-gá cada-í nchaa sá cuèhé sá dúhá cuëndá Yã Ndiõxí cada-gá sá váha, dico ñá ndáá. Te ío ñáyiú cáháⁿ cuèhé cuëndá-í te cächí-yu sá díú-ní dùcaⁿ dacuaha-í ñáyiú dico ñá ndáá sá dúcáⁿ dànehé-í-yu, te ñáyiú-áⁿ nacháhu-yu tnúhu cáháⁿ-yu, chi ducaⁿ tàú-xi cunduu.

Nchaa ñáyiú ñuyúú-a ndècuèchi-yu

⁹ Te vitna cächí dava ñáyiú sá ïo-gá cúnùu nchoo cue ñáyiú isràél dàcúxí dàva-gá ñáyiú, dico yúhú cächí-í sá ñãhá, te sa ní cächí tnúhu ndáá-í xii-ndo sá nchaa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél.

¹⁰ Te núú tütú Yã Ndiõxí cächí-xi: Vá yõo ñⁿ quide ndáá,

¹¹ te ni vá yõo ñⁿ tècú tnùní tnúhu váha,

te ni vá yõo ñⁿ nànducu nihnu Yã Ndiõxí.

¹² Chi nchaá-yu ñá túú nchìcúⁿ nihnú-yu ichi váha, te nchaá-yu cùu-yu ñáyiú xĩndecu neñùú sá cúú-xí Yã Ndiõxí.

Te ni ñⁿ-yu ñá túú quidé-yu ñⁿ sá vãha.

¹³ Te cada iní-ndó sã yúhú-yu cùu-xi datná cúú ñⁿ yaú núú yíndüxi ndíyí núú ïo ndehe sãháⁿ,

te ducaⁿ sãtnahá-xi cùu yuhú-yu, chi ío cáháⁿ cuèhé-yu, te mee-ni dándahú-yu nchaa tnàha ñáyiú-yu.

Te cada iní-ndó sã vènenú cóo yíhí yúhú-yu chi mee-ni cáháⁿ úhú-yu cuëndá tnàha ñáyiú-yu.

¹⁴ Te ío iní-yu cáháⁿ úhú tnáhã-yu.

¹⁵ Te àúⁿ nã cuu àúⁿ nã xiãⁿ xĩsahni tnáhã-yu.

¹⁶ Te nchaa núú xicá cùu-yu quide úhú iní-yu nchaa tnàha ñáyiú-yu nàcuáa ndìhú iní ñáyiú-áⁿ.

¹⁷ Te ñá túú cuìní-yu cundecu ndìhi tnàha váha-yu.

¹⁸ Te ñá túú sàni iní-yu canehé-yu sá yíñùhu núú Yã Ndiõxí.

Duha quidé-yu cächí-xi núú tütú-gá.

¹⁹ Te cùtnùní iní-ó sã nchaa tnúhu ní chídó tnùní ndíi Moisés cúú-xi cuëndá nchaa ñáyiú nchìcúⁿ nihnu nchaa tnúhu-áⁿ. Te tnúhu-áⁿ cúú-xi cuëndá sá vá yõo tnàhí cächí sá ñá túú cuèchi-xi, te ducaⁿ te nchaandi túhú ñáyiú cutnùní iní-yu sá ná chãhu-yu nchaa sá quidé-yu núú Yã Ndiõxí. ²⁰ Te ducaⁿ càda-xi chi ni ñⁿ ñáyiú vá cächí-ó sã vá cùndècu cuèchi-yu núú Yã Ndiõxí cuëndá-ni sá nchìcúⁿ nihnú-yu nchaa tnúhu sá ní chídó tnùní ndíi Moisés, te tnúhu-áⁿ cächí tnúhu-xi cuëndá-ni sá cùtnùní iní-ó sã ndécú-ó ichi cuèhé ichi duha.

Te núú na quìndáá iní-ó Xĩtoho Jesucristú te naníhí tàhú-ó

²¹ Te vitna ní cutnùní iní-ó sã ñá díú sã cadá-ó nchaa nacuáa ní cáháⁿ ndíi Moisés cudíu-o núú Yã Ndiõxí, chi mee-gã quidé cudíu-o núú-gã. Te núú tütú ndíi Moisés ndìhi núú tütú tée ní xóo

cáháⁿ tnúhu Yá Ndiöxí ndéé sanaha cáháⁿ-xi nàcuáa cada ñaha-gã xii-o vitna. ²² Te ducaⁿ cùdiu-o núú Yá Ndiöxí te núu na quindáá iní-ó Xítohó Jesucristú. Te ñu-ni ducaⁿ cùdiu nchaa ñáyiú ñuyíú te núu na quindáá iní ñáhã-yu xii-gá, chi ñⁿ-ni cùu-o nchaa-o sá cúú-xí Yá Ndiöxí. ²³ Chi nchaá-yu ndècu cuéchi-yu, chi ñá ñⁿ-yu quidè-yu nàcuáa cáháⁿ Yá Ndiöxí sá cúú-yu ñáyiú quidè váha. ²⁴ Dico Yá Ndiöxí ío váha iní-gá chi ní quidè ñaha-gã xii-o ñⁿ sá váha, chi dicó-ni ducaⁿ ñí quidè-gá nàcuáa vá cùndècu-gá cuéchi-o núú-gã, chi Xítohó Jesucristú ní sati ñíñí-gã te ní xíhí-gá, te ducaⁿ ñí yáha-gá cuendá sá vá cùndècu-gá cuéchi-o. ²⁵ Te Yá Ndiöxí ní taxi ndecu-gá Xítohó Jesucristú núú ñáyiú ñuyíú-a, te ní xíhí-gá sá cuendá nchaa yíca cuéchi-yu, te ducaⁿ ñí cuu cuendá sá ncháá ñáyiú na quindáá iní ñáhã xii-gá te vá náchãhu-yu cuéchi-yu núú Yá Ndiöxí. Te Yá Ndiöxí ní quidè ndee iní-gá nchaa sá cuéhé sá dúhá ñí quidè cue ñáyiú ní xíndecu ndéé sanaha. Te xíãⁿ ní xíhí Xítohó Jesucristú cuendá cutnùni iní-ó sá Yá Ndiöxí cúú-gã Yáá ío váha quidè ndáá cuéi ducaⁿ ñí quidè ndee iní-gá nchaa sá ñí quidè cue ñáyiú-áⁿ. ²⁶ Núu xíãⁿ vitna ní cutnùni ndisa iní-ó sá quidè ndáá-gá, te quidè-gá sá cuè ñáyiú vá cùndècu-gá cuéchi-yu núú-gã, te núu na quindáá iní-yu Xítohó Jesucristú.

²⁷ Te vitna vá càchí-ó sã ío càhnu cuu-o cuendá sá ñà túú-gã cuéchi-o ndècu núú Yá Ndiöxí, te ducaⁿ ñà túú-gã cuéchi-o ndècu núú-gã cuendá sá sàndáá iní-ó Xítohó Jesucristú, te ñá díú sã cuendá nchaa tnúhu ní cáháⁿ ndíj Moisés. ²⁸ Te cutnùni iní-ó sã ndéda-ni càa ñáyiú vá cùndècu-gá cuéchi-yu núú Yá Ndiöxí te núu na quindáá iní-yu Xítohó Jesucristú cuéi ní quidè-yu

nchaa nàcuáa ní cáháⁿ ndíj Moisés àdi ñà túú ní quidè-yu.

²⁹ Te cutnùni iní-ó sã Yá Ndiöxí cúú-gã Ndiöxí nchaandi túhú ñáyiú, te ñá díú mèe-ni Ndiöxí ñáyiú isràél cúú-gã. ³⁰ Te ñⁿdi díí-gã cúú-gã Ndiöxí, te nchaa ñáyiú sàndáá iní ñáhã xii Xítohó Jesucristú te vá cùndècu-gá cuéchi-yu núú Yá Ndiöxí cuéi cúú-yu ñáyiú isràél àdi ñà túú cúú-yu. ³¹ Te ñá díú sã sàndáá iní-ó Xítohó Jesucristú te cachí-ó sã ñà túú nàndíhí nchaa tnúhu sá sánú ichi ñaha xii-o nàcuáa cada-o, te ñáhã chi sá dúhá sàndáá iní-ó-gã te xíãⁿ nchicúⁿ nihnu-o quidè-o nàcuáa càháⁿ tnúhu-áⁿ.

4

Cuendá ndíj Àbrahám

¹ Te vitna na càchí tnúhu-í xii-ndo cuendá ndíj Àbrahám tée ní cuu ñani tnáhã-ó ñí xíndecu ndéé sanaha. ² Te ndíj-áⁿ ñà túú ní xíndecu cuéchi ndíj núú Yá Ndiöxí, dico ñá díú cuendá ñⁿ chiúⁿ ní quidè ndíj ducaⁿ ñà túú ní xíndecu cuéchi ndíj núú-gã. Chi núu cuendá ñⁿ chiúⁿ ní quidè ndíj ducaⁿ ñà túú ní xíndecu cuéchi ndíj núú Yá Ndiöxí ñá, te cada càhnu ndíj mee ndíj ní cùu, dico ñá díú núú Yá Ndiöxí cada càhnu ndíj mee ndíj te núu ducaⁿ ñí quidè ndíj. ³ Te chí dándacu iní nàcuáa càháⁿ-xi núú tùtú Yá Ndiöxí núú càchí-xi: “Té Àbrahám ní sàndáá iní-dé Yá Ndiöxí, te xíãⁿ ní cachí-gá sá cúú-dé núú-gã”, duha càchí-xi núú tùtú-gã. ⁴ Te sá cúhúⁿ yáhu ñⁿ tée quidè chiúⁿ, te vá càchí-ó sã xíãⁿ cúú-xí ñⁿ táhú sã cúú-xí-dé chi yáhu tnáhí-dé cúú-xí. ⁵ Te vá yóo ñⁿ ndàcu cada ñⁿ chiúⁿ nàcuáa cùdiu-xi núú Yá Ndiöxí. Te ñà túú nà chiúⁿ xini ñuhu-xi cada ñáyiú te cùdiú-yu núú-gã, chi xini ñuhu-ni-xi sá quindáá-ni iní-yu-gã. Te ñu-gá càchí-gá sá ñáyiú ndècu ichi cuéhé ichi duha vá cùndècu-gá cuéchi-yu núú-gã, te núu na quindáá iní ñáhã-yu xii-gã. ⁶ Te ñu-ni ducaⁿ

nĩ cáháⁿ ndíi Dàvíi, chi ní cachí ndíi sá ìo váha táhú nchaa ñáyiú ní cachí Yá Ndiöxí cudíu núú-gã, dico ñá díú cuendá ìⁿ chiuⁿ quidé-yu cudíu-yu núú-gã. ⁷ Te duha ní cachí ndíi:

Váha táhú nchaa ñáyiú quide cahnu iní Yá Ndiöxí nchaa cuéchi-xi,
te ñá túú-gã quidé cuendá-gã nchaa sá cuèhé sá dúhá ní quidé-yu.

⁸ Váha táhú-yu chi Yá Ndiöxí cachí-gã sá ñà túú-gã cuéchi-yu.

Duha ní cachí ndíi Dàvíi.

⁹ Te ñá díú mèe-ni ñáyiú ngündecu señá ñi-xi ducaⁿ váha táhú-yu, chi tnáhá ñáyiú ñá túú ngündecu señá ñi-xi ducaⁿ váha táhú-yu. Te sa nàha-o sá Yá Ndiöxí ní cachí-gã sá cudíu ndíi Àbrahám núú-gã cuendá sá ñi sándáá iní ñáhá ndíi xii-gã. ¹⁰ Te cunaha-ndo sá dīhna-gã ní cachí Yá Ndiöxí sá cudíu ndíi Àbrahám núú-gã te dàtnùní ngündecu señá ñi ndíi. ¹¹ Te ní ngündecu señá ñi ndíi cuendá xíáⁿ cuu-xi ìⁿ señá sá cudíu ndíi núú Yá Ndiöxí. Te ndéé cútñahá vátá ngündecu-gã señá ñi ndíi, te sa cudíu ndíi núú-gã chi ní sándáá iní ñáhá ndíi xii-gã. Te sá dúcáⁿ ñà túú ndécu señá ñi ndíi cútñahá ní sándáá iní ndíi Yá Ndiöxí xíáⁿ ní cuu ndíi dàtná ìⁿ díhí dūtú nchaa ñáyiú sándáá iní ñáhá xii-gã, ñáyiú ñá túú ní ngündecu señá ñi-xi, te cùdú-yu núú-gã. ¹² Te ndíi Àbrahám ní cuu tucu ndíi dàtná ìⁿ díhí dūtú nchaa ñáyiú ní ngündecu señá ñi-xi, dico ñá díú cuendá-ni sá ñi ngündecu señá ñi-yu cùu ndíi díhí dūtú-yu, chi cuendá sá sándáá iní-yu Yá Ndiöxí nchicúⁿ nihnú-yu nàcuáa ní quide ndíi ní sándáá iní ñáhá ndíi xii-gã ndéé cútñahá vátá ngündecu-gã señá ñi ndíi.

Yá Ndiöxí cada-gã nchaa nàcuáa ní cachí-gã te núu na quindáá iní-ó-gã

¹³ Te Yá Ndiöxí ní xáhaⁿ-gã xii ndíi Àbrahám sá ndúú táhú ndíi cunuu ndíi ñuyíú, ndihí cue déhe ndíi, ndihí nchaa dava-gã cue ñaní tnáhá ndíi vitna cacu túu. Te ducaⁿ ní xáhaⁿ Yá Ndiöxí xii ndíi ndihí cue ñaní tnáhá ndíi, chi ní sándáá iní ñáhá ndíi xii-gã núu xíáⁿ ní cudíu ndíi núú-gã. Te ducaⁿ ní xáhaⁿ-gã xii ndíi dico ñá díú cuendá sá ñi quide ndíi nàcuáa ní xáhaⁿ Yá Ndiöxí xii ndíi Moisés cada ñáyiú ndéé cuèé-gã. ¹⁴ Te núu mee-ni ñáyiú nchicúⁿ nihnu quide nàcuáa ní cáháⁿ ndíi Moisés ní ndúu táhú-yu cunúú-yu ñuyíú-a ní cùu ña, te ñá túú xini ñuhu-xi quindáá iní-ó Yá Ndiöxí, te ñá túú nàndíhí tnúhu ní xáhaⁿ Yá Ndiöxí xii ndíi Àbrahám ní cùu te núu ducaⁿ. ¹⁵ Te núu ìⁿ ñáyiú ñá túú quide nàcuáa cáháⁿ tnúhu sá sánú ìchi ñaha xii-o nàcuáa cada-o te nacháhu-yu sá dúcáⁿ quidé-yu. Te núu ñá túú tnúhu sá sánú ìchi ñaha-xi xii-o nàcuáa cada-o ní cùu ña, te ñá túú cuéchi-o ní cùu.

¹⁶ Te ducaⁿ ní xáhaⁿ Yá Ndiöxí xii ndíi Àbrahám nàcuáa cada-gã, chi cuendá sá ñi sándáá iní ñáhá ndíi xii-gã. Te ducaⁿ ní quide-gã chi ìo váha iní-gã, dico ñá díú sá ìⁿ chiuⁿ ní quide ndíi ducaⁿ ní xáhaⁿ-gã. Te sá dúcáⁿ ní cuu te cùu-xi ìⁿ tnúhu ndáá sá cúú-xi nchaa ñaní tnáhá ndíi, ñáyiú sándáá iní ñáhá xii-gã dàtná ní sándáá iní ñáhá mèe ndíi xii-gã, te ñá díú mèe-ni cuendá nchaa ñaní tnáhá ndíi nchicúⁿ nihnu nchaa nàcuáa ní cáháⁿ ndíi Moisés, chi ndíi Àbrahám-áⁿ ní cuu ndíi dàtná ìⁿ díhí dūtú cue ñáyiú sándáá iní ñáhá xii Yá Ndiöxí. ¹⁷ Te núú túú Yá Ndiöxí cáháⁿ-xi nàcuáa ní xáhaⁿ-gã xii ndíi, te duha ní xáhaⁿ-gã: “Yòhó té Àbrahám ní quide ñaha-ì xii-n dàtná ìⁿ díhí dūtú cue ñáyiú xīndecu nihí ñuyíú.” Duha ní xáhaⁿ Yá Ndiöxí xii ndíi, càchí-xi núú túú-gã. Te Yá Ndiöxí náhá ndáá-gã sá cadá-xi nàcuáa ní xáhaⁿ-gã xii ndíi Àbrahám, te

d̄iu-ni-gá cúú Yáá ní sándáá iní ndíi, te d̄iu-ni-gá dándòto-gá ñáyiu ní xíhí, te d̄iu-ni-gá quidé tá ngündecu nchaa sá vátá cùndècu-gá ñuyúú-a.

18 Te Yá Ndiòxí ní xáhaⁿ-gá xii ndíi Àbrahám sá ïo cuéhé dèhe ndíi coo, te ïo ní sándáá iní ndíi nàcuáa ní xáhaⁿ-gá dico ñá túú ní cùtnuní iní ndíi nasa cada-gá, chi ïo ní sahnu ndíi. Te cuendá sá dúcáⁿ ïo ní sándáá iní ndíi tnúhu ní xáhaⁿ-gá nũu xiãⁿ ní cuu ndíi d̄ihí d̄útú vai ñáyiu x̄ndecu ñihí ñuyúú. 19 Te ndíi Àbrahám ñũhu ndíi ñⁿ ciendú cuíá cùtnàhá ducaⁿ ní xáhaⁿ Yá Ndiòxí xii ndíi, te ní cutnùní iní ndíi sá ñà túú t̄ahú ndíi sá cóó dèhe ndíi ndihí ñad̄ihí ndíi ndíi Sárá, chi ndi ndúú-yu sa ní sahnu vihí-yu, te cuéi ducaⁿ dico ní sándáá-ni iní ndíi nàcuáa ní xáhaⁿ Yá Ndiòxí. 20 Te ñá túú ní s̄ani ñⁿ saní úú iní ndíi nàcuáa ní xáhaⁿ Yá Ndiòxí cada-gá sá cúú-xí ndíi, chi da uuⁿ-gá váha ní sándáá iní ndíi nàcuáa ní xáhaⁿ-gá, te ní cachí ndíi sá ïo càhnu cuu-gá. 21 Te ní cutnùní ndáá iní ndíi sá Yá Ndiòxí ndácú-gá quidé-gá nchaa sá càháⁿ-gá. 22 Te sá ni sándáá iní ndíi nàcuáa ní càháⁿ Yá Ndiòxí, núu xiãⁿ ní cachí-gá sá cúú ndíi ñⁿ tée ñá túú cuéchi-xi núú-gá.

23 Te ní ngódó tnùní núú t̄útú Yá Ndiòxí cuendá ndíi Àbrahám sá ní cachí-gá sá ñà túú cuéchi ndíi núú-gá, te ñá díú-ní cuendá méé ndíi ni ngódó tnùní núú t̄útú-gá. 24 Chi tnàhá cuendá-ó nchaa-ó ní ngódó tnùní núú t̄útú-gá. Te càchí-gá sá ñà túú cuéchi-o nũú-gá chi sándáá iní-ó-gá, te d̄iu-gá cúú-gá Yáá ní dándótó ñàha xii Xítohó Jesucristú Yáá cúú Xítohó-ó. 25 Te Yá Ndiòxí ní cachí-gá sá díú Xítohó Jesucristú cuú-gá cuendá nacháhu-gá nchaa cuéchi-o. Te ní xíhí-gá te ní ndoto-gá cuendá nchaa-ó v̄a cùndècu-gá cuéchi-o nũú Yá Ndiòxí te núu na quindáá iní-ó-gá.

5

Ío váha tnàhá ñáyiu càchí Yá Ndiòxí sá ñà túú cuéchi-xi

1 Te vitna, ñà túú-gá cuéchi-o ndècu núú Yá Ndiòxí chi sándáá iní-ó Xítohó Jesucristú, te ïo váha ndècu ndihí-o Yá Ndiòxí vitna sá cuendá Xítohó Jesucristú. 2 Te cuendá sá ni sándáá iní-ó Xítohó Jesucristú xiãⁿ d̄iu-gá ní quide ní ngündecu váha-o nũú Yá Ndiòxí, te ducaⁿ-ni cùndecu-o, te ïo cùd̄í iní-ó chi ndècu ndihí-o tnúhu ndee ñí sá s̄aa nduu ngündecu-o nũú ïo váha càa ndecu Yá Ndiòxí. 3 Te ñá díú-ní sá cuendá sá ndúú t̄ahú-ó cùndecu-o núú ndécú-gá cúdí ñí-ó, chi cùd̄í iní-ó ndòho-o cuendá-gá, chi cùtnuní iní-ó sá nũu na ndòho-o cuendá-gá te cunduu càhnu-gá iní-ó, 4 te núu cùu-o ñáyiu ta quide cahnu-gá iní-xi te cùtnuní sá cúú-ó ñáyiu quide váha, te núu cùu-o ñáyiu quide váha te uuⁿ-gá tá ngündecu ndihí-o tnúhu ndee ñí cuáháⁿ sá cáda váha ñaha Yá Ndiòxí xii-o. 5 Te núu ducaⁿ te vá ñⁿ nduu ndixi cuéchi iní-ó sá ndécú ndihí-o tnúhu ndee ñí ngündecu váha-o. Te Espíritú sá ní taxi Yá Ndiòxí ndécú ndihí-o xiãⁿ quidé-xi cùtnuní iní-ó sá ïo cùu iní ñàhá Yá Ndiòxí xii-o.

6 Te nchoo ñà túú v̄edana ná ní ndàcu-o cada-o cuendá d̄acácu ni-hnu-o mèe-o, dico Xítohó Jesucristú ní xíhí-gá cuendá-ó, ndihí cuendá nchaa dava-gá ñáyiu ñà túú tnàhá tnúhu ndihí Yá Ndiòxí, te ní xíhí-gá mei nduu taú-xi cuú-gá. 7 Te cud-ana-ni núu xihí ñⁿ ñáyiu sá cuendá ñⁿ ñáyiu quide ndáá, te áma xihí tucu ñⁿ-yu sá cuendá ñáyiu quide váha tnàhá ñáyiu-xi. 8 Te Yá Ndiòxí ní quide-gá sá nchoó cùtnuní iní-ó sá ïo cùu iní ñàhá-gá xii-o, chi cùtnàhá ndécú-ó ichi cuéhé ichi duha te ní tendaha-gá Xítohó Jesucristú ní quixi-gá ñuyúú-a ní xíhí-gá cuendá-ó. 9 Te sá cuendá sá ní xíhí Xítohó Jesucristú xiãⁿ ñà túú-gá cuéchi-o ndècu núú Yá Ndiòxí, te vitna ní cutnùní ndáá

iní-ó sǎ vǎ dáquihíⁿ ñáhá-gǎ Yǎ Ndiöxí xii-o núú ùhú núú ndàhú sá cuèndá Xítohó Jesucristú. ¹⁰ Te cútnàhá ñá túú tnàhá tnúhu-o ndíhi Yǎ Ndiöxí ní cùu ní xíhí Xítohó Jesucristú Yaa cúú Dèhe-gá cuèndá cuu váha iní ñáhá-gǎ xii-o, te ducaⁿ te nduu táhú-ó cùndecu-o ndíhi-gá ní caa ní quíhíⁿ cuèndá sá ní ndoto Xítohó Jesucristú. ¹¹ Te ndètu-o sáá nduu ngùndecu-o ndíhi-gá ní caa ní quíhíⁿ, te ñá díú-ní xǎⁿ quidé-ó chí tnàhá cúdíí iní-ó Yǎ Ndiöxí, chí Xítohó Jesucristú ní quide-gá ducaⁿ cùdíí iní-ó-gǎ, te díu-ni Xítohó Jesucristú ní quide-gá ní nucúndecu váha-o ndíhi Yǎ Ndiöxí.

Nàcuáa ní quide ndíi Àdán ndíhi nàcuáa ní quide Xítohó Jesucristú

¹² Te ndíi Àdán ñá túú ní quide ndáá ndíi núú Yǎ Ndiöxí núu xǎⁿ ní ngùndecu nchaa sá cuèhé sá dúhá ñuyíú-a, te sá cuèndá nchaa sá cuèhé sá dúhá quide ñáyiú xǎⁿ xihí-yu, te nchaá-yu xihí-yu chí nchaá-yu quidé-yu nchaa sá cuèhé sá dúhá. ¹³ Te sa quide-gá-yu nchaa sá cuèhé sá dúhá te dàtnùní ní ngùndecu nchaa tnúhu sá ní chídó tnùní ndíi Moisés nàcuáa ní xáhaⁿ Yǎ Ndiöxí cada ñáyiú, te nchoo cùtnuní iní-ó sǎ núu ñá túú tnúhu sá sánú ichi ñaha xii-o nacuáa cada-o, te ñá túú cuèchi-o sànuu. ¹⁴ Te ndéé cútnàhá ní xíndecu ndíi Àdán ní quesaha-xi xíhí ñáyiú, te ducaⁿ-ni xihí-yu ndéé ní sáá nduu ní xíndecu ndíi Moisés. Te ducaⁿ ní xihí-yu chí ní quidé-yu nchaa sá cuèhé sá dúhá cuèi ñá túú ní quidé-yu nàcuáa ní quide ndíi Àdán, chí ndíi-áⁿ ñà túú ní sàndáá iní ndíi nàcuáa ní xáhaⁿ Yǎ Ndiöxí cada ndíi. Te ndíi Àdán ní cuu ndíi ñⁿ téé cùu cahnu ní xíndecu ñuyíú-a, te sátá dúcáⁿ te ní quixi Xítohó Jesucristú te Yaa-áⁿ ïo-gá càhnu cuu-gá.

¹⁵ Te sá ní quide ndíi Àdán te vǎ càchí-ó sǎ ñⁿ-ní cùu-xi ndíhi sá ní cachí Yǎ Ndiöxí nduu táhú-ó vitna. Te sá ñà túú ní quide ndáá ndíi xǎⁿ

nchaa ñáyiú xihí-yu, dico Yǎ Ndiöxí ío váha iní-gá chí ío váha ní quide-gá sá cúú-xí nchaa nchoo ñáyiú ndècu ñuyíú-a, chí dicó ducaⁿ ní cachí-gá sá nánihí tàhú-ó, te ñⁿndíi-ni téé tnàhá-dé ío váha ní quide-dé sá cúú-xí-ó, te téé-áⁿ cúú-dé Xítohó Jesucristú. ¹⁶ Te sá ní quide ñⁿndíi-ni ndíi Àdán ñá túú ñⁿ-ni cùu-xi ndíhi sá ní quide Yǎ Ndiöxí sá cúú-xí-ó, chí ndíi-áⁿ ñà túú ní quide ndáá ndíi núú-gǎ. Te sá dúcáⁿ ní quide ndíi te xǎⁿ ní cuu-xi cuèchi díhna nuu ní quide ndíi, núu xǎⁿ ní cachí Yǎ Ndiöxí sá cuè ñáyiú quíhíⁿ-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gǎ ní quide sá cuè ñáyiú naníhí tàhú-yu dicó-ni ducaⁿ, te ducaⁿ te vǎ cùndècu-gá cuèchi-yu núú-gǎ cuèi ío vǎi cuèchi-yu. ¹⁷ Te sá dúcáⁿ ñà túú ní quide ndáá ñⁿndíi-ni ndíi Àdán-áⁿ núú Yǎ Ndiöxí, xǎⁿ ní quide-xi xihí nchaa ñáyiú. Te sá cuèndá sá ní quide ñⁿndíi-ni Xítohó Jesucristú xǎⁿ ío váha ní quide ñaha Yǎ Ndiöxí xii ñáyiú, chí dicó-ni ducaⁿ ní nduu táhú-yu cùdíú-yu núú-gǎ. Te nchaa ñáyiú ducaⁿ cùdíu núú-gǎ nduu táhú-yu cunúú-yu ndíhi Xítohó Jesucristú cuèndá sá ní quide-gá sá vǎha sá cúú-xí-yu.

¹⁸ Te sá dúcáⁿ ní quide ndíi Àdán ñá túú ní quide ndíi nàcuáa ní xáhaⁿ Yǎ Ndiöxí xii ndíi ñⁿ xito, núu xǎⁿ ní cachí-gá sá ncháá ñáyiú tàú-yu nacháhu-yu nchaa cuèchi-yu, dico Xítohó Jesucristú ní quide-gá ñⁿ sá vǎha cuèndá nchaa ñáyiú vǎ cùndècu-gá cuèchi-yu núú Yǎ Ndiöxí te núu na quíndáá iní ñáhǎ-yu xii-gá, te ducaⁿ te cundecú-yu ndíhi-gá ní caa ní quíhíⁿ. ¹⁹ Te sá ñà túú ní sàndáá iní ñⁿndíi-ni ndíi Àdán nàcuáa ní xáhaⁿ Yǎ Ndiöxí xii ndíi, xǎⁿ ní nguínchicúⁿ nihnu nchaa ñáyiú quidé-yu nchaa sá cuèhé sá dúhá. Te ducaⁿ ñⁿndíi-ni Xítohó Jesucristú ní quide-gá

nàcuáa ní xáhaⁿ Yá Ndiöxí cuëndá sá Yá Ndiöxí cachí-gá sá cúú-yu núú-gã.

²⁰ Te Yá Ndiöxí ní xáhaⁿ-gã xii ndíi Moisés nàcuáa cada ñáiyu, te sá cuëndá tnúhu-áⁿ uuⁿ-gá ní ngúíta nchaa ñáiyu quidé-yu nchaa sá cuèhé sá dúhá, te Yá Ndiöxí uuⁿ-gá cündàhú iní ñáhá-gã xii-yu tucu. ²¹ Te sá cuëndá nchaa cuéchi ñáiyu xiáⁿ xihí-yu, dico Yá Ndiöxí ío váha iní-gá chi ñu-gá ní cachí-gá sá ncháá ñáiyu na tnàhá tnúhu ndihí ñaha xii-gá cudú-yu núú-gã, te cundecú-yu ndihí-gá ní caa ní quíhíⁿ, te ducaⁿ chi Xítohá Jesucristú ní quide-gá sá váha sá cúú-xí-yu.

6

Ñáiyu ñá túú-gã ndécú ichi cuehé ichi duha ndécú-yu cuëndá Xítohá Jesucristú

¹ Te sá dúcáⁿ quide Yá Ndiöxí, te vá cáni iní-ó cànchicúⁿ nihnu-ni-ó ichi cuehé ichi duha, chi ñá díú sá cànchicúⁿ nihnu-o ìchi-áⁿ te ngóo càni iní-ó sá ío-gá cundàhú iní ñáhá-gã xii-o. ² Te vá cúú cànchicúⁿ nihnu-o ìchi cuehé ichi duha, chi nchoo cùu-o datná cue ñáiyu sa ní xihí, núu xiáⁿ vá cúú-gã canchicúⁿ nihnu-o ìchi-áⁿ. ³ Te sa nàha-o sá cuëndá sá ní sandute-o quèe-xi sá tnàhá tnúhu-o ndihí Xítohá Jesucristú. Te sá ní sandute-o quèe tucu-xi sá cúú-ó datná ñáiyu ní xihí ndihí-gá. ⁴ Te ñá díú-ní sá ní xihí-ó ndihí-gá chi quèe tucu-xi sá ní nguíndüxi-o ndihí-gá te ní ndoto-o datná ní ndoto mee-gã ní dándótó ñaha Dútú Ndiöxí Yaa ío càhnu cuu, te ducaⁿ ní cuu cuëndá sá vá cündecu-gá-ó datná ní xíndecu-o.

⁵ Te núu ñⁿ-ni cùu-o ndihí Xítohá Jesucristú cuëndá sá cúú-ó datná ñáiyu ní xihí ndihí-gá, te ndáá sá cúú-ó datná ñáiyu ní ndoto ní ngúndecu váha datná ní ndoto mee-gã ní nucúndecu váha-gá. ⁶ Te

nchoo nàha-o sá cúú-ó ñáiyu ío ndècu cuéchi-xi ní cùu, dico sátá ní cuu-o datná ñáiyu ní xihí datná ní xihí Xítohá Jesucristú núu cùrúxí, te ndéé dàvá-áⁿ ní dáñá-ó nchaa ichi cuehé ichi duha ndècu-o ní cuu, te ñá túú-gã cùnùu sá cuèhé sá dúhá iní-ó. ⁷ Chi nchaa ñáiyu ní xihí ñá túú-gã ndécú-yu ichi cuehé ichi duha. ⁸ Te núu cùu-o datná ñáiyu ní xihí datná ní xihí Xítohá Jesucristú ñá, te cùtnuní ndáá iní-ó sá cündecu-o ndihí-gá ní caa ní quíhíⁿ. ⁹ Te sa nàha-o sá Xítohá Jesucristú ní xihí-gá te ní ndoto-gá te vá ñⁿ ndùu ñⁿ quíú-gã te cuú-gá, chi ñá túú nãgá sá cáda cùú-gá. ¹⁰ Te Xítohá Jesucristú ní xihí-gá ñⁿ xito-ní sá cuëndá nchaa cuéchi nchoo ñáiyu ñuyíú, te vá ñⁿ ndùu-gá cuú-gá, te ndècu-ni-gá sá cúú-xí Yá Ndiöxí. ¹¹ Núu xiáⁿ nchòhó cada iní-ndó sá datná sá ní xihí-ndó vá cündecu-gá-ndó sá cúú-xí ìchi cuehé ichi duha, chi ndècu-ná-ndó sá cúú-xí Yá Ndiöxí, chi ní tnàhá tnúhu-ndo ndihí Xítohá Jesucristú Yaa cúú Xítohá-ó.

¹² Te núu xiáⁿ vá dáñá-gã-ndó cùnùu ní ñⁿ sá cuèhé sá dúhá iní-ndó cuëndá sá vá cáda-gã-ndó ní ñⁿ sá cuèhé sá dúhá sàni iní-ndó. ¹³ Te vá dáñá-ndó tàxi tñuní ñáhá ní ñⁿ sá cuèhé sá dúhá-áⁿ xii-ndo cuëndá sá vá cáda-gã-ndó, te chí dáñá ná tàxi tñuní ñáhá Yá Ndiöxí xii-ndo, te chí dáñá ná chindee ñaha-gá cada-ndo mèe-ní sá váha, te ducaⁿ te cada iní-ndó sá cúú-ndó datná ñáiyu ní xihí te ní ndoto ndècu. ¹⁴ Te ducaⁿ càda-ndo chi vá ndácú-gã ní ñⁿ sá cuèhé sá dúhá tàxi tñuní ñáhá-xi xii-ndo, chi Yá Ndiöxí cündàhú iní ñáhá-gá chindee ñaha-gá xii-ndo. Te ducaⁿ chi ñá túú-gã cùnùu nchaa tnúhu sá ní chídó tñuní ndíi Moisés cada ñáiyu.

Ñáiyu nchicúⁿ nihnu sá váha

¹⁵ Te ñá díú sá cündàhú iní ñáhá Yá Ndiöxí xii-o chindee ñaha-gá ndihí sá ñá túú-gã cùnùu nchaa tnúhu ní chídó tñuní ndíi Moisés,

te cachí-ó sã cúu-ní cùndecu-o ichi cuehé ichi duha. ¹⁶ Te nchoo xini-ó sã núu na cuãha-o tnũhu cunu cuechi-o núú ìⁿ ñáyiú cuini cunu cuechi-o núú-xi, te cùu-ná-ó ñáyiú xinu cuechi núú-yu te quide-o nchaa chiuⁿ tahu-yu. Te ducaⁿ sãtnahá-xi cùu nchaa ñáyiú quide nchaa sã cuehé sã dúhá chí tàxi tnuni ñáhá-ná-xi xii-yu, te ñu nchaa xiãⁿ dácũta nihnu ñaha-xi xii-yu, te ñu-ni ducaⁿ sãtnahá-xi cùu nchaa ñáyiú sãndáá ini ñáhá xii Yá Ndiõxí chí tàxi tnuni ñáhá-gã xii-yu, te quidé-yu nchaa sã vãha nãcuáa cuini mée-gã cada-yu. ¹⁷ Te nchõhõ ducaⁿ ni xõo cada-ndo nchaa sã cuehé sã dúhá ní cùu, dico táxãhu xii Yá Ndiõxí chí vitna ni yũhu ni ini-ndó quide-ndo nchaa nacuaá càháⁿ tnũhu-gã sã ni ngũndecu ndihi-ndo. ¹⁸ Te vitna ñã túú-gã táxi tnuni ñáhá ni ìⁿ sã cuehé sã dúhá xii-ndo, te quide-ná-ndó nchaa sã vãha tãuchiúⁿ Yá Ndiõxí cada-ndo. ¹⁹ Te duha càháⁿ-í cuendá cue ñáyiú xinu cuechi cuendá sã nchõhõ tecú tnuni-ndó nãcuáa ndũu tnũhu càháⁿ-í. Te nchõhõ ní dãñá-ndó ní taxi tnuni ñáhá nchaa sã cuehé sã dúhá xii-ndo, te ñã túú ní quide-ndo nacuaá ní càháⁿ Yá Ndiõxí cada-ndo chí da vihi-gã ní quide-ndo, te ñu-ni ducaⁿ chí dãñá ná tàxi tnuni ñáhá Yá Ndiõxí xii-ndo vitna cuendá cada-ndo mée-ni sã vãha nãcuáa cuini mée-gã cada-ndo, te ducaⁿ te cuu-ndo ñáyiú quide ndáá cundecu núú-gã.

²⁰ Te nchoo cũtnahá ní xõo cada-ndo nchaa sã cuehé sã dúhá ñã túú ní xõo cada-ndo ni ìⁿ sã vãha cuini Yá Ndiõxí cada-ndo. ²¹ Te dicó sácãⁿ núú sãñaha nchaa sã cuehé sã dúhá-ãⁿ te núu na càda-o, te ni ìⁿ sã vãha vá nihí-ó te núu na càda-o nchaa xiãⁿ, te ñu nchaa xiãⁿ dácũta nihnu ñaha-xi xii-o. ²² Te vitna ñã túú-gã cúú-ó ñáyiú ndècu ichi cuehé ichi duha, chí cùu-ná-ó ñáyiú quide nchaa nacuaá càháⁿ Yá Ndiõxí. Te sã dúhá quide-o cuu ndisa-xi ìⁿ sã vãha sã cúú-xí-ó, te cùu-o ñáyiú

quide ndáá ndécú-ó núú-gã vitna, te sãá nduu cùndecu-o ndihi-gã ni caa ni quihíⁿ. ²³ Te nchaa sã cuehé sã dúhá dicó dácũta nihnu ñaha-xi xii-o, dico Yá Ndiõxí ní quide-gã sã dicó-ni ducaⁿ ndũu táhú-ó cùndecu-o ndihi-gã ni caa ni quihíⁿ, chí ní tnahá tnũhu-o ndihi Xitohó Jesucristú Yáá cúú Xitohó-ó.

7

Cuendá ñáyiú tnãndaha

¹ Te nchaa nchõhõ ñáyiú ndècu ndihi-í ichi Xitohó Jesucristú sa nãha-ndo nacuaá càháⁿ tnũhu sã dãnehé ñáhá xii-o nacuaá cada-ndo cùndecu-o, chí tnũhu-ãⁿ càháⁿ-xi dóho nchaa ñáyiú xĩndecu vĩvú ñuyiú-a. ² Te nchaa ñáyiú ñã ní sa ndècu yĩ-xi, te ñu tnũhu-ãⁿ dãnehé ñáhá-xi xii-yu sã vã dãñã-yu yĩ-yu, dico núu na cùú yĩ-yu te ñã túú-gã ná càháⁿ tnũhu-ãⁿ cuendá-yu. ³ Dico núu vátá cùú-gã yĩ-yu te ñã túú ndũu vãha-xi naquehéⁿ-yu ingá téé, dico núu na cùú yĩ-yu te quendõo mée-yu, te ñã túú nãgã càháⁿ tnũhu sã dãnehé ñáhá xii-yu nacuaá cada-yu te ducaⁿ te cuu naquehéⁿ-yu ingá téé, te ñã túú cùu-xi ìⁿ cuechi.

⁴ Te nchõhõ cue ñáyiú ndècu ndihi-í ichi Xitohó Jesucristú cúú-ndó dãtná ñáyiú ní xihí dãtná ní xihí-gã. Te xiãⁿ ñã túú-gã táxi tnuni ñáhá nchaa tnũhu ní chído tnuni ndii Moisés xii-ndo. Te ducaⁿ ni cuu cuendá nchõhõ ngũndecu-ndo ndihi Xitohó Jesucristú Yáá ní xihí ní cùu te ní ndoto-gã. Te ducaⁿ ni cuu cuendá nchaa nchoo ñáyiú ndècu ichi-gã cada-ndo nchaa nacuaá càháⁿ Yá Ndiõxí. ⁵ Te nchoo ni xĩndecu-o ichi cuehé ichi duha, te tnũhu sã sãnú ichi ñaha xii-o nacuaá cada-ndo cùndecu-o cachí-xi sã ñã túú vãha cundecu-o ichi-ãⁿ, te nchoo dã uuⁿ-gã ní quide-o nchaa sã cuehé sã dúhá sã dúcãⁿ càháⁿ tnũhu-ãⁿ, te sã dúcãⁿ ní quide-o te ta xita

nihnu-o cuáháⁿ ní cùu. ⁶ Te vitna cada iní-ó sá cúú-ó datná ñáyiú ní xíhí sá cúú-xí tñuhu sá dánèhé ñáhá xii-o nacuáa cada-o cùndecu-o, chí ñá túú-gã cùnùu-xí, te vitna mee-nã Espiritú Yã Ndiõxí chindèe ñaha-xi xii-o xinu cuechi-o núú-gã, te ñá díú cuèndá nchaa tñuhu sá ní ngúndéé ndéé díhna cada ñáyiú xinu cuechi-o núú-gã vitna.

Nchaa sá cuèhé sá dúhá ñuhu iní-í

⁷ Te cuèj duhá càháⁿ-í dico vá cúú tñahí càháⁿ-ó sá tñuhu sá sánú ichi ñaha xii-o nacuáa cada-o cùndecu-o ñá díú tñuhu váha cùu-xi. Te yúhú ñá túú cùtnuní iní-í ná cúú nchaa sá cuèhé sá dúhá ní cùu te núu ñá túú tñuhu-áⁿ ní càchí tñuhu-xi xii-í, te ní ñá túú cùtnuní tucu iní-í núu váha àdi ñá túú váha sá nchídó ìní-í sá ndécú ndíhi tñaha ñáyiú-o ní cùu te núu ñá túú tñuhu-áⁿ ní càchí-xi sá vã cúú cùu iní-í sá ndécú ndíhi-yu. ⁸ Te tñuhu-áⁿ ní dánèhé ñáhá-xí xii-í sá vã cúú càda-í ní ìⁿ sá cuèhé sá dúhá, dico sá cuèndá tñuhu-áⁿ uuⁿ-gã ducaⁿ ní sani iní-í ní quide-í. Te núu ñá túú tñuhu sá sánú ichi ñaha xii-o nacuáa cada-o cùndecu-o ña, te ñá túú cùtnuní iní-í sá quidè-í nándi sá cuèhé sá dúhá ní cùu. ⁹ Te cùnàhá vátá nihí-gá-í tñuhu-áⁿ te ñá túú tñahí ná sání ìní-í ndécú-í ní cùu, dico sátá ní nihí-í tñuhu-áⁿ te ní cutnùní iní-í sá ndécú cuèchi-í, te ta xíta nihnu-í cuáháⁿ ní cùu. ¹⁰ Te núu ní quide-í nchaa nacuáa càháⁿ tñuhu-áⁿ te sa ndéé ama-gã naníhí tãhú-í ní cùu, dico ñá túú ní quide-í núu ní cutnùní iní-í sá tá xíta nihnu-í cuáháⁿ ní cùu. ¹¹ Te sá xíí tñuhu-áⁿ xiáⁿ uuⁿ-gã ní cunuu nchaa sá cuèhé sá dúhá ní dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáháⁿ ní cùu.

¹² Te tñuhu sá sánú ichi ñaha xii-o nacuáa cada-o cùndecu-o cuu-xí tñuhu ío yíñuhu ní taxi Yã Ndiõxí, te ìⁿ ìⁿ tñuhu-áⁿ cúú-xí mèe-ni tñuhu váha, te ní ìⁿ tñuhu cuèhé tñuhu duhá ñá túú ñuhu tñahá. ¹³ Te vá cúú càchí-í sá tñuhu váha-áⁿ ní quide-xi ta xíta nihnu-í cuáháⁿ ní

cùu, chí nchaa sá cuèhé sá dúhá ní quide-í, xiáⁿ tá dàcuíta nihnu ñaha-xi xii-í cuáháⁿ ní cùu, te sá cuèndá tñuhu váha-áⁿ ní cutnùní iní-í sá quidè-í nchaa sá cuèhé sá dúhá, te xiáⁿ tá xíta nihnu-í cuáháⁿ ní cùu. Te sá cuèndá nchaa nacuáa càháⁿ tñuhu sá sánú ichi ñaha xii-o nacuáa cada-o cùndecu-o ní cutnùní iní-í sá xidó ndécú cuèchi-í ní cùu.

¹⁴ Te tñuhu-áⁿ ní taxi Espiritú

Yã Ndiõxí ndécú ndíhi-o cachí tñuhu-xi nacuáa cada váha-o. Te nchoo cùu-o mee-ni ñáyiú yíca cuèchi, te tàxi tñuni ñáhá nchaa sá cuèhé sá dúhá xii-o ní cùu. ¹⁵ Dico nchoo tñahá iní-ó càda-o nchaa sá váha dico ñá túú quide-o, te da nchaa sá ñá túú tñahá iní-ó càda-o quide-o, te ñá túú cùtnuní iní-ó ná cuèndá ducaⁿ quide-o. ¹⁶ Te sá dúcáⁿ quide-o nchaa sá ñá túú tñahá iní-ó, te xiáⁿ ndíxí tñu iní-ó sá tñuhu sá dúcáⁿ sànu ichi ñaha xii-o nacuáa cada-o cùndecu-o cuu-xí tñuhu ío váha. ¹⁷ Te cùtnuní iní-ó sá nchaa sá cuèhé sá dúhá ñuhu iní-ó, xiáⁿ quidè-xí dùcaⁿ quide-o sá ñá túú váha, te ñá díú sá cáhú ìní mèe-ó dùcaⁿ quide-o. ¹⁸ Te cùu-o cue ñáyiú sàni cuehé sání dùha iní-xi, te cùní-ó càda-o nchaa sá váha dico ñá túú nihí ndéé-ó càda-o. ¹⁹ Te cùní-ó càda-o nchaa sá váha dico ñá ndácú-ó, te ñá túú cùní-ó càda-o datná quidè nchaa ñáyiú ndécú ichi cuehé ichi duhá, chí ñáyiú-áⁿ mee-ni nchaa sá cuèhé sá dúhá quidè-yu, dico díu-ni nchaa xiáⁿ quidè-ó tñahá-ó. ²⁰ Te sá dúcáⁿ quide-o nchaa sá ñá túú tñahá iní-ó càda-o te ñá díú mèe-o ducaⁿ cahu iní-ó quide-o, chí nchaa sá cuèhé sá dúhá ñuhu iní-ó xiáⁿ quidè-xí dùcaⁿ quide-o.

²¹ Te ducaⁿ tñahí yáha-o òré cùní-ó càda-o sá váha, chí da mee-ni nchaa sá cuèhé sá dúhá quide-o. ²² Te ío cùdíí ìní-ó càda-o nchaa nacuáa càháⁿ Yã Ndiõxí, ²³ te dicó-ni sá ncháá sá cuèhé sá dúhá ñuhu iní-ó, xiáⁿ quidè-xí ngani ñaha-xi xii-o ñá túú quide-o sá váha sàni iní-ó càda-o, te ducaⁿ yáha-o chí

nchaa sá cuèhé sá dúhá-ǎⁿ cúnùu-xi taxi tñuní ñáhá-xí xii-o.

²⁴ ¡Te ndàhú ní cuu nchoo! Chi vá yoo ìⁿ ni ndàcu cada nacuaá vá táxi tñuní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáháⁿ ní cùu. ²⁵ Te táxáhu xii Yá Ndióxi sá Xitohó Jesucristú ní quide-gá cuendá sá vá táxi tñuní ñáhá-gǎ ni ìⁿ sá cuèhé sá dúhá xii-o, sá tá dàcuíta nihnu ñaha xii-o cuáháⁿ ní cùu. Te mee-o sàni iní-ó cada-o nchaa nacuaá càháⁿ Yá Ndióxi, dico núu nchaa sá cuèhé sá dúhá ná cúnùu-xi taxi tñuní ñáhá-xí xii-o, te ñi-u-ni nchaa xiǎⁿ cada-o.

8

*Ñáyiu quide nchaa nacuaá càháⁿ
Espíritu Yá Ndióxi*

¹ Te vitna nchaa nchoo ñáyiu tñàhà tñúhu ndihi Xitohó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ìchi duha, chi mee-nǎ nchaa nàcuáa càháⁿ Espiritú Yá Ndióxi quidé-ó. ² Te Espiritú Yá Ndióxi-ǎⁿ táxi tñuní ñáhá-xí xii-o, te ducaⁿ chi ndècu ndihi-o Xitohó Jesucristú, te sá dúcáⁿ tàxi tñuní ñáhá Espiritú-gá xii-o núu xiǎⁿ ñá túú-gǎ táxi tñuní ñáhá ni ìⁿ-gǎ sá cuèhé sá dúhá xii-o, te ducaⁿ quide Espiritú-gá cuendá sá vá cuíta nihnu-o, te ñi-u-ni Espiritú-gá quidé-xí cuendá sá nchóó ndècu táhú-ó cùndecu-o ndihi-gǎ ni caa ni quíhíⁿ. ³ Te nchoo ñá ní ndàcu-o cada-o nchaa nacuaá càháⁿ tñúhu sá sánú ìchi ñaha xii-o nacuaá cada-o cùndecu-o, núu xiǎⁿ tñúhu-ǎⁿ ñá túú ní ñihí ndéé-xí càda-xi cuendá sá nchóó vá cuíta nihnu-o. Dico Yá Ndióxi ní tendaha-gǎ Déhe mee-gǎ ní quixi ñuyúú-a, te Yaá-ǎⁿ cúú-gǎ ìⁿ ñáyiu, te càa-gǎ dàtná cáá ñáyiu ndècu cuéchi-xi xíndecu ñuyúú-a, te sá cuendá nchaa cuéchi nchaa nchoo ñáyiu xíndecu ñuyúú-a ní quixi-gǎ, te ndéé dàvá-ǎⁿ ní quide-gǎ cuendá sá vá táxi tñuní ñáhá-gǎ ni ìⁿ sá cuèhé sá dúhá xii-o. ⁴ Te ducaⁿ ní quide-gǎ cuendá nchoo nchìcúⁿ nihnu-o

quide-o nacuaá càháⁿ tñúhu sá sánú ìchi ñaha xii-o nacuaá cada-o, chi ñá túú-gǎ cúnùu ni ìⁿ sá cuèhé sá dúhá iní-ó, chi Espiritú Yá Ndióxi-nǎ táxi tñuní ñáhá-xí xii-o.

⁵ Te nchaa ñáyiu cúnùu nchaa sá cuèhé sá dúhá iní-xi mee-ni xiǎⁿ ñúhú iní-yu te quidé-yu. Dico nchoo ñáyiu quide nchaa nacuaá cuiní Espiritú Yá Ndióxi ñúhú iní-ó mèe-ni nacuaá càháⁿ Espiritú-gá-ǎⁿ te quide-o. ⁶ Te núu mee-ni nchaa sá cuèhé sá dúhá cúnùu iní-ó, te cuíta nihnu-o, dico núu mee-ni nchaa tñúhu càháⁿ Espiritú Yá Ndióxi cúnùu iní-ó, te ío váha cuu iní-ó cùndecu-o ndihi-gǎ ni caa ni quíhíⁿ.

⁷ Te nchaa ñáyiu ñúhu iní mee-ni sá cuèhé sá dúhá cùu úhú iní-yu Yá Ndióxi, te ñá túú cuiní-yu cadá-yu nàcuáa càháⁿ-gǎ, te ni ñǎ ndácú-yu cadá-yu. ⁸ Te nchaa ñáyiu ducaⁿ cúnùu nchaa sá cuèhé sá dúhá iní-xi-ǎⁿ ñá túú cùdiu-yu núu Yá Ndióxi.

⁹ Te nchòhó chi ñá túú-gǎ cúnùu sá cuèhé sá dúhá iní-ndó, chi mee-nǎ nàcuáa càháⁿ Espiritú Yá Ndióxi quidé-ndó, te ducaⁿ quide-ndo chi ndècu ndihi-ndo Espiritú-gǎ, te ñi-u-ni Espiritú-gá-ǎⁿ ní tendaha Xitohó Jesucristú véxi ndècu ndihi-o, te nchaa ñáyiu ñá túú ndècu ndihi Espiritú sá ní tendaha Xitohó Jesucristú véxi ndècu ndihi-o ñá túú ndècu ndihi ñáhá-yu xii-gǎ. ¹⁰ Te núu ndècu ndihi-ndo Xitohó Jesucristú, te cuéi na cùu yiqui cùñú-ndó sá cuendá nchaa sá cuèhé sá dúhá ío ñuyúú-a, dico iní-ndó chi cùndecu ndihi-xi Yá Ndióxi chi ñá túú-gǎ cuéchi-ndo ndècu núú-gǎ. ¹¹ Te núu ndècu ndihi-ndo Espiritú Yá Ndióxi Yaá ní dándótó ñaha xii Xitohó Jesucristú, te ñi-u-ni-gǎ cada te ndoto yiqui cùñú-ndó sá tá xita nihnu cuáháⁿ núu na cúú-xi, te ducaⁿ chi ndècu ndihi-ndo Espiritú-gǎ.

¹² Te nchòhó ñáyiu ndècu ndihi-í ìchi Xitohó Jesucristú, ñá túú-gǎ tàú-ndó cúnùu ni ìⁿ sá

cuèhé sá dúhá iní-ndó nàcuáa vá cùndècu-gá-ndó ichi cuehé ichi duha. ¹³ Chi núu na cùnuu sá cuèhé sá dúhá iní-ndó te cuíta nihnu-ndo, chi quíhíⁿ-ndó núú ùhú núú ndàhú. Dico núu daña-ndo mèe-ndo chindee ñaha Espiritú Yá Ndióxi xii-ndo cuendá sá vá cùnuu-gá sá cuèhé sá dúhá iní-ndó ñá, te nduu táhú-ndó cùndècu-ndo ndíhi-gá ni caa ni quíhíⁿ te núu ducaⁿ na càda-ndo.

¹⁴ Chi nchaa ñáyiú quide nchaa nacuaa sànu ichi ñaha Espiritú Yá Ndióxi cúu-yu déhe-gá. ¹⁵ Te Espiritú sá ní taxi Yá Ndióxi ndécú ndíhi-o ñá túú quide-xi sá nchóó yùhú-ó cùnú cuechi-o núú-gá, chi Espiritú-áⁿ quidé-xí sá nchóó cùu-o déhe-gá, te ñu-ni Espiritú-áⁿ quidé xáhaⁿ-o xii Yá Ndióxi: “¡Yòhó Dútú Ndióxi cúu-n Tátá méé-ndí!” duha xáhaⁿ-o xii-gá. ¹⁶ Te ñu-ni Espiritú-gá-áⁿ tnahá tñuhu-xi ndíhi iní-ó, te càháⁿ ndáá-xi sá nchóó cùu-o déhe-gá. ¹⁷ Te sá dúcáⁿ cùu-o déhe Yá Ndióxi xiáⁿ ní cachí-gá sá tnahá-ó nduu táhú-ó sá ní nduu táhú Xítóhó Jesucristú, te ducaⁿ nduu táhú-ó te núu na càda ndee iní-ó ndòho-o datná ní ndòho Xítóhó Jesucristú, te núu ducaⁿ te ío cuu càhnu-o ndíhi-gá ni caa ni quíhíⁿ.

¹⁸ Te yùhú càchí-í sá ñà túú nà cada-xi cuèi ndòho-o cuendá-gá ndécú-ó ñuyúú-a, chi ío váha càa núú ndúú táhú-ó cùndècu-o na saá nduu. ¹⁹ Te nchaandi túhú sá ní cadúha Yá Ndióxi ní taxi ndècu-gá ñuyúú-a ndètu cahnu-ná-xi sáá nduu càchí-gá sá ío càhnu cuu nchaa déhe-gá. ²⁰ Te nchaa sá ní cadúha Yá Ndióxi ní taxi ndècu-gá ñuyúú-a ní sáá nduu ñà túú-gá cúu-xí sá vâha sá cúu-xí-gá. Te ñá díú mèe sá ní taxi ndècu Yá Ndióxi ñuyúú-a ducaⁿ ní sàni iní-xi cunduu, chi mee-gá ducaⁿ tnahí ní cachí-gá cunduu sá sáá nduu vá cúu-xí sá vâha sá cúu-xí-gá, dico sáá tucu nduu te nchaa xiáⁿ cuu

tucu-xi sá vâha sá cúu-xí-gá. ²¹ Te nchaa sá ní taxi ndècu-gá ñuyúú-a vá cùnduu-gá-xi datná cáá-xí vitna te ni vá dánàa-gá, chi nduu saa-xi te ngúndècu váha-xi datná ngúndècu váha nchaa cue déhe-gá. ²² Te nàha-o sá ncháandi túhú sá nchító ní cadúha Yá Ndióxi ndécú ñuyúú-a ndòho-xi vitna datná ndóhó ñⁿ ñadihí sa ní tnahá òré cacu déhe-xi. ²³ Te ñá díú-ní nchaa sá dúcáⁿ ní cadúha-gá-áⁿ ducaⁿ ndòho-xi, chi tnahá nchoo dúcáⁿ ndòho-o ndècu-o ñuyúú-a tucu, te nchoo sá ní nduu táhú-ó Espiritú Yá Ndióxi Espiritú sá ní cachí méé-gá nduu táhú-ó dñhanuu. Te ío ndòho tnahá-ó ndècu-o ñuyúú-a te ndètu cahnu-ná-ó sáá nduu ndàda saa-gá yiqui cùú-ó, te càháⁿ-gá sá cúu-ó déhe-gá. ²⁴ Te Yá Ndióxi ní quide-gá ní naníhí táhú-ó núu xiáⁿ ní ngúndècu ndíhi-o tñuhu ndee iní ndétú-ó sáá nduu càda-gá nàcuáa ní cachí-gá, te núu sa ndècu ndíhi-o sá ndúú táhú-ó te vá cúú càháⁿ-ó sá cùndètu-o sá ndúú táhú-ó chi sa ndècu ndíhi-o. ²⁵ Dico sá ndétú-ó nduu táhú-ó cùu-xi sá vâta cùndècu ndíhi-gá-ó, te xini ñuhu-ni-xi cada ndee-ni iní-ó cùndètu-o ndéé sáá nduu nduu táhú-ó sá dúcáⁿ ní cachí Yá Ndióxi nduu táhú-ó.

²⁶ Te Espiritú-gá chindee ñaha-xi xii-o nacuaa níhí ndéé-ó cùndècu-o, te nchoo ñà túú xini-ó càháⁿ ndíhi-o Yá Ndióxi nàcuáa tàú-xi cunduu dico Espiritú-gá càháⁿ ndàhú-xi núú-gá cuendá-ó cuèi òré ñá nihí-ó tñuhu càháⁿ-ó cuendá nchaa sá ío cuini-ó càcáⁿ-ó núú-gá. ²⁷ Te Yá Ndióxi sa nàha ndáá-gá nchaa nàcuáa sàni iní-ó, te ducaⁿ sá nàha ndáá-gá nchaa nàcuáa sàni iní Espiritú-gá. Te Espiritú-gá càháⁿ ndàhú-xi núú-gá cuendá nchoo ñáyiú yindahá-gá, te càháⁿ ndàhú-xi núú-gá nàcuáa cuini méé-gá cunduu.

Nchaa sá ná càda ñaha ñáyiú te vá ndácú-yu nadatùhú-yu iní-ó chi

ndacu nahi-ni-o yãha-o nchàa sá ná cáda ñàhá-yu

²⁸ Te sa ñaha-o sá Yã Ndiõxí quidé-gã sá ncháá sã yãha-o ndècu-o ñuyíú-a cùu-xi sá vãha sá cúú-xí nchòo cue ñáyíu cùu iní ñáhá xii-gã, chi cùu-o ñáyíu ní cáháⁿ-gã cundecu ndihí-gã dàtná ní cachí iní mée-gã. ²⁹ Te ndée cùtnàhá vátá ngãva-gã ñuyíú, te Yã Ndiõxí sa ñaha-gã nándi cùu ñáyíu cundecu ndihí-gã, te ñu-ni ndée dàvá-áⁿ ní cachí-gã sá ñáyíu-áⁿ cunduu váha iní-yu dàtná váha iní Déhe mee-gã, te ducaⁿ ní cachí-gã cuendá sá Déhe mee-gã-áⁿ cunuu-gã núu nchàa ñáyíu cundecu ndihí-gã. ³⁰ Te nchaa ñáyíu ducaⁿ ní cachí-gã cundecu ndihí-gã ndée cùtnàhá vátá ngãva-gã ñuyíú cáháⁿ ñáhá-gã xii-yu vitna, te nchaa ñáyíu ducaⁿ cáháⁿ-gã càchí-gã sá ñà túú-gã cuéchi-yu ndècu núú-gã, te ñu-ni ñáyíu-áⁿ cachí-gã sá ïo càhnu cuú-yu.

³¹ Te vitna ní cutnùni iní-ó, te ñà túú nãgã caní iní-ó, chi Yã Ndiõxí ndécú ndihí ñaha-gã xii-o, te vá yõo ñⁿ-gã ndacu quehndé nihnu cuendá sá vã chindèe ñaha-gã xii-o. ³² Te Yã Ndiõxí ñà túú ní cùdí iní-gã Déhe-gã sá cúú-gã cuendá nchaa nchoo ñáyíu xindecu ñuyíú-a, te sá dúcáⁿ ndée Déhe-gã ñà túú ní cùdí iní-gã xíãⁿ cùtnùni iní-ó sã táxí-gã nchaandi túhú sá xíní ñùhu-o. ³³ Te vá yõo ñⁿ ndacu cacáⁿ cuéchi núú Yã Ndiõxí cuendá nchaa ñáyíu ní cachí-gã cundecu ndihí-gã te núu ná cúú cuéchi-yu ndècu. Chi mee-gã càchí-gã sá ñà túú ndècu cuéchi-yu núú-gã. ³⁴ Te vá yõo ñⁿ ndacu daquihíⁿ ñáhá xii-o núú ùhú núú ndàhú, chi Xítohó Jesucristú ní xíhí-gã te ní ndoto-gã, te cuánda-gã núú ndécú Dütú Ndiõxí núcõo-gã xio cùha-gã, te ducaⁿ ïo cunuu-gã, te yàcáⁿ cáháⁿ ndàhú-gã núú Dütú Ndiõxí cuendá-ó. ³⁵ Te vá yõo ñⁿ ndacu cada ñaha xii-o ñⁿ sá ñà túú vãha cuendá sá vã cúú

iní ñáhá-gã Xítohó Jesucristú xii-o, te ni tnúndòho tnúhu ndàhú, te ni sá ndihú iní-ó ñã cùtnùni iní-ó ñasa cada-o càcu nihnu-o ñⁿ sá ná yãha-o, te ni nchàa sá cáda ñaha ñáyíu sá cuendá-gã, te cuéi-ni sá vã ñihí-ó sá cóhó sá cáxí-ó, te cuéi-ni sá vã ñihí-ó dõó cuihnu-o, te cuéi ndècu-ná-ó sá yãha-o ñⁿ sá yãha-o, te cuéi sa ndècu-ná-ó sá cáhni ñáhá-yu, dico Xítohó Jesucristú vá dáñá ndée-gã sá cúú iní ñáhá-gã xii-o. ³⁶ Te quee ndáá-xi ñacuáa ní cáháⁿ ñⁿ téé ní xóo cáháⁿ tnúhu Yã Ndiõxí ndée sanaha ní ngódó tnùni núú tütú-gã núú càchí-xi:

Yòhó Dütú Ndiõxí nchaa-ni nduu nchaa-ni òré cùni ñáyíu cahni ñáhá-yu xii-ndí sá cuendá-n,

te càchí-yu sá cúú-ndí dàtná cue mbée cue quití sa ndècu túha-ná cahni-yu.

Duha ní cachí téé ní xóo cáháⁿ tnúhu-gã-áⁿ, te ducaⁿ ní ngódó tnùni núú tütú-gã. ³⁷ Te cuéi ducaⁿ nándi sá ná càda ñáhá-yu xii-o, dico vá ndácú-yu nadatùhú-yu iní-ó chi ndacu nahi-ni-o yãha-o nchàa sá dúcáⁿ ná càda ñáhá-yu xii-o, te ducaⁿ chi Xítohó Jesucristú Yaá ïo cùu iní ñáhá xii-o ndecu ndihí ñaha-gã chindèe ñaha-gã. ³⁸⁻³⁹ Te yúhú cùtnùni ndáá iní-í sá ñⁿ sá ïó ñuyíú-a vá ndácú-xí càda-xi cuendá sá vã cúú iní ñáhá-gã Yã Ndiõxí xii-o, te ni sá cúú-ó, te ni sá cùndècu-o ñuyíú-a, te ni ñⁿ espíritú sá ïo cunuu cundihí yucu ñávãha te ni ñⁿ dava-gã cue espíritú cùndihí-xi vá ndácú-xí càda-xi cuendá sá vã cúú iní ñáhá Yã Ndiõxí xii-o. Te ni sá cúú ñuyíú-a vitna, te ni sá cúú ndée cuée-gã, te ni ñⁿ sá ndécú àndíu, te ni ñⁿ sá ndécú ñuyíú-a, te ni ñⁿ sá ní cadúha mee Yã Ndiõxí, ni ñⁿ xíãⁿ vá ndácú-xí càda-xi cuendá sá vã cúú iní ñáhá-gã xii-o chi ndècu ndihí-o Xítohó Jesucristú Yaá cúú Xítohó-ó.

9

*Yá Ndiöxí ní cachí-gá sá ñáyiú is-
ràél cuú-yu ñáyiú canchicúⁿ nihnu
ñaha xii-gá*

¹ Te yúhú càháⁿ ndáá-í chi cùu-í ìⁿ tée ndècu ndihì Xítóhó Jesucristú, te ndècu ndihì-í Espíritú Yá Ndiöxí nùu xiáⁿ cùtnùnì iní-í sá càháⁿ ndáá-í. ² Te nchaa-ni nduu nchaa-ni òré ío ndìhú iní-í, te ducaⁿ-ni ío quide úhú-xi iní-í ³ sá cuendá nchaa ñáyiú cùu ndi mee-í. Te núu dícó cúu-xí ìⁿ sá chindèe ñaha xii-yu nucúndecu váha-yu núu Yá Ndiöxí ñá, te dàña-í meé-í dācuíta nihnu ñaha Xítóhó Jesucristú núu dícó sá cúu. ⁴ Te nchaa ñáyiú cùu ndi mee-í-áⁿ cúu-yu ñáyiú isràél, te Yá Ndiöxí ní cachí-gá sá cúu-yu déhe-gá, te ní quide-gá nācuáa ní cutnùnì iní-yu sá ío càhnu cuu-gá, te ní càháⁿ ndáá-gá núu-yu nācuáa cada ñaha-gã xii-yu, te ní xáhaⁿ-gã xii ndii Moisés ní chídó tñunì ndii nācuáa cada-yu cundecú-yu. Te ní xáhaⁿ-gã xii-yu nācuáa cada-yu cada càhnu ñahá-yu xii-gá, te ní xáhaⁿ tūcu-gá xii-yu nchaa nācuáa cada-gá ndéé cuèé-gá. ⁵ Te nchaa ñáyiú-áⁿ cúu-yu ñanì tñáhá nchaa cue tée ní cunūu ní xindecu ndéé sanaha, te diu-ni ñanì tñáhá-yu cùu Xítóhó Jesucristú Yaá ní tendaha Dütú Ndiöxí ní quixi ñuyú-a, te tñáhá-gá cúu-gã Ndiöxí te ío cūnuu-gá, te nchaa nduu nchaa quíú ío càhnu cuu-gá. Te ducaⁿ na cūnduu.

⁶ Te vá càchí-ó sã Yá Ndiöxí ñá túú ní quide-gá nchaa nācuáa ní cachí-gá cada-gá cuendá sá ñā túú sàndáá iní ñáhá dàva ñáyiú isràél xii-gá. Te sá dúcáⁿ xiquide davá-yu te ñā túú quidé-yu nācuáa tàú-xi cada-yu sá cúu-yu ñáyiú isràél. Te ñáyiú ducaⁿ xiquide-áⁿ cúu-yu ñáyiú ñā túú cùu cuendá ñáhá Yá Ndiöxí. ⁷ Te cuèi nchaa-yu cùu-yu ñanì tñáhá ndii Àbrahám dico ñā túú quidé-yu nchaa nācuáa

tàú-xi cunduu cada-yu sá cúu-yu ñanì tñáhá ndii. Te Yá Ndiöxí ní xáhaⁿ-gã xii ndii Àbrahám: “Nchaa cue ñanì tñáhá tē Isàác tēe cùu déhe ducuⁿ-n, mee-ni cuè ñáyiú-áⁿ cuu ñanì tñáhá-n”, duha ní xáhaⁿ-gã xii ndii Àbrahám. ⁸ Te xiáⁿ cùtnùnì iní-ó sã ñā nchaa ñáyiú cùu ñanì tñáhá ndii Àbrahám cúu-yu ñáyiú cùu cuendá Yá Ndiöxí, chi mee-ni ñáyiú sàndáá iní nācuáa ní càháⁿ-gá cada-gá, ñáyiú-áⁿ cúu cuendá-gá. ⁹ Te duha nduu tñuhu ní xáhaⁿ Yá Ndiöxí xii ndii Àbrahám: “Sáá nduu te yúhú cada-í te coo ìⁿ déhe-n ndihì ñadihì-n tã Sàrá”, duha ní xáhaⁿ-gã xii ndii.

¹⁰ Te ñā díú-ní xiáⁿ ní quide Yá Ndiöxí, chi tñáhá ní ndatnúhu-gá ndihì ndii Rèbecá cùtnáhá vitna ñuhu úú déhe ndii ndihì ndii Isàác tēe ní cuu ñanì tñáhá-ó ní xindecu ndéé sanaha. ¹¹⁻¹³ Te cùtnáhá vitna ñuhu-gá déhe ndii Rèbecá, cùtnáhá vátá cáda-gã-güexi ní ìⁿ sá cuèhé sá dúhá, te ní ìⁿ sá vāha, ní xáhaⁿ Yá Ndiöxí xii ndii: “Déhe-n tēe díhna na càcu te tēe-áⁿ tñi-dé nchaa tñuhu càháⁿ déhe-n tēe cùu úú ná càcu”, duha ní xáhaⁿ-gã xii ndii Rèbecá. Te ní quee ndáá-xi nācuáa ní càháⁿ Yá Ndiöxí núu tütú-gá núu càchí-xi: “Té Jácób ní cuu váha iní-í núu-dē, te té Esàú ñā túú ní cùu váha iní-í núu-dē”, duha càchí-gá núu tütú-gá. Te ducaⁿ ní cuu chi ducaⁿ ní cachí meé-gã cunduu sá càháⁿ-gá nchaa ñáyiú cuinì meé-gã, te ñā díú cuendá ìⁿ chiúⁿ quidé-yu càháⁿ ñahá-gã xii-yu.

¹⁴ Te vá cúu tñáhí càháⁿ-ó sã Yá Ndiöxí ñā túú quide váha-gá sá dúcáⁿ quide-gá chi mee-gã ío ndáá quidé-gã! ¹⁵ Te mee-gã ní xáhaⁿ-gã xii ndii Moisés: “Cundàhú iní-í chindee-í mee-ni cuè ñáyiú càchí iní-í”, duha ní xáhaⁿ-gã xii ndii. ¹⁶ Te xiáⁿ cùtnùnì iní-ó sã cūndàhú iní-gá ñáyiú chi ducaⁿ cuinì meé-gã cunduu, dico ñā túú cūndahú iní ñáhá-gã xii-yu cuendá sá dúcáⁿ cuinì-yu cada-gá, te ní ñā túú

cùndahú iní ñáhá-gã xií-yu cuèndá sá ïo ndùcu ndeé-yu quidé-yu ñⁿ sá quidè-yu. ¹⁷ Te núú tütú Yá Ndiöxí cãháⁿ-xi nàcuáa ní xáhaⁿ-gã xii téé ní cuu Faràón téé ní xíndaha nàcióⁿ Ègiptú, te duha ní xáhaⁿ-gã: “Yúhú ní quide-í yíndàha-n ñáiyu cuèndá cada-í titní núú sá cáda-í núú-n cuèndá cutnùní iní-n sá ïo càhnu cuu-í, te ducaⁿ nchaa ñáiyu ñuyúú cutnùní iní-yu sá yúhú cúú-í Ndiöxí”, duha ní xáhaⁿ-gã xii téé ní cuu Faràón. ¹⁸ Te xíáⁿ cutnùní iní-ó sá Yá Ndiöxí cùndahú iní-gã mee-ni cuè ñáiyu cãchí iní mée-gã, te ducaⁿ ndàda dí-gã iní nchaa ñáiyu cãchí iní mée-gã ducaⁿ càda-gã.

¹⁹ Te sá dúhá càháⁿ-í te dava-ndo quèsaha-ndo: “Ná cuèndá Yá Ndiöxí dácàa-gã cuèchi díquí ñáiyu núu ni ñⁿ-yu ñá ndácú-yu quehndé ni-hnú-yu cuèndá sá vã cáda Yá Ndiöxí nàcuáa cuèní-gã”, quesaha-ndo. ²⁰ Te chí cuãha cuèndá sá dícò ñáiyu ñuyúú-a cùu-ndo te ñá túú ndùu váha-xi sá nchòhó càháⁿ-ndó ñⁿ tnúhu sá ñá túú ndùu váha sá cúú-xí Yá Ndiöxí. Te duha na càháⁿ-í núú-ndó nàcuáa tecú tnùní-gã-ndó nàcuáa ndùu tnúhu càháⁿ-í. Te ñá túú xìní-ó sá ñⁿ quídí ñuhu cùñaha-xi xii ñáiyu ní cadúha ñaha xii-xi: “Ná cuèndá duha ní cadúha ñaha-n xii-í”, cùñaha-xi. ²¹ Chí ñáiyu cadúha nchaa quídí-áⁿ cuu-ni cadúha-yu ndíhi ñuhu cuèi nása na cùnduu quídí cadúha-yu canehe chiúⁿ-yu, chí ñⁿ-ni ñuhu cadúha-yu quídí cãnehe chiúⁿ-yu ndi tnahá nduu sácóo-yu vico ndíhi quídí sá cãnehe chiúⁿ-yu nduu cùtexínu.

²² Te diu-ni ducaⁿ quide Yá Ndiöxí, chí cuèní-gã dandòho-gã ñáiyu ñá túú quide nchaa nacúaa nduu vétú iní-gã, te cada-gã nàcuáa cutnùní iní-yu sá ïo càhnu cuu-gã. Te sa ndécu túha-ná-yu sá quíhíⁿ-yu núú ùhú núú ndàhú, te cuèi ducaⁿ dico ïo ta quide cahnu iní-gã cuáháⁿ. ²³ Te ducaⁿ

quide-gã cuèndá cutnùní iní nchaa ñáiyu ñuyúú sá ïo váha quide-gã sá cúú-xí nchaa nchoo ñáiyu cùndahú iní-gã, chí ní cachí-gã sá nchóó cuè ñáiyu cùndahú iní-gã nduu táhú-ó cùndecu-o ndíhi-gã núú ïo váha càa ndecu-gã. ²⁴ Te dava nchoo ñáiyu ní càháⁿ Yá Ndiöxí cúú-ó ñáiyu isràél, te dava-o cùu-o ñáiyu ñá túú cùu ñáiyu isràél. ²⁵ Te ní quee ndáá-xi nàcuáa ní xáhaⁿ Yá Ndiöxí xii ndíi Òseás téé ní xóo càháⁿ tnúhu-gã ndéé sanaha ñí chídó tnùní ndíi núú tütú-gã núú cãchí-xi:

Ñáiyu ñá túú cùu cuèndá-í ní cùu te nduu cuèndá-í-yu,

te diu-ni ñáiyu-áⁿ ñá túú cùu váha iní-í núú-yu ní cùu, dico vitna cùu váha iní-í núú-yu.

²⁶ Te diu-ni ñuú núú dúcáⁿ ñí cachí-í sá ñá túú ñáiyu cùu cuèndá-í diu-ni ñuú-áⁿ coo ñáiyu cuu déhe yúhú Dútú Ndiöxí Yá ndécú túu andíu.

Duha ní xáhaⁿ Yá Ndiöxí xii ndíi Òseás ní chídó tnùní ndíi núú tütú-gã. ²⁷ Te ndíi Chàíá téé ní xóo càháⁿ tucu tnúhu Yá Ndiöxí ndéé sanaha ñí càháⁿ ndíi cuèndá ñáiyu isràél, te duha ní cachí ndíi: “Cuèi cuéhé víhí ñáiyu isràél dàtná cuéhé ñuhu cùchí lámár dico sacú-ni-yu vá quèní-yu tnúndòho tnúhu ndàhú. ²⁸ Te Yá Ndiöxí ïo ndíhi cada-gã nchaa nàcuáa càháⁿ-gã ñuyúú”, duha ní cachí ndíi. ²⁹ Te ní càháⁿ tucu ndíi nàcuáa cada-xi ndéé cuèe-gã, te ní cachí ndíi:

Yá Ndiöxí Yá táxí tnùní nchaandi túhú sá ïo andíu ndíhi ñuyúú ñá túú ní dànaa-gã nchaa ñáiyu isràél, chí núu ní ndíhi-yu danàa ñaha-gã,

te nchoo cùu-o datná ní cuu nchaa ñáiyu ní xíndecu ñuú Sodomá ndíhi nchaa ñáiyu ní xíndecu ñuú Gòmorrá, te ndíhi-o nàa datná ní naa nchaa ñáiyu-áⁿ ní cùu.

Duha ní cachí ndíi.

Ñáyiú isràèl ñá túú sàndáá iní-yu tnúhu Xítohó Jesucristú

³⁰ Te sá cuèndá xiáⁿ nũ vitna càchí tnúhu-í xii-ndo sá cuè ñáyiú ñá túú cùu ñáyiú isràèl ñá túú ní nànducu nihnú-yu nàcuáa cadá-yu cudíú-yu núú Yá Ndiöxí, dico vitna cudíú-yu núú-gã chi ní sàndáá iní-yu Xítohó Jesucristú. ³¹ Te ñáyiú isràèl nchìcúⁿ nihnú-yu tnúhu sá dánèhé ñáhá xii-yu nàcuáa cadá-yu cudíú-yu núú Yá Ndiöxí dico ñá túú cudíú-yu núú-gã chi ñá ndácú-yu cadá-yu nchaa nàcuáa càháⁿ-xi. ³² Te ducaⁿ ñá túú cudíú-yu núú Yá Ndiöxí chi ñá túú sàndáá iní-yu Xítohó Jesucristú, te sàni iní-yu sá sá cuèndá mee-ni nchaa sá quidé mèe-yu cudíú-yu núú-gã, te sá dúcáⁿ quidé-yu te cùú-yu dàtná ìⁿ ñáyiú nguñenu ìⁿ yúú te ndúá-yu. Te ducaⁿ sàtnahá-xi cùú-yu chi ñá túú cùu váha iní-yu núú Xítohó Jesucristú. ³³ Te quèe ndáá-xi nàcuáa ní càháⁿ Yá Ndiöxí ìⁿ xichi núú tütú-gã núú càchí-xi:

Yúhú táxi ndècu-í ìⁿ tée ñuú Siòn,
te cuu-dé dàtná ìⁿ yúú, te
yúú-ãⁿ nguñenu ñáyiú te
nduá-yu,

te nchaa ñáyiú na quindáá iní ñáhá
xii-dé, te vá ndíxí cuèchi
iní-yu sá dúcáⁿ ñá sàndáá iní
ñáhá-yu xii-dé.

Duha càchí-gã núú tütú-gã.

10

¹ Te nchòhó ñáyiú ndècu ndìhi-í ichi Xítohó Jesucristú càchí tnúhu-í xii-ndo sá càháⁿ ndìhi-í Yá Ndiöxí cuèndá ñáyiú isràèl, chi ío cuíní-í sá nànihí tàhú-yu. ² Te na càháⁿ ndáá-í cuèndá-yu sá ío ndùcu ndeé-yu xinu cuechí-yu núú Yá Ndiöxí, te dicó-ni sá ñá túú quidé-yu nàcuáa cuíní mèe-gã cadá-yu. ³ Chi ñá túú quide cuèndá-yu nàcuáa cuíní Yá Ndiöxí cada ñaha-gã xii-yu nàcuáa cudíú-yu núú-gã, te quide-ní-yu nàcuáa sàni iní mèe-yu cudíú-yu

núú-gã te ñá túú cuíní-yu tñí-yu tnúhu càháⁿ-gã nàcuáa cudíú-yu núú-gã. ⁴ Te Xítohó Jesucristú ní quide-gã cuèndá sá vã cùnù-gã nchaa tnúhu ní chidó tñini ndíi Moisés, te nchaa ñáyiú na quindáá iní ñáhá xii-gã te ñu-gã cada te cudíú-yu núú Yá Ndiöxí.

⁵ Te ndíi Moisés càháⁿ ndíi núú tütú ndíi cuèndá ñáyiú cuíní cudíu núú Yá Ndiöxí cuèndá sá nchìcúⁿ nihnú-yu nchaa nàcuáa ní càháⁿ ndíi. Te ní cachí ndíi sá ncháá ñáyiú na càda nchaa nàcuáa ní xáhaⁿ Yá Ndiöxí xii ndíi ní chidó tñini ndíi te nanihí tàhú-yu, te núu dicó ndacú-yu cadá-yu nchaa nàcuáa ní càháⁿ ndíi. ⁶ Dico vitna núu na quindáá iní-ó Xítohó Jesucristú, te cudíu-o núú Yá Ndiöxí. Te duha càchí tnúhu ní chidó tñini ndíi núú tütú-gã: “Vá caní ìni-ndó sá xini ñuhu-xi cada-ndo ìⁿ sá vã yòo tñahí ndàcu cada sá cáá tñu-ndo àndü te cùñaha-ndo xii Cristú cuuⁿ-ndo ndìhi-gã núú ñuyúú-a. ⁷ Te ni vã caní tucu iní-ndó sá quihíⁿ tñu-ndo núú xindecu nchaa ñáyiú ní xihí te cada-ndo sá Cristú ndoto-gã”, duha càchí tnúhu-áⁿ sá vã dúcáⁿ caní iní-ó. ⁸ Te càchí tucu tnúhu-áⁿ: “Tnúhu Yá Ndiöxí sá ndécú ndìhi ñaha-xi xii-ndo chi sàni iní-ndó cuèndá tnúhu-áⁿ te càháⁿ-ndó”, duha càchí tnúhu-áⁿ. Te tnúhu sá ndécú ndìhi-ndo-áⁿ cùú-xi tñuhu càháⁿ-ndí núú ñáyiú, te xini ñuhu-xi sá quindáá iní-yu tnúhu-áⁿ. ⁹ Te núu na nñuu-ndo càháⁿ-ndó sá Xítohó Jesucristú cùú-gã Xítohó-ndó, te quindáá iní-ndó ñi yuhu ñi iní-ndó sá Yá Ndiöxí ní dándótó-gã Xítohó Jesucristú, te nanihí tàhú-ndó te núu ducaⁿ na càda-ndo. ¹⁰ Te nchaa ñáyiú ducaⁿ sàndáá iní te càháⁿ-yu sá Xítohó Jesucristú cùú-gã Xítohó-yu, ñáyiú-áⁿ cudíú-yu núú Yá Ndiöxí te nanihí tàhú-yu.

¹¹ Te núú tütú Yá Ndiöxí càchí-xi sá ñi ìⁿ ñáyiú sàndáá iní ñáhá xii Xítohó Jesucristú vã ndíxí cuèchi iní-yu sá dúcáⁿ sàndáá iní ñáhá-yu

xii-gá. ¹² Te sá cúú-xí Xítohó Jesucristú chi #ⁿ-ni cùu ñáiyu isràél ndihí ñáiyu ñá túú cùu ñáiyu isràél, chi diu-gá cúú-gá Yáá cùnùu taxi tñuní-gá nchaa ñáiyu, te ío váha quide-gá sá cúú-xí nchaa ñáiyu càháⁿ ndihí ñaha xii-gá. ¹³ Te quèe ndáá-xi nàcuáa càháⁿ-xi núú tütú Yá Ndióxi núú cächí-xi: “Nchaa ñáiyu na càháⁿ ndàhú núú Xítohó Jesucristú sá dácäcu nihnu ñaha-gá xii-yu, te ñáiyu-áⁿ naníhí tãhú-yu”, duha cächí-xi núú tütú-gá. ¹⁴ Te ñáiyu-áⁿ vã nihí-yu nàcuáa càháⁿ ndàhú-yu núú-gá te núu ñá túú sàndáá iní ñáhã-yu xii-gá, te ni vã nihí-yu nàcuáa cadã-yu quindáá iní ñáhã-yu xii-gá te núu vátã cündédóho-gá-yu tñuhu-gá, te ni vã nihí-yu tñuhu-gá te núu vá yõ quíhíⁿ cútñuhu ñaha xii-yu. ¹⁵ Te ni vã yõ quíhíⁿ ducaⁿ cútñuhu ñaha xii-yu tñuhu-gá te núu Yá Ndióxi vá téndãha-gá ñáiyu quíhíⁿ cútñuhu ñaha xii-yu. Te núú tütú Yá Ndióxi cächí-xi: “Ío vii ío váha cùu iní-ó vëxi ñáiyu dãnehé ñáhã xii-o nacuáa ndùu tñuhu sá càháⁿ nàcuáa naníhí tãhú-ó”, duha càháⁿ-xi núú tütú-gá.

¹⁶ Te ñã ncháã-yu cuiní-yu quindáá iní-yu tñuhu-áⁿ. Te ní quee ndáá-xi nàcuáa ní xãhaⁿ ndíi Chàia xii Yá Ndióxi te duha ní xãhaⁿ ndíi xii-gá: “Yõhó Dútú Ndióxi na nàcãni tñuhu-í núú-n sã ío sacú-ni ñáiyu sàndáá iní-yu tñuhu càháⁿ-ndí”, duha ní xãhaⁿ ndíi xii-gá. ¹⁷ Te xini ñuhu-xi sã dñhã-gã cundedóho-yu tñuhu-áⁿ cuendã ducaⁿ te quindáá iní-yu, te tñuhu-áⁿ cúú-xí tñuhu Xítohó Jesucristú.

¹⁸ Te vá cúú càháⁿ-ó sã ñã túú ní nihí ñáiyu isràél tñuhu-gá, chi ncháã-yu ní nihí-yu tñuhu-gá, chi núú tütú Yá Ndióxi cächí-xi:

Cue tée ní càháⁿ tñuhu Yá Ndióxi ní càháⁿ-güedé tñuhu-gá núú ñáiyu,

te tñuhu-áⁿ ní xité nuu-xi nihí ñuyú.

Duha cächí-xi núú tütú-gá. ¹⁹ Te ni vã càháⁿ-ó sã ñáiyu isràél ñã túú ní cùu tñuní iní-yu nàcuáa ndùu tñuhu-gá chi ní tecu tñuní-yu. Te ndéé sanaha ní chídó tñuní ndíi Moisés nàcuáa ní xãhaⁿ Yá Ndióxi xii ñáiyu isràél, te duha ní xãhaⁿ-gã xii-yu:

Yúhú cada váha-í nchaa ñáiyu ñã túú cùu ñáiyu isràél, ñáiyu ñã túú cütñuní iní-xi nàcuáa cada váha cundecu núú-í, te nchòhó cudééⁿ-ndó nüü-yu te cuu cuédú ímí-ndõ-yu.

Duha ní xãhaⁿ Yá Ndióxi xii-yu te ducaⁿ ní chídó tñuní ndíi Moisés. ²⁰ Te ndíi Chàia ñã túú tñáhí ni yùhú ndíi ní quide ndíi núú Yá Ndióxi ní càháⁿ ndíi tñuhu-gá, te ní cachí ndíi: Ñáiyu ñã túú nãnducu ñaha xii-í ní cùu ní naníhí ñáhã-yu xii-í, te ni ñã túú ndùcu tñuhu ñáhã-yu xii-í ní cùu te ní xini ñáhã-yu.

Duha ní cachí ndíi Chàia ní càháⁿ ndíi tñuhu Yá Ndióxi. ²¹ Te ní quide tucu ndíi núú Yá Ndióxi ní càháⁿ ndíi tñuhu-gã cuendã ñáiyu isràél, te ní cachí ndíi: “Nchaa-ni nduu yihi-í càháⁿ-í ñáiyu isràél te ñã túú cuiní-yu quindáá iní-yu chi ío sãã iní-yu”, duha ní cachí ndíi Chàia ní càháⁿ ndíi tñuhu Yá Ndióxi.

11

Cuendã ñáiyu isràél ñáiyu naníhí tãhú

¹ Te cuéi ducaⁿ dico vá càháⁿ-ó sã Yá Ndióxi dáquèe tñuhu-gã ñáiyu isràél chi diu-ni ñáiyu-áⁿ cúú cuendã-gã, chi yúhú tñáhã-í cúú-í mei tãe isràél, te ñãni tñáhã-í ní cuu ndíi Abrahãm tãe ní xíndecu ndéé sanaha vihi-gã, te diu-ni ñãni tñáhã-í ní cuu tucu ndíi Benjamín.

² Te ndéé sanaha dùcaⁿ ní cachí Yá Ndióxi sã nchùhú ñáiyu isràél cúú-ndí ñáiyu cùu cuendã-gã, te ñã túú dàquèe tñuhu ñáhã-gã xii-ndí, te nchòhó sa xini-ndó nàcuáa càháⁿ-xi núú tütú Yá Ndióxi núú cächí-xi nàcuáa ní quide té Eliás ní ndacãⁿ cuéchi-dé núú-gã

cuendá ñáyiú isràél. ³ Te duha ní xáhaⁿ-dë xii-gá: “Yòhó Dútú Ndiöxí, ná nàcani tnúhu-í núú-n sá ñi sahní-yu cue tée càháⁿ tnúhu-n, te ní dátànú-yu núú xihí quiti ndùu táhú-n, te yúhú-ná ní cácu-í ndécù-í dico nànducu ñahá-yu chi tnàhá-í cuini-yu cahni ñahá-yu xii-í”, duha ní xáhaⁿ-dë xii Yá Ndiöxí. ⁴ Te Yá Ndiöxí ní xáhaⁿ-gã xii-dé: “Sa ní dáqueé ðiiⁿ-í úsá mìl cue tée cùu cuendá-í, te ñá túú nèhe-güedé sá yíññhu núú Bàál sá càchí-yu cùu ndiöxí-yu te ñá ndáá sá ndiöxí cúú-xí”, duha ní xáhaⁿ-gã xii té Èliás. ⁵ Te ducaⁿ sátnahá-xi cùu vitna chi xindecu ñáyiú ní cáháⁿ-gá ní chitnahá ñáhá xii-gá, te ducaⁿ ñi quide-gá chi ní cundàhú iní ñáhá-gã xii-yu. ⁶ Te ducaⁿ ñi cáháⁿ ñáhá-gã xii-yu sá cundàhú iní ñáhá-gã, te ñá díú cuendá ðiiⁿ chiúⁿ quidé-yu ducaⁿ ñi cáháⁿ ñáhá-gã xii-yu, chi núu dicó cuendá ðiiⁿ chiúⁿ quidé-yu ducaⁿ ñi cáháⁿ ñáhá-gã xii-yu ña, te ñá díú-gã sá cúú iní mée-gã ducaⁿ ñi cáháⁿ ñáhá-gã xii-yu te núu ducaⁿ.

⁷ Te na càchí tnúhu-í xii-ndo nàcuáa cùu vitna sá ñáyiú isràél cuini-yu cudíu-yu núú Yá Ndiöxí dico ñá ndácù-yu, dico dava ñáyiú ní cáháⁿ-gã ñáyiú-áⁿ cudíu-yu núú-gã, te ñáyiú ducaⁿ ña túú cùdiu núú-gã-áⁿ ïo ní cuu sáá iní-yu núú-gã. ⁸ Te ní quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Yá Ndiöxí ní càchí-gá sá cúu-yu ñáyiú ïo ñi ðiquí-xi, chi cuèi ndèhé-yu nàcuáa càháⁿ tnúhu-gá dico ñá cùtnùní iní-yu nàcuáa càháⁿ-xi, te cuèi ndèdóho-yu dico ñá túú quèe díquí-yu, te ducaⁿ-ni quidé-yu ndéé vitna”, duha càchí-xi núú tütú-gá. ⁹ Te ndíi Dàvíí ní cachí ndíi:

Ñáyiú ïo váha ndècu te cùdíi iní-yu quidé-yu vico,
dico yáha-yu dàtná yáha ðiiⁿ quiti ngáva trampá àdi ðiiⁿ quiti ñá

cùtnùní iní-xi quèe xití ñnuu,
chi cuíta nihnú-yu te nacháhu-yu nchaa sá quidé-yu.

¹⁰ Te cúu-yu ñáyiú ñá túú vèdana tècù tnùní, te cùu tucú-yu dàtná ðiiⁿ ñáyiú ïo ndòho nchido ðiiⁿ sá vèe.
Duha ní cachí ndíi Dàvíí.

Ñáyiú ñá túú cùu ñáyiú isràél naníhí táhú-yu

¹¹ Te cuèi ducaⁿ dico vá càchí-ó sá sá dúcáⁿ ña túú ní quide ndáá ñáyiú isràél te ní xíta nihnu duúⁿ-yu, te ñáhá chi sá dúcáⁿ ñi quidé-yu te ní ngúndecu ndihi dava-gá ñáyiú tnúhu sá càháⁿ nàcuáa naníhí táhú-yu, te ñáyiú isràél quini-yu nàcuáa naníhí táhú ñáyiú ña túú cùu ñáyiú isràél, te tnàhá-yu cudíi iní-yu naníhí táhú-yu. ¹² Te sá dúcáⁿ ñi quide sáá iní-yu ña túú ní quide ndáá-yu núú Yá Ndiöxí, te xiáⁿ ní cuu-xi ðiiⁿ sá vaha sá cúú-xi ñáyiú nihíi ñuyúú, dico sáá nduu te cada ñáyiú isràél nchaa nàcuáa càháⁿ Yá Ndiöxí, te dàvá-áⁿ ïo-gá váha cuu xii nchaa ñáyiú nihíi ñuyúú.

¹³ Te nchòhó ñáyiú ña túú cùu ñáyiú isràél càchí tnúhu-í xii-ndo sá Yá Ndiöxí ní cachí-gá sá càháⁿ-í tnúhu-gá núú-ndó, te yúhú càchí-í sá ïo càhnu cuu chiúⁿ quide-í. ¹⁴ Te duha càháⁿ-í cuendá sá núu cudana ïo dava ñáyiú cùu ndi mee-í cudíi iní-yu cada váha ñaha Yá Ndiöxí xii-yu dàtná quidé vaha ñaha-gã xii-ndo, te naníhí táhú-yu. ¹⁵ Te sá cuendá sá ñi quee tíhú ñáyiú isràél ní nacáháⁿ cáhnu iní tnáhá ñáyiú nihíi ñuyúú ndihi Yá Ndiöxí, dico na sáá nduu núcúndecu váha ñáyiú isràél ndihi Yá Ndiöxí, te ïo-gá váha tnahá ñáyiú nihíi ñuyúú, te ñáyiú-áⁿ cada iní-ó sá cúu-yu dàtná ñáyiú ní xihí, dico dàvá-áⁿ cada tucu iní-ó sá cúu-yu dàtná ñáyiú ní ndoto chi nucúndecu váha-yu ndihi-gá. ¹⁶ Te núu sá lúhá-ni ðiiⁿ tílúlu yusaⁿ càváha te ðiu-ni ducaⁿ càváha nihíi. Te núu càváha yóho

ɨⁿ yutnu te ðiu-ni ducaⁿ càváha-xi nɨhí-xi. Te ðiu-ni ducaⁿ sátnahá-xi cùu ñáyiú isràél, chí ñani tnáhá-yu ní xíndecu ndéé sanaha nǐ cuú-yu ñáyiú ní cuu cuendá ñáhá Yá Ndiöxí, te ðiu-ni ducaⁿ cùu cuendá ñáhá-gǎ xii mèe-yu ndéé vitna.

¹⁷ Te ío ɨⁿ yutnu váha nàni olívú, te dava dité yutnu-áⁿ nǐ téhndé te ní nucódó dité yutnu òlívú cùtexínu, te mee-nǎ yutnu òlívú váha-áⁿ ío váha quíde-xi nchito dité yutnu òlívú cùtexínu-áⁿ. Te dité nchaa yutnu òlívú váha-áⁿ cuú-xí ðàtná ñáyiú isràél, te nchaa dité-xi sá nǐ téhndé-áⁿ cuú-xí ðiu-ni ñáyiú isràél ñáyiú ñá túú tnáhá tnúhu ndihí Yá Ndiöxí. Te dité yutnu òlívú cùtexínu sá nǐ nucódó tnáhá-áⁿ cuú-xí ðàtná ñáyiú ñá túú cùu ñáyiú isràél tnáhá tnúhu ndihí Yá Ndiöxí. ¹⁸ Te vá cání iní-ndó sǎ sǎ dúcáⁿ ndécu váha-ndo ndihí Yá Ndiöxí te ío cùnuu-ndo dacúxí ñáyiú isràél, te vá dúcáⁿ càni iní-ndó chí sǎ cuendá nchaa ñani tnáhá ñáyiú isràél ní xíndecu ndéé sanaha ducaⁿ ndécu váha-ndo ndihí Yá Ndiöxí vitna, te ñá díú sǎ cuendá nchòhó ndécú ndihí váha ñáyiú-áⁿ Yá Ndiöxí vitna.

¹⁹ Te cudana sàni iní-ndó te càchí-ndó sǎ ñáyiú isràél ní quee tíhú-yu cuendá sǎ nchòhó nucuíní-ndó nǔú-yu nucúndecu váha-ndo ndihí Yá Ndiöxí. ²⁰ Te ndáá sǎ nǐ quee tíhú-yu chí ñá túú ní sàndáá iní ñáhá-yu xii-gǎ, te nchòhó ío váha cùu ndecu-ndo ndihí-gǎ chí ní sàndáá iní-ndó-gǎ, dico vá càchí-ndó sǎ ío càhnu cuu-ndo, te ío váha chí cuàha cuendá nàcuáa cundecu-ndo. ²¹ Te cue ñáyiú isràél cuú-yu ñáyiú cùu cuendá-gǎ ní cùu te ní dáqueé tíhú ñáhá-gǎ xii-yu cuendá sǎ ñá túú ní sàndáá iní ñáhá-yu xii-gǎ, te tnáhá nchòhó daquèe tíhú ñáhá-gǎ xii-ndo te núu na càda-ndo ðàtná ní quíde ñáyiú-áⁿ. ²² Te chí cáda cuendá sǎ Yá Ndiöxí ío váha iní-gǎ, dico cùdééⁿ-gǎ núú nchaa ñáyiú

ñá túú sàndáá iní ñáhá xii-gǎ, dico sǎ cuú-xí nchòhó cue ñáyiú sàndáá iní ñáhá xii-gǎ chí ío váha iní-gǎ. Te ducaⁿ-ni cùnduu váha iní-gǎ sǎ cuú-xí-ndó te núu vá dáñá ndéé-ndó càda-ndo nacuáa càháⁿ-gǎ cuendá sǎ ío váha iní-gǎ, te núu ñáhá te tnáhá nchòhó quee tíhú-ndó ðàtná ní quee tíhú ñáyiú isràél, ñáyiú ñá túú ní sàndáá iní ñáhá xii-gǎ. ²³ Dico núu ñáyiú isràél ñáyiú ní dáqueé tíhú ñáhá Yá Ndiöxí quíndáá iní ñáhá-yu xii-gǎ te nduu cuendá ñáhá tùcu-gǎ xii-yu, te ñáyiú-áⁿ cuú-yu ðàtná dava dité yutnu òlívú sǎ nǐ téhndé te ní nucódó tnáhá tùcu. Te ducaⁿ sátnahá-xi cuú-yu te núu na quíndáá iní ñáhá-yu xii-gǎ. ²⁴ Te nchòhó cuú-ndó ðàtná nchaa dité yutnu òlívú cùtexínu, chí ñá díú ñáyiú isràél cuú-ndó, te dité nchaa yutnu òlívú cùtexínu-áⁿ nǐ nucódó-xi núú dité yutnu òlívú váha-áⁿ. Te yáchí-gǎ nucúndecu váha ñáyiú isràél ndihí Yá Ndiöxí, chí cùu-yu ðàtná nchaa dité yutnu òlívú váha sǎ nǐ téhndé te ní nucódó tnáhá tùcu. Te ducaⁿ sátnahá-xi cuú-yu te núu na quíndáá iní ñáhá-yu xii-gǎ.

Sáa nduu te naníhí tàhú ñáyiú isràél

²⁵ Te nchòhó ñáyiú ndécu ndihí-í ichi Xítóhó Jesucristú, na càchí tnúhu-í xii-ndo ɨⁿ tnúhu ndúu yuhu ni cuu, cuendá sǎ vǎ cání iní-ndó sǎ ío-gǎ váha sǎa díquí-ndó dacúxí ñáyiú isràél, chí dava ñáyiú isràél cuú sǎa iní-yu núú Yá Ndiöxí nini na ndihí ñáyiú ní cachí Yá Ndiöxí ngúndecu váha ndihí ñáhá-yu xii-gǎ, ñáyiú ñá túú cùu ñáyiú isràél. ²⁶ Te nduu na ndihí ñáyiú-áⁿ ngúndecu váha-yu ndihí Yá Ndiöxí, te ðavá-áⁿ naníhí tàhú ñáyiú isràél chí quee ndáá-xi nàcuáa càháⁿ Yá Ndiöxí núú tütú-gǎ núú càchí-xi: Ndàa ñuu Síon quixi Yaá cada naníhí tàhú nchaa ñáyiú,

te ðiu-ni Yaá-áⁿ cada-gá cuendá sá dáñá nchaa ñáyiú isráel ichi cuèhé ichi duha.

²⁷ Te yúhú cada càhnu iní-í nchaa cuèchi ñáyiú isráel, chi cada-í dàtná ní cachí-í ndéé sanaha.

Duha càchí Yá Ndiòxí núú tütú-gá.

²⁸ Te sá cuendá tnúhu sá càháⁿ nàcuáa naníhí tãhú-ó xíáⁿ cúú úhú iní ñáyiú isráel Yá Ndiòxí, te sá dúcáⁿ quidé-yu xíáⁿ nchòhó ní níhí-ndó tnúhu sá càháⁿ nàcuáa naníhí tãhú-ndó. Te ní cachí Yá Ndiòxí sá ñáyiú isráel cuu cuendá-gá, te cùu iní ñáhá-ní-gá xií-yu, te ducaⁿ quide-gá chi ducaⁿ ní xáhaⁿ-gá xii cue ñaní tnáhã-yu ní xíndecu ndéé sanaha. ²⁹ Te Yá Ndiòxí ñá túú ndúu úhú iní-gá ðⁿ sá táxi-gá, te ni ñá túú ndixi cuèchi iní-gá sá càháⁿ ñáhá-gá xii-o. ³⁰ Te nchòhó chi ñá túú sãndáá iní-ndó Yá Ndiòxí ní cùu, dico vitna ñini ñá túú sãndáá iní ñáhá ñáyiú isráel xii-gá, te ní cundàhú iní ñáhá-gá ní dácãcu nihnu ñaha-gá xii-ndo núú ùhú núú ndàhú. ³¹ Te vitna quidé-yu dàtná ní xóo cada nchòhó cútñáhá ñá túú ní xóo quindáá iní-ndó-gá. Dico sáá nduu te natuha ñáhã-yu xii-gá te dácãcu nihnu ñaha-gá xií-yu sá cundàhú iní ñáhá-gá dàtná ní quide ñaha-gá xii nchòhó. ³² Te Yá Ndiòxí ní dáñã-gá sá dúcáⁿ cùnduu saá iní nchaa ñáyiú cuendá cuíní-gá cundàhú iní ñáhá-gá xií-yu.

³³ Te súúni vãha quide ñaha Yá Ndiòxí xii-o, te ío vãha xini-gá nchaa cuéi sá ío andiú te cuéi sá ío ñuyú-a, te ducaⁿ ío vãha sãá nchaa sá xini tnúni-gá. Te ñá ndácú-ó cùtnuní iní-ó nã cúú nchaa sá sãni iní-gá cada-gá, te ni ñá ndácú-ó cùtnuní iní-ó nãcuáa ndúu cuendá nchaa sá quide-gá. ³⁴ Te núú tütú-gá càchí-xi: “Vã yóo ðⁿ cùtnuní iní-xi nãcuáa sãni iní Yá Ndiòxí, te ni vã yóo ðⁿ ndacu dacahu iní ñáhã xii-gá nãcuáa càháⁿ-gá. ³⁵ Te Yá Ndiòxí ñá túú quide yica iní-gá cada-gá sá vãha sá cúú-xi

ñáyiú cuendá ðⁿ sá sãñáhã-yu xii-gá chi ñá túú dùcaⁿ quide-gá”, duha càchí-xi núú tütú-gá. ³⁶ Te ducaⁿ chi mee Yá Ndiòxí ní taxi ndecu-gá nchaandi tühú sá ío ñuyú, te ðiu-ni mee-gã táxi tnúni-gá nchaa sá ní taxi ndecu-gá, te nchaa cùu-xi cuendá-gá. Te vitna chí ná càchí-ó sã ío càhnu cuu-gá ni caa ni quíhíⁿ. Te ducaⁿ na cùnduu.

12

Cada-o nãcuáa nduu vétú iní Yá Ndiòxí

¹ Te vitna nchòhó ñáyiú ndècu ndíhí-í ichi Xítohó Jesucristú càchí tnúhu-í xii-ndo sã Yá Ndiòxí cundàhú iní ñáhã-gá xii-o chindee ñaha-gá, núú xíáⁿ càháⁿ ndàhú-í núú-ndó sã dáñã-ndó mée-ndo núú ndáhã-gá, te cada iní-ndó sá cúú-ndó dàtná ðⁿ tãhú sã nchító-ó ní nduu tãhú-gá. Te cuu-ndo ñáyiú vãha ñáyiú cada nchaa nãcuáa nduu vétú iní Yá Ndiòxí chi ducaⁿ tãu-ndó càda-ndo sá cúú-xi-gá.

² Te vã cãnchicúⁿ nihnu-gã-ndó càda-ndo datná xiquide nchaa ñáyiú ndècu ichi cuèhé ichi duha ndècu ñuyú-a, te vã cúhúⁿ-gã iní-ndó ichi cuèhé ichi duha-áⁿ, chi mee-nã sã vãha cuhuⁿ iní-ndó, te ducaⁿ te cùtnuní iní-ndó nchaa nãcuáa cuíní Yá Ndiòxí cada-ndo, te nchaa sá cuíní-gá cada-ndo cùu-xi mee-ni sã vãha, sã ío vãha ndúu vétú iní-gá, te cùu-xi nchaa sá xini ñúhu-xi cada-ndo núú-gá.

³ Te sá cuendá chiúⁿ ní cundàhú iní ñáhã Yá Ndiòxí ní taxi-gá xii-í xíáⁿ núu na càháⁿ-í dóho-ndo vitna: Vã cãni iní-ndó ðⁿ sã ñá túú tãu-ndó çani iní-ndó te cucahãⁿ-ndo sã ío càhnu cuu-ndo. Te nchòhó ní sãndáá iní-ndó Yá Ndiòxí núu chindee ñaha-gá xii-ndo, te vitna chí cuãha cuendá núu ná daha núú chiúⁿ-gã ndacu-ndo càda-ndo. ⁴ Te nchoo títí xichí cùu yiqui cuñú-ó, te ndí ðíⁿ ndí ðíⁿ chiúⁿ quide-xi ðⁿ ðⁿ-xi. ⁵ Te ducaⁿ sãtnahã tucu-xi cùu nchoo ñáyiú ndècu ndíhí Xítohó Jesucristú chí cuéi ná daha tnáhã-ó

dico ñⁿ-ni cùu-o ndìhì-gá, te ducaⁿ mée-o tucu ñⁿ-ni cùu-o.

⁶ Te mee Yá Ndiòxí ní cundàhú iní ñáhá-gá xii-o ní taxi-gá chiⁿ taú-ó càda-o ñⁿ ñⁿ-o te chindee ñaha-gá xii-o, te xini ñuhu-xi cada-o nacuaá nduu chiuⁿ ní taxi-gá cada-o. Te núu ní nduu táhú-ó núú-gá sá càháⁿ-ó tnúhu sá dácàhu iní ñáhá mée-gá xii-o te càháⁿ-ó nàcuáa sàndaá iní-ó chindee ñaha-gá xii-o, ⁷ àdi ní nduu táhú-ó núú-gá sá ïo váha chindee-o tnàha ñáyi^u-o te ñi^u-ni ducaⁿ càda-o, àdi ní nduu táhú-ó dānehé-ó ñáyi^u tnúhu-gá te ñi^u-ni ducaⁿ càda-o, ⁸ àdi ní nduu táhú-ó núú-gá sá dácàháⁿ-ó ñáyi^u canchicúⁿ nihnú-yu ichi-gá te ñi^u-ni ducaⁿ càda-o, àdi ní nduu táhú-ó núú-gá sá cuañaha-o xii tnaha ñáyi^u-o sá nihí-ó ndècu ndìhì-o te ñi^u-ni ducaⁿ càda-o, dico ni yùhu ni iní-ó cuañaha-o xii-yu, àdi ní nduu táhú-ó núú-gá taxi tnúni-ó te ñi^u-ni ducaⁿ càda-o, te ni yùhu ni iní-ó càda-o, àdi ní nduu táhú-ó núú-gá chindee-o cuè ñáyi^u ndècu ndìhì tnúndòho tnúhu ndàhú te ñi^u-ni ducaⁿ càda-o, te ïo cudí^í iní-ó càda-o chiuⁿ-áⁿ.

Nchaa nàcuáa tàù-xi cada nchaa ñáyi^u ndècu ichi Xitohó Jesucristú

⁹ Te cuu iní tnáhá ndisa-ndo ñⁿ ñⁿ-ndo, te dañā-ndo nchāa sá cuèhé sá dúhá te cada-ndo mée-ni sá váha. ¹⁰ Te ïo cuu iní tnáhá-ndó, te cada-ndo cuèndá sá ñⁿ-ní ñáyi^u cùu-ndo, te ñⁿ ñⁿ-ndo càni-gá iní-ndó cànehe yíñuhu núu tnáhá-ndó.

¹¹ Te nducu ndèe-ndo cada-ndo nchaa chiuⁿ tahu Xitohó Jesucristú vá túhio-ndo, te cada-ndo ni yuhu ni iní-ndó sá cúu-xí-gá.

¹² Te ïo cudí^í iní-ndó cùndecu-ndo chi ní ngùndecu ndìhì-ndo tnúhu ndee iní sá cùndècu ndìhì-ndo Xitohó Jesucristú, te cada càhu iní-ndó cuèi nāndi na càda ñaha ñáyi^u xii-ndo sá cuèndá-gá, te vá dañā ndèe-ndó càháⁿ ndìhì-ndo Yá Ndiòxí.

¹³ Te chindee tnàha-ndo te núu ïo dava nchòhó ñáyi^u ndècu ichi-gá ïo ñⁿ sá cúmāní xii-ndo, te ïo váha cuu iní-ndó còto-ndo ñáyi^u véxi vehe-ndo.

¹⁴ Te cācāⁿ táhú-ndó núú Yá Ndiòxí cuèndá nchaa ñáyi^u nāndi quide ñaha xii-ndo, te cācāⁿ táhú-ndó núú-gá sá ná chindee ñaha-gá xii-yu te ñā díú dà cācāⁿ táhú-ndó núú-gá sá ná dàcuíta nihnu ñaha-gá xii-yu.

¹⁵ Te núu ïo ñáyi^u cùdí^í iní-xi te cudí^í iní-ndó ndìhì-yu, te núu ïo ñáyi^u ndìhú iní-xi te ndìhú iní-ndó ndìhì-yu.

¹⁶ Te cuu ñⁿnuu-ndo cùndecu-ndo, te vá cādā càhu-ndo mee-ndo, te tnahá tnúhu-ndo ndìhì nchaa ñáyi^u ndàhú iní-xi, te vá cāní iní-ndó sá ïo-gá túha-ndo.

¹⁷ Te vá nānchòcāva-ndo nāchinaa-ndo ñⁿ sá quidé ñaha ñáyi^u xii-ndo, te ïo nducu ndèe-ndo cada-ndo mee-ni sá váha nàcuáa cuu váha iní ñáyi^u. ¹⁸ Te ïo nducu ndèe-ndo cada-ndo sá ndácú-ndó cùndecu váha-ndo ndìhì nchaa ñáyi^u. ¹⁹ Te nchòhó ñáyi^u ïo cùu iní-í, vá cāní iní-ndó nāchinaa-ndo ñⁿ sá cādā ñaha ñáyi^u xii-ndo, chi cundetu-ndo sá mée Yá Ndiòxí ná nāchinaa-gá sá quidé ñahá-yu xii-ndo, chi quee ndāá-xi nàcuáa càháⁿ Yá Ndiòxí núu tütú-gá núu cāchí-xi: “Yúhú dandòho-í-yu chi nāchinaa-í nchaa sá quidé-yu”, duha cāchí-gá núu tütú-gá. ²⁰ Te xini ñuhu tucu-xi cada-ndo nacuaá càháⁿ tucu-xi ingá xichi núu tütú-gá núu cāchí-xi: “Te núu ñáyi^u cùu úhú iní ñáhá xii-ndo ñā túú sá cóhó sá cāxí-yu te cuañaha-ndo xii-yu, te núu ducaⁿ na càda-ndo te ïo cucahaⁿ núu-yu”, duha cāchí-xi núu tütú-gá. ²¹ Te núu ïo ñⁿ sá quidé ñaha tnaha ñáyi^u-ndo xii-ndo te vá nānchòcāva-ndo nāchinaa-ndo sá quidé ñahá-yu xii-ndo, chi cada-ndo sá váha sá cúu-xí-yu, te ducaⁿ te vá cādā-ndó sá ñā túú

tàù-ndó càda-ndo núú Yá Ndiöxí dàtná quidè-yu.

13

¹ Te nchaa ñáyiù tàù-yu quindáá iní-yu nchaa cue téé cùchiuⁿ, chi Yá Ndiöxí ní cachí-gá sá cùndècu téé cùchiuⁿ ñuyíú-a, núú xíáⁿ xíndecu-güedé vitna. ² Te nchaa ñáyiù ñá túú sàndáá iní ñáhá xii cue téé cùchiuⁿ ñá túú tnàhá iní Yá Ndiöxí sá dúcáⁿ quidè-yu, chi mee-gá ní cachí-gá sá cùndècu-güedé. Te nchaa ñáyiù ducaⁿ ñá túú sàndáá iní ñáhá xii cue téé cùchiuⁿ nacháhu-yu sá dúcáⁿ quidè-yu. ³ Te nchaa ñáyiù quide váha ñá túú yùhú-yu cue téé cùchiuⁿ chi quide váha-yu, dico nchaa ñáyiù ñá túú quide váha chi xiyùhú-yu cue téé cùchiuⁿ. Te vitna núú nchòhó cuení-ndó sá vá yùhú-ndó cuè téé cùchiuⁿ te chí cádá váha, te ducaⁿ te cáháⁿ váha-güedé cuendá-ndó. ⁴ Te Yá Ndiöxí ducaⁿ ní cachí-gá cundecu-güedé cuendá cada-güedé sá ñá túú nã cuu cundecu-ndo, te núú ñá túú quide váha-ndo ndècu-ndo te quiyùhú iní-ndó núú-güedé, chi ñá túú àúⁿ nã cuu ndècu ndihí-güedé tnúhu ndee iní dandòho-güedé nchaa ñáyiù ñá túú quide váha, chi Yá Ndiöxí ducaⁿ ní cachí-gá cundecu-güedé sá dúcáⁿ càda-güedé dandòho-güedé nchaa ñáyiù ñá túú quide váha. ⁵ Núú xíáⁿ ío xìni ñuhu-xi sá quindáá iní-ndó nchàa cue téé cùchiuⁿ, te ñá díú sá yùhú-ndó dandòho ñaha-güedé xii-ndo, chi cada-ndo sá cùtnùní iní-ndó sá cúú-xí ñⁿ sá váha. ⁶ Chi díu cuendá xíáⁿ sàcáⁿ-ndó díhúⁿ núú cuè téé cùchiuⁿ, te ducaⁿ chi Yá Ndiöxí ducaⁿ ní cachí-gá cundecu-güedé te díu-ná chiuⁿ ndeé-güedé ñùhú iní-güedé.

⁷ Te nacháhu-ndo nchàa sá tàù-ndó núú nchàa ñáyiù tàù-ndó núú-xi, te cuèi díhúⁿ tàù-ndó cuendá ñuhu-ndo núú cuè téé cùchiuⁿ àdi nágá díhúⁿ tàù-ndó núú-güedé te nacháhu-ndo

núú-güedé. Te ío-gá canehe-ndo sá yíñùhu núú nchàa ñáyiù cùnùu, te cáháⁿ váha-ndo ndihí-yu. ⁸ Te vá dácùidó-ndó ndùu nacháhu-ndo sá tàù-ndó núú tnàha ñáyiù-ndo, te cuu iní tnàhá-ndó ñⁿ ñⁿ-ndo. Te núú ducaⁿ quide-ndo ndecu-ndo ña, te quide-ndo nchaa nacuaá cáháⁿ tnúhu sá sánú ìchi ñaha xii-o nacuaá cada-o cùndecu-o. ⁹ Te duha ndùu tnúhu cáháⁿ Yá Ndiöxí cuendá nchaa sá vá cúú càda-o: “Nchaa nchòhó cue téé vá cáháⁿ ndihí-ndo ñáyiù dihi te núú ñá díú ñàdihí-ndó cùu-yu, te ducaⁿ-ni nchàa nchòhó cue ñáyiù dihi tucu vá cáháⁿ ndihí-ndo téé te núú ñá díú yì-ndo cuu-güedé, te vá cahní-ndó tnàha ñáyiù-ndo, te vá dúhú-ndó sá ndécú ndihí-yu, te vá dácàcu-ndo cuèchi neñùú, te vá xíhó-ndó sá ndécú ndihí tnaha ñáyiù-ndo”, nchaa xéhé cachí Yá Ndiöxí sá vá cúú càda-o. Te tnúhu-a quide-o ndihí nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núú quide-o ingá tnúhu sá cächí-xi: “Cuu iní-ndó nchàa tnaha ñáyiù-ndo dàtná cúú iní-ndó mèe-ndo”, duha cáháⁿ tnúhu-áⁿ. Te nchaa dava-gá quidè-ó te núú quide-o nacuaá cáháⁿ tnúhu-a. ¹⁰ Te nchaa ñáyiù cùu iní tnàha ñáyiù-xi te ñá túú quide úhú iní-yu tnàha ñáyiù-yu, te núú ducaⁿ cùu iní-yu tnàha ñáyiù-yu te quidè-yu nàcuáa cáháⁿ tnúhu sá sánú ìchi ñaha xii-o nacuaá cada-o cùndecu-o.

¹¹ Te ducaⁿ xìni ñuhu-xi cada-ndo chi sa ní cutnùní iní-ndó nàcuáa ta xica nduu cuáháⁿ ñuyíú-a, te ní sáá nduu sá ío xìni ñuhu-xi ndixi túu iní-ó càda-o nchaa nacuaá cáháⁿ Yá Ndiöxí, chi vitna sa ní cuyatni-gá nduu nàcuaca ñaha Xítóhó Jesucristú xii-o dácúúxí ndeé cùtnàhá ní sàndáá iní-ó tnúhu-gá. ¹² Te cada iní-ndó sá dàtná ñⁿ niú sá sá ta cuyatni túndaá, ducaⁿ sàtnahá-xi cùu ñuyíú yíca cuèchi-a chi sa ta cuyatni nduu quixi tucu Xítóhó Jesucristú, te núú xíáⁿ xíní ñuhu-xi

daña-o nchaa sá cuèhé sá dúhá te cada-o mée-ni sá vâha, te ducaⁿ te ni ìⁿ sá cuèhé sá dúhá vâ cúnùu-xi taxi tñuní ñáhá-xí xii-o, te ducaⁿ te vâ cúú-gá-ó dàtná ñáiyu ndècu núú nées chi cuu-ná-ó dàtná ñáiyu ndècu núú ditó. ¹³ Te cada-o nchaa nacuáa tàú-xi cunduu cundecu-o dàtná tàú-xi cada ñáiyu ndècu ichi Xítóhó Jesucristú, te vâ quìhíⁿ-ó víco cuehé vico duha, te vâ cúú-ó ñáiyu quìhu, te ni vâ càháⁿ ndìhi-o ñáiyu dìhí te núú ñá díú ñàdìhí-ó cùú-yu, te ducaⁿ-ni cuè ñáiyu dìhí tucu vâ càháⁿ ndìhí-yu téte te núú ñá díú yíⁿ-yu cùu-güedé, te ni vâ cùndècu-o ichi díí ìní, te ni vâ nàá-ó ndìhi tñaha ñáiyu-o, te ni vâ cúú-ó ñáiyu cuédú ìní. ¹⁴ Te vitna nchòhó daña-ndo mée-ndo sá Xítóhó Jesucristú ná chindee ñaha-gá xii-ndo càda váha-ndo cùndecu-ndo datná quidé mée-gá ndécú-gã, te vâ cání-gã ìní-ndó càda-ndo datná ní xóo cada-ndo cùtnàhá ní cunuu nchaa sá cuèhé sá dúhá ìní-ndó.

14

Vá cuatnùhu tñaha-o nacuáa ndècu-o ichi Xítóhó Jesucristú

¹ Te núú ìⁿ ñáiyu ndècu ichi Xítóhó Jesucristú ñá túú tècú tñuní váha-yu nacuáa cuìní Yá Ndiòxí cadá-yu, te queheⁿ cuendá-ni-ndó-yu te vâ ténàá tñáhá-ndó ndìhí-yu. ² Chi íó ñáiyu sàni ìní sá cúú vâha ìní Yá Ndiòxí sá cúú càxi-yu nàni ñihí-yu, te dava ñáiyu ñá túú cùtnuní váha ìní-yu nacuáa càháⁿ Yá Ndiòxí te mee-ni yúcu xéxi-yu. ³ Te ñáiyu xèxi nchaa núú sá ñihí-yu te vâ dáquèe tíhù-yu ñáiyu ñá túú xèxi, te ducaⁿ-ni ñáiyu ducaⁿ ñá túú xèxi-áⁿ vâ cuatnùhú-yu nchaa ñáiyu ducaⁿ xèxi nchaa núú sá ñihí-xi-áⁿ, chi tñáhá ñáiyu ducaⁿ xèxi nchaa núú sá ñihí-xi-áⁿ quèhéⁿ cuendá ñáhá Yá Ndiòxí xii-yu. ⁴ Te ñá túú ndècu ndìhi-o tñuhu ndee ìní cuatnùhu-o

ñáiyu xínu cuechi, chi mee ñáiyu cùu patródⁿ-yu tàú-yu càháⁿ-yu te núu cùndáá ñáiyu xínu cuechi núú-yu àdi ñá túú cùndáá-yu. Te ducaⁿ sãtnahá-xi cùu ñáiyu xínu cuechi núú Yá Ndiòxí, chi mee-gã càháⁿ-gã te núu nása quidé-yu, te diu-ni mee-gã cada te cùndáá-yu cundecú-yu núú-gã.

⁵ Te na càchí tñuhu tucu-í xii-ndo sá íó ñáiyu càchí sá íó dava nduu ío càhnu cuu-xi, te íó tucu dava ñáiyu càchí-yu sá ìⁿ-ni cuu-xi nchaa-ni nduu, te xini ñuhu-xi sá cùtnuní ndáá ìní-yu sá ndáá cúú-xí nacuáa càháⁿ-yu ìⁿ ìⁿ-yu. ⁶ Te ñáiyu cánehe íí dava nduu quidé-yu sá nêhè-yu sá yíñùhu núú Yá Ndiòxí, te ñáiyu càchí sá ìⁿ-ní cùu-xi nchaa-ni nduu quidé-yu sá nêhè-yu sá yíñùhu núú Yá Ndiòxí tñáhá-yu. Te diu-ni ducaⁿ sãtnahá-xi cùu nchaa ñáiyu xèxi nchaa nàni ñihí-yu, chi quidé-yu sá nêhè-yu sá yíñùhu núú Yá Ndiòxí, chi ndacáⁿ táhù-yu núú-gã cuendá nchaa sá ñihí-yu. Te diu-ni ducaⁿ sãtnahá-xi cùu nchaa ñáiyu ñá túú xèxi nchaa núú sá nchító-ó chi quidé-yu sá nêhè-yu sá yíñùhu núú Yá Ndiòxí, te ndacáⁿ táhù-yu núú-gã cuendá nchaa sá ñihí-yu.

⁷ Te nchoo cuèi vitna ndècu vívú-ó àdi cuèi na cùú-ó dico ñá díú cuendá mée-ó cùú-ó. ⁸ Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó diu-ni sá cúú-xí-gã, núu xíáⁿ cuèi vitna ndècu vívú-ó àdi cuèi na cùú-ó dico diu-ni Xítóhó Jesucristú cúú cuendá ñáhá-gã xii-o. ⁹ Chi Xítóhó Jesucristú ní xíhí-gã te ní ndoto-gã, te vitna cùu-gã Xítóhó nchaa ñáiyu, cuèi ñáiyu xíndecu vívú te cuèi ñáiyu ní xíhí.

¹⁰ Te nchòhó, ñá túú nduu váha-xi cuatnùhu tñaha-ndo nacuáa ndècu-ndo ichi Xítóhó Jesucristú, te ni ñá túú nduu váha-xi daquèe tíhù tñáhá-ndó, chi nchaa-o sáá nduu cùndecu-o núú Xítóhó Jesucristú,

te mee-gã cachí-gá te núu ní quide ndáá-ó àdi ñá túú ní quide ndáá-ó. ¹¹ Te Yá Ndiöxí cächí-gá núu tütú-gá:

Yúhú Yá Ndiöxí ndécù-í cächí tnúhu ndáá-í xii-ndõ sã nchàa ñáyiu ngüñí xití-yu núu-í, te nchaá-yu cáháⁿ-yu sá yúhú cùu-í Ndiöxí.

Duha cächí Yá Ndiöxí núu tütú-gá.

¹² Núu xiãⁿ nchaa-o ndí díiⁿ nàcanj tnúhu-o núu Yá Ndiöxí nchaa sá ní quide-o.

Vá dácuita nihnu tnàha-o

¹³ Núu xiãⁿ vá cuátnúhu tnaha-gá-ndó, te cada yica-ndo càda-ndo mee-ni sá vâha, te vá cáda-ndó ñⁿ sá ñà túú tàu-ndó càda-ndo cuendá sá vã cuíta nihnu dava ñáyiu ndècu ndihí-ndo ichi Xítohó Jesucristú. ¹⁴ Te yúhú ndécú ndihí-í Xítohó Jesucristú te cùtnuní ndáá iní-í sá ncháá núú sã cúú cãxi-o cuu-ni caxi-o te vá cúú cuèchi. Te ñáyiu sàni iní sá vá cúú cãxi-yu te núu na cãxi-yu te cuu cuèchi xií-yu. ¹⁵ Te nchòhó, te núu cuendá sá xéxi-ndó nchàa núú sã cúú cãxi-ndo, cuendá xiãⁿ ñá túú-gã cúú vâha iní nchaa ñáyiu ndècu ndihí-ndo ichi Xítohó Jesucristú, te ñá túú-gã quidé-ndó sã cúú ìní ndisa-ndõ-yu te núu ducaⁿ na càda-ndo, te núu ñⁿ sá sání iní-ndó cãxi-ndo te cùtnuní iní-ndó sã xiãⁿ cada-xi cuíta nihnu ñáyiu ndècu ndihí-ndo ichi Xítohó Jesucristú te vá cãxi-ndó xiãⁿ te núu ducaⁿ, chi Xítohó Jesucristú ní xíhí-gá cuendá-yu. ¹⁶ Te núu ñⁿ sá quidé-ndó sàni iní-ndó sã cúú-xí ñⁿ sá vâha, te ñáyiu cächí-yu sá ñà túú vâha te vá cáda-ndó cuendá sá vã cáháⁿ cuèhé-yu cuendá-ndó.

¹⁷ Te sá yíndàha ñaha Yá Ndiöxí xii-o xiãⁿ ío xini ñuhu-xi cada ndáá-ó cùndecu-o, te cùndecu vâha ndihí tnàha-o, te cudíí ìní-ó cùndecu-o chi Espiritú-gá ndécú ndihí ñaha-xi xii-o, te nchaa xéhé ïo-gá cùnùu dacúxí sã cóhó sã cãxi-ó. ¹⁸ Te nchaa ñáyiu ducaⁿ quide nchaa sá

ïo-gá xini ñuhu-xi, xinu cuechí-yu núu Xítohó Jesucristú, te sá dúcáⁿ quidé-yu te ndùu vétú ìní Yá Ndiöxí, te cùdíu-yu núu ñáyiu.

¹⁹ Te nchoo chí ná ndùcu-o nacuaá cada-o cùndecu ndihí vâha tnàha-o, te nducu tùcu-o nacuaá cada-o chìndee tnúhu tnàha-o nacuaá cuíta cundáá-gá-ó núu Xítohó Jesucristú quíhíⁿ. ²⁰ Te ñá díú sã cuendá ñⁿ núú sã xéxi-ó, te dàquee tíhú-ó sã vâha ní quide ñaha Yá Ndiöxí xii tnàha ñáyiu-o. Te na cächí tnúhu ndáá-í xii-ndo sã ncháá-ni núú sã cúú cãxi-o, te dícó-ni sá ñà túú ndùu váha-xi núu sã cuendá-ni sã cãxi-ó ñⁿ núú sã cúú cãxi-o cuíta nihnu ñⁿ tnàha ñáyiu-o.

²¹ Te váha-gá sá vã cãxi-ó cùñú te vá cóhó ndídí, te ni ñà túú nãgá cada-o te núu xito-o sã xiãⁿ cada te ngüíta tnàha ñáyiu-o càda-yu sá ñà túú vâha, àdi xito-o sã xiãⁿ cada te ngüíta-yu caní ñⁿ caní úú iní-yu cundecú-yu ichi Xítohó Jesucristú, te vá cùndáá-gá-yu núu-gã te núu ducaⁿ na càda-o. ²² Te núu ñⁿ sá vâha sàni iní-ó càda-o, te vá dátúu-o núú ñáyiu chi mee-ni núú Yá Ndiöxí dátúu-o. Te nchoo cùu-o ñáyiu ío vâha táhú-xi te núu cùtnuní ndáá iní-ó sã quidé ndáá-ó núu nãndí cùu sá quidé-ó, te cùtnuní iní-ó sã ñà díú ñⁿ cuèchi cùu-xi sá quidé-ó. ²³ Te núu nchoo sàni iní-ó sã quidé vâha-o àdi ñá túú quide váha-o òré xéxi-ó ñⁿ núú sã xéxi-ó, te cuu cuèchi xii-o te núu ducaⁿ na càda-o. Te ducaⁿ cùu cuèchi xii-o chí ñà túú ñⁿ-ni sá sání iní-ó, chí nchaa núú sã quidé-ó sàni ñⁿ sàni úú iní-ó núu váha-ni àdi ñá túú vâha-ni, te cuu cuèchi xii-o sã dúcáⁿ quide-o.

15

Cada-o sã vâha sá cúú-xí tnàha ñáyiu-o

¹ Te nchoo ñáyiu ío vâha sàndáá iní ñáhá xii Xítohó Jesucristú, xini ñuhu-xi cuáñaha-o tnúhu ndee ìní xii ñáyiu ñà túú ñihí ndéé cùndecu ichi-gá, te vá cáda-ó mèe-ni sá

cúu-xí mèe-o. ² Te cada-o sá vâha nâcuâa cuu vâha iní tnâha ñâyiu-o cuendá cuu-xi sá vâha sá cúu-xí-yu, te ducaⁿ cuíta níhí ndéé-gâ-yu quindáá iní-yu Xítohó Jesucristú. ³ Te Xítohó Jesucristú ñá túú ní quide-gá mee-ní sá cúu vâha iní mée-gâ, te ní quee ndáá-xi nâcuâa càháⁿ-xi núú tûtú Yá Ndióxi nâcuâa ní xâhaⁿ Xítohó Jesucristú xii-gá, te càchí-xi: “Nchaa ñâyiu cùu úhú iní ñáhá xii-n ní xícuèhé ní xíduha ñáhá-yu xii-í”, duha càháⁿ-xi núú tûtú Yá Ndióxi nâcuâa ní xâhaⁿ Xítohó Jesucristú xii-gá. ⁴ Te ndéé sanaha ní ngúndéé nchaa tnúhu Yá Ndióxi núú tûtú-gá, te ducaⁿ ní ngúndéé cuendá dacuâha-o, te tnúhu-áⁿ dánèhé ñáhá-xí cùnduu cahnu iní-ó cuèi nândi nâ yâha-o cùndecu-o ichi-gá, te sá xíí tnúhu-áⁿ te vá ndìhú-gá iní-ó cùndecu-o, te diu-ni sá xíí tnúhu-áⁿ cùndecu ndìhi-o tnúhu ndee iní. ⁵ Te Yá Ndióxi quidé-gá ndécú ndìhi-o tnúhu càhnu iní, te diu-ni-gá quidé-gá ñá túú ndìhú iní-ó ndècu-o. Te xicáⁿ táhù-í núú-gá sá díú-gá ná cádá te cuu ñⁿnuu-ndo cùndecu-ndo datná ní quide mee Xítohó Jesucristú cùtnâhá ní xíndecu-gá ñuyú-a. ⁶ Te ducaⁿ nchaa-ndo cuu ñⁿnuu-ndo, te daníhí tnáhá-ndó yócó tâchí-ndó te càchí-ndó sá ño càhnu cuu Yá Ndióxi Yáá cúú Tâta Xítohó Jesucristú.

Ñâyiu ñá túú cùu ñâyiu israél ní ndìhi-yu tnúhu Xítohó Jesucristú

⁷ Te núú xiáⁿ chí quéhéⁿ cuendá tnáhá datná ní quide Xítohó Jesucristú ní queheⁿ cuendá ñáhá-gâ xii-o, te núú ducaⁿ na càda-ndo te ño cuu càhnu Yá Ndióxi. ⁸ Te na càchí tnúhu-í xii-ndo sá Xítohó Jesucristú ní quixi-gá ní quide-gá sá vâha sá cúu-xí ñâyiu israél, te sá dúcáⁿ ní quide-gá xiáⁿ cùtnùní ndáá iní-ó sá Yá Ndióxi quidé-gá ñⁿ sá càháⁿ-gá, chí Xítohó Jesucristú ní quide-gá nchaa nâcuâa ní xâhaⁿ Yá Ndióxi xii cue ñani tnáhá-ó ní xíndecu ndéé sanaha. ⁹ Te ducaⁿ ní quide Xítohó

Jesucristú sá vâha sá cúu-xí ñâyiu israél cuendá nchaa ñâyiu ñá túú cùu ñâyiu israél cachí-yu sá ño càhnu cuu Yá Ndióxi, te ducaⁿ quèsahá-yu chí ño cùndahú iní ñáhá-gâ chindèe ñaha-gá xii-yu, te quee ndáá-xi nâcuâa càháⁿ-xi núú tûtú Yá Ndióxi núú càchí-xi:

Yúhú cachí-í sá ño càhnu cuu-n núú nchaa ñâyiu ñá túú cùu ñâyiu israél,

te cata-í ndudú chiñuhu ñaha-í xii-n. Duha càchí-xi núú tûtú-gá ¹⁰ Te càchí tucu-xi núú tûtú-gá:

Te nchòhó ñâyiu ñá túú cùu ñâyiu israél ño chí cúdíí iní ndìhi ñâyiu israél ñâyiu ndècu ndìhi-í.

Duha càchí-xi núú tûtú-gá. ¹¹ Te càchí tucu-xi ingá xichi núú tûtú-gá:

Nchaa nchòhó ñâyiu ñá túú cùu ñâyiu israél chí càháⁿ sá ño càhnu cuu Yá Ndióxi,

te nchaa ñâyiu na càháⁿ-yu sá ño càhnu cuu-gá.

Duha càchí-xi núú tûtú-gá. ¹² Te ndí Chàia càchí tucu ndíí núú tûtú Yá Ndióxi:

Coo ñⁿ ñani tnáhá ndíi Isái téé ní xíndecu ndéé sanaha,

te téé-áⁿ taxi tnùní-dé cue ñâyiu ñá túú cùu ñâyiu israél,

te ñâyiu-áⁿ cundee cùu cahnu iní ñáhá-yu xii-dé.

Duha ní càháⁿ ndíi Chàia càchí-xi núú tûtú-gá.

¹³ Te xicáⁿ táhù-í núú Yá Ndióxi Yáá ní taxi tnúhu ndee iní ndécú ndìhi-o sá mée-gâ ná càda ño cudíí iní-ndó cùndecu-ndo, te ducaⁿ ño vâha cundecu iní-ndó núú-gâ chí sàndáá iní-ndó-gâ, te ducaⁿ Espiritú-gá ná càda te uuⁿ-gá uuⁿ-gá cuíta ngúndecu ndìhi-ndo tnúhu ndee iní quíhíⁿ sá cádá vâha ñaha-gâ xii-ndo.

¹⁴ Te nchòhó ñâyiu ndècu ndìhi-í ichi Xítohó Jesucristú cùtnuní ndáá iní-í sá nchòhó ño vâha iní-ndó, te ducaⁿ ño vâha cùtnuní iní-ndó nchaa tnúhu vâha, te ducaⁿ ño dâsahú tnáhá-ndó nâcuâa cundecu-ndo.

15 Te dawa tnúhu ní chídó tnùn-í nùú tütú-a cùu-xi tnúhu sá ïo càháⁿ-í dóho-ndo, te ducaⁿ ní tee-í cuendá sá nchòhó dandacu iní-ndó tnúhu-áⁿ, te ní tee-í chi Yá Ndiöxí ní cundàhú iní ñáhá-gã xii-í ní taxi-gá chüⁿ quide-í ¹⁶ xínú cuèchi-í nùú Xítóhó Jesucristú càháⁿ-í tnúhu-gá nùú ñáyiú ñá túú cùu ñáyiú isràél. Te tnúhu-áⁿ cúu-xi tnúhu sá sánú ichi ñaha xii-o nacúaa naníhí tãhú-ó, te ducaⁿ dānehé-í ñáyiú ñá túú cùu ñáyiú isràél tnúhu Yá Ndiöxí cuendá cuú-yu dàtná ¹⁷ sá ndúú tãhú-gã, te Espíritú-gá quidé-xi cúu-yu ñáyiú cùdiu nùú-gã, te cùu váha iní ñáhá-gã xii-yu.

¹⁷ Te ïo váha cùu iní-í cuendá nchaa chüⁿ quide-í sá cúu-xi Yá Ndiöxí, chi Xítóhó Jesucristú ndécú ndihí ñaha-gá xii-í. ¹⁸ Te mee-ni nācuāa quide Xítóhó Jesucristú chindēe ñaha-gá xii-í xǎⁿ-ni càháⁿ-í, te sá dúcáⁿ quide-gá xǎⁿ ní sándáá iní cue ñáyiú ñá túú cùu ñáyiú isràél tnúhu-gá. Te ducaⁿ chi ní chindee ñaha-gá xii-í ní càháⁿ-í tnúhu-gá te ducaⁿ-ni ní chindee ñaha-gá xii-í ní quide-í titní nùú sá ñí quide-í nùú-yu ní xiní-yu. ¹⁹ Te Espíritú Yá Ndiöxí ní quide-xi ní quide-í titní nùú sá vã yõ tñahí ndàcu cada ní xiní-yu te ïo ní cuñúhu-yu. Te nchaa ñuú ní sáháⁿ-í ní càháⁿ-í tnúhu Xítóhó Jesucristú nùú ñáyiú cuèi ndéé ñuú Jerusàlén, te cuèi ndéé distritú Ilíricú, nùu nchaa ñuú-áⁿ ñí sáháⁿ-í ní càháⁿ-í nùú-yu tnúhu sá càháⁿ nācuāa naníhí tãhú-ó. ²⁰ Te ducaⁿ ïo ndūcu ndee-í càháⁿ-í tnúhu sá càháⁿ nācuāa naníhí tãhú-ó nùú vátá ñihí-gá-yu tnúhu cuendá Xítóhó Jesucristú, te ducaⁿ quide-í chi ñá túú cuèni-í quíhíⁿ-í càháⁿ-í tnúhu-gá nùú sá xīndecu ñáyiú càháⁿ tnúhu-gá. ²¹ Te quide-í nācuāa càháⁿ-xi nùú tütú Yá Ndiöxí nùú càchí-xi:

Ñáyiú vátá ñihí-gá tnúhu cuendá
Yáa quixi ñuyú te ñihí-yu,
te ducaⁿ tēcú tnùn-í-yu tnúhu-gá.

Duha càchí-xi nùú tütú-gá.

Té Pãblú cuèni-dé quíhíⁿ-dé ñuú Ròmá

²² Te sá dúcáⁿ càháⁿ-í tnúhu-gá nùu xǎⁿ ñá túú ní ndàcu-í quixi-í quixi coto ñaha-í xii-ndo cuèi ducaⁿ-ni sàni iní-í quixi coto ñaha-í. ²³ Te ní cuu titní cuía ducaⁿ-ni sàni iní-í quixi coto ñaha-í xii-ndo, te vitna ní ndihí-í nchaa iha ní càháⁿ-í tnúhu Xítóhó Jesucristú nùú nchaa ñáyiú. ²⁴ Nùu xǎⁿ sání iní-í sá ndūu na quíhíⁿ-í nacióⁿ Èspaña te yáha càháⁿ-í quini-í nása ndēcu-ndo, te dāvá-áⁿ ïo cudíⁿ iní-ó cūndecu tnaa-o, te ducaⁿ te òré nucúhuⁿ tucu-í ichi te cada ndee iní-ndó chindēe ñaha-ndo xii-í. ²⁵ Te vitna quíhíⁿ-í ñuú Jerusàlén quínehe-í sá ndúú tãhú ñáyiú ndēcu ichi Xítóhó Jesucristú xīndecu yácáⁿ. ²⁶ Te ñáyiú xīndecu ichi Xítóhó Jesucristú ndécú distritú Macèdoniá, ndihí distritú Acáyá ní cuu ²⁷ ñnūu-yu ní sacáⁿ tñahã-yu sá ndúú tãhú ñáyiú ndàhú xīndecu ichi-gá ndécú ñuú Jerusàlén. Te ducaⁿ tñahí ní cudíⁿ iní-yu cadá-yu, te ducaⁿ tñahí tàu-yu cadá-yu chindēe-yu ñáyiú xīndecu ñuú Jerusàlén. Te ñáyiú Macèdoniá ndihí ñáyiú Acáyá-áⁿ ñá túú cúu-yu ñáyiú isràél. Te ñáyiú xīndecu ñuú Jerusàlén cúu-yu mee-ni ñáyiú isràél, te ducaⁿ tàu-yu cadá-yu chi sá cuendá ñáyiú isràél-áⁿ ñí ñihí-yu tnúhu sá càháⁿ nācuāa naníhí tãhú-yu, nùu xǎⁿ tàu-yu chindee ñáhá-yu ndihí nchaa sá ñihí-yu. ²⁸ Te sátá ná yãha quínguáha cuendá-í-yu sá ndúú tãhú-yu, te ducaⁿ te dàtnùn-í quee-í quíhíⁿ-í nacióⁿ Èspaña, te ichi yáha-í yáha càháⁿ-í nùú ndécú-ndó. ²⁹ Te cūtnun-í ndáá iní-í sá òré ná quèxio-í nùú ndécú-ndó, te Xítóhó Jesucristú ïo chindee ñaha-gá xii-í càháⁿ-í tnúhu-gá nùú-ndó nācuāa ïo váha cūndecu-ndo ichi-gá.

³⁰ Te nchòhó ñáyiú ndēcu ndihí-í ichi Xítóhó Jesucristú càháⁿ ndàhú-í

núú-ndó sǎ ǎo chindee ñaha-ndo xii-í cáháⁿ ndihi-o Yá Ndióxi cuendá-í, te ducaⁿ càda-ndo chi ndècu ndihi-ndo Xítohó Jesucristú. Te Espíritú Yá Ndióxi quidé-xí cùu iní tnàhá-ó ìⁿ ìⁿ-o. ³¹ Te ǎo chí cǎcǎⁿ táhú núú Yá Ndióxi sǎ ná còto ñaha-gǎ xii-í, te ñá túú ná cada ñaha nchaa ñáyiú ñá túú sándáá iní ñáhá xii-gǎ xindecu distritú Jùdeá. Te cǎcǎⁿ táhú tùcu-ndo núú-gǎ sǎ ncháá sǎ cánèhe-í quíhíⁿ nduu táhú ñáyiú ndècu ichi-gǎ ndécú ñúú Jerusálén ǎo váha cuu iní-yu queheⁿ cuendá-yu. ³² Te ducaⁿ càda-ndo cuendá sǎ núú Yá Ndióxi ná cǎchí-gǎ te ǎo cudí iní-í òré quexìo-í núú ndécú-ndó, te ǎo váha cuu iní-í cundecu ndihi ñaha tnàí xii-ndo. ³³ Te vitna xicǎⁿ táhù-í núú Yá Ndióxi Yaá quidé ǎo váha cùu iní-ó ndècu-o sǎ ná chindee chitúu ñaha-gǎ xii-ndo nchaa-ndo. Te ducaⁿ na cùnduu.

16

Té Pǎblú quidé ndèe iní-dé ñáyiú ndècu ñúú Ròmá

¹ Te yúhú tendaha-í tá Fèbè quixi-xi núú ndécú-ndó, te tnàhá-xi ndècu-xi ichi Xítohó Jesucristú, te quíde-xi chiuⁿ Yá Ndióxi sǎ cúú-xí ñáyiú ndècu ichi Xítohó Jesucristú xindecu ñúú Céncreá. ² Te cuiní-í sǎ ǎo váha cuu iní-ndó queheⁿ cuendá-ndó-xí, chi ndècu ndihi-xi Xítohó Jesucristú, te cada-ndo nàcuáa tàú-xi cunduu dàtná tàú-xi cada ñáyiú ndècu ichi-gǎ, te ǎo chindee-ndo-xi te núú ná cúú sǎ xini ñúhu-xi, chi tnàhá-xi ǎo chindee-xi cue ñáyiú ndècu ichi Xítohó Jesucristú, te tnàhá yúhú ducaⁿ ǎo chindee-xi.

³ Te cúñaha-ndo ǎo na càda ndee iní té Àquilú ndihi ñadihí-dé tá Priscilá, chi ñáyiú-áⁿ ñí quíde chiúⁿ-í ndihi-yu ní quíde-ndí chiúⁿ Xítohó Jesucristú. ⁴ Chi mèe-yu ní cǎcu cuú-yu sǎ cuendá sǎ ñí dǎcǎcu ñàhá-yu xii-í sǎ ñí yáha-í, núú xíáⁿ ǎo ndàcǎⁿ táhù-í núú-yu, te ñá

díú-ní yúhú ducaⁿ ǎo ndàcǎⁿ táhù-í núú-yu chi tnàhá nchaa ñáyiú ñá túú cùu ñáyiú israhèl xindecu ichi-gǎ xindecu nchaa xichi ducaⁿ ǎo ndàcǎⁿ táhù-yu núú té Àquilú ndihi núú ñadihí-dé tá Priscilá. ⁵ Te cúñaha tùcu-ndo sǎ ǎo na càda ndee iní nchaa ñáyiú xindecu ichi Xítohó Jesucristú tàcǎ vehe té Àquilú ndihi tá Priscilá dǎcuahá-yu tnúhu-gǎ, te cúñaha tùcu-ndo sǎ ǎo na càda ndee iní té Epènetú chi tnàhá-dé ǎo ñúhu iní-í-dé, chi té-áⁿ cúú-dé téé díhna nuu ñí sándáá iní tnúhu Xítohó Jesucristú distritú Acáyá. ⁶ Te cúñaha tùcu-ndo sǎ ǎo na càda ndee iní tá Màriá xíchí ndécú ndihi-ndo, xíchí ǎo ndècu ndee xinu cuechi núú Xítohó Jesucristú. ⁷ Te cúñaha tùcu-ndo sǎ ǎo na càda ndee iní cue téé cùu ndi mee-í té Àndrónicú ndihi té Jùniás, chi tnàhá-güedé ní xíhi ndihi ñaha-güedé xii-í vecaá, te ǎo cùdiu-güedé núú nchaa cue téé ní táúchiúⁿ Jèsús cáháⁿ tnúhu-gǎ. Te díhna-gǎ-güedé ní sándáá iní-güedé tnúhu Xítohó Jesucristú dǎcúúxí yúhú.

⁸ Te cúñaha-ndo sǎ ná càda ndee iní té Àmpliás chi tnàhá-dé ǎo ñúhu iní-í-dé, te ndècu-dé tnàhá-dé ichi Xítohó Jesucristú. ⁹ Te cúñaha tùcu-ndo xii té Bǎnú téé cùndihi ñaha xii-o quíde-o chiuⁿ Xítohó Jesucristú sǎ ná càda ndee iní-dé, te cúñaha tùcu-ndo xii té Èstaquis sǎ ná càda ndee iní-dé chi tnàhá-dé ǎo ñúhu iní-í-dé. ¹⁰ Te cúñaha tùcu-ndo xii té Àpelés sǎ ǎo na càda ndee iní-dé, chi té-áⁿ ǎo váha cùndáá-dé núú Xítohó Jesucristú, te cúñaha tùcu-ndo xii ñáyiú xindecu vehe té Àristóbulú sǎ ǎo na càda ndee iní-yu. ¹¹ Te cúñaha-ndo xii té Heròdiòn téé cùu ndi mee-í sǎ ǎo na càda ndee iní-dé, te cúñaha-ndo xii ñáyiú ndècu ichi Xítohó Jesucristú xindecu vehe té Nàrcisú sǎ ǎo na càda ndee iní-yu. ¹² Te cúñaha-ndo xii tnàhá tá Trifená ndihi tá Trifosá sǎ ǎo na càda ndee iní-yu, chi tnàhá-yu quíde-yu chiúⁿ Xítohó Jesucristú. Te tnàhá tá Pèrsidá

xíchí ndécú ndíhi-o ichi Xítohó Jesucristú cúñaha-ndo xii-xi sá ïo na càda ndee iní-xi, chi tnàhá-xi ïo ndècu ndee-xi quide-xi chiuⁿ Xítohó Jesucristú. ¹³ Te cúñaha-ndo tnàhá té Rűfú tée ïo váha sàndáá iní tnúhu Xítohó Jesucristú sá ïo na càda ndee iní-dé ndíhi náná-dě, chi ñaha-áⁿ quidé iní-í sá cúú-áⁿ dàtná náná-í. ¹⁴ Te cúñaha-ndo sá ïo na càda ndee iní té Asincritú, ndíhi té Flègonté, ndíhi té Hěrmás, ndíhi té Pàtrobás, ndíhi té Hěrmés, ndíhi nchaa dava-gá cue ñáyiú ndècu ndíhi-o ichi Xítohó Jesucristú xíndecu ndíhi-güedé. ¹⁵ Te cúñaha tucu-ndo sá ïo na càda ndee iní té Filólogó, ndíhi tá Jülüá, ndíhi té Nèreú, ndíhi cúha té Nèreú, ndíhi tá Òlimpás, ndíhi nchaa dava-gá ñáyiú sàndáá iní tnúhu Xítohó Jesucristú xíndecu ndíhi-yu.

¹⁶ Te ïo yíñùhu cada ndee iní tnàhá-ndó ñⁿ ñⁿ-ndo. Te nchaa ñáyiú tàcá nchaa iha dàcuaha tnúhu Xítohó Jesucristú quidé ndèe iní ñáhá-yu xii-ndo.

¹⁷ Te nchòhó ñáyiú ndècu ndíhi-í ichi Xítohó Jesucristú càháⁿ-í dóho-ndo sá cadá cuendá-ndó núu ïó ñáyiú quide nacuaá vá cúú ñⁿnuu-ndo cundecu-ndo, chi ñáyiú-áⁿ sánú ichi ñahá-yu ñⁿ ichi ñá túú vǎha, chi ñá túú ñⁿ-ni cuu-xi tnúhu càháⁿ-yu ndíhi tnúhu sá ñí níhí-ndó ndècu ndíhi-ndo, te ñáyiú ducaⁿ xíquide vá ñíhí tnàhá-gá-ndó ndíhi-yu. ¹⁸ Chi ñáyiú-áⁿ ñá túú quidé-yu chiⁿ sá cúú-xí Xítohó Jesucristú, chi mee-ni sá cúú-xí mée-yu quidé-yu, te mee-ni nchàa tnúhu sá ïo vii ïo váha cuháⁿ càháⁿ-yu òré cuháⁿ-yu dándahú-yu nchaa ñáyiú ïo yáchí sàndáá iní-xi ñⁿ tnúhu. ¹⁹ Te nchaa ñáyiú ñíhí-yu tnúhu sá nchòhó sàndáá iní-ndó tnúhu Xítohó Jesucristú, núu xíⁿ ïo cùdíí iní-í. Te cuiní-í sá nchòhó ïo váha cutnúni iní-ndó nàcuáa cada-ndo mée-ni sá váha, te vá cání iní-ndó càda-ndo datná xíquide

nchaa ñáyiú ndècu ichi cuehé ichi duha. ²⁰ Te Yá Ndióxi Yáá quidé ïo váha cùu iní-ó ndècu-o ïo ndíhi cada-gá cuendá sá sàcúíhⁿ ñá túú-gá ná cada ñaha-xi xii-ndo, te xicáⁿ tǎhú-í núú Xítohó Jesucristú sá ïo na chindee chitúu ñaha-gá xii-ndo.

²¹ Te té Timúteú tée quide ndíhi-í chiⁿ Xítohó Jesucristú iha quide ndee iní ñáhá-dě xii-ndo, te tnàhá té Lúciú, ndíhi té Jàsón, ndíhi té Sosipàtér cue tée cùu ndi mee-í quidé ndèe iní ñáhá-güedé xii-ndo.

²² Te tnàhá yúhú té Tèrciú tée càdúha tutú-a cuendá té Pǎblú quidé ndèe iní ñáhá-í xii-ndo, chi ñⁿ-ni cùu-o ndíhi Xítohó Jesucristú.

²³ Te tnàhá té Gǎyú tée dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi núu-dé vehe tàcá ñáyiú dàcuahá-yu tnúhu Xítohó Jesucristú. Te tnàhá té Èrastú tée yíndaha díhúⁿ núú quidé ndèe iní ñáhá-dě xii-ndo, te tnàhá té Cuártú tée ndècu ndíhi-o ichi Xítohó Jesucristú quidé ndèe iní ñáhá-dě xii-ndo.

²⁴ Te xicáⁿ tǎhú-í núú Xítohó Jesucristú sá ïo na chindee chitúu ñaha-gá xii-ndo nchaa-ndo. Te ducaⁿ na cùnduu.

Cáháⁿ-ó sǎ ïo càhnu cuu Yá Ndióxi

²⁵ Te vitna chí ná cǎchí-ó sǎ ïo càhnu cuu Yá Ndióxi, chi mee-gǎ cada te ïo-gǎ cuita níhí ndéé-gǎ-ndó cùndecu-ndo ichi Xítohó Jesucristú dàtná cǎchí tnúhu sǎ càháⁿ nàcuáa naníhí tǎhú-ó, tnúhu sǎ dánèhé-í ñáyiú cuendá Xítohó Jesucristú, te nchaa tnúhu-a ñⁿ-ni cùu-xi ndíhi nchaa tnúhu sǎ ñí cǎchí Yá Ndióxi cuu yuhu ndéé cùtnàhá ní ngáva ñuyúú, te vitna ní quee túu-xi,

²⁶ chi mee Yá Ndióxi ní dátúu-gǎ núú-ó vitna, te càháⁿ-ndí nàcuáa ní chídó tnúni cue tée ní xóo càháⁿ tnúhu Yá Ndióxi ndéé sanaha. Te ducaⁿ tnúhu sǎ ndúú yuhu ni cuu ta xité nuu-xi ñíhí ñuyúú cuháⁿ, chi ducaⁿ ñí cǎchí Yá Ndióxi Yáá ndécú nchaa nduu nchaa quíú

cunduu cuèndá sá quíndáá iní ñáhá
ñăyiu xii-gá, te tñí-yu nchaa tñúhu
càháⁿ-gá.

²⁷ ¡Te ñⁿdii-ni Yá Ndiõxí cúú-gă
Yaá ío sàá sá xini tñùní-xi! ¡Te
nchaa-o chì ná càchí-ó sã ío càhnu
cúu-gá, chí ndècu ndihi-o Xitohó Je-
sucristú, te ducaⁿ-ni càda-o ni caa ni
quíhíⁿ! Te ducaⁿ na cùnduu. Te ío
chí cáda ndèe iní-nă vitna.

TUTÚ DÍHNA NUU NĪ CADÚHA TĒ PĀBLŪ QUÍHⁿ NDAHA ÑÁYIU ÑUÚ CÒRINTÚ

*Té Pāblū cādūha-dé tutú quíhⁿ
ndaha ñáyiū x̄ndecu ichi Xítoho Jesu-
crístú ndécú ñúú Còrintú*

¹ Yúhú té Pāblū ní cáháⁿ ñáhá Yá Ndióxi xii-í cuendá sá cáháⁿ-í tnúhu Xítoho Jesucristú núu ñáyiū, chi ducaⁿ nī cachí Yá Ndióxi cunduu. Te cādúha-í tutú-a ndihi té Sōstenés tēe ndēcu ndihi-o ichi Xítoho Jesucristú ² cuendá daquixi-í ndaha nchòhó ñáyiū x̄ndecu ichi Yá Ndióxi ndécú ñúú Còrintú, chi nchòhó cúu-ndo ñáyiū cūu cuendá Yá Ndióxi cuendá sá ndécú ndihi-ndo Xítoho Jesucristú. Te diu-ni-ndo cūu-ndo ñáyiū ní cáháⁿ ñáhá Yá Ndióxi cuendá cundecu yinúhu-ndo núu-gá, ndihi nchaá dāva-gá ñáyiū ndēcu nchaá xichi, ñáyiū cāchí sá ío cāhnu cuu Xítoho Jesucristú. Te Yaá-áⁿ cúu-gá Xítoho-yu, te diu-ni-gá cúu-gá Xítoho nchoo tūcu. ³ Te x̄icáⁿ táhù-í núu Tātá-ó Dútú Ndióxi ndihi núu Xítoho Jesucristú sá ndi nduú-gá ío na chindee chitúu ñaha-gá xii-ndo, te ío váha cuu iní-ndó cūndecu-ndo.

*Yá Ndióxi ío chindee ñaha-gá xii-o
cuendá sá ndécú-ó ndihi Xítoho Jesu-
crístú*

⁴ Te ducaⁿ-ni ío ndácáⁿ táhù-í núu Yá Ndióxi cuendá-ndó, chi mee-gá ío chindee chitúu ñaha-gá xii-ndo sá cuendá Xítoho Jesucristú. ⁵ Te cuendá sá ndécú-ndo ndihi Xítoho Jesucristú, núu x̄iáⁿ Yá Ndióxi ío chindee ñaha-gá xii-ndo sáá díquí-ndó nācuáa cáháⁿ-ndó, ndihi nācuáa cūtnuní iní-ndó, ⁶ chi tnúhu sá ni ñihí-ndó cuendá Xítoho Jesucristú ní quée-xi iní-ndó. ⁷ Te x̄iáⁿ núu nchaá sá váha ñá túú tnáhi cūmání xii-ndo chi Yá Ndióxi ío chindee ñaha-gá. Te ducaⁿ

quide-gá ñini nchòhó ni yūhu ni iní-ndó ndētu-ndo sáá nduu quixi tucu Xítoho Jesucristú. ⁸ Te Yá Ndióxi ducaⁿ-ni ío chindee ñaha-gá xii-ndo cuendá sá vā yō teñaha cuēchi nduu na quixi tucu Xítoho Jesucristú. ⁹ Te nchaá sá cáháⁿ Yá Ndióxi dacuití quide-gá, te diu-gá cúu-gá Yaá ní cáháⁿ ñáhá xii-ndo cuendá cuu ñⁿnuu-ndo ndihi Déhe-gá Xítoho Jesucristú Yaá cúu Xítoho-ó.

*Ñá túú cūu ñⁿnuu ñáyiū ndēcu ichi
Xítoho Jesucristú*

¹⁰ Te nchòhó ñáyiū ndēcu ndihi-í ichi Xítoho Jesucristú cáháⁿ-í dóho-ndo sá vā ndi dííⁿ cāni iní-ndó, te ío cuu ñⁿnuu-ndo cūndecu-ndo, te ñⁿ-ni cāni iní-ndó, te ñⁿ-ni cáda-ndo chi ducaⁿ cūnī-gá cunduu. ¹¹ Te duha cáháⁿ-í dóho nchòhó ñáyiū ndēcu ndihi-í ichi Xítoho Jesucristú, chi cue ñáyiū vehe té Clóe ní cachí tnúhu-yu xii-í sá ñá túú cūu ñⁿnuu-ndo ndecu-ndo. ¹² Te duha ndūu tnúhu ní ñihí-í nācuáa cūu ndecu-ndo, chi dāva-ndo cāchí-ndó: “Yúhú cūu-í cuendá té Pāblū.” Te dāva-ndo cāchí-ndó: “Yúhú cūu-í cuendá té Apolós.” Te dāva-ndo cāchí-ndó: “Yúhú cūu-í cuendá té Pélú.” Te dāva tucu-ndo cāchí-ndó: “Yúhú cūu-í cuendá Xítoho Jesucristú”, duha cāchí-ndó. ¹³ Te vá dúcáⁿ cáháⁿ-ndó chi ñá túú nā dāha Xítoho Jesucristú ndécú chi ñⁿdi-ni-gá. Te ñá díú yúhú té Pāblū ní x̄ihí-í núu cūrúxi sá cuendá-ndó, te ni ñá túú ní s̄andute-ndo cuendá sá yúhú cuu cuendá ñáhá-í xii-ndo. ¹⁴ Te táxāhu xii Yá Ndióxi chi ñá díú nchāa-ndo ni dacuandute-í, chi té Crispú-ni ndihi té Gáyú-ni ní dācuándute-í-güedé. ¹⁵ Te x̄iáⁿ núu vá cúu tnáhi cáháⁿ-ndó sá ni sandute-ndo sá cúu cuendá ñáhá-í xii-ndo. ¹⁶ Te ní ndacu tucu iní-í sá tnáhá tucu ñáyiū cūu ndi mee té Estēfanás ní dācuándute-í, te diu-ná ñáyiū-áⁿ ni s̄annu sá ñá túú-gá nágá ñáyiū ni dācuandute-í. ¹⁷ Te Xítoho Jesucristú ñá túú ní

tëndaha ñaha-gá xii-í sá dácuañdute-í ñáiyu, chi ní tendaha ñaha-gá xii-í sá cãháⁿ-í tnúhu-gá nũ-yu, tnúhu sá cãháⁿ-í ñacuáa naníhí tãhú-ó. Te ñã túú cãháⁿ-í dàtná cãháⁿ ñáiyu túha. Te ducaⁿ quide-í cuendá sá nchòhó quíndáá váha iní-ndó tnúhu sá cãháⁿ ñacuáa ní xihí Xítóhó Jesucristú núú cùrúxí. Chi núu na cãháⁿ-í dàtná cãháⁿ ñáiyu túha te nchòhó vá quíndáá iní-ndó tnúhu-áⁿ ñacuáa tàú-xi cunduu.

Sá cuendá Xítóhó Jesucristú cùtnùní iní-ó sã ïo càhnu cuu Yá Ndióxi

¹⁸ Te nchaa ñáiyu ta xíta nihnu cuáháⁿ càchí-yu sá ñã túú nãndíhi tnúhu sá cãháⁿ ñacuáa ní xihí Xítóhó Jesucristú núú cùrúxí, dico sá cúú-xí nchò ñáiyu sa ní naníhí tãhú, chi tnúhu-áⁿ cúú-xí ìⁿ tnúhu sá ñi taxi Yá Ndióxi ndécú ndíhi-o cuendá ndacu-gá cada-gá nchaa ñacuáa cuení-gá iní-ó, ¹⁹ te quèe ndáá-xi ñacuáa cãháⁿ-gá núú tütú-gá núú càchí-xi:

Yúhú cada-í te nchaa ñáiyu túha vá nãndíhi-gá nchaa sá xini tnùní-yu,

te nchaa ñáiyu ío váha sãá díquí-xi vá nãndíhi-gá nchaa ñacuáa sãni iní-yu.

Duha càchí Yá Ndióxi núú tütú-gá.

²⁰ Te xíãⁿ cùtnùní iní-ó sã nchãá ñáiyu sãni iní-xi sá ïo túha ndècu ñuyúú-a, ndíhi nchaa cue tée dàcuaha ñaha xií-yu nchaa tnúhu ní chídó tnùní ndíi Moisés, ndíhi nchaa ñáiyu ío váha sãá díquí-xi cãháⁿ cuendá nchaa sá ío ñuyúú-a, te nchaa ñáiyu-áⁿ càchí Yá Ndióxi sá ñã túú nãndíhi nchaa sá xini tnùní-yu sá cúú-xí-gã. ²¹ Te Yá Ndióxi ío váha cùtnùní iní-gá ñacuáa quide-gá, chi ñã túú dàña-gá cundecu ndíhi ñahá-yu xii-gá sá cuendá nchaa sá ñi sãá díquí mée-yu, te ducaⁿ quide-gá chi cuení-gá sá cundèdóho-yu tnúhu sá sãni iní-yu ñã túú nãndíhi. Te sá

cuendá tnúhu-áⁿ te naníhí tãhú-yu te núu na quíndáá iní ñãhá-yu xii-gá.

²² Te cue ñáiyu isràél cuení-yu quini-yu sá vã yõo tnàhí ndàcu cada, te cue ñáiyu grìégú nchicúⁿ nihnú-yu nchaa sá dácuaaha ñáiyu ío túha. ²³ Dico nchoo yìhi-o cãháⁿ-ó nũ ñáiyu sá Xítóhó Jesucristú ní xihí-gá núú cùrúxí. Te cue ñáiyu isràél ñã túú tnàhí tnàhá iní-yu cundèdóho-yu tnúhu-áⁿ. Te cue ñáiyu ñã túú cùu ñáiyu isràél càchí-yu sá ñã túú vèdana nãndíhi tnúhu-áⁿ. ²⁴ Dico sá cúú-xí nchãa ñáiyu ní cãháⁿ ñahá Yá Ndióxi chi cuéi cùú-yu ñáiyu isràél àdi ñã túú cùú-yu, dico ñáiyu-áⁿ càchí-yu sá sã cuendá Xítóhó Jesucristú cùtnùní iní-yu sá ïo càhnu cuu Yá Ndióxi te ndècu ndíhi-gá nchaa sá xini tnùní-gá. ²⁵ Te sá quidé Yá Ndióxi càchí ñáiyu ñuyúú-a sá ñã túú nãndíhi, dico xíãⁿ ío-gá nãndíhi dàcúúxí sá sãni iní mée-yu. Te sá ñi xihí Xítóhó Jesucristú núú cùrúxí, xíãⁿ càchí ñáiyu sá ñã túú ní ñihí ndéé Yá Ndióxi cada-gá sá ñi sani iní-gá cada-gá. Dico sá dúcãⁿ ñi quide Yá Ndióxi, xíãⁿ cúú-xí sã ío-gá ní ñihí ndéé-gã ní quide-gá ìⁿ sá ñi sani iní-gá dàcúúxí sã sãni iní mée ñáiyu ñuyúú-a. ²⁶ Te nchòhó ñáiyu ndècu ndíhi-í ichi Xítóhó Jesucristú, chí dãndàcu iní ñacuáa ndècu-ndo cùtnãhá ní cãháⁿ ñahá Yá Ndióxi xii-ndo, chí sacú-ni-ndo túha dàcúúxí ñáiyu ñã túú ndècu ichi-gá. Te ducaⁿ sãcú-ni-ndo tàxi tnuní-ndó, te ñiu-ni ducaⁿ sãcú-ndó nèhe ñáiyu sá yíñùhu núú-ndó. ²⁷ Te ñáiyu ñã túú ndècu ichi Yá Ndióxi càchí-yu sá ñã túú tnàhí túha dava-gá tnàha ñáiyú-yu, dico dava ñáiyu ñã túú túha-áⁿ cãháⁿ ñahá Yá Ndióxi xií-yu cundecú-yu ichi-gá, te cundecu ndíhi ñaha-gã xií-yu, te ducaⁿ dãndó canúú-yu nchaa ñáiyu càchí sá ïo túha. Te cãháⁿ tucu-gá ñáiyu

càchí dava-gá ñáyiú sá ñà túú tñàhí tàú cunuú cundecú-yu ichi-gá, te ducaⁿ cundecu ndihí ñaha-gá xii-yu, te dándóo canúú-yu nchaa ñáyiú càchí sá táxí tñuní. ²⁸ Te ducaⁿ Yá Ndióxi càháⁿ-gá ñáyiú ñà túú tñàhí cunuú cundecu ndihí-gá, ndihí ñáyiú quèe tíhú núú dáva-gá tñàha ñáyiú-xi, ndihí ñáyiú càchí-yu sá ñà túú vèdana nándíhi, nchaa ñáyiú-áⁿ càháⁿ-gá cundecu ndihí-gá, te ducaⁿ quide-gá cuendá dándóo canúú-yu nchaa ñáyiú càchí sá ïo cunuú. ²⁹ Te núú xiáⁿ ni ñáyiú vá cúú càchí-yu sá ïo càhnu cuú-yu núú Yá Ndióxi. ³⁰ Dico nchòhó chi mee Yá Ndióxi ní quide-gá ndécú-ndó ndihí Xítohó Jesucristú, te Xítohó Jesucristú ní quide-gá ní cutnùní iní-ó sá Yá Ndióxi cúú-gá Yaá ndécú ndihí nchaa sá xíní tñuní-gá. Te ñu-ni Xítohó Jesucristú ní quide-gá cuendá sá nchóó vǎ cundècu-gá cuéchi-o núú Yá Ndióxi, te ducaⁿ cundecu yíñuhu-o núú-gá, te nduu táhú-ó cundecu-o ndihí-gá ni caa ni quíhíⁿ. ³¹ Te sá dúcáⁿ quide-gá núú xiáⁿ xíní ñuhu-xi cada-o nacuaá càháⁿ-xi núú tütú Yá Ndióxi núú càchí-xi: “Vá càchí-ndó sá mée-ndó ïo càhnu cuu-ndo, chi càchí-ndó sá Yaá cúú Xítohó-ndó ïo càhnu cuu-gá”, duha càchí-xi núú tütú-gá.

2

Tnúhu sá càháⁿ nàcuáa ní cuu ní xíhí Xítohó Jesucristú núú cùrúxí

¹ Te nchòhó ñáyiú ndècu ndihí-í ichi Xítohó Jesucristú sa nàha-ndo sá cùtnàhá ní quixí-í ní càháⁿ-í tñuhu Yá Ndióxi núú-ndó, te ñà túú ní càháⁿ-í dàtná càháⁿ ñáyiú ío váha sàá díquí-xi, àdi datná càháⁿ ñáyiú ío túha. ² Chi cùtnàhá ní xíndecu ndihí ñaha-í xii-ndo chi ní sani iní-í sá mée-ní cuendá Xítohó Jesucristú càháⁿ-í núú-ndó ndihí nacuaá ní cuu ní xíhí-gá, te ñu ducaⁿ ní quide-í. ³ Te cùtnàhá ní quexìo-í núú ndécú-ndó te ni ñà cùtnùní iní-í nása cada-í ní cùu,

te ío ní quiyùhú iní-í ní càháⁿ-í tñuhu-gá núú-ndó. ⁴ Te cùtnàhá ní càháⁿ-í nàcuáa ndùu tñuhu Xítohó Jesucristú núú-ndó, te nàha-ndo sá Espiritú Yá Ndióxi ní chindee ñàha-xi xii-í ní càháⁿ-í tñuhu-gá núú-ndó, te tñuhu-áⁿ ní quèe-xi iní-ndó. Te ñà túú ní càháⁿ-í ñáyiú tñuhu càhnu núú-ndó tñuhu sá càháⁿ cue ñáyiú ío váha sàá díquí-xi. ⁵ Te ducaⁿ ní cuu cuendá sá nchòhó quíndáá iní-ndó tñuhu Yá Ndióxi chi ní quide-gá sá vǎha sá cúú-xí iní-ndó, te ñà díú sá cuendá tñuhu sá càháⁿ ñáyiú càchí sá ïo túha ducaⁿ ní sándáá iní-ndó tñuhu-gá.

Espiritú Yá Ndióxi quidé-xí cùtnuní iní-ó nàcuáa sàni iní-gá

⁶ Te nchoo càháⁿ-ó tñuhu càhnu núú ñáyiú sa ní níhí ndéé ndècu ichi Xítohó Jesucristú. Te tñuhu-áⁿ ñà túú càháⁿ ñáyiú ñà túú ndècu ichi-gá, te ni cuè téé yíndaha ñaha xii-yu ñà túú càháⁿ-güedé tñuhu-áⁿ chi cue téé-áⁿ naa-güedé. ⁷ Te tñuhu càhnu-áⁿ cúú-xí tñuhu Yá Ndióxi, te mee-gá ní càchí-gá ndéé cùtnàhá vátá ngáva-gá ñuyúú sá ncháá ñáyiú na quíndáá iní tñuhu-áⁿ te nduu táhú-yu cundecu-yu ndihí-gá núú ío váha caa ndecu-gá ni caa ni quíhíⁿ. Te tñuhu-áⁿ ndúú yùhu-xi ní cuu. ⁸ Te ni ñáyiú cue téé yíndaha cue ñáyiú ñuyúú-a ñà túú tècú tñuní-güedé tñuhu-áⁿ, chi núú dícó tècú tñuní-güedé tñuhu-áⁿ te vá catá càa-güedé Xítohó Jesucristú núú cùrúxí cahni ñaha-güedé xii-gá ní cùu. Te ñu-ni Yaá-áⁿ ío càhnu cuu-gá. ⁹ Dico ducaⁿ ní cuu chi ní quee ndáá-xi nàcuáa càháⁿ-xi núú tütú Yá Ndióxi núú càchí-xi:

Yá Ndióxi sa ní sani iní-gá nchaa nàcuáa cada-gá sá cúú-xí cuendá nchaa ñáyiú cùu iní ñàhá xii-gá.

Te sá ní sani iní-gá cada-gá cúú-xí sá vátá quíní-gá ñáyiú te ni vátá cùndèdóho-gá-yu,

te ni ñà túú tnàhí cùtnuní iní-yu nása cada-gá.

Duha cächí-xi núú tütú-gá. ¹⁰ Te mee Yá Ndiöxí ní cachí-gá sá Espiritú-gá cada-xi te nchoo cùtnuní iní-ó nchàa nacuáa sàni iní-gá cada-gá, núu xiáⁿ ducaⁿ tècú tnùnì-ó vitna, chi Espiritú-gá xiní-xi nchaandi túhú nacuáa sàni iní-gá cada-gá.

¹¹ Te ñá ñⁿ ñáyiu xiní ndáá-yu nacuáa sàni iní ingá ñáyiu, chi mee ñáyiu-án xiní ndáá-yu nchaa nacuáa sàni iní-yu. Te ducaⁿ sätnahá-xi cùu Yá Ndiöxí chi medi-ni Espiritú-gá xiní-xi nchaa nacuáa sàni iní-gá. ¹² Te nchoo chi Yá Ndiöxí ní taxi-gá Espiritú-gá ndécú ndìhi-o, te ñá díú ñùyú-a ducaⁿ ni quèe espíritú ní ngúndecu ndìhi-o. Te ducaⁿ ní taxi-gá Espiritú-gá ndécú ndìhi-o cuendá ducaⁿ cùtnuní iní-ó nacuáa ndùu nchaa sá vâha sá dicó ducaⁿ ní taxi-gá ndécú ndìhi-o. ¹³ Te cuendá nchaa sá vâha-án cãháⁿ-ndí, te cãháⁿ-ndí nacuáa dàcahu iní ñáhá Espiritú Yá Ndiöxí xii-ndo, te ñá túú cãháⁿ-ndí nacuáa càhu iní ñáyiu ñùyú-a cãháⁿ-yu, te diu-ni nchaa tnúhu dàcahu iní ñáhá Espiritú-gá xii-ndí cãháⁿ-ndí, diu-ni nchaa xiáⁿ dánèhé-ndí nchaa ñáyiu ndècu ndìhi tucu Espiritú-gá.

¹⁴ Te ñáyiu ñá túú ndècu ndìhi Espiritú Yá Ndiöxí ñá túú tnàhá iní-yu nacuáa ndùu tnúhu dàtecú tnúhu ñaha Espiritú-gá xií-yu, te ni ñá túú tècú tnùnì-yu, te cächí-yu sá ñá túú nàndìhi-xi. Te ducaⁿ chi mee-ni nchàa ñáyiu ndècu ndìhi Espiritú-gá tècú tnùnì-yu nacuáa ndùu tnúhu-án. ¹⁵ Te cue ñáyiu ducaⁿ ndècu ndìhi Espiritú Yá Ndiöxí cùtnuní ndáá iní-yu ná cúú nchàa sá vâha, te vá yõ ñⁿ xiní nchaa nacuáa sàni iní-yu. ¹⁶ Te núú tütú Yá Ndiöxí cächí-xi: “Vá yõ ñⁿ xiní nacuáa sàni iní Yá Ndiöxí, núu xiáⁿ vá yõ ñⁿ ndacu ná danèhé

ñáhá xii-gá”, duha cächí-xi núú tütú-gá. Te nchoo chi ñⁿ-ni sàni iní-ó ndìhi Xítóhó Jesucristú.

3

Cue té xiquide chiúⁿ Yá Ndiöxí

¹ Te nchòhó ñáyiu ndècu ndìhi-í ichi Xítóhó Jesucristú cächí tnúhu-í xii-ndo sá ñá ní ñìhi-í nacuáa cada-í cãháⁿ-í tnúhu-gá núú-ndó dàtná cãháⁿ-í núú nchàa ñáyiu quide nchaa nacuáa cãháⁿ Espiritú Yá Ndiöxí, chi ní cãháⁿ-í núú-ndó dàtná cãháⁿ-í núú nchàa ñáyiu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñáyiu íchí ní sándáá iní tnúhu Xítóhó Jesucristú, núu xiáⁿ ducaⁿ ní cãháⁿ-í núú-ndó. ² Te ní quide ñaha-í xii-ndo dàtná ñⁿ déhe yiquíⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo ñⁿ sá ñá túú tnàhí úhú tecú tnùnì-ndó, te ñá túú ní dànèhé ñáhà-í xii-ndo ñⁿ sá xító-í sá vâ tècú tnùnì-ndó. Te quide cuendá-í sá díú-ní dùcaⁿ vá tècú tnùnì-ndó ndèe vitna te núu na dànèhé ñáhà-í xii-ndo nchàa dava-gá tnúhu. ³ Te ducaⁿ chi quide-ni-ndo nacuáa sàni iní mée-ndó, chi ndècu-ni-ndo ichi cuédú iní, te nàa ndìhi tnàha-ni-ndo, te ñá túú tnàhí cùu ñⁿ-nuu-ndo ndecu-ndo. Te xiáⁿ cùtnuní sá mée-ní nchàa nacuáa sàni iní mée-ndó quide-ndo, te xiquide-ndo dàtná quidé nchàa ñáyiu ñá túú ndècu ichi Xítóhó Jesucristú. ⁴ Te dava-ndo cächí-ndó: “Yúhú cúú-í cuendá té Pãblú.” Te dava-ndo cächí-ndó: “Yúhú cúú-í cuendá té Àpolós”, duha cächí-ndó. Te sá dúcáⁿ cãháⁿ-ndó xiáⁿ cùtnuní sá quidé-ní-ndó mée-ni nchaa nacuáa sàni iní mée-ndó.

⁵ Te yúhú té Pãblú cächí tnúhu-í xii-ndo sá ñá túú cùnuu-í, te ni té Àpolós ñá túú cùnuu-dé chi dicó cue tée xinu cuechi núú Yá Ndiöxí cúú-ndí, te ní cãháⁿ-ndí

tnúhu-gá núú-ndó, núu xiǎⁿ ní sándáá iní-ndó. Te ndi díiⁿ ndi díiⁿ nduu chiuⁿ ní táhú Yá Ndióxi cada-ndí. ⁶ Te yúhú cúu-í datná ñⁿ téé chihí tatá chí dâcâháⁿ ñâhá-í xii-ndo túha-ndo ichi Yá Ndióxi. Te té Àpolós cúu-dé datná ñⁿ téé nâcuhñu chí téé-áⁿ ndécú-dé dánèhé ñâhá-dé xii-ndo tnúhu-gá. Te Yá Ndióxi cúu-gá Yaá quidé sàhnu tatá ní chihí-í-áⁿ, te duha càháⁿ-í chí diu-gá quidé-gá tá nihí ndéé-ndó ndècu-ndo ichi-gá. ⁷ Te núu xiǎⁿ ní téé chihí tatá te ní téé nâcuhñu ñâ túú cùnuu-güedé, dico Yá Ndióxi ío cùnuu-gá chí diu-gá quidé-gá xñu tatá-áⁿ te sàhnu-xi. ⁸ Te ñⁿ-ní cùu téé chihí tatá ndihí téé nâcuhñu. Te ducaⁿ sâtnahá-xi cùu nchúhú cue téé xíquide chiúⁿ Yá Ndióxi, te nâcuáa nduu chiuⁿ ní quide-ndí te ducaⁿ cunduú táhú taxi Yá Ndióxi nduu táhú-ndí. ⁹ Te nchòhó cúu-ndó datná ñⁿ xichi núú ní quée tatá, te nchúhú cúu ñⁿnuu-ndí quidé chiúⁿ-ndí xiáⁿ. Te ducaⁿ sâtnahá-xi cùu-ndo chí cùu cuendá ñâhá Yá Ndióxi xii-ndo, te nchúhú cúu ñⁿnuu-ndí quidé-ndí chiúⁿ-gá.

Te cùu tucu-ndo datná ñⁿ vehe sá vítná sáá, te ducaⁿ sâtnahá-xi cùu-ndo chí Yá Ndióxi quidé-gá tá sàhnu nihnu-ndo ichi-gá cuáháⁿ. ¹⁰ Te yúhú cúu-í datná ñⁿ téé cùnuu dâcaá vehe te ní tava-í cimièntú-xi, te díiⁿ cue téé véxi dâcaá-güedé ndóho, te ñⁿ ñⁿ cue téé-áⁿ ïo xñi ñuhu-xi cada cuendá-güedé nâcuáa dâcâa-güedé. Núu ducaⁿ sâtnahá-xi cùu yúhú chí Yá Ndióxi ní taxi-gá chiúⁿ quide-í te chindee ñâha-gá, chí díhna-gá-í ní quixi-í ní càháⁿ-í tnúhu Xítohó Jesucristú núú-ndó, te díiⁿ cue téé véxi dâcuaha ñâha-ná xii-ndo tnúhu-gá, te ñⁿ ñⁿ cue téé-áⁿ ïo xñi ñuhu-xi cada cuendá-güedé nâcuáa dâcuaha ñâha-güedé xii-ndo tnúhu-gá. ¹¹ Te cimièntú vehe-áⁿ cada iní-ó sá cúu-xí mèe Xítohó Jesucristú, te ducaⁿ chí yúhú ní dánèhé ñâhá-í xii-ndo ní ngúndecu

ndihí-ndo Xítohó Jesucristú, te vá yõo-gá cundecu ndihí-ndo chí ñⁿdii díi-ni-gá ndécú. ¹² Te dava cue téé dâcaá-güedé vehe váha te chihí-güedé díhúⁿ cuáaⁿ, ndihí díhúⁿ cuixíⁿ, ndihí yúú sã ïo vii càa. Te dava-güedé dâcâa-güedé vehe vítú, te dava-güedé dâcâa-güedé vehe ité, te dava-güedé dâcâa-güedé vehe tnuvixiⁿ. ¹³ Te sáá nduu te nchaa vehe-áⁿ càyú-xi, te vehe vítú-áⁿ ndihí vehe ité-áⁿ ndihí vehe tnuvixiⁿ-áⁿ ndoo ndoo càyú, te nchaa vehe váha-áⁿ vã càyú-xi cuèi na yãha ñuhú. Te nchaa cue téé ní dâcáá vèhe váha-áⁿ cada iní-ó sã cúu-güedé ñâyü ío váha quide chiúⁿ Yá Ndióxi. Te nchaa cue téé ní dâcáá vèhe vítú, ndihí cue téé ní dâcáá vèhe ité, ndihí cue téé ní dâcáá vèhe tnuvixiⁿ cada iní-ó sã cúu-güedé ñâyü ñâ túú cuñi cada chiúⁿ Yá Ndióxi nâcuáa tàú-xi cunduú. Te sáá nduu te cutnùni nâcuáa nduu chiúⁿ ní quide ñⁿ ñⁿ ñâyü, chí Yá Ndióxi càháⁿ-gá nâcuáa nduu chiúⁿ ní quide ñⁿ ñⁿ ñâyü ní quide chiúⁿ-gá. ¹⁴ Te cue ñâyü ío váha xíquide chiúⁿ Yá Ndióxi te cùdí chiúⁿ quidé-yu, te ñâyü-áⁿ nihí-yu sã ndúú táhú-yu. ¹⁵ Te cue ñâyü ñâ túú quide chiúⁿ Yá Ndióxi nâcuáa tàú-xi cunduú, te vá cùdí chiúⁿ ní quidé-yu chí cuíta te ndóo-ná-yu duha, dico mèe-yu chí naníhí táhú-yu.

¹⁶ Te yúhú càháⁿ-í dóho-ndo dândacu-í iní-ndó sã cúu-ndó datná vehe Yá Ndióxi, chí Espiritú-gá ndécú ndihí ñâha-xi xii-ndo. ¹⁷ Te núu yoo na dânaa ñâha xii nchòhó ñâyü cùu veñúhu-gá, te Yá Ndióxi danàa ñâha-gá xii ñâyü-áⁿ, te ducaⁿ càda-gá chí nchòhó cúu-ndó ñâyü cùu cuendá-gá.

¹⁸ Te vá dándàhú-ndó mèe-ndo sã ïo túha-ndo. Te núu ío dava-ndo sãni iní-ndó sã túha-ndo datná sãni ìní cue ñâyü ñâ túú ndècu ichi Yá Ndióxi, te cada-ndo sã cúu-ndó datná ñâyü ñâ túú tnàhí túha, te ducaⁿ te cuu ndisa-ndo ñâyü

túha sá cúu-xí Yă Ndiöxí. 19 Te nchaa sá xini tnuni nchaa ñáyiú cächí sá ïo túha ñá túú ndècu ichi Yă Ndiöxí ñá túú nändíhi-xi sá cúu-xí-gá. Te cächí-xi núú tütú-gá: “Nchaa ñáyiú cächí sá ïo túha te Yă Ndiöxí dandöo canúú ñáhá-gă xií-yu núú nchàa sá quidè-yu”, duha cächí-xi núú tütú-gá. 20 Te cächí tucu-xi inga xichi: “Yă Ndiöxí cútunúni iní-gá nchaa nàcuáa sàni iní ñáyiú cächí sá ïo túha. Te nchaa nàcuáa sàni iní-yu-áⁿ cächí-gá sá ñà túú vèdana nändíhi-xi”, duha cächí-xi núú tütú-gá. 21 Núú xíáⁿ cáháⁿ-í dóho-ndo sá vă cächí-ndó sá nchúhú cue téé dānehé ñáhá xì-ndo tnúhu-gá ïo cāhnu cuu-ndí. Te nchaa sá ïo ñuyú-a cùu-xi sá vāha sá cúu-xí-ndó. 22 Te cuèi yúhú ndíhi té Àpolós ndíhi té Pelú ndécú-ndí sá cúu-xí-ndó, te cuèi nchaa sá ïo ñuyú-a te cuèi nchaa nduu ndècu-ndo te cuèi sá cùu-ndó dīco nchaa cùu-xi sá vāha sá cúu-xí-ndó. Te cuèi nchaa sá ndécú tnāví, te cuèi nchaa sá cóo ndèé cuèé-gá nchaa cùu-xi sá vāha sá cúu-xí-ndó. 23 Te mee-ndo ndècu-ndo sá cúu-xi Xitohó Jesucristú, te mee Xitohó Jesucristú ndécú-gá sá cúu-xi Yă Ndiöxí.

4

Nàcuáa ndiú chiúⁿ quide cue téé ní táuchúúⁿ Xitohó Jesucristú cáháⁿ tnúhu-gá

1 Te cada cuendá-ndó sá nchúhú dīcó-ni cue téé xīnu cuechí núú Xitohó Jesucristú cúu-ndí, te chiúⁿ-án ní taxi Yă Ndiöxí quidè-ndí cáháⁿ-ndí tnúhu sá ní cächí-gá yíyùhu ni cuu. 2 Te xini ñuhu-xi sá ncháá ñáyiú ducaⁿ ní sáñaha Yă Ndiöxí chiúⁿ quidè-yu cada ndáá-yu cadá-yu chiúⁿ-án. 3 Te yúhú ñá túú quide cuendá-í núú nása ndúu tnúhu cáháⁿ-ndó cuendá-í núú cùu-í téé vāha àdi ñá túú cùu-í. Te diu-ni ducaⁿ ñà túú quide cuendá-í núú nása-gá cáháⁿ nchaa dāva-gá

ñáyiú cuendá-í. Te ni mèe-í ñá túú cáháⁿ-í núú cùu-í téé vāha àdi ñá túú cùu-í. 4 Te sànuu ini-í sá ñà túú nà cùmāni-í núú Yă Ndiöxí, dīco ñá dīú sá xīáⁿ te cächí-í sá ñà túú cuèchi-í ndécú núu-gá, chí mee-gá nāhá ndāá-gá te núu nása quide-í ndécú-í. 5 Te nchòhó vā cáháⁿ-gá-ndó sá ñà túú cundáá ñáyiú núú Yă Ndiöxí, chí vātá sàá-gá nduu cundáá cuèchi-yu. Te na sàá nduu quixi tucu Xitohó Jesucristú te dāvā-áⁿ dātúu-gá nchaa sá quidè-yu, nchaa sá ñà túú xini-ó quidè-yu vitna, te ducaⁿ dātúu-gá nchaa nàcuáa sàni iní-yu. Te Yă Ndiöxí cáháⁿ vāha-gá cuendá nchaa ñáyiú ní quide vāha.

6 Te nchòhó ñáyiú ndècu ndíhi-í ichi Xitohó Jesucristú, cācunehe-í té Àpolós ndíhi yúhú núu-ndó dānehé ñáhá-í xii-ndo nàcuáa cada-ndo cuendá ducaⁿ cùu-xi ñⁿ sá vāha sá cúu-xí-ndó, ndíhi cuendá sá nchòhó canchicúⁿ nihnu-ndo cada-ndo mee-ni nchaa nàcuáa yòdo tnuní núú tütú Yă Ndiöxí. Te ducaⁿ te vā cächí-ndó sá ñⁿ téé cáháⁿ tnúhu Yă Ndiöxí ïo-gá cāhnu cuu-dé dācúxí ingá-dé. 7 Te nchòhó vā cächí-ndó sá ïo-gá cúnúu-ndo dācúxí dāva-gá ñáyiú chí Yă Ndiöxí ní quide-gá ní ngūndecu ndíhi-ndo nchaa sá xini tnuní-ndó. Te mee-gá ducaⁿ ní quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mēé-ndó ní quide-ndo dūcaⁿ ní ngūndecu ndíhi-ndo nchaa sá xini tnuní-ndó.

8 Te nchòhó quidè-ndó sá ñà túú tnāhí-gá ná cùmāni-ndó núú Yă Ndiöxí, te quide-ndo sá ní ñihí-ndó nchaa sá cuini-ndó núu-gá ndécú ndíhi-ndo, te sànuu sá cúu-nā-ndó dātá cue téé yindaha ñáyiú, te nchúhú ñá túú cùu ñⁿnuu ndíhi ñaha-ndí xii-ndo quindaha ndíhi ñaha-ndí xii-ndo ñáyiú, jte vāha-ni te núu dīcó ndisa sá yindāha-ndo ñáyiú chí tnāhá nchúhú ní tnāhá ndíhi ñaha-ndí

xii-ndo quindaha-ó-yu te núu dícó cúú-xí ìⁿ sá ndàá dico ñáhá! ⁹ Te yúhú quidé cuèndá-í sá nchúhú cue téé ní táúchíúⁿ Xítóhó Jesucristú cáháⁿ tnúhu-gá núú ñáiyu ní cachí Yá Ndióxi sá cúú-ndí cue téé ñá túú nàndíhi sá cúú-xí dàva-gá ñáiyu. Te ní cachí tucu-gá sá cúú-ndí dàtná cue ñáiyu sa ní tnahá òré cuú-xi quíhíⁿ nacháhu cuéchi-xi, te nchaa ñáiyu cùñúhu ñáhá-yu xii-ndí sá dúcáⁿ ndòho-ndí, te tnahá nchaa espíritú cùñúhu ñaha-xi xii-ndí. ¹⁰ Te cuèndá sá xínú cuéchi-ndí núú Xítóhó Jesucristú, xiáⁿ cúú-ndí dàtná cue téé ñá túú vèdana nàndíhi sá cúú-xí ñáiyu. Te nchòhó quidé-ndó sá cúú-ndó ñáiyu ío túha ndècu ndíhi Xítóhó Jesucristú. Te ñáiyu càchí-yu sá nchúhú cúú-ndí cue téé ñá túú ndàcu cada ìⁿ sá cadá sá cúú-xí Yá Ndióxi. Te nchòhó quidé-ndó sá cúú-ndó ñáiyu ío vâha ndàcu quide ìⁿ sá sání iní-ndó sá cúú-xí-gá. Te cue ñáiyu dàquee tíhú ñáhâ-yu xii-ndí, te nchòhó néhé-yu sá yíñúhu núú-ndó. ¹¹ Te nchúhú chí nchaa-ni nduu ío ndòho-ndí, chí xihí-ndí docó, yíchí-ndí ndute, te ñá túú dǒo-ndí, te nchaa ñáiyu quide úhú ñáhâ-yu xii-ndí, te ní vèhe-ndí ñá túú ndèé cáá cùndecu-ndí. ¹² Te ío ndòho-ndí quidé chiúⁿ-ndí nihí-ndí sá xéxi-ndí. Te cue ñáiyu xícuehé ñáhâ-yu xii-ndí dico xicáⁿ táhú-ndí núú Yá Ndióxi cuèndá-yu, te ñá cúú tnahí quini ndeé ñáhâ-yu xii-ndí dico quide cahnu iní-ndí nchaa sá quidé ñáhâ-yu. ¹³ Te mee-ni tnúhu cuèhé tnúhu duha càháⁿ-yu cuèndá-ndí dico sàcahnu iní-ndí te dāsahú-ndí-yu mee-ni tnúhu váha. Te càchí-yu sá cúú-ndí dàtná ìⁿ sá ñá túú-gá vèdana nàndíhi, te nchaa-ni nduu ducaⁿ càháⁿ-yu xáhâⁿ-yu xii-ndí.

¹⁴ Te yúhú duha càháⁿ-í núú tütú-a dāsahú ñáhâ-í xii-ndo, dico

ñá díú tnúhu sá cúú càháⁿ núú-ndó càháⁿ-í. Te duha càháⁿ-í dóho-ndo chí quide iní-í sá sùúni dàtná déhe mee-í cúú-ndó chí ío cùu iní ñáhâ-í xii-ndo. ¹⁵ Te nchaa-o ndècu-o ichi Xítóhó Jesucristú vitna, dico yúhú cúú-í téé díhna nuu ní dánèhé ñáhâ xii-ndo nacuaa nduu tnúhu sá càháⁿ nàcuáa naníhí táhú-ó, núu xiáⁿ cúú-í dàtná tātá-ndó. Te cuèi vâi vihi cue téé na quixi-güedé danèhé ñáhâ-güedé xii-ndo tnúhu-gá dico ìⁿ di-ni yúhú cúú-í téé díhna nuu-gá ní dánèhé ñáhâ xii-ndo tnúhu-gá. ¹⁶ Núu xiáⁿ càháⁿ-í dóho-ndo sá cànchícúⁿ nihnu-ndo càda-ndo nchaa nacuaa quide-í.

¹⁷ Te xiáⁿ núu sa ní tendaha-í té Timutéu véxi coto ñaha-dé xii-ndo, te téé-áⁿ ío cùu iní-í-dé te quide ndáá-dé, te cùu-dé dàtná déhe-í chí yúhú ní sanu ichi-í-dé ichi Xítóhó Jesucristú, te téé-áⁿ cachí tnúhu-dé xii-ndo nchaa nacuaa quide-í ndécú-í ichi-gá. Te diu-ni nàcuáa na càchí tnúhu-dé-áⁿ diu-ni ducaⁿ quide-í nchaa xichi núú tàcá ñáiyu dàcuaha tnúhu Xítóhó Jesucristú. ¹⁸ Te dava nchòhó ío quide cahnu-ndo mee-ndo chí sání iní-ndó sá vâ quixí-gá-í quixi coto ñaha-í xii-ndo. ¹⁹ Dico núu mee Yá Ndióxi ná càchí-gá te ío ndíhi quixi coto ñaha-í xii-ndo, te dàvâ-áⁿ quini-í te núu nása quide nchaa ñáiyu ducaⁿ ío xíquide cahnu mee-xi-áⁿ ndécú-yu ichi Xítóhó Jesucristú. Te vá cadá cuèndá-í tnúhu càháⁿ-yu chí chiúⁿ quidé-yu cada cuèndá-í. ²⁰ Te vitna yindaha ñaha Yá Ndióxi xii-o, te chindee ñaha-gá xii-o quide-o nchaa sá vâha sání iní-ó quide-o te ñá díú mèe-ni sá càháⁿ-ó. ²¹ Te ío chí cání ìni núu ndédacáa sá vâha-gá cada-í òré ná quéxió-í núú ndécú-ndó, núu sá ténâá ñáhâ-í xii-ndo àdi sá càháⁿ ndíhi ñaha-í xii-ndo ndíhi tnúhu vii tnúhu váha nàcuáa cutnùni iní-ndó sá cúú iní ñáhâ-í xii-ndo.

5

Èⁿ cuéchi cahnu vihi

1 Te yúhu sa ní níhí ndǎá-í tnúhu nàcuáa cùu ndecu-ndo, chí ìⁿ té ndècu ndìhi-ndo ndeca-dé nǎná chàhá-dé. Te xǎⁿ cúú-xí ìⁿ cuèchi càhnu víhi, chí ndéé nchaa ñáiyu ñá túú ndècu ichi Yá Ndióxi càchí-yu sá vǎ cúú tnáhí ducaⁿ càda-o. 2 ¡Te nchòhó ío quide cahnu-ni-ndo mee-ndo xindecu-ndo! ¡Te tàú-ndó sǎ cùndiyí-ndó ndìxi cuèchi iní-ndó sǎ dúcáⁿ cùu ndecu-ndo ni cuu! Te té ducaⁿ quide-áⁿ xini ñuhu-xi sá vǎ dáñá-gǎ-ndó nihí tnáhá ndìhi ñaha-dé xii-ndo ni cùu dico ñá túú dùcaⁿ quide-ndo. 3 Te yúhú ñá túú ndècu ndìhi ñaha-í xii-ndo dico datná tnúhu sá ndécú ndìhi ñaha-í xii-ndo chí ducaⁿ-ni ío ñuhu iní ñáhà-í xii-ndo. Te yúhú càchí-í sá náchǎhu té-áⁿ cuèchi-dé sá dúcáⁿ quide-dé, te ñiu-ni ducaⁿ càháⁿ-í núú-ndó te núu dicó ndécú ndìhi ñaha-í xii-ndo. 4 Te òré nǎtácá-ndó càháⁿ ndìhi-ndo Yá Ndióxi te ñiu-ni Xítóhó Jesucristú ñá túú dáña ndéé-gǎ chindèe ñaha-gǎ xii-ndo, te òré-áⁿ cada-ndo nàcuáa cuini Xítóhó Jesucristú cada-ndo, te cada iní-ndó sǎ tnáhá-í ndécú ndìhi ñaha-í xii-ndo. 5 Chí tàú-xi sá té ducaⁿ quide-áⁿ daquèe tǎhú-ndó-dé, te ducaⁿ te sácuihná dandòho ñaha-xi xii-dé cuèi na cúú-dé, dico na sǎá nduu te nduu tǎhú-dé cundecu-dé ndìhi Xítóhó Jesucristú.

6 Te nchòhó ñá túú ndèu váha-xi sǎ càchí-ndó sǎ ío càhnu cuu-ndo. Te xini-ndó sǎ cuèi luha-ni levadurá ná quǎhu yuchi cuáha pǎá dándaa-xi cuèi luha-ni nà quǎhu te nihí-ni yuchi sǎháⁿ ndoho-xi. Te ducaⁿ sǎtnáhá-xi cùu nchohó chí núu ndècu ndìhi-ndo ìⁿ ñáiyu quide sǎ ñá túú vǎha te nchaa-ndo ñá túú-gǎ cúú vǎha iní-ndó ndècu-ndo. 7 Te xini ñuhu-xi sǎ cadá-ndó datná quide cuè ñáiyu quide vico pascuá, chí ñá túú chíhi-yu levadurá yuchi cuáha pǎá xéxi-yu nduu quide-yu vico-áⁿ. Te sǎ quǎhu pǎá-áⁿ cada iní-ó sǎ cúú-xí nchàa sǎ cuèhé sǎ dúhá ñí xóo cada-ndo. Te vǎ cadá-gǎ-ndó ñí ìⁿ sǎ cuèhé sǎ dúhá,

te ducaⁿ te cuu-ndo ñáiyu váha chí sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pascuá cue quiti-áⁿ cada iní-ó sǎ cúú-güedi datná Xítóhó Jesucristú nàcuáa ní xihí-gǎ núú cùrúxi. 8 Te núu xǎⁿ xini ñuhu-xi sǎ vǎ cadá-gǎ-ndó ñí ìⁿ sǎ cuèhé sǎ dúhá sǎ ñí xóo cada-ndo, te ni vǎ cúhúⁿ-gǎ iní-ndó te ni vǎ cadá-gǎ-ndó, te ni yùhu ñí iní-ná-ndó càda-ndo mee-ni sǎ vǎha.

9 Te tutú sǎ sà ní dáquixi-í ndaha-ndo ñí cachí-í sǎ vǎ nihí tnáhá-ndó ndìhi cue ñáiyu ndècu ichi díí iní. 10 Te sǎ dúcáⁿ càháⁿ-í núú tütú ní dáquixi-í ndaha-ndo te vǎ cáni iní-ndó sǎ yúhú càchí-í sǎ vǎ cúú-gǎ tnáhá tnúhu-ndo ndìhi cue ñáiyu ndècu ichi cuehé ichi duha, ndìhi ñáiyu ndècu ichi díí iní, ndìhi ñáiyu xiho nchaa sǎ ío ñuyíú, ndìhi ñáiyu dùhu sǎ ndécú ndìhi tnaha ñáiyu-xi, ndìhi ñáiyu quide cahnu sǎ càchí-yu cùu ndióxi te ñá ndǎá sǎ ndiòxi cúú-xí chí dicó cue té ñuyíú-a ní cadúha nchaa xǎⁿ, chí núu ducaⁿ na càda-ndo vǎ tnáhá tnúhu-gǎ-ndó ndìhi-yu te xini ñuhu-xi sǎ vǎ cùndècu-gǎ-ndó núú ndécú-yu. 11 Te ñá túú dùcaⁿ quee-xi nacuáa càháⁿ-í núú tütú-í, chí yúhú càchí-í sǎ vǎ cúú tnáhá tnúhu-ndo ndìhi ñáiyu càchí sǎ ndécú ichi Xítóhó Jesucristú te ñá ndǎá sǎ ndécú-yu ichi-gǎ. Te núu cùú-yu ñáiyu ndècu ichi díí iní, àdi cuú-yu ñáiyu xiho nchaa sǎ ío ñuyíú-a, àdi cuú-yu ñáiyu quide cahnu nchaa sǎ càchí-yu cùu ndióxi te ñá ndǎá chí dicó cue té ñuyíú-a ní cadúha nchaa xǎⁿ, àdi cuú-yu ñáiyu yiti yùhu-xi, àdi cuú-yu ñáiyu quǎhu, àdi cuú-yu ñáiyu dùhu sǎ ndécú ndìhi tnaha ñáiyu-xi, te nchaa ñáiyu ducaⁿ càchí sǎ ndécú ichi-gǎ te ñá ndǎá te ducaⁿ xǎquide-yu, te ni vǎ cúú nihí tnáhá-ndó ndìhi-yu caxi-ndo

ndihí-yu. ¹²⁻¹³ Te ñá díú yǔhú cùu-í téé cáháⁿ cuendá nchaa ñáiyu ñá túú ndècu ichi Xítohó Jesucristú nũu quide ndáá-yu àdi ñá túú quide ndáá-yu ndècú-yu, chi mee Yá Ndiòxí cáháⁿ-gá te núu nása quidé-yu ndècú-yu. Dico nchòhó chi tàú-ndó cada cuendá-ndó nũu nása quide cue ñáiyu ndècu ndihí-ndo ichi Xítohó Jesucristú. Núu xǎⁿ xíní ñũhu-xi daquee tíhú-ndó tée ducaⁿ ñá túú quide váha ndècu ndihí-ndo-áⁿ, te vá dáñá-gá-ndó nihí tnáhá ndihí ñaha-dé xii-ndo.

6

Nàcuáa tàú-xi cada ñáiyu ndècu ichi Xítohó Jesucristú te núu ñá túú ndècu ndihí váha tnáhá-yu

¹ Te dava nchòhó òré ñá túú ndècu ndihí váha tnáha-ndo te cùyi-ndo cuáháⁿ-ndó nũu cuè téé cùchiuⁿ ñá túú ndècu ichi Xítohó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núú cuè téé ndècu ichi-gá ducaⁿ tàú-ndó quǎhíⁿ-ndó càcáⁿ cuéchi-ndo. ² Te nchòhó sa ñaha-ndo sá ncháá ñáiyu cùu cuendá Yá Ndiòxí sáá nduu cáháⁿ-yu te núu ní quide ndáá nchaa dava-gá ñáiyu àdi ñá túú ní quide ndáá-yu, te nchòhó tnáhá-ndó cùu-ndo ñáiyu ducaⁿ cáháⁿ, te núu ducaⁿ te cutnùní iní-ndó sá ndácú-ndó cada ndáá-ndó ncháa cuéchi sá ñá túú úhú cundáá vitna ndècu-ndo ñuyúú-a. ³ Te nchòhó sa ñaha-ndo sá ncháá ndéé cue espíritú xínú cuéchi núú Yá Ndiòxí sáá nduu cáháⁿ-ó te núu nása quide-xi ndecu-xi. ¡Núu xǎⁿ cùtnùní iní-ó sá úúⁿ-gá ndacu-o cada ndáá-ó ncháa cuéchi sá íó ñuyúú-a! ⁴ Te núu íó dava-ndo íó nása cùu ndecu-ndo te xínáá-ndó, te vá quǎhíⁿ-ndó càcáⁿ cuéchi-ndo nũu cuè téé ndèhe-ndo sá ñá túú ndècu-güedé ichi Yá Ndiòxí, dico nchòhó chi da núú cuè téé-áⁿ cuáháⁿ-ndó sàcáⁿ cuéchi-ndo. ⁵ Te duha cáháⁿ-í cuendá cuahaⁿ núú-ndó chi ñá túú quide váha-ndo

sá dúcáⁿ quide-ndo. ¿Te náa dìcò-ñá ñá túú tnáhi ìⁿ téé cùtnùní iní-xi nàcuáa cada ndáá cuéchi-ndo ndècu ndihí-ndo ichi Xítohó Jesucristú-áⁿ?

⁶ Te nchòhó, ñá túú quide váha-ndo, chi dava-ndo cuáháⁿ-ndó nũu cuè téé ñá túú ndècu ichi Xítohó Jesucristú sàcáⁿ cuéchi-ndo cuendá dava-gá cue ñáiyu ndècu ndihí-ndo ichi-gá.

⁷ Te ñá túú quide váha-ndo sá dúcáⁿ náa ndihí tnáha-ndo te cuáháⁿ-ndó sàcáⁿ cuéchi-ndo, te váha-gá sá cadá càhnu iní-ndó cuèi nándi na cada ñaha tnaha ñáiyu-ndo xii-ndo cuèi dùhú-yu sá ndécú ndihí-ndo dico cada càhnu-ni iní-ndó. ⁸ Dico nchòhó chi ñá túú quide cahnu iní-ndó chi da uuⁿ-gá ñá túú quide váha-ndo sàcúú-xi tnáha ñáiyu-ndo, chi cùu úhú iní-ndó-yu, te dùhu-ndó-yu, te ndéé méé-ndó nàcuáa ndècu-ndo ichi Xítohó Jesucristú ducaⁿ quide tnaha-ndo.

⁹ Te nchòhó sa ñaha-ndo sá ncháá ñáiyu ndècu ichi cuehé ichi duha vá ndúú tǎhũ-yu cundecú-yu núú ndécú Yá Ndiòxí táxi tnùní-gá, núu xǎⁿ vá cání iní-ndó sá ñáiyu-áⁿ nduu tǎhũ-yu cundecú-yu ndihí-gá. Te ni cuè ñáiyu ndècu ichi díí iní, te ni cuè ñáiyu quide cahnu nchaa sá càchí-yu cùu ndiòxí te ñá ndáa chi dìcò cue téé ñuyúú-a ní cadúha nchaa xǎⁿ, te ni cuè téé cáháⁿ ndihí ñadìhí te ñá díú ñàdihí-güedé cùu-yu, te ni cuè ñáiyu dìhí cáháⁿ ndihí téé te ñá díú yǔhú-yu cùu-güedé, te ni cuè téé cáháⁿ ndihí tnáha téé-xi, ¹⁰ te ni cuè ñáiyu dùhu, te ni cuè ñáiyu xìho sá ndécú ndihí tnaha ñáiyu-xi, te ni cuè ñáiyu quihu, te ni cuè ñáiyu cáháⁿ úhú, te ni cuè ñáiyu dànícuehé tnáha ñáiyu-xi te dùhu ñahá-yu, te ni ìⁿ cue ñáiyu duha xǐquide vá ndúú tǎhũ-yu cundecú-yu núú ndécú Yá Ndiòxí táxi tnùní-gá. ¹¹ Te dava nchòhó ducaⁿ ní xóo cada-ndo ni cùu, te vitna ní cuu-ndo ñáiyu sa ní nduu ndoo ní nduu nine iní-xi, te ní cuu-ndo

ñāyiu cūu cuendá Yá Ndiǒxí, te ní cuu tucu-ndo ñāyiu ñá túú-gá cuéchi-xi ndècu núú-gá. Te ducaⁿ ní quide ñaha Yá Ndiǒxí xii-ndo sá vāha sá cuendá Xítohó Jesucristú, te ní ngúndecu ndihi-ndo Espíritú Yá Ndiǒxí.

Nàcuáa ndiūu cuendá yiqui cūñú-ó

¹² Te cāchí ñāyiu sá ncháá sá sání iní-ó cuu cada-o, te ndáá cāháⁿ-yu dīc-ó-ní sá ñā ncháá cūu-xi sá vāha sá cúú-xi-ó. Te núu cūñí nchaa sá sání iní-ó-áⁿ taxi tñuní ñáhá-xí te vā cādá-ó. ¹³ Te nchòhó sa xini-ndó sá ncháá sá xéxi-ó cuānguee-xi xití-ó, te xití-ó ní cuāha tñahí-xi sá cūhúⁿ nchāa sá cāxi-ó, dico xití-ó ndihi nchaa sá xéxi-ó chí naa-xi. Te Xítohó Jesucristú néhé cuendá-gá yiqui cūñú-ó, te ducaⁿ yiqui cūñú-ó cūu-xi cuendá-gá, te ñá túú ní cuāha yiqui cūñú-ó sá cūndècu-xi ichi díí iní. ¹⁴ Te dàtná ní quide Yá Ndiǒxí ní dándótó-gá Xítohó Jesucristú ducaⁿ càda ñaha-gá xii nchoo tūcu chi dandòto ñaha-gá xii-o núu na cūú-ó, chi ndācu-gá quidé-gá nchaa sá vāha.

¹⁵ Te nchòhó sa ñaha-ndo sá yiqui cūñú-ó cūu-xi cuendá Xítohó Jesucristú chí ñⁿ-ni cūu-o ndihi-gá, núu xiǎⁿ ñá túú tñahí ndūu vāha-xi cāháⁿ ndihi-o ñāyiu ndècu ichi díí iní, chí yiqui cūñú-ó cūu-xi cuendá Xítohó Jesucristú, te núu ducaⁿ na càda-o te cada iní-ó sá cuendá-nā ñāyiu-áⁿ cúú yiqui cūñú-ó, núu xiǎⁿ ñá túú tñahí ndūu vāha-xi ducaⁿ càda-o. ¹⁶ Te sa xini-ndó sá núu ñⁿ tée na cāháⁿ ndihi-dé ñⁿ ñadihí ndécú ichi díí iní te cada iní-ó sá ñⁿ-nā yiqui cūñú cūu-yu. Te ducaⁿ cāháⁿ-xi núu tūtú Yá Ndiǒxí núu cāchí-xi: “¹ ñⁿ tée na cāháⁿ ndihi-dé ñⁿ ñadihí te ñⁿ-nā yiqui cūñú cūu-yu”, duha cāchí-xi. ¹⁷ Te ducaⁿ sātñahá-xi cūu nchaa ñāyiu tñahá tñuhu ndihi Xítohó Jesucristú, chí ñⁿ-nā cúu-yu ndihi-gá.

¹⁸ Te núu xiǎⁿ cāháⁿ-í dóho-ndo sá vā cūndècu-ndo ichi díí iní, chí núu ducaⁿ na càda-ndo te

ñá túú tñahí sá vāha cūu-xi sá cúú-xi yiqui cūñú-ndó chí ío dàcuíta nihnu-xi yiqui cūñú-ndó. Te nchaa dava-gá sá cuèhé sá dúhá ñá túú quide-xi yiqui cūñú-ndó dàtná quidé xiǎⁿ. ¹⁹ Te nchòhó sa cūtnuní iní-ndó sá yiqui cūñú-ndó cūu-xi dàtná ñⁿ vehe núú ndécú Espíritú Yá Ndiǒxí. Te ducaⁿ sātñahá-xi cūu yiqui cūñú-ndó chí ndècu-ndo ndihi Espíritú-gá. Te mee-gá ní taxi-gá Espíritú-gá ndécú ndihi-ndo, te ñá díú mèe-ndo cuu cuendá-ndó mèe-ndo chí Yá Ndiǒxí cúú cuendá ñáhá-gá xii-ndo. ²⁰ Te ducaⁿ cūu-ndo ñāyiu cūu cuendá Yá Ndiǒxí chí Xítohó Jesucristú ní nachāhu-gá nchaa yíca cuéchi-ndo. Te núu xiǎⁿ xini ñūhu-xi sá ñihí ní ndúú-ndó càda-ndo nacuāa cuu cāhnu Yá Ndiǒxí, te ducaⁿ tūu-xi cada-ndo chí espíritú-ndó ndihi yiqui cūñú-ndó cūu-xi cuendá-gá.

7

Sáhú sá cúú-xi ñāyiu ní tñándaha

¹ Te ní quexiò tutú sá ní dàquixí-ndó ndāha-í, te vitna na cāchí tñuhu-í xii-ndo cuendá tñuhu cāháⁿ-ndó núu tūtú-ndó. Te vāha cada-xi te núu vā cāndèca tée ñadihí, te ducaⁿ-ni vāha cada-xi te núu ñāyiu ñihí vā cāndècá-yu tée. ² Te dīc-ó-ní sá núu ducaⁿ na càda-ndo te dava-ndo cāni iní-ndó cūndecu-ndo ichi díí iní. Núu xiǎⁿ xini ñūhu-xi sá ncháá cuè tée ndi dííⁿ cūndecu ñadihí-güedé, te ducaⁿ-ni tūcu nchaa cue ñāyiu ñihí ndi dííⁿ cūndecu yí-yu. ³ Te cāchí tñuhu-í xii-ndo sá ncháá cuè tée vā cúú cāchí-güedé sá vā cúú cāháⁿ ndihi-güedé ñadihí-güedé, te ñⁿ-ni ducaⁿ cuè ñāyiu ñihí tucu, vā cúú cāchí-yu sá vā cúú cāháⁿ ndihi-yu yí-yu. ⁴ Te nchaa cue ñāyiu ñihí chí ñá díú mèe-ní-yu cūu cuendá-yu yiqui cūñú-yu chí tñahá cúú cuendá yí-yu, te ducaⁿ-ni nchāa cue tée tucu chí ñá díú-ní mèe-güedé cúú

cuendá-güedé yiqui cùñú-güedé chi tnàhá cúú cuendá cue ñadìhí-güedé. ⁵ Te cue téé vá cúú càchí-güedé sá vá cúú cǎháⁿ ndihí-güedé ñadìhí-güedé. Te ni cue ñáyiú dìhí vá cúú càchí-yu sá vá cúú cǎháⁿ ndihí-yu yíi-yu. Àdi te núú ní ndatnúhu-yu sá vá dúcáⁿ càdá-yu ìⁿ úú nduu cuendá sá cuiní-yu ío cǎháⁿ ndihí-yu Yá Ndiöxí, dico nà yáha núú ná daha nduu ducaⁿ ñí ndatnúhu-yu sá vá dúcáⁿ càdá-yu te naníhí tnàhá tùcú-yu, chi núú ñáhá te cudana te vá cuacàhnu iní-yu te sácuihná dacàháⁿ ñáhá-xí xii-yu cadá-yu sá ñà túú tàú-yu cadá-yu.

⁶ Te tnúhu cǎháⁿ-í-a quèe-xi sá tée ndihí ñadìhí cuu candeca tnàhá-yu dico ñà túú quide yica-í sá dúcáⁿ càdá-yu. ⁷ Te yúhú sání iní-í sá ñúú dìcò sá cúú te nchaa-ndo cùndecu-ndo datná ndécú-í, dico ñáhá chi mee Yá Ndiöxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ñí cutáhú-ó núú-gǎ sá cùndecu ñadìhí-ó te dava-o ñáhá. ⁸ Te càchí tnúhu-í xii nchòhó cue téé vátá ñihí-gá ñadìhí-xi sá vǎha-gá sá ñúú vá cùndecu ñadìhí-ndó datná yúhú. Te ducaⁿ-ni nchòhó cue ñáyiú dìhí ñáyiú vátá ñihí-gá yíi-xi sá vǎha-gá sá ñúú vá cùndecu yíi-ndo. Te ñiu-ni duha cǎháⁿ-í sá cúú-xí nchàa nchòhó ñáyiú dìhí ní quendóo quèé sá vǎha-gá sá ñúú vá cándeca-gá-ndó tée. ⁹ Te càchí tnúhu-í xii nchaa-ndo sá ñúú xito-ndo sá vá cùndéé iní-ndó cùndecu mee-ndo te vǎha-gá sá ñúú tnándaha-ndo, te ñà díú sá mée-ní càni cuehé cani duha iní-ndó cùndecu-ndo.

¹⁰ Te nchaa nchòhó ñáyiú sa ní tnándaha cǎháⁿ-í dóho-ndo, te ñà díú mèe-í duha càhu iní-í cǎháⁿ-í dóho-ndo chi Xítohó Jesucristú ducaⁿ dàcahu iní ñáhá-gǎ xii-í, chi mee-gǎ cuiní-gǎ cada-ndo nàcuáa na cǎháⁿ-í-a. Te nchaa nchòhó cue

ñáyiú dìhí cǎháⁿ-í dóho-ndo sá vá dáñá-ndó yíi-ndo. ¹¹ Te núú ío dava-ndo sá ní dáñá-ndó yíi-ndo, te xini ñuhu-xi sá vá cándeca-gá-ndó tée, chi cundecu mee-nǎ-ndó àdi núú ñáhá te naqueheⁿ tucu-ndo tée ní cuu yíi-ndo. Te nchaa nchòhó cue téé ndècu ñadìhí-xi cǎháⁿ-í dóho-ndo sá vá dáñá-ndó ñáyiú cuu ñadìhí-ndó.

¹² Te tnúhu na cǎháⁿ-í-a cùu-xi sá ñí sani iní mèe-í te ñà díú tnúhu sá ñí cachí Xítohó Jesucristú cǎháⁿ-í cúú-xí. Te núú dava nchòhó cue téé ndècu ichi Xítohó Jesucristú ndécá-ndó ñáyiú dìhí ñáyiú ñà túú ndècu ichi-gǎ, te vá dáñá-ndó-yu te núú cùu vǎha iní-yu ndéca ñáhá-yu xii-ndo. ¹³ Te núú dava nchòhó cue ñáyiú dìhí ñáyiú ndècu ichi Xítohó Jesucristú ndécá-ndó cue téé ñà túú ndècu ichi-gǎ te vá dáñá-ndó-güedé te núú cùu vǎha iní-güedé ndécá ñàha-güedé xii-ndo. ¹⁴ Te núú ìⁿ tée ñà túú sàndáá iní-dé Xítohó Jesucristú te ñadìhí-dé sàndáá iní ñáhá-áⁿ xii-gǎ, te tée-áⁿ ñí cuu-dé ìⁿ tée sa ní cuyatni tnàhá tnúhu ndihí ñaha xii-gǎ sá cuendá ñadìhí-dé. Te ducaⁿ sǎtnahá-xi cùu tucu ñadìhí ñà túú sàndáá iní ñáhá xii Xítohó Jesucristú te yíi-aⁿ sàndáá iní ñáhá-dé xii-gǎ, te ñaha-áⁿ sa ní cuyatni tnàhá tnúhu-aⁿ ndihí-gǎ sá cuendá yíi-aⁿ, te ñiu-ni ducaⁿ sǎtnahá-xi cùu cue landú-yu chi sa ní cuyatni tnàhá tnúhu-güexi ndihí-gǎ. Te núú vá dúcáⁿ cùu te cue landú-yu-áⁿ ío xica cùndecu-güexi núú-gǎ. ¹⁵ Te núú ìⁿ tée ñà túú sàndáá iní ñáhá xii Xítohó Jesucristú cuiní-dé dañá tnàha-dé ndihí ñadìhí-dé ñaha sàndáá iní ñáhá xii Xítohó Jesucristú, te ñiu-ni na càda-dé nàcuáa sàni iní-dé. Te ñiu-ni ducaⁿ tùcu te núú ñadìhí ñaha ñà túú sàndáá iní ñáhá xii Xítohó Jesucristú cuiní-aⁿ dañá-aⁿ tée sàndáá iní ñáhá xii-gǎ, tée cùu yíi-aⁿ te ñiu-ni na càda-aⁿ nàcuáa sàni iní-aⁿ. Chi tée sàndáá iní ñáhá

xii Xítoho Jesucristú ñá túú tàú-dé cada yica-dé ñadihí-dé cundecu ndihi ñaha-aⁿ xii-dé te núú ñá túú cuini-aⁿ. Te ñu-ni ducaⁿ ñadihí ñaha sàndáá iní ñáhá xii-gá ñá túú tàú-aⁿ cada yica-aⁿ cundecu ndihi ñaha yíi-aⁿ xii-aⁿ te núú ñá túú cuini-dé cundecu ndihi ñaha-dé xii-aⁿ, chi Yá Ndióxi cuini-gá sá ncháá nchòo ñáyiú ndècu ichi-gá cundecu váha-o vǎ nǎa-ó. ¹⁶ Chi cue té sàndáá iní tnúhu Xítoho Jesucristú ñá túú cùnuni iní-güedé te núú ndacu-güedé canu ichi-güedé ñadihí-güedé ichi-gá àdi ñáhá te núú ñá túú sàndáá iní ñáhǎ-yu xii-gá, te ducaⁿ-ni cué ñáyiú ñadihí sàndáá iní tnúhu Xítoho Jesucristú ñá túú cùnuni iní-yu te núú ndacú-yu canu ichi-yu yíi-yu ichi-gá àdi ñáhá te núú ñá túú sàndáá iní ñáhá-güedé xii-gá.

¹⁷ Te duha na càchí tnúhu-í xii-ndo, nchaa chiúⁿ ní nduu táhú-ndó núú Yá Ndióxi quidé-ndó ndéé cùnàhá ní cáháⁿ ñáhá-gǎ xii-ndo ní natuha-ndo ichi-gá te ñu-ni chiúⁿ-án cada-ndo cundecu-ndo. Te nchaa xichi núú tàcǎ ñáyiú dàcuaha tnúhu-gá ñu-ni duha càháⁿ-í dóho-yu. ¹⁸ Te nchaa cue té ndècu seña ñi-xi dàtná ní cachi ndii Moisés, cue té ní cáháⁿ Yá Ndióxi ndécú ichi-gá, te ñu-ni ducaⁿ cùnduu-güedé cundecu-güedé, te nchaa cue té ñá túú ndècu seña ñi-xi ní cáháⁿ-gá cundecu ichi-gá, ñu-ni ducaⁿ cùnduu-güedé cundecu-güedé vǎ cuǎha-güedé seña ñi-güedé. ¹⁹ Te ñi-ni cùu-xi cuéi na cuǎha-o seña ñi-o àdi vǎ cuǎha-o. Te sǎ io-gá xini ñúhu-xi cada-o xǎⁿ cúu-xi sǎ cádá-ó ncháa nacúaa cuini Yá Ndióxi. ²⁰ Chi xini ñúhu-xi sǎ cùndecu-ni-o datná ndécú-ó cùnàhá ní cáháⁿ ñáhá Yá Ndióxi xii-o ní ngùndecu-o ichi-gá. ²¹ Te núú cùu-ndo ñáyiú ñá túú tnàhí dàñá quee núú chiúⁿ patróoⁿ-xi cùnàhá ní cáháⁿ ñáhá Yá Ndióxi xii-ndo, te ñá túú nǎ cani iní-ndó, dico núú dàña

ñaha patróoⁿ-ndó quee-ndo núú chiúⁿ-ndó te váha-ni quee-ndo núú chiúⁿ-ndó. ²² Te sǎtǎ ní cáháⁿ ñáhá Xítoho Jesucristú xii nchòho ñáyiú ducaⁿ ñá túú tnàhí dàñá quee núú chiúⁿ patróoⁿ-xi-án, te ní cuu-ndo dàtná ñáyiú dàñá quee núú chiúⁿ patróoⁿ-xi sǎ cúu-xi-gǎ, te ducaⁿ chi ñá túú-gǎ ndécú-ndó ichi cuehé ichi duha. Te nchòho ñáyiú dàñá quee núú chiúⁿ patróoⁿ-xi cùu-ndo datná ñáyiú ñá túú tnàhí dàñá quee núú chiúⁿ patróoⁿ-xi sǎ cúu-xi Xítoho Jesucristú, te ducaⁿ chi xinu cuechi-ná-ndó núú-gǎ. ²³ Te Yá Ndióxi ní nduu cuendǎ ñáhá-gǎ xii-o chi Xítoho Jesucristú ní nacháhu-gá nchaa yicǎ cuéchi-o sǎ ndécú núú Yá Ndióxi ní cùu, te vǎ dàñá-ndó sǎ tnàha ñáyiú-ndo nàdatuhú iní ñáhǎ-yu xii-ndo vǎ cùnú cuéchi-ndo núú Xítoho Jesucristú nàcuáa tàú-xi cunduu. ²⁴ Te núú xǎⁿ càchí tnúhu-í xii nchaa nchòho ñáyiú ndècu ndihi-í ichi Xítoho Jesucristú sǎ cùndecu-ni-ndo datná-ni ndècu-ndo ndéé cùnàhá ní cáháⁿ ñáhá-gǎ xii-ndo, te ñu-ni ducaⁿ cùndecu-ndo ichi-gá.

²⁵ Te càchí tnúhu tucu-í xii-ndo sǎ Xítoho Jesucristú ñá túú càchí tnúhu-gá xii-í núú nása cáháⁿ-í cuendǎ nchaa ñáyiú vátǎ tnàndaha-gǎ. Te duha sàni iní-í cáháⁿ-í cuendǎ-yu, te nchòho cuu quíndáá iní-ndó tnúhu càháⁿ-í chi Xítoho Jesucristú chindèe chitúu ñaha-gǎ xii-í. ²⁶ Te yúhú càchí-í sǎ sǎ cuendǎ nchaa tnúndòho tnúhu ndàhú ió ñuyúú-a vitna, te váha-gá sǎ ncháá ñáyiú te núú nása xǎndecú-yu te ducaⁿ-ni na cùndecú-yu. ²⁷ Te nchaa cue té ndècu ñadihí-xi te ducaⁿ-ni na cùndecu-güedé ndihi-yu, te nchaa cue té ñá túú ñadihí-xi te ducaⁿ-ni na cùnduu-güedé vǎ ndúcú-güedé ñadihí-güedé. ²⁸ Dico nchaa cue té na nducu ñadihí-xi te ñá díú ñiⁿ cuéchi cùu-xi sǎ dúcǎⁿ ná nducu-güedé ñadihí-güedé, te

d̄u-ni ducaⁿ c̄u tucu cue ñáyi u d̄ihí te núu na ñihí-yu yí-yu chi ñá d̄iú ñⁿ cuéchi c̄u-xi sá dúcáⁿ ñihí-yu yí-yu. Te núu cue tée na ñihí-güedé ñadihí-güedé te nándi ndohó-yu cundecú-yu ñuyíú-a, te núu xiáⁿ duha càháⁿ-í cuendá sá v̄a ndúcú-güedé ñadihí-güedé cuendá sá v̄a ndóhō-yu.

²⁹ Te nchaa nchòhó ñáyi u ndècu ndihí-í ichi Xitohó Jesucristú na càchí tnúhu-í xii-ndo sã ñã túú-gã v̄ai nduu cumání te quixi tucu Xitohó Jesucristú, núu xiáⁿ xíní ñùhu-xi sá ndèé vitna ngúita nchaa cue tée ndècu ñadihí-xi cada-güedé chiⁿ Xitohó Jesucristú, te cada-güedé dàtná sá ñã túú ñadihí-güedé. ³⁰ Te nchaa ñáyi u ndihú iní-xi te na càda-ní-yu sá ñã túú ndihú iní-yu cadá-yu chiⁿ Yá Ndiõxí. Te nchaa ñáyi u cùd̄í iní-xi te na càda-ní-yu sá ñã túú cùd̄í iní-yu cadá-yu chiⁿ-gá, te nchaa ñáyi u ndècu ndihí nándi sá ndécú ndihí te na càda-ní-yu sá ñã túú ñã ndécú ndihí-yu cadá-yu chiⁿ-gá. ³¹ Te nchaa ñáyi u nèhe chiⁿ nchaa sá ió ñuyíú-a te na càda-ní-yu cuendá sá ñã túú ñã néhé chiⁿ-yu cadá-yu chiⁿ Yá Ndiõxí, chi nchaa sá ió ñuyíú-a sa ñùhu-xi ichi cuáháⁿ-xi núu ndihí ñnhu-xi.

³² Te cuní-í sá v̄a cùhúⁿ iní-ndó nándi sá ió ñuyíú-a, te ni ñã túú tnáhí ná cani iní-ndó cundecu-ndo, chi nchaa cue tée ndècu ichi Xitohó Jesucristú x̄ndecu mee ió ñùhu iní-güedé cada-güedé chiⁿ-gá nàcuáa cud̄i-güedé núú-gã. ³³ Te nchaa cue tée sa ndècu ñadihí-xi cue tée ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cud̄i-güedé núú ñadihí-güedé. ³⁴ Te diu-ni ducaⁿ c̄u tucu cue ñáyi u d̄ihí chi ñã túú ñⁿ-ni cuu ñáyi u sa ndècu yí-xi ndihí ñáyi u vátá cundècu-gá yí-xi, chi

ñáyi u ndècu ichi Xitohó Jesucristú ñã túú ndèca tée ió ñùhu iní-yu cadá-yu chiⁿ-gá nàcuáa ñihí ní ndúy-yu cundecu yíñuhú-yu núú Yá Ndiõxí, dico cue ñáyi u d̄ihí ndécá tée ndècu ichi-gá ió ñùhu iní-yu nàcuáa cundecú-yu ñuyíú-a cuendá cud̄i-yu núú yí-yu.

³⁵ Te duha càháⁿ-í cuendá cúú-xí ñⁿ sá v̄aha xii-ndo, te cud̄i núú tnáhá-ndó, te cuu-ndo ñáyi u cada ndáá núú Xitohó Jesucristú, te mee-ni-gã cuhuⁿ iní-ndó. Te ñã d̄iú sá dúhá càháⁿ-í te quide yica-í sá cadá-ndó nàcuáa càháⁿ-í.

³⁶ Te núu ió dava-ndo s̄ani iní-ndó sã ñã túú nduu váha-xi sá ió cuu sacuéhé d̄ehe yoco-ndo cundecú-yu ñã, te núu s̄ani iní-ndó sã v̄aha-gá candecá-yu tée te cada-ndo nàcuáa s̄ani iní-ndó, chi ñã d̄iú ñⁿ cuéchi c̄u-xi. ³⁷ Te núu dava-ndo ndècu d̄ehe yoco-ndo, te v̄a yó ñⁿ cada yica ñãha xii-ndo sá cándecá-yu tée. Te núu mee-ndo s̄ani váha iní-ndó nàcuáa cada-ndo, te núu v̄a dásáⁿ-ndó d̄ehe yoco-ndo càndeca ñãha tée te quide váha-ndo sã dúcáⁿ quide-ndo. ³⁸ Te nchaa ñáyi u dásaⁿ d̄ehe yoco-xi càndeca ñãha tée te váha-ni quidè-yu, te nchaa ñáyi u ñã túú dásaⁿ d̄ehe yoco-xi càndeca ñãha tée te váha-gá tucu quidè-yu sá dúcáⁿ quidè-yu.

³⁹ Te nchaa ñáyi u d̄ihí ndécú yí-xi xini ñuhu-xi sá cundècu-ní-yu ndihí yí-yu nini ndècu vívú-güedé chi ducaⁿ càháⁿ tnúhu sá dánèhé ñáhá xii-o nàcuáa cada-o cundecu-o, dico núu na cùú-güedé te cuu naquehéⁿ-yu ingá tée candecá-yu d̄icó-ni sá d̄iú-ni tée ndècu ichi Xitohó Jesucristú. ⁴⁰ Te yúhú s̄ani iní-í sá ió-gá váha cundecú-yu te núu v̄a nánducú-yu ingá tée candecá-yu, te duha càháⁿ-í chi Espiritú Yá Ndiõxí ducaⁿ dàcahu iní ñáhá-xi xii-í càháⁿ-í.

8

Cuendá nchaa sá nchító-ó sãñaha

ñáyiú ndüu táhú nchaa sá cächí-yu cùu ndiòxí

¹ Te vitna na cãháⁿ-í cuendá nchaa sá nchító-ó sãñaha ñáyiú ndüu táhú nchaa sá cächí-yu cùu ndiòxí te ñã ndãá chi dicó ndaha cue tee ñuyíú-a ní cuáha nchaa xiãⁿ. Te nchoo sa cùtnuní váha iní-ó cuendá nchaa xiãⁿ, dicó-ni sá cuendá nchaa sá cùtnuní váha iní-ó xiãⁿ quidé cãhnu-o mee-o, dico núu cùu iní-ó tnàha ñáyiú-o te canu ichi-ò-yu ichi váha. ² Te núu dava-ndo sãni iní-ndó sã túha-ndo dico cùu-ndo ñáyiú vátá cútúha-gá nãcuáa táu-xí cunduu. ³ Te núu nchòhó cùú iní-ndó Yã Ndiòxí te mee-gã cáháⁿ-gá sá cùú-ndó ñáyiú cùu cuendá-gá.

⁴ Te vitna na cächí tnúhu-í xii-ndo nãcuáa ndüu cuendá nchaa sá nchító-ó sãñaha ñáyiú ndüu táhú nchaa sá cächí-yu cùu ndiòxí te ñã ndãá chi dicó ndaha cue téee ñuyíú-a ní cuáha nchaa xiãⁿ. Te nchoo cùtnuní iní-ó sã ncháá sã cächí ñáyiú cùu ndiòxí cadúha-yu ñuyíú-a ñã túú cùu-xí ndiòxí, chi ñⁿdii díí-ni Yã Ndiòxí ndécú. ⁵ Te cue ñáyiú ñuyíú-a cächí-yu sá cuéi andüu te cuéi ñuyíú-a ndècu titní ndiòxí. Te ndãá sã ndèni ní cuu ndècu espíritú sá cächí ñáyiú cùu ndiòxí te ñã ndãá sá ndiòxí cùú-xí, te nchaa xiãⁿ táxi tnùnì ñáhá-xí xií-yu. ⁶ Te nchoo cùtnuní ndãá iní-ó sã ñⁿdii díí-ni Yã Ndiòxí ndécú te ñⁿ-gã cùú-gã Tãtá-ó, te nchoo cùu-o ñáyiú cùu cuendá-gá. Te ñⁿ-ni mee-gã ní táuchíúⁿ-gã ní cuáha nchaa sá ió ñuyíú-a, te cùtnuní tucu iní-ó sã ñⁿdii díí-ni Xítóhó Jesucristú ndécú, te Yaá-áⁿ ñí quide-gá nchaa chiúⁿ ní táhú Dütú Ndiòxí ní cadúha-gá nchaandi túhú sá ió ñuyíú. Te ñⁿ-ni mee Xítóhó Jesucristú quidé ndècu-o ichi-gá vitna.

⁷ Te ñã ncháá nchòhó ñáyiú ndècu ichi Xítóhó Jesucristú cùtnuní iní-ndó nãcuáa ndüu tnúhu cãháⁿ-í. Chi sa ní cáaⁿ-ndo quide cãhnu-ndo nchaa sá cächí-yu cùu ndiòxí ní cùu.

Te cuendá xiãⁿ núu nãqueheⁿ-ni-ndo nchaa sá nchító-ó ndüu táhú nchaa sá cächí-yu cùu ndiòxí-áⁿ xéxi-ndó, te sãni-ni iní-ndó sã quidé cãhnu-ndo nchaa sá cächí-yu cùu ndiòxí-áⁿ te ñã ndãá sá ndiòxí cùú-xí. Te núu sãni iní-ndó sã ñã túú váha caxi-ndo sã dúcáⁿ ndüu táhú-xi-áⁿ te xéxi-ndo te xiãⁿ ñã túú cùu váha iní-ndó cuendá sá dúcáⁿ quide-ndo. ⁸ Te ñã díú nchaa sá xéxi-ó quide-xi cudüu-o núú Yã Ndiòxí, chi ñⁿ-ni quide-xi cuéi na cãxi-o àdi vá cãxí-ó chi ni ñⁿ sá cãxí-ó vã chindèe ñaha-xi cudüu-o núú Yã Ndiòxí. Te cuéi vá cãxí-ó dico ñã díú xiãⁿ cada sá vã cudüu-o núú-gã. ⁹ Te cuu-ni caxi-ndo nchaa nãni nihí-ndó. Te dicó-ni sá càda cuendá-ndó sã ñã díú cuendá sá xéxi-ndó-áⁿ cuíta nihnu dava ñáyiú ndècu ndihí-ndo ichi Xítóhó Jesucristú cada-yu nãndi sá cadá-yu nãcuáa vá cùú váha iní Yã Ndiòxí chi ñáyiú-áⁿ ñã túú cùtnuní iní-yu. ¹⁰ Te nchòhó ñáyiú xini váha cuendá nchaa sá cächí-yu cùu ndiòxí, te núu na quihíⁿ-ndó núu ndécú nchaa xiãⁿ te ngóo-ndo cãxi-ndo nchaa sá ñí cutáhú-xi, te quini ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nãcuáa ndüu cuendá nchaa sá dúcáⁿ cächí-yu cùu ndiòxí-áⁿ, te cuéi sãni iní-yu sã ñã túú quide váha-ndo sã dúcáⁿ quide-ndo te cudana te cada yicá-yu caxí-yu tnàhá-yu nchaa sá dúcáⁿ ñí nduu táhú nchaa sá cächí-yu cùu ndiòxí-áⁿ te ñã ndãá sá ndiòxí cùú-xí. ¹¹ Te núu ducaⁿ cùtnuní iní-ndó nãcuáa ndüu cuendá nchaa xiãⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dàva-gá ñáyiú ndècu ndihí-ndo ichi Xítóhó Jesucristú, ñáyiú vátá cùtnuní-gá iní-xi nãcuáa ndüu cuendá nchaa xiãⁿ, te ñⁿ-ni cuendá tnàhá ñáyiú-áⁿ ñí xihí Xítóhó Jesucristú. ¹² Te sá dúcáⁿ quide-ndo-áⁿ cùú-xí ñⁿ cuéchi núú Xítóhó Jesucristú, chi quide-ndo nãcuáa xínu iní-yu cada-yu ñⁿ sá sãni iní-yu ñã túú váha, núu xiãⁿ ñã

túu quide váha-ndo sã cúu-xí-yu. 13 Te núu yúhú cùtnùní iní-í sã sã cuendá ìñ sã cáxi-í te ngóo ìñ ñáyiú ndècu ndìhi-í ichi Xítohó Jesucristú cadá-yu ìñ sã vã cúu vãha iní Yã Ndiòxí, te váha-gá sã vã cáxi-gã-í xíã cuendá sã vã cadã-yu ìñ sã vã cúu vãha iní-gá.

9

Nchaa sã cúu cada cue téé ní táuchíú Xítohó Jesucristú cáhá tnúhu-gá

1 Te yúhú chi cuu cada-í nchaa sã sání iní-í, chi tnàhá-í ní táuchíú Xítohó Jesucristú cáhá-í tnúhu-gá núu ñáyiú. Te yúhú ní xiní núu-í Xítohó Jesucristú Yaá cúu Xítohó-ó te nchòhó cúu-ndó ñáyiú ní sándáá iní tnúhu-gá sã càhá-í te ducaⁿ chi ndècu ndìhi-í-gá. 2 Te ió dava ñáyiú ñã túu sándáá iní-yu sã Xítohó Jesucristú ní táuchíú-gá cáhá-í tnúhu-gá, dico nchòhó chi cùtnùní ndáá iní-ndó sã díú-gã ní tendaha ñaha-gá xii-í xícá cùu-í càhá-í tnúhu-gá, te ducaⁿ chi yúhú ní cáhá-í tnúhu-gá núu-ndó te ní sándáá iní-ndó-gã te xíã cùtnùní sã díú-gã ní tendaha ñaha-gá xii-í xícá cùu-í càhá-í tnúhu-gá núu ñáyiú.

3 Te duha ndùu tnúhu càhá-í cuendá cundedóho nchaa ñáyiú sàtnuhu ñaha xii-í. 4 Chi yúhú cuu-ni caxi-í nchaa núu sã cúu cáxi-o na taxi ñáyiú. 5 Te cuu-ni cundecu ñadìhí-í te caca ndeca-í-yu nchaa núu xícá cùu-í càhá-í tnúhu Yã Ndiòxí dàtná quidé dâva-gá cue téé càháⁿ tnúhu-gá, ndìhi cue téé cùu ñaní Xítohó Jesucristú, ndìhi té Pèlú. 6 Te tnàhá yúhú ndìhi té Bèé cuu dañá-ndí chùuⁿ quide-ndí te cada-ndí dàtná xíquide dâva-gá-güedé càháⁿ-güedé tnúhu Xítohó Jesucristú. 7 Te nchoo xini-ó sã ncháá cuè sandadú dacuitíí sã ñúhu yãhu-güedé xínu cuèchi-güedé, te ñã túu dicó ducaⁿ xínu cuechi-güedé. Te ducaⁿ

sàtnahá-xi cùu tucu ñáyiú xítu ìñ sã xítu chi dacuitíí ñihí-yu ìñ sã xítu-yu xéxi-yu, te ñã díú dicó ducaⁿ xítu-yu. Te ducaⁿ cùu tucu cue téé cùu toli chi quìhni-güedé dícu quiti xito-güedé xihí-güedé te ñã túu dicó ducaⁿ xito-güedé-di. 8 Te vá caní iní-ndó sã sã dúhá càhá-í te càhu iní mée-i duha càhá-í, chi tnúhu càhá-í-a ìñ-ni quèe-xi ndìhi tnúhu ní cáháⁿ ndí Moisés. 9 Chi ndí-án ní chídó tnùní ndí núu tütú ndí nàcuáa ní xáhaⁿ Yã Ndiòxí xii ndí, te cächí-xi: “Vã chíhí-ndó ñunu yuhu ndicutu oré danchihí-di triú”, duha cächí-xi núu tütú ndí. Te ñã díú sã dúcáⁿ ní cáháⁿ Yã Ndiòxí te càháⁿ-gá mee-ni cuendá ndicutu-án. 10 Chi ní cáháⁿ-gá cuendá nchoo cuè ñáyiú ndècu ichi-gá, te ndáá sã díú cuendá-ó dùcaⁿ ní cáháⁿ-gá. Te nchaa cue téé xítu chíhi tatá sàni iní-güedé sã díú tatá chíhí-güedé-án cuu sã cáxi-güedé, te ñu-ni ducaⁿ cùu tucu cue téé xicani triú chi cãni-güedé cuendá quee caxi-güedé. 11 Te ducaⁿ sàtnahá-xi cùu nchúhú cue téé càháⁿ tnúhu Xítohó Jesucristú, chi dānehé ñahá-ndí xii-ndo cuendá nchaa sã váha quide ñaha Yã Ndiòxí xii-o, núu xíã dai tau-xi sã nchòhó chindee ñaha-ndo xii-ndí núu ná cúu sã xiní ñúhu-ndí. 12 Te núu dava cue téé càháⁿ tnúhu Yã Ndiòxí chindèe-ndo-güedé, te uuⁿ-gá ducaⁿ tau-ndó chindee-ndo nchúhú cue téé ní sanu ichi ñaha xii-ndo ichi-gá.

Te cuèi tau ndisa-ndo sã chindèe ñaha-ndo xii-ndí dico ñã túu dùcaⁿ càháⁿ-ndí núu-ndó cada-ndo, te quide cahnu iní-ndí cuèi nándi sã tá yãha-ndí véxi. Te ducaⁿ quide-ndí cuendá sã ñã túu ñã caní iní ñáyiú cuendá-ndí te ducaⁿ cuíta cuténuu-gá tnúhu sã càháⁿ nàcuáa naníhí tàhú-ó quíhíⁿ. 13 Te nchòhó xini-ndó sã ncháá cuè téé xínu cuechi veñúhu ñu-ni xíãⁿ ñihí-güedé xéxi-güedé, te ñu-ni cue téé-án xínu cuechi-güedé núu xihí

quiti nduu táhú Yá Ndióxi, te ñu-ni xiáⁿ nihí tucu-güedé sá xéxi-güedé. 14 Te ñu-ni ducaⁿ sátnahá-xi cùu nchúhu cue téé cáháⁿ tnúhu sá cáháⁿ nàcuáa nanihí tãhú-ó, chi Xítoho Jesucristú ní cachí-gá sá díu-ní cuendá chiuⁿ quide-ndí nihí-ndí caxi-ndí. 15 Te ñá ñⁿ nduu cáháⁿ-í núu-ndó cada-ndo nacuáa tãu-xi cunduu sá cúu-xi-í, te vá caní ñí-ndó sá sá dúhá cáháⁿ-í te ñⁿ sá xicáⁿ-í núu-ndó. ¡Chi cuéi na cúu-í sá ndóhò-í te ñá díu sá cáháⁿ ñáyiú sá sá cuendá sá cáháⁿ-í tnúhu Xítoho Jesucristú nihí-í xéxi-í!

16 Te yúhú ñá túu quide cahnú-í mée-í sá cáháⁿ-í tnúhu sá cáháⁿ nàcuáa nanihí tãhú-ó, chi táu tnàhá-í sá cáda-í chi ducaⁿ ní cachí Yá Ndióxi cada-í. ¡Te ndàhú ní cuu yúhú te núu vá cáháⁿ-í tnúhu-áⁿ! 17 Te ñá túu cáháⁿ-í tnúhu-gá sá cúu ñí mée-í chi mee-gã ní táuchíuⁿ-gã cáháⁿ-í tnúhu-gá. Te núu cáháⁿ-í tnúhu-gá sá cúu ñí mée-í te tãu-í nihí-í sá ndúu tãhú-í ní cùu. 18 Dico sá sá ní nduu tãhú-í cúu-xi sá ño cùdí ñí-í sá dícó ducaⁿ cáháⁿ-í tnúhu sá cáháⁿ nàcuáa nanihí tãhú-ó. Te cuéi tãu-í queheⁿ-í sá táxi-ndó nduu tãhú-í sá cuendá sá cáháⁿ-í tnúhu Xítoho Jesucristú, dico ñá túu dùcaⁿ quide-í. 19 Te sá dúcáⁿ dícó ducaⁿ cáháⁿ-í tnúhu sá cáháⁿ nàcuáa nanihí tãhú-ó, xiáⁿ ní ñⁿ ñáyiú ñuyíú-a vá cúu cãchí-yu sá táxi tnúu ñáhã-yu xii-í, te cuéi ducaⁿ dico mee-í ní saní ñí-í sá cúu-í dàtná ñⁿ téé xinu cuechi núu nchãa ñáyiú cuendá ducaⁿ cuíta cuu vai-yu tuhá-yu ichi Xítoho Jesucristú quíhíⁿ. 20 Te òré ñúhú tnàhí tnuú cue ñáyiú isràel te quide-í sá ñⁿ-ní cùu-í ndihí-yu cuéi ñá túu nchícúⁿ nihnu-í tnúhu ní cáháⁿ ndí Moisés, te ducaⁿ quide-í cuendá sá ñáyiú-áⁿ quindáá ñí-yu tnúhu cáháⁿ-í te tuhá-yu ichi Xítoho Jesucristú. 21 Te òré ñúhú tnàhí tnuú nchãa ñáyiú ñá túu nchícúⁿ nihnu tnúhu ní cáháⁿ ndí Moisés, te quide-í sá quide-í dàtná quide mée-yu cuendá

quindáá ñí-yu tnúhu cáháⁿ-í, te tuhá-yu ichi Xítoho Jesucristú. Te cuéi ducaⁿ quide-í dico ñá túu dàña ndeé-í quide-í nchãa nàcuáa cùuⁿ Yá Ndióxi cada-o, te ducaⁿ chi nchícúⁿ nihnu-í quide-í nchãa nàcuáa cáháⁿ Xítoho Jesucristú. 22 Te òré ndécú-í ndihí nchãa ñáyiú ñá túu cùtnuní váha ñí-xi nàcuáa cundecu ichi Xítoho Jesucristú, te tnàhá-í quide-í dàtná quide-yu cuendá sá ná tedóho-yu nchãa tnúhu cáháⁿ-í te ducaⁿ cùtnuní-gá ñí-yu nàcuáa cundecú-yu ichi-gá. Te nchãandi túhú ñáyiú quide-í sá ñⁿ-ni cuu-í ndihí-yu cuendá ducaⁿ ñíhí-í nàcuáa cada-í te cundecóho-yu tnúhu cáháⁿ-í te tní-yu ichi Xítoho Jesucristú te nanihí tãhú-yu. 23 Te duha quide-í cuendá sá cuíta quindáá ñí-yu tnúhu sá cáháⁿ nàcuáa nanihí tãhú-ó quíhíⁿ, te ducaⁿ te tnàhá yúhú ío váha cundecu-í dàtná cáháⁿ tnúhu-áⁿ.

24 Te nchòhó sa xini-ndó sá nchãa cué téé xinu quíhu màrcúhyú nchãa-güedé xinu-güedé, dico ñⁿ-ni-dé cúu téé ndacu ngodó núu te téé-áⁿ cúu téé nihí sá ndúu tãhú-xi, te ducaⁿ xini ñuhu-xi cada nchòhó tucu chi cada-ndo nchãa nàcuáa cùuⁿ Yá Ndióxi cada-ndo cuendá ducaⁿ nihí-ndó sá ndúu tãhú-ndó. 25 Te nchãa cue téé xini dadiqui te váha váha quide cuendá-güedé núu ná cúu sá cáda tnèñu te xòcani-güedé cuendá sá ñá díu xiáⁿ cada te cuíta-güedé òré dadiqui-güedé. Te ducaⁿ quide-güedé cuendá cùuⁿ-güedé nihí-güedé sá ndúu tãhú-güedé, te sá ndúu tãhú-güedé-áⁿ cúu-xi ñⁿ sá ndíhí nihnu ñuyíú-a. Dico nchoo nducu ndee-o quide-o nàcuáa nihí-ó sá ndúu tãhú-ó, te xiáⁿ cudí-xi cundecu ndihí-o ní caa ní quíhíⁿ. 26 Te yúhú quide-í dàtná quide cué téé xinu, chi cue téé-áⁿ xini-güedé núu quéxiò-güedé, te quide tucu-í dàtná xi quide cue téé sa ní cutúha nàa, te ñá túu quide-í

dàtná quidé cue té vitna dàcuaha naá. Te ducaⁿ chi yúhú quidé-í nchaa nàcuáa cuñí Yá Ndióxi cunduu. ²⁷ Te yúhú ñá túú dàña-í taxi tnùnì ñáhá nì ìⁿ sá cuèhé sá dúhá xii-í chi yòtnii-í mee-í. Te ducaⁿ quide-í chi yúhú càháⁿ-í tnúhu Xítohó Jesucristú núú ñáyi, te cuñí-í sá vā cuíta sá ñ cachí Yá Ndióxi nduu táhù-í.

10

Cuendá nchaa sá ñ cadúha cue té ñuyú-a quide cahnu ñáyi

¹ Te nchòhó ñáyi ndècu ndihi-í ichi Xítohó Jesucristú na càchí tnúhu-í xii-ndo cuendá nchaa ñaní tnáhá-ndí ñáyi israhél ní xindecu ndéé sanaha, chi vitna tnàhá nchòhó cúú-ndó dàtná cue ñaní tnáhá nchaa ñáyi-áⁿ chi ndècu-ndo ichi-gá. Te nchaa ñáyi-áⁿ ñí taxi ndecu Yá Ndióxi ìⁿ vicó ñí dánèhé ñáhá-xí xii-yu ichi quíhíⁿ-yu, te ní quee dava ndute làmár nání Mǎr Tícuèhé te nchaá-yu ní yáha-yu. ² Te sá dúcáⁿ ñí cuu te nchaá-yu ìⁿ-ná ní cuú-yu ndihí ndíi Moisés, te ní xíhi ndaha ñaha ndíi xii-yu. ³ Te nchaá-yu ní xexí-yu sá ñí sáñaha Yá Ndióxi xii-yu. ⁴ Te ducaⁿ nchaa tucú-yu ní xihí-yu ndute sá ñí sáñaha-gá xii-yu, ndute sá ñí quee yiqui nàha cava. Te cava-áⁿ cada iní-ó sá cúú-xí dàtná Xítohó Jesucristú te ducaⁿ chi ndihí ñaha-gá xii-yu ichi cuáháⁿ-yu dàvá-áⁿ. ⁵ Dico ío vāi-yu ñá túú ní quidé-yu nàcuáa càháⁿ Yá Ndióxi, te xiáⁿ ñá túú ní cùu váha iní ñáhá-gá xii-yu. Te sá dúcáⁿ ñí quidé-yu núu xiáⁿ óré ñúhú-yu ichi cuáháⁿ-yu xití yucu ío vāi-yu ní xihí.

⁶ Te ducaⁿ ñí cuu cuendá nchoo vā cáncícúⁿ nihnu-o càda-o nacuáa ní quidé-yu, chi ñáyi-áⁿ mee-ni nchaa sá cuèhé sá dúhá ñí saní iní-yu ní quidé-yu. Te nchoo xini ñuhu-xi sá vā dúcáⁿ càda-o. ⁷ Te yúhú càháⁿ-í dóho-ndo sá vā quindáá iní-ndó te ní vā cadá càhnu-ndo ni ìⁿ sá càchí-yu cùu

ndióxi ní cadúha cue té ñuyú-a dàtná ní quide cue ñaní tnáhá-ndí ní xindecu ndéé sanaha. Chi ñáyi-áⁿ ñí quidé-yu dàtná càháⁿ-xi núú tütú Yá Ndióxi núú càchí-xi: “Nchaa ñáyi ní xexí-yu ní xihí-yu ní quidé-yu vico, ní quide càhnu-yu sá càchí-yu cùu ndióxi ní cadúha-yu te ñá ndáá sá ndióxi cúú-xí”, duha càchí-xi núú tütú-gá. ⁸ Te ni vā cundècu-ndo ichi dǎí iní dàtná ní quide dava ñáyi-áⁿ, chi sá dúcáⁿ ñí quidé-yu te ní xihí ócò únì mǎl-yu ìⁿ-ni nduu. ⁹ Te vā cání iní-ndó sá sá càhnu iní Yá Ndióxi te nándi sá cuèhé sá dúhá càda-ndo cuendá cuñí-ndó quini-ndó núu nása cada ñaha-gá xii-ndo, chi ñáyi ní xindecu ndéé sanaha-áⁿ ducaⁿ ñí xoo cada-yu, te ní xihí-yu ní xexihaⁿ còó. ¹⁰ Te ni vā càháⁿ cuèhé-ndó cuendá Yá Ndióxi, chi dava ñáyi ní xindecu ndéé sanaha-áⁿ ducaⁿ ñí quidé-yu ní càháⁿ cuèhé-yu cuendá-gá te ní quixi espíritu xínú cuèchi núú-gá ní sahní ñaha-xi xii-yu.

¹¹ Te ducaⁿ ñí cuu te ducaⁿ ñí ngúndéé núú tütú Yá Ndióxi cuendá dacuàha-o vitna te cuyatni nduu naa ñuyú-a. Te nchaa tnúhu sá ñí ngódó tnùnì-áⁿ càháⁿ dóho ñaha-xi xii-o cuendá sá vā cadá-ó dàtná ní quide ñáyi-áⁿ. ¹² Te xiáⁿ núu nchaa nchòhó ñáyi sàni iní sá ío váha cundáá ndécú ichi Xítohó Jesucristú cada cuendá-ndó sá dúcáⁿ-ní cundáá-ndó núú-gá, te vā dáná cuendá-ndó càda-ndo sá ñá túú cùu váha iní Yá Ndióxi. ¹³ Te ñu-ni dàtná quidé sàcuíhná dácáháⁿ-xi iní nchaa dava-gá ñáyi nándi quidé-yu, te ñu-ni ducaⁿ quide ñaha-xi xii-ndo. Dico mee Yá Ndióxi cúú-gá Yá quide ndáá xii quide-gá nchaa sá càháⁿ-gá, te ñá dáñá-gá sá súñí cuídó sàcuíhná coto ndéé ñáhá-xí xii-ndo, chi neni-ni nàcuáa cundee iní-ndó dàña-gá ducaⁿ quide ñaha-xi xii-ndo. Te ñu-ni-gá chindee ñaha-gá xii-ndo cundee iní-ndó vā cadá-ndó cuèi nándi sá ná dàcahu iní ñáhá-xi xii-ndo.

14 Te xiáⁿ núu cãháⁿ-í dóho nchòhó ñáyu ío cùu iní-í sã vã quindáá iní-ndó nì ñⁿ sã cãchí-yu cùu ndiòxí te ñã ndàá chi dicó ndaha cue téé ñuyú-a ní cuáha nchaa xiáⁿ, te ni vã cáda cãhnu-ndo. 15 Te duha cãháⁿ-í chi cùu-ndo ñáyu tècú tnúni, te mee-ndo ño váha cuáha-ndo cuendá te núu váha-ni cãháⁿ-í ãdi ñã túu váha-ni. 16 Te nchoo ndácáⁿ táhú-ó núu Yã Ndiòxí cuendá ndudí ndéhé yoho yàha stilé sã xihí-ó, te sã dúcáⁿ xihí-ó ndudí ndéhé yoho yàha stilé-áⁿ, te xiáⁿ ndácú iní-ó sã ñⁿ-ní cùu-o ndihí Xítohó Jesucristú cuendá sã ñi sati ñiñí-gã ní xihí-gá núu cùrúxí, te ãu-ni ducaⁿ sãtnahá tucu-xi cùu paá sã xéxi-ó òré xihí-ó ndudí ndéhé yoho yàha stilé-áⁿ, chi sã dúcáⁿ xéxi-o paá-áⁿ xiáⁿ ndácú iní-ó sã ñⁿ-ní cùu-o ndihí Xítohó Jesucristú sã cuendá yiqui cùñú-gá. 17 Te cuéi vãi vihi-o dïco ñⁿdii-ni paá xéxi-ó, te sã dúcáⁿ ñⁿdii-ni paá xéxi-ó xiáⁿ ndácú iní-ó sã ñⁿ-ní cùu-o ndihí Xítohó Jesucristú.

18 Te cada cuendá-ndó nãcuáa quide ñáyu israél, chi ñáyu-áⁿ xéxi-yu sã ndúú táhú Yã Ndiòxí. Te sã dúcáⁿ quidé-yu-áⁿ cùtnúni iní-ó sã tnàhá tnúhu-yu ndihí-gá. 19 Te vã caní iní-ndó sã sã dúhá cãháⁿ-í te cãchí-ndó sã cùnuu nchaa sã cãchí-yu cùu ndiòxí ní cadúha cue téé ñuyú-a chi ñã túú ná cùú nì ñⁿ nchaa xiáⁿ. Te ãu-ni ducaⁿ cùu tucu nchaa sã sãñaha ñáyu ndúu táhú-xi chi ñã túú cùnuu-xi, chi ñⁿ-ní cùu-xi ndihí nchaa dava-gá sã xéxi-ó. 20 Te yúhú cãchí-í sã sã dúcáⁿ quide nchaa ñáyu ñã túú tnàhá tnúhu ndihí Yã Ndiòxí, te dicó nchaa espíritú cùndihí yucu ñávãha sãñãhá-yu sã ndúú táhú-xi sã dúcáⁿ quidé-yu. Te ñã díú Yã Ndiòxí sãñãhá-yu sã ndúú táhú-gã. Te yúhú cuñí-í sã vã tnàhá tnúhu-ndo ndihí cue espíritú cùndihí yucu ñávãha. 21 Te ducaⁿ chi vã cùú tnàhá tnúhu-o ndihí cue espíritú cùndihí yucu ñávãha te tnahá

tnúhu-o ndihí Xítohó Jesucristú, te ñã túú ndúu váha-xi ngóo cãxi-o coho-o sã ndúú táhú cue espíritú cùndihí yucu ñávãha-áⁿ, te ngóo cáda-o nacúaa ní dándõ tnúhu Xítohó Jesucristú coho-o ndudí ndéhé yoho yàha stilé, te caxi-o paá cada-o sã ndácú iní-ó sã ñi xihí-gá núu cùrúxí. 22 Te vã caní iní-ó ãucaⁿ cada-o cuendá sã vã cùdéeⁿ Yã Ndiòxí, chi ñã túú ná cãhnu cuu-o núu cada-o nãni véxi iní meé-ó, chi mee-gã ío cãhnu cuu-gã.

Cada-o nchaa nacúaa cuu cãhnu Yã Ndiòxí

23 Te ndáá sã ncháá sã cuñí-ó cáda-o te cuu cada-o dïco ñã ncháá cùu-xi sã váha sã cùú-xi-ó, te ni ñã ncháá-xi chindee ñaha-xi nacúaa níhí ndée-gã-ó cùndecu-o ichi Xítohó Jesucristú. 24 Te xini ñuhu-xi sã cáda-ó sã váha sã cùú-xi tnàha ñáyu-o te ñã díú mée-ni sã cùú-xi mée-o cada-o.

25 Te nchòhó cuu caxi-ndo nchaa cuñú sã cùyãhu cuñú sã xini caxi-ndo, te vã ndúcú tnúhu-ndo te núu cùu-xi cuñú sã ñi nduu táhú sã cãchí-yu cùu ndiòxí. Te ñã túú ná caní iní-ndó cãxi-ndo, 26 chi ñuyú-a ndihí nchaa sã ío cùú-xi cuendá Yã Ndiòxí.

27 Te núu ñⁿ ñáyu ñã túú ndècu ichi Xítohó Jesucristú cãháⁿ ñãhá-yu xii-ndo quíhíⁿ-ndó cãxi-ndo díta vehé-yu, te núu sãni iní-ndó sã quíhíⁿ-ndó te cuu quíhíⁿ-ndó te caxi-ndo cuéi ná cùu sã táxi-yu dïco vã cãcãⁿ tnúhú-ndó nũ-yu núu ndée ní níhí-yu, te ducaⁿ te cuu váha iní-ndó cãxi-ndo. 28 Te núu ñⁿ ñáyu cãchí-yu sã xiáⁿ cùú-xi sã ñi nduu táhú sã cãchí-yu cùu ndiòxí te vã cãxi-ndó cuendá sã ñáyu ducaⁿ cãháⁿ-áⁿ cuu váha iní-yu te ñã túú tnàhí ná caní iní-yu. 29 Te yúhú cãháⁿ-í cuendá nãcuáa sãni iní meé ñáyu ducaⁿ cãháⁿ-áⁿ te ñã díú sã nãcuáa sãni iní meé-ndó quide-ndo.

Te dava-ndo cãchí-ndó: “Cuu-ni cada-o nchaa nacúaa sãni iní meé-ó cuéi dava-gã ñáyu sãni iní-yu

sá ñà túú ndùu váha-xi sá dúcáⁿ càda-o”, duha càchí-ndó. ³⁰ Te càchí tucu-ndo: “Ñá túú tàú-xi cáháⁿ cuèhé ñáyiú cuèndá-ó sá cuèndá nchaa sá xéxi-ó chi ndàcáⁿ táhú-ó núú Yá Ndiòxí òré xéxi-ó”, duha càchí-ndó. ³¹ Te cuèi nándi sá xini caxi-ndo nihí-ndó xéxi-ndo àdi quide-ndo, te cada-ndo nàcuáa cáháⁿ váha ñáyiú cuèndá Yá Ndiòxí. ³² Te vá cadá-ndó sá ñà túú tàú-ndó càda-ndo cuèndá sá vá cadá ñáyiú ñⁿ sá ñà túú cùu váha iní Yá Ndiòxí. Te ni sá cúu-xí cuè ñáyiú isràél, te ni sá cúu-xí cuè ñáyiú ndècu ichi-gá vá dúcáⁿ càda-ndo sá cúu-xí-yu. ³³ Te yúhú ío ndùcu ndee-í quidè-í nàcuáa cudùu-í núú nchaa ñáyiú, te quide-í sá váha sá cúu-xí-yu, te ñá túú quide-í mee-ni sá cúu-xí mée-í. Te ducaⁿ quide-í cuèndá quíndáá iní-yu tnúhu Xítóhó Jesucristú te naníhí táhú-yu.

11

¹ Te chí cànchìcúⁿ nihnu cada-ndo nchaa nacuáa quide-í nchìcúⁿ nihnu-í nchaa nàcuáa quide Xítóhó Jesucristú.

Nàcuáa tàú-xi cada nchaa ñáyiú dìhí núú tàcá-yu dàcuahá-yu tnúhu Yá Ndiòxí

² Te nchòhó ñáyiú ndècu ndihí-í ichi Xítóhó Jesucristú càchí tnúhu-í xii-ndo sá ío cùdí iní-í, chi ndàcu iní ñáhá-ndó xii-í, te quide-ndo nchaa nacuáa ní dánhèhé ñáhà-í xii-ndo. ³ Te cùiní-í sá nchòhó cutnùnì iní-ndó sá ñⁿdii-ni Yá Ndiòxí cúu-gá Yáá cùnùu taxi tnunì ñáhá xii Xítóhó Jesucristú, te ducaⁿ Xítóhó Jesucristú ñⁿdii-ni-gá cùnùu taxi tnunì-gá nchaa cue téé, te nchaa cue téé ñⁿu-ni mee-güedé cùnùu-güedé táxí tnùnì-güedé ñadìhí-güedé. ⁴ Te núu nchoo cuè téé na dàdàhu-o díquì-ó òré càháⁿ-ó núú ñáyiú tnúhu sá dácàhu iní ñáhá Yá Ndiòxí xii-o àdi òré càháⁿ ndihí-o-gá, te ñⁿ sácáⁿnúú

cúu-xí te núu ducaⁿ na càda-o dadàhu-o díquì-ó. ⁵ Dico núu ñáyiú dìhí vá dàdàhu-yu díquì-yu òré càháⁿ ndihí-yu Yá Ndiòxí, àdi òré càháⁿ-yu tnúhu sá dácàhu iní ñáhá-gá xii-yu núú tnàhá ñáyiú-yu, te sácáⁿnúú cúu-xí te núu vá dàdàhu-yu díquì-yu, chi ñⁿ-ni cùu-xi te núu na dèté ndii-yu díquì-yu. ⁶ Te núu ñá túú cùinì cue ñáyiú dìhí dàdàhu-yu díquì-yu te váha-gá sá ná dèté ndii-yu díquì-yu. Te núu cùcahaⁿ núu-yu sá dèté díquì-yu te váha-gá sá ná dàdàhu-yu díquì-yu. ⁷ Te nchoo cuè téé vá cúu dàdàhu-o díquì-ó òré càháⁿ ndihí-o Yá Ndiòxí ní òré càháⁿ-ó tnúhu sá dácàhu iní ñáhá-gá xii-o núú ñáyiú chí díhna-gá-ó ní cadúha ñaha Yá Ndiòxí xii-o, te ní taxi ndecu-gá nchaa sá xini tnùnì-ó dàtná ndécú nchaa sá xini tnùnì mée-gá. Te ducaⁿ ní quide-gá chí cùinì-gá sá nchóó càda-o nacuáa cáháⁿ nchaa dava-gá ñáyiú sá ío càhnu cuu-gá, te cue ñáyiú dìhí quidè-yu nàcuáa cunuu nchòo cue téé. ⁸ Te Yá Ndiòxí ní cadúha-gá téé, dico ñá díú yiqui naha ñadìhí ní quènehe-gá ní cadúha-gá téé chí yiqui naha téé ní quènehe-gá ní cadúha-gá ñadìhí. ⁹ Te sá cuèndá téé ducaⁿ ní cadúha-gá ñadìhí-áⁿ te ñá díú sá cuèndá ñadìhí ní cadúha-gá téé. ¹⁰ Núu xíáⁿ tàú-xi sá ncháá ñáyiú dìhí dàdàhu-yu díquì-yu cuèndá ducaⁿ cùtnunì sá ñà túú cùnùu-yu dàtná cùnùu nchoo cue téé. Te ducaⁿ xini ñuhu-xi cadá-yu sá cuèndá nchaa espíritú xínú cuèchi núú Yá Ndiòxí. ¹¹ Te vitna nchoo ñáyiú ndècu ichi Xítóhó Jesucristú, vá càchí-ó sá cuè téé ñá túú xini ñuhu-güedé cue ñáyiú dìhí chindee ñáhá-yu, te ni vá càchí-ó sá cuè ñáyiú dìhí ñá túú xini ñuhú-yu cue téé chindee ñàha-güedé xii-yu. ¹² Te ñⁿ yiqui naha téé ní queñuhu Yá Ndiòxí ní cadúha-gá ñadìhí, dico

vitna chi ñáyiú ðíhí dácàcú-yu téé. Te téé, ñadíhí ní cadúha Yá Ndiõxí, te ðiu-ni ducaⁿ ní cadúha-gá nchaa dava-gá sá íó.

¹³ Te mee-ndo càda cuendá-ndó te núu ndúu váha-xi sá vǎ dádáhu cue ñáyiú ðíhí díquí-yu òré càháⁿ ndíhí-yu Yá Ndiõxí àdi ñáhá. ¹⁴ Te nchaa ñáyiú càháⁿ-yu sá ñà túú ndúu váha-xi sá cuè téé cunduu nàni idi díquí-güedé, chi ìⁿ sácáⁿnúú cúú-xí càchí-yu. ¹⁵ Te nchaa ñáyiú ðíhí ñáyiú nàni idi díquí-xi càchí ñáyiú sá ìⁿ sá vǎha cùu-xi sá cúú-xí-yu sá dúcáⁿ nàni idi díquí-yu. Te ducaⁿ chi Yá Ndiõxí ní cachí-gá sá dúcáⁿ cunduu-yu cuendá quidáhu-xi díquí-yu. ¹⁶ Te núu íó ñáyiú cuení dacáá cuendú cuendá sá ñí càháⁿ-í-a, te na cùnahá-yu sá ncháá nchúhú cue téé càháⁿ tnúhu Xítohó Jesucristú ðiu-ni ducaⁿ sàni iní-ndí cada nchaa ñáyiú ðíhí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñà túú quide datná ní quide Xítohó Jesucristú cùtnàhá ní cudìni-gá ndíhi cue téé ní xica cuu ndíhi-gá

¹⁷ Te nchòhó ñà túú quide váha-ndo ndècu-ndo núu xǎⁿ ðuha na càháⁿ-í dóho-ndo, chi nchòhó òré tàcá-ndó ñà túú quide váha-ndo chi ñà túú chìndee tnaha-ndo cada-ndo sá vǎha, chi da nàdatuhú iní tnáhá-ndó nàcuáa ndècu-ndo. ¹⁸ Te díhna-gá na càchí tnúhu-í xii-ndo sǎ ñíhí-í tnúhu sá òré tàcá-ndó quide-ndo nacuáa ní càháⁿ Xítohó Jesucristú, te ñà túú cùu ìⁿnuu-ndo òré ducaⁿ quide-ndo nacuáa ní càháⁿ-gá. Te dava sá càháⁿ ñáyiú sàndáa iní-í te dava ñáhá. ¹⁹ Te ndáa sá dúcáⁿ tnàhí cada-xi vǎ cúú ìⁿnuu-ndo cuendá ducaⁿ cùtnuní núu ndèdaçaa-ndo sandáa ndisa iní-ndó tnúhu Xítohó Jesucristú te ndèdaçaa-ndo ñáhá! ²⁰ Te ndí tnahá òré tàcá-ndó quide-ndo datná ní quide Xítohó Jesucristú cùtnàhá ní cudìni-gá ndíhi cue téé

ní xica cuu ndíhi-gá, te ñà túú quide-ndo nacuáa taù-xi cunduu chi cùtexínu-ni quide-ndo. ²¹ Chi òré tàcá-ndó quide-ndo nacuáa ní cachí Xítohó Jesucristú, te dava-ndo ngödó núú-ndó díhna-gá-ndó xèxi-ndo sá néhé-ndó te ñà túú sá cùndètu tnaha-ndo, te ñà túú càháⁿ tnáhá-ndó núu xǎⁿ dava-ndo ñà túú xèxi-ndo ndahá xití-ndó, te dava-ndo xidó-ndó quide-ndo chi xini-ndo. ²² Te vǎ dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quide-ndo te dàquee tihú-ndó nchaa dava-gá ñáyiú ndècu ndíhi-ndo ichi Yá Ndiõxí, te dándó canúú-ndó nchaa ñáyiú ndáhú sá dúcáⁿ quide-ndo. ¡Núu xǎⁿ vǎ cúú càchí-í sá cúú-ndó ñáyiú quide váha chi ñà túú quide váha-ndo sǎ dúcáⁿ quide-ndo ndecu-ndo!

Xítohó Jesucristú ní dándó tnúhu-gá sá cóhó-ó ndùdí ndéhé yoho yàha stilé te caxi-o pàa cuendá ndacu iní-ó sǎ ñí xíhí-gá

(Mt. 26:26-29; Mr. 14:22-25; Lc. 22:14-20)

²³ Te datná-ni ní dánèhé ñáhá Xítohó Jesucristú xii-í te ðiu-ni ducaⁿ ñí dánèhé ñáhá-í xii-ndo, chi ðiu-ni niú cùtnàhá ní sáha cuendá ñáhá ndíi Jüdás Iscarioté xii-gá núú cuè téé cùu úhú iní ñáhá ñí queheⁿ-gá pàa, ²⁴ te ní ndacáⁿ táhú-gǎ núú Yá Ndiõxí, te ní táhú cuèchi-gá, te ní xáhaⁿ-gǎ xii cue téé xica cuu ndíhi-gá: “Chí quéhéⁿ pàa-a caxi-ndo te cada iní-ndó sǎ cúú-xí datná yiqui cùñú-í, chi yúhú cuú-í sácüendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, càchí-gá xáhaⁿ-gǎ xii-güedé. ²⁵ Te sátá ñí yàha ní xexi-güedé pàa sá ñí sǎñaha-gǎ, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tucu-gá núú Yá Ndiõxí. Te ní xáhaⁿ-gǎ xii cue téé xica cuu ndíhi-gá: “Chí cóhó ndùdí ndéhé yoho yàha stilé-a, te

cada iní-ndó sã cúú-xí dàtná níñí-í, te cuèndá níñí-í sã cáti òrè cuú-í cutnùni ndáá sã Yá Ndiòxí cada-gá ingá núú sã vâha sã cúú-xí ñâyiu. Te ndi tnahá òrè coho-ndo ndùdí ndéhé yoho yâha stilé-án te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xâhaⁿ-gã xii-güedé. ²⁶ Te ndi tnahá òrè xéxi-ndó pàá te xihí-ndo ndudí ndéhé yoho yâha stilé, te xiáⁿ dátúu-ndo núú ñâyiu sã Xítohó Jesucristú ní xihí-gá cuèndá-yu, te ducaⁿ-ni càda-ndo cundecu-ndo ndéé ná sãá nduu quixi tucu Xítohó Jesucristú.

Nàcuáa cada-o òrè caxi-o pàá ndíhi òrè coho-o ndudí ndéhé yoho yâha stilé dàtná ní cachí Xítohó Jesucristú

²⁷ Te dava-ndo ñã túú quide-ndo nacuaá cuiní Yá Ndiòxí cada-ndo òrè xéxi-ndó pàá ndíhi òrè xihí-ndó ndudí ndéhé yoho yâha stilé, te sã dúcáⁿ quide-ndo-án te cucuéchi xii-ndo chi ñá túú nèhe-ndo sã yíñùhu sã cúú-xí yiqui cuñú Xítohó Jesucristú, te ni ñã túú nèhe-ndo sã yíñùhu sã cúú-xí níñí-gã. ²⁸ Te ío váha cada cuèndá-ndó te núú ndècu váha iní-ndó núú Xítohó Jesucristú òrè cúmãní-gã caxi-ndo pàá ndíhi òrè cúmãní-gã coho-ndo ndudí ndéhé yoho yâha stilé. Te núú ndècu váha iní-ndó núú-gã te caxi-ndo te coho-ndo. ²⁹ Te dava nchòhó ñã túú sãni váha iní-ndó cuèndá yiqui cuñú Xítohó Jesucristú te xèxi-ndo paá te xihí-ndo ndudí ndéhé yoho yâha stilé, te nacháhu-ndo sã dúcáⁿ ñã túú sãni váha iní-ndó. ³⁰ Te diu sã dúcáⁿ quide-ndo núú xiáⁿ vai-ndo cuhú, te ío ndàhú ndécú-ndó, te dava ñâyiu ndècu ndíhi-ndo sa ní xihí-yu. ³¹ Dico núú ío váha sãha-o cuèndá nàcuáa ndècu-o núú Yá Ndiòxí, te vá dúcáⁿ dândoho ñaha-gá xii-o. ³² Te òrè ndéhé Yá Ndiòxí sã ñã túú quide ndáá-ó ndècu-o te dândoho ñaha-gá xii-o. Te ducaⁿ quide-gá cuèndá sã vã

cuíta nihnu-o, chi núú ñáhá te cuíta nihnu-o ndíhi nchaa ñâyiu ndècu ichi cuehé ichi duha.

³³ Te núú xiáⁿ càháⁿ-í dóho nchaa nchòhó ñâyiu ndècu ndíhi-í ichi Xítohó Jesucristú sã òrè tacá-ndó càda-ndo nacuaá ní quide Xítohó Jesucristú cutnàhá ní cudini-gá ndíhi cue téé ní xica cuu ndíhi-gá, te cundetú tñaha-ndo nduu nchaa-ndo te dàtnùni ducaⁿ càda-ndo. ³⁴ Te núú dava-ndo xihí-ndó dòcò te caxi duuⁿ-ndo vèhe-ndo te dàtnùni nat-acá-ndó, cuèndá òrè natacá-ndó te vá cádá-ndó ñã sã ñã túú tàù-ndó càda-ndo cuèndá sã vã dândoho ñaha Yá Ndiòxí xii-ndo. Te òrè quixi coto ñaha-í xii-ndo te dàvã-án cachí tñuhu-í xii-ndo nchaa dava-gá sã cúmãní.

12

Nàcuáa chindee ñaha Espiritú Yá Ndiòxí cada-o ñã ñã-ò

¹ Te nchòhó ñâyiu ndècu ndíhi-í ichi Xítohó Jesucristú cuiní-í cachí tñuhu-í xii-ndo nàcuáa chindee ñaha Espiritú Yá Ndiòxí xii-o ñã ñã-ò cuèndá cutnùni iní-ndó.

² Te nchòhó sa nàha-ndo sã cutnàhá vátá cundècu-gá-ndó ichi Xítohó Jesucristú ní xóo dandàhú ñáhá yùcu ñávãha xii-ndo, te ní xóo quíndáá iní-ndó nchaa sã ní cadúha cue ñâyiu ñuyúú-a nchaa sã càchí-yu cùu ndiòxí te ñã ndáá sã ndiòxí cúú-xí, te nchaa xiáⁿ ñã túú càháⁿ-xi. ³ Te cuiní-í sã nchòhó cutnùni iní-ndó sã Espiritú Yá Ndiòxí ñã túú chindee-xi ni ñã ñâyiu cuèndá sã càháⁿ úhú-yu Xítohó Jesucristú. Te ni ñã ñâyiu ñã túú càhu iní-yu càháⁿ-yu sã Xítohó Jesucristú cúú-gã Xítohó-yu te núú ñã túú Espiritú Yá Ndiòxí dácahu iní ñáhá-xí xii-yu.

⁴ Te ndi díñⁿ ndí díñⁿ ndùu chiuⁿ ní cachí Espiritú Yá Ndiòxí cada-o, te diu-ni ñã díñⁿ-ni Espiritú-gá ndécú.

⁵ Te ndi díñⁿ ndùu chiuⁿ quide-o xinu cuechi-o núú ñã díñⁿ-ni Xítohó Jesucristú. ⁶ Te ndi díñⁿ ndí díñⁿ

chindee ñaha Yá Ndiõxí xii-o nàcuáa cada-o chiuⁿ-gá, te ñiu-ni ñⁿ ñii-gá ndécú chindee-gá nchaa ñáyiu. ⁷ Te Espíritú Yá Ndiõxí quidé-xí sá nchóó càda-o sá vãha, te ducaⁿ chindee-o cue ñáyiu ndècu ndihi-o ichi Xítohó Jesucristú. ⁸ Te dava-o ñi nduu táhú-ó nùú Yá Ndiõxí sá Espíritú-gá cada te ndacu-o càháⁿ-ó tnùhu sá ño càhnu cuu ñiu-ni tnùhu mee Yá Ndiõxí, te dava tucu-o ñi nduu táhú-ó cùtnuní iní-ó nàcuáa càháⁿ tnùhu-gá te càháⁿ-ó nàcuáa cuíní Espíritú-gá. ⁹ Te dava tucu-o ñi nduu táhú-ó sá ño quíndáa iní-ó Xítohó Jesucristú cuèndá cada-gá ñⁿ sá cuíní-ó, te ducaⁿ chi Espíritú Yá Ndiõxí chindee ñaha-xi xii-o. Te dava tucu-o ñi nduu táhú-ó sá càcáⁿ táhú-ní-ó nùú Xítohó Jesucristú cuèndá ñáyiu cùhú te ndúha-yu. ¹⁰ Te dava tucu-o ñi nduu táhú-ó sá ndácú-ó càda-o nchaa sá vã yõ tnàhí ndàcu cada, te dava tucu-o ñi nduu táhú-ó nùú Yá Ndiõxí sá càháⁿ-ó tnùhu sá dácàhu iní ñãhá-gá xii-o, te dava tucu-o ñi nduu táhú-ó sá cùtnuní iní-ó nùú ñiu Espíritú Yá Ndiõxí chindee ñaha-xi xii ñáyiu òré càháⁿ-yu tnùhu-gá àdi cue espíritú cùndihi yucu ñávãha. Te dava tucu-o ñi nduu táhú-ó càháⁿ-ó tnùhu sá dácàhu iní ñãhá Espíritú Yá Ndiõxí xii-o tnùhu sá ñà túú xini-ó, te dava tucu-o ñi nduu táhú-ó càháⁿ-ó nàcuáa quèe-xi nchaa tnùhu-áⁿ. ¹¹ Te ñⁿ ñii díí-ni Espíritú Yá Ndiõxí ducaⁿ chindee ñaha-xi, te ñiu-ni Espíritú-gá dácãhñu ñaha-xi xii-o ndi ñⁿ nùú chiuⁿ sá cuíní mée-xí càda-o.

Nchaa-o ñⁿ-ni cuu-o ndihi Xítohó Jesucristú

¹² Te nchoo ñáyiu ndècu ñuyúú-a titní xichi cùu yiqui cuñú-ó dico ñⁿ-ni cùu-xi, te ñiu-ni ducaⁿ sãtnahá-xi cùu-o vitna ndecu-o ichi Xítohó Jesucristú chi ñⁿ-ni cùu-o ndihi-gá. ¹³ Te dava-o cùu-o ñáyiu isràél, te dava-o ñà túú cùu-o ñáyiu isràél, te dava-o cùu-o ñáyiu ñà

túú tnàhí dàñá quee nùú chiúⁿ patróoⁿ-xi, te dava-o cùu-o ñáyiu dàñá quèe nùú chiúⁿ patróoⁿ-xi. Te mee Espíritú Yá Ndiõxí ní quide-xi sá ncháá-ó ñⁿ-ná cùú-ó ndècu-o ndihi Xítohó Jesucristú. Te Yá Ndiõxí ní cachí-gá sá ncháá-ó cùndecu ndihi-o Espíritú-gá.

¹⁴ Te nchòhó xini-ndó sá titní xichi cùu yiqui cuñú-ó te ñà díú ñⁿ-ni xichi cuu-xi. ¹⁵ Te cuèi sáhá-ó ndihi ndaha-o ñà túú ñⁿ-ni cuu-xi dico vã cùú càchí-ó sá sáhá-ó ñà túú cùu-xi yiqui cuñú-ó. ¹⁶ Te cuèi lóho-o ndihi tinuu-o ñà túú ñⁿ-ni cuu-xi dico vã càchí-ó sá lóho-o ñà túú cùu-xi yiqui cuñú-ó. ¹⁷ Te nùu ñihíí ní ndúú yiqui cuñú-ó ní xindee mee-ni tinuu-o, te ñà túú ndéè cundeé lóho-o cùndedóho ñi cùu te nùu ducaⁿ, àdi nùu ñihíí yiqui cuñú-ó ní xindee mee-ni lóho-o te ñà túú ndéè cundeé dítní-ó ñi cùu te nùu ducaⁿ. ¹⁸ Dico mee Yá Ndiõxí ní taxi ndecu-gá ñⁿ ñⁿ xichi yiqui cuñú-ó nàcuáa ní cachí iní mée-gã. ¹⁹ Te nùu ñⁿ-ni sá ní xindee ñihíí yiqui cuñú-ó, te vã cùnduu-xi nacuáa tàú-xi cunduu ñi cùu te nùu ducaⁿ. ²⁰ Dico titní xichi cùu yiqui cuñú-ó, te ñⁿ-ni cùu-xi ñihíí-xi.

²¹ Te sa ñaha-o sá vã cùú càchí-ó sá tinuu-o ñà túú xini ñuhu-xi ndaha-o, àdi díquí-ó ñà túú xini ñuhu-xi sáhá-ó. ²² Te nchoo sã ñaha-o sá dáva xichi yiqui cuñú-ó sá càchí-ó sá ñà túú cùnuu ío-gá xini ñuhu-xi. ²³ Te dava xichi yiqui cuñú-ó sá ñà túú quide cuendá cávhi-ó nchaa xíãⁿ sá quidáhu dóo sácũhnu-o, te dava xichi yiqui cuñú-ó ñà cùú cùtúu chi dacuití sá quidáhu. ²⁴ Te nchaa xichi yiqui cuñú-ó sá cùú cùtúu ñà túú xini ñuhu-xi quidáhu. Te Yá Ndiõxí ní taxi ndecu-gá nchaa xichi yiqui cuñú-ó nàcuáa tàú-xi cunduu. Te ní cachí-gá sá dáva-gá xichi yiqui cuñú-ó nùú vã cùú cùtúu quidáhu. ²⁵ Te ducaⁿ ñi quide-gá cuèndá sá ñⁿ-ní cùu yiqui cuñú-ó. Te ducaⁿ ndi tnahá ñⁿ ñⁿ xichi yiqui

cũñú-ó chindee tnaha-xi. Te ducaⁿ sãtnahá-xi cùu nchoo vitna ndecu-o ichi Xítohó Jesucristú chi chindee tnaha-o. ²⁶ Te núu ìⁿ xichi yiqui cùñú-ó ná tnàhúhú te ñihí-ó quide úhú-xi, te núu ìⁿ xichi yiqui cùñú-ó ïo váha ndecu-xi te ducaⁿ ñihí yiqui cùñú-ó cúu váha-xi. Te ducaⁿ sãtnahá-xi cùu-o vitna ndecu-o ichi Xítohó Jesucristú.

²⁷ Te nchoo ndecu ndihi-o, Xítohó Jesucristú, te cùu-o datná yiqui cùñú-gá te ìⁿ ìⁿ-o cùu-o datná ìⁿ ìⁿ xichi yiqui cùñú-gá. ²⁸ Te ducaⁿ sãtnahá-xi cùu-o chi Yá Ndióxi ní taxi-gá ndí ðíⁿ ndí ðíⁿ chiuⁿ quide-o sá cúu-xí nchaa ñáyiú ndècu ichi-gá. Te díhna-gá cue téé caca cuu cáháⁿ tnúhu-gá núu ñáyiú ní taxi ndecu-gá, te dátñuní ní taxi ndecu-gá cue téé cáháⁿ tnúhu-gá nàcuáa dàcahu iní ñáhá mée-gá, te dátñuní ní taxi ndecu-gá cue téé dènehé ñáhá xii ñáyiú tnúhu-gá núu tàcá-yu, te dátñuní ní taxi ndecu tucu-gá cue téé ndàcu quide sá vã yõo tnàhí ndàcu cada. Te ní taxi ndecu tucu-gá cue téé xicáⁿ táhú-ní núu Xítohó Jesucristú cuèndá ñáyiú cùhú te ndúha-yu. Te ní taxi ndecu tucu-gá cue téé chindee cue ñáyiú ndècu ichi-gá. Te ní taxi ndecu tucu-gá cue téé yindaha ñaha xii ñáyiú ndècu ichi-gá, te ní taxi ndecu tucu-gá cue téé cáháⁿ tnúhu sá dácàhu iní ñáhá Espiritú-gá tnúhu sá ñà túú xini-güedé. ²⁹ Te ñà ncháá-ó cùu-o cue téé ní táuchíúⁿ Xítohó Jesucristú cáháⁿ tnúhu-gá núu ñáyiú, te ñà ncháá-ó cùu-o cue téé cáháⁿ tnúhu sá dácàhu iní ñáhá Yá Ndióxi xii-o. Te ñà ncháá-ó cùu-o cue téé dácuaa ñaha xii-yu. Te ñà ncháá-ó cùu-o cue téé quide sá vã yõo tnàhí ndàcu cada. ³⁰ Te ñà ncháá-ó cùu-o cue téé ðicó-ni cacáⁿ táhú núu Xítohó Jesucristú cuèndá ñáyiú cùhú te ndúha-yu. Te ñà ncháá-ó cùu-o cue téé cáháⁿ tnúhu sá dácàhu iní ñaha Espiritú Yá Ndióxi tnúhu sá ñà túú xini-ó, te ñà ncháá-ó cùu-o cue téé cùtnuní iní-xi

cáháⁿ nàcuáa ndùu tnúhu-áⁿ. ³¹ Te ïo nducu ndèe-ndo cada-ndo nàcuáa nduu táhú-ndó núu Yá Ndióxi nchaa sá ïo-gá cùnùu cada-ndo. Te vitna na dènehé ñáhá tucu-í xii-ndo nàcuáa cada-ndo, dico sá dènehé ñáhá-í-a ïo-gá cùnùu-xi.

13

Cuu iní-ó tnàha ñáyiú-o

¹ Te núu nchoo xini-ó cáháⁿ-ó tnúhu sá ïo vii ïo váha cuáháⁿ cáháⁿ ñáyiú ñuyúú-a, àdi xini-ó cáháⁿ-ó tnúhu sá ïo vii ïo váha cuáháⁿ cáháⁿ cue espíritú xínú cuèchi núu Yá Ndióxi, te núu xini-ó cáháⁿ-ó nchaa tnúhu-áⁿ te ñà túú cùu iní-ó cuè tnaha ñáyiú-o ña, te ñà túú nandíhi-xi sá xini-ó cáháⁿ-ó tnúhu-áⁿ te cùu-o datná dāca sá ïo dusaⁿ quide. ² Te núu cùu-o ñáyiú cáháⁿ tnúhu sá dácàhu iní ñáhá Yá Ndióxi, àdi cuu-o ñáyiú cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiú ïo váha cùtnuní iní-xi nchaa nàcuáa quide Yá Ndióxi, àdi cuu-o ñáyiú ïo váha sàndáá iní ñáhá xii Yá Ndióxi nàcuáa ndacu-o cùu-o ìⁿ yucu xocuiñi-xi núu ndécú-xí, te núu nchaa xíáⁿ xini-ó càda-o te ñà túú cùu iní-ó cuè tnaha ñáyiú-o ña, te ñà túú vèdana nandíhi-xi te núu vá cúu iní-ó tnàha ñáyiú-o cuèi na càda-o nchaa xíáⁿ. ³ Te cuèi nchaa sá ndécú ndihi-o na dácáhñu-o, te cuèi na cuáha cuèndá-ó mée-o cáyú-ó sá cúu-xí Yá Ndióxi, dico ñà túú vèdana chindee ñaha-xi xii-o sá ðucáⁿ càda-o te núu ñà túú cùu iní-ó cuè tnaha ñáyiú-o.

⁴ Dico núu cùu iní-ó cuè tnaha ñáyiú-o, te cahnú iní-ó, te quide váha-o, te ñà túú cùu-o ñáyiú cuédú iní, te ni ñà túú cáháⁿ-ó núu cùu cahnu-o, te ni ñà túú sàni iní-ó càda cahnu-o mee-o, ⁵ te ni ñà túú ñùhu cuehé iní-ó, te ni ñà túú ndecu-o mee-ni sá cúu-xí mée-o, te ni ñà túú-gá cùdèèⁿ-ó cuèndá ìⁿ sá cúu, te ni ñà túú-gá sá cùhuⁿ iní-ó sá quide ñàha tnaha ñáyiú-o xii-o. ⁶ Te ni ñà túú-gá cùdèè iní-ó nchaa sá ñà

túu vâha quide ñáyi, chi mee-nã cuendã nchaa sã vâha cùdí ìní-ó. ⁷ Te nchaa sã yâha-o sãcahnu ìní-ó, te sàni vâha ìní-ó cuendã nchaa ñáyi, te sàni ìní-ó sã díú-ní nchaa sã vâha cuu xii nchaa tnâha ñáyi-o ndéé cuèé-gá, te ío quide cahnu ìní-ó cuèi nãndi sã yâha-o, te nchaa xiãⁿ quidé-ó te núu cùu ìní-ó cuè tnaha ñáyi-o.

⁸ Te ni caa ni quíhíⁿ duha-ni cuu ìní-ó cuè tnaha ñáyi-o. Dico sáá nduu te vá cóo-gã ñáyi cáháⁿ tnúhu sã dácàhu ìní ñáhá Yã Ndiõxí, te ni vã cóo-gã ñáyi cáháⁿ tnúhu sã dácàhu ìní ñáhá Espiritú Yã Ndiõxí tnúhu sã ñã túú xini-yu, te ni vã cóo-gã ñáyi túha dàtnã túha ñáyi vitna. ⁹ Te vitna ñã túú cùtnuní ìní-ó nchaa nacuaã sàni ìní Yã Ndiõxí chi sacú-ni cùtnuní ìní-ó, te ducaⁿ sãcú-ni cáháⁿ-ó nãcuãã nduu tnúhu-gá, dico cáháⁿ-ó tnúhu-gá nãcuãã dácàhu ìní ñáhá-gã xii-o. ¹⁰ Te na sáá nduu càda Yã Ndiõxí nchaa nãcuãã tàù-xi cunduu, te dàvã-áⁿ te nchaa sã càchí-gã ñã túú ndècu-xi nacuaã tàù-xi cunduu vá dúcã-gã cundecu-xi.

¹¹ Te yúhú cùtnàhá ní cuu landú-í ní xóo cada-í sã cùu-í landú, ní xóo cáháⁿ-í, ní xóo cani ìní-í, te ní xóo tecú tnùn-í dàtnã quidé cuè landú xindecu vitna, dico sãtã ní cuu-í ìⁿ tée cùu sacuéhé te ñã túú-gã quidè-í dàtnã ní xóo cada-í cùtnàhá ní cuu landú-í. ¹² Te ducaⁿ sãtnahá-xi cùu-o vitna ndecu-o ichi Xítóhó Jesucristú, chi ñã túú cùtnuní vâha ìní-ó nãcuãã nduu cuendã Yã Ndiõxí, te cùu-o datná ñáyi ndèhe ìⁿ núu yùtátã sã ñã túú túu vâha núu-xi, te ducaⁿ sãtnahá-xi cùu-o chi ñã túú cùtnuní vâha ìní-ó nãsa cùu cuendã-gã, dico sáá nduu quini núu-ó-gã. Te nchoo sãcú-ni cùtnuní ìní-ó nãcuãã nduu-gã vitna dico na sáá nduu te quini ndáá-ó nãcuãã càa nacuaã nduu-gã dàtnã xini ñáhá mèe-gã xii-o. ¹³ Te ni caa ni quíhíⁿ ducaⁿ-ni quindáá ìní-ó Yã Ndiõxí, te ducaⁿ-ni cùndecu ndihi-o tnúhu

ndee ìní cundecu-o ndihi-gá, te ducaⁿ-ni ío cuu ìní-ó-gã ndihi tnâha ñáyi-o. Te sã cùu ìní-ó Yã Ndiõxí ndihi sã cùu ìní-ó tnâha ñáyi-o xiãⁿ ío-gã cùnùu-xi dácúxí dàva-gã.

14

Ñáyi cáháⁿ tnúhu sã dácàhu ìní ñáhá Espiritú Yã Ndiõxí

¹ Te vá dáñã ndéé-ndó cùu ìní-ndó tnâha ñáyi-ndo, te cuhuⁿ ìní-ndó sã nduu táhú-ndó núú Yã Ndiõxí titni núu chiúⁿ cada-ndo nacuaã chindee ñãha Espiritú-gã xii-ndo, te ío cuhuⁿ ìní-ndó sã ndúú táhú-ndó cáháⁿ-ndó tnúhu sã dácàhu ìní ñáhá Yã Ndiõxí xii-ndo. ² Te cue ñáyi cáháⁿ tnúhu sã dácàhu ìní ñáhá Espiritú Yã Ndiõxí tnúhu sã ñã túú xini-yu, te tnúhu cáháⁿ-yu-áⁿ cúu-xí sã cúu-xí Yã Ndiõxí te ñã díú sã cúu-xí ñáyi chi ñã túú tècú tnùn-í-yu, te mee Espiritú Yã Ndiõxí quidé-xí dùcaⁿ cáháⁿ-yu tnúhu yiyuhu. ³ Te cue ñáyi ní nduu táhú núú Yã Ndiõxí cáháⁿ tnúhu sã dácàhu ìní ñáhá-gã xii-yu, te ñáyi-áⁿ dácàháⁿ-yu ñáyi nãcuãã cuita níhí ndéé-gã-yu cundecú-yu ichi-gã, te ducaⁿ cuãñáhã-yu tnúhu ndee ìní xii-yu òrè ndihú ìní-yu. ⁴ Te ñáyi cáháⁿ tnúhu sã dácàhu ìní ñáhá Espiritú Yã Ndiõxí xii-yu tnúhu sã ñã túú xini-yu-áⁿ, ñáyi-áⁿ mee-ni-yu níhí ndéé-yu ndècú-yu ichi-gã. Dico ñáyi cáháⁿ tnúhu sã dácàhu ìní ñáhá-gã xii-yu, cáháⁿ-yu tnúhu-áⁿ nãcuãã níhí ndéé dàva-gã ñáyi nchicúⁿ nihnu ichi-gã.

⁵ Te yúhú ío cudíⁿ ìní-í te núu nchaa-ndo cáháⁿ-ndó tnúhu sã dácàhu ìní ñáhá Espiritú Yã Ndiõxí xii-ndo tnúhu sã ñã túú xini-ndó. Dico ío-gã cudíⁿ ìní-í te núu nchaa-ndo cáháⁿ-ndó tnúhu sã dácàhu ìní ñáhá-gã, chi ío-gã xini ñúhu-xi sã cáháⁿ-ndó tnúhu-áⁿ dácúxí sã cáháⁿ-ndó tnúhu sã dácàhu ìní ñáhá Espiritú-gã cáháⁿ-ndó tnúhu sã ñã túú xini-ndó. Dico ìⁿ-ni nùtnahá-xi quide-ndo te núu nchòhó ñáyi cáháⁿ tnúhu

sá dácàhu iní ñáhá Espíritú-gá cáháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiu ndècu ichi Yá Ndiòxí cuita níhí ndéé-gá-yu quíhíⁿ cundecú-yu ichi-gá. ⁶ Te núu yúhú quexio-í núu ndécú nchòhó ñáyiu ndècu ndihí-í ichi Xítóhó Jesucristú, te ngüita-í cáháⁿ-í mee-ni tnúhu sá dácàhu iní ñáhá Espíritú Yá Ndiòxí xii-í tnúhu sá ñà túú xini-í, te ñà túú nã sá vâha cuu-xi sá cúu-xi-ndó. Dico cuu-xi sá vâha xii-ndo te núu na cáháⁿ-í núu-ndó nchaa tnúhu sá dánèhé ñáhá Yá Ndiòxí xii-í tnúhu sá vâtá dácuaà-gá-í, ndihí nchaa tnúhu sá sá xini-í, ndihí nchaa tnúhu sá dácàhu iní ñáhá-gá xii-í cáháⁿ-í, ndihí nchaa dava-gá tnúhu-gá.

⁷ Te na càda-o cuendá sá núu ìⁿ tée tiú-dé vílu àdi cani-dé àrpá te núu ñà túú sàhnú-dé ndihí-xi ìⁿ yaá, te ñà cùtnùní iní-ó nã yaá caní-dé àdi ná yaá tiú-dé te núu ducaⁿ na càda-dé. ⁸ Te ñiu-ni ducaⁿ sãtnahá-xi cùu tucu tée cùu sandadú tiú cútú, chi núu vá tiú vâha-dé nàcuáa tàú-xi cunduu òré quíhíⁿ-güedé nã-güedé, te vá ngündecu túha dava-gá cue sandadú te núu ducaⁿ na càda-dé vá tiú vâha-dé. ⁹ Te ducaⁿ sãtnahá-xi cùu nchohó te núu vá cáháⁿ-ndó ìⁿ tnúhu nàcuáa tàú-xi cunduu núu ñáyiu te vá tècú tnùnì-yu tnúhu cáháⁿ-ndó. ¡Chi àúⁿ nã cuu cáháⁿ-ndó te núu ducaⁿ na càda-ndo! ¹⁰ Te ío titnì núu tnúhu ío ñuyíú, te ìⁿ ìⁿ núu tnúhu-áⁿ cùtnùní iní ñáyiu nàcuáa quèe-xi. ¹¹ Te núu nchoo ñà tècú tnùnì-ó ìⁿ tnúhu cáháⁿ ìⁿ ñáyiu, te quide-ó-yu ñáyiu ñúú xicá chi ñà túú cáháⁿ-yu tnúhu cáháⁿ-ó, te ñiu-ni ducaⁿ quide ñahá-yu xii nchoo tucu. ¹² Te xiãⁿ núu càchí tnúhu-í xii nchaa nchòhó ñáyiu ío cuìní nduu táhú núu Yá Ndiòxí sá Espíritú-gá chindee ñaha-xi xii-ndo cada-ndo ná daha núu chiúⁿ, te ío nducu ndèe-ndo cada-ndo chiúⁿ sá ní nduu táhú-ndó nàcuáa cuita níhí ndéé-gá ñáyiu ndècu ichi-gá quíhíⁿ.

¹³ Te núu cáháⁿ-ndó tnúhu sá ñà túú xini-ndó, tnúhu sá dácàhu iní ñáhá Espíritú Yá Ndiòxí xii-ndo, te xini ñuhu-xi sá càcáⁿ táhú-ndó núu Yá Ndiòxí cuendá sá ná chindee ñaha-gá xii-ndo cáháⁿ-ndó núu ñáyiu núu nása quèe-xi tnúhu-áⁿ. ¹⁴ Chi núu nchoo na cáháⁿ ndihí-o Yá Ndiòxí ndihí tnúhu sá ñà túú xini-ó, te ni yúhu ni iní-ó cáháⁿ ndihí-o-gá dicó-ni sá ñà tècú tnùnì-ó nàcuáa nduu tnúhu cáháⁿ-ó. ¹⁵ Te xiãⁿ núu xini ñuhu-xi cáháⁿ ndihí-o Yá Ndiòxí ni yúhu ni iní-ó nàcuáa chindee ñaha Espíritú-gá xii-o te cáháⁿ-ó nàcuáa tecú tnùnì-ó, te ñiu-ni ducaⁿ càda-o oré xitá yúhu-o chiñuhu-o Yá Ndiòxí, chi ni yúhu ni iní-ó ducaⁿ cada-o nàcuáa chindee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnúhu cáháⁿ-ó xita-o. ¹⁶ Chi núu nchoo na ndacáⁿ táhú-ó núu Yá Ndiòxí ndihí mee-ni tnúhu sá ñà túú xini-ó tnúhu sá dácàhu iní ñáhá Espíritú-gá xii-o, te ñáyiu ñà túú ní nduu táhú cáháⁿ tnúhu cáháⁿ-ó ndèdóho ñahá-yu xii-o, te ñáyiu-áⁿ vã ndácú-yu cáháⁿ-yu tnúhu cáháⁿ-ó ndacáⁿ táhú-ó ndihí-yu núu Yá Ndiòxí chi ñà túú tècú tnùnì-yu tnúhu cáháⁿ-ó. ¹⁷ Te vâha-ni quide-o sá dúcáⁿ cáháⁿ-ó ndacáⁿ táhú-ó núu Yá Ndiòxí, te dicó-ni sá tnúhu-áⁿ ñà túú chindee-xi ñáyiu nàcuáa cuita níhí ndéé-gá-yu cundecú-yu ichi-gá. ¹⁸ Te yúhú ío ndacáⁿ táhú-í núu Yá Ndiòxí chi cáháⁿ-í tnúhu sá ñà túú xini-í tnúhu sá dácàhu iní ñáhá Espíritú-gá xii-í, te cáháⁿ-gá-í dácúúxí nchaa nchohó. ¹⁹ Te òré tàcá ñáyiu ndècu ichi Yá Ndiòxí dácuaà-gá-yu tnúhu-gá, te cáháⁿ-í tnúhu-gá núu-yu sá sá ní cùtnuní iní mée-í nàcuáa ducaⁿ cùtnuní iní-yu nàcuáa nduu tnúhu cáháⁿ-í. Te tnahá-gá iní-í cáháⁿ-í úhúⁿ-ni tnúhu-áⁿ núu-yu dácúúxí sã cáháⁿ-í úxí mĩ tnúhu sá ñà túú xini-í, tnúhu sá dácàhu iní ñáhá Espíritú Yá Ndiòxí xii-í cáháⁿ-í.

²⁰ Te nchòhó ñáyiu ndècu ndihí-í ichi Xítóhó Jesucristú, vá caní iní-ndó dàtná sání iní cue landú,

chi cani iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú líhli vá cundècu-ndo ichi cuehé ichi duha, chi cue landú-án ñà túú ndècu-güexi ichi-án.²¹ Te núú tütú Yá Ndiöxí cáháⁿ-xi nàcuáa ní cáháⁿ-gá, te cächí-xi: “Cue téé ñúú xicá cáháⁿ ndí dñíⁿ núú tnúhu quiñⁿ-güedé cáháⁿ-güedé tnúhu-í núú ñáyiú isràél cada-güedé núú-í, te cuèi ducaⁿ dico vá quíndáá iní-yu tnúhu-í”, duha ní cachí Yá Ndiöxí te ducaⁿ ní ngúndéé núú tütú-gá.²² Te tnúhu sá dácàhu iní ñáhá Espiritú Yá Ndiöxí xii-o tnúhu sá ñà túú xini-ó, xíáⁿ cúú-xí cuendá sá cútnùní iní cue ñáyiú ñà túú sàndáá iní tnúhu Yá Ndiöxí sá ñà túú cùu váha iní ñáhá-gá xii-yu. Dico sá cúú-xí cuè ñáyiú sàndáá iní tnúhu-gá ñà túú nã quidé-xí sá cúú-xí-yu. Te tnúhu sá dácàhu iní ñáhá Yá Ndiöxí xii-o, xíáⁿ cúú-xí cuendá sá cútnùní iní cue ñáyiú sàndáá iní tnúhu-gá sá ndécú ndíhi ñaha-gá xii-yu, dico ñà túú ducaⁿ sani iní cue ñáyiú ñà túú sàndáá iní tnúhu-gá.²³ Te núú ní tacá nchaa nchòhó ñáyiú ndècu ichi Yá Ndiöxí, te nchaa-ndo ní ngüíta-ndo cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te mei òré-án quexio cue ñáyiú ñà túú sàndáá iní tnúhu-gá, ndíhi cue ñáyiú vátá quini dana-gá tnúhu-gá núú ndécú-ndó, te ñáyiú-án quesáhá-yu sá lúcú-ndó te núú ducaⁿ cáháⁿ-ndó tnúhu sá dácàhu iní ñáhá Espiritú-gá xii-ndo òré quexio-yu.²⁴ Dico núú nchaa-ndo cáháⁿ-ndó tnúhu sá dácàhu iní ñáhá Yá Ndiöxí xii-ndo, te mei òré-án quexio cue ñáyiú ducaⁿ ñà túú sàndáá iní-xi tnúhu-gá, ndíhi cue ñáyiú ducaⁿ ñà túú xini dana tnúhu-gá-án, te ñáyiú-án cutnùní iní-yu sá ndécú cuèchi-yu núú-gá, te ngüíta-yu cuáha-yu cuendá sá ñà túú quide váha-yu ndécú-yu cuendá sá cáháⁿ-ndó tnúhu-gá ndédóho-yu.

²⁵ Te nchaa sá cuèhé sá dúhá ní quidé-yu sàni iní-yu yiyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yá Ndiöxí, te cachí-yu sá ìo càhnu cuu-gá, te cachí tucú-yu sá ndàá ndécú ndíhi-ndo-gá.

Cada-o nàcuáa tàú-xi cunduu

²⁶ Te vitna nchòhó ñáyiú ndècu ndíhi-í ichi Xítóhó Jesucristú xini ñuhu-xi duha cada-ndo. Òré tacá-ndó te dava-ndo càta yuhu-ndo chiñuhu-ndo Yá Ndiöxí, te dava-ndo dásahú-ndó ñáyiú tnúhu-gá, te dava-ndo cáháⁿ-ndó nàcuáa dàquixi túu Yá Ndiöxí iní-ndó, te dava-ndo cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te dava-ndo cáháⁿ-ndó nàcuáa quèe-xi tnúhu-án. Te nchaa sá quidé-ndó ná cùu-xi nacuáa chindee-xi ñáyiú nàcuáa cuita níhi ndéé-gá-yu cundecú-yu ichi-gá.²⁷ Te òré cáháⁿ-ndó tnúhu sá dácàhu iní ñáhá Espiritú Yá Ndiöxí xii-ndo tnúhu sá ñà túú xini-ndó, te úú-ni-ndo àdi úní-ni tnáhá-ndó cáháⁿ-ndó tnúhu-án te vá úúⁿ ní cáháⁿ-ndó chi ndéé ndíhi ñⁿ-ndo te dàtnùní ngüíta ingá-ndó cáháⁿ-ndó. Te xini ñuhu-xi sá ñⁿ ñáyiú cáháⁿ-yu nàcuáa quèe-xi tnúhu cáháⁿ-ndó-án.²⁸ Te núú ñà túú ñáyiú tècú tnùní nàcuáa quèe-xi tnúhu cáháⁿ-ndó-án, te núú méé núú ñⁿ-ní-ndó cáháⁿ-ndó tnúhu-án cáháⁿ ndíhi-ndo Yá Ndiöxí te vá cáháⁿ-ndó núú ñáyiú.²⁹ Te òré cáháⁿ-ndó tnúhu sá dácàhu iní ñáhá Yá Ndiöxí xii-ndo te úú-ni-ndo àdi úní-ni tucu-ndo cáháⁿ, te dava-gá-ndó cùndedóho-ndo tnúhu-án te cáháⁿ-ndó núu váha-ni cáháⁿ-güedé àdi ñà túú váha-ni.³⁰ Te núú ñⁿ-ndo ní dácáhú iní ñáhá Yá Ndiöxí xii-ndo ñⁿ tnúhu cáháⁿ-ndó, te núú ñⁿ-ndo sá cáháⁿ-ndó te ngüíñí-ndó te quihu tucu ingá-ndó cáháⁿ-ndó nàcuáa ní dácáhú iní ñáhá Yá Ndiöxí xii-ndo.³¹ Te nchaa nchòhó ñáyiú ní nduu táhu cáháⁿ tnúhu sá dácàhu iní ñáhá

Yá Ndióxi, te vá úúⁿ-ní cǎháⁿ-ndó chí díhna-gá ìⁿ-ndo cǎháⁿ te dàtnùní cǎháⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa ndùu tnúhu cǎháⁿ ìⁿ ìⁿ-ndo, te ducaⁿ te cudìⁿ-gǎ iní-ndó cǎnchicúⁿ nihnu-ndo ìchi-gǎ. ³² Te nchaa ñáyiú cǎháⁿ tnúhu Yá Ndióxi sá nàha-ná mèe-yu nàcuáa quidé-yu cǎháⁿ-yu tnúhu-gǎ nàcuáa ñá túú quide cutexínu-yu. ³³ Te Yá Ndióxi cúú-gǎ Yaá quidé ò váha cùu ìⁿ-nuu-ndo ndecu-ndo, te ñá túú dàticá nuu ñaha-gǎ xii-ndo.

Te na cǎchí tnúhu-í xii-ndo nàcuáa cǎháⁿ-í nchaa núú tàcǎ cue ñáyiú ndècu ndìhi-o ichi Xitohó Jesucristú. ³⁴ Te yúhú cǎchí-í sá vǎ cúú cǎháⁿ cue ñáyiú díhí òré tàcǎ-ndó dàcuaha-ndo tnúhu-gǎ, chí ñá túú dùcaⁿ cuiní-gǎ cadá-yu, te quíndáa-ni iní-yu cadá-yu nàcuáa tàú-xi cunduu. ³⁵ Te núú ìⁿ sǎ cuiní-yu nducu tnúhu-yu te ndéé òré nasáa-yu vehé-yu te nducu tnúhu-yu núú yíⁿ-yu, chí ñá túú ndùu váha-xi sǎ cǎháⁿ-yu núú tàcǎ nchaa ñáyiú dàcuáha ndìhí-yu tnúhu-gǎ.

³⁶ Te chí dándàcu iní sǎ ñà díú nchòhó cúú-ndó ñáyiú ní ngúndecu ndìhí tnúhu Yá Ndióxi díhna nuu nàcuáa datècú tnúhu-ndo dàva-gǎ ñáyiú, te ní ñà díú mèe-ni nchòhó sa ní ngúndecu ndìhí-ndo tnúhu Yá Ndióxi vitna, núú xiǎⁿ vá cǎchí-ndó sǎ ò cùnuu-ndo. ³⁷ Te núú dàva nchòhó sǎní iní-ndó sǎ cǎháⁿ-ndó nàcuáa dàcahu iní ñáhá Yá Ndióxi xii-ndo àdì saní iní-ndó sǎ quidé-ndó nàcuáa chìndee ñaha Espiritú-gǎ xii-ndo, te cuáha váha-ndo cuendá sǎ ncháá tnúhu cǎháⁿ-í-a cùu-xi tnúhu sǎ ní cǎchí tnúhu mee Xitohó Jesucristú cada-o. ³⁸ Te ndèda-ni càa ñáyiú ndècu ndìhí-ndo te núú ñá túú sándáa iní-yu tnúhu cǎháⁿ-í, te vá cadá cuendá-ndó tnúhu cǎháⁿ-yu.

³⁹ Te vitna nchòhó ñáyiú ndècu ndìhí-í ichi Xitohó Jesucristú, ò caní iní-ndó cǎháⁿ-ndó tnúhu sǎ

dácàhu iní ñáhá Yá Ndióxi núú ñáyiú, te dañà-ndo na cǎháⁿ cue ñáyiú ní nduu táhú núú Yá Ndióxi sǎ cǎháⁿ-yu tnúhu sǎ dácàhu iní ñáhá Espiritú-gǎ xii-yu tnúhu sǎ ñà túú xìní-yu. ⁴⁰ Te cada-ndo nchàa nàcuáa tàú-xi cunduu nàcuáa ñá túú nà cuu cundecu-ndo.

15

Ní ndoto Xitohó Jesucristú

¹ Te vitna nchòhó ñáyiú ndècu ndìhí-í ichi Xitohó Jesucristú cuiní-í sǎ dándàcu iní-ndó nàcuáa ní dánèhé ñáhà-í xii-ndo tnúhu sǎ cǎháⁿ nàcuáa naníhí tàhú-ò, chí díu tnúhu-áⁿ ní sándáa iní-ndó te nchicúⁿ nihnu-ndo. ² Te sǎ xii tnúhu-áⁿ níhnu-ndó ìchi cuáháⁿ-ndó núú ndúú táhú-ndó cundecu-ndo ndìhí Yá Ndióxi ní caa ní quíhíⁿ, te ducaⁿ ndùu táhú-ndó núú cundècu-ndo ní caa ní quíhíⁿ ndìhí Yá Ndióxi te núú nchicúⁿ nihnu-ndo nàcuáa ní dánèhé ñáhà-í xii-ndo, te núú ñá túú nchicúⁿ nihnu-ndo te ñá túú ní sándáa iní-ndó nàcuáa tàú-xi cunduu.

³ Te yúhú sa ní cǎchí tnúhu-í xii-ndo ìⁿ tnúhu sǎ ò cùnuu ní níhí-í, chí ní cǎchí tnúhu-í xii-ndo sǎ Xitohó Jesucristú ní xihí-gǎ cuendá nchaa yicǎ cuèchi-o, te ducaⁿ ní cuu chí ducaⁿ cǎháⁿ-xi núú tùtú Yá Ndióxi sǎ dúcáⁿ yáha-gǎ. ⁴ Te ní chindúxi ñaha-güedé xii-gǎ te nduu úní ní dándótó ñaha Yá Ndióxi xii-gǎ, te ducaⁿ ní cuu chí ducaⁿ cǎháⁿ-xi núú tùtú Yá Ndióxi. ⁵ Te sǎtá ní ndoto-gǎ te ní quee túu-gǎ núú tè Pèlú, te dàtnùní ní quee túu-gǎ núú dàva-gǎ cue téé ní táuchíúⁿ-gǎ cǎháⁿ tnúhu-gǎ. ⁶ Te sǎtá dúcáⁿ te dàtnùní ní quee túu-gǎ núú ùhúⁿ cièndú cue ñáyiú ndècu ichi-gǎ, te vai-yu xíndecu-ní-yu vitna chí sacú-ní-yu ní xihí. ⁷ Te dàtnùní ní quee túu-gǎ núú tè Jàcobó, te sǎtá dúcáⁿ te dàtnùní ní quee túu-gǎ núú nchaa cue téé ní táuchíúⁿ-gǎ cǎháⁿ tnúhu-gǎ.

⁸ Te ndéé núú ní ndìhí-ná te ní quee túu-gǎ núú mèe-í, te òré ní

quee túu-gá núu-í te cùu-í dàtná ìíⁿ déhe yiquìⁿ vátá sàá-gá nduu càcu chi cùu-í ìíⁿ téé ñá túú sàni váha iní-xi cuendá-gá ní cùu. ⁹ Te yúhú ñá túú cùnuu-í dàtná cúnùu cue téé ní táuchíúⁿ Xítóhó Jesucristú cáháⁿ tnúhu-gá. Te cùu-í ìíⁿ téé ní táuchíúⁿ-gá cáháⁿ tnúhu-gá, cuéi ñá túú táu-í sá cáháⁿ-í tnúhu-gá, chi ní xóo cuu úhú iní-í cue ñáyiú ndècu ichi Yá Ndiòxí. ¹⁰ Dico Yá Ndiòxí ío váha iní-gá chi ní quide ñaha-gá xii-í ìíⁿ téé váha, chi ñá túú-gá quidè-í dàtná ní xóo cada-í. Te ío cùndahú iní ñáhá-gá chindèe ñaha-gá xii-í dico ñá túú àúⁿ ná cuu chindee ñaha-gá, chi ío-gá vèi chiuⁿ-gá ní cuu sa ta quide-í cuáháⁿ dàcúúxí dává-gá cue téé ní táuchíúⁿ-gá cáháⁿ tnúhu-gá te ñá díú mèe-í ducaⁿ quide-í chi mee Yá Ndiòxí ío cùndahú iní ñáhá-gá chindèe ñaha-gá xii-í quidè-í chiúⁿ-gá. ¹¹ Te ñá túú ná cada-xi cuéi dává-gá-güedé sa ní cuu vèi-gá chiúⁿ-gá quidé-güedé àdi yúhú, chi ìíⁿ-ni tnúhu cáháⁿ-ndí te tnúhu-áⁿ cúú tnúhu ní sándáá iní-ndó.

Cue ñáyiú ní xihí ndotó-yu

¹² Te nchúhú cue téé cáháⁿ tnúhu Xítóhó Jesucristú cáháⁿ-ndí sá ní xihí-gá te ní ndoto-gá, ¿te ná cuendá dává nchòhó càchí-ndó sá vǎ ndótó cué ñáyiú ní xihí? ¹³ Te núu ducaⁿ sàni iní-ndó sá vǎ ndótó cué ñáyiú ní xihí te ní Xítóhó Jesucristú ñá túú ní ndòto-gá te núu ducaⁿ. ¹⁴ Te núu dicó Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndí xii-ndo ñá túú nàndíhi-xi te núu ducaⁿ, te àúⁿ ná cuu sándáá iní-ndó-gá te núu ducaⁿ. ¹⁵ Te núu dicó cúú-xí ìíⁿ sá ndáá tnúhu sàni iní dává-ndo ñá, te dàcuandehnde-ndí sá cáháⁿ-ndí tnúhu Yá Ndiòxí núú-ndó te núu ducaⁿ, te ñá túú cáháⁿ ndáá-ndí núú-ndó sá Yá Ndiòxí ní dándótó-gá Xítóhó Jesucristú, te núu ndáá nàcuáa sàni iní dává-ndo sá vǎ

ndótó cué ñáyiú ní xihí, dico ñá ndáá nàcuáa sàni iní-ndó. ¹⁶ Te núu vǎ ndótó cué ñáyiú ní xihí te ní Xítóhó Jesucristú ñá túú ní ndòto-gá. ¹⁷ Te núu Xítóhó Jesucristú ñá túú ní ndòto-gá ñá, te àúⁿ ná cuu sándáá iní-ndó-gá te núu ducaⁿ, te ndècu-ni cuèchi-ndo núú Yá Ndiòxí te núu ducaⁿ. ¹⁸ Te núu ndáá nàcuáa sàni iní-ndó ñá te cue ñáyiú ní sándáá iní ñáhá xii Xítóhó Jesucristú ñáyiú ní xihí ní xíta nihnú-yu te núu ducaⁿ. ¹⁹ Te núu nchòo ndècu ndihi-o tnúhu ndee iní núú Xítóhó Jesucristú cuendá-ni sá cùndècu-o ñuyúú-a ñá, te cùu-o ñáyiú ío-gá duuⁿ duuⁿ ndàhú sá cúú-xí dává-gá ñáyiú te núu ducaⁿ.

²⁰ Dico ndáá sá Xítóhó Jesucristú ní xihí-gá te ní ndoto-gá núu xǎⁿ cùtnùní iní dává-o sá ndótó cué ñáyiú ní xihí ñáyiú ní sándáá iní tnúhu-gá. ²¹ Te sá cuèchi ìíⁿ-di-ni téé ní xíndecu ñuyúú-a xǎⁿ xihí ñáyiú, te sá cuendá ìíⁿ-di-ni tucu ingá téé te ndoto cue ñáyiú ní xihí. ²² Te nchaa ñáyiú xihí-yu sá cuèchi ìíⁿ téé, te téé-áⁿ cúú-dé ndíi Àdán téé díhna nuu ní cuu ñani tnáhá cué ñáyiú ñuyúú. Te díu-ni ducaⁿ sá cuendá ìíⁿ-di-ni téé te ndoto cue ñáyiú ní xihí, te téé-áⁿ cúú-dé Xítóhó Jesucristú chi nchaa ñáyiú ndècu ndihi-gá ndotó-yu. ²³ Te díhna-gá Xítóhó Jesucristú ní ndoto-gá xǎⁿ cùtnùní iní dává-o sá ndùu na quixi tucu-gá ñuyúú-a te dává-áⁿ ndoto nchaa ñáyiú ní xihí ñáyiú ní sándáá iní tnúhu-gá. ²⁴ Te dàtnùní ducaⁿ te sáá nduu nàa nchaa sá ío ñuyúú, te Xítóhó Jesucristú danàa-gá nchaa ndi túhú sá cúnùu ío ñuyúú-a, chi danàa-gá nchaa ñáyiú ío cùnuu, ndihi yucu ñávàha, ndihi nchaa espíritú xínú cuèchi núú-xi. Te ducaⁿ te cùñaha-gá xii Tátá-ó Dùtú Ndiòxí taxi tnùní-gá. ²⁵ Chi Xítóhó Jesucristú dacuitíi tàxi tñuní-gá ndéé ná sáá nduu dànaa-gá nchaa sá cúú úhú iní ñáhá xii-gá. ²⁶ Te ndéé núú ní ndihi-ná te danàa-gá

sá quidé xihí ñáiyu. ²⁷ Te ducaⁿ chi càháⁿ-xi núú tútú Yá Ndiöxí sá méé-gá ní nachihí-gá nchaa sá ío ndaha Xítohó Jesucristú cuendá sá méé Xítohó Jesucristú taxi tnùní-gá, te vá yõ ìⁿ tàxi tnuní ñáhá xii Yá Ndiöxí, chi mee Yá Ndiöxí cúú-gá Yaá ní nachihí-gá nchaa sá ío ndaha Xítohó Jesucristú. ²⁸ Te díhna-gá ní xáhaⁿ Yá Ndiöxí xii Xítohó Jesucristú Yaá cúú Dêhe-gá sá quíndàha-gá nchaa sá ío, te òré ná quíndaha Xítohó Jesucristú nchaa sá ío, te cúñaha-gá xii Yá Ndiöxí taxi tnùní ñáhá-gá xii-gá, te ducaⁿ te mee-ná Yá Ndiöxí taxi tnùní-gá nchaandi tühú sá ío.

²⁹ Te núú ñá túú ndáá càháⁿ-í, ¿te ná cuendá dava ñáiyu sànduté-yu cuendá ñáiyu ní xihí núú ñá túú ndáá sá ndótó ñáiyu ní xihí?

³⁰ Te nchúhú ducaⁿ-ni sàni iní ñáiyu cahni ñáhá-yu xii-ndí, te núú vá ndótó ñáiyu ní xihí te àúⁿ ná cuu ducaⁿ quide cahnu iní-ndí ducaⁿ cuiní-yu cahni ñáhá-yu xii-ndí te núú ducaⁿ. ³¹ Te nchòhó ñáiyu ndècu ndihí-í ichi Xítohó Jesucristú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo sá ìⁿ nduu ìⁿ nduu ndeé iní ñáhá ñáiyu cahni ñáhá-yu xii-í. ³² Te núú òicó ndáá sá vá ndótó ñáiyu ní xihí dàtná càchí dava ñáiyu, te àúⁿ ná cuu ní xíndecu-í ñuú Éfesú ní cuu úhú iní ñáhá ñáiyu xii-í te núú ducaⁿ, chi ñáiyu-áⁿ ní quidé-yu dàtná quidé ìⁿ quiti dééⁿ sá cúú-xi-í. Te núú ndáá sá vá ndótó ñáiyu ní xihí ñá, te váha-gá núú cachí-ó dàtná càchí ñáiyu: “Vitna na còho-o te na càxi-o chi tneé idá cuú-ó”, duha càchí-yu.

³³ Te vá dáñá-ndó mée-ndo dan-dahú ñáhá ñáiyu ndècu ichi cuehé ichi duha xii-ndo, te ngüita-ndo càni iní-ndó dàtná sání iní-yu. Chi quée ndáá-xi nàcuáa càháⁿ tucu dava-gá ñáiyu, chi càchí-yu sá núú ñáiyu quide váha na nihí tnáhá-yu

ndihí ñáiyu ndècu ichi cuehé ichi duha, te ngüita ñáiyu quide váha-áⁿ cadá-yu tnáhá-yu nchaa sá cuèhé sá dúhá dàtná quidé ñáiyu-áⁿ. ³⁴ Te ío váha cuáha-ndo cuendá nàcuáa cundecu-ndo, te vá cadá-gá-ndó dàtná quidé cuè ñáiyu ndècu ichi cuehé ichi duha. Te dava-ndo quide-ndo datná quidé cuè ñáiyu ndècu ichi cuehé ichi duha chi ñá túú sàndáa iní-ndó Yá Ndiöxí. Te duha càháⁿ-í cuendá sá cúcàhaⁿ núú-ndó cuendá nchaa sá ñá túú váha quide-ndo.

Nàcuáa ndoto ñáiyu ní xihí

³⁵ Te cudana dava-ndo ndècu tnúhu-ndo núú nása ndoto ñáiyu ní xihí, te nása cunduu yiqui cùñú-yu òré ndotó-yu. ³⁶ Te nchòhó ñáiyu ducaⁿ càháⁿ cúú-ndó ñáiyu ñá túú tnáhí cùnuni iní-xi, te duha na càháⁿ-í nàcuáa tecú tnùní-ndó. Te núú ìⁿ tatá ná chíhí-ó te tēhyú méé-xí te xínu déhe-xi. ³⁷ Dico ñá díú sá sà ní xínu ta sàhnu cuáháⁿ ní cùxi-o, te òiu-ni ducaⁿ quide-o cuéi trùú ndihí nchaa dava-gá tatá xítú-ó. ³⁸ Te Yá Ndiöxí quidé-gá sá cùnduu tatá xínu-áⁿ dàtná cuiní méé-gá cunduu. Te ndēda-ni cāa tatá te òiu-ni-gá quidé-gá sá cùnduu-xi nàcuáa tàú-xi cunduu. ³⁹ Te ndi díñⁿ ndáa nchaa yiqui cùñú, chi tucu cāa yiqui cùñú nchoo cuè ñáiyu, te tucu cāa yiqui cùñú nchaa quiti xica núú ñúhú, te tucu cāa yiqui cùñú nchaa quiti ndāva, te tucu cāa yiqui cùñú nchaa chácá. ⁴⁰ Te ducaⁿ ñá túú ìⁿ-ni caa nchaa yiqui cùñú sá ío andiu ndihí nchaa yiqui cùñú ñáiyu ío ñuyú-a, te ducaⁿ ñá túú ìⁿ-ni ndáa vii nchaa sá ío andiu ndihí ñuyú-a. ⁴¹ Te ducaⁿ cūu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñá túú ìⁿ-ni dayehé nchaa chódíní. ⁴² Te ducaⁿ sàtnahá-xi cūu ñáiyu ní xihí te ndoto, chi tucu cāa yiqui cùñú-yu sá nguíndūxi te tucu cunduu yiqui cùñú-yu òré ndotó-yu, te yiqui cùñú sá ndótó

ndíhí-yu-án vǎ ndíhí nihnu-gá-xi. 43 Te yiqui cùñú ñáyiú xihí ñá túú nàndíhí-xi, dico yiqui cùñú sá ndótó ndíhí-yu te ío váha cunduu. Te nchaa yiqui cùñú ñáyiú xihí ñá túú tnàhí-gá ndee-xi, dico yiqui cùñú ndoto ndíhí-yu xǎá ío cunduu ndee-xi. 44 Te yiqui cùñú nchaa ñáyiú xihí cúú-xí cuèndá ñuyíú-a, dico yiqui cùñú sá ndótó ndíhí-yu xǎá cundecu-ná-xi cuèndá Espíritú Yá Ndióxi. Te dàtná ío yiqui cùñú sá cúú-xí cuèndá ñuyíú-a, te ducaⁿ ío yiqui cùñú sá cúú-xí cuèndá mee-nǎ Espíritú Yá Ndióxi.

45 Te núú tütú Yá Ndióxi càchí-xi: “Ndíi Ádán ndíi ní xíndecu ndéé díhna ní chíhí Yá Ndióxi íní ndíi”, duha càchí-xi núú tütú-gá. Te íngá tucu téé cùú-dé dàtná ndíi Ádán te téé-áⁿ cúú-dé Xítoho Jesucristú, te Yaá-áⁿ quidé-gá sá mée-nǎ Espíritú Yá Ndióxi quidé-xí ndècu-o ichi-gá vitna. 46 Te díhna-gá yiqui cùñú cuèndá ñuyíú-a ní ngúndecu, te dàtnúni ngúndecu yiqui cùñú cundecu ndíhí mee-nǎ Espíritú Yá Ndióxi. 47 Te téé díhna nuu ní xíndecu ñuyíú-a chí ñuhu ní cadúha ñaha Yá Ndióxi xii-dé, te téé-áⁿ cúú-dé ndíi Ádán, te íngá tucu téé ní cuuⁿ-dé andíu te téé-áⁿ cúú-dé Xítoho Jesucristú. 48 Te nchaa ñáyiú càa yiqui cuñú-yu dàtná cáá yiqui cuñú téé Ádán téé ducaⁿ ní cuáha ñuhu-áⁿ, te nchaa ñáyiú ní nduu táhú cundecu ndíhí téé ducaⁿ vèxi cuuⁿ andíu-áⁿ, ñáyiú-áⁿ nduu yiqui cùñú-yu dàtná cáá yiqui cuñú ní nduu táhú-dé ndécú ndíhí-dé vitna, te téé-áⁿ cúú-dé Xítoho Jesucristú. 49 Te nchaa ñáyiú ñuyíú-a càa-yu dàtná-ní càa datná-ní ndúu téé ducaⁿ ní cuáha ñuhu-áⁿ. Te nchaa nchoo ñáyiú ní nduu táhú cundecu ndíhí téé ducaⁿ vèxi cuuⁿ andíu-áⁿ nduu-o dàtná-ní càa datná-ní ndúu téé-áⁿ tucu.

50 Te nchòhó ñáyiú ndècu ndíhí-í ichi Xítoho Jesucristú càchí tnúhu-í xii-ndo sǎ ncháá nàcuáa càa yiqui

cuñú ñáyiú xíndecu vitna vá sàá-xi cundecu-xi núú ndécú Yá Ndióxi táxi tnúni-gá, chí ñuyíú-a ndíhí nihnu-xi. Dico sá tàú-xi sáá núú ndécú-gá táxi tnúni-gá xini ñuhu-xi cuu-xi sá cudíi cundecu. 51 Te na càchí tnúhu-í xii-ndo ñⁿ tnúhu sá yíyùhu ní cuu: Dava-o cùú-ó te dava-o cundecu-ni-o, dico nchaa-o nàdáma yiqui cuñú-ó. 52 Te uuⁿni ducaⁿ nàdáma yiqui cuñú-ó òré càháⁿ ñⁿ cútú, te cútú-áⁿ càháⁿ-xi òré sa ta cùyatni naa ñuyíú. Te òré càháⁿ cútú-áⁿ te ndoto nchaa ñáyiú ní xihí ñáyiú ní xíndecu ichi Xítoho Jesucristú, te ducaⁿ te vá ñⁿ ndúu ñⁿ quíú-gǎ cuú-yu. Te nchaa ñáyiú ndècu vivú te nàdáma yiqui cuñú-yu tnàhá-yu. 53 Te nchaa yiqui cùñú ndécú ndíhí nchaa ñáyiú ndècu ñuyíú-a vitna ñá túú cudíi-xi chí xihí-xi, dico yiqui cùñú nduu táhú nchoo ñáyiú ndècu ichi Xítoho Jesucristú chí cudíi-xi ní caa ní quíhíⁿ chí vá cùú-gá-xi. 54 Te òré ná ndúu táhú-ó yiqui cuñú sá dúcáⁿ cudíi ní caa ní quíhíⁿ-áⁿ, te vá cundècu ndíhí-gá-ó yiqui cuñú sá ñá túú cudíi. Te dàvá-áⁿ te quee ndáá-xi nàcuáa càháⁿ-xi núú tütú Yá Ndióxi núú càchí-xi: “Vitna ñá túú-gá xihí ñáyiú chí mee-nǎ Yá Ndióxi cúnúu-gá táxi tnúni ñáhá-gá xii-yu. 55 Te ñá túú tnàhí-gá ná ndoho ñáyiú sá cuèndá tnúhu xihí, chí vá cóo-gǎ tnúhu xihí”, duha càchí-xi núú tütú Yá Ndióxi. 56 Te cue ñáyiú ndècu ndíhí-yu tnúhu sá sánú ichi ñaha xii-yu nàcuáa cadá-yu cundecú-yu dico uuⁿ-gá quidé-gá yiqui nchaa sá cuèhé sá dúhá. Te sá cuèndá nchaa sá cuèhé sá dúhá quidé-yu-áⁿ, te xǎá ní ngúndecu tnúhu xihí dándòho ñaha-xi xii-yu. 57 Dico táxáhu xii Yá Ndióxi chí ní taxi-gá tnúhu ndee íní ndécú ndíhí-o sá sàá nduu te vá quíni-gá-ó tnúhu xihí, te ducaⁿ chí ndècu ndíhí-o Xítoho Jesucristú.

58 Te xǎáⁿ núu càháⁿ-í dóho nchòhó cue ñáyiú ndècu ndíhí-í ichi Xítoho

Jesucristú chi ío cùu iní ñàhà-í xii-ndo, te càháⁿ-í dóho-ndo sá cànchicúⁿ nihnu-ni-ndo ichi Xítohó Jesucristú cuèi nándi na càda ñaha ñáyiú xii-ndo sá cuendá-gá, te ío nducu ndèe-ni-ndo cada-ndo chiuⁿ-gá, chi sa ñaha-ndo sá ncháá chiuⁿ quide-o cuendá-gá ñá túú àuⁿ nã cuu quide-o.

16

Nàcuáa sàcáⁿ tnáhá ñáyiú díhúⁿ

¹ Te na càchí tnúhu-í xii-ndo cuendá díhúⁿ sá sàcáⁿ tnáhá-ndó sá cúu-xí ñáyiú ñúú Jerusálén, chi diu-ni duha ní dánèhé-í cue ñáyiú xíndecu ichi Xítohó Jesucristú ndécú ìⁿ ìⁿ xichi distritú Gâlaciá. ² Te duha cada-ndo ndi tnáhá nduu ndumíngú, te ìⁿ ìⁿ-ndo dàquee diⁿ-ndo sacú díhúⁿ nàcuáa chindee ñaha Yá Ndióxi xii-ndo ñhí-ndó cuendá òré quexio-í te sa cundecu túha díhúⁿ-ãⁿ. ³ Te òré quexio-í te mee-ndo cãxi-ndó-yu núu ndédacàa-yu sãni iní-ndó càda ndáá canehe díhúⁿ-ãⁿ quíhíⁿ ndaha ñáyiú xíndecu ichi Xítohó Jesucristú ndécú ñúú Jerusálén. Te cadúha-í ìⁿ úú tutú canehe-yu quíhíⁿ cuendá cutnùní iní ñáyiú ñúú Jerusálén nàcuáa ndùu chiuⁿ cuáháⁿ-yu. ⁴ Te núu xìni ñuhu-xi sá quíhíⁿ-í te candeca-í-yu quíhíⁿ.

Té Pãblú sání iní-dé quíngoto-dé cue ñáyiú ndècu ichi Xítohó Jesucristú

⁵ Te yúhú sání iní-í yáha-í ìⁿ úú ñúú cáá dìstritú Macèdoniá, te dãtnùní ducaⁿ te sáá-í núú ndécú-ndó. ⁶ Te òré quexio-í te cudana cundecu ndihí ñaha-í xii-ndo vài nduu, àdi cudana te cundecu ndihí ñaha-í xii-ndo ndèé yáha nchaa yóo quidé víxiⁿ-xi. Te sátá dúcáⁿ te cada ndee iní-ndó chindee ñaha-ndo xii-í òré nuçúhuⁿ ichi-í te núu ndèé ichi na quíhíⁿ-í. ⁷ Te duha càháⁿ-í chi núu Yá Ndióxi ná càchí-gá te cundecu ndihí ñaha tnàa-í xii-ndo òré quexio-í te ñá díú dícó-ni ichi yáha-í. ⁸ Te

cundecu-ni-í ñúú Éfesú-a ndèé tnahá vico Pentecostés. ⁹ Te ducaⁿ chi iha ío tédóho ñáyiú tnúhu Xítohó Jesucristú sá càháⁿ-í núú-yu. Núu xíãⁿ ío váha quèe cuendá cada-í chiuⁿ-gá cuèi ío vài ñáyiú ñá túú tnahá iní-yu sá càháⁿ-í tnúhu-gá.

¹⁰ Te núu na quixi coto ñaha té Timùteú xii-ndo, te ío váha cuu iní-ndó càháⁿ ndihí-ndo-dé cuendá ducaⁿ ñá túú nã caní iní-dé cundecu ndihí ñaha-dé xii-ndo, chi tnahá-dé cúu-dé tée quide chiuⁿ Xítohó Jesucristú dàtná quidè-í. ¹¹ Te cuiní-í sá ni ìⁿ-ndo vá caní cuèhé iní-ndó cuendá dé, te chindee-ndo-dé nàcuáa cuu váha iní-dé òré quixi-dé quixi coto ñaha-dé xii-í, chi yúhú ndihí dava-gá ñáyiú ndècu ichi Xítohó Jesucristú ndétú-ndí-dé quexio-dé.

¹² Te ío ní càháⁿ ndáhú-í núú tè Àpolós tée ndècu ndihí-o ichi Xítohó Jesucristú cuendá quixi-dé ndihí dava-gá cue tée ndècu ndihí-o ichi-gá quixi coto ñaha-güedé xii-ndo dico ñá túú ní cuiní-dé quixi-dé vitna, dico quixi-dé ndèé cuèé-gá.

Tnúhu ndèé núú ní ndihí-ná

¹³ Te ío quíhí iní-ndó cundecu-ndo ichi Xítohó Jesucristú, te vá dáña ndèé-ndó quíndáá iní-ndó-gã, te ío yíi cùnduu iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ichi-gá. ¹⁴ Te ío váha cuu iní tnáhá-ndó, te ducaⁿ ío váha cada tnàha-ndo te núu nándi cùu sá váha sãni iní-ndó càda-ndo.

¹⁵ Te nchòhó ñáyiú ndècu ndihí-í ichi Xítohó Jesucristú sa ñaha-ndo sá dñhanuu cuè ñáyiú cùu ndi mee té Èstéfanás ndécú dìstritú Acáyá ní sãndáá iní-yu tnúhu Xítohó Jesucristú. Te vitna ñá túú dàña ndèé-yu quidé-yu sá váha sá cúu-xí dàva-gá ñáyiú sãndáá iní tnúhu-gá. ¹⁶ Te càháⁿ ndáhú-í núú-ndó sá quíndáá iní-ndó nchaa ñáyiú ducaⁿ xíquide, ndihí nchaa dava-gá ñáyiú ío nducu ndee quide chiuⁿ ndihí-ndo cuendá Xítohó

Jesucristú. ¹⁷ Te ío cùdíí iní-í sá nĩ quexìo té Èstéfanás, ndihì té Fortunatú, ndihì té Acàicú, chí cue té-áⁿ nĩ quide-güedé núú-ndó nĩ quide-güedé nchaa sá ñà túú ndàcu-ndo cada-ndo cuendá-í ní cùu. ¹⁸ Te ío tàxi-güedé tnúhu ndee iní xii-í, te diu-ni ducaⁿ tàxi-güedé tnúhu ndee iní xii nchòhó tucu, te núu xíãⁿ xíní ñùhu-xi sá cánèhe-ndo sá yíñùhu núú nchaa cue téé duha xíquide váha.

¹⁹ Te nchaa ñáyiú xĩndecu ichi Xítohó Jesucristú ndécú distritú Àsiá quide ndee iní ñáhã-yu xii-ndo, te ío cada ndee iní-ndó càchí té Àquilú ndihì ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuàha tnúhu Yá Ndiõxí vehé-yu xii nchaa nchòhó ñáyiú ndècu ichi-gá. ²⁰ Te cada ndee iní tucu-ndo càchí cue dava-gá ñáyiú ndècu ndihì-o ichi Xítohó Jesucristú. Te nĩ yùhu nĩ iní-ndó càda ndee iní tnáhá-ndó ìⁿ ìⁿ-ndo.

²¹ Te vitna ndaha mee yùhú té Páblú téè-í tnúhu-a quide ndee iní ñáhà-í xii-ndo.

²² Te ñáyiú ñá túú cùu váha iní-xi núú Xítohó Jesucristú te na cuíta nihnú-yu. Te vitna nchaa-o chí ná càchí-ó sã Xítohó Jesucristú quixi tucu-gá.

²³ Te xicáⁿ táhù-í núú Xítohó Jesucristú sá ná chĩndee chitúu ñaha-gã xii-ndo. ²⁴ Te ío cùu iní ñáhà-í xii-ndo ñacuáa ndècu-o ichi Xítohó Jesucristú, te ducaⁿ na cùnduu, te ío chí cadá ndèe iní-nã vitna.

TUTÚ CÚÚ ÛÚ NÍ CADÚHA TÊ PĀBLŪ QUÍHÍⁿ NDAHĀ ÑÁYIU ÑUÚ CÒRINTÚ

Té Pāblū cādūha-dé tutú quíhíⁿ ndaha ñáyiū xīndecu ichi Xítohó Jesucristú ndécú ñuú Còrintú

¹ Yúhú té Pāblū càháⁿ-í tnúhu Xítohó Jesucristú chi ducaⁿ ní cachí Yá Ndióxi cunduu. Te cādúha-í tutú-a ndíhi té Timùteú té ndecu ndíhi-o ichi-gá cuendá daquixi-í ndaha nchòhó ñáyiū xīndecu ichi Yá Ndióxi ndécú ñuú Còrintú, te tutú-a cuu-xi tnàhá cuendá nchaa ñáyiū cūu cuendá Yá Ndióxi xīndecu nchaa ñuú yīndèhu distritú Acāyá. ² Te xicáⁿ táhù-í núú Tātá-ó Dútú Ndióxi ndíhi núú Xítohó Jesucristú sá io na chīndee chitúu ñaha-gá xii-ndo, te diu-ni ndi nduú-gá ná càda te io váha cuu iní-ndó cūndecu-ndo.

Té Pāblū càháⁿ-dé nchaa nàcuáa ndòho-dé

³ Te chí ná càchí-ó sá io váha iní Dútú Ndióxi Yá cūú Tātá Xítohó Jesucristú, te diu-ni Dútú Ndióxi cūú-gá Yáá io cūndahú iní ñáhá xii-o, te diu-ni-gá cūú-gá Yáá táxi tnúhu ndee iní. ⁴ Te cuéi nāndi ndòho-o ndecu-o dīco diu-ni Dútú Ndióxi táxi-gá tnúhu ndee iní xii-o, te ducaⁿ quide-gá cuendá sá nchóó cuāñaha-o tnúhu ndee iní xii nchaa ñáyiū nāndi ndòho ndecu, te diu-ni nchaa tnúhu ndee iní táxi-gá xii-o diu-ni nchaa tnúhu ndee iní-áⁿ cuāñaha-o xii-yu. ⁵ Te Xítohó Jesucristú io ní ndoho-gá, te ducaⁿ nchòo tucu io ndòho-o, te ducaⁿ io vai tnúhu ndee iní ñihí-ó ndecu ndíhi-o chi ndecu-o ndíhi Xítohó Jesucristú. ⁶ Te nchúhú nāndi ndòho-ndí ndécú-ndí cuendá sá nchòhó ñihí-ndó tnúhu ndee iní cundecu ndíhi-ndo te naníhí tǎhú-ndó. Te Yá Ndióxi táxi-gá tnúhu ndee iní xii-ndí, te

ducaⁿ quide-gá cuendá sá nchòhó tnàhá-ndó ñihí-ndó tnúhu ndee iní-áⁿ te naníhí tǎhú-ndó, te ducaⁿ càda ndee cada cahnu iní-ndó ndòho-ndo datná ndóhó nchúhú. ⁷ Te nchúhú io váha sǎni ndáá iní-ndí cuendá-ndó chi ndòho-ndo datná ndóhó-ndí, te ducaⁿ táxi Yá Ndióxi tnúhu ndee iní xii-ndo datná táxi-gá xii-ndí.

⁸ Te nchòhó ñáyiū ndecu ndíhi-ndí ichi Xítohó Jesucristú cuiní-ndí cachí tnúhu-ndí xii-ndo nàcuáa ní yáha-ndí cūtnàhá ní xīndecu-ndí distritú Àsiá chi dàvá-áⁿ io ní ndoho-ndí, te luha-ná te vá cūndèe iní-ndí yáha-ndí nchaa tnúndòho-áⁿ ní cūu chi ní xehndé iní-ndí sá vǎ cǎcu-ndí. ⁹ Chi ní sǎni iní-ndí sá ndíyi-ná cuu-ndí ní cūu, te ducaⁿ ní yáha-ndí cuendá sá io-gá quíndáá iní-ndí Yá Ndióxi sá díú-gá taunihnu ñaha-gá xii-ndí, te ñá díú mèe-ndí taunihnu-ndí mée-ndí, te diu-gá cūú-gá Yáá dándòto cuéi ñáyiū sa ní xíhí. ¹⁰ Te diu-ni-gá ní taunihnu ñaha-gá ñá túú ní sǎhni ñaha ñáyiū xii-ndí, te diu-ni-gá táúnihnu ñaha-gá xii-ndí cuéi vitna, te cūtnuní ndáá iní-ndí sá díú-ni-gá taunihnu ñaha-gá xii-ndí núú cuaháⁿ núú vèxi te vá cáhni ñaha ñáyiū. ¹¹ Te nchòhó tnàhá-ndó chīndee ñaha-ndo xii-ndí chi càháⁿ ndíhi-ndo Yá Ndióxi cuendá-ndí, te io vai ñáyiū càháⁿ ndíhi ñáhá-yu xii-gá cuendá-ndí, te ducaⁿ io vai ñáyiū ndàcáⁿ táhú-yu núú-gá cuendá nchaa sá vǎha quide ñaha-gá xii-ndí.

Té Pāblū càháⁿ-dé ná cuendá ñá túú ní nàyáha-dé ñuú Còrintú

¹² Te io váha cūu iní-ndí chi cūtnuní iní-ndí sá cūú-ndí cue té cūu ndáá datná cuiní Yá Ndióxi cunduu ndecu-ndí ñuyúú-a, te diu-ni ducaⁿ quide-ndí sá cūú-xi-ndó chi mee-gá cūndahú iní ñáhá-gá xii-ndí chīndèe ñaha-gá, te ñá túú

quide-ndí dàtná sání iní cue ñáyiú ñuyíú-a. ¹³⁻¹⁴ Nchaa nàcuáa ndùu tñuhu chido tñuní-ndí dáquixi-ndí ndaha-ndo cùu-xi mee-ni tñuhu sá ñá túú ùhú tecú tñuní-ndó. Te nchòhó sa cùtnuní luha iní-ndó nàcuáa quide-ndí ndécú-ndí, te cuíní-ndí sá ìo-gá váha tecú tñuní-ndó cuendá sá òré ná quíxi tucu Xítohó Jesucristú, te dàvá-án ìo cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuendá xiáⁿ núu ní sani iní-í yáha cáháⁿ-í úú xito núú ndécú-ndó cuendá ío cudíí ìní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha cáháⁿ-í núú ndécú-ndó, te òré ndixi tucu-í te nayáha cáháⁿ tucu-í, te òré nayáha cáháⁿ-í te taxi-ndo sá cúú ìchi-í cuendá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñá túú ní quíxi coto ñaha-í xii-ndo te cudana sàni iní-ndó sá yùhú ñá túú ní sáha váha-í cuendá nàcuáa ní sani iní-í cada-í, àdi cudana ñáyiú ndècu ìchi cuehé ìchi duha, chi cue ñáyiú-án tnaa càchí-yu sá cúú cadá-yu [#] sá sání iní-yu cadá-yu te tnaa càchí-yu sá ñáhá. ¹⁸ Dico Yá Ndióxi Yáá ío váha quide ndáa nàha ndáa nàhá càxi-gá sá nchùhú ñá túú dàma-ndí sá càháⁿ-ndí. ¹⁹ Te yùhú ndíhi té Silvanú ndíhi té Timùteú dánèhé ñáhá-ndí xii-ndo cuendá Xítohó Jesucristú Yáá cúú Dèhe Yá Ndióxi, te Xítohó Jesucristú cúú-gá Yáá ñá túú dàma-gá tñuhu càháⁿ-gá, chi cùu-gá Yáá càháⁿ mee-ni tñuhu ndáa tñuhu cuiti. ²⁰ Te diu-ni Xítohó Jesucristú cúú-gá Yáá quidé nchàa nacuáa ní cachí Yá Ndióxi. Te sá cuendá sá dúcáⁿ quide Xítohó Jesucristú xiáⁿ càchí-ó sá ìo càhnu cuu Yá Ndióxi. Te nchaa-o na càchí-ó sá díú-ní dùcaⁿ na cada-gá. ²¹ Te mee Yá Ndióxi quidé-gá ndécú-ní-ó ìchi Xítohó Jesucristú. Te diu-ni mee-gá ní cáháⁿ ñáhá-gá xii-o cuendá cunu cuechi-o núú-gá. ²² Te Yá Ndióxi ní quide-gá sá nchóó cùu-o ñáyiú cùu

cuendá-gá, te ní taxi-gá Espiritú-gá ní ngúndecu ndíhi-o cuendá cutnùní iní-ó sá ndàa cada ñaha-gá xii-o nàcuáa ní cachí-gá cada-gá.

²³ Te Yá Ndióxi nàhá-gá sá yùhú càháⁿ ndáá-í ná cuendá vátá quíxi-gá-í quixi coto ñaha-í xii-ndo, te vátá quíxi-gá-í chi ñá túú cuíní-í dandíhú-í iní-ndó. ²⁴ Te nchùhú ñá túú tàú-ndí cada yica ñaha-ndí xii-ndo nàcuáa quíndáá iní-ndó Yá Ndióxi, chi sa sàndáá váha iní-ndó-gá, chi nchùhú cuíní-ndí chindee tñuhu ñaha-ndí xii-ndo nàcuáa ío-gá cudíí ìní-ndó cùndecu-ndo.

2

¹ Te ní sani ndáa iní-í sá vǎ quíxi ndíhi-ni-í quixi coto ñaha-í xii-ndo cuendá sá vǎ dándíhú-í iní-ndó. ² Te nchòhó cúú-ndó ñáyiú tàxi tñuhu ndee ìní xii-í cudíí ìní-í ndécú-í, te xiáⁿ núu ñá túú cuíní-í dandíhú-í iní-ndó, chi núu ducaⁿ na càda-í te vǎ cùndecu váha-gá iní-ndó nàcuáa taxi-ndo tñuhu ndee ìní xii-í. ³ Te xiáⁿ núu ní tendaha-í tutú véxi ndaha-ndo cuendá sá òré quixi coto ñaha-í xii-ndo, te dàvá-án quini-í sá quidé-ndó nàcuáa cudíí ìní-í te ñá díú dà dandíhú-ndó ìní-í òré quexìo-í, chi nchòhó tàú-ndó càda-ndo sá yùhú cudíí ìní-í. Te cùtnuní ndáa iní-í sá núu yùhú cudíí ìní-í te tñáhá nchòhó cudíí ìní-ndó cuendá sá dúcáⁿ cudíí ìní-í. ⁴ Te ndàhyú-í sá ndíhú ìní-í òré ní cadúha-í tutú ní dáquixì-í ndaha-ndo, chi ío cuehé sá sání ìní-í, te ñá túú ní dàquixi-í tutú-án ndaha-ndo cuendá sá dándíhú ìní ñáhà-í xii-ndo, chi ní dáquixì-í cuendá sá nchòhó cutnùní iní-ndó sá ìo cùu ìní ñáhà-í xii-ndo.

Nàcuáa tàú ñáyiú ñuú Còrintú cadá-yu cuendá [#] ñáyiú ñá túú quide ndáa

⁵ Te na càchí tñuhu-í xii-ndo cuendá [#] téé ní quide [#] sá ñá túú tàú-dé cada-dé ndécú ndíhi-ndo, te

ní quide ndàhú-xi luha iní-í cuèndá sá nǐ quide-dé-áⁿ dico nchòhó tñàhá-ndó nǐ dándìhú-dé luha iní-ndó, te duha cǎchí-í sá lúhá-ní nǐ dándìhú-dé iní-ndó cuèndá sá vǎ cuídó-gá-í ná tñúhu cǎháⁿ-í. ⁶ Te nàcuáa ní ndatnúhu-ndo nǐ quide ndáá-ndó cuèchi téé-áⁿ te sa ndóí-gá cuu nàcuáa ní quide-ndo-dé. ⁷ Te vitna tàú-ndó càda cahnu iní-ndó sá nǐ quide-dé, te cuǎñaha-ndo tñúhu ndee iní xii-dé chi núu ñáhá te vǎ nihí ndéé-gǎ-dé cada-dé sá vǎha cuèndá sá ndìhú iní-dé. ⁸ Te xiǎⁿ núu cǎháⁿ ndàhú-í núu-ndó sá càdá tucu-ndo sá cúú iní-ndó-dé. ⁹ Te ñú-ní cuèndá iha cǎháⁿ-í ñúú núu tutú sá sá ní dàquixi-í ndaha-ndo, te ducaⁿ nǐ quide-í xító ndéé ñáhà-í xii-ndo núu ndisa cuini-ndó càda-ndo nchaa nacúaa cǎháⁿ-í. ¹⁰ Te ndéda-ní càa ñáyiu na càda cahnu iní-ndó ñúú sá quidě-yu, te tñàhá yúhú cada cǎhnu iní-í sá quidě-yu tucu. Te núu ò ñúú sá xini ñúhu-xi cada cahnu iní-í te quide cahnu iní-í, te mee Xítóhó Jesucristú náhá-gǎ sá dúcáⁿ quide-í, te ducaⁿ quide-í cuèndá sá nchòhó cuu-xi sá vǎha xii-ndo. ¹¹ Te ducaⁿ te sácúlná vǎ nihí-xi ná càda ñaha-xi xii-o, chi nchoo sá xini-ó nàcuáa quide-xi.

Té Páblú ndìhú iní-dé ndécú-dé ñúú Tròás

¹² Te ní xica-í cuáháⁿ-í ñúú Tròás cuèndá yàcáⁿ cǎháⁿ-í tñúhu sá cǎháⁿ nacúaa naníhí tǎhú-ó tñúhu Xítóhó Jesucristú, te òrè ní quexio-í te ní níhí-í ñúú ichi cǎhnu cǎháⁿ-í tñúhu-gá. ¹³ Dico ñá túú ní cùu vǎha iní-í chi ñá túú ní naníhí-í té Titú téé ndècu ndìhí-o ichi Xítóhó Jesucristú, núu xiǎⁿ ní quide ndee òrè tñáhà-í ndìhí cue ñáyiu ñúú-áⁿ, te ní xica-í cuáháⁿ-í distritú Macèdoniá.

Dàquetìhú-ó yucu ñávǎha chi ndècu ndìhí-o Xítóhó Jesucristú

¹⁴ Te táxǎhu xii Yá Ndióxi chi ducaⁿ-ni sǎnu ichi ñaha-gǎ xii-ndí nàcuáa cunuu-ndí núu yucu ñávǎha

chi ndècu ndìhí-ndí Xítóhó Jesucristú, te mee Yá Ndióxi sǎchíuⁿ ñaha-gǎ xii-ndí cǎháⁿ-ndí tñúhu-gá. Te cada iní-ó sá tñúhu-gá-áⁿ cúú-xi dàtná ñúú yúcú sǎ ò vǎha sǎháⁿ te ta xítenuu dicó-xi ndèni ní cuu cuáháⁿ. Te ducaⁿ sǎtnahá-xi cùu tñúhu-gá chi nchúhú quidè-ndí nàcuáa ta xítenuu ndèni ní cuu cuáháⁿ. ¹⁵ Te cùu-ndí dàtná dicó ñúú yúcú sǎ ò vǎha sǎháⁿ, te nàceni cuèndá Xítóhó Jesucristú núu Yá Ndióxi, te dicó yúcú-áⁿ nchítá cuèi núu xǐndecu cue ñáyiu sa ní naníhí tǎhú, te cuèi núu xǐndecu cue ñáyiu ta xita nihnu cuáháⁿ. ¹⁶ Te sá cúú-xi cuè ñáyiu ta xita nihnu cuáháⁿ-áⁿ, dicó yúcú-áⁿ cúú-xi dàtná ñúú sá sǎhni ñàha xií-yu, dico sá cúú-xi cuè ñáyiu sa ní naníhí tǎhú, dicó yúcú-áⁿ cúú-xi dàtná ñúú sá ndécá òrè-yu, ducaⁿ sǎtnahá-xi cùu nchúhú. Te vitna chí cuǎha cuèndá núu ná cúú ñáyiu sǎni iní-ndó ndàcu cada nacúaa ndúu tñúhu cǎháⁿ-í-a. ¹⁷ Chi nchúhú cǎháⁿ-ndí tñúhu Yá Ndióxi dico ñá túú ndǎhú quidè-ndí ndìhí tñúhu-gá dàtná xǐquide dava-gǎ-güedé, chi quide ndáá-ndí cǎháⁿ-ndí tñúhu-gá, te mee-gǎ ní cachí-gǎ sá dúcáⁿ càda-ndí te ndèhe-gǎ sá nchúhú quidè-ndí nàcuáa ní cachí-gǎ, chi ndècu ndìhí-ndí Xítóhó Jesucristú.

3

Cuèndá ñgá núú sǎ vǎha ní cachí Yá Ndióxi cada-gǎ ñáyiu

¹ Te cuèi duha cǎháⁿ-ndí núu-ndó dico ñá túú xini ñúhu-xi sá cǎñaha-ndí xii-ndo sá cúú-ndí cue téé quide vǎha, te ní ñá túú xini ñúhu-xi cacanehe-ndí ñúú tutú núu cǎháⁿ-xi sá cúú-ndí cue téé vǎha danèhé ñáhà xii-ndo datná xǐquide dava-gǎ-güedé, te ní ñá túú xini ñúhu-xi sá nchòhó taxi-ndo ñúú tutú núu cǎháⁿ-ndó sá nchúhú cúú-ndí cue téé quide vǎha. ² Te ñá túú xini ñúhu-xi ducaⁿ cada-ndí. Te cùtnuní ndáá iní-ndí sá nchòhó cúú-ndó dàtná ñúú tutú sá ò vǎha

càháⁿ cuèndá-ndí. Te ducaⁿ sãtnahá-xi cùu-ndo chi nchaa ñáyiú nìhí-yu tnúhu nàcuáa quide-ndo ndecu-ndo, te xiáⁿ cùtnùní iní-yu sá nchúhú cúú-ndí cue téé quide váha. ³ Te nchòhó cúú-ndó cuèndá Xítohó Jesucristú, te cùu-ndo datná tutú-gá te tutú-áⁿ nì táuchíúⁿ-gã xii-ndí ní cadúha-ndí, te mee-ni ndíhi Espíritú Yã Ndiõxí ní ngúndeé tnúhu-áⁿ te ñã díú ndíhi tindá ní ngúndeé. Te ñã díú ìⁿ núú yúú ní ngúndeé chi iní-ndó cùu-xi núú dúcáⁿ nì ngúndeé tnúhu-áⁿ te ducaⁿ sãtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yã Ndiõxí quidé vãha ñaha-gã xii-ndí, chi ndècu ndíhi-ndí Xítohó Jesucristú. ⁵ Te nchúhú chi ndàcu-ndí quidé-ndí sá vãha dico ñã díú mèe-ndí ducaⁿ ndàcu-ndí quidé-ndí, chi mee Yã Ndiõxí chindèe ñaha-gã xii-ndí nùu ndàcu-ndí quidé-ndí sá vãha. ⁶ Te mee Yã Ndiõxí ní quide-gá sá nchúhú ndacu-ndí cunu cuechi-ndí núú-gã càháⁿ-ndí núú ñáyiú cuèndá ingá núú sã vãha ní cachí-gá cada ñaha-gã xii-yu. Te sá vãha ní cachí-gá cada ñaha-gã xií-yu-áⁿ ñã túú ìⁿ-ni cuu-xi ndíhi nchaa tnúhu sá nì xáhaⁿ-gã xii ndíú Moisés ní chídó tnùní ndí, te ducaⁿ chi espíritú Yã Ndiõxí néhé chùuⁿ-xi nchaa tnúhu sá càháⁿ cuèndá nchaa sã vãha-áⁿ. Te nchaa tnúhu ní chídó tnùní ndí Moisés, dándixi túu-xi iní nchaa ñáyiú ndècu ndíhi tnúhu-áⁿ sã cuíta nihnú-yu cuèndá nchaa cuéchi-yu, dico cue ñáyiú ndècu ndíhi Espíritú Yã Ndiõxí ñáyiú-áⁿ ndécú ndíhi-yu tnúhu ndee ìní sá cãcu nihnú-yu.

⁷ Te tnúhu sá nì càháⁿ Yã Ndiõxí ndéé díhna nàcuáa cada ñáyiú ní ngúndeé-xi ìⁿ núú yúú quèhéⁿ. Te òré ní dátúu ndí Moisés nàcuáa càháⁿ tnúhu sá nì càháⁿ Yã Ndiõxí ndéé núú yúú-áⁿ núú cue ñáyiú isràél, te súúní nì tásaⁿ núú ndí te

ñã túú-gã ní cùu cundehé-yu núú ndí, te ducaⁿ-gã ducaⁿ-gã quidé-xí datásaⁿ-xi núú ndí ni cùu ñã túú-gã ducaⁿ nì quide-xi. Te tnúhu ndéé núú yúú-áⁿ dándixi túu-xi iní cue ñáyiú sá cuíta nihnú-yu sá cuèndá nchaa cuéchi-yu, te ío váha ní quide-xi cùtnáhá ní ngúndecu ndíhi cue ñáyiú isràél tnúhu-áⁿ. ⁸ Te sá dúcáⁿ nì quide-xi xiáⁿ cùtnùní sá tnúhu càháⁿ Espíritú Yã Ndiõxí vitna uuⁿ-gã ducaⁿ ìo-gã váha quide-xi. ⁹ Te núu ducaⁿ ìo váha ní quide-xi cùtnáhá ní ngúndecu ndíhi cue ñáyiú isràél tnúhu sá dándixi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gã ducaⁿ vãha quide-xi vitna ní ngúndecu ndíhi-o tnúhu sá càháⁿ nàcuáa quide Yã Ndiõxí cuèndá sá vã cùndècu-gã cuéchi ñáyiú núú-gã. ¹⁰ Te vã càchí-ó sã cùtnáhá ní ngúndecu ndíhi cue ñáyiú isràél tnúhu ndéé núú yúú-áⁿ ìo-gã váha ní quide-xi, te ñáhá chi uuⁿ-gã váha quide-xi vitna cuendá tnúhu sá càháⁿ nàcuáa quide Yã Ndiõxí. ¹¹ Te núu ducaⁿ ìo váha ní quide-xi cùtnáhá ní ngúndecu ndíhi ñáyiú isràél tnúhu sá ñã túú ní cùdí, te uuⁿ-gã ducaⁿ ìo váha quide-xi vitna ní ngúndecu ndíhi-o tnúhu sá vã ndíhí nihnu tnahí-gã.

¹² Te cùtnuní iní-ndí sá vã ndíhí nihnu sá dúcáⁿ ìo váha quide-xi, núú xiáⁿ ío víi ío váha cùu iní-ndí càháⁿ-ndí tnúhu sá nì ngúndecu ndíhi-o. ¹³ Te ñã túú quide-ndí datná ní xóo cada ndí Moisés, chi ndí-áⁿ nì xóo dàdãhu ndí núú ndí òré datásaⁿ-xi núú ndí cuèndá sá vã quíni cue ñáyiú isràél òré ñã túú-gã datásaⁿ-xi núú ndí. ¹⁴ Te cue ñáyiú isràél ñã túú ní tècú tnùní váha-yu nàcuáa ní xóo danèhé ñáhá ndí Moisés xii-yu, te cuéi ndéé vitna ñã túú tècú tnùní-yu òré dácuahá-yu tnúhu sá nì càháⁿ Yã Ndiõxí ndéé díhna nàcuáa cada-gã, te cada iní-ó sã datná sá nì xidáhu núú ndí Moisés yidáhu núú-yu cuèndá sá vã cùtnùní núú-yu cundehé-yu

te tecú tnùnì-yu, dico núu tnahá tnúhu-yu ndìhi Xítohó Jesucristú te tecú tnùnì-yu. ¹⁵ Te cuèi ndéé vitna òré dácuaá-há-yu nchaa tnúhu sá ñi chídó tnùnì ndíi Moisés nchaa núu tütú ndíi, te cada iní-ó sá dàtná sá ñi xídáhu núu ndíi yídáhu núu-yu chi ñá túú tècú tnùnì-yu. ¹⁶ Dico cue ñáyiú na tũha ñaha xii Xítohó Jesucristú te tècú tnùnì-yu tnúhu-gá. ¹⁷ Te Xítohó Jesucristú ñi-ni cùu-gá ndìhi Espiritú Yá Ndiòxí, te nchaa ñáyiú ndècu ndìhi Espiritú-gá ñá túú-gá táxi tnùnì ñáhá ñi ñi sá ñá túú vaha xii-yu. ¹⁸ Te dàtná cúu ñi yutatá sá dánèhé núu ñáhá-xí xii ñáyiú ñi sá vaha, ducaⁿ sãtnahá-xi cùu-o chi quide-o nacuaá cáháⁿ ñáyiú sá ño càhnu cuu Xítohó Jesucristú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndáá-gá. Te Espiritú-gá quidé-xí dùcaⁿ ta cundáá-ó núu-gá cuáháⁿ.

4

¹ Te mee Yá Ndiòxí ní cundàhú iní ñáhá-gá xii-ndí ní taxi-gá chiuⁿ quide-ndí càháⁿ-ndí tnúhu-gá, núu xíáⁿ ñá túú tnàhí nàtúhú iní-ndí cáháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñá túú vaha quide dayuhu ñáyiú, chi nchaa xíáⁿ cúu-xí ñi sácáⁿ-núu sá cúu-xí-yu, te nchúhú ñá túú sàni iní-ndí dandàhú-ndí ñáyiú te ni ñá túú sàni iní-ndí dama-ndí nàcuáa càháⁿ tnúhu Yá Ndiòxí, chi càháⁿ ndáá-ndí nàcuáa tàu-xi cáháⁿ-ndí, te mee Yá Ndiòxí ñáhá-gá nàcuáa ndùu tnúhu càháⁿ-ndí núu ñáyiú, te ñáyiú-áⁿ cùnùnì iní-yu sá nchúhú càháⁿ vaha-ndí. ³ Te cue ñáyiú ñá túú tècú tnùnì nàcuáa ndùu tnúhu sá càháⁿ nàcuáa naníhí tàhú-ó càháⁿ-ndí núu-yu, ñáyiú-áⁿ cúu-yu ñáyiú ta xita nihnu cuáháⁿ. ⁴ Te cue ñáyiú-áⁿ cúu-yu ñáyiú ío sàá iní-xi chi ñá túú cùnì-yu quíndáá iní-yu tnúhu Xítohó Jesucristú,

te xíáⁿ núu sácuihná cùnùu-xi núu-yu te nihí-xi nàcuáa quide-xi dadáhu ndodo iní ñáhá-xí xii-yu cuendá sá vã tècú tnùnì-yu tnúhu sá càháⁿ nàcuáa naníhí tàhú-yu, te tnúhu-áⁿ cúu-xí tnúhu sá ño vaha chi càháⁿ-xi sá ño càhnu cuu Xítohó Jesucristú, te cùu-gá dàtná mée Tãtã-gã Dútú Ndiòxí. ⁵ Te nchúhú ñá túú càháⁿ-ndí cuendá sá cúu-xí mèe-ndí núu-ndó chi càháⁿ-ndí cuendá Xítohó Jesucristú, te càhí-ndí xii-ndo sá díú-gã cúu-gã Yaá ío cùnùu, te càhí-ndí xii-ndo sá mée-ndí cúu-ndí dícò-ni cue tée xinu cuechi sá cúu-xí-ndó, te ducaⁿ quide-ndí nàcuáa cuu vii cuu vaha iní Xítohó Jesucristú. ⁶ Te Yá Ndiòxí Yaá ní dáyèhé ndéé cùnàhá nee ñuyúí ní cùu, Yaá-áⁿ ní cachí-gá sá Xítohó Jesucristú cada-gá nàcuáa tecú tnùnì-ó sá ño càhnu cuu mee Yá Ndiòxí. Te sá dúcáⁿ ní quide-gá te cada iní-ó sá dàtná tnúhu sá ñi dáyèhé-gá iní-ó.

Ío quíndáá iní-ó Yá Ndiòxí

⁷ Te nchúhú ndécú ndìhi-ndí tnúhu Xítohó Jesucristú, te tnúhu-gá cúu-xí dàtná ñi sá ño vaha ñũhu ñi xití quídi ñũhu, te nchúhú cúu-ndí dàtná quídi-áⁿ. Te ducaⁿ sãtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nacuaá cutnùnì sá mée Yá Ndiòxí quidé-gã nchaa sá vaha te ñá díú mèe-ndí. ⁸ Te cuèi ío ndòho-ndí ndécú-ndí dico nihí-ndí nàcuáa quide-ndí tá yãha-ndí nchaa tnúndòho-áⁿ cuáháⁿ, cuèi áma sa ndètu víi-nã quehndé iní-ndí sá vã ndácú-ndí yãha-ndí nchaa tnúndòho-áⁿ, dico ndàcu-ndí yãha-ndí. ⁹ Te cuèi nànducu ñaha ñáyiú cuíni-yu ná cada ñáhá-yu xii-ndí dico ñá túú dàña ñaha Yá Ndiòxí xii-ndí, te cuèi cànihá-yu xii-ndí dico càcu-ndí ñá túú sãhni ñahá-yu. ¹⁰ Te ndèni ní cuu cuáháⁿ-ndí xíca cùu-ndí, te càcu

căcu cahni ñahá-yu xii-ndí dàtná ní quidé-yu Xítohó Jesucristú, te ducaⁿ yăha-ndí cuendá cutnùní sá ndécú tũu Xítohó Jesucristú andiu te chindee ñaha-gá xii-ndí. ¹¹ Te nchúhú nini ndècu-ndí ñuyú-a te nchaa-ni nduu căcu căcu cahni ñaha ñăyiu xii-ndí sá cuendá Xítohó Jesucristú, te ducaⁿ yăha-ndí ndécú-ndí cuendá cutnùní sá Xítohó Jesucristú ndécú ndihí ñaha-gá xii-ndí cuéi vá cúdii yiqui cùñú-ndí cundecu-xi. ¹² Te sá dúcáⁿ căcu căcu cahni ñaha ñăyiu xii-ndí xiăⁿ nchòhó uuⁿ-gá tá ñihí ndéé-ndó cuăháⁿ ndécú-ndó ichi Xítohó Jesucristú.

¹³ Te ñⁿ tée ní xindecu ndéé sanaha ñi chídó tñuni-dé núú tütú Yá Ndióxi núú cächí-xi: “Yúhú ní sándáá iní-í Yá Ndióxi núu xiăⁿ ní cáhá-í”, duha ní cächí tée-áⁿ. Te dàtná-ni ní sani iní tée-áⁿ ñi cáhá-dé te ñⁿ ducaⁿ sãni iní nchúhú tucu núu xiăⁿ cächí-ndí: “Sándáá iní-ndí Yá Ndióxi núu xiăⁿ cáhá-ndí”, duha cächí-ndí. ¹⁴ Te cùtnuni iní-ndí sá ñⁿ na cù-ndí te Yá Ndióxi dandòto ñaha-gá xii-ndí dàtná ní dándótó-gă Xítohó Jesucristú, te tñahá nchòhó ducaⁿ căda ñaha-gá xii-ndo, te dāvá-áⁿ candeca ñaha-gă xii-o quihíⁿ nucúndecu-o núú-gă. ¹⁵ Te nchúhú nándi cùu sá tá yăha-ndí véxi cuendá nchòhó ngúndecu váha-ndo, te ducaⁿ cuíta cáyá-gă ñăyiu ngúndecu váha sá xii Yá Ndióxi, te ñⁿ ducaⁿ cuíta cuu vai-gă ñăyiu ndacáⁿ táhũ-yu núú-gă te cachí-yu sá ñⁿ cãhnu cuu-gă.

¹⁶ Te xiăⁿ núu nchúhú ñá túú tñahí nătúhú iní-ndí ndécú-ndí ichi Xítohó Jesucristú, te cuéi yiqui cùñú-ndí tá xàu-xi cuáháⁿ dico iní-ndí chi uuⁿ-gá uuⁿ-gá tá ñihí ndéé-xí cuáháⁿ. ¹⁷ Te nchaa sá ndòhó-ndí ñuyú-a ñá túú cächí-ndí sá cùú-xí ñⁿ tñúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyú-a te Yá Ndióxi ío

váha cada ñaha-gă xii-ndí nduu na sàá-ndí núú ndécú-gă, te ñⁿ ducaⁿ căda ñaha-gă xii-ndí ñi caa ñi quihíⁿ. ¹⁸ Te nchúhú ñá túú nchícúⁿ nihnu-ndí sá tũu ndèhe-ndí ío ñuyú-a, chi nchícúⁿ nihnu-ndí sá vătă quini-gă-ndí ndécú andiu, te ducaⁿ quide-ndí chi nchaa sá tũu ndèhe-ndí ío ñuyú-a vá cúdii-xi cundecu-xi, te nchaa sá ñá túú tũu ndècu andiu xiăⁿ cudíi-xi cundecu-xi ñi caa ñi quihíⁿ.

5

¹ Te yiqui cùñú-ó cùu-xi datná ñⁿ vehe, te vehe-áⁿ ñá túú cúdii-xi, te ducaⁿ sãtnahá-xi cùu yiqui cuñú-ó chi vá cúdii-xi, te na sãá nduu vã cùndècu-gă-ó ndihí yiqui cuñú-ó, te Yá Ndióxi taxi-gă ñⁿ yiqui cùñú sáá sá cùú-xí-ó, te xiăⁿ cùú-xí dàtná ñⁿ vehe sá ñá túú ní cãdúha cue ñăyiu ñuyú-a, chi mee Yá Ndióxi ní cadúha-gă vehe-áⁿ te vehe-áⁿ cudíi-xi cundecu-xi ñi caa ñi quihíⁿ andiu. Te ducaⁿ sãtnahá-xi cùu yiqui cuñú sá táxi Yá Ndióxi xii-o chi cudíi-xi cundecu-xi ñi caa ñi quihíⁿ. ² Te nchúhú ndècu ndihí-gă-ndí yiqui cùñú-ndí sá ndécú ndihí-ndí vitna te sama cuini-ndí sá ío ndihí taxi Yá Ndióxi yiqui cùñú sáá cùndecu ndihí-ndí. ³ Chi mee-gă vá dáñá-gă sá dúcáⁿ-ní cùnduu-ndí cundecu-ndí, chi dai taxi-gă yiqui cùñú sáá-ãⁿ xii-ndí. ⁴ Te nini ndècu-ndí ndihí yiqui cùñú-ndí vitna ío sãni iní-ndí te ndihú iní-ndí, dico ñá díú sá dúhá quide-ndí te ñá túú-gă tñahá iní-ndí cundecu-ndí ndihí yiqui cùñú-ndí, chi cuini-ndí sá Yá Ndióxi ío ndihí taxi-gă yiqui cùñú sáá nduu táhú-ndí, chi xiăⁿ cudíi-xi ñi caa ñi quihíⁿ te yiqui cùñú-ndí sá tá ndihí nihnu cuáháⁿ-a vá cúdii-xi cundecu-xi. ⁵ Te ducaⁿ tñahí ní cachí Yá Ndióxi cunduu sá dúcáⁿ nduu táhú-ó yiqui cuñú sáá-ãⁿ, te

ní taxi-gá Espiritú-gá ní ngúndecu ndìhi-o cuèndá cutnùní iní-ó sã ndàá taxi-gá yiqui cùñú sáá-áⁿ nduu táhú-ó.

⁶ Te xíáⁿ nùu nchúhú ñìhí ndéé-ndí ndécú-ndí, te cùtnuní iní-ndí sá ñìni ndecu-ndí ndìhi yiqui cùñú-ndí sá ndécú ndìhi-ndí vitna te vátá sàá-gá-ndí cundecu-ndí mei nùú ndécú Xítohó Jesucristú.

⁷ Te ducaⁿ cùtnuní iní-ndí chí sàndáá iní-ndí Yã Ndiòxí ndécú-ndí ñuyíú-a cuèi ñá túú xìní-ndí-gá.

⁸ Te ío váha cùu iní-ndí ndécú-ndí, te sàni iní-ndí sá vâha-gá sá nùu vá cùndecu-gá-ndí ndìhi yiqui cùñú-ndí sá ndécú ndìhi-ndí vitna. Te ducaⁿ sàni iní-ndí chí váha-gá cundecu-ndí mei nùú ndécú Xítohó Jesucristú.

⁹ Te ío ndècu ndee-ndí quidé-ndí nàcuáa cuu vii cuu váha iní Xítohó Jesucristú vitna ndècu-ndí ñuyíú-a, te ðiu-ni ducaⁿ càda-ndí cuèi òré vá cùndecu-gá-ndí.

¹⁰ Te dacuítí sã ncháá-ó cùndecu-o nùú Xítohó Jesucristú ìⁿ nduu, te ðává-áⁿ mee-gã cáháⁿ-gá te nùu nása ndùu chiuⁿ ní quide-o ìⁿ ìⁿ-o, nùu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gã nduu táhú-ó.

Nàcuáa ní cuu ní ngúndecu váha-o ndìhi Yá Ndiòxí

¹¹ Te nchúhú quíyùhú iní-ndí nàcuáa cada Xítohó Jesucristú, nùu xíáⁿ càháⁿ-ndí tnúhu-gá nùú ñáyiú cuèndá xínu iní-yu tuha ñàhá-yu xii-gá. Te mee Yã Ndiòxí sa nàha-gá nàcuáa quide-ndí

ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. ¹² Te sá ðúhá càháⁿ-ndí te vá cání iní-ndó sã nchúhú càháⁿ váha-ndí cuèndá-ndí nàcuáa nchòhó cuu váha iní ñàhá-gá-ndó xii-ndí te ñàhá, chí duha càháⁿ-ndí cuèndá sá nchòhó ñìhi-ndó tnúhu

cáháⁿ váha-gá-ndó cuèndá-ndí nùú ñáyiú. Te ducaⁿ ñìhi-ndó tnúhu cùñaha-ndo xii cue ñáyiú quide nínu mee-xi, chí cue ñáyiú-áⁿ ñà túú quide cuèndá-yu nása ndècu iní-yu.

¹³ Te nùu nchòhó sání iní-ndó sã lùcú-ndí cuèndá nàcuáa quide-ndí ndécú-ndí te cùu-xi cuèndá Yã Ndiòxí, àdi nùu sàni iní-ndó sã ñà túú lùcú-ndí cuèndá nàcuáa quide-ndí ndécú-ndí te cùu-xi sá vâha sá cúú-xí-ndó.

¹⁴ Te quide-ndí nàcuáa cuení Xítohó Jesucristú chí cùtnuní iní-ndí sá ío cùu iní-gá nchaa ñáyiú, te ducaⁿ xìní ndáá-ndí sá ñí xíhí-gá cuèndá ncháá-yu, te xíáⁿ nùu cada iní-ó sã ðàtná tnúhu sá ncháá ñáyiú ní xíhí-yu ndìhi-gá.

¹⁵ Te ducaⁿ ñí xíhí Xítohó Jesucristú cuèndá nchaa ñáyiú chí cuení-gá sá ncháá-yu cundecú-yu cada-yu nàcuáa cuení méé-gã te vá cáda-yu nàcuáa cuení méè-yu, chí mee-gã ní xíhí-gá te ní ndoto-gá cuèndá cuu-xi sá vâha sá cúú-xí-yu.

¹⁶ Te xíáⁿ nùu nchúhú ñá túú-gã ná sání iní-ndí cuèndá tnàha ñáyiú-ndí nùu nàndíhi-yu àdi ñá túú nàndíhi-yu ðàtná ní xóo caní iní-ndí cùtnàhá ní xíndecu-ndí ichi cuèhé ichi duha, te ðává-áⁿ ñí xóo caní iní-ndí cuèndá Xítohó Jesucristú ðàtná sání iní cue ñáyiú ndècu ichi cuèhé ichi duha vitna.

¹⁷ Te nchaa nchoo ñáyiú ní tnàhá tnúhu ndìhi Xítohó Jesucristú ní nduu-o ðàtná ìⁿ ñáyiú saa, te ducaⁿ chí ñá túú-gã quidé-ó ðàtná ní xóo cada-o cùtnàhá ní xíndecu-o ichi cuèhé ichi duha, chí ní ngúita-o quide-o mee-ná sá vâha te nchaa xíáⁿ cúú-xí sã sáá sã cúú-xí-ó chí vátá quíni-gá-ó càda-o.

¹⁸ Te ducaⁿ quide-o ndecu-o chí mee Yã Ndiòxí quidé-gã sá dúcáⁿ càda-o cundecu-o. Te Xítohó Jesucristú ní quide-gá ní ngúndecu váha-o ndìhi Yá Ndiòxí vitna, te ducaⁿ chí mee Yã Ndiòxí ducaⁿ tnàhí ní cachí-gá cunduu, te ðiu-ni mee Yã Ndiòxí ní taxi-gá

chìuⁿ quide-ndí càháⁿ-ndí tnúhu-gá nàcuáa ngúndecu váha cue ñáyi ndihí-gá. ¹⁹ Te ducaⁿ chi mee-gá ní cachí-gá sá Xítohó Jesucristú cada-gá nàcuáa nucúndecu váha nchaa nchoo cuè ñáyi ndècu ñuyú-a ndihí Yá Ndiòxí. Te nchaa ñáyi ní tuha ñaha xii-gá ñá túú-gá sání iní-gá sá ñáyi-áⁿ nacháhu-yu cuèchi-yu núú-gá. Te mee Yá Ndiòxí ní taxi-gá chìuⁿ quide-ndí càháⁿ-ndí tnúhu-gá núú ñáyi nàcuáa ngúndecu ndihí ñaha váha-yu xii-gá. ²⁰ Te Xítohó Jesucristú ní cachí-gá sá nchúhú càháⁿ-ndí tnúhu-gá núú nchaa ñáyi, te sá dúhá quide-ndí càháⁿ-ndí tnúhu-gá te quide-ndí núú Yá Ndiòxí càháⁿ-ndí yuhu-gá, te xíáⁿ núú càháⁿ ndàhú-ndí núú-ndó sá tnàhá tnúhu-ndo ndihí Yá Ndiòxí cuèndá cundecu váha-ndo ndihí-gá, te duha càháⁿ-ndí chi ducaⁿ càhí Xítohó Jesucristú cada-ndí. ²¹ Te Xítohó Jesucristú cúú-gá Yaá ñá túú tnàhí cuèchi-xi, dico Yá Ndiòxí ní quide ñaha-gá xii-gá dàtná ñⁿ ñáyi ndècu cuèchi-xi, te ducaⁿ chi Xítohó Jesucristú ní xido-gá cuèchi nchaa nchoo ñáyi ñuyú-a, te ducaⁿ ní xido Xítohó Jesucristú nchaa cuèchi-o cuèndá sá núú na tnàhá tnúhu-o ndihí-gá te cudíu-o núú Yá Ndiòxí, te ducaⁿ ní cuu chi mee Yá Ndiòxí ducaⁿ ní cachí-gá cunduu.

6

¹ Te nchoo ñⁿ-ni cùu-o quide chìuⁿ-o cuèndá Yá Ndiòxí núú xíáⁿ càháⁿ ndàhú-ndí núú-ndó sá vǎ dícó-ni ducaⁿ cùndedóho-ndo tnúhu Yá Ndiòxí, chi cada-ndo nàcuáa na chindee ñaha-ni-gá. ² Chi mee-gá càhí-gá ñⁿ xichí núú tütú-gá núú càhí-xi: Sáa nduu te cundàhú iní ñàhá-í xii-ndo chindee ñaha-í cuèndá naníhí tǎhú-ndó, te ní sǎa nduu tǎu-xi sá cundàhú iní ñàhá-í xii-ndo chindee ñaha-í

cuèndá naníhí tǎhú-ndó, núú xíáⁿ ní xíndedóho-í tnúhu ní càháⁿ-ndó te ní chindee ñàhá-í xii-ndo nàcuáa naníhí tǎhú-ndó.

Duha càhí-gá núú tütú-gá. Te vitna cùu-xi nduu cundàhú iní ñàhá Yá Ndiòxí chindee ñaha-gá, te cùu-xi nduu naníhí tǎhú-ó.

³ Te nchúhú ñá túú quide-ndí ñⁿ sá ñá túú tǎu-ndí cada-ndí sá cúú-xí ñáyi, chi cuèni-ndí sá vǎ càháⁿ cuèhé-yu cuèndá chìuⁿ quide-ndí. ⁴ Te nchaa sá quidé-ndí cúú-xí nàcuáa cutnùní iní cue ñáyi sá nchúhú xínú cuèchi-ndí núú Yá Ndiòxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáyi xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yǎha-ndí véxi. ⁵ Te duha ta yǎha-ndí véxi, núú cánha ñáyi xii-ndí, núú chíhí ñàhá-yu vecaá, núú cuáá ndeé ñàhá ñáyi xii-ndí xícuèhé ñàhá-yu, te ío ndóho-ndí quidé-ndí chìuⁿ Yá Ndiòxí, te áma xidí-ndí te áma ñá túú xidí-ndí, te áma nihí-ndí sá xéxi-ndí te áma ñá túú nihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yá Ndiòxí, te quide cahnu iní-ndí cuèi nándi quide ñaha ñáyi xii-ndí, te cundàhú iní-ndí tnàha ñáyi-ndí, te quide-ndí nchaa sá váha nàcuáa chindee ñaha Espiritú Yá Ndiòxí xii-ndí, te ío ndisa iní-ndí cúú iní-ndí cue tnàha ñáyi-ndí. ⁷ Te dànehé-ndí ñáyi mee-ni tnúhu ndáá, te nchaa chìuⁿ quide-ndí te quide-ndí nàcuáa chindee ñaha Yá Ndiòxí xii-ndí, te cuèndá sá quidé ndáá-ndí ndécú-ndí núú xíáⁿ nihí ndeé-ndí dáquèe tǎhú-ndí nchaa sá cuèhé sá dúhá. ⁸ Te dava ñáyi quide nínu ñàhá-yu xii-ndí, te davá-yu tnúhu cuèhé tnúhu duha càháⁿ-yu xǎháⁿ-yu

xii-ndí, te davá-yu xícáháⁿ váha-yu cuendá-ndí te davá-yu xícáháⁿ cuèhé-yu, te davá-yu càchí-yu sá dándàhú-ndí ñáyiú dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xìní-yu ná ñáyiú cùu-ndí, te davá-yu càchí-yu sá xìní-yu yoo cùu-ndí, te davá-yu cuíní-yu cahni ñàhá-yu xii-ndí dico vátá cáhni ñàha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiòxí, te cuèi ndòho-ndí dico ñá túú cùu-xi sá cùu-ndí. ¹⁰ Te cuèi ndihú iní-ndí dico ñá túú ãña ndeé-ndí sá cùdí iní-ndí, te cùu-ndí cue téé ndàhú dico sànu ichi-ndí vai ñáyiú ichi Yá Ndiòxí cuendá ngúndecu váha-yu sá cuendá-gá, te cuèi ñá túú ñá ndécú ndihí-ndí dico ñá túú ñá cùmāni xii-ndí.

¹¹ Te nchòhó ñáyiú ndècu ndihí-í ichi Xítohó Jesucristú ndécú ñúú Còrintú ío cùu iní ñàhá-ndí xii-ndo, te ni yùhu ni iní-ndí càháⁿ-ndí nchaa tnúhu càháⁿ-ndí sá cùu-xí-ndó. ¹² Te nchúhú chi ni yùhu ni iní-ndí cùu iní ñàhá-ndí xii-ndo, dico nchòhó chi ñá túú dùcaⁿ quide-ndo sá cùu-xí-ndí. ¹³ Te yúhú càháⁿ ndàhú-í núu-ndó dàtná quidé ìⁿ téé cùu tátá òré càháⁿ ndihí-dé cue déhe-dé sá ni yùhu ni iní-ndó cùu iní ñàhá-ndó xii-ndí dàtná quidé mèe-ndí cùu iní ñàhá-ndí xii-ndo.

Nchoo cùu-o datná ìⁿ vehe Yá Ndiòxí

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cùu ìⁿnuu-ndo ndihí-yu cada-ndo dàtná xíquidè-yu, chi ðìⁿ cuu nchaa sá vāha te ðìⁿ cuu nchaa sá cuèhé sá dúhá, te ñúmí nchícanhii ndihí niú chi ñá túú ìⁿ-ni cuu-xi. Te ducaⁿ sàtnahá-xi cùu nchaa sá vāha ndihí nchaa sá cuèhé sá dúhá chi ñá túú ìⁿ-ni cuu-xi. ¹⁵ Te ðiu-ni

ducaⁿ ñà túú ìⁿ-ni cuu Xítohó Jesucristú ndihí sácúlná, te ðiu-ni ducaⁿ ñá túú ìⁿ-ni cuu ñáyiú sàndáá iní ñàhá xii Xítohó Jesucristú ndihí ñáyiú ñá túú sàndáá iní ñàhá xii-gá. ¹⁶ Te ðiu-ni ducaⁿ sàtnahá tucu-xi cùu vehe Yá Ndiòxí ndihí nchaa sá càchí ñáyiú cùu ndiòxí ní cadúha cue téé ñuyú-a, chi vá cùu quíhi ni ìⁿ xíáⁿ xití vehe-gá. Te nchoo cùu-o datná vehe Yá Ndiòxí Yáá ndécú túu andíu, chi mee-gá càchí-gá núu tütú-gá núu càchí-xi:

Yúhú vá cùmāni cundecu-í ndihí-yu ndèni ní cuu na cùndecú-yu, te ðiu-ni yúhú cuu-í Ndiòxí-yu, te mèe-yu cuu-yu ñáyiú cùu cuendá-í.

Duha càchí-gá núu tütú-gá. ¹⁷ Te xíáⁿ núu càchí tucu-gá ingá xichi núu tütú-gá núu càchí-xi:

Chí tá quèe tnuú nchaa ñáyiú ñá túú sàndáá iní ñàhá xii-í, te vá cání iní-ndó cada-ndo ni ìⁿ sá cuèhé sá dúhá,

te ducaⁿ te queheⁿ cuendá ñàhá-í xii-ndo,

¹⁸ te yúhú cuu-í Tātá-ndó, te nchòhó cuu-ndo cue déhe ducuⁿ-í, ndihí cue déhe yoco-í,

duha càháⁿ yúhú Yáá ío càhnu cuu. Duha càchí-gá núu tütú-gá.

7

¹ Te sá dúcáⁿ ío váha càháⁿ Yá Ndiòxí sá cùu-xí-ó núu xíáⁿ càháⁿ-í dóho nchòhó ñáyiú ío cùu iní-í sá dùuⁿ duuⁿ ãña-o nchaa sá cuèhé sá dúhá, chi nchaa xíáⁿ ñá túú cùu-xi sá vāha sá cùu-xí iní-ó ndihí yiqui cuñú-ó, te cada-o nàcuáa tãu-xi cunduu nàcuáa cundáá-ó núu Yá Ndiòxí, te cada-o sá néhé-ó sá yíñúhu núu-gã.

Cue ñáyiú ñúú Còrintú quidé vāha-yu

² Te ni yùhu ni iní-ndó chì cùu iní ñàhá xii-ndí, chi nchúhú vá yóo ìⁿ quide úhú iní-ndí, te ni vā yóo ìⁿ dàcuíta nihnu-ndí, te

ni vǎ yǎo ɨⁿ dāndahú-ndí. ³ Te sá dúhá cáháⁿ-í te vǎ cání iní-ndó sǎ ɨⁿ cuéchi dācaá-í díqui-ndó, chi dǎtná sa ní cachí-í xii-ndo sǎ yǔhú ío cùu iní ñáhà-í xii-ndo, te cuéi vitna ndècu-gá-ó ñùyíú-a àdi cuéi na cùú-ó dico diu-ni ducaⁿ cùu iní ñáhà-í xii-ndo. ⁴ Te yǔhú ío váha sàni iní-í cuendá-ndó, te ducaⁿ ío váha cáháⁿ-í cuendá-ndó, te ío ndècu ndihí-í tnúhu ndee iní cuendá-ndó, te ío cùdíí iní-í sǎ cuendá-ndó cuéi nándi ndòho-í ndihí dava-gá-güedé ndécú-ndí.

⁵ Te nchúhú cǔtnàhá ní sáháⁿ-ndí distritú Macèdoniá, te ñá túú tnàhí ní ndètátú-ndí cuendá nchaa sǎ ní yáhandi chi ío ní ndoho-ndí cuendá nchaa sǎ ní quidé-yu, chi ío ní cuándéé ñáhà-yu xii-ndí, te ío ní sani iní-ndí nùu nása-gá yáha-ndí ní cùu. ⁶ Dico Yá Ndiòxí ní taxi-gá tnúhu ndee iní xii-ndí òré ní quexìo té Titú núú ndécú-ndí, te diu-ni Yaá-áⁿ cúú-gǎ Yaá sǎñaha-gǎ tnúhu ndee iní xii cue ñáyüu ndihú iní-xi. ⁷ Te ducaⁿ ní taxi Yá Ndiòxí tnúhu ndee iní xii-ndí cuendá sǎ ní quexìo té Titú núú ndécú-ndí, te ñá díú-ní sǎ cuendá ní quexìo-dé chi ní níhí tucu-ndí tnúhu ndee iní cuendá ní caní-dé cuendú núú-ndí sǎ nchòhó ní sǎñaha-ndo tnúhu ndee iní xii-dé, te ní cachí tnúhu-dé xii-ndí sǎ nchòhó ío cuíní-ndó cáháⁿ ndihí ñaha-ndo xii-ndí, te ní cachí tnúhu tucu-dé xii-ndí sǎ nchòhó ío ndihú iní-ndó cuendá nàcuáa cùu ndecu-ndo ni cuu, ndihí cuendá sǎ ío sàni iní-ndó cuendá-í, te sǎ dúcáⁿ ndùu cuendú ní caní-dé núú-ndí nùu xǎⁿ ío ní cudíí iní-í.

⁸ Te nchòhó ní ndihú iní-ndó cuendá tnúhu cáháⁿ-í núú tutú sǎ ní dáquixí-í ndaha-ndo, te òré ní níhí-í tnúhu sǎ ndihú iní-ndó te tṇaa-ni ní ndixi cuéchi iní-í sǎ dúcáⁿ ní quide-í te dǎtnúni ñá túú-gǎ ní ndixi cuéchi iní-í. ⁹ Te vitna ní ndihú iní-ndó, te xǎⁿ ní quide-xi ní ndixi cuéchi iní-ndó sǎ ñá túú quide váha-ndo

ndècu-ndo ni cuu, te ní cudíí iní-í dico ñá díú cuendá sǎ ní ndihú iní-ndó ní cudíí iní-í chi cuendá sǎ ní ndixi cuéchi iní-ndó, te ní ndihú iní-ndó nàcuáa ní cuu váha iní Yá Ndiòxí, te xǎⁿ nùu ní cuu-xi ɨⁿ sǎ váha sǎ cùú-xí-ndó cuendá tnúhu ní cáháⁿ-í te ñá túú ní cùu-xi ɨⁿ sǎ cuéhé sǎ cùú-xi-ndó. ¹⁰ Te nchoo nùu na ndihú iní-ó nàcuáa cuu váha iní Yá Ndiòxí, te ndixi cuéchi iní-ó te nùu ñá túú quide váha-o ndècu-o, te sǎ dúcáⁿ quide-o te nàníhí tàhú-ó, te vá ndihú iní-ó sǎ dúcáⁿ ní quide-o, te dava ñáyüu xǎndecu ichi cuéhé ichi duha ndihú iní-yu dico ñá túú ndixi cuéchi iní-yu cuendá nchaa sǎ ñá túú váha quidé-yu, te sǎ dúcáⁿ quidé-yu te cuíta nihnú-yu. ¹¹ Te sǎ dúcáⁿ ní ndihú iní-ndó nàcuáa ní cuu váha iní Yá Ndiòxí, te xǎⁿ nùu ndècu ndee-ndo quide-ndo nchaa nacuáa tàú-xi cunduu, te vitna ní yǔhu ní iní-ndó cáháⁿ-ndó sǎ quidé váha-ndo, te ío cùdééⁿ-ndó nùú méé-ndó sǎ ñá túú quide váha-ndo ndècu-ndo ni cuu, te yǔhú-ndó ndècu-ndo cuendá sǎ ñá túú quide váha-ndo ni cùu, te ío ní xúhuⁿ iní ñáhà-ndó xii-í, te ní ndúcú ndéé-ndó ní quide ndáá-ndó cuendá téé ndècuéchi ndècu ndihí-ndo, te sǎ dúcáⁿ ní quide-ndo te xǎⁿ ní cutnùni sǎ méé-ndó ñá túú cuéchi-ndo. ¹² Te ní cadúha-í tutú ní dáquixí-í ndaha-ndo, te ní quide-ndo nàcuáa ní cáháⁿ-í, te sǎ dúcáⁿ ní quide-ndo xǎⁿ ní cutnùni iní-ndó sǎ ío cùu iní ñáhà-ndó xii-í. Te Yá Ndiòxí náhá-gǎ sǎ díú cuendá xǎⁿ ní dáquixí-í tutú ndaha-ndo, te ñá díú-ní cuendá sǎ sání iní-í cuendá téé ndècuéchi ndècu ndihí-ndo, te ní ñá díú-ní cuendá ñáyüu ní dándihú téé ndècuéchi-áⁿ iní-xi ní càdúha-í tutú ní dáquixí-í ndaha-ndo. ¹³ Te cuendá sǎ quidé váha-ndo ndècu-ndo xǎⁿ cúú-xí tnúhu ndee iní ndécú ndihí-ndí.

Dico ñá díú-ní xǎⁿ chi tnàhá ío cùdíí iní-ndí cuendá sǎ ío cùdíí

iní té Titú, te ducaⁿ cùdíí iní-dé chi nchòhó ní sãñaha-ndo tnúhu ndee iní xii-dé. ¹⁴ Te yúhú ñá túú cùcahaⁿ núú-í sá nì cáháⁿ váha-í cuendá-ndó núú tẽ Titú cùtnáhá vátá quíxí-gã-dé núú ndécú-ndó, chi ní cutnùní iní-dé sá ndáá cáháⁿ váha-í nàcuáa quide-ndo datná cúú-xí sã ndáá nchaa tnúhu dàcuaha ñaha-í xii-ndo. ¹⁵ Te vitna ío-gã váha cùu iní té Titú cuendá-ndó, chi ndàcu iní-dé sá ncháá-ndó ío váha ní tnú-ndo nchaa tnúhu ní cáháⁿ-dẽ núú-ndó, te ndàcu tucu iní-dé sá nì queheⁿ cuendá váha-ndo-dẽ, te ní dátũ-ndo núú-dẽ sá ío ní quiyùhú iní-ndó sã vã ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí iní-í cuendá-ndó chi cùtnuní ndáá iní-í sá ñá túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu iní-ó chindee tnaha-o

¹ Te nchòhó ñáyíu ndècu ndihí-ndí ichi Xítohó Jesucristú càchí tnúhu-ndí xii-ndo nàcuáa quide ñaha Yá Ndiõxí xii cue ñáyíu xĩndecu ichi-gã ndécú dìstrítú Macèdoniá, chi ío chindee ñaha-gã xii-yu cuendá sá quidé váha-yu ndécú-yu. ² Te cuéi ndòho vihí-yu ndécú-yu dico ío-ni cùdíí iní-yu, te cuendá xíãⁿ núu nì yùhu nì iní-yu ní sacáⁿ tnáhã-yu díhúⁿ sã cúú-xí tnàha ñáyíu-yu, te ñá túú tnàhí nì xĩnduu díi-yu cuéi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhã-yu, chi ní quide yica iní-yu ní sacáⁿ tnáhã-gã-yu, te yúhú càchí tnúhu ndáá-í xii-ndo sã nì yuhu nì iní-yu ducaⁿ nì quidé-yu. ⁴ Te ío ní cáháⁿ ndàhú-yu núú-ndí cuendá sá cuãha-ndí tnúhu sã tnáhã-yu chindeé-yu dava-gã cue ñáyíu cùu cuendá Yá Ndiõxí. ⁵ Te ñá díú-ní nàcuáa ní sani iní-ndí ní quidé-yu, chi ní xídó-gã-yu ní quide váha-yu, te ducaⁿ chi mée-yu ní sani iní-yu sã cáda-yu nchaa

nàcuáa cuení Yá Ndiõxí, te dãtnùní ducaⁿ te ní cachí-yu sá cúú càdá-yu nchaa nàcuáa na cũñaha-ndí xii-yu. Te ducaⁿ nì quidé-yu chi ducaⁿ nì cuení mée Yá Ndiõxí cunduu. ⁶ Te sá dúcáⁿ nì quide ñáyíu-áⁿ núu xíãⁿ cáháⁿ ndàhú-ndí núú tẽ Titú sá quíxí tucu-dé núú ndécú-ndó cuendá dàxínu cava-dé chiúⁿ sá sã ní nguíta-dé quidé-dẽ dátacá-dé díhúⁿ sã sã ní nguíta-ndo sacáⁿ tnáhã-ndó, te ducaⁿ quide-ndo chi cundahú iní-ndó tnàha ñáyíu-ndo. ⁷ Te nchòhó cúú-ndó ñáyíu ío ngòdónúú quide nchaa sã váha, te ío váha sàndáá iní-ndó Xítohó Jesucristú, te ío váha cùtnuní iní-ndó nàcuáa cáháⁿ tnúhu-gã, te ío váha dàcuaha-ndo ñáyíu tnúhu-gã, te ío ndùcu ndee-ndo quide-ndo mee-ni sã váha, te ducaⁿ ío cùu iní ñáhã-ndó xii-ndí, te sá dúcáⁿ quide-ndo núu xíãⁿ cáháⁿ ndàhú-í núú-ndó sã ngòdó núú-gã-ndó càda-ndo sã cúú-xí tnàha ñáyíu-ndo.

⁸ Dico yúhú ñá túú tàuchiuⁿ-í sá dúcáⁿ càda-ndo, chi cuendá-ni sã càchí tnúhu-í xii-ndo nàcuáa quide dava-gã cue ñáyíu ndècu ichi Xítohó Jesucristú, chi cue ñáyíu-áⁿ nì yùhu nì iní-yu quidé-yu sã váha sã cúú-xí tnàha ñáyíu-yu, te càchí tnúhu-í xii-ndo nàcuáa quide-yu cuendá cutnùní núu nãsa càda-ndo núu ndisa sã cúú iní-ndó cuè tnaha ñáyíu-ndo. ⁹ Te nchòhó sa xini-ndó sã Xítohó Jesucristú ío cundahú iní ñáhã-gã xii-o, te ío váha ndècu-gã ní cùu te ní quixi-gã ñuyíu-a ní quide váha ñaha-gã xii-o, te ñuyíu-a ñá túú ní xĩndecu váha-gã, te ducaⁿ nì quixi-gã ñuyíu-a cuéi ñá túú ní xĩndecu váha-gã cuendá sã nchóó ngũndecu váha-o núú ndécú-gã.

¹⁰ Te na càchí tnúhu-í xii-ndo nàcuáa sàni iní-í. Chiúⁿ sã nì yuhu nì iní-ndó nì nguíta-ndo quide-ndo cuíá nì yáha chi cùu-xi sã váha sã cúú-xí-ndó núu na dàxínu cava-ndo. ¹¹ Te dàtná-ni nì yuhu nì iní-ndó nì tausaha-ndo chiúⁿ-áⁿ te ducaⁿ-ni nì yuhu nì

iní-ndó dàxínu cava-ndo, te cacáⁿ tnáhá-ndó sá ndécú ndíhi-ndo nacuaá xito mee-ndo ndacu-ndo. ¹² Te núu nchòhó ní yùhu ní iní-ndó cacáⁿ tnáhá-ndó sá xító mée-ndo ndacu-ndo ña, te cùu váha iní Yá Ndiòxí, chi mee-gá sa nàha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sá yùhú cuíní-í sá nchòhó ndoho-ndo cùndecu-ndo te dava-gá-yu ngùndecu váha-yu sá cuèndá-ndó. ¹⁴ Te vitna ndècu ndee iní-ndó nàcuáa ndacu-ndo chindee-ndo cue ñáyiú xini ñuhu, te nduu ñà túú ndècu ndee iní-ndó te cue ñáyiú-áⁿ chindee ñáhá-yu xii-ndo te núu ndècu ndee iní-yu, te ducaⁿ te ní nchòhó ñà túú nà cumání xii-ndo te ní cuè ñáyiú-áⁿ ñà túú nà cumání xií-yu. ¹⁵ Te ducaⁿ te quee ndáá-xi nàcuáa càháⁿ-xi núú tütú Yá Ndiòxí núú cächí-xi: “Cue ñáyiú ío vèi sá ní níhí ñà túú ní cùu sobrá xii-yu, te cue ñáyiú sacú ní níhí ñà túú ní cumání xií-yu”, duha cächí-xi núú tütú-gá.

Té Titú ndíhi cue téé cùndíhi-dé

¹⁶ Te ndàcáⁿ tãhú-í núú Yá Ndiòxí chi mee-gá ní quide sá tè Titú ío ñuhu iní ñáhá-dé xii-ndo dàtná ñùhú iní ñáhá-í xii-ndo. ¹⁷ Te yùhú ní xáhaⁿ-í xii-dé sá quixí còto ñaha-dé xii-ndo te ní sáha-dé tnúhu, te ñà díú mée-ni sá dúcáⁿ ní xáhaⁿ-í xii-dé quixi coto ñaha-dé xii-ndo, chi mee-dé cúdíí tnàhí iní-dé quixi coto ñaha-dé xii-ndo.

¹⁸ Te tendaha-ndí ìⁿ téé ndècu ndíhi-o ichi Xítóhó Jesucristú quixi-dé ndíhi té Titú, te téé quixi ndíhi té Titú-áⁿ cúu-dé ìⁿ téé ío váha càháⁿ cue ñáyiú xíndecu ichi Xítóhó Jesucristú cuèndá-dé cuèndá sá ío váha quide-dé chiúⁿ Xítóhó Jesucristú càháⁿ-dé tnúhu-gá tnúhu sá càháⁿ nàcuáa naníhí tãhú-ó. ¹⁹ Te cue ñáyiú xíndecu ichi Xítóhó Jesucristú ñà díú-ní sá càháⁿ váha-yu cuèndá-dé, chi tnáhá ní caxi ñáhá-yu xii-dé cuèndá sá cacá cùu ndíhi ñaha-dé xii-ndí chindee ñaha-dé tacá sá cúu-xí ñáyiú ndàhú,

te quide-ndí chiúⁿ-a cuèndá ío cuu càhnu Yá Ndiòxí, te cue ñáyiú cutnùní iní-yu sá nchòhó ní yùhu ní iní-ndó quide-ndo nchaa sá váha sá cúu-xí cuè tnaha ñáyiú-ndo.

²⁰ Te cuíní-ndí sá vã càháⁿ cuèhé ñáyiú cuèndá nàcuáa quide-ndí ndíhi sá ngäutnàha sá cúu-xí cuè tnaha ñáyiú-o, te ío vèi cuu-xi.

²¹ Chi ndècu ndee-ndí quidé-ndí nàcuáa càháⁿ váha Xítóhó Jesucristú cuèndá-ndí, te quide tucu-ndí nàcuáa càháⁿ váha ñáyiú sá quidé vãha-ndí.

²² Te tendaha tucu-ndí ingá tucu téé ndècu ndíhi-o ichi Xítóhó Jesucristú quixi-dé ndíhi cue téé úú quixi coto ñaha xii-ndo, te téé quixi ndíhi-güedé-áⁿ ní cuu vèi xito quide-dé nàcuáa cutnùní iní-ndí sá ío ndècu ndee-dé quidé-dé sá váha, te vitna ío-gá cuíní-dé cada-dé sá váha vitna quixi-dé núú ndécú-ndó, chi cùtnuní ndáá iní-dé sá cúu-ndó cuè ñáyiú quide váha. ²³ Te cächí tnúhu-í xii-ndo sá tè Titú cúu-dé ìⁿ téé cùndíhi-í quidé-ndí chiúⁿ Xítóhó Jesucristú, te tnáhá-dé cúu-dé ìⁿ téé xínu cuechi núú-ndó càháⁿ-dé tnúhu-gá. Te cächí tnúhu tucu-í xii-ndo cuèndá cue téé úú quixi ndíhi-dé, chi cue téé-áⁿ cúu-güedé cue téé tendaha cuè ñáyiú xíndecu ichi Xítóhó Jesucristú quixi coto ñaha xii-ndo. Te cue téé-áⁿ quidé-güedé nàcuáa cachí ñáyiú sá ío càhnu cuu Xítóhó Jesucristú. ²⁴ Te chí cadá sá cúu iní ndisa-ndo-güedé cuèndá ducaⁿ na cùtnuní iní nchaa dava-gá ñáyiú xíndecu ichi Xítóhó Jesucristú sá ndáá ndisa ducaⁿ quide-ndo, te ducaⁿ cùtnuní iní-yu sá ndáá ndisa quide váha-ndo dàtná càháⁿ-ndí cuèndá-ndó sá quidé vãha-ndo.

9

Cuèndá sá ngäutnàha sá cúu-xí cuè ñáyiú xíndecu ichi Xítóhó Jesucristú

1 Te cuendá sá ngäutnáha sá cúú-xí cuè ñáiyu ndècu ichi Xítohá Jesucristú ñá túú-gã xíní ñùhu-xi cachí tnúhu-í xii-ndo núú tütú-a nàcuáa cada-ndo, 2 chi sa cùtnuní iní-í sá ío cuíní-ndó chindee-ndó-yu. Te ducaⁿ-ni ío váha càháⁿ-í cuendá-ndó núú ñáiyu xíndecu ichi Xítohá Jesucristú ndécú dístítú Macèdoniá, te xáhaⁿ-í xii-yu sá nchòhó ñáiyu xíndecu ichi Xítohá Jesucristú ndécú dístítú Acáyá sa ní cuu ñⁿ cuíá ducaⁿ cuíní-ndó càcáⁿ tnáhá-ndó sá cúú-xí cuè ñáiyu ndàhú ndécú ichi-gã. Te vai cue ñáiyu dístítú Macèdoniá cuíní-yu cacáⁿ tnáhá-yu sá cúú-xí cuè ñáiyu ndàhú ndécú ichi Xítohá Jesucristú cuendá sá ñí ñíhi-yu tnúhu sá nchòhó ío cuíní-ndó dùcaⁿ cada-ndo. 3 Te cuendá sá sání iní-ndó càda-ndo xiáⁿ tendaha-í cue téé ndècu ndíhi-o ichi Xítohá Jesucristú quixi-güedé núú ndécú-ndó cuendá dàtúha ñaha-güedé xii-ndo, cuendá sá vã quée ndèhnde-í núú ñáiyu sá ñí càháⁿ váha-í cuendá-ndó, te ducaⁿ cùndecu túha ndisa-ndo dàtná sa ní càháⁿ-í núú-yu. 4 Chi na cuáháⁿ ndèè quixi-í ndíhi ñⁿ úú cue ñáiyu dístítú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá ñí càháⁿ váha-í cuendá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. 5 Te xiáⁿ núú ní sani iní-í sá váha-gã codonuu cue téé ndècu ndíhi-o ichi Xítohá Jesucristú quixi coto ñaha-güedé xii-ndo cuendá chindee ñaha-güedé tacá sá ñí sani iní-ndó càcáⁿ tnáhá-ndó cuendá sá cùndècu túha-xi, te cuu-xi dàtná ñⁿ táhú sá ñí quene cuu iní méé-ndó càcáⁿ tnáhá-ndó sá cúú-xí cuè tnaha ñáiyu-ndo. Te ducaⁿ te vã yõ cani iní-xi quesàhá-yu sá nchùhú ní quide yica-ndí ducaⁿ ñí sacáⁿ tnáhá-ndó.

6 Te nchòhó sa xíní-ndó sá ñáiyu na chìhi vai tatá te vai ñíhi-yu cùu, te cue ñáiyu na chìhi sacú tatá te

sacú ñíhi-yu cùu. Ducaⁿ sãtnahá-xi cùu ñáiyu sacáⁿ tnáhá sá cúú-xí tnàha ñáiyú-yu. 7 Te ñⁿ ñⁿ-ndo càcáⁿ tnáhá-ndó nàcuáa quene cuu iní méé-ndó, te ío váha cuu iní-ndó dùcaⁿ cada-ndo te vã cadá-ndó cuendá-ñí sá quidé yica ñaha ñáiyu xii-ndo, chi Yá Ndiõxí cúú váha iní-gã núú nchàa ñáiyu cùdí iní sacáⁿ tnáhá sá cúú-xí cuè tnaha ñáiyu-xi. 8 Te Yá Ndiõxí ndacu-gã chindee ñaha-gã xii-ndo nàcuáa cundecu váha-ndo, chi diu-gã cada te ñíhi-ndó nchàa núú sá xíní ñùhu-ndo cundecu ndíhi-ndo, te ñà túú tnàhi-gã ná cumání xii-ndo, te mee-gã chindee ñaha-gã xii-ndo ñíhi-ndó ío vai cundecu ndíhi-ndo cuendá ducaⁿ chindee-ndo cue tnaha ñáiyu-ndo. 9 Te núú tütú Yá Ndiõxí càchí-xi ñⁿ xichi:

Ñⁿ ñáiyu ío vai sá ñí sãñàhá-yu xii ñáiyu ndàhú,

te sá ñí quide ñáiyu-áⁿ ñí cuu-xi sá váha sá vã yõ cùnaa.

Duha càchí-xi núú tütú-gã. 10 Te mee Yá Ndiõxí táxi-gã nchaa sá cúú tàtá nchaa nchòhó ñáiyu xítu nãndí sá xítú cuendá cuu sá cúú nchito-ndo, te diu-gã cada te ío vai sá ñíhi-ndó cùndecu ndíhi-ndo, te ducaⁿ ío-gã vai sá váha cada-ndo sá cúú-xí cuè tnaha ñáiyu-ndo. 11 Te Yá Ndiõxí taxi-gã vai núú sá cùndècu ndíhi-ndo cuendá ducaⁿ ñí yuhu ñí iní-ndó vai cuáñaha-ndo sá cúú-xí tnàha ñáiyu-ndo. Te cuendá nchaa sá sacáⁿ tnáhá-ndó quèheⁿ cuendá-ndí cuu xii tnàha ñáiyu-ndo, te cue ñáiyu-áⁿ ío ndacáⁿ táhú-yu núú Yá Ndiõxí cuendá sá dúcáⁿ sacáⁿ tnáhá-ndó sá cúú-xi-yu. 12 Te sá dúcáⁿ quide-ndo sacáⁿ tnáhá-ndó sá cúú-xí cuè ñáiyu cùu cuendá Yá Ndiõxí, te ñáiyu-áⁿ ñà túú-gã ná cumání xii-yu, te ío ndacáⁿ táhú-yu núú Yá Ndiõxí sá dúcáⁿ quide-ndo. 13 Te ñáiyu-áⁿ cutnùní iní-yu sá nchòhó quidé-ndó sá sãndáá ndisa iní-ndó tnúhu Xítohá Jesucristú, te cuendá xiáⁿ te ñáiyu-áⁿ

chiñuhú-yu Yá Ndiöxí, te cuendá sá dúcáⁿ ñí yuhu ñí iní-ndó sácáⁿ tnáhá-ndó sá cúu-xí-yu ndíhi sá cúu-xí ncháa dava-gá ñáiyu, te cachí-yu sá ño cànhu cuu Yá Ndiöxí. 14 Te ñáiyu-áⁿ cáháⁿ ndíhi-yu Yá Ndiöxí cuendá-ndó, te ño cuu váha iní ñáhá-yu xii-ndo cuendá sá Yá Ndiöxí chindèe ñaha-gá xii-ndo quide-ndo sá váha sá cúu-xí-yu ndíhi dava-gá ñáiyu. 15 Te ño ndácáⁿ táhú-ó núu Yá Ndiöxí cuendá sá ñí taxi-gá sá ño váha ndècu ndíhi-o, te ñí ñá cùnùní iní-ó ñása cunduu tnúhu cáháⁿ-ó cuendá sá váha ñí taxi-gá.

10

Té Páblú ndécú ndíhi-dé tnúhu ndee iní sá cáháⁿ-dé tnúhu Xítoho Jesucristú

1 Te Xítoho Jesucristú ño cànhu iní-gá, te cundahú iní ñáhá-gá xii-o chindèe ñaha-gá, núu xiáⁿ yúhú té Páblú ducaⁿ quide-í cáháⁿ ndáhú-í núu-ndó nàcuáa cada-ndo. Te dava-ndo cächí-ndó sá yúhú ño ndáhú iní-í òré ndécú ndíhi ñaha-í xii-ndo, te òré ñá túú ndècu ndíhi ñaha-í xii-ndo te ño ñí cáhá-í. 2 Te cáháⁿ ndáhú-í núu-ndó sá cáda-ndó nàcuáa vá cáháⁿ ñí-í núu-ndó òré quixí-í quixí coto ñaha-í xii-ndo. Te cuíní-í sá ndíhi tnúhu ñí iní-xi cáháⁿ ndíhi-í cue ñáiyu cächí sá ñí-ni cuu-í ndíhi cue ñáiyu ñá túú sàndáa iní tnúhu Xítoho Jesucristú. 3 Te nchúhú cùu-ndí cue tée ñuyú-a, dico ndècu ndee-ndí quidé-ndí nàcuáa ndàcu-ndí dáquèe tíhú-ndí ncháa sá cuèhé sá dúhá, dico ñá díú mèe-ndí ducaⁿ ndàcu-ndí quidé-ndí, 4 te ñí ñí sá ño ñuyú-a ñá túú chindèe ñaha-xi, chí mee Yá Ndiöxí chindèe ñaha-gá xii-ndí dáquèe tíhú duuⁿ-ndí ncháa núu sá cuèhé sá dúhá. 5 Te xiáⁿ núu ñíhi-ndí tnúhu cáháⁿ-ndí sá ñí-ndí yuhu cue ñáiyu cáháⁿ tnúhu sá ñá túú cùu váha iní Yá Ndiöxí, ñáiyu xíquide ñíu mee-xi cächí sá ñá

túu nàndíhi tnúhu-gá. Te quide-ndí sá ñáiyu-áⁿ quindáa iní-yu tnúhu Xítoho Jesucristú. 6 Te nchúhú sa ndècu túha-ndí sá dáquèetíhú-ndí cue ñáiyu ñá túú cuíní cada nàcuáa cuíní Xítoho Jesucristú, dico díhna-gá xíní ñúhu-xi sá ncháa nchòhó ñáiyu cuíní cada nàcuáa cuíní-gá cundáa-ndó.

7 Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càn iní-ndó cuendá-ndí. Chí núu cùnùní ndáa iní-ndó sá cúu-ndó cuendá Xítoho Jesucristú, te díu-ñí ducaⁿ táu-ndó càn iní-ndó cuendá-ndí tucu. 8 Te Xítoho Jesucristú ñí taxi-gá tnúhu ndee iní ndécú ndíhi-ndí sá dánèhé ñáhá-ndí xii-ndo nàcuáa cùita cuehnu nihnu-ndo ìchi-gá quíhíⁿ, te ñá díú sá dánèhé ñáhá-ndí xii-ndo nàcuáa cùita nihnu-ndo, te cuè na chido-gá-í cáháⁿ-í cada ñíu-í mèe-í cuendá tnúhu ndee iní ñí taxi Xítoho Jesucristú ndécú ndíhi-ndí, dico vá cùcàhàⁿ núu-í chí cáháⁿ ndáa-í. 9 Te ñá túú cuíní-í sá nchòhó caní iní-ndó sá yúhú dáyhú ñáhá-í xii-ndo nàcuáa ndùu tnúhu cáháⁿ-í núu tütú-í. 10 Te dava-ndo cächí-ndó sá ténàa ñáhá-í xii-ndo núu tütú-í, te mee-ñí tnúhu cànhu sá ño cùnuu cuu-xi, te cächí tucu-ndo sá òré ndécú ndíhi ñaha-í xii-ndo te ñá túú cáhá-í sá cúu-í ñí tée cùu váha cùu dico iní-ndó, te cächí tucu-ndo sá ñá túú tnáhá iní-ndó nàcuáa quide-í òré dácuàhà ñaha-í xii-ndo. 11 Te nchòhó ñáiyu ducaⁿ cáháⁿ cada cuendá váha-ndo sá dàtná-ñí cáháⁿ-ndí núu tütú-ndí díu-ñí ducaⁿ quide-ndí òré ndécú ndíhi ñaha-ndí xii-ndo.

12 Te nchúhú, vá cúu tnàhí cáháⁿ-ndí sá ñí-ni cuu-ndí ndíhi cue ñáiyu cáháⁿ váha cuendá mèe-xi, chí ñáiyu-áⁿ sáni iní-yu ná cúu sá váha te quidé-yu te xiáⁿ cächí-yu sá ño váha quidé-yu, te cächí-yu sá quidé váha-gá-yu dàcúxí tnàhà ñáiyú-yu, te sá dúcáⁿ cáháⁿ-yu te quidé-yu dàtná quidé cuè ñáiyu ñá túú tnàhí

cùtnuní iní-xi. ¹³ Te dico nchúhú ñá túú xidó-ndí cáháⁿ váha-ndí cuendá-ndí, chí cáháⁿ váha-ndí cuendá-ndí dico nàcuáa ndùu chiuⁿ ní taxi Yá Ndióxi cáháⁿ-ndí, chí mee-gã ní cachí-gá ndéé není sáá-ndí cáháⁿ-ndí tnúhu-gá, te ní sáá-ndí ndéé ñuú-ndó cáháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee iní sá tnàhá nchòhó cuu cáháⁿ ndihí ñaha-ndí xii-ndo, chí díhna-gá nchúhú ní quixi-ndí ní cáháⁿ-ndí tnúhu Xítohó Jesucristú ñuú-ndó, tnúhu sá cáháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí méé-ndí cuendá chiuⁿ quide dava-gá-güedé quesaha-ndí sá chíúⁿ mée-ndí cúú-xí. Te cuiní-ndí sá nchòhó cuita quindáá-gá iní-ndó Xítohó Jesucristú, te ducaⁿ te níhí-gã-ndí nàcuáa cada-ndí chiuⁿ-gá nchaa dava-gá xichi núú ní cachí-gá cada-ndí chiuⁿ-gá. ¹⁶ Chí cáháⁿ-ndí tnúhu-gá tnúhu sá cáháⁿ nàcuáa naníhí tàhú-ó, te yáha-gá-ndí ñuú-ndó quíhí-ndí nchaa dava-gá xichi cáháⁿ-ndí, te vá cádá càhnu-ndí méé-ndí cuendá chiuⁿ sá sá ní quide dava-gá-güedé.

¹⁷ Te cue ñáyiú cuiní cada càhnu mee-xi te vá dúcáⁿ cadá-yu, chí mee Xítohó Jesucristú ná càda cahnú-yu-gá. ¹⁸ Te nchaa ñáyiú na cáháⁿ váha Xítohó Jesucristú cuendá-yu, ñáyiú-áⁿ cúdiú-yu núú-gã, te ñá túú cùdiú-yu núú-gã cuendá sá cáháⁿ váha-yu cuendá méé-yu.

11

Cuendá té Páblu ndihí cuendá cue téé cachí sá cáháⁿ tnúhu Yá Ndióxi te ñá ndáá

¹ Te cuiní-í sá nchòhó cada ndee iní-ndó cundedóho-ndo tnúhu na cáháⁿ-í, chí cáháⁿ-í dàtná cáháⁿ cue ñáyiú ñá túú cùtnuní iní-xi, te cuéi nása-gá ná cùnduu tnúhu cáháⁿ-í dico chí cádá ndéé iní

cundedóho-ndo. ² Chí yúhú ío ñùhu iní ñáhà-í xii-ndo dàtná ñùhú iní ñáhà mée Yá Ndióxi xii-o, te ní cáháⁿ-í tnúhu Xítohó Jesucristú núú-ndó ñuu xiáⁿ ní tnahá tnúhu-ndo ndihí-gá vitna, te sá dúcáⁿ ní quide-í te cada iní-ndó sá yúhú cúú-í dàtná ñⁿ téé xica ndáhú te nchòhó cúú-ndó dàtná ñⁿ xíchí cuéchí, te Xítohó Jesucristú cúú-gá dàtná ñⁿ téé nándaha ndihí xíchí cuéchí-ãⁿ. Te ducaⁿ càda iní-ndó chí na sáá nduu te yúhú na càni cuendá ñáhà-í xii-ndo núú Xítohó Jesucristú, te cuu-ndo ñáyiú vá cùndècu tnahí-gá cuéchi-xi. ³ Te yúhú-í sá sàculháⁿ dandàhú ñáhà-xí xii-ndo vá cání-gã iní-ndó càchicúⁿ nihnu-ndo ní yuhu ní iní-ndó íchi Xítohó Jesucristú dàtná nchicúⁿ nihnu-ndo vitna. Te yúhú-í ná yáha-ndo dàtná ní yáha tá Èvá, chí sàculháⁿ ní nduu-xi cóó ní dandàhú ñáhà-xí xii-xi, chí sàculháⁿ-ãⁿ ío váha ní xito-xi nàcuáa ní quide-xi ní dandàhú-xi tá Èvá-áⁿ. ⁴ Te nchòhó, quidé ndéé iní-ndó sàcundedóho-ndo nchaa tnúhu cáháⁿ cue téé cáháⁿ ingá núú tnúhu cuendá Jesús tnúhu sá ñá túú dānehé ñáhà-ndí xii-ndo, te quide ndee tucu iní-ndó ndedóho-ndo dānehé ñáhà-güedé xii-ndo cuendá ingá espíritú, te ñá díú cuendá Espíritú Yá Ndióxi sá ní ngúndecu ndihí-ndo dānehé ñáhà-güedé xii-ndo, te quide ndee tucu iní-ndó ndedóho-ndo dānehé ñáhà-güedé xii-ndo ingá núú tnúhu sá càchí-güedé cáháⁿ nàcuáa naníhí tàhú-ndó, te ñá díú nàcuáa ndùu tnúhu sá ní sàndáá iní-ndó cuendá naníhí tàhú-ndó cáháⁿ-güedé. ⁵ Te cue téé ducaⁿ cáháⁿ-áⁿ càchí-güedé sá Yá Ndióxi ní tendaha ñaha-gá xii-güedé xicá cùu-güedé cáháⁿ-güedé tnúhu-gá te ío cùnuu-güedé, dico ñá ndáá sá cáháⁿ-güedé tnúhu-gá. Te yúhú cùtnuní iní-í sá cué téé-ãⁿ ñá túú cùnuu-güedé dàtná cùnuu yúhú. ⁶ Te cuéi ñá túú cáháⁿ-í dàtná cáháⁿ

cue tée ío váha sàà díquí-xi dico ío váha cùtnuní iní-í cuèndá nchaa sá dácuaáha-í, te yúhú sa quide-í nàcuáa cutnùní iní-ndó sá ío váha cùtnuní iní-í nàcuáa ndùu nchaa tnúhu càháⁿ-í.

⁷ Te cudana te sàni iní-ndó sá yúhú ñá túú ní quide váha-í sá ní quide-í mée-í dàtná ìⁿ tée ío ndáhú iní-xi, chi ñá túú ní xicáⁿ-í yáhu-í núú-ndó cuèndá sá ní càháⁿ-í tnúhu Yá Ndiòxí tnúhu sá càháⁿ nàcuáa naníhí tãhú-ó núú-ndó. ⁸ Te ní queheⁿ-í díhúⁿ ní taxi dava-gá cue ñáyiú ndècu ichi Xítohó Jesucristú, te díhúⁿ-ãⁿ ní dándóñúhu-í ní saaⁿ-í nchaa sá ní xini ñúhu-í cùtnàhá ní càháⁿ-í tnúhu Xítohó Jesucristú núú-ndó.

⁹ Te cùtnàhá ní xíndecu ndíhi ñaha-í xii-ndo te áma ní xóo cumání sá xini ñúhu-í, te ñá túú ná ní xicáⁿ-í núú ní ìⁿ-ndo. Chi cue ñáyiú xíndecu ichi Xítohó Jesucristú ndécú dístiritú Macèdoniá ní quixí-yu ní taxi-yu sá cumání xii-í, te ñá túú tnàhí ní dásatú iní ñàhá-í xii-ndo cãcãⁿ-í núú-ndó núu ná cúú sá xini ñúhu-í, te ñu-ni ducaⁿ càda-í. ¹⁰ Te ñu-ni duha càháⁿ váha-í cuèndá-í te ní ìⁿ cue ñáyiú dístiritú Acãyá vá ñihí-yu tnúhu cùñàhá-yu xii-í cuèndá cadí-yu yuhu-í. Te mee Xítohó Jesucristú nàhá-gã sá ndàá càháⁿ-í dàtná càháⁿ ndàá mée-gã. ¹¹ Te cudana te sàni iní-ndó sá sá dúhá càháⁿ-í te ñá túú cùu iní ñàhá-í xii-ndo, dico ñàhá chi mee Yá Ndiòxí nàhá-gã sá yúhú ío cùu iní ñàhá-í xii-ndo.

¹² Te nàcuáa-ni ta quide-í véxi te ñu-ni ducaⁿ càda-í cuèndá sá cuè tée cùní cada níu mee-xi càchí sá ìⁿ-ni cuu ndíhi ñaha-güedé xii-í vá ñihí-güedé tnúhu càháⁿ-güedé cachí-güedé sá ìⁿ-ni chiuⁿ quide ndíhi ñaha-güedé xii-í. ¹³ Te cue tée-áⁿ càchí-güedé sá Yá Ndiòxí ní tendaha ñàhá-gã xii-güedé xicá cùu-güedé càháⁿ-güedé tnúhu-gã dico ñá ndàá, chi mee-ni dándahú-güedé ñáyiú ndíhi tnúhu càháⁿ-güedé, te quide-güedé dàtná

quidé cuè tée càháⁿ tnúhu Xítohó Jesucristú dico ñá ndàá sá cúú-güedé cue tée càháⁿ tnúhu-gã. ¹⁴ Te vá cùñúhu-o sá dúcãⁿ quide cue tée-áⁿ, chi mee sàcúíhná quidé-xí sá cúú-xí dàtná ìⁿ espíritú xínú cuèchi núú ío váha càa ndecu Yá Ndiòxí dico ñá ndàá sá xínú cuèchi-xí xíãⁿ. ¹⁵ Te xíãⁿ vá cùñúhu-o sá cuè tée xínu cuechi núú-xí quide-güedé sá cúú-güedé cue tée quide váha chi ñá ndàá sá quidé váha-güedé chi dándahú-güedé ñáyiú. Te nàcuáa ndùu nchaa sá quidé-güedé te ducaⁿ nàcháhu-güedé núú Yá Ndiòxí.

Té Pãblú ío ndòho-dé cuèndá sá cúú-dé tée càháⁿ tnúhu Xítohó Jesucristú

¹⁶ Te yúhú càháⁿ tucu-í dóho-ndo sá vá cání iní-ndó sá yúhú cùú-í ìⁿ tée càháⁿ lúcú càháⁿ duha, te núu daya-ndo dúcãⁿ sani iní-ndó dico chí cadá ndèe iní cundedóho-ndo tnúhu na càháⁿ-í cuèndá ducaⁿ tnàhá-í cada níu-í mée-í. ¹⁷ Te vitna na càháⁿ-í dàtná càháⁿ ìⁿ tée ñá túú cùtnuní iní-xi, chi tnúhu càháⁿ-í ñá túú ìⁿ-ni cuu-xi ndíhi tnúhu Xítohó Jesucristú, chi vitna càháⁿ-í nàcuáa cada níu-í mée-í. ¹⁸ Te ío cuèhé ñáyiú quide níu mee-xi cuèndá nchaa sá ío ñuyúú-a te xíãⁿ núu tnàhá-í cùní-í cada níu-í mée-í. ¹⁹ Chi cùtnuní sá nchòhó quidé ndèe iní-ndó sàcúndedóho-ndo nchaa tnúhu càháⁿ cue tée càháⁿ lúcú càháⁿ duha, te ducaⁿ quide ndee iní-ndó sàcúndedóho-ndo tnúhu càháⁿ-güedé chí càchí-ndó sá ío túha-ndo. ²⁰ Te nchòhó, quide ndee iní-ndó tní-ndo nchaa tnúhu càháⁿ cue tée quide yica ñaha xii-ndo sá cúnú cuèchi-ndo núú-güedé, te xicáⁿ-güedé nándí sá xicáⁿ-güedé núú-ndó, te taxi tnuní ñàhá-güedé xii-ndo, te quide-güedé sá ío cùnuu-güedé ndécú ndíhi ñaha-güedé xii-ndo, te càniha-güedé xii-ndo, te cuèí nchaa xíãⁿ quidé ñaha-güedé xii-ndo dico quide ndee-ni iní-ndó. ²¹ Te nchòhó

càhí-ndó sá cúú-ndí cue téé ñá túú ní cùyi cada nándi sá cádá, te ndáá chi ñá túú ñi cuu-ndí ndihi cue téé ducaⁿ xíquide.

Dico núu cue téé-áⁿ cùyi-güedé quidé ñinu-güedé méé-güedé, te tnàhá-í cùyi-í ducaⁿ càda-í. Te sá dúhá càháⁿ-í te càháⁿ-í dàtná ñi téé ñá túú cùtnuni iní-xi.²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñi-ni téé càháⁿ tnúhu hèbreú cùú-í, àdi quide cahnu-güedé méé-güedé cuendá sá cúú-güedé cue téé isràél, te yúhú tucu tnàhá-í cùú-í téé isràél, àdi quide cahnu-güedé méé-güedé cuendá sá cúú-güedé ñani tnàhá ndí Abrahám, te tnàhá yúhú cùú-í ñani tnàhá ndí Abrahám tucu.²³ Àdi quide cahnu-güedé méé-güedé cuendá sá sání iní-güedé sá díú núú Xítohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gá. Te sá dúhá quide cahnu-í méé-í te càháⁿ-í dàtná ñi téé ñá túú cùtnuni iní-xi, te yúhú cùú-í ñi téé ío-gá quidé chiú-gá dàcúxí cué téé-áⁿ, te vai xito ní cuu càniha ñáiyu xii-í, te vai xito ní cuu chihí ñahá-yu vecaá xii-í, te vai xito ní cuu càcu càcu cahni ñaha ñáiyu xii-í.²⁴ Te cue ñáiyu isràél ní canihá-yu xii-í úhúⁿ xito, te ndi tnàhá ñi xito ní canihá-yu ní dáquée-yu ócó sáhúⁿ cúmí ñi sàtà-í.²⁵ Te úní xito ní caniha tucu ñáiyu xii-í ndihi carrutí, te ñi xito ní sáha yúú ñahá-yu xii-í, te ní cuu úní xito quée naa bàrcú xití ndute òré sácúhu-í, te ñi xito ío ní ndoho-í ní xíndecu-í ñi nduu ñi núú ndute làmár.²⁶ Te ío titní xichi ní cuu xica cuu-í, te dava xichi ní càcu cuido ñaha ndute ñuhu xii-í, te dava xichi ní càcu duhu ñadúhú nchaa ndachiuⁿ-í, te dava xichi ní càcu cada ñaha cué ñáiyu cùu ndi mee-í ñi sá cádá ñahá-yu xii-í, te ñi-ni ducaⁿ ní càcu cada ñaha tucu cue ñáiyu ñá túú cùu ndi mee-í ñi sá cádá ñahá-yu xii-í ní cùu, te cué xití

ñuú te cué xití yucu càcu càcu cada ñaha ñáiyu xii-í ñi sá cádá ñahá-yu, te ñi-ni ducaⁿ càcu càcu quini-í tnúndóho òré ñúhú-í bàrcú cuáháⁿ núú ndute làmár. Te cue ñáiyu càhí sá ndécú ichi Xítohó Jesucristú te ñá ndáá càcu càcu cada ñahá-yu xii-í ñi sá cádá ñahá-yu.²⁷ Te ío ndóho-í cuendá chiúⁿ quide-í chi ío xàú-í, te ní cuu vai xito ñá túú xidí-í, te titní xito ní cuu xihí víhi-í docó, te titní xito ní cuu yíchi-í ndute, te titní xito ní cuu ñá túú tnàhí ná xéxi-í cuendá chiúⁿ quide-í, te titní xito ní cuu ndóho-í sá víxiⁿ, te titní xito ní cuu ñá túú nihí-í dóo cuihnu-í.

²⁸ Te ñá díú-ní xǎⁿ chi ñi nduu ñi nduu ío sání iní-í cuendá nchaa ñáiyu ndécú ichi Xítohó Jesucristú xíndecu nchaa xichi.²⁹ Te ndéda-ni cà ñáiyu ñá túú nihí ndéé cùndecu ichi Xítohó Jesucristú, te ío cùndahú iní-í chi sànuu sá tnàhá-í ñá túú nihí ndéé-í cundecu-í ichi-gá sá dúcáⁿ quidé-yu. Te núu ñi ñáiyu quidé-yu sá ñi nchóhó ñáiyu ndécú ichi Xítohó Jesucristú quidé-ndó ñi sá ñá túú tàú-ndó càda-ndo te vá cúú vǎha iní-í chi cudééⁿ-í.³⁰ Te núu xini ñuhu-xi sá cádá càmu-í méé-í, te cuu ducaⁿ càda-í te càháⁿ-í mee-í cuendá nchaa sá quidé nàcuáa ñá túú nihí ndéé yiqui cuúú-í.³¹ Te Dútú Ndíoxí Yaa cúú Tǎtǎ Xítohó Jesucristú ñahá-gá sá yúhú càháⁿ ndáá-í núú-ndó, te ñi-gá tàú-gá cachí-ó sá ío càmu cuu-gá ñi caa ñi quíhⁿ.³² Te cùtnàhá ní xíndecu-í ñuú Dámascú te téé cùu gobiernú téé cùndihi téé yíndaha ñáiyu nani Aretás ní taxi ndecu-dé cue téé ní xíndedí yuyèhe sá ñúhú dòco ñuú cuendá òré quée-í te tñi ñaha-güedé xii-í ní cùu.³³ Dico yúhú ní quée-í ñi xití tídihi, te cue ñáiyu cùndihi ñaha xii-í ní queñuhu ñahá-yu ndáa ventaná nchí yiqui naha sá ñúhú dòco ñuú-áⁿ, te ducaⁿ te ní càcu-í ñá túú ní ndácu-güedé tñi ñaha-güedé xii-í.

12

Té Páblú càháⁿ-dé sá ò vii càa sá nǐ dǎnehé núú ñáhá Xítóhó Jesucristú xii-dé

¹ Te ñá túú ndéè nándǐhi-xi sá càháⁿ váha-o cuendá méé-ó, dico vitna xini ñuhu-xi ducaⁿ cada-í chi càháⁿ-í nàcuáa ní quide ñaha Xítóhó Jesucristú xii-í, chi ní quide-gá sá nǐ cutnùnǐ iní-í nàcuáa ndúu tnúhu-gá, te vai núú sá nǐ dǎnehé núú ñáhá-gǎ xii-í. ² Te yúhú xini-í ñⁿ téé sǎndáá iní ñáhá xii Xítóhó Jesucristú, te sa ní cuu úxícúmí cuiá sá tée-áⁿ nǐ sáá-dé ndéé andiu cùu uni, te ñá túú xini-í te núu ndihi yiqui cùñú-dé ní sáá-dé àdi ñáhá, chi ñⁿdií díí-nǐ Yá Ndióxi ñáhá-gá te núu nása càa-dé ní sáá-dé. ³ Te yúhú càháⁿ ndáá-í cuendá téé-áⁿ, dico dàtná ní cachí-í sá ñá túú xini-í te núu ndihi yiqui cùñú-dé ní sáá-dé andiu àdi ñáhá, chi mee Yá Ndióxi ñáhá-gá te núu nása càa-dé ní sáá-dé. ⁴ Te téé-áⁿ nǐ sáá-dé ñⁿ xichi núú ò váha càa andiu, te yacáⁿ ní xindedóho-dé tnúhu mee-ni sá cùú-xí cuendá méé-dé, te tnúhu-áⁿ vǎ cùú tnàhí càháⁿ-dé núú nǐ ñⁿ ñáyiu. ⁵ Te yúhú quidé ñinu-í téé-áⁿ, dico mee-í ñá túú càháⁿ váha-í cuendá-í cuendá cada ñinu-í méé-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yiqui cuñú-í. ⁶ Te núu dicó yúhú cuini-í te cuu càháⁿ váha-í cuendá-í cuendá cada ñinu-í méé-í, te núu ducaⁿ na càháⁿ-í te ñá túú cùu-xi ñⁿ tnúhu neñúu càháⁿ-í, chi cùu-xi ñⁿ sá càháⁿ ndáá-í te núu na càháⁿ-í. Dico vǎ dúcáⁿ càda-í chi cuini-í sá nchòhó cada cuendá-ndó nàcuáa ndúu tnúhu càháⁿ-í ndihi nàcuáa quide-í, te ducaⁿ mée-ndo càháⁿ-ndó te núu ná téé cùu-í, te ñá díú sá yúhú càháⁿ váha-í cuendá méé-í cuendá nchòhó cachí-ndó sá ò cùnuu-í.

⁷ Te sá nǐ dǎnehé núú ñáhá Xítóhó Jesucristú xii-í cùu-xí sá xidó ò váha, te cuendá sá vǎ cada càhnu-í méé-í núu xiáⁿ Xítóhó Jesucristú ní quide-gá duha ndòho yiqui cuñú-í vitna. Te sá dúcáⁿ quide ñaha-gá

xii-í te xiáⁿ sáculháⁿ nǐ ñihí-xi ichi càhnu dandoho ñaha-xi xii-í. ⁸ Te ní cuu úní xito càháⁿ ndàhú-í núú Xítóhó Jesucristú sá nǎ cada-gá nàcuáa vǎ ndòhó-gǎ yiqui cùñú-í. ⁹ Dico mee-gǎ cachí-gá xii-í: “Yúhú ò cùndahú iní ñáhà-í xii-ñ chindee ñaha-í, te ñá túú nǎ cùmǎni xii-n, te cùtnuní sá ò-gá chindèe-í cue ñáyiu ñá túú ñihí ndéé cùndecu”, duha ní cachí-gá xii-í. Te xiáⁿ núu yúhú ò cùdǐ iní-í sá ñá túú ñihí ndéè-í ndécù-í, chi ñⁿ cuendá xiáⁿ Xítóhó Jesucristú ñá túú dàña nihnu ñaha-gá xii-í chindèe ñaha-gá. ¹⁰ Te xiáⁿ núu cùdǐ iní-í sá dúhá ñá túú ñihí ndéè-í ndécù-í, te cùdǐ tucu iní-í cuendá nchaa tnúhu cuèhé tnúhu duha càháⁿ ñáyiu cuendá-í, te cùdǐ iní-í cuendá nchaa sá ndòhó-í, te cùdǐ tucu iní-í cuendá sá quidé ñaha ñáyiu xii-í, te cùdǐ tucu iní-í cuendá nchaa dǎva-gá sá ndòhó-í cuendá Xítóhó Jesucristú. Te òré ñá túú ñihí ndéè-í te Xítóhó Jesucristú chindèe ñaha-gá xii-í ñihí ndéè-í.

Té Páblú ò sàni iní-dé cuendá cue ñáyiu xindecu ichi Xítóhó Jesucristú ndécù ñúu Còrintú

¹¹ Te cùu-í dàtná ñⁿ téé ñá túú cùtnuní iní-xi sá dúhá càháⁿ váha-í cuendá-í, te ducaⁿ quide-í chi mee-ndo quide-ndo sá dúcáⁿ càháⁿ-í, dico mee-ndo tàu-ndó càháⁿ váha-ndo cuendá-í ní cùu. Te dǎva cue téé ò quide càhnu-güedé méé-güedé, te cachí-güedé sá Xítóhó Jesucristú ní táuchíuⁿ-gǎ sá càháⁿ-güedé tnúhu-gá, dico yúhú cùnuu-gá-í dǎcúxí cue téé-áⁿ cuèí ñá túú vǎdǎna ná cùu-í ndécù-í ñuyíu-a. ¹² Te cùtnàhá ní xindecu ndihi ñaha-í xii-ndo ò ní quide càhnu iní-í nǎndǐ sá nǐ yáha-í ní quide-í chiúⁿ Xítóhó Jesucristú sá cùu-xí-ndó. Te ní chindee ñaha-gá xii-í ní quide-í titní núú sá vǎ yòo tnàhí ndàcu cada te ní cuñúhu-ndo, te sá dúcáⁿ nǐ chindee ñaha-gá xii-í ní cutnùnǐ iní-ndó sá yúhú cùu ndisa-í ñⁿ téé ní cachí Xítóhó Jesucristú sá càháⁿ-í tnúhu-gá.

13 Te yúhú ñⁿ-ni quide ndihí ñaha-í xii-ndo ndihí nchaa dava-gá cue ñáyiú ndècu ichi Xítohó Jesucristú, te dicó-ni sá yúhú ñá túú ní cuíní-í taxi-ndo sá xíní ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuíní-í chindee ñaha-ndo te chí cáda cahnu iní ñáhá xii-í.

14 Te vitna sa ndècu túha-í sá quixi-í núu ndécú-ndó, te sá quixi còto ñaha tucu-í xii-ndo cùu-xi xito cuu úní sá quixi-í, te cuíní-í sá vǎ dándihú-ndó iní-ndó ndècu-ndo sá táxi-ndó cùu xii-í, chí ñá díú xiǎⁿ ndèé iní-í chí mee-ndo ndèé iní-í quixi-í. Te duha cǎháⁿ-í chí nchòhó xíní-ndó sá cuè téé cùu tátá sǎñaha-güedé sá cúu-xi cuè déhe-güedé te ñá díú cuè déhe-güedé sǎñaha-güedé sá cúu-xi mèe-güedé. 15 Te yúhú ío váha cùu iní-í dándòñuhu-í sá ndécú ndihí-í nàcuáa ndacu-í chindee ñaha-í xii-ndo cùndecu váha-ndo sá cúu-xi Yá Ndióxi chí ío cùdí iní-í, te cuèi na cùu-í sá cuendá-ndó, chí ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá cǎvihi-ndo xii-í.

16 Te ñaha-ndo sá ñá túú ní dándihú-í iní-ndó ná taxi-ndo cùu xii-í, dico dava-ndo cǎchí-ndó sá ío váha ní xito-í nàcuáa ní quide-í nàcuáa ní dándàhú ñáhà-í xii-ndo, 17 Te chí cǎháⁿ te núu yúhú ní dándàhú ñáhà-í xii-ndo ndihí cue téé ní tendaha-í ní quixi coto ñaha xii-ndo. 18 Te ní cǎháⁿ ndàhú-í núú téé Títú ndihí núú ingá tucu téé ndècu ndihí-o ichi Xítohó Jesucristú ní quixi coto ñaha-güedé xii-ndo. Te nchòhó cùtnùní iní-ndó sá tǎ Títú ñá túú ní dándàhú ñáhà-dé xii-ndo, te ducaⁿ chí ñⁿ-ni sàni iní-ndí te ñⁿ-ni quide-ndí.

19 Te cudana te sàni iní-ndó sá sá dúhá cǎháⁿ-ndí te tàunihnu-ndí mée-ndí, dico ñá díú dùcaⁿ quee-xi tnúhu cǎháⁿ-ndí, chí cǎháⁿ-ndí nàcuáa tàu-xi cǎháⁿ-ndí chí ndècu ndihí-ndí Xítohó Jesucristú, te mee Yá Ndióxi náhá ndáá-gá nàcuáa

ndùu tnúhu cǎháⁿ-ndí, te nchaa sá cǎháⁿ-ndí cúu-xi cuendá nchòhó cue ñáyiú ío cùu iní-ndí, te cǎháⁿ-ndí nàcuáa cundecu váha-ndo ichi Xítohó Jesucristú. 20 Te ío sàni iní-í cuendá-ndó chí na cuáháⁿ te òré quixi-í quixi coto ñaha-í xii-ndo, te ñá túú quide-ndo nàcuáa cuu váha iní-í, te sá dúcáⁿ te yúhú cǎháⁿ-í nàcuáa vǎ cúu váha iní-ndó, te ducaⁿ ío sàni iní-í cuendá-ndó chí na cuáháⁿ òré quexiò-í te nàá-ndó, àdi ndecu-ndo ichi cuédú iní, àdi cudééⁿ núú tnáhá-ndó, àdi ñá túú cùu ñⁿnuu-ndo ndecu-ndo, àdi cǎháⁿ cuèhé-ndó cuendá tnàha ñáyiú-ndo núú chítú núú tǎcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. 21 Te ío sàni iní-í cuendá-ndó chí na cuáháⁿ òré quixi-í, te Yá Ndióxi cada-gá te cucahaⁿ núu-í sá cuendá-ndó, te ío ndihí iní-í cuendá-ndó te núu vátá dǎñá-gǎ-ndó nchaa sá cuèhé sá dúhá ñí ngüíta-ndo quide-ndo ndéé sanduu, te vǎi-ndo ní ngüíta-ndo dùcaⁿ quide-ndo, chí ndècu-ndo ichi díú iní te nándi-gá nchaa sá cuèhé sá dúhá quide-ndo, te ducaⁿ ío ndihí iní-í te núu vátá dǎñá-gǎ-ndó nchaa xiǎⁿ.

13

Tnúhu ndéé núú ñí ndihí-ná

1 Te sá quixi-í vitna núú ndécú-ndó cùu-xi xito cuu úní sá quixi còto ñaha-í xii-ndo. Te cǎchí tnúhu-í xii-ndo sá òré cundáa cuèchi-ndo te canehe núú úú àdi úní ñáyiú cǎháⁿ ndáa nàcuáa ndùu cuèchi-ndo. 2 Te yúhú sa ní cǎháⁿ-í dóho-ndo cùtnàhá ní quixi-í ní quixi coto ñaha-í xii-ndo xito cuu úú, te díu-ni ducaⁿ cǎháⁿ tucu-í dóho-ndo vitna vátá quixi tucu-gá-í quixi coto ñaha-í xii-ndo. Te nchòhó ñáyiú ní cunduu ñí ngüíta quide nchaa sá cuèhé sá dúhá, tenáa ñáhà-í xii-ndo òré quexiò-í te núu vátá dǎñá-gǎ-ndó nchaa sá cuèhé sá dúhá quide-ndo te tnàhá

nchaa dava-gá-ndó tēnaá ñáhà-í xii-ndo. ³ Te nchòhó cuiní-ndó quini-ndó núu ndáá sá quidé-í núu Xítohó Jesucristú càhá-í yuhu-gá, dico dàvá-án cutnùní ndáá iní-ndó. Te Xítohó Jesucristú quidé-gá nàcuáa cutnùní iní-ndó sã ïo càhnu cuu-gá te ñá túú quide-gá dàtná quidé ìñ ñáyiú ñá túú nihí ndéé cūndecu. ⁴ Te Xítohó Jesucristú ní ndoho-gá dàtná ìñ ñáyiú ñá túú nihí ndéé cūndecu, chi ní sahi ñaha-güedé xii-gá núú cùrúxí dico mee Yã Ndióxi ní quide-gá ní nihí ndéé Xítohó Jesucristú ní ndoto-gá ndécú-gã vitna, te tnàhá nchúhú tucu ducaⁿ yãha-ndí ñá túú nihí ndéé-ndí cūndecu-ndí, dico mee Yã Ndióxi chindèe ñaha-gá xii-ndí nihí ndéé-ndí ndécú-ndí cuendá sá ndécú ndihí-ndí Xítohó Jesucristú, te xĩⁿ núu ndàcu-ndí quidé-ndí nàcuáa tàù-xi cunduu sá cúú-xí-ndó.

⁵ Te chí cádá cuendá váha te núu ndisa sá sàndáá iní-ndó tnúhu Xítohó Jesucristú, te núu ndáá sá ndécú-ndó ichi-gá te cūtnuní iní-ndó sã ndécú-ndó ndihí-gá.

⁶ Te cuiní-ndí sá nchòhó cutnùní ndáá iní-ndó sã nchúhú ndécú ndihí ndisa-ndí Xítohó Jesucristú.

⁷ Te nchúhú càháⁿ ndihí-ndí Yã Ndióxi cuendá-ndó cuendá sá vã cádá-ndó ñi ìñ sá cuèhé sá dúhá, te vã cání iní-ndó sã sã dúcáⁿ càháⁿ ndihí-ndí-gá cuendá-ndó, te cuiní-ndí sá nchòhó cutnùní iní-ndó sã nchúhú ïo ndècu yiñuhu-ndí núú-gã, te ñáhá chi càháⁿ ndihí-ndí-gá cuendá-ndó chi cuiní-ndí sá nchòhó cada váha-ndo cūndecu-ndo cuéi sàni iní-ndó sã nchúhú cúú-ndí cue tée ñá túú ndècu yiñuhu núú-gã. ⁸ Te nchúhú

mee-ni càháⁿ váha-ndí cuendá tnúhu ndáá tnúhu Yã Ndióxi, te ñá túú càháⁿ-ndí ìñ tnúhu sá ñà túú tàù-xi càháⁿ-ndí cuendá tnúhu-án. ⁹ Te cùdíí iní-ndí sá ñà túú-gã xíní ñuhu-xi cada-ndí nàcuáa nihí

ndéé-ndí tenáá ñáhá-ndí xii-ndo càháⁿ-ndí dóho-ndo, chi nchòhó sa ní nihí ndéé-ndó ndècu-ndo ichi-gá. Te nchúhú càháⁿ ndihí-ndí Yã Ndióxi cuendá-ndó cuendá sá nchòhó cundáá-ndó cūndecu-ndo ñá túú-gã ná cumání-ndó núú-gã. ¹⁰ Te xĩⁿ núu duha nduu nchaa tnúhu tēe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cūndecu ndihí ñaha-í xii-ndo te vã ïo nihí càháⁿ-í dóho-ndo nàcuáa nduu tnúhu ndee ìni ní taxi Xítohó Jesucristú ndécú ndihí-í, chi ní taxi-gá tnúhu ndee ìni xii-í nàcuáa canu ichi ñaha-í xii-ndo cuíta cuehnu nihnu-ndo ichi-gá quíhíⁿ, te ñá díú cuendá sá cánúichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiú ndècu ndihí-ndí ichi Xítohó Jesucristú ïo quide ndee ìni ñáhá-ndí xii-ndo, te ïo chí ndúcú nàcuáa cada-ndo cundáá-ndó núú Yã Ndióxi cuendá sá ñà túú tnàhí-gá ná cūmání-ndó núú-gã, te ndee ndèe cada iní-ndó cūndecu-ndo, te chí cúú ìñ nuu cūndecu ndihí tnaha, te ducaⁿ te Yã Ndióxi cūndecu ndihí ñaha-gã xii-ndo chí ïo cūu ìni ñáhá-gã xii-o, te ñu-gá quidé-gã ïo váha cūu iní-ó ndècu-o. ¹² Te ndihí tnúhu yiñuhu chí cádá ndèe ìni tnáhá. ¹³ Te nchaa ñáyiú cūu cuendá Yã Ndióxi ndécú ìha quide ndee ìni ñáhá-yu xii-ndo.

¹⁴ Te xicáⁿ táhú-ndí núú Xítohó Jesucristú sá ïo na chindèe chítúu ñaha-gã xii-ndo. Te mee Yã Ndióxi ná cádá-gã nàcuáa cutnùní iní-ndó sã ïo cūu ìni ñáhá-gã xii-ndo, te Espiritú-gá cūndee cūu cahnu iní-ndó cūndecu-ndo. Te ducaⁿ na cūnduu. Te ïo chí cádá ndèe ìni-ñá vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU DISTRITÚ GÁLACIÁ

Té Páblú cádúha-dé tutú quíhiⁿ ndaha nchaa ñáyiú sàndáá iní ñáhá xii Xítohó Jesucristú ndécú distritú Gálaciá

¹ Te yúhú té Páblú ní tendaha ñaha Xítohó Jesucristú, ndihi Dútú Ndiöxí véxi-í cãháⁿ-í tnúhu-gá. Te ñu Yá Ndiöxí ní dándótó-gã Xítohó Jesucristú Yáá ní xíhi ní cùu. Te cãchí tnúhu-í xii-ndo sã ñã díú ñáyiú ñuyúú-a ní tëndaha ñaha xii-í véxi-í, te ní Yá Ndiöxí te ní Xítohó Jesucristú ñã túú ní xãháⁿ-gã xii ñã ñáyiú quixí-yu cachí tnúhu-yu nãcuáa cada-í. ² Te yúhú té Páblú cádúha-í tutú-a ndihi nchaa dava-gã ñáyiú ndècu ichi Yá Ndiöxí ndécú ndihi-í iha cuëndá daquixi-í ndaha nchòhó ñáyiú sàndáá iní ñáhá xii Xítohó Jesucristú ndécú distritú Gálaciá. ³ Te xicáⁿ tãhù-í núú Dútú Ndiöxí, ndihi núú Xítohó Jesucristú sã ïo na chindee chitúu ñaha-gã xii-ndo, te ducaⁿ ndi nduú-gã ná cáda te ïo váha cuu iní-ndó cùndecu-ndo. ⁴ Te Xítohó Jesucristú ní xíhi-gã sã cuëndá nchaa cuéchi nchoo cué ñáyiú ndècu ñuyúú-a. Te ducaⁿ ñi quide-gã, chi cuini-gã sã vã cùndècu-o ichi cuehé ichi duha. Te ducaⁿ ñi cuu, chi Dútú Ndiöxí ducaⁿ ñi cuini-gã cunduu. ⁵ Te ïo chí ná ndãcãⁿ tãhù-ó núú Yá Ndiöxí cuëndá sã ïo cãhnu cuu-gã, te ñu-ñi ducaⁿ càda-o ni caa ni quíhiⁿ! Te ducaⁿ na cùnduu.

Mee-ni tnúhu Xítohó Jesucristú cúu-xí tnúhu sã cãháⁿ nãcuáa naníhi tãhù-ó

⁶ Te ïo cùnúhu-í cúu chi ïo ndihi ní dãnã-ndó ichi Yá Ndiöxí. Te Yáá-áⁿ ñi cãháⁿ ñáhã-gã xii-ndo, chi Xítohó Jesucristú ïo ní cundãhú

iní ñáhã-gã ní quide váha ñaha-gã xii-ndo, te vitna dàcuaha tucu-ndo ingá tnúhu, te cãchí-ndó sã xiãⁿ dácãcu nihnu ñaha-xi xii-ndo núú ùhú núú ndãhú. ⁷ Dico ñáhã, chi ñã túú-gã tnúhu sã dácãcu nihnu ñaha xii-o núú ùhú núú ndãhú. Te dicó-ni sã ïo ñáyiú véxi daticá nuu ñáhã-yu xii-ndo dãnehé ñáhã-yu tnúhu sã dãcuíta nihnu ñaha xii-ndo, chi tnúhu-áⁿ ñã túú cùu-xi tnúhu Xítohó Jesucristú. ⁸ Te yúhú cãháⁿ-í tnúhu Xítohó Jesucristú, dico núú ïo ñáyiú véxi dãnehé ñáhã xii-ndo ingá tnúhu sã ñã túú ní dãnehé ñáhã-í xii-ndo, te nchòhó cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu. Te cuéi yúhú, te núu na dãmã-í tnúhu danèhé ñáhã-í xii-ndo, te ñu-ñi ducaⁿ cãháⁿ-ndó sã nãchãhu-í núú-gã te núu ducaⁿ na càda-í. Àdi te núu ñã espíritú xínú cuéchi núú-gã véxi-xi cãháⁿ-xi ingá tnúhu sã ñã túú ní dãnehé ñáhã-í xii-ndo nãcuáa naníhi tãhù-ndó ñã, te ñu-ñi ducaⁿ cãháⁿ-ndó sã nãchãhu-xi núú Yá Ndiöxí te núu ducaⁿ na càda-xi. ⁹ Te ñu-ñi duha sa ní dãnèhé ñáhã-í xii-ndo sã núu véxi ñáyiú dãnehé ñáhã ingá tnúhu sã ñã túú ní dãnehé ñáhã-í xii-ndo nãcuáa naníhi tãhù-ndó ñã, te cachí-ndó sã ñáyiú-áⁿ nachãhu-yu núú Yá Ndiöxí sã dúcãⁿ quidé-yu, duha ní cachí-í xii-ndo.

¹⁰ Te duha nduu tnúhu cãháⁿ-í chi nchòhó sa xini-ndó sã yúhú cuini-í sã Yá Ndiöxí cãháⁿ-gã sã quidé vãha-í ndécù-í, te ñã díú sã ñáyiú ñuyúú-a cachí-yu sã quidé vãha-í, àdi sã ïo cùdíí ñi-yu nchaa nãcuáa quidé-í ndécù-í. Te núu na càni iní-í cudíu-í núú ñáyiú ñuyúú-a, te ñã túú cùu-í téé xinu cuechí núú Xítohó Jesucristú te núu ducaⁿ na càda-í.

Nãcuáa ní cuu ní ngúíta té Páblú cãháⁿ-dé tnúhu Yá Ndiöxí

¹¹⁻¹² Te nchòhó ñáyiú ndècu ndihi-í ichi Xítohó Jesucristú cãchí tnúhu-í xii-ndo sã tnúhu sã dãnèhé ñáhã-í xii-ndo nãcuáa naníhi

tàhú-ndó cùu-xi tnúhu sá nǐ cachí tnúhu mee Xítóhó Jesucristú xii-í, te ñá díú ìñ ñáyiú ñuyúí-a ní càhu iní-yu tnúhu-án, àdi danehé ñáhã-yu xii-í, chi mee Xítóhó Jesucristú ní dánèhé ñáhã-gã.

13 Te nchòhó sa nihí-ndó tnúhu nàcuáa ní xóo cada-í cùtnàhá nchicúⁿ nihnu-í nchaa nàcuáa dàcuaha ñáyiú cùu ndí mee-í ñáyiú isràèl ní cùu. Te dàvã-án ïo ní xóo cuu úhú iní-í nchaa ñáyiú ndècu ichi Yá Ndiòxí, te nándi sá nǐ xóo cada-í-yu, te ní cuini-í danàa-í-yu ní cùu. 14 Te yúhú ío-gá ní xóo quene cáva-í ní xóo dacuaha-í nchaa sá dácuaaha ñáyiú cùu ndí mee-í dácúxí ñáyiú ìñ-ni cuà-í ndihí-yu ní cùu, te ío-gá ní xóo cuini-í cada ndáa-í canchicúⁿ nihnu-í nchaa nàcuáa ní dánèhé ñáhã cuè ñaní tnáhã-í ní xíndecu ndéé sanaha ní cùu. 15 Te ndéé cùtnàhá vátã cácu-gã-í Yá Ndiòxí sa nèhe váha ñaha-gã xii-í cuendá sá càháⁿ-í tnúhu-gá, núu xíãⁿ ní càháⁿ ñáhã-gã xii-í quidè-í chiúⁿ-gã vitna, te sá ducáⁿ nǐ quide-gá te ío váha ní quide ñaha-gã xii-í. 16 Te òré ní càháⁿ ñáhã Yá Ndiòxí xii-í te ní cachí tnúhu-gá cuendá Déhe-gã Xítóhó Jesucristú. Te ducaⁿ nǐ quide Yá Ndiòxí cuendá sá cuini-gã sá cùñaha-í xii ñáyiú ñá túú cùu ñáyiú isràèl cuendá Yaá cúú Dèhe-gã. Te cùtnàhá ní càháⁿ ñáhã Yá Ndiòxí xii-í, te vá yóo ìñ níú-xi ní ndùcu tnúhu-í nàcuáa cada-í. 17 Te ní ñà túú ní sáhãⁿ-í ñúú Jerusalén nducu tnúhu-í núú cuè téé díhna nuu nǐ tendaha Xítóhó Jesucristú càháⁿ tnúhu-gá núu nása cada-í, chi ndihí-ni ní sáhãⁿ-í distritú Àrabíá ní xíndecu tnaa-í te dàtnùní cuánuhú tucu-í ñúú Dàmascú.

18 Te núú ùní cuía sá nǐ càháⁿ ñáhã Yá Ndiòxí xii-í, te ní sáhãⁿ tucu-í ñúú Jerusalén ní càháⁿ ndihí-í té Pèlú, te ní xíndecu-í ndihí-dé sáhúⁿ nduu. 19 Te tnàhá té Jàcobó ñaní Xítóhó Jesucristú ní càháⁿ ndihí-í. Te ñá túú ní xini-í dava-gã cue téé ní tendaha Xítóhó

Jesucristú càháⁿ tnúhu-gã. 20 Te Yá Ndiòxí ndéhé ndí ndehe caxi-gã sá ncháá tnúhu tèe-í núú tùtú-a sá cúú-xí-ndó cùu-xi ìñ sá ndàá.

21 Te sátã ní sáhãⁿ-í ñúú Jerusalén, te dàtnùní ní sáhãⁿ-í distritú Síríá, ndihí distritú Ciliciá. 22 Te nchaa ñáyiú xíndecu ichi Xítóhó Jesucristú ndécú distritú Jùdeá ñá túú xini ñáhã-yu xii-í ní cùu. 23 Dico ní xóo níhí-yu tnúhu nchaa nàcuáa ní xóo cada-í, te ní cachí-yu: “Tée cùu úhú iní ñáhã xii nchaa nchoo ñáyiú ndècu ichi Xítóhó Jesucristú càháⁿ-dé tnúhu-gã núú ñáyiú cuendá quíndáá iní ñáhã-yu xii-gã, te diu-dé nándi sá quidè ñaha-dé, te cuini-dé danàa ñaha-dé cuendá sá vã cóo-gã ñáyiú quíndáá iní ñáhã xii-gã ní cùu”, duha ní cachí-yu cuendá-í. 24 Te ní ngúita-yu ní cachí-yu sá ïo càhu cuu Yá Ndiòxí cuendá sá ñà túú-gã quidè-í dàtnã ní xóo cada-í.

2

Té Pãblú ní nihí tnáhã-dé ndihí dava-gã cue téé càháⁿ tnúhu Yá Ndiòxí

1 Te ní nútnahá úxícú^mí cuía sá ní sáhãⁿ-í ñúú Jerusalén ní càháⁿ ndihí-í té Pèlú, te dàtnùní ndécã-í té Bèé ní sáhãⁿ, te tnàhá té Titú ní sáhãⁿ ndihí-ndí-dé. 2 Te ní sáhãⁿ-í chi mee Yá Ndiòxí ní cachí-gã sá quihíⁿ-í. Te yacáⁿ ní tacá mee-ni cuè téé cùnuu. Te ní xáhaⁿ-í xii-güedé nàcuáa ndùu tnúhu danehé-í ñáyiú ñá túú cùu ñáyiú isràèl cuendá naníhí tàhú-yu. Te ducaⁿ nǐ quide-í cuendá cuini-í quini-güedé nàcuáa ndùu chiúⁿ quide-í, chi nacuahãⁿ cachí-güedé sá ñà túú nándihí-xi. 3 Te té Titú téé ndècu ndihí-í chi ñá díú téé isràèl cúú-dé, dico ñá túú ní quide yica-güedé cuáha-güedé señã ñii-dé. 4 Te ñáyiú càchí sá ndécú ichi Xítóhó Jesucristú te ñá ndàá sá ndécú-yu ichi-gã, ñáyiú-án nǐ chitnahá ñáhã-yu xii-ndí cuendá cuini-yu quini-yu nása quide-ndí

ndécú-ndí ichi Xítóhó Jesucristú. Te ducaⁿ ní quidé-yu cuendá sá nchühú sa ní cácu nihnu-ndí ñá túú-gá quidé-ndí nchaa nacuáa ní cáháⁿ ndíi Moisés. Te cuini-yu sá núcuíta saa tucu-ndí cada-ndí nchaa nacuáa ní cáháⁿ ndíi nucúndecu-ndí datná ní xíndecu-ndí cútnáhá vátá cácu nihnu-gá-ndí núú tnúhu-áⁿ ní cùu. ⁵ Te nchühú ñá túú tnàhí ní dàña-ndí méé-ndí dandàhú ñáhá-yu xii-ndí. Te ducaⁿ ní quide-ndí, chi cuini-ndí sá ñá túú nágá tnúhu dácánuu ndíhi tnúhu sá cáháⁿ nacuáa naníhí tànhú-ó ndècu ndíhi-ndo.

⁶ Te ni ìⁿ tnúhu sá vátá quini-gá-í ñá túú ní cächí tnúhu cue téé cùnuu núú ñáiyu cada-í. Dico yúhú chi ñá túú ní quide cuendá-í núu cùnuu-güedé àdi ñá túú cùnuu-güedé, chi núú Yá Ndiòxí ìⁿ-ní cùu-o nchaa-o. ⁷ Te ní cutnùní iní-güedé sá Yá Ndiòxí ní cachí-gá xii-í sá cáháⁿ-í tnúhu-gá núú ñáiyu ñá túú cùu ñáiyu isràél datná ní quide-gá té Pèlú ní xáhaⁿ-gá cáháⁿ-dé tnúhu-gá núú ñáiyu isràél. ⁸ Te ducaⁿ ní cutnùní iní-güedé, chi ñu-ni Yá Ndiòxí Yaá chíndèe ñaha xii té Pèlú cáháⁿ-dé tnúhu-gá núú ñáiyu isràél, ñu-ni Yaá-áⁿ chíndèe ñaha-gá xii-í cáháⁿ-í tnúhu-gá núú ñáiyu ñá túú cùu ñáiyu isràél.

⁹ Te té Jàcobó, ndíhi té Pèlú, ndíhi té Juáá, cue téé ío cùnuu-gá ní cutnùní iní-güedé sá Yá Ndiòxí ío chíndee ñaha-gá xii-í quidè-í chiuⁿ-gá. Te ío váha ní cáháⁿ ndíhi ñaha-güedé xii-í, ndíhi té Bèé, te ní cuu ìⁿnuu-ndí sá nchühú quíhíⁿ-ndí cáháⁿ-ndí tnúhu Yá Ndiòxí núú nchàa ñáiyu ñá túú cùu ñáiyu isràél, te mee-güedé cáháⁿ-güedé tnúhu-gá núú ñáiyu isràél. ¹⁰ Te ìⁿ-ni tnúhu ní cáháⁿ-güedé dóho-ndí te ní cachí-güedé xii-ndí sá chíndèe-ndí cue ñáiyu ndàhú, te sa ducaⁿ tnàhí sàni iní-ndí cada-ndí.

Té Páblú cáháⁿ-dé dóho té Pèlú ñuú Antiòquia

¹¹ Te cútnáhá ní sáháⁿ té Pèlú ñuú Antiòquia yácaⁿ ní cáháⁿ-í dóho-dé, chi quide-dé ìⁿ sá ñá túú tàú-dé cada-dé ní cùu. ¹² Te quide váha-dé ní cùu chi xèxi-dé ndíhi ñáiyu ñá túú cùu ñáiyu isràél, dico òré ní sáá ìⁿ úú ñáiyu cùndíhi té Jàcobó, te òré-áⁿ ñá túú-gá ní cuini-dé caxi-dé ndíhi ñáiyu-áⁿ. Te ducaⁿ ní quide-dé chi ní yúhú-dé cue ñáiyu nchicúⁿ nihnu quide nchaa nacuáa ní cáháⁿ ndíi Moisés sá vā cáháⁿ váha-yu cuendá-dé. ¹³ Te tnàhá dava-gá ñáiyu isràél xíndecu ichi Yá Ndiòxí ñá túú quide váha-yu, chi quidé-yu datná quidé té Pèlú ní cùu, te ndéé tnàhá té Bèé ní ngüíta-dé ducaⁿ quide-dé ní cùu. ¹⁴ Te òré ní xiní-í sá ñá túú quide-güedé ndíhi-yu nacuáa cáháⁿ tnúhu Yá Ndiòxí, te núú nchàa ñáiyu ndècu ichi Yá Ndiòxí ní xáhaⁿ-í xii té Pèlú: “Yòhó cúu-n tée isràél, te ñá túú quide-n nchaa nacuáa quide ñáiyu isràél, chi quide-ni-n datná quidé nchàa ñáiyu ñá túú cùu ñáiyu isràél. Te núu ducaⁿ quide-n, ¿te ná cuendá dánèhè-n ñáiyu ñá túú cùu ñáiyu isràél sá cadá-yu nchaa nacuáa quide ñáiyu isràél?”, duha ní xáhaⁿ-í xii té Pèlú.

Ìⁿ-ni naníhí tànhú-ó ndíhi ñáiyu isràél núu na quindáá iní-ó Xítóhó Jesucristú ndíhi-yu

¹⁵ Te yúhú ndíhi té Pèlú cúu-ndí ñani tnàhá ñáiyu isràél, te ñá túú ndècu-ndí ichi cuèhé ichi duha datná ndécú nchàa ñáiyu ñá túú cùu ñáiyu isràél. ¹⁶ Te xiní-ó sá vā cùndècu-gá cuèchi-o núú Yá Ndiòxí te núu na quindáá iní-ó Xítóhó Jesucristú, te ñá díú sá cáncicúⁿ nihnu-o càda-o nchaa nacuáa ní cáháⁿ ndíi Moisés. Te tnàhá dava nchühú ñáiyu isràél sàndáá iní-ndí Xítóhó Jesucristú, te xíáⁿ cutnùní iní-ndí sá ñá túú-gá cuèchi-ndí

ndécú nũú-gã, dico ñá díú sã ní cãncicúⁿ nihnu-ndí ní quide-ndí nãcuáa ní cáháⁿ ndíi Moisés, chi cuendá sã sãndáá iní-ndí Xítoho Jesucristú. Te vã yõo ñⁿ cachí-ó sã ñã túú ndècu cuéchi-xi núú Yã Ndiõxí cuendá sã nchicúⁿ nihnú-yu nchaa nãcuáa ní cáháⁿ ndíi Moisés.

¹⁷ Te núú cuñí-ó sã vã cundècu cuéchi-o núú Yã Ndiõxí cuendá sã sãndáá iní-ó Xítoho Jesucristú, te xíáⁿ cútnùní iní-ó sã ñã túú quide váha-o. ¡Te vã cúú tnàhí cani iní-ó sã Xítoho Jesucristú dánèhé ñáhã-gã xii-o sã vã cádá váha-o cundecu-o! ¹⁸ Te yúhú cãchí-í sã vã cãncicúⁿ nihnu-gã-ó nchãa nãcuáa ní cáháⁿ ndíi Moisés, dico núú vitna cãchí-í sã xíní ñũhu-xi cada-o nchaa nãcuáa ní cáháⁿ ndíi Moisés nũu xíáⁿ ní dáñã-í ñã túú-gã nchicúⁿ nihnu-í nchaa nãcuáa ní cáháⁿ ndíi cuendá sã cuñí-í cundecu-í sã cúú-xí Yã Ndiõxí. ²⁰ Te Xítoho Jesucristú ní xíhí-gã cuendá-í, dico dàtnã tnũhu sã tnãhá-í ní xíhí ndíhi-gã, chi ñã cúú-gã cada-í nchaa nãcuáa sãni iní mèè-í, chi Xítoho Jesucristú-nã ndécú ndíhi ñaha-gã xii-í táxí tnùní ñáhã-gã. Te vitna ndècu-í ñuyíú-a, te ío sãndáá iní-í Xítoho Jesucristú Déhe Yã Ndiõxí, te chindee ñaha-gã xii-í. Te ñũu-ni Xítoho Jesucristú ío cùu iní ñáhã-gã xii-í nũu ní xíhí-gã núú cùrúxí sã cuendá-í. ²¹ Te vitna ñã túú dàquee tíhù-í sã váha ní quide ñaha Yã Ndiõxí xii-í, chi núú ní ndàcu-o vã cundècu cuéchi-o núú Yã Ndiõxí cuendá sã nchicúⁿ nihnu-o quide-o nchaa nãcuáa ní cáháⁿ ndíi Moisés ní cùu ñã, te áúⁿ nã cuu ní xíhí Xítoho Jesucristú ní cùu te núú ducaⁿ.

3

Vã dáñã ndéè-ó quindáá iní-ó tnũhu Xítoho Jesucristú

¹ Te nchòhó ñãyiu distritú Gálaciá, ñãyiu sa xĩndecu ichi Xítoho Jesucristú, ¿ná cuendá ío ñĩ iní-ndó ñã cuñí-ndó tnũ-ndo nchaa tnũhu cáháⁿ-gã?, ¿te yoo ní dádãhu ndodo iní ñáhã xii-ndo núú ducaⁿ quide-ndo? Te nãha-ndo sã ío váha ní dánèhé ñáhã-ndí xii-ndo nãcuáa ní cuu ní xíhí Xítoho Jesucristú. ² Te vitna cáháⁿ-ndó nũu sã nchicúⁿ nihnu-ndo nchãa nãcuáa ní cáháⁿ ndíi Moisés ní níhí-ndó Espiritú Yã Ndiõxí ndécú ndíhi-ndo, àdi sã ní sãndáá iní-ndó tnũhu Xítoho Jesucristú sã ní dánèhé ñáhã-ndí xii-ndo ní níhí-ndó Espiritú-gã ndécú ndíhi-ndo. ³ Te nchòhó ío ñĩ díquí-ndó chi Espiritú Yã Ndiõxí tá quide váha ñaha-xi xii-ndo cuáhãⁿ ní cùu. ¿Te nãa vitna mee-nã-ndó cuñí-ndó càda-ndo nãcuáa ta quide ñaha Espiritú-gã cuáhãⁿ xii-ndo ní cùu-án? ⁴ Te sãni ñⁿ sãni úú iní-í cuendá-ndó sã áúⁿ nã cuu nãndi yãha-ndo ndècu-ndo ichi Yã Ndiõxí. ⁵ Te xíní-ndó sã Yã Ndiõxí ní taxi-gã Espiritú-gã ní ngũndecu ndíhi-ndo, te ní quide-gã sã vã yõo tnàhí ndàcu cada núú-ndó ní xíní-ndó. Te ducaⁿ ní quide-gã, dico ñã chí ní sãndáá iní-ndó-gã, dico ñã díú cuendá nchaa nãcuáa ní cachí ndíi Moisés cada ñãyiu ducaⁿ ní quide-gã.

⁶ Te ndíi Àbrahã ducaⁿ ío ní sãndáá iní ndíi Yã Ndiõxí, núú xíáⁿ ní cachí-gã sã ní cudíu ndíi núú-gã sã dúcãⁿ ní quide ndíi. ⁷ Te cãchí tnũhu ndáá-í xii-ndo sã nchãá ñãyiu sãndáá iní ñáhã xii Yã Ndiõxí dàtnã ní sãndáá iní ñáhã ndíi Àbrahã xii-gã, ñãyiu-án ñⁿ-ní cùú-yu ndíhi ndíi núú-gã. ⁸ Te núú tütú Yã Ndiõxí ní ngódó tnùní tnũhu váha, tnũhu sã ní xãháⁿ Yã Ndiõxí xii ndíi Àbrahã, te ñũu ní xãháⁿ-gã xii ndíi: “Nchaa ñãyiu nihí ñuyíú cada váha-í-yu sã cuendá-n”, ñũu ní xãháⁿ-gã xii ndíi. Te sã dúcãⁿ ní ngódó tnùní núú tütú Yã Ndiõxí ndéè dàvã-án, te xíáⁿ cútnùní sã sãá nduu, te cue ñãyiu ñã túú cùu ñãyiu isràél

vá cùndècu-gá cuéchi-yu núú-gă te núu na quìndáá iní ñáhá-yu xii-gá. ⁹ Te xíáⁿ núu nchaa ñáyiú sàndáá iní ñáhá xii Yá Ndiòxí cada váha ñaha-gá xii-yu dàtná ní quide váha-gá ndíi Àbrahám, chi ndíi-áⁿ ducaⁿ ní sàndáá iní ñáhá ndíi xii-gá.

¹⁰ Te nchaa ñáyiú cuìní cada nchaa nàcuáa ní cáháⁿ ndíi Moisés cuèndá sá cuìní-yu sá vâ cùndècu-gá cuéchi-yu núú Yá Ndiòxí, ñáyiú-áⁿ dañá nihnu ñaha-gá xii-yu, chi vá ndácũ-yu cadá-yu nàcuáa sàni iní-yu, te ducaⁿ càda-gá chi quèe ndáá-xi nàcuáa càháⁿ-xi núú tûtú-gá núú càchí-xi sá ncháá ñáyiú ñá túú quide nchaandi túhú nàcuáa ní cáháⁿ ndíi Moisés te dañá nihnu ñaha-gá xii-yu. ¹¹ Te núu na càncicúⁿ nihnu-ni-o càda-o nàcuáa ní cáháⁿ ndíi Moisés, te ñá túú vèdana chindee ñaha-xi xii-o ñacuáa vá cùndècu-gá cuéchi-o núú Yá Ndiòxí. Te ndáá chi núú tûtú-gá càchí-xi sá ncháá ñáyiú sàndáá iní ñáhá xii-gá, ñáyiú ñá túú-gă cuéchi-xi ndècu ío váha ndècú-yu núú-gă. ¹² Te núu dicó ío ñáyiú quide nchaandi túhú nàcuáa ní cáháⁿ ndíi Moisés ñá, te ñá túú xìni ñuhu-xi quìndáá iní-yu tnúhu Xítóhó Jesucristú, chi núú tûtú Yá Ndiòxí càchí-xi sá núu dicó ío ñáyiú ndacu cada nchaa nàcuáa ní cáháⁿ ndíi Moisés ñá, te cundecu váha-yu núú Yá Ndiòxí.

¹³ Te tnúhu ní chídó tnùní ndíi Moisés càchí-xi sá ío ndècu cuéchi-o núú Yá Ndiòxí cuèndá sá ñá ndácú-ó càda-o nchaa nàcuáa ní cáháⁿ ndíi, te cuèndá xíáⁿ tá dañá nihnu ñaha-gá xii-o cuáháⁿ. Dico Xítóhó Jesucristú ní xido-gá nchaa cuéchi-o cuèndá sá vâ dáñá nihnu ñaha-gá Yá Ndiòxí xii-o. Te càchí-xi núú tûtú Yá Ndiòxí: “Íⁿ tée na càta caa-güedé ñⁿ yutnu, te tée-áⁿ cúú-dé tée dañá nihnu ñaha Yá Ndiòxí”, duha càchí-xi núú tûtú-gá. ¹⁴ Te ducaⁿ ní yáha Xítóhó Jesucristú, chi cuìní Yá Ndiòxí sá ndùu táhú nchaa ñáyiú ñá túú cùu ñáyiú israél cundecu váha-yu dàtná ní nduu

táhú ndíi Àbrahám ndécú váha ndíi. Te ducaⁿ ní yáha-gá cuèndá nchaa nchoo ñáyiú sàndáá iní ñáhá xii-gá ngúndecu ndíhi-o Espíritú Yá Ndiòxí sá ní cachí mée-gă taxi-gá.

Nàcuáa ní cachí Yá Ndiòxí cada-gá

¹⁵ Te nchòhó cue ñáyiú ndècu ndíhi-í ichi Yá Ndiòxí na càchí tnúhu-í xii-ndo nàcuáa quide cue ñáyiú ñuyíú-a cuèndá tecú tnùní-gá-ndó nàcuáa quide Yá Ndiòxí. Chi ñáyiú-áⁿ òré cuìní-yu cadá-yu ñⁿ sá càdă-yu, te díhna-gá ndátnúhu-yu te òré cúú ñⁿnuú-yu, te sáha firmá-yu ñⁿ tûtú te tûtú-áⁿ vâ yõo ñⁿ ndacu cáháⁿ sá vâ nándíhi-gá-xi, te ni vâ yõo-gá ndacu nágá tnúhu chido tnùní núú-xí.

¹⁶ Te ducaⁿ ní quide Yá Ndiòxí ndíhi ndíi Àbrahám, chi ní xáhaⁿ-gă xii ndíi nàcuáa cada-gá, te tnúhu-áⁿ cúú-xí cuèndá mée ndíi ndíhi cuèndá ñⁿ ñaní tnáhá ndíi cundecu ñuyíú-a ndéé cuèé-gá. Te núú tûtú-gá càchí-xi sá tnúhu-áⁿ cúú-xí cuèndá ñⁿ-ní ñaní tnáhá ndíi te ñá díú cuèndá ncháá-yu. Te ñaní tnáhá ndíi tée cùu cuèndá tnúhu-áⁿ cúú Xítóhó Jesucristú. ¹⁷ Te na càchí tnúhu-í xii-ndo sá Yá Ndiòxí ní quide ndáá duuⁿ-gá ndíhi ndíi Àbrahám nàcuáa cada-gá. Te sa ní cuu cúmí cièndú ócò úxí cuiá sá dúcáⁿ ní xáhaⁿ Yá Ndiòxí xii ndíi Àbrahám, te dàtnùní ní xáhaⁿ-gă xii ndíi Moisés chido tnùní ndíi nàcuáa cada ñáyiú, te nchaa tnúhu ní chídó tnùní ndíi Moisés ñá túú dàquee tihú-xi tnúhu sá ní xáhaⁿ Yá Ndiòxí xii ndíi Àbrahám nàcuáa cada-gá. ¹⁸ Te núu dicó cuèndá nchaa tnúhu sá ní chídó tnùní ndíi Moisés ní náníhí tàhú-ó ñá, te ñá túú-gă xíni ñuhu-xi cada cuèndá-ó tnúhu ní xáhaⁿ Yá Ndiòxí xii ndíi Àbrahám cada-gá ní cùu te núu ducaⁿ. Te ndíi-áⁿ ní náníhí tàhú ndíi chi ducaⁿ ní cachí Yá Ndiòxí cada ñaha-gá xii ndíi.

¹⁹ Te nchaa tnúhu ní cáháⁿ ndíi Moisés ní ngódó núú-xí nchicúⁿ

nihnu ñáyiú cuèndá ducaⁿ cùtnuní iní-yu sá ndécú cuèchi-yu, te nchicúⁿ nihnu-ní-yu ndéé ní sáá nduu ní quexio Yaá cúú ñani tnáhá ndíi Àbrahám, chi Yaá-áⁿ ducaⁿ ní xáhaⁿ Yá Ndiòxí quixi-gá cada váha-gá nchaa ñáyiú. Te nchaa tnúhu ní chídó tnùní ndíi Moisés, chi Yá Ndiòxí ní tendaha-gá cue espiritú xínú cuèchi núú-gá ní sáháⁿ-xí ní xitnúhu ñaha-xí xii ndíi nàcuáa danèhé ndíi ñáyiú. ²⁰ Te Yá Ndiòxí ñá túú ní cáháⁿ-gá núú méé ñáyiú, chi ndíi Moisés ní cáháⁿ ndíi yuhu-gá núú-yu, dico cùtnàhá ní cáháⁿ ndíi-gá ndíi Àbrahám chi núú méé núú ñⁿ ndíi ndíi-gá ní xáhaⁿ-gá xii ndíi nàcuáa cada-gá.

Nàcuáa ndíi nchaa tnúhu ní chídó tnùní ndíi Moisés

²¹ Te nchaa nàcuáa ní chídó tnùní ndíi Moisés, ndíi nchaa nàcuáa ní xáhaⁿ Yá Ndiòxí xii ndíi Àbrahám cada-gá, ñá túú dàquee tihú tnáhá-xí. Te núú dicó nánihí tãhú ñáyiú nchicúⁿ nihnu nchaa nàcuáa ní cáháⁿ ndíi Moisés ñá te cudíú-yu núú-gá cuèndá-ni sá nchicúⁿ nihnú-yu nchaa nàcuáa ní cáháⁿ ndíi ni cùu. ²² Te núú tütú Yá Ndiòxí cãchí-xi: “Nchaa nchòhó ñáyiú ndècu ñuyúú ndécú cuèchi-ndo”, duha cãchí-xi. Te ducaⁿ càháⁿ-xí cuèndá quindáá iní-ó Xitohó Jesucristú, te naníhí tãhú-ó chi ducaⁿ ní cachí Yá Ndiòxí cada-gá.

²³ Te cùtnàhá vátá cùndècu ndíi-gá-ó tnúhu Xitohó Jesucristú, te nchicúⁿ nihnu-o nchaa nàcuáa ní cáháⁿ ndíi Moisés, te ní cùtnuní iní-ó sá io ndècu cuèchi-o ní cùu. Te ducaⁿ-ni nchicúⁿ nihnu-o ndéé ní sáá nduu ní quexio Xitohó Jesucristú ñuyúú-a, te ní sándáá iní-ó-gã. ²⁴ Te nchaa tnúhu sá ní chídó tnùní ndíi Moisés ní sanu ichi ñaha-xí xii-o nàcuáa cada-o cùndècu-o, te ducaⁿ-ni sanu ichi ñaha-xí xii-o ndéé ní sáá nduu ní quexio Xitohó Jesucristú ñuyúú-a. Te ducaⁿ ní cuu cuèndá quindáá

iní-ó-gã, te vátá cùndècu-gá cuèchi-o núú Yá Ndiòxí. ²⁵ Te vitna ní ngùndècu ndíi-o tnúhu Xitohó Jesucristú, te ñá túú-gã xíní ñúhu-xi canu ichi ñaha nchaa tnúhu ní chídó tnùní ndíi Moisés.

²⁶ Te vitna tnáhá nchaa nchòhó cúú-ndo ðèhe Yá Ndiòxí, chi ní sándáá iní-ndo Xitohó Jesucristú.

²⁷ Te nchòhó ní sandute-ndo dàtná cãchí-gá, te ndècu-ndo ndíi-gá, te quide-ndo nchaa nàcuáa ní cáháⁿ-gá ndécú-ndo, te io ndècu yíñuhu-ndo núú Yá Ndiòxí dàtná ndécú yíñuhu mee Xitohó Jesucristú. ²⁸ Te vitna ñⁿ-ni cùu-o nchaa-o ndècu-o ndíi Xitohó Jesucristú cuèi cùu-o ñáyiú isràél àdi ñá túú cùu-o, te cuèi cùu-o ñáyiú ñá túú tnáhi dàñá quee núú chíúⁿ patróóⁿ-xí àdi cuu-o ñáyiú dàñá queé núú chíúⁿ patróóⁿ-xí,

te cuèi téé te cuèi ñadíhí ñⁿ-ni cùu-o nchaa-o ndècu-o ndíi Xitohó Jesucristú. ²⁹ Te nchòhó ndécú ndíi-ndo Xitohó Jesucristú, te cùu-ndo datná cue ñani tnáhá ndíi Àbrahám, chi ní nduu tãhú-ndo cùndècu váha-ndo núú Yá Ndiòxí dàtná ní nduu tãhú ndíi-áⁿ ndécú váha ndíi núú-gã, te ducaⁿ chi mee-gã ducaⁿ ní cachí-gá cunduu.

4

¹ Te nchòhó xíní-ndo sã ñⁿ té líhli chi vátá nãgã cuãñaha tãtã-dé cuu cuèndá-dé chi líhli-dé, te ñⁿ-ni cùu-dé ndíi téé xínu cuechi, dico na sáá nduu cuèhnu-dé, te nduu tãhú-dé nchaa sã ndécú ndíi tãtã-dé. ² Te xitò-yu té líhli-áⁿ sãhnú-dé ndéé sáá nduu ní cachí tãtã-dé sã cuãñaha-dé sã ndúú tãhú-dé. ³ Te ducaⁿ sãtnáhá-xi cùu nchoo, chi nchicúⁿ nihnu-o nchaa nàcuáa ní cáháⁿ cue téé ní xíndècu ndéé sanaha ni cùu. ⁴ Te ní sáá nduu ní quide Yá Ndiòxí dàtná ní cachí-gá, te ní tendaha-gã Déhe-gá Xitohó Jesucristú ní quixi-gá ñuyúú-a, ní dácácú ñaha ñⁿ ñadíhí te ní cuu-gá ñáyiú, te ní quide-gá nchaa nàcuáa ní cáháⁿ ndíi Moisés. ⁵ Te ducaⁿ ní tendaha Yá Ndiòxí

Déhe-gá cuendá sá vǎ cǎnchícúⁿ nihnu-gá-ó nchàa nacuaá ní chídó tñuní ndíi Moisés cuendá ducaⁿ te cuu-o déhe Yá Ndióxi.

⁶ Te Yá Ndióxi ní taxi-gá Espíritú Déhe-gá Xítoho Jesucristú ndécú ndíhi-ndo chí cùu-ndo déhe-gá, te Espíritú-áⁿ chindèe ñaha-xi xii-ndo te cǎchí-ndó: “Yòhó Dútú Ndióxi cúu-n Tǎtǎ méé-ndí”, duha cǎchí-ndó. ⁷ Te xǎn cútnúmi iní-ndó sǎ cúú-ndó déhe Yá Ndióxi vitna, te ñá túú-gǎ cúú-ndó dàtná cue ñáyiú ñá túú tñáhí dàñǎ quee núú chíúⁿ pǎtróoⁿ-xi. Te sǎ dúcǎⁿ cùu-ndo déhe-gá, te Xítoho Jesucristú taxi-gǎ nchaa sǎ vǎha ní cachí Yá Ndióxi nduu táhú-ndó.

Te Pǎblú ío sǎni iní-dé cuendá nchaa ñáyiú ndècu ichi Xítoho Jesucristú

⁸ Te cútnàhá vátá quindáá-gǎ iní-ndó tñúhu Yá Ndióxi ní xinu cuechi-ndo núú nchàa sǎ cǎchí-yu cùu ndiόxí te ñá ndáá sǎ ndiόxí cúú-xí. ⁹ Te vitna nchòhó cǎháⁿ ndíhi-ndo Yá Ndióxi, te mee-gǎ xǎni ñáhá-gǎ xii-ndo, te ñá túú nduu váha-xi nanchòcáva iní-ndó càda tucu-ndo nacuaá ní xóo cada-ndo díhna, chí nchaa xiǎⁿ ñá túú védana nándíhi-xi. ¹⁰ Te nchòhó cǎnehe íi-ni-ndo nduu cachí-ndó íi, te díu-ni ducaⁿ quide-ndo dava yoó ndíhi dava cuíá, te ndi tnahá nduu sácóo vico díu-ni ducaⁿ quide-ndo cǎnehe íi-ndó nduu-áⁿ. ¹¹ Te ío sǎni iní-í cuendá-ndó, chí na cuáháⁿ áúⁿ nǎ cuu ní dǎnehé ñáhà-í xii-ndo tñúhu Yá Ndióxi.

¹² Te cǎháⁿ ndàhú-í núú nchòhó ñáyiú ndècu ndíhi-í ichi Xítoho Jesucristú sǎ cadá-ndó dàtná quidé-í ñá túú nchícúⁿ nihnu-í nchaa tñúhu ní cǎháⁿ ndíi Moisés, chí yúhú quidé-í vitna dàtná ní quide nchòhó ñá túú ní cǎnchícúⁿ nihnu-ndo nǎcuáa ní cǎháⁿ ndíi. Te cútnàhá ní xindecu ndíhi ñaha-í xii-ndo ní quide váha ñaha-ndo xii-í. ¹³ Te sa nàha-ndo sǎ cútnàhá ní cǎháⁿ-í tñúhu Xítoho Jesucristú núú-ndó ndéé díhna ní cuhú-í, núú xiǎⁿ ní xindecu ndíhi ñaha-í xii-ndo

ní cǎháⁿ-í tñúhu-gǎ núú-ndó. ¹⁴ Te cuéhé sǎ ní tnahá-í-áⁿ cúú-xí ñⁿ cuéhé sǎ vǎ yóo tñáhí cundee ími-xi cundecu ndíhi ñaha xii-í ní cùu, dico nchòhó chí ío váha ní cǎháⁿ ndíhi ñaha-ndo xii-í, te ñá túú ní sǎni cuéhé ní sǎni duha iní-ndó cuendá-í, te ní cǎháⁿ ndíhi ñaha-ndo xii-í dàtná tñúhu sǎ yúhú cùu-í ñⁿ espíritú xínú cuèchi núú Yá Ndióxi àdi datná méé Xítoho Jesucristú. ¹⁵ ¿Te ná ní tnahá-ndó núú ñá túú-gǎ sǎni váha iní-ndó cuendá-í dàtná ní xóo cada-ndo ndéé díhna ío váha ní xóo caní iní-ndó cuendá-í? Te na cǎchí tñúhu ndáá-í xii-ndo sǎ ío ní cuu iní ñáhá-ndó xii-í cútnàhá ní xindecu ndíhi ñaha-í xii-ndo, te nándi sǎ ndécú ndíhi-ndo taxi-ndo xii-í ní cùu, te núú dicó sǎ cúú te ndéé tñúu-ndo tava-ndo te taxi-ndo xii-í ní cùu. ¹⁶ ¿Te náa cùu úhú iní ñáhá-ndó xii-í vitna cuendá sǎ cǎháⁿ-í tñúhu ndáá tñúhu Yá Ndióxi núú-ndó-áⁿ?

¹⁷ Te ío ñáyiú ío váha cǎháⁿ ndíhi ñaha xii-ndo, dico ñáyiú-áⁿ ñúhú cuéhé iní-yu, chí cuini-yu sǎ vǎ cúú-gǎ cǎháⁿ ndíhi tñaha-o, chí mee-nǎ-yu cundecu ndíhi-ndo cuini-yu. ¹⁸ Te váha quide ñáyiú cǎháⁿ ndíhi ñaha xii-ndo ndíhi tñúhu yíñúhu, te núú cuini-yu cadá-yu ñⁿ sǎ váha sǎ cúú-xí-ndó. Te ducaⁿ-ni na cadá-yu cuéi óré ñá túú ndècu ndíhi ñaha-í xii-ndo. ¹⁹ Te nchòhó ñáyiú ní sanu ichi-í ichi Xítoho Jesucristú cǎchí tñúhu-í xii-ndo sǎ quidé-xí ími-í dàtná quidé-xí ími ñⁿ ñadíhi ñaha sa ní tnahá óré cacu déhe-xi, te ducaⁿ quide-xi iní-í, chí ío vai sǎni iní-í cuendá-ndó dàtná ní xóo cada-í ndéé díhna, te ducaⁿ-ni càda-í ndéé ná sǎá nduu càda-ndo nchaa nacuaá cǎháⁿ Xítoho Jesucristú. ²⁰ ¿Te ío váha cada-xi te núú dicó tnaví sa ndècu ndíhi ñaha-í xii-ndo cuendá cǎháⁿ-í núú-ndó nǎcuáa cada-ndo, te ñá cútnúmi iní-í nása cada-í cuendá-ndó!

Cuendá ndíi Àgár ndíhi ndíi Sǎrǎ

21 Te nchòhó ñáiyu cuení canchicúⁿ nihnu nchaa tnúhu ní cáháⁿ ndíi Moisés, ¿náa ñá túú təcú tnùní-ndó nàcuáa càháⁿ-xi tnúhu ní chídó tnùní ndíi? 22 Chi càchí tnúhu ní chídó tnùní ndíi-áⁿ sá ndíi Abrahám ní xindecu úú dèhe ducuⁿ ndíi, te ìⁿ-dé ní cuu dèhe ndíi ndíhi ñadíhi méé ndíi ndíi Sără, te ingá-dé ní cuu-dé dèhe ndíi ndíhi ìⁿ ndíi ní xinu cuechi nũ-yu ní xínani Àgár. 23 Te sá dúcáⁿ nĩ cacu dèhe ndíi Sără, chi mee Yá Ndiòxí ní cundàhú iní ñáhá-gá xii-aⁿ, chi ducaⁿ nĩ cachí-gá cada-gá. Dico ndíi ní xinu cuechi-áⁿ chi ducaⁿ tnàhí ní nduu táhú ndíi-áⁿ sá cóó dèhe ndíi. 24 Te na càchí tnúhu-í xii-ndo nã cúú sá nánèhé ndi ndúú cue ndíi ðíhí-áⁿ. Te úú xito ní cáháⁿ Yá Ndiòxí nàcuáa cada-gá, te ìⁿ ndíi-áⁿ nánèhé ndíi nàcuáa ní cáháⁿ Yá Ndiòxí xito díhna nuu, te ingá tucu ndíi-áⁿ nánèhé ndíi nàcuáa ní cáháⁿ tucu-gá xito cùu uú. Te ndíi Àgár-áⁿ nánèhé ndíi nàcuáa ní xáhaⁿ Yá Ndiòxí xii ndíi Moisés yucu Sinái cada ñáiyu, te nchaa ñáiyu nchicúⁿ nihnu nchaa tnúhu-áⁿ cúú-yu dàtná dèhe ndíi Àgár téé ní xinu cuechi, chi téé-áⁿ ñá túú tnàhí ní dàñá-dé quee-dé núú chíúⁿ pàtróóⁿ-dè, te ducaⁿ sàtnahá-xi cúú-yu chi nchicúⁿ nihnú-yu nchaa nàcuáa ní xáhaⁿ Yá Ndiòxí xii ndíi Moisés. 25 Te tnúhu Àgár queé-xi: Yucu Sinái, te yucu-áⁿ yíndèhu-xi nacióⁿ Àrabiá. Te ndíi Àgár-áⁿ nánèhé tucu ndíi cue ñáiyu ndècu ñúú Jerusàlén, chi ñáiyu-áⁿ ndécú-nĩ-yu dàtná ní xindecu ndíi Àgár ndíhi dèhe ndíi, chi cue ndíi-áⁿ nĩ cuu cue ndíi ñáiyu ñá túú tnàhí ní dàñá quee núú chíúⁿ pàtróóⁿ-xi, te ducaⁿ sàtnahá-xi cùu ñáiyu-áⁿ chi nchicúⁿ nihnu-nĩ-yu nchaa nàcuáa ní cáháⁿ ndíi Moisés. 26 Dico nchoo nĩ nduu táhú-ó cunde-cu-ó ñúú Jerusàlén sáa núú ndécú Yá Ndiòxí, te vitna chi ñá túú-gã nchicúⁿ nihnu-o nchàa nàcuáa ní cáháⁿ ndíi Moisés. 27 Te duha càháⁿ-í, chi núú tütú Yá

Ndiòxí càchí-xi:

Yòhó ñaha ní nduu táhú vã cóó dèhe-xi ní cùu, vitna cana saa-n sã cùdã ìní-n cuèi vátá quini-gá-n nãsa càcu ìⁿ landú.

Te cuèi ní cuu táhú-n sã vã cóó dèhe-n ní cùu dico ío-gá titní dèhe-n còo dacúúxí xíchí nĩ cuu táhú tnàhí sã cóó dèhe-xi.

Duha càchí-xi núú tütú-gá. 28 Te nchoo cuè ñáiyu ndècu ichi Xítohó Jesucristú vitna cùu-o datná ndíi Isàác, chi ndíi-áⁿ nĩ cacu ndíi, chi mee Yá Ndiòxí ní cachí-gá sã cãcú ndíi. Te ducaⁿ sàtnahá-xi cùu nchoo chi ní nduu-o dèhe-gá vitna chi ducaⁿ nĩ cachí tucu-gá cunduu.

29 Te dèhe ndíi Àgár ní nduu táhú tnàhí ndíi sã cãcú ndíi ñuyúú-a, te ndíi-áⁿ nĩ cuu úhú iní ndíi ndíi Isàác, te ndíi Isàác-áⁿ chi Espiritú Yá Ndiòxí ní quide ní cacu ndíi. Te ducaⁿ sàtnahá-xi cùu vitna, chi nchaa nchoo ñáiyu ndècu ndíhi Espiritú Yá Ndiòxí cúú ùhú iní ñáhá ñáiyu xii-o. 30 Te núú tütú Yá Ndiòxí càchí-xi: “Chí nãcuícuⁿ xíchí xínú cuèchi ndíhi dèhe-xi na nùhú-yu, chi dèhe xíchí xínú cuèchi-áⁿ ñá túú nã níhí-dè nduu táhú-dè, chi mee-ni dèhe ñaha ndècu vehe-xi nduu táhú-dè sã cuãñaha tãtã-dè”, duha càchí-xi núú tütú-gá. 31 Te nchoo cuè ñáiyu ndècu ichi Xítohó Jesucristú ñá túú-gã cúú-ó dàtná cúú dèhe ndíi ní xinu cuechi-áⁿ, chi ní cuu-o vitna datná cúú ndíi ní nduu táhú nchaa sã nĩ sãñaha tãtã-xi-áⁿ. Te ducaⁿ nĩ cuu, chi Yá Ndiòxí ní dáccu ñaha-gã xii-o cuendá sã vã cãnchicúⁿ nihnu-gá-ó nchàa nàcuáa ní cáháⁿ ndíi Moisés.

5

Canchicúⁿ nihnu-ni-o ichi Xítohó Jesucristú

1 Te Xítohó Jesucristú ní quide-gá nàcuáa vã cãní ìní-ó sã nãníhí tãhú-ó te núu na cãnchicúⁿ nihnu-o nàcuáa ní cáháⁿ ndíi Moisés, te ðiu-ni ducaⁿ cãni ìní-ó cunde-cu-ó te vã ngòo cãni ìní-ó sã nãníhí tãhú-ó te núu na

cànchicúⁿ nihnu-o càda-o nacuaá ní cáháⁿ ndíi, chí núu ducaⁿ na càda-o te ío dandòho-o mee-o datná ní xóo ndoho-o cùtnàhá vátá cùndècu-gá-ó ichi-a.

² Te yúhú té Pàblú cuíní-í sá cùndedóho-ndo ìiⁿ tnúhu na càháⁿ-í-a. Te núu nchòhó cuáha-ndo seña ñii-ndo cuendá sá sàndáá iní-ndó nàcuáa ní cachí ndíi Moisés cada-ndo, te núu ducaⁿ na càda-ndo ña, te àuⁿ nã cuu ndècu-ndo ichi Xítoho Jesucristú te núu ducaⁿ.

³ Te datná ní cachí-í xii-ndo, te ñu-ní ducaⁿ càháⁿ tucu-í vitna sá núu ndéda-ni càa ìiⁿ téa na cuáha-dé seña ñii-dé, te xini ñuhu-xi sá dàcuítí tàú-dé cada-dé nchaa nàcuáa ní cáháⁿ ndíi Moisés. ⁴ Te nchaa nchòhó ñáiyu sàni iní sá ña túú-gá cuéchi-xi ndècu núú Yã Ndiòxí cuendá sá nchìcúⁿ nihnu-ndo nchaa nacuaá ní cáháⁿ ndíi Moisés, ña túú-gá ndécú-ndó ndíi Xítoho Jesucristú, te ni Yã Ndiòxí ña túú-gá cùndàhú iní ñahá-gá xii-ndo càda váha ñaha-gá.

⁵ Dico nchaa nchoo ñáiyu sàndáá iní ñahá xii-gá cùdiu-o núú-gá, chí chindee ñaha Espiritú-gá xii-o, te ndètu cahnu-ná-ó sáa nduu cñaha núú Yã Ndiòxí xii-o sá cùdiu-o núú-gá. ⁶ Te nchoo cuè ñáiyu ndècu ndíi Xítoho Jesucristú ìiⁿ-ní quide-xi cuéi na cuáha-o seña ñii-o àdi vá cuáha-o, chí ña túú chindee ñaha-xi xii-o nacuaá cundecu váha-o ndíi-gá. Te ìiⁿ-ndíi díi-ni sá xini ñuhu-xi quindáá iní-ó Xítoho Jesucristú, te núu ducaⁿ na càda-o te cuu iní-ó cuè tñaha ñáiyu-o.

⁷ Te nchòhó ío váha quide-ndo ndecu-ndo ichi Yã Ndiòxí ní cùu, te vitna cùñúhu-í sá ña túú-gá sàndáá váha iní-ndó tnúhu-gá, te ducaⁿ quide-ndo chí ndècu ñáiyu sànu ichi ñaha xii-ndo ingá ichi. ⁸ Te ña díú Yã Ndiòxí Yaa ní cáháⁿ ñahá xii-ndo ducaⁿ ní cachí-gá cada-ndo sá vã quindáá-gá iní-ndó tnúhu-gá. ⁹ Te nchòhó xini-ndó sá núu luha lev-adurá ná quíhu yuchi te dàndaa-xi.

Ducaⁿ sãtnahá-xi cùu ñáiyu dandahú ñahá xii-ndo, chí cuíní-yu dàcuíta nihnu ñahá-yu xii-ndo nchaa-ndo. ¹⁰ Te yúhú cùtnùni ndáá iní-í sá Xítoho Jesucristú chindee ñaha-gá xii-ndo cuendá sá ñã túú nãgá tnúhu quindáá iní-ndó, dico nchaa ñáiyu ducaⁿ dandahú ñahá xii-ndo nacháhu-yu núú Yã Ndiòxí nchaa sá quidè-yu cuéi nã-gá ñáiyu cùu-yu.

¹¹ Te càchí tnúhu-í xii nchòhó ñáiyu ndècu ndíi-í ichi Yã Ndiòxí sá núu dicó dānehé-ni-í ñáiyu sá cuáha-yu seña ñii-yu datná ní cachí ndíi Moisés ña, te vá yóo cuu úhú iní ñahá xii-í ní cùu, te ni vá túu úhú iní-yu cuendá sá ñi xihí Xítoho Jesucristú núú cùrúxí ní cùu. ¹² Te nchaa ñáiyu dàsatú iní ñahá xii-ndo sã cuáha-ndo seña ñii-ndo, te váha-gá sá nã cadá-yu mēe-yu ìiⁿ tnúndòho, te ña díú sã dúcáⁿ cànuichi ñahá-yu xii-ndo cùndecu-ndo.

¹³ Te nchòhó ñáiyu ndècu ndíi-í ichi Xítoho Jesucristú ñu-gá ní taunihnu ñaha-gá xii-ndo cuendá sá vã cànchicúⁿ nihnu-gá-ndó nchaa nacuaá ní cáháⁿ ndíi Moisés, dico vá cání iní-ndó sã sã dúcáⁿ ní taunihnu ñaha-gá xii-ndo, te cuu-ni cada-ndo nãndi sá cuéhé sá dúhá vèxi iní-ndó, dico cuu iní tnáhá-ndó ìiⁿ ìiⁿ-ndo te chindee tñaha-ndo. ¹⁴ Chí ducaⁿ càháⁿ Yã Ndiòxí sá cúú iní-ó cuè tñaha ñáiyu datná cúú iní-ó mēe-o. Te núu ducaⁿ na càda-o, te quide-o nchaa nacuaá tàú-xi cada-o datná càháⁿ nchaa tnúhu ní chídó tnùni ndíi Moisés. ¹⁵ Te núu nchòhó cúú úhú iní tnáhá-ndó ndècu-ndo, te ña túú quide váha-ndo te núu ducaⁿ quide-ndo, dico yúhú càchí-í sá vã dúcáⁿ-gá cada-ndo cùndecu-ndo cuendá sá vã dàcuíta nihnu tñaha-ndo.

Nàcuáa sàni iní ñáiyu ndècu ichi cuéhé ichi duha ndíi nàcuáa sàni iní ñáiyu ndècu ndíi Espiritú Yã Ndiòxí

¹⁶ Te na càchí tnúhu-í xii-ndo sã cadá-ndó nchaa nacuaá culní

mée Espiritú Yă Ndiöxí cada-ndo, te ducaⁿ te vá cáni-gă ini-ndó cada-ndo nândi nchaa sá cuèhé sá dúhá sàni ini mée-ndó. ¹⁷ Chi nchaa xǎⁿ ñá túú tñhá tñuhu-xi ndihi Espiritú Yă Ndiöxí. Te ñu-ni ducaⁿ quide Espiritú Yă Ndiöxí, chi ñá túú tñhá ini-xi nchaa sá cuèhé sá dúhá sàni ini-ndó. Te sá dúcáⁿ ñá túú tñhá tñuhu tñaha-xi xǎⁿ ñá túú nihi ndéé-ndó cada-ndo ñⁿ sá vâha sàni ini-ndó cada-ndo. ¹⁸ Te núu quide-ndo nchaa nacuaá sànu ichi ñaha Espiritú Yă Ndiöxí, te ñá túú-gă táxi tñuni ñáhá nchaa tñuhu ní chídó tñuni ndíi Moisés xii-ndo.

¹⁹ Te nchaa ñáyiú xini-yu nchaa nacuaá quide ñáyiú quide cuehé quidé dúha. Te duha quidé-yu: Cue téé cãháⁿ ndihi-güedé ñáyiú ñíhi te ñá díú ñàdihí-güedé cùu-yu, te ñu-ni ducaⁿ xiquide cue ñáyiú ñíhi, te nândi-gă nchaa sá cuèhé sá dúhá cuáháⁿ véxi-yu quidé-yu. ²⁰ Te quide cahnú-yu nchaa sá cãchí-yu cùu ndiöxí te ñá ndáá sá ndiöxí cùu-xí, te quide nduu tñhá-yu, te cùu úhú ini tñáhă-yu, te nãá-yu, te cùu cuiñú tñáhă-yu, te ío yáchí cúdeéⁿ-yu, te ndúcú-yu mee-ni sá cùu-xí mée-yu, te ñá túú cùu ñⁿnuú-yu cundecú-yu, te quide ñíhi tñhá-yu. ²¹ Te cùu cuedú ini-yu nchaa sá ndécú ndihi dava-gă-yu, te sãhni tñhá-yu, te ío quihú-yu, te ndi cuu ndi cuú-yu quidé-yu nchaa sá cuèhé sá dúhá, te nândi-gă nchaa sá cuèhé sá dúhá quidé-yu. Te sa cãchí tñuhu-í xii-ndo sá nchãá ñáyiú ducaⁿ xiquide vá ndúú tãhú-yu cundecú-yu núu ndécú Yă Ndiöxí táxi tñuni-gă.

²² Dico Espiritú Yă Ndiöxí chindèe ñaha-xi xii-o cuu ini tñhá-ó, te cùdíi ini-ó ndècu-o, te ío váha cùu ini-ó, te cãhnu ini-ó, te váha ini-ó, te cundahú ini tñhá-ó, te quide ndáá-ó ndècu-o. ²³ Te ndáhú ini-ó, te quide-o nchaa nacuaá tau-ó cada-o, te nchaa xǎⁿ chindèe ñaha Espiritú Yă Ndiöxí quidé-ó, te núu ducaⁿ quide-o, te vá yõo ñⁿ-gă cãháⁿ

sá ñá túú quide váha-o ndècu-o. ²⁴ Te nchoo cùe ñáyiú ndècu ndihi Xitohó Jesucristú, sa naha-o sá ñí xihí-gă núu cùrúxí sá cuendá-ó, núu xǎⁿ duuⁿ duuⁿ ní dáñá-ó nchaa ichi cuehé ichi duha, te ñá túú-gă táxi tñuni ñáhá ni ñⁿ sá cuèhé sá dúhá sá ñí xõo caní ini-ó ní cùu. ²⁵ Te vitna ní ngüdecu ndihi-o Espiritú Yă Ndiöxí chindèe ñaha-xi, te xini ñuhu-xi sá cádá-ó nacuaá sànu ichi ñaha Espiritú-gă cada-o.

²⁶ Te vá cádá cãhnu-o mee-o, te vá ndúcú-ó plètú, te ni vá cùu cuedú ini-ó sá ndécú ndihi tñaha ñáyiú-o.

6

Chindee tñaha-o ñⁿ ñⁿ-o

¹ Te nchòhó ñáyiú ndècu ndihi-í ichi Xitohó Jesucristú cãchí tñuhu-í xii-ndo sá núu ñⁿ ñáyiú ndècu ndihi-ndo ichi-gă ní quidé-yu ñⁿ sá ñá túú tau-yu cada-yu núu-gă, te nchòhó ñáyiú quide váha ndècu ndihi Espiritú Yă Ndiöxí cãháⁿ-ndó dôho cue ñáyiú ducaⁿ xiquide-áⁿ cuendá nucúnu ichi-yu, te vii vii cãháⁿ ndihi-ndõ-yu, te ío coto-ndo mée-ndo cuendá sá vã cádá-ndó ñⁿ sá ñá túú tau-ndó cada-ndo núu-gă. ² Te ío chindee tñaha-ndo, te cuáha tñaha-ndo tñuhu ndee ini cundecu-ndo cuendá nchaa sá yãha-ndo. Te núu ducaⁿ na cada-ndo, te quide-ndo nchaa nacuaá ní cãháⁿ Xitohó Jesucristú cada-o.

³ Te núu ío ñⁿ-ndo cãchí-ndó sá ío váha quide-ndo ndècu-ndo ichi Yă Ndiöxí te ñá ndáá ñá, te dicó dándahú-ndó mée-ndo sá dúcáⁿ quide-ndo. ⁴ Te ndi ñíhi ndi ñíhi cãda cuendá-ndó núu quide váha-ndo ndècu-ndo àdi ñá túú quide váha-ndo. Te núu quide váha-ndo ndècu-ndo ña, te cudíi ini-ndó sá cùu-xí mée-ndo, te vá cáni ini-ndó sá quidé váha-gă-ndó dácúxí dava-gă-yu. ⁵ Chi tau-ó sá ndi ñíhi ndi ñíhi cãda cuendá-ó sá nacuaá ndècu-o.

6 Te nchaa nchòhò ñáyiù dàcuaha tnúhu Yá Ndiòxí chindee-ndo cuè téé dàcuaha ñaha xii-ndo tnúhu-gá cuañaha-ndo nāndi sá xíní ñùhu-güedé.

7 Te vá dándàhú-ndó mēe-ndo cundecu-ndo, chi vá cúú cùdiqui ndeé-ó Yá Ndiòxí, chi nchòhò xíní-ndó sá ñù na càda váha-o cundecu-o, te cùu-xi ñⁿ sá váha sá cúú-xí-ó, dico núu vá cáda váha-o ña, te ío ndoho-o te núu ducaⁿ na càda-o. 8 Te núu quide-o nchaa sá cuèhé sá dúhá sàni iní-ó, te ñiu-ni xíáⁿ dàcuíta nihnu ñaha-xi xii-o, dico núu quide-o nchaa nacuaá sànu ichi ñaha Espiritú Yá Ndiòxí xii-o, te cundecu ndihí-o Yá Ndiòxí ni caa ni quíhíⁿ. 9 Te xini ñuhu-xi vá dáñá ndeé-ó càda váha-o cundecu-o, te ducaⁿ te sáá nduu càda váha ñaha Yá Ndiòxí xii-o, te núu vá ná tùhú iní-ó càda váha-o cundecu-o. 10 Te cada-o sá váha sá cúú-xi nchaa tnaha ñáyiù-o vitna ndecu-o ñuyú-a, te ío-gá tàú-ó chindee-o cue ñáyiù ndècu ndihí-o ichi Xítohó Jesucristú.

Tnúhu ndeé núú ní ndihí-ná

11 Te cundehe-ndo sá ndāa ndāa lètrá téé-í núú tütú-a sá cúú-xí-ndó. 12 Te nchaa ñáyiù quide yicá sá cuāha-ndo sēñá ññ-ndo dàtná ní cachí ndíi Moisés, ñáyiù-áⁿ cúú-yu ñáyiù cuíní cudíu núú tnaha ñáyiù-xi. Te ducaⁿ quidé-yu cuendá sá vá ndóhò-yu cuendá nchaa tnúhu sá dánèhé ñáhá sá ní xíhí Xítohó Jesucristú núú cùrúxí. 13 Te ni ñáyiù sa ní ngúndecu ndihí sēñá ññ-xi ñá túú quidé-yu nchaa nàcuáa ní cáháⁿ ndíi Moisés, dico mēe-yu cuíní-yu sá cuāha-ndo sēñá ññ-ndo. Te ducaⁿ quidé-yu chi quide cahnú-yu mēe-yu núú nchaa ñava-gá ñáyiù. 14 Te yúhú chi ñá túú quide cahnú-í mēe-í cuendá nchaa sá quídè-í, chi mee-ni sá ño cùu váha iní-í sá Xítohó Jesucristú ní xíhí-gá núú cùrúxí cuendá-ó. Te ñiu cuendá sá ní xíhí-gá ñá túú-gá ndécù-í ichi cuèhé ichi duha, te ní ñá túú-gá táxi

tnùnì ñáhá ní ññ sá cuèhé sá dúhá xii-í. 15 Te ñá túú ná chindee ñaha-xi xii-o cuéi na cuāha-o sēñá ññ-o àdi vá cuāha-o, chi ndècu ndihí-o Xítohó Jesucristú, te ní nduu-o dàtná ññ ñáyiù saa, te xíáⁿ cúú-xí sá ño-gá xíní ñùhu-xi. 16 Te xicáⁿ táhù-í núú Yá Ndiòxí sá nchaa nchòhò ñáyiù quide nchaa nacuaá càháⁿ-í-a cundecu nahi-ndo, nchòhò ñáyiù cùu cuendá Yá Ndiòxí dàtná ñáyiù isràél chi ñáyiù-áⁿ ní cachí-gá sá cúú cuendá-gá. Te mee-gá ío cundàhú iní ñáhá-gá xii-ndo chindee ñaha-gá.

17 Te není vitna cuíní-í sá vá yòo ññ-gá chidácá nihnu ñaha xii-í cuendá chiùⁿ quide-í, chi yayacáⁿ sa ní nduu tìlòhó ññ-í cuendá sá ndóhò-í cuendá Xítohó Jesucristú.

18 Te nchòhò ñáyiù ndècu ndihí-í ichi Xítohó Jesucristú xicáⁿ táhù-í núú-gá sá ño na chindee ñaha-gá xii-ndo nchaa-ndo. Te ducaⁿ na cunduu. Te ío chí cáda ndèe iní-ná vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ ÉFESÚ

*Té Páblú cáduha-dé tutú quihiⁿ
ndaha ñáyiú xĩndecu ichi Xítohó Jesu-
crístú ndécú ñúú Éfesú*

¹ Yúhú té Páblú ní tendaha ñaha Yá Ndiöxí cáháⁿ-í tñuhu Xítohó Jesucristú núú ñáyiú, chi ducaⁿ ní cachí Yá Ndiöxí cunduu, te vitna cadúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiöxí xĩndecu ñúú Éfesú, te diu-ni nchòhó cúú-ndó ñáyiú sándáá iní ñáhá xii Xítohó Jesucristú.

² Te xicáⁿ táhú-í núú Dütú Ndiöxí Yaá cúú Tátá-ó, ndihi núú Xítohó Jesucristú sá ná chĩndee chitúu ñaha-gá xii-ndo, te ducaⁿ ndi nduú-gá ná cádá te ío váha cuu iní-ndó cùndecu-ndo.

*Espíritú Yá Ndiöxí chĩndèe ñaha-xi xii-o chi ndècu ndihi-o Xítohó Jesu-
crístú*

³ Te cachí-ó sá ïo càhnu cuu Yá Ndiöxí Yaá cúú Tátá Xítohó Jesucristú, te ndéé andiú quide Yá Ndiöxí nchaa sá váha sá cúú-xi-ó cuendá sá ndécú ndihi-o Espíritú-gá, te ducaⁿ quide-gá chi ndècu ndihi-o Xítohó Jesucristú.

⁴ Te ndéé cùtnàhá vátá ngáva-gá ñuyúú ní cachí Yá Ndiöxí sá nchóó cùu-o ñáyiú cùu cuendá-gá, te ducaⁿ ní cachí-gá sá cuendá Xítohó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gá, te ducaⁿ te vá cùndecu cuèchi-o. ⁵ Te Yá Ndiöxí ío cùu iní ñáhá-gá xii-o núú xiáⁿ ducaⁿ ní cachí-gá ndéé cùtnàhá vátá ngáva-gá ñuyúú sá nchóó nduu-o déhe-gá. Te sá cuendá nchaa sá cádá Xítohó Jesucristú sá cúú-xi-ó, xiáⁿ ducaⁿ ní cachí Yá Ndiöxí, te

ducaⁿ ní cachí-gá chi ducaⁿ tnàhí ní sani iní-gá cunduu. ⁶ Te xiáⁿ núú xini ñuhu-xi sá nchóó càchí-ó sá ïo càhnu cuu Yá Ndiöxí, chi ío cùndahú iní ñáhá-gá chĩndèe ñaha-gá xii-o. Te ducaⁿ quide-gá chi ndècu ndihi-o Xítohó Jesucristú Yaá ío cùu iní-gá. ⁷ Te Yá Ndiöxí ío cùu iní ñáhá-gá xii-o núú xiáⁿ Xítohó Jesucristú ní

sati níñi-gá te ní xihí-gá cuendá dacácu nihnu ñaha-gá xii-o núú ùhú núú ndàhú, te ducaⁿ càda cahnu iní-gá nchaa yicá cuèchi-o.

⁸ Te Yá Ndiöxí ío cùndahú iní ñáhá-gá chĩndèe ñaha-gá xii-o, nàcuáa ngùndecu ndihi-o nchaa sá xini tñuni-ó te ducaⁿ te cuu-o ñáyiú tècú tñuni. ⁹ Te Yá Ndiöxí ní dánèhé ñáhá-gá xii-o nchaa sá ndúú yùhu, nchaa sá ní sani iní-gá cada-gá. Te ducaⁿ ní quide-gá chi ducaⁿ ní sani iní-gá cunduu. ¹⁰ Te sá ní sani iní-gá cada-gá te dacuitíí sá cádá-gá ná sáa nduu, te na sáa nduu-áⁿ te mee-gá cada sá Xítohó Jesucristú quindaha-gá nchaa sá ío andiú, ndihi nchaa sá ío ñuyúú-a.

¹¹ Te nchóo ní nduu táhú-ó ní nduu-o ñáyiú cùu cuendá Yá Ndiöxí chi ndècu ndihi-o Xítohó Jesucristú. Te ducaⁿ ní cuu chi ducaⁿ tnàhí ní sani iní Yá Ndiöxí cunduu. Te nchaandiú túhú sá quide-gá, quide-gá nàcuáa sáni iní méé-gá cunduu. ¹² Te ducaⁿ ní cuu cuendá sá nchùhú ñáyiú díhna nuu ní sándáá iní tñuhu Xítohó Jesucristú cáháⁿ-ndí sá ïo càhnu cuu mee Yá Ndiöxí cuendá nchaa sá váha quide-gá. ¹³ Te nchòhó tucu cùtnàhá ní xĩndedóho-ndo tñuhu ndáá tñuhu sá cáháⁿ nàcuáa naníhí táhú-ó ní cuu ñnuu-ndo ndihi Xítohó Jesucristú chi ní sándáá iní-ndó-gá. Te xiáⁿ cùtnuni sá nchòhó ní nduu-ndo ñáyiú cùu cuendá Yá Ndiöxí, chi ní ngùndecu ndihi-ndo Espíritú-gá sá ní cachí-gá taxi-gá. ¹⁴ Te sá ndécú ndihi-o Espíritú Yá Ndiöxí xiáⁿ cùtnuni sá ndáá nduu táhú-ó cùndecu-o ndihi-gá ná sáa nduu nàcuaca

ñaha-gá xii nchaa nchoo ñáyiú cùu cuendá-gá, te sá dúcáⁿ càda-gá nùu xiáⁿ tàú-ó cächí-ó sá ïo càhnu cuu-gá.

Té Páblú xicáⁿ táhú-dě núú Yá Ndiöxí cuendá cue ñáyiú ndècu ichi-gá

¹⁵ Te yúhú ñihí-í tnúhu sá nchòhó ïo váha sàndáá iní-ndó Xítohó Jesucristú, te nchaa ñáyiú cùu cuendá Yá Ndiöxí ïo cùu iní-ndó-yu.

¹⁶ Te xiáⁿ nùu ñá túú dàña ndeé-í ndácáⁿ táhú-í núú-gá cuendá-ndó, te ïo xicáⁿ táhú-í ¹⁷ núú Yá Ndiöxí Yáá cùú Tàtá Xítohó Jesucristú cuendá-ndó. Te ñu-ni Yá Ndiöxí cùú-gá Yáá ïo càhnu cuu. Te xicáⁿ táhú-í núú Yá Ndiöxí sá mée-gá ná cáda sá Espiritú-gá chindee ñaha-xi xii-ndo cuendá cuu-ndo ñáyiú tecú tnùnì, te na càda-xi sá cùtnùnì iní-ndó nàcuáa sàni iní Yá Ndiöxí. ¹⁸ Te ducaⁿ xicáⁿ táhú-í núú Yá Ndiöxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee iní ní taxi-gá ní ngúndecu ndihi-ndo cùtnháá ní cáháⁿ ñáhá-gá xii-ndo. Te ducaⁿ cùtnùnì tucu iní-ndó sá ncháá sá ní cachí-gá taxi-gá nduu táhú nchoo cuè ñáyiú cùu cuendá-gá cùú-xi mée cuí-ni sá ïo-gá váha. ¹⁹ Te cùtnùnì tucu iní-ndó sá Yá Ndiöxí ïo càhnu cuu-gá quidé-gá nchaa núú sá váha sá cùú-xi nchòo ñáyiú sàndáá iní ñáhá xii-gá, chi quide-gá sá vǎ yǎo tnáhì ndàcu cada sá cùú-xi-ó dàtná ní quide-gá ²⁰ ní dándótó-gá Xítohó Jesucristú cùtnháá ní xihí-gá. Te ní taxinucóo-gá Xítohó Jesucristú xio cùha-gá táxi tnùnì-gá. ²¹ Te Xítohó Jesucristú ïo-gá cùnùu-gá dàcúxí nchàa núú cuè espíritú, ndihi dàcúxí nchàa cue téé yìndaha ñáyiú, ndihi dàcúxí nchàa dava-gá cue téé cùnùu. Te cuèi vitna te cuèi ndéé núú cuáháⁿ núú vǎxi ducaⁿ-ni ïo cunuu-gá taxi tnùnì-gá. ²² Te mee Yá Ndiöxí ní quide-gá sá Xítohó Jesucristú taxi tnùnì-gá nchaandi túhú sá ïó, te ñu-ni mee Yá Ndiöxí ní cachí-gá sá ncháá ñáyiú cùu

cuendá-gá quìndaha ñaha Xítohó Jesucristú. ²³ Te cada iní-ó sá ncháá ñáyiú cùu cuendá Yá Ndiöxí cùú-yu yiqui cùñú Xítohó Jesucristú, chi ìⁿ-ni cùú-yu ndihi-gá, te mee-gá táxi tnùnì-gá nchaandi túhú sá ïó.

2

Yá Ndiöxí ïo cùndahú iní ñáhá-gá xii-o nùu xiáⁿ ní dàcácu nihnu ñaha-gá

¹ Te nchòhó cùú-ndó dàtná ñáyiú ní xihí cuendá nchaa sá cuèhé sá dúhá quide-ndo ní cuu, dico vitna cada iní-ndó sá dàtná ní ndoto-ndo chi ní nduu táhú-ndó cùndecu-ndo ndihi Yá Ndiöxí ní caa ní quíhíⁿ.

² Te ducaⁿ ní xíndecu-ndo ichi cuèhé ichi duha, chi ní cànchicúⁿ nihnu-ndo nchàa sá cuèhé sá dúhá ïó ñuyúú-a, te ní xóo cada-ndo nchàa nacuáa càháⁿ sácúíhná, te ñu-ni sácúíhná-áⁿ táxi tnùnì-xi nchaa dava-gá espíritú cùndihi-xi, te ñu-ni-xi ndècu ndihi-xi nchaa ñáyiú ñá túú cùnì tnì tnúhu càháⁿ Yá Ndiöxí, te dàcáháⁿ ñáhá-xi xii-yu cuendá cùndecu-ni-yu ichi cuèhé ichi duha. ³ Te nchaa-o dùcaⁿ ní xóo cada-o dàtná quidé cuè ñáyiú-áⁿ, chi ní xóo cada-o nchàa sá cuèhé sá dúhá ní xóo canì iní-ó, te nàndi-gá nchaa sá cuèhé sá dúhá ní xóo cahu iní-ó ní xóo cada-o, núu xiáⁿ tàú-ó sá dándòho ñaha Yá Ndiöxí xii-o ní cùu datná tàú-xi dándòho-gá nchaa ñáyiú ducaⁿ ndècu ichi cuèhé ichi duha-áⁿ. ⁴ Te Yá Ndiöxí ïo cùu iní ñáhá-gá xii-o núu xiáⁿ ní cùndahú iní ñáhá-gá xii-o ⁵ cuèi cùu-o datná ñáyiú ní xihí sá cuendá nchaa sá cuèhé sá dúhá quide-o ní cuu. Te ducaⁿ ní quide-gá ní cùndahú iní ñáhá-gá xii-o cuendá cùndecu-o ndihi Xítohó Jesucristú vitna, te cuu ìⁿ-nuu-o ndihi-gá. Te sá cuendá-ni sá cùndahú iní ñáhá Yá Ndiöxí xii-o xiáⁿ ní quide-gá nàcuáa nchoo nànhíhí tàhú-ó. ⁶ Te cada iní-ó sá dàtná ní quide Yá Ndiöxí cùtnháá ní dándótó-gá Xítohó Jesucristú cùtnháá ní xihí-gá ducaⁿ ní quide ñaha-gá xii-o chi ndècu-o ndihi-gá

vitna. Te Xítohó Jesucristú sa ndècu-gá andïu nõu ndécú Yá Ndiõxí. Te cada ini-ó sá Yá Ndiõxí sa ní quide-gá sá nchóó ní ngúndecu túu-o ndïhi Xítohó Jesucristú, chi ío váha ndècu-o vitna. ⁷ Te Yá Ndiõxí quidé váha ñaha-gã xii-o vitna cuendá sá ná saá nduu, te ñiu-ni mee-gã cada te cutnùní ini nchaa ñáyiú sá ío cùu ini ñáhá-gã xii-o, te ducaⁿ ío chindee chitúu ñaha-gã xii-o cuendá sá ndécú ndïhi-o Xítohó Jesucristú. ⁸ Te Yá Ndiõxí ío cùndahú ini ñáhá-gã xii-ndo nõu xíáⁿ ní quide-gá sá nchòhó naníhí tãhú-ndó. Te ducaⁿ ní quide-gá chi ní sándáá ini-ndó-gã. Te ñá ñíú sá cuendá ìⁿ chiuⁿ ni quide-ndo ducaⁿ ní naníhí tãhú-ndó, chi mee Yá Ndiõxí ní cuini-gá sá dicó-ni ducaⁿ naníhí tãhú-ndó. ⁹ Te mee Yá Ndiõxí ní cachí-gá sá ñá ñíú cuendá ìⁿ chiuⁿ quide-o naníhí tãhú-ó, te ducaⁿ ní cachí-gá cuendá sá vã cáda càhnu-o mee-o. ¹⁰ Te Yá Ndiõxí ní quide ñaha-gã xii-o datná ìⁿ ñáyiú saa cuendá sá ní tnahá tnúhu-o ndïhi Xítohó Jesucristú, te ducaⁿ ní quide-gá cuendá sá cáda-ó mèe-ni sá váha. Te Yá Ndiõxí ducaⁿ tnahí ní sani ini-gá cunduu sá nchóó cùu-o ñáyiú cada mee-ni sá váha.

Xítohó Jesucristú quidé-gã ío váha cùu ini-ó ndècu-o

¹¹ Te nchòhó chí dándacu ini nàcuáa ní xíndecu-ndo ní cùu, chí ñá túú cùu-ndo ñáyiú isràél, te ni ñá túú quide-ndo datná quidé ñáyiú-áⁿ, chí ñáyiú-áⁿ sãha-yu señá ñí-ⁿyu, te dàquee tihũ-yu nchaa ñáyiú ñá túú ndècu señá ñí-xi. ¹² Te chí dándacu ini nàcuáa ní xíndecu-ndo, chí dàvá-áⁿ ñá túú ní xíndecu-ndo ndïhi Xítohó Jesucristú, te ni ñá túú ní xõ cuu tnahá tnúhu-ndo ndïhi ñáyiú isràél, te ni ñá túú ní xíní tnùní-ndó nàcuáa ndùu tnúhu sá ní cáháⁿ ndáá Yá Ndiõxí nàcuáa cada váha-gã ñáyiú, te ni ñá túú ní cùu-ndo ñáyiú quindaha-gã, te ni ñá túú ní xõ níhí-ndó tnúhu ndee ini sá cùndecu-ndo ndïhi-gã.

¹³ Te cuèi ní cuu-ndo ñáyiú ñá túú tnahá tnúhu ndïhi Yá Ndiõxí ní cùu, dico vitna ní tnahá tnúhu-ndo ndïhi-gã chí cùu ìⁿnuu-ndo ndïhi Xítohó Jesucristú, cuendá sá ní sati níñí-gã te ní xíhí-gã te xíáⁿ ducaⁿ tnahá tnúhu-ndo ndïhi Yá Ndiõxí vitna. ¹⁴ Te Xítohó Jesucristú ní quide-gá sá nchóó ío váha cuu ini-ó cùndecu-o, te ñiu-ni-gá ní quide cuendá sá vã dáquèe tihú ñáhá ñáyiú isràél xii ñáyiú ñá túú cùu ñáyiú isràél, te ducaⁿ ìⁿ-ná cuú-yu cundecú-yu. ¹⁵ Te sá ní xíhí Xítohó Jesucristú, xíáⁿ ñá túú-gã cùnuu nchaa tnúhu sá sánú ìchi ñaha xii ñáyiú nàcuáa cada-yu cundecú-yu ní cùu. Te ducaⁿ ní xíhí Xítohó Jesucristú cuendá sá cuè ñáyiú isràél ndïhi cue ñáyiú ñá túú cùu ñáyiú isràél ìⁿ-ná cuú-yu cundecú-yu ichi-gã, te ducaⁿ te vã dáquèe tihú tnahá-gã-yu, te ío váha cundecu ndïhi tnahá-yu. ¹⁶ Te ducaⁿ ní quide Xítohó Jesucristú ní xíhí-gã núú cùrúxí cuendá sá cuè ñáyiú cùu ñáyiú isràél ndïhi cue ñáyiú ñá túú cùu ñáyiú isràél vã dáquèe tihú tnahá-gã-yu. Te ducaⁿ ní xíhí-gã cuendá ìⁿ-ná cuú-yu tnahá tnúhu-yu ndïhi Yá Ndiõxí nàcuáa cuu váha ini ñáhá-gã xíi-yu.

¹⁷ Te cuèi cùu-ndo ñáyiú ñá túú tnahí xíní ndáá cuendá Yá Ndiõxí ní cùu, dico Xítohó Jesucristú ní quixi-gã ñuyíú-a ní cáháⁿ-gã tnúhu váha nàcuáa ío váha cuu ini-ndo cùndecu-ndo ndïhi Yá Ndiõxí. Te ñiu-ni ducaⁿ ní quide-gá sá cùu-xi nchaa ñáyiú sa xíní cuendá Yá Ndiõxí, ñiu-ni ñáyiú isràél. ¹⁸ Te cuèi cùu-o ñáyiú isràél àdi ñá túú cùu-o dico ñiu-ni mee Xítohó Jesucristú ní quide-gá sá ncháá-ó tnahá tnúhu-o ndïhi Dútú Ndiõxí Yaa cúú Tãtã-ó. Te ducaⁿ ní tnahá tnúhu-o ndïhi Yá Ndiõxí chí ní ngúndecu ndïhi-o Espíritú-gã. ¹⁹ Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnahá tnúhu ndïhi Yá Ndiõxí ní cùu, dico vitna

chi ñá-nǎ ní cuu-ndo ndíhi nchaa dava-gá ñáyiú cùu cuendá-gá chi cùu-ndo déhe-gá. ²⁰ Te cada iní-ó sǎ cuè téé ní táuchíúⁿ Xítóhó Jesucristú cáháⁿ tnúhu-gá, ndíhi cue téé ní xóo cáháⁿ tnúhu Yá Ndióxi ndéé sanaha cùu-güedé dátá cimiéntú ñáⁿ vehe, te nchòhó cúu-ndó dátá ndóho sǎ sǎá vehe-áⁿ, te cada tucu iní-ó sǎ Xítóhó Jesucristú cúu-gǎ ñáⁿ yúú cúnúu cuu cimiéntú vehe-áⁿ. ²¹ Te ducaⁿ ño váha cùu ñáⁿnuu nchaa ndóho-áⁿ ndíhi yúú cúnúu-áⁿ, te ducaⁿ tucu ño váha ta quée tnàha nchaa ndóho-áⁿ cuáaá. Te xǎⁿ cada iní-ó sǎ cúu-xí vehe Yá Ndióxi, vehe sǎ ño ní cuu íí. Te ducaⁿ sǎtnahá-xi cùu nchaa ñáyiú ndècu ichi Xítóhó Jesucristú chí ní tnahá tnúhu-yu ndíhi-gá, te ñáⁿ nduu ñáⁿ nduu ta cùu víi cuu váha-gá-yu núú Yá Ndióxi cuáháⁿ. ²² Te tnàhá nchòhó ducaⁿ sǎtnahá-xi cùu-ndo chí ní ngúndecu ndíhi-ndo Xítóhó Jesucristú, te ducaⁿ ta cùu víi cuu váha tucu-ndo núú Yá Ndióxi cuáháⁿ, te cùu-ndo dátá vehe Yá Ndióxi chí ndècu ndíhi-ndo Espíritú-gá.

3

Té Páblú yíhi díqui-dé cáháⁿ-dé tnúhu Xítóhó Jesucristú núú ñáyiú ñá túú cùu ñáyiú isráel

¹ Te yúhú té Páblú yíhi-í vecaá sǎ cuendá sǎ cáháⁿ-í tnúhu Xítóhó Jesucristú núú nchòhó ñáyiú ñá túú cùu ñáyiú isráel, núú xǎⁿ díu cuendá-gá duha yíhi-í vecaá vitna. ² Te nchòhó sa nàha-ndo sǎ Yá Ndióxi ní cundáhu iní ñáhá-gǎ xii-í, te ní cachí-gǎ sǎ yúhú quíhi díqui-í cáháⁿ-í tnúhu Xítóhó Jesucristú núú-ndó, te cuendá sǎ cáháⁿ-í tnúhu-gǎ núú-ndó te cuu-xi sǎ váha sǎ cúu-xí-ndó. ³ Te yúhú sa ní cachí tnúhu-í xii-ndo lùha nacuaá ndùu tnúhu ndùu yuhu ní cuu, sǎ ní cachí tnúhu Yá Ndióxi xii-í. ⁴ Te òrè dàcuaha-ndo tnúhu ndùu yuhu-áⁿ ní cùu te quini-ndó sǎ yúhú tècú tnúni-í nàcuáa ndùu tnúhu-áⁿ, te

tnúhu-áⁿ cáháⁿ-xi cuendá Xítóhó Jesucristú. ⁵ Te tnúhu-áⁿ cúu-xí tnúhu sǎ vǎ yóo tnàhi xini ní cùu, dico cue téé ní táuchíúⁿ Xítóhó Jesucristú cáháⁿ tnúhu-gá, ndíhi cue téé cáháⁿ nàcuáa dàcahu iní ñáhá Yá Ndióxi ní níhi-güedé tnúhu ndùu yuhu-áⁿ, chi Espíritú Yá Ndióxi ní xáhaⁿ-xi xii-güedé. ⁶ Te duha cáháⁿ tnúhu ndùu yuhu-áⁿ ní cùu: “Cuéi ñáyiú ñá túú cùu ñáyiú isráel te cuéi ñáyiú cùu ñáyiú isráel dico ñáⁿ-ni ndùu táhü-yu sǎ váha núú Yá Ndióxi, te núu na quíndáá iní-yu tnúhu sǎ cáháⁿ nàcuáa naníhi tǎhü-yu, te ñáⁿ-ná cúu-yu cundecú-yu, te ducaⁿ ñáⁿ-ni cada váha ñaha Yá Ndióxi xii-yu te núu na cundecu ndíhi-yu Xítóhó Jesucristú”, duha ndùu tnúhu ndùu yuhu-áⁿ ní cùu.

⁷ Te Yá Ndióxi ní cundáhu iní ñáhá-gǎ xii-í ní taxi-gǎ chíuⁿ quide-í cáháⁿ-í tnúhu-gǎ, te mee-gǎ quidé-gǎ sǎ yúhú ndacu-í cáháⁿ-í tnúhu-gǎ. ⁸ Te nchaa ñáyiú cùu cuendá Yá Ndióxi cúu-yu ñáyiú ío-gǎ cúnúu cadá-yu chíuⁿ-gǎ dàcúúxí yúhú, te cuéi ducaⁿ dico Yá Ndióxi ní cundáhu iní ñáhá-gǎ xii-í ní taxi-gǎ chíuⁿ quide-í cáháⁿ-í tnúhu-gǎ núú cué ñáyiú ñá túú cùu ñáyiú isráel. Te tnúhu-gǎ-áⁿ cáháⁿ-xi sǎ súúni ño váha cada ñaha Xítóhó Jesucristú xii-o. ⁹ Te ducaⁿ ní cachí Yá Ndióxi sǎ cáháⁿ-í tnúhu-gǎ cuendá danèhé-í nchaa ñáyiú. Te sǎ dánèhé-í-yu-áⁿ cúu-xí tnúhu ndùu yuhu sǎ ní sani iní-gǎ ndéé sanaha nàcuáa cada váha-gǎ cue ñáyiú. Te ndéé dává-áⁿ ní quesaha ndùu yuhu tnúhu-áⁿ ní cùu. Te díu-ni-gǎ cúu-gǎ Yaá ní cadúha nchaandi túhú sǎ ño. ¹⁰ Te ducaⁿ ndùu yuhu tnúhu-áⁿ ní cùu cuendá sǎ ncháá espíritú cúnúu ndecu andiú quini-xi vitna nàcuáa quide nchaa ñáyiú ní tuha ñaha xii Yá Ndióxi cuendá ducaⁿ cùtnuní iní-xi sǎ ño váha cùtnuní iní-gǎ nàcuáa cada-gǎ. ¹¹ Te Yá Ndióxi

ní sani iní-gá ndéé sanaha nàcuáa ní cuini-gá cada Xítohó Jesucristú, te ní saá nduu ní quide Xítohó Jesucristú nàcuáa ní cuini Yá Ndiöxí cada-gá. ¹² Te vitna cùyii-o cáháⁿ ndihí-o Yá Ndiöxí cuendá sá ndécú ndihí-o Xítohó Jesucristú, te sandáá iní-ó-gá. ¹³ Te núu xiáⁿ cáháⁿ-í dóho-ndo sá cuéi duha ndòho-í vitna dico vá ná tühú iní-ndo cànchicúⁿ nihnu-ndo ichi Xítohó Jesucristú. Te sá dúhá ndòho-í te cùu-xi sá vaha sá cúu-xí-ndó, chi cuu-ndo ñáyiú cùu cahnu núu Yá Ndiöxí.

Xítohó Jesucristú ío cùu iní ñáhá-gá xii-o

¹⁴ Te sá cuendá nchaa sá ní sani iní Dütú Ndiöxí quidé-gá xiáⁿ yúhú ngüñí xiti-í núu-gá cáháⁿ ndihí-í-gá, te diu-ni-gá cúu Yáa cúu Tátá Xítohó Jesucristú. ¹⁵ Te mee Yá Ndiöxí ní cachí-gá sá ncháá espíritú ndécú àndiu cunduu-xi datná ní cachí méé-gá cunduu-xi. Te ní cachí tucu-gá sá nchóó cùu-o ñáyiú, te cunduu-o datná cuini méé-gá cunduu-o. ¹⁶ Te xicáⁿ táhù-í núu Dütú Ndiöxí sá Espíritú-gá ná cadá nàcuáa cuita nihí ndéé-gá-ndó quíhíⁿ cundecu-ndo ichi-gá, te ducaⁿ xicáⁿ táhù-í núu-gá cada Espíritú-gá chi ío cahnu cuu-gá. ¹⁷ Te xicáⁿ táhù-í núu Yá Ndiöxí sá Xítohó Jesucristú ná cundecu ndihí ñaha-ni-gá xii-ndo chi sandáá iní-ndó-gá, te ducaⁿ te vá dáña ndéé-ndó ío cuu iní tnáhá-ndó. ¹⁸ Te xicáⁿ táhù-í núu Yá Ndiöxí cuendá-ndó ndihí cuendá dava-gá ñáyiú cùu cuendá-gá, cuendá sá cùnüní iní-ndó sá sùní cùu iní ñáhá Xítohó Jesucristú xii-o. ¹⁹ Te duha xicáⁿ táhù-í núu Yá Ndiöxí chi cuini-í sá ncháá-ndó təcú tnùní-ndó sá ío cùu iní ñáhá Xítohó Jesucristú xii-o cuéi vá ndácú cava-o quini-ó nàcuáa cùu iní ñáhá-gá xii-o. Te xicáⁿ táhù-í núu Yá Ndiöxí sá ío na cundecu ndihí ñaha-gá xii-ndo, te ducaⁿ cànchicúⁿ nihnu-ndo

càda-ndo nchaa nacuáa quide mee-gá.

²⁰ Te Yá Ndiöxí ío-gá vài sá ndácú-gá táxi-gá dàcúxí sá xicáⁿ-ó núu-gá, te cuéi ndéé nchaa sá ñà túú sàni iní-ó nihí-ó te táxi-gá, te ducaⁿ chi mee-gá ndécú ndihí ñaha-gá xii-o, te ndàcu-gá quidé-gá nándi sá vaha sá cúu-xí-ó. ²¹ Te vitna nchaa nchoo ñáyiú ndècu ichi Xítohó Jesucristú chí ná cànchí-ó sá ío cahnu cuu Yá Ndiöxí, te ducaⁿ-ni cáháⁿ-ó sá ío cahnu cuu-gá ní caa ní quíhíⁿ chi ndècu ndihí-o Xítohó Jesucristú. Te ducaⁿ na cùnduu.

4

Espíritú Yá Ndiöxí quidé-xí cùu ñnuu-o ndecu-o

¹ Te yúhú té Páblú yíhí-í vecaá sá cuendá Xítohó Jesucristú, te cáháⁿ ndáhú-í núu-ndó sá cadá vaha-ndo cundecu-ndo datná tau-xi cada cue ñáyiú ní cáháⁿ Yá Ndiöxí cundecu ndihí-gá. Te nchòó tnáhá-ndó cùu-ndo ñáyiú ní cáháⁿ ñáhá Yá Ndiöxí cundecu ndihí-gá. ² Te vá cadá cahnu-ndo mee-ndo, cunduu vaha iní-ndó, cunduu cahnu iní-ndó, te cuu iní tnáhá-ndó nàcuáa ducaⁿ cundee iní-ndó núu ná cúu sá cùmáni núu tnáhá-ndó. ³ Te ío nducu ndèe-ndo cuu ñnuu-ndo cundecu-ndo, chi Espíritú Yá Ndiöxí chindee ñaha-xi xii-ndo, te ducaⁿ ío vaha cuu iní-ndó cundecu-ndo chí cùu ñnuu-ndo. ⁴ Te nchoo ñáyiú ndècu ichi Xítohó Jesucristú ñni cùu-o, te ducaⁿ ñni Espíritú Yá Ndiöxí ndécú, te diu-ni ducaⁿ ñni tnúhu ndee iní ní ngúndecu ndihí-o cùnàhá ní cáháⁿ ñáhá Yá Ndiöxí xii-o. ⁵ Te ñni Xítohó Jesucristú ndécú táxi tnuní ñáhá-gá xii-o, te ñni cùu-o sandáá iní-ó tnúhu-gá, te ñni ní sandute-o. ⁶ Te ñni Dütú Ndiöxí cúu Yáa cúu Tátá-ó ncháa-o, te diu-gá cùnùu-gá yíndàha ñaha-gá xii-o ncháa-o. Te Yá Ndiöxí dácáháⁿ-gá iní-ó quide-o chiuⁿ-gá,

te ducaⁿ ndècu ndihi ñaha-gá xii-o nchàa-o.

⁷ Te nchoo ndì dííⁿ ndì dííⁿ chindee ñaha Yá Ndiöxí xii-o quide-o nacuaa ndüu chiuⁿ ní cachí Xítoho Jesucristú cada-o. ⁸ Te quèe ndáá-xi nàcuáa càháⁿ-xi núu tütú Yá Ndiöxí núu cächí-xi:

Xítoho Jesucristú cuánda-gá andiu te ío cùnuu-gá,

chi nchaa cue espíritu cúu ùhú iní ñáhá xii-gá ñá túu ní ndàcu-xi naá ndihi ñaha-xi xii-gá,

te mee-gá ní cachí-gá nàcuáa ndüu chiuⁿ nduu táhú ìⁿ ìⁿ ñáyiú cada-yu.

Duha cächí-xi núu tütú-gá.

⁹ Te sá dúcáⁿ càháⁿ-xi sá cuánda-gá andiu xiáⁿ cútnuní iní-ó sá ní cuuⁿ-gá ñuyíú-a. ¹⁰ Te Xítoho Jesucristú ní cuuⁿ-gá ñuyíú-a, te ñu-ni-gá cuánda-gá andiu cuendá ío cunuu-gá taxi tnùní-gá nchaandi túhú sá ío. ¹¹ Te ní dácãhñu-gá cue tée xínu cuechi núu-gá ìⁿ ìⁿ núu chiuⁿ cada-güedé. Te ní cachí-gá sá òava-güedé càháⁿ-güedé tnúhu-gá, te òava-güedé ní cachí-gá sá càháⁿ-güedé nàcuáa dàcahu iní ñáhá Yá Ndiöxí xii-güedé. Te òava-güedé ní cachí-gá sá cúu-güedé cue tée datécú tnúhu cue ñáyiú nàcuáa cada-yu naníhí tàhú-yu. Te òava-güedé ní cachí-gá sá cúu-güedé cue tée quindaha ñaha xii ñáyiú dacuàha ñaha-güedé xii-yu tnúhu-gá. ¹² Te ducaⁿ ní cachí-gá cada cue tée-áⁿ cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu nàcuáa cada-yu chiuⁿ-gá, te ducaⁿ cuita níhí ndéé-gá-yu cundecú-yu ichi Xítoho Jesucristú. ¹³ Te ducaⁿ ní cachí Xítoho Jesucristú cunduu ndéé sáá nduu cùu ìⁿnuu-o quindáá iní-ó tnúhu-gá, te ducaⁿ cùu ìⁿnuu-o tecú tnùní-ó nàcuáa ndüu cuendá-gá chi ñu-ni-gá cúu-gá Déhe Yá Ndiöxí, te cuu-o ñáyiú ío quide ndáá

dàtná quidé mèe Xítoho Jesucristú. Te ducaⁿ te ñá túu tnàhí-gá ná cùmání-ó núu Yá Ndiöxí. ¹⁴ Te ducaⁿ te vá cúu-gá-ó dàtná cue landú vátá cútnuní váha-gá iní-xi, te ní vá cáda-gá-ó dàtná quidé ndüte lamár, chi ndute-áⁿ òré quéné tàchí te cuáháⁿ-xi duha cuáháⁿ-xi dàcáⁿ, te ducaⁿ chi vá quindáá-gá iní-ó tnúhu càháⁿ nchaa ñáyiú dandahú ñáhá xii-o, chi ñáyiú-áⁿ ío váha xitò-yu nàcuáa dandahú ñáhá-yu xii-o chi cächí-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ío cuu iní tnáhá-ó, te vá dandahú tnáhá-ó, chi càháⁿ-ó mèe-ni sá ndáá. Te xini ñuhu-xi sá ìⁿ nduu ìⁿ nduu cuita cada ndáá-gá-ó quíhíⁿ dàtná quidé ndáá mèe-gá, te ñu-ni-gá cúu-gá Yaá cùnüu cuu díhna tàxi tnuní ñáhá-gá xii-o. ¹⁶ Te ñu-ni Xítoho Jesucristú quidé ñaha-gá xii nchaa nchoo ñáyiú ndècu ichi-gá dàtná yiqui cùñú mèe-gá, chi ìⁿ yiqui cùñú ío váha ní quèe tnàha ìⁿ ìⁿ xichi, te ducaⁿ yìhi túchi yiqui cùñú-áⁿ yótnì-xi nchaa nàcuáa ní quèe tnàha. Te ducaⁿ sàtnahá-xi cùu nchoo chi ìⁿ-ni cùu-o ndecu-o ichi Xítoho Jesucristú tàxi tnùní ñáhá-gá xii-o. Te núu nchoo quide-o nchaa nàcuáa tàu-xi cunduu te cùu iní tnáhá-ó, te ducaⁿ ta níhí ndéé-gá-ó cuáháⁿ ndécú-ó ichi-gá.

Vá cáda-gá-ó dàtná ní xóo cada-o cùtnàhá ní xindecu-o ichi cuehé ichi duha

¹⁷ Te vitna yúhú càháⁿ-í dóho-ndo quide-í núu Xítoho Jesucristú sá vá cùndècu-gá-ndó dàtná xindecu ñáyiú ñá túu sàndáá iní ñáhá xii Yá Ndiöxí, chi nchaa ñáyiú-áⁿ ñà túu vèdana nàndíhí nchaa sá sání iní-yu. ¹⁸ Te ní ñà túu vèdana cùtnuní iní-yu nàcuáa ndüu tnúhu ndáá tnúhu Yá Ndiöxí. Te ñáyiú-áⁿ ñà túu ndüu tàhú-yu cundecú-yu nàcuáa cuní Yá Ndiöxí, chi ñá túu vèdana tècú tnùní-yu te ducaⁿ chí ío sáá iní-yu. ¹⁹ Te ñá túu tnàhí-gá ná

sání iní-yu ndécú-yu ichi cuèhé ichi duha, te ío cùdí iní-yu ndécú-yu ichi dí iní, te ñá díú-ní xǎn chi nándi-gá nchaa sá cuèhé sá dúhá quidé-yu ndécú-yu. ²⁰ Dico tnúhu Xítóhó Jesucristú sá ní sándáá iní-ndó chi ñá túú ducaⁿ sanu ichi ñaha-xi xii-ndo cada-ndo. ²¹ Te nchòhó ní cutnùní iní-ndó nàcuáa ndúu cuendá Xítóhó Jesucristú, te dàcuaha-ndo tnúhu ndáá diu-ni tnúhu-gá nàcuáa ndécú-ndo ichi-gá. ²² Te vitna vá cáni-gá iní-ndó cada-ndo datná ní xóo cada-ndo cùtnáhá ní xíndecu-ndo ichi cuehé ichi duha, chi núu nchaa-ni sá cuèhé sá dúhá-áⁿ ná cùhuⁿ-ni iní-ndó cada-ndo, te uuⁿ-gá uuⁿ-gá cuita dacuítá nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-áⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xini ñuhu-xi sá vá dúcáⁿ-gá caní iní-ndó cada-ndo te tàú-ndó ndúu-ndo datná íⁿ ñáiyu ní cacu túu saa. ²⁴ Te nduu iní-ndó dàtná cuíni méé Yá Ndióxi cunduu, chi nduu-xi nàcuáa càa iní méé-gá, te ducaⁿ te cuu-ndo ñáiyu ío váha cada ndáá, te cuu ndisa-ndo ñáiyu ñá túú tnàhí ná cumání cundecu núu-gá.

²⁵ Te cuendá xǎn núu cáháⁿ-í dóho-ndo sá nchòhó vá dàcuàndehnde-gá ndó dàtná ní xóo cada-ndo, te mee-ná sá ndáá cáháⁿ ndíhi tnàha-ndo, chi íⁿ-ni cùu-o ndecu-o ichi Xítóhó Jesucristú.

²⁶ Te núu cùdééⁿ-ndó te cada cuendá-ndó sá vá cadá-ndó íⁿ cuéchi sá dúcáⁿ cùdééⁿ-ndó, te vá dúcáⁿ-ní cùhuⁿ iní-ndó tnúhu sàtú iní-áⁿ. ²⁷ Te vá dáñá-ndó mée-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gá cada-ndo, chi nducu-ná-ndó íⁿ chiuⁿ váha cada-ndo nàcuáa ducaⁿ ñíhí-ndó sá chíndèe-ndo cue ñáiyu ndáhú ñáiyu ñá túú ná ndécú ndíhi.

²⁹ Te vá cáháⁿ-gá-ndó ní íⁿ tnúhu cuèhé, chi mee-ná tnúhu vii tnúhu váha cáháⁿ-ndó nàcuáa ducaⁿ ngúnu ichi cue ñáiyu ndédóho ñaha xii-ndo, te núu ducaⁿ na cada-ndo

te cuu-xi sá váha sá cúu-xí ñáiyu ducaⁿ ndédóho ñaha xii-ndo-áⁿ. ³⁰ Te vá cadá-gá-ndó ní íⁿ sá ñá túú tàú-ndó cada-ndo cuendá sá vá dándihú-ndó iní Espíritú Yá Ndióxi, chi diu Espíritú-gá ndécú ndíhi-ndo, te xǎn cùtnùní iní-ndó sá sáá nduu nàcuaca ñaha-gá xii-ndo cundecu-ndo ndíhi-gá ní caa ní quíhíⁿ.

³¹ Te vá dásátú-gá-ndó iní tnàha ñáiyu-ndo, te ní vá cùhúⁿ iní-ndó tnúhu sàtú iní, te ní vá cùdééⁿ-gá-ndó, te cuéi núu chítú núu tàcá vá cáháⁿ cana-ndo cùcuèhé-ndó tnàha ñáiyu-ndo, te ní vá cuátnúhu-ndo tnaha ñáiyu-ndo, te ní vá cáni cuèhé caní duha iní-ndó cuendá tnàha ñáiyu-ndo. ³² Te cundahú iní tnáhá-ndó, te cada tnàha-ndo sá váha, te cada càhnu iní tnáhá-ndó núu ná cúu sá cúmání núu tnáhá-ndó dàtná ní quide Yá Ndióxi ní quide càhnu iní-gá nchaa yíca cuéchi-ndo sá cuendá Xítóhó Jesucristú.

5

Nàcuáa tàú-xi cundecu nchaa ñáiyu cùu déhe Yá Ndióxi

¹ Te nchòhó cúu-ndó ñáiyu ío cùu sá ñáhá Yá Ndióxi, te diu déhe-gá cúu-ndó núu xǎn xíni ñuhu-xi can-chicúⁿ nihnu-ndo cada-ndo datná quidé mée-gá. ² Te ío cuu iní tnáhá-ndó cundecu-ndo datná cúu iní ñáhá Xítóhó Jesucristú xii-ndo, chi diu-gá ní cachí-gá sá cúu-gá cuendá nchaa cuéchi-o te ní xíhí-gá, te sá dúcáⁿ ní xíhí-gá te ní cuu-gá dàtná íⁿ táhú sá cúu-xí Yá Ndióxi, te ío váha ní cuu iní Yá Ndióxi sá dúcáⁿ ní quide-gá.

³ Te sá cuendá sá nchòhó cúu-ndó ñáiyu cùu cuendá Yá Ndióxi núu xǎn nchaa nchòhó cue téé vá cáháⁿ ndíhi-ndo ñáiyu díhí te núu ñá díú ñàdihí-ndó cùu-yu, te ducaⁿ-ni nchaa nchòhó cue ñáiyu díhí tucu vá cáháⁿ ndíhi-ndo cue téé te núu ñá díú yíhí-ndo cuu-güedé, te ní vá cáni tnàhí iní-ndó cundecu-ndo ichi díí

iní, te ni vǎ xǐhó-ndó nì ìⁿ sá ndécú ndìhi tnaha ñáyiú-ndo, te ni ìⁿ nchaa xǐáⁿ vǎ cǎní iní-ndó cada-ndo, te ni vǎ cǎcú nèhe-ndo. ⁴ Te ni vǎ cǎháⁿ-ndó ìⁿ tnúhu sá ni vǎ cúú cùndedóho ñáyiú, te ni vǎ cǎháⁿ-ndó ìⁿ tnúhu cùtexínu, te ni dǎva-gǎ nchaa tnúhu sá ñà túú vǎdana nàndìhi vǎ cǎháⁿ-ndó, chi nchaa tnúhu-áⁿ ñà túú tàù-xi cǎháⁿ-ndó, te xini ñuhu-xi sá vǎha-gǎ sá ndàcǎⁿ tǎhú-ndó núú Yǎ Ndióxi cuendá nchaa sá vǎha quide-gǎ. ⁵ Te nchòhó sa xini ndáá-ndó sǎ ncháá cuè téé cǎháⁿ ndìhi ñáyiú dǐhí te ñá díú ñàdìhí-güedé cúú-yu, ndìhi cue ñáyiú dǐhí cǎháⁿ ndìhi cue téé te ñá díú yǐ-yu cùu-güedé, nchaa ñáyiú-áⁿ vǎ ndúú tǎhú-yu cundecú-yu núú ndécú Yǎ Ndióxi ndìhi Xítohó Jesucristú táxi tnùnigǎ. Te ni cuè ñáyiú xǐndecu ichi díí iní, te ni cuè ñáyiú xǐho nchaa sá ndécú ndìhi tnaha ñáyiú-xi vǎ ndúú tǎhú-yu cundecú-yu ndìhi-gǎ núú ndécú-gǎ táxi tnùnigǎ. Te tnúhu sá cǎchí-ó xǐho-o nchaa sá ndécú ndìhi tnaha ñáyiú-o, ìⁿ-ni cùu-xi ndìhi tnúhu sá cǎchí ñáyiú quide cahnú-yu nchaa sá cǎchí-yu cùu ndióxi te ñá ndáá sá ndióxi cúú-xí. ⁶ Te vǎ quǐndáá iní-ndó nì ìⁿ tnúhu sá ñà túú nàndìhi cǎháⁿ ñáyiú, chi ñáyiú-áⁿ ò dandòho ñaha Yǎ Ndióxi xǐ-yu cuendá nchaa sá cuèhé sá dúhá quide-yu chi ñá túú sàndáá iní ñǎhá-yu xii-gǎ. ⁷ Núú xǐáⁿ cǎháⁿ-í dóho-ndo sǎ vǎ nihí tnáhá-ndó ndìhi cue ñáyiú-áⁿ.

⁸ Te nchòhó ní cuu-ndo dàtná cue ñáyiú ní xǐndecu núú néé chi ní xǐndecu-ndo ichi cuèhé ichi duha, dico vitna ní ngúndecu-ndo ichi Xítohó Jesucristú, te ñá túú-gǎ ndécú-ndó núú néé dàtná ní xǐndecu-ndo ní cùu. Te vitna cada-ndo ncháa nacuáa tàù-xi cunduu chi ndècu-ndo ichi-gǎ. ⁹ Te sá cuendá sá ndécú-ndó ichi-gǎ núú xǐáⁿ cúú-ndó ñáyiú váha, te quide ndáá-ndó ndècu-ndo, te ñá túú

dàcuandehnde-ndo chi cǎháⁿ-ndó mèe-ni sá ndáá. ¹⁰ Te ío váha cada cuendá-ndó ncháa sá cúú váha iní Xítohó Jesucristú, te xǐáⁿ cada-ndo. ¹¹ Te vǎ cǎnchícúⁿ nihnu-ndo tnáhá-ndó cada-ndo datná quide cuè ñáyiú ndècu ichi cuèhé ichi duha, chi nchòhó tàù-ndó cǎháⁿ-ndó dóho nchaa ñáyiú ducaⁿ ndècu ichi cuèhé ichi duha-áⁿ cuendá nchaa sá quide-yu. ¹² Te cucahaⁿ núú-ndó vǎ cǎháⁿ-ndó cuendá ni ìⁿ sá cuèhé sá dúhá quide dayuhu nchaa ñáyiú-áⁿ. ¹³ Dico óré dándixi túu tnúhu Yǎ Ndióxi iní-yu nàcuáa quide-yu te cùtnuní iní-yu sá ñǎ túú quide váha-yu, te ducaⁿ ndìxi cuèchi iní-yu cuendá nchaa sá cuèhé sá dúhá quide-yu. ¹⁴ Te núú tütú Yǎ Ndióxi cǎchí-xi:

Nchòhó cúú-ndó dàtná ñáyiú xidí, te vitna ndiquíú iní-ndó,

te cùu tucu-ndo datná ñáyiú ní xǐhí, te vitna ndoto-ndo,

te Xítohó Jesucristú chindee ñaha-gǎ xii-ndo nàcuáa vǎ cùndècu-gǎ-ndó ichi cuèhé ichi duha.

Duha cǎháⁿ-xi núú tütú-gǎ.

¹⁵ Te ío váha cada cuendá-ndó nàcuáa cada-ndo cùndècu-ndo, te vǎ cadá-ndó dàtná xǐquide cue ñáyiú ñá túú tècú tnùní, chi cada-ndo dàtná xǐquide ñáyiú ío váha sáa díquí-xi. ¹⁶ Te ìⁿ nduu ìⁿ nduu cǎní iní-ndó cada-ndo nchaa nacuáa tàù-xi cunduu, chi vitna ío cùnuu nchaa sá cuèhé sá dúhá. ¹⁷ Te cuu-ndo ñáyiú tècú tnùní cuendá ducaⁿ cùtnuní iní-ndó nàcuáa cuíni Yǎ Ndióxi cada-ndo, te vǎ cadá-ndó dàtná xǐquide cue ñáyiú ñá túú tnáhí cùtnuní iní-xi nàcuáa cuíni Yǎ Ndióxi cadá-yu. ¹⁸ Te vǎ cúú-ndó ñáyiú quihu chi núú ducaⁿ na cada-ndo te dàcuíta nihnu-ndo mèe-ndo, te dañá-ndo mèe-ndo sá Espiritú Yǎ Ndióxi ná tàxi tnuní ñáhá-xí xii-ndo. ¹⁹ Te cǎháⁿ-ndó nàcuáa-ni cuáháⁿ ndudú sá ní xóo cata nchaa cue ñáyiú ndéé sanaha ní xóo chiñuhú-yu Yǎ Ndióxi. Te cǎháⁿ-ndó nàcuáa

cuaháⁿ ndudú sá chíñuhu-ndo Yá Ndióxi, te cata-ndo. Te cuéi nchaa dava-gá ndudú diu-ni ducaⁿ cáháⁿ-ndó te cata-ndo. Te ni yùhu ni iní-ndó càta-ndo nchaa ndudú-áⁿ chíñuhu-ndo Yá Ndióxi. ²⁰ Te vá dáñá ndèé-ndó ndacáⁿ táhú-ndó núú Tàtá-ó Dütú Ndióxi cuéi ndècu váha-ndo àdi ñá túú ndècu váha-ndo. Te ducaⁿ càda-ndo chi ndècu ndihí-ndo Xítohó Jesucristú.

Tàu-xi sá quindáá iní tnáhá cué ñáyiu ndècu ichi Xítohó Jesucristú

²¹ Te nchòhó ñáyiu ndècu ichi Xítohó Jesucristú tàu-xi sá quindáá iní tnáhá-ndó, te ducaⁿ càda-ndo chi nèhe-ndo sá yíñuhu núú Yá Ndióxi.

²² Te nchaa nchòhó ñáyiu òhí ndécú yí-xi, xìni ñuhu-xi sá quindáá iní-ndó yí-ndo datná sàndáá iní-ndó Xítohó Jesucristú. ²³ Chi yí-ndo tàxi tnuní ñáhá-güedé xii-ndo dàtná quidé Xítohó Jesucristú táxi tnuní ñáhá-gá xii nchoo cué ñáyiu ndècu ichi-gá. Te diu-gá cúu-gá Yaá ní dácácu nihnu ñaha xì-o núú ùhú núú ndàhú, te cùu-o datná yiqui cùñú-gá. ²⁴ Te dàtná quidé nchò ñáyiu ndècu ichi Xítohó Jesucristú sàndáá iní-ó tnè-o nchaa tnúhu càháⁿ-gá, ducaⁿ tàu-xi cada nchaa nchòhó ñáyiu òhí quindáá iní-ndó tnè-ndo nchaa tnúhu càháⁿ yí-ndo.

²⁵ Te tnàhá nchaa nchòhó cue téé tucu tàu-xi sá ío cuu iní-ndó ñàdihí-ndó dàtná quidé Xítohó Jesucristú cúu òhí ñáhá-gá xii nchaa nchoo ñáyiu ndècu ichi-gá, chi mee-gá ní xíhí-gá sá cuendá-ó sá cúu òhí ñáhá-gá xii-o. ²⁶ Te ducaⁿ ní quide-gá cuendá sá ncháá ñáyiu vitna ngündecu ichi-gá cuu yíñuhu-yu núú Yá Ndióxi, te ducaⁿ ndàda ndoo ndada nine-gá iní-yu sá cuendá sá quindáá iní-yu tnúhu Yá Ndióxi, te cuanduté-yu. ²⁷ Te ducaⁿ ní quide-gá cuendá sá ncháá ñáyiu na ngündecu ichi-gá

íó váha cundecú-yu núú-gá, te ducaⁿ vâ cündècu-gá ní ñá cuéchi-yu núú-gá, te ní ñá-gá sá ñà túú-gá ná cumání-yu núú-gá chi ío cundecu yíñuhu-yu. ²⁸ Te sá dúcáⁿ quide Xítohó Jesucristú sá cúu-xí cué ñáyiu ndècu ichi-gá, xíⁿ tàú-xi sá nchòhó cue téé xíndecu ñàdihí-xi cuu iní-ndó ñàdihí-ndó, te coto-ndó-yu dàtná xító-ndó yiqui cùñú méé-ndó, te cada iní-ndó sá ncháá cué téé ío cùu òhí ñàdihí-xi cùu iní-güedé méé-güedé chi ñá-ná cúu-yu. ²⁹ Te nchoo sà naha-o sá ní ñá ñáyiu ñá túú dàquee tíhú-yu yiqui cùñú-yu, chi da uuⁿ-gá chíndéé-yu te xító-yu. Te diu-ni ducaⁿ quide Xítohó Jesucristú ndihí nchaa ñáyiu ndècu ichi-gá, ³⁰ chi cùu-o datná yiqui cùñú méé-gá, te ducaⁿ chí ñá-ni cùu-o ndihí-gá. ³¹ Te tnúhu Yá Ndióxi càchí-xi: “Sá cuendá xíⁿ núu nchaa cue téé na ñihí ñàdihí-xi te ñá-ná cada-güedé tátá-güedé ndihí náná-güedé, te ñàdihí-ñá-güedé cuu cuu ndihí-güedé, te ducaⁿ ñá-ná cuu-güedé ndihí-yu”, duha càchí-xi. ³² Te tnúhu-a cùu-xi ñá tnúhu càhnu vihi, te ducaⁿ sá tnàhá-xi cùu Xítohó Jesucristú ndihí cue ñáyiu ndècu ichi-gá. ³³ Te càháⁿ-ni tucu-í dóho nchaa nchòhó cue téé xíndecu ñàdihí-xi sá ío cuu iní-ndó ñàdihí-ndó te coto-ndó-yu dàtná xító-ndó mèe-ndo, te ducaⁿ-ni nchaa nchòhó ñáyiu òhí tucu canehe-ndo sá yíñuhu núú yí-ndo.

6

¹ Te nchaa nchòhó cue landú, quindáá iní-ndó tátá-ndó ndihí náná-ndó chí ducaⁿ cuíní Yá Ndióxi cunduu, te diu ducaⁿ tnàhí tàu-xi cada-ndo. ² Te Yá Ndióxi ní cachí-gá sá cánèhe-ndo sá yíñuhu núú tátá-ndó ndihí núú náná-ndó. Te tnúhu-áⁿ cúu-xí tnúhu cùnuu ní càháⁿ-gá cada cue ñáyiu cuendá cada váha ñaha-gá xíi-yu. ³ Te ní cachí-gá sá núu ducaⁿ na càda-ndo

te ío váha cundecu-ndo, te ducaⁿ ío náha cùdíi-ndo cùndecu-ndo ñuyíú-a.

⁴ Te nchaa nchòhó cue tée cùu tátá, vá dásátú-ndó ínì cue déhe-ndo chí canu ichi-ndo-güèxi nacuaá tàú-xi cunduu, te dacuàha-ndo-güèxi nchaa tnúhu váha nàcuáa cuínì Yá Ndiòxí cunduu.

⁵ Te nchaa nchòhó cue ñáyiú xínu cuechi, quindáá ínì-ndó cuè ñáyiú dii chiúⁿ-xi quide-ndo, te canehe-ndo sá yíñuhu núú-yu, te ío váha cuu ínì-ndó càda-ndo chiúⁿ-yu, te ducaⁿ nì yuhu nì ínì-ndó càda-ndo. Te cada ínì-ndó sá dàtná tnúhu sá chiúⁿ Xítohó Jesucristú quidé-ndó. ⁶ Te dava ñáyiú xínu cuechi, mee-ni òré ndéhé ñáyiú dii chiúⁿ-xi quidé-yu ío ndùcu ndeé-yu quide chiúⁿ váha-yu cuèndá cuínì-yu cudíú-yu. Dico nchòhó vá dúcáⁿ càda-ndo, chí cuèi ndècu ñáyiú dii chiúⁿ-xi quide-ndo àdi ñá túú-yu dico cada chiúⁿ váha-ni-ndo, te cada ínì-ndó sá dàtná tnúhu sá chiúⁿ Xítohó Jesucristú quidé-ndó, te cada-ndo nì yuhu nì ínì-ndó nàcuáa cuínì Yá Ndiòxí cunduu. ⁷ Te ío váha cuu ínì-ndó càda-ndo chiúⁿ-áⁿ, chí cada ínì-ndó sá dàtná tnúhu sá chiúⁿ Xítohó Jesucristú quidé-ndó te ñá díú chiúⁿ cue ñáyiú ñuyíú-a. ⁸ Te nchòhó sa cùtnunì ínì-ndó sá nàcuáa ndúu chiúⁿ váha nì quide-ndo ñⁿ ñⁿ-ndo, te ducaⁿ cùnduu sá táxí Xítohó Jesucristú nduu táhú-ndó cuèi cùu-ndo ñáyiú dàñá queé núú chiúⁿ patróóⁿ-xi àdi cuu-ndo ñáyiú ñá túú tnàhí dàñá quee núú chiúⁿ patróóⁿ-xi.

⁹ Te nchaa nchòhó ñáyiú xíndecu ndíhi ñáyiú xínu cuechi, tnàhá-ndó tàú-ndó càda váha-ndo sá cúú-xí cuè ñáyiú xínu cuechi núú-ndó, te vá cùnduu nínu ínì-ndó núú-yu, te chí cuàha cuèndá sá díú-ní Xítohó Jesucristú Yaa ndécú àndiu taxi tnunì ñáhá-gá xii-ndo ndíhi-yu, te sá cúú-xí mée-gá chí ñⁿ-ni cùu-ndo

núú-gá, te ñⁿ-ni càda ñaha-gá xii-ndo.

Yá Ndiòxí chindè-gá cue ñáyiú ndècu ichi-gá cuèndá sá vá ndácú sàculhá nàá ndíhi ñaha-xi xii-yu

¹⁰ Te vitna nchaa nchòhó ñáyiú ndècu ndíhi-í ichi Xítohó Jesucristú càchí tnúhu-í xii-ndo sá ío nducu-ndo nàcuáa cada-ndo níhi ndéé-ndó cùu ñⁿnuu-ndo ndíhi Xítohó Jesucristú, chí mee-gá ío càhnu cuu-gá, te chindee ñaha-gá xii-ndo. ¹¹ Te díu-ni nchaa sá ní nduu táhú-ndó núú Yá Ndiòxí díu-ni nchaa xiáⁿ cuhuⁿ ínì-ndó, chí xiáⁿ chindee ñaha-xi xii-ndo níhi ndéé-ndó cùndecu-ndo cuèndá sá vá dándáhu ñáhá sàculhá xii-ndo. ¹² Chí nchoo ñá díú cuè ñáyiú ñuyíú-a nàá ndíhi-o, chí ndíhi cue espíritú cùndíhi yucu ñáváha, te díu-ni nchaa espíritú-áⁿ cùnúu-xi cuèi núú nínu quide-xi nchaa sá cuèhé sá dúhá, te díu-ni-xi cùnuu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. ¹³ Te ío cuhuⁿ ínì-ndó nchaa sá ní nduu táhú-ndó núú Yá Ndiòxí cuèndá ducaⁿ níhi ndéé-ndó cùndecu-ndo, te vá ndácú yùcu ñáváha ná cada ñaha-xi xii-ndo òré cuínì-xi coto ndeé ñáhá-xí. Te sátá ná dàquee tíhú-ndó yùcu ñáváha te ñⁿ-ni cunduu-ndo cùndecu-ndo ichi Yá Ndiòxí. ¹⁴ Te ducaⁿ cùndecu-ni-ndo ichi Yá Ndiòxí cada-ndo dàtná xíquide cue sandàdú, chí cue téé-áⁿ ío ñⁿ xíndáa-güedé. Te cáháⁿ-ndó mée-ni tnúhu ndáá tnúhu Yá Ndiòxí, te cuu-ndo dàtná cue sandàdú cue téé ndàda tí xiti-xi òré quíhíⁿ-güedé nàá-güedé. Te ducaⁿ sàtnahá-xi cuu-ndo te núu na càháⁿ-ndó mée-ni tnúhu ndáá tnúhu Yá Ndiòxí. Te cada ndáá-ndó cùndecu-ndo ichi-gá, te cuu-ndo dàtná cue sandàdú cue téé xíxlhnu sá yídáhu ñaha xii-güedé òré nàá-güedé cuèndá sá vá nícuèhé-güedé. Te ducaⁿ sàtnahá-xi cuu-ndo te núu na càda ndáá-ndó cùndecu-ndo ichi-gá. ¹⁵ Te cundecu túha-ndo

cáháⁿ-ndó tnúhu Xítoho Jesucristú, tnúhu sá cáháⁿ nàcuáa cuu váha iní ñayiu cundecu-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sátnahá-xi cuu-ndo te núu na cùndecu túha-ndo cáháⁿ-ndó tnúhu Xítoho Jesucristú núu ñayiu. ¹⁶ Te cächí tnúhu tucu-í xii-ndo sá ío quindáá iní-ndó Yá Ndiöxí cuendá sá vǎ ndácú sàcúhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquidáhu ñaha-xi xii-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàá ndíhi-güedé. Te ducaⁿ sátnahá-xi cuu-ndo te núu na quindáá iní-ndó Yá Ndiöxí. ¹⁷ Te ío cuhuⁿ iní-ndó sǎ ní naníhí tǎhú-ndó, te cuu-ndo dàtná cue sandàdú cue téé ñúhu mbelú cáxíⁿ. Te ducaⁿ sátnahá-xi cuu-ndo te núu na cùhuⁿ iní-ndó sǎ ní naníhí tǎhú-ndó. Te ío cuhuⁿ iní-ndó tnúhu Yá Ndiöxí, chí tnúhu-áⁿ ní taxi Espíritú-gǎ ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machití cuaháⁿ-güedé nàá-güedé. Te ducaⁿ sátnahá-xi cuu-ndo te núu na cùhuⁿ iní-ndó tnúhu Yá Ndiöxí. ¹⁸ Te vǎ dáñǎ ndèe-ndó cáháⁿ ndíhi-ndo Yá Ndiöxí nàcuáa chindee ñaha Espíritú-gǎ xii-ndo, te cácáⁿ tǎhú-ndó núú-gǎ núu ná cuíní-ndó, te ío cundecu túha-ndo cáháⁿ ndíhi-ndo-gǎ, te vǎ nátùhú iní-ndó cácáⁿ tǎhú-ndó núú-gǎ cuendá nchaa dava-gǎ cue ñayiu cùu cuendá-gǎ. ¹⁹ Te tnàhá cuendá-í cácáⁿ tǎhú-ndó núú Yá Ndiöxí cuendá sǎ ná chindee ñaha-gǎ xii-í níhí-í tnúhu cáháⁿ-í òré cáháⁿ-í tnúhu-gǎ, te ducaⁿ vǎ yùhú-í cáháⁿ-í nàcuáa ndùu tnúhu sǎ cáháⁿ nàcuáa naníhí tǎhú-ó núú ñayiu tnúhu sǎ vǎtǎ cùndédóho-gǎ-yu. ²⁰ Te Yá Ndiöxí ní cachí-gǎ sǎ yùhú cuu-í ñⁿ téé cada-í núú-gǎ cáháⁿ-í tnúhu-gǎ núú ñayiu, te ñiu cuendá tnúhu-áⁿ yíhí-í vecá vitna. Te ío cácáⁿ tǎhú-ndó núú Yá Ndiöxí cuendá-í cuendá sǎ yùhú cuyíⁿ-í ní yùhu ní

iní-í cáháⁿ-í tnúhu-gǎ núú ñayiu nàcuáa tàú-xi cunduu.

Tnúhu ndée núú ní ndíhi-ná

²¹ Te té Tiquicú téé ío cùu iní-í ndécú ndíhi-o ichi Xítoho Jesucristú cúú-dé ñⁿ téé ío váha quide ndáá xínú cuèchi-dé núú Xítoho Jesucristú, téé-áⁿ cachí tnúhu-dé xii-ndo nàcuáa cùu ndecu-í ndíhi nchaa nàcuáa quide-í cuendá ducaⁿ cùtnuní iní-ndó. ²² Te cuendá xiǎⁿ núu cuíní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nàcuáa cùu ndecu-ndí iha, te ducaⁿ tàxi-gǎ-dé tnúhu ndee iní cundecu ndíhi-ndo.

²³ Te xicáⁿ tǎhú-í núú Tǎtá-ó Dütú Ndiöxí ndíhi núú Xítoho Jesucristú sǎ ncháá nchòhó ñayiu ndècu ndíhi-í ichi-gǎ sǎ ñiu-gǎ ná cádá te ío váha cuu iní-ndó cùndecu-ndo, te ducaⁿ ío cuu iní tnáhá-ndó, te ío quindáá iní-ndó-gǎ. ²⁴ Te nchòhó ío cùu iní-ndó Xítoho Jesucristú, te ñǎ túú dàña ndèe-ndó cùu iní-ndó-gǎ. Te mee Yá Ndiöxí ío na chindee chitúu ñaha-gǎ xii-ndo. Te ducaⁿ na cùnduu. Te ío chí cádá ndèe iní-nǎ vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ FÌLIPÚ

Té Páblú cáduha-dé tutú quíhíⁿ ndaha ñáyiú quide ndáá xĩndecu ichi Xítóhó Jesucristú ndécú ñuú Filipú

¹ Yúhú té Páblú ndíhí té Timúteú cúú-ndí cue téé xĩnu cuechi núú Xítóhó Jesucristú, te tëndaha-ndí tutú-a véxi ndaha nchòhó cue téé yĩndaha nchaa ñáyiú ndècu ichi Xítóhó Jesucristú, ndíhí cue téé chĩndee ñaha xii-ndo, ndíhí nchaa dava-gá ñáyiú xĩquide ndáá ndécú ichi-gá ñuú Filipú. ² Te xicáⁿ táhù-í núú Tátá-ó Dütú Ndióxí ndíhí núú Xítóhó Jesucristú sá ná chĩndee chitúu ñaha-gá xii-ndo, te ducaⁿ ndí nduú-gá ná cáda te ío váha cuu iní-ndó cùndecu-ndo.

Té Páblú càháⁿ ndíhí-dé Yá Ndióxí cuendá nchaa ñáyiú ndècu ichi-gá

³ Te ndí tnahá òré ndácú iní ñáhà-í xii-ndo, te ndácáⁿ táhù-í núú Tátá-ó Dütú Ndióxí sá ndécú-ndó ichi-gá. ⁴ Te ndí tnahá òré ducaⁿ quide-í te ío cùdí iní-í càháⁿ ndíhí-í-gá cuendá-ndó. ⁵ Chi ndéé cùtnáhá ní sándáá iní-ndó-gá ní ngúita-ndo tnahá-ndó quide váha-ndo ndècu-ndo cuendá sá quĩndáá iní ñáyiú tnúhu Xítóhó Jesucristú. ⁶ Te yúhú sàni ndáá iní-í sá Yá Ndióxí Yaá ní quesaha chĩndee ñaha xii-ndo quide váha-ndo ndècu-ndo, te diu-ni-gá chĩndee ñaha-gá xii-ndo càda váha-ndo cùndecu-ndo ndéé ná sàá nduu quixi tucu Xítóhó Jesucristú. ⁷ Te ducaⁿ tnahí tàù-xi cani iní-í sá cúú-xi-ndó, chi ío cùu iní ñáhà-í xii-ndo. Te tnahá-ndó ío chĩndee chitúu ñaha Yá Ndióxí xii-ndo ndècu-ndo, te diu-ni ducaⁿ chĩndee ñaha-gá xii-ndo tnahá-ndó cuéi vitna yìhí-í vecaá, te diu-ni

ducaⁿ chĩndee ñaha-gá xii-í cuéi òré cuáháⁿ-í núú cué ñáyiú ñá túú tnahá iní tnúhu-gá, chi nihí-í tnúhu nàdanhocáva-í núu ná tnúhu càháⁿ-yu cuendá-gá, te nchaa ñáyiú xáhaⁿ-í xii-yu sá tnúhu-gá cúú-xi tnúhu ndáá cuítí. ⁸ Te mee Yá Ndióxí náhá ndáá-gá sá yúhú ío cùu iní ñáhà-í xii-ndo dàtná cúú iní ñáhá mée Xítóhó Jesucristú xii-o. ⁹ Te xicáⁿ táhù-í núú Yá Ndióxí sá díú-gá ná chĩndee ñaha-gá xii-ndo te uuⁿ-gá cuita cuu iní tnahá-gá-ndó quíhíⁿ, te ducaⁿ ío váha cuita cutnùnì iní-ndó nchaa nacuaá sàni iní-gá cada-ndo, te ducaⁿ ío váha cuita cutnùnì tucu iní-ndó nàcuáa cundecu-ndo. ¹⁰ Te ducaⁿ cùtnunì tucu iní-ndó nchaa sá ío-gá váha xini ñuhu-xi cada-ndo, te ducaⁿ te cuu-ndo ñáyiú cada mee-ni sá váha, te ducaⁿ ñá túú tnahí ná cùmánì-ndó núú Yá Ndióxí ndéé ná sàá nduu quixi tucu Xítóhó Jesucristú. ¹¹ Te diu-ni Xítóhó Jesucristú chĩndee ñaha-gá xii-ndo càda-ni-ndo nchaa núú sá váha nàcuáa cuinì Yá Ndióxí. Te sá ducáⁿ ná càda-ndo te ío cada càhu-ndo-gá, te nchaa dava-gá ñáyiú càháⁿ váha-yu cuendá-gá.

Xítóhó Jesucristú ío cùnuu-gá ndécú ndíhí-gá té Páblú

¹² Te nchaa nchòhó ñáyiú ndècu ndíhí-í ichi Xítóhó Jesucristú na càhí tnúhu-í xii-ndo sá úúⁿ-gá tá xité nuu tnúhu-gá vitna yìhí-í vecaá. ¹³ Te nchaa cue téé cùu sandadú xĩndecu vechiúⁿ núú ndécú téé cùnuu xinì-güedé sá sá cuendá sá càháⁿ-í tnúhu Xítóhó Jesucristú duha yìhí-í vecaá, te diu-ni ducaⁿ sá xinì nchaa dava-gá ñáyiú sá sá càháⁿ-í tnúhu-gá duha yìhí-í vecaá. ¹⁴ Te cuendá sá dúhá yìhí-í vecaá xĩáⁿ ío-gá vai ñáyiú ndècu ichi Yá Ndióxí ta cùtnunì-gá iní-yu sá cúú-gá ñⁿ Yaá ío quide ndáá, te uuⁿ-gá tá cùyí-yu càháⁿ-yu tnúhu-gá, te ñá túú tnahí-gá yúhú-yu càháⁿ-yu.

15 Te na cächí-í tnúhu ndáá-í xii-ndo sã dãva ñáyiú cãháⁿ-yu tnúhu Xítohó Jesucristú cuendá-ni sã cúú cuèdú iní ñãhã-yu xii-í sã ïo chindee ñaha-gã xii-í cãháⁿ-í tnúhu-gã. Te ducaⁿ quidè-yu chi cuiní-yu nàà ndihí ñãhá-yu xii-í, dico davã-yu chi ïo vãha sãni iní-yu cãháⁿ-yu tnúhu-gã. 16-17 Te ñáyiú-ãⁿ cãháⁿ-yu tnúhu-gã chi cùu iní ñãhã-yu xii-í, te sa nãhá-yu sã sã cuendã sã cãháⁿ vãhá-í cuendã tnúhu-gã núú ñáyiú ñã túú tnãhá iní tnúhu-gã, cuendã xíãⁿ yíhi-í vecãã. Te dava-gã-yu cãháⁿ-yu tnúhu Xítohó Jesucristú cuendá-ni sã cuiní-yu cuu sã vãha xii mèe-yu, te ñã díú sã cãháⁿ-yu cuendã sã sãni vãha iní-yu. Te ducaⁿ quidè-yu chi cuendã cuiní-yu sã nãndi-gã cada ñaha-güedè xii-í. 18 Dico ïo cudíí iní-í sã cãháⁿ-yu tnúhu Xítohó Jesucristú cuèi cùu vãha iní-yu àdi ñã túú cùu vãha iní-yu cãháⁿ-yu.

Te ñu-ni ducaⁿ cudíí iní-í núú cuãháⁿ núú vèxi. 19 Te cùtnuní iní-í sã sã cuendã nchaa sã quidè ñaha-güedè xii-í, cuendã xíãⁿ cada vãha ñaha Yã Ndiöxí xii-í, chi nchòhó ïo cãháⁿ ndihí-ndo-gã cuendã-í, te Espiritú ní taxi Xítohó Jesucristú ndécú ndihí-o ïo chindee ñaha-xi xii-í. 20 Te cuiní-í sã ñã túú tnãhí ná cumãni-í núú Yã Ndiöxí cuendã sã vã cúú cãháⁿ núú-í, te cùtnuní iní-í sã díú-gã chindee ñaha-gã xii-í. Te cuiní tucu-í sã ïo cuyí-í cãháⁿ-í tnúhu-gã vitna dàtnã tá quidè-í vèxi, te ducaⁿ ïo cada nínu-í Xítohó Jesucristú cuèi vitna ñini ndècu-í ñuyúú-a te cuèi na cùú-í ducaⁿ-ni càda nínu-í-gã. 21 Te ñini ndècu-í ñuyúú-a te Xítohó Jesucristú ïo cùnnu-gã ndécú ndihí ñaha-gã xii-í, te na sãã nduu cùú-í te ïo-gã vãha tnãhá-í chi nucúndecu-í ndihí-gã. 22 Te núu na cùndecu-gã-í ñuyúú-a te cada-gã-í chiuⁿ sã cúú-xí Yã Ndiöxí, te ñã cùtnuní iní-í nãsa cada-í núú sã cùndecu-í àdi sã cùú-í. 23 Te ïo vãi saní iní-í te cuiní-í

cuú-í chi ïo-gã vãha cundecu-í núú ndécú Xítohó Jesucristú. 24 Dico sã cúú-xí nchòhó chi ïo xini ñuhu-xi cundecu-í. 25 Te cùtnuní ndáá iní-í sã ñⁿ tnúhu ndáá cãháⁿ-í, te cùtnuní tucu iní-í sã cùndecu-ni-í cundecu ndihí ñaha-í xii-ndo nchãã-ndo cuendã chindee ñaha-í xii-ndo cuíta quindáã-gã iní-ndó Xítohó Jesucristú quíhiⁿ, te ducaⁿ ïo cudíí iní-ndó cùndecu-ndo. 26 Te ducaⁿ te uuⁿ-gã cachí-ndó sã ïo cãhnu cuu Xítohó Jesucristú cuendã sã ñí dácãcu ñaha-gã xii-í ndécú ndihí ñaha-í xii-ndo.

27 Te xini ñuhu-xi cada-ndo nchaa naçuãã cãháⁿ tnúhu Xítohó Jesucristú. Te núu ní ndacu-í vèxi coto ñaha-í xii-ndo, te dàvã-ãⁿ quini ndáá-í sã ndécú-ní-ndó ïchi Xítohó Jesucristú. Dico núu ñã túú ní ndàcu-í quixi coto ñaha-í xii-ndo ñã, te ñu-ni níhi-í tnúhu sã ndécú-ní-ndó ïchi-gã, te níhi tucu-í tnúhu sã ñⁿ-ní cùu-ndo ndecu-ndo, te níhi tucu-í tnúhu sã ñⁿ-nuu nducu ndee-ndo cãháⁿ-ndó tnúhu Yã Ndiöxí núú ñáyiú, tnúhu sã sãndáã iní-ndó. 28 Te ñã túú yùhú-ndó nchãã sã quidè ñaha ñáyiú cùu úhú iní ñãhá xii-ndo, te sã dúcãⁿ quidè-ndo ñã túú yùhú-ndó nchãã sã quidè ñãhá-yu xii-ndo, te ndixi túu iní-yu sã nchòhó ndécú-ndó ñⁿ ïchi núú nãnihí tàhú-ndó, te ñáyiú-ãⁿ cuíta nihnú-yu, chi ducaⁿ ñí cachí Yã Ndiöxí cunduu. 29 Te mee Yã Ndiöxí ní taxi-gã tnúhu ndee ìní sã quindáã iní-ó Xítohó Jesucristú, te ñã díú-ní sã quindáã iní-ó-gã chi tnãhá ndoho-o cuendã-gã. 30 Te tnãhá nchòhó ndóhó-ndó cuendã-gã vitna, te nchòhó ní xini núú-ndó nãçuãã ní ndoho-í, te vitna ñihí-ndó tnúhu nchaa nãçuãã ndòho tucu-í.

2

Xítohó Jesucristú ñã túú ní quidè nínu-gã mèe-gã dico Yã Ndiöxí ní quidè nínu ñaha xii-gã

1 Te Xítohó Jesucristú dácàhu iní ñáhá-gă xii-ndo nàcuáa cundecu-ndo, te cùu iní ñáhá-gă xii-ndo nàcuáa cuu vâha iní-ndó cundecu-ndo, te ndècu ndîhi-ndo Espíritú Yă Ndiôxí, te ío cùndahú iní tnáhá-ndó. 2 Te xiăⁿ nũu cãháⁿ-í dóho-ndo sã ío cuu ñⁿnuu-ni-ndo cundecu-ndo nacuáa ío-gă cudîí ñí-í, te ñⁿ-ni cùu iní tnáhá-ndó, te ñⁿ-ni cãni iní-ndó, te ñⁿ-ni càda-ndo. 3 Te vâ cadá ññu-ndo mēe-ndo nducu-ndo mee-ni sá cùú-xí mēe-ndo, chi cunduu ndàhú iní-ndó, te caní iní-ndó sã tnàha ñâyiu-ndo ío-gă cùnũu-yu dácúxí mēe-ndo. 4 Te ni vâ cãní iní-ndó nducu-ndo mee-ni sá vâha sá cùú-xí mēe-ndo, chi nducu-ndo sá cùú-xí tnàhá cuendá tnàha ñâyiu-ndo.

5 Te ío vâha caní iní-ndó nàcuáa cundecu-ndo dàtná quidé mēe Xítohó Jesucristú. 6 Te ñⁿ-ni cùu Xítohó Jesucristú ndîhi Yă Ndiôxí. Te cuēi ducaⁿ dico mee Xítohó Jesucristú ní sani iní-gă sã ñà túú cùyica cundecu-gă taxi tnùní-gă ndîhi Yă Ndiôxí. 7 Te ní dáñá-gă sá cùnũu-gă andiū te ní quixi-gă ñuyú-a ní cuu-gă ñⁿ ñâyiu, te ní quide-gă dàtná quidé ñⁿ tēe xñu cuechi. 8 Te ní cuu-gă ñⁿ tēe dàtná ndãa cue tēe xñdecu ñuyú-a, te ní cuu-gă ñⁿ tēe ío ndàhú iní-xi chi ñà túú ní quide nínu-gă mēe-gă, te ní sãndáá iní-gă ní quide-gă nchaa nàcuáa ní xáhaⁿ Yă Ndiôxí xii-gă cùtnàhá ní quixi-gă ñuyú-a. Te sá dúcáⁿ ñ sãndáá iní-gă xiăⁿ ní xíhí-gă núú cùrúxí. 9 Te xiăⁿ ío ní quide nínu ñaha Yă Ndiôxí xii Xítohó Jesucristú cuendá ío cunuu-gă. Te ní xáhaⁿ Yă Ndiôxí xii Xítohó Jesucristú sá cùú-gă Xítohó nchaa ñâyiu ndècu ñuyú-a. 10 Te ducaⁿ ñ quide Yă Ndiôxí cuendá nchaa Espíritú ndécú andiū, ndîhi nchaa ñâyiu ndècu ñuyú-a, ndîhi nchaa ñâyiu ní xíhí ngũñí xít-yu ndîhi nchaa espíritú-án te cachí-yu ndîhi-xi sá ío cãhnu cuu Xítohó Jesucristú. 11 Te ncháa-yu cachí-yu

sá Xítohó Jesucristú cùú-gă Yaá táxí tnùní. Te sá dúcáⁿ càdã-yu, te quide cahnú-yu Dútú Ndiôxí.

Ñâyiu ndècu ichi Xítohó Jesucristú cùú-yu dàtná ñⁿ ñuhú

12 Te xiăⁿ nũu nchaa nchòhó ñâyiu ío cùu iní-í cuiní-í sá quindáá iní ñáhá-ndó xii-í dàtná ní quide-ndo cùtnàhá ní xñdecu ndîhi ñaha-í xii-ndo, chi dává-án ñà túú tnàhí ní dáña ndeé-ndó ní sãndáá iní ñáhá-ndó xii-í. Te cuiní-í sá úúⁿ-gă quindáá iní ñáhá-ndó xii-í vitna ñà túú ndècu ndîhi ñaha-í xii-ndo. Te ío nducu ndeé-ndo cada-ndo nchaa nacuáa tãu-xi cunduu ndeé ná sãá nduu ndũu tãhú-ndó cundecu-ndo ndîhi Xítohó Jesucristú, te ío canehe-ndo sã yíñũhu núú-gă. 13 Te Yă Ndiôxí ío vâha dácãhu iní ñáhá-gă xii-ndo càda-ndo nchaa nacuáa cuiní mēe-gă, te diū-ni mee-gă chindēe ñaha-gă xii-ndo dũcaⁿ quide-ndo.

14 Te vâ cãní iní-ndó nã tnũhu cãháⁿ-ndó cuendá ñâyiu, te ní ñà túú nãndi tnũhu cùtnàha-ndo ndîhi-yu, 15 te ducaⁿ te cuu-ndo ñâyiu ñà túú cuēchi-xi núú Yă Ndiôxí. Te nchòhó ñâyiu cùu déhe Yă Ndiôxí, ñà túú tnàhí-gă ná cumání-ndó núú-gă níni ndècu-ndo tnuú nchaa ñâyiu ndècu ichi cuehé ichi duha ñuyú-a, ñâyiu cuihna iní-xi. Te cuu-ndo dàtná chódíní sá dáyehé niú nee, 16 te ducaⁿ chi dãcuaha-ndo ñâyiu tnũhu Yă Ndiôxí tnũhu sá cãháⁿ nàcuáa naníhí tãhú-yu. Te nũu ducaⁿ-ni na càda-ndo te òrè ná sãá nduu càda ndáá Xítohó Jesucristú nchaa yíca cuēchi ñâyiu, te dává-án vâ cùú cãháⁿ núú-í, chi ñà túú dió ducaⁿ ní sãhni iní-í cada-í nchaa chiúⁿ ní tãhú-gă. 17 Te nchòhó ío vâha quide-ndo ndecu-ndo ichi Yă Ndiôxí chi sãndáá iní-ndó-gă, te yúhú cahni ñaha-güedé xii-í cuendá nchaa sá vâha quide-ó. Te xiăⁿ ío cùdîí iní-í te cùdîí tucu iní-í dàtná cùdîí iní-ndó cuendá nchaa sá vâha quide-ndo. 18 Te diū-ni ducaⁿ ío chí

cudíí iní dàtná cudíí iní mée-í cuendá nchaa sá yáha-í ndécú-í.

Té Timùteú ndihi té Epafròditú

19 Te núu Xítohó Jesucristú ná cächí-gá te ndíhi-ni tendaha-í té Timùteú quixi-dé quixi coto ñaha-dé xii-ndo nàcuáa cudíí iní-ndó. Te òré ndixi-dé canaha-dé tnúhu ndixi núu nása cùu ndecu-ndo, te tnàhá yúhú ío cudíí iní-í tucu. 20 Te núu ncháá cuè téé ndècu ndíhi-í te ìⁿndi-í té Timùteú-a cùu-dé téé ío váha sàni iní-xi dàtná sàni iní-í, chí diu tnàhi-ni-dé ío sàni iní-dé núu nása ndècu-ndo. 21 Chí dava-gá-güedé mee-ni sá cùu-xí mée-güedé ío sàni iní-güedé, te ñá túú sàni iní-güedé cada-güedé chiuⁿ tahu Xítohó Jesucristú. 22 Te nchòhó sa xini-ndó sá té Timùteú-a cùu-dé ìⁿ téé quide váha chí nándi sá tá yáha-dé véxi te quide ndee iní-dé. Te cùu-dé dàtná ìⁿ déhe-í ndécú ndíhi ñaha-dé xii-í xínú cuèchi-ndí núu Xítohó Jesucristú cáháⁿ-ndí tnúhu-gá núu ñáiyu. 23 Te òré ná cùtnuní núu nása cada ñaha-güedé xii-í te ndíhi-ni tendaha-í-dé quixi coto ñaha-dé xii-ndo. 24 Te sàni iní-í sá Xítohó Jesucristú cada-gá te tnàhá mée-í ío ndíhi quixi coto ñaha-í xii-ndo.

25 Te tnàhá sàni iní-í sá ío xini ñuhu-xi tendaha-í té Epafròditú téé ndècu ndíhi-o ichi Xítohó Jesucristú ndixi coto ñaha-dé xii-ndo, chí tnàhá-dé quidé-dé chiuⁿ-gá te quide ndee iní-dé tnàhá-dé nándi yáha-dé sá cuendá-gá, te diu mee-ndo ní tendaha-ndo-dé véxi-dé cuendá coto ñaha-dé xii-í. 26 Te ducaⁿ cuíní-í tendaha-í-dé ndixi-dé chí mee-dé ío sàni iní-dé ndixi cáháⁿ ndíhi ñaha-dé xii-ndo, te ío ndíhú iní-dé sá ní ñíhí-ndó tnúhu sá cùhú-dé ní cùu. 27 Te ndáá sá ní cuhú-dé chí luha ndiquiⁿ-ná cuú-dé ní cùu, dico Yá Ndiòxí ní cundáhú iní ñáhá-gá xii-dé ní quide tátna ñaha-gá te ní ndúha-dé. Te ñá díú-ní mée-dé ducaⁿ ní cundahú iní ñáhá-gá xii-dé chí tnàhá yúhú ío ní cundáhú

iní ñáhá-gá xii-í, chí núu ní xíhí-dé te ío-gá ndíhú iní-í ní cùu. 28 Te xíáⁿ ío ndíhi cuíní-í tendaha-í-dé ndixi-dé cuendá òré nasáá-dé núu-ndó te ío cudíí iní-ndó, te ducaⁿ yúhú ñá túú-gá ná cani iní-í. 29 Te òré nasáá-dé te ío cudíí iní-ndó nàqueheⁿ cuendá-ndó-dé, te ducaⁿ ío ndacáⁿ táhú-ndó núu Xítohó Jesucristú cuendá-dé. Te ío canehe-ndo sá yíñuhu núu nchàa cue téé quide datná quidé-dé. 30 Chí téé-a sa luha ndiquiⁿ-ná cuú-dé ní cùu sá xínú cuèchi-dé núu Xítohó Jesucristú, te ní sàni iní-dé sá ñá túú ná cada-xi cuèi na cùu-dé ní quide-dé nchaa chiuⁿ sá cùmáni cada-ndo cuendá-í ní cùu.

3

Ñáiyu cundáá núu Yá Ndiòxí

1 Te vitna nchaa nchòhó ñáiyu ndècu ndíhi-í ichi Xítohó Jesucristú cáháⁿ ndáhú-í núu-ndó sá ío cudíí iní-ndó sá yíndàha ñaha-gá xii-ndo. Te yúhú ñá túú cùu dusaⁿ-í tee tucu-í nchaa tnúhu sá sá ní dánèhé ñáhá-í xii-ndo, chí cùu-xi tnúhu sá ío chíndee ñaha-xi xii-ndo. 2 Te ío quíhi iní-ndó vǎ cáda cuendá-ndó ní ìⁿ tnúhu cáháⁿ cue téé ío cuihna iní-xi ñá túú tnàhi cuíní cada sá váha, chí cue téé-áⁿ néhé-güedé iní iná chí cächí-güedé sá ncháá cuè téé xini ñuhu-xi cuáha-güedé seña ñíi-güedé cuendá ducaⁿ cùdiu-güedé núu Yá Ndiòxí. 3 Dico nchoo chí cùdiu-o núu Yá Ndiòxí cuèi dava-o sá ní ngúndecu seña ñíi-o te dava-o ñáhá, chí Espíritú-gá chíndèe ñaha-xi xii-o quide-o nchaa nacuáa tàu-xi cunduu cuendá cuu càhnu-gá. Te ío cudíí iní-ó cächí-ó sá ío càhnu cuu Xítohó Jesucristú, te ñá túú sàni iní-ó sá sá cuendá nchaa sá váha quide-o cùdiu-o núu Yá Ndiòxí. 4 Te núu dicó cuendá nchaa sá váha quide-o cùdiu-o núu Yá Ndiòxí, te yúhú sa ama-gá cùdiu-í núu-gá cuendá nchaa sá ní quide-í ní cùu te núu dicó ducaⁿ. Te ío cue téé cächí-güedé sá cùdiu-güedé

núú Yá Ndiöxí cuendá nchaa sá váha quide-güedé. Te yúhú uuⁿ-gá ducaⁿ cáháⁿ-í núu dícó sá cúú chí yúhú ní xídó-gá-í ní quide-í dàcúúxí dáva-gá-güedé. ⁵ Te núú úná-ni nduu sá ní cacu-í te ní sáha-güedé sèñá ñi-í, te yúhú cù-í téé isràèl, te mei ñàní tnàhá ndíi Benjàmín téé ní xíndecu ndéé sanaha cùu-í. Te cáháⁿ-í tnúhu hèbreú tnúhu cáháⁿ tātá-í ndíhi nánà-í, te ní cundihi-í nchaa cue téé cùu fariséú, te ní cànchicúⁿ nihnu-í nchaa nàcuáa ní cáháⁿ ndíi Moisés dàtná xíquide mee-güedé. ⁶ Te yúhú ní sani iní-í sá ñⁿ ichi ndáá ndécú-í ní cùu, te ío ní cuini-í cunu cuechi-í núú Yá Ndiöxí, núu xiáⁿ nándi sá ní quide-í nchaa ñáyiú ndècu ichi Xítohó Jesucristú, te vá yóo ñⁿ ní xóo cúñaha ñⁿ tnúhu xii-í cachí-yu sá ñà túú quide-í nàcuáa ní cáháⁿ ndíi Moisés ní cùu. ⁷ Te nchaa sá sání iní-í sá ío nándíhi nchicúⁿ nihnu-í ní cùu, ní cutnùní iní-í sá ñà túú tnàhí chindee ñaha-xi nacuáa cundáá-í núú Yá Ndiöxí, núu xiáⁿ duuⁿ duuⁿ ní xehndé iní-í sá vá chindèe ñaha-xi cuendá sá ní cuini-í cundecu ndíhi-í Xítohó Jesucristú. ⁸ Te nchaa sá càchí ñáyiú chindee ñaha cundáá-ó núú Yá Ndiöxí ní cutnùní iní-í sá ñà túú chindee ñaha-xi. Te yúhú ní cutnùní iní-í sá ío-gá váha tnahá tnúhu-o ndíhi Xítohó Jesucristú. Te nchaa sá sání iní-í chindèe ñaha xii-í ní cùu, ñà túú-gá sàndáá iní-í sá chindèe ñaha-xi vitna chí ní cutnùní iní-í sá ñà túú nándíhi-xi. Te ducaⁿ quide-í ñà túú-gá sàndáá iní-í nchaa xiáⁿ sá chindèe ñaha-xi, chí cuini-í sá úú-gá cuita tnahá tnúhu-í ndíhi Xítohó Jesucristú quíhíⁿ, ⁹ te cuu ñⁿ-nuu-í ndíhi-gá, te ducaⁿ-ni cundáá-í núú Yá Ndiöxí dàtná cundáá-í vitna, dico ñà díú cuendá sá nchicúⁿ nihnu-í nàcuáa ní cáháⁿ ndíi Moisés ní cùu, chí cuendá sá sàndáá iní-í Xítohó Jesucristú. Te Yá Ndiöxí ní quide-gá cundáá-í núú-gá, te ducaⁿ chí ní sàndáá iní-í Xítohó Jesucristú. ¹⁰ Te cuini-í

cutnùní iní-í nchaa nàcuáa sání iní Xítohó Jesucristú, te cuini-í sá ío chindee ñaha-gá, te diu-ni-gá cúú-gá Yá ní xíhí te ní ndoto-gá, te ducaⁿ cuini-í cada-gá cuendá cada-í nchaa nàcuáa cuini-gá. Te cuini-í tnàhá-í ndoho-í dàtná ní ndoho-gá. Te yúhú cuini-í sá vá cáda-í ní ñⁿ sá ñà túú tnàhá iní Yá Ndiöxí, chí diu cuendá-áⁿ ní xíhí Xítohó Jesucristú. ¹¹ Te cuini-í sá Yá Ndiöxí cachí-gá te tnàhá-í ndoto na sáa nduu ndòto nchaa ñáyiú sa ní xíhí ní xíndecu ichi-gá.

Cada-o nchaa nacuáa tàú-xi cunduu cuendá níhí-ó sá ndúú tãhú-ó

¹² Te cùmání-gá cada-í nchaa nàcuáa cáháⁿ-í-a, te cumání-gá cada-í nchaa nàcuáa cáháⁿ Yá Ndiöxí cuendá sá ñà túú-gá ná cumání-í núú-gá. Te ío ndùcu ndee-í nchicúⁿ nihnu-í quidè-í nàcuáa ducaⁿ ñà túú-gá ná cumání-í núú-gá, chí diu cuendá-áⁿ ní cáháⁿ ñáhá Xítohó Jesucristú xii-í. ¹³ Te nchaa nchòhó ñáyiú ndècu ndíhi-í ichi Xítohó Jesucristú càchí tnúhu-í xii-ndo sá cùtnùní ndáá iní-í sá vitná cùmání-gá cada-í nchaa nàcuáa ñà túú-gá ná cumání-í núú-gá. Te ní níhí-í ñⁿ sá ío xini ñuhu-xi cada-í te xiáⁿ quidè-í, te ñà túú-gá quidé cuendá-í nchaa sá ní xóo cada-í, te ío ndùcu ndee-í quidè-í nchaa nàcuáa cáháⁿ Yá Ndiöxí. ¹⁴ Te ndùcu ndee vihi-í nchicúⁿ nihnu-í quidè-í nchaa nàcuáa cáháⁿ-gá, te diu-ni ducaⁿ cada-í ndéé ná sáa nduu sáá-í núú ndécú-gá taxi-gá sá ndúú tãhú-í. Te ducaⁿ tnàhí sa ní cáháⁿ ñáhá-gá xii-o cundecu-o ndíhi-gá, te ducaⁿ ní cáháⁿ ñáhá-gá xii-o sá cuendá Xítohó Jesucristú chí tnàhá tnúhu-o ndíhi-gá.

¹⁵ Te nchaa nchòhó ñáyiú quide váha ndècu ichi Yá Ndiöxí xini ñuhu-xi caní iní-ndó dàtná sání iní-í-a, àdi núu dáva-ndo ñà túú sání iní-ndó dàtná sání iní-í-a, dico mee Yá Ndiöxí dandixi túú-gá iní-ndó te cutnùní iní-ndó nàcuáa cada-ndo.

16 Te xini ñuhu-ni-xi cada-o nchaa nacuaa ta quide-o véxi.

17 Te nchaa nchòhó ñáyiú ndècu ndihí-í ichi Xítohó Jesucristú càháⁿ-í dóho-ndo sã cáncñícúⁿ nihnu-ndo càda-ndo datná quidé-í. Te cundehe-ndo nàcuáa quide nchaa ñáyiú sa nchícúⁿ nihnu nchaa nàcuáa dānehé ñāhā-í xii-ndo cuendá ducaⁿ càda-ndo tnahā-ndó. 18 Te sa ní cuu vāi xito cachí tñúhu-í xii-ndo sã íó ñáyiú ñā túú tñāhí cuu vāha iní-xi sã ní xihí Xítohó Jesucristú núú cùrúxí cuendá sã nānihí tǎhú-ó, Te ndihí ndute núú-í dāndācu iní ñāhā-í xii-ndo cuendá-yu. 19 Te sáá nduu te nchaa ñáyiú ducaⁿ xīquide-áⁿ cuíta nihnú-yu, chi mee-ni nchāa sã cuéhé sã dúhá ñūhu iní-yu te diu-ni nchaa xǎⁿ cúnúu quidé-yu, te cucahaⁿ núú-yu cuendá nchaa sã quidé-yu núú dicó sã cúú, dico ñāhá chi da quide cahnú-yu mēe-yu cuendá nchaa xǎⁿ. Te mee-ni nchāa sã íó ñuyúú-a ñūhu iní-yu. 20 Dico nchoo chi andiú ndècu núú cúú ñūú-ó, te ndètu cahnu-o sáá nduu quixi tucu Xítohó Jesucristú nacuaca ñaha-gǎ xii-o. Te diu-ni-gá cúú-gǎ Yaá ní dácācu nihnu ñaha xii-o núú úhú núú ndāhú. 21 Te yiqui cūñú-ó chi vá cúdí-xi cundecu-xi dátñá cáá-xí vitna, dico mee Xítohó Jesucristú nadama-gá yiqui cūñú-ó te ndada-gá dátñá ní nduu yiqui cūñú mēe-gǎ cútñahá ní ndoto-gá. Te ducaⁿ càda-gá chi ndācu-gá quidé-gǎ nchaa sã vāha càchí iní-gá, te ducaⁿ tàxi tñuní-gá nchaandi túhú sã íó.

4

Ío cudíí iní-ó sã ndécú-ó ichi Xítohó Jesucristú

1 Te nchaa nchòhó ñáyiú ío cùu iní-í ndécú ndihí-í ichi Xítohó Jesucristú ío culní-í càháⁿ ndihí ñaha-í xii-ndo. Te ío cudíí iní-í cuendá nchaa sã vāha quide-ndo chi ñā túú ní xita chiúⁿ Yá Ndióxi ní quide-í sã cúú-xí-ndó, te diu-ni nchòhó ñáyiú ío cùu iní-í càháⁿ-í dóho-ndo sã

cáncñícúⁿ nihnu-ni-ndo ichi Xítohó Jesucristú.

2 Te yòhó tá Vòdiá ndihí yòhó tá Síntiqué càháⁿ ndāhú-í núú-ndó sã cúú ñⁿnuu-ndo cundecu-ndo ichi Xítohó Jesucristú. 3 Te yòhó téé cūndihí-í quide ndáá quidé nchāa chiúⁿ quide-í, càháⁿ ndāhú-í núú-n sã chindēe tñúhu-n úú ñáyiú dihí-áⁿ cuendá sã ná cùu ñⁿnuú-yu cundecú-yu, chi cútñahá ní xindecu ndihí ñāhá-yu xii-í ío ní chindee ñāhá-yu xii-í, ndihí té Clémenté, ndihí nchaa dava-gá-yu ní quide-ndí chiúⁿ Xítohó Jesucristú, te nchaa ñáyiú-áⁿ sa yòdo tñuní-yu núú tütú Yá Ndióxi sã ndúú tǎhú-yu cundecú-yu ndihí-gá ni caa ni quíhíⁿ.

4 Te nchaa-ni nduu ío cudíí iní-ndó sã ndécú-ndó ichi Xítohó Jesucristú. 5 Te càháⁿ-ni tucu-í dóho-ndo sã cudíí ndísa iní-ndó! 5 Te ío vāha cuu iní-ndó càháⁿ ndihí-ndo ñáyiú cuendá ná cútñuní iní-yu sã cúú-ndó ñáyiú vāha iní-xi, chi sa ta cùyatni nduu quixi tucu Xítohó Jesucristú.

6 Te ñā túú tñāhí ná cani iní-ndó te núu nása cùu ndecu-ndo, chi càháⁿ ndihí-ndo Yá Ndióxi cuendá sã ná chindee ñaha-gá xii-ndo. Te ío ndacáⁿ tǎhú-ndó núú-gǎ. 7 Te núu ducaⁿ na càda-ndo te Yá Ndióxi cada-gá te ío vāha cuu iní-ndó cūndecu-ndo. Te nchoo ñáyiú ñā túú cūtñuní iní-ó nása quide-gá ndéé ducaⁿ ío vāha cùu iní-ó, te ducaⁿ ío vāha cùu iní-ó chi cùu ñⁿnuu-o ndihí Xítohó Jesucristú.

Mee-ni sã vāha cuhuⁿ iní-ó

8 Te càháⁿ ndāhú tucu-í núú nchāa nchòhó ñáyiú ndècu ndihí-í ichi Xítohó Jesucristú sã mēe-ní sã vāha cuhuⁿ iní-ndó. Te xini ñuhu-xi cuhuⁿ iní-ndó mēe-ni nchaa tñúhu ndáá, ndihí nchaa tñúhu yíñūhu, ndihí nchaa tñúhu sã ío cudíí iní-ó, ndihí nchaa tñúhu sã ío vii ío vāha cuáháⁿ, ndihí nchaa tñúhu sã ñā túú ñūhu tnahá tñúhu cuéhé, ndihí nchaa tñúhu sã càchí ñáyiú vāha,

ndihi nchaa dava-gá tnúhu sá sání iní mée-ndó sá ïo váha te ðiu-ni nchaa xiãⁿ cuhuⁿ iní-ndó.

⁹ Te cútnàhá ní xindecu ndihi ñaha-í xii-ndo ní ðànèhé ñàhá-í nàcuáa cada-ndo te ní sándáá iní-ndó. Te xiãⁿ càháⁿ-í dóho-ndo sá vâ dáñá ndéé-ndó càda-ndo, te ðiu-ni ducaⁿ vâ dáñá ndéé-ndó càda-ndo nchaa nacuáa ní quide-í ní xiní-ndó. Te núu ducaⁿ na càda-ndo te Yá Ndiòxí Yáá quidé ïo váha cùu iní-ó ndècu-o cundecu ndihi ñaha-gá xii-ndo.

Ñáyiú ñuú Filipú ndécú ichi Xítohó Jesucristú sãñàhá-yu sá ndúú tãhú tã Pãblú

¹⁰ Te cùdíí víhí iní-í ndacáⁿ tãhù-í núú Xítohó Jesucristú sá ní ndacu iní ñàhá-ndó xii-í, dico ñã díú sá ñã túú ñùhu iní ñàhá-ndó xii-í chí ðicó sá ñã ñihí-ndó nàcuáa cada-ndo chindee ñaha-ndo xii-í ní cùu. ¹¹ Te ñã díú sá dúhá càháⁿ-í te caní iní-ndó sá càchí tnúhu-í xii-ndo sá ïo ñⁿ sá cùmání xii-í, chí yúhú cùu váha-ni iní-í núú ïó xii-í àdi ñã túú ïó. ¹² Te xini-í cunduu ndàhù-í, te xini-í cunduu cuica-í, te xini-í caxi-í ndahá xiti-í, te xini-í cuú-í docó, te xini-í nàcuáa quide-xi oré ñã túú vèdana ná ndécú ndihi-o, te xini-í nàcuáa quide-xi oré xidó ndécú ndihi-o. Te ducaⁿ ní cutúha-í quidè-í cuendá nchaa nàcuáa ta yãha-í véxi. ¹³ Te nchaa ndacu-í quidè-í chí Xítohó Jesucristú chindee ñaha-gá xii-í. ¹⁴ Te nchòhó ïo váha ní quide-ndo ní cundàhú iní ñàhá-ndó xii-í ní chindee ñaha-ndo vitna ndecu ndihi-í tnúndòho.

¹⁵ Te nchòhó cue ñáyiú ñuú Filipú sa nàha-ndo nacuáa ní cuu cútnàhá ní ngúíta-í càháⁿ-í tnúhu Xítohó Jesucristú ðistrítú Macèdoniá, te cútnàhá ní ndee-í ðistrítú-áⁿ te ðiu tnàhí-ni nchòhó ní taxi-ndo sá ndúú tãhù-í, te nchaa ñáyiú ndècu ichi Xítohó Jesucristú dava-gá xichi ñã túú tnàhí ní chindee ñaha-yu xii-í. ¹⁶ Te cuèi cútnàhá ní xindecu-í ñuú Tesàlónicá titní xito ní tendaha-ndo sá ndúú tãhù-í

sá ní cutnùnì iní mée-ndó ní xiní ñùhu-í. ¹⁷ Te vâ caní iní-ndó sá sá dúhá càháⁿ-í te cuini-í nãndi-gá taxi tãhù-ndó, te duha càháⁿ-í chí Yá Ndiòxí ïo-gá vâi sá váha cada ñaha-gá xii-ndo sá dúcáⁿ quide-ndo. ¹⁸ Te ní xidó vâi nchaa sá xini ñùhu-í ndécú ndihi-í vitna, te ducaⁿ ïo vâi sá ndécú ndihi-í ní cuu chí ní tendaha tucu-ndo sá ndúú tãhù-í véxi ndihi té Epafròditú. Te tãhù-a cùu-xi datná ñⁿ tãhú sá ní sãha-ndo mee Yá Ndiòxí, te cùu vii cuu váha iní-gá sá dúcáⁿ ní quide-ndo. ¹⁹ Te núu ná cùú sá xini ñùhu-ndo, te mee Yá Ndiòxí ïo vâi taxi-gá chí ïo vâi sá ndécú ndihi-gá, te ducaⁿ càda-gá chí ndecu ndihi-o Xítohó Jesucristú. ²⁰ Te vitna nchaa-o chí ná càchí-ó sá ïo càhnu cuu Tátá-ó Dütú Ndiòxí ní caa ní quíhíⁿ. Te ducaⁿ na cunduu.

Tnúhu ndéé núú ní ndihi-ná

²¹ Te cúñaha-ndo sá ïo na càda ndee iní nchaa ñáyiú ndècu ichi Xítohó Jesucristú, ñáyiú cùu cuendá Yá Ndiòxí. Te tnàhá nchaa ñáyiú xindecu ichi Xítohó Jesucristú ndécú ndihi-í quidé ndèe iní ñàhá-yu xii-ndo. ²² Te nchaa ñáyiú cùu cuendá Yá Ndiòxí xínú cuèchi vehe té Cèsár tée yindaha cuéhé nacióⁿ quidé ndèe iní ñàhá-yu xii-ndo, ndihi nchaa dava-gá ñáyiú cùu cuendá-gá.

²³ Te Xítohó Jesucristú ïo na chindee chítuu ñaha-gá xii-ndo nchaa-ndo. Te ducaⁿ na cunduu. Te ïo chí càdá ndèe iní-nã vitna.

TUTÚ NÍ CADÚHA TÉ PÁBLÚ QUIHIⁿ NDAHA ÑÁYIU ÑUÚ CÒLOSÁ

*Té Páblú cadúha-dé tutú quíhiⁿ
ndaha ñáyiú xĩndecu ichi Xítoho Jesu-
crístú ndécú ñuú Còlosá*

¹ Yúhú té Páblú ní tendaha ñaha Yá Ndióxi càháⁿ-í tnúhu Xítoho Jesucristú núú ñáyiú chi ducaⁿ cuini méé Yá Ndióxi cunduu, te cadúha-í tutú-a ndihi té Timúteú ² cuendá daquixi-í ndaha nchòhó ñáyiú ñuú Còlosá, ñáyiú cùu cuendá Yá Ndióxi, ñáyiú quide ndáá ndécú ichi Xítoho Jesucristú, te xicáⁿ táhù-í núú Tátá-ó Dütú Ndióxi sá ïo na chĩndee chitúu ñaha-gá xii-ndo, te ducaⁿ ndí nduú-gá ná cadá te ïo váha cuu iní-ndó cundecu-ndo.

*Té Páblú càháⁿ ndihi-dé Yá Ndióxi
cuendá ñáyiú sãndáá iní ñáhá xii
Xítoho Jesucristú*

³ Te ducaⁿ-ni càháⁿ ndihi-ndí Yá Ndióxi Yaá cúú Tátá Xítoho Jesucristú ndacáⁿ táhú-ndí núú-gá cuendá nchaa nacuaa quide-ndo ndecu-ndo, ⁴ chi níhí-ndí tnúhu sá ïo sãndáá iní-ndó Xítoho Jesucristú, te ducaⁿ ïo cùu iní-ndó nchaa ñáyiú cùu cuendá Yá Ndióxi. ⁵ Te ducaⁿ quide-ndo chi sãndáá iní-ndó sã ndúú táhú-ndó cundecu-ndo núú ndécú Xítoho Jesucristú, te tnúhu-áⁿ ní níhí-ndó cutnàhá ní xĩndedóho-ndo tnúhu ndáá tnúhu Xítoho Jesucristú. ⁶ Te tnúhu Xítoho Jesucristú tá xité nuu-xi níhí ñuyú cuáháⁿ. Te vai ñáyiú ta sãndáá iní-yu cuáháⁿ, te ta quide-yu mee-ni sã váha cuáháⁿ ndécú-yu ichi-gá. Te nchòhó chi ndéé cutnàhá ní tecú dóho-ndo tnúhu-gá ní quesaha-xi ta cùu vai ñáyiú ñuú-ndó tá quide ndáá-yu núú-gá cuáháⁿ. Te dává-áⁿ ní cutnùní ndáá ndisa iní-ndó sã Yá Ndióxi

ïo chĩndee chitúu ñaha-gá xii-ndo. ⁷ Te ducaⁿ ní dánèhé ñáhá tẽ Ępafrás tée ïo cùu iní-ndí, chi tnàhá-dé ïo quide ndáá-dé xínú cuèchi-dé núú Xítoho Jesucristú quide-dé núú-ndí dácuàha ñaha-dé xii-ndo tnúhu-gá. ⁸ Te càhí tnúhu-dé xii-ndí sá ïo cùu iní ñáhá-ndó xii-ndí, te ducaⁿ quide-ndo chi Espiritú Yá Ndióxi chĩndèe ñaha-xi xii-ndo.

⁹ Te ndéé cutnàhá ní níhí-ndí tnúhu nacuaa quide-ndo ndecu-ndo ndéé dává-áⁿ ní ngúita-ndí ñá túú dàña ndee-ndí xicáⁿ táhú-ndí núú Yá Ndióxi cuendá-ndó sã Espiritú-gá ná tàxi-xi nchaa-gá sá cùmání quini tnùní-ndó, te ducaⁿ te cutnùní váha-gá iní-ndó nacuaa cuini Yá Ndióxi cada-ndo. ¹⁰ Te sá ducáⁿ te ndacu-ndo cada-ndo mee-ni sá váha dàtná cuini Xítoho Jesucristú cada nchaa ñáyiú ndecu ichi-gá. Te ducaⁿ ïo nduu vétú iní-gá te núu na cada-ndo nchaa núú sã váha. Te ducaⁿ ïo-gá cuita cutnùní iní-ndó nchaa nacuaa cuini Yá Ndióxi cada-ndo. ¹¹ Te mee-gá cúú-gá Yaá ïo cùnuu, te ñuú-gá ïo chĩndee ñaha-gá xii-ndo, te cudíí iní-ndó cuèi nãndi na càda ñaha ñáyiú xii-ndo sã cuendá-gá, te ducaⁿ ïo cunduu càhny iní-ndó. ¹² Te ndacáⁿ táhú-ó núú Dütú Ndióxi chi ní quide túha ñaha-gá xii-o cuendá nduu táhú-ó cundecu-o ndihi nchaa dava-gá ñáyiú yĩndaha-gá xĩndecu núú cãndò canine ñá túú tnàhí-gá ni ñⁿ cuèchi ïó. ¹³ Te ñuú-gá ní quide ní dàñá-ó nchaa ichi cuèhé ichi duha núú tàxi tnùní yucu ñávãha, te ní nachihí ñaha-gá xii-o ndãha Déhe-gá Yaá ïo cùu iní-gá. ¹⁴ Te Déhe-gá ní xihí-gá cuendá sã nchóó cãcu nihnu-o núú ùhú núú ndãhú, te ní quide càhny iní-gá nchaa sã cuèhé sã dúhá ní quide-o.

*Ñáyiú cùu ñⁿnuu ndihi Yá Ndióxi
cuendá sã ní xihí Xítoho Jesucristú*

¹⁵ Te Yá Ndióxi cúú-gá Yaá vá cúú quini-ó dico Xítoho Jesucristú chi ní quixi túu-gá ñuyú-a, te

ní quide-gá nchaa nàcuáa sàni iní-gá. Te dàtná-ni sàni iní-gá te ducaⁿ sàni iní Yá Ndiòxí, te Yaa-áⁿ ducaⁿ-ni ndècu-gá ndéé cútñàhá vátá ngáva-gá ñuyúú. ¹⁶ Te Xítóhó Jesucristú ní quide-gá núú Yá Ndiòxí ní cadúha-gá nchaa sá ió andiú ndìhi nchaa sá ió ñuyúú-a, te ní cadúha-gá nchaa sá cúú quíni núú-ó cùndehe-o, ndìhi nchaa sá vǎ quíni tñàhí-o, ndìhi nchaa espíritú cùnùu vihi xinu cuechi núú Yá Ndiòxí, ndìhi nchaa dava-gá espíritú xinú cuèchi. Te nchaa ní cadúha Xítóhó Jesucristú chi ducaⁿ ní cachí Yá Ndiòxí cunduu. Te ducaⁿ ní cachí Yá Ndiòxí cunduu cuèndá nchaa cuu-xi mee-ni sá vǎha sá cúú-xi Xítóhó Jesucristú. ¹⁷ Te Xítóhó Jesucristú ducaⁿ-ni ndècu-gá ndéé cútñàhá vátá ngáva-gá ñuyúú-a, te ñiú núú ndáhá-gǎ cándòdo ñuyúú-a, ndìhi andiú, ndìhi nchaandi túhú sá ió. ¹⁸ Te ñiú Xítóhó Jesucristú cùnùu-gá yíndàha ñaha-gá xii nchaa nchoo ñáyiú ndècu ichi-gá, te ñiú-gá quidé-gǎ ndécú vǎha-o núú-gǎ. Te núú ncháá ñáyiú ndoto ñiú-gá cúú-gǎ Yaa ío càhnu cuu sa ní ndoto, te sá dúcáⁿ ní ndoto-gá te xíáⁿ cúú-gǎ Yaa ío tàxi tnuni nchaandi túhú sá ió ñuyúú-a ndìhi andiú. ¹⁹ Te ducaⁿ ío cùnùu-gá táxi tñùní-gá chi ndáá sá ñiⁿ-ni cuu-gá ndìhi Yá Ndiòxí. ²⁰ Te Xítóhó Jesucristú ní xihí-gá núú cùrúxí, chi ducaⁿ ní cuíni Yá Ndiòxí cunduu cuèndá sá vǎ yóo ñiⁿ-gá cuu úhú iní ñáhá xii-gá cuéi ñáyiú xíndecu ñuyúú-a, te cuéi cue espíritú ndécú àndiú.

²¹ Te nchòhó cútñàhá vátá cùndècu-gá-ndó ichi Xítóhó Jesucristú ñá túú tñàhí ni xóo cáháⁿ ndìhi-ndo-gǎ, chi mee-ni ní xóo cuu úhú iní-ndó-gǎ, te mee-ni ncháa sá cuèhé sá dúhá ní xóo cunuu ní xóo cada-ndo ní cuu, dico Xítóhó Jesucristú ní quide-gá ní tñahá tñúhu-ndo ndìhi Yá Ndiòxí vitna. ²² Chi ñiú cuèndá-áⁿ ní xihí Xítóhó Jesucristú núú cùrúxí cuèndá sá

nchóo ndùu ndoo nduu nine iní-ó ngúndecu-o núú Yá Ndiòxí, te ducaⁿ te ñá túú tñàhí-gá ná cumání-ó núú-gǎ, te vǎ yóo ñiⁿ-gá cachí sá nchóo ndècu cuéchi-o. ²³ Te núú vǎ dáñá ndéé-ndó quíndáá iní-ndó Xítóhó Jesucristú, te cundecu-ni-ndo ichi-gá, te vǎ cáni iní-ndó dáña-ndo tñúhu ndee iní ní taxi-gá ndécú ndìhi-o. Te nchaa tñúhu-gá-áⁿ tá xité nuu-xi ñihí ñuyúú cuáháⁿ, te ñiú-ni tñúhu-áⁿ cáháⁿ yúhú té Páblú dánèhé-í ñáyiú.

Te Páblú yíhi ñiⁿ-de cáháⁿ-de tñúhu Xítóhó Jesucristú núú ñáyiú ndècu ichi-gá

²⁴ Te vitna ío cùdíi iní-í ndòhò-í cuèndá-ndó, chi Xítóhó Jesucristú ío ní ndoho-gá cuèndá-ó, te tñàhá yúhú ndòhò-í cuèndá nchaa ñáyiú ndècu ichi-gá, dico vitna cumání-gǎ ndoho-í cuèndá-yu. ²⁵ Te Yá Ndiòxí ní cachí-gá sá yúhú quíhi díquí ñáhà-í xii nchaa nchòhó ñáyiú ndècu ichi-gá cuèndá danèhé ñáhá vǎha-í xii-ndo tñúhu-gá cuèndá cuu-xi sá vǎha sá cúú-xi-ndó. ²⁶ Te nchaa tñúhu sá dánèhé ñáhà-í xii-ndo ñá túú ní təcú dóho nchaa ñáyiú ní xíndecu ndéé sanaha, te mee-gá ní cuíni-gá sá ncháá nchòo ñáyiú yíndaha-gá vitna cundecu ndìhi-o tñúhu-áⁿ. ²⁷ Te mee-gá ní cachí-gá sá dátúu-gá nchaa tñúhu sá ío vii ío vǎha cuáháⁿ núú ncháa ñáyiú yíndaha-gá. Te tñúhu-áⁿ cúú-xi cuèndá tñàhá nchaa nchòhó ñáyiú ñá túú cuu ñáyiú isráel. Te tñúhu-áⁿ dánèhé ñáhá-xi xii-ndo sá Xítóhó Jesucristú ndécú ndìhi ñaha-gá xii-ndo. Te cuèndá xíáⁿ ní ngúndecu ndìhi-ndo tñúhu ndee iní cundecu-ndo ndìhi-gá ní caa ní quíhiⁿ.

²⁸ Te nchúhú mee-ni cuèndá Xítóhó Jesucristú cáháⁿ vǎha-ndí, te dàsahú-ndí ñáyiú nàcuáa cadá-yu. Te vǎha vihi danèhé-ndí nchaa ñáyiú nàcuáa tecú tñùní-yu tñúhu-gá, te ducaⁿ dánèhé-ndí-yu

nàcuáa cundáa-yu núu Yá Ndiöxí, te ducaⁿ chi tnàhá tnúhu-yu ndihi Xítóhó Jesucristú. ²⁹ Te cuendá xíáⁿ ío ndücu ndee-í quidé-í chiúⁿ Xítóhó Jesucristú, te mee-gã ío chindee ñaha-gã xii-í núu xíáⁿ ndácù-í quidé-í chiúⁿ-gã.

2

¹ Te cuiní-í sá nchòhó cutnùni iní-ndó sã ío sàni iní-í cuendá-ndó, ndihi cuendá nchaa ñáiyu ndècu ñuú Laodiceá, ñáiyu xindecu ichi Xítóhó Jesucristú. Te ducaⁿ-ni ío sàni iní-í cuendá nchaa ñáiyu vátá quini ñáhá-gã xii-í. ² Te cuiní-í sá nchòhó ndihi nchaa ñáiyu-áⁿ ío nducu ndèe-ndo canchicúⁿ nihnu-ndo ichi Xítóhó Jesucristú, te ío cuu iní tnàhá-ndó, te ducaⁿ cùu ìⁿnuu-ndo cundecu-ndo. Te cuiní-í sá nchòhó ndihi dava-gã ñáiyu-áⁿ ío váha sáá sá xini tnùni-ndó cuendá tecú tnùni-ndó nchaa nacúáa ndüu cuendá Xítóhó Jesucristú chi ío ndüu yuhu ni cuu, dico vitna ní dátüu-gã núu-ó. ³ Te Xítóhó Jesucristú néhé váha-gã nchaa tnúhu sá ío xini ñuhu-xi tecú tnùni-ó. ⁴ Te duha càháⁿ-í chi cuiní-í sá vã quindáá iní-ndó ni ìⁿ tnúhu càháⁿ nchaa ñáiyu cuiní dandàhú ñáhá xii-ndo cuéi ío váha càháⁿ-yu. ⁵ Te cuéi ñá túú ndècu ndihi ñaha-í xii-ndo dico ducaⁿ-ni ío ñuhu iní ñáhà-í, te ío cùdí iní-í chi nihí-í tnúhu sá ío cùu ìⁿnuu-ndo ndecu-ndo, te ñá túú dàña ndeé-ndó sàndáá iní-ndó Xítóhó Jesucristú.

⁶ Te dátna-ni ní sàndáá iní-ndó Xítóhó Jesucristú, te ducaⁿ-ni quindáá iní-ndó-gã canchicúⁿ nihnu-ndo ichi-gã. ⁷ Te ni yùhu ni iní-ndó canchicúⁿ nihnu-ndo ichi-gã, te ducaⁿ cuita cutnuni-gã iní-ndó nchaa nacúáa càháⁿ-gã quihíⁿ. Te vá dáña ndèe tnàhí-ndo quindáá iní-ndó nchaa tnúhu sá ní dánèhé ñáhá cuè téé càháⁿ tnúhu-gã xii-ndo. Te xini ñuhu-xi ndacáⁿ táhú vihi-ndo núu Yá Ndiöxí cuendá nchaa tnúhu-áⁿ.

Ñáiyu ío váha tnàhá tnúhu ndihi Xítóhó Jesucristú

⁸ Te ío quihí iní-ndó cùndecu-ndo chi xica cuu ñáiyu cuiní dandàhú ñáhá xii-ndo, te ñáiyu-áⁿ càháⁿ-yu mee-ni nchaa tnúhu ní cahu iní nchaa cue téé ñuyüu-a, te nchaa tnúhu-áⁿ ñã túú vèdana nàndíhi-xi. Te ducaⁿ quidé-yu chi nchicúⁿ nihnu-ní-yu nchaa nàcuáa ní xóo cada ñáiyu ní xindecu ndéé sanaha. Te càháⁿ-yu nàcuáa sàni iní yucu ñávàha, te ñá túú càháⁿ-yu nàcuáa cuiní mée Xítóhó Jesucristú.

⁹ Te Xítóhó Jesucristú cúu-gã ìⁿ ñáiyu dico ìⁿ-ni cùu-gã ndihi Dútú Ndiöxí. ¹⁰ Te nchòhó chi ñá túú tnàhí-gã ná cùmàni-ndó núu-gã chi ndècu ndihi-ndo Xítóhó Jesucristú. Te ío cùnuu-gã te tàxi tnuni-gã nchaa núu cuè espíritú cùnuu. ¹¹ Te mee-gã ní ndada ndoo ní ndada nine-gã iní-ndó chi ní ngúndecu ndihi-ndo-gã te ducaⁿ ñã túú-gã ndécú-ndó ichi cuehé ichi duha, te cada iní-ndó sã ní ngúndecu ndihi-ndo ìⁿ seña, chi ní ndada ndoo ní ndada nine-gã iní-ndó, dico ñá díú ìⁿ-ni cuu-xi ndihi seña sã sãha cue téé israhél ñi-güedé. ¹² Te nchòhó sa ní sandute-ndo te cada iní-ndó sã dátna tnúhu sá ní xihí-ndó ndihi Xítóhó Jesucristú, te ní nguindüxi-ndo ndihi-gã, te ní ndoto-ndo ndihi-gã, te ducaⁿ càda iní-ndó chi ñá túú-gã ndécú-ndó ichi cuehé ichi duha. Te ducaⁿ chi sàndáá iní-ndó nchaa nacúáa quide Yá Ndiöxí, te diu-gã ní dándótó-gã Xítóhó Jesucristú. ¹³ Te nchòhó cùtnàhá ndécú-ndó ichi cuehé ichi duha cùu-ndo dátna ñáiyu ní xihí, chi ñá túú tnàhá tnúhu-ndo ndihi Yá Ndiöxí ní cùu, te ni ñã díú ñáiyu israhél cúu-ndó. Te Yá Ndiöxí ní cachí-gã sã nchóó ío váha tnàhá tnúhu-o ndihi Xítóhó Jesucristú vitna. Te ducaⁿ ní quide-gã chi sa ní quide càhnu iní-gã nchaa sã cuèhé sá dúhá ní xóo cada-o. ¹⁴ Te vitna duuⁿ duuⁿ ñã túú-gã cuéchi-o ndècu

núú-gă. Te nchoo ña túú cuíní-ó cada-o nacuaá cãháⁿ-gă, te cuendá xíãⁿ ío ndècuéchi-o, te vãi nacháhu-o núú-gă ní cùu. Te vitna ña túú-gă ni ìⁿ cuéchi-o ndècu núú-gă, chi ñu cuendá-áⁿ nĩ xíhí Xítóhó Jesucristú núú cùrúxí. ¹⁵ Te sá dúcáⁿ nĩ xíhí Xítóhó Jesucristú núú cùrúxí, te duuⁿ duuⁿ ní dáquée tíhú-gă sácufhná ndihí nchaa espíritú cúndihí-xi, te ní quendóo canúú-xi, te mee-gă ío cùnuu-gă táxí tnùnì-gă.

Nanducu nihnu-o mee-ni sá vãha cãchí Xítóhó Jesucristú

¹⁶ Te núu dava ñáyiu xícuehé ñáhã-yu xii-ndo cuendá sá ña túú xèxi-ndo xihí-ndo datná quidé mée-yu te vá cádá cuendá-ndó, te ní vã cádá cuendá-ndó te núu xícuehé ñáhã-yu xii-ndo cuendá sá ña túú cãnehe íí-ndó vico quide meé-yu núu cuiá núu cuiá, ndihí vico quidé-yu ndi tnahá yóó, ndihí cuendá sá ña túú cãnehe íí-ndó nduu ndetatú-yu. ¹⁷ Te nãcuáa quidé-yu ndi tnahá òré quidé-yu nchaa vico-áⁿ, ndihí nãcuáa quidé-yu ndi tnahá nchaa nduu cãnehe íí-yu-áⁿ, te cada iní-ó sã sã quidé-yu-áⁿ dánèhé núú ñáhã-xí nãcuáa cada Xítóhó Jesucristú núu cuaháⁿ núú vèxi. ¹⁸ Te vá quindáa iní-ndó nì ìⁿ tnúhu cãháⁿ ñáyiu cãchí sá cuíta nihnu-ndo cuendá sá ña túú tnì-ndo tnúhu cãháⁿ-yu, chi cãchí-yu sá ío xini ñuhu-xi cada cahnu-o nchaa cue espíritú xínú cuèchi núú Yá Ndiòxí, te ní yùhu ní iní-ó cãnehe-o sá yíñùhu núú-xi. Te ñáyiu-áⁿ cãchí-yu sá ndáa cãháⁿ-yu chí dácoto ñaha saní-yu nãcuáa cãháⁿ-yu, te ío quide cahnú-yu mée-yu cuendá nchaa sá saní iní mée-yu quidé-yu, te ña túú vèdana nàndihí nchaa sá quidé-yu. ¹⁹ Te nchaa ñáyiu ducaⁿ xíquide-áⁿ ña túú tnahá tnúhu-yu ndihí Xítóhó Jesucristú. Te mee-gă cúú-gă Yá cúnúu taxí tnunì ñáhã-gă xii nchaa nchoo ñáyiu ndècu ichi-gă,

te chindee ñaha-gă xii-o ndècu-o ichi-gă, te mee-gă quidé-gă cúú ìⁿnuu-o ndècu-o, te ta quide-o nchaa nacuaá cuíní Yá Ndiòxí cuaháⁿ.

²⁰ Te nchòhó cúú-ndó dàtná ñáyiu ní xíhí ndihí Xítóhó Jesucristú cuendá sá vã cãchicúⁿ nihnu-gă-ndó nãcuáa cãháⁿ ñáyiu ña túú ndècu ichi-gă. Te núu ducaⁿ ña, ¿te ná cuendá tnì-ní-ndó tnúhu cãháⁿ ñáyiu-áⁿ te quide-ni-ndo datná quidé-yu? ²¹ Chi ñáyiu-áⁿ cãchí-yu sá ío sá ní vã cúú tèe ndaha-o, te dava ní vã cúú cãxi-o, te dava ní vã cúú tnì-o. ²² Te nchaa xíãⁿ, núú néhé chiuⁿ-ni-o ndihí nihnu-xi. Te nchaa sá dúcáⁿ cãháⁿ-yu-áⁿ cúú-xí mée-ni sã ní cahu iní mée nchaa ñáyiu ñuyúú-a nãcuáa cada-yu cundecú-yu. ²³ Te nchaa tnúhu cãháⁿ-yu-áⁿ sánuu sá cúú-xí ìⁿ tnúhu cãháⁿ ìⁿ téé ío váha sãa díquí-xi, chí cãchí-yu sá cádá cahnu-o Yá Ndiòxí nãcuáa vèxi iní mée-ó, te cunduu ndàhú iní-ó dico ña túú dànehé ñáhã-yu nãcuáa tàú-xi cunduu. Te cãchí tucú-yu sá cádá ùhú-ó mée-o, chí ducaⁿ cuíní Yá Ndiòxí cada-o cãchí-yu. Te nchaa xíãⁿ ña túú vèdana chindee ñaha-xi xii-o cuendá sá vã táxí tnùnì ñáhã ní ìⁿ sã cuèhé sã dúhá saní iní-ó.

3

¹ Te nchòhó cada iní-ndó sã ní xíhí-ndó ndihí Xítóhó Jesucristú te ní ndoto-ndo ndihí-gă, núu xíãⁿ tàú-ndó cada-ndo nchaa sá vãha dàtná cuíní mée-gă chí mee-gă núcõo-gă xio cùha Dútú Ndiòxí chí tnahá-gă ío cùnuu-gă. ² Te ío cuhuⁿ iní-ndó nchaa sã vãha cãchí Xítóhó Jesucristú nduu táhú-ndó cundecu ndihí-ndo, te vá cúhúⁿ iní-ndó mée-ni nchaa sá ío ñuyúú-a. ³ Te ducaⁿ cada-ndo chí cùu-ndo datná ñáyiu ní xíhí ndihí Xítóhó Jesucristú, chí ña túú-gă ndècu-ndó ichi cuehé ichi duha. Te Yá Ndiòxí néhé cuendá ñáhã-gă xii-ndo chí tnahá tnúhu-ndo ndihí Xítóhó Jesucristú.

4 Te Xítohó Jesucristú cúú-gã Yáa ndécú ndìhi ñaha xii-o vitna, te sáá nduu quèe túu ndìhi ñaha-gã xii-o àndiu, te tnàhá-ó ïo cunu-u-o ndìhi-gã.

Duuⁿ duuⁿ daña-o nchàa sá cuèhé sá dúhá ñùhu iní-ó te cada-o mèe-ni sá vâha

5 Te duuⁿ duuⁿ daña-ndo nchàa sá cuèhé sá dúhá ñùhu iní-ndó. Te nchaa nchòhó cue tée vá càháⁿ ndìhi-ndo ñáyiú dìhí te núu ñá díú ñàdihí-ndó cùú-yu, te ducaⁿ-ni nchàa nchohó cue ñáyiú dìhí tucu vá càháⁿ ndìhi-ndo cuè tée te núu ñá díú yì-ndo cuu-güedé, te nchaa-ndo vá cání-gã iní-ndó càda-ndo ni ìⁿ sá cuèhé sá dúhá ndìhi tnaha ñáyiú-ndo. Te vá cání cuèhé cani duha-gã iní-ndó sã cúú-xí-ndó ndìhi-yu, te vá cání-gã iní-ndó ni ìⁿ sá cuèhé sá dúhá, te ni vá xihó-ndó ìⁿ sá ndécú ndìhi tnaha ñáyiú-ndo, chi núu ducaⁿ na càda-ndo xiho-ndo sá ndécú ndìhi-yu te ìⁿ-ni cùu-ndo ndìhi ñáyiú chìnùhu nchaa sá càchí-yu cùu ndiòxí te ñá ndàá sá ndiòxí cúú nchàa xíáⁿ. 6 Te nchaa ñáyiú ducaⁿ xíquide ïo dandòho ñaha Yá Ndiòxí xií-yu na sáá nduu tnúndòho tnúhu ndàhú, chi ñá túú sàndáá iní ñáhã-yu xii-gã. 7 Te nchòhó cútñahá ní xíndecu-ndo ìchi cuehé ìchi duha, te tnàhá-ndó nĩ xóo cada-ndo dàtná quidé nchàa ñáyiú-áⁿ. 8 Te vitna duuⁿ duuⁿ daña-ndo nchàa sá ná càchí tnúhu-í-a: Vá cúdeéⁿ-gã-ndó, te ni vá cùndùu líhli-gã iní-ndó, te ni vá cúú ùhú-gã iní-ndó tnàha ñáyiú-ndo, te ni vá cùcuèhé-gã-ndó-yu, te ni ìⁿ-gã tnúhu cuèhé vá càháⁿ-ndó. 9 Te ni vá dácùandehnde-gã-ndó, chi nchòhó sa ní dáñá-ndó nchàa ìchi cuehé ìchi duha, te ñá túú-gã sání cuèhé sání dùha iní-ndó ná cada-ndo vitna datná ní xóo cada-ndo. 10 Te vitna nchòhó ní nduu-ndo ñáyiú váha, te uuⁿ-gã tá cùtnuní iní-ndó nchàa nacuaá cuní Yá Ndiòxí cada-ndo, te ducaⁿ

ta ndùcu ndee-ndo quide-ndo mee-ni sá vâha dàtná quidé mèe-gã. 11 Te vitna ní ngúndecu ndìhi-ndo Xítohó Jesucristú, te vá cáda cuèndá-gã-ndó núu cùu-ndo ñáyiú isràél àdi ñá túú cùu-ndo, te ni vá cáda cuèndá-ndó núu cùu-ndo ñáyiú ní ngúndecu seña ñi-xi àdi ñáhá, te ni vá cáda cuèndá-ndó núu cùu-ndo ñáyiú véxi ñuú xicá, te ni vá cáda cuèndá-ndó núu cùu-ndo ñáyiú cùu neñuú, te ni vá cáda cuèndá-ndó núu cùu-ndo ñáyiú ñá túú tnàhí dàñá quee núú chíúⁿ pàtróóⁿ-xi, te ni vá cáda cuèndá-ndó núu cùu-ndo ñáyiú dàñá queé núú chíúⁿ pàtróóⁿ-xi, chi Xítohó Jesucristú cùnùu-gã ndécú ndìhi ñaha-gã xii-o nchàa-o.

12 Te Yá Ndiòxí ní dáquée ìⁿ ñaha-gã xii-ndo cuèndá cundecu-ndo ndìhi-gã, te vitna cùu-ndo ñáyiú quide ndáá ndécú ìchi-gã. Te mee-gã ïo cùu iní ñáhã-gã xii-ndo núu xíáⁿ tàú-ndó cùndahú iní tnàhá-ndó, te ïo váha cuu iní-ndó chindee tnaha-ndo, te cuu-ndo ñáyiú ndàhú iní-xi, te ïo vii ïo váha cuu iní-ndó cùndecu ndìhi tnaha-ndo, te ïo càhnu cunduu iní-ndó cuèndá nchaa sá quidé ñaha ñáyiú xii-ndo. 13 Te ducaⁿ cànehe-ndo tnúhu càhnu iní núú ndi mèe-ndo nacuaá ndècu-ndo ìchi-gã, te cada càhnu tucu iní-ndó núu ná cúú sã cùmání núú tnàhá-ndó. Te dàtná ní quide càhnu iní Xítohó Jesucristú nchaa sá ñá túú vâha ní xóo cada-ndo ducaⁿ càda-ndo cada càhnu iní-ndó nchàa sã cùmání núú tnàhá-ndó ndècu-ndo. 14 Te Xíni ñùhu vihi-xi sá ïo cuu iní tnàhá-ndó cùndecu-ndo, chi núu ducaⁿ na càda-ndo, te quide-ndo nchaa dava-gã sã càháⁿ-í, te ñá túú tnàhí-gã ná cùmání-ndó. 15 Te daña-ndo sã Yá Ndiòxí ná chindee ñaha-gã nàcuáa ïo váha cuu iní-ndó cùndecu-ndo, chi ñiú cuèndá-áⁿ nĩ càháⁿ ñáhá Yá Ndiòxí xii-ndo cuèndá cuu ìⁿnuu-ndo ndìhi nchaa dava-gã ñáyiú ndècu ìchi-gã, te ducaⁿ-ni ïo ndacáⁿ táhú-ndó

núú-gă.

16 Te ío cuhuⁿ iní-ndó tnúhu Xítóhó Jesucristú, te ío váha cuáha-ndo cuendá nàcuáa cáháⁿ tnúhu-gá te ducaⁿ dānehé tnáhá-ndó. Te ío cáháⁿ dóho tnàha-ndo nacuáa cada-ndo cānchicúⁿ nihnu-ndo cāda-ndo nchaa nacuáa cáháⁿ tnúhu-gá, te cata-ndo ndùdú ndèé núú tūtú Yă Ndióxi, ndihi nchaa dava-gá ndudú sá xini méé-ndó xita-ndo te nchaa xǎⁿ cata-ndo chihuhu-ndo Yă Ndióxi. Te óré xitá-ndó te ni yúhu ni iní-ndó ndacáⁿ táhú-ndó núú-gă. 17 Te cuhuⁿ iní-ndó Xítóhó Jesucristú óré sání iní-ndó cāda-ndo ìⁿ chiuⁿ àdi ná tnúhu cuini-ndó cáháⁿ-ndó, te ñu-ni-gá cuhuⁿ iní-ndó. Te xini ñuhu-xi ndacáⁿ táhú-ndó núú Yă Ndióxi, te ñu-ni Xítóhó Jesucristú chindee ñàha-gá xii-ndo ndacáⁿ táhú-ndó núú Tátá-ó Dütú Ndióxi.

Nacuáa tàù ñáyiu ndècu ichi Xítóhó Jesucristú cadá-yu sá cúú-xi ndi meé-yu

18 Te nchaa nchòhó ñáyiu ñíhi ñáyiu ndècu yì-xi quindáá iní-ndó yì-ndo, chi ducaⁿ tàù-xi cada nchaa ñáyiu ñíhi ndécú ñichi Xítóhó Jesucristú. 19 Te nchaa nchòhó cue téé ndècu ñadihí-xi cuu iní-ndó ñadihí-ndó, te vá cūcuèhé-ndó-yu. 20 Te nchaa nchòhó ñáyiu ndècu tátá-xi ndihi náná-xi quindáá iní-ndó-yu, chi núú ducaⁿ na cāda-ndo te ndùu vétú iní Yă Ndióxi. 21 Te nchaa nchòhó ñáyiu cūu tátá ndihi náná vá dāsátú-ndó ñi cue déhe-ndo, chi núú ducaⁿ na cāda-ndo te ni vǎ quixí-gǎ iní-güxi cada-güxi sá vǎha. 22 Te nchaa nchòhó ñáyiu xinu cuechi quindáá iní-ndó nchaa ñáyiu cūu patróoⁿ-ndó, te ni yúhu ni iní-ndó cāda-ndo nchaa chiuⁿ tahú-yu cuèi óré ndécú-yu àdi óré ñá túú-yu, te ñá díú óré-ni ndèhé-yu cada-ndo cuendá-ni sá cuini-ndó cūdiu-ndo núú-yu, chi cada-ndo sǎ néhé-ndó sǎ yíñuhu núú Xítóhó

Jesucristú. 23 Te nchaa chiúⁿ sani iní-ndó cāda-ndo te cada-ndo ni yuhu ni iní-ndó, te sá dúcáⁿ cāda-ndo-áⁿ te cada-ndo cuendá sá xinu cuèchi-ndo núú Xítóhó Jesucristú te ñá díú núú ñáyiu ñuyíú-a xinu cuechi-ndo. 24 Te nchòhó sa ñàha-ndo sá Xítóhó Jesucristú taxi-gǎ sǎ ndúú táhú-ndó te núú ducaⁿ na cāda-ndo, chi cūu-ndo ñáyiu xinu cuechi núú-gă. 25 Te nchaa ñáyiu quide nchaa sá cuèhé sá dúhá nàcháhu-yu núú Yă Ndióxi cuendá nchaa sá quidè-yu, te mee-gǎ vá cadá cuendá-gǎ cuèi ná ñáyiu cūu-yu, chi nchaa-yu nacháhu-yu nchaa sǎ ñá túú vǎha quidè-yu núú-gă.

4

1 Te nchaa nchòhó ñáyiu cūu patróoⁿ cuu-ndo ñáyiu váha, te cada-ndo nchaa nacuáa tàù-xi cunduu ndihi nchaa ñáyiu xinu cuechi núú-ndó, te cunaha-ndo sǎ àndiu ndecu Yaá cúú Xítóhó-ndó tàxi tñuni ñáhá-gǎ xii-ndo.

2 Te nchaa nchòhó ñáyiu ndècu ichi Xítóhó Jesucristú, vá dáñá ndèé-ndó cáháⁿ ndihi-ndo Yă Ndióxi, te ío cuhuⁿ iní-ndó-gǎ óré cáháⁿ ndihi-ndo-gǎ, te óré-áⁿ ío ndacáⁿ táhú-ndó núú-gă. 3 Te cǎcáⁿ táhú-ndó tnáhá cuendá-ndí núú-gǎ cuendá sá díú-gǎ ná cadá te ndacu-ndí cáháⁿ-ndí tnúhu-gǎ núú nchaa dava-gǎ ñáyiu, te ducaⁿ cáháⁿ-ndí tnúhu Xítóhó Jesucristú sǎ ñá túú ní xīndecu ndihi nchaa ñáyiu ní xīndecu ndéé sanaha, te ñu cuendá tnúhu-áⁿ yíhí-í vecaá vitna. 4 Te cáháⁿ ndihi-ndo Yă Ndióxi cuendá cáháⁿ-í nacuáa tàù-xi cunduu te tecú tñmí-yu.

5 Te cada-ndo nchaa nacuáa tàù-xi cunduu sǎ cúú-xi nchaa ñáyiu ñá túú ndècu ichi-gǎ, te ducaⁿ-ni ío nducu ndèe-ndo cada-ndo nchaa nacuáa tàù-xi cunduu. 6 Te cada cuendá-ndó sǎ ío vii ío váha cunduu tnúhu cáháⁿ ndihi-ndó-yu, te cáháⁿ-ndó ñⁿ tnúhu nacuáa cuu váha iní-yu, te ío váha

cundehe-ndo nàcuáa cunduu tnúhu cúñaha-ndo xii ìⁿ ìⁿ-yu.

Tnúhu ndéé núú nǐ ndihi-ná

⁷ Te té Tiquicú téé ío cùu iní-ó ndècu ndihi-o ichi Xítohó Jesucristú, téé-áⁿ cachí tnúhu-dé nchaa nàcuáa cùu ndecu-í. Te tnàhá-dé xínu cuèchi-dé núú Xítohó Jesucristú te ío váha quide ndáá-dé. ⁸ Te tendaha-í-dé quixi-dé cachí tnúhu-dé nchaa nàcuáa cùu ndecu-ndí iha, te taxi-dé tnúhu ndee ìní cundecu ndihi-ndo. ⁹ Te tnàhá tucu té Ònésimú téé ío cùu iní-ó ndècu ndihi-o ichi Xítohó Jesucristú quixi ndihi-dé, te ñu-ni téé ñuú-ndó cùu-dé te tnàhá-dé ío váha quide ndáá-dé. Te ndi ndúú-güedé cachí tnúhu-güedé nchaa nàcuáa cùu iha.

¹⁰ Te té Arístarcú téé yíhi ndihi-í vecaá quidé ndèe ìní ñáhá-dě xii-ndo ndihi té Mácú ñaní pǐmú tǐ Bèé. Te sa nàha-ndo nchaa nacuáa ní cáháⁿ-í cada-ndo quèheⁿ cuendá-ndó tǐ Mácú, te núu na quixi-dé quixi coto ñaha-dě xii-ndo, te ío váha cuu iní-ndó quèheⁿ cuendá-ndó-dě. ¹¹ Te tnàhá téé nàni Jesús, àdi Bustú chí úú ñu-dé, quidé ndèe ìní ñáhá-dě xii-ndo. Te cue téé-a cùu-güedé cue téé isràèl ní chitnahá ñáhá-güedě xii-í càháⁿ-ndí núú ñáyiú nàcuáa ndíhu ndaha ñaha Yá Ndiòxí xií-yu, te ni ìⁿ-gá ñáyiú isràèl ñá túú quide datná quidé-güedě. Te ío váha tàxi-güedé tnúhu ndee ìní xii-í. ¹² Te tnàhá téé ñuú-ndó tǐ Ēpafrás quidé ndèe ìní ñáhá-dě xii-ndo, te cùu-dé tnàhá-dé téé xínu cuechi núú Xítohó Jesucristú. Te ducaⁿ-ni nǐ yuhu ni iní-dé xìcáⁿ táhú-dě núú Yá Ndiòxí cuendá-ndó cuendá sá cànchicúⁿ nihnu-ni-ndo ichi-gá, te ducaⁿ te ío váha tecú tnùní-ndó nchaa nacuáa cùní Yá Ndiòxí cada-ndo, te ñu-ni ducaⁿ cànchicúⁿ nihnu-ndo cada-ndo. ¹³ Te yúhú càchí tnúhu ndáá-í xii-ndo sá sùúni sàni iní-dé sá méé-ní sá váha cuu xii-ndo cùndecu-ndo ndihi nchaa ñáyiú xíndecu ichi Xítohó Jesucristú ndécú

ñúú Laodiceá, ndihi nchaa ñáyiú xíndecu tucu ichi-gá ndécú ñúú Hièrápólís. ¹⁴ Te tnàhá té Lùcá téé xíni nchaa núú yúcú sá quidé tátna quide ndee ìní ñáhá-dě xii-ndo téé ío cùu iní-ó, te tnàhá tucu té Dëmás quidé ndèe ìní ñáhá-dě xii-ndo.

¹⁵ Te cúñaha-ndo na càda ndee ìní nchaa ñáyiú ndècu ndihi-o ichi Xítohó Jesucristú ndécú ñúú Laodiceá, ndihi tá Mínfás, ndihi nchaa ñáyiú ndècu ichi-gá tàcá vehe-xi dàcuahá-yu tnúhu-gá. ¹⁶ Te tutú càdúha-í-a tendaha-í quixi ndaha-ndo, te òré ná ndíhí dàcuaha-ndo te tendaha-ndo quíhíⁿ ndaha ñáyiú xíndecu ichi-gá ndécú ñúú Laodiceá cuendá dacuàhá-yu tnàhá-yu. Te ñu-ni ducaⁿ dàcuaha-ndo tutú tendaha-í quíhíⁿ ndaha ñáyiú ñuú Laodiceá òré ná dándixi-yu ndaha-ndo. ¹⁷ Te na càchí tnúhu-í xii-ndo nàcuáa cúñaha-ndo xii té Àrquipú, te ñuha cúñaha-ndo xii-dé: “Yá Ndiòxí ní taxi-gá chiú” quide-n, te ío váha cada cuendá-n càda-n nchaa nacuáa ní cachí-gá”, ñuha cúñaha-ndo xii-dé. ¹⁸ Te yúhú té Páblú ndihi ndaha mee-í téé-í ìⁿ úú tnúhu-a quide ndee ìní ñáhá-í xii-ndo, te cunaha-ndo sá yúhú yíhí-í vecaá. Te Yá Ndiòxí ío na chindee chítúu ñaha-gá xii-ndo. Te ducaⁿ na cùnduu. Te ío chí càdá ndèe ìní-ná vitna.

**TUTÚ DÍHNA NUU NĪ
CADÚHA TĒ PĀBLÚ
QUIHĪⁿ NDAHA
ÑÁYIU ÑUÚ
TESĀLÓNICÁ**

Té Pāblú ndihi cue tēe cūndihi-dé cādūha-güedé tutú quihĪⁿ ndaha ñáyiū xīndecu ichi Xítoho Jesucristú ndécú ñuú Tesalónica

¹ Yúhú té Pāblú cādūha-í tutú-a ndihi té Silvanú, ndihi té Timùteú cuendá daquixi-í ndaha nchòhó ñáyiū ndècu ndihi-ndí ichi Xítoho Jesucristú ndécú ñuú Tesalónica, chi cūu ñnuu-ndo ndihi Tātá-ó Dütú Ndiõxí, ndihi Xítoho Jesucristú. Te xicáⁿ táhù-í núú Dütú Ndiõxí, ndihi núú Xítoho Jesucristú sá ïo na chindee chitúu ñaha-gă xii-ndo, te ducaⁿ ndí nduú-gá ná càda te ïo váha cuu iní-ndó cūndecu-ndo.

Ñáyiū ñuú Tesalónica ïo váha sàndáá iní-yu Yá Ndiõxí

² Te ndi tnahá òré cāháⁿ ndihi-ndí Yá Ndiõxí ndácáⁿ táhù-ndí núú-gă sá ïo quide váha-ndo ndècu-ndo, te ducaⁿ xicáⁿ táhù-ndí núú-gă sá ná còto ñaha-gă xii-ndo. ³ Te ïo ndácáⁿ táhù-ndí núú Tātá-ó Dütú Ndiõxí sá ñi yuhu ñi iní-ndó sàndáá iní-ndó-gă, te xīnu cuechi-ndo núú-gă, te cūu iní tnahá-ndó nàcuáa ndècu-ndo ichi-gă ñu xíáⁿ ïo xīto tnahá-ndo. Te cūtnuní ndáá iní-ndó sá quixí tūcu Xítoho Jesucristú ñu xíáⁿ ñá túú dàña ndeé-ndó ndètu-ndo-gă. ⁴ Te

nchòhó ñáyiū ndècu ndihi-ndí ichi Xítoho Jesucristú sa nàha-ndí sá Yá Ndiõxí ïo cūu iní ñáhá-gă xii-ndo, te ñu-gá ní cāháⁿ ñáhá-gă xii-ndo cuendá cūndecu-ndo ichi-gă. ⁵ Te cūtnàhá ní dānehé ñáhá-ndí xii-ndo tñuhu-gă, chi ñá díú sá cúú ñi mée-ndí ducaⁿ ñi dānehé ñáhá-ndí

xii-ndo, chi mee Espiritú Yá Ndiõxí ní chindee ñàha-xi ní cāháⁿ-ndí ñi yuhu ñi iní-ndí tñuhu-gă núú-ndó. Te ñaha-ndo sá cūtnàhá ní xīndecu ndihi ñaha-ndí xii-ndo ñi quide-ndí nàcuáa cāháⁿ Yá Ndiõxí cuendá sá cúú-xí sá váha sá cúú-xí-ndó.

⁶ Te nchòhó nchicúⁿ ñihnu-ndo quide-ndo vitna datná quidé-ndí, chi quide váha-ndo dàtná quidé mēe Xítoho Jesucristú, te díí ñi ní tñi-ndo ichi-gă cuēi ní ndoho ní tnahá-ndó, chi mee Espiritú-gă ní chindee ñàha-xi xii-ndo. ⁷ Te sá dūcáⁿ quide váha-ndo núú Yá Ndiõxí, xíáⁿ yínchicúⁿ ñihnu ñáyiū distritú Macèdoniá, ndihi ñáyiū distritú Acáyá xīquide váha-yu tnahá-yu, ñáyiū xīndecu ichi-gă.

⁸ Te ñu-ndo ñi sanu ichi-ndo ñáyiū distritú Macèdoniá, ndihi ñáyiū distritú Acáyá, te ñá díú-ní ñáyiū nchaa ñuú-áⁿ chi nchaa ñáyiū dava-gă ñuú ñihí-yu tñuhu sá ïo sàndáá iní-ndó Yá Ndiõxí, Te ñá túú-gă ná tñuhu cāháⁿ-ndí cuendá-ndó, chi nchaa-yu sa ñihí-yu tñuhu sá ïo váha quide-ndo ndecu-ndo. ⁹ Te mēe-yu xīcāháⁿ váha-yu cuendá-ndó sá ïo váha ní queheⁿ cuendá ñáhá-ndó xī-ndí cūtnàhá ní quixi-ndí díhna nuu. Te ní dáña-ndó nchaa sá càchí-ndó cūu ndiõxí-ndó chi ñá díú ndiõxí cúú-xí, te ní tñi-ndo ichi Yá Ndiõxí Yaá ndécú tūu andū chi ñu-gă cúú-gă Ndiõxí ndisa, te xīnu cuechi-ndo núú-gă vitna, ¹⁰ te ndètu-ndo quixi tucu Xítoho Jesucristú Déhe Yá Ndiõxí Yaá ndécú andū, chi ñu-ni-gă ní quixi-gă ñuyíú-a ní xíhí-gă, te ní ndoto-gă ní dándótó ñàha Yá Ndiõxí xii-gă. Te ñu-ni Xítoho Jesucristú dácacu ñihnu ñaha-gă xii-o núú ùhú núú ndàhú, chi sàndáá iní-ò-gă.

2

Nàcuáa ndiū chiuⁿ ní quide té Pāblú ñuú Tesalónica

¹ Te nchòhó ñáiyu ndècu ndihi-ndí ichi Xítohó Jesucristú ñaha-ndo sá ñà díú àúⁿ nã cuu ni quixi coto ñaha-ndí xii-ndo, chi ní sándáá iní-ndó tnúhu Yá Ndiòxí. ² Te ñaha-ndo sá cùtnàhá ní xíndecu-ndí ñuú Filipú ío ní xúhuⁿ tnúhu cuèhé tnúhu duha núú-ndí, te ní caniha-güedě xii-ndí. Te ní ndee-ndí ní quixi-ndí ñuú-ndó, te ñá túú ní yùhú-ndí ní cáháⁿ-ndí tnúhu Yá Ndiòxí núú-ndó, chi mee-gã ní chindee ñaha-gá xii-ndí cuèi ío chitu ñáiyu ní cuu úhú iní ñáhá xii-ndí. ³ Te ñá túú ní dándahú ñáhá-ndí xii-ndo chi mee-ni tnúhu ndáá ní cáháⁿ-ndí núú-ndó, te ní ñà túú ní ñⁿ tnúhu cuèhé ñúhú iní-ndí ní cáháⁿ-ndí tnúhu-gá núú-ndó chi sa ní nduu ndoo ní nduu nine iní-ndí. ⁴ Te mee Yá Ndiòxí ní cachí-gá sá cáháⁿ-ndí tnúhu-gá, te cáháⁿ-ndí nàcuáa cùu iní mée-gã, chi sa ñaha-gá nàcuáa càa iní-ndí, te ñá túú cáháⁿ-ndí nàcuáa cùu iní ñáiyu. ⁵ Te ñaha-ndo sá ñà díú ñⁿ tnúhu cudí iní-ndó cùndecu-ndo ichi ñuyú ní cáháⁿ-ndí núú-ndó cuendá taxi-ndo díhúⁿ. Te Yá Ndiòxí sa ñaha-gá sá cáháⁿ ndáá-ndí. ⁶ Te ñá ñⁿ ndùu ni quide-ndí ñⁿ sá cádá-ndí cuendá-ni sá cádá càhnu ñaha-ndo xii-ndí, àdi cada cahnu ñaha dava-gá ñáiyu, te cuèi tàú ndisa-ndí sá cádá càhnu ñaha-ndo xii-ndí ní cùu, chi chiùⁿ Xítohó Jesucristú quidé-ndí, te dicó-ni sá nchùhú ñá túú ní cuíní-ndí sá dúcáⁿ càda-ndo. ⁷ Te ío vii ío váha ní cáháⁿ-ndí núú-ndó, dàtná quidé ñⁿ ñaha cuu náná vii vii cáháⁿ ndihi cue déhe-aⁿ dácuehnu ñaha-aⁿ xii-güexi. ⁸ Te ducaⁿ ío cùu iní ñáhá-ndí xii-ndo, dico ñá díú-ni sá ñí cáháⁿ-ndí tnúhu Yá Ndiòxí núú-ndó, chi ndéé iní-ndí taxi-ndí ní dácótó ñaha-xi, te núu dicó ní cùu-xi sá cúú, cuendá sá ío cùu iní ñáhá-ndí xii-ndo. ⁹ Te nchòhó

ñáiyu ndècu ndihi-ndí ichi Xítohó Jesucristú ñaha-ndo sá ío ní quide chiùⁿ-ndí cuendá ní níhí-ndí sá ñí xexi-ndí. Te cuèi nduu cuèi níú ní quide chiùⁿ-ndí ní níhí-ndí sá ñí xexi-ndí ní cáháⁿ-ndí tnúhu Yá Ndiòxí núú-ndó cuendá sá ñà túú ní cuíní-ndí chichiuⁿ ñaha-ndí xii-ndo.

¹⁰ Te nchòhó ñáiyu sándáá iní tnúhu Yá Ndiòxí xini ndáá-ndó sá cúú-ndí cue téé váha te ducaⁿ sá naha Yá Ndiòxí tucu, te ní xica-ndí ichi ndáá òré ní cáháⁿ-ndí tnúhu-gá núú-ndó te ñu-ni ducaⁿ quide-ndí vitna. Te vá yõ ñⁿ cáháⁿ sá ñà túú quide ndáá-ndí ndécú-ndí. ¹¹ Te ñaha tucu-ndo sá ñí dácáháⁿ ñáhá-ndí xii-ndo, te ní taxi-ndí tnúhu ndee iní xii-ndo nchàa-ndo, te dàtná quidé ñⁿ tátá ndihi cue déhe-dé ní quide-ndí. ¹² Te ní çachí-ndí xii-ndo sá cádá ndáá-ndó cùndecu-ndo nàcuáa tàú-xi cada nchaa ñáiyu tnàhá tnúhu ndihi Yá Ndiòxí, chi mee-gã ní cáháⁿ ñáhá-gá xii-o cuendá nduu táhú-ó cùndecu-o ndihi-gá núú ío váha càa ndecu-gá táxi tnùní-gá.

¹³ Te xiãⁿ ío ndacáⁿ táhú-ndí núú Yá Ndiòxí sá nchòhó òré ní tedóho-ndo tnúhu-gá ní cáháⁿ-ndí, te ní sándáá iní-ndó chi ní cutnùní iní-ndó sá díú tnúhu Yá Ndiòxí cúú-xi, te ñá díú tnúhu ñáiyu ñuyú-a cùu-xi. Te ndáá sá cúú-xi ñⁿ sá ío váha sá cúú-xi nchòo cue ñáiyu ní sándáá iní tnúhu-gá. ¹⁴ Te nchòhó ñáiyu ndècu ndihi-í ichi Xítohó Jesucristú, ío ní ndoho ní tnahá-ndó sá ñí quide ñaha ñáiyu ñuú-ndó. Te nchòhó ní ndoho-ndo dàtná ní ndoho nchaa ñáiyu tàcá dácuaⁿ tnúhu Xítohó Jesucristú ndécú dìstrítú Jùdeá, chi tnàhá-yu ío ní dándóhó ñaha ñáiyu ñuú-yu. ¹⁵ Te ñu-ni ñáiyu dìstrítú Jùdeá-án ñí sahní-yu cue téé ní xóo cáháⁿ tnúhu Yá Ndiòxí ndéé sanaha. Te ñu-ni ñani tnàhá-yu cùu cue ñáiyu ní sahní ñaha xii Xítohó Jesucristú, te sátá xiãⁿ te ní ngüíta-yu ní cuu

úhú iní ñáhă-yu xii-ndí, núu xíăⁿ ñá túú tnàhá iní Yă Ndiôxí nchaa sá quidé-yu, te ndéé nchaa dava-gă ñani tnáhă-yu cùu úhú iní-yu. ¹⁶ Te ío chidácá nihnu ñàhá-yu xii-ndí òré càháⁿ-ndí tnúhu Yă Ndiôxí núu ñăyiu ñá túú cùu ñăyiu isràél, te ducaⁿ quide ñăyiu-áⁿ cuendá cuiní-yu sá vă càháⁿ-ndí tnúhu-gă, sá cádá cuendá naníhí tǎhú ñăyiu ñá túú cùu ñăyiu isràél-áⁿ, te sá dúcáⁿ quidé-yu te ío ta cùu vai-gă cuéchi-yu cuáháⁿ. Te Yă Ndiôxí ío cùdéeⁿ-gă núu-yu, te tendaha-gă ìⁿ tnúndôho quixi sá cúu-xí-yu te ío ndohó-yu.

Té Păblú cuiní-dé quíngoto-dé ñăyiu xîndecu ichi Xítóhó Jesucristú ndécú ñúú Tesalónicá

¹⁷ Te nchòhó ñăyiu ndècu ndihí-ndí ichi Xítóhó Jesucristú ní quee-ndí núu-ndó, te cuéi ní cuxica-ndí dico ducaⁿ-ni ñúhu iní ñáhă-ndí xii-ndo, te ío ñúhu iní-ndí sá quíxí còto ñaha tucu-ndí xii-ndo. ¹⁸ Te yúhú té Păblú ducaⁿ-ni ñúhu iní-í sá cuédicó mée-í quixi-í, quixi coto ñaha-í xii-ndo, dico yucu ñávăha chidácá nihnu ñaha-xi xii-í. ¹⁹ Te nchoo ñăyiu ndècu ichi Xítóhó Jesucristú ndètu-ni-gă-ó quèxio-gă candeca ñaha-gă xii-o ndăa andiu cundecu-o ndihí-gă. Te cùdîí víhí ìní-ndí sá cuendá-gă chi ní chindee ñaha-gă ní sanu ichi ñaha-ndí xii-ndo ìchi-gă, te ío vâi ñăyiu cáháⁿ váha-yu cuendá-ndí ná sâá nduu quixi tucu-gă. ²⁰ Te ducaⁿ ío vâi ñăyiu cáháⁿ váha-yu cuendá-ndí cuendá sá ñí sanu ichi ñaha-ndí xii-ndo ìchi-gă, te quide váha-ndo. Te xíăⁿ ío cùdîí ìní-ndí.

3

¹⁻² Te sa ní cunduu ñá túú-gă càháⁿ ndihí tnàha-o, núu xíăⁿ ñá ní cùndee-gă iní-ndí ní tendaha-ndí té Timúteú ní quixi coto ñaha-dě xii-ndo, te nchúhú ní quendóo-ndí

ñúu Atenás, chi tnàhá-dé xínú cuéchi-dé núu Yă Ndiôxí, ndihí núu Xítóhó Jesucristú càháⁿ-dé tnúhu-gă núu ñăyiu. Te ní quixi-dé ní taxi-dé tnúhu ndee ìní xii-ndo cuendá sá ío quindáá-ni iní-ndó Xítóhó Jesucristú, te canchicúⁿ nihnu-ni-ndo ñí yuhu ni iní-ndó ìchi-gă. ³ Te vâ nátúhú iní-ndó canchicúⁿ nihnu-ndo ìchi-gă sá dúhá cùu úhú iní ñáhă ñăyiu xii-o, te nchòhó sa nàha-ndo sá dăcuití să ndóhó víhi-o cuendá-gă. ⁴ Te ndéé cùtnàhá ndécú ndihí ñaha-gă-ndí xii-ndo ñí cachí tnúhu ndáá-ndí sá ío ndoho-o, te ducaⁿ ndisa quide-xi. ⁵ Te xíăⁿ núu ñá ní cùu váha-gă iní-í chi cuendá ñá túú-gă ní ñihí-í tnúhu năcuăa cùu ndecu-ndo núu ní tendaha-í té Timúteú ní quixi-dé ní ndúcú tnúhu-dé núu-ndó núu ndècu-ni-ndo ichi Xítóhó Jesucristú, chi ní saní ìⁿ ní saní úú iní-í sá cúu-xí-ndó, chi ná ndéé chidácá nihnu ñaha yùcu ñávăha xii-ndo te cuíta chiuⁿ ní quide-ndí sá cúu-xí-ndó ñí càháⁿ-í.

⁶ Te ñáhă, chi ní ndexìo té Timúteú sá ñí quixi-dé ñúu-ndó, te nàha-dé tnúhu ní nasáá sá ñí yuhu ni iní-ni-ndo sândáá iní-ndó Yă Ndiôxí, te cùu iní-ndó cué tnaha ñăyiu-ndo. Te càchí-dé sá ío ñúhu iní ñáhă-ndó xii-ndí, te ío cuiní-ndó càháⁿ ndihí ñaha-ndo, te diu-ni ducaⁿ ío cuiní nchúhú càháⁿ ndihí ñaha-ndí xii-ndo tùcu. ⁷ Te ío ndòho-ndí chi ío cùu úhú iní ñáhă ñăyiu xii-ndí, dico sá ñí ñihí-ndí tnúhu sá nchòhó ñăyiu ndècu ndihí-ndí ichi Xítóhó Jesucristú ñá túú dàña ndéé-ndó sândáá iní-ndó Yă Ndiôxí, te xíăⁿ cúu-xí ìⁿ tnúhu càhnu iní ní ñihí-ndí chi ní naníhí ndéé-ndí. ⁸ Te ní nduu vétú iní-ndí sá ñí ñihí-ndí tnúhu ndècu-ni-ndo ìchi-gă. ⁹ Te òré càháⁿ ndihí-ndí Yă Ndiôxí, te ío ndàcáⁿ tǎhú-ndí núu-gă cuendá sá ñà túú dàña nihnu-ndo ìchi-gă, núu xíăⁿ ío cùdîí ìní-ndí. ¹⁰ Te cuéi nduu cuéi níú

xicáⁿ táhú-ndí núú Yá Ndiöxí sá mée-gá ná càda te sáá ìⁿ nduu nàníhí tnáhá-ó cuèndá danèhé ñáhá vâha-gá-ndí tnúhu-gá sá cúmání-gã xii-ndo.

¹¹ Te mee Tâtá-ó Dütú Ndiöxí, ndihí Xítohó Jesucristú chindee ñaha-gá xii-ndí te quixi-ndí quixi coto ñaha-ndí xii-ndo. ¹² Te mee Xítohó Jesucristú ná chindee ñaha-gá xii-ndo, te ío-gá cuita cuu iní tnáhá-gá-ndó nàcuáa ndècu-ndo ichi-gá ndihí nchaa dava-gá ñáyíu dàtná cúú iní ñáhá-ndí xii-ndo. ¹³ Te xicáⁿ táhú tùcu-ndí núú Tâtá-ó Dütú Ndiöxí sá nì yuhu nì iní-ndó càncicúⁿ nihnu-ni-ndo ìchi-gá, te ducaⁿ te cundáá-ndó núú-gã, te ñá túú-gã ná cumání-ndó òré ná sàá nduu quìxi tucu Xítohó Jesucristú ndihí nchaa ñáyíu sa ndècu ndihí-gã.

4

Nàcuáa cuíni Yá Ndiöxí cada-o

¹ Te nchòhó ñáyíu ndècu ndihí-í ichi Xítohó Jesucristú càháⁿ ndàhú-í núú-ndó sá cùndèdòho-ndo na càháⁿ-í nàcuáa cuu tnúhu càháⁿ Xítohó Jesucristú, chi mee-gã cuíni-gá sá càdá-ndó nàcuáa ní dánèhé ñáhá-ndí xii-ndo cuèndá cuu váha iní Yá Ndiöxí núú-ndó, te ducaⁿ-ni càda-ndo ndéé núú cuaháⁿ núú vèxi.

² Te nchòhó sa nàha-ndo nàcuáa ní càháⁿ-ndí núú-ndó, chi ní càháⁿ-ndí nàcuáa ní táuchíúⁿ Xítohó Jesucristú te ní cachí-gá sá ³ Yá Ndiöxí cuíni-gá sá càdá ndáá-ó cùndecu-o ichi-gá. Te nchoo cuè téé vá càháⁿ ndihí-o ñáyíu dìhí te núú ñá díú ñàdihí-ó cùú-yu, te ni cuè ñáyíu dìhí vá càháⁿ ndihí-yu téé núú ñá díú yíi-yu cùu-güedé.

⁴ Te núú xíáⁿ nchaa nchòhó tnàha téé-í ndí dííⁿ cùndecu ñàdihí-ndó, te díu-ni ducaⁿ nchòhó cue ñáyíu dìhí tucu ndí dííⁿ cùndecu yíi-ndo, te mee-ni tnúhu yííhúhú càháⁿ ndihí tnàha-ndo. ⁵ Te vá cání cuèhé

cani duha iní-ndó dàtná quidé cuè ñáyíu ñá túú sàndáá iní tnúhu Yá Ndiöxí. ⁶ Te ni ìⁿ-ndo vá cání iní-ndó dandahú-ndó tnàha téé-ndo càháⁿ ndihí-ndo ñàdihí-güedé. Te ducaⁿ-ni nchòhó cue ñáyíu dìhí tucu vá cání iní-ndó dandahú-ndó tnàha dìhí-ndó càháⁿ ndihí-ndo yíi-yu. Chi núú ducaⁿ na càda-ndo, te Yá Ndiöxí ío dandòho ñaha-gá xii-ndo dàtná ní cachí-ndí ndéé díhna. ⁷ Chi Yá Ndiöxí ní càháⁿ ñáhá-gã xii-o cuèndá sá càdá-ó mée-ni sá váha, te ñá díú sá cuèhé sá dúhá. ⁸ Te nchaa ñáyíu na càda sáá iní-xi tnúhu càháⁿ-ndí, te quide sáá iní-yu núú Yá Ndiöxí, chi ñá díú tnúhu téé ñuyíú-a cùu-xi, chi tnúhu Yá Ndiöxí, Yaá ní taxi Espiritú-gá ndécú ndihí-o cuu-xi.

⁹ Te nchòhó ñáyíu ndècu ndihí-í ichi Xítohó Jesucristú, ñá túú-gã xíní ñúhu-xi cachí tnúhu-í xii-ndo sá cúú iní tnáhá-ndó, chi Yá Ndiöxí sa ní dánèhé ñáhá-gã xii-ndo nàcuáa cuu iní tnáhá-ndó, ndihí nàcuáa cuu iní-ndó dàva-gá tnàha ñáyíu-ndo. ¹⁰ Te ducaⁿ xiquide-ndo ndihí nchaa ñáyíu ndècu ndihí-ndo ichi Xítohó Jesucristú ndécú dìstrítú Macèdoniá. Te càháⁿ ndàhú-ndí núú-ndó sá càdá ndáá-gá-ndó, te cuita cuu iní-gá-ndó cuè tnàha ñáyíu-ndo quíhíⁿ. ¹¹ Te cada ndee iní-ndó cùndecu ñucaxi iní-ndó, te cuhuⁿ iní-ndó chiuⁿ mee-ndo, te xíáⁿ cada-ndo dàtná ní dánèhé ñáhá-ndí xii-ndo. ¹² Te ducaⁿ te tnàhá nchaa ñáyíu ñá túú sàndáá iní tnúhu Yá Ndiöxí càháⁿ váha-yu cuèndá-ndó, te ducaⁿ te ñá túú tnàhí-gá ná cúmání xii-ndo.

Nàcuáa cada-xi òré quixi tucu Xítohó Jesucristú

¹³ Te vitna na càhí tnúhu-ndí xii nchòhó ñáyíu ndècu ndihí-ndí ichi Xítohó Jesucristú cuèndá nchaa ñáyíu sa ní xíhí, ñáyíu ní sàndáá iní tnúhu Yá Ndiöxí cuèndá sá vá ndihú iní-ndó cuèndá-yu dàtná

xĩquide nchaa ñáyiu ñá túú yìhi iní-xi sá quíxí tucu Xítohó Jesucristú ñuyíú-a. ¹⁴ Te nchoo sàndáá iní-ó sá nĩ xíhí Xítohó Jesucristú te ní ndoto-gá ní dándótó ñaha Yá Ndiòxí, te sàndáá tucu iní-ó sá dàtná ní dándótó Yá Ndiòxí Xítohó Jesucristú, ducaⁿ dándoto-gá nchaa ñáyiu ní xíhí ñáyiu ní sàndáá iní ñáhá xii-gá.

¹⁵ Te na cächí tnúhu tucu-ndí ingá tnúhu nàcuáa ní cáháⁿ Xítohó Jesucristú, chi ní cachí-gá sá ná sàá nduu quíxi tucu-gá te nchaa ñáyiu sàndáá iní tnúhu-gá ndécú vívú ñuyíú-a vá códo nùu-yu núú ñáyiu ní xíhí ndaa andíu, chi jùndú candeca ñaha-gá xii-yu ndaa. ¹⁶ Chi Xítohó Jesucristú quee túu-gá andíu, te cana-gá nchaa ñáyiu ní sàndáá iní tnúhu-gá, te òré-áⁿ Yá Ndiòxí cada-gá te òré-áⁿ, cáháⁿ ìⁿ cútú te òré-ni-áⁿ ndoto nchaa ñáyiu ní xíhí, ñáyiu ní sàndáá iní tnúhu-gá. ¹⁷ Te dàtnùnì nchaa nchoo ñáyiu xĩndecu vívú ñuyíú-a naníhí tnáhá-ó ndíhí-yu, te ndanchita-o ndíhu-o xití vícò naníhí tnáhá-ó ndíhí Xítohó Jesucristú, te candeca ñaha-gá xii-o ndaa andíu cundecu ndíhí-o-gá ni caa ni quíhíⁿ. ¹⁸ Núu xiáⁿ chí cuáha tnaha tnúhu ndee iní, te vá ndíhú iní-ndó chi naníhí tàhú-ndó núu-gá.

5

¹ Te nchòhó ñáyiu ndècu ndíhí-í ichi Xítohó Jesucristú ñá túú-gá xínì ñùhu-xi sá cächí tnúhu-í xii-ndo sá quíxí tucu-gá, te ní ñá túú-gá xínì ñùhu-xi sá cächí tnúhu-í xii-ndo nàsa cada-xi òré quíxi-gá. ² Chi nchòhó sa nàha ndáá-ndó sá Xítohó Jesucristú quíxi-gá nduu ñá túú yìhi iní-ó, chi dàtná quidé ìⁿ ñadúhú cada-gá òré quíxi-gá, chi nduu ñá túú nã yíhí iní-ó quíxi tucu-gá. ³ Te sáá nduu te cachí nchaa ñáyiu ndècu ichi cuehé ichi duha: “Vitna ío váha cùu iní-ó ndècu-o, te ñá túú-gá ná cúmání xii-o”, duha

quesàhá-yu. Te ñáyiu-áⁿ òré ñá túú nã yíhí iní-yu, te quèxio tnúndòho tnúhu ndàhú sá cúu-xi-yu. Chi cada-xi dàtná quidé-xi ìⁿ ñáyiu dèhí ní tnahá òré cacu déhe-xi, chi na iní-yu ní dàtnùhú ñáhá-xi te vá cãcu-yu núú tnúndòhó-yu, te ducaⁿ sá tnáhá-xi yáha nchaa ñáyiu ñá túú ndècu ichi-gá, chi na iní-yu quexio tnúndòho sá cúu-xi-yu te vá cãcu-yu núú tnúndòho-áⁿ. ⁴ Te nchòhó ñáyiu ndècu ndíhí-í ichi Xítohó Jesucristú, ñá túú-gá ndécú-ndó ichi cuehé ichi duha, núu xiáⁿ sa yìhi-ná iní-ndó nduu quíxi-gá te vá yáha-ndo dàtná yáha nchaa ñáyiu ñá túú ndècu ichi-gá, chi ñáyiu-áⁿ ñá túú nã yíhí iní-yu sá quíxí-gá. Te na iní-yu quexio-gá dàtná quidé ñadúhú na iní-ó quíhu-güedé vehe-o dùhu-güedé ducaⁿ càda-gá òré quíxi-gá. ⁵ Te nchoo ñá túú-gá ndécú-ó ichi cuehé ichi duha, te ichi-áⁿ cúu-xi dàtná ìⁿ ichi nee ndècu-o ni cuu, te vitna sa ní ngúndecu-o ichi váha, te ducaⁿ chi Yá Ndiòxí ní dándíxí túu-gá iní-ó cuendá cutnùnì iní-ó nàcuáa nduu cuendá-gá. ⁶ Te xini ñuhu-xi dandixi túu-o iní-ó, te cada váha-o cundecu-o ichi-gá, te vá cáda-ó dàtná quidé nchaa ñáyiu ñá túú sàndáá iní ñáhá xii-gá, chi ñáyiu-áⁿ ñá túú-gá quidé cuendá-yu te núu quide váha-yu àdi ñá túú quide váha-yu ndécú-yu. ⁷ Te nchaa ñáyiu quide cuehé quidé dùha cúu-yu dàtná ìⁿ ñáyiu xidí àdi xínì, chi ñá túú quide cuendá-yu nàcuáa cada-yu ìⁿ sá váha dàtná cùnì Yá Ndiòxí. ⁸ Te nchòhó ñáyiu sa ní cutnùnì iní-xi nàcuáa nduu ichi váha, dandixi túu-ndo iní-ndó cundecu-ndo, te quindáá ndisa iní-ndó Yá Ndiòxí, te cuu iní-ndó cuè tnaha ñáyiu-ndo te ducaⁿ te vá táxi tnùnì ñáhá nì ìⁿ sá cuehé sá dúhá xii-ndo. Te ío cuhuⁿ iní-ndó sá cundècu-ndo ndíhí-gá ni caa ni quíhíⁿ. ⁹ Chi Yá Ndiòxí ní cachí-gá sá vã quíhíⁿ-ó núú ùhú núú ndàhú,

chi mee-gă nacuaca ñaha-gă xii-o cunde-cu-o ndihi-gá, chi ní sándáá iní-ó Xítohó Jesucristú. ¹⁰ Te mee Xítohó Jesucristú ní xihí-gá sá cuendá nchaa yíca cuéchi-o, te ní ndoto-gá cuendá nduu táhú-ó cunde-cu-o ndihi-gá andiu na sáá nduu cuéi sa ní xihí-ó, àdi vátá cùú-gá-ó. ¹¹ Núu xiáⁿ chí cuãha tnàha tnúhu ndee iní, te chindee tnàha-ndo cunde-cu-ndo ichi-gá dàtná tá quide-ndo véxi.

Té Páblú dáquini sàhú-dé ñáyi ndècu ichi Xítohó Jesucristú

¹² Te nchòhó ñáyi ndècu ndihi-ndí ichi Xítohó Jesucristú, càháⁿ ndàhú-ndí núú-ndó sá cànèhe-ndo sá yíñùhu núú cuè té cùnno xinu cuechi núú Yá Ndiòxi, cue té dānehé ñáhá xii-ndo nacuáa cunde-cu-ndo ichi-gá. ¹³ Te càháⁿ váha-ndo ndihi-güedé, te cuu iní-ndó-güedé, chi nàha-ndo sá chíúⁿ Yá Ndiòxi quidé-güedé. Te cunde-cu ndihi váha tnàha-ndo nchaa-ndo.

¹⁴ Te càháⁿ ndàhú tucu-ndí núú-ndó sá càháⁿ-ndó dōho nchaa ñáyi ñá tuú cuini cada chiúⁿ, te ducaⁿ cuãñaha-ndo tnúhu ndee iní xii nchaa ñáyi quiyuhu iní-xi canchicúⁿ nihnu ichi-gá, te chindee tucu-ndo nchaa ñáyi vátá ngūnu ichi váha-gá, te cunduu càhnu iní-ndó núu-yu nchaa-yu.

¹⁵ Te cada ndee iní-ndó te núu ndècu tnaha ñáyi-ndo cùu úhú iní ñáhá-yu xii-ndo, te vá tnàhá-ni-ndo cùu úhú iní-ndó-yu. Te mee-ni sá váha cada-ndo sá cúu-xí nchaa tnaha ñáyi-ndo.

¹⁶ Te nchaa nduu ío cudí iní-ndó cunde-cu-ndo. ¹⁷ Te ñⁿ nduu ñⁿ nduu càháⁿ ndihi-ndo Yá Ndiòxi. ¹⁸ Te ndacáⁿ táhú-ndó núu-gá te núu nándi cùu sá yãha-ndo ndècu-ndo, chi ducaⁿ cuini-gá cada-o, te diu ducaⁿ nduu tnúhu càháⁿ Xítohó Jesucristú.

¹⁹ Te vá quèhndé nihnu-ndo chiúⁿ quide Espiritú Yá Ndiòxi iní-ndó.

²⁰ Te vá cáda sáá iní-ndó núu cuè té càháⁿ tnúhu Yá Ndiòxi nacuáa dàcahu iní ñáhá-gá xii-güedé. ²¹ Te cada cuendá váha-ndo nacuáa càháⁿ-güedé, te tñi-ndo nchaa tnúhu váha càháⁿ-güedé. ²² Te dañ-ndo nchaa ichi cuehé ichi duha.

²³ Te mee Yá Ndiòxi quidé-gá ío váha cùu iní-ó ndècu-o ichi-gá. Te xicáⁿ táhú-í núu-gá sá ná càda íí ñáhá-gá xii-ndo, te na còto ñaha-gá xii-ndo ndihi iní-ndó cuendá sá vá cáda-gá-ndó ní ñⁿ sá cuèhé sá dúhá, te diu-ni ducaⁿ na càda-gá sá cúu-xí-ndó ndéé ná sáá nduu quixi tucu Xítohó Jesucristú ñuyú-a. ²⁴ Chi Yá Ndiòxi Yaá ní càháⁿ ñáhá xii-o cada-gá nacuáa ní càháⁿ-gá, te chindee ñaha-gá xii-ndo.

Té Páblú quidé ndèe iní-dé ñáyi xñdecu ichi Xítohó Jesucristú ndécú ñúú Tesalónica

²⁵ Te nchòhó ñáyi ndècu ndihi-í ichi Xítohó Jesucristú, cácaⁿ táhú-ndó núu Yá Ndiòxi sá ná chindee ñaha-gá xii-ndí.

²⁶ Te cùñaha-ndo xii nchaa ñáyi ndècu ndihi-o ichi Xítohó Jesucristú sá ní yuhu ní iní-ndí quidé ndèe iní ñáhá-ndí xii-ndo ndihi-yu.

²⁷ Te vitna mee Yá Ndiòxi ndéhé-gá sá càháⁿ ndàhú-í núu-ndó sá dácua-ndo tutú-a núu nchaa ñáyi ndècu ndihi-o ichi-gá.

²⁸ Te Xítohó Jesucristú ío na chindee chítúu ñaha-gá xii-ndo núu cuaháⁿ núu véxi. Te ducaⁿ na cunduu. Te ío chí cáda ndèe iní-ná vitna.

**TUTÚ CÚÚ ÛÚ NÍ
CADÚHA TĒ PĀBLÚ
QUÍHⁿ NDAHA
ÑÁYIU ÑUÚ
TESĀLÓNICÁ**

Té Pāblú ndihi cue té cùndihi-dé cādūha-güedé tutú quíhⁿ ndaha ñáyiú xindecu ichi Xítóhó Jesucristú ndécú ñúú Tesālónicá

¹ Yúhú té Pāblú cādūha-í tutú-a ndihi té Silvanú, ndihi té Timúteú cuendá daquixi-í ndaha nchòhó ñáyiú ndècu ndihi-ndí ichi Xítóhó Jesucristú ndécú ñúú Tesālónicá, chi tnàhá tnúhu-ndo ndihi Tátá-ó Dütú Ndiòxí, ndihi Xítóhó Jesucristú. ² Te xicáⁿ táhú-ndí núú Dütú Ndiòxí, ndihi núú Xítóhó Jesucristú sá ná chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cùndecu-ndo.

Yá Ndiòxí cada ndáá-gá cuéchi nchaa ñáyiú ndècu ichi cuehé ichi duha na sàá nduu quixi tucu Xítóhó Jesucristú

³ Te nchòhó ñáyiú ndècu ndihi-ndí ichi Xítóhó Jesucristú, càhí tnúhu-í xii-ndo sá cùnàha-ndo sá ñà túú dàña ndee-ndí ndàcáⁿ táhú-ndí núú Yá Ndiòxí cuendá-ndó, chi dacuití dūcaⁿ taú-xi cūduu chi ío-gá tá sàndáá iní-ndó-gá cuáháⁿ, te ducaⁿ ùuⁿ-gá tá cūu iní tnàhá-ndó nàcuáa ndècu-ndo ichi Yá Ndiòxí. ⁴ Núú xiáⁿ nchúhú ío váha càháⁿ-ndí cuendá-ndó núú nchàa ñáyiú sàndáá iní tnúhu Yá Ndiòxí nchaa núú tàcá-yu dàcuahá-yu tnúhu-gá, chi ío sàndáá iní-ndó-gá, te ñà túú dàña ndeé-ndó nchicúⁿ nihnu-ndo ichi-gá, te quide cahnu-ni iní-ndó cuéi nándi sá yàha-ndo ndècu-ndo ichi-gá. ⁵ Te sá dúcáⁿ quide váha-ndo ndècu-ndo xiáⁿ cùtnùní nàcuáa cada ñaha Yá Ndiòxí xii-ndo na sàá nduu, chi nduu táhú-ndó cùndecu-ndo núú táxi tnùní-gá, te

ducaⁿ càda-gá chi cūu-gá Yá quidé ndáá cuiti. Te vitna ndòho-ndo nacuáa ndihu ndaha-gá dava-gá ñáyiú.

⁶ Te Yá Ndiòxí ío váha ndáá quidé-gá, chi mee-gá nachinaa-gá nchaa sá quidé ñaha ñáyiú cūu úhú iní ñáhá xii-ndo, ⁷ te nchoo ñáyiú ndòho cuendá Xítóhó Jesucristú nucúndecu váha-o na sàá nduu núu túu-gá andiu, te tnàhá cue espíritú xínú cuéchi núú Yá Ndiòxí cuuⁿ ndihi-gá, te cue espíritú-án quidé-xi nchàa núú chiúⁿ tahu-gá. Te òré nuu túu-gá andiu ndihi cue espíritú-án, te ío dátásaⁿ-xi andiu. ⁸ Te dandòho-gá nchaa ñáyiú ñà túú tnàhá tnúhu ndihi Yá Ndiòxí, ñáyiú ñà túú sàndáá iní tnúhu Xítóhó Jesucristú tnúhu sá càháⁿ nàcuáa naníhí tàhú-yu. ⁹ Te nchaa ñáyiú-án ío dandòho ñaha-gá xií-yu, chi ndohó-yu ni caa ni quíhⁿ, te vá cùndécú-yu núú ío váha càa ndecu-gá táxi tnùní-gá. ¹⁰ Te ducaⁿ càda ñaha-gá xií-yu na sàá nduu, te dàvá-án ío cada càhnu ñaha nchaa ñáyiú sàndáá iní ñáhá xii-gá. Te tnàhá nchaa nchòhó ñáyiú ní sàndáá iní tnúhu ní càháⁿ-ndí ducaⁿ càda-ndo, te nchaa-o ío cuñúhu-o-gá dàvá-án.

¹¹ Te cuendá xiáⁿ núu ío xicáⁿ táhú-ndí núú Dütú Ndiòxí sá ná chindee ñaha-gá xii-ndo cùndecu váha-ndo ichi-gá dàtna cuini méé-gá cundecu nchaa ñáyiú ní càháⁿ-gá cundecu ndihi-gá. Te xicáⁿ táhú tūcu-ndí núú-gá sá ío na chindee ñaha-gá xii-ndo càda-ndo nchaa sá váha sàni iní-ndó, ndihi cuendá chiúⁿ quide-ndo cuendá-gá, te ducaⁿ chi sàndáá iní-ndó-gá. ¹² Te núu ducaⁿ na càda-ndo, te càháⁿ váha ñáyiú cuendá Xítóhó Jesucristú, te tnàhá-ni nchòhó càháⁿ váha-yu cuendá-ndó, chi mee Yá Ndiòxí ndihi Xítóhó Jesucristú cùndáhu iní ñáhá-gá chindee ñaha-gá xii-ndo.

2

Tée quixi dandàhú ñáyiu

1 Te nchòhó ñáyiu ndècu ndihí-ndí ichi Xítohó Jesucristú cächí tnúhu-ndí xii-ndo nàcuáa cada-xi nduu na quíxi tucu-gá, chí quixi-gá nacuaca ñaha-gã xii-o, núu xí^a càháⁿ-ndí dóho-ndo. 2 Te ñá díú sã íⁿ tnúhu tecú dóho-ndo te ngúita-ndo càni íⁿ caní úú iní-ndó, te ní vã yùhú-ndó te núu véxi íⁿ tée cächí-dé sã càháⁿ-dé tnúhu Yá Ndiòxí, te cächí-dé sã sã véxi Xítohó Jesucristú, te vã quíndáá iní-ndó tnúhu càháⁿ-dé chí ñá ndáá, àdi véxi íⁿ tée nèhe íⁿ tutú núú-ndó te cächí-dé sã yùhú ní tendaha-í véxi, te núu tütú-áⁿ càháⁿ-xi sã sã véxi Xítohó Jesucristú, te diu-ni vã quíndáá iní-ndó nàcuáa càháⁿ-xi, te ndèda-ni càa ñáyiu càháⁿ-yu dàvã-áⁿ sã sã véxi-gá dico vã quíndáá tnàhí iní-ndó. 3 Núu xí^a dátüha ñaha-í xii-ndo cuèndá sã vã dáña tnàhí-ndo mèe-ndo dandahú ñáhã ñáyiu. Chí cùmání-gã sãá nduu quíxi tucu Xítohó Jesucristú, te ngúita nchaa ñáyiu cuu úhú iní-yu Yá Ndiòxí, te dàvã-áⁿ quini-yu íⁿ tée xidó quidé nchaa sã cuèhé sã dúhá, te tée-áⁿ quíhíⁿ-dé núu ùhú núu ndàhú ní caa ní quíhíⁿ. 4 Te diu-ni tée-áⁿ vã ndèe iní-dé nchaa sã cächí ñáyiu cùu ndiòxí-yu ndihí nchaa dava-gá sã quidé càhnú-yu, te cächí-dé sã ío cùnuu-dé, te quíhu-dé ndéé xití veñúhu núu ndécú cuè ñáyiu chíñuhu ñaha xii Yá Ndiòxí coo-dé, te cùñaha-dě xii-yu sã cúu-dé Yá Ndiòxí.

5 Te dandacu iní-ndó chí nchaa tnúhu-a sa ní cachí tnúhu-í xii-ndo cùtnàhá ní xíndecu ndihí ñaha-í. 6 Te nchòhó sa cùtnuní iní-ndó nã cúú sã ngání ñaha xii tée-áⁿ núu ñá túú-dé vitna, dico na sãá nduu tàú-xi quee-dé caca cuu-dé te dàvã-áⁿ quini ñáhã nchaa ñáyiu. 7 Te ío titní núú sã cuèhé sã dúhá quidé yucu ñávaha dicó-ni sã vátã quíni-gã ñáyiu, dico ndècu íⁿ sã ñá

dáña càda-xi nchaandi túhú nàcuáa cächí iní-xi, dico sãá nduu xòcuíñí sã ñá dáña-áⁿ te dàvã-áⁿ cada-xi nchaa nàcuáa cächí iní-xi. 8 Te sãá nduu quini-yu tée quide nchaa sã cuèhé sã dúhá-áⁿ ñuyíú-a. Te òré ná quixi túu Xítohó Jesucristú, te mee-ni sã dátãsaⁿ-xi, ndihí yóco yuhu-gá cuú tée-áⁿ. 9 Te sácuihnã tendaha-xi tée-áⁿ quixi-dé, te cuáñaha-xi tnúhu ndee iní cada-dé nándi sã cadã-dé. Te cada-dé sã ñá túú tnàhí ndacu ní íⁿ ñáyiu ñuyíú-a cadã-yu, dico mee-ni dandahú ñáhã-dě xii-yu caca cuu-dé. 10 Te nchaa núu sã cuèhé sã dúhá càda-dé dandahú-dé nchaa ñáyiu sa ñúhu ichi cuáhãⁿ núú ùhú núú ndàhú, chí ñá túú ní cuíni-yu quíndáá iní-yu tnúhu ndáá tnúhu Yá Ndiòxí cuèndá nanhí tãhú-yu. 11 Te sã dúcãⁿ ñá túú ní cuíni-yu quíndáá iní-yu tnúhu ndáá, núu xí^a daña Yá Ndiòxí dacáhãⁿ yucu ñávaha iní-yu quíndáá iní-yu nchaa tnúhu ndehnde 12 cuèndá cuíta nihnú-yu, te ducaⁿ yãha-yu chí ñá túú sãndáá iní-yu tnúhu ndáá càháⁿ Yá Ndiòxí, chí mee-ni nchaa sã cuèhé sã dúhá cùdíⁿ iní-yu quidé-yu, te cuíta nihnú-yu chí ducaⁿ ní cachí Yá Ndiòxí cunduu.

Ñáyiu ní cachí Yá Ndiòxí nanhí tãhú

13 Te nchòhó ñáyiu ndècu ndihí-ndí ichi Xítohó Jesucristú, ñáyiu ío cùu iní-gã cächí tnúhu-ndí xii-ndo sã ñá túú dàña ndee-ndí ndacãⁿ tãhú-ndí núú Yá Ndiòxí cuèndá-ndó, chí ducaⁿ tàú-xi cunduu, chí Yá Ndiòxí ní cachí-gã ndéé cùtnàhá vátã ngãva-gã ñuyíú sã nanhí tãhú-ndó, te diu Espiritú-gã dacáhãⁿ-xi iní-ndó ndècu yíñuhu-ndo núú-gã, te sãndáá iní-ndó tnúhu ndáá càháⁿ-gã núu xí^a ní nanhí tãhú-ndó. 14 Chí cuèndá tnàhí-a ní càháⁿ ñáhã Yá Ndiòxí xii-ndo, te ducaⁿ ní nanhí tãhú-ndó chí ní sãndáá iní-ndó tnúhu Xítohó Jesucristú ní càháⁿ-ndí núú-ndó,

te sáá nduu te cundecu-ndo tñahá-ndó núú ío váha cãa ní nduu táhú Xítóhó Jesucristú ndécú-gã.

¹⁵ Núu xiãⁿ nchòhó ñáyiú ndècu ndihí-ndí ichi Xítóhó Jesucristú ío cãháⁿ-ndí dóho-ndo sã và dáñã nihnu-ndo ichi-gã, te ní và nácuànaa-ndo nchaa tnúhu ní cãháⁿ-ndí núú-ndó cùtnàhá ní xíndecu ndihí ñaha-ndí xii-ndo, te ñu-ni ducaⁿ càda-ndo nchaa tnúhu tëndaha-ndí véxi. ¹⁶⁻¹⁷ Te xicáⁿ táhú-ndí núú-gã sá ná dàcãháⁿ-gã iní-ndó cùndecu-ni-ndo ichi-gã, te ducaⁿ ío na chindee ñaha-gã xii-ndo cãháⁿ-ndó mée-ni tnúhu váha, te cada váha-ndo cùndecu-ndo nacúaⁿ cuu váha iní-gã, chi mee Dütú Ndiõxí ío cùu iní ñáhã-gã xii-o, te ñu-gã ní taxi-gã tnúhu ndee iní cundecu ndihí-o ní caa ní quíhíⁿ, te ní cachí tnúhu tucu-gã ingá tnúhu váha sá cùndetu-o Xítóhó Jesucristú.

3

Cãháⁿ ndihí-ndo Yã Ndiõxí cuèndá-ndí

¹ Te nchòhó ñáyiú ndècu ndihí-ndí ichi Xítóhó Jesucristú, ndéé núú ndihí-nã cãchí tnúhu-í xii-ndo sã cãháⁿ ndihí-ndo Yã Ndiõxí cuèndá-ndí cuèndá sá ná chindee ñaha-gã xii-ndí, te ducaⁿ ndihí-ni cuténuu tnúhu Xítóhó Jesucristú nchaa xichi, te cudíí iní-yu tnúhu-gã dàtná quidé nchòhó. ² Te cãháⁿ ndihí tucu-ndo Yã Ndiõxí cuèndá sá ná còto ñaha-gã xii-ndí, te ñã túú nã cada ñaha ñáyiú cuihna iní-xi ndècu ichi cuehé ichi duha xii-ndí, chi ñã ncháã-yu sãndáá iní-yu tnúhu-gã. ³ Dico Xítóhó Jesucristú quidé-gã nchaa sã cãháⁿ-gã, te ñu-gã cada te nchòhó cundecu-ni-ndo ìchi-gã, te coto ñaha-gã xii-ndo cuèndá sã ñã túú nã cada ñaha yùcu ñávãha. ⁴ Te Xítóhó Jesucristú quidé-gã cùtnúni iní-ndí sã nchòhó quidé-ndó nchaa nacúaⁿ ní dánèhé ñáhã-ndí xii-ndo, te ñu-ni ducaⁿ càda-ndo cundecu-ndo. ⁵ Te

xicáⁿ táhú-ndí núú Yã Ndiõxí sá ná chindee ñaha-gã xii-ndo cùu iní-ndó-gã, te ñu-ni-gã ná chindee ñaha-gã xii-ndo cùnduu cahnu iní-ndó, chi Xítóhó Jesucristú ducaⁿ ío cãhnu iní-gã.

Tàú-ó càda chiúⁿ-o

⁶ Te nchòhó ñáyiú ndècu ndihí-í ichi Xítóhó Jesucristú, cãháⁿ-í dóho-ndo sã mée-gã cuiní-gã sã và nihí tñahã-gã-ndó ndihí ndéda-ni cãa ñáyiú cãchí sã sãndáá iní tnúhu-gã, ñáyiú ñã túú cuiní cada chiúⁿ, chi ñáyiú ducaⁿ xíquide ñã túú cuiní-yu tní-yu tnúhu sã ní dánèhé ñáhã-ndí xii-ndo. ⁷ Te nchòhó sa xini-ndó nacúaⁿ cada-ndo cùndecu-ndo canchicúⁿ nihnu-ndo nacúaⁿ quide-ndí. Te cùtnàhá ní xíndecu ndihí ñaha-ndí xii-ndo chi ní ñⁿ nduu ñã túú ní tñhío-ndí. ⁸ Te ní ñã túú dico ducaⁿ ní quèheⁿ-ndí sã ndécú ndihí ñáyiú caxi-ndí àdi canehe-ndí, chi cuèi nduu cuèi niú ío ní quide chiúⁿ-ndí ní nihí-ndí díhúⁿ ní saaⁿ-ndí nchaa sã ní nãndihí-ndí cuèndá sã ñã túú ní cuiní-ndí chichiuⁿ ñaha-ndí xii-ndo. ⁹ Te cuèi tàú ndisa-ndí cachí tnúhu-ndí xii-ndo sã chindèe ñaha-ndo xii-ndí ní cùu, dico ní quide chiúⁿ-ndí cuèndá ní cuiní-ndí dánèhé ñáhã-ndí xii-ndo nacúaⁿ cada-ndo cùndecu-ndo. ¹⁰ Te cùtnàhá ní xíndecu ndihí ñaha-ndí xii-ndo ní cachí-ndí sã ncháã ñáyiú ñã túú cuiní cada chiúⁿ te vá cuãha-ndõ-yu sã cãxí-yu. ¹¹ Te vitna nihí-ndí tnúhu sã ío dava nchòhó ñã túú tñahí quide chiúⁿ-ndo, chi àúⁿ nã cuu ndí cuu ndí cuu-ni-ndo núú ndécú dàva-gã tñaha ñáyiú-ndo. ¹² Te yúhú cãháⁿ-í dóho nchaa nchòhó ñáyiú ducaⁿ ñã túú cuiní cada chiúⁿ sã cáda chiúⁿ-ndo cuèndá nihí-ndó ncháã sã cóhó sã cãxí-ndó, te duha cãháⁿ-í dóho-ndo, chi ducaⁿ cuiní Xítóhó Jesucristú Yáá táxí tnúni ñáhã xii-o cada-ndo, te óré cada chiúⁿ-ndo te vá ío cada dusaⁿ-ndo.

¹³ Te nchòhó ñáiyu ndècu ndihí-í ichi Xítohó Jesucristú, vá dáñá ndéé-ndó càda-ndo mee-ni sá vâha. ¹⁴ Te núu ìíⁿ ñáiyu ndècu ndihí-ndo ñá túú cuíní-yu tnáí-yu tnúhu càháⁿ-ndí núú tütú-a, te cundehe-ni-ndo núu ndéda càá-yu, te vá nihí tnáhá-gă-ndó ndihí-yu cuendá sá ná cùcahaⁿ núú-yu, ¹⁵ dico vá cúú ũhú iní-ndô-yu, chi cáháⁿ-ndó dôho-yu cada-ndo sá ndécú-ndó ichi Xítohó Jesucristú ndihí-yu.

Tnúhu ndéé núú ñí ndihí-ná

¹⁶ Te mee Xítohó Jesucristú ío váha cùu iní-gá ndécú-gă, te xicáⁿ táhù-í núú-gă sá mée-gă ná cáda te ío váha cuu iní-ndó tnáhá-ndó cùndecu-ndo cuéi nása-gă ná cùndecu-ndo. Te mee-gă ná cùndecu ndihí ñaha-gă xii-ndo nchâa-ndo.

¹⁷ Te vitna yúhú té Păblú tée-í tnúhu-a quide ndee iní ñáhà-í xii-ndo, te diu-ni duha càa nchaa letrá-í nchaa núú tütú cáđŭha-í. ¹⁸ Te xicáⁿ táhù-í núú Xítohó Jesucristú sá ío na chindee chitúu ñaha-gă xii-ndo nchâa-ndo. Te ducaⁿ na cùnduu. Te ío chí cáda ndèe iní-nă vitna.

TUTÚ DÍHNA NUU NĪ CADÚHA TÉ PĀBLÚ QUIHĪⁿ NDAHA TÉ TIMÛTEÚ

*Té Pāblú cādūha-dé tutú quíhĪⁿ
ndaha té Timùteú*

¹ Yúhú té Pāblú ní tendaha ñàha Yá Ndiòxí cāháⁿ-í tnúhu Xítohó Jesucristú núú ñáyiú chi ducaⁿ ní cachí Yá Ndiòxí cunduu, te diu-gá cúú-gă Yaá ní dácăcu nihnu ñaha xii-o núú úhú núú ndáhú. Te tnàhá Xítohó Jesucristú ducaⁿ ní cachí-gă sá cāháⁿ-í tnúhu-gă, te diu-gă ní taxi-gă tnúhu ndee iní xii-o să cundăcu-o ndihĪ-gă ni caa ni quíhĪⁿ. ² Te yòhò té Timùteú cúú-n ĩⁿ tée ní sanu ichi ndisa-í ichi Xítohó Jesucristú chi ío váha ní sándáá iní-n-gă. Te cādúha-í ĩⁿ tutú daquixi-í ndaha-n. Te xicáⁿ táhù-í núú Tātá-ó Dútú Ndiòxí ndihĪ núú Xítohó Jesucristú sá ío na chindee chitúu ñaha-gă xii-n, te ducaⁿ ndĪ nduú-gă ná cādá te ío váha cuu iní-n cundăcu-n.

*Cuendá nchaa ñáyiú dāndahú
tnàha ñáyiú-xi*

³ Te nàha-n nacuáa ní cāháⁿ-í cútñàhá ní quee-í ñuú Éfesú véxi-í distritú Macèdoniá, chi ní cachí-í sá quéndōo-n ñuú-áⁿ cāháⁿ-n dōho nchaa ñáyiú dāndahú ñáhá cāhĪ sá cāháⁿ tnúhu Yá Ndiòxí te ñá ndáá sá cāháⁿ-yu tnúhu-gă, te diu-ni ducaⁿ cāháⁿ-í vitna cada-n cundăcu-n. ⁴ Te cúñaha-n xiú-yu sá vā cādá cuendá-yu nchaa cuendú nihĪ-yu năcuáa ní xóo cada ñáyiú ní xindecu ndéé sanaha, te nchaa cuendú-áⁿ dicó chináá ñáhá-xí chi ñá túú vėdana nāndihĪ-xi, te ni ñà túú chindee ñaha-xi cada-o nacuáa cuinĪ Yá Ndiòxí, chi mee-ni să quindáá iní-ó-gă quidė-xí quide-o nchaa nacuáa cuinĪ-gă.

⁵ Te duha cāháⁿ-í cúñaha-n xiú-yu cuendá sá ná cùu iní-yu tnàha

ñáyiú-yu, te xini ñuhu-xi nduu ndoo nduu nine iní-yu, te cunduu váha iní-yu, te quindáá iní-yu Yá Ndiòxí, te vā cāní ĩⁿ cani úú iní-yu, te núu ducaⁿ na cādá-yu te cuu iní ndisá-yu nchaa tnàha ñáyiú-yu. ⁶ Chi dava ñáyiú ñá túú-gă quidė-yu nchaa năcuáa cāháⁿ-í-a, chi mee-nă nchaa cuendá sá ñă túú vėdana nāndihĪ xicāháⁿ-yu. ⁷ Te cuinĪ-yu cāháⁿ-yu nchaa tnúhu ní cāháⁿ ndĪ Moisés dico ñá ndăcŭ-yu, chi cuėi ni yuhu ni iní-yu cāháⁿ-yu dico ñă tēcú tnūnĪ-yu năcuáa ní cāháⁿ ndĪ, te ni tnúhu cāháⁿ mēē-yu ñă cútñunĪ iní-yu năcuáa ndūu-xi.

⁸ Te sa nàha-o sá ncháá tnúhu ní cāháⁿ ndĪ Moisés váha, te núu na tēcú tnūnĪ-ó nă cuendá ducaⁿ ní ngūndecu nchaa tnúhu-áⁿ.

⁹ Te cútñunĪ iní-ó să ñă díú să cúú-xí nchaa ñáyiú quide váha ndėcu ñuyúú-a ni ngūndecu nchaa tnúhu-áⁿ, chi ní ngūndecu-xí sá cúú-xí nchaa ñáyiú ñá túú quide váha, ndihĪ cuendá nchaa ñáyiú ío sáa iní-xi, ndihĪ cuendá nchaa ñáyiú quide cuehé quidė dūha, ndihĪ cuendá nchaa ñáyiú ío ndėcu cuechi-xi, ndihĪ cuendá nchaa ñáyiú ñá túú nēhe vėdana sá yĪñuhu núú Yá Ndiòxí, ndihĪ cuendá nchaa ñáyiú ñá túú cāháⁿ váha cuendá ichi Yá Ndiòxí, ndihĪ cuendá nchaa ñáyiú sàhni tātá-xi ndihĪ nāná-xi, ndihĪ cuendá nchaa dava-gă ñáyiú sàhni tnaha, ¹⁰ ndihĪ cuendá nchaa cue tée cāháⁿ ndihĪ ñáyiú dĪhĪ te ñá díú ñādhĪ-güedé cúú-yu, ndihĪ cuendá tucu nchaa ñáyiú dĪhĪ cāháⁿ ndihĪ cue tée te ñá díú yĪ-yu cùu-güedé, ndihĪ cuendá nchaa cue tée cāháⁿ ndihĪ tnàha ndĪ mee tée-xi, ndihĪ cuendá nchaa ñáyiú chĪváha tnàha ñáyiú-xi cuendá sá cuinĪ-yu nĪhĪ-yu díhŭⁿ, ndihĪ cuendá nchaa ñáyiú ndehnde, ndihĪ cuendá nchaa ñáyiú cācunehe ndéé Yá Ndiòxí cuendá cuinĪ-yu cútñunĪ iní tnàha ñáyiú-yu sá cāháⁿ ndáá-yu, te

ñá ndáá sá càháⁿ ndáá-yu, ndihí cuendá nchaa ñáyiú quide nchaa dava-gá sá ñá túú tàuchiuⁿ Yá Ndióxi cáda-yu. Cuendá nchaa ñáyiú ducaⁿ xíquide ní ngúndecu nchaa tnúhu-áⁿ. ¹¹ Te nchaa tnúhu-áⁿ ñⁿ-ni cùu-xi ndihí nchaa tnúhu sá ní cachí Yá Ndióxi cáháⁿ-í, te tnúhu-áⁿ cúu-xí tnúhu váha víhi, chi mee-gá ío váha iní-gá.

Té Páblú ndàcáⁿ táhú-dě núú Yá Ndióxi sá ní cundáhú iní ñhá-gá xii-dé

¹² Te Xítoho Jesucristú ní cutnùní iní-gá sá cáda ndáá-í cada-í nchaa chiúⁿ tahu-gá. Te ndàcáⁿ táhú-í núú-gá sá ní taxi-gá chiúⁿ-gá quidè-í, te ío chindee ñaha-gá xii-í. ¹³ Te ní taxi-gá chiúⁿ-gá quidè-í cuèi ní xóo cáháⁿ cuèhé-í cuendá-gá, te cuèi ní xóo cúú cuèhé cúú duha-í nchaa ñáyiú ndècu ichi-gá, te cuèi nándi-gá sá ní xóo cada-í-yu dico ní cundáhú iní ñhá Yá Ndióxi xii-í, chi vátá quindáá-gá iní-í Xítoho Jesucristú cutnàhá ducaⁿ ní xóo cada-í, te ní ñá cutnùní iní-í nchaa sá quidè-í ní cùu, te cuèi ducaⁿ ní xóo cada-í, ¹⁴ dico Yá Ndióxi ío ní cundáhú iní ñhá-gá xii-í te chindee ñaha-gá. Te mee Xítoho Jesucristú chindèe ñaha-gá xii-í sàndáá iní-í-gá, te cùu iní-í nchaa tnàha ñáyiú-í.

¹⁵ Te ñihí-ó tnúhu sá Xítoho Jesucristú ní quixi-gá ñuyíú-a cuendá sá dácău nihnu-gá nchaa ñáyiú ndècu ichi cuèhé ichi duha. Te tnúhu-áⁿ cúu-xí ñⁿ tnúhu ndáá, te xini ñuhu-xi quindáá iní nchaa nchoo ñáyiú ndècu ñuyíú-a. Te yúhú cúu-í téé ío-gá ndécú cuèchi-xi núú Yá Ndióxi ní cùu. ¹⁶ Te Yá Ndióxi ní cundáhú iní ñhá-gá ní dácău nihnu ñaha-gá xii yúhú téé xidó ndécú cuèchi-xi ní cùu, cuendá cutnùní iní nchaa ñáyiú sá Xítoho Jesucristú ío cànhu iní-gá. Te sá dúcáⁿ ní quide ñaha-gá xii-í, te xíáⁿ cutnùní iní-yu sá núu na quindáá iní ñhá-yu xii-gá te cundecú-yu ndihí-gá ní caa ní quíhíⁿ. ¹⁷ Te

nchaa-o chí ná càchí-ó sá ío cànhu cuu Yá Ndióxi, te canehé-o sá yíñùhu núú-gá ní caa ní quíhíⁿ, chi mee-gá cúu-gá Yá táxi tnùní nchaa nduu nchaa quíú. Te cùu-gá ñⁿ Yá ñá túú xini núú-ó, te ñⁿ dídí ní-gá ío ndècu ndihí-gá nchaa sá xini tnùní-gá.

¹⁸ Te yòhó té Timùteú téé cùu datná ñⁿ déhe mee-í sa ñaha-n nacuaá ní cáháⁿ dava-gá cue téé càháⁿ tnúhu Yá Ndióxi cuendá-n, te diu-ni ducaⁿ càháⁿ-ú tucu, te cada-n nchaa nacuaá càháⁿ tnúhu-áⁿ chi diu nchaa tnúhu-áⁿ canu ichi ñaha-xi xii-n cada-n nchaa nacuaá cùini Yá Ndióxi. ¹⁹ Te ío quindáá iní-n Xítoho Jesucristú, te cada váha-n cùndecu-n nacuaá cundecu váha iní-n, chi dava ñáyiú ñá túú-gá ducaⁿ quidè-yu núu xíáⁿ ñá túú-gá sàndáá iní-yu nàcuáa càháⁿ tnúhu-gá. ²⁰ Te diu-ni ducaⁿ ní quide té Himènéú ndihí té Ljandrú ní dáñá ndèe-güedé ñá túú-gá sàndáá iní-güedé nàcuáa càháⁿ tnúhu Xítoho Jesucristú, te ní xáhaⁿ-í xii-güedé sá ná cùndoho-ná-güedé núu nása cada ñaha sàcùíhñá xii-güedé, te ducaⁿ ní xáhaⁿ-í cuendá sá vǎ càháⁿ cuèhé-gá-güedé cuendá Yá Ndióxi.

2

Nàcuáa cáháⁿ ndihí-o Yá Ndióxi

¹ Te na càchí tnúhu-í xii-n nchaa nacuaá cada-n. Te díhna-gá càchí tnúhu-í sá cáháⁿ ndihí-n Yá Ndióxi cuendá nchaa ñáyiú te núu nása cùu xíndecú-yu, te cácáⁿ táhú-n núú-gá cuendá-yu, te ducaⁿ ío ndacáⁿ táhú-n núú-gá cuendá nchaa sá váha quide ñaha-gá xii-yu. ² Te ducaⁿ càháⁿ ndihí-n Yá Ndióxi cuendá nchaa cue téé cùnuu ndihí cuendá nchaa dava-gá cue téé cùchiuⁿ cuendá cada váha-güedé, te ducaⁿ nchòo ñá túú ñá cuu cundecu-o, te ñá túú tnàhí ná caní iní-ó cùndecu-o, te ío cundecu yíñùhu-o núú Yá Ndióxi, te cada-o nchaa nacuaá tàù-xi cunduu. ³ Te núu ducaⁿ na càda-o cáháⁿ ndihí-o

Yá Ndiöxí cuendá nchaa ñáyi te quide váha-o, te ndúu vétú iní Yá Ndiöxí Yaá ní dácâcu nihnu ñaha xii-o núu ùhú núu ndàhú. ⁴ Te mee-gá cuini-gá sá ncháá ñáyi tecú tnúni-yu nchaa tnúhu cãháⁿ-gá, chi cuini-gá sá nãnihí tãhú-yu. ⁵ Te ñⁿ-ni Dútú Ndiöxí ndécú, te ñⁿ-ni Xítohó Jesucristú, te medi-ni Xítohó Jesucristú quidé-gã tnãhá tnúhu-o ndihí Yá Ndiöxí. ⁶ Te Xítohó Jesucristú ní dãnã-gã mee-gã ní sahani ñaha-güedé xii-gã cuendá sá cuini-gá sá cãcu nihnu nchaa ñáyi ndècu ñuyú núu ùhú núu ndàhú. Te Yá Ndiöxí cuini-gá sá ncháá ñáyi ñuyú ndécú vitna níhi-yu tnúhu nãcuáa ní cuu ní xíhi Xítohó Jesucristú. ⁷ Te Yá Ndiöxí ní cachí-gá sá cãháⁿ-í tnúhu-ãⁿ ndëni ní cuu núu xĩndecu ñáyi ñã túú cùu ñáyi israhél, te mee-ni tnúhu ndáá dãnèhé-í-yu nãcuáa quindáá iní ñãhá-yu xii-gã, te yúhú cãháⁿ ndáá-í sá Yá Ndiöxí ní cachí-gá sá cãháⁿ-í tnúhu-gá chi ndècu ndihí-í Xítohó Jesucristú, te ñã túú dãndahú ñãhá-í xii-n.

⁸ Te yúhú cuini-í sá ncháá xìchi cãháⁿ ndihí cue téé Yá Ndiöxí, te na cùnduu ndoo cunduu nine iní-güedé òré ndonehe-güedé ndaha-güedé cãháⁿ ndihí ñaha-güedé xii-gã, chi vá cùú cùdèéⁿ-güedé cuendá nchaa sá quidé ñaha ñáyi xii-güedé, te ni vá cání iní-güedé cúcuèhé tnãhá-güedé ndihí-yu. ⁹ Te cãchí tnúhu-í xii-n sã ncháá ñáyi ñã ní ná cùnduu díoyu nãcuáa tàú-xi cunduu, te vá cùnduu cuehé cunduu duha dàtnã cáá dío nchaa ñáyi ndècu ichi cuehé ichi duha, te na ndádã-yu díquí-yu nãcuáa tàú-xi cunduu, te vá ndádã cuèhé ndada duhá-yu, te vá cání iní-yu cunduu víi-yu ndihí sá ò ndèyáhu, te ni vá cání iní-yu cuinhú-yu dóó sã ò ndèyáhu. ¹⁰ Te mee-ni sã váha cadã-yu, chi ducaⁿ tàú-xi cada nchaa ñáyi ñã ní ndécú ichi Yá Ndiöxí. ¹¹ Te òré tàcã-yu núu

dãcuãhá-yu tnúhu Yá Ndiöxí, te cue ñáyi ñã ní dãnã-gã na ñãhi dacuãhá-yu tnúhu-gã, te cadã-yu nchaa nãcuáa cãháⁿ cue téé dàcuaha ñaha xii-yu tnúhu-gã. ¹² Te yúhú cãchí-í sá vá cùú dàcuaha ñáyi ñã ní cue téé, te ni vá cùú tàxi tnuní ñãhá-yu xii-güedé chi cunduu tnãví-ni yuhú-yu cundedóho-yu. ¹³ Te ducaⁿ xini ñuhu-xi cadã-yu, chi Yá Ndiöxí ní cadúha-gã díhna-gã té Adán te dàtnúni ní cadúha-gã tá Èvá. ¹⁴ Te ñã díú mèe té Adán ní dãndahú ñãhá sãcuíhnã xii-dé, chi tá Èvá ní dãndahú-xi, te ñã túú ní quide váha-xi núu Yá Ndiöxí sá dúcãⁿ ní sãndáá iní-xi tnúhu ní cãháⁿ sãcuíhnã-ãⁿ. ¹⁵ Dico ñáyi ñã ní nduu tãhú-yu sá cóo dèhe-yu, te naníhi tãhú-yu te núu vá dàñã ndèe-yu canchicúⁿ nihnú-yu ichi Yá Ndiöxí, te cundecu yíñuhú-yu núu-gã, te cuu iní-yu nchaa tnãhá ñáyi-yu, te cadã-yu nchaa nãcuáa tàú-xi cunduu cundecú-yu.

3

Nãcuáa tàú cue téé yìndaha ñaha xii ñáyi ndècu ichi Yá Ndiöxí cada-güedé

¹ Te ò ñⁿ tnúhu cãháⁿ ñáyi sá núu ñⁿ téé cuini quindaha ñaha xii ñáyi ndècu ichi Yá Ndiöxí, te ñⁿ sá váha cuini-dé cada-dé cãchí-yu, te ndáá quèé-xi tnúhu cãháⁿ-yu. ² Te yúhú cãchí-í sá cuè téé ducaⁿ na quindaha ñaha xii ñáyi te xini ñuhu-xi cuu-güedé cue téé quide ndáá cuendá sá vá cãháⁿ ñáyi cuendá-güedé sá ñã túú quide ndáá-güedé. Te na cù-güedé cue téé ndèca ñⁿ caa-ni ñãdihí, te na cù-güedé cue téé ñã túú quide cutexinu ndècu, te na cù-güedé cue téé quide nchaa nãcuáa tàú-xi cunduu, te na cù-güedé cue téé sãñaha núu vehe ndetátú nchaa ñáyi ñuhu ichi, te na cù-güedé cue téé dãnèhé

ñáhá vâha xii ñáyiú tnúhu Yá Ndiöxí. ³ Te vá cúú-güedé cue téé quihu, te ni vá cúú-güedé cue téé ndücu pletú, te ni vá cúú-güedé cue téé dicó-ni ducaⁿ nihí díhúⁿ, te ni vá cúú-güedé cue téé sàni iní nàá, te ni vá cúú-güedé cue téé ñuhu iní mee-ni díhúⁿ. Chi na cùu-güedé cue téé vâha iní-xi te cunduu càhnu iní-güedé. ⁴ Te na cùu-güedé cue téé ío vâha sànu ichi ñadihí-xi ndihí landú-xi, te na cùu-güedé cue téé quide nacuaá sàndáá iní ñáhá làndú-xi cuendá caneh-güexi sá yíñuhu núú-güedé. ⁵ Chi núu cùu-güedé cue téé ñá ndácú cànuichi ñadihí-xi ndihí landú-xi, te vá ndácú-güedé quindaha-güedé cue ñáyiú ndècu ichi Yá Ndiöxí. ⁶ Te vá cúú-güedé cue téé íchí ni sàndáá iní-xi tnúhu Yá Ndiöxí, chi na cuáháⁿ te cada nínu-güedé méé-güedé te cuíta nihnu-güedé dàtná ní xíta nihnu sácuihná. ⁷ Te xini ñuhu-xi cuu-güedé cue téé càháⁿ vâha ñáyiú cuendá-xi, cuéi ñá díú ñáyiú ndècu ichi Yá Ndiöxí cuendá sá vá cuátnùhu ñaha ñáyiú xii-güedé, chi núu ñáhá te cudana te sácuihná quesaha-xi tàxi tñuní ñáhá-xí xii-güedé.

Cue téé chindee ñaha xii cue téé yindaha ñaha xii ñáyiú ndècu ichi Yá Ndiöxí

⁸ Te tnàhá cue téé chindee ñaha xii cue téé yindaha ñaha xii ñáyiú ndècu ichi Yá Ndiöxí xini ñuhu-xi cuu-güedé cue téé quide nchaa nacuaá tàú-xi cunduu, te vá cúú-güedé cue téé càchí sá càháⁿ ndáá te ñá ndáá, te ni vá cúú-güedé cue téé quihu, te ni vá cúú-güedé cue téé sàni iní-xi dicó-ni ducaⁿ nihí díhúⁿ. ⁹ Te xini ñuhu-xi cuu-güedé cue téé ñá túú dàña ndeé sàndáá iní tnúhu Yá Ndiöxí, te na cùu-güedé cue téé ío vâha cùu iní-xi cuendá nchaa sá vâha quide-güedé. ¹⁰ Te xini ñuhu-xi coto ndeé ñáhá xii-güedé te núu cùu-güedé cue téé quide vâha, te núu cùu-güedé cue téé

quide vâha ña te cuu chindee-güedé cue téé yindaha ñaha xii ñáyiú ndècu ichi Yá Ndiöxí. ¹¹ Te tnàhá tucu nchaa ñáyiú díhí ná càdá-yu nchaa nàcuáa tàú-xi cunduu, te vá cùnduu yiti yuhú-yu, te ni vá cúú-yu ñáyiú quide cutexínu ndècu, te na cùu-yu ñáyiú ío vâha quide ndáá. ¹² Te nchaa cue téé chindee ñaha xii cue téé yindaha ñaha xii ñáyiú ndècu ichi Yá Ndiöxí, xini ñuhu-xi cuu-güedé cue téé ndècu ñⁿ caa-ni ñadihí-xi, te na cùu-güedé cue téé sànu ichi vâha ñadihí-xi ndihí landú-xi. ¹³ Te núu na càda ndáá-güedé chindee-güedé cue téé yindaha ñaha xii ñáyiú ndècu ichi Yá Ndiöxí, te canehé-yu sá yíñuhu núú-güedé, te ducaⁿ te vá cúú càháⁿ núú-güedé càháⁿ-güedé núú ñáyiú tnúhu Xítohó Jesucristú sá sàndáá iní-güedé.

Ío càhnu cuu tnúhu càháⁿ Yá Ndiöxí

¹⁴ Te cuení-í ndíhi-ni quixi coto ñaha-í xii-n dico díhna-gá càdúha-í tutú-a daquixi-í ndaha-n ¹⁵ chi na cuáháⁿ cuyaa-í. Te xíáⁿ núu càdúha-í tutú-a daquixi-í ndaha-n cuendá cutnùní iní-n nâsa cada-n cùndecu-n ndihí nchaa ñáyiú ndècu ichi Yá Ndiöxí. Te ñáyiú-áⁿ cúu-yu dàtná ñⁿ vehe cùu cuendá Yá Ndiöxí Yáá ndécú nchaa nduu nchaa quiú, chi ndècu ndihí ñaha-gá xií-yu, te cúu-yu ñáyiú càháⁿ vâha cuendá tnúhu-gá. ¹⁶ Te cùtnumí ndáá iní-ó sá ío càhnu cuu tnúhu càháⁿ Xítohó Jesucristú, tnúhu sá càháⁿ nàcuáa ndùu ichi ndècu-o, te duha càháⁿ tnúhu-áⁿ:

Te ní quixi Yá cúú Ndiöxí ñuyúú-a ní cuu-gá ñⁿ ñáyiú,

te Espíritú Yá Ndiöxí ní càháⁿ ndáá-xi sá cúú-gá ñⁿ Yáá ío vâha quide ndáá,

te cue espíritú xínú cuèchi núú Yá Ndiöxí ní xini ndáá-xi nchaa nàcuáa ní quide Yáá ní quixi ñuyúú-a.

Te ní xíté nuu tnúhu-gá nihíi ñuyíú-a,
te ndéni ní cuu ní nguíta-yu sàndáá
iní ñáhá-yu xii-gá,
te mee-gá cuánda-gá andiu.
Duha càchí tnúhu-án.

4

*Ñáyiu daña nihnu vá quíndaá-gá
iní-yu Yá Ndióxi*

¹ Te Espíritú Yá Ndióxi càháⁿ ndáá-xi sá sàá nduu daña nihnu dava ñáyiu ndècu ichi-gá vá quíndaá inú ñáhá-gá-yu xii-gá, te ducaⁿ chi cue espíritú cùndihi yucu ñávàha dandàhú ñáhá-xí xii-yu, te mee-ná nchaa tnúhu càháⁿ nchaa ñáyiu cùndihi nchaa espíritú-ánⁿ cuhuⁿ inú-yu. ² Te nchaa ñáyiu ducaⁿ cùndihi cue espíritú cùndihi yucu ñávàha-ánⁿ cúu-yu ñáyiu ío dandahú méé-xí chi càchí-yu sá càháⁿ ndáá-yu te ñá ndáá, te ñá túú tnàhi-gá ná quidé-xí inú-yu cuendá nchaa sá cuèhé sá dúhá quidé-yu. ³ Te ñáyiu-ánⁿ quesàhá-yu sá vâ cúú càndeca tnaha ñáyiu, te ní vâ cúú càxi-yu dava núú sá xini-yu caxi-yu, dico Yá Ndióxi ní cadúha-gá nchaa sá nchító-ó cuendá caxi-o, te cuini-gá sá ncháá nchò ñáyiu sàndáá inú tnúhu-gá ndacáⁿ táhú-ó núú-gá òré caxi-o. ⁴ Te nchaa sá ní cadúha Yá Ndióxi cúú-xí sá vâha te vá dàquèe tihú-ó, te xini ñuhu-xi ndacáⁿ táhú-ó núú-gá cuendá nchaa xiáⁿ. ⁵ Te Yá Ndióxi càchí-gá sá méé-gá quidé-gá cúú-xí sá vâha sá cúú-xí-ó te núu na ndacáⁿ táhú-ó núú-gá.

*Tée quide ndáá xínú cuèchi núú
Xítóhó Jesucristú*

⁶ Te núu na dàcuaha-n ñáyiu ndècu ndihi-o ichi Xítóhó Jesucristú nchaa nàcuáa càháⁿ-í-a ña, te cuu-n ñⁿ tée quide ndáá xínú cuèchi núú-gá, te nducu ndèe-ni-n dacuaha-n tnúhu Yá Ndióxi sá sàndáá inú-n, te canchicúⁿ nihnu-ni-n càda-n nchaa nàcuáa càháⁿ-gá, te núu ducaⁿ nà cada-n, te níhí ndéé-n cùndecu-n

ichi-gá. ⁷ Te vá cáda cuendá-n nchaa cuendú cuèhé cuendú duha càháⁿ ñáyiu, ndihi nchaa dava-gá cuendú sá ña túú nàndihi cuendá sá ña túú nà cumání-n cùndecu-n núú Yá Ndióxi. ⁸ Te núu ñⁿ chiuⁿ cada-o te nàcaá luha yiqui-o te nàndihi-xi luha, dico ío-gá nàndihi-xi te núu cada-o sá cùndecu yíñuhu-o núú Yá Ndióxi. Te núu ducaⁿ na càda-o te cùu-xi ñⁿ sá vâha sá cúú-xí-ó vitna, te ní caa ní quíhíⁿ ducaⁿ cùu-xi ñⁿ sá vâha sá cúú-xí-ó. ⁹ Te xini ñuhu-xi sá ncháá-ndó quíndaá inú-ndó nchaa tnúhu càháⁿ-í-a chi cùu-xi tnúhu ndáá. ¹⁰ Te vitna ío nducu ndee-o quide-o chiuⁿ Yá Ndióxi Yaá ndécú nchaa nduu nchaa quíú te quide ndee inú-ó cuendá nchaa sá quidé ñaha ñáyiu xii-o, chi sàndáá inú-ó sá díú-gá chindee ñaha-gá xii-o. Te nchaa ñáyiu cùndahú inú ñáhá-gá te chindee ñaha-gá xii-yu, dico ñáyiu sàndáá inú ñáhá xì-gá ío-gá cúnúú-yu chindee ñaha-gá xii-yu, chi dàcácu nihnu ñaha-gá núú ùhú núú ndàhú.

¹¹ Te nchaa tnúhu-ánⁿ cùñaha-n xii-yu, te càháⁿ-n dõho-yu sá ná cáda-yu nchaa nàcuáa càháⁿ-xi. ¹² Te ío cada váha-n cùndecu-n cuendá sá vâ yõ daquèe tihú ñáhá xii-n cuendá sá cúú-n tée cuechi, te ío váha cada-n nchaa sá táu-n càda-n cuendá ducaⁿ canchicúⁿ nihnu nchaa ñáyiu ndècu ichi Yá Ndióxi, te vii vii càháⁿ ndihí-n-yu, te cuu inú-n-yu, te ío quíndaá inú-n Yá Ndióxi, te mee-ni sá vâha cani inú-n, te ducaⁿ càda-n cuendá canchicúⁿ nihnú-yu. ¹³ Te nini cùyaa-í quixi-í, te ío nducu ndèe-n càháⁿ ndodo-n tnúhu Yá Ndióxi núú-yu, te dacuàhá-n-yu nàcuáa càháⁿ tnúhu-gá, te càháⁿ-n dõho-yu nàcuáa cuu vii cuu váha inú-yu cundecú-yu ichi Yá Ndióxi. ¹⁴ Te vá dáña ndéé-n càda-n nàcuáa nduu táhú ní taxi Yá Ndióxi ní ngùndecu ndihi-n cùtnàhá ní sacáⁿ ndodo cue tée yindaha ñaha xii ñáyiu ndècu ichi Yá Ndióxi ndaha-güedé díquí-n,

te ní cachí tnúhu-güedé sá dúcáⁿ ní cuiní Yá Ndióxi cunduú.

¹⁵ Te ní yúhu ní iní-n càda-n nchaa nacuaá càháⁿ-í-a cuendá sá ná quini ñáyiú sá ío-gá váha ta quide-n cuaháⁿ. ¹⁶ Te ío váha cundehe-n nchaa nacuaá quide-n, ndihi nchaa nacuáa dānehé-n-yu, te vá dáña ndéé-n dùcaⁿ cada-n. Te núu ducaⁿ na càda-n te nduu táhú-n cūndecu váha-n núú Yá Ndióxi ní caa ní quihíⁿ ndihi nchaa ñáyiú na tédóho nchaa tnúhu càháⁿ-n.

5

Nacuáa tàú-xi cada-o cūndecu-ó ndihi ñáyiú sàndáá iní tnúhu Yá Ndióxi

¹ Te vá ténàá-n nchaa cue téé cūu sacuéhé chí vii vii càháⁿ-n dōho-güedé, te cada iní-n sá dàtná tátá-n cūu-güedé, te diu-ni ducaⁿ vii vii càháⁿ-n dōho nchaa cue téé cuechi, te cada iní-n sá dàtná cue ñani-n cūu-güedé. ² Te diu-ni ducaⁿ vii vii càháⁿ tucu-n dōho nchaa ñáyiú dihi ñáyiú cūu sacuéhé, te cada iní-n sá dàtná ñaná-n cūu-yu, te diu-ni ducaⁿ vii vii càháⁿ tucu-n dōho nchaa ñáyiú dihi ñáyiú cuechi, te cada iní-n sá dàtná cue cūha-n cūu-yu, te ío cuu váha iní-n óré ducaⁿ càháⁿ-n dōho nchaa ñáyiú cuechi-áⁿ.

³ Te canehe-n sá yíñúhu núú ñáyiú dihi ní quendóo quée, te chindéé-n-yu núu ndàhú-yu. ⁴ Te núu ñⁿ ñaha quée ndécú cuè déhe-aⁿ àdi cue déhe ñani-aⁿ, te ío xini ñuhu-xi cada-güexi nchaa nacuaá tàú-xi cunduú núu-aⁿ chi ducaⁿ cuini Yá Ndióxi cada-güexi. Te núu ducaⁿ na càda-güexi te nānchocáva-güexi quide-güexi sá váha sá cúu-xí ñáyiú ní dācuéhnú ñaha xii-güexi. Te núu ducaⁿ na càda-güexi te quide váha-güexi te ío nduu vétú iní Yá Ndióxi. ⁵ Te ñáyiú quée ñáyiú ndàhú ndécú ichi Yá Ndióxi sàndáá iní-yu sá díú-gá chindéé ñaha-gá xií-yu, te cuéi nduu cuéi niú ñá túú dàña ndéé-yu càháⁿ ndihi ñahá-yu xii-gá.

⁶ Te nchaa ñáyiú quée cúdí iní quidé nchaa sá cuéhé sá dúhá cūu-yu dàtná ñáyiú ní xihí cuéi ndécu vívú-yu. ⁷ Te cúñaha-n xii nchaa ñáyiú sá ná cáda-yu nchaa tnúhu càháⁿ-í-a cuendá sá ñá túú ná cumáni-yu cundecú-yu, te ducaⁿ vá yóo càháⁿ cuéhé cuendá-yu. ⁸ Te ío xini ñuhu-xi chindeé-yu cue tnaha ñáyiú-yu, dico ío-gá xini ñuhu-xi chindeé-yu cue ñáyiú cūu ndi meé-yu ndécu ndihí-yu, te núu vá dúcáⁿ càda-yu te ñá túú-gá sàndáá iní-yu cada-yu nacuaá càháⁿ Yá Ndióxi. Te sá dúcáⁿ ná cada-yu te vihi-gá quidé-yu dācúxi ñáyiú ndécu ichi cuehé ichi duha.

⁹ Te chido tnúni-n mēe-ni ñáyiú quée ñáyiú sa ndécu únidico cuía-xi àdi vihi-gá cuendá ñáyiú-áⁿ cada-yu nchaa nacuaá cuini Yá Ndióxi núu nchaa ñáyiú ndécu ichi-gá, te ñáyiú-áⁿ xini ñuhu-xi cuú-yu mee-ni ñáyiú ní quide ndáá ní xīndecu ndihi yí-xi. ¹⁰ Te na cūu-yu ñáyiú quée quidé váha cūdiu núu nchaa ñáyiú, te na cūu-yu ñáyiú quée xini canu ichi váha cue landú-xi, te na cūu-yu ñáyiú sáñaha núu vehe ndetatú cue ñáyiú ñuhu ichi, te na cūu-yu ñáyiú ndécu túha quide nani chūuⁿ cuendá cue ñáyiú ndécu ichi Yá Ndióxi, te na cūu-yu ñáyiú chindee nchaa ñáyiú ndécu ndihi tnúndóho tnúhu ndàhú, te na cūu-yu ñáyiú ñá túú dàña ndéé quidé nchaa núu sá váha.

¹¹ Te vá chidó tnúni-n ñáyiú quée ñáyiú ñá túú ndécu únidico cuía-xi cada chūuⁿ Yá Ndióxi, chi núu cuechi-gá-yu ña, te vá cūndáá-yu cada-yu chūuⁿ-gá, chi quesahá-yu natnāndaha tucú-yu. ¹² Te sá cuendá xiáⁿ te nacháhu-yu núu Yá Ndióxi, chi vá cáda-gá-yu nacuaá ní cuu tnúhu cada-yu ní cūu. ¹³ Te ngüita-yu cani iní-yu quihíⁿ-yu ndi vehe ndi vehe caca nihni-yu, te nchaa ñáyiú ducaⁿ quide ío cūu cuhndú-yu, te cūyiti yuhú-yu, te ndēni ní cuu cuaháⁿ-yu chinee

díquí-yu vehe tnàha ñáiyú-yu ndèhé-yu núu nása ndècú-yu, te ñá túú tàú-yu ducaⁿ càdá-yu, te càháⁿ-yu mee-ni tnúhu sá ñá túú nàndíhi. ¹⁴ Núu xǎⁿ cuíní-í sá ncháá ñáiyu quèé ñáiyu cuechi na nàtnándaha tucú-yu cuendá cuú-yu náná, te ducaⁿ càdá-yu nchaa sá xíní ñúhu-xi cadá-yu vehé-yu, te núu ducaⁿ na càdá-yu, te nchaa ñáiyu cùu úhú iní ñáhá xì-o vâ nihí-gá-yu tnúhu càháⁿ cuèhé-yu cuendá tnúhu Yá Ndiòxí. ¹⁵ Te dava ñáiyu quèé ndècú ichi Yá Ndiòxí ní cùu ní dáñá-yu te ní tnií-yu tnúhu càháⁿ sácúíhná.

¹⁶ Te núu dava ñáiyu ndècu ichi Yá Ndiòxí ndècú ndíhi-yu ìⁿ ñaha quèé cúu ndí meé-yu ña, te tàú-yu chindee ñáhá-yu xii-aⁿ cuendá sá vâ ío chí chiuⁿ-aⁿ nchaa ñáiyu ndècu ichi Yá Ndiòxí, te ducaⁿ te nchaa ñáiyu ndècu ichi-gá-áⁿ ñíhi ndéé-gá-yu chindèé-yu dava-gá ñáiyu quèé ñá túú vèdana ndècu ndíhi.

¹⁷ Te nchaa cue téé ío váha quide yíndaha ñaha xii ñáiyu ndècu ichi Yá Ndiòxí ío xíní ñúhu-xi canehe sá yíhi ñúhu núú-güedé, te chindee ñaha xii-güedé. Te uuⁿ-gá tàú ñáiyu ducaⁿ càdá-yu sá cúu-xí ncháa cue téé ní yúhu ní iní càháⁿ tnúhu-gá. ¹⁸ Te núu tütú Yá Ndiòxí càchí-xi: “Vá chíhi-ndó ñunu yuhu ndícutu oré dánchezí-dí triú”, duha càchí-xi. Te càchí tucu-xi ingá xichi: “Íⁿ téé quide chiuⁿ dacuítíí tàú-xi sá cúhúⁿ yáhu-dé”, duha càchí-xi núú tütú-gá.

¹⁹ Te núu ío ñáiyu véxi sácáⁿ cuéchi núú-n cuendá ìⁿ téé yíndaha ñaha xii ñáiyu ndècu ichi Yá Ndiòxí ñá, te cada cuendá-n tnúhu càháⁿ-yu te núu véxi-yu ndíhi úú àdi úní ñáiyu càháⁿ ndáá nàcuáa ní cuu, áⁿ núu ñáhá te vâ cadá cuendá-n tnúhu càháⁿ-yu. ²⁰ Te núu cue téé yíndaha ñaha xii ñáiyu-áⁿ ndècú cuéchi-güedé, te càháⁿ-n dóho-güedé

núu ncháa ñáiyu ndècu ichi-gá cuendá sá dává-gá-yu vâ cúyíⁿ-yu ducaⁿ càdá-yu. ²¹ Te Yá Ndiòxí ndíhi Xítóhó Jesucristú náhá-gá ndíhi cue espíritú xínú cuéchi núú-gá sá yúhú càháⁿ-í dóho-n sá cadá-n ncháa nacuáa càháⁿ-í-a, te ìⁿ-ni càháⁿ ndíhi-n cuè téé xíní tnáhá ndíhi-n, ndíhi cue téé ñá túú xíní tnáhá ndíhi-n. ²² Te vâ ío cundihi iní-n taxi ndecu-n ìⁿ téé quíndaha ñaha xii ñáiyu, chí díhna-gá cada cuendá-n te núu cùu-dé ìⁿ téé quide ndáá, chí núu cuendá-ni na taxi ndecu-n-dé te vâ cadá ndáá-dé, te yòhó ndaa díquí-n cuendá nchaa sá cuèhé sá dúhá càda-dé, te ío coto-n mèe-n vâ cadá-n ní ìⁿ sá cuèhé sá dúhá.

²³ Te ducaⁿ ío mee-ni cùhú xití-n te vâ cóhó-n mèe-ni ndute, chí tnàhá luha vínú ndéhé yoho yàha stilé coho-n cuendá cada tátna-xi.

²⁴ Te dava ñáiyu cùtnuní nchaa sá cuèhé sá dúhá quide-yu, te cùtnuní tucu sá nácháhu-yu na sáá nduu, te dava tucú-yu chí ñá túú cùtnuní nchaa sá cuèhé sá dúhá quide-yu, dico na sáá nduu cundáa cuéchi-yu te dává-áⁿ cùtnuní. ²⁵ Te ducaⁿ sátnahá-xi cùu nchaa sá váha quide dává-yu chí cùtnuní, te cuéi ñá túú cùtnuní òré-ni dico dacuítíí sá sáá nduu cùtnuní.

6

¹ Te nchaa ñáiyu ndècu tnuú quide chiuⁿ ndíhi ìⁿ patróóⁿ xíní ñúhu-xi ío canehé-yu sá yíñúhu núú-dé cuendá sá vâ càháⁿ cuèhé ñáiyu cuendá Yá Ndiòxí, te ní vâ càháⁿ cuèhé-yu cuendá tnúhu-gá.

² Te núu patróóⁿ cue ñáiyu xínu cuechi-áⁿ sàndáá iní-dé Yá Ndiòxí, te ñá díú sá dúcáⁿ sàndáá iní-dé Yá Ndiòxí te vâ canehé-yu sá yíñúhu núú-dé, chí uuⁿ-gá tàú-yu cada váha-yu cunu cuéchi-yu núú-dé, te ducaⁿ na càdá-yu chí xínu cuéchi-yu núú tée sàndáá iní ndíhi-yu tnúhu Yá Ndiòxí. Te vâ dáñá ndèé-n dànehé-n-yu nchaa

nàcuáa càháⁿ-í-a, te cúñaha-n xii-yu sá ná càdá-yu.

Nduu vétú iní-ó cùndecu-o

³ Te ío cue téé ñá túú tñi-güedé nàcuáa càháⁿ tnúhu Xítohó Jesucristú, te cue téé-áⁿ càchí-güedé sá càháⁿ ndáá-güedé dico ñá ndáá, chi ñá túú càháⁿ-güedé nàcuáa cuáháⁿ tnúhu-gá. Te nchaa tnúhu Xítohó Jesucristú cúu-xí mée-ni tnúhu ndáá, te chindee ñaha-xi cada ndáá-ó cùndecu-o ichi-gá. ⁴ Te nchaa cue téé ducaⁿ xiquide quide cahnu-güedé mée-güedé dico ñá túú vèdana xini-güedé, te cue téé-áⁿ ñá túú ndècu váha iní-güedé chi nándi tnúhu sá ñá túú nándihi cuini-güedé cútnàha-güedé. Te ngüita-güedé cúu cuèdú iní tnáhá-güedé, te nàá ndihi tnáhá-güedé, te xicuèhé tnáhá-güedé, te ñá túú-gá cúu váha iní núu tnáhá-güedé. ⁵ Te cue téé-áⁿ mee-ni nàa-güedé chi ñá túú sàni váha iní-güedé, te ni ñá túú xini-güedé nàcuáa cuáháⁿ tnúhu ndáá tnúhu Yá Ndióxi, te càchí-güedé sá ïo váha cundecu-güedé ichi-gá chi sàni iní-güedé sá ïo vèi díhúⁿ nihí-güedé cundecu ndihi-güedé. Te yúhú càháⁿ-í dóho-n sá vè nihí tnáhá-n ndihi nchaa cue téé ducaⁿ xiquide. ⁶ Te ndáá sá ichi Yá Ndióxi cúu-xí ïiⁿ ichi sá ïo váha cundecu-o, dico xini ñuhu-xi nduu vétú iní-ó nàcuáa ndècu-o ñuyíu-a. ⁷ Te nchoo cuè ñáyiu chi ñá túú vèdana nèhe-o ní quexìo ñuyíu-a, te diu-ni ducaⁿ ñá túú vèdana canehe-o quíhíⁿ òré ná cùú-ó. ⁸ Te ío xini ñuhu-xi nduu vétú iní-ó te núu ndècu-ni sá cunchito-o ndihi dóo cuíhnu-o. ⁹ Te ío ñáyiu ío cuini-yu cuu cuicá-yu, te ñáyiu-áⁿ dácàhu iní ñáhá yucu ñávàha xii-yu cadá-yu nándi sá cuèhé sá dúhá, te nándi-gá nchaa sá cuèhé sá dúhá càhu iní-yu quidè-yu, te nchaa sá quidè-yu-áⁿ ñá túú vèdana nándihi-xi chi uuⁿ-gá ndádá ndàhú ñáhá-xí xii-yu, te dàcuíta nihnu

ñaha-xi. ¹⁰ Chi nchaa ñáyiu ñuhu iní mee-ni díhúⁿ, te xíáⁿ quidè-xí ngüita-yu sàni iní-yu cadá-yu nándi sá cuèhé sá dúhá. Te ío ñáyiu ndècu ichi Yá Ndióxi te sá tnúhu ducaⁿ ñuhu iní mee-ni díhúⁿ ní dáñá-yu ñá túú-gá sàndáá iní ñáhá-yu xii-gá, te vitna ñá túú tnàhi-gá ndécú váha iní-yu.

Cahni iní-ó càda-o nchaa nacuáa càháⁿ Yá Ndióxi chi sàndáá iní-ó-gá

¹¹ Te yòhó téé quide chiuⁿ Yá Ndióxi xini ñuhu-xi vá cadá-n dàtná quidè nchaa ñáyiu ní cachí-í sá ñá túú quide ndáá, te vá dáñá ndèe-n càda ndáá-n cùndecu-n, te cada-n nàcuáa nduu vétú iní Yá Ndióxi, te ío quindáá iní-n-gá, te cuu iní-n nchaa tnaha ñáyiu-n, te cada cahnu iní-n nchaa sá ná yàha-n cùndecu-n ichi-gá, te cunduu ndàhú iní-n. ¹² Te cahni iní-n càda-n nchaa nacuáa cuini Yá Ndióxi chi sàndáá iní-n-gá, te ío cuhuⁿ iní-n sá cùndecu-n ndihi Yá Ndióxi ní caa ní quíhíⁿ, chi diu cuèdá tnàhi-áⁿ ní càháⁿ ñáhá-gá xii-n, te ní càháⁿ ndáá-n núu vèi ñáyiu sá ïo váha sàndáá iní-n-gá. ¹³ Te Yá Ndióxi Yaá quidè nchito nchaandi túhú sá ío ñuyíu nàha-gá sá càháⁿ-í dóho-n vitna, te diu-ni ducaⁿ nàha tucu Xítohó Jesucristú Yaá ní càháⁿ tnúhu ndáá núu tē Pilatú ¹⁴ sá quindáá iní-n càda-n nchaa nacuáa càháⁿ Yá Ndióxi, te nchaa tnúhu càháⁿ-gá cada-n nàcuáa vá dáquèe tíhú ñáhá ñáyiu xii-n, te ducaⁿ-ni càda-n ndéé ná sàá nduu quixi tucu Xítohó Jesucristú. ¹⁵ Te quixi tucu-gá chi ducaⁿ ní cachí Yá Ndióxi cunduu, te mee Yá Ndióxi nàhá-gá ná nduu quixi tucu Xítohó Jesucristú. Te Yá Ndióxi ío váha cùu iní-gá te ïiⁿ dii díi-ni-gá ío-gá cùnùu-gá dàcúúxí cuè téé tàxi tnuní ïiⁿ ïiⁿ nacióⁿ ndihi nchaa dava-gá cue téé cùnùu, chi tàxi tnuní ñáhá-gá xii-güedé, te nchaa ñáyiu ndècu ñuyíu-a tàxi tnuní-gá. ¹⁶ Te diu-gá cúu-gá Yaá ndécú nchaa nduu

nchaa quíú, te ío càhnu cuu-gá chi dàtná dáyèhé nchícanhii dáyehé-xi núú ndécú-gă, te vâ yôo ìⁿ cùyii dayatni núú ndécú-gă, te ni ñã túú nì ìⁿ ñáyiu xìní ñáhá xii-gá te ni vâ ndácũ-yu quiní ñáhă-yu xii-gá. Te ío na cànehe nchaa ñáyiu sá yíñùhu núú-gă ni caa ni quíhíⁿ, te ducaⁿ ïo na tàxi tnuní-gá ni caa ni quíhíⁿ. Te ducaⁿ na cùnduu.

¹⁷ Te cáháⁿ-n dôho nchaa ñáyiu cuica ndècu ndihí nchaa sá ío ñuyíú-a cuendá sá vâ cáda càhnú-yu mée-yu, te duuⁿ duuⁿ vâ cùndéé iní-yu ni ìⁿ sá ndécú ndihí-yu chi vâ cúdí-xi, te cáháⁿ-n dôho-yu sá ná cùndéé iní-yu Yá Ndiöxí chi ðiu-gá cúú-gă Yaá ndécú nchaa nduu nchaa quíú, te chitu nũú ndáhá tàxi-gá nchaa sá xíní ñùhu-o, chi cuini-gá sá ío cuu váha iní-ó cùndecu-o. ¹⁸ Te cáháⁿ tucu-n dôho-yu sá ná cáda-yu mee-ni sá váha, te cuendá nchaa sá váha cadá-yu-áⁿ te cuú-yu ìⁿ ñáyiu cuica sá cúú-xí Yă Ndiöxí, te na cùndecu túha-yu chindéé-yu cue ñáyiu ndáhú cuañáhá-yu sá xíní ñùhú-yu. ¹⁹ Te núu ducaⁿ na cáda-yu te Yá Ndiöxí cuañaha-gă sá ndúú tãhũ-yu na sàá nduu, te ngùndecu váha-yu ndihí-gá ni caa ni quíhíⁿ.

Tnúhu ndéé núú nĩ ndihí-ná

²⁰ Te yôhó té Timùteú cáháⁿ-í dôho-n sá ío cada cuendá-n vâ dăma tnúhu ní taxi Yá Ndiöxí danèhé-n ñáyiu, te vâ cáda cuendá-n nchaa cuendú cuèhé cuendú duha ío ñuyíú-a chi ñã túú nândíhi-xi, te nì vâ cáda cuendá-n nchaa tnúhu xitnáha ñáyiu cãchí sá xícá naha tnúhu cue tée túha chi ñã díú ìⁿ tnúhu ndáá cúú-xí. ²¹ Te ío ñáyiu ñã túú-gă sàndáá iní-yu tnúhu Yá Ndiöxí, chi ní quide cuendá-yu nchaa tnúhu xica naha ñáyiu-áⁿ.

Te Yá Ndiöxí ná chindee chitúu ñaha-gă xii-n. Te ducaⁿ na cùnduu. Te ío cada ndee iní-nă vitna.

TUTÚ CÚÚ ÛÚ NÍ CADÚHA TÉ PÄBLŪ QUIHⁿ NDAHA TÉ TIMŪTEÚ

*Té Păblŭ cādŭha-dé tutú quíhⁿ
ndaha té Timŭteú*

¹ Yúhú té Păblŭ ní tendaha ñaha Yá Ndióxi cáháⁿ-í tnúhu Xítohó Jesucristú núú ñăyiu, chi ducaⁿ ní cachí Yá Ndióxi cunduu. Te cáháⁿ-í dàtná ní cachí Yá Ndióxi sá ncháá nchòo ñăyiu ndècu ndihí Xítohó Jesucristú naníhí tànhú-ó. ² Te yúhú té Păblŭ cādŭha-í tutú-a daquixi-í ndaha yòhó té Timŭteú chi ïo cùu iní ñàhá-í xii-n, te ðiu-í ní sanu ichi ñaha-í xii-n ichi Xítohó Jesucristú, te xicáⁿ táhù-í núú Dŭtú Ndióxi ndihí núú Xítohó Jesucristú sá ïo na chindee chítúu ñaha-gă xii-n, te cundàhú iní ñàhá-gă, te ducaⁿ ndi nduú-gá ná cádá te ïo váha cuu iní-n cùndecu-n.

Cáháⁿ váha-o cuendá Xítohó Jesucristú

³ Te cuèi nduu cuèi niú ducaⁿ-ni cáháⁿ ndihí-í Yá Ndióxi cuendá-n, te ndácáⁿ táhù-í núú-gă, te xinu cuechi-í núú-gă dàtná ní quide cue ñani tñàhá-í ní xindecu ndéé san-duu, te cùtnuní iní-í sá quidé ndáá-í núú-gă dàtná ní xóo cada-güedé. ⁴ Te ïo sàni iní-í naníhí tñàhá-ó cuendá ïo cudí iní-í, chi ndàcu iní-í sá ïo ní ndáhyú-n sá ndihú iní-n cùtnàhá ní quide ndee iní-í tñàhá-ó. ⁵ Te nàha-í sá sàndáá ndisa iní-n Yá Ndióxi dàtná ní ngúita díhna-gá xítá-n tá Lòidá ndihí náná-n tá Èunicé quidé-yu, te cùtnuní ndáá iní-í sá díú tñàhá-n ïo váha sàndáá iní-n-gă.

⁶ Te xiáⁿ dándàcu iní ñàhá-í xii-n cuendá sá ïo-gá nducu ndèe-n cada-n chiúⁿ ní nduu táhú-n núú Yá Ndióxi cada-n, chi ní taxi-gá tnúhu ndee iní ní ngúndecu ndihí-n

cùtnàhá ní sacáⁿ ndodo-í ndaha-í díquí-n sá díú chiúⁿ-gá cada-n. ⁷ Te Espiritú sá ní taxi Yá Ndióxi ndécú ndihí-o ñá túú cùu-xi ñⁿ Espiritú sá cádá nàcuáa yùhú-ó, chi cùu-xi ñⁿ Espiritú sá táxi tnúhu ndee iní cada-o chiúⁿ-gá, te ðiu-xi quide cuu iní tñàhá-ó ñⁿ ñⁿ-o, te ðiu-ni tucu-xi quide cutnuní iní-ó nàcuáa cada-o cùndecu-o. ⁸ Te xiáⁿ núú vá cùcàhaⁿ núú-n cáháⁿ váha-n cuendá Xítohó Jesucristú, te ni vâ cùcàhaⁿ núú-n sá dúhá yihi-í vecaá sá cuendá-gá, te xini ñuhu-xi sá tñàhá-n ndòho-n sá cuendá tnúhu-gá, te cundee iní-n ndòho-n, chi Yá Ndióxi chindee ñaha-gá xii-n. ⁹ Te Yá Ndióxi ní dácàcu nihnu ñaha-gă xii-o núú ùhú núú ndàhú, te ní cachí-gá sá cádá-ó nchàa nacuáa cùni méé-gă cunduu, te ducaⁿ ní quide-gá chi ducaⁿ ní sani iní méé-gă cunduu sá cádá váha ñaha-gă xii-o, te ñá díú sá ïo váha quide-o ndecu-o ducaⁿ ni quide-gá. Te ndéé cùtnàhá vátá ngáva-gá ñuyúú ní cachí-gá sá cádá váha ñaha-gă xii nchaa nchoo ñăyiu ní ngúndecu ndihí Xítohó Jesucristú vitna. ¹⁰ Te vitna cùtnuní iní-ó sá ïo váha quide ñaha-gă xii-o, chi ní quixi Xítohó Jesucristú ñuyúú-a ní dácàcu nihnu ñaha-gă xii-o núú ùhú núú ndàhú, te Yaá-áⁿ ní quide-gá cuendá sá vâ cùú-gá-ó cùú dúcáⁿ-ó, chi ní cachí-gá sá cùndecu-o ni caa ni quíhⁿ te núu na quíndáá iní-ó tnúhu-gá.

¹¹ Te ní cachí-gá sá cáháⁿ-í tnúhu-gá núú ñăyiu ñá túú cùu ñăyiu isràèl te dacuàha váha-iyu tnúhu-gá, te cuèi ndèni ní cuu ndécú-yu te quíhⁿ-í cáháⁿ-í tnúhu-gá núú-yu chi ducaⁿ ní cachí-gá cunduu. ¹² Te cuendá xiáⁿ nándi sá ndòhò-í vitna cuendá-gá, dico ñá túú cùcàhaⁿ núú-í chi cùtnuní váha iní-í nàcuáa sàni iní Xítohó Jesucristú Yaá sàndáá iní-í, te yúhú ní dàñà-í méé-í núú ndàhá-gă, te cùtnuní ndáá iní-í sá cótó ñaha-gă xii-í ndéé ná sàá nduu

nàcuaca ñaha-gá.

13 Te vá dáña ndèe-n càda-n nchaa nacuáa càháⁿ tnúhu váha ní dánèhé ñàhá-í xii-n, te ío quindáá iní-n Yá Ndióxi, te nchaa-o nàcuáa ndècu-o ndihi Xítoho Jesucristú ío cuu iní tnáhá-ó ìⁿ ìⁿ-o. 14 Te cada cuendá váha-n sã vá dãma tnúhu Yá Ndióxi sã ní taxi-gá ndécú ndihi-n, te Espíritú-gá sã ní taxi-gá ndécú ndihi-o chindee ñaha-xi xii-n.

15 Te yòhó sa xini-n sã nchaa ñáyiu ndècu distritú Àsiá, ñáyiu ní sándáá iní tnúhu Xítoho Jesucristú ní dáña ñàhá-yu xii-í, te tnàhá té Fígeló ndihi té Hèrmógenés ní dáña ñaha-güedé xii-í. 16 Te xicáⁿ táhù-í núú Xítoho Jesucristú sã ná chindee-gá cue ñáyiu cùu ndi mee té Onèsiforó, chí diu-dé ío vãi xito ní quixi-dé ní quide cuendá ñàhá-dě xii-í, te ní taxi-dé tnúhu ndee iní, te ñã túú ní cucahaⁿ núú-dě sã yíhi-í vecaá. 17 Te cùtnàhá ní xíndecu-dé ñúú Rómá ducaⁿ-ni ní xóo nanducu ñàhá-dé xii-í ndèe ndéé naníhi ñàhá-dě. 18 Te xicáⁿ táhù túcu-í núú Xítoho Jesucristú sã ná cùndahú iní ñàhá-gã xii-dé nduu na sãá cundáá cuéchi nchaa ñáyiu. Te yòhó sa xini ndáá-n sã ío ní chindee ñàhá-dé xii-o cùtnàhá ní xíndecu-o ñúú Éfesú.

2

Tée quide ndáá xínú cuèchi núú Xítoho Jesucristú

1 Te yòhó téé cùu datná ìⁿ déhe mee-í ío nducu ndèe-n cada-n nacuáa níhi ndéé-gã-n cùndecu-n ichi Xítoho Jesucristú chí diu-gá chindee ñàhá-gã xii-n. 2 Te nchaa tnúhu sã ní dánèhé ñàhá-í xii-n ndihi nchaa dava-gá ñáyiu, xíãⁿ danèhé-n dàva-gá cue téé quide ndáá cuendá danèhé-güedé dava-gá ñáyiu.

3 Te cahni iní-n ndòho-n cunu cuechi-n núú Xítoho Jesucristú dàtná cuini-n ndòho ìⁿ sandadú sãhni iní-dé xínú cuèchi-dé. 4 Chí ní ìⁿ sandadú ñã túú nãgá sáni

iní-dé cada-dé òré xínú cuèchi-dé cuendá cudíu-dé núú téé tàxi tnúni ñàhá. 5 Te diu-ni ducaⁿ sãtnahá-xi cùu tucu ìⁿ téé dàdiqui, chí núú vá dàdiqui-dé nàcuáa tàú-xi cunduu te vá níhi-dé sã ndúú táhù-dě. 6 Te núú ìⁿ téé xínú cuechi ío ndècu ndee-dé quidé chiúⁿ-dé chíhi-dé tatá, te diu-dé tàú-dé díhna-gá-dé níhi-dé sã cúhúⁿ yãhu-dé. 7 Te cani iní-n nchaa tnúhu càháⁿ-í-a, te Xítoho Jesucristú chindee ñaha-gã xii-n te tecú tnúni-n nchaa.

8 Te ndacu iní-n sã Xítoho Jesucristú ní cuu-gã ñani tnáhá ndii Dàvíí, te ní xíhi-gá te ní ndoto-gá, te diu ducaⁿ nduu tnúhu dànehé-í ñáyiu. 9 Te ío dàndoho ñaha ñáyiu xii-í cuendá sã càháⁿ-í tnúhu-gá, te quide ñàhá-yu xii-í dàtná quidé-yu ìⁿ téé ní quide ìⁿ cuéchi càhnu, chí ní chíhi ñàhá-yu vecaá xii-í, dico tnúhu Yá Ndióxi chí vá ndácú-yu nganí-yu. 10 Te xíãⁿ nũu cuéi nãndi cùu nchaa sã quidé ñàhá-yu xii-í, dico quide cahnu iní-í cuendá sã naníhi táhù tnàhá nchaa dava-gá ñáyiu cuini Yá Ndióxi cundecu ndihi-gá, chí nchaa ñáyiu na tnàhá tnúhu ndihi Xítoho Jesucristú nduu táhù-yu cundécú-yu ndihi-gá núú ío váha càa ndecu-gá ní caa ní quíhíⁿ.

11 Te xéhé cúú-xí ìⁿ tnúhu ndáá cuíti:

Nchoo cùu-o datná ñáyiu ní xíhi ndihi Xítoho Jesucristú chí ñã túú-gã ndécú-ó ìchi cuehé ichi duha,

te xíãⁿ nũu cuéi na sãá nduu cúú-ó ñúyíú-a, dico diu-ni cundecu-o ndihi-gá.

12 Te núú na cùndee iní-ó ndòho-o nãndi sã ndòhó-ó sã cuendá-gá, te sãá nduu te cunuu-o ndihi-gá.

Te núú na càháⁿ-ó sã ñã túú xini-ó-gã, te diu-ni ducaⁿ cùñaha-gã xii-o sã ñã túú xini ñàhá-gã ná sãá nduu càda ndáá-gá cuéchi nchaa ñáyiu.

13 Te núu nchoo ñà túú quide ndáá-ó ndècu-o núú-gã ñá, dico mee-gã chi ío ndáá quidé-gã, chi Yá Ndiõxí nchaa sá sání iní-gã quidé-gã.

Tée quide nacuáa ndüu vétú iní Yá Ndiõxí

14 Te dandacu iní-n nchaa ñáyiú ndècu ndihí-o ichi Xítohó Jesucristú nchaa tnúhu càháⁿ-í-a, te cúñaha-n xii-yu sá Xítohó Jesucristú cuíni-gá sá ñà túú-gã nándi tnúhu cútnáhá-yu, chi nchaa tnúhu càháⁿ-yu-áⁿ dácuíta nihnu-xi ñáyiú ndèdóho ñaha xii-yu, chi ñá túú vèdana nándíhi nchaa tnúhu-áⁿ. 15 Te ío nducu ndèe-n cada ndáá-n cùndecu-n núú Yá Ndiõxí, te cada-n chiúⁿ-gá nàcuáa nduu vétú iní-gá, te cáháⁿ ndáá-n tnúhu-gá, cuendá sá vã cucáhaⁿ núu-n núú-gã. 16 Te vã cáda cuendá-n nchaa tnúhu sá ñà túú vèdana nándíhi càháⁿ ñáyiú cuendá Yá Ndiõxí, chi nchaa ñáyiú càháⁿ tnúhu-áⁿ ndihí nchaa ñáyiú sácúndedóho ñaha xii-yu uuⁿ-gá quidé-yu nchaa sá cuèhé sá dúhá. 17 Te nchaa tnúhu-áⁿ cútènuu-xi dàtná quidé ñⁿ cuèhé sã ññá ñaha xii ñáyiú xité nuu-xi nihí yiqui cúnú-yu. Te tnáhá té Himèneú ndihí té Ñletú càháⁿ-güedé tnúhu-áⁿ quidé-güedé dàtná quidé ñáyiú-áⁿ. 18 Te cue téé-áⁿ ñà túú-gã càháⁿ ndáá-güedé dàtná càháⁿ tnúhu Yá Ndiõxí, chi càchí-güedé sá ncháá nchòo ñáyiú ndècu ichi Yá Ndiõxí cúú-ó dàtná cue ñáyiú sa ní ndoto, dico na cúú ndisa-o te vã ndótó-gã-ó càchí-güedé. Te dava ñáyiú ní dáñá-yu sá sàndáá iní-yu tnúhu Yá Ndiõxí sá dúcáⁿ càháⁿ-güedé. 19 Te cuèi ducaⁿ quide davá-yu, dico Yá Ndiõxí ní taxi ndecu-gá cue ñáyiú ni yùhu ni iní ndécú ichi-gá, te cùtnuní sá ndécú ndihí ñaha-gá xii-yu, chi ñⁿ xichi núú tütú-gã càchí-xi sá méé-gã xini-gá cue ñáyiú cùu cuendá-gá. Te

ingá tucu xichi núú tütú-gã càchí-xi sá ncháá ñáyiú sàndáá iní ñáhá xii Xítohó Jesucristú xini ñùhu-xi sá vã cùndecu-gá-yu ichi cuèhé ichi duha.

20 Te ñáyiú cuica chi ndècu ndihí-yu vehé-yu cóho sã ní cuáha mee-ni dñúⁿ cuááⁿ, ndihí cóho sã ní cuáha mee-ni dñúⁿ cuixíⁿ, te nchaa cóhó-áⁿ cúú-xi dàtná cue ñáyiú ñà túú nã cúmání núú Yá Ndiõxí. Te ndècu ndihí tucú-yu cóho sã ní cuáha mee-ni ñùhu, ndihí cóho sã ní cuáha mee-ni yùtnu, te nchaa cóhó-áⁿ cúú-xi dàtná cue ñáyiú ñà túú quide ndáá núú Yá Ndiõxí. 21 Te nchaa ñáyiú ío ndècu yiñuhu núú Yá Ndiõxí cúú-yu ñáyiú ñà túú nihí tnáhá ndihí cue ñáyiú ñà túú quide ndáá núú-gã, te cue ñáyiú ndècu yiñuhu núú-gã-áⁿ ñà túú tnáhí quée cáva-yu quidé-yu nchaa chiúⁿ tahu-gá.

22 Te ío cada cuendá-n vã cáda-n nàcuáa quide cue téé cuechi ndècu ichi cuèhé ichi duha, te cada-n nàcuáa cundáá-n cùndecu-n ichi Yá Ndiõxí, te quindáá iní-n-gã, te cuu iní-n nchaa tnaha ñáyiú-n, te cundecu nahi-n, chi ducaⁿ tauú-xi cada-n ndihí nchaa dava-gá ñáyiú sa ní nduu ndoo ní nduu ñine iní-xi ñáyiú càháⁿ ndihí ñaha xii Yá Ndiõxí. 23 Te vã cáda cuendá-n ñⁿ ñⁿ tnúhu xitnáha ñáyiú chi ñà túú vèdana nándíhi-xi, chi núu na càda cuendá-ó te dicó dánáá ñáhá-xi. 24 Chi nchaa cue téé xinu cuechi núú Yá Ndiõxí xini ñùhu-xi càháⁿ váha-güedé ndihí nchaa ñáyiú, te danèhé ñáhá váha-güedé tnúhu-gá, te cunduu càhu iní-güedé te vã nàá-güedé. 25 Te vii vii cáháⁿ-güedé dóho nchaa ñáyiú sáá iní-xi, ñáyiú ñà túú tnáhá iní tnúhu ndáá tnúhu Yá Ndiõxí, te ducaⁿ te cudana Yá Ndiõxí cada-gá te ndixi túu iní-yu sá ñà túú quide váha-yu ndécú-yu te quindáá iní-yu tnúhu-gá. 26 Te ducaⁿ te cutnùní iní-yu sá sàcuíñná cùnùu-xi taxi tnuní ñáhá-xi xii-yu, chi dàcahu iní ñáhá-xi xii-yu quidé-yu nchaa nàcuáa cùu iní-xi

ni cùu.

3

Nàcuáa cada ñáiyu òré sa ta cùyatni sáa nduu quixi tucu Xítóhó Jesucrístú

¹ Te càchí tnúhu-í xii-n cuendá cunaha-n nàcuáa cada-xi òré sa ta cùyatni sáa nduu quixi tucu Xítóhó Jesucrístú, chi dàvá-áⁿ ïo cada úhú-xi. ² Chi ngüíta ñáiyu cuhuⁿ iní-yu mee-ni sá cúu-xí mèé-yu, te cuhuⁿ iní-yu mee-ni ðíhúⁿ, te ío cada càhnú-yu mèé-yu, te cunduu yíchí iní-yu, te cáháⁿ cuèhé-yu cuendá Yá Ndiòxí, te vá quindáá-gá iní-yu ni tãtä-yu ni nãñá-yu, te ni vã ndácáⁿ táhú núú tnáhã-yu cuendá nchaa sá vãha cada tnáhã-yu, te cadã-yu mee-ni sã ñã túú tnáhã iní Yá Ndiòxí. ³ Te vá cúú iní tnáhã ndí meé-yu, te nãã-yu te vá cuánãã-yu, te tee tnáhã-yu cuéchi neñúú, te vá cuánãã-yu cadã-yu nchaa sá cuèhé sá dúhá sàni iní-yu, te ío cunduu cuihna iní-yu, te vá tnáhã iní-yu nchaa sá vãha. ⁴ Te dayuhu cuãha cuendá tnáhã-yu núú cuè téé cùchiuⁿ, te ío cunduu yí iní-yu cadã-yu nãndi sã ñã túú vãha, te ío cada nínu-yu mèé-yu, te mee-ni nchã sá cúdí iní-yu cadã-yu, te vá cúdí iní-yu nanducu nihnú-yu Yá Ndiòxí. ⁵ Te quesãhá-yu sá tnáhã-yu ndécú-yu ichi Yá Ndiòxí dico vá cadã-yu nchaa nàcuáa cáháⁿ-gá.

Te yúhú càchí tnúhu-í xii-n sã vã nihí tnáhã-n ndíhi nchaa ñáiyu ducaⁿ quide. ⁶ Te dava ñáiyu-áⁿ quíhíⁿ-yu dava vehe núú xíndecu ñáiyu, te ngüíta-yu dandãhú-yu ñáiyu ðíhí ñã túú xini dana cuendá Yá Ndiòxí, te ñáiyu ðíhí-áⁿ cúu-yu ñáiyu ndécú vihi cuéchi-xi, chi ío cùdí iní-yu quidé-yu nchaa náni sá cuèhé sá dúhá sàni iní-yu. ⁷ Te cuèi ío dàcuahã-yu, dico ñã túú cùtnuní iní-yu nása cuáhãⁿ tnúhu

ndáá tnúhu Yá Ndiòxí. ⁸ Te ñáiyu ducaⁿ dandãhú ñáhã xii cue ñáiyu ðíhí-áⁿ ñã túú cáháⁿ vãha-yu cuendá tnúhu Yá Ndiòxí, chi quidé-yu dàtnã ní quide ndí Jánés ndíhi ndí Jãmbrés chi cue ndí-áⁿ ñã túú ní cùu vãha iní cue ndí núú ndí Moisés cuendá tnúhu ní cáháⁿ ndí, Te ñáiyu-áⁿ cúu-yu ñáiyu sàni iní mee nìne-ni nchaa sá cuèhé sá dúhá, te cuèi càchí-yu sã sãndãá iní-yu Yá Ndiòxí dico ñã ndáá sã sãndãá iní ñáhã-yu xii-gá. ⁹ Dico vá ndácú-gã-yu dandãhú-yu vãi ñáiyu, chi nchaa ñáiyu cutnùní iní-yu sã ïo nñi ðiquí-yu, te ñã túú cáháⁿ ndáá-yu dàtnã ní quide cue téé úú ñã túú ní tnáhã iní tnúhu ní cáháⁿ ndí Moisés.

Té Pãblú dásãhú-dé té Timùteú

¹⁰ Te yòhó quidé-n nchãa nacuáa ní dãnèhé ñáhã-í xii-n, te ní xini-n nchãa nacuáa quide-í ndécú-í, te cùtnuní iní-n nàcuáa sàni iní-í ndécú-í ñuyú-a, te xini-n sã ïo sãndãá iní-í Yá Ndiòxí, te ío càhnu iní-í, te cùu iní-í nchaa ñáiyu, te xini tucu-n sã ïo quide cahnu iní-í cuèi nãndi sã yãha-í ndécú-í dico ñã túú dàña ndeé-í ichi-gá. ¹¹ Te ío vãi sã quidé ñãha ñáiyu xii-í dãndòho ñáhã-yu sã ndécú-í ichi Xítóhó Jesucrístú, te sa nãha tucu-n datná ní quide ñáhã-yu xii-í cùtnáhã ní xíndecu-í ñuú Antiòquiá, ndíhi ñuú Ìconiú, ndíhi ñuú Listrá, chi ío ní dãndòhó ñáhã-yu xii-í sã cuendã-gá. Dico Xítóhó Jesucrístú ío ní xito ñaha-gã xii-í te ní chindee ñaha-gã cuèi nãndi cùu sã ñi yãha-í. ¹² Te na càchí tnúhu ndáá-í xii-n sã ïo vãi sã ñã túú vãha cada ñaha ñáiyu xii nchaa ñáiyu cuini sã ñã túú nã cumání núú Yá Ndiòxí cuendá sã ndécú ndíhi-yu Xítóhó Jesucrístú. ¹³ Dico dava ñáiyu càchí-yu sã cáháⁿ-yu tnúhu Yá Ndiòxí te ñã ndáá sã cáháⁿ-yu tnúhu-gã, ñáiyu-áⁿ uuⁿ-gã cuita cada-gã-yu nchaa sã cuèhé sã dúhá quíhíⁿ, te ducaⁿ-ni ío dandãhú tnáhã-yu.

14 Te yòhó chi ío váha ní sándáá iní-n tnúhu Yá Ndiòxí sá dácuaàha-n, te vitna càháⁿ-í dóho-n sá vâ dáñá ndéé-n quindáá iní-n tnúhu-áⁿ, te yòhó sa nàha-n ná cúú ñáyiú ní dánèhé ñáhá xii-n tnúhu-gá. 15 Te yòhó chi ndéé cútnàhá cúú lándú-n ní ngúíta-n dácuaaha-n tnúhu ndéé núú tútú Yá Ndiòxí, te ñu-ni nchaa tnúhu-gá canu ichi ñaha-xi xii-n te nanihí tãhú-n, chi sándáá iní-n Xítóhó Jesucristú. 16 Te nchaa cue téé ní tee tnúhu Yá Ndiòxí, chi ñu-ni mee-gã ní dácáhú iní ñáhá-gã xii-güedé nácuaáa tee-güedé, te tnúhu-gá ío váha dácuaàha-o nchaa dava-gá ñáyiú, te càháⁿ-xi dóho-o sá vâ cündecu-gá-ó ichi cuehé ichi duha, te núú ñá túú quide ndáá-ó ndècu-o te nàcanu ichi ñaha-xi, te dánèhé ñáhá-xi nácuaáa cada-o cündáá-ó núú Yá Ndiòxí. 17 Te ñu-ni tnúhu-gá dátúha ñaha vãha-xi xii nchoo cuè ñáyiú ndècu ndihí-gá cuendá cada-o nchaa núú sá vãha.

4

1 Te Xítóhó Jesucristú quixi-gá taxi tnúni-gá ñuyíú-a, te cada ndáá-gá cuèchi nchaa ñáyiú sa ní xíhí, ndihí cuèchi nchaa ñáyiú xñdecu vívú. Te mee-gã ndihí Yá Ndiòxí náhá-gã sá ío càháⁿ-í dóho-n vitna 2 sá ío dácuaàha-n ñáyiú tnúhu-gá, te vâ dáñá ndéé-n dácuahá-n-yu ndéda-ni càa oré cuèi ñá túú cuíni-yu cundedóho-yu, te nchaa ñáyiú ñá túú cuíni cada ndáá cúñaha ndáá-n nchaa nácuaáa quidé-yu. Te cúñaha tucu-n xii-yu sá vâ dúcáⁿ-gã cadá-yu, te càháⁿ-n dóho-yu cuendá cada ndáá-yu cundecú-yu. Te ío cunduu càhnu iní-n òré càháⁿ-n dóho-yu, te ío dácuaàhá-n-yu tnúhu-gá. 3 Chi sáá nduu te vâ càchí-gá-yu cund-edóho-yu nchaa tnúhu sá sánú ichi ñaha cundecu váha-o núú Yá Ndiòxí, chi mee-nã nchaa sá cúdíí iní mée-yu cundedóho-yu, te nducú-yu cue téé dánèhé ñáhá xii-yu nchaa tnúhu cùu iní-yu-áⁿ.

4 Te vâ cadá cuendá tnàhí-gá-yu tnúhu ndáá tnúhu Yá Ndiòxí, chi mee-nã tnúhu sá ñá túú nándihí cada cuendá-yu. 5 Dico yòhó ío quihí iní-n cundecu-n, te cahni iní-n cuèi nándi na ndòho-n, te dácuaàha-ni-n ñáyiú tnúhu Yá Ndiòxí, ñáyiú vátá quindáá iní ñáhá-gã xii-gá, te cada-ni-n nchaa chiuⁿ ní tãhú-gã cada-n.

6 Te yúhú sa ñúhu ichi-ná-í quihíⁿ-í núú ndécú Yá Ndiòxí cundecu-í, chi sa ní cuyatni cahni ñaha-güedé xii-í cuendá sá xínú cuèchi-í núú-gã. 7 Te ní quide-í nchaa chiuⁿ ní tãhú Yá Ndiòxí cada-í te vitna ní xinu cava nchaa chiuⁿ ní tãhú-gã-áⁿ ní quide-í, te ñá túú ní dàña ndéé-í ní sándáá iní-í-gã, te ducaⁿ-ni sándáá iní-í-gã ndéé vitna. 8 Te vitna sa ndècu túha-ná sá ndúú tãhú-í cuendá sá quidé ndáá-í núú Yá Ndiòxí, te Xítóhó Jesucristú taxi-gá tãhú-áⁿ nduu tãhú-í ná sáá nduu, chi cùu-gá ñiⁿ Yaá quidé ndáá cuiti, te ñá díú-ni yúhú taxi-gá tãhú-áⁿ cuu cuendá-í, chi tnàhá nchaa ñáyiú ndètu cahnu-ná sáá nduu quixi tucu-gá ñuyíú-a cuañaha-gã tãhú-áⁿ nduu tãhú-yu.

Chiuⁿ tahu té Pãblú cada té Timùteú

9 Te cuíni-í sá ío ndihí quixi-n quixi coto ñaha-n xii-í. 10 Chi té Dëmás ñá túú-gã quidé cuendá ñáhá-dé xii-í, chi mee-nã nchaa sá ío ñuyíú-a ío cùdíí iní-dé. Te ní dándöo ñaha-dé cuáháⁿ-dé ñuu Tesalónica, te té Crèscnté cuáháⁿ-dé cundecu-dé distritú Gálaciá, te té Titú cuáháⁿ-dé cundecu-dé distritú Dálmaciá. 11 Te ñiⁿdi-ná té Lúca ndécú ndihí ñaha-dé xii-í, te cúñaha-n xii té Mãcú quixi-n ndihí-dé, chi téé-áⁿ ndacu-dé cada-dé ñiⁿ chiuⁿ-í. 12 Te té Tiquicú ní tendaha-í-dé cuáháⁿ-dé ñuu Éfesú. 13 Te òré quixi-n te yáha-n vèhe té Càrpú cáá ñuu Tróás canehe-n ñiⁿ dóó tãchahi ní dándöo-í

vehe-dé quixi, ndihi nchaa librú-í, te tnàhá nchaa dava-gá tutú-í ndécú vèhe-dé canehe-n quixi chi xiáⁿ ío-gá xiní ñuhu-í. ¹⁴ Te té Ljandrú té cùu rerú ío vài sá ñà túú vâha ní cuu quide ñaha-dé xii-í, dico mee Yă Ndiöxí nâhá-gă nása cada ñaha-gă xii-dé cuendá sá dúcáⁿ quide-dé. ¹⁵ Te vá ñihí tnâhá-n ndihi-dé chi ío càháⁿ cuèhé-dé cuendá nchaa tnúhu càháⁿ-ó.

¹⁶ Te cùtnâhá ndécá ñaha-güedé xii-í ní sâháⁿ núú cuè té cùchiuⁿ xito díhna nuu, chi mee ñii ní sâháⁿ te ñá túú ní sâháⁿ ni ñⁿ cue té cùndihi-í, chi nchaa-güedé ní dándõo ñaha-güedé xii-í, te yúhú xicáⁿ táhù-í núú Yă Ndiöxí sá vâ cadá cuendá-gá sá dúcáⁿ ñi quide-güedé. ¹⁷ Dico Xítohó Jesucristú ní chindee ñaha-gá xii-í, chi ní taxi-gá tnúhu ndee ñí ní càháⁿ-í tnúhu-gá nâcuâa tàú-xi cunduu núú cuè té-áⁿ ndihi núú nchâa ñáyiú, dico ñá ñáú ñáyiú isrâél cúú-yu, te ñiu-gá ní dâcâcu nihnu ñaha-gă xii-í ñá túú ní sâhni ñaha-güedé. ¹⁸ Te mee Xítohó Jesucristú coto ñaha-gá xii-í te ñá túú ñá cuu cuèi nândi sá ná cadá ñaha ñáyiú xii-í te ñiu-ni-gá coto ñaha-gă xii-í ndéé ná sâa nduu sâá-í andiu núú ndécú-gá táxi tnúni-gá. Te nchaa-o chí ná càchí-ó sâ ío càhnu cuu-gá ni caa ni quihíⁿ. Te ducaⁿ na cunduu.

Tnúhu ndéé núú ñi ndihi-ná

¹⁹ Te ío cùñaha-n na càda ndee ñí tá Priscá, ndihi té Àquilú, ndihi cue ñáyiú cùu ndi mee té Onésiforó.

²⁰ Te té Èrastú ní quendóo-dé ñuú Còrintú, te té Trófimú ní dándõo-í-dé ñuú Miletú chi cùhú-dé. ²¹ Te ío cundihí ñí-n quixi-n oré vátá sâá-gá yóó quidé víxiⁿ-xi. Te ío cada ndee ñí-n càchí té Èúbulú, ndihi té Pudenté, ndihi té Línú, ndihi tá Claudiá, ndihi nchaa dava-gá ñáyiú sândáá ñí tnúhu Xítohó Jesucristú.

²² Te xicáⁿ táhù-í núú Xítohó Jesucristú sá ná cùndecu ndihi ñaha-gá

xii-n ndihi nchaa dava-gá-yu. Te ducaⁿ ío na chindee chitúu ñaha-gă xii-ndo nchâa-ndo. Te ducaⁿ na cunduu. Te ío chí cadá ndèe ñí-nâ vitna.

TUTÚ NÍ CADÚHA TÉ PÁBLÚ QUIHIⁿ NDAHA TÉ TÌTÚ

*Té Páblú cádúha-dé tutú quíhíⁿ
ndaha té Títú*

¹ Yúhú té Páblú xínú cuèchi-í núnú Yá Ndióxi, te diu-gá ní tendaha ñaha-gá xii-í cáháⁿ-í tnúhu Xítóhó Jesucristú núnú ñáyiú cuèndá quíndáá iní nchaa ñáyiú ní cachí Yá Ndióxi naníhí tàhú, ndíhi cuèndá sá tècú tnùní váha-yu tnúhu-gá, te ñáyiú na quíndáá iní tnúhu-gá cada ndáá-yu cundecú-yu ichi-gá. ² Te yúhú dácúaha-í-yu tnúhu-gá cuèndá cundecu ndíhí-yu tnúhu ndee iní sá cündècu ndíhí-yu Yá Ndióxi ní caa ní quíhíⁿ, chí ndéé cútñahá vátá ngáva-gá ñuyíú-a ní cachí-gá sá cündècu ndíhi ñaha-gá xii-yu, te ñá túú dándahú ñáhá-gá, chí quíde-gá ñⁿ sá cáháⁿ-gá. ³ Te ní sáá nduu ní cachí-gá sá ñíhí-yu tnúhu nàcuáa cuáháⁿ tnúhu-gá, te diu-ni tnúhu-áⁿ ní cachí Yá Ndióxi Yaá dácácu ñíhnu ñaha xii-o núnú ùhú núnú ndáhú sá dácúaha-í ñáyiú. ⁴ Te tutú-a cádúha-í cuèndá daquixi-í ndaha yòhó té Títú, téé ní sanu ichi ndisa-í ichi Xítóhó Jesucristú, chí ñⁿ-ni tnúhu sàndáá iní-ó. Te xicáⁿ táhú-í núnú Tátá-ó Dütú Ndióxi sá ío na chindee chitúú ñaha-gá xii-n, te diu-ni-gá ná càda te ío váha cuu iní-ñ cündecu-n. Te xicáⁿ táhú tucu-í núnú Xítóhó Jesucristú Yaá dácácu ñíhnu ñaha xii-o núnú ùhú núnú ndáhú sá díú-ní dùcaⁿ na cada ñaha-gá xii-n.

Chiuⁿ quide té Títú distritú Crétá

⁵ Te yúhú ní dándöo ñaha-í xii-n distritú Crétá, chí cuíní-í cada-n nchaa chiuⁿ cumání, te cuíní-í taxi ndecu-n cuè téé quíndaha ñaha xii cue ñáyiú sàndáá iní tnúhu Yá Ndióxi xíndecu ñⁿ ñⁿ ñúú yíndèhu

distritú-áⁿ, te cada-n nàcuáa ní cachí-í cada-n. ⁶ Te cue téé cada chiuⁿ-áⁿ xíní ñúhu-xi cuu-güedé mee-ni cuè téé ío váha quíde ndáá nàcuáa vá yòo cáháⁿ dóho-güedé, te na cùu-güedé cue téé ndècu ñⁿ dii-ni ñadíhí-xi. Te ducaⁿ nchaa landú-güedé ná cùu-güexi landú sàndáá iní ñáhá xii Yá Ndióxi cuèndá sá vá yòo cuatnuñaha xii-güexi quesahá-yu sá ío sáá iní-güexi te quíde-güexi nándi sá ñá túú tàú-güexi cada-güexi. ⁷ Chí xíní ñúhu-xi sá nchaa cuè téé quíndaha ñaha xii ñáyiú sàndáá iní tnúhu Yá Ndióxi ío cundecu yíñúhu-güedé, chí ducaⁿ tàú-xi cada nchaa cue téé quíde chiuⁿ Yá Ndióxi, te xíní ñúhu tucu-xi sá vá cúu-güedé cue téé ñí iní-xi, te ní vá cúu-güedé cue téé líhli iní-xi, te ní vá cúu-güedé cue téé quíhu, te ní vá cúu-güedé cue téé plètú, te ní vá cúu-güedé cue téé dícó-ni ducaⁿ ñíhí díhúⁿ. ⁸ Te xíní ñúhu-xi cuu-güedé cue téé sáñaha nùu vehe ndetatú cue ñáyiú ñúhu ichi, cue téé quíde váha sá cúu-xí tnàha ñáyiú-xi, cue téé ío váha cútñuní iní-xi nàcuáa cada cundecu ñuyíú-a, cue téé quíde ndáá xíndecu, cue téé quíde nchaa nàcuáa ndùu vétú iní Yá Ndióxi, cue téé xító mee-xi ñá túú quíde cutexínu. ⁹ Te na cùu-güedé cue téé ío váha sàndáá iní tnúhu váha tnúhu Yá Ndióxi sá ní dánhé ñahá-í xii-ndo cuèndá ducaⁿ te cue téé-áⁿ ndacu-güedé cáháⁿ-güedé dóho ñáyiú cuèndá càdà-yu nchaa nàcuáa cáháⁿ Yá Ndióxi, te níhí-güedé tnúhu cáháⁿ váha-güedé núnú nchaa ñáyiú dàquee tíhú tnúhu Yá Ndióxi, te mee-ni cuè téé ducaⁿ quíde váha taxi ndecu-n quíndaha-güedé ñáyiú sàndáá iní tnúhu-gá.

¹⁰ Te na càchí tnúhu-í xii-n sá váí ñáyiú sáá iní-xi ío, te cáháⁿ-yu mee-ni tnúhu sá ñá túú nándíhi, te dándahú-yu tnàhá ñáyiú-yu, te ñáyiú isràèl ío-gá vài-yu ducaⁿ xíquide. ¹¹ Te nchaa ñáyiú ducaⁿ

xĩquide xini ñuhu-xi nducu-o tnúhu cúñaha-o xii-yu cuendá cadí-yu yuhú-yu, chi dānehé-yu dava-gá ñáiyu ñⁿ sá ñā túú tau-yu dacuahá-yu, te ducaⁿ quidé-yu cuendá-ni sá nihí-yu díhúⁿ, te ío titní xichi ní cuu dāndahú-yu nchaa ñáiyu xĩndecu ñⁿ-ni vèhe.

¹² Te ní cachí ñⁿ téé ío váha sáá díquí-xi ndècu mei ñuú distritú Crétá sá ncháá ñáiyu ñuú-dé-áⁿ ío ndèhndé-yu, te ío cuihna iní-yu, te ío vai xexí-yu, te cùhndú-yu.

¹³ Te ndáá ní cáháⁿ-dé chi ducaⁿ quidé-yu, te xĩáⁿ ío cáháⁿ-n dōho-yu cuendá sá ná quindáá váha iní-yu tnúhu Yá Ndióxi. ¹⁴ Te cúñaha-n xii-yu sá vā cáda cuendá-yu nchaa tnúhu ndehnde cáháⁿ ñáiyu isràél, te ni vā cáda cuendá-yu nchaa tnúhu cáháⁿ ñáiyu ñā túú cuini quindáá iní tnúhu Yá Ndióxi.

¹⁵ Te nchaa sá ñi cadúha Yá Ndióxi ío ñuyú-a cùu-xi mee nine-ni sá váha sá cúu-xi nchaa ñáiyu sa ní nduu ndoo ní nduu nine iní-xi ndècu ichi Yá Ndióxi. Dico nchaa sá ñi cadúha-gá ñā túú cùu-xi sá váha sá cúu-xi nchaa ñáiyu ndècu ichi cuehé ichi duha, chi ñā túú sàndáá iní-yu tnúhu-gá, chi mee-ni sá cuehé sá dúhá ñuhu iní-yu, te ñā túú quide cuendá-yu núu quide váha-yu ádi ñā túú quide váha-yu ndècu-yu. ¹⁶ Te cachí-yu sá sàndáá iní-yu Yá Ndióxi, dico nchaa sá quidé-yu-áⁿ cāhí tnúni-xi sá ñā ndáá. Te Yá Ndióxi chi duuⁿ duuⁿ ñā túú tnáhá iní-gá nchaa nācuáa quidé-yu, chi ío sáá iní-yu, te ñā túú quidé-yu ni ñⁿ sá váha.

2

Tnúhu váha tnúhu Yá Ndióxi

¹ Te yòhó òré dānehé-n ñáiyu, te danèhé-n-yu mee-ni nācuáa cáháⁿ tnúhu váha tnúhu Yá Ndióxi. ² Te nchaa cue téé cùu sacuéhé ná cáda cuendá-güedé vá cáda cùtexínu-güedé cundecu-güedé, te na cūndecu yĩñuhu-güedé, te

na cuáha váha-güedé cuendá nācuáa cada-güedé cundecu-güedé, te na quindáá váha iní-güedé Yá Ndióxi, te na cùu iní-güedé tnàha ñáiyu-güedé, te na cūnduu cahnu iní-güedé cuéi nāndi sá ná yāha-güedé. ³ Te vitna cáháⁿ tucu-í sá cúu-xi nchaa ñáiyu díhí ñáiyu cùu sacuéhé sá ná cūndecu yĩñuhú-yu, te vá cúu-yu ñáiyu yiti yùhu-xi, te ni vā cúu-yu ñáiyu quihu, te na dānehé-yu nchaa dava-gá ñáiyu cada váha-yu. ⁴ Te na dāsahú-yu nchaa ñáiyu díhí ñáiyu cuechi cuendá ná cùu iní-yu yíi-yu, ndihí cue landú-yu, ⁵ ndihí cuendá sá ná cāni váha iní-yu nācuáa cundecú-yu, ndihí cuendá sá vā cāni iní-yu cadá-yu ni ñⁿ sá cuehé sá dúhá, ndihí cuendá sá ná cādá-yu nchaa chiuⁿ ñuhu vehé-yu, ndihí cuendá sá cáda váha-yu nchaa tnàha ñáiyú-yu, ndihí cuendá sá ná cáda-yu nchaa nācuáa cáháⁿ yíi-yu, te ducaⁿ xini ñuhu-xi cadá-yu cuendá sá vā yōo cáháⁿ cuehé cuendá tnúhu Yá Ndióxi. Duha cúñaha-n xii cue ñáiyu díhí ñáiyu cùu sacuéhé cuendá ducaⁿ dāsahú-yu nchaa ñáiyu díhí ñáiyu cuechi.

⁶ Te yòhó cáháⁿ-n dōho nchaa cue téé cuechi cuendá sá ná cāni váha iní-güedé nācuáa cundecu-güedé, ⁷ te cada-n mēe-ni sá váha cuendá ducaⁿ cānchicúⁿ nihnu-güedé cada-güedé, te òré danèhé-n-güedé te ío váha cuu iní-n dānehé-n-güedé, te ndihí tnúhu yĩñuhu cáháⁿ ndihí-n-güedé. ⁸ Te cáháⁿ-n mēe-ni tnúhu váha, te ducaⁿ te vá yōo ñⁿ cáháⁿ cuehé cuendá tnúhu cáháⁿ-n, te nchaa ñáiyu cùu úhú iní ñáhá xii-o cucahaⁿ núu-yu, te vá nihí-yu tnúhu cáháⁿ cuehé-yu cuendá-ó.

⁹ Te ío cáháⁿ-n dōho nchaa cue téé xinu cuechi sá ná quindáá iní-güedé cada-güedé nchaa chiuⁿ tahu patróoⁿ-güedé nācuáa cudiu-güedé

núú cuè téé-áⁿ, te vá càháⁿ sàá iní-güedé. ¹⁰ Te vá cání iní-güedé duhu-güedé, te cada ndáá-güedé cuendá sá ñà túú nã caní iní ñáhá cuè patróóⁿ-güedé, te ducaⁿ te cutnúni iní ñáyiú sá tnúhu Yá Ndióxi ío váha dānehé ñáhá-xí nācuáa cada-o cūndecu-o, te ñu-gá cúú-gá Yá dácācu nihnu ñaha xii-o núú ùhú núú ndàhú.

¹¹ Te nchoo ñi cutnúni iní-ó sá Yá Ndióxi ío cūndahú iní-gá nchaa nchoo ñáyiú ndēcu ñuyúú-a, te ní taxi-gá tnúhu ndee iní sá nánihí tǎhú nchaandi túhú ñáyiú te núú na quindáá iní ñáhá-yu xii-gá.

¹² Te ní cachí-gá sá dáñá-ó nchaa ichi cuehé ichi duha chi ñá tnàhá iní-gá cūndecu-o ichi-áⁿ, te vá ío cuhuⁿ iní-ó nchaa sá ío ñuyúú-a, te ní cachí tucu-gá sá ío caní iní-ó nācuáa cūndecu-o vitna ndecu-o ñuyúú-a te cada ndáá-ó cūndecu-o cuendá nduu vétú iní-gá. ¹³ Te cūndetu-o sáá nduu càhnu vihi, nduu quixi tucu Xítoho Jesucristú Yá cúú Ndióxi-ó, te ñu-gá ní dácācu nihnu ñaha-gá xii-o núú ùhú núú ndàhú. Te nduu-áⁿ ío cudíí iní-ó. ¹⁴ Te mee-gá ní xihí-gá chi ducaⁿ ñi cuiní-gá cūnduu, te ducaⁿ ñi quide-gá cuendá nchoo vá cūndēcu-gá-ó ichi cuehé ichi duha, te nduu ndoo nduu nine iní-ó, te ducaⁿ te cuu-o cuè ñáyiú quindaha-gá, te ñi yùhu ñi iní-ó càda-o mee-ñi sá váha.

¹⁵ Te nchaa tnúhu-áⁿ danèhé-n-yu te cúñaha-n xii-yu nācuáa cadá-yu, te cáháⁿ-n dōho-yu te núú ñá túú quide ndáá-yu. Te cada-n sá cúú-n ñiⁿ téé xinu cuechi núú Yá Ndióxi, te vá dáñá-n mèe-n daquee tíhú ñáhá ñáyiú xii-n.

3

Nchaa sá tauú ñáyiú ndēcu ichi Yá Ndióxi cadá-yu

¹ Te cúñaha-n xii-yu sá ná quindáá iní-yu cadá-yu nchaa nācuáa càháⁿ nchaa cue téé

cúchiuⁿ, te tauú-yu chindee ñáhá-yu xii-güedé nchaa chiúⁿ váha quide-güedé. ² Te vá càháⁿ cuèhé-yu cuendá ñáyiú, te vá cūnduu pletú-yu, te na cúú-yu ñáyiú ndàhú iní-xi, te na cūndahú iní-yu nchaa tnàha ñáyiú-yu.

³ Te tnàhá-ó ñi xóo cada-o dàtná quidé ñáyiú-áⁿ vitna, chi ío ñi díquí-ó chi ñá tēcú tnúni-ó nācuáa càháⁿ tnúhu Yá Ndióxi ní cūu, te ío ní xīnduu sáá iní-ó núú-gá, te ní xīndecu-o ñiⁿ ichi sá ñà túú tauú-ó cūndecu-o ñi cūu, te nāndi sá cuèhé sá dúhá ío ñuyúú-a ní xóo cudíí iní-ó ñi xóo cada-o chi ní xóo taxi tnúni ñáhá-xí xii-o, te ní xóo cada cuèhé ní xóo cada duha-o ñi cūu, te ní xīndecu-o ichi cuedú iní, te cuendá nchaa sá ñi xóo cada-o-áⁿ xíáⁿ ío ní xóo cuu ùhú iní ñáhá ñáyiú xii-o, te ducaⁿ-ñi nchōo tucu ní xóo cuu ùhú iní-ó-yu. ⁴ Te Yá Ndióxi Yá ní dácācu nihnu ñaha xii-o núú ùhú núú ndàhú ní dāndíxi túu-gá iní-ó nācuáa cutnúni iní-ó sá ío váha iní-gá, te cūu iní ñáhá-gá xii nchaa nchoo ñáyiú ndēcu ñuyúú-a. ⁵ Te Yá Ndióxi ní dácācu nihnu ñaha-gá xii-o núú ùhú núú ndàhú, dico ñá díú cuendá ñiⁿ sá váha quide-o ndecu-o ñuyúú-a ducaⁿ ñi quide-gá, chi mee-gá ducaⁿ tnàhí ní cūndahú iní ñáhá-gá xii-o. Te ní nduu ndoo ní nduu nine iní-ó, te ní cuu-o dàtná ñiⁿ ñáyiú saa, chi Espiritú Yá Ndióxi ducaⁿ ñi quide ñaha-xi xii-o. ⁶ Te Espiritú-gá ní taxi-gá ñi yùhu ñi iní-gá ndécú ndíhi-o, te ducaⁿ ñi quide-gá chi ní sándáá iní-ó Xítoho Jesucristú Yá ní dácācu nihnu ñaha xii-o núú ùhú núú ndàhú. ⁷ Te ío cūndahú iní ñáhá-gá xii-o ñu sa ní quide ndáá-gá cuéchi-o te ní cuu-o dēhe-gá, núú xíáⁿ vitna ndētu-ná-ó sáá nduu nduu tǎhú-ó cūndecu-o ndíhi-gá ñi caa ñi quíhíⁿ.

⁸ Te tnúhu ní cáháⁿ-í-a cūu-xi tnúhu ndáá cuiti, te cuiní-í sá ñi yuhu ñi iní-n cáháⁿ-n tnúhu-gá núú-yu cuendá sá ncháá ñáyiú sándáá iní ñáhá xii Yá Ndióxi nducu

ndèe-yu cadá-yu mee-ni sá vâha, te tnúhu-áⁿ cúu-xí mée-ni tnúhu vâha, te ío vâha sá cúu-xí-yu. ⁹ Te vá cadá cuèndá-n nchaa tnúhu sá ñà túú nàndíhi xítñaha ñáiyu, te vá cadá cuèndá-n ñáiyu nándi cãháⁿ cuèndá nchaa sá ñí xóo cada cue ñáiyu ní xíndecu ndée sanaha, te vá cadá cuèndá-n nchaa tnúhu xítñaha ñáiyu xicuehé tnáhã cuèndá tnúhu ní chídó tnùní ndíi Moisés, chi nchaa tnúhu xítñahã-yu-áⁿ ñà túú tnàhí nandíhi-xi, te dàcuíta ñaha-xi xì-o.

¹⁰ Te núu ío ñáiyu ní ngüíta-yu nándi tnúhu cãháⁿ-yu cuèndá sá vã cúu ñⁿnuu cue ñáiyu ndècu ichi Yá Ndiöxí ñá, te ñáiyu-áⁿ cãháⁿ sàhú-n dôho-yu ñⁿ úú xito, te núu vá tníⁿ-yu tnúhu cãháⁿ-n ñá, te vá nìhí tnáhã-gã-n ndíhi-yu. ¹¹ Te ducaⁿ càda-n, chi ñáiyu-áⁿ duuⁿ duuⁿ ñá túú-gã cuìní-yu cadá-yu sá vâha, chi mee-nã sá cuèhé sá dúhá tnáhã iní-yu cadá-yu, te cùtnuní iní méè-yu sá ñà túú quíde ndáá-yu, te sáá nduu te nacháhu-yu nchaa sá quídè-yu.

Nàcuáa cada té Titú

¹² Te cuìní-í tendaha-í té Àrtemás quixi-dé núu ndécú-n àdi té Tiquicú, te òré ná quèxio ndéda-ni càa ñⁿ cue té-a núu ndécú-n, te ío nducu ndèe-n quíhíⁿ-n ñúú Nicópolis núu quíhíⁿ-í cundecu-í, chi yacáⁿ cuìní-í quíhíⁿ-í cundecu-í yóo quídé vîxiⁿ-xi. ¹³ Te ío cuáñaha-n nchaa sá xíní ñùhu té Zénás téé ío vâha xíní nchaa nàcuáa cãháⁿ lèí, ndíhi té Àpolós cuèndá sá ñà túú nã cumání xii-güedé ichi. ¹⁴ Te cuìní-í sá ncháá ñáiyu ndècu ndíhi-o ichi Yá Ndiöxí cada váha-yu, te cuáñahã-yu ñⁿ sá xíní ñùhu ñáiyu, te ío vâha chùⁿ cadá-yu te núu ducaⁿ na càdá-yu.

Tnúhu ndée núu ñí ndíhi-ná

¹⁵ Te vitna ío cada ndee ìní-n càchí nchaa ñáiyu ndècu ndíhi-í íha, te cúñaha-n sá ío na càda ndee iní nchaa ñáiyu cùu iní ñáhã xì-o,

ñáiyu sàndáá iní ñáhã xìi Yá Ndiöxí. Te Yá Ndiöxí ío na chindee chitúu ñaha-gã xii-ndo nchaa-ndo. Te ducaⁿ na cùnduu. Te ío chí cadá ndèe iní-nã vitna.

TUTÚ NÍ CADÚHA TÉ PÁBLÚ QUIHIⁿ NDAHA TÉ FILEMÓN

*Té Páblú cádúha-dé tutú quíhíⁿ
ndaha té Filemón*

¹ Te yúhú té Páblú téee yíhi veacaá sá cuendá Xítohó Jesucristú cádúha-í ìⁿ tutú ndíhi té Timùteú cuendá daquixi-í ndaha yòhó té Filemón, te ío cùu iní ñàhà-í xii-n chi tnàhá-n quide-n chiuⁿ Yá Ndiòxí. Te tutú-a tëndaha-í quixi ndaha-n ² ndíhi ndaha ñaha nàni Apiá ñaha ndècu ndíhi-o ichi Xítohó Jesucristú, ndíhi ndaha té Àrquipú, chi tnàhá-dé quidé-dé chiuⁿ Yá Ndiòxí, ndíhi ndaha nchaa ñáyiú tàcá vehe-n dàcuahá-yu tnúhu-gá. ³ Te xicáⁿ táhù-í núú Tátá-ó Dütú Ndiòxí ndíhi núú Xítohó Jesucristú sá ío na chindee chitúu ñaha-gá xii-ndo, te ducaⁿ ndí nduú-gá ná cádá te ío váha cuu iní-ndó cündecu-ndo.

*Té Filemón ío sàndáá iní-dé
Xítohó Jesucristú te cùu iní-dé tnàha
ñáyiú-dé*

⁴ Te ndí tnàhá òré càháⁿ ndíhi-í Yá Ndiòxí cuendá-n ndàcáⁿ táhù-í núú-gá. ⁵ Chi ñíhí-í tnúhu sá ío sàndáá iní-n Xítohó Jesucristú, te cùu iní-n cuè ñáyiú ndècu ichi-gá. ⁶ Te xicáⁿ táhù-í núú Yá Ndiòxí sá dàtná-ni sàndáá iní-n-gá ducaⁿ-ni dànehé-n ñáyiú cuendá ducaⁿ ngñu ichi-yu tnàhá-yu, te cutnùní iní-yu nàcuáa ndùu nchaa sá vâha tàxi Xítohó Jesucristú xii-o, te tnàhá-yu nduu táhù-yu nchaa sá vâha-áⁿ. ⁷ Te yòhó té Filemón cúú-n tée ndècu ndíhi-í ichi Xítohó Jesucristú càchí tnúhu-í xii-n sá ío cùdí iní-í cuendá sá ío váha quide-n ndecu-n, chi cùu iní-n nchaa ñáyiú ndècu ichi Yá Ndiòxí, te uuⁿ-gá ñíhí ndèé-í sá dúcáⁿ quide-n, te ñiú-n ío sáhã-n-yu tnúhu ndee iní ndécú ndíhi-yu.

*Té Páblú chindèe tnúhu-dé té
Ònésimú*

⁸ Te yúhú té Páblú ní taxi Xítohó Jesucristú tnúhu ndee iní ndécú ndíhi-í sá táxi tnùní ñàhà-í xii-n te tahu-í chiuⁿ cada-n, dico vá táxi tnùní ñàhà-í xii-n, ⁹ chi váha-gá sá càháⁿ ndàhú-í núú-n sá cádá-n nchaa nacuáa càháⁿ-í chi ío cùu iní ñàhà-í xii-n. Chi yúhú sa ta yíi-í cuáhãⁿ, te yíhi-í veacaá cuendá sá càháⁿ-í tnúhu Xítohó Jesucristú. ¹⁰ Te càháⁿ ndàhú-í núú-n sá ñà túú nã cani iní-n cuendá té Ònésimú, chi ní cuu-dé vitna dàtná ìⁿ déhe-í, chi ní sàndáá iní-dé tnúhu Yá Ndiòxí ní xáhaⁿ-í xii-dé vitna yíhi-í veacaá.

¹¹ Te nàha-n sá cütñahá ní xíndecu ndíhi-n-dé ñá túú ní quide ndáá-dé, dico vitna ío váha quide-dé ndécú ndíhi-í-dé, te ñiú-ni ducaⁿ càda-dé òré cundecu ndíhi tucu-n-dé. ¹² Te vitna tendaha-í-dé ndixi-dé cundecu tucu-n ndíhi-dé, te òré queheⁿ cuendá-n-dé, te cada iní-n sá yúhú ní queheⁿ cuendá-n.

¹³ Te vitna yíhi-í veacaá sá cuendá tnúhu Xítohó Jesucristú, te cuñí-í ngani-í-dé cunu cuechi-dé núú-í cuendá cada-dé núú-n ní cùu. ¹⁴ Dico ñá túú ní ngani-í-dé, chi vátá ndátnúhu ndíhi ñaha-gá-í xii-n núu nása cachí-n cünduu. Te ñá cündèe iní-í cada yica-í cada-n ìⁿ sá váha sá cúú-xi-í, chi cuñí-í sá mée-n càni iní-n núu cuu àdi sá vá cúú. ¹⁵ Te ní cunduu ní quee

té Ònésimú vehe-n, te cudana te mee Yá Ndiòxí ducaⁿ ní cachí-gá cunduu cuendá dacuàha-dé cada váha-dé. Te ndixi tuçu-dé cundecu ndíhi ducaⁿ-ná-n-dé. ¹⁶ Te vá cúú-gá-dé dàtná ìⁿ tée xinu cuechi chi ní cuu-dé dàtná ìⁿ ñani-ó chi ní sàndáá iní-dé Yá Ndiòxí, te yúhú ío cùu iní-í-dé, dico yòhó uuⁿ-gá cuu iní-n-dé, chi cùu-dé ìⁿ tnàha ñáyiú-o, te ndècu-dé ichi Yá Ndiòxí.

¹⁷ Te ìⁿ-ni cùu-o ndecu-o ichi Yá Ndiòxí núu xíãⁿ càháⁿ ndàhú-í núú-n sá quéhéⁿ cuendá-n-dé dàtná quéhéⁿ cuendá-n yúhú òré quéxi-í vehe-n. ¹⁸ Te núu ío ìⁿ

sá nǐ cumání-dě núú-n ñà túú ní quide ndáá-dé cùtnàhá ní xindecu-n ndìhi-dé, àdi ío ìíⁿ sá tàú-dé te vá ndàcáⁿ cuèndá-n núú-dě, chi yúhú ndacáⁿ cuèndá-n núú-í. ¹⁹ Te ndaha mee yúhú té Páblú cádúha-í tutú-a càchí tnúhu-í xii-n sá ná chǎhu-í nchaa sá nǐ quide-dé. Dico dandacu saú iní-n sǎ yúhú ní sanu ichi ñaha-í xii-n ichi Xítóhó Jesucristú. ²⁰ Dico yòhó té ndècu ndìhi-í ichi Xítóhó Jesucristú cada ndee ìní-n càda-n tnúhu ndàhú càháⁿ-í núú-n chi ndècu-o ichi-gá. Te ducaⁿ càda-n nacuaa cuu-xi òtáⁿ ìíⁿ tnúhu ndee ìní sá cúú-xi-í, chi ndì ndùú-ó ndècu-o ichi-gá.

²¹ Te cùtnuní ìní-í sá cádá-n nchàa nacuaa càháⁿ-í, te cùtnuní tucu ìní-í sá ìo-gá vǎi sá vǎha cada-n dàcúúxí tnúhu ndàhú càháⁿ-í núú-n, núu xiáⁿ tëndaha-í tutú-a véxi ndaha-n. ²² Te vitna cuìní-í cada túha-n ìíⁿ vehe cundecu-í, chi sǎni ìní-í sá quíxí còto ñaha-í xii-ndo, te ndètu-í sáá nduu-ǎⁿ chi nchòhó xicáⁿ táhú-ndó núú Yá Ndiòxí cuèndá-í.

Tnúhu ndéé núú nǐ ndìhi-ná

²³ Te ío cada ndee ìní-n càchí té Ēpafrás té yìhi ndìhi-í vecaá sá cuèndá tnúhu Xítóhó Jesucristú.

²⁴ Te ío cada ndee ìní tucu-n càchí té Mácú, ndìhi té Arìstarcú, ndìhi té Dêmás, ndìhi té Lùcá, chi tnàhá cue té-ǎⁿ quide-güedé chiuⁿ Xítóhó Jesucristú.

²⁵ Te Xítóhó Jesucristú ío na chìndee chitúu ñaha-gǎ xii-ndo nchàa-ndo. Te ducaⁿ na cùnduu. Te ío chí cádá ndèe ìní-nǎ vitna.

TUTÚ QUIHIⁿ NDAHA CUE ÑÁYIU HÈBREÚ

Dútú Ndiöxí ní cachí-gá sá Dêhe-gá cada núú-gă

¹ Te ndéé sanaha, Yá Ndiöxí ní xáhaⁿ-gă xii cue téé ní cachí iní méé-gă cada núú-gă cáháⁿ-güedé tnúhu-gá núú nchâa ñani tnáhá-ó ní xíndecu ndéé dàvá-áⁿ te diu ducaⁿ ní quide-güedé. Te titní xito ducaⁿ ní xáhaⁿ-gă xii-güedé ní cáháⁿ-güedé tnúhu-gá. Te ndi dííⁿ ndi dííⁿ ní xítñúhu ñaha-gă xii-güedé nâcuáa cáháⁿ-güedé tnúhu-gá núú-yu. ² Te sátá ní cuu vai nduu ta yáha cuáháⁿ, te ní sáá nduu ní cachí Yá Ndiöxí sá Dêhe-gá cada núú-gă cáháⁿ tnúhu-gá núú-ó. Te diu-ni mee-gă ní táúchíúⁿ ní cadúha Dêhe-gá ñuyíú ndihí nchaa sá íó, te ní cachí-gá sá ncháá cùu-xi cuendá Dêhe-gá. ³ Te Dêhe Yá Ndiöxí ío càhnu cuu-gă dàtná càhnu cuu mee-gă, te dàtná-ni sàni iní méé-gă diu-ni ducaⁿ sàni iní Dêhe-gá chi tnàhá-gă cúú-gă Ndiöxí, te sá cuendá tnúhu càháⁿ Dêhe-gá xíáⁿ ndécú-ní nchâa sá íó ñuyíú, te ducaⁿ chi ío càhnu cuu Dêhe-gá, te diu-ni Dêhe-gá ní quide nâcuáa vá cùndecu-gă cuèchi-o. Te sátá dúcáⁿ te ní ngóo-gă xio cùha Tátá-gă Dútú Ndiöxí Yáá ío cùnnu ndecu andiu.

Dêhe Dútú Ndiöxí ío-gă cùnùu-gă dàcúúxí cuè espíritú xínú cuèchi núú-gă

⁴ Te Dêhe Yá Ndiöxí ío-gă cùnùu-gă dàcúúxí cuè espíritú xínú cuèchi núú-gă, te ducaⁿ chi ní nduu táhú-gă núú Tátá-gă Dútú Ndiöxí sá ío-gă cùnnu-gă dàcúúxí cuè espíritú-áⁿ. ⁵ Chi Yá Ndiöxí ñá túú ní xáhaⁿ-gă xii ní ñⁿ cue espíritú xínú cuèchi núú-gă dàtná ní xáhaⁿ-gă xii Dêhe-gá, te duha ní xáhaⁿ-gă: Yòhó cúú-n Dêhe mee-í,

te ducaⁿ-ni cùndecu-n núú ndécú-í. Duha ní xáhaⁿ-gă. Te ní cachí tucu Yá Ndiöxí:

Yúhú cúú-í Tátá Yáá-áⁿ,
te mee-gă cúú-gă Dêhe-í.

Duha ní cachí-gă. ⁶ Te cùtnàhá ní tendaha-gă Dêhe-gá Yáá ío cùnnu ní quixi-gă ñuyíú-a, te ní cachí-gă:

Tàú-xi sá ncháá cuè espíritú xínú cuèchi núú-í chiñuhu-xi Dêhe-í.

Duha ní cachí-gă. ⁷ Te Yá Ndiöxí ní cáháⁿ-gă cuendá cue espíritú xínú cuèchi núú-gă, te ní cachí-gă:

Yúhú quidè-í sá ncháá cuè espíritú xínú cuèchi núú-í cúú-xí dàtná táchí,

te diu-ni cue espíritú-áⁿ quidè-í sá cúú-xí dàtná itá ñuhú.

Duha càchí-gă. ⁸ Dico Dêhe-gă chi ñá túú dùcaⁿ ní xáhaⁿ-gă, chi duha ní xáhaⁿ-gă:

Yòhó tnàhá-n cùu-n Ndiöxí dàtná cúú yúhú Yáá cúú Tátá-n,

te ducaⁿ-ni tàxi tnuní-n ní caa ní quíhíⁿ,

te ío váha ndáá quidè-n tàxi tnuní-n.

⁹ Te dàquee tihú-n nchâa sá cuèhé sá dúhá, te cùu iní-n nchâa sá váha,

núu xíáⁿ yúhú Yáá cúú Tátá-n ní quide-í sá ío-gă vii ío-gă váha cuu iní-n,

dàcúúxí nchâa dava-gă ñá yiu ndècu ndihí-n.

Duha ní xáhaⁿ-gă xii Dêhe-gă. ¹⁰ Te ní xáhaⁿ tucu Yá Ndiöxí xii Dêhe-gă:

Yòhó cúú-n Yáá ío cùnnu, chi ndéé cùtnàhá ñá túú vèdana ná íó te ní cadúha-n ñuyíú ndihí andiu.

¹¹ Te andiu ndihí ñuyíú chi naa-xi, dico yòhó chi cundecu-ni-n ní caa ní quíhíⁿ.

Te andiu ndihí ñuyíú chi ndihí-xi dàtná ndíhí ñⁿ dóó,

¹² te dàtná cuíni-n quide ñá yiu ndihí ñⁿ dóó òré ndácáⁿ tnáhnú-yu tàxi ndecú-yu ñⁿ xio, ducaⁿ càda-n ñuyíú ndihí andiu,

te dàtná nádâma dóó ñâyiu ducaⁿ càda tucu-n ñuyúú ndìhi andiu.

Te yòhó dàtná-ni càa-n ndecu-n vitna ducaⁿ-ni cùnduu-n cundecu-n ni caa ni quíhⁿ, chi vá yíí tnhá-n.

Duha ní xáhaⁿ Yá Ndiöxí xii Déhe-gá. ¹³ Te Yá Ndiöxí ñá túú ní xáhaⁿ-gá xii ni ñⁿ cue espíritú xínú cuèchi núú-gá dàtná ní xáhaⁿ-gá xii Déhe-gá, te duha ní xáhaⁿ tùcu-gá:

Ngóo xio cùha-í taxi tñùní-n, te yúhú cada-í te nchaa sá cúú ùhú iní ñáhá xii-n canehe-xi sá yíñùhu núú-n.

Duha ní xáhaⁿ-gá xii Déhe-gá. ¹⁴ Te nchaa espíritú xínú cuèchi núú Yá Ndiöxí mee-ni chùuⁿ-gá quidé-xí, chi tëndaha-gá cue espíritú-áⁿ cuáháⁿ-xi nchaa núú ndécú cuè ñâyiu ní nduu táhú cundecu ndìhi-gá chindee ñàha-xi xii-yu.

2

Vá dàñá ndèè-ó tñùhu sá càháⁿ nàcuáa naníhí tàhú-ó

¹ Te sá cuendá sá ño cùnuu Xítohó Jesucristú, núú xiáⁿ ío xíni ñùhu-xi cada cuendá-ó nchàa tñùhu càháⁿ-gá sá sá ní xíndedóho-o cuendá sá vâ dàñá ñihnu-o. ² Te cue espíritú xínú cuèchi núú Yá Ndiöxí ní càháⁿ-xi tñùhu-gá ndéé sanaha, te tñùhu ní càháⁿ cue espíritú-áⁿ cúú-xí sá ndáá cuíti. Te nchaa ñâyiu ñá túú ní cuíni tñii nchaa tñùhu ní càháⁿ cue espíritú-áⁿ, te ni ñà túú ní cuíni-yu cundedóho-yu, nchaa ñâyiu-áⁿ ñí nacháhu-yu nàcuáa ndùu nchaa cuèchi ní quidé-yu ñⁿ ñⁿ-yu. ³ Te sá dúcáⁿ ñí yáha cue ñâyiu-áⁿ, xiáⁿ cútnùní ndáá iní-ó sá vâ càcu ñihnu-o te núu na dàña ñihnu-o tñùhu sá càháⁿ nàcuáa naníhí tàhú-ó, tñùhu sá ño cùnuu, chi nacháhu-o te núu ducaⁿ na càda-o. Te díhna-gá Xítohó Jesucristú ní càháⁿ-gá tñùhu-áⁿ te nchaa ñâyiu ní xíndedóho nchaa nàcuáa ndùu tñùhu-áⁿ ñí càháⁿ ndáá-yu tñùhu-áⁿ núú-ó. ⁴ Te tnhá Yá Ndiöxí

cúndìhi-gá nchaa ñâyiu-áⁿ quidé-gá nàcuáa cútnùní iní-ó sá tñùhu-áⁿ cúú-xí tñùhu ndáá, chi quíde-gá titní núú sá vâ yòo tnhá ndàcu cada te ío cùñùhu-o. Te Espíritú Yá Ndiöxí quidé-xí nàcuáa nduu táhú-ó ndì dííⁿ núú chùuⁿ cada-o nàcuáa cuíni méé-gá. Te sá dúcáⁿ quíde Yá Ndiöxí nchaa xiáⁿ, xiáⁿ cútnùní iní-ó sá tnhá-gá càháⁿ-gá sá tñùhu-áⁿ cúú-xí tñùhu ndáá.

Xítohó Jesucristú ní xínduu yiqui cùñù-gá dàtná cáa yìquì cuñú nchoo cuè ñâyiu ñuyúú-a

⁵ Te Yá Ndiöxí vá táxí ndècu-gá cue espíritú xínú cuèchi núú-gá taxi tñùní-xi ñuyúú sáá sá vátá quíni-gá-ó, te díu cuendá xiáⁿ càháⁿ-í. ⁶ Te núú tütú Yá Ndiöxí càchí-xi:

Yòhó Dútú Ndiöxí ñá túú nâ cúú cuè ñâyiu ñuyúú núu ndacu iní-n-yu, àdi chindeé-n-yu.

⁷ Te yòhó ní cachí-n sá nchaa ñâyiu ñuyúú-a vá cùnùu-yu dàtná cùnùu cue espíritú xínú cuèchi núú-n,

dico ní cachí-n sá sáá nduu te ío cùnùu-yu tnhá-yu, te mee-n càháⁿ-n sá ño càhnu cuú-yu,

te ní cachí tucu-n sá táxí tñùní-yu nchaa sá ñí cadúha-n.

⁸ Te ducaⁿ nchàandi túhú sá ío quíndàhá-yu.

Duha càchí-xi núú tütú-gá. Te sá dúcáⁿ ñí cachí Yá Ndiöxí sá quíndàha ñâyiu ñuyúú nchaa sá ío, xiáⁿ cútnùní sá ncháandì túhú sá ío taxi tñùní-yu, dico vátá sáá-gá nduu dùcaⁿ quíni-ó càda-xi. ⁹ Te nchoo sa nàha-o sá tñáá-ní ñí quíde Yá Ndiöxí cuendá sá vâ cùnùu Xítohó Jesucristú dàtná cùnùu cue espíritú xínú cuèchi núú-gá. Te ducaⁿ ñí quíde Yá Ndiöxí chi ní cundàhú iní-gá nchaa ñâyiu ñuyúú-a, chi ní cachí-gá sá Dèhe-gá cuú cuendá nchaa-yu, te Xítohó Jesucristú ío ní ndoho-gá òré ní xíhí-gá, núú xiáⁿ ní nduu táhú-gá cùnùu vihi-gá vitna. Te mee Yá

Ndiöxí cächí-gá sá ïo càhnu cuu Déhe-gá.

¹⁰ Te Yá Ndiöxí ní cadúha-gá nchaandí túhú sá ío nàcuáa ní cächí iní mée-gá, te sá dúcáⁿ ní quide-gá núu xiáⁿ váha-ní sá ní cächí-gá sá Xítohó Jesucristú nándi ndoho-gá te cuú-gá cuendá ducaⁿ ñà túú tnàhí-gá ná cùmání-gá núú Yá Ndiöxí. Te sá dúcáⁿ ní cuu núu xiáⁿ ní níhí Yá Ndiöxí nàcuáa cada-gá càndeca-gá nchaa ñáyiú cùu déhe-gá quihíⁿ núú ïo váha càa cundecú-yu ndihí-gá ni caa ni quihíⁿ. Te Xítohó Jesucristú cúu-gá Yá ní quide nàcuáa nduu táhú cue ñáyiú cundecú-yu ndihí Yá Ndiöxí.

¹¹ Te Xítohó Jesucristú cúu-gá Yá quidé ndècu yiñuhu ñáyiú núú Yá Ndiöxí ñáyiú sàndáá iní ñáhá xii-gá, te Xítohó Jesucristú ndihí cue ñáyiú-áⁿ ìⁿ-ni Yáá cúú Tātá-yu ndihí-gá, núu xiáⁿ Xítohó Jesucristú Yáá cúú Déhe Dútú Ndiöxí ñà túú cùcahaⁿ núú-gá càháⁿ-gá sá ñàní-gá ndihí cùha-gá cúú nchàa ñáyiú-áⁿ. ¹² Te quèe ndáá-xi nàcuáa càháⁿ-xi núú tütú Yá Ndiöxí núú cächí-xi nàcuáa ní xáhaⁿ Xítohó Jesucristú xii Tātá-gá Dútú Ndiöxí, te duha ní xáhaⁿ-gá:

Cáháⁿ váha-í cuendá-n núú nchàa cue tée cùu datná ñàní-í ndihí núú nchàa cue ñáyiú dñí cúú datná cùha-í,

te cata-í ndudú chiñuhu ñaha-í xii-n núú tàcá-yu.

Duha yòdo tnuní núú tütú-gá nàcuáa ní xáhaⁿ Déhe-gá xii-gá. ¹³ Te ingá tucu xichi núú tütú Yá Ndiöxí càháⁿ-xi nàcuáa ní cáháⁿ Xítohó Jesucristú cuendá-gá, te duha ní cächí-gá:

Yúhú nchaa-ni nduu quindáá iní-í Tātá-í Dútú Ndiöxí.

Duha cächí-xi núú tütú Yá Ndiöxí nàcuáa ní cáháⁿ Xítohó Jesucristú. Te ingá tucu xichi núú tütú Yá Ndiöxí càháⁿ-xi nàcuáa ní cáháⁿ tucu Xítohó Jesucristú, te duha ní cächí-gá:

Iha ndècu ndihí-í nchaa ñáyiú cùu déhe Tātá-í Dútú Ndiöxí, te ñiu-ni ñáyiú-áⁿ ní taxi cuendá Tātá-í cuu cuendá-í.

Duha cächí-xi núú tütú-gá nàcuáa ní cáháⁿ Xítohó Jesucristú.

¹⁴ Te sá cuendá nchaa ñáyiú cùu déhe Yá Ndiöxí cúu-yu yiqui cùñú, núu xiáⁿ ducaⁿ tnàhá Xítohó Jesucristú ní cuu-gá yiqui cùñú, te ducaⁿ ní cuu-gá yiqui cùñú cuendá cuú-gá, te sá dúcáⁿ cúu-gá te ndacu-gá daquèe tñhú-gá sàcuíhná, te ñiu sàcuíhná-áⁿ quidé-xi xihí ñáyiú. ¹⁵ Te ducaⁿ ní quide-gá cuendá sá cue ñáyiú ñuyú-a vá yùhú-gá-yu sá cùu-yu, chi nchaa-ni nduu yùhú-yu sá cùu-yu. ¹⁶ Te na cächí tnùhu ndáá-í sá Xítohó Jesucristú ní quixi-gá cuendá chindee-gá cue ñáyiú cùu ñaní tnàhá ndii Àbrahám, te ñà díú cuendá sá chindèe-gá cue espíritu xínú cuèchi núú Yá Ndiöxí. ¹⁷ Te cuendá xiáⁿ núu dai ní xini ñuhu-xi sá cúu-gá ñáyiú cuendá yàha-gá nándi sá yàha-gá datná yàha cue ñáyiú cùu ndi mee-gá cuendá ducaⁿ cùu-gá dútú ïo cùnuu te cuu ndáá-gá núú Yá Ndiöxí, te cundàhú iní-gá nchaa ñáyiú te cuú-gá cuendá sá vã cùndècu-gá cuèchi-yu núú Yá Ndiöxí. ¹⁸ Te mei òré ndóhó Xítohó Jesucristú ní xito ndéé ñáhá sàcuíhná xii-gá te núu ndisa sá vã cadá-gá ni ìⁿ sá ñà túú tàu-gá cada-gá, te sá dúcáⁿ ní ndoho-gá xiáⁿ núu ndácú-gá chindèe-gá nchaa ñáyiú ducaⁿ yàha.

3

Xítohó Jesucristú ío-gá cùnuu-gá dàcúúxi ndii Moisés

¹ Te nchòhó cúu-ndó ñáyiú ndècu ndihí-í ichi Xítohó Jesucristú ñáyiú cùu cuendá Yá Ndiöxí, te tnàhá-ndó cùu-ndo ñáyiú ní cáháⁿ ñáhá-gá cuendá cundecu-ndo ndihí-gá. Te yúhú cächí tnùhu-í xii-ndo sá ïo váha cada cuendá-ndó nàcuáa nduu cuendá Xítohó Jesucristú, chi

diu-gá cúu-gă Yaá ní tendaha ñàha Dútú Ndiöxí ní quixi-gă ñuyú-a, te diu-gá cúu-gă Dútú ío cùnuu chi quide-gă núú Yá Ndiöxí. Te diu-ni cuendá Xítohó Jesucristú càháⁿ tnúhu sá ñi sàndáá iní-ó. ² Te mee Yá Ndiöxí ní sáha chiúⁿ-gă Xítohó Jesucristú, te ío ndáá quidé-gă chiúⁿ-áⁿ sá cúu-xí Yá Ndiöxí, te diu-ni ducaⁿ ñi quide ndíi Moisés ní quide ndíi chiúⁿ ní táhú Yá Ndiöxí, te ío ndáá ní quide ndíi chiúⁿ-gă sá cúu-xí nchàa ñáyíu cùu cuendá-gă, te cue ñáyíu-áⁿ cùú-yu dàtná vehe mee-gă. ³ Te ìⁿ téé dàcaa ìⁿ vehe váha ío càhnu-gă cúu-dě dàcúúxí vehe dacao-dé. Te ducaⁿ sàtnahá-xi cùu Xítohó Jesucristú chi ío-gă càhnu cuu-gă dàcúúxí ndíi Moisés. ⁴ Te nchoo sà naha-o sá ncháá vehe dacuítí ndècu cue téé ní dácáá, dico sa naha tucu-o sá Yá Ndiöxí quidé-gă ndécú nchàa sá ío ñuyú-a. ⁵ Te ndíi Moisés-áⁿ ío ndáá ní quide ndíi chiúⁿ ní táhú Yá Ndiöxí ní quide ndíi sá cúu-xí nchàa ñáyíu cùu cuendá-gă. Te sá dúcáⁿ ñi quide ndíi xíáⁿ ní cuu ndíi ìⁿ téé ní xinu cuechi núú Yá Ndiöxí. Te ní xáhaⁿ ndíi xii nchaa ñáyíu cùu cuendá-gă nàcuáa càháⁿ-gă ndéé cuéé-gă. ⁶ Dico Xítohó Jesucristú cúu-gă Déhe mee Yá Ndiöxí, te cùu-gă Yaá ío quide ndáá yíndàha-gă nchaa ñáyíu cùu cuendá Yá Ndiöxí. Te tnáhá-ó cùu-o ñáyíu cùu cuendá-gă, te diu-ni ducaⁿ cùu cuendá ñáhá-gă xii-o te núu na cànchicúⁿ ñihnu-ni-o càni ndáá iní-ó cuendá-gă ndéé ná sáá nduu ngündecu-o ndíhi-gă.

Cue ñáyíu cùu cuendá Yá Ndiöxí ío váha cùu iní-yu ndécú-yu ndíhi-gă

⁷ Te núú tütú Yá Ndiöxí yódó tnùní nàcuáa ní càháⁿ Espíritú-gă, te duha ní cachí-xi:

Te núu nchòhó ndèdóho-ndo nchàa tnúhu càháⁿ Yá Ndiöxí vitna,

⁸ te vá cùndùu sáá iní-ndó dàtná ní xínduu sáá iní ñáyíu ní dáquéé tìhú tnúhu Yá Ndiöxí, ñáyíu ní xíndecu xití yucu,

chi ñáyíu-áⁿ ní xito ndeé-yu Yá Ndiöxí núu nása cada ñaha-gă xii-yu.

Duha ní cachí Espíritú-gă. ⁹ Te càchí tucu Espíritú Yá Ndiöxí nàcuáa ní càháⁿ mée-gă, te duha ní cachí-gă:

Xití yucu ní xito ndéé ñáhá cué ñani tnáhá-ndó ñi xíndecu ndéé sanaha xii-í,

te ducaⁿ ñi quide ñáhá-yu cuéi ní xini-yu nchaa sá ñi quide-í ndí ùdico cuíá ñi xíndecú-yu xití yucu-áⁿ.

¹⁰ Te sá dúcáⁿ ñi quidé-yu núu xíáⁿ ní cudéèⁿ-í núú-yu,

núu xíáⁿ ní càháⁿ-í cuendá-yu, te ní cachí-í:

“Ñáyíu-a quide-ní-yu nchaa sá ñà túú tàú-yu cadá-yu te ní ñà túú cuíní-yu cadá-yu nchaa nàcuáa sàni iní-í,

te ní ñà túú cuíní-yu cadá-yu nàcuáa càháⁿ-í”,

duha ní càháⁿ-í cuendá-yu.

¹¹ Te xíáⁿ núu ní cudéèⁿ-í núú-yu te ní xáhaⁿ ndáá-í xii-yu sá vā ndúú tǎhū-yu cundecu váha-yu núú ndécú-í.

Duha ní cachí Yá Ndiöxí càchí Espíritú-gă.

¹² Te nchòhó ñáyíu ndècu ndíhi-í ichi Xítohó Jesucristú, càháⁿ-í dóho-ndo sá ío cada cuendá-ndó vā càni cuéhé iní-ndó te ngóo-ndo vā quíndáá-gă iní-ndó Yá Ndiöxí te dañá-ndo ìchi-gă, te diu-gă cúu-gă Yaá ndécú nchàa nduu nchaa quiú.

¹³ Te ìⁿ nduu ìⁿ nduu ío chí cuáha tnàha tnúhu ndee iní cundecu-ndo ñini ndecu-ndo ñuyú-a cuendá sá vā xínu iní-ndó càda-ndo nándi sá cuéhé sá dúhá, te ducaⁿ te vā cúu sáá iní-ndó núú Yá Ndiöxí. ¹⁴ Te vā dañá ndèé-ó càni ndáá iní-ó nàcuáa cada ñaha Yá Ndiöxí xii-o, te dàtná-ni ní sani iní-ó ndéé cùtnáhá ní tuha-o ìchi Yá Ndiöxí, te diu-ni ducaⁿ càni iní-ó ndéé ná sáá nduu vā cùndècu-gă-ó ñuyú-a, te núu ducaⁿ na càda-o te cùu ìⁿnuu-o ndíhi Xítohó Jesucristú.

15 Te duha càháⁿ-xi [¶] xichi núú tütú Yă Ndiöxí:

Te núú nchòhó ndèdóho-ndo nàcuáa càháⁿ Yă Ndiöxí vitna,

te vá cündüu sáá iní-ndó dàtná ní xínduu sáá iní cue ñáyiú ní dáquée tíhú tnúhu-gá ndée sanaha.

Duha cächí-xi núú tütú-gá. 16 Te cue ñáyiú ducaⁿ ní xínduu sáá iní-xi cùú-yu ñáyiú ní ndeñuhu ndíi Moisés nàcióⁿ Ègiptú, te ñáyiú-áⁿ ní xíndedóho-yu tnúhu ní càháⁿ Yă Ndiöxí te ní quide sáá iní-yu ní dáquée tíhú-yu tnúhu-gá. 17 Te ndi ùdico cuá ní xúhuⁿ-yu ichi ío ní cùdééⁿ Yă Ndiöxí núú-yu cuendá sá ní quide-yu nándi nchaa sá cuéhé sá dúhá, te ñáyiú-áⁿ ní xíhí-yu xití yucu. 18 Te nchaa ñáyiú-áⁿ ñà túú ní cuíní-yu tní-yu tnúhu ní càháⁿ Yă Ndiöxí núú xíáⁿ ní càháⁿ ndáá-gá sá vă ndúú tãhú-yu cundecú-yu núú ío váha càa ndecu-gá. 19 Te xíáⁿ núú nchoo cùtnuní iní-ó sã nchaa ñáyiú-áⁿ ñà túú ní ndüu tãhú-yu cundecu váha-yu núú ndécú-gã, chi ñà túú ní sãndáá iní-yu tnúhu ní càháⁿ-gá.

4

1 Te vitna ndècu ndíhi-gá-ó tnúhu Yă Ndiöxí tnúhu sá dánhé ñáhá xii-o sá cúú cundecu váha-o núú ndécú-gã, te tàú-xi quiyuhú iní-ó chi na cuáháⁿ te vá ndúú tãhú-ó cundecu váha-o núú ndécú-gã. 2 Te tnáhá nchoo ní ngúndecu ndíhi-o tnúhu sá càháⁿ nàcuáa naníhí tãhú-ó dàtná ní xíndecu ndíhi cue ñáyiú ndée sanaha, dico ñáyiú-áⁿ chi ñà túú vèdana ni nàndíhi-xi cuèj ní xíndedóho-yu tnúhu-áⁿ chi ñà túú ní sãndáá iní ñáhã-yu xii-gá. 3 Dico nchoo cùu-o ñáyiú ní sãndáá iní tnúhu Yă Ndiöxí, núú xíáⁿ ndüu tãhú-ó cundecu váha-o núú ndécú-gã, te ní quee ndáá-xi nàcuáa càháⁿ-gá núú tütú-gá núú cächí-xi: Yúhú ní cudèⁿ-í núú-yu, te ní càháⁿ ndáá-í sá vă ndúú

tãhú-yu cundecu váha-yu núú ndécú-í.

Duha ní cächí-gá. Te cuu nduu tãhú-yu cundecu váha-yu núú ndécú Yă Ndiöxí ní cùu, chi sa ní xínu cava nchaa chiúⁿ ní quide-gá sá ní cadúha-gá ñuyíú. 4 Te núú tütú Yă Ndiöxí càháⁿ-xi nàcuáa ní quide-gá nduu úsá, te duha cächí-xi:

Yă Ndiöxí ní quide chiúⁿ-gá ínú nduu ní quide-gá nchaa chiúⁿ-gá te ní ndetatú-gá nduu úsá.

Duha cächí-xi núú tütú-gá. 5 Te cächí tucu-xi núú tütú Yă Ndiöxí nàcuáa ní càháⁿ-gá cuendá cue ñáyiú ndée sanaha, te duha ní cächí-gá:

Cue ñáyiú-a vá ndúú tãhú-yu cundecu váha-yu núú ndécú-í ndetátú-í.

Duha ní cächí-gá. 6 Te ñáyiú ní xíndedóho tnúhu sá càháⁿ nàcuáa naníhí tãhú-ó ndée sanaha, ñà túú ní ndüu tãhú-yu cundecu váha-yu núú ndécú Yă Ndiöxí ndetátú-gá, te ducaⁿ chi ñà túú ní sãndáá iní ñáhã-yu xii-gá, dico ío-gá ñáyiú nduu tãhú cundecu váha núú ndécú-gã ndetátú-gá. 7 Te ní xica cuéhé nduu sá dúcáⁿ ñà túú ní sãndáá iní ñáhã ñáyiú-áⁿ xii-gá, te dàtnuní ní càháⁿ ndíi Dàví yuhu-gá nàcuáa cada-gá vitna, te ðiu-ni nàcuáa sa yòdo tnuní ðiu-ni ducaⁿ chido tnuní tucu-í nàcuáa ní càháⁿ ndíi yuhu-gá, te duha ní cächí-gá:

Te núú nchòhó ndèdóho-ndo tnúhu càháⁿ-í te vá cádá sáá iní-ndó.

Duha ní cächí-gá. 8 Te ndíi Jòsué ní sanu ichi ndíi ñáyiú núú quihíⁿ-yu cundecu váha-yu, dico ñà ðíú cuendá xíáⁿ ní càháⁿ Yă Ndiöxí, chi cuendá nàcuáa cada-gá vitna ní càháⁿ-gá. 9 Núú xíáⁿ sáá nduu ndüu tãhú nchaa ñáyiú cùu cuendá Yă Ndiöxí ngúndecu váha-yu núú ndécú-gã ndetátú-gá. 10 Te nchaa ñáyiú ducaⁿ na ndüu tãhú cundecu váha núú ndécú Yă Ndiöxí ndetátú-gá, te tnáhá-yu ndetatú-yu

cuèndá nchaa sá vâha ní quidé-yu datná ndètátú méé-gă. ¹¹ Te xini ñuhu-xi sá nchóó ïo nducu ndèe-o nducu-o nacuáa cada-o cuèndá nduu tãhú-ó ngündecu váha-o núú ndécú Yã Ndióxí ndètátú-gă, chi na cuáháⁿ dava-ndo càda-ndo datná ní quide cue ñáyiú ñá túú ní sãndáá iní ñáhá xii-gă, te vá ndúú tãhú-ndo cündecu váha-ndo núú ndécú-gă te núú ducaⁿ na càda-ndo.

¹² Te tnúhu Yã Ndióxí cúú-xí datná ìⁿ sá nchító-ó chi quide-xi nãndi sá quidé-xí, te cùu-xi datná ìⁿ sá dèéⁿ víhí-gă dàcúúxí ìⁿ yuchi sá ndèé úú xio núú-xi. Te ducaⁿ sãtnahá-xi cùu tnúhu-gă chi quée-xi iní-ó, te dàndixi túu-xi nchaandi túhú sá sání iní-ó te núú quide váha-o àdi ñá túú quide váha-o ndècu-o. ¹³ Te ni ìⁿ sá ní cadúha Yã Ndióxí vá càni iní-ó sá ndácú-xi nguivãha-xi núú-gă, chi nchaandi túhú sá sání iní-ó ndècu túu-xi núú-gă, te ðiu núú Yãá-áⁿ na càni cuendá-ó nchaa sá quidé-ó.

Xítóhó Jesucristú cúú-gă Dútú ïo cùnnu

¹⁴ Te Xítóhó Jesucristú cúú-gă Dútú ïo cùnnu ndecu ndihi-o, te ðiu-gă cúú-gă Déhe Dútú Ndióxí, te Yãá-áⁿ cuãndaa-gă andiu ni nucündecu-gă núú Yã Ndióxí, núú xiãⁿ tàú-xi sá cãnhicúⁿ nihnu-ni-o quindáá iní-ó-gă. ¹⁵ Te mee Yãá-áⁿ ïo cùnnu-gă cúú-gă dútú-ó ndècu ndihi-o, te ïo na cùndahú iní ñáhá-gă xii-o cuèndá sá ñã nihí ndéé-ó cündecu-o. Te ducaⁿ càda-gă chi ní yãha-gă datná yãha mee-o, chi nchaa sá ní yãha-gă-áⁿ ní cuu-xi sá càdá-gă nãndi nchaa sá cuèhé sá dühá ní cùu dico ni ìⁿ ñá túú ní quide-gă. ¹⁶ Núú xiãⁿ tàú-ó sá nchóó ní yuhu ni iní-ó cãháⁿ ndihi-o Yã Ndióxí Yãá ïo cùndahú iní ñáhá xii-o chindee ñaha-gă, te ducaⁿ càda-o te cundahú iní ñáhá-gă chindee ñaha-gă xii-o ndèda-ni càa oré xini ñuhu-o-gă.

5

¹ Te nchaa cue dútú cùnnu núú ñáyiú isrãél ðiu-ni ñáyiú cùu-güedé, te ducaⁿ ní ngündecu-güedé cuèndá cada-güedé chùⁿ sá cúú-xí Yã Ndióxí cuèndá-yu, chi ðiu cue téé-áⁿ ní xóo nacani cuèndá-güedé núú-gă quiti ní xóo cahni-güedé ní xóo nduu tãhú-gă, te ducaⁿ ní xóo cada-güedé cuèndá sá càdá càhnu iní Yã Ndióxí cuéchi-yu, te ducaⁿ ní xóo nacani cuèndá tucu-güedé núú-gă nchaa dava-gă sá ní xóo nihí-güedé ní xóo nduu tãhú-gă. ² Te nchaa cue dútú-áⁿ ní xóo cundee iní-güedé nchaa sá ní xóo cada nchaa ñáyiú ñá túú ní quide ndáá ñáyiú ñá túú cùnuni iní-xi, te ducaⁿ ní xóo cada cue dútú-áⁿ chi tnáhá-güedé ñá túú ní xóo nihí ndéé-güedé cundecu-güedé cuèndá nchaa sá ní xóo yãha-güedé. ³ Te sá cuèndá sá dúcáⁿ ñã túú ní xóo nihí ndéé-güedé núú xiãⁿ dai ní xini ñuhu-xi sá tnáhá-güedé cuáha-güedé Yã Ndióxí sá ndúú tãhú-gă cuèndá méé-güedé datná quidé-güedé cuèndá ñáyiú.

⁴ Te ni ìⁿ téé vá ndácú-dě cuu-dé dútú cùnnu cuèndá-ni sá càchí iní méé-dě te núú ñá ðiú mèe Yã Ndióxí ducaⁿ cuini-gă sá cúú-dě dútú cùnnu datná ní quide-gă ndíi Àron.

⁵ Te cuèi Xítóhó Jesucristú chi ñá ðiú mèe-gă ní quide-gă méé-gă ìⁿ dútú cùnnu nacuáa cada nínu-gă méé-gă, chi mee Tãtá-gă Dútú Ndióxí ducaⁿ ní cachí-gă sá cúú-gă Dútú cùnnu, te ducaⁿ chi Yã Ndióxí ní xáhaⁿ-gă:

Yòhó cúú-n Dèhe-í,

te cuini-í sá dühá-ni cündecu-n núú ndécú-í.

Duha ní xáhaⁿ-gă xii Xítóhó Jesucristú. ⁶ Te núú tütú Yã Ndióxí yóóo tnùnì nacuáa ní xáhaⁿ tucu-gă xii Xítóhó Jesucristú, te duha ní xáhaⁿ-gă:

Yòhó cúú-n dútú cundecu ni caa ni quihíⁿ,

te cùu-n datná ní cuu ndíi Melquisèdec.

Duha ní xáhaⁿ-gã xii Xítohó Jesucristú. ⁷ Te cùtnàhá ní xíndecu Xítohó Jesucristú ñuyíú-a te níhi ní xóo cáháⁿ ndihi-gã Yã Ndiöxí te ní xóo cáháⁿ ndàhú-gã núú-gã, te ní xóo ndáhyú-gã òré ducaⁿ nĩ xóo cáháⁿ ndihi-gã Yã Ndiöxí, te ducaⁿ nĩ quide-gã chi nàha-gã sá Yã Ndiöxí cúú-gã Yaá ndacu dàcácu nihnu ñaha xii-gã cuendá sá vã cùu dúcáⁿ-gã. Te Yã Ndiöxí ní xíndedóho-gã nchaa tnúhu ní cáháⁿ Xítohó Jesucristú cuendá sá nĩ quide-gã nchaa nàcuáa ní xáhaⁿ Yã Ndiöxí cada-gã. ⁸ Te sá cuendá nchaa sá nĩ ndoho Xítohó Jesucristú xíáⁿ ní cutnùnì iní-gã cada-gã nchaa dava-gã sá vãha nàcuáa cuiní méé Yã Ndiöxí cada-gã. Te ducaⁿ nĩ cuu cuéi cùu-gã Déhe Yã Ndiöxí. ⁹ Te sá dúcáⁿ nĩ quide-gã nchaa nàcuáa cuiní méé Yã Ndiöxí, xíáⁿ nũu vitna cùu-gã Yaá dácácu nihnu nchaa ñáyiu sàndáá iní ñáhã xii-gã núú ùhú núú ndàhú. ¹⁰ Te mee Yã Ndiöxí ní cachí-gã sá Xítohó Jesucristú cúú-gã dútú cúnùu datná ní cunuu ndíi Melquisèdec cùtnàhá ní cuu ndíi dútú ñuyíú-a.

Cuendá ñáyiu cuiní daña nihnu ichi Yã Ndiöxí

¹¹ Te vai-gã tnúhu ndècu cáháⁿ-í nàcuáa ndùu cuendá Xítohó Jesucristú, ndihi ndíi Melquisèdec, te dicó-ni sá nchòhó ío cuéé tècú tnùnì-ndó, te yúhú ío ùhú níhí-í nàcuáa cáháⁿ-í nàcuáa tecú tnùnì-ndó.

¹² Te nchòhó sa ní cuu cuéhé nduu ndècu-ndo ichi Xítohó Jesucristú, te tàù-ndó dànehé-ndó cue ñáyiu ndècu ichi-gã tnúhu-gã nũu dicó sá cúú, dico xini ñuhu-ni-xi sá cùndècu ñáyiu danèhé ñáhã tnúhu-gã xii-ndo, tnúhu sá nĩ dácúáhã-ndó ndéé díhna sá ñà túú ùhú tecú tnùnì-ndó. Te sá dúcáⁿ quide-ndo núu xíáⁿ cúú-ndó dàtná cue landú vitna sàdi camá, landú vátá cúú-gã caxi dítá. ¹³ Chi nchaa ñáyiu cùu datná landú vitna sàdi, ñáyiu-áⁿ cúú nèñuú-yu ñã túú

cùtnunì iní-yu nàcuáa càháⁿ tnúhu sá càháⁿ nàcuáa cada ndáá-yu cundecú-yu. ¹⁴ Te nchaa sá vátá cúú-gã caxi cue landú yíquíⁿ xíáⁿ cúú-xi cuendá cue ñáyiu sacuéhé, te xíáⁿ cúú-xi dàtná tnúhu sá dácúàha ñáyiu sa ní níhí ndéé ndècu ichi-gã, ñáyiu sa ní cutnùnì váha iní-xi nándi cùu nchaa sá cuéhé sá dúhá, ndihi nándi cùu nchaa sá vãha.

6

¹ Te xíáⁿ nũu vitna xini ñuhu-xi dacuaha-o dava-gã tnúhu Yã Ndiöxí cuendá ducaⁿ te cuu-o ñáyiu tècú tnùnì nchaa tnúhu-gã. Te xini ñuhu-xi sá ncháá tnúhu Xítohó Jesucristú sá nĩ dácúáhã-ó ndéé díhna vá dácúàha-gã-ó dàtná ní dácúáhã-ó chi sa tècú tnùnì-o. Te ñã túú-gã xini ñuhu-xi dacuaha-o datná ní dácúáhã-ó ndéé díhna nàcuáa cada-o ndixi cuéchi iní-ó cuendá nchaa sá cuéhé sá dúhá quide-o, sá tá dácúita nihnu ñaha xii-o cuáhãⁿ ní cùu. Te ducaⁿ vã dácúàha-gã tucu-o dàtná ní dácúáhã-ó ndéé díhna nàcuáa cada-o quíndáá iní-ó Yã Ndiöxí, ² ndihi cuendá nàcuáa ní dácúáhã-ó nàcuáa cuandute-o, ndihi cuendá nàcuáa cada-o càcáⁿ ndodo-o ndàha-o díquí ñáyiu ní sàndáá iní ñáhã xii-gã. Te ducaⁿ ñã túú-gã xini ñuhu tucu-xi dacuaha-o datná ní dácúáhã-ó ndéé díhna cuendá nàcuáa ndoto cue ñáyiu ní xíhí, ndihi cuendá nàcuáa ní dácúáhã-ó sá Yã Ndiöxí daquíhíⁿ-gã ñáyiu núú ùhú núú ndàhú ni caa ni quíhíⁿ. ³ Te núu Yã Ndiöxí ná càchí-gã, te cuita dacuàha-gã-ó nchaa dava-gã tnúhu sá cùmãní quíhíⁿ.

⁴ Te cue ñáyiu sa tècú tnùnì tnúhu Yã Ndiöxí, ñáyiu sa xini nchaa nàcuáa ndùu nchaa sá vãha quide ñaha Yã Ndiöxí xii-o ndihi-yu, ñáyiu sa chindee ñaha Espiritú Yã Ndiöxí, ⁵ ñáyiu sa cùtnunì iní-xi sá ío váha tnúhu Yã Ndiöxí, ñáyiu sa xini nàcuáa ta quide Yã Ndiöxí véxi nchaa sá vã yõo tnàhí ndàcu

cada, ⁶ te núu ñáyi-u-áⁿ ná nguíta tucú-yu daqueè tíhú duúⁿ-yu tnúhu Yá Ndióxi, te vá ndácú-gã-ó ná canu ichi-ó-yu nàcuáa ndixi cuéchi iní-yu te núu ducaⁿ na càdá-yu, te sá dúcáⁿ ná càdá-yu te tnàhá-yu cùú-yu dàtná cue téé ní sahní ñaha xii Xítohó Jesucristú Déhe Yá Ndióxi núu cùrúxi. Te sá dúcáⁿ ná càdá-yu te ngóo dava-gã ñáyi-u cáháⁿ cuèhé-yu cuèndá Xítohó Jesucristú. ⁷ Te nchaa ñáyi-u cùú-yu dàtná ñuhu, chi ñuhu-áⁿ ndi tnàhá òré cùúⁿ dàú te xihí-xi ndute, te dava ñuhu váha cùu sá xitú ñáyi-u, te sá cùú núú ñuhu-áⁿ ío nàndíhi-xi, te mee Yá Ndióxi quidé-gã cùú sá váha núú ñúhú-áⁿ. ⁸ Dico núu da ñu na ndaa núú ñuhu-áⁿ te ñá túú vèdana nàndíhi-xi te núu ducaⁿ, te Yá Ndióxi vá cùú váha iní-gã cuèndá ñuhu-áⁿ sá dúcáⁿ dà ñu ndaa núú-xi, te ñu-áⁿ ndíhi-xi cáyú. Te ducaⁿ sátnahá-xi cùu ñáyi-u dàquee tíhú tnúhu Yá Ndióxi chi ñá túú cùu váha iní-gã núú-yu.

Níhí-ó sã ndétú-ó ndúu táhú-ó

⁹ Te cuèi duha càháⁿ-í dico nchòhó cue ñáyi-u ío cùu iní-í, chi cùtnuní ndáá iní-í sá vã càdá-ndó dàtná xiquide dava-gã ñáyi-u, te mee-ni sá váha cuu xii-ndo chi cùu-ndo ñáyi-u sa ní naníhí táhú. ¹⁰ Te ducaⁿ chi Yá Ndióxi cùú-gã Yaá ío váha quide ndáá, te vá dáná ndòdo iní-gã nchaa sá váha quide-ndo, te ní vã dáná ndòdo iní-gã nàcuáa quide-ndo cuu iní-ndó-gã, te sá dúcáⁿ quide-ndo cuu iní-ndó-gã xiáⁿ chindèe-ndo cue ñáyi-u ndècu ndíhi-ndo ichi Xítohó Jesucristú, te ducaⁿ-ni ta quide-ndo véxi ndéé vitna. ¹¹ Te cuíní-í sá ñiⁿ ñiⁿ-ndo nducu ndee-ndo cada-ndo nàcuáa cuíní Yá Ndióxi dàtná tá quide-ndo véxi, te ñi-u-ni ducaⁿ càda-ndo ndéé ná sáá nduu ndúu táhú-ndó cùndecu-ndo ndíhi-gã núú ndécú-gã, te ducaⁿ te níhí-ndó nchàandi túhú sá ndétú-ndó ndúu táhú-ndó cùndecu ndíhi-ndo ní caa ní quíhíⁿ. ¹² Te

yúhú cuíní-í sá nchòhó vá tühío-ndo càda-ndo nchaa nàcuáa cuíní Yá Ndióxi, te cada-ndo dàtná quidé ñáyi-u sàndáá iní tnúhu-gã, ñáyi-u càhnu iní-xi. Te sá dúcáⁿ quidé-yu xiáⁿ níhí-yu nchaa sá ní cachí Yá Ndióxi nduu táhú-yu.

¹³ Te cùtnàhá ní xáhaⁿ Yá Ndióxi xii ndíi Àbrahám nàcuáa cada-gã, te ní cacunehe-gã méé-gã nàcuáa cutnùní iní ndíi sá ndáá cada-gã nàcuáa ní xáhaⁿ-gã xii ndíi, te vá yóo ñiⁿ ní càcunehe-gã cuèndá sá quíndáá iní ndíi tnúhu ní cáháⁿ-gã. Te ducaⁿ ní quide-gã chi ñiⁿ díi-ni mee-gã ío cùnuu-gã. ¹⁴ Te duha ní xáhaⁿ-gã xii ndíi Àbrahám: “Yóhó té Àbrahám na càchí tnúhu ndáá-í xii-n sá ío chindee ñàhá-í xii-n, te cáyá cuéhé víhí ñàní tnàháⁿ”, duha ní xáhaⁿ-gã xii ndíi. ¹⁵ Te ndíi Àbrahám ío ní quide ndee iní ndíi ní xíndetu ndíi, te ducaⁿ te Yá Ndióxi ní quide-gã nàcuáa ní xáhaⁿ-gã cada-gã sá cùú-xi ndíi. ¹⁶ Te núu ñiⁿ ñáyi-u càháⁿ ñiⁿ tnúhu ndáá cuíti te càcu nehé-yu Yá Ndióxi cuèndá quíndáá iní tnàha ñáyi-u tnúhu càháⁿ-yu, te òré ducaⁿ na càháⁿ-yu te ñá túú-gã sá dácáá ñáyi-u càháⁿ ndíhi-yu cuèndú. ¹⁷ Te ducaⁿ ní quide Yá Ndióxi ní cáháⁿ ndáá-gã sá càdá-gã nàcuáa ní cachí-gã, te ducaⁿ ní cáháⁿ-gã cuèndá nchaa ñáyi-u ní cachí-gã nduu táhú sá càdá-gã nàcuáa cutnùní iní-yu sá quidé-gã ñiⁿ sá càháⁿ-gã, te ní ñá túú nàdáma-gã ñiⁿ sá càháⁿ-gã. ¹⁸ Te nchoo ní natuha-o Yá Ndióxi cuèndá dàcácu níhu ñaha-gã xii-o núú úhú núú ndáhú, te ní níhí-ó tnúhu ndee iní ndécú ndíhi-o cuèndá sá vã dáñá ndéé-ó cùndetu-o sáá nduu ndúu táhú-ó cùndecu-o ndíhi-gã. Te ducaⁿ ní níhí-ó tnúhu ndee iní chi Yá Ndióxi ní cáháⁿ ndáá-gã sá càdá-gã nàcuáa ní cachí-gã, te ñá túú dándahú ñàhá-gã, te ní ñá túú nàdáma-gã ñiⁿ sá ní cachí-gã

cada-gá. ¹⁹ Te tnúhu ndee iní ndécú ndihí-o xíáⁿ quidé-xí cùtnuní ndáá iní-ó sá ndúú táhú-ó cùndecu-o ndihí Yá Ndiöxí núú ndécú-gá, te ducaⁿ cùtnuní ndáá ndisa iní-ó sá cuendá Xítohó Jesucristú Yá ndécú núú Yá Ndiöxí. ²⁰ Te ducaⁿ ní nucúndecu Xítohó Jesucristú núú Yá Ndiöxí cuendá ducaⁿ cànchicúⁿ nihnu-o càda-o, te ducaⁿ ní nucúndecu-gá núú Yá Ndiöxí chi cùu-gá dútú cúnù datná ní cunuu ndí Melquisèdec ñuyú-a, te ducaⁿ-ni cùu-gá dútú cúnù ni caa ni quihíⁿ.

7

Xítohó Jesucristú cúu-gá dútú datná ní cuu ndí Melquisèdec

¹ Te ndí Melquisèdec ní xíndaha ndí cue ñáyiú ñuú Sàlém, te ní cuu ndí dútú ní xinu cuechi ndí núú Dútú Ndiöxí Yáá ío cúnuu. Te ndí Melquisèdec-áⁿ ní xícáⁿ táhú ndí núú Yá Ndiöxí cuendá ndí Abrahám cùtnáhá ní sáháⁿ ndí Abrahám-áⁿ ní nàá ndí ndihí cue dava-gá cue téé yíndaha ñáyiú. Te cue téé-áⁿ ñà túú ní ndàcu-güedé nàa-güedé ndihí ndí Abrahám-áⁿ chi ní xíta-güedé. ² Te nchaa sá ní níhí ndí Abrahám-áⁿ núú ní nàá ndí, te ní quide ndí ùxí xichi te ñⁿ xichi núú ùxí-áⁿ ní sáñaha ndí xii ndí Melquisèdec. Te ñⁿ ndí Melquisèdec-áⁿ queé-xí: Téé ío váha quide ndáá yíndaha ñaha xii ñáyiú, ñaha quèe-xi. Te ní xóo danàni ñahá-yu xii ndí Téé yíndaha ñuú Sàlém, ñaha ní xóo danàni ñahá-yu. Te tnúhu Sàlém-áⁿ queé-xí: Ñuú ndécú ñahi, ñaha quèe-xi tnúhu-áⁿ. Núú xíáⁿ queé tucu-xi nacúáa ñani ndí Téé yíndaha ñuú ndécú ñahi, ñaha quèe tucu-xi ñⁿ ndí. ³ Te ñá túú tnúhu núú yoo cùu tátá ndí ndihí ñaná ndí, te ni ñà túú tnúhu núú yoo cùu xí ndí ndihí xitná ndí, te ni ñà túú tnúhu núú ñándí cùu ñáyiú ní cuu ñani tnáhá ndí ní

xíndecu ndéé sanaha-gá, te ni ñà túú tnúhu núú ná ama ní cacu ndí, te ni ñà túú tnúhu núú ná ama ní xihí ndí. Te ndí-áⁿ ducaⁿ-ni ní cuu ndí dútú ní xíndecu ndí, te ducaⁿ sátnahá-xi cùu Xítohó Jesucristú déhe Yá Ndiöxí chi cuu-gá dútú ní caa ni quihíⁿ.

⁴ Te vitna chí cuáha váha cuendá sá ndí Melquisèdec ní cuu ndí ñⁿ téé ío ní cuu càhnu ní xíndecu ñuyú-a, chí ndí Abrahám téé ní cuu ñani tnáhá-ó ní xíndecu ndéé sanaha ní quide ndí ùxí xichi nchaa sá ní níhí ndí núú ní nàá ndí. Te ñⁿ xichi núú ùxí-áⁿ ní sáñaha ndí xii ndí Melquisèdec.

⁵ Te ndí Moisés ní chídó tnùní ndí ñàcuáa cada nchaa dútú, cue téé ní cuu ñani tnáhá ndí Lèví sá cuè téé-áⁿ queheⁿ-güedé ñⁿ xichi núú ùxí xichi sá níhí cue ñáyiú isràél ñáyiú cùu ñani tnáhá-güedé cuu cuendá-güedé. Te ducaⁿ quide-güedé cuè ñani tnáhá-güedé ndihí-yu ní cuu ndí Abrahám. ⁶ Te cuè ñá díú ñani tnáhá ndí Melquisèdec cúu ndí Abrahám dico ní queheⁿ ndí Melquisèdec-áⁿ ñⁿ xichi núú ùxí xichi nchaa sá ní níhí ndí Abrahám. Te ndí Melquisèdec-áⁿ ní xícáⁿ táhú ndí núú Yá Ndiöxí cuendá ndí Abrahám. Te ñⁿ-ni ndí Abrahám-áⁿ ní xáhaⁿ Yá Ndiöxí xii ndí sá cáda váha ñaha-gá xii ndí. ⁷ Te sa cùtnuní iní-ó sá núú ñⁿ téé na càcáⁿ táhú-dé núú Yá Ndiöxí cuendá ñⁿ ñáyiú, te téé-áⁿ cúnù-gá-dé. ⁸ Te cue dútú ñáyiú isràél quéhéⁿ-güedé ñⁿ xichi núú ùxí xichi nchaa sá níhí-yu cùu cuendá-güedé, te cue téé-áⁿ cuu-güedé. Te núú tütú Yá Ndiöxí càchí-xi sá ndí Melquisèdec ndécú-ní ndí, te ducaⁿ càháⁿ-xi chí ñá túú tnúhu sá ní xihí ndí. ⁹⁻¹⁰ Te sá dúcáⁿ ní sáñaha ndí Abrahám sá ní nduu táhú ndí Melquisèdec, te xíáⁿ cada iní-ó sá sá ndecu ndihí ndí Abrahám cue ñani tnáhá ndí Lèví cue téé cùu dútú, cue téé queheⁿ ñⁿ xichi núú ùxí xichi nchaa sá níhí ñáyiú isràél

cuëi vátá cácu-gã-güedé. Te cada iní-ó sã tnáhã-güedé ní sãha-güedé ndíi Melquisèdèc ìⁿ xichi núú ùxí xichi nchaa sã ní níhí ndíi Àbrahám núú ní nàà ndíi. Te ducaⁿ càda iní-ó chi cue téé-áⁿ cúú-güedé ñaní tnáhã ndíi Àbrahám cuëi vátá cácu-gã-güedé dàvã-áⁿ.

11 Te sã cuendã cue dútú cue téé cùu ñaní tnáhã ndíi Lèví ní ngúndecu ndíi cue ñáyiu isràél tnúhu sã sánú ìchi ñaha xii-yu nàcuáa cadã-yu cundecú-yu. Te ñaní tnáhã ndíi Àrón cúú cuè dútú-ãⁿ. Te núu dìcò cue dútú-ãⁿ ní ndàcu-güedé cada-güedé nàcuáa cudíu ñáyiu isràél núú Yã Ndiòxí, te ñã túú-gã xíní ñùhu-xi ngúndecu ingã dútú dàtnã ndíi Melquisèdèc ní cùu. Te dútú-ãⁿ ñã túú ní cùu-dé dàtnã ní cuu cue ñaní tnáhã ndíi Àrón. 12 Te núu cuè dútú cue téé cùu ñaní tnáhã ndíi Lèví-áⁿ ní ngúndecu ingã dútú. Te sã dúcãⁿ ní ngúndecu ingã dútú xiãⁿ dacuití ní xini ñùhu-xi sã dãmã nàcuáa ndùu tnúhu sã sánú ìchi ñaha xii-yu nàcuáa cadã-yu cundecú-yu. 13-14 Te ñu-ni cuendã dútú-ãⁿ sa níhí-ó tnùhu, te dútú-ãⁿ cúú Xítohó Jesucristú, te ñã díú ñaní tnáhã ndíi Àrón cúú-gã chi ñaní tnáhã ndíi Jüdã cúú-gã. Te nchaa-o tà xíní ndáá-ó sã ñaní tnáhã ndíi Jüdã cúú-gã, te ndíi Moisés ñã túú tnáhí ná ní càchí ndíi cuendã cue ñaní tnáhã ndíi Jüdã sã cúú-güedé dútú, chi ní ñⁿ-güedé ñã túú ní cùu-güedé dútú ní cùu.

15 Te vitna cùtnuní ndáá iní-ó nàcuáa ní cuu, chi Xítohó Jesucristú cúú-gã ingã dútú dàtnã ní cuu ndíi Melquisèdèc. 16 Te ñã díú cuendã tnúhu sã sánú ìchi ñaha xii ñáyiu nàcuáa cadã-yu cundecú-yu ducaⁿ ní cùu-gã dútú, chi ní cuu-gã dútú cuendã sã cúú-gã Yaa cundecu ní caa ní quíhíⁿ chi vá ñⁿ ndùu te ndíi nihnu-gã. 17 Te duha ní xáhaⁿ Yã Ndiòxí xii-gã:

Yòhó cúú-n dútú dàtnã ní cuu ndíi Melquisèdèc,

te cundecu-n nchaa nduu nchaa quíú.

Duha ní xáhaⁿ Yã Ndiòxí xii-gã. 18 Te xiãⁿ núu nchaa tnúhu ndéé díhna, tnúhu sã ní xíndecu ndíi cue dútú ñã túú-gã cùnu-xi vitna chi ñã túú-gã xíní ñùhu-xi te ní ñã túú nã chíndèe ñaha-xi. 19 Te ñu-ni tnúhu-áⁿ cúú-xi tnúhu sã ní chidó tnúni ndíi Moisés canu ìchi ñaha xii ñáyiu nàcuáa cadã-yu cundecú-yu. Te tnúhu-áⁿ ñã túú vèdana ní quíde-xi nàcuáa chindee-xi ñáyiu cudíu-yu núú Yã Ndiòxí. Dico vitna ní ngúndecu ndíi-ò tnùhu ndee ñí sã ño-gã váha dàcúúxí tnùhu ndéé díhna, chi ndècu ndíi-ò Xítohó Jesucristú Yaa cúú dútú-ó. Te Yaa-áⁿ quíde-gã tnáhã tnúhu-ò ndíi Yã Ndiòxí vitna.

20 Te Yã Ndiòxí ní cáhãⁿ ndáá cuiti-gã sã Xítohó Jesucristú cuu-gã dútú. 21 Dico ñã túú dúcãⁿ ní cáhãⁿ-gã cuendã cue ñaní tnáhã ndíi Lèví cue téé ní cuu dútú, cuëi mei òré ní chisaha-güedé ní cuu-güedé dútú. Te cùtnáhã ní chisaha Xítohó Jesucristú cúú-gã dútú, te Yã Ndiòxí ní xáhaⁿ ndáá cuiti-gã xii-gã, te duha ní xáhaⁿ-gã:

Yúhú Dútú Ndiòxí cáhãⁿ ndáá cuiti-í te vá dãmã-í tnúhu cáhãⁿ-í:
“Yòhó cúú-n dútú dàtnã ndíi Melquisèdèc,

te cundecu-n ní caa ní quíhíⁿ.”

Duha ní xáhaⁿ Yã Ndiòxí xii Xítohó Jesucristú. 22 Te Xítohó Jesucristú quíde-gã nàcuáa cutnúni ndáá iní-ó sã Yã Ndiòxí cada-gã ingã núú sã váha sã cúú-xí-ó dàtnã ní cachí-gã, te xiãⁿ cúú-xí sã ño-gã váha dàcúúxí tnùhu ní cáhãⁿ-gã ndéé díhna. 23 Te ño cuéhé cue ñaní tnáhã ndíi Lèví ní cuu-güedé dútú, te ducaⁿ cuendã sã ñã túú ní cùdí-güedé cundecu-güedé chi ní ndíi-güedé ní xíhí. 24 Dico Xítohó Jesucristú chi vá cùú-gã, chi cundecu-gã ní caa ní quíhíⁿ núu xiãⁿ ñu-ni-gã cuu-gã dútú, te vá yò ñⁿ-gã cuu dútú cada núú-gã. 25 Te núu xiãⁿ Xítohó Jesucristú dàcãcu nihnu

ñaha-gã xii nchoo ñãyiu núú ùhú núú ndàhú, nchoo ñãyiu sàndáá iní ñáhá xii-gá, te ñiu-ní nchoo cùu-o ñãyiu tñàhá tnúhu ndihi Yá Ndiöxí, te vá ñⁿ ndùu-gá te cuíta nihnu-o. Te ducaⁿ chi Xítohá Jesucristú ñá túú xòcuñí-gá núú Yá Ndiöxí càháⁿ ndàhú-gá cuèndá-ó.

²⁶ Te Xítohá Jesucristú cúu-gã Yaá cúu dütú cúnúu xini ñuhu-o cundecu ndihi-o, te ñiu-gá cúu-gã Yaá chindèe chítúu ñaha xii-o, te cùu-gá Yaá ío quide ndáá núú Yá Ndiöxí, te cùu-gá Yaá cándòo canine chi ñá túú tñàhí cuèchi-gá. Te ñá túú tñàhí quide-gá dàtná quidé nchaa cue ñãyiu ndècu ichi cuehé ichi duha, te cùu-gá Yaá ní nucúndecu andiu núú ndécú Yá Ndiöxí te yàcáⁿ táxi tñùní-gá. ²⁷ Te ñá túú quide-gá dàtná ní quide cue dütú ní cunuú ní xíndecu, chi cue dütú-ãⁿ ñⁿ nduu ñⁿ nduu ní xóo cahni-güedé quiti ní xóo nduu táhú Yá Ndiöxí, te díhna-gá cuèndá nchaa cuèchi mee-güedé ducaⁿ ñí xóo cada-güedé te dàtnúni ducaⁿ ñí xóo cada tucu-güedé cuèndá nchaa cuèchi ñãyiu. Dico Xítohá Jesucristú chi ñⁿ xito-ni ní xíhí-gá sá cúu-xí nchaa ñãyiu chi ducaⁿ ñí sani iní-gá, te vá ñⁿ ndùu-gá ducaⁿ càda tucu-gá. ²⁸ Te sá cuèndá nchaa tnúhu ní chidó tñùní ndíi Moisés xíãⁿ ní xíndecu cue téé ní cuu dütú cúnúu, te cue téé-áⁿ ní cuu-güedé cue téé yíca cuèchi-xi. Te sátá dúcáⁿ ñí chidó tñùní ndíi Moisés nàcuáa cada ñãyiu, te ní xica cuèhé víhí ndùu te dàtnúni ní càháⁿ ndáá cuíti Yá Ndiöxí sá Dèhe-gá cuu-gá dütú cúnúu. Te Yaá cúu Dèhe-gá-áⁿ ñí quide-gá nchaa nàcuáa tau-xi cundu, te ñiu-ni ducaⁿ càda-gá ñí caa ñí quíhíⁿ.

8

Xítohá Jesucristú cúu-gã dütú cúnúu

¹ Te Xítohá Jesucristú Yaá cúu dütú cúnúu ndecu ndihi-o

cuánda-gá andiu, te ní ngóo-gá xio cùha Dütú Ndiöxí Yaá ío cúnúu, te tñàhá-gá cúnúu-gá. Te ñiu cuèndá-o cùu-xi sá ío-gá cúnúu ta càháⁿ-ndí véxi. ² Te núú ndécú Yá Ndiöxí cúu-xí núú ñí víhí. Te cada iní-ó sã cúu-xí ñⁿ vehe te xíãⁿ ndécú Xítohá Jesucristú cúu-gá dütú, te vehe-áⁿ ñí dácáá mèe Yá Ndiöxí te ñá díú cue téé ñuyúú-a. ³ Te sá cuèndá nchaa tnúhu ní chidó tñùní ndíi Moisés xíãⁿ ní xíndecu cue dütú cúnúu cuèndá sá càhni-güedé quiti nduu táhú Yá Ndiöxí, te nacani cuèndá-güedé núu-gã nchaa dava-gá sá ñihí-güedé nduu táhú-gã. Te xíãⁿ núu dai ní xini ñuhu-xi sá tñàhá Xítohá Jesucristú cuañaha-gã ñⁿ sá ndúú táhú Yá Ndiöxí, te táhú-ãⁿ cúu-xí mèe-gá chi ní xíhí-gá ní cuu-gá dàtná ñⁿ táhú sã cúu-xí Yá Ndiöxí. ⁴ Te núu ní xíndecu-ni Xítohá Jesucristú ñuyúú-a te vá cúu-gá dütú ní cùu, chi sa ndècu cue dütú sãñaha nchaa sá ndúú táhú Yá Ndiöxí dàtná càháⁿ nchaa tnúhu ní chidó tñùní ndíi Moisés. ⁵ Te nchaa sá quidé cue dütú ñãyiu israhél nùtnahá-xi luha nchaa sá quidé Xítohá Jesucristú Yaá cúu dütú cúnúu ndecu andiu. Te quèe ndáá-xi nàcuáa ní xáhaⁿ Yá Ndiöxí xii ndíi Moisés cúnahá tá cüyatni nguíta ndíi dacáa ndíi vehe-gá, te duha ní xáhaⁿ-gã: “Ío váha cada cuèndá-n nàcuáa dacáa-n vehe-í dàtná cáá sã ñí dánhé ñáhà-í xii-n xítí yucu”, duha ní xáhaⁿ-gã xii ndíi. ⁶ Dico vitna chi Xítohá Jesucristú cúu-gã dütú cúnúu, te ío-gá càhnu nduu chiuⁿ quide-gá dàcúúxí cue dütú cue ñãyiu israhél. Te ñiu Xítohá Jesucristú cúu-gá Yaá quidé tñàhá tnúhu-o ndihi Yá Ndiöxí, te ducaⁿ chi Yá Ndiöxí ío-gá váha ndùu tnúhu ní càháⁿ-gá xito cùu uú dàcúúxí tnúhu ní càháⁿ-gá ndéé díhna, te ducaⁿ ío váha ndùu tnúhu ní càháⁿ-gá xito cùu uú chi ní cachí-gá sá ñngá núú sã ío-gá váha cada ñaha-gã xii-o vitna.

7 Te núu nàcuáa ní cachí Yá Ndióxi cada ñaha-gã xii-o ndéé díhna ni quide-xi nchaa nacuáa tau-xi cunduu nàcuáa nduu táhú-ó cundecu váha-o núu-gã ñá, te ñá túú xini ñuhu-xi cáháⁿ tucu-gá sá cáda-gã ingá núú sã váha sá cúu-xí-ó vitna ni cuu. ⁸ Te Yá Ndióxi ñá túú ní cuu váha iní-gá núú ñáyiú isráel núu xiáⁿ ní cáháⁿ-gá cuendá-yu, te duha ní cachí-gá:

Yúhú cuú-í Dútú Ndióxi, te duha ndùu tnúhu na cáháⁿ-í; Sáá nduu te cada-í ingá núú sã váha sá cúu-xí cuè ñani tnáhá ñáyiú isráel, ndíhi cue ñani tnáhá ndí Júdá ñu-ni ñáyiú isráel.

⁹ Te tnúhu sá cáháⁿ-í-a ñá túú ñⁿ-ni cuu-xi ndíhi tnúhu sá ní xáhaⁿ-í xii cue ñáyiú ní cuu ñani tnáhá-yu ní xindecu ndéé sanaha càda-í-yu,

te ñu-ni dàvá-áⁿ ní quide yica-í ní ndeñuhu-í-yu nàcióⁿ Ègipútú,

te ñá túú ní cuíni-yu tní-yu tnúhu ní xáhaⁿ-í xii-yu cuendá ducaⁿ càda váha-í-yu,

te xiáⁿ núu ní dáña ñihnu-í-yu ñá túú-gã ní quide cuendá-í-yu.

¹⁰ Te na sãá nduu te duha ndùu tucu ingá núú sã váha cada-í cue ñáyiú isráel.

Te yúhú cada-í nàcuáa cutnùni váha iní-yu nàcuáa cuíni-í cadá-yu,

te ducaⁿ ní yuhu ní iní-yu cadá-yu.

Te yúhú Yá Ndióxi quindaha-í-yu, te mèe-yu cuú-yu ñáyiú cùu cuendá-í.

¹¹ Te dàvá-áⁿ chi ní ñáyiú cùu ndí meé-yu,

te ní cuè dava-gá ñáyiú vá cutnùhu tnáhá-yu sá nátùha ñahá-yu xii-í,

chi dàvá-áⁿ nchaa ñáyiú cundecu ndíhi ñahá-yu xii-í,

cuèi ñáyiú cùnuu te cuèi ñáyiú ñá túú cùnuu.

¹² Te dàvá-áⁿ cada càhnu iní-í nchaa sá cuèhé sá dúhá quide-yu,

te vá ñⁿ ndùu-gá ndacu iní-í nchaa sá quidé-yu.

Duha ní cachí Yá Ndióxi cuendá ñáyiú isráel. ¹³ Te sá dúcáⁿ ní cáháⁿ Yá Ndióxi sá cáda-gã ingá núú sã váha sá cúu-xí ñáyiú xiáⁿ cutnùni sá tnúhu sá ní cáháⁿ-gá díhna ñá túú-gã xini ñuhu-xi. Te cada iní-ó sã tnúhu-áⁿ cúu-xí ñⁿ sá ní cunaha ndècu te ñá túú-gã nándíhi-xi te cuíta-ná-xi, ducaⁿ sãtnahá-xi cùu tnúhu sá ní cáháⁿ-gá ndéé díhna.

9

Cuendá vehe Yá Ndióxi

¹ Te tnúhu sá ní cáháⁿ Yá Ndióxi ndéé díhna cùu-xi cuendá nàcuáa cada ñáyiú isráel chiñuhu ñahá-yu xii-gã, ndíhi cuendá vehe-gá caa ñuyú-a. ² Te ñáyiú isráel ní dácáá-yu vehe Yá Ndióxi, te vehe-áⁿ ní cuu-xi vehe dóo te ní xúhuⁿ nehu xití-xi. Te cuártú díhna ní xínani-xi cuártú ní cuu íi, te xiáⁿ ní xindecu ñⁿ sá ndéé dité-xi sá ní cándodó ñⁿ caa candíl núú dité-xi, te ní xínutnii ñⁿ mèsá ní xóo códo páá ní xóo nduu táhú Yá Ndióxi. ³ Te cuártú cúu úu ní xínani-xi cuártú ní cuu íi víhí-gã. ⁴ Te xití cuártú-áⁿ ní xínutnii ñⁿ sá ní cuáha mee-ni díhúⁿ cuááⁿ te núú xiáⁿ ní xóo cahmi-güedé dúsa sá sàháⁿ tnámí. Te ñu-ni xiáⁿ ní xindecu tucu ñⁿ càjá ní cuu mee-ni díhúⁿ cuááⁿ te xití càjá-áⁿ ní xúhuⁿ ñⁿ lítu ní cuáha mee-ni díhúⁿ cuááⁿ, te xití lítu-áⁿ ní xúhuⁿ mànáá sá ní xóo caxí-yu dàvá-áⁿ.

Te ñu-ni xití càjá-áⁿ ní xúhuⁿ tnudii ndíi Àrón sá ní saa itá-xi, ndíhi yúú sá ní xindeé tnúhu ní cáháⁿ Yá Ndióxi nàcuáa cada ñáyiú. Te duha ní xínani càjá-áⁿ: Càjá sá ñúhú tnúhu ní cáháⁿ Yá Ndióxi sá cúu-xí ñáyiú, duha ní xínani-xi. ⁵ Te núú càjá-áⁿ ní cándodó úu tnáhá sá ní cadúha-yu, te xiáⁿ cáá-xí dàtná cáá espíritú xínú cuèchi núú Yá Ndióxi. Te cuendá úu xiáⁿ ní cutnùni iní-yu sá ío càhnu cuu Yá Ndióxi, te sá ní cadúha-yu-áⁿ ndéé ndíxiⁿ-xi, te ndíxiⁿ-xi-áⁿ dàhu-xi xio xio núú

quidé càhnu iní Yă Ndiöxí nchaa yíca cuëchi ñáyiú, dico vá cúú-gă cáhá-í cuendá nchaa dava-gă xiăⁿ vitna.

⁶ Te nchaa xiăⁿ ní xindecu xiti vehe Yă Ndiöxí, te cue dútú nǐ xóo quíhu-güedé ñⁿ nduu ñⁿ nduu xiti cuártú díhna ní xóo cada-güedé năcuáa tàú-güedé cada-güedé sá cúú-xí Yă Ndiöxí. ⁷ Te cuártú cúú úú-áⁿ chi mee-ní dútú cúnúu ní xóo quíhu-dé ñⁿ xito-ní ndi tnahá cuíá. Te ndi tnahá òré ducaⁿ ní xóo quíhu dútú cúnúu-áⁿ te ní xóo canehe-dé níñí nǐ xóo quíhu ní xóo nduu táhú Yă Ndiöxí. Te ducaⁿ nǐ xóo cada dútú-áⁿ cuendá sá Yă Ndiöxí cada càhnu iní-gă nchaa yíca cuëchi mee-dě, ndihí nchaa yíca cuëchi ñáyiú. ⁸ Te sá dúcáⁿ mēe-ní dútú cúnúu ní xóo quíhu-dé xiti cuártú ní cuu í-gă-áⁿ, xiăⁿ Espíritú Yă Ndiöxí quidé-xí cùtnuní iní-ó sá nǐndi ducaⁿ ní xindecu vehe-áⁿ nǐ xóo cadá-yu năcuáa ní xóo cúnaha Yă Ndiöxí cadá-yu. Te xiăⁿ cùtnuní sá vătă sàa-gă nduu cáháⁿ ndihí-yu Yă Ndiöxí năcuáa tàú-xi cunduu. ⁹ Te sá dúcáⁿ nǐ xindecu vehe-áⁿ, ndihí sá dúcáⁿ nǐ xóo cada nchaa cue dútú-áⁿ, xiăⁿ cùtnuní iní-ó năcuáa quide Yă Ndiöxí vitna, chi nchaa quití ní xóo cahni cue dútú-áⁿ nǐ xóo nduu táhú Yă Ndiöxí, ndihí nchaa dava-gă sá nǐ xóo nduu táhú-gă ñă túú ní quide-xi năcuáa nduu ndoo nduu nine iní cue ñáyiú năcuáa cutnúní iní-yu sá ñă túú-gă cuëchi-yu ndècu núú Yă Ndiöxí. ¹⁰ Te sá dúcáⁿ nǐ xóo cada nchaa dútú-áⁿ nǐ níhí tnahá-xí ndihí nchaa tnúhu sá dănêhé ñáhá xí ñáyiú ná cúú sá cáxi-yu ndihí ná cúú sá cúú còhó-yu ndihí năcuáa ndàhá-yu. Te tnúhu-áⁿ nǐ cuu-xi mee-ní sá nǐ sanu ichi ñaha xii-yu năcuáa cundecú-yu ñuyíú-a. Te tnúhu-áⁿ nǐ nândihí-xi ndéé ní sáá nduu nǐ nadama Yă Ndiöxí tnúhu-áⁿ cuendá sá vá dúcáⁿ-gă cadá-yu cundecú-yu.

¹¹ Te Xítóhó Jesucristú ní quixi-gă

ñuyíú-a, te diu-gă cúú-gă Yaá cúú dútú cúnúu, te xiăⁿ núu quide-gă nchaa sá vâha sá cúú-xí-ó. Te vitna ní nucúndecu-gă núú ío vii ío vâha càa, te núú ndécú-gă-áⁿ ñă túú cúu-xi ñⁿ vehe sá nǐ dăcáá cuè tée ñuyíú-a. ¹² Te cada iní-ó sá Xítóhó Jesucristú cuánguihu-gă xiti cuártú núú nǐ cuu íi víhí dâtná ní xóo cada dútú cúnúu ní xindecu ndéé sanaha, chi ní nucúndecu-gă núú ndécú Yă Ndiöxí. Dico ñă túú ní quide-gă dâtná ní xóo cada dútú cúnúu ní xindecu ndéé sanaha, chi dútú-áⁿ òré ní xóo quíhu-dé xiti cuártú ní cuu íi-gă-áⁿ, te ní xóo canehe-dé níñí chivá ndihí níñí chěhlu ní xóo quíhu. Dico Xítóhó Jesucristú chi níñí mēe-gă ní sati ní xihí-gă núú cùrúxí, te xiăⁿ duuⁿ duuⁿ cuáháⁿ-gă ní nucúndecu-gă núú ndécú Yă Ndiöxí. Te sá dúcáⁿ nǐ quide-gă xiăⁿ ní naníhí tàhú-ó. ¹³ Te nchaa ñáyiú ní xóo cada năcuáa vá cúú-gă-yu ñáyiú ní cuu íi, ñáyiú-áⁿ nǐ xóo códó ñáhá cuè dútú níñí ndicutu, ndihí níñí chivá, ndihí yáá cúnú chěhlu quiti sâhni-güedé cuendá nduu íi tucú-yu. ¹⁴ Dico níñí Xítóhó Jesucristú chi ío-gă nândihí-xi sá cúú-xí nchòo ñáyiú xindecu vitna! Te cuendá níñí-gă-áⁿ, chi Espíritú Yă Ndiöxí sá ndécú nchaa nduu nchaa quíú nǐ cuu ñⁿnuu-xi ndihí Xítóhó Jesucristú sá cúú cùú-gă cuendá cuu-gă dâtná ñⁿ táhú sá cúú-xí Yă Ndiöxí cuèi cùu-gă Yaá ñă túú tnahí cuëchi-xi, te ní sati níñí-gă te ní xihí-gă. Te cuendá xiăⁿ ní cutnúní iní-ó sá Yă Ndiöxí ní quide càhnu iní-gă nchaa sá ñă túú vâha ní quide-o, te ní nduu ndoo ní nduu nine iní-ó. Te ducaⁿ nǐ nduu ndoo ní nduu nine iní-ó cuendá sá ndécú-ó cúnú cuëchi-o núú Yă Ndiöxí Yaá ndécú nchaa nduu nchaa quíú.

¹⁵ Te Xítóhó Jesucristú ní quide ndáá-gă núú Yă Ndiöxí cuendá cue ñáyiú ndècu ñuyíú-a. Te cuendá xiăⁿ Yă Ndiöxí cada-gă ingá núú sá

vãha sã cúu-xi-yu dàtnã ní cachí-gá, te ducaⁿ càda-gá sã cuendã nchaa ñãyiú ní cáháⁿ-gã cundecu ndihi-gá, chí ñãyiú-áⁿ nduu táhú-yu cundecu ndihí vãha ñãhá-yu xii-gá ni caa ni quíhíⁿ chi ducaⁿ ní cachí-gá, te ducaⁿ chi Xítohó Jesucristú ní xihí-gá núú cùrúxí cuendã sã Yã Ndiõxí cada càhnu iní-gã nchaa yíca cuèchi-yu, nchaa cuèchi sã ní quidé-yu cùtnãhá ní cunuu tnúhu sã ní cáháⁿ-gã díhna. ¹⁶ Te nchoo xini-ó sã núu ìⁿ tée na càdúha ìⁿ tutú nãcuáa cada ñãyiú dàcãhñu-yu nchaa sã ndécú ndihí-dé, te tutú-áⁿ xini ñuhu-xi ndéé ná yãha nduu cúú-dé. ¹⁷ Te ñã túú tàú-xi cada ñãyiú nãcuáa càháⁿ-xi núú tütú-áⁿ ñini ndècu tée ní cadúha, dico sátá ná yãha cuú-dé te cadã-yu nãcuáa càháⁿ-xi. ¹⁸ Te cuèi tnúhu ní cáháⁿ Yã Ndiõxí ndéé díhna nãcuáa cada vãha-gã ñãyiú, te ñu-ni ndihí ñiñí ní cundãá-xi chi ní sahani-güedé quiti te ní sati ñiñí-güedi. ¹⁹ Te ndii Moisés ní cáháⁿ ndodo ndii núú nchaa ñãyiú nãcuáa ní cachí Yã Ndiõxí cadã-yu, te nãcuáa-ni nduu tnúhu ní chídó tnùní ndii núú tütú ndii ní cáháⁿ ndii, te ní dácã ndii ndute ñiñí chëhlu ndihí ñiñí chivã líhli, te ní queheⁿ ndii ìⁿ díte yutnu nãni hisópó ndihí luha idi ticuèhé, te ní chindóyo ndii ñiñí-ãⁿ. Te ní sódó ndii núú tütú ndéé tnúhu Yã Ndiõxí sã ní chídó tnùní ndii-áⁿ, te tnãhá cue ñãyiú xíndecu-áⁿ ní chúcú ndii. ²⁰ Te ní xãháⁿ ndii Moisés xii-yu: “Cuendã ñiñí-a ní cundãá sã Yã Ndiõxí cada ñãha-gã xii-ndo sã vãha chi ducaⁿ ní cachí-gã cada-gã sã cúu-xi-ndó”, duha ní xãháⁿ ndii xii-yu. ²¹ Te ñu-ni ducaⁿ ní quide tucu ndii ní chúcú ndii ñiñí vehe-gã ndihí nchaa sã nãndihí-güedé òré chíñuhu-güedé Yã Ndiõxí ndécú xití vehe-gã-áⁿ. ²² Te tnúhu ní chídó tnùní ndii Moisés càchi-xi sã méé-ni ñiñí chucu-güedé nchaa sã cànehe chùu-güedé òré chíñuhu-güedé Yã Ndiõxí, te sacú-nã te ndihí ndoo

nchaa xíãⁿ chucu-güedé ñiñí ni cùu. Te dacuitíi ní xini ñuhu-xi sã cáti ñiñí cuendã ducaⁿ càda cahnu iní Yã Ndiõxí nchaa yíca cuèchi ñãyiú.

Xítohó Jesucristú ní xihí-gã núú cùrúxí cuendã sã vã cùndècu-gã cuèchi-o núú Yã Ndiõxí

²³ Te sã cuendã sã ní xihí Xítohó Jesucristú núú cùrúxí, xíãⁿ ñã túú-gã cuèchi-o ndècu núú Yã Ndiõxí. Te cuendã nchaa sã ní xihí xití vehe-gã sã ní dácãá ñãyiú isràél xíãⁿ cùtnùní iní-ó nãcuáa quide-xi núú ndécú-gã. Te dacuitíi ní xini ñuhu-xi sã càhni-güedé cue quiti ní cachí Yã Ndiõxí cuendã nduu íi nchaa sã ní xihí xití vehe-gã-áⁿ. Te cuèi ducaⁿ ní sahani-güedé cue quiti-áⁿ dico ñã túú ní quide-xi nãcuáa ngúndecu vãha-o núú Yã Ndiõxí. Dico Xítohó Jesucristú ní xihí-gã, te sã ní xihí-gã xíãⁿ ní quide-gã nãcuáa ngúndecu vãha-o núú Yã Ndiõxí. ²⁴ Te Xítohó Jesucristú cuãndaa-gã andiu núú ndécú Yã Ndiõxí cáháⁿ ndàhú-gã cuendã-ó, te Xítohó Jesucristú chí ñã díú ìⁿ vehe ní dácãá cuè tée ñuyúú-a cuãnguihu-gã. Te vehe Yã Ndiõxí sã ní dácãá cuè ñãyiú isràél ñuyúú-a ndéé sanaha, ndihí nchaa nãcuáa ní xóo cada-güedé xití vehe-gã-áⁿ xíãⁿ cùtnùní iní-ó nãcuáa quide-xi núú ndécú-gã. ²⁵ Te dútú cùnùu núú ñãyiú isràél ní xóo quíhu-dé núú cuá núú cuá xití cuártú ní cuu íi víhí-gã-áⁿ, te ní xóo canehe-dé ñiñí ní xóo quíhu xití cuártú-áⁿ dico ñã díú ñiñí méé-dé. Dico Xítohó Jesucristú chí ñã túú dùcaⁿ ni quide-gã chí ìⁿ xito-ni ní sati ñiñí-gã te ní xihí-gã. ²⁶ Chí núu ni xihí-gã nuu núu te ndéé cùtnãhá ní ngáva ñuyúú ducaⁿ ngüíta-gã cada-gã ní cùu, te vitna ta ndihí nduu cuáháⁿ ní quixi-gã ñuyúú-a ní xihí-gã ìⁿ xito-ni cuendã cuu-gã dàtnã ìⁿ táhú sã cúu-xi Yã Ndiõxí, te ducaⁿ ní quide-gã

cuendá sá vǎ cǔndècu-gá cuéchi ñáyiú núú Yǎ Ndiǒxí. ²⁷ Te nchoo cuè ñáyiú ñuyú-a chi ìⁿ xito-ni cuú-ó te dàtnùní ducaⁿ te cada ndáá Yǎ Ndiǒxí cuéchi-o. ²⁸ Te ducaⁿ sǎtnahá-xi cùu Xítóhó Jesucristú chi ìⁿ xito-ni ní xíhí-gá cuendá sá vǎ cǔndècu-gá cuéchi ñáyiú núú Yǎ Ndiǒxí, te ducaⁿ ñí cuu ní xíhí-gá chi mee-gǎ ducaⁿ ñí cachí-gá cunduu. Te quixi tucu Xítóhó Jesucristú ñuyú-a dico ñá díú-gǎ sá cáda-gǎ cuendá sá vǎ cǔndècu-gá cuéchi ñáyiú núú Yǎ Ndiǒxí, chi quixi-gá nacuaca-gá nchaa ñáyiú ndètu ñaha xii-gá cuendá cundecú-yu ndihi-gá ñi caa ñi quíhíⁿ.

10

¹ Te nchaa tnúhu ní xáhaⁿ ndíi Moisés xii ñáyiú isráel cada-yu, nchaa tnúhu-áⁿ ñí quide-xi ní cutnùní luha iní-yu nàcuáa cada Yǎ Ndiǒxí cada váha ñaha-gǎ xii-o vitna. Dico ñá díú mèi nacuáa ní xáhaⁿ ndíi Moisés xii ñáyiú quide Yǎ Ndiǒxí vitna chi dáma quide-gá. Te nchaa tnúhu ní cáháⁿ ndíi Moisés ñá túú ní ndàcu-xi cada-xi nacuáa cundáa nchaa ñáyiú túha ñaha xii Yǎ Ndiǒxí cuèi ní xóo cahni-güedé quiti ní xóo nduu táhú-gǎ núú cuiá núú cuiá. ² Te núu dícǎ sá ñí xóo cahni-güedé quiti ní xóo nduu táhú Yǎ Ndiǒxí ní quide-xi nacuáa nduu ndoo nduu nine iní cue ñáyiú, te vá cáhni-gǎ-güedé cue quiti-áⁿ nduu táhú-gǎ ní cùu, te ducaⁿ te cutnùní iní-yu sá ñà túú-gǎ cuéchi-yu ndècu núú Yǎ Ndiǒxí ní cùu. ³ Te sá dúcáⁿ ñí xóo cahni-güedé quiti ní xóo nduu táhú Yǎ Ndiǒxí núú cuiá núú cuiá, xiǎⁿ ní xóo ndacu iní cue ñáyiú nchaa sá cuéhé sá dúhá ñí xóo cada-yu. ⁴ Te ducaⁿ chi níñí ndicutu-áⁿ ndihi níñí chivá-áⁿ ñà túú ní xóo ndacu-xi cada-xi nàcuáa vá cǔndècu cuéchi-yu núú Yǎ Ndiǒxí.

⁵ Te xiǎⁿ núu cǔtnàhá ní quexiío Xítóhó Jesucristú ñuyú-a ní

xáhaⁿ-gǎ xii Yǎ Ndiǒxí:

Yòhó Tǎtà-í, ñá túú ndùu vétú váha iní-n sǎ sǎhni-güedé quiti ndùu táhú-n,

te ni ñá túú ndùu vétú váha tucu iní-n cuendá nchaa dava-gá sá táxi-güedé ndúú táhú-n,

núu xiǎⁿ ní quide túha-n yiqui cuñú-í cuendá yúhú cuú-í te nduu táhú ñáhá-n xi-í.

⁶ Te ni ñá túú ndùu vétú váha iní-n cuendá quiti sǎhmi-güedé ndúú táhú-n te ni ñá túú ndùu vétú váha iní-n cuendá nchaa dava-gá sá táxi-güedé ndúú táhú-n cuendá sá vǎ cǔndècu-gá cuéchi ñáyiú núú-n.

⁷ Núu xiǎⁿ yúhú ní cachí-í xii yòhó Tǎtà-í Dútú Ndiǒxí sá yúhú véxi-í ñuyú-a cada-í nchaa sá cuini-n cáda-í dàtná yódó tnùní cuendá-í núú tütú-n.

Duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. ⁸ Te Xítóhó Jesucristú díhna-gá ní xii-gá Yǎ Ndiǒxí Yaá cúu Tǎtà-gǎ: “Yòhó Tǎtà-í ñá túú ndùu vétú váha iní-n cuendá quiti sǎhni-güedé ndúú táhú-n, ndihi cuendá quiti sǎhmi-güedé ndúú táhú tucu-n cuendá sá vǎ cǔndècu-gá cuéchi ñáyiú núú-n, ndihi cuendá nchaa dava-gá táhú sǎ táxi-güedé xii-n ñà túú ndùu vétú váha iní-n cuendá nchaa xiǎⁿ”, duha ní xáhaⁿ Xítóhó Jesucristú xii Tǎtà-gǎ Dútú Ndiǒxí. Te ducaⁿ ñí xáhaⁿ-gǎ cuèi núú tütú ndíi Moisés yódó tnùní sá dúcáⁿ cáda-güedé. ⁹ Te sáta dúcáⁿ te ní xáhaⁿ tucu-gá xii Tǎtà-gǎ Dútú Ndiǒxí: “Yòhó Tǎtà-í Dútú Ndiǒxí, mee-í véxi-í ñuyú-a cuendá cada-í nchaa nàcuáa cuini-n”, duha ní xáhaⁿ-gǎ xii Tǎtà-gǎ. Te sá dúcáⁿ ñí cáháⁿ Xítóhó Jesucristú xiǎⁿ ní cutnùní sá ñà túú-gǎ xini ñùhu-xi ducaⁿ cada-güedé cahni-güedé nchaa quiti-áⁿ, te ducaⁿ chi mee Xítóhó Jesucristú ní xíhí-gá ní cuu-gá dàtná ìⁿ táhú sá cúu-xí Yǎ Ndiǒxí, te ducaⁿ ñí cuu chi ducaⁿ

tnàhí ní cachí Yă Ndiôxí cunduu.
 10 Te Xítohó Jesucristú ní quide-gá
 nàcuáa ní cuiní Yă Ndiôxí cada-gá,
 chi ní xíhí-gá núú cùrúxí chi ducaⁿ
 nĩ cuiní méé-gă cunduu, te ìⁿ
 xito-ni ní xíhí-gá sá cuendá nchaa
 ñâyiu, te cuendá xiăⁿ nõu ndècu
 yiñuhu-o núú-gă vitna.

11 Te cue dútú ñâyiu israél chi ìⁿ
 nduu ìⁿ nduu ní xóo cahni-güedé
 quiti ní xóo nduu táhú-gă, te ñá
 túú ní dâma-güedé nàcuáa ní xóo
 cada-güedé. Te nchaa sá nĩ xóo
 cada-güedé-áⁿ ñá túú ní quide-xi
 nacuáa vá cündècu-gă cuéchi ñâyiu
 núú Yă Ndiôxí. 12 Dico Xítohó Je-
 sucristú ní cachí-gá sá cúú cùú-gá,
 te ní xíhí-gá núú cùrúxí cuendá
 nchaa yíca cuéchi nchaa nchoo
 ñâyiu ndècu ñuyúú-a. Te sátá dúcáⁿ
 te dâtnúni ní ngóo-gá xio cùha Dútú
 Ndiôxí táxi tnùní-gá, te vá ìⁿ ndùu
 ìⁿ quíú-gă te cuú-gá. 13 Te ñiu-ni
 xiăⁿ cundecu-gá cundetú-gá ndéé
 sáá nduu cànehe nchaa sá cúú ùhú
 iní ñáhá xii-gá sá yiñuhu núú-gă.
 14 Te cuendá sá nĩ xíhí Xítohó Je-
 sucristú ìⁿ xito-ni xiăⁿ ní cuu-gá
 dàtná ìⁿ táhú sá cúú-xí Yă Ndiôxí,
 xiăⁿ ní quide-xi sá ncháá ñâyiu cùu
 cuendá-gă ñá túú-gă ná cumání-yu
 núú-gă ni caa ni quíhíⁿ. 15 Te mee
 Espiritú Yă Ndiôxí càháⁿ ndáá-xi
 nàcuáa ní cáháⁿ-gá cuendá-ó, te
 duha ní cáháⁿ-gá:

16 Sáá nduu te cada-í nchaa ñâyiu
 nàcuáa na càháⁿ-í-a,
 te cada-í nàcuáa cutnúni iní-yu
 tnúhu sá dánèhé-í-yu tnúhu
 sá cánùichi ñaha xii-yu
 nàcuáa cadá-yu cundecú-yu,
 te cada tucu-í sá tnĩ-yu nchaa
 tnúhu-áⁿ.

Duha ní cachí-gá. 17 Te ní cachí
 tucu-gá:

Te vá ìⁿ ndùu ìⁿ quíú-gă ndacu iní-í
 sá quidé sáá iní-yu tnúhu-í,

te ni vá ìⁿ ndùu ìⁿ quíú-gă te ndacu
 iní-í nchaa sá cuèhé sá dúhá
 quidé-yu.

Duha ní cáháⁿ Yă Ndiôxí càchí
 Espiritú-gá. 18 Te sá dúcáⁿ quide
 cahnu iní Yă Ndiôxí nchaa cuéchi-o,
 núú xiăⁿ ñá túú-gă xini ñuhu-xi cuú
 quiti nduu táhú-gă cuendá nchaa sá
 cuèhé sá dúhá quide-o.

*Tàú-ó sã tnàhá tnúhu-o ndìhi Yá
 Ndiôxí*

19 Te cue dútú nĩ xóo cunuu
 nõu ñâyiu israél cue téé-áⁿ nĩ xóo
 quíhu-güedé xiti cuártú ní cuu íí
 víhí-gă. Dico nchoo cuè ñâyiu
 ndècu ichi Xítohó Jesucristú vitna
 tàú-ó sã nĩ yuhu ni iní-ó tnàhá
 tnúhu-o ndìhi Yá Ndiôxí. Te cuu
 tnahá tnúhu-o ndìhi-gá chi Xítohó
 Jesucristú ní sati ñíhí-gă te ní
 xíhí-gá núú cùrúxí. 20 Te cada iní-ó
 sã dõó sã nĩ xíndedí nàcuáa ní xóo
 quíhu-güedé xiti cuártú ní cuu íí
 víhí-gă-áⁿ nĩ xócuíhí, te ducaⁿ càda
 iní-ó chi Xítohó Jesucristú ní xíhí-gá
 cuendá nchoo ñíhí-ó nàcuáa cada-o
 ngündecu váha-o sã cúú-xí-gă. 21 Te
 ñiu-gá cúú-gă Yaá cúú dútú-ó, te
 ñiu-gá cúú-gă Dútú cùnùu ndecu-gá
 núú ndécú Yă Ndiôxí. 22 Núu xiăⁿ
 xini ñuhu-xi sá ño tnahá tnúhu-o
 ndìhi Yá Ndiôxí, te vá cáni ìⁿ cani
 úú iní-ó, te ño váha quindáá iní-ó-gă
 chi ñiu-gá ní ndada ndoo ní ndada
 nine-gá iní-ó cuendá nchoo cùtnúni
 iní-ó sã ñá túú-gă cuéchi-o ndècu
 núú-gă. Te ní sandute-o cuendá sá
 dúcáⁿ nĩ nduu ndoo ní nduu nine
 iní-ó. 23 Te nchoo càháⁿ ndáá-ó
 sã ndécú ndìhi-o tnúhu ndee iní
 sá ndúú táhú-ó cündecu ndìhi-o Yă
 Ndiôxí, te xini ñuhu-xi sá vá dáñá
 ndéé-ó cànchicúⁿ nihnu-o tnúhu
 ndee iní-áⁿ chi Yá Ndiôxí cada-gá
 nàcuáa ní cachí-gá sá cúú-xí-ó. 24 Te
 xini ñuhu-xi cuhuⁿ iní tnáhá-ó te
 çhindee tnàha-o nacuáa ducaⁿ cùu
 iní tnáhá-gă-ó, te cada-o mēe-ni
 sá váha. 25 Te nchoo vá dáñá
 ndéé-ó nàtaçá-ó nõu dácuàha-o
 tnúhu Yă Ndiôxí, te vá cadá-ó dàtná
 xiquide davá-yu ñá túú-gă cuiní-yu
 quixí-yu núú dácuàha-o tnúhu-gá.
 Chi xini ñuhu-xi sá cuàha tnàha-o
 tnúhu ndee iní canchicúⁿ nihnu-o

ìchi-gá, te uuⁿ-gá ducaⁿ tàú-xi cada-o vitna ta cuyatni nduu quixi tucu Xítohó Jesucristú ñuyú-a.

²⁶ Te cue ñáyi sa ní tecú tnùnì nàcuáa càháⁿ tnúhu Yá Ndiòxí te núu na nguíta-yu ñucúuⁿ cadá-yu nándi sá cuèhé sá dúhá, te áuⁿ nã cuu ní xíhí Xítohó Jesucristú cuendá-yu, te ni vã yõ ñⁿ-gá cuú cuendá sá vã cùndècu-gá cuèchi-yu núú Yá Ndiòxí. ²⁷ Te núu ducaⁿ na cadá-yu nándi sá cuèhé sá dúhá, te ío quiyùhú iní-yu nàcuáa cada ñaha Yá Ndiòxí xii-yu. Chi nchaa ñáyi cùu úhú iní ñáhá xii-gá daquihíⁿ ñáhá-gã xii-yu núú ñùhú núú càyú núú ío ndohó-yu. ²⁸ Te nchaa ñáyi ní xóo daquèe tihú tnúhu ní càháⁿ ndí Moisés, te núu ndècu úú àdi úní ñáyi càháⁿ ndáá sá dúcáⁿ ní dáquée tihú-yu tnúhu ní càháⁿ ndí, te vã yõ ní xóo cundàhú iní ñáhá xii nchaa ñáyi ducaⁿ ní xóo cada chi ní xóo cahni ñaha-güedè. ²⁹ Te núu ducaⁿ ní ndoho cue ñáyi ducaⁿ ní dáquée tihú tnúhu ní càháⁿ ndí Moisés-áⁿ, te uuⁿ-gá ndoho cue ñáyi dàquee tihú ñáhá xii Xítohó Jesucristú Yaá cúu Déhe Yá Ndiòxí ñu-ni ñáyi cächí sá ñã túú nándihi níñí-gã. Te níñí-gã-áⁿ ní sati, te ní xíhí-gá, te ducaⁿ ní cuu cuendá cada Yá Ndiòxí ingá núú sã vãha sá cúu-xí nchòo ñáyi ndècu ñuyú-a dàtná ní cachí-gá cada-gá. Te ñu-ni cuendá níñí-gã-áⁿ ní nduu ndoo ní nduu nine iní cue ñáyi-áⁿ ní cùu, te ñu-ni ñáyi-áⁿ càháⁿ úhú-yu Espíritú Yá Ndiòxí sá chindèe chítúu ñaha xii-o. ³⁰ Te nchoo sã naha-o sã Yá Ndiòxí cächí-gá ñⁿ xichi núú tütú-gá: “Yúhú cada-í te nacháhu ñáyi nchaa sá quidè-yu, te duha càháⁿ-í chi nachinaa-í cuendá nchaa sá quidè-yu-áⁿ”, duha cächí-gá. Te sa ñaha tucu-o nacuáa càháⁿ-xi núú tütú-gá núú cächí-xi: “Yá Ndiòxí cada ndáá-gá cuendá nchaa sá quidè ñáyi cùu cuendá-gá”, duha cächí-xi núú

tütú-gá. ³¹ Te ío ndàhú ndoho cue ñáyi na dàndoho ñaha Yá Ndiòxí, te ñu-gá cúu-gá Yaá cùnu nchaa nduu nchaa quú!

³² Te chí dándacu iní nàcuáa ní quide-ndo cùtnàhá vitna cuu saa ní tecú tnùnì-ndó tnúhu Yá Ndiòxí, chi dàvá-áⁿ ní quide càhnu iní-ndó cuèi nándi sá ní yáha-ndo cuendá-gá. ³³ Te dava-ndo ní quide úhú ñáhá ñáyi xii-ndo núú chítú núú tàcá, te nándi tnúhu cuèhé tnúhu duha ní xáhãⁿ-yu xii-ndo. Te dava-ndo ní cuyi-ni-ndo ní xindecu ndihi tnàha-ndo cuèi nándi ní ndoho dava-gá-ndó. ³⁴ Te ní cundàhú iní-ndó cuè ñáyi yihí vecaá, te cuèi ní quendèe ñáyi sá ndécú ndihi-ndo dico ñã túú ní ndíhú iní-ndó chi ní cudí-ni iní-ndó. Te ducaⁿ ní quide-ndo chi sa ñaha-ndo sá ndúú tãhú-ndó sã ío-gá vãha, te xíãⁿ cundecu ndihi-ndo ní caa ní quihíⁿ. ³⁵ Te xíãⁿ vã dáñá ndèe-ndó quindáá iní-ndó nàcuáa ní cachí Yá Ndiòxí cada ñaha-gá xii-ndo, chi sáá nduu te ío vãha cada ñaha-gã xii-ndo. ³⁶ Te nchòhó xini ñùhu-xi ío cada ndee iní-ndó càda-ndo nchaa nacuáa càháⁿ Yá Ndiòxí, te ducaⁿ te nduu tãhú-ndó sã ní cachí-gá nduu tãhú-ndó cùndecu ndihi-ndo ní caa ní quihíⁿ. ³⁷ Te Yá Ndiòxí cächí-gá núú tütú-gá:

Te cuyatni vii-nã nduu quixi Yaá quixi ñuyú-a, te vã cuyàa-gá.

³⁸ Te nchaa ñáyi cundáá núu-í ñã túú dàña ndeé-yu sàndáá iní ñáhã-yu xii-í,

te cuendá xíãⁿ cundecu-ni-yu ichi-í, dico núu na dàñá-yu ichi-í te vã cúu vãha iní-í núu-yu.

Duha cächí Yá Ndiòxí núú tütú-gá.

³⁹ Dico nchoo chi ñã túú cùu-o ñáyi ducaⁿ xiquide dàñá-ó ichi Yá Ndiòxí, chi cùu-o ñáyi nchicúⁿ ni-hnu-ni sàndáá iní-ó-gã, te sá dúcáⁿ te nduu tãhú-ó cùndecu-o ndihi-gá ní caa ní quihíⁿ, te ñã túú cùu-o ñáyi dàña nihnu ichi-gá te xita nihnú-yu.

11

Ñáyiú sàndáá iní ñáhá xii Yá Ndióxi

¹ Te núu sàndáá ndisa iní-ó Yá Ndióxi te ducaⁿ cùtnuní ndáá iní-ó sá ñihí-ó sá cuení-ó núú-gá. Te núu sàndáá iní-ó-gá te ducaⁿ cùtnuní ndáá tucu iní-ó sá càháⁿ ndáá-gá cuendá nchaa sá ñà túú xini-ó. ² Te ducaⁿ ñi quide ñáyiú ñi xindecu ndéé sanaha ío ní sàndáá iní-yu Yá Ndióxi te xiáⁿ núu ío váha ní cuu iní ñáhá-gá xii-yu.

³ Te núu nchoo sàndáá ndisa iní-ó Yá Ndióxi te cùtnuní ndáá iní-ó sá sá cuendá tñuhu ní càháⁿ-gá ní cuáha andiu ndíhi ñuyíú-a. Te cùtnuní iní-ó sá ñà díú sá cuendá ñiⁿ sá túu ndèhe-o ío ñuyíú-a ní cuáha andiu ndíhi ñuyíú-a.

⁴ Te ndíi Àbél ío ní sàndáá iní ndíi Yá Ndióxi núu xiáⁿ ío-gá ní cuu iní-gá sá ñi sáñaha ndíi ní nduu táhú-gá dàcúúxi sá ñi sáñaha ndíi Cáin xii-gá ní nduu táhú-gá. Te ndíi Àbél-áⁿ ñi cutnùni iní ndíi sá ñi cudíu ndíi núú Yá Ndióxi cuendá sá ñi queheⁿ cuendá-gá sá ñi sáñaha ndíi ní nduu táhú-gá. Te cuéi ñà túú-gá ndíi ndècu ñuyíú-a dico yodo tñuní sá ñi sàndáá iní ndíi Yá Ndióxi cuendá ducaⁿ càda-o canchicúⁿ ni-hnu-o.

⁵ Te té Ènóc téé ní xindecu ndéé sanaha ñà túú ní xihí-dé chi ní nacuaca ñaha túu Yá Ndióxi xii-dé cuendá sá ñi sàndáá iní ñáhá-dé xii-gá. Te vá yoo ñi nànihí ñáhá xii-dé chi mee-gá ní nacuaca ñaha-gá xii-dé. Te núu tütú Yá Ndióxi càchí-xi sá cùtnàhá vátá nàcuaca ñaha-gá xii té Ènóc, te ní quide-dé mee-ni nàcuáa ní cuu váha iní ñáhá-gá xii-dé. ⁶ Te nchaa ñáyiú ñà túú sàndáá iní ñáhá xii Yá Ndióxi ñà ndácú-yu cadá-yu nàcuáa cudíú-yu núú-gá, chi nchaa ñáyiú cuení tuha ñaha xii-gá xini ñùhu-xi sá quindáá iní-yu sá ndécú-gá, te quindáá iní-yu sá núu na nducunihnu ñahá-yu xii-gá te cuáñaha-gá xii-yu sá ndúú táhú-yu.

⁷ Te Yá Ndióxi ní dátùha-gá ndíi Nöé nchaa nàcuáa cada-gá. Te ní quide ndíi nchaa nàcuáa ní xáhaⁿ Yá Ndióxi cada ndíi, te ní cadúha ndíi ñiⁿ bàrcú cuendá xiti bàrcú-áⁿ quée ndíi ndíhi nchaa ñáyiú vehe ndíi cuendá cácu nihnú-yu. Te ducaⁿ ñi quide ndíi chi ní sàndáá iní ndíi Yá Ndióxi. Te sá dúcáⁿ ñi sàndáá iní ndíi-áⁿ Yá Ndióxi xiáⁿ ní cutnùni sá ncháá ñáyiú ío ndècu cuéchi-yu, chi ñà túú ní cànchicúⁿ nihnú-yu cadá-yu nàcuáa ní quide ndíi. Te sá dúcáⁿ ñi quide ndíi ní sàndáá iní ndíi Yá Ndióxi xiáⁿ ío ní cundáá ndíi núú-gá.

⁸ Te Yá Ndióxi ní xáhaⁿ-gá xii ndíi Àbrahám sá quée ndíi ñuú núu ndécú ndíi quíhíⁿ ndíi ingá xichi cundecu ndíi. Te ní quide ndíi nàcuáa ní xáhaⁿ Yá Ndióxi chi ní quee ndíi cuháⁿ ndíi núú cuáñaha Yá Ndióxi cundecu ndíi. Te òré ní quee ndíi núu ndécú ndíi te ñà túú ní cùtnuní iní ndíi ndéé cúu núú cuháⁿ ndíi cundecu ndíi. Te ducaⁿ ñi quide ndíi chi ní sàndáá iní ndíi Yá Ndióxi. ⁹ Te sá dúcáⁿ ñi sàndáá iní ndíi Yá Ndióxi núu xiáⁿ ní xindecu ndíi núu ñi sáñaha-gá cundecu ndíi, te cuéi ducaⁿ dico ñà túú ní quide ñuú ndíi xiáⁿ. Te ní xoo cundecu ndíi vehe cùtexínu vehe dóó. Te díu-ni ducaⁿ ñi quide ndíi Isáac ndíhi ndíi Jàcób chi tñahá cue ndíi-áⁿ ñi cachí Yá Ndióxi sá ndúú táhú cue ndíi xiáⁿ cundecu cue ndíi. ¹⁰ Te ducaⁿ ñi quide ndíi Àbrahám chi ní xindecu ndíi ndéé ní sáa nduu nduu táhú ndíi cundecu ndíi núu ndécú Yá Ndióxi. Te núu ndécú-gá-áⁿ cúu-xi ñuú ní cadúha mee-gá, te ñuú-áⁿ cudíi-xi ñi caa ñi quíhíⁿ.

¹¹ Te ndíi Sàrá, sa ní xidó cuíá ndíi sá cóo dèhe ndíi chi sa ní sahnu vihi ndíi, dico Yá Ndióxi ní quide-gá te ní xoo ñiⁿ dèhe ndíi. Te ducaⁿ chi ní sàndáá iní ndíi Yá Ndióxi te ní cutnùni ndáá iní ndíi sá cadá-gá nàcuáa ní xáhaⁿ-gá xii ndíi. ¹² Te cuéi ío ní sahnu ndíi Àbrahám ndíhi ñadíhí ndíi, ndíi Sàrá dico dacutíi

ní nduu táhũ-yu ní xóo ìⁿ déhe-yu. Te xí^an nũu ío cuéhé ndĩquíⁿ yáwá ndíi Àbrahám ní cáyá dàtná cuéhé chòdíní ndèé andiũ, ndíhi dàtná cuéhé ñuhu cúchí lámár, chí ní vǎ yóo ìⁿ ndacu cahu ñaha xii-yu sá cuèhè-yu.

¹³ Te cue ndíi-áⁿ ducaⁿ-ni ní sándáá iní cue ndíi Yá Ndiòxí ndéé ní sáá nduu ní xíhí cue ndíi. Te cue ndíi-áⁿ ñà túú ní ndùu táhú cue ndíi quini cue ndíi nchaa nàcuáa ní cachí Yá Ndiòxí cada-gá, dico ní cutnùní ndáá iní cue ndíi-áⁿ nàcuáa cada-gá núú cuaháⁿ núú vèxi. Te ío ní cudíi iní cue ndíi, te ní cachí cue ndíi sá dícó-ni ichi yáha cue ndíi ñuyíú-a, chí ñá díú ñuyíú-a cundecu ducaⁿ cuè ndíi. ¹⁴ Te sá dúcáⁿ ndùu tñuhu ní cáháⁿ cue ndíi-áⁿ, xí^an ní cutnùní sá cùiní cue ndíi íngá xichi núú cùndècu cue ndíi. ¹⁵ Te ní ñà díú ñúú núú ní quee cue ndíi ní cùiní cue ndíi nùhú cue ndíi. Chí núu ducaⁿ ní sàni iní cue ndíi te nùhú cue ndíi ní cùu. ¹⁶ Dico ñáhá chí cùiní cue ndíi quíhíⁿ cue ndíi ìⁿ xichi núú vǎha-gá cáá cùndecu cue ndíi. Te núú dúcáⁿ ío-gá vǎha càa-áⁿ cúu-xí ñúú núú ndécú Yá Ndiòxí, te sá dúcáⁿ ní sani iní cue ndíi xí^an nũu ío vǎha cùu iní Yá Ndiòxí cáchí-gá sá ñà túú cùcahaⁿ núú-gǎ cúu-gǎ Ndiòxí cue ndíi-áⁿ, te cùtnùní iní-ó sǎ ndàá sá dúcáⁿ càháⁿ-gá chí ní quide túha-gá ìⁿ xichi núú cùndècu cue ndíi-áⁿ.

¹⁷ Te ndíi Àbrahám ní xíndecu ìⁿndi-ni déhe ndíi ndíhi ñadihí ndíi, te cùtnáhá ní xito ndéé ñáhá Yá Ndiòxí xii ndíi ní xícáⁿ-gá déhe ndíi, ndíi Isàác cuèndá nduu táhú ñáhá-gǎ xii ndíi. Te ní xáhaⁿ ndíi sá cúu ndùu táhú-gǎ déhe ndíi, te ducaⁿ ní quide ndíi chí ní sándáá iní ñáhá ndíi xii-gǎ. Te sa ndècu túha ndíi sá cuǎñaha ndíi déhe ndíi xii-gǎ cuèi mee Yá Ndiòxí ní xáhaⁿ ndáá-gǎ xii ndíi ¹⁸ sá sǎ cuèndá ndíi Isàác te ngúndecu cue ñani tnahá ndíi. ¹⁹ Te ducaⁿ ní quide ndíi Àbrahám, chí ní cutnùní ndáá iní ndíi sá Yá Ndiòxí ndácú-gǎ

dándòto-gǎ cuèi ñáyiũ sa ní xíhí. Te sá dúcáⁿ ní xáhaⁿ ndíi xii Yá Ndiòxí sá cúu ndùu táhú-gǎ déhe ndíi, te xí^an cada iní-ó sǎ sá ní xíhí ndíi Isàác te ní ndoto tucu ndíi ní nucúndecu ndíi ndíhi tátá ndíi, ndíi Àbrahám.

²⁰ Te ndíi Isàác ní xícáⁿ táhú ndíi núú Yá Ndiòxí cuèndá sá cádá vǎha-gǎ cue déhe ndíi, ndíi Jácób ndíhi ndíi Esàú núú cuaháⁿ núú vèxi. Te ducaⁿ ní quide ndíi chí ní sándáá iní ndíi Yá Ndiòxí. ²¹ Te sa ta cùyatni-nǎ nduu cùú ndíi Jácób, te ní xícáⁿ táhú ndíi núú Yá Ndiòxí cuèndá cue déhe ñani ndíi déhe ndíi Chèé. Te yituu-ná ndíi tatnu ndíi ní chiñuhu ndíi Yá Ndiòxí. Te ducaⁿ ní quide ndíi chí ní sándáá iní ñáhá ndíi xii-gǎ. ²² Te cùtnáhá sa ta cùyatni vii-nǎ nduu cùú ndíi Chèé, te ní cachí ndíi sá cuè ñáyiũ Israèl sáá nduu quèé-yu núú xíndecú-yu-áⁿ. Te ní cáháⁿ tucu ndíi nàcuáa cada-yu yiqui cùñú ndíi na sáá nduu quèé-yu núú ndécú-yu-áⁿ. Te ducaⁿ ní quide ndíi chí ní sándáá iní ndíi Yá Ndiòxí.

²³ Te cùtnáhá ní cacu ndíi Moisés te ní chiváha ñaha nǎnǎ ndíi ndíhi tátá ndíi úní yóó. Te ducaⁿ ní quide cue ndíi-áⁿ chí ní sándáá iní cue ndíi Yá Ndiòxí. Te ní quide cuèndá cue ndíi-áⁿ sǎ ío vǎha càa ndíi Moisés déhe cue ndíi, te ñà túú ní yuhú cue ndíi nàcuáa ní cáháⁿ tée cùu Faraón sá cáhni-dè cue landú. ²⁴ Te sáta ní sahnu ndíi Moisés te duuⁿ duuⁿ ní cachí ndíi sá vǎ càháⁿ ñáyiũ sá déhe yoco tée cùu Faraón cúu nǎnǎ ndíi. Te ducaⁿ ní quide ndíi chí ní sándáá iní ndíi Yá Ndiòxí. ²⁵ Te ducaⁿ ní quide tucu ndíi chí ní tnahá-gǎ iní ndíi ndoho ndíi ndíhi nchaa ñáyiũ cùu cuèndá Yá Ndiòxí dàcúúxí sǎ cudíi iní ndíi cundecu tnaa ndíi ichi cuéhé ichi duha. ²⁶ Chí ní sani iní ndíi sá vǎha-gǎ ndoho ndíi cúcuéhé ñáhá cuè ñáyiũ xii ndíi sá cuèndá Yá quixi ñuyíú-a dàcúúxí sǎ cùndècu ndíhi ndíi nchaa sá ío Ègiptú. Te ducaⁿ ní quide ndíi chí ní xúhuⁿ iní ndíi sá Yá Ndiòxí cuáñaha-gǎ sá

ndúú tǎhú ndíi. ²⁷ Te ndíi Moisés ní quee ndíi nàcióⁿ Ègíptú te ñá túú ní quide cuendá ndíi sá ïo cùdééⁿ tée cùu Faraón núú ndíi. Te ducaⁿ ñi quide ndíi chi ní sándáá iní ndíi Yá Ndiòxí. Te ní quide càhnu iní ndíi cuendá nchaa sá ñi yáha ndíi, te ní quide iní ndíi sá Yá Ndiòxí ndécú ndíi ñaha túu-gá xii ndíi cuèi ñá túú ní xini núú ñáhá ndíi xii-gá. Te ducaⁿ ñi sani iní ndíi chi Yá Ndiòxí ndécú ndíi ñaha-gá xii ndíi.

²⁸ Te ndíi Moisés cúú ndíi tée ní tausaha ñi quide vico pàscuá ndíi cue ñáyiú isràél, te dàvá-áⁿ ñi táuchíúⁿ ndíi ní sahní-yu mbéé te ñííⁿ quiti-áⁿ ñi dácánúú-yu yuyèhé-yu. Te ducaⁿ ñi quide ndíi chi ní sándáá iní ndíi Yá Ndiòxí. Te ducaⁿ ñi quide tucu ndíi cuendá sá espíritú sá ñi tendaha Yá Ndiòxí cahni-xi mee-ni dèhe tée dèhe díhna cue ñáyiú Ègíptú, te vá cáhni-xí ñi ñⁿ dèhe cue ñáyiú isràél. ²⁹ Te ndute làmár sá nání Mǎr Tícuèhé ní queé dava-xi ní natúu ñuhu yìchí ní ñíí ñi yáha cue ñáyiú isràél. Te ducaⁿ ñi cuu chi ní sándáá iní-yu Yá Ndiòxí. Te cue tée Ègíptú tñahá-güedé nchìcúⁿ-güedé cuaháⁿ dico ñá túú ní ndàcu-güedé yáha-güedé chi ní ndíi-güedé ní cáhá.

³⁰ Te cue ñáyiú isràél ní dúcúⁿ ndéé-yu úsá nduu ñuú Jericó te ní ngoyo nchaa sá ñúðoco. Te ducaⁿ ñi cuu chi ní sándáá iní-yu Yá Ndiòxí. ³¹ Te ñⁿ ñaha ní xíndecu ichi díí iní ní xínani-aⁿ Ràháb, ñaha-áⁿ ñà túú ní xíhí-aⁿ dàtná ní xíhí nchaa ñáyiú ío ní cuu sáá iní-xi núú Yá Ndiòxí, chi ní cuu váha iní-aⁿ núú cuè tée ní tendaha cuè ñáyiú isràél ní sángoto dayuhu ñúú-aⁿ. Te ducaⁿ ñi quide-aⁿ chi ní sándáá iní-aⁿ Yá Ndiòxí.

³² Te núu dícó sá cúú te cáháⁿ-í cuendá ndíi Gedéón, ndíi cuendá ndíi Bàràc, ndíi cuendá ndíi Sànsón, ndíi cuendá ndíi Jèté, ndíi cuendá ndíi Dàvíí, ndíi cuendá ndíi Sàmúél, ndíi cuendá

nchaa cue tée ní xóo cáháⁿ tñuhu Yá Ndiòxí ndéé sanaha, te nchaa cuendá cue tée-áⁿ cáháⁿ-í te núu dícó cùyáchí-í dico ñá túú cùyáchí-í. ³³ Te nchaa cue ndíi-áⁿ ñi sándáá iní cue ndíi Yá Ndiòxí núu xíáⁿ ní xóo ndacu cue ndíi ní xóo náá cue ndíi ndíi nchaa ñáyiú dava-gá ñuú. Te nchaa ñáyiú-áⁿ ñà túú ní xóo ndacú-yu nàá-yu ndíi cue ndíi, te ní xóo cada cue ndíi nchaa nàcuáa tàú-xi cunduu, te ní quide váha ñaha Yá Ndiòxí xii cue ndíi dàtná ní cachí-gá cada ñaha-gá xii cue ndíi. Te cuèi nchaa cue quiti dééⁿ ñà túú ní ndàcu-güedi ná cada ñaha-güedi xii cue ndíi. ³⁴ Te ní xóo ndacu cue ndíi ní xóo ndahvá cue ndíi ñuhú sá vá yóo tñahí ndàcu ndahvá, te ní cácu cue ndíi vá yóo ní ndàcu cahni ñaha xii cue ndíi. Te cue ndíi-áⁿ ñà túú ñíhí ndéé cuè ndíi ní cùu, dico ní ñíhí ndéé cuè ndíi chi Yá Ndiòxí ní chindee ñaha-gá xii cue ndíi, te nchaa ndíi-áⁿ ïo ní ñíhí ndéé cuè ndíi ní nàá cue ndíi ndíi nchaa ñáyiú ní cuu úhú iní ñáhá xii cue ndíi, te nchaa ñáyiú ducaⁿ ñi xóo nàá ndíi cue ndíi-áⁿ ñà túú ní xóo ndacú-yu nàá ndíi ñáhá-yu xii cue ndíi chi ní xóo cunú-yu. Te ducaⁿ ñi cuu chi ní sándáá iní cue ndíi Yá Ndiòxí. ³⁵ Te dava ñáyiú díhí ní nduu tǎhú-yu ní ndoto cue ñáyiú ní xíndecu ndíi-yu ní nucúndecu ndíi ñaha tucú-yu.

Te dava ñáyiú ío ní dándóhó ñaha tñaha ñáyiú-yu te ní xíhí-yu, dico ñá túú ní dàñá-yu ichi váha nàcuáa cácu ñíhí-yu núú tñaha ñáyiú-yu, te ducaⁿ chi ní cuini-yu sá ndótó-yu ndéé cuèé-gá nàcuáa ngúndecu váha-yu núú ndécú Yá Ndiòxí. ³⁶ Te dava cue ndíi ío ní ndoho cue ndíi chi ío ní cudíquí ndéé ñáhá ñáyiú xii cue ndíi, te ní caníhá-yu xii cue ndíi, te dava cue ndíi ní dácútú ñáhá-yu, te ní chihi ñáhá-yu xii cue ndíi veçaá. ³⁷ Te dava cue ndíi ní sahní ñáhá-yu ndíi yúú. Te dava cue ndíi ní chidava ndáá ñáhá-yu ní xehndé ñáhá-yu ndíi sièrrá. Te dava cue ndíi ní xito ndéé

ñahá-yu te núu ndisa sá sándáá iní cue ndíi Yá Ndiöxí, te dava cue ndíi ní sahani ñahá-yu ndíhi machití. Te mee-ni ñíi mbéé ndíhi ñíi chivá, ní xóo cuu dóo cue ndíi. Te mee-ni ñíi cue quití-án ní xóo cuu dóo cue ndíi cuéi ndéni ní cuu ní xóo caça cuu cue ndíi. Te mee-ni cuéi tée ndàhú ní cuu cue ndíi. Te ío ní xóo dandihú-yu iní cue ndíi, te nándi sá ní xóo cada ñahá-yu xii cue ndíi ní xóo dandòho ñahá-yu. ³⁸ Te cue ndíi-án ïo-gá ní xínduu váha iní cue ndíi dàcúúxí nchàa dava-gá ñáyiu. Te nchaa cue ndíi-án ní xica cuu cue ndíi cuéi nchaa núu ñà túú vâ yôo tnàhí ndècu, te cuéi xití yucu ní xica cuu cue ndíi. Te ní xóo cada vehe cue ndíi nchaa yaú cava. Te ndéni ní cuu nchíi yaú ní xóo cundecu cue ndíi. ³⁹ Te ío ní cudíu cue ndíi núú Yá Ndiöxí cuèndá sá ní sándáá iní ñahá cuè ndíi xii-gá. Te cuéi ducaⁿ ní quide cue ndíi dico ñà túú ní xíní cue ndíi nchaa sá ní cachí Yá Ndiöxí cada-gá. ⁴⁰ Te ducaⁿ ní cuu chi ñⁿ sá ïo-gá váha ní cachí Yá Ndiöxí cada-gá. Te sá dúcáⁿ ïo-gá váha ní cachí-gá cada-gá cúu-xí cuèndá nchoo ndíhi cuèndá cue ndíi-án cuèndá sá ñà díú mèe-ni cue ndíi-án cundáá cue ndíi núú-gá, chi tnàhá nchoo cundáá-ó núú-gá.

12

Ío cuhuⁿ iní-ó Xitohó Jesucristú

¹ Te cue ñáyiu ní xíndecu ndéé sanaha ní quide-yu nàcuáa ní cutnúni sá ní sándáá iní-yu Yá Ndiöxí. Te cada iní-ó sá ncháá ñáyiu-án xíndéhe ñahá-yu xii-o vitna. Núu xiáⁿ xíní ñuhu-xi sá vâ cáda-ó ní ñⁿ sá cuèhé sá dúhá chi ñu nchaa xiáⁿ quide-xí ñà túú cundáá-ó núú Yá Ndiöxí. Te vâ cáda cuèndá-ó nchàa sá quidé tnèñu iní-ó nàcuáa ndacu-o càda-o nchaa nacuáa càháⁿ-gá. Te ío càhnu cunduu iní-ó càncicúⁿ nihnu-o càda-o nchaa nacuáa ní cachí-gá cada-o cundecu-o ñuyúú-a. ² Te ío cuhuⁿ iní-ó Xitohó Jesucristú, chi

ñu-gá ní quide ní sándáá iní-ó Yá Ndiöxí, te ñu-ni ducaⁿ quide-gá cuéi vitna te cuéi ndéé núu cuàháⁿ núu vèxi ñu-ni ducaⁿ càda-gá sá quíndáá iní-ó Yá Ndiöxí. Te Xitohó Jesucristú ío ní quide ndee iní-gá ní ndoho-gá te ní xihí-gá núu cùrúxí, te ñà túú ní quide cuendá-gá cuéi ñⁿ sácáⁿ núú cúú-xí sá dúcáⁿ ní ndoho-gá. Te ducaⁿ ní quide-gá chi sa nàha-gá sá ná yàha sá dúcáⁿ ndòho-gá te ío cudíí iní-gá. Te vitna núcóo-gá xio cùha núu núcóo Yá Ndiöxí te tàxi tnuní-gá.

³ Te xini ñuhu-xi sá ïo cada cuèndá-ndó nàcuáa ní quide Xitohó Jesucristú chi Yaá-án ïo ní quide càhnu iní-gá nchaa sá ní ndoho-gá ní quide ñaha nchàa ñáyiu ndècu ichi cuehé ichi duha xii-gá. Te ducaⁿ càda cuendá-ndó nàcuáa ní quide-gá cuèndá sá vâ túu dusaⁿ-ndo, te ni vâ nátùhú iní-ndó càda-ndo nchaa nacuáa càháⁿ-gá.

⁴ Te nchòhó dáquèe tihú-ndó nchàa sá cuèhé sá dúhá dico vátá càhni ñaha-gá-yu xii-ndo sá dúcáⁿ quide-ndo. ⁵ Te ndacu iní-ndó nàcuáa càháⁿ Tàtá-ó Dütú Ndiöxí dásàhú ñahá-gá xii nchoo cuè ñáyiu cùu déhe-gá. Te duha càchí-gá núu tütú-gá:

Nchòhó cue déhe mee-í, vâ cání iní-ndó sá àuⁿ nâ cuu dândoho ñaha-í xii-ndo, te ni vâ nátùhú iní-ndó òré càháⁿ-í òho-ndo nàcuáa cada-ndo cundecu-ndo.

⁶ Chi mee-í dándòho-í nchaa ñáyiu cùu iní-í cuèndá sá cundáá-yu núu-í, te quide úhú-í-yu, te ñu-ni-yu cúu-yu ñáyiu càchí-í cúu déhe-í.

Duha càchí-gá núu tütú-gá. ⁷ Te ío cada ndee iní-ndó sá dúcáⁿ dândoho ñaha Yá Ndiöxí xii-ndo, chi quide-gá sá cúu-gá Tàtá-ó. Te ñà túú ní ñⁿ tée cùu tátá te cachí-ó sá ñà túú sànu ichi-dé cue déhe-dé nàcuáa tàú-xi cunduu. ⁸ Te núu Yá Ndiöxí ñà túú dândoho ñaha-gá xii-ndo dàtná dándòho-gá cue ñáyiu càchí-gá cúu

dêhe-gá, te ñá díú dêhe mee-gă cúu-ndó te núu ducaⁿ, chi cùu-ndo datná cue ñáyiú ñá túú cùtnuní yoo cùu tátá-xi. ⁹ Te nchoo sá naha-o sá cùtnàhá ní cuu landú-ó ní sanu ichi ñaha tátá-ó nàcuáa taú-xi cunduú, te ducaⁿ ní xóo canehe-o sá yíñùhu núu-güedê te diu-ni ducaⁿ nèhe-o sá yíñùhu núu-güedê vitna. Te núu ducaⁿ ní sándáa iní-ó tátá-ó, te ío-gá xíní ñùhu-xi quíndáa iní-ó Tátá-ó Dütú Ndiöxi cuendá ducaⁿ ndüu táhú-ó cùndecu-o ndihi-gá ni caa ni quíhíⁿ, chi diu-gá cúu-gă Yaá ní chihí iní-ó. ¹⁰ Te cùtnàhá ní cuu landú-ó, ñá túú títní nduu ni càniha tátá-ó ní sanu ichi ñaha-güedê xii-o nàcuáa ní cuu iní méé-güedê. Te Yá Ndiöxi ducaⁿ dândoho ñaha-gá xii-o sànu ichi ñaha-gá cuendá cúu-xí sã vâha sá cúu-xí-ó, te ducaⁿ quide-gá cuendá nchoo cada ndáá-ó datná quidé mée-gá. ¹¹ Te òré véxi ìⁿ tnúndòho sá cúu-xí-ó te ñá túú cùdíí iní-ó chi dândihú iní ñáhá-xí xii-o. Te nchaa ñáyiú ngúnu ichi sá cuendá nchaa tnúndòho-án te ngüíta-yu quide ndáá-yu, te ío vâha cùu iní-yu ndécú-yu.

Vá dáquèe tihú-ó tnùhu Yá Ndiöxi

¹² Te núu xíáⁿ ío chí ndúcú ndèe-gá canchicúⁿ nihnu-ndo ichi Xítoho Jesucristú, te vá dicó yica cùu iní-ndó càncicúⁿ nihnu-ndo ichi-gá. ¹³ Te cada vâha-ndo cùndecu-ndo ichi-gá cuendá nchaa ñáyiú sàni ìⁿ saní úú iní-xí níhí ndê-yu cundecú-yu ichi-gá te vá ná tñhú iní-yu canchicúⁿ nihnú-yu.

¹⁴ Te nducu-ndo nàcuáa cada-ndo cùndecu vâha-ndo ndihi cue tñaha ñáyiú-ndo, te ío cada vâha-ndo cùndecu-ndo nacuáa cundáá-ndó núú Yá Ndiöxi chí núu vá dúcáⁿ càda-ndo te vá ndúú táhú-ndó cùndecu-ndo ndihi-gá. ¹⁵ Te ío vâha cada cuendá-ndó nàcuáa cada-ndo cùndecu-ndo, chi núu ñáhá te vá chíndèe ñaha-gá Yá Ndiöxi xii-ndo. Te ío vâha cada cuendá tucu-ndo nàcuáa cùndecu-ndo vá cání cuèhé iní-ndó cuendá Yá Ndiöxi, chí núu ducaⁿ na càda-ndo te dava-gă ñáyiú

ndècu ndihi-ndo ichi-gá tñahá-yu ngüíta-yu ducaⁿ càda-yu, te vá cùndecu vâha-gá-ndó ndihí-yu ichi-gá. ¹⁶ Te cada cuendá tucu-ndo sã vã cùndecu-ndo ichi díí iní, te ní vã dáquèe tihú-ndó ní ìⁿ sá cúu cuendá Yá Ndiöxi datná ní quide ndíí Esàú, chí sá cuañaha tátá ndíi-án nduu táhú ndíi ní cùu ní dama ndíi ìⁿ cóhó comidá. ¹⁷ Te nchòhó sa naha-ndo sá cùtnàhá ní cuíni ndíí Esàú cácáⁿ táhú tátá ndíi núú Yá Ndiöxi cuendá nchaa sá ndúú táhú ndíi ní cùu, te ñá túú ní xicáⁿ táhú tátá ndíi núú Yá Ndiöxi nàcuáa cuíni méé ndíi ní cùu. Te ní ndáhyú víhí ndíi, te cuèi ducaⁿ ní quide ndíi dico ñá túú ní ndàcu-gá ndíi nànhí ndíi táhú sã ní dama ndíi comidá.

¹⁸ Te cue ñáyiú isràel ní sátuhá-yu ìⁿ yucu núu càyú ñuhú, te nchòhó ñá túú ndèe ducaⁿ sàháⁿ tuha-ndo ìⁿ yucu núu càyú ñuhú datná ní quide cue ñáyiú-án. Te cùtnàhá ducaⁿ ní sátuhá-yu yucu-án te ní cunee víhi nihíí yucu-án, te ní quene táchí níhi. ¹⁹ Te ní tecú dóho-yu ní cáháⁿ ìⁿ cútú, te ní tecú tucu dóho-yu ní cáháⁿ Yá Ndiöxi ní cáháⁿ ndihi ñaha-gă xii-yu. Te nchaa ñáyiú ní tecú dóho-xi ní cáháⁿ-gá te ní cuíni-yu sá vã cáháⁿ-gá. ²⁰ Te ducaⁿ ní quidé-yu chí ñá túú ní cùndee iní-yu nàcuáa ní cáháⁿ-gá, te duha ní cachí-gá: “Te cuèi ìⁿ quití na yáha xití yucu-a, te cahni-ndo-di ndihi yúú àdi ndihi ìⁿ yutnu puyá”, duha ní cachí-gá. ²¹ Te sá dúcáⁿ ní quide-xi ní xíní-yu xíáⁿ ío ní dáyuhú ñáhá-xí xii-yu. Te tñahá té Moisés ní yùhú-dé, te ní cachí-dé: “Quídi ñaha-xi xii-í sá yùhú-í”, duha ní cachí-dé.

²² Te nchòhó, ñá túú quide-ndo datná ní quide cue ñáyiú-án ní sàháⁿ tuhá-yu yucu-án, dico cada iní-ndó sã sã ní tuha-ndo yucu Sión sá ndécú núú ndécú Yá Ndiöxi, ndihi ñuú-gá ñuú Jerusalén sá cáá àndiu te diu-gă cúu-gă Yaá ndécú nchaa

nduu nchaa quíú. Te ñiu-ni xiáⁿ xĩndecu cuéhé víhí cuè espíritú xínú cuèchi núú-gá²³ chíñùhu ñaha-xi xii-gá. Te nchòhó cúú-ndó cuè ñáiyu cùu cuendá Yá Ndióxi, te ní tnahá tnùhu-ndo ndihí nchaa dava-gá ñáiyu cùu cuendá-gá, ñáiyu yòdo tnuní núú tütú-gá ndécú àndiu, te ñiu-ni ñáiyu-áⁿ cuáñaha-gá xii-yu sá ndúú tãhú-yu. Te nchòhó ní tuha-ndo Yá Ndióxi Yaá cada ndáá yicá cuèchi nchaa ñáiyu. Te cada iní-ndó sá ní tnahá tnùhu-ndo ndihí cue ñáiyu ní quide ndáá ní xĩndecu ichi Yá Ndióxi ñuyíú-a. Te ñáiyu-áⁿ ñà túú tnahí-gá ná cúmãñi-yu vitna ndécú-yu núú-gá.²⁴ Te ní tnahá tnùhu-ndo ndihí Xitohó Jesucristú Yaá ní quide nàcuáa cada Yá Ndióxi ingá núú sá vãha sá cúú-xi nchaa nchoo ñáiyu ndècu ñuyíú-a, chí ní sati níñi-gá te ní xihí-gá núú cùrúxi. Te níñi Xitohó Jesucristú ñà túú ñiⁿ-ni cuu-xi ndihí níñi ndí Àbél, chí ñiu cuendá níñi-gá-áⁿ ní quide càhnu iní Yá Ndióxi nchaa cuèchi-o.

²⁵ Núú xiáⁿ ío cada cuendá-ndó vã dáquèe tihú-ndó tnùhu càháⁿ Yá Ndióxi, chí nchaa ñáiyu ní xĩndecu ndéé sanaha ñucaⁿ ní quidé-yu ní dáquèé tihú-yu tnùhu ní càháⁿ-gá ñuyíú-a sá cúú-xi-yu. Te ñà túú ní càcu-yu chí ní nacháhu-yu sá dúcáⁿ ní quidé-yu. Te uuⁿ-gá tucu nchoo chí vã càcu-o te núú ducaⁿ na dáquèe tihú-ó tnùhu càháⁿ Yá Ndióxi ndéé àndiu sá cúú-xi-ó.²⁶ Te cùtnhá ní càháⁿ Yá Ndióxi ndéé sanaha te ní quidi-xi ñuyíú. Te vitna càchí-gá: “Yúhú quidi tucu-í ingá xito ñuyíú, te ñà díú mèe-ni ñuyíú ducaⁿ quidi-í chí tnahá àndiu quidi-í”, càchí-gá.²⁷ Te sá dúcáⁿ càháⁿ-gá sá ingá xito tucu ducaⁿ càda-gá xiáⁿ cùtnuní sá ncháàndi tihú sá túú ndèhe-o danaa-gá. Te nchaa sá ñà túú ndèe túu quiní-ó ñuyíú-a xiáⁿ vã quidi-xi te ní vã náá-xi.²⁸ Te núú ní cachí Yá

Ndióxi nduu tãhú-ó cùndecu-o chí mee-gá táxi tnuní-gá xiáⁿ, te ní vã quidi-xi te ní vã náá-xi. Te xiáⁿ ío xini ñuhu-xi ndacáⁿ tãhú-ó núú-gá, te yĩñùhu yĩñùhu cunu cuechi-o núú-gá nàcuáa cuu vãha iní-gá, te ducaⁿ cùhuⁿ iní-ó sã ío càhnu cuu-gá.²⁹ Te Tãtá-ó Dütú Ndióxi cúú-gá dàtná ñiⁿ ñuhú chí danàa-gá nchaa sá ñà túú quide nacuáa cuu vãha iní-gá.

13

Nàcuáa tãhú-xi cada-o cuendá cuu vãha iní Yá Ndióxi

¹ Te nchaa nchòhó ñáiyu ndècu ichi Xitohó Jesucristú, vã dáñá ndéé-ndó cùu iní tnahá-ndó nàcuáa ndècu-ndo ichi-gá.² Te cunaha-ndo sá núu lò ñáiyu ñuhu ichi ní quexió-yu vehe-ndo te cuáñaha-ndo vèhe ndetatú-yu, te cuáñaha-ndo sá cáxi-yu. Chí davá-yu ndéé espíritú xínú cuèchi núú Yá Ndióxi ní sáháⁿ vehé-yu ní queheⁿ cuendá-yu te ñà túú ní cùtnuní iní-yu sá díú espíritú xínú cuèchi núú-gá cúú-xi.

³ Te ndacu tucu iní-ndó cuè ñáiyu xixihí vecaá, te cada iní-ndó sá tnahá-ndó yihí-ndo vecaá ndihí-yu. Te ndacu tucu iní-ndó nchaa ñáiyu ío ndòho, te cada iní-ndó sá tnahá-ndó ndòho-ndo ndihí-yu.

⁴ Te nchaa ñáiyu na càchí-yu sá ñiⁿ sá vãha cùu-xi sá ñiⁿ téé ndihí ñiⁿ ñadihí ná nihí tnahá-yu candeca tnahá-yu. Te nchòhó cue téé vã cáni iní-ndó càháⁿ ndihí-ndo ñadihí te núu ñà díú ñadihí-ndó cúú-yu. Te ducaⁿ-ni nchòhó cue ñáiyu ñihí tucu vã cáni iní-ndó càháⁿ ndihí-ndo téé te núu ñà díú yihí-ndo cuu-güedé, chí Yá Ndióxi dandòho-gá nchaa ñáiyu ndècu ichi díú iní.

⁵ Te vã cùhúⁿ iní-ndó mèe-ni díhúⁿ. Te núu nãndi cùu nchaa sá ndécú ndihí-ndo te ñiu-ni nchaa xiáⁿ sa nduu vétu iní-ndó, chí Yá Ndióxi ní cachí-gá: “Ní ñiⁿ nduu vã dáñá nihnu ñaha-í xii-ndo, chí

nchaa-ni nduu chindee ñàha-í", duha ní cachí-gá. ⁶ Te xiáⁿ nõu nchoo nì yuhu ni iní-ó cáháⁿ-ó ñⁿ ñⁿ-o, te cachí-ó:

Yá Ndiõxí cúu-gã Yaá chíndèe ñaha xii-í,
núu xiáⁿ ñá túú yùhú-í cuéi nándi cáháⁿ ñáyiú cada ñàhá-yu xii-í.

Duha cachí-ó.

⁷ Chíndácú iní cue téé ní sanu ichi ñaha xii-ndo ichi Xítohó Jesucristú cue téé ní cáháⁿ tnúhu Yá Ndiõxí núú-ndó, te ío váha chí nácuáha cuèndá nácuáa ní quide nchaa cue téé-áⁿ nì xíndecu-güedé ndéé ní sáá nduu ní xihí-güedé. Te ío quindáá iní-ndó Yá Ndiõxí dátá ní xóo cada cue téé-áⁿ.

⁸ Te dátá-ni ní quide Xítohó Jesucristú ndéé sanaha diu-ni ducaⁿ quide-gá vitna, te diu-ni ducaⁿ càda-gá ndéé núú cuáháⁿ núú vëxi. ⁹ Te vá dáñá-ndó mée-ndo dandahú ñáhá ñáyiú dacáháⁿ ñáhá xii-ndo natuha-ndo ingá ichi, ñáyiú dānehé tnàha ñáyiú-xi nándi sá nì cutúha-yu, te nchaa xiáⁿ ñá túú ñⁿ-ni cáháⁿ-xi ndihi tnúhu sá ndécú ndihi-ndo. Te Yá Ndiõxí chíndèe ñaha-gá xii-o nácuáa níhí ndéé-ó cūndecu-o ichi-gá, te ducaⁿ te cuu-xi sá vāha sá cúu-xí-ó, te ñá díú cuèndá ñⁿ sá xéxi-ó ñihí ndéé-ó ndecu-o ichi-gá. Te dava ñáyiú cachí-yu sá dává nõu comidá cuu caxi-o te dava ñáhá nácuáa níhí ndéé-ó cūndecu-o ichi-gá, dico ñá ndáá sá sá dúcáⁿ vā caxí-ó nchaa nõu comidá níhí ndéé-ó cūndecu-o ichi-gá.

¹⁰ Chi Xítohó Jesucristú ní xihí-gá cuèndá-ó nõu cùrúxí, te nchaa ñáyiú nchìcúⁿ nihnu-ni quide nchaa nacuaa ní quide nchaa dútú nì xinu cuechi nõú Yá Ndiõxí ndéé sanaha, ñáyiú-áⁿ vā cúú tnàhá tnúhu-yu ndihi Xítohó Jesucristú Yaá ní xihí núú cùrúxí sá dúcáⁿ quidè-yu. ¹¹ Chi dútú cúnúu-gá ní xíndecu ndihi cue ñáyiú israhél, téé-áⁿ nì xóo canehe-dé níhí nchaa quiti ní xóo cahni-dé ní xóo quihu

ndéé xití cuàrtú ní cuu íi-gã. Te ducaⁿ nì xóo cada dútú-áⁿ cuèndá cada cahnu iní Yá Ndiõxí nchaa yicá cuèchi ñáyiú, te cuñú nchaa quiti-áⁿ nì xóo cahmi-güedé ñⁿ xio yuhu nõú. ¹² Te ducaⁿ nì yáha Xítohó Jesucristú chi ndéé ñⁿ xio yuhu nõú ní sahi ñaha-güedé xii-gá. Te cuèndá níhí-gã sá nì sati núú cùrúxí núú nì xihí-gá, ní nduu ndoo ní nduu nine iní cue ñáyiú sàndáá iní ñáhá xii-gá. ¹³ Te vitna chí ná túha-o Xítohó Jesucristú te cada ndee iní-ó ndòho-o dátá ní ndòho-gá. ¹⁴ Te ñuyú-a ni ñⁿ xichi ñá túú ndéé cáá ñⁿ nõú cudíi ni caa ni quihíⁿ cuèndá cūndecu-o, dico ducaⁿ-ni ñúhu iní-ó ñⁿ xichi núú ndúú tãhú-ó cūndecu-o ni caa ni quihíⁿ.

¹⁵ Te núu xiáⁿ xini ñúhu-xi sá vā dáñá ndéé-ó chíñúhu-o Dútú Ndiõxí chí Xítohó Jesucristú ní quide-gá nácuáa ndacu-o tnàhá tnúhu-o ndihi Yá Ndiõxí, te òré cáháⁿ ndihi-o-gá te nuu núu ndacáⁿ tãhú-ó nõú-gá. Te nchaa tnúhu cáháⁿ-ó òré cáháⁿ ndihi-o-gã cúu-xi dátá ñⁿ tãhú sã cúu-xí-gã. ¹⁶ Te vá dáñá ndéé-ndó càda-ndo mee-ni sá váha cūndecu-ndo, te ducaⁿ chindee tnaha-ndo ñⁿ ñⁿ-ndo ndihi sá ndécú ndihi-ndo. Te núu ducaⁿ na càda-ndo te cani iní-ndó sá cúu-xí dátá ñⁿ tãhú sã ío váha cūu iní Yá Ndiõxí.

¹⁷ Te quindáá iní-ndó càda-ndo nchaa nacuaa cáháⁿ cue téé yindaha ñaha xii-ndo nacuaa ndecu-ndo ichi Xítohó Jesucristú, chí diu cue téé-áⁿ quidè cuèndá ñáhá-güedé xii-ndo nácuáa cūndecu váha-ndo nõú-gã. Te sáá nduu nàcāni tnúhu-güedé nõú-gã nõu ní quide váha-güedé àdi ñá túú ní quide váha-güedé ní xíndecu ndihi ñaha-güedé xii-ndo. Te núu ducaⁿ na càda-ndo quindáá iní-ndó-güedé te cudíi iní-güedé cūndecu ndihi ñaha-güedé xii-ndo, te vá ndihú iní-güedé. Te núu vá dúcáⁿ càda-ndo te vá cúu-xí sã váha xii-ndo nchaa

sá quidé-güedé sá cúú-xí-ndó.

¹⁸ Te cãháⁿ ndàhú-í núú-ndó sã cãháⁿ ndihí-ndo Yã Ndiõxí cuendá-ndí. Te nchúhú cútñuní ndáá iní-ndí sã ñà túú nã cúmãní-ndí núú Yã Ndiõxí, te ducaⁿ chi ndücu-ndí nãcuáa quide-ndí cundáá-ndí núú-gã. ¹⁹ Te cãháⁿ ndàhú tucu-í núú-ndó sã ño cãcãⁿ tãhú-ndó núú Yã Ndiõxí cuendá sã mée-gã ná cáda te ño ndihí quixi coto ñaha tucu-í xii-ndo.

Tnúhu ndéé núú ní ndihí-ná

²⁰ Te Yã Ndiõxí Yaá quidé cùu váha iní-ó ndècu-o, Yaá-áⁿ ní dándótó-gã Xítóhó Jesucristú. Te Xítóhó Jesucristú-áⁿ cúú-gã dàtná ìⁿ toli ío-gã quéné cãva xito mbéé. Te ducaⁿ sãtnahá-xi cùu-gã cuendá sã ní sati níñi-gã te ní xihí-gã, te ducaⁿ ní cuu cuendá sã ní quide ndáá-gã ndihí Yã Ndiõxí sã cáda-gã ingá núú sã vãha sã cúú-xí nchòo cue ñáyiú ndècu ñuyú-a. Te nãcuáa ní quide ndáá-gã ndihí Yã Ndiõxí te ñiu-ni ducaⁿ càda-xi núú cuaháⁿ núú vèxi. ²¹ Te xicãⁿ tãhú-í núú Yã Ndiõxí sã mée-gã ná chindee ñaha-gã xii-ndo cuendá cada-ndo mēe-ni sã vãha nãcuáa cuñí mée-gã, te mee-gã ná cáda ñaha-gã xii-o nchàa sã vãha sã sání iní-gã. Te ñiu-ni ducaⁿ na tàuchiuⁿ-gã cada Xítóhó Jesucristú sã cúú-xí-ó, duha xicãⁿ tãhú-í núú-gã. Te vitna nchaa-o chí ná cãchí-ó sã ño cãhnu cuu Xítóhó Jesucristú ni caa ni quihíⁿ. Te ducaⁿ na cùnduu.

²² Te cãháⁿ ndàhú-í núú nchòhó ñáyiú ndècu ndihí-í ichi Xítóhó Jesucristú sã cáda cãhnu iní-ndó nãcuáa ndüu nchaa tnúhu cãháⁿ-í dásãhú ñãhã-í xii-ndo, chí ñã túú vai tnúhu chido tnuní-í núú tütú-a sã cúú-xí-ndó.

²³ Te cãchí tnúhu-í xii-ndo sã tē Timùteú tēe ndècu ndihí-o ichi Xítóhó Jesucristú ní cácu-dé ñã túú-gã yihí-dě vecaá. Te núu na quèxio ndihí-dé núú ndécú-í te quixi-í ndihí-dé núú ndécú-ndó quixi coto ñaha-ndí.

²⁴ Te cùñaha-ndo sã ño na càda ndee iní nchaa cue tēe yindaha ñaha xii-ndo nacuáa ndècu-ndo ichi Yã Ndiõxí. Te ducaⁿ cùñaha tucu-ndo xii nchaa dava-gã ñáyiú cùu cuendá-gã sã ño na càda ndee iní-yu. Te cue ñáyiú nacióⁿ Italiá ñáyiú ndècu ndihí-o ichi-gã cãchí-yu sã ño cada ndee iní-ndó. ²⁵ Te Yã Ndiõxí ño na chindee chitúu ñaha-gã xii-ndo nchàa-ndo. Te ducaⁿ na cùnduu. Te ío chí cáda ndèe iní-nã vitna.

TUTÚ NÍ CADÚHA TÉ SÀNTIAÚ

Té Sàntiaú cadúha-dé tutú quíhíⁿ ndaha ñáyiú isràèl nchíté nuu ñihí ñuyúú

¹ Yúhú té Sàntiaú xínú cuèchi-í núú Yá Ndióxi ndihí núú Xítohó Jesucristú, te tée-í tnúhu-a quide ndee iní ñáhá-í xii nchòhó ñáyiú isràèl nchíté nuu ñihí ñuyúú-a.

Yá Ndióxi táxi-gã sá xini tnùní-ó

² Te nchòhó ñáyiú ndècu ndihí-í ichi Xítohó Jesucristú, ío cudíí iní-ndó, cundecu-ndo cuéi náí cùu sá úhú vèxi cuèndá-ndó, ³ chi ducaⁿ te cutnùní iní-ndó sá sàndáá ndisa iní-ndó-gã, te cunduu càhnu iní-ndó cuéi náí ná yáha-ndo. ⁴ Te cunduu càhnu-ni iní-ndó te ducaⁿ te cuu-ndo ñáyiú váha, te cundáá-ndó núú Yá Ndióxi, te ducaⁿ te ñá túú-gã ná cumání-ndó núú-gã.

⁵ Te núu cùmání sá xini tnùní-ó, te cacaⁿ-ó núú Yá Ndióxi te mee-gã taxi-gã, chi ío váha iní-gã, te ñá túú cùnini iní-gã núú-ó. ⁶ Te ni yùhu ni iní-ó cacaⁿ-ó núú-gã, te quindáá ndisa iní-ó sá táxi-gã sá cúmání quini tnùní-ó, te vá cání ñⁿ caní úú iní-ó. Chi nchaa ñáyiú sàni ñⁿ sàni úú iní-xi cùu-yu dàtná ndute làmár cuáháⁿ-xi duha cuáháⁿ-xi dàcáⁿ nàá-xi òré quéné táchí. ⁷ Te nchaa ñáyiú ducaⁿ sàni iní-xi, te vá cání iní-yu sá ñihí-yu sá xicáⁿ-yu núú-gã. ⁸ Chi nchaa ñáyiú sàni ñⁿ sàni úú iní-xi ñá cùtnùní iní-yu ndédacàa sá sání iní-yu cadá-yu.

⁹ Te nchaa ñáyiú ndàhú ñáyiú ndècu ichi-gã, xini ñuhu-xi ñá túú-gã ná caní iní-yu, mee-nã cudíí iní-yu, chi Yá Ndióxi chindèe ñaha-gã xíí-yu. ¹⁰ Te nchaa ñáyiú cuica xini ñuhu-xi cundecu váha iní-yu núú Yá Ndióxi cuéi náí ná yáha-yu. Chi ñáyiú-áⁿ cùu-yu dàtná itá nchaa cùhú sá ñá túú cùdíí

naha. ¹¹ Chi òré ní cuu níhi cahni nchíanchii, te ní dádií-ni-xi nchaa cùhú cuíí-áⁿ te ní cóyo-ni nchaa itá-xi, te ñá túú-gã cáá vìi. Te ducaⁿ sàtnahá-xi cùu ñáyiú cuica chi núú chíúⁿ-ni-yu xihí-yu.

Nchaa ñáyiú quide cahnu iní-xi nchaa sá yáha-yu

¹² Te váha táhú nchaa ñáyiú quide cahnu-ni iní-xi cuéi nándí sá yáha-yu ndécú-yu ichi Yá Ndióxi, chi òré ná ndihí nchaa xíáⁿ yáha-yu, te cuáñaha Yá Ndióxi ñⁿ coróná váha vìhi cundecu ndihí-yu, te ndáá chi ducaⁿ càháⁿ Yá Ndióxi sá táxi-gã xii nchaa nchoo ñáyiú ñuhu iní ñáhá xii-gã. ¹³ Te nchaa ñáyiú sàni iní-xi cada nándí sá cuèhé sá dúhá, te vá cání iní-yu sá Yá Ndióxi táuchiuⁿ-gã ducaⁿ cadá-yu, chi Yá Ndióxi ñá quíú te caní iní-gã cada-gã ñⁿ sá cuèhé sá dúhá, te ni ñá túú tàuchiuⁿ-gã sá dúcáⁿ cadá-yu. ¹⁴ Te cuíni-yu cadá-yu nchaa sá cuèhé sá dúhá chi ducaⁿ vèxi iní-yu. ¹⁵ Te nchaa ñáyiú ío ñuhu iní nchaa sá cuèhé sá dúhá te quidé-yu, te núu na càda-ní-yu te cuíta nihnú-yu.

¹⁶ Te nchòhó ñáyiú ío cùu iní-í ndécú ndihí-í ichi Xítohó Jesucristú, vá dáñá-ndó mée-ndo dandahú ñáhá ñáyiú xii-ndo. ¹⁷ Chi nchaa sá váha vèxi-xi núú Yá Ndióxi Yaá ndécú àndiu, chi diu mee-gã ní cadúha-gã àndiu ndihí nchaa chódiní, ndihí yóó, ndihí nchíanchii. Te Yá Ndióxi ñá túú ndí queheⁿ ndí queheⁿ-gã sá cání iní-gã, te ni ñá túú cùu-gã dàtná ñⁿ cuándahú cuáháⁿ-xi duha cuáháⁿ-xi dàcáⁿ, chi ñⁿ-ni sá sání iní-gã. ¹⁸ Te Yá Ndióxi ní cuíni-gã sá cùú-ó dèhe-gã, te ndáá sá cùú-ó dèhe-gã chi sàndáá iní-ó tnúhu-gã. Te nchoo ñáyiú sàndáá iní-xi tnúhu-gã cùnùu-gã-ó chi ní nduu-o dèhe-gã.

Ichi ndáá cuíti

¹⁹ Te nchòhó ñáyiú ío cùu iní-í ndécú ndihí-í ichi Xítohó Jesucristú, cundedóho-ndo ñⁿ tnúhu

na càháⁿ-í-a. Te cuini-í sá cùndecu túha-ndo cùndedóho-ndo tnúhu Yá Ndióxi, te cani váha iní-ndó nàcuáa cáháⁿ-ndó, te cunduu càhnu iní-ndó te vá cùdéeⁿ-ndó. ²⁰ Chi núu na cùdéeⁿ-ó te ñá túú quide váha-o núú Yá Ndióxi. ²¹ Te dañ-ndo nchàa sá cuèhé sá dúhá ío ñuyiú-a. Te quindáá iní-ndó tnúhu Yá Ndióxi ndécú ndìhi-ndo, te vá cùnduu sáá iní-ndó, te ducaⁿ te naníhí tàhú-ndó.

²² Te quindáá iní-ndó tnúhu-gá te vá cuendá-ni cùndedóho-ndo, chi núu na cùndedóho-ndo te vá tní-ndó ñá, te dicó-ni dandahú-ndó mèe-ndo te vá nánihí tàhú-ndó. ²³ Chi nchaa ñáyiú dicó-ni sàcùndedóho tnúhu-gá te ñá túú sàndáá iní-yu, ñáyiú-áⁿ cùú-yu dàtná ñá ñáyiú sàcùndehé-ni núú-xi núú yütátá. ²⁴ Chi nini ndehé-yu ní xiní-yu núú-yu, te ní xócání-yu te ní nacuanaa-ní-yu nàcuáa càa núú-yu. Te ducaⁿ sàtnahá-xi cùu ñáyiú sàcùndedóho tnúhu Yá Ndióxi, te ñá túú tní-yu. ²⁵ Te nchaa ñáyiú dàcuaha ndisa tnúhu ní dándöo Yá Ndióxi ñihnu-ní-yu ichi-gá, chi ñá díú ñá sá vèe cùu-xi. Te ñáyiú-áⁿ ñá túú dicó-ni sàcùndedóho-yu chi quide ndáá-yu núú-gá, te cùdí iní-yu xíndecú-yu.

²⁶ Te nchaa ñáyiú càchí sá ndécú ichi ndáá te cùtexínu-ni càháⁿ-yu, te xiáⁿ dicó-ni dandahú-yu mèe-yu sá ndécú-yu ichi ndáá. ²⁷ Te núu ndècu-o ichi ndáá cuiti ichi Dútú Ndióxi, te chindee-o nchàa ñáyiú ní ndóo ndàhú, ndìhi ñáyiú quèe ndécú ndìhi tnúndòho tnúhu ndàhú, te vá cádá-ó nãndi sá cuèhé sá dúhá ío ñuyiú-a.

2

Ñánuu-ni cùu iní-ó nchàa tnaha ñáyiú-o

¹ Te nchòhó ñáyiú ndècu ndìhi-í ichi Xítohó Jesucristú Yaá cùnùu, ñánuu-ni càháⁿ ndìhi váha-ndo nchàa tnaha ñáyiú-ndo. ² Te núu núú nátàcá-ndó chìñuhu-ndo

Yá Ndióxi ní sáá ñáⁿ téé ío váha càa dóo ñihnú-dé, te ní sáá tucu ñáⁿ téé ñihnu dóo ndàhú, ³ te núu téé ñihnu dóo vãha-ni-áⁿ nehé-ndó sá yíñuhu núú-dé, te taxinucóo-ndo-dé ñáⁿ núú xilé váha, te téé ndàhú-áⁿ daxòcòo-ndo-dé ñáⁿ xio àdi canucóo-ndo-dé núú ñúhú, ⁴ te núu ducaⁿ na càa-ndo te ñá túú quide váha-ndo. Chi ñáⁿ-ni-dé cùú iní-ndó, te ñáⁿ-dé ñá túú cùu iní-ndó.

⁵ Te nchòhó ñáyiú ío cùu iní-í ndécú ndìhi-í ichi Xítohó Jesucristú, chí cùndedóho tucu tnúhu na càháⁿ-í-a. Yá Ndióxi càháⁿ-gá vãi ñáyiú ndàhú cuendá tnahá tnúhu ndìhi ñahá-yu xii-gá, te ndècu váha-gá-yu dàcúxí ñáyiú cuica ñáyiú ñá túú sàndáá iní tnúhu-gá, chi ní cachí-gá sá ncháá ñáyiú na cùu iní ñahá xii-gá nduu táhú-yu cundecú-yu ndìhi-gá ni caa ni quíhíⁿ. ⁶ Te nchòhó, ñá túú nèhe-ndo sá yíñuhu núú ñáyiú ndàhú, chi núú ñáyiú cuica-ni nèhe-ndo sá yíñuhu. ¿Te náa ñá cùtnùní iní-ndó sá ñáyiú cuica dandoho ñaha-gá-yu xii-ndo, te càndeca ñahá-yu sàháⁿ núú cuè téé cùchiuⁿ-áⁿ? ⁷ Te ñánu-ní-yu ío càháⁿ cuèhé-yu cuendá Xítohó Jesucristú, te nchòhó sa ní nduu-ndo dèhe-gá.

⁸ Te ñáⁿ ndudú cùnùu-gá ní càháⁿ Yá Ndióxi ní ngódó tnùní núú tütú-gá càchí-xi sá cùú iní-ó tnaha ñáyiú-o dàtná cùú iní-ó mèe-o. Te núu ducaⁿ na càa-o te quide váha-o. ⁹ Dico núú ñá túú cùu iní ñánuu-o cuè tnaha ñáyiú-o, te cuu cuéchi xii-o chi ñá túú quide-o nacuaá càháⁿ Yá Ndióxi. ¹⁰ Te núu ñá ñáyiú ndàunihnu ñáⁿ sá càháⁿ Yá Ndióxi, te dava-ni quidé-yu ñá, te ñáyiú-áⁿ ñá túú quidé-yu nàcuáa càháⁿ ndudú Yá Ndióxi. ¹¹ Te Yá Ndióxi ní cachí-gá sá tée ndècu ñadìhi-xi vá càháⁿ ndìhi-dé ingá ñadìhí. Te ñánu-ni-gá ní cachí-gá sá vá cáhmí-ó tnaha ñáyiú-o. Te cuèí ñá túú càháⁿ ndìhi-o ingá ñadìhí, te núu sàhni-o tnaha ñáyiú-o te ñá túú quide-o

nacuáa cãháⁿ ndudú Yã Ndiõxí, ¹² Te nchoo xini ñuhu-xi cãháⁿ-ó tñuhu váha te cada ndáá-ó, chi ñá díú ñⁿ sá vëe cùu-xi sá ní cachí Yã Ndiõxí cada-o. Te mee-gã ní cachí-gã sá cáda ndáá-gã cuèchi-o na sàá nduu. ¹³ Te nchaa ñáyiú ñá túú cùndahú iní tnàha ñáyiú-xi, te vá cùndahú iní ñáhá-gã xií-yu na sàá nduu càda ndáá-gã cuèchi-yu. Te nchaa ñáyiú cùndahú iní tnàha ñáyiú-xi te Yã Ndiõxí cùndahú iní ñáhá-gã xií-yu na sàá nduu-ãⁿ.

Quindáá iní-ó Yã Ndiõxí te cada váha-o

¹⁴ Te nchòhó ñáyiú ndècu ndihí-í ichi Xítohó Jesucristú, te núu cãchí-ó sã sãndáá iní-ó Yã Ndiõxí te ñá túú quide-o sá vãha, te ñá túú ndèé nándihí-xi, chi vá nánihí tãhú-ó te núu ducaⁿ na càda-o. ¹⁵ Te núu ndèhe-o ñⁿ tnaha ñáyiú-o ñá túú dõõ-yu àdi ñá túú sá cùchitõ-yu, ¹⁶ te xãhaⁿ-o: “Núhú-n te nducu-n dõõ cuihu-n te nducu-n sã cáxi-n”, xãhaⁿ-o, te ñá túú nã sãñaha-o, te sá dúcãⁿ quide-o te ñá túú quide váha-o. ¹⁷ Te núu cãchí-ó sã sãndáá iní-ó Yã Ndiõxí te ñá túú quide váha-o ndècu-o, te vèdana nãndihí-xi.

¹⁸ Te íó ñáyiú cãchí-yu sá sãndáá iní-yu Yã Ndiõxí, te íó ñáyiú cãchí-yu sá méé-ní sã vãha quide-yu. Te yúhú cãchí-í sá nõu ñá túú quide-o sá vãha, te ñá túú sãndáá iní-ó Yã Ndiõxí. Te nchoo quide-o sá vãha núu xiãⁿ cùtnùní iní-ó sã sãndáá iní-ó-gã. ¹⁹ Te íó ñáyiú cãchí sá ñⁿdii-ni Yã Ndiõxí ndécú, te váha-ni cãháⁿ-yu. Te tnàhá yucu ñãvãha ndihí nchaa espíritú cùndihí-xi xiní-xi sá ndécú ñⁿdii-ni Yã Ndiõxí, te yúhú-xi dico ñá túú tnè-xi tñuhu-gã. ²⁰ Te íó ñⁿ díquí-ó te núu na cãchí-ó sã sãndáá iní-ó Yã Ndiõxí, te vá cáda-ó sã vãha. ²¹ Te ñani tnàhá-ó ndii Àbrahám téé ní xíndecu ndéé sanaha ñí ngúndecu váha ndii núú Yã Ndiõxí, chi ní xito ndéé ñáhá-gã xii ndii núu ndisa sá

cãhni ndii déhe ndii té Isàác nduu tãhú-gã ní cùu, te dàvá-áⁿ ní cutnùní iní-gã sá ño sãndáá iní ñáhá ndii xii-gã, núu ñá ní dàña-gã cahni ndii déhe ndii. ²² Te nàha-o sá ndii Àbrahám ñá díú-ní sã méé-ní sã ní sãndáá iní ñáhá ndii xii-gã, chi ní tnè ndii tñuhu-gã. ²³ Te ducaⁿ ní quee ndáá-xi nacuáa cãháⁿ-xi núú tütú Yã Ndiõxí núú cãchí-xi: “Ndii Àbrahám ní sãndáá iní ndii ní quide ndii nchaa nacuáa ní xãhaⁿ Yã Ndiõxí, te ní ngúndecu váha ndii núú-gã, te ní cachí-gã sá cúú ndii ñⁿ téé ío váha tnàhá tñuhu ndihí-gã”, duha cãchí-xi núú tütú-gã.

²⁴ Te xiãⁿ cùtnùní iní-ó sã ñá díú mèe-ni sá quindáá iní-ó Yã Ndiõxí, chi núu na càda-o nacuáa cuu váha iní-gã te ngúndecu váha-o núú-gã ²⁵ dàtná ní quide-gã tá Ràháb ñⁿ ñadihí ní xíndecu ndéé sanaha, chi xíchí-ãⁿ ní xíndecu-xi ichi díú iní, dico ní tuha-xi ichi Yã Ndiõxí te ní ngúndecu váha-xi núú-gã, chi ní chindee-xi cuè téé isràel cue téé ní xica chiúⁿ-gã, te ní sanu ichi ñaha-xi xii-güedé ñⁿ ichi núú vã nánihí ñáhá cuè téé cùu úhú iní ñáhá xii-güedé. ²⁶ Te nchaa ñáyiú cãchí sá sãndáá iní Yã Ndiõxí, te ñá túú quide-yu nacuáa cãháⁿ-gã ñáyiú-ãⁿ cúú-yu dàtná ñⁿ ñáyiú ní xihí. Chi ñá túú-gã ndíxí tũu iní-yu nchaa sá cuèhé sá dúhá quide-yu. Duha sãtnahá-xi cùu nchaa ñáyiú ñá túú cuení tnè tñuhu cãháⁿ Yã Ndiõxí.

3

Nacuáa quide yaa-o

¹ Te nchòhó ñáyiú ndècu ndihí-í ichi Xítohó Jesucristú, vá nchãá-ndó càni iní-ndó cùu-ndo mestrú dacuãha-ndo ñáyiú tñuhu Yã Ndiõxí chi íí cáá-xí. Chi na quítnahá nduu nacuãha-o cuendá núú-gã, te núu ñá túú ní quide ndáá-ó ñá, te vá cúú vãha iní-gã núú-ó. ² Te nchaa-o ño cuèhé sã ñá túú vãha quide-o. Te nchaa ñáyiú ñá túú cãháⁿ tñuhu cuèhé tñuhu duha cúú-yu ñáyiú ñá túú

nã cúmãní chi ío ndáá quidě-yu. Te xini-yu cotnii-yu mée-yu, te quide váha-yu núu Yá Ndióxi. ³ Te dàtná cuini-ndó cùu ìn quiti te núu na chihi-o frenú yuhu-di, te ducaⁿ sãtnahá-xi cùu ñáyiú sãcótnei mee-xi, chi ñá túú càháⁿ-yu tnúhu cuèhé tnúhu duha. ⁴ Te dàtná cuini-ndó cùu barcú cuèi ñãhnu vihi-xi, dico òré quéné ñihi táchí te tũdaha-xi ìn xio, dico téé dàcaca ndacu-dé dáquihíⁿ-dé-xi ndihi ìn yutnu sã dánani-güedé tímú ndàa núu càchí iní-dé quihíⁿ-xi. ⁵ Te ducaⁿ cùu tucu yaa-o chi ío lĩhi-xi dico ío cuèhé tnúhu càháⁿ-ó ndihi-xi. Te ducaⁿ-ni sãtnahá-xi cùu tucu sãlúhá ñũhú chi sãhmi-xi ìn yucu. ⁶ Te ñiu-ni ducaⁿ sãtnahá-xi cùu yaa-o chi ío cuèhé tnúhu cuèhé tnúhu duha càháⁿ-ó ndihi-xi, te dàcuíta ñihnu ñaha-xi xii-o. Te ío cuèhé cuèchi quide-o ndihi-xi cuendá sã ñuyúú-a ñũhu tnahá ñũhú tñi yucu ñãváha dàticã ñihnu ñaha-xi. ⁷ Te ndacu-o càda masú-ó nchàa núu quiti ío ñuyúú cuèi quiti dééⁿ quiti xica núu ñũhú, te cuèi quiti ndàva, te cuèi cóó, te cuèi quiti ñũhu xití ndute làmár, chi ducaⁿ quide dava cue téé ñuyúú-a. ⁸ Dico yaa-o chi vá yõ ìn ndàcu cada masú ñáhá xii-xi nacuáa càháⁿ-ó mée-ni tnúhu váha ndihi-xi, chi mee-ni tnúhu cuèhé tnúhu duha cùnũu-gã càháⁿ-ó ndihi-xi. Te cùu-xi datná ìn venènú chi dàti-u-xi iní-ó. ⁹ Te ñiu-ni ndihi yaa-o quide cahnu-o Dútú Ndióxi Yaá cúu Tãtá-ó, te ñiu-ni ndihi yaa-o caháⁿ úhú-ó cuè tnahá ñáyiú-o. Te xini ñũhu-xi vá dúcãⁿ càda-o, chi mee-gã ní chihi-gã sã xini tnùn-ó ndihi iní-ó, dàtná cáa mée-gã ñũhú iní-gã. ¹⁰ Te ñiu-ni yuhu-o quèe tnúhu váha càháⁿ-ó, te ñiu-ni yuhu-o quèe tnúhu cuèhé tnúhu duha. Te nchòhó ñáyiú ndècu ndihi-í ichi Xitohó Jesucristú cunaha-ndo sã ñã túú ndũu váha-xi ducaⁿ càda-o. ¹¹ Te ñã túú xini-ndó

sã ìn núu quèé ñihni ndute, te quèe ndute váha te quèe ndute úa-ãⁿ. ¹² Te nchòhó ñáyiú ndècu ndihi-í ichi Xitohó Jesucristú, te ñã túú xini-ndó sã ìn yutnu ngúxí, te cùuⁿ aceitúná, àdi xini-ndó sã ìn yoho yaha stilé te cùuⁿ ngúxí. Te ducaⁿ cuèi ìn núu quèé ñihni ndute, vá cúu quèe ndute váha te quee ndute úhá. Te ducaⁿ sãtnahá-xi cùu yuhu-o chi vá cúu càháⁿ-ó tnúhu váha te càháⁿ-ó tnúhu cuèhé tnúhu duha.

Nchaa sã váha xini tnùn-ó taxi Yá Ndióxi

¹³ Te núu ndècu ñáyiú túha tnuú-ndó ñáyiú cùnuní iní-xi, te xini ñũhu-xi mee-ni sã váha cadá-yu, ducaⁿ te cutnùn iní-ó sã túha ndisá-yu, te vá cadá càhnú-yu mée-yu. ¹⁴ Te núu nchoo cuèdú iní-ó te cuini-ó cùnũu-o núu tnàha ñáyiú-o, te vá càchí-ó sã túha-o, chi ñã túú quide ndáá-ó te núu ducaⁿ ña càda-o. ¹⁵ Chi ñã díú xĩãⁿ ní dànehé ñáhá Yá Ndióxi, chi ñuyúú iha ní cacu ñihnu-xi cuendá sã yũcu ñãváha dàcahu iní ñáhá-xi. ¹⁶ Te núu ndécú ñáyiú cuèdú iní ñáyiú cùn-ó cunuu, te yacãⁿ mee-ni ndãhú nãá xĩndecú-yu, te ñã túú quide váha-yu, chi mee-ni nchàa sã cuèhé sã dúhá quidè-yu. ¹⁷ Te núu ní taxi Yá Ndióxi sã xini tnùn-ó, te cada váha-o, te càháⁿ ndihi váha-o nchàa tnahá ñáyiú-o, te tñi-o tnúhu váha càháⁿ-yu, te cundãhú iní-ó-güè-yu te chindee-õ-yu, te vá cáni ìn cani úú iní-ó, te ío cunduu ndáá iní-ó. ¹⁸ Te núu cuini-ó ñã túú ñã cuu cundecu-o ñuyúú-a, te cada váha-o sã cúu-xi tnàha ñáyiú-o cuendá sã ñã túú ñã cuu cundecu-o ndihi-yu. Te ducaⁿ te nguĩnchicúⁿ dava-gã tnàha ñáyiú-o càda váha-yu.

4

Vá cúu cundecu-o ichi Yá Ndióxi te cada-o nãndi sã cuèhé sã dúhá

¹ ¿Te xini-ndó ñã cuendá nãá ñáyiú te xĩsahni tnàhá-yu-ãⁿ? Te

nàá-yu sá tn̄hu cuédú ínì, chi ðiu-ni xiáⁿ ñúhú ínì-yu, te ñá túú ndècu váha ínì-yu. ² Chi cuínì-yu cundecu ndìhì-yu ìⁿ sá ñà túú ndècu ndìhì-yu, te ñá túú nihì-yu núu xiáⁿ x̄ccuu cuédú ínì tn̄há-yu, te x̄ccuèhé tn̄há-yu, te càni tn̄há-yu, te x̄sahni tn̄há-yu. Te ñá túú nihì-yu sá cuínì-yu chi ñá túú x̄icáⁿ-yu núu Yá Ndióxi. ³ Te cuèi x̄icáⁿ-yu ìⁿ sá cuínì-yu núu-gã te ñá túú sãñaha-gã, chi ñá túú x̄icáⁿ-yu ìⁿ sá cúú x̄ii-yu sá váha, chi ìⁿ sá ná ndìhì-yu núu cádá-yu nchaa sá cuèhé sá dúhá x̄icáⁿ-yu, núu xiáⁿ ñá nihì-yu. ⁴ Te nchaa ñáyiu ducaⁿ x̄iquide ío cùu sáá ínì-yu núu Yá Ndióxi. Te naha-ndo sá ncháá ñáyiu cùd̄íí ínì-xi cundecu ichi cuèhé ichi duha cùu úhú ínì-yu Yá Ndióxi, chi vá cúú cùndecu-o ichi cuèhé ichi duha, te cundecu-o ìchi-gã. ⁵ Te ñá túú ðìò ducaⁿ càháⁿ-xi núu tütú Yá Ndióxi núu cãchì-xi: “Yá Ndióxi ní taxi-gã Espiritú-gã ndécú ndìhì-o. Te Espiritú-gã-áⁿ cuínì-xi sá méé-ní-gã cuhuⁿ ínì-ó”, duha cãchì-xi núu tütú-gã. ⁶ Te Yá Ndióxi ío chindee ñaha-gã cuèndá cada ndáá-ó núu-gã dàtná cãchì tucu-xi núu tütú-gã núu cãchì-xi: “Yá Ndióxi ñá túú cùu váha ínì-gã núu nchàa ñáyiu quide cahnu mee-xi, dico chindee-gã cue ñáyiu ndàhú ínì-xi”, duha càháⁿ-xi núu tütú-gã. ⁷ Te cada-ndo nàcuáa càháⁿ Yá Ndióxi. Te vá cádá-ndó nàcuáa cuínì yucu ñávãha, ducaⁿ te xóo cóo ndéé ñáhá-xi x̄ii-ndo. ⁸ Te tñi-ndo tn̄hu càháⁿ Yá Ndióxi te cundecu ndìhì ñaha-gã xii-ndo. Te nchaa nchòhó ñáyiu ndècu ichi cuehé ichi duha dañã-ndo ìchi-áⁿ te cada váha-ndo. Te nchaa nchòhó ñáyiu sàni ínì cunu cuechi núu Yá Ndióxi te quide-ni-ndo nchaa sá cuèhé sá dúhá, te ñá túú quide váha-ndo núu ducaⁿ, chi x̄ini ñuhu-xi sá càcãⁿ-ndó núu Yá Ndióxi sá ná ndádá ndòo ndada nine-gã ínì-ndó. ⁹ Te ndixi cuèchi ínì-ndó nchàa sá quidé-ndó

ndéé ndáhyú ndisa-ndo sã ndìhú ínì-ndó, te ñá dúú dà cud̄íí ínì-ndó. ¹⁰ Te náhmá-ndó núu Yá Ndióxi nchaa sã ní quide-ndo, te ngündecu váha-ndo núu-gã.

Vá càháⁿ-ó nchàa sá quidé tn̄aha ñáyiu-o

¹¹ Te nchòhó ñáyiu ndècu ndìhì-í ichi Xitohó Jesucristú, vá cuátñuhu tnaha-ndo, chi nchaa ñáyiu sãtnuhu tnaha ðicó-ni ndàa nuú-yu ndèhe tnaha-yu, te ñá túú càháⁿ váha-yu cuèndá tn̄hu Yá Ndióxi sá sánú ichi ñaha x̄ii-yu nàcuáa cundecú-yu, chi dàquee t̄ih̄u-yu tn̄hu-áⁿ. Te núu cãchì-ndó sã ñà túú càháⁿ váha tn̄hu Yá Ndióxi, te xiáⁿ queé-xi sã ñà túú sãndáá ínì-ndó tn̄hu càháⁿ-gã, te cuínì-ndó cùnūu tn̄hu-ndo núu tn̄hu-gã. ¹² Te mee Yá Ndióxi ní cachi-gã nàcuáa cada-o, te ðiu-ni mee-gã càháⁿ-gã te núu ní quide váha-o, àdi ñá túú ní quide váha-o. Te ðiu-ni mee-gã dàcãcu nihnu ñaha-gã xii-o núu úhú núu ndàhú, te ðiu-ni-gã daquih̄iⁿ ñáhã-gã xii-o núu úhú núu ndàhú-áⁿ te núu vá cádá váha-o. Te nchoo ñà túú nã cúú-ó, te núu mee-ni nchàa sá quidé tn̄aha ñáyiu-o cùndehe-o.

Ñá túú cùtnuni ínì-ó nãsa tũndaá-ó ìngã nduu

¹³ Te dava nchòhó cãchì-ndó sã vítná àdi tneé quih̄iⁿ-ndó ìⁿ ñúu, te yàcãⁿ cundecu-ndo ìⁿ cuiá cada-ndo ìⁿ ndáhú te níhì-ndó ðih̄iⁿ. ¹⁴ Te ní ñã x̄ini-ndó nã cúú sã yãha-ndo vítna àdi tneé. Te nchoo cùu-o datná ìⁿ vícò núhú, chi vícò-áⁿ tn̄avíí ndéhé-ó te tna tnaa-gã sa ní ndóñh̄uhú-xi. Ducaⁿ sãtnahã-xi cunu nchoo chi ìⁿ úú nduu duha v̄exi-o ñuyíú-a te ndoñuhu-o. ¹⁵ Te núu sãndáá ínì-ó Yá Ndióxi te duha càháⁿ-ó: “Te núu Ndióxi ná cãchì-gã sã cùndecu tnaa-o ñuyíú-a te cada ch̄iⁿ-o”, duha cachi-ó. ¹⁶ Dico mee-ndo ch̄i ío ñiá ínì-ndó cuínì-ndó cùnūu tn̄hu-ndo núu Yá Ndióxi, te ñá túú

ndùu váha-xi sá dúcáⁿ quide-ndo.
 17 Te núu xini-ó cada-o sá váha te
 ñá túú quide-o, te cùu-xi ìⁿ cuéchi
 núú-gã.

5

*Tnúhu sá dátũha ñaha xii nchaa
 ñáyiu cuica ña túú sãndáá ini tnúhu
 Yã Ndiõxí*

¹ Te nchòhó ñáyiu cuica ñáyiu
 cuihna ini-xi cundedóho-ndo tnúhu
 na càháⁿ-i-a. Vitna nguíta-ndo
 ndihú ini-ndó, te ndáhyú víhi-ndó,
 chi quixi ìⁿ tnúndòho cuendá-ndó
 te ndoho víhi-ndo. ² Te nchaa sá
 ndécú ndihi-ndo ndihi cuita tiu
 quihⁿ, te quee tíquidi dóó-ndó,
³ te díhúⁿ-ndó caxi cudi ñuhu.
 Te xiáⁿ cuita naquiní ndeé-ndó
 tnúndòho sá ña túú quide váha-ndo.
 Te ndihi-ndo ndihi díhúⁿ-ndó
 sá ñi taxúha-ndo, chi vitna
 sa ta cùyatni sáá nduu ndihi
 ñuyúⁿ-a. ⁴ Te nchaa cue téé
 ní quide chiuⁿ núú chíuⁿ-ndó
 ñi ndatnúhu-ndo ndihi-güedé
 nàcuáa cháhu-ndo-güedé ní cùu,
 te ña túú ní cháhu-ndo-güedé
 nàcuáa ní xáhaⁿ-ndo xii-güedé,
 núú xiáⁿ ío ndécuéchi-ndo. Te Yã
 Ndiõxí Yaa ndécú àndiu ní tecú
 dóho-gá nàcuáa càháⁿ-güedé sá ñi
 dándahú-ndó-güedé. ⁵ Te nchòhó
 ñáyiu cuica, sá ndécú váha-ni-ndo
 cundee ini-ndó, núu quide-ni-ndo
 nchaa sá vèxi ini-ndó. Te cùu-ndo
 datná ìⁿ quiti nùcũhnu mee-ni
 xèxi-di, te sáá nduu sàhni-güedé-di.
 Te ducaⁿ sãtnahá-xi cùu nchòhó
 chi ndècu váha-ndo vitna, te sáá
 ìⁿ nduu nàcháhu-ndo nchaa sá
 quidé-ndó núú Yã Ndiõxí te núu vá
 quindáá ini-ndó-gã. ⁶ Te quide úhú
 ini-ndó sàhni-ndo cue ñáyiu quide
 ndáá núú Yã Ndiõxí, te ña túú nã
 quidé-yu.

*Cunduu càhnu ini-ó te càháⁿ
 ndihi-o Yã Ndiõxí*

⁷ Te nchòhó ñáyiu ndècu ndihi-í
 ichi Xitohó Jesucristú, cada ndee-ni
 ini-ndó cùndetu-ndo ndéé ná quixi
 tucu-gã ñuyúⁿ-a, te cada-ndo datná

quidé nchaa ñáyiu chihí tatá chi
 sácùndetú-yu ndéé cúúⁿ dáú te
 chihí-yu. Te cùndee-ni ini-yu
 sácùndetú-yu ndéé cúúⁿ-gã dáú
 te cùu itú-yu, te ndùdíⁿ ini-yu.
⁸ Te ducaⁿ càda nchòhó tucu
 cada ndee ini-ndó cùndetu-ndo,
 chi sa ta cùyatni nduu quixi
 tucu Xitohó Jesucristú. ⁹ Te
 duha ndùu tnúhu càháⁿ-í núú
 nchòhó ñáyiu ndècu ndihi-í ichi
 Xitohó Jesucristú, vá ndácáⁿ cuéchi
 núú tnáhá-ndó te núu nása cùu
 ndecu-ndo, chi ña cuéhé-gá nduu
 cùmání te quixi Cristú nacuaca
 ñaha-gã xii-ó cùndecu-o núú Yã
 Ndiõxí, te mee-gã cada ndáá-gã
 cuéchi-o. ¹⁰ Te nchòhó ñáyiu ndècu
 ndihi-í ichi Xitohó Jesucristú, ndacu
 ini-ndó nàcuáa ní quide nchaa
 cue téé ní xóo càháⁿ tnúhu Yã
 Ndiõxí ndéé sanaha sá ío càhnu
 ní xínduu ini-güedé cuéi nándi ní
 ndoho-güedé. ¹¹ Te cùtnuní ini-ó
 sá cúú-ó ñáyiu ío váha táhú-xi te
 núu na càda càhnu ini-ó nchaa sá
 ná yáha-o cuendá Yã Ndiõxí. Te
 ñaha-ndo sá ndíi Jòb ducaⁿ ñi quide
 ndíi, chi nándi sá ñi yáha ndíi te
 ní quide càhnu ini ndíi. Te sátá ñi
 yáha ní ndoho ndíi, te ío cuéhé sá
 ñi sãñaha Yã Ndiõxí xii ndíi. Chi
 ío váha ini-gá te ío cùndahú ini-gá
 nchaa ñáyiu ío càhnu ini-xi.

¹² Te nchòhó ñáyiu ndècu
 ndihi-í ichi Xitohó Jesucristú, chí
 cùndédóho tucu tnúhu na càháⁿ-í-a,
 chi ío xini ñuhu-xi. Vá cáciu
 nèhe-ndo Yã Ndiõxí óré cùini-ndó
 sá cùtnuní ini ñáyiu sá ndáá
 cada-ndo ìⁿ sá càháⁿ-ndó. Te ñi
 vá cáciu nèhe-ndo sá cächí-yu cùu
 ndiõxí cádũha cue téé ñuyúⁿ-a. Te
 núu ìⁿ sá xicáⁿ tnàha ñáyiu-ndo
 núú-ndó te cùñaha-ni-ndo te núu
 cuu àdi sá vá cúú. Te vá cáciu
 nèhe-ndo Yã Ndiõxí, ducaⁿ te vá
 dándòho ñaha-gã xii-ndo.

¹³ Te núu ndòho-ndo te càháⁿ
 ndihi-ndo Yã Ndiõxí, àdi te núu
 ndècu váha-ndo te cudíⁿ ini-ndó
 te chíñuhu-ndo-gã, ¹⁴ àdi núu
 cùhú-ndó te cana-ndo cué téé

yìndaha ñaha xii-ndo nacuaá ndècu-ndo ichi Yá Ndiòxí cuèndá tee-güedé acití díquí-ndó, te cacadáⁿ táhú-güedé núú-gã cuèndá-ndó dàtná ní cachí méé-gã cunduu. ¹⁵ Te núú quíndáá ndisa iní-ndó sã ndúha-ndo, te ndúha-ndo chi Yá Ndiòxí cada tátna ñaha-gã xii-ndo, àdi núú ní quide-ndo ìⁿ sá ñà túú tàú-ndó càda-ndo núú-gã te cada càhnu iní-gã cuèchi-ndo. ¹⁶ Te xini ñuhu-xi cùtnùhu tnàha-ndo oré ñá túú cùndáá-ndó núú Yá Ndiòxí cuèndá chindee tnùhu tnàha-ndo cáháⁿ ndihi-ndo-gã te xocani-gã cuéhé-ndó, te cada càhnu iní-gã nchaa sá ñà túú vaha ní quide-ndo te núú cundecu váha iní-ndó. Te nchaa ñáyi ndècu váha iní-xi núú Yá Ndiòxí na càcáⁿ-yu ìⁿ sá cuini-yu núú-gã te nihí-yu, chi sàá tnùhu-yu núú-gã. ¹⁷ Te té Eliás, téé ní xindecu ndéé sanaha ñí cáa-dé dàtná cáá nchò. Te ní cáháⁿ ndihi-dé Yá Ndiòxí ni yuhu ni iní-dé ní xáhaⁿ-dé xii-gã sá vã dácùⁿ-gã dáú, te ní tnì-gã tnùhu ní cáháⁿ-dé, te ñá ní dàcuuⁿ-gã dáú ùní cuíá dava. ¹⁸ Te dātñùní ducaⁿ te ní cáháⁿ ndihi tucu té Eliás-áⁿ Yá Ndiòxí sá dácùⁿ-gã dáú te ní cuuⁿ, te ní cuu tucu nchaa sá ñí xitu-güedé.

¹⁹ Te nchòhó ñáyi ndècu ndihi-í ichi Xitohó Jesucristú, te núú dava-ndo sã ndecu-ndo ichi Yá Ndiòxí ní cùu te ní dáñá-ndó, te ndècu tucu dava-ndo nadaxinu iní tnáhá-ndó nùcùndecu tucu-ndo ìchi-gã, ²⁰ te núú ducaⁿ na càda-ndo te dácácu nihnu tnàha-ndo núú ùhú núú ndáhú, te mee Yá Ndiòxí cada càhnu iní ñáhá-gã xii-ndo cuèi ío cuéhé cuèchi ní quide-ndo.

TUTÚ DÍHNA NUU NĪ CADÚHA TÉ PÈLÚ

*Té Pèlú cadúha-dé tutú sá cúú-xí
cuè ñáyiú sàndáá iní ñáhá xii Yá
Ndiöxí*

¹ Yúhú té Pèlú ní tendaha ñàha Xítohó Jesucristú xicá cùu-i càháⁿ-í tnúhu-gá, te càdúha-í tutú-a sá cúú-xí nchòhó ñáyiú xinchíté nuu ndècu distritú Pònto, ndihí distritú Gálaciá, ndihí distritú Capadociá, ndihí distritú Àsiá, ndihí distritú Bitiniá. ² Chì Dútú Ndiöxí ní cachí-gá sá cúú-ndó dèhe-gá ndéé cútñahá vátá ngáva-gá ñuyúú, te Espiritú-gá ní quide-xi ndècu yíñuhu-ndo núú-gá vitna. Te ní cachí-gá sá cúú-ndó dèhe-gá cuendá tñi-ndo nchàa tnúhu càháⁿ Xítohó Jesucristú, ndihí cuendá nduu ndoo nduu nine iní-ndó, chi diu cuendá-áⁿ nĩ xihí Xítohó Jesucristú. Te xicáⁿ tãhù-í núú Yá Ndiöxí sá ïo na chindee chitúu ñaha-gã xii-ndo cuèi vitna te cuèi núú cuaháⁿ núú vèxi, te diu-ni-gá ná cáda te ïo váha cuu iní-ndó cùndecu-ndo.

*Tnúhu ndee iní sá ndécú ndihí
ñáyiú sàndáá iní ñáhá xii Yá Ndiöxí*

³ Te vitna chí ná càchí-ó sã ïo càhnu cuu Yá Ndiöxí Yaá cúú Tátá Xítohó Jesucristú, chí diu-gá ïo ní cundàhú iní ñáhá-gã xii-o núu xíáⁿ ní quide-gá sá nchóó nĩ nduu-o dàtná ìⁿ ñáyiú saa vitna. Te ducaⁿ nĩ quide ñaha-gã xii-o cuendá sá Xítohó Jesucristú ní xihí-gá te ní ndoto-gá. Te cuendá sá ní nduu-o dàtná ìⁿ ñáyiú saa, xíáⁿ ní ngúndecu ndihí-o tnúhu ndee iní ⁴ sá cùndecu ndihí-o-gá nĩ caa nĩ quihíⁿ, chí ducaⁿ nĩ cachí-gá cunduu. Te yacáⁿ vá quini-gá-ó nĩ ìⁿ sá cuèhè sá dúhá, te ïo cudíⁿ iní-ó cùndecu-o ndihí-gá nĩ caa nĩ quihíⁿ. ⁵ Te sá sàndáá iní-ó Yá Ndiöxí, núú xíáⁿ coto ñaha-gã xii-o

ndéé ná sàá nduu nàqueheⁿ cuendá ñáhá-gã chí ïo càhnu cuu-gá.

⁶ Te xíáⁿ ïo cudíⁿ iní-ndó ndècu-ndo, te cuèi nándi ndòho-ndo ndècu-ndo dico sacú-ni nduu ducaⁿ ndòho-ndo. ⁷ Te òré ná cáda càhnu iní-ndó yàha-ndo nchàa sá ná càda ñaha ñáyiú xii-ndo, te ducaⁿ te cutnùni sàndáá ndisa iní-ndó Yá Ndiöxí, te sá dúcáⁿ sàndáá iní-ndó Yá Ndiöxí ïo-gá váha dàcúúxí dñhúⁿ cuàáⁿ chí xíáⁿ ñá túú cudí-xi. Te cuèi ducaⁿ dico xito ndéé nãhí-ní-güedé núu ndisa cùu-xi dñhúⁿ cuàáⁿ. Te ducaⁿ sãtnahá-xi cùu nchòhó cuendá nchaa sá ndòhó-ndó, te na sàá nduu quixi tucu Xítohó Jesucristú te cúñaha-gã xii-ndo: “Ío váha ní quide-ndo, te vitna ïo càhnu cuu-ndo, te tàú-ndó nùcùndecu váha-ndo”, duha cúñaha-gã xii-ndo.

⁸ Te vitna ïo cùu iní-ndó Xítohó Jesucristú cuèi vátá quini-gá-ndó-gã, te ducaⁿ ïo sàndáá iní-ndó-gã, te ïo cudíⁿ iní-ndó te súúni nĩ ñá cùtnùni iní-ndó ñasa cunduu tnúhu càháⁿ-ndó sã dúcáⁿ ïo cudíⁿ iní-ndó ⁹ cuendá sá nĩ naníhí tãhú-ndó, chí ní sàndáá iní-ndó-gã.

¹⁰ Te cue téé ní xóo càháⁿ tnúhu Yá Ndiöxí ndéé sanaha nĩ cachí-güedé nàcuáa cada-gá cundàhú iní ñáhá-gã xii-o vitna. Te cue téé-áⁿ ïo váha ní dácuahá-güedé nàcuáa cada Yá Ndiöxí dàcácu nihnu ñaha-gã xii-o vitna. ¹¹ Te Espiritú Xítohó Jesucristú ní ngúndecu ndihí cue téé-áⁿ nĩ xáhaⁿ-xi xii-güedé nàcuáa ndoho-gá, te ní xáhaⁿ tucu-xi xii-güedé sá sãtá ná yàha ndoho-gá te ïo cunuu-gã ndihí Yá Ndiöxí. Te ïo ní sani iní-güedé núu ná nduu sàá ducaⁿ càda-xi, ndihí nchaa nándi-gá cúú sã cáda-xi. ¹² Te Yá Ndiöxí ní xáhaⁿ-gã xii-güedé sá ncháá tnúhu váha càháⁿ-güedé vá cúú-xí cuendá méé-güedé, chí cuendá nchoo cuè ñáyiú ndècu ñuyúú-a vitna cùu-xi. Te diu-ni tnúhu-áⁿ cúú tnúhu càháⁿ nchúhú cue téé càháⁿ tnúhu Yá Ndiöxí núú-ndó. Te Espiritú sá nĩ taxi Yá Ndiöxí ndécú ndihí-o

chindee ñaha-xi xii-ndí cãháⁿ-ndí tñuhu-gá. Te cue espíritú xínú cuèchi núú Yã Ndiõxí ío cuení-xi quini ndáá-xi nchaa nãcuáa cuáháⁿ tñuhu-áⁿ.

Yá Ndiõxí cãchí-gá sá cáda-ó mèe-ni sá vãha

¹³ Te sá dúcáⁿ ío váha ní quide ñaha Yã Ndiõxí xii-ndo xíáⁿ xíní ñuhu-xi ío váha cuáha-ndo cuendá nãcuáa cundecu-ndo te vá cãní iní-ndó cáda-ndo ni ñⁿ sá cuèhé sá dúhá, te ío quindáá iní-ndó sá Yã Ndiõxí cada váha ñaha-gã nduu na quixi tucu Xítohó Jesucristú. ¹⁴ Te ío tñⁿ-ndo nchãa tñuhu cãháⁿ Yã Ndiõxí, te vá cúhúⁿ-gã iní-ndó nãndí sá cuèhé sá dúhá sã ní xúhuⁿ iní-ndó cútñahá vátá cundecu-gã-ndó ìchi-gá te ni vá cáda-ndó. ¹⁵ Te cada-ndo mèe-ni sá vãha cundecu-ndo dátñá quidé mèe Yã Ndiõxí Yaá ní cãháⁿ ñáhá xii-o cundecu-o ndihí-gá. ¹⁶ Te cãchí-gá núú tütú-gá: “Cada-ndo mèe-ni sá vãha cundecu-ndo, chi ducaⁿ quide yúhú”, duha cãchí-gá núú tütú-gá.

¹⁷ Te Yã Ndiõxí cada ndáá-gá cuèchi nchaa ñáyiu, te vá cáda cuendá-gá cuèi náí ñáyiu cùu-yu, te nchòhó cãchí-ndó sã díú Tãtá-ndó cùu-gá te ndáá, núú xíáⁿ xíní ñuhu-xi canehe-ndo sá yíñuhu núú-gã ndí nchãa nduu cundecu-ndo ñuyú-a. ¹⁸ Te ñⁿ-gá ní dácãcu nihnu ñaha-gã xii-ndo ñⁿ ichi sá ñà túú nãndíhi ní sanu ichi ñaha cuè ñaní tñáhá-ndó ní xíndecu ndéé sanaha ni cùu, te nchòhó sa ñaha-ndo sá sã dúcáⁿ ní quide ñaha Yã Ndiõxí ní dácãcu nihnu ñaha-gã xii-ndo ìchi-áⁿ ñà túú ní chãhu-gá ni ñⁿ díhúⁿ cuááⁿ, te ni ñⁿ díhúⁿ cuixíⁿ sá ndíhí nihnu ñuyú-a cuendá-ndó. ¹⁹ Chi Xítohó Jesucristú ní quixi-gá ní sati níñí-gã, te ní xíhí-gá núú cùrúxí cuendá sá nchóó nãníhí tãhú-ó, te cùu-gá dátñá ñⁿ mbéé quití ío váha iní-xi, quití cãndoo canine. ²⁰ Te ducaⁿ ní ndoho Xítohó Jesucristú, chi ducaⁿ tñáhí ndéé tñuní ndoho-gá

ndéé cútñahá vátá ngãva-gá ñuyú. Te ducaⁿ ní yáha-gá cútñahá ní quixi-gá òré vitna cùmání sãá nduu nãa ñuyú-a cuendá nchoo cùu-xi sá vãha xii-o vitna. ²¹ Te nchòhó sa ñihí-ndó tñuhu nãcuáa ní yáha Xítohó Jesucristú cútñahá ní quixi-gá ñuyú-a, núú xíáⁿ sãndáá iní-ndó Yã Ndiõxí. Te Yã Ndiõxí ní dándótó-gã Xítohó Jesucristú, te sátá ní dándótó ñaha-gá te ní cãchí-gá sá ío cãhnu cuu Xítohó Jesucristú. Te sá dúcáⁿ ní cuu, xíáⁿ ío sãndáá iní-ndó Yã Ndiõxí, te ní taxi-gá tñuhu ndee iní ndécú ndihí-ndo sá sãá nduu cundecu-ndo ndihí-gá ni caa ni quíhíⁿ.

²² Te Espíritú Yã Ndiõxí ní quide-xi te ní sãndáá iní-ndó tñuhu-gá, te xíáⁿ ní nduu ndoo ní nduu nine iní-ndó, te cùu iní tñáhá ndisa-ndo nãcuáa ndecu-ndo ìchi Yã Ndiõxí, te xíni ñuhu ndisa-xi sá ío ni yùhu ni iní-ndó cùu iní tñáhá-ndó ñⁿ ñⁿ-ndo. ²³ Te nchòhó ní nduu-ndo dátñá ñⁿ ñáyiu saa sá cuendá tñuhu Yã Ndiõxí, te tñuhu-áⁿ candeca-xi iní-ndó ni caa ni quíhíⁿ, te vá ñⁿ ndùu ndihí nihnu-xi, te ñá díú cuendá ñáyiu ñuyú-a ni ndùu-ndo ñⁿ ñáyiu saa chí cuendá tñuhu-gá. ²⁴ Chi núú tütú Yã Ndiõxí cãchí-xi:

Nchaa ñáyiu ndecu ñuyú-a cùu-yu dátñá cúhú, chi cúhú-ãⁿ tnaa-ni cùdí-xi te xihí-xi, ducaⁿ sãtnahá-xi cùu-yu.

Te nchaa sá ndécú ndihí-yu cùu-xi datñá ñⁿ itá cúhú-ãⁿ, chi itá-áⁿ tnaa-ni tucu cùdí-xi te ndãhvã-xi, ducaⁿ sãtnahá-xi cùu nchaa sá ndécú ndihí-yu.

²⁵ Dico tñuhu Yã Ndiõxí chi vá náá tñáhí-xi, chi duha-ni ndecu-xi, te ñⁿ-ni duha cundecu-xi ni caa ni quíhíⁿ.

Duha cãchí-xi núú tütú-gá. Te ñⁿ tñuhu-áⁿ ní dánèhé ñáhá nchúhú cue téé cãháⁿ tñuhu Yã Ndiõxí xii-ndo.

2

¹ Te xíǎⁿ xíní ñúhu-xi dañá-ndo nchaa núú sá cuéhé sá dúhá, te dañá-ndo ichi tnúhu ndehnde, te dañá-ndo vǎ dándàhú-gá-ndó mèe-ndo sá quidé vǎha-ndo, te dañá-ndo ichi cuedú ínì, te dañá-ndo nchàa tnúhu yiti. ² Te cada-ndo cuèndá sá cúu-ndó dàtná cue landú yíquíⁿ vitna sadi camá, chi landú-áⁿ mee-ni sàdi-güexi te sǎhnu-güexi. Te cada iní-ndó sá dúcáⁿ càda-ndo chi xínì ñúhu-xi sá ïo cuhuⁿ iní-ndó dàcuaha-ndo tnúhu Yá Ndiöxí, chi xíǎⁿ cúu-xí mèe-ni tnúhu vǎha, te ducaⁿ te cuita cuehnu nihnu-ndo ichi-gá quíhíⁿ ndéé ná sàá nduu cùndecu-ndo núú ndécú-gá. ³ Te ducaⁿ xínì ñúhu-xi cada-ndo, chi nchòhó sá ní cutnùnì ndisa iní-ndó sá Yá Ndiöxí ïo vǎha iní-gá.

Xítohó Jesucristú cúu-gǎ dàtná ìⁿ yúú

⁴ Te ïo nanducu ñihnu-ni-ndo Xítohó Jesucristú Yáá quidé nàcuáa naníhí tǎhú-ó. Te ñú-gá ní cuu-gá dàtná ìⁿ yúú sǎ ñà túú nándihí sá cúu-xí ñǎyiu ñuyíú-a, chi ní dáquée tíhú ñáhǎ-yu xii-gá. Dico Yá Ndiöxí ní cachí-gá sá Xítohó Jesucristú cúu-gǎ dàtná ìⁿ yúú sǎ ïo-gá vǎha, chi ïo cùnuu-gá. ⁵ Te nchòhó sá ní naníhí tǎhú-ndó, te ïo-gá chí nánducu nihnu Yá Ndiöxí cuèndá cuu ìⁿnuu-ndo cùndecu-ndo ndihí Espiritú-gá. Te núu ducaⁿ na càda-ndo te cuu-ndo dàtná yúú vǎha dàcaa-güedé dava vehe, te cuu tucu-ndo dàtná cue dútú ní xinu cuechi núú Yá Ndiöxí ndéé sanaha, nàcuáá ñá túú nǎ cumánì-ndó núú-gǎ, chi nchaa cue téé-áⁿ ní xóo cuáha ñaha-güedé sá ní xóo nduu tǎhú-gá. Te nchòhó vitna tàù-ndó càda-ndo nchaa nàcuáa càháⁿ-gá, te nduu vétú iní-gá. Te ducaⁿ càda-ndo chi ndécú-ndo ndihí Xítohó Jesucristú. ⁶ Te Yá Ndiöxí càchí-gá núú tütú-gá:

Yúhú taxi ndecu-í ìⁿ Yáá ñúú Sión,

te cuu-gá dàtná ìⁿ yúú vǎha sá sánútnǎi-güedé xíquí cimientú ìⁿ vehe, chi yúhú ní cachí-í sá Yáá-áⁿ ïo cunuu-gá.

Te nchaa ñáyiu quíndáá iní ñáhá xii-gá vǎ ìⁿ ndúu ndixi cuéchi iní-yu sá dúcáⁿ sàndáá iní ñáhǎ-yu xii-gá.

Duha càchí-gá núú tütú-gá. ⁷ Te nchòhó ñáyiu sàndáá iní ñáhá xii Xítohó Jesucristú ïo cùu iní-ndó-gǎ, te nchaa ñáyiu ñá túú sàndáá iní ñáhá xii-gá quidé-yu dàtná càháⁿ-xi núú tütú Yá Ndiöxí núú càchí-xi:

Yúú sǎ ní dáquée tíhú cue téé dàcaa vehe, xíǎⁿ cúu-xí yúú sǎ ïo-gá nándihí vitna.

Duha càchí-xi núú tütú-gá. Te yúú-áⁿ cada iní-ó sǎ cúu-xí Xítohó Jesucristú, chi ní dáquée tíhú ñáhá-güedé xii-gá. ⁸ Te càchí tucu-xi ingá xichi núú tütú Yá Ndiöxí:

Yúú-áⁿ nguñenu ñáyiu te ndúá-yu. Duha càchí-xi núú tütú-gá. Te tnúhu-áⁿ quée-xí sǎ ïo quide sáá iní ñáyiu núú-gǎ, chi ñá túú cuínì-yu tníí-yu tnúhu càháⁿ-gá, te ducaⁿ tnàhí ndéé tnuní sá ncháá ñáyiu ñá túú cuínì tníí tnúhu càháⁿ-gá, te ïo cùu sáá iní-yu núú-gǎ.

Ñáyiu ndécú ndihí Yá Ndiöxí

⁹ Te nchoo cùu-o ñáyiu sá ní dáquée ñíⁿ ñaha Yá Ndiöxí xii-o cuèndá cundecu-o ndihí-gá, te cùu-o dútú xínú cuéchi-o núú-gǎ, te mee-gǎ cúu-gǎ Yáá ïo cùnuu, te cùu-o ñáyiu quide ndáá xíndecu ichi-gá te cùu tucu-o ñáyiu yíndaha-gá. Te ducaⁿ ní quide ñaha-gǎ xii-o cuèndá sá cùñaha-o xii nchaa ñáyiu sá ïo càhnu cuu-gá, te ïo vai núú sǎ vǎha quide-gá, te ñú-gá ní quide ní dáñá-ó nchàa ichi cuehé ichi duha ndécú-o ní cuu, te ní sanu ichi ñaha-gǎ xii-o ìⁿ ichi vǎha, te vitna cutnùnì iní-ó sǎ ïo càhnu cuu-gá. ¹⁰ Te nchoo cùu-o ñáyiu ñá túú ndécú ndihí Yá Ndiöxí ní cùu, dico vitna ní nguñecu ndihí-o-gǎ,

te dává-án vátá saá-gá nduu càda vâha ñaha-gã xii-o, dico vitna sa ní saá nduu quide vâha ñaha-gã xii-o, chi ío cùndahú iní ñáhá-gã.

Cada vâha-o cùndecu-o cunu cuechi-o núú Yá Ndiõxí

¹¹ Te nchòhó ío cùu iní ñàhà-í xii-ndo, te cächí tnúhu-í xii-ndo sã nchóó cùu-o datná cue ñáyiu ndècu tnaduha ìⁿ ñúú, te ducaⁿ sãtnahá-xí cùu-o chi tnaa-ni ndècu-o ñuyú-a, te saá nduu ndùu táhú-ó cùndecu-o núú ndécú Yá Ndiõxí táxí tnùnì-gã, te xíãⁿ càháⁿ ndàhú-í núú-ndó sã vã cádá-ndó ní ìⁿ sã cuèhé sã dúhá sãni iní-ndó, chi nchaa xíãⁿ ñá túú cùu-xi sã vâha sã cúú-xi-ndó. ¹² Te cada vâha-ndo cùndecu-ndo núú nchàa ñáyiu ñá túú ndècu ichi Yá Ndiõxí, te cuèi na càháⁿ ñáyiu sã nchòhó nchicúⁿ ñihnu-ndo ichi cuehé ichi duha, dico quini-yu nchaa sã vâha quide-ndo, dico na saá nduu dândixi túú Yá Ndiõxí ini-yu sã ñá túú quide vâha-yu ndécú-yu, te dává-án cachí-yu sã quidé vâha-ndo ndècu-ndo, te cada càhnú-yu Yá Ndiõxí.

¹³ Te Xítohó Jesucristú cuinì-gã sã nchòhó ío quindáá iní-ndó nchàa cue téé cùchiuⁿ taxi tnuní ñáhá xii-ndo, te ducaⁿ-ni quindáá iní-ndó cuèi mee téé cùnno vihi-gã yíndaha ñaha xii ñáyiu. ¹⁴ Te ducaⁿ-ni quindáá iní-ndó nchàa dava-gã cue téé cùnno, chi Yá Ndiõxí ducaⁿ ñí cachí-gã cunduu sã cuè téé-án cada ndáá-güedé nchaa cuèchi ñáyiu quide cuehé quidé dùha ndecu, te càháⁿ vâha-güedé cuendá nchaa ñáyiu xíquide vâha ndècu. ¹⁵ Te Yá Ndiõxí cuinì-gã sã cádá vâha-ndo cùndecu-ndo cuendá nchaa ñáyiu ío ñí dîquí-xi càháⁿ cuèhé cuendá-ndó sã ndécú-ndó ichi Yá Ndiõxí vã ñihí-gã-yu tnúhu càháⁿ-yu.

¹⁶ Te nchòhó, Yá Ndiõxí ní quide-gã sã cúú-ndó ñáyiu cuu cada ñacuáa véxi iní mee-xí, dico ñá díú sã dúcáⁿ ñí quide ñaha-gã xii-ndo, te ngóo-ndo càni

iní-ndó càda-ndo nándi sã cuèhé sã dúhá, chi cada-ndo sã cúú-ndó ñáyiu xinu cuechi núú Yá Ndiõxí.

¹⁷ Te canehe-ndo sã yíñuhu núú nchàa ñáyiu, ndihí núú téé cùnno vihi yíndaha ñaha xii-yu, te cuu iní tnáhá ndí mee-ndo nacuaá ndècu-ndo ichi Yá Ndiõxí, te ío canehe-ndo sã yíñuhu núú-gã.

Nchaa ñacuáa ndoho-o cùndecu-o ichi Xítohó Jesucristú

¹⁸ Te nchaa nchòhó ñáyiu xinu cuechi canehe-ndo sã yíñuhu núú cuè patróoⁿ-ndó, te quindáá iní-ndó càda-ndo nchaa chiuⁿ tahu-güedé. Te ìⁿ-ni càda-ndo núú cuè téé vâha iní-xi, ndihí núú cuè téé ío cuihna iní-xi. ¹⁹ Te núú nchòhó ná càda ndee iní-ndó ndòho-ndo nchaa sã ñá túú tàú-ndó ndòho-ndo cuendá sã cuinì-ndó cùndáá-ndó núú Yá Ndiõxí ñá, te ío nduu vétú iní-gã. ²⁰ Te núú nchòhó ní quide-ndo ìⁿ cuèchi, te sãni iní-ndó dândoho ñaha ñáyiu xii-ndo, ¿te ná sã vâha cùu xíãⁿ-i? Dico núú nchòhó ná cádá ndèe iní-ndó ndòho-ndo nchaa sã cádá ñaha ñáyiu xii-ndo sã cuendá sã quidé-ndó sã vâha ña, te núú ducaⁿ na càda-ndo te cùu-xi ìⁿ sã vâha núú Yá Ndiõxí. ²¹ Te Yá Ndiõxí ní cachí-gã sã cádá ndèe iní-ó ndòho-o nándi ndoho-o sã cuendá sã quidé-ó sã vâha, chi ío ní ndoho Xítohó Jesucristú cuendá-ó, te ducaⁿ tàú-ó cànchicúⁿ ñihnu-o càda ndee iní-ó ndòho-o nándi ndoho-o, chi ducaⁿ ñí quide-gã. ²² Te mee-gã ñá túú quide-gã ní ìⁿ sã cuèhé sã dúhá, te ní ìⁿ tnúhu ndehnde ñá túú càháⁿ-gã. ²³ Te òré ní xóo cúcuèhé ñáhá-güedé xii-gã, te ñá túú ní xóo danchòcáva-gã tnúhu cuèhé, te òré ní xóo dândòho ñaha-güedé xii-gã, te ñá túú ní xãháⁿ-gã xii-güedé sã ío ná cada ñaha-gã, chi núú ndáhá Yá Ndiõxí ní xóo nachihí-gã mee-gã, ndihí nchaa sã sání iní-güedé cada ñaha-güedé xii-gã. Te Yá Ndiõxí cúú-gã Yuá ío vâha cada ndáa cuèchi nchaa ñáyiu na saá nduu. ²⁴ Te

Xítohó Jesucrístú cúú-gǎ Yaa ní xíhí núú cùrúxí cuendá nchaa cuéchi nchoo ñáyiú ndècu ñuyíú-a. Te ducaⁿ ní xíhí-gǎ cuendá nchoo dùuⁿ duuⁿ dañá-o nchaa ichi cuéhé ichi duha, te cada ndáá-ó cùndecu-o ichi-gǎ. Te ní dánicuèhé ñáhá-güedě xii-gǎ, te sá dúcáⁿ ní ndoho-gǎ xíáⁿ ní ngúndecu váha nchoo vitna. ²⁵ Te nchoo cùu-o datná cue mbéé cue quití ní xíta ní cùu, dico vitna ní tuha-o Xítohó Jesucrístú, te Yaa-áⁿ cúú-gǎ dàtná ìⁿ toli xító ñaha-gǎ xii-o vitna cuendá sá vǎ cuíta nihnu-o.

3

Nàcuáa tàú ñáyiú tnǎndaha cadá-yu cundecú-yu

¹ Te nchaa nchòhó ñáyiú dìhí ní tñandaha ío quindáá iní-ndó yìⁿ-ndo cuendá sá núu ñá túú sàndáá iní-güedé tnúhu Yá Ndióxi te quindáá iní-güedé cuendá sá ndéhe-güedě quidé ndáá-ndó ndècu-ndo, te ni ñá túú xìni ñuhu-xi cáháⁿ-ndó tnúhu-gǎ núú-güedě. ² Chi ndèhe mee-güedé sá nchòhó quidé ndáá-ndó ndècu-ndo, te nèhe-ndo sá yíñùhu núú Yá Ndióxi. ³ Te vǎ cání iní-ndó mèe-ni cunduu vii-ndo, te ndada-ndo ñiquí-ndó nàcuáa tàú-xi cunduu, te vǎ cání iní-ndó nǎndi canehe-ndo, te ni vǎ cání iní-ndó cuìhnu-ndo mee-ni dóó váha sǎ ío vii ndáa. ⁴ Chi iní-ndó xìni ñuhu-xi cunduu vii cunduu váha-xi núú Yá Ndióxi cuéi vitna te cuéi núú cuáháⁿ núú vèxi, te cuu-ndo ñáyiú ío càhnu iní-xi, te núu ducaⁿ na càda-ndo te ío cuu váha iní Yá Ndióxi. ⁵ Te ducaⁿ ío vii ío váha ní xínduu iní nchaa ñáyiú dìhí ní xíndecu ndéé sanaha, te ñáyiú-áⁿ ío ní sàndáá iní-yu Yá Ndióxi te ní cudíú-yu núú-gǎ, te ní tñí-yu nchaa tnúhu ní cáháⁿ yíⁿ-yu. ⁶ Te ducaⁿ ní xóo cada ndíi Sǎrá ní xóo quindáá iní ndíi yíⁿ ndíi, ndíi Àbrahám, te ní cánehe ndíi dìhí-áⁿ sǎ yíñùhu núú yíⁿ ndíi. Te núu nchòhó quidé váha-ndo ndècu-ndo

te ñá túú yùhú-ndó nǎ cada ñaha tnàha ñáyiú-ndo xii-ndo, te núu ducaⁿ quide váha-ndo ndècu-ndo te quide-ndo datná ní quide ndíi Sǎrá.

⁷ Te nchòhó cue téé ndècu ñadihí-xi ío váha cuáha-ndo cuendá nàcuáa cundecu váha-ndo ndíhí-yu, te ío vii cáháⁿ ndíhí-ndó-yu, chi ñáyiú-áⁿ íí-gǎ-yu dàcúúxí nchòo cue téé, te ducaⁿ càda-ndo chi ndí ndúú-ndó ndúu táhú-ndó cundecu-ndo ndíhí Yá Ndióxi, te núu ducaⁿ na càda-ndo te óré cáháⁿ ndíhí-ndo Yá Ndióxi te tedóho ñaha-gǎ xii-ndo.

Ñáyiú quide sá váha ndòhó-yu

⁸ Te cǎchí tnúhu tuçu-í xii-ndo sǎ ío cuu ìⁿ-nuu-ndo cùndecu-ndo, te cundàhú iní tnáhá-ndó ìⁿ ìⁿ-ndo, te cuu iní tnáhá tùcu-ndo nàcuáa ndècu-ndo ichi Yá Ndióxi, te cuu-ndo ñáyiú ndàhú iní-xi. ⁹ Te núu ìⁿ sǎ ñá túú váha quide ñaha ñáyiú xii-ndo, te ñá díú-ní dùcaⁿ nanchocáva-ndo càda-ndó-yu, àdi xícuèhé ñáhǎ-yu xii-ndo, te vǎ ná dànhocáva-ndo dìu-ni tnúhu cuéhé, chi cǎcǎⁿ táhú-ndó núú Yá Ndióxi cuendá sǎ ná cádá váha ñaha-gǎ xii-yu, te ducaⁿ càda-ndo chi Yá Ndióxi ní cáháⁿ ñáhá-gǎ xii-ndo cuendá sǎ cádá váha ñaha-gǎ xii-ndo tnáhá-ndó. ¹⁰ Te núú tütú Yá Ndióxi cǎchí-xi:

Nchaa ñáyiú cuíni cundecu váha ndí nchàa nduu nini cundecú-yu ñuyíú-a,

xìni ñuhu-xi sǎ vǎ càháⁿ-yu tnúhu cùtexínu, te ni vǎ dàcuàndehndé-yu.

¹¹ Te xìni ñuhu-xi duuⁿ duuⁿ dañá-yu nchaa ichi cuéhé ichi duha, te cadá-yu mee-ni sǎ váha,

te ío ndúcú-yu nàcuáa cadá-yu cundecu váha-yu ndíhí tnàha ñáyiú-yu te dìu-ni ducaⁿ cànchicúⁿ nihnú-yu cadá-yu.

¹² Te Yá Ndióxi xító-gǎ nchaa ñáyiú quide ndáá núú-gǎ te tedóho-gǎ nchaa tnúhu càháⁿ-yu,

dico nchaa ñáyiú ñá túú cuíní cada ndáá, ñáyiú-áⁿ ñá túú cùu váha iní-gá núu-yu.

Duha cächí-xi núú tütú-gá.

¹³ Te vá yõ níhi ndéé cada ñaha xii-o ìⁿ sá ñá túú váha te núu mee-ni sá váha na càda-o cundecu-o. ¹⁴ Adi núu ná cúú sá ná cáda ñaha ñáyiú xii-o sá cuendá sá quidé váha-o ndècu-o ña, te sá dúcáⁿ ná cáda ñáhá-yu xii-o cùu-xi ìⁿ sá váha sá cúú-xí-ó núú Yá Ndiòxí. Te na cächí tnúhu-í xii-ndo sá vá yùhú-ndõ-yu, te ni vã cùndiyí-ndó cuendá nchaa sá ná càda ñahá-yu xii-ndo. ¹⁵ Te nèhe-ndo sá yíñùhu núú Xítohó Jesucristú. Te ío cundecu túha-ndo dànehé-ndó ñáyiú véxi ndùcu tnúhu núu-ndó nàcuáa ndùu tnúhu ndee iní ní taxi Xítohó Jesucristú ndécú ndìhi-ndo, te cuu yìi cuu váha iní-ndó cãháⁿ ndìhi-ndõ-yu, te cãháⁿ-ndó núu-yu mee-ni tnúhu yíñùhu nacuáa cùu váha iní Yá Ndiòxí. ¹⁶ Te ío cada váha-ndo cundecu-ndo cuendá sá vã cùndiyí-ndó, te núu ducaⁿ na càda-ndo, te nchaa ñáyiú xicuehé ñáhá xii-ndo cuendá sá quidé váha-ndo ndècu-ndo ichi Xítohó Jesucristú quendóo canúu-yu ndìhi nchaa tnúhu cãháⁿ-yu, chi nchòhó quidé váha-ndo ndècu-ndo. ¹⁷ Te váha-gá sá ndóhó-ó cuendá sá quidé-ó sá váha te núu mee Yá Ndiòxí ducaⁿ cuíní-gá cunduu, te ñá díú sá ndóhó-ó cuendá sá ñá túú quide-o sá váha.

¹⁸ Te Xítohó Jesucristú ní xíhí-gá sá cuendá nchaa cuéchi nchaa nchoo ñáyiú ndècu ñuyíú-a, te ìⁿ xito-ni ducaⁿ ñí xíhí-gá te ducaⁿ te vá cùu tnàhí-gá, te mee-gã cúú-gã Yaá ñá túú tnàhí cuéchi-xi, te ducaⁿ ñí ndoho-gá cuendá nchaa cuéchi ñáyiú ndècu ñuyíú-a ñáyiú ñá túú cuíní cada ndáá núú Yá Ndiòxí, te ducaⁿ ñí cuu cuendá sá núcundecu váha-yu núú Yá Ndiòxí te núu na quindáá iní ñáhá-yu xii-gá. Te mee-gá ní xíhí-gá dico Espiritú-gá chi ní xíndecu-ni-xi, ¹⁹ te Espiritú-gá

ní sáháⁿ-xi ní cãháⁿ-xi tnúhu Yá Ndiòxí núú nchaa espíritú ñáyiú ndècu núú ùhú núú ndàhú. ²⁰ Te ñáyiú-áⁿ cúú ñáyiú ní xíndecu ndéé sanaha cùtnàhá ní xíndecu ndíi Nõé, chi ñáyiú-áⁿ ío ní quide sáá iní-yu núú Yá Ndiòxí. Te Yá Ndiòxí ío váha iní-gá, chi ní dácacá-gá nduu ñí xíndecu ndíi Nõé ní cadúha ndíi bàrcú cuendá ndétú-gã ndixi cuéchi iní-yu sá ñá túú quide váha-yu ndècú-yu ni cùu. Te dàvá-áⁿ ñí ndaa ndute ñuyíú te ní cácu úná duha ná tnàhá ñáyiú, chi ní quée-yu xití bàrcú-áⁿ, te ñá túú ní cãhá-yu. ²¹ Te sá dúcáⁿ ñí cácu ñáyiú úná-áⁿ ñá túú ní cãhá-yu ndute ní ndaa ñuyíú dàvá-áⁿ. Te xíáⁿ quée-xí sá cuándute ñáyiú vitna, te naníhí tàhú-yu te núu na quindáá iní-yu tnúhu ndáá tnúhu Yá Ndiòxí. Te ñá díú sá cuándute-o te nduu ndoo nduu nine yiqui cùnú-ó te naníhí tàhú-ó, chi xini ñuhu-xi náhmá-ó núú Yá Ndiòxí nchaa yíca cuéchi-o, te nduu ndoo nduu nine iní-ó, te ducaⁿ te naníhí tàhú-ó, chi Xítohó Jesucristú ní xíhí-gá cuendá-ó te ní ndoto-gá. ²² Te Yaá-áⁿ cuándaa-gá andiú, te ní ngóo-gá xio cùha Yá Ndiòxí, te tàxi tnuni-gá nchaa Espiritú cùnùu ndìhi nchaa dava-gá cue espíritú xínú cuéchi.

4

Cada-o nàcuáa cuíní méé Yá Ndiòxí

¹ Te Xítohó Jesucristú ní ndoho-gá cùtnàhá ní xíndecu-gá ñuyíú-a, te vitna nchòhó cundecu túha-ndo ndòho-ndo cuendá-gá, chi nchaa ñáyiú ndòho nándi sá ndóhó cuendá-gá dàñá-yu nchaa sá cuéhé sá dúhá. ² Te ducaⁿ ñá túú-gã ndécú-yu ichi cuéhé ichi duha, chi mee-ná nàcuáa cãháⁿ Yá Ndiòxí quidé-yu ndècú-yu ñuyíú-a. ³ Te nchòhó sa ñàha-ndo sá ío cuéhé núú sá cuéhé sá dúhá ñí xóo cada-o cùtnàhá vátá cundècu-gá-ó ichi Yá Ndiòxí, chi ní xóo cada-o nchaa sá cuéhé sá dúhá cùdíí iní nchaa

ñáiyu ñá túú sàndáá iní tnúhu-gá, te dàvá-áⁿ ní xóo cada-o nchàa núú sá cuèhé sá dúhá, te ní xóo caní cuèhé ní xóo caní duha iní-ó, te ní cuu-o cuè ñáiyu quihu, te ní xóo cundecu-o víco núú ní xóo cada-o nchàa sá ñà túú vâha, te ní xóo níhí tnáhá-ó ndìhí nchaa tnaha quihu-o, te ní xóo chiñuhu-o nchàa sá càchí-yu cùu ndiòxí te ñá ndàá sá ndiòxí cúu nchàa xiáⁿ, te nándi-gá nchaa sá cuèhé sá dúhá ní xóo cada-o dàvá-áⁿ. ⁴ Te ñáiyu-áⁿ cùñuhu-yu vitna sá ñà túú-gã nihí tnáhá-ó ndìhí-yu cada-o nchàa sá cuèhé sá dúhá quidé-yu, te xiáⁿ càháⁿ cuèhé-yu cuendá-ó vitna. ⁵ Dico sáá nduu te ñáiyu-áⁿ nãhmá-yu nchaa sá quidé-yu núú Xítohó Jesucristú, chi ñi-gá sa ndècu túha-gá sá cáda ndáá-gá cuéchi nchaa ñáiyu sa ní xihí, ndìhí cuéchi nchaa ñáiyu xíndecu vívú. ⁶ Te cue ñáiyu sa ní xihí ní xíndedóho tnúhu Xítohó Jesucristú, te cuèi ní xihí-yu dàtná xihí dava-gá ñáiyu, dico espíritú-yu chi ní nduu táhú-xi ndècu váha-xi dàtná ndécú Yá Ndiòxí.

⁷ Te vitna ta cùyatni danaa Yá Ndiòxí ñuyú-a núu xiáⁿ ío váha cuáha-ndo cuendá nàcuáa cuñdecu-ndo, te càháⁿ ndìhí-ndo-gã. ⁸ Te xini ñuhu-xí sá ío cuu iní tnáhá-ndó ñⁿ ñⁿ-ndo, chi núu ducaⁿ na cùu iní tnáhá-ndó ñⁿ ñⁿ-ndo, te vá cáni-gã iní-ndó càda cuendá-ndó nchàa sá ñà túú vâha quide ñaha ñáiyu xii-ndo, ⁹ te nchòhó ñáiyu xíndecu vehe-xi cuáha nùu-ndo vehe xii cue ñáiyu ñuhu ichi na ndetátú-yu, te ío váha cuu iní-ndó dùcaⁿ cada-ndo. ¹⁰ Te Yá Ndiòxí ní taxi-gá ndí díñⁿ núú táhú ndécú ndìhí-ndo ñⁿ ñⁿ-ndo, te nàcuáa ndùu táhú ní nduu táhú-ndó ñⁿ ñⁿ-ndo te ducaⁿ chindee tnaha-ndo, te vá dáñá ndéé-ndó càda-ndo nchaa nacuáa tàuchiúⁿ Yá Ndiòxí cada-ndo, te chindee ñaha-gá xii-ndo. ¹¹ Te dava nchòhó ñáiyu càháⁿ tnúhu Yá Ndiòxí núú ñáiyu, xini ñuhu-xi

cáháⁿ-ndó nàcuáa ndùu tnúhu-gá núu-yu, te dava nchòhó ñáiyu quide nchaa núu chiúⁿ chindee tnaha ñáiyu-xi, xini ñuhu-xi cada-ndo sá Yá Ndiòxí chindèe ñaha-gá xii-ndo, te ducaⁿ càda-ndo nchaa núú sá vâha, chi Xítohó Jesucristú tnáhá-gá chindèe ñaha-gá xii-ndo, te ducaⁿ ío cuu càhnu Yá Ndiòxí. Te vitna tàú-ó càháⁿ-ó sá ío càhnu cuu Xítohó Jesucristú, chi ñi-gá cùnùu-gá nchaa nduu nchaa quíú, te ducaⁿ na cùnduu.

Ndoho tnáhá-ó cùndecu-o ichi Xítohó Jesucristú

¹² Te nchòhó ñáiyu ío cùu iní-í, vá cùñuhu-ndo sá ío ndòho-ndo ndecu-ndo ichi Xítohó Jesucristú, chi sá dúcáⁿ ndòho-ndo-áⁿ cùtnùní ndisa sá sàndáá iní-ndó-gã, te vá cáni iní-ndó nã cuendá ducaⁿ ndòho-ndo. ¹³ Chi da cudíí ñi-ndó te núu ndòho-ndo datná ní ndoho Xítohó Jesucristú, te ducaⁿ súúní cùdíí ñi-ndó òré ná quixi tucu-gá ñuyú-a te dàvá-áⁿ quini-ndó sá ío càhnu cuu-gá. ¹⁴ Te núu xicuèhé ñáhá ñáiyu ndècu ichi cuèhé ichi duha xii-ndo cuendá sá ndécú-ndó ichi Xítohó Jesucristú, te xiáⁿ cúu-xí ñⁿ sá vâha sá cúu-xí-ndó núú-gã, te ducaⁿ chi Espíritú Yá Ndiòxí sá ío cùnùu ndecu ndìhí ñaha-xi xii-ndo, te nchaa ñáiyu ndècu ichi cuèhé ichi duha-áⁿ càháⁿ cuèhé-yu cuendá Xítohó Jesucristú, dico nchòhó càchí-ndó sá ío càhnu cuu-gá. ¹⁵⁻¹⁶ Te núu nchòhó dándòho ñaha ñáiyu xii-ndo sá cuendá sá ndécú-ndó ichi Xítohó Jesucristú ñá, te vá cúu càháⁿ núu-ndó, chi ndacáⁿ táhú-ndó núú Yá Ndiòxí cuendá sá ndécú-ndó ichi-gá. Te cuèi ndòho-ndo ndecu-ndo, dico ñà túú cùu-ndo ñáiyu sàhni ndíyi te ní ñà túú cùu-ndo ñáiyu dùhu, te ní ñà túú cùu-ndo ñáiyu quide cuèhé quidé dùha, te ní ñà túú cùu-ndo ñáiyu chindee tnúhu tnaha ñáiyu-xi ñⁿ sá ñà túú tàú-ndó càda-ndo.

¹⁷ Te vitna sa quèsaha Yá Ndiòxí cada ndáá-gá nchaa sá quidé nchòo

ñáiyu ndècu ndìhi-gá, te núu ducaⁿ te ndéé-gá cada-gá nchaa ñáiyu ñá túú sàndáá iní ñáhá xii-gá òré ná sáá nduu dùcaⁿ cada ñaha-gá xii-yu. ¹⁸Te nchòhó xini-ndó sã ñáiyu quide váha ndècu ichi Xítohó Jesucristú ndòho tnahá-yu ndècú-yu, dico sáá nduu te nduu táhũ-yu cundecú-yu ndìhi-gá. Te núu ducaⁿ ndòho nchaa ñáiyu quide váha ña, ζte nása-gá yáha nchaa ñáiyu ndècu ichi cuehé ichi duha na sáá nduu càda ndáá Yá Ndiòxí cuechi-yu-i? ¹⁹Te nchaa nchòhó ñáiyu ndòho nacuáa cuini Yá Ndiòxí xini ñuhu-xi sá vã dáñá ndéé-ndó càda váha-ndo cundecu-ndo, te ío quindáá iní-ndó sã xító ñaha-gá xii-ndo. Te ñu-gá cúú-gã Yaá ni cadúha ñaha xii-o, te quide-gá ñⁿ sá càháⁿ-gá.

5

Nàcuáa tàú-xi cada ñáiyu ndècu ichi Xítohó Jesucristú

¹ Te yúhú càháⁿ-í dóho nchaa nchòhó cue téé yíndaha nchaa dava-gá ñáiyu ndècu ichi Xítohó Jesucristú, chi tnahá yúhú yíndaha-í ñáiyu ndècu ichi-gá, te sàndáá iní-í tñuhu-gá, te ní xini-í nchaa nàcuáa ní ndoho-gá, te sáá nduu te tnahá-í cunuu-í ndìhi-gá. ² Te ío canehe cuendá-ndó nchaa ñáiyu ndècu ichi Yá Ndiòxí yíndaha-ndo te cada-ndo dàtná quidé cuè toli, chi cue téé-áⁿ ío váha xito-güedé mbéé-güedé. Te canehe cuendá-ndó-yu sá cúú iní méé-ndó te ñá díú sã íó ñⁿ ñáiyu cada yica ñaha xii-ndo, te ni ñá díú sã cuini-ndó cùhuⁿ yáhu-ndo, chi ni yùhu ni iní-ndó còto-ndó-yu, chi ducaⁿ cuini Yá Ndiòxí cunduu. ³ Te vã cáda-ndó sã ío cunuu-ndo núú-yu, chi cada-ndo mée-ni sá váha cuendá ducaⁿ cànchicúⁿ nihnú-yu cadá-yu tnahá-yu. ⁴ Te òré ná quixí tùcu Xítohó Jesucristú Yaá néhé cuendá ñáhá xii-o nchaa-o ñuyú-a, te taxi-gá sã ío váha nduu

táhú-ó, te cunuu-o ndìhi-gá ni caa ni quíhⁿ.

⁵ Te nchòhó ñáiyu ndècu ichi Xítohó Jesucristú càháⁿ-í dóho-ndo sã ío quindáá iní-ndó cuè téé yíndaha ñaha xii-ndo nacuáa ndècu-ndo ichi-gá, te nchaa-ndo tàú-ndó quindáá iní tnahá-ndó ñⁿ ñⁿ-ndo, chi núú tùtú Yá Ndiòxí càchí-xi ñⁿ xichi:

Nchaa ñáiyu quide cahnu mee-xi ñá túú cùu váha iní Yá Ndiòxí núú-yu,

dico nchaa ñáiyu ndàhú iní-xi te chindee ñaha-gá xii-yu.

Duha càchí-xi núú tùtú-gá. ⁶ Te dañá-ndo mée-ndo núú ndáhá Yá Ndiòxí, chi mee-gã ío cunuu-gá. Te núu ducaⁿ na càda-ndo, te sáá nduu te cada nínu ñaha-gã xii-ndo. ⁷ Te nchaa sã yáha-ndo ndècu-ndo te nachihi-ndo ndàha Yá Ndiòxí, chi mee-gã xító ñaha-gá xii-ndo.

⁸ Te ío váha cuáha-ndo cuendá cundecu-ndo, te quíhi iní-ndó chi sàcuíhná xicá cùu-xi cuini-xi dacuíta nihnu ñaha-xi xii-o, chi ío cùu úhú iní ñáhá-xí, te cùu-xi datná ñⁿ quiti dééⁿ xicá ndùcu sá cáxi-xi. ⁹ Te ío quindáá iní-ndó Xítohó Jesucristú, te vã dáñá-ndó mée-ndo dandahú ñáhá sàcuíhná xii-ndo càda-ndo nacuáa cuini-xi, chi naha-ndo sá ncháá ñáiyu ndècu ichi Xítohó Jesucristú xíndecu nihí ñuyú ndòhó-yu dàtná ndòhó nchòo ndecu-o ichi-gá. ¹⁰ Dico sacú-ni nduu duha cundòho-o te dàtnúni ñá túú-gã ná cumání-ó cundecu-o núú Yá Ndiòxí, te dàvá-áⁿ vã cáni ñⁿ cani úú iní-ó cundecu-o ichi-gá. Te ío-gá ngúndecu ndìhi-o tñuhu ndee iní cada-o nchaa nacuáa càháⁿ-gá, te ducaⁿ càda-o chi mee Yá Ndiòxí ío chindee ñaha-gá xii-o, te ñu-ni Yaá-áⁿ ío cùu iní ñáhá-gã xii-o, chi ní càháⁿ ñáhá-gã xii-o cundecu-o núú ío váha cãa ndecu-gá cundecu-o ni caa ni quíhⁿ, te ducaⁿ ní quide-gá chi ní sàndáá iní-ó Xítohó Jesucristú. ¹¹ Te ío ndacáⁿ

táhú-ó núú Yă Ndiõxí chí ío càhnu
cuu-gá, te cùnuu-gá nchaa nduu
nchaa quíú. Te ducaⁿ na cùnduu.

Tnúhu ndéé núú nǐ ndihí-ná

¹² Te té Silvanú xini-í sá cúú-dě
#ⁿ téé quide ndáá ndécú ichi Xítóhó
Jesucristú, te diu-dé ní cáháⁿ
ndàhú-í núú-dě ní tee-dé #ⁿ ǔú
tnúhu sá nǐ xáhaⁿ-í xii-dé núú
tútú-a cuendá daquixi-í ndaha-ndo,
te núú tútú-a cǎchí tnúhu ndáá-í
xii-ndo sǎ Yă Ndiõxí ío cùu iní
ñáhá-gǎ, te chindee ñaha-gá xii-ndo
ndècu-ndo, te cǎchí tnúhu tucu-í
xii-ndo sǎ ío quindáá iní-ndó sǎ
ndáá ducaⁿ quide ñaha-gá xii-ndo.

¹³ Te cue ñáyiú ndècu ñnúú
Babiloniá, ñáyiú ndècu ichi Yá
Ndiõxí, diu-ni ñáyiú ní cachí Yă
Ndiõxí sá nánihí tǎhú datná cúú
nchòhó, ío quide ndee iní ñáhá-yu
xii-ndo, te tnáhá té Mǎcú téé cùu
datná #ⁿ déhe-í quidé ndèe iní
ñáhá-dě xii-ndo. ¹⁴ Te ndihí tnúhu
yiñúhu cada ndee iní tnáhá-ndó
#ⁿ #ⁿ-ndo, te xicáⁿ tǎhù-í núú Yă
Ndiõxí sá ío na cùndecu nahí nchaa
nchohó ñáyiú ndècu ndihí Xítóhó
Jesucristú. Te ducaⁿ na cùnduu. Te
íó chí cádá ndèe iní-nǎ vitna.

TUTÚ CÚU ÒÚ NÍ CADÚHA TÉ PÈLÚ

*Té Pèlú càdúha-dé tutú quíhíⁿ
ndaha ñáyiú sàndáá iní tnúhu Yá
Ndióxi*

¹ Yúhú té Xímú, àdi Pelú chi úú òú-í, xínú cuèchi núú Xítohó Jesucristú, chi mee-gá ní tendaha ñáha-gá xii-í xicá cùu-í càháⁿ-í tnúhu-gá. Te càdúha-í tutú-a sá cùu-xí nchàa nchohó ñáyiú sàndáá iní ñáhá xii-gá dàtná sàndáá iní-ndí-gá, te ducaⁿ chi Tátá-ó Dútú Ndióxi ní dácàháⁿ-gá iní-ó ní sàndáá iní-ó-gá, chi cùu-gá Yaa ío váha quide ndáá ndíhi Xítohó Jesucristú Yaa dácàcu nihnu ñaha xii-o núú ùhú núú ndàhú. ² Te xicáⁿ táhù-í núú Yá Ndióxi sá ùuⁿ-gá uuⁿ-gá ná cuita chindee chitúu ñaha-gá xii-ndo quíhíⁿ, te ducaⁿ ío váha cuu iní-ndó cùndecu-ndo, te ducaⁿ càda-gá chi ta cùtnuní-gá iní-ndó nàcuáa ndùu cuendá-gá, te ducaⁿ ta cùtnuní tucu iní-ndó nchàa nacuaáa ndùu cuendá Xítohó Jesucristú Yaa cùú Xítohó-ó.

*Nàcuáa quide ñáyiú ndècu ichi
Xítohó Jesucristú*

³ Te Yá Ndióxi ío càhnu cuu-gá chi chindee ñaha-gá xii-o quide ndáá-ó ndècu-o datná cuiní meé-gá, te ducaⁿ chi cùtnuní iní-ó nàcuáa sàni iní Xítohó Jesucristú Yaa ní càháⁿ ñáhá xii-o. Te òré ní càháⁿ ñáhá-gá xii-o te ní cutnùní iní-ó sá ío càhnu cuu-gá te ío váha quide-gá. ⁴ Te ducaⁿ ní cutnùní tucu iní-ó nàcuáa ní càháⁿ-gá cada ñaha-gá xii-o, te tnúhu ní càháⁿ-gá-áⁿ ío càhnu cuu-xi te ío váha, te nchoo ní sàndáá iní-ó tnúhu-áⁿ núu xíáⁿ ñá túú-gá ndécú-ó ichi cuehé ichi duha te ní ñá túú-gá sání iní-ó càda-o nándi sá cuehé sá dúhá, te ní cuu vii ní cuu váha iní-ó vitna. ⁵ Te sá dúcáⁿ quide-gá te xíáⁿ ío nducu ndèe-ndo cada-ndo

nchaa nacuaáa càháⁿ-í-a, te nchòhó sàndáá iní-ndó-gá dico ñá díú mèe-ni xíáⁿ chi tnàhá xíní ñúhu-xi cada ndáá-ndó cùndecu-ndo. Te núu quide ndáá-ndó ndècu-ndo te xíní ñúhu-xi tecú, tnùní-ndó tnúhu-gá. ⁶ Te núu tècú tnùní-ndó te cùu-ndo ñáyiú xíní cotnii mee-xi, te núu cùu-ndo ñáyiú sàcòo tnií mee-xi te xíní ñúhu-xi cunduu càhnu iní-ndó cuéi nándi sá ná yáha-ndo cùndecu-ndo, te núu càhnu iní-ndó te xíní ñúhu-xi cada ndáá-ndó cùndecu-ndo datná cuiní meé Yá Ndióxi cada-ndo. ⁷ Te núu quide ndáá-ndó ndècu-ndo, te xíní ñúhu-xi ío cuu iní tnáhá ndí mee-ndo nacuaáa ndècu-ndo ichi-gá, te núu cùu iní tnáhá ndí mee-ndo te xíní ñúhu-xi cuu iní-ndó nchàa dava-gá tnàha ñáyiú-ndo.

⁸ Te núu sa ducaⁿ quide-ndo ndecu-ndo te uuⁿ-gá cuita ducaⁿ càda-ndo quíhíⁿ núú cuaháⁿ núú vèxi, te núu ducaⁿ quide-ndo te cùu-ndo cue ñáyiú ñá túú dàna iní-xi xíndecu, te cuita cutnùní-gá iní-ndó nchàa nacuaáa sàni iní Xítohó Jesucristú quíhíⁿ. ⁹ Te nchaa ñáyiú ñá túú cuiní ducaⁿ càda cuú-yu ñáyiú ñá túú tnáhi ndíxi túu iní-xi sá Yá Ndióxi sa ní ndada ndoo ní ndada nine-gá iní-yu cuendá nchaa sá cuehé sá dúhá ní xóo cadá-yu, te ñáyiú-áⁿ cùú-yu dàtná ñⁿ ñáyiú cuáá àdi datná ñⁿ ñáyiú ñá túú cùtnuní váha núu-xi, te ducaⁿ sàtnahá-xi cùú-yu cuendá sá dúcáⁿ quidé-yu. ¹⁰ Te xíáⁿ núu yúhú càháⁿ-í dóho nchaa nchòhó ñáyiú ndècu ichi Xítohó Jesucristú, te ío nducu ndèe-ndo cada váha-ndo cùndecu-ndo cuendá cutnùní ndáá iní-ndó sá Yá Ndióxi ní càháⁿ ñáhá-gá xii-ndo, te ducaⁿ ní quide-gá chi ducaⁿ ní cachí-gá cada-gá. Te vá ñⁿ ndùu cani iní-ndó dàña-ndo ichi-gá, te núu vá dáña ndèé-ndó càda-ndo nchaa nacuaáa càháⁿ-í-a. ¹¹ Te núu ducaⁿ na càda-ndo cùndecu-ndo, te ío vii ío váha cada Yá Ndióxi queheⁿ cuendá ñáhá-gá xii-ndo òré ná sàà-ndó

núú ndécú Xítohá Jesucristú táxi tnùnì-gá nchaa nduu nchaa quíú, te ñu-ni Yaá-áⁿ cúú Xítohá-ó te ní dácácu nihnu ñaha-gá xii-o núú úhú núú ndàhú.

¹² Te ducaⁿ-ni quíhi-í dandacu iní ñáhà-í xii-ndo nchàa tnúhu càháⁿ-í-a cuèi sa xìnì-ndó tnúhu-áⁿ, te cuèi sàndáá váha iní-ndó nchàa tnúhu ndáá dácuaàha-ndo. ¹³ Te yúhú quidé cuèndá-í sá ïo táú-xi càháⁿ-í dóho-ndo ñini ndecu-í ñuyúú-a cuèndá sá vǎ nácuaànaa-ndo nacuáa cada-ndo cùndecu-ndo. ¹⁴ Chi Xítohá Jesucristú ní cachí-gá sá ñà túú-gǎ vǎi nduu cundecu-í ñuyúú-a te cuú-í. ¹⁵ Te ïo nducu ndèe-í nducu-í nácuaá cada-í cuèndá quendóo ndíhi-ndo nchàa tnúhu càháⁿ-í-a, te cuèi na yǎha cuú-í dico vá nácuaànaa-ndo cada-ndo nchaa nacuáa càháⁿ tnúhu sá dánèhé ñáhà-í xii-ndo vitna.

Cue téé ní xìnì núú sǎ ïo càhnu cuu Xítohá Jesucristú

¹⁶ Te sa ní dánèhé ñáhà-ndí xii-ndo sǎ ïo càhnu cuu Xítohá Jesucristú. Te ní cachí tnúhu tucu-ndí nácuaá cada-gǎ òré quixi tucu-gǎ, te tnúhu-áⁿ cúú-xi tnúhu ndáá cuiti te ñá díú tnúhu sǎ ñi saní iní cue ñáyúú ñuyúú-a cùu-xi, chi nchúhú ní xìnì núú-ndí nácuaá ní quide-xi cùtnàhá ní cutnùnì iní-ndí sǎ ïo càhnu cuu Xítohá Jesucristú. ¹⁷ Chi dàvǎ-áⁿ ïo váha ní quide Tǎtá-ó Dútú Ndióxi ní quide càhnu-gǎ Xítohá Jesucristú, te ñu-ni dàvǎ-áⁿ ñi càháⁿ Dútú Ndióxi ndéé andíu ñi xáhaⁿ-gǎ xii Xítohá Jesucristú: “Yòhó cúú-n Dèhe-í téé ïo cùu iní-í, te ïo cùdí iní ñáhà-í xii-n”, duha ní xáhaⁿ Yǎ Ndióxi xii Xítohá Jesucristú. ¹⁸ Te nchúhú ní tecú dóho-ndí ní càháⁿ Yǎ Ndióxi ndéé andíu cùtnàhá ducaⁿ ñi xáhaⁿ-gǎ xii Xítohá Jesucristú, chi tnàhá-ndí ndécú-ndí ndíhi-gǎ yucu núú dúcáⁿ ñi quide càhnu ñaha Yǎ Ndióxi xii-gǎ.

¹⁹ Te ndècu ndíhi-o nchaa tnúhu ní càháⁿ cue téé ní xóo càháⁿ tnúhu Yǎ Ndióxi ndéé sanaha te nchaa tnúhu-áⁿ càháⁿ-xi nchaa nácuaá cada-xi vitna, te cùtnùnì iní-ó sǎ tnúhu ndáá cúú-xi, te xìnì ñuhu-xi cada cuèndá váha-ndo nchàa nacuáa càháⁿ tnúhu-áⁿ, chi tnúhu-áⁿ cúú-xi dàtná ñi ñuhú dáyèhé-xi ndéé òré véxi tundaá quéné chòdínì cáhnu dáyèhé-di. Te ducaⁿ sǎtnahá-xi cùu tnúhu-áⁿ chi quide-xi nácuaá cutnùnì iní-ó cuèndá Xítohá Jesucristú. ²⁰ Te xìnì ñuhu-xi sǎ ïo-gǎ cada cuèndá-ndó sǎ ñà túú ñáyúú tecú tnùnì ní ñi tnúhu sǎ ñi chídó tnùnì cue téé ní càháⁿ tnúhu Yǎ Ndióxi ndéé sanaha, te núu Yǎ Ndióxi vá cadá-gǎ nácuaá cutnùnì iní-yu nácuaá càháⁿ nchaa tnúhu-áⁿ. ²¹ Te cue téé-áⁿ ïo ní xíndecu yíñuhu-güedé núú Yǎ Ndióxi, te nchaa tnúhu sǎ ñi càháⁿ-güedé-áⁿ ñà túú cùu-xi tnúhu sǎ ñi cahu iní méé-güedé, chi Espíritú Yǎ Ndióxi ní dácáhú iní ñáhà-xi xii-güedé nácuaá cunduu tnúhu càháⁿ-güedé.

2

Cue téé càhí sǎ càháⁿ tnúhu Yǎ Ndióxi te ñà ndáá

¹ Te ndéé sanduu chi ní xíndecu cue téé ní xóo dandáhú ñáhà xii ñáyúú isráel cachí sǎ càháⁿ tnúhu Yǎ Ndióxi te ñà ndáá sǎ càháⁿ-güedé tnúhu-gǎ, te ñu-ni ducaⁿ tucu cundecu cue téé dandáhú ñáhà xii-ndo vitna, chi cachí-güedé sǎ càháⁿ-güedé tnúhu Yǎ Ndióxi te ñà ndáá. Te cue téé-áⁿ ïo yidáhu càháⁿ-güedé, te nchaa tnúhu càháⁿ-güedé-áⁿ dacuita nihnu ñaha-xi xii-ndo te núu na tédóho-ndo, chi cue téé-áⁿ vǎ núnuu-güedé sǎ Xítohá Jesucristú ní xíhí-gǎ cuèndá-güedé. Te sǎ dúcáⁿ cada-güedé ïo-gǎ ndíhi dacuita nihnu-güedé méé-güedé. ² Te vǎi ñáyúú xínu iní-yu cadá-yu nándi sǎ cuèhé sǎ dúhá cuèndá sǎ dúcáⁿ cada cue téé-áⁿ, te cuèndá xíáⁿ ngóo ñáyúú càháⁿ úhú-yu cuèndá ichi Yǎ Ndióxi.

³ Te mee-ni tnũhu sá nĩ cahu iní cue ñáyiú ñuyiú-a danèhé ñáhá-güedé xii-ndo, te quesaha-güedé sá cúu-xí tnũhu ndáá te ñá ndáá cuendá-ni sá cuañaha-ndo dñhúⁿ xii-güedé, chi diu-ni xiáⁿ tnàhí cuhuⁿ iní-güedé, dico Yá Ndiöxí sa ní cunaha ndècu túha-gá cuendá cada ndáá-gá cuèchi-güedé, te na sàá nduu te cuíta nihnu duuⁿ-güedé, chi Yá Ndiöxí vá nácuaⁿaa-gá ñⁿ sá nĩ cachí-gá cada-gá.

⁴ Te Yá Ndiöxí ñá túú ní quide cahnu iní-gá sá nĩ quide cue espíritú ñá túú ní cuení cada ndáá xínú cuèchi núu-gá ní cùu, chi ní dáquihiⁿ ñáhá-gá xii-xi ñⁿ xichi núú io ndòho-xi ndecu-xi, te xíaⁿ cundedí nihnu-xi ndéé sáá nduu cuíta nihnu duuⁿ-ná-xi. ⁵ Te Yá Ndiöxí ñá túú ní quide cahnu tucu iní-gá nchaa sá nĩ quide ñáyiú ñuyiú dñhna, chi dàvá-áⁿ nĩ dándáá-gá ndute ñuyiú ní cáhá nchaa ñáyiú ndècu ichi cuehé ichi duha te ñⁿdii-ni té Nöé ndihi úsá-gá tucu cue ñáyiú cùu ndi mee-dé ní dácäcu nihnu-gá. Te té Nöé-áⁿ cúu-dé téé ní cáháⁿ dóho-yu nácuaá cada váha-yu cundecú-yu ni cùu te ñá túú ní cuení-yu. ⁶ Te Yá Ndiöxí ní dängává-gá ñuhú ní dánáá-gá ñáyiú ñuú Sodomá ndihi ñáyiú ñuú Gómorrá te mee-ná yáá nĩ nduu ñuú-áⁿ. Te sá dúcáⁿ nĩ cuu xiáⁿ cútñuní iní-ó nácuaá cada ñaha Yá Ndiöxí xii nchaa ñáyiú ñá túú quide váha. ⁷ Dico té Löt téé ní quide ndáá ní xíndecu ñⁿ ñuú-áⁿ dàvá-áⁿ chi ní dácäcu nihnu ñaha-gá xii-dé. Te nchaa ñáyiú ñuú núú nĩ xíndecu-dé-áⁿ io ní xínduu cuihna iní-yu, te mee-ni ichi díí iní ní xíndecú-yu, te sá dúcáⁿ nĩ xóo cada-yu xiáⁿ io ní ndíhú iní té Löt. ⁸ Te ñⁿ nduu ñⁿ nduu ní xóo cada ndàhú-xi iní té Löt-áⁿ cuendá nchaa tnúhu cuèhé tnúhu duha ní xóo cáháⁿ-yu ní xóo cundedóho-dé, ndihi cuendá nchaa sá cuèhé sá dúhá nĩ xóo cada-yu ní xóo quení-dé, te mee-dé

ní cuu-dé ñⁿ téé ní xínduu vii ní xínduu váha iní-xi núú Yá Ndiöxí. ⁹ Te sá dúcáⁿ nĩ yáha té Nöé ndihi té Löt, xiáⁿ cútñuní iní-ó sá Yá Ndiöxí io chindee-gá cue ñáyiú quide ndáá ndécú ichi-gá cuendá sá vã cádá-yu nándi sá cuèhé sá dúhá cuèi nándi na ndòho-yu cundecú-yu. Te Yá Ndiöxí cächí-gá sá ncháá ñáyiú ndècu ichi cuehé ichi duha sa ndècu túha-yu sá quihiⁿ-yu núú ùhú núú ndàhú nduu nà yáha cundáá cuèchi-yu.

¹⁰ Te uuⁿ-gá cada ñaha Yá Ndiöxí xii nchaa cue téé ndècu ichi díí iní, te dàquee tíhú-güedé nchaa tnúhu sá sánú ichi ñaha xii-o nácuaá cada-o cundecu-o, te cùu-güedé cue téé ñí iní-xi, te yí iní-güedé, te ñá túú yùhú-güedé cáháⁿ úhú-güedé cuendá nchaa espíritú cúnúu. ¹¹ Te cue espíritú xínú cuèchi núú Yá Ndiöxí io cùnuu-xi dacúxí cuè téé-áⁿ, dico ñá túú cüyí-xi cáháⁿ-xi dàtná cáháⁿ cue téé-áⁿ òré ndàcáⁿ cuèchi-xi núú Yá Ndiöxí cuendá nchaa sá quidé cuè espíritú cündihi yucu ñávaha.

¹² Te nchaa cue téé dandàhú ñáhá xii-ndo-áⁿ cúu-güedé dàtná cue quiti, chi cue quiti-áⁿ ñá túú ndècu sá xini tnùnigüedi, chi cue quiti-áⁿ nĩ cacu-güedi sá tníí-ó-güedi te cahni-o-güedi. Te ducaⁿ sàtnahá-xi cùu nchaa cue téé-áⁿ, chi cáháⁿ cuèhé-güedé cuendá ndèdani càa espíritú cuèi ñá túú xini-güedé ná espíritú cúu-xí, te diu-ni mee-güedé dácuíta nihnu-güedé méé-güedé sá dúcáⁿ quide-güedé, ¹³ te sáá nduu te nacháhu-güedé nchaa sá quidé-güedé-áⁿ, te cuèi nduu cuèi niú cúdíí iní-güedé quidé-güedé nchaa núú sá cuèhé sá dúhá sàni iní-güedé. Te òré nàtacá-ndó càda-ndo ñⁿ vico chiñuhu-ndo Yá Ndiöxí te chitnahá ñáhá-güedé xii-ndo, te cada dusaⁿ-güedé sá cúdíí iní-güedé sá dándàhú ñáhá-güedé xii-ndo, te dìcò sácáⁿnúú cuàha ñaha-güedé

xii-ndo dùcaⁿ na cada-güedé.

¹⁴ Te nchaa cue téé-áⁿ òré xíní-güedé ìⁿ ñáyiú díhí te ndíhí-ni sàni iní-güedé cáháⁿ ndíhí ñaha-güedé xii-yu, te ñá túú ndùu vétú iní-güedé cuèndá nchaa sá cuèhé sá dúhá quide-güedé chi uuⁿ-gá uuⁿ-gá sání iní-güedé cada-güedé. Te cuáháⁿ-güedé dándàhú-güedé nchaa ñáyiú ñá túú ñihí ndéé càda ndáá cuèndá canchicúⁿ nihnú-yu nchaa tnúhu cáháⁿ-güedé. Te mee-ni nchàa sá ndécú ndíhí tnaha ñáyiú-güedé cúú iní-güedé, te cue téé-áⁿ cúú-güedé cue téé duuⁿ duuⁿ sa ní xíta ñihnu núú Yá Ndióxi. ¹⁵ Chi cùu-güedé cue téé vá cání-gá iní-xi cada ndáá, te nchicúⁿ nihnu-ná-güedé quidé-güedé nàcuáa ní xóo cada ndíi Balaám déhe ndíi Bèór, chi ndíi Balaám-áⁿ ñí xóo tnahá iní ndíi cada ndíi chiúⁿ cuehé nàcuáa ní xóo ñihí ndíi díhúⁿ. ¹⁶ Te Yá Ndióxi ní quide-gá ní cáháⁿ búrru ndíi ní tenàa ñáhá-dí xii ndíi cuèndá sá vǎ cáda ndíi ìⁿ cuéchi sàni iní ndíi cada ndíi ni cùu. Te sá dúcáⁿ ní cuu xǎⁿ ní nguítuu ndíi ñá túú ní quide ndíi ìⁿ sá ñá túú nándíhí sàni iní ndíi ni cùu.

¹⁷ Te nchaa cue téé ducaⁿ xíquide cùu-güedé dàtná ìⁿ doco yìchí, te cùu tucu-güedé dàtná ìⁿ vícò sǎ xídó tǎchí te ñá túú dǎu nchídó-xí, te sa ndècu túha ìⁿ xichi núú ìo nee quíhíⁿ-güedé cundecu-güedé ni caa ni quíhíⁿ. ¹⁸ Te cue téé-áⁿ cáháⁿ-güedé dàtná cáháⁿ ìⁿ téé ìo cùu cahnu dico ñá túú vèdana nándíhí nchaa tnúhu cáháⁿ-güedé, te cue téé-áⁿ dándàhú-güedé nchaa ñáyiú íchí ñí dàña ìchi cuehé ìchi duha, te xǎhaⁿ-güedé xii-yu sá cúú-ní càdá-yu nchaa sá cuèhé sá dúhá quide nchaa ñáyiú ndècu ìchi díí iní, ¹⁹ te xǎhaⁿ tùcu-güedé sá cúú-ní càdá-yu nání véxi iní-yu cuèi sá vǎha te cuèi sá cuèhé, dico mee-güedé chi mee-ni sá cuèhé sá dúhá cùnuu quide-güedé. Te nchaa ñáyiú ñá ndácú dàña nándi

sá cuèhé sá dúhá cùu-yu dàtná ìⁿ ñáyiú xínu cuechi ñá túú tnàhí dàña quee núú chiúⁿ pàtróoⁿ-xi. Te ducaⁿ sàtnahá-xi cùu-yu chi ñá ndácú-yu dàña-yu nándi sá cuèhé sá dúhá quide-yu. ²⁰ Te núu ñáyiú sa ní dàña nchàa ìchi cuehé ìchi duha cuèndá sá ñí cutnùní iní-yu nàcuáa ndùu tnúhu Xitohó Jesucristú, Yáá ní dácácu nihnu ñaha xii-o núú ùhú núú ndàhú ná nanchocáva iní-yu cundecu tucú-yu ìchi cuèhé ìchi duha, te mee-nǎ sá cuèhé sá dúhá tàxi tnuní ñáhá-xí xii-yu, te núu ducaⁿ te vǎa-gá tucu cadá-yu dàcúúxí dàtná ní xóo cadá-yu cùnàhá vátá cùnùní-gá iní-yu nàcuáa ndùu tnúhu-gá. ²¹ Te vǎha-gá sá vǎ ngünu ìchí-yu ìchi ndáá ní cùu te ñá díú sǎ sǎ ní ngünu ìchí-yu te ní dàña-yu nchaa tnúhu-gá sá sǎ ní ñihí-yu ndècu ndíhí-yu sànu ìchi ñaha-xi nàcuáa cundecú-yu ni cùu. ²² Te ñáyiú ducaⁿ xíquide quèe ndáá-xi nàcuáa cuáháⁿ ìⁿ cuèndú sá càchí-xi: “Iná ní nacaxi-dí sá ñí ndusaⁿ-dí, te cùchí quití íchí ñí xichi ndute càndoo cuáháⁿ-ni tucu-dí cuchi ñuhu-dí núú ndèhyú”, duha cuáháⁿ cuèndú-áⁿ.

3

Xitohó Jesucristú quixi tucu-gá

¹ Te nchaa nchòhó ñáyiú ìo cùu iní-í cùnùní iní-í sá ìo vǎha sàni iní-ndó, te xéhé cúú-xí tùtú cúú úú cadúhá-í sá cúú-xí-ndó, te ìⁿ-ni cáháⁿ-í dándàcu iní ñáhá-í xii-ndo nchàa tnúhu sá sǎ ní xíndedóho-ndo. ² Chi cùní-í sá vǎ nàcuànaa-ndo nchaa tnúhu ní cáháⁿ nchaa cue téé ní xóo cáháⁿ tnúhu Yá Ndióxi ndéé sanaha, te ni vǎ nàcuànaa-ndo nchaa tnúhu ní cáháⁿ cue téé ní cáháⁿ tnúhu Xitohó Jesucristú Yáá ní dácácu nihnu ñaha xii-o núú ùhú núú ndàhú, chi díu nchaa tnúhu-áⁿ sánú ìchi ñaha-xi xii-o nàcuáa cada-o cundecu-o.

³ Te ìo-gá xíní ñuhu-xi cutnùní iní-ndó nàcuáa cada-xi òré vátá sǎa-gá nduu quixi tucu Xitohó Jesucristú ñuyú-a, te càchí tnúhu-í

xii-ndo sã cùndècu ñáyiu cuhuⁿ iní mee-ni nchàa sã cuèhé sã dúhá te mee-ni xiáⁿ cada-yu, te cãháⁿ cuèhé cãháⁿ duhá-yu cuendá tnúhu Yá Ndiõxí. ⁴ Te cachí-yu: “Ñá ndáá sã quíxí Xítohó Jesucristú ñuyíú-a, chi núu quixi-gá te sã ndéé ama-gá sa ní quexio-gá ní cùu. Te dàtná-ni quide-xi vitna ñiu-ni duha ní quesaha-xi quide-xi ndéé cùtnàhá ní ngáva ñuyíú, te ñiu-ni duha quide-xi ndéé cùtnàhá ní xindecu cue ñani tnàhá-ó ndéé sanaha, te ñiu-ni duha quide-xi ndéé ní sáá nduu ní xihí-güedé, te ñiu-ni duha quide-xi ndéé vitna”, duha cãháⁿ-yu. ⁵ Te ñucùuⁿ cada-yu vá cáda cuendá-yu sã Yá Ndiõxí ní cãháⁿ-gá te ní ngúndecu andiu ndihi ñuyíú-a, te ñiu-gá ní quide ní quene ñuhu yíchi xití ndute ní ngúndecu-xi ñⁿ xio. ⁶ Te ñⁿ xito ní dándáá Yá Ndiõxí ndute ñuyíú-a ní dãnáá-gã nchaa sã ió. ⁷ Te Yá Ndiõxí ní cachí-gá sã cùndècu-ni ñuyíú-a ndihi andiu ndéé ná sãá nduu càda-gá nchaa nàcuáa ní cãháⁿ-gá sã cúu-xí nchaa ñáyiu ndècu ichi cuehé ichi duha, te dàvá-áⁿ danàa-gá nchaa ñáyiu-áⁿ chi cáyú andiu ndihi ñuyíú-a.

⁸ Te nchaa nchòhó ñáyiu ío cùu iní-í, ío cuhuⁿ iní-ndo tnúhu na cãháⁿ-í-a, chi Yá Ndiõxí ñá túú sàni iní-gá dàtná sání iní méé-ó, te ñⁿ nduu cùu-xi datná úxí cièndú cuíá, te úxí cièndú cuíá-áⁿ cúu-xi dàtná ñⁿ nduu sã cúu-xí-gã. ⁹ Te Yá Ndiõxí ñá túú dàna ndodo iní-gá vá cáda-gã ñⁿ sã cãháⁿ-gá dàtná cãchi cue ñáyiu sã dãná ndòdo iní-gá cada-gá ñⁿ sã cãháⁿ-gá, chi ñucùuⁿ tnahí dácaca-gá nduu cuendá sã ío cùndahú iní ñáhá-gã xii-o, te cuíní-gá sã ncháá ñáyiu ndixi túu iní-yu sã ñà túú quide váha-yu ndècú-yu te tuhá-yu ichi-gá, te ducaⁿ quide-gá chi cuíní-gá sã vá cuíta nihnu ni ñⁿ-yu.

¹⁰ Te dàtná quidé cue ñadúhu

quíhu-güedé ñⁿ vehe dùhu-güedé òré ñá túú yíhi iní xítohó vehe-án, te ducaⁿ càda Xítohó Jesucristú chi nduu ñà túú yíhi iní ñáyiu ñuyíú-a quixi tucu-gá, te dàvá-áⁿ cada-xi andiu dàtná quidé-xí òré níhi víhi cãháⁿ ñúhu, te ñiu-ni òré-áⁿ ndoñuhu àndiu, te cáyú nchaa chódíní, te cáyú tucu tnàhá ñuyíú-a ndihi nchaa sã ió.

¹¹ Te vitna nchòhó sa xini-ndo sã náá ñuyíú-a te xiáⁿ ío xini ñuhu-xi cada váha-ndo cùndecu-ndo, te cada-ndo nàcuáa cuíní méé Yá Ndiõxí cunduu. ¹² Te ío nducu ndèe-ndo ducaⁿ cada-ndo cuendá ducaⁿ ndihi-ni sáá nduu càda-gá nchaa nàcuáa cãháⁿ-gá, te ducaⁿ nchòhó cundecu túha-ndo sãá nduu-áⁿ. Te ñiu-ni nduu-áⁿ ndoñuhu àndiu chi cáyú-xi, te ñiu-ni ducaⁿ ndoñuhu tucu nchaa chódíní chi ndihi-di cáyú. ¹³ Te nchoo ndètu-o sáá nduu cùndecu-o ñⁿ ñuyíú sáá, te quíní-ó ñⁿ andiu saa datná ní cachí Yá Ndiõxí, te yàcáⁿ chi mee-nã cue ñáyiu quide váha cundecu.

¹⁴ Te nchòhó ñáyiu ío cùu iní-í, níni ndètu-ndo sáá nduu dùcaⁿ cada-xi ío nducu ndèe-ndo cada-ndo mee-ni sã váha cundecu-ndo ichi Yá Ndiõxí, te cundecu nahi-ndo, te cada-ndo nchaa nacúáa vá cùndècu cuéchi-ndo núú-gã. ¹⁵ Te ío cada cuendá-ndo sã dácaca-gá nduu dùcaⁿ cada-gá chi cuíní-gá sã ncháá ñáyiu naníhí tàhú-yu. Te té Pãblú téé ío cùu iní-ó ndècu ndihi-o ichi Xítohó Jesucristú ñiu-ni nàcuáa cãháⁿ-í-a ñiu-ni ducaⁿ ní tee-dé ñⁿ núú tütú ní dáquixí-dé ndaha-ndo, te ní tee-dé nàcuáa ní dácáhu iní ñáhá Yá Ndiõxí xii-dé. ¹⁶ Te ñiu-ni ducaⁿ cãháⁿ-dé nchaa dava-gá núú tütú cáduha-dé, te dava tnúhu cãháⁿ-dé ío úhú tecú tnúni-ó, núu xiáⁿ ñáyiu ñá túú cùtnuní váha iní-xi, ñáyiu ío yáchi sàndáá iní-xi ñⁿ tnúhu, ñáyiu-áⁿ tècú tnúni dátñi-yu nchaa tnúhu ní chídó tnúni-dé, ndihi nchaa dava-gá tnúhu yòdo tnuní núú tütú

Yă Ndiôxí, te sá dúcáⁿ quidé-yu te dacuíta nihnú-yu mée-yu.

¹⁷ Te nchòhó ñáyiu ío cùu iní-í, sa cùtnuní iní-ndó nacúaa quide dava ñáyiu, núu xíⁿ ío xìni ñuhu-xi quíhi iní-ndó cùndecu-ndo cuendá ducaⁿ cùndecu-ni-ndo ichi-gá, te vá dáñá-ndó mée-ndo dandahú ñáhá nchàa cue tée ndècu ichi cuehé ichi duha, chí cue tée-áⁿ ñà túú sàni váha iní-güedé cuendá tnúhu Yá Ndiôxí. Te núu na dàña-ndo mee-ndo dandahú ñáhá-güedé xii-ndo te vá cùndècu váha-gá-ndó ichi-gá dàtná ndécú-ndó vitna.

¹⁸ Te nchòhó uuⁿ-gá uuⁿ-gá cuita cutnùní-gá iní-ndó quíhíⁿ nchaa nacúaa ta chindee ñaha Xítóhó Jesucristú xii-ndo cuáháⁿ. Te ducaⁿ ío-gá cuita cutnùní iní-ndó nchàa nacúaa sàni iní-gá, te ñiu-gá cúú-gá Yaá ní dácácu nihnu ñaha xì-o núú ùhú núú ndàhú. Te chí ná cächí-ó sá ío càhnu cuu-gá cuéi vitna té cuéi ndée núú cuáháⁿ núú vèxi. Te ducaⁿ na cùnduu. Te ío chí cádá ndèe iní-ná vitna.

TUTÚ DÍHNA NÍ CADÚHA TÉ JUÁÁ

*Tnúhu sá càháⁿ nàcuáa naníhí
táhú-ó*

¹ Te yúhú té Juáá càchí tnúhu-í xii-ndo cuendá Crístú Yáá càháⁿ nàcuáa cundecu ndihí-o Yá Ndióxi. Te Crístú-áⁿ sa ndècu-gá ndéé cútñahá ní ngáva ñuyúú. Te yúhú ní xiní núú-í ndihí cue téé ní xica cuu ndihí-í nàcuáa càa nacuáa ndùu-gá. Te ní xíndedóho-ndí tnúhu ní cáháⁿ-gá, te ní tendaha-ndí-gá te ní cutnùní ndáá iní-ndí sá ñⁿ yiqui cuñú cúu-gá. ² Te ní quixi túu-gá ñuyúú-a, te ní xiní-ndí-gá, te xiáⁿ càchí tnúhu ndáá-ndí xii-ndo. Te càchí tnúhu tucu-ndí sá ndécú-gá ndihí Tātá-gá Dútú Ndióxi ní cùu, te ní quixi-gá ñuyúú-a ní xíndecu-ndí ndihí-gá. Te ní cachí tnúhu-gá xii-ndí sá ndúú tǎhú-ó cundecu ndihí-o Yá Ndióxi ní caa ní quíhíⁿ te núu na quíndáá iní-ó-gá. ³ Te xiáⁿ dátúu-ndí núu-ndó nchàa sá ní xiní-ndí, ndihí nchaa sá ní xíndedóho-ndí cuendá cuu ñⁿnuu-o nchàa-o datná nchúhú cúú ñⁿnuu-ndí ndihí Tātá-ó Dútú Ndióxi, ndihí Déhe-gá Xítoho Jesucristú. ⁴ Te xiáⁿ núu tèe-í nchaa tnúhu-a cuendá cudíí iní-ó nchàa-o.

Yá Ndióxi cúú-gá datná ñⁿ ñuhú

⁵ Te nchaa tnúhu ní dánèhé ñáhá Xítoho Jesucristú xii-ndí, xiáⁿ dánèhé ñáhà-í xii-ndo. Te ní cachí-gá sá Yá Ndióxi cúú-gá datná ñⁿ ñuhú dáyèhé-gá iní-ó, te ducaⁿ sǎtnahá-xi cùu-gá chí ío váha quide-gá, te ñá túú quide-gá ní ñⁿ sá cuèhé sá dúhá. ⁶ Te núu càchí-ó sá ndécú-ó ichi Yá Ndióxi, te quide-ni-o nchaa sá cuèhé sá dúhá, te dàcuandehnde-o te ñá túú quide ndáá-ó núú-gá. ⁷ Te núu na càda váha-o datná quidé mèe-gá, te cuu ñⁿnuu-o nchàa-o. Te ndada

ndoo ndada nine-gá iní-ó, chí cada càhnu iní-gá nchaa sá cuèhé sá dúhá quide-o, chí ñu cuendá-áⁿ ní xíhí Déhe-gá Xítoho Jesucristú núú cùrúxí.

⁸ Te núu càchí-ó sá ñá túú quide-o ní ñⁿ sá cuèhé sá dúhá, te dándahú-ó mèe-o, te ñá túú quide ndáá-ó núú Yá Ndióxi. ⁹ Te núu na ñàhmá-ó nchaa yíca cuèchi-o núú-gá, te mee-gá cada càhnu iní-gá, te ndada ndoo-gá iní-ó, cuendá cada ndáá-ó cundecu-o ichi-gá, chí mee-gá ío váha quide-gá te ío ndáá quidé-gá, ducaⁿ ní cáháⁿ-gá te ducaⁿ quide-gá. ¹⁰ Te núu na càchí-ó sá ñá túú quide-o ní ñⁿ sá cuèhé sá dúhá, te quide-o Yá Ndióxi ñⁿ ñándéhné, dico ñá túú ndèhné-gá. Te ñá túú ndècu tnúhu-gá iní-ó te núu ducaⁿ na càda-o.

2

*Xítoho Jesucristú càháⁿ ndàhú-gá
cuendá-ó*

¹ Te nchòhó ñáyiu cùu datná déhe-í, chído tnuní-í nchaa tnúhu-a cuendá sá vǎ càdá-ndó ní ñⁿ sá cuèhé sá dúhá. Dico núu ñⁿ-ndo quide-ni-ndo nándi sá cuèhé sá dúhá, te ndècu ñⁿ Yáá càháⁿ ndàhú cuendá-ó núú Yá Ndióxi. Te Yáá-áⁿ cúú-gá Xítoho Jesucristú Yáá quidé ndáá. ² Te ní xíhí-gá sá cuendá nchaa yíca cuèchi-o cuendá ngúndecu váha-o núú-gá te núu na quíndáá iní-ó-gá. Te ñá díú-ní sá cuendá yíca cuèchi nchoo ní xíhí-gá, chí tñahá cuendá nchaa yíca cuèchi ñáyiu ní càa xico ñuyúú.

³ Te núu càda-o nchàa nacuáa càháⁿ Yá Ndióxi, te cutnùní iní-ó sá ndécú-ó ichi-gá. ⁴ Te núu càchí-ó sá ndécú-ó ichi-gá te ñá túú quide-o nacuáa càháⁿ-gá, te dàcuandehnde-o, te ñá túú quide ndáá-ó núú-gá. ⁵ Te núu sàndáá ndisa iní-ó tnúhu-gá, te quide-o nchaa nacuáa càháⁿ-gá, te ducaⁿ te cùu iní ndisa-o-gá, te cutnùní ndáá iní-ó sá ndécú-ó ichi-gá. ⁶ Te núu càchí-ó sá ndécú-ó ichi Yá Ndióxi, te

xini ñuhu-xi cada ndáá-ó cùndecu-o ñuyíú-a datná ní quide ndáá Xítohó Jesucristú cùtnàhá ní xíndecu-gá ñuyíú-a.

Ndudú sáá

⁷ Te nchòhó ñáyiú ndècu ndihi-í ichi Xítohó Jesucristú, ñá túú chido tnuni-í ìⁿ tnúhu saa sà cúú-xí-ndó, chi diu-ni tnúhu sá ní ngúndecu ndihi-ndo ndéé díhna, tnúhu ní xíndedóho-ndo ndéé cùtnàhá ní sàndáá ini-ndó-gá, xiáⁿ chidó tnùní-í. ⁸ Te tnúhu-a cùu-xi datná ìⁿ tnúhu saa tèe-í dándacu ini ñàhá-í xii-ndo nàcuáa ní quide Xítohó Jesucristú cùtnàhá ní quixi-gá ñuyíú-a ní quide váha-gá, te tnàhá nchòhó ní tnì-ndo tnúhu-gá te quide váha-ndo tnàhá-ndó. Te vitna ìⁿ nduu ìⁿ nduu ta cùu vai ñáyiú ta dàña nchaa sá cuèhé sá dúhá cuáháⁿ, chi Xítohó Jesucristú tá dándaxi túu-gá ini-yu cuèndá cutnùní ini-yu nàcuáa nduu cuèndá Yá Ndiòxí.

⁹ Te núu càchí-ó sá quidé váha-o, te cùu úhú ini-ó tnàha ñáyiú-o, te xiáⁿ ñá túú quide ndáá-ó, chi ndècu-ni-o ichi cuèhé ichi duha sá dúcáⁿ quide-o. ¹⁰ Te núu na cùu ini-ó tnàha ñáyiú-o datná cúú ini ñàhá mèe Yá Ndiòxí xii-o ña, te quide ndáá-ó núú-gá, te vá cánúichi-o tnaha ñáyiú-o ìⁿ ichi cuèhé ichi duha. ¹¹ Te núu cùu úhú ini-ó tnàha ñáyiú-o, te ñá túú quide váha-o núú Yá Ndiòxí, chi ndècu-ni-o ichi cuèhé ichi duha, te ñá túú cùtnuni ini-ó sá quidé-ó. Chi cùu-o datná ìⁿ tée ndècu núú nées chi ñá cùtnùní núú-dé ndéé ichi quíhíⁿ-dé. Ducaⁿ sàtnahá-xi cùu nchoo chi ñá cùtnùní ini-ó ndéé ichi quíhíⁿ-ó te núu ducaⁿ na càda-o cuu úhú ini-ó tnàha ñáyiú-o.

¹² Te nchòhó ñáyiú cùu datná déhe-í, yúhú chidó tnùní-í tnúhu-a ìⁿ núú tùtú càchí tnúhu-í xii-ndo sá ní quide càhnu ini Yá Ndiòxí nchaa cuéchi-ndo, chi diu cuèndá-á ní xihí Xítohó Jesucristú. ¹³ Te nchòhó ñáyiú sacuéhé, yúhú tèe-í tnúhu-a

sá cúú-xí-ndó chi càháⁿ ndihi-ndo Jèsús, te Yaá-áⁿ sa ndècu-gá ndéé cùtnàhá ní ngáva ñuyíú. Te nchòhó ñáyiú nchicúⁿ-gá téé tucu-í tnúhu-a sá cúú-xí-ndó chi ñá túú sàndáá ini-ndó tnúhu càháⁿ yucu ñávàha.

Te nchaa nchòhó ñáyiú cùu datná déhe-í, tèe tucu-í tnúhu-a sá cúú-xí-ndó, chi sa càháⁿ ndihi-ndo Tàtá-ó Dütú Ndiòxí. ¹⁴ Te nchòhó ñáyiú ní sàhnu, yúhú chidó tnùní-í tnúhu-a ìⁿ núú tùtú chi càháⁿ ndihi-ndo Jèsús, te Yaá-áⁿ sa ndècu-gá ndéé cùtnàhá ní ngáva ñuyíú. Te nchòhó ñáyiú nchicúⁿ-gá, yúhú chidó tnùní-í tnúhu-a chi ío nihí ndéé-ndó ndècu-ndo, chi tnì-ndo tnúhu càháⁿ Yá Ndiòxí. Te ñá túú sàndáá ini-ndó tnúhu càháⁿ yucu ñávàha.

¹⁵ Te vá cúhúⁿ ini-ndó ní ìⁿ sá cuèhé sá dúhá ío ñuyíú-a, te ní vá cání ini-ndó càda-ndo. Chi núu na cùhuⁿ ini-ó nchaa sá cuèhé sá dúhá ío ñuyíú-a ña, te ñá túú Tàtá-ó Dütú Ndiòxí ñúhú ini-ó te núu ducaⁿ na cání ini-ó. ¹⁶ Te nchaa ñáyiú ñuyíú-a quidé-yu nchaa sá cuèhé sá dúhá, chi diu nchaa xiáⁿ cúdíⁿ ini-yu cadá-yu. Te nchaa sá cuèhé sá dúhá sàni ini-yu, ndihi nchaa sá xini-yu quidé-yu. Te xíquide nínu-yu mèe-yu cuèndá nchaa sá ndécú ndihi-yu. Te nchaa sá ña túú vaha ní cacu nihnu-xi ñuyíú-a. ¹⁷ Te nchaa sá ña túú vaha ío ñuyíú-a, ndihi nchaa sá sání cuèhé sání dùha ini-yu cuita ndihi nihnu-xi quíhíⁿ. Te nchaa ñáyiú tnì tnúhu càháⁿ Yá Ndiòxí cundecú-yu ndihi-gá ní caa ní quíhíⁿ.

Tnúhu ndáá tnúhu Yá Ndiòxí ndihi tnúhu ndehnde

¹⁸ Te nchòhó ñáyiú cùu datná déhe-í, sa nihí-ndó tnúhu sá quíxí ìⁿ tée cunuu-gá-dé cuu úhú ini-dé Cristú. Te sa xíndecu-gá ñáyiú cùu úhú ini ñàhá xii-gá, núu xiáⁿ cùtnùní ini-ó sá sá ta cuyatni nduu naa ñuyíú-a. ¹⁹ Te ñáyiú-áⁿ ní xíndecu ndihi ñàhá-yu xii-o, te ní quéé-yu

cuáháⁿ-yu chi ñá túú ní cùu ìⁿnuu-o ndihí-yu. Chi núu dicó ní cùu ìⁿnuu-o ndihí-yu te cundecu ndihí ñáhá-yu xii-o ní cùu. Te duha ní cuu cuendá cutnùni ndáá iní-ó nchàa-o sá ñá túú cùu ìⁿnuu-o ndihí-yu, chi ñá túú sàndáá iní-yu Yá Ndióxi.

²⁰ Te Xítoho Jesucristú ní taxi-gá Espiritú Yá Ndióxi ndécú ndihí-o, núu xíáⁿ tècú tnùnì-ó tnùhu-gá.

²¹ Te cuendá sá xìnì-ndó tnùhu ndáá tnùhu Yá Ndióxi núu xíáⁿ tèé-í tnùhu-a, te ñá díú ìⁿ sá ñá cùtnùnì iní-ndó cùu-xi. Te sa nàha-ndo sá ñá ìⁿ tnùhu ndehnde ñá túú ñùtnahá-xi núu tnùhu Yá Ndióxi, chi mee ñine-ni tnùhu ndáá cúu-xí.

²² Te nchaa ñáyiú cächí sá ñá díú Jèsús cúu Crístú Yaá ní ten-daha Yá Ndióxi ní quixi ñuyíú-a dàcuandehndé-yu, te cùu úhú iní-yu Jèsús. Te ñu-ní-yu cächí-yu sá ñá díú Dèhe Yá Ndióxi cúu Jèsús, te sá dúcáⁿ quidé-yu te cùu úhú iní-yu Yá Ndióxi ndihí Dèhe-gá Jèsús. ²³ Te nchaa ñáyiú ñá túú sàndáá iní sá Dèhe Yá Ndióxi cúu Jèsús, ñáyiú-áⁿ ñá túú ndécú-yu ichi Tátá-ó Dütú Ndióxi. Te nchaa ñáyiú càháⁿ sá Dèhe Yá Ndióxi cúu Jèsús, ñáyiú-áⁿ ndécü-yu ichi Tátá-ó Dütú Ndióxi.

²⁴ Te nchaa tnùhu Yá Ndióxi ní tecú dóho-ndo ndéé díhna, tnùhu-áⁿ cuhuⁿ iní-ndó. Te núu nchaa tnùhu-áⁿ ná cùhuⁿ-ní iní-ndó, te cundecu ndihí-ndo Yá Ndióxi ndihí Dèhe-gá cuéi vá cùndecu túu-ndo ndihí-gá ñuyíú-a. ²⁵ Te Jèsús ní cachí-gá sá ndúú tãhú-ó cùndecu ndihí-o-gá ñi caa ñi quíhⁿ andíu.

²⁶ Te cuendá nchaa ñáyiú dándahú ñáhá xii-ndo ní chídó tnùnì-í tnùhu-a, ²⁷ dico nchòhó chi ndécú ndihí-ndo Espiritú Yá Ndióxi sá ñi taxi Xítoho Jesucristú. Núu xíáⁿ ñá túú xìnì ñuhu-ndo ñáyiú danèhé ñáhá xii-ndo, chi mee Espiritú-gá dánèhé ñáhá-xí nchàa sá vãha. Te nchaa sá dánèhé ñáhá-xí xii-ndo cuu-xi sá ndáá, te ñá díú ìⁿ tnùhu ndehnde. Te vitna chí cãncñícúⁿ ñihnu-ni ichi Yá Ndióxi dàtná ní

sanu ichi ñaha mée Espiritú-gá xii-ndo.

²⁸ Te nchòhó ñáyiú cùu datná déhe-í, chí cãncñícúⁿ ñihnu-ni ichi Xítoho Jesucristú, chi cuendá òré ná quixí tucu-gá ñuyíú-a te vá yùhú-ndó te ñi vá cúu càhaⁿ núu-ndó núu-gá. ²⁹ Te nchòhó sa nàha-ndo sá mée-gã quidé ndáá-gá, te sa xìnì-ndó sá ncháá ñáyiú quide ndáá cúu-yu déhe Yá Ndióxi.

3

Ñáyiú cùu déhe Yá Ndióxi

¹ Te chí cuãha cuendá sá ño cùu iní ñáhá Tátá-ó Dütú Ndióxi xii-o cuendá sá cúu-ó déhe-gá, chí ducaⁿ ñi cachí-gá, te déhe ndisa-gá cúu-ó. Te núu xíáⁿ ñáyiú ndécú ichi cuéhé ichi duha ñá cúu quini ñáhá-yu xii-o, chí ñá túú xìnì-yu nàcuáa ndùu cuendá Yá Ndióxi.

² Te nchòhó ñáyiú ño cùu iní-í, vitna cùu-o déhe Yá Ndióxi, te vátá cùtnùnì váha-gá iní-ó ñasa cunduu-o ndéé núu cuáháⁿ núu vèxi. Dico sa cùtnùnì iní-ó sá òré ná quixí tucu Xítoho Jesucristú te nduu-o dàtná cáá mée-gá, chí quini-ó-gã nàcuáa-ni càa nacuáa-ni ndùu-gá. ³ Te nchaa ñáyiú sa ndètu ñaha xii-gá sa ta ngùndecu túha-yu cuáháⁿ, chí ta ndùu ndoo nduu ñine iní-yu cuáháⁿ dàtná cáá ndòo caa ñine mee-gá.

⁴ Te nchaa ñáyiú quide nándi sá cuéhé sá dúhá ñá túú quide váha-yu núu Yá Ndióxi, chí ní cachí-gá sá vá dúcáⁿ càda-o. ⁵ Te sa nàha-ndo sá ñi quixí túu Xítoho Jesucristú ñuyíú-a cuendá cada càhnu iní-gá nchaa sá cuéhé sá dúhá quide-o, chí mee-gã ñá túú quide-gá ñi ìⁿ sá cuéhé sá dúhá. ⁶ Te nchaa ñáyiú ndécú ichi Yá Ndióxi ñá túú ñùhú-yu ichi cuéhé ichi duha. Te nchaa ñáyiú ñùhu ichi cuéhé ichi duha ñá túú xìnì-yu nàcuáa ndùu cuendá Xítoho Jesucristú te ñi ñá túú xìnì-yu nàsa càa-gá. ⁷ Te nchòhó ñáyiú cùu datná déhe-í, vá dáñá-ndó mée-ndo

dandahú ñáhá ñáiyu ndècu ichi cuehé ichi duha, chi càchí-yu sá cúú cùndecu-o ichi Yá Ndiöxí te cada-o nãndi sá cuehé sá dúhá dico ñá ndáá. Te nchaa ñáiyu quide váha quide ndáá-yu dàtná quidé mèe Jesús. ⁸ Te nchaa ñáiyu ndècu ichi cuehé ichi duha ndècu ndihí-yu yucu ñávãha, chi ducaⁿ quide mee-xi ndéé cùtnáhá vátá ngáva-gá ñuyíú. Te xiãⁿ ní quixi Jesús Déhe Yá Ndiöxí ní dáquéé tihú-gã nchaa sá quidé yucu ñávãha.

⁹ Te nchaa ñáiyu ní natuha ichi Yá Ndiöxí ní nduú-yu déhe-gá, te ñá túú-gã quidé-yu nãndi sá cuehé sá dúhá chi ní ndada ndoo ní ndada nine-gá iní-yu. Núu xiãⁿ ñá túú-gã quidé-yu nãndi sá cuehé sá dúhá, chi ní ngúndecu ndihí ñaha-gã xii-yu. ¹⁰ Te cùtnuní iní-ó nãndi cùu ñáiyu cùu déhe Yá Ndiöxí, te cùtnuní iní-ó nãndi cùu ñáiyu cùu déhe yucu ñávãha. Te nchaa ñáiyu ñá túú quide ndáá, te cùu úhú iní-yu tnãha ñáiyú-yu, te ñáiyu-áⁿ ñá díú déhe Yá Ndiöxí cúú-yu.

Cuu iní tnáhá-ó ñⁿ ñⁿ-o

¹¹ Te ndéé òrè ní natuha-o ìchi Yá Ndiöxí ní tecú dóho-o sá cúú iní-ó tnãha ñáiyu-o. ¹² Te vá cùnduú úhú iní-ó dàtná ní quide ndíi Càin, chi ndíi-áⁿ ñí xíndecu ndíi ndihí yucu ñávãha núu xiãⁿ ní sahni ndíi ñaní ndíi. Te ducaⁿ ñí quide ndíi chi ní xíndecu ndíi ichi cuehé ichi duha, te ñaní ndíi ní xíndecu-dé ichi váha.

¹³ Te nchòhó ñáiyu ndècu ndihí-í ichi Xítohó Jesucristú, vá cáda cuendá-ndó sá cúú úhú iní ñáhá nchaa ñáiyu ndècu ichi cuehé ichi duha xii-ndo. ¹⁴ Te cunaha-ndo na càchí tnúhu-í xii-ndo sá núu na cùu iní-ó tnãha ñáiyu-o, te cùtnuní iní-ó sá sá ní dáñá-ó ìchi sá tá dàcuíta nihnu ñaha xii-o cuáháⁿ ní cùu, te vitna ní tnúu-ò ìchi váha. Te nchaa ñáiyu ñá túú cùu iní tnãha ñáiyu-xi ñúhu-ní-yu ichi cuáháⁿ-yu núu úhú núú ndàhú. ¹⁵ Te nchaa ñáiyu ñá cúú quini ndéé tnãha ñáiyu-xi cùu-yu dàtná ñⁿ ñáiyu sahni ndíyi.

Te nchòhó sa nãha-ndo sá ñí ñⁿ ñáiyu sahni ndíyi ñá túú ndècu ndihí-yu tnúhu ndee iní sá nãnihí tàhú-yu. ¹⁶ Te Xítohó Jesucristú ní xihí-gá cuendá nchaa yicá cuèchi-o, núu xiãⁿ cùtnuní iní-ó sá ìo cùu iní ñáhá-gã xii-o. Te xiãⁿ cùtnuní iní-ó nãcuáa cada-o cùu iní-ó tnãha ñáiyu-o, te cuéi na cùu-ó cuendá sá cúú-xi ñⁿ-yu, cuendá-ñá sá ná dàcácu nihnu-ò-yu núu tnúndòho ndecú-yu. ¹⁷ Te núu ndècu ndihí-o sá cóhó sá cáxi-ó ndihí nchaa sá nãndihí-o, te ndècu ñáiyu ndàhú ñá túú vèdana ná ndécú ndihí, te ñá túú chindee-ò-yu, te ñá túú cùu iní-ó Yá Ndiöxí te núu ducaⁿ na càda-o. ¹⁸ Te nchòhó ñáiyu cùu datná déhe-í vá cuendá-ni cùnãha cáhãⁿ-ndó sá cúú iní tnáhã-ndó, chi cuu iní tnáhã ndìsa-ndo te coto tnãha-ndo.

Vá yuhú-ó núú Yá Ndiöxí

¹⁹ Te núu ducaⁿ na càda-o, te cutnùní iní-ó sá ndécú-ó ìchi ndáá ichi Yá Ndiöxí, te ñá túú-gã ná quihí iní-ó núú-gã. ²⁰ Te núu ndíhú iní-ó cuendá ñⁿ sá ñí quide-o, te sa nãha Yá Ndiöxí te núu ní quide váha-o àdi ní quide cuehé-ó, chi sa nãha ndáá-gã nãcuáa càa iní-ó. ²¹ Te nchòhó ñáiyu ío cùu iní-í, na càchí tnúhu-í xii-ndo, te núu ñá túú ñá sání iní-ó te ñá túú ñá quidé-ó, te vá yuhú-ó núú Yá Ndiöxí. ²² Te nchaa sá váha na càcãⁿ-ó núú Yá Ndiöxí, te mee-gã taxi-gã chi tnúu-ò tnúhu càhãⁿ-gã, te quide-o nchaa nãcuáa cùu iní-gã. ²³ Te ní cachí Yá Ndiöxí sá quindáá iní-ó Déhe-gã Xítohó Jesucristú, te cuu iní-ó tnãha ñáiyu-o dàtná ní cachí-gã. ²⁴ Te nchaa ñáiyu tnúu-ò tnúhu-gã ndécú-yu ichi-gã, te ndècu ndihí ñaha-gã xii-yu. Te cùtnuní iní-ó sá ndécú-ó ndihí-gã chi ní taxi-gã Espiritú-gã ndécú ndihí-o.

4

Ñáiyu ndècu ndihí Espiritú Yá Ndiöxí ndihí ñáiyu cùu úhú iní ñáhá

xì Xítóhó Jesucrístú

¹ Te nchòhó ñáyíu ío cùu iní-í, vá cùtexínu quíndáá iní-ndó tnúhu càháⁿ nchaa ñáyíu càchí sá ndécú ndìhì Espíritú Yá Ndiòxí. Chi díhna-gá cada cuendá váha-ndo te núu càháⁿ ndáá-yu nàcuáa càháⁿ tnúhu Yá Ndiòxí, chi ío vài ñáyíu ñuyíú-a cachí-yu sá càháⁿ-yu tnúhu-gá dico ñá ndáá. ² Te duha cutnùní iní-ó nãndi cùu ñáyíu ndècu ndìhì Espíritú Yá Ndiòxí. Nchaa ñáyíu càháⁿ ndáá sá Xítóhó Jesucrístú ní quixi-gá ñuyíú-a te ní cuu-gá ìⁿ yiqui cùñú, ñáyíu-áⁿ cùu-yu ñáyíu cùu cuendá Yá Ndiòxí. ³ Te nchaa ñáyíu ñá túú càháⁿ nàcuáa càa Jesús cùtnàhá ní quixi-gá ñuyíú-a ñáyíu-áⁿ dándàhú ñáhã-yu, chi ñá túú cùu-yu ñáyíu cùu cuendá Yá Ndiòxí. Te ñu-ní-yu cùu úhú iní-yu Jèsús. Te nchòhó sa ñàha-ndo sá cùndècu ñáyíu cuu úhú iní ñáhá xii-gá, dico yúhú càchí tnúhu-í xii-ndo sá sà ndecú-yu.

⁴ Te nchòhó ñáyíu cùu datná déhe-í, ndècu ndìhì-ndo Yá Ndiòxí, te ñá dáñá-ndó dándahú ñáhã nchaa ñáyíu càchí sá càháⁿ tnúhu-gá te ñá ndáá. Te ñá túú sàndáá iní-ndó chi Yá Ndiòxí Yaá ndécú ndìhì-ndo taxi tnuní víhí-gã dàcúxí yècu ñávãha ndècu ndìhì nchaa ñáyíu ñúhu ichi cuehé ichi duha. ⁵ Te nchaa ñáyíu dándahú ñáhã sá càháⁿ tnúhu Yá Ndiòxí ndécú-yu ichi cuehé ichi duha, te mee-ní cuendá nchaa sá ío ñuyíú-a càháⁿ-yu. Te tédóho ñàha nchaa dává-gá ñáyíu ndècu ñu-ní ichi cuehé ichi duha. ⁶ Te nchao cùu-o ñáyíu cùu cuendá Yá Ndiòxí. Te nchaa ñáyíu xíndecu ichi-gá tní-yu tnúhu càháⁿ-ó, te nchaa ñáyíu ñá túú ndècu ichi-gá ñá túú tní-yu tnúhu càháⁿ-ó. Te duha te cùtnuní iní-ó nãndi cùu ñáyíu càháⁿ ndáá, te cùtnuní tucu iní-ó nãndi cùu ñáyíu dándahú ñáhã.

Cuu iní-ó tnàha ñáyíu-o dàtná cúú iní ñáhã mèe Yá Ndiòxí xii-o

⁷ Te nchòhó ñáyíu ío cùu iní-í, xìni ñuhu-xi cuu iní tnáhá-ó dàtná cúú iní ñáhã mèe Yá Ndiòxí xii-o, chi mee-gã táxi-gã sá xìni tnùnì-ó cuendá cuu iní-ó tnàha ñáyíu-o. Te nchaa ñáyíu cùu iní tnàha ñáyíu-xi cùu-yu déhe Yá Ndiòxí, te cùtnuní ndáá iní-yu sá ndécú ndìhì ñàha-gá xii-yu. ⁸ Te nchaa ñáyíu ñá túú cùu iní tnàha ñáyíu-xi ñá túú ndècu ndìhì-yu Yá Ndiòxí. Te nchaa ñáyíu ndècu ndìhì Yá Ndiòxí, ñáyíu-áⁿ sãñaha-gã sá xìni tnùnì-yu cuendá cuu iní-yu tnàha ñáyíu-yu. ⁹ Te cùtnuní iní-ó sá cúú iní ñáhã Yá Ndiòxí xii-o nchaa-o, chi ní tendaha-gã ìⁿndi díi-ni Déhe-gá Xítóhó Jesucrístú ní quixi-gá ñuyíú-a cuendá sá díú-gã cada te naníhí tàhú-ó, te núu na quíndáá iní-ó tnúhu-gá. ¹⁰ Te ío cùu iní ñáhã Yá Ndiòxí xii-o nchaa-o. Te ñá díú sá mèe-ó cùu iní-ó-gã, chi díhna-gá mèe-gã sa cùu iní ñáhã tnàhí-gã xii-o, núu xíãⁿ ní tendaha-gã Déhe-gá ní quixi-gá ñuyíú-a ní xihí-gá sá cuendá nchaa yíca cuèchi-o.

¹¹ Te nchòhó ñáyíu ío cùu iní-í, xìni ñuhu-xi cuu iní tnáhá-ó, chi mee Yá Ndiòxí ío cùu iní ñáhã-gã xii-o. ¹² Te ní ìⁿ nchoo ñáyíu ndècu ñuyíú-a ñá túú xìni-ó nàcuáa càa Yá Ndiòxí, dico nchoo ñáyíu ní tuha ichi-gá chi cùtnuní iní-ó sá ndécú ndìhì ñàha-gá xii-o. Núu xíãⁿ cúú iní tnáhá-ó ìⁿ ìⁿ-o, te cùtnuní iní-ó sá cúú iní ndisa-o-gã. ¹³ Te cùtnuní iní-ó sá ndécú-ó ichi-gá, te ndècu ndìhì ñàha-gá xii-o, chi ní taxi-gá Espíritú-gá ndécú ndìhì-o. ¹⁴ Te yúhú ndìhì dává-gá cue téé ní xica cuu ndìhì-gá càháⁿ-ndí sá ní xìni-ndí Jèsús Déhe Yá Ndiòxí ní quixi-gá ñuyíú-a, chi Tátá-ó Dütú Ndiòxí ní tendaha ñàha xii-gá ní quixi-gá cuendá dàcacu nihnu-gá nchaa nchoo ñáyíu ndècu ñuyíú-a núu úhú núu ndàhú. ¹⁵ Te nchaa

ñáyiú cáháⁿ ní yùhu ní iní-xi sá Dêhe Yá Ndiöxí cúú Jèsús, ñáyiú-áⁿ ndécú-yu ichi-gá te ndècu ndihi ñaha-gá xii-yu.

¹⁶ Te sàndáá iní-ó ní yuhu ní iní-ó sá Yá Ndiöxí cúú iní ñáhá-gá xii-o, chi ducaⁿ iní-gá. Te nchaa ñáyiú cùu iní ñáhá xii Yá Ndiöxí ndécú ndihi ñaha-gá xii-yu. ¹⁷ Te núu ndisa cùu iní-ó Yá Ndiöxí te vá yùhú-ó òré ná sàá nduu tàudiⁿ ñaha-gá xii-o tñúu nchaa ñáyiú ndècu ichi cuehé ichi duha, chi quide ndáá-ó ndècu-o núu-gá ñuyiú-a dàtná ní quide mee Jèsús. ¹⁸ Chi nchaa ñáyiú cùu iní ñáhá xii Yá Ndiöxí ñá túú-gá yùhú-yu, te núu cùu iní ndisá-yu-gá. Te núu yùhú-yu te xiáⁿ sa ndòhó-yu, chi ñùhú-yu ichi cuáháⁿ-yu núu ùhú núu ndàhú, chi nchaa ñáyiú yùhú ñá túú cùu iní ndisá-yu Yá Ndiöxí.

¹⁹ Te cuu iní-ó Yá Ndiöxí, chi mee-gá ndéé cùtnáhá vátá quindáá-gá iní-ó tñùhu-gá sa cùu iní ñáhá-gá xii-o. ²⁰ Te nchaa ñáyiú càchí sá cúú iní-yu Yá Ndiöxí, te cùu ùhú iní-yu tñàha ñáyiú-yu, ñáyiú-áⁿ dácuaⁿndèhndé-yu. Te núu ñá túú cùu iní-yu tñàha ñáyiú-yu ndècu ñuyiú-a ña, te uuⁿ-gá quidè-yu Yá Ndiöxí Yaá ñá túú xini núu-yu. ²¹ Te càchí-gá núu tñùhu-gá sá ñáyiú na cùu iní ñáhá xii Yá Ndiöxí, te ducaⁿ-ni cùu iní-yu tñàha ñáyiú-yu.

5

Nchaa ñáyiú ní ndacu ní dáñá ichi cuehé ichi duha

¹ Te nchaa ñáyiú sàndáá iní sá Jèsús cúú-gá Cristú Yaá ní quixi ñuyiú-a, ñáyiú-áⁿ cúu-yu déhe Yá Ndiöxí. Te cùu iní-yu Tàtá-ó Dütú Ndiöxí, te cùu iní-yu Déhe-gá. ² Te núu cùu iní-ó Yá Ndiöxí te quide-o nacuaⁿ cáháⁿ-gá, te cùtnuní iní-ó sá cúú iní tñáhá ndisa-o nacuaⁿ ndècu-o ichi-gá. ³ Te núu cùu iní-ó Yá Ndiöxí te tñi-o tñúhu cáháⁿ-gá, chi cùtnuní iní-ó sá ñá díú ñiⁿ sá

ùhú cúú-xi dàtná càchí ñáyiú. ⁴ Te nchaa nchoo ñáyiú cùu déhe-gá sa ní dáñá-ó ichi cuehé ichi duha, chi ní sàndáá iní-ó Jèsús núu xiáⁿ ní ndacu-o ní dáñá-ó ichi-áⁿ. ⁵ Te nchaa ñáyiú sàndáá iní sá Dêhe Yá Ndiöxí cúú Jèsús ní ndacu-yu ní queé-yu ichi cuehé ichi duha.

Nàcuáa ní cáháⁿ Yá Ndiöxí cuendá Jèsús

⁶ Te Xítoho Jesucristú ní quixi-gá ñuyiú-a, te ní sandute-gá. Te ñá díú-ní xiáⁿ, chi ní xihí-gá sá cuendá nchaa yicá cuèchi-o. Te Espiritú Yá Ndiöxí cáháⁿ-xi mee-ni sá ndáá, chi cáháⁿ Espiritú-gá-áⁿ sá Jèsús cúú-gá Cristú Yaá ní quixi ñuyiú-a. ⁷ Te úní testiú ndécú àndiú, Tàtá-ó Dütú Ndiöxí, ndihi Déhe-gá Xítoho Jesucristú, ndihi Espiritú-gá. Te ñiⁿ-ni tñúhu cáháⁿ ndi nuni testiú-áⁿ. ⁸ Te ducaⁿ cùu-xi ñuyiú-a tucu, chi cáháⁿ Espiritú Yá Ndiöxí sá Jèsús cúú-gá Cristú. Te ní sandute-gá, te ní xihí-gá sá cuendá nchaa yicá cuèchi-o. Te xiáⁿ cùtnuní ndáá iní-ó sá díú Jèsús cúú-gá Cristú. ⁹ Te núu tñi-o tñúhu váha cáháⁿ ñáyiú, te váha-gá tñi-o tñúhu cáháⁿ Yá Ndiöxí, chi cáháⁿ ndáá-gá sá Déhe-gá cúú Jèsús. ¹⁰ Te nchaa ñáyiú sàndáá iní sá Jèsús cúú-gá Déhe Yá Ndiöxí, ñáyiú-áⁿ cùtnuní iní-yu sá cúú-xi ñiⁿ sá ndáá. Te nchaa ñáyiú ñá túú sàndáá iní tñúhu cáháⁿ Yá Ndiöxí quidè-yu-gá ñiⁿ ñándèhndé, dico ñá túú ndèhnde-gá, chi mèe-yu ñá túú sàndáá iní-yu sá Déhe-gá cúú Jèsús dàtná càchí mée-gá. ¹¹ Te Yá Ndiöxí càchí tñúhu ndáá-gá sá cùndècu-o ndihi-gá ni caa ni quihíⁿ. Te duha cáháⁿ-gá chi sàndáá iní-ó Déhe-gá. ¹² Te nchaa ñáyiú na quindáá iní ñáhá xii Déhe-gá cundecú-yu ndihi-gá ni caa ni quihíⁿ. Te nchaa ñáyiú ñá túú sàndáá iní ñáhá xii Déhe-gá vá cùndècú-yu ndihi-gá.

Sáhú ndéé núu ní ndihi-ná

13 Te cuendá sá sàndáá iní-ndó Déhe Yá Ndiǒxí nũu xíǎⁿ chídó tñuní-í tñũhu-a cuendá cutnùní iní-ndó sá cùndècu ndìhi-o-gá ñi caa ñi quíhíⁿ.

14 Te ñá túú tñũhu yùhú cáháⁿ ndìhi-o Yá Ndiǒxí, chi tedóho ñaha-gá xii-o nũu ìⁿ-ná sá ná càcáⁿ-ó nũú-gă datná cuíní mée-gă.

15 Te cùtnuní iní-ó sá táxí-gă sá xìcáⁿ-ó nũú-gă, chi nàha-o sá tedóho ñaha-gá xii-o nũu na càcáⁿ-ó nàcuáa cùu iní-gá.

16 Te núu xìní-ó ñăyiu ndècu ichi Yá Ndiǒxí te quidé-yu sá ñà túú vâha núú-gă, te ndèhe-o sá ñà túú ní xíta nihnu duúⁿ-yu, te cáháⁿ ndìhi-o Yá Ndiǒxí cuendá-yu, te dàcácu nihnu ñaha-gá xii-yu te núu na nùcúnu ichi váha-yu. Chi lò ñáyiu xidó quidé nãndi sá ñà túú vâha te xíta nihnu duúⁿ-yu, te vá càháⁿ ndìhi-gá-ó Yá Ndiǒxí cuendá-yu.

17 Te nchaa sá cuèhé sá dúhá cùu-xi yíca cuèchi, dico ñà ncháá-xi cùu-xi sá dácuíta nihnu ñaha dùuⁿ.

18 Te nàha-o sá nchóó ñăyiu cùu déhe Yá Ndiǒxí ñá túú-gă sání iní-ó càda-o nãndi sá cuèhé sá dúhá. Te ducaⁿ chi mee Jèsús déhe Yá Ndiǒxí xító ñàha-gá xii-o, núu xíǎⁿ ñá ndácú-gă yucu ñăvâha dàxínu iní ñáhá-xi xii-o cada-o sá ñà túú vâha.

19 Te nchoo nàha-o sá ndécú ndìhi-o Yá Ndiǒxí. Te nchaa ñáyiu ndècu ichi cuèhé ichi duha tàxi tñuní ñáhá-ñă yucu ñăvâha xii-yu.

20 Te nàha tucu-o sá ñùyíú-a ní quixi Jèsús Déhe Yá Ndiǒxí ní taxí-gá sá xìní tñuní-ó cuendá cutnùní iní-ó sá mée-gă cúú-gă Ndiǒxí-ó. Te ndècu ndìhi-o mee-gă ndìhi Déhe-gá Jèsús, te ìⁿdii díi-ni mee-gă cúú-gă Yá Ndiǒxí, te ndècu dava-gá sá nácuàca ñaha-gá xii-o cùndècu-o ndìhi-gá ñi caa ñi quíhíⁿ.

21 Te nchòhó ñáyiu cùu datná déhe-í, vá quíndáá iní-ndó ncháa sá càchí-yu cùu ndiǒxí, chi dícó ndaha cue téé ñuyíú-a ní cuáha nchaa xíǎⁿ.

Te ducaⁿ na cùnduu. Te ío chí cádá ndèe iní-nâ vitna.

TUTÚ CÚÚ ÛÚ NÍ CADÚHA TÉ JUÀÁ

Tnúhu Yá Ndiõxí ndihi nàcuáa cuu iní tnáhá-ó

¹ Te yúhú té Juàá tée yìndaha ñaha xii ñáyiú sàndáá iní tnúhu Jèsús, tée-í tnúhu-a ñá núú tütú daquixi-í ndaha yòhó ñaha ní cáháⁿ ñáhá Yá Ndiõxí, te nchaa tnúhu-a cùu-xi tnahá cuèndá cue déhe-n, chi ío cùu iní ñáhà-í xii-ndo, chi ndècu-ndo ichi Yá Ndiõxí. Te ñá díú-ní mèe-í cúú iní ñáhà-í xii-ndo, chi nchaa-ndí nàcuáa sàndáá iní-ndí tnúhu-gá cúú iní ñáhá-ndí xii-ndo. ² Te cùu iní ñáhá-ndí xii-ndo chi ndècu ndihi-ndo tnúhu ndáá tnúhu Yá Ndiõxí, te ducaⁿ-ni cùndècu-o ndihi tnúhu-ánⁿ ni caa ni quihíⁿ. ³ Te xicáⁿ táhù-í núú Tátá-ó Dütú Ndiõxí, ndihi núú Déhe-gá Xítóhó Jesucristú sá ná chindèe ñaha-gá xii-ndo, te coto ñaha-gã te ío váha cuu iní-ndó cùndècu-ndo. Te duha xicáⁿ táhù-í núú-gã chi ndècu ndihi-o tnúhu ndáá tnúhu Yá Ndiõxí, te cùu iní-ó-gã.

⁴ Te ío cùdíí iní-í, chi ní naníhì-í ñá ùú déhe-n, te quidé-yu nàcuáa sànu ichi ñaha tnúhu ndáá dàtná ní táuchíúⁿ mèe Tátá-ó Dütú Ndiõxí. ⁵ Te vitna yòhó ñaha ní cáháⁿ ñáhá Yá Ndiõxí, cächí tnúhu-í xii-n sã xíní ñùhu-xi cuu iní-ó tnàha ñáyiú-o. Te ñá díú ñá tnúhu saa cùu-xi, chi ñá-ni tnúhu sá ní ngúndècu ndihi-o ndéé cùtnáhá ní tuha-o ichi Yá Ndiõxí. ⁶ Te núu cùu iní-ó Yá Ndiõxí, te cùu iní-ó tnàha ñáyiú-o dàtná ní cachí mèe-gã, te tnè-o nchaa tnúhu cáháⁿ-gá. Te ní cachí-gá sá cúú iní-ó-gã, te cuu iní-ó tnàha ñáyiú-o. Te tnúhu-a ní tecú dóho-o ndéé cùtnáhá ní tuha-o ichi-gã.

Cue tée dàndahú tnàha ñáyiú-xi

⁷ Te ío vai ñáyiú dàndahú ñáhá xica cuú-yu ñuyíú-a, te cächí-yu sá ñá ndàá sá Xítóhó Jesucristú ní

cuu-gá ñá ñáyiú ndisa. Te nchaa ñáyiú duha cáháⁿ dácuañdehndé-yu, te cùu úhú iní-yu Jèsús. ⁸ Te quihí iní-ndó sá và dàndahú ñáhá ñáyiú-ánⁿ xii-ndo cuèndá sá và cuíta chùuⁿ Yá Ndiõxí ní quide-o. Te òré ná quixí tucu Jèsús ñuyíú-a te taxi-gá nchaa sá vàha cùu iní mèe-gã cundècu ndihi-o.

⁹ Te nchaa ñáyiú dàña tnúhu Xítóhó Jesucristú, te nàtní-yu ingá ichi, ñáyiú-ánⁿ ñà túú ndècu ndihí-yu Yá Ndiõxí. Te nchaa ñáyiú ñá túú dàña tnúhu Xítóhó Jesucristú ndècu ndihí-yu Yá Ndiõxí ndihi Déhe-gá Xítóhó Jesucristú. ¹⁰ Te núu véxi ñáyiú núú ndécú-ndó cächí-yu sá cáháⁿ-yu tnúhu Yá Ndiõxí te ñá ndàá, te vá cuãha-ndo tnúhu danèhé ñáhã-yu xii-ndo, te ni và cuãha-ndó-yu tnúhu ndee iní cuèndá chùuⁿ quidé-yu. ¹¹ Chi núu na cáháⁿ ndihi váha-ndó-yu, te dàtná tnúhu sá chindèe-ndó-yu quidé-yu nchaa sá cuèhé sá dúhá.

Tnúhu ndéé núú ní ndihi-ñá

¹² Te ío vai-gã tnúhu cuñí-í cachí tnúhu-í xii-ndo, dico vá tée-gã-í chi cuñí-í quixi-í núú ndécú-ndó ndàtnúhu-o cuèndá cudíí víhí iní-ó nchãa-o.

¹³ Te nchaa cue déhe cúhú-n, ñáyiú ní cáháⁿ ñáhá Yá Ndiõxí quidé ndèe iní ñáhã-yu xii-n.

TUTÚ CÚU ÒNÍ NÍ CADÚHA TÉ JUÁÁ

Càháⁿ váha-yu cuèndá té Gǎyú

¹ Te yúhú té Juáá téé yíndaha ñaha xii ñáyiú sàndáá iní tnúhu Jèsús, chido tnuní-í tnúhu-a ñⁿ núú tütú sá cúu-xí yòhó té Gǎyú téé ío cùu iní-í, chi ndècu ndihí-n tnúhu ndáá tnúhu Yá Ndiòxí.

² Te yòhó téé ío cùu iní-í, xìcáⁿ táhù-í núú Yá Ndiòxí sá cùndècu váha-n ñà túú nà cumání xii-n, te vá cùhù-n, chi sa nàha-í sá ndécú vǎha-n núú Yá Ndiòxí. ³ Te ío ní cudíí iní-í òré ní sáá ñáyiú ndècu ichi Yá Ndiòxí, te ní cachí tnúhu-yu sá sàndáá ndisa iní-n tnúhu ndáá ði-u-ni tnúhu-gá te tní-n nchaa nacuaá càháⁿ tnúhu-án. ⁴ Te ío cùdíí iní-í ní níhì-í tnúhu sá ncháá-ní ñáyiú ní sanu ichi-í ichi Yá Ndiòxí ndécú-ní-yu ichi-gá, te quide-ní-yu nchaa nàcuáa càháⁿ-gá.

⁵ Te yòhó téé ío cùu iní-í, ío váha quide-n núú Yá Ndiòxí, chi chindee-n nchaa ñáyiú véxi dava-gá ñúú xìcá, ñáyiú sàndáá iní tnúhu Yá Ndiòxí. ⁶ Te nchaa ñáyiú-án càháⁿ-yu núú tàcá ñáyiú càháⁿ ndihí Yá Ndiòxí iha sá ío cùu iní-n nchaa tnahá ñáyiú-n dàtná càháⁿ Yá Ndiòxí. Te yúhú càháⁿ ndàhù-í núú-n sá cádá ndèe-ni iní-n chindee-n nchaa ñáyiú-án nchaa sá xíní ñuhú-yu ichi. Te núu ducaⁿ na càda-n te quide-n nacuaá cùu iní Yá Ndiòxí, te xínu cuechi-n tnahá-n núú-gá. ⁷ Chi nchaa ñáyiú-án ní tní-yu ichi cuáháⁿ-yu càháⁿ-yu tnúhu Jèsús. Te ñà túú tní-yu ní ñⁿ sá sǎnhaha ñáyiú ñà túú ndècu ichi Yá Ndiòxí. ⁸ Te núu xíáⁿ nchoo xínu ñuhu-xi chindee-o nchaa ñáyiú xínu cuechi núú-gá ñáyiú càháⁿ tnúhu-gá, te ducaⁿ te cutnùní iní-ó sá tnahá-ó xínu cuechi-o ndihí-yu núú-gá.

Ñà túú quide váha té Diótrefés

⁹ Te yúhú ní tendaha-í tutú cuáháⁿ núú tàcá ñáyiú chìñuhú-yu Yá Ndiòxí, dico ñⁿ téé ndècu-án nání-dě Diótrefés, te ñà sàndáá iní-dé nchaa tnúhu càháⁿ-í, chi cuíní-dé cunuu-dě núú-yu. ¹⁰ Te òré quixi-í te cada ndáá-ó nchaa tnúhu cuèhé tnúhu duha càháⁿ-dé cuèndá-í. Te ñà díú-ní xǎⁿ quide-dě, chi nchaa ñáyiú véxi ingá ñúú càháⁿ tnúhu Yá Ndiòxí ñà túú càháⁿ ñáhá-dě vehe-dé, te ní ñà dáñá-dě càháⁿ ndihí ñaha dàva-gá ñáyiú xíí-yu. Te nchaa ñáyiú cuíní càháⁿ ndihí ñaha xii-yu, te quèñuhu ñaha duuⁿ-ni-dé ñà dáñá-gá-dé níhí tnahá-yu ndihí nchaa ñáyiú tàcá dácuaá tnúhu Yá Ndiòxí.

¹¹ Te yòhó téé ío cùu iní-í, vá cùndècu-n ichi cuehé ichi duha dàtná quide nchaa dava-gá ñáyiú, cada-n mèe-ni sá váha. Chi nchaa ñáyiú quide váha ndécú-yu ichi Yá Ndiòxí. Te nchaa ñáyiú quide nchaa sá cuèhé sá dúhá ñà túú ndécú-yu ichi Yá Ndiòxí.

Nchaa ñáyiú càháⁿ váha-yu cuèndá té Demètriú

¹² Te nchaa ñáyiú càháⁿ váha-yu cuèndá té Demètriú, chi quide ndáá-dé dàtná càháⁿ Yá Ndiòxí. Te tnahá yúhú càháⁿ-í cuèndá-dé sá ío váha quide-dé, te nchòhó sa nàha-ndo sá yúhú càháⁿ ndáá-í.

Tnúhu ndéé núú ní ndihí-ná

¹³ Te vai-gá tnúhu cuíní-í cachí tnúhu-í xii-n ni cùu, dico ñà ní tèe-gá-í, ¹⁴ chi cuíní-í quixi ndihí-í, te càháⁿ-ó núú núú-ó.

¹⁵ Te ío cada ndee iní, te xìcáⁿ táhù-í núú Yá Ndiòxí sá ná cùndècu váha-n ñà túú nà cuu cundècu-n. Te nchaa cue ñáyiú xíní tnahá ndihí-o ndècu iha quide ndee iní ñáhá-yu xii-n. Te yòhó cúñaha-n nchaa ñáyiú xíní tnahá ndihí-í ndécú xíáⁿ ná càda ndee iní-yu. Te ío cada ndee iní-ná vitna.

TUTÚ NÍ CADÚHA TÉ JUDÁS

*Té Jùdás càdũha-dé tutú quíhíⁿ
ndaha ñáyíu ní cachí Yă Ndiõxí nduu
cuendá-gá*

1 Yúhú té Jùdás ñani té Jàcobó xínú cuèchi-í núú Xítohó Jesucristú, te càdũha-í tutú-a sá cúú-xí nchòhó ñáyíu ní cachí Yă Ndiõxí Yaa cúú Tātá-ó nduu cuendá-gá, ñáyíu ío cùu iní-gá. Te dàtná-ni xító ñaha-gá xii-ndo vitna diu-ni ducaⁿ còto ñaha-gá xii-ndo ndèé ná sáa nduu quíxi tucu Xítohó Jesucristú ñuyú-a. ² Te xicáⁿ táhù-í núú Yă Ndiõxí sá ïo-gá ná chindee chítúu ñaha-gá xii-ndo, te na cùtnuní-gá iní-ndó sá ïo cùu iní ñáhá-gá xii-ndo, te ducaⁿ ïo váha cuu iní-ndó cùndecu-ndo.

*Ñáyíu ñá túú càháⁿ tnúhu ndáá
tnúhu Yă Ndiõxí
(2 Pedro 2:1-17)*

³ Te nchòhó ñáyíu ío cùu iní-í, ducaⁿ-ní ïo sàni iní-í cadũha-í ìⁿ tutú sá cúú-xí-ndó cuendá danèhé ñáhá-í xii-ndo nàcuáa ní cuu ní naníhí táhú-ó dico ñá túú càdũha-í, dico vitna quide cuendá-í sá xíní ñũhu-gá-xi càháⁿ-í núú tütú-í sá nchòhó ío cundehe-ndo tnúhu càháⁿ-ndó ndíhi ñáyíu, te càháⁿ-ndó nàcuáa ndùu tnúhu sàndáá iní méé-ndó, chi diu-ni tnúhu-áⁿ ní càháⁿ Yă Ndiõxí sá cúú-xí nchàa ñáyíu ndècu ichi-gá. Te vitna ñá túú-gá ná tnúhu càháⁿ-gá sá cúú-xí-yu, chi sa ní càháⁿ duuⁿ-gá.

⁴ Te duha càháⁿ-í núú tütú-a sá cúú-xí-ndó, chi nihí-í tnúhu sá xicá cùu ñáyíu chítnahá ñáhá xii-ndo, te ní ñá túú xíní-ndó ná ñáyíu cúú-yu, te ñáyíu-áⁿ cúú-yu ñáyíu cùu úhú iní ñáhá xii Yă Ndiõxí. Te ìⁿ xichi núú tütú Yă Ndiõxí càchí-xi sá ñáyíu-áⁿ quíhíⁿ-yu núú úhú núú ndàhú, te diu-ni ñáyíu-áⁿ càchí-yu sá ïo váha iní Yă Ndiõxí núu xíáⁿ cuu-ni

cadá-yu nchaa sá cuèhé sá dúhá. Te dàquee tíhũ-yu Yă Ndiõxí Yaa ío cùnuu, ndíhi Xítohó Jesucristú.

⁵ Te nchòhó sa xíní váha-ndo nàcuáa ní quide Yă Ndiõxí ndéé sanaha dico dandacu iní ñáhá-í xii-ndo, chi dàvá-áⁿ ní queñuhu-gá ñáyíu isràél nàcióⁿ Ègiptú, te dava ñáyíu-áⁿ ñà túú ní sàndáá iní ñáhá-yu xii-gá te ní dánáá ñaha-gá xii-yu. ⁶ Te nchaa espíritú ñá túú ní cuíní cada ndáá cunu cuechi núú Yă Ndiõxí ní quee-xi núú ndécú-xí, te mee-gá ní sadí nihnu ñaha-gá xii-xi ìⁿ xichi núú néé te vá cãcu-xi, chi sáa nduu te nayáha-xi cundecu-xi núú úhú núú ndàhú ní caa ní quíhíⁿ. ⁷ Te dandacu iní ñáhá tucu-í xii-ndo nàcuáa ní yáha ñáyíu ñuu Sòdomá, ndíhi ñáyíu ñuu Gòmorrá, ndíhi nchaa ñáyíu ñuu ní cáa yatni xíáⁿ, chi tnàhá-yu ñá túú ní quide váha-yu dàtná ní quide nchaa cue espíritú-áⁿ. Chi cue téé ní xóo càháⁿ ndíhi tnàha ndí mee-güedé, te diu-ni ducaⁿ ní xóo cada cue ñáyíu ìhí tucu. Te sá dúcáⁿ ní quidé-yu núú ní dányóyó Yă Ndiõxí ñuhú ñuu-yu ní dánáá ñaha-gá xii-yu. Te xíáⁿ cùtnuní iní-ó sá nchàa ñáyíu ñá túú cuíní cada váha núú-gá quíhíⁿ-yu núú úhú núú ndàhú ní caa ní quíhíⁿ.

⁸ Te diu-ni ducaⁿ quide ñáyíu chítnahá ñáhá xii-ndo cuíní-yu dandàhú ñáhá-yu, chi càchí-yu sá dácòto ñaha saní-yu nàcuáa cadá-yu, núu xíáⁿ nándi nchaa sá cuèhé sá dúhá quidé-yu sá cúú-xí yiqui cuñú-yu, te dàquee tíhũ-yu nchaa nàcuáa càháⁿ Yă Ndiõxí cada-o, te càháⁿ úhú-yu cuendá nchaa espíritú cùnùu. ⁹ Te mee espíritú cùnùu-gá xínú cuèchi núú Yă Ndiõxí nání Míguél ní nàa-xi ndíhi sácúíhná cuendá yiqui cùñú ndíi Moisés. Te espíritú-áⁿ ñá túú ní cùyí-xi càháⁿ úhú-xi sácúíhná-áⁿ, chi ní xáhaⁿ-ni-xi: “Mee Yă Ndiõxí ñáhá-gá te núu nása cada ñaha-gá

xii-n", duha ní xáhaⁿ-xi. ¹⁰ Te nchaa ñáiyu ducaⁿ dándahú ñáhá xii-ndo-áⁿ càháⁿ cuèhé-yu cuèndá nchaa sá vátá cùtnùní-gá iní-yu nása ndùu, te quidé-yu dàtná quidé cuè quiti chi cue quiti-áⁿ quidé-güedi nání véxi iní-güedi, te ni ñà túú cùtnuní iní-güedi nchaa sá quidé-güedi. Te ducaⁿ sà tnahá-xi cùú-yu, chi nchaa sá cuèhé sá dúhá véxi iní-yu quidé-yu, te sá dúcáⁿ quidé-yu xiáⁿ tá xíta nihnú-yu cuáháⁿ.

¹¹ ¶ Te ndàhú ní cuú-yu chi ío ndohó-yu!, chi quidé-yu dàtná ní quide ndíi Càin. Te nándi sá quidé-yu cuèndá sá cuìní-yu díhúⁿ dàtná ní xóo cada ndíi Bàlaám. Te ío cùu sáá iní-yu núú Yá Ndióxi dàtná ní xóo cada ndíi Còré, núu xiáⁿ tá xíta nihnú-yu cuáháⁿ. ¹² Te òró sácáⁿ-núú sáha ñáhá-yu xii-ndo òré nátacá-ndó quide-ndo vico chiñuhu-ndo Yá Ndióxi. Te òré véxi ndíhi ñáhá-yu xii-ndo te mee-ni sá cùú-xí mèe-yu quide cuendá-yu, te ñà túú nèhé-yu sá yíñuhu núú Yá Ndióxi. Te cùú-yu dàtná ñⁿ vícò sá cuáháⁿ-xi duha cuáháⁿ-xi dàcáⁿ te ñà túú dǎu nchidó-xí, ducaⁿ sà tnahá-xi cùú-yu. Te cùu tucú-yu dàtná ñⁿ yutnu vídí sá ñà túú tnahí cùuⁿ sávídí-xi, te nchaa yutnu ducaⁿ ñà túú cùuⁿ sávídí-xi te tñuhu-güedé ndéé yóho-xi te xihí duuⁿ-xi. Te ducaⁿ sátnahá-xi cùú-yu, chi ñà túú quide váha-yu. ¹³ Te cùu tucú-yu dàtná ndute lámár, chi ndute-áⁿ òré càndá-xi te quecòo tíñú-xi ñⁿ xio. Te cùu tucú-yu dàtná ñⁿ chódíní cuáháⁿ-dì duha cuáháⁿ-dì dàcáⁿ. Te ducaⁿ sátnahá-xi cùú-yu, chi ñà túú cuìní-yu cada váha-yu. Te ñáiyu-áⁿ daquihíⁿ ñáhá Yá Ndióxi xií-yu ñⁿ xichí núú néé núú sá ndecu túha cundecú-yu ni caa ni quihíⁿ.

¹⁴ Te ndíquíⁿ yává ndíi Àdán téé cùu usá ní xínani Ènóc ní dàcáhú iní ñáhá Yá Ndióxi xii-dé ní càháⁿ-dé ñⁿ cuèndá nchaa ñáiyu-áⁿ. Te ní cachí-dé: "Na càchí tñuhu-í xii-ndo

sá Yá Ndióxi quixi-gá ndíhi cuèhé víhi espíritú xínú cuèchi núú-gǎ. ¹⁵ Te dàvá-áⁿ cada ndáá-gá cuèchi nchaa ñáiyu te daquihíⁿ-gá nchaa ñáiyu ndècu ichi cuèhé ichi duha núú ùhú núú ndàhú, te ducaⁿ cada ñaha-gá xií-yu, chi mee-ni sá cuèhé sá dúhá quidé-yu, te càháⁿ úhú ñáhá-yu xii-gǎ", duha ní cachí te Ènóc. ¹⁶ Te ñáiyu-áⁿ ío yica iní-yu chi ñà túú ndùu vétú iní-yu nàcuáa ndècú-yu ñuyíú-a, te sátnuhú-yu tñaha ñáiyú-yu te mee-ni sá cuèhé sá dúhá sàni iní-yu quidé-yu, te quide cahnú-yu mèe-yu, te mee-ni càháⁿ váha-yu núú tñaha ñáiyú-yu cuèndá cuìní-yu sá cadá váha ñaha ñáiyu-áⁿ xií-yu.

Té Jùdás càháⁿ-dé dóho ñáiyu ndècu ichi Yá Ndióxi

¹⁷ Te nchòhó ñáiyu ío cùu iní-í, càháⁿ ndàhú-í núú-ndó sá ío cuhuⁿ iní-ndó tñuhu sá sá ní dǎnèhé ñáhá cuè téé ní tendaha Xítohó Jesucristú càháⁿ tñuhu-gá núú ñáiyu. ¹⁸ Te sa ñaha-ndo sá ñi cachí-güedé sá cùmání-gǎ quixi tucu Xítohó Jesucristú ñuyíú-a, te coo ñáiyu càháⁿ cuèhé càháⁿ duha cuèndá tñuhu-gá. Te ñáiyu-áⁿ cadá-yu mee-ni sá cuèhé sá dúhá véxi iní mèe-yu. ¹⁹ Te ñáiyu-áⁿ cùú-yu ñáiyu càháⁿ nándi tñuhu sá ñà túú nándíhi cuèndá sá vǎ cùú ñⁿ nuu-ndo cundecu-ndo, te mee-ni sá cuèhé sá dúhá ñuhu iní-yu, te ñà túú ndècu ndíhi-yu Espíritú Yá Ndióxi.

²⁰ Te nchòhó ñáiyu ío cùu iní-í, ío dacuàha-ndo tñuhu Yá Ndióxi sá ñi sándáa iní-ndó cuèndá ducaⁿ cuíta cuehnu nihnu-ndo ichi-gá quihíⁿ, te càháⁿ ndíhi-ndo Yá Ndióxi nàcuáa dàcahu iní ñáhá Espíritú-gá xii-ndo. ²¹ Te ío coto-ndo mèe-ndo cundecu-ndo cuèndá cuu váha iní ñáhá Yá Ndióxi xii-ndo, te cundetu-ndo sáa nduu quixi Xítohó Jesucristú ñuyíú-a nacuaa ñaha-gǎ xii-ndo cundecu-ndo ndíhi-gá ni caa

ni quíhíⁿ, chi Yaá-áⁿ ïo cùndahú iní ñáhá-gă xii-o.

²² Te ñáyiú sàni ìⁿ sani úú iní-xi cùñaha-ndo xii-yu nàcuáa cadá-yu cundecú-yu ichi Yá Ndiöxí. ²³ Te nchaa ñáyiú ta xíta nihnu ñùhu ichi cuáháⁿ núú ùhú núú ndàhú, ïo cundihí iní-ndó cùñaha-ndo xii-yu tnúhu Yá Ndiöxí cuèndá sá ná cãcu nihnú-yu, te cundàhú iní-ndó-yu, te quíhí iní-ndó vã cadá-ndó tnàhá-ndó nàcuáa quidé-yu, chi daquèe tíhú-ndó nchàa sá cuèhé sá dúhá quidé-yu-áⁿ.

Nàcuáa ndacáⁿ táhú-ó núú Yá Ndiöxí

²⁴ Te Yá Ndiöxí chindee ñaha-gá xii-ndo cuèndá sá vã cùndècu-ndo ichi cuehé ichi duha, te cundu ndoo cunduu nine iní-ndó càndeca ñaha-gá xii-ndo quíhíⁿ cundecu-ndo núú ïo vâha càa ndecu-gá, te ïo cudíⁿ iní-ndó. ²⁵ Te Yá Ndiöxí ïo ndècu ndihí-gá nchaa sá xìní tnùní-gá te ðiu-gá ní dácãcu nihnu ñaha-gă xii-o núú ùhú núú ndàhú, te ducaⁿ ñí quide ñaha-gă xii-o chi ndècu ndihí-o Xítóhó Jesucristú. Te ïo ndacáⁿ táhú-ó núú Yá Ndiöxí, chi ïo càhnu cuu-gá ndécú-gă táxí tnùní-gá, te súúní vâha iní-gá, te ndàcu-gá quidé-gă nchaa sá vâha, te ducaⁿ-ni ïo càhnu cuu-gá ndéé cùtnàhá vátá ngãva-gá ñuyíú, te ducaⁿ-ni ïo càhnu cuu-gá ndéé vitna, te ðiu-ni ducaⁿ ïo càhnu cuu-gá ni caa ni quíhíⁿ, duha xìni ñuhu-xi ndacáⁿ táhú-ó núú-gă. Te ducaⁿ na cùnduu. Te ïo chí cadá ndèe iní-nã vitna.

NCHAA SÁ NĬ XINÍ TÉ JUÁÁ NDIHI NCHAA SÁ NĬ TECÚ DÓHO-DÉ

Xítohó Jesucristú xáhaⁿ-gã xii té Juáá nchaa nàcuáa cada-xi ñuyúú

¹ Te Yá Ndiöxí ní xáhaⁿ-gã xii Xítohó Jesucristú nchaa sá tá cùyatni vii-nã cada-xi ñuyúú-a cuèndá sá cùñaha-gã xii cue té xínu cuechi núú-gã, te Xítohó Jesucristú ní tendaha-gã ìⁿ espíritú xínú cuèchi núú-gã ní quixi-xi ní cachí tnúhu-xi nchaa tnúhu-áⁿ xii yúhú té Juáá té xínu cuechi núú-gã, te nchaa tnúhu-áⁿ ndéé núú tütú-a. ² Te yúhú cachí tnúhu ndáá-í xii-ndo nàcuáa ní cáháⁿ Yá Ndiöxí, te càháⁿ ndáá tucu-í cuèndá Xítohó Jesucristú, ndihi cuèndá nchaa sá ní xini-í.

³ Te váha táhú ñáyiu dàcuaha nchaa tnúhu ndéé núú tütú-a, te váha tucu táhú ñáyiu ndédóho, te váha tucu táhú nchaa ñáyiu tñi nacuáa càháⁿ-xi, chi sa ta cùyatni vii-nã nduu càda-xi nchaa nacuáa càháⁿ-xi.

Té Juáá cádüha-dé tutú quíhíⁿ ndaha ndi ùsá xichi cue ñáyiu ndècu ichi Yá Ndiöxí

⁴ Te yúhú té Juáá cádüha-í tutú daquixi-í ndi ùsá xichi núú ndécú nchòhó ñáyiu ndècu ichi Yá Ndiöxí ndécú distritú Àsiá. Te mee-gã ná chindee chitúú ñaha-gã xii-ndo, te ío váha cuu iní-ndó cùndecu-ndo. Te cuèi ndéé sanaha diu-ni-gá ndécú, te diu-ni-gá ndécú cuèi vitna, te ducaⁿ-ni cùndecu-gá cuèi ndéé núú cuaháⁿ núú vëxi, te diu-ni ducaⁿ ío na chindee chitúú ñaha ndi ùsá cue espíritú ndécú núú-gã xii-ndo, te ío váha cuu iní-ndó cùndecu-ndo. ⁵ Te diu-ni ducaⁿ na càda tucu Xítohó Jesucristú, te diu-gá cúú-gã Yá cáháⁿ ndáá, te diu-ni-gá ní xihí-gá te

díhna-gá ní ndoto, te dàtnùní ndéé cuèé-gá te ndoto cue ñáyiu ní xihí, te diu-ni-gá táxi tñùní-gá nchaa cue té yìndaha ñaha xii ñáyiu ndècu ñuyúú-a. Te ío cùu iní ñáhá-gã xii-o, te mee-gã ní sati níñi-gã te ní xihí-gá núú cùrúxí sá cuèndá nchaa sá cuèhé sá dúhá quide-o, te ní ndada ndoo ní ndada nine-gá iní-ó, ⁶ te vitna ní quide ñaha-gã xii-o dàtná cue té yìndaha ñáyiu, te ní quide ñaha tucu-gá xii-o dàtná cue dútú xínú cuèchi-o núú Tátá-gã Dútú Ndiöxí. Te vitna nchaa-o chí ná cächí-ó sá ío càhnu cuu Xítohó Jesucristú, te ío cùnuu-gá, te ducaⁿ-ni na cùnuu-gá ni caa ni quíhíⁿ. Te ducaⁿ na cùnduu.

⁷ Te cundehe-ndo àndiu! Chi ichi xití vícò quixi Xítohó Jesucristú, te nchaa ñáyiu ndècu ñuyúú-a quini ñáhã-yu xii-gã, te tñahá nchaa ñáyiu ìⁿ-ni cùu ndihi ñáyiu ní dánicuèhé ñáhá xii-gá quini ñáhã-yu, te nchaa ñáyiu xìndecu nihi ñuyúú, ñáyiu ñá túú cùu váha iní ñáhá xii-gá ndíhú iní-yu òré quini ñáhã-yu xii-gã, te ndáá sá dúcáⁿ càda-xi.

⁸ Te Yá Ndiöxí cächí-gá: “Yúhú ío cùnuu-í chi diu-í sa ndècu ndéé cùtnáhá ní ngáva ñuyúú, te diu-ni-í cundecu ndéé ná sàá nduu nàa-xi ndihi nchaa sá ío, chi yúhú cundecu-í ni caa ni quíhíⁿ”, duha cächí Yá Ndiöxí Yáá ndácú quide nchaandi tühú sá váha. Chi diu-ni-gá sa ndècu ndéé cùtnáhá ní ngáva ñuyúú, te diu-ni-gá ndécú-gã vitna, te ducaⁿ-ni cùndecu-gá ni caa ni quíhíⁿ.

Té Juáá ní xini-dé Xítohó Jesucristú Yáá ío cùnuu

⁹ Te yúhú té Juáá té ndècu ndihi-ndo ichi Xítohó Jesucristú, tñahá-í ndóhó-í cuèndá-gá dàtná ndóhó-ndó, te tñahá-í nduu táhú-í cundecu ndihi ñaha-í xii-ndo núú ndécú Yá Ndiöxí táxi tñùní-gá. Te ío quide cahnu iní-ó cuèi nándi

yáha-o ndècu-o sá cuèndá Xítohó Jesucristú. Te yúhú ní ngava-í vecaá ìⁿ ñúú nání Pátmós, te ñúú-áⁿ cáá xiti ndute lámár. Te ducaⁿ ñí cuu cuèndá sá cáháⁿ-í tñúhu Yá Ndiòxí, te cáháⁿ váha-í cuèndá Xítohó Jesucristú. ¹⁰ Te ìⁿ nduu ndumíngú nduu nàtacá-ó chìñuhu-o Yá Ndiòxí ní quide ñaha Espíritú-gá xii-í nàcuáa càchí iní-xi, te ní tecú dóho-í ñíhí ní cáháⁿ ìⁿ sá ní cáháⁿ ndàa sàtà-í te dàtná ñíhí cáháⁿ ìⁿ cútú ducaⁿ ñíhí ní cáháⁿ-xi. ¹¹ Te càchí sá cáháⁿ-áⁿ:

—Yúhú sa ndècu-í ndéé cútñàhá ní ngáva ñuyíú, te ñiu-ni-í cundecu-í ndéé ná sàà nduu nàa-xi ndihí nchaa sá ió, te chido tñùní-n ìⁿ núú tütú sá ná ðànehé núú ñàhà-í xii-n, te daquìhíⁿ-n tütú-áⁿ ndi úsá xichi núú xíndecu cue ñáyiú ndècu ichi Yá Ndiòxí xíndecu ðistrítú Asíá, ndaha ñáyiú ñúú Éfesú, ndaha ñáyiú ñúú Èsmirná, ndaha ñáyiú ñúú Pèrgamú, ndaha ñáyiú ñúú Tiàtirá, ndaha ñáyiú ñúú Sàrdís, ndaha ñáyiú ñúú Filàdelfiá, ndaha ñáyiú ñúú Laodiceá, nchaa ñáyiú ñúú-áⁿ daquìhíⁿ-n tütú-áⁿ ndahá-yu —càchí sá cáháⁿ-áⁿ.

¹² Te ní nchócuñhu-í ndéhè-í nñu ná cúú sá cáháⁿ-áⁿ, te ní xiní-í xínutñí úsá tñàhá sá ñí cuáha mee-ni ðíhúⁿ cuááⁿ sá ndéé ðité-xi, te núú ðité-xi-áⁿ yíndòdo ìⁿ caa candíl. ¹³ Te cuádava tnuú nchaa xíáⁿ ní xiní-í nútní Yaa cáá dàtná cáá nchàa nchoo ñáyiú ndècu ñuyíú-a, te ñíhnu-gá ìⁿ dóó cání càa-xi ndéé núú sàhá-gá, te yidúcuⁿnuu ìⁿ sìnhú ní cuáha mee-ni ðíhúⁿ cuááⁿ pèchú-gá. ¹⁴ Te idi ðíquí-gá cuìxíⁿ quiyí dàtná cuìxíⁿ idi dava mbéé, àdi yúhá sá quée òré quidé víxiⁿ-xi, te tìñu-gá quidé-xí dàtná quidé-xí òré sàà itá ñuhú. ¹⁵ Te sàhá-gá súúní dàtásaⁿ-xi dàtná dàtásaⁿ sá nání bróncé òré càyú-xi ducaⁿ dàtásaⁿ-xi sàhá-gá, te dónaha tñúhu càháⁿ-gá quidé-xí dàtná quidé-xí dónaha tìtní víhí yùte. ¹⁶ Te xio ndaha cùha-gá núndàha-gá

úsá tñàhá chódíní, te mei yùhu-gá quéné ìⁿ yuchi cáhnú ndéé úú xio núú-xi, te núú-gá quidé-xí dàtná quidé-xí núú nchìcanchii òré súúní ngòyo cahni.

¹⁷ Te sá ðúcáⁿ càa Yaa-áⁿ ñí xiní-í nñu xíáⁿ ní yùhú-í ní nduá-í núú-gá, te ní cuu-í dàtná ìⁿ téé ní xíhí sá ðúcáⁿ ò ní yùhú-í, ðico mee-gá ní sacáⁿ ndodo-gá ndaha cùha-gá núú yiqui cùñú-í, te ní cachí-gá:

—Vá yùhú-n, chi ñiu-ni yúhú sa ndècu-í ndéé cútñàhá ní ngáva ñuyíú, te ñiu-ni yúhú cundecu-í ndéé ná sàà nduu nàa-xi ndihí nchaa sá ió. ¹⁸ Te yúhú cúú-í Yaa ní xíhí te ní ndoto-í, te vitna ndècu vívù-í, te ducaⁿ-ni cundecu-í ní caa ñí quíhíⁿ. Te yúhú cúnùú-í núú nchàa ñáyiú ní xíhí te ñiu-ni-í cúnùú-í núú ndécù-yu. ¹⁹ Te chido tñùní-n nchàa sá ñí xiní-n-áⁿ ìⁿ núú tütú, ndihí nchaa nàcuáa cùu vitna, ndihí nchaa sá cádá-xi ndéé núú cuáháⁿ núú vèxi-gá. ²⁰ Te na càchí tñúhu-í xii-n nàcuáa quèe-xi ndi úsá chódíní ñí xiní-n yòtní-í xio ndaha cùha-í, ndihí nàcuáa quèe-xi ndi úsá sá ñí cuáha mee-ni ðíhúⁿ cuááⁿ, sá ndéé ðité-xi te yíndodo ìⁿ caa candíl núú ðité-xi-áⁿ. Te ndi úsá chódíní-áⁿ, xíáⁿ cúú-xí sá cútñúní iní-ó sá ndécú úsá cue téé xínu cuechi núú Yá Ndiòxí, te ndi úsá cue téé-áⁿ ndécú-güedé ndi úsá xichi núú ndécú ñáyiú ndècu ichi Yá Ndiòxí. Te cuèndá ndi úsá sá ndéé ðité-xi-áⁿ, xíáⁿ cúú-xí sá cútñúní iní-ó sá ndécú úsá xichi ñáyiú ndècu ichi Yá Ndiòxí —duha càchí Yaa cáháⁿ-áⁿ.

2

Tñúhu sá cúú-xí ñáyiú xíndecu ichi Yá Ndiòxí ndécú ñúú Éfesú

¹ Te ní cachí tuçu Yaa càháⁿ-áⁿ xii-í sá chídó tñùní-í nchaa tñúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xínu cuechi núú Yá Ndiòxí ndécú ñúú Éfesú sá cúú-xí cuè ñáyiú xíndecu ichi-gá ndécú ñúú-áⁿ, te duha ní

cachí-gá: “Yúhú cùu-í Yaá núndàha úsá chódíní xio ndaha cùha-í, te xica cuu-í núú ndécú ndí usá sá ní cuáha mee-ni díhúⁿ cuàáⁿ, sá ndéé dité-xi te yìndodo ìⁿ caa candíl núú dité-xi. ² Te yúhú xìní-í nchaa nàcuáa quide nchohó ñáyiú xìndecu ichi Yá Ndiòxí ndécú ñúú Èfesú, te xìní-í sá ìo ndùcu ndee-ndo quide chiuⁿ-ndo cuendá-gá, te ìo quide cahnu iní-ndó ndècu-ndo quide-ndo chiuⁿ-gá. Te xìní-í sá ñà túú tnàhí tnàhá iní-ndó nàcuáa quide nchaa ñáyiú ndècu ichi cuehé ichi duha. Te xìní tucu-í sá xító ndéé-ndó cuè téé càhí sá ní tendaha-í véxi càháⁿ tnúhu-í te ñà ndàá sá càháⁿ-güedé tnúhu-í, te ducaⁿ te cùtnuní iní-ndó sá ñà ndàá sá càháⁿ-güedé tnúhu-í. ³ Te xìní tucu-í sá ìo ndòho-ndo quide-ndo chiuⁿ cuendá-í, te ducaⁿ ìo quide cahnu iní-ndó cuèí nándi yáha-ndo, te ñà túú cùu dusaⁿ-ndo quide-ndo chiuⁿ-án. ⁴ Dico ñà túú cùu váha iní-í chi nchòhó ñà túú-gá quidé-ndó datná ní xóo cada-ndo cùtnàhá vitna cùu víi-ni ní sándáá iní ñàhá-ndó xii-í, chi vitna ñà túú-gá cùú iní ñàhá vihi-ndo datná ní xóo cada-ndo dàv-áⁿ. ⁵ Te chí dándacu iní nàcuáa ní xóo cada-ndo cùtnàhá vitna cùu saa ní sándáá iní ñàhá-ndó xii-í, te ndixi cuèchi iní-ndó sá ñà túú-gá quidé vâha-ndo ndècu-ndo vitna, te nucuíta saa tùcu-ndo cada-ndo datná ní xóo cada-ndo ndéé díhna. Te nchòhó cada iní-ndó sá ndécú ndìhi-ndo ìⁿ sá ní cuáha mee-ni díhúⁿ cuàáⁿ, sá ndéé dité-xi te yìndodo ìⁿ caa candíl núú dité-xi. Te núu vá ndíxí cuèchi iní-ndó nàcuáa quide-ndo ndecu-ndo ña, te quixi-í xocáni-í xiáⁿ, te ducaⁿ sãtnahá-xi cada ñaha-í xii-ndo te núu vá ndíxí cuèchi iní-ndó nàcuáa quide-ndo ndecu-ndo, te ducaⁿ te vá yó-gá nàtacá chiñuhu ñaha xii-í ñúú-ndó. ⁶ Dico quide váha-ndo ìⁿ xichi chi dàquee tíhú-ndó nchàa sá quidé cuè ñáyiú cùu nicolaitás, te yúhú tnàhá-í dàquèe tíhú-í nchaa

sá quidé ñáyiú-án. ⁷ Te nchòhó cada cuendá váha-ndo nàcuáa xáhaⁿ-í xii Espiritú Yá Ndiòxí xáhaⁿ-xii xii cue ñáyiú ndècu ichi-gá xìndecu nchaa xichi. Te duha ndùu tnúhu xáhaⁿ-í xii Espiritú-gá xáhaⁿ-xii xii-yu: Cúñaha-n xii nchaa ñáyiú sá núu na càda ndee iní-yu yáha-yu nándi sá ná yáha-yu sá cuendá-í, te yúhú cada-í te nduu táhú-yu cundecu váha-yu núú ndécú Yá Ndiòxí, duha xáhaⁿ-í xii Espiritú-gá cùu-xii ñáyiú”, duha càhí Yaá càháⁿ-án. Te nchaa tnúhu-án ní chídó tnùn-í-í sá cùú-xí ñáyiú xìndecu ichi Yá Ndiòxí ndécú ñúú Èfesú.

Tnúhu sá cùú-xí ñáyiú xìndecu ichi Yá Ndiòxí ndécú ñúú Èsmirná

⁸ Te ní cachí tucu Yaá càháⁿ-án xii-í sá chídó tnùn-í-í nchaa tnúhu sá vítná càháⁿ-gá ìⁿ núú tütú, te tendaha-í quíhíⁿ ndaha téé xinu cuechi núú Yá Ndiòxí ndécú ñúú Èsmirná sá cùú-xí cuè ñáyiú xìndecu ichi-gá ndécú ñúú-án, te duha càhí-gá: “Yúhú ndécú-í ndéé cùtnàhá ní ngáva ñuyú, te ñu-ni-í cundecu-í ndéé ná sáá nduu nàa-xii ndìhi nchaa sá ìo, te ñu-ni-í ní xihí te ní ndoto-í ndécú-í vitna. ⁹ Te yúhú xìní-í nchaa nàcuáa quide nchohó ñáyiú ndècu ichi Yá Ndiòxí ndécú ñúú Èsmirná. Te xìní-í sá ìo ndòho-ndo ndecu-ndo sá cuendá-í, te xini tucu-í sá ìo ndàhú-ndó dico cùu-ndo ñáyiú xìndecu váha núú Yá Ndiòxí. Te xini tucu-í sá ìo càháⁿ cuèhé ñáyiú israhél cuendá-ndó, dico ñà túú quidé-yu nàcuáa tàú-yu cada-yu sá cùú-yu ñáyiú israhél, chi cùú-yu ñáyiú xinu cuechi mee-ni núú sácúíhna. ¹⁰ Dico nchòhó vá yúhú-ndó cuèí nándi cùu nchaa sá ná ndòho-ndo cuendá-í, chi sácúíhna cada-xi te ngava dava-ndo vècaá, te ducaⁿ càda-xi chi cuíní-xi coto ndéé ñàhá-xí xii-ndo núu ndisa sá vá ná túhú iní-ndó sá nchicúⁿ nihnu-ndo ichi Yá Ndiòxí. Te ndòho-ndo ùxí nduu dico vá dáña ndéé-ndó cànhicúⁿ nihnu-ni-ndo ichi-gá cuèí na cùu-ndó sá cuendá-gá,

te yúhú cada-í te nduu táhú-ndó cùndecu-ndo ndihí-gá ní caa ní quíhíⁿ. ¹¹ Te nchaa nchòhó cada cuèndá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xí xii cue ñáyiú ndècu ichi-gá xĩndecu nchaa xichi, te duha ndùu tnúhu xáhaⁿ-í xii Espíritú-gá xáhaⁿ-xí xii-yu: Cúñaha-n xii nchaa ñáyiú sá nũu na cùndee iní-yu yáha-yu nándi sá ná yáha-yu sá cuèndá-í te vá cuíta nihnú-yu na sàá nduu cuíta nihnu nchaa dava-gá ñáyiú, duha xáhaⁿ-í xii Espíritú-gá cúu-xi ñáyiú”, duha ní cachí Yaá càháⁿ-áⁿ. Te nchaa tnúhu-áⁿ ní chídó tnùnì-í sá cúu-xí ñáyiú xĩndecu ichi Yá Ndiòxí ndécú ñùú Èsmirná.

Tnúhu sá cúu-xí ñáyiú xĩndecu ichi Yá Ndiòxí ndécú ñùú Pèrgamú

¹² Te ní cachí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tútú, te tendaha-í quíhíⁿ ndaha tée xĩnu cuechi núú Yá Ndiòxí ndécú ñùú Pèrgamú sá cúu-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Yaá néhé ìⁿ yuchí cánì te ndèé úú xio núu-xi. ¹³ Te yúhú xìnì-í nchaa nàcuáa quide nchohó cue ñáyiú xĩndecu ichi Yá Ndiòxí ndécú ñùú Pèrgamú, te xìnì tucu-í sá ndécú-ndó nũú ïo cùnuu yucu ñáváha, te ñá túú dàña ndeé-ndó nchicúⁿ nihnu-ndo ìchi-í, te ducaⁿ ïo sàndáá iní ñáhá-ní-ndó xii-í, te ñu-ñi ducaⁿ ní quide-ndo cùtnáhá ní sahani-güedé té Àntipás núú ndécú-ndó ñu-ñi núú dúcáⁿ ïo cùnuu yucu ñáváha. Te ndíi-áⁿ ní quide ndáá ndíi ní xĩndecu ndíi ichi-í chí ní càháⁿ váha ndíi cuèndá-í. ¹⁴ Dico ñá túú cúu váha iní-í cuèndá ìⁿ úú sá quide-ndó, chí ndècu ndihí-ndo ñáyiú nchicúⁿ nihnu-ni nchaa nàcuáa ní càháⁿ ndíi Bàlaám. Chí ndíi-áⁿ ñà túú ní quide váha ndíi chí ní dácáhú ìní ndíi ìngá tée ní xĩnani Bàlác nàcuáa cada-dé canu ichi-dé cue ñáyiú israél ìngá ichi sá ñà túú váha, chí ní xáhaⁿ tè Bàlác-áⁿ xii-yu

sá caxí-yu nchaa sá ndúú táhú nchaa sá ní cadúha cue tée ñuyúú-a dānani ñáyiú ndiòxí te ñà ndaá sá ndiòxí cúu-xí, te ní dácáhú ìní ñáhá-dě xii-yu sá cùndécú-yu ichi dǐi ìní. ¹⁵ Te ndècu ndihí tucu-ndo ñáyiú nchicúⁿ nihnu sá dácúaha cue ñáyiú cúu nicolaitás. Te nchaa sá dácúaha ñáyiú-áⁿ dáquèe tíhù-í, ¹⁶ te nchòhó chí dāndixi cuèchi ìní sá ñà túú quide váha-ndo ndècu-ndo, chí núu ñáhá te quixi-í nàá-í ndihí cue ñáyiú-áⁿ ndihí yuchí cánì sá quéné yúhu-í. ¹⁷ Te nchaa nchòhó cada cuèndá váha-ndo nàcuáa xáhaⁿ-í xii Espíritú Yá Ndiòxí xáhaⁿ-xí xii cue ñáyiú ndècu ichi-gá xĩndecu nchaa xichi. Te duha ndùu tnúhu xáhaⁿ-í xii Espíritú-gá xáhaⁿ-xí xii-yu: Cúñaha-n xii nchaa ñáyiú sá nũu na càda ndee iní-yu yáha-yu nándi sá ná yáha-yu sá cuèndá-í, te yúhú cuáñaha-í sá ndúú yúhu xii-yu caxí-yu ìⁿ sá vátá quínì-gá-yu caxí-yu. Te xíáⁿ cúu-xí mànáá sá ní xóo caxi cue ñáyiú ní xĩndecu ndéé sanaha, te cuáñaha tucu-í ìⁿ caa yúú cuixíⁿ xii-yu, te núú yúú-áⁿ cundeé ìⁿ ñu saa. Te ñu-áⁿ vǎ yóo tnáhí xìnì chí ìⁿ ñu ñu-í ñáyiú na quèheⁿ cuendá ñu-áⁿ quínì-yu, duha xáhaⁿ-í xii Espíritú-gá cúu-xi ñáyiú”, duha càchí Yaá càháⁿ-áⁿ. Te nchaa tnúhu-áⁿ ní chídó tnùnì-í sá cúu-xí ñáyiú xĩndecu ichi Yá Ndiòxí ndécú ñùú Pèrgamú.

Tnúhu sá cúu-xí cuè ñáyiú xĩndecu ichi Yá Ndiòxí ndécú ñùú Tiàtirá

¹⁸ Te ní cachí tucu Yaá càháⁿ-áⁿ xii-í sá chídó tnùnì-í nchaa tnúhu sá vítná càháⁿ-gá ìⁿ núú tútú, te tendaha-í quíhíⁿ ndaha tée xĩnu cuechi núú Yá Ndiòxí ndécú ñùú Tiàtirá sá cúu-xí cuè ñáyiú xĩndecu ichi-gá ndécú ñùú-áⁿ, te duha càchí-gá: “Yúhú cúu-í Déhe Yá Ndiòxí, te càa tinuu-í dàtná cáá itá ñuhú, te sáhà-í cáá dàtná cáá sá nánì bròncé òrè ñuhú-xí núú ñuhú càyú-xi. ¹⁹ Te yúhú xìnì-í nchaa nàcuáa quide nchohó

ñáyiú xĩndecu ichi Yá Ndiöxí ndécú ñùú Tiàtirá. Te xini tucu-í sá ïo cùu iní-ndó Yá Ndiöxí te sãndáá iní-ndó-gá. Te xini tucu-í nãcuáa ndùu chiuⁿ quide-ndo sá cúú-xí-gá. Te xini tucu-í sá ïo quide cahnu iní-ndó cuëi nãndi cùu sá yãha-ndo ndècu-ndo. Te xini tucu-í sá ïo-gá ndúcú ndèe-ndo quide váha-ndo vitna dacúúxí cǔtnáhá vitna cùu saa ni sãndáá iní-ndó Yá Ndiöxí. ²⁰ Dico ñá túú cùu váha iní-í cuendá ìⁿ sá quidé-ndó, chi ñá túú tnãhi ná sãni iní-ndó ndècu ndihi-ni-ndo ñáyiú nchicúⁿ nihnu nchaa nãcuáa dãnehé ñáhá ñaha nani Jezabél. Te ñaha-án càchí-aⁿ sá càhá^{n-a} tnúhu Yá Ndiöxí dico ñá ndáá sá càhá^{n-a} tnúhu-gá, te cuáhá^{n-a} dãndahú-aⁿ nchaa ñáyiú xĩnu cuechi núu-í ndihi nchaa sá dãnèhé ñáhá-án cuendá cundecú-yu ichi ñá iní, te caxí-yu nchaa sá ndúú tãhú nchaa sá ni cadúha cue téé ñuyúú-a dãnani ñáyiú ndiöxí te ñá ndáá sá ndiöxí cúú nchaa xiãⁿ. ²¹ Te ní cuu vai nduu ta dacaca-í ndécú-án cuendá ndixi cuéchi iní-aⁿ sá ñá túú quide váha-aⁿ ndècu-aⁿ, te cuëi ducaⁿ quide-í dico ñá túú cuini-aⁿ daña-aⁿ ni ìⁿ sá cuèhé sá dúhá quide-aⁿ. ²² Te vitna yúhú ïo dandòho-í-aⁿ chi tni ñaha cuèhé xii-aⁿ, te ñu-ni ducaⁿ ïo dandòho-í nchaa ñáyiú quide datná quidé-án te núu vá ndíxí cuéchi iní-yu sá ñá túú quide váha-yu ndécú-yu, te daña-yu nchaa sá cuèhé sá dúhá quidé-yu. ²³ Te nchaa ñáyiú cundihí ñaha xii ñaha-án cahni-í-yu, te ducaⁿ te nchòhó ndihi dava-gá nchaa ñáyiú xĩndecu ichi Yá Ndiöxí ndécú nchaa xichi cutnuni iní-ndó ndihi-yu sá yúhú cúú-í Yaá xini ndáá nchaa nãcuáa sãni iní ñáyiú, ndihi nchaa nãcuáa quide-xi iní-yu. Te nchòhó nãcuáa ndùu sá quidé-ndó ìⁿ ìⁿ-ndo te ducaⁿ cunduu sá táxi-í nduu tãhú-ndó. ²⁴ Te dava nchòhó ñáyiú ndècu ñuu Tiàtirá, ñáyiú ñá túú nchicúⁿ nihnu nãcuáa dãnehé ñáhá ñaha nani Jezabél-án ñá túú xini-ndó ná cúú sá càchí ñáyiú ndùu yuhu dacahu

iní ñáhá yùcu ñávãha. Te nchòhó, ñá túú nãgá cachí tnúhu-í xii-ndo càda-ndo ²⁵ ñu-ná sá ïo nducu ndèe-ndo cada-ndo nchaa nãcuáa càháⁿ tnúhu sá ndécú ndihi-ndo, te ducaⁿ-ni càda-ndo ndéé òré quixi tucu-í. ²⁶ Te nchaa nchòhó ñáyiú na càda ndee iní yãha nãndi sá ná yãha sá cuendá-í, te núu na càda-ni-ndo nchaa nãcuáa cuini-í cada-ndo ndéé nduu vá cundècu-gá-ndó ñuyúú-a, te yúhú taxi-í tnúhu ndee iní xii-ndo sã táxi tnuni-ndó nchaa ñáyiú ñuyúú ²⁷ datná ní quide mee Tãtã-í Dútú Ndiöxí ní taxi-gá tnúhu ndee iní ndécú ndihi-í, te ducaⁿ càda ñaha-í xii-ndo tàxi-í tnúhu ndee iní xii-ndo cuendá ïo taxi tnuni-ndó, te cada iní-ndó sã càdá-ndó cué ñáyiú datná quidé-xí ìⁿ quidi òré tãhú-xi càchi duuⁿ-xi, te ducaⁿ chi nchòhó cada-ndo sá ncháá ñáyiú ñá túú quide váha cuita nihnú-yu. ²⁸ Te cada iní-ndó sã datná dáyhé chódini quiti quène oré sa ta tũndaá-nã cuáháⁿ ducaⁿ càda-xi oré ná sãá nduu ngũta-xi cada váha-xi, te ducaⁿ chi yúhú cada-í nãcuáa nduu tãhú-ndó cundecu ndihi ñaha-ndo xii-í núú ïo váha càa ndecu-í. ²⁹ Te nchaa nchòhó cada cuendá váha-ndo nãcuáa xãhaⁿ-í xii Espiritú Yá Ndiöxí xãhaⁿ-xi xii cue ñáyiú ndècu ichi-gá xĩndecu nchaa xichi”, duha càchí Yaá càháⁿ-án. Te nchaa tnúhu-án ni chidó tnuni-í sá cúú-xí ñáyiú xĩndecu ichi Yá Ndiöxí ndécú ñùú Tiàtirá.

3

Tnúhu sá cúú-xí ñáyiú xĩndecu ichi Yá Ndiöxí ndécú ñùú Sãrdís

¹ Te ní cachí tucu Yaá càháⁿ-án xii-í sá chidó tnuni-í nchaa tnúhu sá vitná càháⁿ-gá ìⁿ núú tütú, te tendaha-í quihíⁿ ndaha téé xĩnu cuechi núú Yá Ndiöxí ndécú ñùú Sãrdís sá cúú-xí cué ñáyiú xĩndecu ichi-gá ndécú ñuu-án te duha càchí-gá: “Yúhú cúú-í Yaá ndécú ndihi ndi usá espíritú cúú cuendá Yá Ndiöxí, te ñu-ni-í cúú-í Yaá ndécú ndihi ndi usá chódini. Te yúhú xini-í

nchaa nàcuáa quide nchohó ñáiyu xĩndecu ichi Yá Ndióxi ndécú ñùú Sárdís, te xini-í sá cúu-ndó dàtná ñáiyu ní xihí cuéi càchí ñáiyu sá ñhá. ² Te chí cuáha cuendá nàcuáa quide-ndo ndecu-ndo vitna, te nducu ndèe-ndo cada-ndo ìⁿ úú-gá nchaa sá vâha nchicúⁿ nihnu-ndo vitna, chi sa ndètu vii-nâ daña-ndo nchâa-ndi túhú sá vâha quide-ndo ni cuu, te quide cuendá-í sá ñâ túú quide-ndo nchaa nacuáa cuini Yá Ndióxi cada-ndo. ³ Te chí dándacu ini nàcuáa càháⁿ tnúhu sá ní xĩndéohó-ndo cùtnâhá ní tuha-ndo ichi Yá Ndióxi, te canchicúⁿ nihnu-ndo càda-ndo nacuáa càháⁿ tnúhu-áⁿ, te ndixi cuéchi ini-ndó sá ñâ túú quide vâha-ndo ndècu-ndo, te núu vá nàcuáha-ndo cuendá nàcuáa quide-ndo ndecu-ndo ña, te cada-í dàtná quidé ñàdúhú, chi òré ñâ túú nâ yihí ini-ndó quèxio-í núú ndécú-ndó. ⁴ Dico ndècu ndihi-ndo ìⁿ úú ñáiyu càndoo caa nine ini-xi, chi ñáiyu-áⁿ ñi nduu táhú-yu cuihnú-yu dóó cuixiⁿ cuendá cundecu ndihi-í-yu, te ducaⁿ chi cùdiú-yu núú-í. ⁵ Te nchaa ñáiyu na càda ndee ini-xi yâha nândi sá ná yâha sá cuendá-í, te ñáiyu-áⁿ nduu táhú-yu cuihnú-yu dóó cuixiⁿ, te vá náquète-í diú-yu núú tütú núú yódó tnùni cue ñáiyu ní nduu táhú cundecu ndihi-í ni caa ni quihíⁿ, te cúñaha-í xii Tâtâ-í Dútú Ndióxi ndihi cue espíritú xínú cuèchi núú-í sá ñáiyu-áⁿ cúu-yu ñáiyu cùu cuendá-í. ⁶ Te nchaa nchòhó cada cuendá vâha-ndo nàcuáa xâhaⁿ-í xii Espíritú Yá Ndióxi xâhaⁿ-xi xii cue ñáiyu ndècu ichi-gá xĩndecu nchaa xichiⁿ, duha càchí Yaá càháⁿ-áⁿ. Te nchaa tnúhu-áⁿ ñi chidó tnùni-í sá cúu-xi ñáiyu xĩndecu ichi Yá Ndióxi ndécú ñùú Sárdís.

Tnúhu sá cúu-xi cué ñáiyu xĩndecu ichi Yá Ndióxi ndécú ñùú Filàdelfiá

⁷ Te ní cachí tucu Yaá càháⁿ-áⁿ xii-í sá chidó tnùni-í nchaa tnúhu sá vitná càháⁿ-gá ìⁿ núú tütú, te tenda-í quihíⁿ ndaha téé xĩnu cuechi

núú Yá Ndióxi ndécú ñùú Filàdelfiá sá cúu-xi cué ñáiyu xĩndecu ichi-gá ndécú ñùú-áⁿ, te duha càchí-gá: “Yúhú cúu-í Yaá ío vâha quide ndáá te ñâ túú tnâhí cuéchi-í. Te díhna-gá ndii Dàvií ní taxi tnùni ndii ñáiyu, te vitna yúhú táxi tnùni-í-yu, te yúhú càháⁿ-í te núu ndèndida càa ñáiyu ndihu ndaha-í te ndèndida càa ñáiyu vá ndihu ndaha-í. ⁸ Te yúhú xini-í nchaa nàcuáa quide nchohó ñáiyu xĩndecu ichi Yá Ndióxi ndécú ñùú Filàdelfiá, te yúhú ní quide-í nàcuáa ní níhi-ndó ìⁿ ichi cahnu quide-ndo chiuⁿ-í, te vá yõo ìⁿ cada nàcuáa vá nihí-gá-ndó nàcuáa cada-ndo chiuⁿ-í. Te cuéi ñâ túú ío nihí ndéé-ndó cundecu-ndo ichi Yá Ndióxi dico tnii-ndo nchaa tnúhu càháⁿ-í, te ni ìⁿ xito ñâ túú càháⁿ-ndó sá ñâ túú ndècu ndihi ñaha-ndo xii-í. ⁹ Te nchaa ñáiyu quide nchaa nacuáa cuini yucu ñávâha, ñáiyu-áⁿ cúu-yu ñáiyu isràél, te cuéi cùu-yu ñáiyu isràél dico ñâ túú quidé-yu nàcuáa tàú-yu cada-yu, te yúhú cada-í sá ncháá ñáiyu-áⁿ canehé-yu sá yíñùhu núú-ndó, te cutnùni ini-yu sá yúhú ío cùu ini ñâhá-í xii-ndo. ¹⁰ Te ío quide ndee-ni ini-ndó nchicúⁿ nihnu-ndo quide-ndo nchaa nacuáa ní càháⁿ-í, te xiáⁿ coto ñaha-í xii-ndo ñâ túú nâ tnahá-ndó nduu na quixi nchaa tnúndòho tnúhu ndâhú ñuyiú-a. Te òré quexio nchaa tnúndòho-áⁿ ñuyiú-a te dàvâ-áⁿ cutnùni nàcuáa nduu sá quidé ìⁿ ìⁿ ñáiyu. ¹¹ Te ío ndihi quixi tucu-í. Te vá dàñâ ndéé-ndó càda-ndo nchaa sá vâha nchicúⁿ nihnu-ndo quide-ndo cuendá sá vá cuíta sá ní cachí Yá Ndióxi nduu táhú-ndó. ¹² Te nchaa nchòhó ñáiyu na càda ndee ini yâha nândi sá ná yâha sá cuendá-í, te yúhú cada-í sá nchòhó ío cuu càhnu-ndo cundecu-ndo núú ndécú Tâtâ-í Dútú Ndióxi, te vá ìⁿ nduu-gá xocuiñi-ndó núú ndécú-gá. Te cada ini-ndó sá dàtná sá chidó tnùni-í diú Tâtâ-í Dútú Ndióxi ñii-ndo chi

ducaⁿ-ni cùndecu-ndo ndihì-gá, te cada tucu iní-ndó sá dàtná sá chídó tñuní-í nàcuáa nàni ñuú-gá ñii-ndo, chi ðiu ñuú-gá-án cundecu-ndo, te ñuú-án nání-xí Jèrusalén Sáa, duha nàni ñuú-gá. Te ñuú-án quee-xi andiu núú ndécú Yá Ndióxi Yáa cúú Tàtá-í quée-xi ñuyíú. Te cada tucu iní-ndó sá dàtná sá chídó tñuní-í ðiu mee-í ñii-ndo, te xián cúú-xí ñii ðiu saa, te ducaⁿ càda iní-ndó chi cundecu ndihì ñaha-ndo xii-í. ¹³ Te nchaa nchòhó cada cuèndá váha-ndo nàcuáa xáhaⁿ-í xii Espiritú Yá Ndióxi xáhaⁿ-xi xii cue ñáyiu ndècu ichi-gá xíndecu nchaa xichi”, duha càchí Yáa càháⁿ-án. Te nchaa tñuhu-án nì chídó tñuní-í sá cúú-xí ñáyiu xíndecu ichi Yá Ndióxi ndécú ñúú Filadelfiá.

Tnúhu sá cúú-xí ñáyiu xíndecu ichi Yá Ndióxi ndécú ñúú Laodiceá

¹⁴ Te càchí tucu Yáa càháⁿ-án xii-í sá chídó tñuní-í nchaa tñuhu sá vítná càháⁿ-gá ñii núú tütú, te tendaha-í quíhⁱ ndaha téé xinu cuechi núú Yá Ndióxi ndécú ñúú Laodiceá sá cúú-xí cue ñáyiu xíndecu ichi-gá ndécú ñúú-án, te duha càchí-gá: “Yúhú cúú-í Yáa quidé núú Yá Ndióxi, te cúú-í Yáa quidé ndáa chi càháⁿ ndáa cuiti-í nàcuáa càháⁿ Yá Ndióxi. Te yúhú cúú-í Yáa ní quide ní ngúndecu nchaa sá ñi cadúha Yá Ndióxi. ¹⁵ Te yúhú xini-í nchaa nàcuáa quide nchohó ñáyiu xíndecu ichi Yá Ndióxi ndécú ñúú Laodiceá, te xini-í sá ñà túú cuini-ndó càncicúⁿ nihnu-ndo nchaa nacuáa càháⁿ-í, te ni ñà túú cuini-ndó dàña duuⁿ-ndo. Te váha-gá sá dúúⁿ duuⁿ cada-ndo nchaa nacuáa càháⁿ-í àdi núú ñáhá te duuⁿ duuⁿ dañá-ndo. ¹⁶ Te sá dúcáⁿ quide-ndo ñà túú cuini-ndó dùuⁿ duuⁿ-ni cada-ndo nàcuáa càháⁿ-í, te ni ñà túú cuini-ndó dùuⁿ duuⁿ-ni dañá-ndo te sáá nduu vã cùndèe-gá iní-í cuèndá nchaa sá quidé-ndó-ãⁿ, te daquèe tíhú ñáhà-í xii-ndo. ¹⁷ Te càchí-ndó sá cuicá-ndó, te ío váha ta yáha-ndo nchaa nduu cuáháⁿ, te ñà túú

tñahí ná cúmání xii-ndo, te ñà túú cùtnuní iní-ndó sá cúú-ndó dàtná cue ñáyiu ío ndàhú yáha, te cùu-ndo datná ñáyiu ndàhú, ñáyiu ío cùndahú iní ñáhá tñaha ñáyiu-xi, te cùu-ndo datná cue ñáyiu cuáá, te cùu tucu-ndo datná cue ñáyiu ndàhú ñà túú tñahí dóó-xi. ¹⁸ Te na càchí tñuhu-í xii-ndo sá cadá-ndó dàtná xiquide cue ñáyiu sàaⁿ ñii sá ñi cuáha mee-ni ðihúⁿ cuáaⁿ sá ío váha càa, te ducaⁿ quidé-yu te ío-gá cúú cuicá-yu. Te cada tucu-ndo dàtná xiquide cue ñáyiu sàaⁿ dóó cuixiⁿ sácuñnu-yu cuèndá sá vã cúú-yu dàtná ñáyiu ndàhú ñà túú dóó-xi, te cada tucu-ndo dàtná quidé cue ñáyiu sàaⁿ yúcu quée núú-xi nàcuáa cutnuni váha núu-yu, te duha càháⁿ-í xáhaⁿ-í xii-ndo chi cuini-í sá nàtuha ñaha-ndo xii-í, te ío váha cundecu-ndo sá cúú-xí Yá Ndióxi. ¹⁹ Te càháⁿ-í dóho nchaa ñáyiu cùu iní-í òrè ñà túú quide ndáa-yu, te dándoho-í-yu, núu xián cuini-í sá nchòhó ndixi cuéchi iní-ndó sá ñà túú quide váha-ndo ndècu-ndo. ²⁰ Te na càchí tñuhu-í xii-ndo sá yúhú cúú-í dàtná ñii téé nùtnii yuyèhe ndaa quehe te càháⁿ-í ñáyiu yìhí xití vehe, te núu na càda cuèndá-yu sá càháⁿ-í te nacaáⁿ-yu yuyèhe te quíhu-í xití vehe cudini-í ndihí-yu, te duha càháⁿ-í chi cuini-í cundecu ndihì ñaha-í xii-ndo. ²¹ Te nchaa nchòhó ñáyiu na càda ndee iní-xi yáha nándí sá ná yáha sá cuèndá-í, te yúhú taxi-í xii-ndo ñii xichi núú ndécú-í cundecu-ndo te cunuu-ndo tñahá-ndó dàtná cùnùu-í, chi yúhú ducaⁿ ñi quide ndee iní-í ní yáha-í nándí sá ñi yáha-í te vitna ní nduu táhù-í ndécú-í núú ndécú Tàtá-í Dútú Ndióxi cùnùu-í. ²² Te nchaa nchòhó cada cuèndá váha-ndo nàcuáa càháⁿ Espiritú Yá Ndióxi xáhaⁿ-xi xii cue ñáyiu ndècu ichi-gá xíndecu nchaa xichi”, duha càchí Yáa càháⁿ-án. Te nchaa tñuhu-án nì chídó tñuní-í sá cúú-xí ñáyiu xíndecu ichi Yá Ndióxi ndécú ñúú Laodiceá.

4

Nàcuáa chiñuhu ñáyiú Yá Ndiõxi andiú

¹ Te sátá nǐ yáha ducaⁿ nǐ cuu te ní xiní-í nchí andiú, te ní cáháⁿ tucu Yaa ní cáháⁿ ndihi ñaha xii-í díhna, te Yaa-án nǐ cáháⁿ níhi-gá dátna cáháⁿ níhi ñⁿ cútú, te ní cachí-gá xii-í:

—Taquène iha te na dānehé ñàhà-í xii-n nchàa nacuáa cada-xi ndéé núú cuaháⁿ núú vèxi — cachí-gá.

² Te òré-ni-án nǐ quide ñaha tucu Espiritú Yá Ndiõxi xii-í nàcuáa cāchí iní-xi, te diu-ni òré-án nǐ xiní-í nútñ^ñ ñⁿ xilé váha andiú te cāa dátna cáa xilé sácõo nchihí cue ñáyiú ío cūnuu, te núú xilé váha-án núcõo Yaa táxi tñuní. ³ Te Yaa-án cáa-gá dátna cáa yúú chāhnhí yúú váha sá nání jǎspé, te cāa tucu-gá dátna cáa yúú váha sá nání cōrnalíná, te ñuhu doco ñaha ñⁿ cóo yāhnhí xii-gá, te tásaⁿ-di dátna tásaⁿ ñⁿ yúú váha sá nání èsmeraldá. ⁴ Te ní xiní tucu-í nútñ^ñ ócò cūmí xilé váha nǐ cāndéé núú núcõo-gá, te núú xilé-án xīnucóo ócò cūmí cue téé cūu sacuéhé te xixihnu-güedé mee-ni dõo cuixíⁿ, te ñⁿ caa coróná sá nǐ cuáha mee-ni díhúⁿ cuááⁿ xixúhuⁿ díqui-güedé. ⁵ Te núú núcõo Yaa táxi tñuní-án sáa nduté, te cáháⁿ ñuhu te xica chihí-xi dónaha, te cāyú úsá iti núú núcõo-gá, te sá úsá iti-án xǎⁿ cūtnùní sá ndécú úsá espíritú cúú cuendá-gá. ⁶ Te ndécú ñⁿ sá ndécú ndāa núú-gá te xǎⁿ cáa dátna cáa lámár, te dátna cáa vidiú cáa ñihí.

Te nǐ cāndéé dñi Yaa núcõo-án xīnutñ^ñ cūmí quiti te titñí víhí tīnuu-güedi ndéé ndāa sátá-güedi ndihi ndāa núú-güedi. ⁷ Te quiti díhna nuu cāa-di dátna cáa ndicaha, te quiti cūu uú cáa-dí dátna cáa ndicutu, te quiti cūu uní néhé-dí núú téé, te quiti cūu cumí cáa-dí dátna cáa yacolo oré cuaháⁿ-di núú tàchí. ⁸ Te ndi cūmí quiti-án ndéé íñú ndíxíⁿ-güedi ñⁿ ñⁿ-güedi, te ñihí

xití ndíxíⁿ-güedi ndihi ndāa sátá ndíxíⁿ-güedi ndéé tīnuu-güedi, te nduu núú chíñuhu-güedi Yá Ndiõxi, te xáhaⁿ-güedi xii-gá:

Yòhó Dútú Ndiõxi ducaⁿ-ni ta quide ndáá-n vèxi, te ducaⁿ-ni quide ndáá-n cuéi vitna, te diu-ni ducaⁿ cāda ndáá-n núú cuaháⁿ núú vèxi,

te cūu-n Yaa quidé nchāa-ndi túhú sá váha,

te diu-ni-n sá ndecu-n ndéé cūtnáhá ní cuáha ñuyíú,

te diu-ni-n ndécú-n cuéi vitna, te diu-ni-n cūndecu-n cuéi ndéé núú cuaháⁿ núú vèxi.

Duha xáhaⁿ cuéi quiti-án xii Yaa núcõo núú xilé váha-án chíñuhu ñaha-güedi.

⁹ Te cue quiti-án ío ndacáⁿ táhú-güedi núú Yaa núcõo núú xilé váha-án cuendá nchaa sá quidé-gá. Te Yaa-án cúú-gá Yaa ndécú nchāa nduu nchaa quíú. Te cue quiti-án cāchí-güedi sá ío cāhnu cuu-gá te nèhe-güedi sá yíñuhu núú-gá. Te ndi tnahá òré ducaⁿ cāháⁿ-güedi, ¹⁰ te ndi òcò cūmí cue téé cūu sacuéhé xīnucóo-án ngüñí xití-güedé núú Yaa núcõo-án, chi diu-gá cúú-gá Yaa ndécú nchāa nduu nchaa quíú te chíñuhu ñaha-güedé xii-gá, te tava-güedé coróná ñuhu díqui-güedé te tàxi ndecu-güedé núú-gá, te xáhaⁿ-güedé xii-gá:

¹¹ Yòhó cúú-n Dútú Ndiõxi Yaa cúú cuendá ñáhá xii-ndí,

te ío cāhnu cuu-n, te ío váha quide-n,

te nèhe-ndí sá yíñuhu núú-n, chi ducaⁿ tau-xi cada-ndí,

chi yòhó cúú-n Yaa ní cadúha nchaandi túhú sá ío,

te ducaⁿ nǐ ngūndecu nchaa xǎⁿ chi mee-n dūcaⁿ ní sani iní-n cāda-n.

5

Cuendá Yaa cáa dátna cáa ñⁿ mbéé quiti ní dānicuèhé-güedé ndihi cuendá ñⁿ tutú

¹ Te ní xiní tucu-í sá Yaa núcõo núú xilé váha-án nūndāha-gá ñⁿ tutú

ní nacaúnuu xio ndaha cùha-gá, te ndèé lètrá ndàa sáta-xi ndihi ndàa xítì-xì, te úsá tnàhá tutú líhli ñuhu seyú ndèé sáta tütú-áⁿ cuendá sá vǎ dáñá-xí nàcaá. ² Te ní xiní-í ìⁿ espíritú xínú cuèchi núú Yá Ndiòxí, te ndee víhi-xi te níhi càháⁿ-xi, te càchí-xi:

—¿Yoo tàù-xi xocàni nchaa tutú líhli ñuhu seyú ndèé sáta tütú-a te nadacàá-xi? —càchí espíritú-áⁿ.

³ Dico ni àndiù, te ni núú ñuyú-a, te ni ndàa xítì ñuhu ñá túú ìⁿ ñáyiu tàù-xi nadacàá tütú-áⁿ te cundèhé-yu. ⁴ Te yúhú ní ngúíta-í ndàhyú víhì-í cuendá sá ñà túú nì ìⁿ ñáyiu tàù-xi nadacàá tütú-áⁿ cundèhé-yu. ⁵ Te ìⁿ cue téé cùu sacuéhé xínucóo xíáⁿ nǐ cachí-güedé xii-í:

—Vá ndàhyú-gá-n, te cada cuendá-n chi Yaá ío cùnuu cuu ndi mee cue ñáyiu cùu ñani tnàhá ndíi Jùdá, diu-ni Yaá cùú ñani tnàhá ndíi Dàvíí, Yaá-áⁿ cúú-gǎ Yaá ní ndacu ní yáha nchaa nàndi sá nǐ yáha, núu xíáⁿ diu-gá tàù-gá xocàni-gá nchaa tutú líhli ñuhu seyú ndèé sáta tütú-áⁿ te nadacàá-gá —duha càchí téé cùu sacuéhé-áⁿ.

⁶ Te tnuú ndi ócò cùmí cue téé cùu sacuéhé xínucóo-áⁿ, ndihi tnuú ndi cùmí quiti xínutnì-áⁿ, ndihi núú núcò Yaá táxí tnùnì-áⁿ nǐ xiní-í nùtnì ìⁿ Yaá cáá dàtná cáá ìⁿ mbéé quiti ní dánícuèhé-güedé te ní xíhì-dì ni cùu te ní ndoto-dì, te ndèé úsá ndiqui-dì, te ndèé úsá tinùu-dì, te sá úsá tinùu-dì-áⁿ cùtnùnì sá ndécú úsá espíritú cùu cuendá Yá Ndiòxí, ducaⁿ càa Yaá-áⁿ ní xiní-í. Te cue espíritú-áⁿ nǐ tendaha-gǎ xicá cùu-xi ní caa xico ñuyú. ⁷ Te Yaá cáá dàtná cáá ìⁿ mbéé quiti ní dánícuèhé-güedé-áⁿ nǐ sáháⁿ-gá núú Yáá núcòo núú xilé váha-áⁿ. ⁸ Te òré ní queheⁿ-gá tutú-áⁿ te ndi cùmí quiti xínutnì xíáⁿ nǐ ngúíñì xítì-güedi núú-gǎ, te ducaⁿ nǐ ngúíñì xítì tùcu ndi ócò cùmí cue téé cùu sacuéhé xínucóo-áⁿ, te ndi

dííⁿ núú-güedé xínehe-güedé yaá sá nánì àrpá, te xínehe tucu-güedé ndí dííⁿ núú-güedé ìⁿ caa tǐcùú ní cuáha mee-ni díhúⁿ cuaáⁿ, te chitu dǔsa sá sáháⁿ tnámí. Te ñúhmá dǔsa sá sáháⁿ tnámí-áⁿ cúú-xí dàtná nchaa tnúhu càháⁿ nchaa ñáyiu ndècu íchi Yá Ndiòxí òré càháⁿ ndihi ñàhá-yu xii-gá. ⁹ Te xita-güedé ìⁿ ndudú sáá ndihi cue quiti-áⁿ chíñùhu ñaha-güedé xii-gá, te càchí-güedé ndihi cue quiti-áⁿ:

Yòhó tàù-n queheⁿ-n tutú-a te xocàni-n nchaa tutú líhli ñuhu seyú ndèé sáta-xi,

chi yòhó ní sati níñì-n te ní xíhì-n, te cuendá xíáⁿ ní nduu cuendá Yá Ndiòxí cue ñáyiu ìⁿ ìⁿ nàcióⁿ, ndihi ñáyiu xíndecu ìⁿ ìⁿ ñuú, ndihi ñáyiu càháⁿ ndí dííⁿ ndí dííⁿ núú tnúhu, ndihi ñáyiu xíndecu ìⁿ ìⁿ xichi.

¹⁰ Te ní quidè-n-yu dàtná cue téé yíndaha ñáyiu, te ní quide túcú-n-yu dàtná cue dútú sá cúú-xí Yá Ndiòxí.

Te sáá nduu te taxi tnùnì-yu ñuyú-a.

Duha càháⁿ cue téé-áⁿ ndihi cue quiti-áⁿ chíñùhu-güedé ndihi-güedi Yáá-áⁿ.

¹¹ Te sáta dúcáⁿ te ní tecú dóho-í ní càháⁿ cuèhé víhì espíritú xínú cuèchi nǐ candéé núú núcò Yaá táxí tnùnì-áⁿ, ndihi núú xínutnì ndi cùmí cue quiti-áⁿ, ndihi núú xínucóo cue téé cùu sacuéhé-áⁿ, te ní xiní-í sá sùúnì cuèhé víhì espíritú-áⁿ xíndecu xíáⁿ, ¹² te níhi ní càháⁿ cue espíritú-áⁿ, te càchí-xi:

Yòhó Yaá cáá dàtná cáá ìⁿ mbéé quiti ní dánícuèhé-güedé te ní xíhì ní cùu te ní ndoto,

te yòhó ío càhnu cuu-n, te ndècu ndihi-n nchaandi túhú,

te ío ndècu ndihi-n sá xini tnùnì-n, te ndàcu-n quide-n nchaa sá cuínì-n,

te nèhe-ndí sá yíñùhu núú-n, te ío váha quide-n,

te chiñuhu ñaha-ndí xii-n, chi ducaⁿ
tàu-ndí cada-ndí chi ío càhnu
cuu-n.

Duha càchí nchaa cue espíritú-áⁿ
xáhaⁿ-xi xii-gá chíñuhu ñaha-xi.

13 Te ní tecú dóho-í ní cáháⁿ
nchaandi túhú sá ní cadúha Yá
Ndióxi ndécú àndiu, ndihi nchaa sá
ndécú ñuyú, ndihi nchaa sá ndécú
xítí ñuhu, ndihi nchaa sá ñuhú xítí
ndute lámár, te xícachí-xi:

Yòhó Yaa núcõo núú xilé
váha, ndihi yòhó Yaa cáá
dàtná cáá ñⁿ mbéé quití
ní dánicuèhé-güedé táxí
tnùní-ndó, te nèhe-ndí sá
yíñuhu núú-ndó,

te ducaⁿ ío ndàcáⁿ táhú-ndí
núú-ndó, chí ío váha
quide-ndo te ío cùnuu-ndo,

te diu-ni duha cáháⁿ váha-ndí
cuèndá-ndó ñi caa ní quíñⁿ.

Duha càchí nchaa sá ní cadúha Yá
Ndióxi.

14 Te ndi cùmí cue quití xínutñí-áⁿ
càchí-güedi:

—¡Ducaⁿ na cunduul! —
cachí-güedi.

Te ndi òcó cùmí cue tée cùu
sacuéhé xíndecu-áⁿ ñí ngüñí
xítí-güedé chíñuhu-güedé Yaa
ndécú nchaa nduu nchaa quíú.

6

Cuèndá úsá tutú ñuhu seyú

1 Te sátá dúcáⁿ te ní xiní-í sá
Yaa cáá dàtná cáá ñⁿ mbéé quití
ní dánicuèhé-güedé-áⁿ ñí xócání-gã
ñⁿ tutú ñuhu ñuhu seyú ndéé sátá
tútú sá ní nadúcúⁿ nuu-áⁿ, te ní
tecú dóho-í ní cáháⁿ ñⁿ quití cùmí
xínutñí-áⁿ, te níhi ní cáháⁿ-di dàtná
cáháⁿ ñuhu, te càchí-di:

—¡Taquixi cundehe-n! —cachí-di.

2 Te òré-ni-áⁿ ñí xiní-í ñⁿ cuàyú
cuéxíⁿ yódó ñaha ñⁿ sá yódó ñaha
xii-di, te sá yódó ñaha xii-di-áⁿ
néhé-xí ñⁿ arcú sá cúú tnúxí-xi, te
ní nduu táhú-xi ñⁿ coróná, te ní
ndacu-xi ní cunuu-xi te ducaⁿ-ni ta
cùnuu-xi cuáháⁿ.

3 Te òré ní xócání-gã tutú ñuhu
cùu uú ñuhú seyú ndéé sátá tutú
sá ní nadúcúⁿ nuu-áⁿ, te ní tecú
dóho-í ní cáháⁿ tucu ingá quití cùu
uú xínutñí-áⁿ, te càchí-di:

—¡Taquixi cundehe-n! —cachí-di.

4 Te òré-ni-áⁿ ñí xiní tucu-í ñⁿ
cuàyú tícuèhé ní quee-di cuáháⁿ-di,
te yòdo ñaha ñⁿ sá yódó ñaha xii-di,
te sá yódó ñaha xii-di-áⁿ ní níhí-xi
tnúhu ndee íní sá dáticánuu-xi ñáyú
vá cùndecu ndihi tnaha váha-gá-yu,
te ngüita ñáyú cahni tnàhá-yu, te ní
nduu táhú-xi ñⁿ yuchí cáhnu vñhi.

5 Te òré ní xócání tucu Yaa-áⁿ ingá
tutú ñuhu cùu uní ñuhú seyú ndéé
sátá tutú sá ní nadúcúⁿ nuu-áⁿ, te
ní tecú dóho-í ní cáháⁿ quití cùu uní
xínutñí xíáⁿ, te càchí-di:

—¡Taquixi cundehe-n! —cachí-di.

Te òré-ni-áⁿ ñí xiní tucu-í ñⁿ
cuàyú tnúú te yòdo ñaha tucu ñⁿ sá
yódó ñaha xii-di, te sá yódó ñaha-áⁿ
núndaha-xi úú yaxiⁿ libré. 6 Te
ní tecú dóho-í ní cáháⁿ ñⁿ sá ñí
cáháⁿ tnuú cue quití xínutñí-áⁿ, te
càchí-xi:

—Ñⁿ cuàrtú-nã triú níhí-ndó sã
ñⁿ díhúⁿ denariú, te uní cuàrtú-nã
cebàdá níhí-ndó sã ñⁿ tucu díhúⁿ
denariú, dico acítí ndihi ndudí
ndéhé yoho yaha stilé chí vá ndíhí
ñihu —duha càchí sá cáháⁿ-áⁿ.

7 Te òré ní xócání tucu Yaa-áⁿ tutú
ñuhu cùu cumí ñuhú seyú ndéé sátá
tútú sá ní nadúcúⁿ nuu-áⁿ, te ní tecú
tucu dóho-í ní cáháⁿ tucu ingá quití
cùu cumí xínutñí-áⁿ, te càchí-di:

—¡Taquixi cundehe-n! —cachí-di.

8 Te òré-ni-áⁿ ñí xiní tucu-í ñⁿ
cuàyú yáhá, te yòdo ñaha tucu ñⁿ
sá yódó ñaha xii-di, te sá yódó
ñaha xii-di-áⁿ nání-xí Sã xihí, te xíáⁿ
sáhní-xí ñáyú, te sátá xíáⁿ nchícúⁿ
sá nèhé núú ndécú ñáyú ní xihí. Te
cùmí xichí cùu ñuyú, te sá sáhní
ñaha xii ñáyú-áⁿ ní níhí-xi tnúhu
ndee íní danà-xi ñáyú ñⁿ xichí
ñuyú, te davá-yu cahni ñaha-xi
ndihi yuchí, te cada-xi sá cóo tnámá
te cuú-yu, te cada tucu-xi sá cóo

cuèhé cahni-xi ñáyiú, te ñi-u-ni tucu-xi cada sá ncháá quiti dééⁿ cahni-di ñáyiú.

⁹ Te òré ní xócání tùcu Yaá-áⁿ tutú lìhli cùu uhúⁿ ñúhú sèyú ndéé sátá tütú sá ñí nadúcúⁿ nuu-áⁿ, te òré-áⁿ ñí xiní-í nútñí ñⁿ núú sácódó sá ndúú tǎhú Yá Ndiòxí, te ndàa caha xǎⁿ ní xiní-í xìndecu nchaa àlmá ñáyiú ní sahní-güedé núú ñuyíú sá cuendá tñuhu Yá Ndiòxí, ndihi sá cuendá sá ñí cáháⁿ váha-yu cuendá-gá. ¹⁰ Te nchaa àlmá-áⁿ ñíhi xícáháⁿ-xi, te xǎháⁿ-xi xìi Yá Ndiòxí:

—Yòhó Dütú Ndiòxí cúu-n Yàá ñá túú tñáhi cuèchi-xi, te ñá túú tñáhi quée cáva-n quide-n ñⁿ sá cǎháⁿ-n. ¿Te ná ndéé ama dandòho-n ñáyiú ndècu ñuyíú nachinaa-n cuendá sá ñí quide ñàhá-yu xii-ndí-i? —càchí cue àlmá-áⁿ xǎháⁿ-xi xìi-gá.

¹¹ Te sátá dúcáⁿ te nchaa cue àlmá ñáyiú-áⁿ ñí ñíhi-xi dóó cùixíⁿ ní quée cuíhnu-xi, te ní xítñuhu ñaha xii-xi sá ná ndètatú-xi te cundetú tnaa-xi ndéé ná xínu cava cuú ñáyiú nàcuáa ndéé tñuní dàtná ní xíhí cue ñáyiú dii àlmá-xi cùu-xi. Te ñáyiú sa ní xíhí-áⁿ ñⁿ-ni cúu-yu ndihi ñáyiú vitna cuú-áⁿ chi mee-ni chùuⁿ Xitohó Jesucristú quidè-yu, te ñi-u-ni ichi-gá ndécü-yu.

¹² Te òré ní xócání tùcu Yaá-áⁿ tutú lìhli cùu iñú ñúhú sèyú ndéé sátá tütú sá ñí nadúcúⁿ nuu-áⁿ, te ní xiní-í súuní ñíhi ní quidi-xi ñuyíú, te ní cutnuu ñíhí núú nchíanchii dàtná ñⁿ dóó tñúú, te ní cuu ticuèhé ñíhí ñíhí núú yóó. ¹³ Te ní xiní-í ní ngoyo chódíní ñuyíú-a dàtná ngóyó ngǔxí yíhí òré quéné tǎchí ñíhi. ¹⁴ Te ní xiní-í ní nadúcúⁿ nuu andíu dàtná nádúcúⁿ nuu ñⁿ tutú te ní ndóñúhú-xi, te nchaa tindúú ñí xica ndehe-xi núú ndécú-xí, te ducaⁿ ñí xica ndehe tucu nchaa tindúú yichí ndécú xiti ndute làmár.

¹⁵ Te nchaa cue téé yindaha ñáyiú ní nguíváha-güedé, ndihi nchaa dava-gá cue téé ío tàxi tñuní, ndihi nchaa ñáyiú cuica, ndihi nchaa cue téé tàxi tñuní sandádú, ndihi cue

sandádú cue téé ío váha sáa díquí-xi nàcuáa cada-güedé nàa-güedé, ndihi nchaa ñáyiú ñá túú tñáhi dàñá quee núú chíúⁿ patróón-xi, ndihi nchaa ñáyiú dàñá quée núú chíuⁿ patróón-xi. Te dava ñáyiú-áⁿ ñí nguíváha-yu xiti yaú, te davá-yu ní nguíváha-yu nchaa tñuú cava. ¹⁶ Te xǎháⁿ-yu nchaa tindúú ndihi nchaa cava:

—Chí tǎcùuⁿ chiváha ñaha-ndo xii-ndí cuendá sá vǎ quini ñáhá Yáá ío tàxi tñuní núcóo núú xilé váha, ndihi cuendá sá vǎ dándòho ñaha Yáá cáá dàtná cáá ñⁿ mbéé quiti ní dǎnicuèhé-güedé, chí Yáá-áⁿ ío cùdèéⁿ-gǎ núú-ndí —duha càchí nchaa ñáyiú-áⁿ xǎháⁿ-yu xii nchaa tindúú-áⁿ ndihi nchaa cava-áⁿ.

¹⁷ Te vitna ní sáa nduu ío cùu cahnu nduu tñúndòho tñuhu ndàhú, te vǎ yóo ñⁿ cundee ñí-xi yáha nchaa tñúndòho-a.

7

Ñáyiú israél ñáyiú naníhí tǎhú

¹ Te sátá xǎⁿ te ní xiní-í cúmí tñáhá espíritú xínú cuèchi núú Yá Ndiòxí xínutñí-xi ndí cúmí xio ñuyíú, te cue espíritú-áⁿ ní ngani-xi tǎchí cuendá sá vǎ cuícó-gǎ-xi ní làmár, te ní díquí yutnu, te ní ñⁿ xichi ñuyíú vǎ cuícó-gǎ-xi. ² Te cue espíritú-áⁿ ndécú ndihi-xi tñuhu ndee ñí danàa-xi sá ío làmár ndihi sá ío ñuhu yíhí, te ní xiní tucu-í ingá espíritú xínú cuèchi núú Yá Ndiòxí ní quee nchita-xi ndàa nacuáa quène nchíanchii, te nundaha-xi seyú Yá Ndiòxí Yáá ndécú nchàa nduu nchaa quíú, te ñíhi ní cáháⁿ-xi xǎháⁿ-xi xìi ndí cúmí cue espíritú-áⁿ:

³ —Vǎ dǎnàa-ndo sá ío làmár, te ní vǎ dǎnàa-ndo yutnu, te ní ñⁿ sá ío ñuyíú vǎ dǎnàa-ndo, chí cundetú-ndo ndéé ná tàxi ndecu-ndí ñⁿ sèñá tñee nchaa ñáyiú xínu cuèchi núú Tǎtá-ó Dütú Ndiòxí —duha càchí espíritú-áⁿ xǎháⁿ-xi xìi ndí

cumí espíritú xĩnutnĩ ndi cumí xichi ñuyú.

⁴ Te ní tecú dóho-í ní cáháⁿ ñⁿ sá nĩ cáháⁿ, te ní cachí-xi sá núú ndi úxúú xichi cue ñáyiú israél te ní xínu ñⁿ cièndú údico cumí mĩl-yu ní ngúndecu sèhá tneé-yu. ⁵ Te núú ñⁿ cièndú údico cumí mĩl ñáyiú-áⁿ, te ní xínu úxúú mĩl cue ñani tnáhá ndi Júdá ní ngúndecu sèhá tneé-yu, te úxúú mĩl cue ñani tnáhá ndi Rùbén, te úxúú mĩl cue ñani tnáhá ndi Gäd, ⁶ te úxúú mĩl cue ñani tnáhá ndi Àsér, te úxúú mĩl cue ñani tnáhá ndi Nefçalí, te úxúú mĩl cue ñani tnáhá ndi Manàsés, ⁷ te úxúú mĩl cue ñani tnáhá ndi Mió, te úxúú mĩl cue ñani tnáhá ndi Lèví, te úxúú mĩl cue ñani tnáhá ndi Isàcár, ⁸ te úxúú mĩl cue ñani tnáhá ndi Zabùlón, te úxúú mĩl cue ñani tnáhá ndi Chèé, te úxúú mĩl cue ñani tnáhá ndi Benjamín, nchaandi túhú ñáyiú-áⁿ nĩ ngúndecu sèhá tneé-yu.

Cuèhé víhí ñáyiú ñihnu dóó cuixíⁿ

⁹ Te sátá xĩaⁿ te ní xini-í cuèhé víhí ñáyiú, ñáyiú ñⁿ ñⁿ nacióⁿ, ndihi ñáyiú ñⁿ ñⁿ ñuu, ndihi ñáyiú cáháⁿ ndi díⁿ ndi díⁿ núú tnũhu, ndihi ñáyiú ní xĩndecu ñⁿ ñⁿ xichi, te nchaa ñáyiú-áⁿ xĩnutnĩ-yu ndaa núú Yáa táxí tnùní núcõo núú xilé váha, ndihi núú Yáa cáá dàtná cáá ñⁿ mbéé quiti ní dánicuèhé-güedé, te vá yõ ñⁿ ndacu cahu ñaha xi-yu chi cuèhé víhí-yu, te nchaá-yu xĩxĩhnu-yu mee-ni dóó cuixíⁿ, te nũndahá-yu nchaá-yu ñⁿ caa ndaha yutnu ñúú. ¹⁰ Te nchaá-yu níhi xicáháⁿ-yu, te cächí-yu:

Yáa táxí tnùní núcõo núú xilé váha cùu-gá Ndiõxí-ó,
te diu-gá ndihi Yáa cáá dàtná cáá ñⁿ mbéé quiti ní dánicuèhé-güedé ní dácacu ñihnu ñaha-gá xii-o núú ùhú núú ndàhú.

Duha cächí nchaa ñáyiú-áⁿ. ¹¹ Te nchaa espíritú xínu cuèchi núú Yá Ndiõxí ní nadúcúⁿndèé-xi xĩnutnĩ-xi ní càndéé núú núcõo

Yáa núcõo núú xilé váha, ndihi núú xĩnucõo cue téé cùu sacuéhé, ndihi cue ndi cumí quiti xĩnutnĩ-áⁿ, te nchaa-xi ní ngüñí xiti-xi te ní ngúnu ndeyi-xi núú Yáa núcõo núú xilé váha-áⁿ, te nchaa-xi ní ngüíta-xi chiñuhu ñaha-xi xii-gá, ¹² te cächí-xi: Na cáháⁿ ndáá-ndí núú yòhó Tátá-ndí Dútú Ndiõxí sá ío càhnu cuu-n, te ndacu-n quide-n nchaa sá váha cùní-n, te ío váha quide-n, te ndècu ndihi-n nchaa sá xini tnùní-n,

te chiñuhu ñaha-ndí xii-n, te ducaⁿ ndácáⁿ táhú-ndí núú-n cuèndá nchaa sá quidé-n, te nèhe-ndí sá yĩñuhu núú-n, te tnúhu cáháⁿ-ndí-a cùu-xi tnúhu ndáá, te diu-ni duha cáháⁿ-ndí ndéé núú cuaháⁿ núú véxi.

Duha cächí nchaa cue espíritú-áⁿ xáhaⁿ-xi xii Yáa núcõo núú xilé váha-áⁿ.

¹³ Te ñⁿ cue téé cùu sacuéhé xĩndecu-áⁿ ní xicáⁿ tnúhú-dé núú-í, te cächí-dé:

—¿Yóndi cùu ñáyiú dàcáⁿ xĩxĩhnu dóó cuixíⁿ-áⁿ, te ndèé véxi-yu núú dàcáⁿ xĩndáá-yu-i? —cächí-dé.

¹⁴ Te yúhú ní xáhaⁿ-í:

—Tátá, ñá túú xini-í, dico mee-n xini-n —duha ní xáhaⁿ-í xii-dé.

Te dàtnùní ní cachí tnúhú-dé xii-í ná cúú ñáyiú-áⁿ, te cächí-dé:

—Nchaa ñáyiú-a cùu-yu ñáyiú ní quee núú ío víhí tnúhu ndòho tnúhu ndàhú sá vá cùndéé iní-ó te véxi-yu iha, te cùu-yu ñáyiú sa ní nduu ndoo ní nduu nine iní-xi cuèndá sá ní sati níñí Yáa cáá dàtná cáá ñⁿ mbéé quiti ní dánicuèhé-güedé, cuèndá xiáⁿ vitna ní ndihí-yu ní nduu cuixíⁿ dóó xĩxĩhnu-yu. ¹⁵ Te núú xiáⁿ vitna ní nduu táhũ-yu ndècú-yu núú ndécú Yá Ndiõxí Yáa táxí tnùní núcõo núú xilé váha, te cuèi nduu cuèi niú xínu cuèchí-yu núú-gá vitna, te diu-gá xító ñaha-gá xií-yu. ¹⁶ Te vitna ní sáa-yu núú-gá cundecú-yu te vá ndóhó-gá-yu

docó, te ni vǎ quíní-gá-yu ndohó-yu yíchí-yu ndute, te ni vǎ quíní-gá-yu ndohó-yu cahni nchíanchii, te ñá túú-gǎ ná cahni ndohó-yu. ¹⁷ Te ducaⁿ chi Yaá cáá dàtná cáá ìⁿ mbéé quiiti ní dánicùèhé-güedé ndécú-gǎ núú nútnǎi xilé váha núcóo Yá Ndióxi Yaá táxi tnùní, Yaá-áⁿ coto ñaha-gǎ xii-yu dàtná quidé ìⁿ toli oré xító-dě mbéé-dě, te candeca ñaha-gǎ xii-yu quíhíⁿ núú tǎo ndute, te ndute-áⁿ cúú-xí ndute candeca iní-yu, te Yá Ndióxi cada-gǎ sǎ vǎ quíní-gá-yu tnúhu ndàhyú —duha ní cachí tnúhu tée cùu sacuéhé-ǎⁿ xii-í.

8

Cuendá tíciúú sǎ ní cuáha mee-ni dǎhúⁿ cuááⁿ

¹ Te sǎtá dúcáⁿ te Yaá cáá dàtná cáá ìⁿ mbéé quiiti ní dánicùèhé-güedé ní xócání-gǎ tutú líhli cùu usá ñúhú sèyú ndéé sǎtá tütú sǎ ní nadúcúⁿnuu-áⁿ, te òré-áⁿ ní cunahi sùúni návii-nǎ ní cuu andiu dàtná cuádava òré. ² Te ní xini-í usá tnàhá espíritú xínú cuèchi núú Yá Ndióxi xǐnutnǎi-xi núú núcóo-gǎ, te ní níhi-xi ìⁿ caa cütú xǐnehe-xi. ³ Te dàtnùní ní xini tucu-í ingá espíritú xínú cuèchi núú-gǎ ní quexio-xi nehe-xi ìⁿ tíciúú ní cuáha mee-ni dǎhúⁿ cuááⁿ te ñuhu vai dúsa sǎ sàháⁿ tnámí, te ní ngúnutnǎi espíritú-áⁿ núú ndécú sǎ ní cuáha mee-ni dǎhúⁿ cuááⁿ núú sácódó sǎ ndúú tǎhú Yá Ndióxi, te xǐǎⁿ nútnǎi-xi ndàa núú-gǎ, te dúsa sǎ sàháⁿ tnámí-áⁿ cahmi espíritú-áⁿ núú sácódó sǎ ndúú tǎhú-gǎ-áⁿ cuendá ñúhmá dǎsa-áⁿ cundihi-xi nchaa tnúhu càháⁿ ñáyiú càháⁿ ndihi ñaha xì-gǎ, nchaa ñáyiú cùu cuendá-gǎ. ⁴ Te nùndaha espíritú-áⁿ tíciúú ñúhú dǎsa sǎ sàháⁿ tnámí càyú, te quène ñúhmá nútnǎi-xi núú Yá Ndióxi, te ñúhmá-ǎⁿ cundihi-xi nchaa tnúhu càháⁿ ñáyiú càháⁿ ndihi ñaha xì-gǎ, nchaa ñáyiú cùu cuendá-gǎ. ⁵ Te ní queheⁿ

espíritú-áⁿ tíciúú te ní dáchitú-xi ñuhú yódó núú sácódó sǎ ndúú tǎhú Yá Ndióxi, te ní xítenuu-xi ñuyúú, te òré ducaⁿ ní quide-xi te ní cáháⁿ víhí ñúhu, te ío dusaⁿ ní quide-xi ñuyúú, te ní sáá nduté, te níhi víhi ní tnáa.

Ndi úsá espíritú ní tiú-xi ìⁿ caa cütú xǐnehe-xi

⁶ Te ndi úsá cue espíritú xǐnehe ìⁿ caa cütú-ǎⁿ ní ngúndecu túha-xi cuendá tiú-xi.

⁷ Te espíritú díhna nuu ní tiú-xi cütú néhé-xí, te ñuyúú-a ní ngoyo ñíñí dácánuu-xi ndihi ñuhú ndihi níñí, te luha-ná te cuu dava ñuyúú ní cáyú, te luha-ná te cuu dava tucu nchaa yutnu ío ñuyúú ní cáyú, te luha-ná te cuu dava tucu nchaa cùhú ío ñuyúú ní cáyú.

⁸ Te espíritú cúú úú ní tiú-xi cütú néhé-xí, te dàtná cáá ìⁿ tǐndúú cáá ìⁿ sǎ ní ngava xití lámár te nchicúⁿ ñuhú, te luha-ná te cuu dava ndute lámár-áⁿ ní nduu-xi náñí. ⁹ Te luha-ná te cuu dava nchaa quiiti xǐxúhuⁿ xití lámár-áⁿ ní xíhí-güedi, te luha-ná te cuu dava nchaa bàrcú ní quée naa-xi xití ndute.

¹⁰ Te espíritú cúú ùní ní tiú-xi cütú néhé-xí, te ní ngava ìⁿ chódíní cáhnú ndéé andiu ñuyúú te nchicúⁿ ñuhú-di, te ñuhú-áⁿ cáá dàtná cáá ñúhú iti. Te luha-ná te cuu dava nchaa yúte ní ngava chódíní-áⁿ, te luha-ná te cuu dava tucu nchaa núú quènihni ndute ní ngava-di.

¹¹ Te chódíní-áⁿ nání-di: Yúcu Úá. Te ndute xica nchaa yúte-áⁿ ndihi nchaa ndute quènihni-áⁿ ní cuu úá-xi dàtná yúcu úá, te ío cuéhé ñáyiú ní xíhí sǎ dúcáⁿ ní cuu úá ndute-áⁿ.

¹² Te espíritú cúú cùmí ní dácàháⁿ-xi cütú néhé-xí, te luha-ná te cuu dava nchíanchii ñá túú ní dàyehé-xi, te ducaⁿ lùha-ná tucu cuu dava yóo ñà túú ní dàyehé-di, te ducaⁿ lùha-ná te cuu dava tucu nchaa chódíní ñà túú ní dàyehé-güedi, te luha-ná te

cuu dava nduu ñà túú ní dàyehé nchíanchii, te ducaⁿ lùha-ná te cuu dava niú ñá túú ní dàyehé yóó ndihi nchaa chódíní.

¹³ Te sáta dúcáⁿ te ní xiní-í xícó ìⁿ espíritú xínú cuèchi núú Yá Ndióxi núú tàchí, te ní tecú dóho-í níhi càháⁿ-xi, te càchí-xi:

—Ío ndàhú ndoho nchaa ñáyiú xĩndecu ñuyíú òré ná dàcàháⁿ úní-gá cue espíritú cùmání cútú xĩnehe-xi, chi sa xĩndecu túha-ná-xi sá dácàháⁿ-xi! — duha càchí espíritú-áⁿ.

9

¹ Te espíritú cúú ùhúⁿ ní tiú-xi cútú néhé-xí, te òré-án ní xiní-í ní quee ìⁿ espíritú andiu te càa-xi datná cáá ìⁿ chódíní, te ní ngava-xi ñuyíú, te ní níhí-xi ìⁿ ndacaá néhé-xí cuendá nacaáⁿ-xi yuyèhe yaú cùnú víhí. ² Te ní nacaáⁿ-xi yaú-áⁿ te ní ngüíta-xi ní quene ñúhmá datná quéné ñúhmá ìⁿ xítnú cáhnú vihi, te ní quene táchí ní xítenuu-xi ñúhmá-áⁿ te ní sadí-xi núú nchíanchii, te ní cunee ñuyíú.

³ Te xití ñúhmá-áⁿ ní quene tíca làngóstá, te ní xítenuu-di ñuyíú, te dééⁿ-güedi datná dééⁿ nchacua. ⁴ Te ní ngúndecu ndihi-güedi tnúhu ndee ìní cuendá sá dándòho-güedi mee-ni ñáyiú ñá túú ndéé seña Yá Ndióxi tneé-xi, te ñá túú ná cada-di nchaa yutnu ndihi nchaa cúhú. ⁵ Te ñá túú tnúhu ndee ìní ndécú ndihi-güedi sá cáhní-güedi ñáyiú, chi mee-ni sá dándòho ñaha-güedi xii-yu úhúⁿ yóó. Te òré ní ngüíta-güedi dándòho ñaha-güedi xii-yu te tàhú tnúhú núú dáquée-güedi iñu-güedi datná quidé-xí núú dáquée nchacua iñu-güedi. ⁶ Te ñáyiú-án xicáⁿ táhú-yu sá ndíhi cuú-yu cuendá sá ïo ndòhó-yu dàquée ñaha nchàa quití-án iñu-di xii-yu te ñá cuíní-xi cuú-yu, te ìⁿ nduu ìⁿ nduu sàni ìní-yu cuú-yu te ñá túú cuíní-xi cuú-yu chi ñá túú tnúhu xihí sá cúú-xí-yu.

⁷ Te nchaa tíca làngóstá-án xĩndáa-güedi datná ndáa nchaa cuáyú cue tée cuáháⁿ nàá, te díquí-güedi ñùhu ìⁿ sá cáá datná cáá còroná ní cuáha mee-ni díhúⁿ cuááⁿ, te núú-güedi càa datná cáá núú cuè tée. ⁸ Te idi díquí-güedi càa datná cáá ìdi díquí ñáyiú dìhí, te núhu-güedi càa datná cáá núhu ndicaha. ⁹ Te yidúcuⁿnuu-güedi ìⁿ sá cáá datná cáá càá, te ndíxiⁿ-güedi quide-xi datná quidé-xí núú vèxi cuéhé víhí càrretá sá táñùhu cuayú cuáháⁿ-güedé ndihi-güedi núú nàa-güedé. ¹⁰ Te ndéé iñu núú lùhmá-güedi datná ndéé iñu núú lùhmá nchacua, te iñu núú lùhmá-güedi-án dáquée-güedi ñáyiú dándòho ñaha-güedi xii-yu, te ducaⁿ-ni càda-güedi dándòho ñaha-güedi xii-yu ndéé xínu úhúⁿ yóó.

¹¹ Te nchaa tíca làngóstá-án táxi tnùní ñáhá espíritú sá táxi tnùní yaú cùnú víhí, te espíritú-án nání-xí Àbadón tnúhu hèbreú, te tnúhu griégú nání-xí Àpolión, te ndi ndúú tnúhu-án quée-xí: Sá dánàa ñáyiú.

¹² Te tnúndòho-a cuu-xi tnúndòho díhna nuu, te vitna cùmání úú-gá.

¹³ Te espíritú cúú iñu ní tiú-xi cútú néhé-xí. Te núú Yá Ndióxi nútñi ìⁿ sá ní cuáha mee-ni díhúⁿ cuááⁿ núú sácòdó sá ndúú táhú-gá, te ndi cùmí xíquí-xi xĩndecu ìⁿ caa ndíqui, te ní tecú dóho-í ní cáháⁿ ìⁿ sá ní cáháⁿ nihnu ndi cùmí ndíqui-áⁿ. ¹⁴ Te sá cáháⁿ nihnu ndíqui-án xáhaⁿ-xi xii espíritú cúú iñu sá ní tiú cútú-áⁿ:

—Cuáháⁿ nandaxi-n ndi cùmí espíritú ndútú ndècu yúte càhnu nani Eúfratés —càchí sá càháⁿ-án xáhaⁿ-xi xii espíritú-áⁿ.

¹⁵ Te sáta dúcáⁿ te ní nandáxi ndi cùmí cue espíritú-áⁿ cuendá cahni-xi cuéhé víhí ñáyiú, te sa yatni datná cuádava ñáyiú xĩndecu ñuyíú cahni-xi, te ducaⁿ chi sa ndècu túha tnàhí cue espíritú-án ndétú-xí sàà òré, àdi nduu, àdi yóó, àdi

cuía ducaⁿ càda-xi cahni-xi ñáyiu.
 16 Te ní xiní-í nchaa cue sandádú cúndíhi-xi xixódó-güedé cuàyú, te ní ñíhi-í tnúhu sá xínu úú cièndú millón-güedé.

17 Te duha xíndáa cue cuàyú-áⁿ ndíhi cue téé yòdo ñaha-áⁿ ní xiní-í: Te cue téé-áⁿ yídúcúⁿ nuu ñⁿ sá yídúcúⁿnuu pèchú-güedé, te luha ticuèhé te luha cuíi datná cuíi andíu, te luha cuááⁿ, te nchaa cuàyú-áⁿ cáá díquí-güedi datná cáá díquí ndicaha, te yuhu-güedi quène ñuhú ndíhi ñúhmá, ndíhi àzufré nchícúⁿ ñuhú. 18 Te ío cuèhé ñáyiu ñuyúú ní xíhí chi luha-ná te cud-avá-yu ní xíhí sá cuèndá ñuhú-áⁿ ndíhi ñúhmá-áⁿ ndíhi àzufré-áⁿ. 19 Te ndíhi núú lúhmá-güedi ndíhi yuhu-güedi dándoho-güedi ñáyiu, te núú lúhmá-güedi nèhe-xi díquí còó, te díu-ni datná cáá còó cáá ñíhi lúhmá-güedi.

20 Te nchaa dava-gá ñáyiu ní cácu ñá túú ní xíhí núú ncháa tnúndóho-áⁿ ñá túú ní cuíni-yu dañá-yu ichi cuèhé ichi duha ndécü-yu, chi quide cahnu-ni-yu nchaa espíritú cúndíhi yucu ñáváha, ndíhi nchaa sá càchí-yu cùu ndióxí ní cadúha cue téé ñuyúú-a, te dava xíáⁿ ní cuáha mee-ni díhúⁿ cuááⁿ, te dava ní cuáha mee-ni díhúⁿ cuixíⁿ, te dava ní cuáha sá nání bròncé, te dava ní cuáha mee-ni yúu, te dava ní cuáha mee-ni yùtnu, te nchaa xíáⁿ ñá túú cùnuni núú-xi, te ní ñá túú tècú dóho-xi, te ní ñá ndácú-xí càca-xi. 21 Te ní sá sáhní tnàhá-yu, te ní sá sáhní ndùu tnahá-yu, te ní sá ndécü-yu ichi díí ñí, te ní sá dúhú ndàchiuⁿ tnahá-yu ñá túú ní cuíni-yu dañá-yu.

10

Íⁿ espíritú xínú cuèchi núú Yá Ndióxí néhé-xí ñⁿ libré

¹ Te sáta dúcáⁿ te ní xiní tucu-í ñⁿ espíritú cùnùu xinu cuechi núú Yá Ndióxí ní quee-xi andíu, te

yíhi-xi xítí vícò cuànguee-xi ñuyúú te ndàa díquí-xi ndécü ñⁿ còó yáhnchí, te núú-xi súúni chàhnchí datná chàhnchí núú nchicanhíi, te ndí ndùú díhiⁿ-xi càa datná cáá itá ñuhú. ² Te nùndaha-xi ñⁿ libré líhli ní nandicá, te sáhá cùha-xi ní sani-xi núú ndute lámár, te sáhá datni-xi ní sani-xi núú ñuhu yìchí. ³ Te espíritú-áⁿ ñíhi víhi ní cáháⁿ-xi, te ní quide-xi datná quidé ñⁿ ndicaha oré cánásaa-dí, te òré ducaⁿ ñíhi víhi ní cáháⁿ-xi te úsá xito ní cáháⁿ ñuhú. ⁴ Te sáta ní yáha ní cáháⁿ ñuhú-áⁿ úsá xito, te chido tnùn-í ñⁿ núú tütú nàcuáa ní cáháⁿ-xi ní cùu, te meí òré-áⁿ ní tecú dóho-í ní cáháⁿ ñⁿ sá ní cáháⁿ andíu te càchí-xi:

—Vá chídó tnùn-í nàcuáa ní cáháⁿ ñuhú-áⁿ, iní meé-ni-n ná cùhuⁿ —duha càchí sá ní cáháⁿ-áⁿ.

⁵ Te espíritú sá nútní ñⁿ xio sáhá-xi núú ndute lámár-áⁿ ndíhi ingá xio sáhá-xi núú ñuhu yìchí-áⁿ ní xiní-í ní ndonehe-xi ndaha cùha-xi, ⁶ te càchí-xi:

—Yá Ndióxí Yáá ndécü ncháa nduu nchaa quíú Yáá ní cadúha ñuyúú, ndíhi andíu, ndíhi lámár, ndíhi nchaa sá íó, Yáá-áⁿ nánhá ndáá-gá sá yùhú càháⁿ ndáá-í, te vá cùyaa víhi ⁷ te cada-xi nchaa nàcuáa ndùu tnúhu ndùu yuhu ní cáháⁿ-gá, tnúhu ní xáhaⁿ-gá xii cue téé ní xinu cuechi núú-gá, cue téé ní xóo cáháⁿ tnúhu-gá ndéé sanaha, chi òré ná tíú espíritú cúú úsá cútú néhé-xí, te òré-áⁿ cada-xi nchaa nàcuáa ndùu tnúhu ndùu yuhu sá ní xáhaⁿ-gá xii nchaa cue téé-áⁿ —duha càchí espíritú-áⁿ.

⁸ Te sáta dúcáⁿ te ní tecú tucu dóho-í ní cáháⁿ tucu sá ní cáháⁿ andíu-áⁿ, te càchí-xi xii-í:

—Cuáhán te queheⁿ-n libré líhli sá ní nandicá nùndàha espíritú-áⁿ, espíritú sá nútní ñⁿ xio sáhá-xi núú ndute lámár, te ñⁿ xio sáhá-xi núú ñuhu yìchí —duha càchí sá ní cáháⁿ-áⁿ.

⁹ Te yùhú ní sáháⁿ-í núú ndécü espíritú-áⁿ xicáⁿ-í libré líhli nèhe-xi-áⁿ, te ní cachí-xi:

—Iha te caxi-n, te cuvídí yuhu-n dàtná cúvídí òré xíhí-n ndùdí ñùñú, dico xití-n chi cada úa-xi —càchí-xi.

¹⁰ Te ní quehe-í librú líhli nùndaha espíritú-án ñí xexi-í, te yuhu-í ní quide vídí-xi dàtná vídí ndudí ñùñú, dico sátá ñí ngava-xi xití-í te ní quide úa-xi. ¹¹ Te ní cachí tucu espíritú-án xii-í:

—Dacuití cǎháⁿ tucu-n nàcuáa cǎchí Yǎ Ndiǒxí cuèndá ñáyiu titní víhí nàcióⁿ, ndihí cuèndá ñáyiu titní víhí ñùú, ndihí cuèndá ñáyiu cǎháⁿ ndí dííⁿ ndí dííⁿ núú tñuhu, ndihí cuèndá cue téé yìndaha ñáyiu.

11

Cuèndá úú cue téé cǎháⁿ nàcuáa cǎchí Yǎ Ndiǒxí

¹ Te ní níhí-í ìíⁿ tnuyoo nàcuáa chicùhá-í ìíⁿ sá chicùhá-í, te ní cǎháⁿ ìíⁿ sá ñí cǎháⁿ, te cǎchí-xi:

—Ndacuñí te chicùhá-n vèhe Yǎ Ndiǒxí, te chicùhá tucu-n núú sácódó sá ndúú tǎhú-gǎ, te cahu-n ná daha tñàhá ñáyiu chiñuhu ñaha xii-gǎ xìndecu. ² Dico vá chicùhá-n ndáa quehé vehe-gǎ, chi xíaⁿ ñí nduu cuèndá cue ñáyiu ñá túú cùu ñáyiu isràél, te ñáyiu-án nduu nuu-nǎ-yu núú ñí cuu ñuú-gǎ, te cadá-yu dàtná cǎchí iní méé-yu, te údico úú yóo ducaⁿ cadá-yu. ³ Te yúhú tendaha-í úú tñàhá cue téé cǎháⁿ yuhu-í nàcuáa cǎchí Yǎ Ndiǒxí, te úxúú cièndú únidico nduu ducaⁿ cǎháⁿ-güedé yuhu-í cada-güedé núu-í, te cuihnu-güedé dóó tñúú sǎ sácuihnu cue ñáyiu ndihú iní-xi —duha cǎchí sá cǎháⁿ-án.

⁴ Te ndí ndúú cue téé-án cúu-güedé dàtná úú yutnu òlívú sá xìnutñí núú Yǎ Ndiǒxí, ndihí dàtná úú sá ndéé dité-xi, sá yìndòdo ìíⁿ caa candíl núú dité-xi ndècu tucu núu-gǎ, te diu-gǎ cúu-gǎ Yáa yìndaha ñuyúú. ⁵ Te ñáyiu na càni iní-xi ná cada ñaha xii-güedé te yuhu-güedé quene ñuhú cahmi

ñaha-xi xii-yu, te ducaⁿ càda-güedé cahni-güedé nchaa ñáyiu na cùu úhú iní ñàhá xii-güedé. ⁶ Te ndí ndúú-güedé ndécú ndihí-güedé tñuhu ndee iní cada-güedé sá vǎ cúuⁿ dàú, te ducaⁿ càda-güedé ñini cǎháⁿ-güedé nàcuáa cǎchí Yǎ Ndiǒxí, te ndacu-güedé nadatau-güedé ndute nduu-xi níñí, te ndacu-güedé dandòho-güedé nchaa ñáyiu titní núú tñuhu ndòho, te ducaⁿ càda-güedé ná daha xito cǎchí iní méé-güedé. ⁷ Te ná yáha sá cǎháⁿ-güedé nàcuáa ní cachí Yǎ Ndiǒxí, te dàvá-án quene ìíⁿ quití dééⁿ yàú cùnú víhí sǎ ìo nèhé cáá, te quití-án ngüita-di nàa-di ndihí ndí ndúú cue téé-án te cahni ñaha-di xii-güedé. ⁸ Te yiqui cuñú cue téé-án cautuu-xi ìíⁿ tnuú ñuú cǎhnú núu ní sahní-güedé Xitohó Jesucristú núú cùrúxí, te diu Yáa-án cúu Xitohó-ó ndihí-güedé, te cǎchí ñáyiu sá ñuú-án cúu-xí dàtná ñuú Sòdomá ndihí nàcióⁿ Ègíptú. ⁹ Te úní nduu dava cautuu yiqui cuñú-güedé xíaⁿ, te ñáyiu nchaa nàcióⁿ, ndihí ñáyiu nchaa ñuú, ndihí ñáyiu cǎháⁿ ndí dííⁿ ndí dííⁿ núú tñuhu, ndihí ñáyiu xìndecu nchaa xichí quini-yu yiqui cuñú-güedé, te vá dàñá-yu nguíndüxi. ¹⁰ Te nchaa ñáyiu-án nduu vétú iní-yu sá dúcáⁿ cùu cue téé cǎháⁿ nàcuáa cǎchí Yǎ Ndiǒxí-án, te ìo cudíí iní-yu, te nándí sá cuǎha tǎhú tñàhá-yu sá cúdíí iní-yu sá dúcáⁿ ñí xíhí-güedé, te ducaⁿ chi diu-güedé ní quide ìo ní ndohó-yu. ¹¹ Te sátá ná yáha úní nduu dava sá dúcáⁿ cùu-güedé te Yǎ Ndiǒxí dandòto ñaha-gǎ xii-güedé, te ndacóo-güedé, te nchaa ñáyiu na quini sá ndótó-güedé te yùhú víhí-yu. ¹² Te ndí ndúú cue téé-án tecú dóho-güedé cǎháⁿ ìíⁿ sá cǎháⁿ ndéé andiu, te cúñaha-xi xii-güedé:

—Chí táquene iha —duha cúñaha sǎ cǎháⁿ-án xii-güedé.

Te cue téé-án quíhu-güedé ìíⁿ xití vícò caa-güedé andiu, te nchaa

ñáyiú cùu úhú iní ñáhá xii-güedé quini ñáhá-yu xii-güedé caa-güedé andiu. ¹³ Te òré-án níhi víhi tnáa ñuyúú, te úxí xichi cùu-xi ñuú núú cündecu-güedé-án te ìⁿ xichi ñuú-án naa, te cuú úsá mĩ ñáyiú, te nchaa dava-gá ñáyiú cácu vá cuú yuhú víhi-yu, te cachí-yu sá ío càhnu cuu Yá Ndióxi Yáá ndécú àndiu.

¹⁴ Te tnúndòho-a cuu-xi tnúndòho cuu úú yáha, te vitna sa ndetu vii-ná tucu sáá tnúndòho cuu uní.

Espiritú cúú úsá tíú-xi cútú néhé-xí

¹⁵ Te espíritu cúú úsá ní tíú-xi cútú néhé-xí, te òré-án ní tecú níhi ní cáháⁿ titní sá ní cáháⁿ andiu, te cächí-xi:

Nchaa sá cúú cuendá nchaa ñáyiú ñuyúú táxi tnùnì-yu ni cùu ní nduu cuendá Tátá-ó Dütú Ndióxi táxi tnùnì-gá,

Te tnàhá Yáá ní tendaha-gá ní sáháⁿ ñuyúú táxi tnùnì-gá nchaa xíáⁿ,

te ñiu-gá taxi tnùnì-gá ni caa ni quíhíⁿ.

Duha ní cáháⁿ nchaa sá ní cáháⁿ-án. ¹⁶ Te ndi ócò cùmí cue téé sacuéhé xñucóo núú xilé váha ní ngúñí xítí-güedé núú Yá Ndióxi, te ní nuu núú-güedé ndàa núú ñúhú te ní ngúíta-güedé chíñùhu ñaha-güedé xii-gá, ¹⁷ te cächí-güedé:

Ío ndácáⁿ táhú-ndí núú yòhó Dütú Ndióxi,

Yáá ndácú quide nchaandi túhú sá váha,

te ñiu-ni-n ndècu-n ndéé cùtnàhá ní ngáva ñuyúú, te ñiu-ni-n ndècu-n vitna, te ñiu-ni-n cùndecu-n ndéé núú cuaháⁿ núú vèxi,

te ío càhnu cuu-n te ní ngúíta-n ío-gá táxi tnùnì-n.

¹⁸ Te nchaa ñáyiú xñdecu ñuyúú xícudéⁿ-yu núú-n,

te vitna ní sáá nduu dàndohó-n-yu chí ñá túú cùu váha iní-n núú-yu,

te cada ndáá-n cuèchi nchaa ñáyiú sa ní xíhí,

te ní sáá tucu nduu cuñaha-n sá ndúú táhu nchaa ñáyiú ní xinu cuechi núú-n ní cáháⁿ-yu tnúhu-n, ndihí nchaa dava-gá ñáyiú cùu cuendá-n, chí ñáyiú-án néhè-yu sá yíñùhu núú-n,

te cuèi ñáyiú cùnuu ndihí ñáyiú ñá túú cùnuu cuñaha-n sá ndúú táhú-yu,

te ní sáá tucu nduu dànaa-n nchaa ñáyiú sàhni tnaha ñáyiú-xi.

Duha cächí ndi ócò cùmí cue téé sacuéhé-áⁿ xáhaⁿ-güedé xii Yá Ndióxi.

¹⁹ Te ní xiní-í ní nacaáⁿ yuyèhe vehe Yá Ndióxi andiu, te xítí vehe-gá-án ní xiní-í ndécú cájá ñúhú sá yódó tnùnì nàcuáa ní cundáa cada-gá sá cúú-xí ñáyiú, te òré-án ní xiní-í ní sáá nduté, te ní cáháⁿ ñúhu te ío dusaⁿ ní quide-xi, te níhi víhi ní tnáa, te súúni càhnu dáú ñíñí ní cuuⁿ.

12

Cuendá ìⁿ ñadìhí ndihí cuendá ìⁿ quiti déeⁿ nání dragón

¹ Te ío víhi ní quide-xi ìⁿ sá ní quide-xi andiu, te ní xiní-í ìⁿ ñadìhí te dóo níhnu-án quide-xi datná quidé-xí núú nchìcanchii, te ndàa núú sàhá-aⁿ quide-xi datná quidé-xí núú yòó, te ñúhu ìⁿ coroná díquí-aⁿ te ndéé úxúú chódíní. ² Te ñúhu déhe-aⁿ te càna saa-aⁿ sá quidé úhú ñáhá-xí xii-aⁿ chí sa ndetu vii-ná cacu déhe-aⁿ. ³ Te dátñuní ní quide tucu-xi sá ní quide-xi andiu, te ní xiní-í ìⁿ quiti càhnu quiti ticuehé, quiti déeⁿ nání dragón, te ndéé úsá díquí-di ndihí úxí ndiqui-di, te ìⁿ caa coroná ñúhú ìⁿ caa díquí-di-án.

⁴ Te quiti-án luha-ná te cuu dava nchaa chódíní dāngòyo-di ñuyúú ndihí lúhmá-di, te quiti-án ní ngunu tní-di núú ñaha ndetu vii-ná cacu déhe-xi-án cuendá caxi-di déhe-aⁿ òré cacu ni cùu. ⁵ Te ñaha-án ní cacu déhe-aⁿ te téé cùu-dé, te té líhli-án ío cunuu-dé taxi tnùnì-dé nchaa ñáyiú ñuyúú, te mee Yá Ndióxi

ní nacuaca ñaha-gã xii té lĩhli-áⁿ cuendá cundecu ndihĩ ñaha-dẽ xii-gã núú ndécú-gã táxi tnuni-gã.

⁶ Te ñadihĩ-áⁿ nĩ xinu-aⁿ cuáháⁿ-aⁿ xitĩ yucu núú nĩ quide túha Yá Ndiõxĩ cundecu-aⁿ cuendá xiáⁿ nihĩ-aⁿ caxi-aⁿ, te ducaⁿ nihĩ-aⁿ sá cáxi-áⁿ ùxúú ciendú únidico nduu chi ducaⁿ nduu cundecu-aⁿ xiáⁿ.

⁷ Te sátá dúcáⁿ te andiu nĩ xinĩ-í espíritú cúnúu xinu cuechi núú Yá Ndiõxĩ nání Miguél, ndihĩ nchaa dava-gã espíritú cundihĩ-xi, te nchaa espíritú-áⁿ nàá-xi ndihĩ quitĩ dééⁿ nání dragón ndihĩ nchaa espíritú cundihĩ-di. ⁸ Te quitĩ-áⁿ ñã túú ní ndácu-di ndihĩ nchaa espíritú cundihĩ-di, te ñã túú ní nihĩ-gã-di núú cundècu-di andiu ndihĩ nchaa espíritú cundihĩ-di-áⁿ. ⁹ Te cue espíritú xínú cuèchi núú Yá Ndiõxĩ-áⁿ nĩ dǎngává-xĩ quitĩ dééⁿ nání dragón-áⁿ ndihĩ nchaa espíritú cundihĩ-di ñuyúú, te quitĩ-áⁿ cúú-dĩ mèi sácúíhná àdi sá càchĩ-ó cùu yucu ñávãha, te diu xiáⁿ ní dándàhú-xi ñáyiu nihĩ ñuyúú, te diu-ni xiáⁿ ní nduu-xi cóo nĩ dándàhú-xi ñáyiu ndéé sanaha.

¹⁰ Te ní təcú dóho-í nihĩ ní cáháⁿ tucu ìⁿ sá nĩ cáháⁿ andiu, te càchĩ-xi:

—Vitna te Yá Ndiõxĩ ní quide-gã ní ngúndecu ñáyiu ndihĩ-gã, te ío càhnu cuu-gã, te ío tàxi tnuni-gã, te tnàhá Crìstú Yaá ní tendaha Yá Ndiõxĩ ní quixi ñuyúú-a ío tàxi tnuni-gã, te ducaⁿ chi sa ní xócúíhnĩ sácúíhná sã sùúú nùnúu sacáⁿ cuèchi núú Tǎtá-ó Dütú Ndiõxĩ cuendá nchaa ñáyiu ndècu ndihĩ-o ichi-gã, te nduu niú ducaⁿ sacáⁿ cuèchi-xi núú-gã cuendá-yu ni cùu. ¹¹ Dico ní ndacú-yu ní cunúú-yu núú sácúíhná sã dúcáⁿ sacáⁿ cuèchi cuendá-yu-áⁿ ní cùu, te ducaⁿ nĩ cunúú-yu sá cuendá Yaá cáá dàtná cáá ìⁿ mbéé quitĩ ní dǎncuèhé-güedé, chi Yaá-áⁿ nĩ sati níñĩ-gã te ní xihĩ-gã sá cuendá-yu, te ducaⁿ nĩ cunuu tucú-yu sá cuendá

sá sàndáá iní ñáhã-yu xii Yaá-áⁿ, te ñã túú ní yuhú-yu cuú-yu sá cuendá-gã. ¹² Te vitna ío chí cúdĩ iní nchaa nchòhó espíritú xínú cuèchi núú Yá Ndiõxĩ, ndihĩ nchaa nchòhó ñáyiu ndècu andiu, dico ìndàhú ní cuu nchaa ñáyiu xĩndecu nihĩ ñuyúú! Chi sùúú cùdèéⁿ sácúíhná nĩ ngava-xi te nándi cada ñaha-xi xii-yu, te ducaⁿ chi cùnuni iní-xi sá sácú duha-ná nduu cudĩ-xi cundecu-xi —duha càchĩ sá nĩ cáháⁿ andiu.

¹³ Te sátá nĩ quee quitĩ dééⁿ nání dragón-áⁿ andiu nĩ ngava-di ñuyúú quitĩ cùu mei sácúíhná-áⁿ, te quitĩ-áⁿ nĩ chinchícú-di ñadihĩ ñaha ní çacu déhe téé-xi-áⁿ. ¹⁴ Te ñadihĩ-áⁿ ní nduu táhú-aⁿ ní quene úú ndíxi-aⁿ, te càa datná cáá ndíxiⁿ ìⁿ yacòlo cahnu vihi cuendá ndava-aⁿ nùhú-aⁿ yucu núú ní cachĩ Yá Ndiõxĩ cundecu-aⁿ, te yàcáⁿ cundecu-aⁿ únĩ cuíá dava cuendá sá vã nihĩ ñáhã quitĩ dééⁿ quitĩ nàni dragón-áⁿ te xiáⁿ nihĩ-aⁿ sá cáxi-áⁿ, te quitĩ-áⁿ cúú tucu-di datná ìⁿ cóo dééⁿ. ¹⁵ Te quitĩ-áⁿ nĩ quene cuéhé ndute yuhu-di, te ndute ní quene yuhu-di-áⁿ nĩ cuu-xi ìⁿ yúte, te ducaⁿ nĩ quide-di cuendá ndute-áⁿ cuido-xi ñadihĩ-áⁿ ní cùu. ¹⁶ Te ñuhu yìchĩ ní chindee-xi ñadihĩ-áⁿ, chi ní ndátá te ní quee naa-ni ndute ní quene yuhu quitĩ-áⁿ. ¹⁷ Te sátá dúcáⁿ nĩ quide-xi xiáⁿ ní cudééⁿ víhĩ quitĩ-áⁿ núú ñadihĩ-áⁿ, te ní xica-di cuáháⁿ-di núú xĩndecu nchaa dava-gã cue déhe ñadihĩ-áⁿ cuendá nàá ndihĩ ñaha-di, te ñáyiu-áⁿ cùú-yu ñáyiu tnĩ nchaa tnúhu càháⁿ Yá Ndiõxĩ, te nchícúⁿ nihnú-yu nchaa tnúhu sá càháⁿ váha cuendá Xitohó Jesucristú.

13

Cuendá úú quitĩ

¹ Te yuhú ní ngúnu tnĩ-í yuhu làmár, te ní xinĩ-í ní quene ìⁿ quitĩ te ndèé úsá díquí-di te úxĩ ndiqui-di, te

núú ìᵐ ìᵐ ndiqui-di-áⁿ ndécú ìᵐ caa coroná. Te ìᵐ ìᵐ díquí-di-áⁿ ndéé tnúhu sá càháⁿ úhú-xi cuendá Yá Ndióxi. ² Te quiti-áⁿ cáá-dí dàtná cáá cuñí, te sáhá-di càa datná cáá sáhá óso, te yuhu-di càa datná cáá yùhu ndicaha. Te quiti dééⁿ nání dràgón ní sáñaha-di tnúhu ndee ìní xii quiti-áⁿ cuendá taxi tnùní víhí-dí, te dràgón-áⁿ nǐ sáñaha-di núú ndécú-dí tàxi tnuní-di xii quiti ní quene xití làmár-áⁿ, te ducaⁿ nǐ quide-di cuendá sá nihí ndéé quiti-áⁿ cunuu-di. ³ Te ìᵐ díquí quiti ní quene xití làmár-áⁿ càhú víhí càa ní nícuèhé, te sa ndètu vií-nǎ cuú-di sànuu dico ní ndúha-di, te nihí ñuyú ní nihí ñáyiu tnúhu sá dúcáⁿ ní cuu, te ío ní cuñúhu-yu te ní tuhá-yu quiti-áⁿ. ⁴ Te nchaa ñáyiu-áⁿ nǐ cachí-yu sá ío càhnu cuu quiti dééⁿ quiti nàni dragón-áⁿ cuendá sá nǐ sáñaha-di tnúhu ndee ìní sá táxi tnùní quiti ní quene xití làmár-áⁿ, te ní ngúíta-yu ní chiñuhú-yu quiti ní quene xití làmár-áⁿ, te càchí-yu:

—Vá yóo ìᵐ nǔtnahá ñáhá xii quiti-a, te ni vǎ yóo ìᵐ ndacu nàa ndihi ñaha xii-di —cachí-yu.

⁵ Te ní nihí-di tnúhu ndee ìní sá càháⁿ úhú-di Yá Ndióxi, te cada càhnu-di mee-di, te údico úú yóo ducaⁿ nǐ nihí-di tnúhu ndee ìní-áⁿ cunuu-di. ⁶ Te ducaⁿ nǐ quide-di ní cáháⁿ úhú-di Yá Ndióxi ndihi cuendá nchaa sá quidé-gá, te diu-ni ducaⁿ nǐ cáháⁿ úhú-di núú ndécú-gǎ, te ní cáháⁿ úhú tucu-di nchaa ñáyiu ndècu ndihi-gá andiu. ⁷ Te ducaⁿ nǐ nihí-di tnúhu ndee ìní sá nàá-di ndihi nchaa ñáyiu cùu cuendá Yá Ndióxi, te ducaⁿ nàa ndihi ñaha-di xii-yu ndéé òré vǎ ndácú-gǎ-yu nàa ndihi ñáhá-yu xii-di, te tnàhá ní ngúndecu ndihi-di tnúhu ndee ìní sá táxi tnùní-di ñáyiu nchaa nàcióⁿ, ndihi ñáyiu nchaa ñuú, ndihi nchaa ñáyiu càháⁿ ndí dííⁿ ndí dííⁿ núú tnúhu, ndihi ñáyiu

xǐndecu nchaa xichi. ⁸ Te cue ñáyiu nihí ñuyú ní cachí-yu sá ío càhnu cuu quiti-áⁿ, te ñáyiu-áⁿ cùu-yu ñáyiu ñá túú yòdo tnuní núú tütú Yá cáá dàtná cáá ìᵐ mbéé quiti ní dánicuèhé-güedé Yá ní xihí ní cùu te ní ndoto. Te ndéé cúnàhá ní ngáva ñuyú sa yòdo tnuní ñáyiu naníhí tàhú, dico ñáyiu càchí sá ío càhnu cuu quiti-áⁿ ñá túú yòdo tnuní-yu núú tütú-gá.

⁹ Te nchaa nchòhó ñáyiu xǐndedóho chí cündedóho váha nchaa nàcuáa cuáháⁿ tnúhu-áⁿ. ¹⁰ Te nchaa ñáyiu na chihí tnaha ñáyiu-xi vecaá te sáa nduu te quihíⁿ-yu tnàhá-yu vecaá, te nchaa ñáyiu sàhni tnaha ñáyiu-xi ndihi yuchí te diu-ni ndihi yuchí cuú-yu tnàhá-yu, te xiǎⁿ núu ío xini ñuhu-xi sá ncháá ñáyiu cùu cuendá Yá Ndióxi cunduu càhnu ìní-yu, te quindáá ìní ñáhá-yu xii-gá.

¹¹ Te ní xiní tucu-í ingá quiti ní quene-di núú ñuhu yìchí, te ndéé úú ndiqui-di te càa datná cáá ndiqui canerú, te càháⁿ-di dàtná càháⁿ quiti dééⁿ nání dràgón. ¹² Te dàtná ndécú ndihi quiti ní quene xití làmár-áⁿ tnúhu ndee ìní sá táxi tnùní-di ducaⁿ ndècu ndihi quiti ní quene ñuhu yìchí-áⁿ tnúhu ndee ìní taxi tnùní-di cada-di núú quiti ní quene xití làmár-áⁿ, te quiti ní quene ñuhu yìchí-áⁿ nǐ quide yica-di sǎ ncháá ñáyiu xǐndecu nihí ñuyú chiñuhú-yu quiti ní quene xití làmár-áⁿ, quiti càhú víhí nǐ tnahá ní nícuèhé te ní ndúha-di. ¹³ Te quiti ní quene xití ñuhu yìchí-áⁿ nǐ quide-di titní núú sǎ vǎ yóo tnàhí ndàcu cada, te nchaa ñáyiu ní xiní-yu sá ndéé andiu nǐ dǎngóyó-dí ñùhú ñuyú. ¹⁴ Te sá dúcáⁿ nǐ ngúndecu ndihi-di tnúhu ndee ìní ní quide-di nchaa xiǎⁿ ní quide-di núú quiti ní quene xití làmár-áⁿ, te sá dúcáⁿ nǐ quide-di te xiǎⁿ ní dándàhú-di nchaa ñáyiu xǐndecu nihí ñuyú, te

ní xáhaⁿ-di xii-yu sá ndúcü-yu ìⁿ sá cádüha-yu nàcuáa-ni càa nacuáa-ni ndüu quiti ní quene xití lámár-áⁿ, quiti cãhú víhí nì tnahá ní nícuèhé díquí-xi-áⁿ nì quée machiti te ñá túú ní xihí-di chi ní xíndecu-ni-di. 15 Te quiti ní quene xití ñuhu yichí ní ngúndecu ndihi tucu-di tnúhu ndee ìní sá chíhí-dí ìní sá nì cadúha-yu-áⁿ, sá nì natavá-yu dàtná cáá quiti ní quene xití lámár-áⁿ, te ducaⁿ nì quide quiti-áⁿ cuendá cáháⁿ sá nì cadúha-yu-áⁿ, te xíáⁿ cada-xi cuú nchaa ñáiyu ñá túú ní cuini chiñuhu ñaha xii-di. 16 Te quiti ní quene xití ñuhu-áⁿ quidé-dí sá ncháá ñáiyu ngúndéé ìⁿ tnuní ndaha cùhá-yu àdi tneé-yu, te ducaⁿ nì quide-di cuèi ñáiyu cùnuu te cuèi ñáiyu ñá túú cùnuu, te cuèi ñáiyu cuíca te cuèi ñáiyu ndàhú, te cuèi ñáiyu ñá túú dàñá quee núú chíúⁿ pàtróóⁿ-xi, te cuèi nchaa ñáiyu dàñá quée núú chíúⁿ pàtróóⁿ-xi ncháá-yu ducaⁿ nì ngúndéé tnuní ñíⁿ-yu. 17 Te ní quide-di sá ncháá ñáiyu ñá túú ndèè tnuní ñíⁿ-xi vá cúú cuááⁿ-yu sá cãchí iní-yu te ní vá cúú dicó-yu ìⁿ sá cuíni-yu dicó-yu, te tnuní-áⁿ cúú-xi ñi quiti ní quene xití lámár-áⁿ àdi número-di. 18 Te xini ñuhu-xi sá ncháá ñáiyu ío váha cùtnuní iní-xi ío váha cuáha-yu cuendá nàcuáa quée-xi número quiti-áⁿ, te número-áⁿ cúú-xi ñíú cièndú únídico íñú, te cùu-xi cuendá ìⁿ ñáiyu ñuyú.

14

Cuendá ìⁿ cièndú údico cúmí mĩ ñáiyu

1 Te sátá dúcáⁿ te ní xiní-í Yaa cáá dàtná cáá ìⁿ mbéé quiti ní dánicuèhé-güedé nútñí-gá ìⁿ yucu ñúú nání Sión ndécú àndü, te nutñí-gá ndihi ìⁿ cièndú údico cúmí mĩ ñáiyu, te tneé-yu ndèè ñi-gá ndihi ñi tátá-gã Dútú Ndióxi. 2 Te ní tecú dóho-í ní quide-xi andü

dàtná quidé-xi núú xícá cuèhé víhí ndüte, te quide tucu-xi datná quidé-xi òré níhi víhi caháⁿ ñuhu, te quide tucu-xi datná quidé-xi òré cuèhé víhí ñáiyu càní-yu àrpá. 3 Te ní tecú dóho-í xixita yuhu sá xítá yùhu núú Yaa núcõo núú xilé váha, ndihi núú ndi cùmí cue quiti xínutñí-áⁿ, ndihi núú ncháa cue téé cùu sacuéhé xínucóo-áⁿ, te xixita-xi ìⁿ ndudú sáá. Te mee-ni cuè ñáiyu ìⁿ cièndú údico cúmí mĩ-áⁿ quée díquí-yu ndudú-áⁿ, te ñáiyu-áⁿ cùü-yu ñáiyu ní dácãcu nihnu ñaha Yaa cáá dàtná cáá ìⁿ mbéé quiti ní dánicuèhé-güedé núú ñáiyu ndècu ichi cuehé ichi duha xíndecu ñuyú, te vá yõo ìⁿ-gá quée díquí-xi ndudú sáá-áⁿ chi mee-ni ñáiyu ní cácu nihnu-áⁿ quée díquí-yu. 4 Te ñáiyu ní cácu nihnu-áⁿ cùü-yu ñáiyu ñá túú ní xíndecu ichi díí ìní, te cùu-yu ñáiyu càndoo canine iní-xi, te ndèni ní cuu cuáháⁿ Yaa cáá dàtná cáá ìⁿ mbéé quiti ní nícuèhé-áⁿ, te ducaⁿ-ni ndèndaha ñàhá-yu xii-gá cuáháⁿ, te ñáiyu-áⁿ nì cácu nihnú-yu núú ncháa ñáiyu ñuyú, ñáiyu ndècu ichi cuehé ichi duha, te ñáiyu ní cácu nihnu-áⁿ cùü-yu ñáiyu ñíhna nuu nì nduu táhú Yã Ndióxi cuu cuendá-gá ndihi Yaa cáá dàtná cáá ìⁿ mbéé quiti ní dánicuèhé-güedé. 5 Te cùu-yu ñáiyu ñá túú càháⁿ ni ìⁿ tnúhu ndehnde, te càndoo canine iní-yu ndècù-yu núú núcõo Yã Ndióxi táxi tnuní-gá.

Cuendá úní cue espíritú xínú cuèchi núú Yã Ndióxi

6 Te sátá dúcáⁿ te ní xiní-í ìⁿ espíritú xínú cuèchi núú Yã Ndióxi xícó-xi cuädava andü, te ndècu ndihi-xi tnúhu sá càháⁿ nàcuáa naníhí tahú-ó, tnúhu sá ñá túú tnáhi ndihi nihnu te tnúhu-áⁿ danèhé espíritú-aⁿ nchaa ñáiyu ndècu ñuyú, ñáiyu nchaa nacióⁿ, ndihi ñáiyu nchaa ñúú, ndihi nchaa ñáiyu càháⁿ ndí dííⁿ ndi dííⁿ núú tnúhu,

ndihi ñáyu xĩndecu nchaa xichi.

⁷ Te níhi ní cáháⁿ-xi te cächí-xi:

—Nchaa nchòhó ñáyu ndècu ñuyú canehe-ndo sã yĩñuhu núú Yã Ndiòxí, te cächí-ndó sã ïo càhnu cuu-gá chi sa ní sáá nduu càda ndáá-gá nchaa cuéchi-ndo, te chiñuhu-ndo-gã chi ðiu-gá ní cadúha-gá andiu, ndihi ñuhu yìchí, ndihi làmár, ndihi nchaa ndóhyo — duha cächí espíritú-áⁿ.

⁸ Te nchicúⁿ tucu ingá espíritú xínú cuèchi núú Yã Ndiòxí, te cächí-xi:

—Vitna ní naa ñuú Babiloniá ñuú ïo cùnuu, te ducaⁿ ní naa chi cue ñáyu ñuú-áⁿ ní quidé-yu ní xíta ni-hnu nchaa ñáyu ñihí ñuyú, chi ní sanu ichi ñàhá-yu ichi cuèhé ichi duha — duha cächí espíritú-áⁿ.

⁹ Te nchicúⁿ tucu ingá espíritú xínú cuèchi núú Yã Ndiòxí te níhi cáháⁿ-xi, te cächí-xi:

—Nchaa ñáyu chĩñuhu ñaha xii quiti ní quene xití làmár, ndihi sã ní natava ñàhá-yu nàcuáa càa-di-áⁿ, ñáyu ní dáñá mèe-xi ní ngúndeé tñuní ndahá-yu àdi tneé-yu, ¹⁰ ñáyu-áⁿ sùúni dándoho ñaha Yã Ndiòxí xii-yu chi ïo cùdéeⁿ-gã, te ducaⁿ ïo dandòho ñaha-gá xii-yu chi daquihíⁿ ñàhá-gã xii-yu núú ñùhú núú ñùhú àzufre càyú-xi, te núú cuè espíritú xínú cuèchi núú-gã ducaⁿ dándoho ñaha-gá xii-yu, ndihi núú Yáá cáá dàtná cáá ìⁿ mbéé quiti ní dánicuèhé-güedé. ¹¹ Te ni caa ni quihíⁿ quene ñùhmá núú dúcáⁿ cùndecú-yu ndohó-yu-áⁿ, te cuèi nduu cuèi niú ducaⁿ ndòhó-yu. Te ducaⁿ ndòho nchaa ñáyu chĩñuhu ñaha xii quiti ní quene xití làmár, ndihi sã ní natava ñàhá-yu nàcuáa càa-di-áⁿ, te ðiu-ni ñáyu-áⁿ cúu-yu ñáyu ní ngúndeé tñuní ndaha-xi àdi tneé-xi — duha cächí espíritú-áⁿ.

¹² Te xíáⁿ xíní ñùhu-xi sã ncháá ñáyu cùu cuendá Yã Ndiòxí cunduu càhnu iní-yu, chi ðiu-ní-yu cùu-yu ñáyu tñi nchaa tñuhu càháⁿ-gá,

te ni yùhu ni iní-yu sàndáá iní-yu Xítohó Jesucristú.

¹³ Te sáta dúcáⁿ te ní tecú dóho-í ní cáháⁿ ìⁿ sã ní cáháⁿ andiu, te cächí-xi:

—Chido tñuni-n ìⁿ núú tùtú nàcuáa na cáháⁿ-i-a. “Neni vitna ïo váha táhú nchaa ñáyu sàndáá iní tñuhu Xítohó Jesucristú te xihí-yu” — duha cächí sã ní cáháⁿ-áⁿ.

Te Espíritú Yã Ndiòxí ní cáháⁿ-xi, te cächí-xi:

—Ndáá, chi ndetatú-yu chi ñá túu-gã nágá chiúⁿ ndohó-yu cadá-yu, te Yã Ndiòxí sa nàha-gá nchaa nàcuáa ndùu chiúⁿ ní quidé-yu — duha cächí Espíritú-gá.

Nchaa sã cúu núú ñùhú

¹⁴ Te sáta dúcáⁿ te dàtnùni ní xini-í ìⁿ vícò cuixíⁿ, te núú vícò-áⁿ ní xini-í núcò ìⁿ Yáá, te càa-gá dàtná cáá ìⁿ téé ñuyú, te díquí-gã ñùhú ìⁿ coroná ní cuáha mee-ni ðihúⁿ cuááⁿ, te nùndaha-gá ìⁿ yuchí ndíquí te sùúni déeⁿ. ¹⁵ Te ní xini-í ìⁿ espíritú xínú cuèchi núú Yã Ndiòxí ní quee-xi xití vehe-gá, te ñhi ní cáháⁿ-xi xàhaⁿ-xi xii Yáá núcò núú vícò-áⁿ:

—Sa ní cuu nàquehdé-n nchaa sã ní cuu ñuyú ndihi yuchí ndíquí-n, chi sa ní cuu núcòo tñaha-xi — duha cächí espíritú-áⁿ xàhaⁿ-xi xii Yáá-áⁿ.

¹⁶ Te Yáá núcòo núú vícò-áⁿ ní dáyaħa ndodo-gá yuchí ndíquí-gã núú ñuyú ní nataxi tñaha-gá nchaa sã ní cuu.

¹⁷ Te ní xini tucu-í ingá espíritú xínú cuèchi núú Yã Ndiòxí ní quee-xi xití vehe-gá sã cáá àndiu, te nùndaha-xi tñahá-xi ìⁿ yuchí ndíquí déeⁿ. ¹⁸ Te ní xini tucu-í ní quee tucu ingá espíritú xínú cuèchi núú Yã Ndiòxí núú nùtni núú sácòdò sã ndúú táhú-gã, te ndècu ndihí-xi tñuhu ndee iní táxi tñuni-xi ñùhú, te espíritú-áⁿ ñhi ní cáháⁿ-xi xàhaⁿ-xi xii espíritú néhé yùchí ndíquí déeⁿ-áⁿ:

—Ngüita naquehdé-n ndihi yuchí ndíquí-n ndèhé yoho yàha

stilé sá ío ñuyíú chi sa ní cuu nàtehndé —duha càchí espíritú-áⁿ xáhaⁿ-xí xii espíritú néhé yùchí ndíquí-áⁿ.

¹⁹ Te espíritú néhé yùchí ndíquí-áⁿ ñí dáyáha ndodo-xi yuchí ndíquí-xí nũú ñuyíú ñí nàquehndé-xi nchaa ndéhé yoho yáha stilé, te ní chihi-xi ñí xichi núú ñí chihi-xi cuéndá xiáⁿ quihni-xi quee ndudí-xi, te sá dúcáⁿ ñí quide-xi xíáⁿ cútnùní iní-ó sá ïo cùdééⁿ Yá Ndióxi núú ñáyíu ñuyíú.

²⁰ Te ndéhé yoho yáha stilé-áⁿ ñí quihni-xi ñí xio yuhu ñúú, te ndudí ndéhé yoho yáha stilé-áⁿ ñí nduu-xi ñíñí te ní quee-xi núú quíhni ñihnu espíritú-áⁿ. Te úní cièndú mìl mètrú ní xica ñíñí-áⁿ, te dàtná ñí mètrú dava ní sáá cuehnu ñíñí-áⁿ ñí xica-xi.

15

Úsá tnúndòho

¹ Te ío vîhi ní quide-xi ñí sá ñí quide-xi andíu te ní cuñuhu vîhi-í, te ní xiní-í úsá tnàhá espíritú xínú cuèchi núú Yá Ndióxi, te ñí ñí cue espíritú-áⁿ ndécú ndíhi-xi tnúhu ndee ñí dandòho-xi ñáyíu ñuyíú, te nà yáha nchaa tnúndòho-áⁿ, te vá cùdééⁿ-gá Yá Ndióxi núú-yu dándòho ñaha-gá xii-yu.

² Te ní xiní-í ñí làmár te ndute làmár-áⁿ cáá dàtná cáá vidriú, te dàcánuu-xi ndíhi ñuhú, te yuhu làmár-áⁿ xínutnî nchaa ñáyíu ní ndacu ní dáquéé tîhú ñáhá xii quiti ní quee xití làmár-áⁿ, te ducaⁿ ñí ndacú-yu ní dáquéé tîhú-yu sá ñí natava ñahá-yu nàcuáa càa-di-áⁿ, te ducaⁿ ñí ndacu tucú-yu ní dáquéé tîhú tucú-yu númerú-di sá cúú dàtná dîu-di, te nchaa ñáyíu-áⁿ ñí nduu táhú-yu núú Yá Ndióxi àrpá xínehé-yu cuéndá caní-yu.

³ Te xíxitá-yu ndudú sá ñí xita ndíi Moisés ndíi ní xinú cuechi nũú Yá Ndióxi ndéé sanaha, te xita

tucú-yu ndudú Yá cáá dàtná cáá ñí mbéé quiti ní dánícuèhé-güedé, te càchí-yu:

Yòhó Dútú Ndióxi ío càhnu cuu-n, chí quide-n nchaa sá vâ yòo tnàhí ndàcu cada, te cùu-n Yáá ndácú quide nchaandi túhú sá vâha, te ío ndáá quidé-n te ío ndáá càháⁿ-n, te yíndaha-n nchaa ñáyíu ñíñí ñuyíú.

⁴ Te nchaa ñáyíu nèhé-yu sá yíñùhu núú-n, te nchaa-yu càchí-yu sá ïo càhnu cuu-n, chí ñí dîi díi-ni yòhó cúú-n Yáá ío vâha quide ndáá, te nchaa ñáyíu ñíñí ñuyíú nat-acá-yu chíñuhu ñahá-yu xii-n, te ducaⁿ càdá-yu chí ndèhé-yu nchaa sá vâha quide-n.

Duha càchí ñáyíu-áⁿ xíxitá-yu.

⁵ Te sáta dúcáⁿ te ní xiní-í ní nacaáⁿ yuyèhe vehe Yá Ndióxi andíu, te xití vehe-gá-áⁿ ndécú sá ndèé tnúhu-gá.

⁶ Te xití vehe-gá-áⁿ ñí quee úsá tnàhá espíritú xínú cuèchi núú-gá, te ñí ñí-xi ndècu ndíhi-xi tnúhu ndee ñí dandòho-xi ñáyíu, te xíñuhu-xi mee-ni dóó vâha, te súúni vâha càndoo, te chàhnhí, te yídúcúⁿnuu cínchú ní cuáha mee-ni dîhúⁿ cuááⁿ pèchú ndi úsá cue espíritú-áⁿ.

⁷ Te ñí quiti cúmí xínutnî núú núnñí xilé vâha ní sáñaha-di ñí caa sá nàhá tícúú ní cuáha mee-ni dîhúⁿ cuááⁿ xii ñí ñí espíritú-áⁿ, te xití nchaa tícúú-áⁿ ñíhú ñí sá ñíhú te xíáⁿ cútnùní sá Yá Ndióxi dandòho-gá ñáyíu ñuyíú, te dîu-gá cúú-gá Yá ndécú nchaa nduu nchaa quíú.

⁸ Te xití vehe-gá-áⁿ ñí chítú ñíhí, te ducaⁿ ñí quide-gá cuéndá cutnùní iní ñáyíu sá ïo càhnu cuu-gá táxí tnùní-gá, te vá yòo ñí cuu quíhu xití vehe-gá-áⁿ ndèé ndíhi ndi úsá tnúndòho cada ndi úsá cue espíritú-áⁿ ñuyíú.

16

Tnúndòho cada-xi ñuyúú

¹ Te sáta dúcáⁿ te ní tecú dóho-í níhi ní cáháⁿ ìⁿ sá ní cáháⁿ xítí vehe Yá Ndióxi, te xáhaⁿ-xi xii ndi usá cue espíritú-áⁿ:

—Chí cuàháⁿ coyo-ndo sá ñúhú xítí nchaa tícúú néhé-ndó-áⁿ núú ñuyúú, chí sá ñúhú-áⁿ cúú-xí tñúndòho tendaha Yá Ndióxi sá cúú-xí nchaa ñáyíu ñuyúú —duha càchí sá càháⁿ-áⁿ.

² Te espíritú díhna ní sáháⁿ-xi ní coyo-xi sá ñúhú xítí tícúú néhé-xí-áⁿ ñuyúú, te nchaa ñáyíu ñùhu tñuní quiti ní quene xítí làmár ñáyíu ní chiñuhu sá ní natava ñàhá-yu xii-di, nchaa ñáyíu-áⁿ ní quené-yu ndíhyi tèhyú te súúni dándòho ñaha-xi xii-yu.

³ Te espíritú cúú ùú ní coyo-xi sá ñúhú xítí tícúú néhé-xí núú làmár, te ndute làmár-áⁿ ní nduu-xi níñí te càa-xi datná cáá níñí ñáyíu sa ní xihí, te nchaa quiti ñùhu xítí làmár-áⁿ ní xihí-güedi.

⁴ Te espíritú cúú ùní ní coyo-xi sá ñúhú xítí tícúú néhé-xí nchaa yúte ndíhi nchaa núú quènihni ndute, te ndute nchaa yúte-áⁿ ndíhi nchaa ndute quènihni-áⁿ ní nduu-xi níñí.

⁵ Te sáta dúcáⁿ te ní tecú dóho-í ní cáháⁿ ìⁿ espíritú xínú cuèchi núú Yá Ndióxi, espíritú yíndàha ndute, te xáhaⁿ-xi xii Yá Ndióxi:

—Yòhó Dútú Ndióxi cúú-n Yáá quidé ndáa cuiti núu duha quide-n tendaha-n tñúndòho-a, te diu-ni-n cùu-n Yaá ndécú ndéé cútnàhá ní ngáva ñuyúú, te diu-ni-n cùu-n Yaá ndécú vitna te ñá túú tñàhí cuèchi-n. ⁶ Chí cue ñáyíu ñuyúú ní dácácã-yu níñí nchaa ñáyíu ní cáháⁿ tñúhu-n ndíhi nchaa dava-gá ñáyíu cùu cuendá-n, te ní sahní-yu nchaa ñáyíu-áⁿ, te vitna ní dátíu-n ndute ní nduu-xi níñí te ducaⁿ-ni càa ndute-áⁿ xihí-yu, te ducaⁿ tàú-xi ndohó-yu cuendá sá ní sahní-yu

cue ñáyíu cùu cuendá-n —duha càchí espíritú-áⁿ xáhaⁿ-xi xii-gá.

⁷ Te ní tecú tucu dóho-í ní cáháⁿ ìⁿ sá ní cáháⁿ núú nùtnii núú sácódó sá ndúú tãhú Yá Ndióxi, te xáhaⁿ-xi xii-gá:

—Ndáá sá yòhó Dútú Ndióxi Yaá ndácú quide nchaandi túhú sá vãha dándòho-n ñáyíu nacuáa tàú-xi cunduú —duha càchí sá càháⁿ-áⁿ xáhaⁿ-xi xii-gá.

⁸ Te espíritú cúú cùmí ní coyo-xi sá ñúhú xítí tícúú néhé-xí núú nchíanchii cuendá nchíanchii-áⁿ cahmí-xi nchaa ñáyíu ñuyúú. ⁹ Te ncháa-yu ní ndòho vñí-yu ní cáyú-yu, te cuèi ducaⁿ ní ndohó-yu dico ñá túú ní cuini-yu ndixi cuèchi iní-yu cuendá nchaa sá ñà túú vãha quidé-yu, te ni ñà túú ní càchí-yu sá ìo càhnu cuu Yá Ndióxi chí da ní cáháⁿ úhú-yu cuendá-gá, te diu-gá cúú-gá Yaá ducaⁿ ní tendaha tñúndòho-áⁿ sá cúú-xi-yu.

¹⁰ Te espíritú cúú úhúⁿ ní coyo-xi sá ñúhú xítí tícúú néhé-xí núú ndécú quiti ní quene xítí làmár-áⁿ táxi tñúni-di, te nchaa núú táxi tñúni-di ní cuu nee, te nchaa ñáyíu ñuyúú ndéé yáa-ná-yu nàcaxi nihnú-yu sá ndóhó-yu. ¹¹ Dico ni ducaⁿ ñá túú ní cuini-yu dãñá-yu ní ìⁿ sá cuèhé sá dúhá quidé-yu, chí da ní cáháⁿ úhú-yu cuendá Yá Ndióxi Yaá ndécú àndiú sá cuendá sá dándòho ñaha ndíhyi tèhyú ndèe-yu-áⁿ ndíhi nchaa dava-gá sá yãha-yu.

¹² Te espíritú cúú ìñú ní coyo-xi sá ñúhú xítí tícúú néhé-xí xítí yúte càhnu nani Eúfratés, te ndute yúte-áⁿ ní yíchí cuendá yãha cue tée yíndaha ñáyíu xíndecu ndàa xio nacuáa quène nchíanchii.

¹³ Te ní xiní-í ní quee ìⁿ espíritú cùndíhi yucu ñávãha yuhu quiti dééⁿ nání dragón, te ní xiní tucu-í ní quee tucu ingá espíritú cùndíhi yucu ñávãha yuhu quiti ní quene xítí làmár, te ní xiní tucu-í ní quee

tucu ingá espíritú cúndihí yucu ñávaha yuhu téé dándahú ñáiyu cächí sá cáháⁿ tnúhu Yá Ndióxi te ñá ndáá, te ndi nùní espíritú-áⁿ xíndáa-xi dátá cáá làhvá. ¹⁴ Te ndi nùní espíritú-áⁿ quidé-xí sá vǎ yǒo tnàhí ndàcu cada, te xica datacá-xi nchaa cue téé yíndaha ñaha xii ñáiyu xíndecu nihí ñuyú cuendá nàá-güedé mei ndùu cachí Yá Ndióxi coo tnúndòho cahnu vihi-gá, te diu mee Yá Ndióxi cúu-gǎ Yaá ío càhnu cuu. ¹⁵ Te Yaá cúu Xitohó-ó ní cachí-gá: “Cunaha-ndo chi nduu ñá túú yihí iní-ndó quixi-í núú ndécú-ndó, te cada-í dátá quidé ñádúhú. Te váha táhú nchaa nchòhó ñáiyu xíndecu túha, chi cùu-ndo dátá cue ñáiyu xíndecu túha xixíhnu-ni dóo-xi cuendá sá vǎ cúcàhaⁿ núu-yu dátá cúcàhaⁿ núú cuè ñáiyu ñá túú nihnu dóo-xi, te duha cáháⁿ-í cuendá sá nchòhó cundecu túha-ndo òré quexìo-í”, duha cächí-gá. ¹⁶ Te ndi nùní cue espíritú cúndihí yucu ñávaha-áⁿ ní dátá-cá-xi nchaa cue téé yíndaha ñaha xii ñáiyu, te ní taxi ndecu ñaha-xi ñⁿ xichi núú nání Armagedón, duha nani xíaⁿ tnúhu hebéu.

¹⁷ Te espíritú cúu úsá ní coyo-xi sá ñúhú xití ticúu néhé-xí núú tàchí, te ní tecú dóho-í níhi ní cáháⁿ Yaa núcòo núú xilé váha xití vehe-gá, te cächí-gá:

—Xéhé-ñǎ cúmǎní te xínu cava nchaa tnúndòho tnúhu ndáhú — duha cächí-gá.

¹⁸ Te sáta dúcáⁿ te ní sáá nduté te ní cáháⁿ ñúhu, te súúni dùsaⁿ ní quide-xi, te níhi vihi ní tnáa ñuyú, te ndéé cútnáhá ní ngúndecu ñáiyu ñuyú te vátá ñⁿ xito-gá níhi tnáa dátá ní quide-xi. ¹⁹ Te ñuú cáhnú ío cùnuu nani Babiloniá ní quée dava-xi ní cuu-xi úní xichi, te nchaa ñuú cáá nihí ñuyú ní ngoyo nchaa vehe, chi Yá Ndióxi ní ndacu iní-gá nchaa sá cuéhé sá dúhá quide nchaa ñáiyu ñuú Babiloniá-áⁿ, te

ducaⁿ ní quide ñaha-gǎ xii-yu chi ío cùdééⁿ-gǎ núu-yu. ²⁰ Te nchaa tindúú ní ndóñúhú-xi cuèi nchaa tindúú ñuhu yichí ndécú xití lámár. ²¹ Te ní xiní-í ní cuuⁿ ñiñi nàhnu vihi ní ngaundodo-xi cue ñáiyu ñuyú, te nchaa ñiñi-áⁿ vée-xi dátá údico kílu, te cue ñáiyu ñuyú ní cáháⁿ úhú-yu cuendá Yá Ndióxi sá dúcáⁿ ní dácúuⁿ-gǎ ñiñi nàhnu vihi-áⁿ, chi ní cuu-xi ñⁿ tnúndòho cahnu vihi sá cúu-xi-yu.

17

Ñadìhí ndécú ichi díí iní

¹ Te núú úsá espíritú néhé ticúu-áⁿ, te ñⁿ-xi ní quixi-xi núú ndécú-í, te cächí-xi xii-í:

—Néhe ná quihíⁿ-ó dānehé ñáhà-í xii-n nchaa tnúndòho sá ndóhó ñadìhí ñaha ndècu ichi díí iní, te ñaha-áⁿ cúnùu-aⁿ núcóo-aⁿ núú ñúhú vihi ndute. ² Te ñaha-áⁿ ndécú díí iní-aⁿ ndihí nchaa cue téé yíndaha ñaha xii ñáiyu xíndecu nihí ñuyú, te nchaa dava-gǎ ñáiyu ñuyú ío iní-yu nchicúⁿ nihnú-yu quidé-yu nchaa nàcuáa quide ñaha-áⁿ —duha cächí espíritú-áⁿ.

³ Te òré ducaⁿ quide ñaha Espíritú Yá Ndióxi xii-í nàcuáa cächí iní-xi, te ñⁿ espíritú xínú cuèchi núu-gǎ ndécá ñaha-xi xii-í cuáháⁿ ñⁿ xití yucu, te xití yucu-áⁿ ní xiní-í ñⁿ ñadìhí yódó-áⁿ ñⁿ quiti ticuehé, te ndéé úsá díquí-di te úxí ndiqui-di, te nihí-di ndéé tnuní-di mee-ni tnúhu sá cáháⁿ úhú cuendá Yá Ndióxi. ⁴ Te ñadìhí-áⁿ nihnú-áⁿ dóo muràdu ndihí dóo ticuehé, te mee-ni sá ní cuáha dñúⁿ cuááⁿ, ndihí yúú váha sá nání pèrlá, ndihí nchaa dava-gǎ núú yúú váha, mee-ni nchaa xíaⁿ ní cuáha sá yíhí lõho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndáhá-áⁿ, te nùndaha-aⁿ ñⁿ ticúu ní cuáha mee-ni dñúⁿ cuááⁿ te ñúhu mee-ni sá cuéhé sá dúhá, te xíaⁿ cútnùní iní-ó sá cúu-áⁿ ñⁿ ñadìhí ñaha ndècu ichi cuehé ichi duha. ⁵ Te tneé-aⁿ ndéé tnuní ñⁿ tnúhu,

te cächí-xi: “Ñuú Babiloniá ñuú ío cùnuu, cada iní-ndó sá cúú-xí mèi ñadihí-a, te ñuú ñadihí-a cùu-aⁿ ñaha sanu ichi ñaha xii nchaa ñáiyu ñíhí ñáiyu ndècu ichi ñíhí iní, te nándi-gá nchaa sá cuèhé sá dúhá sànu ichi-aⁿ nchaa ñáiyu cadá-yu”, duha càháⁿ tnúhu ndèé tnuní tneé ñadihí-áⁿ. Te vá yòo tècú tnùní ná cuendá ducaⁿ càháⁿ tnúhu-áⁿ.⁶ Te ní cutnùní iní-í sá ñíhí ñàhá-áⁿ ní dácá-cá-áⁿ ñíhí ñáiyu cùu cuendá Yá Ndióxi ní sahi ñaha-aⁿ xii-yu, te ñáiyu ní xíhí-áⁿ cúu-yu ñáiyu ní càháⁿ váha cuendá Xitohó Jesu-crístú, te sá dúcáⁿ ní quide-aⁿ te ní nduu-aⁿ dàtná ñíhí ñáiyu quíhu. Te ío ní cuñúhu-í sá dúcáⁿ ní cuu ní xini-í.⁷ Te sá tá dúcáⁿ te espíritu xínú cuèchi núú Yá Ndióxi-áⁿ cächí tucu-xi xii-í:

—Vá ndèé dúcáⁿ cùñúhu-n, chi vitna na cächí tnúhu-í xii-n ñacuáa quèe-xi cuendá quiti ndèé úsá díquí-xi ndíhí úxí ndiqui-xi-áⁿ, ndíhí ñacuáa quèe-xi cuendá ñadihí ñaha yòdo ñaha xii-di-áⁿ.⁸ Te quiti ní xini-n-áⁿ cúú-dí ñíhí quiti sa ní xíndecu te vitna ñá túú-gá-di ndècu, te sáá nduu te quene-di yaú cùnú víhí sá ío nèhé cáá, te dàtnùní sáá nduu te quíhíⁿ-di núú ùhú núú ndàhú ní caa ní quíhíⁿ, te cue ñáiyu xíndecu ñuyú cuñúhu víhí-yu quiti-áⁿ chí cùu-di ñíhí quiti sa ní xíndecu ní cùu te sáá nduu cùndecu tucu-di, te ñáiyu ducaⁿ cùñúhu ñaha xii-di-áⁿ ñá túú yòdo tnuní-yu núú tütú núú yódó tnùní cue ñáiyu naníhí tàhú, chí ndèé cùtnàhá vátá ngáva-gá ñuyú ducaⁿ sa yòdo tnuní cue ñáiyu naníhí tàhú.

⁹ Te nchaa ñáiyu tècú tnùní xini ñuhu-xi caní váha iní-yu cuendá tnúhu-a. Te ndí úsá díquí quiti-áⁿ cada iní-ó sá cúú-xí úsá tándúú núú núcóo ñadihí-áⁿ.¹⁰ Te ndí úsá díquí quiti-áⁿ cada iní-ó sá cúú-xí úsá tnhá cue téé yíndaha ñaha xii ñáiyu, te úhúⁿ cue téé-áⁿ

ñá túú-gá cùnúu-güedé vitna, te ñíhí téé-áⁿ cùnúu-dé vitna te ingá-dé vátá sáá-gá nduu cùnúu-dé, te na sáá nduu ducaⁿ cùnúu-dé te sacú-ní nduu cùnúu-dé.¹¹ Te quiti ní xíndecu ní cùu te ñá túú-gá-di ndècu vitna, cùu-di datná téé cùu uná yíndaha ñaha xii ñáiyu, te ñíhí-ni cùu-di ndíhí cue téé úsá yíndaha ñáiyu-áⁿ, te quiti-áⁿ sáá nduu cuíta nihnu-di quíhíⁿ-di núú ùhú núú ndàhú ní caa ní quíhíⁿ.

¹² Te ndí úxí ndiqui quiti-áⁿ cada iní-n sá cúú-xí úxí tnhá cue téé quíndaha ñaha xii ñáiyu, dico vátá sáá-gá nduu cùnúu-güedé quíndaha ñaha-güedé xii-yu. Te cue téé-áⁿ níhí-güedé tnúhu ndee iní taxi tnùní-güedé ndíhí quiti-áⁿ, dico tnaa-ni taxi tnùní-güedé ndíhí quiti-áⁿ.¹³ Te ndí úxí cue téé-áⁿ cuu ñíhí-güedé taxi tnùní-güedé, te chindee-güedé quiti-áⁿ cuendá cuu ñíhí-güedé ndíhí-di cuendá taxi tnùní-gá-di.¹⁴ Te cue téé-áⁿ nàá-güedé ndíhí Yaá cáá dàtná cáá ñíhí mbéé quiti ní dancuèhé-güedé dico vá ndácú-güedé nàá-güedé ndíhí-gá chí cuíta-güedé. Te ñíhí-gá cúú-gá Yaá ío cùnúu taxi tnuní cuèi nchaa téé yíndaha ñaha xii ñáiyu, te ducaⁿ-ni taxi tnuní-gá cuèi nchaa dava-gá-yu. Te mee Yá Ndióxi ní cachí-gá nándi cùu nchaa ñáiyu cundecu ndíhí Yaá cáá dàtná cáá ñíhí mbéé quiti ní dancuèhé-güedé-áⁿ, te ñíhí-ni ñáiyu-áⁿ cúu-yu ñáiyu ní càháⁿ-gá te cúu-yu ñáiyu quide ndáá ndécú ichi-gá —duha cächí espíritu xínú cuèchi núú-gá.

¹⁵ Te ní cachí tucu espíritu-áⁿ xii-í:

—Ndute ñuhu núú núcóo ñadihí ñaha ndècu ichi ñíhí iní-áⁿ, ndute-áⁿ cada iní-n sá cúú-xí ñáiyu nchaa nàcióⁿ, ndíhí ñáiyu nchaa ñuú, ndíhí ñáiyu xíndecu nchaa xichi, ndíhí ñáiyu càháⁿ ndí ñíhíⁿ ndí ñíhíⁿ núú tnúhu.¹⁶ Te dàtná ní cachí-í sá ndí uxí ndiqui quiti ní

xiní-n-ǎⁿ cúu-xí ǔxí tñàhá cue téé quíndaha ñàha xii ñáyíu, te cue téé-áⁿ cuu úhú iní-güedé ñadihí ñaha ndècu ichi díí iní-áⁿ, te ni vǎ cáda cuèndá ñáhá-gǎ-güedé xii-aⁿ, te ndada ndàhú ñáhá-güedé, te dacàchi ñaha-güedé xii-aⁿ, te cahmi ñaha-güedé. ¹⁷ Te mee Yǎ Ndiòxí ducaⁿ dàcaháⁿ-gǎ iní cue téé-áⁿ cuèndá cada-güedé nàcuáa cuíní mée-gǎ, te xiǎⁿ núu cuu ìⁿnuu-güedé cuèndá cúñaha-güedé xii quiti-áⁿ cada-di núu-güedé taxi tñùní-di, te ducaⁿ-ni càda-di núu-güedé taxi tñùní-di ndéé ná sǎá nduu càda Yǎ Ndiòxí nàcuáa ní cachí-gǎ. ¹⁸ Te ñadihí ñaha ní xiní-n-ǎⁿ cada iní-n sǎ cúu-áⁿ ñúú cáhnú ñúú ío cùnuu, te ñúú-áⁿ ndécú tée ío-gǎ cùnùu taxi tñuní nchaa cue téé yíndaha ñaha xii ñáyíu xíndecu ñuyíú —duha ní cachí espíritú xínú cuèchi núú Yǎ Ndiòxí xii-í.

18

Ní naa ñúú Babiloniá

¹ Te ducaⁿ te dátñuní ní xiní tucu-í ingǎ espíritú xínú cuèchi núú Yǎ Ndiòxí, te ndéé andíu nì dátǎsaⁿ-xi te ní dáyehé-xi ñuyíú, te espíritú-áⁿ ío cùnuu-xi. ² Te níhi ní cáháⁿ-xi, te cǎchí-xi:

—Ní sǎá nduu nàa ñúú cáhnú ñúú cùnùu nani Babiloniá, te xiǎⁿ-nǎ natacǎ nchaa núú espíritú cúndihí yucu ñávǎha cundecu-xi, te vǎ queé-gǎ-xi xiǎⁿ, te ðíu-ni xiǎⁿ natacǎ nchaa quiti ndàva núú tàchí nchaa quiti ndehe quide, quiti ñá túú tñàhá iní ñáyíu te xiǎⁿ-nǎ cundecu-güedi. ³ Te ducaⁿ chi ñáyíu ñúú-áⁿ sánú íchí-yu nchaa ñáyíu níhí ñuyíú ichi cuèhé ichi duha, te ducaⁿ-ni xíñchícuⁿ nihnu nchaa ñáyíu ñuyíú xíquidé-yu, te nchaa cue téé cùnuu yíndaha ñaha xii ñáyíu, cue téé-áⁿ cúu ìⁿnuu-güedé ndihí nchaa ñáyíu ñúú-áⁿ quidé-güedé ndihí-yu nándi sǎ cuèhé sǎ dúhá. Te nchaa

ñáyíu ðico nándi sǎ díco queheⁿ ñáyíu ñúú-áⁿ ío cùu cuicá-yu, te ducaⁿ queheⁿ nchaa ñáyíu ñúú Babiloniá-áⁿ nchaa sǎ díco ñáyíu-áⁿ cuèndá xiǎⁿ cǎnehé-yu ndécú-yu ichi cuèhé ichi duha —duha cǎchí espíritú-áⁿ.

⁴ Te sǎtá dúcáⁿ te ní tecú dóho-í ní cáháⁿ ìⁿ sǎ ní cáháⁿ andíu, te cǎchí-xi:

—Nchaa nchòhó ñáyíu cùu cuendá-í quee-ndo ñúú Babiloniá cuèndá sǎ vǎ cúndècu-ndo tñahá-ndó ichi cuèhé ichi duha dátñá ndécú ñáyíu ñúú-áⁿ, te ducaⁿ te vǎ quíní-ndó tñúndòho tñúhu ndàhú sǎ quíxí cùu xii ñáyíu-áⁿ.

⁵ Chi ío cuèhé cuèchi-yu ní cuu ndècu núú Yǎ Ndiòxí, te mee-gǎ nǎhá-gǎ nàcuáa ndùu nchaa sǎ quidé-yu. ⁶ Te nchòhó ñáyíu cùu cuendá-í, chí nánchòcáva dandòho-ndo ñáyíu-áⁿ dátñá quidé mée-yu dándohó-yu cue ñáyíu, te úú xito nanchòcáva-ndo dándohó-ndó-yu, te ducaⁿ càda-ndo cuendá ío-gǎ ndohó-yu. ⁷ Te

íó quide cahnú-yu mée-yu, te ío cùdíí iní-yu quidé-yu nchaa núú sǎ cuèhé sǎ dúhá, te sǎ dúcáⁿ xidó-yu quidé-yu nchaa sǎ cuèhé sǎ dúhá núu xiǎⁿ nchòhó ío dándohó-ndó-yu, te ducaⁿ chí ñáyíu ñúú-áⁿ sání iní-yu, te cǎchí-yu: “Nchúhú cúu-ndí dátñá ìⁿ ñadihí ñá túú queé, ñaha ío cùnuu yíndaha ñaha xii ñáyíu. Te ducaⁿ sǎtnahá-xi cùu-ndí chí nchaa-ni nduu ío váha cùu iní-ndí ndécú-ndí, te ni vǎ sǎá ìⁿ nduu te ndíhú iní-ndí”, duha cǎchí ñáyíu ñúú-áⁿ. ⁸ Te sǎ cuèndá nchaa sǎ quidé-yu-áⁿ núu xiǎⁿ ìⁿ-ni ndùu sǎá tñúndòho sǎ cúu-xí-yu, te ío ndohó-yu chí ñúú-yu coo tnamá, te coo cuèhé cahni ñaha-xi xii-yu, te ío ndíhú iní-yu, te cáyú ñúú-yu, te ducaⁿ ndohó-yu chí Dútú Ndiòxí ío cùnuu-gǎ, te ðíu-gǎ ducaⁿ dándohó ñaha-gǎ xii-yu —duha cǎchí sǎ ní cáháⁿ andíu-áⁿ.

⁹ Te nchaa cue téé cùnuu yíndaha

ñaha xii ñáyiú ío ndáhyú-güedé sá ndìhú iní-güedé òré ná quíni-güedé quene ñúhmá cáyú ñuú cue ñáyiú Babiloniá, chi ñuú cue téé-áⁿ cúu-güedé cue téé cùu ñnuu ndihí-yu quide-güedé nchaa núú sá cuèhé sá dúhá ndihí-yu, te ducaⁿ chi ío tnàhá iní-güedé cundecu-güedé ndihí-yu ichi ñú iní. ¹⁰ Te cue téé-áⁿ xica-ná cundecu-güedé cundehe-güedé nàcuáa ndoho nchaa ñáyiú ñuú-áⁿ sá yùhú-güedé nchaa tnúndòho-áⁿ, te cachí-güedé:

—¡Ndàhú nchòhó ñáyiú ñuú cáhnú ñuú cùnùu nani Babiloniá! Chi uuⁿ ní ní sáá nchaa tnúndòho tnúhu ndàhú sá cúu-xí-ndó —duha cachí-güedé.

¹¹ Te nchaa ñáyiú dícò nchaa sá nándihí ñáyiú ñuú Babiloniá tnàhá-yu ío ndáhyú-yu sá ndìhú iní-yu chi vá yòo-gá cuaaⁿ nchaa sá dícò-yu. ¹² Te dícò-yu nchaa sá ní cuáha mee-ni díhúⁿ cuáaⁿ, ndihí nchaa sá ní cuáha mee-ni díhúⁿ cuixíⁿ, te dícò tucú-yu sá ní cuáha mee-ni yúú vaha yúú nání pèrlá, ndihí nchaa dava-gá sá ní cuáha dava-gá yúú vaha, te dícò-yu tnàhá dóó sèdá, ndihí ingá núú dóó vaha sá nání línú, ndihí dóó muràdú, ndihí dóó tícuèhé te mee-ni dóó vaha cùu-xi, te dícò tucú-yu tnàhá yutnu sá sàháⁿ tnámí, te dícò tucú-yu sá ní cuáha sá nání màrfil, te dícò tucú-yu sá ní cuáha mee-ni yùtnu vaha sá ío ndéyáhu, te dícò tucú-yu sá ní cuáha mee-ni cáá, ndihí sá ní cuáha mee-ni sá nání bròncé, ndihí sá ní cuáha mee-ni yúú vaha yúú nání màrmól. ¹³ Te dícò tucú-yu canèlá, ndihí yúcu sá sàháⁿ tnámí, ndihí dúsa sá sàháⁿ tnámí, ndihí yúcu sá nání mìrrá, te dícò tucú-yu ingá núú dúsa sá sàháⁿ tnámí nani olivánú, te dícò tucú-yu ndudí ndéhé yoho yàha stilé, ndihí acití yutnu nani olívú, ndihí yuchi triú vaha, te dícò tucú-yu nchaa dava-gá núú triú, te

dícò-yu tnàhá mbéé, ndihí cuàyu, ndihí nchaa dava-gá quití tatá, te dícò tucú-yu tnàhá carrèta, te dícò tucú-yu tnàhá ñáyiú xínu cuechi, ñáyiú ñá túú tnàhí dàná quee núú chíúⁿ pàtróoⁿ-xi. ¹⁴ Te nchaa ñáyiú dícò-áⁿ cùñàhá-yu xii ñáyiú ñuú Babiloniá:

—¡Nchaa sá ío cùdíí iní-ndó cundecu ndihí-ndo ní cuu vá ndácú-gá-ndó níhí-ndó vitna, te nchaa sá sání iní-ndó sá ío nchaa càa ndecu ndihí-ndo ndihí nchaa dava-gá sá ndécú ndihí-ndo ní ndihí nihnu-xi vitna, te ní ñⁿ nduu-gá vá ñhí-ndó ní ñⁿ xíáⁿ cundecu ndihí-ndo! —duha cúñaha ñáyiú-áⁿ xii-yu.

¹⁵ Te nchaa ñáyiú ní cuu cuica ní xóo dícò nándi nchaa sá ní xóo dícò ní queheⁿ cue ñáyiú ñuú Babiloniá, nchaa ñáyiú-áⁿ xica-ná cundecú-yu cundèhé-yu sá yùhú-yu cuèndá nchaa tnúndòho sá yàha cue ñáyiú ñuú-áⁿ, te ío ndáhyú-yu sá ndìhú iní-yu sá dúcáⁿ ndòho ñáyiú-áⁿ. ¹⁶ Te cúñaha tucú-yu:

—¡Ndàhú nchòhó ñáyiú xíndecu ñuú cáhnú ñuú nání Babiloniá! Chi nchòhó cúu-ndó dàtná ñⁿ ñadìhí ñaha ñihnu dóó vaha dóó muràdú, ndihí dóó tícuèhé, te mee-ni sá ní cuáha díhúⁿ cuáaⁿ, ndihí mee-ni sá ní cuáha yúú vaha yúú nání pèrlá, ndihí sá ní cuáha dava-gá yúú vaha sá ío vii ndáa mee-ni nchaa xíáⁿ ní cuáha sá yíhí lóho-aⁿ, ndihí sá ñúhú dúcúⁿ-aⁿ, ndihí sá ñúhú dúcúⁿ ndàhá-áⁿ. ¹⁷ ¡Te uuⁿ ní ní ndihí nihnu nchaandi túhú sá ndécú ndihí ñadìhí-áⁿ, te ducaⁿ sàtnahá-xi cùu nchòhó ní cùu! —duha cúñaha-yu xii cue ñáyiú ñuú Babiloniá.

Te nchaa cue téé dàcaca barcú ndihí nchaa cue téé tàxi tnuní bàrcú-áⁿ, ndihí nchaa ñáyiú ñuú xití bàrcú-áⁿ, ndihí nchaa dava-gá cue téé nándi chiúⁿ quide ndecu lamár, nchaa ñáyiú-áⁿ xica cundecú-yu ¹⁸ te quíni-yu òré quene ñúhmá cáyú ñuú cue ñáyiú

Babiloniá, te níhi cáháⁿ-yu, te cachí-yu:

—Ni ñⁿ ñuú ñá túú nŭtnahá-xi ñuú Babiloniá —duha cáháⁿ-yu.

19 Te nchaa ñáyiⁿ-áⁿ chídó-yu ñuhu díquǐ-yu, te ngüíta-yu ndáhí-yu sá ndìhú iní-yu, te níhi cáháⁿ-yu, te cachí tucú-yu:

—¡Ndàhú nchòhó ñáyiⁿ xĩndecu ñuú cáhnú ñuú nání Babiloniá! Chì ío cuica-ndo ní cùu, te ñiⁿ-ndo ní quide ní cuu cuica nchaa ñáyiⁿ ndècu ndìhi barcú, te vitna uuⁿni ní ñaa-ndo ndìhi ñuú-ndó —duha cachí-yu.

20 Te nchaa nchòhó ñáyiⁿ ndècu andiⁿ ío chí cúdǐ iní sá dúcáⁿ dándoho Yá Ndiòxí nchaa ñáyiⁿ ñuú Babiloniá-áⁿ, te ñiⁿ-ni ducaⁿ chí cúdǐ iní nchaa nchòhó cue téé ní cachí Xítoho Jesucristú cáháⁿ tnúhu-gá, te ñiⁿ-ni ducaⁿ chí cúdǐ iní nchaa nchòhó cue téé cáháⁿ tnúhu Yá Ndiòxí nàcuáa dàcahu iní ñáhá-gá xii-ndo, te ñiⁿ-ni ducaⁿ chí cúdǐ iní nchaa dává-gá nchòhó ñáyiⁿ cùu cuendá-gá cuendá sá dúcáⁿ dándoho-gá nchaa ñáyiⁿ ñuú-áⁿ. Te ducaⁿ càda ñaha-gá xii cue ñáyiⁿ-áⁿ cuendá nchaa sá quidé ñáhá-yu xii-ndo.

21 Te sátá dúcáⁿ te ní xiní-í ñⁿ espíritú xinú cuèchi núú Yá Ndiòxí, te espíritú-áⁿ ño ndee-xi te ní queheⁿ-xi ñⁿ yúú cáhnú dàtná càhnu yódó te ní dáquèe-xi xití ndute làmár, te càchí-xi:

—Dàtná ní quide-í ní dáquèe-í yúú xití ndute ducaⁿ càda-xi ñuú cáhnú ñuú Babiloniá, chí ñáyiⁿ ñuú-áⁿ ño ndìhi naá-yu ndìhi ñuú-yu, te vá ñⁿ ndùu ñⁿ quíú-gá quini ñáhá ñáyiⁿ xii-yu. 22 Te ni ñⁿ-gá ñáyiⁿ càni arpá, te ni ñⁿ-gá ñáyiⁿ tiú vǐlu, te ni ñⁿ-gá ñáyiⁿ tiú cútú, te ni ñⁿ-gá yáá vá cóo ñuú-áⁿ, te ni ñⁿ-gá cue ñáyiⁿ xiní cada ñⁿ núú chiúⁿ vá cóo-gá, te ni vá yóo-gá canehe chiúⁿ yúú cúú yódó mullnú.

23 Te ni ñⁿ-gá ñuhú vá cùndècu ñuú-áⁿ, te ni ñⁿ nduu-gá vá cóo víco tnándaha, te ñáyiⁿ ñuú-áⁿ ñáyiⁿ quide ndáhú cúu-yu ñáyiⁿ ío-gá cuicá-yu dàcúúxí ñáyiⁿ quide ndáhú xĩndecu níhi ñuyíú, dico nchaa-yu naá-yu chí quide nduú-yu te ío dándahú-yu cue ñáyiⁿ ñuyíú sá dúcáⁿ quidé-yu.

24 Te ñiⁿ-ni ñuú-áⁿ ní dácáçá-yu níñí cue téé ní cáháⁿ tnúhu Yá Ndiòxí, te ñiⁿ-ni ducaⁿ ní quidé-yu nchaa dává-gá cue ñáyiⁿ cùu cuendá-gá, te ñiⁿ-ni-yu quide xísahni tnàha ñáyiⁿ ñuyíú —duha càchí espíritú-áⁿ.

19

1 Te sátá dúcáⁿ te ní tecú dóho-í níhi ní cáháⁿ cuéhé víhi ñáyiⁿ andiⁿ, te càchí-yu:

¡Ío càhnu cuu Yá Ndiòxí!, chí ñiⁿ-gá cúú-gá Yáá ní dácáçú nihnu ñaha xii-o núú ùhú núú ndàhú, te ío cùnuu-gá, te mee-ni sá vaha quide-gá,

2 te mee-gá ío váha ndáá quidé-gá quidé ndáá-gá cuèchi nchaa ñáyiⁿ,

chí ñiⁿ-gá ní dáquihíⁿ-gá ñadìhí ñaha ndècu ichi dǐ iní núú ùhú núú ndàhú,

chí ñiⁿ-aⁿ ní sanu ichi-aⁿ ñáyiⁿ ñuyíú ichi cuéhé ichi duha,

te ducaⁿ ní dáquihíⁿ ñáhá-gá xii-aⁿ núú ùhú núú ndàhú chí nàchinaa-gá sá ní sahní-aⁿ cue ñáyiⁿ ní xinú cuèchi núú-gá.

Duha càchí-yu.

3 Te càchí tucú-yu:

—¡Ío càhnu cuu Yá Ndiòxí!, chí nchaa nduu nchaa quíú ducaⁿ-ni quène ñúhmá núú ñúhú ñaha-áⁿ càyú-aⁿ —duha càchí-yu.

4 Te ndí òcò cùmí cue téé cùu sacuéhé xĩndecu-áⁿ ní ngüíñí xití-güedè núú Yá Ndiòxí núú núcòo-gá táxí tnùní-gá, te tnàhá cue quití cùmí xĩnutnǐ-áⁿ ní ngüíñí

xítí-güedi núú-gă, te cue téé-án cächí-güedé ndihi cue quiti-án:

—Sá ndáa sá ío cànhu cuu Yá Ndiöxí —duha cächí-güedé ndihi cue quiti-án.

⁵ Te sátá dúcáⁿ te ní tecú dóho-í ní cáháⁿ ìⁿ sá ní cáháⁿ mei núú nútní xilé váha núcáo Yá Ndiöxí, te cächí sá cáháⁿ-án:

Nchaa nchòhó ñáyiú xínu cuechi núú Yá Ndiöxí, ñu-ni nchòhó ñáyiú nèhe sá yíñuhu núú-gă,

cáháⁿ-ndó sã ío cànhu cuu-gá cuèi cùnno-ndo àdi ñá túú cùnno-ndo.

Duha cächí sá cáháⁿ-án.

Íⁿ vico cùu datná vico tnãndaha

⁶ Te sátá dúcáⁿ te ní tecú dóho-í ní cáháⁿ cuéhé víhí ñáyiú andíu, te òré ducaⁿ ní cáháⁿ-yu te ní quide-xi dàtná quidé-xí núú xícá cuéhé víhí ndüte, te ní quide tucu-xi dàtná quidé-xí òré cáháⁿ níhi víhi ñúhu, te cächí-yu:

Ío cànhu cuu Dútú Ndiöxí Yaa cúú Tátá-ó! Te ío cùnno-gá táxi tnùnigá, te quide-gá nchaandi túhú sá váha.

⁷ Te ío chí ná cùdíí iní-ó, te chí ná cächí-ó sã ío cànhu cuu Yá Ndiöxí,

chi vitna ní sáá nduu càda Yaa cáá dàtná cáá ìⁿ mbéé quiti ní dánícuéhé-güedé ìⁿ vico, te cùu-xi datná vico tnãndaha.

Te nchaa ñáyiú cùu cuendá-gá sa ní ndíhi-yu sa ndècu túha-yu cundecú-yu vico-án, te cada iní-ó sã ñáyiú-án cùu-yu dàtná ìⁿ ñadìhí xíchí tnãndaha ndíhi-gá,

⁸ te ñáyiú-án ní nduu táhü-yu cuíhnú-yu dóó váha dóó chàhnchí sá ío váha càndoo.

Duha cächí-yu.

Te sátá dúcáⁿ ní nduu táhü ñáyiú cùu cuendá Yá Ndiöxí dóó váha ñíhnú-yu, xiãⁿ cùtnuní iní-ó sã cùu-yu ñáyiú quide ndáá núú-gă.

⁹ Te ìⁿ espíritú xínu cuèchi núú Yá Ndiöxí ní cächí tnúhu-xi xii-í, te cächí-xi:

—Chido tnùnín ìⁿ núú tùtú nàcuáa ña cáháⁿ-í-a: “Váha táhü nchaa ñáyiú ní cáháⁿ ñáhá Yaa cáá dàtná cáá ìⁿ mbéé quiti ní dánícuéhé-güedé cundecú-yu vico, te vico-án cúu-xi dàtná vico tnãndaha cada-gă”, te duha chido tnùnín chi tnúhu-a cùu-xi tnúhu ndáá tnúhu Yá Ndiöxí —duha cächí espíritú-án.

¹⁰ Te ní ngüíñí xítí-í núú espíritú-án cuendá chiñuhu-í-xi ni cùu, te ní cächí-xi:

—Vá dúcáⁿ càda-n, chi tnàhá-í dícó xínu cuèchi-í núú Yá Ndiöxí dàtná quidé-n xínu cuechi-n núú-gă ndihi nchaa dava-gă ñáyiú ndècu ndíhi-n ichi-gá, ñáyiú nchícúⁿ ni hnu quide ni yuhu ni iní nchaa nàcuáa cáháⁿ Xítóhó Jesucristú, te núu xiãⁿ cächí-í sá vá dúcáⁿ càda-n, chi mee Yá Ndiöxí chiñuhu-n —duha cächí espíritú-án.

Te nchaa cue téé cáháⁿ tnúhu Yá Ndiöxí cáháⁿ-güedé nàcuáa nduu tnúhu cáháⁿ Xítóhó Jesucristú.

Cuendá Yaa yódó ìⁿ cuayú cuixíⁿ

¹¹ Te ní xiní-í nchi andíu, te ní xiní-í ní quee ìⁿ Yaa yódó-gă ìⁿ cuayú cuixíⁿ. Te Yaa-án nánigă Yaa quidé ndáá cuiti, duha nàni-gă. Te quide-gá nchaa sá cáháⁿ-gă, te ío váha quide ndáá-gă cuèchi nchaa ñáyiú, te nchaa ñáyiú nàa ndíhi ñaha xii-gă ío váha xiní-gă nàcuáa cada ñaha-gă xii-yu chi ío ndáá quidé-gă. ¹² Te tinùu-gă dáyèhé-xi dàtná dáyèhé ñuhú, te titní coróná ñuhú díquí-gă, te nèhe-gă ìⁿ sá ndéé ñu-gă, te vá yóo ìⁿ cùtnuní iní-xi nása cuáháⁿ tnúhu-án, chi ìⁿ dii díi-ni mee-gă náhá-gă nàcuáa cáháⁿ-xi.

¹³ Te Yaa-án ñíhnú-gă ìⁿ dóó ní cuu mee-ni ñíñí, te Yaa-án cächí tnúhu-gă nchaa nàcuáa sàni iní Yá Ndiöxí, núu xiãⁿ nánigă Tnúhu Yá Ndiöxí. ¹⁴ Te sátá-gă nchícúⁿ nchaa

espíritu xínú cuèchi núú Yá Ndiòxí, te cue espíritu-áⁿ cúu-xí dàtná sandadú, te xíxihnu-xi dóó cuixíⁿ dóó vâha sá cãndò, te xíxódó-xi cuàyú cuixíⁿ. ¹⁵ Te yuhu Yaá yódónù-áⁿ quéné ìⁿ yuchí cáhnú, te ndihí yuchí-áⁿ dãnícuehè-gá nchaa ñáyíu xĩndecu ñuyú, te ío dandòho ñaha-gá xii-yu, te dàtná quidé tée quihni ndéhé yoho yâha stilé ducaⁿ sãtnahá-xi cada ñaha-gã xii-yu, chi ío dandòho ñaha-gã xii-yu cuëndá sá ío cùdéeⁿ-gã. Te mee-gã ío cùnuu-gá táxi tñuní-gá, te quide-gá nchaandi túhú sá vâha. ¹⁶ Te sátá dõó níhnú Yáá-áⁿ ndihí núú ticácáⁿ-gã yódó tñuní nãcuáa nãni-gá, te duha càháⁿ-xi: “Tée ío cùnuu taxi tñuní ñáhá xii nchaa cue tée yĩndaha ñaha xii ñáyíu ndihí nchaa dava-gá ñáyíu”, duha ndée tñuní sátá dõó-gã-áⁿ ndihí ticácáⁿ-gã-áⁿ.

¹⁷ Te dàtnúní ní xini-í ìⁿ espíritu xínú cuèchi núú Yá Ndiòxí nùtní-xi núú nchĩcanchii, te níhi ní càháⁿ-xi, te xãha-xi xii nchaa quiti ndava núú tãhí:

—Nchaa nchòhó quiti ndàva, chí táquixi chi caxi-ndo nchaa sá ñi quide túha Yá Ndiòxí, ¹⁸ chi caxi-ndo cùñú nchaa cue tée yĩndaha ñaha xii ñáyíu, ndihí cuñú nchaa cue tée tàxi tñuní ñáhá xii cue sandadú, ndihí cuñú nchaa cue tée ío ñí xĩndáa, ndihí cuñú nchaa cuàyú, ndihí cuñú nchaa cue tée ní xódó ñaha xii-güedi, ndihí cuñú nchaa dava-gá ñáyíu, ñáyíu ñá túú tñahí ní dàñá quee núú chíúⁿ pãtróóⁿ-xi, ndihí cuñú nchaa ñáyíu ní dàñá ñi quee núú chíúⁿ pãtróóⁿ-xi, ndihí cuñú nchaa ñáyíu cùnuu, ndihí cuñú nchaa ñáyíu ñá túú cùnuu, te nchaa cuñú-áⁿ caxi-ndo —càhí espíritu-áⁿ xãhaⁿ-xi xii nchaa quiti-áⁿ.

¹⁹ Te sátá dúcáⁿ te ní xini tucu-í quiti ní quene xití làmár, ndihí nchaa cue tée yĩndaha

ñaha xii ñáyíu, ndihí nchaa cue tée cùu sandadú-güedé ní naníhí tñahá-güedé ndihí quiti-áⁿ cuëndá cuu ìⁿnuu-güedé ndihí-di nãá-güedé ndihí Yaá yódó cuàyú-áⁿ, ndihí nchaa cue espíritu cúu sandadú ndihí-gá. ²⁰ Te cue espíritu cúu sandadú ndihí Yaá-áⁿ ñi tñi-xi quiti-áⁿ, ndihí tée ío dandahú ñáhá xii ñáyíu càhí sá càháⁿ tñúhu Yá Ndiòxí te ñá ndáa sá càháⁿ-dé tñuhu-gá, te ñi-ni té-áⁿ ñi quide-dé titni núú sã vã yõ tñahí ndãcu cada núú quiti-áⁿ. Te sá dúcáⁿ ñi quide té-áⁿ xiãⁿ ní dandahú-dé ñáyíu ní sãndáa iní-yu ní quée-yu tñuní quiti-áⁿ, te ní chiñùhú-yu sá ñi dãndácú ñahá-yu xii-di, te cue espíritu-áⁿ ní dáquée-xi quiti-áⁿ núú ñùhú núú ñùhú àzufré càyú-xi, ndihí tée ducaⁿ dandahú ñáhá xii ñáyíu-áⁿ, te xiãⁿ cuhuⁿ té-áⁿ ndihí quiti-áⁿ, te ío ndoho-dé ndihí-di. ²¹ Te ndihí yuchí cáhnú sã quéné yùhu Yaá yódó cuàyú-áⁿ ñi sahni-gã nchaa dava-gá cue tée cùndihí quiti-áⁿ, te nchaa cue quiti ndàva ní chítú xití-güedi ní xexi-güedi cuñú nchaa cue té-áⁿ.

20

Úxí ciendú cuía

¹ Te sátá dúcáⁿ te ní xini-í ìⁿ espíritu xínú cuèchi núú Yá Ndiòxí ní quee-xi andíu, te nùndaha-xi ndacaá nacaáⁿ-xi yèhe ìⁿ yaú cùnú víhí núú cùndecu sãcuíhná, te nùndaha tucu-xi ìⁿ cadená cáhnú. ² Te espíritu-áⁿ ñi tñi-xi quiti déeⁿ nãní drãgón, te ñi-ni quiti-áⁿ cúu-dí mèi yucu ñãvãha sã nãní sãcuíhná, te ñi xiãⁿ ní nduu-xi cóo ndée sanaha. Te espíritu-áⁿ ñi dácútú ñaha-xi xii-di, te ducaⁿ-ni cùndutu-di ndée xínu úxí ciendú cuía. ³ Te sátá ñi dácútú ñaha espíritu-áⁿ xii-di te ní dáquée ñaha-xi xii-di yaú-áⁿ chi ñi yaú-áⁿ tàú-di quée-di cundecu-di. Te ní nacadí-xi yuyèhe yaú-áⁿ, te ní tee-xi sèyú yuyèhe-áⁿ cuëndá sá vã

quéné-gã-di dandàhú-di cue ñáyi
ñuyú, te xiáⁿ cudedí nihnu-di
ndéé xínu úxí cièndú cuía. Te
sátá ná yáha úxí cièndú cuía-áⁿ te
nandáxi-di te quene-di yaú núú
ñúhú-dí-áⁿ caca cuu tnaa-di ñⁿ úú
nduu.

⁴ Te dàtnùní ní xiní-í xínutnì ò títí
xilé váha, te xiáⁿ xínucóo ncha
ñáyi ní ngúndecu ndihí tñúhu ndee
íní cada ndáá cuéchi ncha ñáyi, te
ní xiní-í xíndecu tñhá cue ñáyi ní
xehndé-güedé dúcúⁿ-xi cuèndá sá
ní cáháⁿ-yu tñúhu Yá Ndióxi, ndihí
cuèndá sá ní cáháⁿ váha-yu cuèndá
Xítóhó Jesucristú. Te diu-ní ñáyi-áⁿ
cúu-yu ñáyi ñá túú ní chñuhú-yu
quiti ní quene xití lámár-áⁿ, te
ní ñà túú ní chñuhú-yu sá ní
dándácú ñáyi ní natava ñhá-yu
xii-di, te ní ñà túú ní dàñá-yu
mèe-yu quée-yu tñuní quiti-áⁿ chi
ní tnéé-yu te ní ndàhá-yu ñá túú
ní dàñá-yu quée tñuní-di. Te ní
xiní-í ní ndoto cue ñáyi-áⁿ cuèndá
tñhá-yu cunúú-yu taxi tñuní-yu
ndihí Xítóhó Jesucristú úxí cièndú
cuía. ⁵ Te dava ñáyi ní xihí ñá
túú ní ndótó-yu, chi ndéé yáha úxí
cièndú cuía te dàtnùní ndotó-yu. Te
ñáyi ní xiní-í ní ndoto-áⁿ cúu-yu
ñáyi ní ndoto díhna nuu. ⁶ Te
ío váha ní tnahá ncha ñáyi ní
nduu táhú ní ndoto díhna nuu!,
chi cue ñáyi-áⁿ ío cùdiú-yu núú
Yá Ndióxi, te ncha ñáyi-áⁿ vã
quihíⁿ-yu núú ùhú núú ndàhú,
te ñáyi-áⁿ cúu-yu dutú ndécú-yu
núú Yá Ndióxi ndihí núú Xítóhó
Jesucristú, te ñáyi-áⁿ cunúú-yu
dàtná cunúú Xítóhó Jesucristú, te
cunuu ndihí ñhá-yu xii-gá úxí
cièndú cuía.

⁷ Te sátá ná yáha úxí cièndú
cuía-áⁿ te sácúíhná quee-xi núú
yíndedí nihnu-xi-áⁿ, ⁸ te ngúíta
tucu-xi dandàhú-xi ncha ñáyi
xíndecu nihí ñuyú, te cuéi ñáyi
ñúú Gög, te cuéi ñáyi ñúú Màgóg
ducaⁿ quihíⁿ-xi dandàhú ñhá-xi

xii-yu, te datácá-xi ncha ñáyi
cuèndá nàa-yu, te cuéé víhí-yu
dàtná cuéé ñuhu cúhí lámár.
⁹ Te ncha ñáyi-áⁿ tñi-yu ichi
quihíⁿ-yu ñⁿ ichi sá cuàháⁿ núú
cáá ñⁿ yodo cahnu vihi, te sáa-yu
núú xíndecu ñáyi cùu cuèndá
Yá Ndióxi, te ñáyi-áⁿ chidócó-yu
cue ñáyi cùu cuèndá-gá-áⁿ ndihí
ñúú-yu, te ñúú-áⁿ ío cùu iní-gá,
dico mee Yá Ndióxi dangòyo-gá
ñuhú cahmi-gá ncha ñáyi
ducaⁿ chidoco ñaha xii ñáyi cùu
cuèndá-gá-áⁿ, te ncha ñáyi-áⁿ
cuú. ¹⁰ Te sácúíhná sã dúcáⁿ
dandàhú ñhá xii ñáyi chidoco
ñaha xii ñáyi cùu cuèndá Yá
Ndióxi-áⁿ dàquée ñaha-gã xii-xi núú
ñuhú núú ñuhú àzufre càyú-xi, te
diu-ni xiáⁿ sa ñuhu quiti ní quene
xití lámár, ndihí téé ní dandàhú
ñáyi ní xáhaⁿ-dè xii-yu sá cáháⁿ-dé
tñúhu Yá Ndióxi te ñá ndáá sá
cáháⁿ-dé tñuhu-gá, te xiáⁿ cuhuⁿ-xi
ndoho-xi ní caa ní quihíⁿ ndihí quiti
ní quene xití lámár, ndihí téé càhí
sá cáháⁿ tñúhu Yá Ndióxi te ñá ndáá
sá cáháⁿ-dé tñuhu-gá.

Cùndáá cuéchi ñáyi

¹¹ Te ní xiní-í nùtnì ñⁿ xilé váha
xilé cuixíⁿ, te núú xilé-áⁿ núcóo ñⁿ
Yaá. Te ndèhe Yaá-áⁿ ní ndóñúhú
àndiu ndihí ñuyú-a, te ducaⁿ ní
ndóñúhú-xi chi vá cùndecu-gá-xi.
¹² Te sátá dúcáⁿ te ní xiní-í ncha
ñáyi ní xihí ní cùu, ñáyi cunuu
ndihí ñáyi ñá túú cunuu xínutnì-yu
núú Yáá núcóo núú xilé váha-áⁿ, te
Yaá-áⁿ cúu-gã Yá Ndióxi, te óré-áⁿ ní
nandicá ncha tutú núú yódó tñuní
ncha nàcuáa nduu sá ní quide ñⁿ
ñáyi-áⁿ, te ní nandicá tucu ingá
tutú núú yódó tñuní ncha ñáyi ní
nanihí tàhú, te ncha ñáyi ní xihí
ní cùu xínutnì-yu núú Yá Ndióxi
cundáá cuéchi-yu, te ncha nàcuáa
nduu ncha cuéchi-yu yodo tñuní
núú nchaa tutú-áⁿ ducaⁿ cùndáá.
¹³ Te ncha ñáyi ní xihí xití ndute
lámár, ndihí ncha ñáyi ní xihí núú

ñuhu yìchí nchaa ñáiyu-áⁿ cundáá cuéchi-yu nàcuáa ní quidé-yu ìⁿ ìⁿ-yu. ¹⁴ Te vitna te vá cùu-gá ñáiyu chi ñá túú-gá tnúhu xihí, te nchaa ñáiyu ñuhu núú ñùhú núú càyú ñáiyu-áⁿ cùu-yu ñáiyu ní xíta nihnu ní caa ní quíhíⁿ. ¹⁵ Te ducaⁿ chi nchaa ñáiyu ñá túú yòdo tnuni núú tütú núú yódó tnùnì nchaa ñáiyu naníhí tàhú ní dáquèe ñaha Yá Ndiòxí xii-yu núú ñùhú núú càyú.

21

Andiu sàa ndihi ñuyú sáa

¹ Te sátá dúcáⁿ te ní xiní-í andiu sàa ndihi ñuyú sáa, te andiu sà ndécú ðìhna ndihi ñuyú sà ndécú ðìhna ní ndóñúhú-xí, te tnàhá làmár ní ndóñúhú-xí. ² Te yúhú te Juáá ní xiní-í ñuú Jerusàlén sáa ní quée-xi núú ndécú Yá Ndiòxí, te ñuú-áⁿ cùu-xí ñuú méé-gá, te ío vii càa chì càa datná cáa ìⁿ ñadìhí xíchí tnàndaha. ³ Te ní tecú dóho-í níhi ní cáháⁿ ìⁿ sá ní cáháⁿ andiu, te càchí-xi:

—Chí cùndèdóho ìⁿ tnúhu na càháⁿ-í-a: Yá Ndiòxí ndécú ndihi-gá cue ñáiyu vitna, te ducaⁿ-ná cundecu ndihi ñaha-gá xii-yu, te ðiu-yu cùu-yu ñáiyu cùu cuendá-gá, te vá ìⁿ ndùu ìⁿ quíú-gá te dañà ñaha-gá xii-yu. ⁴ Te mee Yá Ndiòxí cada-gá sá ñà túú tnàhí-gá ná canì iní-yu cundecú-yu, te ní vǎ quìní-gá-yu tnúhu xihí, te ní vǎ quìní-gá-yu tnúhu ndàhyú, te ní vǎ quìní-gá-yu tnúhu ndihú iní-xi, te ní vǎ quìní-gá-yu tnúhu cùhú, chi nchaa sá ní xiní-yu ñuyú ðìhna vá quìní-gá-yu vitna —duha càchí sá ní cáháⁿ-áⁿ.

⁵ Te Yáa núcòo núú xilé váha-áⁿ ní cachí tnúhu-gá xii-í, te càchí-gá:

—Yúhú quídè-í nàcuáa nduu saa nchaa sá cùndècu vitna. Te vitna chido tnùnì-n ìⁿ núú tütú nchaa tnúhu sá ní cáháⁿ-í-a, chi nchaa tnúhu-a cùu-xi tnúhu ndáa cuiti —duha càchí-gá.

⁶ Te dàtnùnì ní cachí tnúhu tucu-gá xii-í:

—Sa ní xínu cava nchaa chiuⁿ ní sani iní-í cada-í, te ðiu-ni yúhú cùu-í Yáa sa ndècu ndéé cùtnàhá ní ngáva ñuyúú, te ðiu-ni-í cundecu-í ní caa ní quíhíⁿ. Te nchaa ñáiyu cùnì tuha ñaha xii-í te cada iní-yu sá dàtná ndute cùu-xi sá cuáñaha tǎhú-í xii-yu candeca-xi iní-yu ní caa ní quíhíⁿ. ⁷ Te nchaa ñáiyu na cùndee iní yáha nándi sá ná yáha-yu sá cuendá-í, te ñáiyu-áⁿ nduu tǎhú-yu cundecu váha-yu, te yúhú cuu-í Ndiòxí-yu, te ducaⁿ méé-yu cuú-yu déhe-í. ⁸ Te nchaa ñáiyu na yúhú ndoho cuendá-í quíhíⁿ-yu núú ñùhú núú càyú ndihi ñáiyu ñá túú sàndáá iní ñáhá xii-í, ndihi ñáiyu quide nándi nchaa sá cuèhé sá dúhá, ndihi ñáiyu sǎhni tnaha, ndihi ñáiyu ndècu ichi ðí ìní, ndihi ñáiyu quide nduu, ndihi ñáiyu chìñuhu nchaa sá càchí-yu cùu ndiòxí ní cadúha cue tée ñuyúú-a, ndihi ñáiyu dàcuandehnde, nchaa ñáiyu ducaⁿ xiquide-áⁿ cuita nihnú-yu chi quíhíⁿ-yu núú ñùhú núú ñùhú àzufré càyú-xi —duha ní cáháⁿ Yá Ndiòxí ní cachí tnúhu-gá xii-í.

Ñuú Jerusàlén sáa

⁹ Te núú ùsá espíritú xínehe tícùu ñùhú tnúhu ndòho, te ìⁿ-xi ní quixi-xi te càchí-xi:

—Taquixi, te na dànehé ñàhá-í xii-n nchaa ñáiyu cùu cuendá Yá cáa dàtná cáa ìⁿ mbéé quiti ní dánicuèhé-güedé, ñáiyu-áⁿ cada iní-n sá cùu-yu dàtná ìⁿ xíchí cuéchí vitna tnàndaha, te ducaⁿ càda iní-n sá cùu-yu chi cundecú-yu ndihi-gá —duha ní cachí tnúhu espíritú-áⁿ xii-í.

¹⁰ Te òré quídé ñàha espíritú Yá Ndiòxí xii-í nàcuáa càchí iní-xi, te espíritú néhé tícùu-áⁿ ndécá ñàha-xi xii-í cuásaá ìⁿ tìndúú dùcúⁿ, te xíáⁿ ní dànehé núú ñáhá-xi xii-í ñuú Jerusàlén te ñuú-áⁿ ní quée-xi

núú ndécú Yá Ndiöxí, te ñúú-án cúú-xí ñúú méé-gá. ¹¹ Te ñúú-án ïo càhnu cuu-xi chi ducaⁿ ïo càhnu cuu mee-gá, te dátásaⁿ-xi dátá dátásaⁿ yúú vâha sá nání jâspé yúú cáá dátá cáá vidriú sá tûu ingá xio ndâa sátá-xi. ¹² Te ni càndéé yuhu ñúú-án sũúni ðúcúⁿ nchaa sá ñúhú ðoco, te nchií úxúú yuyèhe-xi, te ndi tnahá ìⁿ ìⁿ yuyèhe-án xîndecu ìⁿ caa espíritú xínú tuèchi núú Yá Ndiöxí. Te ndi tnahá ìⁿ ìⁿ yuyèhe-án yódó tnùnì ðiú ìⁿ caa xichi cue ñáyiú isrâél. ¹³ Te úní yuyèhe-xi nchií ndâa xio nacuaá quène nchíanchii, te úní tucu yuyèhe-xi nchií ndâa xio cuha nacuaá quène nchíanchii, te úní tucu yuyèhe-xi nchií ndâa xio datni nacuaá quène tucu nchíanchii. ¹⁴ Te sá ñúhú ðoco-án chi úxúú tnahá yúú cúú cîmientú-xi, te ndi tnahá ìⁿ ìⁿ yúú-án ndèé ìⁿ caa ðiú cue téé ní cáháⁿ tnúhu Yaá cáá dátá cáá ìⁿ mbéé quiti ní dánicuehé-güedé, te ðiú mee-gá ní táuchíúⁿ-gá ní cáháⁿ-güedé tnúhu-gá.

¹⁵ Te espíritú sá cáháⁿ ndihi ñaha xì-i-án néhé-xí ìⁿ sá cání ní cuáha mee-ni díhúⁿ cuááⁿ, te ndihi xíáⁿ chicùhá-xi ñúú-án, ndihi sá ñúhú ðoco ñúú-án, ndihi nchaa yuyèhe-xi. ¹⁶ Te ñúú-án ìⁿ-ni nèhe-xi cuendá quèhéⁿ-xi ndihi cuendá càni-xi, te espíritú-áⁿ ní chicùhá-xi ndihi sá néhé-xí-áⁿ ñúú-án, te nèhe-xi ócó úú ciéndú mîl mètrú sá cání te ðiú-ni ducaⁿ nèhe-xi cuendá quèhéⁿ-xi, te ðiú-ni ducaⁿ nèhe-xi sá ðúcúⁿ nchaa vehe caa ñúú-án. ¹⁷ Te dátáⁿ ní ní chicùhá-xi sá ñúhú ðoco ñúú-án, te xíáⁿ néhé-xí ùnídico cúmí mètrú sá ðúcúⁿ, te ní chicùhá-xi dátáⁿ chicùhá cue ñáyiú ñuyíú-a.

¹⁸ Te sá ñúhú ðoco-án ní cuáha mee-ni yúú vâha yúú sá nání jâspé, te ñihí ñúú-án cúú-xí mèe-ni díhúⁿ cuááⁿ, te càa datná cáá vidriú sá ïo vâha càndoo te tûu ndâa ingá xio. ¹⁹ Te ndi úxúú yúú cúú cîmientú

sá ñúhú ðoco-án ndèé ndí díⁿ núú yúú vii càa sátá-xi, te yúú díhna ndèé mee-ni yúú vâha sá nání jâspé sátá-xi, te yúú cúú ùú ndèé tucu ingá núú yúú vâha sá nání zâfirú sátá-xi, te yúú cúú ùní ndèé tucu ingá núú yúú vâha sá nání âgatá sátá-xi, te yúú cúú cùmí ndèé ingá núú yúú vâha sá nání èsmeraldá sátá-xi. ²⁰ Te yúú cúú ùhúⁿ ndèé tucu ingá núú yúú vâha sá nání ònicé sátá-xi, te yúú cúú ìñú ndèé tucu ingá núú yúú vâha sá nání còrnalíná sátá-xi, te yúú cúú ùsá ndèé tucu ingá núú yúú vâha sá nání crìsólítú sátá-xi, te yúú cúú ùná ndèé tucu ingá núú yúú vâha sá nání bèrilú sátá-xi, te yúú cúú ìⁿ ndèé tucu ingá núú yúú vâha sá nání tòpacíú sátá-xi, te yúú cúú ùxí ndèé tucu ingá núú yúú vâha sá nání crìsopásá sátá-xi, te yúú cúú ùxí ìⁿ ndèé tucu ingá núú yúú vâha sá nání jàcintú sátá-xi, te yúú cúú ùxúú ndèé tucu ingá núú yúú vâha sá nání âmatístá sátá-xi. ²¹ Te ndi úxúú yuyèhe sá ñúhú ðoco-án cúú-xí mèe-ni yúú vâha sá nání pèrlá, te ndùu ñi yúú cúú ìⁿ ìⁿ yuyèhe-án. Te tnuú cáhnú ndècu xití ñúú-án cúú-xí mèe-ni díhúⁿ cuááⁿ, te càa-xi datná cáá vidriú sá tûu ndâa ingá xio.

²² Te ní xini-í sá ñâ túú vèhe núú chíñúhu ñáyiú Dútú Ndiöxí cáá ñúú-án, chi mee-nâ Dútú Ndiöxí Yaá quidé nchâa-ndi túhú sá vâha ndècu ñúú-án, ndihi Yaá cáá dátá cáá ìⁿ mbéé quiti ní dánicuehé-güedé. ²³ Te ñúú-án ñâ túú-gá xíní ñúhu-xi nchíanchii dayèhé-xi, te ni yóó ñâ túú-gá xíní ñúhu-xi, chi mee-nâ Yá Ndiöxí dáyéhé-gá ñúú-án ndihi Yaá cáá dátá cáá ìⁿ mbéé quiti ní dánicuehé-güedé. ²⁴ Te cue ñáyiú nchaa ñúú cáá ñuyíú, ñáyiú ní naníhí tàhú xîndecu ñúú-án dáyéhé-gá núú-yu, te nchaa cue téé yîndaha ñaha xii-yu nèhe-güedé sá

yíñùhu sá cúú-xí ñùú-áⁿ, te guide cahnu ñaha-güedé xii-gá. ²⁵ Te yuyèhe ñuu-áⁿ ñà túú tnàhí nàndedí, te ñuu-áⁿ ñà túú tnàhí cùndiquíⁿ. ²⁶ Te nchaa ñáyiú nèhé-yu sá yíñùhu sá cúú-xí ñùú-áⁿ te guide cahnú-yu Yá Ndióxi. ²⁷ Te ñuu-áⁿ vâ cúú cùndecu ni ìⁿ ñáyiú ndècu ichi cuehé ichi duha, te ni ìⁿ ñáyiú ndehnde, te ni ìⁿ ñáyiú guide sá ñà túú cùu váha iní Yá Ndióxi vâ cúú cùndecú-yu ñuu-áⁿ, chi mee-ni ñáyiú naníhí tàhú ñáyiú yòdo tnuní núú tütú Yaá cáá dàtná cáá ìⁿ mbéé quití ní dánicuehé-güedé, mee-ni ñáyiú-áⁿ cundecú-yu ñuu-áⁿ.

22

¹ Te sáta dúcáⁿ te ñu-ni espíritu-áⁿ ní dánèhé núú ñáhá-xí xii-í yúte núú ñúhú ndùte candoo canine, te ndute-áⁿ candeca-xi iní ñáyiú ni caa ni quíhíⁿ, te ndute-áⁿ quée-xí mèi núú núcõo Yá Ndióxi ndihí Yaá cáá dàtná cáá ìⁿ mbéé quití ní dánicuehé-güedé. ² Te cuádava tnuú cáhnú yáha xití ñuu-áⁿ cáá yúte-áⁿ, te xio xio yuhu yúte-áⁿ níhnú yùtnu cuuⁿ sávidí-xi, te sávidí nchaa yutnu-áⁿ cúú tucu-xi sá cándeca iní ñáyiú ni caa ni quíhíⁿ, te nchaa yutnu-áⁿ cúúⁿ sávidí-xi úxúú xito ìⁿ cuía chi ndi tnahá yóó cúúⁿ sávidí-xi, te nchaa ndaha-xi cùu-xi tátna sá cúú-xí nchaa ñáyiú. ³ Te vâ yõo ìⁿ-gá cada ìⁿ sá ñà túú cùu váha iní Yá Ndióxi ñuu-áⁿ. Chi ñuu-áⁿ núcõo mee Yá Ndióxi ndihí Yaá cáá dàtná cáá ìⁿ mbéé quití ní dánicuehé-güedé xítaxi tnùní-gá, te nchaa ñáyiú xinu cuechi núú-gá cada càhnu ñahá-yu xii-gá. ⁴ Te nchaa ñáyiú-áⁿ cundehe núú-yu Dútú Ndióxi, te tneé-yu cundeé ñu-gá. ⁵ Te ñuu-áⁿ vâ quíni-gá-yu niú, te ni vâ cánèhe chiuⁿ-gá-yu ñuhú cutnùní núú-yu, te ni nchíanchii ñá túú-gá xíní ñùhu-xi dayehé ñuu-áⁿ chi mee Dútú Ndióxi dáyhé-gá, te ni caa

ni quíhíⁿ cunúú-yu cundecú-yu ñuu-áⁿ.

Sa ta cùyatni nduu quixi tucu Xítohó Jesucristú

⁶ Te sáta dúcáⁿ te ní cachí tnúhu espíritu xínú cuèchi núú Yá Ndióxi-áⁿ xii-í:

—Nchaandi túhú tnúhu-a cùu-xi mee-ni tnúhu ndáá cuiti. Te Yá Ndióxi Yaá dácàhu iní nchaa cue téé càháⁿ tnúhu-gá nàcuáa cáháⁿ-güedé ní tendaha-gá ìⁿ espíritu xínú cuèchi núú-gá ní quixi-xi ní dánèhé-xi nchaa ñáyiú xínu cuechi núú-gá nchaa nàcuáa cada-gá, te vâ cùyaa-gá ducaⁿ càda-gá —duha càchí espíritu-áⁿ.

⁷ Te ní cáháⁿ Xítohó Jesucristú, te càchí-gá:

—Ío ndíhi quixi tucu-í!

‘Te ío váha tnahá nchaa ñáyiú tnèi nchaa tnúhu càháⁿ Yá Ndióxi yódó tnùní núú tütú-a! —duha càchí-gá.

⁸ Te yúhú té Juáá ní tecú dóho-í nchaa nàcuáa ní ngódó tnùní núú tütú-a, te ní xíní núú-í nchaa nàcuáa cada-xi ndéé cueé-gá. Te sáta dúcáⁿ ní cuu te ní ngüíñí xití-í núú espíritu sá ní dánèhé núú ñáhá nchaa xíáⁿ cuendá chiñuhu-í-xi ni cùu. ⁹ Te ní cachí-xi:

—Vá dúcáⁿ càda-n, chi yúhú dícó xínú cuèchi-í núú Yá Ndióxi dàtná cúú yòhó ndihí nchaa dava-gá ñáyiú ndècu ndihí-n ichi-gá càháⁿ-ndó tnúhu-gá, ndihí nchaa ñáyiú tnèi nchaa tnúhu ndéé núú tütú-a, te xíáⁿ càchí-í sá vâ dúcáⁿ càda-n, chi mee Yá Ndióxi ducaⁿ chiñuhu-n-gá —càchí espíritu-áⁿ xii-í.

¹⁰ Te ní cachí tnúhu tucu-xi xii-í, te càchí-xi:

—Vá chídàhu-n ni ìⁿ tnúhu Yá Ndióxi ndéé núú tütú-a, chi sa ní cuyatni cada-xi nchaa nàcuáa ndéé tnuní. ¹¹ Te dañá sá ncháá ñáyiú ndècu ichi cuehé ichi duha na cùndecu-ní-yu ichi-áⁿ, te ducaⁿ-ni dañá-n nchaa ñáyiú guide nándi-gá nchaa sá cuèhé sá dúhá ná càda nahi-ni-yu nchaa sá cuèhé sá

dúhá sàni iní-yu, te nchaa ñáyi
quide váha te ducaⁿ-ni na càda
váha-yu cundecú-yu, te nchaa
ñáyi quide nchaa nacuáa cùu váha
iní Yá Ndióxi te ñu-ni ducaⁿ na
càdá-yu cundecú-yu —duha càchi
espíritú-áⁿ.

¹² Te ní cachí Xítoho Jesucristú:

—Cundedóho-n tnùhu na
càháⁿ-í-a. Ío ndíhi quixi tucu-í,
te canehé-í nchaa sá ndúú tǎhú
ñáyi quixi, te nacuáa nduu chiⁿ ní
quidé-yu ñⁿ ñⁿ-yu te ducaⁿ cùnduu
sá cuǎñaha-í nduu tǎhú-yu. ¹³ Te
yúhú cùu-í Yaá sa ndècu ndéé
cútnàhá ní ngáva ñuyúy, te ñu-ni-í
cundecu-í ni caa ni quíhíⁿ —duha
càchí-gá.

¹⁴ Te váha tǎhú nchaa ñáyi sa ní
nduu ndoo ní nduu nine iní-xi, chi
ñáyi-áⁿ ní nduu tǎhú-yu quíhu-yu
xítí ñuú-áⁿ, te caxí-yu sávidí yutnu
nùtní-áⁿ te xǎⁿ candeca-xi iní-yu ni
caa ni quíhíⁿ. ¹⁵ Te ñuú-áⁿ vǎ cùú
quíhu ni ñⁿ ñáyi ndècu ichi cuehé
ichi duha, ni cuè ñáyi quide nduu,
te ni cuè ñáyi ndècu ichi díí iní, te
ni cuè ñáyi sàhni tnaha ñáyi-xi,
te ni cuè ñáyi chĩñuhu nchaa sá
ní cadúha cue téé ñuyúy-a càchí-yu
cùu ndióxí, te ni cuè ñáyi tnàhá iní
dacuàndehnde, te ni ñⁿ ñáyi ducaⁿ
xíquide vá ndúú tǎhú-yu quíhu-yu
xítí ñuú-áⁿ.

¹⁶ Te ní cáháⁿ tucu Xítoho Jesu-
cristú, te càchí-gá:

—Yúhú Xítoho Jesucristú ní
tendaha-í espíritú xínú cuèchi núú-í
cuendá cachí tnùhu-xi xii-n nacuáa
nduu tnùhu cùñaha-n xii nchaa
ñáyi ndècu ndíhi-n ichi-í dácuaá
tnùhu-í ñⁿ ñⁿ ñuú. Te yúhú cùu-í mei
ñàní tnàhá ndíi Dàvíí, te cada iní-n
sǎ cùu-í dàtná ñⁿ chodíní quiti quène
datneé —duha càchí-gá.

¹⁷ Te nchaa ñáyi cùu cuendá
Xítoho Jesucristú Yaá cáá dàtná cáá

ñⁿ mbéé quiti ní dánicuèhé-güedé,
ñu-ni ñáyi-áⁿ cùu-yu ñáyi cada
iní-ó sǎ cùu-yu ñⁿ ñadíhí xíchí
tnàndaha ndíhi ñaha xii-gá, te
ñáyi-áⁿ ñⁿ-ni càháⁿ-yu ndíhi
Espíritú Yá Ndióxi, te xǎháⁿ-yu
ndíhi Espíritú-gá xii nchaa dava-gá
ñáyi:

—Chí táquixi —cachí-yu xǎháⁿ-yu
ndíhi Espíritú Yá Ndióxi.

Te nchaa ñáyi ducaⁿ ndédóho
tnùhu-áⁿ vitna, te xini ñuhu-xi ducaⁿ
cáháⁿ-yu tnàhá-yu cùñàhá-yu xii
nchaa dava-gá ñáyi-áⁿ, te nchaa
ñáyi cùní tuha ichi-gá te na
quixí-yu, te dicó ducaⁿ cùu tǎhú-yu
sǎ cándeca iní-yu ni caa ni quíhíⁿ.

¹⁸ Te nchaa nchòhó ñáyi
ndédóho nchaa nacuáa càháⁿ tnùhu
Yá Ndióxi ndéé núú tütú-a càháⁿ-í
dóho-ndo. Te núú ñⁿ ñáyi na
còdo-gá tnùhu chido tnùní-yu núú
tütú-a, te Yá Ndióxi ío dandóho
ñaha-gá xii-yu chi yáha-yu nchaa
tnúndóho yodo tnuní núú tütú-a te
núú ducaⁿ na càdá-yu. ¹⁹ Te núú
ñⁿ ñáyi na chidáhu dava tnùhu Yá
Ndióxi ndéé núú tütú-a te ñáyi-áⁿ
vǎ ndúú tǎhú-yu cundecú-yu
ñuú-gá, te ni vǎ ndúú tǎhú-yu sǎ
cándeca iní-yu ni caa ni quíhíⁿ dàtná
yódó tnùní núú tütú-a.

²⁰ Te Xítoho Jesucristú Yaá càháⁿ
sǎ ncháá tnùhu-a cùu-xi tnùhu
ndáá ní cáháⁿ-gá ní tecú dóho-í, te
càchí-gá:

—Ndáá sǎ ío ndíhi quixi tucu-í —
duha càchí-gá.

Te yúhú ní xáhaⁿ-í xii-gá:

—Ducaⁿ na cùnduu, taquixi yohó
Xítoho Jesucristú —duha ní xáhaⁿ-í
xii-gá.

²¹ Te Xítoho Jesucristú ío na
chìndee chítuu ñaha-gǎ xii-ndo
ncháa-ndo. Te ducaⁿ na cùnduu. Te
ío chí càdá ndèe iní-nǎ vitna.